

REV. PAT. F.  
ANACLETI  
REIFFENSTUEL  
THEOLOGIA  
MORALIS,

*Cum Additionibus & Supplemento*

R. P. F. MASSÆI KRESSLINGER,

*IN DUOS TOMOS DISTRIBUTA.*

---

M D C C L V I I I.



THE COLLEGE

OF THE

UNIVERSITY

OF THE

STATE

OF

NEW YORK

1880

1881

1882

1883

1884



# THEOLOGIA MORALIS

BREVI, CLARAQUE METHODO  
COMPREHNSA,

A T Q U E

JUXTA SACROS CANONES,

Et Novissima Decreta SUMMORUM PONTIFICUM diversas  
PROPOSITIONES damnantium, ac probatissimos Auctores,  
succinctè resolvens omnes Materias Morales.

AUCTORE R. P. F.

ANACLETO REIFFENSTUEL,

*Ordinis Minorum S. Francisci Reform. Provinc. Bavaria.*

EDITIO DECIMA,

CÆTERARUM OMNIUM NOVISSIMA ATQUE LOCUPLETISSIMA, JURI CANONICO  
EJUSDEM AUCTORIS POTISSIMUM CONFORMATA.

Pluribus Additionibus, præsertim quoad Tractatus de LEGIBUS, JURE & JUSTITIA;  
BENEFICIIS, IMMUNITATE ECCLESIASTICA, de SACRAMENTIS, atque  
modo extraordinario eadem administrandi condemnatis ad mortem, pestiferis, infirmis, aliis-  
que hominum statibus: item quoad IMPEDIMENTA MATRIMONII, & Praxin impe-  
trandi dispensationes adaucta; nec non compendiosa Propositionum Damnatarum Declaratione  
*una & altera illustrata à*

R. P. F. MASSÆO KRESSLINGER,

*Prov. Bav. ejusd. Ord. Lect. Jub. & Tertio Exprovinciali.*

Copioso insuper ornata BULLÆ CRUCIATÆ explanativo Tractatu, per

JACOBUM ESTEVA

ORDINATO.

Cum Appendice, continente modum legendi & scribendi citationes utriusque Juris.

TOMUS PRIMUS.



ANTVERPIÆ,

Sumptibus MARCI-MICHAELIS BOUSQUET & Sociorum.

MDCCLVIII.



# THE FOLIO MORALIS

BREV. CLARARQUE METHODO  
COMPTHESSA  
ALIVE

THESE SACROS CANONES  
The Doctor Summus Pontifex  
The Canon Law  
The Canon Law  
The Canon Law

THESE SACROS CANONES  
The Canon Law  
The Canon Law  
The Canon Law

THESE SACROS CANONES  
The Canon Law  
The Canon Law  
The Canon Law

THESE SACROS CANONES  
The Canon Law  
The Canon Law  
The Canon Law

THESE SACROS CANONES  
The Canon Law  
The Canon Law  
The Canon Law



THESE SACROS CANONES  
The Canon Law  
The Canon Law  
The Canon Law





INCARNATÆ SAPIENTIÆ SACRARIO,

TRIADOSQUE PRÆEXCELSO SOLIO

DEI-IPARÆ

IN ICONE PRODIGIOSA ARÆ

MAJORIS REGALIS MERCENarii COENOBII

BARCINONENSIS,

S U B

DE MERCEDE

CAPTIVORUM REDEMPTRICEQUE

INVOCATIONE

SUPREMA DOMINA,



EDULE circumspexi, modo nō pene chartas omnes, æneis formis excusas, subque Mœcenate, hujus Primoribus Faucis sacrari, Tiaris utputa, Albogaleris, Causiis, Diadematibus, Archistragis, sive Archistrategis, sive Architalassis, cæterisque Dynastis, inspectantibus præcipuè Auctoribus, imperium, opesque, unà cum nobilitate [ita, ut in omni judicio elegans paucos inveniet sub Jacentum, etsi per illustrium tutela; quamvis plures sub Potentum, Divitumque patrocinio, licet obscura ex stirpe] quo tempore animadverti, quatuor ob motiva dicari, inter quæ *Primum*, communiusque eorum est, velle Mœcenatum abripere, ut astrictum honori ita sit, quod eorum auxilium sit certum pro Honorantium voluntate, atque infelicitate: ita ad hunc auribus eorum inservientes finem, ut hujus intuitu sæpe sæpius in suis assentatiunculis prorumpant, [ni præsumptio foret; ast ridicula valde] quod eorum promerentibus operibus, tanti Mœcenatis illustrari nominibus, livori reformidabunt nulli; quasi gentilitia stemmata typis mandata, nominaque descripta, impenetrabile Clypeum, atque inviolabile asylum forent ad quemcumque intellectus partum, etsi defectuosum tegendum, rectam adversus sententiam; cum & ipsorum Procerum magnitudo tota, judicium, objurgationemque effugere nequeat,



si quot molitur, edictæve Sapientiae sententiae non accedat; ita idemdem ludificatis, ut postquam Scientiam, atque Ignorantiam risum commorint, si palponibus non delectetur Magnas, infestæ Ei illæ factæ fuerint; cui si jucundæ, bene visum fuit Eis, ipsammet admissionem muneris, unâ cum offerentis encomio, fore præmium potius excessivum, quam honori æquale; Unde plerique minoris facti fuere, quo plaudī conabantur, in fortioris laqueum iudicii se dantes, per quod evadere intendebant.

*Secundum*: pensandarum quarundam gratiâ exceptarum gratiarum, commonstratione cum veræ voluntatis, præ oculis jugiter eas habentis.

*Tertium*: certum faciendi Mœcenatum, affici veriori cordis affectu dicantis, in cuius testimonium, ei sacrat æstimabilius ejus opus.

*Quartum* demum: ut universi condigni sint plausus ejus fructus: Quorum tamen aliqui prudentius se gerentes, nedum nobilitatis; fortitudinis, atque amoris eum seligunt præditum [quibus contentus erat Horatius] (1).

(1)  
Hor.  
Carm. 1.

*Mœcenæ Atavis edite Regibus  
O & præsidium, & dulce decus meum.*

Sed, & sapientiæ, ut ita tutius tanti Mœcenatis, inque doctrina conspici, non adsit jam, qui iudicium faxit, nec ausit.

Unde [Cœlorum splendidissime Cœlum] deduxi: quod sub typico sudarunt prælo scripta, subque protectione, & mandabantur, unum saltem ex dictis induent motivum: Cumque tam longè fuerim hoc fugiendi illatum, ut eis omnibus ductus, præsens munusculum, parvum scilicet hunc Bullæ Cruciatæ expositivum Tractatum [unâ cum reimpressione Operis Theologici Moralis P. Reiffenstuel; à se nunc non oblatus; quia in ea nullus Ejus influxus] dicari coner; pro Mœcenate tanto, cui dicta omnia adaptari queant, sum sollicitus: Quamobrem Politici consilio rejecto *Libros*

(2)  
Petrus Ble-  
sens epist.  
46.

*consecres Potentatibus*, (2) hujus erga mea non manente vallis mente Heroes, cum primis eam in Te direxi, illustriorem Mœcenatem, Pulchriorem Esther, Mulierem fortio-rem, utriusque Viraginem ævi singularem, Cœli orbisque terrarum cumulatam gloriam, secundam, sed meliorem Heviam, Adæque filiam, sed tanta puritate nitentem, ut à damnationis chirographo fueris conspurcata, eo quod, non pro te,

(3)  
Esther 15.  
v. 13.

*sed pro omnibus constituta est hæc lex.* (3) Nusquamve in ea comprehensa; quia aeterna redemptione inventa. (4) Undèque ab æterno Candor lucis aeternæ, & Speculum

(4)  
Hebr. c. 9.  
v. 12.

*fueris sine macula.* (5) An quis Te tantam prudenter mirabitur? Minimè, si te Patris, scilicet æterni, Sponsam agnoscat dignissimam; Filii, imaginis, nempe speciei, Genitricem veram credat: Spiritusque Sancti, muneris, videlicet usus, Filiam

(5)  
Sap. c. 7.  
v. 26.

*attendat: totiusque Beatissima Trinitatis nobile triclinium.* (6) Admiretur: igitur Solam Te sine exemplo. (7) Te ipsammet, si fat, canentem.

(6)  
S. Bonav.  
in Cant. ad  
Deiparam.

Tibi ergo [Navis Institoris] elegi, hosce meæ primos mentis fructus sacrari; dulciter illectus tanto simulacro Archetypi tanti. Tibi sub de Mercede, Captivo- rumque Redemptrice invocatione; ita ut comem, atque propitiam erga infimam mi-

(7)  
Cant. c. 6.  
v. 8.

seramque Navim hanc te præbeas, quod non hujus velle, benè tamen indigere tanti auxilii tutelam, atque præsidium mereatur: cum ex tempore enixè deprecatur, om-

*Primum  
motivum.*

nes queat horrendas procellas, hujus ventis à Philautiæ Principe agitatæ Maris, com- motas evadere; quassatam igitur non patiaris eam, sed ab omnibus fac liberam, ut tandem in Portus Cœlestis tonsilla illigetur; qualiter aliàs ad te clamantibus Navitis, in liberico Mari à formidabili tempestate oppressis, à tanta vexa se visere salvos, tantâ visâ super vas Imagine, ab Angelis ibi adducta; ut testata fuit Sancta Maria de Cervellò, quæ eâ illic astitit. (8) Illis sinum efflagitatum non negasti; illi, & ergo [fac dicere mereatur] Hierusalem concessisti; pro quo angustiat, vestigat-

(8)  
Constat in  
processu  
Canoniza-  
tionis dic-  
tæ S. Ma-  
riæ de  
Cervellò,  
vulgò, del  
Socor.

que in primis, obediens Dilecto tuo. (9) *Quarite primum Regnum Dei*: cum ferventius rogat, ut tam indignæ instrumento creaturæ non dedigneris, tuum Sacrum Purissimæ conceptionis mysterium in ejus ore deferri in ævum: hanc ergo sibi gratiam neutiquam negandam, in de Mercede fidit fortiter; quod illud tanti ei sit, ut [conscia es] hac de causa Tibi sub invocatione data [nec sub alia: quia aliæ om- nes de Mercede emanant tua] hoc affectus signum dicari non dubitarit.

(9)  
Matth. 6.  
v. 33.

Sed ut de prima causali non sit qui miretur, pauca hæc alia, percurrat, cum prima legerit. Nonne sub tradita invocatione es, quæ magis diligis, cum magis com- monstras tam occultum mysterium [Tota Pulchra?] certè equidem. Ad quid enim Religioni à te erectæ, habitum omnimodè album deferre præcepisti, ni ad candorem jam animationis tuæ exprimendum? cujus certè vivum, atque usitatum est Sym- bolum. Undè hæc Religio tua, inter sequendum S. Thomæ disciplinam, tanti acerrima



acerrema Propugnatrix Mysterii [et si gloria tanta etiam titulo speciali Minori deberi, hoc non negetur] perpetuo ab Ea [uti, & ab Hac] illius culta memoria omni Sabbato, post *Salve* solemniter decantatum? unde deficiente Mercenariis hujus Regalis Cœnobii Religionis pane, (10) die Conceptionis purissimæ, quibusdam co-  
 ctioni [eo quotidianæ tempore] contradicentibus, aliisque eæ assentientibus; tan-  
 dem Artopto ad Calcariam accedente panes fornicandi causâ, in sanguinem, atque  
 lutum versa est massa? Quo dilecta Genitrix nostra Barcino, in miraculi monu-  
 mentum, tanti decusque Mysterii, publici voce Præconis jussit, ne in posterum  
 latterarias simili die accendi posse. Cujus rei veritas juramento attestata pridie No-  
 nas Octobris 1638. in Basiliensi Concilio, ut habet cit. A. (11) Igitur sub tali  
 invocatione, præ aliâ, magis tanti es zelotes arcani, adeoque sub eâ sacravit [cum  
 & inscia haud es, vivis, atque ferventibus flagrare, & devinciri cupiditatibus, atque  
 curis, ardere sine termino in horum Etna voluptatum] sed an liberè? [præsto]

(10)  
 Refertque  
 R. P. M.  
 Emman.  
 Mariano  
 Kibera in  
 sua Capilla  
 Real. &c.  
 §. 3. pag.  
 41.

(11)  
 Constat-  
 que in Li-  
 brorum  
 Tabulario  
 dicti Cœ-  
 nobii, tra-  
 diturque  
 in Historia  
 Lombardi-  
 ca anno  
 1496. im-  
 pressa.

(12)  
 Probatque  
 multiplici-  
 ter cit. R.  
 P. M. Em-  
 manuel  
 Mariano  
 Kibera in  
 sua Cap.  
 Real. &c.  
 §. 2. pag.  
 21.

(13)  
 Arnoldus  
 tract. de  
 Laudibus  
 Deiparæ.

(14)  
 Habetur  
 etiam in  
 cit. lib.  
 pag. 67.

(15)  
 Ciris v.  
 27.

Tam fuere decora Magna, queis Urbem hanc veluti felicitatis tuæ palladium  
 observasti, ut vera physica, atque Reali Descensione (12) in ejus Regale Palatium  
 anno jam 1218. eam magnificaris, qua proculdubio in alterum fuerit illud Mon-  
 tem Tabor transformatum: si enim illic resplenduit Christus; & hic coruscavit Ma-  
 ter ejus de *Mercede* Virgo: Si Redemptor noster, indè, gessit ibi Redemptionis  
 negotium; & hic Corredemptrix, Captivorum Redemptrix, Redemptionis dispo-  
 nendæ causâ descendit: Sique demum coram D. Petro, D. Joanne, atque D. Ja-  
 cobo illud fuit conventum; & hic palam D. Petro Nolasco, D. Raymundo de  
 Penyasfort, atque D. Rege D. Jacobo, Orbis debellatore: Unde pro te optime  
 Arnoldus (13) *Dividunt coram Patre inter se Mater, & Filius pietatis officia, &*  
*miris allegationibus muniunt Redemptionis humanæ negotium.* Alteraque vice, cum me-  
 dia nocte non accessissent servi tui ad Matutinas canendas [uti mos Mercenariis tuis  
 jam, in hoc Cœnobio est] eo quod Cymbalorum curator, iis oblitus fuisset ad eas  
 vocare die mirabilis Purificationis tuæ, cum Angelis tuis Chorum occupasti, dul-  
 ceque melos cantu resonavit acuto, sic Regina sedens in med a Chori sede coram  
 simulacro tanto, summè micans, pretioso splendida fastu, ubi trium spatio hora-  
 rum inter tantæ Virginis amplexus (14) sua fuit voce decantatus beatus, atque tanti  
 felix Petrus Nolasco. Hæc diu versa Lector cum animo tuo, dum miratus cano  
 (15).

*Felix illa dies, Felix dicatur & annus,  
 Faelices qui talem annum videre diemque.*

tamque tibi est chara, ut pariter Patronam, atque ejus tutelarem designata non fis  
 stabiliri, effectioneque tanta; ut in quot se obtulerint casus, agger fortis, suppe-  
 tiæque actutum ei fueris. Fateatur ita, formidabile illud, tam immane malum,  
 vibrans gladius, pestis, severa parca, quia nemini parcens, quo vexabatur Patria  
 nostra anno 1652. à cujus oppressione eam repellendo liberaisti; à tanta de *Mercede*  
 promeritum particeps; postquam in solemnî pompa per ejus indigena tuum ductum  
 fuerit simulacrum.

Patefaciat libellorum supplicum tam propitia subscriptio ab Excellentissimo, Sa-  
 pientique Senatu in tuæ Imaginis exhibitorum manus; ejus signanter, cui feliciter  
 assentiisti quinto Idus Octobris anni 1687. amandando exercitus illos Locustarum,  
 messes devorantium, universam exhorrentumque Urbem, nedum Barcinone, sed  
 toto è Gotholaunico Principatu.

Ostendat illa tam copiosa, quam exoptata [aridis Summè Agris] pluvia, quam  
 rogatus, inter plures Sanctotum Icones, magna cum Religiosorum associatione  
 latas, fufis, haud fui adepta; solumque interpellatione tua, Tua, enitens Cœlum,  
 Cœlum pacans, ad Templum Montis Calvariae celebribus suppliciis ducta, universa  
 associante Civitate, affecuta. Anno 1680. quo quidem videris ei commonstrare,  
 tibi arrogaris, subsidii sollicitudinem in angustiis.

Proclamet demum miraculorum multitudo tota, intuitu quorum Sanctitas Cle-  
 mentis VII. in ejus Bulla, expedita Avenione decimo sexto Calendas Decembris  
 anni 1267. Pontificatus ejus secundi, obtulit plenariam indulgentiam contribuentibus  
 eleemosynis, pro Ecclesiæ ædificatione, hodie persistentis, expressâ illâ, in eâ, his  
 verbis: *Ubi Beata Virgo multa miracula operatur.*

Tot igitur tantasque attendente, à te liberaliter Patriæ nostræ dilectæ dispensatas *Secundum*  
 gratias, quomodo libere valebat [cum & se verum fatetur Filium] alteri sacrare? *motioun.*  
 [cum innatum nobis insit cor verum, præ omnibus aliis Empyreî concivibus, ad ti-  
 bi omni nostra humana actione complacendum; quo non erit qui miretur, si tertio  
 adductum præcipuè ordine miraculum spacio videat] undè ex his, referendisque,  
 nulla cum libertate; ni summa dicatur: quia tota voluntate, si ad hanc illa se-  
 quatur,



(16) quatur, ut ait Bernardus (16): *Porro ubi voluntas, ibi libertas*. Igitur hunc cumque et si actum iustitiæ, tamen ob parvitatem muneris non auderet, tandem trepidatione adjecta, cum & pudore amisso ita, inivit, eo ducta Te, qualiter, & Filium tuum, non oblatum aspicere, sed offerentis voluntatem, ut docet Capellanus tuus, mellissimus Doctor Bernardus (17): *Offero, quod possum bonam voluntatem*. David psallendo non placuit Deo propter psalterium, sed propter affectum. Unde sibi fuit suavis, te munusculi parvitatem oblitam futuram esse, ejusque affectum unice aspecturam; sique attigit Hispanus Seneca (18) veritatem, dicens: *Beneficium est ipsa tribuendi voluntas*, non parvum erit beneficium ejus, cum & quantum valet, veluti

(17) alter Philosophus Esquines Socrati; unum quod habet se ipsum totum, tibi veræ Minervæ offert, in cujus signum, & veritatem, ecce munusculum parvum desiderii obsequiosis locupletatum, quo tibi renes suos, à te scrutatos, noviter aperit. Unde cum, & æquali ducantur medio Auctores, ad suis patefacienda Mœcenatibus corda, eos in hoc nescio si sectatus; nam concivibus meis, potiusquam,

(18) Tibi, scis conari; meum enim tibi totum esse, [ut est adnotatum] certam fore, non dubito: sed quis erit, qui miretur, si me tantum, atque sacrum simulacrum vidisse, atque tanto inspexisse animo sit confectus? vultum quidem æthereo nitescentem splendore, cui nedum procul Triviæ, Dianæ, Junones, Pallades, atque Veneres fuere quinimò pulchritudo ipsa procul? equidem nullus. Namque obtutum in ea figere, philtum valet, ad salutiferum ita; ac eo fortius in prolectando, ut ait viam latam, & paratam Hierusalem tutò, ac certo ducat: tantum igitur fateatur Petrus, ter pro distincto, Nolasco scilicet, Armengol, & Pasqual in tuo Regali Cœnobio commorantes, quorum integra corda, omnimodis tibi fuere submissa, acutum, quod in te oculos conjecere: Tanta est tuæ Iconis faciei pulchritudo, ut mantinea non fuerit, qui eam coloribus exprimere quierit, ita ut

(19) aggresso, frustra, cum postea alium in originali vultum adverterit: non quia cum exporrecta fronte saepe, saepeque obducta [ut notant affecti]; sed physiognomia per instans tunc variata ei visa fueris; quo videris similem non pati: uti nec labeculam minimam, à fumo, pulvere, muscis, aliave causa, et si in indumentis ornatibusque: Inenarrabilis ergo profectò tantæ Iconis Sacræ formositas, cui tanta pelliciendi vis, ut non sit qui eam intueatur, quin ad originalem non sit suaviter allectus; ita ut ei adapteretur, vereque dici queat (19): *Quicumque omnium Domina, castaque Dei Matris imaginem veneratur, magna retribuit, quandoquidem imaginis veneratio in prototypum redit*. Nec ita prolectatus, quin ex corde toto viam salutis amplexatus, cujus veritatis testis citatus Petrus Armengol, qui postquam tantum aspectarit simulacrum, intentos intenderitque in id oculos genuflexus, ita originalis ejus conflagarit amore, ut ex facto, sæculi nobilitate relicta, atque atrocitate, sceleratorum Ducis exercitio usurpata, contempta, nobilitatem, tui instituti suscepit, habitum actutum induens.

(20) Demumque si suis Mœcenatibus suos consecrant fructus Auctores, ut par in iis dato respectu, communiter accipiantur, cui securius; quomodoque magis hostii lumen poteram pertingere, ni primitias has tibi dicando? vitæ Armario, naturæque creatæ prodigio (20), *Summaque temporum laudi*. Sique Sapientia est validior clypeus, quis te sapientior? cum Divinæ Sapientiæ Mater. Unde (21): *Gymnasium diviniore Sapientiæ, & forma seu venustus Christianæ disciplinæ fassus te est Ildephonsus*; quæ cum adhuc fores in via scientiarum maria habuisti Maria; et si te rerum omnium ea, scientia utputa beata, ac per se infusa, insciam te monstraris aliquando mirata

(21) humana, cujus gnara eras divina: Dein si prudentius se gerunt Hi, cum in iis attendunt nobilitatem, amorem, & fortitudinem. Quis te nobilior; cum veræ, atque primæ nobilitatis Fons, utpote Regum Regis origo, præterquam, quod ex stirpe Davidis, stirpe Regia. *Atavis edite Regibus*. Quæ si unice virtus (23) quis te adhuc? cum in instanti animationis tuæ tibi fuerint omnes infusæ? Quis mei, saltem dum Patriæ nostræ, amantior? certè nullus, itaque absque dubio fatebitur, qui relata viderit, teque sub de Mercede invocatione, veram dilectricem asseverabit, cum aliunde jam: *Omnibus (24) misericordiæ sinum aperias, ut de plenitudine tua accipiant universi*. Hic: *Dulce decus meum*. Quis te demum fortior? cum in te vera sit fortitudo: *Ostendam (25) in Te fortitudinem*. Fortis itaque à vero Salomone Christo inventa, cum alter postquam te quæsierit, non invenit Salomon: *Mulierem fortem (26) quis inveniet? En. O & presidium*.

(22) Tibi ergo gratiarum omnium Paradiso, Sapientiæ superiori; Nobilitati generis nostri; Amori Patriæ nostræ; Fortitudini Regni nostri, accipias hoc munusculum, iterum precor, itaque, quod foeliciter currat, prudentius, atque securius, quam de Imperatore Theodosio ait Sozomenus (27): *Omnino enim quod tibi arridet; illud*

(23) (24) (25) (26) (27)

(28) (29) (30) (31) (32)

(33) (34) (35) (36) (37)

(38) (39) (40) (41) (42)

(43) (44) (45) (46) (47)

(48) (49) (50) (51) (52)

(53) (54) (55) (56) (57)

(58) (59) (60) (61) (62)

(63) (64) (65) (66) (67)



*illud Lectoribus, & utile, & praeclarum videbitur. Nec quisquam est, qui sit post tuam* (27)  
*ceusuram ei, vel digitum admoturus, palam fateri valeam. Lubentissimè igitur Tibi* Sozome-  
*Davidicæ Turri, me meis millies consecro: non ut aliàs Protoplasti nostri Filii, ut* nus in ar-  
*celebretur nomen meum, qualiter illi* (28): *Venite faciamus nobis Civitatem, &* gumento  
*Turrim, cujus culmen pertingat ad Cælum, & celebremus nomen nostrum; sed ut te* Histor. Ec-  
*videntes Arcem, turrime inexpugnabilem, ad Te confugiant, tuaque supplices* clesticæ.  
*poscant numina, certò habenda, media erga tantum simulacrum visitatione, inque* (28)  
*tantum originale affectione, viam salutis non errent. Quod jam in sensu Tostar. illi* Gen. 11.  
*intendebant* (29): *Finis eorum erat bonus, scilicet ut omnes videntes illam Turrim al-* Tostar. in  
*tissimam non aberrarent.* Genes. cap. 11.

Erga Te vivat ergo in Nobis viva fides, spesque talis, ut cum Seraphico Doctore  
 nostra sit tui invocatio (30): *Unam ergo, ac Te solam pro Nobis in Cælo fatemur solli-* q. 8.  
*citam. Itaque per te à servitute corporali, & spiritali [si lapsi fuerimus] redem-* (30)  
*ptis, igneque charitatis probatis, merear cum dilecta Patria nostra tantam puritatem,* S Bonav.  
*protectione tanta, tuamque Triados sine fine* (31) *videre, sine fastidio amare, sineque* in speculo  
*fatigatione laudare. Ubi & in ævum tibi foeliciter pro omnibus canam. O mihi fœ-* Virginis  
*licem! O mihi* (32) *terque quaterque beatam.* cap. 6.

(31)  
 August. de  
 Civit. Dei  
 lib. ultim.  
 (32)  
 Eneid.  
 lib. 1. v. 98.

Sacros Pedes tuos in tanto simulacro  
 humillimè deosculatur

*Servus addictissimus, & affectus*

BS. JACOBUS ESTEVA.



# B I B L I O P O L Æ

## L E C T O R I

**S**I quidem ex sæpius repetitâ Libri alicujus editione, de ejus præstantia judicare fas est; certe propria aliorumque experientia satis abunde edocti sumus, hos R. P. ANACLETI REIFFENSTUEL Tractatus de Theologia Morali, (utpote uno fere eodemque tempore, diversisque locis, plurium typis impressos, nunc denuo in lucem prodeuntes,) inter optimos esse connumerandos.

At verò, quod omnibus evenire solet, quoties prælo impositus hic Liber, toties mutatus exiit ab illo.

Primus R. P. KRESSLINGERUS huic Operi iterum vulgato suos Commentarios adjecit, & SS. Pontificum *Propositiones damnatas* præfixit.

Hoc Kresslingerianum exemplar secutus R. P. JAC. ESTEVA *Barcinonensis*, B. V. Deiparæ intemeratæ Barcinonensium Tutelaris sub mirabili invocatione de *Mercede* auspiciis, elegantissimum Tractatum ordine XV. explanativum *Bullæ Cruciatæ* subjunxit.

Ad hanc Barcinonensem editionem, mirum in modum mendosam, *Antverpiæ* anno 1743. verbotenus recusam, accessit *Supplementi* loco peregregius Libellus [jam anno 1734. minori forma editus] R. P. KRESSLINGERI, *Propositiones damnatas à SS. Pontificibus succincte declarantis & ex professo pertractantis*.

Hanc excepit editio *Monachii* anno 1742. prælo mandata, duobus inconcinnis voluminibus in quarta forma, attritis typis, vilique charta; ceterum, ut suum cuique tribuamus, accuratissima & modo dictis longe emendatior; ast Tractatu XV. *Bullæ Cruciatæ & Supplemento Kresslingeriano* truncata: aucta tamen tum novis KRESSLINGERI Additionibus, suis quibusque locis insertis, tum ejusdem notulis sub titulo *Compendiosa Propositionum damnatarum Declaratio*, ad ipsas Propositiones adjectis.

Anno denique 1745. hoc Monacense exemplum Venetiis iterum prodiit adulteratum, speciem quidem nitiditatis præ se ferens propter egregiam chartam majoremque formam, ast mendis refertissimum. Quod ne temere asseruisse videamur, aperto libro tria hæc specimina attulisse sat erit.

*Tract. I. Dist. 1. q. 5. n. 42. ibi: ignorantia nec directe est voluntaria; supplendo y nec indirecte, habebis sententiam integram.*

*Eodem Tract. Dist. II. q. 2. n. 12. inanes voces nulla subjecta sententia reperies: verum restituendo hæc verba, ipsa tamen non sufficit ad malitiam medii pravi; erit completus verborum ambitus.*

*Eod. Tract. Dist. III. q. 2. n. 17. loco peccatum cognitionis, lege peccatum cogitationis.*

Et ita porro perlegendo singulas ferme paginas, non potuimus non summam editoris vituperare negligentiam.

His igitur omnibus probe perpensis, novam Auctoris nostri editionem aggressi, operam dedimus, benevole Lector, ut eam Tibi sisteremus omnibus numeris absolutam. En igitur R. P. ANACLETI REIFFENSTUEL *Theologiam Moralem*, cum primis & novissimis Additionibus R. P. MASSÆI KRESSLINGERI, annexo Tractatu XV. *Bullæ Cruciatæ*; nec non *Supplemento Kresslingeriano*, quod paulo ante dedita opera dixi esse scriptum ex professo, ut bene distinguatur ab Additionibus, quæ *ὡς ἐν παραποσεί* tantum Propositiones damnatas perstringunt: sicuti ipse testatur KRESSLINGERUS in *Præfatione ad Neo-Confessarios* sæpius laudato *Supplemento* præmissa: Item *Tom. II. Tract. XIII. Dist. 3. q. 5. post n. 71. Addit. II. pag. 33. citans Supplementum suum; & in Supplemento pag. 77. & 79. allegans suas Additiones*: Item in *Propositionibus damnatis* ad initium *Tomi I. exstantibus*, ad finem *Constitutionis Clementinæ*, ibi: *ut etiam fustus deduxi in alio Libello SUCCINCTA DECLARATIO &c. intitulato.*

Hæc itaque omnia sic in unum collecta, erratis, quantum fieri potuit, vacua; indice generali rectius disposito munita, Tibi præbemus benevole Lector, certo confisi animo, rem Tibi haud ingratam nos executos esse. Quare iis non invitus frui, studiisque nostris favens, vale.

J. ESTEVA



## J. ESTEVA AD LECTOREM.

**N**on ab Ego, quia munus impleſſe meum; dictis in Exordio Tractatus Bulla conabar, ſed ut ſuperius faciam velle; hanc ad te Amicum ſcribo Lectorem. Hoc precor legas, atque perlegas Opus Theologiæ Moralis, omni commendatione, laudeque digniſſimum, pateſcetque tibi in eo Auctoris mens, ita acuta, quæ non hoc ſolum, cum & altera typis mandare quit volumina, ut plura dedit: Ita mens patet in libro ſicut vultus in ſpeculo.

Cecinit. Accipe igitur benevole Auctoris tanti opus: Huncque meum Bulla Cruciatæ explanativum Tractatum, hic additum; quia cum omnimode Hiſpanis Confeſſariis ſumme neceſſarius, atque perutilis ſit; (ut ibi dictum jam manet) eſſi in eo nullo nova modo, cum ſolidiores, atque communiores D. D. opiniones filio tenui, modove non miro [ni, quia nimis reſtrictim ſunt ſermones (aſt certe non voluntate) demireris] trado; Unice ut nil tibi deſiat in opere optabile pro Foro Pœnitentiæ miniſtrando; quamvis enim alii ſcripti compures Libri ſint de Bulla, fors ad tuas non ita facile accederent manus: Neque enim (ait Auguſt.) omnia quæ ab omnibus ſcribuntur in omnium manus veniunt, & fieri poſteſt, ut nonnulli qui etiam hæc noſtra intelligere valent, illos planiores non inveniant; ideoque utile eſt, plures a pluribus fieri diverſo ſtilo, etiam de quæſtionibus eiſdem, ut ad plurimos res ipſa perveniat. Non ergo omnino eum rejicias, ſed cum pro utilitatis modo tantus tibi ſit, contentus ero: Multoque magis ſi cum hæc omnia legeris, in lectione neutiquam ſiſtas, ſed Hiſpanici noſtri Seneca conſilium inſequendo tuas dirigas lecto actiones: Sic evolvendi ſunt Auctores, ut quod legeris, in tuos uſus transformes. Hunc ergo addiſcas mi Lector legendi modum, ſi forſitan hucusque (in uſu) inſcius fuiſti: quo documentum illius celeberrimi Philoſophi Bion ſuis in primis præſtitum Diſcipulis [referentibus humanis, ſacriſque litteris] Reſpicite (aſt eis) tanquam in ſpeculo veltras operationes, ut bonas augeatis, & ornetis, malas vero retractetis. Jugiter præ oculis habeas. Otium ſine litteris, mortem Seneca appellavit: Ergo, & peſſima cum his litteris vocari debet; ſi his facta non accedant: Unde vè illis, qui juſtitiam, juſtam pro aliis fatentur, ipſi autem æs retinent alienum o! &c. Abſit igitur obcecatio: trabem, trabem in tuis videas Lector oculis, cum culmen, culmen in alienis intueris, (tibi enim damnabilius) iſque tuas regas rationes; quæ illa, ſi his ea. Sunt veluti baſſamum a corruptione oblivionis præſervantes. Directa, non puram ignorantiam rerum a te relegabunt, ſed, & noxarum inmemor ſies; meliori baſſamo præſervatus ab earum ſeditate, ejuſque termino. Hæc Lector Amice agas; quod autem bene, ægreve has mentis primitias meæ accipias, cum defectus ejus corrigas (unde valde tibi gratus, ſi omnes benigne celes) non triſtabor: Nullam] enim] exiſtimo lucubrationem, ſeu ſcriptionem adeo ſœliciter, & fortunate procedere, ut nullus contradicat. Mique Amicus, aut ſis Inimicus, Amicus mihi enim ſemper eris. Vale.

Sydonius  
Apollina-  
ris.

Auguſt.  
lib. 1. de  
Trinit.  
cap. 3.

Seneca  
lib. 3.  
Epiſt. 12.

Cit. Senec.  
Epiſt. 81.

Cit. Senec.  
Epiſt. 21.

Clemens  
Alexandr.  
lib. 1. de  
Strom.

## APPROBATIO, ET CENSURA D. RAYMUNDI SALA,

Presbyteri S. Theologiæ Doct̃oris, Eccleſiæ Parochialis S. Michaelis Barcinonenſis Rect̃oris  
meritiſſimi, hujus Diœceſis Examinatoris Synodalis digniſſimi, &c.

**E**X commiſſione Perilluſtr. D. D. Joſep̃hi Ignatii de Amigant & de Olzina Sanctæ Eccleſiæ Barcinonenſis Canonici, & pro Illuſtriſſimo, ac Reverendiſſimo D. D. Philippo de Aguado, & Requexo Ep̃ſcopo Barcinonenſi. Vic. Gen. & Off. legi opus hoc complectens Theologiæ Moralem univerſam brevi claraque methodo comprehenſam Authore R. P. F. Anacleto Reiffenſtuel Ordinis Minorum S. Franciſci, addendumque in nova editione Tractatum de Bulla S. Cruciatæ a Jacobo Eſteva Clerico, & Sanctæ Theologiæ Profeſſore ejuſdemque Subtilis Scholæ Alumno elaboratum, dignaque comperi, quæ una communi proſpectui editio exponeret ea Opera, quæ licet a diverſis Authoribus ſcripta, & doctrinæ ſoliditas, & ſcribendi dilucida, brevique methodus apud doctos, & ſtudioſos æque grata, acceptaque fore ſperare jubent. Primum opus Authoris nomen ſatis ſuperbe probat, a quo & in Theologia, & in Jure Canonico nihil non admodum utile, nihil non tutum, & inoffenſo pede decurrendum, ſicut de Hilarii Libris ait Hieronymus, univerſi Chriſtiani Orbis judicium innumeris præliis monſtravit. Secundum autem ſimile eſt huic, ejuſdemque Parentis gemellus fœtus crederetur, ſi ejus nomine in lucem prodiiſſet. Sed eam rem quam in illis Germaniæ partibus non neceſſariam Author omiſit, ita appoſite plene, ac dilucide novus Autor Hiſpanus adjecit, ut ei proſpecto Germanus videatur, Opusque ita unum appareat, ut ejus utilitas verbis Caſſiodori de Inſtit. Divin. Script. cap. 23 commendari digna exiſtat: Legatur communi utilitate Codex hic, quando in uno corpore diligentia ſtudioſi viri potuit recondere, quæ in magna Bibliotheca vix prævalent inveniri. Quare univerſum Opus prælo digniſſimum, ac publico proſpectui utiliſſimum ſentio. Barcinone die 13. Aprilis anno 1736.

DR. RAYMUNDUS SALA.

Die 13. Aprilis 1736.

IMPRIMATUR.

DE AMIGANT & DE OLZINA,  
Vic. Gen. & Off.

APPROBATIO R. P. FR. BONAVENTURÆ ABAD. ETATNES  
Philosophiæ Lect̃oris in Regali Sancti Franciſci Barcinonenſi Cœnobio.

**E**X commiſſione Supremi Senatus, hunc Tractatum Bullæ Cruciatæ per Dominum Jacobum Eſteva Philoſophiæ, & Sac. Theologiæ Bm. compositum, Summæque Morali Reiffenſtuelis addendum vidi, & miratus ſum tam uberes præmaturæ ſapientiæ fructus, cum primo juventutis flore conjunctos. Falſum ſiquidem hic inveni illud Nazianzeni eloquium: Pluraque canities novit, quam læta juvenſtis, expertuſque ſum in hoc opere, quam bene dicebat quondam Plautus, quod non atate, verum ingenio adipiſcitur ſapientia. Reiffenſtuelis quidem Summa aurea tota eſt, immo tota aurum purum eſt, ut ingens aviditas, quæ ab ſtudioſis moralitatis undique perquiritur, atteſtatur. Jacobi vero novus Tractatus pellucida gemma eſt, quæ pretioſo Reiffenſtuelis auro novum ſapientiæ lumen, novumque ſubtilitatis ſplendorem ſuperaddet. Sed tamen, ut verum fatear, nec comparavi illi lapidem pretioſum; & omne aurum in comparatione illius arena eſt exigua. Bulla etenim Cruciatæ, quam hic nobis exponit inſinitus theſaurus eſt hominibus, quo qui utentur, participes ſient amicitie Dei. Dignum itaque eum cenſeo, qui publicæ luci mandetur, cum nihil contineat orthodoxæ Fidei, Decretis Apoſtolicis, aut bonis moribus diſſonum, ſalvo ſemper meliori, & c. Datum Barcinonæ in Regali S. Franciſci Cœnobio, die 15. Octobris An. 1735.

FR. BONAVENTURA ABAD. Lect̃or Artium.

b 2

PRO-



# PROLOQUIUM PRIMUM

## IPSIUS AUCTORIS,

*Una cum Approbationibus Theologicis Operis.*

**Q**UA par est, reverentia & humilitate tuis, Benevole Lector, non tam faventibus, quam frequentibus oculis aspiciendum, revidendumque sese offert istud Theologiae Moralis, brevi, claraque methodo comprehensae Opusculum. Ejus intentio, finisque, est, & tuam, & Proximorum promovere salutem. Addat Divina Bonitas desideratum Votis successum. Quoniam vero in Librorum delectu nihil gratius accidere solet, quam si concurrat simul succincta brevitās, scriptorum claritas, rerumque, atque doctrinarum universitas, & ad omnem usum expedita utilitas: haec eadem praesens Opusculum per singula exhibere studuit, tibi que facere, atque utinam! & satisfacere. Ceterum, ut intentum suum assequeretur felicius, selegit Auctores probatissimos, Sententias probabiliores, magisque fundatas (non tamen silendo probabiles) Conclusionesque aut solidis rationibus, aut ipsis SS. Canonum Auctoritatibus [queis & Theologia Moralis, & recta vivendi ratio sese, Deo jubente, submittere, atque obsequi tenetur] fortiter stabilivit. Adduntur Decreta Summorum Pontificum novissima, &, ubi cavenda in docendo scandalositas, aut timenda in praticando temeritas, Propositiones damnatae propriis locis fideliter inferuntur. Summaria praeponuntur brevīa, in quibus veluti Iliadem in nuce, totam materiarum seriem, scopumque conspiciere valeas. Ut autem minori cum labore singula reperire liceat, hinc Elenchus Tractatum, illinc Index Materiarum Alphabeticus inserviet locupletissimus. Numerositatem Objectionum adhibere dissuasit ipsamet Theologiae Moralis Methodus passim recepta, brevitāsque in fronte promissa; nonnullae tamen majoris claritatis gratia nonnumquam apponuntur; alias si forsan alicubi desideres, eas supplere poterunt vel rationes adductae, vel SS. Canones, Legesque allegatae. Tuum penes haec, Lector Benevole, sit judicium: nam omnia, quaecunque sequuntur, meliori sint submissa judicio, atque imprimis humillime subiecta Censurae Sanctae Romanae Ecclesiae, utpote quae, *disponente Domino, cunctorum Fidelium Mater est, & Magistra*, c. Damnamus. De Summa Trinitate, & Fide Catholica.

### APPROBATIO ORDINARI.

**T**heologiam Moralem R. P. Anacleti Reiffenstuel, Ordinis Minorum Sancti Francisci Reformatum, Provinciae Bavariae Ex-Diffinitoris, Lectoris Jubilati, & SS. Canonum Actualis, sedulo pervolvi, nihilque in ea Orthodoxae Fidei aut bonis moribus vel a longe contrarium inveni, quinimo Opus omnibus numeris absolutum, in quo omnia tum clare proposita, tum solide resoluta, & adeo caute enodata sunt, ut per hoc expectationi de tanto viro universim conceptae plene fuerit satisfactum. Quare ob communem omnium utilitatem lucem publicam jure meritissimo sibi vindicat. Ita sentio. Aegum Frisingae, die 2. Januarii Anno 1692.

VITUS ADAMUS L. B. a Pellkhofen, de Hohenbuechbach in Mosach,  
Ecclesia Cath. Frising. Can. Capit. & Vicarius in Spirit. General. nec non  
Praeposit. ad S. Petrum in Monte Madron, Librorum Censor.

### LICENTIA ET APPROBATIO ORDINIS.

**F**rater Carolus Franciscus de Varese, Ordinis Minorum Strict. Observantiae S. P. N. Francisci Lector Emeritus, Supremae & Universalis Inquisitionis Qualificator, ac Cismontanae Familiae Observantium, & Reformatum Commissarius Generalis & Servus. Dilecto nobis in Christo P. Fr. Anacleto Reiffenstuel, Lectori Jubilato, SS. Canonum Actuali, ac Ex-Diffinitori nostrae Reformatae Provinciae Bavariae Salutem.

Cum juxta Apostolicas, Nostrique Ordinis Constitutiones revisum, & approbatum fuerit Volumen quoddam a te nuper editum, cujus Titulus est: *Theologia Moralis*. Tenore praesentium ad salutaris obedientiae meritum facultatem tibi impertimur, quatenus servatis servandis illud Typis mandare valeas. Datum Romae die 16. Maji 1691.

FR. CAROLUS FRANCISCUS de Varese,  
Commissarius Generalis.



## FACULTAS ADM. REV. P. MINISTRI PROVINCIALIS.

**C**um Theologia Canonico-Moralis a Rev. Patre Anacleto Reiffenstuel, Ord. S. Francisci Reformatum, Almae nostrae Provinciae Bavariae Ex-Diffinitore, Lectore Jubilato, & SS. Canonum Actuali composita, a duobus Theologis sit revisa, & approbata, plurimumque recommendata, & omnia, quae in editione Librorum de jure sunt servanda sint observata. Tenore praesentium Facultatem impertior, ut hoc laudatissimum Opus Theologicum pro utilitate publica Typis mandari possit. Actum Monachii 11. Febr. Anno 1692.

Fr. BENNOMAYR, Lector Jubilatus, Almae  
Provinciae Bavar. Minister Provincialis.

## CENSURA THEOLOGICA.

**S**uum Moralis Theologiae Opus R. P. Anacletus Reiffenstuel, Nostrae Provinciae Ex-Diffinitor, Lector Jubilatus, & Sacrorum Canonum Actualis Ordinis, ita Catholicae Fidei ac bonis moribus conformavit, ita solidis ac fundamentalibus doctrinis stabilivit, ita notabilibus atque utilibus distinctionibus illustravit, ita praeclearis quaestionibus, categoricis conclusionibus, ac prolixis compendiis integravit, ut Numero & Muneri eximii Theologi ac Canonistae simul satisfacisse videatur. Ita censeo, ex Mandato Superiorum, Frisingae, die 3. Febr. Anno 1692.

Fr. FORTUNATUS HUEBER, Totius Ord. S. Francisci, & Provinciae  
Bavaricae Pater, Lector & Concionator Generalis, p. t. Guardianus Loci.

**T**heologiam Moralem Universam, brevi, simulque clara Methodo comprehensam, atque juxta SS. Canones, & novissima Decreta Summorum Pontificum, diversas Propositiones damnantium, ac probatissimos Auctores, succincte resoluens omnes Materias Morales a Rever. P. Anacleto Reiffenstuel, Ord. Min. S. Francisci Reformat. Almae Provinciae Bavaricae S. Antonii de Padua Ex-Diffinitore, Lectore Jubilato, & SS. Canonum Actuali, industrie, solideque congestam & elaboratam, ex Mandato Superiorum solerter revidi, revidendoque deprehendi, id omne, quod ab Auctore promittitur in Titulo, exacte servari in progressu, videlicet doctrinae breviter, claritate, cum S. S. Canonum allegatione, & circumspecta ad novissima Decreta Pontificum attentione. Quare, cum haec Theologia Moralis non tantum nihil Orthodoxae Fidei aut bonis moribus contrarium, sed plurima Reipublicae litterariae proficua, Curatoribusque animarum necessaria contineat, illam vel ob ipsos etiam frequentissimos textus Juris (quorum peritia Auctorem summe commendat) juris publici ut fiat, dignissimam censeo. Dabam in Conventu S. P. Francisci Stigmatizati Frisingae Anno 1692. 3. Februarii.

Fr. FLORIDUS MOSMILLER, Ord. Min. S. Francisci  
Reformat. Provinciae Bavaricae SS. Theol. Lector.

## PROLOQUIUM SECUNDUM

*In Additiones, una cum Approbationibus earum.*

**U**ti praefixus Libro titulus tibi, Benigne Lector, exhibet, post plures Germaniae, & Italiae Editiones denuo in Lucem prodit Rever. Patris Anacleti Reiffenstuel Ord. Min. & Provinciae Nostrae Alumni Theologia Moralis, augmentata tamen adhuc magis in omnibus ferme locis, & juxta novissimas Recentiorum Pontificum Bullas instructa. Quatenus autem haec Additiones commodius a propria Auctoris Doctrina secerni valeant, initium & finis earum a potiori, si tamen fuerint notabiliores ac longiores, aliquo asterisco \* signantur, & simul per hoc nomen *Additio* indicantur. Quod si post unum numerum ipsius Auctoris plures similes Additiones occurrerint, immediate sibi invicem succedentes, etiam singulis distincta aliqua ciphra (uti vocant) adjungitur, ponendo e. g. *Additio I. Additio II.* &c. ut sic commodius in Indice annotari, & in suis locis propriis facilius post numeros ordinarios ipsius Auctoris inveniri queant. Tu interim Amice Lector laborem istum benigno oculo prosequere, atque ad animarum salutem, quae est unicus finis ac scopus, utere, & vale.

## FACULTAS ORDINARIA.

*Circa novissimas Additiones.*

**C**um novae denuo Additiones copiosae Theologico-Canonicae ad nominatissimam ubique, & jam saepius reimpressam Theologiam Moralem R. P. Anacleti Reiffenstuel Ord. Min. S. Francisci Reformatum Lectoris Jubilati &c. ab Adm. Rev. Patre Massaeo Kresslinger ejusdem Ordinis Lectore Jubilato, ac Provinciae Bavaricae Patre ter Emerito compositae, a Theologis, ad hoc specialiter deputatis, perlectae, ac summe laudatae, nihil Orthodoxae Fidei, aut bonis moribus contrarium contineant, sed potius Bono publico peritiles futurae sint: ideo, ut publicam Lucem videre possint, licentiam, & Facultatem concedimus, ac impertimur. In quorum fidem praesentes, a Nobis subscriptas, & proprio Sigillo munitas dedimus. Frisingae die 15. Maii 1741.

(L. S.) JOS. LUDOVICUS Bero de Welden.  
Vicarius Generalis.



## L I C E N T I A.

Reverendissimi, & Eminentissimi S. R. E. Cardinalis Laurentii Cozza &c. &c.  
pro tunc Ministri Generalis Ordinis.

Fr. Laurentius &c. dilecto Nobis P. Massæo Kreslinger &c. Salutem &c.

Cum juxta Apostolicas, nostrique Ordinis Constitutiones revisæ, laudatæ, & approbatæ fuerint *Additiones Theologico-Canonicalis* ad Theologiam Moralem Rev. Patris Anacleti Reiffenstuel a te multo labore, atque eruditione composita, & collectæ, ab aliis vero plurimis magna aviditate desideratæ, & expectatæ, tenore præsentium ad Salutaris Obedientia meriti tibi Facultatem impertimur, quatenus servatis servandis eisdem Typis dare, ac publici Juris, & utilitatis scire valeas. Vale. Datum in Nostro Conventu S. S. Crucifixi Nemoris 20. Octobris 1725.

Fr. LAURENTIUS a S. Laurentio Minister Generalis &c. &c.

## F A C U L T A S.

Moderni Reverendissimi P. Ministri Generalis. &c.

Fr. Cajetanus de Laurino Lector Jubilatus, Catholicæ Majestatis in Regali Congressu Matritensi pro Immacolata Conceptione B. V. Mariæ Theologus, ac totius Ordinis Fratrum Minorum S. P. N. Francisci Minister Generalis, Commissarius Visitator Apostolicus, & in Domino Servus. Dilecto nobis in Christo R. P. Fratri Massæo Kreslinger Nostræ Reformatæ Provinciæ Bavaricæ Lectori Jubilato, & Patri Emerito &c. Salutem, & Seraphicam Benedictionem.

Cum juxta Apostolicas, nostrique Ordinis Constitutiones per idoneos Censores revisæ, & approbatæ fuerint *Additiones* quædam Theologiæ Morali R. P. Anacleti Reiffenstuel a te composita. Harum nostrarum vigore cum salutaris Obedientia merito tibi facultatem impertimur, quatenus, servatis de jure servandis, illas Typis mandare possis, & valeas. Datæ ex hoc nostro Conventu S. P. Francisci Gentiani die 27. Aprilis 1742.

Fr. CAJETANUS a Laurino Minister Generalis

De Mandato Reverendissimi in Christo Patris Generalis &c.

Fr. JOANNES LAURENTIUS a Roma Secretarius Generalis Ordinis.

## CENSURA THEOLOGICA I.

Quanto in pretio habeatur *Theologia Moralis* R. P. Anacleti Reiffenstuel, Ord. Minor. S. Francisci Reformat. Theologi Jubilati &c. ex hoc solo dignoscere licet, quod Eadem in Germania jam sæpius sit Typis vulgata, non recensitis multis mille Exemplaribus Venetiis impressis, ac per Italiam, aliasque mundi partes copiose distractis. Et ut Opus istud, a Doctoribus summe æstimatum, cuivis etiam Tyroni Litterario magis deserviret, ab A. R. P. Massæo Kreslinger ejusdem Ordinis Lectori Jubilato, ac Prov. Bavar. Patre Emerito per variorum Casuum resolutiones ita adauctum fuit, ut in Doctrinæ soliditate, & clara tractandi Methodo hand dispar sit, ac si redivivus Auctor ipse manum apposuisset. Quapropter dignissimum censeo, ut Opus istud, sicuti illibate est conditum, ita in Legentibus multiplicem fructum ferat. Monachii 21. Augusti 1725.

Fr. THOMAS CANT. PRUGGMAYR.  
Lector Jubilatus, & Guardianus.

## CENSURA THEOLOGICA II.

*Additiones Theologico-Canonicalis* ad *Theologiam Moralem* R. Patris Anacleti Reiffenstuel, Provinciæ Bavaricæ Lectoris Jubilati, sæpius reimpresam, ab A. R. Patre Massæo Kreslinger Lectori Jubilato, ejusdem Provinciæ Patre Emerito compositas, de Mandato Superiorum accurata perlegi diligentia. Quemadmodum autem tam solidæ ac perspicuæ Doctrinæ securitate, quam omnimoda cum Orthodoxæ Fidei & morum principiis concordantia cum eximio illo Opere per omnia perfectissime symbolizant, nec non ad exquisitam & facilem praxim in quotidianis, ac etiam extraordinariis casibus discutiendis manuducunt, ita dignissimas censeo, ut ad publicum Christianæ Reipublicæ emolumentum, atque summam Confessariorum consolationem publico prælo committantur. Datum Frisingæ 20. Septembris 1725.

Fr. STANISLAUS KARG. Ord. Minor. S. Francisci Reformat.  
Lector Jubilatus & Sacrorum Canonum actualis.

## CENSURA THEOLOGICA I.

Pro Novissimis Additionibus.

Cum *Theologia Moralis* R. P. Anacleti Reiffenstuel Ordinis Fratrum Minorum S. Francisci almæ Provinciæ Bavaricæ Lectoris Jubilati adeo a Doctis viris æstimetur, ut iterato intra terminum unius quinquennii, (id est ab anno 1737.) exemplaribus jam compluribus millibus distractis, & divenditis, de novo reimprimi mereatur: Boni communis, & rei Litterariæ sollicitus Adm. R. P. Massæus Kreslinger Lector Jubilatus, & hujus almæ Provinciæ Bavaricæ ter Emeritus Pater ac Diffinitor &c. quasdam adhuc novas (maxime de Materia Legum, Contractuum & Sacramentorum) Additiones annexuit, quas tantâ claritate, & soliditate proponit, ut plane maximæ æstimationis pondus superaddituræ sint. Proinde dignissimum censeo hoc Opus, ut cum novis Additionibus ad communem utilitatem toti erudito orbi denuo appareat. Monachii 17. Junii 1741.

Fr. THOMAS PRUGGMAYR  
Lector Jubilatus, & Provinciæ Pater.

## CENSURA THEOLOGICA II.

Pro Novissimis Additionibus.

Régi presentes novas Additiones ad *Theologiam Moralem* Reverendi Patris Anacleti Reiffenstuel Lectoris Jubilati &c. ab Adm. Rever. Patre Massæo Kreslinger Lectori Jubilato, Provinciæ Bavaricæ patre Emerito ac Diffinitore &c. compositas: & quia easdem tam claritate, quam solidæ doctrinæ securitate illis, ab Eodem clarissimo Auctore in priori editione huic ubique terrarum notissimo operi maxima utilitate insertis, similes omnino inveni, dignissimas censeo, ut hæc quoque novam, atque passim desideratissimam prælaudati operis editionem pro uberima utriusque fori utilitate denuo illustrent. Datum Frisingæ 11. Junii 1741.

Fr. STANISLAUS KARG.  
Lector Jubilatus mpp.

A D



A D.

# PROPOSITIONES DAMNATAS A SUMMIS PONTIFICIBUS

INTRODUCTIO A. R. P. MASSÆO KRESSLINGER.

Quando legis aliquam Bullam Pontificiam, in qua damnantur certæ Propositiones, sæpius invenies, eandem reprobari tamquam *Laxas*, *Scandalosas*, *Temerarias*, *Erroneas*, *piarum aurium Offensivas*, *male Sonantes*, *Suspectas*, *sapientes Hæreses*, *Hæresi proximas*, *Hæreticas*, *Blasphemias*, *Schismaticas* & *Seditiosas*; consultum igitur, ac valde proficuum reputavi, antequam ad ipsasmet similes Bullas deveniam, aliqualem horum terminorum explicationem præmittere. Itaque.

*Laxa* dicitur aliqua Propositio, quæ in materia morum nimium relaxat frænum libertati.

*Scandalosa*, quæ præbet occasionem ruinæ spiritualis, seu peccati; hincque etiam *Perniciosa* intituitur.

*Temeraria*, quæ nullam pro se vere gravem, contra se vero firmissimas habet rationes.

*Erronea*, quæ contradicit alicui conclusioni Theologicæ, deductæ ex talibus duabus præmissis, quarum una est evidens, & altera de Fide.

*Piarum Aurium offensiva*, quæ in materia Religionis affert aliquid, si non falsum, saltem valde indecens.

*Male sonans*, quæ abutitur vocabulis contra communem sensum Fidelium.

*Suspecta*, quæ ex circumstantiis videtur innuere latentem Hæresin.

*Hæresi proxima*, quæ a plerisque censetur tamquam contraria Fidei saltem deductive.

*Hæretica*, quæ formaliter & explicite opponitur alicui articulo Fidei.

*Blasphemia*, quæ continet injuriam contra Deum, B. Virginem, aut Sanctos.

*Schismatica*, quæ nata est inducere scissionem inter caput Ecclesiæ, ejusque membra.

*Seditiosa*, quæ apta est excitare tumultum, & concitare subditos contra suos legitimos Superiores.

*Impia*, quæ pugnat contra Cultum, alias Deo, B. Virgini, vel Sanctis debitum.

Præterea multæ Propositiones solent damnari, prout jacent, id est, in eo sensu, quem verba ha-

bent secundum se, nimirum ut separata, ac præcisa ab alio contextu, forsan tales Propositiones in libro ipso, ex quo excerptæ sunt, per antecedentia vel subsequenta modificante. Aliæ vero Propositiones, uti Bajanæ & Jansenianæ &c. reprobantur etiam in sensu ab Auctoribus earum in suis libris intento.

His prænotatis addendum est ulterius, Propositiones a diversis Pontificibus damnatas respicere Theologiam vel Mysticam, vel Dogmaticam, seu Polemicam, vel Speculativam, vel demum Moralem; ubi sciendum, quod *Theologia Mystica* dicatur ea facultas, quæ hominem ducit, ac instruit ad apicem perfectionis Evangelicæ, & ad intimam cum Deo (quantum in hac vita obtineri potest) unionem. *Theologia Dogmatica*, seu *Polemica* appellatur, quæ tractat controversias Fidei inter nos, & Heterodoxos agitas. *Theologia Speculativa*, seu *Scholastica* vocatur, quæ speculativas præcipue quæstiones examinat, e. g. de Deo Uno, & Trino, de Gratia, de Angelis, de Incarnatione Verbi Divini &c. deducendo varias Conclusiones partim ex principiis Fidei, partim ex ratione naturali. Demum *Theologia Moralis* est illa, quæ ad actus humanos dirigendos, & casus conscientiæ recte resolvendos ordinatur. In præsentī, uti totam Theologiam Moralem subsequenter pluribus Additionibus augmentavi, ita prævie noxias, atque a Summis Pontificibus rejectas doctrinas in tres Paragraphos divisi: *In primis* ponendo propositiones damnatas a potiori concernentes statum perfectionis Evangelicæ, seu Theologiam Mysticam: *Secundo* propositiones damnatas circa liberum arbitrium, Gratiam Divinam, & Charitatem a potiori respicientes Theologiam Speculativam, & Dogmaticam, seu Polemicam: *Tertio* demum loco, propositiones damnatas a potiori spectantes ad materiam morum, seu Theologiam Moralem; ubi pariter sensus earum vel hic succincte declarabitur, vel ad illos Tractatus, Distinctiones, & Numeros, in quibus declaratæ inveniuntur, fiet remissio. His præcitis, sit.

## §. I.

Continens Propositiones damnatas à potiori concernentes statum internum Hominis, & Theologiam Mysticam.

## D E C R E T U M

## INNOCENTII PAPÆ XI.

Quo damnantur Propositiones 68. Michaelis de Molinos.

Feria V. die 28. Aug. & iterum 19. Novemb. 1687.

**A** Dabolendam perniciosissimæ hæresis pravitatem, quæ in plerisque mundi partibus non sine maximo Animarum discrimine invaluit, rigor debet Apostolicus excitari, ut Pontificiæ sollicitudinis aucto-

ritate & providentia hæreticorum protervia in ipsis suæ falsitatis conatibus elidatur, & Catholicæ veritatis lumen in Ecclesia Sancta resplendens, eam ubique demonstret ab omni execratione falsorum dogmatum



matum expiatam. Cum igitur compertum fuerit, quendam *Michaelem de Molinos* perditionis filium, prava dogmata, tum verbis, tum scriptis passim docuisse, & in praxim deduxisse, quæ prætextu Orationis, Quietis, contra doctrinam & usum a SS. Patribus, ab ipsis Ecclesiæ nascentis primoribus receptum, fideles a vera Religione & a Christianæ pietatis puritate, in maximos errores, & turpissima quæque inducebant; Sanctissimus D. N. INNOCENTIUS Papa XI. cui cordi est, ut fidelium Animæ sibi ex alto commissæ, purgatis pravarum opinionum erroribus, ad optatum salutis portum tuto pervenire possint, pro re tam gravi, auditis pluries coram se Eminentissimis & Reverendissimis DD. Cardinalibus in tota Republica Christiana Generalibus Inquisitoribus, ac pluribus in Sacra Theologia Magistris, eorumque suffragiis, tum voce tum scripto susceptis, matureque perpensis, implorata etiam Sancti Spiritus assistentia, ad damnationem infra scriptarum Propositionum ejusdem *Michaelis de Molinos*, a quo fuerunt pro suis recognitæ, & de quibus Propositionibus tanquam a se dictatis, scriptis, communicatis & creditis, & ipse convictus, & respective confessus, devenire, ut infra; decrevit.

## PROPOSITIONES.

1 Necessarium est annihilari potentias; & hæc est via interna.

2 Velle operari active, est offendere Deum, qui vult solus Agens esse; & ideo necesse est derelinquere se in illo, & deinde se habere corporis mortui instar.

3 Vota faciendi aliquam rem sunt impeditiva perfectionis.

4 Activitas naturalis est inimica gratiæ, & impedit operationem Dei & veram perfectionem; quia Deus vult operari in nobis, sine nobis.

5 Anima nihil operando annihilat se, & redit ad suum principium & ad suam originem, quæ est essentia Dei, ubi manet transformata, & divinizzata; & tunc Deus manet in se ipso, quia tunc non sunt amplius duæ res unitæ, sed una sola; & sic vivit, & regnat Deus in nobis, & anima se annihilat in esse operativo.

6 Interna via est illa, in qua non cognoscitur aut lumen, aut amor, aut resignatio, neque necessarium est cognoscere Deum, & sic bene proceditur.

7 Non debet anima cogitare aut præmium, aut poenam, aut Paradisum, aut infernum, aut mortem, aut æternitatem.

8 Non debet velle scire, an ambulet cum voluntate Dei; an sit resignata illi, vel non; nec est necesse, ut velit cognoscere suum statum, nec proprium nihilum, sed sese habeat quasi corpus mortuum.

9 Non debet anima memor esse, vel sui ipsius, vel Dei, vel ullius rei; & in via interna omnis reflexio est nociva, etiam reflexio supra suas actiones humanas ac proprios defectus.

10 Si propriis defectibus aliquis scandalizat alterum, non est necesse ad id facere reflexionem, dummodo non sit voluntas scandalizandi; & non posse reflectere ad proprios defectus est donum Dei.

11 Ad dubia, quæ accidunt, rectene procedamus, an non, non est necessarium reflectere.

12 Qui dedit liberum arbitrium Deo, non debet curare de ulla re, nec de inferno, nec de Paradiso, nec de habendo desiderio suæ propriæ perfectionis, nec virtutum, nec propriæ Sanctitatis, nec propriæ Salutis, a cujus etiam spe se purgare debet.

13 Dum consignatum fuerit liberum arbitrium Deo, illi debet relinqui cura & cogitatio omnium rerum nostrarum, & permitti, ut in nobis sine nobis suum Divinum faciat velle.

14 Qui resignatus est Divinæ voluntati, non debet a Deo quidnam petere, quia petere est imperfectio,

cum sit actus propriæ voluntatis & electionis, & est quodammodo velle, ut Divina voluntas nostræ se conformet, & non nostra voluntati Divinæ: & illud, *Petite, & accipietis*, ex Evangelio non fuit dictum a Christo pro animabus internis, quæ nolunt habere voluntatem; quin & istæ eo deveniunt, ut non possint a Deo quidquam petere.

15 Unde, sicut nihil debent a Deo rogare, etiam non debent reddere illi gratias pro ulla re; quia utrumque est æqualiter actus propriæ voluntatis.

16 Non oportet quærere Indulgentias pro poena debita peccatis propriis, quia melius est satisfacere Divinæ justitiæ, quam quærere misericordiam; nam illud procedit ex puro Dei amore, & hoc ex amore interessato, id est, personalis commodi nostri, & non est res grata Deo, nec meritoria, quia est velle subterfugere crucem.

17 Ex quo traditum est Deo liberum arbitrium, cura etiam ac cogitatio animæ nostræ, non debent ulterius æstimari tentationes, nec alia fieri illis resistentia nisi negativa, non utendo industria: & si natura inde patitur, necesse est illam sinere pati, quia natura est.

18 Qui in Oratione utitur imaginibus, figuris, speciebus, & propriis conceptibus, non adorât Deum in spiritu & veritate.

19 Qui amat Deum, prout illum ratio argumentando repræsentat, aut intellectus comprehendit, non amat Deum verum.

20 Dicere, in Oratione utendum discursu & cogitationibus tunc, cum Deus non loquitur animæ, est ignorantia: Deus non loquitur unquam, illius loqui est operari, semperque in anima operatur, dum illa suis discursibus, cogitationibus & operationibus eum non impedit.

21 In Oratione manendum est in fide obscura & universali, cum quiete & oblivione omnis alterius cogitationis particularis & distinctæ attributorum DEI & Trinitatis, atque standum in præsentia Dei ad eum adorandum, amandum, eique serviendum, verum sine productione ullorum actuum; Deus namque id genus rebus non delectatur.

22 Non est hæc cognitio Fidei actus quispiam productus a creatura, sed cognitio quædam illi a Deo data, quam creatura non novit se habere, neque adeo postea scit se habuisse, idemque dicendum de amore.

23 Mystici cum S. Bernardo in *Scala Claustralium*, distinguunt quatuor gradus, Lectionem, Meditationem, Orationem, & Contemplationem infusam. Qui semper est in primo, numquam transit ad secundum. Qui semper est in secundo, numquam ad tertium pertingit, quæ est Contemplatio nostra acquisita, ubi consistendum est tota vita, dummodo Deus non trahat animam, nihil tale expectantem, ad Contemplationem infusam: & hac cessante redeundum est Animæ ad gradum tertium, & eo consistendum, non amplius revertendo ad secundum aut primum.

24 Quantæcunque cogitationes inter orandum accidunt etiam impuræ, quin & contra Deum & Sanctos, contra Fidem & sacramenta, si non voluntarie foveantur, neque actu aliquo voluntatis rejiciantur, sed cum indifferentia & resignatione tolerantur, non impediunt Orationem Fidei: imo illam reddunt perfectiorem, quia Anima magis est resignata voluntati Divinæ.

25 Tametsi superveniat somnus & dormiatur, omnino tamen oratur & contemplatio fit actualiter; quia Oratio & resignatio, Resignatio & oratio, totum est idem; & quamdiu continuatur Resignatio, utique etiam Oratio continuatur.

26 Tres hæc Viæ, Purgativa, Illuminativa, & Unitiva, ineptia est maxima, quæ umquam prolata sit in ipsa Mystica, cum non sit nisi Via unica, id est, Via interna.

27 Qui



27 Qui desiderat, & amplectitur devotionem sensibilem, is nec desiderat, nec querit Deum, sed seipsum: quique per Viam internam incedit, male facit eam desiderando, ac habere conando, sive in locis sacris, sive diebus solemnibus.

28 Bonum est tedium rerum spiritualium; quia sic ab amore proprio expurgamur.

29 Cum anima interna fastidit discursus de Deo & Virtutibus, manetque frigida, non sentiendo se ad fervorem accendi, bonum signum est.

30 Quidquid sensibile in vita spirituali percipitur, illud omne abominabile est, sordidum & immundum.

31 Nemo meditativus exercet veras virtutes internas, quales non possunt cognosci a sensibus. Perdere oportet Virtutes.

32 Nec ante, nec post Communionem alia opus est præparatione aut gratiarum actione (pro animabus hisce internis) quam ut se teneat in solita Resignatione passiva; quia in hac invenitur amor, qui supplet modo perfectiori, quam omnes alii virtutum actus, qui fieri possunt, & sunt in via ordinaria. Et si in hac occasione Communionis accidant motus humiliationis, petitionis aut gratiarum actionis, reprimi debent, quoties non cognoscuntur esse speciales Dei impulsus; aliter enim sunt impulsus naturæ nondum mortuæ.

33 Male facit anima, quæ Via ista interna graditur, si diebus solemnibus facere velit conatum aliquem particularem ad habendum sensum aliquem Devotionis; quia animabus internis omnes dies sunt pares, omnes festi: idemque est de locis sacris, cum omnia loca his animabus sint paria.

34 Deo gratias agere lingua & verbis non est animarum internarum, quarum est in silentio se tenere, non præbentes Deo impedimentum, quo minus in iis operetur: & quanto amplius se Deo resignant, tanto magis experiuntur impotentiam dicendi *Pater noster*.

35 Animabus hujus vitæ internæ non convenit, ut faciant operationes etiam virtuosas ex propria electione & activitate; alioquin mortuæ non forent. Nec debent facere actus amoris erga D. Virginem, Sanctos, Humanitatem Christi; quia, cum hæc sint objecta sensibilia, talis est amor erga illa.

36 Nulla creatura, neque D. Virgo, nec Sancti, sedem habere debent in corde nostro; quia Deus solus vult occupare illud, & possidere.

37 In occasione tentationum etiam vehementium non debet anima facere actus explicitos virtutum oppositarum, sed tenere se in suprascripto amore & resignatione.

38 Crux voluntaria mortificationum gravis est & sine fructu, ideoque omittenda.

39 Opera sanctissima, & austeritates, quas Sancti subierunt, non sufficiunt ad animam vel uno assultu liberandam.

40 B. Virgo nunquam opus aliquod externum fecit, & omnium Sanctorum fuit sanctissima: igitur perveniri potest ad Sanctitatem sine opere externo.

41 Deus, ut nos humiliet, & ad veram transformationem perungere faciat, permittit, & vult in animabus quibusdam perfectis, etiam non arreptitiis, ut dæmon operetur violentiam in earum corporibus, illasque committere faciat actus carnales, etiam in vigilia & sine mentis offuscatione, movendo illis physice manus, aliaque membra contra earum voluntatem; & idem dicendum est in ordine ad alios actus per se peccaminosos: quo casu non sunt peccatum, quia non adest consensus.

42 Potest dari casus, quo hæ violentiæ ad actus carnales existant in eodem tempore ex parte duarum personarum, id est, viri & femine, & consequatur actus ex parte amborum.

43 Deus temporibus præteritis faciebat Sanctos per medium tyrannorum, hodie eos facit per medium dæmonum; qui, dum illis causant dictas violentias, facit, ut ii magis se vilificent, & annihilent in se ipsis, seque in Deo resignent.

*Ampl. Reifferskuel Theolog. Tom. I.*

44 Job blasphemavit, & tamen in eo non peccavit labiis suis; quia id fuit per violentiam dæmonis.

45 Sanctus Paulus passus est in suo corpore tales violentias dæmonis; unde scripsit: *Non quod volo bonum, hoc ago, sed quod nolo malum, hoc facio.*

46 Hæ violentiæ sunt medium magis proportionatum ad annihilandam animam, eamque promovendam ad veram transformationem & unionem: neque alia est via; estque via facilior & securior.

47 Cum hæ violentiæ accidunt, oportet, sinamus satanam agere, non utendo propria industria aut viribus, sed consistendo in nihilo nostro: ac tamen accidant pollutiones, actusque obsceni manibus procurati, atque etiam his magis insolita & peregrina, non opus est his inquietari, sed excludendi sunt scrupuli, dubia, timores, quia anima magis illuminata, robustiorque & candidior efficitur, & acquiritur sancta illa libertas. At imprimis non oportet ea confiteri, sitque sanctissime illa non confitendo, quia sic vincitur dæmon, & thesaurus quidam pacis obtinetur.

48 Satanas, qui facit tales violentias, suggerit deinde, esse graves defectus ad inquietandam Animam, ut non progrediatur in via interna: unde ad tollendas illi vires præstat ea non confiteri, quia ne quidem sunt peccata venialia.

49 Job per violentiam dæmonis faciebat pollutiones manibus suis eo ipso tempore, quo *mundas habebat ad Deum preces*. Ita interpretando in tali sensu textum quemdam *cap. 16. Job.*

50 David, Jeremias & multi e Prophetis sanctis patiebantur ejusmodi violentias harum impurarum operationum externarum,

51 In Scriptura Sacra multa sunt exempla violentiarum ad actus externos peccaminosos, ut Sampsonis, qui per violentiam occidit seipsum cum Philistæis, uxorem duxit alienigenam, fornicatus est cum Dalila meretrice; quæ alias erant res prohibitæ, & fuissent peccata: item Judith, quæ crevit est Holoferni, Elisæi, qui pueris maledixit, Eliæ, qui igne consumpsit duos Duces cum cohortibus Regis Achab. An autem fuerit violentia facta immediate a Deo, vel dæmonis ministerio, ut in aliis accidit animabus, in dubio relinquitur.

52 Quando hæ violentiæ, etiam impuræ, veniunt sine mentis offuscatione, tunc anima potest se unire Deo, & reipsa semper magis unitur.

53 Ad cognoscendum in praxi, an aliqua operatio in aliis personis fuerit violentia, regula, quam ea de re habeo, non solum est, quod protestentur hæ animæ se non consensisse, vel quod non possint jurare se consensisse, ac quod videamus esse animas, quæ profectum faciunt in Via interna: sed præsertim me dirigo lumine quodam actuali, & quod superius est cognitione humana ac Theologica, quo cognosco certo cum interna securitate, operationem ejusmodi esse violentam: & hoc lumen certus sum venire a Deo, quia mihi venit conjunctum cum securitate, quod veniat a Deo, neque mihi vel umbram dubii in contrarium relinquit; eum in modum, quo interdum accidit, ut Deus revelando rem quampiam, eodem tempore animam securam reddat, se esse, qui eam revelationem facit, neque anima possit in contrarium dubitare.

54 Spirituales illi Viæ ordinariæ in hora mortis se delusos & confusos invenient, cum omnibus passionibus in altero mundo expurgandis.

55 Per hanc Viam internam pervenitur, etsi cum multa tolerantia, ad expurgationem & mortificationem omnium passionum, ita, ut nihil amplius sentiat, nihil, nihil plane, neque percipiat quis inquietudinem ullam perinde, ut corpus quoddam mortuum, neque anima se amplius in diversa transferri sinat.

56 Dux leges & dux voluntates, altera animæ, altera amoris proprii, durant, quamdiu amor proprius durat: unde; ubi hic expurgatus & mortuus fuerit, uti fit per Viam internam: non amplius ibi sunt illæ dux leges, neque dux voluntates, nec ultra



ultra sit ulla subreptio, aut motus improvisus, neque aliquid porro sentitur, ne unum quidem veniale peccatum.

57 Per contemplationem acquisitam pervenitur ad statum non peccandi amplius, seu mortaliter, seu venialiter.

58 Ad ejusmodi statum pervenitur, non faciendo reflexionem ad operationes proprias, quia defectus nascuntur ex reflexione.

59 Via interna separata est a Confessione, a Confessariis, & a Casibus conscientie, a Theologia & Philosophia.

60 Animabus provectis, quæ reflexionibus mori incipiunt, quin & eo, ut mortuæ sint, jam pertinent, Deus nonnumquam impossibilem reddit Confessionem, ipseque supplet tantumdem ipsis largiendo gratie præservantis, quantum reciperent ex Sacramento: ideoque his animabus non expedit eo casu ad Sacramentum Pœnitentiæ accedere, quia non possunt.

61 Anima, cum ad mortem mysticam, pertingit, non potest ultra velle aliud, quam vult Deus; quia non habet amplius voluntatem, & Deus illam ipsi ademit.

62 Per Viam internam pervenitur ad continue consistendum immobiliter in pace quadam imperturbabili.

63 Pervenitur etiam mediante Via interna ad mortem sensuum; imo signum, quod quis in nihilo illo consistat, id est, mortuus sit morte mystica, est, si sensus externi non magis jam repræsentent res sensibiles, quam si non existerent; quandoquidem non efficiant, ut intellectus se iis applicet.

64 Theologus minus est dispositus, quam simplex & idiota, ad hoc ut sit contemplativus. Primo, quia non habet fidem tam puram. Secundo, quia non est tam humilis. Tertio, quia non curat perinde de sua salvatione. Quarto, quia habet caput plenum phantasmatis, speciebus, opinionibus & speculationibus, & in eum nequit verum lumen intrare.

65 Superioribus obediri debet in exteriori, & latitudo voti Obedientiæ Religiosorum pertingit solummodo ad exterius: aliud est in interiori, quo solus Deus & Director intrant.

66 Rifu digna est doctrina quædam nova in Ecclesia Dei, Animam, ad interna quod attinet, gubernari debere per Episcopum, & si is idoneus non fuerit, eundem animæ ab illo ad suum Directorem. Dico novam, quia nec Scriptura Sacra, nec Concilia, nec Canones, nec Bullæ, nec Sancti, nec Auctores umquam id dixerunt, neque dicere possunt; quia Ecclesia non judicat de occultis, habetque ius Anima, ut eligat, quem maluerit.

67 Dicere, opus esse, ut internum manifestetur tribunali externo Superiorum, & esse peccatum, nisi fiat, ea est deceptio manifesta, quia Ecclesia non judicat de occultis, atque animabus suis damnum adferunt fraudibus hisce & fictionibus.

68 In mundo non est facultas, nec Jurisdictio ad mandandum, ut manifestentur litteræ Directoris circa internum animæ: & idcirco monitos esse oportet, esse hunc assultum quemdam satanæ.

Quas quidem Propositiones tamquam hæreticas, suspectas, erroneas, scandalosas, blasphemias, piarum aurium offensivas, temerarias, Christianæ disciplinæ relaxativas & everivas, & scandalosas respective, ac quæcunque super iis verbo, scripto vel typis emissæ, pariter cum voto eorumdem Fratrum nostrorum S. R. E. Cardinalium & Inquisitorum Generalium damnavimus, circumscripsimus, abolevimus, deque eisdem & similibus omnibus & singulis posthac quoquo modo loquendi, scribendi, disputandi, easque credendi, tenendi, docendi, aut in praxim reducendi facultatem quibuscunque interdiximus, & contrafacientes omnibus dignitatibus, gradibus, ho-

noribus, beneficiis ipsò facto perpetuo privavimus, & inhabiles ad quæcunque decrevimus, vinculoque etiam anathematis eo ipso innodavimus, a quo nisi a Nobis & a Romanis Pontificibus Successoribus nostris valeant absolvi. Præterea eodem nostro Decreto prohibuimus, & damnavimus omnes Libros, omniaque Opera quocunque loco & idiomate impressa, nec non omnia Manuscripta ejusdem *Michaelis de Molinos*, vetuimusque, ne quis, cujuscunque gradus, conditionis vel status, etiam speciali nota dignus, audeat sub quovis prætextu, quolibet pariter idiomate, sive sub iisdem verbis, sive sub æqualibus aut æquipollentibus, sive absque nomine; seu ficto aut alieno nomine ea imprimere, vel imprimi facere, neque impressa, seu manuscripta legere, vel apud se retinere, sed Ordinariis locorum, aut hæreticæ pravitatis Inquisitoribus statim tradere, & consignare teneatur sub eisdem pœnis superius inflictis: qui Ordinarii & Inquisitores statim ea igni comburant, & comburi faciant.

Tandem, ut prædictus *Michael de Molinos* ob hæreses, errores & turpia facta prædicta debitis pœnis in aliorum exemplum & ipsius emendationem plecteretur, lecto in eadem nostra Congregatione toto Processu, & auditis dilectis filiis Consultoribus nostri Sanctæ Inquisitionis Officii, in Sacra Theologia & in Jure Pontificio Magistris, cum eorumdem Venerabilium Fratrum nostrorum S. R. E. Cardinalium unanimi voto, dictum *Michaelem de Molinos* tamquam reum convictum & confessum respective, & uti hæreticum formalem, licet pœnitentem, in pœnam arcti & perpetui carceris, & ad peragendas alias pœnitentias salutes, prævia tamen abjurazione de formali per ipsum emittenda, servato Juris ordine damnavimus, mandantes, ut die & hora præfigendis in Ecclesia Sanctæ Mariæ supra Minervam hujus almæ Urbis, præsentibus omnibus Venerabilibus Fratribus nostris S. R. E. Cardinalibus, & Romanæ Curiae nostræ Prælati, universoque populo ad id etiam per concessionem Indulgentiarum convocando, ex alto tenor Processus, stante in suggesto eodem *Michael de Molinos*, una cum sententia inde secuta legeretur. Et postquam idem *Michael de Molinos* habitu pœnitentiæ indutus prædictos errores & hæreses publice abjurasset, dedimus facultatem Dilecto Filio nostri Sancti Officii Commissario, ut eum a Censuris, quibus innodatus erat, in forma Ecclesiæ consueta absolveret: quæ omnia in executionem dictæ nostræ Ordinationis die 3. Septembris labentis solemniter adimpleta sunt.

Et licet supra narratum Decretum mandato nostro latum ad majorem Fidelium cautelam typis editum, publicis locis affixum, & divulgatum fuerit, nihilominus, ne hujus Apostolicæ damnationis memoria futuris temporibus deleri possit, utque populus Christianus Catholica veritate instructior per viam salutis incedere valeat, prædecessorum nostrorum Summorum Pontificum vestigiis inherentes, hac nostra perpetuo valitura Constitutione supradictum Decretum denuo approbamus, confirmamus, & debite executioni tradi mandamus, iterum supradictas Propositiones definitive damnantes, & reprobantes, Librosque & Manuscripta ejusdem *Michaelis de Molinos* prohibentes, & interdicentes sub eisdem pœnis & Censuris contra transgressores latis & inflictis.

Decernentes insuper, præsentis Litteras semper & perpetuo validas & efficaces existere, & fore, suosque plenarios & integros effectus sortiri, & obtinere, sicque per quoscunque Judices Ordinarios & Delegatos, quavis auctoritate fungentes, & functiones ubique judicari, & definiri debere, sublata eis & eorum cuilibet quavis aliter judicandi, & interpretandi facultate & auctoritate, ac irritum & inane, quidquid secus super iis a quocunque, quavis auctoritate, scienter vel ignoranter contigerit attentari. Volumus autem, ut præsentium transumptis, etiam



etiam impressis, manu Notarii publici subscriptis & sigillo alicujus personæ in Dignitate Ecclesiastica constitutæ munitis, eadem fides prorsus adhibeatur, quæ

ipsis Originalibus Litteris adhiberetur, si essent exhibitæ, vel ostensæ.

Nulli ergo omnino hominum liceat hanc paginam &c.

SANCTISSIMI D. N.

D. INNOCENTII D. P. PAPÆ XII.

Damnatio & prohibitio Libri Parisiis anno 1697. impressi, cui titulus;

*Explication des Maxilles des Saints sur la vie interieure &c.*

12. Martii 1699.

INNOCENTIUS PAPA XII.

*Ad perpetuam rei memoriam.*

CUM alias ad Apostolatus Nostri notitiam pervenerit, in lucem prodiiſſe librum quemdam Gallico idiomate editum, cui titulus: *Explication des Maximes des Saints sur la vie interieure, per Messire François de Salignac Fenelon, Archevêque Duc de Cambray Precepteur des Messieurs les Ducs de Bourgogne, d'Anjou, & de Berry. A Paris chez Pierre Abovin, Pierre Emery, Charles Clouſier 1697*, Ingens vero subinde de non sana libri hujusmodi doctrina excitatus in Galliis rumor adeo percubuerit, ut opportunam Pastoralis vigilantie nostræ opem efflagitaverit, nos eundem Librum nonnullis ex Venerabilibus Fratribus Nostriſ S. R. E. Cardinalibus, aliisque in Sacra Theologia Magistris, mature, ut rei gravitas postulare videbatur, examinandum commisimus. Porro hi mandatis obsequentes, postquam in quamplurimis Congregationibus varias Propositiones ex eodem libro excerptas diuturno, accuratoque examine discusserant, quid super earum singulis sibi videretur, tam voce, quam scripto Nobis exposuerunt. Audis igitur in pluribus itidem coram Nobis desuper actis Congregationibus memoratorum Cardinalium, & in Sacra Theologia Magistrorum Sententiis, Dominici Gregis Nobis ab Æterno Pastore crediti periculis, quantum nobis ex alto conceditur, occurrere cupientes, motu proprio, ac ex certa scientia, & matura deliberatione nostris; deque Apostolicæ potestatis plenitudine, librum prædictum ubicumque & quocumque alio idiomate, seu quavis editione, aut versione hucusque impressum, aut posterum imprimendum, quippe ex cujus lectione, & usu fideles sensim in errores ab Ecclesia Catholica jam damnatos induci possent, ac insuper tamquam continentem Propositiones sive in obvio eorum verborum sensu, sive attenta sententiarum connexionem, temerarias, scandalosas, male sonantes, piarum aurium offensivas, in praxi perniciosas ac etiam erroneas respective tenore præsentium damnamus, & reprobamus, ipsiusque libri impressionem, descriptionem, lectionem, retentionem, & usum omnibus, & singulis Christi fidelibus etiam specifica, & individua mentione, & expressione dignis, sub poena excommunicationis per contrascentes ipso facto absque alia declaratione incurrenda, interdiciamus, & prohibemus: volentes, & Apostolica auctoritate mandantes, ut, quicumque supradictum librum penes se habuerint, illum statim, atque præsentis litteræ eis innotuerint, locorum Ordinariis, vel hæreticæ pravitatis Inquisitoribus tradere, ac consignare omnino teneantur. In contrarium facientibus non obstantibus quibuscumque. Ceterum Propositiones in dicto libro contentæ, quas Apostolici censura judicii, sicut præmittitur, configendas duximus, ex Gallico idiomate in latinum versæ sunt tenoris, qui sequitur, videlicet:

1 Datur habitualis Status amoris DEI, qui est Charitas pura, & sine ulla admixtione motivi proprii interesse. Neque timor poenarum, neque desiderium remun-

*Anacl. Reiffensuel Theol. Tom. I.*

nerationum habent amplius in eo partem. Non amatur amplius Deus propter meritum, neque propter perfectionem, neque propter felicitatem in eo amando inveniendam.

2 In Statu Vitæ contemplativæ, seu unitivæ amittitur omne motivum interessatum timoris, & spei.

3 Id, quod est essentielle in directione Animæ, est, non aliud facere, quam sequi pedetentim gratiam cum infinita patientia, præcautione, & subtilitate. Oportet se intra hos limites continere, ut sinatur Deus agere, & numquam ad purum amorem ducere, nisi quando Deus per unctionem interiorem incipit aperire Cor huic Verbo, quod adeo durum est Animabus adhuc sibi met affixis, quod adeo potest illas scandalizare, aut in perturbationem conjicere.

4 In Statu sanctæ indifferentiæ Anima non habet amplius desideria voluntaria, & deliberata propter suum interesse, exceptis iis occasionibus, in quibus toti suæ gratiæ fideliter non cooperatur.

5 In eodem Statu sanctæ indifferentiæ nihil nobis, omnia Deo volumus. Nihil volumus, ut simus perfecti, & beati propter interesse proprium, sed omnem perfectionem, ac beatitudinem volumus, in quantum Deo placet efficere, ut velimus res istas impressione suæ gratiæ.

6 In hoc Sanctæ indifferentiæ Statu nolumus amplius salutem, ut salutem propriam, ut liberationem æternam, ut mercedem nostrorum meritorum, ut nostrum interesse omnium maximum, sed eam volumus voluntate plena, ut gloriam, & beneplacitum Dei, ut rem, quam ipse vult, & quam nos vult velle propter ipsum.

7 Derelictio non est nisi abnegatio, seu sui ipsius renuntiatio, quam Jesus Christus a nobis in Evangelio requirit, postquam externa omnia reliquerimus. Ista nostra ipsorum abnegatio non est, nisi quoad interesse proprium. Extremæ probationes, in quibus hæc abnegatio, seu sui ipsius derelictio exerceri debet, sunt tentationes, quibus Deus æmulator vult purgare amorem, nullum ei ostendendo perfugium, neque ullam spem quoad suum interesse proprium, etiam æternum.

8 Omnia Sacrificia, quæ fieri solent ab Animabus quam maxime desinteressatis circa earum æternam beatitudinem, sunt conditionalia. Sed hoc Sacrificium non potest esse absolutum in statu ordinario. In uno extremarum probationum casu hoc Sacrificium sit aliquo modo absolutum.

9 In extremis probationibus potest animæ invincibiliter persuasum esse persuasione reflexa, & quæ non est intimus conscientiæ fundus, se julte reprobam esse a Deo.

10 Tunc Anima divisa a semetipsa expirat cum Christo in Cruce dicens: Deus, Deus meus, ut quid dereliquisti me. In hac voluntaria impressione desperationis conficit Sacrificium absolutum sui interesse proprii quoad æternitatem.



11 In hoc Satu Anima amittit omnem spem sui proprii interesse, sed numquam amittit in parte superiori, id est in suis actibus directis, & intimis spem perfectam, quæ est desiderium desinteressatum promissionum.

12 Director tunc potest huic Animæ permittere, ut simpliciter acquiescat iacturæ sui proprii interesse, & iustæ condemnationi, quam sibi a Deo indictam credit.

13 Inferior Christi pars in Cruce non communicavit Superiori suas involuntarias perturbationes.

14 In extremis probationibus pro purificatione amoris fit quædam separatio partis superioris Animæ ab inferiori. In ista separatione actus partis inferioris manant ex omnino cæca, & involuntaria perturbatione; nam totam, quod est voluntarium, & intellectuale, est partis superioris.

15 Meditatio constat discursivis actibus, qui a se invicem facile distinguuntur. Ista compositio actuum discursivorum, & reflexorum est propria exercitatio amoris interessati.

16 Datur Status contemplationis adeo sublimis, adeoque perfectæ, ut fiat habitualis, ita ut quoties Anima actu orat, sua Oratio sit contemplativa, non discursiva. Tunc non amplius indiget redire ad meditationem, ejusque actus methodicos.

17 Animæ contemplativæ privantur intuitu distincto, sensibili, & reflexo Jesu Christi duobus temporibus diversis. Primo in fervore nascente earum contemplationis. Secundo Anima amittit intuitum Jesu Christi in extremis probationibus.

18 In Statu passivo exercentur omnes virtutes distincte, non cogitando, quod sint virtutes. In quolibet momento aliud non cogitatur, quam facere id, quod Deus vult, & amor zelotypus simul efficit, ne quis sibi virtutem velit, nec umquam sit adeo virtute præditus, quam virtuti amplius affixus non est.

19 Potest dici in hoc sensu, quod anima passiva, & desinteressata nec ipsum amorem vult amplius, quatenus est sua perfectio, & sua felicitas, sed solum quatenus est id, quod Deus a nobis vult.

20 In confitendo debent animæ transformatæ sua peccata detestari, & condemnare se, & desiderare remissionem suorum peccatorum, non ut propriam purificationem, & liberationem, sed ut rem, quam DEUS vult, & vult nos velle propter suam gloriam.

21 Sancti Mystici excluderunt a statu animarum transformatarum exercitationes virtutum.

22 Quamvis hæc doctrina (*de puro amore*) esset pura, & simplex perfectio Evangelica, in universa traditione designata, antiqui Pastores non proponebant passim multitudini Justorum, nisi exercitia amoris interessati eorum gratiæ proportionata.

23 Purus amor ipse solus constituit totam vitam interiorem, & tunc evadit unicum principium, & unicum motivum omnium actuum, qui deliberati, & meritorii sunt.

Non intendimus tamen per expressam Propositionum hujusmodi reprobationem alia in eodem libro contenta ullatenus approbare. Ut autem eadem præsentis litteræ omnibus facilius innotescant, nec quisquam illarum ignorantiam valeat allegare, volumus pariter, & auctoritate præfata decernimus, ut illæ ad valvas Basilicæ Principis Apostolorum, ac Cancellariæ Apostolicæ, nec non Curiae Generalis in Monte Citatorio & in Acie Campi Floræ de Urbe per aliquem ex Cursoribus nostris, ut moris est, publicentur, illarumque exempla ibidem affixa relinquantur, ita, ut sic publicatæ omnes, & singulos, quos concernunt, perinde afficiant, ac si unicuique illorum personaliter notificatæ, & intimatæ fuissent: utque ipsarum præsentium litterarum transumptis, seu exemplis etiam impressis, manu alicujus Notarii publici subscriptis, & sigillo personæ in Ecclesiastica Dignitate constitutæ munitis, eadem prorsus fides tam in judicio, quam extra illud ubique locorum habeatur, quæ ipsis præsentibus haberetur, si forent exhibitæ, vel ostensæ. Datum Romæ apud Sanctam Mariam Majorem sub Annulo Piscatoris die xii Martii MDCXCIX. Pontificatus Nostri Anno Octavo.

J. F. CARD. ALBANUS.

Anno a Nativitate D. N. Jesu Christi 1699. Indictione 7. die vero 12. Mensis Martii, Pontificatus autem Sanctissimi in Christo Patris, & D. N. D. Innocentii, Divina Providentia Papæ XII. anno ejus octavo supradictum Breve affixum, & publicationem fuit ad valvas Basilicæ Principis Apostolorum, Magnæ Curiae Innocentianæ, in acie Campi Floræ, ac aliis locis solitis & consuetis Urbis per me Franciscum Perinum, ejusdem SS. D. N. Papæ Cursores.

## C O R O L L A R I U M.

*In quo succincte explicantur allegata Propositiones.*

**D**educes ex lectione harum propositionum, quod ea potissimum damnata fuerint propterea, quia vel ex pessimis principii animam via perfectissimæ, nimirum unitivæ, deditam posuerunt in mera quiete, seu in statu mere passivo, vel saltem ab eadem, culmen perfectionis attingente, excluderunt exercitium aliquarum virtutum, præsertim Spei, quasi vero impossibilis cum excellenti gradu perfectionis Evangelicæ, cum tamen SS. PP. & Theologi communissime Spem principalibus virtutibus nimirum Theologicis semper annumeraverint; uti & exercitium aliarum virtutum summo opere recommendaverint. Vide Tract. 4. Dist. 6. num. 9. & sequenti Additione. Item alium a me editum Libellum succincta Declaratio &c. intitulatum cap. 1.



## C O M P R E H E N D E N S

*Propositiones damnatas circa Liberum Arbitrium, Gratiā Divinā, & Charitatem, Merita, ac Demerita &c. a potiori respicientes Theologiam Speculativā & dogmaticā.*

## P R O P O S I T I O N E S X L I.

Martini Lutheri Anno 1520. damnatae a LEONE X. per Bullam  
*Exurge Domine &c.*

1 **H**æretica sententia est, sed usitata, Sacramenta novæ legis justificantem gratiam illis dare, qui non ponunt obicem.

2 In puero post Baptismum negare remanens peccatum, est Paulum & Christum simul conculcare.

3 Fomes peccati etiamsi nullum adsit actuale peccatum, moratur exeuntem a corpore animam ab ingressu cœli.

4 Imperfecta charitas morituri fert secum necessario magnum timorem, qui se solo satis est facere poenā Purgatorii, & impedit introitum regni.

5 Tres esse partes Poenitentiae, Contritionem, Confessionem & Satisfactionem, non est fundatum in Sacra Scriptura, nec in antiquis SS. Christianis Doctoribus.

6 Contritio, quæ paratur per discussionem, collationem & detestationem peccatorum, qua quis recogitat annos suos in amaritudine animæ suæ, ponderando peccatorum gravitatem, multitudinem, feccitatem, amissionem æternæ beatitudinis, ac æternæ damnationis acquisitionem, hæc contritio facit hypocritam, imo magis peccatorem.

7 Verissimum est proverbium, & omnium doctrina de contritionibus hucusque data præstantius, de cetero non facere, summa poenitentiae: optima poenitentia nova vita.

8 Nullo modo præsumas confiteri peccata venialia, sed nec omnia mortalia, quia impossibile est, ut omnia mortalia cognoscas: unde in primitiva Ecclesia solum manifesta mortalia confitebantur.

9 Dum volumus omnia pure confiteri, nihil aliud facimus, quam quod misericordiae Dei nihil volumus relinquere ignoscendum.

10 Peccata non sunt ulli remissa; nisi remittente Sacerdote credat sibi remitti: imo peccatum maneret, nisi remissum crederet, non enim sufficit remissio peccati & gratiae donatio, sed oportet etiam credere esse remissum.

11 Nullo modo confidas absolvi propter tuam contritionem, sed propter verbum Christi, *Quodcumque solveris &c.* Hic, inquam, confide, si Sacerdotis obtinueris absolutionem, & crede fortiter te absolutum, & absolutus vere eris, quidquid sit de contritione.

12 Si per impossibile confessus non esset contritus, aut Sacerdos non serio, sed joco absolveret, si tamen credat se absolutum, verissime est absolutus.

13 In Sacramento Poenitentiae ac remissione culpæ non plus facit Papa aut Episcopus, quam infimus Sacerdos, imo ubi non est Sacerdos, æque tantum quilibet Christianus, etiam mulier aut puer esset.

14 Nullus debet Sacerdoti respondere, se esse contritum, nec Sacerdos requirere.

15 Magnus est error eorum, qui ad Sacramenta Eucharistiae accedunt, huic innixi, quod sint confessi, quod non sint sibi conscii alicujus peccati mortalis, quod præmiserint orationes suas & preparatoria, omnes illi ad iudicium sibi manducant, & bibunt: sed, si credant, & confidant, se gratiam ibi consecuturos, hæc sola fides facit eos puros & dignos.

16 Consultum videtur, quod Ecclesia in communi Concilio statueret, laicos sub utraque specie communicandos: nec Bohemi sub utraque specie communicantes sunt hæretici, sed schismatici.

17 Thesauri Ecclesiae, unde Papa dat Indulgentias, non sunt merita Christi & Sanctorum.

18 Indulgentiae sunt piæ fraudes fidelium, & remissiones bonorum operum, & sunt de numero eorum, quæ licent, & non de numero eorum, quæ expediunt.

19 Indulgentiae his, qui veraciter eas consequuntur, non valent ad remissionem poenæ pro peccatis actualibus debitæ apud Divinam Justitiam.

20 Seducuntur credentes, Indulgentias esse salutaris, & ad fructum Spiritus utiles.

21 Indulgentiae necessariae sunt solum publicis criminibus, & proprie conceduntur duris solummodo & impatientibus.

22 Sex generibus hominum Indulgentiae nec sunt necessariae, nec utiles: videlicet mortuis seu morituris, infirmis, legitime impeditis, his, qui non commiserunt crimina, his, qui crimina commiserunt, sed non publica, his, qui meliora operantur.

23 Excommunicationes sunt tantum externæ poenæ, nec privant hominem communibus spiritualibus Ecclesiae orationibus.

24 Docendi sunt Christiani plus diligere excommunicationem, quam timere.

25 Romanus Pontifex Petri Successor non est Christi Vicarius super omnes totius mundi Ecclesias ab ipso Christo in B. Petro institutus.

26 Verbum Christi ad Petrum: *Quodcumque solveris super terram &c.* extenditur dumtaxat ad ligata ab ipso Petro.

27 Certum in manu Papæ, aut Ecclesiae prorsus non esse statuere articulos Fidei, imo nec leges morum seu bonorum operum.

28 Si Papa cum magna parte Ecclesiae sic vel sic sentiret, nec etiam erraret, adhuc non est peccatum, aut hæresis contrarium sentire, præsertim in re non necessaria ad salutem, donec fuerit per Concilium universale alterum reprobatum, alterum approbatum.

29 Via nobis facta est enervandi auctoritatem Conciliorum, & libere contradicendi eorum gestis, & iudicandi eorum decreta, & confidenter confitendi, quidquid verum videtur, sive probatum fuerit, sive reprobatum a quocumque Concilio.

30 Aliqui articuli Joannis Hufs condemnati in Concilio Constantiensi sunt Christianissimi, verissimi & Evangelici, quos nec universalis Ecclesia posset damnare.

31 In omni opere bono justus peccat.

32 Opus bonum optime factum, est veniale peccatum.

33 Hæreticos comburi, est contra voluntatem Spiritus.

34 Præliari adversus Turcas est repugnare Deo visitanti iniquitates nostras per illos.

35 Nemo est certus, se non semper peccare mortaliter, propter occultissimum superbiae vitium.



36 Liberum arbitrium post peccatum est res de solo titulo; & dum facit, quod in se est, peccat mortaliter.

37 Purgatorium non potest probari ex S. Scriptura, quæ sit in Canone.

38 Animæ in purgatorio non sunt securæ de eorum salute, saltem omnes; nec probatum est ullis aut rationibus aut Scripturis, ipsas esse nec extra

statum merendi; aut agendæ charitatis.

39 Animæ in Purgatorio peccant sine intermissione, quamdiu quærunt requiem, & horrent poenas.

40 Animæ ex Purgatorio liberatæ suffragiis viventium minus beatantur, quam si per se satisfecissent.

41 Prælati Ecclesiastici & Principes sæculares non male facerent, si omnes saccos mendicitatis dererent.

## PROPOSITIONES LXXIX.

Michaelis Bajæ, & aliorum damnatæ a S. PRO V. per Constitutionem *Ex omnibus*, & a GREGORIO XIII. per Bullam *Provisionis nostræ*.

**P**IUS Episcopus Servus Servorum DEI. Ad perpetuam rei memoriam. *Ex omnibus afflictionibus, quas in hoc loco a Domino constituti tam luctuoso tempore sustinemus, ille animum nostrum præcipue excruciat dolor, quod Religio Christiana tantis jam pridem turbinibus agitata, novis quotidie propositis opinionibus conflictetur, Christianique populus, antiqui hostis suggestionibus dissectus, in alios atque alios errores passim & promiscue deferatur. Quantum vero ad Nos attinet, totis viribus conamur, ut illi simul atque profiliunt penitus opprimantur: magno enim mæore afficimur, quod plerique spectata aliquin probitatis & doctrinæ, in varias Sententias, offensionis & periculi plenas, tum verbo, tum scriptis prorumpunt, deque eis etiam in scholis invicem controversantur, cujusmodi sunt sequentes:*

1 Nec Angeli, nec primi hominis adhuc integri merita recte vocantur Gratia.

2 Sicut opus malum ex natura sua est mortis æternæ meritorium, sic bonum opus ex natura sua est vitæ æternæ meritorium.

3 Et bonis Angelis & primo homini, si in statu illo permansissent usque ad ultimum vitæ, felicitas esset merces, & non Gratia.

4 Vita æterna homini integro & Angelo promissa fuit intuitu bonorum operum, & bona opera ex lege naturæ ad illam consequendam per se sufficiunt.

5 In promissione facta Angelo & primo homini continetur naturalis iustitiæ constitutio, qua pro bonis operibus, sine alio respectu, vita æterna iustis promittitur.

6 Naturali lege constitutum fuit homini, ut, si in Obedientia perseveraret, ad eam vitam pertransiret, in qua mori non posset.

7 Primi hominis integri merita fuerunt primæ creationis munera, sed juxta modum loquendi Scripturæ Sacræ non recte vocantur Gratiæ; quo fit, ut tantum merita, non etiam Gratiæ debeant nuncupari.

8 In redemptis per gratiam Christi nullum inveniri potest bonum meritum, quod non sit gratis indigno collatum.

9 Dona concessa homini integro & Angelo, forsitan non improbanda ratione possunt dici Gratia, sed quia secundum usum Scripturæ nomine Gratiæ tantum ea munera intelliguntur, quæ per Jesum male merentibus & indignis conferuntur, ideo neque merita, nec merces, quæ illis redditur, Gratia dici debet.

10 Solutionem poenæ temporalis, quæ peccato dimisso sæpe manet, & corporis resurrectionem proprie non nisi meritis Christi adscribendam esse.

11 Quod pie & iuste in hac vita mortali usque in finem conversati vitam consequimur æternam, id non proprie Gratiæ DEI, sed ordinationi naturali statim initio creationis constitutæ iusto DEI iudicio deputandum est; nec in hac retributione bonorum ad Christi meritum respicitur, sed tantum ad primam institutionem generis humani, in qua lege naturali institutum est, ut iusto DEI iudicio Obedientiæ mandatorum vita æterna reddatur.

12 Pelagii Sententia est: Opus bonum citra Gratiam adoptionis factum non est Regni Cœlestis meritorium.

13 Opera bona a Filiis adoptionis facta non accipiunt rationem meriti ex eo, quod fiunt per Spiritum adop-

tionis, inhabitantem corda filiorum DEI, sed tantum ex eo, quod sunt conformia legi, quodque per ea præstatur obedientia legi.

14 Opera bona iustorum non accipient in die iudicii extremi ampliorem mercedem, quam iusto DEI iudicio mererentur accipere.

15 Dicit, rationem meriti non consistere in eo, quod, qui bene operatur, habeat gratiam & inhabitantem Spiritum Sanctum, sed in eo solum, quod obedit Divinæ legi: quam Sententiam sæpius repetit, & multis rationibus probat fere toto libro.

16 In eodem libro sæpius repetit, quod non est vera legis obedientia, quæ sit sine charitate.

17 Dicit, sentire cum Pelagio: qui dicunt esse necessarium ad rationem meriti, ut homo per gratiam adoptionis sublimetur ad statum Deificum.

18 Dicit, opera Catechumenorum, ut Fidem & Poenitentiam ante remissionem peccatorum factam, esse vitæ æternæ merita, quam vitam non consequentur Catechumeni, nisi prius præcedentium delictorum impedimenta tollantur.

19 Videtur insinuare, quod opera iustitiæ & temperantiæ, quæ Christus fecit, ex dignitate Personæ operantis non traxerint majorem valorem.

20 Nullum est peccatum ex natura sua veniale, sed omne peccatum meretur poenam æternam.

21 Humanæ naturæ sublimatio & exaltatio in consortium Divinæ naturæ debita fuit integritati primæ conditionis, & proinde naturalis dicenda est, & non supernaturalis.

22 Cum Pelagio sentiunt, qui Textus Apostoli ad Rom. 2. *Gentes, quæ legem non habent, naturaliter, quæ legis sunt, faciunt*, intelligunt de Gentibus, Fidei Gratiæ non habentibus.

23 Absurda est eorum Sententia, qui dicunt, hominem ab initio dono quodam supernaturali, gratuitoque supra conditionem naturæ fuisse exaltatum, ut Fide, Spe, Charitate Deum super naturaliter coleret.

24 A vanis & otiosis hominibus secundum insipientiam Philosophorum excogitata est sententia, hominem ab initio sic constitutum, ut per dona naturæ superaddita fuerit largitate Conditoris sublimatus, & in Dei Filium adoptatus.

25 Omnia opera infidelium sunt peccata, & Philosophorum virtutes sunt vitia.

26 Integritas primæ creationis non fuit indebita humanæ naturæ exaltatio, sed naturalis ejus conditio; quam sententiam repetit, & probat per plura Capitula.

27 Liberum arbitrium sine gratiæ DEI adiutorio, non nisi ad peccandum valet.

28 Pelagianus est error, dicere, quod liberum arbitrium valet ad ullum peccatum vitandum.

29 Non solum fures ii sunt & latrones, qui Christum viam, ostium, veritatis & vitæ negant; sed etiam quicumque aliunde, quam per Christum in viam iustitiæ, hoc est, ad aliquam iustitiam conscendi posse, dicunt.

30 Aut qui docent, tentationi ulli sine gratiæ ipsius adiutorio resistere hominem posse, sic, ut in eam non inducatur, aut ab ea superetur.



31 Charitas perfecta & sincera, quæ est ex corde puro & conscientia bona, & Fide non ficta, tam in Catechumenis, quam in pœnitentibus potest esse sine remissione.

31 Charitas illa, quæ est plenitudo legis, non est semper conjuncta cum remissione peccatorum.

33 Catechumenus iuste, recte, & sancte vivit, & mandata Dei observat, ac legem implet per charitatem, ante obtentam remissionem peccatorum, quæ in Baptismi lavacro demum percipitur.

34 Distinctio illa duplicis amoris naturalis videlicet, quo Deus amatur ut auctor naturæ, & gratuiti, quo Deus amatur ut Beatificator, vana est, commentitia, & ad illudendum sacris litteris & plurimis veterum testimoniiis excogitata.

35 Omne, quod agit peccator vel servus peccati, peccatum est.

39 Amor naturalis, qui ex viribus naturæ exoritur, ex sola Philosophia per elationem præsumptionis humanæ cum injuria Crucis Christi defenditur a nonnullis Doctoribus.

37 Cum Pelagio sentit, qui bonum aliquod naturale, hoc est, quod ex natura solis viribus ortum ducit, agnoscit.

38 Omnis amor Creaturæ rationalis, aut vitiosa est cupiditas, qua mundus diligitur, quæ a Joanne prohibetur: aut laudabilis illa charitas, qua per Spiritum Sanctum in corde diffusa Deus amatur.

39 Quod voluntarie fit, etiamsi necessitate fiat, libere tamen fit.

40 Suis actibus peccator servit dominanti cupiditati.

41 Is libertatis modus, qui est a necessitate, sub libertatis nomine non reperitur in Scripturis, sed solum non libertatis a peccato.

42 Justitia, qua justificatur per fidem impius, consistit formaliter in obedientia mandatorum, quæ est operum Justitia, non autem in gratia aliqua animæ infusa, qua optatur homo in Filium DEI, & secundum interiorem hominem renovatur, ac Divinæ naturæ cōsors efficitur, ut sic per Spiritum Sanctum renovatus deinceps bene vivere, & DEI mandatis obedire possit.

43 In hominibus pœnitentibus ante Sacramentum Absolutionis, & in Catechumenis ante Baptismum est vera justificatio, separata tamen a remissione peccatorum.

44 Operibus plerisque, quæ a fidelibus fiunt, ut mandatis DEI pareant, cujusmodi sunt, obedire parentibus, depositum reddere, ab homicidio, a furto, a fornicatione abstinere, justificantur quidem homines, quia sunt legis obedientia & vera legis Justitia, non tamen ii obtinent incrementa virtutum.

45 Sacrificium Missæ non alia ratione est Sacrificium, quam generali illa, quæ omne opus, quod fit, ut Sancta Societas DEO homo inhæreat.

46 Ad rationem & definitionem peccati non pertinet voluntarium, nec definitionis quæstio est, sed causæ & originis, utrum omne peccatum debeat esse voluntarium.

47 Unde peccatum originis vere habet rationem peccati sine ulla relatione ac respectu ad voluntatem, a qua originem habuit.

48 Peccatum originis est habituali parvuli voluntate voluntarium, & habitualiter dominatur parvulo, eo quod non gerit contrarium voluntatis arbitrium.

49 Et ex habituali voluntate dominante fit, ut parvulus decedens sine regenerationis Sacramento, quando usum rationis consecutus erat, actualiter Deum odio habeat, Deum blasphemet, & legi DEI repugnet.

50 Prava desideria, quibus ratio non consentit, & quæ homo invitus patitur, sunt prohibita præcepto: *Non concupisces*.

51 Concupiscentia sive lex membrorum, & prava ejus desideria, quæ inviti sentiunt homines, sunt vera legis inobedientia.

52 Omne scelus ejus est conditionis, ut suum Auctorem & omnes posteros eo modo inficere possit, quo infecit prima transgressio.

53 Quantum est ex vi transgressionis, tantum meritorum malorum a generante contrahunt, qui cum minoribus nascuntur vitiis, quam qui cum majoribus.

54 Definitiva hæc sententia, Deum homini nihil impossibile præcepisse, falso tribuitur Augustino, cum Pelagii sit.

55 Deus non potuisset ab initio talem creare hominem, qualis nunc nascitur.

56 In peccato duo sunt, actus & reatus: transiente autem actu, nihil manet, nisi reatus, sive obligatio ad pœnam.

57 Unde in Sacramento Baptismi aut Sacerdotis Absolutione proprie reatus peccati dumtaxat tollitur, & ministerium Sacerdotum solum liberat a reato.

58 Peccator pœnitens non vivificatur ministerio Sacerdotis absolventis, sed a solo DEO, qui pœnitentiam suggerens & inspirans, vivificat eum, & resuscitat, ministerio autem Sacerdotis solum reatus tollitur.

59 Quando per eleemosynas, aliaque pietatis opera DEO satisfacimus pro pœnis temporalibus, non dignum pretium DEO pro peccatis nostris offerimus, sicut quidam errantes autumant (nam alioquin essemus saltem aliqua ex parte redemptores) sed aliquid facimus, cujus intuitu Christi satisfactio nobis applicatur, & communicatur.

60 Per passiones Sanctorum in Indulgentiis communicatas non proprie redimuntur nostra delicta, sed per communionem charitatis nobis eorum passiones impertiuntur, ut digni simus, qui pretio sanguinis Christi a pœnis pro peccatis liberemur.

61 Celebris illa Doctorum Distinctio, Divinæ legis mandata bifariam impleri: altero modo, quantum ad præceptorum operum substantiam tantum: altero, quantum ad certum quemdam modum, videlicet secundum quem valeant operantem perducere ad Regnum æternum (hoc est, ad modum meritorum) commentitia est, & explodenda.

62 Illa quoque Distinctio, qua opus dicitur bifariam bonum, vel quia ex objecto & omnibus circumstantiis rectum est & bonum (quod moraliter bonum appellari consuevit) vel quia est meritorium Regni æterni, & quo fit a vivo Christi membro per Spiritum charitatis, rejicienda est.

63 Similiter & illa Distinctio duplicis Justitiæ: alterius, quæ fit per Spiritum Charitatis inhabitantem, alterius, quæ fit ex inspiratione quidem Spiritus Sancti, cor ad pœnitentiam excitantis, sed nondum cor inhabitantis, & in eo charitatem diffundentis, qua Divinæ legis justificatio impleatur, odiosissima & pertinacissima rejicitur.

64 Denique & illa Distinctio duplicis vivificationis: alterius, qua vivificatur peccator, dum ei pœnitentia & vitæ novæ propositum, & inchoatio per DEI gratiam inspiratur; alterius, qua vivificatur, qui vere justificatur, & palmis vivus in vite Christo efficitur, commentitia judicatur, & Scripturis minime congruens.

65 Non nisi Pelagiano errore admitti potest usus aliquis liberi arbitrii bonus, sive non malus, & gratiæ Christi injuriam facit, qui ita sentit, & docet.

66 Sola violentia repugnat libertati hominis naturali.

67 Homo peccat etiam damnabiliter in eo, quod necessario facit.

68 Infidelitas pure negativa in his, quibus Christus non est prædicatus, peccatum est.

69 Justificatio impii fit formaliter per obedientiam Legis, non autem per occultatam communicationem & inspirationem gratiæ, quæ per eam justificatos facit implexe legem.



70 Homo existens in peccato mortali, sive in reatu æternæ damnationis, potest habere veram charitatem, & charitas etiam perfecta potest consistere cum reatu æternæ damnationis.

71 Per Contritionem, etiam cum charitate perfecta, & cum voto suscipiendi Sacramentum conjunctum, non remittitur etiam (extra casum necessitatis, aut martyrii) sine actuali susceptione Sacramenti.

72 Omnes omnino justorum afflictiones sunt ultiones peccatorum ipsorum: unde Job & Martyres, quæ passi sunt, propter sua peccata passi sunt.

73 Nemo præter Christum est absque peccato originali: hinc Beata Virgo mortua est propter peccatum ex Adam contractum, omnesque ejus afflictiones in hac vita, sicut aliorum Justorum, fuerunt ultiones peccati actualis vel originalis.

74 Concupiscentia in renatis relapsis in peccatum mortale, in quibus jam dominatur, peccatum est, sicut & alii habitus pravi.

75 Motus pravi concupiscentiæ sunt, pro statu hominis vitiiati, prohibiti præcepto: *Non concupisces*; unde homo eos sentiens, & non consentiens transgreditur præceptum: *Non concupisces*; quamvis transgressio in peccatum non deputetur.

76 Quamdiu aliquid concupiscentiæ carnalis in diligente est; non facit præceptum: *Diliges Dominum Deum tuum ex toto corde tuo*.

77 Satisfactiones laboriosæ Justificatorum non valent expiare de condigno poenam temporalem, restantem post culpam condonatam.

78 Immortalitas primi hominis non erat gratiæ beneficium, sed naturalis conditio.

79 Falsa est Doctorum Sententia, primum hominem potuisse a DEO creari, & institui sine Justitia naturali.

Quas quidem sententias stricto coram Nobis examine ponderatas, quamquam nonnullæ aliquo pacto sustineri possent, in rigore & proprio verborum sensu ab Assertoribus intento, hæreticas, erroneas, suspectas, temerarias, scandalosas, & in pias aures offensionem immittentes, respectu ac quacumque super iis, verbo, scriptoque emissa præsentium Auctoritate damnamus, circumscribimus & abolemus, deque eisdem & similibus posthac, quocumque pacto loquendi, scribendi, & disputandi facultatem quibuscumque interdiciamus. Qui secus fecerint, ipsos

omnibus dignitatibus, gradibus, honoribus, Beneficiis, & officiis perpetuo privamus, ac etiam inhabiles ad quacumque decernimus, vinculo quoque anathematis eo ipso inmodamus, a quo nullus Romano Pontifice inferior valeat ipsos, excepto mortis articulo, liberare. Ceterum, ut jam commoti his de rebus tumultus, & contracta odia facilius comprimi possint, simulque animarum saluti plenius consulatur, Dilecto Filio Nostro Antonio tituli S. Bartholomæi in Insula Presbytero Cardinali Granvelano nuncupato, per Apostolica scripta mandamus, ut ipse, quid ad perpetuam dictarum Sententiarum & scripturarum abolitionem, quid ad arcenda hujusmodi prologia & disputationes, quid denique ad unionem & pacem cum communi omnium & Ecclesiæ Catholica satisfactione componendum facto opus sit, inprimis diligenter expendat; deinde in iis omnibus, quæ pro communi salute, tranquillitate & honore optima judicaverit, salva semper Ecclesiæ prædictæ Unitate, etiam per alium seu alios fide, doctrina & religione præstantes ocus exequatur, faciatque, quidquid decreverit, inviolate ab omnibus observari; Contradictores quoslibet per censuras & penas prædictas, ceteraque juris & facti remedia opportuna, appellatione postposita, compescendo: invocata etiam ad hoc, si opus fuerit, auxilio brachii secularis. Non obstantibus, quod forsitan ab Apostolica Sede sit indultum, quod interdicti, suspendi, vel excommunicari non possint per litteras Apostolicas, non facientes plenam & expressam ac de verbo ad verbum de indulto hujusmodi mentionem, & quibuslibet aliis Privilegiis, exemptionibus, indulgentiis & litteris Apostolicis specialibus vel generalibus, quorumcumque tenorem existant, per quæ præsentibus non expressa, vel totaliter non inserta effectus præsentium impediri valeat quomodolibet, vel differri, & de quibus quorumcumque totis tenoribus de verbo ad verbum habenda sit in Nostri litteris mentio specialis. Nulli ergo omnino hominum liceat hanc paginam Nostre damnationis, circumscriptionis, abolitionis, interdicti, decreti, mandati, privationis, & inmodationis infringere, vel ei ausu temerario contraire. Si quis autem hoc attentare præsumperit, indignationem Omnipotentis DEI, ac Beatorum Petri & Pauli Apostolorum ejus se noverit incursum. Datum Romæ apud Sanctum Petrum Anno Incarnationis Dominicæ millesimo quingentesimo sexagesimo septimo Calendis Octobris, Pontificatus Nostri Anno secundo.

## DECRETUM INNOCENTII X.

INNOCENTIUS EPISCOPUS SERVUS SERVORUM DEI.

Universis Christi Fidelibus salutem, & Apostolicam Benedictionem.

**C**UM occasione Impressionis Libri, cui Titulus, *Augustinus Cornelii Jansenii Episcopi Iprensis*, inter alias ejus opiniones orta fuerit, præsertim in Galliis controversia super quinque ex illis, complures Galliarum Episcopi apud nos institerunt, ut easdem Propositiones Nobis oblatas expenderemus, ac de unaquaque earum certam, & perspicuam ferremus sententiam.

Tenor vero præfatarum Propositionum est, prout sequitur.

**P**rima: Aliqua DEI præcepta hominibus justis volentibus, & conantibus secundum præsentem, quas habent, vires sunt impossibilia, deest quoque illis gratia, qua possibilia fiant.

Secunda: Interiori gratiæ in statu naturæ lapsæ nunquam resistitur.

Tertia: Ad merendum, & demerendum in statu Naturæ lapsæ non requiritur in homine libertas a necessitate, sed sufficit libertas a coactione.

Quarta: Semi-Pelagiani admittebant prævenientis gratiæ interioris necessitatem ad singulos actus, etiam

ad initium Fidei, & in hoc erant Hæretici, quod velent eam gratiam talem esse, cui posset humana voluntas resistere, vel obtemperare.

Quinta: Semi-Pelagianum est dicere, Christum pro omnibus omnino hominibus mortuum esse, aut sanguinem fudisse.

Nos, quibus inter multiplices curas, quæ animum nostrum assidue pulsant, illa in primis cordi est, ut Ecclesiæ Dei Nobis ex alto commissa, purgatis pravæ opinionum erroribus, tuto militare, & tanquam navis in tranquillo mari, sedatis omnium tempestatum fluctibus ac procellis, secure navigare, & ad optatum salutis portum pervenire possit, pro rei gravitate, coram aliquibus S. R. E. Cardinalibus ad id specialiter sæpius congregatis a pluribus in Sacra Theologia Magistris, easdem quinque Propositiones, ut supra nobis oblatas, fecimus sigillatim diligenter examinari, eorumque suffragia, tum voce, tum scripto relata mature consideravimus, eosdemque Magistros, variis coram Nobis actis Congregationibus, prolixè super eisdem, ac super earum qualibet differentes audivimus.

Cum



Cum autem ab initio hujusmodi discussionis ad Divinum implorandum auxilium multorum Christi fidelium preces, tum privatim, tum publice indixissemus, postmodum iteratis eisdem ferventius, ac per Nos sollicitè implorata Sancti Spiritus assistentia, tandem Divino Numine favente, ad infra scriptam devenimus declarationem & definitionem.

Primam prædictarum Propositionum: Aliqua Dei præcepta hominibus iustis volentibus & conantibus, secundum præsentem, quas habent, vires sunt impossibilia, deest quoque illis gratia, qua possibilia fiant: Temerariam, Impiam, Blasphemiam, Anathemate damnatam, & Hæreticam declaramus, & uti talem damnamus.

Secundam: Interiori gratiæ in statu naturæ lapsæ numquam resistitur: Hæreticam declaramus, & uti talem damnamus.

Tertiam: Ad merendum, & demerendum in statu naturæ lapsæ non requiritur in homine libertas a necessitate, sed sufficit libertas a coactione: Hæreticam declaramus, & uti talem damnamus.

Quartam: Semi-Pelagiani admittebant prævenientis gratiæ interioris necessitatem ad singulos actus, etiam ad initium Fidei, & in hoc erant Hæretici, quod velent eam gratiam esse, cui posset humana voluntas resistere, vel obtemperare: Falsam & Hæreticam declaramus, & uti talem damnamus.

Quintam: Semi-Pelagianum est dicere, Christum pro omnibus omnino hominibus mortuum esse, aut sanguinem fudisse: Falsam, Temerariam, Scandalosam & intellectam eo sensu, ut Christus pro salute dumtaxat prædestinatorum mortuus sit: Impiam, Blasphemiam, Contumeliosam, Divinæ pietati derogantem, & Hæ-

reticam declaramus, & uti talem damnamus.

Mandamus igitur omnibus Christi fidelibus utriusque sexus, ne de dictis Propositionibus sentire, docere, prædicare alias præsumant, quam in hac præsentis nostræ Declaratione & Definitione continetur sub censuris & poenis contra Hæreticos, & eorum fautores in Jure expressis.

Præcipimus pariter omnibus Patriarchis, Archi-Episcopis, Episcopis, aliisque locorum Ordinariis, nec non hæreticæ pravitatis Inquisitoribus, ut Contradictores, & Rebelles quoscunque per censuras & poenas prædictas, ceteraque Juris & facti remedia opportuna, invocato etiam ad hoc (si opus fuerit) auxilio brachii secularis, omnino coerceant, & conepescant.

Non intendentes tamen per hanc declarationem, & definitionem super prædictis quinque Propositionibus factam approbare ullatenus alias opiniones, quæ continentur in prædicto Libro Cornelii Jansenii. Datum Romæ apud S. Mariam Majorem Anno Incarnationis Dominicæ Millefimo, Sexcentesimo, quinquagesimo tertio, pridie Kal. Junii, Pontificatus Nostri Anno nono,

H. I. DATARIUS.

G. Gualterius.

F. Ciambinus.

Anno a Nativitate D. N. JESU Christi 1653. Indictione 6. Pontificatus Sanctissimi in Christo Patris, & D. N. D. Innocentii, Divina Providentia Papæ X. anno ejus Nono, die vero nona Mensis Junii, supradicta Constitutio affixa, & publicata fuit in Ecclesia Lateranensi ac Basilica Principis Apostolorum de Urbe, nec non Cancellaria Apostolica valvis, ac in acie Campi Floræ, per me Hieronymum Mascellam S. S. D. N. Papæ Cursorem.

Pro Domino Mag. Curforum P. Paulus Desiderius Cursor.

## CONSTITUTIO CLEMENTIS XI.

Contra Paschasium Quesnellium.

C L E M E N S E P I S C O P U S.

Servus Servorum DEI

Universis Christi Fidelibus Salutem & Apostolicam Benedictionem.

UNIGENITUS DEI Filius pro nostra & totius mundi salute Filius hominis factus, dum Discipulos suos doctrina veritatis instrueret, universamque Ecclesiam suam in Apostolis erudiret, præsentia disponens, & futura prospiciens, præclaro ac saluberrimo documento nos admonuit, ut attenderemus a falsis Prophetis, qui veniunt ad nos in vestimentis ovium, quorum nomine potissimum demonstrantur magistri illi mendaces, & in deceptione illusores, qui splendida pietatis specie prava dogmata latenter insinuantes introducunt Sectas perditionis sub imagine sanctitatis, utque facilius incautis obrepant, quali deponentes lupinam pellem, & sese Divinæ Legis sententiis, velut quibusdam ovium velleribus obvolventes sanctarum Scripturarum, adeoque etiam ipsius novi Testamenti verbis, quæ multipliciter in suam, aliorumque perditionem depravant, nequiter abutuntur: antiqui scilicet, a quo progeniti sunt, mendacii parentis exemplo, ac magisterio edocti, nullam omnino esse ad fallendum expeditiorem viam, quam ut, ubi nefarii erroris subintroducitur fraudulentia, ibi Divinorum verborum prætendatur Auctoritas.

His Nos vere Divinis monitis instructi, ubi primum, non sine intima cordis nostri amaritudine, accepimus, Librum quemdam, gallico idiomate olim impressum, & in plures Tomos distributum, sub titulo: *Le nouveau Testament en François, avec des Reflexions morales sur chaque verset &c. à Paris 1699.* Aliter vero; *Abregé de la Morale de l'Evangile, des Actes des Apotres, Anaclet. Reiffenstuel Theol. Tom. I.*

des Epitres de saint Paul, des Epitres Canoniques, & de l'Apocalypse; ou Pensées Chrétiennes sur le Texte de ces Livres sacrés &c. A Paris 1693. & 1694. Tametsi alias a nobis damnatum, ac revera Catholicis veritatibus pravarum doctrinarum mendacia multifariam permiscentem, adhuc tamen tamquam ab omni errore immunem a pluribus haberi, Christi fidelium manibus passim obtrudi, ac nonnullorum nova semper tentantium consilio, & opera studiose nimis quaqua versum disseminari, etiam latine redditum, ut perniciosæ institutionis contagium, si fieri posset, pertransfeat de gente in gentem, & de regno ad populum alterum: versutis hujusmodi seductionibus, atque fallacis creditum Nobis Dominicum gregem in viam perditionis sensim abduci summopere dolumus: adeoque Pastoralis non minus curæ nostræ stimulis, quam frequentibus orthodoxæ Fidei zelatorum querelis, maxime vero complurium Venerabilium Fratrum, præsertim Galliæ Episcoporum, litteris ac precibus excitati, gliscenti morbo, qui etiam aliquando posset in deteriora quæque prorumpere, validiori aliquo remedio obviam ire decrevimus.

Et quidem ad ipsam ingruentis mali causam providæ nostræ considerationis intuitum convertentes, perspicue novimus, summam hujusmodi Libri perniciem ideo potissimum progredi, & invalescere, quod eadem intus lateat, & velut improba fanies, nonnisi secto ulcere foras erumpat; cum Liber ipse primo aspectu legentes specie quadam pietatis illiciat, molliti enim sunt sermones



sermones ejus super oleum, sed ipsi sunt jacula, & quidem intento arcu ita ad nocendum parata, ut sagittent in obscuro rectos corde. Nihil propterea opportunius, aut salubrius præstari a Nobis posse arbitrati sumus, si fallacem Libri doctrinam generatim solummodo a Nobis hactenus indicatam, pluribus sigillatim ex eo excerptis propositionibus, distinctius, & apertius explicaremus; atque universis Christi Fidelibus noxizianorum semina e medio tritici, quo tegebantur, educta, velut ob oculos exponeremus. Ita nimirum denudatis, & quasi in propatulo positis, non uno quidem, aut altero, sed plurimis, gravissimisque, tum pridem damnatis, tum etiam nove adinventis erroribus, plane confidimus, benedicente Domino, fore, ut omnes tandem apertæ jam, manifestæque veritati cedere compellantur.

Id ipsum maxime e re Catholica futurum, & sedandis præsertim in florentissimo Gallix Regno exortis ingeniorum varie opinantium, jamque in acerbiores scissuras protendentium diffidiis apprime proficuum, conscientiarum denique tranquillitati perutile, & propemodum necessarium, non modo præfati Episcopi, sed & ipse inprimis charissimus in Christo Filius noster Ludovicus Francorum Rex Christianissimus, cujus eximium in tuenda Catholica Fidei puritate, extirpandisque erroribus zelum satis laudare non possumus, sæpius Nobis est contactatus: repetitis propterea vere piis, & Christianissimo Rege dignis officiis, atque ardentibus votis a Nobis efflagitans, ut instanti animarum necessitati prolata quantocyus Apostolici censura Judicii consuleremus.

Hinc, aspirante Domino, ejusque cælesti ope confisi, salutare opus sedulo, diligenterque, ut rei magnitudo postulabat, aggressi sumus, ac plurimas ex prædicto Libro, juxta supra recensitas respective editiones, fideliter extractas, & tum Gallico, tum Latino idioma te expressas Propositiones a compluribus in sacra Theologia Magistris, primo quidem coram duobus ex Venerabilibus Fratribus nostris sanctæ Romanæ Ecclesiæ Cardinalibus accurate discuti, deinde vero coram Nobis, adhibito etiam aliorum plurium Cardinalium consilio, quam maxime diligentia ac maturitate, singularum insuper Propositionum cum ipsomet Libri textu exactissime facta collatione, pluries iteratis Congregationibus, expendi, & examinari mandavimus. Hujusmodi autem Propositiones sunt, quæ sequuntur, videlicet:

1 Quid aliud remanet animæ, quæ Deum, atque ipsius gratiam amisit, nisi peccatum, & peccati consecutiones, superba paupertas, & segnis indigentia, hoc est, generalis impotentia ad laborem, ad orationem, & ad omne opus bonum?

2 JESU Christi gratia, principium efficax boni cujuscumque generis, necessaria est ad omne opus bonum, absque illa non solum nihil fit, sed nec fieri potest.

3 In vanum Domine præcipis, si tu ipse non das, quod præcipis.

4 Ita Domine, Omnia possibilia sunt ei, cui omnia possibilia facis eadem operando in illo.

5 Quando Deus non emollit cor per interiorem unctionem gratiæ suæ, exhortationes, & gratiæ exteriores non inserviunt, nisi ad illud magis obdurandum.

6 Discrimen inter foedus Judaicum, & Christianum est, quod in illo Deus exigit fugam peccati, & implementum legis a peccatore, relinquendo illum in sua impotentia: in isto vero Deus peccatori dat, quod jubet, illum sua gratia purificando.

7 Quæ utilitas pro homine in veteri foedere, in quo Deus illum reliquit ejus propriæ infirmitati, imponendo ipsi suam legem? quæ vero felicitas non est, admittere ad foedus, in quo Deus nobis donat, quod petit a nobis?

8 Nos non pertinemus ad novum foedus, nisi in quantum participes sumus ipsius novæ gratiæ, quæ operatur in nobis id, quod Deus nobis præcipit.

9 Gratia Christi est gratia suprema, sine qua confiteri Christum numquam possumus, & cum qua numquam illum abnegamus.

10 Gratia est operatio manus omnipotentis DEI, quam nihil impedire potest, aut retardare.

11 Gratia non est aliud, quam voluntas omnipotentis DEI, jubentis, & facientis, quod jubet.

12 Quando Deus vult salvare animam, quocumque tempore, quocumque loco, effectus indubitabilis sequitur voluntatem DEI.

13 Quando Deus vult animam salvam facere, & eam tangit interiori gratiæ suæ manu, nulla voluntas humana ei resistit.

14 Quantumcumque remotus a salute sit peccator obstinatus, quando Jesus se ei videndum exhibet lumine salutari suæ gratiæ, oportet, ut se dedat, accurrat, sese humiliet, & adoret Salvatorem suum.

15 Quando Deus mandatum suum, & suam æternam locutionem comitatur unctione sui Spiritus, & interiori vi gratiæ suæ, operatur illa in corde obedientiam, quam petit.

16 Nullæ sunt illecebræ, quæ non cedant illecebris gratiæ, quia nihil resistit omnipotenti.

18 Gratia est vox illa Patris, quæ homines interius docet, ac eos venire facit ad Jesum Christum. Quicumque ad eum non venit, postquam audivit vocem exteriorum Filii, nullatenus est doctus a Patre.

18 Semen verbi, quod manus DEI irrigat, semper affert fructum suum.

19 DEI gratia nihil aliud est; quam ejus omnipotens voluntas, hæc est idea, quam Deus ipse nobis tradit in omnibus suis Scripturis.

20 Vera gratiæ idea est, quod Deus vult sibi a nobis obediri, & obeditur, imperat, & omnia fiunt, loquitur tamquam Dominus, & omnia sui submissa sunt.

21 Gratia Jesu Christi est gratia fortis, potens suprema, invincibilis, utpote quæ est operatio voluntatis omnipotentis, sequela & imitatio operationis Dei incarnantis, & resuscitantis Filium suum.

22 Concordia omnipotentis operationis Dei in corde hominis cum libero ipsius voluntatis consensu demonstratur illico nobis in Incarnatione, veluti in fonte atque archetypo omnium aliarum operationum misericordiæ & gratiæ, quæ omnes ita gratuitæ atque ita dependentes a Deo sunt, sicut ipsa originalis operatio.

23 Deus ipse nobis ideam tradidit omnipotentis operationis suæ gratiæ, eam significans per illam, qua creaturas e nihilo producit, & mortuis reddit vitam.

24 Justa idea, quam Centurio habet de omnipotentia DEI, & Jesu Christi, in sanandis corporibus solo motu suæ voluntatis, est Imago Ideæ, quæ haberi debet de omnipotentia suæ gratiæ in sanandis animabus a cupiditate.

25 Deus illuminat animam, & eam sanat æque ac corpus sola sua voluntate, jubet, & ipsi obtemperatur.

26 Nullæ dantur gratiæ, nisi per fidem.

27 Fides est prima gratia, & fons omnium aliarum.

28 Prima gratia, quam Deus concedit peccatori, est peccatorum remissio.

29 Extra Ecclesiam nulla conceditur gratia.

30 Omnes, quos Deus vult salvare per Christum, salvantur infallibiliter.

31 Desideria Christi semper habent suum effectum, pacem intimo cordium infert, quando eis illam optat.

32 Jesus Christus se morti tradidit ad liberandum pro semper suo sanguine primogenitos, id est, Electos de manu Angeli exterminatoris.

33 Proh! quantum oportet bonis terrenis, & sibi met ipsis renunciasse, ad hoc, ut quis fiduciam habeat, sibi, ut ita dicam, appropriandi Christum Jesum, ejus amorem, mortem, & Mysteria, ut facit sanctus Paulus dicens: *Qui dilexit me, & tradidit semetipsum pro me.*



34 Gratia Adami non producebat, nisi merita humana.

35 Gratia Adami est sequela creationis, & erat debita naturæ sanæ, & integræ.

36 Differentia essentialis inter gratiam Adami & statum innocentie, & gratiam Christianam est, quod primam unusquisque in propria persona recepit: ista vero non recipitur, nisi in persona Jesu Christi resuscitati, cui nos uniti sumus.

37 Gratia Adami, sanctificando illum in semetipso, erat illi proportionata; gratia Christiana nos sanctificando in Jesu Christo est omnipotens, & digna filio Dei.

38 Peccator non est liber, nisi ad malum, siue gratia Liberatoris.

39 Voluntas, quam gratia non prævenit, nihil habet luminis, nisi ad aberrandum; ardoris, nisi ad se præcipitandum; virium, nisi ad se vulnerandum. Est capax omnis mali, & incapax ad omne bonum.

40 Sine gratia nihil amare possumus, nisi ad nostram condemnationem.

41 Omnis cognitio Dei, etiam naturalis, etiam in Philosophis ethnicis, non potest venire nisi a Deo, & sine gratia non producit nisi præsumptionem, vanitatem, & oppositionem ad ipsum Deum, loco affectuum adorationis, gratitudinis, & amoris.

42 Sola gratia Christi reddit hominem aptum ad sacrificium Fidei; sine hoc nihil nisi impuritas, nihil nisi indignitas.

43 Primus effectus gratiæ baptismalis est facere, ut moriamur peccato, adeo ut spiritus, cor, sensus non habeant plus vitæ pro peccato, quam homo mortuus habeat pro rebus mundi.

44 Non sunt nisi duo amores, unde volitiones, & actiones omnes nostræ nascuntur; amor Dei, qui omnia agit propter Deum, quemque Deus remuneratur; & amor, quo nos ipsos, ac mundum diligimus, qui, quod ad Deum referendum est, non refert, & propter hoc ipsum fit malus.

45 Amore Dei in corde Peccatorum non amplius regnante, necesse est, ut in eo carnalis regnet cupiditas, omnesque actiones ejus corrumpat.

46 Cupiditas, aut Charitas usum sensuum bonum vel malum faciunt.

47 Obedientia legis profluere debet ex fonte, & hic fons est charitas. Quando Dei amor est illis principium interius, & Dei gloria ejus finis, tunc purum est, quod apparet exterius, alioquin non est nisi hypocrisis aut falsa iustitia.

48 Quid aliud esse possumus nisi tenebræ, nisi aberratio & nisi peccatum sine Fidei lumine, sine Christo, & sine Charitate.

49 Ut nullum peccatum est sine amore nostri, ita nullum est opus bonum sine amore Dei.

50 Frustra clamamus ad Deum, Pater mi: si spiritus Charitatis non est ille, qui clamat.

51 Fides justificat, quando operatur, sed ipsa non operatur, nisi per Charitatem.

52 Omnia alia salutis media continentur in fide, tamquam in suo germine, & semine, sed hæc fides non est absque amore, & fiducia.

53 Sola Charitas Christiano modo facit (actiones Christianas) per relationem ad Deum, & Jesum Christum.

54 Sola Charitas est, quæ Deo loquitur, eam solam Deus audit.

55 Deus non coronat, nisi Charitatem; qui currit ex alio impulsu, & ex alio motivo, in vanum currit.

56 Deus non remunerat nisi Charitatem, quoniam charitas sola Deum honorat.

57 Totum deest Peccatori, quando ei deest spes, & non est spes in Deo, ubi non est amor Dei.

58 Nec Deus est, nec Religio, ubi non est Charitas.

59 Oratio Impiorum est novum peccatum, & quod Deus illis concedit, est novum in eos iudicium.

*Anacl. Reiffenstuel Theol. Tom. I.*

60 Si solus supplicii timor animat poenitentiam, quo hæc est magis violenta, eo magis ducit ad desperationem.

61 Timor non nisi manum cohibet, cor autem tamdiu peccato addicitur; quamdiu ab amore iustitiæ non ducitur.

62 Qui a malo non abstinere, nisi timore poenæ, illud committit in corde suo, & jam est reus coram Deo.

63 Baptizatus adhuc est sub lege, sicut Judæus, si legem non adimpleat, aut adimpleat ex solo timore.

64 Sub maledicto legis numquam fit bonum, quia peccatur siue faciendo malum, siue illud non nisi ob timorem evitando.

65 Moyse, Prophetæ, Sacerdotes, & Doctores legis mortui sunt, absque eo, quod ullum Deo dederint filium, cum non effecerint nisi mancipia per timorem.

66 Qui vult Deo appropinquare, nec debet ad ipsum venire cum brutalibus passionibus, neque adduci per instinctum naturalem, aut per timorem, sicuti bestię, sed per fidem, & per amorem, sicuti filii.

67 Timor servilis non sibi repræsentat Deum, nisi ut Dominum durum, imperiosum, injustum, intractabilem.

68 Dei Bonitas abbreviavit viam salutis claudendo totum in Fide, & precibus.

69 Fides, usus, augmentum, & præmium Fidei, totum est donum puræ liberalitatis Dei.

70 Numquam Deus affligit innocentes, & afflictiones semper serviunt, vel ad puniendum peccatum, vel ad purificandum Peccatorem.

71 Homo ob sui conservationem potest sese dispensare ab ea lege, quam Deus condidit propter ejus utilitatem.

72 Nota Ecclesiæ Christianæ est, quod sit Catholica comprehendens & omnes Angelos cæli, & omnes Electos, & iustos terræ; & omnium Sæculorum.

73 Quid est Ecclesia, nisi cætus Filiorum Dei manentium in ejus sinu, adoptatorum in Christo, subsistentium in ejus persona, redemptorum ejus sanguine, viventium ejus spiritu, agentium per ejus gratiam, & expectantium gratiam futuri Sæculi.

74 Ecclesia, siue integer Christus, Incarnatum Verbum habet ut Caput, omnes vero Sanctos ut membra.

75 Ecclesia est unus solus homo, compositus ex pluribus membris, quorum Christus est Caput, vita, substantia, & persona, Unus solus Christus, compositus ex pluribus Sanctis, quorum est Sanctificator.

76 Nihil spatiosius Ecclesia Dei, quia omnes Electi, & iusti omnium Sæculorum illam componunt.

77 Qui non ducit vitam dignam Filio Dei, & membro Christi, cessat interius habere Deum pro Patre, & Christum pro Capite.

78 Separatur quis a Populo Electo, cujus figura fuit Populus Judaicus, & Caput est Jesus Christus, tam non vivendo secundum Evangelium, quam non credendo Evangelio.

79 Utile, & necessarium est omni tempore, omni loco, & omni personarum generi studere, & cognoscere spiritum, Pietatem, & Mysteria Sacræ Scripturæ.

80 Lectio Sacræ Scripturæ est pro omnibus.

81 Obscuritas Sancti Verbi Dei non est Laicis ratio dispensandi se ipsos ab ejus lectione.

82 Dies Dominicus a Christianis debet sanctificari lectionibus pietatis, & super omnia Sanctarum Scripturarum. Damnosum est velle Christianum ab hac lectione retrahere.

83 Est illusio sibi persuadere, quod notitia Mysteriorum Religionis non debeat communicari feminis, lectione Sacrorum librorum. Non ex feminarum simplicitate, sed ex superba Virorum scientia ortus est scripturarum abusus, & natæ sunt hæreses.

84 Abripere e Christianorum manibus novum Testamentum, seu eis illud clausum tenere, auferendo eis modum illud intelligendi, est illis Christi os obturare.

85 Interdicere Christianis lectionem Sacræ Scripturæ.



ræ, præsertim Evangelii, est interdicare usum luminis filiis lucis, & facere, ut patiantur speciem quamdam excommunicationis.

86 Eripere simplici populo hoc solatium, jungendi vocem suam voci totius Ecclesiæ, est usus contrarius praxi Apostolicæ, & intentioni Dei.

87. Modus plenus Sapientia, lumine, & Charitate, est dare animabus tempus portandi cum humilitate, & sentiendi statum peccati, petendi spiritum poenitentiae, & contritionis, & incipiendi, ad minus, satisfacere justitiæ Dei, antequam reconcilientur.

88 Ignoramus, quid sit peccatum, & vera poenitentia, quando volumus statim restitui possessioni bonorum illorum, quibus nos peccatum spoliavit, & detrectamus separationis istius ferre confusionem.

89 Quartus decimus gradus conversionis Peccatoris est, quod, cum sit jam reconciliatus, habet jus assistendi Sacrificio Ecclesiæ.

90 Ecclesia auctoritatem excommunicandi habet, ut eam exerceat per primos Pastores de consensu, saltem præsumpto, totius Corporis.

91 Excommunicationis injustæ metus numquam debet nos impedire ab implendo debito nostro: numquam eximus ab Ecclesia, etiam quando hominum nequitia videmur ab ea expulsi, quando Deo, Jesu Christo, atque ipsi Ecclesiæ per Charitatem affixi sumus.

92 Pati potius in pace excommunicationem, & anathema injustum, quam prodere veritatem est imitari Sanctum Paulum: tantum abest, ut sit erigere se contra auctoritatem, aut scindere unitatem.

93 Jesus quandoque sanat vulnera, quæ præceptis primorum Pastorum festinatio infligit, sine ipsius mandato; Jesus restituit, quod ipsi inconsiderato zelo rescindunt.

94 Nihil pejorem de Ecclesia opinionem ingerit ejus inimicis, quam videre illic dominatum exerceri supra fidem fidelium, & foveri divisiones propter res, quæ nec fidem lædunt, nec mores.

95 Veritates eo devenerunt, ut sint lingua quasi peregrina plerisque Christianis, & modus eas prædicandi est veluti idioma incognitum: adeo remotus est a simplicitate Apostolorum, & supra communem captum fidelium, neque satis advertitur; quod hic defectus sit unum ex signis maxime sensibilibus senectutis Ecclesiæ, & iræ Dei in Filios suos.

96 Deus permittit, ut omnes Potestates sint contrariæ Prædicatoribus veritatis, ut ejus victoria attribui non possit, nisi divinæ gratiæ.

97 Nimis sæpe contingit membra illa, quæ magis stricte unita Ecclesiæ sunt, respici, atque tractari tamquam indigna, ut sint in Ecclesia, vel tamquam ab ea separata, sed Justus vivit ex fide, & non ex opinione hominum.

98 Status persecutionis, & poenarum, quas quis tolerat, tamquam hæreticus, flagitiosus, & impius, ultima plerumque probatio est, & maxime meritoria, utpote quæ facit hominem magis conformem Jesu Christo.

99 Pervicacia, præventio, obstinatio id nolendo, aut aliquid examinare, aut agnoscere, se fuisse deceptum, mutant quotidie quoad multos in odorem mortis id, quod Deus in sua Ecclesia posuit, ut in ea esset odor vitæ, v. g. bonos libros, instructiones, sancta exempla &c.

100 Tempus deplorabile, quo creditur honorari Deus, persequendo veritatem, ejusque discipulos. Tempus hoc advenit .... haberi, & tractari a Religionis Ministris, tamquam impium, & indignum omni commercio cum Deo, tamquam membrum putridum, capax corrumperendi omnia in societate Sanctorum, est hominibus piis morte corporis mors terribilior. Frustra quis sibi blanditur de suarum intentionum puritate, & zelo quodam Religionis, persequendo flamma, ferroque viros probos, si propria passione est excæcatus, aut abreptus aliena, propterea quod nihil vult examinare. Frequenter credimus sacrificare Deo impium, & sacrificamus diabolo Dei Servum.

101 Nihil spiritui Dei & doctrinæ Jesu Christi magis opponitur, quam communia facere juramenta in Ecclesia, quia hoc est multiplicare occasiones pejerandi, laqueos tendere infirmis, & idiotis, & efficere, ut nomen, & veritas Dei aliquando deserviant consilio impiorum.

*Auditis itaque tuam voce, tum scripto Nobis exhibitis præfatorum Cardinalium, aliorumque Theologorum suffragiis, divinique imprimis luminis, privatis ad eum finem, publicisque etiam indictis precibus, implorato presidio, omnes, & singulas Propositiones præinsertas, tamquam falsas, captiosas, male sonantes, piarum aurium offensivas scandalosas, perniciosas, temerarias, Ecclesiæ, & ejus praxi injurias, neque in Ecclesiam solum, sed etiam in Potestates sæculi contumeliosas, seditiosas, impias, blasphemias, suspectas de hæresi, ac hæresin ipsam sapientes, nec non hæreticos, & hæresibus, ac etiam schismati faventes, erroneas, hæresi proximæ, pluries damnatas, ac demum etiam hæreticas, variasque hæreses, & potissimum illas, quæ in famosis Jansenii Propositionibus, & quidem in eo sensu, in quo hæc damnata fuerunt, acceptis, continentur, manifeste innovantes, respectu hac nostra perpetuo valitura Constitutione declaramus, damnamus, & reprobamus.*

*Mandantes omnibus utriusque sexus Christi fidelibus, ne de dictis Propositionibus sentire, docere, prædicare aliter præsumant, quam in hac eadem Nostra Constitutione continetur, ita ut quicumque illas, vel illorum aliquam conjunctim, vel divisim docuerit, defenderit, ediderit, aut de iis, etiam disputative, publice, aut privatim tractaverit, nisi forsitan impugnando, Ecclesiasticis censuris, aliisque contra similia perpetrantes a Jure statutis penis ipso facto, absque alia declaratione subiaceat.*

*Certum per expressam præfatarum Propositionum reprobationem alia in eodem Libro contenta nullatenus approbare intendimus; cum præsertim in decursu examinis complures alias in eo deprehenderimus Propositiones illis, quæ, ut supra, damnatae fuerunt, consimiles, & affines, iisdemque erroribus imbutas: nec sane paucas sub imaginario quodam, veluti grassantis hodie persecutionis obtentu, inobedientiam, & pervicaciam nutriendas, easque falso Christianæ patientiæ nomine prædicantes; quas propterea singulatim recensere, & nimis longum esse duximus & minime necessarium ac demum, quod intolerabilius est, Sacrum ipsum novi Testamenti Textum damnabiliter vitiatum comperimus, & alteri dudum reprobatae versionis Gallicæ Montensi in multis conformem: a vulgata vero editione, quæ tot Sæculorum usu in Ecclesia probata est, atque ab Orthodoxis omnibus pro authentica haberi debet, multipliciter discrepantem, & aberrantem, pluresque in alienos exoticos, ac sæpe noxios sensus, non sine maxima perversitate detortum.*

*Eundem propterea Librum, utpote per dulces sermones & benedictiones, ut Apostolus loquitur, hoc est, sub falsa piæ institutionis imagine, seducendis Innocentium cordibus longe accommodatum, siue præmissis, siue alio quovis titulo inscriptum, ubicumque, & quocumque alio idioma, seu quavis editione, aut versione hæcenus impressum, aut imposterum (quod absit) imprimendum, Auctoritate Apostolica tenore præsentium iterum prohibemus, ac similiter damnamus, quemadmodum etiam alios omnes, & singulos in ejus defensionem tam scripto, quam typis editos, seu forsitan (quod Deus avertat) edendos libros, seu libellos eorumque lectionem, descriptionem, retentionem, & usum omnibus & singulis Christi fidelibus sub pena excommunicationis per contrascentes ipso facto incurrenda, prohibemus pariter, & interdiciamus.*

*Præcipimus insuper Venerabilibus Fratribus Patriarchis, Archiepiscopis, & Episcopis, aliisque locorum Ordinariis, nec non hæretica pravitate Inquisitoribus, ut contradictores, & rebelles quoscumque per censuras, & præfatas, aliaque juris, & facti remedia, invocato etiam ad hoc, si opus fuerit brachii sæcularis auxilio, omnino coerceant, & compellant.*

*Volumus autem, ut earundem præsentium transumptis, etiam impressis, manu alicujus Notarii publici subscriptis,*



Et sigillo personæ in dignitate Ecclesiastica constitutæ munitis eadem fides prorsus adhibeatur, quæ ipsis originalibus litteris adhiberetur, si forent exhibitæ, vel ostensæ.

Nulli ergo hominum liceat hanc paginam nostræ declarationis, damnationis, mendati, prohibitionis, & interdictionis infringere, vel ei ausu temerario contraire. Si quis autem hoc attentare præsumpserit, indignationem Omnipotentis Dei, ac Beatorum Petri, & Pauli Apostolorum ejus se noverit incursurum. Datum Romæ apud Sanctam Mariam Majorem Anno Incarnationis Domini millesimo septingentesimo decimo tertio, sexto Idus Septembris, Pontificatus nostri Anno decimo tertio.

I. Card. Prodaturus.

F. Olverius.

Visa de Curia L. Sergardus.

Loco + Plumbi.

Registrata in Secretaria Brevium.

L. Martinettus.

Anno a Nativitate Domini Nostri Jesu Christi millesimo septingentesimo decimo tertio, Indictione sexta, die vero decima Septembris, Pontificatus Sanctissimi in Christo Patris, & Domini nostri, Domini Clementis Divina Providentia Papæ XI. Anno decimo tertio, supradictæ Litteræ Apostolicæ affixæ, publicatæ fuerunt ad Valvas Ecclesiæ Lateranensis, & Basilicæ Principis Apostolorum, Cancellariæ Apostolicæ, Curie Generalis in Monte Citatorio, in Acie Campi Floræ, ac in aliis locis solitis, & consuetis Urbis per me Petrum Romulatum Apostolicum Cursorem.

Antonius Placentius &c.

## C O R O L L A R I U M.

Compendiose declarans has Propositiones damnatas in 2 §. contentas.

**E**xperieris amice Lector, si has omnes Propositiones attente legas, atque ad invicem conferas, quod doctrina Paschasii Quesnellii multum in fundamentis Jansenii, Jansenius in Michaeli Bajo, demum Michael Bajus non parum fundetur in principiis Calvinii, & ex parte Lutheri, dum voluntati creatæ proxime liberum auferunt arbitrium, gratiam sufficientem tollunt, omniaque bona gratiæ efficaci irresistibili imputant, prout recte notat Francolinus in suo Tyrocinio Theologico part. 3. §. 1. n. 56 & 57. Ut magis, & clarius id pateat, assumamus pro exemplo liberum arbitrium hominis in ordine ad opus meritorium, seu ad obtinendam justificationem ex una, & gratiam actualem ad hoc opus concurrentem ex altera parte. In hoc exemplo (uti advertit Dominicus Viva in Trutina Thesium Quesnellianarum Proposit. X. n. 5.) tam Lutherus, quam Calvinus negant, gratiam Divinam coherere posse cum arbitrii libertate proxima; hæc tamen cum distinctione, quod Lutherus teneat, liberum arbitrium præsentis casu se habere mere passive, seu (uti sonant formalia juxta Propositionem XXXVI. inter damnatas a Leone X.) Liberum arbitrium post peccatum esse rem de solo titulo; e contra vero Calvinus equidem admittat concursum arbitrii cum gratia, taliter autem, ut ipsa voluntas nequeat abjicere gratiam, impediendo ejus operationem. Utriusque hujus Hæresiarchæ errorem damnat, & anathematizat Concilium Oecumenicum Trident. Sess. 12. de Justificatione sequentibus formalibus.

### C A N O N E IV.

### & LXV.

**S**i quis dixerit liberum hominis arbitrium a Deo motum, & excitatum NB. nihil cooperari assentiendo Deo excitanti, atque vocanti, quo ad obtinendam justificationis gratiam se disponat, ac præparet, neque NB. posse dissentire, si velit, sed velut inaniter quoddam nihil omnino agere, NB. mereque passive se habere, anathema sit.

Non nisi Pelagiano errore admitti potest aliquis usus liberi arbitrii bonus, sive non malus, & gratia Christi injuriam facit, qui ita sentit.

Inter Propositiones Jansenii quinque ab Innocentio X. damnatas.

### C A N O N E V.

### sic sonat II.

**S**i quis liberum hominis arbitrium post Adæ peccatum amissum, & extinctum esse dixerit, aut rem esse de solo titulo &c. anathema sit.

Interiori gratiæ in statu naturæ lapsæ nunquam resistitur.

### & III.

Ad merendum, & demerendum in statu naturæ lapsæ non requiritur in homine libertas a necessitate; sed sufficit libertas a coactione.

Inter Propositiones Quesnellii centum, & unam à Clementi XI. reprobatae

### sic tenet I.

Quid aliud remanet animæ, quæ Deum, ac ipsius gratiam amisit, nisi peccatum, & peccati consecutiones, superba paupertas, & segnis indigentia, hoc est NB. generalis impotentia ad laborem, ad orationem, ad omne opus bonum.

### & X.

Gratia est operatio manus Omnipotentis Dei, quam nihil impedire potest, aut retardare.

Vides amice Lector, quod Concilium Tridentinum decernat imprimis ad opus meritorium, quo justificetur homo, concurrere una cum gratia active ipsam voluntatem. Secundo præfatum voluntatis concursum ita esse liberum, ut, si vellet, dissentire posset. Jam vero post hoc Oecumenicum, Generale, seu Universale Concilium insurrexerunt aliqui, nempe Michael Bajus, Cornelius Jansenius, & Paschasius Quesnellius, jactantes, sese cum Adhærentibus veros Catholicos, qui denuo, ac de novo quoad opus meritorium sustulerunt exercitium, & usum proxime liberi arbitrii, omnia adscribentes gratiæ adeo efficaci, ut eandem nihil (consequenter nec ipsa voluntas) impedire possit, seu retardare. Quid ergo in ordine ad opus meritorium, his stantibus, in effectu remaneret libero arbitrio, nisi respectu solus titulus; cum juxta ipsos voluntas a gratia ita præventa sit, ut agat necessario, & tamen adhuc mereatur? Audiamus jam ipsammet Horum doctrinam, tantummodo paucas adducendo reprobatae a Christi Vicario sententias.

Inter rejectas propositiones septuaginta novem Michaelis Baji,

XXVIII. sic habet.

Pelagianus error est, quod liberum arbitrium valeat ad ullum peccatum vitandum.

Conferantur jam ad invicem ab attento, atque a passionibus, & partialitatibus necdum prævento lectore singulæ allegatæ propositiones, & certo constabit, quantum, & quomodo in suis principiis memorati Auctores inter se conveniunt, uti etiam fusius deduxi in alio Libello Succincta Declaratio &c. intitulo cap. 2 & 3.



## §. III.

## D E C L A R A N S

Propositiones damnatas a potiori spectantes ad Materiam Morum seu ad Theologicam Moralem.

## D E C R E T U M I.

## A L E X A N D R I V I I.

Feria V. die 24. Septemb. 1665. emanatum

In Congregatione Generali Sanctæ Romanæ, & universalis Inquisitionis habita in Palatio Apostolico Montis Quirinalis, coram Sanctissimo D. N. D. Alexandro Divina Providentia Papa VII. ac Eminentissimis & Reverendissimis D. D. S. R. E. Cardinalibus in tota Republica Christiana adversus hæreticam pravitatem Generalibus Inquisitoribus, a Sancta Sede Apostolica specialiter deputatis.

Sanctissimus D. N. audit non sine magno animi sui mœrore, complures opiniones Christianæ disciplinæ relaxativas, & animarum perniciem inferentes, partim antiquatas iterum suscitari, partim noviter prodire, & summam illam luxuriantium ingeniorum licentiam in dies magis excrecere, per quam in rebus ad conscientiam pertinentibus modus opinandi irrepsit alienus omnino ab Evangelica simplicitate, Sanctorumque Patrum doctrina, & quem si pro recta Regula fideles in praxi sequerentur, ingens eruptura esset Christianæ vitæ corruptela. Quare, ne ullo umquam tempore viam salutis, quam suprema veritas Deus, cujus verba in æternum permanent, arctam esse definivit, in animarum perniciem dilatarî, seu verius perverti contingeret, idem S. S. D. N. ut oves sibi creditas ab ejusmodi spatiofa, lataque, per quam itur ad perditionem, via, pro pastoralî sollicitudine in rectam semitam evocaret, earundem opinionum examen pluribus in Sacra Theologia Magistris, & dein Eminentissimis D. D. Cardinalibus, contra hæreticam pravitatem Generalibus Inquisitoribus, serio commisit: qui tantum negotium strenue aggressi, eique sedulo incumbentes, & mature discussis usque ad hanc diem infra scriptis Propositionibus, super unaquaque ipsarum sua suffragia Sanctitati suæ sigillatim exposuerunt.

## P R O P O S I T I O N E S.

1. Homo nullo unquam vitæ suæ tempore tenetur elicere actum Fidei, Spei, & Charitatis, ex vi præceptorum Divinorum ad eas virtutes pertinentium.

*Hæc propositio suscipitur declaratur Tract. 4. Dist. 2. n. 27. ac Dist. 5. n. 9. & Dist. 6. post n. 9. Addit.*

2. Vir equestris ad duellum provocatus potest illud acceptare, ne timiditatis notam apud alios incurrat.

*Videatur Tract. 9. Dist. 3. n. 45. & sequentibus Additionibus.*

3. Sententia asserens, Bullam Cœnæ solum prohibere absolutionem hæresis, & aliorum criminum, quando publica sunt, & id non derogare facultati Tridentini, in qua de occultis criminibus sermo est, anno 1629. 18. Julii in Consistorio Sacræ Congregationis Eminentissim. Cardinalium, visa, & tolerata est.

*Respicitur Tract. 4. Dist. 4. n. 29 & 30.*

4. Prælati Regulares possunt in foro conscientie absolvere quoscunque Sæculares ab hæresi occulta & ab excommunicatione propter eam incurra.

*Recolligantur dicta Tract. 13. Dist. 2. post n. 75. præsertim Addit. VI. & Tract. 14. Dist. 9. n. 11.*

5. Quamvis evidenter tibi constet, Petrum esse hæreticum, non teneris denunciare, si probare non possis.

*Ratio, cur hæc propositio fuerit damnata, est quia talis denunciator ab omni periculo pena talionis, aliave immunis est; quoniam coram Tribunali Sacræ Inquisitionis (apud quod, ubi viget, illa denuntiatio fieri debet) hoc crimen non tenetur probare tanquam Actor, sed tantum deponere, quod audit,*

*veluti testis, ac sufficit præfato Sacro Tribunali hæc denuntiatio saltem ad diligentiam adhibendam pro ulteriori inquisitione, & ponendis cautelis. Ita Felix Potestas Tom. 2. n. 506. & Viva hic, ambo Itali.*

*An autem etiam in Germania, ubi non viget Sacra Inquisitio, & ubi Hæretici cum Catholicis permixti vivunt, sit facienda denunciatio Episcopis cum tanto rigore: & quando crimen hæresis probari nequit, examinat la Croix lib. 2. n. 15. atque incitat in negativam, quando exinde non imminet periculum grave seductionis aliorum &c. Dum autem ipsi obijciunt allegata propositio damnata, ait, illam esse intelligendam tantummodo quoad loca, in quibus viget Officium inquisitionis, seu ubi Bulla in tanto rigore usu recepta sunt, non autem quoad Germaniam, ubi juxta plures viros eximie doctos non sunt cum tanto rigore receptæ. Vide la Croix loc. cit. si similibus casus emergat.*

6. Confessarius, qui in Sacramentali Confessione tribuit pœnitenti chartam postea legendam, in qua ad venerem incitat, non censetur sollicitasse in Confessione, ac proinde non est denunciandus.

*Videatur Tract. 14. Dist. 8. n. 61. ubi reperitur hæc propositio reprobata.*

7. Modus evadendi obligationem denunciandæ sollicitationis est, si sollicitatus confiteatur cum sollicitante, hic potest ipsum absolvere absque onere denunciandi.

*Ibid. n. 66.*

8. Duplicatum stipendium potest Sacerdos pro eadem Missa licite accipere, applicando petenti partem etiam specialissimam fructus ipsimet celebranti correspondentem, idque post Decretum Urbani VIII.

*Videatur Tract. 14. Dist. 5. n. 51. & seqq. præsertim n. 55.*

9. Post Decretum Urbani potest Sacerdos, cui Missæ celebrandæ traduntur, per alium satisfacere, collato illi minore stipendio, alia parte stipendii sibi retenta.

*Ibid. n. 95. & seqq.*

10. Non est contra Justitiam pro pluribus Sacrificiis stipendium accipere, & Sacrificium unum offerre, neque etiam est contra fidelitatem; etiam si promittam, promissione etiam Juramento firmata, danti stipendium, quod pro nullo alio offeram.

*Ibid. n. 51. & seqq. præsertim n. 53.*

11. Peccata in Confessione omissa, seu oblita, ob instans periculum vitæ, aut ob aliam causam non tenemur in sequenti confessione exprimere.

*Vid. Tr. 14. Dist. 7. n. 45.*

12. Mendicantes possunt absolvere a Casibus Episcopis reservatis, non obtenta ad id Episcoporum facultate.

*Ibid. Dist. 9. n. 11. Videantur etiam desuper Viva in sua Trutina hic, uti pari modo Matthæus in cautela Confessarii, quorum prior Urbanum VIII. alter vero Clement. X. adducit, eandem Propositionem reprobantes.*

13. Satisfacit præcepto annuæ Confessionis, qui confitetur Regulari Episcopo præsentato, sed ab eo injuste reprobato.

*Vid. Tract. 14. Dist. 8. n. 14.*

14. Qui facit Confessionem voluntarie nullam, satisfacit præcepto Ecclesiæ.

*Vide Tract. 10. Dist. 3. n. 20.*



15 Pœnitens propria auctoritate substituere sibi alium potest, qui loco ipsius pœnitentiam adimpleat.

*Vid. Tract. 14. Dist. 10. n. 15.*

16 Qui Beneficium curatum habent, possunt sibi eligere in Confessarium simplicem Sacerdotem, non approbatum ab Ordinario.

*Vide Tract. 14. Dist. 8. n. 14. & n. 15.*

17 Est licitum Religioso vel Clerico calumniatorem gravia crimina de se, vel de sua Religione spargere minantem occidere, quando alius modus defendendi non suppetit: uti suppetere non videtur, si calumniator sit paratus, vel ipsi religioso, vel ejus Religioni publice & coram gravissimis viris prædicta impingere, nisi occidatur.

*Vide Tract. 9. Dist. 3. n. 23. & sequentibus numeris, ac Additionibus.*

18 Licet interficere falsum accusatorem, falsos testes, ac etiam Judicem, a quo iniqua certo imminet sententia, si alia via non potest innocens damnum vitare.

*Ibid. n. 24.*

19 Non peccat maritus, occidens propria auctoritate uxorem in adulterio deprehensam.

*Ibidem præsertim n. 25.*

20 Restitutio a Pio V. imposita Beneficiatis non recitantibus Horas, non debetur in conscientia ante sententiam declaratoriam Judicis, eo quod sit pœna.

*Vid. Tract. 2. Dist. 2. Additione post n. 43. Item Tract. 6. Dist. 1. n. 34. ac sequentibus Additionibus.*

21 Habens Capellaniam collativam aut quodvis aliud Beneficium Ecclesiasticum, si studio literarum vacet, satisfacit suæ obligationi, si officium per alium recitet.

*Vid. Tract. 6. Dist. 1. n. 87.*

22 Non est contra Justitiam Beneficia Ecclesiastica non conferre gratis, quia Collator conferens illa Beneficia Ecclesiastica pecunia interveniente, non exigit illam pro collatione Beneficii, sed veluti pro emolumento temporali, quod tibi conferre non tenebatur.

*Vid. Tract. 5. Dist. 3. n. 45.*

23 Frangens Jejunium Ecclesiæ, ad quod tenetur, non peccat mortaliter, nisi ex contemptu vel inobedientia hoc faciat; puta, quia non vult se subicere præcepto.

*Vid. Tract. 10. Dist. 2. n. 39.*

24 Mollities, Sodomia, Bestialitas sunt peccata ejusdem speciei infamæ; ideoque sufficit dicere in confessione se procurasse pollutionem.

*Vide Tract. 9. Dist. 4. n. 67. & seqq. præsertim n. 68.*

25 Qui habet copulam cum soluta, satisfacit confessionis præcepto, dicens, commisi cum soluta grave

peccatum contra Castitatem, non explicando copulam.

*Vid. Tract. 1. Dist. 1. n. 24. & Dist. 2. n. 30.*

26 Quando litigantes habent pro se opiniones æque probabiles, potest Judex pecuniam accipere pro ferenda sententia in favorem unius præ alio.

*Vid. Tract. 1. Dist. 3. n. 62.*

27 Si liber sit alicujus junioris & moderni, debet opinio censeri probabilis, dum non constet, rejectam esse a Sede Apostolica tamquam improbabilem.

*Vid. Tract. 1. Dist. 3. n. 40. & seqq.*

28 Populus non peccat, etiam si absque ulla causa non recipiat legem a Principe promulgatam.

*Vid. Tract. 2. Dist. 1. n. 36.*

Quibus peractis, dum similibus Propositionum examini cura, & studium impenditur, interea idem Sanctissimus, re mature considerata, statuit, & decrevit, prædictas Propositiones & unamquamque ipsarum, ut minimum tamquam scandalosas esse damnandas, & prohibendas, sicuti eas damnat, ac prohibet; ita ut qui, cumque, illas, aut conjunctim aut divisim docuerit, defenderit, ediderit, aut de eis etiam disputative publice aut privatim tractaverit, nisi forsan impugnando, ipso facto incidat in Excommunicationem, a qua non possit (præterquam in articulo mortis) ab alio quacunque etiam dignitate fulgente, nisi a pro tempore existente Romano Pontifice, absolvi.

Insuper districtè in virtute sanctæ obedientiæ, & sub interminatione Divini Judicii prohibet omnibus Christi Fidelibus, cujuscunque conditionis, dignitatis, ac status etiam speciali & specialissima nota dignis, ne prædictas opiniones, aut aliquam ipsarum ad praxim deducant.

Loco + Sigilli.

JOANNES LUPUS S. Romanæ  
& universalis Inquisitionis Not.

Anno a Nativitate D. N. Jesu Christi millesimo, sexcentesimo, sexagesimo quinto. Indiæ. 3. die vero 2. Mensis Octob. Pontificatus autem S. S. in Christo Patris D. N. D. Alexandri Divina Providentia Papæ VII. anno undecimo, supradictum Decretum affixum, & publicatum fuit ad valvas Basilicæ Principis Apostolorum, Cancellariæ Apostolicæ, ac in Acie Campi floræ, ac in aliis locis solitis, & consuetis Urbis per me Carolum Melanum ejusdem S. S. D. N. & Sanctissimæ Inquisitionis Cursorem.

Romæ Typis Rev. Camerae Apostolicæ 1665.

## DECRETUM II.

### ALEXANDRI VII.

Feria 5. die 18. Martii 1666. emanatum, in quo continuat Damnationem.

In Congregatione Generali Sanctæ Romanæ, & universalis Inquisitionis, habita in Palatio Apostolico Montis Quirinalis coram S. S. D. N. D. Alexandro Divina Providentia Papæ VII. ac eminentissimis & Reverendissimis D. D. S. R. E. Cardinalibus, in tota Republica Christiana adversus hæreticam pravitatem Generalibus inquisitionibus, a S. Sede Apostolica specialiter deputatis.

Sanctissimus D. N. post latum Decretum die XXIV. Septemb. proxime elapsi, quo viginti octo Propositiones damnatæ fuerunt, examinatis sedulo, ac accurate usque ad hanc diem infra scriptis aliis, quadragessimum quintum numerum implentibus per plures in Sacra Theologia Magistros, ac per Eminentissimos & Reverendissimos D. D. Cardinales adversus hæreticam pravitatem Generales Inquisitores, eorum suffragia sigillatim super unaquaque ipsarum audivit.

## PROPOSITIONES.

29 In die Jejunii, qui sæpius modicum quid comedit, etsi notabilem quantitatem in fine comederit, non frangit Jejunium.

*Vid. Tract. 10. Dist. 2. num. 7. & postnum. 35. Addit. II.*

30 Omnes Officiales, qui in Republica corporaliter laborant, sunt excusati ab obligatione Jejunii, nec debent se certificare, an labor sit compatibilis cum Jejunio.

*Vid. Tract. 19. Dist. 2. n. 69.*



31 Excusantur absolute a præcepto jejunii omnes illi, qui iter agunt equitando, utcumque iter agant, etiam si iter necessarium non sit, & etiam si iter unius diei conficiant.

*Ibid. n. 70. ac 71. & Addit. seq.*

32 Non est evidens, quod consuetudo non comedendi ova & lacticia in Quadragesima obliget.

*Vid. tract. 10. dist. 2. n. 9 & 10.*

33 Restitutio fructuum ob omissionem Horarum suppleri potest per quascumque elemosynas, quas antea Beneficiarius de fructibus sui Beneficii fecerit.

*Ratio damnationis est; quia donatio præcedens omissionem Horarum fuit omnino liberalis, per quam res absolute donata transiit in dominium pauperis donatarii, adeoque per eandem non poterit subiaceri obligationi nova primum post hanc donationem supervenienti. Vid. tract. 6. dist. 1. n. 34. & sequentibus Additionibus.*

34 In die Palmarum recitans officium Paschale satisfacit præcepto.

*Ibid. n. 60.*

35 Unico officio potest quis satisfacere duplici præcepto, pro die præfenti & crastino.

*Ibid. n. 74.*

36 Regulares possunt in foro conscientie uti privilegiis suis, quæ sunt expresse revocata per Concilium Trident.

*Non desuerunt Auctores apud Dominicum Viva hic, qui putant, Regulares Privilegiis expresse a Concilio Tridentino revocatis adhuc uti posse, non quidem in foro externo, cum id vetitum fuerit a Gregorio XIII. ad vitandas dissensiones inter Episcopos & Regulares, sed solum in foro Conscientie. Ast hæc doctrina quoad Privilegia cassata (secus dic quoad alia) merito est rejecta, cum Concilium Tridentinum, approbante Summo Pontifice quadam Privilegia Regularium clavis terminis revocet absolute, & indistincte, adeoque pariter illa revocatio absolute, ac indistincte intelligenda est, prout utique Successores sic revocare possunt, quod Antecessores absque ulla stricta obligatione concesserunt.*

37 Indulgentiæ concessæ Regularibus & revocatæ a Paulo V. hodie sunt revalidatæ.

*Vide tr. 12. dist. 3. n. 67.*

38 Mandatum Tridentini factum Sacerdoti, facienti ex necessitate cum peccato mortali, confitendi quamprimum, est consilium, non præceptum.

*Vide tr. 14. dist. 2. n. 32. & seqq.*

39 Illa particula quamprimum intelligitur, cum Sacerdos suo tempore confitebitur.

*Ibidem.*

40 Est probabilis opinio, quæ dicit, esse tantum veniale, osculum habitum ob delectationem carnalem, & sensibilem, quæ ex osculo oritur, secluso periculo consensus ulterioris, & pollutionis.

*Vid. tr. 9. dist. 4. n. 71. ac seqq. & præsertim Additionibus post n. 78.*

41 Non est obligandus concubinarium ad ejiciendam concubinam, si hæc nimis utilis esset ad oblectamentum concubinari, vulgo *regalo*, dum deficiente illa nimis ægre ageret vitam, & aliæ epulæ tædio magno concubinarium afficerent, & alia famula nimis difficile inveniretur.

*Vid. tr. 14. dist. 8. n. 47. junctis Additionibus.*

42 Licitum est mutuanti aliquid ultra sortem exigere, si se obliget ad non repetendam sortem usque ad certum tempus.

*Vid. tr. 8. dist. 4. n. 40 & 41.*

43 Annuum legatum pro anima relictum non durat plus, quam per 10. annos.

*Ratio damnationis dista Propositionis est, quia annuum illud Legatum pingue e. g. & proportionatum stipendio potuit esse factum absque restrictione ad certum tempus; ergo non debet annuum Legatum indefinite factum illico restringi ad decennium.*

Dices: juxta Sotum & alios Doctores nulla anima ultra decennium detinetur in purgatorio: ergo nec præsumendum est, quod fundator ultra decennium petierit persolvere contenta in litteris foundationis. Resp. imprimis, antecedens gratis asseri, atque esse falsum & contra communem persuasionem fidelium, ac contrarium apud Dominicum Viva hic patere ex Historiis Ecclesiasticis, vi quarum plures anime longe ultra decennium in hoc ergastulo sunt detenta. Deinde dato etiam, quod ex revelationibus in uno alterove casu constaret, animam fundatoris certo jam frui beatitudine, adhuc Heredes tenerentur satisfacere legato annuo perpetuo, & ex Ecclesia communi praxi censetur voluntas fundatoris, ut suffragium illud, si non sibi, saltem aliis de Familia proficiat.

44 Quoad forum conscientie reo correcto, ejusque contumacia cessante cessant censuræ.

*Vid. tr. 13. dist. 1. n. 42.*

45 Libri prohibiti, donec expurgentur, possunt retineri, usque dum adhibita diligentia corrigantur.

*Notandum ex Viva hic, quod Libri Hereticorum hæresim continentes, vel de Religione tractantes in Bulla Cæna prohibeantur absolute sub excommunicatione reservata: alii vero passim prohiberi soleant sub censura: donec corrigantur. De his itaque ultimis aliqui Theologi docuerunt retineri posse, donec opportune eorum correctio aut expunctio fuerit indulta, cui tamen Doctrina repugnant Regula Indicis præscripta in Concilio Tridentino, in quibus absolute prohibetur a Pontifice, ne quis apud se habeat, vel retineat libros quovis titulo interdictos, & consequenter parendum est Pontifici mandanti, ut dicti Libri deferantur Inquisitioni Sancti Officii, ubi id vigeat, ut recte observat Sabinus Bononiensis, dum scribit in dictas Propositiones damnatas. Quid in Germania quoad libros prohibitos secunda Classis sit sentiendum, eruitur ex Tract. 4. dist. 4. num. 42.*

Quibus mature pensatis, idem Sanctissimus statuit, ac decrevit, prædictas Propositiones & unamquamque ipsarum, ut minimum tamquam scandalosas esse damnandas, & prohibendas, sicuti eas damnat, ac prohibet, ita ut quicumque illas, aut conjunctim aut divisim docuerit, defenderit, ediderit, aut de eis etiam disputative, publice, aut privatim tractaverit, nisi forsan impugnando, ipso facto incidat in excommunicationem, a qua non possit (præterquam in articulo mortis) ab alio quacumque etiam dignitate fulgente, nisi a pro tempore existente Romano Pontifice absolvi.

Insuper districte in virtute Sanctæ obedientie, & sub interminatione Divini Judicii prohibet omnibus Christi Fidelibus, cujuscumque conditionis, dignitatis, & status etiam speciali, & specialissima nota dignis, ne prædictas opiniones, aut aliquam ipsarum ad praxim deducant.

Loco + Sigilli.

JOANNES LUPUS Sacra Romane  
& universalis Inquisitionis Not.

Anno a Nativitate D. N. Jesu Christi millesimo sexcentesimo sexagesimo sexto, Indictione quarta, die vero 23. Mensis Martii, Pontificatus autem Sanctiss. in Christo Patris & D. N. D. Alexandri Divina Providentia Papæ VII. anno undecimo supradictum Decretum affixum, & publicatum fuit ad vultus Principis Apostolorum, Cancellariæ Apostolicæ, ac in acie Campi Floræ, ac in aliis locis solitis & consuetis Urbis per me Carolum Melaniam, ejusdem S. S. D. N. Papæ & Sanctiss. Inquisitionis Cursorem.

Romæ Typis Rev. Cameræ Apost. 1666.



## D E C R E T U M I.

## I N N O C E N T I I X I.

Feria 5. die 2. Martii Anno 1679.

In Congregatione Generali Sanctæ Romanæ, & universalis Inquisitionis, habita in Palatio Apostolico Vaticano coram Sanctiss. D. N. D. Innocentio, Divina Providentia Papa XI., ac Eminentissimis, & Reverendissimis DD. S. R. E. Cardinalibus & in tota Republica Christiana adversus hæreticam pravitatem Generalibus Inquisitoribus, a Sancta Sede Apostolica specialiter deputatis.

Sanctissimus D. N. Innocentius Papa XI. prædictus ovium sibi a Deo creditarum salutis sedulo incumbens, & salubre opus in segregandis noxiis doctrinarum pascuis ab innoxiiis a se. record. Alexand. VII. Prædecessore suo inchoatum prosequi volens, plurimas Propositiones, partim ex diversis, vel libris, vel thesibus, seu scriptis excerptas, & partim noviter adinventas Theologorum plurimum examini, & deinde Eminentissimis, & Reverendissimis DD. Cardinalibus, contra hæreticam pravitatem Generalibus Inquisitoribus, subiecit. Quibus propositionibus sedulo accurate sæpius discussis, eorumdem Eminentissimorum Cardinalium, & Theologorum votis per Sanctitatem suam auditis, idem Sanctissimus D. N. re postea mature considerata statuit, & decrevit pro nunc sequentes propositiones, & unamquamque ipsarum, sicut jacent, ut minimum tamquam scandalosas, & in praxi perniciosas, esse damnandas, & prohibendas, sicuti eas damnat, & prohibet. Non intendens tamen Sanctitas sua per hoc decretum alias propositiones in ipso non expressas, Sanctitati suæ quomodolibet, & ex quacumque parte exhibitas, vel exhibendas ullatenus approbare.

## P R O P O S I T I O N E S.

1 Non est illicitum in Sacramentis conferendis sequi opinionem probabilem de valore Sacramenti, relicta tutiore, nisi id vetet lex, conventio, aut periculum gravis damni incurrendi. Hinc sententia probabiliter tantum utendum non est in collatione Baptismi, Ordinis Sacerdotalis, aut Episcopalis. *Declaratur hæc propositio tr. 1. dist. 3. num. 58.*

2 Probabiliter existimo, judicem posse judicare juxta opinionem etiam minus probabilem.

*Videatur tr. 1. dist. 3. n. 61.*

3 Generatim dum probabilitate, sive intrinseca, sive extrinseca quantumvis tenui, modo a probabilitatis finibus non exeatur, consili aliquid agimus, semper prudenter agimus.

*Vid. tr. 1. dist. 3. n. 44. & seqq.*

4 Ab infidelitate excusabitur infidelis non credens, ductus opinione minus probabili.

*Vid. tract. 4. dist. 2. num. 30.*

5 An peccet mortaliter, qui actum dilectionis Dei semel tantum in vita eliceret, condemnare non audemus.

*Vid. tr. 4. dist. 6. n. 9. & Additione sequenti.*

6 Probabile est, ne singulis quidem rigorose quinquenniis per se obligare præceptum Charitatis erga Deum.

*Ibidem.*

7 Tunc solum obligat, quando tenemur justificari, & non habemus aliam viam, qua justificari possumus.

*Ibidem.*

8 Comedere, & bibere usque ad satietatem ob solam voluptatem, non est peccatum, modo non obsit valetudini; quia licite potest appetitus naturalis suis actibus frui.

*Vid. tract. 1. dist. 2. Additione post num. 39. Item tr. 3. dist. 3. n. 51.*

9 Opus conjugii ob solam voluptatem exercitum omni penitus caret culpa, ac defectu veniali.

*Vid. tr. 1. dist. 2. Additione post n. 39.*

*Anacl. Reiffensuel Theol. Tom. I.*

10 Non tenemur proximum diligere actu interno, & formali.

*Vid. tract. 4. dist. 6. n. 12.*

11 Præcepto, proximum diligendi satisfacere possumus per solos actus externos.

*Ibid.*

12 Vix in Sæcularibus invenies, etiam in Regibus superfluum statui. Et ita vix aliquis tenetur ad eleemosynam, quando tenetur tantum ex superfluo statui.

*Vid. tr. 4. dist. 6. n. 42. & Additione sequenti.*

13 Si cum debita moderatione facias, potes absque peccato mortali de vita alicujus tritari, & de illius morte naturali gaudere, illam inefficaci affectu petere, & desiderare, non quidem ex displicentia personæ, sed ob aliquod temporale emolumentum.

*Vid. tr. 4. dist. 7. num. 10. 11. & 12. cum suis Additionibus.*

14 Licitum est, absoluto desiderio cupere mortem Patris, non quidem ut malum Patris, sed ut bonum cupientis; quia nimirum ei obventura est pinguis hæreditas.

*Ibid.*

15 Licitum est filio gaudere de parricidio parentis a se in ebrietate perpetrato, propter ingentes divitias inde ex hæreditate consecutas.

*Ibid.*

16 Fides non censetur cadere sub præceptum speciale; & secundum se.

*Vid. tract. 4. dist. 2. n. 13.*

17 Satis est, actum Fidei semel in vita elicere.

*Vid. tract. 4. dist. 2. n. 28.*

18 Si a potestate publica quis interrogetur, fidem ingenue confiteri, ut Deo, & fidei gloriosum consulo; tacere, ut peccaminosum per se non damno.

*Vid. tr. 4. dist. 2. n. 45.*

19 Voluntas non potest efficere, ut assensus fidei in se ipso sit magis firmus, quam mereatur pondus rationum ad assensum impellentium.

*Vid. tr. 4. dist. 3. n. 58.*

20 Hinc potest quis prudenter repudiare assensum, quem habebat supernaturalem.

*Ibid. n. 39. & Addit.*

21 Assensus fidei supernaturalis, & utilis ad salutem stat cum notitia solum probabili revelationis, imo cum formidine, qua quis formidet, ne non sit locutus Deus.

*Ibid.*

22 Non nisi fides unius Dei necessaria videtur necessitate medii, non autem explicita Remuneratoris.

*Vid. tract. 4. dist. 2. num. 16. & seqq.*

23 Fides late dicta ex testimonio creaturarum, similive motivo ad justificationem sufficit.

*Ibid. n. 20. & seqq.*

24 Vocare Deum in testem mendacii levis, non est tanta irreverentia, propter quam velit, aut possit damnare hominem.

*Vid. tr. 6. dist. 2. n. 29. & Addit. post n. 40.*

25 Cum causa licitum est jurare sine animo jurandi, sive res sit levis, sive gravis.

*Ibid. n. 38. & Addit. post n. 40.*

26 Si quis, vel solus, vel coram aliis, sive interrogatus, sive propria sponte, sive recreationis causa, sive quocumque alio fine joret, se non fecisse aliquid, quod revera fecit, intelligendo intra se aliquid aliud, quod non fecit, vel aliam viam ab ea, in qua fecit,

vel



vel quodvis aliud additum verum, revera non mentitur, nec est perjurus.

*Ibid.*

27 Causa justa utendi his amphibologiis est, quoties id necessarium, aut utile est ad salutem corporis, honores, res familiares tuendas, vel ad quemlibet alium virtutis actum, ita, ut veritatis occultatio sentiat tunc expediens, & studiosa.

*Ibid.*

28 Qui mediante commendatione, vel munere ad Magistratum, vel Officium publicum promotus est, poterit cum restrictione mentali præstare juramentum, quod de mandato Regis a similibus solet exigi, non habito respectu ad intentionem exigentis; quia non tenetur, fateri crimen occultum.

*Ibid.*

29 Urgens metus gravis est causa Justa Sacramentorum administrationem simulandi.

Ratio hujus damnationis est; quia simulare Sacramentorum administrationem ponendo externe omnes partes Sacramenti, interne autem nullam habere intentionem administrandi Sacramentum, idem est, ac mentiri; non enim refert, utrum quis mentiatur verbo, vel facto, prout notat D. Thomas 22. quæst. 111. art. 1. atqui ob metum gravem mentiri non licet, ne quidem pro defendenda vita cap. Super eo. de Usur. ergo nec licebit simulare ex metu gravi Sacramentorum administrationem. Confirmatur: non licet ob metum gravem sacrilege administrare Sacramentum; cum non liceat ob metum gravem peccare: ergo nec licebit ob metum gravem fidei, seu simulate administrare Sacramentum: quoniam majus est peccatum simulate administrare Sacramentum, quam sacrilege juxta cap. 7. de Celebratione Missarum juxta Summarium. Hinc non licet formulam absolutariam, Ego te absolvo a peccatis tuis, proferre super aliquem scienter incapacem Sacramentalis absolutionis. Sed quando absolute negando absolutionem foret periculum, ne Confessarius Sigillum Confessionis exinde frangat, deberet sub formatione Crucis alia Oratio e. g. Misereatur &c. tacite proferri, aut sub obscuro dici, Ego te neutiquam absolvo a tuis peccatis, ita, ut adverbium neutiquam non perciperetur ab adstantibus, ut advertit Kugler in cit. proposit. Videantur fusi Cardenas, & Dominicus Viva, quando scribunt in dictam propositionem.

30 Fas est viro honorato occidere invasorem, qui nititur calumniam inferre, si aliter hæc ignominia vitari nequit: idem quoque dicendum, si quis impingat alapam, vel fuste percutiat, & post impacta alapam, vel ictum fustis fugiat.

*Vid. tr. 9. dist. 3. n. 26. & sequentibus numeris, ac Additionibus.*

31 Regulariter occidere possum furem pro conservatione unius aurei.

*Ibid.*

32 Non solum licitum est defendere defensione occisiva, quæ actu possidemus, sed etiam ad quæ jus inchoatum habemus, & quæ nos possessuros speramus.

*Ibid.*

33 Licitum est tam hæredi, quam legatario contra injuste impediens, ne vel hæreditas adeatur, vel legata solvantur, se taliter defendere, sicuti & jus habenti in cathedram, & præbendam contra eorum possessionem injuste impediens.

*Ibid. n. 29.*

34 Licet procurare abortum ante animationem factus, ne puella deprehensa gravida occidatur, aut infametur.

*Ibid. n. 37.*

35 Videtur probabile, omnem fœtum, quamdiu in utero est, carere anima rationali, & tunc primum incipere eandem habere, cum paritur, ac consequenter dicendum erit, in nullo abortu homicidium committi.

*Ibid.*

36 Permissum est furari, non solum in extrema necessitate, sed etiam in gravi.

*Vid. tr. 9. Dist. 5. n. 13 & n. 14. ac Additione post. n. 104.*

37 Famuli, & famulæ domesticæ possunt occulte heris suis surripere ad compensandam operam suam, quam majorem judicant salario, quod recipiunt.

*Ibid. n. 39.*

38 Non tenetur quis sub pœna peccati mortalis restituere, quod ablatum est per pauca furtiva, quantumcumque sit magna summa totalis.

*Ibid. n. 20.*

39 Qui alium movet, aut inducit ad inferendum grave damnum tertio, non tenetur ad restitutionem illius damni illati.

*Vid. tr. 9. dist. 5. n. 61. vide etiam n. 44. circa hanc doctrinam.*

40 Contractus Mohatra licitus est, etiam respectu ejusdem personæ, cum contractu retrovenditionis prævie inito cum intentione lucris.

*Vid. tr. 8. dist. 4. n. 27.*

41 Cum numerata pecunia pretiosior sit numeranda, ut nullus sit, qui non majoris faciat pecuniam præsentem, quam futuram, potest creditor aliquid ultra sortem a mutuatario exigere, & eo titulo ab usura excusari.

*Ibid. a. 40. & n. 41.*

42 Usura non est, dum ultra sortem aliquid exigitur, tamquam ex benevolentia, & gratitudine debitum, sed solum, si exigatur tamquam ex justitia debitum.

*Ibid. n. 25. & seqq.*

43 Quidni non nisi veniale sit, detrahentis auctoritatem magnam sibi noxiam falso crimine elidere?

*Vid. tr. 9. dist. 6. n. 11. & n. 12.*

44 Probabile est, non peccare mortaliter, qui imponit falsum crimen alicui, ut suam justitiam, & honorem defendat. Et si hoc non sit probabile, vix ulla erit opinio probabilis in Theologia.

*Ibid.*

45 Dare temporale pro spirituali non est Simonia, quando temporale non datur tamquam pretium, sed dumtaxat tamquam motivum conferendi, vel efficiendi spirituale, vel etiam quando temporale sit solum gratuita compensatio pro spirituali aut econtra.

*Vid. tr. 5. dist. 3. n. 43.*

46 Et id quoque locum habet, etiam si temporale sit principale motivum dandi spirituale: imo etiam si sit finis ipsius rei spiritualis, sic, ut illud pluris æstimetur, quam res spiritualis

*Ibid. n. 45. & n. 46.*

47 Cum dixit Concilium Tridentinum, eos alienis peccatis communicantes, moraliter peccare, qui, nisi quos digniores, & Ecclesiæ magis utiles ipsi judicaverint, ad Ecclesias promovent, Concilium vel primo videtur per hoc digniores non aliud significare velle, nisi dignitatem eligendorum sumpto comparativo propositionis, vel secundo locutione minus propria ponit digniores, ut excludat indignos, non vero dignos, vel tandem loquitur tertio, quando sit concursus.

*Vid. tr. 11. dist. 1. n. 45. & 46. ac. n. 47.*

48 Tam clarum videtur, fornicationem secundum se nullam involvere malitiam, & solum esse malam, quia interdicta, ut contrarium omnino rationi distonium videatur.

*Vid. tr. 9. dist. 4. n. 12.*

49 Mollities jure naturæ prohibita non est, unde, si Deus eam non interdixisset, sæpe esset bona, & aliquando obligatoria sub mortali.

*Ibid. n. 45.*

50 Copula cum conjugata consentiente marito non est adulterium, adeoque sufficit in confessione dicere, se esse fornicatum.

*Ibid. n. 18.*

51 Famulus, qui submissis humeris scienter adjuvat herum suum ascendere per fenestras ad stuprandam virginem, & multoties eidem subservit deferendo scalam, aperiendo januam, aut quid simile cooperando, non peccat mortaliter, si id faciat metu notabilis detrimenti, puta, ne a Domino male tractetur, ne torvis oculis aspiciatur, ne domo expellatur,

*Vid. tr. 4. dist. 7. n. 24. cum seqq. Additionibus.*

52 Præceptum servandi festa non obligat sub mortali, seposito scandalo, si absit contemptus.

*Vid. tract. 10. dist. 2. n. 24.*

53 Satisfacit præcepto Ecclesiæ de audiendo sacro, qui duas ejus partes, imo quatuor simul a diversis celebrantibus audit.

*Ibid. n. 40. & n. 41.*



54 Qui non potest recitare Matutinum, & Laudes, potest autem reliquas Horas, ad nihil teneretur, quia major pars trahit ad se minorem.

*Vid. tract. 6. dist. 2. n. 81.*

55 Præcepto Communionis annuæ satisficit per sacrilegam Domini manducationem.

*Vid. tract. 10. dist. 2. n. 28.*

56 Frequens Confessio, & Communio etiam in his, qui gentiliter vivunt, est nota prædestinationis.

*Vid. tr. 10. dist. 3. n. 56.*

57 Probabile est, sufficere attritionem naturalem, modo honestam.

*Vid. tr. 14. dist. 6. n. 42.*

58 Non tenetur Confessario interroganti fateri peccati alicujus consuetudinem.

*Vid. tract. 14. dist. 7. n. 53.*

59 Licet Sacramentaliter absolvere dimidiate tantum confessos ratione magni concursus poenitentium, qualis v. g. potest contingere in die magnæ alicujus festivitatis, aut indulgentiæ.

*Ibid. n. 41.*

60 Poenitenti habenti consuetudinem peccandi contra legem Dei, naturæ, aut Ecclesiæ, etsi emendationis nulla spes appareat, nec est neganda, nec differenda absolutio, dummodo ore proferat, se dolere, & proponere emendationem.

*Vid. tr. 14. dist. 8. n. 51. & seqq.*

61 Potest aliquando absolvi, qui in proxima occasione peccandi versatur, quam potest, & non vult omittere, quinimo directe, & ex proposito querit, aut ei se ingerit.

*Ibid. n. 47. junctis Additionibus.*

62 Proxima occasio peccandi non est fugienda, quando causa aliqua utilis, aut honesta non fugiendi occurrit.

*Ibid.*

63 Licitum est querere directe occasionem proximam peccandi pro bono spirituali, vel temporali nostro, vel proximi.

*Ibid.*

66 Absolutionis capax est homo, quantumvis laboret ignorantia Mysteriorum Fidei, & etiam si per negligentiam, etiam culpabilem nesciat Mysterium Sanctissimæ Trinitatis, & Incarnationis Domini nostri JESU Christi.

*Vid. tract. 4. dist. 2. n. 24. & Addit.*

65 Sufficit, illa Mysteria semel credidisse.

*Ibid. n. 28.*

Quicumque autem cujusvis conditionis, status, & dignitatis illas, vel illarum aliquam conjunctim, vel divisim defenderit, vel ediderit, vel de eis disputative, publice, aut privatim tractaverit, vel prædicaverit, nisi forsan impugnando, ipso facto incidat in excommunicationem latæ sententiæ, a qua non possit (præterquam in articulo mortis) ab alio quacumque dignitate fulgente, nisi pro tempore existente Romano Pontifice, absolvi.

Insuper districte in virtute Sanctæ Obedientiæ, & sub interminatione Divini Judicii prohibet omnibus Christi Fidelibus, cujuscumque conditionis, dignitatis & status, etiam speciali, & specialissima nota dignis, ne prædictas opiniones, aut aliquam ipsarum ad praxin deducant.

NB.

Tandem, ut ab injuriolis contentionibus Doctores, Scholastici, aut alii quicumque impofterum se abstinuant, & ut paci, & charitati consulatur, idem Sanctissimus in virtute Sanctæ Obedientiæ eis præcipit, ut tam in libris imprimendis, ac manuscriptis, quam in thesibus, disputationibus, ac prædicationibus caveant ab omni censura, & nota, nec non a quibuscumque convitiis contra eas propositiones, quæ adhuc inter Catholicos hinc inde contravertuntur, donec a S. Sede recognita super iisdem propositionibus judicium proferatur.

Loco + Sigilli.

JOANNES LUPUS Sacre Romanæ  
& universalis Inquisitionis Not.

Anno a Nativitate D. N. Jesu Christi 1679. Indict. 2. die vero 4. Mensis Martii, Pontificatus autem Sanct. & D. N. D. Innocentii Div. Prov. Papæ XI. anno tertio supradictum Decretum affixum, & publicatum fuit ad valvas Basilicæ Principis Apostolorum, Cancellariæ Apostolicæ, ac in acie Campi Floræ, ac in aliis locis solitis & consuetis Urbis per me Franciscum Perinum ejusd. Sanctiss. D. N. & Sanctiss. Inquisitionis Cursorem.

Romæ Typis Rev. Camerae Apost. 1679.

## DECRETUM II.

### INNOCENTII XI.

Circa Communionem quotidianam.

CUM ad aures Sanctissimi D. N. fide dignorum testimonio pervenerit, in quibusdam Diocesisbus vigere usum quotidianæ Communionis, etiam in Feria sexta Parasceve, & simul affirmari eandem quotidianam Communionem præceptam esse a jure Divino, quin etiam in illius administratione aliquos abusus inolevisse, videlicet, quod aliqui, non in Ecclesia, sed in privatis Oratoriis, & domi, imo cubantes in lecto, & non laborantes ulla gravi infirmitatis nota fumant Sacrosanctam Eucharistiam, quam argentea theca inclusam, in crumena, aut secreto illis deferunt Sacerdotes Sæculares, aut Regulares, alique in Communionem accipientes plures formas ac particulas, vel grandiores solito, ac tandem quis confiteatur peccata venialia simplici Sacerdoti, non approbato ab Episcopo, aut Ordinario. Cum autem hæc Sanctissimus consideranda commiserit Sac. Congregat. Cardinalium, Concil. Tridentini Interpretum, eadem Sacra Congregatio prævia matura discussione super præ-

*Anacl. Reiffenstuel Theol. Tom. I.*

dictis unanimi sententia ita censuit: etsi frequens, quotidianusve Sacrosanctæ Eucharistiæ usus a SS. Patribus fuerit semper in Ecclesia probatus, numquam tamen, aut sæpius illam percipiendi, aut ab ea abstinendi, certos singulis mensibus, aut hebdomadis dies statuerunt, quod nec Concil. Tridentinum præscripsit, sed quasi humanam infirmitatem secum reputaret, nihil præcipiens, quid cuperet, tantum indicavit, cum inquit: optaret quidem Sacra Sancta Synodus, ut singulis Missis fideles adstantes Sacramentali Eucharistiæ perceptione communicarent. Idque non immerito, multiplices enim sunt conscientiarum recessus, variæ ob negotia spiritus alienationes, multæ econtra gratiæ, & Dei dona parvulis concessa: quæ cum humanis oculis scrutari non possimus, nihil certe de cujusque dignitate atque integritate, & consequenter de frequentiori aut quotidiano vitalis panis esu potest constitui. Et propterea, quod ad negotiatores ipsos attinet, frequens ad Sacram alimoniam percipiendam accessus Con-



Confessariorum secreta cordis explorantium iudicio est relinquendus, qui ex conscientiarum puritate & frequentie fructu, & ad pietatem processu Laicis negotiatoribus, & Conjugatis, quod prospiciant eorum saluti profuturum, id illis præscribere debebunt. In Conjugatis autem hoc amplius animadvertent, cum B. Apostolus nolit eos invicem fraudari, nisi forte ex consensu ad tempus, ut vacent orationi, eos serio admonent, tanto magis ob sacratissimæ Eucharistiæ reverentiam continentiam vacandum, puriorque mente ad celestium Epularum Communionem esse conveniendum. In hoc igitur Pastorum diligentia potissimum invigilabit, non ut a frequenti, aut quotidiana Sacrae Communionis sumptione unica præcepti formula aliquid deterreantur, aut sumendi dies generaliter constituentur, sed magis, quid singulis permittendum per se, aut Parochos, seu Confessarios sibi decernendum putet; illudque omnino provideat, ut nemo a Sacro Convivio, seu frequenter, seu quotidie accesserit, repellatur, & nihilominus det operam, ut unusquisque digne pro devotionis, & præparationis modo rarius aut crebrius Dominici Corporis suavitatem degustet. Item Moniales quotidie Sacram Communionem petentes admonendæ erunt, ut in diebus ex earum Ordinis instituto præstitutis communicent, si quæ vero puritate mentis eniteant, & fervore spiritus ira incaluerint, ut dignæ frequentiori, aut quotidiana SS. Sacramenti perceptione videri possint, id illis a Superioribus permittatur. Proderit etiam præter Parochorum & Confessariorum diligentiam opera quoque Concionatorum uti, & cum eis constitutum haberi, ut, cum fideles ad SS. Sacramenti frequentiam (quod facere debent) accedant, statim de magna ad illud sumendum præparatione ordinationem habeant, generatimque ostendant, eos, qui ad frequentiore, aut quotidianam salutiferi Cibi sumptionem devoto studio excitantur, debere, si ve Laici negotiatores sint, si ve conjugati, si ve quicumque alii, suam agnoscere infirmitatem, ut dignitate Sacramenti, ac divini Iudicii formidine discant celestem mensam, in qua Christus est, revereri, & si quando se minus paratos senserint, ab ea abstinere, seque ad maiorem præparationem accingere. Episcopi autem, in quorum Diocæsi bus viget huiusmodi devotio erga SS. Sacramentum, pro illa gratias Deo agant: eamque ipsi adhibito prudentiæ & iudicii temperamento alere debebunt, & ab eorum officio postulari sibi maxime persuadebunt, nulli labori, aut diligentia parcendum, ut omnis irreverentiæ, & scandali suspicio in veri & immaculati Agni perceptione tollatur, vir-

tutesque ac dona in fumentibus augeantur, quod abunde continget, si ii, qui devoto huiusmodi studio, Divina præstante gratia, tenentur, seque Sacratissimo Pane frequentius refici cupiunt, suas vires expendere, seque probare cum timore, & charitate assueverint: quibus Christum Dominum, qui se fidelibus manducandum, & se pretium in morte tradidit, atque in celesti Regno se premium est daturus, precatur Sacra Congregatio, ut suam opem ad dignam præparationem, & sumptionem largiatur. Porro Episcopi & Parochi, seu Confessarii redarguant asserentes, Communionem quotidianam esse de Jure Divino, doceant in Ecclesia, seu Oratoriis privatis ex dispensatione, seu Privilegio Pontificis de manu Sacerdotis sumendam SS. Eucharistiam, nec eam ullo modo deferendam in crumena, aut secreto ad existentes domi, vel cubantes in lecto, quam ad infirmos, qui ad illam suscipiendam ad loca prædicta accedere non valeant, & ad eos, si ab Ecclesia deferatur, publice & cum pompa juxta formam Ritualis Romani: si vero ab Oratorio privilegiato, cum forma decenti. Curent etiam, ut circa Communionem in Feria 6. Parasceve, Missalis Rubricæ, ac Ecclesiæ Romanæ usus serventur. Insuper admonent, nulli tradendas plures Eucharistiæ formas, seu particulas, neque grandiores, sed consuetas. Non permittant, ut venialium Confessio fiat simplici Sacerdoti, non approbato ab Episcopo, aut Ordinario. Si Parochi, & Confessarii, etiam Regulares, aut quicumque alii Sacerdotes fecus egerint, sciant, Deo Optimo Maximo rationem reddituros esse neque defuturam Episcoporum, & Ordinariorum justam ac rigorosam animadversionem in contrascentes, etiam Regulares, etiam Societatis JESU, facultate ipsis Episcopis & Ordinariis per hoc Decretum per Sedem Apostolicam specialiter attributa.

Et facta de præmissis omnibus, ac de verbo ad verbum relatione, Sanctitas Sua approbavit, ac præsens Decretum Typis dari, ac publicari voluit. In quorum &c. Datum Romæ 12. Febr. 1679.

F. Card. Columna Præf.

S. Archiep. Brancacius Episc. Viterbiens. Secr.

Die 15. Mensis Februarii 1679. supradictum Decretum affixum, & publicatum fuit per Urbem ad valvas Curie, & in acie Campi Floræ, ut moris est per me Ægidium Felicem SS. D. N. PP. Censorum. Pro Domino Mag. Cursorum Gregorius Scapius, Apost. Curs.

## DECRETUM I.

### ALEXANDRI D. P. PAPÆ VIII.

Circa duas Propositiones de Peccato Morali. Feria V. die 24. Augusti 1690.

SANCTISSIMUS D. N. Alexander Papa VIII. non sine magno animi sui mœrore audivit duas Theses, seu Propositiones, unam denuo, & in maiorem fidelium perniciem suscitari, alteram de novo erumpere, & cum sui Pastoralis Officii munus sit, oves sibi creditas a noxiis pascuis avertere, & ad salutaria semper dirigere, dictarum Thesium, si ve Propositionum examen pluribus in Sacra Theologia Magistris, & deinde Eminentissimis, & Reverendissimis DD. Cardinalibus Inquisitoribus sedulo commisit, qui pluries remature discussa ex infra scriptis Thesibus, seu Propositionibus super unaquaque ipsarum sua suffragia Sanctitati Sux sigillatim exposuerunt.

I. Bonitas objectiva consistit in convenientia objecti

cum natura rationali, formalis vero in conformitate actus cum regula morum: ad hoc sufficit, ut actus moralis tendat in finem ultimum interpretative: HUNC homo non tenetur amare, neque in principio, neque in decursu vitæ suæ moralis.

*Thesis ista ab Alexandro VIII. rejecta, jam fuit explicata superius, agendo de prima Propositione damnata ab Alexandro VII. Ubi nota, istam Propositionem esse propter ultima ejus verba, id est, propterea reprobam: quia tenet, HUNC finem ultimum non debere necessario amari nec in principio, nec in decursu vitæ, quæ Propositio non solum ab Alexandro VII. sed etiam ab Innocentio XI. ordine 5. & 6. anathemate jam fuerat confixa antecederet, prout propterea Alexander VIII. lamentatur in præfatione, unam ex præfatis duabus propositionibus NB. resuscitari in maiorem fidelium perniciem.*



II. Peccatum Philosophicum, seu morale est actus humanus disconveniens naturæ rationali, & rectæ rationi: Theologicum vero, & mortale est transgressio libera Divinæ Legis. Philosophicum, quantumvis grave, in illo, qui Deum vel ignorat, vel de Deo actu non

cogitat, est grave peccatum, sed non est offensa Dei, neque Peccatum mortale dissolvens amicitiam Dei, neque æterna pœna dignum.

*Declarationem hujus Propositionis vide Tr. 5. Dist. 1. post n. 2. in Additione: item apud Dominicum Viva part. 3. ad initium.*

## D E C R E T U M I I.

## A L E X A N D R I V I I I.

Maxime circa Sacramentum Pœnitentiæ. Feria V. die 7. Decembris 1690.

**I**N Congregatione Generali Sanctæ Romanæ, & universalis Inquisitionis habita in Palatio Apostolico Montis Quirinalis, coram Sanctissimo D. N. D. Alexandro Divina Providentia Papa VII. ac Eminentissimis, & Reverendissimis DD. S. R. E. Cardinalibus in tota Republica Christiana contra hæreticam pravitatem Generalibus Inquisitoribus, a Sancta Sede Apostolica specialiter deputatis.

Sanctissimus D. N. Alexander Divina Providentia Papa VIII. prædictus; pro Pastoralis cura ovium a Christo Domino sibi commissæ de earum salute sollicitus, ut inoffenso gradu per rectas semitas possint incedere, & pascua nimium perniciofa in pravis doctrinis exhibita vitare, unius supra triginta Propositionum examen pluribus in Sacra Theologia Magistris, & deinde Eminentiss. ac Reverendissimis DD. Cardinalibus contra hæreticam pravitatem Generalibus Inquisitoribus commisit, qui tantum negotium diligenter aggressi, eique sedulo, ac pluries incumbentes, super unaquaque ipsarum sua suffragia Sanctitati Sux sigillatim detulerunt.

## P R O P O S I T I O N E S.

I. In statu naturæ lapsæ ad peccatum mortale, & demeritum sufficit illa libertas, qua voluntarium, ac liberum fuit in causa sua peccato originali, & voluntate Adam peccantis.

*Docuerunt Calvinus, & Lutherus libertatem indifferentiam, qua positis omnibus requisitis potest quis agere, vel non agere. Et post Adæ peccatum esse extinctam, & nihilominus actionem aliquam malam imputari ad peccatum; quia (inquirebant affectu priorum Michael Baji conformiter propositioni damnatæ, & Jansenius juxta propositionem ex damnatis ordine tertiam) ad peccandum sufficit libertas a coactione, ita ut quis aliunde per extraneos non cogatur, sed eligat malum per suam propriam potentiam volitivam; non autem requiritur libertas a necessitate, seu libertas indifferentia superius explicata, qua excluderet necessitatem peccandi. Sententia ista tam a Concilio Trident. Sess. 6. Can. 5. & Can. 6. quam a summis Pontificibus Pio V. Gregorio VIII. Innocentio X. & Alexandro VII. fuit rejecta sub fulmine excommunicationis: rationes rejiciendi suspensæ inveniuntur apud Controversistas. Ut autem hoc fulmen excommunicationis saltem apparenter in foro externo evadant, subintroierunt alii concedentes quidem requiri ad merendum, vel demerendum, aliquam libertatem indifferentiam, non tamen formalem, sed virtutalem in sua causa, quom causam taliter declarant, ut pro eadem assignent peccatum originale, & libertatem Adam. Sed plane hæc libertas indifferentia, prout ab his auctoribus explicatur, non excludit necessitatem ex parte operantis; cum juxta hanc explanationem etiam motus indeliberati voluntatis provenientes ex concupiscentia, & actus cum ignorantia invincibili exerciti forent nihilominus peccaminosi, utpote procedentes ex potentia volitiva, cuius ignorantia, & concupiscentia non raro causa est ipsum peccatum originale, utpote per quod intellectus noster magis obscuratus fuit, & fomes peccati ortum traxit. Sicque hæc sententia tantum in verbis differt a doctrina Calvinii, Baji, Jansenii, & hinc merito fuit pariter rejecta ab Alex VII.*

II. Tametsi detur ignorantia invincibilis juris naturæ, hæc in statu naturæ lapsæ operantem ex ipsa non excusat a peccato formali.

*Cum nihil libere sit opitum, quin præcognitum, non poterit operatio censeri libera libertate indifferentia, sicque imputabilis ad demerendum, quando invincibiliter, seu incurabiliter ignoratur malitia actus; hincque merito doctrina illa, quæ voluit, posse peccatum personale stare cum ignorantia invincibili, fuit rejecta; ex quo ipso fundamento fuit damnata propositio ordine 6. Michaelis Baji taliter sonans: Infidelitas pure negativa in iis, quibus Christus non est prædicatus, peccatum est.*

III. Non licet sequi opinionem, vel inter probabiles probabilissimam.

*Vid. tract. 1. dist. 7. num. 50. ubi explicatur.*

IV. Dedit semetipsum pro nobis, oblationem Deo, non pro solis electis, sed pro omnibus, & solis fidelibus,

*Non solum Calvinus, & Lutherus, verum etiam Jansenius negarunt, Christum esse mortuum pro reprobis, cum hac tamen distinctione, quod priores duo etiam negent quacunque Beneficia, ac dona supernaturalia conferri reprobis ex meritis Christi. Econtra vero Jansenius ipsis multa beneficia supernaturalia ex meritis Christi concedit, sicque in hoc sensu Christum esse mortuum pro reprobis admittit, non tamen pro æterna illorum salute. Omnes tres rejecti sunt a summis Pontificibus; ut autem hanc damnationem eludant, subintroierunt alii admittentes quidem, Christum etiam mortuum pro reprobis, aut pro solis fidelibus, non tamen pro infidelibus reprobis, hincque subjunxerunt aliam sequentis tenoris.*

V. Pagani, Judæi, Hæretici, alique hujus generis nullum omnino accipiunt a JESU Christo induxum, adeoque hinc recte inferes, in illis esse voluntatem nudam, & inermem, sine omni gratia sufficienti.

*Hæc propositio merito, uti & prior, in qua fundatur, rejecta fuit: Deus enim illuminat omnem hominem venientem in hunc mundum. Jo. 1. qui & pro omnibus mortuus est, 2. ad Cor. cap. 5. & dedit redemptionem semetipsum pro omnibus, 1. ad Timoth. cap. 2. vers. 6. Estque propositio pro peccatis nostris, non pro nostris autem tantum, sed etiam pro totius mundi, 1. Jo. c. 2.*

VI. Gratia sufficiens statui nostro, non tam utilis, quam perniciofa est, sic, ut proinde merito possimus petere: a gratia sufficienti libera nos Domine.

*Jansenius statim in prima ex suis quinque Propositionibus damnatis non solum gratiam sufficientem in statu naturæ lapsæ negavit in ordine ad certa præcepta, sed & in subsequentibus docuit, gratiam interiori quamcumque per Christum Salvatorem datam, esse unicam efficacem, cui æquiquam resistitur. Novatores alii equidem sufficientem absolute non negant, dicunt tamen; illam esse perniciosam, eo quod conjungatur semper cum omissione culpabili actus præcepti. Ast merito exinde damnantur: absit enim a Christianis asserere, quod Christus Dominus, qui illuminat omnem hominem venientem in hunc mundum, nobis per suam Sanctissimam mortem, & sacratissima merita quidpiam perniciosum procuraverit. Quod autem homines huic gratia non cooperentur, nullatenus Deo sed propria malitia adscribendum est. Certe etiam in ordine naturali est beneficium neutiquam perniciosum habere oculos: sibi autem quis imputet, qui claudendo palpebras noluerit uti uti ad videndum.*

VII. Omnis humana actio deliberata est Dei dilectio, vel mundi; si Dei, Charitas Patris est; si mundi, concupiscentia carnis, hoc est, mala est.

*Per dictam Propositionem Joannis Sinicbii, & Macarii Havermans, ac nonnullorum aliorum Locanienfium non solum resistitur error Michaelis Baji a S. Pio V. & Gregorio XIII. reprobatus per damnationem Propositionis 28. verum etiam hæc doctrina jam censetur rejecta ab ipso Concilio Trid. Sess. 6. can. 7. ubi definit fidem, spem, & timorem, quæ præcedunt justificationem, non esse peccata, quamvis formaliter nec etiam sint actus Charitatis, seu dilectio Dei.*

VIII. Necessè est, infidelem in omni opere peccare.



Denno hac doctrina videtur jam damnata antecedenter, quando propositio Michaelis Baji ordine 25. proscripta fuit sequentis tenoris: omnia opera infidelium sunt peccata, & virtutes Philosophorum sunt vitia. Quinimo etiam prius rejecta fuit per Concil. Trid. anathematizans sess. 6. can. 7. illum, qui dixerit, opera omnia, que ante justificationem fiunt, quacunque ratione facta sunt, vere esse peccata. Et quis dixerit, esse peccatum, si infidelis misericordia motus pauperi dederit elemosynam, cum tamen ipsemet Nabuchodonosor fuerit Danielis c. 4. admonitus, ut peccata sua elemosynis redimat.

IX. Revera peccat, qui odio habet peccatum mere ob ejus turpitudinem, & disconvenientiam cum natura, sine ullo ad Deum offensum respectu.

Mirum non est, quod Rigoristæ illi docuerint, odium peccati mere ob ejus turpitudinem peccatum esse, cum ex principiis Bajanis præcedenter voluerint, omne, quod non est dilectio DEI, fore peccaminosum. Ceterum hunc errorem jam ante hos Novatores rejectit Concil. Trident. sess. 14. cap. 4. dum enuntiat, talem timorem non solum non facere hominem non Hypocritam, & magis peccatorem, verum etiam donum Dei esse, & Spiritus Sancti impulsus: atqui peccatum utique non est donum Dei, & Spiritus S. impulsus: ergo. Videantur dicta tract. 14. distinct. 6. quest. 4.

X. Intentio, qua quis detestatur malum, & prosequitur bonum, mere ut cœlestem obtineat gloriam, non est recta nec Deo placens.

Sane obstupefendum, quod homines, qui volunt esse Catholici, similia docere audeant; cum tamen Concil. Trid. sess. 6. can. 31. rejecerit tale assertum ut hæreticum his verbis: si quis dixerit, justificatum peccare, dum intuitu æternæ mercedis operatur, anathema sit. Ac præterea Regius Psalter psal. 18. expresse exclamat ad Deum: inclinavi cor meum ad faciendas justificationes tuas in æternum NB. propter retributionem.

XI. Omne, quod non est ex fide Christiana supernaturali, quæ per dilectionem operatur, peccatum est.

Uti bene notat Dominicus Viva hic, ex deliramento Michaelis Baji superius jam allegato, & refutato (quod scilicet inter Charitatem, & iniquitatem nihil mediet) denno descendit hac Thesis confixa, quod videlicet peccaminosa sint nostra operationes, si non procedant ex fide supernaturali, quæ per dilectionem operatur. Vide dicta proposit. VII. & proposit. VIII.

XII. Quando in magnis peccatoribus deficit omnis amor, deficit etiam fides, & etiam si videantur credere, non est fides divina, sed humana.

Assertum errorem jam proscripterat Concil. Trid. sess. 6. cap. 15. ubi docet, fidem infusam non amitti per quodvis mortale (sicut amittitur gratia) sed per peccatum infidelitatis: tum can. 28. in quo ponit sequentia: si quis dixerit, amissa per peccatum gratia simul & fidem semper amitti &c. aut eum, qui NB. fidem sine Charitate habet, non esse Christianum, Anathema sit. Accedit Auctoritas Divi Pauli in peccatore fidem sine Charitate subsistere posse agnoscens, dum ait. 1. Cor. cap. 13. Si habuero NB. omnem fidem, Charitatem autem non habuero: nihil sum: ubi utique agnoscit fidem sine Charitate posse dari.

XIII. Quisquis etiam æternæ mercedis intuitu Deo famulatur, charitate si caruerit, vicio non caret, quoties intuitu licet beatitudinis operatur.

De hoc jam actum fuit propositione decima.

XIV. Timor gehennæ non est supernaturalis.

Hunc errorem denno jam damnavit Concil. Trid. sess. 14. c. 4. dum talem doctorem (idem est de timore) vocat donum Dei, & Spiritus S. impulsus. Vide de hoc tr. 14. dist. 6. qu. 4.

XV. Attritio, quæ gehennæ & poenarum metu concipitur, sine dilectione benevolentiae Dei, propter se non est bonus motus, ac supernaturalis.

Refutatur uti prius, & fundatur in falso illo principio Michaelis Baji, quod videlicet omne opus, quod non est ex Charitate, peccatum sit.

XVI. Ordinem præmittendi satisfactionem absolutioni induxit non politia, aut institutio Ecclesiæ, sed ipsa Christi lex, & præscriptio, natura rei idipsum quodammodo dictante.

XVII. Per illam praxim mox absolvendi Ordo poenitentiae est inversus.

A nostro Sixto IV. antea Ordinis Generali, deinde Summo Pontifice error iste, qui erat Petri de Osimo, damnatus fuit, uti testatur Cardinalis de Lugo Disp. 12. de Poenitentia n. 42. Accedit ratio, quod hoc Sacramentum sit institutum ad formam judicii proferentis sententiam; sed hoc solet proferri ante executionem poenae decreta: ergo. Quando autem adducuntur Orosius Cardinalis, S. Cyprianus, & Abbo Archiepiscopus Rheimensis testantes in antiqua Ecclesiâ satisfactionem ordinariæ præstitam ante absolutionem, præfati, & alii Auctores

intelligendi sunt de absolutione Canonica, quæ olim delinquentes in foro Canonico absoluebantur a residuis poenis Canonicis, & publicis, non autem de absolutione Sacramentali a peccatis.

XVIII. Consuetudo moderna quoad administrationem Sacramenti Poenitentiae, etiam si eam plurimorum hominum sustentet auctoritas, & multi temporis diuturnitas confirmet, nihilominus ab Ecclesiâ non habetur pro usu, sed abusu.

Gratis, & temerarie novatores Rigoristæ finxerunt, quod moderna praxis administrandi Sacramentum Poenitentiae habeatur pro abusu, cum nunquam ostendi queat, dictam praxim esse contra præceptum Divinum, vel Ecclesiasticum. Vide Dominicum Viva hic num. 5.

XIX. Homo debet agere tota vita poenitentiam pro peccato originali.

Contenderunt teste Viva hic n. 2. Lutherus, & Calvinus, concupiscentiam, seu fomitem peccati esse ipsum peccatum originale; ex quo baud dubie sequeretur, sicuti apud nos etiam post Baptismum remanet concupiscentia, ita & permanere ipsum peccatum originale; quod idem videntur occulte sentire rigidi hi Novatores, atque exinde inferre, quod homo debeat tota vita sua agere poenitentiam pro peccato originali, utpote quod in principiis Lutheri ac Calvinii adhuc remanet etiam post Baptismum, cum remaneat pro tunc fomes peccati, seu concupiscentia, in qua constituitur ratio peccati originalis. Ast falsum est, quod ipsa concupiscentia sit peccatum originale juxta clarum textum Conc. Trid. sess. 5. can. 5. Præterea (uti bene advertit Matthæus in sua Cautela confessorii Lib. 3. c. 3. n. 42.) ista propositio enervat efficaciam Baptismi, per quem, etsi remaneat concupiscentia, nihilominus plene, & integre remittitur peccatum originale, & actualia, ante Baptismum commissa, juxta Trid. sess. 5. can. 5. in Decret. de Peccato originali; ac sess. 14. c. 2. Item remittitur omnis poena; cum. Per Baptismum de Consecrat. dist. 4. Propterea Baptizatis nulla pro peccatis præteritis injungenda est satisfactio, sed morientes, si post susceptum Baptismum aliam culpam non committant, statim ad regnum celorum, & Dei visionem perveniunt, uti loquitur expresse Concilium Florent. in Decreto Eugenii; ac Tridentinum sess. 7. cap. 14. definit, in Baptismo totam poenam semper remitti. Ad quid ergo opus est agere tota vita poenitentiam pro peccato originali?

XX. Confessiones apud Religiosos factæ pleræque vel sacrilegæ sunt, vel invalidæ.

XXI. Parochianus potest suspicari de Mendicantibus, qui elemosynis communibus vivunt, de imponenda nimis levi, & incongrua poenitentia, seu satisfactione, ob quæstum, seu lucrum subsidii temporalis.

Sunt Rigoristæ in Sacramento Poenitentiae erga alios nimis severi, uti patet ex damnatis antecedentibus propositionibus; hic autem erga se ipsos nimium laxi, dum publice sine scrupulo, & anxietate conscientiae talia absolute, & generaliter Regularibus mendicantibus de Religione Catholica, quam tamquam supremi Pastores, seu Summi Pontifices non raro laudabilissime ac utilissime rewerunt, & in ejus gremium plures miliones animarum, etiam in Indiis tamquam extremis orbis partibus adduxerunt, eximie meritis, summo impingere presumunt, quæ certe sine gravissima detractioe asseri nequeant, imo sine nota temerarii judicii cogitari. Videatur Dominicus Viva hic.

XXII. Sacrilegi sunt judicandi, qui jus ad communionem percipiendam prætendunt, antequam condignam de delictis suis poenitentiam egerint.

Etsi non negetur, aliquando consultum esse, ut poenitentia persolvatur, antequam sacra communio percipiatur: attamen, si id non fiat, sacrilegium committi, ex nullo textu sacrae Scripturae, aut Concilii Oecumenici probari potest. Scio quidem, quod Paulus Apostolus requirat, ut quis, antequam ad has Epulas Divinas accedat, se ipsum probeat, id tamen non ita intelligendum venit, quasi necessario præcedenter ante accessum ad S. Communionem prævia condigna satisfactio requireretur, sed potius de prævia confessione debet fieri interpretatio. Audiatur desuper Concil. Trid. sess. 13. cap. 7. taliter loquens: Ex Ecclesiastica consuetudine declaratur, illam NB. tantum probationem esse necessariam, ut nullus sibi conscius peccati mortalis, quamvis sibi contritus videatur, absque præmissa Sacramentali confessione ad Sacram Eucharistiam accedere debeat. Item quomodo consultum invenitur, ut v. g. Consuetudinarius, cui singulis diebus per aliquot hebdomades brevis oratio tamquam poenitentia medicinalis imponitur, ut (inquam) talis consuetudinarius a cibo hoc alias singulariter confortante abstineat, usque dum per hanc poenitentiam condigne pro suis peccatis satisfaciatur?

XXIII. Similiter arcendi sunt a Sacra Communionem, quibus nondum inest amor Dei purissimus, & omnis mixtionis expers.



Datur etiam suo modo in absurdum aliqua coherentia, ita nimirum, ut ex uno absurdo sequantur plura. Sic quia Bajanum juxta jam dicta conformiter propositioni 38. damnata Michaelis Baji docuerunt, omnem actionem humanam delibetam, quae non est charitas Patris, esse dilectionem mundi, & concupiscentiam carnis, exinde occulti affectu Michaelis Baji, ac Novatores consequenter inferunt, preparationem illam, qua juxta Apostolum Paulum homo se ipsum probat, ut de pane illo edat &c. debere necessario procedere ex purissimo amore Divino, alias autem fore dilectionem mundi, peccaminosam, & consequenter tales a S. Communionem arcendos.

At reprobantur partim ex jam dictis antecedentibus, partim ex Concilio Tridentino, quod sess. 13. c. 7. declarans illam preparationem ad Sacram Communionem ab Apostolo Paulo desideratam non facit ullam mentionem charitatis purissimae quasi necessario praequisitae, sed potius Sacramentalis Consecrationis, supposito, quod quis in peccato gravi extiterit.

XXIV. Oblatio in templo, quae fiebat a Beata Virgine Maria in die Purificationis suae per duos pullos columbarum, unum in holocaustum, & alterum pro peccatis, sufficienter testatur, quod indiguerit purificatione: & quod Filius, qui offerebatur, etiam macula Matris maculatus esset secundum verba legis.

Equidem hac Thesis confixa directe non spectat ad Theologiam Moralem, uti consideranti patet, ut tamen nulla ex propositionibus ab Alexandro VIII. rejectis absque aliquo saltem declaratione relinquatur, juxta explicatur: praeponendum itaque ex Origine Homilia 14. in Lucam, a feminis parturientibus post tempus purificationis (id est, triginta diebus post partum) duos pullos columbarum a pauperibus, a ditioribus autem unum agnum anniculum, & unum pulum columbae in lege veteri fuisse in templo oblatos, & quidem pullos columbae semper offerebatur pro peccato, id est, pro immunditia contracta a genitrice, & ab infante, tum ob conceptionem impuram ex concupiscentia carnis utrum trahentem, tum ex vi natiuitatis sordide: nam, cum vocem in mensibus in utero matris aliqua excrementa, & copia sanguinis congregentur, in exitu partus expelluntur, & quia tota hac materia NB. ex infectione peccati, ac concupiscentia tanquamomite peccati oritur, idcirco Sacrificium illius pulli pro peccato offerri dicebatur, uti bene notat Dominicus Viva hic num. 3.

Jam autem ter Immaculata, ac Purissima Dei Genitrix Maria juxta Isaiam cap. 7. tanquam Virgo peperit filium, & quidem conceptum de Spiritu Sancto, prout Symbolum Apostolorum nos docet, consequenter his immunditias ex concupiscentia carnis, & concubitu cum viro eventibus subiecta nequaquam fuit. Nequaquam immunda judicatur, quae Sancto Spiritu obumbrante totius munditiae, & Sanctitatis Auctorem genuisse probatur: inquit apud Dominicum Viva hic num. 7. Sanctus Enigius, & S. Augustinus L. de Heresi. cap. 5. contra Manichaeos ait: Stulte, unde fordes ex Virgine Matre, ubi non est concubitus cum homine Patre? Nihil plane in hoc conceptu, nihil in partu impurum fuit &c. &c. Vere o Beata Virgo, vere non habes causam, nec tibi opus est purificatione concludit S. Bernardus Serm. 1. de Circumcisione. Neque ex eo, quod offerendo duos pullos columbarum antiquae legi Purificationis sese subjecerit, sequitur, quod purificatione indiguerit; alias pariter ex circumcissione Christi deberet inferri in ipso macula originalis peccati, & ex dato tributo subiectio Christi ad Caesarem colligeretur, uti recte notat Matthaeus in Castel. Consecr. Lib. 3. cap. 3. n. 56.

XXV. Dei Patris sedentis simulacrum nefas est Christiano in templo collocare.

Videtur hac propositio renovare errorem Iconoclastiarum in VII. Synodo Generali ad annum 787. sub Adriano Papa damnatum, quae damnatio de novo renovata fuit a Concilio Tridentino, sess. 25. in Decret. de Invocatione Sancti. contra Lutheranos, & Calvinistas statuente, Imagines Christi, Deiparae, & aliorum Sanctorum non solum in templis habendas, sed etiam eis debitum honorem, & venerationem impertientiam. Nec dicatur cum his Novatoribus, in ipso, aliisque Conciliis equidem fuisse definitam retentionem Imaginum Christi, Deiparae, & Sanctorum; nihil autem esse decisum de Imaginibus representantibus ipsummet Deum. Nam contra est, quod eadem videatur ratio, uti consideranti patet: si enim Deus Pater sub figura corporea apparuit Danieli, prout ipsemet testatur cap. 7. Ibi aspicebam, donec throni positi sunt, & antiquus dierum sedet, & Spiritus S. sub specie Columbae Matthaei cap. 3. cur non posuerit Deus etiam sub figura corporea representari, & in templo collocari?

Nec obest, quod Deus sit incorporeus: nam etiam Angeli sunt incorporei, & tamen constat ex Dei imperio Exod. cap. 25. Angelos sculpta similitudine expressos fuisse, & in VII. Synodo definitum esse, imagines Angelorum posse depingi. Consule de hoc interius Theologiam Potemicam.

XXVI. Laus, quae desertur Mariae ut Mariae, yana est.

Errorum horum gravissimum Leo Isauricus inter hereticos post Gentiles, & Mahumetanos omnium primus jam docuit, quem resuscitarunt Wiclephilla teste Valdensi T. 3. cap. 118. nullam aliam salutationem honorificam B. V. concedentes, quam Civilem, quales etiam Regibus, & Magnatibus exhibetur. Errori huic repugnat perpetuus Ecclesiae usus, & traditio, ac novissime Concilium Tridentinum, sess. 25. superius citatum precipiens non solum laudem, sed etiam honorem, ac cultum B. Virginis, ac Sanctis exhiberi, qui equidem non sit cultus Latriae, sed Hyperdulia respectu B. Virginis, & Dulia respectu aliorum Sanctorum. Videantur dicta Tract. 4. Dist. 1. quaest. 3. & 4.

XXVII. Valuit aliquando Baptismus sub hac forma collatus: In nomine Patris &c. praetermissis illis: Ego te baptizo.

Cum ad valorem Baptismi requiratur: ut exprimat actio Ministri, sicuti ad valorem Sacramenti Penitentiae, hinc, sicuti in Sacramento Penitentiae, si omitteretur: Ego te absolvo, nunquam reputatum legitur validum Sacramentum Penitentiae, ita pariter discurrendum, si in Baptismo intermissum fuit: Ego te baptizo. Et hinc Alexander Tertius, prout refertur cap. 1. de Baptismo, jam anno 1175. declaravit Baptismum tanquam invalidum in quo sub expressione formae non continentur haec verba: Ego te baptizo. Vide Tract. 14. Dist. 3. quaest. 3.

XXVIII. Valet Baptismus collatus a Ministro, qui omnem ritum externum, formamque baptizandi observat, intus vero in corde suo apud se resolvit, non intendendo facere, quod facit Ecclesia.

Expresse Concil. Trident. sess. 7. de Sacramentis in genere, Can. 11. hac posuit formatia: Si quis dixerit in Ministris, dum Sacramenta faciunt, & conferunt, non requiri intentionem saltem faciendi; quod facit Ecclesia, anathema sit. Quod idem jam antecessenter statuit Concil. Florent. in Decret. Unionis. Textum hunc forte explicarunt aliqui, ut suam adhuc opinionem aliquo modo manutenere valeant: dicendo nimirum, vi allegati textus requiri quidem intentionem materialiter faciendi, quod facit Ecclesia, non autem formaliter, id est, praecipere quidem intentionem ponendi ritum externum, prout ponit Ecclesia, non autem requiri intentionem internam, neque implicitam faciendi Sacramentum Nomine Christi tanquam principalis, prout facit Ecclesia; quinimo (inquiunt) interne poterit haberi expresse intentio contraria, nimirum nullum conficiendi Sacramentum, dummodo haec positiva contraria intentio non prodeat exterius. Ita illi. Videtur tamen torta hac explicatio reprobata per confixionem allegatam 28. Propositionis ex ea ratione; quia Minister Sacramenti operatur nomine Christi tanquam principaliter operantis, adeoque saltem implicite debet se conformare intentioni ipsius Christi, quae erat non solum ritus externus, sed ipsum Sacramentum conficiendi. Solutionem objectionum invenies passim apud Theologos.

XXIX. Futilis, & toties convulsa est assertio de Pontificis Romani supra Concilium Oecumenicum Auctoritate, atque in Fidei quaestionibus decernendis infallibilitate.

Auctoritas Romani Pontificis supra Concilium Oecumenicum, seu Generale, & ejusdem infallibilitas in decernendis quaestionibus Fidei desumitur ex illo Christi Domini ad Petrum Matthaei cap. 16. Tu es Petrus; & super hanc petram aedificabo Ecclesiam meam, & portae inferi non praevalerunt adversus eam. Nam si Ecclesia fundatur super Petrum, non autem Petrus supra Ecclesiam, ipsemet Petrus erit fundamentum nostrae Fidei, non autem Ecclesia, seu Concilium Oecumenicum, & consequenter Petro major Auctoritas deferenda. Deinde, si contra Petrum, & Successores praevalere nequeunt portae inferi, consequenter Papa nequit falli in decernendis articulis Fidei; alias multum praevalerent contra ipsum portae inferi. Taceo alias graves rationes, quas pro se habent haec duo asserta de Pontificis in materia Fidei infallibilitate, & ejusdem supra Concilium auctoritate: hinc merito propositio 29. damnata fuit, quia hanc ipsam duplicem assertionem NB. futiliter & toties convulsam pronunciare ausuerat.

XXX. Ubi quis invenerit Doctrinam in Augustino clare fundatam, illam absolute potest tenere, & docere non respiciendo ad ullam Pontificis Bullam.

Magna quidem est auctoritas Divi Augustini, non tamen irrefragabilis, nisi relata ad ea, quae a Conciliis, & Summis Pontificibus approbata sunt. Quare haud dubie pariter ad Bullas Pontificias respici debet; cum teste Sac. Scriptura quondam materiam Fidei Summus Pontifex loquens de Cathedra, non autem Divus Augustinus invenitur habere promissam infallibilem assistentiam Spiritus Sancti. Quinimo Divus Augustinus ipsemet aliqua retractavit, prout fatetur Lib. de Dono perseverantiae, cap. 21. Pateat confixa hac Jansenistarum propositio ortum trahit a Bajanis, qui, ut facilius se subtrahere possent a Bullis



*Bullis Pontificiis, suam Doctrinam reprobantibus, contenderunt (licet falsissime) multis Michaelis Baji propositiones indubitanter ab Augustino doceri, sicque easdem ob Auctoritatem D. Augustini tantis laudum Eucemiis ab Ecclesia recommendari manu teneri posse, non respiciendo ad Bullas Pontificias, quibus eadem damnantur.*

XXXI. Bulla Urbani VIII. *In Eminenti*, est subreptitia.

*Sciendum est, quod Bulla ista Urbani VIII. confirmaverit Constitutiones adversus 79. Propositiones Michaelis Baji a S. Pio V. & Gregorio XIII. proscriptas, ac præterea prohibuerit aliquem librum Jansenii Augustinus Cornelii Jansenii intitusatum, utpote continentem nonnullas ex dictis 79. Propositionibus damnatis, & harum principis insistentem. Quare occulti Bajanorum, & Jansenistarum fautores videntes se exinde confisos, ut omnem vim huic Bullæ adimant, ausi sunt, eandem dicere subreptitiam, id est, dolo extortam per expositionem falsi. Sed contra est primo, quod Pontifex direxerit eam Bullam ad universalem Ecclesiam, damnando Doctrinam Bajanam, & Jansenisticam tamquam hæreticam, scandalosam, ac periculosam, & consequenter locutus sit de Cathedra, ubi errare non potest, aut decipi in materia Fidei. Contra est secundo, quod ipsemet Pontifex in ea Bulla fateatur, NB. ex matura illius libri, cui titulus Augustinus &c. lectione compertum esse, multos ibi errores Baji contineri.*


Quibus mature consideratis idem Sanctissimus statuit, & decrevit 31. supradictas propositiones tamquam te-

merarias, scandalosas, male sonantes, injurias, hæresi proximas, hæresin facientes, erroneas, schismaticas, & hæreticas respective esse damnandas, & prohibendas, sicut eas damnat, & prohibet, ita, ut quicumque illas aut conjunctim, aut divisim docuerit, defenderit, ediderit, aut de iis etiam disputative, publice, aut privatim tractaverit, nisi forsan impugnando, ipso facto incidat in Excommunicationem, a qua non possit (præterquam in articulo mortis) ab alio quacumque etiam dignitate fulgente, nisi a pro tempore existente Romano Pontifice absolvi.

Insuper directe in virtute Sanctæ Obedientiæ, & sub interminatione Divini Judicii prohibet omnibus Christi Fidelibus, cujuscumque conditionis, dignitatis, & status etiam speciali, & specialissima nota dignis, ne prædictas opiniones, aut aliquam ipsarum ad praxim deducant. Non intendit tamen Sanctitas sua per hoc Decretum alias propositiones in majori numero ultra supradictas 31. jam exhibitas, & in hoc Decreto non expressas approbare.

Alexander Spononius S. Romanae, & Universalis Inquisitionis Not.

Loco + Sigilli.



## A D M O N I T I O

### A D C A N D I D A T O S T H E O L O G I Æ.

**S**i allegatas Propositiones damnatas, paragrapho tertio contentas, & ad Theologiam moralem potissime spectantes, una cum succincta earum explicatione post absolutam Theologiam de novo, & quidem attente, ac repetitis vicibus relegant, antequam examinati, & approbati Neo-Confessarii sacrum Poenitentiae Tribunal actualiter accedant, ingentem exinde, experientia teste, utilitatem percipient, nec non a pluribus erroribus sibi præcavebunt: Ubi, ut Eadem facilius memoriae imprimantur, pro majori adjutorio specialem aliquem in dictas Propositiones damnatas Indicem formavi, illico annexendum, in quo Doctrinam cui-libet Propositioni damnatae immediate oppositam, sicque merito tenendam posui, & ut quælibet Propositio damnata eo citius in fonte inveniri queat, præprimis numerum dictæ propositionis; Deinde nomen Pontificis, qui eam damnavit, adjunxi.





# INDEX SPECIALIS

*Compendiose referens cujuslibet Propositionis Damnata oppositam Doctrinam.*

## A

- A** Bortus procuratio aliquoties est conjuncta cum Homicidio; quia aliquoties fœtus adhuc in utero materno existens est animatus. Proposit. 35. Innocent. XI.
- Abortum procurare non licet ad evitandam infamiam, vel aliud grave malum. Proposit. 34. Innoc. XI.
- Abolvere nequeunt Sæculares ab Hæresi occulta Prælati regulares Proposit. 3. & 4. Alexand. VII.
- Abolvere pariter nequeunt citra licentiam Ordinarii Regulares mendicantes ipsos Sæculares a Casibus specialiter Episcopo reservatis. Prop. 12. Alex. VII.
- Abolvi nequeunt regulariter ignorantes culpabiliter Mysterium Trinitatis, & Dominicæ Incarnationis. Proposit. 64. Innocent. XI.
- Abolvi nequeunt propter solum confuxum pœnitentium dimidiatæ tantum Confessio. Proposit. 59. Innocent. XI.
- Abolutio quo ad Consuetudinarios, & constitutos in occasione proxima. Vide *Consuetudinarii* Item Vid. *Occasione proxima* &c.
- Abolutionem non debet necessario præcedere executio Pœnitentiæ. Proposit. 16. Alexand. VIII.
- Actus Fidei, Spei, & Charitatis, quando, & quoties sint eliciendi? Proposit. 1. Alexand. VII. Item. Proposit. 5. 6. 7. 16. 17. & 65. Innocent. XI.
- Actus moraliter boni dari possunt apud peccatores, & Infideles absque virtute Charitatis. Proposit. 7. & 8. Alexand. VIII.
- Adulterium reputari debet copula cum conjugata habita, quamvis Maritus ipsemet in eam consentiat. Proposit. 50. Innocent. XI.
- Adultera deprehensa. Vid. *Uxor deprehensa in Adulterio*.
- Amore deficiente apud graves peccatores, potest adhuc remanere fides. Proposit. 12. Alexand. VIII.
- Assensus fidei supernaturalis nequit stare cum formidine; nec prudenter repudiari. Proposit. 20. & 21. Innocent. XI.
- Attritio naturalis non sufficit ad Sacramentum pœnitentiæ. Proposit. 57. Innocent. XI.
- Attritio est supernaturalis, quamvis concepta ex metu gehennæ &c. Prop. 15. Alexand. VIII.
- Augustini auctoritas, etsi in Ecclesia magna, non tamen tanta est, ut absolute non respiciendo ullam Bullam pontificiam teneri, & doceri possit. Proposit. 30. Alex. VIII.

## B

- B**aptismus non valet sine debita intentione, quamvis ceteroquin omnem ritum externum Baptizans adhibeat. Proposit. 28. Alexand. VIII.
- Baptizans, & non in formula pronuntians illa verba: *Ego te Baptizo*, invalide Baptizat. Proposit. 27. Alex. VIII.
- Beneficia collata cum Simonia quæ? Prop. 22. Alex. VII.
- Beneficia sunt conferenda dignioribus. Prop. 47. Innoc. XI.
- Beneficiati omittentes Horas Canonicas tenentur pro rata ad restitutionem, etiam ante sententiam declaratoriam Judicis. Prop. 20. Alexand. VII. Nec satisfaciunt per Eleemosynam antecedenter gratis datam. Prop. 33. Alexand. VII.
- Beneficiati Curati nequeunt sibi eligere Confessarium simplicem Sacerdotem, non approbatum ab Ordinario. Prop. 16. Alex. VII.
- Anacl. Reiffenstuel Theolog. Tom. I.*

Bestialitas est distinctum peccatum a mollicitie, & Sodomia. proposit. 24. Alex. VII.

## C

- C** Alumnatores. Vid. *Occidi*.
- Charitas proximi. Vid. *Diligere*.
- Charitatis actus. Vid. *Actus fidei*.
- Censuræ illimitate latæ non illico cessant correcto Reo, nisi Is quoque absolvatur. Prop. 44. Alex. VII.
- Christus mortuus est etiam pro Paganis, Judæis, & reprobis. Prop. 4. & 5. Alex. VIII.
- Comedere, & bibere usque ad satietatem ob solam voluptatem non licet. Proposit. 8. Innocent. XI.
- Communione sacram possunt sumere etiam Illi, quibus necdum inest amor purissimus. Proposit. 23. Alex. VIII.
- Communioni Sacræ non necessario præmittenda est actualis de delictis suis executio Pœnitentiæ. Proposit. 22. Alex. VIII.
- Communione annuæ præcepto non satisfit per Communionem Sacrilegam. Proposit. 55. Innocent. XI.
- Concubinaris debet ejicere suam Concubinam, quamvis ea deficiente nimis ægre ageret vitam, & aliæ Epulæ tædio magno Illum afficerent, aliaque famula nimis difficile inveniretur. Proposit. 41. Alexand. VII.
- Confessarius sollicitans ad turpia quandonam sit denuntiandus? Prop. 5. & 7. Alex. VII.
- Confessarius Regularis. Vid. *Abolvere*.
- Confessio & Communio frequens in his, qui alias gentiliter vivunt, non est nota prædestinationis. Prop. 56. Innocent. XI.
- Confessione sacrilega seu nulla non satisfit præcepto annuæ Confessionis. Proposit. 14. Alexand.
- Confessiones apud Religiosos factas esse plerasque invalidas, & sacrilegas, gravissima est impostura merito damnata. Proposit. 20. & 21. Alexand. VIII.
- Consuetudinarii tenentur suam consuetudinem peccandi fateri, si desuper a Confessario interrogentur &c. & quandonam dicti possint absolvi? Proposit. 58. & 60. Innocent. XI.
- Copula cum conjugata &c. Vide *Adulterium*.
- Copulam actualem exeroens cum soluta non satisfacit in Confessionali, si dicat: *Commisi grave peccatum cum soluta*. Proposit. 25. Alexand. VII.
- Copulam conjugalem exercere ob solam voluptatem non caret omni culpa. Proposit. 9. Innocent. XI.
- Crimen falsum non licet alteri imponere ad diminuendam ejusdem auctoritatem, alias sibi futuram noxiam, vel ad defendendam justitiam, & suum honorem. Proposit. 43. & 44. Innoc. XI.

## D

- D**enunciatio. Vid. *Confessarius sollicitans*. Item Vid. *Hæretici*.
- Detractio Vid. *Crimen falsum* &c.
- Deum in testem vocare in re etiam leviter falsa est peccatum grave. Proposit. 24. Innoc. XI.
- Dilectionis Dei actus sæpius in vita elici debent. Proposit. 5. & 6. Innocent. XI.
- Diligere tenemur proximum non solum externe sed etiam interne. Proposit. 10. 11. 13. Innoc. XI.
- Duellum acceptari nequit præcise ex ea ratione, ne provocatus apud alios timiditatis notam incurrat, Proposit. 2. Alexand. VII.



## E

**E**leemosyna sub præcepto pauperibus danda est a divitibus, & quomodo? Proposit. 12. Innoc. XI. Eleemosyna præcedenter data non supplet obligationem restituendi ob omittas Horas Canonicas. Proposit. 33. Alexand. VII.

## F

**F**amuli, vel Famulæ nequeunt uti occulta compensatione ex eo præcise; quia ipsi judicant, operas suas esse majores Salario. Proposit. 37. Innocent. XI. Famuli nequeunt Herum suum circa grave peccatum adjuvare ad stuprandam Virginem, Eidem multoties subserviando, scalam deferendo, aperiendo januam, aut quid simile cooperando. Proposit. 51. Innoc. XI. Festa servandi obligatio. Vide *Præceptum servandi* &c. Fidem tenetur quis confiteri interrogatus de hac a Potestate publica. Propos. 18. Innoc. XI. Fides non solum in unum Deum, sed etiam Remuneratorem est necessaria necessitate medii. Proposit. 22. Innocent. XI. Fides elicitæ præcise ob testimonium Creaturarum, vel ex simili motivo non sufficit ad justificationem. Proposit. 23. Innocent. XI. Fides potest etiam in gravibus peccatoribus subsistere sine charitate. Prop. 11. & 12. Alex. VIII. Fides. Vid. *Actus fidei* &c. Fidei assensus. Vid. *Assensus fidei*. Fornicatio est in se intrinsece, mala, non solum ideo, quia prohibita. Proposit. 48. Innoc. XI. Fornicatio qualiter in Confessionali explicanda? Vid. *Copula*. Furari non licet in necessitate præcise gravi. Proposit. 36. Innoc. XI. Furta etiam minuta obligant sub gravi ad restitutionem si per ea devenitur ad magnam summam. Proposit. 38. Innocent. XI. Fur. Vid. *Occidi*.

## G

**G**ratia datur non solum efficax, sed etiam sufficiens Proposit. 6. Alexand. VIII. Gaudere de morte Vid. *Mortem Patris* &c. Gloria Cælestis &c. Vid. *Peccatum detestari* &c.

## H

**H**æretici evidenter tales debent denunciari. Ubi, & quando? Proposit. V. Alex. VII. Hæretici an sine speciali, & particulari privilegio possint absolvi a Prælati Regularibus? Vid. *Absolvere nequeunt* &c. Horas Canonicas minores recitare quis debet, si potest, quamvis ex aliis causis nequeat recitare matutinum cum laudibus. Proposit. 54. Innoc. XI. Horæ Canonicæ. Vid. *Officium divinum*. Item Vide *Beneficiati* &c.

## I

**J**ejunium frangens peccat mortaliter, etsi id non fiat ex contemptu, Proposit. 23. Alex. VII. Jejunium frangitur etiam, si per frequentatam modicam comestionem tandem ad notabilem quantitatem pervenitur. Prop. 29. Alex. VII. Jejunium servare tenentur Officiales Reipublicæ etiam corporaliter laborantes, uti etiam iter agentes equitando nisi aliunde excusentur. Prop. 30. & 31. Alex. VII. Jejunium Quadragesimale etiam obligat ad abstinendum ab Ovis, & lacticiniis, ubi est consuetudo. Prop. 32. Alexand. VII.

Ignorantia invincibilis excusat a peccato. Prop. 2. Decreto II. Alexand. VIII. Ignorans principalia Fidei Myſteria an absolvi possit? Vid. *Absolvi nequeunt* &c. Imagines Patrem cælestem repræsentantes licite in templis collocari possunt. Proposit. 25. Alexand. VIII. Indulgentiæ Regularium a Paulo V. revocatæ, non sunt hodie revalidatæ. Proposit. 37. Alexand. VII. Infidelis non peccat necessario in omni opere, Proposit. 8. Alex. VIII. Judex nequit pro pecunia ferre sententiam in favorem unius partis, quando opiniones pro utraque parte sunt æque probabiles. Proposit. 26. Alexand. VII. Judex multo minus potest judicare juxta sententiam minus probabilem. Prop. 2. Innoc. XI. Jurare non licet etiam cum causa sine animo jurandi. Proposit. 25. Innocent. XI. Jurare falso etiam in re levi est peccatum grave. Proposit. 24. & 25. Innoc. XI. Jurare cum restrictione. Vid. *Restrictio*. &c.

## L

Legatum annuum pro animabus in Purgatorio plus durare potest quam per 10. annos. Prop. 43. Alex. VII. Legis obligatio non dependet ab acceptatione populi. Proposit. 28. Alexand. VII. Libertas ad peccandum qualis requiratur in statu naturæ lapsæ? Prop. 1. Alex. VIII. Decreto Ejusdem II. Libri prohibiti an, & quando retineri possint? Propos. 45. Alex. VII.

## M

Mariæ Beatissimæ Virgini Laus collatâ qua talis non potest vana dici. Proposit. 26. Alexand. VIII. Maritus. Vid. *Uxor*. Mendicantes Regulares &c. Vide *Absolvere*. Missa qualiter die festo audienda? Proposit. 52. & 53. Innoc. XI. Missa. Vid. *Stipendium Missæ*. Mollities, Sodomia, & Bestialitas sunt peccata distinctæ ab invicem speciei. Propos. 24. Alex. VII. Mollities est peccatum contra naturam; unde nunquam bona, multo minus aliquando obligatoria. Propos. 49. Innoc. XI. Mortem parentis non licet optare ob pinguem hereditatem exinde capiendam. Propos. 14. Innoc. XI. De morte Patris in ebrietate occisi non licet gaudere ob ingentes divitias exinde acquisitas. Propos. 15. Innoc. XI. Mutuanti non licet aliquid ultra sortem exigere præcise propter dilationem solutionis usque ad certum tempus. Propos. 42. Alex. VII.

## O

Occasio proxima est deferenda. Proposit. 61. 62. 63. Innoc. XI. In occasione proxima constituti quandomodo absolvi nequeant? Propos. 41. Alex. VII. Occidi nequeunt privata auctoritate Calumniatores, aut falsi accusatores, vel testes, sive injuste impediētes ab Additione hæreditatis &c. Propos. 17. 18. Alex. VII. & Propos. 30. 32. 33. Innoc. XI. Occidi nequit fur regulariter propter conservationem unius Aurei. Proposit. 31. Innoc. XI. Officium divinum nequit recitari per substitutum, quamvis Beneficiatus vacet studio litterarum. Proposit. 21. Alex. VII. Officii divini Obligationi non satisfacit per unicam recitationem pro die præsentis, & Crastino. Propos. 35. Alexand. VII. Officii divini recitandi obligationi neque satisfacit, si in die palmarum persolvatur Officium Paschale. Prop. 34. Alex. VII.



Opinionem extrinsecè probabilem non facit illico unus Auctor modernus. Propos. 27. Alex. VII.

Opinionem probabilem relicta tutiori non licet sequi in iis, quæ concernunt valorem Sacramenti. Propos. 1. Innoc. XI. Nec in puncto fidei. Propos. 4. Innoc. XI.

Opinionem tenuiter probabilem, generaliter loquendo, sequi non licet. Proposit. 3. Innocent. XI.

Opinionem minus probabilem non licet sequi in puncto fidei. Proposit. 4. Innocent. XI.

Opinionem inter probabiles probabilissimam sequi licet. Proposit. 3. Alex. VIII.

Originale peccatum non habet annexam poenitentiam toto tempore vitæ suæ agendam. Prop. 19. Alex. VIII.

Osculum habitum ob delectationem carnalem est peccatum grave. Proposit. 40. Alexand. VII.

## P

**P**apam esse supra Concilium, neutiquam est opinio inutilis &c. Proposit. 29. Alexand. VIII.

Poenitentia personaliter a peccatore persolvenda, nequit peragi per alium a se propria auctoritate substitutum. Proposit. 15. Alexand. VII.

Peccatum odisse ob meram ejus turpitudinem, aut inconvenientiam cum natura, peccatum non est. Prop. 9. Alexand. VIII.

Peccatum detestari, vel prosequi bonum mere ad obtinendam cœlestem gloriam est intentio recta, & Deo placens. Proposit. 10. & 13. Alexand. VIII.

Peccata in una Confessione ex inculpabili oblivione, vel alia legitima causa non proposita debent exprimi in sequenti Confessione. Proposit. 11. Alexand. VII.

Peccatum Philosophicum quid? Proposit. I. & II. Dec. I. Alex. VIII.

Præceptum servandi festa graviter obligat. Proposit. 22. Innoc. XI.

Privilegia Regularium. Vid. *Regulares nequeunt Absolvere* &c.

Probabilismus. Vid. *Opinio probabilis*.

## R

**R**egulares nequeunt excipere confessiones Sæcularium, si quidem sunt præsentati Ordinario, ab eo tamen reprobati, quamvis injuste, Propos. 13. Alex. VII.

Regulares non possunt amplius in foro Conscientiæ uti privilegiis a Concilio Tridentino expresse revocatis. Proposit. 36. Alex. VII.

Regulares mendicantes. Vid. *Absolvere*.

Regularium indulgentiæ &c. Vid. *Indulgentia* &c.

Restituere, & illatum damnum refarcire tenetur damnificato, qui alterum movit, & induxit ad illud damnum inferendum. Propos. 39. Innoc. XI.

Restrictione pure mentali uti non licet. Propos. 26. 27. 28. Innoc. XI.

## S

**S**acerdos ex morali necessitate celebrans in peccato gravi obligatur confiteri quamprimum. Propos. 38. Alex. VII.

Sacramentum simulare non licet propter metum gravis mali, alias imminetis. Propos. 29. Innoc. XI.

Sacramenta administrandi moderna praxis male carpitur a Jansenistis. Propos. 16, 17, 18. Alex. VIII.

Satisfactio non debet necessario præmitti absolutioni. Propos. 16, 17, & 18. Alex. VIII.

Sententia probabilis. Vid. *Opinio probabilis*.

Simonia committitur, quamvis temporale non detur pro spiritali tamquam pretium, sed solummodo tamquam principale motivum. Propos. 45. & 46. Innoc. XI.

Simonia in Beneficiis quondam committatur. Vid. *Beneficia* &c.

Sodomia, vide *Mollities*.

Solicitans in Confessione &c. Vid. *Confessarius*.

Stipendium Missæ nequit accipi duplicatum, applicando uni specialem, & alteri fructum specialissimum. Propos. 8. Alex. VII.

Stipendium Missæ pertinet ad eum, qui actualiter celebrat illam Missam, nec potest ab altero regulariter pars aliqua pro se retineri. Proposit. 9. Alexand. VII.

Stipendia plura nequeunt accipi pro unico Missæ sacrificio. Propos. 10. Alex. VII.

## T

**T**imor gehennæ est motus bonus, & super naturalis. Prop. 14. & 15. Alexand. VIII.

## V

**V**oluptas &c. Vid. *Comedere* &c. Idem Vid. *Copula conjugalis* &c.

Urbani VIII. Bulla, *In Eminenti* &c. non est subreptitia. Proposit. 31. Alex. VIII.

Usura in quibusdam contractibus abscondita, seu Palliata. Proposit. 42. Alex. VII. Item Propos. 40. 41. & 42. Innoc. XI.

Uxor deprehensa a Marito in adulterio nequit ab eo propria auctoritate occidi. Proposit. 19. Alexand. VII.



## SYNOPSIS TOTIUS OPERIS.

## TRACTATUS PRIMUS.

*De Actibus Humanis, & Conscientia.*

## TRACTATUS II.

*De Legibus.*

## TRACTATUS III.

*De Peccatis.*

## TRACTATUS IV.

*De Virtutibus Theologicis.*

## TRACTATUS V.

*De Religione, & Vitiis oppositis.*

## TRACTATUS VI.

*De Horis Canonicis, Juramento, & Voto.*

## TRACTATUS VII.

*De Justitia, & Jure, ceterisque Virtutibus Cardinalibus.*

## TRACTATUS VIII.

*De Contractibus.*

## TRACTATUS IX.

*De Præceptis Decalogi, ubi & de Restitutione.*

## TRACTATUS X.

*De Præceptis Ecclesiæ.*

## TRACTATUS XI.

*De Beneficiis Ecclesiasticis, Jure Patronatus, & Decimis.*

## TRACTATUS XII.

*De Immunitate Ecclesiastica, & Indulgentiis.*

## TRACTATUS XIII.

*De Censuris, ac Irregularitate, aliisque Pœnis Canonicis.*

## TRACTATUS XIV.

*De Sacramentis.*

## TRACTATUS XV.

*De Bulla Cruciatæ.*

## E L E N C H U S

*Tractatum, Distinctionum, Questionum & Paragraphorum hujus Libri.*

## TRACTATUS I.

DE ACTIBUS HUMANIS ET CONSCIENTIA.

Distinctio Prima.

*De Voluntario, & Involuntario.*

- Quæstio I. Quid, & quotuplex sit voluntarium, 1  
 II. Quando effectus, veluti indirecte, & in causa voluntarius, imputetur ad culpam? 2  
 III. Quo tempore peccatum tum commissionis, tum omissionis, indirecte, seu in causa duntaxat voluntarium, contrahatur? 3  
 IV. An violentia, Metus, & Concupiscentia causent Involuntarium? 4  
 V. Quotuplex sit Ignorantia, & an causet Involuntarium? 5

Distinctio Secunda.

*De natura actus Humani, seu Moralis, & variis ipsum concernentibus.*

- Quæstio I. Quid sit Actus Humanus, seu Moralis? 7  
 II. Unde Actus Humani desumant suam bonitatem, vel malitiam moralem? *ibid.*  
 III. Quomodo malitia, & præsertim bonitas debeat esse voluta, ut eam Actus Humanus desumat ex objecto, & circumstantiis, 9  
 IV. De bonitate, vel malitia Actus Humani, 10  
 V. An detur Actus indifferens? 11  
 VI. Quid requiratur, ut Actus Humani boni sint meritorii vitæ æternæ? 13

Distinctio Tertia.

*De Conscientia, aut Regula Actuum Humanorum.*

- Quæstio I. De Natura, & divisione Conscientiæ ut sic, ubi & de Conscientia recta, seu certa, 14  
 II. De Conscientia erronea, ejusque obligatione, 15  
 III. De Conscientia dubia, ejusque obligatione, 17  
 IV. De Conscientia probabili, & an ipsam licite sequi possimus? 18  
 §. I. Quid sit Conscientia, & Opinio probabilis? *ibid.*  
 §. II. An sit licitum sequi Sententiam probabilem, etiam in concursu probabilioris, & tutioris? 20  
 §. III. Inferuntur Corollaria de Ministro Sacramentorum, Medico, Judice, & Advocato, 21  
 Quæstio V. De Conscientia scrupulosa, ejusque signis, & remediis contra scrupulosos, 23

## TRACTATUS II.

DE LEGIBUS.

Distinctio Prima.

*De Natura Legum.*

- Quæstio I. Quid, & quotuplex sit Lex, 25  
 II. De conditionibus Legis, ejusque differentia à simplici Præcepto, 26  
 III. De Promulgatione ad Legem requisita, *ibid.*  
 IV. De acceptione Legum, 28  
 V. Quænam opera, & an etiam actus interni, per Legem humanam possint præcipi, vel prohiberi? 29

Distinctio Secunda.

*De Obligatione Legum.*

- Quæstio I. De obligatione Legis Veteris, ejusque cessatione, 30  
 II. De Obligatione Legis novæ seu Evangelicæ, ejusque perfectione, 31  
 III. De Obligatione Legum humanarum, & an obligent cum periculo vitæ? 32  
 IV. De Legibus Pœnalibus, earumque obligatione, 34  
 Append. I. De Lege irritante, seu invalidante Contractus, aliosve Actus, 35  
 Append. II. De Legibus ac Principum Edictis imponentibus Vectigalia, vel Tributa &c. 36

Distinctio Tertia.

*De Subjecto Obligationis Legum.*

- Quæst. I. Quinam obligentur Legibus Pontificiis, aliisque Ecclesiasticis, 38  
 II. An Clerici obligentur Legibus Civilibus, ac Legislator teneatur propriis? 39  
 III. An Peregrini obligentur Legibus, & Consuetudinibus locorum, per quæ transeunt? 40  
 IV. Resolvuntur varia Quæsitæ quoad Peregrinos, 42  
 V. Qua intentione, quibusque actibus satisfiat præceptis Legum? 43

Distinctio



## Distinctio Quarta.

*De Interpretatione, Dispensatione ac Revocatione Legum.*

- Quaestio I. De Interpretatione Legum; ubi & de Epicheja. 44  
 II. De Dispensatione Legum, & variis ipsam concernentibus. 45  
 III. De revocatione Legum. 48  
 IV. Quando Leges tollantur per contrariam consuetudinem? 49

## TRACTATUS III.

## DE PECCATIS.

## Distinctio Prima.

*De Diversitate, & Distinctione Peccatorum.*

- Quaestio I. Qua ratione Peccatum dividatur? 51  
 II. Quid sit peccatum actuale, & quæ ejus causa? 52  
 III. De Peccato Habituali. 54  
 IV. Unde defumenda sit Distinctio specifica moralis Peccatorum? 55  
 V. Unde defumatur Distinctio numerica moralis Peccatorum? 56

## Distinctio Secunda.

*De Peccato Mortali, & Veniali.*

- Quaestio I. De natura, conditionibus, & signis Peccati mortalis, ac venialis. 59  
 II. Quibus de causis Peccatum ex genere mortale, fiat per accidens veniale, & e contra. 60  
 III. Quibus modis remittantur Peccata venialia? ubi & de Sacramentalibus. 62

## Distinctio Tertia.

*De Septem Peccatis Capitalibus.*

- Quaestio I. De Superbia, & variis eam concernentibus. 63  
 II. De Avaritia, & Filiabus ejus. 64  
 III. De Luxuria, & Filiabus ejus. 65  
 IV. De Invidia, ejusque Filiabus. 66  
 V. De Ira, & Filiabus ejus. 66  
 VI. De Gula, & Filiabus ejus. 67  
 VII. De Acedia, & Filiabus ejus. 68

## TRACTATUS IV.

## DE VIRTUTIBUS THEOLOGICIS.

## Distinctio Prima.

*De virtutibus Theologicis generatim.*

- Quaestio I. Quid, & quotuplex sit tum Virtus ut sic, tum Theologica. 69  
 II. De perfectione, & cessatione Virtutum Theologicarum, & an habeant medium. 70

## Distinctio Secunda.

*De Fide.*

- Quaestio I. Quid sit Fides, & quod objectum ejus. 71  
 II. Quænam puncta Fidei sint necessario explicite credenda. 72  
 III. Quo tempore obligentur Fideles ad eliciendum actum Fidei. 74  
 IV. Quæ sit obligatio exterius confitendi, & profitendi Fidem. 76

## Distinctio Tertia.

*De Ecclesia, Libris Canonicis, & Traditionibus.*

- Quaestio I. De vera Christi Ecclesia. 77  
 II. Quænam sint notæ veræ Ecclesiæ Christi. 78  
 III. De Sacra Scriptura, seu Libris Canonicis. 80  
 IV. De multiplici Sensu, Obscuritate, atque Interpretatione Sacrae Scripturæ. 82  
 V. De Traditionibus. 84  
 VI. Quænam sit totius Fidei resolutio. 84

## Distinctio Quarta.

*De Vitiis Fidei oppositis.*

- Quaestio I. Quotuplex, & quam grave peccatum sit Infidelitatis. 86  
 II. Quid requiratur ad formalem, & perfectam Hæresin. 86

- III. De conditionibus ad incurrendam excommunicationem ob Hæresin latam requisitis, ejusque absolutione. 88  
 IV. De Apostasia, Lætionem Librorum prohibitorum, & Dispensatione cum Hæreticis. 90

## Distinctio Quinta.

*De Spe, atque oppositis Vitiis.*

- Quaestio I. De Spe Theologica ejusque obligatione. 92  
 II. De Vitiis Spei oppositis, Desperatione scilicet, ac Præsumptione. 94

## Distinctio Sexta.

*De Charitate, ejusque Obligatione.*

- Quaestio I. Quid sit Charitas, & quæ ejus obligatio. 95  
 II. De Dilectione Inimicorum. 97  
 III. De multiplicibus actibus Charitatis. 100  
 IV. De præcepto dandi Eleemosinam. 102  
 V. De Correctione fraterna. 102

## Distinctio Septima.

*De Vitiis Charitati oppositis.*

- Quaestio I. De Odio DEI, & Proximi. 104  
 II. De Scandalo. 106  
 Append. Contingens sex utiles casus circa materiam scandali. 108  
 III. De Discordia, Contentione, & Schismate. 110  
 IV. De Bello, & variis ipsum concernentibus. 112

## TRACTATUS V.

## DE RELIGIONE, ET VITIIS OPPOSITIS.

## Distinctio Prima.

*De Virtute Religionis, & variis ejus Actibus.*

- Quaestio I. De natura, objecto, & præstantia virtutis Religionis. 113  
 II. De variis actibus virtutis Religionis. 114  
 III. De Adoratione Deo debita. 115  
 IV. De Cultu Sanctorum, Sacrarum Reliquiarum atque Imaginum. 116  
 V. De Oratione, & conditionibus ad ipsam requisitis. 118

## Distinctio Secunda.

*De Vitiis Religioni oppositis per excessum.*

- Quaestio I. Quid sit Superstitio, & quæ species ejus. 120  
 II. De Idololatria. 121  
 III. De Divinatione, ejus speciebus, & gravitate. 122  
 IV. De Vana Observantia, ejusque speciebus, & gravitate. 123  
 V. De Magia, & Maleficio, aliisque huc attinentibus. 124

## Distinctio Tertia.

*De Vitiis Religioni oppositis per defectum.*

- Quaestio I. De Tentatione Dei. 126  
 II. De Sacrilegio, & quale sit peccatum. 127  
 III. De Simonia. 128  
 IV. Solvuntur alia Dubia circa Simoniam, ejusque poenas. 130  
 Append. Ad quartam Quaestionem, continens adhuc nonnulla quaesita circa pacta, & Contractus simoniacos, ac circa restitutionem simoniace acceptorum. 132  
 V. De Blasphemia. 134

## TRACTATUS VI.

## DE HORIS CANONICIS, JURAMENTO, ET VOTO.

## Distinctio Prima.

*De Horis Canonicis.*

- Quaestio I. Quid sint, & quo Jure obligent Horæ Canonicae. 136  
 II. Quinam teneantur recitare Horas Canonicas. 137  
 III. Quanta sit obligatio recitandi Horas Canonicas. 139  
 V. Quænam Intentio, & attentio requiratur ad recitationem Horarum Canonicarum. 142  
 V. De Integritate, Continuatione, Ordine, & Qualitate, quibus persolvendæ sunt Horæ Canonicae. 143  
 VI. De



VI. De Loco, & Tempore, quibus persolvendæ sunt Horæ Canonice.	146
VII. De causis excusantibus à recitatione Horarum Canonice.	147

## Distinctio Secunda.

## De Juramento.

Quæstio I. Quid & quotuplex sit Juramentum.	149
II. De Conditionibus ad Juramentum requisitis.	150
III. Solvantur diversa Dubia Juramentum concernentia.	153

## Distinctio Tertia.

## De Voto.

Quæstio I. Quid, & quotuplex sit Votum.	155
II. Quæ sit obligatio Voti.	156
III. De cessatione, commutatione, & irritatione Voti.	159
IV. De Potestate Dispensandi in Votis.	161
Append. Quomodo practice impetrari possit Dispen- tatio in Votis.	163

## TRACTATUS VII.

DE JUSTITIA, ET JURE, CÆTERISQUE VIRTUTIBUS  
CARDINALIBUS.

## Distinctio Prima.

## De Virtutibus Cardinalibus.

Quæstio I. De Prudentia, ejusque partibus.	166
II. De Vitiis Prudentiæ oppositis.	167
III. De Justitia, & variis ipsam concernentibus <i>Remissive</i> .	168
IV. De Temperantia, & annexis Virtutibus.	<i>ibid.</i>
V. De Fortitudine, ejusque partibus, & oppositis Vitiis.	169
VI. Quæ requirantur ad Martyrium.	<i>ibid.</i>

## Distinctio Secunda.

## De Virtute Justitiæ, ac Jure generatim.

Quæstio I. Quid sit Justitia, & quæ Virtutes eidem annexæ.	171
II. De Divisione Justitiæ in Commutativam & distributivam.	172
III. Quid, & quotuplex sit Jus? Ubi & de Actione reali, & personali.	173

## Distinctio Tertia.

## De Speciebus Juris in re.

Quæstio I. Quid, & quotuplex sit Dominium.	175
II. Quid sit Ususfructus.	176
III. De Usu juris, & variis ipsum concernentibus.	<i>ibid.</i>
IV. Quid, & quotuplex sit Possessio, & quæ ejus privilegia.	177

## Distinctio Quarta.

## De Objecto, &amp; Subjecto capaci Domini.

Quæstio I. Quænam cadant sub objectum Domini.	178
II. De Peculio Filii familias, nec non, & Bonis Uxoris.	179
III. De Bonis, & Dominio Clericorum Beneficiorum.	181
IV. De Dominio Religiosorum.	183

## Distinctio Quinta.

## De Acquisitione Domini.

Quæstio I. De modis generatim acquirendi rerum Dominium, Bonisque incertis, ac Thesauris inventis.	184
II. De Venatione, & Piscatione, ac variis ipsam concernentibus.	186
III. De alijs modis acquirendi rerum Dominium Jure Gentium.	188

## Distinctio Sexta.

## De Præscriptione, &amp; Usucapione.

Quæstio I. Cur lex Præscriptionis, seu Usucapionis sit introducta, & an valeant in foro Conscientiæ.	190
--	-----

II. Quæ Conditiones requirantur ad Præscriptionem.	192
III. Quantum temporis requiratur ad Usucapionem, seu Præscriptionem complendam?	194
Append. Continens septem Casus de Præscriptione.	197

## TRACTATUS VIII.

## DE CONTRACTIBUS.

## Distinctio Prima.

## De Contractibus in genere.

Quæstio I. Quid, & quotuplex sit Contractus.	199
II. Qualis consensus requiratur ad valorem Contractuum.	201
III. Quinam contrahere possint.	203
IV. De Restitutione in integrum, & quibus competat.	204

## Distinctio Secunda.

## De Contractibus Gratuitis.

Quæstio I. De Promissione, ejusque obligatione.	205
II. De Donatione, & variis ipsam attinentibus.	206
Append. De variis donationibus in specie.	208
III. Quid sit Commodatum, Precarium, & Depositum.	209
VI. Ex qua culpa teneatur Commodatarius, Depositarius, & hujusmodi, si res commodata, deposita, &c. apud ipsum pereat.	210

## Distinctio Tertia.

## De Testamentis, &amp; ultimis Voluntatibus.

Quæstio I. Quid, & quotuplex sit Testamentum, & quæ ejus requisiti.	212
II. An testamentum non privilegiatum in Foro Conscientiæ validum sit, si ei desint solemnitates Juris Civilis.	214
III. De Testamentis ad pias causas, aliisque privilegiatis.	215
IV. An omnes, præsertim Religiosi, eorumque Novitii, testari possint.	219
V. An Clerici Sæculares Beneficarii valeant testari.	220
Append. I. An, & quomodo ambo Conjuges adhuc viventes possint erigere Testamentum reciprocum?	221
Append. II. An, & de quibus rebus Conjuges ex hac vita decedentes testari queant? Item de qualibus Bonis Superstitibus relictæ vidui, vel viduæ?	222
VI. De Codicillis, Legatis, & Fidei-commis.	224
VII. Et Institutione Hæredum, Falcidia, Trebellianica, & Successionibus ab intestato.	225
Appendix. Praxis Conficiendi Testamentum.	227

## Distinctio Quarta.

## De Contractibus Onerosis.

Quæstio I. De Mutuo, & variis ipsum concernentibus.	228
Append. Additionalis continens varia Quæstiones de Mutuo.	230
II. Quid sit Usura, & quo jure prohibita.	233
III. An Pactum mutuandi, &c. Contractus Mohatra, & Montes Pietatis contineant Usuram.	234
IV. An aliqui Tituli excusent ab Usura.	235
V. De Pignore, & Hypotheca, ubi & de Antichresi, & pacto Legis Commissoriæ.	238
VI. De Censibus, & an sint liciti.	<i>ibid.</i>
VII. Quid, & quotuplex sit Cambium, & an licitum.	240
VIII. De Emptione, & Venditione.	241
Append. ad Quæstionem VII. de Emptione & Venditione, in qua de hac materia adhuc ulteriora valde utilia, & practica per decem Additiones adjuncta continentur.	243
IX. De Ludo, & Sponsionibus.	245
X. De Contractu Societatis.	248
Quæstio Additionalis de Locatione & Conductione.	252

## TRACTATUS IX.

## DE PRÆCEPTIS DECALOGI, UBI ET DE RESTITUTIONE.

## Distinctio Prima.

## De Præceptis Decalogi in genere, ac primis tribus in specie.

Quæstio I. Quid generatim censendum sit de Præceptis Decalogi eorumque obligatione.	254
II. Quænam sub Primo, & Secundo Præcepto Decalogi contineantur.	256
III. De	



## II. De Tertio Præcepto Decalogi, ejusque obligatione. 257

## Distinctio Secunda.

## De Quarto Præcepto Decalogi.

- Quæstio I. Quæ sit obligatio Filiorum erga Parentes. *ibid.*  
 II. De Obligatione Parentum erga Filios. 259  
 III. De obligatione Subditorum erga Superiores, & e contra *ibid.*

## Distinctio Tertia.

## De Quinto Præcepto Decalogi.

- Quæstio I. Quænam Quinto Præcepto Decalogi prohibeantur. 260  
 II. Quoddam Homicidium sit prohibitum. *ibid.*  
 III. De Homicidiis specialem malitiam continentibus. 264  
 IV. De Restitutione ratione injusti Homicidii vel Mutilationis. 267

## Distinctio Quarta.

## De Sexto Præcepto Decalogi.

- Quæstio I. De Castitate, & opposito vitio Luxuriæ, ac utriusque speciebus.  
 II. De Fornicatione, Adulterio, & Stupro. 270  
 III. De obligatione Restitutionis ratione Stupri, & Adulterii. 271  
 IV. De Incestu, & Raptu. 273  
 V. De prima specie Peccati contra naturam, quæ est Mollicities. 274  
 VI. De cæteris speciebus Peccati contra naturam. 277  
 VII. De Impudicitia, hoc est de osculis, tactibus, aspectibusque impudicis; & an detur levitas materiæ in re venerea. 278

## Distinctio Quinta.

## De Septimo Præcepto Decalogi.

- Quæstio I. Quid sit Furtum, & quæ quantitas ad Furtum mortale sufficiat. 282  
 II. De minutis, ac Domesticorum Furtis. 284  
 III. De Cooperantibus ad Furtum, vel injustam Damnificationem. 287  
 IV. De Restitutione, atque ordine in ipsa servando, circa Bona Fortuniæ. 289  
 V. Ex qua culpa oriatur obligatio Restitutionis ratione damni dati. 292  
 VI. De causis excusantibus à Restitutione, omnino, vel ad tempus. 294

## Distinctio Sexta.

## De Octavo Præcepto Decalogi.

- Quæstio I. De Detractione, & variis ipsam concernentibus. 297  
*Append.* Continens varia adhuc quæsitæ de Detractione. 299  
 II. De Contumelia. 302  
 III. De Convitio, Improperio, Maledicto, Irrisione, Sufuratione, ac Libello famoso. *ibid.*  
 IV. Quibus modis Fama, vel Honor injuste ablati refarciri possit, ac debeat. 303  
 V. De Causis excusantibus à Restitutione Famiæ, & Honoris. 304  
 VI. De Judicio Temerario, & Suspicionem. 305

## Distinctio Septima.

## De Nono, &amp; Decimo Præcepto Decalogi.

- Quæstio I. Quænam Nono, & Decimo Præcepto Decalogi prohibeantur. 307  
 II. De Delectationibus motosis, & Desideriis illicitis. 308

## TRACTATUS X.

## DE PRÆCEPTIS ECCLESIAE.

## Distinctio Prima.

## De Primo, &amp; Secundo Præcepto Ecclesie sive de Festis.

- Quæstio I. Quænam generatim Primo, & Secundo Præcepto Ecclesie injungantur. 311

- II. Quæ opera diebus Festis prohibita sint. 312  
 III. Quæ causæ excusent Opera prohibita diebus Festis. 314  
 IV. Quæ sit obligatio audiendi Missam diebus Festis. 315  
 V. Quæ causæ excusent à Præcepto audiendi Missam. 316

## Distinctio Secunda.

## De Tertio Præcepto Ecclesie; sive, de Jejunio.

- Quæstio I. Quid sit Jejunium, & quæ ejus requisita. 317  
 II. Solvuntur varia Dubia circa tres Jejunii conditiones. 319  
 III. Quæ sit obligatio Jejunii. 323  
 IV. Quæ causæ à Jejunio excusent. 324

## Distinctio Tertia.

## De quarto, &amp; quinto Præcepto Ecclesie; sive

## De Annua Confessione, &amp; Communione Paschali.

- Quæstio I. Quid sit, & quo jure, ac quando obliget confessio Sacramentalis. 327  
 II. Quomodo Præceptum Ecclesiasticum annuæ Confessionis obliget. 328  
 III. An, & quæ sit obligatio Juris tum Divini, tum Ecclesiastici sumendi Eucharistiam. 330  
 IV. Varia Quæsitæ circa sumptionem Sacramenti Eucharistiæ solvuntur. 333  
 V. Quid sit sentiendum de Communionem frequenti, & quotidiana. 335

## TRACTATUS XI.

## DE BENEFICIIS ECCLESIASTICIS, JURE

## PATRONATUS, ET DECIMIS.

## Distinctio Prima.

## De Beneficiis Ecclesiasticis, eorumque Collatione.

- Quæstio I. Quid, & quotuplex sit Beneficium Ecclesiasticum. 336  
 II. De Collatione Beneficiorum. 338  
 III. Quinam Beneficia libere conferre possint. 339  
 IV. Quibus conferenda sint Beneficia? ubi, & de Conditionibus ex parte eorum requisitis. 343  
 V. Quæ sint obligationes Beneficiorum. 343  
*Append.* Qualiter Beneficiario obligato dimittere Beneficium ob simoniam in ejusdem receptionem commissam practice succurri queat? 344

## Distinctio Secunda.

## De Incompatibilitate, Renunciatione, &amp; Permutatione Beneficiorum.

- Quæstio I. Quæ Beneficia sint incompatibilia, vel compatibilia. 348  
 II. Quæ sint pœnæ recipientium plura Beneficia, incompatibilia. 349  
 III. Quid, & quotuplex sit Renunciatio Beneficiorum, & ex quibus causis fieri possit. 350  
 IV. An sit licita Resignatio Beneficii in favorem tertii, vel reservata annua Pensione. 352  
 V. An, & quomodo possit fieri Permutatio Beneficiorum Ecclesiasticorum. 353

## Distinctio Tertia.

## De Jure Patronatus.

- Quæstio I. Quid sit Jus patronatus, & quomodo acquiratur. 354  
 II. Quotuplex sit Jus patronatus, & quomodo Ecclesiasticum differat a Laicali. 356  
 III. De jure præsentandi, aliisque juribus Patrono competentibus. 358

## Distinctio



# XLVIII ELENCHUS TRACTATUUM, &c.

## Distinctio Quarta.

### De Decimis.

- Quæstio I. Quid sint Decimæ, Primitiæ, & oblationes. 359  
 II. Quo jure, & ex quibus rebus solvendæ sint Decimæ. 360  
 III. Quibus solvendæ sint Decimæ. 361  
 IV. Quibus modis eximatur quis à præstatione Decimarum. 363

## TRACTATUS XII

### DE IMMUNITATE ECCLESIASTICA, ET INDULGENTIIS.

#### Distinctio Prima.

##### De Immunitate Ecclesiastica ut sic, ejusque Speciebus.

- Quæstio I. Quid & quotuplex sit Immunitas Ecclesiastica, & quo jure constituta. 364  
 II. In quibus consistat Immunitas localis, sive Ecclesiarum. 365  
 III. De Immunitate reali, & personali. 366

#### Distinctio Secunda.

##### De Jure Asylorum.

- Quæstio I. Quo jure, quibusque locis competat privilegium Asyli. 368

- II. Quæ personæ gaudeant jure Asyli Ecclesiastici. 370  
 III. Quæ crimina non gaudeant Immunitate Ecclesiastica 372  
 IV. De commodis Immunitatis Ecclesiasticæ, pœnisque eam violantium, ac modo extrahendi Reos criminum exceptorum. 374

#### Distinctio Tertia.

##### De Indulgentiis.

- Quæstio I. Quid sit Thesaurus Ecclesiæ. 377  
 II. Quid, & quotuplex sit Indulgentia. 378  
 III. De potestate concedendi Indulgentias, & de conditionibus ad earum valorem requisitis. 379  
 IV. De Subjecto Indulgentiarum capaci, & quomodo possint defunctis. 380  
 V. Varia Dubia de Indulgentiis breviter resoluta. 382  
 VI. Quæ indulgentiæ per Paulum V. revocata, & quales loco earum concessæ. 385  
 VII. De indulgentiis Apocryphis ab Innocentio XI. reprobatis. 386  
 VIII. Quales soleant de facto Indulgentiæ concedi Ecclesiis, & Altaribus privilegiatis. 389  
 IX. De Jubilæo, & variis ipsum concernentibus. 393  
 X. De facultate absolvendi tempore Jubilæi. 400  
 XI. De Suffragiis. 408







# THEOLOGIÆ MORALIS

## BREVI, SIMULQUE CLARA

### METHODO COMPREHENSÆ

### TRACTATUS PRIMUS.

### DE ACTIBUS HUMANIS, ET CONSCIENTIA.



nem pervenire, Deumque tamquam ultimum Finem suum apprehendere valeat. Cum igitur juxta illud Davidicum, Psal. 36. *Declina à malo, & fac bonum*, alia ratione id fieri ne queat, nisi per exercitationem actuum bonorum, fugamque malorum: hinc in præsentem utilissimo, omnibusque, præsertim Confessariis, scitu summe necessario Tractatu, quem *De actibus Humanis & conscientia* inscribunt, ea considerata occurrunt, quibus homo in suis actionibus ita possit dirigi, imò & alios dirigere, ut tandem exercitatione bonorum actuum, fugaque malorum, præparatam sibi Gloriam æternam consequi mereatur.

#### DISTINCTIO I.

*De Voluntario, & Involuntario.*

#### QUÆSTIO I.

*Quid & quotuplex sit voluntarium.*

#### SUMMARIUM.

- 1 *Finis ultimus hominis.*
- 2 *Voluntarium accipitur tripliciter.*
- 3 *Voluntarium stricte, quid?*
- 4 *Voluntarium stricte, dividitur in perfectum & imperfectum.*
- 5 *Directum, & indirectum.*
- 6 *Et quomodo exercentur?*
- 7 *Voluntarium secundum se, & in sua causa.*
- 8 *Voluntarium interpretativum.*

2 **C**ONCL. I. Voluntarium generatim tribus modis accipitur. Et primo quidem *Voluntarium* illud dicitur, quod sit absque obligatione præcepti: sic *Anacl. Reiffensuel Theol. Tom. I.*

Religiosi præter Officium Divinum quandoque dicuntur recitare quasdam preces voluntarias, id est, absque obligatione dicendas. Verum de voluntario taliter accepto hic non loquimur. Secundo *Voluntarium* sumitur latissime, prout idem est, ac *Spontaneum*: quomodo omne illud dicitur *Voluntarium*, quod neque vi, neque ignorantia sit, procedit tamen ab aliquo principio intrinseco cum prævia cognitione. Vel clarius, *Voluntarium*, prout coincidit cum *Spontaneo*, dicitur illud, quod procedit a potentia appetitiva ex prævia cognitione objecti. Et hoc modo voluntarium convenit brutis, utpote quæ agunt sponte ex inclinatione appetitus sensitivi, prævia cognitione sensitiva. Sed & de *Voluntario* tam large accepto, ac prout etiam convenit brutis, hic sermo non est.

3 Tercio modo *Voluntarium* sumitur stricte, ac prout illud derivatur à voluntate, & competit soli Naturæ rationali habenti voluntatem. Et hoc modo *Voluntarium* dicitur, illud quod procedit a voluntate ex prævia cognitione intellectiva. Dicitur, *quod procedit à voluntate*; quia aliud est *Voluntarium*, aliud vero *Volitum*: nam pluvia, vel serenitas opportuna, est quidem ab agricola volita, non tamen ipsi voluntaria: utpote cum non procedat dicta pluvia, vel serenitas, ab ejus voluntate tanquam effectus ipsius; quamvis sit objectum suæ voluntatis, seu volitum ab ipsa. Et de *Voluntario* taliter accepto loquimur in præsentem.

4 **CONCL. II.** *Voluntarium* hoc tertio modo sumtum varie dividitur; & primo quidem in perfecte *Voluntarium*, & in *Voluntarium* imperfecte. *Voluntarium perfecte* dicitur illud, quod præcedit a voluntate ex prævia cognitione perfecta, seu deliberata objecti; quo modo peccatum, præsertim mortale, debet esse *Voluntarium*. *Voluntarium imperfectum* econtra est explicandum, quo modo motus voluntatis primi censentur voluntarii, seu potius semivoluntarii, eo quod procedant a cognitione imperfecta, seu indeliberata.

5 Deinde *Voluntarium* dividitur in directum, & indirectum. *Voluntarium directum*, seu directe voluntarium dicitur illud, quod per se ac positive procedit a voluntate, in quantum agens est: quo modo actus voluntatis sive elicti, sive imperati, censentur esse voluntarii. *Indirecte* vero illud dicitur *Voluntarium*, quod procedit a voluntate, in quantum non agit, cum tamen agere posset, ac (loquendo de *Voluntario* culpabili) etiam deberet: sic submersio navis censetur gubernatori ejus: A indi



indirecte voluntaria, quando desistit a gubernaculo, mediante quo potuisset, ac debuisset impedire submer-  
sionem navis.

6 Ex quo patet, Voluntarium directe exerceri & totum positivum voluntatis; Voluntarium vero indire-  
cte per omissionem actus, quem quis non solum potuit,  
sed (si sit sermo de culpabili voluntario) debuit habere.  
Siquidem tunc solum effectus censetur indirecte, simul-  
que culpabiliter voluntarius, quando quis non agit, cum  
tamen possit, & debeat agere: si enim gubernator na-  
vis non possit navem dirigere, vel quis alius adsit, cui  
gubernatio navis non est commissa, non imputabitur  
ei submersio ipsius. Verumtamen notanter additum  
fuit, *indirecte, simulque culpabiliter voluntarius*: simpli-  
ter enim & absolute ad voluntarium sufficit, ut quis  
deliberate omitat opus, quod facere seu non omittere  
poterat: neque ad hoc requiritur præceptum seu obli-  
gatio faciendi id, quod omittitur; quamvis ejusmodi  
obligatio requiratur, ut omissio illa sit culpabilis, & pec-  
caminosa. Guiliel. Herincx. *part. 2. Summæ Theologiae*,  
*Tract. 2. disp. 1. num. 19. & alii.*

7 Uterius Voluntarium dividitur in Voluntarium  
secundum se, & in Voluntarium in sua causa; sive (ut  
alii loquuntur) in formaliter Voluntarium & in virtua-  
liter Voluntarium. *Voluntarium secundum se* (quod &  
*Voluntarium formale* nuncupatur) dicitur illud, quod  
a voluntate ex proprio ac formali proposito fit, ac de-  
pendet: sic est voluntaria præsens lectio. *Voluntarium*  
*in sua causa* (quod & *virtuale* appellatur) illud censetur,  
quod non in se, sed solum in sua causa cuius est vo-  
luntarium, in quantum voluntas, etsi non intendat ef-  
fectum, vult tamen causam illius effectus; unde & hic  
saltem virtualiter, seu in sua causa censetur esse volunta-  
rius: sic illi, qui voluntarie se inebriant, censentur esse  
voluntarii, saltem virtualiter, rixæ illæ, vel blasphem-  
iæ, quas in tali ebrietate committit, si prius novit,  
in ebrietate se solere rixari, vel blasphemare.

8 Huc additur *Voluntarium interpretativum*, estque  
illud, quod adesse præsumitur, seu interpretatur ex  
aliquo signo extrinseco, positivo vel negativo: sic in  
foro externo *Qui tacet, consentire videtur*, juxta Reg.  
43. Juris in 6. Similiter Religiosus suo Superiore absen-  
te, & urgente necessitate, rationabiliter ac honeste  
quandoque quidpiam agit ex consensu ejus interpreta-  
tivo, sive rationabiliter præsumpto, dum ex aliis acti-  
bus prudenter interpretatur, & præsumit, superiorem  
suum, si interrogaretur, in talibus circumstantiis haud  
futurum invitum. Et hoc posterius aliqui appellant *Vo-*  
*luntarium interpretativum conditionatum* Superioris. Ni-  
hilominus *Voluntarium interpretativum*, præsertim in  
malam partem acceptum, non raro confunditur cum  
*Voluntario indirecto*, & in causa: & sic juxta satis com-  
munem modum loquendi, si quis projiciat sagittam ad  
occidendam feram præviso periculo occidendi hominem  
si sequatur homicidium, censetur occisio isthæc hominis  
eidem voluntaria in sua causa, indirecte, atque inter-  
pretative, quamvis non fuerit intenta & directe volita.

## Q U Æ S T I O I I.

Quando effectus, veluti indirecte & in causa vo-  
luntarius, imputetur ad culpam?

### S U M M A R I U M.

- 9 *Quæ requirantur, ut effectus, veluti in causa volun-*  
*tarius, imputetur ad culpam?*
- 10 *Corollaria.*  
*Loth, quomodo excusetur ab incestu.*
- 11 *Alia Corollaria.*
- 12 *Quæ excusare soleant, ne effectus pravus, veluti in cau-*  
*sa voluntarius imputetur?*
- 13 *Corollaria.*
- 14 *Explicatur amplius Conclusio.*
- 15 *Quando imputetur effectus, veluti indirecte volun-*  
*tarius?*

16 *Quando quis censetur teneri ad tollendam causam*  
*peccati?*

9 CONCL. I. Ad hoc, ut effectus virtualiter at-  
que in causa censetur esse voluntarius, &  
cuius imputetur ad culpam, omnino requiritur, quod  
operans adverterit periculum secuturi effectus ad positio-  
nem illius causæ. Ita communis. Ratio est: quia si quis  
nullam de effectu secuturo habuit advertentiam, tunc  
talis effectus nullo modo foret prævisus, ac proinde neu-  
tiquam voluntarius, sed potius ex naturali inadverten-  
tia proveniens: nam juxta illud tritum Philosophorum,  
*Nihil est volitum, quin præcognitum.*

10 Infertur proinde I. Quod, quamvis effectus illi  
pravi, qui frequenter accidunt in ebrietate, voluntarie  
se inebriantibus imputentur ad culpam, eo quod potue-  
runt prævideri, & etiam soleant actualiter prævideri  
saltem in confuso, ac proinde sint voluntarii saltem vir-  
tualiter & in sua causa: nihilominus illi eventus, qui  
raro contingunt, nec fuerunt prævisi, ad culpam non  
imputentur. Et hac de causa Sanctus Augustinus l. 22.  
cap. 44. *contra Faustum*, excusat ipsum Loth ab incestu,  
quem ebrius admisit, ut legitur *Gen. cap. 19.* eo quod  
non præviderit, incestum ex ejus ebrietate secuturum.

11 Infertur II. Circumstantias invincibiliter igno-  
ratas, non imputari ad culpam; quia non fuerunt præ-  
visæ in causa. Sic Jacob Patriarcha non peccavit ingre-  
diendo ad Liam. *Gen. 26.* quia bona fide credebatur, se  
ingredi ad Rachel conjugem suam. Econtra vero sequi-  
tur, eum, qui scienter & voluntarie occidit mulierem  
gravidam, censeret etiam occidere infantem, licet hoc  
expresse non intendat. Ratio est: quia mortem infantis  
secuturam prævidere poterat, ac debebat, hoc ipso,  
quod sciebat, foeminam illam esse gravidam, sicque con-  
sequenter etiam habuerit saltem in confuso notitiam de  
foetu: & idem fit in aliis hujusmodi.

12 CONCL. II. Nihilominus sola advertentia ef-  
fectus pravi ex actione libera secuturi non semper suffi-  
cit, ut is cuius imputetur ad culpam, & hoc tunc  
verificatur, quando ejusmodi actio ceteroquin licita  
est, & necessaria, vel utilis, simulque effectus ille pra-  
vus non intenditur, neque in eo habetur complacentia.  
Ita Doctores communiter, quos refert, & sequitur San-  
chez lib. 9. *de Matrimon. disp. 45. n. 4.* Ratio est: quia  
effectus per accidens, ac præter intentionem subsequens  
non imputatur ei, qui jus suum persequitur.

13 Infertur proinde cum Doctoribus communiter,  
quod expertus se pollui equitatione, tamen absque peri-  
culo consensus, non teneatur pedester incedere, & ab  
equitatione desistere. Ratio est: quia equitatio est res  
utilis, neque causa per se & suapte natura talis effectus  
pravi, seu foeditatis. Infertur ulterius, quoties pollutio  
sequitur præter intentionem ex causa aliqua necessa-  
ria, vel utili corpori, ut est cibus, & potus modera-  
tus, aut animæ, ut orare, studere, vel utili aliis, prout  
est audire Confessiones, &c. nullam esse culpam, non  
desistere a causa ista, quamvis inde præter intentionem  
prævideatur pollutio secutura. Ratio præter hætenus  
dicta, ulterior est: quia talis patitur pollutionem po-  
tius, quam agit.

14 Dicitur notanter in Conclusionem, *quando talis*  
*actio ceteroquin est licita, & necessaria vel utilis.* Siqui-  
dem quando absque urgente necessitate exercetur actio  
ex sua natura turpis, & per se tendens ad procurandam  
ejusmodi foeditatem, ut sunt tactus impudici, id est,  
facti non ex aliqua necessitate, &c. sed ex animo libidi-  
noso circa partes inhonestas, &c. tunc non vitare ejus-  
modi causas, est peccatum mortale, & censetur ipsamet  
pollutio esse voluntaria in sua causa: & servata propor-  
tione idem dicendum de similibus. Additur etiam in  
Conclusionem, *simulque effectus ille pravus non intenditur*,  
&c. Nam si effectus talis pravus, ut puta pollutio, ab  
aliquo intenderetur, vel quis in ea subsequente delibe-  
rate delectaretur, sibi que complaceret in ea, certum  
est, committi peccatum ratione hujus pravi intentionis,  
vel complacentiæ.



15 CONCL. III. Ad hoc, ut effectus ad liberam omissionem alicujus actus consequens, culpam imputetur ad culpam, veluti indirecte voluntarius, præter advertentiam illius effectus pravi ex sua omissione secuturi, requiruntur insuper tres aliæ conditiones; videlicet, quod possit agere, agendoque illum effectum impedire, non agat, & tamen teneatur agere. Ita D. Thomas 1. 2. q. 6. art. 3. & communis. Ratio primæ conditionis est: quia nemo peccat in eo, quod vitare non potest, siquidem *nemo potest ad impossibile obligari*, juxta Reg. 6. Juris in 6. Ratio secundæ conditionis, quod nempe quis non agat, cum agere possit, patet ex eo: quia in omissione talis actus consistit ratio Voluntarii indirecti. Ratio tandem tertie conditionis, quod quis teneatur agere, patet ex eo: quia nisi hoc requireretur, Deo (quod absit) imputarentur omnia peccata totius Mundi, cum potuisset ea impedire non creando genus humanum, vel aliis modis, quamvis ut auctor naturæ, atque universorum Dominus, id facere non teneatur. Similiter submersio v. g. navis imputaretur illi, cui navis gubernatio non fuit commissa, ac proinde tempore naufragii non fuit præsens; quod utique est absurdum.

16 Quæres: quandonam quis censetur teneri ad tollendam causam peccati, vel impediendum malum, ita ut hoc facere intermittenti censetur subsequens effectus malus fuisse indirecte voluntarius, ac proinde ad peccatum imputetur? Resp. Id attendi debere ex variis præceptis obligantibus. Quandoque enim quis tenetur ad hoc ex præcepto Justitiæ, sicque est magis adstrictus, quam alius, quia videlicet ex officio ad ejusmodi malum impediendum est obligatus: quomodo gubernator, cui cura navis est commissa, tenetur pro viribus impedire navis submersionem: & similiter Prælati subditorum peccata. Quandoque autem ejusmodi obligatio consurgit solum ex præcepto Charitatis, quo quilibet tenetur proximo suo in certis casibus: quandoque vero ex præcepto alterius Virtutis: prout in singulis Præceptorum materiis passim solent explicare Theologi.

### QUÆSTIO III.

Quo tempore peccatum tum commissionis, tum omissionis, indirecte seu in causa dumtaxat voluntarium contrahatur?

#### SUMMARIUM.

- 17 Peccatum commissionis, & omissionis, quid?
- 18 Sensus propositæ Quæstionis declaratur exemplis.
- 19 Aliud exemplum de dante alteri venenum.
- 20 Et de dormiente, donec sequatur ommissio Missæ; ac de Clerico, projiciente Breviarium in mare.
- 21 Resolutio Quæstionis.
- 22 Notabilis declaratio Conclusionis.
- 23 Solvitur obiectio.
- 24 Alia obiectio, ejusque solutio.
- (a) Tract. 1. Dist. 2. n. 30.
- 25 Pœna, vel inhabilitates ob peccatum in causa dumtaxat voluntarium, quando incurrantur?

17 **A**Dvertendum, per Peccatum commissionis intelligi illud, quod fit contra aliquod præceptum negativum, seu quidpiam fieri prohibens: ut est furtum, adulterium, homicidium, quæ pugnant contra illa præcepta Decalogi: *Non furtum facies: Non machaberis: Non occides, &c.* Peccatum omissionis e contra est illud, quod fit contra præceptum affirmativum, seu quidpiam fieri præcipiens: ut est ommissio Missæ die Festo audiendæ, & sic de aliis loquendo. Hoc prænotato

18 Sensus hujus quæstionis est, quo tempore incuratur peccatum commissionis, vel omissionis, indirecte & in causa dumtaxat voluntarium. Ut si quis ante ebrietatem bene prævideat, se in ebrietate commissurum homicidium, vel adulterium, & nihilominus scienter se inebriet usque ad privationem usus rationis, sicque committat homicidium, vel adulterium; Quæstio remanet,

an talis peccet peccato homicidii, vel adulterii eo tempore, quo scienter dedit causam per ebrietatem tali peccato, vel potius tunc, quando in ebrietate actualiter committit homicidium, vel adulterium? Et ratio dubitandi est: quia tempore actualis homicidii, ipse per ebrietatem privatus est usu rationis, uti supponitur; ergo non videtur pro eo tempore posse actualiter peccare.

19 Similiter, si quis scienter dedit alteri venenum, non nisi post aliquot hebdomadas mortem allaturum; rursum quæritur, an talis peccet peccato homicidii pro eo tempore, quo dedit venenum, vel potius pro tunc, quando actualiter sequitur homicidium, seu mors proximi? Et ratio dubitandi est: quia ille, qui dedit venenum, potest jam de peccato suo esse contritus tempore actualis mortis subsequen- ac velle mortem proximi impedire, nec tamen amplius posse: atqui nemo videtur posse actualiter peccare in eo, quod vitare non potest.

20 Insuper, si aliquis mane voluntarie se inebriet, bene prævidens secuturam omissionem Sacri audiendi die Festo; vel tandem dormiat, aut tergiversetur dormi, prævidendo periculum non audiendi Sacrum die Festo, donec tandem actualiter sequatur ommissio Sacri; aut si Sacerdos navigaturus, voluntarie projiciat Breviarium in mare, optime prævidens, inde se reddi impotentem ad recitandum Breviarium per multos dies, & hujusmodi. Quæritur, inquam, quo tempore tales peccent? An videlicet solum pro tunc, quando scienter dederunt causam tali omissioni, vel an insuper peccent adveniente illo tempore, quo currit præceptum audiendi Missam, aut recitandi Breviarium, non obstante, quod tunc talis amplius Missam audire, vel Breviarium recitare non possit? Et hoc idem de innumeris aliis casibus quæri potest.

21 CONCL. I. In his, & similibus casibus, Peccatum commissionis, aut etiam omissionis, indirecte vel in causa dumtaxat voluntarium, contrahitur mox in ipsa appositione causæ, vel impedimenti, quæ fuit in libera hominis potestate; non autem amplius tempore subsequenti: quo sequitur v. g. mors alterius veneno causata, aut ommissio Sacri, vel recitationis Breviarii, si tunc revera adfuit impotentia impediendi mortem alterius, vel Sacrum audiendi, &c. Ita Scotus 2. dist. 42. *Maltrius lib. 2. Sent. disp. 6. num. 132.* estque communis sententia Doctorum, paucis exceptis. Ratio hujus Conclusionis desumitur imprimis ex rationibus dubitandi proxime allatis. Accedit, quod tempore appositionis causæ mortis proximi per porrectum venenum, jam sit volitum homicidium saltem virtualiter, & in sua causa; & similiter tempore appositionis impedimenti audiendi Missam die Festo, vel recitandi Breviarium, ommissio hujus etiam indirecte, ac in sua causa jam est voluta: ergo tunc contrahitur tale peccatum, sive commissionis, sive omissionis, non autem tempore subsequenti, si revera tunc adfuit impotentia actum prohibendum, actualis v. g. homicidii subsequen- impediendi, vel actum præceptum Missæ audiendæ ponendi.

22 Dicitur notanter, si tunc revera adfuit impotentia impediendi mortem alterius, &c. Siquidem certum est apud omnes, atque indubitatum, si tunc sit in libertate ac potestate hominis, adhuc impedire actum prohibitum, v. g. homicidium veneno porrecto causatum, nec tamen impediatur, etiam tempore actualis mortis proximi subsequen- committi, vel potius continuari & consummari peccatum homicidii; cum adfuit libertas sufficiens, atque voluntarium, ad contrahendum peccatum etiam pro eo tempore. Et similiter, si tempore præcepti audiendi Missam adfuit adhuc potestas & libertas ipsam audiendi, & tamen quis eam audire negligat, etiam tunc committitur peccatum omissionis externæ: siquidem tunc prava voluntas omittendi actum præceptum, opere externo consummatur, ac perficitur. Ceterum data Conclusio loquitur in casu veræ impotentiae, actum prohibitum ex postfacto impediendi, vel actum præceptum ponendi; & ait, tunc ejusmodi peccatum contrahi dumtaxat in ipsa appositione causæ vel impedimenti, utpote quæ fuit in hominis potestate.



23 Nec obstat, quod, quando quis posuit impedimentum audiendi v. g. Missam, nondum currebat præceptum Missæ audiendæ; ac proinde non videatur posse pro tunc tale peccatum omissionis Missæ contrahi. Respond. enim, quod licet tunc præceptum non obligarit ad ponendum actum auditionis Missæ, obligabat tamen ad non ponendum impedimentum exercendi talem actum pro tempore debito: hoc enim præcepto non solum præcipitur ipsa auditio Missæ, sed etiam, ne voluntarie & absque legitima ratione ponatur causa impeditiva illius: sicuti similiter præceptum non occidendi hominem, nedum prohibet actuale homicidium, sed etiam, ne ponatur probabilis causa ipsius. Et per hoc patet ad rationes dubitandi, ab initio Quæstionis propositas.

24 Dices: Ut actus prohibitus, vel ommissio actus præcepti, sit formaliter peccatum, sufficit voluntarium indirectum, aut in causa: ergo illud etiam tempore subsequenti contrahitur. Consequentia probatur. Tum quia jam adest sufficiens voluntarium, videlicet indirectum, aut in causa. Tum quia tunc completur, sive consummatur peccatum actualis v. g. omissionis Missæ aut homicidii veneno causati. Tum tandem, quia alioquin non esset necesse, confiteri tales actus externos, aut omissiones ex priori data causa necessario subsecutas, & in se non liberas; quod videtur absurdum, & contra Decretum Alexandri VII. ejusque Propositionem 25. Resp. negando consequentiam. Ad ejus primam probationem dicitur, adesse quidem sufficiens voluntarium, ut peccatum formaliter contrahatur pro tempore appositionis causæ, sive impedimenti, utpote quæ fuit in libera hominis potestate: non autem pro tempore subsequenti, si tunc revera (uti supponit Conclusio) adfuit potentia ponendi actum præceptum, vel impediendi actum prohibitum. Ad alteram probationem claritatis gratia distinguitur assumptum: completur, sive consummatur tunc peccatum actualis v. g. omissionis Missæ, vel homicidii veneno causati, dumtaxat physice, sive in genere entis, conceditur: completur etiam moraliter, sive in genere moris, negatur; eo quod tunc ommissio actus præcepti, vel eventus actus prohibiti, non amplius subsit libertati ac potestati hominis, sicque secundum se non sit capax malitiæ moralis. Ad ultimam probationem responderetur, in tali casu per se loquendo satis quidem esse, si in Confessione sufficienter explicetur ejusmodi libera positio causæ, sive impedimenti, utpote quæ sola supponitur fuisse in libertate, sive potestate hominis, per accidens tamen, sive quia alioquin non sufficienter explicaretur illa libera positio causæ, aut impedimenti, sive ob annexam Censuram, vel reservationem actus opere externo consummati, etiam quandoque requiri, ut explicetur ipsemet actus externus. Porro Decretum Alexandri VII. loquitur de peccato externo, quod tempore actualis commissionis suberat potestati ac libertati hominis, ut suo loco (a) dicitur.

25 CONCL. II. Nihilominus ad incurrendas poenas, vel inhabilitates, quæ sive Jure Ecclesiastico, sive Civili, in perpetrantes certa crimina sunt statuta, regulariter loquendo non sufficit sola appositio causæ talis criminis, sed requiritur, ut tale crimen opere externo consummetur. Ita Doctores communiter. Sic v. g. si quis alteri machinetur mortem veneno porrecto, quamvis mortaliter peccet, non tamen incurrit irregularitatem, si alterius mors actualis non subsequatur. Similiter qui conatur percutere Clericum, si ipsum, utpote aufugientem, non percusserit actualiter, non incurrit excommunicationem latam in percussores Clericorum: & idem fit in aliis similibus. Ratio horum generalis est: quia leges poenales sunt stricte interpretandæ; simulque earum verba debent intelligi cum effectu, argum. cap. *Hec autem verba de penit. dist. 1.* juncta Glossa *ibidem*: nam sola voluntas, seu conatus non solet per leges humanas puniri sine effectu, nisi secus in ipsamet Lege exprimat; prout exprimi-

tur loquendo de crimine læsæ Majestatis. *l. Quisque. C. Ad legem Juliam Majestatis*; & notat communis Theologorum, & Canonistarum.

#### QUESTIO IV.

#### An Violentia, Metus, & Concupiscentia causent Involuntarium?

#### SUMMARIUM.

- 26 *Involuntarium aliud simpliciter, aliud secundum quid.*
- 27 *Violentia causat involuntarium simpliciter.*
- 28 *Metus non causat involuntarium simpliciter, sed tantum secundum quid.*
- 29 *Pro nullo metu debet quis peccare.*  
(b) Tract. 2. dist. 2. q. 3.
- 30 *Pacta, contractus &c. metu initi, regulariter valent.*  
(De hoc Tract. 8. dist. 1. n. 8. & seqq.)
- 31 *Metus gravis, seu cadens in constantem virum, & levis, quid?*
- 32 *Concupiscentia antecedens minuit voluntarium.*
- 33 *Non item Concupiscentia consequens.*
- 34 *Peccatum ex infirmitate, ignorantia, & malitia. Passio potest omnino tollere voluntarium.*

26 **A**dvertendum, quod Involuntarium dividatur in Involuntarium simpliciter, & in Involuntarium dumtaxat secundum quid. *Involuntarium simpliciter* dicitur illud, quod voluntas simpliciter & absolute, seu independenter ab omni conditione non vult, atque omnino respuit. *Involuntarium secundum quid* dicitur illud, quod quidem aliquo modo est involuntarium, simul tamen ratione alicujus additæ conditionis est voluntarium: sic projectio mercium in mare tempore periculi naufragii, est involuntaria secundum quid; quia naufragus non libenter illas projicit, imo libentius servaret, si posset absque periculo vitæ, nihilominus tamen in tali necessitate constitutus vult eas projicere ad servandam vitam. Unde patet, Involuntarium secundum quid semper habere adjunctum aliquid de Voluntario. Hoc prænotato fit

27 CONCL. I. Violentia causat Involuntarium simpliciter. Ita certa & communis Doctorum. Ratio est, quia violentum dicitur illud, quod fit contra naturam atque intrinsecam inclinationem rei, cui tribuitur. Sic, v. g. patitur homo violentiam, quando vi detinetur in loco, unde libenter exiret, aut quando membra ipsius externa contra suam voluntatem ab aliquo alio moventur. Hinc, si Tyrannus cujuspiam manus violenter moveret ad sacrificandum Idolo thus, talis non peccaret; nam ejusmodi actio foret ipsi simpliciter involuntaria.

28 CONCL. II. Metus non causat Involuntarium simpliciter, sed tantum secundum quid; ac proinde id, quod metu fit, est simpliciter & absolute voluntarium, involuntarium autem tantum secundum quid. Ita D. Thomas 1. 2. qu. 6. art. 6. & consentiunt non solum omnes Theologi, sed etiam Juristæ. Sic projectio mercium in mare est simpliciter voluntaria tempore tempestatis, propter timorem naufragii, cujus metuatur esse impeditiva; non obstante, quod ipsa secundum quid, id est, prout consideratur secundum se, atque extra hunc casum necessitatis, sit involuntaria. Hinc etiam, qui metu mortis sacrificat Idolo, aut aliud malum perpetrat, coram Deo reus est peccati; quia adest sufficiens voluntarium, & propter nullum malum evitandum licitum est committere peccatum. Et hinc Juristæ dicere solent: *Coacta voluntas, est voluntas*, arg. c. *Merito. 15. qu. 1.* & habet Glossa *ibidem*.

29 Certum licet pro nullo metu debeat quis peccatum mortale incurrere, ut dicitur c. *Sacris. De his, quæ vi metusve causa, &c.* eo quod peccatum sit omnium malorum gravissimum propter offensam Dei, utpote infiniti boni, quam continet. Nihilominus Leges humanæ positivæ quandoque cessant obligare in casu magni periculi seu damni, quod rationabiliter timetur secu-



secuturum; prout patet in præcepto Ecclesiastico Jejunii, quod non obligat cum probabili periculo, seu metu secuturæ infirmitatis, de quo alibi. (b)

30 Ex data Conclusionē ulterius sequitur, quod Pacta, Contractus, Transactiones, Renuntiationes, & consimiles actus, quamvis fiant ex metu gravi, atque injuste incusso, regulariter sint validi, tam pro Foro externo, quam conscientie; prout post Glossam cap. Super hoc. Vers. Resignationis de Renunciat. tenet Henricus Pirrhing, tit. de his, quæ vi metusve causa fiunt, n. 10. Sanchez lib. 4. de Matrim. disp. 8. n. 4. & communior aliorum, paucis exceptis: quia videlicet, quod ex metu fit, simpliciter est voluntarium. Verum tamen est quod ea, quæ per metum gravem atque injuste incussum fiunt, ita suadente æquitate, sint per sententiam Judicis rescindenda: unde cap. 2. eod. inquit Pontifex: *Quæ metu & vi fiunt, de jure debent in irritum revocari*. Quinimo dantur aliqui Contractus, ut Matrimonium, Sponsalia, Professio Religiosa &c. qui ob metum gravem, & injuste incussum, (c) ipso jure irriti sunt; ratione quorum notanter additum fuit, *regulariter loquendo*.

31 Porro metus gravis (qui etiam dicitur *Metus cadens in constantem virum*) ille est, quem vir constans, & fortis, prudenter & rationabiliter concipit. Et ad hujusmodi metum, secundum Doctorem Subtilem in 4. dist. 29. q. un. & alios communiter, duæ requiruntur conditiones. Prima est, quod malum, de quo est metus, sit grave: hujus autem mali gravitas attendi debet ex natura mali in se, ut est v. g. mors, captivitas, carcer, mutilatio enormis, stuprum, & ejusmodi; non autem ex vana & non fundata æstimatione patientis, seu metuentis, qui posset alioquin levissimum malum tamquam grave apprehendere. Secunda conditio ad metum gravem requisita est, quod ejusmodi grave malum certo immineat; hoc est, ut non levi æstimatione, sed certitudinaliter, saltem certitudine sufficiente in actibus humanis, judicetur eventurum. Quod si alterutra harum conditionum deficiat, censetur metus levis.

32 CONCL. III. Concupiscentia, prout est Passio, seu motus appetitus sensitivi prosequentis bonum delectabile, aut fugientis malum; cujusmodi sunt amor, desiderium, spes, gaudium, ira: Hujusmodi inquam Concupiscentia, seu Passio, si sit antecedens, semper minuit voluntarium, seu volubilitatem actus, ad quem impellit; & consequenter minuit etiam virtutis meritum, aut culpæ reatum. Ita D. Thomas 1. 2. q. 77. art. 6. & 7. & communis Theologorum. Ratio primæ partis est: quia per Concupiscentiam, seu passionem antecedentem intelligitur ea, quæ in appetitu sensitivo naturaliter exurgens, omnem voluntatis deliberationem prævenit, eamque trahit, seu inclinat atque excitat, ad eliciendum actum amoris, iræ &c. Atqui talia minuunt voluntarium; cum illud voluntati magis sit voluntarium, ad quod ipsa semetipsam movet, quam id, ad quod voluntas ab aliquo alio movetur, & quasi impellitur.

33 Dicitur notanter, *Concupiscentia, seu passio antecedens*. Nam secus est dicendum de Concupiscentia, seu passione consequenti, quam videlicet quis voluntate propria excitat in appetitu suo sensitivo, ut inde promptius in objectum feratur: puta, si quis in se excitet magnum desiderium vini, ut intemperantius ac delectabilius bibere possit; aut econtra, loquendo de operibus virtuosis, si quis in se excitet magnum misericordiæ erga pauperes affectum, quo magis impellatur ad subveniendum pauperibus, & hujusmodi. Nam loquendo de tali passione consequente nostram voluntatem, fatentur omnes, eam non solum non minuere, sed etiam augere voluntarium. Ratio est: quia ex magnitudine affectus voluntatis provenit, ut in appetitu sensitivo similis effectus excitetur.

34 Confirmantur hætenus dicta ex illa communi Theologorum doctrina, qua juxta triplicem radicem suam, peccatum distinguunt in peccatum ex infirmitate, ex malitia, & ex ignorantia. Et addunt Doctores, peccatum ex mera malitia gravius esse, quam peccatum ex infirmitate: atqui peccans ex infirmitate, peccat oc-

casionaliter ex inclinatione concupiscentiæ antecedentis, seu appetitus sensitivi, cui voluntas nata est condelectari; ergo.

Notant etiam Doctores, posse accidere, quod quandoque passio omnino tollat voluntarium: quia potest dari passio aliqua vehementissima, quæ aufert judicium rationis; prout nonnumquam contingit ex melancholia, vel alia causa naturali, imo interdum aliqui propter iram, vel amorem inordinatum insaniunt: atqui sine usu ac judicio rationis non consistit libertas, neque ratio voluntarii liberi: ergo. Verum regulariter hoc non contingit, sed habent locum dicta in Conclusionē.

## QUÆSTIO V.

Quotuplex sit Ignorantia, & an causet Involuntarium?

### SUMMARIUM.

- 35 Ignorantia, quid?
- 36 Quæ ignorant homines, sunt in duplici differentia.
- 37 Ignorantia varie dividitur.  
*Ignorantia simplicis privationis, & prava dispositionis.*
- 38 Ignorantia juris, & facti
- 39 Ignorantia antecedens, concomitans, & consequens.
- 40 Ignorantia invincibilis, & vincibilis, quanam?  
*\* Quandoquæ ignorantia vincibilis sit actualiter imputabilis ad culpam?*
- 41 Ignorantia crassa, & affectata, quæ?
- 42 Ignorantia antecedens causat involuntarium simpliciter.
- 43 Concomitans facit non voluntarium.
- 44 Consequens causat voluntarium, saltem indirecte & in sua causa.
- 45 Regula generalis prædictorum.

35 **A**Dvertendum, quod Ignorantia proprie dicta differat a simplici negatione scientiæ; talis enim negatio scientiæ datur etiam in lapide; Ignorantia vero importat privationem illius scientiæ, quam quis posset habere: unde solum earum rerum proprie dicimur habere Ignorantiam, quas pro tali statu ac tempore scire possemus, & non scimus.

36 Porro ea, quæ ignorant homines, sunt in duplici differentia. Aliqua enim tenetur quis scire: prout omnes tenentur communiter scire principales Articulos Fidei, & universaliora Juris præcepta; singuli autem ea, quæ ad proprium cujusque statum, vel officium spectant. Quædam vero sunt, quæ licet quis scire possit, non tamen tenetur ea scire: uti sunt pleræque doctrinæ Philosophicæ, Geometricæ, Arithmeticæ &c. His prænotatis, sit

37 CONCL. I. Ignorantia proprie dicta, seu quæ importat privationem talium rerum, quarum noticiam quis habere potest, varie dividitur. Ita communis; idque patet inductione; siquidem omnis aliis divisionibus, scitu minus utilibus, Ignorantia dividitur in primis in Ignorantiam simplicis privationis, & in Ignorantiam prava dispositionis. *Ignorantia simplicis privationis* est carentia scientiæ seu cognitionis alicujus, cujus quis fuisset capax pro tali tempore, & statu: ut si quis adultus, & rationis compos, nesciat ea, quæ scire potuisset. *Ignorantia prava dispositionis* est positiva deceptio, & contrarius veritati error: & talis v. g. datur in Judæis, Hæreticis, & Paganis, qui non solum alicujus veritatis præsertim supernaturalis, cognitionem non habent, sed insuper erronee judicant rem aliter esse, ac revera est.

38 Ignorantiæ alia celebris divisio est in Ignorantiam juris, & facti. *Ignorantia juris* est, cum quis ignorat legem, seu aliquid esse prohibitum aut præceptum: v. g. si quis nesciat, die Veneris esse prohibitam comestionem carnis; aut si quis nesciat, percussioni



Clerici esse annexam excommunicationem, tunc talis dicitur habere Ignorantiam Juris. *Ignorantia facti* est, si quis ignoret factum ipsum esse prohibitum; quod tamen revera illicitum est ac prohibitum: ut si quis occidat hominem, putans esse feram; talis enim ignorat, hic & nunc a se fieri actum prohibitum, nempe homicidium, non obstante, quod aliquin sciat, homicidium esse prohibitum. Idem accidit, si quis nesciat carnem esse, quam comedit die Jejunii, vel si non recogitet, esse diem Jejunii. Et hoc ultimum Exemplum ideo hic apponitur, quia oblitio, & inconsideratio, etiam nomine Ignorantiae comprehenditur.

39 Rursus Ignorantia dividitur in antecedentem, & concomitantem, & consequentem. *Ignorantia antecedens* est illa, quae antecedit omnem voluntatem, non solum explicitam, sed etiam implicitam; ac proinde nullo modo voluntaria est, nec directe, nec indirecte. *Ignorantia concomitans* est ea, quae concomitanter se habet ad actum voluntatis nostrae; id est, quando Ignorantia habetur de eo quod agitur, tamen etiam si sciretur, nihilominus ageretur: sic fieret, cum quis vellet quidem occidere hostem, sed ignorans eum occidit, putans, se occidere feram. Tandem *Ignorantia consequens* dicitur illa, quae consequitur aliquo modo voluntatem nostram, vel explicitam, vel saltem implicitam, directam vel indirectam: & hinc Ignorantia consequens censetur esse voluntaria, imo etiam culpabilis, si versetur circa rem scitu necessariam.

40 Ignorantia ulterius dividitur in vincibilem, & invincibilem. *Ignorantia invincibilis* dicitur ea, quae diligentia humana impediri non potuit: seu (ut alii loquuntur) quae morali diligentia superari ac tolli nequivit, eo quod numquam in mentem venerit dubitare, aut cogitare de opposito; vel etiam si in mentem venerit, tamen adhibita diligenti inquisitione, ignorantia illa depelli, & veritatis cognitio acquiri non potuit: & huiusmodi ignorantia invincibilis re ipsa est ignorantia antecedens, de qua proxime dictum. *Ignorantia vincibilis* ea est, quae morali diligentia superari, ac tolli, & opposita scientia acquiri potuisset, ac debuisset: & huiusmodi ignorantia vincibilis in re coincidit cum ignorantia consequente.

#### Additio.

\* Ut autem dicatur aliquis ignorantia vincibili, actualiter ad culpam imputabili laborare, necesse est, ut id ipsum (nimirum quod debeat ignorantiam deponere) huic incidat; prout ex communissimo DD. recte notant La Croix Tomul. I. Theolog. Moral. n. 748. & Henno Tract. de Conscient. dist. I. quest. 5. Id est debet eidem pro tunc ex timore prudenti aliquo modo saltem in confuso, si non circa certam speciem peccati, occurrere periculum graviter errandi, & exurgens exinde obligatio moralem diligentiam impendendi, ut hanc suam ignorantiam deponat. E. G. Ponamus quempiam rusticum, qui ut juvenis pro addiscenda Christiana Doctrina facile potuisset, & debuisset saepius accedere Conciones, aut Catecheses, ex quarum neglectu multa perpetravit illicita, quae tamen pro tunc ignoravit esse peccata, sicque nec in Confessionali clavibus Ecclesiae subiecit; modo autem primum in profectioni aetate constitutus idem crescit ex Concionatoribus aut Confessariis. Queritur modo, an ista peccata in juventute perpetrata censeatur rusticus ille commisisse ex ignorantia vincibili, quae esset ad culpam imputabilis, ita ut de novo teneatur eadem tamquam sufficienter voluntaria confiteri, vel non? & responderetur conformiter dictis: nimirum si huic periculum exinde errandi graviter, saltem in confuso, & consequenter obligatio per Catecheses, aliasve pastorales instructiones, &c. errores deponendi jam in juventute occurrerint, resolvitur affirmative: secus negative. Atque haec Doctrina ex communiori Theologorum desumpta bene debet notari ad tollendos multos scrupulos, & anxietates, ac ad solvendos plurimos casus conscientiae: multa enim po-

tuissent, & debuissent saepe sciri, & fieri, de quibus tamen non occurrebat pro tunc obligatio faciendi, aut periculum errandi. \*

41 Porro ignorantia vincibilis, seu consequens, juxta quod sequitur voluntatem nostram vel directe, dum scilicet quis data opera vult ignorare, vel indirecte, quatenus non curat scire ea, quae scire deberet, dividitur in affectatam, & in crassam seu supinam. *Ignorantia crassa*, seu *supina* dicitur illa, qua quis non curat scire ea, quae communiter homines sui status & conditionis sciunt. *Ignorantia affectata* vocatur ea, cum quis data opera vult ignorare, & non inquirere veritatem; sive ob discendi tedium ac pigritiam, sive ut ratione talis ignorantiae circa legis obligationem habitae vel excusationem aliquam mereatur a transgressionem legis, vel liberior ac sine remorsu conscientiae peccari possit. Juxta quod de talibus Job cap. 21. legitur: *Qui dixerunt DEO, recede a nobis, & scientiam viarum tuarum nolumus. Et Pl. 35. Nohit intelligere, ut bene ageret.*

42 CONCL. II. Ignorantia antecedens, seu invincibilis, causat involuntarium simpliciter. Ita communis Doctorum. Ratio est: quia huiusmodi ignorantia nec directe nec indirecte est voluntaria, imo opus ex illa procedens non fieret, si ignorantia illa non adesset. Patet hoc in eo, qui occidit hominem, putans esse feram; nam is nullatenus hominem occideret, si talis ignorantia non adesset. Et hinc factum ex tali ignorantia, cum homini nullo modo sit voluntarium, non imputatur ad peccatum.

43 CONCL. III. Ignorantia concomitans non quidem causat positive involuntarium, facit tamen non voluntarium. Ita Doctores passim. Ratio est: quia positive involuntarium dicit aliquid voluntati displicens: atqui occisio sui inimici, quem quis occidit, putans esse feram, non displicet voluntati, imo occidisset nihilominus, si scivisset, eum esse suum inimicum; ergo nec est ipsi involuntarium. Quia vero nihil est volitum, quia praecognitum, hinc ignorantia concomitans reddit talem occisionem non voluntariam.

44 CONCL. IV. Ignorantia consequens seu vincibilis, sive affectata illa sit, sive crassa & supina, non causat involuntarium, sed voluntarium, saltem indirecte & in sua causa: ac proinde factum ex tali ignorantia vincibili, seu consequente procedens, est simpliciter voluntarium, saltem indirecte. Ita rursus communis Theologorum. Ratio est: quia ipsamet ignorantia vincibilis, seu consequens, est simpliciter voluntaria, vel directe, si est affectata; vel saltem indirecte, si est crassa & supina, ut patet ex earum explicationibus supra allatis; ergo etiam factum ex tali ignorantia non est involuntarium, saltem indirecte, sive in sua causa.

45 Ceterum pro complemento haec dictorum, Nota generaliter, dum dictum est, factum ex ignorantia esse involuntarium, sive simpliciter, sive secundum quid; illud intelligendum esse de objecto secundum eam rationem tantum, secundum quam ipsum fuit ignotum, non autem in quantum ipsum fuit cognitum, ut advertunt omnes Doctores. Hinc si quis occidens alterum, sciat quidem ipsum esse hominem, nesciat tamen esse Patrem suum, vel Sacerdotem; factum ex tali ignorantia erit quidem involuntarium operanti, in quantum est parricidium, vel sacrilegium; non vero, in quantum est homicidium: & sic loquendo de similibus.



DISTINCTIO II.

De natura Actus Humani, seu Moralis, & variis  
ipsum concernentibus.

QUÆSTIO I.

Quid sit Actus Humanus, seu Moralis?

SUMMARIUM.

- 1 Actus humanus, & Actus hominis, differunt.
- 2 Actus humanus hic sumitur, pro morali, licet aliquando differant.
- 3 Actus humanus seu moralis, quid?
- 4 Quomodo debeat fieri ad regulam nostrorum actuum?
- 5 Regula morum alia remota, alia proxima.

**A**dvertendum I. Quod recepto Theologorum stylo non sit idem, Actus humanus, & Actus hominis: omnis enim actio ab homine quomodocumque elicit, etiam si sit mere naturalis, ut nutritio, augmentatio, &c. aut facta absque advertentia seu deliberatione, ut dum quis pedem aut manum movet, vel barbam fricat aliis intentus, potest dici actio seu Actus hominis: Actus autem humani proprie dicuntur actiones illæ, quæ ex voluntate deliberata procedunt. Hinc Doctor Subtilis 2. distinct. 41. quæst. un. optime eos appellavit Actus non humanos, qui procedunt ex sola imaginatione, & non ex libero arbitrio impellente.

2 Advertendum II. Quod in proposito Actus humanus communiter solet a Doctoribus sumi pro Actu morali, & cum eo converti, non obstante, quod in rigore loquendo latius patere videatur actus humanus, quam moralis: siquidem actus illi, quos non raro eliciunt pueri, libere quidem, sed ante cognitionem boni & mali moralis, virtutis nimirum ac vitii (ut dum ex apprehensione, & cognitione solius commodi, vel incommodi naturalis, deliberate eligunt unum objectum præ alio v. g. saccharum præ sale) possunt quidem dici Actus humani, sed non in rigore loquendo Actus morales. Verum his non obstantibus, ac restringendo & sumendo Actum humanum, prout coincidit cum morali, sit

3 CONCL. I. Actus humanus, seu moralis ut sic, bene definitur, quod sit Actus voluntatis liber, elicitus cum advertentia rationis ad aliquam regulam nostrorum actuum in ordine ad ultimum Finem nostrum. Hæc Conclusio in re est communis, & probatur declarando singulas ejus particulas. Dicitur inprimis, Actus voluntatis liber: quia ad Actum humanum seu moralem omnino requiritur, quod sit liber, id est, quod libere procedat a voluntate & delectu operante; libertas enim actus, est fundamentum totius generis moris, & per consequens boni vel mali moralis, etiam quoad malitiam venialem. Et additur, elicitus cum advertentia rationis: quia Actus moralis non solum debet procedere a voluntate quomodocumque, sed operante cum advertentia rationis, ita videlicet, ut ratio seu intellectus advertat, quid agatur. Et defectu hujus conditionis actus illi, qui procedunt ex sola imaginatione, ut puta inadvertenter fricare barbam, &c. non sunt proprie loquendo morales, eo quod non eliciantur cum advertentia rationis.

4 Dicitur ulterius, ad aliquam regulam nostrorum actuum. Quod intelligendum de Regula vel præcipiente, vel consulente, vel permittente, vel prohibente, ut sic sub Actu morali generaliter sumpto comprehendamus non solum actus morales bonos, qui nobis sunt præcepti, vel saltem sub consilio præpositi; sed etiam indifferentes nobis permittos (de quibus infra Quæst. 5.) atque insuper actus moraliter malos, seu peccaminosos, qui per Regulam nostrorum actuum nobis sunt prohibiti. Et defectu hujus conditionis, a ratione Actus morales excluduntur illi, qui eliciuntur a pueris ante usum ra-

tionis. Additur tandem, in ordine ad ultimum Finem nostrum, ad quem per actus nostros moraliter bonos accedimus, per malos vero ab eodem recedimus.

5 Quæres autem, quænam sit illa Regula morum, a qua per accessum, vel recessum, derivatur moralitas in Actus humanos. Resp. cum D. Thoma 1. 2. quæst. 19. art. 4. & communi Theologorum, ejusmodi Regulam esse duplicem, remotam videlicet, & proximam. Regula morum, seu actionum nostrarum moralium remota, est Lex extrinseca nobis præscribens, quidnam secundum rectam rationem sit agendum, vel fugiendum: de qua in Tractatu II. qui est De legibus, dicitur. Regula proxima actionum nostrarum (quam Doctor Subtilis Quodlib. 18. appellat Regulam Intrinsecam) est ipsummet dictam rectæ rationis, seu conscientie nostræ, proxime nobis dictans, quidnam sit conforme vel difforme legi extrinsecæ, ac proinde bonum, vel malum, faciendum vel omittendum. Et de hac proxima Regula morum fusius agetur in sequenti Distinctione, quæ erit De Conscientia.

QUÆSTIO II.

Unde Actus humani desumant suam bonitatem, vel malitiam moralem?

SUMMARIUM.

- 6 Actus voluntatis alii elicit, alii imperati.
- 7 Bonitas naturalis, & moralis in actibus nostris, quæ?
- 8 Bonum triplex, delectabile, utile, & honestum.
- 9 Bonitas vel malitia Actus morales ex triplici capite desumitur.
- 10 Bonitas vel malitia ex objecto desumpta, est primaria & essentialis actui; alia est accidentalis & secundaria.
- 11 Circumstantiæ quandoque tribuunt actui primam speciem bonitatis, vel malitiæ morales.
- 12 Sola bonitas intentionis non sufficit ad tollendam malitiam mediæ prævi.
- 13 Oculi simplex quis?
- 14 Intentio judicat omnes, quomodo intelligendum?
- 15 Nunquam licitum est, facere malum culpæ cum ordinatione ad finem bonum.
- 16 Culpa vacat, eligere ex duobus id, quod minus malum de se foret, si unum necessario eligendum sit.
- 17 Nova instantia, & notabilis solutio ipsius.

**A**dvertendum I. Quod actus voluntatis alii sint elicit, alii imperati. Actus voluntatis elicit dicuntur illi, qui ab ipsamet voluntate eliciuntur, seu immediate producantur: uti sunt actus volitionis, nolitionis, ac hujusmodi. Actus imperati voluntatis sunt illi, qui ex imperio ipsius voluntatis producantur: uti si voluntas imperet potentie loco motivæ, ut pergat in Ecclesiam, talis ambulatio ex imperio voluntatis procedens dicitur Actus voluntatis imperatus; & idem dicendum de actibus ipsius intellectus, aut aliarum potentiarum, ex imperio voluntatis procedentibus. Imo notant Doctores, voluntatem etiam sibi ipsi posse imperare actum v. g. detestationem de peccato commisso, ut proinde sint aliqui actus a voluntate elicit, & simul ab eadem imperati. Unde autem tales actus voluntatis, sive elicit, sive imperati, suam desumant bonitatem, vel malitiam moralem, quæstio remanet.

7 Advertendum II. Quod in actibus nostris duplex Bonitas considerari possit, una naturalis, alia moralis. Bonitas naturalis consistit in integritate, seu aggregatione eorum omnium, quæ in entitate actus naturaliter requiruntur: sic v. g. cantus bene consonans, ac juxta regulas Musices factus, dicitur naturaliter bonus, quamvis forsan sit lascivus, & moraliter malus. Bonitas moralis consistit in integritate, seu aggregatione eorum omnium, quæ actui humano secundum rectam rationem convenire debent. Econtra vero malitia moralis consistit in defectu omnium, vel saltem alicujus eorum, quæ actui



actui humano secundum rectam rationem convenire debent: siquidem, ut post D. Dionysium *lib. de Divinis Nominibus cap. 4.* notant Doctores. *Bonum est ex integra causa, malum vero ex quolibet defectu.*

8 Advertendum III. Quod bonum communiter triplex assignetur, videlicet bonum utile, bonum delectabile, ac bonum honestum. Ex his *Bonum delectabile* dicitur illud, quod operanti affert delectabilitatem; ut est cibus, vel potus. *Bonum utile* vero, quod affert utilitatem, ut sunt divitiae hujus mundi. Et certum est, in hujusmodi duplici Bono non consistere bonitatem moralem actus humani, cum saepius id, quod nobis utile aut delectabile accidit, sit lege Divina prohibitum, ut patet in furto, quod furanti affert utilitatem; ac innumeris aliis. Tandem *Bonum honestum* idem est, ac moraliter bonum, estque illud, quod est secundum rectam rationem; id est, quod est conforme dictamini rectae rationis, seu conscientiae nostrae proponentis nobis, quidnam sit consentaneum legi extrinsecae, sive Divinae, sive humanae, ac proinde moraliter bonum vel malum, prosequendum vel fugiendum, &c. Et prosequendo hujusmodi bonum honestum, dicitur quis bene seu virtuose operari, ac propterea esse dignus laude atque praemio: qui vero secus agit, dicitur male seu vitiose agere, atque esse dignus vituperio & supplicio. His praenotatis, sit

9 CONCL. I. Bonitas, vel malitia Actus moralis, ex triplici capite desumitur, videlicet ex objecto, ex fine extrinseco, qui dicitur *Finis operantis*, & denique ex aliis circumstantiis. Ita Doctor Subtilis in 2. dist. 40. estque in re communis Theologorum. Quae quidem Conclusio sic intelligenda est, quod ad bonitatem Actus moralis, sive humani, debeat concurrere & bonitas objecti, & bonitas finis extrinseci, & bonitas omnium circumstantiarum; ita videlicet, ut in nullo horum sit aliqua turpitudine moralis; ad malitiam autem Actus humani sufficiat malitia uniuscujusque praedictorum trium. Ratio est: quia bonum est ex integra causa, malum vero ex quolibet defectu, ut jam supra dictum est n. 7.

10 CONCL. II. Bonitas, vel malitia Actus moralis, ex objecto desumpta, est primaria, atque in hoc sensu etiam dicitur essentialis actui in genere moris spectato; desumpta vero ex circumstantiis qua talibus (sub his etiam comprehendendo finem extrinsecum, seu intentionem operantis) est accidentalis & secundaria. Ita Scotus *Quest. 4. Prologi*, cum suis, & aliis Theologis pluribus. Declaratur Conclusio exemplis: Sic furtum in genere moris spectatum sumit suam primariam malitiam ab objecto, seu re aliena, eo quod repugnet dari furtum, si res ablata non sit aliena; ac proinde talis malitia ex objecto desumpta, dicitur furto in genere moris spectato esse essentialis in eo sensu: quatenus in ordine ad ea, quae ad extra Bonitatem aliquam vel malitiam in Actum morale refundunt, primum ac principale est ipsum objectum. Quod si vero quis furetur ea simul intentione, ut possit fornicari, aut gulae indulgere, tunc haec malitia ex prava ista intentione, seu fine extrinseco desumpta, erit furto accidentalis, quia potest adesse vel abesse, salva furci malitia essentiali; eritque simul secundaria, utpote cum jam aliam malitiam furto essentialem supponat.

11 Dicitur notanter in posteriori parte Conclusionis, *desumpta vero ex circumstantiis qua talibus*. Fatendum quippe est, circumstantiam quandoque tribuere actui etiam primam, atque essentialem bonitatis, vel malitiae speciem: in eo tamen casu ipsae desinunt esse circumstantiae in genere moris, respectu talis actus (non obstante, quod maneant ejusdem circumstantiae in esse naturae) sed induunt rationem objecti, prout recte notat Doctor Subtilis *loc. cit.* Sic fit, dum quis actionem ex se indifferentem, puta studium, elicit ad honorem Dei, vel actionem bonam ob finem pravam, dando, v. g. elemosynam ob vanam gloriam: in his enim casibus ejusmodi finis extrinsecus, seu intentio bona aut mala, confert actui primam omnino speciem bonitatis vel malitiae, utpote cum nullam aliam priorem,

seu praexistentem supponat; Studium quippe ex se opus indifferens; bonitas vero elemosynae ob illum pravam finem vanae gloriae corrumpitur, & cessat in tali actu.

12 CONCL. III. Sola intentio bona, seu bonitas finis extrinseci, diminuit quidem malitiam medii pravi, ipsa tamen non sufficit ad malitiam medii pravi omnino tollendam, imo potius totum opus est simpliciter malum. Ita communis. Sic v. g. mendacium officiosum non desinit esse mendacium, eo quod per illud necessitati proximi subveniatur: quinimo, ut inquit D. Augustinus *lib. Contra mendacium, cap. 31.* *Etiam ad sempiternam salutem nullus ducendus est opitulante mendacio.* Similiter, si quis furetur animo dandi ex re furta elemosynam, non per hoc excusatur a malitia furci, non obstante, quod ejus malitia per hoc aliquantulum minuat: siquidem, ut habetur *Rom. cap. 3.* non sunt facienda mala, ut eveniant bona. Ratio horum generalis est: quia bonum est ex integra causa, malum vero ex quolibet defectu; ergo si medium est malum, integra actio vitabitur, atque evadet mala.

13 Obijcitur nihilominus contra hanc secundam Conclusionem, *Matth. cap. 6.* dixit Christus Dominus: *Si oculus tuus fuerit simplex, totum corpus tuum lucidum erit:* ubi per oculum denotatur intentio, secundum SS. Patres & Doctores passim; ergo si intentio, seu finis bonus est, totum etiam opus erit bonum. Resp. negando consequentiam: quia ut bene notat D. Bernardus *lib. De precepto & dispensatione.* (ubi hoc dubium ex professo tractat) non est oculus simplex, nisi cum recta intentione etiam opus sit rectum: etenim, ut intentio sit bona, non solum finis bonus intendi debet, sed etiam bene, id est, sine admixtione pravae circumstantiae, aut medii mali.

14 Obijcitur ulterius. Juxta illud tritissimum axioma *Intentio judicat omnes*; ergo si quis bona intentione proximo subveniendi faciat mendacium officiosum, vel leve furtum, non videtur peccare. Probatur consequentia ex S. Augustino, in *Prefatione ad Psalm 31.* sic dicente: *Non valde attendas, quid homo faciat, sed quid, cum facit, aspiciat:* ergo. Resp. negando consequentiam: nam axioma illud intelligi debet juxta proxime dicta ex S. Bernardo: neque enim intentio est bona, nisi finis bonus intendatur & simul bene, id est, sine admixtione pravae circumstantiae, aut medii mali. Ad S. Augustinum dicitur, eundem velle duntaxat, quod ad operis honestatem requiratur, ut agens aspiciat ad bonum virtutis, illud attendendo atque volendo, & non opus ex se bonum, atque ante oculos humanos excellens, faciat ob pravam finem vanae gloriae, aut hujusmodi, ne alioquin justum quidem faciat, sed non juste. Neutiquam autem vult S. Augustinus *loc. cit.* ex sola bonitate finis desumi bonitatem actus moralis, cum bonum debeat esse ex integra causa, malum vero sit ex quolibet defectu. Hinc, ut legitur 1. *Reg. cap. 15.* Saul Rex plurimum reprehensus fuit, eo quod quaedam spolia ex caede Amalec contra Dei praecceptum reservavit, licet id fecerit ob honestum finem, nempe ut ex iisdem spoliis Dei in signum gratitudinis sacrificaret, atque hostias offerret.

15 Obijcitur tertio. Ex duobus malis minus est eligendum; *can. Duo mala, & can. Nervi. dist. 13.* ergo, si v. g. mendacium occurrat dicendum, ut vitentur graviora facinora, illud erit licitum. Resp. negando consequentiam: nam quamvis ex duobus malis minus sit eligendum, quando eorum alterum necessario est faciendum; uti patet quotidie in Civilibus, nec non & Phylis, ubi Chirurghi secant infirmo manum, ut vitam ejus servent: numquam tamen est faciendum aliquod malum culpae cum ordinatione ad aliquem finem bonum. Siquidem malum culpae est gravius omni malo poenae, ac proinde numquam licite potest eligi pro quocumque malo poenae vitando: unde ut inquit Apostolus *ad Rom. 3.* Eorum damnatio justa est, qui dicunt, faciamus mala, ut eveniant bona.

16 Urgebis. Ergo saltem minus malum culpae potest licite eligi ad fugiendum majus malum culpae. Resp. negando sequelam, vel potius suppositum ejus: nam si



tanta occurrat necessitas, ut ex duobus, quorum aliquodlibet esset peccatum, necessario unum mihi sit eligendum, debeat quidem eligi id, quod ceteroquin minus forer, illud tamen revera tunc non habebit rationem peccati, sed vacabit omni culpa, prout cum D. Augustino *lib. contra mendacium cap. 18.* notat communis Theologorum. Sic quando die Dominico debebo vel omittere auditionem Missæ; vel domi relinquere infirmum solitarius cum periculo vitæ ejus, eo quod non habeam alium, qui interea decumbenti inserviat; tunc teneor eligere omissionem Missæ (nam minus obligat præceptum Ecclesiasticum de Missa audienda, quam præceptum naturale de subveniendi proximo extreme indigenti) quamvis ipsa in tali casu mihi ad culpam nullatenus imputetur.

17 Instabis. Ergo pariter, si possum meo mendacio impedire graviora alterius peccata, potero licite mentiri, neque mentiendo peccabo; quia ex duobus malis minus eligerem. Resp. negando sequelam: aliud enim est, ex duobus malis, quorum unum necessario est eligendum, minus eligere, juxta dicta *num. præ.* aliud vero, facere malum culpæ (nam mentiri est intrinsece malum) cum ordinatione ad vitandum majus peccatum alterius, quod alter libere, non vero necessario, commissurus putatur, de quo *num. 15.* Et gravius longe mihi malum est, proprio peccato me coinquinare, quam sine culpa mea alterius peccatum permittere, forte non futurum. Et certe (ut optime S. Augustinus *lib. Contra mendacium, cap. 9.* solvens hoc dubium, notavit) si hanc peccatis aperuerimus viam, ut committamus minora, ne alii committant majora, lato limite, imo nullo limite cuncta intrabunt atque regnabunt, dum profecto & furtis nostris strupra cavebuntur aliena &c. non solum minora pro majoribus, sed etiam (loquendo de maximis peccatis) pauciora peccata pro pluribus licita esse invenientur, quod absit.

### QUÆSTIO III.

Quomodo malitia, & præsertim bonitas debeat esse volita, ut eam Actus Humanus desumat ex objecto & circumstantiis?

#### SUMMARIUM.

- 18 Ad malitiam actus contrahendam non est necesse, ut ea sit directe volita, &c.
- 19 Corollarium notabile.
- 20 Ad bonitatem moralem actus ex objecto desumendum requiritur, ut hæc sit directe volita.
- 21 Licet necesse non sit, ut ea appetatur tamquam objectum formale motivum.
- 22 Ut actus bonitatem moralem desumat ex fine intrinseco, & circumstantiis, quid requiratur?
- 23 Quid observandum circa objectum indifferentia?
- 24 Sufficit cognosci & amari honestatem implicite.
- 25 Bona intentio nostris actionibus præfigenda, cur?
- 26 Commendatur bona intentio manè facta, & an sufficiat?
- 27 Sufficit ad meritum intentio virtualis, & quæ ea sit?

CONCL. I. Ad hoc, ut actus moralis desumat suam malitiam ex objecto aut circumstantiis, non requiritur, ut malitia ipsius sit directe volita & intenta, sed sufficit advertere aliquo modo, actum esse malum. Unde ad contrahendam malitiam sufficit quodcumque voluntarium, sive directum, sive indirectum, ac virtuale, ita omnes Doctores; & ratio est: quia bonum est ex integra causa, malum vero ex quolibet defectu, prout post D. Dionysium *cit. libr. de Divinis Nomin. c. 4.* sentit communis Doctorum.

18 Inferitur proinde, quamvis operans directe malitiam nolit, ipsique turpitudine actus displiceat, nihilominus hoc ipso, quod actum illum faciat, cui adjunctam esse malitiam advertit, eum peccare. Ratio est: quia licet displiceat malitia, non tamen displicet efficaciter;

ac proin ipsa malitia saltem indirecte, & in sua causa, seu (ut alii loquuntur) interpretative est ipsi voluntaria, quod sufficit ad malitiam actus. Et hoc quidem est certum, in eoque conveniunt Doctores passim: major autem difficultas est de bonitate actus, & quomodo ea debeat esse volita, ut ipsam actus desumat ex objecto & circumstantiis.

20 CONCL. II. Ut actus desumat bonitatem moralem ex objecto, non sufficit voluntarium indirectum seu interpretativum honestatis, sed requiritur, ut hæc sit præcognita, & directe volita: unde si quis faciat obiective bonum, seu honestum, nulla habita ratione honestatis ipsius, is non facit actum moraliter bonum & honestum; puta si quis faciat actum justitiæ in contractibus humanis ex intentione solius lucri, vel reddat alteri, quod suum est, ex solu metu humano, neutiquam curando, quod hoc sit honestum, Deoque placitum, is non facit actum moraliter bonum & honestum: licet enim talis justum facere dici possit, non tamen juste. Ita Doctor subtilis *Quodlib. 18.* estque communis aliorum, paucis exceptis.

21 CONCL. III. Nihilominus ad contrahendam bonitatem ex objecto non est necesse, ut honestas ejus appetatur tamquam objectum formale motivum, seu ut ratio formaliter appetendi; satis quippe est, eam cognosci simulque intendi, etiam si talis honestas non ametur propter se, nec sit ratio motiva actus, sed aliqua alia bonitas, dummodo nulla opponatur mala intentio, aut alia prava circumstantia. Ita Barthol. Mastrius *in 2. Sentent. disp. 1. nu. 193.* estque communior Doctorum. Sic enim, qui dat (forte jussu Confessarii) eleemosynam in satisfactionem suorum peccatorum, non solum elicit actum Pœnitentiæ, sed etiam actum Misericordiæ, non obstante, quod in tali casu motivum formale eliciendi actum illum eleemosynæ sit honestas Pœnitentiæ. Et hoc procedit de bonitate ex objecto desumpta, & cui nulla prava circumstantia admiscetur.

22 CONCL. IV. Loquendo tamen de fine extrinseco, & nonnullis circumstantiis, debet quandoque honestas amari propter seipsam, seu formaliter intendi, ut actus illam honestatem contrahat. Ita Scotus, *Quodlib. 18. §. de primo.* Mastrius *cit. disp. 5. n. 199.* & videtur communis inter Doctores. Probatur simulque declaratur Conclusio: nam imprimis bonitas finis operantis (qui dicitur *Finis extrinsecus*) est omnino extrinseca, & accidentaliter actui; ergo si ipsa non sit ratio motiva agendi, actusque ex intentione agentis data opera non conjungatur, nequaquam poterit actus eam finis extrinseci honestatem participare. Sic v. g. quia jejunium ultra honestatem Temperantiæ, quæ ipsi ex objecto competit, potest ex intentione bona, seu fine extrinseco operantis, aliam quoque accidentalem honestatem participare (nimirum Pœnitentiæ, si fiat in satisfactionem peccatorum; Religionis, si fiat ob cultum Dei) ut jejunium etiam hujusmodi honestates participet, necesse est, quod hæc per se intendantur ab operante: & idem fit in similibus.

23 Deinde etiam in objectis indifferentibus, ut actus honestatem cujuspiam virtutis participet ex fine extrinseco, seu bona intentione operantis, necesse est, operantem moveri ab honestate illius finis extrinseci seu virtutis. Sic, ut actus comestitionis, studii, dormitionis, &c. qui ex se indifferentes est, acquirat bonitatem Obedientiæ erga Deum, volentem, quod tempore congruo moderate comedamus, dormiamus, studeamus aut alia ejusmodi opera exerceamus, necesse est, ut hujusmodi honestas virtutis Obedientiæ erga Deum intendatur, & propter se appetatur; alioquin enim actus ille nullam bonitatem virtutis Obedientiæ contrahet, sed remanebit in sua indifferentia. Idem dicendum de aliis similibus.

24 CONCL. V. Verumtamen dicta in præmissis Conclusionibus, ubi habetur, quod honestas debeat cognosci, & amari, aut etiam per se intendi, non sic intelligenda sunt, quasi exigatur reflexio cognitionis, vel volitionis circa honestatem objecti, aut circumstantiarum: sufficit enim, modo aliquo implicito, aut æ-

qui-



quivalenti cognosci, & appeti honestatem illam, apprehendendo v. g. objectum ut laudabile, ut dignum premio, ut placitum Deo, ut commendatum a viris probis; vel in speciali, ut opus Iustitiæ, Charitatis, Obedientiæ &c. sicque illud volendo. Hinc Christus Matth. cap. 12. inquit: *Quicumque potum dederit uni ex minimis istius, calicem aque frigide, tantum in Nomine Discipuli, amen dico vobis, non perdet mercedem suam.*

25 Quæres, quid sit sentiendum de bona intentione nostris operibus præfigenda? Resp. I. Cur Libri Ascetici adeo commendent bonam intentionem, ratio desumitur ex dictis, ne videlicet alioquin iustum quidem operemur, sed non iuste; simulque negligamus innumeras occasiones bene agendi; atque promerendi augmentum gratiæ & gloriæ coelestis, quas continuo habere possumus constituti in statu gratiæ, dummodo ex bona intentione, puta Amoris Dei, aliarumque virtutum supernaturalium, eliciamus actiones nostras, sive ex objecto bonas, sive indifferentes.

26 Ubi quidem inprimis commendatur propositum initio diei conceptum, ob Dei Amorem omnia agendi ad ipsius perennem gloriam: sed quia huiusmodi intentio generalis non videtur posse virtualiter permanere, atque influere in omnes actiones totius diei; hinc eam interdum renovandam, atque peculiaribus actionibus nostris præfigendam, monet Jeremias Drexelius lib. 1. *Amusis* cap. 5. §. 4. citans D. Thomam, aliosque. Et hæc etiam fuit expressa mens D. Bonaventuræ lib. 2. *dist.* 41. *art.* 1. *quest.* 3. ad 6. ubi ad hoc, ut actio aliqua sit meritoria, requirit talem relationem ad Deum, non qua quis in generali refert ad Deum omnia opera diei, vel anni, sed qua quis refert aliquod opus ad Deum, ita quod opus sequens directam habeat ad opus primum ordinationem, & consequentiam: cuiusmodi relationem in Deum, alii appellant *intentionem virtutalem*. Concordat Doctor subtilis 2. *dist.* 41. *quest.* un. ubi ait: *Non videtur minor relatio (in Deum) sufficere ad meritum, quam relatio virtualis.*

27 Resp. II. Nihilominus sufficere ad meritum intentionem, seu relationem virtutalem in Deum, fatentur tum citati, tum alii Doctores. Dicitur autem Intentio virtualis, quæ licet actu jam præterierit, manet tamen in virtute sua: & talis tunc censetur haberi, quando operans virtute actualis intentionis prius habitæ facit omnia, quæ facit, tamquam ex radice, ita quod illa intentio actualis fuerit principium ordinatum ad omnes illos actus sequentes. Exemplum huius, proposito nostro accommodatissimum, ponit Scotus 4. *dist.* 6. *quest.* 6. ubi ait: *Hoc modo intendens ire ad sanctum Jacobum, ex intentione huius finis ordinat multa alia necessaria ad illum finem; exsequens autem illi ordinata, non semper cogitat de sancto Jacobo, nec de reverentia eius. Dico tamen, quod semper meretur, quia vel habet intentionem eorum, quæ sunt ad finem illum, cuius est illa prima intentio, vel habet actus aliquos sequentes ex illis intentionibus: in quibus proinde virtualiter continuatur illa prima intentio eundi ad sanctum Jacobum, non obstante, quod interveniant aliqui actus distrahentes. Similia habet sanctus Bonaventura loc. cit. hinc inferens: de viris Religiosis, qui in principio ex charitate devoverunt portare Religionis onus: quidquid enim (inquit) faciunt, quod ad suam Religionis observantiam spectat, ex prima intentione est eis meritorium ad salutem, nisi forte (quod absit) contraria intentio superveniat: in aliis autem, quæ ad Religionem non spectant, secus est, quia illa intentio non se extendit ad alia. Hinc quoad similia erit renovanda intentio, ne maneat in sua indifferentia, & absque merito: quamvis admodum sit consultum, meritorium, Deoque gratum, eandem etiam quoad reliquos actus iterare, tum ad debitum Deo servitium eo exquiritius ferventiusque præstandum; tum ad augendos internos virtutum actus, & participandam multiplicem bonitatem extrinsecam.*

## QUÆSTIO IV.

### De bonitate, vel malitia Actus externi.

#### SUMMARIUM.

- 28 Bonitas vel malitia moralis, per se primo inest actui voluntatis interno.
- 29 Actus externus, saltem occasionaliter, addit bonitatem &c. interno.
- 30 Habet etiam distinctam bonitatem, vel malitiam moralem ab interno.
- 31 Hoc amplius probatur.
- 32 Voluntas reputatur pro facto, quomodo?
- 33 Exemplum Viduæ, mittentis duo minuta in munera Dei, declaratur.
- 34 Actus interior & exterior, an sint duo peccata?
- 35 Id amplius declaratur.

CONCL. I. Bonitas, aut malitia Actus moralis, per se primo inest actui voluntatis interno atque elicitio; in aliis autem actibus exterioribus ac imperatis, uti sunt actus intellectus, atque actus potentiarum sensitiarum, & membrorum exteriorum, non nisi secundario & participative, id est, dependenter ab actu interiori voluntatis, reperitur bonitas, vel malitia moralis. Ita Doctor noster 2. *dist.* 42. *quest.* 2. & alii. Ratio est: quia causa prima eliciendi actum liberum & sicque operandi bonum, aut peccandi, est voluntas; ergo etiam bonitas actus, vel malitia peccati, primario erit in actu voluntatis; in actibus autem aliarum potentiarum solum secundario, & dependenter ab actu voluntatis, ejusque libertate.

29 CONCL. II. Actus externus regulariter loquendo, addit aliquid bonitatis vel malitiæ actui interiori; saltem causaliter, vel occasionaliter. Hæc Conclusio sic prolata est certa inter Theologos. Ratio est: quia dum ponitur Actus exterior, occasione ejus regulariter loquendo intenditur, aut diutius continuatur interior; ergo vera est Conclusio, quod nimirum occasione Actus exterioris & causaliter, regulariter addatur nova bonitas vel malitia actui interno, utpote qui occasione Actus externi solet intendi, vel diutius continuari. Et hoc ipsum docet experientia: Sic qui re ipsa Martyrium patitur, regulariter loquendo plus meretur, quam qui illud solummodo efficaciter exoptat; dum enim re ipsa patitur Martyrium, occasione exterioris passionis elicit plures novos intensiores actus internos voluntatis, quibus Martyrium ob Dei amorem acceptat, & tolerat. Similiter, dum quis actu ipso fornicatur, hic actus exterior reddit utique affectum internum fornicandi intensiorem, quam ante fuerat, ut taceantur aliæ prave cupiditates, occasione talis actus externi pravi in homine subsequentes. Et hoc quidem est certum, & a Doctoribus communiter concessum: an autem ipsemet Actus exterior secundum se addat specialem bonitatem, vel malitiam actui interno, inter Theologos plurimum celebris est quæstio, ad quam breviter respondendo, sit

30 CONCL. III. Actus exterior habet etiam bonitatem, vel malitiam moralem propriam, distinctam ab ea, quam habet actus interior voluntatis elicitus, ac proinde simpliciter loquendo, actus exterior superaddit specialem bonitatem, vel malitiam actui interiori. Ita Doctor Subtilis *Quodlib.* 18. cum omnibus suis, quamvis multi alii Theologi teneant oppositum. Probatur Conclusio inprimis auctoritate D. Augustini 1. 13. *de Trinit. c.* 5. dicentis: *Mala voluntate vel sola quilibet miser efficitur, sed miserior potestate, qua desiderium mala voluntatis impletur.* Hinc Glossa super illud Exod. 20. *Non machaberis*, inquit: *Qui opus adjicit voluntati, iniquitatem addit iniquitati.* Probatur eadem Conclusio ratione: Si actus externus non superadderet specialem malitiam actui interno malo, sequeretur, actum externum non esse necessario confitendum; sufficeret



sufficeret enim solum actum internum efficacem occidendi v. g. vel adulterandi, confiteri: consequens est absurdum, & contra Decretum Alexandri VII. an. 1665. sequentem inter alias propositionem, ordine 25. damnantis: *Qui habet copulam cum soluta, satisfacit Confessionis præcepto, dicens: Commisi cum soluta grave peccatum contra castitatem, non explicando copulam.* Probatur sequela: quia juxta sententiam oppositam actus externus v. g. fornicationis, non habet specialem malitiam ab interiori; ergo hoc solo explicato in Confessione, jam tota malitia sui peccati explicaretur; & consequenter, cum hoc dici nequeat, erit admittenda Conclusio.

31 Confirmatur Conclusio. Tum quia Deus ipsemet specialibus præceptis prohibere dignatus est actum internum, & externum peccati; ut patet ex eo, quod sexto præcepto Decalogi expresse prohibuerit adulterium, & nono pravam concupiscentiam seu voluntatem adulterandi; ergo aliam agnovit malitiam in actu externo, quam interno, alioquin frustra multiplicarentur ejusmodi præcepta. Tum quia plures Leges, tam Canonice, quam Civiles, puniunt actus externos, non tamen internos (non obstante, quod hi in Foro externo legitime probentur, puta per propriam Confessionem) ut patet in excommunicatione annexa hæresi formali externæ, non internæ; aut percussioni actuali Clerici, non autem voluntati hunc percutiendi, ac hujusmodi. Tum quia actus externi sunt vere liberi, haud obstante, quod libertatem participant à voluntate, ejusque imperio; ergo etiam sunt boni vel mali, prout substant imperio voluntatis, & quidem distincta bonitate vel malitia, non minus, ac habent diversam libertatem. Nam, ut subtiliter argumentatur Scotus *loc. cit.* voluntas utriusque actui distinctam & propriam communicat libertatem, dum actui interno communicat libertatem ut eliciens, qui proin est immediate voluntarius; exteriori vero communicat libertatem ut imperans, qui proinde (ne quoad præpositum dicatur se habere, sicut instrumentum inanimatum manu artificis motum) est saltem participative liber, ac mediate voluntarius. Tali libertate imperata (non vero elicit) censetur etiam liber actus fidei, qui equidem est immediate elicitus a causa naturali: nimirum ab intellectu; imperatus autem a causa libera, nempe voluntate: ubi tamen id sufficit, ut talis actus dicatur specialiter bonus, & meritorius, tanquam actus proprius Fidei Virtutis Theologicæ, distinctus ab ipsa voluntatis pia affectione credendi.

32 Obijcitur tamen contra hanc conclusionem, afferendo plures SS. Patrum Auctoritates, ac præsertim illam D. Bernardi, *Epist. 77.* dicentis: *Legimus, qui videtur mulierem ad concupiscendum, jam machatus est in corde suo. Quid planius, quod voluntas pro facto reputatur, ubi factum excludit necessitas.* Hæc ille. Resp. Sensus talium locutionum esse, quod voluntas pro facto reputetur quoad culpam, & reatum in malo, non vero quoad quantitatem culpæ: uterque enim peccat mortaliter, tam adulterans, quam concupiscens adulterium; sed ille gravius, utpote iniquitatem addens iniquitati.

33 Quod si quis instet. Juxta illud commune adagium: *Voluntas pro facto reputatur, ubi facultas operis deest*: unde etiam Christus Lucæ cap. 21. Viduam pauperem, quæ misit duo minuta in gazophylacium Templi, prætulit aliis, qui multa miserunt; ergo. Resp. dictum illud, *voluntas pro facto reputatur*, &c. verum esse, quantum ad sufficientiam ad salutem, præmiumque substantiale in Cœlis consequendum; non vero, quantum ad præmii excellentiam, majoremque actus bonitatem. Et ita etiam dictum adagium explicat Divus Bonaventura hic *Dist. 49. art. 2. quæst. 1. in fine.* Nec urget exemplum Viduæ pauperis, cum in illo casu cetera non fuerint paria; nam Vidua illa pauper misit duo minuta ex majori fervore, & charitate, quam ceteri, qui plus mittebant: hi enim, ut Christus Dominus ibi attestatur, ex abundanti sibi, miserunt in munera Dei, illa vero omnem victum suum, quem habuit, misit.

34 Quæres, an actus interior & exterior sint unum,

vel duo peccata? Resp. Quantum attinet ad praxim, sufficit in Confessione explicare actum externum deliberate perpetratum, v. g. se furatum esse toties summam gravem; hoc ipso enim indicatur etiam interna voluntas furandi, a qua derivatur malitia peccati in actum externum. Non autem sufficit ei, qui actum internum, sive propositum peccandi opere externo complevit, solum actum internum explicare, sed tenetur etiam explicare actum externum, propter dicta *num. 30.* Et hæc est certa, atque omnimodis tenenda: præsertim post Decretum Alexandri VII. ibidem allatum. Nec obstat, quod circumstantiæ peccatorum aggravantes juxta multos Doctores, non sint necessario explicandæ in Confessione. Respondetur enim, peccatum externum etiam specie morali differre ab interno; cum prima & generica peccatorum divisio sit in peccata cordis, oris, & operis, unde & aliud moraliter est, voluntas occidendi hominem; & aliud, actualis occisio hominis.

35 Num autem actus exterior & interior sint unum vel duo peccata, eo quod habeant duplicem malitiam distinctam, est Quæstio magis Theologica, & speculativa. Potest tamen breviter dici, quod licet actus exterior & interior sint duo peccata partialia, quatenus uterque actus in se ipso formaliter consideratus habet propriam suam malitiam; nihilominus tamen sint unum peccatum totale, quatenus sunt ad invicem subordinati, & naturaliter connexi: nam actus exterior naturaliter subordinatur interiori, a quo pendet in suo esse, & vicissim actus interior pendet ab exteriori, tamquam ab objecto, & ultimo suo complemento.

## QUÆSTIO V.

### An detur Actus indifferens?

#### SUMMARIUM.

36 Actus indifferens, quid?

37 Certum est, dari actus indifferentes ob defectum deliberationis.

38 Dantur insuper actus humani indifferentes.

39 An homo teneatur omnem actum dirigere in finem bonum?

\* Vel in Deum summe diligibilem?

\* An liceat operari ex sola delectabilitate objecti?

\* De imperfectionibus.

36 **A**dvertendum, quod per Actum indifferentem in proposito intelligatur ille, qui nec bonus est nec malus in genere moris; ac proin neque speciali laude & præmio dignus, neque vituperio aut supplicio. Unde Actus indifferens mediat inter actum moraliter bonum, & inter actum moraliter malum, seu peccaminosum.

37 CONCL. I. Certum est, plures dari actus etiam in individuo, qui nec boni sunt, nec mali propter inadvertentiam, & defectum actualis deliberationis, ac proinde hac ratione indifferentes; uti sunt, ex inadvertentia & imaginatione quadam movere manum, fricare barbam, levare festucam, &c. & præsertim innumeri tales dantur in pueris. Et tales actus indifferentes dari, admittit pariter Doctor Angelicus 1.2. quæst. 18. art. 19. de iis autem non esse quæstionem inter Theologos, notat Scotus in 2. dist. 41. ante solutionem argumentorum, cum defectu deliberationis non sint actus humani, sed extra genus moris. Igitur loquendo de actibus humanis libere, & cum advertentia rationis elicitis, sit

38 CONCL. II. Dantur insuper actus humani indifferentes, qui nec boni, nec mali sunt in genere moris, etiam si libere & cum advertentia rationis eliciantur. Ita Doctor Subtilis *cit. dist. 41. D. Bonaventura 2. dist. 41. art. 1. quæst. 3.* Alensis, & quam plures Theologi, quamvis etiam non pauci oppositum teneant. Probatur Conclusio in primis auctoritate S. Hieronimy, *Epist. 89. ad S. Augustinum*, sic scribentis: *Bonum est continentia, malum luxuria: inter utrumque indifferens est ambulare, manibus capitis purgamenta projicere, spiritus rheumata jucere* =

hæc



*hoc nec bonum, nec malum est; sive enim feceris, sive non feceris, nec justitiam habebis, nec injustitiam.* Hæc ille. Confirmatur. Quia nulla datur obligatio referendi quemcunque actum in finem honestum; ergo potest dari Actus indifferens. Probatum assumptum: tum quia nulli legitur talis obligatio, simulque ea admodum foret dura & difficilis naturæ humanæ, ejusque fragilitati, propter innumera hujus vitæ impedimenta, occupationes, atque distractiones. Tum quia alioquin actus ex objecto indifferentes, & in bonum finem non relati, ut puta moderate comedere, ambulare, purgamenta naribus projicere, &c. non facta alia bona intentione, forent hoc ipso mali, & peccata saltem venialia, ac proinde essent materia sufficiens Sacramenti poenitentiae, & Confessionis: hoc autem est contra praxim prudentum Confessariorum, & communem sensum Fidelium: ergo. Item quis reum peccati arguet illum, qui intermittit talem actum, qui tantum est de consilio; non autem de præcepto? Etenim si talis intermissio foret peccaminosa, eo ipso esset ille actus, qui intermittitur obligatorius ac de præcepto, & non pure de consilio.

39. Obijcitur tamen afferendo præcipuum fundamentum adversæ sententiæ. Tenetur homo quemcunque actum ex deliberatione procedentem dirigere in finem honestum; ergo nequit dari Actus indifferens, sed erit vel bonus, si dirigatur in finem honestum, vel malus, si non dirigatur. Probatum antecedens: quia tenemur diligere Deum ex toto corde, & in tota anima nostra. Matth. 22. cum concordantiis: atqui hoc præceptum non observat is, qui scienter ac deliberate exercet actum indifferenter absque ulteriori relatione in Deum; ergo. Resp. negando antecedens: id namque videtur esse contra communem sensum hominum; vix enim ullus est, qui, quando lavat faciem, aut expuit, aliaque similia opera ex se indifferentia exercet, cogitet se teneri ad apponendum semper bonum finem, non obstantem, quod valde consultum, simulque meritorium, & laudabilissimum sit ipsum apponere. Ad probationem antecedentis dicitur, præcepto diligendi Deum super omnia, in hac vita satisfieri certis actibus positivis supernaturalibus, & abstinentia ab actibus dilectioni Dei oppositis, simulque observatione mandatorum Dei, juxta illud Salvatoris Joan. 14. *Qui habet mandata mea, & servat ea, ille est, qui diligit me.*

#### Additio I.

\* Instabis: Si non adest obligatio positiva quemcunque Actum deliberatum referendi in Deum summe diligibilem, tunc possumus admittere cum antiquis Philosophis opera quædam media inter bonum, & malum; atqui juxta D. Augustinum *Epist. 19. ad Hieronymum.* Cavendum est, ne sicut Philosophi quædam facta hominum media dicamus inter recte factum, & peccatum, quæ neque in recte factis, neque in peccatis numerentur: ergo.

Respondeo D. Augustinum, si in fonte legatur, ibidem plane non contra nostram stare sententiam, quin imo potius nobis favere: etenim illa verba in minori allata non adducit ex mente propria, sed agens de Petro & Paulo, &c. tantummodo ponit eadem verba per modum objectionis, ad quam respondet, non esse inconveniens cum Philosophis admittere opera media, qualia censuit circumcisionem, aliaque caeremonialia Legis Veteris tempore Apostolorum ante promulgationem & obligationem Evangelii, tamquam pro tunc nec amplius præcepta, nec etiam prohibita; bene tamen permissa, ut sic synagoga cum honore sepeliretur. De quo vide infra Tract. 2. dist. 2. q. 1. \*

#### Additio II.

\* Urgebis: Si dantur actus indifferentes in individuo, tunc liceret operari ex sola delectabilitate objecti e.g. audire concertum musicæ, quia recreat; videre, vel odorare flores, quia delectant visum ac odoratum,

aut studere Poësi, sive Mathematicæ ex animi oblectatione, &c. sed non licet citra peccatum veniale operari ex delectabilitate objecti: ergo Min. probat quia alias liceret comedere, & bibere ad satietatem ex delectabilitate, vel ex eodem motivo conjugibus exercere copulam; quod tamen utrumque ab Innocentio XI. damnatum est: cum Propositio ordine 8. ab eodem Pontifice confixa sic sonet: *Comedere & bibere usque ad satietatem ob solam voluptatem non est peccatum, modo non obstat valetudini, quia licite potest appetitus naturalis suis actibus frui.* Altera ordine 9. taliter: *Opus conjugii ob solam voluptatem exercitum omni penitus caret culpa ac defectu veniali.* Ad hanc satis difficilem instantiam respondent aliqui I. distinguendo Maj. liceret ex sola delectabilitate objecti operari, si objectum sit tale, cujus delectabilitas non nimium soleat ordinarie absorbere hominem in ipsa voluptate, concedunt; si esset tale objectum, cujus delectabilitas solet ordinarie nimium absorbere hominem in ipsa voluptate, negant: talia autem objecta nimium ordinarie absorbentia hominem in voluptate, seu trahentia ad voluptatem aliquam immoderatam forent ista duo: nimirum exercitum copulae, & comestio ad satietatem, supposito, quod semel liceret hæc facere ex sola delectabilitate, in quibus plerumque vel voluptas immoderata actualiter interveniret, vel saltem grave periculum foret excedendi limites ipsius licentiæ seu permissionis: nam nescit cupiditas, ubi finiatur necessitas, inquit D. Augustinus, qui etiam lib. 4. cont. Julian. *Apostat. cap. 14.* addit, quod sola voluptas in copula carnali ita hominem absorbeat, ut non facile ad Deum convertatur; ob quas rationes merito in similibus objectis prohibetur operari ex sola delectabilitate.

Resp. II. Adhuc aliter disting. Major. liceret operari ex sola delectabilitate objecti, quando ipsa delectatio est finis intentus a natura, conced. quando non est intentus a natura, & tamen assumitur, neg. Hoc autem contingit in memoratis Propositionibus damnatis; cum voluptas assumatur tamquam finis comestitionis & operis conjugalis: ut patet ex illis verbis *ob solam voluptatem, &c.* Et si harum actionum finis a natura intentus non sit voluptas, sed comestitionis competens hominis sustentatio, & copulae conjugalis extinctio libidinis, ac procreatio proles.

Paucis natura istas duas actiones ordinavit ad conservationem speciei, & individui humani, atque delectationem illam in gula & in copula conjugali annexuit non ut finem hominis comedentis & generantis, sed ut medium aptum ad comedendum & generandum, quale medium, si invertendo ordinem naturæ assumatur pro fine, sæpius oberit potius, quam proderit conservationi speciei & individui humani ob periculum excessus juxta jam dicta in I. Responsione. Deinde finaliter loquendo, quamvis etiam posset probari universaliter in nullis actionibus esse licitum operari propter solam delectabilitatem, eo quod juxta S. Thomam 2. 2. q. 141. art. 6. omnia delectabilia ordiuntur ad aliquam hujus vitæ necessitatem, tamquam ad suum finem naturalem; adhuc tamen non sequitur, quod non possit dari actus moralis indifferens in individuo, habens pro fine suo ipsam necessitatem naturæ aliquam, etiam in minus notabilibus sublevandam e.g. abigere a facie muscam, occidere pulicem aliquam molestum, vel excutere e vestibus parum pulveris &c. \*

#### Additio III.

\* Quæres, an actus indifferens inter bonum, & malum ita debeat esse indifferens, ut non solum peccatum, verum etiam omnem imperfectionem necessario excludat? Ante responsionem nota, quod imperfectio, prout distinguitur a peccato, & nec est materia sufficiens se sola pro absolutione describatur: *Actio, vel omissio repugnans consilio in re ad mores spectante.* H. N.

Resp. Actus indifferens non necessario excludit imperfectionem, quin eadem cum ipso stare possit, dummodo talis actus ceteroquin non sit bonus, nec etiam ma-



lus in genere moris. Probatur ab exemplis: Sic enim *intermittere Missam die non Festo, non sequi inspirationes Divinas*; ad opera de consilio tendentes, communiter censentur indifferentia, utpote omissiones rei nec præceptæ, nec prohibita, & tamen similes ex communi æstimatione reputantur imperfectiones (quid enim alias esset imperfectio?) ergo actus indifferens non necessario excludit imperfectionem. \*

QUESTIO VI.

Quid requiratur, ut Actus humani boni sint meritorii vitæ æternæ?

SUMMARIUM.

- 40 Meritum, quid?
- 41 Meritum de condigno, & Meritum de congruo, quod?
- 42 Ad Meritum de condigno, ex parte operantis requiritur Status viæ, & Status gratiæ.
- 43 Status viæ, & Status gratiæ, quid?
- 44 Sancti in Cælis sibi nihil amplius merentur, nec damnati demerentur.
- 45 Requiritur Status gratiæ ad meritum de condigno, probatur.  
Corollarium.
- 46 Opera bona viva, mortificata, & mortua declarantur.
- 47 Opera bona mortua, seu in statu peccati mortalis facta, ad quid prosunt?
- 48 Corollarium.  
\* An Actus meritorius eo ipso sit etiam satisfactorius?  
Additio I.  
\* Cur animæ in purgatorio potius dicantur satisfacere?  
Additio II.  
\* Quando nam ad actum satisfactorium non requiritur Status gratiæ? Additio III.

40 **A**dvertendum I. Meritum ut sic bene definiri, dicendo: *Meritum est actus laudabilis, exigens aliquo modo collationem præmii*. Dicitur, *actus laudabilis*: quia per actus peccaminosos non meremur præmium, sed potius supplicium. Simulque per hoc indicatur, quod actus meritorius debeat esse liber, & moraliter bonus; nam per ea, quæ naturaliter & necessario eveniunt, nec laudem meremur, nec vituperium.

41 Advertendum II. Meritum ut sic communiter dividi a Theologis in Meritum de condigno, quod proprie & absolute meritum dicitur; & in Meritum de congruo, quod dicitur meritum secundum quid duntaxat, & cum addito *ly, de congruo*. Meritum de condigno generatim illud est, quod habet condignitatem & æqualitatem cum præmio: in quo sensu, loquendo de Merito de condigno vitæ æternæ, dicitur Sapient. 3. *Quoniam Deus tentavit eos, & invenit illos dignos se*. Et Apocal. 3. *Ambulabunt mecum in Albis, quia digni sunt*, & alibi. Meritum de congruo illud dicitur, cui licet deficiat talis condignitas & æqualitas, adhuc tamen congruum est, ut ex liberalitate remunerantis conferatur ipsi aliquod præmium. Et juxta hæc potest Actus moraliter bonus dividi in Actum meritorium de condigno, & de congruo: quod ut clarius intelligatur, sit.

42 CONCL. I. Ad Meritum de condigno vitæ æternæ, præter bonitatem moralem ipsius actus, requiritur insuper ex parte operantis Status viæ, & Status gratiæ sanctificantis; ac proinde ad actum bonum de condigno meritorium vitæ æternæ, hæc duo requiruntur necessario. Ita certa, & communis Theologorum.

43 Ubi sciendum, quod per *Status viæ* intelligatur decursus vitæ præsentis, juxta phrasin Sacræ Scripturæ, quæ præsentem vitam appellat peregrinationem 2. Cor. 5. ibi: *Quoniam dum sumus in corpore, peregrinamur a Domino*, & alibi. Per *Status gratiæ* vero intelligitur status gratiæ habitualis, seu sanctificantis; id est, quod quis sit constitutus in gratia sanctificante, per quam homo de facto fit amicus Dei, ejusque filius adoptivus, & dignus vita æterna. Et in tali Status gratiæ de facto

Anacl. Reiffenstuel. Theol. Tom. I.

nullus est, quicumque habet peccatum mortale, sive originale, sive actuale nondum remissum; nam gratia habitualis, & peccatum de facto repugnant, sicut lux & tenebræ. Hoc prænotato probatur prima pars conclusionis, quod nempe Status viæ requiratur ad Meritum de condigno vitæ æternæ. Sic enim 2. Cor. 6. dicitur: *Ecce nunc tempus acceptabile, ecce nunc dies salutis*. Et Joan. 9. *Venit nox (id est mors) quando nemo potest operari*: intellige, meritorie.

44 Infertur proinde, quod Sancti in Cælis defectu hujus conditionis (id est, quia non amplius sunt viatores) per intensissimos actus amoris Dei nihil amplius sibi mereantur; quamvis possint pro nobis intercedere, suæque intercessionis quidpiam nobis impetrare a Domino Deo. Similiter Animæ in Purgatorio nihil amplius merentur in ordine ad augmentum gratiæ, & gloriæ cælestis, per tolerantiam suarum poenarum, quamvis satisfacere, seu potius satisfacere possint pro suis peccatis. Et econtra Damnati in inferno, licet continuo blasphemant Deum, non promerentur novum supplicium (eo quod amplius non sint viatores) sed pro peccatis in hac vita commissis duntaxat æternaliter torquentur.

45 Altera pars Conclusionis, quod nempe ad Meritum de condigno requiratur Status gratiæ, est etiam certa inter Catholicos. Ratio est: quia propter impedimentum peccati mortalis nullus potest de condigno mereri vitam æternam; peccatori enim non debetur vita, sed mors, juxta illud Rom. 6. *Stipendium peccati mors*. Accedit, quod quis per peccatum mortale constituitur inimicus Dei; ac proinde hoc ipso sit indignus amicitia, donisque ipsius, præsertim supernaturalibus. Hinc sequitur, quod peccator, quamdiu persistit in statu peccati mortalis, per eleemosynas & alia opera bona tunc temporis peracta, nullum promeretur augmentum gloriæ cælestis, neque aliud donum supernaturale de condigno; quamvis non idcirco ejusmodi bona opera sint prorsus inutilia, propter dicenda in secunda Conclusionem.

46 Et conformiter dictis Opera moraliter bona a Theologis communiter dividuntur in opera mortua, mortificata, & viva. Opera bona viva, sunt opera moraliter bona in statu gratiæ facta, quæque per nullum peccatum mortale subsequens mortificantur. Opera mortificata, sunt opera moraliter bona, quæ quidem fuerunt facta in statu gratiæ, adhuc tamen per peccatum mortale subsequens mortificantur: id est, impediuntur, ne habeant suum valorem promerendi vitam æternam stante ejusmodi peccato mortali. Ceterum si homo per veram poenitentiam denuo justificetur, tunc hujusmodi merita bonorum operum per peccatum mortale mortificatorum iterum in hominis justificatione reviviscunt, id est, recuperant suum pristinum valorem promerendi vitam æternam in Cælis. Opera bona mortua dicuntur ea, quæ sunt in statu peccati mortalis; peccatum enim mortale est mors animæ. Et talia numquam reviviscunt in ordine ad meritum vitæ æternæ quodam in Cælis consequendum; eo quod illud, quod numquam antea vixit, nequeat impofterum reviviscere.

47 CONCL. II. His tamen non obstantibus, Opera bona in statu peccati mortalis facta non sunt penitus inutilia, nec idcirco ab homine intermittenda. Ita omnes Doctores Catholici. Ratio est: quia in primis hujusmodi Opera bona sunt meritoria, saltem de congruo, quorundam gratiarum actualium, seu auxiliorum supernaturalium, quibus ejusmodi homo facilius perducitur, atque excitatur ad agendam veram poenitentiam de peccatis, ut sic justificetur. Deinde solent ejusmodi homines per Dei misericordiam præservari a nonnullis periculis labendi in peccata graviora; aut clementer protegi, ne toties labantur, & sic in altera vita gravius puniri non mereantur. Tertio hujusmodi homines sensim assuefiunt exercitio bonorum operum, ac deinde facilius de peccatis commissis agunt poenitentiam; & postmodum in statum gratiæ restituti constantius persistunt in continuandis, agendisque aliis bonis operibus.



48 Et huiusmodi effectus bonorum operum licet in statu peccati mortalis peractorum, certe non sunt modici: quamvis omnibus viribus cuique sit allaborandum, ut Divina gratia adjuvante vel numquam labatur in peccatum mortale, vel si per fragilitatem humanam ceciderit, citius per veram poenitentiam refurgat, sicque bona opera evadant meritoria de condigno augmenti gratiae sanctificantis, & vitae aeternae, cum sempiterno fructu in Caelis quondam recipiendo.

#### Additio I.

\* Quæres, an actus meritorius eo ipso sit etiam satisfactorius? Ante Responsum nota, quod actus aliquis moraliter bonus quatenus *Meritorius* collationem præmii, quatenus vero *Satisfactorius* respiciat compensationem pro poena alioquin debita & subeunda in vindictam peccati.

Debet autem illud, quod Deo redditur in compensationem poenae alias sustinendae, semper esse aliquo modo afflictivum, uti ex D. Thoma & S. Bonaventura advertit cum aliis Suarez *Tom. 4. in 3. part. disp. 37. sect. 6.* Nam uti ad peccatum ipsum concurrat appetitus boni delectabilis indebiti, ita æquitas postulat, ut compensatio fiat per subtractionem boni delectabilis, quæ subtractio solet esse aliquo modo afflictiva, utpote contra appetitum sensitivum inclinantem in bonum delectabile. H. N.

Resp. Actus meritorius est etiam satisfactorius. Ita communis, & probatur, Actus meritorius est actus alicujus virtutis, prout consideranti patet ex dictis præcedentibus; sed Actus virtutis est etiam satisfactorius; nam Actus virtutis semper est aliquo modo afflictivus, utpote habens annexam aliquam difficultatem in retrahenda voluntate a bono delectabili, transferendo eandem ad bonum honestum, quæ difficultas superata tamquam aliquid afflictivum dein ordinatur in compensationem poenae, alias subeundae propter peccatum: ergo. \*

#### Additio II.

\* Ceteroquin uti ad actum meritorium de condigno vitae aeternae desideratur Status viæ, & gratiae sanctificantis, ita etiam de facto requiritur ad satisfactorium de condigno ex opere operantis pro poena alias in Purgatorio toleranda.

Hincque Animæ in Purgatorio non dicuntur exhibere satisfactionem pro peccatis, sed potius satisfationem; quoniam non sunt in Statu viæ.

Item graves peccatores saltem de potentia Dei ordinaria non censentur satisfacere per suas castigationes & afflictiones pro peccatis in ordine ad delendas poenas Purgatorii, quia etsi sint in via, non tamen existunt in gratia sanctificante, per quam unimur Christo, & in qua unione vis satisfaciendi per opera propria fundatur: in Christo enim vivimus (intellige, vita spiritali per gratiam sanctificantem) mereamur & satisfacimus: inquit Concilium Trid. *Sess. 14. de poenit. cap. 8.* ubi vides, quod pariformiter loquatur de merito, ac satisfatione.

Nec opponas: Satisfactio Sacramentalis habet vim remittendi poenam peccatis confessis debitam, quamvis eadem persolvatur in statu peccati mortalis, prout dicitur Tract. 14. dist. 10. quæst. 1. ergo ad satisfationem quatenus remissivam poenae non requiritur Status gratiae sanctificantis. Respondeo enim disting. anteced. Satisfactio Sacramentalis habet vim remittendi poenam ex opere operato, concedo; ex opere operantis, nego anteced. & similiter distinguo consequens: ad satisfationem remissivam poenae alias in Purgatorio peccatis debitæ non requiritur Status gratiae, si sit remissiva ex opere operato, & præcise respiciendo Merita Christi, concedo: si sit remissiva ex opere operantis, & adiungendo merita propria per Merita Christi dignificata, nego consequentiam.

#### Additio III.

\* Dices adhuc: si famulus in statu peccati mortalis existens dat pauperi eleemosynam, sibi ad hunc finem a Domino communicatam, fructus etiam satisfactorius adhuc manet Domino; ergo ad bonum opus, quale utique est elargitio eleemosynæ, non requiritur status gratiae ad obtinendum fructum satisfactorium.

Resp. disting. consequens, non requiritur status gratiae in eo, qui est causa primaria huius boni operis: prout moraliter loquendo respectu actus misericordiae Dominus largiens revera est causa principalis, & primaria, neg. conseq. In eo, qui est causa tantum instrumentalis, secundaria, & quasi accidentalis, prout in præsentibus censetur esse famulus, conc. conseq.

Econtra vero ponamus alium casum, quod aliquis Superior præcipiat suo subdito, ut pro certo Benefactore oret Rosarium: in tali casu, si subditus recitaret Rosarium existens in statu peccati mortalis, & absque contritione prævie elicitæ, fructus satisfactorius nec recitanti, nec Benefactori applicaretur: quia respectu huius recitationis Rosarii ipse recitans est causa eliciens principalis, in qua requiritur status gratiae. Videantur dicenda Tract. 12. Dist. 3. quæst. 11. & Kazenberger in Supplemento 2. cap. 3. sect. 4. in Append. n. 252. \*

### DISTINCTIO III.

#### De Conscientia ut Regula Actuum Humanorum.

#### QUESTIO I.

De natura, & divisione Conscientiae ut sic; ubi & de Conscientia recta, seu certa.

#### SUMMARIUM.

- 1 Conscientia, unde sic dicta?  
(a) Dist. 2. n. 5.  
Remorsus conscientiae, & Testimonium ejus, quid?
- 2 Conscientia, quid?
- 3 Dividitur in quinque membra.
- 4 Conscientia recta, quid?
- 5 Veritas duplex, speculativa & practica.
- 6 Conscientia recta duplex.
- 7 Quomodo differat a probabili?
- 8 Quanta sit obligatio Conscientiae rectae?

1 **C**onscientia, quæ est regula proxima actionum humanarum, juxta dicta superius (a) sumitur hic pro judicio practico intellectus, proponente quidpiam homini ut bonum vel malum moraliter, ac proinde prosequendum vel fugiendum: ipse enim actus intellectus practici, quo judicat aliquid esse bonum, vel malum aut indifferens in genere moris, vocatur Conscientia. Dicitur autem Conscientia, quasi Cordis scientia, ut advertit D. Bernardus *lib. 1. de Conscientia cap. 8.* & partim se extendit ad opera nostra præterita, ea vel accusando tamquam male facta, & dicitur Remorsus conscientiae; vel commendando tamquam bene facta, & appellatur ab Apostolo 2. Cor. 1. *Testimonium Conscientiae nostrae*; partim vero respicit opera instantia seu futura, dicendo, quæ agenda sint tamquam bona seu honesta, quæque omittenda tamquam turpia seu inhonesta, & dicitur alio nomine *Dictamen rectæ rationis*.

2 **CONCL. I.** Conscientia est actus intellectus practici judicantis aliquid hic & nunc agendum esse, vel fuisse tamquam bonum honestum, aut fugiendum esse, vel fuisse tamquam turpe & inhonestum. Ita Layman *lib. 1. tr. 1. cap. 2.* quæ definitio in re est communis: quamvis Conscientia quandoque etiam accipiat pro habitu intellectus, id est, pro habituali dictamine intellectus, quo cognoscitur hic & nunc operationem faciendam esse bonam, aut malam moraliter.

3 **CONCL. II.** Conscientia hæcenus explicata communiter



munitur dividitur in quinque membra, scilicet in Conscientiam rectam, erroneam seu falsam, dubiam, probabilem seu opinativam, & scrupulosam. Ratio hujus divisionis est: quia Conscientia nihil aliud est, nisi judicium practicum intellectus, dictans, quid hic & nunc a nobis sit agendum, vel non agendum, juxta regulas morum extrinsecas: atqui intellectus sic judicando, quandoque est certus in suo judicio, & dicitur *Conscientia recta*, seu certa: aliquando errat, & dicitur *Conscientia erronea*: quandoque probabiliter judicat, & vocatur *Conscientia probabilis*, seu opinativa: interdum vero dubitat, ac neutri parti determinatum præbet assensum, & est *Conscientia dubia*; & tandem quandoque scrupulis agitur, & dicitur *Conscientia scrupulosa*. Loquendo nunc de altera parte Quæstionis, sit

4 CONCL. III. *Conscientia recta*, seu (ut alii loquuntur) certa & vera, recte definitur, quod sit dictamen verum intellectus, dictans absque ulla formidine de opposito, quod faciendum est, esse bonum vel malum. Ita in re communis. Et quidem, si hujusmodi dictamen practicum intellectus sit rectum, ac verum tam speculativa, quam practica veritate, tum hujusmodi Conscientia dicitur omnimode recta seu vera. Si autem sit rectum, seu verum veritate dumtaxat practica, non autem speculativa, tunc hujusmodi Conscientia dicitur solum practice vera: quæ divisio conscientiarum rectarum ut intelligatur,

5 Notandum, quod *Veritas speculativa* sit veritas simpliciter & absolute sumpta, prout objectum est in re: & hoc modo illud dumtaxat judicium intellectus est verum, quod est conforme objecto, ut se habet a parte rei; quod ita judicat de objecto, prout ipsum revera se habet a parte rei. *Veritas practica* dicitur illa, quæ fundatur in prudenti ac firma estimatione rei, ex gravibus motivis orta.

6 Hinc inferitur, quod *Conscientia tam practice, quam speculative recta*, sit dictamen intellectus, dictans absque ulla formidine de opposito, aliquid hic & nunc esse honestum, ac proinde prosequendum, quod revera a parte rei honestum est: prout sit in innumeris actibus bonis atque honestis, qui ut tales proponuntur ab intellectu voluntati, atque revera a parte rei sunt honesti. *Conscientia solum practice recta*, est dictamen verum veritate dumtaxat practica; id est, desumptum ex prudentibus motivis, dictans absque ulla formidine de opposito, hoc esse honestum & faciendum, quod tamen revera a parte rei non est tale. Exemplum hujus habemus Gen. c. 29. cum Jacob Patriarcha optima fide, & conscientia recta ad Liam accessit, ita secum discurrens: *Honestum est, accedere ad propriam uxorem: hæc est mea uxor* (uti prudenter arbitrari debebat Jacob, cum non nisi temere de mala fide Labani, supponentis sibi pro Rachel Liam, suspicari potuisset) ergo *honestum est, ad hanc accedere*: quod tamen a parte rei non erat, cum Lia pro tunc non fuerit ejus legitima uxor, sed Rachel.

7 Porro cum in definitione Conscientiarum rectarum additur, *absque ulla formidine de opposito*, per hanc particulam Conscientia recta seu certa differt a Conscientia probabilis, utpote quæ non habetur sine ulla formidine de opposito; prout ex dicendis infra Quæst. 4. patebit.

8 Quæres, quanta sit obligatio Conscientiarum rectarum seu certarum, quidpiam præcipientis, aut prohibentis? Resp. certum esse, Conscientiam rectam seu certam adeo obligare hominem, ut his delinquat, atque peccet, nisi illam in operando sequatur, quando præscribit aliquid ut faciendum vel fugiendum sub præcepto & non tantum sub consilio. Ita omnes Doctores. Ratio est: quia voluntas peccat, si in operatione non sequatur suam regulam proximam: atqui Conscientia, præsertim recta, est regula proxima voluntatis operantis, seu actionum ejus; ergo peccat voluntas, nisi Conscientiam recte præcipientem, aut prohibentem, in operando sequatur. Dicitur autem in responsione, & *non tantum sub consilio*; quia si Conscientia recta quidpiam dumtaxat proponat agendum per modum consilii, non autem præcepti, sicuti non obligamur sub peccato ad adimplen-

Anacl. Reiffensuel, Theol. Tom. I.

da omnia consilia (quamvis eadem sequi sit melius, & consultius) ita nec sub peccato tenemur sequi Conscientiam rectam, quidpiam sub consilio dumtaxat proponentem; ut certum est.

## QUESTIO II.

### De Conscientia erronea, ejusque obligatione.

#### SUMMARIUM.

- 9 Conscientia erronea, quid?
- 10 Conscientia practice dumtaxat recta an sit erronea?
- 11 Conscientia erronea invincibilis, & vincibilis, quid? (b) Dist. I. q. 5. n. 40.
- 12 Conscientia erronea quæcumque obligat negative &c.
- 13 Corollaria ex dictis.
- 14 Actio debet esse libera, ut quis peccet agendo contra Conscientiam erroneam.
- 15 Ad hanc non sufficit solus scrupulus.
- 16 Conscientia invincibiliter errans, obligat etiam positive.
- 17 Corollarium.
- 18 Conscientia vincibiliter errans obligat, ut eam deponamus, &c.
- 19 Alioquin peccabit operans, quamcumque partem elegerit.
- 20 Solvitur instantia.
- 21 Conscientia erronea, quomodo sit deponenda?
- 22 Notabilis objectio; & quomodo Lex Divina nullum reddat perplexum?
- 23 Quid agendum, quando utraque contradictionis pars putatur esse peccatum?
- 24 Quid, si quis nesciat discernere, ubi sit minus malum?

9 CONCL. I. Conscientia erronea est illa, quæ dicat aliquid esse faciendum, vel non faciendum, quod revera tale non est, absque fundamento probabilis. Et dicitur, *absque fundamento probabilis*, ad differentiam Conscientiarum probabilis, quæ quandoque etiam dicat aliquid esse honestum seu licitum, quod a parte rei est inhonestum ac illicitum; & tamen, quia id colligit ex motivis probabilibus, non dicitur conscientia erronea, sed probabilis.

10 Si quærat, an Conscientia practice dumtaxat recta, possit dici erronea, nec ne? Resp. cum Maffrio disp. I. Theol. moral. num. 14. hanc esse quæstionem de nomine; nam hujusmodi Conscientia potest dici & recta, & erronea, sub diverso tamen respectu. Recta quidem respectu voluntatis, quia prudenter eam dirigit, quantum satis est, ut ipsa non peccet; & hæc dicitur *Rectitudo practica*. At respectu objecti potest dici erronea, quia re ipsa errat circa objectum, putans esse honestum, quod tamen a parte rei tale non est.

11 CONCL. II. Conscientia erronea dividitur in invincibilem, & vincibilem. Ita communis. Conscientia erronea invincibilis est, cujus error adhibita diligentia morali, vinci seu vitari non potuit; ideoque non voluntarius est, nec ad culpam imputatur: talis fuit in Jacob Patriarcha accedente ad Liam. Conscientia erronea vincibilis est, cujus error, moraliter loquendo, vitari potuit, & debuit; ac proinde indirecte voluntarius, atque culpabilis existit. Unde colligitur, hanc divisionem Conscientiarum erronearum in invincibilem ac vincibilem multum coincidere cum divisione Ignorantiarum in invincibilem & vincibilem, de qua superius (b) etenim prior procedit ex Ignorantia invincibili, posterior autem ex vincibili.

12 CONCL. III. Conscientia erronea quæcumque, sive vincibilis sit, sive invincibilis, præcipientis aliquid ut agendum vel fugiendum, obligat negative, ne videlicet contra eam operemur; ac proinde operari contra ejusmodi Conscientiam erroneam nondum depositam, semper est peccatum. Ita certa, & communis Theologorum. Nam juxta illud Rom. 14. *Omne, quod non est ex fide* (id est, ex dictamine conscientiarum) *peccatum est*.



Et, ut inquit Innocentius III. c. *Litteras, de Restit. spoliat*: quidquid sit contra conscientiam, adificat ad gehennam. Accedit ratio: quia voluntas operans contra Conscientiam erroneam, vere consentit in malum, habetque sufficientem affectum ad peccatum, quod apprehendit. Nec obstat, quod Conscientia illa sit erronea. Nam hoc ipso, quod error ejus non cognoscatur, agere contra ipsum est peccatum: ita enim Conscientia illa proponit in apprehensione operantis, objectum esse faciendum aut fugiendum, ac si re ipsa sic se haberet.

13 Ex dictis infertur, quod putans esse jejunium de præcepto, quando non est, peccet contra Temperantiam, si non jejunet, nisi Conscientiam suam erroneam, melius investigando veritatem, deponat. Similiter, si quis erronee putet, mentiri officiose in tali casu esse peccatum mortale, ac nihilominus mentiatur, peccat mortaliter, quamvis ceteroquin tale mendacium sit solum veniale. Insuper sequitur, quod operans contra Conscientiam erroneam, sive vincibilem, sive invincibilem, peccet in ea specie peccati, & contra illam virtutem, sicuti intellectus falso judicat: v. g. in prædictis duobus casibus prior peccat contra virtutem Temperantiam, alter in specie mendacii mortalis. Item si quis erronee existimet, se peccaturum mortaliter, operando contra hanc conscientiam erroneam, peccabit mortaliter; si venialiter, venialiter: quod si Conscientia dicat peccatum in genere, non descendendo ad aliquam speciem ejus, erit peccatum in genere, & ad nullam particularem peccati speciem pertinebit. Siquidem tota malitiae hujus ratio consistit in hoc, quod quis operatur contra dictamen suae conscientiae; ergo talis & tanta erit malitia, qualem & quantam Conscientia dicit.

14 Notandum tamen cum Sanchez *lib. 1. in Decalogum cap. 11. num. 3.* & aliis, ad hoc, ut quis contra Conscientiam erroneam agendo peccet, necessarium esse, ut actio ipsius sit libera. Hinc si quis in carcere v. g. constitutus existimet, se peccare Missam non audiendo, non ideo peccat: similiter non delinquit scrupulosus, cum involuntarias suas passiones aut in oratione distractiones, peccata esse arbitratur. Ratio est clara: quia ad omne peccatum requiritur libertas.

15 Adde etiam cum Navarro in *Manuali. Prælude 9. n. 9.* & Doctoribus communiter, quod ad hujusmodi Conscientiam erroneam induendam non sufficiat solus scrupulus in genere, vel in particulari. Hinc si quis faciat opus licitum, quod credit ei licere, non peccat, licet angatur scrupulo aliquo in contrarium: quia scrupulosus, quamvis aliquo modo angatur, ac vereatur hic latere peccatum, non tamen determinate sic judicat, imo potius oppositum credit esse verum. Quod si tandem conscientia erronea sit dumtaxat consulens, vel permittens, sicut non est peccatum agere contra consilium, ita nec foret peccatum agere contra istam Conscientiam.

16 CONCL. IV. Conscientia invincibiliter errans, præcipiens aliquid ut agendum aut fugiendum, non solum obligat negative, ne scilicet contra eam operemur, juxta proxime dicta; sed obligat etiam positive, ut ipsam sequamur, ut proinde quis peccet, nisi dictamen illius in operando sequatur. Ita Scotus 2. in *Reportatis, dist. 39.* Matrius *disp. 1. Theol. moral. num. 19.* & communis Theologorum. Ratio est: quia ex quo Conscientia est invincibiliter errans, taliter, ut nulla morali diligentia vinci ac deponi possit, ita ipsa se habet in prudenti ac inculpabili æstimatione operantis, ac si esset simpliciter & absolute recta; ergo tenetur quis eam sequi, non minus, ac Conscientiam rectam seu certam.

17 Infertur proinde, quod si quis mentiatur ad liberandum proximum e periculo vitæ, ob Conscientiam invincibiliter errantem, putans, se ex misericordia ad id teneri, is actum bonum faciat, & si non mentiatur, peccet contra virtutem Misericordiae. Dicitur notanter, ob Conscientiam invincibiliter errantem putans, &c. nam si Conscientia illa erronea fuisset vincibilis, aliud esset dicendum, juxta Conclusionem sequentem.

18 CONCL. V. Econtra Conscientia vincibiliter dumtaxat errans, proponens aliquid ut præceptum, quod revera prohibitum est, aut econtra, non solum non obligat positive, ut eam sequamur, sed neque licite ipsam sequi possumus; obligat tamen, ut eam deponamus. Ita Doctores communiter. Ratio est: quia ex una parte agere contra Conscientiam erroneam, est peccatum, ut patet ex dictis n. 12. ex altera vero parte conscientia talis erronea, utpote vincibilis, non excusat a peccato; ergo qui eam sequitur, revera peccat, & qui contra eam nedum depositam operatur, etiam peccat.

19 Superest proinde, quod quis obligetur ad deponendam Conscientiam suam erroneam vincibilem. Et hæc quidem obligatio tanta est, ut in ejusmodi casu, stante tali conscientia erronea vincibili, quamcumque tandem partem quis elegerit, sit peccaturus: nam si facit id, quod revera a lege præceptum est, operabitur contra Conscientiam suam oppositum dictantem; sin minus, sed sequatur dictamen Conscientiae suae, peccabit contra legem, a qua non absolvitur per errorem suae Conscientiae, utpote mere vincibilem & culpabilem.

20 Nec dicas, posse hominem in tali occasione constitui, ut non possit suam conscientiam vincibiliter errantem deponere; prout v. g. contingeret, si alius non adesset, a quo possit consilium petere, reique veritatem ediscere, ipse vero semetipsum adjuvare non valeat. Respondenim cum Matrio *disp. 1. Theol. moral. n. 34.* & aliis, in hujusmodi casibus Conscientiam illam revera reddi invincibilem; siquidem qui illam habet, non potest hic & nunc eam superare atque deponere, ac proinde sequendo illam non peccabit, prout dictum est *num. 16.* loquendo de Conscientia invincibiliter errante.

21 Quod si quis quærat, quomodo conscientia erronea sit deponenda? R. Quando Conscientia erronea est vincibilis, eam facile deponi posse, dummodo quis debitam adhuc diligentiam in investigando rei veritatem, illudque attentius consideret, in quo se falli suspicatur, discurrendo ex primis principiis practicis ad suum errorem agnoscendum. Idem, & quidem facilius fieri potest, adhibendo consilium prudentioris, juxta illud Prov. 13. *Qui agunt omnia cum consilio, reguntur sapientia.* Et Ecclesiastici 32. *Fili, sine consilio nihil facias, & post factum non punitebis.* Cæterum Conscientia erronea invincibilis, hoc ipso, quod sit invincibilis, moraliter deponi nequit: nam ad libitum, & sine ulla ratione, non nisi temere deponeretur.

22 Objicies contra IV. & V. Conclusionem simul. Lex divina nullum reddit perplexum: atqui hoc fieret, si conscientia erronea sive vincibilis, sive invincibilis semper obligaret negative, ne scilicet voluntas contra ipsam agat; ergo Conscientia erronea non sic obligat. Major est certa, & ab omnibus concessa: quia Lex Divina numquam facit, quod homo necessario peccet, ita ut peccatum evadere non possit; nam hoc ipso jam non committeretur peccatum defectu libertatis. Minor vero probatur: potest enim quis ex Conscientia erronea existimare, utramque partem contradictionis esse peccatum; prout fieret, si quis die Festo assistens moribundo existimaret, esse peccatum mortale, tali die omittere auditionem Sacri, ac vicissim esse peccatum mortale in tali extrema necessitate deferere moribundum; ergo. Ad hanc objectionem satis notabilem, & quæ varie proponi, atque urgeri potest, Resp. concessa majori, negando minorem, ejusque probationis consequentiam: nam si ejusmodi Conscientia erronea sit vincibilis, tenetur homo eandem deponere juxta proxime dicta, & tunc alterutrum eligere, quod judicat hic & nunc esse faciendum; videlicet (loquendo de præmissis casu) audire Missam, si adsint alii, qui commode possunt moribundo assistere, atque inservire; vel, si hi non adsint, omittere Missam, & moribundo assistere, ob rationes mox dicendas.

23 Quod si vero Conscientia erronea sit invincibilis, & talis, quam deponere quis nequeat discurrendo per prima principia practica, vel petendo consilium a doctioribus; tunc tenetur homo in ejusmodi casu constitutus eligere



eligere illud, quod sibi minus malum apparet, & hoc faciendo non peccabit. *arg. c. Duo mala, dist. 13. & can. Juravit David. 22. q. 4.* At vero, si eligat illud, quod gravius peccatum esse judicaverit, peccati reus erit; ut communiter notant Doctores. Ratio est: quia omne peccatum non ex necessitate, sed ex libertate admittitur; ergo cum hic & nunc (juxta datam hypothesein) necessario sit unum eligendum ab homine, non libertate, sed necessitate eligit minus, sicque non peccat: peccaret autem eligendo majus, quia potest excessum malitiæ ejus vitare eligendo id, quod sibi minus peccatum apparet.

24 Si autem in tali casu constitutus discernere, atque judicare ex perplexitate aut alia causa non possit, quodnam illorum sit minus malum sive peccatum, sed in utroque actu parem apprehendat malitiam, homo ille non peccabit, quidquid egerit ex utroque; quia nemo peccat necessitate. Exemplum hujus proxime præmissum est. Aliud cum Laymano *lib. 1. tr. 1. c. 4. n. 4.* addi potest de Parocho: nam si Parochus ad Ecclesiam Festo die veniens, sacrificaturus pro populo, recorderetur se jejunum non esse, nec alius Sacerdos tunc accersiri possit, qui celebret (in quo casu Parochus videtur perplexus: si enim celebrem, cogitat ipse, peccabo adversus reverentiam Sacramenti, propter legem Ecclesiæ: si autem non celebrem, peccabo contra legem Charitatis, propter scandalum populi) profecto in tali casu, si scandalum aliter evitari non potest, ut supponitur, Parochus celebrare deberet; cum lex Ecclesiastica cedat majori legi Charitatis naturalis: si tamen hanc ipsam veritatem præ inopinata perturbatione perspicere nequeat, nec alium habeat, a quo edoceatur, non peccabit Parochus, licet Sacrificio abstineat cum scandalo populi.

### QUESTIO III.

#### De Conscientia dubia, ejusque obligatione.

#### SUMMARIUM.

- 25 Conscientia dubia, quid?
- 26 Dividitur varie juxta variam Dubii divisionem.  
Dubium speculative, &  
Conscientia speculative dubia, quid?
- 27 Dubium practicum, &  
Conscientia practice dubia, quid?
- 28 Dubium practicum duplex, generale;  
Et particulare, seu practice practicum.
- 29 Dubium positivum, & negativum, ac Conscientia positive & negative dubia quid?
- 30 Cum Conscientia practice dubia illicitum est operari.
- 31 Et operans cum ea peccat pro qualitate dubii.
- 32 Loquendo tamen de dubio proprie practico.
- 33 Cum Conscientia solum speculative dubia, seu practice deposita, non est illicitum operari.
- 34 Declaratur hoc exemplo.
- 35 In dubiis tutior pars est eligenda, quomodo?
- 36 Corollaria practica.

25 **CONCL. I.** Per Conscientiam dubiam intelligitur ea, quæ neutri parti determinatum præstat assensum, sed anceps manet inter utramque, v. g. an hoc sit licitum, vel non licitum, peccatum, nec ne? Unde Dubium in præsentī accipitur proprie, nempe pro eo, quod contingit, quando intellectus inter duas partes oppositas hæret suspensus, adeo quod neutri determinatum præbeat assensum.

26 **CONCL. II.** Conscientia dubia varie dividitur, juxta variam scilicet Dubii divisionem. Hinc, quia Dubium in primis dividitur in practicum, & speculative, etiam conscientia dubia communiter dividitur in Conscientiam practice dubiam, & speculative dubiam. *Dubium speculative* dicitur illud, quando dubitatur de veritate, id est, quando dubitatur de aliquo, non quærendo directe de praxi, seu actione humana, num ea licita sit, nec ne, sed de quodam alio; an ita se habeat, nec ne, v. g. si dubito, utrum Baptismus collatus in nomine Christi tantum, sit validus; utrum tali die sit *Anacl. Reiffenstuel Theolog. Tom. I.*

jejunium, nec ne; utrum fundus, quem possideo, vere sit meus; utrum votum castitatis emiserim; utrum matrimonium, quod contraxi, sit validum; utrum bellum, in quo milito, sit justum &c. Hæc enim omnia & alia his similia, spectant ad Dubium speculative: quia in ipsis directe ac immediate non quæritur de praxi, seu actione humana, an ea sit licita, nec ne, sed de quodam alio, ut patet; non obstante, quod ex tali Dubio speculative multa postmodum Dubia practica oriri possint. Et juxta hoc Conscientia speculative dubia est intelligenda, quod nempe sit ea, quæ dubitat de aliquo, non tamen quærendo directe ac immediate de praxi, seu actione humana, utrum ea licita sit, nec ne, sed de aliquo alio; ut sit in allatis exemplis.

27 *Dubium practicum* est, quando dubitatur de operatione; id est, practicum dubium dicitur illud, in quo directe quæritur de ipsa praxi, seu actione humana, num ea in talibus circumstantiis sit licita: nec ne? v. g. an hodie teneam jejunare, an sim obligatus hac die audire Missam, vel confiteri? an teneam restituere fundum, quem habeo &c. Et huic Dubio practico correspondet Conscientia practice dubia; estque illa, quæ dubitat immediate de praxi, seu actione humana, utrum ea licita sit, nec ne? prout sit in allatis exemplis, & aliis hujusmodi.

28 Dubium practicum subdividitur a nonnullis Theologis in generale, & particulare. *Dubium practicum generale*, seu universale, dicitur illud, quando dubitatur in genere, an hæc, vel illa actio sit licita; v. g. an per se loquendo liceat ad Beneficium Ecclesiasticum eligere minus dignum relicto digniore; an liceat die Festo bellare, piscari, pingere &c. *Dubium practicum particulare* (quod proprie practicum, seu practice practicum appellatur) censetur illud, quando in particulari dubitatur, utrum hic & nunc licita sit talis actio, nec ne? v. g. an hodie excuser a jejunio ob certas circumstantias, nempe ob aliqualem infirmitatem, iter, labores susceptos, &c. Et juxta hoc etiam Conscientia practice dubia subdividi potest.

29 Dubium ulterius a Theologis subdividitur in positivum, & negativum. *Dubium positivum* tunc contingit, quando quis habet pro utraque parte judicium probabile, quod aliquid sit, & etiam quod non sit. Et juxta hoc tunc dicitur Conscientia nostra positive dubia; quando pro utraque parte occurrunt rationes æque probabiles, adeo ut intellectus in neutram partem judicium suum inclinet, sed videns rei difficultatem, ac rationes utrinque pugnantes, in suo judicio maneat suspensus. *Dubium negativum* est, quando quis pro neutra parte habet rationes probabiles, & sic remanet suspensus neque affirmando, neque negando, quod talis actus sit licitus, aut illicitus. Et hoc modo etiam Conscientia negative dubia est explicanda.

30 **CONCL. III.** Cum Conscientia vere practice dubia semper est illicitum operari; id est, semper est peccatum, operari stante Conscientia vere ac proprie practice dubia, qua nempe dubitat, an in particulari illud sit peccatum, nec ne, quod operatur. Ita Scotus *Quæst. I. Prologi, in fine, & in 4. dist. 30. quæst. 1. §. Dico ergo*; estque communis Doctorum. Ratio est: quia qui operatur cum Dubio proprie practico, seu (ut alii loquuntur) practice practico, manifeste se exponit periculo peccandi; ergo etiam peccat, juxta illud Eccle. 3. *Qui amat periculum, in illo peribit.* Confirmatur Conclusio ex illo Rom. 14. *Omne, quod non est ex fide, peccatum est*: atqui illud, quod fit cum Conscientia practice dubia, non est ex fide, id est, ex dictamine Conscientiæ; ergo est peccatum.

31 **CONCL. IV.** Operans cum conscientia practice dubia, peccat pro qualitate dubii, & in ea specie peccati, de qua dubitat: ita ut, si dubitet, an peccet mortaliter, agendo mortaliter peccet; si venialiter, peccet venialiter, si dubitet, an in specie furti delinquat, operando malitiam furti contrahat, & sic loquendo de aliis. Ita rursus Scotus *loc. cit.* & communiter Doctores. Ratio est: quia operans cum tali



dubio practico, exponit se periculo transgrediendi præceptum tale vel tale, & peccandi in ea specie peccati, de qua dubitat; ergo etiam malitiam ejus contrahit. Probatur consequentia: quia juxta illud allegatum: *Qui amat periculum, in illo peribit*: atqui talis exponit se periculo peccandi in tali specie peccati; ergo operando cum tali periculo perit in ipso, id est, peccat in tali specie peccati. Et hoc Doctores passim extendunt ad casum, quo cuipiam in confuso proponitur aliquod opus peccaminosum a Conscientia, sub dubio tamen, an sit mortale vel veniale: nam exequens tale opus stante illo dubio practico (sermo est de dubio proprie practico, & non de simplici anxietate, vel scrupulo) peccat mortaliter; quia operans cum tali dubio practico, exponit se periculo peccandi mortaliter. Concordant in simili dicta superius n. 13. de Conscientia erronea.

32 Ad huc notanter, sermo est de dubio proprie practico &c. Nam dicta in hac utraque Conclusionem, intelligenda sunt de vero & proprie dicto dubio practico; id est, de tali, quo quis vere ac in particulari dubitat, an hoc vel illud sit peccatum mortale vel veniale, ita quod habeat verum judicium suspensum, neque illud deponat. Nam si quis vere dubitet, sed solum patiatur quosdam timores, anxietates, aut scrupulos, quia sæpe etiam hominem nolentem affligunt, non peccabit operando contra illos; præsertim si hoc faciat ex ratione aliqua probabili, vel sequendo consilium Confessarii, aut aliorum Doctorum, prout magis dicitur infra *Quest. 5. agendo de Conscientia scrupulosa*.

33 CONCL. V. Nihilominus operari cum conscientia solum speculative dubia, non semper est peccatum; etenim si tale dubium ex rationabili fundamento practice deponatur, peccatum non est facere aliquid, vel omittere cum dubio speculativo. Ita Doctor noster in 4. dist. 30. q. 1. estque rursus communis Doctorum. Ratio est: quia regula nostrarum actionum non est notitia speculativa, quæ in sola objecti veritate cognoscenda consistit, sed practica, quæ omnium circumstantiarum qualitatem & conditionem perpendit; atqui objectum, quod secundum se & speculative consideratum apparet dubium, accidentibus certis circumstantiis potest reddi practice certum, quod liceat; ergo.

34 Declaratur Conclusio exemplis: inprimis, si quis dubitet speculative, an res, quam possidet, sit sua, nec ne, non obstante ejusmodi dubio speculativo, potest practice judicare, sibi de facto licitum esse rem illam retinere, eo quod in dubio melior sit conditio possidentis: sicque licite, & absque peccato rem illam retinebit. Similiter Sacerdos ægrotus, qui considerata qualitate morbi sui speculative dubitat, an sibi liceat a Divini Officii recitatione abstinere, accedente Medici vel Confessarii consilio practice est certus id sibi licere: unde deposito practice illo dubio suo, non peccabit omitendo Divinum Officium. Insuper miles, si speculative dubitet de justitia belli, potest hoc dubium practice deponere, atque ad mandatum sui Principis vel Ducis in eo militare, eo quod in dubiis standum sit judicio Superiorum, simulque sibi a suo Principe hic & nunc pugna præcipiatur: & taliter deponens dubium suum speculativum, non peccabit militando. Idem dicendum de innumeris aliis casibus.

35 Quæres, quomodo sit intelligendum illud commune dictum, *in dubiis tutior pars est eligenda*, prout desumitur ex Jure Canonico. *g. Juvenis, de sponsalibus*; & c. *Ad audientiam, de Homicidio*, & alibi. Resp. I. Per hoc axioma non intendi, quod in omni materia, omnique dubio, etiam mere speculativo, semper sit eligenda tutior pars; nam dubium speculativum potest ex rationabili fundamento practice deponi, sicque cessat dubium: quia non est in dubio, qui probabilibus rationibus flectitur ad unam partem. Sylvester *vers. Opinio*, q. 1. Quinimo in certis materiis possumus etiam

eligere partem minus tutam relicta tutiore, prout ex professo dicitur *Quest. sequenti. Resp. II. cum Ludov. Engel. tit. De Voto, num. 3.* & aliis, hanc regulam plerumque esse tantum de consilio, & non de præcepto, nisi quis in dubio practico perseveret, neque ad ejus depositionem sese resolvere possit: tunc enim non licet agere cum tali Conscientia practice dubia, sed debet eligi pars tutior, juxta dicta num. 30. & 31. Alii respondent, dictum illud procedere in dubio negativo, ac proprie dicto, quando nimirum pro neutra parte adsunt ullæ rationes, vel saltem non sufficientes, cur unam præ altera amplecti debeamus; secus autem esse in dubiis positivis, quando utrinque sunt rationes probabiles. Et hac ratione pro nunc potest responderi ad citatos textus Juris: nam exactior illorum Capitulorum explicatio spectat ad interpretes Juris Canonici.

36 Ex hæcenus dictis inferitur, si quis dubitat, utrum aliqua actio sit peccatum, nec ne, videt autem, omitendo talem actionem nullatenus se peccaturum, quod is teneatur perseverante tali dubio abstinere ab illa actione; alioquin enim peccaret. Quod si vero Conscientia dubia existat de utraque contradictionis parte, ita ut quis dubitet, an ipsa actio sit peccatum, aut potius ejus omissio, tunc tutior pars sic debet eligi, quod dubitans abhibeat diligentiam, quam potest, ad dubium prudenter deponendum, petendo videlicet consilium a doctioribus, vel ex se discurrendo, Deumque rogando, ut se dignetur illuminare: hoc enim est tutius, utpote cum in depositione talis Conscientiæ dubiæ nullum subsit periculum peccandi, bene tamen in executione aut omissione actus durante tali dubio. Si autem adhibitis præfatis mediis pro neutra parte possit quis dubium deponere, eligat illam partem, in qua minus mali sibi apparet; quia hæc censetur tutior in tali casu, juxta illud commune dictum (& habetur *can. Duo mala, & can. Nervi, dist. 13.*) *Ex duobus malis minus est eligendum, & tunc aliquis non peccabit eligendo minus malum.*

#### Q U Æ S T I O I V.

De Conscientia probabili, & an ipsam licite sequi possimus?

37 PRæsens Quæstio est una ex utilissimis, quæ occurrunt in Tractatu de Actibus Humanis: quia vero ipsa ob sui nobilitatem, simulque copiam materiarum, longiori indiget discussione, ne ejus prolixitas pariat confusionem, expedit, ut eam in Paragraphos dividamus.

##### §. I.

Quid sit Conscientia, & Opinio probabilis?

#### S U M M A R I U M.

- 38 Conscientia probabilis, quid?
- 39 Est cum formidine de opposito.
- 40 Diversitas sententiarum in judicando, quæ Opinio sit probabilis.
- 41 Opinio probabilis, quæ?
- 42 Opinio probabilis probabilitate intrinseca, vel extrinseca, quid?
- 43 Est alia magis, alia minus probabilis, & tuta.
- 44 Per probabilitatem quantumvis tenuem, quid intelligatur?
- 45 Sententia Raymundi Lumbier.
- 46 Sententia Joannis de Cardenas.

38 CONCL. I. Conscientia probabilis, quæ etiam opinativa dicitur, est judicium practicum intellectus, quo quis ex gravi, licet non penitus certo fundamento, assentit, & adhæret uni parti determinate, sed cum formidine de opposito. Ita in re communis. Differt inprimis a Conscientia certa seu recta, quod hæc relinquat intellectum certum de una parte contradictio-



nis, non autem Conscientia probabilis, utpote quæ habetur cum formidine de opposito. Differt etiam a Conscientia dubia, utpote quæ neutri parti determinatum præbet assensum, sed manet anceps ac suspensa intra utramque contradictionis partem; non sic Conscientia probabilis, utpote quæ determinate assentit uni parti ex fundamento probabili, licet cum formidine de opposito.

39 Dicitur notanter, *licet cum formidine de opposito*: nam, cum illud fundamentum non sit omnino evidens, sed probabile tantum, potest ipsi subesse falsum. Ceterum per hanc formidinem de opposito tollitur quidem firmitas assensus, non autem ejus determinatio: adhuc enim intellectus determinate assentit uni parti, & quidem ex gravi fundamento, licet non adeo firmiter, prout fit in Conscientia recta. Quod si vero intellectus in re morali formet iudicium circa honestatem, malitiam aut indifferentiam actus, vel objecti dumtaxat ex levi, vel etiam nullo fundamento, ea non erit Conscientia probabilis, sed improbabilis & temeraria.

40 Quantum attinet ad alteram partem quæstionis, necessario prorsus præmittendam, eo quod Conscientia probabilis sequatur ad opinionem probabilem, sicut assensus conclusionis ad assensum præmissarum, quænam in specie opinio censeri debeat probabilis, prout discernitur ab improbabili, hoc opus, hic labor est: quot enim capita, tot sententiæ, & qui alicujus opinionis assertor est, illi veram probabilitatem assignat. Quinimo jamjam cruda illa quorundam assertio cœpit in auribus prurire, quod unus aut alterius Auctoris dictum fundet opinionem probabilem. Sed quoniam hæc doctrina periculosa sane fuit, non immerito eandem Sedes Apostolica rejiciendam censuit, dum Alexander VII. inter alias Propositiones etiam hanc, ordine 27. damnavit: *Si liber sit alicujus junioris, & moderni, debet opinio censeri probabilis, dum non constet, rejectam esse a Sede Apostolica tamquam improbabilem*. Hac itaque Propositione dimissa, sit

● 41 CONCL. II. *Opinio probabilis* generatim illa censetur, quæ gravi nititur fundamento, licet non penitus certo, simulque nullam contra se habet rationem convincentem. Ita communior modus loquendi Doctorum: neque dissentit Aristoteles 1. *Top. cap. 1.* ubi ait: *Probabilia sunt, quæ videntur omnibus aut pluribus, vel sapientibus omnibus, aut plurimis*. Præsertim autem ad hoc, ut opinio censeri possit probabilis, requiritur, quod non sit contra Sacram Scripturam, Definitionem Sanctæ Matris Ecclesiæ, Traditiones Sanctorum Patrum, aut unanimum Doctorum consensum: nam opinio in aliquo horum deficiens, non tam opinio censeri debet, quam Hæresis, vel Error, aut Temeritas.

42 Ceterum quia grave illud fundamentum, cui opinio probabilis innititur, duplex esse potest, intrinsecum videlicet, atque ex ipsa rei natura, effectibus & circumstantiis ipsius desumptum; & extrinsecum, nempe ex magna Doctorum eam tenentium auctoritate depromptum: hinc dupliciter poterit opinio quædam operanti esse probabilis, scilicet vel probabilitate intrinseca, vel probabilitate saltem extrinseca. *Opinio probabilis probabilitate intrinseca* dicitur illa, cujus probabilitas habetur ex ratione; id est, ex principiis intrinsecis talis propositionis, qualia sunt causæ, vel effectus ipsius, aut definitio, vel circumstantiæ, aut quid simile. *Opinio probabilis probabilitate extrinseca* censetur ea, quæ habetur ab auctoritate; id est, a gravitate atque prudentia Doctorum eam tenentium: qualis potissimum habet locum respectu idiotarum, & hominum minus peritorum, qui rationes intrinsecas examinare, atque de ipsis iudicium ferre non possunt: quibus proinde ad prudenter & rationabiliter, sicque ad probabiliter operandum, sufficit, si a Viro docto, prudenti, pioque intelligant, hoc sibi licere. Quinimo etiam apud Virum doctum quandoque auctoritatem alicujus Doctoris valde periti, & timoræ conscientia, majoris esse ponderis, quam esset ratio aliqua verisimilis ceteroquin ad probabilitatem sufficiens, inter a-

lios notat Sanchez lib. 1. in *Decal. cap. 9. num. 8.* cum auctoritas tanti Doctoris, & qui rem mature examinasse, probeque intelligere censetur, non sit leve fundamentum.

43 Insuper quia fundamentum illud, cui innititur opinio probabilis, potest esse majus & minus, seu magis minusque grave; hinc sequitur, inter opiniones probabiles dari latitudinem: ex his enim alia est probabilior, quæ videlicet firmiori fulcitur fundamento, efficacioribusque firmatur rationibus; alia minus probabilis, quæ licet habeat fundamentum ad probabilitatem sufficiens, non tamen tam firmum, ut altera opinio. Tutior autem opinio dicitur ea, in qua minus periculum peccandi reperitur: & potest bene accidere, quod opinio aliqua sit tutior, non tamen probabilior, imo minus probabilis. Exemplum sit in ea quæstione, an furtipiens rem proximi in extrema necessitate, teneatur ad restitutionem, si ad pinguiorem fortunam pervenerit: nam in hoc casu tutius erit restituere, quia restituendo nequit committi peccatum: nihilominus opposita sententia, negans obligationem restituendi, est probabilior, eo quod jure poli in extrema necessitate sint omnia communia.

44 Quæres, quid intelligatur per *Probabilitatem quantumvis tenuem*, de qua loquitur Propositio novissime damnata ab Innocentio XI. estque ordine 3. & sic sonat: *Generatim dum probabilitate, sive intrinseca, sive extrinseca, quantumvis tenui, modo a probabilitatis finibus non exeat, confisi aliquid agimus, semper prudenter agimus*. Resp. I. Hæc Præpositio damnatur a Pontifice, sicut jacet, prout in principio sui Decreti monet idem Pontifex: unde cumprimis rejecta est sententia, quæ indefinite, atque in omni casu & materia, licitam esse sequelam opinionis probabilis asserit.

45 Resp. II. Quænam sit opinio tenuiter probabilis, atque in citato Decreto damnata, variant Doctores. Et quidem Raymundus Lumbier Tom. 3. *Summæ an. 1737.* distinguit duplex genus opinionum probabilium, eo quod aliæ sint certe probabiles, & aliæ sint probabiliter probabiles; & addit, per opiniones tenuiter probabiles in citato Decreto intelligi eas, quæ solum sunt probabiliter probabiles: id ipsum sentit Emmanuel de Filguera in *Lucerna Decretali, in expos. 3. Proposit. Innocentii XI.* Et hi auctores per opinionem certo probabilem volunt intelligi eam, quæ est intrinseca ex fundamentis, quibus innititur; vel ex Doctoribus, si existat extrinseca, qui eam tuentur, imo ex contrariis eam probabilem vocantibus: unde talis opinio certitudinem tribuit sive eam sequenti, sive consulenti, quod sit probabilis. Probabilitas probabiliter talis dumtaxat desumitur communiter ex paucis Doctoribus eam opinioni tribuentibus, sed ab aliis plerumque probabilis non censetur: & addunt, quod ejusmodi opinioni probabiliter tali nefas sit adhærere, quia ex ea nequit aliquis prudenter certum dictamen concipere ad operandum, sed tantum dubium.

46 Econtra Joannes de Cardenas, in *Crisi Theologica, ad propositionem III. Innocentii XI. cap. 2. n. 34.* ait, quod opinio tenuiter probabilis, quæque in dicto Decreto damnatur, non sit ea, quæ est probabiliter probabilis (qui enim format iudicium probabile de probabilitate opinionis, non habet dubium practicum de illa, sed potius iudicium reflexum certum) sed illa, quæ quamvis habeat probabilitatem apparentem, plures autem Viri sapientes dubitant de ejus probabilitate. Sive ea (inquit) censetur opinio tenuiter probabilis, de cujus probabilitate merito dubitatur: unde opinio tenuis probabilitatis in idem recidit, ac opinio dubiæ probabilitatis; quando autem dubitatur de probabilitate, intervenit dubium practicum, in quo tutior pars est amplectenda. Plura de his citatus Cardenas: nobis in progressu non est sermo de opinionibus tenuiter dumtaxat probabilibus.



## §. II.

An sit licitum sequi Sententiam probabilem etiam in concursu probabilioris & tutioris?

## S U M M A R I U M.

- 47 *Quæstiones aliæ versantes circa honestatem actus, aliæ circa Materiam facti, quæ?*  
 48 *Notabile discrimen inter utrasque.*  
 49 *Quod amplius declaratur.*  
 50 *Licitum est, in rebus moralibus sese conformare Conscientiæ vere probabili.*  
 51 *Frustra post factum inquiritur sententia probabilis.*  
 52 *Ex propositionibus æque probabilibus, & circa honestatem Actus versantibus, potest eligi qualibet pro libitu.*  
 53 *Imo & opinio vere quidem, sed minus probabilis, relicta probabiliori & tutiori.*  
 54 *Quamvis id non semper expediat.*  
*Neque locum habeat quoad Propositiones de Fide.*  
*(c) Tract. 4. dist. 2. n. 30.*  
 55 *Confessarius debet se conformare opinioni penitentis vere probabili.*  
 56 *Premissa doctrina non habet locum in Quæstionibus circa Materiam facti versantibus.*

47 **A**Dvertendum, quod quantum ad propositum, aliæ Quæstiones versantur circa honestatem actus, quæ solet vocari *Materia Juris*, & aliæ circa naturam, conditionem seu validitatem actus, quæ dici solet *Materia facti*, ut notat *Mastrius 2. Sent. disp. 5. n. 142. & in Theol. mor. disp. 1. n. 73. Quæstiones circa honestatem actus versantes*, dicuntur illæ, in quibus quæritur, an hæc vel illa actio sit licita & honesta, ita ut absque peccato fieri possit: puta, an vir sexagenarius teneatur ad jejunium Ecclesiasticum? an Clericus voluntarie distractus sub recitatione Horarum Canoniarum, satisfaciatur? an in die Festo licitum sit pingere? ac hujusmodi. *Quæstiones versantes circa validitatem, naturam seu conditionem actus*, hoc est, circa Materiam facti, censentur illæ, in quibus de aliquo horum quæritur: puta, utrum Baptismus aqua rosacea collatus sit validus? utrum hæc vel illa medicina sit infirmo profutura? an hæc pars litigantium in Judicio habeat justam causam? in quarum prima quæritur de validitate actus sive Baptismi, in secunda de natura seu virtute medicinæ, & in tertia de conditione causæ.

48 Est autem inter Quæstiones prioris & posterioris generis, notabile discrimen: siquidem honestas actus proxime dependet totaliter a prudenti judicio operantis, cui si actus est conformis, hoc ipso bonus est ac honestus; si difformis, malus. Ratio est: quia conscientia est proxima regula actionum humanarum, per quam voluntati, quæ de se est potentia cæca, dictatur, quid sit agendum vel fugiendum: unde fit quod si actus est conformis Conscientiæ practice rectæ, licet forsitan invincibiliter erranti, adhuc talis actus non sit formaliter peccatum neque imputetur ad culpam.

49 Secus est de Quæstionibus posterioris generis, seu quæ versantur circa Materiam facti: etenim actus non desumit suam naturam, conditionem, aut validitatem ex judicio nostri intellectus, quantumvis prudenti; sed vel ex natura sua intrinseca, vel ex ordinatione aut institutione extrinseca alterius. Sic enim medicina, si a parte rei & ex intrinseca natura sua non est proficua, sed nociva; nil proderit infirmo, imo ipsum occidet, non obstante judicio probabili Medici, existimantis eam profuturam. Similiter causa litigantis in Judicio non est justa ex eo, quia eam Judex probabiliter censet justam, sed quia ipsa a parte rei, & secundum Legum ordinationem talis est. Sic pariter Baptismus aqua rosacea collatus non valebit ob probabile judicium Ministri, arbitrantis ipsum valiturum, si revera talis non est ex institutione Christi. Et hinc non mirandum, quod diverso modo de his, ac de prioribus in progressu simus lo-

cuturi: nam sequendo Sententiam probabilem circa honestatem actus, nullum incurritur periculum alicujus peccati, vel alterius damni; secus accidit in materia facti, ubi ex sequela opinionis minus probabilis relicta probabiliori ac tutiori, incurritur magnum periculum nocuenti in bonis animæ, corporis aut fortunæ, proximo inferendi, si forsitan a parte rei opinio illa non subsisteret. His prænotatis, sit

50 **CONCL. I.** Potest homo in rebus moralibus, & actionibus humanis, licite sese conformare conscientiæ seu opinioni vere probabili. Hæc conclusio sic absolute prolata, ac præcindendo a quacunque probabilitate opinionis oppositæ, est ferme omnium Theologorum, imo & Jurisperitorum, prout fatetur Prosper Fagnanus in cap. *Ne initaris*, num. 45. de *Constit.* quamvis ipse postmodum contrariam sententiam teneat. Ratio est: quia ut aliquis licite & honeste operetur, sufficit, quod quis regulam rectæ rationis sequatur: sed hoc fit sequendo Sententiam vere probabilem; hæc etenim non ex levi, sed gravi fundamento auctoritatis, vel rationis concipitur; ergo. Confirmatur: quia, cum in moralibus haberi semper non possit omnimoda certitudo per rei evidentiam, consequenter sufficit certitudo ex probabilibus desumpta, alioquin enim vix quidquam recte ageretur, propter incertitudinem rerum practicarum. Hinc Alexander Papa VIII. die 7. Decembris, 1690. inter alias Propositiones etiam sequentem, ordine 3. non immerito damnavit: *Non licet sequi opinionem, vel inter probabiles probabilissimam.*

51 Obijcies tamen. Judicium probabile propter formidinem, quam habet intrinsecus infixam, non est certum; ergo neque potest habere moralem certitudinem, & consequenter neque esse regula recta nostrarum actionum. Resp. Antecedens esse verum speculative, non autem practice; prout in simili dictum est supra n. 33. & seqq. de dubio speculativo, & pratico: hinc taliter distincto antecedente, negatur consequentia. Solum hic vitandus quorundam abusus, qui post actum jam perpetratum ad medendum remoribus Conscientiæ suæ student casibus, ut inveniant fundamenta & opiniones Doctorum probabiles, quæ suo desiderio faveant. Hoc enim (ut loquitur Henricus disp. 4. de *Conscientia quæst. 3. n. 25.*) plane est medicinam sperare post mortem: nam attendendum est dictamen Conscientiæ antecedens, quod direxit operationem, non aliud subsequens, utpote quod actum jam præteritum practice nequaquam dirigit.

52 **CONCL. II.** Insuper, quando duæ occurrunt opiniones æque probabiles circa honestatem actus versantes, licitum erit eligere eam, quam quis maluerit. Ita communior Doctorum, præsertim Theologorum, contra Fagnanum loc. cit. n. 121. & seqq. Ratio desumitur tum ex dictis n. 50. Tum ex eo: quia quando utraque opinio est æque probabilis (non enim repugnat, quod intellectus humanus ex diversis principiis, atque rationibus hinc inde applicatis, judicet utramque contradictionis partem æque probabilem) non est major ratio, cur quis unam potius sequi teneatur, quam alteram, ergo liberum erit eligere quam maluerit. Nec obstat, quod alterutra contradictionis pars a parte rei sit falsa. Quia hoc ipso quod ejus falsitas determinare non cognoscatur, neque moraliter cognosci possit, ea etiam per errorem electa non violaretur formaliter præceptum aliquod, etsi materialiter contra illud ageretur; quod stante ejusmodi Conscientia vere probabili, culpa vacat ob rationes dictas.

53 **CONCL. III.** Loquendo de actibus quantum ad eorum honestatem spectatis, etiam in concursu probabilioris & tutioris, licite potest eligi opinio vere quidem, sed minus probabilis, minusque tuta; quamvis hoc non semper expediat. Ita communior Theologorum, præsertim Recentiorum, etsi Canonistæ, atque non pauci alii teneant contrarium. Ratio est. Tum quia, qui juxta opinionem vere probabilem operatur, non temere, sed prudenter operatur; ergo non peccat, cum honestas actus proxime dependeat a prudenti judicio



operantis. Tum quia, loquendo de actibus quantum ad eorum honestatem spectatis, qui se conformant dictamini Conscientiæ vere probabilis, non exponit se ulli periculo inferendi aliquod nocumentum, siue sibi, siue proximo, ex dictis n. 48. & seqq. Tum quia Summi quoque Pontifices quandoque secuti sunt opinionem probabilem, relicta probabiliori, ac tutiori, prout inter alios refert Bernardus Sannig. *Tom. I. Scholæ Theologicæ, tract. 7. dist. 5. q. 3. n. 7.* recte n. 4. præmittens, hanc Sententiam non esse revocatam per novissimum Decretum Innocentii XI. 2. Martii, 1679. emanatum. Et hoc ipsum patet ex verbis citati Decreti; partim quia initium ipsius Pontifex expresse declarat, se damnare Propositiones ibi contentas, sicut jacent: partim quia prima & tertia propositio, quæ ad propositum præ ceteris faciunt, loquuntur generatim, atque etiam in Sacramentis, vel de opinionibus, *quantumvis tenuis probabilitatis*, quales ablit defendere, ut supra n. 40. & 44. & seqq. notatur.

§4 Additur notanter in Conclusionem, *quantumvis id non semper expedit*. Tum quia non omnia, quæ licent, semper expediunt juxta illud D. Apostoli I. Cor. 6. *Omnia mihi licent, sed non omnia expediunt*. Tum quia, ut Doctor Subtilis in 3. dist. 25. q. 1. §. *Sed hic occurrunt*, recte monet. *In moralibus quando sunt altercationes de aliquo peccato, quando primo est mortale, ut si iunus peritus in scientia dicat, quod non licet sic mercari, & alius dicat, quod licet, tutius est non procedere sic, nec sic, sed expectare, quousque veritas pateat*. Hæc ille, per ly *tutius est*, hanc partem optime consulens, sed eam sub obligationis vinculo non concludens. Adde etiam, quod præmissa Conclusio locum habere non possit quoad propositiones circa Mysteria Fide Divina credenda formatas. Ratio hujus est: quia Conclusio solum loquitur de propositionibus vere probabilibus: atqui circa Mysteria, quæ Fide Divina credenda sunt, propositio fallâ in concursu alterius, jam cognitæ ut probabilioris, numquam potest habere rationem propositionis vere probabilis, prout infra suo loco (c) dicetur.

§5 CONCL. IV. Confessarius tenetur conformare se quoad Judicium Sacramentale opinioni pœnitentis, si ejus opinio vere probabilis sit, etiam contra propriam opinionem; & consequenter, si pœnitens bona fide sequatur sententiam, quæ a probatis Auctoribus tamquam tuta & probabilis defenditur, Confessarius vero eam speculative improbabilem censeat, tenetur is, deposito, ac relicto proprio judicio, beneficium absolutionis eidem impendere. Ita Sanchez lib. 1. in Decal. c. 9. n. 27. & seqq. & communior Doctorum; & favet Scotus 4. dist. 15. q. 1. §. *Ex hoc dico*, volens, hoc observandum a Confessario in imponenda pœnitentia. Ratio est: quia audita Sacramentali Confessione, non potest Confessarius negare absolutionem pœnitenti rite disposito, nullumque peccati obicem ponenti: atqui pœnitens sequendo opinionem vere probabilem non peccat, ac proinde (nisi aliud obstat) recte est dispositus; ergo non potest ipsi absolutio denegari. Hinc Layman lib. 1. tract. 1. c. 5. n. 10. sic loquitur: *Reprehendenda est quorundam Confessariorum consuetudo, qui veriti pœnitentem contra propriam Sententiam absolvere, eundem ad alium Confessarium ablegant, qui oppositam opinionem probabilem tenet: si enim ille alter absolvere potest, cur non & tu possis? aut cur tua speculativa persuasio pœnitenti obesse debeat?*

§6 CONCL. V. Etli in Quæstionibus de honestate actus præmissa doctrina locum habeat, aliter tamen est discurrendum loquendo de Materia facti, & quantum attinet ad Quæstiones de natura, conditione, aut valore actus, prout inter alia suadet diversitas utriusque supra n. 48. & 49. insinuata. Dicendum proinde cum communissima, & receptissima Doctorum sententia (quidquid unus, vel alter frustra reclamet) in Materia facti non esse licitum, sequi Sententiam minus probabilem minusque tamen in concursu probabilioris ac tutioris. Ratio est: quia nemo potest extra casum necessitatis tuto, ac licite se exponere gravi periculo inferendi magnum damnum proximo: atqui in Materia facti sequens opinio-

nem minus probabilem in concursu probabilioris ac tutioris, exponeret se gravi periculo inferendi magnum damnum proximo, & quidem extra casum necessitatis, utpote cum juxta hypotesin tali periculo facile possit occurrere eligendo opinionem probabiliorem & tutiorem; ergo id non licet. Major patet ex præcepto Charitatis de diligendo proximo, sicut se ipsum. Minor probatur inductione. Sic enim Sacerdos in administratione Sacramentorum adhibens materiam vel formam dubiam, minusque probabilem & tutam, cum possit adhibere certam aut tutiorem, exponeret sine ulla prorsus necessitate non solum periculo invaliditatis ipsum Sacramentum, sed etiam recipientem periculo non habendi fructum Sacramenti, cum dispendio æternæ salutis, si forte sua Sententia minus probabilis a parte rei falsa esset. Similiter Medicus adhibendo medicamina minus tuta, probabilioribus ac tutioribus, quæ posset adhibere, relictis, ponit infirmum in periculo perdendæ sanitatis, aut etiam vitæ, cum irreparabili damno. Item Judex, adjudicans causam parti, minus probabilem sententiam habenti in Jure, exponeret se periculo inferendi grave damnum in bonis fortunæ alteri parti litigantium, probabilioris sententiam habenti. Siquidem ad evitanda ista damna proximo impendentia, nihil prorsus juvat probabile judicium operantis.

## §. III.

Inferuntur corollaria de Ministro Sacramentorum, Medico, Judice, Advocato.

## SUMMARIUM.

- 57 Tres aureæ Regule Scoti a Ministro Sacramentorum observandæ.
- 58 Non licet sequi opinionem probabilem de valore Sacramenti, relicta tutiore.
- 59 Dicitur Regule Scoti etiam observandæ a Medico, & Judice.
- 60 Quod observandum a Medico in curando infirmo?
- 61 Quid agendum Judici in judicando?
- 62 Præsertim quando litigantes habent pro se opiniones æque probabiles.
- \* Et quid in causis criminalibus?
- 63 Quid dicendum de Advocatis?
- 64 Quædam obligationes Advocatorum.
- 65 Solvuntur objectiones.
- 66 In Medicina & Jure, quando dentur opiniones probabiles?
- 67 Differentia inter Judicem & Advocatum, atque officium utriusque.
- 68 Bellum inferre, & litem judicialiter movere, differunt.

§7 Quantum igitur attinet imprimis ad Ministrum Sacramentorum, sunt eidem observandæ, ac præ oculis jugiter habendæ, tres illæ aureæ Regulæ, quas Doctor Subtilis 4. dist. 3. q. 2. §. *Tertio de forma vers. Circa istum*, adducit, & sequuntur alii communiter. Prima est; *Si possibilitas adest, via tutissima est eligenda*, Secunda: *Si non adest possibilitas, via tutissima proxima est tenenda*. Tertia est ista: *Cessante impossibilitate caute est supplendum, quod impossibilitas prohibebat*. Unde Baptismus v. g. in materia, vel forma dubia collatus, denuo sub conditione iterandus est, ut dicitur in Jure Canonico c. *De quibus, de Baptismo*.

§8 Unde jure merito novissime ab Innocentio XI. damnata est, & tamquam scandalosa, & in praxi perniciose prohibita sequens Propositio ordine I. *Non est illicitum in Sacramentis conferendis sequi opinionem probabilem de valore Sacramenti, relicta tutiore, nisi id vetet lex, conventio, aut periculum gravis damni incurrendi*. Hinc sententia probabilis tantum utendum non est in collatione Baptismi, Ordinis Sacerdotalis aut Episcopalis. Hæc, inquam, Propositio est damnata; ac proinde hactenus dicta, præsertim circa materiam Sacramentorum, magis confirmantur.

\* Ubi



\* Ubi tamen utiliter pro majori praxi ulterior circa hanc propositionem explicatio videri poterit in succincta Declaratione propositionum damnatarum &c. quorum Lector remittitur. \*

59 Licet autem supra dictas tres Regulas Doctor non solum ex professione tradiderit observandas circa Sacramentorum materiam & formam ab eorum Ministro, seu spirituali Medico animæ; oportet nihilominus easdem (servata tamen proportione) etiam observari a vero Medico in curandis ægitudinibus hominis, atque etiam a Judice in ferendis sententiis.

60 Quantum igitur attinet ad Medicum, notant communiter Doctores, Medicum in curando infirmo debere sequi sententias certas, si adsint, relictis incertis ac dubiis. Hinc, ut notat Layman *loc. cit. num. 15.* citans plures alios, etsi probabilis opinio sit, medicamentum infirmo profuturum esse, non ideo sequitur probabile esse, quod liceat Medico tale medicamentum dubium adhibere; quin potius, cum agatur de periculo corporis, securior via est eligenda. Quare Medici, & Chirurghi, debent sequi sententias certas & securas, si suppetant, rejectis incertis ac dubiis: graviterque peccat Medicus, si experiendi tantum causa inexplorata medicamenta certis dimissis infirmo adhibeat, ejusque sanitatem & vitam hac ratione gravi periculo exponat. Quod si certa curatio non occurrat, tenetur Medicus sectari ea, quæ probabiliora judicat, posthabitis opinionibus minus probabilibus. Si vero nulla medicamenta suppetant nisi dubia & periculosa, tunc prudenter examinandum erit, hinc quidem vis ac periculum morbi, illinc vero tam spes sanandi, quam timor & periculum nocendi, & quidem si Medicus intelligat, certo moriturum infirmum, nisi medicamentum adhibeatur, non carens quidem periculo accelerandæ mortis, junctum tamen cum probabili spe conferendæ sanitatis, adhibere poterit.

61 Quantum tandem attinet ad Judicem, etiam communiter notant Doctores, quod Judex teneatur judicare secundum sententiam, quæ inspectis allegationibus & probationibus partium probabilior est, Jurique conformior. *L. ob carmen. §. 3. ff. de Testibus*: nam Judicis officium est, partibus litigantibus sententiam dicere secundum merita causæ. Unde cavenda est doctrina nonnullorum Theologorum, olim volentium, si circa propositam controversiam contrariæ sint opiniones probabiles de jure, posse Judicem relictæ probabiliori judicare secundum alteram minus probabilem. Quinimo hæc sententia modo est expresse rejecta ab Innoc. XI. qui damnavit sequentem, ordine 2. Propositionem: *Probabiliter existimo, Judicem posse judicare juxta opinionem etiam minus probabilem.*

62 Similiter cavenda est illa nonnullorum Theologorum sententia, qui volebant, quando utraque opinio est æque probabilis, integrum esse judici, quam maluerit, opinionem eligere, & secundum eam judicare, imo cessante scandalo nunc secundum unam, nunc secundum aliam. Cavendum, inquam, est ab hujusmodi sententia: quis enim non videat, ab æquitate alienum esse, si duo æquale jus habent, Judicem, quem oportet esse juris Interpretem, Justitiæque Administrum, uni eorum totum adjudicare, alteri abjudicare? Unde non immerito Alexander VII. inter alias etiam sequentem, ordine 26. Propositionem damnavit. *Quando litigantes habent pro se opiniones æque probabiles, potest Judex pecuniam accipere pro ferenda sententia in favorem unius præ alio.* Igitur in tali casu, si post causæ accuratam discussionem neutra litigantium pars, inspectis allegatis, de facto, aut de jure superare videatur, debet Judex vel arbitros, partium consensu statuere, vel compositionem suadere, imo etiam imperare, si casus nimium sit intricatus, causaque diutius jam protrahatur, vel denique cuilibet dimidium juris, aut rei, de qua lis est, adjudicare: nisi forsan unus ex litigantibus foret in possessione rei litigiosæ: nam tunc potius huic Judex favere deberet; cum in pari causa potior sit conditio possidentis. Reg. 65. Juris in 6. & Reg. 128. ff. de Reg. Juris.

#### Additio.

\* Dices: Si Rationes & Probationes sunt probabiliores, quod aliquis accusatus, vel inquisitus ob certum grave delictum e. g. Homicidii sit nocens; interim tamen adhuc adsunt etiam rationes in contrarium vere probabiles, quod sit innocens, Judex in tali casu pronuntiat, ac sententiam dicit pro reo, saltem non condemnando eundem ad mortem: ergo potest Judex sequi sententiam minus probabilem. Ante responsionem nota, aliud esse judicium Civile, & aliud Criminale. Judicium Civile principaliter respicit commodum privatum litigantium. Criminale vero bonum commune, & vindictam publicam. H. N.

Respond. concess. antec. distinguo consequens. Judex potest sequi sententiam minus probabilem in actionibus civilibus, neg. in criminalibus, subdisting. potest sequi talem sententiam, quæ sit minus probabilis attendendo præcise ad principia directæ, & speculativa, conc. quæ esset minus probabilis respiciendo pariter ad principia reflexa, & practica, neg. conf. Nam attendendo ad principia reflexa, ipsa jura in criminalibus gravioribus præcipiunt, ut nullus ad gravissimam ordinariam poenam condemnetur, nisi similes probationes sint omnino clares: quoniam *satius est, impunitum relinqui facinus nocentis, quam innocentem damnare. L. abjunctem. ff. de Penis.* Præsertim cum ex tali non condemnatione Reipublicæ nulum imminet periculum gravis mali, vel, si hoc adveniat, reus posset accurate observari, aut omnino custodiri pro exigentia periculi. Econtra vero ex condemnatione ad mortem Reo, forsan a parte rei innocenti immineret damnum irreparabile. \*

63 Quæres, an id, quod proxime de Judice dictum est, similiter de Advocato sit sentiendum? Resp. negative, prout tenet communior Doctorum, præter Fagnanum *loc. cit. num. 381. 387. ac seqq.* & quosdam alios. Ratio est, quia Advocati officium non est, definire, sive jus dicere inter partes contendentes, sed uni parti litigantium assistere, atque patrocinium afferre: cum igitur, quotiescumque causa dubia seu controversa est, permittatur parti litem cum adversario contestari, atque propositis juribus & rationibus suis sententiam Judicis dirimentis expectare; consequenter, si Advocatus causam clientuli non manifeste iniquam, sed probabilem judicet, licite ejus patrocinium suscipit, etsi causam adversarii probabiliorē, & facilius obtinendam arbitretur. Imo fieri potest, atque nonnumquam solet, ut pars illa, quæ a principio minus probabilis apparebat, in progressu litis probabilior evadat.

64 Notant tamen Doctores, quod Advocatus, causam dubiam suscipiens, ad aliqua sit obligatus. Et primo quidem, ut ante omnia diligenter inspicat causæ sibi propositæ æquitatem, aut probabilitatem; & si injustam comperiat, nullo modo ejus patrocinium suscipiat. Ratio est: quia alioquin peccaret cooperando ad malum. Secundo, ut post diligentem totius causæ considerationem sincere aperiat clienti, quantam probabilitatem, vel spem obtinendæ victoriæ habeat; alioquin enim, si falsa opinione aut spe inani victoriæ clientem detineat, ac sumptibus frustra faciendis involvat, ad compensationem damni ei obligatur. Tertio, ut Advocatus, qui causæ dubiæ patrocinium suscipit, paratus sit quamprimum desistere, & clienti suo significare, si in progressu litis ejus iniquitatem manifeste deprehenderit: non tamen ut notat D. Thomas 2. 2. q. 71. art. 3. debet eam prodere, ut scilicet aliam partem juvet, vel secreta suæ causæ alteri parti revelet, sed debet causam deferere, vel eum, cujus causam agit, inducere ad cedendum, vel ad componendum sine adversarii damno. Plura de hoc in jure Canonico *lib. 1. tit. 32. n. 69. & seqq.*

65 Objicies I. Contra hætenus dicta. Ad prudenter operandum sufficit certitudo moralis, non enim tenemur semper habere summam rei certitudinem, sed sufficit moralis: atqui similiter Sacerdos, Medicus, & Judex



Judex habet certitudinem moralem, quod non peccet, nullumque damnum proximo interat, eo ipso, quod pro se habeant sententiam vere probabilem: ergo. Resp. negando minorem, loquendo de casu, quo ejusmodi opinio probabilis circa Materiam facti habetur in concursu probabilioris, ac tutioris. Tunc enim medicus v. g. non est moraliter certus de procuranda sanitate infirmi, si neglecto tutiori ac probabiliori pharmaco, quod hic & nunc adhibere posset, adhibet aliud minus tutum; minusque probabile: neque etiam habet pro se sententiam vere probabilem; quod id licite facere possit, tum ob grave periculum nocuenti infirmo inferendi, tum ob communem sententiam Doctorum, id licite fieri negantium.

66 Dices: Si hoc est verum, ergo in Medicina, in Jure, in Sacramentorum administratione nulla dabitur opinio probabilis; quia nemini unquam licebit eis uti: atqui hoc est absurdum; ergo. Respond. ejusmodi opiniones in concursu alterius opinionis probabilioris ac tutioris, dici solum probabiles speculative, non autem practice. Ratio est: quia non possumus ex ipsis formare judicium practicum, quod dicet, hic & nunc esse licitum, absque ulla necessitate omittere viam certam, vel saltem tutiorem, & eligere cum gravi periculo damni proximo inferendi aliam minus certam, minusque tutam. Interim tamen speculative etiam in Medicina, Jure, & Sacramentorum administratione, dantur opiniones probabiles, quas licebit & expediet sequi in casu necessitatis, & quando opinio probabilior hic & nunc praticari nequit, juxta tres illas aureas Regulas supra n. 57. ex Doctore Subili allatas.

67 Obijcies II. Contra dictam 63. Judex tenetur ex officio ferre sententiam pro parte probabiliori; ergo & Advocatus poterit solum defendere causam magis probabilem, alioquin enim defendendo causam minus probabilem induceret Judicem ad aliquid iniquum, nempe ad ferendam sententiam, quam is licite ferre non posset. Resp. negando consequentiam, & paritatem: quia Judicis officium est definire, ac jus dicere inter partes litigantes; sicque causa rite prius discussa tenetur ex officio pro parte probabiliori stare, sententiamque ferre. Secus dicendum de Advocato, cujus officium non est definire, atque jus inter partes dicere sed tantum parti uni assistere, atque (sub positis jam cautelis) patrocinium ferre, donec lis per definitivam Judicis sententiam fuerit decisa. Neque ideo Advocatus censetur inducere Judicem ad aliquid iniquum: nam solum conatur ostendere, partem sui clientuli (prout nonnumquam in progressu litis apparet) esse verioris, sive probabilioris; non autem vult, ut stante minori probabilitate talis causæ, pro ea feratur sententia definitiva.

18 Urgebis: Cujus causa existit minus probabilis, non potest alteri bellum inferre; ergo neque litem judicalem ipsi movere, & consequenter neque Advocatus tali causæ patrocinari. Respond. negando consequentiam, & paritatem. Siquidem per litem judicialiter motam fit solum inquisitio veritatis, utri parti revera plus juris competat: simulque hujus decisio relinquatur Judici, cujus est, utriusque partis fundamenta penitus expendere, ac postea litem sententia definitiva decidere. Econtra illatio belli, est ipsamet sententiæ executio; unde supponit, sententiam esse latam, vel saltem debere fieri in favorem ejus, qui bellum infert: cujus autem jus est minus probabile, non debet sententia pro illo, sed potius contra illum ferri, ac proinde is alteri bellum licite inferre non potest.

## QUÆSTIO V.

De Conscientia scrupulosa, ejusque signis, & remediis contra scrupulos.

### SUMMARIUM.

- 69 Conscientia scrupulosa, & scrupulus, quid?
- 70 Signa Conscientiæ scrupulosæ, quæ?
- 71 Quæ sit origo scrupulorum?
- 72 An sit licitum operari contra conscientiam scrupulosam.
- 73 Solutur obiectio scrupulorum.
- 74 Alia scrupulorum instantia diluitur.
- 75 Explicantur quædam auctoritates.
- 76 Discrimen inter Timoratos timore Dei, & inter Scrupulos, quale?
- 77 Mala scrupulorum.
- 78 Remedia contra scrupulos, qualia?
- 79 Consilium pro scrupulosis, qui suæ conscientia curam habent.
- 80 Quid de nimium scrupulosis circa peccata præterita, & parum sollicitis circa futura?

69 **C**onscientia scrupulosa dicitur talis a Scrupulis. Porro Scrupulus est inanis apprehensio & hinc ortus timor atque anxietas, alicubi esse peccatum, ubi revera non est. Unde Conscientia scrupulosa importat inanem apprehensionem ex frivolis ortam rationibus, qua quis suspicatur aliquid esse peccatum, quod non est.

70 Signa autem scrupulosæ Conscientiæ sunt potissimum sequentia. I. Pertinacia judicii, qua scrupulosi homines Doctoris, aut sui Confessarii consiliis non acquiescunt: unde varios consulunt & fatigant, & tamen nullius judicio stant nisi suo. II. Ex levi apparentia frequens judiciorum mutatio: unde oritur in agendo inconstantia v. g. in Horis Canonicis aliquando decies mutant judicium, num hunc vel illum Versiculum dixerint; imo nonnumquam contra proprium judicium, quod tale quid agere non sit peccatum, adhuc sunt inquieti, timentque, ne forte peccent, vel peccaverint. III. Perturbate agere, & cæco quodam modo in externis actionibus procedere; & hoc quidem malum ex prioribus descendit. IV. Habere reflexiones extravagantes infinitatam circumstantiarum. V. Timere in omnibus peccatum, & contra sapientum, imo & contra proprium judicium esse inquietum. His accedit ultimum Conscientiæ scrupulosæ signum, si nempe Confessarius judicat, talem esse scrupulosum, juxta hætenus dicta. In particulari autem signa Scrupuli, hic & nunc præsentis, sunt sequentia duo: in primis, si per illum experiaris, te nimium angere, & turbare. Deinde si alias expertus sis, te similia apprehendisse sine fundamento. Ita discurrent inter alios Hermannus Busenbaum, in *Medulla Theolog. moral. lib. 1. tr. 1. cap. 3.*

71 Queritur I. Quæ sit origo Conscientiæ scrupulosæ, & scrupulorum? Resp. cum Doctoribus passim, origines & causas Scrupulorum esse potissimum sequentes. I. Est ignorantia, qui enim ignorantes sunt, quibusvis facile moventur, ac decipiuntur. II. Cerebri, & imaginationis debilitas. III. Complexio frigida, & melancholica. IV. Immoderatus, & indifferetis fervor. V. Nimius timor servilis; hic enim animam tremulam & trepidantem facit. VI. Consuetudo, seu conversatio cum Scrupulosis. VII. Tentatio diabolica. Et tandem VIII. causa scrupulorum, est permissio Dei, qui quandoque singulari sua providentia superbiam nostram a scrupulis depasci permittit, vel in fornace scrupulorum nos purgat, nostramque fidelitatem ad augendum in nobis meritum probat; ubi in casu ultimo sæpius tales homines tempore mortis suæ non sine admiratione Divinæ Providentiæ videmus maximis abundare consolationibus cessante omni anxietate.



72 Quæritur II. An sit licitum operari contra Conscientiam scrupulosam? Resp. cum communi Doctorem, affirmative. Ratio est clara: quia Conscientia scrupulosa nititur solum levibus atque frivolis rationibus, ac proinde ejus judicium est imperfectum atque imprudens; ergo licite ac laudabiliter ipsi resistitur.

73 Nec judicatur I. cum scrupulosis. Juxta illud commune dictum: *In dubiis tutior pars est eligenda*; ergo. Resp. enim, axioma istud loqui de Dubio proprie dicto, non autem de mero ac inani scrupulo, qui importat inanem suspensionem ex levibus causis ortam, qua quis putat esse peccatum, quod revera non est. Porro quomodo vulgatum hoc axioma sit intelligendum, habetur superius n. 35.

74 Nec dicatur II. Ad licite operandum necessario requiritur judicium intellectus saltem probabile de honestate operis: atqui stante scrupulo deest tale judicium intellectus; ergo eo stante non est licitum operari contra scrupulum. Respond. quippe negando minorem: nam scrupulus verus, quantumcumque urgeat, minime tollit assensum partis contrariæ, seu judicium intellectus de ipso: quod si vere tollat determinatum assensum alterius partis, jam non erit amplius scrupulus, sed verum dubium, ut recte notat Sanchez lib. 1. in Decal. c. 10. n. 80. ac proinde cum ipsa procedendum foret juxta dicta superius Quæst. 3. Unde cum conscientia scrupulosa facile transire possit in conscientiam vincibiliter erroneam, vel dubiam, colligere licet, quam miser & periculosus sit status hominis vere scrupulosi.

75 Nec dicatur III. Secundum illud D. Gregorii, ac refertur *can. 4. dist. 5. Bonarum mentium est ibi culpam timere, ubi culpa non est.* Et illud Proverb. 28. *Beatus homo, qui semper est pavidus*, & alibi; ergo bene fit, si quis est scrupulosus. Respond. enim negando consequentiam: hujusmodi siquidem auctoritates loquuntur de Conscientia timorata vera, & rationabili; non autem de Conscientia inaniter scrupulosa, & plurimum cor affligente. Sed occasione hujus

76 Quæritur ulterius, quale sit discrimen inter Timoratos timore Dei, & inter scrupulosos? Resp. cum Petro Marchantio Tomo I. *Tribunalis, tract. 5. titul. 6. quæst. 2.* & aliis, plures passim assignari differentias; ceteris tamen clarior est ea, quæ desumitur ab effectibus. Effectus enim Timoris Dei in timoratis, sunt puritas & firmitas cordis, vigilantia, & sollicitudo sine anxietate, apprehensio mali sine turbatione, poenitentia cum spe & amore conservandæ justitiæ, & injustitiæ vindicandæ propter Deum omnis justitiæ Fontem. Hinc timorati timore Divino, ob amorem Dei atque observantiam mandatorum ipsius, etiam verbum otiosum refugiunt, simulque imperturbati, stabiles & constantes incedunt viam mandatorum DEI, & cum cordis tranquillitate custodiæ suæ invigilant, atque absque turbatione ad DEUM suspirant,

77 Econtra vero res se habet in scrupulosis. Primo timor scrupulorum plenus est impuritate atque inconstantia mentis. Deinde tantum abest, ut

scrupulosi in sollicitudinem alacrem ac vigilantiam cordis exeant, ut potius in anxietatem, pusillanimitatem, tepiditatem, ac tedium omnis boni devolvantur: simulque apprehensio mali fit in ipsis cum turbatione totius hominis, ita ut ne seipsos capiant, imo quodam mentis delirio fatiscant. Omittuntur alia plura discrimina, & mala Conscientiæ scrupulosæ.

78 Quæritur ultimo. Quænam sint remedia contra scrupulosos? Resp. Inprimis saluberrimum contra scrupulos remedium esse, scrupulos contemnere: cum enim hi ex frivolis concipiuntur rationibus, hinc tali inanitate perpenfa, jure merito contemnuntur, & licite contra eos quis operatur. Quia tamen scrupulosus non semper semetipsum juvare potest, tunc alterum remedium est, ut scrupulosus deposito proprio judicio, & non obstantibus suis rationibus, per omnia se submittat judicio, ac verbo pii ac prudentis Viri, aut Confessarii, cum manifestum sit, Deum non plus exigere a tali persona afflicta. Confessarius autem ante omnia videat, quæ sit causa scrupulorum, eamque cognitam laboret amovere. Præterea sit is in suis Responsionibus resolutus, atque, ne scrupulus scrupulo inducatur, absteineat a multis discursibus, & probationibus suorum dictorum, cum in illis ipsis frequenter non deesset scrupulosis talibus materia novorum scrupulorum. Quare urgeat Confessarius scrupulosum, ut simpliciter suis dictis credat: alias certe vix juvari poterit. Et hæc sunt duo remedia præcipua contra scrupulos, quamvis plura a Doctoribus afferantur.

79 Certis tamen dimissis, consulit Vasquez 1. 2. *disp. 67. cap. 2.* loquendo de illis scrupulosis, qui simul conscientiæ suæ curam habent, quod Confessarius, si semel cognoscat talem scrupulis agitari, ei tale consilium præbeat, suadeatque, ut nihil putet esse mortale, nisi quod manifeste & absque formidine videatur ipse esse mortale. Imo vero interdum potest aliquis adeo esse scrupulosus, ut nisi jurare possit, illud esse mortale, credere non debeat mortale esse.

80 Difficilius remedium adhibetur illis scrupulosis, qui sunt nimium scrupulosi circa præterita peccata, de futuris autem parum sunt solliciti. Præcipuum autem remedium pro talibus esse solet, ut frequenter ad Sacramentum Confessionis accedant, sicque cautiore efficiantur in cavendis futuris peccatis; de cetero autem remediis supra dictis utantur. Porro si aliqui vere judicentur scrupulosi, etiam si non sint adeo cauti in evitandis futuris peccatis, non est cum illis ita severe agendum, sicut cum illis, qui scrupulosi non sunt: quamvis simul attendere debeant scrupulosi, ne manifeste declinent ad alterum extremum, & prætextu scrupulorum evitandorum nimiam sibi licentiam usurpent, & interdum pro scrupulis vera, & manifeste recta conscientiæ dictamina contemnant, magnas trabes festucas reputent, & quasi pulices camelos deglutiant. Unde in hisce scrupulis curandis Confessarius magna consideratione status Poenitentis, prudentia, atque discretionem procedere debet.



# T R A C T A T U S II, D E L E G I B U S.

**S**icuti conscientia est actuum humanorum regula, proxima tamen seu intrinseca, ita & Lex est eorundem extrinseca seu remota regula, cui, ut actiones nostrae morales recte fiant, conformandae sunt. Quare Tractatus de Legibus ad Theologiam Moralem ex professo pertinere dignoscitur: nam quamvis Jurisconsulti Leges pertractent, id equidem faciunt diversa plane ratione, videlicet in ordine ad Forum externum, pacemque Reipublicae, ac Justitiam politicam procurandam, & conservandam; cum tamen Theologi de Legibus agant, quatenus sunt regulae extrinsecae seu remotae actionum humanarum, quidnam nobis sit agendum aut fugiendum, praeceptum vel prohibitum, ostendentes quatenus sic hominem sibi obsequentem ad Finem ultimum, quo tendit, aeternamque salutem dirigant, atque perducant.

## D I S T I N C T I O I.

### De Natura Legum.

## Q U A E S T I O I.

Quid, & quotuplex sit Lex?

## S U M M A R I U M.

- 1 Ratio ordinis?
- 2 Lex unde sic dicatur?
- 3 Varia Legis nomina.  
Et an Lex differat a Jure?
- 4 Lex, quid?
- 5 Varia Legis divisiones.
- 6 Lex naturalis,
- 7 Et positiva, quid, & quomodo differant?
- 8 Lex positiva Divina, duplex.
- 9 Lex positiva humana, quotuplex? Jus Gentium.
- 10 Jus Civile.
- 11 Leges Ecclesiasticae, seu Canonicae.

**U**T a nominis etymologia ordiamur, Lex dicitur a *legendo*, eo quod leges solebant olim in publicis tabulis scribi, & populo legendae proponi, ut sentit Isidorus lib. 2. *Etymolog. cap. 10.* Sive Lex dicitur a *ligando*, eo quod homines legibus ligentur, seu obligentur ad aliquid praestandum, vel omittendum, ut inter alios vult Doctor noster 4. *dist. 15. qu. 2. art. 1.*

3 Solet autem Lex variis aliis nominibus appellari. Aliquando enim *Jus* vocatur, eo quod definiat, ac praescribat, quod iustum est: sic dicimus Jus naturale, Jus Divinum, Jus Civile, ac Ecclesiasticum, quamvis strictius loquendo inter legem & jus detur nonnulla differentia: quia ut dicitur c. *Jus generale, dist. 1.* *Jus generale nomen est, Lex autem juris est species.* Aliquando Lex dicitur *Statutum*, eo quod sit stabilis atque firma. Quandoque etiam dicitur *Constitutio*, quia illam praecedere solet plurium consilium, & consensus quidpiam constituentium, seu simul statuentium. Quamvis vero Legis nomen late sumptum quamcumque regulam, seu agendorum normam significet; quo sensu etiam regulae Grammaticae, & aliarum artium, solent vocari Leges, proprie tamen loquendo, & quantum ad propositum, Lex aliud non est, quam regula quaedam actionum humanarum, secundum quam vel ad bene agendum dirigimur, vel a male agendo retrahimur, ut sic in genere moris bene ac honeste agere inveniamur. Et taliter agendo de Lege, fit

4 CONCL. I. Lex est recta agendorum ratio, a publica potestate communitati denunciata, cum voluntate eam perpetuo obligandi, ad aliquid agendum, vel omittendum. Ita in re Doctores communiter, quamvis alii aliis verbis legem describendo utantur; prout Herincx *Anacl. Reiffensiel. Theol. Tom. I.*

*dist. 1. de Legib. q. 1. ait;* Lex nihil est aliud, quam regula ab eo, qui potestatem habet, ordinata, obligans creaturam rationalem, ut illi se conformet: nam hujusmodi definitiones in re conveniunt, earumque particularae magis patebunt ex dicendis.

5 CONCL. II. Lex ut sic immediate dividitur in naturalem, & positivam: ex quibus Lex positiva subdividitur in Divinam, & humanam: & Divina iterum dividitur in Novam, & Veterem; humana vero in Jus Gentium, Ecclesiasticum, & Civile.

6 *Lex naturalis* (quam alii *Jus naturale* appellant) dicitur ea, quae non ex libera alicujus Legislatoris voluntate imposita est, sed congenita nobis cum ipsa natura, & ab hac profluens. Porro hujusmodi Legem naturalem dari in nobis, est de fide certum: sic enim lumen naturae nobis dicitur, non esse furandum, non occidendum, non falsum testimonium dicendum, & hujusmodi. Hinc D. Paulus *Rom. cap. 2.* inquit: *Gentes, quae legem non habent* (scripturam videlicet) *naturaliter ea, quae legis sunt, faciunt.* Et infra: *Qui ostendunt opus Legis scriptum in cordibus suis, testimonium reddente illis conscientia ipsorum, & alibi.*

7 *Lex positiva* (sive *Jus positivum*) est, & dicitur illa, quae ex libera Dei, vel hominis voluntate pendet. Et dicitur, *Lex positiva*; quia a Superiore non ex quasi necessitate, ac intrinseca exigentia objecti, sed libere & contingenter ponitur. Differt autem a Lege naturali, quod haec sit invariabilis, illa vero variabilis. Deinde, quod Lex positiva ex libera Legislatoris voluntate procedat; non item Lex naturalis, utpote quae ex intrinseca exigentia objecti provenit. Insuper differunt in eo, quod illa, quae jure naturae sunt prohibita, ideo prohibita sint, quia in se mala; quae autem Jure positivo prohibentur, ideo sunt mala, quia prohibita: sic enim comestio pomi vetiti in paradiso ideo fuit mala & peccaminosa, quia prohibita erat a Deo.

8 *Lex positiva Divina* est, quae a Deo Opt. Max. in tempore lata, & condita est. Et haec subdividitur in Legem veterem, quam pro tempore veteris Testamenti Deus ipse condidit, de multis disponendo, quae ad Jus naturale non spectant; ut fuerunt lex Circumcisionis, Lex Agni Paschalis, & plurimae aliae leges circa Caeremonialia, & Judicialia veteris Testamenti: Et in Legem novam, seu Evangelicam, quam Christus Dominus, Deus simulque homo instituit, atque in novo Testamento observari mandavit; prout amplius patet ex Sacra Scriptura.

9 Lex positiva humana est, quae immediate fertur ab homine. Unde & *Jus humanum* dicitur; & subdividitur in Jus Gentium, Jus Civile, & Jus Ecclesiasticum. *Jus Gentium* est lex humana, quam omnes populi & variae gentes inter se servare debent: ut est consuetudo recipiendi Legatos sub lege immunitatis ac securitatis, libertas commerciorum inter gentes non inimicas, jus belli fundatum in potestate illa, quam una Respublica vel Monarchia suprema habet ad puniendam, vindicandam, atque reparandam injuriam sibi ab altera illatam: haec enim & alia hujusmodi, cum sint plurimum consona Legi naturali, omnium populorum consensu sunt recepta & constituta; ac proinde dicuntur esse de Jure Gentium.

10 *Jus Civile*, seu *Lex Civilis* dicitur ea, quae ad civium politicam gubernationem, atque ad temporalia jura tuenda, ipsamque Rempublicam in pace & justitia conservandam ordinatur. Unde hujusmodi Leges Civiles circa ordinanda bona temporalia praecipue versantur; & quia non omnium Nationum iidem sunt sensus & inclinationes (nam & *diversitatem corporum, diversitas saepe sequitur animorum. c.* *Quia diversitatem De Concession. Prabend.*) hinc non est unum idemque Jus Civile apud omnes gentes, sed variatur pro varietate

C loco-



locorum, temporum, personarum, aliarumque circumstantiarum. Et tales Leges Civiles sunt, quæ in Jure Civili continentur: item ex, quæ dicuntur *Leges municipales*, quas quælibet Civitas sibi constituit.

11 *Leges tandem Ecclesiasticae* (quæ alio nomine *Leges Canonicae* appellantur) sunt illæ quæ pro recta gubernatione Ecclesiæ, atque ad spiritualem animarum profectum, vel a Summo Pontifice, vel ab aliis Prælatiis atque Magistratibus Ecclesiasticis legitime conduntur. Et tales sunt, quæ tum in Jure Canonico continentur, tum a Conciliis Generalibus, Provincialibus, Synodalibus, aut etiam ab Ordinariis locorum legitima auctoritate feruntur.

### QUÆSTIO II.

De Conditionibus Legis, ejusque differentia a simplici Præcepto.

#### SUMMARIUM.

- 12 *Legis encomia.*
- 13 *Legis conditiones generatim, quæ?*
- 14 *Lex debet esse recta agendorum ratio.*
- 15 *Ad eam requiritur auctoritas in Legislatore.*
- 16 *Ejusque legitima promulgatio.*
- 17 *Et ut feratur cum voluntate obligandi subditos.*
- 18 *Lex quomodo debeat esse perpetua?*
- 19 *Lex quomodo differat a simplici Præcepto?*
- 20 *Alia differentia utriusque.*

12 **C**um optima sit lex, si recte feratur, atque custodiatur, utpote quæ pravam concupiscentiam hominum, seu (ut loquitur Gregorius IX. in Proëmio Decretalium) *effrenatam cupiditatem, sui prodigam, pacis emulam, matrem litium, materiam iurgiorum reprimere satagit*: hinc summe necessarium est, ejusdem conditiones rite cognoscere. Et quidem Isidorus, relatus *can. 2. dist. 4.* easdem paucis complectitur dicendo: *Erit autem lex honesta, justa, possibilis, secundum naturam, secundum patriæ consuetudinem, loco temporisque conveniens, necessaria, utilis, manifesta quoque, ne aliquid per obscuritatem in captionem contineat, nullo privato commodo, sed pro communi civium utilitate conscripta.* Hæc ille. Brevius tamen omnes necessariæ legis conditiones continentur in ejus definitione *num. 4.* allata, ubi dicitur: *Lex est recta agendorum ratio, a publica potestate communitati denuntiata, cum voluntate eam perpetuo obligandi &c.*

14 I. Igitur ad Legem requiritur, ut sit *recta agendorum ratio*; sive, ut ait citatus Isidorus, quod sit *honesti, justa, possibilis &c.* Siquidem lex injusta non est absolute dicenda *Lex*, sed solum cum addito, *Lex iniusta*: & si constet, eam esse talem, non tenentur eidem subditi obedire. Unde de hujusmodi lege injusta hic non agitur, sed tantum de justa.

14 II. Ad rationem Legis requiritur legitima auctoritas legem ferendi in Legislatore, quæ conditio indicatur in supra posita definitione per *ly a publica potestate*. Porro hujusmodi potestatem condendi leges & quidem universim, habet Deus ter Opt. Max. Deinde loquendo de legibus positivis humanis, easdem potest ferre Summus Pontifex in materia spiritali, & concernente animarum salutem, rectamque Ecclesiæ gubernationem, pro toto Orbe Christiano: quia ipsi, tamquam suo in terris Vicario, commisit Christus Dominus in B. Petro Apostolo omnium suarum Ovium curam, ut habetur *Matth. 16. & Joan. 21.* Quin etiam alii Prælati Ecclesiastici inferiores, ut Episcopi, possunt leges quasdam ferre, quæ tamen solum astringunt proprii Territorii subditos. Similiter Imperator pro toto Imperio Romano, Rex pro suo regno, alique Principes ac Magistratus sæculares pro suis subditis leges ferre possunt, juxta quod propria cujusque Potestas ac jurisdictio se extendit.

15 III. Ad rationem Legis requiritur legitima ejusdem promulgatio; quæ conditio in data definitione legis

denotatur per *ly communitati denuntiata*, id est, promulgata. Siquidem, ut habet receptum inter Jurisconsultos dictum *ex can. 3. dist. 4.* *Leges instituuntur, cum promulgantur; firmanur, cum moribus utentium approbantur.* Unde etiam si aliquis v. g. ex Senatu, a quo Lex conditur, certo sciat, sequenti Mense, vel septimana eadem fore promulgandam prout in Senatu jam decreverunt; ante tamen actualem promulgationem non astringitur huic Legi. Verum de hac legum promulgatione agetur ex professo *Quæstione sequenti.*

16 IV. Requiritur, ut Lex a superiore feratur *cum voluntate obligandi*; id est, quod Legislator velit communitati quidpiam præcipere, eamque ad observantiam legis obligare: nam si Princeps tantum quidpiam consulat, aut a subditis fieri libenter se videre declarat, non autem clare jubeat, & præcipiat, lex non erit, sed consilium, aut beneplacitum Principis.

17 Tandem additur in allata definitione Legis *ly perpetuo obligandi*. Per quam particulam denotatur, quod lex debeat esse perpetua, id est, lata cum voluntate subditos perpetuo obligandi. Ubi tamen perpetuitas legis non accipitur pro æternitate non habente principium, nec finem (alioquin nulla daretur lex positiva) sed accipitur pro duratione indefinita, quatenus lex debet ferri non pro uno dumtaxat die, vel anno, sed cum voluntate subditos perpetuo obligandi. Intellige, quantum est ex prima intentione Legislatoris, & nisi lex postmodum legitime revocetur.

18 Quæres, quomodo Lex differat a simplici Præcepto? Resp. differre in pluribus. Nam inprimis Præceptum simplex proxime ac immediate fertur in personas singulares, earumque ossibus adheret, quocumque terrarum discesserint: Lex vero censetur immediate afficere locum, seu territorium Legislatoris, atque hinc in subditos ibidem existentes transire. Et ideo fit, quod leges territorii non obligent cives absentes; econtra tamen præcepta Superiorum, v. g. Prælatorum Regularium, obligent subditos, ubicumque existant: cum eis competat jurisdictio in subditos, non ratione loci, sed per se ac ratione personæ, propter votum Obedientiæ.

19 Deinde Præceptum tendit ad personas singulares, cum quibus plerumque extinguitur, nec transit ad successores; quale est, si pater quidpiam præcipiat filio; Abbas Religioso; Princeps huic vel illi subdito: Lex vero imponitur toti Communitati, & loquitur non tantum ad præsentem, sed etiam ad futuros; nam *Lex est commune præceptum. L. 1. ff. de Legibus.* Insuper Præceptum expirat morte præcipientis: & absque nova revocatione cessat cessante vita, aut officio præcipientis: Lex autem, & Statutum, durat etiam post mortem Legislatoris, semperque vim suam habet, donec revocetur, aut per contrariam consuetudinem legitime abrogetur. Siquidem Leges ex natura sua sunt perpetuæ, non autem Præcepta simplicia, seu quæ non feruntur per modum constitutionis generalis.

### QUÆSTIO III.

De Promulgatione ad Legem requisita.

#### SUMMARIUM.

- 20 *Ut Lex obliget in conscientia, requiritur ejus promulgatio.*
- 21 *Leges, an interdum extendantur ad præterita?*  
*Et Regula Cancellaria nondum publicata obligent?*  
*Quid de Constitutione Sixtina irritante matrimonia Eunuchorum de facto contracta?*
- 22 *Solutio præmissorum.*
- 23 *Scriptura non est de substantia Legis.*
- 24 *Leges Imperatorum, qualem requirant promulgationem?*
- 25 *Quid de Statutis inferiorum Principum?*
- 26 *Lex Pontificia Roma promulgata, an illico obliget pro toto mundo?*



- 27 *Fundamenta sententia affirmativa.*  
 28 *Corollarium pro hac sententia.*  
 29 *Fundamenta sententia negativa, ab Auctoritate.*  
 30 *Et ratione.*  
 31 *Confirmatur hac sententia.*  
 32 *In praxi quid observandum?*

20 **CONCL. I.** Ut Lex in conscientia, & quoad culpam vel poenam obliget, certum est, requiri ejus publicationem, seu promulgationem. Ita communis, ac præsertim Doctor Subtilis 4. dist. 3. quæst. 4. art. 2. ubi ex hoc infert, præceptum de recipiendo Baptismo in Lege Evangelica incepisse Jerosolymis primum in die Pentecostes, quando ibidem per Apostolos post receptum Spiritum sanctum solemniter promulgatum fuit. Ratio est: quia Lex est communis vivendi regula, sive commune præceptum: ergo omnino publicari debet, ut ab omnibus observari, & quilibet secundum eam suas actiones instituere possit, prout lege jubente tenetur, & contra transgressor legis juxta demeritum puniri valeat. Nam alioquin ignorantia merito excusaret subditum ab observantia legis: Cur enim (inquit Imperator, *Auth. 66. Ut factæ novæ constitutiones §. Sancimus. Collat. §.*) culpabimus eos, qui positis nostras ignoraverint constitutiones.

21 Nec obstat, quod quandoque leges ad præterita etiam negotia extendantur, prout innuitur in Jure Canonico, cap. ult. de Constitut. ibi: Cum Leges & constitutiones futuris certum sit dare formam negotiis, non ad præterita facta trahis, nisi nominatim in eis de præteritis caveatur: in quo proin postremo casu videntur leges obligare pro tempore, quo necdum fuerunt publicatæ. Confirmari potest hæc instantia ex *Regulis Cancellariæ Apostolicæ*, quas singuli Summi Pontifices a principio sui Regiminis circa Causas Beneficiales, & Judiciales facere, vel a suis Prædecessoribus factas renovare, augere, vel minuere solent; atque etiam (ita sonat earundem Præfatio) ex tunc licet nondum publicatas, & sub tempore duraturas, observari volunt. Quinimo Sixtus V. in Constitutione, Cum frequenter. (& habetur tom. 2. Bullarii Romani, Constitut. 59. dicti Pont.) damnavit conjugia per Eunuchos, & Spadones non solum contrahenda, sed etiam de facto jam contracta, eaque nulla & invalida declaravit; & consequenter Lex Pontificia videtur extendi posse etiam ad acta præterita, & obligare ante publicationem.

22 Resp. enim cum Lud. Engel, tit. de Præbendis, n. 19. & aliis, hæc & confimiles leges, in quibus nominatim sic cavetur, partim obligare quoad nullitatem actus in contrarium gesti, non vero quoad culpam, aut poenam; de qua posteriori obligatione dumtaxat in proposito est sermo. Partim eas obligare in tantum, quod Judex circa talia negotia etiamnum pendentia (id est, nondum sententialiter decisa) teneatur ferre sententiam conformiter tali legi de novo conditæ: prout per quoscunque Judices fieri jubetur cit. Constitutione Sixti V. §. 3. atque circa prædictas Regulas in Cancellaria Apostolica observari debet.

23 Fatendum tamen, quod ad obligationem legis sufficiat quævis promulgatio, sive dein ea fiat per scripturam in publico loco affixam, sive voce præconis: siquidem scripturam ad substantiam legis non requiri, sed voce etiam, aliove signo eam communitati denunciari posse, fatentur passim Doctores. Nec obstat textus can. 3. dist. 1. ibi: Lex est constitutio scripta. Quia hoc dicitur partim ex eo, quia plerumque lex in scripturam redigi solet, ut perpetua ejus memoria habeatur, perpetuisque temporibus inviolata perseveret: partim ad differentiam Juris consuetudinarii, quod dicitur *Jus non scriptum*, prout habetur §. Constat. Instit. de Jure naturali, gentium, & civili.

24 **CONCL. II.** Leges Civiles a supremo Principe Imperii (puta, ab Imperatore) pro pluribus Provinciis latæ, ut subditos obligent, requiritur earundem promulgatio in singulis respective Provinciis, & si sint latæ absque alia temporis determinatione, non obligant, nisi primum post duos menses a tempore promulgationis legis. Ita Theologi, & Jurisconsulti communiter.

*Anacl. Reiffenstuel Theolog. Tom. I.*

Ratio est: quia ita expresse constitutum est in Jure Civili, atque approbatum praxi & consuetudine Sacri Romani Imperii: siquidem in *Auth. Ut factæ novæ constitutiones §. Collat. §.* Rubrica Tituli absolute sic loquitur. Ut factæ novæ constitutiones post insinuationem earum post duos menses valeant.

25 Solum nota cum Doctoribus passim, hanc Imperatoriam Constitutionem non habere locum in Statutis inferiorum Principum, vel Civitatum; quippe quorum jurisdictio est angustior. Unde per se loquendo, & nisi aliud in ipsamet Lege præscribatur, aut de longa consuetudine fuerit observatum, Statuta inferiorum Principum sufficienter promulantur unica solemnibus publicatione facta in Curia aut præcipua Civitate; & tunc, si certum tempus expressum non habeant, obligant scientes statim, ignorantes autem post tempus arbitrium, quo rationabiliter potest præsumi de ipsorum notitia, & quod post tale tempus non debuissent Constitutionem ignorare.

29 **CONCL. III.** Etsi communior Doctorum sentiat, quod Lex Pontificia, simul ac Romæ in Curia, aliisque locis consuetis solemniter fuerit promulgata, quantum est ex se, sive in actu primo, ubique terrarum vim obligandi habeat: opposita tamen sententia, requirens ad obligationem earum saltem pro Foro interno, seu conscientia, promulgationem Constitutionum Pontificiarum in singulis Diocesium vel Provinciis, non est improbabilis. Hæc Conclusio ex proposito sic ponitur ob magnam sententiarum, atque rationum varietatem, & plurimas inde deducendas consequentias, quæ melius relinquuntur judicio Superiorum, utpote quibus in dubio subditi obedire tenentur.

27 Ratio prioris, & communioris sententiæ, quod nimirum sola promulgatio Constitutionum Pontificiarum Romæ facta sufficiat ad earum obligationem, desumitur imprimis ex Jure Canonico, cap. 1. de Postulat. Prælat. ubi dicitur, quod id solum sufficit, ut ad constitutionis Pontificia observantiam teneatur, qui noverit eam solemniter editam, aut publice promulgatam: atqui hoc jam fit, si Bulla Pontificia Romæ promulgatur, & de tali promulgatione cuipiam certo constet; ergo. Confirmatur hæc sententia ex praxi, & stylo Curia Romanæ: siquidem in Curia Romana totius Orbis lites deciduntur juxta Constitutiones Pontificias Romæ publicatas, etiam si alibi promulgatæ non sint: hoc autem non videretur justum esse, & æquitati consentaneum, si dictæ Constitutiones non obligarent ubique, haud obstante, quod in aliis Provinciis non sint publicatæ. Accedit, quod Urbanus VIII. in Bulla, In eminenti. (quæ habetur tom. 5. Bullarii Romani, Constit. 288. dicti Pont.) §. 12. expresse declaraverit, ad obligationem illius Bullæ sufficere solam publicationem Romæ factam, nec aliam in Regnis, provinciis, vel civitatibus requiri; ergo a pari idem dicendum de ceteris.

28 Ex hac sententia, quam sequitur communior Doctorum, ac præsertim Layman lib. 1. tract. 4. c. 2. n. 4. infert citatus Auctor, quod Lex Pontificia, simul ac Romæ publicata est, quantum est ex parte sui, ac in actu primo, omnem obligandi vim habeat pro toto Orbe Christiano: cur autem quoad actum secundum (id est, ut re ipsa aliquis constringatur) non statim omnes obliget, id, ait, non provenire ex defectu legis, aut promulgationis, sed ex defectu alicujus conditionis accidentalis, puta quia eam aliqui ignorant. Et ita communiter discurrunt Doctores hujus primæ sententiæ.

29 Altera vero pars Conclusionis, continens sententiam Doctorum, asserentium, non sufficere solam promulgationem Romæ factam, probatur imprimis ab auctoritate: siquidem ita sentiunt Navarrus cap. 23. Manualis, num. 44. Medina 1. 2. quæst. 90. art. 4: & insuper pro hac sententia Azorius tom. 1 lib. 5. cap. 3. q. 3. (sed postea secutus priorem sententiam) citat Abbatem, Antonium Butrium, Imolam, Lignanum, Zabarellam, Felinum, Scotum, & alios. Eandem sententiam novissime lectus est Petrus Marchantius tom. 2. Tribunalia, tract. 1. tit. 8. quæst. 5. ipsamque ex professo docet Bernardus Sannig



tom. 3. Theolog. tract. de Legibus. dist. 3. quest. 6. atque probabilem censet Pirhing, tit. de Constit. n. 31. & sequitur Ludov. Engel, tit. de Constit. num. 67. ubi etiam respondere conatur ad cap. 1. de Posulat. Prælat. pro favore prioris sententiæ supra n. 27 allegatum.

30 Fundamentum hujus posterioris sententiæ est: quia Pontifices volunt Jus Civile servari, ubicunque Jure Canonico nihil est specialiter constitutum, juxta illud c. 1. de Novi operis mutatione. Sicut Leges non dedignantur sacros Canones imitari, ita & sacrorum statuta Canonum Principum constitutionibus adiuvantur; atque circa modum promulgandi Leges Ecclesiasticas, in Jure Canonico nihil habetur clare constitutum; ergo erit recurrendum ad Jus Civile, quod ad Legum obligationem requirit, ut promulgentur in singulis Provinciis, juxta dicta n. 24. Confirmatur: quia ipsimet summi Pontifices de facto in quibusdam legibus requirunt. & mandant publicationem fieri in singulis Provinciis & Diocæsi- bus, ut patet ex cap. Cum infirmitas. de Penit. & Remiss. & Bulla Urbani VIII. quæ incipit, Pastoralis. (& habetur tom. 4. Bullarii Romani, Constit. 62. dicti Pont.) & alibi: sed frustra hoc fieri videretur, si generaliter, & absque alia speciali declaratione (quod additur propter Bullam n. 27. citatam) Romanus Pontifex per legem Romæ promulgatam illico totum Mundum obligare inenderet, etiam pro Foro Conscientiæ; ergo.

31 Confirmatur secundo: quia, ut eleganter differtur Sannig. loc. cit. ipsamet lex Christi Domini non fuit sufficienter Jerosolymis in ipso die Pentecostes pro toto orbe promulgata, uti omnes concedunt; ergo neque lex Pontificia Romæ dumtaxat promulgata. Consequentia tener, nisi detur disparitas. Unde (infert citatus Auctor) ex hac sententia patet, quomodo multæ Bullæ Pontificiæ in variis Regnis, & Provinciis non obligent de facto, eo quod ab Ordinariis locorum aut ex negligentia, aut aliis de causis gravibus, v. g. ob laicam potestatem, vel defectum finis legis, non fuerint debite promulgatæ in suis Diocæsi- bus, juxta Paparum voluntatem & mandatum; contra quas longa consuetudo, & ipsi contraria invaluit, & vim contrariæ legis tandem obtinuit. Hactenus ille.

32 Quantum ad praxin attinet, in hac sententiarum, & rationum varietate, subditis standum imprimis erit iudicio Superiorum suorum; nam his in dubio obedire tenentur. Deinde attendenda est praxis, & consuetudo locorum, utpote quæ est tantæ efficacit, ut non tantum Jus dubium interpretari possit (nam consuetudo est optima legum interpret. c. Cum dilectus. de consuetud. & L. 36. ff. de Legibus) sed etiam legi ceteroquin manifestæ debito tempore derogare, cap. ult. de Consuetud.

#### Q U Æ S T I O I V.

#### De Acceptatione Legum.

#### S U M M A R I U M.

- 33 Legem acceptari, & usu recipi, quid?
- 34 Ad legem, an requiratur acceptatio populi?
- 35 Leges firmantur, cum moribus utentium comprobantur, quomodo?
- 36 Si lex justa est, tenetur eam populus acceptare.
- 37 Nisi habeat justam causam non acceptandi, & quid tunc agendum?
- 38 Quid de singularibus quoad praxin?
- 39 Peccant non recipientes, neque observantes justam legem, donec usu contrario abrogata sit.
- 40 Cur multa Bullæ Pontificiæ in variis Regionibus non obligent.

33 **A**dvertendum, quod Lex post promulgationem debite factam tunc censetur acceptari, quando Communitas eam approbat verbo, scripto, aut alio signo, vel quando ipsam in casu occurrente observat. Deinde, dum Communitas legem observat, dicitur lex etiam esse usu recepta. Hoc prenotato, sit

34 CONCL. I. Ad naturam, & intrinsecam constitutionem Legis humanæ non requiritur acceptatio populi, quamvis per acceptationem & usum Lex accidentaliter perficiatur, seu confirmetur. Ita communior Doctorum, hoc intelligentium tum de Lege Imperatoria, tum Pontificia. Ratio est: quia supremo Principi, utputa Summo pontifici, aut Imperatori, neque voluntas, neque potestas deest subditos obligandi ad observantiam suæ legis. Non quidem voluntas, uti supponitur; eo quod velit condere novam legem. Neque deest potestas: quia Summo Pontifici in rebus spirituales Ecclesiæ gubernationem concernentibus, tenentur obedire omnes Christiani, tanquam Pastori universali, Christianique in terris Vicario. In Imperatorem vero populus lege aurea omnem potestatem contulit. L. 1. ff. de Constitut. Principum. Quod si in aliqua Republica adhuc vigeret Regimen Democraticum, in quo potestas ferendi Leges residet penes ipsam Communitatem, haud dubie requireretur acceptatio populi: Conclusio autem solum loquitur de Regimine Monarchico.

35 Nec obstat illud Gratiani can. 3. dist. 4. Leges instituantur, cum promulgantur; firmantur, cum moribus utentium comprobantur. Resp. enim, in primis textum hunc aperte stare pro conclusione, dum concedit, leges jam institui per legitimam promulgationem, ac proinde ante earum acceptationem. Resp. ulterius, illud, quod subiungitur, firmantur, cum moribus utentium comprobantur, non de firmitate intrinseca & substantiali intelligendum esse, utpote quam leges jam ante earum acceptationem habent; sed de quadam extrinseca dumtaxat & accidentali firmitate, quatenus leges moribus utentium comprobatae, non facile amplius per contrariam legem, vel consuetudinem abrogantur. Sive (ut loquitur Fagnanus in c. Treugas. n. 49. de Treuga.) leges ex moribus utentium accipiunt firmitatem stabilitatis, non autem firmitatem auctoritatis.

36 CONCL. II. Si lex justa est, tenetur eam populus acceptare sub peccato; nisi habeat justam causam non acceptandi. Ita communis Doctorum, paucis exceptis, quorum tamen sententia novissime ab Alexandro VII. rejecta est, dum ab ipso inter alias propositiones etiam sequens, ordine 28. damnata fuit: Populus non peccat, etiam si absque ulla causa non recipiat legem a principe promulgatam.

37 Dicitur in Conclusionem, nisi habeat justam causam non acceptandi. Nam quando subest rationalis causa a Principe verisimiliter ignorata, secus erit dicendum. Idem dic, quando ex circumstantiis contraria Principis voluntas satis colligitur; prout v. g. præsumi posse videtur in lege valde difficili, nimiumque dura & gravi, quod Princeps non intendat ab initio absolute obligare: sed solum tentare populi sensum, & quomodo is tali legi sese accomodet, ut juxta eum valeat postmodum Princeps legem vel plene confirmare, vel relaxare, ac moderari. Interea tamen populus in tali casu non potest simpliciter rejicere legem, sed debet ad Principem recurrere per remedium supplicationis pro sublatione legis: qua stante supplicatione, licitum est populo, suspendere obligationem legis; prout in simili habetur c. Si quando, de Rescriptis & notat Sannig Dist. 3. de Legib. quest. 7. n. 4. post Rodriguez, Bonacinam, & alios.

38 Addit Layman lib. 1. tract. 4. c. 3. n. 3. quamvis Lex Pontificia spectata sua natura, quantum est de se, seu in actu primo, mox habeat vim obligandi subditos in toto Mundo: tamen quod attinet ad praxin, peccati damnandos non esse, neque puniendos singulos e Communitate, si legem Pontificiam in sua Diocæsi neque promulgatam, neque usu receptam, ipsi quoque non observent; de quo plura citatus Auctor.

39 CONCL. III. Et si primi, qui legem Pontificiam, vel Diocæsanam rite latam, & sufficienter promulgatam non receperunt, neque observant, peccaverint, nisi justam causam habuerint non acceptandi, successores tamen eorum illam non observando amplius non peccant. Ita Pirhing. tit. de Constitut. n. 42. & alii. Ratio est: quia, postquam talis Lex longo tempore in Diocæsi non est unquam recepta, neque observata, existimare possunt successores, illam per non usum, ac vi contrariæ consuetudinis jam præscriptæ abrogatam esse.



40 Et ex his patet (inquit Herincx *disp. 3. de Legibus* n. 117.) quomodo multæ Leges, ac Bullæ Pontificiæ, in variis Regionibus non obligent; videlicet, quia vel in iis neque publicatæ neque acceptatæ fuerunt; vel quia defectu publicationis, & acceptationis, esto ab initio culpabili, tandem in perfectam consuetudinem defuerunt. Illud autem plerumque oritur ex eo, quod Ordinarii frequenter advertant, aut existiment, ac sæpe non sine fundamento, Leges varias non congruere publicæ utilitati suarum Diocesium ob inveteratas, & rationabiles earundem consuetudines, genium plebis, defectum finis legis, v. g. quia lata sunt ob pericula & defectus, qui ibidem generationem non grassantur, imo vix noscuntur. Interdum etiam Ordinarii ob potestatem Laicam non possunt exequi pro libitu suo mandata Apostolica, donec tandem tractu temporis eadem absint in consuetudinem.

### QUESTIO V.

Quænam opera, & an etiam actus interni per Legem humanam possint præcipi, vel prohiberi?

#### SUMMARIUM.

- 41 *Lege humana quænam generatim præcipi possint?*
- 42 *Corollaria.*
- 43 *Consilia Evangelica, an possint præcipi?*
- 44 *Materia legis prohibitoria, quæ?*
- 45 *Potest idem actus pluribus legibus præcipi.*
- 46 *Actus interni nequeant lege humana præcipi.*
- 47 *Per se & directe.*
- 48 *Bene tamen indirecte & concomitanter.*
- 49 *Ratio ulterior Conclusionis.*
- 50 *Solutio objectionum.*
- 51 *Lege humana nunquam potest præcipi inhonestum, bene tamen permitti.*

41 **C**ONCL. I. Lege humana sive Ecclesiastica, sive Civili, possunt præcipi non solum opera Justitiæ sed etiam aliarum virtutum; dummodo non sint nimis ardua, atque difficilia. Ita Doctores communiter. Ratio est: quia Legislator potest ejusmodi actiones præcipere, quæ sunt utiles bono communi: aut prohibere, si earum omissio Communitati expedire videatur: atqui non sola opera Justitiæ, sed etiam actus aliarum virtutum, expediunt quandoque bono communi; ergo.

42 Sic imprimis Lege Ecclesiastica præcipiuntur opera virtutis Temperantiæ, & Religionis, indicendo certorum dierum jejunium, ac præcipiendo devotam Missæ auditionem diebus Festivis & hujusmodi, ut sic populus Christianus ad veri Dei cultum excitetur, atque in bonis operibus exercendis amplius confirmetur. Deinde ob eandem rationem possunt lege humana præcipi, aut prohiberi, actiones ceteroquin ex natura sua indifferentes: prout prohibetur Christianis deferre arma ad Infideles, item labor servilis diebus Festivis, & hujusmodi.

43 Dicitur notanter in Conclusionem, *dummodo non sint nimis ardua, atque difficilia*: siquidem Lex debet esse possibilis, & secundum naturam hominum, id est, humanæ conditioni accommodata. Et hinc Ecclesia non potest absolute præcipere actus consiliorum Evangelicorum, nimirum perpetuæ Castitatis, Paupertatis, atque Obedientiæ Religiosæ: hæc enim, licet ex postfacto recte præcipiantur illis, qui ad eorum observantiam sese prius per votum solemne Professionis Religiosæ voluntarie obligarunt, utpote qui virtute sui voti ad observantiam ipsorum jam obligantur juxta *Psal. 75. Vovete, & reddite Domino Deo vestro*, & alibi: universali tamen, & ante spontaneam obligationem rationabiliter præcipi non possunt.

44 **C**ONCL. II. Insuper legis prohibitoria materia sunt omnia illa, quæ justitiæ, aliisque virtutibus, quarum observatio Reipublicæ utilis est: simulque facilis, contrariantur. Ratio est: quia leges feruntur in

bonum Communitatis; ergo juste prohibentur ea, quæ bono communi contrariantur.

45 **C**ONCL. III. Potest idem actus pluribus legibus, & pluribus titulis præcipi, aut prohiberi; puta Lege naturali, divina, ac humana simul. Ita communis Doctorum. Ratio est: quia nihil impedit, quo minus idem actus pro meliori Juris Divini, aut naturalis observatione, vel declaratione, Jure insuper humano prohibeatur. Sic enim furtum, aut homicidium voluntarium, non solum Jure naturali ac Divino, sed etiam Lege humana tum Ecclesiastica, tum Civili, sub gravissimis poenis prohibetur; econtra vero honor debitus parentibus, aliisque legitimis Superioribus, deferri mandatur.

46 **C**ONCL. IV. Actus mere interni non possunt ulla Lege humana, sive Civili, sive Ecclesiastica, per se ac directe præcipi. Ita communior & probabilior Doctorum. Ratio est: quia solus Deus est secretorum cognitor, & judex, atque, ut dicitur *Psal. 7. Scrutans corda, & renes Deus*. Hinc etiam *1. Regum. 16. habetur: Homo videt ea, quæ parent; Deus autem intuetur cor*. Confirmatur Conclusio: siquidem Ecclesia non judicat de occultis, ut dicitur *cap. Sicut tuis de Simonia*. & alibi. Et hac de causa Hæresis, aut Simonia, vel Usura mere mentalis, quamvis coram Deo sint ex genere suo gravia peccata, nihilominus poenas juris non incurrunt; prout communiter docent Theologi, tum Canonistæ. Imo est vulgatum inter Jurisconsultos dictum, & habetur *can. Cogitationis de Penitent. Dist. 1. Cogitationis poenam nemo patitur*: intellige, ab homine, bene tamen a Deo, ut explicat Glossa ibidem.

47 Notanter autem dictum est in Conclusionem, *actus mere interni per se, & directe non possunt præcipi lege humana*: nam per accidens, & concomitanter bene possunt sic præcipi, ut mox dicetur. Hinc sit

48 **C**ONCL. V. Prædictis tamen non obstantibus, possunt actus aliqui interni Lege humana præcipi, vel prohiberi per accidens, seu indirecte & concomitanter, quatenus requiruntur ad moralem substantiam actuum externorum. Ita communior & probabilior Doctorum. Sic quippe Ecclesia præcipit diebus Festivis devotam auditionem Missæ, atque Confessionem Sacramentalem saltem semel in anno peragendam, ad quam utique illinc requiritur interior attentio; hinc autem dolor de peccatis. Similiter, cum legitimus Superior Sacerdoti præcipit, ut Missam celebret, eamque pro tali intentione applicet, vel Sacramentum Baptismi aut poenitentia administret, consequenter etiam per accidens, seu indirecte & concomitanter præcipit, ut habeat internam intentionem sacrificandi, Missamque applicandi, aut baptizandi, vel a peccatis poenitentem absolvendi: utpote cum sine ea tales actus valide elici, atque moraliter subsistere non possint.

49 Ratio ulterior Conclusionis est: quia leges & præcepta homini imponuntur, ut ea humano modo impleat, non brutorum more; ergo sicuti opus præceptum violari non potest, nisi per actum, vel omissionem humanam ac liberam, ita neque impleri: unde si quis ebrius, vel dormiens, die Festo Missæ intersit, non satisfacit præcepto, quia ipsam non audit actu humano ac morali. Accedit, quod in prædictis casibus actus illi exteriores sine ullo actu interiori, attentione scilicet vel intentione, forent mera simulatio, Deo & hominibus execrabilis.

50 Et hac ratione, nimirum rite distinguendo, & concedendo, quod Ecclesia possit quidem præcipere actus internos indirecte, & concomitanter ut conjunctos externis, non vero per se & directe, solvuntur plures objectiones & instantiæ, quæ in præsentia materia fieri possunt.

51 **C**ONCL. VI. Quamvis Lege humana nunquam possit præcipi aliquid injustum, ac inhonestum, seu peccaminosum; nihilominus aliquando licite permittuntur quædam injusta, atque inhonesta ad evitacionem majoris mali, non quidem approbando minus malum tamquam licitum, sed dissimulando ejus poenam. Ita communis Doctorum. Ratio primæ partis patet ex ipsa definitione Legis; alioquin enim ipsa foret iniqua, sicque non obligaret. Ratio vero secundæ partis est: quia quando utrumque malum omni diligentia possibili per legem evitari non potest, locum habet illud vulgatum: *Ex duobus malis*



malis minus est eligendum; non quidem approbando minus malum, sed quatenus utrumque impediri amplius non potest, minus eligendo tamquam medium ad evitandum majus malum.

## DISTINCTIO II.

### De Obligatione Legum.

#### QUESTIO I.

#### De Obligatione Legis Veteris ejusque cessatione.

#### SUMMARIUM.

1. *Præcepta Veteris Legis alia moralia.*
  - (a) Ut dicetur num. 11.
  - Alia ceremonialia.
  - Et alia judicialia.
2. *Unde dicta divisio desumatur?*
3. *Lex vetus obligabat solos Judæos per se loquendo.*
4. *An etiam obligavit Gentiles?*
5. *Ea cessavit introducta Lege Evangelica.*
6. *Circumcisio, & alia ceremonialia Legis veteris defuncto sunt illicita.*
7. *Sed post Christi mortem per aliquod tempus fuerunt licita.*
8. *Et quamdiu?*
9. *Præcepta judicialia Legis veteris, quomodo sint evacuata?*
10. *Differentia inter ceremonialia, & judicialia Legis veteris.*
11. *Præcepta moralia ipsius obligant defuncto, & quare?*
  - (b) Ut dictum n. 5. & seqq.

**A**dvertendum cum communi Theologorum, quod præcepta veteris Legis, seu Mosaicæ, fuerint in triplici differentia. Alia siquidem fuerunt *Præcepta moralia*, quæ ad morum disciplinam spectabant: qualia sunt, *non occides, non machaberis*, & hujusmodi, quæ etiamnum remanserunt, & obligant, non quatenus Leges veteris Testamenti, sed quatenus sunt Juris Naturalis. (a) Alia fuerunt *Præcepta ceremonialia*, quæ ad cultum Dei pertinebant; ac præscribebant, quomodo, & quibus ceremoniis in veteri Testamento Deus fuerit colendus, ut sic populus Judaicus, ad idololatriam propensus, ab eadem retraheretur: ut Circumcisio, varii ritus Sacrificiorum, esus Agni Paschalis, & plura hujusmodi, quæ passim in veteri Testamento, ac præsertim in libris Moysis reperiuntur. Et tandem alia fuerunt *Præcepta judicialia*, quibus constituebatur rectus ordo populi tum inter se, tum quoad communitatem, atque in exercendis judiciis observandus: hujusmodi enim præcepta fuerunt veluti quædam justitiæ, inter homines illos observandæ, determinationes, ad quas Judices populi Israelitici in decisionibus occurrentium litium atque causarum attendere debuerunt.

2 Porro hæc triplex præceptorum veteris Legis divisio clare habetur *Deut. cap. 6.* ubi dicitur: *Hæc sunt præcepta, & ceremonia, atque judicia*; qualia alibi sæpius leguntur. Hinc D. Apostolus *Rom. 7.* loquens de Lege veteri, vocat illam *Mandatum sanctum, & justum, & bonum*. Sanctum quidem quoad præcepta ceremonialia, utpote quibus homo peculiariter ordinatur ad Deum, ejusque cultum exequendum. *Justum* propter præcepta judicialia, quibus homo maxime ordinatur ad proximum, ut præbeat unicuique, quod suum est. *Bonum* tandem propter præcepta moralia, quæ per se continent bonitatem atque honestatem, & ordinant hominem potissimum ad se ipsum. Hoc prænotato, sit

3 CONCL. I. Lex vetus per se loquendo obligabat solos Judæos. Ita Herincx. *disp. 2. de Legibus qu. 2. n. 15.* estque communis Theologorum. Ratio est: quia ad Judæos solos Lex illa dirigebatur, illisque solis fuit promulgata, ut constat ex Sacra Scriptura passim; atqui Lex non obligat nisi eos, ad quos dirigitur, & quibus injungitur; ergo.

4 Dicitur, *per se loquendo*. Quia imprimis liberum fuit aliis Nationibus, Legem Mosaicam assumere, eamque profiteri per susceptam Circumcisionem; hæc enim erat janua Legis veteris, eo ferme modo, quo defuncto Baptismus est janua Legis Evangelicæ, ejusque Sacramentorum. Deinde quamvis præcepta moralia non obligaverint Gentiles, in quantum erant per positivam Dei iussionem in lege Mosaicæ mediante Decalogo renovata; nihilominus etiam Gentiles tenebantur ejusmodi præcepta moralia observare, in quantum erant Juris naturæ.

5 CONCL. II. Lex vetus, ejusque obligatio cessavit introducta Lege Evangelica. Ita Conclusio est de fide; & habetur *Act. c. 15.* ubi a sanctis Apostolis in Concilio Jerosolymitano congregatis, ex instinctu Spiritus Sancti decretum fuit, atque promulgatum, non amplius obligare Circumcisionem, aliaque Legalia veteris seu Mosaicæ Legis. Idem patet ex tota Epistola D. Pauli ad Galatas, & alibi. Unde in jure Canonico, *cap. Majores, de Baptismo*, habetur: *Abfit, ut in illam damnatam hæresin incidamus, quæ perperam affirmabat, Legem cum Evangelio, & Circumcisionem cum Baptismo servandam.*

6 CONCL. III. Circumcisio, & alia Præcepta ceremonialia veteris Legis, defuncto in Lege Evangelica non solum penitus obligare cessarunt, sed insuper eorum observatio est prohibita, illicita, & mortifera, seu mortem animæ afferens. Ita omnes Catholici; & patet ex alatis auctoritatibus, de quibus *num. præc.* Accedit ratio: quia omnes ceremoniæ illæ fuerunt umbra & figura futurorum juxta illud *1. Corinth. 10.* *Omnia in figura contingebant eis*: fuerunt enim Ceremonialia principaliter instituta ad præfiguranda Christi Mysteria ut futura, ejusque tamquam Messie in Lege promissi adventum, ergo cum ejusmodi adventus, aliaque olim præfigurata Mysteria Christi jam fuerint completa, oportuit, ut & illæ ceremoniæ cessarent, ne alioquin significando aliquid ut futurum, quod tamen revera jam est factum, falsum significarent.

7 Fatendum tamen est cum D. Augustino *Epist. 9. & 10. ad S. Hieronymum*, & Theologis communiter, quod usus atque observatio Legalium, seu Ceremonialium veteris Legis, etiam post Christi mortem atque promulgationem Evangelii, fuerit ad aliquod tempus licitus; modo in eis non collocaretur ulla spes salutis, neque ea observarentur ut signa præfigurativa futurorum. Ratio est: quia ipsimet Apostoli sæpius observarunt Legalia post Evangelium jam promulgatum; ergo eorum observatio fuit ad tempus licita, & non illico mortifera. Antecedens patet; sic enim *Act. c. 16.* S. Paulus legitur circumcidisse Timotheum; & *Act. c. 21.* idem S. Apostolus, de consilio Seniorum, purificatus ascendit in templum. Congruentiam hujus optimam addit D. Augustinus *loc. cit.* ut videlicet Synagoga sepeliretur cum honore, simulque Judæorum scandalum omne eviraretur, sicque ipsi facilius possent ad Fidem Christi converti, dum advertebant suas ceremonias, utpote pro tempore veteris Legis bonas, sanctas, atque a Deo præceptas, non ita subito abrogari, atque contemni, sicuti ritus Gentilium.

8 Ceterum successu temporis, postquam veritas Evangelii magis, magisque mundo illuxit, umbra Legis tandem omnino evanuit, adeo ut jam *Act. c. 15.* appellaretur *Hæresis Phariseorum, qui crediderunt, dicentes, quia oportet circumcidi, & præcipere quoque servare legem Moysi.* Unde patet, jam illo tempore non amplius obligasse legem Moysis. Quo autem tempore ea cæperit esse illicita, ejusque observatio mortifera, variant Theologi, cum illud ex Sacra Scriptura clare non constet, & post dictum Concilium Jerosolymitanum adhuc D. Paulus circumciderit Timotheum, atque ipse purificatus ascenderit in Templum, ut proxime dictum. Sunt, qui Legalium usum volunt fuisse licitum usque ad viginti quinque annos circiter post Christi Passionem, nonnulli ultra: quamvis certum videatur, quod ante mortem S. Ignatii Martyris ac tertii post S. Petrum Ecclesiæ Antiochenæ Episcopi, res ista jam fuerit per Ecclesiam decisa, ut notat Bernardus Sannig. *Dist. 2. de Legibus qu. 3. n. 9.*

9 CONCL.



9 CONCL. IV. Præcepta judicialia veteris Legis per adventum ac mortem Christi, atque prædicationem Evangelii, fuerunt quidem evacuata, ita ut desinerent vi illius Legis obligare; nihilominus ob naturalem æquitatem potest eorum aliquorum observatio etiam nunc per Prælatos Ecclesiæ præcipi. Ita D. Thomas 1. 2. q. 104. art. 3. & alii communiter.

10 Unde est differentia inter Præcepta ceremonialia, & judicialia Legis veteris. Nam ceremonialia adeo sunt evacuata, ut non solum sint mortua, sive nullius amplius obligationis, aut utilitatis, sed etiam mortifera, ita ut illicitum sit ea observare tempore Legis Evangelicæ. Judicialia vero, etsi non obligent tempore Legis gratiæ vi veteris Legis, imo nec observari possint ex obligatione ipsius: tamen ob eorundem convenientiam, & æquitatem naturalem, possunt etiam defacto absque peccato observari, imo de novo præcipi per eos quorum est condere leges; prout hoc in nonnullis eorum fieri, patet inductione. Sic inprimis defacto solvuntur Decimæ Parochis, aliisque Ecclesiæ Ministris, quia jure naturali, simulque Divino, debetur necessaria sustentatio Ecclesiæ Ministris, juxta illud Salvatoris, *Matthæi c. 10. Dignus est operarius cibo suo.* Et 1. Corinth. 9. *Si nos vobis spiritualia seminavimus, magnum est, si nos carnalia vestra metamus?* & alibi. Similiter, quamvis mulier post partum statim possit ingredi Ecclesiam, nec teneatur abstinere per certos dies secundum Legem Mosaicam; si tamen puerperæ ex veneratione voluerint aliquamdiu abstinere, earum devotio admittitur in Jure Canonico c. un. de Purificatione post partum. Idem patet in pluribus similibus passim occurrentibus.

11 CONCL. V. Præcepta moralia etiamnum obligant, non quidem vi veteris Legis, sed quatenus sunt Juris naturalis, aut in Lege Evangelica per Christum denuo renovata. Ita communis Doctorum. Ratio primæ partis est; quia lex vetus per Christi adventum, & mortem, fuit evacuata; (b) ergo vi ipsius præcepta moralia amplius non obligant. Ratio vero secundæ partis est: quia omnia Præcepta moralia veteris Legis reducuntur tum ad geminum Præceptum Dilectionis Dei & proximi, tum ad præcepta Decalogi: hæc autem obligant de Jure naturali, simulque sunt per Christum renovata, ut habetur *Matth. c. 19. Marci 10. & Lucæ 18.* ergo.

## Q U Æ S T I O I I.

De obligatione Legis novæ, seu Evangelicæ, ejusque perfectione.

### S U M M A R I U M.

- 12 Lex nova, quibus nominibus appelletur?
- 13 Lex Evangelica a Christo lata est pro toto Mundo, & obligat etiam Judeos ac Gentiles.
- 14 Obligavit tamen primum post sui promulgationem.
- 15 Lex nova excedit veterem multis modis.
  1. Quia est facilior veteri.
- 16 Solvitur obiectio.
  - (c) Juxta dicta quæst. præc.
- 17 II. Quia non conferuntur efficaciora auxilia gratiæ.
  - (d) De hoc infra Tract. 14. Dist. 1. n. 12. & seqq.
- 18 III. Quia lex Evangelica per Filium Dei promulgata est &c.

12 **A**dvertendum, quod Lex nova variis nominibus appellatur. Et primo quidem dicitur *Lex Evangelica*, eo quod in quatuor Evangeliiis, vel potius in quatuor libris unius Evangelii contineatur registrata. Secundo dicitur *Lex nova*, vel in comparatione Legis veteris seu Mosaicæ, vel quia totum hominem per gratiam renovat. Tertio dicitur *Lex libertatis*, *Jacob. c. 2.* Item *Lex Fidei*, *Rom. c. 3.* Et tandem *Lex gratiæ*, eo quod non solum gratiam multo copiosorem conferat virtute Sacramentorum, ac in veteri Lege contigit; sed insuper contineat, & afferat omnis gratiæ Auctorem Christum Jesum. His prænotatis, sit

13 CONCL. I. Lex Evangelica a Christo Domino condita est, & lata pro toto Mundo; adeoque ad eam, atque ad suscipiendum Baptismum obligantur etiam Judæi, & Gentiles. Ita omnes Theologi. Prima pars, quod nempe Christus sit Auctor Legis Evangelicæ, desumitur ex illo *Isaia 33.* ubi de Messia venturo, seu Christo Domino propheticè prædicitur: *Dominus judex noster, Dominus Legifer noster.* Unde & in Evangelio passim, ac præsertim *Joan. c. 14.* Christus de suis Legibus ait: *Mandata mea servate.* Altera pars, quod nempe Christus Legem Evangelicam tulerit non pro uno dumtaxat populo, sed pro universo Mundo, ipsemet expressit *Matth. c. ult.* præcipiens Apostolis: *Euntes docete omnes Gentes baptizantes eos in nomine Patris, & Filii, & Spiritus Sancti: docentes eos servare omnia, quaecumque mandavi vobis.* Et *Marci c. ult.* *Euntes in mundum universum, prædicate Evangelium omni creatura.* Accedit ratio: quia Christus fuit Redemptor totius Mundi: ergo & Legislato, condendo pro omnibus leges, per quas ad sanctificationem, vitamque æternam pervenirent.

14 CONCL. II. Nihilominus Lex Evangelica post factam sui institutionem non statim obligavit omnes, sed primum, quando solemniter fuit promulgata. Et hæc quidem promulgatio Jerosolymis contigit in die Pentecostes, qua Apostoli accepto prius Spiritu sancto cœperunt solemniter prædicari Baptismum, ejusque obligationem, dicentes: *Pœnitentiam agite, & baptizetur unusquisque vestrum, Actorum c. 2.* In ceteris vero locis post mensem, vel annum, aut plures annos incepit dicta obligatio, prout nimirum variis populis Evangelium Christi serius, aut citius solemniter, & Deo per miracula doctrinam Evangelicam confirmante promulgabatur. Ita Doctor Subtilis 4. dist. 3. qu. 4. cum aliis. Ratio hujus patet ex dictis dist. præc. qu. 2. & 3. ubi generatim dictum est, ad cujusque Legis obligationem requiri, quod solemniter promulgetur.

15 CONCL. III. Lex nova ad veterem comparata, multis modis excedit in dignitate seu perfectione. Ita omnes Catholici; idque patet inductione, assignando speciales Legis Evangelicæ prærogativas præ veteri seu Mosaicæ. Nam I. Lex Mosaicæ fuit gravior multo lege Evangelicæ. Hinc D. Petrus *Actor. c. 15.* dixit de lege veteri: *Quid tentatis imponere jugum super cervices discipulorum, quod neque patres nostri, neque nos portare potuimus?* Non quod Lex vetus absolute fuerit observatu impossibilis (Deus enim non præcipit impossibilia) sed quia observatu fuit admodum difficultis: quæ quidem difficultas oriebatur ex nimia præceptorum tum ceremonialium, tum judicialium numerositate, quorum aliqua satis erant difficilia. E contra de Lege Evangelicæ ait Christus *Matth. c. 11.* *Jugum meum suave est, & onus meum leve.*

16 Nec obstat, quod Christus *Matth. c. 5.* multa super addiderit Decalogo, dum v. g. ad illud præceptum, *non occides*, addidit, *non irasci.* & hujusmodi. Resp. enim cum D. Augustino lib. 19. contra Faustum, negando assumptum: Christus enim nil superaddidit, sed tantum explicavit melius Decalogum reprobando expositionem antiquorum Phariseorum. Adde, quod in Lege Evangelicæ cessavit obligatio ceremonialium, & judicialium veteris Legis, etsi non moralium. (c)

17 II. In Lege Evangelicæ conferuntur efficaciora, & copiosiora auxilia gratiæ ad ferendum onus Legis, justitiamque operandam, quam in Lege Mosaicæ. Ratio est: quia in Lege Evangelicæ omnia septem Sacramenta conferunt gratiam ex opere operato digne suscipientibus; in Lege Mosaicæ vero sola Circumcisio conferebat gratiam (d) & quidem respectu gratiæ Baptismalis admodum parvam. Insuper in Lege Evangelicæ, eo quod merita Christi jam sunt actu exhibita, Spiritus Sanctus abunde datur credentibus; in Mosaicæ vero, quia merita Christi tunc solum erant prævisa, atque in futurum exhibenda, etiam mensura gratiæ dabatur modica.

18 III. Lex Evangelicæ est dignior veteri: quia quamvis utramque Legem Deus condiderit: nihilominus Mosaicam promulgavit per ministerium Angelorum, Evangelicam vero per Filium suum unigenitum. Excedit præ-



terea, & differt in materia: nam Myſteria Sanctiſſimæ Trinitatis, Incarnationis, & Redemptionis noſtræ in Lege veteri fuerunt multum occultata, aut ſolum præfigurata; quæ tamen in Lege Evangelica ſunt revelata, & clariuſ manifestata, aut jam actu exhibita. Omittuntur plures aliæ ſimiles legis Evangelicæ prærogativæ, præ veteri, ſeu Moſaica.

### Q U Æ S T I O III.

De Obligatione Legum humanarum, & an obligent cum periculo vitæ?

#### S U M M A R I U M.

- 19 *Potestas legislativa alia Ecclesiastica, alia Civilis; & quomodo differant?*  
(e) Dist. præc. n. 9. & 14.
- 20 *Leges humanae tum Ecclesiasticae, tum Civiles, obligant in Conscientia, & sub peccato.*
- 21 *Solvitur obiectio.*
- 22 *Id verum regulariter loquendo.*
- 23 *Lex humana obligat cum aperto vitæ periculo, quando ejus observatio est necessaria ad bonum publicum conservandum.*
- 24 *Vel quando ejus violatio cederet in contemptum Fidei, aut Ecclesiasticae potestatis.*  
(f) Vid. tract. 7. dist. 1. n. 49. & 50.
- 25 *Extra dictos duos casus non obligat cum periculo vitæ, vel gravis incommodi.*
- 26 *Corollarium generale.*
- 27 *Aliud de infirmo, itinerante &c.*
- 28 *Quid liceat excommunicato, vel irregulari occulto, ad vitandum infamiam?*  
\* *Qualiter cognoscatur obligatio gravis, vel levis?*

19 **S**upponendum hic conformiter superius (e) dictis, quod Lex, ac potestas legislativa humana, alia sit Ecclesiastica, alia Civilis. Differunt autem inter se varie. I. Ratione originis: quia potestas legislativa Ecclesiastica proxime, ac immediate provenit a Deo, prout patet ex verbis Christi Matth. 16. *Tibi dabo claves regni caelorum.* Et Joan. 21. *Pasce oves meas.* Item Actorum 20. *Posuit vos Spiritus Sanctus Episcopos, regere Ecclesiam Dei, quam acquisivit sanguine suo.* Contra vero potestas legislativa civilis immediate provenit ab hominibus; utpote cum populus per Legem auream contulerit in Regem, atque Imperatorem, totam suam potestatem, L. 1. ff. de Constitut. Principum: quamvis & hæc saltem mediate sit a Deo, juxta illud Rom. 13. *Non est potestas, nisi a Deo.* II. Differunt ratione obiecti, & finis: liquidem potestas legislativa Ecclesiastica per se, & directe, versatur circa res spirituales, ad salutem animarum, & consequendam vitam æternam ordinatas. Civilis vero potestas per se, ac directe, seu immediate, tantum respicit commoditatem, & tranquillam gubernationem Reipublicæ; quamvis mediate, ac per accidens, etiam salutem animarum respicere possit, in quantum vitia prohibet, ac punit. Unde sequitur, quod hæc duæ potestates, Civilis nempe & Ecclesiastica, propriis officiis, ac dignitatibus discretæ sint: quamvis Ecclesiastica ob excellentiam obiecti, & finis sui, tanto præstet Civili, quanto quæ sunt spiritualia, præstant corporali- bus. His prænotatis, sit

20 **CONCL. I.** Leges humanæ justæ, ac legitime promulgatæ, non solum Ecclesiasticæ, sed etiam Civiles, regulariter loquendo obligant in conscientia, ita ut earum transgressio in materia gravi sit peccatum mortale. Ita omnes Doctores. Ratio est: quia juxta quartum Præceptum Decalogi tenemur obedire non solum parentibus, sed etiam legitimis Superioribus nostris, juxta præcipientibus. Accedit illud Apostoli Rom. 13. *Omnia anima sublimioribus potestatibus subdita sit.* Et mox infra: *Subditi estote non solum propter iram, sed etiam propter conscientiam; id est, non solum metu poenarum, sed etiam, ne peccetis.*

21 **Quod si quis obijciat.** Potestas Civilis non potest infligere poenam mortis æternæ; ergo neque sub ea, sive sub peccato mortali reatum poenæ æternæ inducente, quidpiam præcipere. Probatur consequentia: quia ejusdem est, sub poena quidpiam præcipere, & poenam transgressoribus inferre posse; ne alioquin lex sit inutilis. Resp. Negando consequentiam, cum sua probatione: nam ad hoc, ut potestas Civilis quidpiam in conscientia obligans præcipere valeat, sufficit potestas legislativa, quam habet a DEO, qui jussit legitimis Superioribus juxta præcipientibus esse obediendum. Nec idcirco lex illa erit inutilis: nam poenam mortis æternæ, transgressoribus impoenitentibus statutam sufficit, quod Dominus Deus justus Judex infligat; utpote cujus mandatum simul violatur, & a quo etiam, saltem mediate, provenit potestas legislativa Civilis, juxta citatum illud Rom. 13. *Non est potestas, nisi a Deo: itaque qui resistit potestati, Dei ordinationi resistit.*

22 Dicitur notanter in Conclusionem, regulariter loquendo. Siquidem non omnes Leges humanas obligare in Conscientia, patebit ex dicendis Quæst. seq. ubi ostendetur, dari leges aliquas mere poenales, quæ ad culpam non obligant, sed ad solam poenam subeundam.

23 **CONCL. II.** Quando legis observatio est moraliter necessaria ad publicum bonum conservandum, tunc Lex humana potest obligare cum aperto vitæ periculo. Ita Herincx disp. 3. de Legibus quæst. 12. estque communis. Ratio est: quia conservatio boni communis, omnino est præferenda bono vitæ privati hominis; ergo in tali casu necessitatis potest Superior, cui ex officio incumbit providere bono communi, obligare subditum ad observantiam legis cum periculo vitæ. Sic imprimis communiter admittitur, teneri militem tempore periculoso permanere in statione sua cum aperto mortis discrimine. Similiter tempore pestis tenetur Parochus, tum vi officii sui, tum præsertim accedente speciali præcepto Episcopi, permanere in suo loco ad excipiendas pestiferorum Confessiones non obstante manifesto vitæ periculo. Idem accidere potest in aliis similibus casibus.

24 **GONCL. III.** Quando violatio Legis humanæ cederet in contemptum Fidei, aut Ecclesiasticæ legis vel potestatis, tunc est lex servanda etiam cum periculo vitæ. Ita cit. Herincx cum omnibus Catholicis Doctores. Sic si quis ab Hæreticis captus, urgeatur ad comedendum carnes tempore Quadragesimæ in contemptum Ecclesiasticæ legis, illique Hæretici minentur mortem, nisi carnes comedat; potius ei moriendum foret, quam ut in talibus circumstantiis carnes comederet. Ratio est: quia violatio legis Ecclesiasticæ in talibus circumstantiis cederet in contemptum Fidei Catholicæ, potestatisque Ecclesiasticæ; & comedens carnes ad talem Hæreticorum instantiam, eorum sectam exterius profiteretur, ac metu mortis ipso opere contemneret potestatem Ecclesiæ: hoc autem nullo modo licet, sed est intrinsece malum. Unde tali potius esset subeunda mors, quam si quis ex præfata causa oppeteret, revera foret Martyr; (f) cum moreretur ob confessionem Fidei Catholicæ, qua credimus, Ecclesiam a Christo accepisse potestatem certas leges Fidelibus imponendi.

25 **CONCL. IV.** Extra præfatos casus Lex humana, sive Civilis, sive Ecclesiastica, non obligat cum periculo mortis, aut alterius gravis damni. Ita Doctores communiter. Hinc c. 4. de reg. juris, dicitur: *Quod non est licitum in lege, necessitas facit licitum.* Accedit ratio: quia lex debet esse secundum naturam hominum; id est, conditioni humanæ accommodata: id autem non fieret, si leges humanæ semper obligarent cum periculo vitæ, etiam extra casus supra memoratos; ergo. Hinc

26 Inferitur I. Quia duo memorati casus sunt rari, communiter non obligare Leges humanas cum periculo vitæ, amissionis membrorum, famæ, notabilis boni temporalis, perturbationis pacis, aut alterius similis gravis mali, quod considerata qualitate legis prudenter judicatur tale.



27 Infertur II. Eum non peccare, qui pressus gravi infirmitate corporis, de consilio Medicorum comedit carnes diebus jejuniis; aut qui gravi labore corporali fatigatus, vel ex prolixo itinere fessus, utitur secunda refectio: quia cum tanto incommodo corporali non obligat lex jejunii Ecclesiastici. Idem dicendum de iis, qui diebus Festivis remanent domi ad ejus custodiam, nec audiunt Missam in locis, ubi unica Missa celebratur. Innumera similia exempla passim occurrunt.

28 Infertur III. Excommunicatum occultum licite se gerere tamquam non excommunicatum, in quantum hoc est necessarium ad vitandam infamie notam, aut similibus mali periculum; adeoque si non habet, a quo absolvi possit, non teneri abstinere a Divinis, vel (prævia tamen contritione) Sacramentorum administratione, aut ab eligendo, & hujusmodi, si absque periculo infamie, alterius gravis mali abstinere non possit. Similiter irregularis factus ob culpam occultam, potest celebrare, ordines suscipere &c. si tam cito nequeat obtinere dispensationem, & absque gravi nota, vel damno, non possit diutius abstinere. Et ita de multis aliis est discurrendum, ac notat cit. Herinæx cum communi.

Additio.

\* Quæres: ex quibus signis cognoscatur, quod Legislator velit obligare non solum sub levi, sed etiam sub culpa gravi? Resp. ex sequentibus. I. Si ipsa materia, quæ præcipitur, vel prohibetur, sit gravis, nec aliunde ex circumstantiis, vel ex consuetudine tamquam optima Legum interprete constet de voluntate alia Legislatoris, qui utique posset, si vellet, in materia etiam gravi tantum obligare sub levi culpa, vel etiam sub sola pœna; cum tota ratio obligationis dependeat ab ejusdem voluntate. II. Si ipsa verba Legis indicent mentem Legislatoris graviter obligare volentis, e. g. dum expresse poneret, quod graviter intendat obligare, vel quando adderet *præcipimus*, sive *prohibemus in virtute Sanctæ Obedientiæ* &c. formalis enim obedientia non solet facile in levibus injungi. III. Si adjiciatur pœna Excommunicationis majoris, suspensionis, vel interdicti; nam similes pœnæ notabiles spirituales ex praxi Ecclesiæ non annectuntur in Jure Canonico peccatis venialibus. IV. Si communis Doctorum, cui non posset opponi gravis ratio in contrarium, vel si usus, & consuetudo optima Legum interpretes, censeant per transgressionem talis Legis committi peccatum grave. Porro, quando similia signa non adessent insinuantia obligationem gravem, in dubio, num Legislator intenderit graviter vel leviter adstringere subditos, potius judicandum est de obligatione levi, quam gravi: nam in dubiis benigniora preferenda sunt, juxta Reg. 56. ff. de Regulis Juris. Et in obscuris minimum est sequendum. Reg. 30. de Reg. Juris in 6. Ob quam ipsam rationem in dubio, num verba Legislatoris contineant veram legem, vel potius Consilium, magis in favorem subditorum judicandum erit posterius. Quod idem sentiendum, si consideratis omnibus considerandis adhuc dubitetur, num lex sit mixta, vel pure pœnalis. \*

Q U Æ S T I O I V.

De Legibus Pœnalibus, earumque obligatione.

S U M M A R I U M.

- 29 Lex humana moralis, & pœnalis, quid?  
30 Dantur leges aliquæ mere pœnales.  
31 Solvitur objectio.  
32 Quod lex aliqua sit mere pœnalis, pendet ex intentione Legislatoris.  
33 Dicitur intentio Legislatoris, unde desumenda?  
34 Ad subeundam pœnam ferenda sententia non tenetur Reus ante sententiam judicis condemnatoriam.

35 Pœna ipso jure infligita, seu lata sententia, & pœna ferenda sententia, qua?

36 Et quando pœna censeatur esse lata, vel ferenda sententia?

37 Alia hujus regula.

38 Verba illa, Sit excommunicatus, anathema &c. an contineant pœnam lata sententia?

39 Pœna lata sententia si non requirunt executionem externam, statim habent locum in Conscientia.

40 Secus, quando pœna illa requirit executionem externam &c.

41 Corollarium de Beneficiario.

42 Disparitas utriusque casus.

43 Instantia de inhabilitate ad Beneficia, & an hac possit sententiam judicis?

\* Occurritur objectioni.

44 Quid dicendum de pœnis corporis afflictivis?

45 Corollaria notabilia.

29 **A**dvertendum, quod Lex humana, præter alias sui diversiones, communiter dividatur in moralem, seu absolute obligatoriam, & in legem pœnalem. Lex moralis, seu absolute obligatoria dicitur illa, quæ mores solum dirigit, obligando ad actum aliquem eliciendum, vel omittendum, nullam vero pœnam transgressoribus expresse imponit: unde tunc pœna Judicis arbitrio imponi debet. Lex pœnalis contra dicitur illa, qua aliquid præcipitur, vel prohibetur, sub certa pœna transgressoribus constituta: cujusmodi pœna potest esse multiplex, nimirum vel spiritualis, ut Excommunicatio, Suspendio &c. vel temporalis, ut confiscatio bonorum; vel etiam corporalis, ut incarceration, mutilatio; fustigatio &c. Porro Lex pœnalis rursus dividitur in mere pœnalem, & mixtam. Lex mixta dicitur, quæ ad actum sub culpa præstandum, simulque ad certam pœnam transgressores obligat; & dicitur Lex mixta, quia est mixta ex morali, & pœnali. Leges mere pœnales appellantur eæ, quæ ad culpam non obligant, sed ad solam pœnam: & tales dari mox dicetur. Hinc fit

30 CONCL. I. Dantur Leges aliquæ pure pœnales, quæ ad culpam non obligant, sed ad solam pœnam transgressoribus impositam. Ita communis Doctorum, & novissime sequitur Christoph. Haunoldus tom. 1. de Justitia & jure, tract. 1. cap. 1. controvers. 5. quamvis Sanchez lib. 6. in Decalogum cap. 4. num. 12. velit ejusmodi ordinationes ad solam pœnam obligantes, non esse proprie leges. Ratio Conclusionis est: quia lex non obligat ultra mentem Legislatoris. Unde in simili notant Doctores, quos citat & sequitur Layman l. 1. tract. 4. c. 14. num. 2. quod Legislator circa materiam ceteroquin gravem possit obligare solum sub veniali, nam actus agentium non operantur ultra eorum intentionem, arg. cap. ult. de Præbendis Hinc dantur quædam Religiosorum Ordinum Statuta, quæ ad culpam, seu sub peccato non obligant, sed tantum ad pœnam a Superioribus infligendam. Similiter ad culpam non obligant nonnullæ Constitutiones Politicæ, circa eos actus, qui nec Juri Divino, nec naturali adverfantur, eorum tamen intermissio confert ad tranquillum Reipublicæ statum; v. g. ne quis noctu sine lumine ambulet, ne certum vestium ornatum portet, & hujusmodi.

31 Nec dicas. Ubi nulla intervenit culpa, ibi etiam juste non potest a Superiore infligi pœna; nam pœna est noxæ vindicta; ergo. Resp. enim negando consequentiam: quia licet in transgressionem legis mere pœnalis nulla interveniat culpa Theologica, seu quæ sit peccatum coram Deo; nihilominus intervenit culpa Politica, importans defectum contra laudabilem Reipublicæ, aut Ordinis Religiosi constitutionem, bonamque politicam, quæ proinde culpa merito castigatur competentem pœnam.

32 CONCL. II. Quod Lex aliqua sit mere pœnalis, non bene desumitur ex sola pœnæ adjectione, sed id dependet ex intentione legislatoris, quæ tum ex verbis Legis, tum ex subjecta materia, aliisque circumstantiis, prudenti judicio desumenda est. Ita D. Thomas 2. 2. quæst.



quæst. 108. art. 4. & alii communiter. Ratio est: quia inprimis adjectio pœnæ spiritualis, v. g. Excommunicationis, Suspensionis, & hujusmodi, potius indicat, legislatorem voluisse obligare sub culpa: cum tales pœnæ non nisi ob culpam, seu peccatum, infligi soleant. Deinde loquendo etiam de pœna temporali, per ejus adjectionem magis augetur virtus obligatoria legis, quam minuitur: unde sequitur, quod, quænam leges sint mere pœnales recte non desumatur ex adjectione pœnæ, sed hoc pendeat ex intentione Legislatoris, utpote a qua leges suam vim obligandi habent.

33 Ceterum ejusmodi intentio legislatoris, si non clare habentur ex verbis legis, prudenti judicio tum ex subjecta materia, tum ex aliis circumstantiis desumenda erit: neque enim circa hoc certa, & generalis regula dari potest. Huc etiam multum juvat consuetudo, utpote quæ est optima legum interpret: siquidem per consuetudinem ex lege pœnali mixta posse fieri pure pœnalem, ac cessante reatu conscientie manere solam pœnam Fori externi, observat Suarez lib. 7. de Legibus, cap. 19. nu. 11. & Layman lib. 1. tr. 4. c. 24. nu. 12. & sequitur Ludov. Engel. tit. De Consuetud. n. 17. Qui addunt, id fortasse contingere in Legibus Civilibus imponentibus exactiones, aut prohibentibus venari, vel ligna scindere, sive aliquid ex Regno extrahere: licet enim in principio directivæ fuerint, nihilominus potuerunt usu fieri mere pœnales, & quasi naturam mutare, quia non aliter sunt receptæ.

34 CONCL. III. Quotiescunque Lex pœnalis imponit pœnam primum a Judice infligendam, seu pœnam ferendæ sententiæ, certum est, non obligari Reum ad subeundam, vel solvendam pœnam ante sententiam Judicis condemnatoriam. Ita communis. Neque enim Reus ad amplius tenetur, quam lex ipsa imponit: hæc autem totum imponit, ut Reus pœnæ adjudicetur; quod spectat potius ad Judicem, quam ipsummet Reum. Hinc inferitur, quando Reus per legem excommunicandus, vel officio, aut Beneficio privandus decernitur (quæ formula continet dumtaxat pœnam ferendæ sententiæ) quod is ante latam a Judice sententiam possit valide, ac licite se gerere tamquam non excommunicatum, & non privatum; sique exercere omnes actus sui officii, aut Beneficii: quia revera ante sententiam Judicis necdum incurrit ejusmodi pœnam, quamvis commiserit crimen, ob quod excommunicandus, vel officio, aut Beneficio privandus est per Judicem. Sed illico pro hujus & sequentium Conclusionum intelligentia.

35 Quæres, quid sit pœna ipso jure inflicta, sive latæ sententiæ, & unde dignoscatur, pœnam esse ferendæ sententiæ, vel potius ipso jure latam? Resp. I. Pœna ipso jure inflicta, seu latæ sententiæ, dicitur illa, quæ posito delicto statim vi legis irrogatur; ut si in lege pœnali dicatur, qui tale delictum commiserit, sit ipso facto excommunicatus, officio aut beneficio privatus &c. pœna primum per Judicem juxta præscriptum legis infligenda vocatur illa, quam Legislator comminatur delinquenti, nondum autem imponit, sed primum per sententiam Judicis imponendam statuit: ut si dicatur, qui tale delictum commiserit, privetur officio, excommunicetur &c. Et hæc alio nomine dicitur Pœna ferendæ sententiæ: prior autem vocatur sub aliis terminis, Pœna latæ sententiæ.

36 Resp. II. Pœna censetur lata ipso jure, seu esse latæ sententiæ, quoties in lege pœnali adhibentur hujusmodi verba: Ipso facto, ipso jure, Mox, Ex tunc &c. sit excommunicatus, suspensus, vel privatus. Insuper est pœna latæ sententiæ, si Legislator sibi, vel legi suæ adscribat sententiam, dicendo v. g. Auctoritate nostra, Virtute hujus legis, ipso jure, subiaceat tali pœnæ &c. Addit Herrinx disp. 5. de Legibus, n. 7. idem esse dicendum, si Lex utatur solo verbo indicativi modi, præsentis, aut præteriti temporis, v. g. Excommunicamus, Suspendimus, Excommunicationem se noverit incurrisse, Sciat se esse excommunicatum, & hujusmodi.

37 Resp. III. Si Lex utatur verbis imperativi modi, quæ non efficiunt immediate ipsam pœnam, sed vel reatum pœnæ, dicendo, qui hoc fecerit, reatum talis pœnæ

incurrat, Fiat reus talis pœnæ: vel ipsam actionem Judicis, dicendo, Excommunicetur, Suspendatur, Privetur suo officio, aut beneficio. Est excommunicandus, privandus &c. Hujusmodi, inquam, formulæ solum continent sententiam ferendam, seu pœnam infligendam a Judice. Ratio est: quia de tali pœna ferendæ sententiæ possunt ejusmodi verba commode explicari; ergo etiam debent sic explicari: siquidem in pœnis benignior est interpretatio facienda, juxta Regulam 49. Juris in 6. cum concordantiis.

38 Resp. IV. Num illa verba, Sit excommunicatus, suspensus, privatus officio, Sit anathema, & hujusmodi, nullo alio addito contineant pœnam latæ sententiæ, nec ne? variant Doctores. Affirmant non pauci, eo quod ejusmodi verba imperativi modi efficiant immediate ipsammet pœnam. Oppositum nihilominus tenet Navarrus cap. 27. Manualis n. 12. ubi ait, quod hujusmodi verba, Sit excommunicatus, non denotent sententiam latam, sed ferendam, nisi cum alia Jura id declarant. Probat hoc Navarrus varie; & inprimis auctoritate Glossæ cap. 2. vers. Sequestratus, de Foro competent. Deinde, quia verbum sit est futuri temporis, & potest commode explicari per ly Fiat excommunicatus &c. unde per illud non fertur sententia ipso jure, nisi aliquid aliud addatur, puta ipso jure, ipso facto sit excommunicatus &c. Tandem, quia stante dubio mitior pars in pœnis est eligenda: atqui præfata verba sunt dubia, ut patet ex allatis rationibus, atque ipsa Doctorum varietate sentiendi; ergo.

39 CONCL. V. Loquendo nunc de pœnis latæ sententiæ, si pœna ipso jure imposita aliam executionem externam non requirat, statim ut factum illud, cui talis pœna ipso jure annexa est, committitur, habet ipsa locum in Conscientia. Ita Ludov. Engel. tit. de Conflit. n. 43. etque communior Doctorum. Et tales sunt pœna Excommunicationis latæ sententiæ, & alia Censuræ Ecclesiasticæ, item Irregularitates, impedimenta matrimonii, & hujusmodi: nam tales pœnas, si sint latæ sententiæ, ipso facto, & ante omnem sententiam judicis incurrunt, recepta praxis & usus declaravit.

40 CONCL. VI. Si vero pœnæ ipso jure illatæ, etiam externam executionem requirant (veluti est amissio domini, confiscatio bonorum, privatio Beneficii aut officii Ecclesiastici &c. ipso jure statuta) tunc ulterius ad obligationem in conscientia producendam requiritur sententia declaratoria Judicis super crimine admisso, nisi lex in specie addat clausulam, alia etiam declaratione non secuta. Ita Engel hoc cit. num. 43. Layman lib. 1. Tract. 4. c. 15. nu. 6. citans alios, & tenent Doctores passim. Desumitur hoc ex c. Cum secundum, de Hæreticis in 6. ubi bona Hæreticorum ipso jure confiscantur, & tamen ipsi non illico in Conscientia obligantur bona sua tradere fisco; quin etiam dictæ confiscationis executio, seu bonorum occupatio, prohibetur fieri ante sententiam declaratoriam Judicis Ecclesiastici super crimine hæresis admisso: ergo idem dicendum est de aliis similibus pœnis externam executionem requirentibus; cum de similibus idem judicium sit habendum, c. Inter corporalia. De Transl. Episcop.

41 Ex hac Conclusionem inferitur cum Bonacina disp. 1. de Legibus, qu. 1. punct. 7. §. 2. n. 11. & aliis, quod Beneficiarius possit retinere Beneficium suum Ecclesiasticum, donec declaretur per sententiam Judicis, tale delictum ab ipso esse commissum, propter quod privatus sit ipso jure suo Beneficio: nisi forte in lege habeatur expressum, pœnam impositam statim in Foro conscientie subeundam esse, seu illico deberi ante ullam Judicis declarationem super crimine admisso.

42 Quod si quæras disparitatem, cur pœnæ latæ sententiæ, sed executionem externam non requirentes, incurrantur ipso facto admitti criminis ante omnem sententiam Judicis, non vero aliæ requirentes externam executionem? Resp. Doctores hanc disparitatis rationem dare; quia priores sunt pœnæ privativæ, quæ non indigent actione, sed dumtaxat cessatione; posteriores autem sunt pœnæ positivæ, atque indigentes reali actione, seu executione. Cum igitur naturæ humanæ foret admodum grave quin



quin & contrarium, quod quis delinquens teneatur in semetipso exequi poenam positivam, sicque esse sui ipsius & accusator, & iudex, & executor; ejusmodi leges non censentur obligare in conscientia ante sententiam iudicis, nisi secus in eis exprimat.

43 Fateor, quod Sanchez lib. 9. de Matrim. disp. 30. n. 1. & 2. hanc dispositionem impugnet, eo quod inhabilitas ad Beneficia Ecclesiastica acquirenda, & ad ferendum suffragium sint poenae dumtaxat privativae, & tamen possunt sententiam iudicis, prout voluit Sotus, Navarrus, Molina, & Ledesma; quos citat. Verum haec ipsa doctrina allegatorum Theologorum, sententiam iudicis in his casibus requirentium, non caret difficultate: nam inhabilitatem ad electionem activam & passivam incurri ante omnem sententiam iudicis, censent inter alios Suarez lib. 5. de Legibus, cap. 9. Engel loc. cit. & Layman lib. 1. tract. 4. cap. 15. nu. 5. ubi bene notandum, quod aliter debeat in praesenti discursu de Jure aliquo, seu Beneficio, quod necdum possidetur, sub certa conditione acquirendo, & aliter de Jure quaesito, vel Beneficio jam legitime possessio iterum deperdendo: nam quoad posterius, ut illud jus, vel possessio per poenam ipso Jure illatam iterum amittatur, requiritur conformiter jam dictis num. 40. praevia aliqua sententia declaratoria, secus quoad prius, si nimirum agatur de Jure, seu Beneficio primum sub certa conditione quaerendo.

#### Additio.

\* Atque ex hac Doctrina patet resolutio sequentis dubii: cur nimirum Beneficiatus non teneatur propter poenam ipso jure illatam beneficium antea legitime obtentum atque possessum relinquere ante sententiam declaratoriam iudicis, & quare nihilominus propter similem poenam obligetur in Conscientia ante aliam sententiam declaratoriam restituere pro rato fructus, si post primos sex Menses culpabiliter omiserit recitare horas Canonicas? prout contraria sententia ab Alexandro VII. anno 1665. expressa damnata est, quae erat sequentis tenoris: *Restitutio a Pio V. imposita Beneficiatis non recitantibus horas, non debetur in Conscientia ante sententiam declaratoriam iudicis, eo quod sit poena.* Resp. enim, Clericos illos Beneficiatos omittentes horas Canonicas ideo ante sententiam declaratoriam teneri pro rato ad restitutionem fructuum; quia in eisdem nec dum (sicuti quoad ipsum Beneficium actu possessum) habent jus quaesitum, sed primum quaerendum cum hac conditione annexa, ut recitent inter alia onera etiam horas Canonicas, quas si intermittunt, incurrunt poenam praefatam, seu redduntur pro rato inhabiles ac incapaces ad ipsum jus alias primum quaerendi, id est recipiendi dictos fructus; non autem per aliquam actionem ipsis admittitur quodpiam jus quaesitum; seu quod jam actu possiderent. Videatur de hoc fusius in Jure Canonico lib. 1. Decret. tit. 2. §. 10. an. 226. usque ad n. 238.

44 CONCL. VII. Tandem loquendo de poenis corporis afflictivis, tenetur quidem Reus per se ipsum exequi poenam aliquam honestam, & non nimis acerbam, postquam per sententiam iudicis ad ipsam fuit condemnatus; puta, quod pergat in carcerem, subeat abstinentiam aliquam, vel moderate se ipsum flagellet, prout moris est in quibusdam Religionibus: nihilominus nequit Reus obligari, ut graviores poenas corporis, ut puta mortis, mutilationis &c. directe in semet ipso exequatur, sed solum, ut ipsas per ministros Justitiae illatas patienter sustineat. Ita communis

45 Unde passim norant Doctores, quod damnatus ad bibendam venenum, parere non teneatur; quod damnatus ad mortem inedia perferendam, possit licite comedere cibos sibi clam allatos: quinimo quod damnatus ad mortem, vel mutilationem, possit etiam post sententiam iudicis fugere, si via effugiendi pateat. Herinex disp. 5. de Legibus, quest. 3. Engel ubi supra, n. 44. Layman loc. cit. num. 7. & seqq. qui tamen recte addunt, quod damnatus ad furcam, vel gladium, debeat collum praebere, aut scalam ascendere &c. nam hoc non est directe mortem

infeare, sed inferendam sustinere, & per accidens solum ac indirecte ad eam cooperari.

### APPENDIX I.

#### De Lege irritante, seu invalidante Contractus, aliosve Actus.

### SUMMARIUM.

Utrum omnis Actus prohibitus subjaceat irritationi?

Additio I.

Quid intersit, an actus aliquis per Iudicem primum, vel per ipsum Jus pronuncietur irritus? Additio II.

An omnis actus ipso Jure pronuntiatus tamquam irritus reputetur plenissime irritatus? Additio III.

An actus aliquis ipso quidem Jure pronuntiatus irritus, sed nondum plenissime irritatus subsistat saltem in Foro interno, seu conscientiae ante aliquam sententiam iudicis, vel exceptionem partis? Additio IV.

Corollaria ex hac doctrina. Additio V.

Solvitur notabilis obiectio Additio VI.

#### Additio I.

\* **N**on omnes contractus, aliive actus, qui per legem prohibentur, jubentur, eo ipso necessario irritari; nam multa fieri prohibentur, quae, si facta fuerint, obtinent roboris firmitatem, inquit Pontifex cap. Ad Apostolicam. de Regularibus Sic matrimonium cum voto simplici castitatis, vel alio impedimento praecise impediens initum est quidem prohibitum, non tamen irritum, seu invalidum. Quare ut actus aliquis a Lege prohibitus censetur simul nullitati subiectus, debet id Legislator vel directe, ac explicite exprimere, vel saltem indirecte, & implicite insinuare. Explicite fit, si dicat e. g. talis actus irritetur, vel etiam talis actus sit ipso facto irritus &c. Implicite autem, dum absque simili expressa mentione vel ad talem actum certas personas inhabilitat, vel praescribit certam formam substantialem in contractu seu tali actu observandam; nam si personae inhabilitatae postea hunc actum seu contractum instituunt, vel alias habiles praescriptam formam non observant, eo ipso talis actus seu contractus subiacet nullitati, quamvis nulla clausula irritatoria sit expresse adjuncta.

#### Additio II.

\* Porro sicuti Lex poenalis alia est latae sententiae, alia primum ferendae, ita pariformiter Lex irritans alia annulat actum seu contractum ipso Jure, alia vero invalidat eum primum per sententiam decisivam iudicis, e. g. si Lex dicat, irritetur &c. signum est, quod actus contra talem Legem factus tamdiu valeat, quamdiu per auctoritatem iudicis non rescinditur: talis actus est contractus venditionis, in quo intervenit laesio ultra dimidium iusti pretii. L. 2. C. De rescindenda venditione. Econtra vero si Lex absolute pronunciet aliquem actum seu contractum nullius roboris, siue aliis utatur terminis explicite, vel saltem implicite, invaliditatem ipso Jure talem indicantibus, similis actus censetur invalidus, etiam antequam Iudex eundem ut talem decidat, idque vel pro utroque foro, ita, ut nullam obligationem talis contractus pariat, ne quidem naturalem, ac pro foro interno, vel praecise pro foro externo taliter nimirum, ut ante declarationem iudicis equidem adhuc daret obligatio naturalis, etsi non civilis, prout nimirum memoratus actus seu contractus fuerit plenissime, vel non plenissime per ipsam Legem irritatus, pro quo \*

#### Additio III.

\* Notandum ulterius, quod tunc aliquis contractus, aliive actus, qui spectando solum jus naturale foret adhuc validus, censetur per Jus positivum plenissime irritari, quando vel in irritatione adduntur similes clausulae:

Etiā



*Etiam in foro animæ non suffragetur: sive quod obtentum est, non valeat ullatenus retineri: aut taliter: viribus careat absque omni alia declaratione &c. vel si etiam absque similibus clausulis irritetur aliquis actus alias irrefcindibilis, nimirum talis, qui, si semel valet, semper valet, & si semel non valet, semper non valet, quales actus sunt Matrimonium, & Professio Religiosa; unde si Matrimonium propter certa impedimenta dirimentia pronuntiatur ab Ecclesia tamquam invalidum, vel Professio ante annum decimum sextum, aut absque præmissio Novitiatu irrita, tales actus contra dictas Leges celebrati censentur semper irriti in Foro quoque conscientiæ, & ante omnem sententiam Judicis etiam præcise declarationem. Quod si vero actus, per Jus positivum etiam ipso facto pronunciati irriti, ex natura sua extiterint rescindibiles, nec in irritatione eorum fuerit opposita aliqua ex supra allegatis clausulis, similes actus dicuntur a Lege non plenissime irritari. Et de his ultimis finaliter quæritur, utrum, dum ipso Jure, seu (quod idem est) ipso facto explicite vel implicite pronuntiantur irriti per Legem, debeant ita reputari irriti, ut quoque sint tales ante ullam Judicis sententiam etiam præcise declarationem, & quamvis nemo sese excipiendo opponat, ejusque rescissionem petat? Ad quod\**

*Additio IV.*

\* Respondeo, in his circumstantiis similes actus, et si ipso Jure per Legem pronunciati irriti, in foro interno seu conscientiæ probabilissime ante exceptionem, seu Judicis declarationem adhuc subsistunt. Ratio est: quia similes actus Jure naturali ante Legem positivam irritantem subscississent ex una parte, uti supponitur, & ex altera non constat sufficienter, quod Lex positiva eisdem ita annullaverit, ut neque valeant in foro conscientiæ ante exceptionem, seu Judicis declarationem; ergo Jus naturale manet adhuc in sua possessione, debemusque pro valore alicujus actus stare, quamdiu possumus. Accedit, quod Lex positiva, si intendat similes actus plenissime irritare, addat certas clausulas superius adductas; ergo dum has non adjungit, signum est, quod neque intendat irritare plenissime, & in foro conscientiæ ante sententiam Judicis declarationem.\*

*Additio V.*

\* Ex hac doctrina practice varios poteris resolvere casus de alienatione rei Ecclesiasticæ facta non servata forma in Jure requisita, de Testamento sine debita solemnitate condito, de electione, in qua certæ conditiones per Jus positivum ad valorem præscriptæ non interveniunt, de contractu cum pupillo absque auctoritate Judicis celebrato, de donatione ultra quingentos solidos &c. nam etsi omnes isti actus, seu contractus per Legem positivam Canonice, vel Civilem pronuntiantur directe vel indirecte ipso jure nulli, possunt tamen exinde acquisita, si nullum aliud peccatum in fervendo interveniat, in foro conscientiæ licite retineri, & electus in possessione suæ præbendæ persistere, usque dum similes actus per oppositionem partis adversæ, seu declarationem Judicis declarentur nulli.\*

*Additio VI.*

\* Dices, exinde sequi, quod in effectu non sit discrimen, sive aliquid primum irritetur per sententiam decisivam, sive pronuntietur ipso jure irritum per sententiam declarationem; cum utrobique in effectu non detur obligatio restituendi; aut actum recognoscendi tamquam invalidum ante aliquam sententiam. Respondeo, esse adhuc notabilem diversitatem inter utramque irritationem ex eo, quod actus per sententiam solummodo decisivam irritandus primum incipiat computari tamquam nullus a tempore irritationis per Judicem factæ, non a tempore contractus instituti. Econtra vero actus ipso jure nullus post sententiam nullitatis declarationem semel pronun-

ciatum fictione Juris retrotrahitur quoad suos effectus ad tempus instituti contractus, ita, ut alias nulliter contrahens post sententiam declarationem debeat restituere omnes fructus exinde non solum a tempore declarationis, verum etiam a die instituti contractus perceptos. E. g. ponamus: Petrus in aliquo testamento absque debita solemnitate facto percepit equas, & vaccas, ex quibus successu temporis acquisivit hinnulos, & vitulos: in hoc casu si testamentum impugnatur, ac a Judice declaratur ipso jure nullum, debet Petrus restituere non solum equas & vaccas, verum etiam hinnulos, & vitulos. Item ponamus, quod Petrus vi alicujus testamenti absque debita solemnitate facti acquisierit hortum, ex quo intra certum tempus varios obtinuerit fructus: in hoc casu, si illud testamentum oppugnatur, ac a Judice ipso jure nullum declaratur, debet Petrus restituere non solum hortum, verum etiam omnes fructus exstantes, quos a tempore, quo hortum obtinuit, exinde acquisivit. Videatur Reiffenstuel in Jure Canonico lib. 1. decret. tit. 2. §. & Tractatu de Regulis Juris Regula sexagesima quarta.

A P P E N D I X I I.

De Legibus ac Principum Edictis imponentibus Vectigalia, vel Tributa &c.

S U M M A R I U M.

- \* Potestas imponendi Vectigalia vel Tributa fundatur in Jurisdictione: Jurisdictio quotuplex? Addit. I.
- \* Explicatur qualibet in specie. Addit. II.
- \* Regalia quidnam importent? Addit. III.
- \* Vectigalia quotuplicia? Addit. IV.
- \* Tributa declarantur. Addit. V.
- \* Vocantur etiam *Steura*, *Collecta*, *Exactiones*, *Gabella*, *Accisa*, vel *Indebita*. Addit. VI.
- \* Specialiter de Capitatione. Addit. VII.
- \* Vectigalia imponere, an, & quando liceat? Addit. VIII. & Addit. IX.
- \* Quot conditiones requirantur, ut juxte imponantur Tributa? Addit. X. & XI.
- \* Quidnam sit Principibus observandum in cudendis variis monetis? Addit. XII.

*Additio I.*

\* CUM potestas ferendi Leges, constituendi nova Vectigalia, & imponendi Tributa ac Collectas requirat aliquam ex parte ferentis, seu imponentis Jurisdictionem, & quidem maxime in Romano Imperio, non communem, sed supremam; hinc pro claritate majori Notand. I. Quod Jurisdictio sit quadruplex, nimirum *Suprema*, *Superior*, *Inferior* seu *Bassa*, & *Simplex*, pro quibus omnibus\*

*Additio II.*

\* Notandum II. Quod *Jurisdictio simplex*, seu respective *infima* sit potestas cognoscendi aliquas præcise causas civiles, & quidem absque coercitione, seu jure exequendi sententiam. Dicta Jurisdictio absque potestate exequendi vix amplius est in usu in nostra Patria.

*Jurisdictio inferior*, seu *Bassa* (ab aliis appellatur *Imperium mixtum*) est potestas judicandi, & exequendi seu coercendi quoad causas Civiles, vel etiam Criminales extra Jus Gladii. Hæc in nostra Patria teste Chlingensperger cap. 4. *Jurisprudentiæ feudalis*. q. 14. fuit ab Ottone Bavaricæ Duce, & Rege Hungariæ concessa Nobilitati Bavaricæ ob præstita merita in acquirendo pro tunc Regno Hungarico.

*Jurisdictio superior* est potestas judicandi in causis non solum Civilibus, sed etiam criminalibus gravioribus usque ad poenam capitis inclusive. Vocari quoque solet *Imperium merum*, atque in Bavaria, ubi hæc scribo, tribuitur Regiminibus, ac Præfecturis Electoralibus, &



& quibusdam civitatibus, ac talibus nonnullis Illustribus Familiis, quæ *Imperium merum* habent annexum suis Castris, qualia exinde vocantur Dynastiæ vulgo *Herrschafften*, ad distinctionem Hoffmarchiarum habentium solummodo Jurisdictionem Bassam.

*Jurisdicctio suprema* est summa potestas ferendi Leges proprie tales, gubernandi Rempublicam, & dicendi Jus in Territorio cum prærogativis Regalibus, eaque Jurisdicctio in Romano Imperio vel est *immediata*, vel *subalterna*. Prior adscribitur Imperatori in Romano Imperio; posterior autem Electoribus, S. R. I. Principibus, aliisque Imperii Statibus immediatis.\*

## Additio III.

\* Notandum III. Regalia majora supremæ Jurisdictionis præprimis *immediate* Imperatoriæ, deinde etiam saltem magna ex parte *subalterna* annexa nihil aliud esse quam Jura Majestatis (uti vocantur) seu varias potestates, quibus veluti partibus Majestas tamquam totum quodpiam potestativum componitur. Talia Regalia censentur Jus aggrandi, seu reis condemnatis promeritam & in Jure taxatam remittendi pœnam, Jus nobilitandi, Academiâs instituendi, monetas cudendi, Vectigalia, vel tributa imponendi, aliæve Leges pro suo Territorio salutare condendi: de quibus, ac quænam ex his non solum Imperatori, verum etiam immediatis Imperii Statibus conveniant, Publicistæ fufius tractant.\*

## Additio IV.

\* Notandum IV. Vectigalia in sensu communi dici omnes illos redditus, qui pro mercibus in Territorium invehendis vel avehendis, seu etiam pro transitura solvuntur. In sensu aliquo strictiori præstationes datæ pro mercibus vectis *per aquam* vocantur *Portoria*; quod si *per terram*, proprie appellantur *Vectigalia*, quæ vero pro sola transitura, nominantur *Pedagia*, & ea solvuntur ab his, qui per tale Territorium vel pedestres incedunt, vel etiam sella, lectica, aut equo iter instituunt; nam etiam isti in Jure reputantur quasi pedestres, *L. Qui sella ff. de Servit. Præd. rust.* Si aliqui per pontes euntes debent solvere præstationes, nominantur ex *Pontenagia*. Quod si per naves peniles seu rotatiles super aquas de una ripa in aliam transferuntur, solutiones præstandæ dicuntur *Pontivegia*.\*

## Additio V.

\* Notandum V. Tributum in sensu latissimo sumptum (prout nimirum derivatur a verbo *Tribuo*) esse omne illud, quod Principi vel Reipublicæ tribuitur ex gravi causa, sive fiat præcise ob in vel avectionem mercium, sive intuitu reparationis Pontium, aut securitatis itinerum, sive ex aliis motivis in diversis rebus ad promovendum, vel conservandum bonum publicum. Et in hoc sensu non solum Collectas ac Gabellas, verum etiam Vectigalia, Portoria, atque Pedagia comprehendit. Ast in sensu ad propositum nostrum magis accommodo Tributa (germanice *Steuer*) vocantur illæ contributiones: quæ extra avectionem, vel invectionem mercium, vel extra transituram, habentibus supremam Jurisdictionem solvuntur ex bonis immobilibus, vel etiam mobilibus, ad conservandum statum, ac competentem dignitatem Principis, aut ad congrue prospiciendum aliis necessitatibus, & utilitatibus Reipublicæ, seu boni communis.\*

## Additio VI.

\* Notandum VI. Quod ultimo descripta Tributa (vulgo *Steuer*) alia sint ordinaria, alia extraordinaria. Priora singulis plerumque annis in certa quantitate solvuntur: Posteriora vero ingruente solum aliqua extraordinaria necessitate, aliave gravi causa. Vocantur autem *Steuer* præsertim extraordinariæ de novo impositæ personis pro rebus, alio nomine *Collectæ*, *Exactiones*, *Tallia* &c. Item si certæ pensiones pecuniariæ Principi, vel

Anach. Reiffenmet. Theol. Tom I.

Reipublicæ solvendæ imponuntur esculentis vel poculentis (puta vino, cerevisiæ, carni &c.) nominantur subinde ab Auctoribus *Gabelle*; vel *Accisa*, ab aliis *Accisa*, vulgo *Ausschlag*. Quando autem ex his ipsis poculentis dantur Principi aliqua in natura (uti in Bavaria ex qualibet urna vini sex mensuræ) appellantur in nostra Patria *Indebita*, germanicæ *Umgeld*. Extranei, præsertim Itali, uti Belletus, Sperellus, & Bartolus ajunt, Collectas imponi Subditis *Titulo Jurisdictionis*, Tributa autem præsertim antiqua ipsis rebus *Titulo Domini*. Sed quidquid de hoc sit, in præsentem nos accommodamus priori explicationi.\*

## Additio VII.

\* Notandum VII. Quod inter Tributa inveniatur quodpiam, quod vocari solet *Capitatio*, germanice *Kopffsteuer*, eratque memoratum Tributum jam agnitum ab Ethnicis, & pote datum a subditis tamquam professio subjectionis, & agnitio publica Majestatis in suo Principe, sine qua agnitione Rempublicam diu pacificam stare non posse optime sciebant, sicque hæc *Steura* redundabat in conservationem Boni publici, seu Reipublicæ. Ut autem eadem apud Christianos tolerari queat, debet esse modica (uti recte notat Auctor hujus operis in Jure Canonico *Lib. 3. Decret. tit. 39. n. 38.*) quando a singulis, etiam minimæ fortunæ hominibus, æque, ac a maximis præstatur æqualiter ob subjectionem utrobique repertam; ubi tamen alias taxatio fieri debet potius juxta proportionem geometricam, reflectendo nimirum simul ad majora, vel minora Bona subditorum, & taxam instituendo proportionaliter juxta eorum æstimationem. His notatis ponitur.\*

## Additio VIII.

\* Concl. I. Si Leges, aliæve ordinationes *Vectigalia*, non lucri, & quæstus causa, sed tantummodo *Titulo Impensarum*, nempe pro refarcitione pecuniarum, in confectionem, seu reparationem quarundam viarum, aut pontium expensarum, vel expendendarum, in modica, seu minuta quantitate statuant, eadem licite a transeuntibus exiguntur, dummodo hæc viæ, seu pontes singulorum pertranseuntium utilitatem, seu majorem commoditatem vere concernant, nec limites excedant, neque post refarcitionem expensarum protrahantur, neque potius palliatum quodpiam aliud commodum privatum in occulto respiciant. Ita sub his terminis communis, ipsumque Jus naturale dictat, ut, qui sentit commodum, sentiat & onus, conformiter *Reg. 55. Juris in 6.* Sic ex communi consuetudine in Patria nostra teste Illustrissimo Cancellario intimo Schmid in *Semi Centuria II. Controvers. 20. n. 5. & 8.* Communitates quædam civitatum, seu opidorum solent privatas quasdam ponticulas, vel vias pro majori transeuntium commoditate, seu utilitate facere, quibus dein a Principe Territoriali conceditur, ut ab illuc euntibus pauculos nummos, aut crucigeros exigere possint, usque dum exinde refarciantur expensæ propterea factæ, vel faciendæ pro conservatione.\*

## Additio IX.

\* Quodsi quæras, quomodo similia in Romano nostro Imperio a Principe territoriali suis subditis concedi valeant, cum Recessus Imperii de anno 1576. §. *Ultrius*. Germanice *Weiters seynd*, &c. §. *seq.* ac Capitul. Leopoldi §. 21. apud Chlingensperg. *loc. cit. qu. 22.* & apud Cancellarium intimum de Schmid pariter *loc. cit. n. 6.* omnino prohibeant, ne principes ipsimet, aut Status Imperii nova vectigalia erigant, aut vetera adaugeant, simulque ad nova instituenda, vel constituta reformanda, aut transformanda præter Imperatoris, etiam Electorum consensum requirant? Ad hoc dubium respondet Illustriss. D. de Schmid *loc. cit.* Dictam prohibitionem esse intelligendam de iis vectigalibus, quæ pro majori splendore Domus, seu Familiæ Principis &c. non

D respi-



respicendo præcise refarcitionem expensarum &c. cum gravamine commerciorum imponuntur in magna quantitate, non autem de talibus minutis, quæ transeuntibus respectu nullum gravamen, sed potius sublevamen causant propter commoditatem viarum. \*

*Additio X.*

\* **Concl. I I.** Si *Tributa* quatuor conditiones statim adducendas observant, *Leges* eadem imponentes justæ sunt, atque similes collectas teste Clingenperger *loc. cit.* non tantum Imperator cum consensu Statuum juxta *Instrumentum Pacis art. 8.* verum etiam Principes Imperii, supremæ Superioritatis Jure gaudentes, adhibito consensu, vel consilio Statuum Provincialium juxta diversa pacta, ac territoriorum consuetudines licite decernunt. Sunt autem conditiones quatuor Sequentes. I. Ut causa motiva imponendi sit causa ardua, atque redundans in Bonum Reipublicæ saltem mediate, uti sic influit honorifica; & respectu status adhuc competens sustentatio sui Principis, dummodo non adsint bona sufficientia Cameralia ad hunc finem destinata. II. Ut causa ista motiva necessitatis, vel intentæ utilitatis sit Tributo proportionata, quatenus Tributum non sit majus, quam causa motiva imponendi exigit; in quo enim excedit, iniquum & restitutioni est obnoxium. III. Ut dictum Tributum non influmatur in usus alienos, ad quos populus nequaquam concurrere tenetur, puta ad luxum, ad mera voluptuaria, excessiva ædificia, prodigas largitiones, &c. IV. Ne tale Tributum diutius duret, quam causa motiva postulat, nisi forsan nova superveniat, quasi æque gravis &c. ita sub his limitationibus tenet communissima Theologorum æque ac Jurisperitorum, etiam (quantum ex nonnullorum perustratione mihi constat) A Catholicorum contra Machiavellitas, & nonnullos (utinam non plures) pseudopoliticos sectatores, tenentes in favorem suorum Principum, permissum esse collectare subditos, quomodo, & quando sui Domini velint; cum tamen populus non sit propter Principem, sed Princeps propter populum, nec ei absolutum dominium proprietatis competat in Bona subditorum.

*Additio XI.*

\* *Et in hoc habent, quod multum attendant Consilarii, & Confessarii Principum* (inquit Auctor noster Pater Reiffentuel l. 3. Decret. Tit. 39. n. 42.) *ne alias vel minus eant, vel adulantes Politici, vel displicere timentes, & se & Principes in aeternum perdant.* Terribilem ad hoc propositum narrat historiam piissimus æque ac doctissimus Episcopus Tortonenfis Paulus Arelus Tom. I. de vitiis &c. de quodam Pro-Rege Siciliæ, qui similia Accisa rei frumentariæ imposuit; at mortis proximus conscientie stimulis agitatus instar bovis mugit, ad ultimum usque vitæ halitum exclamans: *Vae mihi jam ad tartara delapsus o propter grave scelus exorbitantis Tributorum impositionis a me commissum.* \*

*Additio XII.*

\* **Corollarii loco**, & incidentaliter adhuc annectere liceat, quod Consilarii Principum illi, quorum interest, si periculum æternæ damnationis (evadere velint, bene attendere habeant, non solum, ne per varia Decreta, & Leges bonum publicum nimium oneretur Tributis, verum etiam, ne gravetur monetis talibus, quæ in valore intrinseco a consuetis nimium recedunt, licet cum magno Boni publici damno exponuntur periculo devaluationis, prout jam suo tempore Illustrissimus Cancellarius intimus D. de Schmid Tit. I. art. I. n. 131. lamentabatur: *Deus ignoscat* (sunt ejusdem verba formalia) *supremorum Principum Ministris Cameralibus, & eorum substitutis Hebraeis, qui Imperium Romanum pro exiguo (ut vocant) appaldo multis millionibus ejusmodi depravata moneta impleverunt, quo onere plebs relevari non potest, si suo tempore redemptio moneta fiat, nisi cum damnificatione &c.* Si igitur S. Aug. regula firma est, quod non

*dimittatur peccatum, nisi restituatur ablatum, Domino Deus! quid tribues his flagellatoribus moneta, quando sumes tempus ad vindictam? Ita ille.* \*

**DISTINCTIO III.**

*De subjecto obligationis Legum.*

**QUESTIO I.**

**Quinam obligentur Legibus Pontificiis, aliisque Ecclesiasticis.**

**SUMMARIUM.**

- 1 Omnes Fideles obligantur legibus Pontificiis pro toto orbe latis.
  - 2 Iisdem obligantur etiam hæretici.
  - 3 Solvitur instantia.
  - 4 Corollarium.
  - 5 Judæi tamen, & pagani, non obligantur legibus Ecclesiasticis.
  - 6 Corollaria.
  - 7 Limitatio.
  - 8 Alia limitatio.
  - 9 Leges inferiorum Prelatorum obligant solum subditos proprii territorii.
  - 10 Religiosi exempti, an teneantur legibus per Ordinarios locorum editis?
  - 11 Id ipsum amplius declaratur.
- \* *An Legibus Ecclesiæ adstringantur pueri?*

1 **CONCL. I.** Legibus Summi Pontificis in materia spirituali, & salutem animarum, rectamque Ecclesiæ gubernationem concernente, pro toto Orbe Christiano legitime latis, obligantur omnes Christi Fideles. Ita Catholici unanimiter. Ratio est: quia Christus Dominus Divino Petro, ejusque legitimis Successoribus Romanis Pontificibus, omnium suarum Ovium curam demandavit Joan. 21. trina vice eidem præcipiens: *Pasce oves meas.* Accedit illa generalis promissio eidem facta Matth. cap. 16. *Tibi dabo claves Regni Cælorum, & quodcumque ligaveris super terram, erit ligatum & in Cælis:* nam sub ista generali promissione continetur etiam potestas condendi justas leges, ut sic Oves Christi securius pascantur.

2 **CONCL. II.** Etiam Hæretici obligantur Legibus Pontificiis pro toto Orbe Christiano latis. Ita communis Theologorum, adeo ut Lugo *disp. de Pœnitentia sect. 7. n. 147.* absurdissimum esse dicat, si quis negaret. Hæreticos obligari Legibus Ecclesiasticis jejunii, abstinentiæ, a carnibus, Censuris contra eos latis, & hujusmodi. Ratio est: quia Hæretici per Baptismum jam sunt ingressi Ecclesiam, ejusque membra effecti; ergo obligantur legibus ejusdem. Et certe, si ipsi non obligarentur Legibus Ecclesiasticis, frustra tot leges pœnales in Jure Canonico, aliisque Constitutionibus Ecclesiasticis, contra Hæreticos fuissent latæ.

3 Nec obstat, quod Hæretici resistent Ecclesiæ, Summoque Pontifici, ac legibus ipsius. Resp. enim, hoc nequaquam eos excusare; cum ex suo delicto, atque perfidia, nemo debeat reportare commodum, puta exemptionem a legibus. Quinimo Hæretici pertinaciter non obtemperantes legibus (quibus tamen de jure tenentur obedire) eo amplius peccant; cum tanto sint graviora peccata, quanto diutius infelicem animam detinent alligatam: ut dicitur in cap. ult. de Consuetud. Hinc in forma Resp. distinguendo antecedens: Hæretici defacto resistunt legibus Ecclesiæ, conceditur, de jure ipsis resistunt, ita ut bene in hoc agant, negatur antecedens, & consequentia.

4 Ex hac Conclusionem infertur cum Gobath *tract. 9. Theologiæ experiment. n. 49. & seqq.* & communi aliorum, quandoquidem Hæretici subint Legibus Ecclesiasticis, quod eorum matrimonia contracta cum impedimento dirimente vi Juris Ecclesiastici, v.g. in tertio aut quarto gradu consanguinitatis, vel affinitatis, sint nulla & invalida: unde sequitur, quod si ad veram Fidem Cath.



Catholicam convertantur, impetrata prius legitima dispensatione, horum matrimonia sint renovanda.

5 CONCL. III. Judæi, Saraceni, atque Pagani, item Catechumeni necdum baptizati, non obligantur Legibus Ecclesiasticis. Ita communior, contra Innocentium, Hostiensem, & Fagnanum *c. Canonum statuta. n. 64. de Constitut.* Ratio Conclusionis est: quia tales per Baptismi januam necdum sunt ingressi Ecclesiam, cui proinde subiecti non sunt. Hinc in Jure Canon. *c. Gaudemus de Divortis.* expresse dicitur, quod Infideles & Pagani Constitutionibus Canonicis non arctantur: quid enim ad nos secundum Apostolum (1. Corinth. 5.) de his qui foris sunt, judicare?

6 Infertur proinde, tales valide contrahere matrimonium cum impedimento dirimente Jure dumtaxat Ecclesiastico: ut si contrahant in secundo, tertio, vel quarto gradu consanguinitatis, aut affinitatis, & hujusmodi. Infertur ulterius, infideles non baptizatos, atque Catechumenos, non obligari lege Ecclesiastica de jejunando, aut habenda abstinencia carniū certis diebus ab Ecclesia præscripta, & aliis hujusmodi: siquidem tales necdum per Baptismum ingressi sunt Ecclesiam, proinde ejus legibus non subjiuntur.

7 Limita tamen hoc primo, nisi hujusmodi Leges Ecclesiasticæ contineant Jus naturale, vel Divinum; ut puta de non blasphemando, non furando, & hujusmodi: nam ad talium legum observantiam obligantur etiam Judæi, aliique Infideles, non quidem vi Legis Ecclesiæ, sed vi Juris naturalis, aut Divini.

8 Limita secundo, nisi Judæi, aliive Infideles sub sint Ecclesiæ in temporalibus; prout fit Romæ, & in nonnullis aliis locis: tunc enim ii tenentur obedire Papæ, aut alii Prælato Ecclesiastico quoad ea, quæ eorum statum concernunt, non minus, ac tenerentur obedire legibus alterius Principis temporalis, si in ejus territorio morarentur.

9 CONCL. IV. Leges inferiorum Prælatorum Ecclesiasticorum solum adstringunt subditos proprii sui Territorii: & sic Leges, seu Constitutiones in Concilio Provinciali editæ, obligant dumtaxat subditos intra talem Provinciam existentes; Statuta vero Episcoporum obligant tantum subditos propriæ Diocesis, dum intra ipsam existunt; & sic loquendo de aliis. Ita communis Doctorum. Ratio est: quia ad obligationem legis necessaria est Jurisdictio: a quo hæc deficit, si alter non sit subditus legislatoris, aut extra ipsius Territorium existat; ergo. Hinc *cap. ult. de Constitut. in 6.* decernitur, quod si Episcopus per speciale Statutum sub pœna excommunicationis quidpiam prohibuerit, v. g. furtum, ejusmodi Statutum non obliget suos Diocesanos extra ipsius Diocesis actu existentes; ac proinde hi, si extra illam Diocesis delinquant, v. g. furtum committant, non incurrant excommunicationem. Siquidem *Extra Territorium jus dicenti impune non paretur*, prout ibidem subjungitur.

10 Quæres I. An Religiosi auctoritate Apostolica ab Ordinariis locorum exempti, teneantur eorum legibus, seu Statutis? Resp. I. Tenerentur omnibus casibus, qui in Jure sunt expressi. Sic in Concilio Trident. *sess. 25. cap. 12. de Regularibus*, habetur statutum, ut Censuræ, & Interdicta ab Ordinariis promulgata, mandante Episcopo, a Regularibus in eorum Ecclesiis publicentur, atque observentur. Item, ut Dies Festi, quos in Diocesi sua servandos idem Episcopus præceperit, ab exemptis omnibus, etiam Regularibus servantur. Tacentur alii similes casus, utpote quorum notitia specialiter Religiosis incumbit.

11 Resp. II. Quamvis in aliis casibus Religiosi exempti de jure non teneantur ad observantiam Statutorum Episcopaliū, utpote a quorum Jurisdictione specialiter sunt exempti; nihilominus ratione scandali evitandi quandoque tenentur Regulares exempti etiam ad observandas alias Constitutiones Synodales, & Statuta Episcopalia, dummodo Statui Religioso non repugnent, simulque spectent ad communem observantiam, ac devotionem totius populi; prout recte observat Sanchez

*Anacl. Reiffenstuel Theolog. Tom. I.*

*lib. 4. in Decalog. c. 15. n. 21. Vasquez & alii.* Hinc quando Lege Diocesana præcipiuntur jejunia, populus valde scandalizabitur, si viderit talia jejunia non observari a Religiosis illis, quos, utpote vitæ anterioris professores, judicat ad hoc magis obligatos: unde revera ratione talis scandali evitandi, tunc Jure naturæ tenebuntur Regulares exempti ad talia jejunia observanda.

*Additio.*

\* Quæres II. An, & quando pueri astringantur Legibus Ecclesiasticis? R. Pueri ante perfectum usum rationis (qui primum post completum septennium adesse præsumitur) non tenentur Legibus Ecclesiasticis, uti nec perpetuo amentes Infantibus in hoc æquiparati. Ita præter alios Sanchez, Sayrus & Suarez cum Bonacina *Tract. de Legibus. disp. 1. quæst. 1. punct. 6.* ac La Croix *lib. 1. num. 676.* Ratio est: quia, ut hæc Leges etiam in actu primo obligent, fundamentum harum obligationum est usus rationis; & sic antequam is adsit, possunt dicti licite, & absque peccato diebus Dominicis, atque Festivis non interesse Missæ, ac tempore Jejunii comedere carnes; neque etiam peccant, qui ad hanc comestitionem cooperantur, apponendo tales cibos, sicut si apponerent Catechumenis ob eandem rationem; quia nimirum necdum sub Lege comprehenduntur, ne quidem in actu primo: quamvis loquendo de allegatis Parvulis, saltem dum magis annis discretionis appropinquant, consuetius fit, ut etiam isti sensim assuescant Præceptis Ecclesiasticis, licet necdum actu sint capaces rationis perfectæ.

Porro discurrendo de aliis Præceptis Ecclesiasticis, quæ majorem exigere videntur prudentiam, e. g. circannuali Communionem Paschalem, ut magis agnoscences gravitatem Mysterii Eucharistici cum majori reverentia accedere addiscant, requirunt AA. cum Patre Henno *Tract. de Leg. disp. 3. quæst. 7. art. 2. Conclus. 3.* ultra septennium aliquo modo plures annos ad obligationem contrahendam, uti patebit ex *Tract. 10. dist. 3. quæst. 4.* Item, ut Pueri non solum culpam, sed etiam pœnam ordinariam incurrant, Vasquez, Soto & Emanuel Sacum Busenbaum *lib. 1. Tract. 2. cap. 2. dub. 1.* & Sabino Bononienfi in sua *Luce Morali part. 1. tract. 5. quæst. 18.* desiderant regulariter loquendo, & nisi Lex expresse aliter disponat, pubertatem, quæ apud Masculos anno 14 apud Puellas vero 12. absoluto contingit juxta dicenda *Tract. VIII. Dist. 1. Quæst. III.* prout etiam in Jure Civili Impuberes regulariter solent mitiori, quam ordinaria pœna castigari, eo, quia præsumitur, non in tantum malitiam actus penetrasse, sicuti puberes.

## QUÆSTIO II

An Clerici obligentur Legibus Civilibus, ac Legislator teneatur propriis?

### SUMMARIUM.

- 12 In Legibus vis obligandi directiva, & coactiva, quid?
- 13 Leges & statuta Laicorum non extenduntur ad Ecclesias, & Clericos, nisi approbentur ab Ecclesia.
- 14 Eisdem tamen quandoque obligantur Clerici quoad vim directivam.
- 15 Corollarium.  
Non vero quoad vim coactivam.
- 16 Legibus a Republica latis, tenentur singuli ex illa.
- 17 Princeps supremus tenetur propriis legibus vi directiva, non coactiva.
- 18 Corollarium de Papa, an obligetur præceptis totius Ecclesiæ?
- 19 Declaratur Conclusio.

12 **A**Dvertendum, quod in Legibus duplex vis obligandi distingui solet, una directiva, & alia coactiva. Illa dicitur a lege obligari vi directiva ad quidpiam agendum, vel omittendum, qui in conscientia, &



sub peccato tenetur servare talem legem: unde huiusmodi obligatio est sub culpa, sive dein dicta obligatio proveniat ex vi ipsiusmet legis, prout leges solent obligare subditos; sive aliunde, puta ex naturali æquitate, & dictamine rectæ rationis. Ille vero dicitur a lege obligari vi coactiva, qui tenetur ad observantiam ejus ex vi ipsius legis, aut potestatis legislativæ, ita ut sit legi subiectus, & si eam non observaverit, subiaceat poenis per legem taxatis, aut per Legislatorem infligendis: unde hæc obligatio respicit poenam transgressoribus incumbentem. His prænotatis, sit

13 CONCL. I. Leges civiles seu Statuta Laicorum, directe, & ex sua vi propria non extenduntur ad Ecclesias vel personas Ecclesiasticas, earumque bona nisi ab Ecclesia approbentur: uti approbantur per privilegia concessa a Sede Apostolica aliquibus Principibus, de quibus Cler. Erot. Eccl. c. 27. citans plures alios DD. Hæc Conclusio habetur expresse in Jure Canonico variis in locis, ac præsertim cap. 7. § 10. t. de Constitut. Accedit ratio: quia Ecclesia, & personæ Ecclesiasticæ (uti sunt Clerici, atque Regulares) earumque bona, sunt exempta a jurisdictione Principum secularium: atqui lex non obligat eos, in quos Legislator non habet jurisdictionem; ergo.

14 CONCL. II. His tamen non obstantibus, si Leges Civiles expresse non disponant de Ecclesiis, Clericis, eorumque bonis, sed ob publicam utilitatem communiter quidpiam statuunt, neque aliunde repugnent Statui Clericali, aut immunitati Ecclesiasticæ, eidem etiam obligantur Clerici quoad vim directivam, licet non quoad vim coactivam. Ita Doctores passim. Ratio est: quia quamvis talis obligatio erga Clericos directe non possit provenire ex legibus Civilibus, ob defectum jurisdictionis in Clericos; ea tamen partim provenit ex naturali æquitate (nam turpis omnis pars est suo universo non congruens, c. Quæ contra dist. 8.) simulque ad vitandum scandalum aliorum, atque ad conservandam unitatem & pacem Reipublicæ, partim vero dicta obligatio provenit ex auctoritate Ecclesiæ. Nam ut dicitur cap. 1. de novi operis nuntiatio. Sicut leges non dedignantur sacros Canones imitari, ita & sacrorum statuta Canonum Principum constitutionibus adiuvantur: illis videlicet, quæ communem concernunt Reipublicæ utilitatem, neque sacris Canonibus, aut Immunitati Ecclesiasticæ repugnant.

15 Inferitur proinde, quod Leges Civiles pretia rerum taxantes, vel mercium erectionem extra Provinciam prohibentes, aut certum modum ædificandi præscribentes, & huiusmodi, etiam obligent Personas Ecclesiasticas, saltem quoad directivam (alioquin enim magna in Republica oriretur difformitas, & confusio) quamvis non quoad vim coactivam, ita scilicet, ut Clerici subiaceant poenis per leges Civiles statutis, ac per Judices seculares puniri valeant; cum sint exempti ab eorum jurisdictione. Unde Clerici, si fuerint transgressores talium legum, oblata querela deferendi sunt ad iudices seu Prælatos suos Ecclesiasticos, ab eisque perpenſa gravitate materiæ, & scandali suborti, poena condigna affici debent, sive statuta per legem Civilem, sive alia mitiore; prout notat Rodericus tom. 1. qq. Regul. quest. 66. art. 2. Reg. 9. Layman l. 1. tract. 4. c. 13. n. 4. & alii.

\* Videatur de his fusius, & utiliter in Jure Canonico Auctoris lib. 1. Decret. Tit. 2. §. 13. & 14.\*

#### Additio.

\* Quod si scire cupias, an, & quando Clerici obligentur illis Legibus seu Statutis Laicorum, quæ imponunt certa onera, puta Tributa, Vectigalia &c. Respondeo de hac obligatione fieri mentionem, & suo modo fusiorum deductionem Tractatu 12. Dist. 1. quest. 3. quorsum Lector remittitur. Ut autem magis reſciatur, quid sint Tributa, & Vectigalia, ac quotuplicia, & quo titulo similia onera imponantur? Videatur desuper superius Dist. 2. Appendice II. post. Questionem 4.\*

16 CONCL. III. Quantum nunc attinet ad alteram partem Quæstionis, & loquendo inprimis de talibus Le-

gibus, quæ ab aliqua Republica, vel tota Communitate conduntur, nullum dubium est, quin iisdem singuli ex tali communitate obligentur: sic quippe legibus a Magistratu latis, tenentur singuli Consiliarii, & statuti per Canonicas capitulariter constitutis, obligantur singuli Canonici in particulari. Ratio est clara, quia singuli Canonici, vel Consiliarii, sunt subditi respectu totius Capituli, vel Magistratus; ergo & obligantur legibus ipsius.

17 CONCL. IV. Loquendo vero de Legibus ab aliquo supremo Principe latis, & quidem de talibus, quæ Principem æque ac subditos decent, Princeps seu Legislator, cessante rationabili causa excusante, tenetur etiam propriis legibus vi directiva, non tamen vi coactiva. Ita communior Doctorum. Ratio primæ partis, loquentis de vi directiva, est: quia alioquin subditi ex libera transgressionem propriæ Legis per Legislatorem facta facile scandalizarentur, simulque jure de talibus dici posset illud Salvatoris Matth. 23. Alligant onera gravia, & importabilia, & imponunt in humeros hominum, digito autem suo nolunt ea movere. Hinc illud Canonis dictum: Patere legem, quam tu ipse tuleris. c. Cum omnes de Constitut. Altera pars, quod Legislator non teneatur suis Legibus vi coactiva, probatur ex eo: quia, ut quis teneatur legibus vi coactiva, debet posse cogi per Superiorem ad earum observantiam, & si ipsas non observaverit, puniri: atqui Princeps supremus, seu Legislator non recognoscit Superiorem in terris, a quo possit cogi, vel puniri, a se ipso autem nemo proprie cogitur; ergo.

18 Inferitur proinde, quod Papa non obligetur vi coactiva præcepto audiendi Missam, vel jejunandi diebus statutis: quia non habet superiorem in terris, a quo cogi possit ad talium legum Ecclesiasticarum observantiam, & ob earum transgressionem puniri; a semetipso autem nemo proprie cogitur. Nihilominus tenetur Papa propriis legibus statum suum æque ac alios decentibus, vi directiva, adeo ut peccaret, cessante rationabili causa excusante, non observando ejusmodi leges Ecclesiasticas, a se vel suis Antecessoribus latis. Et idem dicendum de Imperatore respectu Legum Imperialium æque personam Imperatoris decentium, & aliis huiusmodi.

19 Dicitur notanter in Conclusionem, loquendo de talibus legibus, quæ Principem æque ac subditos decent. Siquidem certum est, Principem atque Legislatorem iis legibus nullatenus obligari, quæ ad subditos directe feruntur, & in Principem proprie non cadunt: quales leges sunt, ne quis in civitate arma ferat, ne vestibus auro intextis utatur, ut quilibet tributa aliasque exactiones diligenter solvat, & alia plura huiusmodi: nam patet, tales leges Principi non convenire, neque ipsum astringere.

### Q U Æ S T I O I I I.

An Peregrini obligentur Legibus, & consuetudinibus locorum, per quæ transeunt?

#### S U M M A R I U M.

- 20 Peregrini tenentur legibus totius Ecclesiæ ubique locorum.
- 21 Tenentur etiam legibus particularibus locorum, quamprimum ibi domicilium figunt.
- 22 Si mora in aliquo loco sit longior, tenetur peregrinus ad ejus leges.
- 23 Advenæ & peregrini quoad contractus tenentur legibus locorum.
- 24 Corollaria.
- 25 An Advenæ & peregrini teneantur aliis particularium locorum, variant Doctores.
- Sententia tamen affirmativa est communior.
- 26 Hujus multiplex probatio.
- (a) Dist. I. n. 18.
- 27 Quid dicendum de legibus universalis Ecclesiæ, quando ipse alibi, sed non in propria patria obligantur?
- 28 Corollarium de incolis regni Castellæ.
- Aliud de Germanis existentibus in Italia.
- 29 Contraria nonnullorum sententia refertur.



- 30 Quid econtra dicendum de legibus, quæ vigent in patria, sed non in loco, ubi quis hospitatur?  
 \* Item, si in proprio quidem Territorio, sed in loco exempto, existente intra limites ejusdem?

20 **C**elebris, & plurimum practica Quæstio est præfens, unde exactius declaranda propter quotidianorum casuum emergentias. Et quidem, ut certa ab incertis separentur, certum inprimis est legibus communibus totius Ecclesiæ ubique locorum teneri Peregrinos, & Advenas Christianos; cum semper subsint jurisdictioni Ecclesiæ, ubicumque existant. Sic quilibet peregrinus tenetur ad jejunia Quadragesimæ & Vigiliarum, atque ad audiendam Missam diebus Dominicis, Festivisque; quia hæc sunt de Præcepto totius Ecclesiæ.

21 Certum insuper est, illum, qui migrat aliorum fixurus ibidem domicilium, mox teneri legibus illius loci, cum primum incipit ibidem degere: nam ex tunc incipit esse incola illius loci. Sic constituens domicilium in Civitate Frisingensi, mox tenetur ad servanda omnia Festa particularia hujus loci, quæ sunt de præcepto, quamvis primum heri vel nudius tertius advenerit.

22 Præterea si mora in aliquo loco sit longior, ut puta hebdomadam, vel saltem per mensem, ratione cujusdam negotii expediendi, usus communis docet, tales Peregrinos teneri sese accommodare legibus & consuetudinibus loci, observando scilicet Festa vel jejunia de præcepto illius loci. Ratio est: tum quia hoc exigit quies Reipublicæ, quæ alias ex diversis hominum moribus perturbaretur. Tum quia habitatores ad tempus longius in aliquo loco acquirunt ibidem quasi domicilium: nam quasi domicilium dicitur locus, ubi quis per longius tempus moram trahit, absque tamen animo ibidem perpetuo consistendi. Quæstio igitur remanet solum de Advenis & Peregrinis, qui vel per talem locum transeunt, vel ibidem pro brevi dumtaxat tempore morantur absque animo figendi domicilium, vel quasi domicilium: de & his loquendo, fit

23 **CONCL. I.** Advenæ & Peregrini quoad contractus obligantur legibus locorum, per quæ transeunt, atque ibidem contrahunt. Hæc Conclusio est certa, & communis Doctorum; ac patet tum ex consuetudine & communi sensu populorum, tum ex *cap. ult. de Foro competent.* ubi dicitur, quod *ratione contractus forum quis sortitur*; atqui forum sortiri, & legibus loci attingi, a pari procedunt. Similia habentur in Jure Civili: unde loquendo de legibus contractuum præfens Quæstio non habet difficultatem.

24 Sic inprimis tenentur Peregrini servare formam contractuum in tali loco præscriptam. Similiter obligantur ad pretium ibidem taxatum, in emptione rerum persolvendum. Insuper ab iisdem Advenis, seu Peregrinis, debet solvi vectigal alicui contractui juste appositum; quia est onus contractus ibidem celebrati: & idem dicendum de similibus.

25 **CONCL. II.** Quamvis multi Doctores probabiliter teneant, Peregrinos & Advenas non astringi peculiaribus legibus atque consuetudinibus particularium locorum, per quæ transeunt, vel in quibus brevi dumtaxat tempore per modum hospitii reperiuntur, cessante tamen scandalo, & quando eæ non obligant in proprio suo domicilio; prout sub daris limitationibus docet Sanchez *lib. 3. de Matrim. disp. 18.* & rursum *lib. 1. in Decalog. c. 12. n. 38.* citans Silvestrum, Toletum, Rosellam, Azorium, pluresque alios, quibus postea accesserunt Sannig. *disp. 3. de Legib. quæst. 8. num. 9.* Tannerus, Bonacina, Diana, & Layman. *lib. 1. tract. 4. cap. 12. n. 4.* inde inferens, quod peregrinus veniens Augustam die S. Udalrici, qui eo loco Festus est non teneatur (per se loquendo, & secluso scandalo) Missam audire, & a servilibus operibus abstinere, licet totum diem ibi mansurus sit. Nihilominus opposita sententia, quæ ejusmodi obligationem admittit, est communior, eamque tenet Abbas in *c. Consilium. n. 6. de Observ. junior.* id probans ex textu illius Capituli. Hostiensis, Suarez, Valquez, Navarrus, Ledesma, Covarruvias, Henriquez, Palaus, Anac. Reiffenstuel. Theol. Tom. I.

Lezana, Herincx, & Mastrius *disp. 2. Theolog. Moral. n. 119.* pro hac sententia citans quamplures alios.

26 Ratio hujus posterioris sententiæ desumitur inprimis ex Jure Canonico, *can. 111. dist. 12.* ubi ex S. Augustino *Epist. 118.* refertur sententia D. Ambrosii, dicentis: *Cum Romam venio, jejuno Sabbatho; cum Mediolani sum, non jejuno: sic etiam tu, ad quam forte Ecclesiam veneris, ejus morem serva, si cuiquam non vis esse scandalo, nec quemquam tibi.* Ubi Glossa *v. Societate.* ait: *quod quilibet tenetur vivere secundum consuetudinem illorum, inter quos versatur, c. quæ contra. dist. 8. & c. quisquis. dist. 41.* Unde versus:

*Si fueris Roma, Romano vivito more:  
 Et si sis alibi, vivito sicut ibi.*

Accedit ratio: quia leges immediate censentur afficere locum, seu territorium legislatoris, atque hinc in subditos ibidem existentes transire, ut dictum superius (a) & notat Layman *loc. cit. cap. 11. n. 1. & 2.* post Suarez, & alios; ergo hoc ipso, quod Peregrinus reperiatur in tali loco, tenetur legibus particularibus illius, ac censetur subditus domini illius territorii. Unde secundum omnes Advena, non servans leges peculiares alicujus loci, potest a legislatore, ac Judice illius loci propter talem legum transgressionem puniri; & consequenter ad eas obligatur.

27 **CONCL. III.** Loquendõ nunc de Legibus universalis Ecclesiæ, Advenæ & Peregrini, licet in loco diu moraturi non sint, sed tantum transeant, obligantur communibus legibus & consuetudinibus totius Ecclesiæ ibidem vigentibus, quamvis hæc in ipsorum patria ex speciali privilegio, aut consuetudine non observentur, neque obligent. Hæc Conclusio a fortiori procedit propter dicta *n. præced.* estque communis inter Doctores, paucis exceptis. Ratio ulterior est: quia Jus commune universos ex natura sua obligat; & si alicubi ratione specialis privilegii, vel consuetudinis contrariæ non obliget, id videtur esse privilegium locale, seu loco coherens, non autem personale, seu sequens personam, quocumque ierit. Accedit, quod tales consuetudines a Jure communi exorbitent: sed quæ a Jure communi exorbitant sunt restringenda juxta *Reg. 28. Juris in 6.* cum concordantiis.

28 Inferitur proinde cum Doctoribus passim, quod Castellanus (id est, incola regni Castellæ in Hispaniis, ubi de antiqua consuetudine licitum est, diebus Sabbatinis comedere extremitates, & intestina animalium) dum per alienas regiones peregrinatur, peccet vescendo extremitatibus ac intestinis illorum animalium diebus Sabbati. Similiter Germani, dum tempore Quadragesimæ, vel aliis diebus jejunalibus morantur in Italia, tenentur abstinere a lacticiniis, juxta consuetudinem universalis Ecclesiæ ibidem etiamnum vigentem, non obstante, quod in Germania licitus sit usus lacticiniorum (id est, lactis, butyri, casei, & ovorum) diebus jejunalibus. Et idem dicendum de aliis similibus.

29 Ceterum quamvis hæc sententia sit valde communis, simulque tutior & probabilior, ac proinde ordinariè in praxi tenenda, maxime ut evitetur occasio omnis scandali: nihilominus non desunt Doctores aliqui oppositum tenentes cum Sanchez *lib. 3. de Matrimonio. disp. 18. num. 7.* quorum sententiam non omnino improbabilem, censet Layman *cit. cap. 12. n. 3.* dummodo absit omne periculum scandali. Unde propter auctoritatem talium virorum doctorum (inquit Ludov. Engel. *tit. de Constit. n. 30.*) non auderem semper alicujus gravis peccati damnare eum, qui contrarium teneret seu practicaret, præsertim antecedente aliqua rationabili causa, v. g. conservandæ valetudinis, & remoto scandalo: ut si Germanus tempore Quadragesimæ in Italia privatim comederet, ova, caseum, & alia lacticina. Hæc ille.

30 **CONCL. IV.** Econtra vero Advenæ, & Peregrini non tenentur præceptis Juris communis, etiam in sua patria vigentibus, si hæc non sint in usu in loco, ubi per modum hospitii reperiuntur, aut morantur. Ita Doctores communiter. Ratio est: quia quilibet potest se accommodare rationalibus consuetudinibus locorum,



in quibus existit. Hinc inferitur, quod Germanus, si per regnum Castellæ in Hispaniis existens transeat, possit ibidem diebus Sabbatinis licite vesci extremitatibus & intestinis animalium, quibus ibidem vesci licitum est. Similiter Itali, dum hospitantur, aut morantur in Germania, licite diebus jejunalibus comedunt lacticia, non obstante, quod hæc in Italia sint gravissime prohibita: & sic loquendo de aliis. Ratio hujus ulterior est: quia nemo tenetur ad patriæ consuetudines, dum ab ea abest; imo in hujusmodi casibus valet privilegium locale, quo frui possunt omnes, qui morantur in tali loco.

*Additio.*

\* Ob quod ipsum ultimum fundamentum ratione Privilegii localis non tenetur quis Legibus proprii Territorii, si existat in loco exempto, quamvis dictus locus exemptus sit intra limites proprii Territorii. Exemplificant Bonacina & Layman apud Busenbaum *Tract. 2. cap. 2. Dub. 2.* si Episcopus sub poena Excommunicationis vetaret lusum alearum, non obligarentur Clerici studentes in loco exempto a Jurisdictione Episcopali sito intra Territorium. \*

QUESTIO IV.

Resolvuntur varia quæsitæ quoad Peregrinos.

SUMMARIUM.

- 31 *Occasio movendi sequentes quæstiones.*
- 32 *Discrepancia inter Calendarium novum, & antiquum.*
- 33 *An extra Parochiam, ubi est Festum, Parochiani possint alibi laborare?*
- 34 *An etiam exire ad alibi laborandum?*
- 35 *An talis mane exiens teneatur prius Missam audire?*
- 36 *Negativa est valde probabilis.*
- 37 *Quando teneamur prævenire audiendo Missam?*
- 38 *An discedens loco, ubi non est jejunium, perventurus tamen ad locum, ubi est jejunium, possit comedere carnes?*
- 39 *Utrum teneatur absolovere jejunium Quadragesimale, qui pervenit ad locum, ubi illud jam est absolutum?*
- 40 *Cessante fraude, negative respondetur.*
- 41 *Quid, si in fraudem jejunii inde discedat?*  
\* *Occurritur objectioni.*
- 42 *An contra, qui jejunium jam peregit, teneatur rursus jejunare?*

31 **A**dvertendum, multa esse Festa particularia locorum, quæ in una Diocesi vel Parochia obligant sub præcepto, in alia vero non obligant. Sic Festum S. Wolfgangi in Diocesi Ratisbonensi, die 31. Octobris, est de præcepto, non vero in vicina Diocesi Frisingensi: unde in ipsa civitate Landshutana licitum est, hac die opera servilia exercere, cum pertineat ad Diocesis Frisingensem, non vero in suburbiis ultra Isaram, quia spectant ad Diocesis Ratisbonensem. Et alia quam plura Exempla passim habentur in confinibus duarum Diocesum, in ordine ad Festa particularia dictarum Diocesum.

32 Hoc idem contingit quoad Festa & jejunia totius Ecclesiæ in illis locis, in quorum uno Calendarium Romanum novum, in altero vero vetus observantur: nam quamvis hæc duo Calendaria convenient quoad dies Dominicos, nihilominus quoad Festa immobilia, una cum jejniis præviis discrepant decem diebus, quoad Quadragesimam vero, ac Festa mobilia Paschatis & Pentecostes, &c. quandoque concordant, quandoque pluribus hebdomadibus discrepant. Unde plures casus formari possunt de iis, qui ab uno loco ad alium transeunt, an & quomodo teneantur ad hujusmodi festa, vel jejunia de præcepto observanda. Hoc prænotato.

33 Quæritur I. An, quando est Festum in una Parochia; in altera autem Parochia vicina non est, possint subditi Parochiæ, in qua est Festum de præcepto, extra limites suæ Parochiæ laborare? Resp. Affirmative, prout

tenet Lessius *lib. 4. de just. & jur. cap. 2. n. 55.* Navarrus *cap. 13. Manualis. n. 5.* & alii. Ratio est: quia Statuta, & consuetudines locales, sunt veluti loco affixæ; unde non ligant talia Festa Parochianos, dum existunt extra districtum Parochiæ.

34 Quinimo Navarrus *loc. cit.* asserit, posse rationaliter teneri, eos qui in Festi Vigilia, vel etiam ipso Festo, a suo proprio loco in alium laborandi gratia exeunt, ubi Festum illud non observatur, juxta rigorem Juris non peccare. Rationem dat: quia non laborant in loco, ubi est dies Festus. Accedit, quod tales videantur uti jure suo. Verumtamen communiter homines magis timorati in tali casu solent servare diem Festum, quamvis si ab aliquibus sententia Navarri practicaretur, non esset ipsis formandus scrupulus peccati; præsertim, si prius ante suum egressum audiant Missam, ut vult citatus Navarrus.

35 Quæritur II. An talis exiens e loco, ubi est Festum de præcepto, teneatur audire ibidem Missam, si eodem die perveniat ad locum, ubi non est dies Festus? Affirmat Navarrus *cit. n. 5.* eo quod dies Festus, ubi aliquem deprehendit, obliget eum ad sui observantiam.

36 Communior tamen, & valde probabilis sententia est, talem non teneri ad Sacrum in priori loco audiendum, dummodo eodem mane sit venturus extra limites illius loci, ubi agitur dies Festus. Ratio est: quia, quando præcipitur auditio Missæ, subintelligitur tacita conditio, si toto illo tempore, quo Missæ celebrantur, quis manserit in loco diei Festi, & consequenter subditus præcepto: talis autem adhuc mane est extra fines illius Parochiæ Festum de præcepto celebrantis, prout supponitur: ergo.

37 Neque tenetur talis prævenire, audiendo Missam ante suum discessum: quia tunc solum tenemur prævenire, quando manente vi præcepti, seu nostra subjectione, videmus nos postea fore impediendos; ut cum quis manens in loco, ubi viget præceptum diei Festi, videt se horis posterioribus impeditum iri negotiorum causa, tenetur prius audire Missam. Secus est, quando intra tempus implendi præceptum desinit esse subditus alicujus loci particularis, & reperitur extra limites illius; prout argumentatur Lessius *loc. cit. n. 56.* Tunc enim non tenetur prævenire; sicut a pari, si existerem in territorio hora septima, & viderem, me per dispensationem fore a præcepto deobligandum hora 10. exinde non tenerer præveniendi exequi præceptum Missæ v. g. hora 7.

38 Quæritur III. An, qui mane discedit ex oppido, ubi non est jejunium, possit comedere carnes, quamvis vesperi, vel meridie sit venturus ad locum, ubi est jejunium de præcepto? Resp. affirmative, eo quod in priori loco constitutus, nondum teneatur lege jejunii posterioris loci. Non tamen econtra potest quis in loco domicilii, ubi est jejunium, vesci carnibus, si inde mane discedat, perventurus ad locum, ubi non est jejunium. Ratio est: quia tenetur legibus proprii domicilii, quamdiu in eo reperitur.

39 Quæritur IV. Utrum is, qui durante Quadragesima negotiorum causa e loco proprii domicilii recedit, ac venit in locum, ubi ob discrepationem novi & veteris Calendarii Quadragesima jam est peracta, teneatur eandem ibi perficere, & tamdiu abstinere a Carnibus, atque jejunare, donec compleatur tota Quadragesima? Ratio dubitandi est: quia præceptum jejunii Quadragesimalis est generale; ergo obligat ubique, & ubique impleri debet. Et hujusmodi sententia affirmativa utique est magis pia, tutior, ac proinde Catholicis omnibus in praxi suadenda.

40 Nihilominus oppositum videtur probabilius, si loquamur de iis, qui non in fraudem jejunii, sed bona fide, v. g. negotiorum causa, ab uno loco in alium commigrarunt, præsertim cum valde difficile sit, in convictu humano, seorsim ab aliis servare jejunium, & ceteris omnibus a lege jejunii solutis, ac Festa Paschalia cum gaudio celebrantibus, adhuc jejunare, & Quadragesimam continuare, prout tenet Lessius ibidem *n. 59.* &



Bonacina *disp. 1. de Legibus. quæst. 1. punct. 6. n. 64.* cum aliis. Ratio generalis est: quia potest quis sese moribus eorum, quibuscumque vivit, accommodare, juxta illud vulgatum, & superius jam adductum:

*Si fueris Romæ, Romano vivito more:*

*Et si sis alibi, vivito sicut ibi.*

41 Dicitur notanter, si loquamur de iis, qui non in fraudem jejunii &c. Siquidem, ut dicitur c. *Sedes & c. Ex tenore de Rescript. frau.* & doli alicui patrocinari non debent: unde non careret scrupulo peccati gravioris, si civis Landshutanus die 31. Octobris exiret ad suburbana civitatis ultra Isaram, eo solum animo, ut ibi posset vesci carnibus (siquidem in Diocesi Ratisbonensi, ob solemnitatem S. Wolfgangi, principalis Patroni, hac die non est jejunium Vigilæ omnium Sanctorum, sed illud pridie anticipatur) quia hoc fieret in fraudem legis, ac jejunii Vigilæ omnium sanctorum totam Ecclesiam obligantis: quidquid cum nonnullis aliis contradicat Bonacina *loc. cit.* ea ratione permotus, quod talis videatur uti jure suo: nullus autem videtur dolo facere, qui suo jure utitur. *Reg. 55. ff. de Reg. Jur.*

*Additio.*

\* Sed potest negari suppositum, quod nimirum quis habeat Jus præcise eo fine exeundi e suo Territorio. Profecto, si quis ex illo solo fine a loco promulgati Concilii Tridentini exiret ad locum non promulgati Concilii, ut contrahere posset Matrimonium clandestinum, postea iterum redeundo ad suum proprium Territorium, tale Matrimonium non valeret juxta Declarationes Cardinalium videndas *Tom. 4. Decret. Tit. 3. §. 3. \**

42 Quæritur V. Utrum econtra is, qui explevit jejunium Quadragesimæ, vel aliud, si venerit ad locum, ubi illud necdum est peractum (prout sæpe fit itinerantibus ratione novi Calendarii non ubique recepti) teneantur ibidem rursus a carnibus abstinere, atque jejunare? *Resp.* cum citat. *Lessio n. 52. & alii*, talem non teneri: quia præceptum illud jam implevit: Ecclesia vero neminem obligat ad duplex jejunium. Cavendum tamen, ne alii inde scandalizentur. Et hoc idem dicendum est de celebratione Festorum, ac similibus aliis.

## Q U Æ S T I O V.

Qua intentione, quibusque actibus satisfiat præceptis Legum?

### S U M M A R I U M.

- 43 *Intentio duplex hic distinguenda.*
- 44 *Ut impleatur præceptum, requiritur intentio faciendi opus.*
- 45 *Non tamen intentio satisfaciendi præcepto.*
- 46 *Corollaria.*
- 47 *Oportet tamen mutare animum.*
- 48 *Potest quandoque adimpleri præceptum per actum ex circumstantia malam.*
- 49 *Solvitur objectio.*
- 50 *Nisi modus sit de intrinseca ratione actus præcepti.*
- 51 *Potest quandoque uno actu satis fieri pluribus præceptis.*
- 52 *Fallit in debitis justitiæ.*
- 53 *Quid de Pœnitentia Sacramentali?*
- 54 *An eodem tempore per plures actus possit satisfieri pluribus præceptis?*
- 55 *Corollarium.*

43 **Q**uamvis ad primam Quæstionis partem attinet, advertendum est, quod in executione operis præcepti possumus duplicem habere intentionem; unam præstandi opus, quod præcipitur; alteram satisfaciendi præcepto per tale opus. Hoc prænotato Quæstio remanet; quænam ex his intentionibus requiratur ad satisfaciendum præceptis, seu legibus.

44 **CONCL. I.** Ut præceptum actum humanum injungens adimpleatur, requiritur ad minimum intentio

faciendi opus, quod præcipitur: sic v. g. ut satisficiat præcepto Divini Officii persolvendi, requiritur intentio recitandi Horas Canonicas, seu orandi, & non sufficit earum recitatio facta solo animo studendi, vel discendi. Ita Sanchez *lib. 1. Decal. c. 13. n. 2.* Bonacina *disp. 1. de Legibus. q. 1. punct. 10. n. 2. & alii.* Ratio est: quia talia opera præcepta debent præstari modo humano; non præstantur autem humano modo, nisi adsit voluntas, & intentio eadem præstandi: sic enim recitatio Horarum Canonicarum facta recreationis, aut studii causa, proprie non est oratio. Idem dicendum de eo, qui negotiorum causa, vel animo præcise pascendi oculos intrat in templum, nihil cogitans de Missa audienda, quæ interim celebratur; nam non censetur eam audivisse, cum defuerit animus ipsam audiendi.

44 **CONCL. II.** Nihilominus ad satisfaciendum præcepto non requiritur intentio satisfaciendi præcepto, sed sufficit intentio præstandi opus, quod præcipitur. Ita cit. Sanchez *n. 9.* Suarez, Herincx *disp. 3. de Legibus. n. 80. & alii.* Ratio est: quia lex humana tantum præcipit voluntariam operis executionem, non autem quasi reflexam implendi præcepti intentionem.

45 Inferitur proinde, quod si quis die Festo Missam reverenter audiat non recordatus, esse diem Festum, is jam satisficiat præcepto, ex communi Doctorum sententia. Quinimo, licet Missam die Festo attente audiens, habeat expressam intentionem tunc non satisfaciendi præcepto Ecclesiæ, sed aliam postea Missam audiendi, adhuc is satisficit, ita, ut non teneatur postmodum aliam audire, prout notant cit. Auctores, & Layman *cit. tract. 4. c. 4. n. 7.* Suarez, & alii; quamvis nonnulli contrarium sentiant. Et eadem ratio est de Horis Canonicis: quod scrupulosis notandum est, qui, cum videntur sibi inter orandum distracti, officium vel partem officii recitant cum proposito postea repetendi: neque enim tales tenentur repetere Officium, præsertim, si eorum distractio fuit involuntaria.

47 Fatendum tamen est, si quis in tali voluntate non satisfaciendi præcepto permanferit, eum peccaturum ratione pravæ suæ intentionis; quam proinde tenetur deponere, animumque mutare. Similiter si quis in falsa persuasionem maneat, quasi præcepto non satisfecerit, peccabit ratione suæ conscientie erroneæ, nisi vel animum mutet, aut errorem deponat, vel aliam Missam audiat, siue Horas Canonicas repetat; & idem dicendum de similibus aliis.

48 **CONCL. III.** Potest quandoque adimpleri præceptum per actum ex aliqua circumstantia malam. Ita Bonacina *loc. cit. punct. 9. n. 1.* Suarez, Sanchez & alii. Ratio est: quia talis adimplet substantiam præcepti; ergo etiam satisficit præcepto, quamvis peccet pro ratione pravi finis, aut circumstantiæ malæ. Idem probatur exemplis, ac inductione: sic enim, qui jejunat ob vanam gloriam, aut ex affectu avaritiæ, ut parcat sumptibus, jam satisficit præcepto jejunii Ecclesiastici; cum abstinere ab esu carnium, & multiplici refractione. Similiter Sacerdos, qui Missam celebrat in statu peccati mortalis, satisficit & suæ obligationi, & præcepto audiendi Missam die Festivo, non obstante, quod gravissime peccet: siquidem ponendo actum præceptum jam adimplet quis id, quod injungebatur, & consequenter satisficit etiam præcepto.

49 Nec obstat, quod talis non adimpleat modum ac finem præcepti, qui est honorare D E U M per actum præceptum. *Resp.* enim, hoc neutiquam obstat: quia modus non cadit sub præcepto, dummodo non sit de intrinseca ratione actus præcepti. Et hoc idem dicendum de fine, juxta illud commune dictum Theologorum: *Finis præcepti non cadit sub præcepto.*

50 Additur tamen, nisi modus sit de intrinseca ratione actus præcepti: nam quando modus est de intrinseca ratione actus præcepti, nequit adimpleri præceptum non adimpleto modo. Sic sacrilege confitens, non satisficit præcepto Paschalis Confessionis; quia ad Sacramentum Pœnitentiæ, tamquam partes ipsius, necessario debent concurrere contritio, & confessio omnium peccatorum.



Similiter, si quis dormiens die Festo assistat Missæ, nequaquam satisfacit præcepto Ecclesiæ: quia ad devotam Missæ auditionem requiritur, ut quis assistat modo humano, seu cum advertentia rationis, quod in dormiente non fit. Idem accidit in similibus casibus.

51 CONCL. IV. Possumus uno eodemque actu pluribus præceptis satisfacere, nisi aliud colligatur ex mente præcipientis. Ita Sanchez *loc. cit. cap. 14. n. 5.* Herincx *num. 85.* & alii. Patet ex quotidiana praxi: sic enim, qui obligatur ad recitandas Horas Canonicas ratione Ordinis sacri, simulque Beneficii Ecclesiastici, satisfacit una recitatione. Similiter quando Dominica, ac dies Festus de præcepto, incidunt in eundem diem, non tenetur quis audire duas Missas. Insuper qui vovit jejuna die Veneris, satisfacit unico jejunio, quamvis in eundem diem incidant quatuor anni Tempora, vel Vigilia alicujus Sancti. Et hoc ipsum generaliter contingit in illis casibus, quando obligatio plurium præceptorum cadit super eandem materiam.

52 Dicitur notanter, nisi aliud colligatur ex mente præcipientis. Sic enim inprimis non possumus unica solutione satisfacere pluribus obligationibus, seu debitis Justitiæ: nam qui debet alteri ex duplici obligatione bis centum florenos, non satisfacit, si semel dat centum. Ratio est: quia in debitis Justitiæ attenditur æqualitas rei ad rem: non potest autem unum centum esse æquale debitis plurium centum. Secus est in debitis legalibus, utpote in quibus attenditur mens & intentio legislatoris, quæ læpius ferri potest in unum idemque opus.

53 Similiter, si cuipiam pro pœnitentia Sacramentali injungantur tria Rosaria, is non satisfacit recitando unicum Rosarium: quia circa hoc clara est intentio, & mens Confessarii præcipientis. Quinimo si Confessarius pro pœnitentia injungat auditionem Missæ, censetur (nisi oppositum aliunde colligatur) velle obligare ad aliam auditionem Missæ ab ea, quam quis die Festo audire tenetur: secus, si imponat quotidianam auditionem Missæ, nam tunc satisfaceret pœnitens unica in Festis audita; quia hæc præsumitur fuisse intentio Confessarii, nisi is aliud expressisset.

54 CONCL. V. Insuper possumus eodem tempore per diversos actus satisfacere pluribus præceptis, quoties unus actus non impedit alium. Ita Sanchez, Bonacina, & alii passim. Ratio est: quia ille præcepto satisfacit, qui facit id, quod præceptum est: sed quoties unus actus non impedit alium, possumus eodem tempore facere, quod pluribus præceptis est injunctum; ergo.

55 Sic, qui tempore Missæ recitat Horas Canonicas, satisfacit præcepto Missæ audiendæ ratione diei Festi, utpote quam devote audit sub ea recitando Horas Canonicas, simulque præcepto Officii Divini, utpote quod devote recitat; sicque eodem tempore præstat diversos actus: quorum unus non impedit alterum. Et hæc limitatio idcirco additur, quia, si unus actus exercitium alterius impediret, clarum est, non posse eodem tempore per diversos actus pluribus præceptis satisfaceri.

#### DISTINCTIO IV.

De Interpretatione, Dispensatione, ac Revocatione Legum.

#### QUESTIO VI.

De Interpretatione Legum; ubi & de Epicheja.

#### SUMMARIUM.

- 1 Interpretatio, quid?
- 2 Interpretatio legum duplex authentica, & doctrinalis.
- 3 Hæc potius menti Legislatoris, quam verbis convenire debet.

- 4 Mens Legislatoris unde præcipue cognoscatur?
- 5 Verba generalia generaliter intelligenda, quomodo?
- 6 Lex penalis, & odiosa, stricte interpretanda?
- 7 Unde Verba ejus accipienda cum effectu.  
Limitatur in crimine læsæ Majestatis, &c.
- 8 Leges favorabiles ample sunt interpretanda.  
Nomine Clericorum, & populi, qui comprehenduntur?
- 9 Epicheja, quid?
- 10 Et quomodo differat ab interpretatione legis?
- 11 Habet quandoque locum.

1 INTERPRETATIO aliud non est, quam verbi vel sententiæ per aliud clarius explicatio: unde tunc fit Interpretatio legis, quando ipsa per alia verba clarius explicatur.

2 Ceterum Interpretatio legum generatim duplex est, una necessaria, seu authentica, cui nempe necessario est acquiescendum: & talis est illa, quam Princeps seu Legislator, aut ejus successor, in suis Legibus dedit. De hac interpretatione intelligendum est illud, quod habetur L. 11. C. de legibus. juncto Summario ibidem: *Hinc est legem interpretari, cujus est condere.* Et c. Inter alia de Sent. Excommunic. ibi: *Ut unde jus prodiit, interpretatio quoque procedat.* Alia Interpretatio legis dicitur doctrinalis, scholastica, seu magisterialis: & talem possunt ac solent dare Doctores, atque Auctores diversorum Librorum, quæ tamen probabilitatem dumtaxat affert, non necessitatem: unde huic necessario inhærendum non est, nisi sit communis Doctorum consensus, ac alia meliora Juris fundamenta non suppetant. Porro ut hujusmodi Interpretatio doctrinalis melius fiat, pro ea rite ordinanda communiter solent dari quædam regulæ. Hinc fit

2 CONCL. I. Interpretatio legum potius menti Legislatoris, quam verbis convenire debet. Ita Doctores communiter: nam, ut dicitur L. Scire, ff. de Legibus. *Scire leges non hoc est, verba earum tenere; sed vim ac potestatem.* Et Regul. 88. Juris in 6. *Certum est, quod is committit in legem, qui legis verba complectens, contra legis nititur voluntatem.*

4 Ceterum mens legislatoris ex ratione in lege posita præcipue cognoscitur. Hinc c. Intelligentia. de Verb. significat. dicitur: *Intelligentia dictorum ex causis est assumenda dicendi, quia non sermoni res, sed rei est sermo subiectus.* Unde illud vulgatum: *Ratio legis est anima legis.*

5 CONCL. II. Verba generalia legis generaliter sunt accipienda: five, Jus generaliter & indistincte loquens, generaliter & indistincte est intelligendum, nisi per aliud distinguatur. Ita rursus Doctores communiter. Hinc illud receptissimum: *Ubi lex non distinguit, neque nos distinguere debemus*, prout loquitur Summarium l. De pretio ff. de publiciana in rem actione. Intellige, nisi jus illud per aliud distinguatur (quæ limitatio notanter in Conclusionem additur) nam secus est dicendum, quando una lex generalis per aliam specialem aut per rationis ac circumstantiarum diversitatem distinguitur.

6 CONCL. III. Lex penalis, item lex nova correctoria legis antiquæ, & omnis alia odiosa, in dubio stricte interpretanda est, nec facile extendenda ultra casum & personas expressas. Ita unanimis Doctorum: siquidem juxta Reg. 15. Juris in 6. *Odia restringi, & fautores convenit ampliari.* Et Reg. 49. eod. *In pœnis benignior est interpretatio facienda.* Dicitur notanter, in dubio stricte interpretanda est, &c. Quia, si verba legis penalis, aut alterius odiosæ, ejusque mens adeo clara sint, ut salva ratione recti sermonis non possint aliam interpretationem habere, lex erit observanda, non obstante, quod odiosa & durior appareat: prout inter alias desumitur ex l. Prospexit ff. Qui & a quibus manumissi. ibi: *Quid quidem perquam durum est; sed ita lex scripta est.*

7 Ex hac Conclusionem inferunt Doctores, quod verba legis penalis intelligi debeant cum effectu arg. c. Hæc autem verba. de Pœnit. dist. 1. ibi: *Hæc autem verba cum effectu accipimus.* Sic excommunicationem in percussores Clericorum latam non incurrit, qui Clericum voluit percutere, sed non potuit; quia voluntas, seu conatus,



non punitur sine effectu. Excipe tamen crimen læsæ Majestatis l. Quisquis. C. Ad legem Julianam Majestatis & nonnulla alia crimina in Jure specialiter expressa: siquidem quoad talia etiam ipsi conatui, seu voluntati in opus exterius prodeunt, a Legibus Civilibus, & sacris Canonibus, certæ poenæ fuerunt decretæ, non obstante, quod ea crimina non fuerint opere externo completa; idque factum est ob summam perniciem, quam Reipublicæ inferre solent.

8 CONCL. IV. Leges favorabiles ample sunt interpretandæ: sive, in materia favorabili verba accipi debent secundum amplam suam significationem. Siquidem juxta citatam Reg. 15. Juris in 6. Odiā restringi, & favores convenit ampliari. Intellige nisi aliud exprimatur, vel appareat ex verbis legis, seu dispositionis. Sic in materia odiosa nomine Clericorum non comprehenduntur Episcopi. l. Quia periculosum de Sentent. excomm. in 6. Neque Canonici, aut alii in dignitate Ecclesiastica constituti, arg. c. Sedes de Rescriptis. Neque Religiosi, arg. Clem. 1. De supplenda neglig. Prælat. cum concordantibus: bene tamen in materia favorabili. Similiter sub nomine populi in materia poenali non comprehenditur Clerus, ac proinde interdicto populo non censetur interdictus Clerus, nisi secus fuerit expressum c. Si Sententia de Sent. excomm. in 6. tamen in materia favorabili nomen Populi comprehendit non tantum Sæculares, sed etiam Clericos, ac Regulares. Idem dicendum de aliis similibus. Quantum nunc attinet ad alteram Quaestionis partem.

9 Quæres, quid sit Epicheja? Resp. Epicheja est benigna legis interpretatio secundum æquum & bonum, declarans, casum aliquem particularem ex mente legislatoris ob suas circumstantias speciales sub lege universaliter lata non esse comprehensum: nam in omnibus causis potior debet esse ratio æquitatis, quam stricti Juris. l. Placuit C. de Judiciis.

10 Differt autem Epicheja strictè loquendo ab Interpretatione Legis. Siquidem per hanc interpretamur verba legis, quando sunt obscura & ambigua: per Epichejam vero interpretamur mentem legislatoris etiam in verbis de se clavis: nimirum Generalibus, id est, ubi constat de universali verborum sensu, dubitatur autem de mente legislatoris, utrum nempe is talem casum particularem ob certas circumstantias voluerit, vel potuerit comprehendere sub generali locutione legis.

11 Et quidem quandoque, dum ipsemet legislator amplius commode interrogari nequit de mente sua, esse locum Epichejæ in casu aliquo particulari ob certas circumstantias concurrentes, communiter tenent Doctores. Ratio est: quia de iis, quæ forte uno aliquo casu accidere possunt, jura non constituuntur l. 4. & duabus seqq. ff. de Legibus. Etenim Legislator in lege ferenda communem spectat utilitatem, ac proinde ad id præsertim attendit, quod ut plurimum accidere solet: sed possunt aliqui casus particulares occurrere, quandoque fortuito, in quibus lex illa generaliter lata deficiat, ita quidem, ut non solum non obliget, sed neque licite servari possit; unde ipsa est tunc corrigenda per Epichejam. Sic enim, si lege Civili cautum sit, ne tempore hostili portæ civitatis aperiantur, nihilominus eæ per Epichejam possunt ac debent aperiri, si cives hostium impetum fugientes in civitatem se recipere volunt: & idem in plurimis aliis.

## QUÆSTIO II.

De Dispensatione Legum, & variis ipsam concernentibus.

### SUMMARIUM.

- 12 Dispensatio quid?
- \* Quomodo interpretanda?
- 13 Papa dispensat in omni lege Ecclesiastica, non vero Divina.
- 14 Potest tamen legem Divinam interpretari.
- 15 Legislator, ejusque successor, dispensat in propria lege, etiam secum ipso.

16 Inferior nequit dispensare in lege Superioris, nisi in certis casibus, &c.

17 Corollarium.

18 Dispensatio a Legislatore concessa sine causa, est valida.

19 Sed non licita, nec sic præsumenda.

20 An etiam peccet utens tali dispensatione?

21 Irrita est dispensatio concessa sine justa causa ab inferiore in lege superioris.

22 Corollaria.

23 Dispensatio ob subreptitiæ obtenta non valet.

24 In Dispensationibus clausula, si preces veritate nitantur, vel exprimitur, vel subintelligitur.

\* Corollarium.

25 Quomodo Papa censeatur dispensare in votis, juramentis &c. cum tamen hæc obligent jure Divino?

26 Responsio verior.

(b) Tract. 6. Dist. 2. n. 23.

\* An cesset dispensatio cessante causa? Additio I. & II.

\* An cesset eadem morte concedentis? Add. III.

\* Item, an morte Executoris? Add. IV.

12 CONCL. I. Dispensatio est juris communis relaxatio facta cum causæ cognitione ab eo, qui jus habet dispensandi. Ita Glossa c. Requiritis. 1. quæst. 7. & Doctores communiter.

Additio.

\* Ex qua descriptione colligitur, quod dispensatio ordinarie sit strictè interpretanda tamquam vulnus Juris, seu a Jure communi exorbitans, arg. Reg. Que a Jure. 28. de Reg. Juris in 6. nec extendenda ultra propriam verborum significationem, ordinarie loquendo. Quod si in dispensatione aliqua verba forent obscura, dubia, vel incerta, attendenda est ipsa supplicatio Legislatori, seu Superiori facta; nam Princeps precibus sibi factis se solet accommodare; verba autem conformiter menti Principis interpretanda sunt. cap. In his de verb. significat. \*

12 CONCL. II. Papa potest dispensare in omni Jure Ecclesiastico, non autem in lege Divina. Ita omnes Theologi. Ratio est: quia in primis legislator, vel ejus successor, potest dispensare in propria lege; siquidem ejusdem est ligare, & solvere. Econtra vero inferior non potest tollere, aut relaxare legem Superioris: atqui Papa, utpote homo, est inferior respectu Dei, ut patet. Et hinc Papa nequit dispensare in præceptis Decalogi, ut v. g. furtum sit licitum, aut perjurium, & hujusmodi.

14 Quo tamen non obstante interdum in Lege Divina positiva habet locum interpretatio, quod ea ob certas circumstantias hic & nunc per se ipsam obligare cesset: quo modo Judæi interpretati sunt præceptum Divinum de Sabbato custodiendo non obligare, sed eis licitum esse pugnare, si ipsis diei Sabbati pugna inferatur ab hostibus, ne alioquin citius disperdantur a terra; ut legitur 1. Machab. c. 2. v. 41.

15 CONCL. III. Quilibet Legislator, aut ipse Superior, vel Successor in jurisdictione, potest cum suis subditis in Lege propria dispensare: imo etiam secum ipso; cum non debeat esse deterioris conditionis, ac sui subditi. Ita communis. Ratio est: quia obligatio legis humanæ inducitur per voluntatem legitimi Superioris præcipientis; ergo etiam per ipsius voluntatem potest auferri: nam Omnis res, per quasunque causas nascitur per easdem dissolvitur. cap. 1. de Reg. Juris.

16 CONCL. IV. Inferior non potest dispensare in lege Superioris, nisi in certis casibus ex permissione Juris, aut delegatione Superioris sibi facta, vel expresse privilegio, aut legitima consuetudine, ejusmodi potestatem dispensandi obtinuerit. Ita certa, & communis: quia Lex Superioris per inferiorem tolli non potest; ut dicitur in Clem. Ne Romani, de Election.

17 Inferitur proinde, quod Episcopus in Jure communi, aut Lege Pontificia nequeat dispensare, nisi hujusmodi potestas dispensandi sibi competat ex permissione



matione Juris communis, vel delegatione Summi Pontificis, sive ex privilegio, aut longæva consuetudine. Quod notanter additur: quia ex hujusmodi capitibus possunt Episcopi ex causa rationabili dispensare circa observationem Festorum, ac jejuniorum totius Ecclesiæ, & quoad plura alia, puta circa levæ, vel circa ea, quæ frequenter occurrunt, aut quando est necessitas & periculum in mora, ac præterea recursus ad Summum Pontificem difficilis, &c.

18 CONCL. V. Dispensatio in Lege humana, si concedatur sine justa causa a Legislatore, vel ipsius Successore, aut Superiore, valida est, sed non licita. Ita Herincx *Disp. 4. de Leg. quæst. 1. n. 14.* Bonacina *disp. 1. de Legib. quæst. 2. punct. 3.* Sanchez, Filiucius, alique communiter, contra Vasquez & nonnullos alios, qui ejusmodi dispensationem ajunt esse invalidam. Ratio primæ partis est: quia obligatio legis pendet a voluntate legislatoris; ergo si ipse vult aliquem, etiam sine justa causa eximere ab obligatione legis, valebit ejusmodi dispensatio, seu exemptio.

19 Altera vero pars ex eo patet. Tum quia ejusmodi dispensatio non caret periculo scandali: tum quia dispensans sine causa, imprudenter utitur sua potestate, & temere eximit partem ab ordine totius corporis; nam *tempus omnis pars est suo universo non congruens. c. Quæ contra. dist. 8.* Quare etiam numquam præsumendum est, quod Legislator velit dispensare sine aliqua rationabili causa; cum numquam præsumendum sit, quod velit dispensando peccare, nisi aliunde expresse constet, quod dispense in propria Lege sine justa causa; in quo quidem casu

20 Addunt multi Doctores, quod non solum peccet legislator sine justa causa in propria lege dispensans, sed etiam qui talem dispensationem postulat, aut eadem utitur: quamvis, an tale peccatum sit ex genere suo mortale, vel dumtaxat veniale, iidem postmodum inter se variant, & plures velint per se loquendo, ac secluso scandalo, id esse dumtaxat peccatum veniale. Sed verius est, utentem tali dispensatione (sub data limitatione) nullatenus peccare: quia per eam, utpote validam, jam est exemptus a lege, simulque talis habet legitimam causam sese ceteris non conformandi, videlicet dispensationem, prout notat citat. Herincx. *n. 15.* allegans Rodriguez, Navarrum, & alios.

21 CONCL. VI. Quod si vero Inferior sine justa causa dispensat in lege Superioris, v. g. Episcopus in Lege Pontificia, irrita est dispensatio. Ita communis. Ratio est: quia Inferior non habet potestatem dispensandi in lege Superioris, nisi quatenus ipsi a Superiore concessa est facultas dispensandi; atqui non est verisimile, Superiorem velle concedere Inferiori potestatem dispensandi sine justa causa; cum hoc esset in præjudicium boni communis, simulque talis facultas adversaretur fini legis.

22 Inferitur proinde I. Eum, cum quo Inferior dispensavit absque justa causa in lege Superioris, non posse uti dispensatione; nam dispensatio est invalida; & consequenter ille, cum quo fuit dispensatum, non est exemptus ab obligatione legis.

23 Inferitur II. Etiam invalidam fore dispensationem a Summo Pontifice, vel ejus Delegato impetratam in Votis, ac Juramentis, si ejusmodi dispensatio impetrata fuit per obreptionem, vel per subreptionem, id est, narrata falsa causa, aut tacita veritate necessario exprimenda. Ratio est: tum quia hic non intervenit justa causa dispensandi, eo quod causa illa non subsistat. Tum quia Deus Ecclesiæ Prælati contulit ejusmodi potestatem dispensandi in ædificationem, & non in destructionem, *2. Cor. c. 13. v. 10.* atqui hoc fieret, si ipsi absque ulla causa possent in Votis, Juramentis, & hujusmodi dispensare; nam id non tam foret dispensare, quam dissipare.

24 Et hac de causa, si Summus Pontifex cum aliquo dispenset ad factam præviam ejus supplicationem, solent communiter hujusmodi clausulæ in litteris dispensationis addi: *Si ita est, Si preces veritate nitantur.* Quinimo licet tales clausulæ expresse non apponantur, semper tamen non solum in votis & juramentis, sed etiam ex

mente Pontificis in aliis materiis tacite intelliguntur; prout clare habetur decisum *cap. 2. de Rescriptis.* Et hæc servata proportionem sunt intelligenda de aliis dispensationibus, quæ quandoque impetrantur ab inferioribus Prælati Ecclesiæ, vel Legatis Summi Pontificis, aut (pro foro conscientie) a Confessariis tempore Jubilæi, sive aliis habentibus potestatem dispensandi.

#### Additio.

\* Ex quo colliges, quod dispensatio sit invalida, si dispensandus in sua supplica alleget causam motivam seu finalem a parte rei falsam, quamvis id etiam bona fide, & ex inculpabili ignorantia faceret, putans illam causam allegatam esse a parte rei veram. Dixi notanter *causam motivam falsam*: secus enim foret sentiendum, si falsitas contingeret præcise circa causam impulsivam: ubi nota, quod *motiva*, seu finalis causa vocetur illa, quæ movet actualiter Legislatorem ad dispensandum: *impulsiva* autem, sine qua Legislator quidem seu Superior absolute adhuc dispensaret, sed tamen difficiliter. Ita pulcherrime resolvitur *c. 20. de Rescriptis*, ubi etiam adhuc alia notabilia decisa invenies. \*

25 Quæres I. Quomodo sit intelligendum, Papam posse dispensare ex gravi causa in Votis, Juramentis, Matrimonio rato, & hujusmodi: cum tamen obligatio Voti ac juramenti sit de Jure Divino, prout & Matrimonium Jure Divino est indissolubile; Papa autem in Jure Divino nequeat dispensare, juxta dicta. Resp. in solutione hujus instantiæ Doctores variare. Nam imprimis dicunt aliqui, quos sequitur Fagnanus *in c. Dudum n. 24. de Elect.* in hujusmodi casibus Papam proprie non dispensare, sed tantum declarare, seu interpretari Jus Divinum ob aliquam necessitatem gravem, aut aliam circumstantiam, in illo speciali casu non obligare, prout in simili *n. 14.* dictum est de Judæis interpretantibus præceptum Divinum quoad observationem Sabbati. Verum hæc sententia ex eo non placet: quia in dispensatione Votorum requiritur potestas jurisdictionis, ut constat ex praxi: atqui hæc non requireretur, si tantum interveniret interpretatio Juris Divini, cum hæc solum requiratur prudentiam, cujus est actus; idemque liquet ex allato exemplo de Judæis, dictum præceptum Divinum abique alia jurisdictione interpretantibus.

26 Alio modo respondet Sanchez *lib. 2. de Matrim. disp. 24. n. 5. & lib. 8. disp. 6. n. 6.* cum aliis, docens, quod duplex sit Jus naturale Divinum: aliud absolute, ut de non fornicando, non mentiendo, & in hoc Pontifex nullo modo dispensat. Aliud fundatum in actu, vel contractu humano, ut Votum, Matrimonium ratum; & in hoc potest dispensare. Sed tunc non proprie dispensat Papa in Jure Divino tollendo huius obligationem (Jus enim Divinum est, ut, qui Votum habet, id impleat, & hoc semper manet) sed dispensat tollendo obligationis fundamentum, quatenus Papa loco Dei remittit jus, vi Voti v. g. Deo acquisitum; quo facto evanescit juris Divini circa illud Votum obligatio. Et hoc amplius declarat Herincx *disp. 1. de Legib. q. 6. n. 54.* Qui (inquit) in dispensatione Votorum tantum concurrit remissio partis, cui facta est promissio: Deus enim per suum in terris Vicarium remittit, seu condonat jus sibi ex promissione acquisitum: facta autem partis remissione cessat Voti, seu talis promissionis obligatio; quemadmodum etiam alia promissio, sive contractus civilis, non obstante, quod Jure naturæ obliget ad sui impletionem, dissolvitur, atque obligare cessat parte Jus suum remittente. Concordant dicenda inferius (b) explicando conditiones in omni Juramento, & Voto, tacite subintellectas, quarum tertia est hæc: *Nisi is, in cujus gratiam & utilitatem juratio (vel Votum factum) est, obligationem remittat*: hoc enim facto cessabit illius obligatio, cum quilibet suo juri renuntiare valeat. Porro praxis impetrandi dispensationes quoad Vota, vel etiam quoad impedimenta Matrimonii reperitur in suis propriis locis, nimirum *Tract. 6. dist. 3. q. 1. & Tract. 14. dist. 15.*



Additio I.

\* Quæres II. An cessat dispensatio actualiter jam facta, si cessat causa finalis, seu motiva adæquata, & totalis, antequam eadem dispensatio deducatur in usum? Casus potest esse sequens: Bertha extra Matrimonium habuit copulam cum Cajo suo consanguineo in quarto gradu, atque exinde genuit prolem, ad quam legitimandam ad instantiam supplicantium actualiter dispensatur per deputatum in Rescripto executorem, ut possint contrahere Matrimonium; interim tamen, antequam hanc dispensationem deducant in usum, seu antequam actualiter contrahant Matrimonium, ipsa proles, cujus legitimatorio erat in supplica adducta tamquam unica causa motiva dispensandi, moritur: queritur jam, an nihilominus prædicti possint contrahere Matrimonium? Ante responsum suppono, quod causa motiva dispensandi debeat verificari pro tunc, quando actualiter dispensatur, uti cum aliis advertit Covarruvias *de Matrim. p. 2. tom. 1. c. 6. §. 9. de dispens. n. 22.* affirmans ita esse decisum a Rota. Et hinc, si in dicto casu proles moreretur ante actualem dispensationem, cessaret ipsa dispensatio, nec posset contrahi Matrimonium inter Cajum & Bertham consanguineos. Dubium vero remanet adhuc, si mors prolis contingeret post dispensationem jam factam, antequam fuerit Matrimonium actualiter contractum, an etiam tunc cesset dispensatio?

Resp. Et si non a paucis notanter a Castropalao *part. 1. tract. 3. disp. 4. punct. 15.* & a Patre Henno *Tract. de Leg. disp. 3. qu. 15. art. 5.* valde probabiliter defendatur, in simili casu cessante post factam dispensationem causa motiva dispensandi non cessare dispensationem, sed posse deduci in usum: contraria tamen sententia Thomæ Sanchez *lib. 8. de Matrim. disp. 30. n. 14.* ac plurium aliorum, nec cedit gravitate Auctorum, nec pondere rationum: etenim in actibus adhuc revocabilibus mens dispensantis non videtur se extendere ad illud tempus a quo sine peccato dispensatio non potuit inchoari; atqui non potuit licite & sine peccato inchoari absque aliqua rationabili causa motiva: ergo. Quare loquendo in praxi circa casum superius specificatum, ubi agitur de valore actus, motua prole post concessam dispensationem ante contractum Matrimonium pro securitate petatur adhuc dispensatio; quoniam, etsi attendendo ad principia directa sententia Patris Castropalao &c. adhuc sit valde probabilis, attamen contraria est tutior, hincque ubi agitur de valore Sacramenti, uti hic, merito sequenda. Quod si vero Matrimonium jam fuisset bona fide contractum, & dubium postea primum superveniret, relinquendi sunt in Matrimonio; quoniam ex una parte nec caret Sententia contraria sua probabilitate; ex altera vero talibus conjugibus favet regula possessoria: sicut a pari in aliis casibus, superveniente dubio post contractum Matrimonium permittendi sunt conjuges in sua possessione. Ita suadet Bosco *part. 6. Theol. Sacram. disp. 12. sect. 13. conclus. 4. n. 312.* Interea tamen, si etiam tales pro majori quiete adhuc volunt petere dispensationem, haud dubie agent tutissime. \*

Additio II.

\* Quæres III. An cesset dispensatio, si causa motiva dispensandi cessat, postquam dispensatio jam est deducta in usum? & quidem si pro eo tempore cessat solummodo causa impulsiva, non autem motiva; vel si motivam tantum ex aliqua parte, non ex integro; quod tunc adhuc duret prior dispensatio, est communissima: difficultas tamen adhuc remanet, si apud illas personas particulares dispensatas causa motiva adæquate, & ex integro cessat, an tunc pariter cesset dispensatio? e. g. ponamus, quod quis dispensatus sit ad comedendas diebus jejunalibus carnes ob infirmitatem, aut quoad Horas Canonicas ob oculorum imbecillitatem, queritur, an talis adhuc sit exemptus a Jejunio, vel Horis Canonicis, si sanitas, postquam aliquo tempore jam usus est dispen-

satione, ex integro sit recuperata, & non tantum quis primum incipiat esse in statu reconvalescentiæ. Item si visus denuo perfecte post aliquod tempus redierit? ubi non desunt Auctores, qui cum Diana, Salas, & Burghaber affirmativam defendunt ex ratione persuasi; quia obligatio legis semel per dispensationem extincta non amplius reviviscit, nec, quod destructum est, reproducit, nisi ab eo, qui producere potest, id est, nisi Legislator, qui respectu talium personarum mediante dispensatione sustulit legem, iterum eandem de novo ponat, seu resuscitet volendo, ut hi iterum obligentur. Communior tamen Doctorum distinguit, an per dispensationem cum una, vel altera persona particulari factam redigatur quispiam in statum irrevocabilem, vel num in adhuc revocabilem? nam in primo casu concedit, non cessare dispensationem etiam cessante causa motiva dispensandi: sic e. g. si in voto simplici Castitatis, vel etiam in impedimento consanguinitatis fuit dispensatum ad contrahendum Matrimonium propter paupertatem sponsæ, non cessat dispensatio, nec opus est alia nova, si contracto jam Matrimonio femina illa ex donatione v. g. vel hereditate ad pinguiorem fortunam devenerit, quia Matrimonium, in quo dispensatur, est ex sua natura actus irrevocabilis: nam in hoc sensu verificatur sequens 73. *Reg. Juris in 6. Factum legitime retractari non debet, licet casus postea eveniat, a quo non potuit inchoari.* Quod si vero actus, in quo dispensatur, est revocabilis, puta in comestione carnis, exemptione a recitatione Breviarii, cessante certo causa motiva adæquata dispensandi, cessaret etiam dispensatio; quia Legislator in actibus revocabilibus censendus est dispensare velle tantum pro eo tempore, quo licite, & sine peccato dispensare potest; atqui etiam in propria lege juxta jam dicta nequit licite dispensare sine causa rationabili: ergo nec censendus est pro eo tempore, quo causa rationabilis non amplius durat, velle dispensare. Atque hæc, quæ dicta sunt de dispensationibus, pariter debent intelligi de aliis gratiis, & privilegiis, quæ concessa sunt contra Jus commune, & in præjudicium Tertii; de quibus vide Jus Canonicum *lib. 5. decret. titul. 33. num. 185.* \*

Additio III.

\* Quæres IV. An per mortem dispensantis cesset dispensatio, posito, quod pro tunc causa motiva dispensandi subsistat? Casus possunt esse varii: e. g. Bertha petit Romæ dispensationem in voto perpetuæ Castitatis ob stimulum carnis, vel Cajus, ut valeat contrahere cum sua consanguinea Cornelia a se impregnata, & exinde diffamata, &c. Papa quidem annuit supplicanti cum mandato exequendi, si preces veritate nitantur; interea tamen, antequam executioni mandetur illa dispensatio, Papa moritur. Queritur jam, utrum adhuc dispensatio subsistat, vel an eadem cesset?

Resp. I. Si gratia dispensationis jam actualiter est concessa, vel Jus supplicanti actualiter aliquo saltem modo acquisitum, eadem durante adhuc causa motiva, non cessat morte dispensantis, quamvis ipsa necdum fuisset executioni mandata: hincque, si fuerit desuper quoque requisita aliqua executio, eandem Executores deputati possunt, imo tenentur etiam post mortem dispensantis facere. Ita clarissime reperitur decisum *cap. 9. de Off. Delegat. in 6.* Atque ex hoc inferitur, quod in allegatis superius casibus concessio Papæ non expiret, sed deputati in Rescripto Pontificio Executores debeant illam dispensationis gratiam durante adhuc pro eo tempore causa motiva executioni mandare; quia talis gratia non est facienda, sed jam facta respectu Papæ; cum Orator, seu supplicans vi concessionis Pontificiæ habeat Jus quæsitum, & executores jubeantur exequi, si preces veritate nitantur.

Resp. II. Si gratia dispensationis primum foret facienda, nec ullum Jus supplicanti acquisitum e. g. si Papa dixisset, quod cogitet aliquando dispensare, vel si in Rescripto dispensationis, ad Executorem directo, sequentia verba inferat *Dispenses cum Titio, si expedire judicaveris* &c.



Et c. in simili casu re adhuc integra, per mortem dispensare volentis cessat, seu expirat dispensatio, quamvis causa motiva dispensandi perduraret. Ita eruitur ex cap. Si cui nulla. §. fin. de Præb. in 6. Qualiter autem cognoscatur, num aliqua gratia dispensationis sit facta, vel facienda, in dubio eruere poteris ex Jure Canonico Lib. 1. Tit. 4. §. 10. apud præsentem Auctorem; ubi is cum Abbate, & Sanchez lib. 8. de Matrim. disp. 28. n. 87. & pluribus ibi relatis defendit, quod censeatur gratia facta, si in Rescripto constituatur Executor necessarius, seu cum mandato exequendi, si preces veritate nitantur; e contra vero, si Executor denominetur, ut exequatur juxta suum beneplacitum, reputetur Executor voluntarius, sicque gratia primum facienda, quæ expirat morte concedentis re adhuc integra. Ita communior, quamvis non desint alii quoque cum Anchorano, Archidiacono, & aliis gratiam factam, & faciendam aliter explicantes.

#### Additio IV.

\* Quæ. V. An per mortem denominati in Rescripto Executoris expiret facultas exequendi, vel transeat ad alium, e. g. demortui successorem? Resp. I. Si facultas exequendi fuit facta præcise certæ personæ e. g. Sempionio; tunc, eo moriente, etiam expirat facultas exequendi. Ita deducitur ex Jure Canonico, arg. cap. 42. de Officio & Potestate Judicis delegati.

Resp. II. Quod si facultas exequendi potius alligata fuit Officio, seu Dignitati e. g. Episcopo, vel Officiali Diœcesis Frisingensis, prout ordinarie contingit; tunc transit hæc facultas ad Successorem, in illa Dignitate, vel Officio. arg. cap. 14. de Officio & Potestate Judicis deleg. atque ex hac ratione credo, quod litteris dispensatoriis in causis matrimonialibus, quando constituitur in illis Executor, soleat plerumque superinscribi Episcopo vel Officiali Diœcesis N. vel discreto Viro confessori ex approbatis ab Ordinario per penitentem eligendo, non exprimendo eorum proprium nomen, & cognomen specificum.

Porro in dubio, utrum hæc facultas sit delegata Personæ, vel Officio, consideranda est materia subjecta, ac totus contextus verborum, utrum exinde colligi non possit? Vide præsentem Auctorem lib. 1. Decret. Tit. 29. n. 128. \*

### QUESTIO III.

#### De revocatione Legum.

#### SUMMARIUM.

27 Abrogatio, Derogatio, & Irritatio legis quid, & quomodo differant?

28 Leges semel latæ possunt justis de causis revocari.

29 Quæ sint ejusmodi justæ causæ?

30 Nova lex generaliter lata, tollit priorem contrariam.

31 Nisi prior sit specialiter loquens.

32 An tollat consuetudines, vel statuta particularia locorum?

33 An, & quando cessante causa legis, cesset ipsa lex?

34 Declaratur & limitatur data responsio.

\* An cessante motivo Legis in persona particulari cesset ipsa Lex ex parte ejusdem?

\* Ostenditur disparitas inter Legem, & dispensationem.

27 **N**Otandum, quod hæc tria inter se differant, videlicet Abrogatio legis, Derogatio Legis, & Irritatio Legis. Abrogatio quippe legis fit, quando lex totaliter cassatur, & tollitur. Derogatio legis e contra est, cum lex ex parte solum tollitur, quatenus Legislator unum, vel alterum legis articulum mutat, aut a generali constitutione certos casus speciales excipit; juxta quod l. Derogatur 102. ff. de Verb. signif. dicitur, Derogatur legi, cum pars detrahatur; abrogatur legi, cum prorsus tollitur. Tandem Irritatio Legis fit, quando Lex ab inferiori Magistratu constituta, auctoritate Superioris rescinditur, seu irrita & nullius roboris esse declaratur: ut si leges ab Episcopo latæ auctoritate Summi Pontificis annullentur, seu irritentur.

28 **CONCL. I.** Leges semel latæ possunt denuo justis de causis revocari, idque potest fieri tum per ipsum Legislatorem, tum per ejus successorem. Ita omnes Doctores, atque constat ex praxi: sic enim multæ leges antiquiores tam in Jure Civili, quam Canonico reperiuntur, quæ fuerunt revocatæ per alias posteriores; ut taceamus alias Constitutiones tum Pontificias, tum Imperiales, quæ justis de causis per Successores fuerunt revocatæ.

29 Dicitur justis de causis, Quia nonnisi gravi de causa leges, legitima auctoritate conditæ, sunt immutandæ: siquidem novitates plerumque querelas, & discordias pariunt; ac proinde, uti l. 2. ff. de Constit. Princ. notatur; In rebus novis constituendis evidens esse utilitas debet; ut recedatur ab eo jure, quod diu æquum visum est. Porro justæ causæ mutandi legem sunt, si experientia teste constet, legem aliquam, quæ a principio sperabatur futura utilis, non expedire Reipublicæ: aut si quidem a principio fuerat utilis, postmodum mutatis rerum circumstantiis desinat esse utilis, & communitati conveniens. Leges enim debent juxta exigentiam locorum, temporum, & conditionem personarum constitui: unde juxta horum diversitatem nonnumquam variæ eduntur leges, atque etiam priores temperantur, suppleuntur, & corriguntur per posteriores. Hinc illud vulgatum Canonistarum dictum: Concorda tempora, & concordabis jura: arg. c. Si peccaverit. 2. q. 1. juncta Glossa c. Si Ecclesia. v. Temporibus. 23. q. 4.

30 **CONCL. II.** Nova lex, seu Constitutio generalis Principis, tollit legem priorem contrariam, etiam si de ipsa non faciat mentionem. Ita habetur expresse in Jure Canonico c. 1. de Constit. in 6. Accedit ratio: quia princeps non censetur ignorare legem communem priorem; ergo, dum novam statuit contrariam, aliam ipso facto revocare dignoscitur.

31 Ceterum hæc Conclusio intelligenda est de lege priori generaliter lata. Nam in primis lex prior specialiter loquens non tollitur per legem posteriorem generaliter loquentem, sed hæc per illam distinguitur: sic v. g. leges generales de testamentis editæ, non comprehendunt testamenta ad pias causas, aut testamenta militum, vel alia privilegiata, quia de his habentur speciales leges: idem dicendum de aliis hujus modi.

32 Insuper ab hac generali doctrina sunt excipiendæ rationabiles consuetudines, & particularia Statuta locorum: siquidem per legem generaliter latam non censetur Papa, vel alius Legislator, velle derogare particularibus locorum vel personarum Statutis, aut consuetudinibus rationalibus, neque eadem revocare, nisi id exprimat. Ita enim habetur expresse decisum cit. cap. 1. de Constit. in 6. Quia talia particularia statuta, & consuetudines locorum, censetur Legislator probabiliter ignorare, unde non videtur velle quidpiam statuere de ipsis nisi id exprimat. Dicitur notanter, nisi id exprimat: nam si Legislator exprimat, velle se derogare etiam particularibus locorum consuetudinibus, aut Statutis, revera etiam illis derogatur. Id autem per hujusmodi clausulas in lege oppositas, nulla obstante consuetudine contraria: sive, non obstantibus quibuscunque constitutionibus locorum, aut hujusmodi.

33 Quæres an cessante causa legis, Lex quoque ipsa cessare videatur? Resp. Cessante causa motiva seu finali legis adæquata, tunc in totum, & respectu totius communitatis, cessat etiam obligatio legis, etiam si non adsit aliud decretum, aut revocatio Principis. Ita Doctores communiter. Ratio est: quia cessante causa, cessat effectus, prout habetur c. Cum cessante. de Appellat. Accedit, quod lex non obliget ultra mentem Legislatoris: atqui Legislator non præsumitur velle obligare ad observantiam legis, quando cessat motiva legis adæquata, seu in totum, ac respectu totius communitatis, quia tunc cessaret finis legis; ergo.

34 Dicitur, cessante causa motiva adæquata, sive in totum. Quia si ob plures causas motivas lex condita sit, & una causa cesset manentibus ceteris, non cessat obligatio Legis. Sic v. g. cessante una causa, propter quam imposita



sunt tributa, non illico cessat obligatio solvendi tributa, si alæ causæ eorum perseverent. Et additur, & respectu totius communitatis: quia secus est dicendum, si causa legis cesset solummodo respectu particularis personæ, seu in casu particulari: sic v.g. quando ob periculum rixarum prohibetur noctu portatio armorum, punietur quis tanquam transgressor legis, si arma portaverit, quamvis tectetur, nullum apud se subesse rixarum periculum: & taliter de aliis materiis discurrendo possunt resolvi plurimi casus. Ratio est: quia lex non respicit singulares tantummodo personas, sed totam communitatem; ergo adhuc manet ejus obligatio, non obstante, quod causa ipsius respectu particularis personæ, vel causæ cessarit. Quinimo, quando dubitatur, utrum causa legis cessaverit in totum, & respectu totius communitatis, ac per consequens, an cessaverit obligatio legis, nec ne, præsumendum erit in favorem legis, & quod adhuc obliget; siquidem in dubio melior est conditio possidentis: atqui in tali casu lex possidet, cum constet, legem latam esse, & dubitetur de ipsius sublatione; ergo.

## Additio I.

\* Dices: Juxta doctrinam Quæstione prima numero undecimo traditam potest quandoque fieri Epicheja, quod nimirum ex mente Legislatoris iste, vel ille casus particularis sub Lege non comprehendatur: sed Epicheja non videtur aptiorem habere locum, quam tunc, quando cessat finis legis, seu causa motiva in aliqua persona particulari: ergo. Antequam respondeatur, nota, quod finis legis, seu causa motiva possit cessare, vel contrarie, vel solum negative. Tunc cessat finis Legis contrarie, quando fieret illicitus, vel saltem in aliquo casu particulari ob varias circumstantias specialiter valde difficilis, seu moraliter impossibilis: e.g. si allegata superius quæstione Civibus hostium impetum fugientibus intelligeretur sub generali prohibitione interdictus in Civitatem ingressus, quamvis certo nullum foret periculum, ne simul hostes ingrederentur.

Tunc vero finis legis dicitur cessare tantum negative, si is quidem non reddatur illicitus, aut moraliter impossibilis, attamen per observationem legis in hac, vel illa persona particulari dictus finis, quem respectu communitatis in Lege ferenda sibi Legislator præfigebat, non obtineatur: e.g. in abstinencia a carne diebus veneris, & sabbatinis finis hujus legis est maceratio corporis: ponamus autem, quod unus vel alter dives magis delectetur comestione piscium quam carnis, apud talem particularem personam cessaret finis legis negative. H. N.

Resp. Disting. min. Epicheja videtur habere locum &c. quando finis legis cessat contrarie, concedo: quando tantummodo negative cessat, neque aliunde gravis ratio suadet Epichejam; nego minorem & consequentiam. Unde notanter dictum est præcedenter, quandoque tantum habere locum Epichejam: non enim debemus nobis in similibus nimium abhlandiri: alias sane allegatus superius dives posset diebus jejunalibus comedere carnes.\*

## Additio II.

\* Urgebis: Juxta jam dicta præcedentis quæstionis, cessante causa motiva seu finali dispensationis in aliqua particulari persona, cessat etiam quoad eandem regulariter dispensatio; ergo etiam cessante causa motiva, ac finali legis in aliqua persona particulari, cessat ipsa lex. Resp. negando consequentiam, & paritatem. Disparitas est, quia ipsa dispensatio data est pro particularibus personis, uti supponitur; & hinc mirum non est, quod cessante in illis causa motiva dispensationis cesset ipsa dispensatio; econtra vero lex non est lata pro personis particularibus, sed pro tota communitate; hincque non cessat, nisi pariter causa motiva cesset respectu totius communitatis. Quod si etiam loquendo de dispensationibus, ponas aliquem casum, quo conceditur dispensatio pro tota communitate, ibidem ob paritatem rationis de lege similiter admittitur, quod non cesset

dispensatio, etsi causa motiva dispensandi cesset in una, vel altera particulari persona. E.g. ponamus, quod circa jejunium Quadragesimæ dispensetur in aliquo oppido ob pauperem civium cibos jejunaes propter caritatem difficillime comparantium: in hoc casu, etsi unus, alterve dives eandem difficultatem in emptione ciborum non pateretur, exinde tamen apud ipsum non cessaret dispensatio, quæ facta est pro tota communitate; hincque posset se aliis in dispensatione conformare, quod bene notandum ad solvendo plurimos casus.\*

## QUESTIO IV.

Quomodo Leges tollantur per contrariam consuetudinem?

## SUMMARIUM.

- 35 Consuetudo sumitur dupliciter.
- 36 Consuetudo, triplex, præter legem, secundum legem, & contra legem.
- 37 Lex humana potest tolli per consuetudinem contrariam, rationabilem tamen & legitime præscriptam.
- 38 Quæ consuetudo censetur rationabilis?
- 39 Solvitur instantia.
- \* Occurritur alteri adhuc Objectioni.
- 40 Consuetudo, quomodo dicatur legitime præscripta?
- 41 Per consuetudinem contrariam decennio abrogatur Lex Civilis.
- 42 An decennium pariter sufficiat ad tollendam legem Canonicam?
- 43 Probatur sententia affirmativa.
- (c) Dist. I. q. 4. per totam.
- 44 Solvuntur Objectiones.
- \* An consuetudo legem tollat, si Legi addatur Clausula derogativa consuetudinis? Addit. I.
- \* An Lex abroget consuetudines particulares? Addit. II.

35 **C**onsuetudo aliis verbis dicitur *Jus non scriptum* ad differentiam legum, seu Constitutionum, quæ appellantur *Jus scriptum*. Porro generatim Consuetudo dupliciter sumitur; primo pro ipso usu, seu frequentatis actibus alicujus communitatis, & a nonnullis appellatur *Consuetudo facti*: secundo pro ipsomet jure, quod tandem ex ejusmodi diuturno usu, & frequentatis actibus nascitur. Et hoc posteriori modo *Consuetudo* aliud non est, quam jus quoddam moribus constitutum, quod pro lege suscipitur: in qua, non autem in priori acceptione sermo nunc est de Consuetudine. Ceterum

36 Consuetudo generatim sumpta dividitur tripliciter, nempe in eam, quæ est præter legem, secundum legem, & contra legem. *Consuetudo præter legem* (quæ & *juris constitutiva* dicitur) est illa ipsa, quam superiori numero descripsimus, ac reperitur in casibus a jure non decis: unde hujus Consuetudinis vis est, constituere jus novum, ubi nulla lex posita fuit. Ubi tamen ab initio, vel saltem in continuatione requiritur intentio per hos actus inducendi obligationem; qualis intentio, seu consensus & voluntas adesse non censetur, si communitas aliqua ideo quidpiam facit; quia ex errore, seu ignorantia credit adesse legem & obligationem sic faciendi; nam errantis, seu ignorantis nullus est consensus, L. 15. ff. de jurisdic. consequenter nec adesse censetur voluntas seu intentio se obligandi. Et hinc si populus per multos annos observaret aliquod Festum vel Jejunium, putans ex errore illud esse præceptum, exinde non induceretur consuetudo obligativa præter legem. Porro in dubio probabilius præsumi poterit, hos actus potius ex devotione, quam ex intentione inducendi obligationem processisse; quia libertas est in possessione, neque aliquis præsumitur sibi voluisse onus imponere, nisi de eo sufficienter constet. Suarez hic l. 7. c. 15. n. 13. *Consuetudo secundum legem* est, quæ legem jam præexistentem supponit, eamque vel deducit in usum, vel si ambigua est, interpretatur: & de hac loquitur illud commune dictum, *Consuetudo est optima legum interpret.* c. Cum dilectus.



de Consuet. & L. 37. ff. de Legibus. Tandem Consuetudo contra legem (quæ & Defuetudo, seu consuetudo legi contraria dicitur) est illa, qua lex vel usu numquam recepta fuit, vel jam recepta usu contrario denuo tollitur, & abrogatur: & de hac præcipue sermo est in proposito.

37 CONCL. I. Lex humana potest tolli per consuetudinem contrariam, dummodo ea sit rationabilis, ac legitime præscripta. Ita omnes Doctores, & habetur expresse cap. ult. de Consuetudine, cum concordantiis. Dicitur notanter, *lex humana*: siquidem contra legem naturalem, ac Divinam, nulla currit consuetudo, quæ potius dicenda esset corruptela; quinimo *tanto graviora sunt peccata, quanto diutius infelicem animam detinent alligatam*, ut cit. cap. ult. notatur. Hinc prava consuetudo pejerandi, blasphemandi, vel fornicandi, numquam potest tollere legem Divinam de non pejerando, blasphemando, aut fornicando.

38 CONCL. II. Ea consuetudo generatim loquendo censetur rationabilis, quæ nec Juri naturali, aut Divino adversatur, neque jure Canonico reprobatur tamquam corruptela, neque peccandi licentiam aut occasionem præbet, neque alia ratione communi utilitati perniciofa est: quæ vero in aliquo horum deficit, censetur irrationabilis, & consequenter numquam potest induci per actus legi contrarios. Ita Layman lib. 1. tract. 4. c. 24. & alii.

39 Dices. Omnis lex debet esse rationabilis, & iusta; ergo hoc ipso quælibet consuetudo legi contraria erit irrationabilis, atque iniusta. Resp. enim negando consequentiam: quia nihil impedit, quod lex secundum unam rationem, & in ordine ad certum finem seu respectum fuerit rationabilis, simulque consuetudo eidem contraria secundum aliam rationem, ac sub diverso respectu ac fine, etiam sit rationabilis: sic enim duæ contrariæ leges solent pariter esse rationabiles, prout videre est in mutatione, seu revocatione legum.

#### Additio.

\* Urgebis: Actus consuetudinis contra Legem sunt irrationabiles; ergo etiam ipsa consuetudo, quæ ex his actibus generatur. Consequentia videtur patere ab exemplo; sic enim si actus blasphemandi sunt irrationabiles, etiam consuetudo blasphemandi ex his generata censetur irrationabilis. Antec. vero probatur, actus introducentes consuetudinem possunt esse peccaminosi, cum valeat introduci consuetudo contra legem per actus etiam formaliter peccaminosos, uti tenent Baldus, Sanchez, Diana, Lugo, Hostiensis, Jafon, Joannes Andreas, Haunoldus &c. Sed actus formaliter peccaminosi sunt utique irrationabiles; cum nullum peccatum sit rationabile: ergo. Resp. Inprimis non deesse Auctores, qui, etsi concedant per actus materialiter peccaminosos posse introduci consuetudinem; id tamen negant de actionibus formaliter peccaminosis. Et ita defendunt Layman, Azorius, Engel, Henno, Felix Potestas, & alii. Nihilominus, quia ex Jure Canonico L. 1. Decret. Tit. 4. §. 5. n. 143. cum superius allegatis Doctoribus admittitur posse per actus formaliter peccaminosos constitui legitimam consuetudinem; ideo aliter

Resp. II. Concesso antec. negando consequentiam; nam quoad actus præcedentes ipsam consuetudinem Juris necdum adest consensus legalis ipsius Legislatoris, hincque hi actus scienter contra legem, & voluntatem Legislatoris exerciti sunt formaliter peccaminosi, & consequenter irrationabiles; econtra vero habita ipsa consuetudine cum suis legitimis conditionibus, adest dictus consensus legalis, sicque consuetudo, & actus post eandem elicti non amplius erunt formaliter peccaminosi, & consequenter nec irrationabiles. De exemplo autem adducto circa blasphemias negatur paritas: quia ibidem juxta jam dicta nec in actibus præcedentibus, nec in ipsa consuetudine exinde generata (quæ tantum est facti, non juris) adest consensus legalis supremi Legislatoris, sicut quoad nostrum propositum habetur in pura lege humana, dummodo dicta consuetudo fuerit tempore legitimo continuata, arg. c. fin. de Consuetudine.\*

40 CONCL. III. Consuetudo dicitur legitime præscripta in tantum, quatenus tempore a legibus definito majori parte alicujus veræ communis est continuata. Ita communis. Ratio est: quia consuetudo legitime præscripta idem est, ac usus longævus, seu longa consuetudo, prout patet ex c. Cum consuetudinis. & cap. ult. de Consuet. cum concordantiis. Quod ut magis intelligatur,

41 Quæres, quantum temporis requiratur, & sufficiat, ut consuetudo censeatur legitime præscripta, ita ut legem aboleat? Supponitur, non moveri hic quæstionem de abolitione legis sciente ipsomet Legislatore: nam si is resciat, suam legem non observari, & tamen non contradicat, cum tamen facile possit, non requiritur certum tempus ex communi Doctorum; cum ibi Lex potius per tacitum consensum & per viam conniventiae, quam per consuetudinem abrogetur. Difficultas itaque solummodo restat, si id fiat Legislatore ignorante? ad quam Resp. I. Ad consuetudinem contra legem Civilem Principe ignorante inducendam requiritur, & sufficit decennium. Ita communis. Ratio est: quia consuetudo, ut derogat legi Civili, debet esse longa, quæ & sufficit arg. L. 1. C. Quæ sit longa consuetudo: atqui per longam consuetudinem intelligitur illa, quæ decennio duravit; nam decennium in Jure vocatur longum tempus l. Super longi. 11. C. de Præscript. long. temp. ibi: Super longi temporis præscriptione, quæ ex decem annis introducit.

42 Resp. II. Loquendo de legibus Ecclesiasticis, seu Canonis, quamvis multi Doctores distinguendum censeant inter legem receptam, & numquam receptam; & hanc quidem decennio per contrariam consuetudinem tolli concedant, ad illam autem tollendam requiri quadraginta annos, asserant: ut volunt Ludov. Engel tit. de consuetud. n. 15, Layman l. 1. tract. 4. c. 3. n. 4. Navarrus, Zoësius, & alii plures. Nihilominus probabilius videtur, Jurique conformius, non esse opus memorata distinctione, sed generaliter ad abrogandam quamcumque legem Ecclesiasticam vi contrariæ consuetudinis, rationabilis tamen, sufficere decennium. Ita Lessius lib. 2. de just. & jure c. 6. n. 46. Pirhing tit. de Consuetud. n. 39. Christoph. Haunold. tract. 1. c. 3. Controv. 2. n. 130. Sannig distinct. 4. de Legibus. quæst. 1. n. 5. & innuit Herincx disp. 3. de Legibus. q. 16. n. 217.

43 Ratio hujus posterioris sententiæ est: quia ubi Jus non distinguit, neque nos distinguere debemus: sed Jus nullibi distinguit inter legem Canonice usu receptam, & non receptam; ergo. Deinde cum acceptatio populi non requiratur ad intrinsecam constitutionem legis humanæ, ut dictum est superius (c) parum refert, num lex Pontificia sit aliquando recepta, nec ne; cum utraque jam habeat suam intrinsecam, & substantialem firmitatem ac robur obligandi. Confirmatur eadem sententia: quia non est inducenda discrepantia inter Jus Civile & Canonicum, ubi non habetur expressa dispositio Juris in contrarium arg. c. 1. De novi operis nuntiis. atqui ad abrogandam legem Civilem per contrariam consuetudinem sufficit decennium, ut dictum n. 41. & in Jure Canonico quoad hoc non reperitur expressa dispositio in contrarium; ergo.

44 Nec obstat, quod c. Auditis de Præscript. & c. Cum Ecclesia de Causa possess. & alibi, ad præscribendum contra bona, & jura Ecclesiastica requiratur spatium quadraginta annorum. Resp. enim, ibi sermonem esse de præscriptione contra bona immobilia Ecclesiarum, atque earum jura, utpote quæ sunt instar bonorum immobilium; prout desumitur ex ipsomet textu: non autem de præscriptione contra leges Ecclesiasticas, sive Pontificias. Alioquin enim, cum contra Romanam Ecclesiam non currat nisi sola centenaria præscriptio c. Cum vobis de Præscript. & alibi, leges Papales non nisi centenaria præscriptione, seu consuetudine in contrarium abrogari possent; quod est contra communem Doctorum.

#### Additio I.

\* Quæres I. An, si Legislator humanus decernens legem velit, quod hæc valeat non obstante consuetudine contraria,



*traria, vel nulla obstante consuetudine*, an (inquam) nihilominus talis lex possit tolli per consuetudinem contrariam? Resp. probabiliter affirmative, nisi talis consuetudo reprobetur tanquam corruptela, seu velut irrationabilis. Ratio est: quia legislator per similes clausulas censetur solum improbare consuetudinis praesentes contrarias, si quae existerent: non autem prohibet per easdem introductionem consuetudinis in futurum. Et ita tenent Glossa, Abbas, Cardinalis Thufcus, Covarruvias & alii citati in Jure Canonico lib. 1. Decret. Tit. 4. §. 8. n. 195. \*

Additio II.

\* Quæres II. Quando consuetudo semel contra aliquam legem legitime introducta censetur iterum abrogata? Resp. I. Consuetudines locorum particularium per legem contrariam non censentur abrogatae, si nulla adfit clausula abrogatoria. Ita communis. Ratio est: quia sicuti Legislator particularia locorum statuta, ita & particulares locorum consuetudines censetur ignorare, a-

deoque nec velle sub lege Generali contraria comprehendere earum revocationem, nisi exprimat per aliquam clausulam derogatorem. Resp. II. Si legi Generali contrariae annexa sit clausula derogatoria: e. g. *nulla obstante contraria consuetudine* &c. tunc praesentes generales consuetudines exinde censentur abrogatae. Ita communis, & ratio est: quia alias dicta clausula derogatoria nullum haberet effectum, prout patet consideranti, & eruitur ex jam dictis praecedente quaestio. Resp. III. Valde probabiliter tamen per dictam clausulam derogatorem, legi Generali contrariae annexam non abrogatur praexistens consuetudo immemorialis, id est illa, cujus determinatum initium memoriam hominum excedit. Ratio est: quia, ut illa, tanquam alias specialiter privilegiata, censetur sublata, videtur requiri, ut de eadem etiam fiat specialis mentio, prout subinde contingit addendo legi contrariae sequentem clausulam: *non obstante quacumque consuetudine, etiam immemoriali* &c. Et ita teste Fagnano decrevit S. Congregatio, prout totum hoc videre poteris fusius in Jure Canonico Lib. 1. Decret. tit. 4. §. 8. per totum. \*



T R A C T A T U S I I I.

D E P E C C A T I S.

1 **P**ostquam visum est de Actibus Humanis generatim, nec non & de Conscientia, utpote Regula proxima eorumdem, simulque de Legibus, quae sunt regula remota atque extrinseca ipsorum: merito subiungitur praesens Tractatus de Peccatis, utpote quae sunt per recessum a memoratis actionum nostrarum Regulis, ipsaque Lege Divina. Nam, ut inquit D. Ambrosius lib. de Paradiso. cap. 8. *Quid est peccatum, nisi praevaricatio legis divinae, & caelestium inobedientia praeceptorum?* Prout id ipsum uberius declarabitur in progressu.

2 **N**on loquimur hic de peccato generalissime sumpto, ac prout non solum reperitur in anima seu moribus, sed etiam in arte & natura: in qua acceptione generalissima peccatum definitur a S. Augustino lib. 2. de Consensu Evangelistarum. cap. 4. dicendo: *Peccatum est transgressio legis.* In hoc enim sensu etiam artifex dicitur peccare, quando errat in opere suo, illud non faciendo juxta regulas artis; & vocatur *Peccatum artis*: sicuti & natura tunc dicitur peccare in suis effectibus, quando producit monstra; & appellatur *Peccatum naturae*. In Proposito non est sermo de peccato artis, vel naturae; sed solum de peccato animi, seu in actibus moralibus commissio.

D I S T I N C T I O I.

De diversitate, & distinctione Peccatorum.

Q U A E S T I O I.

Qua ratione Peccatum dividatur?

S U M M A R I U M.

- 1 \* Ratio ordinis.
- 2 Peccatum generalissime,  
Peccatum artis, & naturae.
- \* Item Peccatum Philosophicum, & Theologicum.
- 3 Peccatum animi, quid?
- 4 Peccatum ut sic dividitur
- 5 I. Ratione diversae originis, in peccatum originale, &
- 6 Peccatum personale, quid?
- 7 II. Ratione objectorum in peccata carnalia, &
- 8 Peccata spiritualia, quae?
- 9 Avaritia cur numeretur inter peccata spiritualia?
- 10 III. Ratione legis violatae, dividitur peccatum in peccatum commissionis, & omissionis, quid?
- 11 Praeceptum aliud affirmativum, & aliud negativum; & quomodo differant?
- 12 IV. Ratione diversae radicae, dividitur peccatum in peccatum ex ignorantia.  
(a) Ut dictum tract. I. dist. I. n. 42.
- 13 Peccatum ex passione, seu infirmitate, &
- 14 Peccatum ex malitia, quid?
- 15 Peccatum actuale, & habituale.

Additio.

\* Potest autem illud peccatum animi considerari, vel quatenus est disconveniens creaturae rationali, vel quatenus est offensivum Dei, & inductivum poenae. Sub prima consideratione vocatur a nonnullis peccatum Philosophicum; in secunda autem peccatum Theologicum. Porro regulariter saltem & ordinarie loquendo non datur purum peccatum Philosophicum, quin concurrat Theologicum; quia saltem ordinarie, ac regulariter, quando apprehenditur peccatum ut disconveniens creaturae rationali, etiam occurrerit aliquo modo tamquam displicens Deo; adeoque jam aderit simul peccatum Theologicum & offensa Dei.

Atque propterea, dum aliqui Theologi verbis generalibus, & quasi indiscriminatim peccatum Theologicum a Philosophico separare voluerunt, ab Alexandro VIII. tamquam scandalosa, temeraria, piarum aurium offensiva & erronea rejecta est sequens propositio: *Peccatum Philosophicum, seu morale est actus humanus disconveniens naturae rationali & rectae rationi: Theologicum vero & mortale est transgressio libera Legis Divinae, Philosophicum quantumvis grave in illo, qui Deum vel ignorat, vel de Deo actu non cogitat, est grave peccatum, sed non est offensa Dei, neque peccatum mortale dissolvens amicitiam Dei, neque aeterna poena dignum.* Haec propositio, uti jacet, utique est erronea; quia, si quis Deum ignorat, vel de eo, dum peccat, non cogitat; id fit saltem ordinarie vincibiliter, & culpabiliter; & consequenter, si tunc graviter peccat, eo ipso etiam committit offensam Dei, sicque peccatum Theologicum. Vide de hoc fusius Auctores, qui scribunt in Propositiones damnatas: non enim vacat haerere diutius in peccato Philosophico, cum in praesenti potius respiciatur ad peccatum Theologicum, prout consideratur in ordine ad tribunal Penitentiae, in quo sensu sit. \*



3 CONCL. I. Peccatum animi generatim aliud non est, quam aliquid denominans naturam intellectualem Deo displicentem, inducensque in anima reatum alicujus pœnæ; prout amplius explicabitur in sequentibus.

4 CONCL. II. Peccatum ut sic varie dividitur. Patet hoc inductione. Nam I. Ratione diversæ originis, dividitur peccatum in originale, & personale; ex quibus personale subdividitur in actuale, & habituale; quorum utrumque demum subdividitur in mortale, & veniale.

5 *Peccatum originale* dicitur illud, quod trahitur a primo parente nostro Adamo per carnalem propagationem: siquidem juxta illud Apostoli *Rom. 5. Per unum hominem peccatum in hunc mundum intravit, & per peccatum mors, & ita in omnes homines mors pertransiit, in quo omnes peccaverunt.* Quod de peccato originali est accipiendum, prout communiter docent SS. Patres & Theologi, ipsumque Concil. Trid. *Seff. 5. in Decreto de Peccato originali.*

6. *Peccatum personale* est illud, quod a propria cujusque voluntate contrahitur, atque a propria (ut ita dicam) cujusque persona committitur; unde & *Personale* appellatur. Et tale est quodlibet peccatum a nobis commissum; solo peccato originali excepto, utpote quod voluntate propria non commisimus, sed a primo parente nostro Adamo commissum per naturalem propagationem ab eo derivatam contraximus. Quidnam autem sit peccatum actuale & habituale, mortale & veniale, dicetur infra fusius in propriis Quæstionibus.

7 II. Ratione objectorum, circa quæ versantur peccata, & a quibus actiones desumunt suam specificationem, dividuntur peccata in carnalia, & spiritualia, juxta illud Apost. 2. *Corinth. cap. 7. Mundemus nos ab omni inquinamento carnis & spiritus,* & alibi. Porro *Peccata carnalia* sunt ea, quæ in concupiscentia carnis, seu in inordinata delectatione carnali consistunt: qualia sunt Gula, & Luxuria, & diversæ peccatorum species ad hæc duo peccata reducibiles.

8 *Peccata spiritualia* dicuntur ea, quæ in concupiscentia seu inordinata delectatione spiritali perficiuntur, & consummantur: qualia sunt Superbia, inanis Gloria, & hujusmodi. Imo D. Gregorius *lib. 31. Moral. cap. 31.* inquit, quod Capitalium Vitiolorum quinque sint spiritualia, videlicet Superbia, Invidia, Ira, Avaritia, & Acedia: duo vero carnalia, videlicet Gula seu ventris ingluvies, & Luxuria.

9 Nec obstat, quod Avaritia versetur circa objectum corporale, nempe circa pecunias; ac proinde non videatur esse Peccatum spirituale. Resp. enim cum D. Thoma 1. 2. q. 72. a. 2. quamvis res, in qua delectatur avarus, corporale quoddam sit, & quantum ad hoc connumerari possit peccatis carnalibus, quia tamen ipsa delectatio non pertinet ad carnem, sed ad spiritum, ideo S. Gregorius dixit, Avaritiam esse Peccatum spirituale; nam finis peccatorum carnalium est delectatio carnis.

10 III. Ratione legis violatæ, Peccatum ut sic dividitur in peccatum commissionis & omissionis. Per *Peccatum commissionis* intelligitur id, quod fit contra præceptum negativum, seu contra legem quidpiam fieri prohibentem: ut est Adulterium, Homicidium & hujusmodi; nam pugnant contra illa Præcepta Decalogi, *non mœchaberis, non occides* &c. *Peccatum omissionis* econtra dicitur illud, quo violatur præceptum affirmativum, siue lex quidpiam fieri præcipiens: ut est omissio Missæ die Festo, & hujusmodi. Unde patet, quod peccatum commissionis opponatur præcepto negativo, peccatum vero omissionis præcepto affirmativo; ac proinde, quod hæc peccati divisi o desumatur a lege, quæ violatur. Pro cujus clariori intellectu.

11 Notandum, quod lex, seu præceptum aliud sit affirmativum, aliud negativum. *Præceptum affirmativum* est, quo præcipitur, ut fiat aliquid certo tempore: quale est illud Decalogi: *Memento, ut diem Sabbati sanctifices.* Idem illud: *Honora patrem tuum, & matrem tuam.* Porro *Præceptum negativum* est, quo prohibetur aliquid, ne fiat: ut illud, *non mœchaberis, non occides* &c. Est autem inter hujusmodi præcepta, seu leges, notabile discrimen: nam Præceptum affirmativum obli-

gat quidem semper, sed non pro semper; id est, obligat non pro omni, sed pro certo tantum & determinato tempore: sic enim non omni tempore, sed solum die Festivo tenemur audire Missam, item tenemur honorare Parentes, tempore opportuno ipsis deferendo honorem, eisque succurrendo in necessitate constitutis. Econtra præceptum negativum obligat semper & pro semper, seu pro omni tempore: quia nullo prorsus tempore licitum est mœchari, aut absque legitima auctoritate occidere hominem.

12 IV. Ratione diversæ radicis, ex qua procedit, dividitur peccatum in peccatum ex ignorantia, ex passione, ac ex malitia. *Peccatum ex ignorantia* dicitur illud, quod ex ignorantia vincibili procedit. Dicitur, *ex ignorantia vincibili*: quia, quod ex ignorantia invincibili sit, omnino involuntarium censetur, ac proinde peccatum non est. (a)

13 *Peccatum ex passione*, seu infirmitate est, quod ex gravi motione appetitus sensitivi originem ducit, trahentis voluntatem ad consensum: quale est, si quis gravi tentatione victus tandem succumbit peccato. Et tale dicitur etiam *peccatum ex infirmitate*, eo quod ex infirmitate conditionis humanæ proveniat; cum naturale sit voluntati, ut condelectetur motibus appetitus sensitivi, ob fomitem peccati ex peccato originali derelictum.

14 Tandem *peccatum ex malitia* est, quod absque ignorantia, vel passione quadam præcedente, committitur ex plena libertate, seu prava voluntate operantis, juxta illud *Job. c. 34. Qui quasi de industria recesserunt a DEO.* Et hujusmodi peccatum ex mera malitia commissum (ceteris paribus) est gravius, quam peccatum ex passione.

15 Inter alias autem peccati divisiones celebris est illa, qua peccatum dividitur in actuale, & habituale; circa quam quia plura occurrunt dicenda, hinc ea duabus sequentibus Quæstionibus expeditur, prius tamen agendo de peccato actuali, & postea de habituali.

## QUÆSTIO II.

Quid sit peccatum actuale, & quæ ejus causa?

### SUMMARIUM.

16 *Peccatum actuale*, quid?

17 *Et quomodo definitur?*

18 *Solvitur obiectio*

19 *In peccato actuali duo consideranda, materiale scilicet, & formale, quid?*

20 *Peccatum actuale formaliter non consistit in positivo, sed privativo.*

21 *Alia ratio Conclusionis.*

22 *Solvitur instantia.*

23 *Deus non est causa, & auctor peccati.*

24 *Deus concurrit ad materiale peccati, non tamen ad ejus formale.*

\* *Occurritur alicui Objectioni.*

25 *Deus, quomodo dicatur hominem inducere, excacare &c.*

26 *Alii modi, quibus dicatur Deus hominem inducere, excacare &c.*

27 *Causa propria & interna peccati est sola voluntas creata.*

28 *Dantur etiam causæ externæ peccati, quæ?*

29 *Alia circa peccatum actuale remissive.*

16 **P**ER peccatum actuale intelligitur actualis transgressio legis Divinæ: unde tunc committitur peccatum actuale, quando actualiter violatur lex Divina, siue deinde id contingat eliciendo actum a lege prohibitum, siue omittendo præceptum. Tale peccatum actuale v.g. fit, dum quis actu mentitur, vel actu occidit hominem, aut actualiter omittit auditionem Missæ die Festo. Et de hoc loquendo, sit

17 CONCL. I. *Peccatum actuale* bene definitur cum D. Augustino 1. 22. contra Faustum. c. 27. dicendo: *Peccatum est dictum, vel factum, vel concupitum contra legem Dei.* Dicitur primo, *dictum, factum, vel concupitum*, ad indicandum triplex peccatum, videlicet cogitationis, oris, & operis. Dicitur ulterius, *contra legem Dei*: nam quamvis etiam detur transgressio legis humanæ, siue



Ecclesiasticæ, sive Civilis, hæc tamen non aliter est peccatum, nisi quia est contra legem Dei, volentis ac præcipientis, ut nostris legitimis Superioribus quidpiam iuste præcipientibus obediamus, prout patet ex quarto Præcepto Decalogi, & alibi sæpe.

18 Si dicas obijciendo contra hanc conclusionem, allata definitio non convenit peccato actuali omissionis; ergo non est bona. Probaturs antecedens: quia ommissio actus præcepti, v. g. auditionis Missæ die Festo, non est dictum, nec factum, nec concupitum contra legem Dei, sed potius libera omnium trium ommissio; ergo. Resp. negando antecedens, ejusque probationis consequentiam: quia enim *affirmatio & negatio reducuntur ad idem genus*, ut communiter notant Doctores, hinc in allata definitione sub ly *dictum, factum &c.* etiam horum negationes intelliguntur id est, *non dictum, non factum contra legem Dei.*

19 Pro resolutione sequentis Conclusionis notandum breviter, quod in peccato actuali commissionis duo considerari possunt, materiale scilicet & formale. *Materiale peccati* (quod alii *Substratum peccati* appellant) est ipsemet actus peccatoris hominis, quo perpetratur peccatum. *Formale vero peccati*, est privatio, seu carentia rectitudinis debitæ inesse illi actui, quæ nempe rectitudo, seu conformitas ad legem divinam, deberet hic & nunc inesse actui humano, & non inest: & in hac carentia rectitudinis debitæ actui consistit ratio formalis peccati, seu peccatum formaliter sumptum. Sic in peccato homicidii, materiale, seu substratum hujus peccati, est extensio manus, ac elevatio gladii erga hominem occidendum: formale vero, est privatio debitæ rectitudinis, seu conformitatis ad legem Divinam, quatenus illa elevatio manus, percussioque fit contra prohibitionem legis Divinæ, volentis, ne homo iniuste occidatur; ac proinde actus ille caret sua debita rectitudine, seu conformitate ad legem Dei, quam habere debet quilibet actus humanus. Et hoc idem fit in aliis peccatis actualibus commissionis, ac suo modo etiam in peccatis omissionis: quo proposito, sit.

20 CONCL. II. Peccatum actuale formaliter acceptum non consistit in positivo, sed privativo; id est, in carentia seu privatione debitæ rectitudinis, seu conformitatis ad legem Divinam. Ita Doctor Subtilis 2. *dist. 37. q. 1.* cum suis (excepto Pontio) D. Bonaventura 2. *dist. 37. art. 2. q. 1.* Alensi, & pluribus aliis, contra non paucos Theologos oppositum tenentes. Conclusio hæc sequitur imprimis ex præcedenti Notando. Accedit auctoritas D. Augustini, qui super illud Joannis cap. 1. *Sine ipso factum est nihil*: per *Nihil* intelligit peccatum, atque ait: *Manifestum est, quia peccatum nihil est*: ergo hoc nequit consistere in positivo. Probaturs deinde Conclusio ratione: quia, si peccatum formaliter consisteret in positivo, sequeretur, quod Deus per se & directe esset causa peccati: sed consequens est falsum; ergo. Probaturs sequela: quia omne ens positivum per se & immediate efficitur a Deo, utpote sine cujus immediato concursu nulla causa secunda potest operari, aut aliquid efficere, ut magis ostendi solet in Philosophia.

21 Confirmatur hoc ex definitione peccati supra ex D. Augustino relata: nam in ea ly *dictum, factum, concupitum*, denotat materiale peccati; ly *contra legem Dei*, denotat formale peccati: atqui esse contra legem Dei, importat aliquid privativum, videlicet carentiam debitæ rectitudinis, seu conformitatis ad legem Divinam, quæ deberet inesse actui humano, & non inest; ergo.

22 Nec dicas. Homicidium, Blasphemia, & hujusmodi, sunt peccatum, ut patet: sed Homicidium, Blasphemia &c. consistunt in positivo; ergo peccatum consistit in positivo. Resp. enim distinguendo minorem: sed Homicidium, Blasphemia, consistunt in positivo, si sumantur pro materiali, seu substrato peccati, conceditur; si sumantur pro formali, negatur minor, & consequentia. Sic enim consistunt in privativo, neque in privatione debitæ rectitudinis, seu conformitatis ad legem Divinam, quæ deberet inesse actui, & non inest: & hinc

Anacl. Reiffenstuel Theolog. Tom. I

Homicidium in bello iusto, vel auctoritate publica erga malefactores factum, non est peccatum, eo quod hic non interveniat illa privatio conformitatis ad legem; quamvis quoad cetera iniusta, & iniusta hominis occisione, sint omnia æqualia. Verum de hoc plura in Theologia speculativa.

23 CONCL. III. Quamvis peccatum aliquam causam habeat (eo saltem modo, quo privationes dicuntur habere causam) Deus tamen non est causa, & auctor peccati. Hæc conclusio est de Fide certa, contra nonnullos Hæreticos. Ratio imprimis est: quia peccatum, cum sit malum omnium maximum, quin & aversio a DEO tamquam ultimo Fine, repugnat infinitæ Sapientiæ, Justitiæ, & Bonitati Dei: unde is peccatum gravissime, & sub interminatione æternæ damnationis prohibuit. Accedunt clarissima Sacræ Scripturæ testimonia, ut Psal. 5. *Non Deus volens iniquitatem tu es.* Sapient. 14. *Odio sunt Deo impius, & impietas ejus.* & alibi sæpe.

24 Nec obstat I. Quod Deus concurrat physice, ac immediate, ad substratum & materiale peccati, puta ad elevationem manus in actu homicidii. Resp. enim: licet Deus, tamquam causa prima & universalis, concurrat positive ad substratum seu materiale peccati, ut omnes fatentur; non tamen concurrat ad ipsius actus defectum, id est, ad privationem debitæ rectitudinis, seu conformitatis ad legem Divinam, in qua privatione consistit ratio formalis peccati. Hanc enim DEUS solum permittit, quatenus hominem a rectæ rationis regula libere deviantem non impedit, ne tollat ejus libertatem; ac proinde vi pacti sui generalis desinendo causas secundas motus suos agere, permittit de facto hominem agere, quidquid vult, quem tamen, si peccaverit, nec poenituerit, suo tempore severissime est judicaturus, ac puniturus.

Ad libit.

\* Nec refert, quod privatio illa debitæ rectitudinis ex ipso materiali substrato peccati contra legemposito exurgat necessario absque novo alio concursu; nam hoc non obstante Deus ad materiale peccati concurrens adhuc nequit dici causa peccati formalis; quia illa privatio debitæ rectitudinis non resultat ex materiali peccati, ut istud est effectus Dei, sed præcise ut est effectus causæ secundæ liberæ. Ratio hujus est: quia Deus concurrendo ad esse materiale peccati e. g. ad motum gladii, agit conformiter suæ Legi generali, qua statuit se concursurum ad motus causarum secundarum: econtra causa secunda libera deliberate agens concurret ad esse materiale peccati disformiter Legi Divinæ prohibenti motum gladii ad occidendum proximum; unde tunc privatio debitæ rectitudinis surgit ex materiali substrato peccati, non prout est Dei, sed creaturæ effectus.

25 Nec obstat II. Quod Deus in S. Scriptura quandoque legatur hominem indurare, excæcare, & hujusmodi: ut Exod. 7. *Ego indurabo cor Pharaonis.* Isaia 6. *Excæca cor populi hujus.* & alibi. Resp. enim cum communi Theologorum, hujusmodi S. Scripturæ loca non esse intelligenda de actione positiva, ita quod Deus immitat errores, aut duritiam in cor peccatoris, ut explicant nonnulli Hæretici (hoc enim repugnat citatis, & aliis pluribus Sacræ Scripturæ testimoniis) sed ea imprimis quoad Deum esse intelligenda permissive, sive quatenus is iusto suo judicio permittit peccata: Deus enim, partim ut salva remaneat homini peccatori sua libertas, partim ut nonnunquam uno peccato libere aliquo eliciendo puniat aliud, partim ut homines iusti per malos quandoque exerceantur, partim ob alia sua inperferutabilia judicia, permittit homines male agere: occasione cujus hi subinde in peccatis magis indurantur, atque ad bonum faciendum excæcantur.

26 Deinde dicitur Deus hominem indurare, excæcare &c. subrahendo specialiora gratiæ actualis auxilia. Deus enim iusto suo judicio, ac in poenam præsertim priorum peccatorum, subrahit homini in peccatis

E 3

inve-



Inveterato, non quidem omnia, sed solum specialia & liberiora gratiæ actualis auxilia; sine quibus ille posset quidem bene agere, prævidetur tamen a Deo non bene operaturus, idque ob propriam suam malitiam, & perversam voluntatem. Ulterius alio modo dicitur Deus excicare hominem, occasionaliter videlicet, siue inscrutabili suo iudicio aliquid ponendo, vel removendo, ex cuius positione, vel remotione, sumit homo ex propria malitia occasionem peccandi: ut quando respiciens ad munera Abel, præbuit occasionem Cain ad æmulationem, ipsumque fratricidium (nam hoc posse Deum facere, non quidem ex primaria intentione peccati, sed aliis de causis, certum est; cum etiam homo in certis casibus licite possit aliquid facere, vel omittere, non obstante, quod prævideat proximum inde accepturum occasionem peccandi) vel quando patienter & longanimitè fert iniquitates, qua patientia abutentes peccatores sumunt maiorem peccandi licentiam, sicque dantur in reprobum sensum.

27 CONCL. IV. Causa propria, & interior peccati, est sola voluntas creata, deficiens a recta regula morum in operationibus liberis. Ita certa omnium. Ratio est: quia voluntas libera est debitor, ut omnem actum suum, siue elicitum, siue imperatum, eliciat conformiter legi Divinæ; ergo hoc non faciendo peccet, sicque est causa propria peccati.

28 Dicitur notanter, *causa propria, & interior peccati*. Nam dantur etiam causæ exteriores peccati: ex quibus inprimis est Diabolus, qui incitando, & tentando homines, est causa moralis inductiva peccati. Accedunt Mundi & Carnis illecebræ, ut patet: imo nonnumquam unus homo est alteri causa peccati; præterea etiam potentia exteriores sunt sæpe voluntati causa, seu potius occasio peccati. Adhuc tamen hæc omnia non sufficiunt ad peccatum, nisi voluntas libere consentiat; & alioquin potius præbent homini iusto atque in certamine constanti ansam victoriæ, meritique, & augmenti gratiæ & gloriæ cœlestis.

29 Alia plura, quæ concernunt Peccatum actuale, parim colligi possunt ex dictis supra Tract. 1. dist. 2. parim amplius patebunt ex dicendis, præsertim ubi agetur de Peccato mortali & veniali.

### QUESTIO III.

#### De Peccato Habituali.

#### SUMMARIUM.

30 Post actum peccati remanet aliquid in homine, unde is denominatur peccator.

31 Quod in S. Scriptura dicitur Macula.

32 Peccatum habituale, quid?

33 Illud qua tale non addit novam malitiam.

34 Tamen per accidens, seu ratione alterius præcepti, quod violatur, quandoque novum peccatum committitur.

35 Post transactum actum peccati mortalis plura eveniunt in homine, quæ?

36 Reatus pænæ, & reatus culpæ, quid?  
Sententia Scotistarum.

36 Hac sententia nulli subiacet censura.

38 Solvitur obiectio.

Peccatum habituale cur potius consistat in reatu culpæ, quam privationis gratiæ?

**C**ertum est apud omnes, & indubitatum, post actum peccatum physice jam præteritum, adhuc hominem manere peccatorem; atque adeo aliquid in eo relinqui, per quod in esse peccatoris constituitur, & a quo denominatur peccator, quousque per veram pœnitentiam consequatur remissionem ipsius. Patet hoc ex S. Scriptura passim, ut ex illo Luc. 7. *Mulier, quæ erat in civitate peccatrix. Matth. 9. Publicani, & peccatores venientes discumbebant cum JESU.* Rom. 5. *Cum adhuc peccatores essemus, & alibi passim.*

31 Hoc autem, a quo post transactum actum peccati denominatur quis peccator, vocatur in S. Scriptura *Macula*; ut *Jeremie 2. Si laveris te nitro, & multiplicaveris tibi herbam borith, maculata es in iniquitate tua.* Et *Josue c. 22. Usque in præsentem diem macula hujus sceleris in nobis permanet.* Et *Ecclesiastici 31. Qui inventus est sine macula; & alibi.* Unde homo postmodum a tali Macula per peccatum contracta, dicitur maculatus, pollutus, imundus, coinquinatus, & abominabilis coram Deo, ut sæpissime legitur in S. Litteris; a qua proinde Macula Regius Psalter petivit ablui, & mundari; dum *Psal. 50. oravit, dicens: Amplius lava me ab iniquitate mea, & a peccato meo munda me.* His prænotatis, sit

32 CONCL. I. Peccatum habituale nihil aliud est, quam peccatum actuale, cujus commissio physice jam præterit, moraliter tamen permanet. Ita in re Doctores omnes, prout bene notat Maltrius 2. *disp. 6. n. 261.* licet postmodum multum discrepent in assignando, quidnam sit illud, ratione cujus peccatum physice jam transactum censeatur adhuc moraliter permanere, & durare, quousque per veram pœnitentiam retractetur, & deleatur.

33 CONCL. II. Peccatum habituale qua tale non addit novam malitiam supra illam, quæ fuit admissa in instanti commissionis actualis peccati, quæque moraliter permanere dicitur. Ita rursus omnes Theologi, nemine discrepante. Hinc fit, quod propter peccatum habituale præcisè non mereatur homo maiorem pœnam, ac supplicium, quantumcumque illud duret, quam fuerit promeritus in illo instanti ac momento, in quo actualiter peccavit.

34 Dicitur notanter, *præcisè propter peccatum habituale*. Quia, si occurrat tempus, quo inget Præceptum eliciendæ contritionis, amoris Dei, aut receptionis alicujus Sacramenti, & tunc homo negligat mediante contritione, aut digna Sacramenti receptione sese restituere in statum gratiæ, atque expellere peccatum habituale mortale, jam committet is novum peccatum mortale propter violationem hujus præcepti, ac proinde absque dubio erit dignus majori pœna. Verum hoc contingit non vi ipsius peccati habitualis qua talis, ac præcisè sumpti, sed per accidens ratione alterius occurrentis præcepti, quod de novo violatur. Et hoc idem dicendum de eo, qui de peccato suo præterito habet novam complacentiam: siquidem per hanc committitur novum peccatum actuale. Ceterum novo peccato actuali non superveniente, sola permanentia peccati habitualis non augeat malitiam actus peccaminosi præteriti, neque pœnam ipsi correspondentem.

35 CONCL. III. Post transactum actum peccati mortalis plura eveniunt in homine: peccante mortaliter. Primo enim is labitur in iram, atque inimicitiam Dei, cui æque odio sunt impius, & impietas ejus, ut dicitur *Sap. 14.* Secundo, privatur homo per peccatum mortale gratia habituali, seu sanctificante: siquidem defacto gratia & peccatum sunt impossibilia, eo ferme modo, quo lux & tenebræ. Tertio, remanet in homine reatus, id est, obligatio quædam ad pœnam ex actu peccaminoso præterito contracta: statim enim, ac homo peccat, obligatur is ad pœnam peccato suo correspondentem, quousque pœna illa soluta fuerit, ac remissa.

36 Porro Reatus iste dupliciter potest considerari: primo, prout talis obligatio ad pœnam dicit ordinem ad Deum, qui propter peccatum commissum decernit homini pœnam, suo peccato correspondentem: & talis reatus, seu obligatio ad pœnam, dicitur *Reatus pænæ*. Secundo, prout ejusmodi obligatio ad pœnam respicit ipsum peccatum actuale præteritum, utpote ex quo proxime contrahitur, illudque immediate consequitur: & talis Reatus, seu obligatio ad pœnam, prout respicit & proxime consequitur ad ipsum actum peccati præcedentis, dicitur proprio nomine *Reatus culpæ*. Et in hoc reatu culpæ, juxta Doctorem Subtilem 4. *dist. 14. q. 1* & Scotistas, consistit formaliter Peccatum habituale; id est, ratione hujus Reatus culpæ censetur in homine peccatore moraliter remanere



manere peccatum suum actuale physice jam præteritum, donec per veram penitentiam expietur, ipsaque gratia sanctificans recuperetur.

37 Dices: S. Pius V. in Bulla, quæ incipit: *Ex omnibus* (estque confirmata a Gregorio XIII. & Urbano VIII. in hujus Constitutione 289. quæ incipit: *In eminenti*, ac refertur Tomo V. Bullarii Romani) inter alias Propositiones Michaelis Baii damnavit hanc, ordine 56. *In peccato duo sunt, actus, & reatus; transiente autem actu, nihil movet nisi reatus, sive obligatio ad penam.* Atqui hæc videtur esse ipsissima sententia ex Scoto nunc relata: ergo. Resp. negando minorem: siquidem Bajus ille assererat, transiente actu peccati in peccatore nihil manere, nisi reatum, sive obligationem; sicque volebat, in ipso etiam non remanere privationem gratiæ sanctificantis, prout liquet ex ejus Propositione tum reata, tum 41. in qua negavit, justificationem hominis fieri per gratiam infusam. Econtra Scotus, & Scotistæ unanimiter fatentur, remanere in peccatoribus ejusmodi privationem gratiæ sanctificantis. Tacentur plures aliæ disparitates, quæ legentibus citatam Bullam facile patebunt; in qua simul §. 3. expresse notatur, quod Propositiones illæ in proprio verborum sensu, ab assertoribus intento, damnentur.

38 Urgebis. Ergo peccatum habituale potius consistit in privatione gratiæ sanctificantis, quam in Reatu culpæ. Probatur sequela. Peccatum habituale in eo formaliter consistit, quod tollitur in justificatione: sed in justificatione tollitur ipsa privatio gratiæ; ergo Resp. negando antecedens, ejusque probationis majorem claritatis gratia distinguendo: Peccatum habituale in eo formaliter consistit, quod per se primo tollitur in justificatione; conceditur: quod per se secundo dumtaxat tollitur, negatur major: sicque distincta minori negatur consequentia. Nam quod per se primo tollitur in justificatione, sunt ipsamet peccata physice præterita, & moraliter adhuc permanentia: censentur autem moraliter permanere propter Reatum culpæ, non propter privationem gratiæ. Et hoc amplius ex eo ostenditur: tum quia hæc ratione peccata venialia habitualiter permanent: id est, non propter privationem gratiæ (hanc enim non inducunt) sed propter correspondentem Reatum culpæ. Tum quia alioquin omnia peccata mortalia habitualia forent ejusdem rationis, ac speciei: non minus ac privatio gratiæ est æqualis, ac ejusdem speciei, in omnibus peccatoribus peccato mortali obnoxiiis. Ueberior de hoc disputatio relinquatur Theologiæ Speculativæ.

#### QUÆSTIO IV.

Unde desumenda sit Distinctio specifica moralis Peccatorum?

#### SUMMARIUM.

- 39 Cur non sit sermo de distinctione specifica physica peccatorum?
- 40 Distinctio specifica moralis peccatorum omissionis, unde desumatur?
- 41 Distinctio specifica moralis peccatorum commissionis desumitur per ordinem ad diversas specie virtutes;
- 42 Vel rectitudines, quarum sunt formaliter privationes.  
\* Sollicitur aliqua instantia.
- 43 Ex sola diversitate præceptorum non semper recte infertur diversitas specifica peccatorum.
- 44 Quando ex diversitate præceptorum possit colligi diversitas specifica peccatorum?
- 45 Saltem ab extrinseco.
- 46 Ubi est peccatum, non jejunare die, quo duplex occurrit jejunium Ecclesiasticum.
- 47 Secus, si ad alterum quis teneatur ex voto.
- 48 Violatio Castitatis in Religioso professu, vel Clerico in Sacris, continet duplicem specie malitiam. Non ve-

ro novam, si Religiosus sit simul in Sacris.

49 Si votum & juramentum super eadem re factum violetur, est duplex specie malitia.

Quid, si violetur votum sæpius renovatum?

39 UT ex Titulo Quæstionis patet, in proposito non est sermo de distinctione specifica physica peccatorum, id est, de illa, qua peccata secundum suum esse materiale ab invicem distinguuntur (quæ distinctio desumitur ab objectis, cum generaliter actus distinguantur per objecta) sed de distinctione specifica morali. Ratio est: quia hic loquimur de distinctione specifica peccatorum in ordine ad Confessionem Sacramentalem, utpote cum juxta Concilium Trid. Sess. 14. cap. 5. & can. 7. & Theologos unanimiter, teneantur Fideles in Confessione peccata sua explicare non solum quoad numerum, sed etiam quoad speciem, ac circumstantias peccati speciem mutantis: ad hoc autem parum refert scire distinctionem, aut unitatem physicam peccatorum. Sic enim occisio Laici, & Clerici, sunt quidem physice loquendo ejusdem speciei, non tamen moraliter, utpote cum occisio Clerici superaddat specialem malitiam Sacrilegii: contra vero furtum bovis, & furtum centum florenorum, physice loquendo distinguuntur specie, eo quod habeant objecta specie diversa; & tamen moraliter sunt peccata, & furta ejusdem speciei. Igitur loquendo de distinctione specifica morali peccatorum, ac in ordine ad Confessionem Sacramentalem, sit

40 CONCL. I. Distinctio specifica moralis peccatorum omissionis, recte desumitur ex actibus debitis, quorum sunt omissiones; atque ideo omissiones illæ sunt peccata specie distincta, quæ privant actibus debitis secundum speciem moraliter distinctis. Ita communiter Doctores. Sic v. g. omisio Missæ die Festo audiendæ, distinguitur specie ab ommissione largitionis elemosinæ in casu præcepto, quia ipsa Missæ auditio, atque elargitio elemosinæ, sunt actus debiti specie distincti. Econtra omisio Missæ in die Dominico, & omisio Missæ in die Festo, non distinguuntur specie moraliter, quia neque actus præceptus auditionis Missæ in prædictis diebus distinguitur specie. Et in hoc conveniunt omnes: major autem difficultas est de peccatis commissionis, & unde desumenda sit eorum distinctio specifica moralis; de quibus loquendo, sit.

41 CONCL. II. Distinctio specifica moralis peccatorum commissionis, desumitur recte per ordinem ad diversas specie virtutes, vel rectitudines, quarum formaliter sunt privationes. Ita Doctor noster 2. dist. 37 q. 1. cum suis, & aliis, qui tenent, peccatum actuale formaliter consistere in privativo. Ratio est: quia universaliter privationes sumunt suam specificationem ab oppositis formis; sic enim cæcitas, & tenebræ distinguuntur specie ab invicem, eo quod oppositæ formæ, nempe lux & visus, specie distinguuntur: ergo, cum peccatum commissionis formaliter consistat in privativo, juxta dicta n. 20. ejusdem Distinctio specifica recte desumitur in ordine ad diversas specie virtutes, vel rectitudines, quarum est privatio.

42 Dicitur notanter sub disjunctione, per ordinem ad diversas specie virtutes, vel rectitudines. Nam ad distinctionem specificam moralem peccatorum sufficit, ut vel diversis specie virtutibus opponantur, ut furtum & fornicatio, quorum prius oppositum est virtuti Justitiæ, alterum virtuti Castitatis; vel saltem eidem virtuti secundum aliam & aliam specie rectitudinem, ut avaritia & prodigalitas, quæ specie differunt, non obstante, quod opponantur eidem virtuti Liberalitatis: quia licet Liberalitas sit unica virtus formaliter & adæquata, includit tamen duplicem rectitudinem per respectum ad duo extrema; id est, duplex rationis dictamen, quorum uno prohibetur excessus, cui opponitur prodigalitas, & altero defectus, cui opponitur avaritia.



## Additio.

\* Dices : Dantur peccata specie distincta , quæ tamen nec sunt contra distinctas virtutes , nec contra diversas rectitudines ejusdem virtutis : ergo regula assignata pro distinctione specifica peccatorum non est adæquata. Prob. an. furtum unius crucigeri , & furtum decem florenorum sunt duo peccata specie distincta ; utpote cum unum sit peccatum veniale , alterum mortale : & tamen opponuntur uni eidemque virtuti Justitiæ secundum eandem rectitudinem , nimirum istam , ut non lædam proximum in bonis fortunæ : ergo. Resp. neg. ant. quoad adductum exemplum ; verum quidem est , furtum unius crucigeri , & furtum decem florenorum , etsi non specie physica , bene tamen specie Theologica ab invicem distingui ; negatur tamen , quod sint hæc duo furta contra eandem rectitudinem Theologicæ , atque in ordine ad confessionale discurrendum : nam in hoc sensu alia est rectitudo non offendendi DEUM graviter per gravem damnificationem proximi in bonis fortunæ , & alia non offendendi Deum leviter per levem damnificationem proximi in bonis fortunæ. Et tali modo etiam specie Theologica distinguuntur consensus plenus , & consensus semiplenus circa idem peccatum carnis , cum sint contra distinctas rectitudines Theologicas. \*

43 CONCL. III. Ex sola diversitate præceptorum non semper recte , ac sufficienter , colligitur ab extrinseco diversitas specifica peccatorum. Ita communis. Ratio est : quia fieri potest , & sæpe contingit , quod eadem res , & ex eodem motivo formali , tam præcepto Divino , quam humano , Ecclesiastico , & Civili præcipiatur , aut prohibeatur ; sic enim furtum prohibetur tum Jure naturali , ac Divino , tum humano , Ecclesiastico , & Civili : atqui ob hanc solam præceptorum diversitatem furtum simplex non contrahit plures specie malitias , ut omnes fatentur ; ergo. Additur tamen in Conclusionem , non semper recte colligitur , propter mox dicenda : hinc fit

44 CONCL. IV. Tunc solum ex diversitate præceptorum potest ab extrinseco colligi diversitas specifica peccatorum , quando præcepta illa sunt formaliter diversa ; id est , quando sub diversis motivis formalibus , ad diversas virtutes , aut rectitudines spectantibus , quidpiam præcipiunt , vel prohibent : ut v. g. quia datur præceptum Divinum prohibens furtum simpliciter ex motivo Justitiæ , & simul aliud præceptum Ecclesiasticum prohibens furtum rei sacræ ex motivo Religionis ; hinc malitia furti rei sacræ distinguitur specie a malitia simplicis furti ; & qui furatur rem sacræ , duplicem committit malitiam specie distinctam , injustitiæ scilicet , & sacrilegii. Prout etiam multi Doctores contra alios non improbabiler pariformiter discurrent , si quis equidem rem profanam , aut in loco sacro existentem auferat. *can. Quisquis inventus* 17. q. 4. Item tali modo colligitur , quod non jejunare in Vigilia SS. Apost. Petri & Pauli , & in ipso dicto Festo operibus servilibus vacare sint duo specie distincta peccata ; quia jejunium in Vigilia & intermissio operum servilium in Festo ex diversis formaliter motivis præcipiuntur : jejunium quidem ex motivo temperantiæ , intermissio autem operum servilium in ipso Festo ex motivo Religionis , ut magis colantur memorati principes Apostoli. Et idem fit in aliis similibus , quæ prohibentur diversis præceptis ex motivo diversarum virtutum , vel rectitudinum.

45 Dicitur notanter in Conclusionem , colligi potest ab extrinseco. Nam supposita etiam ejusmodi lege formaliter diversa , adhuc peccata illa specificantur intrinsece penes diversas illas virtutes , aut rectitudines , ex quarum motivo quidpiam est præceptum , vel prohibitum , & quarum peccata illa sunt privationes : ex diversitate præceptorum vero dicta distinctio solum colligitur ab extrinseco.

46 Ex dictis deducitur I. cum Vasquez 1. 2. disp. 98. c. 3. & aliis passim , non esse plura specie vel numero distincta peccata , in Confessione necessario explicanda cum quis non jejunat in aliqua Vigilia incidente in Quadragesimam , aut Quatuor anni Tempora. Item si quis

non audiat Missam die Dominico , in quem simul incidit Festum alicujus Sancti. Ratio est : quia jejunium , quamvis in dicto casu bis vel ter præcipiatur ab Ecclesia , adhuc tamen semper præcipitur ex eodem motivo virtutis Temperantiæ : unde quamvis detur duplex causa , seu duplex titulus malitiæ , nempe duplex præceptum Ecclesiæ , adhuc erit unica malitia , unumque peccatum. Idem dicendum de altero exemplo , ubi auditio Missæ præcipitur in utroque casu ex motivo virtutis Religionis.

47 Deducitur II. Cum eodem Vasquez , & aliis , secus esse dicendum de eo , qui Feria sexta tenetur jejunare ex voto : is enim , si Feria sexta , in quam simul incidit jejunium Ecclesiasticum Vigiliæ , aut Quatuor Temporum , violet jejunium , peccabit duplici peccato , scilicet & contra virtutem Temperantiæ impositæ ratione præcepti Ecclesiastici , & contra virtutem Religionis ratione voti.

48 Deducitur III. Quod violatio Castitatis in Religioso professio , vel Clerico in sacris Ordinibus constituto , duplicem habeat malitiam specie distinctam , ac necessario in Confessione explicandam ; nimirum luxuriæ contra Temperantiam , seu Castitatem , & Sacrilegii , contra Religionem : quia motiva harum virtutum sunt specie distincta. Econtra Religiosus professus , simulque in Sacris constitutus , non peccat nova specie malitiæ propter duplex votum violatum , nempe votum Castitatis Religiosæ , & votum Castitatis sacro Ordini annexum : quia hæc vota non sunt distinctæ speciei : sola autem præceptorum diversitas non facit malitias specie distinctas , nisi etiam sint contra diversas specie virtutes , vel rectitudines. Unde sufficit , quod talis in Confessione dicat , se commisisse fornicationem contra votum Castitatis : uti post Sanchez lib. 7. de Matr. disp. 27. n. 27. Bonacinum , & communiorum aliorum , contra Ledesnam , notat Mastrius disp. 14. Theol. mor. n. 32.

49 Secus foret , si votum , & juramentum , super eodem re factum violetur ; quia tunc erit diversa specie malitia , necessario in Confessione explicanda. Sanchez ibidem n. 26. Etsi enim tam votum , quam juramentum pertineant ad virtutem Religionis , adhuc tamen spectant ad ipsam sub diversa ratione , atque rectitudine : votum quidem , ob fidem datam Deo servandam ; juramentum vero , ne Deus in testem falso adducatur. Quod si vero violetur votum , sæpius , aut etiam millies renovatum , committitur unicum nihilominus peccatum : quia omnia ea vota eodem modo ad unam Religionis virtutem pertinent ; simulque repetitio illa voti habet se , sicut repetitum ejusdem rei ab eodem Superiore præceptum. Et conformiter dictis resolvi poterunt innumeri casus , ex quibus etiam multi adhuc circa diversas materias in propriis locis adducentur.

## QUESTIO V.

Unde desumatur distinctio numerica moralis Peccatorum ?

## SUMMARIUM.

- 50 Ratio ordinis Questionum.  
*Actus peccaminosi physice distincti , non semper distinguuntur moraliter.*
- 51 Tot sunt peccata numero distincta , quot sunt actus peccaminosi moraliter interrupti.
- 52 Quando nam censeantur actus voluntatis moraliter interrupti ? Id fit I. per voluntatem contrariam.
- 53 II. Per cessationem voluntariam ab actu.  
\* Nisi adsit propositum brevi post iterum continuandi.
- 54 III. Juxta quosdam etiam per cessationem involuntariam & naturalem. Sed hæc sententia videtur limitanda.
- 55 Peccata interna , quæ solo animo perficiuntur , multiplicantur numero , quoties actus ipsi renovantur.
- 56 Peccata , quæ opere exteriori perficiuntur , quando multiplicentur numero ?



57 Unico actu occidens decem homines committit unum numero peccatum.

58 Secus, si id fiat pluribus actibus externis distinctis. Ampliatio dictorum ad alios casus.

59 Quid dicendum de actibus pravis incompletis, v. g. proxime præcedentibus, vel sequentibus fornicationem?

60 Vel occisionem inimici?

61 Quid de sapius percutiente, blasphemante, contumelias iterante, in eodem commotionis impetu?

\* Quomodo resolutio ultimi dubii concordetur cum dictis prioribus? Add. I.

\* Quid sentiendum de sapius infra noctem fornicante, vel se polluyente ex eodem actu libidinis? Addit. II.

\* Quid de intermittente per aliquot tempus restitutionem, quam facere facile potuisset, modo voluisset? Addit. III. & IV.

\* Ponuntur adhuc duo utilia Corollaria. Addit. V.

50 **C**um juxta Sacrum Concilium Trid. Sess. 14. c. 5. & can. 7. & omnes Catholicos, in Sacramento Pœnitentiæ confiteri teneamur omnia, & singula peccata mortalia, tam quoad speciem, & circumstantias peccati speciem mutantes, quam quoad numerum, quorum memoria cum debita & diligenti præmeditatione habetur: post explicatum modum dignoscendi Distinctionem specificam moralem, merito subjungitur præfens Quæstio de distinctione numerica morali peccatorum. Et additur, de Distinctione numerica morali. Si quidem physice loquendo concedunt omnes, quod multiplicentur peccata numero juxta numericam multiplicationem actuum physicorum peccaminosorum, quod tamen moraliter loquendo non semper fit: quia multi quandoque actus peccaminosi physice distincti, constituunt unum dumtaxat numero peccatum moraliter loquendo; ut patet in eo, qui cogitat occidere suum inimicum, ac ea intentione quærit equum, præparat arma, accingit se itineri, ponit hosti insidias, & tandem ipsum actu occidit, hic enim multos quidem habet actus illicitos physice distinctos, moraliter tamen non nisi unum numero peccatum committit, ut patebit ex dicendis. Hoc prænotato, sit

51 CONCL. I. Loquendo de multiplicatione seu distinctione numerica peccatorum, tot sunt peccata numero distincta, quot sunt actus voluntatis pravi moraliter interrupti, ac repetiti. Ita Doctores communiter. Ratio est: quia nullum est peccatum, nisi in quantum ab ipsa voluntate deliberate procedit: ergo tot sunt peccata numero distincta, quot sunt actus voluntatis pravi moraliter interrupti, ac repetiti. Sed mox

52 Quæritur, quandonam censeantur actus voluntatis moraliter interrupti? Resp. cum Maltrio disp. 15. Theol. moral. n. 66. & communi Doctorem. Toties censeantur actus voluntatis moraliter interrupti, quoties nec formaliter, nec virtualiter perseverant; id est, quoties nullus effectus assignari potest, in quo virtualiter prior ejusmodi actus permanere censeatur. Id autem pluribus modis accidere solet. Et primo quidem actus peccaminosus moraliter interruptitur (ita ut nec formaliter, nec virtualiter permanere censeatur) per voluntatem contrariam; prout fatentur omnes. Sic enim actus prior omnino revocatur, & per consequens etiam formaliter interruptitur: prout fit, si quis de priore actu peccaminoso agit pœnitentiam, aut dolet ipsum se perpetrasse.

53 Secundo interruptitur moraliter actus pravius per cessationem ab actu illo voluntariam, & liberam: ut si quis semel suum in procurando peccato quamvis irritum conatum peregit, & post modum tædio, vel lassitudine victus ab illo conatu pravo desistit sine proposito ulterius progrediendi, jam prior ille actus censeatur moraliter interruptus; prout D. Petrus intra breve tempus hac de causa ter Christum negasse dignoscitur. Ratio est: quia talis censeatur actum illum interpretative revocare, hoc ipso, quod ab illo actu pravo cesset voluntarie sine proposito ulterius pergerendi.

Additio

\* Dicitur notanter: sine proposito ulterius pergerendi: nam si tale propositum pergerendi adesset, & Actus illi alias inter se forent moraliter unibiles ad unum completum constituendum, cessatio ab actu non faceret interruptionem moralem, & sic nec numero multiplicaretur peccatum. E. g. Si quis cum femina turpia, & ad copulam dispositiva exercere inchoasset; interea tamen ob intervenientem aliam personam ad aliquod tempus cessaret, in animo tamen adhuc suo non revocans peccaminosum illud propositum, in eo casu, si post discessum alterius denuo turpissimos priores actus prosequeretur, non censeretur inter hos & præcedentes intercedere interruptio moralis, sed unum numero peccatum vi mali illius propositi moraliter continuatum committeretur, non obstante cessatione illa voluntaria, prout bene notandum. \*

54 Tertio, non pauci Doctores, inter quos est Vasquez 1.2. disp. 75. c. 3. tenent, etiam per cessationem involuntariam & naturalem, si ea fiat per somnum, si per distractionem ad alia, actum peccaminosum moraliter interrumpi. Sed hæc sententia patitur plures instantias, ac proinde nonnulli id relinquendum censent judicio prudentum, quia non in omnibus peccatis requiritur, ac sufficit eadem unio, vel continuatio ad unitatem numericam moralem ipsorum: aut saltem dicta sententia procedit solum in peccatis internis, quæ sola mente consummantur, ut est peccatum odii, hæresis, & hujusmodi; non autem in peccatis, quæ opere externo perficiuntur, prout amplius patebit ex sequentibus: unde sit

55 CONCL. II. Peccata interna, quæ solo animo perficiuntur, ut hæresis, Odium Dei vel proximi, Delectatio venerea morosa, & hujusmodi, toties multiplicantur numero, quoties actus ipse internus peccati renovatur. Ita communis; & ratio est: quia quilibet talis actus internus in se est perfectus, & consummatus, simulque posterior actus nullam habet dependentiam vel connexionem cum priori. Ex qua doctrina Layman lib. 1. tract. 3. c. 3. n. 3. infert, fieri posse, quod idem homo mille peccata Odii, vel internæ Infidelitatis uno die committat. Quamvis plerumque impossibile sit, internorum horum actuum, seu peccatorum numerum inire; ideoque satis sit in Confessione moram temporis explicare, v. g. dicendo: *Integro anno persuti in inimicitia, & saepe, cum inimici memoria occurrit, actus odii exercui, ferme in singulos dies, vel singulas hebdomadas*: hinc enim prudens Confessarius jam poterit formare judicium de statu pœnitentis.

56 CONCL. III. Peccata, quæ opere externo perficiuntur, toties numero multiplicantur, quoties actus ipsi exteriores peccatum illud consummantes repetuntur. Ita Doctores communiter. Sic, qui plures homines successively occidit, plura committit homicidia numero distincta. Similiter si quis sæpius fornicetur quamvis eadem nocte, plura committit peccata fornicationis numero distincta, atque in Confessionali explicanda. Ratio est: quia interveniunt duo actus mali, quorum unus ad alterum non ordinatur, nullamque cum ipso habet connexionem: eo quod quilibet eorum in se sit completus, & consummatus actus.

57 Dicitur notanter I. *Plures homines successive occidit*. Nam, si quis unico actu decem, vel plures homines occidat, vel occidere velit v. g. explosione tormenti bellici, vel stratagemate, unum numero peccatum committit, gravius tamen; uti tenent Suarez part. 3. tom. 4. disp. 22. sect. 5. n. 33. Marchantius tom. 1. Tribunalis tract. 3. tit. 4. quæst. 2. concl. 2. Navarrus, Layman, & alii, contra Azorium part. 1. lib. 2. instit. moral. c. 4. q. 2. Ratio est: quia hujusmodi distinctio numerica obsectorum, ut puta plurium hominum, est tantum materialis, cum actus, aut intentio occidendi, respiciat illa omnia per modum unius objecti formalis, totalis & adæquati: certe si homini mediocriter diviti 10. aureos auferrem, foret unum numero peccatum, dum fieret per unum actum. Quamvis enim ceteroquin singula illa objecta posset actui dare completam malitiam, attamen prout conjunguntur, atque ab actu per modum unius respiciuntur, conse-



conferunt actui simul unam completam malitiam, majorem tamen; quam etiam quidam Doctores volunt esse in Confessione exprimendam.

58 Quod si vero contingat, non uno eodemque actu, sed pluribus actibus externis ab invicem distinctis, decem homines successive occidi, tunc erunt decem peccata Homicidii numero distincta, propter rationem positam in Conclusionem. Et quod hic dicitur de Homicidio, pariter intelligendum de aliis peccatis opere externo consummatis, ut puta de Furtis, Blasphemiis, Detractionibus, & hujusmodi: nam auferens eodem actu res pluribus proprias, aut simul detrahens pluribus, vel blasphemans omnes Sanctos, committit unum numero peccatum: secus, si id fiat pluribus actibus externis ab invicem distinctis.

59 Dicitur II. *Actus exteriores peccatum consummantes, seu completi.* Nam aliter est dicendum de quibusdam actibus incompletis, qui solent esse vel via ad actum pravam consummandum, vel ipsum comitari, aut ejusdem esse complementum: uti respectu peccati Fornicationis solet esse delectatio inordinata circa tale peccatum, aspectus, verba obscena, tactus impudici, & hujusmodi, quæ vel ipsum opus pravam proxime præcedunt, vel comitantur, aut veluti consuetæ appendices mox sequuntur, ac explicato in Confessione ipso pravo opere satis intelliguntur, & unum quodammodo cum ipso opere censentur.

60 Sic pariter, si quis volens occidere inimicum suum, etiam aliquot dierum itinere distantem (prout exemplificat Tannerus tom. 2. disp. 4. qu. 2. n. 61. citans Navarrum, Valentiam, & alios) accipit arma, insidet equo, vocat socios jam paratos ad occidendum, facit iter longum, ac interim animum occidendi sæpius repetit, & somnum vel alia negotia interponit, tandem vero ponit insidias, & actu occidit; censetur moraliter loquendo unum peccatum homicidii consummati perpetrare, eo tamen gravius, ceteris paribus, quo diutius in tam pravo proposito perseveravit. Ratio est: quia prior prava voluntas in actione itineris, & aliis externis actibus ad finem illum ordinatis moraliter continuatur, & virtualiter perseverat; & quamvis actus physice multiplicentur, non tamen moraliter. Sicuti ergo, quæ plura sunt in genere entis, una domus sunt; ita actus illi in genere entis distincti, sunt unum quid in genere moris scilicet unum peccatum opere externo consummatum, cum ad hoc illi omnes ordinentur, tanquam actus incompleti ad completum.

61 His addes cum Doctoribus communiter, quod is, qui eodem commotionis impetu, eademque pugna vel contentione, alterum sæpius percussit, vel contumelia repetita affecit, aut iterato blasphemavit, semel tantum peccasse censetur, saltem in ordine ad Confessionem Sacramentalem: censetur enim moraliter loquendo esse unicus actus, propter ordinem unitatis moralis, quem actus illi repetiti ex eodem commotionis impetu procedentes inter se habent. Secus dicendum, si per intervalla ad verberandum quis proximum aggreditur, convitiatur, aut Deum blasphemat.

#### Additio I.

\* Quod si dubites, quomodo hæc ultima doctrina concordet cum dictis in Conclusionem tertia, in qua docetur, quod peccata externa completa toties multiplicentur, quoties actus completi (quales reputantur quælibet verbera, quælibet Blasphemia, quælibet contumelia &c.) repetuntur? Resp. præcedentem tertiam Conclusionem esse intelligendam, quando illi actus repetiti de se ita perfecte sunt completi, ut nequeant amplius inter se per unionem moralem constituere unum continuum; secus vero dicendum, quando equidem in se tales actus sunt quid completum, potentes tamen adhuc cum aliis facere unum continuum morale. Sic e.g. quamvis comestio notabilis unius cibi de carne diebus jejunalibus sit sufficiens ad constituendum unum completum peccatum mortale; si tamen aliquis successive plures similes in uno prandio comederet, foret unum convi-

vium continuum, & consequenter unum numero peccatum, quamvis gravius: certe etiam in physicis, quamvis aqua A. sit ens completum, potest tamen commixta cum aqua B. per unionem physicam constituere unum continuum physicum: cur ergo non pariter in moralibus? \*

#### Additio II.

\* Nec dicas: Ergo etiam erit unum continuum morale, & consequenter unum numero peccatum, si quis ex eodem æstu libidinoso adhuc perdurante committat tres pollutiones, vel eadem nocte cum una tres fornicationes, sicuti si ex eodem commotionis impetu committeret tres Blasphemias, vel tres contumelias ejusdem speciei.

Respondeo enim negando illatum. Disparitas est; quia ex communi prudentum æstimatione illæ completæ pollutiones & fornicationes ita sunt in se ipsis actus perfecte completi, ut unus cum altero nequeat constituere unum morale, ac continuum; quoniam una pollutio, vel fornicatio non accipit ab altera augmentum intra eandem lineam: non enim talis juxta communem sensum prudentum censetur semel pollutionem, vel semel aliquam graviorem fornicationem commisisse, sed tres. Econtra qui tribus verberibus, vel alapis repetitis, aut tribus continuis ejusdem speciei contumeliis alterum inhonorat, bene dicitur ex communi prudentum sensu semel verberasse Petrum v. g. sed gravius, vel semel inhonorasse, sed graviori contumelia, quam si tantummodo una alapa, vel una contumelia non repetita eundem affecisset. Vide de hoc fusius La Croix lib. V. num. 150. & seqq. \*

#### Additio III.

\* Quæres adhuc finaliter, quot numero distincta peccata committat ille, qui per aliquod tempus intermittit eam, quam posset, & tenetur facere restitutionem ablatorum in bonis famæ, seu fortunæ, aut executionem alterius rei, ad cujus impletionem obligatur ex præcepto, vel voto &c. Resp. talem tamdiu unum tantummodo numero peccatum, gravius tamen committere, quamdiu moraliter manet idem numero propositum non restituendi rem alienam, vel non adimplendi rem promissam &c. Censetur autem id ipsum malum propositum non restituendi &c. moraliter permanere tamdiu, quamdiu quis mente, & habitualiter ita est dispositus, ut quoties de facienda restitutione cogitat, semper vel positive consentiat non restituere, vel negative se habens omittat velle restituere, aut Votum servare, etiam si sibi occurrat sua obligatio. Ita Sporer tract. 4. Prelim. ad Præcept. secunda Tabula. cap. 3. sect. 3. num. 121. La Croix lib. 5. num. 181. & Sabinus Bononiensis in sua Luce Moral. part. 1. tract. 35. n. 15. cum aliis. Ratio est: quia voluntas illa mala taliter adhuc permanens conjungit moraliter similia ad invicem peccata per intermissionem restitutionis, vel executionis votorum &c. commissa. Confirmatur: si aliquid hanc moralem unionem interrumpere, sicque peccata numero multiplicaret, foret vel somnus, vel distractio, vel conversio ad alia negotia disparata: sed nihil horum dictam moralem unionem interruptit: ergo. Major est Adversariorum: minor probatur a pari in alio exemplo: ponamus, quod quis habeat efficacem voluntatem trucidandi suum inimicum, præparet arma, & quærat occasiones ubique locorum eundem aggrediendi, tandem inveniat ipsum, & repetitis vulneribus occidat: in hoc casu committitur unum numero homicidium, quamvis gravissimum; nec continuatio, seu unio inter voluntatem efficacem occidendi, & inter ipsam occisionem interruptitur per somnum, distractiones, aut quia subinde talis Homicida ad alia disparata negotia intra hoc tempus se convertit, modo id ipsum tempus intermedium inter priores, & posteriores actus non sit nimis longum: ergo pariformiter erit etiam hic discurrendum. \*

Additio



Additio IV.

\* Quod si dicta mala voluntas non restituendi, aut votum non exequendi &c. revocaretur, vel expresse, puta per contritionem, confessionem &c. vel saltem interpretative, e. g. assumendo media restitutionis, voti executionis &c. & postea iterum de novo intermitteretur ipsa restitutio, aut voti executio, sive de novo eliceretur malum propositum non restituendi, votum non exequendi, haud dubie ex communi Doctorum fieret interruptio inter actus priores & posteriores, sicque peccata multiplicarentur. Ceterum pro praxi Confessarium notat ex DD. Sabinus Bononiensis *loc. cit. n. 17.* non debere eisdem quoad similes casus nimis esse anxios ac molestos pœnitentibus in inquirendo numero interruptionum, sed sufficere, si inquirent, quanto tempore res aliena voluntarie & culpabiliter detenta sit, vel quamdiu culpabiliter votum non fuerit executioni mandatum &c. \*

Additio V.

\* Pro majori dictorum claritate ponuntur tamquam Corollaria duo casus. *Primus.* Petrus famulus ante trimestre abstulit Hero suo septem florenos, quos adhuc culpabiliter retinet; modo confitetur, quod commiserit furtum. In hoc casu, si Pœnitens sponte non expresse-rit, quærat Confessarius *primo*, num furtum sit in materia gravi? *Secundo*, quanto tempore retineat hanc rem alienam culpabiliter? *Tertio*, an intra hoc tempus numquam voluerit restituere? Si numquam: continuabitur peccatum; alias autem multiplicabitur juxta numerum multiplicatæ volitionis restituendi.

*Secundus casus.* Paulus ægrotus vovit peregrinationem ad Divam Virginem OEttinganam post recuperatam sanitatem illico instituendam. Sanitati autem plene restitutus differt peregrinationem non solum per breve temporis spatium, quod non foret peccatum grave, sed etiam uno, alterove anno, & quidem absque ulla rationabili causa, ac quamvis facillime, ac commode eandem conformiter suo voto facere potuisset. Modo id ipsum Clavibus Ecclesiæ in Sacramento Pœnitentiæ sub-jicit. In isto secundo casu pariformiter Confessarius indaget *primo*, a quanto tempore potuisset commode hoc votum exequi, quod neglexit? *Secundo*, an intra hoc tempus sibi proposuerit, illud executioni mandare, & quoties? Atque ex responso pœnitentis denuo defumet, num is unum vel plura numero distincta perpetraverit peccata. NB. Posui notanter hic casum, quo quis pro determinato tempore seu illico votum executioni mandandum adpromisit: nam si nullum tempus executioni præfixisset, an etiam tunc differens mortaliter peccaret, colligetur ex materia de votis. \*

DISTINCTIO II.

De Peccato mortali, & veniali.

QUESTIO I.

De natura, conditionibus, & signis Peccati mortalis, & venialis.

SUMMARIUM.

- 1 Peccatum mortale, quid?
- 2 Peccatum veniale, quid?
- 3 Peccatum mortale, & veniale, in nonnullis conveniunt.
- 4 In pluribus tamen differunt.
- 5 Ad quodcunque peccatum actuale tres requiruntur conditiones.
  1. Ut sit voluntarium.
  2. Ut sit liberum.
  3. Ut advertatur malitia peccati.
- 6 Ad peccatum mortale requiruntur alia tria, quæ?
- 7 Ad peccatum veniale sufficit advertentia semiplena intellectus.

10 Quanam censeatur perfecta advertentia & sufficiens ad peccatum mortale?

11 Et quanam imperfecta, seu semiplena?

12 Signa, quibus in dubio discerni possit consensus perfectus ab imperfecto.

Regula I. Regula II. Regula III. Regula IV.

\* Quale sit Peccatum, si malum advertatur tantum in genere?

1 CONCL. I. Per Peccatum mortale illud intelligitur, quod ita Deum offendit, ut in animam inducat privationem gratiæ sanctificantis, & amicitiae Divinæ (quæ privatio est mors animæ) & si quis in ea finaliter decedit, puniatur etiam pœna æterna, quæ est mors secunda. Et de hoc dicitur *Sapient. 16. Homo occidit per malitiam animam suam.* Et *Rom. 6. Stipendia peccati, mors.* Quæ de causa recte peccatum istud appellatur mortale.

2 Peccatum veniale econtra illud dicitur, quod licet Deum offendant, non tamen ita graviter, ut amicitiam cum DEO destruat, & inducat æternæ pœnæ reatum. Et dicitur veniale a venia, eo quod facilius veniam consequatur, & aliquo modo venia dignum sit. De hoc intelligitur illud *Proverb. 24. Septies enim cadet justus.* Et *Jacob. cap. 3. In multis offendimus omnes.* & hujusmodi.

3 CONCL. II. Peccatum mortale, ac veniale, in nonnullis conveniunt, in pluribus tamen differunt. Et quidem conveniunt in primis ex eo: quia non solum peccatum mortale, sed etiam veniale, est actus moraliter malus, DEO displicens, ipsumque offendens, ac proinde dignus supplicio sibi correspondente. Insuper conveniunt: quia non solum peccatum mortale, sed etiam veniale nequit eligi ad promovendam honestatem alterius finis; cum juxta illud Apostoli *Rom. 3. non sint facienda mala, ut eveniant bona.* Tertio conveniunt: quia utrumque peccatum est actus humanus moraliter malus, ac proinde requirens voluntarium, atque libertatem sufficientem. Insuper utrumque peccatum a sola creatura rationali, non autem a DEO, vel brutis elici potest. Sunt & non nulla alia, in quibus peccatum veniale ac mortale conveniunt, quæ hic omittuntur.

4 Econtra vero differunt hæc duo: nam peccatum veniale longe facilius potest consequi remissionem, quam mortale; unde jure merito illud vocatur veniale a venia. Deinde, peccatum veniale non tollit vitam animæ, sive gratiam sanctificantem; neque excludit hominem ab amicitia Dei, neque privat ipsum in perpetuum visione Dei, ac æterna beatitudine: bene tamen peccatum mortale. Tertio, peccatum mortale virtualiter ac moraliter magis amat creaturam, quam Deum, nam peccans mortaliter constituit sibi ultimum finem in creatura, saltem virtualiter ac interpretative, quatenus per peccatum mortale convertitur ad creaturam, bene cognoscens, quod per illam conversionem amittat conjunctionem cum Deo, & ab eo tamquam ultimo Fine suo separetur: secus fit in peccato veniali. Alia discrimina inter utrumque peccatum patebunt ex sequentibus Conclusionibus.

5 CONCL. III. Ad contrahendum quodcunque peccatum actuale, sive mortale, sive veniale, tres requiruntur conditiones. Prima est, ut sit voluntarium, id est, ut fiat a voluntate consentiente. Et defectu hujus conditionis nullus actus est peccatum, qui non est voluntarius; sive is sit internus vel occultus, ut cogitationes contra Fidem, cogitationes blasphemæ, motus carnis, etiamsi fiant usque ad effusionem seminis, dummodo non sint voluntarii; sive externus ac violentus, ut si cupiam reluctanti manus elevetur a Tyranno ad idolum incendendum, vel si stuprum virgini per vim inferatur. Hæc enim, & alia hujusmodi, si sint homini prorsus involuntaria, ejusque voluntas in talia nullatenus consentiat, peccata non sunt, imo potius occasio victoriæ, & augmenti meriti supernaturalis. Unde D. Augustinus *lib. De vera Religione. cap. 14. ait: Usque adeo peccatum voluntarium est malum, ut nulla modo sit peccatum, si non sit voluntarium.*



6 Altera conditio, ad contrahendum quodlibet peccatum requisita, est, ut sit liberum; id est, ut sit in potestate voluntatis illud facere, vel non facere. Et defectu hujus conditionis excusantur a peccato motus primo primi iræ, concupiscentiæ, & sensualitatis, qui præveniunt advertentiam & libertatem nostram; item alii motus vehementissimi, quibus usus rationis perturbatur, aut qui nobis dormientibus accidunt, vel contingunt omnino contra renitentiam nostræ voluntatis.

7 Tertia conditio est, ut advertatur malitia peccati. Et defectu hujus conditionis excusatur a peccato, qui aliquo die non jejunit, nihil cogitans de jejunio in tali die; item qui lapidem projicit fortuito, non videns periculum aliquod lædendi transeuntes; item qui celebrat contractum usurarium, non advertens ipsum esse talem. Ceterum hæc tria perfectius debent concurrere ad peccatum mortale, quam veniale; ut mox amplius dicetur.

8 CONCL. IV. Tria insuper ad peccatum mortale requiruntur, quorum, si unum desit, jam non amplius sit peccatum mortale, sed ad summum veniale. Primo enim, ex parte intellectus requiritur plena advertentia, & deliberatio. Secundo, ex parte voluntatis requiritur perfectus consensus. Et tertio, ad peccatum mortale requiritur gravitas materiæ. Ita Doctores omnes; idque importat ipsa gravitas peccati mortalis, utpote digni æterna damnatione.

9 CONCL. V. Quamvis advertentia ad peccatum mortale requisita debeat esse plena, & perfecta, per firmum judicium intellectus de malitia actus, vel saltem de periculo ipsius, ut dictum est; nihilominus ad peccatum veniale sufficit advertentia semiplena, seu imperfecta-notitia, per imperfectum & semiplenum judicium de malitia actus, vel periculo ipsius. Ita rursus communis. Ratio discriminis inter peccatum mortale, & veniale est, quod hoc sit levis dumtaxat offensa Dei, nec separans hominem ab amicitia ipsius, sicuti peccatum mortale; ergo etiam sufficit minor advertentia, ac deliberatio, ad contrahendum peccatum veniale, quam mortale. Sed occasione hujus

10 Queritur I. Quenam censeatur esse perfecta advertentia, & sufficiens ad peccatum mortale? Resp. I. Nullum est peccatum mortale in consensu voluntatis, nisi cogitatio aliqua præcesserit (& quidem cogitatio expressa, quam vocant actualem) malitiæ moralis, vel periculi, vel saltem expressa aliqua dubitatio. Ratio est: quia si nihil horum præcesserit, censeatur adfuisse naturalis inconsiderantia & oblitio malitiæ actus. Et hinc communiter Doctores eum excusant a peccato, qui in die jejunii comedit carnes, nihil cogitans de præcepto seu die jejunii: & idem de aliis similibus dicendum.

11 Resp. II. Cum Sanchez *disp. 1. in Decalogum c. 1. n. 10.* & aliis, quod tunc plena deliberatio adsit, quando ratio perfecte animadvertit objectum malum quoad circumstantias, quibus moveri potest ad illud excutendum: semiplena autem & imperfecta, cum quis ita animadvertit, aut animadvertere potest quadam præfenti cogitatione, ut possit quidem excutere malum illud, sed non tam facile, eo quod nondum plene cernat, in quoniam, vel quali motu hæreat; prout solet accidere semidormientibus, seu illis, qui nondum plene a somno excitati, pollutionis sibi contingentis malitiam advertunt.

12 Queritur II. Quando, quibusve ex signis in dubio discernere possimus, an quis habuerit consensum perfectum, & sufficientem ad peccatum mortale, vel imperfectum dumtaxat, qui non sufficit ad mortale? Resp. cum Mastrio *disp. 13. Theol. Mor. num. 13.* Bonacina, Reginaldo, & aliis, id ex sequentibus regulis dignosci posse. I. Si homo advertens ad peccatum ita se cognoscit esse animo dispositum, ut, quamvis illud facile committere posset, non committeret; tunc ut plurimum signum est, atque judicandum, non adfuisse consensum deliberatum, & sufficientem ad mortale. II. Si dubitans sit vir adeo bonæ & timoræ conscientiæ, ut peccatis dissentire soleat, in dubio ut plurimum judicandum est, eum non habuisse plenam advertentiam, &

perfectum consensum; licet aliquam in repellendis tentationibus negligentiam admiserit. Secus est dicendum de eo, qui frequenter tentationibus succumbere consuevit, hic enim in dubio putandus est consentisse perfecte. Ratio discriminis est: quia, cum prior summo odio peccatum morale prosequatur, si in illud plene, deliberate, ac perfecte consensisset, facile discerneret, econtra vero, cum posterior illud parvi faciat, si minime consensisset, nullum in ipso suboriretur dubium. III. Quando quis dubitat, an aliquid fecerit in somno, an in vigilia, seu dum esset sui compos, vel potius dum ebrietate aut phrenesi correptus fuit, non leve signum est, fecisse seu voluisse sine plena advertentia & consensu: nam quæ cum plena advertentia & consensu fiunt, facillime cognoscuntur facta fuisse ratione plene advertente; cum rationis usus liberam permittat homini de suis actionibus cognitionem, nisi forte mora temporis aliquam induxerit oblivionem. Aliam, & ordine IV. regulam addit Sanchez *lib. 1. Decalog. cap. 1. n. 18.* dicens: quando motus pravus tempore fere imperceptibili insurgit, & paulo post, quam primum in mentem venit, eum adversari rationi, voluntas ipsum expellere curat, est signum, aut nullius, aut imperfecti consensus præstiti.

#### Additio.

\* Quæres III. An censeatur haberi advertentia sufficiens ad mortale, si incidat tantum in genere objectum vel actionem esse malam, absque eo, quod occurrat in specie, num sit peccatum mortale, vel veniale? Resp. I. Si incidat objectum vel actionem esse malam in genere, & simul occurrat periculum, quod possit esse mortale peccatum, in hoc casu habetur sufficiens advertentia ad peccatum grave, cum probe cognoscatur adesse periculum gravis peccati, quæ cognitio sufficit ad contrahendum peccatum grave, uti patet de eo, qui operator cum dubio practico. Ita in hoc sensu communis.

Resp. II. Si nihil occurrat de periculo peccati mortalis, & de obligatione ante operationem melius indagandi ex apprehensione periculi exurgente, tunc non habetur sufficiens advertentia ad peccatum mortale, quamvis apprehendatur aliqua malitia in genere prorsus abstrahendo a mortali & veniali; adeoque talis operatio erit tantum venialiter mala. Ita Felix potestas in suo *Examine Tom. 1. part. 4. cap. 6. n. 3724.* & La Croix *Lib. 1. n. 3.* cum Navar. Arriag. Gobat, Valentia &c. contra Mastrium, Bonacinam, Tannerum, Azorium &c. Ratio est; quia gravitas in tali casu nullo modo est cognita neque in confuso; adeoque nec voluntaria. Nec dicas: etiam levitas peccati non est cognita expresse in eo casu, & tamen est sufficienter voluntaria; cum etiam in ista sententia contrahatur adhuc leve peccatum: ergo pariformiter potest discursu de gravitate. Resp. enim negando consequentiam: major enim requiritur advertentia ad peccatum mortale seu grave, quam ad veniale, ac leve; quia ad peccandum venialiter satis est, quod talis cognoscat se peccare, & non cognoscat se graviter peccare; sicuti ad peccatum veniale sufficit advertentia semiplena, non item ad mortale. \*

#### QUESTIO II.

Quibus de causis peccatum ex genere mortale, fiat per accidens veniale, & econtra.

#### SUMMARIUM.

- 13 Peccatum veniale triplex est, videlicet veniale ex genere suo.  
Ex parvitate materiæ, & ex imperfectione actus.  
(b) Juxta dicta n. 8.
- 14 Peccatum mortale duplex: aliud tale ex genere suo.  
Aliud ex accidenti.
- 15 Peccatum ex genere mortale tribus modis potest fieri veniale per accidens.



16 Peccatum veniale quomodo generatim fiat mortale per accidens?

17 Illud fit I. ratione conscientie erroneæ, vel dubiæ.

18 II. Ratione finis mortalis adjuncti.

Et quomodo hoc intelligendum?

19 III. Ratione contemptus;

Et quando fiat transgressio legis ex contemptu?

20 Corollaria.

21 IV. Ratione nimii affectus, volentis transgredi præceptum sub mortali obligans.

22 V. Ratione gravi scandali.

(c) Tract. 4. Dist. 7. quæst. 2.

23 Addunt aliqui periculum proximum incidendi in mortale.

24 Periculum proximum peccandi mortaliter quod?

(d) Tract. 14. Dist. 8. quæst. 3.

13 **CONCL. I.** Peccatum veniale triplex est, aliud enim est veniale ex suo genere & objecto, aliud ex parvitate materiæ, & aliud ex imperfectione actus. Ita communis. *Peccatum ex genere suo veniale* dicitur illud, quod versatur circa objectum, quod per se, & absolute spectatum, est materia offensæ levis: ut cogitatio vana, verbum otiosum, mendacium jocosum, risus immoderatus, & hujusmodi. Ratio est: quia talia ex objecto non habent gravem cum recta ratione, ac lege Dei repugnantiam. *Peccatum veniale ex parvitate materiæ* dicitur illud, quod licet ex genere suo esset mortale v. g. furtum, ob levitatem tamen materiæ est veniale: ut est furtum unius oboli, aut alterius rei levis. Tandem *peccatum veniale ex imperfectione actus* dicitur, quod sit veniale ex defectu perfectæ deliberationis, quamvis ex objecto foret mortale. Siquidem ad peccatum mortale requiritur plena deliberatio, ac perfectus consensus (b) unde, si talis non adsit, actus ex genere suo mortalis, per accidens redditur venialis: ut sunt subiti, ac non plene deliberati motus odii, invidiæ, luxuriæ, superbiæ, & hujusmodi.

14 **CONCL. II.** Peccatum mortale duplex est, aliud quidem mortale ex genere suo, aliud vero mortale ex accidente. Ita rursus communis Doctorum. Porro *Peccatum mortale ex genere suo* dicitur illud, quod per se graviter lædit charitatem Dei, vel proximi, aut nos ipsos: & talia peccata ex genere suo mortalia sunt omnia; quæ sunt contra Virtutes Theologicas, item ferme omnia, quæ sunt contra præcepta Decalogi, dummodo excipias mendacium jocosum, una cum similibus, nam illud ex genere suo non est mortale, quamvis sit contra octavum Præceptum Decalogi. *Peccatum mortale ex accidente* dicitur, cum actus aliquis ceteroquin venialis, aut etiam ex genere suo indifferens, sit per accidens mortalis: quod, quomodo contingat, patebit ex dicendis. Hinc ulterius sit

15 **CONCL. III.** Peccatum ex genere suo mortale, potest fieri veniale per accidens tribus de causis. I. Si ex parte intellectus non adsit perfecta advertentia malitiæ: prout fit, si quis ex imperfecta advertentia rationis gravem vindictam proximo appetat. II. Ex parte voluntatis, si nempe non adsit perfectus consensus voluntatis: cujus signa sunt, si quis valde timide, ac suspense, processisse se meminit, vel si semidormiens fuit non plene sui compos, judicetque se id non fuisse facturum, si plene vigilasset, & hujusmodi, de quibus dictum n. 12. Tandem III. Peccatum mortale potest per accidens fieri veniale ex parte materiæ, si hæc sit parvi momenti: prout furtum, quod ex genere suo est mortale, ratione parvitatatis materiæ potest fieri veniale. Ratio horum omnium patet ex dictis supra n. 8. estque certa, & communis inter Theologos. Modo ceteroquin bene advertas, quod dentur aliqua peccata, quæ ex parte materiæ non recipiunt parvitatem, uti odium Dei, Blasphemia, &c.

16 **CONCL. IV.** Peccatum ex genere suo veniale, potest per accidens fieri mortale variis etiam modis; qui tamen omnes hac universali regula comprehenduntur, quod tunc *Peccatum ex genere veniale fiat per accidens mortale*.

Anacl. Reiffenstuel. Theol. Tom. I.

tale, quando supervenit aliqua circumstantia transferens illud ad speciem peccati mortalis. Ita certa, & communis Doctorum; & mox explicabitur sequent. **Conclus. unale sit**

17 **CONCL. V.** Quinque præsertim de causis, seu modis, peccatum ex genere veniale, sit per accidens mortale. I. Ratione conscientie erroneæ, vel dubiæ, quando videlicet committitur practice dubitando, vel erronee credendo, se facere peccatum mortale. Ratio hujus patet ex dictis Tract. 1. Dist. 3. quæst. 2. & 3.

18 II. Peccatum ex genere veniale, sit per accidens mortale ratione finis mortalis adjuncti, id est, quando intentio est mortalis: ut, si quis faciat mendacium jocosum, ut feminam inducat ad fornicationem. Ratio est: quia, cum finis mortalis intendatur, jam committitur peccatum mortale ratione hujus pravi finis. Ceterum hoc non ita accipiendum est, quasi tunc duplex peccatum grave committatur, unum mendacii mortalis, & alterum fornicationis desideratæ, ac utrumque in Confessione sit necessatio explicandum; satis enim est, illud malum desiderium, utpote ex quo tota malitia mortalis in id veniale derivatur, fateri in Confessione, prout notat Sanchez lib. 1. in Decalog. cap. 5. n. 7. Nam seclusa malitia finis mortalis, mendacium illud manet veniale, quod non est necessario confitendum; licet optimum sit, illud quoque fateri. Et idem dicendum de similibus.

19 III. Peccatum veniale, per accidens sit mortale ratione contemptus; id est, si transgressio aliqua, vel inobedientia de se venialis, committitur ex formali contemptu Legis, vel Legislatoris: hoc enim est peccatum superbiæ consummatæ, ac formalis inobedientia; & licet materia legis obligantis sub veniali sit levis, contemptus tamen legis est gravis. Circa hoc notandum cum Doctore Angelico 2. 2. q. 186. art. 9. & aliis communiter, quod tunc aliquis transgrediatur præceptum ex contemptu, quando voluntas ejus renuit subjici ordinationi legis, vel Regulæ sui ordinis, & ex hoc procedit ad faciendum aliquid contra legem, seu regulam: id est, contemptus præcepti est causa illius peccati committendi, atque ideo quis præceptum violat, quia ipsi, aut Superiori præcipienti subjici non vult. Quare contemptus formaliter, & directe tendit contra legis, ac Legislatoris superioritatem: atque idcirco ex veniali reddit peccatum mortale.

20 Inferitur proinde I. Quod peccare ex contemptu importet duo, nempe actum peccandi, & causam ejus: requiritur enim, ut quis peccet ex contemptu præcepti, id est, ideo, quia præceptum est. Inferitur II. cum cit. D. Thoma, & aliis passim, quando quis propter aliquam causam particularem, v. g. ex concupiscentia, vel ira, inducitur ad aliquid faciendum contra legem, vel Regulam, quod is non peccet ex contemptu, sed ex aliqua alia causa, v. g. ex ira, concupiscentia, vel prava consuetudine. Imo sola prava consuetudo peccandi non illico arguit contemptum legis; quamvis frequentia peccati dispositive inducat ad contemptum, juxta illud Prov. 18. *Impius, cum in profundum venerit peccatorum, contemnit.*

21 IV. Peccatum veniale, per accidens sit mortale ratione nimii affectus; id est, quando in veniali constituitur ultimus finis. Ceterum ad hoc non satis est, quod committens veniale feratur nimis intenso affectu in objectum ejus; sed tunc illud evenit, quando quis eo affectu committit peccatum ex genere veniale, ut vellet illud committere etiam transgrediendo præceptum sub mortali obligans. Sic fit, si quis ita inordinate afficiatur ad fabulas, lusum, verba otiosa, & hujusmodi, ut malit die Festo omittere Sacrum, quam illis privari. Item, si quis committat veniale cum ea animi præparatione, ut, quamvis esset mortale peccatum, adhuc illud perpetraret. Hic tamen affectus non tantum habitualis, sed etiam actualis esse debet, ut peccatum mortale contrahatur: quia ad culpam non imputatur id, ad quod committendum habitus tantum est paratus.



22 V. Veniale transit in mortale ratione gravis scandalii, quod peccator secuturum prævidit, aut prævidere potuit, ac debuit: ut si ex tali peccato veniali præbeas alteri directam occasionem blasphemandi, quia in tali casu peccato veniali quidpiam superadditur graviter charitati proximi repugnans. Sed de hoc plura alibi (c) agendo de scandalo.

23 Addunt aliqui, quod veniale, vel etiam opus indifferens, transeat in mortale ratione periculi proximi in mortale incidendi: quando nimirum quis sine sufficienti cautela, aut necessitate aliquid facit, per quod in peccatum mortale labitur, vel in proximum periculum peccandi mortaliter.

24 Porro periculum proximum peccandi mortaliter illud esse censetur, quod ex suo genere frequenter homines similis conditionis in peccatum mortale inducit; vel si experimento constet, in hoc homine talem effectum habere, ut nunquam, vel ferme nunquam ea utatur sine novo peccato. Gobat *tr. 7. Theol. Experim. n. 525. & seqq.* ac alii. Et illud quidam Auctores moraliter determinant, hoc modo: Si quis, inquit, existens in ejusmodi occasione decem vicibus, septies, aut ultra in peccatum cadat, est occasio proxima; unde in Confessione explicanda est species peccati, cujus periculo se exposuit, quia eodem peccati genere peccavit, juxta illud *Ecclesiastici 3. Qui amat periculum, in illo peribit.* Verum de hoc alibi. (d)

### QUESTIO III.

Quibus modis remittantur peccata venialia? ubi & de Sacramentalibus.

#### SUMMARIUM.

- 25 Hic non agitur de remissione peccati mortalis.  
(e) Tract. 14. Dist. 2. q. 2. & 3. ac Dist. 6. q. 3.
- 26 Peccata venialia multis remediis extra Sacramentum Penitentiae expiari possunt.
- 27 I. Per contritionem.
- 28 II. In homine iusto etiam per attritionem de illis conceptam.
- 29 III. Per usum aliarum virtutum, qui aequè placeat Deo, &c.
- 30 IV. Per omnia Sacramenta novæ legis rite suscepta.
- 31 Sacramentalia vero non remittunt venialia per se ac immediate.
- 32 Sed remote solum, ac mediate.
- 33 Sacramentalia, quid, & quot sint?
- 34 Inter ea numeratur oratio quotidiana Fidelium.
- 35 Aspergio Aquæ benedictæ, &c.
- 36 Manducatio panis benedicti.
- 37 Confessio generalis.
- 38 Largitio elemosynæ.
- 39 Et benedictio Episcopi, vel Abbatii consecrati.

25 **U**T ex titulo Questionis patet, non loquimur hic de peccato mortali: nam quæ dispositio ad ejusdem remissionem requiratur, & quibus modis virtute contritionis perfectæ, ut dignæ receptionis Sacramentorum illud remittatur, dicetur suo loco. (e) Sed loquendo de peccatis venialibus, sit

26 CONCL. I. Certum est, quod peccata venialia non sint materia necessaria Sacramenti Penitentiae, ac proinde aliis etiam modis extra illud possint remitti. Ita omnes Catholici; & patet ex Concilio Trid. *Sess. 14. c. 5.* ubi dicitur: *Nam venialia, quibus a gratia Dei non excludimur, & in quæ frequentius labimur, quamquam recte & utiliter, citraque omnem præsumptionem in Confessione dicantur, quod piorum hominum usus demonstrat; taceri tamen citra culpam, multisque aliis remediis expiari possunt.* Hæc Concilium: ubi bene notandum ly multisque aliis remediis expiari possunt.

27 CONCL. II. Extra Sacramentum delentur peccata venialia imprimis per Contritionem; & quidem omnia, quorum displicentiam continet, seu de quibus in

genere saltem habetur Contritio. Ita communis Doctorum: siquidem Contritio perfecta sufficit ad tollenda peccata mortalia; ergo multo magis ad venialia, si de illis habeatur. Solum hic adde cum Suarezio *part. 3. tr. 4. disp. 11. sect. 3. n. 7.* & aliis, quod, licet quæcumque Contritio, etiam remissa, sufficiat ad tollendam omnem culpam eorum peccatorum venialium, de quibus habetur, non tamen semper sufficiat ad tollendam omnem poenam eis correspondentem: ad hoc enim requiritur major satisfactio poenalis, nisi suppleatur per intentiones actus Virtutum.

28 CONCL. III. Peccata venialia extra Sacramenta, delentur in homine iusto etiam per Attritionem de eisdem conceptam. Ita Suarez *loc. cit. n. 11.* Mastrius *disp. 21. Theol. moral. n. 82.* Tannerus, alique, contra Vasquez, & quosdam Recentiores, in homine iusto ad deletionem peccati venialis extra Sacramentum requirentes Contritionem formalem, vel saltem virtualem. Ratio autem nostræ Conclusionis est: quia peccata venialia non sunt tamen gravis offensæ Dei, sicuti mortalia; ergo etiam minor sufficit satisfactio pro eorundem remissione, quam pro remissione peccatorum mortalium.

29 CONCL. IV. Etiam per actus aliarum Virtutum, qui æque placent Deo, ac veniale displicuit, delentur peccata venialia hominis iusti, si actus illi virtuosus eliciantur in ordine ad deletionem peccati venialis, aut saltem a Deo ad talem finem acceptentur. Ita Doctor Subtilis 4. *dist. 21. quest. 1. §. In ista questione.* Mastrius *loc. cit. n. 83.* & alii. Ratio desumitur imprimis ex illa Salvatoris promissione *Lucæ c. 6. Dimittite, & dimittentur vobis.* Et similis promissio etiam de aliarum actibus Virtutum, ac præsertim Misericordiæ, passim habetur in Scriptura sacra. Accedit Concilium Trid. *loc. cit.* ubi ait, peccata venialia multis aliis remediis expiari posse.

30 CONCL. V. Peccata venialia remittuntur ex opere operato per omnia Sacramenta novæ legis cum debita dispositione suscepta, dummodo ad ea nullus formalis, vel virtualis vigeat affectus. Ita Mastrius ibidem *n. 58.* cum communi SS. Patrum, & Doctorum. Ratio est: quia omnia Sacramenta novæ Legis sunt instituta a Christo Domino ad sanctificandas animas nostras ex opere operato, seu ex virtute Dominicæ Passionis, atque conferendam digne suscipientibus remissionem peccatorum.

31 CONCL. VI. Sacramentalia vero, qualia sunt Aspergio Aquæ benedictæ, Manducatio panis benedicti &c. non habent vim remittendi venialia ex se atque immediate, sed remote solum & mediate, quatenus propter fidem, & preces, atque suffragia Ecclesiæ, quæ in benedictione Aquæ lustralis, & hujusmodi orat, ut res illæ benedictæ conferant ad salutem mentis & corporis devote recipientium, impetrant nobis a Deo auxilia gratiæ prævenientis atque excitantis nos ad eliciendos actus bonos Poenitentiae, vel aliarum virtutum, per se sufficientes ad remissionem peccatorum venialium; simulque, quia ejusmodi Sacramentalia propter Ecclesiæ preces juvant ad impetranda nobis alia Dei beneficia, v. g. dæmonis compressionem, præventionem a peccandi periculis, & corporis sanitatem. Ita Doctor Subtilis 4. *dist. 21. q. 1.* D. Thomas, & communior Theologorum contra Azorium *part. 1. Institut. moral. lib. 4. cap. 11. q. 4.* & quosdam alios. Ratio quoad primam partem est: quia hujusmodi Sacramentalia non habent talem virtutem remittendi venialia ex institutione Christi, utpote de qua nullibi constat, sicuti de virtute Sacramentorum: Ecclesia vero ex se hanc virtutem eisdem dare nequit.

32 Secunda vero pars, quod Sacramentalia saltem remote (modo in Conclusionem explicato) remittant venialia, probatur ex eo: quia Deus non sinit Ecclesiæ preces omnino esse irritas, & inanes. Quamvis interim negari non possit, hunc effectum remissionis peccatorum venialium non esse omnino infallibilem; & hoc præcipue propter exiguam fidem, ac devotionem recipientis, aut ejus indispositionem: alioquin certe aspergio Aquæ benedictæ dormienti facta, conferret ipsi effectum remissionis peccatorum venialium, quod nemo dicet. Sed occasione hujus



33 Quæres, quid sint Sacramentalia? Resp. Sacramentalia nihil aliud sunt, quam res sacræ, seu actiones aut remedia quædam ab Ecclesia instituta, quibus solet attribui effectus remissionis peccatorum venialium, modo proxime declarato. Communiter autem huiusmodi Sacramentalia enumerantur sex, ad quæ certa reducuntur, & continentur sequenti versiculo:

*Orans, tinctus, edens, confessus, dans, benedicens.*

34 Per ly *Orans*, denotatur quotidiana Oratio Fidelium, ac præsertim *Pater noster*; de quo dicitur *c. De quotidianis, de Penit. dist. 3. De quotidianis, brevioribus, levibusque peccatis, sine quibus hæc vita non ducitur, quotidiana oratio Fidelium satisfacit; eorum est enim dicere, Pater noster, qui es in cælis &c. Delet omnino hæc oratio minima & quotidiana peccata.* Huc reducitur Tinctio pectoris.

35 Per ly *Tinctus*, significatur aspersio Aquæ benedictæ: de qua *c. Aquam, de Consecr. dist. 3. sic legitur: Nam si cinis vitulae sanguine aspersus populum sanctificabat, & mundabat; multo magis aqua sale aspersa, divinisque precibus sacrata populum sanctificat, atque mundat.* Huc reducitur Unctio caeremonialis in Regem, & similes Unctiones; item impositio Cineris benedicti.

36 Per ly *Edens*, intelligunt aliqui dignam Sacrosanctæ Eucharistiæ, imo cujuslibet Sacramenti susceptionem. Verum hoc non tam videtur spectare ad Sacramentalia, quam ad ipsa Sacramenta: & hinc alii per ly *Edens*, intelligunt devotam manducationem Panis benedicti, & huiusmodi. Ubi tamen DD. suadent, imo Gretserus apud La Croix lib. 6. part. 1. n. 227. obligat, ut, nisi velimus nosmetipsos tali Benedictione indignos reddere, residua similibus rerum specialiter sic benedictarum e. g. Olla Agni, vel putamina Ovorum tempore Paschali benedictorum reverenter, ac decenter tractentur, potius comburendo quam talia ossa canibus, aut ovorum illorum putamina in finetum projiciendo.

37 Per ly *Confessus*, communiter intelligitur Confessio generalis, quæ in hunc finem ab Ecclesia est instituta, ut dicatur in principio Missæ, atque sub Prima, & Completorio.

38 Per ly *Dans*, denotatur elargitio Eleemosynæ, juxta illud *Tob. 4. Eleemosyna ab omni peccato liberat. Daniel. c. 4. Peccata tua eleemosynis redime.* & alibi. Huc reducuntur alia Opera Misericordiæ, tum corporalia, tum spiritualia.

39 Tandem per ly *Benedicens*, designatur Benedictio Episcopali, vel Abbatis consecrati, alios benedicentis; prout explicat Bonacina tom. 1. disp. 5. qu. 6. sect. 2. punct. 2. citans plures alios, & tenet Glossa in Proœmio Sexti Decretalium. *Benedictionem*: ubi inquit: *Per benedictionem Prælati devotè susceptam venialia remittuntur*: atque ad hoc allegat *c. Dictum est, & c. Maledicam, & cap. Intra 1. quæst. 1.* quamvis non adeo clare id habeant.

### DISTINCTIO III.

#### De Septem Peccatis Capitalibus.

#### QUESTIO I.

#### De Superbia, & variis eam concernentibus.

#### SUMMARIUM.

- 1 Peccata capitalia sunt septem; & cur sic appellantur?
  - 2 Superbia, quid?
  - 3 Superbia si sit consummata, est peccatum mortale.
  - 4 Secus, si sit imperfecta.
  - 5 Plures sunt filie Superbiæ, quæ?
  - 6 Vana gloria, quid?
  - 7 Et quale peccatum?
  - 8 Præsumptio, quid, & quale peccatum?
  - 9 Ambitio, quid, & quale peccatum?
- Anacl. Reiffenstuel Theol. Tom. I.

10 Superbia, cur dicatur vitium capitale?

11 Quænam sint remedia contra Superbiam?

1 **S**upponitur cum D. Gregorio lib. 31. moral. c. 31. & communi Doctorum, septem esse peccata Capitalia: quæ sunt, Superbia, Avaritia, Luxuria, Invidia, Ira, Gula, & Acedia. Et hæc dicuntur Capitalia, quoniam ab his alia peccata oriuntur, & instar capitis, quod influit in membra, ipsa influunt in alia peccata; ut inquit D. Gregorius loc. cit. Siquidem ex his septem Capitalibus vitiis frequentius cetera peccata oriuntur, secundum rationem causæ finalis, licet nonnulla ex aliis causis interdum oriuntur. Et quia Superbia vitiorum omnium mater est, ac regina (*in ipsa enim initium sumpsit omnis perditio. Tob. 4.*) de ea merito ante alia peccata capitalia tractatur.

2 CONCL. I. Superbia est appetitus inordinatus propriæ excellentiæ super alios, Matrius disp. 15. Theol. mor. n. 137. Dicitur excellentiæ super alios: nam Superbia proprie dicta involvit affectum immoderatum excellentiæ suæ relatæ ad alios, quibus aliquis præesse cupit, aut antecellere: prout desumitur ex ipso nomine superbiæ; etenim *superbire* sic dicitur a *super*, & *ire*, quia nempe superbus super alios, & supra suam mensuram ire vult. In quo sensu D. Augustinus lib. 14. de Civitate Dei c. 3. ait: *Quid est superbia, nisi perversæ celsitudinis appetitus?* Nec obstat, quod idem S. Augustinus loc. cit. c. 23. asserat, quod sibi placens immoderate, sit superbus. Nam hoc recte a Doctore nostro ibidem explicatur de superbia large dicta (quam alio nomine *Philantiam* vocant) cum superbia proprie accepta involvat relationem excellentiæ super alios, ut dictum.

3 CONCL. II. Superbia est peccatum mortale, si sit consummata & perfecta, id est, si quis ita excellere appetat, ut DEO, Superioribus, eorumque legibus subiaci nolit. Ita certa, & communis Doctorum. Quinimo ejusmodi superbia consummata est peccatum gravissimum: talisque præcipue datur in diabolo, ac pessimis hominibus; estque radix omnium peccatorum, prout declarabitur n. 10.

4 Dicitur notanter, *si sit consummata, & perfecta*. Siquidem imperfecta tantum superbia, qua quis non renuens iis subiaci, quibus debet, in suo dumtaxat affectu sese magnificat; est tantum veniale peccatum, ut docent passim Doctores: quia sine DEO, & aliorum respectu, sese plus iusto efferre, non est adeo gravis inordinatio. Et quamvis superbia ex genere suo sit peccatum mortale, nihilominus aliqui motus ipsius propter imperfectionem actus, aut alias circumstantias, possunt esse veniales: foret tamen gravis inordinatio, adeoque peccatum mortale, si fieret cum notabili aliorum contemptu, vel complacentia in aliorum abiectione.

5 Et si plures soleant assignari Filie superbiæ, ut Inobedientia, Jactantia, Hypocrisis, Contentio, Pertinacia, Discordia, Curiositas, tres tamen sunt præcipuæ, videlicet Vana gloria, Præsumptio, & Ambitio; quæ ideo dicuntur Filie superbiæ, quatenus ab eo originantur. Matrius disp. 15. Theol. mor. n. 138. cum aliis.

6 CONCL. III. Vana gloria, quæ est una ex præcipuis Filiabus superbiæ, est cupiditas inanis gloriæ. Ratio est: quia vanus gloriosus vult propriæ manifestationem excellentiæ, sive veræ, sive fictæ; unde appetitus excellentiæ movet ad inanem gloriam, & sic oritur ex superbia, tamquam infelix soboles ipsius.

7 Porro Vana gloria est peccatum per se, seu ex genere suo tantum veniale, ut docet D. Thomas 2.2. q. 142. art. 3. eo quod hoc vitium ex genere suo, & secundum se spectatum, nec Deo, nec proximo, gravem inferat injuriam. Hinc concionari v. g. vel alias actiones sacræ facere ob vanam gloriam, est tantum veniale peccatum. Quo tamen non obstante, vana gloria sæpe fit peccatum mortale per accidens; idque vel ratione materiæ, si nimirum gloriatio sit de re moraliter mala; quia approbatio operis pravi, eandem cum illo speciem habet: vel ratione notabilis damni proximo illati; ut si quis prorumpat in gravem



eiusdem contumeliam, qualis fuit jactantia Pharisei, Luca 18 dicentis, *Non sum sicut ceteri hominum: raptores, iniusti, adulteri: velut etiam hic publicanus*, aut humilissimi.

8 CONCL. IV. *Præsumptio* est appetitus aggrediendi aliquid supra vires: cum enim homo vult dicere, vel facere aliquid supra id, quod potest, dicitur *Præsumptuosus*. Est autem *Præsumptio* communiter, ac ex genere suo, peccatum veniale: fit autem per accidens mortale, si gravis injuria Deo, aut damnum proximo inferatur: v. g. si quis præsumat jurisdictionem Ecclesiasticam, potestatem Ordinis sacri, Officium Medici, Advocati, Confessarii &c. sine debita peritia suscipere; aut si quis aliquid præsumit cum periculo probabili gravis damni proprii corporalis, vel spiritualis incurrendi, absque iusta causa.

9 CONCL. V. *Ambitio*, quæ est una ex præcipuis Filiabus superbiæ, est inordinatus appetitus dignitatis, & honoris non debiti: ut si ambias Beneficium, vel Officium, quo es indignus. Est per se peccatum veniale: fit autem mortale vel ratione materiæ, ex qua honor inordinate petitur; vel ratione medii mortalis, per quod honor quaeritur; vel ratione gravis damni, quod proximo inferitur. Quod si vero moderate honor appetatur ob honestum finem, nullum erit peccatum, sed actus Magnanimitatis.

10 Quæres, cur Superbia dicatur esse vitium Capitale? Resp. id intelligendum esse potissimum de superbia completa, quæ omnem humilitatem & subjectionem excludit: ut cum quis in tantum sese extollit, ut nolit legi Divinæ, ac legitimis Superioribus, esse subiectus. Hæc autem non tantum est vitium Capitale, sed etiam regina & mater omnium vitiorum, juxta D. Gregorium lib. 31. moral. cap. 31. idque tum propter universalem ejus influentiam, quam habet in omnia vitia: tum quia ex eo, quod quis renuat esse subiectus legi Divinæ, ac legitimis Superioribus, aperitur porta latissima omnibus peccatis, legumque transgressionibus. Hinc Ecclesiastici 10. dicitur: *Initium omnis peccati est superbia: qui temerit illam, adimplebitur maledictis, & subvertet eum in finem.*

11 Quæres ulterius, quænam sint remedia contra Superbiam? Resp. cum communi Doctorum, eadem esse remedia Superbiæ, quæ Humilitatis adjuncta, de quibus fusa libri Aseetici. Tria tamen præcipue sunt remedia contra Superbiam a Doctore Angelico 2. 2. q. 162. art. 6. ad 1. assignata, ad quæ cetera reduci possunt. Primum, est consideratio propriæ infirmitatis; juxta illud Ecclesiastici 10. *Quid superbit terra & cinis?* Secundum, est consideratio magnitudinis Divinæ, secundum illud Job. 15. *Quid times contra Deum spiritus tuus?* Tertium, est consideratio imperfectionis propriorum bonorum, de quibus homo superbit, juxta illud Isaie 40 *Omnis caro fenum, & omnis gloria ejus quasi flos agri.* Et Isaie 64. *Quasi pannus menstruatus universa justitie nostræ.*

## QUESTIO II.

### De Avaritia, & Filiabus ejus.

#### SUMMARIUM.

- 12 Avaritia, quid?
- 13 Avaritia, quale sit peccatum?
- 14 Ipsa rectissime numeratur inter Peccata capitalia, cur?
- 15 Filiæ Avaritiæ sunt septem, nempe,  
Obduratio cordis, Inquietudo mentis,
- 16 Violentia, Fallacia, Perjurium,  
Frams, & Proditio.

12 CONCL. I. *Avaritia* est immoderatus appetitus habendi pecunias, sive possessiones. Ita in re communis. Dicitur, *immoderatus appetitus*: nam si ipse sit ordinatus, qualis fuit in Abraham, Jacob, & multis aliis, pecunias & possessiones copiosas ob debitum finem habentibus, peccatum non erit; juxta illud Psal. 61. *Divitiæ si affluant, nolite cor apponere.* Et additur, *haben-*

*di pecunias, sive possessiones*: quia circa has, tamquam objectum suum, versatur Avaritia. Quod si vero fiat sermo de immoderata cupiditate habendi voluptates, mundanam excellentiam, aut aliud ejusmodi bonum creatum, non erit proprie Avaritia, & prout hæc est speciale vitium.

13 CONCL. II. Avaritia, prout adversatur Justitiæ, est ex genere suo peccatum mortale; quamvis per accidens possit fieri veniale propter imperfectionem actus, aut levitatem materiæ, sicuti de furto dici solet. Prout vero Avaritia opponitur liberalitati, est peccatum ex genere suo veniale; nisi in tantum crescat amor divitiarum, ut præferatur Charitati Dei, aut proximi, volens potius transgredi præceptum sub mortali obligans, quam largiri suas pecunias, dando v. g. eleemosynam pauperi in extrema necessitate constituto. Ita D. Thomas 2. 2. q. 118. art. 4. & alii passim.

14 CONCL. III. Avaritia rectissime numeratur inter Vitia Capitalia. Ratio est: quia ex Avaritia, velut ex fonte & radice, multa alia peccata oriuntur; prout patet ex septem Filiabus ejus mox enarrandis. Hinc 1. Timoth. 6. dicitur: *Qui volunt divites fieri, incidunt in tentationem, & in laqueum diaboli, & desideria multa inutilia, & nociva, quæ mergunt homines in interitum, & perditionem. Radix enim omnium malorum est cupiditas.* Sic etiam Ecclesiast. 10. dicitur: *Nihil est iniquius, quam amare pecuniam: hic enim & animam suam venalem habet.* Unde ad Coloss. 3. Avaritia appellatur *Simulacrorum servitus*, qualia passim habentur in Scriptura sacra.

15 CONCL. IV. Filiæ Avaritiæ sunt septem, ac recte recensentur a D. Gregorio cit. lib. 31. moral. cap. 31. dum ait: *De Avaritia proditio, frams, fallacia, perjurium, inquietudo, violentia, & contra misericordiam obdurationes cordis oriuntur.* Ratio est; quia Avaritia excedit, in duobus, videlicet in retinendo, & in acquirendo. Ut excedit in retinendo, parit *Obdurationem cordis*, claudens viscera sua ad preces pauperis. Ut vero excedit in acquirendo, sic in affectu parit *inquietudinem mentis*, seu supervacuas curas, quæ avarus, semper in craftinum sollicitus, superflue agitur: nam, ut dicit Ecclesiast. c. 5. *Avarus non implebitur pecunia.*

16 Porro in effectu inducit Avaritia ad alias quinque Filias. Nam interdum impellit, ut vim proximo quis inferat, aliena rapiendo; ut faciunt fures & raptores: & sic committitur *Violentia*. Interdum inducit ad committendum dolum, ut fit in contractibus illicitis, vel licitis male exercitis. Qui dolus si committatur simplici verbo, erit *Fallacia*: si additum fuerit juramentum, erit *Perjurium*. At sit dolus committatur in opere, vel id fiet circa rem aliquam, & erit *Frams*; vel contra personam, & dicetur *Proditio*. Et sic in omnibus sunt septem Filiæ Avaritiæ.

## QUESTIO III.

### De Luxuria, & Filiabus ejus.

#### SUMMARIUM.

- 17 Luxuria quid, & quale peccatum?
- Ejus species, quæ?
- (a) Tract. 9. dist. 4. per totum.
- 18 Luxuria recte numeratur inter vitia capitalia.
- 19 Ejus filiæ sunt octo; nimirum
- 20 Cacitas mentis.
- 21 Præcipitatio.
- 22 Inconsiderantia.
- 23 Inconstantia.
- 24 Amor sui, & Odium Dei.
- 25 Affectus præsentis sæculi, &
- 26 Horror futuri sæculi.

17 CONCL. I. *Luxuria* est inordinatus appetitus vel usus venereorum. Ita communis. Et hoc peccatum est ex genere suo mortale, ac inter vitia Intemperantiæ vel maxime exprobrabile. Ejus septem species recte numerantur, videlicet Fornicatio, Adulterium, Incestus, Stuprum, Raptus, Sacrilegium, & Vitium contra naturam; quamvis nonnulli omittant unam, videlicet Sacri-



Sacrilegium. Verum de Luxuria, ejusque speciebus alibi. (a)

18 CONCL. II. Luxuria recte connumeratur inter septem Vicia Capitalia. Ratio est: quia multa alia ex illa oriuntur, tum propter vehementiam delectationis venereæ, tum propter connaturalitatem hujusmodi concupiscentiæ; unde ex ejus appetitu procedit homo ad multa vitia perpetranda, prout nimium quantum probat misera experientia.

19 CONCL. III. Filiæ Luxuriæ post S. Gregorium cit. lib. 31. moral. c. 31. & communem Doctorum, convenienter numerantur octo; nempe Cæcitas mentis, Præcipitatio, Inconsiderantia, Inconstantia, Amor sui, Odium Dei, Affectus præsentis sæculi, & Horror futuri sæculi. Harum priores quatuor se tenent ex parte intellectus, ejusque vires atque operationes valde deordinant; aliæ quatuor se habent ex parte voluntatis, ipsiusque deordinant operationes.

20 Cæcitas mentis, quæ est prima Luxuriæ Filia, facit quod luxuriosus non apprehendat bonum & malum, ut sunt. Hinc Danielis c. 13. de tali dicitur: *Species deceptit te, & concupiscentia subvertit cor tuum.* Videmus proinde, tales homines bona sua cum Filio Prodigio, de quo Luca c. 15. dissipare vivendo luxuriose, & honorem pravi pendere, ac multa alia sibi inconvenientia facere. Et hoc exprimunt Pictores pingendo subinde Libidinem in forma puelli, velatos oculos habentis.

21 Præcipitatio impedit actum intellectus seu rationis, qui est consilium de his, quæ agenda sunt propter finem. Nam qui cæco amore agitantur, absque consilio præcipitanter operantur, sibi que de rebus agendis consulere nequeunt, ut eas dirigant ad debitum finem: & hinc sæpe in varia mala labuntur, propter consilii defectum.

22 Inconsiderantia est tertia Luxuriæ Filia, quia per Luxuriam impeditur, ac deordinatur rectum rationis judicium de agendis: qui enim hac pice maculantur, inconsiderate agunt, quæ proprium statum & personam dedecent. Hinc Danielis c. 13. legitur de Senibus luxuriosis: *Everterunt sensum suum, & declinaverunt oculos suos, ut non viderent calum, neque recordarentur judiciorum iustorum.*

23 Inconstantia facit, quod quis ex affectu voluptatum venerearum a piis propositis facile deficiat. Nam homo ex impetu concupiscentiæ impeditur, ne exequatur id, quod recta ratio faciendum esse dictavit; unde in omnibus suis decretis inconstans apparet: estque hujusmodi peccator difficilis curationis.

24 Amor sui, ac vicissim Odium Dei, dicuntur Filiæ Luxuriæ, eo quod luxuriosus homo ob voluptates seipsum faciat finem suarum actionum, non Deum; imo lascivus solet a rebus Divinis abhorre, atque ab ipso Deo, tamquam peccatorum vindice. Unde patet, hæc duo deordinare voluntatem, ejusque actum, quoad appetitum finis, ne scilicet debitum Finem ultimum, qui est solus Deus, prosequatur.

25 Affectus præsentis sæculi, & vicissim Horror futuri sæculi, sunt etiam Filiæ Luxuriæ: amor enim voluptatum carnalium ita animum luxuriosi afficit, ut subinde etiam Beatitudinem æternæ paratus foret renuntiare, si præsentibus frui jugiter permitteretur.

26 Horror futuri sæculi. Quia luxuriosus, dum nimis carnalibus delectationibus detinetur, contemnit & fastidit spirituales: & quia nimia detentio & perseverantia in delectationibus carnalibus hinc animum captivavit, illius vero contemplatio gravitatis peccati cum terrore inferni cor affligit, mox sequitur Horror futuri sæculi, in tantum, quod homo quandoque prolabatur in desperationem. Ecce! in quot laqueos incidunt, qui in hoc turpissimo vitio habituantur.

## QUESTIO IV.

### De Invidia, ejusque Filiabus,

#### SUMMARIUM.

27 Invidia, quid?

*Invidus proprie, quid?*

28 Corollaria.

\* *Quid de Mercatoribus cupientibus habere Emptores ad alios euntes?*

29 Invidia, quale peccatum?

30 Invidia recte connumeratur inter vitia capitalia.

31 Ejus filiae sunt quinque; nimirum

*Susurratio, Detractatio, Exultatio in adversis proximi, Afflictio in prosperis ejus, & Odium.*

27 CONCL. I. Invidia est tristitia de bono proximi, prout proprium malum aestimatur, & diminutivum proprii boni, seu propriæ gloriæ ac excellentiæ. Hoc enim vitium est præcipue de bonis, in quibus est gloria & honor; estque ad illos tantum, quibus homo vult se æquare, vel præferre, non autem respectu multum distantium, cum nullus plebejus v. g. homo nisi infans, studeat se æquare, vel præferre in gloria Regi, aut alteri multum excellentiori. Porro per Invidiam volumus, & desideramus alium carere tali bono, quia per illud nos excellit. Unde proprie *Invidus* dicitur, qui tristatur de bono alterius, putans inde propriam excellentiam diminui.

28 Infertur proinde, quod tristari de bono alterius, non quia ipse tale bonum habet, sed quia nos tale bonum non habemus, non spectet ad peccatum Invidiæ: nam hæc tristitia proprie est Zelus, & æmulatio; & si sit de bonis honestis, est laudabilis, juxta illud 1. Cor. 12. *Æmulamini charissimè meliora.* Infertur ulterius, si quis tristetur de bono alterius, in quantum imminuet sibi exinde periculum cujuscumque nocimenti (ut puta si quis tristetur de exaltatione sui inimici, timens, ne ab ipso postea lædatur) quod talis tristitia non sit invidia, sed magis effectus timoris; ut notat D. Thomas 1. 2. q. 36. art. 1. & sequuntur alii.

#### Additio.

\* Ex his ipsis dictis pariter infertur, quod proprie invidia non sit, nec grave peccatum, si mercator, sive alius Artifex, vel Opifex tristetur ex eo, quod vicinus vendat, & non ipse: etenim talis tristitia non tam versatur circa bonum alterius, quam circa malum proprium, quod est carentia venditionis; unde non tam tristatur, quia alter vendit, quam quia ipse non vendit tantum, quantum alter. Prout recte cum Burghaber, & La Croix advertit Franciscus Henno *Tract. de Peccatis disp. 4. qu. 3. conclus. 1.* Nec dicas: si alter pariter non venderet, nec ille prior tristaretur: consequenter tristatur de bono alterius, adeoque de bono alieno. Resp. enim venditionem alterius esse quidem occasionem propriæ tristitiæ, sed non motivum ejusdem, prout tamen requiritur ad invidiam. Ita Henno *loc. cit.* Interea tamen, si similis tristitia procedit ex interna radicata passione & aversione erga alterum, qua sæpius jam erat gavisus de alterius infortunio, signum est evidens latentis invidiæ, & odii erga proximum. In dubio (ut practice loquamur) quærat Confessarius ex tali homine poenitente, an, si æqualem alteri accessum habuisset emptorum, nihilominus fuisset contristatus de ejusdem fortuna, & si deprehendat animum ejusdem dispositum, ut credat, quod sic &c. prudenter deducet Confessarius, hanc tristitiam processisse ex invidia. +

29 CONCL. II. Invidia est peccatum mortale ex genere suo, contrarium Charitati: quia Charitas gaudet de bono proximi; Invidia vero tristatur de bono proximi. Potest nihilominus Invidia fieri peccatum veniale, tum ob imperfectionem consensus, & non plenam advertentiam; tum ob materiæ levitatem, uti pueris con-



ingere consuevit, qui de levibus aliorum puerorum bonis tristitiam capere solent.

30 CONCL. III. Invidiæ peccatum recte inter vitia Capitalia numeratur a S. Gregorio *sæpe cit. lib. 31. moral. cap. 31.* & communi Theologorum. Siquidem ex ipsa invidia, tamquam ex capite, multa alia peccata originem ducunt, uti patet ex quinque Filiabus ejus mox enarrandis; ac merito tum a sacra Scriptura, tum a SS. Patribus gravissime perstringitur.

31 CONCL. IV. Filiæ Invidiæ recte a S. Gregorio *loc. cit.* assignantur quinque; quæ sunt Odium, Sufurratio, Detractio, Exultatio in adversis proximi, & Afflictio in prosperis ejus. Invidus namque, dum de bono proximi tristatur, putans, inde suam excellentiam diminui, ob hanc tristitiam tollendam movetur ad desiderandum, quod proximus illo bono careat: unde incipit suo conatu gloriam alterius diminueri; idque vel occulte, & tunc sequitur *Sufurratio*; vel manifeste, & tunc sequitur *Detractio*. Quod si consequatur suam intentionem, gaudet de illius adversitate: si vero non potest, affligitur de ipsius prosperitate: & si hæc tristitia duret, postea generat *Odium*. De hoc peccato dicitur *Sap. 2. Invidia diaboli mors introivit in orbem terrarum.*

### QUESTIO V.

#### De Ira, & Filiabus ejus.

#### SUMMARIUM.

32 *Ira, quid? est bona, si modum non excedat, Et Satellitium rationis.*

33 *Ira inordinata, quale peccatum?*

34 *Filiæ iræ sunt sex, nempe*

35 *Indignatio.*

36 *Tumor mentis.*

37 *Clamor.*

38 *Contumelia.*

(d) Tract. 9. dist. 6. quæst. 2. per totum.

39 *Blasphemia.*

(e) Tract. 5. dist. 3. q. 5. per totum.

40 *Rixæ.*

32 CONCL. I. *Ira*, prout est unum ex peccatis Capitalibus, est inordinatus appetitus vindictæ. Dicitur, *inordinatus*: nam si ordinate appetatur vindicta, non est peccatum. Quinimo *Ira*, si præscriptum rationis modum non excedat, bona est; & habet in homine eum locum, quem miles in Republica: nec immerito dicitur *Satellitium rationis*, de qua intelligendum illud *Psal. 4. Irascimini, & nolite peccare*. Sic fit, si vindicta appetatur debito modo, puta exigente Justitia per ministros Justitiæ. Similiter peccatum non est, si Superiores debito cum moderamine irascuntur culpis subditorum, eosque puniunt.

33 Quod si *ira* modum a ratione præscriptum non servet, adeoque sit inordinata, jam erit peccatum. Et quidem, si *Ira* modum a ratione præscriptum excedat ex parte objecti, expetendo scilicet injustam vindictam, v. g. ob causam non legitimam, aut majorem vindictam quam oportet, vel absque debita auctoritate Superioris exequendam, est ex genere suo peccatum mortale; quamvis per accidens ob imperfectionem actus, vel levitatem vindictæ appetitæ, possit fieri veniale. Et de tali *Ira*, præsertim tendente ad vindictam mortis intelligitur illud *Salvatoris Matth. 5. Omnis qui irascitur fratri suo, reus erit judicio*. Si vero *Ira* non servet præscriptum a ratione modum dumtaxat ex parte ipsius motus, tunc erit ex genere suo peccatum veniale; quamvis per accidens possit fieri mortale, ut puta ratione affectus adjuncti, quo quis paratus existit aliquid facere, quod est peccatum mortale, vel si quis deliberate modum adeo excedat, ut videatur potius fera bestia quam homo, erumpendo in gestus enormes, tursiones, spumas, membrorum contorsiones &c. nam similia magis, vel saltem æque creaturam rationalem tamquam Imaginem Dei deturpant, quam plena ebrietas: uti recte cum nostro Marchantio

& Sporero advertit Henno *Tract. de Peccatis. disp. 4. quæst. 5. Conclus. 2.*

34 CONCL. II. Filiæ Iræ communiter a Doctoribus cum cit. D. Gregorio *lib. 31. Moral. cap. 31.* sex assignantur; quæ sunt, indignatio, Tumor mentis, Clamor, Contumelia, Blasphemia, Rixæ.

35 *Indignatio* est inordinatus affectus ex eo, quod quis reputet, se indigne ab alio tractari. Est communiter veniale peccatum; imo si ex justo rationis judicio procedat, nullum est. Posset tamen esse mortale, si cresceret usque ad deliberatum odium, vel contemptum personæ gravem.

36 *Tumor mentis* est, quo quis morose excogitat diversas vias vindictæ iisque cogitationibus animum tumefacit. Quale sit peccatum, judicandum est ex qualitate vindictæ, quæ excogitatur accedente sufficienti deliberatione.

37 *Clamor* est, cum iratus extollit vocem multa inordinate & confuse effutens. Est communiter peccatum veniale, nisi aliud addatur, ut puta blasphemia, vel contumelia, aut hujusmodi.

38 *Contumelia* est dictum, vel factum injuriosum, quo quis proximo præsentem palam aliquod malum objicit, aut ejus honorem & existimationem palam violat. Est ex genere suo peccatum mortale, nisi levitas materiæ, aut imperfectio actus excuset; de qua amplius alibi. (d)

39 *Blasphemia* fit, cum jactamus convitia in Deum, aut Sanctos: estque peccatum mortale, nisi inadvertentia, aut indeliberatio excuset. De hac etiam ex professo alibi. (e)

40 *Rixæ* tandem, si modum graviter non excedant, uti & leviculæ pugnæ, veniales sunt: secus, si progrediantur ad seditiones, vulnera, cædes.

### QUESTIO VI.

#### De Gula, & Filiabus ejus.

#### SUMMARIUM.

41 *Gula, quid?*

*Committitur quinque modis.*

42 *Gula ut sic dividitur in commensationem, & ebrietatem.*

43 *Est de se, ac ex genere suo, peccatum veniale.*

44 *Nihilominus per accidens fit mortale in pluribus casibus.*

(f) Dist. 2. num. 21.

45 *Ebrietas, quid?*

46 *Differentia inter dormientem, & ebrium.*

47 *Ebrietas plena est ex genere suo peccatum mortale.*

48 *Signa plenæ ebrietatis, quæ?*

49 *Quando censetur ebrietas voluntaria, sicque peccatum mortale?*

50 *Inebriare se causa recuperandæ sanitatis, vel tuendæ vitæ, non est peccatum.*

\* *Quid sentiendum, si fiat ex alio fine?*

51 *Comedentes, & bibentes ob solam voluptatem, an peccent?*

52 *Gula est peccatum capitale, cujus quinque sunt Filiæ, nempe.*

53 *Hebetudo mentis.*

54 *Immoderata letitia.*

55 *Multiloquium.*

56 *Scurrilitas; & quomodo hac differat a stultiloquio?*

*Et multiloquio?*

57 *Et spurcitia, seu Immunditia.*

41 CONCL. I. *Gula* est inordinatus appetitus cibi & potus. Ita in re communis. Sive ut aliqui loquuntur, *Gula* est vitium in appetitione, & usu cibi & potus, debitum modum excedens, delectationis gratia. Hoc autem fieri potest quinque modis, sequenti versiculo comprehensis:

*Præpropere, laute, nimis, ardentem, studiose.*

*Præpropere* edit quis, quando tempore jejunii ante horam comedendi fit comestio. *Laute*, quando quis cibos nimis



nimis exquisitos, ac delicatos, vult comedere. *Nimis*, quando plus iusto comeditur. *Ardenter*, si voraciter quis comedat. *Studiose*, dum quis quaerit cibos nimis accurate praeparatos.

42 CONCL. II. Gula opponitur virtuti Temperantiae, & Sobrietatis; atque ut sic dividitur in Comestationem & Ebrietatem, tamquam in duas species, quarum illa in inordinato appetitu seu excessu ciborum, haec vero in excessu potus committitur. De his dicitur *ad Galat. 5. Manifesta sunt autem opera carnis: quae sunt fornicatio &c. ebrietates, comestationes, & his similia, quae praedico vobis, sicut praedixi: quoniam, qui talia agunt regnum Dei non consequentur.*

43 CONCL. III. Tamen si vitium Gulae inter Peccata Capitalia recte numeretur, eo quod plurimum aliorum origo esse soleat; nihilominus per se loquendo, atque ex genere suo, ea est peccatum veniale. Ita Sylvester *in Gula. n. 2.* allegans mentem D. Thomae pluribus in locis, Mastrius *disp. 15. Theol. Moral. n. 146.* Reginaldus *lib. 15. n. 64.* & alii. Ratio est: quia Gula praecise sumpta, & seclusis malitiis contra alias Virtutes pugnantibus non repugnat graviter Charitati Dei: vel proximi. Unde si quis edat ante tempus, si nimis exquisita, si plus iusto, si nimis voraciter ad modum canum, vel nimis exquisita praeparata (qui sunt quinque modi peccandi vitio Gulae) per se loquendo non peccat mortaliter.

44 Nihilominus per accidens, & ob adjunctam malitiam aliis Virtutibus repugnantem variis modis Gula fit peccatum mortale, atque juxta allegatam sententiam D. Apostoli *ad Galat. 5.* inducit amissionem vitae aeternae. Idque imprimis accidit ratione perverse voluntatis, quando scilicet in tali delectatione Gulae constituitur finis ultimus, juxta quod de similibus legitur *ad Philipp. 3. Quorum Deus ventris est*: hac enim ratione generaliter ex peccato veniali fieri per accidens mortale, jam supra (f) dictum est. Sic fit, quando homo adeo inhæret delectationibus ciborum & potus, ut ob eas paratus sit legem Dei graviter violare: puta, si quis ob id furetur, vel contractus faciat iniquos, si violet jejunia Ecclesiae diebus prohibitis vescendo carnibus, vel saepius comedendo; si non solvat creditoribus, ut opipare victitet, ac hujusmodi. Deinde Gula fit mortale peccatum ratione gravis nocimenti, si id homo corpori suo advertenter adfert. Idem accidere potest in aliis similibus casibus, ac praesertim in ebrietate, quae est altera species Gulae ut sic, & contradistincta a Comestatione, de qua proinde loquendo, fit

45 CONCL. IV. *Ebrietas* est excessus in potu inebriante, causa voluptatis, donec usus rationis adimatur. Ita in re Doctores communiter. Dicitur, *donec usus rationis adimatur*. Siquidem malitia ebrietatis plenae, & perfectae, in eo consistit, quod quis tantum ob voluptatem, aut ingluviem, advertenter se privet usu rationis, & quidem violenter, ac modo innaturali rationem perturbando, seque privando proxima potestate utendi ratione ad omnem subitam necessitatem.

46 Et hoc ultimum notanter additur, ad excludendum somnum: non etiam dormiens privatus existit usu rationis, sed modo naturali ab auctore naturae instituto, ad virium naturalium conservationem. Simulque dormiens non simpliciter existit privatus usu rationis, quia excitatus a somno, quocumque tandem tempore, mox habet proximam potestatem utendi ratione ad omnem necessitatem: hoc autem secus fit in plene, ac perfecte ebrio, uti patet.

47 CONCL. V. Ebrietas plena & perfecta, qua praedicto modo usus rationis plene sopitur, est ex genere suo peccatum mortale. Ita omnes Doctores. Ratio est: quia censetur gravis difformitas, magnumque malum, abjecta rationis potestate ad brutorum stoliditatem voluptatis causa ultro se abjicere. Unde ebrietas inter opera carnis, quae excludunt a regno Coelorum, merito connumeratur *cit. cap. 5. ad Galatas.*

48 Dicitur, *Ebrietas plena & perfecta*. Nam, si quis post potum adhuc discernere possit inter bonum &

malum, licet nonnihil phantasia turbata sit, aut sequatur vomitus, lingua titubet, pedes vacillent, oculi cernant duplicia, vel domus gyrari videatur, nondum est plena ebrietas; ideoque tantum peccatum veniale, quamvis ex gravioribus, si deliberate sit commissum. Lessius *lib. 4. de just. & jure c. 3. n. 30.* Bonacina *disp. ult. in Decalogum. q. 1. punct. 1. n. 4.* & alii: qui simul pro signo ebrietatis ponunt, si quis temulentus non advertit: quid agat, & bonum a malo non discernat; adeoque sequenti die non meminerit, quid pridie fecerit, dixerit, aut qua ratione domum venerit &c. cum alias talium rite meminisse soleat.

49 Ceterum allata Conclusio intelligenda est, dummodo ejusmodi ebrietas sit voluntaria. Et hoc fit, quando quis ebrietatem intendit directe, vel saltem indirecte, nempe tantum bibendo, quantum potest, non curans, an sequatur ebrietas, nec ne; vel quando quis advertit se inebriandum, si pergat potare, & nihilominus non desistit. Quod si quis non praeviderit periculum ebrietatis (prout accidit in ebrietate Noe *Gen. 9.*) & ignorans fortitudinem potus, vino circumventus fuit, aut in auram exiens vento turbatus, nec hoc praevидit, culpa vacat, saltem mortali.

50 Insuper Conclusio posita dumtaxat procedit, si ebrietas fiat causa voluptatis. Nam non esse peccatum, inebriare se ex praescripto Medicorum, si aliter sanitas recuperari non possit in casu quopiam extraordinario, tenent Sylvester, Cajetanus, Toletus, Layman, & alii. Siquidem malitia ebrietatis in eo consistit, quod quis sine iusta & gravi causa, tantum ob voluptatem, adeo se ingurgitet, donec usu rationis privetur, ut notat Mastrius *disp. 15. Theol. Moral. n. 147.* In casu autem posito adest iusta causa reparandae sanitatis. Et ob eandem rationem non esse peccatum, si quis cogatur bibere intento ense, alioquin interficiendus, tenent Lessius, Azorius, Reginaldus, & alii.

#### Additio

\* *Nec dicas*: Ex hac ultima doctrina semel admissa sequi videtur, quod pariformiter liceat sese ad invicem provocare ad haustus cum manifesto periculo plenae ebrietatis ex parte unius saltem Potatorum, si alter tamquam Victor exinde lucretur certas pecunias ad hunc finem positas; quoniam tales non bibunt ob voluptatem, sed ut obtineant honorem, ac pecunias.

*Nam contra est*, quod non solum formalis ebrietas, quae nimirum fit ex motivo voluptatis, sed etiam alia voluntaria, ac violenta per potum privatio totalis rationis (quae ab aliis vocatur ebrietas materialis) sit illicita, utpote notabilis difformitas creaturae rationalis, saltem tunc, quando causa motiva sese inebriandi non sit valde ardua, qualis haud dubie neutiquam foret praecise lucrum pecuniarum, ac putativus ille honor, quem similes compotatores sibi accrescere imaginantur. De hoc fusius videatur Gobath in *Quin. Tr. 5. c. 5. S. 5. a num. 26. usque ad num. 36.* Legatur quoque desuper S. August. *Serm. 231. de tempore* taliter scribens: *Certa bibendi lege contenditur, qui poterit vincere laudem meretur ex crimine &c. o infelicitas generis humani! quam multi inveniuntur, qui ebriosos, & luxuriosos amplius, quam oportet, cogunt bibere, & ante ostium pauperibus petentibus vel unum calicem dissimulant dare. . . Et quod peius est, aliqui Clerici, qui hoc deberent prohibere, ipsi cogunt alios plus bibere, quam expedit &c. si te, & alium inebriaveris, habebis hominem amicum, habebis Deum inimicum.* Ita S. Augustinus.\*

51 Quæres incidentaliter, an comedentes, & bibentes ob solam voluptatem captandam, peccent venialiter? Ad hoc olim multi Doctores responderunt negative: verum eorum sententia amplius teneri non potest, cum sit novissime rejecta ab Innocentio XI. qui inter alias etiam sequentem Propositionem, ordine 8. damnavit: *Comedere & bibere usque ad satietatem ob solam voluptatem non est peccatum, modo non obsit valetudini, quia licite potest appetitus naturalis suis actibus frui.* Ubi tamen bene



notandum ly ob solam voluptatem: nam si quidem sentitur voluptas, verumtamen ob hanc solam quis non comedat, vel bibat, sed ad conservandam valetudinem, aut restaurandas vires, peccatum nullum committitur; cum hic sit finis a natura intentus moderatæ comestionis. Videantur dicta Tract. 1. dist. 2. quæst. 5. post. num. 39.

52 CONCL. VI. Gula merito inter Peccata capitalia connumeratur, eo quod sit mater plurium vitiorum, prout nimium probat (proh dolor!) ipsa experientia: præcipue autem, teste S. Gregorio *cit. cap. 31.* quinque infelices gignit Filias, quæ sunt, Hebetudo mentis, immoderata lætitia, Multiloquium, Scurrilitas, & Spurcitia.

53 *Hebetudo mentis*, seu Stupiditas consistit in eo, quod non possit quis orare, aut alia huiusmodi præstare. Hæc fit mortalis tunc, quando quis inordinate bibendo, vel comedendo, voluntarie redditur ineptus ad intelligenda vel præstanda ea, quæ ad salutem sunt necessaria; vel ad quæ ex officio, aut alias sub gravi peccato quis tenetur.

54 *Immoderata*, seu inepta lætitia hoc loco non quamvis inordinatam denotat lætitiā, qualis omne peccatum comitari solet, sed eam præcipue, quæ movet ad cantiones obscenas, actus turpes, saltus vel choreas inhonestas &c. Et huiusmodi immoderata lætitia fit mortale peccatum, quando est inductiva ad consensum aut delectationem mortalem; vel ad eam ordinatur.

55 Per *Multiloquium* peccatur juxta illud *Proverb. 10.* *In multiloquio non deerit peccatum.* Et quidem tunc peccat quis mortaliter per Multiloquium, quando illo utitur in gravem irreverentiam Dei, aut in tantum eo delectatur, ut paratus sit illud præferre impletioni alicujus præcepti sub culpa mortali obligantis: alioquin vero, ac ex genere suo, est peccatum veniale.

56 *Scurrilitas* idem est, ac jocularitas quædam, proveniens ex defectu rationis, quæ sicut non potest cohibere verba, ita non potest cohibere exteriores gestus. De hac, sicut & de Stultiloquio, fit mentio ad *Ephes. cap. 5.* ubi etiam Scurrilitas aperte secernitur a Stultiloquio, dum dicitur: *Aut turpitudine, aut stultiloquium, aut scurrilitas, quæ ad rem non pertinet.* Differt autem Scurrilitas a Stultiloquio, quod Scurrilitas dicat quamdam inhonestam in verbis & gestibus, v. g. Scurrilia dicere, canere, vel alia huiusmodi ad risum excitandum agere. *Multiloquium* vero consistit in superfluitate verborum: quæ, si præferantur absque recta ratione, seu judicio intellectus, *Stultiloquium* erit. Porro Scurrilitas per se, & secluso scandalo, est peccatum veniale: foret tamen mortale, si fieret causa delectationis venereæ.

57 *Spurcitia* tandem seu *Immunditia*, attenditur secundum inordinatam emissionem quarumcumque superfluitatum, specialiter vero quantum ad emissionem feminis: & hæc, si voluntaria sit, est peccatum mortale. Tantum autem cibi vel potus capere, ut vomitus sequatur, si usus rationis non adimatur, per se loquendo non videtur peccatum mortale; ut notat communior, & probabilior Doctorum.

#### Q U Æ S T I O VII.

#### De Acedia, & Filiabus ejus.

#### S U M M A R I U M.

58 *Acedia*, quid?

59 *Acedia* dupliciter accipitur,

1. Generaliter.

60 II. Specialiter, & quale peccatum sit?

61 *Acedia* recte ponitur inter vitia capitalia.

62 *Acedia* filia sunt sex, nempe

63 *Malitia.*

64 *Rancor.*

65 *Pusillanimitas.*

66 *Desperatio.*

67 *Torpor*, &

68 *Evagatio mentis.* Huc spectat *Curiositas*, *Verbofinitas*, & *Inquietudo.*

58 CONCL. I. *Acedia* generaliter denotat incuriam, negligentiam, & pigritiam quamdam: in proposito autem, & prout est septimum peccatum Capitale, *Acedia* est fastidium rerum spiritualium. Unde directe repugnat effectui Charitatis, qui est, gaudere de bono spirituali.

59 Porro *Acedia* sumitur dupliciter. Primo generaliter, pro omni tædio, & torpore animi, bona facere negligentis: & hoc modo *Acedia* non habet rationem specialem vitii, quia omne vitium refugit spiritualem bonum virtutis oppositæ; ut patet in luxurioso, & gulofo, quorum prior tristatur de bono Continentiæ, posterior de bono Abstinentiæ, illudque refugit, prout est laboriosum, aut corpori molestum, vel delectationis ejus impeditivum.

60 Secundo *Acedia* sumitur specialiter, seu prout est speciale vitium: & consistit in tristitia de bono Divino, de quo alioquin Charitas gaudet: & hoc modo *Acedia* ex se, ac genere suo, est peccatum mortale, quia directe repugnat Charitati Dei: utpote cum sit tristitia ac tædium de ipsa amicitia Dei, mediante habituali charitate alias obtinenda: quoniam hæc ipsa ab acedioso apprehenditur tamquam mala appetitui sensitivo, propter adjunctas difficultates obtinendi, atque conservandi eandem per virtutum exercitia, & illicitarum voluptatum fugam. Priori autem modo, seu generaliter sumpta *Acedia*, tunc demum est peccatum mortale, cum propter eam committitur opus prohibitum, vel omittitur opus præceptum sub mortali.

61 CONCL. II. *Acedia*, prout est tristitia de spirituali bono Divino, ac speciale vitium, recte a St. Gregorio *lib. 31. Moral. cap. 31.* inter vitia capitalia numeratur, utpote cum plura alia vitia oriantur ex ea secundum rationem causæ finalis. Nam sicut homines multa operantur propter delectationem, tum ut ipsam consequantur, tum quia ex ejus impetu ad aliquid agendum permoventur: ita etiam propter tristitiam multa operantur, vel ut ipsam evitent, vel quia ejus pondere in aliqua mala agenda prorumpunt.

62 CONCL. III. Filia *Acediæ* merito sex enumerantur a S. Gregorio *loc. cit.* & aliis, quæ sunt *Malitia*, *Rancor*, *Pusillanimitas*, *Desperatio*, *Torpor* circa præcepta, ac *Evagatio mentis* circa ipsa.

63 *Malitia* non sumitur hic, prout est genus omnium vitiorum; sed accipitur specialiter pro ea malitia, qua quis odio habet bona spiritualia, & vellet ea non esse; aut qua ipsum poenitet bene fecisse, vel implevisse id, ad quod tenebatur: aut qua contemnit Dei beneficia, v. g. desiderando, se non fuisse natum, aut non agnovisse Christum &c. est autem malitia sic sumpta ex genere suo mortale peccatum.

64 *Rancor* etiam non accipitur hic communiter pro odio; sed pro quadam indignatione contra eos, qui ad spiritualia bona inducunt.

65 *Pusillanimitas* est respectu consiliorum, qua nimium homo Divina consilia, quæ perfectionis sunt, exequi non audet ex mero animi timore: utputa, si quis a jejuniis, Religione, & huiusmodi virtutum actibus se subtrahit, ex timore deficiendi. Et hæc ex genere suo est veniale peccatum, nisi ratione voti, aut alia de causa quis sit obligatus ad talia bona opera exequenda.

66 *Desperatio*, intellige, consequendæ æternæ beatitudinis, est peccatum mortale, quando cum consensu rationis pleno fit, ut est certum.

67 *Torpor* est circa præcepta, quando scilicet homo negligit & omittit facere ea, quæ sunt ex præcepto facienda. Alii vero per Torporem intelligunt eum, cum bona opera non fiunt cum debito fervore.

68 Tandem *Evagatio mentis* est, qua quis in exercitio operum spiritualium evagatur circa illicita, aut impertinentia. Et hæc, si fiat per cognitionem, diffundentem se ad cognitionem impertinentium, dicitur *Curiositas*: si vero per locutionem, dicitur *Verbofinitas*: & si per inquietudinem corporis, quando scilicet aliquis per inordinatos membrorum motus vagacitatem indicat mentis, tunc dicitur *Inquietudo*.



## T R A C T A T U S V I.

## DE VIRTUTIBUS THEOLOGICIS.

1 **J**ustitia Christiana generatim duo involvit, fugam scilicet peccatorum, & actionem bonorum operum; juxta quod dicitur *Psal. 36. Declina a malo, & fac bonum.* Et *Isaia c. 1. Quiescite agere perverse, discite bene facere.* Quia igitur præcedenti Tractatu visum est de Peccatis, superest, ut perspecta peccatorum malitia, Virtutum excellentia, decor, & natura declaretur; atque earum inprimis; quæ ceteras antecellunt, uti sunt Virtutes Theologicæ, sic dictæ, quia Deum pro suo immediato objecto respiciunt. Porro Tractatus de Virtutibus Theologicis celebris est, atque ob sui utilitatem, simul ac necessitatem, non solum in Theologia speculativa, sed etiam Morali communiter examinatur.

## D I S T I N C T I O I.

*De Virtutibus Theologicis generatim.*

## Q U Æ S T I O I.

Quid, & quotuplex sit tum Virtus ut sic, tum Theologica?

## S U M M A R I U M.

- 1 *Justitia Christiana involvit duo, quæ?*
- 2 *Virtutis nomen varie accipitur.*  
*Et quomodo in proposito?*
- 3 *Virtus, quid?*
- 4 *Sumitur magis proprie pro habitu.*
- 5 *Virtus ut sic tripliciter dividitur.*
- 6 *Virtutes intellectuales, & morales, quid?*
- 7 *Virtutes infusæ & acquisitæ dantur, & quid sint?*
- 8 *Virtus Theologica, quid?*
- 9 *Virtutes Theologicæ quomodo differant a Moralibus?*
- 10 *Religio, quomodo respiciat Deum?*
- 11 *Tres tantum sunt Virtutes Theologicæ.*

2 **P**ro clariori resolutione præmittendum, quod nomen Virtutis latissime spectatum varias habeat significationes. Et inprimis quandoque Virtus accipitur pro quacunque perfectione, præsertim ea, quæ in vi seu facultate operandi consistit. Sic *Psal. 32. dicitur: Verbo Domini celi firmati sunt, & spiritu oris ejus omnis virtus eorum.* Sic e contra membra languida hominis, dicuntur esse destituta omni virtute sua. Deinde nomen Virtutis sumitur nonnumquam pro effectu seu opere, quod per excellentem vim operativam attingitur, seu efficitur: sic *Marc. c. 6. dicitur de Christo: Non poterat ibi virtutem ullam facere.* Sed hæc Virtutis acceptiones nostro proposito parum deserviunt. Tertio igitur, & magis ad propositum, Virtus accipi solet, vel pro actu, live operatione moraliter bona; ut est actus Fidei, Spei, & Charitatis Divinæ, actus humilitatis, patientiæ, & hujusmodi: in quo sensu D. Augustinus l. 2. *De libero arbitrio, cap. 19. dixit: Virtutem esse bonum usum liberi arbitrii.* Vel pro habitu, seu facilitate & promptitudine quadam, inclinante ad ejusmodi bonam operationem: & hæc posterior est magis propria Virtutis acceptio, de qua loquendo, sit.

3 **CONCL. I.** *Virtus generatim sumpta, est habitus perficiens substantiam intellectualem, & ad bonam operationem inclinans.* Ita in re communis Doctorum. Unde & Aristoteles 2. *Ethic. cap. 6. dixit, quod Virtus hominis aliud non sit, quam habitus, ex quo & bonus homo ipse efficitur, & bonum ejus opus: live, ut verbis ejusdem utamur, virtus est, quæ facit habentem, & opus ejus bonum.* Et in hoc sensu Virtus opponitur vitio; nam vitium reddit habentem malum, & opus ejus malum.

4 **Dicitur I. Habitus.** Quamvis enim Virtus quandoque sumatur pro ipsomet actu virtuoso, ut proxime dictum est; communius tamen, & magis proprie, accipitur pro habitu, ad eliciendos ejusmodi actus bonos inclinante: neque enim illico solet dici virtuoso, temperans, vel mansuetus &c. qui unum vel alterum actum virtutis temperantiæ, vel mansuetudinis elicit, sed qui ex actibus illis jam frequentatis acquisivit habitum live promptitudinem quamdam sic operandi. Dicitur II. *Perficiens substantiam intellectualem:* quia Virtus proprie accepta non datur in brutis, aut rebus inanimatis, sed in homine dumtaxat, & Angelis, perfectissime autem in D E O. Dicitur III. *& ad bonam operationem inclinans:* quia sicut generaliter habitus inclinant ad actus sibi correspondentes prompte atque faciliter eliciendos, ita & Virtus jam habitata, seu radicata in homine.

5 **CONCL. II.** *Virtus generatim dividitur tripliciter, nimirum ex parte subjecti in Virtutes intellectuales & morales, & ex diversitate causæ efficientis in infusæ & acquisitæ, & ex diversitate objecti in Theologicas & Morales.* Ita communis, idque probatur inductione.

6 Inprimis enim *Virtutes intellectuales* sunt ex, quæ intellectum, in quo subjectantur, perficiunt: & tales juxta Aristotelem 6. *Ethic. c. 3. sunt quinque, videlicet Intellectus, Scientia, Sapientia, Ars, & Prudentia;* nam hæc spectant ad intellectum, in eoque subjectantur: quibus addi potest Fides infusa & Theologica, quam Philosophus ignoravit. Verum de his (dempta Prudentia, & Fide, de quibus infra suo loco) melius agitur in Philosophia. *Virtutes morales,* prout contradistinguuntur ab intellectualibus, dicuntur, quæ subjectantur in appetitu rationabili (hoc est, in voluntate) & versantur circa dirigendos mores, atque juxta dictamen rectæ rationis moderantur, & dirigunt affectus animi nostri. Et hujusmodi Virtus moralis tum ab Aristotele 2. *Ethic. c. 6. & Doctore nostro 3. dist. 36. quest. iii. §. Dicitur, tum ab aliis passim definitur, dicendo: Virtus est habitus electivus in mediocritate consistens, quod nos determinata ratione, prout definierit sapiens.*

7 Deinde dari Virtutes infusæ, & acquisitæ, patet ex eo: quia cum Virtutes nobis a natura non insint, imo defacto, ac post lapsum primi parentis nostri Adæ, cogitationes hominum potius intentæ sint ad malum ab adolescentia sua; hinc duæ generatim sunt causæ effectivæ Virtutum, videlicet D E U S per infusionem earum, & proprium exercitium hominis, quo quilibet sibi comparat quosdam habitus virtuosos. Proinde & juxta hoc duplex principium effectivum, Virtutes ut sic recte dividuntur in infusæ, & acquisitæ. Et quidem *Virtutes infusæ* dicuntur ex, quæ nobis a D E O immediate infunduntur; ut sunt habitus Fidei, Spei, & Charitatis, qui etiam parvulis in Sacramento Baptismatis divinitus infunduntur; ut taceantur ex Virtutes, quæ Angelis, & primis nostris Parentibus in sua creatione a Deo infusæ fuerunt. *Virtutes acquisitæ* e contra sunt, quæ nostra industria, nostrisque frequentatis actibus comparantur, seu acquiruntur: ut sunt habitus Temperantiæ, Mansuetudinis, & hujusmodi; nam, ut inquit Philosophi, *ex frequentatis actibus fit habitus.* Ceterum de tertio membro datæ divisionis in Virtutes Theologicas, & Morales, mox amplius dicetur; hinc sit

**CONCL. III.** *Virtus Theologica ut sic recte describitur, dicendo: Virtus Theologica est virtus a Deo infusa, cujus principalis actus tendit in Deum tamquam objectum immediatum.* Ita in re Doctores communiter. Dicitur inprimis, *Virtus a D E O infusa:* nam Virtutes Theologicæ, prout sumuntur pro habitu, infunduntur homini a D E O in Sacramento Baptismi. Et additur,



cujus principalis actus tendit in DEUM; quia non est necesse, ut omnis ejus actus immediate tendat in DEUM; nam actus ille, quo quis credit revelationem Divinam, Mundum esse creatum in tempore, canem Tobiae in hujus adventu movisse caudam suam *Tob. cap. 11.* est quidem actus Fidei, non tamen tendit in DEUM immediate. Sufficit proinde ad rationem Virtutis Theologicæ, quod actus ejus principalis sic immediate tendat in Deum, utpote in quem credimus; quem consequi speramus, quem super omnia amamus.

9 Ceterum per illa verba tamquam objectum immediatum, assignatur differentia Virtutum Theologicarum a Moralibus, proveniens ex diversitate objecti. Siquidem Virtutes Theologicæ habent pro suo immediato objecto Deum, in quem earum actus principalis tendit, tamquam in objectum terminativum Quod: secus autem in Virtutibus Moralibus, puta in Religione, Temperantia, Misericordia, & aliis hujusmodi: nam hæc pro suo immediato objecto non habent Deum, sed vel cultum Deo exhibendum, vel passiones moderandas, aut miseriam indigentium sublevandam &c. Quamvis & hæc saltem mediate ac remote tendant in Deum, propter quem tales actus boni eliciuntur.

10 Si dicas. Religio etiam immediate respicit Deum, utpote cui defert cultum debitum, Eumque honorare satagit; ergo. Resp. claritatis gratia distinguendo antecedens; Religio respicit Deum ut objectum immediatum, ac terminativum Quod, negatur; ut objectum Cui: conceditur antecedens, sed negatur consequentia. Quia Virtutes Theologicæ respiciunt Deum ut objectum Quod, & quidem principaliter (nam actus principalis earum est, credere Deum esse, sperare Deum consequi in æterna beatitudine, Deum super omnia amare) Religio vero pro objecto Quod respicit cultum Deo deferendum, ipsum vero Deum respicit dumtaxat ut objectum Cui, cui videlicet cultum illud deferre laborat.

11 CONCL. IV. Tres tantum dantur Virtutes Theologicæ, videlicet Fides, Spes, & Charitas, & non plures. Ita omnes Theologi; nam prædictis tribus dumtaxat convenit definitio Virtutis Theologicæ proximè allata. Hinc & Apostolus 1. Corinth. 13. has tres tantum enumerat, dicens: *Nunc autem manent Fides, Spes, Charitas, tria hæc.* Et Concilium Trid. Sess. 6. cap. 7. de his tribus solummodo mentionem facit, dum inquit: *Unde in ipsa justificatione cum remissione peccatorum hæc omnia simul infusa accipit homo per Jesum Christum, cui inseritur, fides, spes & charitatem.* Quo tamen non obstante quælibet harum Virtutum Theologicarum distinguitur in habituales, & actuales; per hanc intelligendo actuale exercitium, sive actum ipsum Fidei, vel Charitatis; per illam vero habitum istarum Virtutum divinitus nobis infusum.

## QUESTIO II.

De perfectione, & cessatione Virtutum Theologicarum, & an habeant medium?

### SUMMARIUM.

- 12 Virtutes Theologicæ sunt perfectiores Moralibus.
- 13 Inter Theologicas quæ sit perfectior?
- 14 Charitas amittitur per omne peccatum mortale, non Fides & Spes.
- 15 Hæc tamen tunc informes sunt, non vivæ.
- 16 In Beatis manet Charitas, non Fides, & Spes.
- 17 Virtutes consistunt in medio, vel formaliter, vel tantum materialiter.
- 18 Et habent medium vel ex parte objecti, vel solum ex parte actus.
- 19 Virtutes Theologicæ, an, & quomodo habeant medium?

12 CONCL. I Virtutes Theologicæ sunt perfectiores omnibus Virtutibus Moralibus. Ita communis: nam Theologicæ habent perfectius objectum, videlicet ipsummet DEUM.

13 CONCL. II. Inter ipsasmet Virtutes Theologicas omnium excellentissima est Charitas, deinde Spes; non obstante, quod ordine generationis Fides præcedat Spem, & hæc Charitatem. Ita communis omnium, cum Doctore Angelico 1. 2. q. 62. art. 3. & desumitur ex illo 1. Corinth. 13. *Nunc autem manent Fides, Spes, Charitas, tria hæc: major autem horum est Charitas.* Accedit ratio: quia Charitas non perfectius conjungit Deo, quam Fides, & Spes. Imo Charitas est mater omnium Virtutum, ac sine ea ceteræ Virtutes non sunt meritoriae, nec profunt de condigno ad vitam æternam, juxta illud Apostoli 1. Corinth. 13. *Et si habuero omnem fidem, ita ut montes transferam, Charitatem autem non habuero, nihil sum. Et si distribuero in cibos pauperum omnes facultates meas, & si tradidero corpus meum, ita ut ardeam, Charitatem autem non habuero, nihil mihi prodest.*

14 CONCL. III. Charitas amittitur quidem per quodlibet peccatum mortale, non tamen semper Fides & Spes. Ita omnes Theologi. Nam Charitas defacto est impossibilis cum quolibet peccato mortali, ac per illud demeritorie destruitur: habitus vero infusus Fidei amittitur per oppositum actum Infidelitatis, & Spes per actum Desperationis.

15 CONCL. IV. Fides & Spes, quando in peccatoribus reperiuntur sine Charitate, non obstante, quod in propria sua specie sint perfectæ, nihilominus sunt informes, non vivæ, ac imperfectæ in tantum, quia non perducunt ad beatitudinem. Ita Doctor Subtilis 3. dist. 36. §. *De tertio*, idque desumitur tum ex verbis Apostoli 1. Corinth. 13. proxime relatis: tum ex illo ad Galat. 5. ubi dicitur: *in Christo JESU neque circumcisio aliquid valet, neque præputium, sed fides, quæ per Charitatem operatur.* Et in hoc sensu D. Augustinus lib. 15. de Trinitate cap. 18. ait: *Sine Charitate quippe Fides potest quidem esse, sed non & prodesse.* Et lib. 14. de Civitate Dei cap. 9. *Sic igitur fides est quidem sine Charitate, sed non perfecta virtus.*

16 CONCL. V. In Patria, seu in Statu gloriæ cœlestis, non remanet in Beatis Fides & Spes, bene tamen Charitas. Ita omnes Doctores. Probatur hoc imprimis de Fide: quia Fides est solum de illis rebus, quæ non videntur; unde D. Augustinus Serm. 27. De verbis Apostoli, ait: *Quid est Fides? Credere, quod non vides.* Atqui Beati vident Deum semper, ac intuitive; ergo non possunt amplius in Deum credere. Confirmatur: quia, ut inquit Apostolus 1. Corinth. 13. *Videmus nunc per speculum in enigmate, tunc autem facie &c.* Cum autem venerit, quod perfectum est, evacuabitur, quod ex parte est. Probatur idem de Spe: quia ut ait Apostolus Rom. 8. *Spes quæ videtur, non est spes: nam quod videt quis, quid sperat?* atqui Sancti in cœlis vident id, quod est objectum Spei, scilicet Deum, Eoque perfecte fruuntur; ergo amplius non sperant. Quod autem in Beatis maneat Charitas, certum est, juxta illud 1. Corinth. 13. *Charitas nunquam excidit.* Unde Sancti in cœlis perfectissime amant Deum.

17 Quantum attinet ad posteriorem partem Questionis, est præmittendum, quod Virtutes varie possint intelligi consistere in medio, videlicet formaliter & secundum se, vel dumtaxat materialiter. Formaliter, & secundum se, virtus consistit in medio, quando ipsemet habitus virtutis inter duos extremos habitus vitiosos sibi oppositos versatur, prout Liberalitas mediat inter Avaritiam, & Prodigalitatem; nam quodlibet horum vitiorum extreme opponitur Liberalitati: Avaritia quidem per defectum, sumptus etiam necessarios non faciendo; Prodigalitas vero per excessum, expendendo bona sua in sumptus non necessarios. Materialiter dicitur virtus consistere in medio, quando ex una quidem parte contingit formaliter peccari contra illam virtutem; ex altera vero parte non sic, sed solum per oppositionem ad aliam virtutem ob certas rationes & circumstantias: sic Temperantia



perantia mediat inter Intemperantiam in cibo & potu, & inter Inediam: nam Inedia, per quam quis voluntarie se interficit, formaliter non opponitur Temperantiae, sed Charitati erga se ipsum.

18 Alio adhuc modo Virtutes possunt intelligi, habere medium, nempe vel ex parte objecti, vel solum ex parte actus. Priori modo contingit, Virtutes habere medium, quando objectum actus virtuosi ita requirit medium, ut neque certam mensuram ejus excedere, neque ab eadem deficere possit: sic fit in virtute Temperantiae, quæ salvatur in mediocritate cibi & potus sumendi, ita ut neque plus, neque minus sumatur, quam exigit natura juxta præscriptum rectæ rationis. Posteriori modo Virtus intelligitur habere medium, quando virtus non petit certum modum ex parte objecti observandum, bene tamen in actibus circa illud versantibus, ne scilicet alio modo, quam oportet, exerceantur: sic amor Dei consistit in medio; nam non potest excedere ex parte objecti (Deus enim est dignus omni amore) bene tamen ex parte actus, volendo scilicet amorem Dei elicere illicito modo, v. g. occidendo se ipsum.

19 CONCL. VI. Virtutes Theologicæ habent quidem suo modo medium, quod possunt, ac debent observare; non tamen habent medium ex parte objecti sui formalis, sed solum ex parte actus, sive exercitii earum. Ita communis; idque suadet ex illo vulgato dicto: *Virtus consistit in medio*. Hinc *Isaia cap. 30.* dicitur: *Hæc est via, ambulate in ea, & non declinetis neque ad dexteram (scilicet per excessum) neque ad sinistram (nempe per defectum)* qualia etiam habentur *Deuter. 5.* & *Proverb. 4.* Et D. Apostolus *Rom. 12.* generatim præcipit, *Non plus sapere, quam oportet sapere*. Accedit ratio: quia in exercitio Virtutum Theologicarum potest dari non solum defectus, prout fit in omissione talium actuum tempore urgentis præcepti (ut taceamus vicia extreme opposita per defectum, nempe Infidelitatem, Desperationem, & Odium Dei) sed etiam excessus, si actus illi fiant modo indiscreto, & *plures quam oportet, sapere* volendo; prout fieret, seipsum ob amorem Dei putativum interficiendo, aut eidem immolando filium suum, prout olim fecerunt Gentiles.

## DISTINCTIO II.

### De Fide.

### QUÆSTIO I.

#### Quid sit Fides, & quod objectum ejus?

#### SUMMARIUM.

- 1 Fidei nomen varie accipitur.
- 2 Aliæ Fidei acceptiones,
- 3 Fides supernaturalis actualis.
- 4 Et habitualis, quid?
- 5 Objectum materiale Fidei, quod?
- 6 Objectum Fidei complexum, & incomplexum, quid?
- 7 Corollaria.
- (\*) Dist. 3. quæst. 5.
- 8 Objectum formale Fidei est veritas Dei.
- 9 Plebei, quomodo credant ob propositionem Concionatoris?
- 10 Evangelio non crederem, nisi me Catholicæ Ecclesiæ commoveret Auctoritas, quomodo intelligendum?

1 **S**Tylo receptissimo inter Virtutes Theologicas primo loco ponitur Fides, non quod ea sit dignior ceteris, sed quia, ut inquit Concilium Trid. *Sess. 6. cap. 8.* *Fides est humana salutis initium, fundamentum, & radix omnis justificationis*: quod intelligendum de Fide supernaturali, & Theologica. Siquidem generatim Fidei nomen varie sumitur, quando de pro Fidelitate seu

veritate in servandis promissis: in quo sensu is dicitur se vire Fidem, qui stat suis promissis. Deinde pro conscientia, seu dictamine ejus: sic accipitur *Rom. 14.* *Omne quod non est ex fide (id est, quod est contra dictamen conscientiae) peccatum est*. Quo modo etiam in Jure dicitur quis bonæ fidei possessor, qui bona conscientia quidpiam possidet, credens, illud esse suum. Tertio, Fides quandoque sumitur pro fiducia consequendi rem desideratam, aut promissam: prout accipitur *Matth. 14.* *Modica fidei, quare dubitasti?* Et *Jacobi cap. 1.* *Posculet autem in fide nihil habetis*. Quamvis hunc locum multi Doctores non absque fundamento accipiant de ipso actu Fidei Theologicæ, seu assensu credulitatis Divinarum promissionum, cujus effectus est prædicta fiducia, juxta illud *Marci cap. 11.* *Omnia, quaecumque petitis, credite, quia accipietis*.

2 Rursus aliquando fides accipitur pro objecto fidei, juxta illud Symboli S. Athanasii: *Hæc est fides Catholica*, id est, Articuli Fidei Catholicæ, seu objecta materialia ejus. Ultimo tandem, & proprie, ac quantum ad propositum, accipitur Fides pro Virtute intellectuali, & quidem Theologica, qua creditur aliquid propter auctoritatem Dei illud revelantis, Et dicitur, *propter auctoritatem DEI*: non enim hic loquimur de Fide humana, qua aliquid creditur propter auctoritatem hominum illud affirmantium; sed sermo est solummodo de Fide Divina, de qua Apostolus *ad Heb. 10.* dicit: *Justus ex Fide vivit*. His prænotatis, ut

3 CONCL. I. Fides supernaturalis actualis est actus supernaturalis, quo quis concurrente simul gratia Divina excitante, & collustrante assentitur alicui propositioni ex eo, quia Deus summe verus ipsam revelavit. Ita in re communis. Siquidem motivum Fidei actualis est veritas Dei, quidpiam nobis revelantis: nam quia Deus, qui nec fallere potest, nec falli, hoc aut illud hominibus revelare dignatus est, hinc Fide Divina credimus, illud esse verum.

4 CONCL. II. Fides supernaturalis habitualis est virtus divinitus nobis infusa, & donum Dei, quo firmiter assentimur iis omnibus, quæ a Deo nobis revelata sunt, quatenus sunt revelata. Ita communis Doctorum. Neque enim differt hæc definitio ab ea, quam affert S. Paulus Apost. *ad Heb. 11.* dicens: *Est autem fides, sperandarum substantiarum rerum, argumentum non apparentium*. Nam *ly argumentum non apparentium*, indicat totam naturam Fidei in data definitione clarius explicatam: *argumentum enim idem est, ac firma adhæsiō intellectus*: *ly non apparentium* &c. denotat, quod talis firma & infallibilis adhæsiō intellectus nitatur certitudine revelationis Divinæ, factæ de iis, quæ quidem nondum videmus, speramus tamen consequi in cælis. Unde additur, *sperandarum substantiarum rerum*: quibus verbis partim nobis indicatur primum objectum Fidei, qui est Deus, quemque pie vivendo in cælis consequi speramus: partim vero manifestatur quædam Fidei proprietas, utpote quæ debet esse certa & infallibilis, unde appellatur *substantia*: simulque est fulcrum Spei Christianæ, nam quæ speramus, fide Divina fiunt nobis certa.

5 CONCL. III. Objectum materiale primum incomplexum Fidei, est solus Deus; quamvis omnes aliæ a Deo nobis revelatæ propositiones spectent ad objectum materiale, minus tamen principale, & complexum fidei Divinæ. Ita rursus Theologi communiter. Ratio primæ partis est: quia, ut inquit D. Augustinus *lib. 4. de Civitate Dei. cap. 20.* *Fidei primum, & maximum officium est, ut in verum credatur Deum*. Accedit, quod inter omnia credibilia omnium maximum, atque præstantissimum sit ipsemet Deus; utpote qui est Ens infinitum, & summe bonum, & ad cujus cognitionem omnia cetera credibilia referuntur: latque hoc intelligitur per objectum primum materiale Fidei; ergo. Hinc in Symbolo Apostolorum mox a principio dicitur: *Credo in Deum* &c. & postmodum pro clario ejus cognitione ceteri Articuli subjunguntur.

6 Altera pars ex eo patet: quia per objectum materiale Fidei intelligitur illud, quod est credendum fidei



Divina, præsertim quando per auctoritatem Ecclesiæ nobis constat de tali revelatione a Deo facta; ergo etiam omne illud spectat ad objectum materiale. Et additur, *complexum*: nam per *Objectum Fidei complexum* intelligitur tota propositio objectiva divinitus revelata, cui assentimur mediante actu Fidei: per *incomplexum* vero intelligitur subjectum, & prædicatum talis propositionis divinitus revelatæ.

7 Inferitur proinde, quod ad objectum materiale Fidei spectet imprimis Deus, ejusque existentia, & Mysterium SS. Trinitatis. Deinde creatio Mundi, & redemptio generis humani per Christum facta. Insuper quidquid in S. Scriptura, seu Libris Canonicis continetur: nam quamvis eorum aliqua parum videantur ad Dei cognitionem facere, ut, quod canis Tobie caudam moveat, quod Saul quæsierit asinas, & hujusmodi; nihilominus quia & hæc a Spiritu sancto in Sacris Litteris nobis sunt revelata, pertinent ad objectum materiale, minus tamen principale Fidei, suntque credenda propter auctoritatem Divinæ veritatis, ac revelationis. Insuper spectant ad objectum materiale Fidei ea, quæ ex Traditione Apostolica nobis Ecclesia proponit credenda, ut dicetur inferius. (a)

8 CONCL. IV. Objectum formale & motivum Fidei supernaturalis, est prima & infallibilis veracitas Dei, seu veritas ejus in revelando. Ita Doctor Subtilis Quæst. 1. Prologi. cum Scotistis, & multis aliis. Ratio est: quia ideo credimus Fide Divina articulis Fidei, quia Deus eos nobis revelavit, & ideo credimus Deo revelanti, quia est prima veracitas; ergo veracitas Dei revelantis est ratio motiva Fidei Divinæ, & consequenter ejus objectum formale.

9 Nec dicas. Plurimi de plebe credunt articulis Fidei, non ex motivo veritatis Dei revelantis, sed ob propositionem Concionatoris, vel Ecclesiæ Catholicæ: atqui hi eliciunt veros actus Fidei Divinæ; ergo. Respondetur enim, distinguendo majorem: credunt articulis Fidei, ob solam propositionem Concionatoris, aut Ecclesiæ, negatur; credunt ob hanc, & simul implicite apprehensam revelationem veracissimam Dei, conceditur major: & eodem modo distincta minori, negatur consequentia. Siquidem dum homines simpliciores credunt articulis Fidei, sibi per Concionatores atque Ecclesiam propositis, simul apprehendunt, id a Deo fuisse revelatum, ob cujus infallibilem veracitatem credunt auditis, ac propositis sibi per Ecclesiam & Concionatores. Nam, ut dicitur Rom. 10. *Fides ex auditu, auditus autem per Verbum Christi*. Et 1. Thess. 2. *Quoniam, cum accepissetis Verbum auditus DEI, accepistis illud non ut verbum hominum, sed sicut est vere Verbum Dei*. Occasione cujus proinde

10 Quæritur, quomodo sit intelligendum illud dictum S. Augustini lib. contra epist. Fundamenti. c. 5. *Ego vero Evangelio non crederem, nisi me Catholica Ecclesia commoveret auctoritas*. Unde est communis praxis Fidelium, qui credunt, quidquid Sancta Mater Ecclesia credendum proponit? Resp. hoc ex eo fieri, non quod Ecclesiæ auctoritas sit objectum formale Fidei, seu ratio motiva credendi (hæc enim est sola veracitas Dei, quidpiam revelantis) sed quia Ecclesiæ auctoritas est ratio nobis proponens, seu ostendens objecta credendi. Nam per Ecclesiam proponuntur, ac exhibentur nobis illi Articuli, qui sunt credendi, atque per ipsam sive libri Canonici Sacræ Scripturæ, sive Traditiones Apostolicæ determinantur, atque declarantur, quod sint a Deo revelati, & a Spiritu Sancto dictati, vel a Christo ore tenus Apostolis traditi, atque per Apostolos posteris: sicque fit, quod hi potius, quam alii per Hæreticos, vel apocryphos libros jactitati, propter infallibilem veracitatem Dei Fide Divina sint a Fidelibus credendi. Quia igitur Spiritus sanctus in negotio tanti momenti non finit Ecclesiam, dilectam suam Sponsam, errare, securissime, & absque ullo erroris periculo creduntur propter Dei veracitatem, & fide Divina omnia ea, quæcumque Ecclesia nobis sic credenda proponit. Et hoc innuunt citata S. Augustini verba: *Evangelio non crederem, nisi me*

*Ecclesia commoveret auctoritas*: prout clare indicat ly commoveret.

## QUESTIO II.

Quanam puncta Fidei sint necessario explicite credenda.

### SUMMARIUM.

- 11 *Credere explicite, & implicite, quid? Fides explicita, & implicita, quæ?*
- 12 *Salus animæ, prima & ultima. Necessitas mediæ, & necessitas præcepti, quid?*
- 13 *Fides tum habitualis, tum actualis, quomodo necessaria ad salutem?*
- 14 *Infantibus & perpetuo amentibus, non est necessaria fides actualis.*
- 15 *Necessitas explicite credendi aliquos Articulos non est æqualis respectu omnium.*
- 16 *Fides explicita de existentia Dei, & ut Remuneratoris, requiritur necessitate mediæ.*
- 17 *Idem affirmant multi de Mysterio SS. Trinitatis, & Incarnationis Verbi.*
- 18 *Notabilis objectio solvitur.*
- 19 *Dicta solutio propugnatur, & objectio retorquetur.*
- 20 *Cognitio, & fides ex puris naturalibus non juvat ad justificationem.*
- 21 *Aliud est, explicite credere; aliud, explicite scire Articulos Fidei.*
- 22 *Non pauci tenent oppositam sententiam.*
- 23 *Quanam teneantur Fideles explicite credere necessitate præcepti?*
- 24 *Doctrina notabilis quoad hoc.*
- \* *Alia adhuc notabilis doctrina.*

11 **A**Dvertendum cum communi Doctorum, dupliciter nos posse credere Articulis Fidei, nimirum explicite, & implicite. *Credere explicite* idem est, quod distincte & in particulari credere aliquod Mysterium Fidei; puta, quod Deus sit unus in essentia, & in personis trinus; quod Christus pro nobis sit passus, &c. Unde *Fides explicita* dicitur, per quam res divinitus revelata, in se, & sub propria ratione creditur: ut fit in allatis exemplis. *Implicite vero credere* idem est, ac alicui propositioni Fidei attentiri confuse, in communi seu universali, quatenus virtualiter continetur in alia propositione, quam distincte credimus: ut, si quis credat, quidquid sancta Mater Ecclesia credendum proponit; talis enim implicite credit omnes Articulos Fidei. Hinc *Fides implicita* appellatur, per quam credimus res in universali, seu prout in aliqua alia propositione continentur.

12 Notandum ulterius, quod duplex possit intelligi necessitas Fidei ad salutem animæ (sive primam, quæ est gratia sanctificans; sive ultimam, quæ est æterna gloria, seu visio beatifica in Cœlis) una mediæ seu finis, alia præcepti. *Necessitas mediæ*, seu finis, dicitur illa, qua quidpiam ita est necessarium ad finem, puta ad salutem animæ consequendam, ut sine eo, quamvis inculpabiliter omittatur, finis, v. g. animæ salus, obtineri non possit: sic in statu Evangelii Baptismus aliquis, nimirum vel Fluminis, vel Flaminis, vel Sanguinis est necessarius ad vitam æternam, quia sine eo, etiam ex ignorantia invincibili, aut impotentia physica non suscepto, salus æterna obtineri non potest; uti patet in parvulis in utero materno decedentibus. *Necessitas præcepti* dicitur ea, qua quidpiam sub obligatione præcepti necessario præstandum est ad consequendam salutem æternam, eo quod alioquin quis transgrediendo præceptum mortaliter peccaret, nisi excuset ignorantia, vel impotentia. Addunt Doctores tertium membrum, nempe *Necessitatem mediæ, & præcepti simul*: prout defacto adultis hominibus necessarius est Baptismus Fluminis determinate ad salutem, casu quo possunt eum in resuscipere. His prænotatis, fit

13 CONCL. I. Fides non solum habitualis, sed & actualis, seu accepta pro ipso actu credendi aliquod supernaturale objectum, fuit omnibus, usum rationis habentibus.



habentibus, pro quocunque Statu necessaria ad gratiam, & æternam gloriam consequendam, & quidem necessitate mediæ seu finis, adeo, ut ea prætermiſſa salus animæ obtineri numquam potuerit, nec possit, etiam si inculpabiliter seu ex ignorantia invincibili non habeatur. Ita communis Theologorum, & patet ex illo ad Hebr. 11. *Sine fide impossibile est placere DEO: credere enim oportet accedentem ad DEUM, quia est, & inquirentibus se remunerator sit.* Quæ verba non solum de Fide habituali, quam solum suscipiunt parvuli in Sacramento Baptismatis, sed etiam de Fide actuali quorundam Myſteriorum quandoque ab adultis habenda, communiter intelliguntur a Doctoribus; idque ex se ipsis satis indicant. Hinc Innocentius XI. merito inter alias propositiones sequentem, ordine 16. damnavit, *Fides non censetur cadere sub præceptum speciale, & secundum se.*

14. Dicitur notanter, *omnibus hominibus usum rationis habentibus.* Quia infantibus, ac perpetuo amentibus, non est necessaria Fides actualis, sed sufficit habitualis, id est, habitus Fidei supernaturalis in Sacramento Baptismatis infusus. Unde Concilium Trid. Sess. 7. can. 13. de Baptismo ait: *Si quis dixerit, parvulos, eo quod actum credendi non habent, suscepto Baptismo inter fideles computandos non esse: ac propterea præstare, omitti eorum Baptisma, quam eos non actu proprio credentes Baptizari in sola fide Ecclesiæ, anathema sit.*

15. CONCL. II. Licet omnes fideles teneantur explicite credere aliquos Articulos Fidei, hæc tamen necessitas non est æqualis respectu omnium. Ita Scotus 3. dist. 25. q. 1. & alii. Ratio est: quia Majores Ecclesiæ, ut Prælati & præsertim Episcopi, tenentur habere fidem magis explicitam Myſteriorum Fidei Catholice, utpote qui subditos suos ex officio instruere tenentur de rebus Fidei. Minores vero, præsertim rudiores & simplices, de necessitate non tenentur omnes & singulos Articulos explicite & distincte credere, sed sufficit, principales credere explicite (quoniam autem hi sunt, mox dicitur) ceteros vero credere implicite, seu in generali, credendo, quidquid Ecclesia credendum proponit.

16. CONCL. III. Fides explicita de existentia veri Dei, & quod is sit iustus remunerator, decernens præmia iustis, & puniens supplicia, omnibus adultis usumque rationis habentibus, est necessaria ad salutem necessitate mediæ. Ita communis Doctorum, & desumitur ex citatis illis verbis Apostoli Hebr. 11. *Sine fide impossibile est placere DEO: credere enim oportet accedentem ad DEUM, quia est, & inquirentibus se remunerator sit.* Hinc Innocentius XI. merito inter alias sequentem, ordine 22. Propositionem damnavit: *Non nisi fides unius DEI necessaria videtur necessitate mediæ, non autem explicita Remuneratoris.*

17. CONCL. IV. Insuper multi Doctores volunt, necessario esse explicite credendum necessitate mediæ Myſterium SS. Trinitatis, nec non Myſterium Incarnationis, nempe Filium DEI esse pro nobis incarnatum, Christumque esse verum Deum & hominem. Ita sentit Sanchez lib. 2. in Decalog. cap. 2. n. 8. & seqq. citans pro hac sententia D. Thomam, Gabrielem, Molinam, Valentiam; idemque tenent Matrius, Sannig, Fillucius, Bassens, aliique plures. Rationem dant: quia hæc duo Myſteria sunt fundamentum totius nostræ salutis. Nam in nomine SS. Trinitatis confertur Baptismus, sine quo nemo potest salvari: per Christum vero sumus salvati, atque redempti, ipseque simul est verus Deus, verique Dei Filius, per quem creati sumus.

18. Nec obstat (inquiunt) quod multi Gentiles, quin & adulti prius in infantia baptizati, v. g. pueri in sylvis enutriti, & paulo post acquisitos annos discretionis morientes, aut muti & surdi a nativitate, invincibiliter ignorent hæc Myſteria, utpote numquam sibi proposita. Resp. enim, tales non damnati propter peccatum infirmitatis, sed vel propter peccatum originale, vel propter alia peccata contra Legem Naturæ commissa. Quod si vero quis eorum jam

baptizatus numquam mortaliter peccaverit, ad Divinam providentiam pertinet, ut vel speciali lumine supernaturali interius illustretur, vel ab aliquo alio hæc Fidei Myſteria eidem proponantur, ut explicite credere possit; prout in simili factum legitur Eunuchus Regiæ Candacis Act. cap. 8. & Cornelio Centurioni. Act. 10.

19. Neque hæc responsio cuiquam rara, vel voluntarie data videatur. Siquidem allata instantia non solum urget contra sententiam admittentem, quod explicite credendum sit necessitate mediæ Myſterium SS. Trinitatis, & Incarnationis Dominicæ; sed ea etiam solvenda est ab omnibus Theologis, utpote qui juxta novissimum Decretum Innocentii XI. num. 16. allegatum admittere tenentur, quod Fides explicita unius DEI ut Remuneratoris sit necessaria ad salutem necessitate mediæ. Nam pariter quaeritur, quomodo explicite possit credere in Deum ut Remuneratorem, sicque salvari mutus & surdus a nativitate, aut puer jam baptizatus, sed post acquisitos annos discretionis illico moriens, qui de æterna retributione, atque de Deo ut Remuneratore, invincibiliter nihil umquam audivit, imo (loquendo de illo surdo) neque audire potuit?

20. Nec juvat dicere, talia lumine naturali posse cognosci. Nam (si non detur responsio proxime allata) contra est: quia vel Deum ut Remuneratorem non licet naturali ratione cognoscere vel si hoc fieri possit (prout naturaliter potest cognosci, atque demonstrari existentia Dei) tamen istud non sufficit ad salutem, juxta cit. Decretum Innocentii XI. in quo pariter sequens, ordine 23. Propositio, damnata legitur: *Fides late dicta ex testimonio creaturarum, similiter motivo ad justificationem sufficit.* Et merito hæc propositio est damnata: nam ut loquitur Concilium Trid. Sess. 6. cap. 8. *Fides est humane salutis initium fundamentum, & radix omnis justificationis:* atqui hujusmodi initium, fundamentum & radix, nequit haberi ex puris naturalibus, quidquid olim contraxerint Pelagiani & Semipelagiani hæretici; ergo.

21. Addunt tamen Auctores hujus sententiæ, quod aliud sit, *explicitè credere* Articulos Fidei; & aliud, *explicitè scire*, ita ut quis interrogatus possit rationem reddere de prædictis Myſteris Fidei: primum enim necessarium est necessitate mediæ, non secundum. Insuper (inquiunt) sufficit, hujusmodi Articulos & Myſteria Fidei cognoscere saltem secundum substantiam, imo si quis tam hebes sit, ac obtusus ingenio, ut non possit hos omnes Articulos capere secundum substantiam, sufficit, si saltem assensum præbuerit hujusmodi Articulis ad salutem necessariis, eosque crediderit, dum sibi proponebantur a Parocho, vel alio. Quia sic jam tales explicite credunt, licet non explicite sciant illos, ita ut interrogati possint apte respondere, & rationem reddere: hoc enim posterius non est necessarium ad salutem necessitate mediæ, sed solum necessitate præcepti, a qua tamen rudes excusantur ratione suæ impotentiae Bassæus. v. Fides l. n. 11. cum aliis.

22. Dicitur notanter in Conclusionem, n. 17. data: *Insuper multi Doctores volunt &c.* Nam oppositam sententiam videlicet hæc duo Myſteria Fidei non esse necessario credenda necessitate mediæ, sed dumtaxat necessitate præcepti etiam non pauci tenent; ut Lugo disp. 12. de Fide n. 91. & seqq. citans Medinam, Vegam, Suarez, Turrianum, pluresque alios; eamque non minus probabilem censet Layman lib. 2. tract. 1. cap. 8. & Herincx disp. 7. de Fide n. 49. Ratio horum est: quia necessitas illa mediæ post prædicationem Evangelii neque habetur clare ex S. Scriptura, neque ex traditione Patrum, neque ex ratione; nam tam rationes, quam testimonia S. Scripturæ, atque Sanctorum Patrum, commode intelliguntur de necessitate præcepti, non mediæ.

23. CONCL. V. Omnes Fideles, postquam ad rationis usum pervenerint, tenentur necessitate præcepti explicite credere, & saltem quoad substantiam seu crasso modo scire Myſteria contenta in Symbolo Apostolorum, Orationem



tionem Dominicam, Sacramenta maxime necessaria, ut Baptismum, Eucharistiam, & Pœnitentiam; reliqua vero tunc, quando quis ea recepturus est, & v. g. Matrimonium initurus; item Præcepta Decalogi & Ecclesiæ. Ita Doctores communiter. Qua de causa omnes ejusmodi Articuli, & materiæ, dicuntur *Prima Fidei Rudimenta*, quæ in Catechesibus & Concionibus publice circumferuntur in Ecclesia, & omnibus proponuntur tamquam explicite credenda, & scienda.

24 Hoc tamen intellige: nisi impotentia, aut invincibilis ignorantia excuset: nam isthæc necessitas, talia explicite credendi & sciendi, est præcepti dumtaxat; unde potest excusare impotentia, aut invincibilis ignorantia, non minus, ac in aliis præceptis. Quod notandum pro hominibus agrestibus, & hebetibus: quamvis & hi pro viribus sint instruendi, ut præter primaria Fidei Mysteria sciant saltem ea, quæ ad dignam Sacramentorum receptionem ab ipsis peragendam, & status sui conditionem observandam, requiruntur. Certe Innocentius XI. anno 1679. sequentem inter alias Propositionem, ordine 64. damnavit: *Absolutionis capax est homo, quantumvis laboret ignorantia Mysteriorum Fidei, & etiam si per negligentiam, etiam culpabilem nesciat Mysterium Sanctissimæ Trinitatis, & incarnationis Domini nostri JESU Christi.* Hactenus Proposition damnata. Væ autem Pastoribus, quibus ex Officio sub gravissimo peccato incumbit pueros, aliosque ignorantes suæ Parochiæ in similibus instruere, si ex socordia negligent. O! quam longe utilius inquit P. Herincx hic D. 7. n. 42. instituerentur coram plebe Conciones Catecheticæ, quam conceptus subtiles captum plebis excedentes.

#### Additio.

\* Quæres occasione damnatæ Propositionis prius alata, quid ergo agendum Confessario, si in Confessionali deprehendat puerum, aut alium rudem vincibili laborare ignorantia principalium Mysteriorum Fidei, SS. Trinitatis, & Incarnationis Dominicæ, qui tamen serio promittit, quod ea velit proxime addiscere, sicque ignorantiam suam deponere? Ante Responsionem suppono, quod talis nequiret absolvi, si nollet eam, quam posset, deponere ignorantiam, uti per se patet ex propositione damnata, & ratione: etenim talis nolens deponere ignorantiam vincibilem, quam posset, est in actuali voluntate peccatum suum grave continuandi, sic utique incapax absolutionis? Quod si autem serio promittat, se velle proxime hanc ignorantiam deponere, de qua nunc cordintime dolet: Resp. conformiter libello fucincte declaranti propositiones damnatas I. Extra articulum mortis neque tunc talem esse absolvendum, antequam eundem Confessarius breviter, ac pro modulo pœnitentis instruat de Mysterio SS. Trinitatis, & Incarnationis. Ratio est: quia juxta prius dicta saltem probabile est, hæc duo Mysteria esse necessario credenda non solum necessitate præcepti, sed etiam necessitate medii, adeoque exponeretur Sacramentum probabili periculo nullitatis, si talis, antequam hæc credat Mysteria, actu absolveretur; nam, si quæ sunt necessaria necessitate medii, sine his nequit Sacramentum Pœnitentiæ valide subsistere &c. Sic si quis neque crederet Deum ut Unum, & Remuneratorem, talis, nisi prævie instrueretur, invalide absolveretur, non solum si laboraret ignorantia vincibili, sed etiam invincibili: nam absque necessariis necessitate medii nequit aliquis obtinere gratiam sanctificantem, adeoque nec gratiam absolutivam.

Resp. II. Si pœnitens iste de suis peccatis omnibus, sicque virtualiter de ista ignorantia (supposito, quod fuerit vincibilis) vere doleat cum proposito, nec tamen ob periculum imminens mortis amplius tempus videretur superesse, prævie ante absolutionem hunc instruendi de dictis Mysteriis SS. Trinitatis & Incarnationis, absolvi debet, non quidem absolute, sed conditionate: nam pariter probabile, imo probabilissimum est, dicta Mysteria esse necessaria tantum necessitate præcepti, non autem medii, adeoque bona ejus voluntas in his

circumstantiis, ubi amplius instrui nequit, redderet hunc capax absolutionis, non quidem absolute (ne ob probabilitatem alterius contrariæ sententiæ Sacramentum exponeretur periculo invaliditatis (sed conditionate. Videatur Dominicus Viva in sua Trutina Theologica in dictam propositionem. \*

### QUESTIO III.

Quo tempore obligentur Fideles ad eliciendum actum Fidei?

#### SUMMARIUM.

- 25 Præceptum Fidei affirmativum, & negativum, quid?
- 26 Obligatio eliciendi actum Fidei, Spei &c.  
Alia per se & directe, alia per accidens.
- 27 Datur præceptum Divinum per se obligans quandoque ad actum Fidei.
- 28 Non sufficit actum Fidei tantummodo semel in vita elicere.
- 29 Primum tempus, quo præceptum Fidei obligat.
- 30 Quando infidelibus adultis censeatur vera Fides sufficienter proposita?  
(b) De hoc inferius Dist. 3. n. 55. & seqq.
- 31 Circa Mysteria Fidei non licet sequi opinionem minus probabilem relicta probabiliori; & cur?
- 32 Quando pueri baptizati teneantur elicere actum Fidei?
- 33 Secundum tempus, quo præceptum Fidei per se obligat.
- 34 Tertium tempus dictæ obligationis. Diverse Doctorum sententiæ circa tempus, quo in vita decursu tenemur elicere actum Fidei.
- 35 Rarius peccatur contra hoc præceptum Fidei, cur?
- 36 Quartum tempus, quo per accidens & indirecte obligamur ad actum Fidei.
- 37 Qualis Confessio tunc sufficiat?
- 38 Quintum tempus, quo obligat præceptum Fidei, est articulus mortis.  
Moribundi ad actus virtutum Theologicarum maxime excitandi.

45 **C**onveniunt Doctores, præceptum Fidei duplex esse, unum affirmativum, aliud negativum. Præceptum Fidei affirmativum importat, ut ea omnia, quæ a DEO sunt revelata, atque ut talia nobis per Ecclesiam proposita, credamus. Negativum est, ut Fidem numquam negemus, neque dissentiamus rebus Fidei, nec etiam erroneis dogmatibus Divinæ veritati contrariis ab Ecclesia reprobatis fidem præstemus. Quia igitur certum est inter Doctores, quod præcepta negativa obligent semper & pro semper; hinc in nullo prorsus casu, aut tempore, licitum est Fidem negare, aut falsum credere. Econtra vero, quia præcepta affirmativa obligant quidem semper, sed non pro semper (id est, obligant solum pro determinato tempore, ac in certis casibus & circumstantiis) hinc Quæstio remanet, quando nam istud affirmativum Fidei præceptum obliget, siue quonam tempore quis teneatur ad eliciendum actum Fidei, & quidem internum; nam de Confessione externa Fidei dicitur *Quæst. seq.*

26 Caterum duplex considerari potest obligatio eliciendi actum internum Fidei (quod servata proportionem pariter dicendum de obligatione eliciendi actum Spei, vel Charitatis &c.) una per se & directe, altera vero indirecte & per accidens. Prior obligatio tunc censeatur adesse, quando præceptum affirmativum Fidei (Spei, vel Charitatis &c.) ex se ipso, atque immediate obligat, ita ut omittens tunc actum Fidei, contra hanc virtutem directe peccet. Indirecte seu per accidens dicitur obligare præceptum affirmativum Fidei, quando talis obligatio provenit ratione alterius præcepti obligatorii, quod observari non potest absque actu Fidei: ut quando actus Fidei est medium necessarium ad implendum præceptum alterius virtutis, quod servari nequit, nisi præcedat actus Fidei.



27 CONCL. I. Datur præceptum divinum per se obligans ad eliciendum quandoque actum internum Fidei. Ita communis Theologorum; atque desumitur ex S. Scriptura passim, ut ex cap. 16. *Marci* n. 29. allegando, & cap. 1. *ad Rom.* *Iustus autem ex fide vivit. Ad Heb.* 11. *Sine fide impossibile est placere DEO: credere enim oportet &c.* cum concordantiis. Hinc merito Alexander VII. hanc inter alias, ordine primam Propositionem, damnavit: *Homo nullo unquam vite sue tempore tenetur elicere actum Fidei, Spei, & Charitatis, ex vi præceptorum Divinorum ad eas virtutes pertinentium.*

28 CONCL. II. Præceptum Divinum de eliciendo actu Fidei per vitæ decursum sæpius obligat, nec sufficit actum Fidei tantummodo semel in vita elicere. Ita certa, & communis; atque præter textus S. Scripturæ proxime citatos, probatur ex illo 1. *Corinth.* 16. *Vigilate, sicut in fide.* Et 1. *Petri* 5. *Cui (diabolo) resistite fortes in fide.* Nam huiusmodi vigilantia, resistentia, & statio in Fide, non salvatur proprie in solo habitu, sed dicit actuale exercitium, simulque persistentiam in ea cum frequentatione actuum. Hinc rectissime Innocentius XI. damnavit sequentem, ordine 17. Propositionem: *Satis est, actum fidei semel in vita elicere.* Item hanc, ordine 65. *Sufficit illa Mysteria semel credidisse;* ubi sermo est de Mysterio Sanctissimæ Trinitatis, & incarnationis Domini Nostri JESU Christi. Verum descendendo magis ad particularia tempora dictæ obligationis, sit.

29. CONCL. III. Primum tempus, quo præceptum Fidei obligat, illud est, quando Fides cuipiam primitus sufficienter proponitur; tunc enim præceptum hoc per se obligat ad eliciendum actum credendi. Ita communis; & colligitur ex illo Salvatoris *Marc.* cap. 16. *Euntes in Mundum universum, predicate Evangelium omni creature: qui crediderit, & baptizatus fuerit, salvus erit: qui vero non crediderit, condemnabitur.* Quæ postrema verba gravem obligationem denotant, cum nemo, nisi ob peccatum mortale, condemnatur. Sed occasione hujus

30 Quæres, quandonam censetur cuipiam vera Fides sufficienter proposita? Respond. I. Loquendo de adultis infidelibus, tunc Fides censetur ipsis sufficienter proposita, ita ut non temere aut imprudenter, sed prudenter credant, & non credendo peccent contra præceptum Fidei, quando rationibus, signis sive notis, aut etiam miraculis, aliisque probationibus, accedente præsertim interiore lumine supernaturali, ita illis credibilia proponuntur Mysteria Fidei, ut recta ratio eisdem dicter, nostram Fidem esse veram, & contrariam Sectam esse falsam, juxta quod dicitur *Psal.* 92. *Testimonia tua credibilia facta sunt nimis.* (b) Et merito Innocentius XI. sequentem inter alias, ordine 4. Propositionem damnavit; *Ab infidelitate excusabitur Infidelis non credens ductus opinione minus probabili.*

31 Neque obstat, quod in aliis materiis moralibus quandoque liceat sequi opinionem minus probabilem. Disparitas enim est: quia in talibus non semper potest, adhibita etiam quacumque diligentia, certitudo, atque veritas ipsa deprehendi: bene tamen circa Mysteria de Fide credenda. Unde cognoscens ex memoratis motivis, suam opinionem circa credenda de Fide minus probabilem existere, aut accedente interiore lumine supernaturali tenetur probabiliorem, tutioremque partem sequi, & credere, aut consulendo doctiores, & Divinum auxilium ferventius implorando veritatem Fidei Catholicæ amplius investigare. Quod si vero vel ex superbia, vel ex inordinato terrenorum affectu, aut negligentia aliunde culpabili id facere intermiserit, jam hoc ipso ignorantia veræ Fidei erit vincibilis, atque culpabilis. Neque opinio illa, veritati Fidei contraria, respectu talis hominis potest revera dici probabilis, eo quod sit destituta gravi fundamento: cum contra eam stet, seu militet ratio convincens, ex infallibili veracitate DEI revelantis deprompta, quam talis, cognita præsertim majori probabilitate assertionis Catholicæ, magis investigare & potuisset, & debuisset, ac nihilominus hoc culpabiliter facere neglexit, haud obstante, quod istud cognoverit

Anacl. Reiffenstuel. Theol. Tom. I.

esse negotium gravissimum, & tangens totam æternitatem.

32 Resp. II. Loquendo de pueris inter Fideles educatis, tunc illi tenentur vi hujus præcepti elicere actum Fidei, quando rationis usum consecuti Mysteria Fidei audiunt, apprehenduntque, quod illa credere sit necessarium ad salutem. Unde, si tunc non eliciant actum Fidei, peccant contra istud præceptum, nisi forte per inadvertentiam excusentur, aut actus Fidei notabiliter non differatur. Et hoc ultimum idcirco additur: quia ejusmodi obligatio non est accipienda pro metaphysico instanti, sed morali; ita videlicet, ut in re tanti momenti non fiat notabilis mora, arbitrio viri prudentis. Sanchez lib. 2. in *Decal.* cap. 1. n. 3. & seqq. Herincx disp. 7. de fide. quest. 6. n. 76. & alii.

33 CONCL. IV. Alterum tempus, quo præceptum Fidei per se obligat, tunc est, quando urget gravis tentatio contra Fidem, quæ aliter vinci nequit: tunc enim tempus est resistendi contrariis actibus Fidei, sequæ in vera Fide muniendi. Idem dicendum, quando imminet periculum abnegandæ Fidei ex horrore tormentorum: idque ob rationem datam. Item, quando instat præceptum exterius confitendi Fidem: hanc enim debite ac veraciter confiteri non possumus, nisi interior Fidei assensus accedat. Herincx num. 77. Sanchez, Basæus & Fides l. n. 16. & alii.

34 CONCL. V. Insuper per vitæ decursum aliis quandoque temporibus urget præceptum eliciendi actum internum Fidei. Ita communis; atque desumitur ex dictis Concl. I. & II. Verumtamen in assignando determinato tempore hujus obligationis, multum variant Auctores: nam aliqui statuunt tempus unius anni: ut Sanchez loc. cit. n. 3. post Ledesnam. Alii assignant Festa solemniora, in quibus celebrantur aliqua Mysteria Fidei; tunc enim dicunt, teneri nos virtute hujus præcepti elicere actum Fidei circa talia Mysteria. Quidam vero non improbabiler asserunt, singulis diebus Dominicis adesse talem obligationem credendi: quorum sententiæ favet Doctor Subtilis 3. dist. 9. quest. un. §. De secundo. dicens, quod Dominicis diebus saltem videatur adoratio aliqua necessario exhibenda Deo. Et tandem nonnulli censent, hoc committendum cujusque arbitrio, dummodo actus internus credendi non nimium differatur: eo quod tempus hujus obligationis nullibi clare determinatum reperiatur.

35 Pro praxi tamen advertendum, quod quamvis Fideles sæpius in vita teneantur elicere actum internum Fidei, ut dictum est: nihilominus ipsi ob hoc non debeant reddi anxii & perplexi, quasi non semper satisfecissent. Nam imprimis plerumque excusantur ratione ignorantie, vel inadvertentie hujus obligationis; eoque magis, quod neque Doctores conveniant in determinatione temporis, quo urget dicta obligatio, contra quam proinde rarius peccatur. Deinde practice loquendo ejusmodi obligationi censetur satisfieri per actus Fidei, qui concurrunt in exercitio aliorum. Actuum bonorum, utputa Spei, Charitatis Dei, Pœnitentie, Orationis, devotæ recitationis Symboli, formatione signi Crucis, auditione Missæ, ac huiusmodi. Herincx loc. cit. num. 76. Sannig dist. 1. de Fide. quest. 21. n. 3. & alii

36 CONCL. VI. Ulterius per accidens & indirecte obligatur quis ad internum actum Fidei eliciendum, quotiescumque adest obligatio exercendi actum alterius virtutis præsupponentis actum Fidei. Ita certa, & communis. Ratio clara est: quia, si quis obligetur ad exercitium alterius virtutis, hoc ipso obligatur ad ponenda media ipsius, atque omne illud, sine quo nequit haberi exercitium actus præcepti. Sic qui in certis circumstantiis tenetur Contritionem elicere, tenetur pariter actum Fidei habere; non enim potest quis propter Deum offensum conteri de peccatis, nisi credat & DEUM esse, & ipsum pœnitentibus peccata remittere. Idem servata proportionem dicendum in casu, quo quis obligatur elicere actum Spei, vel Charitatis, aut Religionis &c. cum & hi præsupponant actum Fidei.



37 Dicitur in Conclusionem, per accidens & indirecte. Siquidem hæc Conclusio loquitur de illis casibus, in quibus præceptum Fidei non obligat per se & directe, sed dumtaxat per accidens, quatenus homo aliunde tenetur elicere actum certæ virtutis, quem elicere nequit absque præsupposito actu Fidei. Et hinc, qui in tali casu non elicit actum illius alterius virtutis, v.g. non convertitur ad DEUM per veram contritionem, satisfacit in Confessione, dicendo, *Se non elicuisse talem actum virtutis*, v. g. Contritionis, cum elicere teneretur: nam præceptum Fidei tunc per se non obligabat. Bassæus v. Fides l. n. 15. & alii.

38 CONCL. VII. Quintum & ultimum tempus, quo obligat hoc præceptum, est articulus mortis. Ita communis. Ratio est: quia tunc magis tenetur homo sese munire adversus tentationes diaboli, seque conjungere DEO, tamquam ultimo Fini, per actum Fidei, quæ est prima, & omnium reliquarum virtutum fundamentum, ac radix nostræ justificationis. Et hinc præsertim moribundi excitandi sunt ad eliciendos actus Fidei, aliarumque virtutum Theologicarum, nec non & Contritionis, prout passim monent Ritualia Diocesana, alique libri: idque tum ex eo, ut per exercitium harum præstantissimarum virtutum homo moriturus sese amplius conjungat DEO, tamquam ultimo Fini: tum quia hujusmodi actus sunt valde meritorii, atque ad depellendas, superandasque tentationes diabolicas, tunc fortius urgentes, efficacissimi: tum quia præceptum Divinum de exercendis harum virtutum actibus maxime tunc obligare dignoscitur.

#### QUÆSTIO IV.

Quæ sit obligatio exterius confitendi, & profutendi Fidem?

#### SUMMARIUM.

- 39 Actus Fidei, item Confessio & Professio Fidei, quomodo differant?
- 40 Datur præceptum Divinum de non neganda Fide externe.
- 41 Etiam externa Fidei confessio quandoque est de præcepto.
- 42 Duplex necessitas externa confessionis Fidei.
- 43 Quando obligemur ad externam Fidei confessionem?
- 44 Casus, in quibus necesse est Fidem occultare modo licito.
- 45 Varii modi Fidem licite occultandi.
- Quando liceat eam occultare tacendo, vel non?
- 46 Quando Fides possit, vel non possit occultari fugiendo?
- 47 Licetum est, eam occultare signis ex se indifferentibus.
- 48 Nisi ea præcipiantur in contemptum Fidei, &c.
- 49 Et nisi sint instituta ad profitendam falsam Religionem.
- 50 Quid si talia fiant per jocum, aut in Comædiis?
- 51 Vestibus infidelium, quando sit licitum uti?
- 52 Et quando non?
- \*Item quando liceat equivocare?

39 **N**Otandum, quod assensus seu actus Fidei corde fiat, confessio autem Fidei præstetur ore; juxta illud Apostoli ad Rom. cap. 10. Corde enim creditur ad justitiam, ore autem confessio fit ad salutem. Sicut autem exterior confessio Fidei fit verbis, ita professio fit factis, aut rebus externis v. g. vestibus, vel aliis in signum illius assumptis.

40 CONCL. I. Datur præceptum Divinum de non neganda Fide externe. Ita est de Fide, atque in Concilio Romano sub S. Cornelio Papa definitum contra hæresin Elcesaitarum, dicentium, posse instante persecutione negari Fidem exterius, dummodo ea corde retineatur. Sed Catholica veritas aperte desumitur ex verbis Christi Matth. 10. Qui negaverit me coram hominibus, negabo & ego eum coram Patre meo. Item 2. Timoth. cap. 2. Si negaverimus eum, & ille negabit nos. & alibi. Hæc ipsum confirmat exemplum tot millium

SS. Martyrum, qui mori maluerunt, quam Fidem exterius negare.

41 CONCL. II. Etiam externa Fidei confessio pro aliquo tempore est de præcepto. Ita rursus omnes Catholici. Patet hoc ex illis verbis Christi. Matth. 10. Omnis ergo, qui confitebitur me coram hominibus, confitebor & ego eum coram Patre meo. & alibi.

42 Dicitur notanter, pro aliquo tempore. Duplex enim est necessitas externæ confessionis Fidei in præmissis duabus Conclusionibus insinuata. Una negativa, scilicet Fidem exterius non negandi: & hæc, cum in præcepto negativo fundetur, obligat semper & pro semper; numquam enim licitum est, Fidem exterius negare, licet corde retineatur, juxta dicta n. 40. Altera est affirmativa, videlicet Fidem exterius confitendi, sive verbis sive factis: & hæc necessitas, quia fundatur in præcepto affirmativo, obligat quidem semper, non tamen pro semper, sed pro aliquo determinato dumtaxat tempore. Quale autem sit hoc tempus per sequentes Conclusiones restat declarandum; hinc sit

43 CONCL. III. Tunc obligamur ad externam Fidei confessionem, quando per ejus omissionem subtraheretur notabilis ac magnus honor debitus DEO, aut utilitas proximis, ne pervertantur in fide, impendenda. Ita Doctores communiter cum D. Thoma 2. 2. q. 3. art. 2. Unde si quis de Fide interrogatus taceret, & ex hoc crederetur, quod Fides non esset vera, aut alii per ejus taciturnitatem averterentur a Fide, peccatum fieret: nam in hujusmodi casibus obligat præceptum confitendi Fidem, cum omisso talis confessionis foret contra honorem Dei, vel utilitatem proximi spirituales.

44 Secus est, quando spectatis omnibus circumstantiis nulla honori Divino injuria notabilis infertur, neque tale imminet detrimentum proximo in ipsa sua vera Fide, imo potius timetur turbatio Infidelium suborbitura absque alia utilitate Fidei, aut Fidelium: nam tunc non obligat præceptum affirmativum Fidei exterius confitendæ (etsi hanc negare numquam liceat) neque est laudabile, in tali casu Fidem publice confiteri, imo necesse tunc est, eam occultare modo licito. Unde ait Christus Matth. 7. Nolite Sanctum dare canibus, neque mittatis margaritas vestras ante porcos, ne forte conculcent eas pedibus suis, & caties conversi dirumpant vos. Ita recte observat Doctor Angelicus loc. cit. ad 3. & alii passim.

45 CONCL. IV. Extra casum, quo propter honorem DEI, vel proximorum salutem urget præceptum affirmativum Fidei exterius confitendæ, licite Fides occultatur variis modis. Et I. quidem tacendo, vel interrogantem, si fuerit privata persona, ratione quadam congruenti eludendo. Additur notanter, si fuerit privata persona: nam interrogatus de sua Fide ab eo, qui publica auctoritate fungitur, aut a Judice, tenetur ex præcepto affirmativo Fidei eam sine ambiguitate & verborum æquivocatione ingenue confiteri, etiamsi ex illa Fidei confessione sibi mors impendat: quia tunc redundat ingens honor DEI, & Fidei nostræ. Nec obstat, quod sit secutura perturbatio Infidelium: hæc enim ob tantam utilitatem honoris divini, Fideique Christianæ, tunc est contemnenda: sic enim semper sensit S. Rom. Ecclesia, & exemplum dederunt SS. Petrus & Joannes Act. 4. Hinc Innocentius XI. sequentem inter alias Propositionem, ordinē 18. damnavit: Si a Potestate publica quis interrogetur, fidem ingenue confiteri, ut Deo, & Fidei gloriosam consulo: tacere, ut peccaminosum per se non damno.

46 II. Potest licite Fides occultari fugiendo. Siquidem licitum est homini Christiano, tempore persecutionis fugere, vel sese occultare, ne cogatur de rebus Fidei respondere, sicque possit periculum vitæ evadere: unde dixit Salvator Matth. 10. Cum persequerentur vos in civitate ista, fugite in aliam. Accedit ratio: quia sic fugiens non significat, se non esse Christianum, vel se negare Fidem; sed potius indicat contrarium, scilicet se nolle Fidem Christi negare, ac malle fugiendo periculum eam negandi evitare. Potest tamen contingere, quod hujusmodi fuga ob aliquas speciales circumstantias reddatur illicita



si nimirum ex tali fuga redundet periculum in honorem DEI, aut proximorum salutem, quod sua præsentia evitaretur: ut si Episcopus, vel Parochus tempore persecutionis fugiat, cum tunc maxime illius opera & auxilio subditi indigeant; tenentur enim ex officio subditis suis consulere in necessariis ad salutem. Unde Christus Joan. cap. 10. ait: *Bonus pastor animam suam dat pro ovibus suis; mercenarius autem videt lupos venientes, & fugit.*

47 III. Licitum est occultare Fidem signis, quæ ex se sunt indifferentia; non vero illis, quæ ad profitendam falsam Religionem instituta sunt. Ita Mastrius disp. 10. Theol. Moral. num. 12. & communis aliorum. Sic, ut alii taceantur, S. Sebastianus in Aula Diocletiani licite occultavit fidem sub chlamyde militari, ut Christianos commodius adjuvare valeret. Similiter secluso scandalo non est illicitum ingredi Tempia hæreticorum, vel eorum Conciones audire curiositatis gratia, cum talis ingressus de se sit indifferens. Item transiens per loca Infidelium, & hæreticorum, potest diebus jejunii vesci carnibus metu mortis, carceris, vel amissionis bonorum, alioquin, si deprehenderetur, incurrendæ: quia etiam esus carniū ex se est indifferens, neque abstinentia illa est introducta ab Ecclesia ad discernendos Catholicos ab hæreticis, nec urget præceptum jejunii Ecclesiastici, cum tanto periculo mortis, aut hujusmodi. Et idem dicendum de similibus.

48 Hæc tamen intellige, nisi Princeps infidelis aut hæreticus talia præciperet in contemptum Fidei; vel ad profitendam falsam Sectam suam: quia tunc talia non licerent, cum cederent in contemptum Fidei, aut legis Ecclesiasticæ; unde potius cuidam moriendum esset, quam comedere carnes diebus prohibitis in contemptum Fidei, vel Ecclesiæ Catholicæ appositas. Similiter non liceret illis diebus comedere carnes ab Infidelibus, vel hæreticis appositas ad explorandum, an quis sit Catholicus, si inde sequeretur notabilis Divini honoris diminutio, vel proximi scandalum, juxta dicta num. 43. atque docet eum aliis citatus Mastrius n. 13. Unde Apostolus 1. Corinth. 8. ait: *Si esca scandalizat fratrem meum, non manducabo carnem in æternum.*

49 Additur notanter num. 47. non vero illis, quæ ad profitendam falsam Religionem instituta sunt. Sic enim non est licitum, imo foret peccatum contra præceptum negativum Fidei, sacrificare Idolis, vel coram illis genua flectere, aut imaginem inanum deorum ad collum gestare, vel alias cæremonias, seu actiones facere, quæ ex sua natura protestativæ sunt falsæ Religionis, etiam si quis talia fecte faceret. Ratio est: quia tales actiones cultum supersticiosum intrinsece continent, suntque ex sua natura falsæ Religionis protestativæ; unde neque metu mortis licet eum cultum exterius exhibere, quantumvis animo fecto.

50 Excipe, nisi id fiat per modum joci, aut representationis, prout in Comædiis fieri solet: hæc enim non est illicita, cum non sit falsæ fidei protestatio, sed potius representatio illius per modum irrisionis, idque aspicientibus abunde pateat, uti supponitur.

51 Quæres I. An licitum sit Fideli, per Provincias Infidelium transeunti, illorum vestibus uti ad occultandam Fidem causa mortis vitandæ? Resp. Solutionem patere ex hæcenus dictis: nam licitum est deferre habitum Infidelium, qui ab istis portatur sine ullo Religionis intuitu, sed solum varius est pro diversitate Nationum, & Provinciarum, prout passim in Anglia, atque aliis hæreticis Provinciis, eorum vestibus utuntur Catholici. Idem etiam quandoque fit in Turcicis Regnis.

52 Secus foret dicendum, neque liceret uti talibus infidelium vestibus, si essent per ipsorum Principes institutæ ut signum ad eorum Sectam profitendam: nam tunc, qui talibus vestibus ad professionem falsæ Religionis deputatis uteretur, hoc ipso talem Sectam vel Religionem exterius profiteretur, quod est contra præceptum negativum Fidei de non profitenda falsa Religione, neque neganda exterius vera Fide, ut dictum num. 40.

Anacl. Reiffenstuel Theol. Tom. I.

Additio.

\* Quæres II. An licitum sit Sacerdoti, aut Religioso vitandæ mortis causa, vel ob aliquod notabile Bonum spirituale salutis animarum tacere, vel verbis ambiguis seu æquivocis eludere, supposito, quod interrogetur a Principe, sive Magistratu acatholico, per cujus regionem transit, num sit Sacerdos, vel Religiosus? Respondetur affirmative, nisi ex circumstantiis honor Divinus notabiliter, aut salus animarum exinde in fide periclitaretur. Ita Sporer Parte 2. in 1. Præcept. Decal. cap. 2. Sect. 4. §. 1. Ratio est: quia hæc interrogatio non est de ipsamet nostra Fide (cum multi sint Catholici, & tamen nec Sacerdotes, nec Religiosi) sed tantum de aliquo particulari statu, nimirum Clericali vel Monachali, quem injuste & ex mero odio erga hunc statum interroganti non tenemur cum tam gravi damno proprio, vel alieno confiteri, adeoque erit locus verbis indifferentibus & ambiguis: quoniam talis Judex vel Magistratus in his circumstantiis non legitime interrogat. Quinimo, si talis positive negaret coram hæreticis, se esse Sacerdotem, vel Religiosum, committeret quidem mendacium, sicuti si id faceret coram Catholicis, non tamen grave in materia fidei. Secus dicendum, si negaret, se esse Catholicum, vel Papistam; ubi per Papistam intelligitur ordinarie subditus Papæ quoad spiritualia. Ita noster Franciscus Henno Tract. de Virtut. disp. 4. quæst. 1. Conclus. 1. Resolut. 8. \*

### D I S T I N C T I O III.

De Ecclesia, Libris Canonicis, & Traditionibus.

#### Q U Æ S T I O I.

De vera Christi Ecclesia.

#### S U M M A R I U M.

- 1 Ecclesia, quid?  
Dividitur in Triumphantem, Purgantem, & Militantem.
- 2 Ecclesia Militans sumitur dupliciter.  
Synagoga, quæ?
- 3 Vera Christi Ecclesia in terris est visibilis.
- 4 Solvitur objectio hæreticorum.
- 5 Vera Ecclesia Caput invisibile est Christus,  
Visibile Summus Pontifex.
- 6 Nec tamen Ecclesia est biceps.
- 7 Vera Ecclesia Christi non potest errare in Articulis Fidei, neque deficere.
- 8 Extra eam nemo salvatur.
- 9 Quid dicendum de Catechumenis?

1 **N**omine Ecclesiæ, quantum ad propositum, communiter a Doctoribus Catholicis intelligitur certus hominum cœtus, ad veram Dei cognitionem & cultum, veramque Religionis societatem divinitus evocatus. Et Ecclesia sub hac ratione generaliter sumpta, dividitur in *Ecclesiam Triumphantem*, quæ Beatos in cœlis complectitur: *Purgantem*, quæ continet Animas Purgatorii: & *Militantem*, quæ Fideles in præsentī vita etiam cum hostibus humani generis militantes comprehendit. Nihilominus adhuc triplex hæc Ecclesia propter unitatem Capitis sui, quod est Christus Dominus, censetur unica tantum Ecclesia, tres ejusmodi diversas partes in se continens, juxta quod dicitur in Symbolo: *Credo in Unam, Sanctam, Catholicam, & Apostolicam Ecclesiam.*

2 Ceterum in præsentī potissimum sermo est de Ecclesia Militante. Et hæc rursus dupliciter sumitur; primo late, seu universaliter pro cœtu omnium Fidelium ab initio mundi usque ad finem ejus existentium quomodo loquitur S. Gregorius Papa Homil. 19. in Evangel. *Universalis Ecclesia, ab Abel justo usque ad ultimum Ele etum, qui in*



*sine mundi nasciturus est.* Deinde, & quidem frequentius, Ecclesia sumitur pro cœtu, seu congregatione omnium Christi Fidem atque doctrinam profitentium, quæ sub uno & summo post Christum Capite & Pastore in terris gubernatur. Et hoc modo sumimus Ecclesiam in proposito: nam Ecclesia Dei, prout erat sub veteri Testamento, seu tempore Legis Mosaicæ, proprio nomine *Synagoga* appellatur; juxta quod ait Breviarium Romanum, die 8. Maji, de S. Michaelis Archangelo: *Eum ut olim Synagoga Judeorum, sic nunc custodem & patronum Dei veneratur Ecclesia.*

3 CONCL. I. De fide est, veram Christi Ecclesiam in terris esse visibilem: cujus quidem Caput primum, sed pro nunc invisibile, est Christus Dominus; post ejus vero discessum Caput visibile totius Ecclesiæ Militantis est Romanus Pontifex, Christi in terris Vicarius. Ita omnes Catholici; quamvis hæretici hoc visibile Caput Ecclesiæ communiter negent, ac multifarie impugnent, perpetuoque odio prosequantur, cum videant, ab Eodem suas hæreses palam confundi, condemnari & profligari. Prior pars hujus Conclusionis, videlicet veram Christi Ecclesiam in terris esse visibilem, probatur ex S. Scriptura contra Hæreticos. Et inprimis illo Salvatoris Matth. 18. *Quod si non audierit eos, dic Ecclesiæ, si autem Ecclesiam non audierit, sit tibi sicut ethnicus & publicanus.* Similiter S. Paulus ait *Actor. cap. 20. Attendite vobis, & universo gregi, in quo vos Spiritus Sanctus posuit Episcopos, regere Ecclesiam Dei.* Et 1. Timoth. 3. inquit idem Apostolus: *Hæc tibi scribo, ut scias, quomodo oporteat te in Domo Dei conversari, quæ est Ecclesia Dei vivi.* Atqui nemo potest dicere Ecclesiæ, neque scire, num alter eam audierit, neque etiam potest quis regere Ecclesiam Dei, nisi ea sit visibilis, & sciatur, quæ sit illa Ecclesia; ergo.

4 Nec obstat, quod obijciunt hæretici. Quidquid fide credimus, non est visibile: sed Ecclesiam fide credimus juxta illud Symboli Apostolici: *Credo in sanctam Ecclesiam Catholicam;* ergo ea non est visibilis. Resp. enim inprimis reterquendo argumentum; nam Christus Joan. 20. dixit: *Quia vidisti me Thoma, credidisti:* ergo in sano sensu, quod videmus, credere possumus, dum videlicet aliud videmus, & aliud credimus, prout fit in proposito. Resp. itaque secundo, majorem esse veram dumtaxat in hoc sensu, quod sub ea ratione, qua aliquid videtur, id sub fidem non cadat; quamvis bene possit credi sub alia ratione, sub qua non videtur, ut probat exemplum S. Thomæ Apostoli. Sic in proposito Ecclesia est visibilis, in quantum videntur homines eam constituentes, & auditur professio Fidei, ac cernuntur sacræ Cæremoniæ: quod autem isthæc constituent veram Christi Ecclesiam, hoc non videtur, sed creditur, Deo id multipliciter attestante.

5 Altera pars Conclusionis, quod hujus veræ Ecclesiæ Caput primum sit Christus, nemo Christianorum est, qui neget; id siquidem expressissime docet Apostolus ad Ephes. cap. 5. dicens: *Christus est caput Ecclesiæ.* Et rursum Ephes. 1. *Et ipsum (Christum) dedit caput supra omnem Ecclesiam, quæ est corpus ipsius:* videlicet Corpus mysticum, cujus ipse est Caput mysticum, & quidem ob suam supremam excellentiam, atque Divinitatem, primum & principale. Ultima tandem pars, quæ est contra hæreticos; probatur ex eo: quia quamvis Christus in cœlis existens maneat adhuc Caput Ecclesiæ invisibile, quatenus eandem adhuc gubernat, & regit, fovetque per internum influxum gratiarum supernaturalium: non tamen manet Caput visibile Ecclesiæ Militantis, utpote quam non amplius per semetipsum gubernat modo visibili (prout olim fecerat in vita sua) cum nec amplius eidem Ecclesiæ Militanti sit visibiliter præsens. Unde ne Ecclesia sua visibilis careret Capite visibili, sanctum Petrum, atque ejus legitimos Successores, Summos videlicet Pontifices, constituit Caput Ecclesiæ visibile, suumque in terris Vicarium, dicens eidem Petro post resurrectionem suam trina vice Joan. 21. *Pasce agnos meos, pasce oves meas.* Id ipsum patet ex aliis Sacræ Scripturæ locis, prout amplius ostendunt

Controversiæ.

6 Nec dicas, hinc sequi, quod Ecclesia sit biceps, & consequenter monstrosa. Negatur enim sequela. Quia Christus est Caput Ecclesiæ primum, atque invisibile; S. Petrus vero, ejusque legitimi Successores, sunt Caput Ecclesiæ dumtaxat secundarium & vicarium, visibile tamen, quod est primario subordinatum. Unde non sequitur, quod Ecclesia sit biceps; sicuti neque Regnum quodcumque temporale censetur biceps, quod in absentia sui Regis gubernatur per Proregem, utpote qui plene subordinatur Regi, ipsiusque vices dumtaxat gerit, ac ejus nomine cuncta gubernat.

7 CONCL. II. Vera ac visibilis Ecclesia ex speciali promissione Christi, & assistentia Spiritus Sancti, non potest errare in Articulis Fidei, neque omnino deficere. Ita omnes Catholici; quamvis hæc Conclusio intelligenda sit non de aliqua parte Ecclesiæ (nam certum est, aliquam partem Ecclesiæ, id est, nonnullos Christianos, imo & aliquas partes Orbis Christiani errare posse, & reipsa quandoque errasse) sed de tota & universali Ecclesia. Conclusio sic explicata probatur ex illo Salvatoris Matth. 16. *Tu es Petrus, & super hanc petram ædificabo Ecclesiam meam, & portæ inferi non prævalent adversus eam.* Item Matth. 28. promittit Christus Ecclesiæ perpetuam suam assistentiam, dicens: *Et ecce, ego vobiscum sum omnibus diebus, usque ad consummationem sæculi.* Et Joan. c. 16. *Spiritus veritatis docebit vos omnem veritatem.* Et Timoth. 3. vocatur Ecclesia Dei vivi, columna & firmamentum veritatis. Atqui si Ecclesia universalis in Fide aliquando erraret, aut omnino deficeret, jam prævalerent adversus eam portæ inferi, neque ipsa esset columna & firmamentum veritatis, neque aliæ dictæ Christi promissiones verificarentur; ergo.

8 CONCL. III. Extra veram Christi Ecclesiam nemo potest salvari. Ita certum, estque decisum in Concilio Generali, seu Lateranensi sub Innocentio III. atque refertur cap. *Firmiter, de Summa Trinitate*, ubi dicitur: *Una vero est Fidelium universalis Ecclesia, extra quam nullus omnino salvatur.* Idque SS. Patres passim declarant exemplo Arcæ Noe, extra quam regnante diluvio nullus hominum mortem evaserat; ac præsertim S. Hieronymus in Epistola ad Damasum Papam (& habetur c. *Quoniam vetusto* 24 q. 1.) ubi Cathedram S. Petri, seu Ecclesiam Catholicam Arcæ Noe comparans, subjungit: *Si quis in Arca Noe non fuerit, peribit regnante diluvio.*

9 Nec obstat, quod juxta D. Ambrosium, aliosque Sanctos Patres & Theologos, Cathecumeni possint salvari, & multi salventur, qui tamen per Baptismum necdum sunt ingressi Ecclesiam Dei. Resp. enim cum S. Augustinus Distinct. 3. de Fide quæst. 1. n. 6. & alijs, allatam Conclusionem esse intelligendam sic, quod nemo possit salvari extra Ecclesiam, id est, qui nec re, nec voto est in Ecclesia: Cathecumeni autem, licet per januam Baptismi actu recepti necdum sint ingressi Ecclesiam, nihilominus voto jam sunt in Ecclesia. Et hoc sufficit ad salutem, non minus, ac Baptismus in voto susceptus; mediante quo, si desit occasio recipiendi Sacramentum Baptismi, posse hominem salvari, patet ex Concilio Trident. Sess. 6. cap. 4. ac pluribus locis Juris Canonici, & præsertim ex cap. *Veniens, de Presbyt. non baptizato.* ibi: *Cum quis non solum per Sacramentum Fidei, sed per Fidem etiam Sacramenti efficiatur procul dubio membrum Christi.*

## QUESTIO II.

Quænam sint notæ veræ Ecclesiæ Christi.

## SUMMARIUM.

- 10 Ratio presentis Quæstionis.
- 11 Notæ Ecclesiæ a modernis hæreticis assignatæ reiciuntur.
- 12 Veræ Notæ Ecclesiæ Christi sunt quatuor, nempe.
- 13 Quod sit una.
- 14 Sancta.
- 15 Catholica.



- 16 *Et Apostolica.*
- 17 *Hæ quatuor notæ conveniunt soli Romane Ecclesiæ.*
- 18 *Ea est Una, & nulla alia Secta.*
- 19 *Ea est sancta.*
- 20 *Ea est Catholica, non vero ulla Secta hæreticorum.*
- 21 *Eadem est Apostolica.*
- 22 *Methodus brevissima reducendi hæreticos ad Fidem Catholicam.*

10 **S**ciendum, quod ab initio nascentis Ecclesiæ jam diversæ fuerint exortæ sectæ & hæreses, quarum quælibet prætendebat, apud se veram consistere Ecclesiam, hocque signis, seu notis ac Symbolis quibusdam ostendere conabantur. Ut igitur vera Ecclesia deprehendi, & a falsis sectis dignosci valeat, consulto recurrendum est ad veras Ecclesiæ notas.

11 Hæretici nostri temporis satis communiter duas assignant Ecclesiæ notas, videlicet veram & inconculsam prædicationem Evangelii, & sincerum usum Sacramentorum. Verum hæc sententia communiter rejicitur a Catholicis: siquidem notæ veræ Ecclesiæ debent ipsa esse notiores (generatim enim notæ debent esse notiores ea re, cujus sunt notæ; quia alias non essent notæ, sed ignotæ) simulque aliis sectis seu Ecclesiis falsis non communes, ut patet; alioquin enim non sufficienter discernere veram Ecclesiam a falsa. Atqui ita accidit prædictis duabus notis: nam quælibet hæreticorum Secta, tum Ariana, Sabelliana, tum Lutherana, Calviniana, Zwingliana, & Anabaptistica &c. hæcenus semper jactitavit, & adhuc jactitat, apud se esse veram prædicationem Evangelii, usumque sincerum Sacramentorum (quod ipsum cumprimis, atque veraciter de se affirmat S. Mater Ecclesia Catholica) hinc prædicta duo non possunt esse signa, symbola, notæque veræ Ecclesiæ Christi, ac proinde aliæ erunt investigandæ. Unde sit.

12 **CONCL. I.** Veræ notæ Ecclesiæ Christi principaliter sunt quatuor, videlicet, quod ea sit **UNA, SANCTA, CATHOLICA, ET APOSTOLICA.** Ita omnes Catholici. Siquidem hæc quatuor notæ partim habentur in Symbolo Apostolorum, ubi dicitur, *Credo in Sanctam Ecclesiam Catholicam*: partim in Symbolo Nyceno & Constantinopolitano, in quo aliæ duæ clarius sunt expressæ, vel additæ, videlicet, quod sit *Una* (quæ particula tamen in Symbolo Apostolico sufficienter jam continetur, dicendo in singulari, *Sanctam Ecclesiam*) & *Apostolica*, dicendo: **CREDIMUS UNAM, SANCTAM, CATHOLICAM, ET APOSTOLICAM ECCLESIAM.** Et hoc quidem Symbolum, utpote in Concilio Generali Constantinopolitano Anno Domini 381. receptum, approbatur, & in SS. Missæ Sacrificio ferme quotidie recitatur a tota Ecclesia universali, imo neque ab hæreticis nostri temporis negatur: unde restant solum prædictæ quatuor notæ explicandæ.

13 Prima igitur Ecclesiæ nota est, quod sit **UNA.** Non enim est dissensionis Deus, sed pacis. 1. Corinth. 14. Ceterum hæc Ecclesiæ unitas consistit inprimis in unitate Capitij, quatenus omnes in Ecclesia existentes idem agnoscunt Caput, tum invisibile, sive Christum Dei Filium, tum visibile, sive Summum Pontificem, Christi in terris Vicarium. Deinde in Unitate & concordia doctrinæ, juxta illud *Hebr. 13. Doctrinis variis & peregrinis nolite abduci.* Et rursus in unitate cultus Divini, & ritus Sacramentorum, quatenus idem apud omnes Sacrificium offeratur, æqualitas in cultu Divino observetur, atque eadem Sacramenta & cum iisdem cæremoniis dispensentur. Et hanc trinam principalem unitatem, in vera Ecclesia Christi observandam, insinuat D. Apostolus, ex instinctu Spiritu Sancti, scribens ad *Ephes. c. 4. Unus Dominus, una Fides, unum Baptisma.*

14 Secunda veræ Ecclesiæ nota est, quod sit **SANCTA**: juxta quod loquitur Apostolus *Ephes. 5. vocans Ecclesiam gloriosam, non habentem maculam aut rugam, aut aliquid hujusmodi, sed ut sit Sancta & immaculata.* Dicitur autem Ecclesia, quantum ad propositum, præcipue ex

eo **Sancta**: quia professio ejus & doctrina est sancta, nihilque continens contra rectam rationem bonoque mores, juxta illud *Psal. 18. Lex Domini immaculata, convertens animas, testimonium Domini fidele &c. Justitiæ Domini rectæ.* Insuper Ecclesia dicitur **Sancta**, quia a Viris Sanctissimis propagata semper fuit, & in ea plurimi eximie Sanctitatis Viri per cuncta semper sæcula floruerunt, & florent.

15 Tertia Ecclesiæ nota est, quod sit **CATHOLICA**, id est, universalis. Et quidem vera Ecclesia dicitur universalis seu Catholica, inprimis quoad locum, quatenus toto Orbe terrarum diffusa est, juxta illud *Marci 16. Euntes in mundum universum, prædicate Evangelium omni creaturæ.* Et *Actorum cap. 1. Eritis mihi testes in Jerusalem, & in omni Judea, Samaria, & usque ad ultimum terræ.* Deinde vera Christi Ecclesia dicitur universalis, etiam ratione temporis, quia semper durabit, & numquam deficiet, juxta illud *Matth. 16. Et super hanc petram ædificabo Ecclesiam meam, & portæ inferi non prævalerunt adversus eam.* Et *Matth. ult. Et ecce, ego vobiscum sum omnibus diebus usque ad consummationem sæculi* & consequenter etiam semper manebunt Rectores Ecclesiæ, sicque & ipsa Ecclesia perseverabit usque ad Consummationem sæculi, Finemque Mundi.

16 Quarta tandem veræ Ecclesiæ nota est, quod sit **APOSTOLICA.** Porro vera Ecclesia Christi dicitur *Apostolica*; tum quia in Apostolis initium habuit, ab eisque per universum Orbem propagata est; tum præsertim, quantum ad propositum, quia in ea datur continua successio Episcoporum ab Apostolis deducta usque ad moderna tempora; qualem continuam, & non interruptam successionem Episcoporum ab Apostolis usque ad nos, nulla alia Congregatio habet præter Romanam Catholicam Ecclesiam. Hinc S. Augustinus *contra Epist. Manichei. c. 4.* inquit: *In Catholica Ecclesia tenet me ab ipsa Sede Petri Apostoli; cui pascendis oves suis post Resurrectionem Dominus commendavit, usque ad præsentem Episcopatum successio Sacerdotum.* Quænam autem sit hæc Successio Sacerdotum, idem S. Augustinus *Epist. 165. ad Generosum.* declarat dicens: *Petro enim successit Linus, Lino Clemens* (numerat omnes Romanos Pontifices usque ad sua tempora) *Siricio Anastasius: in hoc ordine successionis nullus Donatista (Lutheranus) Episcopus invenitur.* Idem passim observant alii Sancti Patres, hac continuata successione Episcoporum, tamquam efficacissimo argumento, ad ostendendam contra hæreticos veram Ecclesiam, utentes.

17 **CONCL. II.** Hæ quatuor veræ Ecclesiæ Christi notæ conveniunt S. Romane Ecclesiæ, & nulli aliæ Sectæ. Hæc Conclusio est rursus omnium Catholicorum, & quia plurimum ab ipsa dependet, oportet eam breviter per singulas partes probare.

18. Primo igitur S. Mater Ecclesia Romana (quam Hæretici ex contemptu, & odio in Summum Pontificem, appellant *Papisticam*) est **Una**: tum quia præter Christum, Caput invisibile veræ Ecclesiæ, agnoscit unum Caput visibile in terris, Papam videlicet legitimum Petri Successorem, Christique in terris Vicarium: quod nulla alia Secta facit. Habet & unitatem atque concordiam veræ doctrinæ, cultus Divini, usus Sacramentorum, ejusdemque incruenti Sacrificii Missæ, per totum quaque versum Orbem terrarum. Hoc autem nulli Sectæ hæreticorum competit, cum neque habeant unitatem capitis visibilis in terris, neque conveniant in unitate doctrinæ, usuque & numero Sacramentorum, ut palam est cuilibet terras hæreticorum vel parum peragranti. Certe plerique eorum, qui ab hæreticis ad Catholicos, atque in gremium S. Matris Ecclesiæ redeunt, pro motivo suæ conversionis allegare solent discordiam suorum, concordiamque Catholicorum in doctrina Fidei, cultuque Divino. Quære ubique terrarum apud Catholicos nostros, an credant sub speciebus panis, & vini illico post verba consecratoria adesse SS. Corpus & Sanguinem Christi, & respondebunt omnes per quatuor mundi partes diffusi, ac bene in fide Catholica instructi, se firmiter sic credere. Quære in locis, in quibus Lutherani sunt permix.



permixti cum Calvinistis, & respondebunt priores, se credere adesse Corpus Christi quidem, non tamen illico post Consecrationem, sed sub manducatione; posteriores autem dicent, omnino non adesse realiter, sed tantum figurative. Item Lutherani Rigidi in multis condemnabunt eos, quos vocant Moderatos, & vicissim hi ultimi rejicient in sua doctrina primos. En! pulchram unitatem! Quare huc quadrat illud S. Hieronymi *Epist. 58. ad Damasum* ubi ait: *In tres partes scissa Ecclesia ad se rapere me festinat &c. Ego interim clamito: Si quis Cathedra Petri jungitur, meus est. Meletius, Vitalis, atque Paulinus (Lutherus, Calvinus, Zwinglius &c.) tibi herere se dicunt: possem credere, si hoc unus assereret: NUNC AUT DUO MENTIUNTUR, AUT OMNES.*

19 Secundo, Ecclesia Romana est *Sancta*, tum propter Sanctitatem doctrinæ, quam perpetuo tradit, docens præcepta Dei esse observanda &c. ubi econtra Lutherani, alique Sæctatores asserunt, ea esse observatu impossibilia, & plura hujusmodi. Tum propter Viros Sanctissimos, a quibus propagata, agnita, defensa & propugnata semper fuit, puta SS. Apostolos, Sanctos Ecclesiæ Doctores, August. Hieron. Ambros. Gregorium, Bernardum, Thomam Aquinatem, Bonaventuram, aliosque. Tum propter hos eosdem, aliosque plurimos Viros Sanctitate vitæ conspicuos, qui a tempore Apostolorum usque nunc in Ecclesia Romana semper floruerunt, & adhuc florent, de quibus extant integri librorum Tomi: adeo, ut solus Ordo Seraphicus a tempore Lutheri numeret circiter quadraginta solemniter Canonizatos & Beatificatos; & quasi innumeros alios vitæ sanctitate, miraculisque conspicuos; ut taceamus ceteras Religiones, totamque Ecclesiam Catholicam. Ubi econtra Lutherani, alique hujus temporis Sæctarii, neque unum e suis Sanctum, sive vitæ Sanctitate & miraculorum gloria conspicuum, assignare valent: talem nimirum, qui pariter ab aliis sic coleretur, uti tamen plurimi ex A catholicis tamquam Sanctos venerantur Doctores Catholicæ Ecclesiæ, puta Hieronymum, Augustinum, Basilium, Chrysostomum &c. Imo apud Adamum Floro in suo articulo Decretorio. *cap. 6. §. 6.* ipsemet Lutherus in *cap. 5. Epist. ad Galatas*. & adhuc clarius in *Epist. de Anabaptistis ad duos Parochos*, fatetur, in Papatu esse nucleum Christianismi, & multos pios, magnosque Sanctos.

20 Tertio, S. Romanam Ecclesiam esse *Catholicam*, id est, toto Orbe terrarum nobis cognito diffusam, clarum est: cum non solum in Europa, imo & in Asia, & Africa, in medio gentis perversæ Mahumeticæ, atque in ipsa America longe, lateque diffundatur. Econtra Sæctarii, sive Lutherani, sive Calvinistæ, aut Anabaptistæ &c. non nisi in parva Germaniæ parte conclusi tenentur; aut si aliqui eorum propter negotiationes, & lucra mundana, in Indiis Orientalibus, vel Occidentalibus defacto existant, in comparatione ad Catholicos modicum sane locum occupant. Accedit, ipsos hæreticos extreme inter se distare, & quamlibet eorum Classem damnare alteram, veluti in fide aberrantem, ut proinde facta supputatione singulæ eorum Sæctæ non nisi minimum locum obtineant. Uade hoc intelligentes ipsimet hæretici, nomen Catholicorum appropriate attribuant Romano-Catholicis. Quod ipsum jam suo tempore factum, recte notavit D. Augustinus *lib. de vera Religione. cap. 7.* dicens: *Tenenda est nobis Christiana Religio, & ejus Ecclesiæ Communicatio, quæ Catholica est, & Catholica nominatur, non solum a suis, verum etiam ab omnibus inimicis: velint enim, nolintve ipsi quoque hæretici, & schismatici alumni, quando non cum suis, sed cum extraneis loquuntur, Catholicam nihil aliud quam Catholicam vocant, non enim possunt intelligi, nisi hoc eam nomine discernant, quo ab universo Orbe nuncupatur.* Hactenus, & ad propositum efficacissime D. Augustinus: qui idem S. Pater *Libro contra Epist. fundament. cap. 4.* hoc ipsum confirmat.

21 Quarto, Sanctam Romanam Ecclesiam esse *Apostolicam*, sive in ea dari continuam Successionem Episcoporum ab Apostolis usque ad nos, patet vel maxi-

me in continua & numquam interrupta successione Romanorum Pontificum, a quibus alii Episcopi per totum terrarum Orbem semper fuerunt creati, & destinati. Admittunt A catholici potiores ipsimet cum D. Augustino superius citato legitimam & non interruptam successionem Pontificum a Petro usque ad quartum vel quintum circiter sæculum; ostendant ergo, efficaciter tamen (nam contrariæ calumniæ, & falsa argumenta fuerunt pridem a Bellarmino & aliis Controversistis Catholicis soluta) Ecclesiam Romanam postea ab hac *Apostolica Successione* defecisse.

Quod autem rursum hæc nota ly *Apostolica* neque Lutheranæ, neque Calvinianæ, aut ulli Sæctæ conveniat, patet ex eo, quia non apparet ullum vestigium talis successionis: nam quæro ex Lutheranis, vel Calvinistis, si Ecclesiam suam velint ab Apostolis absque interrupta serie descendere, sicque *Apostolicam* esse, ubi nam ergo eadem Ecclesia tamquam Apostolica, per Apostolos & legitimos Successores continuata, post prima quatuor sæcula usque ad adventum Lutheri, aut Calvinii &c. extiterit? *Romane* nolunt hoc prædicatum concedere. Præcedentibus antiquis Hæreticis pariter vix attribuent, nam quinam fuerunt illi Hæretici, & cur non eorum symbolum assumpserunt, sed novum corpus doctrinæ symbolicæ euderunt, si apud dictos hæreticos Apostolica una sancta Catholica extitit Ecclesia.

Nec reponant in angustias redacti pro ultimo suo refugio, Ecclesiam veram pro illo tempore intermedio mansisse tantummodo penes paucos quosdam quasi invisibilem. Nam quomodo sic pertitisset *Catholica*, seu per universum mundum diffusa? quam notam antiquissima Concilia Nicenum, Constantinopolitanum, imo ipsimet Apostoli in communi symbolo Apostolorum veræ Ecclesiæ attribuerunt? Et quis sibi persuadeat, Ecclesiam veram, mille ferme annis fuisse a Deo adeo derelictam, & ignotam; cum tamen pronuntietur *Matth. cap. 16. supra Petram*, & per D. Augustinum *civitas Matth. 5. supra Montem posita*, quæ non potest abscondi?

22 CONCL. III. Methodus brevissima atque efficacissima, errantes animas, & hæretica pravitate seductas reducere ad Fidem Catholicam, est clare proponere atque explicare eisdem præmissas quatuor notas veræ Ecclesiæ Christi. Ita Controversistæ. Et ratio est: quia datur solum una Ecclesia Christi, non plures, ut constat ex Symbolo Apostolorum, in quo in singulari dicitur, *Credo Sanctam Ecclesiam Catholicam*. Simulque illa vera Ecclesia Christi est infallibilis in suis dogmatibus, neque potest errare in Fide, idque ob infallibilem Christi promissionem, ut dictum *num. 7.* ac proinde, quidquid ea proponit esse Fide Divina credendum, absque ullo erroris periculo credere oportet veracitatem Dei talia revelantis, nobisque per Ecclesiam suam proponentis. Cum igitur ex supra dictis quatuor Ecclesiæ notis pateat, Ecclesiam Romanam Catholicam esse veram Christi Ecclesiam, utpote cui soli competunt quatuor illæ notæ, non autem Sæctæ Lutheri, Calvinii, aut alii, jam ipsa in dogmatibus Fidei est infallibilis; consequenter cum ea rite creditur Purgatorium, numerus septenarius Sacramentorum, Missæ Sacrificium, & sic discurrendo de cæteris Fidei Mysteriis.

### QUESTIO III.

#### De Sacra Scriptura, seu Libris Canonicis.

#### SUMMARIUM.

- 23 *Libri Canonici seu S. Scriptura, qui?*
- 24 *Numerus eorum in Ecclesia Catholica est antiquissimus.*
- 25 *Solvitur objectio cum notabili Additione.*
- 26 *Hunc vel illum librum esse Canonicum, unde constat?*  
(a) *Supra n. 7.*
- 27 *Declaratur amplius Conclusio.*



- 28 *Vulgata vetus Editio S. Scriptura est authentica, & quanam sit illa?*  
 29 *An in hac qualibet minima vocula sit de Fide?*  
 30 *Verior opinio.*  
 31 *Solvuntur objectiones.*  
 32 *Lectio S. Scripturae in lingua vulgari iuste est interdicta.*  
 33 *Quid in Germania quoad hoc?*

23 **CONCL. I.** Numerus Librorum S. Scripturae, qui & Libri Canonici appellantur, ille est, quem ponit Sacrum atque Oecumenicum Concilium Trident. Sess. 4. in Decreto de Can. Script. ubi Libros Canonicos ex unanimi totius Ecclesiae consensu, & antiquissimorum Conciliorum vestigiis inhærendo, recenset, eosque veluti a Spiritu Sancto dictatos recipit, ac veneratur, dum inter alia sic habet. *Sunt vero infra scripti: Testamenti Veteris, quinque Libri Moysi, id est, Genesis, Exodus, Leviticus, Numeri, Deuteronomium, Josue, Judicum, Ruth, quatuor Regum, duo Paralipomenon, Esdræ primus & secundus, qui dicitur Neemias, Tobias, Judith, Esther, Job, Psalterium Davidicum centum quinquaginta Psalmorum, Parabola, Ecclesiastes, Canticum Canticorum, Sapientia, Ecclesiasticus, Isaias, Hieremias cum Baruch, Ezechiel, Daniel, duodecim Prophetae minores, id est, Osea, Joel, Amos, Abdias, Jonas, Michæas, Nahum, Abacuc, Sophonias, Aggaeus, Zacharias, Malachias, duo Machabæorum, primus & secundus. Novi Testamenti, quatuor Evangelia, secundum Matthæum, Marcum, Lucam, & Joannem, Actus Apostolorum a Luca Evangelista conscripti: quatuordecim Epistolæ Pauli Apostoli, ad Romanos, duæ ad Corinthios, ad Galatas, ad Ephesios, ad Philippenses, ad Colossenses, duæ ad Thessalonicenses, duæ ad Timotheum, ad Titum, ad Philemonem, ad Hebræos. Petri Apostoli duæ, Joannis Apostoli tres, Jacobi Apostoli una, Jude Apostoli una, & Apocalypsis Joannis Apostoli. Si quis autem Libros ipsos integros cum omnibus suis partibus, prout in Ecclesia Catholica legi consueverunt, & in veteri vulgata latina editione habentur, pro Sacris & Canonicis non susceperit, anathema sit. Hactenus verbatim Concilium Tridentinum.*

24 Unde patet, Librorum tertium & quartum Esdræ, simulque librum tertium Machabæorum non esse ex Libris Canonicis, quamvis in Bibliis communiter apponantur, ne penitus pereant. Cæterum prædictus numerus Librorum Canonici Sacrae Scripturae non est novus, quinimo est antiquissimus in Ecclesia Catholica, & receptissimus. Sic quippe S. Augustinus lib. 2. de Doctrina Christiana cap. 8. omnes & singulos præfatos Libros inter Canonicos reponit, atque enumerat. Similiter omnes illi Libri inter Canonicos recepti sunt in Concilio Carthaginensi (anno 397. celebrato) cap. 47. item in Concilio Romano primo sub Gelasio Papa anno 494. celebrato, atque in aliis subsequentibus Conciliis, & præsertim in Florentino in Decreto Unionis.

25 Nec obstat, quod olim de Libro Tobiae, Judith, & quibusdam aliis fuerit controversia inter Catholicos Doctores, eosque quidam SS. Patres excluderint e numero Librorum Canonici. Resp. enim, id contigisse ante definitionem Ecclesiae, quando re adhuc dubia, & necdum per Ecclesiam definita, utraque pars probabiliter amplecti, & teneri poterat; prout fieri solet in aliis materiis necdum ab Ecclesia definitis, & adhuc inter Catholicos Doctores controversis. At post definitionem Ecclesiae nullus Sanctus Pater, aut alius vere Catholicus, ullum ex præfatis Libris Canonicis rejecit.

*Additio.*

\*Quodsi autem quæras, ex qua igitur causa multi Hæretici ex numero Librorum Canonici S. Scripturae excluderint præter Libros Machabæorum, & nonnullos alios in veteri, etiam in novo Testamento, Epistolam Pauli ad Hebræos, Epistolam Jacobi, Epistolam Judæ, & Apocalypsin? Respondeo cum Bellarmino Tom. 1. Controvers. lib. 1. de Verbo Dei, ex Francolino in suo Tyrocinio part. 1. §. 3. ob eandem causam, ob quam tempore S. Augustini Manichæi, alique Hæretici rejecerunt omnes Libros veteris Testamenti, de quibus citatus san-

ctus Pater Libro de Dono perseverantiae ait: *Scripturas sic accipiunt, ut suo quodam privilegio, imo sacrilegio, quod volunt, sumant, quod nolunt, rejiciant: quando nimirum id suis principiis (uti in Libris Machabæorum commendatio precum pro defunctis persolvendarum) minus favere agnoscunt: etsi id ipsum jam ab antiquo receptum, & a moderna Catholica Romana Ecclesia, habente omnia signa veræ Ecclesiae in præcedenti Quæstione explicata, fuerit tamquam de fide agnitum. Unde nam ergo aliunde illi Hæretici, qui omnia ex Verbo Dei scripto clare probari posse contendunt, suos præcise Libros S. Scripturae esse Canonicos sufficienter ostendere queunt? exhibeant nobis clarum aliquem Textum, quem nec D. Augustinus (utique doctior hisce) potuit invenire, utpote qui juxta dicta nequidem Evangelio credidisset, nisi Auctoritas Ecclesiae eum commovisset. Et quidem jure merito; ex quo alio enim, nisi ex hac ipsa Auctoritate tam numerus determinatus librorum, quam legitima versio, ac interpretatio Sacrae Scripturae in tanta disceptantium, etiam ipsorummet inter se Heterodoxorum varietate (ubi e. g. apud Ignatium Schwarz in Instit. Histor. cap. 1. Epistolam Divi Jacobi Calvinus vocat auream: Lutherus autem Stramineam: Zwingliani Lutherum appellant apertum verbi Divini carnificem, atque corruptorem: econtra Lutherus Zwinglianos Interpretes stultos, & clitellarios &c.) undenam (inquam) nisi ex dicta Ecclesiae Auctoritate desumi finaliter & quietative poterunt?*

26 **CONCL. II.** Hunc vel illum Librum esse Canonicum, & habere auctoritatem S. Scripturae a Deo dictatae, aliunde non constat, quam ex Traditione Majorum, & definitione Ecclesiae. Ita omnes Catholici. Siquidem Ecclesiam in rebus Fidei ob specialem assistentiam Spiritus Sancti errare non posse, jam (a) dictum est; ergo quidquid ipsa Fidelibus credendum, & tamquam Librum a Spiritu Sancto dictatum esse proponit, pro tali indubie recipiendum est. Accedit, quod plura Evangelia sub nomine diversorum Apostolorum, ut Thomæ, Thaddæi, Andreæ, Bartholomæi, Barnabæ &c. fuerint conscripta, de quibus fit mentio c. Sancta Romana distinct. 15. ergo necessaria fuit auctoritas Ecclesiae, quæ insistendo continuæ Traditioni ab Apostolis haustæ, atque a Spiritu Sancto peculiariter directæ, hujusmodi noxias & apocryphas scripturas a veris discerneret, verumque Evangelium a Deo dictatum Fidelibus credendum proponeret. Et hinc rectissime S. Augustinus lib. contra Epistolam Manichæi. cap. 5. palam protestatur, dicens: *Ego vero non crederem Evangelio, nisi me Catholica Ecclesia commoveret Auctoritas.* Et rursum ibidem ait, *Evangelium Nazaræorum non admittam, quia non admittitur ab Ecclesia.*

27 Verissimum quidem est, potuisse Deum pluribus aliis modis veram Fidem, verbumque suum, seu S. Scripturam manifestare hominibus, puta per semetipsum immediate, vel per Angelos &c. Verumtamen sicut olim Saulum (id est, Paulum Apostolum) & Cornelium Centurionem, & Eunuchum Reginæ Candacis, non per se, aut Angelos suos, in vera Fide erudire voluit, sed per homines, videlicet per Ananiam, Petrum Apostolum, & Philippum, ut legitur in Actibus Apostolorum cap. 8. 9. & 10. ita etiam ordinariū medium agnoscendi veram Scripturam Sacram aliud esse noluit, quam auctoritatem Ecclesiae Catholicae, utpote quæ teste ipsomet Spiritu Sancto i. Timoth. 3. *Est columna & firmamentum veritatis.* Hinc jam a primordiis suis, orta circa observantiam Legalium dissensione, S. Mater Ecclesia, in Spiritu Sancto ex Apostolis, aliisque Fidelibus legitime congregata Act. cap. 15. determinavit, Gentiles ad Fidem Christi conversos non obligari Legē Mosaicā.

28 **CONCL. III.** Sacra Scriptura, in vulgata veteri Editione contenta, vere est authentica. Ita novissime declaravit, & propter antiquissimum Ecclesiae usum observari statuit Concilium Trident. Sess. 4. in Decreto de Editione Librorum, his verbis. *Insuper eadem Sacrosancta Synodus statuit, & declarat, ut hæc ipsa vetus & vulgata Editio, quæ longo tot seculorum usu in ipsa Ecclesia probata*



probata est, in publicis lectionibus, disputationibus, prædicationibus, & expositionibus pro authentica habeatur, & ut nemo illam rejicere quovis prætextu audeat, vel præsumat. Hæc Concilium.

*Additio.*

\* Ut autem habeatur plena notitia, quænam sit illa *vulgata Editio* Sacræ Scripturæ, a Concilio Tridentino juxta primum dicta, agnita tamquam authentica, notandum est ex Tyrocinio Francolini Romæ a Reverendissimo P. Magistro Sacri Palatii approbato. I. Quod originales, & primævi omnes sacri Codices veteris Testamenti fuerint Hebraice in lucem dati, exceptis Libris Tobie, Judith, Esdræ, ac Danielis ab initio Chaldaice, & secundo Machabæorum, teste D. Hieronymo, Græce vulgatis. E contra quoad novum Testamentum originales Libri, si Francolino fides est, primitus fuerunt Græce editi, exceptis Epistola D. Pauli ad Hebræos, & Evangelio S. Matthæi Hebraico-Syriace, seu potius Syro-Chaldaice conscriptis. Putant nonnulli Evangelium S. Marci in principio Latine fuisse vulgatum.

Notandum II. Primam illam Editionem veteris Testamenti tempore captivitatis Babylonicæ, si non ex integro deperditam, saltem fuisse magna ex parte viciatam, atque corruptam, quam Esdras Divino plenus Spiritu integræ fidei restituit, at postea Rabbiorum ignorantia, vel Amanuensium sive imperitia, sive incuria successive saltem ex aliqua parte iterum depravavit.

Notandum III. Quod post Hebraicam præcipua sit veteris Testamenti Editio Græca septuaginta duorum Interpretum Seniorum Hebræorum, utramque linguam perfecte callentium, qui jussu Philadelphi Regis Ægypti ducentis & quinquaginta circiter annis ante Christum in Insula Pharos mirabili consensu litteras Divinas ex lingua Hebraica selectis Exemplaribus magis authenticis; & Deo singulariter assistente transtulerunt in linguam Græcam, hacque versione non solum Ecclesia Græca, verum etiam ipsimet Apostoli & Evangelistæ jam usi fuerunt, quæ tamen defacto non amplius est pura, suoque originali conformis, uti jam suo tempore observavit S. Hieronymus in præfatione ad Paralip.

Notandum IV. Quod demum quoad utrumque Testamentum subsecuta fuerit Editio Latina, ubi præcipue duæ versiones circumferebantur; una *antiqua*, incerti Auctoris, altera vero *nova*, jussu S. Damasi Papæ a S. Hieronymo conscripta, ex quibus duabus non longe post tempora S. Gregorii cum maturissimo examine, & post longam discussionem, ac collationem cum Exemplaribus majoris fidei conflata est unica, quæ appellatur *vulgata*, & communis, quam Concilium Tridentinum *loc. cit.* vult haberi pro authentica, ex qua reliquæ versiones desumi debent, si tamquam legitimæ agnosci velint ab Ecclesia nostra; tamquam illa, quæ habet notas veræ Ecclesiæ.\*

29 Num autem quælibet minima vocula, & particula Editionis vulgatæ, sit de fide, variant Doctores. Affirmant Franciscus Turrianus 2. 2. dist. 22. dub. 4. & quidam alii. Tum quia idem Concilium Trid. *cit. Sess. 4.* ait: *Si quis autem libros ipsos integros cum omnibus suis partibus, prout in Ecclesia Catholica legi consueverunt, & in veteri vulgata Editione habentur, pro sacris & Canonicis non susceperit, anathema sit:* atqui etiam omnes voculæ sunt partes. Tum quia alioquin tota Editio vulgata nutabit, si in ea quidpiam non canonicum, & quod non est de Fide, contineri dicatur: nam, ut inquit D. Augustinus *Epist. 9. ad Hieronymum. Sacra Scriptura, quæ ad fidem posteris edita est, admissa auctoritate mendacii tota dubia nutat & fluctuat.*

30 Oppositam nihilominus sententiam plures alii Theologi & Controversistæ tenent, ut Bellarminus *lib. 9. de verbo DEI cap. 11.* Bernardinus Vetsveis in *Speculo veræ Ecclesiæ lib. 2. cap. 6. art. 4. n. 3.* Tannerus *tom. 3. disp. 1. De fide quæst. 5. n. 79.* Burghaber *Controvers. 4. n. 16.* citans alios. Afferunt enim, quamvis Editio vulgata

pro authentica ab omnibus habenda sit, utpote quoad fieri potuit, pura & emendata, nihilque continens, quod sit contra Fidem Catholicam, & bonos mores; nihilominus eam necdum ita ab omnibus mendis purgatam esse, quia adhuc emendari possit, aut aliquibus in locis, ubi jam olim ejusdem lectiones variabant, locus esse valeat disceptationi, & aliqua alia lectio ei, quæ in vulgata Editione posita est, subinde præferri. Ratio esse potest: quia hoc ipsum videtur insinuare Præfatio Bibliis vulgatæ Editionis præfixa, dum ait: *Quam quidem (Editionem vulgatam) sicut omnibus numeris absolutam, pro humana imbecillitate affirmare difficile est, ita ceteris omnibus, quæ ad hunc usque diem prodierunt, emendatorem, purioremque esse minime dubitandum.* Et infra: *In hac tamen pervulgata lectione, sicut nonnulla consilio mutata, ita etiam alia, quæ mutanda videbantur, consilio immutata relicta sunt.*

31 Nec obstat Concilium Trid. *loc. cit.* Quia loquitur de partibus, utputa Capitulis, atque integris Libris, quorum nonnullos Hæretici, contra quos præcipue agit Concilium, rejecerunt; non autem de voculis, seu particulis. Idque ex eo amplius patet, quod primum post dictum Decretum Concilii Trid. Editio vulgata per Theologos a Sede Apostolica ad hoc destinatos fuerit revisa, & in nonnullis, emendata. Dictum autem D. Augustini procedit admissio semel in quapiam Scriptura mendacio, quale nefas est admittere in Editione vulgata Bibliorum.

32 CONCL. IV. Lectio Sacræ Scripturæ in lingua vulgari sine Episcopi, aut Inquisitoris licentia juste fuit interdicta. Et hæc quidem prohibitio habetur in *Indice Librorum prohibitorum. Regula 4.* Ratio hujus prohibitionis ibidem affertur: quia experimento manifestum est, si Sacra Biblia vulgari lingua passim sine discrimine permittantur, plus inde ob hominum temeritatem detrimenti, quam utilitatis oriri. Siquidem S. Scriptura, ob altitudinem Mysteriorum supernaturalium, de quibus tractat, ac plurimas locutiones Propheticas, & allegoricas &c. non tam intellectu facilis & clara est, ut a quovis, etiam ceteroquin indocto homine, vel muliercula, statim possit recte intelligi, prout præsumtuose instant Hæretici moderni. Sed de hoc plura *Quæst. seq.*

33 Notat tamen Layman *lib. 2. tract. 1. cap. 15. num. 8.* Quod hæc prohibitio non legendi Sacra Biblia vulgari idiomate, in hisce Regionibus nostris recepta non sit. Nam, ut inquit Nicolaus Serarius, *non puniuntur, sed laudantur, qui in Germania nostra, nulla diserte petita facultate, Biblia vulgata Eckii, vel Dietsbergii legunt.* Versio autem Germanica Lutheri, & aliorum hæreticorum, prorsus interdicta est, utpote pestifera, ob multas admixtas depravationes, & falsas interpretationes.

QUÆSTIO IV.

De multiplici Sensu, Obscuritate, atque Interpretatione Sacræ Scripturæ.

SUMMARIUM.

- 34 Sensus S. Scripturæ duplex, literalis & mysticus.
- 35 Sensus literalis alius proprius, alius improprius.
- 36 Sensus mysticus, quis?
- 37 Est multiplex, ut  
Sensus Allegoricus,  
Anagogicus; & Tropologicus seu Moralis.
- 38 Universim quatuor sensus S. Scripturæ,
- 39 Et in singulis excellabant singuli Ecclesiæ Doctores.
- 40 Quid sensus Accommodativus S. Scripturæ?
- 41 S. Scriptura sapiens est obscura.
- 42 Ipsamet S. Scriptura hoc testatur.
- 43 Interpretatio canonica S. Scripturæ pertinet ad Ecclesiam.
- 44 Doctrinaliter eam interpretari, quibus conveniat?

34 CONCL. I. Generatim, ac prima sui divisione, Sensus Sacræ Scripturæ alius est literalis, alius spiritualis seu mysticus. Ita communis. Et quidem  
Sensus



*Sensus literalis* est, quem verba ipsa immediate significant: prout v. g. hoc nomen *Jerusalem* significat civitatem Palæstinæ, ac plurimæ historiæ in S. Scriptura contentæ literaliter significant res olim gestas.

35 Porro Sensus iste literalis S. Scripturæ subdividitur in proprium, & in improprium seu figuratum. *Proprius* est, quem verba in propria sua significatione usurpata immediate significant: prout fit, dum dicitur David esse Rex, *Jerusalem* capta &c. *Sensus improprius*, seu *figuratus* est, quem verba improprie seu figurate accepta significant: puta quem habent per quamdam Metaphoram, Metonymiam, Catechresin, aut aliam Figuram Rhetoricam: quales locutiones figurate in S. Scriptura sunt satis frequentes, ac Præsertim in Prophetis, imo & alibi. Sic Christus Dominus noster dicitur Leo, Petra, Lapis angularis, Agnus, Vitis &c. per similitudinem quamdam, ac metaphoram, non per proprietatem. Sic etiam Deus, qui tamen est purissimus Spiritus, dicitur habere manus, quatenus est Omnipotens; videre oculis, quatenus est Omniscius; habere pedes, quia est ubique; irasci, poenitere, ac hujusmodi, ob diversos effectus suos.

36 *Sensus mysticus*, seu *spiritualis* S. Scripturæ est ille, qui non significatur per verba immediate, sed mediate solum; quatenus significatur per res illas, quas verba immediate significant. Sic historia Agni Paschalis *Exodi* cap. 12. relata, literaliter significat ritum Agni Paschalis a Judæis olim immolandi; spiritualiter vero seu mystice significat Christum pro salute totius Mundi in ara Crucis postmodum immolatum: idem videre est in aliis innumeris.

37 Cæterum Sensus spiritualis, seu mysticus S. Scripturæ, rursus dividitur in Allegoricum, Anagogicum, & Tropologicum seu Moralem, juxta numerum videlicet trium virtutum Theologicarum, quibus hi tres Sensus mystici S. Scripturæ correspondent. Siquidem *Sensus Allegoricus* correspondet Fidei, & tunc habetur, quando verba S. Scripturæ præter sensum literalem, quem habent, significant aliquid pertinens ad Fidem. *Sensus Anagogicus* correspondet Spei, & tunc habetur quando verba S. Scripturæ præter sensum literalem, quem continent, significant aliquid pertinens ad vitam æternam, quam speramus. *Sensus tandem Tropologicus seu Moralis* correspondet Charitati, & habetur, quando præter sensum literalem verborum significatur aliquid pertinens ad instructionem morum, seu opera Charitatis exercenda.

38 Ea conformiter dictis communiter a Doctoribus dicuntur esse quatuor Sensus S. Scripturæ, videlicet Literalis, Allegoricus, Anagogicus, & Tropologicus seu Moralis, de quibus extant sequentes duo versiculi.

*Littera gesta docet: quid credas, Allegoria.  
Moralis, quid agas; quo tendas, Anagogia.*

Et hi quatuor Sensus commode ostenduntur in nomine *Jerusalem*: nam hæc vox Literaliter significat urbem Palæstinæ; Allegorice Ecclesiam Militantem, Anagogice Ecclesiam Triumphantem, & Tropologice seu Morali-ter quamcumque Animam fidelem. Idem sensus vel omnes, vel saltem aliqui reperiuntur in Cæremoniis veteris Legis, Vasis Sanctuarii, & aliis hujusmodi, quæ proinde varie exponuntur a Sanctis Patribus, & Doctoribus Ecclesiasticis.

39 Notatum quoque est a Viris doctis, juxta hos quatuor sensus S. Scripturæ quatuor dari præcipuos Doctores Ecclesiæ, videlicet S. Hieronymum, S. Ambrosium, S. Augustinum, S. Gregorium Papam; & singulos in singulis S. Scripturæ sensibus principaliter excelluisse, Hieronymum in Literali, Ambrosium in Allegorico, Augustinum in Anagogico, & Gregorium in Morali.

40 Tacetur hic sensus Accommodatitius S. Scripturæ, quo videlicet dicta de uno postmodum accommodantur alteti, ac de eo dicuntur: siquidem iste proprie non est verus aliquis S. Scripturæ sensus, sed potius traductio verborum S. Scripturæ a suo sensu ad alium, ab Auctore Deo non intentum. Nihilominus hic modus appli-

candi, seu accommodandi S. Scripturam, si cætera concurrant, malus non est, imo practicatur ab Ecclesia Catholica passim in Breviario, & Missali Romano, dum dicta de Abraham, Noe, & aliis veteris Testamenti accommodantur ad diversos Sanctos novi Testamenti. Idem Sensus Accommodatitius a SS. Patribus frequenter adhibetur in suis Libris ac Homiliis, idemque in Concionibus frequens est, ac utilissimus, nam verba S. Scripturæ miram quamdam gravitatem & energiam præ se ferunt, ita ut ad persuadendum sint accommodatissima. Cavendum tamen, ne quavis occasione verba S. Scripturæ accommodentur, seu applicentur ad profana, scurrilia, fabulosa, & hujusmodi: id enim nefas est, atque in Concilio Trid. Sess. 4. graviter prohibitum.

41. CONCL. II. S. Scriptura sæpius est obscura, neque est tam perspicua, aperta, & intellectu facilis cuivis, etiam indocto homini vel mulieribus, quin indigeat vera & genuina interpretatione. Ita omnes Catholici Doctores contra Hæreticos. Ratio est: quia S. Scriptura tractat de summis & altissimis Fidei Mysteriis, rebusque supernaturalibus, nempe de SS. Trinitate, incarnatione Filii Dei, Sacramentis, Prædestinatione, & aliis hujusmodi captum humanum, nisi Fides adjuvet, longe superantibus. Insuper sacra Scriptura continet plurimas locutiones allegoricas, & figuratas, imo non pauca, quæ prima fronte videntur contraria, verba etiam ambigua, ac phrasæ Hebraicas. Atqui talia non illico possunt patere hominibus idiotis & indoctis, multo minus quibusvis mulierculis: alioquin certe SS. Patres, atque Ecclesiæ Doctores, frustra tantum temporis consumpsissent in studio, & intelligentia sacre Scripturæ.

42 Confirmatur. Ipsamet S. Scriptura testatur, quædam in ea reperiri obscura, & intellectu difficilia, quæ proinde indigent vera interpretatione. Hinc quippe Christus, incipiens a Moyse, & omnibus Prophetis, interpretabatur duobus Discipulis, euntibus in Emmaus, Scripturas, quæ de ipso erant *Luc. 24.* Similiter Christus Dominus post suam gloriosam Resurrectionem aperuit illis (id est, Discipulis suis) *sensum, ut intelligerent Scripturas Luc. c. 24.* Atqui hoc non fuisset necesse, imo frustraneum, post tot prædicationes integro triennio ex ore Christi jam auditas, si S. Scriptura esset ex se prorsus clara, & cuilibet aperta, ut præsumptuose jactitant Hæretici. Accedit, quod ipsemet Spiritus sanctus per os D. Petri expresse testificetur, in S. Scriptura, & præsertim in Epistolis D. Pauli, esse quædam intellectu difficilia: sic enim habetur 2. *Petri. cap. 3. In quibus* (nempe Epistolis D. Pauli) *sunt quedam difficilia intellectu, quæ indocti & instabiles depravant, sicut & cæteras Scripturas, ad suam ipsorum perditionem.* Hæc ibi.

43. CONCL. III. Interpretatio canonica & infallibilis S. Scripturæ, verique sensus illius ad Ecclesiam pertinet. Ita omnes Catholici, habeturque expresse in concilio Trid. Sess. 4. in Decreto de edit. & usu Sac. Lib. hisce verbis: *Quem* (sensem S. Scripturæ) *tenuit, & tenet sancta Mater Ecclesia, cujus est judicare de vero sensu & interpretatione sanctarum Scripturarum.* Unde dicitur *Matth. 18. Si Ecclesiam non audierit, sit tibi sicut ethnicus & publicanus.*

44 CONCL. IV. Interpretari S. Scripturam etiam doctrinaliter, non cuilibet convenit, sed Viris dumtaxat doctis & idoneis, ac præsertim iis, quibus id ex officio incumbit, utputa Ecclesiæ Doctoribus, Episcopis, & hujusmodi. Ita communis Ratio est: quia alioquin adesset manifestum periculum errandi in interpretatione sacre Scripturæ, si hanc indocti passim & præsumptuose attentarent. Accedit, quod Deus in Ecclesia sua voluerit observari hierarchiam, & subordinationem subordinum erga Superiores, atque esse ordinem inter Doctores & discipulos, inter Pastores & oves, ut alii doceant, alii discant, alii Scripturam interpretentur, alii alia officia exerceant. Unde *Ephes. 4.* dicitur: *Et ipse dedit quosdam quidem Apostolos, quosdam autem Prophetas, alios vero Evangelistas, alios autem Pastores & Doctores, ad consumptionem Sanctorum.* Et 1. *Corinth. 12. Numquid omnes interpretantur?* Quasi diceret, non; sed illi solum, quibus id ex officio incumbit, quique Deo ad hoc electi sunt.

QUESTIO



## Q U Æ S T I O V.

## De Traditionibus.

## S U M M A R I U M.

- 45 *Traditio quid?*  
 46 *Est triplex, nempe Traditio Divina, Apostolica, & Ecclesiastica.*  
 47 *Traditiones Divinae sunt admittendae. Quod ampliatur adhuc magis.*  
 48 *Ipsae sunt ejusdem infallibilitatis, ac Verbum Dei scriptum.*  
 49 *Regula dignoscendi Traditiones Divinas.*

45 **T**raditionis nomine intelligitur in proposito doctrina quaedam ad Religionem spectans, quae tamen expresse in sacra Scriptura non habetur, neque ex illa clare deducitur; sive dein hujusmodi doctrina in libris SS. Patrum scripta reperiatur, sive non.

46 Dividitur autem Traditio in Divinam, Apostolicam, & Ecclesiasticam. *Traditio Divina* (quae & *Verbum Dei non scriptum* appellatur) ea est, quam Apostoli immediate a Spiritu sancto dictatam, vel ex ore Christi acceperunt, quaeque ab Apostolis promulgata, & continua successione conservata, & quasi de manu in manum ad nostra usque tempora tradita fuit: qualis traditio potissimum habetur circa materiam & formam Sacramentorum, & alia hujusmodi in Ecclesia Catholica perpetuo custodita, quae tamen in S. Scriptura expresse non habentur. *Traditio Apostolica* solet nonnumquam confundi cum Divina, eo quod haec ab Apostolis promulgata fuerit: proprie autem Traditio Apostolica vocatur ea, quae ab Apostolis instituta est cum assistentia Spiritus Sancti, nec tamen in S. Scriptura reperitur expressa; ut est jejunium Ecclesiasticum, certis temporibus ab Apostolis institutum. *Traditio tandem Ecclesiastica* dicitur consuetudo quaedam antiqua ab Episcopis, vel populo fidei in Ecclesiam introducta. In praesenti sermo est praecipue de Traditionibus Divinis, seu Verbo Dei non scripto.

47. CONCL. I. Praeter S. Scripturam sunt admittendae, & observandae quaedam Traditiones, seu Verbum Dei non scriptum. Ita omnes Catholici; estque novissime definitum in Concilio Trid. Sess. 4. in Decreto de *Canonicis Scripturis*. Idem communiter probatur ex S. Scriptura 2. *Thessal.* 2. ubi Apostolis praecipit, dicens: *Itaque fratres state, & tenete Traditiones, quas didicistis, sive per sermonem, sive per epistolam nostram.* In quem locum S. Chrysostomus ita scribit: *Hinc patet, quod non omnia per epistolam tradidit, sed multa etiam sine litteris; eadem vero fide digna sunt tam illa, quam ista.* Eodem modo passim loquuntur alii sancti Patres.

## Additio.

Et quomodo ante Legem scriptam in ipsa Lege naturae, post tot saecula sibi invicem succedentia haberi potuit notitia de remedio contra peccatum originale, praesertim quoad semellas &c. Item de futuro Messia &c. nisi per continuas Traditiones cum speciali assistentia Spiritus sancti? undenam Moysi, primo sacri Textus Scriptori, post bis mille annos, & ultra haec ipsa notitia, una cum altera de Mundi primordiis, de Paradiso, de primis Parentibus illuc collocatis &c. communicata fuit, nisi praeter specialem Dei vigilantiam per tales Traditiones? nam uti genealogica Tabula Saliani apud Ignatium Schvvarz in *inst. Histor.* ostendit, *Amram*, Pater Moysis pluribus adhuc annis cum *Levi* Atavo suo, econtra *Levi* cum *Isaac* annis triginta tribus circiter, *Isaac* cum *Sem* quinquaginta, *Sem* cum *Mathusalem* nonaginta octo, & demum *Mathusalem* cum *Adamo* centum quadraginta tribus annis convixerunt, ex quo notitiam de creatione Coeli & Terrae, ac Hominis de limo terrae, de ligno scientiae boni & mali, de

transgressione Praecepti Divini in comedendo fructu, de venturo Messia, &c. haud dubie a Prooparente Adamo per successivas Traditiones haurire potuerunt. Si autem admittuntur Traditiones Divinae antiquae, cur non pariter in Testamento novo? Nec dicatur Christum novi Testamenti Auctorem reprehendisse Judaeos propter Traditiones, dum *Matth.* 15. inquit: *inutilem fecistis Mandatum DEI propter Traditionem vestram.* Respond. enim, Christum ibidem reprehendisse non Traditiones Divinas, & Apostolicas, sed Pharisaicas, quarum aliquae erant inutiles, aliae etiam ex parte periculosa. Caeteroquin Traditiones Divinas, & Apostolicas voluit Apostolus ad *Thessalonicenses*, loc. cit. observari.

48. CONCL. II. Traditiones Divinae sunt ejusdem infallibilitatis & auctoritatis, cujus est ipsum Verbum Dei scriptum. Ita rursus omnes Catholici. Unde Tridentinum Concilium cit. Sess. 4. sic ait: *Sacrosancta Synodus Traditiones tum ad fidem, tum ad mores pertinentes, tamquam vel ore tenus a Christo, vel a Spiritu sancto dictatas, & continua successione in Ecclesia Catholica conservatas, pari pietatis affectu, ac reverentia suscipit, & veneratur.* Accedit ratio: quia Verbum Dei, sive scriptum, sive non scriptum eandem vim atque infallibilitatem habet; cum non solum in scriptis; sed & in verbis suis Deus semper sit infallibilis.

49. CONCL. III. Regula dignoscendi Traditiones Divinas ab Apostolicis, vel Ecclesiasticis ex eo habetur, si Ecclesia ipsa judicet, hanc vel illam Traditionem esse Divinam: quod quidem patere potest vel ex definitione Ecclesiae facta in Concilio Generali, aut per Summum Pontificem loquentem (ut ajunt) ex Cathedra, vel si unanimis consensus SS. Patrum, & Doctorum id testetur.

## Q U Æ S T I O VI.

## Quaenam sit totius Fidei Resolutio.

## S U M M A R I U M.

- 50 *Resolvere Fidem, quid?*  
 51 *Resolutio Fidei a priori fit in primam veritatem Dei nobis revelantis.*  
 (b) *Dist. 2. quest. 1. n. 8.*  
 52 *An resolvatur ultimatè in Deitatem?*  
 53 *Instantia de circulo proponitur.*  
 54 *Et solvitur.*  
 55 *Motiva credibilitatis Fidei, quae?*  
 56 *Fides non resolvitur in motiva humana.*  
 57 *Actus Fidei non est merus actus intellectus, Sed ad ipsum requiritur pia affectio voluntatis.*  
 58 *Propositio damnata refertur, ac refutatur.*  
 59 *Aliae duae propositiones damnatae quo ad propositum.*

50 **A**dvertendum, quod *Resolvere Fidem* aliud non sit quam ordine retrogrado ea, quibus ad actum Fidei pervenimus, relegando investigare principium seu motivum primum, cui totius Fidei certitudo innititur. Quando enim interroganti redditur ultima ratio nos movens ad actum Fidei, & ad quem nulla alia nos movet, tunc Fides nostra ultimo resolvi dicitur, ac proinde ibidem standum est, ne detur processus in infinitum. Hoc praenotato, sit.

51 CONCL. I. Loquendo de Resolutione Fidei in objectum suum formale, sic Fides Divina a priori & ultimatè resolvitur in primam veritatem, seu veritatem Dei nobis revelantis. Ita Doctor noster 3. *dist.* 33. estque communis Theologorum Ratio est: quia objectum formale, & motivum Fidei supernaturalis, est prima & infallibilis veracitas Dei, seu veritas ipsius in revelando, ut dictum superius (b) & consequenter in eam Fides Divina a priori ac ultimatè resolvitur. Unde si quaeras, cur credam Mysterium SS. Trinitatis? Resp. Quia Deus hoc revelavit. Si rursus quaeras, cur credam Deo Revelanti? Resp. Quia Deus est prima Veritas, quae nec fallere potest, nec falli. Et hic datur status in assignanda ratione Fidei supernaturalis, & a priori.



§2 Si dicas. Deus est prima veritas in revelando ratione Deitatis; ergo Fides ultimæ resolvitur in Deitatem, utpote ratione cujus competit Deo infallibilis veritas. Resp. negando consequentiam: etsi enim veritas resolvatur in Deitatem tamquam in rationem essendi, non tamen resolvitur in eam tamquam in rationem formalem credendi: hæc enim potius sistit in ipsa veracitate, quia Fides non attendit, unde ista veritas Deo competit. Herincx *disp. 2. de Fide quæst. 3. n. 11.* Vel dic cum aliis, distinguendo consequens: ergo Fides ultimæ resolvitur in Deitatem materialiter, sive in sensu reali, conceditur; formaliter, seu tamquam in rationem formalem credendi, negatur consequentia.

§3 Neque dicas, prius datam responsionem non sufficere, cum ulterius quæri possit, cur credam, hoc Mysterium SS. Trinitatis Deum revelasse? Neque respondere juvat (inquies) quia in sancto Evangelio sic scriptum habetur: nam urgetur, quærendo, cur potius credam Evangelio S. Matthæi &c. quam Evangelio Nicodemi, vel Nazareorum, vel hujusmodi? Quod si cum S. Augustino *lib. contra Epistolam Manichæi c. 5.* dicam, Evangelio S. Matthæi credo, quia me Catholicæ Ecclesiæ illud amplectentis, atque a Deo revelatum esse attestantis, & veluti Fide Divina credendum proponentis, commovet auctoritas; non sic Evangelio Nicodemi, vel Nazareorum, aut aliis ejusmodi scripturis, cum non sic ab Ecclesia admittantur. Rursum urgebis, quærendo, cur credam Ecclesiæ? Et si hujus infallibilem auctoritatem ex S. Evangelio probare quis conetur, replicabis, hic committi circulum vitiosum, probando S. Scripturam per auctoritatem Ecclesiæ, & hujus auctoritatem vicissim probando per sacram Scripturam.

§4 Ad hanc instantiam, quæ in quacunque sententia urget Respondetur negando assumptum, vel potius suppositum totius discursus: nam dum quæritur, cur credam, Deum hoc revelasse, non amplius petitur ratio a priori, seu causa formalis & motiva credendi Mysterium a Deo revelatum, sed petitur ratio a posteriori, seu quoad nos respectu ipsius revelationis factæ. Porro hæc duo, ut patet ex terminis, sunt valde diversa: & primum quidem spectat ad motivum formale Fidei, posterius vero ad motiva credibilitatis Fidei. Quod ut melius intelligatur, sit

§5 CONCL. II. *Motiva credibilitatis Fidei* dicuntur ea, propter quæ moraliter sit evidens, quod Mysteria nostræ Fidei sint a Deo revelata, & consequenter propter infallibilem ejus veracitatem credibilia: juxta quod *Psal. 62.* dicitur: *Testimonia tua credibilia facta sunt nimis.* Porro hujusmodi motiva Doctor noster Subtilis *q. 2. Prologi. §. Contra omnes istos. & seqq.* ad octo capita apte reducit; quæ sunt, prænuntiatio Prophetica, Scripturarum concordia, Auctoritas scribentium, Diligentia recipientium, Rationabilitas contentorum, Irrationabilitas singulorum errorum, Ecclesiæ stabilitas, & Miraculorum claritas. Et propter hujusmodi motiva credibilitatis, Mysteria Fidei sunt evidenter credibilia, hoc est, evidenter digna, quod credantur esse a Deo revelata, prout tradit Ecclesia Catholica.

§6 Nec dicas. Omnia ista motiva sunt humana, nobisque innotescunt mera fide humana, utputa per libros, narrationem Seniorum, prædicationem Patochorum, vel dictamen rationis naturalis: atqui Fides Divina resolvitur in talia motiva; ergo sequitur, eam resolveri in mera motiva humana, quod est absurdum. Resp. enim, quidquid sit de majori, negando minorem: quia ipsa Fides Divina non resolvitur in talia motiva, tamquam rationem formalem & ultimam credendi, sed judicium dumtaxat credibilitatis objecti Fidei. Nam quia Deus regulariter non loquitur immediate nobis singulis, hinc assensus Fidei supernaturalis ordinariæ non fit, nisi prævia fide humana, qua quis prius credit suo Prædicatori, vel Ecclesiæ (quam per supra dictas Notas, veram esse Ecclesiam Christi agnovit) proponenti Mysteria Fidei, atque testificantis, ea esse a Deo revelata, juxta illud *Rom. 10. Fides ex auditu.* Hoc autem semel supposito, intellectus fidei ac persuasus, talia

esse a Deo revelata, totum se convertit in ipsius Dei veracitatem, ac propter istam unice per actum Fidei supernaturalis assentitur Mysteriis veræ Fidei.

§7 Hoc ipsum amplius declaratur ex eo: quia actus Fidei supernaturalis non est merus actus intellectus, sed ad eum etiam prærequiritur actus voluntatis, imperantis assensum Fidei propter infallibilem veracitatem Dei revelantis. Siquidem actus fidei Theologicæ sunt liberi (alioquin enim meritorii non essent) ac proinde non præcise consistunt in actibus intellectus, quæ est potentia naturalis, sed insuper ad eos requiritur pia affectio supernaturalis voluntatis, qua isthæc intellectui imperet, ut propositis sibi articulis, simulque motivis credibilitatis accedente simul gratia collustrante Dei propter infallibilem veracitatem Dei revelantis firmissime assentiat ejusmodi Mysteriis, credendo vera esse, quæ Deus nobis revelare dignatus est. Quod ipsum apertius docet Concilium Tridentinum *Sess. 6. c. 6.* ibi: *Disponuntur autem ad ipsam justitiam; dum excitati gratia Divina, & adjuti fidem ex auditu concipientes, libere moventur in Deum, credentes, vera esse, quæ divinitus revelata, & promissa sunt.* Et hinc fit, quod audita eadem veræ Fidei prædicatione quidam credant, alii non: quia nimirum illi gratiæ Divinæ excitanti, & adjuvanti libere cooperantes, suo intellectui imperant, simulque eliciunt actum Fidei supernaturalis, non vero ceteri.

§8 Huc facit novissimum Decretum Innocentii XI. inter alias Propositiones sequentem, ordine 19. damnantis; *Voluntas non potest efficere, ut assensus Fidei in seipso sit magis firmus, quam mereatur pondus rationum ad assensum impellentium.* Et merito hæc Propositio damnatur: siquidem intellectus ex vi objecti propositi non necessitatur ad assensum, nisi ubi adest evidentia veri: atqui in objectis Fidei non adest evidentia veri (nam *Fides, est sperandarum substantia rerum, argumentum non apparentium. Hebr. 11.*) ergo ex vi solius objecti intellectus numquam necessitatur ad assensum Fidei, & consequenter ad hunc determinari debet per imperium voluntatis, ut firmiter in obsequium fidei sic objecto adhæreat, quam mereatur pondus rationum (intellige præcedentium motivorum credibilitatis) ad assensum impellentium.

§9 Quantum ad præsentem de Fide materiam, sunt insuper cavendæ aliæ duæ Propositiones, itidem ab Innocentio XI. damnatæ. Earum prior, ordine 20. sic sonat: *Hinc potest quis prudenter repudiare assensum, quem habebat supernaturalem.* Altera vero, ordine 21. ita docuit: *Assensus Fidei supernaturalis, & utilis ad salutem, stat cum notitia solum probabili revelationis; imo cum formidine, qua quis formidet, ne non sit locutus Deus.* Ambæ Propositiones, sicut jacent, damnatæ sunt, ac proin vitandæ.

Additio.

\* Ubi denuo adverte, etiam has ambas Propositiones fuisse vel ex ea ratione jure meritissimo reprobatas: nam vel ille assensus, de quo loquuntur istæ propositiones, nititur summa Dei veritate in dicendo, vel alio motivo creato, & quidem tali, quod ex gravi ratione apparet fallibile? si posterius; non est actus supernaturalis Fidei, nec virtutes Theologicæ; cum non habeat pro objecto Deum, puta in præsentem, quatenus summe verum in dicendo. Si prius; quomodo possum prudenter repudiare hunc assensum, aut de veritate ejusdem prudenter, ac probabiliter formidare? cum ex una parte Deus loquens nec fallere, nec falli queat, ex altera vero, *quod sit locutus Deus,* non habeam ullam NB. gravem rationem dubitandi: nam motiva credibilitatis, præcedentia actum Fidei, me reddunt moraliter certum, Deum fuisse locutum. Quomodo ergo NB. prudenter possum assensum istum repudiare, vel NB. prudenter formidare, ne non sit locutus Deus; cum non apprehendam rationem

H

gravem



gravem formidandi? alias enim stante hac actuali gravi formidine de opposito, non eliceretur verus actus fidei, foretque obligatio ulterius, quantum moraliter fieri potest, indagandi veritatem. \*

## DISTINCTIO IV.

## De Vitiis Fidei oppositis.

## QUESTIO I.

Quotuplex, & quam grave peccatum sit Infidelitas?

## SUMMARIUM.

- 1 Infidelitas alia positiva, alia negativa.
- 2 Culpabilis, & inculpabilis.
- 3 Infidelitas pure negativa, & privativa, quid?
- 4 Species Infidelitatis generatim sunt tres, nempe Paganismus, Judaismus, & Hæresis.
- 5 Pagani, qui? Judei, & Hæretici, qui?
- 6 Quæ Infidelitas sit ceteris gravior?
- 7 Infidelitas, an sit peccatum?
- 8 Et quale?

1 **I**nfidelitas hic sumitur, prout est opposita Fidei Theologicæ. Et hæc generatim est duplex: una positiva, qua aliquid creditur contrarium Fidei: qualis est in Hæreticis, Judæis, ac Ethnicis adultis. Altera negativa, quæ est absentia, vel carentia Fidei; qualis habetur ab ignorantibus Myſteria veræ Fidei.

2 Utraque Infidelitas subdividitur in culpabilem, & inculpabilem: nam potest quis non tantum vincibiliter & culpabiliter ignorare Myſteria Fidei, aut credere erroneum in Fide, sed quandoque etiam invincibiliter, credendo erronee aliquid a Deo esse revelatum, quod tamen tale non est, imo a parte rei existit falsum atque erroneum.

3 Porro ignorantia invincibilis Myſteriorum Fidei, seu carentia involuntaria Fidei, vocatur a Theologis Infidelitas pure negativa, qualis datur in iis, qui nihil umquam de Fide audierunt, sive sint parvuli, sive adulti. Ignorantia autem vincibilis, & voluntaria Myſteriorum Fidei, appellatur privativa; nec aliud est, quam carentia Fidei in eo, qui, cum posset, & deberet Fidem habere audiendo prædicationem Evangelii, id negligit: quo modo solum in adultis reperiri potest, estque ex genere suo peccatum mortale. His prænotatis, sit

4 **CONCL. I.** Species Infidelitatis generatim sunt tres, videlicet Paganismus, Judaismus, & Hæresis. Ita Theologi communiter cum D. Thoma 2. 2. q. 10. art. 5. Unde & Ecclesia Catholica in die Parasceves pro istis tribus tantum generibus Infidelium, nempe pro Hæreticis, Judæis, & Paganis, sigillatim orare consuevit. Accedit ratio: quia aut Infidelitas adversatur veræ Fidei nullo modo, ne quidem in figuris, susceptæ; & est Paganismus: aut adversatur Fidei, susceptæ solum in figuris, & umbra veteris Legis, nempe in Circumcisione, aliisque ceremoniis Legis Mosaicæ, & est Judaismus; aut adversatur Fidei in se formaliter susceptæ, & est Hæresis; vel si quis ad Paganismum, sive Judaismum deficiat, appellatur proprio nomine *Apostasia a fide*: quo modo Julianus Imperator, a Christianis ad Ethnicos deficiens, dicitur *Julianus Apostata*.

5 Igitur Pagani sunt, qui sentiunt contraria Fidei Christianæ, quam nullo modo profitentur: ut sunt Idololatæ colentes plures deos, aut idola sua; item Turcæ, qui licet unum Deum profiteantur cœli terræque Conditorum, negant tamen & SS. Trinitatem & Christum, neque alias veritates Fidei admittunt, ut a Christo revelatas, vel quatenus ad Fidem Christianam pertinent, sed quatenus a Mahometh Pseudo-

Propheta eas acceperunt. Judei dicuntur, qui etiam num legem Mosaicam ad litteram observant, circumcidendo se, ac alia Legalia (quæ fuerunt umbra futurorum, per Christum jam completorum) superstitione custodiendo, totumque novum Testamentum negando, sperantes Christum primum venturum, utpote quem necdum venisse pertinaciter credunt. Hæretici tandem vocantur, qui post receptum Sacramentum Baptismi pertinaciter sentiunt, seu errant contra aliquam veritatem Fidei Catholicæ: duo siquidem ad hæresin formaliter sumptam requiruntur, videlicet & error in intellectu contra aliquam veritatem Fidei, & pertinaciâ in voluntate, ut magis dicetur *Quæst. seq.*

6 **CONCL. II.** Quamquam extensive, seu ratione errorum materialium cum Fide pugnantium, gravior sit Infidelitas Paganorum, quam Judæorum; & dein gravior Judæorum, quam Hæreticorum: nihilominus intensive, seu loquendo quantum ad rationem culpæ, gravior est Infidelitas Hæreticorum, quam Judæorum, & horum, quam Paganorum. Ita Doctor Angelicus 2. 2. q. 10. art. 6. & Theologi communiter Ratio primæ partis est: quia Gentiles, seu Pagani, in pluribus articulis errant contra Fidem, quam Judæi; & hi in pluribus, quam Hæretici, ut patet: quia Paganismus negat omnia divinitus revelata, Judaismus ea solum, quæ sunt novi Testamenti, Hæresis autem aliqua horum: atqui per Infidelitatem extensive graviorem intelligitur ea, quæ pluribus Fidei articulis opponitur, seu quæ in pluribus errat contra veram Fidem; ergo. Altera pars desumitur ex *Epist. 2. S. Petri cap. 2.* ubi de Hæreticis, seu relapsis a Fide dicitur: *Facta sunt eis posteriora deteriora prioribus: melius enim erat illis, non cognoscere viam justitiæ, quam post agnitionem retrorsum converti.*

7 **CONCL. III.** Etsi Infidelitas mere negativa, qualis reperitur in iis, quibus vera Fides nunquam fuit annuntiata, sicque hanc inculpabiliter ignorant, proprie non sit peccatum, sed potius poena peccati originalis, Infidelitas tamen positivâ voluntaria est gravissimum peccatum. Ratio primæ partis desumitur ex defectu voluntarii ad peccatum requisiti, unde Christus *Joan. 15.* ait: *Si non venissem, & locutus fuisset eis, peccatum non haberent*, videlicet Infidelitatis, hincque merito inter alias propositiones Michaelis Baji etiam sequens, ordine 68. rejecta est: *Infidelitas pure negativa in his, quibus Christus non est prædicatus, peccatum est.* Altera vero pars Conclusionis, nempe Infidelitatem positivam esse gravissimum peccatum, habetur ex S. Scriptura passim, ut *Marci ult. Qui vero non crediderit, condemnabitur.* Item *Joan. 3. Qui non credit, jam judicatus est.* & alibi.

8 Ceterum hoc peccatum incredulitatis, seu Infidelitatis positivæ gravius est, quando est directe volitum per voluntatem repugnantem auditui Fidei, vel etiam audita, Fidemque contemnendo. Unde ex genere suo, ac per se loquendo Infidelitas est gravius peccatum omnibus illis, quæ contrariantur Virtutibus moralibus, puta furto, adulterio, homicidio, & hujusmodi: quamvis per accidens, nempe propter imperfectionem actus, possit interdum Infidelitas esse minus grave peccatum.

## QUESTIO II.

Quid requiratur ad formalem & perfectam Hæresin?

## SUMMARIUM.

- 9 Hæresis unde sic dicatur?
- 10 Et quid sit?
- 11 Ad hæresin formaliter sumptam requiritur & error in intellectu.
- 12 Corollarium.
- 13 Et pertinaciâ in voluntate.
- 14 Hinc errans contra Fidem, sed paratus credere, quod credit Ecclesia, non est hæreticus. Cautela Scripturarum Catholicorum.



15 Quid si aliquis ignoret, opinionem suam adversari sensui Ecclesiæ?

(\*) Juxta dicta Dist. 2. n. 30.

16 Pertinacia ad hæresin requisita, in quo consistat?

17 Corollarium.

18 Hæretici formales?

19 Hæretici materiales, qui?

20 Dubitans de Fide peccat peccato hæresis.

21 Dummodo excipiat natus inter hæreticos, donec sufficienter instruat.

22 Quid dicendum de involuntariis cogitationibus hæreticis?

23 Dubitans in Fide, an incurrat excommunicationem?

**E**tsi præsens Quæstio procedat de omnibus tribus Infidelitatis speciebus, specialiter tamen moveri solet de Hæresi, utpote magis obvia, quamvis quæ de hac dicuntur, suo modo locum habeant in aliis Infidelitatibus. Porro Hæresis est nomen græcum, & dicitur sic ab electione; atque ex usu Scriptorum Ecclesiasticorum plerumque accipitur in malam partem, nempe pro ea electione, qua ex arbitrio nostro contra doctrinam Christi, & sensum S. Matris Ecclesiæ eligimus nobis, quid credere velimus.

**10 CONCL. I.** Hæresis est error voluntarius, quem quis perniciositer tenet contra aliquam veritatem Fidei Christianæ, quam suscepit, seu professus est. Ita in re communis Doctorum, & magis patebit ex dicendis. Solum nota, ad Hæresin requiri, ut quis Fidem Christi aliquando susceperit per Sacramentum Baptismi, vel alias eandem publice professus sit; alioquin enim error contra Fidem esset Paganismus vel Judaismus. Catechumeni tamen, id est, in Christum credentes, sed nondum baptizati, si post susceptam Christi Fidem ad hæreticos deficiant, coram Deo vere sunt Hæretici, licet non subiaceant pœnis ab Ecclesia contra Hæreticos latis, eo quod per Baptismum necdum sint ingressi in Ecclesiam. Pirhing tit. de Hæretic. num. 3. & alii.

**11 CONCL. II.** Ad Hæresin formaliter sumptam duo in simul requiruntur, nimirum & error in intellectu, & pertinacia in voluntate. Ita communis. Et quidem requiri errorem in intellectu, patet: quia Hæresis est species Infidelitatis; hæc autem importat errorem in intellectu contra veram Fidem.

**12** Inferunt proinde Doctores, quod si quis metu mortis, seu pœnarum neget exterius Fidem, aut aliquid Fidei contrarium affirmet absque tamen interiori mentis assensu (id est, non credendo id, quod ore profert) quamvis graviter peccet contra præceptum profitendi exterius Fidem, vere tamen & proprie coram Deo, & in Foro conscientie non sit Hæreticus: quia Hæresis essentialiter consistit in interno judicio erroneo intellectus contra veram Fidem, quale hic non adesse supponitur. Additur notanter, *coram DEO, & in Foro conscientie*. Siquidem in Foro externo Ecclesiæ talis censetur hæreticus, atque ut hæreticus per Inquisitores hæreticæ pravitatis merito punitur: nam Ecclesia non judicat de occultis. c. Erubescant. dist. 32. & c. Sicut tuis, de Simonia.

**13** Quod autem simul ad formalem & perfectam Hæresin requiratur pertinacia in voluntate, fatentur passim Doctores. Unde D. Augustinus Epist. 162. ac refertur can. Dixit Apostolus. 24. q. 3. sic ait: Qui sententiam suam quamvis falsam, atque perversam nulla pertinaci animositate defendunt, præsertim quam non audacia sua presumptionis pepererunt, sed a seductis atque in errorem lapsis parentibus acceperunt, querunt autem cauta sollicitudine veritatem, corrigi parati, cum invenerint, nequaquam sunt inter hæreticos deputandi. Hæc ibi.

**14** Inferunt rursus Doctores, quod errans contra Fidem, simul tamen judicio Ecclesiæ sese submittens, paratus credere, quod ipsam credere intellexerit, non sit hæreticus: quia in suo errore non est pertinax. Idque desumitur ex Jure Canonico cap. Damnamus. de Summa Trinitate. ubi hac de causa Joachim Abbas Anacl. Reiffensuel Theolog. Tom. I.

non censetur hæreticus, non obstante, quod docuerit sententiam hæreticam ibidem damnatam, quia videlicet scripta sua submisit judicio Sedis Apostolicæ, sicque non fuit pertinax, ac proinde neque hæreticus, sed erraticus, ut loquitur Fagnanus ad cit. c. Damnamus n. 26. Et hac de causa Scriptores Catholici caute in principio, vel fine librorum suorum, solent apponere protestationem, qua omnia sua dicta & scripta judicio & correctioni Sanctæ Ecclesiæ Catholicæ subjiunt: per hoc siquidem evitant periculum hæreticæ pravitatis, etsi forsitan in eorum scriptis, per inadvertentiam irrepens doctrina ab Ecclesia damnata reperiretur. Fagnanus loc. cit. n. 13.

**15** Quinimo addunt Doctores, quos citat, & sequitur Pirhing tit. de Hæreticis n. 2. quod si quis ignoret, etiam ex ignorantia mortaliter culpabili & crassa, opinionem suam adversari doctrinæ Ecclesiæ Catholicæ, jam non sit proprie hæreticus, neque Ecclesiasticis Hæreticorum pœnis obnoxius. Rationem dant: quia deest pertinacia, quæ requirit scientiam, quod contrarium teneatur ab universali Ecclesia Christi. Accedit, quod peccatum hæresis non sit peccatum ignorantie, sed peccatum infidelitatis positivæ: ad hunc autem requiritur, ut Mysteria Fidei cuiuspiam sufficienter proponantur (a)

**16 CONCL. III.** Pertinacia ad Hæresin formalem requisita non consistit in hoc, quod quis errorem suum acriter & mordicus diu retineat, & pertinaciter tueatur: sed in eo consistit dicta pertinacia, quod quis suum contra Fidem errorem retineat, postquam contrarium est ipsi sufficienter, nimirum taliter propositum, ut de eodem amplius rationabiliter dubitare nequeat, sive quando scit contrarium teneri a reliqua universali Christi Ecclesia, cui judicium suum vult præferre. Ita Mastrius disp. 10. Theol. Moral. n. 24. estque in re communis. Ratio est: quia quilibet in rebus credendis tenetur se subicere regulis ab Ecclesia præfixis, utpote quæ est columna & firmamentum veritatis. 1. Timoth. 3. Igitur, si quis hoc non fecerit, jam plus nimio & inordinate adhæret errori suo, atque ideo pertinax in eo censi debet.

**17** Inferitur proinde, quod ad hanc pertinaciam non requiratur major mora temporis, quam quæ requiritur ad hoc, ut cum plena advertentia possit quis judicare de veritate Fidei sufficienter sibi proposita, & nihilominus suo velit judicio adhærere. Multo minus requiritur prima, vel secunda correctio; quamvis hæc possit conducere ad plene cognoscendam latentem pertinaciam contra veritatem Fidei.

**18 CONCL. IV.** Recte proinde Hæretici dividuntur in formales, & in materiales tantum. *Formales Hæretici*, de quibus solis definitio Hæresis, aliaque antecedentia procedunt, dicuntur illi, qui cum pertinacia eligunt, vel sequuntur sententiam hæreticam contra definitionem Ecclesiæ; sive id fiat lucris temporalis gratia, sive intuitu vanæ gloriæ, vel odii, aut vindictæ. Et de his loquitur S. Augustinus lib. de Fide Catholica, atque refertur c. Firmissime. de Hæretic. Firmissime tene, & nullatenus dubites, omnem hæreticum vel schismaticum cum diabolo & Angelis ejus æterni ignis incendio participandum, nisi ante finem vitæ, Catholica fuerit incorporatus, & reintegratus Ecclesiæ. Hæc ille.

**19 Hæretici materiales** (qui tamen juxta S. Augustinum num. 13. relatum, nequaquam sunt inter hæreticos deputandi) dicuntur illi, qui non ex malo animo aut pertinacia, sed ex simplicitate, aut defectu debitæ informationis errant circa Fidem. Et horum multi sunt in vulgo Hæreticorum; nam defectu pertinaciæ nemo est hæreticus formaliter, qui paratus est judicium suum Ecclesiæ submittere, aut nescit veram Christi Ecclesiam contrarium tenere, vel ita dispositus est saltem habitualiter, ut a suo errore discederet, si sciret eum esse veræ Fidei contrarium. Mastrius loco citato & alii.

**20** Quæres, an dubitans de Fide sufficienter sibi proposita committat Hæresin? Resp. I. Qui circa Fidei



articulum, seu propositionem aliquam sufficienter sibi propositam deliberate dubitat, peccat peccato hæresis, cum virtualiter judicet, ejusmodi articulum Fidei habere incertam veritatem. Hinc Stephanus Papa, relatus cap. 1. de Hæretic. ait: *Dubius in fide, infidelis est, sive hæreticus.*

21 Dicitur notanter, circa articulum Fidei sufficienter sibi propositum. Nam, ut cum aliis notat Layman lib. 2. tract. 1. cap. 13. n. 5. hinc excipiendi sunt illi, qui inter hæreticos nati & educati Catholicam Religionem ignorant: his enim dubitare interim licet, donec instruantur; & argumenta seu motiva credibilitatis Fidei nostræ sufficienter & recte apprehendant. Ratio est: quia talis dubitatio in istis non est conjuncta cum pertinacia, imo eam ordinant ad penetranda melius fundamenta Fidei Catholicæ, exemplo Beroensium, qui audita prædicatione S. Pauli, *susceperunt verbum cum omni aviditate, quotidie scrutantes Scripturas, si hæc ita se haberent, ut legitur in Actibus Apostolorum cap. 17.*

22 Additur enim, *deliberate dubitat*: alioquin enim ob defectum voluntarii peccatum non incurritur. Et hinc annotandum est, eximendum fore scrupulum iis, qui de Fide Catholica dubitare se putant, eo quod hæreticæ aut blasphemæ cogitationes ipsis occurrere soleant: cum enim has serio detestentur, & numquam (uti supponitur) in animum venire exoptent, insuper protestationem faciant eis numquam consentiendi, non possunt culpæ imputari, sed magis merendi apud DEUM occasionem præbent. Et certe solet diabolus animas Deo devotas sæpius per fortissimas imaginationes, & vivacissimas repræsentationes sic torquere, ac si actualiter consensissent; ubi tamen tales se plenissime submittere debent instructioni docti Confessarii, nec multum cum antiquo serpente disputare, ne sicuti prima Mater nostra Eva decipiantur.

23 Resp. II. An dubitans de Fide, suamque dubitationem signo exteriori sufficienter manifestans præter peccatum mortale insuper incurrat excommunicationem ipso jure latam in Hæreticos, major est difficultas. Affirmant plerique in casu, quando quis deliberate dubitat, suamque dubitationem signo externo sufficienter prodit; idque asserunt propter rationes n. 20. allatas. Negat Tannerus tom. 3. disp. 1. quæst. 8. n. 109. post Sa, eo quod talis hæresin plane consummatam & perfectam non habeat. Item probabile censet Lud. Engel in Collegio Juris Canonici. tit. de Hæreticis. num. 2. cum aliis.

### Q U Æ S T I O III.

De conditionibus ad incurrendam excommunicationem ob Hæresin latam requisitis, ejusque absolutione.

### S U M M A R I U M.

24 Inter alias hæreticorum penas prima est excommunication.

25 Ad excommunicationem ob hæresin incurrendam quatuor conditiones requiruntur. I.

26 II. 27. III. 28. & IV. Conditio.

29 De jure communi nequeunt Episcopi absolvere ab hæresi.

30 Solvitur instantia.

31 Tamen in Germania solent habere specialem licentiam absolventi ab ea.

\* Quibusnam hæc licentia concedi soleat?

32 In mortis articulo potest quilibet Sacerdos absolvere ab hæresi, & aliis casibus &c.

33 An tunc simplex Sacerdos possit absolvere præsentem proprio Confessario?

34 Quis sit modus recipiendi hæreticos respucentes?

35 In praxi quid dicendum de absolutione eorum, qui sunt hæretici materialiter.

(b) Ut dictum n. 25.

Aut etiam formaliter?

(c) Ut dictum n. 31.

\* Notabile Corollarium practicum.

24 I Nter varias Hæreticorum penas, Jure tum Canonico tum Civili contra eosdem latas, de quibus fufius agunt Jurisconsulti, maxima & prima est excommunicatio major: quam non quidem ipso Jure Divino, sed antiquissimo Jure Ecclesiastico incurrunt. Et licet olim hæc excommunicatio non fuerit latæ sententiæ, postmodum tamen & ipso jure incurreretur tamquam censura latæ sententiæ, & defacto est reservata Summo Pontifici per Bullam Cœnæ Domini, sic dictam, quia quotannis a Summo Pontifice promulgari solet in die Cœnæ Domini. His prænotatis, sit

25 CONCL. I. Ad excommunicationem ob Hæresin incurrendam sequentes quatuor conditiones requiruntur. Prima est, ut quis sit hæreticus formalis: nam hæretici materiales dumtaxat, sicuti juxta S. Augustinum superius relatum inter hæreticos deputandi non sunt, ita neque excommunicationem in hæreticos formales latam incurrunt. Hinc tales a proprio Parocho possunt Sacramentaliter absolvi: quamvis aliquarum Ecclesiarum consuetudo exigat, ut tales etiam materiales hæretici mittantur ad eos, qui ab hæresi potestatem absolventi habent. Layman ibidem cap. 13. n. 4. Pirhing tit. de Hæreticis. n. 16. & alii.

26 Secunda conditio ad incurrendam dictam excommunicationem requisita est, ut quis hæresin internam signis externis manifestet: siquidem ob solam hæresin mente conceptam non incurri excommunicationem, eo quod Ecclesia non puniat actum mere internum, passim fatentur Theologi, ac proinde ab eadem possunt absolvi quivis expositi Confessarii. Sufficit autem ad incurrendam excommunicationem propter hæresin, quod hæc sufficienter exprimatur signo exteriori quamvis occultissimo, ac nullo prorsus alio teste præsentente. Dicitur tamen, *sufficienter exprimatur*, propter sequentes conditiones.

27 Tertia itaque conditio est, ut actio externa, per quam hæresis interna manifestatur, sit mortaliter peccaminosa. Unde excommunicatus non est, qui hæresin animo conceptam alteri manifestat consilii petendi causa, vel ut ab eo melius instruat: nam hujusmodi manifestatio non est mala seu peccaminosa, quinimo actus bonus, qui ab Ecclesia puniri non potest.

28 Quarta tandem conditio est, ut aliquis hæresin suam exterius manifestet animo eam asserendi, seu profitendi. Ratio est: quia excommunicatio lata est propter externum peccatum hæresis, quale non est nisi illud, quod ab interna hæresi informatur, dum quis eam exterius asserere, vel adstruere intendit. Hinc si quis in somno vel plena ebrietate proferat verba hæretica, non incurret hanc Excommunicationem, cum desit animus. Item si quis lapsus interne in hæresin Lutheri, carnes comedat die ab Ecclesia interdicto ex mera voracitate seu gula, excommunicationem non incurrit: quia comedere carnes ex se est res indifferens, ipsas vero manducare die jejunii est peccatum gulæ, ob violatam legem Ecclesiasticam ex motivo Temperantiæ latam. Quod si vero per talem carnium comestionem velit suam hæresin internam exterius manifestare (quod ipsum ex aliis circumstantiis, puta loci, temporis &c. determinandum erit) tunc excommunicationem in Hæreticos latam incurrit; quia hæresin interiorem sufficienter opere externo manifestat.

29 CONCL. II. Quamvis de jure communi non possint Episcopi, multo minus alii inferiores absolvere ab excommunicatione propter hæresin contracta extra mortis articulum, seu periculum, ac secluso privilegio speciali: nihilominus tale privilegium in partibus Germaniæ habent plerique Episcopi, possuntque talem potestatem quibusdam aliis viris idoneis communicare. Prima pars, licet ob textum Concilii Trid. Sess. 24. cap. 6. de Reformat. a nonnullis Doctoribus fuerit olim in



in dubium revocata, desumitur ex terminis Bullæ Cœnæ Domini, in qua inter alia sic dicitur: *Ceterum a prædictis sententiis nullus per alium, quam per Romanum Pontificem, nisi in mortis articulo constitutus, nec etiam tunc, nisi de stando Ecclesiæ mandatis, & satisfaciendo cautione præstita, absolvi possit.*

30 Nec obstat, quod hæc verba per quosdam Auctores explicata fuerint de absolutione ab hæresi dumtaxat publica. Resp. enim eorum sententiam amplius sustineri non posse, ob Decretum Alexandri VII. inter alias Propositiones enim sequentem, ordine 3. damnantis: *Sententia asserens, Bullam Cœnæ solum prohibere absolutionem hæresis, & aliorum criminum, quando publica sunt, & id non derogare facultati Tridentini, in quo de occultis criminibus sermo est, Anno 1629. 18. Julii in Consistorio Sacræ Congregationis Emin. Cardinalium visa & tolerata est.*

31 Altera vero pars patet ex praxi: siquidem, ut testatur Gobat tract. 7. Theol. experim. n. 371. plerique Episcopi Germaniæ inter alias complures facultates Spirituales, ad reiteratam supplicationem, a Sede Apostolica de quinquennio in quinquennium obtinere solent specialem licentiam absolventi ab hæresi, quam & quibusdam aliis viris idoneis valeant communicare. Unde in casu emergente talis licentia (si aliunde a Sede Apostolica specialiter non habeatur) erit petenda a Reverendissimo Domino Ordinario loci, vel ejus in Spiritualibus Vicario Generali.

*Additio.*

\* Dicitur notanter, Si aliunde a Sede Apostolica hæc licentia specialiter non habeatur: prout tamen quibusdam humiliter supplicantibus solet hæc gratia specialis in Germania concedi. Sic in nostra Provincia ad humilem infantiam singulis quinquenniis renovandam conceditur tam Provinciali, quam uni ex Fratribus in singulis Conventibus per dictum Provinciale deputando facultas absolventi in Foro conscientie Hæreticos etiam seculares extraneos ab Hæresi, & libros Hæreticorum (paucis exceptis) legendi, vel retinendi, ad quos haud dubie etiam poterunt similes hæretici mitti pro absolutione: prout plura de hac & aliis materiis Hæresin concernentibus videre poteris fusius in Jure Canonico l. 5. T. 7. per totum.

32 CONCL. III. In mortis articulo, vel etiam probabili periculo, possunt quilibet Confessarii (imo & Sacerdotes quicunque) absolvere ab hæresi, atque annexa excommunicatione, omnibusque aliis casibus Papæ reservatis quoslibet poenitentes, dummodo de stando Ecclesiæ mandatis, & satisfaciendo cautionem, si opus fuerit, idoneam præstiterint. Ita communis Doctorum: idque patet tum ex relatis verbis Bullæ Cœnæ Domini, ubi articulus mortis expresse excipitur: tum ex Concilio Trid. Sess. 14. cap. 7. de Poenitent. ubi sic habetur: *Veruntamen pie admodum in Ecclesia DEI custoditum semper fuit, ut nulla sit reservatio in articulo mortis: atque ideo omnes sacerdotes quoslibet poenitentes, a quibusvis peccatis, & censuris absolvere possunt.* Ita Concilium Tridentinum admodum provide pro salute animarum sic disponens. Ex quibus verbis S. Concilii tam amplis docet unanimis Doctorum, quod quilibet etiam simplex Sacerdos, imo & Sacerdos degradatus, excommunicatus, irregularis, apostata, possit in mortis articulo absolvere, si non adsit proprius Confessarius, Parochus, vel Episcopus.

33 Num autem præsentem proprio Confessario, puta Episcopo, vel Parocho, possit simplex Sacerdos absolvere in mortis articulo, variant Doctores. Negant multi, eo quod prædicta facultas absolventi solum videatur tunc concessa simplici Sacerdoti ob extremam moribundi necessitatem, quæ jam cessat, si adsit proprius Episcopus, vel Confessarius, aut Parochus. Et hæc sententia in praxi merito est observanda, ne ob defectum praxis, atque uberius scientiæ contingat error per simplicem Sacerdotem cum periculo salutis æternæ morituri. Nihilominus secluso tali periculo posse tunc simplicem Sacerdotem absolvere, non obstante præsentia proprii Parochi vel

Confessarii, probabile censent multi alii Doctores, eo quod Concilium Tridentinum loc. cit. loquatur indistincte, quod nulla sit reservatio in mortis articulo: atqui ubi lex non distinguit, neque nos distinguere debemus. l. de Pretio. ff. de Publiciana in rem action. Ergo.

34 Quæres, quis sit modus recipiendi Hæreticos resipiscences? Resp. I. Eos, qui a secta Lutheri, Calvini, vel alia recedere volunt, antequam ad professionem Fidei, atque ad Sacram Confessionem admittantur, cum primis sufficienter esse instruendos in necessariis Fidei Catholicæ. Alioquin enim multi fecte accedent ob timorem Magistratus sæcularis, aliamve causam, nec diu in Fide Catholica permanebunt, sed facile in suos errores hæreticos relabentur; unde multa incommoda oriri poterunt. II. Hæreticus resipiscens debet abjurare hæresin suam, prout ordinatur in Jure Canonico, c. Si qui voluerint. & c. Saluberrimum. l. 9. 7. Et hæc abjuratio communiter fit coram Sacerdote & testibus; faciendò publicam Professionem Fidei, prout præscribitur in Ritualibus Diocesanis, aliisque Libris de hac materia tractantibus. Tandem III. peracta ista Professione Fidei post præviam sufficientem instructionem perficienda, resipiscens ab hæresi admittitur ad Sacramentum Poenitentiae, & Communionis.

35 Porro si talis reperiatur solum fuisse materiali er hæreticus, aut ex quacunque causa non incurrisse sententiam excommunicationis latam in hæreticos, poterit is absolvi a quolibet Confessario approbato. Siquidem Summus Pontifex ordinarie nullum peccatum sibi reservat, nisi propter annexam excommunicationem sibi reservatam: unde sublata ista excommunicatione, vel ob ignorantiam, aut aliam causam ex superius specificatis sub n. 25. ac seqq. non contracta, potest quilibet Confessarius ab hæresi quoad culpam absolvere. In praxi tamen attendere oportet consuetudinem locorum, juxta quam tales etiam materiales hæretici, qui primum ab Hæresi transeunt ad Catholicos, mittuntur ad eos, qui potestatem absolventi ab hæresi habent. (b) Quod si vero quis fuerit hæreticus formaliter, neque Confessarius potestatem absolventi ab excommunicatione propter hæresin contracta habeat, tunc vel mittat poenitentem ad eum, qui simili potestate pollet, vel ipsemet hanc licentiam per speciales supplices litteras ab Episcopo loci, seu ipsius Vicario Generali obtinere fatagat: nam in hisce partibus ferme omnes Episcopi specialem habent facultatem absolventi ab Hæresi, quam etiam aliis Viris qualificatis delegare possunt. (c)

*Additio.*

\* Pro praxi, quando veniret aliquis Hæreticus, qui primum ab Hæresi ad Fidem Catholicam transiret, observentur dicta priora. Si vero alius Catholicus extra articulum, vel probabile periculum mortis accederet ad Confessarium non præditum facultate absolventi a Casibus Bullæ Cœnæ, & se accusaret, quod e. g. non crediderit, dari Purgatorium, aut Christum existere sub speciebus Eucharisticis &c. antequam talem dimittat ad alium speciali facultate absolventi præditum, quærat prius ex eo I. An deliberate, vel indeliberate id contigerit? Item num scienter vel ignoranter? si indeliberate vel ex ignorantia Hæreseos fecerit, res est salva: poterit enim absolvere; alias autem indaget II. Utrum hanc Hæresin etiam deliberate signo aliquo exteriori manifestaverit, & quidem animo asserendi eandem. Quod si unicum ex his requisitis desit, poterit adhuc absolvere, alias indaget III. An huic suo asserto Hæretico exterius deliberate prolato cognoverit saltem in confuso esse annexam aliquam poenam gravem Ecclesiasticam, puta excommunicationem? nam si hanc neque in confuso scivisset, non obstante, quod per hanc suam manifestationem gravissime peccaret, adhuc non incurreret excommunicationem, & consequenter adhuc valide & licite daretur absolutio a tali Confessario: etenim Casus Papales juxta communem non reservantur nisi propter annexam excommunicationem, quæ, si ignoratur, neque incurritur.



Ex quo patet, quam imprudenter & indiscrete agant illi Confessarii, qui, quam primum intra confitendum quidpiam de Hæresi audiunt, illico Confessionem abrum-punt, & poenitentes nunc fortassis melius, quam alio tempore dispositos mittunt sine absolutione ad quosdam facultate absolvendi a Casibus Bullæ Cœnæ præditos: ubi ipsimet sæpius præsertim simpliciores & rudiores absolvere potuissent si circa priora tria puncta sese informari curassent. \*

#### Q U Æ S T I O I V.

De Apostasia, Lectione Librorum prohibito-  
rum, Disputatione cum Hæreticis, alia-  
ve, cum ipsis communicatione.

#### S U M M A R I U M.

36 Apostasia a Fide, quid?

37 Apostasia a Religione,  
Vel Conventu,

38 Et Apostasia ab Ordine, quid?

39 Lectio librorum perverforum, præsertim hæreticorum  
recte prohibita.

\* Etsi in particulari aliqua persona cesset periculum sub-  
versionis.

40 Duplex circa eam prohibitio Ecclesiæ, una contenta in  
Bulla Cœnæ.

\* Quatuor circa dictam prohibitionem sunt notanda.

41 Excusat parvitas materiae, & quæ talis sit?

42 Altera prohibitio reperitur in Indice librorum prohi-  
bitorum.

43 Disputare de rebus Fidei, quando licitum?

44 Laicis prohibitum est sic disputare.

45 Quando nam id sit licitum Clericis?

46 Catholicis an liceat comitari furores hæreticorum?

\* An etiam sepelire in cæmeteriis Catholicorum? Additio I.

\* Item an liceat famulari apud Hæreticos? Addit. II.

\* Item an, & quæ communicatio sit prohibita cum Ju-  
daeis, & Paganis? Addit. III.

36 CONCL. I. Apostasia a Fide est totalis discessio  
a Fide Christiana. Ita communis. Unde tunc  
proprie committitur Apostasia a Fide, cum quis non tan-  
tum in parte susceptam Fidem Christianam deferit, sed  
in totum, puta deficiendo ad Paganismum, prout fecit  
Julianus Apostata, vel ad Judaismum. Fatendum ta-  
men, quod communiter etiam a Fide Catholica tran-  
siens ad Hæreticos dicatur apostatare; sed hæc locutio  
non est tam propria.

37 Dicitur, Apostasia a Fide. Nam præter hanc est  
adhuc duplex Apostasia, videlicet a Religione, & ab  
Ordine. Apostasia a Religione est criminosa & mortifera  
recessio ab instituto Ordinis Religiosi sine animo rever-  
tendi. Et recte apponitur, criminosa recessio: nam qui  
cum licentia Prælati egreditur, v. g. transiens ad ar-  
ctiorem Religionem, vel ejectus a Religione, aut secun-  
dum Canones ad Episcopalem Dignitatem promotus,  
Apostata non est. Additur etiam, sine animo revertendi:  
nam si quis ad tempus vagaretur sine licentia Prælati,  
Fugitivus potius censeretur spectato Jure communi,  
quam Apostata; licet juxta particulares quarundam Re-  
ligionum Constitutiones etiam hi nomine Apostatarum  
quandoque comprehendantur, eorumque poenis subja-  
ceant; ut de Ordine FF. Minorum observat Sanctus  
de Melfi in Statuta Generalia cap. 2. Statuto 62. Huc  
reducitur Apostasia a Conventu, vel Habitu, & fit, quan-  
do aliquis Religiosus sine licentia Prælati recedit a Con-  
ventu, vel omnino habitum Regularem dimittit.

38 Apostasia ab Ordine dicitur, cum quis in sacris  
Ordinibus constitutus, puta Subdiaconus, Diaconus,  
vel Sacerdos ad statum conjugii, vel laicalis conversa-  
tionis, dimisso habitu Clericali, propria temeritate se  
transfert. Poenæ talium Apostatarum præter peccatum  
mortale, quod incurrunt, plures sunt in Jure Cano-  
nico statutæ, de quibus alii.

39 CONCL. II. Lectio librorum perverforum, præ-  
sertim hæreticorum, quando ex ea aliquod morale pe-  
riculum subversionis imminet, est indubie Jure Divino  
naturali prohibita: hinc quia ejusmodi periculum fre-  
quenter imminet, absolute loquendo recte S. Mater  
Ecclesiæ lectionem Librorum perverforum, præsertim  
hæreticorum, prohibuit. Nam, ut dicitur 2. Timoth.  
c. 2. Sermo eorum ut cancer serpit: unde est merito vi-  
tandus, atque per modum justæ cautelæ pie admodum  
Ecclesiæ Catholica Fideles ab hujusmodi venenosis scrip-  
tis avertit.

#### Additio.

\* Nec dicas, apud te cessare periculum subversionis,  
quod erat finis, seu causa motiva prohibitionis legendi  
libros Hæreticos. Respond. enim etiam transmissio, quod  
circa tuam personam particularem nullum subest pericu-  
lum subversionis (de qua tamen tua præsumptione mul-  
tum dubito) adhuc te non posse libros Hæreticos legere;  
quia, uti patet ex jam dictis Tract. de Legibus, si cessat  
causa motiva Legis non in universali communitate, sed  
tantum in particulari persona, exinde non cessat ipsa  
Lex. Et certe, si sub hoc prætextu illico & ordinarie  
absque concursu aliarum adhuc graviorum circumstan-  
tiarum liceret legere libros Hæreticos, facile quamplu-  
res curiosi de se præsumerent, nullum subesse lectionis  
periculum, & exinde legentes non pauci successive per-  
verterentur. Fateor tamen subinde in extraordinariis  
circumstantiis dandum esse locum Epichejæ, ut viro ali-  
cui docto, ac pio ex præsumpta licentia liceat quidpiam  
in libris Hæreticis inquirere, ac legere, si exinde defen-  
ditur ex una parte Ecclesiæ honor, qui alias pati debe-  
ret, aut prudenter speratur conversio cujusdam Hæreti-  
ci; ex altera vero parte ob periculum in mora non fa-  
cile patet recursus ad illum, qui posset dare licentiam  
hos libros legendi. Ita exemplificant in certis casibus,  
rarioribus tamen, P. Marchantius Parte 2. Tribunal.  
tract. 2. lect. 4. q. 3. dub. I. La Croix Tomul. 8. lib. 7.  
num. 343. & Sporer Tract. 2. in 1. præcept. Decal. cap.  
3. sect. 4. num. 37. \*

40 CONCL. III. Circa Lectionem librorum prohi-  
torum duplex defacto est considerata prohibitio Ec-  
clesiæ. De posteriori agetur n. 42. Prior vero est con-  
tenta in Bulla Cœnæ Domini, in qua excommunicantur  
excommunicatione Papæ reservata, Hæreticorum libros  
hæresin continentes, vel de Religione tractantes, sine  
auctoritate Sedis Apostolicæ scienter legentes, retinen-  
tes, imprimentes, vel quomodolibet defendentes.

#### Additio.

\* Observanda sunt in hac tertia Conclusionem singula  
verba, atque ex his deducendum, quatuor conditiones  
requiri, ut quis legens tales libros excommunicationem  
Bullæ Cœnæ Papæ reservatam incurrat. I. Debet esse li-  
ber II. Alicujus Hæretici. III. Hæresin continere, vel  
saltem de Religione tractare. IV. Scienter legi.

Defectu primæ conditionis juxta quosdam non incur-  
reret istam excommunicationem, qui legeret Manus-  
cripta Hæretici non compacta, seu ordinata per modum  
alicujus libri. Ita Rodriguez, Barbaricus Tamburinus,  
Dominicus Viva & alii apud La Croix loc. c. num. 339.  
quod tamen mihi videtur difficile: melius autem meo  
judicio alii saltem tunc concedunt, quando ista manu-  
scripta non accedunt ad quantitatem decem foliorum.

Defectu secundæ conditionis eximeretur ab Excommu-  
nicatione Bullæ Cœnæ, qui legeret libros Ethnicorum,  
Judæorum, vel etiam Catholicorum, quamvis aliqua  
falsa dogmata ibi continerentur. Ratio est; quia solum  
libro alicujus Hæretici hæc poena Excommunicationis  
in Bulla Cœnæ annectitur: ergo in hac odiosa materia  
Excommunicatio tamquam gravissima poena non debet  
extendi ad alios libros; nam odia restringi, favores con-  
venit ampliari. Reg. 15. Juris in 6. Ob quam ipsam rationem  
non contraheret Excommunicationem Bullæ Cœnæ Pa-  
pæ



pæ reservatam, qui in libris Catholicorum Doctrinam Hæreticorum ad verbum relatum legeret: nam adhuc verum esset, quod non legeret librum alicujus Hæretici, quamvis ceteroquin, si id ex malo fine faceret, haud dubie graviter peccaret.

Defectu *tertiæ Conditionis* non foret Excommunicatus Excommunicatione majori Papæ reservata in Bulla Cœnæ, qui legeret Hæreticorum libros Historicos, Philosophicos, Juristas vel Medicos; nam etsi sint Hæreticorum, non tamen tractant de Religione, ac sua Hæresi, saltem non ex professo. Econtra vero incurreret dictam Excommunicationem, qui legeret librum alicujus Hæretici de Religione ex professo tractantem, sive exponendo S. Scripturam, sive Theologiam, sive Conciones aut calus Conscientiæ, sive alia, quæ ad cultum Dei vel Sanctorum aut ad salutem animarum spectant, teste Suarez de Fide, D. 20. Sect. 2. n. 16. quamvis talis liber nullam in se Hæresin contineret: nam Bulla Cœnæ prohibet legere librum alicujus Hæretici sub distinctione *Hæresin continentem, vel de Religione tractantem*, quia non vult Ecclesia, ut Fœdi sui ex aqua turbida bibant, & ex putrido loco mæritas colligant, nec petit in Religione instrui ab Hæreticis.

Defectu *quartæ Conditionis* non contraheret sæpius mentionatam Excommunicationem Bullæ Cœnæ, qui ex ignorantia etiam crassa & culpabili legeret talem librum, sive sit ignorantia facti, sive juris, id est, sive nesciat librum hunc esse alicujus Hæretici, sive ignoret, lectioni dicti libri fore annexam Excommunicationem. Videantur de his latius Sporer loc. cit. §. 1. & seqq. La Croix loc. cit. n. 328. & seqq. ac Felix Potestas in suo Examine Tom. 2. p. 2. c. 8. per totum. Atque has quatuor Conditiones pro praxi bene notent illi Confessarii, qui non habent speciale Privilegium absolvendi a casibus Bullæ Cœnæ: exinde enim videre poterunt, num suos poenitentes, qui confitentur, se quidpiam in libro hæretico legisse, absolvere valeant, nec ne? Etenim si quatuor allegatæ conditiones concurrant, extra articulum vel periculum mortis &c. debebunt abstinere, & ad alios facultate præditos mittere. \*

41 Quod tamen intelligendum est, nisi taliter legentes excuset parvitas materiæ; ut juxta quosdam AA. est una pagina, etiam libri in folio impressi. Pirhing *tit. de Hæreticis* n. 20. citans alios. Imo plures Doctores censent, dictam excommunicationem non incurri ab eo, qui secluso alio subversionis periculo legit Epistolam, Concionem, aliamve brevem scripturam, etiam impressam alicujus hæretici, atque hæresin continentem? quia verba Bullæ Cœnæ in rigore intellecta loquuntur de libris; prædictæ autem scripturæ non censentur vulgariter nomine libri, prout observat Herincx *disp. 9. de Fide. quest. 8. n. 86.* & Sanchez l. 2. in Decalog. c. 10. n. 29. maxime si hæ Scripturæ sint minores decem foliis, uti vult Tamburinus. Ideoque Catholici his in locis non faciunt sibi scrupulum, si secluso alio periculo legant Epistolam, vel Concionem quamdam hæreticam, quam interdum ab amicis hæreticis accipiunt: quamvis, quia facile venenum latentis hæresis potest inficere corda incauta, Parochis & Confessariis merito sit invigilandum, ut talia evitentur.

42 Altera Ecclesiæ prohibitio circa lectionem librorum, ob errores vel errorum suspicionem prohibitorum, continetur in Indice Librorum prohibitorum, qui jussu S. Concilii Tridentini, & auctoritate SS. Pontificum editus est, & continet plures regulas. Et quidem virtute dicti Indicis Librorum prohibitorum, ubi is receptus est, incurrunt excommunicationem, non tamen reservatam Papæ, qui legunt libros ob errores vel errorum suspicionem prohibitos. Dicitur, *ubi is receptus est*: nam Indicem librorum prohibitorum quoad secundam Classem non esse in Germania receptum, asserunt multi Auctores, ac præsertim Layman lib. 2. tract. 1. c. 15. n. 8.

43 CONCL. IV. Etsi licitum sit Viris doctis, & quandoque necessarium, justam ob causam de rebus Fidei cum Infidelibus disputare, id tamen non nisi debitis cum

circumstantiis est faciendum. Ita communis. Et quidem prima pars patet exemplo Christi, qui disputavit cum Phariseis Joan. c. 8. & alibi. Similiter S. Stephanus disputasse legitur cum Judæis Act. 6. Paulus cum Judæis & Græcis Act. 9. quod ipsum SS. Patres contra Hæreticos sæpius fecisse dignoscuntur. Altera vero pars probatur inductione: inprimis enim ad id ex parte disputantis requiritur congrua scientia; quia viris indoctis de Fide disputare non licet ob periculum multos errores proferendi cum jactura & dedecore Fidei Catholicæ, atque scandalo audientium.

44 Secundo requiritur ex parte disputantis, ne eidem sit inhibita disputatio lege aliqua positiva humana. Sic quippe in Jure Canonico c. 2. de Hæret. in 6. sub pœna excommunicationis ferendæ sententiæ prohibetur Laicis, *publice vel privatim de Fide Catholica disputare*; notat tamen Herincx *disp. 9. de Fide quest. 3. n. 34.* post Coninch, & alios, præmissam legem seu prohibitionem vel non esse usu receptam, vel usu contrario abrogatam in terris, in quibus Hæretici cum Catholicis permixti vivunt: quia passim ibidem cum Hæreticis in privatis colloquiis disputant laici, & sæpe id necessarium est pro avertendo pusillorum scandalo, præsertim ubi propter persecutiones Hæreticorum Clerici non tolerantur.

45 Tertio requiritur finis honestus, videlicet defensio veræ Fidei, errorum confutatio, confirmatio Fidelium, Infidelium conversio, aut infirmorum confortatio. Item, ut ex tali disputatione sperare liceat utilitatem quamdam & fructum: sive in eo, cum quo fit disputatio, sive in audientibus: alioquin enim disputatio foret inutilis, aut ob pravam finem penitus illicita.

46 Quæritur I. An liceat Catholicis comitari funera Hæreticorum ad sepulturam? Resp. hic opus esse distinctione. Et quidem in locis, ubi prohibitum est Catholicis conversari cum Hæreticis sub pœna excommunicationis, palam est, non licere eorum funera comitari: alioquin enim quis ageret contra justam, gravemque prohibitionem. Econtra vero in illis locis, ubi Catholici promiscue vivunt cum Hæreticis, & quotidie sine alia prohibitionem cum iisdem conversantur, licitum est Catholicis comitari funera Hæreticorum, interesse eorum nuptiis, agere ibidem Paranympum &c. Ratio est: tum quia hic cessat omne scandalum, simulque nulla est prohibitio in contrarium, uti supponitur; tum quia sepelire mortuos secundum se est opus bonum Misericordiæ corporalis; tum tandem, ut notat Layman l. 1. tract. 5. part. 2. cap. 4. circa finem, talis comitatus, cognitionis vel necessitudinis gratia præstitus, potius spectat ad communionem politicam, non autem est approbatio hæresis.

#### Additio I.

\* Quæ. II. An in Germania, ubi Hæretici sunt tolerati, funera eorum licite sepeliri possint in Cœmeteriis Catholicorum? Resp. I. Si moriantur tamquam notorie Hæretici formales, de per se loquendo non possunt licite sepeliri in Cœmeterio Catholicorum. Ita sub his terminis communis, quantum constat. Ratio est; quia, si decedunt tamquam Hæretici formales notorii, moriuntur in notorio gravi peccato, sed in notorio gravi peccato mortui nequeunt, de per se loquendo, in loco sacro, uti est Cœmeterium Catholicorum, sepeliri, prout fatentur omnes cum Glossa in cap. Ex parte. de Sepultura. v. Communicabatur. ergo. Quia tamen sæpius non constat notorie in particulari, num isti, vel illi sint Hæretici formales, vel tantum materiales &c. Hinc Resp. II. Absolute loquendo juxta probabiliorem sententiam Hæretici etiam in Germania non sunt sepeliendi in Cœmeterio Catholicorum, nisi ubi adest consuetudo contraria legitime præscripta, vel ubi alias imminet periculum gravis mali ob potentiam Hæreticorum, uti tempore hostili facile contingere potest. Hæc responsio magis probata reperietur Tract. 13. Dist. 2. q. 2. num. 21. & seqq. ac in Jure Canonico lib. 3. Decret. Tit. 28. §. 3. per totum. quorsum hic lector brevitate gratia remittitur.



Additur autem notanter I. *Ubi non adest consuetudo contraria*; quæ tamen dicitur vigere in quibusdam Germaniæ locis, prout ex Layman & Card. de Lugo advertit La Croix Tomul. 1. lib. 2. n. 111. Certe vidi etiam Ecclesias in Germania, in quibus Catholici & A Catholicos mutatis vicibus sua Officia celebrant.

Additur II. *Vel ubi alias imminet periculum gravi mali*; nam cum isto non obligat Lex humana, prout jam annotatur in Jure Canonico loc. cit. n. 78.

#### Additio II.

\* Quer. III. An in Germania Catholici licite famulentur apud Hæreticos? Resp. I. Si adest periculum proximum perversionis, nequeunt famulari Catholici apud Hæreticos. Ita communis & recta: nam qui amat periculum, peribit in illo.

Resp. II. Si absit hoc periculum perversionis, nec aliunde quidquam obstat, in Germania, ubi Hæretici cum Catholicis impune vivunt permixti; possunt Catholici famulari Hæreticis, eo ipso, cum Hæretici sint tolerati, & cum ipsis citra Excommunicationem in Germania communicari possit: licet ceteroquin ordinarie talis famulatus non suadeatur, & si fiat, expresse subjungatur a Theologis, ut similis famulus, antequam operas Hæretico addicat, hanc conditionem apponat, ut nimirum permittatur observare præcepta Ecclesiæ.

Resp. III. Etiam absente periculo perversionis nequeunt Catholici famulari apud Hæreticos, si Catholici per hunc famulatum frequenter sine rationabili causa impediuntur ab observatione præceptorum Ecclesiæ, e. g. audiendi Missam, abstinendi a comestione carnis diebus Veneris ac Sabbatinis, vel ab operibus servilibus die festivo &c. Ita cum Bonacina, Layman & aliis Castropolao hic Tit. 22. p. ult. n. 6. Ratio est; quia quilibet Catholicus tenetur præcepta Ecclesiæ servare, quando id sine gravi suo incommodo & damno facere potest; possent autem tales famuli observare præcepta Ecclesiæ sine gravi suo incommodo & damno, quando nimirum inveniunt faciliter Dominos Catholicos æque bonos & quasi idem, vel tantummodo paulo minus dantes salarium: ergo in simili casu tenentur potius accedere Dominos Catholicos, quam A Catholicos pro famulatu. Id ipsum exemplificat La Croix l. 2. n. 103. taliter: Offerat Dominus Catholicus æque bonus famulo pro salario sex florenos, A Catholicus septem, in eo casu potius Catholicus, quam A Catholicus servitium eligere debet, supposito, quod ab A Catholicis frequenter impediatur ab observatione præceptorum Ecclesiæ; quia defectus unius floreni non est notabile damnum. Quod si vero Catholicus Dominus vellet dare in eo casu tantummodo quatuor florenos, vel adhuc minus, videretur respectu famuli alicujus grave damnum, seu cessatio notabilis lucri in comparatione septem florenorum, quos porrigere vult A Catholicus: unde in tali casu non teneretur operas suas addicere Catholico, si cæteroquin absit periculum perversionis apud Hæreticum; quoniam præcepta Ecclesiæ cum vere notabili incommodo seu damno gravi non obligant, quale damnum, seu potius lucrum cessans adest in præfenti.

Resp. IV. Si talis Catholicus raro impeditur ab observatione alicujus præcepti Ecclesiastici, vel si frequenter quidem, at cum gravi causa e. g. si debet custodire pecora, vigilare in excubiis militaribus, navigare in mari per aliquot menses &c. In similibus casibus, non obstante tali impedimento, potest licite famulatum præstare Hæretico. Ita cum Gobat & Layman La Croix loc. cit. n. 105. Ratio est, quia regulariter loquendo in similibus circumstantiis impediretur pariformiter, si has operas addidisset alicui Domino Catholico, adeoque ex parte Domini A Catholicus non intercedit aliquod speciale impedimentum: licet cæteroquin pro majori adhuc securitate (quoniam occulte venenum Hæreticum aliquoties instillatur suaviter) etiam tali famulo conformiter dictis præcedentibus haud dubie magis Dominus Catholicus, quam Hæreticus foret suadendus. Videatur de

similibus fusius Gobat in Quinario. Tit. 5. cap. 33. a num. 93. & in Theolog. Experiment. Tit. 5. a num. 313.

#### Additio III.

\* Queritur IV. Quenam communicatio cum Judæis vel Paganis, aut Saracenis sit prohibita Christianis? Respond. I. Christianis non tantum prohibetur communicare in ceremoniis Judæorum v. g. in Circumcisione, vel Agni Paschalis comestione &c. sed etiam illicitum est, habitare cum Judæis, vel famulari in ipsorum ædibus, uti expresse deceditur cap. Ad hæc de Judæis & Saracenis. Ubi tamen putat Coninch apud La Croix lib. 2. n. 84. quando Fidelibus prohibetur habitatio cum Judæis, intelligi solam habitationem illam, in qua Christianus sit simul subditus Judæo. Quod autem de Judæis, cum proportionem sentiendum quoque est de Paganis & Saracenis, conformiter c. Judei de Judæis & Saracenis. Respond. II. Prohibitum pariter est, ne Christiani Judæos ad convivium invitent; item ne ipsi a Judæis invitati compareant. Ita expresse habetur c. Omnes 28. quæst. 1. Existimat tamen denuo Coninch cum Azorio, illam tantum comestionem cum Judæis prohiberi, in qua Judæi discretionem ciborum observant, juxta legem Mosaicam; ubi puto observandum esse consuetudinem locorum, si ceteroquin abest periculum seductionis. Resp. III. Quod attinet Mercaturam, & in similibus commercium cum Judæis, id quidem de facto permixtum est Christianis; attamen ordinarie loquendo peccatum grave censetur, rem apud nos sacram, apud ipsos vero contemptam, puta Statuam Christi, vel Crucem eisdem vendere. Ratio est; quia ordinarie periculum subest irreverentiæ, irrisionis, vel blasphemiarum Christi Domini. Resp. IV. Non solum Jure Ecclesiastico, verum etiam Civili prohibitum est Christianis commercium instituere cum Saracenis, aliisve Infidelibus, quoad arma, aliave materialia bellica, quæ contra Christianos deserviunt, ipsis subministranda. Ita habetur non solum in Jure Canonico c. 6. c. 11. & c. 17. de Judæis & Saracenis ac insuper in Bulla Cærenæ Domini, verum etiam in Jure Civili L. Nemo 2. C. Quæ res exportari. illud ipsum sub poena capitali, & confiscatione omnium Bonorum interdicitur. Videatur de his ulterius in casu extraordinario præfens Auctor Lib. 5. Decret. Tit. 6. & cum La Croix, Busenbaum loc. cit. \*

### DISTINCTIO V.

De Spe, atque oppositis Vitiis.

#### QUESTIO I.

De Spe Theologica, ejusque obligatione.

#### SUMMARIUM.

- 1 Spei varia acceptiones.
- 2 Spes Theologica, quid?
- 3 Spes actualis.
- 4 Objectum materiale primarium Spei est Deus.  
(a) Ut dictum Tract. 4. D. 1. n. 8. & seq.
- 5 Ad objectum materiale secundarium Spei, qua spectent?
- 6 Objectum formale Spei Theologica, quod?
- 7 Solvitur instantia.  
Amor Dei duplex, amicitia scilicet, & concupiscentia.
- 8 Spes Divina est infallibilis, quomodo?
- 9 Præceptum Spei aliud negativum, aliud affirmativum.
- 10 Affirmativum, quando obliget per accidens?  
(b) Dist. 2. quæst. 3. n. 36. & 37.
- 11 Et quando obliget per se & directe?  
(c) Cit. Dist. 2. quæst. 3. per totum.



**I** Missis aliis Spei acceptionibus, huc minus attentibus, Spei nomen aliquando sumitur pro ipsa re sperata, juxta illud D. Apostoli *ad Titum*. 2. *Expectantes beatam Spem*. Quandoque pro aliquo, in quo speratur, seu spes nostra ponitur, prout accipitur, *Psal.* 90. *Tu es Domine spes mea*. Magis tamen ad propositum, sumitur Spes pro habitu, vel actu quodam voluntatis, expectantis bonum futurum, arduum item ac difficile. Quod si bonum illud sit naturale, ita ut viribus naturæ acquiri possit, erit spes humana: si vero supernaturale, ut bonum gratiæ & gloriæ cœlestis, ad quod consequendum opus est auxilio Dei, dicetur Spes Theologica seu Divina. Et de hac loquendo, sit

2 CONCL. I. *Spes Theologica* est virtus divinitus infusa, qua desideramus consequi Bonum infinitum, ex gratia & meritis in patria adipiscendum. Ita desumitur ex Doctore nostro 3. *dist.* 26. *q. un.* Nec in re differt ab illa vulgata definitione, qua dicitur: *Spes est virtus divinitus infusa, per quam certa cum fiducia nostræ salutis, & æternæ vitæ bona expectantur*: nam nostræ salutis, & æternæ vitæ bona primario & principaliter consistunt in consecutione infiniti Boni, qui est Deus Ter Opt. Max. ejusque visione & fruitione beatifica, quam non nisi ex gratia Divina, & accedentibus meritis nostris consequimur.

3 Ceterum Spes Theologica actualis est actus supernaturalis, quo desideratur Bonum infinitum D E U S: nam desiderare idem est in re, ac sperare æternam beatitudinem, ut notat Sannig *Tom.* 4. *dist. quæst.* I. n. 7. Porro per Spem Divinam, veluti anchoram fortissimam, firmantur Viatores ad obtinendum æternum beatitudinis Bonum in cœlis, quod prius fide perceperunt: unde non immerito a Magistro Sententiarum (id est, Petro Lombardo) 3. *dist.* 26. appellatur *Spes, certa expectatio futura beatitudinis, veniens ex Dei gratia, & meritis præcedentibus: sine meritis enim sperare, non spes, sed præsumptio dici potest.*

4 CONCL. II. Objectum materiale primarium, seu principale Spei Theologiæ est Deus, seu consecutio Boni infiniti, consistens in visione & fruitione beatifica Dei. Ita in re communis. Siquidem illud Spe Divina primario ac immediate speramus, seu consequi desideramus, quod nos perfecte beatificat: atqui hoc non præstat, nisi D E U S Ter Opt. Max. quatenus eodem in cœlis cum Sanctis suis beatifice fruimur. Accedit, quod, si D E U S non esset objectum immediatum Spei super naturalis, Spes non esset virtus Theologica; siquidem ad virtutem Theologicam requiritur, ut actus principalis ipsius tendat in Deum tamquam objectum immediatum. (a)

5 CONCL. III. Ad objectum materiale & secundarium Spei Theologiæ spectant omnia bona, tam ordinis supernaturalis, ut sunt auxilia Divina, gratia sanctificans, condonatio peccatorum, ac hujusmodi, quam ordinis naturalis, quæ aliquo modo remote conducunt ad attingendum objectum principale Spei, ut puta panis quotidianus &c. Ita communis. Siquidem ea omnia possunt ordinari ut media, vel proxima, vel saltem remota ad attingendum objectum principale Spei, id est, Dominum Deum in æterna gloria beatifice possidendum.

6 CONCL. IV. Objectum formale Spei Theologiæ est ipsamet Bonitas Dei, quatenus nobis bonus est. Ita Doctor Subtilis 3. *dist.* 26. *quæst.* un. Tannerus *tom.* 3. *disp.* 2. *quæst.* I. n. 14. citans D. Thomam, Suarez, & alios; Herincx *disp.* 10. *de Spe quæst.* I. num. 11. Sannig, & alii: quamvis nonnulli dissentiant, & præfertim illi, qui tenent, quod objectum formale Spei, seu motivum sperandi sit summa & infinita Dei promittentis Fidelitas, qui, quod promissit, potest præstare, quia omnipotens est; vult præstare, quia benignissimus est, & certissimo præstiturus est, quia fidelissimus est: ut proinde (inquiunt) sicuti objectum formale Fidei Theologiæ est infallibilis Veracitas, & Charitatis infinita Bonitas Dei, sic & Spei objectum formale sit summa ejusdem Fidelitas in servandis promissis. Sed quidquid sit

de hac Sententia, captu ceteroquin faciliore, ratio Conclusionis est: quia illud est objectum formale Spei, quod proprie movet ad appetitum, seu desiderium objecti materialis: sed talis ratio motiva est bonitas Dei, ut nobis bonus est, seu commodum affert; ergo. Minor ex eo patet: quia voluntas nihil appetit, nisi sub ratione boni.

7 Nec obstat, quod Deus sub ratione Boni sit objectum formale Charitatis. Resp. enim, adhuc disparitatem esse: quia Deus est objectum Charitatis, ut est infinite bonus in se, seu ut est summum Bonum propter se diligibile amore amicitiae: Spei vero est Deus objectum formale, ut est bonus nobis, & diligibilis amore concupiscentiae. Duplex quippe a Theologis solet distingui amor Dei: unus amicitiae, sive (ut alii loquuntur) benevolentiae, quo bona Deo volumus, quatenus ipsi sunt bona; alter concupiscentiae, quo Deo bona volumus, quatenus nobis sunt bona: ut si Deum amamus, quia est nobis benignus, misericors &c. Additur notanter, *nobis*: quia si Deus amatur, quatenus in se est bonus, misericors, infinite perfectus &c. erit amor amicitiae, qui est proprius Charitatis Theologiæ: amor autem concupiscentiae est proprius Spei Theologiæ, & imperfectior priori. Solum adde cum Herincx *loc. cit.* n. 10. quod promissio Divina sit conditio requisita, ut possimus convenienter sperare, non autem ratio formalis, & motiva Spei Theologiæ.

8 CONCL. V. Et si Spes Divina absolute loquendo sit infallibilis, & certa, juxta illud *Rom.* 5. *Spes autem non confundit.* & alibi: nihilominus per accidens, & ex parte nostra ea potest esse incerta & fallax. Ita Filliucius *tract.* 22. num. 248. & alii. Ratio est: quia Spes consequendi vitam æternam supponit etiam nostram cooperationem, & merita: atqui de his non habemus certitudinem; nam, ut dicitur *Eccl.* cap. 9. *Sunt iusti, & opera eorum in manu Dei, & tamen nescit homo utrum amore, an odio dignus sit.* Et hinc fit, quod ex parte nostra Spes sit incerta, imo quandoque vana & fallax ob defectum nostræ cooperationis, quamvis in seipsa propter infallibilem promissionem Dei sit certissima, dummodo aliunde nihil deficiat.

9 CONCL. VI. Certum est, extare præceptum Spei Divinæ: idque aliud est negativum, quo tenemur nunquam desperare, neque præsumere, ac proinde obligat semper, & pro semper: aliud affirmativum, quo aliquoties per vitæ decursum tenemur elicere actum Spei. Hinc quippe *Psal.* 4. dicitur: *Sperate in Domino.* Et ad *Titum* cap. 2. *Sobrie, iuste, & pie vivamus in hoc sæculo, expectantes beatam spem.* Et similia in S. Scriptura passim occurrunt: unde merito Alexander VII. hanc inter alias, ordine I. Propositionem damnavit: *Homo nullo unquam vitæ suæ tempore tenetur elicere actum Fidei, Spei, & Charitatis, ex vi præceptorum Divinorum ad eas virtutes pertinentium.* Hæc Propositio est damnata.

10 CONCL. VII. Præceptum affirmativum Spei per accidens seu indirecte obligat, quoties obligat aliquod aliud præceptum, quod observari nequit absque actu Spei Divinæ, saltem virtuali. Sic fit, quando urget præceptum agendi poenitentiam de peccatis; nam veram poenitentiam non potest quis agere, nisi saltem virtualiter speret, sese veniam suorum peccatorum consecuturum ex meritis Christi, Deique misericordia; prout in simili dictum est superius (b) de præcepto affirmativo Fidei.

11 CONCL. VIII. Præceptum affirmativum Spei per se & directe obligat inprimis circa initium vitæ, quando videlicet quis sufficienter instructus de rebus Fidei, sese ad Deum convertere tenetur, juxta illud *Hebr.* 11. *Credere oportet accedentem ad Deum, quia est, & inquirentibus se remunerator sit.* Alterum tempus est finis vitæ, quando homo in extremo constitutus maxime in Deum sperare tenetur; tum ob tentationes eo tempore ingruentes; tum etiam, quia tunc potissimum eo debemus intentionem dirigere, quo migrandum est, nempe ad Deum in æterna beatitudine æternaliter consequendum. Obligat insuper quandoque præceptum affirmativum Spei



Spei Divinæ sub decursu vitæ nostræ: verumtamen huiusmodi obligationi sufficienter satisfacit per actus Spei, qui concurrunt in exercitio aliarum virtutum; prout in simili dictum est supra (c) fusius declarando, quo tempore teneantur Fideles elicere actum Fidei Theologicæ; quæ (servata tamen proportione) huc erunt applicanda.

## QUESTIO II.

De Vitiis Spei oppositis, Desperatione scilicet, ac Præsumptione.

### SUMMARIUM.

12 Spei per defectum opponitur Desperatio, per excessum Præsumptio.

(d) Ut dictum dist. 1. n. 17. & seqq.

13 Desperatio, in quo consistat?

14 Quale sit peccatum?

15 Quid agendum circa personas afflictas?

16 Peccata in Spiritum sanctum, quæ?

Inter ea cur numeretur Desperatio?

17 Hæc potest consistere cum & sine actu infidelitatis. Desperatio, quid?

18 Præsumptio, quid?

19 Potest committi dupliciter.

12 **C**UM quælibet virtus suo modo consistat in medio (d) hinc contra eam contingit peccari partim per defectum, partim per excessum. Id ipsum videre licet in Spe Theologica, utpote cui per defectum opponitur Desperatio, per excessum autem Præsumptio: non quidem, ac si nimium possimus in Deo sperare (Deus enim est infinite bonus, omnipotens, fidelis, misericors &c. ac proinde ex parte objecti sui formalis non potest fieri excessus contra Spem Theologicam) sed solum, quatenus ex parte actus, seu exercitii Spei Theologicæ potest fieri excessus, in quantum actus Spei exercetur modo indebito. Siquidem Spes Theologica includit iudicium, & desiderium consequendi æternam beatitudinem modo debito, id est ex meritis Christi, & accedente propria cooperatione: Desperatio econtra involvit iudicium de ea numquam consequenda; Præsumptio vero includit iudicium, ac desiderium consequendi æternam beatitudinem modo aliquo indebito, v. g. per solam fidem, vel ex puris naturalibus, ut vivendo scelerate, ut amplius in progressu declarabitur. Hinc fit

13 CONCL. I. Desperatio opponitur virtuti Spei per defectum, & committitur, cum quis desperat, sese remissionem peccatorum, & gloriam æternam esse consequendum, atque ideo omnem conatum eandem consequendi intermittit. Duo siquidem in Desperationem interveniunt; primo iudicium intellectus, quo quis iudicat, sibi nimis arduum, & impossibile esse consequi beatitudinem; secundo fuga voluntatis, qua quis refugit salutem tamquam obtineri impossibilem, atque ideo ab ejus procuratore ob difficultatem mediorum apprehensam desistit. Ita Maltius *disp. 10. Theol. Moral. n. 40.* & alii: quamvis bene notet Herincx *disp. 10. n. 50.* quod Desperatio proprie sit in ipsa voluntate, & actu ipsius, quo quis non vult amplius prosequi beatitudinem, aut media ad eam consequendam opportuna adhibere; iudicium vero illud, quo quis putat, se non amplius obtenturum beatitudinem, potius sit aliquid prævium, atque inducens ad Desperationem, non autem proprie Desperatio.

14 CONCL. II. Desperatio ex genere suo est peccatum mortale, atque inter cetera maxime periculosum. Ratio est clara; quia Desperatio directe opponitur Spei Theologicæ, & quia avertit hominem ab ultimo Fine suo, seu cœlesti beatitudine, simulque media omnia ad hanc consequendam abjicit, quis neget, eam esse maxime periculosum peccatum? Unde Isidorus *lib. 2. de Summo Bono. cap. 14.* ait: *Perpetrare flagitium, mors animæ est; desperare autem, descendere in infernum.*

15 Hoc tamen intelligendum est de vera, & voluntaria Desperatione: nam quandoque accidunt tentationes violentæ, afflictiones graves, & inconsolebiles mœstitiæ, quibus interdum animæ cruciantur, ita ut omni Spe delectatæ videantur. De his autem non procedunt hætenus dicta; quia sunt potius timores, & angustiae excitatæ a diabolo, vel ex turbatione quadam, aut etiam complexionem melancholica provenientes, absque vero & deliberato consensu voluntatis. Super his tamen prudenter invigilare debent Confessarii, huiusmodi afflictas personas in Domino paterne consolando, eisque ostendendo, quod talia culpa vacent, quamdiu voluntas eisdem non consentiat; ac proinde easdem adhortando, ut agnita propria infirmitate, atque demeritis, sese projiciant in sinum bonitatis & misericordiæ DEI, meritaque salutiferæ Passionis JESU Christi Domini nostri, simulque non obstantibus quibuscunque afflictionibus, & mœstitiis, bonum operari minime desistant.

16 CONCL. III. Desperatio recte communeratur inter peccata in Spiritum sanctum, quæ communiter cum Magistro Sententiarum 2. *dist. 43.* & D. Thoma 2. 2. *quest. 14. art. 2.* sex enumerantur, videlicet Desperatio, Præsumptio, Impœnitentia, Obstinatio, Impugnatio veritatis agnitæ, & fraternæ gratiæ Invidentia. Ita Doctores communiter: nam Desperatio ipsam Dei oblatam munificentiam & gratiam, quæ Spiritui sancto, cœu Fonti omnium bonorum tribui peculiariter solet, ex malitia contemptim abjicit; juxta quod impii dixerunt *Jeremia 18.* *Desperavimus: post cognitiones enim nostras ibimus, & unusquisque pravitatem cordis sui mali faciemus.*

17 CONCL. IV. Desperatio potest consistere sine actu Infidelitatis, quamvis non raro habeat annexam Infidelitatem. Ita Maltius *loc. cit. n. 34.* cum aliis. Ratio primæ partis est: quia potest quis actum Desperationis elicere, quamvis non sentiat aliquid contra Fidem: ut si quis credat quidem, Deum esse justum ac misericordem, desperet tamen ex eo, quia iudicat salutem sibi esse impossibilem ob suam pronitatem ad peccandum, & contrarietatem, quam in se experitur ad bene agendum. Altera pars ex eo liquet: quia Desperatio facile excæcat intellectum, ut quis credat, Deum non esse infinite bonum, ac misericordem. Unde Cain ob Abel occisum a Deo correptus, desperans, Deique misericordiam negans, ait: *Major est iniquitas mea, quam ut veniam merear. Gen. 4.* Et in hoc posteriori sensu Magister Sententiarum *loc. cit.* definit Desperationem, dicendo: *Desperatio est, qua quis diffidit penitus de bonitate Dei, asserens suam malitiam Divinæ bonitatis magnitudinem excedere.*

18 Quantum nunc attinet ad Præsumptionem, quæ est alterum peccatum Spei Divinæ oppositum per excessum, ea recte definitur, dicendo: *Præsumptio est Spes obtinendi a Deo gratiam & gloriam æternam inordinate, id est, aliter quam Deus obtinendam statuit.* Et huiusmodi Præsumptionem esse peccatum ex genere suo mortale, atque unum ex sex peccatis in Spiritum sanctum, conveniunt Doctores.

19 Dupliciter autem peccatum Præsumptionis committi potest. Primo, cum quis præsumit, se Divinam gratiam, aut æternam gloriam ex se ipso, & propriis naturæ suæ viribus adipisci posse; quo modo Pelagiani, antiqui hæretici, & a D. Augustino acerrime impugnati, præsumebant, se posse propriis viribus sine supernaturali auxilio Dei omnia præcepta servare, & æternam beatitudinem mereri. Secundo contingit Præsumptio, quando econtra quis præsumit, se sola Dei misericordia, ac liberalitate, Christi que meritis, absque propria pœnitentia, & cooperatione per bona opera beatitudinem, vitamque æternam consecuturum. Et talis erat Præsumptio Lutheranorum, aliorumque quorundam Hæreticorum, qui per solam Fidem in Christum absque aliis bonis operibus sperarunt beatitudinem adipisci, quam S. Concilium Trid. *Sess. 6. cap. 9.* appellat *inanem hæreticorum fiduciam*, & in progressu pluribus refutat.



## DISTINCTIO VI.

De Charitate, ejusque obligatione.

## QUÆSTIO I.

Quid ac quotuplex sit Charitas, &amp; quæ ejus Obligatio?

## SUMMARIUM.

- 1 Charitas est amor, & generatim quid?
- 2 Charitas, ut virtus Theologica, quid, & quod objectum ejus?
- (a) Juxta dicta Dist. 5. n. 7.
- 3 Deus quomodo appellatur Charitas?
- 4 Præceptum de diligendo Deum, partim affirmativum, partim negativum.
- 5 Satisfit diligendo Deum super omnia appetitative.
- 6 Deum super omnia amare intensive, & appetitative, quid?
- 7 Probatio Conclusionis.
- 8 Præceptum diligendi Deum obligat ad frequens exercitium.
- 9 Quo determinato tempore illud obliget?
- (b) Dist. 2. q. 3. per totum.
- Tres propositiones quoad hoc damnatæ.
- 10 Qualiter hæc tria debent esse conjuncta?
- 11 Tria sunt diligenda, Deus, nos ipsi, & proximus.
- 12 Præceptum diligendi proximum, quantum, & unde oriatur?
- 13 Et non satisfit per solos actus externos.
- 14 Debenus etiam dirigere corpus nostrum.
- 15 An creature irrationalis ex Charitate sit diligenda?
- 16 Quis Ordo Charitatis inter nos & proximos observari debeat? Adm. 1. & II.

1 **C**haritatis nomen generatim quidem significat amorem, ac amor seu dilectio; plerumque tamen in S. Scriptura, tum a SS. Patribus sumitur in bonam partem, nempe pro amore boni honesti, seu bonæ voluntate: Amor autem indifferenter in bonum & malum partem accipitur, nempe vel pro amore Dei, vel mundi, & pro amore tum honesto, tum illicito, & carnali. In præfenti igitur loquimur de Charitate, prout est tertia Virtus Theologica, & omnium aliarum virtutum præstantissima, de qua Apostolus 1. Corin. 13. inquit: *Nunc autem manent Fides, Spes, Charitas; tria hæc: major autem horum est Charitas.*

2 **CONCL. I.** Charitas est virtus divinitus infusa, qua diligitur Deus propter se super omnia, & proximus propter Deum. Ita in re communis. Potro objectum materiale primum Charitatis est Deus: objectum vero secundarium ipsius est proximus noster, & omnia alia honeste amabilia, seu quæ possunt ad gloriam Dei, sicque propter ipsum amari; nam *universa propter semetipsum operatus est Dominus Prov. c. 16.* Objectum formale Charitatis Dei est ipsamet infinita Dei bonitas, qua ipse in se bonus est, & amabilis amore amicitiae; (a) ob hanc quippe bonitatem, veluti propter rationem formalem, atque motivam Deus tamquam infinitum Bonum est amandus super omnia.

3 **Dices I.** Joan. c. 4. dicitur: *Deus Charitas est, & qui manet in charitate, in Deo manet;* ergo Charitas non est virtus aliqua infusa. Resp. negando consequentiam: etenim textus allegatus imprimis est intelligendus causaliter, eo modo, quo Deus dicitur spes nostra, patientia nostra, justitia nostra, & hujusmodi, prout passim legitur in S. Scriptura. Deinde Deus dicitur esse Charitas, eo quod sit essentialiter Charitas increata; unde etiam Spiritus sanctus appropriate dicitur *Amor.* Hoc tamen non obstante adhuc in hominibus iustis datur Charitas creata, qua ipsi super omnia diligunt Deum propter se, seu infinitam bonitatem suam, & proximum propter Deum.

4 **CONCL. II.** Extat Præceptum de diligendo Deum super omnia, idque partim est negativum, ne videlicet Deum odio habeamus, aut aliquid agamus, quod dissolvat amicitiam nostram cum Deo, peccando videlicet mortaliter; partim affirmativum, ut observemus mandata ejus. Ita unanimis Fidelium, & patet ex plurimis S. Scripturæ locis. Sic enim *Deuter. 6. & Matth. 22.* legitur: *Diliges Dominum Deum tuum ex toto corde tuo, & in tota anima tua, & in tota mente tua: hoc est maximum, & primum mandatum.* Item *Joan. 14.* *Qui habet mandata mea, & servat ea, ille est, qui diligit me.* Et similia plura occurrunt passim. Hinc Alexander VII. sequentem inter alias, ordine 1. Propositionem damnavit: *Homo nullo unquam vitæ suæ tempore tenetur elicere actum Fidei, Spei, & Charitatis, ex vi præceptorum divinarum ad eas virtutes pertinentium.*

5 **CONCL. III.** Præcepto diligendi Deum super omnia, seu ex toto corde, satisfit diligendo efficaciter Deum super omnia appetitative. Ita communior Doctorum, paucis exceptis, qui volunt adesse obligationem diligendi Deum super omnia etiam intensive. Ceterum ut hæc Conclusio melius intelligatur,

6 Notandum cum Scoto 3. dist. 27. q. un. §. *Quantum ad illum.* & aliis, dupliciter posse Deum super omnia amari, videlicet intensive, & appetitative. Tunc Deus dicitur *super omnia amari intensive*, quando actus amoris Dei est intensior, ac vehementior omni alio amore; tunc vero dicitur *Deus amari super omnia appetitative*, quando Deus magis aestimatur, quam omnes creature, ita ut his omnibus præferatur, & nullius creature timore, aut amore velit quis Deum offendere. Sic Christus *Matth. 10.* ait: *Qui amat patrem, aut matrem plus quam me, non est meus dignus.* Et Paulus *Rom. 8.* *Nulla creatura poterit nos separare a Charitate Dei.* Potest autem facile contingere, ut quis magis intensive unum diligit, & simul aliud magis appetitative: sic enim mater magis intensive diligit filium parvulum, sed magis appetitative filium adultum, qui gubernat rem domesticam; quia hunc magis aestimat præ illo, quamvis alterum juniorem teneriori affectu amoris prosequatur. Hæc terminorum explicatione præmissa.

7 Probatur Conclusio. Nam sensus præcepti de diligendo Deo ex toto corde &c. est, ut Deum diligamus super omnia, ita ut nullius creature amore velimus ejus præcepta transgredi, ipsumque mortaliter peccando offendi. Sic quippe 1. *Joan. 2.* dicitur: *Qui autem servat verbum ejus, vere in hoc Charitas Dei perfecta est.* Accedit, quod defacto nobis constare vix possit, quisnam actus amoris sit intensior altero, quinimo plerumque parentes solent multum intente amare filios, & conjuges sese mutuo; ergo, si magis intensive tenerentur amare Deum, forent in perpetuo periculo transgrediendi hoc præceptum; quod non est dicendum. Sufficit igitur, amare Deum appetitative super omnia, quatenus plus aestimatur Deus ceteris omnibus, adeo ut nullius creature amore velit quis Deum offendere.

8 **CONCL. IV.** Præceptum diligendi Deum obligat ad frequens exercitium, ita ut actus amoris Dei non multo tempore omittatur. Desumitur hoc ex magnitudine hujus præcepti, de quo Salvator ait *Matth. 22.* *Hoc est maximum, & primum mandatum,* & consequenter per vitæ decursum sæpius obligat.

9 Quo autem determinato tempore currat ejusmodi obligatio, variant Doctores, quamvis convenient passim in hoc, quod censeant obligare. I. Circa initium usus rationis. II. Circa finem vitæ. III. Quando quis gravi urgetur tentatione, præsertim odii Dei cum periculo consensus, nisi ad Deum per actum amoris convertatur. IV. Tota vita sæpius, ita videlicet, ut non multo tempore differendus sit actus dilectionis Dei, eo ferme modo, quo superius (b) determinatum est tempus, quo Fideles tenentur elicere actum Fidei Theologicæ. Hinc conformiter dictis ibidem n. 33. Doctor Subtilis 3. dist. 27. q. un. §. *Quantum ad secundum.* dubitative tamen innuit, hoc præceptum urgere singulis diebus Dominicis, dum ait: *Quando autem sit hoc (ut quis teneatur habere actum dile-*



tionis Dei) forte determinavit hoc illud Præceptum divinum: *Sanctifica Sabbatum* &c. & Ecclesia specificavit quantum ad missam audiendam in die Dominico. de Consecr. dist. 1. can. Missas. Hæc ille. Solum nota, sequentes Propositiones esse vitandas, utpote quas damnavit Innocentius XI. quarum prima, ordine 5. sic habet; *An peccet mortaliter, qui actum dilectionis Dei semel tantum in vita eliceret, condemnare non audemus.* Altera ordine 6. talis est: *Probabile est, ne singulis quidem rigorosa quinquennii per se obligare præceptum charitatis erga Deum.* Ultima, ordine 7. ita sonat: *Tunc solum obligat, quando tenemur justificari, & non habemus aliam viam, qua justificari possumus.* Omnes hæc tres Propositiones sunt damnatae, sicut jacent; & merito, ut probant auctoritates S. Scripturæ n. 4. & 8. allegatae.

#### Additio.

\* Porro Charitas illa, qua sæpius in vita Deum tamquam summum bonum diligere tenemur, debet quidem necessario saltem interpretative sic esse constituta, ut, quamvis nec cælum nec infernus existerent, nec ullum præmium sperandum, aut poena pertimescenda foret, nihilominus ipsa Deum amaret propter se (utpote cum Deus quatenus in se infinite bonus sit solummodo objectum formale, principale, & essentiale ipsius Charitatis) exinde tamen non excludit necessario Spem, quasi cum Charitate impossibilem. Quin e contrario Spes ipsa seu amor concupiscentiæ perducit sæpius ad Charitatem seu amorem amicitiae: dum enim video, Deum mihi tam bonum, tam misericordem &c. atque propterea dignum amore concupiscentiæ, exinde ulterius ad ipsum infinitæ bonitatis fontem, a quo cuncta procedunt, cogitatus dirigo: considerando, quantæ perfectionis supremum illud Ens, ex quo tanta bona ad extra promanant, esse debeat in se ipso? quæ consideratio finaliter trahit voluntatem ad amandum amore amicitiae dictum supremum Ens perfectissimum propter se, tamquam motivum principale. Hinc merito La Croix Tom. I. Lib. 2. n. 152. approbat modum illum eliciendi actum Charitatis. *Amo te Deus, quia creasti & redemisti me, & quia cælum mihi vis dare: sed magis adhuc ideo, quia ipse es propter te omni amore dignissimus, ita, ut licet non benefaceres, nec cælum dares &c. tamen amarem, & actu amo te, quia propter infinitam tuam bonitatem & perfectionem es amabilissimus.* Vel aliter: *Amo te mi Deus, non ideo tantum, quia creasti me, redemisti, sanctificasti, conservas, & innumeris quotidie Beneficiis cumulas, neque tantum ideo, quia insuper dare vis mihi æternam in cælo beatitudinem, sed ideo maxime, & super omnia te amo, quia tu Deus ob infinitas perfectiones tuas es omni amore dignissimus. Tu es Deus sapientissimus, potentissimus, sanctissimus, pulcherrimus &c.* Videtur ex dictis formulis, quomodo Spes & Charitas, seu amor concupiscentiæ & amor amicitiae non sint ad invicem impossibiles, nec una alteram necessario excludat, sed potius homo a prima tamquam minus principali ad secundam magis principalem pervenire valeat. Et ideo Archi-Episcopi Cameracensis doctrina illa, qua in hominibus fervidis spem a perfecto amore excludi volebat, quasi nimirum impossibilem cum eodem, ab Innocentio XII. die 12. Martii 1699. rejecta, atque inter plures alias statim ad initium hæc duæ propositiones damnatae fuere, quarum 1. sic sonat: *Datur habitualis status amoris Dei, qui est Charitas pura & sine ulla admixtione proprii interesse: neque timor puniarum, neque desiderium remunerationum habent amplius in eo partem, non amatur amplius Deus propter meritum, neque propter perfectionem, neque propter felicitatem in eo amando inveniendam.* Altera, ordine 2. propositio: *In statu viæ contemplativæ sive unitivæ amittitur omne motivum interessatum timoris & spei.* Profecto si Charitas necessario excluderet Spem, tunc homo perfectus, qui studet in omnibus Deo placere, omnes suas actiones eliciendo propter amorem Dei, non teneretur unquam per totam vitam suam, imo nec posset elicere in tali perfectione constitutus actum Spei, cum tamen jam ante illum Archi-

Episcopum Cameracensem ab Alexandro VII. inter alias etiam sequens propositio conformiter dictis antecedentibus rejecta fuerit: *Homo nullo unquam vitæ suæ tempore tenetur elicere actum Fidei, N.B. Spei, & Charitatis ex vi Præceptorum Divinorum ad eas virtutes pertinentium.* \*

10 CONCL. V. Ex Charitate generatim tria nobis sunt diligenda, videlicet Deus, Nosmetipsi, & Proximus. Patet hoc ex illo Matth. 22. *Diliges Dominum Deum tuum, & proximum tuum, sicut teipsum:* nam hoc ipso, quod mandatur, ut quis diligat proximum, sicut seipsum, dilectio sui ipsius non tantum innuitur (quamvis, cum hæc a natura satis dictetur, quinimo homini congenita existat, expressiori præcepto opus non fuerit) sed insuper ipsa præfertur dilectioni proximi.

11 Ceterum in allato S. Scripturæ textu ly sicut denotat similitudinem, non æqualitatem; prout accipitur Matth. 5. *Estote perfecti, sicut & pater vester cælestis perfectus est,* & alibi sæpe. Hinc non jubemur diligere proximum, quantum nos, sed sicut nos; hoc est, primo loco post Deum nos ipsos, deinde ad normam, & exemplar nostræ dilectionis proximum. Charitas enim inclinat potius in bonum sui subjecti, quam alicujus extranei, idque ob majorem conjunctionem; nam potior est unitas, quam unio. Verum ipsa dilectio proximi necessario sequitur ex præcepto diligendi Deum, prout notat Doctor Subtilis 3. dist. 37. q. 1. m. 5. Contra: nam amans perfecte Deum, hoc ipso debet velle, quod & proximus amet Deum: quia proximus est quoddam bonum extrinsecum Dei, cujus gloria augetur per hoc, quod proximus ipsum amet, eique serviat. Unde ad Charitatem spectat, hæc & similia bona desiderare proximo propter Deum (quod etiam dicendum de bonis proximi corporalibus, aliisque externis, quatenus considerantur ut cedentia ad gloriam Dei) quia ad eandem virtutem pertinet intentio finis, & electio mediorum. Herincx part. 3. disp. 11. q. 4. & alii.

12 CONCL. VI. Præcepto diligendi proximum (quando videlicet illud obligat in occasionibus sublevandæ necessitatis, aut deponendi odium, vel hujusmodi) non satisfacit per solos actus externos; sed adest obligatio diligendi ipsum etiam per actus internos & formales Dilectionis. Desumitur hoc ex pluribus S. Scripturæ testimoniis: ut ex illo Matth. 22. & Luc. 10. *Diliges proximum tuum, sicut teipsum.* Item 1. Joan. 4. *Charissimi, si Deus dilexit nos, & nos debemus alterutrum diligere.* ubi in sequentibus plura quoad hoc. Unde Apostolus Rom. c. 12. vult, ut sit dilectio sine simulatione: atqui ea, quæ exhiberetur actu exteriori, sed absque ullo actu interno dilectionis, non esset sine simulatione; ergo. Et hinc Innocentius XI. sequentes duas propositiones damnavit, quarum prior, ordine 10. sic sonat: *Non tenemur proximum diligere actu interno & formali.* Altera vero, ordine 11. est talis: *Præcepto proximum diligendi satisfacere possumus per solos actus externos.* Et merito utraque est damnata: nam diligere, toties in S. Scriptura præceptum quoad proximum, importat etiam actum internum & formalem, suo tempore prodeuntem in opus externum, juxta illud 1. Joan. 3. *Filioli mei, non diligamus verbo, neque lingua, sed opere, & veritate, cum concordantiis.*

13 Addunt quoad præmissa Doctores cum S. Augustino lib. 1. de Doctrina Christiana, c. 23. etiam corpus proprium ex charitate esse diligendum, eo quod possit participare æternam beatitudinem, postquam fuerit reunitum animæ post generalem Resurrectionem. Verum hoc membrum sufficienter jam includitur sub dilectione sui ipsius. Neque huic dilectioni corporis repugnat moderata & rationabilis castigatio carnis: quinimo cum ejusmodi discretæ carnis mortificatio sit medium consequendi æternam cum anima felicitatem, ea spectat ad verum corporis amorem, sicut ad amorem filii disciplina debita a dilectissimis parentibus imposita.

14 Quæres I. An etiam creaturæ irrationales ex Charitate sint diligendæ? Resp. cum D. Thoma 2. 2. q. 25. art. 3. & aliis passim; quamvis ex charitate possimus diligere



diligere creaturas irracionales, sicut bona, quæ aliis ex charitate dilectis volumus, quatenus scilicet ex charitate volumus eas conservari ad honorem Dei, & utilitatem nostram, vel proximorum; juxta quod *Exodi 23.* præcepit Deus: *Si videris asinum odientis te jacere sub onere, non petranfibis, sed sublevabis eum eo.* Nihilominus creature irracionales non sunt amandæ secundum se, quasi ipsis propter semetipsas, & absque respectu ad honorem Dei, vel utilitatem nostram, aut proximorum velimus bonum: quia charitas fundatur super communicationem beatitudinis æternæ, cujus creatura irrationalis capax non est: neque etiam ea est proximus noster, ac proinde præceptum Dilectionis ad ipsam non extenditur.

*Additio. I.*

\* Quæres II. Qualis ordo Charitatis inter nos, & proximos nostros sit servandus? Resp. ut ordo Charitatis inter nos, & proximos nostros servandus melius cognoscatur, communiter DD. triplicem ordinem, seu tres gradus assignant.

*Primus gradus est,* ut post Deum super omnia diligendum unusquisque diligit semetipsum, quoad Bona spiritualia salutis animæ necessaria, & postea proximum quoad eadem Bona spiritualia, ita quidem, ut huic in extrema necessitate deperdendæ salutis æternæ constituto teneatur aliquis cum periculo non quidem propriæ vitæ spiritualis, bene tamen propriæ vitæ corporalis succurrere, supposito, quod sit spes certa per actionem suam proximo in extrema necessitate salutis æternæ constituto succurrendi, & quod proximus ille in dicta necessitate positus se ipsum juvare nequeat: nam si unquam certe in simili casu tenemur implere id id præceptum Domini, quo ex Charitate juxta S. Joan. I. cap. 3. *debemus pro fratribus animas ponere.* Ex quo inquit D. August. *lib. de Mend. c. 6. Temporalem vitam suam pro æterna vita proximi non dubitabit Christianus amittere.*

*Secundus gradus,* ut diligat se ipsum quoad bona vitæ suæ corporali necessaria, & postmodum proximum quoad eadem bona huic ad conservationem vitæ necessaria.

*Tertius gradus,* ut diligat se ipsum secundum alia bona temporalia conservationi status &c. congrua: postea taliter diligat proximum suum, sublevando ejusdem necessitates de superfluis status &c. Ita cum communi Sabinianus Bononiensis in sua *Luce Morali part. I. tract. 18. n. 13.* Et patet ex ratione, quæ utique nobis dicitur, quod bona spiritualia tamquam excellentiora corporalibus, & corporalia ad conservationem vitæ corporalis necessaria tamquam majora aliis temporalibus, quæ tantum conservationem status respiciunt, sint præferenda: ita tamen, ut in pari necessitate ejusdem ordinis & gradus Charitas possit incipere ab ego (uti ajunt) id est a propria persona: quinimo in necessitate spirituali sic debet fieri, anteponendo salutem æternam periclitantis animæ propriæ. Quod idem quamplures Doctores de vita corporali, quando uterque est in æquali vitæ periculo, sentiendum putant per se loquendo, & si cetera sunt paria: nam (inquit D. August. *lib. de Mend. c. 6.*) *Si quis pro alterius vita temporalis suam ipsam temporalem perdat, non est jam diligere sicut se ipsum, sed plus, quam se ipsum, quod sanctæ doctrinæ regulam excedit.* Dico notanter per se loquendo, id est, nisi adsit altius motivum spirituale, alicujus heroicæ virtutis, quod traheret aliquem ad præponendam vitam alterius propriæ periclitanti. Et ex his gradibus.\*

*Additio II.*

\* Infertur I. Si per unicum mendacium posset aliquis ad veram fidem convertere omnes Indos, non liceret. Ratio est: quia ageret contra bonum spirituale animæ propriæ, eandem aliquo peccato maculans: bonum autem spirituale proprium ac salus animæ propriæ anteponitur aliis.

*Anac. Reiffensuel. Theol. Tom. I.*

Infertur II. Si infans necdum baptizatus foret proximus morti, nec adesset Parochus aut alius ex officio seu justitia obligatus ad Sacramentum hoc administrandum &c. teneretur alius ex Charitate etiam cum periculo deperdendæ vitæ corporalis baptizare. Ratio est: quia infans hic existit in extrema spirituali necessitate, spiritualis autem extrema necessitas alterius, ceteris paribus, & dummodo sit certa spes liberandi proximum ab hac extrema necessitate, est præponenda vitæ corporali propriæ juxta communem DD. quidquid contradicant pauci apud Patrem Sporer *Tract. 3. in IV. Præcept. Decalog. cap. 6. Sect. 4. n. 127.* Hoc tamen intellige, nisi & talis, qui posset infantem baptizare, etiam in peccato mortali existat, vel saltem sit dubius de eodem, durissimum enim foret ita impræparatum emergente subitaneo casu in infelicem æternitatem, vel saltem in periculum ejusdem seipsum præcipitare cum dubio deperdendæ salutis æternæ.

Infertur III. Si latro stricto gladio alicui minaretur mortem, posset hic non solum se defendere, sed etiam, quando aliter tuto evadere nequireret, latronem per modum inculpatæ tutelæ occidere, quamvis prævideret, animam ejusdem ad infernum esse detrudendam. Ratio est: quia hic latro non fuit in extrema necessitate spirituali, sed potius in extrema malitia, qui facile se juvare potuisset, modo voluisset, a suo pessimo proposito desistere: non tenemur autem cum periculo proximo vitæ corporalis talibus succurrere, qui ex propria voluntate se præcipitant in periculum proximum æternæ damnationis.

Infertur IV. Quod tempore famis possimus alicui alteri præsertim Republicæ multum utili, vel superiori cedere panem, tempore naufragii concedere tabulam ad enatandum, tempore pestis intervire infecto, quamvis nosmet ipsos præcipitemus exinde in proximum periculum mortis corporalis: Ratio est, quia, licet conformiter dictis nequeamus vitam nostram corporalem præcipitare in manifestum periculum præcise ob conservationem vitæ corporalis alterius, possumus tamen id ex motivo altiori eliciendæ virtutis heroicæ Charitatis, quæ est bonum spirituale, & consequenter altioris ordinis ac gradus. Qualiter autem in bonis temporalibus, & quando debeamus succurrere proximo, dicitur agendo de elemosyna.

Q U Æ S T I O II.

De Dilectione Inimicorum; ubi etiam de Reconciliatione cum ipsis.

S U M M A R I U M.

- 15 Datur speciale præceptum de diligendis inimicis.
- 16 Vi illius tenemur inimicis exhibere generalia signa dilectionis.
- 17 Vindicta quibus interdicta?
- 18 Exempla de Dilectione inimicorum.
- 19 Tenemur deponere odium, & internum rancorem erga inimicum.
- (c) Ut dictum n. 17.
- 20 Eique veniam roganti remittere offensam, non item satisfactionem, vel damnum illatum.
- \* Ubi etiam in Additione explicatur, quid sit offensa?
- 21 Specialia signa dilectionis, an exhibenda inimicis?
- 22 Corollaria.
- 23 Limitatur allata doctrina.
- 24 Licetum tamen est, odisse peccatum inimici.
- 25 Atque de ejus punitione letari.
- \* Quid sit Reconciliatio? Addit. I.
- \* Quomodo eandem, qui prior offendit, teneatur inchoare? Addit. II.
- \* Quid si duo sese mutuo ad invicem offenderunt? Addit. III.
- \* Qualiter offensus teneatur petenti veniam remittere? Addit. IV.



15 **CONCL. I.** Certum est, dari speciale præceptum Charitatis de inimicis diligendis. Ita omnes Catholici: Sic enim expresse præcepit Christus Dominus *Matth. 5. Ego autem dico vobis, diligite inimicos vestros, benefacite his, qui oderunt vos.* Et hoc non esse consilium dumtaxat, sed verum præceptum, est communis, & concors omnium Theologorum sententia; prout notat Mastrius *disp. 10. Theol. Mor. n. 53.* Accedit illud *Levit. Non oderis fratrem tuum in corde tuo: non quæras ultionem, nec memor eris injuriæ.* Et *Proverb. 25. Si esurierit inimicus tuus, ciba illum, si sitierit, da ei bibere.* Item ad *Rom. c. 12. Nulli malum pro malo reddentes &c.* Ceterum Quæstio potissimum remanet, ad quamnam se extendat isthoc præceptum Charitatis de diligendis inimicis: unde sit

16 **CONCL. II.** Ex speciali præcepto Charitatis sunt inimicis exhibenda generalia signa dilectionis, quæ communiter omnibus ejusdem status & conditionis hominibus præstare solemus. Ita communis. Ratio est: quia talis negatio generalis signi dilectionis, seu exclusio ab eo, vindictæ cupiditatem indicat, quæ privatis est interdicta, juxta cit. textum, *non quæras ultionem, & alibi.*

17 Dicitur notanter, *quæ privatis est interdicta.* Nam alia ratio est in Parente, Prælate, aliisque Superioribus, qui subditos in se peccantes a communibus beneficiis, aut amoris indicis, correctionis gratia aliquamdiu possunt excludere; quamvis si alter sit emendatus, & sufficienter correctus, ejusmodi communia amoris indicia rursus sint exhibenda. Sic pater offensus a filio, potest in locum poenæ eidem negare reconciliationem; imo a domo ad tempus excludere, donec resipiscat, aut convenientem poenam luisse censeatur, exemplo Regis David, qui diu a facie sua exclusit Absalon filium suum 2. *Reg. 14.* Atque id sæpe a parentibus practicitur, quando liberi contra eorum voluntatem contrahunt nuptias statui non convenientes.

18 Ex præmissa Conclusionem infertur primo cum Doctoribus passim, inimicum non esse excludendum a generali dilectione proximorum. Unde si quis communiter oret pro omnibus, excluso inimico, peccat: quamvis enim ad orandum nullo præcepto teneatur, tamen eo ipso, quo pro omnibus orat, nequit tuta conscientia inimicum excipere. Similiter qui omnibus pauperibus occurrentibus elemosynam distribuit, peccat eam negando uni pauperi suo inimico. Idem multi extendunt ad casum, quo quis pluribus simul occurrens, salutem omnes præter inimicum: quia in tali eventu videtur negare signum universale Charitatis, & videtur adesse notabilis contemptus, aut scandalum. Verumtamen etiam frequenter id accidat, nihilominus Basilæus *7. Charitas n. 14.* cum aliis Auctoribus notat, bene ponderandam esse magnitudinem scandali, & intentionem personæ: si enim vel nullum, vel parvum sit scandalum, idque fiat non ex odio, sed in significationem gravaminis accepti, ut alter deinceps caveat offensam inferre, non videtur peccatum saltem mortale incurri.

19 Infertur II. Quemlibet obligari ad deponendum odium, atque internum rancorem erga inimicum, qui comitatur appetitum vindictæ: idque tum per textus S. Scripturæ *n. 15.* allegatos; tum ex illo *Matth. 6.* ubi Christus nos in hunc modum orare præcepit: *Dimitte nobis debita nostra, sicut & nos dimittimus debitoribus nostris.* Hinc idem Salvator noster *Matth. 18.* dixit: *Sic & Pater meus cælestis faciet vobis, si non remiseritis unusquisque fratri suo de cordibus vestris.* Et hac ipsa de causa tenetur quis etiam cavere a signis quibusdam propinquis, quæ gerunt probabilem suspicionem rancoris: ut cum quis numquam vult loqui injurianti; vel, cum ei obviat divertit, vel etiam deliberate, ac voluntarie torvo vultu respicit, & hujusmodi: nam ex talibus signis patet inimicitia, simulque oportet etiam ab omni specie mali abstinere, *1. Thessal. 5.* Hoc tamen limita, nisi ejusmodi signa exteriora conformiter dictis *n. 17.* ad tempus negentur in justam punitionem; quam comitatur zelus justitiæ (c) vel nisi negentur ex eo, quia alioquin time-

tur inimicus in sua malitia futurus obstinatio, aut provocandus ad aliud malum inferendum, sive aliud inconveniens inde oriturum prævideatur. Angelus *7. Diligere.* & alii.

20 Infertur III. Quod proximo veniam sincere roganti teneamur remittere offensam, seu (quod idem sonat) veniam dare. Hinc quidem Christus *Luc. 17.* præcepit, dicens: *Si peccaverit in te frater tuus, & penitentiam egerit, dimitte illi: & si septies in die peccaverit in te, & septies in die conversus fuerit ad te, dicens, penitet me, dimitte illi.* cum concordantiis. Non tamen idcirco ab offenso necessario remittenda est satisfactio pro injuria, vel restitutio pro damno sibi illato: quinimo injuriam, vel damnum passus, potest petere debitam satisfactionem, & si alter hanc ultro præstare nolit, etiam via Juris, intentando videlicet Actionem injuriarum, vel petendo restitutionem, seu recompensationem damnum illatorum, coram competenti Judice eandem postulare. Ratio hujus est: tum quia licitum est cuilibet, jus suum in Judicio prosequi (dummodo hoc fiat secluso omni pravo affectu, atque animo præcise ex odio personæ sese vindicandi) hinc enim constituantur Judices, tamquam publici ministri justitiæ: tum quia aliud est malevolentia, aliud injuria, vel damnum illatum; illam quidem numquam licitum est fovere, bene tamen pro hac debitam petere satisfactionem, vel damni dari recompensationem.

#### Additio

\* Pro clariori hujus ultimæ illationis intelligentia bene notandum, quid sit offensa, & qualiter ea possit cum injuria aut damno conjungi, vel non? Itaque offensa describitur, quod sit *irritatio voluntatis alterius, qua nimirum alteri molestiam inferimus, atque exinde eidem sufficiens motivum præbamus ad displicentiam & indignationem ergo nos concipiendam.* Atque hæc offensa potest esse vel cum, vel sine læsione Juris alterius. Si absque læsione Juris contingat, appellatur offensa simplex: sic dicitur offendi tuus amicus, cui indigenti & commodato petenti denegas sine gravi ratione al quem librum, ad quem ille nullum habet ceteroquin verum jus. Quod si autem dicta offensa fuerit facta cum læsione alterius Juris, tunc vel ita læditur jus illius, ut simul ipse exinde aliquare, quam possidet, privetur, vel non. Si prius, dicitur offensa conjuncta cum damno: si posterius, saltem adhuc est offensa conjuncta cum injuria: e. g. Petrus peccans cum uxore censetur marito facere injuriam, quoniam lædit jus, quod maritus habet in corpus suæ conjugis, quamvis ceteroquin nec proles nec aliud reale damnum ex adulterio sequatur. Injuriam itaque vel damnum non tenetur quis petenti veniam remittere, bene tamen offensam: id est, obligatur offensus alteri humiliter roganti veniam sincere per verba vel alia signa æquivalentia positive manifestare, quod illam internam indignationem antea ratione offensæ conceptam nolit amplius voluntarie & deliberate in mente fovere; licet ceteroquin in Judicio possit debitam adhuc satisfactionem ratione injuriæ, aut resarcitionem ratione damni in re a se possessa illati exigere. Vide Sporer *tract. 2. in 1. Præcept. Decalog. cap. 6. per totum*, ubi exacte hanc materiam examinat. \*

21 **CONCL. III.** Specialia signa, & argumenta Dilectionis inimici exhibere, vel eosdem peculiari benevolentia & dilectione prosequi, consilium est, non præceptum. Ita communis. Ratio est: quia non tenemur inimicos magis diligere, quam alios proximos. Nihilominus consilii, & majoris perfectionis est, ita sese propter Deum superare, ut etiam singularem benevolentiam inimicis impendamus, exemplo Christi Domini, qui pro suis crucifixoribus oravit.

22 Infertur proinde cum Laymano *lib. 2. tract. 3. c. 4.* & aliis, inimicum ægrotum invisere, multum solari, hospitio recipere, obviam factum salutare, familiariter cum eo agere, ac hujusmodi, per se loquendo, atque extra casum necessitatis aut scandali, non esse de præcepto:



præcepto: quia hæc sunt specialia amoris signa, quæ inimicis nemo tenetur exhibere, quamvis talibus specialibus benevolentiae signis exhibitis inimicos diligere, sit opus Misericordiae spiritualis, & valde meritorium.

23 Additur notanter, *per se loquendo* &c. Nam secus est, si ceteroquin sequatur scandalum, aut inimicus in gravi necessitate positus ejusmodi benevolentia, vel auxilio specialiter indigeat. Siquidem imprimis quilibet tenetur scandalum, & ruinam proximi vitare, quoties potest absque gravi suo detrimento. Unde peccat, si quis citra grave suum detrimentum ac incommodum negando specialia signa amoris, quæ antea præstare solebat, majus erga se hominis odium, vel iram concitet. Idem dicendum, si speret, salutatione inimici, vel simili benevolentiae signo, animum ejus sibi, ac Deo facile reconciliandum, & nihilominus ejusmodi signa subtrahat, quæ tamen facile (uti supponitur) exhibere posset. Layman *loc. cit.* Deinde si inimicus sit in casu necessitatis constitutus, urget illud, quod habetur *Proverb. cap. 25. & Rom. 12. Si esurierit inimicus tuus, ciba illum.* Hinc observant Doctores, quod quilibet semper debeat animo paratus esse, speciatim subvenire inimico, cum is graviter indigerit, & alter commode potuerit.

24 CONCL. IV. Licitum tamen est & honestum, in peccatoribus & inimicis odisse atque detestari peccatum, illudque per emendationem tollere, & optare, ut a Deo, aut a Superioribus puniatur. Ita Scotus 3. *dist. 30. q. 1m.* Mastrius *disp. 10. Theol. Moral. n. 55.* & alii. Ratio est: quia sic non habetur odio persona inimici, quæ ad imaginem Dei formata est, & capax existit æternæ beatitudinis, sed potius ejus peccatum, quod tolli, & corrigi, atque puniri volumus. Unde & Regius Pfalter, *Psal. 103.* exoptat, dicens: *Deficiant peccatores a terra, & iniqui, ita ut non sint:* id est, efficiatur, ne amplius sint peccatores.

25 Et hac ratione per Judices, ac publicos justitiæ Ministros, rectissime peccatores puniuntur, imo & pro communi Reipublicæ tranquillitate, aut exigente justitia, ultimo quandoque supplicio afficiuntur. Atque eadem ratione licitum est, de ejusmodi malefactorum punitione lætari, quatenus nimirum per eam tollitur malum peccati, & publicum Reipublicæ incommodum; & econtra tristari, si videmus peccatores prosperari. Aliud enim est, peccatum in proximo odisse, ejusque punitionem, & correctionem optare: aliud vero, personam proximi odio habere, quæ ad imaginem Dei facta est, atque æternæ gloriæ capax existit. Illud licitum est atque bonum, non autem istud.

Additio I.

\* Quæres. Quandonam, & qualiter quis teneatur ex charitate sese cum suo inimico iterum reconciliare? Ante responsiones nota I. Quod reconciliatio tunc fieri dicatur, quando ab uno per verba vel facta venia ac remissio offensæ petitur, & ab altero hæc venia datur. Nota II. Neminem posse inimicum suum etiam ante reconciliationem interne odio habere, volendo præcise huic malum, quatenus ipsi malum est, hoc enim foret peccatum juxta dicenda *Dist. seq. q. 1.* Nota III. Neque posse quempiam ordinarie & regulariter inimico suo etiam ante reconciliationem signa communia denegare, uti cum suis exceptionibus jam patet ex dictis superioribus. Quæstio igitur solummodo remanet, quandonam teneatur ab inimico specialiter veniam errorum petere, verbo, facto vel specialibus quibusdam signis, sicque reconciliationem incipere. Item quandonam alter veniam petitam obligetur dare, & consequenter reconciliationem complere? H. N. \*

Additio II.

\* Resp. I. Si quis alterum innocentem graviter offendit, & exinde sibi inimicum fecit, tenetur ille reconciliationem incipere verbo, aut facto, sive aliis veris si-

Anacl. Reiffenstuel Theolog. Tom. I.

gnis veniam rogando, vel aliam sufficientem satisfactionem loco offensæ æque gratam substituendo. Ita communissima Doctorum cum Patre Sporer *loc. cit. Sect. 3.* & ratio patet ex materia de Restitutione. Excipe tamen I. Si læsus fuerit absens nec facile conveniri possit. Excipe II. Si hæc petitio veniæ fieri deberet cum gravi tuo damno, quod tamen gravius damnum non facile præsumi debet; si enim nequeas circa diminutionem famæ ac prostitutionem Auctoritatis v. g. tamquam Superior &c. verbis petere veniam, poteris id facere factis per specialia signa amicitiae, paterni affectus &c. Excipe III. Si prævideatur, quod læsus petitionem veniæ non sit accepturus, aut inde magis sit irritandus &c. \*

Additio III.

\* Resp. II. Si duo mutuo sese ad invicem offenderunt, & inimici facti sunt, tunc vel sunt offensæ æquales vel inæquales? Si ultimum: tenetur incipere reconciliationem, qui gravius offendit; alias vero, qui prius. Quod si offensæ forent moraliter quasi tempore simultaneæ, & gravitate æquales, utrique æque incumbit data opportuna occasione inchoare reconciliationem; cum non sit major ratio, cur potius unus, quam alter incipiat. Posito autem, quod unus ex istis ex gravi ratione prudenter præsumat, alterum non corresponsum pariter ab ipso petendo veniam, poterit quasi in titulum compensationis mutuae interea suspendere reconciliationem: sicuti, si forent duo debitores ad invicem, & alter debitum non restitueret, posset ut prior suum debitum interea in titulum compensationis retinere: consulitur tamen in simili casu aliquis tertius tamquam mediator, qui rem pacifice inter hos componat. \*

Additio IV.

\* Resp. III. Si offendens veniam verbis sincere rogavit, aut factis aliam æquivalentem satisfactionem congruo tempore exhibuit suo inimico offenso, sicque reconciliationem incepit, tenetur alter eandem reconciliationem complere ignoscendo, seu remittendo offensam: salvo tamen adhuc semper suo jure (si eo voluerit uti) petendi coram legitimo Judice debitam & proportionatam satisfactionem, aut damni rescissionem. Ita colligitur partim ex illo *Matth. cap. 6. Si non dimiseritis hominibus peccata eorum, nec Pater vester caelestis dimittet peccata vestra.* Partim ex numero vigesimo hujus Quæstionis.

Dicitur autem notanter I. Si offendens veniam petit: nam alias nec offensus tenetur dare eandem per externa quædam specialia reconciliationis signa, licet ceteroquin nec tali quidem possit offensus ordinarie negare signa communia, aut internum erga eum fovere odium.

Dicitur II. Si sincere petit: nam si tantum pseudopolitice rogasset, venenum adhuc occulte reservans in sinu suo, utique alter non teneretur veniam dare, complendo sic reconciliationem per specialia aliqua signa externa, cum talis simulatorie petens sit pejor non petente, utpote fraudulenta figens oscula, qualia specialiter detestatur Sac. Script. *Proverb. cap. 27. v. 6.*

Dicitur III. Si congruo tempore petit: nam si offensa fuerit atrox, & adhuc recens, juxta patrem Sporer *loc. cit. n. 43.* offensus non tenetur illico complere externam reconciliationem dando veniam (videtur enim id juxta DD. supra humanam fragilitatem) modo ceteroquin conformiter dictis interne nullum interea odium, & injustam vindictam, seu malevolentiam in pectore retineat. Sabinus Bononiensis *part. 1. Lucis moralis Tract. 18. n. 42.*



## Q U Æ S T I O I I I.

## De multiplicibus actibus Charitatis.

## S U M M A R I U M.

26 *Actus Charitatis, qui?*27 *Dilectio,**Beneficentia,*28 *Gaudium,*29 *Pax, &*30 *Misericordia, quid?**Hujus vitia opposita.*31 *Opera Misericordiae corporalia,*32 *Et spiritualia, quae?*33 *Ex iis duo praecipue examinantur a Theologis.*

26 **C**ONCL. I. Plures sunt actus, vel potius effectus Charitatis videlicet Dilectio, Beneficentia, Gaudium, Pax, & Misericordia; hujusque rursus alia sunt opera corporalia, & alia spiritualia. Ita communis, & patet inductione.

27 Primus igitur, ac praecipuus Charitatis actus internus est *Dilectio*, quae alteri per Charitatem volumus bonum. Porro huic interno actui Charitatis, quatenus tendit ad proximum nostrum, respondet actus aliquis externus, qui dicitur *Beneficentia*, estque veluti executio ipsius dilectionis internae: siquidem per Beneficentiam proximo re ipsa bonum tribuimus, quod ei volumus, ex interno Charitatis affectu, sive dilectione. Hinc I. Joan. cap. 3. dicitur: *Filioli, non diligamus verbo, neque lingua, sed opere & veritate*, id est, tum animo, tum externa exhibitione.

28 *Gaudium* non tam virtus est, quam effectus virtutis, seu ipsius Charitatis; nec aliud est, quam quies animi in bono praesente, & possessio. Nam, dum Deum ex Charitate diligimus, mox laetamur de ipsius bonis, utputa de infinitis perfectionibus Divinis, de exaltatione Nominis sui, conversione Gentium, ac hujusmodi: ac similiter, si proximum veraciter diligimus, gaudemus de bonis ipsius, videlicet de conversione ejus a peccatis, de profectu in virtutibus, imo & de bonis aliis tum spiritualibus, tum temporalibus.

29 *Pax* similiter est actus, seu potius effectus Charitatis, juxta illud Apostoli ad Galat. 5. *Fructus autem spiritus est charitas* (id est, actus dilectionis internae) *gaudium, pax &c.* Et Psal. 118. *Pax multa diligentibus legem tuam.* Porro Pax secundum D. Augustinum lib. 19. de Civit. Dei. cap. 13. est *Tranquillitas ordinis*. Consistit autem in hoc, quod nostra voluntas Divinae voluntati cohaereat, ad eamque reliquas interiores appetitiones accommodet. Item in eo, quod nostra voluntas cum proximi voluntate concordet in iis, quae ad ejus salutem aeternamque beatitudinem pertinent.

30 *Misericordia* est virtus proxime ex Charitate trahens originem, eaque inter virtutes proximum respicientes tenet principatum. Definitur autem a S. Augustino lib. 9. de Civit. Dei. cap. 5. quod sit *alienae miseriae in corde nostro compassio, qua, si possumus, subvenire compellimur*. Duo quippe Misericordia complectitur, videlicet dolorem illum, qui ex alieni mali consideratione nascitur, & actum virtutis, quo, si possumus, alienae miseriae subvenire conamur; quod fit per opera Misericordiae, tum corporalia, tum spiritualia. Huic virtuti Misericordiae per excessum opponitur nimia cordis mollietas, seu nimia indulgentia: per defectum vero cordis durities, atque crudelitas.

31 **C**ONCL. II. Opera Misericordiae recte dividuntur in corporalia, & spiritualia. Ita communis. Et quidem corporalia (sic dicta, quia ad corpus referuntur, & circa illud exhibentur) sunt septem; videlicet, Esurientes pascere, sitientibus potum dare, nudos operire, captivos redimere, aegrotos visitare, peregrinos hospitio suscipere, mortuos sepelire. De quibus omnibus fit

mentio Matth. cap. 25. atque extant plurimi alii textus S. Scripturae passim occurrentes, & loquitur ille vulgatus versiculus:

*Visitò, potò, cibo, redimò, tego, colligò, condo.*

32 Opera Misericordiae spiritualia, seu quae ad animum referuntur, sunt itidem septem; videlicet, peccantes corrigere, ignorantes docere, dubitantibus recte consulere, pro salute proximi orare, consolari mœstos, improborum injurias patienter ferre, aliorum offensam remittere. Et de his loquitur alter vulgatus versiculus, sub ly *consule etiam docere* complectens, dum habet:

*Consule, Castiga, solare, remitte, fer, ora.*

33 Ceterum dimissis aliis actibus Charitatis, utpote de quibus minor est difficultas, Theologi potissimum bina opera Misericordiae examinare solent, videlicet largitionem Eleemosynae, per quam pleraque opera Misericordiae corporalis exercentur, & Correctionem fraternam: unde de his, eorumque obligatione speciales Quaestiones instituentur

## Q U Æ S T I O I V.

## De Praecepto dandi eleemosynam.

## S U M M A R I U M.

34 *Eleemosyna, quid?*35 *Eleemosyna quandoque est de praepcepto?*36 *Ad obligationem dandi Eleemosynam duo concurrere debent, quae?*37 *Corollarium.*38 *Necessitas proximi triplex, extrema, gravis, & communis.*39 *Bona superflua natura, &**Superflua statui, quae?*40 *Tempore necessitatis extrema proximi danda est Eleemosyna de superfluis natura sub praepcepto.*41 *Limitatur haec doctrina.**\* Occurritur objectioni.*42 *De superfluis natura, & statui danda est eleemosyna etiam gravem necessitatem patientibus.**\* Corollaria.*43 *In necessitate communi tenetur quis de bonis superfluis natura, & statui dare Eleemosynam sub veniali.*44 *Nisi subsit ratio negandi; & quae?*

34 **A**Dvertendum, quod *Eleemosyna* generalissime accepta communiter definiatur, quod sit alienae miseriae sublevatio. Et hoc modo Eleemosyna tam late patet, quam late sese extendunt miseriae, quibus creatura rationalis est subjecta; sicque Eleemosyna complectitur sub se omnia opera Misericordiae, tam corporalia, quam spiritualia. Magis tamen ad propositum Eleemosyna accipitur pro opere Misericordiae corporali; estque opus, quo aliquid ex compassione propter Deum indigenti datur. Unde Eleemosyna est actus externus virtutis Misericordiae, quatenus procedit ex motivo sublevandi miseriam proximi; quamvis etiam esse possit actus Charitatis, si fiat ob amorem Dei.

35 **C**ONCL. I. Eleemosyna quandoque est de praepcepto, tenemurque sub peccato mortali aliquando per Eleemosynam succurrere proximo. Ita omnes Catholici. Patet id ex S. Scriptura, ut Ecclesiastici 4. *Eleemosynam pauperis ne defraudes.* Item Luc. 11. *Verumtamen quod superest, date Eleemosynam,* & alibi. Et quidem Eleemosynam corporalem non tantum sub consilio, sed quandoque cadere sub praepcepto, patet ex illo Matth. 25. *Discedite a me maledicti in ignem aeternum: esurivi enim & non dedistis mihi manducare &c.* Siquidem nullus damnatur ob omissionem consilii, sed solum ob violationem praepcepti.

36 **C**ONCL.



36 CONCL. II. Ad incurrendam obligationem dandi Eleemosynam duo concurrere debent, videlicet quod & accipiens in necessitate constitutus sit, & dans habeat bona superflua, unde dare possit Eleemosynam. Ita Doctores passim. Idque desumitur ex S. Scriptura clare, ut ex illo 1. Joan. 3. *Qui habuerit substantiam hujus mundi, & viderit fratrem suum necesse habere, & clausit viscera sua ab eo, quomodo Charitas Dei manet in eo?* Et consequenter, ut propter negatam Eleemosynam perdat Charitas Dei, seu gratia sanctificans, requiritur, ut frater seu proximus noster habeat necessitatem, simulque nos habeamus substantiam, seu media sufficientia eum juvandi. Idem patet ex cit. verbis Matth. 25. *Esurivi enim, & non dedistis mihi &c.*

37 Infertur proinde, si quis non habeat, unde det Eleemosynam, eundem contra hoc præceptum non peccaturum; quia ad impossibile nemo obligatur. Similiter si quis habeat quidem bona plurima, sed non adsit, qui habeat veram necessitatem, non tenebitur præcepto dandi Eleemosynam. Sed mox restat difficultas, quæ necessitas proximi inducat obligationem dandi eidem Eleemosynam, & quis censeatur habere bona superflua, ita ut obligetur de ipsis dare Eleemosynam, supposita sibi que patefacta vera necessitate proximi.

38 Pro resolutione hujus Quæstionis necessario est præmittendum, quod triplex possit intelligi necessitas proximi. Una extrema, cui si non succurratur, proximi vita certo, vel probabiliter periclitabitur. Altera necessitas dicitur gravis, cui si non subveniatur, proximus vitam ægre & difficulter conservabit. Tertia necessitas est communis, & ordinaria; qualis est eorum, qui ostium mendicare solent.

39 Deinde etiam dupliciter potest quis intelligi, habere superflua bona. Primo quidem superflua naturæ; qualia censentur ea, quæ non sunt necessaria ad vitam suam suorumque sustentandam, siue deinde requirantur ad honestam conservationem status sui, siue non. Secundo superflua statui personæ; qualia bona censentur ea, quæ etiam non sunt necessaria ad conditionem, seu statum personæ decenter conservandum. Et hæc distinctio ostenditur a contratio sensu; nam, ut ex terminis patet, necessaria ad naturam dicuntur, quæ requiruntur præcise ad vitam conservandam; necessaria ad statum vero, quæ ad suum, suorumque statum decenter conservandum requiruntur. Nunc sit

CONCL. III. Tempore necessitatis extremæ, vel quasi extremæ proximi, Eleemosyna est danda sub præcepto de superfluis naturæ seu vitæ, quamvis sint necessaria statui personæ; maxime si id fieri possit sine gravi dispendio proprii status. Ita communis, & certissimum asserit Joannes Cardenas ad Proposit. 12. Innocentii XI. n. 9. Et hoc quidem clare desumitur ex hætenus citatis, aliisque pluribus textibus Sacre Scripturæ. Accedit ratio: quia ordine Charitatis, per se loquendo, præferenda est vita proximi decentiæ status nostri. Hinc S. Ambrosius, relatus c. Pasce. dist. 86. sic ait: *Pasce fame morientem; quisquis enim pascendo hominem servare poterat, si non pavisti, occidisti.*

40 Dicitur, maxime si id fieri possit sine gravi dispendio proprii status. Quia imprimis cessat hæc obligatio, quando quis non potest succurrere proximo, nisi cum plena everfione sui status; tum quia Charitas non obligat respectu proximi cum detrimento proprio respective adeo gravi, tum etiam, quia utilius est Reipublicæ, Nobilem retinere statum suum, quam quod privatus pauper vitam, alioquin ad breve tempus duraturam, non tam cito finiat, prout argumentatur Herincx disp. 12. quæst. 3. n. 46. Deinde nemo tenetur pauperi magnam dare quantitatem pecuniæ ad emendam exquisitissimam medicinam ipsi necessariam, sed sufficit adhibere media communia. Layman lib. 2. tract. 3. cap. 6. Sa. & Eleemosyna n. 4. & alii. Insuper cessat isthæc obligatio, si tibi constet, quod ab alio juvandus sit pauper; nam tunc is non censetur esse in extrema necessitate.

Additio.

\* Nec opponas: Bona temporalia pro conservatione status sunt inferioris ordinis vita corporali alicujus hominis privati: ergo hæc Bona ad conservationem vitæ corporalis proximi expendi debent etiam cum valde gravi dispendio proprii status; sicuti ob eandem rationem conformiter dictis antecedentibus vita nostra corporalis exponi debet periculo ad conservandam vitam spiritua-lem proximi nostri in extrema necessitate spirituali constituti. Resp. enim ad istam meo judicio (speculative loquendo) satis difficilem objectionem, imprimis hoc argumentum probare nimium; videlicet, quod contra communem omnium etiam proborum persuasionem dives teneretur quinque millia aureorum cum deperditione proprii status expendere, si per medicamenta tanti pretii vita corporalis unius pauperuli privati, cujus Reipublicæ non multum interest, conservari possit; cum tamen vitam suam propriam non obligentur homines privati tam extraordinariis medicamentis tanti pretii, sed ordinariis, ac communibus solum conservare. Item non sunt homines privati ex communi DD. adstricti pro conservanda vita propria subire conditionem aliquam durissimam extraordinariam: ergo multo minus pro vita aliena. Foret autem homini e. g. Nobili durissimum deici de statu suo, aut valde grave dispendium in eodem pati, ut exinde vita corporalis unius pauperuli, Reipublicæ non multum proficiat, ad tempus conservetur, cui fortassis melius esset in altera vita his miseriis liberari, quam prolongando vitam corporalem eas ulterius sustinere; quare in forma.

Resp. II. Disting. anteced. vita alicujus hominis privati est altioris ordinis, quam bona temporalia illa, ex quorum carentia quis debet quidem aliquid, sed non nimium grave dispendium status pati, con. ex quorum carentia deberet pati valde grave dispendium status, aut omnino de eodem deici, nego anteced. nam in æstimatione morali, & respiciendo utilitatem Reipublicæ vita alicujus hominis privati non censetur pretiosior, quam multa millia florenorum, quæ membra Reipublicæ indigent ad conservationem status, ut exinde suis temporibus bonum publicum promovere, & necessitatibus ipsius Reipublicæ succurrere queant. Videantur La Croix lib. 2. n. 201. & Sporer part. 3. super Decalog. Tract. 3. cap. 6. sect. 2. n. 51. Ceteroquin ipsa vita spiritualis, seu æterna salus alicujus animæ pretioso sanguine JESU Christi redemptæ ita est altioris ordinis, ut nulla bona inferiora huic in æstimatione morali quoad æternam salutem valeant æquiparari; Quid enim prodest homini (inquit Christus apud Matth.) si mundum universum lucretur; animæ vero suæ detrimentum patiat; Licet ceteroquin etiam ibidem (juxta jam dicta) requirantur certæ notabiles condiciones, ut quis cum periculo deperdendæ vitæ corporalis teneatur alterum in extrema necessitate deperdendæ salutis æternæ constitutum juvare.

42 CONCL. IV. Loquendo nunc de bonis superfluis & naturæ, & statui personæ, conveniunt Doctores, ex eisdem dandam esse Eleemosynam non solum patientibus extremam, sed etiam gravem dumtaxat necessitatem. Hinc, ut omittantur citati Sacre Scripturæ textus, S. Ambrosius lib. 1. Officiorum cap. 31. ait: *Grandis culpa est, si sciens te fidelis egeat: si scias, eum fame laborare, ærumnam pati, præsertim si mendicare erubescat.* Quibus postremis verbis eos indicat, qui honestis parentibus nati sæpe graviore paupertate premuntur, dum publice mendicare erubescunt. Et quia in nonnullorum sententia vix amplius dabatur superfluum statui, sicque præsens præceptum, dari Eleemosynam graviter indigentibus de superfluis statui, plurimum enervabatur, jure meritissimo Innocentius XI. inter alias sequentem, ordine 12. Propositionem damnavit; *Vix in secularibus invenies, etiam in Regibus, superfluum statui. Et ita vix aliquis tenetur ad Eleemosynam, quando tenetur tantum ex superfluo statui.*



## Additio

\* Ex hac præcedente Concl. colliges I. Qualiter peccent illi Medici, vel Chirurghi, qui quamvis sciant unum alterumve pauperem gravi infirmitate pressum, nolunt tamen unquam sine oblatione pecuniæ accedere, quamvis sæpius possent levibus medicamentis etiam citra grave suum damnum juvare.

Colliges II. Quali culpæ sint obnoxii illi Advocati, qui numquam causas pauperum eo, quia pingues non sunt, volunt suscipere, etsi sæpius iustissimas, & quæ brevi possunt expediri, sicque eorum miseria saltem ex parte alleviari.

Colliges III. Quam Deo & naturæ humanæ (uti inquit Henno hic) sint exosi illi divites, ac præsertim Ecclesiastici, qui tempore publicæ necessitatis granaria frumentis redundantia accumulunt sub spe majoris pretii & lucri, ubi interim pauperes in valde gravi necessitate constituti vix non fame pereunt; super hos venit maledictio a Spiritu Sancto *Proverb. 11.* ipsis comminata sequentibus verbis: *Qui abscondit frumenta, maledicetur in populis; Benedictio autem super caput vendentium.*

Colliges IV. Non esse immunes a peccato gravi illos, quibus nihil, quo aliis in gravi, vel extrema necessitate constitutis succurrere possint, superest ex eo, quia plura, quam statum deceret, impendunt (prout in formalibus ait Henno *Tract. de Virt. disp. 6. quest. 12. art. 1. Conclus. 3.*) ad vestium pompam, ædium magnificentiam, epulas frequentiores & splendidiore, ludos inordinatos, curiositatis lenocinia, canum & equorum multitudinem &c. \*

43 CONCL. V. Tandem loquendo de necessitate communi, utrum ex bonis superfluis naturæ, & statui personæ sit sub præcepto, vel tantum de consilio danda Eleemosyna pauperibus communem necessitatem patientibus, variant Doctores. Verum communior & probabilior sententia ait, adesse obligationem saltem sub veniali: cum quilibet ex præcepto Charitatis teneatur subvenire proximo necessitatem patienti, si facile possit.

44 Intellige, nisi adsit ratio aliqua negandi: quia tunc nulla omnino culpa foret, negare Eleemosynam. Porro ejusmodi iusta causa negandi Eleemosynam pauperibus rogantibus inter alias censetur ea, si dives propositum habeat aliis pauperibus dandi, vel loco aut tempore opportuniore, si ve pauperibus magis indigentibus. Quod si vero abundans divitiis omnes prorsus pauperes a se repellat, in malo plane statu versari videtur, ut pote cum divite Epulone omni Charitate Dei & proximi exutus, atque inordinato nimium amore divitiarum affectus, cum Christus dicat *Matth. 6. Non potestis Deo servire, & Mammonæ.* Layman. loc. cit. n. 5. & alii.

## QUESTIO V.

## De Correctione fraterna.

## SUMMARIUM.

45 Correctio proximi duplex, Judicialis, & Fraterna.

46 De Correctione fraterna habetur speciale præceptum.

47 Quod ex genere suo obligat sub mortali.

48 Quatuor conditiones requiruntur, ut hoc præceptum obliget; quæ?

\* Ex his tres Casus figurantur.

49 Hoc præceptum obligat omnes, magis tamen Superiores, quam subditos.

50 Et hi rarius contra illud mortaliter peccant.

51 In Correctione fraterna servandus est ordo a Christo præscriptus.

52 Casus, in quibus non est necesse præmittere monitionem secretam, cum Addit. I. & II.

53 Aliter corripiendus inferior, aliter æqualis, aliter Superior; quomodo?

54 Prælati Ecclesiæ in Concionibus non taxandi.

\* An & qualiter corrigendi peccantes ex ignorantia, vel oblivione.

45 **A**dvertendum, quod Correctio proximi delinquentis duplex sit, una judicialis, altera Fraterna. *Judicialis* dicitur illa, quæ fit a Potestate publica in bonum commune: id est, quando adhibetur remedium peccatis delinquentium a publicis Justitiæ Ministris, secundum quod ea redundant in detrimentum boni communis. Et talis correctio est actus Justitiæ vindicativæ: verum de ipsa in proposito non est sermo. *Correctio fraterna* dicitur ea, quæ adhibet remedium peccato, in quantum est quoddam malum ipsius delinquentis. Et hæc est actus Misericordiæ spiritualis, quo per convenientem sermonem proximum a malo peccati avertere, & ad bonum honestum adducere conamur juxta illud *Psal. 140. Corripiet me justus, & increpabit me.* De qua loquendo, sit

46 CONCL. I. De Correctione fraterna habetur speciale præceptum juxta illud Salvatoris *Matth. 18. Si peccaverit in te frater tuus, vade, & corripe eum inter te, & ipsum solum: si te audierit, lucratus eris fratrem tuum.* Quinimo hoc præceptum non solum est Divinum positivum, sed etiam naturale, quo membra ejusdem corporis se mutuo juvare tenentur, unde dicitur *1. Corinth. 12. Si quid patitur unum membrum, compatiuntur omnia membra.* Et generaliter in lege Evangelica nullum præceptum Divinum continetur, quod non sit Juris naturalis, præter præcepta de Sacramentis, & de Fide. D. Thomas 1, 2. *quest. 108. art. 1. & 2.* & alii.

47 CONCL. II. Præceptum hoc ex genere suo obligat sub mortali. Ita Mastrius *disp. 10. Theol. Moral. num. 67.* cum communi. Ratio est: quia Correctio fraterna fit ad lucrandum fratrem amissum per peccatum mortale, juxta cit. textum *Matth. 18. Si te audierit, lucratus eris fratrem tuum;* & consequenter hoc præceptum est de materia gravi. Accedit, quod præceptum Eleemosynæ corporalis obliget quandoque sub mortali; ergo multo magis Correctio fraterna, utpote Eleemosyna spiritualis, per quam subvenitur necessitati spirituali proximi.

48 Intelligi tamen cum Bassæo *Tom. 1. v. Correctio fraterna. n. 7.* & aliis, quod hoc præceptum obliget non quidem semper & pro semper (cum sit præceptum affirmativum) sed dumtaxat pro aliquo tempore, seu concurrentibus certis conditionibus. Inter has autem conditiones prima est, ut moraliter certus sis de peccato proximi: alias enim non nisi temerarie agerem, ipsum corripiendo. Secunda, ut sit spes fructus, saltem probabilis: nam si nulla adsit spes fructus ex nostra correctione secuturi, sed magis appareat periculum secuturæ deteriorationis, aut aliorum malorum, ea erit omittenda, aut differenda in aliud tempus opportunius. Tertia conditio est, ut correptio commode fieri possit. Et quarta, ut non adsit magis idoneus ad corripiendum, qui possit, ac velit hoc onus subire.

## Additio I.

\* Quod si has quatuor conditiones bene notes, poteris exinde resolvere plurimos casus. Majoris claritatis gratia solummodo ponuntur tres. *Primus.* Cajus maritus videt, quod conjux sua nimiam & sibi aliquo modo suspectam habet familiaritatem, & conversationem cum aliquo magno Domino, cujus ipse respective est subditus: manifestat hanc suam displicentiam uxori, quæ tamen innocentior Metello non vult familiarem hanc intermittere conversationem: videt præterea Cajus, quod, si eandem absolute prohiberet, grave damnum a suo Domino sit passurus, aut omnino ab officio amovendus. In hoc casu, si præmissa protestatione, seu salutari ac efficaci adhortatione moraliter possibiles ceteroquin faciat præcautiones &c. non tenetur hanc conversationem absolute interdiceret; partim, quia de peccato uxoris non est certus; partim, quia exinde gravissimum sibi immineret damnum \*



Additio II.

\* *Casus secundus.* Petrus audit virum magnæ auctoritatis graviter contra alios murmurantem; prudenter autem timet, quod, si eundem corrigeret, nihil efficeret, sed ad maiorem indignationem commoveret: in tali passu potest licite correctionem intermittere, quia non foret spes fructus; ad duo autem Petrus attendat, inprimis ne signis tales detractiones approbet: dein, ne, si possibile, eundem ad alium indifferentem discursum pertrahat. \*

Additio III.

\* *Casus tertius.* Bertha famula bene advertit, quod altera ancilla, aut etiam filia heri sui suspecta foveat cum servo, vel alio consortia, quæ etiam post privatam admonitionem continuant. Si indicet hero, vel ejusdem uxori, prævidet, quod vel per ipsam propalationem patris seu matrisfamilias secreti non tenacis, vel aliunde proci ille sit deventurus in notitiam charitative nunc denunciantis, cum gravi suo damno per procum inferendo: taliter non est adstricta ad ulteriorem correctionem, mediante denuntiatione faciendam: ut nec etiam, si prævideret, se nihil per suam correctionem, vel denuntiationem effecturam; cum fides non adhibeatur, &c. Et quoties in Confessionali, si fraternæ correctiones seu Charitative denuntiationes injunguntur, similia a contentibus percipiuntur responsa? Ego jam intimavi patri, & matri familias, nihil dicunt. Sive: Ego jam detuli Superiori, & monui, non vult audire &c. vel sic: Pater Reverende, absit a me, ut denunciem, debeo cum ipsis vivere, quotidie agere, & certo ipsis innotescet, me detulisse, haberemque exinde continuas mortificationes, persecutiones graves &c. vel aliter: Pater Reverende, facerem totum libenter, sed sua Reverentia non novit hanc personam; si resciret enim, quod ego per modum fraternæ correctionis denuntiasset, prout probabiliter in notitiam deveniret, non essem securus in vita & membris &c. Allegationes illæ, si veritate nitantur, plane excusant in simili casu a correctione seu denuntiatione fraterna. \*

49 CONCL. III. Est hoc præceptum Correctionis fraternæ generatim omnes obliget, tam subditos, quam Superiores; strictius tamen obligat Prælatos & Superiores; quibus aliorum cura incumbit. Ita Mattheus loc. cit. n. 68. cum communi. Ratio primæ partis (quæ tamen intelligenda est concurrentibus præfatis quatuor conditionibus) patet ex illis generalibus verbis Christi Matth. 18. Si peccaverit in te frater tuus, corripe eum. Altera vero pars eo probatur, quia subditi tantum ex Charitate tenentur corrigere proximum, Superiores vero non solum ex Charitate, sed simul etiam ex Justitia, ac vi officii sui.

50 Quinimo in hominibus vulgaribus, qui non habent tantam auctoritatem, neque tantam prudentiam ad corripiendum proximum, hoc præceptum non tam frequenter occurrit. Unde præceptum istud est ample accipiendum, nec facile credendum, timoratos homines mortaliter contra illud peccare, præsertim si non fuerint Superiores. Imo etiam concurrentibus supra dictis quatuor conditionibus fieri potest, ut tantum peccetur venialiter, si nempe omittatur correctio ex quadam pusillanimitate, verecundia, timore aut tepiditate, qua quis reputat se minus idoneum ad faciendam correctionem, vel non existimat, se tam strictè obligari ad eam faciendam.

51 CONCL. IV. In Correctione fraterna servandus est ordo, quem Christus explicando obligationem Legis Naturalis præscripsit Matth. 18. illis verbis: Si peccaverit in te frater tuus, vade, & corripe eum inter te & ipsum solum &c. Si autem te non audierit, adhibe tecum adhuc unum vel duos, ne in ore duorum, vel trium testium stet omne verbum. Quod si non audierit eos, dic Ecclesie. Ratio hujus saluberrimæ constitutionis est, ut sic consulatur famæ proximi, & fraterna correctio fiat modo, quo potest, secretiori, ac peccatum ipsius absque causa non manifestetur.

52 Ceterum hoc ipsum intelligendum est regulariter loquendo, & concurrentibus certis conditionibus: unde in pluribus casibus necessarium non est servare hunc ordinem, imo interdum non expedit eundem observare. Et ita inprimis accedit, quando peccatum proximi est publicum: hinc quippe dicitur 1. Timoth. 5. Peccantes coram omnibus argue, ut & ceteri timorem habeant. Quod intelligitur de peccatis publicis: nam, ut loquitur S. Augustinus, c. Quis aliquando. §. Hac ergo. de Penitent. dist. 1. relatus; Publica noxa publico eget remedio. Secundo, si ex prima admonitione secreto facienda non speretur aliquis fructus, quin potius timeantur lites, odia, dissensiones inde orituræ, aut quod delinquens suum peccatum sit confirmaturus &c. cessat obligatio eam faciendi: siquidem ad inutile, vel nocivum nemo obligatur: simulque deficiente fine adæquato legis (qualis in proposito est emendatio fratris, ejusque spiritualis profectus) cessat ipsa lex. Tertio, si peccatum proximi quamvis occultum, verisimiliter credatur seu timeatur adhuc futurum, simulque vergat vel in præjudicium tertii, vel in perniciem Communitatis; ut est proditio patriæ, disseminatio hæresum, aut hujusmodi. Nam cum talibus peccatis communiter privata monitione satis certo & efficaciter consultum esse non videatur; imo potius perversi homines, dum se deprehendendos vident, calidius suam nequitiam occultare soleant, cessat præviæ secretæ monitionis obligatio: quia juxta ordinem Charitatis, spectatis omnibus circumstantiis, major est habenda ratio boni communis, quam privatæ famæ delinquentis. Vide de hoc fusius Jus Canonicum L. 5. Tit. 1. §. 2. & §. 6.

Additio I.

\* Quæres. An quoad peccata occulta quidem, attamen simul vergentia in præjudicium alicujus Reipublicæ debeat ante denuntiationem Superiori faciendam præcedere aliqua monitio privata, quando equidem non scitur pro certo futurus relapsus, dubitatur tamen de seria emendatione? R. Stante tali dubio non requiri præviā monitionem privatam, ob rationem superiori numero jam assignatam; quia stante tali dubio, & consequenter periculo emendationis debet præferri Bonum commune Bono privato, neque talis denuntiatio Superiori facta est peccaminosa diffamatio errantis, utpote quæ non est injusta ablatio famæ ejusdem. Audiatur desuper D. Thomas 2. 2. quaest. 33. art. 7. in formalibus sequentis tenoris: Quod si aliquis occulte tractet, quomodo Civitas tradatur hostibus, vel si Hæreticus privatim homines a Fide avertat; quia ille, qui sic occulte peccat, non solum in te N.B. peccat, sed etiam in alios, oportet N.B. statim procedere ad denuntiationem, ut hujusmodi nocumentum impediatur, nisi forte aliquis N.B. firmiter existimaret, quod statim possit per secretam admonitionem hujusmodi mala impedire. Subsumitur: atqui dubitans de seria emendatione, non existimat firmiter per admonitionem secretam impediri hujusmodi mala: ergo. \*

Additio II.

\* Ceterum si quis N.B. firmiter coram Deo conscientiose existimaret, per secretam, ac privatam monitionem impediri in futurum similia mala, equidem D. Thomas non agnoscit obligationem (intellige ex jure naturali vel Divino) immediate talem peccantem denuntiandi Superiori absque prævia monitione privata; hoc tamen non obstante potest per Superiores illos, qui alias habent potestatem ferendi leges, fieri statutum seu præceptum humanum in similibus Communitati præjudicialis peccatis immediate denunciandi peccantem Superioribus, si videant, illud ly firmiter sæpius non niti firmo fundamento, sed potius suggeri ab amore proprio, vel si experientia doceantur, circa simile crimen occultum privatam monitionem ordinariè nihil, vel parum juvare, sed relapsum potius prudenter esse timendum. Ita Felix potestas cum aliis a se citatis in Exa-



mine Ecclesiastico Tom. 2. part. 3. num. 623. & Mastrius in Theologia Moral. disp. 10. quæst. 3. art. 5. præsertim n. 93. & n. 94. \*

CONCL. V. In casibus, in quibus urget præceptum prævie monendi errantem, aliter corripiendus est inferior, aliter æqualis, & aliter Superior. Ita certa, & communis Doctorum; & patet clare ex S. Scriptura. Siquidem inferior plerumque prius increpandus, & postea mansuete hortandus est, monente Apostolo Gal. 6. Si preoccupatus fuerit homo in aliquo delicto, vos qui spirituales estis, huiusmodi instruite in spiritu lenitatis. Æqualis vero amice commonendus est juxta illud 2. Thessal. 3. Nolite quasi inimicum reputare, sed corripite ut fratrem. Superior denique humiliter potius rogandus est, quam redarguendus, secundum quod dicitur 1. Timoth. 3. Seniorem ne increpaveris, sed obsecra ut patrem.

§4 Præcipue tamen cavendum, ne Prælati Ecclesiæ in publicis Concionibus taxentur coram plebecula; ex hoc enim nullus fructus sperari potest, quin potius timenda est mentis amaricatio, plebis offensio & scandalum, ac vilipensio Prælatorum. Hinc merito in Clem. 1. de Privileg. Religiosis in virtute sanctæ obedientiæ, & sub interminatione maledictionis æternæ districtius inhibetur, ne in Sermonibus suis Ecclesiarum Prælati detrahant. Et S. Hieronymus Epist. 4. ad Rusticum. relatus can. Si Clericatus 16. q. 1. optimum omnibus reliquens exemplum, ait: Non est humilitatis meæ, neque mensuræ judicare de Clericis, & de Ministris Ecclesiarum sinistram quidpiam dicere: habeant illi ordinem, & gradum suum.

#### Additio.

\* Quæres: An sit obligatio fraterne corrigendi, seu admonendi illum, qui peccat ex ignorantia aliqua, vel oblivione? e. g. Si quis ignorans die prohibito comederet carnes, aut nocte irei cubitum oblitus orare Horas Canonicas &c. Resp. I. Si ignorantia vincibilis fuerit, omnino adest obligatio fraternæ correctionis, si adsit spes emendationis, & simul habeantur reliquæ conditiones superius numero 48. specificatæ. Ratio est; quia talis peccat: ergo pariformiter tenemur, si commode possumus per correctionem fraternam eundem in viam meliorem reducere, sicuti, si alia peccata committeret. Resp. II. Si ignorantia, vel oblivio fuerit invincibilis, equidem Bonacina absolute docet, neminem teneri ad correctionem fraternam, nisi quis aliunde fuerit obligatus ex officio, uti Pastor respectu ovium concreditarum, & Confessarius respectu pœnitentium, vel nisi transgressio fuerit in præjudicium tertii. Nam (inquit) tantum obligamur vi Legis Divinæ corrigere peccatum proximi ob periculum animæ; quale tamen non adesset, si fuerit transgressio ex ignorantia vel oblivione invincibili: hoc idem concedunt Oviedo, Bannez, Navarrus & Valentia saltem in Lege humana. Econtra Sanchez, Franciscus Henno, Castropalao, & alii contradicunt, dicentes, adesse obligationem corrigendi; tum quia sic videtur exigere reverentia Legis; tum quia alias posset contrahi habitus contra Legem, & inde magna inclinatio transgrediendi etiam tunc, quando cognoscitur voluntas legislatoris contraria. Hæc ultima sententia consuitur supposito, quod ex una parte talis correctio fieri possit, ex altera vero maxima & quasi certa effulgeat spes fructus. Merito tamen monet La Croix lib. 2. num. 214. opus esse hic discretionem; etenim imprudenter ageret, qui inculpabiliter errantem in re nulli prorsus noxia corrigeret cum non levi ejusdem erubescencia, vel confusione, aut aliorum incommodo: prout juxta P. Gobat in Theolog. Exper. Tit. 3. num. 343. male fecit ille, qui Sacerdorem oblitum Stolæ de hoc defectu non sine confusione admonuit ad aram sub ipso Sacrificio \*

## DISTINCTIO VII.

### De Vitiis Charitati oppositis.

#### QUESTIO I.

### De Odio Dei, & Proximi.

#### SUMMARIUM.

- 1 Deus secundum se nequit odio haberi, sed solum quoad effectus suos.
- 2 Odium Proximi, duplex, personæ, seu Odium inimicitie, & qualitatis, seu odium abominationis.
- 3 Odium Dei, quale Peccatum?
- 4 Odium proximi est ex genere suo mortale.
- 5 Potest per accidens fieri veniale.
- 6 Odium inimicitie semper illicitum, non sic odium abominationis.  
(a) Ut dictum dist. 6. n. 25.
- 7 Corollaria de Odio inimicitie, seu personæ.
- 8 Et Odio qualitatis personæ, quod vocant abominationis.
- 9 Optare sibi mortem a Deo, quando non sit peccatum?
- 10 Cavende quoad propositum quedam Propositiones damnata.
- 11 Ratio damnationis refertur.
- 12 Aliæ Propositiones damnata.
- \* Quomodo dictæ Propositiones sint intelligenda;  
Addit. I. II. III. & IV.
- 13 Maledictio, quale peccatum sit?
- 14 Et cui virtuti repugnet?
- 15 De Invidia, Acedia, remissive.  
(b) Tract. 3. dist. 3. quæst. 4. & 7. per totas.

1 **A**dvertendum, quod Deus dupliciter considerari possit: primo secundum se, ut est summum, ac infinitum Bonum; & sic a nullo potest Deus odio haberi: nam ubi nulla est ratio mali, ibi nullus potest esse actus odii. Deinde potest Deus considerari quoad effectus suos; quatenus scilicet punit peccatores, leges ac præcepta carni contraria posuit, immittit calamitates hujus sæculi diversas, & tandem transgressores mandatorum suorum æternaliter cruciat in inferno: & hoc pacto dæmones, & nonnulli perversi homines Deum odio prosequuntur.

2 Advertendum ulterius, quod Odium proximi duplex esse possit. Unum dicitur *Odium personæ*, quo personæ cuiusdam nobis displicenti malum volumus, quatenus ipsi malum est: & hoc alio nomine dicitur *Odium inimicitie*. Alterum appellatur *Odium qualitatis*, quo personam averfamur dumtaxat secundum malum ipsi adjacens, quod nobis vel aliis contrarium est, non autem secundum seipsam: & hoc vocant *Odium abominationis*. Layman. lib. 2. qu. 3. cap. 8. n. 1. & alii.

3 CONCL. I. Odium Dei est peccatum gravissimum Charitati oppositum, neque illud ob parvitatem materiæ potest fieri veniale. Ita Bonacina disp. 3. de Præceptis Decalogi, qu. 4. punct. ult. & alii. Ratio est, quia quodlibet odium in Deum repugnat summæ ejus Bonitati.

4 CONCL. II. Odium proximi ex genere suo est peccatum mortale, oppositum Charitati. Ita communis. Ratio est: quia sicuti virtute Charitatis Deum & proximum diligimus, ita actibus Charitati oppositis homo Deum & proximum detestatur; ergo & odium proximi est ex genere suo peccatum mortale, cum opponatur excellentissimæ virtuti Charitatis.

5 Dicitur *ex genere suo*. Siquidem odium proximi potest fieri veniale, tum ob imperfectum animi consensum, seu indeliberationem actus (quod etiam in odio Dei locum habet) tum ob parvitatem materiæ: ut si quis leve malum alicui optet, aut si levem aliquam displicentiam, seu modicam aversionem habeat erga proximum: hic enim non peccat mortaliter. Idem d-



cendum, etiam si quis fastidium, indignationem, & quandam modicam aversionem concipiat erga eos, qui nobis spiritualia consulunt, puta erga Concionatores, Confessarios &c.

6 CONCL. III. Etsi interdum licitum sit, hominibus malis, sive peccatoribus ex odio abominationis, seu ob qualitates pravæ ipsi adjunctas optare malum, v. g. ut fur Reipublicæ noxius suspendatur, non quidem hoc optando, quatenus malum ipsius est, sed quatenus boni rationem habet, atque inde majora mala impediuntur (a) nihilominus odium inimicitiae, quo personam proximi odio habemus, Charitati semper adversatur, ut dictum Concluf. præced. Hinc

7 Inferitur I. Eum graviter peccare contra Charitatem, qui alicui magnum malum exoptat ex displicentia personæ, seu quatenus absolute ipsi malum est, non vero ob bonum ipsius vel alterius. Idem de eo dicendum, cui persona alterius tamquam infesta, & odiosa displicet, sicque ipsam non esse desiderat, aut aliud grave malum ex animo precatur. Atque hoc ipsum procedit de illo, qui gaudet, seu complacet de gravi malo proximi, quia ipsi malum est. Ratio est clara: quia hæc pertinet ad odium personæ, quod vocant *Odium inimicitiae*. Et exinde peccat mortaliter, qui ex eo sine recitat Psalmum 108. ut mala inibi contenta veniant super inimicum suum, prout exemplificat Busenbaum hic.

8 Inferitur II. Secus esse dicendum de eo, qui gaudet de malo alicujus, vel tristatur de ipsius bono ex honesto motivo. Sic quippe a peccato mortali excusatur, qui de alicujus infirmitate, vel morte lætatur, eo quod sic non possit amplius nocere Communitati, aut sibi esse occasio peccandi. Similiter non peccat, qui tristatur, dignitates conferri indignis, impios exaltari, sicque habere ansam amplius nocendi probis hominibus: quia hæc spectant ad odium qualitatis personæ, quod alio nomine *Odium abominationis* appellant. Quinimo Bonachina loc. cit. num. 7. hoc extendit ad matrem, quæ mortem filiarum exoptat, eo quod non habeat; unde eas vel ob deformitatem, vel ob inopiam honestis nuptiis tradat.

9 Insuper passim Doctores a peccato excusant eos, qui cum debita resignatione in Divinam voluntatem, atque patientia (secus, si fiat ex impatientia, aut desperatione) sibi a Deo mortem exoptant ad subterfugiendas multiplices graves miseriae hujus sæculi. Et multo magis id dicendum, si tale desiderium concipiatur ex metu Deum offendendi peccato mortali, aut ex desiderio ipsum æternaliter videndi in æterna beatitudine, nam tale desiderium passim a libris asceticis commendatur tamquam bonum, laudabile, Deoque placens, juxta illud Apostoli Philipp. 1. *Desiderium habens dissolvi, & esse cum Christo*.

10 Ne autem in præsentī materia laxentur habentæ maliciis hominum ob indiscretas, imo scandalosas quorundam illationes, merito huic malo Sedes Apostolica providendum censuit, dum Innocentius XI. Anno 1679. sequentes Propositiones, sicut jacent, ut minimum tamquam scandalosas, & in praxi perniciosas (ita sonat censura) esse damandas, & prohibendas statuit, & decrevit. Una, & ordine 13. sic sonat: *Si cum debita moderatione facias, pote absque peccato mortali de vita alicujus tristari, & de illius naturali gaudere, illam inefficaci affectu petere, & desiderare, non quidem ex displicentia personæ, sed ob aliquod temporale emolumentum*. Ita Propositio damnata.

11 Ratio hujus damnationis est: quia quamvis ordinate, & salva Charitate fieri valeat, quod quis sive ob bonum spirituale ipsius, vel alterius, aut propter bonum commune Reipublicæ, vel etiam ad evitandum ingens malum temporale optet alteri mortem, vel aliquod temporale incommodum, prout notat tum Doctor Angelicus 2. 2. q. 76. art. 1. & 3. dist. 10. art. 1. tum Doctor Subtilis 3. dist. 30. q. un. (sic enim principalis intentio non fertur ad malum, sed ad bonum spirituale ipsius, vel alterius, vel ad bonum Communitatis, & ut alter

nocere desinat) nihilominus illicitum est, & Charitati repugnans, optare mortem proximo ob tale emolumentum, quod solummodo speratur, & ad quale adhuc ne quidem habetur jus, aut ob quodcumque etiam modicum: quia tale bonum censetur esse levioris momenti facta comparatione cum vita hominis, adeoque hoc bonum non erit motivum honestum, & sufficiens pro eliciendo licite tali actu, ut recte notat Johan. Cardenas in Crisi Theologica ad cit. Propositionem 13. Innocentii XI. cap. 3.

12 Altera, & ordine 14. Propositio damnata sic sonat: *Licitum est absoluto desiderio cupere mortem Patris, non quidem ut malum Patris, sed ut bonum cupientis, quia nimirum ei obventura est pinguis hæreditas*. Similiter & sequens Propositio, ordine 15. merito est damnata: *Licitum est filio gaudere de parricidio parentis a se in ebrietate perpetrato propter ingentes divitias inde ex hæreditate consecutas*. Hæc proinde Propositiones, tamquam damnatæ, erunt cavendæ; idque ob rationes num. præc. allatas, quæ fortius urgent in proposito ob amorem a filiis specialiter debitum parentibus. Aliam adhuc declarationem harum Propositionum videre poteris apud Sporer Tract. 2. in 1. Præcept. Decalog. cap. 6. Sect. 1. §. 4.

Additio I.

\* Quæres I. Ex qua Regula dignosci queat, licitum esse de incommodo, ac damno alterius ob commodum, ac emolumentum proprium exinde oriturum gaudere, vel vice versa tristari de bono, ac commodum alterius ob malum sibi propereca timendum? Ante Responsum Nota I. Quod aliud sit gaudere de incommodo, malo, ac damno alterius (v. g. de morte immatura Parentis) quatenus id alteri damnosum est, ita, ut ipsum damnum alteri obveniens sit motivum gaudendi: & aliud gaudere de damno, malo, & incommodo alterius, quatenus ex hoc ipso alterius incommodo, seu damno obvenit mihi quoddam bonum, seu emolumentum: primum gaudium juxta præcedentia dicta certo non est licitum, foretque odium inimicitiae; quoad secundum vero, ubi bonum, seu emolumentum mihi obveniens est motivum gaudendi, Nota II. Quod emolumentum mihi obveniens tamquam motivum gaudendi (puta in allegato casu hæreditas paterna) possit imprimis ita influere qua bonum reduplicative, ut tamen de medio acquirendi illud bonum (puta in præsentī de immatura morte Parentis) prorsus præscindatur: secundo taliter, ut etiam per istud gaudium, ac complacentiam ipsum medium acquirendi alteri damnosum (puta in præsentī ipsa immatura mors) simul immediate ac directe attingatur, non quidem tamquam finis ac motivum acquirendi, sed tamquam medium: sic etiam loquendo de voluntate efficaci, si volo sumere medicinam, ut acquiram sanitatem, non solum volo sanitatem, sed etiam ipsam medicinam, & quidem sanitatem tamquam motivum, seu causam finalem, medicinam autem tamquam medium acquirendi hunc finem. Præcedens gaudium præcisivum damni alterius in similibus non videtur illicitum, neque sub propositione damnata comprehensum uti advertit Joan. Kugler in sua Crisi super Cardenam, hic, estque ad tollendos multos scrupulos bene advertendum, præsertim in Primogenituris & Majoribus, ubi mortem Primogeniti, vel senioris familiæ expectare necesse est. De altero vero restat adhuc difficultas: quare \*

Additio II.

\* Respondeo ex libello succincte propositiones damnatas declarante: ab dignoscendam licitatem similium actuum debet quasi ponderatio ab intellectu institui inter commodum, seu emolumentum ex una, & inter incommodum, seu damnum ex altera parte: si emolumentum proprium sit præponderans damno, seu incommodo alterius, licet gaudere de illo, dummodo citra tuam culpam alteri illud incommodum evenierit. Similiter



Similiter si incommodum, ac damnum proprium eventurum sit valde grave, & quasi præponderans emolumentum alterius, licitum erit tibi de bono alterius tristari. Econtra vero, si malum alterius præponderet bono proprio, seu tuo emolumentum respective, & in comparatione damni alterius sit tantummodo leve, non licebit tibi de alterius damno gaudere: sicuti neque licitum erit tristari de adepto alterius emolumento, si tantum exinde tibi comparative exiguum incommodum oriatur. Ratio utriusque partis est; quia instituendo ad invicem ponderationem in libra Charitatis prior modus gaudendi, seu contristandi, ubi non simul cooperator ad malum alterius, nec impedio ejus emolumentum, non videtur contra ordinem rectæ Charitatis, bene vero modus posterior, uti docet Dominicus Viva in Tractina Theologica *part. 1. Proposit. 13. & seqq.*\*

#### Additio III.

\* Exemplificatur pro majori claritate in sequentibus casibus præcedens Doctrina: sic I. Filia multum a Patre sollicitata ad peccatum carnis potest gaudere de immatura morte Parentis propter conservationem salutis spiritualis propriæ animæ: nam salus animæ propriæ est bonum præponderans saluti corporali Parentis. Item II. licet tristari, si homicidæ, alique pessimi malefactores passim tolerantur impune in detrimentum Reipublicæ; nam bonum Reipublicæ est præponderans vitæ malefactorum. Econtra III. Est prohibitum Matri gaudere de morte suæ filiæ, eo quod a marito suo eadem subinde fuerit aliquo modo acerbioribus verbis increpata, & exinde apud matrem querula, a quibus molestiis mater nunc est liberata: nam modicæ hujus molestiæ liberatio non est bonum præponderans malo mortis filiæ. Aliter foret sentiendum, si præcedentes ærumnæ filiæ fuissent valde graves, & sic vita valde amara: nam *melior est mors, quam vita amara. Eccl. c. 30.*

IV. Pariter illicitum est de victoria a Catholicis contra Hæreticos reportata tristari ex eo, quia unus ex hisce occisis hæreticis erat tuus consanguineus, solitus tibi singulis annis quasdam conferre gratias nunc sublatas: nam bonum Reipublicæ Catholicæ est bonum præponderans damno tuo privato, quod ex morte occisi nunc suffers. \*

#### Additio IV.

\* Quæres II. An, ubi licitum est de incommodo alterius ob emolumentum proprium ex postfacto gaudere, pariter ex hoc sine liceat alteri hoc incommodum antecederet optare, seu inefficaciter desiderare? Ante Responsionem nota, quod desiderium inefficax non sit voluntas absoluta, quæ taliter vult objectum, ut simul inquirat media obtinendi illud: hoc enim non foret licitum, uti patebit sequentibus exemplis. Quare desiderium inefficax est tantummodo voluntas conditionata, quæ exoptat, ut, si malum præponderans aliter tolli, vel bonum præponderans aliter acquiri non posset, id fieret (absque tamen sua cooperatione) etiam morte alterius. H. N.

Respondet apud dictum Dominicum Viva Pater Vasquez *part. 2. disp. 114.* affirmative. Ratio est; quia hoc desiderium inefficax in effectu non aliter influit, quam gaudendo de illo objecto; prout apud Viva advertit Divus Thomas. Sic in exemplo: Filia a patre Vitrico blandis verbis sæpius ad peccatum carnis allecta, etsi nequeat efficaciter influere in mortem Patris propter has blanditias, potest tamen inefficaciter optare mortem naturalem Patris, ut exinde liberetur a periculosa hac sollicitudine. Sic etiam, quando quis ducit vitam valde amarā, etsi nequeat se vita privare, ac propterea media exquirere, potest tamen sibi mortem optare, seu inefficaciter desiderare, prout taliter Elias 3. *Reg. cap. 19.* petit animæ suæ, ut moretur ad evandandas Jezabelis insidias. Simile petitum legitur ad Dominum a Moyse factum. *Num. c. 11.* \*

13 Quæres III. Quale peccatum sit maledictio, qua

alicui homini malum imprecatur, v. g. ut fulmine, laqueo pereat, diabolus eum rapiat &c. Resp. I. Certum est, maledicere alicui serio, & ex animo, esse ex genere suo peccatum mortale, quamvis ex inconsideratione actus, vel levitate materiæ, aut si non fiat serio, sed potius ad ostendendam suam displicentiam vel indignationem possit esse veniale: puta, si parens filio, heri ancillæ malum imprecetur, non ex animo deliberato, ut ita eveniat, simulque id fiat absque notabili honoris imminutione; uti post alios exemplificat Layman *loc. cit. cap. 8. num. 8.* Atque tales imprecationes solent fieri frequenter in jumenta, & alias creaturas non rationales.

14 Resp. II. Proximo sine justa causa serio maledicere, seu malum optare, Charitati repugnat, & ad peccatum Odii pertinet, interdum etiam Justitiæ repugnat, & ad contumeliam spectat. Ita communis. Exemplum prioris est: si quis cuipiam absenti ex animo maledicat; nam hoc soli Charitati contrariatur. Exemplum posterioris est: si quis serio maledicat præsentem, ac in faciem ipsius; hoc enim insuper continet contumeliam, quia lædit honorem proximi.

15 Solent hoc loco Doctores agere pariter de Invidia, & Acedia, utpote quæ etiam sunt peccata mortalia Charitati repugnantia. Verum de istis jam dictum superius (b) explicando septem peccata Capitalia, inter quæ & hæc duo connumerantur.

## Q U Æ S T I O II.

### De Scandalo.

#### S U M M A R I U M.

- 16 Scandalum, quid?
- 17 Scandalum activum seu datum, quid?  
Est adhuc duplex.
- 18 Scandalum passivum generatim.  
Scandalum acceptum.  
Subdividitur in Scandalum Pusillorum, & Pharisaicum.
- 19 Peccatum speciale Scandali, quando committatur?
- 20 Non semper est peccatum mortale.
- 21 Scandalum activum quando, & quale peccatum sit?
- 22 Id ipsum amplius ostenditur.
- 23 Causa justa faciendi aliquid indifferens, quo alter creditur abusus, quæ?
- 24 Vitanda tamen Propositio damnata.  
\* Circa cujus intellectum varia ponuntur notabilia.
- 25 Scandalum mere passivum interdum permitti potest, interdum non.
- 26 Quando non possit permitti?  
Et quando possit?
- 27 An ex causa licitum sit petere ab alio, talia, quæ non sine peccato præstiturus existimatur?  
Exempla, in quibus id licet.
- 28 Quid dicendum de Scandalo Pusillorum, & Pharisaicorum?  
\* Ex dictis resolvuntur sex utiles Casus.

16 CONCL. I. Scandalum recte definitur dicendo: Scandalum est dictum, vel factum minus rectum, præbens alteri occasionem ruinæ spiritualis. Ita communis. Dicitur, dictum, vel factum: quia externa tantum actio (subintellige quoque omissionem ejus) potest habere rationem Scandali, non autem sola cogitatio interna. Et additur, minus rectum: quia non solum actio mala, sed quæ tantum habet speciem mali, potest habere rationem Scandali, si alteri occasionem peccandi præbitura sit. Quod si talis actio ne quidem speciem alicujus mali præ se ferat, omnino non dicitur ea actio scandalosa loquendo de Scandalo activo, cujus præcise, non autem Scandali passivi natura hic descripta fuit. Ut autem utriusque Scandali distinctio ab invicem magis cognoscatur, sequitur

17 CONCL.



17 CONCL. II. Scandalum aliud dicitur activum, & aliud passivum. *Scandalum activum*, quod & datum appellant, est illud, cui proxime data definitio convenit, & de quo ex professo loquimur. Et hoc rursus duplex est: nam Scandalum activum aliud est proprium, seu per se tale, dum scilicet quis expressa intentione dat alteri occasionem peccandi hortando, inducendo, vel faciendo aliquid, quod per se est inductivum ad peccatum, & hoc dicitur *Peccatum speciale scandalum*. Aliud est improprie activum: ut fit, si quis ejusmodi Actionem exerceat, quæ suapte natura apta est alteri occasionem peccati præbere, etsi hoc non intendat: ut si quis die jejunii carnes comedat coram talibus personis, quæ spectatis circumstantiis possunt inde accipere occasionem violandi præceptum Ecclesiæ, vel Fidei iacturam faciendi.

18 *Scandalum passivum*, generatim est ipsa spiritualis ruina proximi, in quam quis labitur occasione ab alterius dicto, vel facto accepta. In proposito tamen passivum accipitur, prout contradistinguitur ab activo, atque alio nomine dicitur *Scandalum acceptum*, seu *Scandalum mere passivum*: estque illud, cum & præter intentionem operantis, & præter naturam, seu conditionem operis alter ex eo peccandi occasionem accipit; atque per hoc distinguitur a Scandalo activo: & subdividi potest in *Scandalum Pusillorum*, quod ex hominis ignorantia, vel fragilitate provenit, & in *Scandalum Phariseorum*, quod ex mera malitia alterius ortum habet: prout olim Pharisei, propria malitia, & invidia erga Christum excecati, ex optimis ejus actionibus, miraculis, & doctrinis scandalizati sunt, a quibus proinde *Scandalum Pharisaicum* appellatur.

19 CONCL. III. Peccatum speciale Scandali activi committitur, quoties quis dat, seu dare intendit alteri occasionem ruinæ spiritualis, ea nempe intentione (saltem interpretativa) quidpiam inductivum ad malum dicendo, suadendo, aut etiam faciendo, ut alter peccet; & talis, qui alium inducit ad peccatum intendens illius damnum spirituale, peccat duplici peccato, videlicet peccato speciali Scandali, quod opponitur Charitati, & Correctioni fraternæ, simulque eo peccato, quod ab altero committitur, seu ad quod induxit alterum. Ita Doctores communiter. Ratio est: quia, qui ex intentione est causa peccati alterius, hoc ipso vult illud peccatum, & consequenter etiam ipsius est reus, & non solum peccati Scandali. Hinc talis non satisfacit in Confessione, dicendo, se alterum ad peccatum induxisse, sed tenetur insuper exprimere speciem peccati, ad quod induxit, utpote vel directe, vel saltem indirecte & in sua causa voliti.

20 Advertendum tamen, non semper esse peccatum mortale, licet quis expresse intendat ruinam proximi; quia si hoc sit dumtaxat peccatum veniale, utputa levis indignatio, ad quam quis proximum inducere intendit, erit tantum peccatum veniale. Ratio est: quia quantitas culpæ peccati Scandali ex solo proximi damno considerato pensanda est. Bassæus *de Scandalum* n. 6.

21 CONCL. IV. Scandalum activum superius explicatum ex suo genere est peccatum mortale, quoties quis tenetur impedire occasionem peccati proximi, abstinendo ab opere illo, quod est occasio Scandali, & non abstinere, sive deinde intendat ruinam proximi, si vè non: e. g. Si quis provocaret alterum amicitie causa ad haustus, ex quibus prævidetur secutura plena ebrietas alterius. Ita communis, & ratio clara est: quia (ut supponitur) tenetur impedire occasionem peccati proximi, & non impedit: unde locum habet illud Salvatoris *Matth. 18. Va homini illi, per quem scandalum venit. Additur notanter, quoties tenetur impedire abstinendo &c. & non abstinere*: quia non semper tenetur quis abstinere, ut amplius declarabitur in sequentibus.

22 CONCL. V. Licet is, qui absque sufficienti & iusta causa facit opus speciem mali præ se ferens (idem a potiori dicendum de opere ex se malo, seu peccaminoso) quo credit alios abufuros ad peccatum, censetur regulariter cooperari peccato alieno, dando Scandalum

activum, & consequenter peccet: nihilominus si quis aliquid ex se indifferens faciat iusta intercedente causa non peccat, quamvis ex eo alterum videat sumpturum occasionem peccandi, dummodo hoc nullatenus intendat. Ita Doctores passim. Ratio primæ partis est: quia quilibet tenetur, quantum commode potest, præcavere, atque impedire peccatum proximi; aliter enim faciundo censetur illud saltem indirecte, sive in sua causa velle. Altera vero pars suadetur ex eo: quia talis non censetur cooperari, neque velle peccatum alterius, sed jure suo utendo illud dumtaxat permittere.

23 Porro iusta causa faciendi aliquid indifferens, quamvis eo credatur alter abufurus, non solum est grave damnum, quod quis pateretur abstinendo a tali opere, verum etiam quævis alia causa, quæ iudicio viri prudentis iusta censetur. Nam non semper æqualis causa erit proportionata ad excusandam ministrationem indifferens cuiuspiam abufuro factam: sed quandoque major, vel minor requiritur causa, prout & illa indifferentia remotius, aut propinquius ad illum abufum propinquat, vel etiam gravior, aut minus gravis est obligatio illius virtutis, cui peccatum illud proximi hac occasione committendum opponitur, uti notat Sanchez *lib. 1. in Decalogum. cap. 7. n. 12.* cum aliis. Sic vendens ornamenta, vel fucos, quibus mulier jam parata abutebatur, excusari potest a peccato mortali, si ipso non vendente alter venderet: quia vendere talia ex se est indifferens, ac remote solum dat ansam peccato, simulque subest proportionata causa vendendi; nam alioquin mercatori sequeretur damnum notabile, cum negando talia passim amitteret emptores. Et ob eandem causam excusari possunt caupones vinum præbentes illis, qui timentur se inebriaturi, vel præbentes coenam eis, qui eandem in die jejunii petunt; item & famuli parantes mensam, aut mensæ inservientes, vel cibos coquentes: quia hi non concurrunt ad potationem, vel comestionem, ut est inebriatio, vel fractio jejunii, sed ut est quid deserviens ad refectionem, quod non est intrinsece malum, sed indifferens.

24 E contra vero Innocentius XI. jure sequentem Propositionem, ordine 51. damnavit: *Famulus, qui submissis humeris scienter adjuvat herum suum ascendere per fenestras ad stuprandam virginem, & multoties eidem subservit deferendo scalam, aperiendo januam, aut quid simile cooperando. non peccat mortaliter, si id faciat metu notabilis detrimenti, puta, ne a Domino male tractetur, ne torvis oculis aspiciatur, ne de domo expellatur.* Et merito hæc Propositio damnata, sicque vitanda est, eo quod actiones illæ admodum propinque ad peccatum accedant, imo ad id cooperentur, dum quis eas scienter exercet.

#### Additio I.

\* Ast dubitabis, quidnam circa Propositionem hanc damnatam sit sentiendum, si talis famulus non solum male tractetur v. g. verberibus excipiat, torvis oculis aspiciatur, aut a domo expellatur, verum etiam sic expulsus nullum alium Dominum acquirat; atque exinde non sine magno dedecore, & summa mentis afflictione mendicare cogatur, poteritne saltem in his circumstantiis absque incurfu in Propositionem damnatam præfatas actiones Domino exhibere, cum protestatione tamen, quod eas non exerceat eo fine, ut per has ad stuprum cooperari velit? Respondeo, uti in succincta declaratione Propositionum damnatarum, non deesse Doctores, qui cum Lumbier, & Dominico Viva hic (in quorum sententiam videtur etiam P. Reiffenstuel juxta verba ultima prioris numeri inclinare) sentiunt, tales actiones neque tunc licere famulo, eo quod iudicent eas intrinsece malas, quia omnino proxime influunt in ipsum peccatum stupri: sicuti ergo (inquiunt) juxta communissimam DD. ob omnino proximum influxum in peccatum non licet, haud obstante periculo mortis, Catholicis apud Turcas captivis admoveere ignem tormentis bellicis ad occidendos Christianos, neque vocare concubinam



binam ad peccandum cum suo Hero (cum dicta ob tam proximum influxum videantur intrinsece mala) ita a pari non licebunt (ajunt isti Doctores) famulo memoratæ actiones ob quodcumque periculum, ac damnum. Ita illi. Dantur tamen etiam alii DD. qui cum Castropalao sentiunt contrarium, judicantes illas actiones, non æque, ac occasionem Christianorum per admotionem ignis ad tormenta &c. esse intrinsece malas, cum, etsi multum appropinquant peccato, non tamen sint immediate perpetrativæ alicujus peccati; nam posset Herus ea ipsa famuli cooperatione uti ad subveniendum virgini, si forsitan hæc adigeretur ab alio, sicque ad operandum bene &c. adeoque (addunt) licitas videri actiones istas famuli, non quidem ad evadenda mala gravia in ipsa Propositione allegata, bene tamen ad evitanda alia longe graviora, ac sæpius morte acerbiora. Profecto, quia actiones sequentes in bonum finem poni possent, licitum est juxta Suarez, Sanchez, Lessium, & Layman captivis in trirēibus Turcarum Christianis ob metum mortis, aut alterius mali ipsa morte acerbioris remigare contra Christianos, sarcinas, & arma ad bellum necessaria convellere, & propugnacula ædificare, etsi ista omnia injuste a Turcis ordiantur ad delendos Christianos. \*

#### Additio II.

\* Ceterum, quoniam in praxi quoad casus particulares adhuc, non obstante doctrina præcedenti, sæpius occurrunt dubia, an citra peccatum scandalum hanc vel illam actionem (eodem modo proportionaliter discurre de omissione) ponere valeas, ex qua aliter occasionem sumit peccandi? ad tollendas varias animi anxietates bene observa sequentes Regulas. I. Quod numquam liceat aliquam actionem ex parte tua de se peccaminosam ponere, ex qua alter pariter ansam peccandi accipiat: si: famulo numquam licet ore tenus, vel per litteras Domini agendo internuntium incitare, seu citare concubinam expresse ad peccandum, vel propria manu tales litteras invitatorias nomine Heri scribere. Rebellus, Sanchez, & Viva hic. II. Si actio tua non sit de se mala, ulterius adverte, quomodo hæc ad peccatum ulterius concurrat, an remotius, an propinquius? major enim desideratur causa, si concursus ad peccatum est propinquus, quam si remotus: hinc (teste Viva hic) causa, quæ excusat a locando domum meretrici, non sufficit ad aperiendum ostium venienti ad actualiter peccandum cum Hero: & causa, quæ sufficit famulo ad comitandum Dominum, qui pergit ad amasiam, est insufficiens ad deferendam scalam, ac ad submitteudos humeros. III. Pariter reflecte ad quantitatem damni proprii, si hanc tuam actionem intermittas: nam quo majus est damnum proprium alias eventurum, eo magis excusatur tua actio a peccato Scandali: sic conformiter dictis, juxta Castropalaum contra alios, periculum mortis, aut gravissimæ paupertatis excusat a peccato famulum deferentem Hero suo scalam &c. non item torvus vultus sui Domini &c. IV. Attende ad quantitatem peccati occasione tuæ actionis ab altero perpetrandi; etenim quo gravius est illud, eo major ex parte tua requiritur causa actionem ponendi. V. Considera, an te non concurrente, facile alii reperirentur hanc actionem posaturi, vel non? minor enim causa sufficit in priori, quam posteriori casu. Hinc (uti docte adducit P. Viva hic) facilius excusantur vendentes chartifolia, aleas, gladios &c. quibus non pauci abutuntur quam vendentes venenum, quod non facile reperitur vendibile, nec nisi cum maxima circumspectione vendi ordinarie solet.

25 CONCL. VI. Scandalum mere passivum, seu acceptum ex nostra operatione, quæ neque in se, neque in specie externa illicita est, interdum permitti potest, interdum non. Ita Layman lib. 2. tract. 3. cap. 31. num. 8. cum aliis communiter. Ratio est: quia præceptum impediendi spiritualem ruinam proximi non permittendo Scandalum passivum, est præceptum affirmativum: hoc autem non semper obligat, sed concurrentibus certis conditionibus.

26 Itaque Scandalum mere passivum permitti non potest, sed debet impediri, quotiescumque nulla ratio necessitatis, vel utilitatis propriæ, aut alienæ, seu gravis incommodi vitandi cogit nos quidpiam agere, ex quo putamus alterum fore scandalizandum, seu sumptuum occasionem peccandi; quia lex Charitatis nos obligat impedire peccata proximi, non minus, ac alia ejus damna, si facile possumus. Econtra vero ob causam necessitatis, vel utilitatis potest permitti Scandalum mere passivum; ac proinde, si urget necessitas, vel utilitas, licite aliquid ceteroquin non malum fit a nobis, quamvis exinde alii sumant Scandalum, seu occasionem peccandi. Exempla nonnulla patent ex dictis n. 23.

27 Quinimo fas est ob justam causam necessitatis, seu utilitatis petere ab altero talia, quæ recte & sine peccato fieri possunt (notanter hoc additur, quia numquam licet inducere alterum ad agendum id, quod sine peccato fieri nequit) tametsi alter male, & non sine peccato hoc præstiturus exillimetur. Sic licite ab usurario in casu indigentiae petitur mutuum, quamvis ille sciatur usuras exacturus, & sic peccaturus. Similiter, si id necessitas postulet, possum ab Infideli juramentum exigere, licet sciam ipsum juraturum per falsos deos. Insuper Parochianus potest a Parocho concubinario exigere, & recipere Sacramenta, quamvis timeat, hunc non nisi cum peccato ministraturum. Ratio est: quia talia opera possunt licite præstari; nam potest Sacerdos præmissa, si velit, Confessione, vel saltem Contritione absque ullo peccato ministrare Sacramenta, alter jurare per Deum verum, si hunc agnoscere velit, aut dare gratis mutuum: unde, quia habeo justam causam exigendi, non pecco talia exigendo, ac permittendo eorum peccata.

28 CONCL. VII. Major tamen causa requiritur, ut permittatur Scandalum passivum ex infirmitate, aut ignorantia, quod vocant *Scandalum Pusillorum*, quam requiratur ad permissionem Scandali Pharisaici, seu ex malitia. Ita communis. Unde notant Doctores, Scandali Pharisaici nullam plerumque habendam esse rationem: si autem prævideatur Scandalum ex ignorantia, vel fragilitate secuturum, plerumque, conformiter tamen modificationi præcedentibus duobus numeris assignatæ, esse condescendendum, aut præmittendam debitam instructionem, vel admonitionem.

### A P P E N D I X

#### Continens sex utiles casus circa materiam Scandali,

- \* De impura loquente coram aliis. Addit. I.
- \* De Ruyco ebrio coram aliis blasphemante. Addit. II.
- \* De Nobili obscenas amigres in sua domo habente. Addit. III.
- \* De Matrona ab aliis impure amata. Addit. IV.
- \* De Puella sibi timente, ne per suum vestitum aliis Scandalo exijiat. Addit. V.
- \* De Patre familias tentante famulorum fidelitatem per expositionem pecunie. Addit. VI.

#### Additio I.

\* Ex dictis resolvuntur varii casus I. Petrus impura locutus est coram aliis non quidem ex motivo impuro, sed præcise ex animi levitate, de quo se accusat in confessionali. In hoc casu, si fuerint præsentibus tales personæ, quæ facile exinde potuissent induci ad impuram complacentiam &c. peccavit Petrus graviter peccato Scandali activi; quamvis dubitet, num alii actualiter fuerint ex suis dictis scandalizati: nam ad peccatum Scandali activi sufficit, quod fuerit grave periculum scandali sumendi, si tamen effluens hæc impura advertit pro tunc, illud subesse periculum. Unde decipiuntur tales, qui putant se a peccato Scandali jam exemptos esse, dummodo similia non proferant coram puerulis aut parvis puellis. Hoc tamen verum est,



est, quod excusari a peccato Scandali possint, si hæc verba impura prolata fuerint coram talibus, apud quos ob varias circumstantias non subest periculum, quod exinde ad peccatum impuræ complacentiæ multum alligantur: e. g. si aliquis conjugatus rusticus apud alios similis conditionis inter laborandum ex levitate animi suis discursibus impura quædam verba immiscuisset absque mala intentione, prout sæpius evenire solet. \*

## Additio II.

\* Casus II. Paulus rusticus crapulosus erumpit in blasphemias coram aliis piis & devotis, qui desuper displicentiam & indignationem ostendunt, seu (ut vulgus loquitur) non parum exinde scandalizantur; quæritur ergo, an rusticus dederit Scandalum, de quo se debeat specialiter in confessionali accusare? Resp. Et si ratione crapulæ contra temperantiam & propter blasphemias contra religionem peccaverit, si deliberate fecerit, speciale tamen peccatum Scandali in confessionali detegendum non commisit. Ratio est: quia Scandalum tunc committitur, quando quis per aliorum dicta vel facta ad peccatum inducitur, atqui pii & devoti audientes blasphemias non fuerunt inducti ad peccatum; nam displicentia & indignatio exinde ab illis concepta fuit iusta, si non excedat in modo; ergo. Quare tales devoti dicuntur scandalizari tantum improprie & abusive, uti recte cum Castropalao notat Felix Potestas tom. I. Exam. Confess. part. 2. cap. 2. n. 327. prope finem. Aliud foret, si dictus rusticus similia proferret coram suis prolibus, quæ facile a suis parentibus blasphemias addiscunt &c. \*

## Additio III.

\* Casus III. Cornelius nobilis retinet in suis hypocautis artificiosas quasdam obscenas, quæ parietes exornat, imagines, cum protestatione tamen, quod non ex malo fine, sed tantum ratione artificii easdem conservet, quæritur, an peccet peccato Scandali? Resp. Nobilem istum, si tales imagines retineat palam, graviter peccare peccato Scandali activi, saltem si easdem non cooperiat, & liberum ad illas videndas accessum aliis indistincte concedat. Ita cum Diana La Croix hic n. 236. Ratio est: quia similes imagines magis solent movere ad obscenas cogitationes, quam sermo impurus: ergo eas non amovens magis peccabit Scandalo activo, quam miscens sermones impuros. Viderint jam illi Pictores vel Sculptores, qui artificio suo abutentes tales imagines pingunt vel sculptunt, & exinde sunt origo, ac causa primaria omnium talium malorum. \*

## Additio IV.

\* Casus IV. Maria Matrona honesta ex certis signis vel ab experientia edocta bene cognoscit, quod a quodam viro contra voluntatem suam impure ametur, quale periculum majus est, si aspiciendi eam sese offerat occasio. Hinc quærit ex Confessario, an hoc non obstante possit citra peccatum Scandali prospicere per fenestras, si ab ipso exinde videatur, adire aliquem conventum aut convivium, cui talis intervenit, vel num potius obligetur ab his abstinere? Respond. I. Si a similibus deberet abstinere longo tempore, non obligatur. Ratio est: quia ex una parte dictum scandalum foret tantummodo passivum, ex altera vero conformiter dictis nemo tenetur vitare Scandalum passivum cum gravi suo incommodo, quale foret longiori tempore sese similibus privare ob alterius peccatum, quale posset, dummodo vellet, alter vitare ipsemet. Respond. II. Si deberet dicta Matrona citare suum notabile incommodum, præjudicium, aut damnum tantummodo ad breve tempus sive una, vel altera vice a similibus abstinere, obligaretur, supposito, quod aliquis ex humana fragilitate sciretur inde lapsurus. Ratio est: quia juxta jam dictam. 26. tenemur impedire sub his limitationibus Scandalum Pusillorum. Respond.

Anacl. Reiffenstuel. Theol. Tom. I.

III. Si alter talia peccata committeret ex mera malicia, non obligaretur Matrona supra memoratas visitationes, aliasque actiones sub culpa gravi intermittere. Ratio est: Quia Scandalum illud foret mere Pharisaicum, cujus plerumque nulla habenda est ratio, quando quis propterea deberet non sine aliquali saltem molestia privari libertate sua in alias licitis. Videantur Sporer part. 5. in Decalog. cap. 1. Sect. 2. num. 34. La Croix Tom. I. lib. 2. num. 245. & n. 247. Felix Potestas Tom. I. Exam. Conf. part. 1. cap. 2. n. 326. 343. Porro censentur ordinarie hæc fieri ex mera malicia alterius, quando ille de industria quærit proterve similes occasiones, vel saltem easdem absque ullo signo emendationis sæpe frequentat, nec desistit, quamvis per verba, vel signa etiam personæ ab ipso impare amatæ bene advertat displicentiam ejusdem &c. \*

## Additio V.

\* Casus V. Titia & stemate & forma illustis virgo timet sibi, ne per mundum suum muliebrem, quamvis nihil mali exinde intendat, aliis tamen scandalum præbeat. Quæritur itaque, an isto timore non obstante adhuc tali ornatu vestita sine peccato incidere valeat, nec ne? Ad hoc cum Sporer part. 5. in quantum Præceptum Decalog. cap. 1. num. 38. & 39. ac Busenbaum lib. 2. Tract. 3. cap. 2. dub. 5. art. 2. Respond. I. Si Titia sciret, quempiam per suum ornatum sumpturum esse scandalum in particulari, deberent applicari cum proportionem dicta præcedentis Casus. Respond. II. Si dicta Virgo illustis nullum particularem determinate sciat scandalizandum, sed tantum in genere timeat aliquos forsan scandalizandos fore, non tenetur exinde abstinere a mundo muliebri statui suo competente, modo aliorum lasciviam non intendat, nec ei placeat dicta aliorum luxuria; licet forsan complacentiam venialiter peccaminosam haberet, quod laudetur tamquam formosa. Ratio est: quia alias sub mortali deberent similes formosæ Virgines quasi perpetuo, vel saltem ad longum tempus abstinere tali ornatu; quia hoc periculum in genere tamdiu duraret, quamdiu durat pulchritudo vestium, ac formæ: atqui hoc foret nimis difficile, ac plenum scrupulis, & consequenter non obligatorium; cum non teneamur impedire Scandalum passivum cum tanta nostra difficultate: ergo. Quinimo Felix Potestas Tom. I. Exam. Confess. part. 2. cap. 2. num. 331. cum Sporer & Busenbaum locis citat. excusant a mortali (non tamen a veniali) si talis virgo uteretur vestitu etiam superfluo ac vano v. g. fucando faciem, utendo crinibus alienis, ac denudando aliquid collum & pectus juxta communem talis regionis consuetudinem, nisi tamen talis denudatio vel ornatus foret valde turpis & ad libidinem provocans. Rationem assignat Busenbaum istam: quia huic sexui, præsertim si maritum quærat, nimis grave esset perpetuo talibus abstinere sub peccato mortali, præcise ex eo, ut aliorum Scandalum passivum impediat. Ceterum loquendo de denudatione colli præfata, A. A. docent ut caute, & non nisi cum magna circumspeditione practicetur, ne nimia laxitate major causa peccandi præbeatur. Et hinc addunt Doctores, ut denudatio pectoris liberior, quantum fructuose fieri poterit, a Confessariis dissuadeatur, imo etiam, præsertim si ex Confessione notetur, istam denudationem huius femine, vel aliis in particulari fuisse occasionem frequentioris lapsus, positive interdicitur. Profecto Innocent. XI. sub suo regimine in alma Urbe Romana prohibuit, ne femine sic scandaloso modo nude incedentes communicentur: & Christus ipsemet S. Brigittæ lib. 7. Revel. cap. 16. summam displicentiam, quam in tali denudatione concipit, manifestavit, ac lib. 8. cap. 57. subjunxit, quanto periculo gravis peccati ob Scandalum se tales exponant & quantum gratiæ ipsis subtrahatur. Vide etiam desuper terribilem Visionem lib. 6. Revel. cap. 52. \*



## Additio VI.

\* Casus VI. Quidam Paterfamilias, ut securior sit de fidelitate famuli sui, hominis quidem alias valde dexteri, in hoc tamen puncto sibi non parum suspecti, relinquit in mensa certam pecuniam, quæritur, an facere possit citra peccatum Scandali? Respond. affirmative: ratio est, quia in tali casu ad summum adesset Scandalum passivum, quod non tenemur impedire, si habeamus gravem rationem in contrarium, prout contingeret in præsentij: cum dominus id faceret, partim, ut a sua suspitione liberetur, partim, ut de famuli fidelitate certior reddatur, sicque ipsi plura confidere queat &c. Quinimo Felix Potestas Tom. 1. Exam. Confess. part. 2. cap. 2. n. 336. ex Castropalao subjungit, quod Pater, si habeat filium probabilissime aliquoties subtrahentem ex cista parentis, semper tamen, si increpetur, negantem, possit relinquere clavem in arca, quasi ejus oblitus, aut apponere nummos in loco patenti ex eo fine, ut filius in furto deprehensus efficacius corrigatur, & puniatur, sicque desistat: tum quia hæc actio est pura occasionis permissio facta ex gravi ratione, nimirum ut deprehensus possit efficacius corrigi, & pertrahi ad emendationem: tum quia est res valde indifferens, & ea posita filius adhuc est liber ad non furandum: tum quia talis permissio compensatur ipsa correctione, ad quam maxime Pater habet onus. \*

## QUÆSTIO III.

## De Discordia, Contentione &amp; Schismate.

## SUMMARIUM.

- 29 Discordia, quid?
- 30 Contentio, quid?
- 31 Contentio, quale peccatum?
- 32 Schisma, quid?
- 33 Et quale peccatum?
- 34 Schisma aliud purum, aliud conjunctum cum hæresi.
- 35 & 36 Quid faciendum tempore Schismatis, quando electi sunt duo Pontifices?
- 37 & 38 Optima Practica pro tali tempore.

29 **CONCL. I.** Discordia est dissensio voluntatum circa bonum, quod ex Charitate velle debemus. Ita D. Thomas 2. 2. q. 37. art. 1. & alii. Sicut enim concordia & pax consistit in consensione voluntatum, ita discordia in earum dissensione. De hac utraque extat vulgatum illud proverbium. *Concordia res parva crescunt, Discordia magna dilabuntur.* Dicitur in data definitione, *dissensio voluntatum circa bonum*: nam discordia circa malum non est vitiosa, sed laudabilis. Et additur, *quod ex Charitate velle debemus*, non enim est peccatum Discordiæ, dissentire in bono, quod facere ex Charitate non tenemur, v. g. si socium rogantem, ut cum eo Religionem ingrediaris, aut peregrineris, se qui recuset.

30 **CONCL. II.** Contentio est impugnatio veritatis cum confidentia clamoris. Ita Layman. lib. 2. Traët. 3. cap. 11. cum aliis. Et hæc dupliciter fieri potest, nimirum vel ex intentione formali, quando scilicet quis agnitam veritatem impugnat: vel ex intentione virtuali, si quis doctrinam impugnet non curans, si ea sit vera, siue falsa.

31 Ceterum Contentio, seu veritatis impugnatio est ex genere suo peccatum mortale (quamvis ob imperfectionem actus, vel parvitatem materiæ possit esse veniale) quia opponitur Charitati, & paci. Unde Apostolus ad Galat. 5. inter opera carnis, quæ excludunt a regno Cælorum, enumerat Contentiones. Hoc tamen intellige de tali veritatis impugnacione, quæ serio fit: nam si a Scholasticis exercitii causa, aut ad explorandam alterius doctrinam fiat cum debitis circumstantiis, ea solet esse laudabilis.

32 **CONCL. III.** Schisma est illicita divisio, per inobedientiam ab unitate Ecclesiæ facta. Ita in re communis. Et sensus est, quod peccatum Schismatis committatur, quando quis sese segregat ab unitate Ecclesiæ; prout ea est Corpus mysticum ex diversorum statuum Fidelibus, tamquam membris inter se, & cum uno Capite Christo, ejusque in terris Vicario connexis compositum.

33 Schisma opponitur Charitati, qua tenemur diligere Corpus mysticum Ecclesiæ, ejusque Caput visibile, Christique in terris Vicarium Romanum Pontificem. Unde D. Augustinus lib. 1. de Serm. Domini. cap. 5. ait: *Ubi Charitas non est, non potest esse justitia, quam charitatem, si Schismatici haberent, non dilaniarent Corpus Christi, quod est Ecclesia.*

34 **CONCL. IV.** Schisma subdividitur in purum, & conjunctum cum hæresi. Schisma purum non opponitur Fidei, sed Charitati dumtaxat & paci: ut si quis ex mera malitia abstraheret se ab obedientia veri Romani Pontificis, & alteri adhæreret. Schisma conjunctum cum hæresi dicitur, quando insuper negatur aliqua propositio Fidei, ut puta Primatus Sanctæ Romanæ Ecclesiæ, aut hujusmodi. Et quidem Schisma plerumque tandem transit in hæresim, prout notatur can. Inter hæresim. 24. q. 3. ibi: *Quod quidem in principio aliqua ex parte intelligi potest: Ceterum nullum schisma non aliquam sibi confingit hæresim, ut recte ab Ecclesia recessisse videatur.*

35. Quæres, quid faciendum sit tempore Schismatis, quando electi sunt duo Summi Pontifices? Resp. I. Si sit unus certus Papa, de quo prudenter dubitari non potest, ei erit adhærendum, & qui alteri favent, sunt Schismatici.

36 Resp. II. Si vero in tali casu legitimus Papa sit dubius, ita ut non possit prudenter cognosci, nulli est adhærendum. Ita Sanchez disp. 12. de Schismate. sect. 1. n. 11. Cajetanus, Sylvester, Bassæus, & alii. Ratio est; quia revera tunc nemo ex istis duobus habet verum jus in Ecclesia acquisitum. Accedit, quod temerarium sit, ac periculosum, dubia habere pro certis.

37 Itaque unusquisque tunc se gerat ut unum Ecclesiæ membrum, & Christo Capiti adhæreat, dubios ejus Vicarios habens pro dubiis, paratus uni certo adhære e, quando Ecclesiæ provisum fuerit de certo; quod si contrarium fiat, Schisma fovetur, & hac ex parte peccari potest. Interea vero Christiana Plebs satisfaciet adhærendo suis Episcopis, Parochis, & Doctoribus Catholicis, semper parata adhærere illi Papæ, quem Ecclesia tamquam legitimum receperit. Et hæc sententia Suarezii est tutior, & in praxi tenenda.

38 Nihilominus Sayrus in Thesaur. lib. 3. cap. 5. n. 22. & Trullench. arbitrantur, quod, quamdiu causa est dubia, & duo vel plures contendunt de Papatu, ac se pro Summis Pontificibus gerunt, nec per Concilium Generale res est determinata, tam ipsi, quam sequaces eorum a peccato excusentur, dummodo parati sint ad determinationem Concilii Papatu se abdicare, & ejusdem Concilii determinationi, ac decreto acquiescere. Ceterum prior Suarezii sententia tutior est, & merito tenenda: Bassæus Tom. 2. 7. Schisma. num. 5. & alii.

## QUÆSTIO IV.

## De Bello, &amp; variis ipsum concernentibus.

## SUMMARIUM.

- 39 Ratio Ordinis.
- 40 Bellum, quid, & quomodo differat a Seditione, & Rixa?
- 41 Bellum ex natura sua licitum est, si debitas conditiones habeat.
- 42 Tres ad Bellum justum conditiones requiruntur, quæ? \* Specificantur adhuc alie conditiones.
- 43 Potest dari Bellum ex utraque parte justum formaliter, non autem materialiter.

44 Subditi



- 44 Subditi in dubio de iustitia belli possunt parere Principi.  
 45 Quid dicendum de extraneis?  
 46 Vel paratis sequi quodcumque Bellum?  
 47 In Bello iusto licite occiduntur nocentes.  
 48 Quid de innocentibus?  
 49 In Bello iusto, cui acquirantur bona hostium?  
 50 Quid de iniusto?

\* Quid de Bello iusto specialiter quoad bona spiritualia?  
 Additio I.

" Ad quem spectent Bona mobilia Hosti denuo erepta,  
 ac recuperata? Addit. II.

\* An in his Bonis priores Domini possint prætere  
 jus possidendi, & quando? Addit. III.

\* Quæ sint specialia peccata militantium? Addit. IV.

39 Solent hoc loco passim Doctores agere de bello,  
 sive quod per ipsum Charitas plurimum lædatur,  
 præsertim si est iniustum; sive quia finis Belli pax est,  
 & securitas arg. c. Noli. 23. q. 1. ibi: Bellum geritur, ut  
 pax acquiratur. De quo proinde loquendo, sit

40 CONCL. I. Bellum est conflictus armorum, au-  
 thoritate Principis Superiorem non recognoscentis indi-  
 ctus. Ita communis. Differt autem a Seditione, & Ri-  
 xa, quod Bellum sit multitudinis contra extraneos; Se-  
 ditio multitudinis contra multitudinem ejusdem Com-  
 munitatis: Rixa vero paucorum, vel singulorum  
 contra paucos, vel singulos.

41 CONCL. II. Bellum, si debitis conditionibus ve-  
 situm sit, ex natura sua licitum est. Patet hoc ex in-  
 numeris S. Scripturæ locis. Idque intelligendum est, sive  
 Bellum sit mere defensivum, utpote quia Jure naturæ  
 licitum est vim vi repellere: sive etiam offensivum  
 quo sumitur publica vindicta de gravibus injuriis, si  
 aliunde congrua satisfactio obtineri nequeat.

42 CONCL. III. Ad Bellum iustum tres præsertim  
 requiruntur conditiones, videlicet auctoritas legitima  
 Principis Superiorem non recognoscentis, iusta causa,  
 & recta intentio. Ita Doctores communiter cum D.  
 Thoma 2. 2. q. 40. art. 4. Et quidem, si prima vel se-  
 cunda conditio desit, Bellum non solum Charitati, sed  
 etiam Iustitiæ contrarium est cum onere restituendi  
 damna illata: si autem deficiat sola tertia conditio, id  
 est, intentio recta ex se loquendo non est contrarium  
 Iustitiæ sed soli Charitati. Matrius disp. 10. Theol. Mo-  
 ral. n. 107. & alii.

Additio.

\* Porro stante etiam ceteroquin causa iusta Belli non  
 censetur recta adesse intentio Principis Bellum indicentis.  
 I. Si minima subsit spes Victoriæ: quia tunc temeritatis  
 argueretur Princeps, qui subditos gravissimo periculo  
 multorum damnorum exponeret ob exiguam spem. II.  
 Si damna, quæ ex bello sequuntur, longe prævaleant  
 utilitati Victoriæ speratæ; quia Princeps in suis actioni-  
 bus potius Bono Reipublicæ, quam commodo privato  
 providere debet. Imo Augustus Scipio, Alexander Ma-  
 gnus, & Lucullus (teste Plutarcho in Lucull.) dicere  
 solebant, *malles se unum civem servare, quam mille hostes  
 occidere.* III. Si prævideatur ex dicto Bello, hostes Ec-  
 clesiæ futuros per foedera summe ipsis favorabilia &c.  
 longe potentiores, & Bonum Religionis notabiliter esse  
 diminuendum. Ita cum Victoria, Valentia, Coninch  
 &c. Suarez disp. 13. de Charitate. Sect. 4. n. 8. & Moli-  
 na T. 2. de Just. disp. 107. §. Recte admonet. \*

43 CONCL. IV. Potest Bellum ex utraque parte  
 esse iustum formaliter, non tamen materialiter. Ita cit.  
 Matrius num. 109. cum communi. Et quidem Bellum  
 non posse ex utraque parte esse iustum materialiter,  
 seu a parte rei, ac per se loquendo, patet ex eo: quia  
 realiter & a parte rei soli uni parti potest compe-  
 tere jus. Ceterum quia sæpe ob ignorantiam, vel di-  
 versarum opinionum probabilitatem hoc jus ignora-  
 tur, hinc per accidens seu formaliter accidere po-  
 test, Bellum ex utraque parte esse iustum; prout si.

Anacl. Reiffenstuel Theol. Tom. I.

mile quid sæpenumero contingit in causis civilibus,  
 sive forensibus.

44 CONCL. V. Subditi in dubio de iustitia Belli, pro  
 Principe ad Bellum eos vocante præsumere, eique pa-  
 rere, & militare possunt. Ita Layman lib. 2. tract. 3.  
 cap. 12. n. 8. cum aliis. Ratio est, quia in dubio quisque  
 tenetur obedire Principi, vel Superiori suo. Sufficit pro-  
 inde, ut talibus subditis (idem dic de militibus condu-  
 ctis, si illis postea Bellum imperetur, de cujus iusti-  
 tia dubitant) manifeste non constet de iniustitia Belli.

45 Ceterum milites extranei, atque voluntarii, voca-  
 ti ad Bellum iustitiæ causam magis examinare tenen-  
 tur; & si de iustitia belli dubitetur, ita ut in neutram  
 partem prudenter assentiantur, plerumque militare non  
 possunt; quia nulla cogente, aut excusante obediendi  
 necessitate exponunt se periculo gravissimæ injuriæ in-  
 ferendæ. Dicitur, *plerumque*: nam si quidem causa bel-  
 landi speculative appareat dubia, simul tamen præsum-  
 ptio sit, Principem cum Consiliariis causam illam prius  
 diligenter examinasse, bonaque fide ad Bellum proce-  
 dere, damnari non debent milites, etiam extranei, si  
 eidem, deposito præcepti suo dubio, pro stipendio ser-  
 viant. Layman loc. cit. cum aliis.

46 Illud vero apud omnes in confesso est, milites,  
 qui parati sunt sequi quemcumque ad Bellum vocantem,  
 sive iustum sit, sive iniustum, dummodo stipendium  
 præbeat, versari in malo statu, & nisi propositum mu-  
 tent, a Confedario absolvi non posse. Layman ibidem.  
 Bassius §. Bellum n. 9. & alii.

47 CONCL. VI. In Bello iusto licite occiduntur  
 omnes nocentes ac rebelles, non solum in ipso pugnæ  
 congressu, sed etiam post partam victoriam, si eorum  
 mors ad vindicandam injuriam, & pacem atque securi-  
 tatem firmandam necessaria videatur: nisi forte sub  
 promissione vite sese dederint, tunc enim pactum erit  
 servandum. Ita Matrius loc. cit. cum communi. Addi-  
 tur tamen, *nisi forte sub promissione &c.* nam ut dicitur  
 c. Noli 23. q. 1. *Fides, quando promittitur, etiam hosti  
 servanda est.*

48 Porro Innocentes (quales de Jure naturæ sunt  
 pueri, ac mulieres; de Jure vero Ecclesiastico Reli-  
 giosi, Clerici, peregrini; homines simplices ac rusti-  
 cani, idque secundum juris præsumptionem, quam-  
 diu contrarium de ipsis non ostenditur arg. c. *Innova-  
 mus de Treuga & pace.*) Innocentes, inquam, per se  
 atque ex intentione in Bello occidere numquam licitum  
 est: per accidens tamen, ac præter intentionem ali-  
 quando possunt occidi, utputa si Bellum geri, vel victo-  
 ria obtineri nequit, nisi innocentes una cum nocenti-  
 bus, quibus permixti sunt, simul occidantur: prout  
 accidit in arcium everfione, urbium expugnatione &c.  
 nam tunc ratio boni communis præponderat privato.

49 CONCL. VII. In bello iusto bona mobilia tempo-  
 ralia ab hostibus capta Jure Gentium fiunt occupantis;  
 quod verum est, nisi consuetudo, vel leges particulares  
 locorum contrarium statuunt: Bona autem immobilia  
 fiunt Principis, vel Reipublicæ iustum Bellum indicen-  
 tis. Ita communis, & patet ex §. *Item ea. Instit. de Re-  
 rum divisione.* Ibi: *Ea, quæ ex hostibus capimus, Jure  
 Gentium statim nostra fiunt.* Concordat textus l. *Si quid  
 Bello ff. de Captivis.* juncta Glossa ibidem, recte hoc  
 de rebus mobilibus intelligente. Quod si tamen ali-  
 cubi vigeat lex particularis, vel consuetudo, ut tota  
 præda in communi reponatur, & singulis æqualiter di-  
 vidatur, juxta illud Davidis Regis effatum 1. Reg. 30.  
*Æqua pars erit descendenti, ad prælum, & remanenti ad  
 sarcinas, & similiter dividunt:* tunc ea omnimodis erit  
 observanda.

50 Dicitur notanter, in Bello iusto; nam capta ab hos-  
 tibus in Bello iniusto omnia sunt obnoxia restituti-  
 oni, ut dictum n. 42. Plura de Bello dicere non juvat,  
 si verum est illud Poetæ:

Nulla salus Bello: pacem deposcimus omnes.



## Additio I.

\* Quinimo bona mobilia spiritualia, seu principaliter ad finem spiritualem ordinata, v. g. Patenæ, Calices, pretiosa paramenta &c. etiam in Bello iusto Ecclesiis ablata non sunt capientium, cum sint res extra commercium humanum. Ita Suarez *disp. 13. de Charit. sect. 7. n. 17.* Sylvester *§. Bellum III. num. 6.* & Petrus Marchantius *Tom. 3. Trib. Sacrament. sect. 6. Tit. 2. q. 3. Concl. 4.* adeoque tenerentur milites Christiani similia deprædantes iterum restituere: quia tales res non sunt sub commercio humano. Quoniam vero hoc in praxi raro fieri videmus, præsertim, si milites Hæretici cum Catholicis commixti sunt, permittunt, imo suadent Doctores, ut alii incolæ similes res spirituales a militibus vili pretio (prout plerumque milites sic solent venales exponere) comparent cum hac intentione, quod illas velint iterum Ecclesiæ, ad quam spectant, si eandem rescierint, restituere recepto redemptionis pretio, quale pretium etiam teneretur Ecclesia reddere, utpote cujus negotium utiliter talis gessit. Ita Diana *part. 6. Traët. 4. Resol. 23.* Bassæus *§. Bellum. n. 19.* & Bonacina *de Restit. in part. disp. 2. q. ult. sect. 1. punct. ult. n. 24.* \*

## Additio II.

\* Quærit. I. Ad quem pertineant bona mobilia temporalia per hostem ablata & denuo per milites defensores illius Regionis recuperata? Casus potest esse iste. Hufari hostiles ex licentia sui Capitanei deprædati sunt certos pagos, præter pecora alia insuper bona auferentes, & in sua castra tamquam in locum tutum deportantes. Intra paucos dies hi Hufari ab aliis militibus dictæ Regionis defensoribus ex improvise obruuntur, quibus etiam tota præda, Hufaris partim cæsis, partim in fugam actis, in manus venit. Quæritur jam, an dicti milites teneantur hanc prædam iterum restituere prioribus Dominis, vel num possint sibi retinere? Resp. I. Si pecora vel alia bona temporalia dicti milites virtute bellica ab hostibus Hufaris recuperarunt pro tunc, quando hi eam prædam necdum ad castra, aliumve locum tutum deportarunt, tenentur iterum rusticis restituere; cum tali modo hi milites non fiant Domini prædæ: taliter enim intelligendus est textus *L. Ab Hostibus 12. C. de Postliminio reversis.* ubi eruitur, militem eorum, quæ virtute bellica acquisivit, non Dominum, sed defensorem esse debere. Atque sic sentiunt Angelus, ac Salicet. in *L. ab Host. C. de Capt.* & eo modo etiam explicanda erit Glossa apud Gothofredum in *L. in Bello §. Si quis servum. ff. de Captiv. & Postlim.* dum inquit, *Res meas virtute bellica recuperatas mihi gratis debere restitui.* Resp. II. Si præfati milites hanc prædam recuperarunt jam deportatam antea ab hostibus in tutum locum, non obligantur reddere primo spoliatis. Ita desumitur ex *T. Si quid Bello. 28. ff. de Capt. ibi: Si quid bello captum est, in præda est, non postliminio redit.* Intellige: si recuperetur ab hostibus jam tranquille possidentibus & quidem virtute bellica: sic enim hæc leges ad invicem concordantur, prout bene notandum. \*

## Additio III.

\* Quærit. II. An bona mobilia temporalia, quæ ab hoste in Bello iusto capta, & postmodum incolis illius regionis, in qua spoliū contigit, vendita fuerunt, possint denuo prætendi a primis Dominis jure Postliminii? Casus formari potest sequens. Milites castra metati in terra hostili, data ab eorum Præfecto spoliandi licentia, divitem prædam ex confinibus ad castra tamquam locum tutum comportarunt: post aliquod tempus discedere iussi, quoniam non omnia utensilia ex præda acquisita secum commodè accipere poterant, non pauca ex iis vili pretio quibusdam incolis horum confinium vendiderunt. Quæritur modo, an illi, qui fuerunt antea horum utensilium Domini, possint oblato pretio ab emptoribus

saltem per sententiam iudicis eadem iterum prætendere jure Postliminii? ubi nota, quod jus Postliminii nihil aliud sit, quam *Jus amissæ rei recipiendæ ab extraneo, ac in statum pristinum restituendæ.* H. N.

Resp. Prædicta bona mobilia temporalia, si emptoribus pretium, quod dederunt, offeratur, possunt iterum prætendi a primis Dominis jure Postliminii, saltem in locis; ubi lex Postliminii adhuc est in usu. Probat ex *L. in Bello. 12. §. Si quis servum. ff. de Captiv. & Postlimini. &c. ibi: Si quis servum captum ab hostibus redemerit, protinus est redimentis, quamvis scientis alienum fuisse. sed oblato ei pretio, quod dedit, Postliminio rediisse, aut receptus esse servus credetur.* Ubi Glossa apud Dionysium Gothofredum sic habet; *Res meas ab hoste qui recuperat, eas mihi restituere cogitur.* Accedit lex *Id quod §. ff. de Legat. 1.* Ita præter Covarruviam *part. 2. Relect. c. Porrectum. de Regul. Tom. 1. §. ij. de Capt. in Bello & servit. person. n. 7.* etiam sentiunt Jason, Bartholus & Paulus Castrensis in dictam legem scribentes, ubi ultimus sic habet: *Postquam res fuit nostra, speratur recuperari fictione Postliminii, quod locum habet in rebus, sicut in personis.* Nec opponas textum Juris superiori quæsito allegatum, *L. Si quid, ff. de Captiv. &c. ibi: Si quid in Bello captum est, in præda est, non Postliminio redit.* Resp. enim conformiter dictis, allegatam superiori quæsito legem loqui de recuperatis virtute bellica ex præda in loco tuto posita, ubi lex specialiter propter virtutem bellicam militibus faves: in præfenti autem fit sermo de recuperatis ab hoste per emptionem, quæ duo ad invicem non debent confundi. \*

## Additio IV.

\* Quærit. III. Qualia sint specialia peccata, quæ possunt in Bello committere Principes, Duces, & milites? Resp. I. Posito etiam Bello iusto, Principes peccant. *In primis*, si stipendia non tribuant in pretium laborum & periculorum, quæ miles subit. *Secundo*, si negligent refarciri damna, quæ milites ex denegatione stipendii necessitate pressi subditis aliis inferunt: solent enim ob dictam causam non dati stipendii vicinos Populos molestare, & varia ab aliis extorquere. *Tertio*, si sine causa, & temere exercitum periculo maximo exponant: non enim Princeps Dominus est vitæ subditorum, sed Gubernator, neque pro suo arbitratu potest bona illorum expendere, sed prout communi bono necessarium fuerit; alias non Rex, sed Tyrannus erit. Resp. II. Duces militiæ gravissime peccant, & ad restitutionem obligantur. *In primis*, si plures milites repræsentent, quam secum habeant, aut iusta consuetudo admittat, ut sic plura stipendia accipiant, & sibi retineant. *Secundo*, peccant Duces & Commissarii exercitus, si vel ex negligentia vel muneribus Judæorum &c. excæcati pabulum pro equis, vel alimenta pro militibus scienter permittant advehi jam corrupta, ex quibus sequatur mors militum vel equorum, aut morbi &c. *Tertio*, peccant Duces transientes cum suo exercitu, præsertim Castrorum metatores, qui tenent loca vicina suspensa, neque manifestant, quo sint diversuri; ut sic accedat, & offerat unusquisque locus magnam quantitatem pecuniæ, ne illuc exercitus transeat. *Quarto*, peccant Duces, signantes ultra legitimam consuetudinem suos famulos in milites & centuriones, ut stipendium a Principe designatum immigant, & sibi illam partem referent. Resp. III. Milites peccant, *In primis*, si temere & absque ulla necessitate periculo vitæ se exponunt; at, quando est probabilis spes utilitatis Reipublicæ &c. laudabile erit militi, & actus fortitudinis vitam suam periculo exponere. *Secundo*, peccant, si Stationem aut pugnam deferant, etsi adsit periculum mortis; nam sic totam communitatem exponerent periculo. *Tertio*, peccant mortaliter, si a castris deficiant: quia sub hac obligatione sunt conducti; nam si hæc facultas discedendi libera esset cuilibet militi, non posset Dux secure ad bellum procedere; cum enim existimaret, sufficientem numerum habere ad pugnam, vacuum se & inermem inveniret. *Quarto*, si ultra debitum stipendium quidpiam



quidpiam notabile accipiant præter id, quod consuetudine jam recepta illis debitum est; unde etiam obligati sunt ad restitutionem. Quinto, qui pabulationem in terra amica (secus in terra hostili) instituunt, quamvis sufficiens pabulum aliunde advehatur, aut pretio comparari valeat, Lessius in *Auct. v. Bellum. Casu 4* Quamvis non desint Auctores teste La Croix lib. 3. part. 1. num. 883. existimantes ex communi consuetudine licitam esse pabulationem tamquam onus commune prædiorum, quando pro utilitate Provinciæ Bellum geritur. Si plura scire cupis, vide nostrum *Petrum Marchantium Tom. 3. tract. 6. per totum.*

Ceterum, uti juxta commune Proverbium, *qui bellum dicit, omne malum dicit*, ita juxta effatum Henrici III. Imperatoris, *qui bellum impedit, maledictionem in benedictionem convertit*. Unde, quia teste Polybio lib. 11. *mucro semel evaginatus agre reconditur*, consequenter juxta sententiam Terentii: *Omnia prius experiri consilio, quam armis sapientem decet*. Atque Rex lib. nter incipiens bellum optime comparatur ab Augusto Imperatore alicui, aureo hamo quosdam capere pisciculos allaboranti, cujus abrupti hami damnum nulla captura compensari potest. \*



## T R A C T A T U S V.

### DE RELIGIONE, ET VITIIS OPPOSITIS.

**P**æfens de Religione Tractatus, & cuius Catholico perutilis, & Confessariis scitu admodum est necessarius: cum enim ad Religionis virtutem pertineat, uni DEO debitam exhibere reverentiam & cultum, eademque inter alias virtutes Morales sit excellentissima, utpote proximius ad DEUM accedens, in quantum operatur ea, quæ directe & immediate ordinantur in honorem Divinum; hinc patet, quam utilis sit cuilibet tantæ virtutis exactior notitia, ad perfectiorem illius exercitationem apprime conducens.

#### D I S T I N C T I O I.

*De Virtute Religionis, & variis ejus Actibus.*

#### Q U Æ S T I O I.

*De natura, objecto, & præstantia Virtutis Religionis.*

#### S U M M A R I U M.

- 1 *Utilitas præsentis Tractatus.*
- 2 *Religio, unde sic dicta?*
- 3 *Sumitur tripliciter.*
- 4 *Religio, quid?*
- 5 *Cultus & Honor differunt; quomodo?*
- 6 *Objectum Religionis quale?*  
(a) *Uc dictum Tract. 4. Dist. 1. n. 8. & 10.*
- 7 *Religio inter virtutes Morales præstantissima.*
- 8 *A Religione possunt imperari actus virtutum Theologicarum, & aliarum omnium.*

**N**omen Religionis a religando dictum est, eo quod nos Omnipotenti DEO religet, seu astringat, juxta illud D. Augustini lib. *De vera Relig.* circa finem: *Religet nos Religio uni Omnipotenti Deo*. Quamvis alii aliam hujus nominis derivationem assignent, dum volunt, Religionem dici a *relegendo*, quod ea, quæ ad cultum Divinum pertinent, sæpius sint animo relegenda, seu revolvenda; vel tandem a *reeligendo*, quod per eam Deum, quem per peccatum rejecimus, rursus eligamus, seu reeligamus.

3 Tripliciter autem sumitur Religio: I. Pro virtute, qua debitum Deo cultum exhibemus. II. Pro formula cultus Divini omnibus communi, per quam mancipantur homines obsequio divino, quantum præcise necessarium est ad salutem consequendam; sic dicitur Religio Christiana, & Religio Catholica. III. Pro Statu Religioso; nec aliud est, quam Fidelium ad Christianæ Charitatis perfectionem tendentium, editis votis perpetuæ Paupertatis, Castitatis, & Obedientiæ, stabilis in communi vivendi modus: in quo sensu dicitur Religio Seraphica, Religio S. Dominici &c. & ejus Professores dicitur. *Anacl. Ruffenjiuel Theol. Tom. I.*

cuntur Religiosi, & quandoque Regulares a speciali Regula, quam profitentur. In proposito sumitur Religio in prima dumtaxat acceptione, seu quatenus est virtus, prout inscriptio præsentis Distinctionis, & Quæstionis satis indicat, ibi: *De Virtute Religionis.*

4 CONCL. I. Religio est virtus moralis, inclinans ad debitum cultum DEO tamquam primo rerum omnium Principio exhibendum. Ita Lactantius lib. 4. *Divin. Institut. cap. 28.* estque in re communis. Dicitur, *Virtus*; quæ particula stat loco generis. Et additur, *Moralis*, ad differentiam Virtutum Theologicarum, a quibus distinguitur.

5 Dicitur ulterius, *ad debitum cultum* &c ubi per cultum intelligitur honor, non quidem quomodocumque, sed cum quadam animi submissione exhibitus DEO tamquam primo rerum omnium Principio, prout denotant verba sequentia. Nam hujusmodi submissionem honor in genere non includit: quia honor exhibetur non solum Superioribus, sed etiam æqualibus, imo & inferiori, juxta illud Apostoli Rom. 12. *Honore invicem prævenientes*. Honor quippe generatim nihil aliud est, quam testimonium excellentiæ alterius; Cultus autem ulterius addit submissionem unius ad alium: unde Deus honorat quidem Sanctos, non vero colit. Nos vero per virtutem Religionis non solum absolute seu nude honoramus Deum, ipsius protestando excellentiam, sed etiam colimus, protestando super eam ejus excellentiam, nostramque ad ipsum submissionem, tamquam ad primum rerum omnium Principium: utpote cum omnia producat, conservet, atque gubernet infinita Sapientia, Bonitate, atque Potentia sua.

6 CONCL. II. Objectum materiale atque immediatum Religionis, sive Objectum Quod (ut loquuntur Theologi non est DEUS, sed ipsemet debitus cultus Deo exhibendus, quamvis virtus Religionis remore quodammodo, & ind recte, etiam Deum respiciat pro objecto, nempe pro Objecto Cui: id est, quem attingit per actus suos tamquam finem, seu cui debitum cultum exhibere studet. Ita Lessius lib. 2. *de Just & Jure. cap. 36 dubitat. 2.* Herinx disp. 1. *de Religione. quæst. 1.* etque in re communis; Ratio est, quia per hoc Religio differt a tribus Virtutibus Theologicis Fide, Spe, & Charitate, quod hæc immediate respiciant Deum, tamquam Objectum Quod, saltem primum, ideoque immediate nos conjungant Deo. Econtra vero Religio respicit immediate cultum Deo exhibendum, tamquam Objectum Quod, ipsum vero Deum tamquam Objectum Cui, seu mediante cultu, qui ei exhibetur. (a) Porro Objectum formale Religionis vel est ipsa Divina Excellentia, vel debitum in ea fundatum, indeque consurgens honestas colendi Deum.

7 CONCL. III. Etsi Virtutes Theologicæ sint præstantiores Religione, eo quod immediate attingant Deum, tamen inter Virtutes Morales Religio est omnium præstantissima. Ita Doctores communiter cum D. Thoma 2. 2. *quæst. 81. art. 6.* Ratio est; quia excellen-



lencia virtutum desumitur ex præstantia objecti, ac modi illud attingendi: atqui Religio post Virtutes Theologicas (utpote quæ pro objecto immediato habent ipsummet Deum) habet objectum præstantissimum, videlicet debitum cultum Deo exhibendum, simulque magis de propinquo accedit ad Deum, tamquam ultimum Finem nostrum: ergo. Minor probatur inductione: nam Misericordia v. g. respicit pro objecto miseriam Proximi sublevandam, Justitia jus suum cuilibet reddendum, & sic loquendo de ceteris: at Religio respicit pro objecto cultum Deo exhibendum, sicque propinquius attingit Deum.

8 CONCL. IV. Nihilominus actus Virtutum tum Theologicarum, tum aliarum omnium possunt a virtute Religionis imperari, sicque aliquo modo ad hanc spectare. Ita Herincx *loc. cit. num. 3.* Bassæus *tom. 1. v. Religio 7. num. 5.* & alii. Ratio est: quia omnes actus aliarum Virtutum possunt assumi ut medium colendi Deum, atque supremam ejus excellentiam profitendi. Sic D. Augustinus *c. 3. Enchiridii*, ait, quod *Deus colitur Fide, Spe, & Charitate*. Similiter D. Jacobus in sua *Canonica. cap. 1.* ait: *Religio munda & immaculata hæc est visitare pupillos & viduas in tribulatione eorum, & immaculatam se custodire ab hoc sæculo*. Hoc quippe verificatur ex eo, quatenus ex motivo colendi Deum, nostramque erga eum submissionem profitendi, tales Virtutum actus elicimus, qui proinde a virtute Religionis imperantur, seu causantur. Nisi dicere velis cum Lessio *loc. cit. num. 12.* Religionem & Cultum interdum sumi generatim pro omni Virtutis officio, quo ordinamur ad Deum, sicque accipi in citato S. Scripturæ textu.

## Q U Æ S T I O II.

### De variis actibus virtutis Religionis.

#### S U M M A R I U M.

- 9 Religio generatim, & proprie accepta.
- 10 Actus Religionis universim quot?
- 11 Alii sunt interni, alii externi.
- 12 Devotio, ut est specialis actus Religionis, quid?
- 13 Devotionis largior acceptio.
- 14 Devotionis causa.
- 15 Sacrificium proprie, quid?
  - (a) Tract. 14. Dist. 5. per totam.
  - (b) Ut dictum Quæst. præc. n. 5.
- 16 Sacrificium sumitur quandoque large.
- 17 Oblatio late, & proprie accepta, quid?
  - (c) Plura de his Tract. 11. Dist. 4. n. 9. & seqq.
- 18 Primitiæ, quid?
- 19 Decimæ, quid?
  - (d) Tract. 11. Dist. 4. quæst. 1. & seqq.
- 20 Adjuratio, quid?
- 21 Fit duobus modis.
- 22 Laus Dei.

9 **A**dvertendum, quod, quamvis Religio interdum sumatur generatim pro omni actu virtuoso, quo ad Deum ordinamur, eique obedire & placere studemus (nam & hoc modo servire Deo, sicque nostram erga Deum submissionem profiteri satagimus) proprie tamen illi sint actus virtutis Religionis, atque ab ea proxime eliciantur, qui peculiariter continent nostram erga Deum subjectionem, seu quibus proprie significamus Divinam Excellentiam, & nostram erga Deum submissionem. Et de his loquendo, fit

10 CONCL. I. Actus Religionis universim sunt undecim, videlicet Adoratio, Oratio, Devotio, Sacrificium, Oblatio, Primitiæ, Decimæ, Votum, Juramentum, Adjuratio, & Laus Dei. Ita Doctor Angelicus 2. 2. quæst. 82. & seqq. cum communi, & patebunt singula magis ex dicendis.

11 CONCL. II. Ex hujusmodi actibus Religionis alii sunt interni, alii externi. Horum priores sunt, qui so-

la mente interius perficiuntur, ut sunt Devotio, & Oratio; datur enim & Oratio mentalis, ac proinde hæc non necessario in opus externum prodeunt. Posteriores sunt, qui in opus externum prodeunt: ut sunt Sacrificium, Oblationes, præstatio Primitiarum, vel Decimarum, & hujusmodi. Et de his omnibus sigillatim agendo, fit

12 CONCL. III. Devotio, ut est specialis actus Religionis, nihil aliud est, quam interna quædam sui ipsius ad Cultum Divinum oblatio, seu traditio; & recte describitur, dicendo: Devotio est actus voluntatis hominis, offerentis seipsum Deo ad serviendum. Ita communis: nam Devotio dicitur a *devovendo*, seu se ad alicujus servitium totaliter obstringendo. Unde & olim apud Gentiles *Devoti* dicebantur, qui se ipsos Idolis devovebant in mortem.

13 Dicitur notanter, Devotio, ut est specialis actus Religionis. Siquidem Devotio quandoque sumitur non pro actu peculiari, sed pro ipsa pia affectione, seu promptitudine ad faciendum ea, quæ sunt Cultus Divini, ut sunt Orationes, Laudes Dei, Sacrificium &c. Qua ratione illi, qui prompte & ferventer talia affectant, & superatis vani timoris, tergiversationis, & aliarum perturbationum difficultatibus, cum gaudio spirituali similia præstant, dicuntur *Devoti*, & merito; quia ostendunt sese Divino Cultui & servitio esse totaliter addictos, & mancipatos. Hinc etiam nonnumquam illi, qui in sæculo vivunt sub obedientia & directione alicujus Patris Spiritualis, *Devoti* appellantur, utpote specialius Dei servitio dedicati.

14 Porro Devotionis hujus causa principalis est Spiritus Sanctus, intellectum illuminans, & voluntatem accendens: quamvis ex parte nostra plurimum ea foveatur ex assidua & frequenti consideratione Divinarum Perfectionum, Beneficiorum, Creationis, Conservationis, Gubernationis, ac præsertim Redemptionis per Christum factæ, atque vicissim propriæ nostræ indigentiae & miseriæ. Nam ex harum pia ruminacione oritur in nobis humilitas, & pia affectio totaliter nos Divino cultui servitio mancipandi, sicque immittent se diversi actus aliarum Virtutum, præsertim Theologicarum.

15 CONCL. IV. Sacrificium proprie acceptum, ac prout est actus distinctus a ceteris actibus Religionis, est oblatio externa rei permanentis Deo exhibita, qua significatur supremum Dominium atque excellentia Dei, & subiectio sacrificantis ad ipsum, mediante aliqua ipsius rei oblatæ destructione, seu immutatione. Ita in re communis. Dicitur, *Oblatio externa*. Quia Sacrificium proprie dictum est actus Religionis, & quidem externus, consistens in externa alicujus rei oblatione: prout in Veteri Lege factum legimus in immolatione boum, arietum, vitulorum, hincorum, Agni Paschalis, atque in effusione diversorum libaminum. Sed hæc omnia Sacrificia defacto in Lege Evangelica coadunata sunt in uno tremendo & incruento Missæ Sacrificio, de quo tamen plura suo loco. (a) Dicitur ulterius, *qua significatur supremum Dominium Dei, & subiectio sacrificantis ad ipsum*. Siquidem in hoc consistit ratio virtutis Religionis, quod Deo debitum exhibeamus cultum cum nostra erga ipsum submissione. (b)

16 Additur vero, *Sacrificium proprie acceptum, & prout est actus distinctus a ceteris actibus Religionis*. Siquidem large ac improprie loquendo Sacrificium quandoque accipitur pro quolibet opere bono, quod instar Sacrificii Deum placat, & conciliat: quo modo Contritio, Eleemosyna, imo & quodvis opus justitiæ non raro in S. Scriptura Sacrificium vocatur, ut *Psal. 50. Sacrificium DEO Spiritus contribulatus. Psal. 4. Sacrificate sacrificium justitiæ. Et Psal. 49. Sacrificium Laudis honorificabit me.* & alibi. Verum in hisce textibus Sacrificium non accipitur proprie, ac prout est actus specialis Religionis, sed improprie, atque large pro quolibet actu bono in Deum relato.

17 CONCL. V. Oblationis nomen dupliciter sumitur. I. Late seu generice, pro omni videlicet re ad cultum Divinum oblata, seu data: quo modo quaslibet oblationes ad DEI cultum factas, & ipsas quoque Primitias atque



atque Decimas comprehendit. II. Proprie, ac prout est specialis actus Religionis; sicque Oblatio accipitur pro spontaneis illis oblationibus seu donis, quæ Fideles ob Dei cultum atque honorem ad Altare deferre solent: quales oblationes ad Templum, & Arcam Dei olim plurimas factas esse, constat ex S. Scriptura passim; talesque etiam defacto tum sub Missarum Solemnibus, tum alias crebro fieri videmus. (c)

18 CONCL. VI. *Primitia* vocantur primi fructus agrorum, vinearum, hortorum, & arborum, DEO ut Largitori omnium bonorum in signum gratitudinis, nostræque subjectionis oblatis. Unde patet, oblationem Primitiarum esse specialem actum virtutis Religionis, & quidem externum; cum non nisi per actualem primorum fructuum ad Dei cultum oblationem fiat. Ceterum in animalibus *Primitia* proprio nomine appellantur *Primogenita*.

19 CONCL. VII. *Decima* recte definiuntur, quod sit pars decima omnium fructuum iuste acquiritorum Deo in recognitionem universalis sui Domini debita, atque Ecclesiæ Ministris quotannis exsolvenda. Ita in re communis, & desumitur ex *can. Decimas Deo. 15. quæst. 7. & cap. Tua nobis, de Decimis.* ibi: *Decima, quas Deus in signum universalis Domini sibi reddi præcepit, suas esse Decimas & primitias asseverans, cum concordantiis.* Verum de Decimis, quin & Oblationibus ac Primitiis, ex professo alibi. (d)

20 CONCL. VIII. *Adjuratio* est rei sacræ contestatio ad permovendum alterum. Ita communis. Sic 1. *Thessal. cap. ult.* Apostolus petit, dicendo: *Adiuro vos per Dominum, ut legatur epistola hæc.* Item *Matth. 26.* Princeps Sacerdotum adiuravit Christum, dicendo: *Adiuro te per Deum vivam ut dicas nobis, si tu es Christus,* & alibi. Igitur Adjuratio debet fieri actus Religionis; quia per Divini Nominis invocationem, vel alterius rei sacræ reverentiam adiurando alterum, boni quidpiam ab eo obtinere contendimus; estque Deo gratissimum, si reverentia & amore sui quispiam adiuranti obsequatur, prout & Christus illico Principi Sacerdotum sese adiuranti obsecutus fuit, dicendo manifeste veritatem, de qua interrogabatur.

21 Duobus autem modis Adjuratio fieri potest, videlicet præcipiendo, & deprecando. Exemplum prioris habetur in citatis verbis Apostoli 1. *Thessal. cap. ult.* Et hoc modo etiam adiurantur demones in Exorcismis Ecclesiæ, eisdem imperando, & hac Divini Nominis, atque rerum cælestium contestatione terrorem incuriendo. Exemplum posterioris habetur in precibus Ecclesiæ, per Christi adjurationem supplicantis exaudiri, dum in earum fine subungere solet: *Per Dominum nostrum Jesum Christum &c.* vel absolute, *Per Christum Dominum nostrum.* Item & in Litanis deprecari Deum, *Per crucem & passionem, Per mortem & sepulturam Christi Domini, ac huiusmodi.*

22 CONCL. IX. Cum Laus præconium importet, ac proprie sit populi de aliquo recta loquentis, prout explicat Calepinus: quid sit Laus Dei, notum erit omnibus Laudes Divinas in Ecclesia quotidie & audientibus, & personantibus, juxta illud *Apoc. 19 Laudem dicite Deo nostro omnes Servi ejus, & qui timetis eum, pusilli & magni.* Et *Psal. 33. Semper laus ejus in ore meo.* Quamvis Laus Dei, dum fit a nobis Viatoribus, ferme semper Orationi misceatur, sicque ad hanc reduci possit, ut notat Lessius *lib. 2. cap. 37. n. 1.*

### QUÆSTIO III.

#### De Adoratione Deo debita,

#### SUMMARIUM.

23 *Adoratio, quid?*

24 *Adoratio mere civilis, seu politica,*

*Et Sacra seu Religiosa.*

25 *Hujus tres sunt species, nimirum Latria, Hyperdulia, Et Dulia,*

26 *Adorationis objectum duplex, materiale & formale.*

27 *Deo debetur Cultus Latriæ.*

28 *Tres Personæ Divinae sunt una Adoratione adorandæ, quomodo?*

29 *Christus adoratur Cultu Latriæ.*

30 *SS. Eucharistiæ Sacramentum est adorandum Cultu Latriæ.*

Explicatis præcedenti Quæstione nonnullis actibus virtutis Religionis, qui minori discussione indigere videbantur, pergendum ad reliquos (Juramento, & Voto ad specialem Tractatum reservato, sigillatim explicandos. Et primo loco occurrit Adoratio, utpote præstantissimus Religionis Actus, per quem reveremur supremam Dei Majestatem, nosque illi, quantum possumus, corporis & animæ demissione subijcimus. Siquidem, ut inquit S. Damascenus *Orat. 1. de Imaginibus, Adoratio est submissionis nota, id est, Adoratio est actus, quo quis alteri se submittit in recognitionem suæ excellentiæ.*

24 Quia vero varia sunt excellentiarum genera, hinc pariter diversæ distinguuntur Adorationum species. Et quidem inprimis datur Adoratio mere Civilis, seu politica: qualis exhiberi solet Regibus, Principibusque propter excelsitatem sui status, seu potestatis humanæ quam præ aliis habent: quo modo passim in S. Scriptura leguntur quidem adorasse suos Reges: ut David 1. *Reg. 20. Adoravit tertio Jonathan, cadens pronus in terram.* Verum de Adoratione mere Civili in proposito non agitur, sed solum de Adoratione sacra sive religiosa, quæ cuiuspiam exhibetur ob excellentiam suam sacram & supernaturalem. Et de hac loquendo, sit

25 CONCL. I. Adorationis sacræ seu Religiosæ tres sunt species, videlicet Latria, Hyperdulia, & Dulia. Ita communis Catholicorum. *Latria* juxta receptum Theologorum sensum significat supremam & singularem illam Adorationem, quæ soli Deo propter summam atque infinitam suam excellentiam debetur: unde taliter describi solet: *Adoratio Latriæ est actus Religionis, quo quis alteri (scilicet DEO) sese submittit tamquam habenti supremam suam excellentiam.* Per *Hyperduliam* intelligitur Adoratio, seu cultus ille, qui exhibetur creature cuiuspiam propter singularissimam suam excellentiam: & talis competit Beatissimæ MARIE Virgini propter excellentiam Maternitatis Dei, ac specialissimam sanctitatem, aliaque excellentissima dona sua. Per *Duliam* vero communiter intelligitur cultus ille, qui debetur Sanctis propter supernaturalem excellentiam suæ sanctitatis & gloriæ, quam habent in Cœlis.

26 Et notandum est, quod objectum Adorationis sit duplex, formale scilicet & materiale. *Objectum formale* Adorationis est ratio ipsa, propter quam aliquid adoratur: cujusmodi ratio adorandi semper est dignitas, & excellencia reperta in persona, quæ adoratur. *Objectum materiale* est ipsamet res, seu persona adorata, in qua reperitur ejusmodi excellencia. Sic cum Christum Dominum adoramus cultu Latriæ, ipsemet Christus est objectum materiale Adorationis, Divinitas vero Christi, ejusque suprema excellencia est objectum formale ipsius.

27 CONCL. II. DEO, totique Sanctissimæ Trinitati, ac cuilibet Personæ Divinæ debetur cultus Latriæ. Ita certa, & indubitata omnium Catholicorum: cum quælibet Persona Divina sit DEUS; DEO autem propter supremam suam in omnes excellentiam deberi cultum Latriæ, patet ex ipsa hujus nominis explicatione jam posita.

28 CONCL. III. Tres Personæ Divinae una Adoratione sunt adorandæ, non quidem sic hoc intelligendo, quasi una non possit distincte ab aliis adorari, sed sic, quod aliæ duæ explicite non excludantur. Ita communis Theologorum, ac præsertim Maltius *disp. 1. Theol. Moral. n. 18.* Ratio prioris partis est: quia una est essentia, Excellencia, Divinitas atque Majestas omnium trium Personarum Divinarum, & per consequens una Adoratio debetur omnibus. Altera pars patet: quia sicut unam Divinam Personam possumus distincte concepere ab alia, ita & adorare, modo alteram explicite



non excludamus. Unde in Litanis nunc Patrem, nunc Spiritum Sanctum invocamus; & pleræque Orationes Ecclesie diriguntur modo ad Patrem, modo ad Filium, modo ad Spiritum Sanctum, quamvis interim certæ Personæ explicite non excludantur. Impium enim ac nefarium esset, alias excludere explicite; quia licet tres sint Personæ SS. Trinitatis, una tamen omnium est essentia, Divinitas atque Majestas. Hinc dum unam Personam SS. Trinitatis adoramus, ac invocamus; semper implicite ad alias duas, seu unum Deum nostra dirigitur adoratio, atque invocatio.

29 CONCL. IV. Christus est adorandus Adoratione Latræ. Est de Fide. Ratio est: quia Christus non solum est homo, sed etiam verus Deus, cui utique debetur cultus Latræ. Nec obstat, quod Christus simul includat naturam humanam, quæ non videtur posse adorari cultu Latræ. Resp. enim, hinc solum sequi, quod natura humana non spectet ad objectum formale Adorationis, sive quod non sit ratio formalis adorandi Christum, utpote quæ est Divinitas ejus: non autem, quod non spectet ad objectum materiale, seu Quod Adorationis, ut loquuntur Theologi. Nam, quia juxta Symbolum S. Athanasii, licet Christus sit *Deus & homo*, non duo tamen, sed unus est Christus, etiam unica Adoratione Latræ is adoratur: in qua tamen ratio formalis & motiva adorandi est Divinitas ejus, objectum vero materiale seu objectum Quod, ac terminus adæquatus hujus Adorationis est unus ac totus Christus, verus Deus, verusque homo.

30 CONCL. V. Etiam Sanctissimum Eucharistiæ Sacramentum est adorandum cultu Latræ. Ita omnes Catholici; estque novissime definitum in Concilio Tridentino Sess. 13. cap. 5. & can. 6. ibi: *Si quis dixerit in sancto Eucharistiæ Sacramento Christum unigenitum Dei Filium non esse cultu Latræ, etiam externo adorandum, &c. vel non publice, ut adoretur, populo proponendum, & ejus Adoratores esse idololatrias, anathema sit.* Ratio est: quia in Sanctissimo Eucharistiæ Sacramento adest, realiterque continetur Christus Dominus, verus Deus, cultu Latræ dignissimus.

#### QUESTIO IV.

#### De Cultu Sanctorum, Sacrarum Reliquiarum atque Imaginum.

#### SUMMARIUM.

- 31 Adoratio absoluta, & respectiva, quid?
- 32 Sancti in cælis adorantur Cultu Dulæ, & B. V. Maria Cultu Hyperdulæ absoluto.
- 33 Hic cultus est sacer.
- 34 SS. Reliquiæ, & Imagines quomodo venerentur?  
\* Subjunguntur tria notanda. Addit. I.  
\* Qualiter debeat constare de identitate Corporis? Additio II.
- 35 Verba notabilia Conc. Trident. circa cultum SS. Imaginum.
- 36 Imagines possunt dupliciter considerari, quomodo?
- 37 Objectio Hæreticorum contra Imagines diluitur.
- 38 Homines Sancti necdum Canonizati non possunt cultu publico honorari, bene tamen privato.
- 39 Cultus publicus, & privatus, quis?
- 40 Corollaria de cultu privato.
- 41 Corollaria de cultu publico.
- 42 Limitatio prædictorum.  
\* Verba formalis cujusdam Decreti. Addit. I.  
\* Quænam ex his deducantur? Addit. II.  
Forma Canonizationis, quæ nunc est, olim non requirebatur.
- 43 Decretum Urbani VIII. circa Imagines Sanctorum necdum Beatificatorum.
- 44 Declaratio dicti Decreti.

41 **A**dvertendum, quod Adoratio alia sit absoluta, alia respectiva. Absoluta convenit rei intelle-

ctuali, quæ per se honorabilis, atque adorabilis est: sic Deus, ac Christus cultu Latræ absoluto est adorandus. Unde *Adoratio absoluta* illa est, qua quis colitur ob perfectionem, atque excellentiam sibi intrinsicam. *Adoratio respectiva* vero, qua quis adoratur seu colitur propter excellentiam alterius, quam repræsentat, aut in ordine ad eam consideratur: unde hæc convenit rebus etiam ratione carentibus, utputa sacris Imaginibus, quæ non propter se, sed propter alium, quem repræsentant, honorantur. His notatis, sit.

32 CONCL. I. Sancti cum Christo in cælis regnantes adorantur, seu coluntur cultu Dulæ absoluto propter excellentiam suæ sanctitatis & gloriæ: Beatissima Virgo MARIA vero cultu Hyperdulæ, tum ob perfectissimam atque excellentissimam ejus præ cunctis puris creaturis Sanctitatem & gloriam, tum ob singularissimam dignitatem Maternitatis DEI, qua vere nominatur, & est Mater DEI & Christi. Ita omnes Catholici.

33 Et nota, hujusmodi Adorationem seu cultum Sanctorum (qui duo termini apud Theologos inter se confunduntur; quamvis inter rudiores, ac præsertim in publicis Concionibus lingua germanica habitis, ly *Adorare* cultum Latræ Deo debitum, & ly *colere* seu *venerari* cultum Sanctorum denotare soleat) esse cultum sacrum & religiosum: quia objectum ejus formale, nempe excellentia Sanctitatis, gratiæ, & gloriæ, propter quam Sanctos tamquam Dei Amicos veneramur, est aliquid sacrum & supernaturale. Unde sequitur, cultum Sanctis cum Christo in cælo regnantibus exhibitum specie distingui a cultu mere civili & politico, qui hominibus, v. g. Regibus, Principibus &c. propter dignitatem sui status, vel potestatem humanam dari solet.

34 CONCL. II. Sacræ Reliquiæ, & Imagines Sanctorum venerantur cultu Dulæ respectivo, Imagines autem Beatissimæ Mariæ Virginis cultu Hyperdulæ respectivo; ac tandem Imagines DEI & Christi, item & Sacra Crux Christi cultu Latræ respectivo. Ita rursus Catholici omnes. Et quidem loquendo de sacris Reliquiis Sanctorum in Concilio Tridentino Sess. 25. in *Decreto de Invocatione Sanctorum* &c. sic habetur statutum: *Sanctorum quoque Martyrum, & aliorum cum Christo viventium sancta corpora, quæ viva membra fuerunt Christi & templum Spiritus Sancti, ab ipso ad æternam vitam suscitanda & glorificanda, a Fidelibus veneranda esse, per quæ multa beneficia a Deo hominibus præstantur.* Hæc Concilium, exinde oppositum affirmantes denuo condemnans, prout jam pridem eos damnavit Ecclesia.

#### Additio I.

\* Porro circa venerationem publicam Reliquiarum notanda sunt inprimis verba Concilii Trid. Sess. 25. in *Decreto* mox citato. ubi quoad receptionem novarum Reliquiarum ait: *Non esse recipiendas novas Reliquias, nisi recognoscente, & approbante Episcopo, qui simul, atque de iis aliquid compertum habuerit, adhibitis in Consilium Theologis, & aliis viris piis, ea faciat, quæ veritati, & pietati consentanea judicaverit.* Secundo notanda veniunt verba S. Congregationis post allegatum Caput posita sequentis tenoris: *Sacra Cardinal Congregatio sic censuit: Sanctorum Reliquiæ antiquæ habenda sunt in illa veneratione, quæ hactenus fuerunt: si vero sint novæ, Episcopus servet hoc Decretum, intellige, quomodo antecederet allegatum fuit.*

Notanda sunt Tertio sequentia duo Decreta, quorum prius sic habet: *Officium sit duplex minus de illo Sancto, cujus habetur Reliquia insignis, scilicet Brachium, Caput, Crux vel ea pars Corporis, in qua passus est Martyr, dummodo sit integra & non parva, & modo sit approbata, cujus ratione sit Symbolum in Missa.* Ita Decretum 8. April. 1628. Alterum: *De sancto, cujus habetur corpus, vel insignis Reliquia, non potest fieri Officium, nisi constet de identitate, & nisi reperiat in Martyrologio Romano.* \*



Additio II.

\* Qualiter autem non physice sed tantum moraliter, & verosimiliter debeat constare de identitate Corporis, varios modos Felix Potestas Tom. I. Exam. part. 2. cap. 6. num. 1527. docte assignat, e. g. probatur identitas Corporis. I. Per Instrumentum publicum seu authenticum. II. Per scripturam etiam non authenticam, subscriptam tamen a Superiore & duobus testibus, vel saltem præter subscriptionem Superioris habentem appressum Sigillum. III. Per Scripturam antiquam, quamvis non authenticam, reperi tam tamen apud Reliquias. IV. Per antiquam traditionem seu vocem publicam & communem &c. Putat autem allegatus Auctor ex Bord. tempus antiquum hic censeri sexaginta annos &c. \*

35 Loquendo nunc de cultu Sacrarum Imaginum, quas tum memoriæ gratia, atque ad recolenda Christi & Sanctorum gesta, tum ad impertiendum eisdem honorem debitum atque venerationem retinendas esse, Fides Catholica, atque perpetua Traditio Ecclesiæ docet, sunt inprimis bene notanda verba S. Concilii, Trident. loc. cit. sic statuentis: *Imagines porro Christi, Deiparæ Virginis, & aliorum Sanctorum, in templis præsertim habendas, & retinendas, eisque debitum honorem & venerationem impertiendam, non quod credatur inesse aliqua in iis divinitas, vel virtus, propter quam sint colende; vel quod ab eis sit aliquid petendum, vel quod fiducia in Imaginibus sit figenda, veluti olim fiebat a Gentilibus, quæ in Idolis spem suam collocabant: sed quoniam honor, qui eis exhibetur, refertur ad Prototypa, quæ illa representant, ita ut per Imagines, quas osculamur, & coram quibus caput aperimus, & procumbimus, Christum adoremus, & Sanctos, quorum illæ similitudinem gerunt, veneremur, id quod Conciliorum, præsertim vero secunde Nicenæ Synodi decretis contra Imaginum oppugnatores est sancitum.* Hæc Concilium: cui modo loquendi ubique nos oportet insistere.

36 Ulterius quoad hunc Sacrarum Imaginum cultum advertendum est cum Filliucio tract. 23. de Religione. cap. 1. n. 27. & aliis, dupliciter Imagines considerari, ac venerari posse. Primo, quatenus sunt res quædam sacræ, spectantes ad usum Pietatis & Religionis; quod est, considerare Imagines materialiter. Deinde, quatenus sunt Imagines, ac repræsentativæ Prototypi; quod est considerare Imagines formaliter. Si ergo considerentur Imagines primo modo, honorandæ sunt tantum ut res quædam sacræ; prout etiam vestes spectantes ad usum Pietatis & Religionis in veneratione habentur: si secundo modo, honorandæ sunt sicuti Prototypa, cultu tamen respectivo. Circa quod ultimum extat communissimum inter Doctores dictum, quod si Prototypon adoretur adoratione Patriæ absoluta; Imago ejus adoranda sit adoratione Patriæ respectiva; si autem Prototypon adoratur adoratione Hyperdulæ, vel Dulæ absoluta, Imago ejusdem adoretur adoratione Hyperdulæ, vel Dulæ respectiva.

37 Nec dicatur cum Hæreticis: Exodi cap. 20. habetur. *Non facies tibi sculptile, neque omnem similitudinem, quæ in celo desuper &c.* ergo usus imaginum est illicitus. Resp. enim negando consequentiam: nam loco citato, & in aliis hujusmodi S. Scripturæ locis non prohibentur Imagines absolute, vel quodcumque sculptile; sed solum, ut non fiant ad adorandum ea. Unde loc. cit. mox subjungitur: *Non adorabis ea, neque coles:* eo videlicet modo, sive cultu Divino, quo Gentiles adorabant communiter sua idola, deosque alienos. Et certe, si Imaginum, aut cujuscumque sculpturæ usus fuisset dictis verbis absolute prohibitus, Salomon pessime egisset, quod in templo Hierosolymitano posuerit duos Cherubim 3. Reg. 6. Imo & Deus præcepisset contraria, ut Moyse Num. cap. 21. præcepit, ut faceret Serpentem æneum; quod absit dicere.

38 CONCL. III. Homines vitæ Sanctitate, vel Martyrii fama insignes, quamdiu a Summo Pontifice vel Ecclesia in numerum Sanctorum necdum sunt relati non possunt ordinarie (exceptiones vide infra n. 42.) cultu publico & solemniter honorari: bene tamen cultu privato. Ita Bellarminus lib. 1. de Sanctis. cap. 10. Sanchez lib. 2. in Decalog. cap. 43. n. 3. & seq. & alii communiter, Idque desumitur ex cap. 1. & 2. de Reliquiis & venerat. Sanct. ubi prohibetur, aliquem publice venerari pro Sancto absque auctoritate Romanæ Ecclesiæ; sicque a sensu contrario privatus honor permittitur.

39 Porro per *Cultum privatum* intelligitur ille, qui non exhibetur tamquam institutus ab Ecclesia, neque nomine Ecclesiæ, sed fit ex peculiari devotione colentis; sive deinde talis cultus fiat privatim, sive publice videntibus aliis. *Cultus autem publicus*, seu sollemnis non ideo dicitur talis, quod coram aliis exhibeatur; sed quia defertur nomine Ecclesiæ, & tamquam ab ea institutus.

40 Hinc sequitur I. Imaginem Sancti nondum Canonizati, quinimo neque Beatificati, posse in domibus nostris depingi & retineri, ledere pedes vel manus talium deosculari, ipsorum vestes accipere, Reliquias asservare, in eorum honorem jejunare, preces ad Deum fundere &c. sive alii hoc videant, sive non, dummodo absit scandalum. Ratio est; quia hujusmodi cultus est privatus, & non fit nomine Ecclesiæ.

41 Sequitur II. Non posse Episcopum in honorem Sancti necdum Canonizati diem Festum instituere: quia cultus publicus, qualis est celebratio Festi Sanctorum nondum Canonizatorum reservatus est Summo Pontifici cit. cap. 1. de Reliq. & venerat. Sanctorum. Item non licet privatim, aut publice in Litanis, vel Officio Divino invocare Sanctum nondum Canonizatum: quia Litanie, & Divinum Officium sunt cultus, qui Sanctis exhibetur tamquam institutus ab Ecclesia, & nomine totius Ecclesiæ, Sanchez loc. cit. n. 5. Bonacina disp. 3. in Decalogum. quæst. 1. num. 2. cum aliis. Idem dicendum de SS. Missæ Sacrificio ob eandem rationem: unde, si a Fidelibus petatur celebratio Missæ in honorem alicujus Sancti necdum Canonizati, oportet celebrare Missam de Festo vel feria occurrente, & non propriam Missam acceptam de Communi cum memoria, & invocatione talis Sancti. Insuper non licet necdum Canonizati Reliquias publice venerandas proponere, sive in Processionibus circumferre, aut Altaria vel Tempia ipsis dedicare: hujusmodi quippe cultus pariter censetur publicus, ac proprius eorum, qui ab Ecclesia in Sanctorum numerum sunt relati.

42 Verumtamen hoc intelligendum est, nisi vel speciali Indulto Apostolico provisorium fuerit: quo modo patet aliunde, non raro hætenus pro certis locis unum vel alterum prædictum, imo & ipsam celebrationem Divini Officii de nonnullis Sanctis concessam esse, absque alia solemniter eorum Canonizatione. Vel nisi per antiquam Traditionem aut universalem Ecclesiæ consensum de cujuscumque Sanctitate constet: nam hujusmodi approbatio æquivaleret Canonizationi, & antiquitus non requirebatur forma Canonizationis, quæ nunc in usu est. Bonacina cit. n. 2. Sanchez n. 11. Suarez, & alii, & concordant dicenda n. seq. in fine.

Additio I.

\* Verba formalia Decreti, mandante & approbante Summo Pontifice Alexand. VII. editi, & tam in nostri Breviarii Rubricis particularibus n. 64. quam in Theatro Regularium Patris Lantusca reperibilis sunt sequentia, *Sacra eadem Congregatio presentibus declarare & jussione removere non intendit cultum Beatis per communem Ecclesiæ consensum, vel per immemorabilem temporis cursum, per Patrum virorumque Sanctorum scripta,*



vel temporis centum annorum metam excedentis scientiam ac tolerantiam Sedis Apostolicæ, aut Ordinariorum hactenus præstitum, aut certis modo aut forma ab eo tempore eis exhibitum. Verum, si a centum annis citra cultus hujusmodi aliqua ex parte consisterit auctus, & extensus, eo casu S. eadem Congregatio eundem in pristinum reduci jubet, prout quemvis cultum extra casus prædictos ad expressa tantum verbaliter in Apostolicis indultis omnino revocari mandat. Hucusque formalia S. Congregationis. \*

#### Additio II.

\* Ex quibus colliges, quod neque de aliquo Beato necdum Canonizato liceret, quando non adsunt superius allegatæ conditiones, recitare Officium Divinum, aut Missam, imò nec exponere in Ecclesia ejusdem Reliquias &c. prout expresse declaravit Sacra Congregatio apud Lantusca *loc. cit.* Excipe tamen, nisi adsit specialis licentia Summi Pontificis, qualem solet in processu Beatificationis ordinarie concedere: & quidem *Primo*, ut talis Beati imagines radiis, seu splendoribus exornentur. *Secundo*, ut Reliquiæ ejusdem venerationi Fidelium exponantur. *Tertio*, ut Officium & Missa de eodem singulis annis celebretur, non tamen ab universali Ecclesia, sed a certo solum Regno, Provincia, Oppido, vel Religione; ubi a potiori subungi solet, ut etiam alii Sacerdotes ad similes Ecclesias confluentes Missam de eodem Beato legere valeant. *Quarto*, ut primo Beatificationis anno in Ecclesiis hujusmodi Civitatis, vel Diocesis, aut Religionis solemnia dictæ Beatificationis cum Officio & Missa sub ritu duplicis majoris una vice instituuntur. Videantur desuper Bullarium Clementis XI. Constitutione 82. ac Breve Apostolicum Innocentii XIII. quando novissime Andream Conti ex Ducali sua stirpe natum, & zelosissimum nostræ Seraphicæ Religionis jam ante quadringentos circiter annos Alumnum numero Beatorum associavit; ubi etiam pro celebranda Tri-duana Solemnitate per tres continuos dies plenarias indulgentias semel a quolibet Fidei lucrandas sub-junxit. \*

43. CONCL. IV. Imaginibus Defunctorum, qui cum bona Sanctitatis fama decesserunt, non possunt apponi Aureolæ, sive Radii, neque ipsæ in Oratoriis, aut locis publicis exponi, donec a Sede Apostolica Beati declarentur, & si quæ appositæ sunt, omnino amoveri debent. Ita Angelus Lantusca in *Theatro Regularium*. V. *Beatificatio*. num. 2. idque patet ex Decreto Urbani VIII. quod incipit: *Sanctissimus*. (& habetur tomo 4. Bullarii Romani *Constit.* 39. *dicti Pontificis*) atque ex alia speciali ejusdem Constitutione, quæ incipit: *Cœlestis Hierusalem* (ac refertur in cit. Bullario *Constitut.* 134. *dicti Pont.*) ubi præfatus Pontifex, volens occurrere abusibus, qui irreperunt in colendis quibusdam cum Sanctitatis, aut Martyrii fama vel opinione defunctis, & necdum Canonizationis, vel Beatificationis honore ab Apostolica Sede insignitis, sub gravibus pœnis prohibuit, ne ejusmodi hominum cum Sanctitatis, seu Martyrii fama (quantumque illa sit) defunctorum Imagines cum laureolis, radiis seu splendoribus in Oratoriis, Ecclesiis, aliisque locis publicis aut privatis apponantur; neve eorum gesta, miracula, revelationes, seu quæcumque beneficia, tamquam eorum intercessionibus a Deo accepta, sine recognitione & approbatione Ordinarii in libris enarrentur, prout de hoc fusius in jure Canon. lib. 3. Tit. 45. num. 19. & ne ad eorum sepulchra Tabellæ, atque Imagines ex cera, argento, aliave materia confectæ, vel lampades appendantur. Ubi tamen illico subjungens Summus Pontifex declarat, quod per supra scripta præjudicare in aliquo nolit, neque intendat iis, qui aut per communem Ecclesiæ consensum, vel immemorabilem temporis cursum, aut per Patrum Virorumque Sanctorum scripta, vel

longissimi temporis scientia, ac tolerantia Sedis Apostolicæ, vel Ordinarii coluntur.

44 Quia vero postmodum occasione dicti Decretia quibusdam revocabatur in dubium, an Tabellas & Imagines, quas imposterum offerri contigerit, recipere, & antea oblatas conservare liceret? eadem Sanctitas sua, quæ tantummodo voluit occurrere abusibus, qui irreperere videbantur, in alio Decreto (& refertur in cit. Bullario ad finem præallegatæ *Constit.* 39. nec non & in cit. *Constitut.* 134.) declaravit, quod suæ intentionis numquam fuerit prohibere oblationem, receptionemque Tabellarum & Imaginum hujusmodi, ita ut approbantibus Ordinariis in secreto aliquo seorsum ab Ecclesia loco custodiri, ibidemque jam amota collocari, & asservari possint, ut, si quando Dominus talium Virorum merita Beatificationis, seu Canonizationis honore in terris decorare voluerit, extent hujusmodi Sanctitatis qualescumque probationes, Apostolicæ Sedis judicio tunc examinandæ.

#### QUESTIO V.

De Oratione, & Conditionibus ad ipsam requisitis.

#### SUMMARIUM.

- 45 Oratio varie accipitur.
- 46 Oratio propriissime accepta, quid?
- 47 Oratio mentalis,  
Vocalis,  
Publica, &  
Privata, quæ?
- 48 Oratio aliqua est præcepta.
- 49 Quibus temporibus urgeat præceptum Orationis?
- 50 Quæ bona recte per Orationem postulentur a Deo?
- 51 Oratio debite facta habet infallibilem effectum.
- 52 Sed quatuor ad hoc requiruntur conditiones.
- 53 I. Ut Oratio fiat pro seipso.
- 54 II. Ut petantur necessaria ad salutem.
- 55 III. Ut Oratio sit pia.  
(c) Ut dictum Tract. I. dist. 2. n. 42. & 45.
- 56 IV. Ut fiat perseveranter.
- 57 Causa, cur multi petant, nec accipiant, quæ?
- 58 Preces nostræ debite factæ, numquam sunt irritæ etiam pro bonis temporalibus.
- 59 Cautela petentium bona temporalia.

45 **O** Ratio quandoque sumitur large, videlicet pro quacumque actione bona, atque ex pia intentione procedente: in qua acceptione videtur intelligendum illud Luca 18. *Oportet semper orare, & non deficere.* In quem textum Venerab. Beda ait: *Semper orat, qui semper secundum Deum operatur.* Deinde sumitur Oratio magis proprie, nimirum pro quovis animi pio motu erga Deum: hoc modo capitur a S. Damasceno lib. 3. de *Fide*. cap. 24. dicente; quod *Oratio sit ascensus mentis ad Deum*; & sic comprehendit sub se etiam illos pios motus intellectus & voluntatis, quibus Deum laudamus, benedicimus, atque pro acceptis beneficiis gratias agimus. Propriissime tandem Oratio sumitur pro petitione, seu postulatione alicujus boni ad Deum facta, cujusmodi petitionem ipsum ly *Orate* ex primæva sua institutione importat.

46. CONCL. I. Oratio propriissime accepta est rationalis alicujus boni a Deo postulatio: sive, est decentium a DEO petitio. Ita in re communis. Tria siquidem in oratione spectari possunt. I. Desiderium nostrum, quo bonum aliquod nobis, aliisve conferri, vel malum averti cupimus. II. Hujus desiderii practica quædam explicatio, qua Deum conamur inducere ac permovere, ut id præstet, pro quo rogamus. III. Collatio boni desiderati; qualis fit a Deo. Ipsa vero essentia Orationis consistit in secundo actu, nimirum in



in explicatione desiderii nostri per modum deprecationis, seu petitionis.

47 CONCL. II. Oratio recte dividitur in mentalem & vocalem, ac rursus in publicam & privatam. Ita communis. *Oratio mentalis* est, quæ non voce, sed mente formatur, exercendo videlicet interiores animæ potentias circa Deum, & Myſteria potiſſimum Fidei, cum interna & familiari ad Deum colloctione, variisque piis affectibus voluntatis: prout fit in Meditatione, de qua D. August. *lib. de Spiritu & anima cap. 49.* ait. *Meditatio parit scientiam, scientia compunctionem, compunctio devotionem, devotio vero perficit orationem.* Ceterum *Oratio vocalis* est, quæ formatur distinctis verbis ad extra prolatis, exprimentibus pium internum desiderium nostrum ad Deum. Additur notanter, *exprimentibus pium internum desiderium*; nam hæc sine ulla attentione atque interiori affectu prolata, parum prodest, quin potius iram Dei provocat, juxta illud vulgatum:

*Si mens non orat, in vanam lingua laborat.*

Et tales merito reprehenduntur illis verbis: *Populus hic labiis me honorat, cor autem eorum longe est a me. Isaie 29. Matth. 15.* Oratio publica dicitur, quæ nomine totius Fidelis populi per Ministros Ecclesiæ Deo offertur; ut fit in Missa, & Horis Canonicis: & talis necessario debet etiam esse vocalis. *Oratio privata* est, quam singuli privatim quocumque decenti modo peragunt; de qua loquitur Apostolus 1. *Timoth. 2.* Volo ergo in omni loco &c.

48 CONCL. III. Oratio aliqua est præcepta a Deo, & adultis usum rationis habentibus necessaria ad salutem. Ita communis, & patet ex S. Scriptura, Orationem passim nobis inculcante; ut *Coloss. 4.* *Orationi inflat, vigilantes in ea.* Item: *Thess. ult. Sine intermissione orate,* & alibi. Accedit ratio: quia auxilia Divinæ gratiæ, sine quibus homo nequit consequi salutem, communiter a Deo non conferuntur, nisi ad humiles preces nostras, juxta illud *Matth. 7.* *Petite, & dabitur vobis.*

49 Porro tempora necessaria orandi, seu quibus urget præceptum Orationis, apte determinatur a Sannig *tract. de Relig. dist. 1. q. 3.* & aliis; ut primo sit necessitas orandi ad Deum tempore obligationis, quo peccator tenetur se reponere in statum gratiæ. Deinde tempore gravis tentationis, quæ alio congruenti remedio repelli nequit. Rursus tempore manifesti periculi mortis, quam constitutus in illo subire debet. Quarto tempore gravis pressuræ Reipublicæ, aut Proximi, quæ sola oratione aboleri potest. Et tandem quotiescumque aliquod auxilium Divinum speciale necessarium est ad salutem spiritualem, vel corporalem. Atque, ut taceantur particulares obligationes Clericorum, aut Beneficiorum ad persolvendum Horas Canonicas, vel Confitentium ad implendam Pœnitentiam injunctam, haud defunt Doctores non excusantes a peccato veniali eos, qui mane ac vespere orare negligunt, tum Deo gratias debitas referendo pro receptis præterita die aut nocte beneficiis, tum ejus auxilium implorando pro evitandis instantibus periculis. Ceteri vero satis communiter fatentur, Orationem non posse intermitteri ad longum tempus, utputa ad mensem, vel, ut aliqui volunt, ad octo dies. Herincx *disp. 1. de Religione. q. 3. n. 19.* & concordant dicta superius *Tract. 4. dist. 2. q. 3.*

50 CONCL. IV. Non modo bona spiritualia, sed etiam temporalia a Deo recte postulantur; ita tamen, ut bona temporalia, v. g. sanitas, longitudo vitæ, officia, divitiæ &c. non omnino absolute, sed solum sub conditione, quatenus ad bonum salutaremque usum, adque vitam æternam consequendam profunt, neque salutem animæ obsunt, recte a DEO postulentur. Ita communis; & constat ex Oratione Dominica, in qua juxta Christi instructionem bona tum spiritualia, tum temporalia postulantur. Quod autem bona temporalia non absolute, sed dumtaxat ut conducentia ad vitam æternam, recte postulentur a Deo

per Orationem, patet ex eo; quia non raro ejusmodi bona sunt homini occasio ruinæ spiritualis, ac protrahunt in peccatum; unde in hujusmodi circumstantiis, Deo optime præcognitis, male eadem absolute peterentur.

51 CONCL. V. Oratio, si fiat cum debitis conditionibus, indubitata, atque ex Christi promissione infallibilem habet efficaciam. Ita Sannig *loc. cit. n. 6.* Layman *lib. 4. tract. 1. c. 1.* & Theologi communiter cum D. Thoma 2. 2. q. 83. art. 15. ad 2. Habetur hoc clare ex S. Scriptura, ac Christi promissione, dicentis *Matth. 7.* *Petite, & dabitur vobis.* Item *Luca 11.* *Omnis, qui petit, accipit.* Et rursus *Joan 16.* *Amen, amen dico vobis, si quid petieritis Patrem in nomine meo, dabit vobis,* atqui promissio Christi est infallibilis; ergo.

52 CONCL. VI. Conditiones, quibus concurrentibus semper aliquis impetrat, quod petit, quatuor sunt: ut videlicet quis pro se petat necessaria ad salutem; pie & perseveranter. Ita Doctor Angelicus *loc. cit.* Et hæc quatuor conditiones continentur in præ allegatis Salvatoris verbis *Joan 16.* Nam *ly dabit vobis* primam conditionem, *ly si quid* secundam: *ly nomine meo*, tertiam; ac tandem *ly petieritis*, quartam satis demonstrat.

53 Prima itaque conditio est, ut *Oratio fiat pro se ipso*, non pro illis, juxta doctrinam S. Augustini *tract. 102. in Joannem*, dicentis: *Exaudiuntur omnes pro seipsis, non autem pro omnibus; quia non utcumque dictum est, Dabit, sed Dabit vobis.* Nam etsi pro aliis quoque ex charitate orare possimus, ac debeamus, juxta illud *Jacobi 5.* *Orate pro invicem, ut salvemini, multum enim valet oratio iusti assidua.* Ideo tamen difficilior impetratio censetur esse pro altero, quam pro seipso; quia, ut Deus conferat gratiam, seu donum, quod petitur, debet homo esse dispositus ad recipiendum quæ dispositio non est in libera potestate orantis, si pro alio oret, bene tamen, quando orat pro seipso. Quod, si persona altera, pro qua oratur, sit debite disposita, etiam Orationem factam pro ipsa, ceterisque vestitam conditionibus, comprehendi sub dicta Christi promissione merito censet Layman. *loc. cit. num. 10.*

54 Altera conditio est, ut *petantur necessaria ad salutem.* Nam, ut discurret D. Augustinus *loc. cit.* *Non petitur in nomine Salvatoris, quidquid petitur contra rationem salutis.* Et infra: *Quidquid autem aliud petitur, nihil petitur: non quia nulla omnino res est, sed quia in tante rei comparatione, quidquid aliud concupiscitur, nihil est.*

55 Tertia conditio est, ut *Oratio sit pia*, videlicet actus virtutis Religionis, per quem homo se Deo, tamquam supremo Domino subjicit. Ad hoc autem multum conducit humilitas orantis, plena fides seu fiducia in Deum; opera Misericordiæ &c. juxta varios, & passim obvios textus S. Scripturæ. Ut vero is, qui orat, sit in statu gratiæ constitutus, tametsi ad impetrationem Orationis, stantibus supra dictis conditionibus, absolute non requiratur, ut patet ex oratione Publicani a Deo exauditi, cum dixit *Luca 18.* *Deus propitius esto mihi peccatori:* requiritur tamen status gratiæ ad meritum de condigno vitæ æternæ, atque augmenti gratiæ sanctificantis. (e)

56 Quarta est, ut *perseveranter oremus*: id est, non statim desistamus ab Oratione, si nos non exaudiri arbitremur, sed iterato, sæpius, & instanter petamus, secundum illud *Luc. 18.* *Quoniam oportet semper orare, & non deficere.* Et *Coloss. 4.* *Orationi inflat.* Etenim, ut S. Augustinus *Serm. 5. de Verb. Domini cap. 5.* monet, ideo Deus tardius nonnumquam dat, quæ petimus, ut tandem ferventius & perseverantius orantes, plus etiam impetremus ac petimus. Quædam etiam non negantur, sed, ut congruo tempore dentur, differuntur.

57 Ex dictis patet ad communem multorum hominum querelam, qui orant, & non accipiunt. Causa quippe est, cur multi non obtineant, quod petunt: qui



quia nimirum conditiones præscriptas non observant, ac præsertim bona temporalia petendo, eadem non ad debitum finem, sive salutem animæ suæ referunt, juxta illud Jacobi 4. *Petitis, & non accipitis, eo quod male petatis, ut in concupiscentiis vestris infumatis.* Unde D. Basilii Serm. *De orando Deum*, inquit: *Ideo quandoque petis, & non accipis, quia perperam postulasti, vel infideliter, vel leviter, & non conferenda tibi, vel destitisti.*

§8 Imo dum ceteroquin debite rogamus pro bonis temporalibus, v. g. moderatis divitiis, sanitate &c. quas nobis non expedire nescimus, non ideo irritæ erunt preces istæ: tum quia, si fiunt in statu gratiæ, sunt meritoria gloriæ coelestis, & augmentum gratiæ: tum quia in tali casu ordinarie loco ejusmodi bonorum temporalium, v. g. sanitatis, divitiarum, quæ Deus novit nobis magis fore nociva, sicque misericorditer negat, solet Deus debite rogantibus conferre alia bona temporalia, vel saltem spiritualia specialium auxiliorum gratiæ, magis profutura ad consequendam vitam æternam. Audiatur Jeremias Drexelius, lib. 5. *Heliotropii*. cap. 2. dicens: *Certissimum est, nullas preces cum debita voluntatis resignatione factas esse irritas, nullas omnino: aut enim quod petitur, aut melius quid impetrabitur.* Et S. Isidorus in Sententiis: *Creberrime non exaudit Deus ad voluntatem, sed exaudit ad salutem.*

§9 Quod si vero absque debita in Divinam voluntatem resignatione, quin & obstinate, quidpiam a Deo extorquere contendamus, verendum, ne quod ut optimus Pater negavit, ut rigidus Judex permittat in nostrum malum. Ac proinde, in omnibus omnino precibus illud Domini pro clausula usurpandum: *Verumtamen non mea, Deus, sed tuas voluntas fiat:* prout devotissime monet citatus Drexelius.

## DISTINCTIO II.

### De Vitiis Religioni oppositis per excessum.

#### QUESTIO I.

#### Quid sit Superstitio, & quæ species ejus?

#### SUMMARIUM.

- 1 Religio consistit in medio.  
Quæ vitia eidem opponantur?
- 2 Superstitio, quid?
- 3 Contra Religionem quomodo possit peccari per excessum?  
(a) Conformiter dictis Tract. 4. dist. 1. n. 19.
- 4 Superstitutionis duæ sunt species.
- 5 Una ratione rei cultæ, quæ coli non deberet; & quomodo hæc subdividatur?
- 6 Altera ratione Cultus incongrui, ejusque divisio.
- 7 Cultus falsus, quis, & quomodo accidit?
- 8 Et quale peccatum?
- 9 Cultus superfluus, quis?
- 10 Et quale peccatum?

1. Sicut in ceteris Virtutibus, ita & in Religione vendicat sibi locum illud vulgatum: *Virtus consistit in medio.* Unde Poeta canit:

*Est modus in rebus, sunt certi denique fines,  
Quos ultra, citraque nequit consistere virtus.*

Igitur contra Religionem potest peccari tum per excessum, & nomine generico dicitur *Superstitio*; tum per defectum, & vocatur *Irreligiositas*. Utraque harum varias sub se species complectitur. Et quidem sub Irreligiositate continentur ea vitia, quæ pertinent ad contemptum seu irreverentiam Dei, ac rerum sacrarum, cujusmodi sunt Tentatio Dei, Sacrilegium, Simonia: Blasphemia, Perjurium, ac Violatio Voti, de quibus sigillatim dicetur tum in sequenti Distinctione, tum alibi propriis in locis. Superstitio continet sub se Idololatriam, Divinationem, vanam Observantiam,

& Magiam una cum aliis adhuc duabus Superstitutionis speciebus, quæ contingunt ex parte cultus indebiti, de quibus omnibus in præsentī Distinctione, ordiendo a Superstitutione, ejusque speciebus in genere.

2 CONCL. I. Superstitio in genere est falsa religio, seu vitiosus cultus veri aut falsi Numinis, ac recte definitur dicendo: *Superstitio est vitium Religioni oppositum secundum excessum, quo quis Divinum cultum vel illi exhibet, cui non debet, vel eo modo, quo non debet.* Ita in re communis. Et si enim vel maxime Superstitio committatur in cultu falforum Deorum, tamen etiam in cultu veri Dei hoc vitium accidere potest, prout patet in Judæis defacto Legalia veteris Legis observantibus, & in Hæreticis, qui olim aquam pro vino, vel sanguinem infantum in Eucharistia offerebant, qui ideo non Religiosi, sed Superstitiosi nuncupandi sunt, quamvis vero Deo talia præstiterint. Itaque Superstitio utrumque complectitur, & cultum falforum Deorum, & excessum in cultu veri Dei.

3 Neque dicas. Deus est dignus omni laude, cultu ac reverentia; ergo non potest dari excessus in ejus cultu, neque peccari contra virtutem Religionis per excessum. Resp. enim (a) Concesso antecedente, distinguendo consequens: ergo non potest dari excessus ex parte objecti virtutis Religionis, id est, respectu Majestatis Divinæ, utpote quæ dignissima est omni honore & cultu, conceditur: non potest dari excessus ex parte modi incongrui, aut cultus indebiti ratione rei cultæ, negatur consequentia. Sicut enim v. g. Amor Dei ex parte objecti non habet medium, imo eo perfectior est, quo intensius fertur in Deum utpote objectum infinite amabile, habet tamen medium ex parte actus; quia potest dari excessus in ejus exercitio, si nimirum modo illicito Dei Amorem elicere velimus, nos v. g. interficiendo: ita & Religio ex parte objecti, quod est Divina Majestas, medium non habet, neque patitur excessum, bene tamen ex parte actus, uti fit, si verum Deum falso, aut indebito cultu colamus, vel loco veri Dei falsum Numen adoremus.

4 CONCL. II. Duæ sunt species Superstitutionis, in quas ipsa immediate dividitur, nempe Superstitio ratione rei cultæ, quæ coli non deberet, & Superstitio ratione cultus incongrui, dum modo indebito seu inconvenienti verus Deus colitur. Ita communis, & patet ex proxime dictis. Porro utraque hæc Superstitutionis species rursus subdividitur, & hinc fit

5 CONCL. III. Superstitio ratione rei cultæ, quæ coli non deberet, sive Superstitio ratione cultus falsi Numinis subdividitur in Idololatriam, Divinationem, Observantiam superstitiosam, & Magiam. Ita Herincx disp. 7. de Religione, n. 3. & communior, quamvis Fillucius tom. 2. tract. 5. n. 4. addat pro quinta specie Maleficium: alii vero ad vanam seu superstitiosam Observantiam referant Magiam, & Maleficium, ac proinde tres dumtaxat Superstitutionis species ex parte rei cultæ, quæ coli non deberet, assignent. Ratio Conclusionis est: quia vel diabolus honoratur ut Numen, & est Idololatria; vel colitur, ut aliquid occultum revelet, & est Divinatio; vel, ut dirigat in operando, & sic est Superstitio vanarum Observationum, aut Magia, ad quam reducitur Maleficium, prout amplius patebit ex dicendis.

6 CONCL. IV. Superstitio ratione cultus incongrui subdividitur in Superstitutionem cultus falsi, & Superstitutionem cultus superflui. Ita D. Thomas 2. 2. quæst. 93. art. 1. & 2. cum communi: & patet inductione. Siquidem.

7 Cultus falsus, seu mendax dicitur, vel quia habet falsam significationem: ut si quis defacto coleret Deum ceremoniis Judaicis, quæ significant Christum venturum: vel quia imitatur quis falso verum cultum: ut si quis falsis miraculis veram doctrinam Christianam confir-



confirmare velit, aut proponat falsas Reliquias: item si quis mutet materiam, vel formam Sacramentorum animo colendi Deum, prout faciunt Hæretici nostri temporis in Cœna sua committentes Superstitionem falsi cultus; non enim Christi institutum, sed suas inventiones pertinaciter sequuntur. Insuper ejusmodi cultus potest esse falsus, ac mendax falsitate ex parte ipsius colentis se tenente: ut dum quis Deum colit tamquam publicus ab Ecclesia constitutus Minister, cum commissionem seu potestatem nullam habeat, vel talem non habeat; puta si quis Sacrificium offerat, cum Sacerdos non sit, cujus exemplum habemus in Saule 1. Reg. 13.

8 Et quidem certum est, quod hujusmodi Superstitio, atque omnes isti Superstitiosi, falsique cultus sint ex genere suo peccatum mortale: tum quia gravis inde irreverentia Deo inferitur: tum quia sunt falsitates perniciose, atque nonnumquam nascuntur ex Infidelitate ac Hæresi; uti sit in Ritibus superstitiosis Judæorum, & Hæreticorum: tum tandem, quia prædicatione falsorum Miraculorum, nec non & falsarum Reliquiarum suppositione obfuscatur fides verorum, minorque reverentia & cultus eisdem exhibetur: & hinc eos, qui prædicant falsa miracula, vel incerta, excommunicari refert Navarrus cap. 27. *Manualis* n. 111. idque desumitur ex *Constitut.* 21. Leonis X. *Supernæ Majestatis*, & habetur tom. 1. Bullarii Romani.

9 *Cultus superfluous* econtra dicitur ille, quando præter morem Ecclesiæ ponitur Religio in quibusdam circumstantiis, vel rebus, in quibus non est ponenda: ut si quis Deum colere aggrediatur illis ritibus, modo, seu caeremoniis, quæ neque ad ipsius Dei gloriam, neque ad spiritus excitandi devotionem inserviunt, aut quæ sunt contra statuta, vel consuetudinem Ecclesiæ: uti foret in Missa sæpius dicere Alleluja, plures Cruces facere, quam sit præscriptum, in eam tot vel taliter dispositas candelas, & non plures adhibere, audire Missam a Sacerdote, qui nominatur Joannes, aut hujusmodi.

10 Ceterum Cultus iste superfluous, seu tales ritus superstitiosi, lectulo scandalo & Ecclesiæ contemptu, sunt ordinarie tantum peccata venialia, ut docent Cajetanus, Lessius, Layman, Navarrus, Toletus, & alii. Quod intelligendum, nisi esset cultus non tantum vanus, sed etiam turpis, aut alias graviter in eodem excederetur, nam tunc incurri peccatum mortale pro gravitate materiæ, certum est.

## QUÆSTIO II.

### De Idololatria.

#### SUMMARIUM.

- 11 Idololatria, quid?
  - 12 Est peccatum gravissimum.
  - 13 Idololatria metaphorice accipitur pro omni peccato mortali.
  - 14 Hinc sumitur proprie, nec tamen comprehendit Cultum Sanctorum.
- (b) Dist. præc. quæst. 4. per totum.

II **CONCL. I.** Idololatria, quæ est prima Superstitionis species, & ex suo genere peccatum mortale gravissimum, recte describitur, quod sit Servitus, quæ soli Deo debetur, exhibita alicui creaturæ. Ita in re communis. Dicitur, *Servitus*: quia per Idololatriam Idololatræ serviunt Idolis, cultum Latræ soli Deo debitum illis impendendo, juxta quod dicit Apostolus Rom. 1. *Servierunt creaturæ potius, quam Creatori.*

12 Quod autem Idololatria sit peccatum mortale gravissimum, patet ex eo: quia Idololatra per Idololatræ peccatum honorem Divinum, ipsamque Divinitatem, quantum in se est, transfert in creaturam, teste Apostolo Rom. 1. *Mutaverunt gloriam incorruptibilis Dei in Anac. Reiffenstuel Theolog. Tom. I.*

*similitudinem corruptibilis imaginis hominis, & volucrum, & quadrupedum, & serpentium.* & alibi. Unde sicut in Republica gravissimum censeretur crimen læsæ Majestatis honorem Regium, ipsamque Regiam Majestatem in alium, quam legitimum Principem ex plena scientia, quantum in se est, transferre, ita & in proposito gravissimum crimen est læsæ Majestatis Divinæ, gloriam Dei in creaturam, seu Idolum transferre.

13 Notandum tamen, quod nomen Idololatriæ dupliciter accipitur, primo quidem proprie pro cultu, quo creatura colitur loco Dei, deinde metaphorice, pro omni peccato mortali, quo quis mortifere inhæret creaturæ: quo modo ad Ephes. cap. 5. Avaritia vocatur *Idolorum servitus*. Et in hoc sensu S. Hieronymus in cap. 2. *Amos*, ait: *Avarus aurum, gulosus ventrem, libidinosus penem & Beelphegor colit, lasciva mulier, quæ, cum sit in deliciis vivens, mortua est, adorat venereas voluptates.* Et merito omne peccatum mortale sub nomine Idololatriæ metaphorice sumptæ denotatur: cum peccator per peccatum mortale voluntarie recedens a Deo, ut creaturæ adhæreat, censeatur plurius facere creaturam, quam Deum, ac proinde illam habere loco Dei, hæcque ipsi esse instar Idoli.

14 Sed hoc loco Idololatria proprie sumitur pro cultu, quo creatura colitur loco Dei. Nec tamen idcirco cultus Sanctorum cum Christo in cœlis regnantium, aut Sacrarum Imaginum erit Idololatria: nam illos non honoramus ut Deos, sed ut Amicos DEI, cohæredes Christi, nostrosque apud Deum intercessores: Imagines autem cultu dumtaxat veneramur respectivo, ut jam dictum superius. (b)

## QUÆSTIO III.

De Divinatione, variisque ejus speciebus, & gravitate.

#### SUMMARIUM.

- 15 Divinatio, quid?
  - 16 Contingit dupliciter.
  - 17 Divinationis per expressam demonis invocationem varii modi, qui?
- Ea est gravissimum peccatum, nec admittit parvitatem materiæ.*
- 18 Divinatio per tacitam demonis invocationem, qua?
  - 19 Ejus plures sunt species. I. Astrologia judiciaria.
- Sed naturalis est licita.*
- \* *Quidnam sentiendum, si ex puncto nativitatis aliqua prædicantur?*
- 20 II. Physiognomia,
- Metoposcopia, & Chiromantia.*
- Verum naturalis licita est.*
- 21 III. Observantia somniorum.
  - 22 Et quale peccatum sit?
  - 23 Unde dignosci possit somnium esse a Deo, vel potius a demone?
- 24 IV. Hujus Divinationis species est Augurium.
  - 25 Et V. Sortilegium.
- Sortes divinatoria sunt licita.*
- Sortes divinatoria illicita.*
- 26 Solvitur instantia ex nonnullis exemplis adducta.
  - 27 Divinatio quolibet est peccatum mortale.
- (c) Supra num. 17.
- 28 Dummodo serio & firma fide fiat, alias secus.
- \* *Quidnam statuendum, si similia fiant joci causa?*

15 **CONCL. I.** Divinatio (prout de ea hic loquimur) estque species Superstitionis est inquisitio de aliquo occulto, ope vel disciplina demonis facta. Quo modo Divinatio passim accipitur in S. Scriptura, in qua soli illi vocantur *Divini*, qui ope demonis divinant, seu futura aut incerta revelare nituntur. Etsi enim demones non possint certo cognoscere futura, circa quæ potissimum versatur Divinatio (quamvis latius accipitur etiam



ad aliorum occultorum, v. g. thesaurorum absconditorum inquisitionem, ope dæmonis factam, se extendat) longe tamen plura dæmones de rebus futuris, aliisque occultis cognoscere possunt, quam homines.

16 CONCL. II. Divinatio dupliciter contingit, nimirum vel per expressam dæmonis invocationem, vel per implicitam. Ita certa & communis. Ex his ulterius

17 Prima Divinationis species, seu in qua diabolus expresse invocatur, multis modis contingit, prout nimirum diabolus diversimode consulitur, aut consultus respondet. Aliquando enim apud veteres Gentiles consulebatur per sacrificia animalium, & diabolus respondebat per signa quædam apparentia in extis animalium; & vocatur *Haruspicium*. Aliquando consulebatur per preces coram idolis profusas, & solebat dæmon respondere per Idola; & dicitur *Oraculum*. Aliquando consulebatur in Pythonicis, vel Pythonissis, quos ipse possederat: quandoque id accidit per varias adjurationes, figuras, unctiones, specula, aliaque signa per diabolum instituta, & media detestanda, quæ Dominus DEUS passim in S. Scriptura execratur. Et hanc Divinationis speciem, in qua diabolus expresse invocatur, esse gravissimum peccatum mortale, certum est, & indubitatum, eo quod importet consortium, & societatem cum dæmone, perpetuo & insensibilissimo hoste veri Dei. Et hac de causa recte notant Doctores, ut Bonacina *disp. 3. in Decalogum q. 5. punct. 3. n. 17*. Herincx *cit. disp. 7. num. 16*. & alii, non dari parvitatem materiæ a mortali excusantem, si Divinatio serio fiat.

18 Altera Divinationis species, seu quæ continet tacitam & implicitam dæmonis invocationem, fit, cum quis notitiam alicujus rei ex signo aliquo consequi serio confidit, quam illud naturaliter nullo modo indicare potest; tunc enim Divinator talem notitiam a dæmone tacite desiderare convincitur, cum certum sit, ejusmodi signa vanitatis a DEO instituta non esse.

19 Hujusmodi Divinationis, quæ fit per pactum implicitum, plures species recenset D. Thomas 2. 2. q. 95. art. 3. & seqq. quem sequuntur alii. Prima est Divinatio per Astra, vocaturque *Astrologia judiciaria*, quæ ex aspectu, situ, & motibus astrorum eventus a libero arbitrio pendentes certo prædicit, vel præteritos aut præsentis occultos effectus ab influxu astrorum nullatenus dependentes revelat: v. g. Platonem tale conjugium celebraturum, esse auctorem hujus furti, moriturum ruina suarum ædium &c. Dicitur notanter, *eventus a libero arbitrio pendentes* &c. nam per hoc nullatenus reprobat *Astrologia naturalis*, qua situs & motus astrorum observantur, atque ex iis colliguntur effectus pure naturales, ut eclipses, pluviae, siccitates, morbi animalium, pestes, salubritates &c. Hæc enim omnino licita est, & humano generi perquam utilis.

#### Additio.

\* Quinimo a Lessio, & Busenbaum excusantur a peccato illi, qui ex puncto Nativitatis, sive Horoscopo non quidem certo, sed probabiliter prædicunt complexionem corporis, & inclinationes naturales; nam astra inclinant, etsi non necessitent. Item subdit la Croix *lib. 3. part. 1. n. 9*. non esse peccatum saltem mortale, per Astrologiam velle cognoscere aliquod contingens liberum tantum aliquo modo conjecturaliter, non autem quasi certo futurum &c. Adducit equidem P. Sporer *Tract. 2. in præcept. 1. Decalog. c. 9. sect. 2. n. 16*. Bullam Cali & terræ editam motu proprio a Sixto V. & ab Urbano VIII. die 13. Martii 1631. Constitutione *Inscrutabilis Judiciorum* &c. renovatam, in qua prohibet Astrologis prædicere actiones ab humana voluntate dependentes, etiam si protestentur & adjungant, se id non affirmare tamquam certum. Ast Suarez, Delrio, Valentia, alique dictam prohibitionem apud eundem auctorem valde probabiliter restringunt ad solum forum externum ob præsumptionem nimirum superstitionis etiam interne simul latentis, quamvis externe protestentur ad regendas frau-

des, & vitandas poenas. Profecto in his regionibus sibi conscientie passim non ducunt, qui similes libellos de Horoscopo tractantes legunt: quamvis ego, nisi simul jungatur consideratio temperamenti proprii, & aliarum circumstantiarum in particulari occurrentium, eosdem nihil procius æstimem ordinarie: quoniam illud punctum nativitatis, quod hi Astrologi exactissime attendendum ajunt, deprehendi vix potest ob rapidissimum motum Cælorum, prout id jam observavit apud Sporer *loc. cit. num. 14*. D. Augustinus *lib. 2. de Doct. Christ. cap. 22*. \*

20 Secunda hujus Divinationis species est *Physiognomia*, per quam ex corporis, puta vultus, manuum &c. lineamentis libere contingentes eventus, aut prospera vel adversa prædicuntur. Ejus partes sunt *Metoposcopia* & *Chiromantia*, quarum prior ex facie hominis, frontisque inspectione, altera vero ex manuum lineamentis, quid cui eventurum sit, divinat, seu prædicit, ut solent facere Cingari. Dicitur rursum: *libere contingentes eventus*: datur enim etiam Physiognomia, Metoposcopia, & Chiromantia naturalis, per quam ex corporis & membrorum habitudine ac proportionem, vultus item ac manuum lineamentis, de corporis valetudine ac temperamento, consequenter de hominis etiam ingenio, atque animi propensione, nec non & de superventuris morbis, morte, vel sanitate prædictio aliqua vel conjectura licite fieri potest. Lessius *lib. 2. cap. 43. num. 45*. Delrio *lib. 5. cap. 3. q. 4*. Sanchez, Layman, & alii.

21 Tertia dictæ Divinationis species fit per somnia. Et quidem tunc *Observantia somniorum* est illicita, & cum dæmonis pacto saltem implicito conjuncta, cum ex illis vane ac temere fit conjectatio de effectibus libere eventuro, aut mere casuali vel fortuito. Talis Observantia somniorum multum apud Ethnicos fuit usitata, & a S. Scriptura graviter reprehensa; ut *Levit. cap. 19. Non augurabimini, neque observabitis somnia*, & alibi. Unde & 2. Paralip. 33. graviter taxatur Manasses; qui *observabat somnia, sectabatur auguria, maleficis artibus inferebat*. Cum enim somnia pleraque naturaliter contingant, atque alia & alia juxta diversam corporis constitutionem, ac temperamentum, aut præcedentes animi affectiones, aliasque causas naturales proveniant, nequit ex iisdem capi prænotio de eventibus liberis, nisi vel a Deo, vel a diabolo immittantur: ergo quoties non dignoscuntur esse a Deo, si quis ex eisdem divinet, subjicit se disciplinæ diaboli.

22 Ex his sequitur, quod Divinatio ex observatione somniorum sit ex genere suo peccatum mortale. Per accidens nihilominus potest Observantia somniorum quandoque esse venialis: ut puta ratione simplicitatis, dum homo rudis ea putat esse a Deo; vel quia solum tenuiter credit eisdem. Quod si somnia putentur provenire ex causis naturalibus, licitum est ex iisdem capere conjecturas de ejusmodi causis, v. g. de valetudine, vel constitutione corporis, ac hujusmodi; Somnia autem divinitus immissa, certum est, esse sequenda; qualia leguntur habuisse Joseph Pro Rex Egypti *Genes. cap. 37*. S. Josephus Sponsus Beatæ Mariæ Virginis *Matth. 1. Tres Magi Matth. 2. alique plures*; juxta quod *Num. 12*. Deus dixerat: *Si quis fuerit inter vos Propheta Domini, per somnium loquar ad illum*.

23 Quæres, unde dignosci possit, somnium esse a Deo, vel potius a dæmone? Resp. Inter somnium Divinum & diabolicum communiter discernunt Viri sancti & Doctores, tum ex materia sineque ejus, utrum ad rem bonam & honestam, an vero ad turpem impellat: tum ex interna somniantis, atque ex somno excitati affectione: ut est illustratio, & consolatio animi, insolita promptitudo ad Dei obsequium, & hujusmodi; nam talia a somnio Divino causantur. Econtra vero somnia diabolica vel ad malum inclinant, vel animum



animum perturbant, & ad Dei obsequium tardiores reddunt, ipsumque intellectum obnubilare solent.

24 Quarta Divinationis species fit per avium, piscium, aut aliorum animalium observationem, & dicitur *Augurium*. Hæc futuros liberos eventus, vel casus mere fortuitos enuntiat e volucrum volatu, aut cantu, vel ex piscium motu, animalium occurſu, voce, & similibus; ac prohibetur a S. Litteris sæpius, præsertim locis n. 21. allegatis. Quo tamen non obstante, ex avium volatu, piscium in mari occurſu &c. possunt naturaliter colligi pluviae, serenitates, tempestates, & hujusmodi effectus naturales, quos animalia citius præsentunt, quam homines.

25 Quinta species Divinationis est per sortes (& dicitur *Sortilegium*) quæ eventus futuros, vel veritatis occultæ manifestationem explorat per sortes. Est autem triplex genus sortium, nempe divinatorium, consultorium, & divinitorium. *Sortes divinatoriae* sunt, quæ applicantur ad dividendas hæreditates, ad litem dirimendam, ad honestum lufum &c. Et hæc per se malæ non sunt, sed sæpe bonæ ac utiles, juxta illud *Proverb. 18. Contradictiones comprimit fors, & inter potentes quoque judicat.* Porro *Sortes consultoriae* sunt, quibus a Deo postulatur occultæ veritatis manifestatio, vel consilii directio: istæ etiam non sunt prohibitæ, si causæ necessitas, sive honestas ita exigat, aptiorque modus non appareat dubium vincendi: vel si alias speciali Dei jussu aut instinctu fiant, de quibus dicitur *Proverb. 16. Sortes mittuntur in finem, sed a Domino temperantur.* Tandem *Sortes divinatoriae* sunt, quibus absconditæ veritatis notitia, vel consilii directio non a Deo, & consequenter a dæmone expresse, vel tacite imploratur. Et hæc superstitiosæ, illicitæ atque prohibitæ sunt, prout habetur *can. Sortes 26. q. 5. cum concordantibus*: quia continent expresse, vel tacitam dæmonis invocationem. Unde merito *cap. 1. & 2. tit. de Sortilegiis*: sub gravibus pœnis prohibetur, ne per sortes inquiratur auctor furti, vel quid impoſterum futurum sit: & similiter *c. ult. eod. tit.* generaliter sortium usus in Electionibus ad Beneficia Ecclesiastica damnatur.

26 Nec obstat, quod peccatum Achaz forte deprehensum legatur *Joſue 7.* & Jonas forte deprehensus fuerit *Jonæ c. 1.* item Jonathas mel degultans *1. Reg. 14.* imo & Saul missis sortibus in universas Tribus Israel electus in Regem *1. Reg. 10.* & hujusmodi. Resp. enim, quod talia ex speciali jussu, aut instinctu Dei facta credantur: non tamen idcirco sortibus indifferenter est credendum, cum privilegia singulorum non possint legem facere communem. ut dicitur *c. Non statim. & c. Non exemplo. 26. q. 2.*

27 CONCL. III. Divinatio, & quælibet prædictarum species est ex genere suo peccatum mortale, sive fiat cum expressa, sive cum tacita dæmonis invocatione. Ita communis; & patet ex dictis (c) quia Divinatio importat consortium, & servitutem cum dæmone, perpetuo Dei hoste, ac ipsum homo tacite honorat, ejusque disciplinæ sese subicit, ab eodem occulta vel futura edocendus.

28 Hoc tamen intelligendum, si Divinatio serio fiat, & cum firma fide. Quod si vero joci causa quis ostendat, se velle futura divinare, interim credens, totum esse futile & inane, communiter Doctores censent, talem non incidere in culpam gravem; cum sit potius quædam vanitas, quam superstitio, ut ait Bonacina *disp. 3. in Decal. q. 5. p. 3. n. 18. & 19.* Ubi etiam somnia, sortes &c. a mortali excusat, si quis per simplicitatem (quod in mulierculis facilius locum habet) illis fidem præstet: ut quando ex ruditate putat, a Deo esse, vel tenuiter credit. Hoc modo multæ vanæ, atque inutiles observationes, v. g. ex sternutatione, vulturis occurſu, corrigiæ ruptione, & hujusmodi vanitates excusari possunt a culpa mortali; quia non firma fides, sed vana tantum formido eis tribuitur.

Additio.

\* Ceterum consulto adhuc monet Castropalao *Tract. 17. disp. 1. punct. 3. n. 6. & punct. n. 4.* ad finem, quod etiam joci causa tentare similia res sit plena periculo: partim, quia sæpe interne saltem aliqualis fides adhibetur, & eventus dubia mente expectatur: partim quia ille, qui prædictis signis effectum casu correspondere expertus fuerit, facile incitabitur ad eadem signa serio animo alia vice repetenda, cujus deceptionis periculo hac jocandi methodo se exposuerat. \*

## QUÆSTIO IV.

De vana Observantia, ejusque speciebus, & gravitate.

### SUMMARIUM.

- 29 Vana observantia, quid?
- 30 Et quando distinguatur a Divinatione?
- 31 Ejus tres sunt species, quæ?
- 32 Ars notoria, quid?
- 33 Observantia sanitatum, quid?
- 34 Et quo pacto hæc cognosci possit?
- 35 Observantia eventuum, quid?
- Et quomodo a Divinatione differat?
- 36 Vana Observantia, omnique species ejus sunt peccatum mortale.
- 37 Nisi excuset ignorantia &c.
- 38 Licetum tamen est gestare Agnos Dei, cruces &c.
- 39 Consuetudines aliquid faciendi, vel omittendi certis Festis, an damnae?
- 40 Quid in dubio, non effectus excedat vires causæ naturalis?
- 41 Proteſtatio quando excuset?

CONCL. I. Vana Observantia est superstitio, qua adhibentur media inutilia ad aliquid præstandum, vel impediendum, ad quod a Deo vel natura nullam virtutem habent: uti contingit, quando quis mediis inutilibus contendit acquirere bona temporalia, sanitatem, vel scientiam, aut quando aliquibus verbis intendit alligare dæmonem, eumque includere in annulo, vase, aut cum quis mittit chirographum animalibus noxiis, vel eis litem movet, ut illa expellat, aut cum quis certis schedulis, vel verbis a globorum ictibus immunem sese reddere satagit, & hujusmodi. Ita Doctores communiter.

30 Ceterum dicta vana Observantia distinguitur a Divinatione, quod hæc circa speculativam occultorum, aut futurorum effectuum cognitionem versetur, illa vero ad opus aliquod præstandum, vel impediendum tendat, ut puta ad obtinendam corporis sanitatem, thesauri absconditi inventionem, & quidem per actum aliquod cum dæmone, ut dictum est.

31 CONCL. II. Vanæ Observantiæ tres sunt species, nempe *Ars notoria, observantia sanitatum, & Observantia eventuum*; ad quas species ceteræ sunt revocandæ, sive cum expressa, sive cum tacita, seu implicita dæmonis invocatione fiant. Ita rursus communis; idque amplius patebit ex dicendis discurrendo de singulis. Unde fit

32 CONCL. III. *Ars notoria* est, cum per preces quasdam verborum ignotorum, inspectiones certarum figurarum, & alia hujusmodi media prorsus inutilia expectatur scientia infusa quarundam rerum absque alio labore. Hac arte utuntur Anabaptistæ, dum sumpto poculo suæ Cœnæ in instanti aliquando scripturarum antea omnino ignotarum scientiam consequuntur, dæmone indubie eam suggerente, vel per os ipsorum loquente, ipsosque sic dementante, ut S. Scripturas se intelligere putent.

33 CONCL. IV. *Observantia sanitatum* est superstitio, qua adhibentur media inania & inutilia ad sanandos morbos hominum, vel brutorum: ut contingit, dum ad sanitatis conservationem, recuperationem, vulnerum sanationem, dolorum mitigationem, ab



hostibus, globorumque ictibus protectionem, atque immunitatem, & huiusmodi adhibentur verba, signa & cæremonia, quæ nec ex Divina institutione, nec a natura ad id vires ullas habent. Ita passim Doctores. Sed quia, res quamplures habent varias virtutes naturales, non raro hominibus ignotas, hinc

34 Quæres, quo pacto dignosci possit hæc species vanæ Observantiæ? Resp. cum Fillucio *Tom. 2. disp. 24. c. 6. n. 158. & 159.* & aliis, id potissimum ex sequentibus circumstantiis agnosci posse. I. Si adhibeantur verba ignota, aut characteres ignoti: talia enim implicitè referuntur ad dæmonem ea instituentem, atque intelligentem. II. Si inferantur aliqua falsa, apocrypha, aut minus certa, ut quod Christus habuerit febres, spasmus &c. III. Si causa applicetur improporcionata ad effectum, vel in loco valde distante a passio. Idem dicendum de iis, qui adhibent verba, signa, cæremonias, imagines astronomicas, & similia ad obtinendam sanitatem, ad quam tamen procurandam nullam ex se vim habent: unde necesse est, quod hanc habeant aliunde, non quidem a bonis Angelis, vel a Deo, cum id legitime non constet, imo per Prælatos Ecclesiæ prohibeatur, atque per Theologos & Concionatores concorditer negetur; ergo eam haberi ab arte diabolica, præsumendum est. Et ex his regulis innumeri casus in praxi possunt resolvi, quorum plurimos refert Gobat *Tract. 11. Theol. Experimentalis, parte 4. de Superstitionibus.*

35 CONCL. V. *Observantia eventuum*, quæ est tertia species vanæ Observantiæ, contingit, quando fortuito aliquid accidit vel occurrit, ex quo homo sibi, vel alteri aliquid prosperi, aut adversi coniectat, indeque suas actiones moderatur: ut si v. g. egredienti domum occurrat lepus, aut is picam pictitantem audiat, & inde malum sibi augurium prælagiens domum revertatur. Hæc vanæ Observantiæ species Divinationi *Quæst. præced.* explicatæ valde vicina est: differt tamen ab ea per hoc, quod in ista vana Observantia principaliter intendatur directio operationum, & quidem ex signis fortuito occurrentibus, aut incidentibus: in Divinatione autem signa ex proposito quærantur, & adhibeantur, & quidem ea principaliter intentione, ut notitia acquiratur futurorum, aut occultorum.

36 CONCL. VI. Hactenus explicata vana Observantia, & singulæ tres ejus species ex genere suo sunt peccatum mortale. Ita omnes Doctores. Ratio est clara: quia continent aut expressam, aut saltem implicitam societatem, pactumque cum dæmone, ejusque auxilii invocationem, utpote a quo vel scientiæ infusio, vel curatio morborum, aut operum nostrorum directio expectatur.

37 Adjunt tamen Bonacina *cit. disp. 3. q. 5. p. 4.* Lessius, Valentia, Sanchez, Herincx, alique communiter, homines simplices sæpius a peccato mortali excusari ratione ignorantia, aut bonæ fidei; quia nihil mali in his contineri putant: cum ab huiusmodi hominibus non tam facile semper illud apprehendatur. Insuper tradit Fillucius *disp. 24. n. 161.* etiam peccatum tantum veniale committi, si id fiat ex intentione dandi operam ejusmodi vanitatibus, non tamquam efficacibus, sed ex quadam levitate: ut si quis semel annulum moveri sinat super filum, idque joco faciat, & ad experiendum effectum causa curiositatis. Hic tamen sunt recolligenda, quæ diximus ad finem præcedentis Quæst.

38 CONCL. VII. Nihilominus licitum est gestare Agnos Dei, Evangelium S. Joannis, Cruces benedictas, & huiusmodi res spirituales atque sacratas, ad sanitatem recuperandam, vel contra maleficia præservandam, similesque effectus consequendos, dummodo nihil superstitiosum (de quo *Tract. XIV. dist. 8. Append. I. Addit. X.* agetur) intervenerit, Ita D. Augustinus *tract. 7. in Joannem.* & tenent Catholici unanimiter: dum modo talia debita cum reverentia atque fiducia in Deum gestentur, & nulla conditio superstitiosa superveniat propter adjunctam spem in modo scribendi,

portandi, appendendi, aut alia loci vel temporis inani observatione, ad Divinum cultum, reverentiamque minime pertinente.

39 Utrum autem damnandæ, vel excusandæ sint quædam consuetudines, quibus nonnulli aliquid facere, vel omittere solent certis diebus festivis, distinguendum est. Si enim hæc faciant, ut se magis excitent ad precandum propter diem Sancto dedicatum, vel propter effectum, quem specialiter habent erga Sanctum, a quo opem & auxilium sperant, non committitur Superstitionis peccatum, saltem secluso scandalo, & alia prava intentione. Item non est superstitiosum, notare tempora, vel dies, quibus major vel minor influxus cælorum reperitur, seu quæ aptiora v. g. sunt ad certas herbas medicinales colligendas, atque ad scindenda ligna; vel ad evitandam rerum corruptionem &c. Hoc enim non excedit vires naturæ, atque quotidiana experientia comprobatur.

40 Tandem, quando rationabiliter dubitatur, an effectus sit a causa naturali (multa enim sunt secreta naturæ, virtutesque arcanæ, doctissimorum etiam quandoque virorum ingenia subterfugientes) quando, inquam, rationabiliter dubitatur, an huiusmodi effectus excedat vires causæ naturalis, præsumendum est, provenire a causa naturali. Bonacina *cit. q. 5. punct. 2. n. 9.* citans Lessium, Suarez, Sanchez, Layman, & alios. Ratio est; tum quia dubium explicandum est in mitiorem partem: tum quia multæ res naturales admirabili præfulgent virtute, plerisque etiam viris doctis incognita.

41 Quamobrem excusandi sunt illi, qui huiusmodi res, de quarum virtute naturali dubitatur, ad expellendum morbum adhibere intendunt, dummodo protestationem præmittant, nolle se effectum consequi, si aliqua sublit virtus ex quocunque pacto diabolico, & superstitioso. Secus dicendum, quando palam est, effectum excedere vires causæ naturalis; ac proinde certo, vel fere certo constat, actum huiusmodi esse superstitiosum, seu rem vanam, & inutilem esse ad talem effectum: tunc enim subest malitia Superstitionis, cum adhibeatur medium inutile ad illum effectum. Neque in tali casu, ubi constat certo de inefficacia mediorum, prodest protestatio, cum sit contraria facto: nisi forte id fiat alia intentione, nempe ad convincendum & confundendum dæmonem, non ad experiendum effectum.

## QUÆSTIO V.

De Magia, & Maleficio, aliisque huc attinentibus.

### SUMMARIUM.

- 42 *Magia rationalis, quid?*  
*Est periculosa.*
- 43 *Magia superstitiosa, quid?*
- 44 *Duplex ejus finis.*  
*Magia proprie.*  
*Maleficium, vel Veneficium, quid?*
- 45 *Magia, & Veneficium est peccatum mortale, & habet annexa multa alia peccata.*
- 46 *Remedia Maleficiorum alia moralia,*
- 47 *Alia naturalia,*
- 48 *Et alia supernaturalia, quæ?*
- 49 *Licitum est tollere signa Magica, ut diabolus nocere desinat.*
- \* *Num etiam sit licitum adhibere alia contraria?*
- 50 *Dummodo id fiat absque novo Maleficio.*
- 51 *Solvitur instantia.*  
(c) *Tract. 4. dist. 7. n. 27.*
- \* *Aliqua Corollaria.*
- 52 *Quid agendum Confessario cum Malefico penitente?*
- 53 *Maleficus penitens non tenetur curare sibi chirographum a dæmone restitui.*  
*Bene tamen rumpere aliud, si quod penes se habet.*



54 *Alia tunc a Confessario observanda.*

55 *Quid agendum circa bona Malefico per diabolum data?*

56 *Quomodo is muniendus contra relapsum.*

42 **S**ciendum, quod Magia communiter duplex distinguatur, una naturalis, & altera superstitiosa, seu diabolica. *Magia naturalis* est ratio quædam operandi mira per causas naturales absque dæmonis opera. Hanc Magiam, etsi de se mala non sit, tamen ut periculosa, & sensim ad superstitiones manuducentem passim censent Doctores esse cavendam: quia ingenia humana rebus curiosis & inutilibus implicat, magisque semper curiosa reddit, & successive ad Magiam superstitiosam inducit. Unde merito Lessius *lib. 2. de Just. & Jure cap. 44. n. 1.* omnes libros, qui Magiam naturalem tradunt, suspectos habendos esse, & tamquam periculosos, præsertim juventuti, vitandos asserit.

43 *Magia superstitiosa* (quam alii *Diabolicam* appellant, & de qua solum hic agitur) est ratio quædam operandi mira per signa ope dæmonum: sicut enim Magia naturalis utitur causis naturalibus, ita Magia superstitiosa utitur nonnullis signis, quibus ex pacto quodam allicitur dæmon, ut faciat id, quod Magus vult.

44 Porro Magia superstitiosa duplex est, seu potius duplicem habet finem. Primus finis ejus est propria ostentatio, aliudve commodum suum, aut alienum; sic communi nomine vocatur *Magia*: nam Magia propria est ratio quædam operandi mira ope dæmonum. Alter finis ipsius est noxa alicui inferenda, & proprio nomine dicitur *Maleficium*, vel *Veneficium*. Maleficium quidem, si noxa inferatur incantationibus, seu carminibus, characteribus, aliisque hujusmodi signis ex pacto cum dæmone inito. Veneficium vero, quando malis pharmacis, sive venenis, v. g. veneno amatorio, seu philtro id fit; quævis nonnunquam etiam Incantatores appellantur Venefici.

45 **CONCL. unica.** Magia, sicut & Veneficium, ac Maleficium ex genere suo est peccatum mortale, utpote continens expressam vel tacitam dæmonis invocationem, ac proinde societatem & benevolentiam erga illum. Ita omnes Doctores. Quinimo Magia ordinarie multa alia peccata annexa habet; ut sunt hæresis, abnegatio Dei & sanctorum, idololatria, blasphemia in Deum & Sanctos, profanatio & abusus rerum sacrarum, maxime Sacrosancti Eucharistiæ Sacramenti, luxuria, & nefariæ cum dæmone commixtiones &c. Ea insuper inferre solet maxime damna in bonis temporalibus proximorum, homicidia præsertim infantium, mortes animalium, vastationes segetum, & hujusmodi. Ex quibus, aliisque similibus effectibus colligere licet immanitatem hujus criminis, merito juxta Leges etiam Civiles ignibus plectendi. Sed occasione præmissorum

46 **Quæres I.** Quænam remedia adversus Maleficia sint adhibenda? Resp. Remedia Maleficiorum quædam sunt naturalia, quædam supernaturalia, & quædam moralia. Horum postrema sunt ea, quæ pertinent ad pactum cum dæmone dissolvendum, quando ex pacto nocet: quod fit amovendo signa Magica, ad quorum præsentiam diabolus nocumentum infert, de quo mox plura *n. 49. & seqq.*

47 Naturalia remedia Maleficiorum plerumque parvam vim habent, quia diabolus facile omnem illorum actionem eludit, si velit, & a Deo permittatur. Bonum tamen est illa ab initio experiri juxta præscriptum medicorum, seu quæ ipsi magis congrua judicabunt.

48 Supernaturalia, seu spiritualia, atque Ecclesiastica remedia Maleficiorum sunt optima, & horum decem numerantur cum Lessio *cit. cap. 44. num. 28.* Bonacina, Reginaldo, & aliis. I. Magna fides & fiducia in Deum, seu Divinam protectionem. II. Susceptio Baptismi, si quis nondum est baptizatus. Vel III. loquendo de baptizatis, Confessio Sacramentalis peccatorum: sæpe enim ob peccata permittitur diabolo potestas in hominem, quibus per veram poenitentiam, vitæque emendationem deletis, hæc quoque evanescit.

*Anacl. Reiffenstuel Theolog. Tom. I.*

IV. Sumptio Sanctissimi Eucharistiæ Sacramenti. V. Exorcismi Ecclesiæ, quorum maximam esse vim probat praxis, atque ordinatio Ecclesiæ, cujus nomine sunt, ipsaque quotidiana experientia. VI. Aqua benedicta; hæc enim habet vim ex precibus Ecclesiæ ad avertendas dæmonis infestationes. VII. Reliquiæ Sanctorum, Agnus Dei, Cerei sacri, Panis & sal benedictum, & similes res ab Ecclesia benedictæ, ob præallegatam rationem. VIII. Signum S. Crucis, cujus vis maxima est contra omnes Diaboli machinationes. IX. Invocatio Sanctissimi Nominis JESU, B. MARIE Virginis, Sancti Angeli Custodis, & aliorum Sanctorum. X. Oratio, præsertim conjuncta jejunio, ut patet ex Verbis Christi *Matth. 17.*

49 **Quæres II.** An liceat tollere signa Magica, v. g. ligaturas, nodos, volumina capillorum &c. eo fine, ut diabolus nocere desinat? Resp. I. Certum est, & fatentur omnes, si nullum novum adhibeatur Maleficium, hujusmodi signa licite posse tolli; idque tum in contemptum diaboli, atque Magicæ superstitionis; tum in odium facinoris, quo Maleficus ea posuit veluti tesseram sui pacti cum dæmone. Ratio clara est: quia sic solummodo evertuntur opera diaboli, ejusque atque Malefici impietas exerceatur. Et hoc quidem licitum est facere etiam ea intentione, ut dæmon nocere desinat: quia ejusmodi amotio signorum (secluso novo Maleficio) non est invocatio dæmonis ex natura rei, sed potius eversio prioris pacti per Maleficium cum Cacodæmone initi, & destructio operum diaboli. Et in hoc sensu loquitur Doctor Subtilis 4. *dist. 34. quest. iii.* dicens, quod ridiculum sit quærere, *an liceat tollere maleficium intentione curandi maleficiatum: non enim (inquit) solum licet, sed est meritorium destruere opera diaboli.*

*Additio.*

\* Resp. II. Ex eodem Fundamento, ut solvatur Maleficium, non solum licet tollere ipsa signa magica, sed etiam adhibere alia positive contraria ex se indifferentia, quibus conventio diabolica tollatur. Ita Hiquæus in Scotum *lib. 2. c. 44. dub. 6. n. 45.* Delrius *lib. 6. diff. quest. Magic. c. 2. sect. 1. q. 3.* Sanchez *lib. 7. de Matr. disp. 95. & 96.* Castropalao *Tract. 17. disp. 2. punct. 2.* Sporer *part. 2. in I. Præcept. Decalogi cap. 9. num. 41.* & alii; ac patet ex inculcata Judicum praxi, qui in hunc finem maleficos lavari, & pilos eorum abradi curant, ut, si forsitan aliquod Maleficium ex pacto dæmonis sub capillis occultatum esse, quo insensibiles, & tormentis facile sustinendis pares redderentur, his mediis destruantur. Ratio autem hujus est: quia, uti supponitur, talia signa ex una parte pacto diaboli in contrarium posita ex se sunt indifferentia; ex altera vero ipsum pessimum pactum exinde solvitur, ac via nocendi eluditur in ejusdem contemptum. Nec dicas: talia media e. g. Sigam, quæ te tangit, repercutere, ut soluto sic pacto diabolico nocere amplius nequeat &c. videri a diabolo ipsomet esse instituta in signum cessationis a nocendo, & consequenter applicantem eadem conspirare cum dæmone saltem implicite. Respondeo enim, omissis hic brevittatis gratia aliis solutionibus, cum Sporer *loc. cit. pie,* & probabilissime credi, diabolum, utpote ex se, suæque damnata propensione ad infestandos mortales limitationis impatientem, potius ex imperio Dei arctari ad hujusmodi conditiones, seu contraria signa pactis suis apponenda, ut hoc modo vis sua intra debitos limites divinitus coarctata existat cum non exigua sua mortificatione, dum experitur superbissimus ille spiritus, fortitudinem suam, ac libertatem & appetitum nocendi tam exigua re materiali constringi; sicuti a pari plurimum vexatur, dum quamvis Ens nobilissimum localiter & objective sese igni alligatum videt, atque exinde præter intellectum etiam libertatem suam esse coarctatam.\*



50 Resp. III. Nihilominus non licet tollere Maleficium, vel signa Magica per novum Maleficium, neque hoc a Malefico scienter petere, quamvis hic sese paratum offerat. Ita certa & communis. Ratio est; quia adhibitio novi Maleficii est intrinsece mala, cum sit usus artis Magicæ, & tacita vel expressa dæmonis invocatio ad aliquem effectum obtinendum; ac proinde nullo modo bene fieri potest, neque peti, neque, ut id fiat, assensus præberi juxta illud Apostoli. *Rom. 1. Qui talia agunt, digni sunt morte: & non solum, qui ea faciunt, sed etiam, qui consentiunt facientibus.*

51 Nec dicas. Licitum est petere pecuniam ad usuram ab usurario parato dare, item exigere juramentum ab eo, qui paratus est per falsos deos jurare: ergo etiam licitum erit alterius, qui ad id paratus est incantatione & Maleficio uti ad amovenda a nobis vel aliis Maleficia. Respond. enim negando consequentiam, & paritatem. Ratio disparitatis est: quia id, quod in dictis casibus petitur, nempe pecunia mutua, vel juramentum ex se malum non est, & bene fieri potest, si velit is, a quo petitur, ut dictum superius (c) secus est in nostro casu, ubi Maleficium (juxta hypothesein) non nisi per novum Maleficium tolli potest.

#### Additio.

\* Ex dictis colliges I. Si adsit vetula, de qua dubites, num sit Saga, non licere invertere scopas, ut, si saga est, abire non possit, nisi gressu averso seu cancrino. II. Nec projicere e lecto pulvinar, ut desuper sedere cogatur. III. Nec lac, quod ex maleficio non coagulatur in butyrum calefacere ad ignem, ut totus calor transferatur in sagam, & exinde nocere destinat, tuque butyrum recuperes. Ratio prohibitionis horum & aliorum similium est; quia non solum solvitur prius pactum (quod alias liceret) sed præterea novum involvitur, cum sagæ per similia non præcise in statum naturalem suum redigantur, sed præterea aliquid de novo facere cogantur, ad quod non nisi mediante novo diabolico pacto saltem implicito adstringi possent. \*

52 Quæres III. Quid agendum Confessario cum Malefico pœnitente? Resp. cum Bonacina *disp. 3. in Decalogum quest. 5. punct. 5. n. 11. Sanchez lib. 2. in Decalog. c. 40. n. 52.* & aliis, ante omnia inquirendum esse, an Maleficus inierit pactum cum dæmone: id siquidem tenetur Maleficus imprimis dissolvere. Videtur autem ejusmodi pactum sufficienter dissolvi per veram ac sinceram de suis peccatis actam pœnitentiam, ex puro corde peccata detestando, ac dæmoni renuntiando, & toto affectu DEI Misericordiam implorando.

53 Non tamen necesse est, ut Maleficus pœnitens curet sibi chirographum a dæmone restitui, quia per veram pœnitentiam sufficienter recedit a pacto. Sanchez *cit. cap. 40. n. 53.* Suarez, Candidus Brognolus, & alii. Quod si vero implet Maleficus apud se habeat chirographum, vel ejus exemplar, (regulariter enim, ut notat Candidus Brognolus Bergamensis, in *Manuali Exorcistarum. part. 1. cap. 2. art. 3. §. 10.* cum aliquis homo Deo abrenuntiat, ac dæmoni se devovet, solent duo fieri chirographa, vel si quis scribere nesciat, alia duo signa confici, quorum unum apud dæmonem conservatur, alterum apud Magum, vel Maleficum) tunc is tenetur alterum, quod penes se habet, perfringere, aut ipsimet Confessario tradere: idque partim in detestationem criminis, partim, ut exterius testetur internam, ac perfectam dæmoni abrenuntiationem, sinceramque in Deum conversionem. Alioquin enim, si hujusmodi externum signum, quod penes se habet, nollet Maleficus destruere, adhuc eo ipso pergeret, internum voluntatis actum in dæmonis obsequium profiteri.

54 Secundo debet Confessarius inquirere a Malefico, an commiserit illa enormia peccata superius num. 45. recensita, vel alia hujusmodi: quibus intellectis debito modo procedat, prout cæteroquin necesse est ad Confessionem Sacramentalem.

55 Tertio, si aliquid ope diaboli Maleficus acquisitum haberet, quod cujusdam tertiæ personæ esse cognosceret (puta, quia huic a diabolo sublatum, & Malefico traditum fuit, prout sæpe contingit) illud domino suo erit modo competenti restituendum, sicuti in rebus furto ablati fieri debet. Si vero aliunde, utputa ex occultis thesauris, aut ex rebus in mari totaliter deperditis eam rem diabolus habuerit, Magoque tradiderit, ex eadem personis illis Magus satisfacere tenebitur, quibus fortasse damna in rebus suis familiaribus, aut animalibus intulit. Et hoc item dicendum, si Magus haberet aliunde, unde damna illata refarcire possit: nam restitutio rerum injuste ablatarum, & aliorum damnorum illatorum recompensatio erit necessario facienda, nisi impotentia excuset, prout aliunde constat.

56 Quarto, ne Maleficus pœnitens iterum seducatur, & ad vomitum redeat, simulque ut is a dæmoniis divexationibus, non raro reductoris, magis magisque præservetur, eundem Confessarius muniat remediis spiritualibus, nimirum Agnis Dei, aut aliis rebus consecratis ipsi communicatis, simulque eum exhortetur ad crebro eliciendos actus Virtutum Theologicarum, atque ad meditationem Dominicæ Passionis, detestationemque suorum gravissimorum peccatorum, nec non & aliarum Virtutum exercitium, præsertim vero ad frequentiore Sacramenti Pœnitentiæ, atque Eucharistiæ receptionem. Quin etiam poterit quandoque Confessarius adhibere Exorcismos convenientes, quales pro hujusmodi hominibus tum in Ritualibus Diœcesanis, tum in aliis Benedictonum Libellis passim reperiuntur. Plura de Maleficis & Maleficiis, vel etiam a dæmone obsessis vide *Tract. 14. Dist. 8. post. Quest. 3. Appendice prima.*

## TRACTATUS III.

### De Vitiis Religioni oppositis per defectum.

#### QUÆSTIO I.

#### De Tentatione Dei.

#### SUMMARIUM.

- 1 Irreligiositas, quid, & quæ vitia sub se continent?
- 2 Tentatio alia probationis.  
*Alia seductionis.*
- 3 Tentatio Dei, quid?
- 4 Est duplex, expressa & interpretativa.
- 5 Tentatio Dei ex genere suo est peccatum mortale.
- 6 Purgationes vulgares sunt prohibita.
- 7 Solvitur instantia.
- 8 Tentatio Dei per accidens potest esse venialis.

UT patet ex dictis *Distinct. præced. num. 1.* alia Vitia opponuntur Religioni per excessum, alia per defectum. Visis itaque hactenus prioribus pergendum ad posteriora, quorum omnium genus est Irreligiositas, quæ est defectus cultus Deo debiti. Porro sub Irreligiositate tamquam species sub suo genere continentur Tentatio Dei, Sacrilegium, Simonia, Blasphemia, Perjurium, atque violatio Voti, de quorum quatuor prioribus in præsentī Distinctione, de aliis duobus in sequenti Tractatu dicetur. Et quidem ordiendo a materia præsentis Quæstionis,

2 Tentatio generatim est dictum, vel factum ad capiendum de aliquo experimentum, ut sciatur, quantæ sit potentiæ, prudentiæ, scientiæ, & hujusmodi. Et hæc dicitur *Tentatio probationis*, seu experimenti: quo modo Deus dicitur tentasse Abraham, Job, Tobiam, & alios Sanctos, dum immixtis adversitatibus eorum obedientiam, patientiam, atque in aliis virtutibus constantiam experiri voluit. Est & alia, quæ dicitur *Tentatio seductionis*, seu inductionis ad pecca-



peccatum, quo modo diabolus tentat homines, dum eos ad malum seu peccatum incitat. In proposito sumitur Tentatio priori modo, & quidem in malam partem, quatenus nimirum homo inique tentat Deum, volens aliquam ejus perfectionem experiri: de qua loquendo, sit

3 CONCL. I. *Tentatio Dei* est actus Religioni oppositus, quo quis absque justa causa dicit, aut facit aliquid ad capiendum experimentum de Divina quapiam perfectione; utputa de Potentia, Sapientia, Justitia, aliisque Dei Attributis. Ita Herincx *disp. 8. de Relig. quæst. 1.* Lessius, estque in re communis. Dicitur, *actus Religioni oppositus*: quia est quædam Dei irreverentia, velle de perfectionibus ejus experimentum sumere absque justa causa, & relictis mediis ordinariis a Deo institutis. Et additur, *absque justa causa*: quia si talis adsit, non erit Tentatio: ut si fiat ex Divino instinctu, vel si quis habeat donum miraculorum, aut sanitarum; vel si honor DEI; atque defensio Religionis postulet aliquod opus, ad quod tale experimentum est necessarium. Porro per *experimentum Divina perfectionis* intelligitur omne extraordinarium opus, vel auxilium Dei supra communem rerum ordinem præstandum, quo Divina Potentia, Sapientia, Justitia &c. quasi experientia ipsa cognoscatur.

4 CONCL. II. Tentatio Dei potest fieri dupliciter, expresse scilicet, vel interpretative. Ita communis. Et quidem *Tentatio Dei expressa* tunc accidit, quando aliquid fit directe ea intentione, ut experimentum capiatur de quadam Dei perfectione, ut si te projicias in puteum, experturus, an Deus te sinat submergi, vel an possit te salvare. *Interpretativa tentatio Dei* contingit, quando quis non intendit explicite tale experimentum de Divina perfectione, facit tamen aliquid ob finem alium, quod ex se requirit extraordinarium Dei auxilium, illudque temere expectat: ut si quis tota Quadragesima velit cibo & potu abstinere ad Christi exemplum, persuasus, Deum vires præbiturum (nisi id fieret ex speciali instinctu Divino) aut si alicui alteri periculo absque necessitate se committat, a quo sine extraordinario auxilio Dei, quod temere expectat, liberari nequit. Huc etiam pertinent Purgationes vulgares, de quibus n. 6.

5 CONCL. III. Tentatio Dei, prout fit absque justa causa, regulariter loquendo, atque ex suo genere est peccatum mortale. Ita Doctores communiter. Ratio est: tum quia adversatur excellentissimæ inter Morales Virtuti Religionis, & consequenter ex suo genere est peccatum mortale; tum quia vel tentando Deum quis est incredulus, aut dubius de aliqua ipsius perfectione, & consequenter præter malitiam Infidelitatis irrogat Deo gravissimam injuriam; prout fecerunt olim perfidi Judæi de quibus dicitur *Psal. 77. Tentaverunt Deum in cordibus suis, dicentes, Numquid & panem poterit dare, aut parare mensam in deserto?* vel tentans petit a Deo auxilium extraordinarium sine justa causa, quod arguit gravem audaciam, sicque irreverentiam erga Majestatem Divinam, quæ ter sancte, simulque humiliter ac reverentialiter est tractanda: atque insuper est illud contra sapientissimam Dei ordinationem, qua voluit servari ordinem naturalem, neque absque necessitate eundem invertendum statuit. Unde Christus dæmoni, præcipitium e Templi pinnaculo, unde tamen per scalas descendere poterat, suggerenti respondit *Matth. 4. Scriptum est: Non tentabis Dominum Deum tuum.*

6 Hinc mortaliter peccaminosa est omnis illa Tentatio, qua tentans Deum absque alia necessitate committit se aperto periculo vitæ; utputa projiciendo se in ignem, aut præcipitando ex turri, interim putans, Deum esse ipsum salvaturum. Huc etiam spectant *Purgationes vulgares* (sic dictæ, quod nullo jure, sed populari intentione, & fabricante sunt omnino fictæ invidia. c. *Mennam* 2. q. 5.) quales olim fieri consueverant ferventis sive frigida aquæ, ignitque ferri contactu, & hujusmodi, in quibus expectabatur incolumitas a Deo

extraordinarie præstanda innocenti, quæ merito reprobantur a Jure Canonico *cit. c. Mennam. & c. Omnibus. & c. Consultisti.* 2. q. 5. Item Purgationes, quæ duello fiunt, in quo expectatur, ut Deus tueatur partem innocentem; quod itidem damnatur *can. Monomachiam.* 2. q. 5. & c. 1. ac seqq. *de Purgat. vulgari;* & in Concilio Trid. *Sess. 25. cap. 19. de Reform.*

7 Nec obstat, quod Deus olim videatur quandoque hujusmodi Purgationibus miraculo favisse. Resp. enim, id factum esse, vel ob simplicitatem illius sæculi, atque antequam tales Purgationes fuerunt publice ab Ecclesia damnatæ, vel quia innocentes suspecti ad eas adhibendas cogebantur. Lessius *lib. 2. cap. 15. n. 4.* Quandoque tamen effectus non respondebat, de quo refertur insigne exemplum *cap. 2. de Purg. vulgari.*

8 Dicitur nihilominus in Conclusionem, *regulariter loquendo*, ad denotandum, quod Tentatio Dei aliquando per accidens possit esse peccatum veniale. Et hoc contingit vel ratione inconsiderationis, aut ignorantia non crassæ, vel ratione parvitatæ materiæ, aut periculi; ut quando quis levi morbo affectus, vane sperat sanitatem a Deo relictis mediis ordinariis. Bonacina *cit. disp. 3. quæst. 9. n. 6.* & alii.

## QUESTIO II.

### De Sacrilegio, & quale sit peccatum?

#### SUMMARIUM.

- 9 *Sacrilegium, quid?*
- 10 *Ejus tres sunt species.*
- 11 I. *Qua violatur Persona sacra.*
- 12 II. *Qua locus sacer.*
- 13 Et III. *Qua aliæ Res sacræ violantur.*  
*Huc spectat abusus sententiarum S. Scriptura.*
- 14 *Sacrilegium est ex genere suo peccatum mortale.*
- 15 *Clerici, & Religiosi, a quibus abstinere teneantur ratione Voti Castitatis?*
- 16 *Sacrilegium per accidens fit quandoque peccatum veniale.*
- 17 *Non omne peccatum a Persona sacra commissum est Sacrilegium.*

9 **S**acrilegium, quod a sacris legendum, id est, suffragandis sic dicitur, proprie accipitur pro violatione, seu indigna tractatione rei sacræ, sive pro injuria, ac irreverentia illa, quæ infertur DEO per indignam tractationem rerum sacrarum. Et de hac loquendo, sit

10 CONCL. I. Sacrilegiorum universim tres sunt species: aut enim Sacrilegium fit contra Personam sacram, aut contra Locum sacrum, aut contra Rem sacram. Ita Doctores communiter; & ratio est: quia generatim etiam tria sunt genera rerum sacrarum; videlicet personæ, loca, & res aliæ ad Divinum cultum ordinatæ.

11 Porro ad primam Sacrilegii speciem, qua violatur Persona sacra, pertinet percussio Clerici, fornicatio Ordine sacro initiati, sive Religiosi, aut Religiosæ, & cujuslibet Votum Castitatis habentis. Huc addunt Doctores pertractionem personarum Ecclesiasticarum ad Tribunal sæculare, earundem incarcerationem, & hujusmodi, utpote quibus indigne tractantur personæ Deo sacratæ.

12 Ad secundam speciem Sacrilegii pertinent omnia, quæ fiunt contra sanctitatem Loci sacri: ut sunt destructio malitiosa Loci sacri, everfusio Altarium, injuriosa effusio sanguinis, vel seminis humani in Loco sacro; item si confugientes ad Locum sacrum, tamquam ad Asylum, per vim inde extrahantur, & hujusmodi.

13 Ad tertiam Sacrilegii speciem pertinent ea peccata, quibus aliæ Res sacræ temerantur, seu injuriose tractantur. Dicuntur autem Res sacræ imprimis



Sacramenta, deinde Vasa sacra, vestesque benedictæ, Reliquiæ Sanctorum, Dei ac Sanctorum Imagines, & denique ea omnia, quæ adhibitis certis precibus, ac Ritibus Ecclesiasticis sunt consecrata, & pertinent ad cultum Divinum, atque ministerium Ecclesiasticum. Insuper ad hanc tertiam Sacrilegii speciem spectat abusus sententiarum sacræ Scripturæ ad superstitiones, ad stabiliendas hæreses, ad amatoria, fabulosa, vana, scurrilia, adulationes, detractiones, libellos famosos, & hujusmodi: quam quidem temeritatem graviter inhibuit Concilium Trid. Sess. 4. in Decreto de Editione, & usu sacrorum Librorum. atque omnes hujus generis homines, seu violatores, ac temeratores verbi Dei, juris & arbitrii pœnis per Episcopos coerceri præcepit.

14 CONC. II. Sacrilegium ex genere suo est peccatum mortale. Ita communis: nam opponitur excellentissimæ inter Morales virtuti Religionis. Sic quippe certum est, esse peccatum mortale, quando Sacrilegium fit in contemptum Rei sacræ; prout solent facere Hæretici, cum Vasa sacra, Imagines DEI, Sanctorum, & hujusmodi profanant, & vastant. Similiter constat, committi peccatum mortale Sacrilegii, quando fit aliquid voluntarie ac deliberate in materia gravi, quod habet peculiarem repugnantiam cum sanctitate Rei sacræ: ut est percussio Clerici, item peccatum carnis cum persona DEO sacrata, vel ab eadem persona sacra commissum &c. quia talia notabiliter contraveniunt sanctitati Rei sacræ eique gravem inferunt irreverentiam.

15 Ubi sciendum, quod Religiosi Professi, aut Clerici in sacris constitutione Voti Castitatis teneantur abstinere ab omni deliberata venerea delectatione, actuque tum interno, tum externo, qui est contra Castitatem: uti sunt non solum fornicatio, aut alius actus venereus, sed etiam turpes cogitationes, delectationes morosæ, aspectus impudici, vel tactus obsecrati &c. Unde quidquid in secularibus extra conjugium est aliquo modo peccatum contra Castitatem, id in Religiosis, & Clericis memoratis etiam est Sacrilegium ratione Voti; adeoque habet duplicem malitiam: ita tamen, ut malitia Sacrilegii sit mortalis in iis actibus, in quibus malitia libidinis est mortalis; venialis vero, in quibus illa est venialis, prout non raro contingit ratione imperfecti voluntarii. Lessius lib. 2. c. 41. n. 78. Sylvester, Layman, & alii.

16 CONCL. III. Nihilominus per accidens quandoque Sacrilegium potest fieri peccatum veniale. Ita communis. Sic inprimis accidit, quando irreverentia Rei sacræ illata est dumtaxat levis: prout fieri potest in aliquali inhonoratione, aut dilaceratione Imaginum secluso contemptu, in levi abusu sacrarum Vestium ad profanos usus, in allegatione cujusdam sacræ Sententiæ ad jocum, & idem dicendum de aliis hujusmodi levioribus irreverentiis erga Res sacras, quæ non excedunt peccatum veniale, secluso contemptu, propter parvitatem materiæ, seu irreverentiæ commissæ. Similiter erit peccatum veniale tantum, & quandoque nullum, si irreverentia aliqua fiat Rei sacræ ex inadvertentia, indeliberatione, aut ignorantia non crassa, vel invincibili: hæc enim a peccato mortali excusat in omni materia.

17 Tandem notandum cum Herinex disp. 8. de Relig. quæst. 2. n. 12. & aliis, non omne peccatum a Persona sacra, vel in Personam sacram commissum esse Sacrilegium proprie & formaliter, sed illud tantum, quod directe committitur contra sanctitatem Personæ. Hinc inebriatio, superbia, mendacium, ac hujusmodi, si committantur a Persona sacra, non sunt Sacrilegia. Similiter neque ira erga Personam sacram habita, citra corporalis injuriæ illationem, est Sacrilegium: cum talia directe non repugnent ejus sanctitati, bene tamen percussio corporalis ipsius.

## QUÆSTIO III.

## De Simonia.

## SUMMARIUM.

- 18 *Simonia, unde sic dicta?*
- 19 *Ea est species Sacrilegii.*
- 20 *Simonia definitio declaratur.*
- 21 *Simonia quam grave peccatum?*
- 22 *Est triplex?*
- 23 *Simonia mentalis, quid?*
- 24 *Simonia conventionalis, quid?*  
*Alia pure conventionalis, & alia mixta.*
- 25 *Simonia confidentialis declaratur.*
- 26 *Simonia realis,*
- 27 *Si quid gratis detur, ac recipiatur, non fit Simonia.*
- 28 *Simonia non est intuitu spiritualium functionum dare, aut recipere aliquid per modum stipendii.*
- 29 *An de hujusmodi stipendio licitum sit pacisci?*
- 30 *Idipsum magis declaratur.*  
*\* Addita quadam cautela quoad Parochos.*
- 31 *Simonia non est dare quid ad redimendam injustam vexam circa spiritualia.*
- 32 *Fallit Conclusio in Beneficiis Ecclesiasticis, si quis necdum habet jus in re.*
- 33 *Licitum est, dare vel recipere pretium pro labore per accidens conjuncto cum sacro Ministerio.*
- 34 *Non item pro labore intrinseco, sive per se conjuncto cum ipso.*

18 **S**imonia a Simone Mago nomen, atque in Lege Evangelica originem traxit, non obstante, quod jam in lege veteri a Balaam Num. cap. 22. & a Giezi lib. 4. Regum cap. 5. & a non nullis aliis hoc peccatum legatur commissum. Dicitur nihilominus Simonia a Simone Mago, qui, cum vidisset, quod per manuum impositionem ab Apostolis daretur Spiritus Sanctus (ut legitur in Actibus Apostolorum c. 8.) obtulit eis pecuniam, dicens: *Date & mihi hanc potestatem, ut cuicumque imposuero manus, accipiat Spiritum sanctum.* Cui S. Petrus Apostolus respondit: *Pecunia tua tecum sit in perditionem, quoniam donum DEI existimasti pecunia possideri.*

19 Est igitur Simonia species Sacrilegii; cum vendere rem sacram, seu spirituales pretio temporali sit contra reverentiam Deo in rebus sacris debitam, simulque violet ipsius rei sacræ sanctitatem, quæ cum gratiose nobis a DEO concedatur in nostram proximorumque salutem, atque insuper tantæ sit dignitatis, ut sit pretio inæstimabilis, ac proinde dignis debeat dari gratis, juxta illud Salvatoris Matth. 10. *Gratis accepistis, gratis date:* nihilominus æstimato pretio venditur, aut emitur, rebusque temporalibus æquiparata humanis contractibus subijcitur.

20 CONCL. I. Simonia est studiosa voluntas emendi, vel vendendi aliquid spirituale, vel spirituali annexum pretio temporali. Ita Glossa in Rubricam. tit. de Simonia. estque definitio hæc communiter recepta inter Doctores, & patebit ex ejus declaratione. Dicitur I. *Studiosa voluntas*, id est, actus deliberatus voluntatis: & hæc particula stat loco generis, reliqua adduntur per modum differentiæ. Dicitur II. *Emendi vel vendendi*: sub qua particula comprehenduntur omnes Contractus, & pacta onerosa, in quibus datur pretium temporale, vel ejus æstimatio pro spirituali, sive id fiat per veram emptionem aut venditionem, sive per aliquam permutationem, aut alium hujusmodi Contractum onerosum. Dicitur III. *Pretio temporali* sub qua particula comprehenditur non solum omnis pecunia, sed etiam, quidquid pecunia est æstimabile, ut est munus a lingua, munus a manu, & munus ab obsequio. De quibus fusius n. 39. Hinc in Jure Canonico c. sunt nonnulli. 1. q. 1. reprobat veluti simoniacum *Munus ab obsequio. Munus a manu, & Munus*



a lingua. Et can. Salvator. 1. q. 3. dicitur: Quisquis igitur res Ecclesiasticas non ad hoc, ad quod instituta sunt, sed ad propria lucra, munere linguae, vel indebiti obsequii, vel pecunie largitur, vel adipiscitur, simoniacus est. cum concordantiis.

21 CONCL. II. Simonia ex genere suo est peccatum mortale. Ita certa omnium, & patet ex supra citatis verbis D. Petri Actor. 8. Pecunia tua tecum sit in perditionem, quoniam donum Dei existimasti pecunia possideri. Unde passim SS. Canones graviter reprehendunt Simoniam, appellantes eam Execrabile vitium, turpissimum lucrum, piaculare flagitium, simoniacam pestem, heresim simoniacam, ad cujus comparationem omnia crimina quasi pro nihilo reputantur: uti videre est. Reperiuntur. & c. Quicumque. ac seqq. 1. q. 1. & c. Patet. 1. q. 7. & c. Per tuas, de Simonia. & alibi. Ex quibus verbis facile patet gravitas hujus criminis.

22 CONCL. III. Simonia recte dividitur in mentalem, conventionalem, & realem. Ita communis, & patebit ex earum explicatione. Itaque

23 Simonia mentalis est internum propositum, quo quis, dum confert alteri spirituale, intendit eum obligare ad reddendum temporale, vel econtra, sine ullo pacto exteriori expresso, vel tacito: ut si quis alicui inferviat cum intentione ipsum obligandi, ut in mercedem sibi conferat Beneficium Ecclesiasticum, quamvis nullo pacto exteriori circa hoc interveniat. Unde per Simoniam mentalem non intelligitur hic merum propositum committendi Simoniam (quamvis & hoc jam sit peccatum) sed intelligitur ea Simonia, quæ quidem aliquem actum externum habet v. g. dationem pecuniæ, vel famulitium, malitia tamen ejus non se prodit exteriorius, sed in sola mente manet, eo quod nullum pactum externum neque tacitum interveniat.

24 Simonia conventionalis est, quando non solum est internum propositum obligandi, sed etiam proceditur ad externam conventionem, seu pactum expresse aut tacite factum, dandi sive recipiendi rem spirituales pro temporali, absque tamen executione, saltem utrinque facta. Additur notanter, saltem utrinque facta: nam alia est Simonia pure conventionalis, quæ videlicet ex neutra parte est completa, ut si quidem pactum fuerit initum conferendi Beneficium Ecclesiasticum pro certa pecunia, adhuc tamen neque Beneficium collatum, neque pecunia soluta est. Alia vero est Simonia conventionalis mixta, quæ nimirum est completa solum ex parte unius, sive dando pretium nondum collato Beneficio, sive econtra.

25 Simonie Conventionalis species quædam est Simonia, quæ dicitur Confidentialis, qua quis cuiuspiam Beneficium Ecclesiasticum procurat eligendo, præsentando, resignando, confirmando, aut alia ratione cum certa confidentia, seu pacto inito, ut is, qui Beneficium accepturus est, illud ipsum sibi procuranti, vel alteri, utputa fratri aut nepoti suo, cum fructibus, aut aliqua eorum portione suo tempore cedat. Et adversus hanc Simoniacæ pravitate speciem, quam Confidentialem, seu Beneficiorum confidentiam appellant, eo quod circa sola Beneficia Ecclesiastica contingat, & per quam ex illicita beneficentia quandoque illa asservabantur personis pro tempore inhabilibus, vel etiam nondum natis, edidit Pius IV. severissimam Bullam, quæ incipit, Romanum Pontificem (habeturque rom. 2. Bullarii Romani. Constitut. 85. dicti Pont.) in qua sub gravissimis poenis ipsam prohibuit, eamque prohibitionem innovavit S. Pius V. in sua Constitutione 85. Intolerabilis.

26 Tandem Simonia realis est, quando pactio ex utraque parte impleta est, saltem inchoate: ut si collatio Beneficii facta est, & vicissim pretium solutum, aut saltem pars pretii data pro eo.

27 CONCL. IV. Etsi certum sit, committi Simoniam, si pretium temporale exigatur pro ipsa administratione Sacramentorum, sepultura Ecclesiastica, confirmatione electionum, installatione in Beneficiis, ac hujusmodi, nihilominus si quid gratis detur, ac reci-

piatur, Simonia non committitur. Ita communis. Et quidem prior pars sequitur ex dictis n. 20. Unde in Jure Canonico tit. de Simonia. c. Non satis & c. Cum in Ecclesia. & c. Ad Apostolicam. & alibi. gravissime reprehenduntur, ac prohibentur prave consuetudines exigendi pro similibus sacris functionibus pretium temporale; quamvis laudabiles consuetudines erga sanctam Ecclesiam, pia Fidelium devotione introductæ, sponte aliquid dandi Ecclesiæ Ministris talia spiritualia ministrantibus observari præcipiantur. Et per hoc patet altera pars Conclusionis, quæ amplius habetur can. Sicut Episcopum. 1. q. 2. & alibi.

28 CONCL. V. Insuper Simonia non est, si intuitu spiritualium functionum, utputa administrationis Sacramentorum, Concionum, Missarum celebrandarum, ac hujusmodi, datur aut recipitur aliquid per modum stipendii, hoc est, tamquam aliquod medium pro justa & congrua sustentatione Ministri Ecclesiastici. Est certa, atque communis, & patet ex unanimi sensu, & praxi quotidiana Fidelium. Ratio est; quia unusquisque meretur sustentari ab illo, in cujus licito ministerio occupatur. Unde dicit Christus Dominus Matth. 10. Dignus est operarius cibo suo. Et Apost. 1. Corinth. 9. Si nos vobis spiritualia seminavimus, magnum est, si nos carnalia vestra metamus? quasi diceret: id magnum non est, sed debitum: prout ex contextu patet. Quinimo ex hujusmodi textibus inferunt Doctores, quod eis, qui ministrant populo spiritualia, debeatur sustentatio ex Justitia, sicut operario merces sive cibus: unde appellatur Stipendium sustentationis, quia vere debitum ut stipendium, juxta illud 1. Corinth. 9. Quis militat suis stipendiis?

29 Addunt non pauci, quos sequitur Layman l. 4. tract. 16. c. ult. §. 2. n. 15. etiam licitum esse Ministris Ecclesiasticis, quantum est ex natura rei, de ejusmodi stipendio congruo sustentationis ob spiritualia ministeria persolvenda pacisci. Ratio est: tum quia quilibet potest pacisci de eo, quod sibi Jure naturæ debetur: tum quia Clerici sic paciscentes non exigunt aliquid tamquam pretium spiritualis ministerii (hoc enim, tamquam majus omni pretio temporali gratis exhibent, & alioquin manifestam committerent Simoniam) sed ejusmodi ministerium sacrum gratis exhibentes, requirunt dumtaxat congruam a populo sustentationem, atque ad majorem hujus securitatem paciscuntur de certa ejus quantitate; ubi hæc Superiorum auctoritate, vel consuetudine nondum est determinata, vel si est determinata, ut integre præstetur.

30 Notanter hic additur, id esse licitum quantum est ex natura rei. Siquidem spectato Jure communi antiquo fuisse Simoniam, saltem Juris humani Ecclesiastici sic pacisci, censet Lessius lib. 2. de Just. & Jure. c. 8. n. 49. id probans ex cap. ult. de Pactis. & aliis textibus Juris Canonici: quibus tamen per contrariam consuetudinem in quibusdam rebus, & functionibus, ait esse derogatum. Deinde ubi stipendium functionis a Prælati, vel consuetudine est determinatum, non potest illud excedi sine injustitia. Tandem qui sic paciscuntur, cavere debent, ne habeant intentionem paciscendi de pretio Officii spiritualis, sed tantum de mediis pro congrua sustentatione ipsius personæ; caveant etiam, ne imperiti ex tali pacto offendantur, & scandalizentur, qui proinde monendi sunt, pecuniam non pro ipsa actione sacra, sed pro necessaria solum sustentatione postulari.

#### Additio.

\* Insuper quoad administrationem Sacramentorum, & similium functionum Parochialium Beneficiati Curati, præsertim alias satis bene provisi, attendere debent, ne præcedenti doctrina abutantur, maxime ne respectu pauperum sint nimium rigidi, cupidi, & violenti in exactione pecuniarum pro administratione Sacramentorum, aliorumve functionum Parochialium apud infirmos suos Parochianos, nolentes ipsis talia præstare, nisi



nisi prius securi reddantur de temporali recipiendo illo, quod alias (uti ajunt, & prætendunt) de consuetudine dari solet. Etenim saltem similis consuetudo cum tali nimirum violentia, sordida avaritia, & scandalo in exigendo conjuncta, neutiquam a Jure (uti perperam credunt) admittitur, sed potius reprobatur *cap. 9. de Simonia*. sequentibus formalibus: *Horribile nimis est, quod in quibusdam Ecclesiis ----- pro sepulchris, & exsequiis mortuorum, & Benedictionibus nubentium, seu aliis Sacramentis aliquid requiratur. Putant autem plures ex hoc licere; quia legem moris de longa invaluisse NB. consuetudine arbitrantur, non attendentes, quod tanto graviora sint crimina, quanto diutius infelicem animam tenuerunt alligatam. Ne igitur hæc de cetero fiant ---- districtius prohibemus. Si quis autem contra hoc venire præsumserit, portionem cum Giezi (nimirum simoniaco) se noverit habiturum. Nolumus per hæc rejicere exactones moderatas, ac rationabiles, bene tamen adeo scandalosas, & sordidas, per citatum textum prohibitas; ubi exinde pauperculi Parochiani infirmi a recipiendis mature Sacramentis vel absterrentur, vel saltem, ut parcant sumptibus, in tantum prolongant, ac differunt, usque dum morte ipsa præveniantur. Væ aliquando talibus avaris Pastoribus qui plane hoc fordido modo non oves pascere, sed potius semet ipsos faginare velle convincuntur. \**

31 CONCL. VI. Non est Simonia, dare pecuniam solum ad redimendam vexam circa spiritualia, quam quis injuste patitur. Ita communior Doctorum contra Innocentium; idque desumitur tum ex *c. Quæsitum* 1. 4. 3. tum ex *c. Dilectus*. juncta Glossa *ibid de Simonia*. ubi talis redemptio injustæ vexæ refertur, nec tamen reprehenditur, imo potius approbatur. Accedit ratio: quia dans pecuniam ex tali causa, non dat ipsam pro re spirituali, & tamquam pretium ipsius, sed dat ipsam pro tollenda vexa, seu auferendo iniquo gravamine, atque ad removendum impedimentum pravæ voluntatis alterius. Sic v. g. licitum est, saltem urgente casu necessitatis, aut alterius gravis periculi, dare pecuniam ratione Sacramentorum administrandorum illi Clerico, qui non vult ea ministrare gratis: non quidem ut pretium Sacramentorum (hoc enim est intrinsece malum, atque simoniacum, & in nullo prorsus casu licitum) sed tamquam medium ad removendum impedimentum pravæ voluntatis, seu avaritiæ alterius, atque ut is peccato injustæ vexationis abducatur, & ad officium suum rite præstandum inducatur.

32 Ceterum hæc Conclusio patitur limitationem in Beneficiis Ecclesiasticis: in his quippe non est licitum, quin potius simoniacum, dare pecuniam pro redimenda vexa, quando offerens pecuniam necdum habet jus in re, sive jus quæsitum in Beneficio. Desumitur autem hæc limitatio ex *cap. Matthæus de Simonia*. ubi electus a majori parte, aliis tamen contradicentibus, si his det, aut dari consentiat pecuniam, ut a contradictione desistant, ac ipse postea confirmetur, censetur Simoniacus, & obligatus ad resignandum Beneficium. Ratio est: quia sic daretur pecunia ad consequendum ipsum jus spirituale, prout discurret Abbas Panormitanus *super cit. c. Matthæus de Simonia*. clare distinguens, quod pro jure quærendo non sit licitum tali dare pecuniam etiam ad redimendam vexam, ob textum & rationem allegatam: sed quando jus cuiuspiam jam est quæsitum, & vexatur quis in eo, bene dari possit pecunia pro redimenda vexatione, per textus & rationes *n. præc.* adductas; quia tunc non amplius sterneretur via per pecuniam ad Beneficium Ecclesiasticum. Hoc ipsum tradit Layman *cit. §. num. 22. & seq.* citans alios, & Ludov. Engel *tit. de Simonia n. 31.* ubi etiam resolvit, quod lite beneficii pendente absque labe Simonie non possit fieri transactio (secus dicendum de compositione amabili) ut adversarius accepta pecunia a lite desistat, per textum clarum *cap. Constitutum. & c. Super eo. de Transactionibus*. Plura adhuc circa vexam vi-

deri poterunt in Jure Canonico *lib. 5. tit. 3. §. 13.*

#### Additio.

\* Dices: Ex ista doctrina sequi, quod Simonia committatur, si e. g. Petrus invidis quibusdam, & malevolis hominibus per certas pecunias obstruat os, ut eundem denigrare cessent partim apud certum Parochum, pingue suum Beneficium sibi ipsi alias legitime resignare volentem; partim apud Patronum dicti Beneficii: Respondeo enim negando illatum; talis enim pecunia non datur NB. *Ipsi habenti Jus resignandi, vel præsentandi ad Beneficium* (tunc enim non careret labe Simonie) sed potius alicui tertio, ut cesset à denigratione tanquam injusta vexa. Vide de hac Jus Canonicum Patris Reiffenstuel *lib. 5. Decr. tit. 3. §. 13. n. 309. & seqq.* & Friderich in *QQ. Canonicis de Simonia cap. 2. §. 6. n. 97. &c.* \*

33 CONCL. VII. Loquendo de corporali labore, defatigatione, atque molestia in sacris Ministeriis, utputa in celebrationibus Missarum, administrationibus Sacramentorum, aut Consecrationibus Ecclesiarum &c. occurrente, & an pro eodem licitum sit dare, vel recipere pretium, distinguendum est. Et quidem conveniunt Doctores, pro labore aut obligatione, quæ sacro Ministerio per accidens conjuncta est, licite aliquid dari, & accipi ut pretium: prout fit, quando Sacerdos iter longum conficere debet ad celebrandam in certa Ecclesia Missam, vel administrandum Sacramentum, aut quando Capellanus obligare se debet ad persistendum in suis spiritualibus functionibus toto anno, præsertim tempore peltis, & hujusmodi. Ratio est: quia talis labor aut obligatio ex se est pretio æstimabilis, & per accidens solum hic & nunc annectitur spirituali Ministerio.

34 Secus dicendum de labore intrinseco, seu qui per se ac necessario conjunctus est cum sacro Ministerio: nam pro tali simoniacum est dare, vel recipere pretium, *arg. c. Si quis objecerit. 1. q. 3. & c. Ad nostram. de Simonia*. ubi generaliter mandatur, *quatenus pro Ministerio Ecclesiastico exercendo nullatenus pecunia exigatur*. Quo tamen non obstante potest aliquid dari ac recipi per modum justii stipendii, seu tamquam aliquod medium ad honestam sustentationem Ministrorum Ecclesiæ, ut dictum *num. 28.* Et hoc solum volunt nonnulli antiquiores Auctores, qui videntur oppositum tenuisse: nam commode explicantur, quod loquantur de justo stipendio, Ministris Ecclesiæ in gratiam Fidelium laborantibus debito ad ipsorum sustentationem, non autem de pretio laboris spiritualis. Layman *lib. 4. tract. 10. §. 4. num. 41. & alii.*

#### QUÆSTIO IV.

Solvuntur alia Dubia circa Simoniam, ejusque poenas.

#### SUMMARIUM.

- 35 *Simonia alia Juris Divini, alia Juris Ecclesiastici.*
- 36 *Exempla Simonie Juris Ecclesiastici.*
- 37 *Papa an possit involvi crimini Simonie?*
- 38 *Pretium simoniacum, quid, & quotuplex?*
- 39 *Manus a manu, & lingua, & ab obsequio, quid?*
- 40 *Ad Simoniam requiritur pactum, quale & quando?*
- 41 *Corollaria.*
- 42 *Solvitur instantia de obligatione Antidotali.*
- 43 *Simoniacum est, dare temporale tamquam motivum conferendi, vel efficiendi spirituale. Propositio damnata refertur.*
- 44 *Per gratuitam compensationem, quid intelligatur in ipsa?*
- 45 *Alia propositiones quoad propositam cavenda.*
- 46 *Unde colligendum, an quid detur vel accipiat ex pacto simoniaco, nec ne?*



47 *Pœna contra Simoniam in Jure statuta.*

*Eas non inducit Simonia mentalis,*

48 *Neque conventionalis.*

*Excepta confidentiali.*

49 *Quid, si Simonia conventionalis postmodum hinc inde compleatur?*

50 *Simoniam realis inducit pœnas Juris, quando fit in ingressu Religionis, Ordine, vel Beneficio.*

*Beneficium simoniace recipienti, quid agendum?*

51 *Dispensatio super Beneficio simoniace recepto, a quo possit dari?*

*Et qualiter sit obtinenda?*

52 *Allegata superius pœna non incurruntur, saltem non ante sententiam judicis, si committitur in aliis casibus aliqua Simonia.*

35 **Q**uæritur I. An Simonia alia sit Juris Divini, alia Juris Ecclesiastici? Resp. affirmative cum Glossa communiter recepta *c. Ex parte. 12. v. Dimittere. de Offic. & Potest. Jud. Deleg.* ubi ait: quod *quædam sunt prohibita, quia simoniaca: ut vendere Sacramenta &c. Et quædam simoniaca, quia prohibita; & sunt illa, quæ per constitutionem Ecclesiæ facta sunt simoniaca.*

36 Exemplum Simoniam Juris dumtaxat Ecclesiastici, est imprimis permutatio præbendarum, sive Beneficiorum Ecclesiasticorum, quæ si fiat pacto interveniente, ac propria auctoritate, sine interventu Episcopi, prohibetur tamquam simoniaca *c. Quasitum de Rerum permutat. & alibi: cum tamen permutate unam rem spirituales cum alia spirituali (ut sunt duo Beneficia) ex natura sua non sit simoniacum. Aliud exemplum habetur *can. Placuit; ut nullus. l. q. 1. ubi pro modico balsamo, quod benedictum pro Sacramento Baptismi datur per Ecclesias, prohibetur exigi tremillis, tamquam speciem habens Simoniam. Similiter c. Non satis & c. ea quæ, de Simonia, cavetur, ut pro Christmas & Olei receptione nulla cujusquam pretii exactio attentetur. Atque hanc non esse Simoniam Juris Divini, sed dumtaxat Ecclesiastici, patet ex eo: quia oleum vel balsamum illud, quod benedicitur, secundum se est pretio æstimabile, siquæ pro eo pretium recipi, Jure Divino aut naturali non prohibetur: ergo prohibitio illa, ob speciem Simoniam, fit solo Jure Ecclesiastico.**

37 Hinc inferitur, quod Papa quidem possit involvi crimine Simoniam, quæ est Juris Divini, vendendo v. g. Sacramenta, quia & Papa est subjectus Legi Divinæ, nihilominus in ipso non habeat locum Simonia Juris dumtaxat Ecclesiastici, qualis reperitur in iis, quæ sunt simoniaca, quia prohibita; ut notat Fagnanus *c. Cum prædem, n. 55. de Pactis. Zoësius tit. de Simonia n. 1. 26. & communis. Siquidem Summus Pontifex secundum plenitudinem potestatis de jure potest supra jus dispensare, c. Proposuit, de Concess. præbendæ. Simulque antecessor successorem suum quomodolibet non obligavit: cum non habeat imperium par in parem, prout notatur in c. Exiit. §. Ceterum. de Verb. signif. in 6. cum concordantiis.*

38 Quæritur II. Quid, & quotuplex sit pretium simoniacum? Pretium simoniacum est aliquid temporale datum pro spirituali. Et hoc in Jure Canonico vocatur *Munus*; non quidem, prout munus significat donum gratuitum, sed prout importat onus seu debitum ex obligatione. Ceterum hujusmodi Munus est triplex, videlicet Munus a manu, Munus a lingua, & Munus ab obsequio, prout patet ex dictis, & textibus *num. 20. allegatis.*

39 Per *Munus a manu* intelligitur non solum pecunia, sed etiam omnis res temporalis pretio æstimabilis *c. Totum. l. q. 3. Per Munus a lingua* intelliguntur laudes, preces, seu recommendationes apud Principem v. g. vel populum, ex pacto interponendæ pro eo vel amicis ejus, qui Beneficium vel rem spirituales cuiquam contulit, vel collaturus est: sic enim res spiritualis pacto interposito datur pro illa recommendatione, &

econtra, cum tamen ejusmodi recommendandi obligatio sit quid temporale, ac pretio æstimabile. Lessius *lib. 2. cap. 35. dubit. 20. & alii.* Et hac de causa, si detur aliquid temporale Officialibus pro præbendo dumtaxat aditu, vel Mediatori pro labore illo, quem in se suscipit in semel vel sæpius adeundo Collatorem Beneficii, aut ratione alicujus imminentis damni, v. g. periculi disgratiæ advertendi, non committi Simoniam, censent Navarrus *cap. 23. Manualis. n. 106. & Layman loc. cit. n. 65.* quia videlicet talia in se ipsis sunt pretio æstimabilia. Secus foret, si pro ipso Beneficio conferendo, vel per potentes intercessores impetrando, daretur, aut reciperetur pecunia, ut patet. Tandem per *Munus ab obsequio* intelliguntur servicia, seu obsequia temporalia cuiquam præstata, seu præstanda sub pacto, seu obligatione Beneficii Ecclesiastici collati, seu conferendi, & econtra.

40 Quæritur III. Quid censendum de pacto simoniaco? Resp. I. Certum est, ad rationem Simoniam illius, quæ habet annexas in Jure Canonico certas graves pœnas, requiri pactum expressum vel tacitum, dandi rem spirituales pro temporali, aut econtra, ita videlicet, ut dans temporale intendat alterum obligare ad reddendum spirituale, & econtra. Quamvis idcirco non negetur, posse dari Simoniam ex parte unius dumtaxat; prout patet in Simone Mago, qui solus, non autem D. Petrus, incurrit Simoniam. Idem accidere solet in Simonia mentali.

41 Inferitur proinde, si quis det honorarium alteri ad caprandam dumtaxat ejus benevolentiam, vel conciliandam amicitiam, ut postea sui memor ex benignitate sola & absque ullo pacto etiam implicito præcedente conferrat Beneficium, vel aliam rem spirituales, non committi Simoniam; quia deest pactum, & totum hinc inde gratis datur. Idem dicendum, si quis interserviat Episcopo gratis ad consequendam ejus benevolentiam, vel ut is suam scientiam atque dexteritatem perspectam habeat, siquæ citius alliciatur ad conferendum sibi Beneficium; deest enim pariter omne pactum, uti supponitur. Lessius *loc. cit. Layman cit. cap. ult. §. 2. & 33. & alii, post Glossam c. Cum essent. v. Promiserat. de Simonia.*

42 Nec obstat, quod ex talibus obsequiis, atque honorariis, priatur obligatio quædam Antidoralis; id est talis, qua dans obligat alterum naturaliter ad remunerandum ex virtute gratitudinis. Resp. enim cum Navarro *c. 23. Manualis n. 106. Lessio, & aliis, hoc non obstat; quia ad Simoniam requiritur obligatio ex Iustitia, sive ut ex pacto expresso vel tacito, detur temporale pro spirituali. At obligatio Antidoralis, seu remuneratoria solum est ex decentia & honestate, & procedit ex liberalitate; simulque ex se non determinatur ad reddendam rem spirituales, cum alia ratione remunerando possit eidem satisfieri, nec proprie est obligatio.*

43 Resp. II. Nihilominus dare temporale tamquam motivum conferendi, vel efficiendi spirituales, simoniacum est. Ratio est; tum quia, quando temporale assumitur ut motivum ejusmodi, jam æquivalenter coram Deo oblatio illa est emptio, & res temporalis est pretium, simulque per temporale paratur via ad spirituales obtinendum, prout fecit Simon Magus, sponte offerendo pecuniam ad consequendam potestatem spirituales; cui proinde dixit S. Petrus *Act. 8. Pecunia tua tecum sit in perditionem, quoniam donum Dei existimasti pecunia possideri.* Tum quia hic intervenit pactum, si non explicitum, saltem implicitum, dum ideo datur temporale, ut alter moveatur, seu tacite obligetur ad reddendum spirituales, quæ est ipsissima Simonia & quidem realis, si illud pactum vel per verba expressa, vel saltem ex circumstantiis externis manifestetur: alias vero mentalis, quamdiu intentio ista alterum sic tacite obligandi, atque movendi aliunde exterius etiam per certas circumstantias se non prodit. Hinc merito Innocentius XI. inter alias sequentem, ordine 45. Propositionem damnavit, sicut jacet:

*Dare*



*Dare temporale pro spirituali non est Simonia, quando temporale non datur tanquam pretium, sed dumtaxat tanquam motivum conferendi, vel efficiendi spirituale, vel etiam, quando temporale sit solum gratuita compensatio pro spirituali, aut econtra.*

44 Ubi circa posteriora hujus damnatæ Propositionis verba notandum cum Joanne Cardenas in *Crisi Theologica*, ad dictam Propositionem 45. num. 37. & seqq. quod per gratuitam compensationem intelligatur ea, quæ sit cum pacto, seu interveniente obligatione dandi aliquid titulo gratitudinis: ut si Patronus conferat Clerico Beneficium cum pacto, ut se gratum exhibeat, & ex gratitudine det ipsi aliquam pecuniam (prout esse licitum pascifet de dando ex gratitudine dono temporali pro spirituali, & econtra, olim fuit opinio quorundam) nam qui sic exigit titulo gratitudinis aliquid temporale, excedit limites obligationis Antidotalis, utpote quæ non determinat aliquid temporale, sed potest aliunde impleri; prout bene notat cit. Cardenas n. 46. & jam dictum est supra n. 42.

45 Quoad præsentem materiam cavendæ sunt insuper aliæ duæ Propositiones, quarum prior, ordine 22. ab Alexandro VII. damnata fuit, & sic sonat: *Non est contra iustitiam, Beneficia Ecclesiastica non conferre gratis, quia Collator conferens illa Beneficia Ecclesiastica, pecunia interveniente, non exigit illam pro collatione Beneficii, sed veluti pro emolumento temporali, quod tibi conferre non tenebatur.* Altera vero, illico sequens supra memoratam Propositionem 45. ab Innocentio XI. condemnatam, sic habet: *Et id quoque locum habet, etiamsi temporale sit principale motivum dandi spirituale: imo etiamsi sit finis ipsius rei spiritualis sic, ut illud plus æstimetur, quam res spiritualis.* Hæc utraque Propositio merito est condemnata, ut satis patet ex hæcenus dictis.

46 Resp. III. An aliquid detur, vel recipiatur ex pacto simoniaci, vel potius ex alio iusto titulo, pro Foro interno seu conscientie facile dijudicatur, utpote in quo propria cuiusque intentio seu mens inspicitur: siquidem bona intentio ponit rem extra vitium, mala vero parit Simoniam ad minimum mentalem. Zoësius tit. de *Simonia*. num. 55. loquendo vero pro Foro externo, in dubio ex circumstantiis id erit dijudicandum; & quantum ad hoc, *Tria sunt maxime attendenda, personæ scilicet dantis & accipientis qualitas, quantitas numeris & donationis tempus*, uti notatur c. *Esti quæstiones*, de *Simonia*.

47 Quæritur IV. Quænam pœnæ in Jure sint contra Simoniacos statutz? Resp. I. Diversæ quidem sunt pœnæ in Jure statutz, etiam ipso facto incurrendæ per Simoniacos, prout habetur in *Extravag. Sane. & Extravag. Cum detestabile*, de *Simonia* (nam, ut ibidem notat Pontifex, *plures penarum gravitas, quam Dei timor arcere solet a vetitis*), nihilominus nulla Simonia dumtaxat mentalis inducit ejusmodi pœnas. Ita communis, & desumitur ex cap. ult. de *Simonia*. ibi: *Pro Simonia, qua nullo pacto, sed affectu animi præcedente delinquitur, sufficit per solam penitentiam suo satisfacere Creatori.*

48 Resp. II. Insuper Simonia pure conventionalis non inducit ipso facto pœnas a Jure statutas: nam Canones statuunt pœnas in eos, qui quomodolibet dando, vel recipiendo Simoniam commiserint. *Extrav. Cum detestabile. juncta Extravag. Sane eod.* Idem probabilius dicendum de Simonia conventionali mixta (dummodo hinc excipiantur, ea quæ appellantur *Confidentialis*, seu *Confidentia beneficiorum*, propter specialem Bullam S. Pii V. *Intolerabilis* de qua num. 25.) ut notat Navarrus cap. 23. *Manualis* n. 104. Zoësius, Engel, Lessius, Covarruvias, & communior. Ratio est: quia nullibi in Jure habentur tales pœnæ clare expressæ contra Simoniam conventionalem, etiam mixtam: stante autem dubio, in *penis benignior est interpretatio facienda*. juxta Reg. 49. *Juris in 6.* cum concordantiis.

49 Fatendum tamen, quod tum Simonia conventionalis, tum etiam mentalis sit grave peccatum. Quinimo si Simonia conventionalis postmodum ex parte utriusque compleatur in totum, vel in partem, hinc dando pretium vel partem ejus, illinc vero rem spiritualement,

v. g. Beneficium Ecclesiasticum, etiam incurruntur pœnæ ipso Jure statutz contra Simoniacos, ac retrotrahuntur ad tempus pactionis præteritæ, juxta stylum antiquum Curiz Romanæ. Navarrus cit. n. 104. Lessius lib. 2. c. 35. num. & alii.

50 Resp. III. Simonia realis, quæ committitur in ingressu Religionis, in Ordine (id est, in susceptione, vel collatione Sacramenti Ordinis) vel in Beneficio Ecclesiastico, inducit ipso facto pœnas a Jure statutas. Ita communis, & habetur clare in cit. *Extravag. Sane & Extravag. Cum detestabile de Simonia*, ubi committentes hujusmodi Simoniam realem ipso facto excommunicantur, aliisque pœnis subjiunguntur, quæ ibidem enumerantur. Et præsertim cit. *Extravag. Cum detestabile*, circa committentes Simoniam in Beneficiis Ecclesiasticis statuitur, quod non solum ipso facto incurrant excommunicationem Summo Pontifici reservatam, sed insuper talis collatio, sive provisio irrita sit, nullumque jus tribuat, adeo, ut nec inde faciat aliquis fructus suos, sed ad illorum omnium, quæ percepit, restitutionem sub anima sua periculo sit adstrictus.

Quia igitur omnis collatio Beneficii, quam simoniaca contingit labe fieri, viribus omnino caret, atque exinde jus cuiuspiam nullatenus acquiritur, juxta cit. *Extravag. Cum detestabile*, hinc ille, qui Beneficium simoniace recepit, tenetur (cessante legitima dispensatione) Beneficio taliter acquisito renuntiare. Angelus *Remunatio*. n. 11. Sylvester *Simonia*. q. 13. §. *Octavum*. & alii, non tamen debet talis dimittere possessionem Beneficii, quam defacto habet, absque licentia legitimi Superioris: sed abtineat a perceptione fructuum, excepta stricta necessitate vitæ, & quærat, quam cito poterit, resignare, uti notat Angelus n. 13.

51 Additur vero, cessante legitima dispensatione. Nam inprimis, qui beneficium simplex per Simoniam ab aliis commissam ignoranter recepit, neque eandem Simoniam ratam habuit, & postquam cognita rei veritate Beneficium illud resignat, potest per Episcopum dispensari ad Beneficium illud retinendum arg. cap. *penult. de Electione*. secus, si sit Prælatum, Dignitas, vel Beneficium curatum: quia circa majora cautius est agendum; sicque Episcopus quoad ista non potest dispensare. Supple conformiter dictis in Jure Canonico lib. 5. *Decret. tit. 3. num. 337.* saltem, si obrentio talis Prælatutz &c. jam fuit etiam in Foro externo per sententiam reprobata. Glossa *fin.* & Barbosa ad cit. cap. *penult. num. 4.* Pirhing tit. de *Electione*. n. 98. & seqq. & alii. Quod si ipsemet Beneficiarius commisit Simoniam, aut eam ab aliis commissam ratam habuit, nequit Episcopus cum eo dispensare ad retinendum Beneficium ita simoniace acquisitum, sed solus Papa arg. cit. *Extravag. Cum detestabile*.

Deinde loquendo de Foro conscientie, & quando Simonia est occulta, poterit adiri Summus Pontifex vel potius Major Pœnitentiarius ipsius, & exposito rite per litteras crimine Simoniz (tacito tamen nomine Rei, prout in impetratione dispensationis super occultis impedimentis matrimonii fieri solet juxta inferius dicenda Tract. 14. Dist. 14. num. 170. & 171.) supplicari eidem, ut præter absolutionem ab excommunicatione de opportuno dispensationis, seu habilitationis remedio supplicanti providere dignetur, vi cujus idem supplicans pro Foro conscientie imposterum valeat tale Beneficium retinere, ejusque fructus percipere, & hæcenus perceptos retinere, allegatis in hunc finem veris, & rationabilibus causis, utputa periculo scandalii, aut infamiz, quæ ex dimissione Beneficii oriri posset, vel paupertate Beneficiarii &c. prout totum hoc fusius exprimitur in Jure Canonico lib. 5. *Decret. tit. 3. §. 14.* & hic Tract. 11. Dist. 1. post quæst. 5. in *Appendice*. ubi pariter invenitur, quam difficulter dispensetur cum Simoniacis similibus.

52 Dicitur notanter num. 50. quæ committitur in ingressu Religionis, Ordine, vel Beneficio Ecclesiastico. Si quidem nulla alia Simonia, etiam realis, inducit pœnas Juris ipso facto, & ante sententiam Judicis, nisi in tribus dumtaxat



dumtaxat enumeratis casibus, prout observant Lessius num. 130. Pirhing de Simonia, num. 154. Navarrus, alique communiter. Quare si quis committat Simoniam in administratione aliorum Sacramentorum, quam ordinis, vel in Consecrationibus, Benedictionibus, Dispensationibus, aut hujusmodi, graviter quidem peccabit, non tamen ipso facto incurrat pœnam excommunicationis, suspensionis, vel inhabilitatis alicujus. Ratio est; quia nullibi in Jure exprimitur pœna ipso facto incurrenda, præter tres Simonia species proxime enumeratas; quamvis c. quidquid. 1. q. 1. committens Simoniam in Baptismo, vel collatione Chrismatis, dicatur *competenti pœna, & debita excommunicatione plectendus*; atque etiam c. Qui alium & c. Sicut. & c. Ea qua de Simon. convicti de Simonia jubeantur deponi: nam hæc verba non indicant pœnam latæ, sed dumtaxat ferendæ sententiæ.

# APPENDIX X.

Ad quartam Quæstionem, continens adhuc nonnulla quæstia circa pacta, & Contractus simoniacos, ac circa restitutionem simoniace acceptorum.

## SUMMARIUM.

- \* An accipiens spirituale possit illud retinere, si rem promissam temporalem non extradat? Additio I.
- \* Quidnam sentiendum, si rem temporalem pro spirituali actu jam dedisset? Addit. II.
- \* An, & quando recipiens rem temporalem pro spirituali obligetur eandem restituere, & cui? Add. III.
- \* Resolvuntur exinde varii casus. Addit. IV.

### Additio I.

\* **Q**UÆRES I. An, qui accepit simoniace aliquod spirituale pro re temporali promissa quidem, sed nondum extradita, possit illud spirituale retinere in Foro conscientia ante sententiam Judicis? Quæsitum (quod, uti & sequentia, loquitur de acceptis spiritualibus non ex justo titulo, sed per Simoniam) præsupponit tamquam certum, omne peccatum tale simoniacum versans circa aliquod spirituale ex una, & circa rem temporalem ex altera parte esse prorsus nullum juxta clarum textum Juris cap. fin. de Pactis, nam spiritualia, & sacra in commercium civile evenire nequeunt, juxta Legem 83. §. 5. ff. de Verborum obligationibus. Unde nec simoniace promittens temporale pro spirituali, nec vicissim repromittens spirituale pro temporali obligantur ad executionem sui promissi ante actualem traditionem, quoniam nemo adstringitur ad faciendum id, quod sine proprio peccato executioni mandari nequit. Ex qua ultima ratione eruitur, quod promittens pretium temporale pro re spirituali (puta pro particula sacrae Crucis, vel pro pretiosa Cruce terræ sacrae, aut pro alia insigni Reliquia) sibi actu jam tradita, necdum obligetur alteri vicissim extradere e. g. pecuniam simoniace antea promissam; quinimo nec posset, nisi vellet omnino donare cum seria protestatione, quod nullatenus velit esse adstrictus ad dandum temporale vi præcedentis contractus simoniaci, utpote nullius valoris ex stentis, ubi tamen non raro periculum subest, ne hæc donatio potius sit palliata, quam vere gratuita. Hoc supposito adhuc dubium remanet, utrum actualiter simoniace accipiens aliquod spirituale pro re temporali promissa quidem, sed nondum tradita teneatur ad restitutionem hujus rei spiritualis actu jam receptæ, vel an eandem possit retinere; quin extradat vicissim pretium temporale promissum? ad quod

Respondeo I. In materia beneficii, si quis interveniente Simonia confidentiali adeptus est aliquod Beneficium, nequit illud retinere etiam in Foro conscientia, quamvis nullum aliud pretium alteri dedisset. Ratio

Anacl. Reiffenstuel Theolog. Tom. J.

quia in Simonia confidentiali nullitas collationis, & inhabilitas ad dictum Beneficium incurritur per solam ejusdem collationem & acceptionem absque extraditione alterius rei cujusdam temporalis, uti eruitur ex jam dictis superius.

Respondeo II. Utrum eodem modo discurrendum sit de aliis rebus spiritualibus ab altero acquisitis, non conveniunt Doctores, nec desunt, qui putant, talem rem spirituales e. g. particulam sacrae Crucis &c. retineri posse, quamvis temporale pretium, propterea per pactum Simoniacum alteri promissum, non detur vicissim, quam sententiam etiam antecederet tenuit P. Pichler; eam tamen postea in suo Candidato Jurisprudentia abbreviato lib. 5. tit. 3. n. 22. retractavit, & ad restituendam iterum rem spirituales adstrinxit ex hac, meo judicio, valde efficaci ratione; quia dans spirituale tamquam habens dominium, seu jus ad illud absolute non tenebatur ex una parte id alteri dare: ex altera vero tribuens alteri, huic non dedit animo donandi, sed sub conditione (quamvis illicita, & simoniaca) ut recipiat vicissim temporale, sicque ejus voluntas transferendi in alterum, non verificata conditione, fuit inefficax. Nec dicatur, illam conditionem tamquam turpem esse habendam pro non adjecta; Respondetur enim negando illatum, cum id non procedat illimitate in omni materia, sed solum statuatur in Jure quoad Testamentum, Matrimonium, & Religiosam Professionem, vel tandem, ubi quis aliunde absolute ad alteri dandum jam obligatus existit; uti sic adstringitur Parochus sufficienter provisos pauperibus ægrotis Sacramenta gratis conferre, & Eleemosynarius pauperibus dare Eleemosynam sibi a Domino commissam; non autem in nostro casu dans rem spirituales e. g. sacras pretiosas Reliquias: quamvis enim etiam in hoc supposito, si in alterum hanc rem spirituales transferat, debeat qua talem gratis dare; absolute tamen loquendo NB. non tenetur eandem in alterum transferre &c. quod bene notandum, ut variis tacite præveniatur objectionibus. Vide de oppositione conditionum Tract. 8. Dist. 1. q. 1. post num. 12. \*

### Additio II.

\* **Q**UÆRES II. An saltem ille, qui pro spirituali accepto vicissim simoniace jam actualiter extradidit rem temporalem promissam, valeat obtentum spirituale retinere? Respondeo I. Quoad Beneficia negative. Ratio est: quia per mutuam illam traditionem completur Simonia realis, quæ collationem Beneficii facit nullam, & recipientem ad dictum Beneficium inhabilem, consequenter obligat ad dimittendum Beneficium, & fructus extantes, quos juxta Extravag. Detestabilis inter Communes de Simonia. non fecit suos, pari modo uti Beneficiatus intermittens Horas Canonicas. Excipe tamen, si quis invincibiliter ignorasset, talem contractum (puta per Tertium, ipso invincibiliter ignorante, institutum) esse simoniacam, in quo ultimo casu posset titulo præscriptionis post triennium juxta valde probabilem sententiam Beneficium cum fructibus retinere vi Regulæ Cancellariæ de possessione triennali Beneficii. De quo vide partim Tract. 11. Dist. 1. post num. 80. in Appendice partim in Jure Canonico lib. 5. Decret. tit. 3. §. 13. num. 320. ac seqq.

Respondeo II. Loquendo quoad alia spiritualia possunt ea tuta conscientia ante sententiam Judicis condemnatoriam retineri. Ita communis, & ratio est; quia in tali casu accipiens pretium temporale actualiter pro re spirituali absolute, quamvis illicite transulisse præsumitur, nisi expresse excipiat, jus rei spiritualis in priorem ex una parte, & ex altera talem translationem nullum Jus ipso facto irritavit: ergo. Putat tamen P. Pichler lib. 5. Tit. 3. n. 63. si alter pœnitentia ductus restitueret præcedenti pretium, & repeteret iterum suam rem spirituales, ipsi eandem quoque esse restituendam. \*

M

Additio.



## Additio III.

\* Quæres III. An, & quando reciproce recipiens simoniace quoddam temporale pro spirituali possit illud temporale e. g. pecuniam retinere? & quando teneatur restituere memoratum temporale pretium? Respondeo I. Loquendo de receptis propter collationem Beneficiorum, sicut institutus, electus, vel præsentatus simoniace nequit ipsum Beneficium, sic nec propter illam institutionem, collationem, electionem, vel præsentationem simoniace accipiens pecuniam poterit retinere illam, sed tenetur restituere, & quidem post sententiam Judicis huic Ecclesiæ, in qua alter simoniace obtinuit Beneficium; ante sententiam vero probabiliter illi, a quo dictam pecuniam recepit. Ita partim clare colligitur *cap. De hos. de Simonia.* partim fusius declaratur in *Jure Canonico lib. 5. Decret. Tit. 3. §. 12. n. 295. & 296. Item §. 13. n. 326. 327. & 328.* Ubi adjungitur, *posse talem excusari a restitutione titulo præscriptionis*, si nimirum in recipiendo bona fide processit, & requisito ad præscriptionem debito tempore possessionem hujus rei temporalis continuavit; quo tamen casu, si ignorantia Juris intervenisset, quamvis invincibilis, quoad tempus præscriptionis reflectendum videtur ad dicta *Tract. 7. Dist. 6. q. 2. Addit. 1. post n. 10.*

Respondeo II. Loquendo de aliis temporalibus simoniace propter spiritualia receptis, distinctio est facienda, an recipiens pretium temporale peccaverit præcise contra virtutem Religionis, vel an etiam contra virtutem Justitiæ? si prius, acceptum illud temporale retinere potest ante sententiam Judicis commendatoriam. Ratio hujus est: quia aliæ virtutes extra Justitiam non obligant ad restitutionem rei acceptæ. Secus dicendum, si peccasset contra virtutem Justitiæ commutativæ; nam per se ex tractatu de Justitia notum jam est, ex læsione virtutis justitiæ commutativæ exsurgere obligationem restituendi. Censetur autem peccari contra virtutem hujus justitiæ dupliciter. *In primis*, si aliquod temporale absque alio legitimo titulo accipiat pro illa re spirituali, quæ vel nullum, vel saltem non proportionatum commodum temporale conjunctum habet, uti sunt SS. Reliquiæ, particulæ S. Crucis &c. *Secundo*, si accipiat pretium temporale pro eo spirituali, quod equidem commodum temporale habet conjunctum; interim tamen dans aliunde jam obligatus est illud alicui alteri tribuere, & quidem gratis, prout taliter tenetur Episcopus conferre Beneficia vacantia. \*

## Additio IV.

\* Ex hac duplici Responsione ultimi quæsti plures resolviri possunt Casus. *Primo*, qui accepit pretium temporale pro Rosario terræ sanctæ, atque in ea receptione excessit æstimationem, quæ habetur ratione materiæ & expensarum, alias desuper in itinere fieri solitarum, tenetur illum excessum exigenti restituere. Ratio est: quia spiritualitas Rosarii ratione Indulgentiarum, & attractus ad loca sancta nequit venire in commercium temporale, sicque petens pretium temporale ob rem, quæ nullam temporalem utilitatem habet annexam, non solum contra Religionem, verum etiam peccat contra Justitiam.

*Secundo*. Ex eodem fundamento pariformiter sentiendum de pretio temporali simoniace comparato propter particulam S. Crucis vel ob insignes Reliquias, aut Statuam aliquam Beatissimæ Virginis miraculosam; nam etiam tunc peccatur contra justitiam, & res temporalis est obnoxia restitutioni. Quod si quis tamen venderet Imaginem miraculosam cariori pretio ex eo, quia se privat lucro temporali notabili, alias ob magnum ad hanc imaginem confluum hominum sibi quoad distracta esculenta, & poculenta obveniente, non peccaretur contra justitiam commutativam, si pretium respectu lucri cessantis foret proportionatum; sicque nec teneretur talis ad restitutionem, uti adver-

tunt Suarez, & Pirhing apud Schmalzgrueber *lib. 5. Decret. Tit. 3. num. 290.*

*Tertio*. Similiter ad restitutionem obligatur Episcopus, vel alius Prælatus Ecclesiasticus, si vendat Beneficia Ecclesiastica, quorum collatio ad ipsum pertinet vi sui officii: nam quamvis hæc Beneficia habeant annexam aliquam utilitatem temporalem, ad quam venditor respicere videtur, deberet tamen vi officii sui talis Prælatus Ecclesiasticus eadem aliis conferre, & quidem gratis, & consequenter obligatur ad restitutionem, si non faciat, utpote peccans contra justitiam. *Nec dicatur*, talem quidem obligari indeterminate alicui conferre similia Beneficia, sed non huic determinato, adeoque, si liberrime unum præ alio seligat, posse pro ista determinatione ab illo citra læsionem justitiæ accipi pecuniam: nam *contra est*, quod hæc ipsa assertio sit damnata ab Alexandro VII. Propositione 22. quæ sic sonabat: *Non est contra justitiam Beneficia Ecclesiastica non conferre gratis, quia Collator conferens illa Beneficia interveniente pecunia non exigit illam pro collatione Beneficii, sed veluti pro emolumento temporali, quod tibi conferre non tenebatur.*

*Quarto*. Econtra excusatur a restitutione acceptorum Monasterium, quod propter ingressum, vel admissionem ad S. Professionem a Candidatis accepit certam summam pecuniariam. Nam vel has pecunias recepit titulo *sustentationis, dotis*, aut titulo *legitimæ*, (puta facta ceteroquin renuntiatione ad hæreditatem in futurum) vel præcise acquisivit intuitu ingressus, & admissionis ad S. Professionem? si prius, potuit id cum certo moderamine omnino licite fieri conformiter fundatæ doctrinæ Patris Pichler in Candidato abbreviato Jurisprudentiæ *lib. 5. Tit. 3. n. 16. & 17.* si vero posterius: equidem ob malam hinc intentionem, & pactum receptio ista fuit simoniaca; præcise tamen contra virtutem Religionis, non justitiæ commutativæ, sicque nec restitutioni obnoxia, nisi fuerit Monasterium valde opulentum, simulque NB. ad certum numerum suorum restrictum, quos ea fundatione aliisque mediis, sufficientissime ad hunc ipsum finem præscriptis, sustentare obligatur: tunc enim faceret injuriam aspirantibus, si nihilominus ab ipsis sub palliato titulo *sustentationis*, re ipsa autem conformiter *cap. 40. de Simonia* per pactum simoniacum saltem implicitum pecunias extorqueret, sicque propter injuriam contra justitiam illatam non posset tales pecunias retinere *de per se loquendo*, & nisi Summus Pontifex *Extravag. Sane. Inter communes de Simonia.* gratiose saltem cum Monialibus dispensasset, ut dictæ pecuniæ (exempli gratia titulo pastus, vel etiam titulo honorariorum, seu jocalium &c.) interveniente pacto simoniaco receptæ communitati Monasterii tamquam causæ piæ applicari valeant. Videantur Jus Canonicum (nimirum hujus Auctoris Patris Reiffersuel) *lib. 5. Tit. 3. n. 298. & seqq.* Schmalzgrueber *lib. 5. Tit. eodem n. 289.* Et Pichler ibidem in suo Candidato abbreviato Jurisprudentiæ *num. 16. & 17.*

## QUESTIO II.

## De Blasphemia.

## SUMMARIUM.

53 Blasphemia vi nominis, quid?

54 Ejus definitio.

Quæ declaratur.

55 Datur Blasphemia in Deum, & Sanctos.

56 Blasphemia dividitur in hæreticalem, & non hæreticalem.

57 Estque ex genere suo peccatum mortale.

Nec admittit parvitatem materiæ.

58 Peccata verborum maxime sunt ex intentione dicentis judicanda.

59 Corollaria.

60 Ex ira dicere: Corpus Dei, Chrisma, Sacramenta &c. quale peccatum?

61 Quid



61 Quid de nonnullis aliis verbis?

62 An omnes Blasphemiae sint ejusdem speciei?

63 Quid de Blasphemia in Deum, & Sanctos?

64 Sententia opposita non caret sua probabilitate.

\* Quidnam practice agendum Confessariis cum penitentibus Blasphemis?

53 **B**lasphemia est nomen græcum, & juxta nominis ethymologiam idem est, ac *Nocens dictum*; unde & Maledictioni, Convitio, atque Contumeliæ convenire potest: communiter tamen sumitur pro verbo contumelioso in Deum. Et hoc annotavit D. Augustinus lib. 2. *De moribus Manichæorum cap. 11.* dicens: *est autem Blasphemia cum aliqua mala dicuntur de bonis. Itaque jam vulgo Blasphemia non accipitur, nisi mala verba de Deo dicere: de hominibus namque dubitari potest, Deus autem sine controversia bonus est.* Hæc ille. Et de tali Blasphemia loquendo, sit

54 **CONCL. I.** Blasphemia est contumeliosa in Deum locutio: five (ut alii loquuntur) Blasphemia est verbum maledictionis, convitii, five contumeliæ in Deum. Ita in re communis. Unde patet, quod Blasphemia immediate opponatur Laudi Dei.

Dicitur *locutio contumeliosa*. Quia Blasphemia consistit præcipue in verbis irreverentibus injuriis, & Divinum Nomen seu honorem lædentibus, etsi aliquando etiam committatur ipsis factis, ut puta si Deus contumelioso signo vituperetur, ut expuendo in cælum, aut hujusmodi. Datur insuper Blasphemia cordis, seu interna, non minus, ac dari solet Laus interna Dei: circa quam nihilominus bene attendendum est, num adfuerit plena advertentia & consensus, vel potius dumtaxat sint cogitationes blasphemæ incidentales, & involuntariæ: hæc enim peccatum non sunt, aut saltem non grave defectu voluntarii, plenæque deliberationis.

55 Dicitur ulterius, *contumeliosa in Deum*. Quia, ut notat D. Thomas 2. 2. q. 53. art. 1. Blasphemia est peccatum, quo quis ex pravo cordis affectu de excellentia Divinæ Bonitatis detrahit, illique contumeliæ infert, vel negando aliquid, quod ipsi proprium est, vel aliquid imponendo, quod ei minime convenit. Ceterum per hoc non negatur, dari etiam Blasphemiam in Beatissimam Virginem MARIAM, aliosque Sanctos: etenim, sicut Deus laudatur & honoratur in suis Sanctis, horumque gloria redundat in Deum, sic etiam Blasphemia erga Divam Virginem, & Sanctos redundat in ipsum Deum.

56 **CONCL. II.** Blasphemia inter alias divisiones suas præcipue dividitur in hæreticalem, & non hæreticalem seu simplicem. Blasphemia hæreticalis est illa, quæ Articulis Fidei directe opponitur: seu, quæ aliquid asseritur Fidei contrarium per verbum indicativi modi: ut si quis dicat: *Deus est crudelis, injustus, mendax, infidus, qui res hominum non curat*; vel si quis dicat: *o Deum injustum!* aut *abnego Deum* &c. Blasphemia simplex, seu non hæreticalis dicitur, quæ Articulis Fidei directe non opponitur, sed aliquid vituperabile per modum detestationis, & quasi imprecationis in Deum profert: ut si quis Deo maledicat, aut optet, non esse Deum.

57 **CONCL. III.** Blasphemia ex genere suo est peccatum mortale, estque lethalis culpa, quoties cum perfecta advertentia verba Blasphemæ proferuntur. Ita communis: siquidem Blasphemia gravem infert Deo injuriam. Quinimo notant Doctores, Blasphemiam ratione parvitas materiæ non posse fieri peccatum veniale (in ipsa enim non datur parvitas materiæ, cum omnis Blasphemia gravem injuriam Deo inferre videatur) sed tantum ex indeliberatione, & inadvertentia actus posse quandoque Blasphemiam fieri veniale peccatum.

58 Circa quod bene notanda est doctrina, quam tradit Doctor Angelicus 2. 2. q. 73. art. 2. quod *peccata verborum maxime sunt ex intentione dicentis dijudicanda*. Hæc quippe doctrina etiam locum habet in verbis Blasphemiam sonantibus, vel non sonantibus; quibuscumque enim verbis utaris, non eris reus Blasphemæ in Foro Dei, si absit omnis tam indirecta seu

Anacl. Reiffenstuel. Theol. Tom. I.

virtualis, quam directa seu formalis intentio inhonorandi Deum: & contra coram Deo judicaberis Blasphemus, etiamsi sanctissimis verbis inhonores ex intentione Creatorem tuum. In Foro autem externo præsumitur quis eo sensu locutus, quem verba ex communi usu loquendi indicant: Unde D. Gregorius lib. 26. *Moral. c. 7.* relatus *can. Humana 22 q. 5.* sic inquit: *Humana aures verba nostra talia judicant, qualia foris sonant: Divina vero judicia talia ea audiunt, qualia ex intimis proferuntur.* Hinc

59 Inferitur I. Si quis verba Blasphemæ proferat animo nec actualiter, nec virtualiter advertente, puta in ebrietate, non esset Blasphemiam proprie dictam, sed tantum materialem. Additur notanter, *animo nec actualiter, nec virtualiter advertente*: quia licet non possit esse malitia peccati Blasphemæ, nisi homo actualiter vel virtualiter intelligat, seu advertat ad verba, quæ ore profert; sufficit tamen ad hoc indirecta, & virtualis attentio, & intentio. Unde si quis scienter ac serio loquatur verba, quæ ex propria significatione, modo proferendi, aliisque circumstantiis Divini honoris diminutionem continent, quamvis homo eam directe non intendat, adhuc tamen committit Blasphemiam: sicut a pari ad peccatum detractionis, vel contumeliæ erga hominem non requiritur formale nocendi propositum, sed sufficit virtuale. Layman lib. 4. tract. 10. cap. 6. n. 2. 6. & 7. ac alii.

60 Inferitur II. cum Sanchez lib. 2. 2. in *Decal. cap. 32.* Laymano, Cajetano, Navarro, & aliis, non esse proprie Blasphemiam, quando quis in ira, vel rixa cum aliqua enuntiat quidpiam de Deo, quod verum est, ut puta ex indignatione dicendo: *Corpus Dei, Chrisma, Sacramenta* &c. Quia etsi irreverenter dicantur, non tamen proferuntur per modum contumeliæ, vel injuriæ Dei irrogatæ, nec aliud falsum Deo tribuunt, sicque plerumque non sunt peccata mortalia: dummodo affectus illi indignationis, & iræ non tendat in Deum, sed tantum contra hominem, vel jumentum, cui aliquis irascitur; quod ex modo dicendi, aliisque circumstantiis erit discernendum. Verum hoc non obstante, ejusmodi verba sacra temere & irreverenter proferre in ira, est peccatum cujusdam Irreligiositatis, sed tantum veniale, ut ajunt Sanchez, Cajetanus, Armilla, & alii: quamvis ob scandalum, vel periculum formaliter blasphemandi mortale fieri possit, ideoque homines a tali Irreligiositate, & apparente Blasphemia merito absterrendi sint.

61 Hoc autem intellige, si ejusmodi verba secundum se Divini honoris diminutionem nullam exprimant: nam si verba talia, aut tali modo proferantur, ut contumeliæ Dei, aut Sacramentorum significant: videlicet: *Gantz Timmen Sacrament, gantz Galle Sacrament, Gotts hundred tausend Sternen Sacrament, das dich Gottes Chrisam schende* (ut exemplificat, & docet Layman loc. cit. n. 12. & post eum Gobat tract. 11. *Theolog. Experiment. n. 739.* cum aliis) censeri debent Blasphemæ, dummodo homo attenderit ad vilipensionem Dei, aut rei sacræ, quæ talibus verbis exprimitur. Sæpe autem homines ejusmodi verba blasphemia proferunt inadvertenter, & materialiter tantum, non attendendo quid significant: tum vero excusantur a peccato mortali, dummodo interim conentur perversam ejusmodi consuetudinem deponere.

62 Quæres I. An omnia peccata Blasphemæ sint ejusdem speciei? Resp. I. Blasphemia hæreticalis specie distinguitur a simplici Blasphemia. Ita certa, & communis. Ratio est: quia illa opponitur etiam Fidei, hæc autem Religioni tantum, quæ duæ virtutes sunt, specie diversæ.

63 Resp. II. Probabilius est, etiam Blasphemiam in Deum, & Blasphemiam in Sanctos specie distingui. Ita Maltorius disp. 11. *Theol. Moral. n. 46.* post Caspensem, & alios, contra Sanchez cit. cap. 33. n. 38. Cajetanum, Bonacinam, Azorium, aliosque. Ratio daræ



responsionis est: quia cultus Deo debitus est Patriæ; cultus vero Beatissimæ Virgini MARIÆ, & Sanctis debitus, Hyperdulæ, vel Dulæ: atqui hi cultus specie differunt; ergo etiam Blasphemia in Deum, & Blasphemia in Sanctos specie differunt, cum opponantur ejusmodi diverso cultui, Deo & Sanctis debito.

64 Ceterum quia opposita sententia, asserens Blasphemias in Deum & Sanctos esse ejusdem speciei, eo quod opponantur eidem virtuti Religionis, quæ tribuit cultum Deo, & Sanctis propter DEUM (non obstante, quod hic cultus sit diversus ab illo) multorum Doctorum existit, neque caret sua probabilitate: hinc ipsa nonnumquam Confessariis deservire poterit, præsertim quoad Pœnitentes, hanc diversitatem ultro non exprimentes.

Additio.

\*Quæres II. Quomodo ergo practice agendum sit quoad Pœnitentes, qui confitentur, se blasphemasse? Resp. Eisdem I. esse interrogandos, an deliberate vel indeliberate fecerint? nam si ex mera præcipitancia (prout sæpe contingit, quando super homines vel jumenta indignantur) non considerando perfecte malitiam actus blasphemassent, ab ulterioribus interrogationibus omnino supersedere potest Confessarius: tenentur tamen etiam tales. si in blasphemando jam contraxissent habitum, haud dubie impendere diligentiam, ut iterum desuescant. Quod si vero Pœnitentes

reponerent (prout frequenter audies) fuisse factum ex ira, urgendi sunt; num sub ira saltem in confuso recogitaverint de gravi offensa, nec ne? Et profecto, si aliquo modo longius tales Blasphemias, præsertim notabiliores protraxerint, in dubio præsumendi sunt blasphemasse deliberate. II. Postquam Confessarius ex prima interrogatione cognovit, blasphemias fuisse deliberate, ac serio animo prolatas, instet ulterius, quibus verbis blasphemaverint? nam homines maxime plebei solent sæpius hæc tria confundere, *Blasphemare, imprecari, & jurare*; Germanice *Schelten, fluechen, Schwören*, quæ tamen specie omnino differunt, ut recte advertit Sporer hic. Item ex hoc ipso responso Pœnitentium eruet Confessarius, num forsitan simpliciter Sacramenta protulerint e. g. dicendo Germanice *Sacrament*, aut *Gottes Sacrament*, quæ verba absente scandalo peccatum veniale non excederent, & potius ad Irreligiositatem, quam ad Blasphemiam reducerentur; vel num etiam veras Blasphemias effuderint? Quando in notitiam veræ alicujus Blasphemie devenerit Confessarius, III. Indaget de numero, quoties interpolatis vicibus deliberate contigerit? Hoc sibi etiam notet Confessarius, quod Blasphemie, quæ effutuntur v. g. desperantibus ex maligno affectu seu indignatione erga ipsum Deum, sint quidem respective in Germania rariores, ast tamen periculosiores, quam si effunderentur ex indignatione erga homines, vel jumenta, uti & graviores, ac subinde Hæreticales.



## T R A C T A T U S V I.

### DE HORIS CANONICIS, JURAMENTO, ET VOTO.

1 **I**Nter alios Religionis actus connumerari Juramentum & Votum, superius (a) jam dictum est; verum de ipsis merito seorsum agitur, tum ob copiosiorum, quam continent, materiam, specialesque difficultates, tum majoris claritatis gratia. Quia vero Horæ Canonicae comprehenduntur sub Oratione, uno ex primariis actibus virtutis Religionis, prius de eisdem sub propria distinctione dicendum erit.

#### D I S T I N C T I O I.

De Horis Canonicis.

#### Q U Æ S T I O I.

Quid sint, & quo Jure obligent Horæ Canonicae?

#### S U M M A R I U M.

- 1 Ratio Ordinis.  
(a) Tract. 5. dist. I. n. 10.
- 2 Horæ Canonicae, quæ?  
Dicuntur Officium Ecclesiasticum, & Divinum.
- 3 Officium Ecclesiasticum, Nocturnum, & Diurnum, quid? Laudes an possint separari a Matutino?
- 4 Officium totum constat septem Horis Canonicis.  
Mystica ratio hujus septenarii numeri.
- 5 Usus Horarum Canonicarum jam a tempore Apostolorum.
- 6 Eas non primitus instituit S. Gelasius I.
- 7 Obligatio recitandi Horas Canonicas non est Juris Divini, sed Ecclesiastici.
- 8 Solvitur obiectio.
- 9 Nova instantia de Clericis Beneficiariis proponitur.
- 10 Ea diluitur ostendendo, quod etiam Clerici Beneficarii solo Jure Ecclesiastico teneantur ad Horas.

2 **C**ONCL. I. Nomine Horarum Canonicarum intelliguntur ex preces vocales, quæ ex præcepto Sacrorum Canonum ab Ecclesiasticis personis nomine Ecclesiæ DEO persolvuntur. Et hujusmodi Horæ Canonicae continentur in Breviario, atque alio nomine appellantur Officium Ecclesiasticum, item Officium Divinum: de quo Seraphicus Doctor S. Bonaventura in Speculo Novit. part. 1. cap. 16. verissime dixit: *Nemo Dei se asimet servum, si Dei potissimam negligat servitutem, quæ appropriato vocabulo Dei servitium (Officium Divinum) nuncupatur.*

3 Porro totum Officium Ecclesiasticum dividitur in Diurnum, & Nocturnum; sicut colligitur ex Jure Canonico cap. Dolentes de Celebrat. Missarum ibi: *Distincte precipientes in virtute obedientie, ut Divinum Officium, nocturnum pariter & diurnum, quantum Deus eis dederit, studiose celebrent pariter & devote.* Ubi per Nocturnum Officium intelligitur id, quod de nocte dici consuevit, & vulgo Matutinum nuncupatur, cui juxta morem Ecclesiæ Romanæ Laudes adjunguntur, etsi hæc olim in multis Ecclesiis fuerint a Matutino, intempesta nocte (uti nunc multi Religiosi Ordines etiamnum faciunt) persoluto separata; quemadmodum & defacto in nocte Nativitatis Domini fieri solet. Ad cujus imitationem, inquit Layman lib. 4. tract. 1. cap. 2. cum aliis, neque hodie quidquam obstat, quo minus in privata Oratione preces Nocturnæ a Laudibus separentur; quamvis in publico Choro cujusque Ecclesiæ consuetudo sit servanda. Per Officium Diurnum econtra intelliguntur ceteræ Horæ Canonicae, quæ die sunt persolvendæ.

4 Hoc totum Officium Divinum communiter septem partibus, seu Horis Canonicis constare dicitur, juxta illud Psalmistæ Ps. 118. *Septies in die laudem dixi tibi. Qui septenarius numerus* (subjungit Concilium Agathense, relatum c. 1. de Celebrat. Miss.) *a nobis impletur; si Matutini, Primæ, Tertiæ, Sextæ, Nonæ, Vesperæ, & Completorii tempore nostræ servitutis officia persolvamus: nam de Nocturnis vigiliis idem ipse Propheta ait: Media nocte surgebam ad confitendum tibi.*  
Hæc



Hæc ibi. Accedit etiam mystica ratio hujus septenarii numeri Horarum Canoniarum: septem quippe sunt dona Spiritus Sancti, septem diebus completa fuit creatio mundi, septem sunt mundi ætates, septem petitiones Orationis Dominicæ, septem Psalmi Poenitentiales, ac præsertim septem præcipua Dominicæ Passionis Mytheria, in quorum proinde commemorationem septem Horæ Canonicae recitantur, juxta illos vulgatos versiculos, a Glossa cap. I. de Celebrat. Miss. relatos.

*Hæc sunt, septenis propter quæ psallimus Horis,  
Matutina ligat Christum, qui crimina purgat.  
Prima replet spiritus: causam dat Tertia mortis.  
Sexta Cruci nectit: latus ejus Nona bipertit.  
Vespera deponit: tumultu Completa reponit.*

5 CONCL. II. Usus Officii Divini, ac recitatio Horarum Canoniarum est antiquissimus in Ecclesia, & jam a tempore Apostolorum inchoatus, atque celebratus. Ita Doctores communiter, & colligitur ex illo Actorum 3. Petrus & Joannes ascendebant in templum ad horam orationis nonam. Et Actor. 16. Media nocte Paulus & Silas orantes laudabant Deum. Item Actor. 10. Ascendit Petrus in superiora, ut oraret circa horam sextam. Accedit illud Clementis Papæ I. lib. 8. Constit. Apost. can. 34. sic dicentis: Precationes facite mane, hora tertia, sexta, & nona, & vespere, atque ad Galli cantum.

6 Nec obstat, quod aliqui asserant, a Gelasio I. vel S. Gregorio Magno Horas Canonicas cœpisse. Id siquidem non recte dici, patet ex proxime allatis auctoritatibus tum S. Scripturæ: tum S. Clementis Papæ I. qui S. Petri Apostoli Discipulus extitit. & Fortassis tamen (inquit Azorius Tom. 1. lib. 10. cap. 1. Filliucius) Gelasius Papa legem publicam constituit, qua Clerici preces Canonicas septies in die persolvere cogerentur; ita, ut, quod antea usu & consuetudine antiqua servabatur, lege deinde lata fuerit confirmatum, ac perpetuo in Ecclesia servari præceptum: eo ferme modo, quo S. Callistus Papa I. constituit Quatuor anni Tempora, quibus jejunium ex Apostolica Traditione acceptum ab omnibus servaretur; ut habetur in ejusdem Felto, die 14. Octobris, ac refertur can. 1. dist. 76. Certe S. Gregorius Magnus Ecclesiasticum Officium auxisse legitur in sua Vita, & per consequens illud primus non instituit, sed antea jam institutum augmentavit.

7 CONCL. III. Obligatio recitandi septem Horas Canonicas non est Juris Divini, sed solum Ecclesiastici. Ita Sannig. dist. 2. de Horis Canonis num. 5. Azorius, & alii, contra Abbatem in cap. 1. de Celebrat. Miss. & alios nonnullos, volentes esse Juris Divini. Ratio est: quia nullibi habetur expressum præceptum Divinum recitandi septem Horas Canonicas in S. Scriptura, sed hic mos primum ab Apostolis tamquam Ecclesiæ Prælati, ac Rectoribus incepit; qui postmodum a Successoribus Romanis Pontificibus expressius fuit præceptus.

8 Nec dicas cum opposita sententia Psal. 118. dixit Regius Psalter: Septies in die laudem dixi tibi; ergo hoc est Juris Divini. Resp. enim negando consequentiam: nam hinc quidem factum Regis Davidis habetur, non autem aliquod jus constituitur: alioquin non tantum Clerici, sed vel maxime Reges obligarentur ad recitandum septem Horas Canonicas, quod nemo dixerit. Verum quidem est, quod Ecclesia hoc Davidico exemplo cœlitus instructa ad imitationem ipsius legem sanciverit, ut Clerici septem Horas Canonicas persolverent; inde tamen non sequitur, id esse Juris Divini. Nisi velimus Jus Divinum nimis late sumere pro omni eo, quod habetur in S. Litteris, ac ex eis derivatur: quo modo auctores oppositæ sententiæ videntur impræsentiarum Jus Divinum accipere, latius tamen, quam par est.

9 Urgebis autem, Clerici sunt in sortem Domini Anach. Reiffenstuel Theol. Tom. I.

vocati; atque ideo Clerici dicti, ut habetur can. Duo sunt. 12. quæst. 1. Item Clerici percipiunt Decimas, proventus Ecclesiasticos, redditus annuos Beneficiorum, aliasque eleemosynas a Laicis, ut pro ipsis Deum precentur: ergo Jure Divino, quin & naturali tenentur ad recitandas Horas Canonicas. Probatur consequentia: quia, qui de Altari vivit, Altari inservire tenetur, atque, ut dicitur cap. ult. de Rescriptis in 6. Beneficium Ecclesiasticum datur propter officium, simulque lex Justitiæ, vel saltem Gratiitudinis postulat, ut Clerici pro Fundatoribus atque Benefactoribus, quorum eleemosyna sustentantur, Deum precentur. Ob has, aliasque similes rationes, loquendo de Clericis Beneficiariis, multi Auctores, nominatim Abbas cap. 1. de Celebrat. Missarum Navarrus cap. 7. de Oratione num. 3. Zabarella, Rosella, Tabiena, Armilla, aliique sentiunt, hujusmodi Clericos Beneficiarios etiam Jure Divino, imo & naturali, urgente nimirum lege Justitiæ, & non tantum Jure Ecclesiastico, teneri ad recitandas Horas Canonicas. Hoc tamen non obstante, fit

10 CONCL. IV. Etiam Clerici Beneficarii solo Ecclesiæ præcepto tenentur ad recitandas septem Horas Canonicas. Ita Sylvester v. Hora quæst. 8. dicto 9. Azorius lib. 10. cap. 4. quæst. 13. & alii. Ratio est: quia etsi Clericus Beneficiarius debeat servire Ecclesiæ, atque pro benefactoribus, ipsique Fundatoribus de Jure naturali, id est, lege Justitiæ, & Gratiitudinis, Deum deprecari; inde tamen continuo non sequitur, hoc fieri debere recitando septem Horas Canonicas. Ratio hujus est: quia dantur alia servitia spiritualia Clericis Beneficiariis præscripta, quæ Ecclesiæ servire debent, possetque dictæ obligationi naturali abunde satisfieri, si qualescumque preces ad Deum pro benefactoribus, atque Fundatoribus Beneficiorum persolverent; ergo obligatio determinate recitandi septem Horas Canonicas non est de Jure naturali ac Divino, & consequenter solum de Jure Ecclesiastico. Et per hoc patet ad rationes oppositæ sententiæ, quæ solum probant, aliqua servitia Ecclesiastica, precesque a Clericis Beneficiariis esse persolvendas Jure naturali; non autem determinate septem Horas Canonicas, nisi accedente primum præcepto Ecclesiastico.

## QUESTIO II.

Quinam teneantur recitare Horas Canonicas?

### SUMMARIUM.

- 11 Triâ genera hominum de quibus procedit Quæstio.
- 12 Clerici in Sacris constituti tenentur recitare Horas Canonicas.
- 13 Subdiaconus tenetur eas dicere jam primo die, quo ordinatur, & quas?
- 14 Clerici in Sacris, etsi sint excommunicati, suspensi &c. tenentur recitare Horas.
- 15 Excommunicati tamen non debent dicere, Dominus vobiscum.
- 16 Clerici non Beneficarii Minoristæ non tenentur ad Horas.
- 17 Sola Professio Religiosa non inducit obligationem recitandi Horas.
- 18 Religiosi quinam, & unde teneantur recitare Horas Canonicas?
- \* Occurritur Objectioni.
- 19 Novitii, an sub culpa teneantur recitare Horas?
- 20 Quid de Societate JESU, & nonnullis Monasteriis Monialium?
- 21 Quanta sit obligatio Religiosorum persolvendi Horas Canonicas in Choro?
- \* Quot debeant in Choro esse præsentis?
- 22 Quid de Religioso Clerico, ad statum Laicalem translato?
- 23 Quid de Clerico Professo, sed ejecto ex Monasterio?
- 24 Clerici Beneficarii, qui?

(b) Tract. II. dist. 1. quæst. 1.

M 3

25 Clerici



25 Clerici Beneficarii obligantur ad Horas Canonicas.

26 Quibusdam tamen exceptis.

**T**ria sunt genera hominum, de quibus præfens Quæstio movetur: nam alii sunt Clerici non Beneficarii, alii Beneficarii, & alii Religiosi, & hi sive sint suspensi, excommunicati, degradati, aut Religiosi ex ordine electi, sive non. De quibus omnibus per sequentes Conclusiones sigillatim dicendum.

12 CONCL. I. Clerici omnes in Ordinibus sacris constituti, licet nullum Beneficium Ecclesiasticum habeant, ad recitandas Horas Canonicas sub culpa mortali sunt obligati. Ita omnes Doctores; idque loquendo de Sacerdotibus clare habetur in Jure Canonico c. *Presbyt. & c. Dolentes de Celebrat. Missarum*. Loquendo autem de Diaconis, & Subdiaconis, utpote de quibus citati Canones expresse non loquuntur, dicta obligatio fundatur, atque desumitur ex generali ac immemorabili consuetudine Ecclesiæ: nam consuetudo legitime præscripta habet vim legis, simulque ea est optima legum interpretis c. *Cum dilectus de Consuet.*

13 Et notandum cum communi Doctorum, quod initiatus sacro Subdiaconatus Ordine teneatur jam primo die, quod Ordinem istum sacrum recepit, Officium Divinum persolvere: quamvis primo illo die nondum teneatur totum illius diei Officium dicere, sed obligetur solum ad eas Horas Canonicas recitandas, quæ correspondent tempori illius diei, quo ordinatus fuit, licque obligationem recitandi contraxit; puta, ut incipiat a Sexta vel Nona, si illo tempore fuit ordinatus in Subdiaconum. Layman lib. 4. tract. 1. cap. 6. n. 3. & communis. Notant insuper Doctores, talem non satisfacere præcepto, suæque obligationi, si recitet Horas illas Canonicas ante Ordinationem suam in Subdiaconum quia (inquiunt) pro illo priori tempore necdum concurrat præceptum recitandi Horas, & consequenter tunc nondum potuit illi præcepto satisfieri.

14 CONCL. II. Ejusmodi Clericus non liberatur hac obligatione recitandi Horas; etiam si sit excommunicatus, suspensus, depositus, aut degradatus. Ita communis. Ratio est: tum quia per excommunicationem v. g. non tollitur Ordo sacer, utpote cujus character indelebiter inhæret animæ; & consequenter neque tollitur obligatio recitandi Divinum Officium eidem annexa: tum quia nemo debet ex propria culpa, & iniquitate commodum reportare; prout fieret, si quis excommunicatus, aut ob propriam culpam degradatus liberaretur ab obligatione dicendi Horas Canonicas.

15 Observat etiam Bonacina Tom. 1. disp. 1. de Horis Canon. q. 2. punct. 3. n. 3. Clericum degradatum, aut excommunicatum non posse, dum recitat Divinum Officium, dicere *Dominus vobiscum*; sed debere loco illius dicere, *Domine exaudi*; quia hæc est functio Ordinis, & communicatio quædam in Officiis Divinis, quæ non est licita excommunicatis. Imo Suarez, & Navarrus, relati a Bonacina Tom. 1. disp. 2. de Excommunicatione q. 2. punct. 3. §. 2. n. 6. cum quibusdam volunt, excommunicatum incurrere irregularitatem, dicendo etiam privatim, *Dominus vobiscum*. Sed hoc non videtur admittendum; quia parvas materiam sicut excusat a mortali peccato, ita & ab irregularitate, quæ oritur ex delicto, & imposita est ob peccatum mortale. Bonacina loc. cit. Henriquez, Filiucius, & alii.

16 CONCL. III. Clerici non Beneficarii, neque Religionem professi, constituti solum in quatuor Ordinibus minoribus, non obligantur recitare Horas Canonicas. Ita unanimis Doctorum: idque patet ex communi Ecclesiæ consuetudine, quæ est optima legum interpretis, simulque ex eo, quia ejusmodi obligatio nullibi reperitur in Jure expressa.

17 Quantum attinet ad alterum genus hominum, nempe Religiosorum, sciendum est, ex vi solius Religiosæ Professionis non sequi obligationem dicendi Horas Canonicas; ut inter alios bene notat Reginaldus lib. 18. cap. 11. num. 137. Patet hoc tum ex eo:

quia Professio ipsa Religionis ordinarie obligat tantum ad tria vota essentialia, Paupertatis nimirum, Castitatis, & Obedientiæ, servanda secundum Regulam: tum quia dantur Religionem non deputatæ ad Chorum sed quæ institutæ sunt præcipue ad exercenda corporalia Misericordiæ opera in Hospitalibus, vel ad Militiam adversus Infideles, vel ad aliquas actiones spirituales: imo & in Religionibus Choro addictis dantur Laici, seu Conversi professi, quos constat non teneri ad recitationem Horarum Canonicarum. Hinc videndum, quinam Religiosi; & ex quo fundamento teneantur recitare Horas Canonicas?

18 CONCL. IV. Religiosi omnes, ac singuli (exceptis Novitiis, & Laicis conversis) qui profitentur Religionem Choro addictam, tenentur sub mortali ad persolvendum Divinum Officium, tamen si ad nullum Ordinem sacrum sint promoti; idque vel ratione propriæ Regulæ (ut FF. Minorum Clerici professi, quibus etiam ante receptionem Ordinum sacrorum cap. 3. *Regule*, præcipitur, ut faciant Divinum Officium secundum ordinem Sanctæ Romanæ Ecclesiæ) vel saltem vi generalis consuetudinis, quæ in omnibus Religionibus Choro addictis cum tanta obligatione acceptata est. Ita Doctores communiter, paucis exceptis, quos allegat, & rejicit Layman loc. cit. n. 1. & 2. Ratio est: quia consuetudo habet vim legis, estque dicta consuetudo in Religionibus Choro addictis passim recepta.

#### Additio.

\* Respondent equidem contrariæ sententiæ Patroni, quod hæc generalis consuetudo, quatenus habet vim legis, estque obligatoria, sit præcise acceptata in tantum, ut hæc obligatio afficiat ipsam talem Religionem Choro addictam in communi ad recitationem in publico, non autem singula ejusdem membra in particulari, si absint a Choro, ita nimirum, ut sub mortali equidem nequeat talis Religiosa familia intermittere Chorum in aliquo Monasterio: bene tamen personæ particulares, si absentes a Choro non recitent Horas Canonicas privatim, a mortali excusentur, nisi aliunde vi Regulæ, aut sacri Ordinis suscepti ad Divinum Officium adstringantur: nam Contra est, quod communior Doctorum vi dictæ consuetudinis generalis, quod Religionem Choro addictas non solum in communi, sed etiam quoad singula membra in particulari agnoscat introductam obligationem recitandi Horas Canonicas. Licet ceteroquin, ut verum fatear, etiam altera sententia contraria, quam tenent Joannes Medina, Alphonsus a Castro, Cajetanus, Armilla, Petrus Marchantius, Lessius, Bordonus, ac alii apud Sporer part. 1. Theolog. Sacrament. in Append. cap. 1. n. 14. & quæ plurimum poterit deservire pro scrupulosis Religiosis, ac monialibus, non careat sua probabilitate, quidquid contradicant denegando hic probabilitatem Sanchez, Reginaldus, ac Diana apud La Croix hic, & Martinus Archi-Episcopus Panormitanus apud Felicem Poteltas Tom. 1. Exam. Confess. part. 2. cap. 3. num. 426. Interea tamen, quantum ex Doctoribus potui colligere, verum adhuc manet, quod sententia prima agnoscens vi generalis consuetudinis etiam obligationem in particulari per se loquendo, & præscindendo ab una vel altera Religione in specie sit communior.\*

19 Dicitur notanter in Concl. I. *Exceptis Novitiis, & Laicis professis*: siquidem Laici Choro addicti non sunt. Novitios autem Clericos, Chorumque frequentantes, etsi Paludanus affirmare videatur, teneri persolvere Officium Divinum, eo quod ex elemosinis vivant, & gaudeant privilegiis Clericorum: communis tamen opinio censet, eos non teneri, prout observat Azorius loc. cit. cap. 6. & Bonacina disp. 1. de Horis Canon. q. 2. punct. 2. n. 1. Ratio est: quia ex quo necdum sunt Religionem professi, sed libere possunt exire, ad



ad onera Religionis non tenentur sub obligatione. Adde, de Novitiis non currere consuetudinem necessario dicendi Divinum Officium. Unde Novitii in favorabilibus quidem veniunt nomine Religiosorum, non vero in odiosis.

20 Dicitur II. *Vi generalis consuetudinis*; hæc enim potissimum est ratio, cur Religiosi Professi Choro addicti jam ante receptum Subdiaconatum teneantur saltem in communi recitare Horas Canonicas. Unde si hæc consuetudo in aliqua Religione absolute non viget (sicut dicitur esse in Societate JESU, habente circa hoc specialem Constitutionem Pauli III. *Regimini militantis Ecclesiæ* §. 11. & habetur tom. 1. *Bullarii Roman. Const.* 25. *dicti Pontif.*) non erit ulla obligatio ante promotionem ad Ordines sacros. Et hac ipsa de causa multa Monasteria Monialium, quæ hætenus consueverunt recitare dumtaxat Cursum s. Officium parvum B. Mariæ Virginis, non obligantur ad recitandas Horas Canonicas.

21 CONCL. V. Etsi Communitas Religiosi Ordinis Choro addicti ex generali consuetudine teneatur statutis temporibus Horas Canonicas in Choro persolvere; eaque obligatio, quæ procul dubio saltem quoad habendum Chorum gravis est, inprimis Prælato incumbat, ut curam adhibeat, ne in sua Ecclesia cantus Horarum Canonicarum debitis temporibus intermittatur, ad singulos tamen reliquos hæc obligatio in particulari quoad ipsam frequentationem Chori non descendit: quare peccati mortalis damnari non debet, qui ceteris in Choro rite canentibus ob pigrum abest. Ita communis. Ratio est: quia talis quidem dignus est poena a suo Prælato juxta Ordinis Constitutiones infligenda, nulla tamen consuetudine introducta est tam gravis obligatio, seu singulos obligans sub peccato mortali. Quod si quis iusto impedimento detentus absit, ut puta ratione Concionum, vel Confessionum excipiendarum, certum est, eum nullatenus peccaturum, nec aliquam poenam fuisse promeritum propter absentiam a Choro

#### Additio

\* Ceteroquin, ut obligationi recitandi Horas Canonicas publice in Choro satisfiat, noster Franciscus Henno Tom. 1. *Tract. in Præcepta Decalogi disp.* 1. *quæst.* 3. *art.* 1. *Conclus.* 2. ait, sufficere tres præsentis; contra vero P. Sporer *loc. cit.* n. 17. requirit ad minimum quatuor. Rationem assignat istam, quia essentia Chori consistit in decenti, ac decore alternatione cantantium: alternatio autem decenter, & decore fieri nequit in paucioribus, quam quatuor; ubi tamen subjungit, quaternarium numerum posse compleri etiam ex Novitiis; quia in favorabilibus æquiparantur Professis. Prout pariformiter sentit P. Gaudentius Kerchrove in  *suis Commentariis cap.* 2. §. 2. n. 21. & 22. Puto tamen sententiam Patris Henno posse secure practicari, si alii confessionibus excipiendis, concionibus faciendis, aut infirmis visitandis &c. occupati existant. \*

22 CONCL. VI. Religiosus Clericus professus, necdum sacris Ordinibus initiatus, qui Superioris auctoritate ad statum Laicalem Conversorum translatus est, a recitando divino Officio liber est. Ita communis. Ratio est: quia mutavit statum, cui talis obligatio annexa est.

23 Num autem idem dicendum sit de ejusmodi Religioso nondum sacris Ordinibus initiato, si fuit ejectus ex Monasterio, variant Doctores. Et quidem Azorius *cit. lib.* 10. *cap.* 6. *q.* 6. post Navarrum *c.* 7. *de Oratione* n. 20. probabilius censet, talem ejectum Religiosum adhuc obligari ad recitandas Horas Canonicas, eo quod etiamnum sit Religiosus, suoque vitio contigerit, ut è Monasterio ejiceretur: simulque æquum non censetur, ut quis ex suo delicto commodum reportet. Eum nihilominus ab ejusmodi obligatione liberum pronunciat Herincx *tract.* 4. *de Religione disp.* 2. n. 6. post Bona-

cinam, & alios: quia (inquit) per sententiam remotus est a statu, in quo erat consuetudo obligans, & translatus est ad statum, in quo non reperitur ista obligatio & consuetudo.

24 Quantum attinet ad tertium genus hominum, scilicet Beneficiarios, notandum, per Clericos Beneficiarios intelligi eos, qui habent Beneficium aliquod Ecclesiasticum, sive deinde sint insigniti Ordine aliquo sacro, sive non. Nomine autem Ecclesiastici Beneficii intelligitur jus perpetuum percipiendi fructus ex bonis Ecclesiasticis propter aliquod officium spirituale personæ Ecclesiasticæ auctoritate Ecclesiæ constitutum, prout amplius suo loco (b) explicabitur. Et de hujusmodi Beneficiariis loquendo, sit

35 CONCL. VII. Clerici Beneficium Ecclesiasticum possidentes, etiam si nullo sacro Ordine sint insigniti, obligantur ad Horas Canonicas recitandas. Ita certa, & communis: & patet tum ex *cap. Dolentes* supra n. 3. relato: tum ex aliis Summorum Pontificum Constitutionibus: siquidem *Beneficium datur propter officium cap. ult. de Rescript. in 6.*

26 Excipiuntur tamen quædam Beneficia, v. g. Præposituræ, Personatus &c. quibus ex speciali sua institutione solum annexa est obligatio recitandi Officium parvum B. M. Virginis, aut quid aliud simile. Excipitur etiam is, qui titulum quidem Beneficii obtinet, sed per eum non stat, quo minus defacto aliquos fructus percipere queat, sive per se, sive per alios, aut in aliis Substitutis: talis quippe ex communi Doctorum sententia non tenetur ad Horas Canonicas recitandas; nemo enim suis stipendiis militare cogitur, & qui Altari deserviunt, de Altari participant 1. *Corinth.* 9. Herincx *part.* 3. *tract.* 2. *disp.* 7. n. 58. Navarrus *cap.* 7. *de Orat. num.* 28. Layman *cit. c.* 5. *num.* 3. & seqq. & alii.

#### QUESTIO III.

Quanta sit obligatio recitandi Horas Canonicas?

#### SUMMARIUM.

- 27 Obligatio ad Horas, & eas in totum, vel quoad partem notabilem culpabiliter omittentes peccant mortaliter.
- 28 Quamam censeatur pars notabilis, sufficiens ad peccatum mortale?
- (c) Relato superius n. 3. & 4.
- 29 Quot peccata mortalia committat omittens Officium totius diei?
- 30 An peccet duplici peccato omittens Officium, ad quod tenetur ratione Ordinis sacri simul & Beneficii?
- 31 Beneficiarii omittentes Horas tenentur ad restitutionem fructuum pro rata omissionis.
- 32 Idque post sex menses adepti Beneficii, ac Jure Ecclesiastico. Rata neglecti Officii, quomodo taxanda?
- 33 An tunc etiam restituendi fructus percepti ratione aliarum obligationum? cum Additione.
- 34 Vitanda circa hoc quædam Propositiones damnate.
- \* An oneri restitutionis etiam subiaceant Provifores & Cooperatores? Addit. I.
- \* Num Beneficiarii inculpabiliter omittentes? Addit. II.
- \* Utrum obligentur ad restitutionem, si culpabiliter intermittant tantum levem partem? Addit. III.
- + Quidnam dicendum, si voluntarie sint distracti sub Horis Canonicis? Addit. IV.
- 35 Officium Defunctorum, & Litania majores &c. an extra Chorum sub præcepto dicenda?
- 36 Affirmativa est tenenda.
- 37 Solvitur ratio dubitandi.
- \* Cui facienda sit restitutio?

27 CONCL. I. Omnes hætenus enumerati, atque ad dicendas Horas Canonicas obligati peccant mortaliter, si eas vel in totum, vel quoad partem notabilem culpabiliter, seu absque rationabili causa excusante dicere omittant. Ita certa, & communis. Ratio est



est: quia est præceptum grave, & quidem in materia gravi, spectante ad virtutem Religionis, non minus, ac præceptum audiendi Missam diebus Festivis; ergo etiam transgressio talis præcepti est peccatum ex genere suo mortale. Sed occasione hujus Conclusionis.

28 Quæritur I. Quænam sit censenda pars notabilis, cujus omissio constituat peccatum mortale? Resp. Quamvis non parum variant circa hoc Doctores, uti videre est apud Reginaldum *lib. 18. cap. 11. n. 143. & seq.* dum Navarrus tertiam partem unius Horæ sufficere, Rosella vero totius Officii unius diei omissionem requiri ad constituendum peccatum mortale asserit: sed ambo improbabilius. Communior tamen Doctorum opinio (paucis dissentientibus, aut vespas Sabbati Sancti ob sui breviterem excipientibus, apud Gobat *tract. 5. Theol. Experim. n. 608. & 609.*) videtur tenere, voluntariam omissionem cujuscunque Horæ Canonice sufficere ad peccatum mortale; idque etiam Doctores intelligunt de uno Nocturno Matutini, utpote æquivalente uni Horæ minori. Fundatur hæc satis communis recepta sententia in *cap. 1. & c. Dolentes de Celebrat. Miss. (c)* ubi omnes septem Horæ significantur, ac nominatim quotidie recitari præcipiuntur: unde deducitur, unam Horam omisam censi partem notabilem.

29 Quæritur II. Quot peccata mortalia committat omittens integrum Officium unius diei? Lessius *lib. 2. de Just. & Jure cap. 37. n. 53.* putat, tot numero peccata committi, quot sunt Horæ; eo quod singulæ sint distincta officia, distinctis temporibus ex præcepto Ecclesiæ persolvenda. Sed melius Herincx *disp. 2. de Hor. Can. q. 1. n. 8.* Gobat *loc. cit. n. 617.* Bonacina *disp. 1. q. 5. punct. 1. n. 6.* Navarrus, & alii respondent, esse unicum peccatum, gravius tamen. Ratio est: quia omittitur unicum tantum integrum Officium unius diei, cujus singulæ Horæ sunt pars: ergo etiam fit unicum dumtaxat peccatum externum consummatum omissionis.

30 Quæritur III. An peccet duplici peccato, qui omittit Officium Divinum, ad quod recitandum tenetur ratione Ordinis sacri simul & Beneficii? Affirmant Bonacina *loc. cit. n. 4.* Lessius *num. 52.* Sanchez, Suarez, & alii, & sequitur Sannig *cit. disp. 2. quæst. 1. n. 16.* Rationem afferunt: quia talis Clericus Beneficiarius in Sacris constitutus peccat & contra virtutem Religionis, cujus intuitu obligatur ratione Ordinis sacri, & contra Justitiam ratione Beneficii. Sed Herincx *loc. cit. n. 9.* cum Diana *part. 1. tract. 12. de Horis Canon. resol. 6.* & aliis, probabilius negat, committi duo peccata, etsi duobus vel pluribus titulis quispiam ad Horas Canonicas recitandas obligetur. Ratio est: quia Clericus Beneficiarius omittens Horas non peccat contra Justitiam, sed tantum contra Religionem, ac præceptum Ecclesiæ, quæ istam obligationem Beneficiariis imposuit; prout nec tenentur Jure naturæ ad restitutionem fructuum, sed tantum ex præcepto Ecclesiæ post primos sex menses, ut mox amplius dicetur. Et per hoc solvitur fundamentum oppositæ sententiæ.

31 CONCL. II. Præter reatum culpæ lethalis, si Beneficiarii Horas Canonicas culpabiliter, seu cessante legitimo impedimento intermittant, post sex menses a Beneficio obtento obligantur ad fructuum perceptorum restitutionem pro rata omissionis. Ita certa, & communis omnium; habeturque expresse statutum in Generali Concilio Lateranensi, sub Leone X. *sess. 9.* quam Constitutionem innovavit, magisque explicavit S. Pius V. *Constit. 135.* quæ incipit, *Ex proximo* (ac refertur *tom. 2. Bullarii Romani*) ubi inprimis Pontifex sic loquitur: *Ex proximo Lateranensi Concilio ea salubris sanctio emanavit, ut quicumque habens Beneficium Ecclesiasticum, cum cura, & sine cura, si post sex menses, quam illud obtinuerit, Divinum Officium, legitimo cessante impedimento, non dixerit, Beneficiorum suorum fructus pro rata omissionis Officii & temporis suos non faciat, sed eos tamquam injuste perceptos in fabricas ipsorum Beneficiorum, vel pauperum elemosynas erogare teneatur.* Hæc ibi.

32 Ex quibus verbis colligitur primo, hanc obligationem restituendi fructus Beneficii pro rata neglecti Officii incipere dumtaxat post primos sex menses a tempore adepti Beneficii computandos (nam exceptio illa, *si post sex menses*, firmat regulam in oppositum) quamvis ille, qui primis sex mensibus, cessante legitimo impedimento, Officium non dixerit, grave peccatum intelligatur admisisse, prout subdidit Pontifex ibidem. Colligitur ulterius, hujusmodi obligationem restituendi fructus esse Juris dumtaxat Ecclesiastici: tum quia ortum habet ex salubri sanctione Concilii Lateranensis: tum quia, si esset Juris naturalis, aut divini, pariter pro primis sex mensibus dicta obligatio procederet. Ut autem intelligatur, cujusmodi ratæ prædictæ ratio sit habenda, idem Pontifex in citata sua Constitutione declarando statuit: *Ut, qui Horas omnes Canonicas uno, vel pluribus diebus intermiserit, omnes Beneficii, vel Beneficiorum suorum fructus, qui illi, vel illis diebus responderent, si quotidie dividerentur, qui vero Matutinum tantum, dimidiam, qui ceteras omnes Horas, aliam dimidiam, qui harum singulas, sextam partem fructuum ejusdem diei amittat.* Hæc Pontifex.

33 Ceterum quoad memoratam obligationem restituendi notandum est, quod quamvis Azorius *cit. cap. 14. quæst. 5.* ob tam generalem S. Pii V. loquendi modum & Constitutionem teneat, quod Beneficiarius omnes sui Beneficii fructus, etiam illos, quos propter alias obligationes, utputa Conciones, Sacramentorum administrationem, Missæ celebrationem &c. si simul est Parochus, sibi comparaverat, pro rata neglecti Divini Officii restituere teneatur, oppositum tamen, nempe tuta conscientia posse eam fructuum partem retineri, quam ejus labor, quo alioquin inservivit Ecclesiæ, promeruit, cum multis aliis Auctoribus a se allegatis probabile, & in praxi tutum censet Layman *lib. 4. tract. 2. cap. 5. num. 1. & 2.* & Sa. *Beneficium n. 58.* quorum posterior proinde subjungit, quod sufficiat Parocho restituere quintam partem, Canonico quartam, aliis Beneficiariis tertiam. Sed melius Layman attendendum censet ad aliorum quantitatem officiorum, quæ quandoque plura quandoque pauciora sunt; ac proinde hoc erit prudentis, & timorati Viri arbitrio dijudicandum.

#### Additio.

\* Pater Ludovicus Engel apud Patrem Pichler in suo Candidato Jurisprudentiæ abbreviato *Tit. 41. num. 3.* existimat, si portio reddituum Parochialium unius diei essent tres floreni, Parochum ob omisas præcise Horas Canonicas non nisi ad unum florenum exinde restituendum obligari.\*

34 Circa hoc tamen notanda, & vitanda erit gemina Propositio, novissime ab Alexandro VII. condemnata, quarum prior, ordine 29. sic sonat: *Restitutio a Pio V. imposita Beneficiariis non recitantibus Horas, non debetur in conscientia ante sententiam declarationis judicis, eo quod sit pena.* Altera, ordine 33. sic habet: *Restitutio fructuum ob omissionem Horarum suppleri potest per quascunque elemosynas, quas antea Beneficiarius de fructibus sui Beneficii fecerit.* Utraque, inquam, hæc Propositio est damnata, ac proin evitanda.

#### Additio. I.

\* Quæres I. An pœnæ restitutionis fructuum a S. Pio V. Beneficiariis non recitantibus Breviarium impositæ subiaceant etiam Provifores, & Cooperatores?

Resp. I. Provifor, qui ad tempus constituitur, ut nomine Parochi v.g. ægroti, aut alias impediti administret Sacramenta, aliaque munera Parochialia, non tenetur ad restitutionem, si omittat Breviarium, quamvis ratione Ordinis sacri graviter peccet. Ratio est: quia talis non est verus Beneficiarius; & suum



suum salarium potius habet ob alias functiones Parochiales: secus dicendum quoad Vicarios perpetuos, qui sunt veri Beneficiati, sicque omittentes Horas Canonicas obligantur pro rata ad restitutionem, uti recte notat Henno *Tom. 1. Tract. in Præcept. Decalog. disp. 1. quæst. 3. art. 1. Conclus. 3. Resolut. 4.* Resp. II. Ob rationem superius quoad Provifores adductam pariformiter excusantur Cooperatores Parochorum non habentes verum Beneficium. Item illi Sacellani, in quibusdam arcibus, vel alias apud Nobiles existentes, qui equidem singulis annis percipiunt certos fructus ob quædam ministeria spiritualia, interea tamen illa Sacellania non est erecta auctoritate Episcopi. Ita Sporer *part. 1. Theolog. Sacram. in Appendice cap. 1. n. 29.* \*

Additio II.

\* Quæres II. An poenæ restitutionis fructuum adstringantur Beneficiati, qui inculpabiliter v. g. ex naturali oblivione, vel ob infirmitatem, aut aliud justum impedimentum omittunt Horas Canonicas? Resp. negative nam poena supponit alias culpam; ergo etiam hic debet præcedere culpa, ut incurratur illa poena inhabilitans ad perceptionem fructuum pro rata. Aliam adhuc rationem vide infra *num. 91.* Quinimo cum Gobat, Sporer *loc. cit. num. 33.* & la Croix *lib. 4. num. 1210.* excusant Beneficiatum taliter ægrotum, ut nequeat recitare Horas Canonicas, quamvis hæc infirmitas fuisset contracta ex propria culpa Beneficiati v. g. propter excessivum potum: etsi enim talis antecederet destruendo sanitatem haud dubie contraxerit culpam, attamen hic & nunc factus ægrotus, & forsan de suo peccato contritus non peccat omittendo Horas Canonicas; adeoque, cum ipsa omissio Officii Divini apud talem non amplius sit peccaminosa, præsumendum erit de benignitate Ecclesiæ, quod etiam huic omissioni non annexerit poenam restitutionis, uti advertit Sporer *h.c.* \*

Additio III.

\* Quæres III. An Beneficiatus obligetur aliquid restituere, si quidem culpabiliter quidpiam ex Horis Canonicis intermittat, non tamen talem partem, quæ constitueret peccatum mortale. Respond. negative: nam Bulla S. Pii V. injungit solum restitutionem illis, qui intermittunt culpabiliter NB. aliquam Horam Canonicam ergo, cum talis in casu nostro ne quidem æquivalenter integram Horam Canonicam omitat, neque imponenda erit poena restitutionis; cum non conveniat, poenas ampliari, sed potius restringi. Sporer *loc. cit. num. 35.* & La Croix *lib. 4. num. 1212.* \*

Additio IV.

\* Quæres IV. An Beneficiati teneantur ratione Officii Divini facere restitutionem, si nihil quidem omiserunt, bene tamen Horas Canonicas voluntarie interne distracti persolverunt? Resp. I. Inprimis illos AA. qui admittunt cum distractione voluntaria pure interna impleri adhuc præceptum Ecclesiasticum de recitatione Officii Divini, nec graviter exinde peccari, pariter facile concedere, quod consequenter Beneficiati, etsi voluntarie distracti, non obligentur restituere fructus: & sane pro hac sententia plurimum scrupulosis favorabili a Patre La Croix *lib. 4. n. 1340. seqq.* adducuntur ultra viginti quatuor Doctores non sine gravibus fundamentis: quia tamen quæstione sequenti contraria opinio agnoscetur saltem ut probabilior, hinc Resp. II. Dato etiam, quod ille graviter peccet, qui voluntarie Horas Canonicas sine attentione interna recitat, adhuc tamen probabiliter sustineri potest, quod non obligetur ad restitutionem fructuum. Ita cum Soto, Tolet, Corduba, Garzia, Gobat, & aliis La Croix *lib. 4. Theolog. Moral. num. 1213.* & Sporer *hic. cap. 2. sect. 2. num. 88.*

Ratio est, quia Bulla Piana poenam restitutionis solummodo impositum intermittenti bus omnino recitare Horas Canonicas: ergo in odiosis non est extensio facienda ad eos qui distracte recitant Horas Canonicas. \*

35 Quæres V. An Officium Defunctorum in die Commemorationis Omnium Fidelium Defunctorum; item Litanie majores in Festo S. Marci, ac tribus diebus Rogationum privatim sint a præfatis Clericis, Religiosis, ac Beneficiariis de præcepto recitandæ? Ratio dubitandi est: quia S. Pius V. in Bulla *Quod a nobis*, Breviario præfixa, ab obligatione recitandi extra Chorum diebus in Rubricis præscriptis eximit Officium B. M. A. & I. E. Virginis & Defunctorum, item septem Psalmos Pœnitentiales, & Graduales. Et quidem Diana *part. 1. resol. 42. de Horis Canonicis*, loquendo de litiis, post paucos alios a se allegatos, probabile censet, non teneri eos privatim recitare Litanias in diebus Rogationum; qui non interfunt Processionibus.

36 Resp. tamen cum Herincx *disp. 2. q. 2. n. 14.* Gobat *tract. 5. Theol. Experim. n. 614.* Gavanto *p. 2. sect. 7. cap. 13.* allegante Suarezium, quem sequitur Bonacina *tract. 23. cap. 7. num. 243.* Officium Defunctorum in die Commemorationis Animarum, ac Litanias præfatis diebus etiam privatim recitandas esse ex præcepto. Ratio est: quia Officium Defunctorum censetur esse pars Officii diei Animarum, cui idcirco in Calendario, & Martyrologio tribuitur nomen Commemorationis Defunctorum: Litanie autem ut præfatis diebus privatim dicantur ab iis, qui non interfunt Processionibus, expresse præscribunt Rubricæ. Neque Litanias commemorat, & excipit S. Pius V. in prælegita Bulla, quæ tamen jam olim præceptæ fuerunt *c. Rogationes de Consec. dist. 3.* Accedit communis sensus Doctorum, & praxis Fidelium, optima legum interpret.

37 Et per hoc patet ad rationem in oppositum. Si quidem S. Pius V. de Litiis nullam facit mentionem, ac proinde obligationem easdem privatim dicendi non tollit. Et dum obligationem recitandi privatim, seu extra Chorum, Officium Defunctorum in citata Bulla sultu it, loquitur de diebus Ferialibus, quæ illud Officium aliquoties per annum dicendum esse volunt Rubricæ: non autem sub hac generali abrogatione, seu deobligatione comprehenditur Dies Commemorationis Defunctorum, cum sit pars Officii illius diei. Atque ex his inferunt Doctores, Beneficiarium talia cessante justo impedimento non recitanti, teneri ad restitutionem fructuum pro rata partis omittæ.

Additio.

\* Quæres ultimo. Cui facienda sit restitutio fructuum ex omissione Officii Divini resultans. Respondeo eandem restitutionem fructuum esse faciendam vel fabricæ, seu ornatui illius Ecclesiæ, in qua quis habet Beneficium, vel pauperibus. Ita cum communi Felix Potestas *Tom. I. Examinis Confess. part. 2. cap. 3. num. 496.* & Sabinus Bononiensis *in sua Luce Morali part. 2. tract. 54. n. 41.* Porro inter pauperes comprehenduntur etiam pauperes aliæ Ecclesiæ; item illi, qui secundum suum statum sunt pauperes, uti Religiosi. Item etiam pauperes Consanguinei, Fratres, Parentes &c. Quin etiam poterit talis Beneficiatus sibi metipsum juxta dicenda *n. 90.* applicare, si vere pauper e. g. propter tennes redditus existat: item licite per suam intentionem in partem satisfactionis computaret illas elemosynas, quas alias daret pauperibus, modo non annumeret parti satisfactionis eas, quas jam tribuerat pauperibus ante omissionem Officii Divini: hoc enim foret illicitum & ab Alexandro VII. juxta jam dicta *num. 34.* reprobatur. Videantur Sporer *loc. cit. num. 40.* & La Croix *loc. cit. num. 1215.* \*



## Q U Æ S T I O IV.

Quænam intentio, & attentio requiratur ad recitationem Horarum Canonicarum?

## S U M M A R I U M.

- 38 Quid sit, studiose & devote celebrare Officium Divinum?  
 39 Attentio circa orationem vocalem triplex, ad verba, ad sensum, ad finem orationis.  
 40 Requiritur intentio orandi.  
 (d) De hoc tract. 2. dist. 3. n. 44.  
 41 Sufficit tamen ad satisfaciendum intentio virtualis.  
 42 Qualibet attentio, tum ad verba, ad sensum, quam ad Deum, sufficit.  
 43 Voluntarie distractus absque ulla interiori attentione non videtur satisfacere.  
 Opposita quorundam opinio refertur.  
 44 Ratio Conclusionis.  
 45 Solvitur obiectio cum alia instantia.  
 (e) Conformiter dictis tract. 2. Dist. 1. n. 46. 48. & seq.  
 46 Leviter dumtaxat distractus satisfacit.  
 Et facile est, satisfacere.  
 47 Quid, si distractio non sit plene voluntaria?  
 Vel omnino involuntaria?  
 48 Remedia ad repellendas distractiones opportuniora, quæ?

38 **E**st hic recolendum ex dictis quest. 1. n. 3. quod in c. Dolentes de Celebrat. Missar. præcipiatur, ut Divinum Officium studiose celebretur pariter & devote. Ubi Glossa notat, Studiose, quantum ad officium oris, verba non syncopate pronuntiando. Et devote, quantum ad officium cordis, juxta illud Apostoli Ephes. 5. Cantantes, & psallentes in cordibus vestris Domino. Unde Glossa c. Cantantes dist. 92. hosce vulgatos versiculos refert:

*Non vox sed votum; non musica chordula, sed cor;  
 Non clamans, sed amans, cantat in aure Dei.*

Igitur ad devotionem, seu officium cordis requiritur tum intentio, tum attentio, de qua alii duo versiculi sic canunt;

*Dirige cor sursum: bene profer: respice sensum.  
 Inque Choro ne sis corpore, mente foris.*

39 Advertendum quoque cum D. Thoma 2. 2. q. 83. art. 13. & communi Doctorum, quod attentio triplex sit, quæ orationi vocali potest adhiberi: una ad verba, qua attenditur ad verba, ne aliquis in eis proferendis erret. Secunda ad sensum verborum, qua attenditur, quid verba significant, & hanc habere nequeunt ignari illius idiomatis, in quo recitatur Divinum Officium, v.g. Moniales ignorantes linguam latinam; quamvis possint habere primam & tertiam attentionem, sicque omnino satisfacere. Et tertia ad finem orationis, qua nempe attenditur ad Deum seu terminum nostræ orationis, & ad rem, pro qua oratur; quæ est omnium optima; atque etiam ab idiotis, linguæque, in qua Divinum Officium recitatur, ignaris haberi potest. Prima harum attentionum, ut ait Filliucius, dicitur materialis, secunda litteralis, & tertia spiritualis.

40 CONCL. I. Certum est, intentionem aliquam orandi, seu recitandi Horas Canonicas necessariam esse: alias ejusmodi recitatio non esset actus humanus, honestus, ac devotus, neque proprie oratio. Unde si quis legeret Horas Canonicas in somnio, sub quo nonnulli loqui solent, vel recreationis aut studii causa, talis non impleveret præceptum, quia non haberet intentionem orandi. (d)

41 CONCL. II. Ad orandum, & satisfaciendum præcepto sufficit intentio virtualis ac implicita, neque requiritur necessario intentio expressa & formalis. Ita

Navarrus cap. 13. de Oratione num. 16 & seqq. Filliucius tract. 23. cap. 2. num. 71 & Doctores communiter. Ratio est: quia ejusmodi intentio virtualis, ac implicita sufficit ad actum moralem. Talis intentio v.g. est in eo, qui habet voluntatem satisfaciendi suæ obligationi, vel dicendi Horas Canonicas, ut debet. Imo sufficere ajunt, animo deliberato capere Breviarium, ire ad Ecclesiam seu Chorum, ita, ut interrogatus vere responderet, se id facere ad recitandum Horas, vel satisfaciendum suæ obligationi. Et hoc confirmatur ex dicti supra Tract. 2. Dist. 3. Quest. 5. num. 45. & seqq. ubi ostensum est, ad satisfaciendum, præcepto non requiri specialem intentionem satisfaciendi (dummodo non habeatur intentio contraria) sed sufficere intentionem præstandi opus, quod præceptum est, utputa studiose pariter & devote recitandi Divinum Officium.

42 CONCL. III. Loquendo nunc de attentione, sufficit quidem ad satisfaciendum præcepto recitandi Horas Canonicas quælibet trium supra enumeratarum attentionum, videlicet, ad verba, ad sensum, & ad Deum vel finem Orationis; tamen secunda attentio est præstantior, quam prima, & tertia, quam secunda. Ita post Thomam loc. cit. communis doctorum. Notat tamen Navarrus cap. 28. de Orat. n. 28. id, quod de tertia attentione ad Deum dicitur, esse intelligendum, dummodo interim, quantum necesse est, attendatur, ne orans erret in verbis, dicendo aliud vel aliter, quam quod, vel quomodo præceptum est.

43 CONCL. IV. Qui voluntarie, seu sua sponte distrahitur, & toto animo in alia per cogitationem dispersio, atque adeo absque ulla prædictarum trium interiori attentione Horas Canonicas persolvit, non videtur satisfacere præcepto. Ita communior probabilior, & securior Doctorum sententia, quam tenent Azorius cap. 12. quest. 6. Bonacina disp. 1. quest. 3. punct. 2. § 2. Maltrius disp. 2. Theol. Moral. num. 92. Sannig. quest. 2. n. 11. Herincx, Navarrus, Lessius, Suarez, Reginaldus, Layman, alique plures: quamvis non delinquant oppositum tenentes, quos citat, & sequitur Diana part. 1. tract. 12. resol. 2. qui volunt, interiori attentionem ad Horas Canonicas non requiri, sed sufficere exteriori; ut videlicet eas recitans exterius reverenter assistat, nec sese occupet in aliquo negotio incompatibili cum attentione interiori, utputa confabulando, scribendo, jocando &c. hancque solam exteriori attentionem (inquiunt) præcipi in sæpe cit. c. Dolentes de Celebr. Missarum non autem interiorem.

44 Probatur tamen Conclusio. Quia cit. c. Dolentes, præcipitur, ut Officium Divinum devote recitetur: atqui devotio est actus internus; ergo. Confirmatur, Oratio non subsistit perfecte sine omni interiori attentione, neque est actus devotionis, sed potius simulatio quædam devotionis aut orationis, quam merito Christus reprehendit Matth. 15. Dicens: Populus hic labiis me honorat, cor autem eorum longe est a me; ergo solam exteriori orationem sine ulla profus interiori attentione non censetur Ecclesia præcipere, & consequenter ea sola non sufficit ad satisfaciendum præcepto.

45 Nec dicas. Ecclesia non potest præcipere actum internum; ergo necque attentionem internam in Horis Canonicis. Resp. enim (e) quamvis Ecclesia non possit per se ac directe præcipere actum mere internum, seorsim sumptum; potest tamen Ecclesia ipsum præcipere, seu indirecte & concomitanter præcipere una cum actu externo, quando ad ejus perfectionem actus interior requiritur. Prout in proposito attentio interior requiritur ad rationem perfectæ orationis, cum hæc sine ulla attentione interiori potius esset simulatio orationis, ut dictum: Ecclesia vero non præcepit imitationem orationis, vel etiam orationem qualemcumque demum, sed orationem devotam.



Additio.

\* Nec infles, orationem devotam, c. *Dolentes de Celebrat. Miss.* in tantum solummodo præcipi, ut præter intentionem internam orandi habeatur saltem attentio aliqua externa; agitur enim ibidem contra illos, qui in Choro sub Officio fabulantur, sicque nec externam habent attentionem, ex qua simul cum prævia intentione interna adæquate componitur essentia orationis; nullatenus autem ad formam essentialem ejusdem requiritur simul attentio interna: nam si insuper ad substantiam orationis (quæ sola ab Ecclesia videtur præcipi) exigeretur attentio interna, tunc neque voluntarie distractus satisfaceret præcepto Ecclesiæ: cum talis neque essentiam orationis poneret, sicque se haberet, ac si nihil orasset.

Respondetur enim verosimiliter Ecclesiam ibidem c. *Dolentes* & *Seff. 24. de Reform. cap. 12.* præcipere absolute, & illimitate talem orationem, quæ Deo non displicet, ac potius ad indignationem, quam ad misericordiam commovet, qualis foret utique illa cum voluntaria (secus cum involuntaria) distractione interna; cum videatur peccatum irreverentiæ, exterius Deum alloqui, & profiteri, se eundem colere, atque deliberate id interius non præstare, prout Christus ipsemet conqueritur citatis verbis: *Populus hic labiis me honorat, cor autem eorum longe est a me.* Unde, etsi fortassis ad substantiam rationis non requiratur attentio interna, videtur tamen ea pertinere ad circumstantias ipsius orationis, quas in præsentia videtur Ecclesia simul respexisse saltem probabilius. Interim tamen non nego, contrariam opinionem, quæ vel maxime pro scrupulosis deservit, habere suam quoque probabilitatem, pro qua Thomas Hurtando apud LaCroix lib. 4. num. 1240. præter D. Antonium adducit ultra viginta quatuor Auctores. Ceterum, pro majori declaratione nostræ sententiæ.\*

46 Dicitur notanter in Conclusionem, voluntarie, seu sua sponte distrahitur, & toto animo in alia per cogitationem disperso &c. Nam inprimis; si quis Horas Canonicas animo dumtaxat leviter distracto persolvat, juxta communem & certam Doctorum sententiam mortaliter non peccat, & satisfacit præcepto. Et certe, cum sola attentio ad verba sufficiat, facile est, præcepto Ecclesiæ in hac re satisfacere; ut bene notat Lessius lib. 2. de Just. & Jure cap. 37. n. 69. & 70. Ubi etiam addit, si quis cum hac attentione, saltem confusa ad Deum, vel ad verba, posset simul ad alia attendere (sicut illi, qui ternas simul, vel plures epistolas dictant) quod talis satisfaceret præcepto Ecclesiæ, nec peccaret mortaliter, juxta Navarrum cap. 13. n. 23. quamvis peccaret venialiter ob irreverentiam admissam.

47 Deinde si distractio non sit plene voluntaria, vel contingat solum ex imperfecta animi deliberatione, rursus certum est, satisfieri præcepto, nec committi peccatum mortale; quamvis ob negligentiam in repellendis distractionibus commissam quandoque peccatum veniale contrahatur. Quod si autem distractio omnino fuerit indeliberata, atque involuntaria, & patienter tolerata, homine, quod in se est, faciente, tunc ejusmodi distractiones, quibus homo invitus abripitur ex humana fragilitate, nequaquam ei ad ullum peccatum imputabuntur; imo sunt non raro homini devoto materia patientiæ, mediumque, quo Deus animas nostras a superbia, vanæque gloriæ inquinamentis tutari, propugnareque solet.

48 Quæres, quænam sint remedia ad repellendas animi distractiones opportuniore? Resp. esse potissimum sequentia. Primum est, æstimatio magna de Divino Officio: oratione siquidem Deum alloquimur, quia teste S. Damasceno lib. 3. de Fide cap. 24. *Oratio est ascensus mentis in Deum;* simulque Breviarium plenum est pulcherrimis Virtutum affectibus, utilissimisque petitionibus ab ipso Spiritu Sancto dictatis. Secundum, renovatio attentionis per certa intervalla, maxime ad versum

*Gloria Patri* &c. procurata. Tertium accurata sensuum custodia, quæ est mater & conservatrix devotionis. Quartum, præsentia Dei, & Sanctorum, memoriæ firmiter, ab initio maxime orationis, per devotam præparationem impressa. Et tandem remedium ultimum, est obligationis nostræ & officii consideratio, si videlicet quis perpendat, se ideo ab Ecclesia ordinatum esse, ut Dei obsequio laudibusque se totum impendat, & quasi Legatus necessitates Sanctæ Matris Ecclesiæ, Fideliumque petitiones Deo proponat, & commendat.

Q U Æ S T I O V.

De Integritate, Continuatione, Ordine & Qualitate, quibus persolvendæ sunt Horæ Canonice.

S U M M A R I U M.

49 Septem requisita ad debitam Horarum Canoniarum recitationem.

50 Contra Integritatem Officii Divini, qui peccent? Et quomodo?

51 Satisfacit, qui recitat cum socio non obligato.

\* Quidnam tali sit observandum?

52 Quid de occupatis in pulsandis organis, ponendis libris &c.

53 Continuatio Horarum etiam requiritur.

54 Nisi excuset justa causa, qualis?

55 Alioquin peccatur venialiter.

\* Solvitur objectio.

56 Ordo insuper requiritur, & qualis?

57 Cause licite invertendi ordinem Horarum.

\* Varia exinde Corollaria.

58 Qualitas in Divino Officio, quæ servanda?

Quo Breviario utendum?

59 Recitans Horas ex Breviario alieno, an peccet mortaliter?

60 Non commutandum Officium unius diei in aliud, alioquin peccatur, & quomodo?

61 Quid, si aliud Officium sit æquivalens, aut interveniat causa?

62 Utpote error, aut inconsiderantia.

63 Corollaria.

64 Quid agendum, si quis hodie legit Officium, aut Lectiones diei crastine.

65 Aut omisit hodie recitare de Festo occurrente?

\* Alii adhuc varii Casus, qui in præsentia evenire possunt. Addit. I. II. III. & IV.

\* De Festis ad libitum notabilis doctrina.

Addit. V. & VI.

49 **A**D studiosam, & devotam Horarum Canoniarum recitationem, juxta Doctores communiter, septem requiruntur, nempe Attentio (sub qua & Intentio recitandi comprehenditur) Integritas, Continuatio, Ordo, Qualitas, Locus, & Tempus accommodatum. Et quia de Attentione ad recitationem Horarum Canoniarum requisita jam dictum Quæst. præc. hinc de aliis sex requisitis pro majori hujus materiæ quotidie occurrentis intelligentia sigillatim dicetur in hac, & sequenti Quæstione. Quantum igitur inprimis attinet ad Integritatem Divini Officii, seu Horarum Canoniarum, sit

50 **CONCL. I.** Contra Integritatem Officii Divini (præter eos, qui illud vel ex toto, vel quoad partem notabilem penitus omittunt) peccant, qui Horas Canonicas recitant verba mutilando, syncopando, deglutiendo, si id scienter fiat: secus, si id vel vitio linguæ, vel consuetudine quadam inveterata, & quodammodo in naturam conversa accadat. Ita communis, & colligitur ex c. *Dolentes de Celebrat. Missarum* & *Clem. 1. eod.* ubi taliter verba syncopantes merito reprehenduntur. Ordinarie tamen preces, quæ ita recitantur, non sunt necessario repetendæ: nam etsi non nihil ea in re (quando sit voluntarie) peccetur, legis tamen substantia servatur, atque regulariter parvitas materiæ excusat: nisi sit defectus omnino gravis, tunc enim secus foret dicendum.

51 **CONCL.**



§1 CONCL. II. Satisfacit præcepto Ecclesiæ, qui Horas Canonicas recitat alternis versibus cum socio libero ac minime ad eas recitandas obligato. Ita communis, & patet ex praxi quotidiana: nihil enim refert, an socius sit præcepto adstrictus, nec ne; cum adhuc totum Officium Divinum studiose, pariter ac devote persolvatur.

*Additio.*

\* Porro, qui cum socio, vel cum aliis in Choro officium recitat, tria sibi principaliter annotare debet ex allegandis Doctoribus. *Primo*, ut non solum ad ea, quæ vocaliter profert, attendere, sed etiam dicta Chori, vel sui socii saltem aliquo modo percipere conetur, alias enim (ut bene docent Sporer de Horis Canonicis num. 106. & La Croix lib. 4. n. 1295.) non censeretur una oratio, cum partem ab altero recitatam non faceret moraliter suam, si nullo modo ad dicta alterius auditum suum vellet applicare. *Secundo*, quod si suum auditum ad dicta alterius applicet, & tamen aliqua verba ob v. g. celerem linguam, vel vocis exilitatem socii sui, aut ob intervenientem strepitum non recipiat, non teneatur exinde Horas illas repetere; nam per societatem ipsam, & simul per animi applicationem moraliter possibilem ad dicta alterius censeretur adesse adhuc moraliter una oratio juxta Felicem Potestas Tom. 1. Exam. part. 2. cap. 3. num. 444. Sabinum Bononiensem in sua Luce Moral. p. 2. Tract. 54. n. 26. & Tamburinum l. 2. Decalog. c. 5. §. 4. n. 12. & n. 13. licet circa hoc secundum punctum non desint, qui cum Patre Henno Tom. 1. Tract. de Horis Canonicis, disp. 1. q. 3. art. 3. tenent contrarium, loquendo de recitatione extra Chorum. *Tertio*, quod talis, si animum suum applicet ad recitata ab altero, eaque saltem a potiori percipiat, econtra vero advertat, suum socium esse distractum, nec attendere vicissim ad dicta sua, nihilominus ipsemet attendens satisfaciat officio. Ratio est: quia per debitam recitationem suæ partis, & attentionem debitam ad recitationem alterius partis censeretur moraliter, quantum concernit suam personam, persolvisse totum officium; uti teste Sporer hic n. 107. sentiunt omnes. \*

§2 CONCL. III. Illi, qui inter publicam Horarum Canonicarum recitationem ex officio, vel Superioris jussu occupantur in pulsandis organis, vel ponendis libris, aut thurificandis Altaribus (unde non raro fit, ut aliquam partem Divini Officii nec proferant, nec audiant) satisfaciunt obligationi recitandi, quamvis talem partem non dicant per seipsos. Ita Reginaldus l. 18. n. 160. & alii. Ratio est: quia, cum illi ad celebritatem Divini Officii occupentur in tali servitio, totus Chorus supplet pro ipsis, ita, ut satis dicere existimentur, dum ministrant dicentibus.

§3 CONCL. IV. Quantum attinet ad Continuationem Horarum Canonicarum, ea insuper ad studiosam Divini Officii recitationem requiritur, ut nempe illud non interrumpatur cessante justa causa. Ita communis: alioquin enim nonnulla committeretur irreverentia, si absque ulla prorsus causa interromperetur Divinum Officium.

§4 Dicitur notanter, *absque ulla prorsus causa*: nam si causa justa interrumpendi recitationem Divini Officii interveniat, nullum ne quidem veniale peccatum committitur. Et tales causæ variæ esse possunt: ut puta, si Superior psallentem avocet, vel occurrat necessarium exercitium Charitatis proximo exhibendum; item si interponantur aliqui pii affectus meditationis, devotionisque internæ; vel si quid facias ad tollendam distractionem; aut si quid interius te inquietum facit, ideoque breviter id in charta annotes, vel in Confessionali expectes Pœnitentes, quorum aliqui, dum interim recitas Horas, accedunt, & hujusmodi.

§5 Quod si autem absque ulla rationabili causa interrumpatur Officium Divinum, præsertim loquendo, vel agendo aliena a recitatione, aut profana, peccati venialis culpa non evitatur, uti colligitur ex sæpe cit. c. Dolentes. Peccatum vero mortale non erit, quantumque fiat

interruptio, dummodo omnes Horæ absolvantur intra eundem diem: siquidem adhuc adimpletur substantia præcepti, simulque singulæ partes habent suum pondus, atque significationem, suntque per se quædam preces, & laudes Divinæ.

*Additio.*

\* Dices: Si in eadem Hora, vel in eodem Psalmo fit magna & notabilis interruptio, tunc inter versus & Psalmos recitados, & inter residuos adhuc restantes tollitur unio moralis, quæ spectat ad ritum & normam ab Ecclesia præscriptam: ergo saltem in tali casu peccatur mortaliter, nisi repetatur totum, supposito, quod non adfit alia causa gravis excusans.

Resp. ita quidem sentire Suarez, Vasquez, Gavantum, & nonnullos alios; econtra vero Arriaga, Layman, Sanchez, Bonacina, Sporer & plures apud La Croix, ac cum eodem lib. 4. n. 1306. tenent, ipsam unionem inter Psalmos non præcipi *sub mortali peccato*; cum quilibet Psalmus, imo & a potiori quilibet Versus habeat suam propriam completam significationem; vel si sub gravi præcipiatur etiam aliqua unio moralis, non requiri aliam, quam quæ fit aut per intentionem intra diem continuandi residuum, aut saltem per hoc, quod restantia intra tempus, quo durat obligatio, adhuc addantur, sicuti a pari censeretur una moraliter Disputatio, vel una Confessio, licet horis ante meridianis utraque inchoetur, & interveniente prandio, aliisque gravibus negotiis post notabile temporis intervallum primum post meridiem continuetur. \*

§6 CONCL. V. Ordinem quod attinet, etiam ordo in recitatione Horarum Canonicarum requiritur, nempe ut non invertatur ordo earum inter se, dicendo v. g. Sextam ante Primam, vel Tertiam, sed recitentur eo ordine, qui ex præscripto Ecclesiæ in Breviario ponitur. Ita rursus omnes Doctores.

§7 Ceterum hæc conditio leviter dumtaxat obligat, potestque facile justa causa intervenire, saltem in Officio privato, Horas transponendi: ut si quis ab amico, vel Superiore invitatur ad recitandam secum Primam, cum necdum recitaverit Matutinum, potest hoc postea recitare. Item accedens ad Chorum potest cum Choro pergere, & Horas necdum lectas, vel oblivione dilatas postea dicere. Similiter serius intrans Chorum, parte Horæ jam inchoata, potest cum Choro pergere, & post expletum Officium partem illam supplere, prout passim tradunt, atque exemplificant Doctores.

*Additio.*

\* Item si in itinere constitutus non habeat secum Breviarium, vel habens quidem nequeat tamen commode sub actuali via v. g. ob Psalmos peregrinos recitare Matutinum, talis poterit antea dicere Horas minores ex Diurnali, si nequeat commode prævenire domi quoad Matutinum. Similiter dicendum est, si talis secum portasset in via Breviarium compendiosum, in quo Psalmi ipsius Matutini reperiuntur absque Lectionibus: tunc enim poterit recitare Psalmos Matutini & Laudum, imo & reliqua dilatis Lectionibus: ita La Croix l. 4. n. 1309. Quod si similia fierent absque omni rationabili causa, peccatur venialiter. Pariformiter si adfit causa rationalis v. g. si quis modo habet accommodum socium, cum quo recitet Matutinum sequentis diei, poterit illud cum eodem dicere, quamvis nondum persolverit Vesperas & Completorium diei currentis. Ita Sporer hic n. 134. & La Croix l. 4. n. 1315. Item si quis fuerit oblitus debiti Hymni, Lectionum competentium, vel aliquarum Commemorationum, aut partis cujusdam Horæ, & recorderetur ad noctem v. g. sub examine, poterit supplere absque eo, quod teneatur aliquid aliud repetere. La Croix loc. cit. n. 1311. cum aliis a se citatis. \*

§8 CONCL. VI. Quod ad Qualitatem attinet, Qualitas in Divino Officio attenditur inprimis ex eo, quod recitur Breviarium approbatum ab Ecclesia, quale est solum Breviarium Romanum novum jussu S. Pii V. editum: illis



illis tamen Ordinibus, Monasteriis, locisque exceptis, quos ab ipsa prima institutione a Sede Apostolica approbata, vel consuetudine, quæ, vel ipsa institutio ducentis annis correctionem Breviarii novi, factam anno 1568. per S. Pium V. antecessit, aliis certis Breviariis usos fuisse constiterit, quibus inveteratum illud jus dicendi, & psallendi, suum Officium præfatus Pontifex non ademit. Ita Bulla dicti Pontificis Breviario Romano præfixa.

59 Quæres autem, an recitans Horas Canonicas ex Breviario alieno, sed approbato consuetudine ducentorum annorum peccet mortaliter? Affirmant multi, negat Sylvester v. *Hora*, qu. 12. melius tamen dicitur cum Reginaldo l. 18. n. 170. non esse peccatum, si id fiat uno vel altero die iusta de causa, v. g. juvando in recitando infirmum, aut Prælatum defessum, vel ob repentinam necessitatem studendi, ac huiusmodi.

60 CONCL. VII. Qualitas Officii Divini ulterius attenditur penes hoc, ut recitetur Breviarium Romanum non commutando Officium unius diei cum altero. Unde peccat mortaliter, qui data opera recitat aliud Officium notabiliter brevius, quam sit Officium cadens & ordinatum pro tali die. Ita Sannig *dist. 2. de Horis Can. qu. 3. n. 3.* Herincx *disput. 2. de Horis Can. qu. 3. n. 18.* cum communi. Ratio est: quia alioquin citra peccatum mortale posset quotidie recitari Officium Paschale, quod est contra communem Doctorem, & Decretum Alexandri VII. qui anno 1666. inter alias Propositiones etiam sequentem, ordine 34. damnavit: *In die Palmarum recitans Officium Paschale satisfacit præcepto.* Accedit alia ratio: quia hoc modo omittitur magna & notabilis pars Officii diei, & quidem contra ordinationem Ecclesiæ sine iusta causa; ergo est peccatum mortale.

61 Dicitur, qui data opera, & sine iusta causa recitat aliud Officium notabiliter brevius, peccat mortaliter. Nam secus dicendum est, si quis aliud Officium recitet æquivalens Officio occurrenti, vel si ex inadvertentia, aut ob aliam rationabilem causam recitet etiam aliquantulum minus. Ratio est: quia talis partim satisfacit substantiæ præcepti recitando septem Horas Canonicas; partim non censetur Ecclesiam notabiliter defraudare, aut saltem non advertenter ac deliberate; ergo. Hinc

62 Infertur I. Si quis Officium vel ex toto, vel ex parte, per errorem aut inconsiderantiam mutavit, recitando aliud, eum non teneri ad repetitionem Horarum jam lectarum; etsi eas repetere ad servandam debitam qualitatem Officii Divini, utique sit laudabilius. Ratio est: quia is præcepto Ecclesiæ jam satisfecit, neque Ecclesia præsumitur velle ad duo Officia astringere, eum præsertim, qui sine culpa est.

63 Infertur II. Cum Herincx *loc. cit. n. 19.* Lugone, Tamburino, aliisque, quos refert, & sequitur Gobat *tr. 5. Theol. Experim. n. 642.* quando incepisti per inadvertentiam recitare Officium non præscriptum, & recitato jam Matutino primum advertis errorem, si nolis ab initio repetere, posse te pergere corrigendo ex tunc errorem, ac recitando Officium præscriptum illius diei quoad reliquas Horas: quidquid contradicat Caramuel *in Theol. Regul. disp. 110.* ubi asserit, te fore obligatum ad pergendum in tuo errore, ne alioquin confles tale Officium, quale non reperitur in toto Breviario.

64 Quæres I. Si quis hodie legisset Officium crastinum, aut Lectiones Scripturæ diei crastinæ assignatas ex inadvertentia, quid erit crastina die recitandum? Resp. cum Lugone *lib. 5. Respons. Moral. dub. 8.* Herincx *loc. cit. n. 29.* Sannig. *q. 3. n. 5.* & aliis, recitandum rursus esse Officium crastinum. Ratio est: quia pro tali die est præceptum obligans de persolvendo isto Officio, cui heri, cum tempus præcepti necdum curreret, non fuit satisfactum. Fateor, quod Gobat *l. c. n. 640.* nonnullos Doctores, ac rationes in oppositum adducat; verum & ipse potius huic sententiæ insistendum existimat.

65 Quod si quis per errorem, vel oblivionem, omisit hodie recitare de Festo novem Lectionum Sancti occurrentis, illud vel eo anno penitus ipsi erit omittendum, ut probabilius censet Gobat *l. c. n. 638.* vel poterit prima die non impedita recitari, ut alii existimant. *Anaclet. Reiffenbuel. Theol. Tom. I.*

Additio I.

\* Item: si quis a Diœcesi, in qua certum Festum universale e. g. S. Francisci ob intervenientem Dedicationem, vel Patrocinium fuit translatum, venerit in locum, ubi jam erat illud celebratum; non tenetur ibidem illo anno de dicto Sancto recitare Officium, sed poterit se accommodare Calendario loci. Dico notanter: *non tenetur*; nam posse id recitare adhuc, die alias non impedito, admittit Sporer *part. 1. Theol. Sacram. in Append. cap. 2. sect. 4. n. 125.* \*

Additio II.

\* Quæ. II. An, si quis Peregrinus veniat in aliam Diœcesin, seu Religiosus in aliud Monasterium sui Ordinis &c. ubi est duplex, possit se quoad Officium conformare huic loco, quamvis in sua Diœcesi, seu in suo Monasterio sit de Dominica, vel de Feria? Resp. talis potest se conformare; quia peregrinus potest frui privilegio loci. Ita Sporer *l. c. n. 122.* & La Croix *l. 4. nu. 1253.* cum aliis. Dixi autem notanter: *potest se conformare*: non tamen obligatur, sed licite adhuc ibidem privatim recitabit Festum Diœcesi vel Monasterio suo propria, etiam si hæc fuerint de Dedicatione vel de Reliquiis suæ Ecclesiæ. Sporer *loc. cit.* cum Suarez & Gobat. \*

Additio III.

\* Quæ. III. An, si talis peregrinus primum cras venturus sit ad illum alterum locum, jam possit hodie præveniendo recitare Vesperas, ac pro subsequenti die Matutinum de illo Sancto, qui colitur ibidem in Diœcesi, vel Monasterio alieno? Resp. affirmative. Ita denuo Sporer *loc. c. n. 129.* & Tamburinus *l. 2. in Decalog. c. 5. §. 2. n. 25.* Nam, cum Vesperæ illæ ac subsequens Matutinum sint partes Officii loci illius, in quem talis cras venturus est, non erit inconveniens, posse illud Officium hodie anticipato inchoare. \*

Additio IV.

\* Quæ. IV. Quandonam possint celebrari Horæ Canonicæ de quibusdam Reliquiis? Resp. ut dictum Officium Horarum Canonicarum celebrari queat, debet esse pars aliqua insignis, uti Caput, Brachium, Crus, &c. & quidem alicujus Sancti in Martyrologio Romano descripti, de cujus identitate sufficienter constat. Ita colligitur ex variis Decretis jam superius *Tract. 5. Dist. 1. Quæst. 4.* allegatis. Scio quidem doctrinam Patris Claudii La Croix *l. 4. n. 1260.* dicentis illud Decretum requirens pro recitatione Horarum Canonicarum, ut Reliquia sit alicujus Sancti in Martyrologio Romano descripti esse subtractum e Typographia Apostolica, sicque censi tacite revocatum: meo tamen iudicio ista doctrina viri hujus alias eruditissimi in hoc puncto nullatenus sequenda est. Quod enim memoratum Decretum in viridi existat observantia, patet tum ex Bullario Innocentii XII. cui illud de novo insertum fuit *Constitut. 105. Folio apud me 289.* tum ex Rubricis Breviarii nostri Ordinis confirmatis ab eodem Innocentio XII. per Bullam specialem *Ad perpetuam rei memoriam. die 21. Novem. anno 1696.* ubi pariter dictum Decretum reperitur tamquam validum ac firmum. Pariformiter censuerunt practici & doctissimi viri, quos Romæ specialiter in hoc puncto consului. Quinimo La Croix ad finem Libri IV. se ipsum in hoc corrigit. \*

Additio V.

\* Quæres V. Quandonam possint recitari Horæ Canonicæ de Festis ad libitum? Resp. regulariter loquendo, & nisi una, vel altera sacra Religio &c. obtineat aliquod particulare Privilegium, similis Recitatio Horarum præcise fieri potest pro tunc, quando illo die non



occurrit Dominica, vel octava, vel aliud Festum pro illo die de præcepto: nam si tale adesset, quamvis inferioris ordinis, (puta semiduplex) alterum ad libitum etiam duplex deberet cedere, & illo anno omnino intermitteri. Quod si cum Festo ad libitum concurreret aliud de præcepto, non habens hunc diem proprium, sed translatum, possent de altero ad libitum recitari Horæ Canonicae, & translatum ulterius transferri. Totum hoc desumitur ex Decreto S. Congregationis Rituum 24. Janu. anno 1682. edito, ubi ad Quæsitum Proponentis responsum fuit, *Prædicta officia S.S. ad libitum etiam duplicia, occurrentia diebus Dominicis, Octavis, & Natalitiis S.S. alicujus Religionis, vel Diœcesis ex vi Calendarii proprii, a Sede Apostolica approbati, quamvis sub ritu semiduplici de præcepto celebrandis, non esse transferenda, sed omitti debere: si autem occurrant eodem die, in quo alias aliquod Festum translatum poni deberet, tunc liberum fore, declaravit, eadem Officia ad libitum recitare. & Officium translatum ulterius ad alium diem non impeditum transferre, prout etiam omisso Officio quod semel per Hebdomadam, aut Mensem ex Apostolico Indulto recitari concessum est, Officium ad libitum eodem die occurrens recitari posse decrevit.* Hucusque Decretum S. Congregationis Rituum. Posset autem ulterius moveri dubium; an, dum in octava die alicujus Festi solemniter nequit celebrari Festum ad libitum, id saltem fieri possit, si tale Festum ad libitum caderet in diem infra octavam non specialiter privilegiatam? ad quod equidem La Croix l. 4 n. 1274. respondet affirmative; ergo autem huic resolutioni conformare me nequeo, tum quia etiam dies infra octavam est de præcepto, tum quia in Rubricis particularibus nostri Breviarii, specialiter ab Innocentio XII. per Bullam *Exponi nobis*. editam 3. Decembris anno 1697. approbati, ante Titulum primum num. 12. reperitur Decretum Sacrae Romanae Congregationis editum 11. Augusti 1691. sequentis tenoris: *Nec hujusmodi Officia ad libitum recitentur, dum occurrunt infra octavas, non privilegiatas, etiam si sint particulares, & propriae Religionis.* Vide de hoc fusius Cajetanum Merati per plures annos S. Congreg. Rituum Consultorem in suo Thesaurio Romæ novissime edito Tom. II. part. 1. sect. 3. cap. 10. n. 11 fol. apud me 143. & seqq. \*

#### Additio VI.

\* Quæres VI. An quoad recitationem Horarum Canonicarum idem, ac præcedenter sit statuendum, si facultati recitandi Officium de aliquo Sancto &c. non equidem inferantur expresse hæc verba *ad libitum*, sed sequentia: *Sacra Congregatio recitari posse concessit, vel indulsit?* Ratio dubitandi est, quia *posse recitari, & ad libitum esse recitationem* videntur æquivalentia, & consequenter eodem modo videtur sentiendum, ubi superius Additione V. Respondeo tamen, hoc non obstante, similia Festa, respectu quorum quoad facultatem recitandi de his Horis Canonicas, inferuntur dicta verba *recitari posse*, habenda esse non tamquam *Festa ad libitum*, sed tamquam *Festa de præcepto*, & consequenter in occurrentia, vel concurrentia aliorum Festorum eodem modo, uti de aliis Festis de præcepto in simili casu, quoad recitationem Horarum Canonicarum sentiendum. Ita Cajetanus Merati loc. cit. adducens Decretum S. Congreg. Rituum die 16. Septembris anno 1730. editum sequentis tenoris: *Supplicatur declarari, an sub Nomine Sanctorum ad libitum comprehendantur Officia duplicia, & semiduplexia Sanctorum N.B. recitari concessa absque expressa notula (ad libitum) sed tantum cum sequenti clausula N.B. nimirum recitari possint, & valeant, vel recitari posse censuit?* &c. Et Sac. Rit. Congregatio, dubio proposito respondit negative: id est, non comprehendendi sub nomine Sanctorum ad libitum. Majorem hujus declarationem dat Henricus Pilart in Directorio Canonico Tit. II. n. 21. sic n. memorata Festa non in alio sensu tamquam *ad libitum* censeri debere, quando sunt concessa

sub illis terminis *celebrari posse, recitari posse*, quam, quod liberum fuerit Episcopis, aut Ordinum Superioribus ea acceptare, vel non; semel autem hac acceptatione a Superioribus admittitur liberum non esse subditis servare, vel non, sed reputari debere *tamquam de præcepto*, adeoque esse ex genere illorum, quæ, si uno die nequeunt celebrari, possint transferri in alium non impeditum quoad recitationem Horarum Canonicarum. Quod tamen conformiter dictis non procedit circa Festa ad libitum. \*

#### QUESTIO VI.

De Loco & Tempore, quibus persolvenda sunt Hora Canonica.

#### SUMMARIUM.

- 66 Ratio Ordinis.
- 67 Extra Chorum, ubi possit recitari Officium Divinum?
- 68 Canonici tenentur recitare officium in Choro.
- 69 Nisi adsit necessitas, consuetudo, vel institutio specialis.
- 70 Quo tempore recitanda Hora in & extra Chorum?
- 71 Matutinum & Laudes possunt pridie vespere recitari. Sed circa horam variant Doctores. Additio.
- 72 Hora Minores, ac Vesperæ quo tempore recitanda?
- 73 Quid de Vesperis in Quadragesima?
- 74 An satisfaciatur incipiens Officium ante mediam noctem diei sequentis? Nequit unica recitatione pro duobus diebus satisfieri.
- 75 An sit peccatum mortale, celebrare Missam ante dictum Matutinum?

66 **E**xplicatis prioribus quinque conditionibus, ad studiosam & devotam recitationem Officii Divini requisitis, nempe Attentione, Integritate, Continuatione, Ordine, & Qualitate, pergendum ad alias duas, nimirum ad Locum & Tempus, quo illud recitari possit, ac debeat. Hinc sit

67 CONCL. I. Quantum attinet ad Locum, illi, qui ad Chorum deputati non sunt, possunt ubique Officium Divinum recitare, dummodo non recitent in loco indecenti, aut ubi attentio impediri possit. Ita communis, & ratio est clara: quia nullum Jus reperitur, quo quis Choro non obligatus teneatur Divinum Officium in certo loco recitare. Unde satisfacit præcepto, si Officium recitetur stando, si sedendo, si ambulando, si domi, si in vinea &c. dummodo recitetur studiose pariter ac devote (modo hactenus explicato) simulque non in loco indecenti; hoc enim esset contra debitam reverentiam.

68 CONCL. II. Canonici tenentur recitare Divinum Officium in sua Ecclesia juxta institutionem Beneficii; nisi alio cogat necessitas, aut permittat longæva consuetudo, vel Fundatoris institutio. Ita communis. Ratio est: quia Canonici tenentur satisfacere intentioni Fundatorum; simulque in Clem. 1. de Celebrat. Missar. injungitur Canonicis onus canendi Horas Canonicas in Ecclesiis Cathedralibus, & Collegiatis. Accedit, quod Beneficium detur propter Officium, atque ut inferviatur Ecclesiae c. ult. de Rescript. in 6.

69 Additur notanter, nisi alio cogat necessitas, aut permittat consuetudo &c. Nam imprimis necessitas non habet legem: unde cap. 4 de Reg. juris dicitur: *Quod non est licitum in lege, necessitas facit licitum*: ut si quis sit infirmus, aut iuxta de causa absens. Insuper consuetudo cujuslibet Ecclesiae, atque Fundatoris institutio circa hoc bene sunt attendendæ, ac juxta eas major vel minor obligatio Canonico-rum assistendi Choro colligenda. Quomodo autem Religiosi sint Choro astricti, dictum est supra nu. 21.



70 CONCL. III. Loquendo tandem de Tempore, in publico Officio Chori servanda est consuetudo recepta cujuslibet Ecclesiæ: in privata vero recitatione Horarum Canonicarum, etsi laudabilissimum sit singulas Horas suis temporibus orare, nihilominus ad vitandum peccatum mortale sufficit, ut recitentur eo intervallo, quod est intermedium noctis præcedentis & sequentis. Ita omnes Doctores. Unde qui intra hoc tempus recitat, satisfacit substantiæ præcepti, nec peccat mortaliter, etiam si omnes Horas absolvat mane post mediam noctem, aut primum vesperi ante aliam mediam noctem: quamvis sit peccatum veniale, si id fiat absque causa rationabili, aut alias Horæ ultra debitum tempus sine causa differantur.

71 CONCL. IV. Nihilominus ex recepta Ecclesiæ consuetudine licitum est recitare Matutinum, & Laudes sequentis diei, pridie ad vesperam, nempe post tempus Vesperarum & Completorii circa horam quartam pomeridianam. Ita communis: nam consuetudo derogat rigori Juris positivi *c. ult. de Consuet.* estque optima legum interpret. Imo Gobat tr. 5. Theol. Exper. n. 676. allegat plures Doctores, qui docent, quod is non peccet mortaliter, qui incipit statim hora secunda post meridiem. Et licet citatus Auctor id solum admittat iusta causa urgente, ut si v. g. forent excipiendæ Confessiones ab hora tertia usque ad coenam; alii vero, ac præsertim Escobar tr. 5. Exam. 6. 60. talem damnant peccati mortalis: idem tamen Escobar culpæ venialis dumtaxat reum censet inchoantem, citra iustam causam media tertia, nullius, qui tertia.

*Additio.*

\* Ut autem intra tot sententiarum varietatem perplexæ non reddantur conscientiæ, Rever. Camera Apost. Romæ edidit Anno 1706. sequentem illimitate declarationem, qua nimirum hora pridie inchoari possit Matutinum. Id est

- 20. Januarii, hora 2. cum quadrante.
- 13. Februarii, med. 3.
- 1. Martii, hora 2. cum 3. quadrantib.
- 18. Martii, hora 3.
- 4. Aprilis, hora 3. cum quadrante.
- 20. Aprilis, med. 4.
- 10. Maji, hora 3. cum 3. quadrantib.
- 8. Junii, hora 4.
- 1. Augusti, hora 3. cum 3. quadrantib.
- 21. Augusti, med. 4.
- 7. Septembris, hora 3. cum quadrante.
- 24. Septembris, hora 3.
- 11. Octob. hora 2. cum 3. quadrantib.
- 20. Octobris, med. 3.
- 18. Novembris, hora 2. cum quadrante.
- 15. Decembris, hora 2.

Huic Declarationi haud dubie poterit se quilibet etiam absque ulteriori urgente præveniendi necessitate secure accommodare. \*

72 Ceterum Horæ Minores non possunt dici pridie, sed solum post mediam noctem diei occurrentis: possunt tamen omnes usque ad Vesperas exclusive ob causam honestam vel utilem, v. g. ob majorem commoditatem studendi, ob iter inchoandum, vel alias hujusmodi causas, recitari mane. Ut autem Vesperæ possint mane dici extra tempus Quadragesimæ, requiritur paulo major causa, ut tenet citat. Gobat n. 682. asserens, eum peccaturum venialiter, qui ante meridiem recitat Vesperas, & Completorium absque rationabili causa.

73 Porro Rubrica illa Breviarii, quæ in Quadragesima vult Vesperas dici ante prandium, solum Chorum obligat; uti notat Tobias Lohner *Instruct. 2. part. 4. §. 10. q. 3.* post Gobat *loc. cit. n. 688.* dicentem, fas quidem esse in Quadragesima, Vesperas dicere ante prandium private, at non esse necesse.

*Anacl. Reffenstuel Tom. I.*

74. Quæres, an præceptum recitandi adimpleat is, qui incipit hodiernum Officium recitare paulo ante mediam noctem diei sequentis, utputa media duodecima, si idipsum absque interruptione prosequatur post mediam noctem? Affirmat Leander *Quæst. Moral. part. 1. §. in ord. 6. tr. 8. disp. 4. qu. 109.* Ratio esse potest: quia præceptum celebrandi Missam inter auroram & meridiem servatur incipiendo Missam paulo ante meridiem, etsi pars ejus absolvatur primum post meridiem, ut tenent Doctores passim; ergo a pari idem dicendum in proposito. Ceterum Gobat *loc. cit. n. 685.* hanc Leandri sententiam ex professo rejicit, utpote repugnantem communi judicio & praxi omnium Superiorum, Confessariorum, & aliorum Doctorum. Illud certum est, quod quis noctu recitans totum Officium, non possit pro duobus diebus satisfacere: nam recitatio quælibet Officii est onus affixum cuilibet die in particulari, atque hinc Alexander VII. sequentem Propositionem, ordine 35. jure damnavit: *Unico officio potest quis satisfacere duplici præcepto, pro die præsentis, & crastino.* hinc tenendum oppositum.

75. Quæres ulterius, an sit peccatum mortale, celebrare Missam ante recitatum Matutinum? Resp. negative cum Lessio l. 2. de Just. & Jur. c. 37. n. 81. quidquid pro & contra disputent Doctores apud Barbosa *part. 2. de Off. & Pot. Episc. alleg. 24. n. 15.* ubi viginti Auctores citat, dicentes, esse peccatum mortale, sine rationabili causa celebrare Missam nondum dicto Matutino, & triginta octo alios, qui negant, id esse peccatum mortale. Ratio horum est: quia nihil in Jure de hoc præceptum reperitur, neque consuetudo contraria sub tam gravi obligatione est recepta. Nec obstant Rubricæ Missalis *Tir. de preparat. Sacerdot. celebraturi.* ubi dicunt Missam esse celebrandam saltem Matutino cum Laudibus absolutis. Nam, cum nullum verbum præcepti contineant, tam gravem obligationem non censentur inducere. Imo Gobat *loc. cit. n. 667.* etsi velit, non esse absque causa rationabili prædicandam mihiorem sententiam, eo quod recitatio Matutini sit optima præparatio ad Sacrum, ne venialem quidem culpam per se loquendo hic intervenire censet.

## QUESTIO VII.

### De causis excusantibus a recitatione Horarum Canonicarum.

#### SUMMARIUM.

- 76 Oblivio inculcata excusat a recitatione Horarum.  
*Quid in dubio de recitatione?*
- 77 Gravis infirmitas etiam excusat.  
*Quid in dubio?*
- \* Præsertim in absentia Medici, & Confessarii?
- 78 Aut si infirmitas est levior?
- 79 An prævidens impedimentum futurum, teneatur prævenire recitando Horas?
- 80 An morbi causa impeditus teneatur audire alium recitantem?
- 81 Occupatio gravis etiam excusare potest, quæ?
- 82 Impotentia quoque excusat.  
(c) Tract. 1. Dilt. 1. n. 20. & seqq.
- 83 An, qui non potest recitare totum Officium, teneatur recitare partem, quam potest?
- 84 An, qui solus recitare nequit, teneatur adhibere socium?
- 85 Legitima dispensatio etiam excusat a recitatione Horarum.  
(d) Conformiter dictis n. 7. & seq.
- 86 Item & metus gravis.  
(e) Tract. 2. dist. 2. n. 25. & seq.
- 87 An, qui non potest per seipsum, teneatur recitare per alium?
- 88 An quis Officium omissum teneatur recompensare alio die?
- 89 Et an Beneficiarius supplens alio die, liberetur ab onere restituendi fructus?
- 90 Quid, si ille Beneficiarius sit pauper?
- 91 An Beneficiarius ex iusta causa non recitans teneatur restituere fructus?



**CONCL. I.** Prima causa excusans ab Officio Divino est naturalis, seu inculcata oblivio recitandi unam, vel plures Horas: unde qui ex oblivione inculpabili eas omittit, non peccat. Ita certa, & communis. Notat tamen Herincx *disp. 2. de Horis Canon. n. 46.* quod, si quis advertat, id sibi frequenter contingere, dum statis temporibus non persolvit, omni culpa non vacet: tenebitur enim postmodum meliorem circa hoc attentionem habere. Si vero dubitet, an recitaverit, stat possessio pro præcepto. Secus est, si certus de recitatione Horæ dubitet de Psalmō aliquo in Hora certo recitata inclusō: tunc enim præsumitur, Psalmum illum cum reliqua materia coherentem esse recitatum, quamquam ob naturalem inadvertentiam, uti sæpe fit, memoriam subterfugiat.

**77 CONCL. II.** Altera causa excusans ab Officio Canonico est gravis infirmitas; id est, talis, ut sine magna difficultate, vel corporis periculo Horarum preces recitari non posse videantur. Ita rursus communis: & desumitur ex *c. Clericus victum, dist. 91.* In dubio tamen aut Confessarius erit consulendus, vel prudentis & probi Medici judicio acquiescendum: tamen si enim Medicus (sicut & Confessarius) in lege recitandi Horas Canonicas vel etiam jejunii dispensare nequeat, potest tamen infirmum dubio liberare, atque secundum præsentis circumstantias declarare, justam excusationis causam ipsum hic & nunc habere.

#### Additio.

\* Ast ponamus, nec Medicum, nec Confessarium adesse, vel præsentem ipsosmet dubitare, num morbus sit adhuc vere gravis, vel non, sive, num recitatio Breviarii sit allatura grave nocumentum, nec ne? quid tunc erit ægro agendum? Resp. I. Simili ægro esse suadendum, si Regularis sit, ut adeat suum Superiorem, qui in plerisque Religionibus præsertim mendicantium in dubio omnino potest dispensare, prout quoad nostram Religionem patet ex Compendio Privileg. v. *Officium Divinum.* & v. *Infirmi Fratres.* §. 11. & 12. Nec debet Superior ipsemet in similibus esse scrupulosus. Quod si vero Superior non sit præsens, vel ægrotus non existat talis Regularis, quid tunc erit faciendum? Resp. II. Talem ægrotum in dubio non teneri ad recitationem Breviarii, uti recte præter alios notant Sporer *hic. c. 3. n. 159.* & La Croix *l. 4. n. 1225.* Ratio est: quia non solum ipsum nocumentum, sed etiam periculum futuri nocumenti liberat a recitatione Breviarii; sed quando adest simile dubium, adest etiam eo ipso tale periculum, uti consideranti patet: ergo. Nec dicas, dubius, num sit exemptus a lege, nec ne, tenetur ad observantiam legis, cum Lex existat in possessione, melior autem sit conditio possidentis; & consequenter ægrotus dubitans, num hic & nunc sit exemptus a recitatione Breviarii, adstringetur ad illud stante hoc dubio: *Respondet enim loquendo de legibus præcise Ecclesiasticis disting. ante. cum dubio &c.* tenetur quis ad observantiam legis, nisi ex hac ipsa observantia resultet periculum gravis nocumenti, conc. si resultet tale periculum, nego: nam ad observantiam legis Ecclesiasticæ non tenemur cum tam gravi periculo deperendæ sanitatis. Et hoc bene sibi notent tam circa recitationem Breviarii, quam ex paritate rationis circa Jejunium non solum ægroti, verum etiam Confessarii, qui ad eisdem vocantur.\*

**78** Dicitur noranter in Conclusionē, *gravis infirmitas* &c. Siquidem communiter notant Doctores, nonnullas esse corporis ægrotudines, quæ Clericos ab eo onere non liberant: vel quia sunt leviores, quales fere sunt leviores capitis, pectoris aut stomachi dolores, ut exemplificat Azorius *cit. lib. 10. c. 13.* vel quia ad tempus tantum justam excusationem afferunt, qualis solet esse febris quartana, aut tertiana levis non multum vexans, nec notabiliter homines faciens imbecilles, quæ proin communiter non excusat ægro-

tum a recitando Officio, quia plerumque tempus a morbo liberum relinquit; quod ad orandum eligi possit, saltem anteposendo vel postponendo, ut notant Abbas, Innocentius, Layman.

**79** Et quamvis nonnulli apud Gobat *Tract. 5. Theol. Experim. n. 711.* negare videantur, quod teneatur quis prævenire tempus, si sciat, postmodum se impediendum ex impedimento involuntario (secus juxta omnes, si quis sponte poneret tale impedimentum) quia v. g. paroxysmus febrilis impedit tempus Vesperarum: nihilominus timorati quique non facile intermittunt Officium Divinum, si poterunt prævenire. Quinimo juxta communiorem, & probabiliorem sententiam ad hoc tenentur; cum obligatio recitandi Divinum Officium sit annexa substantialiter toti diei, & accidentaliter solum determinatis horis ipsius.

**80** Quæres, an, qui morbi causa Divinum Officium persolvere nequit, teneatur saltem alium audire illud recitantem? Affirmant nonnulli, ejusmodi ægrotum debere alium recitantem audire, quoties commode possit audire, & non recitare: constans tamen est aliorum opinio, ægrotum ea lege minime teneri: neque enim ullus existat, Canon, quo id præcipitur, neque ratio, quæ id convincit. Azorius *loc. cit. qu. 3.* Navarrus, & alii.

**81 CONCL. III.** Insuper gravis & repentina occupatio, quæ sine scandalo, aut notabili detrimento proprio, vel alieno omitti aut differri non potest, cum ea autem Officii Divini recitatio moraliter loquendo consistere nequit, excusat a recitatione Horarum Canonicarum. Ita Layman, Navarrus, alique passim. Exempla sunt: si ad ægrotum periculose decumbentem, & quasi jam morti proximum ex improvviso eundem sit pro excipienda Confessione &c. ubi longo tempore quis detinetur, puta usque ad 12. nocturnam: si populi tumultus subito exortus sedandus sit: si in Sacra v. g. Hebdomada non solum Confessiones magno pœnitentium concursu Sacerdoti excipiendæ sint, sed etiam Conciones ad populum eidem habendæ &c. quando tamen tali casu preces Horarum intra eundem diem naturalem sine magna difficultate anteponi, vel postponi possunt, id fieri debet, prout notant iidem Auctores. Quod maxime verum est, si similes casus eventuri prævidentur.

**82 CONCL. IV.** Impotentia quoque, qualis est in cæco, aut in eo, qui Breviarium in itinere amisit, neque aliud acquirere potest, excusat ab obligatione sæpe dictæ recitationis. Ratio est: quia *Nemo potest ad impossibile obligari c. 6. de Reg. Juris. in 6.* Verum nihilominus est, eum, qui sponte Breviarium v. g. in mare projicit, unde pluribus diebus Horas recitare non possit, peccaturum mortaliter per talem Breviarii projectionem. Ratio est clara: quia per ejus abjectionem voluntariam (si non urgeat aliqua necessitas illud abjiciendi) per se & proxime impedimentum voluntarie apponit, quo minus possit sequentibus diebus divinum Officium persolvere, cujus proinde omissio eidem in causa censetur fuisse voluntaria, ut alibi (c) dictum.

**83** Quæres autem occasione hujus, & præcedentis Conclusionis, an infirmus, vel alias legitime impeditus, qui non potest totum Officium recitare, teneatur saltem partem recitare, quam potest? Negarunt olim non pauci Doctores; eorum tamen sententia amplius sustineri nequit, cum Innocentius XI. sequentem inter alias Propositionem, ordine 54. damnaverit: *Qui non potest recitare Matutinum, & Laudes, potest autem reliquas Horas, ad nihil tenetur, quia major pars trahit ad se minorem.* Hac igitur relicta Propositione respondetur, affirmativam sententiam esse tenendam: unde si indubitatum sit, te integram aliquam Horam, puta Tertiam vel Vesperas, commode recitare posse, licet alias Horas non possis, teneris illam recitare. Ita Layman *loc. cit. n. 2.* Suarez *l. 4. de Horis c. 28.* Mastrius *disp. 14. Theol. Moral. n. 57.* fuitque hæc sententia ante Decretum Inno-



centii XI. jam inter Doctores communior & probabilior, eo quod quælibet Hora per se sit Canonica oratio, a reliquis Officii partibus distincta.

84 An autem, qui Horas Canonicas ob supervenientem cæcitatem, aut aliud impedimentum recitare solus non potest, sed cum socio, teneatur eum sibi adsciscere, variant Doctores. Et quidem nonnulli affirmant, negant vero Lessius, Henriquez, & alii, quos allegat Bonacina *disp. 1. q. 6. punct. 2. n. 8.* Ceteri respondent sub distinctione, & affirmant, illum dumtaxat teneri adhibere socium, qui vel antea consueverat adhibere, vel potest ipsum commodè habere: alias vero non teneri, etiam si consulendum ei sit, ut sibi ad tam pium opus socium, quoad potest, procuret.

85 CONCL. V. Præter causas hæcenus enumeratas, & magis frequentes insuper excusat legitima dispensatio. Ita Doctores passim. Et inprimis dispensationem Summi Pontificis, etiam sine causa concessam, excusare a recitatione Divini Officii, concedunt omnes illi, quicumque (d) Horas Canonicas jure dumtaxat humano Ecclesiastico præceptas esse asserunt. Negant autem Abbas c. 1. de *Celebrat. Missar.* & alii, qui volunt Jure Divino teneri Clericos ad septem Horas Canonicas; quamvis (subjungit Abbas) quia ista determinatio, seu distinctio Officii Divini est de jure positivo, licite Papa dispensare valeat circa ejus mutationem. An autem, & quomodo etiam Episcopus, vel Superior Regularis possit cum suis subditis ex causa gravi & iusta dispensare circa recitationem Officii Divini, fufius explicant Doctores.

86 CONCL. VI. Tandem a recitatione Horarum Canonicarum potest excusare metus gravis: sicut accidit in casu, quando Clericus transiturus est per latrones, vel loca Hæreticorum, aut Infidelium cum periculo gravi, ita ut, si deprehenderetur, in certum ac evidens vitæ periculum aut alia gravia incommoda deveniret. Ita communis; & ratio clara est: quia cum tanto periculo leges Ecclesiasticæ non obligant, prout alibi (e) dictum.

87 Pro complemento hujus materiæ, Quæres I. An, qui per seipsum non potest ex iusta causa recitare Horas, teneatur eas recitare per alium? Resp. cum Doctoribus communiter negative: quia ex nullo jure constat talis obligatio recitandi per alium, si quis per seipsum non potest. Accedit, quod obligatio recitandi Divinum Officium sit personalis, cui proinde per alium satisfieri nequit conformiter Concilio Trid. *Sess. 24. de Reform. c. 12.* ibi: *Omnès Divina Officia per se, non per substitutos obire compellantur.* Hinc Alexander VII. sequentem inter alias damnavit Propositionem, ordine 21. *Habens Capellaniam collativam, aut quodvis aliud Beneficium Ecclesiasticum, si studio litterarum vacet, satisfacit suæ obligationi, si Officium per alium recitat.*

88 Quæres II. Num talis teneatur Officium omissum alio die recompenfare? Resp. iterum negative. Ratio est: quia onus persolvendi Officium est affixum diei; obligatio autem affixa diei transit cum ipso die, nec potest eidem altero die satisfieri: prout in simili sine iusta causa negligens audire Missam die Festo non satisfacit præcepto Ecclesiæ, si Missam audiat sequenti die feriali.

89 Sunt quidem aliqui Doctores, nempe Filiucius *tr. 23. c. 10. n. 307.* Major, Paludanus, Ledesma, Molfesius, aliique, quos refert Bonacina *quæst. 5. punct. 2. n. 5.* asserentes, Beneficiarium, qui alio die supplet defectum, omissione Divini Officii commissum, liberari ab onere restitutionis, quorum ratio est; quia talis rependit æquale recitando alio die, sicque facit restitutionem in spiritualibus. Opposita tamen sententia, quam tenet Caramuel *Resol. 24.* & communior aliorum, quamque probabiliorē centet Bonacina ibidem, negat, talem liberari ab onere restitutionis fructuum pro rata omissionis Breviarii. Ratio est: quia obstat præceptum Concilii Lateranensis sub Leone X. & Constitutio S. Pii V. injungentis restitutionem fructuum pro rata omissionis Officii, utpote *quos non fecit suos*, ut loquitur Pontifex in Constitutione *num. 21.* allegata; ergo tenetur hosce restituere tamquam non suos.

Anacl. Reiffenstuel Theolog. Tom I.

90 Illud tamen recte admonet Navarrus c. 7. de *Hor. Can. n. 34.* ac sequitur Layman *lib. 4. tract. 4. c. 5. n. 1.* cum aliis; si ipsemet Beneficiarius pauper sit, fructus restituendos pro rata omissionis Divini Officii eidem per modum eleemosynæ applicari posse. Tamen consultum erit in hoc casu, si Confessarius aliam similem satisfactionem imperet, puta ut oret, vel sacrificet pro defuncto Fundatore; aut, si malit, Officium neglectum suppleat: & sic fructus pro rata neglecti Officii eidem per modum eleemosynæ applicari sinantur.

91 Quæres ultimo, an Beneficiarius, qui ex iusta causa omittit recitare Horas Canonicas, teneatur restituere fructus Beneficii pro rata omissionis? Resp. negative, idque constat ex citata Constitutione S. Pii V. qua Beneficarii non recitantes Horas post primos sex menses cessante legitimo impedimento obligantur ad restitutionem fructuum; ergo, qui ob legitimum impedimentum non recitant, hoc ipso nihil tenentur restituere: nam *exceptio firmat regulam in oppositum* juxta vulgatum Canonistarum dictum, atque desumitur ex l. *Quæsitum §. 43. ff. De instructo, vel instrum.* juncta Glossa v. *Non potest non videri.*

## DISTINCTIO II

### De Juramento.

#### QUÆSTIO I

Quid, & quotuplex sit Juramentum?

#### SUMMARIUM.

- 1 Juramentum debite factum est bonum. Et quomodo?
- 2 Juramentum, quid?
- 3 Ejus divisiones.
- 4 Juramentum assertorium, & promissorium.
- 5 Juramentum simplex, & solenne.
- 6 Juramentum per simplicem Dei contestationem, & per execrationem.
- 7 Juramentum an sit; Per fidem meam &c.
- 8 Quid pro Foro externo?
- 9 Aliæ jurandi formulæ examinantur.
- 10 In illis intentio loquentis spectanda.
- 11 An hoc Auff mein Ayd, vel Auff mein Seel, sit Juramentum?
- \* Quales formulæ non contineant Juramentum?
- \* An detur Juramentum absque verbis?

**I**N Omne Juramenti in proposito intelligitur actus Religionis, quo quis Deum in testem adhibet ad confirmationem eorum, quæ affirmat, vel promittit, eaque ratione profitetur, Divinam veritatem esse indefectibilem. Neque enim Juramentum debite factum ex se est malum, sed potius actus Religionis: unde *Deuter. 6.* dicitur: *Dominum Deum tuum timebis: ac per nomen illius jurabis.* Sed hoc intelligendum est de Juramento debite facto, sive quando juratur in veritate, iudicio, atque iustitia, prout requiritur *Jerem. c. 4.* & *Quæst. seq.* amplius dicetur: quia Juramentum non est de genere eorum bonorum, quæ per se bona sunt, & frequentanda; ut est Oratio, Eleemosyna & hujusmodi; sed quæ bona sunt dumtaxat supposita necessitate, seu causa rationabili. Et de tali loquendo, sit

2 CONCL. I. Juramentum recte definitur dicendo: Juramentum est invocatio Divini Numinis in testimonium alicujus rei. Ita D. Augustinus de *Serm. Dom. in monte cap. 17.* & alii. Ratio est: quia finis immediatus usus Juramenti est confirmatio rei dubiæ, seu controversæ juxta illud *Hebr. c. 6.* *Omnis controversia finis ad confirmationem est Juramentum:* quo videlicet aliquid affirmamus, vel promittimus sub obtestatione Divini Numinis, ejusque testimonii invocatione.



3 CONCL. II. Inter varias Juramenti divisiones præcipua est illa, qua Juramentum dividitur in assertorium, & promissorium. Ita Scotus 3. *dist. 39. qu. un.* & alii communiter. Ratio est: quia aut Juramentum fit ad fidem veritatis narratæ adstruendam illi, qui audit: aut fit ad promissionem firmandam, qua alteri vel sponte, vel ex ejus impulsu quidpiam promittimus: atqui prius Juramentum est assertorium, posterius promissorium; ergo. Itaque

4 Juramentum assertorium est, quo simpliciter sine alia promissione aliquid affirmamus, vel negamus. Juramentum promissorium dicitur, quod ad confirmationem promissionis, pollicitationis, aut alterius contractus, seu pacti corroboracionem adjicitur. Et ad hoc Juramentum promissorium (ut notat Engel. *tit. de Jurejurando n. 6.*) duplex requiritur veritas: una intentionis, seu veritas dicti, qua jurans verum existimat esse id, de quo jurat. Et altera executionis, seu veritas facti, qua quis in animo habet fervare illud, quod promittit, suoque tempore servat.

5 CONCL. III. Juramentum tum assertorium, tum promissorium ulterius dividitur in simplex, & solemne. Simplex dicitur omne illud, quod solemne non est. Solemne Juramentum est, quod per certam verborum formulam, vel corporalem alicujus rei v. g. Sancti Evangelii attactum perficitur coram Superiore, ut majorem auctoritatem, æstimationemque habeat: quale potissimum solet fieri in Judiciis, in professione Fidei, fidelitatis, in homagiis, & hujusmodi.

6 Rursus Juramentum aliud est per simplicem Dei contestationem, aliud vero per execrationem (quod & Juramentum execratorium appellatur) & fit, cum jurans sibi ipsi, vel alteri sibi charo mali quidpiam a Deo falsitatis vindice imprecatur, nisi verum sit, quod asserit, aut promittit, e. g. dicendo: *Deus me puniat, si falsa loquor: Diabolus me rapiat, si meis non stem promissis &c.* Ubi tamen advertendum, quod, si quis per talem execrationem sibi imprecetur malum inferendum ab aliqua creatura, semper intendi, & subintelligi debeat permissente Deo tamquam speciali vindice: alias enim non foret Juramentum. Porro Juramentum per simplicem contestationem Dei censetur omne id, quod fit absque tali execratione. Sed occasione præmissorum.

7 Quæres I. An Juramentum censi debeat, si quis per fidem suam, aut honorem Sacerdotalem, vel Nobilitatis suæ aliquid affirmet, vel promittat? Resp. cum Engel. *tit. de Jurejur. n. 3.* Lessio *lib. 2. de Just. & Jure. cap. 42. n. 4.* & aliis, hujusmodi interpositionem fidei factam hac formula, *per fidem meam, fide boni Sacerdotis, & hujusmodi*, non continere Juramentum proprie dictum. Ratio est: quia per illa verba Deus non vocatur in testimonium, sed proferens tantum indicat, se omnino deliberatum, ac memorem fidei, conscientie, & status sui loqui. Quod si tamen aliquis per fidem Christianam seu Catholicam, aut per S. Evangelium rem promitteret sive confirmaret, pro Juramento haberi deberet: quia censeretur Auctorem Fidei in testem statuere.

8 Notant tamen Doctores, hujusmodi interpositionem fidei, quam faciunt Ecclesiastici sub honore Sacerdotali aut Religionis, item Personæ Illustres sub honore suæ Dignitatis, Nobilitatis &c. in Foro externo Juramenti loco acceptari, maxime in causis minoribus, in quibus non decet Ecclesiasticos jurare. Quinimo Reges, & Principes non facile aliorum more jurare solent, sed loco Juramenti in fide, seu per fidem Principis promittere. Layman *l. 4. tr. 3. c. 2. n. 3.*

9 Quæres II. Quid sentiendum de aliis quibusdam jurandi formulis? Resp. imprimis certum est, hanc esse veram eamque expressam Juramenti formam: *Juro per Deum: Per Deum ita est: Deum testem invoco: Deus mihi testis esto.* Quia hujusmodi formulæ expressam invocationem Divini testimonii in se continent: unde si addit animus seu intentio jurandi, certum est, habere rationem jurandi.

10 Quod si quis per simplicem assertionem hujusmodi verba proferat, *Coram Deo hæc dico: Deus scit, me verum dicere: Deus videt ita esse &c.* non erit Juramen-

tum; quia Juramentum debet in se continere non meram assertionem, sed etiam invocationem Divini testimonii, saltem virtuale. Verum in his, & aliis hujusmodi jurandi formulis spectanda est vel maxime intentio loquentis: qua de causa hujusmodi dicta quandoque ut Juramenta usurpantur; ut videre est apud S. Paulum 2. *Timoth. 4. Testificor coram Deo. Ad Galat. 1. Cyram Deo, quia non mentior. Ad Rom. 1. Testis mihi est Deus:* quibus verbis Apostolus jurasse existimatur. Econtra multi jurant ex ira, qui non intendunt proprie jurare, sed potius imprecari malum, vel patefacere iram, ut observat Lessius *cap. 42. n. 7.* Unde & huc applicandum illud jam citatum dictum D. Thomæ 2. 2. *q. 73. art. 2. Peccata verborum maxime sunt ex intentione dicentis dijudicanda.*

11 Quæres III. Utrum isthæc formula, *Volo, dictum meum esse juramentum* (vulgo, *auff mein ayd*) veram Juramenti rationem habeat? Resp. I. In Foro externo, seu judiciali talia verba prolata ad petitionem Judicis exigentis, ut quis juratus annuat, censetur Juramentum. Layman *loc. cit. n. 1.* post Sanchez *lib. 3. in Decalog. cap. 2. n. 4.* Resp. II. Verba illa, *auff mein ayd*, vulgari sermone plerumque Juramentum continent, si deliberate proferuntur. Ratio est: quia ad jurandum satis est, velle verba usurpare in sensu a jurantibus communiter usurpato: atqui hæc formula juxta consuetudinem Germanorum pro juramento usurpari solet; ergo tale præsumendum est, nisi de alia usurpantis intentione constet. Pariter teste Castropalao *T. 14. D. 1. p. 1. n. 7.* censetur ex communi usu continere Juramentum illa verba: *per animam meam:* Germanice, *auff mein Seel, bey meiner Seel:* sumitur enim hic anima, quatenus est imago SS. Trinitatis, & sic jam quatenus respicitur Deus.

#### Additio. I.

\* Quæres VI. Quænam formulæ communiter censeantur non continere rationem Juramenti? Resp. sequentes formulæ, nisi quis per eandem expresse intenderet jurare, non significant rationem Juramenti, si pronuntientur: *Dico in veritate, sin nequam, sin fur, si non ita sit: amputentur mihi amba aures, vel absindatur mihi nasus, si res se ita non habeat: tam verum est, quam sol lucet, quam hic sto &c.* Ratio est: quia similibus verbis nec ex se, nec ex communi sensu, ac usu hominum intelligitur Deus vocari in testem dictorum, ita cum Busenbaum & aliis la Croix *lib. 3. part. 1. n. 256. & seqq.* ac Sporer *Tract. 3. in præcept. Decalog. cap. 1.* Ex quibus colligitur, quod neque committat perjurium, qui similia etiam deliberate profert in re falsa. \*

#### Additio II.

\* Quæres V. An detur aliquod Juramentum sine verbis? Resp. affirmative. Ita cum communi vix non in terminis Sabinus Bononiensis *Tract. XV. n. 15.* Ratio est: quia non minus a legitimo suo Superiore interrogatus sub obtestatione Divini Judicii &c. censetur interpretative aliquid affirmare vel negare, si solum capite annuat, ac si verbis exprimeret: pariformiter dic, si respondeas signo alio sensibili e. g. pro more Regionis ponendo manum supra S. Scripturam, vel super porrectam imaginem Crucifixi; aut ad Sceptrum, seu, quando est Sacerdos per tactum sui pectoris. Unde in nonnullis locis introducta fuit consuetudo, ut uno prælegente formulam Juramenti reliqui jubeantur levare tres primos digitos in signum, quod jurent absque eo, quod aliquid aliud pronuntient. \*

### QUESTIO II.

De conditionibus ad Juramentum requisitis.

#### SUMMARIUM.

12 Tres Juramenti comites, Veritas, Judicium, & Justitia.

13 Quale



- 13 Quale peccatum, si desit iudicium in Juramento?
- 14 Consuetudo incaute jurandi, quale peccatum?
- 15 Quid de consuetudine jurandi sine iusta causa?
- 16 Iustitia, quomodo requiratur ad Juramentum?
- 17 Juramentum promissorium sine animo exequendi est perjurium.

- 18 Si fiat circa rem malam, quale peccatum?
- 19 Juramentum de re illicita non obligat.
- 20 Item: si fiat Juramentum de faciendo opere indifferenti.
- 21 Corollaria.
- 22 Alia notabilia Corollaria.
- 23 In omni Juramento, & Voto quatuor conditiones subintelliguntur quæ?
- 24 Conditiones, quæ tacite seu de Jure insunt, non faciunt actum conditionatum.
- 25 Juramentum promissorium de re bona obligat.
- 26 Quid, si fiat de opere minus bono?
- 27 Veritas etiam requiritur in Juramento.
- 28 Perjurium, quid?

Est peccatum mortale.

- 29 In Perjurio non datur parvitas materiae.
- 30 Potest fieri veniale ex defectu voluntarii, ac deliberationis.

Peccata verborum maxime sunt ex intentione dicentis dijudicanda.

- \* Qualiter quis debeat rem apprehendere veram, ut desuper possit jurare? Addit. I.
- + Quomodo practice sit interrogandus, qui confitetur, se jurasse? Addit. II.
- \* Qualiter sit adstrictus, qui se obligavit sub Juramento de servando secreto? Addit. III.
- \* Quid sentiendum de Mercatoribus jurantibus circa taxam pretii? Addit. IV.

12 **CONCL. I.** Certum est, atque ab omnibus concessum, ut Juramentum sit licitum, & opus bonum, actusque virtutis Religionis, tres requiri conditiones, tamquam comites ejus, nempe Veritatem, Iudicium, & Iustitiam, juxta illud *Jerem. 4. Jurabis, vivit Dominus, in veritate, & in iudicio, & in iustitia.* Veritas in eo consistit, ut veracissimi Numinis testimonium non adducatur in testimonium falsi, seu mendacii. Iustitia consistit in eo, ut æquissimi Numinis testimonium non adducatur in confirmationem dicti, aut rei iniquæ, & peccato obnoxie. Iudicium, seu iudicii discretio in eo, ut cum prudenti intellectus consideratione, ac pia & reverenti voluntatis affectione non sine necessitate, aut magna utilitate juretur.

13 **CONCL. II.** Quantum attinet ad ultimam Juramenti conditionem, quæ est Iudicium; conveniunt Doctores, si desit dumtaxat iudicium (id est, si sine iusta causa, & imprudenter juretur, quod verum est) ordinarie non esse, nisi peccatum veniale. Ratio est: quia tunc non latet gravis irreverentia, cum Deus adhuc adducatur in testimonium rei veræ, licet sine iusta causa, & sic imprudenter. Verum occasione hujus

14 Quæres, quale peccatum sit consuetudo incaute jurandi? Resp. I. Consuetudo jurandi indiscriminatim verum & falsum, etiam cum advertentia, quamdiu voluntaria est, constituit hominem in statu peccati mortalis. Ita Herinx *part. 3. disp. 6. q. 2. n. 15.* & alii. Ratio est: quia ex vi illius consuetudinis est homo in maximo periculo perjurii committendi; juxta quod *Ecclesiastici cap. 23.* dicitur: *Vir multum jurans implebitur iniquitate.* Additur, quamdiu voluntaria est: quia, si homini dicta consuetudo efficaciter displiceat, vi illius displicentiæ, & propositi eam deponendi interruptitur consuetudo.

15 Resp. II. Si consuetudo sit tantum jurandi sine iusta causa, & imprudenter, ea quidem non constituit hominem in statu damnationis, est tamen omnino dissuadenda. Ratio est: tum quia sine iusta causa jurare ad minus est peccatum veniale: tum quia Juramentum a Christo citra necessitatem prorsus reprehenditur *Matth. 5. Ego autem dico vobis, non jurare omnino &c. Sit autem sermo vester, est, est: non, non: quod autem his abundantius est, a malo est:* intellige, si non subsit iusta causa, seu necessitas

jurandi. Unde *Ecclesiastici 23.* dicitur: *Jurationi non assuescat os tuum, multi enim casus in illa.* Cum concordantiis.

16 **CONCL. III.** Quantum attinet ad alteram Juramenti conditionem, quæ est Iustitia (id est, ut res, de qua juratur, sit res honesta, iusta, nullique peccato obnoxia) multiplici opus est distinctione. Et quidem inprimis distinguendum inter Juramentum assertorium, & promissorium: atque loquendo de Juramento assertorio, factum circa rem injustam, vel peccatum alterius, illud regulariter est peccatum dumtaxat veniale, si veritas subsit. Herinx *loc. cit. n. 13.* & communis. Dicitur, regulariter: quia videtur mortale, si Juramentum assumatur ut instrumentum peccati, puta, si per Juramentum confirmetur gravis detractio infamatoria Proximi: contra vero, si quis in Iudicio legitime interrogatus sub Juramento testificetur de peccato Rei, nullum erit peccatum. Quod si vero Juramentum sit promissorium, ad dijudicandam ejus malitiam, vel etiam obligationem, multipliciter rursus erit distinguendum, præsertim an opus illud, super quod cadit Juramentum promissorium, sit bonum, indifferens, vel malum; atque, an adfuerit ex parte jurantis sufficiens deliberatio, simulque animus id exequendi, nec ne. Hinc fit

17 **CONCL. IV.** Quandocunque Juramentum promissorium deliberate fit, sive super re bona, sive mala, aut indifferenti, sine animo exequendi, committitur perjurium. Ita communis. Quia Deus deliberate (secus, si id fiat ex inadvertentia) adducitur in testimonium rei falsæ: in quo formaliter consistit malitia perjurii.

18 **CONCL. V.** Si Juramentum promissorium deliberate fiat circa rem malam animo illud exequendi, jam ratione illius affectus interni pravi erit peccatum mortale, vel veniale pro gravitate operis exequendi; simulque Juramentum, quatenus est testificatio Dei super re illicita faciendâ, habebit distinctam malitiam pro gravitate operis exequendi, nisi forte inadvertentia excuset. Ita Lessius *cit. cap. 42. n. 18.* & alii.

19 **CONCL. VI.** Juramentum de re illicita præstitum nullam parit obligationem. Ita communis, *arg. cap. Quanto, de Jurejurando,* ubi dicitur: *quod Juramentum non fuit institutum, ut esset vinculum iniquitatis.* Et *Reg. 58. Juris, in 6.* *Non est obligatorium contra bonos mores præstitum Juramentum.* Hinc jurans, quod nolit inimico ignoscere, nullum proximo auxilium facere, & hujusmodi, ex tali juramento non obligatur: quia, ut dictum, juramentum non potest esse vinculum iniquitatis.

20 **CONCL. VII.** Ex Juramento de faciendo opere indifferenti nulla quoque oritur obligatio; utputa si quis juret, festucam se levaturum, se barbam fricaturum &c. Ita communis. Ratio est: quia hujusmodi actiones non sunt fructuosæ, quin potius impeditivæ majoris boni. Verumtamen hoc intelligendum est, nisi alia causa, ex qua actiones ceteroquin indifferentes honestatem virtutis acquirant, adjiciatur: ut v. g. si jures, te ædes alicujus non ingressurum, cum tali meretrice non locuturum &c. causa vitandi peccati, jam ob hanc additam causam actio illa, vel potius omissio actionis erit capax obligationis Juramenti, quamdiu periculum illud durat.

21 Ex his patet resolutio illorum casuum quotidianorum, nempe de Patre jurante, se graves pœnas repetiturum a filio, de Hera jurante, se non servaturam diutius hanc, apt illam ancillam, de Fratre, vel Condiscipulo, se apud Patrem vel Magistrum accusaturum esse suum fratrem, vel condiscipulum, de Mercatore, se hanc mercem non viliori pretio venditurum, vel non majori empturum, de Aulico, se non priorem sessurum, non priorem ingressurum &c. Nam inprimis, si tales serio jurant, nec tamen habent intentionem exequendi id, de quo faciendū jurant, delinquant mortaliter, juxta dicta *n. 17.* & amplius notat Gobat *tract. II. Theol. Experim. n. 528.* quia tunc in tali Juramento deest veritas, atque Deus adducitur in testem falsitatis.

22 Nihilominus, ut idem Gobat notat, raro hujusmodi homines peccant mortaliter non faciendo postmodum id, quod serio jurarunt se facturos: ut quando Pater videt,



videt, filium alia ratione emendatum, vel maternis lamentis domum impletum iri, si cædatur filius albæ gallinæ, ac proinde minas remittat; quod etiam de ceteris dicendum. Ratio est: quia vel hujusmodi Juramenta non fiunt ex motivo Virtutis, sed, ut frequenter contingere solet, ex impatientia, & proposito vindictæ; ac proinde non obligant, cum sint facta de re mala, nempe propter vindictam, aut iram suam complendam. Vel, & quidem non raro fiunt de re indifferenti v. g. non prius sedere, intrare &c. vel inutili, ut si corrigendus jam aliunde emendatus sit, neque correctione amplius indigeat: vel non gravi, ut si pater juravit, se castigaturum puerum ita promeritum, & postea sine causa omittat; prout exemplificat Layman *cit. tract. 3. c. 54. n. 6.* Aut certe solet frequenter intervenire una saltem ex quatuor illis conditionibus, quæ subintelliguntur in omni Juramento promissorio. Hinc sit

23. CONCL. VIII. In quolibet Juramento promissorio (imo & Voto) quamvis absolute facto, tacite quædam conditiones subintelliguntur. Ita desumitur ex *c. Quemadmodum* juncta Glossa *¶. Conditio. de Jurejur.* & notat Abbas ibidem *n. 8. Pirhing tit. de Jurejur. n. 119.* & communis. I. Conditio est, *Si potero*: quia ad impossibile nemo obligatur. II. *Salvo jure, & auctoritate Superioris*: quæ conditio desumitur tum ex *c. Ad nostram. 21. de Jurejur.* tum ex *c. Non est, de Voto.* ibi: *Non est voti dicendus transgressor, qui, quod vovit, auctoritate Sedis Apostolicæ distulit adimplere.* III. Conditio est: *Nisi is, in cujus gratiam & utilitatem juratum est, obligationem remittat*, sive expresse, sive tacite: quia quilibet potest cedere juri suo, illudque remittere. Et tandem IV. est. *Dummodo res in eodem statu permanferit*, id est, notabilem mutationem non accipiat: quia notabilis mutatio quasi aliud objectum facit, ad quod verisimili præsumptione jurantis, & promittentis intentio se non extendit.

24 Nec dicas. Juramentum sub conditione conceptum est conditionale; ergo si in omni Juramento (imo & Voto) tacite insunt prædictæ conditiones, illud omne erit conditionale, & consequenter nullum absolutum, quod est contra communem Doctorum. Resp. enim distinguendo antecedens: Juramentum sub conditione extrinseca conceptum (ut puta, juro me hoc facturum, si navis ex India advenerit, si Petrus erit Romam iturus &c.) est conditionale, conceditur: Juramentum sub conditione, quæ tacite seu de jure inest, conceptum est conditionale, negatur antecedens, & consequentia. Nam generaliter conditiones, quæ tacite seu de jure insunt, non faciunt actum conditionatum *arg. L. 3. ff. de Legatis. l. 1. & L. Conditiones. ff. de Condition. & demonstrat.* ibi: *Conditiones, quæ tacite inesse videntur, non faciunt legata conditionalia. cum concordantiis.*

25 CONCL. IX. Juramenta promissoria, quæ cedunt in honorem DEI, tum ad bonum tertii, Ecclesiæ aut Communitatis, fiuntque circa materiam honestam, pariunt obligationem. Ita communis. Et merito quoad hoc traditur hæc generalis regula ex *c. Si vero. & c. Cum contingat. de Jurejurando.* desumpta: *Omne Juramentum editum in alterius utilitatem servandum est, si sine peccato, seu salutis dispendio servari potest.* Ratio est: quia talia Juramenta involvunt reverentiam Divini Numinis, simulque sunt honesta; ergo ex motivo Religionis pariunt obligationem ea adimplendi, subintellige, nisi excuset una ex proxime dictis quatuor conditionibus, in omni Juramento promissorio tacite subintellectis.

26 CONCL. X. Juramentum conceptum de opere minus bono, & cujus oppositum est melius, non obligat, nisi sit factum in favorem tertii. Ita Doctores passim. Ratio est: quia in simili, hac ipsa de causa Votum de opere minus bono editum non obligat, aut saltem ipsius voventis, sive jurantis arbitratu potest commutari in melius: puta, si vovisti Deo, te uxorem ducturum, potes absque alia dispensatione Religionem ingredi, aut in sæculo perpetuam Castitatem servare, cum hoc sit opus melius. Similiter, si vovisti (idem dicendum, si jurasti) te hac hora oraturum, postea vero intelligas,

gratius Deo futurum, si ægroto assistas, opemque feras, non teneris Juramento aut Voto, cum in talibus circumstantiis non sit de meliori bono, sed præcedat auxilium infirmo præstandum. Additur notanter in Conclusionem, *nisi sit factum in favorem alterius*; tunc enim obligabit Juramentum, nisi illud alter remittat: quia in promissione facta homini, aut Juramento in ejus favorem præstito spectatur, quid illi gratius sit; in promissione vero facta Deo, quid melius. Layman *lib. 4. tr. 3. cap. 6. n. 6. & alii.*

27 CONCL. XI. Quantum attinet ad tertiam Juramenti conditionem, quæ est *Veritas* & consistit in eo, ut Dei veracissimi testimonium non adducatur in confirmationem falsi, aut mendacii certum est, eandem requiri ad Juramentum licitum, eaque deficiente committi Perjurium, quod ex genere suo est peccatum mortale.

28 Porro *Perjurium* proprie dictum est Juramentum falsum, quo quis aliud sub obtestatione Divini Numinis confirmat esse verum, quod tamen credit esse falsum; vel econtra, ait esse falsum, quod putat esse verum. Vel brevius; *Perjurium* est Juramentum de falso in opinione jurantis. Ita Mastrius *disp. 11. Theol. Moral. n. 58. & alii.* Additur, *in opinione jurantis*: quia quamvis, quod quis jurat esse verum vel falsum, sit tale a parte rei, si tamen jurans putaret non esse tale, nihilominus pejeraret; quia deliberate Deum in testem rei juxta suam opinionem falsæ adduceret. Inferitur proinde, omne *Perjurium* cum deliberatione factum esse peccatum mortale: quia revera est gravis irreverentia Deo illata, ipsum deliberate adducere in testem mendacii. Et hoc idem dicendum, si quis dubitet de veritate rei: nam exponeret se manifesto periculo adducendi Deum in testem falsitatis, ac proinde peccaret.

29 Nec obstat, quod materia sit levis, aut exigui momenti. Adhuc enim intervenit tota Perjurii malitia, in hoc consistens, quod DEI veracissimi testimonium in confirmationem falsitatis, & mendacii adducatur. Inferunt proinde Doctores communiter, in Perjurio non dari parvitatem materiæ, quæ ipsum a mortali excuset, ob rationem prædictam: quia nimirum in quolibet Perjurio, deliberate & advertenter facto, tota hujus peccati malitia reperitur. Unde merito Innocentius XI. hanc inter alias, ordine 24. Propositionem damnavit: *Vocare Deum in testem mendacii levis non est tanta irreverentia, propter quam velit, aut possit damnare hominem.*

30 Additur, notanter, *deliberate & advertenter facto.* Quia, ut notat Doctor noster 3. *dist. 39. q. un.* estque communis, *Perjurium* sine deliberatione factum non est peccatum mortale: cum generaliter ad omnem actum humanum, ac præsertim ad peccatum mortale requiratur voluntarium, ac sufficiens deliberatio. Unde quavis numquam ratione parvitatis materiæ, adhuc tamen ratione defectus voluntarii, aut sufficientis deliberationis quandoque homines a peccato mortali contingit excusari: dum videlicet proferunt verba, ex se quidem Juramentum falsum sonantia, sed sine intentione actuali, vel virtuali Deum in testem falsitatis adducendi; aut quia id faciunt non cum plena deliberatione: siquidem, ut notat sæpe citatus D. Thomas 2. 2. *quest. 73. art. 2. Peccata verborum maxime sunt ex intentione dicentis judicanda.*

#### Additio 1.

\* Quæst. I. Qualiter quis debeat rem aliquam judicare veram, ut desuper jurare possit? Resp. Sanchez, Castropalao & Diana teste la Croix *lib. 3. part. 1. n. 267.* putant, esse sufficiens, si tantum probabiliter ea res judicetur vera, saltem, si Juramentum fuerit extrajudiciale. Econtra vero Suarez, Dicastillo, alique apud eundem la Croix loco cit. existimant requiri moralem certitudinem talem, ut de opposito non adsit formido prudens, seu fundata in ratione gravi, vel saltem juxta la Croix, ut de opposito non habeatur formido æqualis; aliis enim quis se exponeret periculo gravi aliojuss Perjurii. Et hæc sententia nihil æque, ac Patri la Croix, uti & Patri Sporer *tract. 3. in Decalog. cap. 1. num. 96. & seqq. præ-*



præplacet; ubi tamen ex eodem Auctore adhuc adverte, in causis mere favorabilibus sufficere aliquo modo minorem certitudinem; in aliis vero, ubi alteri grave incommodum nasci posset, requiri majorem, ut quis desuper valeat jurare, præsertim judicialibus. \*

Additio II.

\* Quær. II. Quomodo practice interrogandus, qui contitetur se jurasse? Resp. Talem esse interrogandum eodem ferme modo, quo antea de Blasphemis Tract. 5. dist. 3. q. 5. mentionem fecimus. Nimirum I. Num deliberate vel indeliberate? Quodsi deliberate ac scienter juraverit, indagetur II. Qualiter ergo juraverit, ex hoc enim interrogatorio Confessarius desumet, num verba illa probata verum Juramentum significant, nec ne? Quodsi hæc verba forent dubia, interroget III. Quam mente protulerit? sciam si per eadem non intendit scienter, & positive Deum in testem vocare, non diceretur jurare; atque sic sæpiissime contingere testatur Sporer Tract. 3. in II. Præcept. Decalog. cap. 1. sect. 1. §. 2. num. 9. Quando autem per eadem intendit jurare, aut ipsamet verba deliberate prolata indubitato, & expresse significarent Juramentum, Confessarius ille, nisi ex circumstantiis aliunde jam desumpserit, interroget similem pœnitentem IV. Num in re vera vel falsa juraverit? ubi ex jam antea dictis notandum, quod perjurium sit Juramentum de falso in opinione seu mente jurantis; verum autem Juramentum de vero in mente vel opinione ipsius jurantis. Hinc decipiuntur rudes illi, qui credant se pejerasse, qui tractu temporis experiuntur rem juratam aliter se habere, quamvis tempore Juramenti optima fide crediderint, eandem rem esse veram. Econtra vero errant pariter, qui existimant, se falso non jurasse ex eo, quia postea vident, rem esse veram, quam tamen falsam putabant in ipso actu jurandi. Ita recte Sabinus Bononiensis in Lucæ Morali. Tract. 15. n. 19. Demum finaliter V. S. Confessarius deprehendat, Pœnitentem quoad Juramenta peccasse mortaliter, haud dubie erit etiam inquirendum de numero, quoties nimirum interpolatis vicibus similia Juramenta contigerint? Ceterum, num & quando teneatur aliquis Pœnitens circa Juramentum promissorium servare ipsam rem jurato promissam, colliget Confessarius ex jam dictis.

Additio III.

\* Quær. III. An, & quando in Confessionali a peccato excusari possit Pœnitens, qui Juramentum promiserat, communicatum quodpiam Secretum v. g. Medicinæ nulli revelare, si illud tamen manifestet? Resp. Si nec pœnitens nec ille, qui talem pœnitentem docuit, neque etiam alius per alia medicamenta possint citra manifestationem hujus Secreti sufficienter providere bono publico, vel tertio simili morbo periculose laboranti; haud dubie excusabitur a peccato illud Secretum revelans; uti etiam, si mortuo illo, qui pœnitentem docuit, simul ars ista emoreretur, nisi pœnitens manifestet alteri. Ita cum pluribus Sporer Tract. 3. in Decalog. cap. 1. sect. 2. n. 42. & la Croix tom. 2. lib. 3. n. 329. Ratio est: quia in similibus circumstantiis foret contra charitatem, nolle artem talem revelare, aut ad posteros transmittere: Juramentum autem, quod utique non est vinculum iniquitatis, nequiquam adstringit contra virtutem Charitatis. Quodsi vero similes circumstantiæ non adsint, tenetur pœnitens Secretum celare. \*

Additio IV.

\* Quær. IV. An, & quomodo in Confessionali a perjurio excusari possint Mercatores, qui jurant, se non posse tali pretio merces vendere: item merces sibi metipsis pluris constare, cum tamen neutrum in rigore vi-

deatur verum? Resp. Ex la Croix lib. 3. p. 1. n. 301. primos excusari posse per hoc, quod intelligant, & satis sciantur significare velle, se non posse cum honesto & mediocri lucro ita vendere. Secundi vero poterunt excusari per id, quia, quando dicunt sibi pluris constare, scimus, quod non intelligant nude pretium rei emptæ, sed etiam computent partim expensas v. g. vecturæ &c. partim proportionalem partem sumptuum, quos toto anno faciunt in suam communem negotiationem; hæc enim omnia jure possunt venire nomine pretii, quo res ipsis constat. Quodsi locutiones eorum non essent in hoc sensu veræ, mentirentur, & si jurarent, pejerarent. Ita cum Gobat la Croix loc. cit. ego autem subjungo, talia Juramenta esse ceteroquin Mercatoribus dissuadenda ob periculum perjurii non raro interveniens.

QUÆSTIO III.

Solvuntur diversa adhuc Dubia, Juramentum concernentia.

SUMMARIUM.

- 31 Violatio Juramenti promissorii, quale peccatum?
- 32 Quid, si res sub Juramento promissa sit levis?
- 33 & 34 An liceat Juramentum exigere a juraturo falsum?
- 35 Præsertim in Judicio?
- 36 Aut a juraturo per falsos Deos, vel Mahometem?
- 37 Vel a juraturo bona fide contra veritatem?
- 38 An liceat jurare cum restrictione mentali?
- 39 Vel equivoce?
- 40 Quid, si injuste cogatur ad jurandum?
- \* Num liceat uti Amphibologia, & quando?
- Additio I. & seqq.
- 41 Juramentum, quis possit irritare, dispensare, commutare &c.
- (a) Dist. seq. quæst. 4.

31 Q Uæritur I. Utrum violatio Juramenti promissorii, præsertim in re parva, sit peccatum mortale? Resp. I. Si promissio Juramento firmata sit rei notabilis seu gravis, violatio ejus erit peccatum mortale. Ita Doctores communiter. Ratio est: quia, ut jam dictum n. 4. ad Juramentum promissorium requiritur duplex veritas; una intentionis, seu veritas dicti, qua quis ab initio debet habere intentionem servandi id, quod promittit; & altera executionis, seu veritas facti, qua suo tempore servandum est, quod sub Juramenti Religione quis promissit. Itaque si quis cessante justo impedimento, ac nulla subsistente conditione tacita ex quatuor illis n. 23. assignatis, atque in omni Juramento promissorio tacite subintellectis non impleat id, quod se facturum sub Juramento promissit, jurans, quantum in se est, facit, ut Deus falsum testatus sit.

32 Resp. II. Num autem idem dicendum sit, si materia sub Juramento promissa sit levis, ac parvimenti, variant Doctores. Et quidem affirmativam ob reverentiam Divini Numinis observare procul dubio laudabilissimum est, atque omnimodis consulendum. Negativam tamen sententiam, id est, peccatum mortale tunc non committi, tenent Reginaldus lib. 18. n. 97. Suarez, Sanchez, Sotus, pluresque alii. Ratio desumitur ex dictis n. 23. ubi diximus, plures condiciones dari, quæ excusant jurantem ab obligatione implendi Juramentum promissorium, quarum una est: Si is, in cujus gratiam juratur, id remittat. Atqui nullus censetur facile, & rationabiliter velle obligare sub gravi culpa ad præstandam materiam levem, quam quis promissit sibi sub Juramento; ergo non erit peccatum mortale, materiam levem sub Juramento promissam non adimplere: idque tum ob tacitam remissionem alterius, in cujus favorem juratur; tum ob levitatem materiæ, utpote quæ in simili etiam in Votis excusat.

33 Quær. II. An liceat Juramentum exigere ab eo, quem quis scit falso juraturum, aut juraturum per falsos



falsos Deos, vel per Mahometem Pseudopropheta? Resp. I. Si quis exigit Juramentum ab aliquo, quem nescit juraturum falso, non peccat. Ita communis, & ratio clara est: quia ignorantia ipsum excusat, præsertim accedente bona fide, qua sperat, alterum reverentia Numinis non ausurum falso jurare. Id tamen absque justa causa non est faciendum: quia sicuti peccatum est, saltem veniale, absque necessitate verum jurare, ita etiam alterum absque necessitate ad Juramentum adigere, juxta illud Salvatoris *Math. 5. Quod abundanti-  
us est, a malo est.*

34 Resp. II. Cum Doctore Angelico 2. 2. q. 98. art. 4. & aliis, fas non esse, nisi justa causa subsit, exigere Juramentum ab eo, qui scitur pejeraturus. Ratio est: quia inducere aliquem ad peccatum mortale, puta ad perjurium in casu nostro, est peccatum mortale: tene-  
mur enim, quantum in nobis est, tantam Dei injuriam, & proximi peccatum evitare.

35 Dicitur notanter, *absque justa causa.* Nam imprimis Judex, si tamquam persona publica secundum ordinem juris exigit a litigante Juramentum, non peccat si-  
ve sciat eum falso juraturum, si-ve non; tum quia facit id, ad quod ex officio tenetur, petente præsertim parte adversa; tum quia Judex non debet sequi privatam scientiam, sed præscriptum Juris, adhibendo ea, quibus solet elici veritas, alioquin daret justam causam scan-  
dali. Quando tamen Judex id commode potest declinare, debet, ut notat inter alios Lessius *lib. 2. cap. 42. n. 49.* plures causas subjungens.

36 Insuper, ubi justa ratio ad damnum, vel injuriam cavendam suppetit, etiam in contractibus, & aliis causis potest quis exigere Juramentum ab eo, qui per falsos Deos, aut Mahometem Pseudopropheta noscitur juraturus, non quidem, ut determinate juret tali modo, sed absolute & in genere: sicuti post D. Augustinum *Epistol. 154. ad Publicolam.* notant Doctores communiter. Sic Laban, iniens fœdus cum Jacobo, juravit per Deum Abraham, & Deum Nachor *Gen. 31.* Id ipsum est quotidianum apud Mercatores cum Infidelibus contrahentes. Id tamen sine justa causa exigere non licet, neque etiam permissum est, aliquem inducere ad hoc determinate, quod per falsos Deos juret, quia cooperaretur peccato alterius.

37 Quæritur III. An liceat exigere Juramentum ab eo, qui bona fide jurabit contra veritatem, id est, firmiter sibi persuadens esse verum, de quo jurat, quod tamen a parte rei est falsum? Resp. negative, prout notat Herincx *disp. 6. de Religione. n. 36.* cum Doctores communiter, contra paucos alios. Ratio est: quia respectu petentis est inductio ad falsitatem testificandam, & jurandam, quod est intrinsece malum.

38 Quæritur IV. An liceat æquivoce vel cum restrictione mentali jurare? Resp. I. Hic imprimis cavendæ sunt Propositiones illæ, quas Innocentius XI. *sicut jacent,* sit minimum tamquam scandalosas, & in praxi perniciosas merito damnavit, quarum prior, ordine 25. sic habet: *Cum causa licitum est jurare sine animo jurandi, si-ve res sit levis, si-ve gravis.* Altera ordine 26. est hæc: *Si quis, vel solus, vel coram aliis, si-ve interrogatus, si-ve propria sponte, si-ve recreationis causa, si-ve quocumque alio si-ve juret, se non fecisse aliquid, quod revera fecit, intelligendo intra se aliquid aliud, quod non fecit, vel aliam viam ab ea, in qua fecit, vel quodvis aliud additum verum, revera non mentitur, nec est perjurus.* Tertia, ordine 27. & itidem damnata taliter sonat: *Causa utendi his amphibologiis est, quoties id necessarium, aut utile est ad salutem corporis, honorem, res familiares tuendas, vel ad quemlibet alium virtutis actum, ita ut veritatis occultatio censeatur tunc expediens, & studiosa.* Quarta ordine 28. est illa: *Qui mediante commendatione, vel munere ad Magistratum, vel Officium publicum promotus est, poterit, cum restrictione mentali præstare Juramentum, quod de mandato Regis a similibus solet exigi, non habito respectu ad intentionem exigentis, quia non tenetur fateri crimen occultum.* Ita Propositiones damnatæ.

39 Resp. II. Quando quis se sponte offert ad jurandum, vel si legitime ad hoc compellitur v. g. per Judicem juridice interrogantem, peccat mortaliter, si alieno sensu juret. Ita communis, & patet tum ex Propositionibus proxime relatis, ac damnatis; tum ex eo, quia si juridice interrogatus, æquivoce, atque in alio sensu jurare posset, facile perverteretur judicium. Accedit, quod juridice interrogatus teneatur obedire Judici, sicque jurare in sensu ab eodem intento; ergo jurans æquivoce, vel cum restrictione mentali, committeret perjurium.

40 Resp. III. Nihilominus, quando aliquis injuste cogitur ad Juramentum, non peccat jurans amphibologice, si justa ita jurandi causa subsit ad veritatem aliquam dissimulandam. Ita cit. Lessius *n. 47.* Layman *l. 4. tract. 3. cap. 14. n. 7.* & alii. Atque hanc doctrinam non contineri sub censura Propositionum damnatarum supra allegatarum, satis indicat Joan. Cardenas in *Crisi Theol. ad dictas Propositiones, præsertim num. 77.* Ratio est: quia amphibologicæ locutionis unus sensus verus est; ergo secundum illum, postulante tali necessitate, locutio illa potest Juramento confirmari: cum enim injuste quis cogatur ad Juramentum, non tenetur loqui ad mentem alterius.

#### Additio I.

\* Verum ut clarius innotescat, quando Amphibologie usus liceat, & saltem a mendacio & consequenter etiam a perjurio, si Juramentum adderetur, alienus sit, est notandum, quod Innocentius XI. supra *n. 38.* relatus solum damnet Amphibologiam, quæ sit cum restrictione pure mentali, innuatque per eam committi perjurium & mendacium. Ratio est: quia in Amphibologia cum restrictione pure mentali verba non significant, quod loquens in mente sentit; ergo per hujusmodi Amphibologiam committitur mendacium (mentiri enim est contra mentem ire) & consequenter si adjungatur Juramentum, etiam perjurium. Quocirca, cum non sic omnis Amphibologia ex restrictione pure mentali descendat, ac proin non quævis damnata esse videatur, breviter inquirendum superest, quandonam illa liceat?

I. Itaque censent Doctores licere Amphibologie usum, dum verba sunt æquivoca, & secundum duplicem sensum conceptui mentali correspondere possunt: atque tunc, si adsit ratio occultandi veritatem ab altero intentam, licite usurpas verba in alio sensu, quam sit sensus interrogantis, modo ad talem conceptum exprimendum verba ex se apta sint: sic canis significat terrestrem, marinum vel coelestem &c. \*

#### Additio II.

\* II. Licet uti Amphibologia, quando verba a loquente juxta certas temporis, loci, vel personarum circumstantias sensibiles determinantur ad alium sensum, quam illa secundum se, & nude spectata significant. Ut si quis interroget, an Petrus sit in urbe, & tu ob certas rationes volens abscondere locum, ubi existat, manu, vel digito designans respondeas: *Non est hic*, id est, *in loco, in quo tu stas, & quorsum digito monstras.* Non debemus autem hoc duplici modo uti passim sine aliqua necessitate, aut alia valde rationabili causa; alias perderetur confidentia, & tolleretur sincera fidelitas in commercio humano: multo minus debemus ad tales modos sine magna necessitate aut notabili utilitate adhibere Juramentum. \*

#### Additio III.

\* III. Si verba propter certa Mysteria fumantur in sensu metaphorico (quo juxta D. Augustinum *lib. Contra mendacium. cap. 10.* Jacob se vocavit primo-genitum) quamvis in sensu sibi proprio aliud diversum a mentali conceptu loquentis significant, non tamen fit mendacium. Exemplo nobis sit ipsa æterna Veritas, dum



se ipsum in Mystico & metaphorico sensu *Templum* nuncupavit; dicens: *destruite templum hoc*: minime ignarus, per verba ea juxta propriam significationem Judæos audientes in noticiam templi manu facti deductum iri. \*

Additio IV.

\* IV. Non fit mendacium, si quis respondeat interroganti in eo sensu, in quo habet jus interrogandi, non obitante, quod iste in alio sensu verba percipiat. Hinc si fur, nulla de suo furto præcedente infamia, sed sola vel deferentis aut Judicis pro libitu assumpta suspicione judicialiter inquiratur, an *furtum commiserit*, licite respondet: *furtum non commisi*, videlicet, quod foret materia judiciaræ inquisitionis, & de quo Judex interrogare posset. Item si Puella ab aliis v. g. inducta scripsit cujusdam litteras amatorias tales, quæ plane vi verborum in foro externo indicarent promissionem matrimonii, cujus executionem etiam alter præterdit, quamvis a parte rei, & coram Deo (prout supponimus in casu) Puella numquam intenderit per has litteras promittere matrimonium: in tali casu, si Puella fateretur has litteras esse suas, in foro externo certe condemnaretur ad contrahendum; quare etiam cum Juramento, si a Judice id imponatur, potest negare has litteras esse suas, videlicet in ordine ad promissionem Matrimonii. Nec est ista pura restrictio mentalis, Puella enim non tenetur alio, nisi eo modo respondere, quo Judex pro tribunali sedens habet jus interrogandi; atqui is in dicto casu non habet jus interrogandi circa dictas litteras nisi in ordine ad matrimonium: nimirum an litteras has scripserit, intendendo per eas promittere Matrimonium; ergo etiam Puella non tenetur, nisi in ordine ad hunc finem Judici respondere, & consequenter, cum in ordine ad dictum finem litteras non scripserit, etiam sine mendacio negat, se scripsisse, quoniam interrogatio & responsio sic conveniunt. Plura de similibus vide apud Cardenas in sua *Crisi Theologica super dictas Propositiones. n. 48. & seq.* ac apud Sporer part. 3. in *Delal. cap. 1. sect. 3. §. 4.* \*

Additio V.

\* V. Mendacium non committit ille, qui dicit, se nescire id, quod non noscat scientia communicabili, id est tali, quam liceret alteri communicare: etenim verbum *nescire* ex sui institutione non tantum significat, rem non scire simpliciter, sed etiam non scire eam scientia communicabili, in iis videlicet circumstantiis, ubi occultari petit, uti notat communis Theologorum, atque ita, si interrogatus de aliquo ex solo Confessionali cognito, quod tibi non licet revelare, respondeas *nescio*, non loqueris cum pura restrictione mentali, sed usurpas verbum ex se, & ex recepto usu, ac hominum institutione correspondens conceptui tuo mentali. Hinc D. Augustin. lib. 1. de *Trinitate. cap. 12.* innuit, quod res occultanda nos faciat nescientes. Isque pariter modus loquendi erat Salvatori, dum apud Marcum c. 13. ita dixerit: *De illo autem die vel hora nemo scit, neque Angeli in celo, neque Filius &c.* eo quod de die illa scientiam communicabilem Filius non habuerit &c. Quod si licitum mihi foret id, de quo interrogor, alteri manifestare, jam non amplius video, quomodo possit ad celandum uti quis hoc modo, debetque modus iste non nimium extendi in commercio humano, nec fieri abusus, ne tollatur sinceritas in conversatione humana. \*

41 Quær. V. & ultimo. Quis possit irritare, dispensare, relaxare, aut commutare Juramentum promissorium? Resp. de hoc inferius (a) fore dicendum, agendo de Voto. Nam qui potest Votum relaxare, dispensare, irritare, vel commutare, poterit etiam Juramentum promissorium soli Deo factum: quia Votum, & Juramentum pium in Jure & apud Doctores æquiparantur quoad vinculum, & ambo similem erga solum Deum ex virtute Religionis obligationem continent; ideoque

dispositum de uno, censeri etiam debet dispositum de altero. Sanchez lib. 8. de *Matrim. disp. 7. n. 18.* Layman lib. 4. tract. 3. cap. 11. cum communiori, contra Navarrum, & paucos alios.

DISTINCTIO III.

De Voto.

QUESTIO I.

Quid, & quotuplex sit Votum?

SUMMARIUM.

- 1 Votum, quid?
- 2 Promissio, quid? & quomodo differat a simplici Proposito?
- 3 An Promissio solo animo concepta obliget?
- 4 Deliberatio requiritur ad Votum; & quanta?
- 5 Votum fit soli Deo.  
Promissio etiam hominibus fieri potest.
- 6 Votum est de meliori bono.
- 7 Matrimonium, an sit materia apta Voti?
- \* Item num valeat Votum non committendi unquam ali-  
quod peccatum etiam levisimum?
- 8 Voti divisiones variae.  
Votum simplex, & Votum solemne, quid?
- 9 Differentia Voti solemnitis a simplici.
- 10 Votum personale, reale, & mixtum.
- 11 Votum absolutum, & conditionatum.

1 CONCL. I. Votum est promissio deliberate facta DEO de meliori bono. Ita communis. Dicitur I. *Promissio* Quia ad Votum non sufficit nudum & simplex propositum aliquid melius agendi vel faciendi; sed ulterius requiritur promissio cum vera voluntate sese obligandi, ut habetur cap. *Litteraturam, de Voto.*

2 Ceterum Promissio est deliberata, & spontanea fidei obligatio, facta alteri de re bona possibili. Et differt per hoc a simplici Proposito, quod Promissio inducat obligationem faciendi id, quod promittitur: Propositum autem licet sit firmum ac deliberatum, ex se talem obligationem non inducit. Maltrius disp. 4. *Theol. Moral. n. 26.* cum aliis. Hinc Promissio Deo facta de bono meliori coincidit cum Voto: & potest fieri non solum ore tenus, sed etiam per solum actum locutionis interioris, dummodo fiat deliberate, & cum animo sese obligandi.

3 Nec obstat, quod in promissione homini facta secus fiat, neque sufficiat sola interior promissio, nisi hæc verbis aut aliis signis exterioribus sufficienter manifestetur, atque a Promissario acceptetur. Resp. enim disparitatem esse: quia, ut dicitur I. Reg. 16. *Homo videt ea, quæ parent, Dominus autem intuetur cor.* Unde promissio Deo facta, licet animo tantum interno, mox a DEO cordium nostrorum inspectore videtur, & acceptatur; sicque illico obligat, dummodo sit deliberate concepta. Secus fit in promissione homini facta: nam hæc neque cognosci potest ab homine, cui fit, neque ab ipso acceptari, quousque verbis vel aliis signis exterioribus sufficienter exprimatur.

4 Dicitur II. In allata definitione Voti, *deliberate*. Quia promissio subita & inconsiderata, non sufficit ad rationem Voti: siquidem Votum est lex aliqua privata, qua quis Deo se obligat; nemo autem se obligare vere censetur, nisi plenam habeat deliberationem ejus, quod facit. Unde Vota infantium ob defectum sufficientis usus rationis non tenent, neque etiam obligat Votum per semiplenam dumtaxat deliberationem editum; imo tanta & talis requiritur deliberatio ad validitatem Voti, quanta requiritur ad peccatum mortale committendum. Herincx disp. 4. de *Voto. q. 1. n. 1.* & alij passim.

5 Dicitur III. *Deo facta*. Quia, cum Votum proprie sit actus Religionis & Patriæ, soli Deo fieri debet. Quare, dum aliquid vovemus Sanctis, sentus est, illud



voveri Deo Sanctis nostri emissi Voti futuris testibus, vel id DEO voveri in honorem Sanctorum: quo modo etiam templa & Altaria edificamus DEO in honorem Sanctorum, nam in Sanctis ipsum Deum coli, ac venerari, fatentur omnes Catholici. Circa quod D. Thomas 2. 2. q. 88. art. 3. observat, quod Votum soli Deo fiat, sed promissio possit fieri homini: qualis promissio de re bona homini facta, puta, Sanctis in caelo, Prælati Ordinum &c. potest cadere sub Voto, in quantum homo vovet Deo, se impleturum, quod Sanctis vel Prælati promittit.

6 Dicitur IV. De meliori bono. Quia ad Votum dux ulterius requiruntur conditiones: una est, ut illud, quod vovemus, sit opus bonum moraliter, simulque possibile, sive deinde jam aliunde sit præceptum, sive non: altera, ut bonum illud melius sit, quam ejus oppositum, id est, ut non sit privativum, aut ex se impeditivum alterius operis excellentioris, & perfectioris posset.

7 Hinc matrimonium, regulariter loquendo, non est apta materia Voti: quia melior est virginitas matrimonio; unde ipsa semper potest eligi, ac licite conservari, non obstante Voto de ineundo matrimonio. Dicitur, regulariter loquendo: nam matrimonium etiam potest cadere sub Voto, quando per Matrimonium ob speciales circumstantias potest procurari majus bonum, prout fieret, si vovens frequenti periculo peccati carnis obnoxius, voveat matrimoniale statum, tamquam remedium suæ incontinentiæ, citius assumere. Melius est enim nubere, quam uri, ut inquit Apostolus 1. Corinth. 7.

#### Additio.

\* Quod si indages, an validum sit votum non committendi toto tempore vitæ ullum peccatum etiam veniale, quale Votum pro zelo suo solent subinde emitte nonnullæ devotæ? Resp. Ordinarie dictum Votum juxta communioem D. D. contra nonnullos pronuntiari invalidum; quia bonum illud non est tale, quod foret moraliter possibile spectata fragilitate hominis post lapsum, consequenter non censeretur prudenter emissum: cum vovens moraliter certo transgrederetur illud, sicque tantummodo propter Votum tale præberetur occasio duplicandi peccatum moraliter certo faciendum, quale Votum in similibus circumstantiis plane non videretur acceptum Deo. Ita Sporer tract. 3. in Decal. cap. 2. sect. 2. n. 37. qui n. 38. ob eandem rationem simili modo discurret, si tale Votum non quidem ad perpetuum, sed tamen ad longum tempus v. g. ad integrum annum fuisset emissum.

Econtra validum erit Votum vitandi omnia peccata mortalia, vel certa venialia in specie, v. g. numquam deliberate mentiendi, sive etiam vitandi in genere illa peccata venialia, quæ non solum semiplene, sed plene deliberato animo committuntur. Ratio horum omnium est, quia similia etiam cum ordinario auxilio Divino moraliter vitari possunt. Sporer loc. cit. n. 39. Quinimo, si adsit internus specialissimus stimulus cum extraordinariis auxiliis Divinis, neque auderem declarare tamquam invalidum Votum absolutum non committendi quodcumque veniale. Certe S. Teresa vovit efficere semper, quidquid perfectius esse cognosceret. \*

CONCL. II. Plures sunt divisiones Voti; ex quibus tamen præcipua est illa, qua Votum dividitur in simplex, & solemne. Ita communis; & patebit explicando singulas divisiones ejus. Igitur, quantum attinet ad præmissam divisionem, Votum simplex consistit in nuda & simplici promissione Deo facta sine alia solemnitate. Votum solemne dicitur illud, quod solemnizatur per susceptionem sacri Ordinis aut per Professionem Religionis ab Ecclesia approbatæ; ut dicitur cap. un. de Voto. in 6. Et tale Votum solemne, est Votum perpetuæ Castitatis Ordinibus sacris annexum: quo pariter spectant tria Vota substantialia Religionum, nimirum Obedientiæ, Paupertatis, ac perpetuæ Castitatis, & si quæ alia sunt Vota Religionum approbatarum.

9 Unde non ex eo Votum solemne differt a Voto simplici, quod hoc sit factum privatim, illud publice; cum econtra possit accidere: sed ex eo, quod Votum solemne solemnizetur per susceptionem Ordinis sacri, vel professionem Religiosam, ratione cujus aliquis magis se ponit in potestate Ecclesiæ quantum ad materiam Voti. Hoc quippe non fit in Voto simplici, cum ob id Ecclesia non accipiat majorem potestatem in sic voventem, sicut vi Voti solennis accipit in Clericos in sacris constitutos, ac in Religiosos solemniter professos: quæ de causa hos ad Matrimonium ex post facto contrahendum illegitimavit Ecclesia, non autem contrahentes cum simplici Voto Castitatis, sed istos relinquit Divino judicio. Scotus 4. dist. 38. qu. un. & alii.

10 Votum ulterius dividitur in personale, & reale. Personale est, quo DEO promittitur aliqua actio ipsius personæ voventis: ut cum quis vovet peregrinationem, jejunium, orationem, aut hujusmodi. Votum reale est, quo res aliqua DEO promittitur; ut puta largitio elemosynæ, aut alia res externa pretio æstimabilis. Addunt Doctores tertium membrum, nempe Votum mixtum, estque illud, quod ex utroque participat: ut, si quis voveat peregrinationem ad D. Virginem Lauretanam, ibique elargiri certam elemosinam ad Ecclesiæ illius utilitatem, vel hujusmodi.

11 Votum dividitur rursus, in absolutum, & conditionatum. Absolutum est, quod independenter ab omni conditione emittitur. Conditionatum vero, quod fit sub conditione, ac proinde non impleta conditione illa nullam obligationem inducit: ut si quis voveat peregrinationem si a tali morbo convalescat, si suus filius sit sanitatem recuperaturus; nam non secuta convalescentia, aut sanitate filii, ad implendum Votum non tenetur. Et idem dicendum de similibus.

## QUESTIO II.

### Quæ sit Obligatio Voti?

#### SUMMARIUM.

- 12 Transgressio Voti est mortalis ex genere.
- 13 Per accidens potest esse venialis.
- 14 In Juramento falso non excusat levitas materia; secus in violato, cur?
- (b) Juxta dicta dist. præc. n. 27. & 29.
- \* Ex quo cognosci possit, num hæc vel illa materia sit levis? Additio I. & II.
- 15 Dubius de emissionis Voti, non tenetur.
- 16 Solvitur instantia.
- (c) Tract. I. dist. 3. n. 30. & 36.
- 17 Certus de Voto, sed dubitans de intentione se obligandi, tenetur.
- 18 Votum sine temporis determinatione quando obliget?
- \* Quanta debeat esse dilatio Voti, ut sit peccatum mortale? Additio I. & II.
- 19 Voti obligatio est personalis.
- 20 Dummodo excipiantur Vota realia.
- 21 Quid de Voti Communitatum?
- 22 Factum alienum si voveatur, quomodo explicandum?
- 23 Vovens tenetur implere Votum per seipsum.
- 24 Et impeditus non tenetur substituere alium.
- \* Duo Corollaria. Additio I. & II.

12 CONCL. I. Transgressio Voti ex genere suo est peccatum mortale. Ita communis. Ratio est: quia Votum tendit ad Fidelitatem DEO ex virtute Religionis præstandam. Unde dicitur Eccl. cap. 5. Si quis vovisti Deo, ne moreris reddere; displicet enim ei infidelis & stulta promissio, sed quodcumque voveris, redde, multoque melius est non vovere, quam post Votum promissa non reddere.

13 CONCL. II. Nihilominus ob levitatem materiæ transgressio Voti efficitur venialis. Idem dic, si quis etiam in gravi materia voluisset expresse se tantum obligare sub levi. Ita pariter communis, & ratio est: quia



quia Votum est quasi privata lex, quam sibi quis imponit; atqui in legibus excusare parvitatem materiæ a culpa mortali, uti etiam intentionem Legislatoris tantum sub levi obligare volentis, aliunde liquet. Sic qui singulis diebus vovit dicere tria *Pater & Ave*, & postmodum quandoque, secluso contemptu, omittit recitare, non peccat mortaliter ob levitatem materiæ. Similiter, si quis vovit recitare Rosarium in honorem B. MARIE Virginis, & postmodum omittit dicere pauca aliquot *Ave*, pari ratione non peccat mortaliter. Idem dicendum de similibus.

14 Nec dicas. Jurans falsum, etiam si res sit parva, peccat mortaliter; ergo. Resp. enim negando consequentiam, & paritatem: quia in omni perjurio, etiam circa rem levem deliberate commissio, intervenit tota malitia perjurii, dum DEUS adducitur in testem falsitatis. (b) Secus est in Voto circa materiam levem violato, ubi proinde excusat levitas materiæ non minus, ac in furto. Accedit, quod, quamvis in Juramento assertorio levitas materiæ non excuset a peccato mortali, si quis deliberate falsum juret, ob rationem præmissam, nihilominus violatio Juramenti promissorii, si materia sub Juramento promissa sit levis, a pluribus Doctoribus excusatur a culpa mortali, prout dictum *Distinct. præc. num. 32.*

Additio I.

\* Posito autem, quod libenter scire cuperes aliquam regulam, ex qua mensurari queat, num hæc vel illa materia Voti intermissa censeri debeat gravis vel levis? Resp. ex communi DD. illam materiam esse gravem respectu Voti, quæ spectatis omnibus circumstantiis censetur gravis, si de ea ferretur Lex, seu Ecclesiasticum quodpiam præceptum sub mortali obligans: nam Votum obligat instar præcepti; cum sit quedam privata lex, quam quis sibi imponit. Sic juxta Sanchez, Ledesma, & Dianam apud la Croix lib. 3. part. 1. num. 443. & apud Sporer tract. 3. in Decal. cap. 2. sect. 3. n. 85. Confessio mortalium, & Communio, auditio Missæ, recitatio Breviarii &c. si voveantur, reputantur materia gravis, quia solent alias præcipi sub mortali, & in Voto censentur similia, eadem integritate atque iisdem modis assumpta, ac in præcepto. Unde simile Votum intermitte peccaret graviter, nisi vovens expresse tantum voluisset se obligare ad similia sub levi, quod tamen in materia gravi ordinarie non præsumitur, nisi aliunde clare constet. Sic ponamus in exemplo, quod aliquis jejunium voverit, talis sub gravi tenetur jejunare, & quidem obligatur ad abstinentiam tam a carne, quam a duplici refectione, nisi expresse aliter vovens voluerit. Ratio est: quia pari modo obligat Ecclesiæ Præceptum de Jejunio. Item, si vovit certas preces, tenetur recitare cum intentione, & aliquali attentione saltem illa, quæ requiritur ad substantiam Orationis, uti dicitur quoad Horas Canonicas.

Additio II.

\* At hæc responsione necdum perfecte quietatus, indagabis ulterius. Utrum, si quis materiam parvam e. g. trium *Pater & Ave* quotidie vi voti explendam non solum una alterave vice, sed frequenter infra annum intermittat, illæ materiæ parvæ sæpius intermissæ ad invicem uniantur mortaliter, sicuti uniuntur plura parva furtiva commissa, sicque constituent unam materiam gravem, vi cujus propter frequentes tales omissiones peccetur graviter? Ad hoc dubium optime respondet la Croix tom. 2. lib. 3. part. 1. n. 459. quod equidem aliqui apud Dianam part. 3. tract. 5. R. 24. absolute dicant, materias illas non uniri, nec unquam peccari mortaliter, quantumcumque hæc parvæ materiæ sæpe omittantur: alii vero absolute teneant uniri, & peccari mortaliter, quando tam sæpe omittuntur. Anac. Reiffensuel. Theol. Tom. I.

tur, ut simul unire facerent aliquam materiam gravem. Azorius autem, Granada, Vasquez, Sanchez communiter probabilius distinguunt, & dicunt, si Votum erat affixum diei, materias illas parvas non uniri, sed obligationem extinguere cum die; si autem tale Votum non erat affixum diei, materias has uniri, & obligationem supplendi transire ad sequentes dies, ideoque posse tandem perveniri ad materiam gravem. In dubio, an a vovente res promissa fuerit affixa diei, necne? Sotus, Ledesma, Suarez, Layman, Castropalao & Tannerus cum Diana part. 5. T. 5. R. 52. dant hanc regulam, ut si Vota sint personalia, id est, de actione tantum præstanda a vovente v. g. de Orationibus, præsumatur obligatio esse affixa diei, & sic desinere cum die: si autem Vota sint realia, id est, de aliqua alia re præstanda v. g. de elemosyna, præsumatur elemosyna non desinere cum die, adeoque fore mortale, si tot diebus omittatur, ut fiat materia gravis. Ratio est: quia utraque Vota communiter fiunt cum tali intentione; ergo in dubio præsumuntur sic facta, quia ex communiter contingentibus est prudens præsumptio &c. atque hæc regula placet etiam Patri Sporer loc. cit. n. 105. Item P. Gobat, T. 11. n. 85. ait, in similibus absolute esse recurrendum ad intentionem voventis, an nempe voluerit alio die recompenfare, si uno die rem Deo promissam negligeret: in dubio autem præsumendum erit, quod noluerit obligationem unius diei copulare cum obligatione alterius diei, ideoque peccari tantum venialiter; quia ubi positive non constat aliunde, quod quis voluerit esse adstrictus sub gravi, obligationes potius sunt restringendæ, quam ampliandæ, quoniam præsumitur actus ita confectus, ut sit minus, quam fieri potest, onerosus. Menoch. lib. 6. præsumpt. 9. nam *Quidquid adstringende obligationis est, id, nisi palam verbis exprimitur, omissum intelligendum est. L. Quidquid. 99. ff. de verb. obligat.*\*

15 CONCL. III. Qui dubitat, num Votum emisit, nec ne? non obligatur Voto: & idem dicendum, si dubitet, fueritne Votum, vel dumtaxat propositum? præsumitur enim non fuisse Votum. Ita Engel tit. de Voto. n. 2. Reginaldus lib. 18. n. 276. & alii communiter, paucis exceptis. Ratio est: quia *In dubio melior est conditio possidentis*, juxta Reg. 65. *Juris in 6.* Talis autem dubitans est in possessione suæ libertatis.

16 Nec obstat illa communis regula, quod *In dubio tutior pars sit tenenda. c. Juvenis, de Sponsalibus*, cum concordantiis. Resp. enim, hanc regulam plerumque esse tantum de consilio, non de præcepto: vel quando est de præcepto, loquitur præcipue de dubio practico, ad cujus depositionem quis se reflectere non potest; quia stante debio practico, non licet contra conscientiam practico dubiam operari, ut jam suo loco (c) dictum.

17 CONCL. IV. Econtra si quis ex tenore verborum veram promissionem indicantium certus sit de Voto, dubitet autem, an habuerit intentionem se obligandi, aut sufficientem deliberationem, tenetur Voto. Ita Sanchez lib. 1. de Matrim. disp. 9. Sannig disp. 4. de Relig. q. 2. n. 6. & alii. Ratio est: quia tunc Votum stat in possessione, ac proinde obligat: præsumitur enim, Votum esse editum juxta naturam Voti, id est, cum animo obligandi se, ac sufficienti deliberatione, quandoquidem de opposito post sufficientem disquisitionem constare nequeat. Excipe, si Votum fuerit emissum ante Septennium: tunc enim in dubio præsumitur usus rationis completus necdum adfuisse: quinimo teste Gobat apud la Croix lib. 3. p. 1. n. 387. in his partibus septentrionalibus non debet facile censeri usus rationis perfectus ante novem annos advenisse.

18 CONCL. V. Votum sine temporis determinatione editum executioni mandari debet, cum primum commode potest. Ita communis. Et desumitur ex cap. 23. Deuter. ibi: *Cum Votum voveris Domino, non tardabis reddere, quia requirit Dominus Deus tuus: & si moratus fueris, reputabitur tibi in peccatum.*



## Additio I.

\* Quodsi quæras ulterius, quousque simile Votum differri possit absque mortali? Respondet denuo fundate cum Patre Sporer tract. 3. in Decal. cap. 2. sect. 3. n. 115. Pater la Croix loc. cit. n. 446. esse difficile id definire: interea tamen posse universaliter dici, quod Vota, quæ durant usque ad mortem, uti sunt Votum Religionis, Votum suscipiendi sacros Ordines &c. minori tempore sint differenda, quam alia Vota e. g. peregrinationis, vel eleemosynæ, quæ non sic durant. Ratio est: quia hæc postrema Vota dilatione non minuuntur, sed quocumque tempore fiant, integre præstantur: econtra priora Vota dilatione minuuntur, quia, cum vi Voti v. g. Religionis obligeris Deo servire usque ad mortem, quantum differs Votum, tantum detrahis de tempore serviendi specialiter Deo, & consequenter de Voto &c. Tamburinus cum S. Antonino apud Sanchez hic cap. 14. n. 21. existimat, quoad Vota indeterminato tempore emissæ, quæ præterea non durant usque ad mortem, & respectu quorum ipsa dilatio nec quidpiam imminuit de fine Voti, nec grave habet periculum adjunctum propter oblivionem, aut aliud intercedens impedimentum omnino intermittendi, quod foret tantum peccatum veniale quantumcumque diu similia Vota differantur: quæ regula etiam plurimum placet Patri Sporer loc. cit. n. 116. atque ab eodem in praxi tuta pronuntiatur. Econtra vero Ferdinandus Castropalao hic n. 7. judicat satis rigore; nimirum quoad Votum Religionis fore mortale, si sine omni prorsus rationabili causa differatur ultra sex menses: quoad reliqua Vota autem saltem non a mortali excusat, si sine causa differantur ad duos, tresve annos, quamvis hac dilatione non minuantur. Ratio ipsius est; quia suo judicio hoc videtur gravis deordinatio, sicuti si rem homini debitam tamdiu differas dare sine aliqua causa rationabili. \*

## Additio II.

\* Ceterum hoc quoque ex Doctoribus teste Busenbaum hic poterit esse consolationi, quod minor causa requiratur ad differendum, quam ad omittendum ex integro Votum. Pater Sporer more suo practice & valde utiliter loc. cit. n. 112. & seqq. ponit aliquas causas & casus licite differendi executionem alicujus Voti per duas sequentes Resolutiones. I. Sufficiens causa differendi Votum sine determinato tempore emissum censetur esse, si spes sit, quod Votum postea commodius, utilius, & cum majori devotione sit executioni mandandum: id enim cedit ad majorem DEI gloriam & honorem, e. g. qui vovit peregrinationem ad aliquam ædem sacram, expectare potest usque ad certum Festum, in quo ibidem magna celebratur solemnitas. II. Adolescens, qui vovit ingredi Religionem, potest expectare ad tempus magis aptum, donec ætate & viribus convalescat ad perferendum magis rigorem Ordinis, vel donec necessariis scientiis plus imbuatur, si futurus sit Clericus, sive donec utilem Monasterio artem perfectius addiscat, si recipiendus esset pro Laico. Certe noster doctissimus Corduba Juvenem duodecim annos natum, ac nostram Seraphicam Religionem voventem sentit, posse differre ingressum usque ad 17. vel 18. ætatis annum, ut interim sufficiens robur ad supportanda Ordinis onera acquirat. \*

19 CONCL. VI. Obligatio Voti est personalis, ita ut solum voventem, & non aliam personam obliget, dummodo excipiantur Vota realia. Ita Layman lib. 4. tract. 4. cap. 3. n. 6. & 10. cum communi. Ratio desumitur ex illo Psalm 65. Reddam tibi Vota mea, quæ distinxerunt labia mea. Accedit ratio: quia obligatio Voti ex propriæ voluntatis consensu nasci debet, cum sit quasi privata quædam Lex; ergo non alium, quam ipsum voventem aut consentientem obligat. Additur hic notanter, aut consentientem: quia, si quis in se sponte suscipiat obligationem exequendi alterius Votum, tenetur; nam tunc

non ex aliena, sed ex propria voluntate obligatur, quia obligationem alterius in se sponte suscipit.

20 Dicitur in Conclusionem, dummodo excipiantur Vota realia: siquidem horum Votorum obligatio transit ad hæredes arg. c. Ex parte. de Censibus & fatentur passim Doctores. Ratio est: quia Vota realia obligant voventem, non quomodocumque, sed quatenus est dominus rei promissæ; ergo sicut dominium rei illius, ita & obligatio vi emissi Voti realis eidem annexa transit ad hæredem, supposito, quod deductis debitis, & expensis funeris adhuc aliquid de bonis defuncti super sit: nam hoc ipso, quod quis hæreditatem adit, censetur contractum inivisse ad solvenda omnia defuncti debita, & Vota realia. Hinc Sanchez lib. 4. in Decal. cap. 15. n. 25. ait, hæredem obligari ad solvenda defuncti Vota realia, non vi Voti (nam & hoc solum voventem afficere potest) sed vi contractus memorati.

21 Ex data Conclusionem, ac præsertim priori parte ipsius Inferitur I. cum Layman lib. 4. tract. 4. cap. 3. n. 6. citante Suarezium, Vasquez & Sanchez: quodsi Communitas aliqua certum Votum ediderit, quotannis v. g. peregrinationem instituendi, Posteriores eorum non obligentur ex virtute Religionis, seu vi Voti, in quod ipsi non consenserunt: quamvis interdum ratione pacti, vel statuti, aut longæ consuetudinis ab Ordinario Loci tacite vel expresse approbatæ sub sit obligatio ejusmodi Votum observandi, prout amplius explicat Sanchez cit. c. 15. n. 16. & seqq.

22 Inferitur II. Quod factum alienum voveri non possit, v. g. alium jejunaturum, Religionem ingressurum &c. Ne autem irrita omnino sit ejusmodi Voti promissio non raro usurpata, ita explicari debet, quod animus voventis fuerit obligare se ad curandum, quantum in ipso est, ut alter promissum adimpleat: sic enim non alienum, sed potius proprium factum promittitur. Unde liberi non obligantur Voto parentum offerentium eos Religioni, nisi ex debito quodam honestatis, aut nisi Intelligentes consentiant, vel postea ratificent: alioquin jure contradicere possent, eo quod Religionis ingressus liber esse debeat. c. Præfens 20. quæst. 3.

23 Inferitur III. Quod vovens teneatur Votum personale per seipsum implere, & non liberetur, si per alium impleat, v. g. qui vovit, se jejunaturum, vel peregrinaturum &c. non satisfacit, si alium roget, ut loco sui jejunet, peregrinetur &c. Ratio est: quia vovens factum proprium promissit; ergo ad illud ipsemet obligatur. Ex quo

24 Inferitur ulterius, quod, si quis Votum suum personale ipsemet implere non possit, non teneatur alium rogare, vel substituere, qui impleat. Ratio est: quia actus se non extendit ultra intentionem agentis arg. cap. ult. de Prabendis, cum concordantiis: atqui intentio voventis fuit (uti supponitur) se facturum, v. g. se oraturum, jejunaturum, peregrinaturum &c. ergo ipse solus obligatur, & consequenter, si id præstare non possit, cessat obligatio Voti, nec tenetur illud per alium implere, nisi etiam ad hoc sese obligare intenderit. Quamquam substituere alium in casu justo impedimenti procul dubio sit laudabile; & in eo casu substitutus, si in se hoc onus suscipere promiserit, etiam exequi tenebitur, cap. Licet de Voto &c.

## Additio I.

\* Quæres I. An, si quidam copulative, seu insimul conjunctim vovit peregrinari v. g. Oetingam, & ibidem simul offerre Calicem in honorem B. Virginis: postea autem ante Voti executionem moriatur, an, inquam, hæredes defuncti teneantur aliquid præstare, & quid? Ante responsionem suppono I. Simile Votum esse mixtum, id est partim personale, partim reale, uti consideranti patet. Supp. II. Possit unum alteri annexi vel tamquam præstare accessorium, vel etiam ut æque principale. Si annexitur tamquam accessorium, tunc



tunc qui liberatur a principali, ordinarie etiam liberatur ab accessorio: nam accessorium sequitur naturam sui principalis. *Reg. 42. Juris in 6.* Econtra vero, si alterum connexum foret æque principale, potest quis liberari ab uno, quin eximatur ab altero, uti patebit ex proxime dicendis. H. S.

Resp. I. nisi ante mortem alter expresse obligasset hæredes sub exclusione alias ab hæreditate, hi non tenentur loco defuncti peregrinationem instituere, nec etiam illas expensas, quas alter sub itinere alias facere debuisset, illuc mittere, ut ponantur in cippo. Ratio primi est; quia Votum peregrinandi est personale, quod juxta jam dicta non transit ad hæredes. Ratio secundi est, quia expensæ sub itinere peregrinationis faciendæ sunt respectu peregrinationis præcise quid accessorium, adeoque extincta obligatione quoad principale etiam extinguetur quoad accessorium. Profecto ob eandem rationem ipsemet vovens, si necdum mortuus, bene tamen infirmus lecto fuisset affixus neutiquam fuisset obligatus pecunias sub itinere alias consumendas mittere ad locum peregrinationis. Resp. II. Tenentur tamen hæredes ad locum peregrinationis mittere Calicem saltem in æquivalenti. Ratio est: quia quoad hoc erat Votum reale, & æque principaliter annexum, uti præsumitur in rebus tanti pretii, nisi expresse aliter constet de mente voventis, adeoque transit ad hæredes. *Sporer loc. cit. n. 136. & alii.* Quod si res simili cum peregrinatione promissa foret exigui pretii e. g. si quis vovisset simul cum peregrinatione ponere in cippum quosdam crucigeros, &c. crederem illam rem promissam esse merum quoddam accessorium, quod extinguitur cum suo principali: interea tamen pro majori securitate suaderem, ut illi crucigeri offerantur in alia simili Ecclesia. \*

Additio II.

\*Quæres II. De qua substantia, & quanti pretii debeat esse Calix Voto promissus & mittendus ab hæredibus ad locum peregrinationis? Respondeo cum Sanchez, Sporer, Suarez & aliis, nec requiri, ut dictus Calix conficiatur ex auro, nec sufficere, ut sit ex cupro, vel stanno. Quare debet esse argenteus; ex tali enim materia communiter solent confici Calices *argum. a. Ut Calix. 45. de Consecrat. dist. 1.* pretium autem Calicis non debet quidem esse adeo magnum; alit tamen competens, prout ibidem communiter ad Missæ Sacrificium adhiberi solet, consideratis simul circumstantiis ipsius status personæ voventis, & aliis. Sic etiam, quando quis vovisset in perpetuum certæ Ecclesiæ providere de vino quoad celebrationem Missarum, tam ipse, quam, eo mortuo, Successores tenerentur dare vinum non quidem adeo generosum, nec tamen etiam sufficeret infimæ fortis: sed obligarentur in dubio dare mediocre, prout communiter solet applicari in illa vicinia. Ceterum generalius loquendo, quando attentis omnibus circumstantiis quis in dubio se resolvere nequit circa quantitatem, vel qualitatem, aut numerum, seu pondus & mensuram ipsius rei promissæ, consolationi esse, & pro resolutione deservire poterit textus Juris Canonici *cap. Ex parte. 18. de Censibus.* ubi dum dubitabatur, in quam mensura res promissa solvi debeat, Pontifex respondit sequentibus notabilibus formalibus. *Cum non constet, ad quam mensuram antecessores eorum prædicta Vota persolverint, credimus distinguendum, utrum habitatores regionis ipsius, qui ea continuo persolverunt, ad unam eandemque mensuram hujusmodi vota persolverint, an ad varias & diversas? In primo enim casu ad eandem & illi solvere sunt cogendi. In secundo volentes solvere ad minorem, non sunt cogendi, ut ad majorem persolvant: NB. quoniam, cum hujusmodi vota gratuita fuerint ab initio, benignius sunt a viris Ecclesiasticis exigenda, ne tamquam Exactores videantur lucris temporalibus inhiare. \**

QUESTIO III.

De Cessatione, Commutatione, & Irritatione Votorum.

SUMMARIUM.

- 25 *Obligatio Voti quatuor modis desinere potest.*
- 26 *Cessante causa finali cessat Votum.*
- 27 *Cessat etiam Votum ob mutationem materia.*
- 28 *Clausula in omni Voto subintellecta.*  
(d) *Dist. præc. n. 23.*
- 29 *Votum conditionale cessat non impleta conditione.*
- 30 *Quid de Votis temporalibus? Vel affixis certo tempore?*  
\* *Ex quo cognoscatur, Votum esse certo tempore affixum?*
- 31 *Votorum Commutatio propria auctoritate potest fieri in melius.*
- 32 *Limitatur hoc.*
- 33 *In Professionem Religiosam omnia Vota commutantur.*
- 34 *Quid de Commutatione Voti in opus æquale?*  
\* *Qualis tunc requiratur causa?*
- 35 *Vota a quibus irritari possint?*
- 36 *Corollaria.*  
(e) *Dist. præc. n. 23.*
- 37 *Limitatio circa potestatem irritandi Vota.*
- 38 *Impuberum Vota omnia possunt irritari a Parentibus.*  
*Pubertas quando incipiat?*
- 39 *Prælati an, & quæ Vota Religiosorum irritare possint?*
- 40 *Quid de Votis liberorum puberum, & servorum?*
- 41 *Et quid de Votis Conjugum?*  
*Ratio generalis dictorum.*

25 **A**dvertendum cum Doctoribus communiter, quatuor potissimum modis obligationem Voti desinere posse. I. Per Cessationem; cum nempe Votum ex se ipso cessat obligare absque alia commutatione, irritatione, vel dispensatione, quod variis ex causis contingere potest, uti mox dicetur. II. Per Commutationem. III. Per irritationem Voti, auctoritate Superioris factam. IV. Per legitimam Dispensationem, quæ contingit tunc, quando legitima Superioris auctoritate ex causa rationabili cum vovente super Voto dispensatur. De quibus tribus prioribus per sequentes Conclusiones plura, de Dispensatione vero in subsequenti quæstione.

26 **CONCL. I.** Quantum in primis attinet ad Cessationem Votorum, cessante causa finali ac principali Voti cessat quoque obligatio ejus: v. g. si vovisti, te peregrinaturum pro impetranda valetudine filii, is vero ante peractam peregrinationem moriatur, liberatus es a Voto. Item, si misericordia motus erga alium, quem in lacero habitu videbas, vovisti ei dare eleemosynam: si is pauper non est, non teneris; quia causa finalis hujus largitionis erat sublevatio pauperis. Ita Suarez *lib. 4. de Voto. cap. 18. & alii.*

27 **CONCL. II.** Cessat insuper obligatio Voti ob mutationem materiæ, si videlicet ea fiat impossibilis, illicita, indifferens, aut majoris boni impeditiva. Ratio est: quia in ejusmodi casu neque Votum incipere potuisset, cum hoc debeat esse de re possibili, licita, bona, & majoris boni non impeditiva. Idem dicendum in casu, si postea tam notabilis rerum mutatio accadat, vel specialis & inopinatus casu occurrat, ut rationabiliter præsumi possit, voventis intentionem ad ejusmodi eventum, aut casum specialem se non extendisse. Ratio est: quia actus non se extendit ultra intentionem agentis. Accedit, quod lex positiva in ejusmodi casibus per epichejam soleat admittere benignam interpretationem; ergo idem dicendum de Voto, utpote quæ est lex quædam privata, quam ipsemet vovens sibi imposuit.

28 Quinimo in omni Voto tacite subintelligitur isthæc conditio: *Si res in eodem statu permanferit*; prout a pari supra (d) de Juramento dictum est. Sic qui vovit peregrinationem longam, vel magnam eleemosynam, superveniente gravi morbo, aut inopinata depauperatione



tionem non tenetur Voto. Similiter sicut aegritudo v. g. excusat a præcepto jejunii Ecclesiastici, ita etiam sufficit ad excusandum ab observatione jejunii Voto promissi: & idem de similibus.

29 CONCL. III. Votum conditionatum cessat obligare, si non impleatur conditio appositæ: sic qui vovit peregrinationem, si sanitatem filio, vel aliud beneficium obtineat, hoc non obtento ad Votum non tenetur. Ratio est: quia generaliter conditio appositæ suspendit actum, eaque non eveniente nihil debetur; cum non fuerit animus sese obligandi, nisi in eventum ipsius conditionis.

30 CONCL. IV. Qui Votum temporale emisit, v. g. Votum Castitatis ad biennium, elapso biennio liber est a Voto. Idem est de Voto affixo certo tempore, puta jejunandi diebus Sabbatinis in honorem B. Mariæ Virginis: nam, si intermisit eo die jejunium, sive culpabiliter, sive sine culpa, amplius alio die non tenetur jejunium illud peragere. Ita Doctores communiter, ac præsertim Herincx part. 3. Theologia. disp. 4. de Voto. quest. 4. neque enim vovens voluit se obligare, nisi pro tali determinato tempore.

*Additio.*

\*Ceteroquin speciale signum est, quod quis rem promissam voluerit affigere certo tempore, si ob particularem devotionem talis temporis vel aliam specialem connexionem cum tali tempore Votum illud fuisset emissum, uti cum communi notat Sanchez lib. 4. Moralium. cap. 14. n. 25. & seqq. e. g. vovisti audire Sacrum die Veneris ob specialem devotionem Passionis Domini, vel jejunium die Sabbati in honorem B. Virginis, sive ex eadem ratione singulis diebus Sabbatinis totius anni, aut in aliquo profesto specialis tui Patroni, si tali die omittas culpabiliter, vel inculpabiliter, non teneris supplere altero die. Idem dic, si vovisses peregrinari Romam anno sancto, nam & hoc Votum cessat anno sancto transacto. Sporer tract. 3. in Decal. cap. 2. sect. 3. num. 101. \*

31 CONCL. V. Quantum attinet ad Votorum Commutationem, vovens proprio arbitrio potest Votum suum commutare in id, quod spectatis omnibus manifeste melius, seu præstantius est. Ita communior Doctorum apud Sanchez lib. 4. in Decal. cap. 49. & Layman cit. tract. 4. cap. 8. num. 19. & desumitur ex Jure Canonico. c. Pervenit. 3. de Jurejurando ibi: Non enim propositum aut promissum infringit, qui in melius illud commutat.

32 Hoc tamen intelligendum, si opus sit manifeste melius: nam in dubio stat possessio pro obligatione Voti ad rem promissam, quæ proinde mutari non potest sine Superioris auctoritate. Excipi etiam debent Vota Summo Pontifici reservata: qualia sunt quinque, videlicet Votum perpetuæ Castitatis, Religionis, Peregrinationis Romanæ seu ad limina Apostolorum, Peregrinationis ad S. Jacobum in Compostella, & Peregrinationis in Terram Sanctam. Siquidem horum commutationem ipsemet Papa sibi propriam reservavit, ac proinde in alia, etiam manifeste præstantiora opera (sola Professione Religiosa excepta) sine Summi Pontificis auctoritate commutari nequeunt.

33 Dicitur, sola Professione Religiosa excepta: nam in Votum Religiosæ Professionis possunt commutari omnia Vota antecedentia tam realia, quam personalia, etiam Summo Pontifici reservata; prout habetur c. Scriptura. de Voto. ubi dicitur: Reus fracti Voti aliquatenus non habetur, qui temporale obsequium in perpetuam noscitur Religionis observantiam commutare.

Supra quod Capitulum Juris Canonici S. Thomas 2. 2. q. 88. art. 12. ad 1. doctissime ita discurret: Omnia alia Vota sunt particularium operum: sed per Religionem homo totam vitam suam Dei obsequio deputat; particulare autem in universali includitur, & ideo Decretalis in c. Scriptura, de Voto, dicit, quod reus fracti Voti non habetur, qui temporale obsequium in perpetuam Religionis obser-

vantiam commutat. Hinc Religionem ingrediens non tenetur implere Vota vel Jejuniarum, vel Orationum, vel aliorum hujusmodi, quæ existens in seculo fecit: quia Religionem ingrediens moritur priori vite. Et etiam singulares observantia Religionis non competunt, & Religionis onus satis hominem onerat, ut alia superraddere non oporteat. Ita ille.

34 CONCL. VI. Commutatio Voti in aliud opus æquale, proprio voventis arbitrio fieri non potest, sed opus est auctoritate Prælati puta Papæ, vel Episcopi, aut ejus, qui ab his habet commissionem seu potestatem delegatam. Ita Sanchez lib. 4. Decal. cap. 49. n. 13. Layman n. 19. Sannig dist. 4. de Voto. quest. 4. n. 3. & communior contra quosdam alios, qui putant, per quemlibet Confessarium posse Votum commutari in opus æquale. Ratio Conclusionis est: quia commutatio Voti est actus jurisdictionis. arg. cap. 1. de Votg. ergo ea non competit Confessario, nisi habeat potestatem delegatam, sed solis Prælati. Nec obstat, quod quilibet possit Votum suum commutare in id, quod est manifeste melius, absque alia jurisdictione. Resp. enim, id fieri ex eo, partim quia promissio rei minoris abunde solvitur in præstatione rei majoris: partim quia is, cui fit Votum (nempe Deus) consentit in solutionem melioris. arg. cit. c. Scriptura de Voto.

*Additio.*

\* Porro ut commutatio ab habente potestatem fiat debito modo in aliud opus æquale, requiritur aliqua causa, sufficit tamen quævis rationabilis e. g. specialis utilitas vel consolatio &c. ipsius voventis. Quinimo in Jubilæo, ajunt Suarez, Gobat, Sanchez & alii apud La Croix loc. cit. n. 525. sufficere generalem causam boni communis, ob quod datum est Jubilæum. Quando autem contingeret ista Voti commutatio ab aliquo habente potestatem dispensandi in aliud opus minus, quoniam tunc esset simul partialis dispensatio, requireretur major causa, non tamen tanta, quanta desideratur ad dispensandum ex integro. Videantur causæ pro legitima dispensatione n. 50. allegandæ, quæ certo pugnant a fortiori, si saltem aliqualis interveniat commutatio: quinimo pro tunc non requiruntur in tanto gradu, eo ipso, quoniam simul aliquid aliud, quamvis minus materiæ promissæ subrogatur. Ceterum facta semel per legitimam Jurisdictionem commutatione prius Votum omnino cessat, nisi aliter expresse disposuerit commutans, hincque, si subrogatum successu temporis evaderet inutile vel moraliter impossibile, non teneretur quis loco subrogati redire ad prius Votum. La Croix, lib. 3. part. 1. n. 516. \*

35 CONCL. VII. Quantum attinet ad Irritationem Votorum, Vota facta de re in alterius potestate constituta irritantur, si hic contradicat, & opus promissum absolute nolit fieri. Ita D. Thomas 2. 2. quest. 88. art. 8. & Doctores communiter. Idque intellige, quod ad hujusmodi irritationis validitatem nulla alia requiratur causa, præter ipsam Superioris voluntatem. Ratio est: quia, ut Votum obliget, præter alia requiritur, quod persona vovens sit sui juris quoad illud quod Voto promittitur: neque enim potest quis per promissionem sese firmiter obligare ad id, quod non est in sua potestate, sed in potestate alterius.

36 Hinc Numer. cap. 30. mandatur, quod si mulier quæ velet in domo patris atque in ætate adhuc puellari, vel maritum habuerit, quidpiam voverit, & sic se Juramento adstrinxerit, si pater aut maritus ejus contradixerit, tam Vota quam Juramenta ejus irrita sint, nec eam obligent, eo quod pater, aut maritus contradixerit. Et hoc idem dicendum est de aliis hujusmodi personis, quæ non sunt omnimode in sua potestate, sed sub potestate alterius, atque adeo non habent liberam facultatem vovendi, ut sunt Religiosi, servi, filii familias &c. Hi tamen vovendo non peccant, quia in eorum Votis subintelligitur tacita conditio: Si placuerit Superioribus meis, voveo, hoc vel illud me facturum, ut dictum superius. (e)



37 CONCL. VIII. Nihilominus allata doctrina seu Conclusio proxima, intelligenda est de iis dumtaxat Votorum materiis, in quibus præfatæ personæ voventes non sunt sui juris, sed subiectæ potestati alterius: nam Vota quoad alias materias facta, in quibus dictæ personæ non subjiuntur alterius potestati, valida sunt, neque irritari possunt. Est satis communis inter Doctores: quia tunc cessat ratio in priori Conclusionem allata, nempe subiectio respectu alterius, ob quam dumtaxat datur potestas irritandi Vota. Res tota magis patebit exemplis, atque inductione: itaque

38 I. Conveniunt Doctores cum D. Thoma 2. 2. q. 88. art. 9. omnia Vota impuberum sive personalia, sive realia, irritari posse a Patre, Tutore, aut aliis personis, quarum potestati subsunt: idque accidit tum ob defectum rationis, quem impuberes patiuntur, tum quia sunt naturaliter sub cura Parentum, vel Tutorum, qui eis loco Parentum sunt. Porro in masculis ad pubertatem requiruntur quatuordecim anni completi, in feminis vero duodecim anni completi; antea vero censentur impuberes. Nec obstat, quod quandoque ante dictam ætatem cuiusdam adveniat iudicii maturitas, aut quis etiam Votum ingrediendæ Religionis emiserit. Adhuc enim irritari possunt talia Vota ab impubere edita, ut docet Sanchez lib. 4. Decal. cap. 35. n. 11. Layman loc. cit. cap. 7. n. 10 & alii, eo quod Jura quoad hoc non distinguant.

39 II. Conveniunt Doctores, id, quod proxime dictum est de impubere, videlicet omnia Vota ejus irritari posse a Patre, pariter intelligendum esse de Religiosis professis; utpote qui per Votum obedientiæ penitus abnegarunt propriam voluntatem, neque amplius habent velle & nolle. Excipe tamen Votum Religionis arctioris ingrediendæ; utpote ad quam transitus eisdem Religiosis a Jure conceditur, c. Licet de Regularibus simulque ea Vota, quæ ipsamet Ordinis constitutio efflagitat; nam talia non posse a Prælati irritari, palam est.

40 III. Loquendo de Votis liberorum puberum adhuc in patria potestate existentium, quidquid pauci contradicant, satis etiam inter Doctores convenit, quod Pater non possit omnia Vota liberorum puberum irritare, sed ea tantum, quæ patriæ potestati præjudicium afferunt: puta, quæ liberam & expeditam familiæ gubernationem impediunt, vel filium aut filiam nimis abstrahunt ab obedientia & cura paterna, & hujusmodi; nam in his solum filius puber est subiectus Patri. Et eadem ratione Vota servorum, sive mancipiorum, illa tantum a Dominis irritari possunt, quæ, & quatenus servitutis obligationi officiant.

41 IV. Conveniunt passim Doctores, quod maritus non possit omnia Vota uxoris irritare, sed ea tantum, quæ, & quatenus juri suo, quod habet ad conjugii usum, & familiæ gubernationem, præjudicium afferre possunt. Prout vicissim etiam uxor ea solummodo Vota mariti rescindere, atque irritare potest, quæ derogant juri suo, quod habet in corpus mariti, v. g. ne abstinencia immoderata affligatur, & hujusmodi. Ratio horum omnium generalis est ea, quæ assertur in utraque præmissa conclusione: quia Vota possunt irritari a Superiore in his tantum, in quibus alter ipsi subjiuntur: atqui filii familias, servi, uxor &c. non subjiuntur parentibus, dominis, marito &c. quoad omnia, sed tantum quoad aliqua, ipsorum statum concernentia, de quibus passim, & fufius Auctores; ergo.

#### Q U Æ S T I O IV.

#### De Potestate dispensandi in Votis.

#### S U M M A R I U M.

- 42 Datur in Ecclesia Dei potestas dispensandi in Votis.  
43 Hæc potestas residet generaliter pro toto Orbe in Papa. Quibus aliis ea competat? remissive.  
44 Quam potestatem dispensandi in Votis habeant Confessarii Ordinum Mendicantium?  
45 Vota Summo Pontifici reservata, quæ? Anac. Reiffenstuel Theol. Tom. I.

46 Ea sunt stricte interpretanda.

Quid de Voto Castitatis non perpetuæ, vel non integræ? Item de Voto conditionato?

Ac penali?

47 Limitatio quoad Confessarios Mendicantium.

\* Ulterior Doctrina quoad Confessarios Mendicantium.

48 Possunt Mendicantes dispensare ad petendum debitum cum conjugibus incestuosus, & contrahentibus cum Voto Castitatis; & qui?

\* Quomodo possunt cum similibus dispensare?

49 Dispensatio in votis, ut sit valide, requirit causam.

50 Causæ justæ dispensandi in votis, quæ?

(f) Juxta dicta n. 4.

(g) Ut dictum n. 27. & seqq.

51 An prædicta habeant locum in Votis in favorem tertii emissis?

52 Qui potest dispensare in Votis, an idem possit in Juramentis?

(h) Dist. præc. n. 41.

53 Quid de Regularibus Mendicantibus?

\* Introductio ad Appendicem.

42 CONCL. I. Certum est inter Catholicos, dari potestatem in Ecclesia Dei dispensandi super Votis, ipsi a Christo concessam. Patet hoc tum ex perpetua praxi, & traditione Ecclesiæ, tum ex illa generali potestate, D. Petro, ac legitimis ejus Successoribus a Christo concessa Matth. 16. & 18. Tibi dabo claves Regni celorum &c. Et quodcumque solveris super terram, erit solutum & in celis. Nam ly quodcumque solveris, etiam Dispensationem, seu solutionem a Voto, & Juramento, completitur. Quomodo autem Dispensatio in Votis, & Juramenti fieri possit, non obstante, quod eorum obligatio sit de Jure Divino, dictum est supra Tract. 2. dist. 4. n. 25. & 26.

43 CONCL. II. Ejusmodi potestas dispensandi in Votis, primario, ac generaliter pro toto Orbe, ex Jure Divino residet in Summo Pontifice, tamquam legitimo Petri Successore, Christique in terris Vicario: ut patet ex citato S. Scripturæ textu, specialiter de D. Petro, ac legitimis ejus Successoribus loquente. Quibus aliis autem, sive Jure ordinario, sive ex delegata potestate, aut privilegiis a Summo Pontifice sibi concessis id competat, quilibet in particulari, considerato suo statu, melius dignoscere poterit. Nihilominus loquendo de Seraphici Ordinis privilegiis, sit

44 CONCL. III. Confessarii Ordinum Mendicantium, & qui participant in eorum privilegiis, habent potestatem delegatam dispensandi in omnibus Votis (simulque commutandi omnia Vota etiam jurata, ex extensione Gregorii Papæ XIII.) in quibus de jure ordinario dispensare possunt Episcopi. Ita Herincx dist. 4. de Vota q. 6. n. 66. id ex plurimum Summorum Pontificum concessionibus copiose demonstrans. Quamvis enim Innocentius VIII. hinc exceperit Vota peregrinationis ultra duas dietas: tamen ex concessione aliorum Pontificum, ac nominatim Eugenii IV. Pauli III. & Gregorii XIII. dicta restrictio est sublata; ut patet ex Compendio Privilegiorum Mendicantium. v. Votum in Capucini Annotatione. & Emman. Roderico. Tom. 1. Quæst. Regul. quæst. 63. art. 3. & 4.

45 Dicitur notanter, in quibus de Jure ordinario dispensare possunt Episcopi. Siquidem Episcopi, etsi jure ordinario possint dispensare in omnibus aliis Votis, non tamen in iis (extra casum necessitatis, & impedimenti recursus ad Summum Pontificem) quæ sunt Papæ specialiter reservata. Et quidem ejusmodi Vota Summo Pontifici reservata regulariter sunt quinque, scilicet Votum Castitatis perpetuæ (subintellige, & integræ) Votum Religionis ab Ecclesia approbatæ, Votum peregrinationis Romam ad limina Apostolorum, peregrinationis ad S. Jacobum in Compostella, & peregrinationis in Terram Sanctam. Unde in his neque Confessarii Ordinum Mendicantium dispensare possunt, utpote quæ Summo Pontifici specialiter reservantur, & in Regularium privilegiis communiter excipiuntur.



46 Porro hæ exceptiones, cum juri ordinario Episcoporum præjudicent, seu odiosæ sunt strictæ interpretationis ac proinde in propria verborum significatione accipiendæ. Unde Episcopi jure ordinario (consequenter Confessarii Ordinum Mendicantium, & Communicantium in privilegiis eorum rite approbati, ex delegata potestate sibi a Summis Pontificibus concessa) possunt dispensare in Voto Castitatis non perpetuæ, sed ad certum dumtaxat tempus promissæ v. g. ad annum, vel decennium. Item de Voto Castitatis non integræ v. g. non fornicandi, non nubendi, non petendi debitum, servandi virginitatem dumtaxat, quæ per unicum lapsum carnis irrecuperabiliter amittitur, sitque postmodum observatu impossibilis: secus, si vovens virginitatem intendisset per talia verba sese obligare ad Castitatem absolutam: nam Deus intuetur cor, sicque Votum hoc, utpote Castitatis absolutæ ac perpetuæ, foret indispensabile per Papa inferiorem. Item possunt supra dicti dispensare in Voto conditionato ante conditionem impletam; ut si voveat quis Religionem, aut Castitatem perpetuam, si ex morbo convalescat, poterunt dispensare in Voto, antequam hæc conditio impleatur: secus, si Votum impleta conditione omnino purificetur, ut habet Herincx cit. disp. 4. quæst. 6. n. 62. estque probabilior, quamvis Sanchez lib. 8. de Matrim. disp. 10. n. 13. & Diana part. 3. tract. 5. resol. 25. cum aliis non improbabiler afforant, etiam post impletam conditionem posse Episcopum dispensare. Item possunt prædicti dispensari a supra dictis in Voto pœnali v. g. si fornicatus fuero, voveo me ingressurum Religionem, five ante (ut est communior sententia) five post eventum peccati, atque incursum pœnam; prout sentit cit. Sanchez n. 7. & 8. citans non paucos alios Auctores.

47 Notanter autem hætenus dictum, in quibus de jure ordinario possunt Episcopi dispensare: ut excipiantur illi casus, in quibus competit Episcopis facultas dispensandi etiam in Votis Papæ reservatis, ratione necessitatis extraordinariæ, & quando est impedimentum adeundi Summum Pontificem. In istis enim casibus, ut docet Layman cap. 8. n. 16. citans alios, nequeunt Confessarii Ordinum Mendicantium, vel Communicantium in privilegiis eorundem dispensare, sed opus est recursum ad Episcopum; quamvis nonnullis, ab Herincx relatis soc. cit. n. 69. prædicta limitatio non placeat.

#### Additio.

\*Licet autem quoad quinque Vota reservata, quando eadem fuerunt certa, & non solum dubia, ac præterea absoluta, & determinata, Confessarii Ordinum Mendicantium nequeunt dispensare quoad substantiam, poterunt tamen cum gravi causa quoad indeterminata, seu alternativa e.g. voveo ire Romam, vel per mensem jejunare: item etiam in Votis determinatis quoad circumstantias accidentales talibus Votis additis. Ita communis teste Sporer tract. 3. in 11. Præcept. Decal. c. 3. sect. 3. n. 67. Ratio horum est: quia reservatio est odiosa, sique restringenda. Hinc, prout cum aliis notat La Croix hic n. 544. si vovisti ire Romam ad limina Apostolorum pedester, vel hoc anno, aut sub habitu cujusdam Eremitæ, seu semper per viam mendicando &c. possunt hæ circumstantiæ ex gravi ratione tolli, vel adhuc melius commutari, ut e. g. per currum, alio tempore commodiori, vel in vestibus ac expensis tuis illuc te conferre queas. Item supposito, quod Votum illud absolutum jam fuerit aliquando a Summo Pontifice computatum in aliam materiam, prædicti Confessarii sunt præditi potestate cum valde gravi ratione circa istam alteram materiam dispensandi, vel magis denuo in aliud distinctum opus commutandi. Ita Sanchez l. 8. de Matrim. disp. 9. n. 20. & Card. Lugo lib. 6. Resp. Moral. dub. 1. \*

48 CONCL. IV. Insuper ex speciali concessione S. Pii V. vivæ vocis oraculo facto, quin & iterata concessione Eugenii IV. Congregationi S. Benedicti tum Cassinensi, tum Vallisoletanæ facta, nec non facultate Julii II. eidem Congregationi Vallisoletanæ impetrata (ac refe-

runtur sigillatim a Petro de Murga Tom. 2. Disquisit. Moral. disquis. 1. dub. 13. §. 6. n. 121. & seqq. & Ant. Quintanadvenas tract. 9. Singular. 2. 3. & 4.) possunt Confessarii Mendicantium dispensare ad petendum debitum cum iis conjugibus, qui contraxerunt Matrimonium cum Voto simplici Castitatis antea emissio: item & cum incestuosis conjugibus, qui contracto jam Matrimonio cum alterius conjugis consanguinea intra secundum gradum adulterium perpetrarunt: si tamen tales Confessarii sint viri docti, atque ad hoc a suo Provinciali deputentur. Et hæc quidem deputatio est necessaria juxta tenorem concessionis, & praxin, prout notat Herincx cit. disp. 4. n. 68. & Portel. in Dubiis Regularium. v. Confess. n. 23. ubi bene addit, quod ejusmodi licentia cuiusvis Confessario ab uno Provinciali facta, non expiret amoto Provinciali ab officio; eo quod illa facultas non detur a Provinciali, sed ad commissionem sive deputationem ipsius a Papa, cujus gratia jam facta non expirat morte concedentis. Sunt quidem nonnulli Auctores, qui præmissam Provincialis deputationem non requiri asserunt, quos refert, ac sequitur Antoninus a Spiritu S. Carmelita in Directorio Regularium. part. 1. tract. 2. disp. 1. sect. 2. §. 3. n. 112. & Diana part. 3. tract. 2. resol. 14. & part. 5. tract. 13. resol. 46. ubi hoc ipsum non improbabile censet, licet in priori loco oppositam sententiam sequatur. Verum tenor concessionis S. Pii V. quam refert Rodericus Tom. 1. qq. Regul. quæst. 63. art. 1. & 2. expresse requirit, quod ejusmodi dispensatio in Foro conscientie ad petendum debitum fiat ex commissione Provincialis.

#### Additio

Illud adhuc notanter subjungendum est, quod, etsi Confessarii privilegiati cum aliquo habente Votum perpetuæ Castitatis, & nihilominus absque relaxatione ipsius Voti peccaminose Matrimonium contrahente dispensent quoad petendum debitum conjugale, hæc tamen dispensatio se non extendat ad alia. Hinc, si talis extra Matrimonium committeret peccatum carnis, censeretur adhuc transgredi Votum. Item mortua sua conjuge non posset talis transire ad secundas nuptias, nisi impetret dispensationem in ipso Voto Castitatis: etenim antea præcise fuit dispensatus quoad petendum debitum quoad Matrimonium præcedens actualiter jam contractum. Ita Card. de Lugo lib. 6. Resp. Moral. dub. 1. & Lessius in Auctuario. v. Votum. casu. 1. \*

49 CONCL. V. Dispensatio in Votis, ut sit valida, requirit causam justam dispensandi. Ratio est: quia potestas dispensandi in jure Superioris, nempe ipsius Dei, Prælati Ecclesiæ data est in edificationem, & non in destructionem: ut dicit Apostolus 2. Corinth. 13. v. 10. Id autem non esset, si possent dispensare absolute absque ulla causa.

50 Porro causæ justæ dispensandi in Votis oriuntur ex variis motivis. I. Ex imperfectione actus, si absque prudente & perfecta deliberatione, in ira, metu, dolore, vel tenera ætate &c. Votum factum sit. arg. c. 2. de Voto. quamvis ob imperfectionem actus, & defectum sufficientis deliberationis quandoque Votum penitus non obliget. (f) II. Ex materia Voti, si nimirum vovendi, spectata corporis constitutione, naturæ fragilitate &c. Votum ipsum majoris ruinæ periculum pariturum videatur, adeoque spectatis omnibus dispensatio ad spirituale ejus utilitatem (quæ præcipue hic consideranda est) cessura videatur. III. Ob difficultatem exequendi Votum postea supervenientem, vel ante non prævisam; quamvis interdum, si hæc gravis & manifesta sit, obligatio Voti per se sine dispensatione cesset. (g) IV. Ob necessitatem, vel magnam utilitatem Reipublicæ, aut familiæ, ut si quis longas peregrinationes vovisset; cum præstaret, ipsum familiæ; vel Reipublicæ regendæ interesse, aut hujusmodi. Unde bene Innocentius III. relatus cap. Magna. de Voto. ait: quod in materia dispensationis Votorum hæc tria semper consideranda sint, videlicet, quid liceat secundum equitatem, quid deceat secundum honestatem, & quid expediat secundum utilitatem.



51 Quæres, num prædicta etiam locum habeant in Votis in favorem tertii emissis, utputa in Voto dandi eleemosynam certæ personæ indigenti, aut certæ Ecclesiæ; ita ut ejusmodi Votum adhuc possit commutari, vel dispensari ab habentibus facultatem commutandi, vel dispensandi Vota? Resp. esse distinguendum. Nam si ejusmodi personæ pauperi, vel Ecclesiæ per acceptationem ab ipso, vel Rectore Ecclesiæ, aliove administratore factam jus acquisitum jam fuit, tunc amplius absque ejusdem consensu commutationi, vel dispensationi locus non est: quia privilegia commutandi, vel dispensandi in Votis intelliguntur esse concessa sine præjudicio atque injuria tertii. Secus dicendum de ejusmodi Votis spectatis ante factam illam acceptationem: quia enim tertio tunc necdum aliquod jus, actio, aut petitio competit, Vota in alicujus tertii personæ pauperis, aut Ecclesiæ commodum & favorem edita per dispensationem vel commutationem tolli posse, communior est sententia. Ita Lud. Miranda *Tom. 1. Manual. Pralat. qu. 48. art. 4. Layman tract. 4. de Voto c. 8. num. 21. Sylvester, & alii.*

52 Tandem pro fine hujus materiæ, & conformiter dictis supra (b) notandum, quod, qui habet potestatem dispensandi, seu commutandi Vota, censeatur similiter habere facultatem dispensandi, seu commutandi Juramenta. Ratio desumitur ex dictis ibidem: quia Votum, & Juramentum promissorium DEO factum æquiparantur quoad vinculum; ideoque dispositum de uno cenferi etiam debet dispositum de altero. Et quidem inter omnes convenit, eos qui ratione muneris sui ordinariam habent potestatem commutandi, vel dispensandi Vota (ut sunt Episcopi, ceterique quasi Episcopalem jurisdictionem ordinariam habentes) posse eadem quoque auctoritate respectu sibi subsectorum Vota rejurando confirmata commutare, vel dispensare.

53 Ast loquendo de Regularibus Mendicantibus, & Communicantibus in eorum privilegiis, qui quoad sæculares poenitentes habent potestatem solum delegatam dispensandi, vel commutandi Vota (exceptis quinque Votis Sedi Apostolicæ specialiter reservatis) variant Doctores, an dicti Religiosi similiter habeant potestatem dispensandi, vel commutandi Juramenta. Siquidem Azorius *part. 1. lib. 11. c. 10. quest. 2.* cum quibusdam aliis sententiam negativam tenet. Nihilominus partem affirmativam, videlicet Religiosos Mendicantes posse dispensare, vel commutare etiam Juramenta, tenent plures alii Doctores, quos citat & sequitur Sanchez *l. 8. de Matrim. disp. 2. n. 18. Sannig dist. 6. de Juram. q. 3. n. 8. Lessius lib. 2. de Just. § Jure c. 42. n. 59.* & alii: nam militat æque pro illis superius allata ratio. Accedit extensio Gregorii XIII. juxta quam possunt Regulares Mendicantes commutare Vota etiam jurata; dummodo commutatio non fiat in præjudicium tertii, prout habetur in Compendio Privilegiorum. *§. Votum in Capucini Annotatione.*

## Additio

\* Ceterum hic est finitus Tractatus VI. quoad doctrinam Anacleti Reiffenstuel; quia tamen in quarta Editione sub iisdem numeris continuatis subjunxi pro praxi aliam quæstionem, volui eam etiam de novo hic eodem modo, ne in Indice aliqua confusio contingat, apponere, aliquibus tamen adhuc additis per modum Appendixis. Quare sit \*

## \* A P P E N D I X.

Quomodo practice impetrari possit Dispensatio in Votis.

## S U M M A R I U M.

- 54 Ponitur casus conformis materiæ.  
55 Indagetur Confessarius I. An Puella vere Votum emisit?  
56 Indagetur II. An fuerit votum perpetuæ Castitatis?  
57 III. An fuerit absolutum, vel conditionatum?

58 IV. In qua ætate fuerit emissum?

59 V. Indagetur, an quoad dispensationem non sit periculum in mora?

60 Norma Supplicationis faciendæ.

61 Norma Responsionis ad Supplicam.

62 Quidnam debeat notare Executor Dispensationis circa Confessionem Menstruam injungendam?

63 Quidnam observandum circa alia pietatis opera injungenda?

64 Qualis adhuc Instructio danda ab Executore tali dispensato?

65 Qualiter Dispensatus sit absolvendus?

66 Qualiter practice sit procedendum, ut dispensetur in Voto Religionis?

67 Ponitur Supplica circa Votum Religionis.

68 Rescriptum ad priorem Supplicam.

69 Qualiter dispensetur cum talibus, si non adsit periculum incontinentiæ.

54 **P**ONAMUS Casum in Voto Castitatis; nimirum quod quædam puella soluta voverit perpetuam Castitatem, modo autem suis orbata Parentibus sit in eo statu, ubi variis exponitur periculis incontinentiæ; quare instanter petit dispensari ad effectum nubendi. Quæritur, quomodo practice res instituenda?

55 Respondeo, Confessarium prodenter & recte agere quoad praxin, si indaget I. Num talis puella vere emisit Votum, intendendo se obligare sub culpa, vel solummodo firmum elicuerit Propositum quoddam servandi Castitatem, eo ferme modo, quo homines in Confessionali sibi sæpius firmissimè proponunt vitare deinceps peccata confessa, non tamen exinde vovent? Quod si puella dicat, se tantum fecisse Propositum, aut saltem prudenter dubitet, num fuerit Propositum, vel verum Votum? neutiquam obligabitur; quoniam libertas est in possessione. Quando vero judicat, se voluisse pro tunc obstringere Voto, ulterius.

56 Indagetur II. Quomodo ergo voverit? nimirum an hoc votum fuerit perpetuæ & integræ Castitatis; nam (uti jam dictum *preced. quest. n. 44. § seqq.*) in Votis non nubendi, servandæ Virginitatis, aut Castitatis perfectæ quidem, sed non perpetuæ poterunt denuo dispensare Confessarii privilegiati: ubi tamen in similibus semper notent præfati, ne hoc faciant sine causa, alias enim erit invalida dispensatio. Item ne facile dispensent ex integro, sed subjungant e. g. Confessionem singulis mensibus biennio faciendam &c. Item addant in Votis perpetuis, etsi non perfectis, e. g. in Voto non nubendi &c. opus saltem leve perpetuum, puta, qualibet septimana duo vel tria *Pater noster*, & *Ave Maria*, Vide Sporer *part. 3. Theol. Mor. cap. 3. sect. 4. n. 128.* Quod si vero talis emisit Votum integræ & perpetuæ Castitatis,

57 Indagetur III. An hoc Votum fuerit absolutum, vel conditionatum? etenim in conditionato adhuc posset Confessarius privilegiatus dispensare saltem ante adventum conditionis; quin etiam teste Sporer *Tract. 3. in Decal. c. 3. sect. 3. n. 63. & n. 66.* valde probabiliter etiam conditione jam impleta, præsertim si Vota fuerint poenalia, de quo pariter jam facta est mentio superius n. 56. Quando vero foret absolutum,

58 Indagetur IV. Qua ætate emisit hoc Votum? etenim ante annos pubertatis (NB. masculi dicuntur impuberes, usquedum annum decimum quartum, femellæ vero, usquedum duodecimum compleverunt) emissæ Vota, & postmodum in pubertate non de novo ratificata, possunt irritari ab ipsomet Parente vel Tutore pupilli, & quidem ordinarie sine ulla causa gravi, cum voluntas horum in voluntate Patris aut sui Tutoris existat. Vide Jus Canonicum *lib. 3. Decret. tit. 34. n. 12. § 15. & infra tract. 12. D. 3. de Jubilæo. q. 10.* Si autem promississet, aut de novo ratificasset adepta jam pubertate,

59 Indagetur, & attendat V. Num forsan non adsit urgens necessitas dispensandi, simulque periculum in mora, puta, si ex dilatione usque ad responsum Pontificis ex parte voventis, seu inter contracturos urgeat



periculum incontinentiæ, scandalum, vel alterius gravis mali? Si matrimonium differri nequeat sine gravi dedecore sponsi aut sponsæ, vel familiæ, aut sine infamia ob imprægnationem sponsæ, sive quia alias proles maneret illegitima; quoniam e.g. Cajus contracturus morti est vicinus: in quibus, & similibus casibus posset dispensare juxta dicta antecedentia Ordinarius seu Episcopus supplicantis; alias vero erit scribendum Romam ad Sacram Pœnitentiarium, illas Litteras vel per tertium; puta, per Generalem Procuratorem Ordinis aut per aliquem Agentem Romanum, vel immediate per postam ordinariam dirigendo Romam ad Majorem Pœnitentiarium cum sequenti superscriptione: *Eminentissimo & Reverendissimo D. Cardinali Majori Pœnitentiarario* &c.

60 Porro in dicta Epistola veridice quoque specificat causam, ob quam Orator, seu Oratrix supplicat dispensari; solet autem S. Pœnitentiarium commutando Votum Castitatis ad effectum contrahendi matrimonium dispensare ob sequentes causas: nimirum ob stimulos carnis, quando scilicet vovens, sive sit vir, sive mulier, ita iis stimulis agitur, ut continenter vivere non possit, similiter ad conservandam nobilem Familiam. Item quoad mulieres etiam, si non patientur stimulos, maneant tamen in aliquo periculo amittendi pudicitiam; utpote quia puella pauper, & pulchra, vel orbata parentibus existit, vel ob alias causas, uti testatur Tiburtius Navar. *part. I. Mamuduct. cap. 5.* In nostro casu posset Supplicia sic formari.

*N. Puella soluta emisit Votum Castitatis perpetuæ; sed cum adsit, vel futurum esse prævideat periculum incontinentiæ (si alia foret causa petendi dispensationem, eadem inseratur) humillime supplicat pro dispensatione ad effectum nubendi, quam gratiam studebit pro possibili precibus suis demereri. Dignetur autem Eminentia Vestra rescribere ad NN. in Diocesi N. Oppido N. Hic ponatur una cum expressione Diocesis & Oppidi nomen & cognomen illius, ad quem Litteræ dispensatoriæ debent dirigi e.g. ad Confessarium, nullatenus autem exprimat verum nomen & cognomen ipsius supplicantis, puta in præsentis casu illius puellæ solutæ; nam in Pœnitentiarium similia omittuntur.*

61 Ad factam Supplicationem solet ordinarie accommodando ad præsentem casum responderi in forma sequenti:

#### SI PERICULUM.

**S**acra Pœnitentiarium tibi Confessario a Latrice præsentium electo concedit facultatem, ipsi Latrici præfatum Votum ad effectum nubendi tantum, Auctoritate Apostolica dispensando, commutandi in Sacramentalem Confessionem semel quolibet mense, & in alia Pœnitentia opera per te injungenda, inter quæ sint etiam aliqua pietatis, quæ quotidie facere teneatur, ut ea adimplens memor sit semper obligationis, qua, emissio Voto, adstringebatur, prout secundum Deum ipsius animæ salutem expedire judicaveris, in foro conscientie, & Sacramentali Confessione tantum. Imo, quod si viro, cui conjungetur, supervixerit, castitatem servet, ut prius obligata, & si unquam extra matrimonium fornicata fuerit, aut mortuo viro alteri nupserit absque nova dispensatione, sciat se contra Votum Castitatis facere, & debitum conjugale exigere non posse. Et ita eam moneas &c.

62 Circa præsentem ordinariam formulam Dispensationis Executor per has Litteras deputatus notet I. sequentem clausulam: *Dispensando commutes in Sacramentalem Confessionem semel quolibet mense, & alia Pœnitentia opera præfata injungenda* &c. inter quæ sint etiam alia pietatis, quæ quotidie facere teneatur. Ex qua deducitur, tria debere dispensando injungi. 1. Sacramentalem Confessionem quolibet mense, vel si ob negotia, aut alias graves rationes id fieri non posset, etiam licitum foret (quidquid demum nonnulli contradicant) eandem ad bimestre, vel trimestre extendere, saltem si clausula sic habeat: *Singulis mensibus, vel quoties tibi vi-*

*debitur: aut saltem si ad finem hujus specificationis addat; prout secundum Deum ipsius animæ salutem expedire judicaveris* &c.

63 Ceterum ista Confessio menstrua probabilius ac tutius juxta Sanchez, Palao, ac Syrum Placentium &c. debet esse supererogatoria, sicque aliunde e.g. ob Pœnitentiam medicinalem a Confessario tibi injunctam &c. non debita, 2. Debent imponi etiam alia opera, puta, medium Rosarium inter octiduum semel recitandum &c. vel respectu divitum opus misericordiæ qualibet septimana semel &c. vel lectio spiritualis, aut aliqualis mortificatio in cibo vel potu &c. vel oratio pro Defunctis præsertim quoad pauperes, quæ apud eosdem loco elemosynæ corporalis poterit succedere &c. prout secundum DEUM & animæ salutem, statum, sexum, & ætatem pœnitentis expedire videbitur &c. 3. Debent præterea adjungi adhuc aliqua opera quotidiana, puta, singulis diebus de mane & de nocte unum *Ave Maria* &c.

64 Notet Executor hujus Dispensationis II. Quod præterea Pœnitentem oporteat instruere in sequentibus. Primo. Quod hæc opera pietatis quotidiana injungantur, ut quotidie recordetur obligationis, quam ob Votum habebat. 2. Quod commutatio, quæ datur ad posse contrahere matrimonium, ad nihil inferviat, quousque ipsum matrimonium contrahatur, & si carnaliter peccaret ante talem contractum, contra Votum delinqueret: unde nec tenetur implere pœnitentias impostas, nisi a die contracti & consummati matrimonii. 3. Quod commutatio, quæ datur, non solum valeat ad posse contrahere matrimonium, sed etiam ad posse reddere & exigere debitum conjugale. 4. Quod hæc commutatio valeat solum ad contrahendum & consummandum semel matrimonium, unde mortuo viro, cum quo modo intendit contrahere, alium ducere non potest sine nova dispensatione; cum statim obligatio Voti reviviscat, sicut erat a principio, ob conditionem in formula dispensationis expresse adjungi solitam: ubi tamen redeunte obligatione Voti probabilius teste La Croix *lib. 3. p. 1. n. 118.* cessat iterum obligatio persolvendi opera alia pia subrogata. 5. Quod, si durante matrimonio extra illius usum sibi licitum, alium actum carnis peccaminosum fecerit, contra Votum peccet, & teneatur hanc circumstantiam aperire in Confessione.

65 Notet III. Quod post hanc instructionem talis pœnitens imposita prius pœnitentia pro peccatis etiam aliis in Confessione detectis, absolvatur in forma Ecclesiæ consueta a censuris & peccatis per ista verba: *Dominus noster JESUS Christus te absolvat.* &c. Deinde ego te absolvo a peccatis tuis &c. quibus subjungat: *Item Auctoritate Apostolica specialiter mihi delegata tibi Votum Castitatis, quod emisisti, ad effectum, ut matrimonium contrahere, ac debitum conjugale reddere, & exigere licite valeas, in opera tibi præscripta dispensando commutato in Nomine Patris* &c. *Passio Domini Nostri* &c. Et licet ista formula expressa non sit omnino de essentia dispensationis, attamen saltem est valde congrua.

66 Quæres, quomodo practice procedendum, ut dispensetur cum aliquo in Voto Religionis? Exempli gratia formemus hunc casum, quod quis voverit ingredi certam Religionem, postea tamen seductus, in juventute nomen dederit militiæ; modo autem exactoratus, ac stimulis carnis agitur cupiat nubere, quomodo ergo instruenda Supplicia?

67 Respondeo, præmissis, & cum grano salis applicatis prioribus indagationibus de Voto simplici Castitatis, adhuc præterea ante instructionem cujusdam formulæ specialiter notandum venit Confessario ex Lessio *lib. 2. cap. 41. dub. 5.* multipliciter quempiam posse vovere ingressum in aliquam Religionem. Primo, generatim non specificando aliquam certam. Secundo, specificando apud se aliquam certam Religionem, puta S. Dominici, S. Francisci &c. Tertio, determinando etiam particularem locum ob specialem ad hunc affectum,



effectum, e. g. hoc numero Monasterium S. Bernardi, S. Augustini &c.

Qui primo modo vovit, si non admittitur in uno Ordine, debet tentare alium, idque ad tres, vel quatuor. Ita Sylvester 7. Religio 2. quest. 16. Non tamen tenetur ad alias Religiones diffitas; aut ubi notabiliter est aliud clima & modus vivendi, pergere pro petenda susceptione. Item, si non recipitur in aliqua Religione moderata etiam suæ Religionis, non obligatur ad strictissimam, nisi similia expresse voverit, aut ex circumstantiis idem clare deducatur. Quinimo, si etiam voluisset sub Voto comprehendere Religionem strictiorem, posset ex gravi causa Confessarius privilegiatus commutare in mitiorem; cum non dispensaret in Voti substantia, sed tantum in accidentalibus, prout præter alios observant la Croix lib. 3. part. 1. n. 550. & Sporer Tract. 3. in Decal. cap. 3. sect. 3. n. 67.

Qui vovit secundo modo, vel est talis Ordo, ubi Superiores cujuslibet Monasterii in specie Candidatos recipiunt, & tunc non receptus in uno obligatur tentare adhuc duo vel tria alia loca ejusdem Ordinis, nisi aliud ex ipsa voventis intentione, aut circumstantiis clare colligatur. Quod si vero foret Ordo, in quo potestas recipiendi resideret penes ipsum Provincialem respectu omnium Monasteriorum suæ Provinciæ, puto, talem ob paritatem rationis satisfactorium Voto, si ter in Capitulo compareat, & non suscipiatur, neque Promissum futuræ susceptionis acquirat. Imo, si statim ab initio nulla spes prudens futuræ susceptionis esset (puta, si Provincialis, ac Vocales candide dicerent, prout, si tales resciunt, sæpius solent recte dicere, nullam spem futuræ susceptionis adesse) non obligatur vovens amplius secunda vice susceptionem tentare.

Qui tertio modo Votum emisit determinando locum particularem, si ibidem serio, & non solum causa magis probandi spiritum, patitur repulsam, neutiquam tenetur alia loca tentare. Porro si similes aliquando fuerint recepti, & demum postea intra annum probationis non ex dolo prius intento, sed ex alia causa egrediuntur, omnino a Voto absolvuntur; utpote cum voverint quidem ingressum, sed non Professionem; prout in dubio non debet fieri extensio ad Votum ipsiusmet Professionis faciendæ, quoniam odia non sunt extendenda. His ergo præsuppositis, ac prævie consideratis, si Confessarius adhuc invenerit necessarium scribere Romam, Supplicam instruere poterit, ut sequitur.

NN. Miles pro nunc exauzoratus, antea Studiosus fecit Votum in humanioribus scholis ut Juvenis annorum (hic specificentur anni) quod ingredi velis aliquam Religionem assumendo ibidem statum Clericalem: quia tamen defacto tum ob stimulos carnis, quibus multum agitur, tum ob mores militares depravatos se minus capacem judicat ad servitia talis Religionis, præsertim etiam, quia species ille ad studia ut plurimum evanuerunt; hinc humillime supplicat pro commutatione hujus Voti ad effectum contrahendi matrimonium. Pro qua gratia permanebit perpetuum ad Deum pro sua Sanctitate intercessor.

68 Ad hanc Supplicam Rescriptum Romanum similis erit plerumque Formulæ.

Pro parte Latoris nobis oblata petitio continebat, quod ipse ut Juvenis annorum &c. ingressum in certam Religionem simpliciter voverit, assumendi ibidem Statum Clericalem: cum autem, sicut eadem petitio subjungebat, tum ob stimulos carnis, quibus multum agitur, tum ob depravatos mores militares se minus capacem judicet ad servitia Religionis, hinc pro conscientia sua quiete cupit Votum hujusmodi ad effectum contrahendi matrimonium, in alia penitentia & pietatis opera per Sedem Apostolicam commutari. Quare supplicari fecit humiliter, sibi super id de opportuno remedio misericorditer provideri. Nos igitur, qui Penitentiaria D. Papæ curam gerimus, ejusmodi Supplica-

tionibus inclinati Auctoritate Apostolica specialiter nobis commissa discretioni tuæ committimus, quatenus si ita esse per diligentem Oratoris examinationem, ac post monita & consilia opportuna illi præstata inveneris, eundem a mutatione propositi absolvas hac vice in forma Ecclesiæ consueta, injuncta ei penitentia salutari, sibi que Votum prædictum ad hoc, ut matrimonium legitime contrahere possit, in frequentiam Sacramentalis Confessionis peccatorum suorum singulis scilicet mensibus semel, aut quoties tibi videbitur, & in alia penitentia opera perpetua, inter quæ sint etiam aliqua Religionis, quæ quotidie facere teneatur ad eum finem, ut ea adimplens meminisse semper possit obligationis, qua hujusmodi Voto adstringebatur, prout ipsius animæ salutari expedire judicaveris, dispensando commutes in foro Conscientiæ & Sacramentali Confessione tantum. Datum Romæ &c.

69 Circa Executionem hujus dispensationis Confessarius deputatus Executor quatuor notet.

I. Quod in hoc Rescripto dispensationis non soleat, uti si dispensatur in Voto simplici Castitatis, apponi illa clausula: Si alteri, cui conjungetur, supervixerit, Castitatem servet, ut prius &c. Unde Votum Religionis absolute per commutationem in alia opera tollitur; ideoque monendus est penitens, quod ad hoc Votum (nisi expresse aliter fuisset in Rescripto positum) numquam amplius adstringatur, & ideo, si uxori supervixerit possit aliud matrimonium contrahere, posito, quod ad effectum matrimonii sit tale Votum commutatum. Ita recte nosse Tiburtius Navar. Penitentiarius Apostolicus Lateranensis in Manuduct. ad praxim. part. 1. de Formulis Votorum cap. 4.

II. Notet Confessarius sequentem clausulam in tali Rescripto ordinarie reperibilem: Eundem a mutatione propositi absolvas. Ubi per mutationem propositi intelligitur illud peccatum, quo quis hoc Votum forsan est transgressus, puta ex luriditate nimium differendo Votum, a quo peccato conceditur Confessario Executori potestas absolvendi. Quod si ex me quæras, quid profit illa concessio, cum alias Confessarii jam habeant potestatem absolvendi a simili peccato? Respondeo nihilominus apponi dictam clausulam pro majori securitate, ut, si forsan aliunde illud peccatum numeraretur inter casus reservatos, pro hac vice ille Confessarius, Executor potestatem haberet absolvendi, etsi eidem alias non competere.

III. Notet aliam clausulam: Commutes in Confessionem Sacramentalem &c. de qua clausula cum grano salis discurrendum, sicut superius de Voto simplici Castitatis discurrebamus. Poterit autem pro illis operibus perpetuis ibidem præceptis, quæ non sunt quotidiana, injungi e. g. Visitatio Ecclesiæ Ordinis, quam voverat, semel per hebdomadam, aut Communio in festis præcipuis dicti Ordinis. Item quoad opera quotidiana ibidem contenta poterit imponi gestatio Chordæ, Corrigiæ, vel Scapularis Ordinis, & simul recitatio unius Pater & Ave &c. in honorem Fundatoris Ordinis.

IV. Notet Confessarius, quod, si adlit ex parte dispensandi verum periculum incontinentiæ, sed petatur dispensatio ob alias causas, v. g. ratione provectæ ætatis, quæ videtur oneribus Religionis sufferendis impar, vel quia v. g. aliquis existens in Ordinibus sacris puta Sacerdos secularis cupit ab hoc Voto Religionis emissio esse liber &c. in simili casu non soleat addi clausula ad effectum nubendi, sed potius alia: Dummodo calibem vitam ducat, vel: ad effectum remanendi in sæculo in vita calibe &c. Ubi haud dubie nequit vi talis dispensationis contrahi matrimonium.

Plura adhuc de ista materia, si dicta tibi non sufficiant, videre poteris in Jure Canonico Patris Reiffenstuel lib. 3. Decret. Tit. 34. \*





## T R A C T A T U S VII.

DE JUSTITIA ET JURE, CÆTERISQUE VIRTUTIBUS  
CARDINALIBUS.

**P**ost explicatas Virtutes Theologicas, atque Religionem utpote inter Virtutes Morales præstantissimam, ipsa materiarum connexio subministrat Tractatum de Virtutibus Cardinalibus, ac præsertim de Justitia & Jure, utpote de qua occurrunt difficultates specialiores, atque ob earum præstantiam scitu admodum necessariz: adeo, ut materia de Justitia & Jure, ob sui excellentiam, simul & necessitatem, non solum in Theologia Morali, verum & Speculativa fufius atque ex professo tractari consueverit. Nec immerito: siquidem & Spiritus Sanctus, tantæ Virtutis necessitatem generi humano inculcaturus, per os Sapientis in ipso exordio Libri Sapientiz exclamat, dicens: *Diligite Justitiam qui judicatis terram.* De qua proinde, unica distinctione de ceteris Virtutibus Cardinalibus præmissa, præsens Tractatus instituitur.

## D I S T I N C T I O I.

## De Virtutibus Cardinalibus.

## Q U Æ S T I O I.

## De Prudentia, ejusque partibus.

## S U M M A R I U M.

- 1 Ratio Ordinis, ac præstantia hujus Tractatus.
- 2 Virtutes Cardinales, quot?  
Et cur sic dictæ?
- 3 Prudentia encomia.
- 4 Prudentia, quid?
- 5 An sit unicus habitus?
- 6 Partes subjectivæ, potentiales, & integrales Prudentiæ, Justitiæ &c. quid?
- 7 Partes subjectivæ Prudentiæ sunt quinque; nimirum  
Monastica,
- 8 Oeconomica, Politica, seu Civilis, Legislativa, &  
Militaris.
- 9 Partes potentiales Prudentiæ tres.  
Eubulia, Synesis, & Gnome.  
Epicheja, quid?
- (a) Ut dictum Tract. 2. Dist. 4. n. 9. & seq.
- 10 Partes integrales Prudentiæ sunt octo; quæ?

**C**onveniunt Doctores, quatuor esse Virtutes Cardinales, videlicet Prudentiam, Justitiam, Temperantiam, & Fortitudinem, de quibus legitur *Sapient. cap. 8. Sobrietatem enim & Prudentiam docet, & justitiam, & virtutem, quibus utilius nihil est in vita hominibus*, ubi per sobrietatem Temperantia, & per virtutem Fortitudo designatur. Idcirco autem hæc quatuor dicuntur *Virtutes Cardinales*, quia sunt tamquam aliarum Virtutum fontes & cardines: nam quemadmodum ostium in cardine; sic omnis honestæ vitæ ratio in illis versatur, atque universa boni operis structura eisdem innititur.

3 Inter has autem primum locum sibi vendicat Prudentia, quæ licet secundum essentiam suam sit Virtus intellectualis, adhuc tamen inter Morales merito connumeratur, eo quod actionum nostrarum moralium sit directiva. Qua de causa pluribus passim ea encomiis cohonestatur: Prudentia etenim, sive discretio, a S. P. N. Francisco (teste S. Bonaventura *cap. 5. Legenda*) re-

cte vocatur *Auriga virtutum*: ipsa siquidem est lux agendorum, ars recte vivendi, voluntatis oculus, ceterarum virtutum dux, fons & norma, sine qua nulla potest consistere. Nam, ut inquit S. Bernardus *Serm. 49. super Cantica: Tolle discretionem* (Prudentiam) & virtus vitium erit. Unde & in Jure Canonico *c. Præsentium. 1. quæst. 5. & c. Custos, de Offic. Custod.* legitur, quod Prudentia, sive *Discretio mater est omnium virtutum.*

4 CONCL. I. Prudentia est recta agendorum ratio, sive est virtus, quæ secundum honesti rationem quid agendum, quidve fugiendum sit, homini proponit. Ita in re communis, nam inquit S. Basilus *Serm. in Princip. Proverb. Prudentia est recta eorum, quæ agenda & non agenda sunt, cognitio.*

5 Quia tamen diversa sunt specie agibilia moralia, per prudentiam in particulari dijudicanda; hinc ipsa non est unicus habitus specie indistinctus, sed tot dantur habitus partiales Prudentiæ specie distincti, quot sunt virtutes specie diversæ in voluntate, respicientes diversa agibilia moralia, quæ a Prudentia in particulari dijudicanda, & dirigenda sunt. Quamvis omnes illi habitus partiales constituent unum\* totalem habitum Prudentiæ in viro prudente; unum, inquam, non specie, sed genere: prout cum Doctore Subtili *3. dist. 36. quæst. un. §. De alia.* notant Scotistæ communiter contra nonnullos alios.

6 Pro intelligentia sequentium est præmittendum, quod partes Prudentiæ (idem est de Justitia, Temperantia, & Fortitudine dicendum) aliæ dicantur subjectivæ, aliæ potentiales, aliæ integrales. *Partes subjectivæ* sunt species, seu inferiora, in quas ejusmodi virtus subdividitur. Nomine *Partium potentialium* intelliguntur virtutes, Prudentiæ v. g. affines, ad quam proinde ratione magnæ suæ cognationis reducuntur, eique annecti solent. *Partes integrales* tandem vocantur eæ, quæ ad perfectum actum Prudentiæ concurrere debent; unde hæc non ex eo dicuntur integrantes, quasi virtutem ipsam integrent & componant, quemadmodum manus, pes & caput integrant corpus hominis; sed quod ad perfectum actum virtutis omnes concurrant, ut dictum.

7 CONCL. II. Partes subjectivæ, seu species sub Prudentia tamquam sub genere contentæ, sunt quinque, videlicet Monastica, Oeconomica, Politica, Legislativa, & Militaris. Ita D. Thomas *2. 2. quæst. 47. & alii.* Ratio est: quia Prudentia generatim alia est Monastica (quam & Personalem appellant) estque ea, qua quisque sibi & propriæ suæ directioni prospicit; & alia Gubernativa, quæ aliorum prospicit directioni: atqui Gubernativa ulterius apte subdividitur in quatuor enumeratas posteriores species, quælibet enim earum prospicit directioni aliorum, sed diversimode; ergo in omnibus erunt quinque.

8 Ceterum Prudentia oeconomica est, quæ totius familiæ honestam institutionem tuetur, & gubernat; ejus bonum dumtaxat attendens. Prudentia politica, seu civilis est, qua quis recte novit administrare rempublicam, legumque observantiam procurare: hæc enim spectat bonum commune Civitatis, seu reipublicæ, sicut oeconomica familiæ. Prudentia Legislativa est, qua quis novit idoneas leges condere: & hæc vel maxime necessaria est Legislatoribus. Tandem Prudentia militaris est, qua recte administratur militia: & hæc requiritur in militibus, & amplius in belli Ducibus, ut militia recte administrata bonum commune strenue defendatur.

9 CONCL



9 CONCL. III. Partes potentiales prudentiæ tres communiter assignantur cum D. Thoma *loc. cit. quæst.* 51. videlicet Eubulia, Synesis, & Gnome. *Eubulia* (latine bona consultatio) est habitus recte inclinans ad consultandum, seu ad excogitanda media apta pro consecutione finis. *Synesis* (quod latine est, sensate discernere) est habitus disponens ad ferendum rectum iudicium de particularibus operabilibus consulatis, idque iuxta regulas communes. *Gnome* est habitus recte iudicandi ex principiis quibusdam altioribus præter ordinarias leges, sive contra tenorem verborum legis: prout fit per Epichejam, est benigna legis interpretatio secundum æquum & iustum, quaque nonnumquam determinantur, seu practicanda iudicantur aliqua contra verba legis, etsi non contra mentem legis; eo quod ejusmodi casum ob speciales circumstantias non censeatur Legislator comprehendere voluisse sub lege generaliter lata. (a) Notat tamen Herincx *disp. 1. de Prudentia quæst. 1. n. 15.* quod Synesis & Gnome revera sint ipsamet Prudentia, eamque integrent, uti diversi habitus circa diversas conclusiones integrant unam scientiam totalem.

10 CONCL. IV. Partes integrantes, sive integrales Prudentiæ, a S. Thoma *loc. cit. quæst. 48.* & alii, octo numerantur. I. *Memoria præteritorum*; nam hæc magnam opem affert ad recte formandas deliberationes de fine, ac mediis ad finem assumendis; quia ex ea nascitur experientia, optima rerum magistra. II. *Intellectus*; id est, cognitio primorum principiorum practico-rum. III. *Docilitas*; qua quis facilitatur ad prompte acquiescendum monitis prudentium, quibus recte instruitur. IV. *Solertia*; qua operans disponitur ad facilem, & subitam mediorum excogitationem. V. *Ratio*; qua quis promptus efficitur ad inferendum unum ex alio simili, atque applicandum principia generalia ad particulares conclusiones. VI. *Circumspectio*, per hanc quippe habilitatur homo ad recte expendendas omnes circumstantias actionis moralis. VII. *Prudentia*; qua recte expenduntur futura agibilia moralia, veluti jam connexa cum præsentibus. VIII. *Cautio*; qua instruitur operans, qualiter declinare debeat impedimenta occurrentia, & ne sub specie boni voluntas applicetur malis. Sciendum tamen, quod prædictæ octo non eodem modo censeantur partes integrantes Prudentiæ: nam quinque priores eatenus dicuntur tales, in quantum prærequiruntur ut conditiones præviæ ad actum, seu executionem Prudentiæ; sed tres posteriores; quatenus sunt aliqui actus Prudentiæ, ut notat Sannig *dist. 2. de Prud. quæst. 1. num. 12.*

## QUÆSTIO II.

### De Vitiis Prudentiæ oppositis.

#### SUMMARIUM.

- 11 Prudentiæ quæ vitia opponantur?
- 12 Per defectum contra Prudentiam peccatur *Præcipitatione, Inconsideratione, Inconstantia, & Negligentia.*
- 13 Per excessum contra eam peccatur sex modis.
- 14 Prudentia carnis, quæ?
- 15 Astutia, quid?
- 16 Dolus, &
- 17 Fraus, quid?
- 18 Sollicitudo temporalium, quæ?
- 19 Non prohibetur moderata sollicitudo temporalium.
- 20 Sollicitudo futurorum, quæ?

11 CONCL. I. Licet omne peccatum opponatur Prudentiæ, eo quod sit contra rectum ejus dictamen: magis tamen directe, ac generatim loquendo, opponitur Prudentiæ hinc per defectum Imprudentia, illinc per excessum, seu quasi excessum, Prudentia falsa sive fucata. Ita communis, & ratio est: quia Prudentia consistit in medio, non minus, ac aliæ Virtu-

tes morales, ergo potest contra eam peccati non solum per defectum, sed etiam per excessum, seu quasi excessum. Unde inquit Apostolus *Rom. 12. Non plus sapere, quam oportet sapere, sed sapere ad sobrietatem.*

12 CONCL. II. Per defectum, sive Imprudentiam, peccatur contra virtutem Prudentiæ quadrupliciter, videlicet *Præcipitatione, Inconsideratione, Inconstantia, & Negligentia.* Et quidem *Præcipitatione* peccatur contra Prudentiam, dum quis proposito aliquo fine statim opus aggreditur, non præmissa sufficienti deliberatione de totius negotii qualitate, de mediis illud exequendi, deque cavendis impedimentis. *Inconsideratione* peccatur contra ipsam, dum temere iudicatur, & concluditur de ipso opere exequendo, non præmissa diligenti rerum ac circumstantiarum inspectione. *Inconstantia* vero contra Prudentiam peccat ille, qui rebus jam semel deliberatis, ac recte iudicatis, sine ulla, vel certe sine sufficienti causa mutat iudicium suum. Et tandem contra eandem prudentiam peccatur *Negligentia*, quæ est omisio diligentæ requisitæ in actu intellectus ad excitandam & dirigendam voluntatem, ac vires externas, ut exequantur illud opus, quod faciendum esse, iudicatum est.

13 CONCL. III. Per excessum, aut quasi excessum, seu potius quadam falsa seu fucata specie Prudentiæ, peccatur contra eam sex modis, videlicet Prudentia carnis, Astutia, Dolo, Fraude, Sollicitudine temporalium, & Sollicitudine futurorum. Ita communis.

14 *Prudentia carnis* ea dicitur, qua quis novit excogitare idonea media ad opera carnis complenda: qualia sunt fornicatio, immunditia, gula, ira, & cetera hujusmodi, quæ recenset Apostolus *Galat. 5.* Et hæc Prudentia carnis, qua quis vivit secundum carnem, id est, secundum instinctus, commoditates ac motus naturæ corruptæ, opponitur Prudentiæ spiritus, quæ novit excogitare idonea media ad opera spiritus seu virtutum perficienda. De qua utraque legitur *Rom. cap. 8. Prudentia carnis, mors est; Prudentia autem spiritus, vita & pax: quoniam sapientia carnis inimica est Deo.*

15 *Astutia* sumitur hic in malam partem, nempe pro notitia pravorum mediorum ad fallendum proximum idoneorum cum affectu id opere exequendi. Et hæc continet artem simulandi, & dissimulandi, estque species quædam Prudentiæ Carnis: illi etenim maxime videntur esse prudentes secundum carnem, qui modos norunt occultos fallendi proximum, & sic obtinendi bona temporalia. Porro Astutiæ vitium alio nomine dicitur *Cordis duplicitas*; de qua *Ecclesiastici. 2.* dicitur: *Va duplici corde, & labiis scelestis, & manibus malefacientibus, & peccatori terram ingredienti duabus viis.*

16 *Dolus* est actus externus, seu executio ipsius Astutiæ, & habet præcipue locum in materia Justitiæ, puta in contractibus humanis. Et communiter definitur, quod sit machinatio ad circumveniendum, decipiendum, seu fallendum proximum adhibita.

17 *Fraus* ferme idem est, quod dolus: differt tamen ex eo a dolo, quod Fraus fiat per facta; ut cum memora est minor iusto, vel cum moxata est adulterina, & hujusmodi. Unde Fraus est quid minus commune, quam Dolus.

18 *Sollicitudo temporalium* est nimia mentis occupatio in conquirendis, & conservandis rebus temporalibus, proveniens ex inordinato habendi amore, & amittendi timore. Unde tria in hoc vitio includuntur, nempe nimius affectus ad bona temporalia, timor & anxietas in iis conquirendis vel conservandis, simulque nimia occupatio mentis in illis cogitandis & tractandis. Et hanc inordinatam temporalium Sollicitudinem, veluti valde perniciosam animæ, passim reprehendit Scriptura Sacra, & vel maxime Christus Dominus *Matth. 6.* dicens: *Ne solliciti sitis anime vestra, quid manducatis, neque corpori vestro, quid induamini.* Et alibi.

Ceterum prædictis verbis prohibetur solum inordinata temporalium Sollicitudo; id est, ea quæ est conjuncta cum nimio affectu temporalium, nimiaque

mentio



mentis occupatione, & anxietate in iis corradendis, & conservandis. Siquidem moderata sollicitudo & provisio temporalium, quæ sit absque nimio ad eadem affectu, cordisque anxietate, non solum non est prohibita, sed etiam commendatur *Proverb. 6. ibi: Vade ad formicam, o piger. Et Proverb. 10. Qui congregat in messe, filius sapiens est: qui autem fertit aestate, filius confusiois.* Huc facit illa generalis maledictio toti humano generi data *Gen. 3. In sudore vultus tui vesceris pane.*

20 Tandem *Sollicitudo futurorum* est species quædam Sollicitudinis temporalium, & consistit in nimia animi occupatione circa futura, maxime ut vitæ necessaria habeantur, quæ est conjuncta cum cordis anxietate, & parva fiducia Divinæ Providentiæ: ut cum quis plus justo sollicitus est de victu, vestitu, aliisque rebus necessariis in futurum annum, mensem, vel diem.

### QUESTIO III.

De Justitia, & variis ipsam concernentibus.

#### SUMMARIUM.

21 De his remissive.

21 **M**ateria præsentis quæstionis commodius examinabitur inferius *Distinctione sequenti. Quæst. 1. & 2.*

### QUESTIO IV.

De Temperantia, & Annexis Virtutibus.

#### SUMMARIUM.

22 Temperantia, quid?

*Sumitur etiam large.*

23 Ejus partes subjectivæ sunt tres.

*Abstinencia,*

*(b) Tract. 3. Dist. 3. quæst. 6.*

*Sobrietas, &*

*(c) Cit. quæst. 6. n. 45. & seqq.*

24 Castitas.

*(d) Tract. 9. Dist. 4. quæst. 1. & seqq.*

*Pudicitia, & Continentia reducuntur ad Castitatem.*

25 Partes potentiales Temperantiæ, quæ?

26 Mansuetudo,

27 Clementia,

28 Studiositas,

29 Humilitas, &

*(e) Tract. 3. Dist. 3. quæst. 1.*

30 Modestia, quid, & quæ vitia ei opponantur?

31 Eutrapelia, quid?

32 Temperantiæ partes integrantes sunt Verecundia, & Honestas.

22 **C**ONCL. I. Temperantia est Virtus refrænans inordinatos appetitus & concupiscentias corporis, præsertim circa gustum & tactum. Ita communis. Dicitur notanter, *præsertim circa gustum & tactum*: quia Temperantia proprie dicta proxime versatur in moderandis voluptatibus gustus & tactus, quæ solent oriri ex esculentis, poculentis, & venereis. Unde nemo proprie judicatur intemperans, qui immodice delectatur in contemplatione rerum naturalium, in honoribus, in picturis, aut cantibus ceteroquin honestis, vel in odoriferis, & hujusmodi: sed talis proprie dicitur curiosus, ambitiosus, vel alio ejusmodi nomine notatur. Verum hoc intelligendum de Temperantia proprie dicta: nam si ea sumatur generaliter & large, si Temperantia est virtus, quæ refrænât affectum hominis ab iis, quæ ipsum quomodocumque contra præscriptum rationis alliciunt.

23 CONCL. II. Temperantiæ proprie acceptæ tres potissimum sunt partes subjectivæ, seu species, videlicet Abstinencia, Sobrietas, & Castitas; quamvis nonnulli

addant Pudicitiam. *Abstinencia* est virtus, quæ secundum rectam rationem moderatur appetitum, usumque ciborum oblectantium. Huic peculiariter adversatur *Gula*, quæ est inordinatus appetitus, vel usus ciborum voluptatis causa: sed de hac jam alibi. *(b) Sobrietas* est virtus, quæ secundum rectam rationem moderatur inordinatum appetitum, usumque potionis, vim inebriandi habentis. Huic adversatur *Ebrietas*, quæ est excessus in potu inebriante voluptatis causa factus, donec usus rationis sopiatur: de qua pariter jam dictum. *(c)*

24 *Castitas* tandem est virtus, quæ moderatur inordinatum appetitum, usumque venereorum; & hæc triplex est, nempe Virginalis, Vidualis, & Conjugalis, de quæ sicut & de oppositis vitiis, ex professo alibi. *(d) Pudicitia* est moderantia circa oscula illicita, tactusque impudicos, & similes lascivias, aspectusque venereos: & dicitur *Pudicitia*, quatenus pudori, qui in usu illorum intervenire solet, conformis exilit: quia tamen censetur una eademque virtus circa prævia, & circa principale, hinc pudicitia commode reducitur ad Castitatem. Idem dicendum de *Continentia*, quæ, est Virtus refrænans motus concupiscentiæ carnalis contra rectam rationem ingentes: quinimo hæc in re est ipsa Castitas.

25 CONCL. III. Ad Temperantiam plures aliæ reducuntur virtutes, quæ & partes potentiales ipsius appellantur ratione magnæ sive affinitatis, quam cum Temperantia habent; videlicet Mansuetudo, Clementia, Studiositas, Humilitas, Modestia, Eutrapelia.

26 *Mansuetudo* est virtus temperans irrationabiles passionis iræ, juxta mensuram rectæ rationis. Et dicitur, *juxta mensuram rectæ rationis*: nam contra eam potest peccari tum secundum excessum per peccatum iracundiæ, tum secundum defectum per iræ vacuitatem, Scilicet non increpando, castigando, & vindicando malum, ubi & sicut oportet.

27 *Clementia* magnam cum Mansuetudine gerit affinitatem, nec aliud est, quam lenitas Superioris adversus inferiorem in constituendis poenis. Huic per excessum adversatur *Crudelitas*: per defectum vero nimia, seu indiscreta *Lenitas*.

28 *Studiositas* est virtus, inordinatam sciendi cupiditatem temperans: nam omnis homo naturaliter scire desiderat. Eidem secundum excessum opponitur *Curiositas*, quæ est superflua cognoscendi, aut discendi cura, quamque prohibitam legimus *Ecclesiastici, cap. 3. Altiora te ne quaeris, & fortiora te ne scrutatus fueris, & in pluribus operibus ejus (Dei) ne fueris curiosus.* Secundum defectum adversatur eidem *Negligentia*; quæ est voluntaria omisio eorum addiscendorum, quorum cognitio ad cujusque statum vel officium spectat.

29 *Humilitas* est virtus temperans inordinatum appetitum tendendi ad excelsa. Sive, ut eam S. Bernardus tract. de 12. gradibus Humilitatis, definit: *Humilitas est virtus, qua homo verissima sui agnitione sibi ipsi vilescit.* Huic secundum excessum contrariatur *Superbia*, de qua jam alibi, *(e)* & secundum defectum nimia *Abjectio* sui.

30 *Modestia* est virtus moderans exteriores corporis actiones juxta præscriptum rectæ rationis: estque alia Modestia, quæ servatur in verbis, alia, quæ in factis: & alia, quæ in exteriori cultu, sive in decenti apparatu vestium, conviviorum, atque sapellectilis, juxta proprii cujusque status mensuram observatur. Modestiae secundum excessum opponitur *Petulantia*, & *Insolentia*, secundum defectum vero *morum Ruditas*.

31 Tandem *Eutrapelia* est virtus, in recreationibus honestis, atque ad animi & corporis refocillationem susceptis, rectum rationis moderamen servans: nam excessus in eisdem, sicut & nimius defectus in vitio sunt.

32 CONCL. IV. Partes integrantes Temperantiæ sunt Verecundia, & Honestas. *Verecundia* quandoque accipitur pro passione, sicut importat dolorem, vel timorem, confurgentem ex consideratione alicujus facti inferentis dedecus; sed accepta pro habitu vel actu virtuoso, *Verecundia* est virtus, a turpibus & inhonestis cupiditatibus retrahens. *Honestas* vicissima est virtus inclinans,



inclinans ad decorem in abstinentia inhonestarum voluptatum resplendentem.

QUÆSTIO V.

De Fortitudine, ejusque partibus & oppositis vitiis.

SUMMARIUM.

- 33 Ratio ordinis.  
Fortitudo large, quid?
- 34 Fortitudo proprie, quid?  
Vir fortis, quis?
- 35 Fortitudinis partes potentiales, quæ?
- 36 Magnanimitas, Confidentia, Patientia, & Perseverantia, quid?
- 37 Fortitudini opponitur Timiditas, Stupiditas animi,
- 38 Audacia, & Ignavia animi.

33 **P**ostquam de Temperantia, quæ turpia refugit, & abstinere ab illicitis voluptatibus, dictum est, restat agendum de Fortitudine, quæ honesta aggreditur, & animi dolorem fortiter sustinet: eo præsertim, quod & ipsa occupetur in moderandis passionibus animi, ne mentem ab honesto avocent, atque illis præsertim, quæ pertinent ad fugam corporalem malorum. Potest equidem Fortitudo in largiori sensu accipi pro firmitate animi in bono honesto, qualis in cujuslibet virtutis actione reperitur, verum in hac acceptatione ea non est virtus a ceteris distincta, sed potius conditio ad omnem virtutem requisita. Proprie igitur loquendo de Fortitudine, sit

34 **CONCL. I.** Fortitudo est virtus, quæ voluntatem inclinat ad labores perferendos, & iusta pericula aggredienda. Ita in re communis. Siquidem hæc virtus mediocritatem tenet inter Timiditatem & Audaciam, juxta illud Aristotelis 3. *Eth. c. 6.* dicentis: quod ea sit *Mediocritas circa metum & Audaciam*, nam Fortitudinis virtus consistit in perpessione iustorum laborum, quos fugit Timiditas, & in aggressionem iustorum periculorum, ubi Audacia in quælibet pericula proruit, siue iusta sint & honesta, siue non. Unde *Vir fortis* est, qui honestatis causa nunc quidem cum fiducia pericula aggreditur & tolerat, quando, ubi, & sicuti ratio dicat; nunc vero ingruentia mala timet, aut sustinet, quæ & quando timere, aut tolerare oportet. Et de talibus legitur *Heb. 11. Fortes facti sunt in bello.*

35 **CONCL. II.** Partes Fortitudinis potentiales (nam subjectivas non habet, quia hæc virtus versatur circa materiam valde specialem, quæ plures virtutum species constituere nequit) sunt præsertim Magnanimitas, Confidentia siue Securitas, Patientia, & perseverantia: quæ, quia sunt multum affines ipsi Fortitudini, recte partes potentiales ipsius dicuntur.

36 *Magnanimitas* est virtus, ad opera magna & heroica in omni virtutum genere inclinans. *Confidentia* (quam alii *Securitatem* appellant) est quietatio voluntatis orta ex fiducia, qua quis rationabiliter confidit, se malum imminens superaturum. *Patientia* est virtus, quæ in adversis rebus animi moerorem temperat, ac mala præsentia æquanimiter tolerat. Et tandem *Perseverantia* est virtus; consistens in eo, quod quis in bene coeptis pergat, eaque usque ad finem continuet; juxta quod *Matth. cap. 10.* Salvator ait: *Qui autem perseveraverit usque in finem, hic salvus erit.*

37 **CONCL. III.** Fortitudini, quæ hinc timorem, illinc nimiam fiduciam siue audaciam moderatur, per excessum & defectum utriusque opponuntur varia vitia. In primis enim per excessum timoris opponitur ipsi *Timiditas*, qua fit, ut mala imminencia nimium formidentur, & non aggrediantur, etiam dum recta ratio dicat aggressionem eorum. Per defectum vero timoris opponitur eidem *Stupiditas animi*, qua quis ob animi stuporem nulla mala seu pericula formidat, etiam quando eadem formidare, & cavere secundum rectam rationem deberet.

Anacl. Reiffenstuel. Theol. Tom. I.

38 Deinde per excessum fiduciæ opponitur Fortitudini *Audacia*, seu temeritas in aggrediendis periculis, quando, quomodo, vel ubi non oportet. Per defectum vero fiduciæ opponitur Fortitudini aliud vitium, & dicitur *Ignavia animi*, nihil audentis, ubi, quando, & quomodo aggredi, vel sustinere oporteret.

QUÆSTIO VI.

Quæ requirantur ad Martyrium?

SUMMARIUM.

- 39 Martyrium excellentissimus actus Fortitudinis.
- 40 Martyrium, quid?
- 41 Ad illud in adultis quæ requirantur?
- 42 Quid sufficiat in parvulis?
- 43 Heretici propter sectam suam occisi, non sunt Martyres.
- 44 Ad Martyrium in adultis requiritur ejus acceptatio.
- 45 Quid, si dormiens occidatur in odium Fidei?
- 46 Milites pugnantes contra Infideles, an sint Martyres?
- 47 Quid, si pugnent intentione defendendi Fidem?
- 48 Exercent actum valde meritum.  
Sententia notabiles circa hoc.  
(f) Vide dicenda in simili. n. 55. & 57.
- 49 Morientes pro defensione cujuslibet virtutis supernaturalis, sunt vere Martyres.
- 50 Exempla hujus.
- 51 Quid, si Tyrannus alios pretextus fingat?
- 52 Ad Martyrium requiritur, ut mors inferatur; quomodo?
- 53 Missi in carcerem, vel exilium propter Fidem, an, & quando sint Martyres?
- 54 Martyres desiderio, an sint proprie Martyres?
- 55 Pulchre sententia circa Martyrium sine sanguine.  
Quæ explicantur.
- 56 Morientes in pia causa v. g. servitio pestiferorum, an sint Martyres?
- 57 Sensus fidelium antiquitus circa hoc.
- 58 Ad Martyrium requiritur vel status gratiæ, vel dispositio ad eam.
- 59 Ejusmodi debita dispositio, quæ?
- 60 Injuriam facit Martyri, qui orat pro Martyre.

39 **F**ortitudinis virtus vel maxime elucescit occurrentibus malis seu periculis repentinis, iisque maximis, utputa, quæ mortem inferunt. Unde colligunt Doctores, Martyrium esse excellentissimum Fortitudinis actum; nam Martyres propter testimonium Christi, servandumque bonum veritatis Fidei ipsam vitam profundere non perhorrescunt. *Martyr* enim græce, latine *Testis* est: unde *Martyres Christi* dicuntur quasi testes ipsius, siue veritatis, quæ per Christum nobis innotescit. Agendo igitur de Martyrio, sit

40 **CONCL. I.** Martyrium est tolerantia voluntaria mortis ex odio veræ Fidei, vel alterius Virtutis Christianæ inflicte. Patebit hoc amplius ex declaratione conditionum ad Martyrium requisitarum: unde sit

41 **CONCL. II.** Ad verum Martyrium, tamquam excellentissimum actum virtutis Fortitudinis, requiritur in adultis ex parte intellectus vera Fides, ac deinde ex parte voluntatis pia voluntas tolerandi mortem pro Fide Christi, vel pro defensione alterius Virtutis supernaturalis. Ita communis.

42 Dicitur I. *Requiritur in adultis*; nam in parvulis, qui nullum actum proprium elicere possunt, datur Martyrium absque actu propriæ voluntatis, quando occiduntur odio Fidei: ut patet in SS. Innocentibus, qui ab Herode Rege propter Christum occisi rite ab Ecclesia coluntur tamquam Martyres. Ratio est: quia licet nullum possint elicere actum, quo acceptent Martyrium propter Fidem, adhuc tamen re ipsa propter Fidem perdunt animam suam; ergo eam rursus in coelis invenient, juxta illam generalem promissionem Christi *Matth. 10. Qui perdidit animam suam propter me, inveniet eam.* Quinimo ex speciali privilegio Christi occisio propter causam Fidei est parvulis instar Baptismi; unde salvantur,



tur, etiam si in utero materno occidantur propter Christum, utpote proprio sanguine baptizati.

43 Dicitur II. *Requiritur ad Martyrium ex parte intellectus vera Fides*: quia, ut dicitur *Hebr. c. 11. Sine Fide impossibile est placere Deo*. Unde Hæretici, si occidantur propter sectam suam hæreticam, quam profitentur, Martyres non sunt; nam, ut S. Augustinus in *Psalm 34.* ait: *Martyrem non pœna sed causa facit*; pœna enim communis est latroni & Martyri, hæretico & Catholico, sed causa dispar.

44 Dicitur III. *Deinde ex parte voluntatis pia voluntas tolerandi mortem pro Fide Christi*. Siquidem ad Martyrium in adultis omnino requiritur, ut mors voluntarie acceptetur propter Fidei veritatem tuendam: nam sicut ad Baptismum fluminis, ita & ad Martyrium, seu Baptismum sanguinis requiritur consensus, sive prævia acceptatio illius.

45 Hinc si quis adultus in odium Fidei Christianæ dormiens occidatur, cum antea de morte propter Fidem inferenda nihil omnino cogitasset, atque eam nullatenus acceptaverit, non est proprie censendus Martyr, prout notat Lessius *lib. 3. de Just. & Jure. cap. 1. n. 24.* & Layman *lib. 3. sect. 3. n. 4.* citans Suarezium. Secus foret, si quis ob Fidem in vincula coniectus statuisset secum mori potius, quam Fidem negare: nam si talis postea in odium Fidei dormiens interficiatur, verus Martyr erit; cum in simili etiam ille Baptismi Sacramentum suscipiat in somnis, qui illud antea desideraverat.

46 Quæres, an milites, qui in bello pro defensione veræ Fidei contra Infideles suscepto pugnantes occiduntur, sint Martyres? Resp. I. Certum est, si ejusmodi milites intentionem suam non referant ad causam Fidei, vel aliud motivum supernaturale, sed ad alium finem, utpote honorem, pecuniam, vel bonum dumtaxat humanum Reipublicæ, eos occumbendo in tali bello nequaquam effici Martyres, cum non moriantur propter Christum, aut in testimonium alicujus virtutis supernaturalis a Deo revelatæ, sed ob finem mere humanum.

47 Resp. II. Supposita pia intentione defendendi veram Fidem contra hostes ejusdem, ipsoque statu gratiæ, milites in tali bello pugnantes exercent actum valde meritorium; si tamen pugnando occidantur, proprie Martyres non sunt. Ratio posterioris partis est: quia milites actu pugnantes non voluntate, sed potius necessitate mortem sustinent; quinimo hanc hostibus inferrent, nisi ab ipsis vincerentur. Insuper ipsi non præ se ferunt mansuetudinem Christi, cujus passio est exemplar veri Martyrii, quique, cum pateretur, non comminabatur. I. *Petri 2.* Lessius *loc. cit. n. 36.* Layman, & alii. Accedit praxis, ac sensus Ecclesiæ, quæ decedentes in actuali pugna numquam consuevit colere pro Martyribus.

48 Prior autem pars ex eo patet: quia milites illi, ceteroquin in statu gratiæ constituti, & ex tali optima intentione pugnantes, publicum Deo, veræque Fidei testimonium perhibent, hujusque augmentum atque propagationem totis viribus promovere satagunt, atque pro ejusdem defensione mortem saltem indirecte acceptant, dum periculo ipsius manifesto, sese exponere non perhorrescunt. Huc faciunt verba illa Leonis Papæ IV. exhortatoria ad milites pro Christianorum defensione pugnantes, & consolatoria morientium in hac piissima intentione, quæ referuntur *c. Omni timore, 23. q. 8.* ibi: *Omni timore, ac terrore deposito contra inimicos sanctæ Fidei, & adversarios omnium Religionum agere viriliter studeat. Novit enim Omnipotens, si quilibet vestrum morietur, quod pro veritate Fidei, & salvatione patriæ, ac defensione Christianorum mortuus est: & ideo ab eo præmium cæleste consequetur.* Idipsum S. Joannes a Capistrano suis Cruce signatis contra Turcas, insensissimos Christiani Nominis hostes, prope Belgradum fortiter pugnaturis, affectuose proponebat, illis (apud Waddingum ad Annum 1456.) verbis: *O quam felices, qui in hac pugna Christi moriuntur; quia statim ab Angelis cum sanctis Martyribus, qui pro Fide mortui sunt, coronabuntur.* (f)

49 Dicitur IV. *Vel pro defensione alicujus veræ Virtutis supernaturalis*: nam non solum, qui propter Confessionem Fidei, sed etiam, qui pro defensione aliarum virtutum supernaturalium moriuntur, Martyrii palmam consequuntur. Generaliter enim loquendo omnia virtutum opera, quatenus referuntur in Deum, sunt quædam Fidei protestationes: quia, dum quis potius vult mori, quam Deum peccato quopiam offendere, ipso facto protestatur, Deum esse Summum Bonum, ac omnibus aliis bonis creatis præferendum; quod est articulus Fidei Christianæ.

50 Infertur proinde, quod omnium Virtutum supernaturalium opera possint esse causa Martyrii. Sic enim S. Joannes Baptista est Martyr, quia in odium Virtutis ac Veritatis, quam libere ac impavide prædicabat, fuit occisus. Similiter multæ Sanctæ Virgines sunt Martyres, eo quod fuerint mortuæ pro defensione Virginitatis. Sic etiam S. Thomas Episcopus Cantuariensis est Martyr; quia pro Catholica Ecclesia, ejusque immunitate defendenda mortuus est: idem dicendum de plurimis aliis.

51 Et notandum, quod si quis ob prædictas causas occidatur, vere sit Martyr, licet Tyrannus alios falsos prætextus fingat. Nam & Judæi sub prætextu violatæ Legis Mosaicæ, & quod se regem fecisset, Christum Dominum veluti malefactorem occiderunt, qui tamen Martyr fuit, imo Dux, & Princeps Martyrum. Similiter in primitiva Ecclesia non raro occidebantur Martyres, vere quidem in odium Fidei, sed sub prætextu perversionis Reipublicæ: quibus similia postmodum plurimis aliis SS. Martyribus falso imposita fuerunt.

52 CONCL. III. Ad Martyrium insuper requiritur, quod mors inferatur, ita ut vel mors re ipsa sequatur (& hoc est perfectissimum, & completum genus Martyrii) vel saltem posita fuerit causa sufficiens, ex qua naturaliter ipsa mors consequeretur, nisi divinitus impediatur. Ita communis, & sequitur Herincx *disp. 8. de Baptismo. quest. 1.* Sic enim S. Joannes Evangelista ab Ecclesia celebratur inter Martyres, eo quod missus fuerit in ferventis olei dolium, & eadem ratione tres Pueri in fornacem Babylonicam missi Martyres censentur; quia pro cultu unius veri Dei lethalem cruciatum (et si postea divinitus impeditum) fornacis ardentis subire non exhorruerunt.

53 Infertur proinde 1. Quod proprie & perfecte Martyres non sint, qui in vincula coniecti, vel in exilium acti, aut omnibus bonis suis spoliati multa pro Fide Christi patiuntur, nisi forte secundum quod ex his mors sequatur, prout notat D. Thomas 2. 2. *q. 125. art. 2.* nam talia de se non sunt illativa mortis: quinimo consueverunt homines omnia hujusmodi subire, & gravissimos etiam corporis dolores sustinere, ut vitam conservent. Quod si vero ex præmissis ipsa mors sequatur, Martyrium perficitur, ut patet exemplo SS. Martyrum & Pontificum Marcelli, Joannis, Sylverii, Martini, & Pontiani, quos in carcerem, vel exilium missos, atque ibi ærummis confectos Ecclesia pro Martyribus veneratur.

54 Infertur II. Quod Martyres solo desiderio non sint proprie Martyres, non obstante, quod amorosissimo ejusmodi desiderio maximum in cælis cumulum meritorum consequantur, ac, etiam si affectus Martyrii ad effectum non deducatur, nihilominus ipsa sola eorum voluntas Deo Judice coronetur, *c. Numquid Cain. de Penit. dist. 1.* quia videlicet re ipsa non sustinent mortem propter Confessionem veræ Fidei, neque causam proximam illius.

55 Nec obstat id, quod de S. Martino Turonensi Episcopo canit Ecclesia: *O sanctissima anima, quam etsi gladius persecutoris non abstulit, palmam tamen Martyrii non amisit.* Quo faciunt plures aliæ SS. Patrum sententiæ: ut illa S. Hieronymi in Epitaphio Paulæ circa finem: *Non solum effusio sanguinis in Confessione reputatur,*



reputatur, sed devota quoque mentis servitus immaculata quotidianum est Martyrium. Accedit D. Augustinus Serm. 250. de Tempore. ibi: Christianis quotidiana Martyria deesse non possunt. Sicut enim Castitas, & Veritas, & Justitia Christus est: sic & ille, qui eis infidiatur, persecutor est. Qui & in aliis defendere, & in se custodire voluerit, Martyr erit. Item S. Bernardus in Sentent. brevior. Parcitas in libertate, Largitas in paupertate, Castitas in juventute, Martyrium est sine sanguine. Et concordant plures similes SS. Patrum sententiæ. Respondetur enim, hujusmodi auctoritates loqui de Martyrio non proprie, sed per quandam similitudinem; ut explicat D. Thomas 2. 2. qu. 125. art. 4. ad. 1. Unde idem D. Augustinus lib. de sancta Virginitate. præfert Martyrium perpetuæ Virginitati. Martyrium enim inter omnes actus virtuosos maxime demonstrat perfectionem Charitatis juxta illud Salvatoris Joan. 15. Majorem hac dilectionem nemo habet, quam ut animam suam ponat quis pro amicis suis.

56 Inferitur III. Quod morientes in causa pia v. g. vitam prostituunt ob amorem Dei in servitio pestiferorum proprie non sint Martyres, eo quod mors eidem non inferatur odio Fidei Christianæ, vel alienius Virtutis supernaturalis. Martyrium enim est testimonium externum, quod Christo, vel ejus doctrinæ præbetur per hoc, quod quis mortem pro ea voluntarie subeat; quod non fit, nisi adsit, qui mortem inferat, ut Christum vel ejus doctrinam nobis auferat. In quo sensu loquitur ille vulgatus, Martyrum patientiam commendans ve siculus: Actio displicuit, Passio grata fuit: per actionem denotans crudelitatem Tyrannorum mortem inferentium, per passionem vero patientiam SS. Martyrum.

57 Etendum tamen, quod olim eos, qui, cum pestis seculi grassaretur Alexandria, morbo laborantibus immigrantes libentissime mortem oppetere, velut Martyres religio fidei fides venerari consuevit: ut legitur in Martyrologio Romano ad diem 28. Februarii. Quod quidem factum fuit propter excellentiam operis adeo heroici, atque eximie Charitatis, Christo in suis membris (Fidelibus nimirum) exhibere. Quamvis simul notanter ibidem addatur ly velut Martyres; ad insinuandum, quod proprie loquendo, & in toto rigore tales non sint Martyres.

58 CONCL. IV. Ut Martyrium cuiusvis proferat salutem, requiritur insuper status gratiæ, vel saltem legitima dispositio ad gratiam, juxta illud Apostoli 1. Corinth. 13. Et si tradidero corpus meum, ita ut ardeam, Charitatem autem non habuero, nihil mihi prodest. Quibus vel his excluduntur illi, qui nec Charitatem habent, nec ad eam sunt dispositi, ut sunt Schismatici, Hæretici, aut alii peccatis mortiferis affectu inhærentes: prout inter alios observat Herincx disp. 8. de Baptismo. qu. 3. n. 24.

59 Porro dispositio debita ad Martyrium in peccatoribus non solum est contritio perfecta, sed etiam attritio, ut innuit D. Thomas part. 3. qu. 78. art. 1. dicens: Passio pro Christo suscepta obtinet vim Baptismi: ad hujus enim fructum consequendum sufficit in peccatoribus attritio. Concordat Scotus 4. dist. 14. qu. 1. §. Ex his. ac sequuntur Lessius, Mastrius, Herincx, & alii.

60 Atque de hujusmodi Martyribus verificatur illud D. Augustini Serm. 17. de Verbis Apostoli. & refertur cap. Cum Martha. §. Tertio loco. de Celebrat. Missar. Injuriam facit Martyri, qui orat pro Martyre. Quod intellige, dummodo de ejusmodi Martyrio propter Christum perpeffo legitime constet.

## DISTINCTIO II.

De Virtute Justitiæ, ac Jure generatim.

### QUESTIO I.

Quid sit Justitia, & quæ Virtutes eidem connexæ?

#### SUMMARIUM.

- 1 Justitiæ varia acceptiones.
- 2 Ejus acceptio magis propria.
- 3 Justitia proprie sumpta, quid?
- 4 Reddit alteri jus, & quale?
- 5 Debitum legale, & Debitum morale, quid?
- 6 Virtutes Justitiæ annexæ, quæ?  
(a) Tract. 5. Dist. 1. per totum.
- 7 Pietas varie accipitur.
- 8 Observantia, quid?
- 9 Justitia proprie dicta, an detur inter patrem & filium, dominum & servum?
- 10 Gratitude, quid?  
Ejus officia quinque.
- 11 Veritas, quid?  
Mendacium triplex jocosum, Officiosum, & perniciosum.
- 12 Amicitia, & affabilitas, quid?  
Et quomodo differant?  
Aduatio, & Morositas, quid?

1 **J**ustitiæ nomen varie sumitur: & imprimis Justitia communissime, ac secundum rationem suam generalissimam aliud non est, quam rectitudo voluntatis propter se servata, ut post D. Anselmum de Veritate. cap. 12. loquitur Scotus 4. dist. 46. quest. 1. Et hoc modo Justitia in se continet Virtutes omnes, atque in S. Scriptura non raro sic accipitur; ut Matthæi 5. Beati, qui esuriunt & sitiunt justitiam. & alibi. Deinde sumitur Justitia pro ipsamet rectitudine actus, in quo sensu bona opera exercentes dicuntur operari justitiam, juxta illud ad Hebr. 11. Sancti per fidem vicerunt regna, operati sunt justitiam. Sed de Justitia tantæ acceptæ hic non est sermo.

2 Ulterius igitur, & magis ad propositum Justitia sumitur pro habitu, seu virtute inclinante voluntatem ad reddendum alteri debitum suum, quaecumque illud sit juxta quod loquitur Apostolus ad Rom. 13. Reddite ergo omnibus debita: cui tributum, tributum; cui vectigal, vectigal; cui timorem, timorem; cui honorem, honorem. Unde Justitia sic accepta comprehendit sub se omnes eas virtutes, quæ respiciunt alterum in ordine ad reddendum ipsi quoddam debitum; cujusmodi Virtutes recensentur n. 6. & seqq. Ultimo tandem Justitia sumitur stricte & proprie, quomodo respicit debitum legale, ac jus proprie dictum, reddendum alteri. Et in hac ultima acceptione loquendo de Justitia, sit

3 CONCL. I. Justitia stricte & proprie sumpta bene definitur cum Ulpiano l. Justitia. ff. de Justitia & Jure. taliter: Justitia est constans, & perpetua voluntas jus suum unicuique tribuens. Quæ definitio communiter est recepta, & sensum facit: Justitia est virtus, inclinans, & firmans voluntatem ad perpetuo tribuendum jus suum unicuique. Dicitur, constans & perpetua voluntas: quæ particula stat loco generis; commune est enim omni virtuti, quod sit constans & perpetua voluntas, id est, firmus habitus voluntatis, inclinans ipsam non ad unam dumtaxat diem, vel annum, sed quantum est ex natura talis habitus, perpetuo circa proprium objectum recte operandi.

4 Et additur, jus suum unicuique tribuens; sive, ut alii legunt, jus suum cuique tribuendi: quæ particula stat loco differentiae, per quam Justitia differt a ceteris Virtutibus tanquam per proprium objectum, quod est jus suum cuique tribuere. Dum autem dicitur, jus suum, id intelligendum est de jure proprie dicto, seu debito



debito legali, non autem de jure large sumpto, ac debito morali tantum. Et per hoc differt Justitia proprie dicta, & hic definita ab Observantia, Pietate, & aliis hujusmodi Virtutibus, quæ licet alterum respiciant, non tamen reddunt ipsi debitum aliquod legale, seu jus proprie dictum, sed morale solum, ac proinde non sunt Justitia proprie dicta.

5 Porro *Debitum legale* (quod est debitum stricte, & proprie dictum) illud est, ad quod reddendum, & quidem quoad æqualitatem quis lege adstringitur. Et additur, *quoad æqualitatem*: quia, dum redditur, seu solvitur debitum legale, servatur Justitia proprie dicta, ad quam inter alia requiritur æqualitas dati & accepti, ita scilicet, ut si debeam centum, reddam centum, vel quid æquivalens: & si non posset fieri talis æqualitas, hoc ipso jam non posset esse lex de debito illo totaliter reddendo, utpote cui numquam posset satisfieri, sicque non interveniret debitum legale. *Debitum morale* econtra dicitur illud, ad quod alteri reddendum obligatur quis solum moraliter, ac ex honestate virtutis, id est, quod vel est altioris ordinis, & ita magnum, ut non possit ei reddi ad æqualitatem, ac proinde solum obligat ad satisfaciendum ipsi pro viribus, seu quantum est moraliter possibile; vel ita parvum, ut non inducat obligationem legalem & strictam, sed moralem dumtaxat, quæ ex quadam honestate virtutis procedit; prout fit in Virtutibus Justitiæ annexis, de quibus fit

6 CONCL. II. Virtutes Justitiæ annexæ, ac veluti partes ejus potentiales dicuntur omnes illæ, in quibus intervenit quidem aliquod debitum ad alterum, illud tamen non est legale, sed dumtaxat morale: eo quod fit (uti proxime explicatum) adeo magnum, ut non possit illi satisfieri ad æqualitatem, aut ita parvum, ut non inducat veram obligationem legalem & strictam, sed dumtaxat ex quadam honestate virtutis procedentem. Prioris generis sunt Religio, Pietas, Observantia, & Obedientia, quæ est pars Observantiæ. Posterioris generis est Gratitude, Veritas, Amicitia, Affabilitas, & si quæ sunt aliæ hujusmodi Virtutes, in quibus est solum debitum morale ad alterum. Ita communis post D. Thomam 2.2. *quest. 10.* Nam sola ista virtus, quæ respicit debitum legale, ac jus proprie dictum alteri reddendum, censetur Justitia proprie dicta; ceteræ vero, quæ respiciunt quidem debitum alteri reddendum, sed dumtaxat morale, hoc ipso deviant a ratione perfectæ Justitiæ, tamen, quia respiciunt aliquod debitum erga proximum, censentur Virtutes Justitiæ annexæ, ac veluti partes illius potentiales, uti sunt enumeratæ. Et quidem de *Religione* jam dictum est suo loco. (a)

7 *Pietas* quandoque sumitur pro studio internæ devotionis, & sinceri affectus erga Deum & proximum, in quo sensu 1. *Timoth. 4.* dicitur; *Exerce te ipsum ad pietatem.* Et infra: *Pietas ad omnia utilis est, promissionem habens vitæ, quæ nunc est, & futura.* & alibi. Quandoque *Pietas* accipitur pro Misericordia, seu benigno affectu erga alios, præsertim filios nostræ ope indigentes, quæ ratione *Pietas* passim in S. Scriptura Deo attribuitur, ut *Ecclesiastici. 2.* *Quoniam pius, & misericors est Deus.* & alibi. In proposito tamen *Pietas* sumitur pro speciali virtute, quæ debitum cultum exhibemus parentibus, tamquam vitæ & educationis nostræ post Deum auctoribus.

8 *Observantia* est virtus, quæ debitus cultus deferatur Superioribus, tamquam gubernationis nostræ auctoribus. Sicuti enim pietas colit parentes, eo quod sint nobis post Deum auctores vitæ, atque educationis nostræ; ita Observantia deferat cultum Superioribus, quia sunt auctores nostræ gubernationis. Ad hanc reducitur *Obedientia*, quæ quatenus est specialis virtus, ideo aliquid facit, quia præceptum est. Et prædictæ tres virtutes, nempe Religio, Pietas, & Observantia respiciunt debitum adeo magnum ad alterum, ut non possit eidem satisfieri ad æqualitatem, unde versiculi illi:

*Dignas Cælibus, Genitoribus, atque Magistris,  
Ex merito grates reddere nemo potest.*

9 Sed occasione dictorum, quæres incidentaliter, an inter patrem & filium, dominum & servum (id est, mancipium) possit intercedere Justitia proprie dicta? Resp. negative, loquendo de ipsis spectatis quoad jura & debita, quæ sunt inter eos quæ tales. Ita Aristoteles 5. *Ethic. cap. 6.* Scotus *cit. dist. 46. q. 1.* & alii. Ratio est, quia ad Justitiam proprie dictam requiritur jurium alteritas, id est, jurium distinctio: atqui hæc non habetur inter patrem & filium, inter dominum & servum quæ tales, cum filius & servus non sint sui juris respectu patris, ac domini; ergo. Additur tamen: *loquendo de ipsis spectatis quoad jura & debita, quæ sunt inter eos quæ tales.* Quod enim filius ut filius debet patri, debet ei lege Pietatis, non Justitiæ. Si vero ipsi spectentur, ut sunt distincti homines, atque in multis rebus sui juris, ac diversa jura habentes, sic inter eos potest esse Justitia, & injuria: ut si filius sit emancipatus, vel habeat bona castrensia, aut quasi castrensia, & hæc ipsi a patre contra fas auferantur: item si dominus servum occidat, vel mutilat; nam in vita, membrisque conservandis, servus non subest domino, sed est sui juris.

10 Quantum attinet ad Virtutes posterioris generis, itidem Justitiæ annexas, *Gratitude* est virtus, quæ iis, qui de nobis bene meriti sunt, non solum gratias agimus, sed etiam, cum possumus, referimus. Ejus officia sunt quinque, videlicet beneficii accepti æstimatio, ejus benigna acceptatio, gratiarum actio, grata commemoratio, & tandem repensio.

11 *Veritas*, sive *Veracitas* est virtus qua nos proximis tales dictis & factis exhibemus, quales re ipsa sumus. Huic opponitur *Mendacium*, estque locutio contra mentem, cum scilicet aliud loquimur exterius, aliud interior sentimus. Et dividitur communiter ratione finis, & effectus in jocosum, officiosum, & perniciosum. *Mendacium jocosum* est, quod fit causa voluptatis absque alterius nocumento. *Officiosum*, quod fit causa utilitatis, simulque nemini nocet: & horum utrumque est peccatum ex genere veniale. *Perniciosum* est, quo alicui injuste nocetur, sive alteri prodest, sive non. Et hoc ex genere suo est peccatum mortale, atque gravissime passim in S. Scriptura perstringitur, quamvis per accidens, atque ob levitatem materiæ, seu nocumenti illati possit esse veniale.

12 *Amicitia* est virtus, qua aliqui mutuam apertamque inter se benevolentiam gerunt, seque invicem bonis affici volunt honestatis gratia, & non solum jucunditatis. *Affabilitas* est virtus, quæ procurat, ut conversatio nostra in communi hominum consuetudine sit grata, & talis, qualem esse decet spectata conditione nostra, & eorum, quibuscum agimus, aliisque circumstantiis. Differt ab Amicitia, quod hæc inter notos dumtaxat, Affabilitas vero inter quosvis, etiam ignotos locum habeat: item, quod Affabilitas in sermone, & vitæ consuetudine versetur, Amicitia potissimum in affectu. Contra Affabilitatem delinquitur tum per excessum seu nimio placendi studio, dum quis in omnibus se accommodat aliis, omnia probat, omnia laudat: & hoc si fiat propter utilitatis causam, erit *Adulatio*; si solum, ut quis placeat, is *Blandus* appellatur. Tum per defectum, estque *Morositas*, qua quis proximo in congressibus nonnullam molestiam ac tædium affert, dum parum curat, sese accommodare, sed asper est, & pronus ad contradicendum.

## QUESTIO II.

De divisione Justitiæ in Commutativam, & Distributivam.

### SUMMARIUM.

- 13 Justitia dividitur in Commutativam & Distributivam.
- 14 Justitia Commutativa, quæ?
- 15 Qualem servet æqualitatem?
- 16 Justitia Distributiva, quæ?
- 17 Hæc servat proportionem Geometricam, illa Arithmeticam.
- 18 Proportio



- 18 *Proportio Arithmetica, & Geometrica, quæ?*  
 19 *Utræque Justitia dividitur in præmiativam, & punitivam.*  
 20 *Justitiæ objectum, quale?*

13 **C**elebris est hæc divisio Justitiæ in commutativam & distributivam, ab Aristotele 5. *Ethic. cap. 2.* assignata, & communiter recepta. Earum utraque est Justitia proprie dicta, observans debitum legale, & reddens alteri, quod suum est, ad æqualitatem, sed cum discrimine: nam una servat æqualitatem Arithmeticam, altera tantum Geometricam, prout amplius declarabitur.

14 **CONCL. I.** *Justitia commutativa* dicitur illa, quæ versatur in commutationibus rerum, pactis, & contractibus faciendis. Et hæc tunc observatur, quando fit commutatio rerum secundum æqualitatem dati & accepti: id est, considerando solum valorem rerum sine ullo respectu ad personas, ut videlicet tanti valeat, moraliter saltem, res reddenda, quanti valet accepta, qualescumque tandem sint personæ, sive nobiles, sive ignobiles. Sic fit, quando quis debet alteri centum, & ipsi reddit centum, vel aliquid illis centum æquivalens. Idem accidit in rerum venditionibus, si tanti res vendatur, quanti moraliter saltem, & juxta communem hominum æstimationem hic & nunc valet.

15 Et additur, *moraliter saltem.* Nam dicta æqualitas non semper debet esse omnino exacta & metaphysica, sed sufficit moralis, quæ habetur juxta prudentem hominum æstimationem, prout inter alios notat Maltius 3. *Sentent. disp. 3. n. 150.* Patet hoc manifeste in rerum emptionibus & venditionibus, in quibus exacta & metaphysica illa æqualitas attingi semper non potest, sed solum moralis; sic enim equus, aut quodcumque aliud animal vivens æstimato pretio juste venditur, & emitur, non obstante, quod aurum totius mundi non æquivaleret entitati unius equi, cum omne vivens simpliciter nobilior sit non vivente; quia in tali venditione & emptione saltem intervenit æqualitas moralis, taxanda juxta prudentem æstimationem hominum, atque exigentiam & utilitatem humani convictus, propter quem hæc utiliora, ac proinde magis cara, illa vero minus utilia, sicque minus cara censentur.

16 **CONCL. II.** *Justitia distributiva* e contra illa est, quæ commoda & onera communia, utputa officia, beneficia, communes exactiones, tributa &c. distribuit inter partes Communitatis cum proportionem Geometricam ad singulorum merita, vel status conditionem. Ita in re communis. Talis Justitia distributiva debet observari, quando honores vel præmia distribuuntur juxta cujuslibet meritum, & proportionem status, dando scilicet majora magis de Republica meritis, aut in majore dignitate constitutis; & minora aliis juxta cujusque meritum, statusque conditionem. Idem fit in impositione communium onerum: nam plura (ceteris paribus) debet contribuere ad communes Reipublicæ necessitates, qui majora habet bona seu prædia, minus vero, qui minora bona seu prædia possidet.

17 **CONCL. III.** Justitia commutativa & distributiva varie differunt, præcipue vero in hoc, quod Justitia distributiva servet proportionem sive æqualitatem Geometricam, commutativa Arithmeticam. Ita Scotus 4. *dist. 46. quest. 1.* dicens, quod in *distributiva requiratur æqualitas proportionis, non quantitatis; in commutativa secundum aliquos æqualitas quantitatis, non tamen proportionis.* Maltius *disp. 3. Theol. Moral. n. 1.* & alij. Ratio est: quia finis intrinsecus Justitiæ commutativæ est, constituere æqualitatem inter datum & acceptum, v. g. centum reddendo pro centum: Justitiæ vero distributivæ finis intrinsecus est, constituere æqualitatem inter proportionem & proportionem, ut nimirum talis sit proportio inter res & onera, quæ distribuuntur, qualis est proportio inter conditiones personarum, quibus fit distributio.

18 Porro per *æqualitatem*, seu *proportionem Arithmeticam*, intelligitur verà æqualitas rei ad rem, utputa centum ad centum, aut alterius justii pretii ad rem emptam, *Anach. Reiffensuel Theol. Tom. I.*

sine ullo habito respectu ad personas. Per *proportionem Geometricam* vero intelligitur ea, qua singulis tribuitur id, quod debent habere, cum inæqualitate tamen, juxta scilicet inæqualitatem ipsarum personarum, & cum proportionem ad statum atque conditionem singulorum. Unde sequitur & alia differentia: nam in Justitia distributiva, atque proportionem Geometrica, habetur respectus ad personas, earumque qualitates; prout patet in exemplis n. 16. adductis: secus fit in Justitia commutativa, & proportionem Arithmetica, ubi sine ullo personarum respectu res ipsæ (id est, data & recepta) inter se comparantur.

19 **CONCL. IV.** Utræque hæc Justitia, scilicet tam commutativa, quam distributiva, dividitur ulterius in præmiativam, quæ pro meritis reddit præmia, & in punitivam, seu vindicativam, quæ pro delictis reddit supplicia. Ita Doctores communiter, & probatur inductione. Quia inprimis Justitia distributiva tunc est præmiativa, quando honores, officia, & hujusmodi, in præmium præstitorum beneficiorum distribuit, inæqualiter tamen juxta inæqualitatem ac proportionem status & conditionis singulorum, dando scilicet plus personis in majore dignitate constitutis, & minus in minore dignitate constitutis; prout communiter fieri solet. Tunc vero Justitia distributiva est punitiva, quando nocentes, ut par est, suppliciis afficit, habita tamen ratione dignitatis, seu status personarum; sic adulterium v. g. in privatis personis alicubi pro prima vice punitur, statuendo ipsas cum publico respectu ante fores Ecclesiæ, in personis autem dignioribus multa pecuniaria. Et simile quid in multis aliis pœnis indigendis observari solet. Deinde, quod dicta divisio conveniat Justitiæ commutativæ patet ex eo: quia hæc tunc censetur esse præmiativa, quando distribuuntur æqualiter præmia juxta æqualitatem meritorum, nulla habita ratione conditionis, dignitatis & status personarum, quibus fit illa distributio. Est etiam punitiva, quando æqualia pro delictis supplicia inferuntur: sic enim commutando, pro meritis redduntur præmia æqualia, pro delictis vero supplicia. Maltius in 3. *disp. 7. n. 177.* post Scotum 4. *dist. 46. q. 1. m. §. Hic primo.* & alios.

20 Quæres, quodnam sit objectum Justitiæ proprie dictæ? Resp. cum communi, objectum ejus esse jus proprie dictum, seu jus alteri obstrictum. Ratio est: quia illud est objectum formale virtutis, ad quod virtus principaliter ordinatur; atqui Justitia proprie dicta principaliter ordinatur ad hoc jus constituendum, alterique reddendum, ut patet ex ejus definitione *num. 3.* data & ergo. Restat proinde de hoc jure agendum.

### QUESTIO III.

Quid, & quotuplex sit Jus? Ubi & de Actione reali, & personali.

### SUMMARIUM.

- 21 *Juris varia acceptiones.*  
 (c) Ut dictum Tract. 2. *dist. 1. num. 3. & seqq.*  
 22 *Jus, ut est objectum Justitiæ, quid?*  
 23 *Dividitur in Jus ad rem, &*  
 24 *Jus in re, quid?*  
 25 *Jus in re, & Jus ad rem, quomodo differant?*  
 26 *Actio, quid?*  
 (d) De hac infra Tract. 9. *Dist. 5. n. 117. & 118.*  
 27 *Dividitur in Actionem realem, & personalem.*  
 28 *Realis, seu Actio in rem, &*  
 29 *Personalis, seu Actio in personam, quid?*  
 \* *Actio realis quotuplex?*

21 **A**dvertendum, quod Jus varias habeat acceptiones. Quandoque enim Jus accipitur pro facultate aliquid agendi legitime, & inculpate: quomodo dici solet, aliquem uti jure suo, dum id agit, quod licite agere potest. Interdum pro sententia Judicis, ut *cap. ult. de Constitut. in 6. ibi: Extra territorium Jus dicenti impune*



*impune non paretur.* Aliquando pro ipsa Juris, seu Legum scientia: quo modo Studiosi, qui Jus Civile aut Canonicum audiunt, dicuntur Juri operam dare. Sumitur præterea nomen Juris, ut idem est ac Lex: quo pacto illud dividi solet in Jus naturale & positivum, in Jus Divinum & humanum, & hoc rursum in Jus Canonicum & Civile. (c) Tandem, & quantum ad propositum, Jus accipitur, prout est objectum Justitiæ, de quo loquendo, sit

22 CONCL. I. Jus est facultas seu potestas legitima, quam quis habet ad aliquam rem obtinendam, vel retinendam, aut ad aliquid faciendum, ita ut ab illius rei obventionem, seu retentionem, vel ab illa actione facienda licite impediri non possit. Ita Mastrius disp. 3. Theol. Moral. n. 2. Sive, ut alii brevius loquuntur, Jus est facultas utendi re pro libitu citra injuriam alterius.

23 CONCL. II. Jus taliter acceptum præcipue dividitur in Jus ad rem, & Jus in re. Ita communis; & habetur cap. ult. de Concess. Præbend. in 6. ibi: In quibus Beneficiis jus non esset quaesitum in re, licet ad rem. Porro Jus ad rem dicitur, quo ipsa res nondum est affecta seu obligata, sed habetur tantum Jus in ordine ad acquirendam possessionem & dominium illius rei, antequam hæc actu possideatur. Sive, ut alii loquuntur, Jus ad rem (quod etiam Jus personale vocatur) illud est, quod non tribuit actionem in rem ipsam, sed tantum in personam, se ab illius rei consecutione impediens. Et tale Jus est, quod alicui competit per donationem, & emptionem, aliosque hujusmodi contractus erga rem sibi donatam, venditam &c. antequam illius rei traditio sibi fiat: si enim res illa alteri vendatur, ac re ipsa tradatur, manebit ipsi, nec poteris tu eam vendicare, aut in judicio repetere; quia res illa nondum erat tua facta ante actualem traditionem, sed tantum habes actionem personalem in eum, qui te fraudavit. Tale etiam Jus ad rem est illud, quod quis consequitur per electionem, aut præsentationem ad Beneficium Ecclesiasticum; item per institutionem in hæredem ante additionem hæreditatis, & hujusmodi.

24 Jus in re econtra dicitur illud, quod rem ipsam sibi devinctam, & obligatam habet: sive, quod habetur in re aliqua, cujus possessio, & dominium actu jam cuipiam est comparatum. Aut magis juridice loquendo, Jus in re dicitur id, quod tribuit actionem in rem ipsam, seu actionem realem, quæ dicitur Rei vindicatio, sive (ut alii loquuntur) Rei vindicatio, de qua mox plura. Et tale Jus in re e. g. est illud, quod habetur per emptionem, & alios contractus secuta rei traditione: item quod acquiritur in Beneficio Ecclesiastico per actualem ejus collationem, sive investituram, & hujusmodi.

25 Est autem notabile discrimen inter Jus in re, & Jus ad rem. Siquidem Jus in re ita facit rem propriam illius, qui habet tale jus respectu ipsius rei, ut in quocumque loco hæc sit, & ad cujuscumque manus deveniat, is habeat facultatem, ubicumque eam repererit, recipiendi, & a quocumque repetendi, & quisquis eam receperit, ex Justitia teneatur ipsam restituere. Sic v. g. si equus Petri fuit furto ablati, poterit eum Petrus repetere, ubicumque invenerit, non obstante, quod alius equum bona fide emerit: quia talis equus est Petro obstrictus, & ipse respectu hujus equi habet Jus in re; omnis autem res transit cum suo onere, quo est affecta. Ceterum Jus ad rem non tribuit hujusmodi facultatem in rem ipsam, sed titulum dumtaxat justum, & Jus aliquod inchoatum ad acquirendum illius rei dominium. Ex quo fit, quod, si quis impediatur a consecutione talis rei, respectu cujus sibi competit Jus ad rem, non possit rem ipsam vindicare, atque in judicio repetere, sed dumtaxat actionem personalem instituere adversus eum, qui ipsum injuste impedit, vel impedit ab illius rei consecutione. Hoc ut melius intelligatur,

26 Quæres I. Quid sit Actio generatim, simulque Actio realis, & personalis? Resp. I. Actio generatim aliud non est, quam Jus persequendi in judicio, quod sibi debetur. Ita habetur §. 1. Instit. de Actionibus, estque com-

munis. Dicitur, in judicio: quia nemo sibi ipsi Jus dicere potest, neque quod sibi debetur, privata occupare auctoritate, cum idcirco constituti sint Magistratus: dummodo excipiat casus, in quo locus est occultæ compensationi (d) aut quando est periculum in mora, prout a fure in furto deprehenso quilibet repetere potest rem furtivam.

27 Resp. II. Actio ut sic recte dividitur in Actionem realem, & personalem. Ita communis; & habetur clare §. Omnium. Instit. de Action. ibi: Omnium autem actionum summa divisio in duo genera deducitur: aut enim in rem sunt, aut in personam. Nam agit unusquisque aut cum eo, qui ei obligatus est, vel ex contractu, vel ex maleficio: quo casu prodita sunt actiones in personam, per quas intendis adversarium ei dare, aut facere oportere, & alii quibusdam modis. Aut cum eo agit, qui nullo jure ei obligatus est, movet tamen ei de aliqua re controversiam: quo casu prodita actiones in rem sunt; veluti si rem corporalem possideat quis, quam Titius suam esse affirmet, possessor autem dominum ejus se esse dicat; nam si Titius suam esse intendat, in rem actio est. Hæc ibi. Et sciendum, quod Actiones in rem, alio nomine in Jure appellantur Vendicationes; & Actiones in personam, dicantur Conditiones, ut habetur §. Apellamus. Instit. de Actionibus.

28 Resp. III. Actio realis (quæ & Actio in rem appellatur) ea est, quæ adhæret rei, ipsamque insequitur; adeo, ut in cujuscumque possessionem res nobis obligata devenit, ab eodem reposci, & vendicari possit; & si probaverimus, rem esse nostram, etiam in Judicio necesse habeat possessor eam nobis restituere. Ita habetur tum cit. §. Omnium. Instit. de Action. tum l. Officium. ff. de Rei vindicatione, estque communis.

29 Actio personalis, seu Actio in personam, est illa, quæ proxime tendit in personam nobis obligatam ex contractu aliquo, vel delicto. Et dicitur, personalis: quia quamvis hæc actio sit in ordine ad aliquid recuperandum ab adversario, quod tibi fieri vel dari ab eo petis, nihilominus actio illa ita cohæret personæ, ut ipsa contra alium, qui rem illam forte detinet, institui non possit. Sic v. g. si mutuo dedisti Cajo centum florenos, quos ille Titio donavit, & tradidit, in hoc casu Actio dumtaxat personalis contra Cajum, nulla vero contra Titium tibi competit.

Additio.

\* Quæres II. Quotuplex sit Actio realis? Resp. quotuplex est Jus in Re, totuplex est Actio realis, si quis in tali Jure reali læditur. Jus autem in re in quatuor species subdividitur, nimirum in Dominium, Possessionem, Servitutem, & Pignus; nam res illa ipsamet, quæ nobis aliquo saltem modo immediate subiecta est, vel respicitur ut nostra, vel ut aliena. Si ut nostra, tunc vel est vere nostra, vel tantum putative, ac presumptive? si prius, confurgit Dominium, & Actio realis, competens Domino, vocatur in Jure Rei vindicatio proprie & speciali nomine talis. Si posterius, puta si quis ab altero, quem bona fide putavit Dominum (et si a parte rei talis non fuerit) accepit rem sibi extraditam, resultat Possessio, vi cujus competit actio realis Publiciana, sic dicta a Prætoribus Publico Auctore, contra quemcumque alterum extraneum, ad quem talis res possessa deveniret. Quod si illa res, quæ nobis immediate suo modo subiecta est, respicitur non ut propria, sed ut aliena, refert perpendere, an ea nobis subiciatur in utilitatem, vel tantum in securitatem? Quod si in utilitatem, appellatur Servitus, utpote cum juxta dicenda Servitus sit Jus quoddam in re alterius constitutum, in utilitatem nostram, atque exinde competit Actio realis Concessoria (sic nimirum a Juristis appellata) contra quemcumque, qui nos hoc Jure reali impedire, vel privare contendit. Quando autem res aliena præcise constituta fuit in securitatem nostram, appellatur Pignus, & si res illa a Debitore transferretur in aliquem Tertiū, Creditor contra quemcumque talem haberet Actionem realem Hypothecariam, seu uti vocant Civilistæ) quasi Servitutem.

DISTIN.



## DISTINCTIO III.

## De speciebus Juris in re.

## QUÆSTIO I.

## Quid, &amp; quotuplex sit Dominium?

## SUMMARIUM.

- 1 *Juris in re species, quæ?*
- 2 *Dominium communissime, quid?*  
*Dominium Divinum, & humanum.*
- 3 *Dominium humanum aliud jurisdictionis,*  
*Aliud proprietatis.*  
*\* Notabile Corollarium circa operas a Domino habente*  
*simul in subditos jurisdictionem præsentas.*
- 4 *Dominium proprietatis perfectum, &*  
*imperfectum.*  
*Hoc subdividitur in Dominium directum, & Domi-*  
*nium utile.*
- 6 *Alia de Dominio remissiva.*

1 **J**uris in re varix sunt species, quarum aliquæ rem ipsam, aliæ usum rei respiciunt. Et quidem prioris generis est *Dominium*, quo quis de re sua potest facere quod vult, dando, vendendo, commutando &c. & si impediatur, potest in Judicio experiri, prout n. 4. declarabitur. Accedit *Possessio*, quæ (si est iusta, simulque pacifica) *Dominio* addit, quod in tali jure non impediatur. Et tandem *Proprietas*, quæ insuper dicit, quod quis in tali jure partem non habeat. Posterioris generis, siue *Juris in usu rei*, duæ sunt species, videlicet *Ususfructus*, & *Ususjuris*: de quibus in progressu breviter. Incipiendo igitur a *Dominio*, ejusque divisionibus, sit

2 **CONCL. I.** *Dominium* communissime sumptum aliud non est, quam facultas disponendi de re tamquam sibi subjecta. Sic quippe juxta communem apprehensionem *Dominium* habere censetur, qui aliquid habet, de quo jure proprio, seu citra alterius ordinationem, disponere pro nutu possit; quod idcirco dicitur esse suum. Atque in hac tam generali acceptione illud cum primis subdividitur in *Dominium Divinum*, quale competit Deo per essentiam in omnes creaturas, & in *Dominium humanum*, quod convenit homini per participationem, seu potestatem sibi a Deo collatam in alias creaturas; juxta illud *Gen. I. Crescite, & multiplicamini, & replete terram, & subjicite eam, & dominamini piscibus maris, & volatilibus Cæli, & universis animantibus quæ moventur super terram.* Et de hoc *Dominio humano*, quod & *Politicum*, agitur in proposito.

3 **CONCL. II.** *Dominium humanum* seu politicum, aliud est *Dominium jurisdictionis*, & aliud *Dominium proprietatis*, quorum quodlibet denuo subdividitur. Ita communis, & patet inductione. Et quidem *Dominium jurisdictionis*, est potestas gubernandi suos subditos, id est, illis aliquid præcipiendi, vel prohibendi, ac illos judicandi, puniendi, vel præmiandi: hi quinque enim sunt actus gubernandi. Porro *Dominium jurisdictionis* subdividitur in sæculare, quale est in Imperatoribus, Regibus, Ducibus &c. respectu populorum sibi subditorum in negotiis sæcularibus: & in Ecclesiasticum, quale est in Summo Pontifice, Episcopis, aliisque Prælati Ecclesiasticis, qui habent subditos in spiritualibus. *Dominium proprietatis*, econtra est Jus disponendi de re sua pro libitu, nisi lege prohibeatur: de quo potissimum loquemur.

## Additio.

\* Ante ulteriorem tamen hujus *Dominii proprietatis* declarationem, & divisionem adhuc prænotatum velim circa *Dominium jurisdictionis temporalis*, quod eodem

gaudentes inter alia a subditis etiam prætendant certa servitia, seu operas rusticas, vulgo in nostra patria *Scharwerck* vocatas, de quibus falsissime per plures articulos Illustriss. D. Schmid. in *Comment. ad Statuta Bavarica Tit. 22.* tractat, sapienter advertendo, quod sæpius contra justitiam in iisdem contingant abusus e. g. dum prætendunt a subditis tales operas ad quæstus, & magna exinde captanda lucra; cum tamen intuitu jurisdictionis Bassæ præcise debeantur ad necessitatem corporalem, & domesticam Dominorum jurisdictionalium sublevandam: item dum Domini jurisdictionales opera hac Rusticorum non indigentes extorquent ab invitis per varias fraudes, vel metu injuste incusso multas loco earum pecunias, cum tamen operæ sint in obligatione, non ipsa pecunia; aliud autem pro alio, debitor invito, peti nequit *l. 2. C. Si cert. pet.* Item dum prædictas operas subditorum, quibus ipsimet Domini jurisdictionales revera non indigent, aliis Dominis pro pecunia concedunt; cum tamen ordinarie sint servitia obsequialia, & personalia, quæ aliis locari, aut delegari nequeunt. *l. 26. §. 12. ff. De conditione indebiti.* Unde pro praxi, si similia proponunt tales Domini in Confessionali consilii causa, tu mi Confessarie bene observa, ne decipiaris admittendo in præjudicium subditorum, quæ a parte rei non sunt licita. Potius, nisi in Jure etiam patrio sis versatus, mitte similes ad juris peritos doctos, & conscientiosos, qui præter Jura simul attendentes ad conventiones, & pacta Dominos inter & subditos inita, melius eosdem instruere poterunt, quænam operæ, ac qualiter subditis a Dominis Jurisdictionalibus imponi citra peccatum injustitiæ valeant. Nunc pergendo ad alterum *Dominium*, nimirum proprietatis, sit \*

4 **CONCL. III.** *Dominium proprietatis* aliud est perfectum, aliud imperfectum. Ita rursus communis. *Dominium proprietatis perfectum* (quod & *plenum* dicitur) communiter solet definiri, dicendo: *Dominium est jus perfecte disponendi de re corporali, nisi lege prohibeatur.* Dicitur, *jus*: quæ particula stat loco generis. Dicitur, *perfecte disponendi de re*; quæ particula stat loco differentie, simulque denotat, hic definiri *Dominium perfectum* seu *plenum*, virtute cujus potest quis perfecte disponere de re sua, eaque uti pro suo arbitratu, ipsam vel servando, vel vendendo, donando, commutando, vel etiam destruendo, *nisi lege prohibeatur.* Et hoc ultimum idcirco additur, quia licet *Dominium* ex natura sua tale sit, ut tribuat potestatem disponendi de re sua pro libitu, tamen interdum lege prohibente fit, ut hæc potestas non possit exire in actum. Si pupillus prohibetur alienare rem suam, cum tamen sit verus dominus: similiter quandoque lege prohibente non licet vendere res suas externis Nationibus, eo quod sit prohibita talium mercium extractio e Provincia; quibus similia contingunt passim in aliis casibus.

5 *Dominium proprietatis imperfectum* (cui pariter convenit proxime data *Dominii* definitio, dummodo in ea omittatur *ly perfecte*) vel habet tantum proprietatem rei absque emolumentis seu fructibus, vel econtra emolumentum absque proprietate: & juxta hoc subdividitur in directum, ac utile. *Dominium directum* continet solam rei proprietatem: unde habens hujusmodi *Dominium* dici solet *Proprietarius*, id est, habens talis rei proprietatem. Et tale *Dominium directum* habet Princeps in Feudis, Dominus in prædio ad Emphyteusim dato, & omnis ille, qui dicitur dominus cujuspiam rei, cujus *Ususfructus* alteri concessus est. *Dominium utile* dumtaxat continet solam rei utilitatem, seu emolumentum: & tale est, quod habet Feudatarius, Emphyteuta &c. respectu illius rei, quam ab alio accepit in Feudum, Emphyteusim &c.

6 Ceterum de *Dominio* hætenus explicato, & quibus competat, quibusque modis acquiratur plures occurrunt difficultates, de quibus in sequentibus Distinctionibus dicetur, postquam in præsentis ceterarum specierum *Juris* natura fuerit explicata.



## Q U Æ S T I O II

## Quid sit Ususfructus?

## S U M M A R I U M.

- 7 *Ususfructus, quid?*  
*Jus utendi, & Jus fruendi, quomodo differant?*
- 8 *Fructus rei, quid?*
- 9 *Usufructuarius, quis?*
- 10 *Usufructuarius ad quid teneatur?*
- 11 *Tenetur recte colere rem Usufructuariam.*  
*Et in ea modicas expensas facere.*  
*\* Ususfructus quomodo distinguatur ab Emphyteusi, & Feudo?*

7 **C**ONCL. I. *Ususfructus recte definitur, dicendo: Ususfructus est Jus alienis rebus utendi, fruendi, salva rerum substantia. Ita habetur l. 1. ff. de Usufructu &c. ac §. 1. Instit. eod. estque communis. Et quidem in hac definitione ly Jus, stat loco generis, reliqua ponuntur loco differentiae. Dicitur deinde, utendi; & mox additur ly fruendi, id est, percipiendi fructus rei: tum ut indicetur effectus illius juris, quod tribuitur cuipiam per Ususfructum, qui est legitima potestas utendi & fruendi re aliena, salva tamen ejus substantia: tum quia Jus utendi, & Jus fruendi re aliena, valde differunt: nam is, qui habet solum Jus utendi re aliqua, gaudet nudo dumtaxat usu illius, ita ut, quamvis possit re illa uti pro suis necessitatibus, ex ea tamen fructus non percipiat. Sic qui habet Jus utendi equa alterius, potest quidem ea uti ad suas necessitates; fructus tamen ejus, id est, equæ partus non erit suus, sed domini proprietarii equæ. Econtra Jus fruendi tribuit cuipiam hujusmodi jus, seu potestatem percipiendi fructus rei alienæ: quale Jus, utendi & fruendi simul, importat Ususfructus, ut ex ipso nomine patet: ac proinde Ususfructus est pinguior usu juris.*

8 Porro *Fructus rei* dicitur, quidquid salva rei substantia ex re illa est perceptibile. Sic censetur esse fructus in grege ovium, aliorumque animalium, lac, lana, foetus; in fundo foenum, segetes, fructus arborum, virgulta, arboreaeque caeduae, ita ut succidi possint (non vero fructiferae) lapides in lapidicinis, in domo locatio, & his similia: prout habetur l. 10. & seqq. ff. de Usufructu.

9 Dicitur ulterius in definitione Ususfructus, *re aliena*, ut excludatur jus utendi & fruendi, quod quisque habet in re sua, cujus plenum obtinet Dominium; quia talis non dicitur Usufructuarius, non obstante, quod utatur re illa, ejusque fructus percipiat; sed dicitur Dominus illius rei, quod est quid majus. Tandem additur, *salva rei substantia*: quia Usufructuarius (id est, ille, qui habet Ususfructum rei alienæ) tenetur rem illam, ex qua fructus percipit, integram Proprietario servare.

10 Quæres I. Ad quid teneatur Usufructuarius? Resp. Usufructuario inprimis incumbit solvere impensas, quæ ratione fructuum percipiendorum fieri debent. Tenetur insuper Usufructuarius ad præstandas collectas, tributa, & similes præstationes reales, quæ pro re fructuaria debentur, prout habetur decisum l. 7. §. *Hactenus*, ff. de Usufructu &c. Nam *Qui sentit onus, sentire debet commodum*, & econtra. juxta *Regulam* 55. *Juris. in 6.*

11 Tenetur rursus Usufructuarius rem illam, cujus habet Ususfructum recte colere, eaque quasi bonus paterfamilias uti; prout liquet ex ipsa definitione Ususfructus, dum dicitur esse jus utendi & fruendi *salva rei substantia*. Hinc inferunt Doctores, idque desumunt ex *cit. l. 7. §. Hactenus*. quod, qui habet Ususfructum fundi, teneatur in locum arborum demortuarum novas subserere, juxta arbitrium boni viri, & qui habet Ususfructum ædium, teneatur saltem modicas expensas facere ad facta tecta conservanda. Dicitur, *modicas expensas*: nam ad magnas non tenetur ipse: Usufructuarius,

sed Proprietarius rei, nisi forsan aliter inter eos conventum fuerit. Omittuntur nonnulla alia, obligationem Ususfructuarii, ipsumque Ususfructum concernentia, cum sit materia magis Juridica, & plurimum pendeat ex particularibus pactis, & conventionibus cum Domino proprietario initis.

## Additio.

\* Quæres II. An, & quomodo Ususfructus distinguatur ab Emphyteusi & Feudo? Ratio dubitandi est, quia non solum Ususfructuarius, verum etiam Emphyteuta, ac Feudatarius seu Vasallus uti, ac frui possunt re in Emphyteusin, vel Feudum concessa. Ante Responsum nota, tum ex dicendis infra *Dist. 6. post numer. 30. in Appendice Addit. II.* (tum fusius ex Jure Canonico Auctoris *Lib. 3. Decret. Tit. 18. & Tit. 2.*) quod Emphyteusis sit ille Contractus, quo res immobilis cum translatione Domini utilis, retento Dominio directo, alteri fruenda & colenda conceditur sub onere Laudemii (vulgo Anfall) semper pro investitura seu admissione novi coloni, & insuper certæ annuæ pensionis, tum in recognitionem Domini directi, tum in recompensationem fructuum persolvende. Contra vero Feudum proprie formaliter & essentialiter spectatum est ille Contractus, quo alicui conceditur res immobilis, aut immobili æquivalens cum translatione Domini utilis sub onere fidelitatis seu obsequii specialis. H. N.

Resp. Ususfructus formaliter spectatus, præprimis differt a Feudo & Emphyteusi; quia Emphyteuta, & Vasallus in re emphyteutica, ac feudali habet Dominium utile, & loquendo de actione utilem rei vindicationem; econtra vero Usufructuarius equidem habet Jus in re ad dies vitæ suæ, non vero aliquod Dominium proprie tale, hincque eidem equidem actio confessoria, non autem utilis rei vindicatio competit, uti recte advertit Chlingensperger *lib. 2. Instit. Tit. 4. Concl. 3.* & satis clare exprimitur *Leg. 1. ff. Si ager vectigal. ac l. 25. ff. de Verb. significat.* Dein quando cum Emphyteuta contingit mutatio, ita ut novus colonus investiat, præstatur saltem unum Laudemium Domino directo, & insuper singulis annis præter canonem annuum leve quid in recognitionem Domini directi, quæ duplex pensio annua præsertim in his terris practicatur. Vasallus autem proprie talis vi infeudationis non ad similia, sed potius ad Fidelitatem, ut nimirum damna Domino directo, vel personis ei proxime conjunctis impendunt avertat, specialiter obligatur. Quæ omnia hæc specialia non requiruntur apud Usufructuarium. Plura si capis de Emphyteusi, & Feudo rescire, reperies in Jure Canonico locis superius citatis. In præsentis sufficiat, adduxisse differentiam inter Emphyteusin, Feudum, & Ususfructum. \*

## Q U Æ S T I O III.

## De Usu Juris, &amp; variis ipsum concernentibus.

## S U M M A R I U M.

- 12 *Usus facti, & Usus juris.*
- 13 *Usus juris, quid?*
- 14 *Et quomodo differat ab Ususfructu?*
- 15 *Usuarius, quæ jura competant, nec ne?*
- 16 *Habenti Usum domus, quid liceat?*
- 17 *Minus juris est in Usu, quam Ususfructu.*

12 **A**dvertendum, quod Usus dupliciter sumi possit. I. Pro ipso actu utendi re alterius, sive pro actuali usu licito rei alienæ, & dici solet *Usus facti*, seu *nudus usus rei*: qualis est actualis equitatio ex permissione proprii Domini facta in equo alieno, vel actualis inhabitatio domus alienæ, & hujusmodi. II. Accipitur Usus pro ipsomet jure utendi re aliena, v.g. pro jure illo, quod quis ratione præviæ solutionis habet equitandi tali equo, vel inhabitandi domum alienam, & vocari solet *Usus juris*: de quo loquendo, sit

13 CONCL.



13 CONCL. I. *Ufus juris* recte solet definiri, dicendo: *Ufus est jus utendi tantum re aliena, salva ejus substantia.* Ita Doctores communiter. Dicitur, *jus utendi*: quia hic definitur *Ufus juris*, non autem *Ufus facti* tantum, de hoc enim, cum nihil juris præbeat utentibus, minus solliciti fuerunt Doctores. Ejus tamen mentio fit c. *Exiit*. §. *Nec quisquam. de Verb. Signif. in. 6.* ubi Pontifex sic loquitur: *Qui inquam, usus non juris, sed facti tantummodo nomen habens, quod facti est tantum, in utendo præbet utentibus, nihil juris.*

14 Dicitur ulterius, *utendi tantum*, per quam particulam *Ufus juris* differt ab *Usufructu*, cum quo in ceteris particulis omnino convenit: siquidem minus juris est in *Ufu*, quam in *Usufructu*, & cui *Ufus* alicujus rei competit, vel in testamento relictus est, uti quidem ea re potest, frui vero non potest.

15 Inferitur proinde, quod *Usuarius*, id est, is, cui *Ufus* alienæ rei v. g. horti est concessus, possit quidem in ipso horto deambulare, ac poma, olea & reliqua, quæ ibi nascuntur, ad suum, suæque familiæ, & hospitum victum accipere l. *Plenum. ff. De usu & habitatione.* non possit tamen omnes fructus recipere, eosque suo arbitratu vendere, seu alienare, sicuti posset, si haberet *Usufructum* horti. Item, si cui in testamento legetur *Ufus* jumentorum, vel gregis ovium ac vaccarum, non potest percipere pecorum fœtus, vel lanam (hæc enim in fructu magis, quam in usu numerantur) neque lac, nisi in modica quantitate, & quatenus ad victum quotidianum opus est: potest autem bobus, vel jumentis uti ad arandum, ad agrum stercoreandum, & ad omne aliud ministerium, ad quod boves apti sunt: prout expressè habetur decisum cit. l. *Plenum. ff. De usu & habit. & §. 1. Instit. Eod. cum concordantiis.*

16 Similiter, cui *Utus* domus, seu inhabitatio ejus relicta fuit in testamento aut aliunde competit de jure, potest quidem non solum in propria persona, sed etiam cum sua familia in ipsa habitare, imo & inquilinum secum recipere, aut aliquos hospites: non tamen potest domum alteri locare, neque inhabitationem ejus alicui concedere sine se, neque usum hujusmodi vendere; prout similiter dec sum habetur l. *Cui Ufus. & seqq. ff. De usu & habitatione.*

17 Ex quibus patet, minus esse juris in *Ufu*, quam in *Usufructu*: nam prædicta omnia (dempta venditione *Usufructus*) competunt *Usufructuario*, non autem *Usuuario* tantum. Ceterum illis ipsis modis, quibus *Usufructus* constituitur, vel finitur, etiam nudus *Ufus* constitui, atque definire solet. cit. §. 1. *Instit. de usu & habitatione.* De quibus plura *Juris-Consulti.*

#### QUESTIO IV.

Quid, & quotuplex sit Possessio, & quæ ejus privilegia?

#### SUMMARIUM.

- 18 Possessio, unde sic dicta?  
*Varie accipitur.*
- 19 Ejus divisio.
- 20 Possessio facti, seu naturalis tantum, & possessor bone, & mala fidei.
- 21 Possessio juris & facti simul, & quid?
- 22 Possessionis definitio explicatur.  
*Res incorporales proprie non possidentur.*  
*Res corporales, & incorporales, quæ?*
- 23 Depositarius non possidet, cur?
- 24 Possessionis privilegia plura.
- 25 Enumerantur præcipua.  
(a) Dist. 6. n. 5. & seqq.
- 26 Possessor, si spolietur, ante omnia restituere debet.  
*Possessor invasus potest vim vi repellere.*

18 Possessio sic dicitur a pedibus, & sonat idem quasi pedum positio, prout notatur l. 1. ff. *De acquirenda vel amitt. possess.* nam per pedum positionem super

bona immobilia, at puta, super agrum, vel domum, solet acquiri Possessio. Tribuitur autem hoc nomen interdum ipsis rebus possessis; ut *Psalm 77. Tradidit possessionem eorum igni.* *Matth. 19. Erat enim habens multas possessiones.* & alibi. Verum hoc loco Possessio accipitur pro actu, vel jure possidendi, a quo denominatur quis possessor. Et notanter sub disjunctione dictum est, *pro actu vel jure possidendi*: hæc enim duo non sunt idem, & quamvis possint in simul conjungi (uti fit in possessione juris & facti simul) adhuc tamen ab invicem separari valent, prout accidit in Possessione facti tantum. Hinc fit

19 CONCL. I. Possessio ut sic dividitur in Possessionem juris tantum, facti tantum, & in Possessionem juris & facti simul. Ita in re communis, & patet inductione. Siquidem *Possessio juris tantum* (quæ alio nomine appellatur *Possessio civilis*) est ipsummet jus possidendi rem, solo animo retentum: & habetur, quando quis rem suam ipso facto non amplius possidet, nihilominus de jure, sed solo animo ejus possessionem retinet, & continuat. Hoc modo civiliter, seu de jure possidet, qui abest quidem a rebus suis, adhuc autem animo eas possidet, seu occupat, eo quod non discesserit inde animo relinquendæ possessionis, sed postea revertetur.

20 *Possessio facti tantum* (quam & *naturalem tantum* appellant) est solus actus possidendi sine jure: & talem dumtaxat possessionem habet possessor rei alienæ, eo quod jure possidendi sit destitutus. Ubi simul advertendum, quod, si possessor rei alienæ possideat eam ut suam bona fide (id est, si ipse habeatur pro domino, ac ipsemet bona fide credat, se esse dominum hujus rei, revera tamen non sit, sed ad alium pertineat rei illius dominium) tunc dicatur is *Possessor bone fidei*, atque ejusmodi rem bona fide possidere. Si quis vero rem alienam mala fide possideat, bene sciens, eam rem non esse suam, prout fur possidet rem furtivam, dicitur is *Possessor male fidei*.

21 Tandem *Possessio juris & facti simul* (quæ etiam *civilis & naturalis simul* est) vocatur ea, quæ includit simul utrumque, id est, tam jus, quam actum possidendi. Et talis Possessio competit cuilibet domino, rem suam per corporalem insistentiam possidenti, id est, qui in re, quam de jure possidet, vel in aliqua parte ejus præsens existit, aut saltem res possessa est in conspectu ejus, ut ipsam videat, vel partem ejus: nam quolibet horum sufficit ad possessionem facti, seu naturalem continuandam, siue dein tale quid fiat per se, siue per alium suo nomine. Et de hac loquendo, ulterius fit

22 CONCL. II. *Possessio* est rei corporalis detentio, corporis, & animi, & juris adminiculo. Ita Glossa communiter recepta l. 1. ff. *De acquirenda vel amitt. possess.* Dicitur *detentio rei*: quia ad hoc, ut quis rem actu possideat, necesse est, eam aliquo modo detinere, seu occupare, vel per se vel per alium, qui suo nomine eam detinet: hoc enim essentialiter requiritur ad possessionem juris & facti simul, de qua procedit data definitio. Et additur, *rei corporalis*: nam res incorporales proprie non possidentur, sed dicuntur quasi possideri. arg. c. *cum Ecclesia. de Causa Possess.* ubi Pontifex possessionem juris spiritualis eligendi appellat *quasi possessionem*, juncta l. *Sequitur §. Si viam. ff. de Usurp. & Usucap.* Porro *Res corporales* sunt eæ, quæ ex sui natura tangi possunt; veluti ager, vestis, equus, aurum, & hujusmodi. *Res incorporales* vero, quæ tangi non possunt: ut sunt ea, quæ consistunt, in jure v. g. jus eligendi, jus patronatus, jus ad hæreditatem, usufructus, & alia hujusmodi jura.

23 Dicitur ulterius, *corporis & animi adminiculo*: quia ad possessionem unum sine altero non sufficit, sed requiritur, ut quis rem corporaliter apprehendat, seu detineat, simulque ut eam detineat tamquam suam sique animo possidendi, & non solum nomine alterius ipsam habeat. Hinc Depositarius (id est, ille, qui rem alterius apud se depositam retinet) non dicitur possidere deposti-



depositum, quia non detinet illud animo possidendi, ac retinendi sibi. Additur vero, & *juris adminiculo*: quæ particula sonat idem, ac *jure non refragante*, sive, ut habetur possessio illa non contra jus & fas: nam data definitio convenit Possessionem juris & facti simul. Et per hoc excluditur Possessio manifeste injusta, qua v. g. fur, aut alius rei alienæ invasor possidet rem alienam: siquidem talis non habet possessionem juris & facti simul, quia non detinet rem illam juris adminiculo, sed contra jus & fas; quamvis habeat possessionem facti, seu naturalem.

24. Quæres, quidnam privilegii conferat Possessio? Resp. plura sane privilegia, & commoda asserre Possessionem: adeo quidem, ut quando a duabus partibus litigantibus de proprietate alicujus rei controversia coram Judice agitur, plerumque, & ferme semper existat ingens contentio de ipsa Possessione; uti notatur §. *Retinenda. Instit. de Interdictis*.

25. Et primo quidem in tali casu, si videlicet oboriatur controversia inter quosdam de rei proprietate, si ve dominio, & adhibita diligenti inquisitione maneat adhuc dubium, cujusnam res illa sit, tunc melior est conditio possidentis, & ipsi adjudicabitur causa juxta *Reg. 65. Juris. in 6. In pari delicto; vel causa potior est conditio possidentis*. Deinde Possessio parit in judicio præsumptionem domini: unde in prædicto casu Possessor non tenetur probare, rem esse suam, sed alter, qui eam repetit, & quidem, si hic non satis probaverit rem esse suam, nihil obtinebit, sed alter remanebit in possessione, etiam si revera res ejus non sit; prout expresse habetur *cit. §. Retinenda. Instit. de Interdictis*. Ulterius Possessio, si sit bonæ fidei, suo tempore parit præscriptionem; id est, facit, ut res, quæ prius revera non erat tua, elapso tempore a Jure definito fiat tua, ita ut non amplius tenearis eam domino, postea primum ipsam repetenti, restituere; de quo plura inferius (a) agendo de Præscriptione.

26. His accedit, quod si Possessor privata alicujus violentia de possessione rerum suarum exturbetur, aut ea clam spoliatur, ante omnia debeat fieri restitutio spoliati; non obstante, quod occupator alleget titulum, velitque probare, rem illam esse suam: generaliter enim restitutio spoliati ante omnia fieri debet *c. In litteris. & seqq. de Restit. spoliati*. Nec potest cogi spoliatus (dummodo probaverit, se per adversarium violenter, aut clam possessione rei suæ spoliatum fuisse) ad alios causæ articulos respondere, donec sibi restitutio spoliati facta sit: & tunc primum pars adversa, si quidpiam proponere voluerit, audiri debet *arg. c. 1. & c. Conquerente. Eod. cum concordantiis*. Tandem Possessor ab altero invasus potest vim vi repellere, remque suam defendere, etiam armis, si ita opus fuerit: aut jam expulsus possessionem suam repetere, dummodo id statim, sive in continenti fiat. *c. Olim. de Restit. spoliatorum, & l. Quod est. §. 9. ff. de Vi, & vi armata*.

## DISTINCTIO VI.

De Objecto, & Subjecto capaci Domini.

### QUESTIO I.

Quænam cadant sub objectum Domini?

### SUMMARIUM.

- 1 De cujus Dominio hic agatur?
- 2 Sub Dominium hominis cadunt res inferiores corporea. Et quid de superioribus?
- 3 Unus homo potest cadere sub Dominium alterius, quomodo?
- 4 Homo non habet Dominium vite sue.
- 5 Solvitur instantia.
- (b) De hoc amplius Tract. 9. Dist. 3. n. 10. & seqq.
- 6 Dans nomen militiae non vendit vitam suam.

7 Homo est dominus propria fama.

8 Non tamen sine causa potest tantum bonum prodigere.

1. Non est sermo in proposito de Dominio DEI, quod esse supremum atque perfectissimum in omnes creaturas, de fide est. Neque agitur hic de Dominio Angelorum, sed dumtaxat de Dominio hominis, investigando, quænam cadant sub perfectum Dominium hominis, id est, quænam sint illæ res, in quas homo potest habere Dominium perfectum.

2. CONCL. I. Omnes res corporeæ inferiores, ut puta agri, montes, flumina, plantæ, bestię, metalla &c. cadunt sub Dominium hominis. Ita communis; & patet ex illo *Gen. cap. 1. Crescite, & multiplicamini, & replete terram, & subijcite eam, & dominamini piscibus maris, & volatilibus celi, & universis animantibus, quæ moventur super terram*. & alibi. Dicitur notanter, *res corporeæ inferiores &c.* siquidem rerum superiorum, quales sunt Angeli, & corpora cœlestia, homo non dicitur proprie habere Dominium, bene tamen quorundam effectuum ab ipsis profectorum, ut luminis, caloris &c. nam hinc certa jura proveniunt, ut puta jus prospectus, & hujusmodi, quæ alio nomine appellantur *Servitutes*, de quibus Jurisperiti.

3. CONCL. II. Potest unus homo cadere sub Dominium alterius, & hic in ipsum habere non solum Dominium jurisdictionis, sed aliquo modo etiam proprietatis. Ira rursus communis. Prima pars de Dominio jurisdictionis est clara: sic enim Pater in filium, Dominus in servos, Rex aut Imperator in subditos suos habet Dominium jurisdictionis. Altera pars, quod etiam aliquo modo unus homo habeat Dominium proprietatis in alium, patet in mancipiis, seu servis proprie dictis, quorum olim frequens erat usus; & poterant a dominis ad libitum vendi. Additur tamen, *aliquo modo*: quia dominus non habet tale Dominium in servum, seu mancipium proprie dictum, ut possit ipsum pro libitu & absque ulla causa occidere, sicut potest jumentum suum interficere: nam hoc est contra illud Præceptum Decalogi, lumine naturæ notum, *Non occides*.

4. CONCL. III. Homo non habet Dominium vitæ suæ, sed istud penes solum Deum remanet; unde homo est quidem procurator, custos, & quasi usufructarius vitæ suæ, non autem dominus. Patet hoc ex illo *Sapientie 16. Tu es Dominus, qui vita & mortis habes potestatem*. Accedit ratio: quia alioquin, si homo esset Dominus vitæ suæ, posset licite se privare vita, ac seipsum interficere: hoc autem est falsum & contra citatum illud, *Non occides*; ergo. Ceterum licet homo non sit dominus vitæ suæ, est tamen ejusdem procurator, & custos, atque usufructarius, ita ut habeat jus ea fruendi, eamque defendendi contra injustos invasores, ac vim vi repellendi, atque idcirco, qui privata auctoritate, ac sine justa causa aufert vitam proximo, vel eam aliqua ratione violat & diminuit, facit ipsi injuriam.

5. Si dicas. Potest homo licite uti vita sua cum periculo mortis, v. g. assistendo pestiferis cum periculo contagionis, vel occurrendo hostibus primo loco in acie belli; ergo habet Dominium vitæ suæ. Resp. negando consequentiam: quamvis enim homo in quibusdam casibus habeat facultatem utendi vita sua cum probabili periculo mortis, non tamen habet potestatem, ut vitam directe ac per se possit destruere, sed solum per accidens & indirecte, quatenus justa de causa potest quidpiam agere, cui videt annexum esse periculum vitæ suæ. (b) Dominium autem includit facultatem utendi re quapiam pro libitu, per se quoque ac directe ejus substantiam destruendo, si placuerit.

6. Quod si urgeas. Potest homo vitam suam alteri vendere, prout fit, dum quis dat nomen militiæ: ergo. Resp. negando assumptum; falsissimum quippe est, eos, qui dant nomen militiæ, vendere vitam suam pro pretio ipsis tunc soluto, cum solummodo vendant ministerium, seipsos paratos offerendo ad sustinendos quoscunque labores atque onera militiæ, etiam cum vitæ



vita periculo, imo, si opus fuerit, usque ad effusionem sanguinis.

7 CONCL. IV. Homo vere quidem est dominus propriæ famæ, & honoris, adhuc tamen sine causa tantum bonum prodigere, & licite negligere non potest. Ita D. Thom. 2. 2. q. 73. art. 4. ubi docet, in cuiusque arbitrio esse, pati detrimentum suæ famæ, nisi vergat hoc in periculum aliorum; Maltrius disp. 3. Theol. Moral. n. 34. Lessius, & alii. Ratio est: quia homo post vitam a DEO acceptam comparat sibi primum bonam famam; ergo non est ratio, cur non sit dominus ejus, sicut est aliarum rerum, quas proprio labore acquirit. Et hinc multi Sancti propriam famam, & honorem positive spreverunt, ut per virtutem Humilitatis vitam æternam tutius consequerentur. Sic D. Augustinus scripsit Libros Confessionum, & S. P. N. Franciscus e publico loco suos defectus denuntiavit: quod idem in simili factum est ab aliis pluribus Sanctis.

8 Ceterum non esse licitum, sine causa tantum bonum propriæ famæ & honoris prodigere, patet ex illo Ecclesiastici 41. Curam habe de bono nomine; hoc enim magis permanebit tibi, quam mille thesauri pretiosi & magni. Unde D. Augustinus lib. De bono viduitatis c. 22. & refertur c. Non sunt audiendi 11. q. 3. sic inquit: Nobis necessaria est vita nostra, aliis fama nostra. Et idem in Serm. de Communi vita Clericorum relatus c. Nolo. 12. q. 1. ait: Conscientia necessaria est tibi, fama proximo tuo: qui fidens conscientia suæ, negligit famam suam, crudelis est.

## Q U Æ S T I O II.

### De Peculio Filiifamilias, necnon & Bonis Uxoris.

#### S U M M A R I U M.

- 9 Peculium, unde sic dictum?
- 10 Peculium Filiifamilias castrense.
- 11 Quasi castrense,
- 12 Profectitium, &
- 13 Adventitium, quid?
- \* Ac quadruplex?
- \* Item quandonam in Filiifamilias hæc ipsa patria potestas finiatur?
- 14 Bona dotalia, & paraphernalia uxoris, quæ?
- 15 Dotis proprietas manet penes uxorem.
- 16 Excepto uno, vel altero casu.
- 17 Quid de Bonis paraphernalibus uxoris?
- 18 Corollaria.
- 19 Quomodo peccet uxor, accipiens ex bonis mariti?
- \* Num Acquasius numerentur inter bona uxoris? Addit. I. & II.

(c) Tract. 9. Dist. 5. n. 28. & seqq.

9 **P**eculium, ut habetur l. Depositi. ff. de Peculio. dictum est, quasi pusilla pecunia, sive patrimonium pusillum. Et quantum attinet ad primam partem Quæstionis, Peculium Filiifamilias, id est talis, qui necdum emancipatus, sed patriæ potestati adhuc subjectus existit, communiter quadruplex assignatur, videlicet castrense, quasi castrense, profectitium, & adventitium.

10 Peculium castrense dicitur illud, quod Filiifamilias acquirit in castris, non acquiratur aliunde: & hujusmodi Bona, quæ ipse acquirit, dum militat in castris, dicuntur Bona castrensia.

11 Peculium quasi castrense est, quod Filiifamilias, qui sunt Magistri artium liberalium, Medici, Clerici ex Beneficio, seu Officio Ecclesiastico, vel Advocati, de publico acquirunt: Et si quis Filiifamilias habeat talia Bona, dicitur is habere Bona quasi castrensia, seu Periculum quasi castrense. Porro Bona hujusmodi sive castrensia sive quasi castrensia pleno jure tam quoad proprietatem, quam quoad usumfructum semper ad filios pertinebant, & adhuc pertinent; prout fatentur Juristæ, & Theologi unanimiter, ac videri ulterius poterit Tract. 8. Dist. 1. Conclus. 2.

12 Peculium profectitium dicitur, quod de rebus pa-

ternis proficiscitur, & filius in ipsis negotiando lucratur. Et hoc totum, tam quoad proprietatem, quam quoad usumfructum, patri acquiritur; ut habet communis Doctorum.

13 Tandem Peculium adventitium dicitur omne illud, quod Filiifamilias advenit ex alia causa, quam ex enumeratis; utputa, quod advenit, seu acquiritur ipsi per testamentum ab avo, vel avia, vel aliquo alio factum, aut ex artificio, sive ex prospera fortuna, vel hujusmodi. Et horum Bonorum adventitiorum, si fuerint adventitia ordinaria, usumfructum habet pater, quamdiu Filius est sub sua potestate: dominium autem eorum remanet filio.

#### Additio I.

\* Dixi notanter, si fuerint adventitia ordinaria; nam aliter sentiendum de adventitiis extraordinariis: ubi bene nota distinctionem inter Bona adventitia ordinaria, & extraordinaria seu irregularia, quorum priora sunt, de quibus Paterfamilias usumfructum habet: posteriora vero, quorum usufructu is non gaudet: qualia enumerantur sequentia quinque. I. Quæ donantur Filiifamilias a Principe, vel Augusta. L. Cum multa. 7. C. de Bonis, quæ Liberis. II. Bona, quæ Filiifamilias relinquuntur conditione hac expresse adjecta, ne ad Patrem perveniat usufructus. Authent. Excipitur. C. Fodem. III. Illa, quæ dissentiente Patre consequitur ex successione vel alio justo titulo. L. ult. C. Eodem. IV. Ea, quæ Filiifamilias adipiscitur succedendo una cum Patre vel Matre in Bona defuncti fratris, aut sororis. Authent. Item. C. Eodem. V. Si pater sponte renuntiet usufructui sibi a lege permisso. Authent. Idem est §. 2. C. de Bonis, quæ Liberis. &c. \*

#### Additio II.

\* Ceterum hæc ipsa Patris potestas in Filiifamilias tollitur I. Morte ipsius Patris non solum naturali, sed etiam civili, puta, si Pater propter grave delictum deportetur, seu in perpetuum mittatur exilium &c. II. Per adeptam a filio aliquam Dignitatem: sic apud Romanos Jure Novellarum Novel. 81. a potestate Patria fuerunt liberati filii Consules facti, vel saltem Consulares, Præfecti prætorii, Magistri militum &c. quini-mo teste Illustriss. Cancellario intimo de Schmid in Comment. ad Jus Bavaricum Tit. 3. art. 2. n. 37. hodierno tempore plerique indulgent Consiliariis Principum hoc privilegium exemptionis a Patria potestate. III. Per Emancipationem, si nimirum Pater filium coram publico judicio claris, & expressis verbis ex sua Patria potestate dimittit, ac liberum facit. IV. Justis nuptiis, idque de consuetudine (non autem de jure positivo) in omnibus ferme Europæ partibus, maxime si in matrimonio juncti non amplius habitant in domo paterna. V. Professione Religiosa, qua ex altiori motivo Professi per vota se potius conjiciunt in potestatem sui Superioris. VI. Per susceptionem Ordinum, quoad hoc, ut bona post Clericatum acquisita pleno jure habeant, nec Patri amplius usufructus quæatur. VII. Saltem in Patria nostra vi Juris Bavarici eximuntur a Patria potestate liberi, qui etiam necdum nupti propriam tamen œconomiam, & focum tenent, certas proprias negotiationes, aut opificia instituunt &c. dummodo id fiat cum præscitu, & consensu Patris, quem consensum Pater absque valde gravibus causis denegare non debet, si Proles jam vigesimum quintum annum compleverit. Videatur Illustriss. Schmid l. c. art. 1. & 2. \*

14 Quantum attinet ad alteram quæstionis partem, seu ad Bona Uxoris, est notandum, alia esse Bona Uxoris dotalia, alia paraphernalia. Bona dotalia aliud non sunt, quam dos, quæ ab uxore, vel ab alio ejus nomine datur marito ad onera Matrimonii sustinenda, nimirum ad alendam uxorem, liberos, familiam &c. hæc enim cura præcipue incumbit marito. Bona paraphernalia uxoris econtra dicuntur res illæ, quas Uxor præter dotem, quam marito pro oneribus Matrimonii dedit, simul attulit, sibi



sibi reservavit: prout etiam inter paraphernalia computantur, quæ uxor ex successione parentum, vel fratrum acquirit. Hoc prænotato, sit

15. CONCL. I. Quamvis Uxori remaneat proprietas dotis marito allatæ (excepto uno, vel altero casu) nihilominus plena Bonorum dotialium administratio, & ususfructus ad maritum attinet, idque tum ad alendam Uxorem atque familiam, utpote quæ cura specialiter incumbit marito, tum ad alia onera matrimonii subeunda. Ita communis, estque clare decisum l. 2. §. l. Dotis fructum. ff. de jure dotium. cum concordantiis. Imo dotis proprietas ita remanet penes Uxorem, ut pro ea sint ipsi tacite hypothecata omnia bona mariti, donec sibi dos restituatur text. clar. l. In rebus. C. de Jure dotium. Quare soluto matrimonio per mortem viri præfertur Uxor in repetenda dote omnibus aliis personalibus creditoribus, etiam tempore prioribus, & hypothecam non habentibus. Quin etiam durante matrimonio, si maritus ad inopiam vergit, ita ut periculum sit, ne dotem aggrediatur, & absumat, fas est Uxori eam repetere. arg. cit. l. In rebus. C. eod. & amplius declarat Layman l. 3. tract. 4. cap. 13. num. 7.

16 Dicitur notanter in Conclusionem, excepto uno, vel altero casu: nam duo præcipue dantur casus, in quibus Dominium dotis plene ad maritum transit, sed cum obligatione tantumdem soluto matrimonio restituendi. Primus est, si dos consistat in numerata pecunia, vel aliis rebus usu consumptibilibus arg. l. Res in dotem ff. de Jure dotium. Secundus est, si res dotales usu non consumptibiles, utputa fundus, domus &c. æstimatæ dentur, non quidem eo solo animo, ut sciatur earum valor, si forte deperditæ vel diminutæ fuerint culpa mariti, sed ita æstimatæ, ut æstimatio faciat venditionem & emptionem: nam tunc maritus acquirit Dominium ipsarum, & summæ pecuniariæ taxatæ velut pretii debitor efficitur, ac (nisi secus conventum fuerit) soluto matrimonio potest retinere rem, & offerre pecuniam taxatam text. clar. l. Quoties C. de Jure dotium. Est autem inter dotem, quæ transit in Dominium mariti, & quæ non transit, hoc notabile discrimen, quod in casu, quo dos transit in Dominium mariti, rerum dotialium periculum ad maritum spectet arg. cit. l. Res in dotem ff. Eod. quod alioquin ad Uxorem, tamquam dominam earum rerum, pertineret: quia quælibet res domino suo stat, aut cadit, melioratur, vel perit. Verum de dote plura Jurisperiti.

17 CONCL. II. Quantum est de Jure Cæsareo, & nisi erecta aliqua pacta dotalia, aliter disponant, Uxor in Bona paraphernalia non solum proprietatem, sed etiam plenum dominium atque administrationem habet, ita ut maritus ea nolente nequaquam hujusmodi Bonis sese immiscere possit quamvis bonum atque consultum sit mulieri, quæ seipsam committit marito, res etiam suas pari arbitrio gubernari. Ita habetur expresse in Jure Civili l. Hac lege, C. de Pactis conventis, estque communis. Additur tamen, quantum est de Jure Cæsareo: quia in aliquibus locis, præsertim extra Romanum Imperium existentibus, servantur aliæ Leges, non vero Jus commune Cæsareum, prout nominatim de Belgio testatur Herincx disp. 1. de Contractibus num. 55.

#### Additio.

\* Quinimo Juris Civiles Interpretes apud Chlingensperger l. 2. Instit. Imp. Tit. 8. q. 1. §. 2. scribentes, etiam in Romano Imperio quoad certos casus concedunt in paraphernalia Uxoris marito non quidem Dominium, bene tamen legitimam administrationem, ita, ut, quamvis fructus non lucretur, possit tamen eos in suam, & Uxoris utilitatem (non vero in dispendium) impendere Leg. fin. C. de Pactis conventis, ubi notabilem distinctionem faciunt inter paraphernalia, & receptitia Bona Uxoris: priora dicunt, quæ Uxor jam dotata præter dotem habet, aut acquirit ex successione Parentum, Fratrum &c. aut aliunde ex prospera fortuna: posteriora vero, seu receptitia esse dicunt, quæ Uxor, dum dotem

sibi constituit, ad liberum usum expresse sibi reservavit, nec in mariti potestate esse voluit; & quod hæc ultima ne quidem administrationem concedunt marito, quamvis eadem facile possit præfato expresse, vel tacite concedi quoad priora \*

18 Ex dictis inferitur, virum graviter peccare, consumendo, ac dilapidando Bona paraphernalia Uxoris sine ejus licentia, utpote cum rem alienam absumat. Quinimo etiam si marito committatur Bonorum paraphernalium administratio, adhuc tamen is gravem admittit injustitiam, si prædicta Bona in potationes, venerem, aliasque prodigas aut turpes alienationes expendit. Gobat tr. 5. Quinarii. c. 24. n. 4. §. seq.

19 Inferitur ulterius, etiam Uxorem graviter peccare, & quidem mortaliter, si summam notabilem ex bonis mariti, vel quorum administratio ad ipsum pertinet, eo rationabiliter invito, accipiat: quia accipit illud, cujus dominium, vel certe administratio ad ipsam non pertinet, sed ad maritum, qui exinde tenetur providere familiæ. Additur notanter, summam notabilem: quia non peccat mortifere, si quantitas judicio prudentis, spectato statu, opibus, aliisque circumstantiis non sit notabilis: imo in hujusmodi furtis major ad peccatum mortale requiritur quantitas, quam in aliis. Verum de hoc, & quando uxor peccet, vel non peccet, surripiendo ex bonis communibus, plura inferius (c) agendo de furto.

#### Additio I.

\* Quær. An etiam Acquæstus numerentur inter Bona uxoris: ante Resp. notandum, Acquæstus vocari illa lucra, quæ constante matrimonio opera & industria æquali vel quasi æquali utriusque conjugis acquiruntur; hincque, si maritus penicillo, & uxor acu phrygia pingendo lucrum capiant, tale cujuslibet lucrum particulare non computatur inter Acquæstus; quoniam non contingit communi industria: adeoque respectu cujuslibet potius numeratur inter sua paraphernalia H. N.

Resp. Acquæstus quoad medietatem merito inter Bona uxoris numerantur, hincque uxori post mortem mariti illa medietas restituenda est, nisi aliter quoad pacta dotalia fuerit conventum, aut particularia adsint statuta, vel consuetudines. Ita Barbosa in c. de Donat. inter virum & uxorem n. 6. Gonzalez ibidem. num. 5. & Gutierrez lib. 2. Pract. Quæst. 118. num. 4. ac probatur ex ipso cap. 2. de Donat. inter virum & uxorem, ubi soluto matrimonio cogitur vir restituere dotem, & dividere Bona NB. quæ communiter eis obvenierunt; adeoque signum est, quod medietas Acquæstuum merito inter Bona uxoris numeretur. Præsumuntur autem esse Acquæstus illa lucra tempore matrimonii acquisita, quæ conjugibus ex communi negotiatione, mercatura, aut cauponaria eveniunt, vel etiam, quæ ex talibus opificiis, aut actibus obtinentur, quorum lucra ex emptione & venditione rerum a potiori causantur; ubi uxores æque ac mariti pecuniam recipiunt, atque exinde communem quærunt sustentationem, e. g. talia lucra sunt, quæ obtingunt vi suæ artis vel opificii Pistoribus, Cerevisiariis, Lanionibus, Librariis, placentarum Coctoribus, Unguentariis, Saponariis, &c.

#### Additio II.

\* Dixi notanter: nisi particularia adsint Statuta, quæ nimirum aliter disponunt circa Acquæstus, prout in Jure Bavarico Tit. I. art. I. statuitur, quod equidem Uxor deficientibus Liberis accipiat dimidietatem Acquæstuum; at his extantibus sive ex isto, sive ex præcedenti matrimonio tantum partem filialem. Hoc tamen Statutum Illustriss. Commentator de Schmid ibidem. n. 40. ac seqq. intelligit de illis præcise mulieribus, quæ non exercent cum marito communem cauponariam; negotiationem, aut nundinationem: durissimum enim videtur, quod aliqua Materfamilias, concurrentibus



v. g. Liberis alterius matrimonii debeat esse contenta unica tantum portione filiali, ita, ut notabilem adhuc partem de dimidio laboris, ac sudoris sui cogatur relinquere privignis suis, qui tamen plerumque ingrati sunt, & honestissimis etiam Novercis sua invident. Videatur in emergentia casus allegatus Illustriss. Commentator in Tit. 1. art. 1. & art. 10. \*

QUÆSTIO III.

De Bonis, & Dominio Clericorum Beneficiorum.

SUMMARIUM.

- 20 Bona Clericorum quadruplicia, nempe
- 21 Bona patrimonialia,
- 22 Bona quasi patrimonialia seu industrialia,
- \* Inter qualia Bona computantur redditus Stole, & distributiones quotidianæ, seu Præsentie?
- 23 Bona mere Ecclesiastica, &
- 24 Bona parsimonialia Clericorum.
- 25 Clerici sæculares Beneficarii habent plenum Dominium Bonorum patrimonialium.
- 26 Imo & quasi patrimonialium seu industrialium.
- 27 Corollaria.
- 28 Possunt etiam pro libitu disponere de Bonis parsimonialibus.
- 29 Bonorum mere Ecclesiasticorum acquirunt quidem Dominium, sed cum onere superflua in pias causas erogandi.
- 30 Quod procedit defacto.  
Divisio Bonorum Ecclesiasticorum, quando fit facta?
- 31 Rationes, probantes dictum Dominium Clericorum.
- 32 Rationes ostendentes obligationem erogandi superflua in pias causas.
- 33 Quo jure Beneficarii teneantur superflua in pias causas erogare?  
Referuntur diversæ sententiæ.  
(a) Tract. 4. Dist. 6. quæst. 4.
- 34 Sententia probabilior.
- 35 Dicta obligatio est personalis Clericorum.
- 36 Corollarium.
- 37 Solvitur instantia.  
(b) Dist. 3. n. 4.
- 38 Quantitas sufficiens ad peccatum mortale ratione bonorum Ecclesiasticorum male expensorum, quæ?
- 39 Et quomodo computanda?
- 40 Objectiones notabiles solvuntur.
- 41 Bona Ecclesiastica, quomodo dicantur res Dei?
- 42 Item res seu patrimonia pauperum?
- 43 Clerici, in quo sensu dicantur Dispensatores &c. Bonorum Ecclesiæ?
- 44 An Clerici testari possint?

20 **C**elebris est hæc Quæstio, tractans de Dominio Clericorum Beneficiorum, id est eorum, qui habent Beneficium Ecclesiasticum, sive curatum, sive non curatum. Pro cujus resolutione notandum, quod bona Clericorum quadruplicia distingui soleant: videlicet Bona patrimonialia, quasi patrimonialia, seu industrialia, mere Ecclesiastica, & tandem parsimonialia.

21 Bona patrimonialia Clericorum dicuntur, ea quæ Clericis obveniunt hæreditate, donatione, arte, aliave profana causa, qua solent & Laici acquirere.

22 Bona quasi patrimonialia seu industrialia sunt, quæ a Clericis acquiruntur ex industria spiritali, sive ex extraordinariis functionibus Ecclesiasticis absque Beneficio: veluti celebratione Missarum votivarum, Concionibus, Confessionibus audiendis, Cantu Ecclesiastico, agendo Capellanum, ac hujusmodi. Et recte cum Navarro Tract. de Reditibus Ecclesiasticis, mo. Anac. Reiffenstuel. Theol. Tom. I.

nit. 19. Bona quasi patrimonialia Clericorum dicuntur ea omnia, quæ sunt quesita ratione Clericalis Ordinis, vel officii, alia ratione, quam Juris recipiendi fructus beneficiale.

Additio.

\* Atque hinc etiam redditus Stole, id est, illa bona, quæ Parochis ex Benedictione Nuptiarum, administratione Sacramentorum, ac Sepulturis &c. obveniunt, communior Doctorum modernorum inter Bona industrialia seu quasi patrimonialia numerat; quia Clericis curatis non intuitu Beneficii, sed præcise intuitu laboris spiritalis per modum stipendii dantur. Quod idem Covarruvias, Pirhing, Engel, & Thufcus sentiunt ob paritatem rationis (uti credunt) de distributionibus quotidianis, seu illis fructibus, qui dantur Canonicis intuitu cujusdam laboris, nimirum si præsentis in Choro existant. Nihilominus, quoniam distributiones illæ quotidianæ ex ipsas bonis mere Ecclesiasticis communiter desumuntur, easdem adhuc naturam Bonorum Ecclesiasticorum retinere, alii existimant, quod saltem intellige, si alii fructus grossi præter distributiones quotidianas non adsint. De quo vide Jus Canonicum lib. 3. Decret. Tit. 25. §. 1. n. 9. & Vincentium Petra apud Schmalzgruber. lib. 3. Tit. 4. §. 4. n. 77. & 78. \*

23 Bona mere Ecclesiastica sunt illa, quæ a Clericis acquiruntur ratione alicujus Beneficii Ecclesiastici, quod habent: qualia bona sunt ea, quæ acquiruntur intuitu Episcopatus, Canonatus, Parochiæ, aut alterius Beneficii Ecclesiastici; uti sunt ordinarii redditus eorum, decimæ, fundationes, fructus agrorum, aliarumque rerum ad Beneficium ipsum seu Ecclesiam pertinentium.

24 Bona tandem parsimonialia Clericorum dicuntur ea, quæ Clericus aliquis ex redditibus Ecclesiasticis de congrua sustentatione parcius, quam conformiter suo statui honeste potuisset, vivendo sibi subtrahit. His prænotatis, sit

25 CONCL. I. Clerici sæculares Beneficarii habent plenum dominium Bonorum suorum patrimonialium, unde de istis libere donare, aut alio modo disponere possunt, imo etiam testari seu testamentum facere. Ita communis, & habetur clarissime cap. Quia nos. & c. Relatum. 12. de Testament. ibi: Ceterum quæ Clerici ex hæreditate, vel artificio, aut doctrina proveniunt, distribuuntur pro arbitrio decedentis. Accedit ratio: quia Clerici sæculares nullo modo abdicarunt dominium Bonorum suorum, sicuti abdicare solent Religiosi.

26 CONCL. II. Etiam de Bonis quasi patrimonialibus seu industrialibus Clerici sæculares libere disponere possunt, imo etiam testari. Ita Lessius lib. 2. cap. 4. n. 37. Navarrus, Covarruvias, & alii communiter, paucis exceptis. Ratio est: quia ejusmodi Bona præstantur a Fidelibus absque ullo onere expresso, vel tacito, dandi superflua pauperibus (quale tamen onus Bona Beneficiorum habent annexum) sed dantur eis veluti stipendium suæ sustentationis, & tanquam merces laborum suorum, atque operum personalium spiritalium sibi præstitorum. Unde talia non immerito æquiparentur Bonis Clericorum patrimonialibus; nam dignus est operarius mercede sua. c. 10.

27 Ex dictis inferitur cum cit. Lessio, & aliis, quod Clerici non magis ex Bonis quasi patrimonialibus teneantur in pios usus expendere; quam ex Bonis patrimonialibus: nam amborum Bonorum habent plenum dominium, ac liberam administrationem. Inferitur ulterius, quod, si Clerici de his vivant, vel expendant in pias causas, tantumdem accipere possint de Bonis Ecclesiasticis, & de eis disponere ad libitum, sicut de Bonis patrimonialibus: quia, cum habeant jus vivendi ex Beneficio Ecclesiastico, non tenentur vivere ex aliis suis bonis; unde, si de his vivant, possunt uti compensatione.



28 CONCL. III. Insuper de Bonis parsimonialibus, quæ Clerici de congrua sustentatione parcius vivendo sibi ex redditibus, sive Bonis Ecclesiasticis subtraxerunt, possunt iidem Clerici pro libitu disponere. Ita Covarruvias c. 7. de Testam. n. 9. Lessius n. 39. Engel Tit. de Testam. n. 7. & alii satis communiter contra Abbatem, & nonnullos alios. Ratio est: quia hujusmodi pars fructuum Ecclesiasticorum est justa merces eorum, qui Ecclesiæ serviunt: hinc redeunt fundamenta prioris Conclusionis. Major difficultas est de ceteris Bonis, seu redditibus mere Ecclesiasticis, quæ congruæ sustentationi superfluent, de quibus loquendo, sit

29 CONCL. IV. Clerici Beneficarii acquirunt defacto verum Dominium hujusmodi Bonorum Ecclesiasticorum, id tamen habent cum onere, superflua in pauperes, aliasque pias causas erogandi. Ita quoad primam partem probabilior, simulque communior Doctorum, præsertim modernorum, quamvis sit contra Navarrum tract. de Redditibus. quest. 1. monit. 21. & seqq. Sannig. distinct. 5. de Justit. & Jure. quest. 4. & multos alios tum Theologos, tum Canonistas, præcipue antiquiores, quos refert Lessius l. 2. c. 4. n. 41. quique volunt, Clericos non esse Dominos illius portionis superflue, sed solum Oeconomos, & Dispensatores, adeo, ut ex justitia teneantur eam erogare in pias causas, & si secus egerint, teneantur ad restitutionem Ecclesiæ, pauperibus, vel aliis piis causis faciendam ex aliis Bonis, quæ pleno jure obtinent, puta ex patrimonialibus, industrialibus, vel parsimonialibus. Et hæc quidem sententia non caret sua probabilitate, simulque veluti tutior in praxi merito tenenda.

30 Nihilominus data Conclusio est probabilior, & inter modernos communior, quæ tamen solum procedit defacto, hoc est, pro tempore post divisionem Bonorum Ecclesiasticorum, per Simplicium Papam circa annum Domini 470. factam. Siquidem tunc crescente multitudine Clericorum, variisque subortis incommodis dictus Pontifex Bona Ecclesiastica in quatuor partes divisit, quarum prima tribuebatur Episcopo, secunda Clericis, tertia pauperibus, & quarta fabricis Ecclesiasticis: fuitque isthæc divisio per Gelasium Papam confirmata, ut habetur c. De Redditibus. c. Concesso. & c. Quatuor. 12. q. 1. Porro ante factam ejusmodi divisionem Bonorum Ecclesiasticorum (quorum altera parte Clericis attributa simul fuerunt erecta Beneficia Ecclesiastica) omnes oblationes atque redditus erant bona communia singulis, prout quisque opus habebat, distribuenda, & vivebant Clerici in communi, sicut modo Religiosi.

31 Probatur nunc prima pars Conclusionis taliter explicata ex Jure canonico: nam cap. un. de Clericis non resident. in 6. dicitur, quod Clerici, qui extra casus a Jure concessos non interfunt Divinis Officiis, si de distributionibus ipsis quidquam receperint, rerum sic receptarum Dominium non acquirant: ergo supponitur, quod alii Clerici Beneficarii, qui interfunt Divinis Officiis, acquirant Dominium suorum reddituum Ecclesiasticorum, atque distributionum quotidianarum; alioquin frustra privarentur non interessentes tali Dominio. Deinde Concilium Lateranense sub Leone X., & S. Pius V. in sua Constitutione, quæ incipit Ex proximo. (& habetur Tom. 2. Bullarii Romani. Constitut. 135. dicti Pontificis) statuunt, atque declarant, quod Clerici Beneficarii pro rata omissionis Horarum Canonicarum fructus non faciant suos, ergo ceteri recitantes censentur fructus facere suos: nam argumentum a sensu contrario in Jure reputatur fortissimum. Et hoc ipsum clarius ostendit Concilium Trid. Sess. 24. c. 12. de Reformat. ubi vult, quod Clericus, in casu ibidem expressio delinquens, privetur dimidia parte fructuum, quos ratione etiam præbende, ac residentia fecit suos. Ubi ponderandum ly quos ratione præbende, ac residentia fecit suos. Accedit ratio: quia Clerici sæculares Beneficarii defacto capaces sunt Domini, ergo, cum tot Jura illud ipsis concedere videantur super redditus Ecclesiasticos, non est hoc eisdem denegandum.

32 Altera pars Conclusionis, quod Clerici tale Dominium habeant cum onere, superflua in pauperes aliasque pias causas erogandi, est communis Doctorum sententia, de qua testantur Lessius loc. cit. n. 47. Herincx disp. 4. de Just. & Jure. n. 130. asserens, apud Doctores communiter esse indubitatum, Clericos graviter esse obligatos ad superflua expendenda in pias causas, Lugo disp. 4. de Just. & Jure. sect. 2. n. 1. dicens, quod communis est omnium Doctorum sententia, adesse talem obligationem, ac alii. Et hoc desumitur inprimis ex can. 39. & 75. Apostolorum. atque ex pluribus textibus Juris Canonici: ut ex c. Quia tua. 12. q. 1. ibi: omne, quod superest, in causis piis ac religiosis erogandum est & c. & c. Res Ecclesiæ. 12. q. 1. & alibi. Hinc S. Urbanus Papa (atque refertur in Breviario Romano die Festo ipsius, 25. Maji) de Bonis Ecclesiæ attributis scripsit his verbis: Ipsæ res Fidelium, quæ Domino offeruntur, non debent in alios usus, quam Ecclesiasticos, & Christianorum fratrum, vel indigentium converti: quia vota sunt Fidelium, & pretia peccatorum, ac patrimonia pauperum. Concordat Concilium Trid. Sess. 25. c. 1. de Reform. ubi Omnino eis (Episcopis, aliisque Beneficia habentibus) interdicit, ne ex redditibus Ecclesiasticis consanguineos, familiaresve suos augere studeant: cum & Apostolorum Canones prohibeant, ne res Ecclesiasticas, quæ Dei sunt, consanguineis donent: sed si pauperes sint, iis ut pauperibus distribuant. Ita Trid.

Quo autem Jure hujusmodi obligatio erogandi superflua in pias causas incumbat Beneficariis, variant Doctores. Et quidem, quotquot cum Navarro negant, Clericos acquirere Dominium talium Bonorum mero Ecclesiasticorum superfluum, consequenter inferre solent, eos jure naturali, ac Divino ex motivo virtutis Justitiæ teneri talia in pias causas expendere; ne alioquin alienum rapere, aut male expendere convincantur. Alii vero, qui tale Dominium Clericis admittunt, iterum in diversas abeunt sententias: inprimis enim nonnulli volunt cum Layman l. 4. tract. 2. c. 3. n. 3. eos nihilominus ex virtute Justitiæ obligari. Aliqui cum Lessio lib. 2. cap. 4. n. 47. & Soto arbitrantur, eam obligationem procedere solum ex præcepto positivo Ecclesiæ, passim in SS. Canonibus inculcato: cui sententiæ favet Herincx loc. cit. n. 135. Quidam cum Fagnano in c. Si quis scire. n. 1. & seqq. de Peculio Clericor. asserunt, Beneficiarios teneri ex lege Charitatis redditus superfluos in pauperes erogare. Sed hanc sententiam reliqui admittunt dumtaxat in casu, quo adsunt pauperes in extrema, vel gravi necessitate constituti: nam tunc equidem tenentur Clerici (imo & Sæculares) eisdem de superfluis subvenire ex præcepto Charitatis, non vero extra talem casum necessitatis, ut alibi (a) dictum.

34 Alii tandem, & quidem probabilius asserunt cum cit. Lugone n. 15. & seqq. dictam obligationem oriri ex virtute Religionis, & quantitate ipsorum Bonorum, quæ sunt Res Dei, atque ex primæva Fundatorum intentione, per Ecclesiam ipsumque Beneficiarium in institutione, vel receptione Beneficii Ecclesiastici acceptata, & cultui Divino specialiter deputata, ut proinde non nisi pie & religiose expendi debeant. Ratio est: quia hujusmodi Bona sunt specialiter oblata, & destinata ad cultum Divinum, unde & dicuntur Res DEI, Vota Fidelium & c. eaque Bona recipiunt Clerici Beneficarii ab Ecclesia sub ista obligatione (hoc est, tamquam Vota Fidelium, & Res DEI & c.) per textus proxime allegatos: ergo hoc ipso tenentur Clerici ex motivo Religionis ab Ecclesia & Fundatoribus intento superflua in cultum Divinum, piasque causas expendere, atque aliter expendendo peccabunt contra virtutem Religionis, non minus, ac hæres non adimplens vota realia defuncti. Nam & hujusmodi vota, supposita tamen defuncti voluntate, atque adita hæreditate, obligant hæredem ex virtute Religionis, cujusmodi obligatio est de jure naturali & Divino.

35 Notant tamen Doctores cum Lessio lib. 2. c. 19. n. 48. quod hujusmodi obligatio sit personalis Clericorum: hinc alii ab his accipientes non amplius hoc jure tenent.



tenentur; nam quamvis Beneficiarius ille res mere Ecclesiasticas superfluas male in causas profanas expendiderit, nec non & peccaverit, valida tamen fuit dispositio ejus, cum habuerit Dominium illorum Bonorum, licet cum onere personali superflua in pias causas expendendi.

36 Ex dictis inferitur cum D. Thoma *Quodlibet* 6. art. 12. quod Clerici talia Bona, seu redditus mere Ecclesiasticos superfluos in causas profanas impendentes obligentur quidem ad agendam poenitentiam, non vero ad faciendam restitutionem. Ratio est: quia, cum peccent, si male expendant Bona mere Ecclesiastica in res profanas, hinc tenentur agere poenitentiam de hoc suo peccato; restituere vero nihil tenentur, cum habuerint Dominium talium Bonorum.

37 Nec dicas Si Clerici Beneficarii habent Dominium talium Bonorum, ergo hoc ipso libere de eis disponunt, sicque non peccant illa expendendo etiam in causas profanas. Resp. enim negando consequentiam: quia, ut jam supra (b) dictum, *Dominium est jus perfecte disponendi de re corporali, nisi lege prohibeatur*: in proposito autem Clericis Beneficariis prohibitum est, tales redditus Ecclesiasticos in causas profanas expendere, & quidem non solum Jure Canonico pluribus in locis, verum etiam Jure naturali & Divino, dum ex motivo virtutis Religionis jubentur Bona Divino cultui specialiter destinata, Deoque oblata non nisi ad dictum finem causasque pias expendere.

38 Verumtamen circa hoc advertendum, quod notabilissimum, sufficiens ad constituendum peccatum mortale ratione superfluum Bonorum Ecclesiasticorum in causas profanas expensum, vocetur ea, non quæ furto sublata sufficeret ad peccatum mortale, sed quæ censei potest pars aliquo modo notabilis respectu ipsorum reddituum superfluum Beneficarii, prout observat Lugo *loc. cit.* n. 42. Herinex n. 134. Molina, Coninch, & alii. Ratio diversitatis est: quia Clerici habent Dominium illorum Bonorum, non sic fur in re furitiva. Deinde hic non versamur in materia Justitiæ, sicuti accidit in furto; cum obligatio dandi superflua in pias causas oriatur ex motivo dumtaxat Religionis, sicque satis sit ad vitandam gravem culpam, eadem taliter expendere, ut, si non mathematicè, saltem moraliter, quis ipsa pie & religiose expendisse dici possit: quod salvatur, quamdiu notabilis dictorum reddituum pars male non impenditur.

39 Insuper præter detracta bona patrimonialia, industrialia, & parsimonialia hic habenda est ratio personæ Clerici, & aliarum circumstantiarum; nam, quæ respectu inferioris Beneficarii possent censei superflua, non sunt talia respectu alterius in altiori gradu constituti; & quæ ceteroquin male impensa dici possent, concurrentibus certis circumstantiis talia non sunt, unde hæc prudenti, simulque pio judicio discernenda veniunt.

40 Obicies majoris claritatis gratia cum Navarro, & aliis contra primam partem datæ Conclusionis. In c. *Quia juxta* 16. q. 1. dicitur: *Juxta Sanctorum Patrum traditionem novimus, res Ecclesiæ vota esse Fidelium, præter peccatorum, & patrimonialia pauperum*. Insuper D. Augustinus, relatus c. *Si privatum* 12. q. 1. & rursus c. *Quod autem* 23. q. 7. loquens de bonis Ecclesiæ, inquit: *Non illa nostra sunt, sed pauperum, quorum procuracionem quodammodo gerimus, non proprietatem nobis usurpatione damnabili vendicamus*. cum pluribus concordantiis: ergo si Bona Ecclesiæ sunt res Dei, & patrimonialia pauperum, & ipsi Clerici dumtaxat eorum Dispensatores, & quodammodo Procuratores, non Proprietarii, hoc ipso non habent Dominium ipsorum. Resp. negando consequentiam, & explicando dictas, atque alias consimiles auctoritates.

41 Inprimis enim Bona Ecclesiastica dicuntur *Res Dei*, quatenus cultui Divino specialiter sunt dedicata, & oblata a Fidelibus: non autem, quasi Dominium eorum præcise maneat penes Deum, cum certum sit, eorum Dominium transire in Ecclesiam, juxta illud c. *Nul-* li. 12. q. 2. *Omne, quod Domino consecratur, Sanctum* *Anac.* *Reiffenue.* *Theol.* Tom. I.

*Sanctorum Domino erit, & ad jus pertinebit Sacerdotum.*

42 Deinde hujusmodi Bona dicuntur *Res, seu patrimonialia pauperum*: tum ex eo, quia collata fuerunt ad honestam sustentationem Ministrorum Ecclesiæ, qui ante erectionem Beneficiorum, & divisionem Bonorum Ecclesiasticorum (de qua n. 30.) vere pauperes erant, & nihil proprii in particulari habebant: tum etiam ea dicuntur Bona sive patrimonialia pauperum, non proprie & quoad Dominium seu proprietatem, sed quoad debitum seu obligationem erogandi eadem pauperibus, in quantum necessariam & decentem sustentationem excedunt, prout explicat Fagnanus cap. *Si quis sane* n. 4. & 5. *de Peculio Clericorum*. Et quidem ejusmodi obligatio etiamnum habetur, non quidem ex debito Justitiæ, sed Religio-

nis. 43 Tandem Clerici dicuntur Dispensatores, & quodammodo Procuratores Bonorum Ecclesiæ, alludendo ad tempora primitivæ Ecclesiæ, atque ante erectionem Beneficiorum, & divisionem Bonorum Ecclesiasticorum, per Simplicium Papam primum factam: nam antea Clerici erant pauperes, nihilque in particulari possidebant, sed eis per Episcopos Bona Ecclesiæ, aliaque a Fidelibus oblata opportune dividebantur, prout habetur c. *Episcopus*. & c. *Præcipimus* 12. q. 1. & alibi. Quodsi nonnullæ auctoritates reperiantur, quæ videntur loqui de tempore post factam prædictam divisionem, ex intelligendæ sunt de Bonis ipsi dumtaxat Ecclesiæ addictis, ut puta agris, vineis, aliisque possessionibus (nam horum Clerici Beneficarii etiam de facto sunt solum Administratores (non vero loquuntur de ipsorum redditibus: imo horum Dominium acquirunt Clerici, sed cum onere superflua in pauperes erogandi, ut supra ostensum.

44 Num autem Clerici de Bonis suis testari valeant, commodius dicitur *Tract. seq. Distinct.* 3. agendo de Testamentis. *Quest.* 5. ubi præsens materia amplius declaratur.

## QUESTIO IV.

### De Dominio Religiosorum.

#### S U M M A R I U M.

- 45 Religiosi solemniter professi sunt incapaces Domini rerum temporalium.
- 46 Quid de Novitiis, ac emittentibus Vota simplicia in Societate JESU?
- 47 Habent Religiosi quasi Dominium Bonorum spiritualium.
- 48 Qui Religiosi habeant Dominium rerum temporalium in communi?
- 49 Dominium istud non est omnino liberum.  
(c) *Tract.* 8. *Dist.* 3. *Quæst.* 4. n. 38. & seqq.

45 **C**ONCL. I. Religiosi solemniter professi sunt in particulari penitus incapaces omnis Domini, ac juris rerum temporalium, ita, ut nemo eorum quidquam suo nomine, seu tamquam proprium possit tenere. Ita certa, & communis opinio. Patet hoc inprimis ex c. *Cum ad Monasterium, de Statu Monachorum*. ibi: *Nec æstimet Abbas, quod super habenda proprietate possit cum aliquo Monacho dispensare: quia abdicatio proprietatis, sicut & custodia Castitatis, adeo est annexa Regule Monachali, ut contra eam nec Summus Pontifex possit licentiam indulgere.* & alibi. Concordat Concilium Trident. Sess. 25. c. 2. *de Regularibus*. plura circa hoc statuens.

46 Dicitur, *Religiosi solemniter professi*: quia Novitii retinent Dominium bonorum suorum. Quinimo etiam illi, qui in Societate Jesu finito biennio probationis emittunt tria vota substantialia, sed simplicia solum, Pupertatis, Castitatis & Obedientiæ, adhuc retinent Dominium bonorum suorum per aliquod tempus a Superioribus præscribendum, quo faciant abdicationem bonorum suorum; quamvis interim eo Dominio lic-



re uti non possint sine consensu Superiorum propter Votum simplex Paupertatis: prout patet ex Bulla Gregorii XIII. *Ascendente Domino*. 1584. edita, habeturque Tom. 2. Bullarii Romani. *Constitut.* 89. dicti Pontificis.

47 Additur etiam in Conclusionem, *bonorum temporalium*: quia iurium, & Bonorum spiritualium possunt Religiosi habere Dominium, vel quasi Dominium; unde simplex Religiosus retinet jus honoris, ac famæ suæ, juxta D. Thomam 2. 2. q. 186. art. 7. ad 4. item jus eligendi, præsentandi, confirmandi, absolvendi, suscipiendi alimenta de bonis communibus Monasterii, ac hujusmodi, adeo ut etiam possit agere nomine proprio super hujusmodi iuribus in ordine ad spiritualia bona sibi competentibus, casu quo negarentur: nam per Votum Paupertatis Religiosi non renuntiant bonis spiritualibus nec iuribus prædictis, sed tantum temporalibus, sive bonis exterioribus. *Miranda tom. 1. Manualis Prælat. Quæst. 28. art. 1. in fine.* & alii.

48 CONCL. II. Religiosi professi cujuscunque Ordinis (excepto Ordine FF. Minorum de Observantia, & Capucinatorum) possunt in communi habere Dominium bonorum temporalium, ita ut hæc eorundem Congregationes, Monasteria seu Domus vero Dominio possideant. Ita rursus certa, & communis, atque habetur expressum, & novissime concessum in Concilio Trid. *Sess. 25. cap. 3. de Regularibus.*

49 CONCL. III. Nihilominus Dominium istud Religiosorum in communi, atque Monasteriorum non est omnino liberum & independens, sicut est Dominium Sæcularium. Ita certa, & communis. Ratio est: quia Sæculares possunt libere disponere de rebus suis; Dominium vero Religiosorum in communi habet annexum onus, ut non possit Monasterium alienare bona immobilia, vel etiam mobilia pretiosa, nisi ex iusta causa, & servatis debitis Juris solemnitatibus, atque assensu Summi Pontificis (quamvis in Germania, & quibusdam locis remotis de consuetudine, atque ob locorum distantiam, & difficultatem adeundi Summum Pontificem sufficiat assensus Episcopi, ut notat Ludov. Engel *Tit. De rebus Ecclesiæ non alienandis. n. 15.*) Quod si secus fiat, alienatio nulla est & irrita, atque non solum alienans Bona Ecclesiastica, sed etiam sic alienata suscipiens incurrit pœnam excommunicationis, juxta *Extravag. Ambrosia. tit. De Rebus Ecclesiæ non alienandis.* Ceterum, an Religiosi possint condere Testamentum, vel facere donationem mortis causa, dicitur infra (c) suo loco: alia vero melius ex specialibus singulorum Ordinum Regulis, & Constitutionibus patebunt.

## DISTINCTIO V.

### De Acquisitione Domini.

#### QUÆSTIO I.

De modis generatim acquirendi rerum Dominium, Bonisque incertis, ac Thesauris inventis.

#### SUMMARIUM.

- 1 Res corporales alia, quæ carent Domino.
- 2 Alia, quæ habent Dominium certum vel incertum.
- 3 Quibus modis generatim acquiratur rerum Dominium?  
(a) De hoc Dist. seq. per totum.  
(b) De hoc agitur Tract. 8. per totum.
- 4 Quid de modo acquirendi rerum Dominium Jure belli?  
(c) Tract. 4. Dist. 7. Quæst. 4.
- 5 Res, quæ nullius sunt, Jure natura sunt primo occupantis. Limitatur hoc.
- \* Quid sentiendum de Bonis Peregrinorum?

6 Bona incerta, quæ? & ad quid teneatur eorum inventor?

7 An Dominus admittat rerum deperditarum Possessionem: Ac Dominium?

8 An ab inventore retineri possint post diligentem inquisitionem Domini?  
*Refertur aliorum sententia.*

9 Thesaurus, quid?

\* Corollarium.

10 Thesaurus inventus cujus sit?

11 Quid dicendum spectato Jure civili?

\* Quid, si invenitur fortuito in alieno fundo?

12 Quid, si Thesaurus invenitur in alieno fundo, vel data opera arte magica?

13 An licitum sit emere fundum, in quo scitur latere Thesaurum?

\* Num Thesaurus spectet ad Emphyteutam?

1 **A**Dvertendum, quod res corporales, quæ sub Dominio proprietatis cadere possunt, generatim sunt duplicis generis. Quædam enim etiam nullius sunt, sed carent proprio Domino, ut sunt gemmæ in litore maris, pisces maris, volucres cœli, & alia hujusmodi, quæ necdum in Dominium cujuscunque deveniunt. Et horum Dominium potissimum acquiratur Occupatione, id est, talia sunt regulariter primo occupantis.

2 Alia vero res corporeæ sunt, quæ habent Dominium. Et hæc rursus distinguuntur in eas, quæ habent certum Dominium; uti sunt Bona Petri, Bona Pauli, &c. & in eas, quæ habent Dominium incertum, id est talem, de quo ignoratur, quis ille sit; ut si invenio rem perditam ab altero, & nescio, quis ille sit. Et hæc alio nomine solent dici *Bona incerta*.

8 CONCL. I. Tribus præsertim modis, generatim rerum corporalium Dominium acquiri solet. I. Jure naturali, seu Gentium: & hoc fit multipliciter, nimirum Occupatione, Nativitate, Alluvione, Specificatione, Accessione, Confusione, Commixtione, Edificatione, Plantatione, Fructuum perceptione, & Traditione, de quibus plura in progressu. II. Solet acquiri rerum Dominium Jure Civili, atque Canonico; idque contingit potissimum mediante Præscriptione, atque Usurpatione, utpote quæ ad magis conservandam pacificam hominum conversationem, præcludendasque infinitas lites per leges tum Civiles, tum Ecclesiasticas fuit introducta & constituta. (a) III. Acquiritur rerum Dominium privata hominum voluntate, dum per varias conventiones, pacta & contractus, homines Dominium rerum sibi antea propriarum in alios transferunt. (b)

4 His addi posset modus acquirendi rerum Dominium Jure belli (intellige) iusti. Verum modus iste potest comprehendere sub primo, quo acquiritur rerum Dominium Jure Gentium, & commode reducitur ad Occupationem: quamvis enim hæc potissimum habeat locum in iis rebus, quæ antea nullius sunt, ac proinde Jure Gentium sunt primo occupantis, tamquam potioris, tamen ad Occupationem etiam reduci possunt capta ab hostibus, eo quod & hæc, si sint mobilia, regulariter fiant primo occupantis, ut alibi dictum. (c)

5 CONCL. II. Res illæ, quæ nullius sunt, Jure naturæ ac Gentium sunt primo occupantis, nisi lege aliqua humana earum Dominium cuipiam alteri applicetur. Ita communis, habeturque expressum §. *Fera. Instis. De rerum divisione.* ibi: *Fera igitur bestia, & volucres & pisces, & omnia animalia, quæ mari, cœlo, & terra nascuntur; simul atque ab aliquo capta fuerint, Jure Gentium statim illius, esse incipiunt: quod enim ante nullius est, id naturali ratione occupanti conceditur.* Quod idem ibid. §. *Lapilli.* 18. statuitur de gemmis in litore maris reperiis.

Additur notanter in Conclusionem, nisi lege aliqua humana earum Dominium cuipiam alteri applicetur: nam tunc



tunc esset standum dispositioni talis legis communis, utpote justæ, atque auctoritate publica in Bonum Communis latæ: prout fit in Bonis vacantibus, id est, in Bonis morientium sine hærede, & absque facta aliqua dispositione; hujusmodi enim Bona, quamvis Dominum amplius non habeant, non sunt primo occupantis, sed ex dispositione Juris applicantur Fisco L. 1. 4. § 5. C. De bonis vacantibus.

Additio

\* Quod si illi, qui ab intestato moriuntur, fuerint Peregrini, eorum Bona pariter non sunt primo occupantis, sed ex Juris ordinatione applicantur per Episcopum causis piis, si Hæredes extantes non sciuntur, vel ea Bona hisce e. g. ob nimiam distantiam ex una, & rerum relictarum minorem æstimationem ex altera parte extrahi nequeant. *Authent. Omnes Peregrini C. Communia de Successionibus.* Crederem optimum fore, si præter expensas funerales residuum in simili emergentia daretur ad legendas Missas pro defuncto Peregrino. \*

6 CONCL. III. Bona incerta id est, ea, quæ quidem Dominum habent, sed ignoratur quis ille sit, uti sunt Bona casu amissa, & ab altero inventa, aut quæ in periculo naufragii projecta fuerunt in mare, & postmodum ad litus evaserunt) hujusmodi, inquam, Bona incerta quisque repererit, obligatur ea restituere veris Dominis, si eos dignoscere possit, teneturque ad Dominos illos dignoscendos moralem diligentiam adhibere. Ita Doctores communiter post D. Augustinum lib. 50. *Homiliarum. Hom. 9.* & refertur c. Si quid. 14 q. 5. ibi: Si quid invenisti, & non reddidisti, rapuisti: quantum potuisti, fecisti. Ratio est: quia ille, qui ejusmodi res amisit, earum Dominus esse non desinit: atqui unaquæque res debet reddi Domino suo; ergo.

7 Nec obstat, quod rerum mobilium deperditarum, ita, ut ignoremus, ubi sint, illico amittamus possessionem arg. l. Si id, quod ff. de Acquir. possess. ibi: Si id, quod possidemus, ita perdidimus, ut ignoremus, ubi sit, desinimus possidere. Resp. enim primo, hoc non procedere, si adhuc adhibemus diligentem inquisitionem ad recuperandum ejusmodi rem amissam: nam quamdiu intendimus, querimus, & sollicitamus, ut inveniat, necdum penitus perditæ est possessio ipsius, sed retinetur adhuc civilis possessio cum spe recuperandi etiam naturalem, uti notavit Zasius ad cit. l. Si id, quod. num. 5. § 8.

Resp. secundo, quamvis rerum deperditarum, ita ut post frustra adhibitam diligentem inquisitionem ignoremus, ubi sint, amittamus possessionem, non tamen idcirco perdimus ipsarum Dominium, siquidem facilius amittitur rerum possessio, quam Dominium l. Si quis vi, ff. de acquir. possess. cum similibus. Quia igitur Dominium rei deperditæ remanet adhuc penes priorem dominum, hinc oritur obligatio eandem restituendi vero Domino, si inveniat: & quorundam contraria persuasio merito reprobat a D. Hieronymo in lib. Levit. ac refertur c. Multi. 14. q. 5. illis verbis: Multi sine peccato putant esse, si alienum, quod invenerint, teneant: & dicunt, Deus mihi dedit: cui habeo reddere? Discant ergo peccatum hoc esse simile rapine, si quis inventa non reddat.

8 CONCL. IV. Quod si post diligentem inquisitionem factam dominus talium rerum incertarum v. g. amissarum, & ab alio inventarum, amplius dignosci non possit, juxta communem magisque piam sententiam ex erunt pauperibus erogandæ, aut in alios pios usus infundendæ; quamvis non desint Doctores, probabiliter asserentes, quod res illæ inventæ licite ab inventore retineri possint, si post diligentem inquisitionem factam dominus illarum non compareat. Ratio primæ partis est: quia, si res ipsæ Domino amplius restitui non possunt, saltem restitui & applicari debent iis, quibus velle Dominus præsumitur, ut applicentur: atqui tales sunt pauperes, & aliæ piæ causæ; nam quilibet rationabiliter velle præsumitur, res suas applicari pauperi.

Anacl. Reiffenstuel Theol. Tom. I.

bus, aut aliis piis causis ad remedium animæ suæ, si eas alia ratione acquirere nequeat.

Altera nihilominus pars Conclusionis probatur auctoritate Doctorum satis gravium, qui eam probabilem censent, inter quos sunt Lessius lib. 2. cap. 14. n. 48. Layman lib. 3. tract. 1. c. 5. n. 24. Herincx disp. 4. de Justit. § Jur. q. 8. n. 149. Mastrius disp. 3. Theol. Moral. n. 52. Sotus, Petrus Navarrus, Ledesma, Medina, & alii: siquidem nullo (inquiunt) claro Jure naturali, aut Ecclesiastico prohibetur inventor ejusmodi Bona inventa retinere. Quinimo videtur Communitas hominum in talem retentionem tacite consentire: siquidem hac ratione compensari solent fortuita rerum amissarum damna, & qui hodie amisit, cras casualiter inveniendi rem alterius, ejus dominus post adhibitam debitam diligentiam investigari nequit, rursus refarcire poterit jacturam rei suæ antea deperditæ.

9 CONCL. V. *Thesaurus est vetus quadam depositio pecuniæ, cujus non extat memoria, ut jam dominum non habeat.* Ita definitur Thesaurus l. Numquam. ff. De acquirendo rerum dominio. & sequuntur Doctores communiter. Dicitur, *depositio pecuniæ*: ubi sub nomine pecuniæ intelliguntur quævis opes mobiles, puta gemmæ, vasa, catenæ, nummi aurei & argentei. L. un. C. De thesauris. Et additur, *vetus*: quia, si non sit vetus, adeo quod amplius non extet memoria ejus, non censetur Thesaurus proprie dictus.

Additio.

\* Hinc, si e. g. inveniat cista repleta nummis, ex quorum solum nonnullorum incisus figuris v. g. moderni Imperatoris vel ex ipso anno, cuius monetæ appposito, eruitur, hanc pecuniam non ita pridem, puta tempore novissimi belli fuisse absconditam, talis cista inventa non poterit dici proprie Thesaurus, sed si rescitur, restituenda erit Domino: alias vero inter Bona incerta computabitur; sicque eodem modo, uti in præcedentibus de Bonis incertis ab alio inventis erit discurrendum.

10 CONCL. VI. Spectato Jure naturali, & Gentium, Thesaurus proprie dictus transit in Dominium inventoris, utpote primo occupantis; spectato tamen Jure communi Civili opus est distinctione. Ita Lessius lib. 2. cap. 5. n. Layman loc. cit. n. 23. & alii. Ratio primæ partis est: quia, quæ nullius sunt, Jure naturali & Gentium sunt primo occupantis: atqui Thesaurus proprie dictus nullius est, cum jam Dominum non habeat; ergo. Nec obstat, quod forsan ex signis possit cognosci, a quorum Majoribus fuerit reconditus. Resp. enim, hoc nihil referre; quia, quod desinit tanto tempore possideri, cessavit pariter esse in Dominio cujusquam. Et huic parti favet textus cit. l. Numquam ff. De acquirendo rerum Dominio. ubi post datam thesauri definitionem illico subjungitur: Sic enim fit ejus, qui invenerit, quod non alterius sit. Verum Glossa ibidem hoc intelligit, quando quis in fundo Thesaurum invenit; alias vero dicendum censet, prout habetur l. 1. C. De thesauris, & §. Thesaurus. Instit. De rerum division. quæ est altera pars nostræ Conclusionis. Pro cujus intelligentia, sic

11 CONCL. VII. Spectato Jure Civili, Thesaurus in proprio fundo inventus totus est inventoris: si vero in alieno fundo, non data ad hoc opera, sed fortuito Thesaurum quis invenerit, utpote arando terram, vel alio quocumque casu, dimidium erit Domini fundi, & dimidium inventoris. Ita expresse habetur in Jure Civili cit. l. un. C. De thesauris, & §. Thesaurus. 39. Instit. De rerum division. Et quidem, cum hæc constitutio poenalis non sit, sed secundum requirat naturalem lata, ac definitiva proprietatis rerum, videtur obligare in conscientia ante Judicis sententiam, prout notant Lessius, & Layman loc. cit. post Covarruviam, Cajetanum, Navarrum, & alios, & concordant proxime dicta n. 6.



## Additio.

\* Si inquiras, an pariformiter Thesaurus casu fortuito in alieno fundo repertus dividatur, posito, quod inveniat in loco spectante ad Fiscum, aut ad aliquam Communitatem, vel ad Ecclesiam, puta, si reperiat in ipsa Ecclesia vel ejusdem Cæmeterio &c. ? Respondeo affirmative. Ita enim deciditur *cit. §. Thesaurus. Instit. De rerum divis.* Nec dicas, juxta citatum textum Juris Thesaurum in loco sacro casu fortuito repertum pertinere ex toto ad inventorem. Resp. enim disting. anteced. Si ejusmodi locus sacer pariter ad inventorem quasi ad Dominum spectet; v. g. si reperiretur in propria sua privata domestica Capella, conceditur: si locus hic sacer spectet ad aliquam Ecclesiam, negatur: non enim Ecclesia debet esse deterioris conditionis, ac alii. Chlingensperg. *Lib. 2. institut. Tit. 1. q. 35. §. 36.*

12 CONCL. VIII. Quod si quis data opera in alieno fundo Thesaurum scrutetur, atque inveniat sine consensu Domini, totum fundi Domino reddere compellendus est, atque ulterius puniendus: si autem Thesaurus arte magica, quamvis in proprio fundo, repertus fuerit, tunc totus Fisco adjudicabitur per sententiam Judicis, idque fit in pœnam criminis. Ita habetur *cit. l. un. C. De thesauris*, & sequuntur Doctores communiter. Quamvis Herincx *loc. cit. n. 148.* recte notet, quod utraque hæc dispositio Juris, utpote pœnalis, non obliget ante sententiam Judicis, ad instar aliarum pœnarum.

13 CONCL. IX. Qui scit alicubi Thesaurum latere, & emit locum, antequam effodiat, nullam facit venditori injuriam, & fit Dominus totius Thesauri postmodum eruti. Ita desumitur ex *l. a Tutore. 67. ff. De rei vendicat.* & tenent Lessius, Herincx *n. 149.* alique passim. Ratio est: quia eruit postea Thesaurum ex proprio fundo, nec tenebatur priori Domino indicare ipsum, imo neque hic fuit in ejus Dominio. Huc quadrat Parabola a Christo allata de margarita pretiosa, inventa in agro, quem idcirco quis emisse legitur *Matth. cap. 13.*

## Additio I.

\* Quæres an, si quis equidem non absolute emat illum locum, in quo nescit latere Thesaurum, bene tamen dictum locum accipiat in Feudum, vel Emphyteusin, an, inquam talis Emphyteuta vel Feudatarius fiat Dominus totius Thesauri ex illo loco a se eruti, vel num debeat potius medietatem Thesauri restituere Domino directo? Resp. Thesaurum talem ab Emphyteuta vel Feudatario ipsomet repertum spectare ex integro ad Emphyteutam, seu Feudatarium. Quinimo, si Thesaurus iste inveniretur casu fortuito ab alio tertio, adhuc saltem medietas Thesauri præfato Emphyteutæ &c. tribuenda esset pertinente altera medietate ad inventorem. Ratio est: quia Dominium utile non ad Dominum directum, sed ad Emphyteutam seu Feudatariam spectat, adeoque huic posteriori, non priori competit frui hac utilitate ex inventione Thesauri eveniente. Ita cum Haunoldo, Illung & Card. de Lugo, La Croix *lib. 3. part. 2. n. 108.* Christ. Chlingensperg. *de Jure Feudali. cap. 10. Q. 2.* qui tamen hic, etiam in *Institut. lib. 2. tit. 1. §. 34.* addit, hodiernis moribus ipsomet Principes supremos jure Regalium Thesauros ubique in locis suorum subditorum inventos vel ex toto, vel pro parte sibi attribuire. Quod idem testatur La Croix *loc. cit. n. 111.* qui ultimus adhuc subjungit; quod memorati supremi Principes plus tamen faveant, ac relinquunt illis, qui venas metallorum, quam qui latentem Thesaurum inveniunt, ut nimirum sic suos magis ad indagandas hæc metallorum venas, quæ alias pars fundi censentur, incitent.\*

## Additio II.

\* Noster Pater Henno *Tom. 2. Traët. 2. quest. 5. Conclus. 5. Theologia &c.* ponit in formalibus sequens questionem: *Petes, an Princeps statuere possit, ut Thesaurus ubicunque repertus etiam in fundo proprio, totus sibi reddatur, excepta quarta, aut quinta parte Inventori relicta?* Resp. affirmative, quidquid contradicant aliqui, quorum sententiam improbabilem vocat Clavis Regia. Ratio est, quia si, non obstante jure Gentium totum Inventori adjudicante, potuerint Imperatores ad servandam pacem median partem assignare Domino fundi, & alteram Inventori, quidni posset Princeps supremus, aut Respublica fere totum sibi assignare ad sustinenda Regni, aut Communitatis onera, Ita Auctor citatus.\*

## QUESTIO II.

De Venatione & Piscatione, ac variis ipsam concernentibus.

## SUMMARIUM.

14 Possunt Principes venationem, & piscationem interdicere.  
15 Solvitur instantia.

Jus Naturæ aliud præceptivum, aliud permissivum.  
\* Corollarium ad Principes.

16 Qui contra justam prohibitionem venatur, peccat, teneturque damnum compensare.

17 Quando censeatur gravis obligatio damni compensandi?

18 Is tamen acquirit dominium Ferae captae.

19 Solvitur instantia.

Duplex jus in proposito considerari potest.

20 Quid de animalibus domesticis, vel in certo loco conclusis?

\* De feris in insula, & de piscibus in lacu inclusis.

21 An fera laqueo intricata sit eximentis, vel laqueum penentis?

\* De columbis & apibus volantibus.

14 CONCL. I. Non obstante, quod feræ sylvestres sub nullius dominio existant, ac proinde spectato Jure Gentium fiant primo occupantis *arg. §. Ferae. Instit. De rerum divis.* adhuc tamen possunt Principes venationem, piscationem, & captionem hujusmodi animalium ex rationabili causa aliis interdicere. Ita Covarruvias *part. 2. in reg. Peccatum. §. 8.* Lessius *cit. cap. 5. n. 33. & seqq.* & alii satis communiter, quamvis non defuerint oppositum tenentes, quos referunt iidem Auctores. Conclusio desumitur imprimis ex receptissima praxi, qua in plerisque Regnis, ac Provinciis Principes talem faciunt prohibitionem. Accedit ratio; quia populus potest cedere juri suo; unde, cum Principibus convenientem suo fastigio apparatus, atque honestas pro sua Dignitate recreationes populus concedere teneatur, consuetudine hoc jus Principibus concessum esse, dicendum est. Idipsum suadet ex eo; quia quilibet potest alium prohibere, ne in suo fundo venationem, aucupium, vel piscationem exerceat; ergo & Princeps pro suo territorio. Antecedens patet ex *l. Item, si fundi ff. De usufructu &c.* ubi dicitur: *Aucupiorum quoque & venationum redditum ad fructuarium pertinere.* Et *§. Ferae. Instit. De rer. divis.* Plane, qui alienum fundum ingreditur venandi, aut aucupandi gratia, potest a domino, si is præviderit, prohiberi, ne ingreditur.

15 Nec dicas: Jure Naturæ & Gentium licitum est, animalia libera capere: atqui Princeps non potest tollere Jus Naturæ; ergo. Resp. enim, venationem esse Jure Naturæ licitam eatenus solum, quatenus ipsa non est prohibita Jure Naturæ, sicuti furtum; non autem sic, quasi ejus prohibitio ob rationabiles causas certis personis facta sit contra Jus Naturæ. Hinc sic explicata majori distinguitur minor: Princeps non potest tollere Jus Naturæ præceptivum, id est, illud, quod quidpiam Jure Naturæ præcipitur, aut prohibetur, conceditur: non potest tollere Jus Naturæ negativum, seu permissivum tantum,



tantum, & quoad unum vel alterum objectum determinatum, præsertim accedentibus iustis causis, negatur minor, & consequentia; quia multa sunt Jure Naturæ permixta & licita, quæ tamen iustis de causis Jure humano postmodum prohibentur; alioquin certe nec esus carniū posset certis diebus ab Ecclesia interdici, cum sit Jure Naturæ licitus, id est, non prohibitus hoc Jure.

*Additio.*

\* Illud tamen recte monet Principes Waizenegger de Venat. lib. 4. n. 24. & seqq. ut, dum aliis venationes prohibent, ipsimet eodem Jure venandi ita utantur, quatenus exinde subditi non graventur contra charitatis & justitiæ Leges, prout utique fieret, si per equos venatorios prata, & agri subditorum conculcentur, vel ex neglectu venationis feræ adeo multiplicentur, ut agris miserorum subditorum, qui venari prohibentur, vaide gravia ac sæpe majora, quam per integram steuram (uti sæpius meis auribus lamentantes audivi) inferant damna; ubi plane meo judicio ad restitutionem similium damnorum ex justitia obligantur; cum sint efficax causa intermittentes tales venationes, & tamen rigidissime insuper prohibentes, ne similes rustici, aliive subditi feras occidant, vel per explosionem sclopetorum, aliisve sufficientibus mediis a pratis, seu agris arceant, atque depellant. \*

16 CONCL. II. Qui stante tali prohibitione in loco publico, seu per industriam humanam non concluso venatur, vel in publicis lacubus seu fluminibus piscatur, aut aucupio vulneres capit, peccat contra justam prohibitionem, atque virtutem justitiæ, & obligatur ad compensationem damni illati, quamvis acquirat dominium feræ captæ, atque ad istius restitutionem non teneatur. Ita Sannig dist. 2. de justitia. q. 2. n. 14. Lessius loc. cit. n. 43. Tannerus tom. 3. disp. 4. q. 6. n. 355. & alii. Ratio primæ partis desumitur ex dictis n. 14. nam talis non solum agit contra justam prohibitionem, sicque ratione commissæ inobedientiæ puniri meretur, sed etiam violat jus venandi, piscandi, in tali loco alteri competens.

17 Num autem in particulari casu isthæc obligatio restituendi, sive compensandi damnum illatum sit gravis, nec ne, dijudicandum erit ex qualitate injuriæ, vel læsionis juris venandi, piscandi &c. Principi, vel Reipublicæ competentis: item ex gravitate damni illati, ut puta si animalia capta sint magni pretii, & multa, adeo ut soboles ferina notabiliter extinguatur, vel si ob frequentiam venationis feræ sint redditæ fugaces &c. de quibus plura citatus Lessius, Tannerus, Lugo disp. 6. de just. & Jur. sect. 7. & alii, arbitantes, quod unam alteramve feram capere non censeatur notabiliter damnosum, ita ut attingat culpam mortalem, nili forsitan quis ex officio & ob datum salarium adstrictus esset feras talis sylvæ Domino ejusdem, vel habenti ibidem jus venationis restituere.

18 Altera pars Conclusionis ex eo probatur: quia talis fera sylvestris, vel avis, etiamnum gaudet naturali sua libertate, ac proinde necdum est sub dominio Principis, aut domini fundi, sed est nullius; ergo transit in dominium primo occupantis, qualis in proposito censetur is, qui cepit eam. Ex quo proxime sequitur, quod is non teneatur restituere feram captam, utpote quæ ante nullius erat, & per capturam facta est sua.

19 Si dicas, hanc Conclusionem sibi ipsi contradicere, dum nunc admittit, feram sylvestrem transire in dominium capientis, veluti primo occupantis; & tamen in priori parte asserit, talem peccare contra virtutem justitiæ, ac teneri ad restitutionem. Resp. negando illatum: nam quantum ad propositum, ac stante præfata prohibitionem venandi, piscandi &c. duplex jus considerari potest. Primo quidem ipsum jus venandi, piscandi &c. in tali loco: & hoc, stante ejusmodi justa prohibitionem, competit Principi, vel Domino territoriali, læditurque per venationem, vel piscationem ipso invito ab altero

factam. Secundo jus in ipsam feram: & hoc non competit Principi, vel Domino territoriali, sicque per capturam feræ sylvestris, seu gaudens sua naturali libertate non læditur. Unde fit, quod ratione prioris juris læsi teneatur, qui venatur vel piscatur in loco publico prohibito, ad competentem restitutionem, seu recompensationem damni illati, ratione alterius vero, utpote revera in feram non habiti, ad nihil teneatur.

20 Dicitur notanter in Conclusionem: in loco publico, seu non concluso; nam præfens Conclusio solum intelligenda est de iis animalibus, quæ necdum sunt mansuetæ, neque capta, atque in certo loco inclusa: secus enim dicendum foret de animalibus natura mansuetis & domesticis, uti sunt gallinæ, anates domesticæ, oves, boves, porci, & hujusmodi: quæ proinde, si potestatem Dominorum longius aberrando evaserint, capere non licet, vel si ab aliquo capiantur, sunt Dominis restituenda, alioquin furtum committeretur. §. Gallinarum Insit. De rerum divis. Similiter licitum non est capere feras natura sylvestres, sed certo in loco jam conclusas, v. g. in hortis, vel in nemoribus muro circumdatis, aut pisces ex piscinis &c. talia enim animalia jam non amplius gaudent sua naturali libertate, sed, cum per industriam humanam contineantur sub tali certa custodia, existunt sub dominio ejus, qui est Dominus illius horti, nemoris, piscinæ &c.

*Additio*

\* Ast ponamus, feras quasdam in Insula valde spatiosa, puta duarum vel trium leucarum, vel pisces in Lacubus amplissimis e. g. in Lacu Podamico vulgo Bodensee, Starnbergensi &c. inclusos, existentne hæc animalia sub dominio illius, ad quem spectat Insula, seu Lacus, aut certum ejusdem spatium, vel sicut capientis eo modo, quo in fluminibus? Ante resolutionem notandum pro junioribus, Lacus dici illas aquas, in quibus pisces non habent æque liberum in & egressum, ac in fluminibus, qui Lacus, si sint majores, vocantur germanice See, si minores; Weyher: discernuntur autem ambo a stagnis, eo quod proprie Stagna vulgo Alte Wasser, censeantur aquæ relictæ ex aliquo flumine suum alveum mutante, ubi sæpius copiosa pars piscium cum sua genitura remanet. Hoc notato, equidem de stagnis, & lacubus minoribus, atque etiam suo modo de majoribus, ubi tamen aquæ emitti, sicque pisces ad libitum facile capi possunt, meo judicio non est difficultas, quod memorati pisces spectent ad Dominum lacus, seu stagni ob dicta præcedentia. Discurrendo autem de omnino majoribus, ubi nec aquæ emitti, sicque nec pisces ad libitum capi possunt. Resp. non deesse graves Auctores, qui cum Cardinali de Lugo, Lessio, Haunoldo, Dicastillo, & aliis apud La Croix lib. 3. p. 2. n. 257. existimant, eodem modo sentiendum hic esse, sicuti prius quoad animalia in liberis nemoribus, seu fluminibus existentia, eo quod, etsi aliquo modo sint inclusa, videantur tamen in tantum adhuc sua gaudere libertate, ut vix non æque difficulter in tanto districtu capi queant, ac in sylvis, vel fluminibus, sicque eadem videatur ratio, ac de prioribus. Atque de his ipsis loquitur noster P. Reginaldus Schotti in suo Venatore scrupuloso, Scrupulo 9. Nec puto ejusdem doctrinam, qua ob rationem proxime allegatam sentit cum DD. citatis, continere (si in fonte legatur) ea paradoxa, quæ contra eum adducit Illustriss. Cancellarius de Schmid in suis Commentariis ad Jus Bavaricum Tit. 29 art. 4. n. 6. & seqq. Profecto Magnif. D. Christophorus de Chlingenberg in Universitate Ingolstadtensi celebris per plures annos Jurium Professor lib. 2. Insit. Tit. 1. Q. 22. tenet tamquam probabilius, tales pisces captos cedere occupanti, assignans disparitatem inter piscinas, & similia stagna, ac lacus, simulque addens, quod auferentes non sint fures, alia tamen extraordinaria poena afficiendi, sicuti (meo judicio) feripetæ in alterius Territorio, si deprehendantur, castigantur severissime, ex quo tamen non



sequitur, quod fera capta non sit capientis. Conferantur dicta superius n. 16. & seqq. \*

21 Quæres I. Cui competat dominium feræ laqueo intricatæ, aut piscis nassa conclusi, si eximatur ab alio, quam ponente laqueum, vel nassam? Resp. hic variare Doctores: nam aliqui dominium adjudicant ejusmodi feræ eximenti *arg. l. in laqueum. ff. De acquir. rerum dominio.* ubi Summarius sic habet: *Quod in laqueum meum incidit, non est meum, nisi manualiter capiatur.* nonnulli autem videntur tenere oppositum. Verum rectius distinguitur cum Sannig. *cit. dist. 6. quest. 2. n. 1. & 2. Tannero loc. cit. n. 356.* & aliis: quia vel fera, aut piscis inextricabiliter concludebatur laqueo, sive nassa, vel ita dumtaxat, ut diu luctando sese adhuc expediret. Si primum, sit tendentis laqueum, vel ponentis nassam: quia nihil interest, an manu, vel instrumento quis feram apprehendat. Si secundum, sit eximentis illam feram, utpote quæ adhuc, antequam eximeretur, censebatur habere naturalem libertatem. Et hoc totum videtur velle textus *l. in laqueum*, si bene perpendatur.

#### Additio.

\* Quæres II. Cui competat dominium apum, aut columbarum ex tuo alveari, vel columbario avolantium? Resp. I. Examen apum tuarum avolans tamdiu spectat ad tuum dominium, quamdiu versatur in tuo conspectu, nec est difficilis ejusdem prosecutio: alioquin vero occupantis erit. Ita expresse dicitur in Jure §. 14. *Instit. De rer. divis.* Resp. II. Quoad columbas avolantes, & alia similia animalia, quæ abire & redire solent, juxta formalia Juris §. 14. *Instit. De rerum division.* hæc regula comprobata est, ut eousque tua esse intelligantur, quousque animum revertendi habeant; hincque nec pro tunc licet aucupium harum tuarum domesticarum columbarum, si in agros avolant, nisi sciantur notabiliter destruere semina. Porro animus revertendi videtur desinere tunc quando revertendi consuetudinem deseruerunt: uti in dubio, & nisi particulares circumstantiæ aliter fundeant, deseruisse eandem consuetudinem juxta multos præsumuntur; si, quamvis in sua naturali libertate relicte, bis terve tempore consueto non redierint, vel jam duobus, aut tribus diebus emanserint, sese v. g. associando columbis alterius columbarii &c. Ita Molina *tom. 1. tract. 2. disp. 48.* Attendantur pariter in simili casu particularia locorum statuta, & incolarum mores, ac praxis communis: sic enim noster Pater Franciscus Henno, Auctor alias satis rigidus *tom. 2. tract. 2. disp. 4. quest. 3. Conclus. 2.* testatur de sua patria ad evitanda jurgia & discordias legitimam ibi consuetudinem introductam esse, ut columbæ e columbario proprio ad alienum ultro divertentes fiant posterioris columbarii: quod meo judicio facilius adhuc admitti poterit, si tales columbæ, quamvis naturali libertati relicte duobus, vel tribus diebus permaneant in posteriori columbario; aut si cum alienis columbis evolantes, cum ipsis iterum sæpius, puta ter, quaterve redeant ad alienum posterius columbarium. Item in Hispania teste Lugone reperitur specialis aliqua lex, quæ columbarum capturam, seu jaculationem permittit extra leucam a propriis columbariis existentium: idque ad declinandas varias lites. \*

### QUESTIO III.

De aliis modis acquirendi rerum Dominium jure Gentium.

#### SUMMARIUM.

- 22 Inter modos acquirendi rerum Dominium est Nativitas.  
23 Alluvio, & quando?  
\* De nova insula, vel alvei mutatione.  
24 Specificatio.

\* Quidnam dicendum, si species nova possit reduci ad priorem materiam?

- 25 Accessio,  
26 Confusio, & commixtio; & quomodo differant?  
27 Regula pro Confusione materialium.  
28 Alia regula pro commixtione specierum.  
29 Specialis regula pro commixtione nummorum.  
30 Cur nummi post commixtionem fiant accipientis, non alia res?  
31 Edificatio, quomodo sit modus acquirendi rerum Dominium?  
32 Item Plantatio,  
\* Solvitur objectio.  
33 Fructuum perceptio,  
34 Traditio.  
35 Solvitur instantia.

22 **S**ecundus modus acquirendi rerum Dominium Jure Gentium est Nativitas; per quam nostra sunt, quæ ex manualibus nostro Dominio subjectis nascuntur, uti habetur §. *Item ea. 19. Instit. De rer. divisione.* Unde cui competit Dominium, vel saltem ususfructus pecudum, ut puta ovium, equorum, vaccarum, & hujusmodi, etiam agnorum, hinnulorum, & vitulorum ex ipsis natorum Dominium acquirit.

23 Tertius modus acquirendi rerum Dominium Jure Gentium est Alluvio. Porro Alluvio est incrementum latens, quo flumen tuo fundo paulatim aliquid adjicit, & adeo latenter, ut vix notari queat, quantum quovis momento accedat. Et quod per hujusmodi Alluvionem agro tuo flumen adjicit, Jure Gentium tibi acquiritur. Quod si vero vis fluminis non latenter, sed aperte partem de prædio tuo detraxerit, & vicini prædio appulerit, palam est, eam tuam permanere; prout clarissime habetur §. *Præterea. 20. Instit. Eod.*

#### Additio.

\* Ad hunc tertium modum acquirendi Dominium per alluvionem etiam reducitur acquisitio novæ terræ vel per exurgentem aliquam novam in flumine insulam, vel per alvei mutationem. Loquendo de nova aliqua insula §. 22. *Institution. De rerum divisione.* leguntur sequentia formalia: *Insula, quæ in mari nata est (quod raro accidit) occupantis sit; nullius enim esse creditur. At insula in flumine nata (quod frequenter accidit) siquidem mediam partem fluminis tenet, communis est eorum, qui ab utraque parte fluminis prope ripam prædia possident pro modo scilicet latitudinis cujusque fundi, quæ prope ripam sit. Quod si alteri parti proximior sit, eorum est tantum, qui ab ea parte prope ripam prædia possident.* Ita formalia textus, cui ex Chhngensperg. *lib. 2. Instit. tit. 1. q. 46.* prope finem subjungo, hodiernis moribus quandoque pro locorum diversitate mutas de novo Insulas titulo Regalium sibi applicare Principes & territorii Dominos: quemadmodum in Bavaria Insulæ in Danubio ex inveterata consuetudine ad Principem spectant, secus in Oeno. Ita ille. Aliam distinctionem in Bavaria facit Illust. Baro de Schmid, tribuens absolute Principibus Dominium quoad Insulas in fluminibus navigabilibus exortas, secus si non fuerint navigabilia; videatur in Jure Bavarico *Land-Recht tit. 25. art. 8. n. 10. & seqq.* Discurrendo autem de naturali alvei mutatione, cui pro tunc acquiratur prominentis terræ Dominium, denuo ex textu Juris §. 23. *Instit. De rerum divisione*, desumitur, ibi: *Quod si (flumen) naturali alveo in universum derelicto ad aliam partem fluere ceperit, prior quidem alveus, vulgo Rinnlaal, eorum est, qui prope ripam ejus prædia possident, pro modo scilicet latitudinis cujusque agri, quæ prope ripam sit: novus autem alveus ejus Juris esse incipit, cujus & ipsum flumen est, id est publicus. Quod si post aliquod tempus ad priorem alveum reversum fuerit flumen, rursus novus alveus eorum esse incipit, qui prope ripam ejus prædia possident. Alia sane causa est, si cujus totus ager inundatus fuerit; neque enim inundatio fundi speciem commutat, & ob id, si recesserit aqua, palam est, eum fundum manere, cujus & fuit. Hucusque decisio*



decisio Juris, quæ, cum clara sit, ulteriori explicatione non indiget. \*

24 Quartus modus acquirendi rerum Dominium Jure Gentium est *Specificatio*, per quam intelligitur formatio, seu introductio formæ, vel quasi formæ in alienam materiam, vel partim alienam, partim propriam. Sic qui bona fide, & nomine proprio ex sua & aliena lana vestimentum confecit, hac ratione ejus dominus efficitur, quamvis domino lane alienæ sit restituendus valor ipsius lane. Verum hic modus acquirendi rerum Dominium nonnullas habet limitationes, de quibus agitur §. *Cum ex aliena*. 25. *Instit. De rerum divisione*.

*Additio.*

\* Porro inter alias limitationes citato §. *Cum ex aliena*. 25. *Instit. De rerum divisione*. factas præcipua est, quod specificans etiam bona fide non fiat Dominus illius rei alienæ, in quam novam formam introduxit, si eadem species ad priorem eadem materiam reduci queat, uti contingit, si ex alieno argento fiat nova statua; ubi potius in simili casu remanet Dominium penes illum, qui antea existerat Dominus ipsius talis materiæ. Et hinc, si talis statua ab aurifabro vendatur tertio, eadem potest rei vindicatione immediate repeti a Domino materiæ, apud quemcumque illa statua existat. Econtra vero, si pannifex ex emptæ alterius lana, quam ignoravit esse alienam, confecerit pannum, vel pistor ex alieno frumento farinam, seu panem, vel lanio ex alienis ovibus mactatis præparasset carnes, ac postea vendidisset tertio pariter existenti in bona fide, nequiquam posset per Dominum materiæ hujusmodi exigere immediate pannus, seu panis aut carnes ab illo tertio, cui talia iusto pretio vendebantur, neque etiam in conscientia tertius obligaretur restituere, sed potius, si ille, ad quem antea materia spectabat, habeat prætensionem, eandem vel contra auferentem, si rescatur, vel contra pannificem, seu pistorem, aut lanionem per actionem in factum (uti Juristæ ajunt) instituere deberet. Ratio est: quia, cum illa res nequeat utiliter redigi in priorem materiam, talis specificans, seu introducens inibi formam per ipsummet Jus factus est Dominus, quod dein Dominium transtulit per venditionem in tertium, & consequenter, cum non amplius maneat talis rei Dominus ille, ad quem antea spectabat materia, neque poterit eandem rem a tertio bonæ fidei possessore, qui exinde non est factus ditior, rei vindicatione exigere. Videatur desuper Chlingensperg. lib. 2. *Instit. tit. 1. §. 38. & quæst. 39.* poteritque id pro resolutione multorum casuum deservire. \*

25 Quintus modus acquirendi rerum Dominium Jure Gentium est *Accessio*; cum videlicet quid ornatus causa alteri rei accedit, seu adjicitur: tunc enim, licet hoc pretiosius sit, quam id, cui adjicitur, Accessionis jure acquiritur Domino rei illius, cui adjectio facta est. Sic, si vestitux intextatur purpura aliena, purpura vesti cedit, prout dicitur *loc. cit. §. Si tamen*. 26. Addunt autem circa hoc Doctores limitationem, nisi purpura facile, atque sine lacione vestimenti posset eximi: tunc enim purpura illa esset separanda, suoque Domino in specie petenti reddenda; alioquin autem sufficit pretium ejus reddere.

26 Sextus modus acquirendi rerum Dominium Jure Gentium est *Confusio*. Cui accedit Septimus, qui est *Commixtio*: & hæc differt a Confusione penes hoc, quod in Commixtione corpora separata inter se quoad substantiam remaneant, prout fit in commixtione duorum frumentorum inter se; in Confusione vero corpora in unum coeant, prout fit in permixtione mei & cui vini per errorem, aut industriam in eodem dolio facta.

27 Porro de his duobus modis in Jure §. *Si duorum*. 27. & §. *Quod si frumentum*. 28. *Inst. De rerum divis.* sequentes regulæ ponuntur. Prima, loquens de Conclusionem, talis est. Quando utriusque voluntate confunduntur materiæ duorum Dominorum, veluti si vina sua confuderint, aut ex vino & melle mullum fecerint,

totum corpus inde resultans utriusque commune est: idem dicendum, licet non voluntate amborum Dominorum, sed fortuito illa confusio facta fuerit.

28 Altera regula, loquens de Commixtione, sic habet. Quando species duorum Dominorum, utputa frumenta, ex utriusque voluntate commiscantur, efficiuntur communes: quia ex consensu utriusque singula v.g. grana, quæ cujusque propria fuerant, mutuo communicantur. Quod si casu ea commixtio facta fuerit, aut unus miscuerit sine alterius consensu, non fit aliquid commune: quia singula corpora in sua substantia durant, ac proinde non magis illo casu fit commune frumentum, quam grex intelligitur esse communis, si pecora unius mixta fuerint pecoribus alterius. Undetunc arbitrio judicis æstimandum erit, quale cujusque frumentum fuerit; vel (juxta Glossam ibidem) ut cuilibet tantum frumentum restituatur, quantum fuit suum, quando non apparet, quodnam fuerit suum.

29 Speciale quid habetur in pecunia, sive nummis. 1. *Si alieni*. 78. ff. *De solutionibus*. ibi: *Si alieni nummi, infcio vel invito domino, soluti sunt, manent ejus, cujus fuerunt* (& sic ante aliam mixtionem, post quam discerni nequeant, non fiunt accipientis) *Sed si mixti aliis sunt, ita ut discerni non possint, ejus fieri, qui accepit, in libris Gaji scriptum est, ita ut furti actio domino cum eo, qui dedisset, competere*. Et hoc est speciale in nummis, ut hi commixti propriis nummis, ita ut amplius discerni nequeant, transeant in Dominium accipientis, sive bona, sive mala fide v. g. a fure, emente a mercatore pannum, dati fuerint: sic tamen, quod Domino competat actio furti contra dantem, puta contra furem, qui illam pecuniam abstulit, & mercatori dedit. Quinimo & ipse fur, facta semel commixtione pecuniæ furtivæ cum propria, acquirit illius Dominium, sed dumtaxat imperfectum, hoc est, cum obligatione tantundem restituendi, quantum furto abstulit.

30 Porro in assignanda disparitate inter commixtos nummos, & grana frumenti, & quod illi transeant in Dominium accipientis post commixtionem, non grana sine mutua utriusque Domini voluntate commixta, laborant Doctores. Congruentia tamen esse potest: tum quia majus periculum est in nummis, utpote præ ceteris rebus furto expositis, ac ne eorum Dominium semper maneat incertum: tum quia nummi a publica æstimatione, suum habent valorem, atque statim, ut expendantur & commiscantur, intelliguntur consumpti, non sic grana frumenti aliis permixta.

31 Octavus modus acquirendi rerum Dominium Jure Gentium est *Ædificatio*. De hac §. *Cum in suo*. 26. *Instit. De rerum divis.* statuitur primo, quod si quis in suo solo seu fundo domum ex aliena materia bona fide ædificaverit, ipse fiat Dominus ædificii: quia omne, quod solo inædificatur, solo cedit. Verumtamen Dominus materiæ, quamvis eam stante ædificio vindicare non possit, potest tamen petere satisfactionem pro materia; & si aliqua de causa dirutum sit ædificium, atque ipso materiæ æstimationem necdum accepit, potest hanc vindicare in specie. Deinde decernitur ibidem, quod, si quis vicissim in alieno solo scienter ex sua materia domum ædificat, non solum tunc ædificium solo cedat, atque illius fiat domus, cujus est solum; sed insuper ædificans amittat proprietatem materiæ, ita ut diruto ædificio eam vindicare non possit: quia sic temere ædificando sua voluntate materia illa censetur esse alienata; videtur enim donasse, quod nullo jure urgente concedit. Verum hoc iterum habet suas limitationes, de quibus Jurisconsulti.

32 Nonus modus acquirendi rerum Dominium Jure Gentium est *Plantatio*: de qua §. *Si Titius*. 31. *Instit. Eod.* habetur, quod, si quis alienam plantam in suo solo posuerit, ipsa erit; & e converso, si quis suam plantam in alieno solo posuerit v. g. in solo Titii, erit alterius, nempe Titii, dummodo radices egerit (nam antequam planta radices egerit, ipsius permanet, cujus fuerat antea) quia sicut ædificia, ita multo magis plantæ & arbores solo cedunt, utpote cum a terra susten-



sustinentur, capiantque inde alimentum, vitam & incrementum suum; atque hinc Jure Gentium sunt illius, cujus est solum. Estimationem tamen plantæ, atque impensi laboris mercedem repetere potest, qui in alieno solo plantas posuit, vel frumenta conseruit, dummodo id bona fide factum sit; prout ibidem §. seq. subjungitur, atque in simile dictum est *u. preced.* de edificante in alieno fundo.

*Additio.*

\* Dices. Si ædificium, & planta, vel arbor cedit solo, ita ut Dominus fundi quoque acquirat talium rerum Dominium, tunc pari modo scriptura cedit chartæ, & pictura tabulæ, in qua scribitur, vel pingitur; cum pariter sint basis & substratum, in quo characteres & colores ponuntur: consequens dici nequit ob clarum textum in contrarium §. *Si quis in aliena.* 34. *Inst. De rerum divisione.* ergo nec antecedens. Resp. quoad scripturam in ordine ad Chartam papyraceam eodem modo esse sentiendum, sicut respectu soli quoad ædificium, & plantationem, uti expressè ob rationis paritatem deciditur *lib. 2. Instit. Tit. 1. §. 33.* ubi tamen de Jure Civili loc. cit. §. 34. pretiosa pictura expressè excipitur, ut ea quoad Dominium non cedat tabulæ; unde exceptio firmat regulam in contrarium in casibus non exceptis. \*

33 Decimus modus acquirendi rerum Dominium Jure Gentium est *Fructuum perceptio*. Porro de hoc modo sic habetur §. *Si quis a non domino.* *Instit. 35. De rerum divis.* *Si quis a non domino, quem dominum esse credebat, bona fide fundum emerit, vel ex donatione, aliave qualibet justa causa æque bona fide acceperit, naturali ratione placuit, fructus, quos percepit, ejus esse pro cultura & cura. Et ideo, si postea Dominus supervenerit, & fundum vendiderit, de fructibus ab eo consumptis agere non potest. Ei vero, qui alienum fundum sciens possederit, non idem concessum est: itaque cum fundo etiam fructus, licet consumpti sint, cogitur restituere.* Hæc ibi. Ex quibus patet, quod bonæ fidei possessor Jure Gentium fructus faciat suos, nec eos consumptos teneatur restituere vero Domino, si is postmodum comparuerit, & fundum evicerit: etsi secus sit de malæ fidei possessore; nam is etiam fructus perceptos cogitur restituere.

34 Ultimus tandem modus acquirendi rerum Dominium Jure Gentium est *Traditio*; de qua §. *Per traditionem.* 40. *Instit. Eod.* dicitur sic: *Per traditionem quoque jure naturali res nobis acquiritur, nihil enim tam conveniens est naturali equitati, quam voluntatem domini, volentis rem suam in alium transferre, ratam haberi: & ideo cujuscunque generis sit corporalis res, tradi potest, & a domino tradita alienatur.* Hæc ibi.

35 Nec obstat, quod Traditio fiat privata voluntate hominum, rem suam in alios transferentium, ac proinde male videri possit, quod Traditio connumeretur inter modos acquirendi rerum Dominium Jure Gentium. Resp. enim negando sequelam: quia, quamvis Traditio fiat privata voluntate hominis, rem suam alteri tradentis, huic tamen Traditioni Jure Gentium, atque naturali convenit potestas transferendi rerum Dominium in alios. Sicut a pari, quamvis Occupatio rei sub nullius Domino existentis fiat industria humana, atque voluntate privata cujuscunque rem illam suo labore occupare satagentis, jus tamen, seu potestas transferendi rerum Dominium in primo occupantem convenit Occupationi ex Jure naturæ, atque Gentium, & non solum ex constitutione quadam humana (prout id convenit Præscriptioni, juxta dicenda *Distinct. sequenti*) atque ideo sicut Occupatio, ita & Traditio merito connumeratur inter modos acquirendi rerum Dominium Jure Gentium.

DISTINCTIO VI.

*De Præscriptione & Usucapione.*

QUESTIO I.

Quid, & quotuplex sit Præscriptio? Item cur Lex Præscriptionis seu Usucapionis sit introducta; & an valeat in Foro Conscientiæ?

SUMMARIUM.

- 1 Præscriptio, quomodo sumatur?
- 2 Præscriptio, & Usucapio, quid?
- 3 An differant?
- 4 Jus Præscriptionis, quo Jure sit introductum?
- 5 Habet locum etiam in Foro Conscientiæ.
- 6 Id amplius ostenditur.
- 7 Nemo debet locupletari cum alterius jactura, quomodo?
- \* Præscriptio alia dicitur privativa, alia vero positiva.

*Addit. I.*

- \* Alia ordinaria, alia extraordinaria. *Addit. II.*
- \* Contra quas personas valeat introduci? *Addit. III.*
- \* An per actus meræ facultatis? *Addit. IV. & V.*

1 **P**ræscriptio sumitur in proposito pro acquisitione domini, atque elisione juris alterius, absque ejus consensu ex sola legis dispositione tempore legibus definito. Et de Præscriptione hoc modo sumpta merito impræsentiarum agitur, ut intellectis hætenus diversis modis acquirendi rerum dominium Jure Gentium, etiam percipiatur modus acquirendi rerum Dominium Jure Civili, & Canonico.

2 **CONCL. I.** Præscriptio est acquisitio domini rei alienæ per possessionem ejus certo temporis spatio legibus definito bona fide continuatam. Ita in re communis, & concordat hæc definitio cum illa, quæ *L. 3. ff. De usurpat. & usucap.* habetur, ibi: *Usucapio est acquisitio, vel adjectio domini, per continuationem possessionis temporis lege definiti.* Ubi tamen per *ly acquisitio domini* etiam subintelligitur elisio juris alterius, utpote per quam similiter suo modo acquiritur jus aliquod, quod antea alteri competebat: ceteræ autem particulæ patebunt ex decursu.

3 Porro licet inter Præscriptionem & Usucapionem nonnullas Doctores differentias assignare conentur, defacto tamen ex recepto modo loquendi plerumque inter se confunduntur: nisi quod Usucapio proprie tantum rebus corporalibus conveniat, at vero Præscriptio generaliore habeat significationem, & rebus tam corporalibus, quam incorporalibus competat. Verum quidem est, quod Præscriptio triennalis (qualis datur inter res mobiles) frequentiori usu in Jure dicatur usucapio; ex quo proinde nonnulli cum Glossa *L. 3. ff. De usurpat. & usucap.* deducunt aliam differentiam inter Usucapionem & Præscriptionem, quod nimirum illa proprie sit rerum mobilium, hæc immobilium: quam differentiam etiam Doctor Subtilis 4. *dist. 15. Quest. 2. §. De Secundo.* supponere videtur, ibi: *Ex hoc dico, quod Præscriptio in immobilibus; & Usucapio in mobilibus &c.* Sed hæc differentia non semper attenditur, nam in Jure Usucapio quandoque etiam ad res immobiles refertur, & econtra Præscriptio ad res mobiles; prout fit §. 1. *Inst. de usucap.* & alibi: unde parum, & ferme nihil ab invicem differunt, ratione cujus Doctores eodem modo de utrisque discurrunt.

4 **CONCL. II.** Jus Præscriptionis seu Usucapionis introductum est Jure humano positivo, tum Civili, tum Ecclesiastico, ob publicam utilitatem & quietem, ne incerta essent semper rerum dominia, & infinitæ orirentur lites circa earum proprietatem. Ita habetur *L. 1. ff. De usurpat.* estque communis. Ratio est: quia non illico sequitur, *rem istam emi, vel alter mihi donavit, legavit &c. ergo est mea*; nam si ille, qui mihi eam tradidit, dominus non fuit, neque me dominum facere potuit, juxta



juxta Reg. 79. *Juris. in 6. Nemo potest plus juris transferre in alium, quam sibi competere dignoscatur.* Proinde, nisi Lex ob diuturnam possessionem bona fide habitam, & justo titulo comparatam illius rei dominium expresse mihi attribueret, numquam de hoc securus forem: nam semper timere possem, ne quis superveniat, illius rei, tamquam ante plurimos annos sibi vel suis parentibus injuste ablatae, dominium sibi vendicans.

§ CONCL. III. Translatio domini facta auctoritate legis per Præscriptionem, atque Usucapionem justa est, simulque per eam transfertur rerum dominium nedum in Foro externo, sed etiam in Foro conscientiae, adeo quidem, ut, si Præscriptio cujusdam rei legitime sit completa, postmodum talis non amplius teneatur ad restitutionem rei jam præscriptæ, etiamsi postea certo cognoscat, rem fuisse alienam. Ita Doctores communiter. Ratio est: quia juste potest transferri rerum dominium per Legem communem justam, & legitime promulgatam; ergo idem dicendum de lege Præscriptionis.

6 Confirmatur. Quia Lex Præscriptionis ex una parte est plurimum utilis ac proficua Reipublicæ, & quieti communi, imo etiam necessaria ad rescindendas infinitas lites; ex altera vero parte per eam nemini infertur injuria: nam sicut hodie a Sempronio præscribitur contra Titium, huicque rem suam certo temporis spatio repetere negligenti ejusdem dominium vi Præscriptionis adimitur, ita vi ejusdem Præscriptionis potest Titius alio tempore quidquam præscribere contra Sempronium, vel quemcumque alium, qui negligit rem suam debito tempore repetere. Adde, quod talis sibi, ac propriæ negligentiae, quam Jura ob bonum publicum merito castigant, culpam imputare debeat, si tanto tempore negligat rem suam repetere, quantum Jura requirunt ad Præscriptionem.

7 Dices. Juxta illud lumine naturæ notum *Nemo debet locupletari cum alterius jactura*: sed hoc fit in Præscriptione; ergo. Resp. majorem esse intelligendam de injusta locupletatione, qualis esset, si quis in emptione, aliisve contractibus proximum circumveniret, atque deciperet, sicque cum ejus jactura locupletaretur injuste: non autem dictum illud est intelligendum de justa locupletatione, qualis est ea, quæ fit in bello justo, & in legitima Præscriptione per auctoritatem Legis, ex publica & justa causa transferentis dominium unius in alium, atque in similibus aliis casibus.

#### Additio I.

\*CONCL. IV. Præscriptio ut sic ab aliquibus *imprimis* dividi solet ratione effectus in positivam & privativam. Hanc divisionem faciunt P. Schmier in *Tract. de Præscr. c. 1. sect. 3.* & P. Pichler *lib. 2. Decret. tit. 26. §. 1. n. 7.* Vi Præscriptionis positivæ (inquiunt) novum aliquod jus a tertio acquiro; econtra vero vi Præscriptionis privativæ ab onere aliquo liberor, e. g. si Titius præscribit jus eundi per pratum Caji, vel illic currus ducendi &c. talis Præscriptio diceretur positiva. Quod si vero certo tempore a jure definito, puta decennio, Titius similes actus non amplius exerceret in prato Caji, præfatum jus extingueretur, atque Cajus, cujus pratum ab hoc onere, seu obligatione liberatur, diceretur præscribere Præscriptione privativa, & hinc etiam ab aliquibus Præscriptio ut sic definiri solet, quod sit *modus acquirendi a Jure approbatus, quo per possessionem debito modo, & tempore continuatam obtinetur Jus, vel liberatio aliqua.* \*

#### Additio II.

\*Uterius ratione temporis solet Præscriptio dividi in ordinariam & extraordinariam. Ordinaria vocatur illa, quæ tempore ordinario, id est, juxta dicenda triennio in rebus mobilibus, & decennio vel vicennio (quale tempus etiam in Jure dicitur longum) in rebus immobilibus finitur. Extraordinaria dicitur, quæ tempore

longissimo (quale tempus dicuntur triginta vel quadraginta anni) completur. Atque ad eandem spectat etiam Præscriptio sexaginta, octoginta, vel centum annorum: item Præscriptio immemorialis, quæ requirit tempus immemoriale, seu possessionem tam diuturnam, ut ejus initium excedat memoriam hominum defacto existentium, ad qualem Præscriptionem immemoriam probandam juxta Mascardum *de probat. volūm. 2. conclus. 1042. n. 5. & 6.* sufficit, si testes quinquaginta quatuor annorum (alii putant sufficere quinquaginta duos, vel etiam quinquaginta & unum) testentur, se semper sic vidisse praticari, nec aliter audivisse ab aliis: quinimo communem esse opinionem, quod per homines modo viventes non sciatur hujus initium, etsi fortassis ex documentis probari posset, ante ducentos v. g. vel trecentos annos contrariam fuisse praxin. De hoc ultimo adhuc fusius ad finem materiæ de Præscriptione. \*

#### Additio III.

\*Quæst. I. Contra quas personas possit introduci Præscriptio? Resp. Contra omnes illas personas, quæ sunt capaces alicujus Juris realis, vel personalis, nec a Jure prohibentur agere, potest Præscriptio introduci. Ita cum communi Pichler *lib. 2. Decret. cit. 26. n. 2. 77. & Schmier Tom. 1. Jurisprudencia. lib. 1. tract. 2. cap. 3. sect. 2 §. 1.* cum Rota Romana in *Rec. p. 4. tom. 1. decis. 316. n. 8.* Ratio est: quia tales possunt præscribere contra alios, ergo merito pati debent, si & Præscriptio fiat contra ipsos. Ceterum, quia Filiusfamilias, quamdiu est sub patria potestate, nequit suo nomine agere quoad bona adventitia ordinaria, nec uxor constante matrimonio quoad dotalia, consequenter merito nec quoad ista Bona contra eosdem sub illo tempore Præscriptio inchoari potest, prout statuit Jura *L. Superannali. 1. §. 2. C. de Annal. Except. & L. In rebus dotal. 17. ff. De jur. dotium.* Vide de hoc plura apud Juristas. \*

#### Additio IV.

\*Quæst. II. An contra personas & earum Jura per actus meræ facultatis introduci queat Præscriptio? Antequam respondeam, suppono, quod per actus meræ facultatis intelligantur illi, quos citra ullam obligationem aut conventionem solent elicere aut omittere homines, vel ex mero arbitrio, vel præcise ex causa liberalitatis, hospitalitatis, vel familiaritatis, quales actus per se loquendo ex communi persuasione hominum sunt, aliquem ad prandium invitare, ab hoc pistore panes accipere, hoc molendinum pro conficienda farina accedere &c. H. N.

Resp. Per actus meræ facultatis non introducitur contra alium Præscriptio. Ita teste P. Schmier *loc. cit. cap. 4. sect. 1. §. 3. n. 71.* communissima DD. & patet ex *L. Viam publicam. 2. ff. De via publica & itinere.* Porro in dubio sæpius emergente, num hi actus, aut omissiones in particulari sint meræ facultatis, nec ne? utiliter vide citatum Auctorem, simulque adverte ex Chlengenperger *lib. 2. Instit. tit. 2. quæst. 20.* quod, si per similes actus prætendens Præscriptionem, prohibeat, vel præcipiat, & alter acquiescat libere, jam magnus exinde favor acquiritur præscribenti. \*

#### Additio V.

\*Dices. Si quis alicui Hospitali per triginta annos continuos elargitur quolibet anno triginta florenos, adstringitur etiam postea continuare, si Hospitali ulterius exigit, quamvis dans reponat, se præcedenter ex mera liberalitate dedisse; ut decidit Rota apud Schmier *loc. cit. n. 81.* ergo per actus etiam liberæ facultatis potest contra aliquem introduci Præscriptio. Resp. concessio antecedenti negando consequentiam: talis enim adstringitur continuare solutionem non ex eo quod



quasi vero contra eundem propter actus liberos etiam NB. cognitos ut tales fuisset præscriptum, sed potius, quia hi actus tanto jam tempore uniformiter continuati præsumuntur in Jure processisse ex putativa dantis obligatione. Unde majoris claritatis gratia potuisset etiam distinguere antecedens: talis adstringitur solutionem continuare, quatenus præsumitur præcedentes actus processisse ex putativa obligatione, conc. antec. si agnoscerentur præcedentes actus tanquam ex mera liberalitate procedentes, neg. antec. & consequentiam. Unde quoad similes donationes, seu largitiones, si longo tempore continuantur, caute prænotandum, ut spontaneæ largitatis protestatio præmittatur, alias enim si similes largitiones constanter, ac uniformiter incertæ personæ, vel certo loco fiant tempore ad præscribendum sufficienti, nec aliunde clare appareant processisse ex mera liberalitate, potius præsumuntur factæ ex putativa obligatione; sicque dans stante tali dubio condemnabitur ad continuationem: nam juxta claram Legem Civilem L. 25. ff. De probat. in dubio, num pecuniæ solutæ debitæ fuerint, vel indebitæ, præsumptio pro eo est, qui accepit; qui enim solvit, numquam ita resupinus est, ut facile suas pecunias jactet.\*

## QUESTIO II.

Quæ Conditiones requirantur ad Præscriptionem?

### SUMMARIUM.

- 3 Ad Præscriptionem quæ conditiones requirantur?
- 9 Ad eam requiritur Possessio.
- \* Quotuplex sit possessio, & qualis ad Præscriptionem requiratur? Addit. I. & II.
- 10 Bona fides.
- \* Qualiter debeat esse constituta bona fides, & quando ea adesse præsumatur? Addit. I. & II.
- 11 Et an cum dubio possit Præscriptio inchoari?
- 12 Vel continuari?
- \* Item an Successori noceat mala fides Antecessoris?
- 13 Justus Titulus.
- 14 Tituli nomine quid intelligatur?
- (a) Ut dictum n. 5. & seqq.
- 15 Titulus, quando requiratur ad Præscriptionem?
- \* Qualis Titulus ad Præscriptionem requiratur? Addit. I. & II.
- 16 Et quod res sit apta præscribi.
- 17 Dupliciter dicuntur res non posse præscribi.
- 18 Vel quia ordinario tempore non usucapiuntur.
- 19 Vel quia nullo modo præscribi possunt.

8 **CONCL.** I. Ad præscriptionem legitimam quatuor requiruntur Conditiones I. Possessio rei legitimo tempore a Jure definito continuata. II. Bona fides. III. Justus Titulus. IV. Ut res illa sit apta præscribi. Ita in re communis: & quamvis nonnulli enumerent quinque, tamen ipsi primam conditionem hic assignatam dividunt in duas, easque omnes sequentibus versiculis comprehendunt:

*Non usucapies, nisi sint tibi talia quinque.  
Sit res apta, fides bona, sit titulus quoque justus.  
Possideas juxte, completo tempore legi.*

9 Prima itaque conditio ad Præscriptionem necessaria est Possessio legitimo tempore a Jure definito continuata. Siquidem ut habet Reg. 3. Juris in 6. Sine possessione præscriptio non procedit: quia Præscriptio fundatur super possessione; ubi autem fundamentum non est, superedificari non potest. Porro hujusmodi possessio debet tempore a Jure definito continuari: de quo tempore, & quantum illud sit, dicetur Quæst. seq.

Additio. I.

\* Est autem possessio quadruplex; alia naturalis, alia civilis, alia mixta ex utraque, & demum alia civilissima. Possessio naturalis dicitur detentio actualis

rei nomine suo, & taliter potest etiam fur rem furtivam possidere. Possessio civilis est animus possidendi cum juris adminiculo, id est jure non refragante, & hanc possessionem civilem fur non habet ob defectum bonæ fidei. Possessio mixta est detentio actualis rei, Juris ac animi adminiculo: & talem possessionem exercet non solum dominus rei propriæ huic actualiter insistent, sed etiam possessor bonæ fidei rei privatæ alienæ, quam credit, seu existimat citra peccatum injustitiæ, ac bona conscientia esse suam, tamque sic actualiter detinet. Possessio civilissima dicitur, qua ex mera dispositione legis, consuetudinis, aut statuti absque alio actu præciso fictione juris reputatur rem aliquam non solum mente, sed etiam actuali possessione detinere, etsi nullo modo eandem rem umquam adhuc apprehenderit actualiter: talem possessionem dicitur consecutus ille, cui extraditur actuale instrumentum super contractum e. g. emptionis cujusdam rei confectum atque erectum, etsi nondum illam rem ex ulla sui parte apprehenderit. L. Emptionem. I. C. de Donat.\*

### Additio II.

\* Ceterum ad Præscriptionem neutiquam in jure censetur sufficiens possessio mere naturalis; cum talem etiam fur respectu rei furtivæ exercere valeat, sed ad inchoandam eandem, si agitur de jure novo vi Præscriptionis obtinendo, requiritur vel possessio mixta, id est, ex naturali & civili conflata, vel saltem civilissima per fictionem Juris mixtæ in quibusdam a jure expressis casibus æquivalens. Ad continuandam autem Præscriptionem semel legitime inchoatam sufficit possessio civilis tantum, qualem habet, qui corpore quidem abiit a rebus semel legitime apprehensis, inde tamen non discessit animo relinquendi possessionem, sed postea reversurus. Ita expresse disponitur L. Licet C. De acquirenda possessione. ibi: possessio (& consequenter Præscriptio) nudo animo acquiri non possit; tamen solo animo retineri potest.\*

10 Secunda Condicio ad Præscriptionem requisita est bona fides: quia, ut inquit Reg. 2. Juris in 6. Possessor mala fidei ullo tempore non præscribit. & alibi. Porro bona fides in proposito aliud non est quam conscientia seu credulitas, qua quis prudenter sibi persuadet, rem esse suam, seu (uti alii universaliter definiunt) qua quis prudenter judicat, se nil agere contra jus quodpiam alterius. Dicitur, prudenter: quia, si ex ignorantia crassa, vel inordinata cupiditate illa persuasio procedat, non erit fides bona.

### Additio I.

\* Obijcies: qui contra clara jura prohibentia etiam ex invincibili ignorantia aliquid facit, est in mala fide apud Juristas; atqui talis adhuc potest præscribere non quidem Præscriptione ordinaria, sed saltem extraordinaria, uti cum Haunoldo, & pluribus aliis tenet Schmier De Præscript. c. 5. sect. 1. §. 5. ergo etiam cum mala fide potest aliquis præscribere, & consequenter bona non est conditio ad Præscriptionem necessario requisita. Major probatur ex L. 7. C. De agricol. & cens. ubi sic habetur: Mala fidei possessorem esse nullus ambigit, qui aliquid contra legum interdicta mercatur. Et hinc absolute loquendo ab ipsis Juristis a ratione malæ fidei soli illi excipiuntur, apud quos ignorantia, seu error Juris toleratur, qui exinde non solum tempore longissimo, sed etiam, si habeant simul titulum, ordinario cum tali errore possunt præscribere; quales sunt Minorenes, ac Milites, & in quibusdam casibus Feminae, atque Rustici L. 9. §. 1. ff. De juris & facti ignorantia. & L. ult. C. Eod. Reliqui omnes excluduntur. Ad hanc objectionem Resp. I. Inprimis minorem non esse ita certam, quin aliqui Auctores contradicant, volentes, quod nullo tempore, etiam extraordinario, cum fide solum juridice mala præscribatur, uti videndum apud Engel Lib. 2. Decret. tit. 26. n. 15. & apud Fachinæum Lib. 8. c. 28.

Sed



Sed quidquid de hoc sit, Resp. II. dist. maj. talis est in mala fide juridica, conced. in mala fide Theologica, neg. maj. ac concessa minori similiter disting. consequens; potest etiam apud illos, respectu quorum ignorantia juris non toleratur, præscribi cum mala fide juridica saltem Præscriptione extraordinaria, transmitt. cum mala fide Theologica, neg. Ut enim juxta *dicenda tract. 8. dist. 2. q. 4. n. 34.* duplex est culpa Theologica & Juridica, ita & duplex mala fides. \*

Additio II.

\* Ceteroquin bona fides in præscribente regulariter præsumitur, nisi mala per graves rationes aliunde probetur *argum. L. Merito autem. ff. Pro socio. Dixi regulariter*; quoniam hæc regula suas quoque habet exceptiones, ubi potius creditur adesse mala fides, nisi contrarium aliunde ostendatur in sequentibus. I. Quando possessor talis rei fuit ab initio per personam fide dignam admonitus, ne hanc rem acceptet, eo quod non spectet ad vendentem, si nihilominus eandem absque ulteriori indagatione comparat. II. Si ante comparisonem talis rei jam sit fama per viciniam; rem emendam non esse venditoris. III. Si filius familias sub patria potestate constitutus ferat res emendas tales, quæ prudenter nequeunt credi Bona Castrensis, vel quali Castrensis, aut extraordinaria adventitia. IV. Si homo graviter suspectus de furto afferat has res emendas; quando vero hæc suspicio non niteretur gravi, sed tantum levi fundamento, deberet talis venditor magis cenferi justus, quam fur, *arg. cap. fin. de Præsumpt.* uti etiam cum aliis advertunt Engel. *l. 2. Decret. tit. 26. n. 14. Schmier Tom. I. Jurisprudentia l. 1. Tract. 2. c. 5. n. 85. & seqq.* V. Ordinarie quoad illos, respectu quorum error juris non toleratur, saltem juridice mala potius, quam bona fides censetur adesse, si contractus cum alio initus, vi cujus prætenderetur præscriptio aliqua longi temporis inchoasse, foret à Jure claro reprobatus, e. g. si emeretur res Ecclesiæ pretiosa sine debitis solemnitatibus, nam qui contra Jura mercatur, præsumitur bonam fidem non habere. *Regul. 82. de Reg. Juris in 6.* de quo fusius in Jure Canonico *l. 2. Decret. tit. 26. §. 3. n. 67. & seqq.* VI. Et ultimo bona fides non adesse censetur, si præscriptionem alleganti fortiter ipsummet cum gravi præsumptione resistat, nec is valeat pro se justum titulum specialem, quo rem debito tempore possidet, vel saltem absque titulo speciali tempus immemorabile allegare, atque probare. Tali modo Jus resistit Clerico extraneo, si contra Parochum suum in aliena Parochia vellet præscribere Decimas, prout totum desumitur clare ex *c. 1. de Præscript. in 6.* Unde talis Clericus deberet, vel probare specialem aliquem titulum, quo Jus decimandi acquisivit, vel tempus immemorabile, quo possedit: alias non poterit decimas præscribere. \*

11 Quæres I. An dubitans, utrum res sit sua vel aliena, censetur habere bonam fidem sufficientem ad Præscriptionem, ac proinde stante tali dubio possit præscribere? Resp. I. Si dubium adfuit ab initio, non potest ita dubitans inchoare Præscriptionem, quamdiu manet illa dubitatio. Ita communis. Ratio est: quia dubitans, an res sit sua vel alterius, injuste agit sibi eam arrogando; cum non sit melior sua conditio, quam alterius, de quo dubitatur, utrum forsan sit Dominus; ergo jam non censetur habere bonam fidem.

12 Resp. II. Quomodo dubium supervenit ei, qui bona fide coepit possidere, non obstat illud Præscriptioni continuandæ, neque interruptit possessionem, dummodo interim possessor moralem diligentiam adhibeat in investiganda veritate rei. Ita communior, & probabilior Doctorum, paucis exceptis. Ratio est: quia in dubio melior est conditio possidentis, juxta *Reg. 65. Juris in 6.* ergo, si is, qui incipit dubitare, jam prius bona fide possederit rem, melior est ejus conditio, quam alterius non possidentis. Unde patet disparitas inter hunc & priorem casum: simulque sequitur, quod quidem stante tali dubio non possit quis inchoare possessionem vel

Anacl. Reiffenstuel. Theol. Tom. I.

(cum non sit melior sua conditio, quam alterius) bene tamen possessionem prius jam bona fide coeptam continuare, non obstante dubio postmodum superveniente; dummodo non intermittat adhibere moralem diligentiam in investiganda veritate rei.

Additio.

\* Quæres ulterius II. An Successor, qui ab altero etiam Theologice malæ fidei possessore acquisivit aliquam rem, censetur habere bonam fidem sufficientem ad Præscriptionem, si hanc malam fidem Antecessoris sui invincibiliter ignoravit? Ratio dubitandi est; quia mala fides Antecessoris saltem fictione juris transfunditur in Successorem immediatum tam universalem, quam particularem. *L. Cum Heres. ff. De divers. temp. Præscript. & Authent. male fidei. C. De præscript. longi temp.* adeoque sicut illa mala fides Theologice talis excludit Præscriptionem Antecessoris, ita pariter de Successore immediato videtur esse sentiendum; cum valorem Præscriptionis potissimum ex Jure, a quo dependet, desumere debeamus.

Ante Respons. notandum, quod Successor universalis ille dicatur, qui in Bona defuncti succedit tamquam Heres sive ab intestato, sive ex testamento. Successor autem particularis vocatur, qui succedit in aliqua re particulari ex titulo ad transferendum habili, puta donatione, permutatione, exemptione &c. H. N.

Respondeo I. Etsi ex communi DD. Successori mediatum non obstat quoad Præscriptionem fides mala Antecessoris; de Jure tamen communi mala fides Antecessoris obstat Successori immediato tam universali, quam particulari quoad Præscriptionem ordinariam longi temporis, puta decem annorum inter præsentem, & viginti inter absentes. Ita communis: & desumitur clare ex Legibus, & rationibus in dubitatione allegatis; dummodo bene advertatur, quod loquamur de Jure communi: nam specialiter discurrendo de Jure Bavarico mala fides Antecessoris neutri ex Successoribus immediatis obstat juxta *tit. 9. art. 7.* de quo videatur insignis Commentarista de Schmid ibidem.

Respondeo II. Loquendo de tempore longissimo triginta vel quadraginta annorum, præsens Auctor Pater Reiffenstuel *l. 2. decret. tit. 26. n. 134. ac seqq.* equidem cum pluribus putat, pariter Successori universali obesse malam fidem Antecessoris sui immediati; alii tamen cum Magnif. D. Chlingensperg. *l. 2. instit. tit. 6. q. 12.* non improbabiler existimant, eam malam fidem non obstare Successori etiam universali. Ratio (& quidem meo judicio valde gravis) adducitur ista; quia fides mala tempore longissimo neque nocet Jure Civili, utpote, quod tali tempore Præscriptionem concederet etiam ipsemet Antecessori habenti fidem malam non solum per fictionem juris, sed etiam (uti ponamus) Theologice talem: neque Jure Canonico, quod tantum reprobat malam fidem Theologicam, tamquam peccati nutritivam, qualis tamen in præsentem non reperitur apud similes Successores, invincibiliter (uti supponitur in casu) ignorantes Antecessoris malam fidem Theologicam, sicque suam possessionem absque peccato inchoantes. \*

13 Tertia conditio ad Præscriptionem requisita est *justus titulus*; non quidem verus, atque a parte rei subsistens (nam hic una cum traditione, atque possessione, rei dominium transfert, ut amplius Præscriptione opus non sit) sed coloratus vel saltem rationabiliter ex facto alieno existimatus, id est, Titulus putativus, nimirum, qui justo errore putatur intervenisse, quamvis revera non intervenerit.

14 Porro Tituli nomine in proposito intelligitur causa ex se habilis ad transferendum dominium, vel usucapiendi conditionem præbens: uti sunt donatio, emptio, transactio, hæreditas, legatum, & hujusmodi. Siquidem per tales modos, si tradens fuit Dominus rei alteri traditæ, transfertur dominium rei in ipsum: si vero non erat Dominus, idque a recipiente ignoratur, saltem usucapiendi seu præscribendi conditionem

R

præstat.



præstat. Unde si talis postmodum bona fide possessionem dictæ rei legitimo tempore continet, sicque Præscriptionem illius compleat, non tenebitur amplius eam restituere vero Dominio, etiamsi postea error deprehendatur, ac manifestum fiat, rem illam a principio fuisse alterius, neque potuisse sibi ab eo, a quo acceperat, tradi Titulo donationis, vel emptionis &c. (a)

15 Notandum vero circa hanc tertiam conditionem, quod Titulus non necessario requiratur in omni Præscriptione (contrarium enim patebit ex dicendis nu. 21. & 22.) sed tunc præcipue, quando jus commune contrarium est præscribenti, vel habetur præsumptio contra ipsum, prout notatur c. 1. de præscript. in 6. Si enim tunc non possit allegari Titulus, censetur quis rem possidere mala fide, nisi allegetur Præscriptio temporis immemorialis, quæ est instar Tituli, imo quo non potest allegari melior Titulus de toto mundo, ut loquitur Fagnanus cap. Cum Apostolica n. 6. De his, quæ sunt a Prælati. Insuper requiritur Titulus ad hoc, ut Præscriptio positiva compleatur, seu abso vatur tempore breviori, atque ordinario, de quo amplius cit. num. 21. & 22.

#### Additio. I.

\* Dices: Si non adest justus Titulus, non acquiritur dominium: ergo, ut vi Præscriptionis acquiratur dominium, Titulus requiritur non solum, uti proxime dictum est, quando Jus præscribenti resistit, aut quando illa tempore ordinario absolvitur, sed ad omnem prorsus positivam etiam extraordinariam Præscriptionem. Antec. prob. ex L. 24. C. de rei vindicat. ibi: Nullo justo Titulo præcedente ratio Juris querere dominium prohibet. ergo. Antequam respondeam, ex Patre Schmier hic Notand. I. Alium esse Titulum generalem, alium specialem. Prior dicitur ille, qui communis est pluribus specialibus, uti esse potest Titulus pro suo; nam omnis, qui Emptione vel Donatione aut Hæreditate rem acquirit, pro suo possidet, atque hic Titulus, quatenus generalis juxta communem non sufficit ad Præscriptionem ordinariam. Posterior (nimirum Titulus specialis) vocatur, qui ad unam dumtaxat speciem restringitur e. g. Titulus Emptionis, Donationis &c. Notand. II. Titulum adhuc aliter dividi in verum, coloratum, existimatum seu putativum, & præsumptum. Verus est causa specialis, ex qua dominium defacto transfertur actualiter, ubi non est necessaria ulterior ulla Præscriptio, e. g. si verus Dominus mihi donet suum equum. Coloratus est causa specialis actualiter concurrens, suapte natura ad transferendum Dominium idonea, esto hic & nunc illud ob defectum tenentem se ex parte tradentis non transferatur: sic, si bona fide emicatenam auream a non Domino, habeo Titulum emptionis coloratum. Titulus existimatus dicitur causa specialis ad transferendum dominium habilis, quam subesse credimus, cum tamen non subsit. Quod contingere potest dupliciter, nimirum vel errore facti proprii, vel ex errore facti alieni: sic, librum aliquem mihi crederem esse a Petro donatum, cum tamen is præcise mihi personaliter commodaverit, foret error facti proprii. Contra si servus meus librum a Petro talem commodato accipiens mihi persuaderet, ab eodem fuisse donatum, esset error facti alieni, seu ex facto alieno proveniens. Demum Titulus præsumptus vocatur, qui non curatur, qualis sit in specie, sed ob diuturnitatem temporis præsumitur in genere aliquis adeste Titulus, quicumque demum sit. H. N. \*

#### Additio II.

\* Respond. ad object. disting. consequens. Ad omnem Præscriptionem positivam, etiam extraordinariam requiritur Titulus vel coloratus, vel præsumptus, conc. semper necessario coloratus, negatur consequentia. Quare finaliter sciendum ex Jure, quod ad Præscriptionem

ordinariam positivam Bonorum mobilium ac immobilium requiratur Titulus aliquis specialis actualiter existens coloratus vel saltem existimatus ex errore facti alieni, qui non solum debet dici, sed de eodem quoque sufficienter constare etiam in foro conscientie, cum leges per ordinariam Præscriptionem non concedant translationem domini, nisi dependenter a simili Titulo. Contra nullatenus sufficit Titulus existimatus ex errore facti proprii, multo minus Titulus præsumptus seu generalis. Contra vero ad Præscriptionem extraordinariam omnino sufficiens est, præter bonam fidem Theologicam, Titulus præsumptus ob temporis diuturnitatem. Et quidem, si bona præscribenda habent fortem contra se Juris resistentiam, Titulus ille præsumptus absque aliquo alio speciali colorato solummodo admittitur, si simul concurrat tempus immemorabile: in aliis autem, ubi Jus specialiter non resistit, sufficit tempus longissimum, triginta nimirum annorum in rebus profanis, & quadraginta in Juribus Ecclesiasticis, ac in aliis Bonis ad Ecclesiam spectantibus, quale tempus, si adest, non amplius oportet esse sollicitum de inquisitione alicujus Tituli specialis. Ita omnia ex variis legibus, quas brevitate gratia hic omitto, probat P. Schmier Tom. I. Jurisprud. lib. 1. tr. 2. c. 5. sect. 2. §. 2. & 3. +

16 Quarta, & ultima conditio ad Præscriptionem requisita est, ut res sit apta præscribi: id est, ut sit talis, in qua per legem, aut specialem rationem non prohibetur fieri Præscriptio, utpote quæ jure humano dumtaxat est introducta, ne rerum dominia diutius essent incerto.

17 Ubi tamen notandum cum Lessio l. 2. c. 6. dubit. 15. quod quædam in Jure dicantur non posse præscribi, seu ufucapi, quia ordinario tempore non ufucapiuntur, quædam vero, quia nullo modo præscribi possunt.

18 Prioris generis sunt res furtivæ, ac res vi possessæ; de quibus §. Furtivæ. Instit. de usucap. dicitur: Furtivæ res, & quæ vi possessæ sunt, non possunt ufucapi. Nam quamvis hæ ab ipso fure, vel raptore numquam possint præscribi defectu bonæ fidei, simulque etiam a tertio aliquo, qui eas bona fide a fure accepit, non præscribantur tempore ordinario, eo quod res furtivæ sint vitiosæ: nihilominus ipsæ ab illo tertio bonæ fidei possessore præscribuntur tempore longissimo, seu post triginta annos, prout Doctores communiter tenent, & probant ex l. Sicut in rem C. de præscript. 30. vel 40. annorum. Similiter §. Res fisci. Instit. de usucap. habetur, quod Res fisci ufucapi non potest, & tamen bona fisco jam incorporata præscribuntur annis quadraginta, L. Omnes. C. de præscript. 30. vel 4. annorum.

19 Posterioris generis, quæ scilicet ex eo in Jure dicuntur non posse præscribi, quia nullo modo nulloque tempore præscribi possunt, sunt in primis res publicæ, id est, publicis usibus deputatæ; ut forum, pons, portus, via publica, & alia hujusmodi. Item res sacræ, & Loca Religiosa, uti Calices, Ecclesiæ, Cœmeteria &c. Deinde homo liber nullo tempore præscribi potest. Insuper Laici non possunt præscribere Jura Spiritualia v. g. Jus decimarum Ecclesiasticarum, Jus conferendi Beneficia Ecclesiastica, & hujusmodi, cum talia nec possidere possint. c. Causam. De præscript. estque communis Doctorum. Secus est dicendum de Jure Patronatus, nam hujus Laici non sunt incapaces, sed habilitati a Summo Pontifice. Plura adhuc de similibus, quæ præscribi nequeunt, videre poteris in Jure Canonico lib. 2. decret. tit. 26. §. 2.

#### QUESTIO III.

Quantum temporis requiratur ad Usucapionem seu Præscriptionem complendam?

#### SUMMARIUM.

20 Res mobiles, & immobiles, quæ?

\* Item quid sit Servitus, & quotuplex? Addit. I. & II.

21 Res mobiles privatorum, quo tempore præscribantur?

(a) Juxta



(a) Juxta dicta n. 18.

22 Et quo bona immobilia privatorum?

\* Item quo tempore Bona immobilia Communitatum, Civitatum, & Principum?

23 Præsentem, aut absentes, qui dicantur?

24 Quid de partim præsentem, partim absente?

\* Quo tempore præscribantur Servitutes? Additio I. & II. ac III.

25 Bona immobilia contra Ecclesiam &c. quo tempore præscribantur?

(b) Quæst. I. n. 4.

26 Specialia quoad hoc privilegia quorundam Monasteriorum, & Ordinum.

27 Quo tempore res mobiles Ecclesiarum, vel Monasteriorum præscribantur?

28 Ad Præscriptionem requiritur etiam possessio continua.

29 Præscriptio interruptitur tum naturaliter,

30 Tum civiliter.

\* Item subinde dormit.

\* Figurantur notabiles casus de Præscriptione.

20 **A**dvertendum, quod, quantum ad propositum, sit distinguendum inter res mobiles, & immobiles. Mobiles sunt, quæ loco moveri possunt: ut pecunia, vestis, navis, animalia &c. Immobiles vero quæ loco moveri non possunt: ut prædia, domus, agri, & hujusmodi. Porro nomine immobilium hic etiam comprehenduntur jura, & actiones ad immobilia (notanter dicitur, actiones ad immobilia: nam actiones ad mobilia regulariter, v. g. actio ad debitum certæ pecuniæ, dicitur res mobilis, sicut ipsa pecunia) atque insuper nomine immobilium intelliguntur Beneficia, census, redditus, jus Patronatus, ususfructus, servitutes prædiorum, & similia: hæc enim omnia fixa manent, & instar immobilium afferunt fructum suum & commoditatem.

#### Additio I.

\* Advertendum ulterius, quod Servitus vulgo, *Grund-Dienstbarkeit*, computata inter bona immobilia communiter describitur, esse Jus quoddam in re alterius constitutum vel in utilitatem rei nostræ, vel saltem in utilitatem personæ nostræ. Quod si tale Jus fuerit principaliter constitutum in utilitatem rei nostræ, dicitur *Servitus realis*, sicque Jus illud adhæret prædio nostro, & id transit etiam ad tertium, ad quem prædium nostrum pervenit. Econtra vero, si tale Jus ex re alterius constitutum foret principaliter in utilitatem personæ nostræ, vocaretur *Servitus personalis* (ab aliis mixta) atque cum persona nostra extingueretur: tales Servitutes personales in Jure reputantur usus, vel ususfructus, aut habitatio. Possunt autem tam personalis, quam realis acquiri per pacta, vel per ultimam voluntatem, vel demum Præscriptione, de qua in præsentia.\*

#### Additio II.

\* Porro Servitus realis dividitur in affirmativam & negativam: item in rusticam & urbanam. *Affirmativa* est Jus aliquid faciendi in fundo alterius, v. g. Jus immittendi tignum in ejus parietem, Jus hauriendi aquam in alterius domo &c. *Negativa* est Jus, quo alterum possum prohibere, ne aliquid in fundo suo faciat, e. g. ne ædes suas altius tollat, vel ne fenestram faciat versus meam Domum &c. *Servitus rustica*, dicitur, quæ ex sua natura & origine debetur prædio rustico. *Urbana* vero quæ ex sua natura & origine debetur prædio Urbano. Appellatur autem vi Juris communis prædium Urbanum illud, quod vi suæ originis & naturæ principaliter factum est inhabitandi, negotiandi, recreandi causa; Rusticum vero, quod principaliter constitutum fuit ad fructus colligendos seu conservandos, vel ad pecora recipienda &c. *Leg. I. ff. commun. præd.* In territorio Bavaricæ specialiter juxta Jus ejusdem *Tit. 26. art. 2.* absolute appellatur *Servitus Urbana* Jus quoddam in *Anach. Reiffensuel Theol. Tom. I.*

alterius domum, horreum, vel alia æqualia ædificia acquisitum. Econtra vero *Servitus Rustica* Jus aliquod constitutum in alterius agrum, campum, sylvam, hortum, piscinam, seu stagnum & similia &c. His notatis, sequitur +

21 **CONCL. I.** Res mobiles privatorum cum titulo, & bona fide præscribuntur triennio: sine titulo autem requiritur spatium triginta annorum. Ita communis. Et quidem prima pars expresse habetur *L. un. C. De usucapione transformanda*, & §. 1. *instit. de usucap.* ubi præmissa mentione de titulo, & bona fide subjungitur: *Cautum est, ut res quidem mobiles per triennium usucapiantur.* Verum hinc excipiendæ sunt res furtivæ, & vi possessæ. (a) Altera pars, quæ itidem est communis, desumitur ex *l. Sicut in rem. C. de præscript. 30. vel 40. an.* Et disparitas est: quia spectata naturali æquitate, ipsaque legum dispositione minus tempus requiritur, & sufficit ad præscribendam rem cum titulo, quam sine titulo, non obstante, quod utrobique requiratur bona fides, sine qua nulla prorsus Præscriptio locum habet.

22 **CONCL. II.** Ad præscribenda bona immobilia privatorum cum titulo, loquendo de Jure communi, requiritur spatium decem annorum inter præsentem, & viginti annorum inter absentes: sine titulo autem utrobique requiritur tempus triginta annorum: uti etiam simile spatium 30. annorum exigitur ad præscribendas ordinarie actiones seu obligationes personales. Ita rursus communis Doctorum. Et quidem prior pars habetur expresse *cit. §. 1. instit. de usucap.* cum concordantiis. Altera vero desumitur ex *cit. l. Sicut in rem. C. de præscript. 30. vel 40. annorum.*

#### Additio.

\* Dicitur notanter in conclusione, ad præscribenda Bona immobilia privatorum: nam Bona immobilia Communitatum Sæcularium, ac Civitatum valde probabiliter etiam cum titulo non nisi annis 30. præscribuntur, uti deduci videtur ex *Novella 111. cap. unico*; ubi quidem ad præscribendum contra loca Religiosa anni 40. requiruntur; contra alias vero personas, seu causas (intellige privilegiatas) tricennalis, seu 30. annorum Præscriptio tamquam sufficiens insinuat; quamvis jure antiquo *L. 23. C. de SS. Ecclesiis*, tam contra loca pia, quam contra civitates, ut præscriberetur, spatium centum annorum fuerit requisitum. Item contra bona immobilia patrimonialia Principum præscribenda (quo pariter Auctores sentiunt de civitatibus Imperialibus, & Statibus liberis Imperii quasi Principi æquiparatis) exiguntur 40. anni *Leg. fin. C. de fundis patrimonial. junctis Notis Gothofredi.* Videatur *Pichler, lib. 2. decret. tit. 26. num. 29. in Candid. Jurispr. abbrev. & Schmier hic cap. 5. nu. 553. ac seqq.\**

23 Ceterum *Præsentem* in proposito dicuntur illi, qui in eadem Provincia commorantur: *Absentes*, qui in diversis Provinciis habitant, sive deinde res in eadem Provincia sita sit, sive alibi. Quinimo Lugo *disp. 7. de just. & jure n. 67.* post alios notat, illud, quod dictum est de diversis Provinciis, defecto habere locum in diversis Territoriis habentibus proprium suum Governatorem, qui soli Principi, vel senatui subest. Juxta quam proinde sententiam illi dicuntur esse præsentem, qui in eodem Territorio habitant: absentes vero, qui in diversis Territoriis commorantur.

24 Addunt Jurisconsulti juxta *Authent. Quod si quis. C. de præscript. longi temporis*, quod, si quis partim absens sit, partim præsens, tempus absentis duplicari debeat, ita ut supra decennium tot anni adjiciantur, quot annis ex decennio fuit absens. Unde, si quis per octo annos præsens fuerit, deinde per duos absens, hi duo absentis anni erunt duplicandi, & adhuc duo addendi; atque ita hæc Præscriptio ante duodecim annos non complebitur.

#### Additio I.

\* **CONCL. III.** Ad præscribendas servitutes personales illas, quæ ab aliis vocantur mixtæ: item ad præscribendas



bendas servitutes reales presentes simul titulo colorato cum bona fide simile tempus requiritur, quale superius ad præscribenda cum titulo bona privatorum immobilia desideratur. Ita desumitur ex *L. ult. C. de præscript. longi temporis*, & videri potest ulterior probatio in Jure Canonico *l. 2. decr. tit. 26. §. 6. n. 156. & seqq.* Hoc solum adverte, quod servitus realis negativa tunc præscribi incipiat, quando Dominus in re sua aliquid facere vult, & alter præscribens eundem bona fide prohibet, inhibendo e. g. ne domum altius tollat &c. \*

#### Additio II.

\* CONCL. II. Quo tempore per Præscriptionem sine titulo acquirantur servitutes reales in rebus alienis, faciendum est discrimen inter servitutes continuas & discontinuas: nam *continua* etiam sine titulo cum sola scientia & patientia illius, contra quem præscribitur, acquiruntur decennio inter presentes & vicennio inter absentes *arg. L. 10 ff. Si servitus vindicetur, & L. 2. C. de servitutibus & aqua*. Econtra vero ad præscribendas sine titulo servitutes *discontinuas* juxta communioem, ac præsertim in Bavaria requiritur tempus immemorabile *L. Servitutes 14. De servit. & Jus Bavaricum Tit. 26. art. 4. & 5.* Ubi nota, quod servitus realis *continua* in Jure nominetur ea, quæ ad continuationem suam non indiget novo facto hominis: talis servitus est Jus tigni immittendi in domum alterius: quando enim semel tale tignum illic immisum est, ulteriori hominis facto non indiget. Econtra servitus *discontinua* etiam quoad continuationem facto hominis opus habet, cum exercitium usus talis servitutis contingat per factum hominis: quales servitutes sunt jus eundi, vel plaustra ducendi per fundum alterius, quæ utique non dicuntur continuari sine novo facto hominis. \*

#### Additio III.

\* CONCL. V. Servitutes reales rusticæ, ac personales ususfructus & usus semel præscriptæ iterum amittuntur, seu extinguuntur absque aliquo alio per solum non usum spacio decem annorum inter presentes, & viginti inter absentes; nec tenetur ille, cujus prædium erat obligatum, alterum monere, ut non negligat suum Jus ex Præscriptione antea acquisitum. Ita communis, & patet ex *L. Sicut ususfructum. C. De servitutibus & aqua*. Dixi notanter: *Servitutes rustica absque aliquo alio amittuntur solo non usu*; nam, ut pariter intra tale tempus extinguantur servitutes urbanæ, neutiquam sufficit solus non usus, sed & insuper exigitur, ut alter, cujus prædium servituti subiectum est, exerceat contra præscribentem bona fide oppositum aliquem actum positivum suæ libertatis possessorium: e. g. ut Jus immittendi tignum in alterius murum iterum deperdatur, non sufficit, ut ille, cui memoratum Jus competit, eodem per decennium non utatur; sed & insuper alter, posito, quod velit præscribens tignum immittere in eum murum, debet bona fide resistere e. g. obstruendo foramen, in quod tignum alias immitteretur: a quo tempore, si prior exinde quiescit, incipit Præscriptio, quod dein tempore ordinario decennii inter presentes completur; uti passim notant utriusque Juris Doctores in *l. Hac autem jura. ff. De servitut. urban. præd.* \*

25 CONCL. VI. Ad præscribenda bona immobilia contra Ecclesiam, Monasterium, vel Hospitale, aut contra alias pias causas requiruntur quadraginta anni: idem dic quoad jura talium, quæ habent circa res immobiles; item quoad jura eorum spiritualia: excepta tamen Ecclesia Romana, contra quam ac ejus jura currit sola centenaria Præscriptio, exceptis etiam nonnullis Monasteriis, ac Ordinibus Religiosis, qui speciali privilegio sunt muniti, ita ut majori, quam quadraginta annorum Præscriptione gaudeant. Ita rursus certa, & communis Doctorum; & clare constat tum ex *Auct. Quas actiones. C. De Sacrosanctis Ecclesiis*, tum ex *cap. De quarta. & c. Ad aures. & c. Ad audientiam. De præscript. &*

alibi sæpe. Nec mirandum, quod in allatis hæcenus Conclusionibus præcipue adducantur auctoritates Juris, non autem rationes: liquidem Præscriptio fundatur in solo Jure humano, tum Civili, tum Canonico, ut jam supra (c) dictum.

26 Porro quod additum est in conclusione de nonnullis Monasteriis, ac Ordinibus Religiosis, est notandum cum Lessio *lib. 2. c. 6. dubitat. 7.* Engel, Molina, & aliis, quod Monasteria quædam, & Ordines specialiter sint privilegiati, ut majori, quam quadraginta annorum Præscriptione gaudeant; ita videlicet, ut minoris temporis Præscriptio contra eos non valeat. Sic enim Eugenius IV. de plenitudine potestatis concessit Ordini S. Benedicti, ut res immobiles non nisi annis sexaginta possint contra ipsum præscribi: & idem concessit Julius II. Congregationi S. Salvatoris. Quinimo Ordini Cisterciensium, nec non & Ordinibus Mendicantium, primum in Hispania, & deinde per communicationem in Superiori Germania, a diversis Pontificibus concessam esse centenariam Præscriptionem, docet post Arnoldum Rath, & alios Ludovicus Engel in Collegio Juris Canonici *tit. de præscript. n. 33.*

27 Dicitur notanter in conclusione: *ad præscribenda bona immobilia contra Ecclesiam &c.* Nam utrum res mobiles ad Ecclesiam, vel Monasteria pertinentes usucapiantur trienniali possessione; prout *n. 21.* dictum est de rebus mobilibus privatorum, vel an gaudeant Præscriptione quadraginta annorum, variant Doctores. Et quidem res Ecclesiasticas mobiles trienniali possessione usucapi, affirmant Lessius *loc. cit. n. 22.* Layman, Vallensis, Pirhing, alique plures, idque probant ex *Auct. Quas actiones. C. De SS. Ecclesiis*. Econtra vero easdem pariter gaudere præscriptione quadraginta annorum, æquius esse putant Abbas Panormitanus *c. 1. de in integrum restit.* & Hostiensis, eo quod Jus Canonicum, concedens Ecclesiis aliisque piis locis Præscriptionem quadraginta annorum, inter res mobiles & immobiles non distinguat, & proinde nec nos distinguere debeamus. Et hanc posteriorem sententiam, præsertim circa bona Ecclesiastica mobilia pretiosa absque debitis solemnitatibus alienata, recipiendam censet Engel *loc. cit. n. 28.*

28 CONCL. VII. Præter tempus prædictum requiritur insuper ad Præscriptionem, quod possessio fuerit continua, & non interrupta. Ita communis. Nam Jura inter alias condiciones ad Præscriptionem requirunt, quod ejusmodi possessio fuerit continua, ut patet ex definitione ipsius *n. 2.* allato: quando autem ipsa interruptitur, hoc ipso continua non est.

29 Duplex autem est interruptio Præscriptionis, una naturalis, altera civilis, ut notat Glossa communiter recepta in *c. Illud. De præscript. Naturaliter interruptitur Præscriptio*, quando aliquid incipit deficere ex his, quæ necessario requiruntur ad Præscriptionem: ut si successu temporis superveniat mala fides, seu certa notitia rei alienæ, aut, si quis amittat possessionem rei tam naturalem, quam civilem, non obstante, quod id fiat per injuriam alterius.

30 *Civiliter interruptitur Præscriptio*, quando manentibus naturalibus Præscriptionis interpellatur possidens per actum aliquem juridicum, qui ex legum dispositione talem interruptionem inducit, ut puta per contestationem litis, vel etiam per oblationem Libelli, ac citationem Rei, prout desumitur ex *l. 2. & 3. C. de annali exceptione*. Si tamen auctor succubuerit in lite, vel litem sponte deseruerit, aut si animo tantum interrompendi Præscriptionem litem moverit (quod ex circumstantiis juxta prudens arbitrium Judicis colligendum erit) non interruptitur Præscriptio. Glossa *c. Placuit. §. Potest. 16. q. 3. Pirhing tit. de Præscript. n. 134.* Lessius *n. 49.* & alii.

#### Additio.

\* Quæres, an idem sit interrompi Præscriptionem, & dormire eandem? Respondeo, neutiquam; nam quando interruptitur Præscriptio, tempus præteritum non amplius valet, sed debet de novo inchoari. Econtra vero, quando



quando præcise dormit, equidem tempus illud intermedium dormitionis non numeratur; at tamen remoto illo, ob quod Præscriptio dormiebat, impedimento, tempus præteritum adhuc computatur, ac cum subsequenti connectitur. Taliter dormire dicitur Præscriptio in ætate pupillari; item tempore belli, aut pestis, si Jus tunc non dicatur; similiter Præscriptio contra Ecclesiam aliquam si Prælati ejusdem sit dilapidator, aut fuerit mortuus, usque ad novum Rectorem &c. Vide Jus Can. lib. 2. decret. tit. 26. §. 7. n. 192. & seqq. \*

# A P P E N D I X

## Continens septem Casus de Præscriptione.

\* Ut praxis hujus materiæ magis capiatur, & scioli illi, qui dum vel parum de Præscriptione in Theologia audiunt, illico tamquam Juvenes Confessarii varios etiam difficiles desuper sibi propositos casus resolvunt absque maturo examine prævio, num vere adsint omnes conditiones ad legitimam Præscriptionem requisitæ &c. deinceps cautiore fiant, consultum duxi per modum Additionum septem subungere casus de Præscriptionibus, quorum sit \*

### Additio I.

\* I. Petro nobili, ejusque antecessoribus per plures annos uniformiter factæ sunt certæ præstationes annuæ a quibusdam suorum subditorum; modo autem Petrus per-lustrando acta sui archivii nihil invenit de hac obligatione, quinimo tales se produnt circumstantiæ, quæ potius docent contrarium, nempe obligationem ad hanc solutionem non adfuisse unquam. Quærit itaque ex Confessario, an hoc non obstante possit bona conscientia deinceps titulo Præscriptionis similes præstationes recipere? Respond. Si non constet positive de mala fide Theologica ante completum tempus, & hæ præstationes triginta annis continuis processerint etiam ex titulo tantum præsumpto, possunt eadem licite continuari titulo Præscriptionis, dummodo non habeant conjunctam simul resistantiam Juris. Quod si vero dicta Juris resistantia fuisset his exactionibus annexa, requiretur ad legitimam Præscriptionem absque titulo tempus immemorabile. Ita præter P. Franciscum Schmier P. Pichler lib. 2. tit. 26. num. 84. Ratio patet ex jam dictis hac tertia quæst. quia nempe tales obligationes sunt personales: personales autem obligationes introducuntur, & extinguuntur annis 30. ordinariæ l. 3. c. de Præscript. 30. ann. ubi autem Jus resistit, tempore immemorabili absque titulo cap. 1. de Præscript. in 6. Illud adhuc superaddo notanter, quod non tantum debeat dici, adesse tempus immemorabile (prout sæpius aliqui sibi blandientes facile id credunt in suum commodum absque ulteriori indagatione) sed, & de eodem sufficienter constare.\*

### Additio II.

\* II. Paulus pariter nobilis inhærens vestigiis Antecessorum suorum exigit bona fide a Colonis, si qui moriuntur, passim etiam ab habentibus emphyteusim hæreditariam duplex Laudemium, nimirum pro discessu & accessu de qua tamen rusticorum obligatione duplicis Laudemii nihil positive constat neque ex libris emphyteuticis, neque ex prævio aliquo legitimo pacto speciali cum primo illo domino directo, qui res illas in emphyteusim hæreditariam dabat, ac cum Colonis desuper inito. Et quia hisce stantibus audit ab alio docto, similem exactionem duplicis Laudemii esse in Jure prohibitam, quærit ex Confessario, an ergo graviter peccet hanc praxin tanto tempore jam continuatam prosequendo Titulo Præscriptionis.

Ante responsionem nota hic breviter I. Quod emphyteusis sit ille contractus, quo res aliqua immobilis cum translatione domini utilis, retento dominio directo, seu proprietate, alteri fruenda & colenda pro annua

pensione, in recognitionem domini directi præstanda, conceditur; ubi ille, qui concedit, dicitur in Jure Dominus directus: alter vero, cui sit concessio, vocatur Colonus seu emphyteuta. Nota II. Quod emphyteuta quatuor habeat obligationes, nimirum Primo, ut servet pacta in hoc contractu inita. Secundo, ut colat & conservet rem emphyteuticam. Tertio, ut singulis annis solvat certam pensionem, quæ appellatur Canon annuus. Quarto, ut facta aliqua rei emphyteuticæ alienatione domino directo det Laudemium. Nota II. Quod Laudemium de Jure communi sit quinquagesima, de Jure autem Bavarico juxta locorum observantiam ordinariæ vigesima pars æstimationis rei emphyteuticæ. Dictum Laudemium de Jure communi circa specialia pacta unicum, & quidem juxta Jus commune in sola alienatione rei emphyteuticæ, de Jure autem Bavarico etiam in aliis mutationibus domino directo a Colonis dandum conceditur l. 3. prope finem. C. de jure emphyteutico. Ubi plura desuper in emergentia casus vide apud AA. infra citandos; nos enim hic immoramur in sola Præscriptione. H. N.

Respondeo, talem Nobilem non posse continuare bona conscientia quoad emphyteuses hæreditarias exactionem secundi Laudemii mortualis pro discessu, nisi ostendere queat, sic fuisse practicum tempore immemorabili. Vide desuper Jus Canonicum Patris Reiffenstuel lib. 3. decret. tit. 18. n. 231. August. Michel Volum. 2. Theolog. Canonico-Moralis part. 1. tract. 2. §. 1. punct. 2. num. 13. & seqq. Ratio est: quia tali Præscriptioni resistit Jus l. 3. C. De Jure emphyteutico: atqui juxta dicta ex cap. 1. De Præscriptione in 6. ubi resistit Jus sine specifico titulo requiritur ad Præscriptionem tempus immemorabile: ergo pariter hic. Quod etiam de Jure Bavarico gratis concedit Chlingensperg. lib. Feud. c. 8. q. 8. object. 3. non solum quoad feuda, sed etiam quoad emphyteuses, si loquamur de exactione secundi Laudemii mortualis, quod petitur ob discessum per mortem emphyteutæ: quamvis clarissimus Commentarista in Jus Bavaricum Schmid Tit. 21. art. 21. n. 3. universaliter ad introducendam Præscriptionem hujus Laudemii per modum discessus tantummodo exigat in Bavaria tempus 30. annorum ex eo valde gravi fundamento, quia nimirum Jus Bavaricum huc Laudemio per modum discessus non resistit, sed generaliter, ac positive, ubi est in observantia, ejus continuationem permittit. Idem dictus auctor repetit semicent. 1. Controvers. 31. n. 14. & seqq. \*

### Additio III.

\* III. Coloni aliqui cujusdam Nobilis obligantur præter triticum singulis annis dare quasdam præstationes culinarias, puta anseres, gallinas, & pullos &c. quas tamen intermiserunt ultra 30. annos. Dominus horum subditorum perlustrans aliquando exactius libros suos emphyteuticos, invenit hanc rusticorum obligationem, huicque conformiter petit has præstationes culinarias deinceps quoque faciendas, ac insuper refarcitionem præcedentium hucusque omissarum. Rustici sese excusant ex eo, quod ultra 30. annos nemo hæc unquam ab ipsis exegerit. Quæritur ergo, an exinde prætereundum queant Præscriptionem tam quoad præteritas omnes, quam quoad præstationes culinarias futuras? Ante Resolutionem reflexio facienda est ad Quæstionis I. Conclusionem quartam, in qua Præscriptionem divisimus in positivam, & privativam, quarum ultima foret prætensa a Rusticis, eo quod non exigant vi hujus sibi quidpiam præstari, sed potius sese a præstatione liberari, sicque Dominum suo jure per Præscriptionem privari. H. N.

Respondeo, equidem DD. in hoc puncto non convenire: communior tamen, & meo judicio verior est sententia eximens rusticos titulo Præscriptionis privativæ a præstationibus culinariis tam præteritis, quam futuris. Ita sentiunt Abbas Panormitanus, Paulus Castrensis, Alexander de Imola, Joannes Andreas, Bartolus, Baldus, Barbosa, Cardinalis Tuscus, & alii apud Franciscum Schmier hic c. 4. sect. 2. num. 199. & seqq. Ratio est



prima, quia juxtacalum primum jus exigendi tales præstationes annuas Præscriptione 30. annorum acquiritur; ergo etiam a pari tali tempore extinguitur, præsertim cum L. 3. ac 4. C. de præscript. 30. vel. 40. annorum omnis actio Præscriptioni longissimi temporis extingui dicatur. Ratio secunda desumitur ex leg. 26. C. de usuris, ubi a pari etiam obligatio solvendi usuras, quæ alias foret annua, unica Præscriptione temporis longissimi tollitur. Ratio tertia eruitur ex Jure Canonico c. 4. § 6. de Præscript. ubi annua obligatio solvendi Decimas Episcopo vel Parocho Præscriptione tollitur, si eadem solutio non fuerit facta annis quadraginta: ergo etiam obligatio solvendi annuas præstationes extinguetur, si ea non fuerit observata triginta annis; nam cur in antecedenti requirantur plures (nimirum quadraginta anni) ratio est, quia ibidem præscribitur contra Jurâ Ecclesiastica, ubi juxta jam dicta desiderantur anni quadraginta; alias vero regulariter triginta. L. 3. § 4. C. de Præscript. 30. vel 4. annorum.\*

## Additio IV.

\*IV. Jacobus Decanus cujusdam Ecclesiæ Collegiæ, perlustrando Capituli Archivium, ex antiquis instrumentis deprehendit, aliquot Anniversaria non servari conformiter Fundationi, utpote, cum ibidem semper Missæ aliquot privatæ simul cum solemni dicendæ fuerint injunctæ, quæ tamen non amplius per plurimos annos celebrantur. Quærit ergo is ex Confessario suo, an Missæ privatæ hucusque bona fide intermissæ non debeant resarciri; item num praxis illa celebrandi solum Officium solemne possit etiam deinceps continuari, cum non constet positive per gravia fundamenta de aliqua reductione Missarum auctoritate legitima facta, prout supponitur.

Resp. Si praxis ista obtinuit tempore immemoriali, potest bona conscientia continuari, nec est ulla obligatio resarcitionis, cum nihil possit assignari, quod obstaret tali Præscriptioni. Ita la Croix lib. 4. Theol. moral. num. 852. Hancque sententiam quoad potestatem præscribendi contra onera Missarum secuta est Rota, uti testantur Card. Tuscus Litt. S. concl. 434. n. 9. Corad. lib. 1. cap. 6. num. 324. Quinimo apud la Croix loc. cit. non desunt citati etiam graves Auctores, qui idem defendunt de tempore longissimo; quod tamen ultimum mihi, nisi simul adsit, & ostendi possit specialis aliquis titulus, apparet difficilior; cum videatur adesse resistentia Juris: quoniam Concilium Trid. sess. 25. cap. 5. de reformat. prohibet specialiter derogari fundationibus, & Bulla Pii IV. confirmans continet decretum irritans, quidquid contra factum fuerit.

## Additio V.

\*V. Joannes Beneficiatus longissimo tempore legit singulis septimanis quinque Missas pro Fundatoribus, credens se taliter esse obligatum; modo autem acquires antiquum fundationis instrumentum deprehendit in eodem tantummodo peti singulis hebdomadibus tria Sacra. Quærit itaque ex Confessario, an per illud longissimum tempus contra se ipsum sit exinde introducta Præscriptio, ut teneatur etiam deinceps hebdomatim continuare celebrationem quinque Missarum pro fundatoribus, vel an possit bona conscientia una cum suis Successoribus solum legere tres in futurum? Respondeo, rem non carere sua difficultate, uti poterit videri apud P. Schmier; si enim potest aliquis præscribere contra Fundatores ad extinguendum numerum Missarum conformiter dictis præcedentibus, cur non poterit præscribi a Fundatoribus contra Beneficiatum ad illum numerum Missarum augendum? Hoc tamen non obstante cum eodem auctore sentio probabilior, quod contra Joannem Beneficiatum non sit introducta Præscriptio, adeoque possit deinceps hebdomatim tantum applicari tria Sacra pro Fundatoribus. Ratio est fundamentalis; quia, ut contra ipsum procederet Præscriptio, Fundatores præscribentes jus illud,

deberent habere voluntatem præscribendi contra dictum Beneficiatum; ut sic acquirant possessionem: sed non censentur habere eam voluntatem utilem ad possidendum & præscribendum: ergo. Min. probatur; vel enim tales Fundatores jam sunt mortui, prout plerumque contingit, & hi nil censentur de terrenis amplius possidere: vel adhuc vivunt, & isti utpote bene scientes ex instrumento a se erecto, non esse obligationem celebrandi plura, quam tria Sacra, non præsumuntur de novo velle obligare ad quinque; nam alias, si scientes contrarium, vellent novum onus imponere, forent in mala fide: ergo. Ita P. Schmier approbante & confirmante Facultate Juridica Salisburgensi resolvit in sua Jurisprudencia tom. 1. lib. 1. tract. 2. cap. 4. sect. 2. §. 1. num. 183. ubi etiam contrarias solvit objectiones. Idem tenent Tamburinus & Pasqualigus cum la Croix lib. 4. n. 853.\*

## Additio VI.

\*VI. Ut Andreas obtineret Canonicatum, consanguineus ejusdem Turnario promisit, ac etiam dedit pingue honorarium in scio Andrea. Postquam jam integro triennio Andreas pacifice Beneficium cum titulo colorato legitimæ institutionis possedit, devenit in notitiam hujus rei; hinc dubitans quærit ex Confessario, an teneatur Canonicatum dimittere, vel num possit titulo præscriptionis ulterius retinere? Ante Respons. Nota I. tamquam certum, quod Simonia adhuc sit, si temporale propter Beneficium datur a tertio etiam ignorante illo, qui Beneficium acquirit. c. Quinque 1. q. 5. quapropter si Andreas hunc simoniacum ingressum resciret ante triennium, teneretur aut Canonicatum dimittere, aut dispensationem impetrare. Nota II. quod per Regulas Cancellariæ ille, qui Beneficium aliquod per triennium pacifice possedit, nullatenus desuper molestari queat: & si alius postea obtineret contra hunc possessorem litteras ad dictum Beneficium, nullæ forent, ac irritæ, H. N.

\*Resp. Completo bona fide triennio potest Andreas Canonicatum titulo Præscriptionis tuta conscientia retinere absque ulteriori aliqua dispensatione. Ita Navarrus lib. 3. consil. 30. de Præbend. Thomas Sanchez in Decalog. lib. 7. c. 29. n. 89. Lessius lib. 2. cap. 35. dub. 25. n. 140. & alii contra Leurenium part. 2. Fori Benef. quest. 827. ac Convarruviam Regul. possess. part. 2. §. 10. num. 10. conclus. 6. § 7. Ratio est: quia tam fortes hic in favorem triennalis possessionis ponuntur clausulæ, quam in alia Præscriptione: ergo pariformiter non solum pro foro externo, sed etiam pro interno, sicut in aliis Præscriptionibus erunt intelligendæ. Nec dicas, ab hac triennali possessione excipi ingressum simoniacum, qualis erat in præsentia. Resp. enim excipi ingressum simoniacum per Beneficiatum vel saltem eo approbante factum, non autem ipso ignorante per tertium commissum. Videatur Jus Canon. Reiffenst. lib. 5. tit. 3. num. 278.\*

## Additio VII.

\*VII. Mathias Colonus Bavaricæ præten dit, quod habeat prædium suum jus cædendi ligna, & pascendi pecora in fundo Joannis, eo quod id ipsum jam antecessores sui ante plurimos annos absque ulla contradictione exercuerint. Quærit ergo Joannes ex Confessario, an possit bona conscientia contra Mathiam litem movere, eo quod nequeat ille aliquem hujus juris prætensi titulum specialem exhibere? Respond. cum hæc sit servitus, vel quasi servitus discontinua, quæ juxta dicta ac præsertim de Jure Bavarico absque titulo speciali non præscribitur, nisi tempore immemoriali, non tenetur ulterius Joannes tale præjudicium tolerare, sed potest causam suam in judicio prosequi, in quo etiam victoriam obtinebit, nisi Mathias probare queat tempus immemorabile: ubi nota, quod ea, quæ sunt auditu perceptibilia, per auditum, & visibilia (uti in præsentia) per visum probentur.

Porro



Porro per testes annorum quinquaginta quatuor, vel saltem quinquaginta unius probatur tempus immemoriale, si quilibet eorum deponat. I. Quod ita viderit praticari per quadraginta annos, nec sciat tempore vitæ suæ aliter fuisse praticatum. II. Quod neque alios noscat, qui vidissent, aut a videntibus ipsimet audivissent initium talis usus, seu quod tempore suæ vitæ praticatum fuisset contrarium. III. Quod insuper eorum, qui hujus praxis notitiam habere possunt, communis sit opinio, se pariter nec vidisse initium hujus

usus, nec ab ipsismet videntibus audivisse: prout talem opinionem seu famam communem existare, per duos vel tres probari poterit. Ita deducitur ex L. 28. ff. de probat. ibi: Si Arbitrarius animadvertere debeat, an operis facti memoria exstet, hoc ei querendum est, an aliquis meminerit, id opus factum esse &c. Cum interim nemo sit eorum, qui id meminerit, quibus Consulibus id viderit: sed cum omnium hæc est opinio, NB. nec audisse, nec vidisse, cum id opus fieret, neque ex eis audisse, qui vidissent, aut audissent &c. \*

## T R A C T A T U S V I I I . D E C O N T R A C T I B U S .

I N T E R alios modos acquirendi rerum Dominium recte connumerantur Contractus, sic dicti, quia (ut inquit Doctor Subtilis 4. dist. 15. qu. 2. §. De secundo) ibi simul trahuntur voluntates partium; trahitur enim iste ad transferendum in illum a commodo, quod expectat ab illo, vel quod expectat transferendum in se. Et de Contractibus procedit illud vulgatum Doctorum: Quod a principio est voluntatis, ex postfacto fit necessitatis, id est, post Contractum semel rite celebratum arg. l. Si cut. C. De obligat. & action. Unde haud immerito de Contractibus, utpote quorum obligatio non solum pro Foro externo, verum etiam in Foro conscientiae atque interno locum habet, impræsentiarum agitur.

### D I S T I N C T I O I .

#### De Contractibus in Genere.

#### Q U Æ S T I O I .

#### Quid, & quotuplex sit Contractus?

#### S U M M A R I U M .

- 1 Contractus, unde sic dicti?
- 2 Contractus accipitur large, & stricte.
- 3 Contractus large, seu pactum, quid?
- 4 Requirit necessario plurium consensum in idem.
- 5 Et quidem reciprocum.
- 6 Promissio, antequam sit acceptata, non obligat.
- 7 Discrimen inter promissionem Deo, & homini factam.
- 8 Contractus proprie, quid?
- 9 Solvitur objectio.
- \* Contractus quotuplex?
- 10 Contractus explicitus, & implicitus seu interpretativus, ac quasi Contractus, quid?
- 11 Contractus lucrativus seu gratuitus, & onerosus, quid?
- 12 Contractus absolutus, & conditionatus quid?
- (a) Tract. 6. Dist. 2. num. 24.
- \* Conditio adjecta potest esse honesta vel non. Et quid utrobique sentiendum? Addit. I.
- \* Qualis sit differentia adicere quidpiam Contractui tamquam conditionem, & adicere tamquam modum? Addit. II.
- \* Solvitur objectio. Addit. III.

2 C O N T R A C T U S dupliciter accipitur, large & stricte. Contractus large acceptus coincidit cum Pacto generatim sumpto; quo modo omnem prorsus Contractum, sive gratuitum, sive onerosum sub se comprehendit. Contractus stricte acceptus sub se complectitur solum Contractum onerosum, seu reciprocum, qui nempe ex utraque parte pacipientium, seu contrahentium parit obligationem. Hoc ipsum ut una cum annexis clarius intelligatur, sit

3 C O N C L . I . Contractus large acceptus, seu Pactum generatim sumptum est duorum, vel plurium in idem placitum, & consensus. Ita L. 1. ff. de pactis. Secus 4. dist. 46. q. 1. §. Ad solutionem, & alii.

4 Dicitur: duorum, vel plurium placitum, & consensus. Nam, ut recte cit. l. 1. notatur, nullus est Contractus, nullaque obligatio, quæ non habeat duorum vel plurium consensum, seu conventionem in idem; id est, plurium in unum, unamque sententiam consensum in ordine ad aliquid dandum, faciendum, vel non faciendum. Unde, si unus quidpiam donavit, aut promisit, alter vero id non acceptavit, aut recusavit, jam non fuit Contractus, neque oritur inde aliqua obligatio.

5 Necesse insuper est, ut talis duorum consensus sit reciprocus, id est, inter se mutuo factus: quia ad Contractum non sufficit, ut quovis modo duo in idem consentiant, sed requiritur, ut consensus suos in se mutuo dirigant. Hinc donatio & promissio, etiam si a duobus communi consensu fiat respectu unius tertii, antequam sit acceptata ab illo tertio, ejusque consensus reciprocus accedat, non habet rationem Contractus seu Pacti, sed primum post ejusdem acceptionem.

6 Quinimo ex hoc generatim inferitur, quod nulla promissio seu pollicitatio, antequam sit acceptata, pariat quandam obligationem, ne quidem naturalem, aut in Foro conscientiae. Unde si alteri promissisti, aut donasti quidpiam interius solummodo, non obligaris. Idem dicendum, quando tu signo externo tuam promissionem vel donationem manifestasti, alter vero eam necdum intellexit, aut non acceptavit: siquidem in neutro casu fuit Contractus ob defectum reciproci consensus: & consequenter nulla obligatio inde subsecuta.

7 Et hinc discrimen est inter Votum seu Promissionem DEO factam, & Promissionem homini factam: illa quippe, licet interno tantum animo concepta sit, illico a DEO cordium inspectore cognoscitur, & acceptatur: hæc vero, nisi externo signo manifestata, & Promissario indicata fuerit, ab eo neque cognosci, neque acceptari potest: nam homo videt ea, quæ parent, Deus autem insuetur cor. 1. Reg. 16. Et hinc plures Doctores, de pacto inter homines existente loquentes, asserunt, quod pactum sit duorum reciprocus in idem consensus, signo sensibili expressus: nam aliter homines nequeunt consensum alterius cognoscere, & acceptare.

8 C O N C L . II . Contractus proprie, ac in rigore accipitur pro pacto reciproco oneroso, quod ex utraque parte pacipientium seu contrahentium obligationem parit. Unde recte definitur L. Habeo 19. ff. De verb. signif. dicendo: Contractus est ultro citroque obligatio, id est, duorum vel plurium in idem consensus, ultro citroque obligationem pariens: qualis est Emptio, Venditio, Locatio, Conductio, & hujusmodi, ubi



venditor est obligatus ad dandam mercedem, emptor vero ad refundendum pretium &c.

9 Nec dicas. Inter Patrem & filium, subditum & Superiorem &c. datur mutua sive ultro citroque obligatio, non tamen Contractus; ergo data Contractus definitio non est bona. Resp. enim distinguendo antecedens: inter Patrem & filium, subditum & Superiorem &c. datur mutua obligatio, orta ex Justitia commutativa, negatur, orta ex aliis Virtutibus, ut puta ex Pietate, Observantia, & hujusmodi, conceditur antecedens, sed negatur consequentia; nam Contractus est ultro citroque obligatio, quæ oritur ex motivo Justitiæ commutativæ post mutuum contrahentium consensum.

#### Additio.

\* Solet autem Contractus ut sic proxime explicatus diversimode a Juristis dividi: puta in Contractum seu *pactum nudum*, & in *vestitum*, item in *nominatum* ac *innominatum*: præterea in Contractum *bonæ fidei*, & *stricti Juris*. Ubi *Pactum nudum* dicitur illud, quod in sola conventionione paciscentium consistit absque aliquo alio extrinseco, quo vestiatur: idque habet quidem obligationem naturalem, non tamen civilem, id est, obligat quidem in conscientia, non tamen parit actionem de rigore Juris civilis, ne lites nimium multiplicentur. *Pactum vestitum* nominatur, qui præter conventionem partium aliquod aliud Juris adminiculum accedit, ratione cujus actio civilis in Foro externo oritur: puta si nomine specifico in Jure exornetur, uti Emptio, Venditio, Locatio, Conductio &c. vel si scriptura, aut juramento interveniente vestiatur &c. Contractus *nominatus* appellatur, qui proprium specificum in Jure nomen habet, e. g. Emptio, Venditio &c. hincque eo ipso etiam talis Contractus est pariter pactum vestitum: *Innominatus*, qui tali proprio specifico nomine est destitutus: cujus ultimi quatuor sunt modi. I. *Do, ut des*: e. g. do vinum, ut des triticum. II. *Do, ut facias*: e. g. do triticum, ut mihi excolas vineam meam. III. *Facio, ut des*: e. g. excolo tibi vineam, ut mihi des triticum. IV. *Facio, ut facias*: e. g. reficiam tibi domum tuam, ut tamen tu mihi excolas meum hortum. Demum Contractus *bonæ fidei* est ille, in quo Judex potest multa decernere ex æquo & bono, etsi ea verbis expressa non fuerint: tales Contractus sunt Emptio, Venditio, Locatio, Conductio, & alii §. *Actionum. Instit. de action. enumerati*. Contractus *stricti Juris*, in quo Judex ad rigorem verborum præcise attendit, L. 99. ff. *de verb. obligat.* prout similes censentur Mutuum, Census, Emphyteusis &c. sed de his omnibus plura Juristæ: in specie videatur Reiffenstuel lib. 1. *decret. tit. 35.* quæ autem magis concernunt Theologos sumendo Contractum in sensu aliquo largiori, prout nimirum est plurium consensus in idem, adhuc fit \*

10 CONCL. III. Contractus variz sunt divisiones. Et quidem is primo dividitur in explicitum & implicitum. Contractus *explicitus*, seu formalis est, qui fit expressa partium conventionione, & hic proprie dicitur Contractus *Implicitus*, seu *interpretativus* est, qui fit implicate solum, & absque ulla expressa pactione: qualis est Tutela (id est, quando quis in se suscipit officium Tutoris) & quodvis aliud officium. Qui enim aliquod officium suscipit, eo ipso sese obligat erga alterum, & alter obligatur erga ipsum, juxta leges & consuetudines circa tale officium receptas, neque requiritur alia conventio expressa: & hic dicitur *quasi Contractus*.

11 Deinde Contractus in communi dividitur in lucrativum, & onerosum. Contractus *lucrativus* (quem & *gratuitum* appellant) est, in quo nihil rependitur: ut Promissio, Donatio, Commodatum &c. Huc referri possunt Testamentum, & Legatum, quæ sunt donationes quædam in diem. Contractus *onerofus* est, in quo

aliquid loco ejus, quod datur, reddi debet, vel præstari, ut fit in Emptione, Locatione, & hujusmodi.

12 Tertio Contractus dividitur in *absolutum* & *conditionatum*. Ille est, qui fit independenter a quacumque conditione: Hic vero, qui fit dependenter ab aliqua conditione extrinseca; v. g. dono tibi meum equum, si eris promovendus ad tale officium, vel si navis ex Indiis advenerit. Porro valor Contractus conditionati pendet ab eventu, seu veritate conditionis adjectæ, eaque non existente, seu non impleta nullam inducit obligationem, idque defectu consensus, eo quod quis non aliter contrahere intenderit, nisi sub eventu talis conditionis extrinsecæ. Et additur *conditionis extrinsecæ*: nam conditiones, quæ tacite de jure insunt, v. g. si potero, si alter non resiliat a Contractu &c. non reddunt Contractum conditionatum, prout in simili de Juramento superius (a) dictum est.

#### Additio

\* Porro circa Contractum conditionatum illud adhuc restat notandum, quod conditio adjecta possit esse vel honesta seu indifferens, vel inhonesta. Quando conditio adjecta fuerit honesta seu indifferens (pro ut exempla habes in superiori numero) tunc equidem ante adventum conditionis nulla actualis oritur obligatio implendi Contractum; interea tamen tenetur sic conditionate promittens expectare eventum conditionis, ita ut interim nequeat pro libitu suam promissionem ab altero acceptatam revocare. Econtra vero, si illa conditio fuerit inhonesta, e. g. si Titius ad Bertham dixisset, *dabo tibi decem florenos, si concesseris usum corporis tui*, talis promittens haud dubie non tenebitur expectare eventum tam turpis conditionis, sed poterit promissionem hanc pro libitu suo illico revocare. Quodsi tamen Titius eandem non revocasset, & Bertha sub pacto e. g. recipiendi decem florenos usum corporis actu concessisset, obligaretur Titius, saltem de Jure naturali loquendo, extradere decem florenos, uti Sporer traët. 6. in Decalog. c. 2. sect. 1. mm. 18. recte advertit. \*

#### Additio II.

\* Quæres, an idem sit adjicere quidpiam Contractui tamquam *conditionem*, & addere huic tamquam *modum*? Respondeo, ista duo inter se esse distinctissima, uti patebit ex terminorum explicatione: nam si adjicitur veluti præcise modus absque eo, quod simul sit causa motiva, tunc adjungitur incontinenti tamquam accessorium Contractui substantialiter in se jam completo. Econtra vero, si additur tamquam conditio, tunc ingreditur substantiam Contractus tamquam causa motiva, ita ut sine eadem Contractus substantialiter non diceretur completus. Atque hinc, quamdiu non adest conditio, tamdiu non adest obligatio promissi conditionati: econtra vero actualis obligatio promissi in propositione modali oritur illico, quamprimum talis promissio profertur, quamvis ipse modus adjunctus necdum adsit: interea tamen alter, cui promissio fit, gravatur, ut in futurum adimplere modum studeat. Item exinde, si in propositione conditionata conditio adjuncta fuerit inhonesta, ea non adimpleta, ad nihil obligatur promittens. Econtra si in modali propositione modus additus fuerit inhonestus, aut impossibilis, talis modus habetur pro non adjecto, & promittens adhuc adstringitur ad servandum promissum, etsi ab altero non servetur modus: nam pereunte accessorio non sequitur, quod etiam pereat principale. Ita accurate notat Pater Sporer loc. cit. n. 17. & seqq. Ceterum conditio ordinariæ, & nisi ex circumstantiis aliter colligatur, denotatur per particulam *Si*, modus vero per particulam *Ut*: e. g. talis propositio, *si fueris consecutus gradum Doctoratus, promovebo te ad officium Præfecturæ*, foret conditionata; econtra vero, quando diceretur:



diceretur: *subministro tibi alimenta ad prosequenda tua studia, ut aliquando fias Clericus*, hæc propositio esset modalis, uti recte Pichler lib. 1. *Decret. tit. 35. n. 5.* In dubio autem præsumendum erit, id, quod additur, magis esse conditionem, quam modum. *L. 109. ff. de condit. & demonstr.* \*

Additio III.

\* Dices: si Contractui matrimoniali vel Testamento, aut Professioni Religiosæ adjiciatur conditio turpis, habetur pariter pro non adjecta, & Contractus adhuc obligat, prout ex Haunoldo, Sanchez, & Cardinali de Lugo ostendit la Croix lib. 3. part. 2. n. 599. ergo non est notabile discrimen, siue aliquid adjiciatur tamquam conditio, siue tamquam modus.

Resp. Neg. consequentiam. Etenim, quod in dubio simile Matrimonium, Testamentum aut Professio adhuc regulariter obligent, quamvis conditio illa turpis vel impossibilis non adimpleatur, item quod præfata conditio habeatur ibidem tamquam non adjecta, id provenit ob specialem favorem circa ista tria ex particulari dispositione juris positivi, & nullatenus exinde est facienda extensio ad alios Contractus conditionatos, respectu quorum adhuc verum manet, quod talis conditio turpis reputetur tamquam adjecta, ita, ut ea ex altera parte non adimpleta neque ille, qui hanc conditionem in Contractu posuit, obligetur adimplere Contractum ob defectum consensus, quem expresse alligavit tali conditioni. Atque hoc bene notandum: deserviet enim suo tempore ad resolutionem variorum casuum. Videatur de super la Croix loc. cit. \*

QUÆSTIO II.

Qualis Consensus requiratur ad valorem Contractuum?

SUMMARIUM.

- 13 *Ad consensum pro valore Contractuum requiruntur quatuor conditiones.*
- 14 *Error circa substantiam reddit Contractum nullum.*  
\* Limitatio-hujus doctrinæ.
- 15 *Secus, quando contingit solum circa qualitatem.*  
\* Tria notabilia Corollaria.
- 16 *Metus gravis ab intrinseco proveniens non invalidat Contractum.*
- 17 *Idem est de metu ab extrinseco, sed jure incusso.*
- 18 *Contractus ex metu gravi injuste incusso celebrati,*
- 19 *Aliqui sunt ipso jure invalidi, alii per sententiam Judicis rescindendi.*  
(b) Tract. 1. Dist. 1. n. 28. & 30.
- 20 *Contraria quorundam opinio.*  
(c) Tract. 1. Dist. 1. num. 31.

13 **C**ONCL. I. Ad valorem Contractuum omnino requiritur mutuus, & reciprocus contrahentium consensus, ut patet ex ipsa definitione Contractus n. 8. allata. Porro ad talem consensum quatuor communiter requiruntur conditiones. I. Ut consensus sit plene deliberatus, & liber: de quo plura in sequentibus Conclusionibus. II. Ut consensus sit serius, seu promissorius, id est, fiat cum voluntate serio contrahendi, in qua jam involvitur animus se obligandi juxta naturam Contractus celebrati. Ratio hujus conditionis est: quia consensus simulatus revera consensus non est, sed tantum fingitur: sine consensu autem Contractus validus non est. Unde infertur, quod ficte contrahens re ipsa ex tali Contractu non obligetur, utpote qui Jure naturæ irritus est, & nullus: peccat tamen juxta gravitatem materiæ, qui proximum sua fictione injuste decipit; unde & tenetur eidem ad recompensationem damni, si quod fortasse fuit subsecutum ob suam fictionem. III. Ut consensus internus aliquo signo externo sit expressus: alioquin enim alter contrahentium non posset cognoscere,

neque acceptare consensum præstitum: sine tali autem acceptione contractus non obligat. IV. Ut talis consensus acceptetur ab altero, cum quo fit contractus, ob rationem paulo ante positam, de qua acceptione vide plura inferius dist. 2. q. 2. n. 18. & seqq.

14 **C**ONCL. II. Quando in altero contrahentium contingit error circa substantiam rei, Contractus Jure naturæ est irritus, v. g. dum emitur aurichalcum pro auro, vitrum pro gemma, & hujusmodi; aut dum econtra venditur, & donatur gemma pro vitro &c. Ita omnes Doctores. Ratio est: quia tunc deest consensus substantialis, cum nullus sit errantis consensus, ut dicitur l. Non idcirco. C. de juris & facti ignorantia, & alibi; nam emens intendit emere aurum vel gemmam, non vero aurichalum vel vitrum: sine consensu autem contractus est nullus; ergo. Infertur proinde, quod, dum quis gemmam vendidit, existimans, esse crystalli fragmentum, emptor re comperta ad restitutionem gemmæ teneatur, aut ad justum ei pretium persolvendum, prout de novo inter ipsos conventum fuerit: quia prior emptio fuit nulla, & irrita. Lessius l. 2. c. 17. n. 17. cum communi.

Additio.

\* Hanc doctrinam de nullitate contractus, si erretur in substantia, limitant Sanchez l. 2. de matrim. & Lugo de jure & just. disp. 26. in casu, quo res, quæ pro alia substantialiter diversa traditur, æque bona est, utilis, atque conducens ad usum, ac finem comparantis eadem: tunc enim videtur adesse alterius consensus saltem interpretativus. Hinc valide & licite (inquiunt) potest dari unum medicamentum a petito substantialiter diversum, quando certo constat, ad finem intentum æque deservire. Ubi tamen caute procedendum, atque sincere, ne forsan cupiditas lucris æqualitatem in pretio, aut similem bonitatem & utilitatem fingat, ubi tamen revera, & a parte rei sic non est: prout contingere potest apud Pharmacopolas, qui, dum certas species simplices vel compositas a Medico pro ægrotis præscriptas ad manus non habent, interea tamen erubescunt id manifestare, ne suæ officinæ exinde minoris æstimentur, alias substituunt, quas non certo sciunt, eundem effectum habituras, cum non levi nocumento ægroti, & prostitutione Medici. Vel, qui loco vini Hispanici ad restaurandas reconvalescentis vires petiti aquam mellitam nescio quibuscumque ingredientibus componunt: similis error in substantia certo facit contractum aliquem invalidum. \*

15 Dicitur ceteroquin notanter in conclusione: *quando contingit error circa substantiam*. Nam si error contingit solum circa qualitatem accidentalem, contractus est validus, modo error, vel dolus non dederit causam contractui, id est, modo non vere causa motiva principalis hujus contractus extiterit, neque qualitas illa fuerit in pactum deducta per modum conditionis. Ratio est: quia talis vere consensit in emptionem istius rei, seu substantiæ ejus: Deinde error ille (prout supponitur) non dedit causam contractui, neque qualitas illa fuit deducta in pactum ut conditio: nam alioquin hac deficiente corrueret contractus ob dicta n. 12. simulque, quantum attinet ad prius, errantis nullus foret consensus.

Additio I.

\* Infertur proinde, quod invalidus sit contractus, si res illa, quæ comparatur, est quoad substantiam physicam equidem eadem, ac illa, quæ petitur; interea tamen in ordine ad finem, seu motivum principale omnino inutilis, vel saltem tam parum utilis, ut moraliter censetur nullam omnino continere utilitatem quoad intentum. Ratio est: quia tunc deficiente causa motiva principali censetur pariter deficere consensus in contractum, quamvis ceteroquin error iste tantum circa aliquam qualitatem physicam versetur. E. g. ponamus, Petrus voluit emere vinum forte NB. ut exinde perduret usque ad nuptias post aliquot septimanas primâ institutas; vinitor autem,



autem, ut facilius vina debilia distrahat majori, & proportionato respectu pretio, huic infcio dedit vinum debile ac non firmum, quod post septem vel octo dies corrumpitur; talis contractus ex defectu motivi est nullus, & tenetur vinitor in conscientia pretium ex integro refundere, quamvis illud vinum in substantia physica non differret a vino forti, & ceteroquin pretium fuisset proportionatum pro vino debili.

Idem dic ob eandem rationem, si pharmaca evanida pro aptis ad medicinas conficiendas, vel semina corrupta pro idoneis ad seminandum venduntur: nam similia ad finem illum, in ordine ad quem principaliter petuntur, sunt ex toto, saltem moraliter loquendo, inutilia. Et hinc nullæ sunt, ac restitutioni obnoxie illæ venditiones, quas multi circumforanei praticant, qui ab initio pretiosa unguenta vel pharmaca, queis promissi correspondent effectus, aliquibus paucis equidem valide vendunt, ex hoc tamen præcise motivo, ut sic plures ad emendum alliciant, quos si præsentem viderint, in magna copia deprædicata unguenta seu pharmaca distrahant, adeo tamen alterata, aliisque inutilibus rebus in tanta copia commixta, ut ad promissum finem, ob quem emuntur, moraliter prorsus fiant inepta, ac incapacia. Nec dicant, se non posse alias sine honesto lucro tam vili pretio vendere: Respondeo enim, adeoque eosdem debere similes praxes deceptorias omnino deinceps intermittere. \*

#### Additio II.

\* Inferitur ulterius, quod econtra validus sit contractus, si emas vinum recens, quod credebatur antiquum, sive lymphatum, aut alio minus generoso compatibili mixtum, quod judicabas purum, seu stannum commune, quod existimabas Anglicum, vel pannum in Germania confectum, quem putabas Hollandicum &c. nam in tali contractu ex una parte non datur alia substantia: ex altera autem qualitas ista, respectu cuius error contingit, non fuit in Pactum deducta, ac præterea res ista comparata adhuc moraliter saltem notabiliter, etsi fortassis non in tantum, deservit ad finem seu motivum principale contractus, prout supponitur. Nec refert, quod fortassis habitualiter ita fueris dispositus, ut, si hanc qualitatem abesse, & dictum errorem accidentalem intervenisse scivisses, non contraxisses: nam talis dispositio habitualis non obest valori alicujus contractus onerosi ordinarie, dummodo qualitas ista non fuerit actualiter per modum conditionis in Pactum deducta, nec error dederit causam motivam ac principalem contractui. Certe multi mariti crediderunt ante contractum matrimonialem sponfas suas nobiles, divites, pulchras, morigeras &c. ac postea experiuntur contrarium: nec tamen exinde matrimonium censetur nullum, quamvis probabilissime non contraxissent, si similia ante matrimonium præcivissent. Vide de hoc la Croix lib. 3. p. 2. n. 622. ubi etiam duas objectiones notabiles solutas reperies. \*

#### Additio III.

\* Duo tamen debent tales distrahentes sibi bene notare. *Inprimis*, quod, si substantia illa equidem ad finem a comparente intentum moraliter, & suo modo deserviat, at tamen multo minus, sic decipiendo in qualitate, vel quantitate, aut commixtione, adhuc peccent graviter. *Secundo*, quod, si ob defectum similem res esset minoris æstimationis, & hi nihilominus æquali pretio, ac si defectus iste non adesset, distraxissent, teneantur quoad excessum ad restitutionem, nisi læsio sit modica, prout dicitur *dist. 4. q. 8. n. 95. & seqq.* Idque bene observent laniones, qui majoris lucri gratia carnem vaccinam pro bovina, piltiores, qui panem alteratum & siligine mixtum pro pure triticeo, rustici, qui frumentum aqua humectatum, sicque intumefactum, atque quoad mensuram ampliatum pro sicco vendunt aliis non intelligentibus pretio æquali. Idipsum alte sibi imprimant

fartores, qui vetustas, & suo modo jam attritas vestes ita oppositè purgare, reficere, atque apparenti quadam specie adornare sciunt, ut easdem pro novis, & integris vendant.

Item futores, qui madefactione, percussione, calefactione, aliisque modis corium jam obsoletum adeo immutare noscunt, ut quasi novum appareat: cum tamen exinde miseri emptores longe breviori tempore similibus vestibus, aut calceamentis uti queant, ac si fuissent, prout jactabantur. Præsertim vero id advertant vinitores ac œnopolæ, qui vino debili addunt varias ingredientias ex sulphure & aliis materiis sanitati non adeo conducen- tibus, quæ quidem vinum reddunt gustui amœnum, at stomacho, & capiti nocivum: si enim (inquit nonnemo) reliquæ de tali vino in tabula remanentes lignum quasi corrodunt, quid causabit successu temporis notabilior hujus vini quantitas in stomacho? Sane tales vinitores seu œnopolæ non solum adstringuntur ad restitutionem pretii quoad excessum, sed etiam ad recompensandum damnum, si exinde causatus fuisset morbus, & propterea notabiles expensæ factæ in medicinas, de quo, uti & de pluribus aliis, quæ addi adhuc possunt, videatur *Jus Canonium lib. 3. decret. titul. 17. \**

16 CONCL. III. Metus gravis ab intrinseco proveniens (hoc est, non incussus a causa libera, sed naturali, prout est metus mortis imminentis ob morbum, naufragium, bestias &c.) non invalidat contractum. Ita rursus certa, & communis, atque desumitur ex *c. Sicut nobis. De Regularibus*, ubi Votum Religionis, emissum a constituto in lethali infirmitate, censetur validum; ergo si Vota, & hujusmodi, ex metu facta tempore naufragii, vel infirmitatis lethalis, valida sunt, & obligant ad sui impletionem, ut omnes fatentur, idem dicendum erit de contractibus.

17 CONCL. IV. Similiter metus ab extrinseco proveniens, juxta tamen incussus, contractum non invalidat. Ita pariter unanimis Doctorum. Ratio est: quia talis metus juxta incussus non infert cuiquam injuriam. Hinc validum est matrimonium metu juxta excommunicationis contractum. Similiter, qui promissit aliquid, ne accusetur de crimine, de quo jure poterat accusari, tenetur stare promissis, non obstante, quod promiserit ob metum accusationis: idem dicendum de similibus.

18 CONCL. V. Loquendo tamen de metu gravi ab extrinseco proveniente, simulque injuste incusso, omnes contractus ex hujusmodi gravi metu ad extorquendum consensum injuste incusso celebrati, vel sunt ipso jure invalidi, vel saltem per sententiam Judicis rescindendi. Ita communis Doctorum, atque desumitur ex *Jure Canonico. c. Abbas, & c. Ad audientiam. De his, quæ vi metusve causa fiunt*: ubi generales hæ regulæ dantur: *Quæ metu & vi fiunt, de jure debent in irritum revocari. Item: Quæ vi metusve causa fiunt, carere debent robore firmitatis.*

19 Probatur eadem Conclusio, simulque sub disjunctione loquens declaratur per inductionem. Nam inprimis dantur aliqui contractus, qui, si ex ejusmodi metu celebrentur, ipso jure invalidi existunt, cum in eis requiratur plena libertas. Sic quippe matrimonium, & sponsalia, item promissio dotis, veluti accessoria ad matrimonium, nec non & Professio Religiosa, & quædam his similia, quæ enumerat Glossa magna *c. 2. de his, quæ vi metusve causa. &c.* si fiant ex metu gravi, & injuste incusso, sunt ipso jure invalida. Alii vero contractus, quamvis ob metum gravem ab extrinseco injuste illatum ordinarie non reddantur ipso jure invalidi (nam, ut loquuntur Juristæ, *Coactus voluntas est voluntas*) nihilominus suadente æquitate per sententiam Judicis rescindendi sunt, ut jam superius (b) dictum.

20 Quinimo non desunt Doctores, quos refert Sanchez lib. 4. de matrim. disp. 8. n. 2. inter quos sunt Sotus & Molina, ac sequitur Mastrius disp. 4. Theolog. mor. n. 23. qui volunt, quoslibet contractus metu gravi initos ipso jure irritos & invalidos esse, aut saltem, ut vult Heringx disp. 1. De contractibus qu. 3. n. 49. esse irritabiles pro arbitrio metum passi, vel per Judicem pro Foro externo. Ceterum hæcenus dicta intelligenda solum sunt de metu gravi,



gravi, seu cadente in constantem virum, non autem de metu levi: prout habetur c. Cum dilectus. De his, quæ vi metusve causa &c. Quinam autem censeatur esse metus gravis, superius (c) dictum est.

QUÆSTIO III.

Quinam contrahere possint?

SUMMARIUM.

- 21 *Ætates hominis sunt Infantia, Pueritia, Adolescentia, Juventus, vel virilis ætas, Senectus, & Decrepitas.*
- 22 *Infans, Impubes, Pubes, Minor, seu Minorennis, Major, seu Majorennis.*
- 23 *Pupillus, quis?*  
*Pupillus pubertati, vel infantia proximus, quis?*
- 24 *Generatim, qui possint contrahere?*
- 25 *An & Religiosi?*  
*\* An Filiifamilias? Item Uxores? Additio I. & II.*
- 26 *Utrum Pupillus, vel Minorennis?*
- 27 *Corollarium de Pupillo emente sine Tutoris consensu:*
- 28 *Vel ludendo perdente.*
- 29 *An Minorennis, vel Pupillus tunc obligetur naturaliter?*
- 30 *Quid de Pupillo infantia proximo?*  
*\* Quid de Prodigio contrahente?*
- 31 *Quid, si contrahant Pupilli vel Minorennis cum consensu Tutoris, vel Curatoris?*  
*\* Et an præter consensum Tutoris, vel Curatoris requiratur Decretum Judicis?*
- 32 *Differentia inter Tutorem, & Curatorem.*
- 33 *Obligatio civilis & naturalis: ac obligati civiliter, & naturaliter, qui?*
- 34 *Obligationis naturalis effectus, qui?*

**R**Advertendum, quod, quamvis Doctores varie distinguant ætates hominis, dum alii plures, alii pauciores assignant, prout refert Fagnanus c. Cum sis n. 14. De Convers. conjugat. communior tamen sit sententia Glossæ in Proæmio Libri sexti Decretalium Vers. Perfectus, quæ sex tantum ætates, seu status hominis assignat. Prima est *Infantia*, quæ durat usque ad septimum annum completum. Secunda est *Pueritia*, quæ in feminis durat usque ad duodecimum, in masculis vero usque ad decimum quartum annum completum. Tertia est *Adolescentia*, durans usque ad vigesimum quintum completum. Quarta est *Juventus* vel *virilis ætas* durans usque ad quinquagesimum annum; quamvis alii juventutem, & ætatem virilem dividant, & hanc ab anno quadragesimo, vel saltem quinquagesimo, usque ad quinquagesimum nonum computent. Quinta est *Senectus*, quæ exinde usque ad annum septuagesimum protenditur. Sexta est *Senium*, seu *Decrepitas*, quæ abinde continuatur usque ad mortem.

22 Advertendum ulterius, quod juxta præmissas vitæ humanæ ætates varia nomina sortiatur homo. Atque, ut omittatur nomen Juvenis, Viri, Senis, & hujusmodi, quæ ad propositum minus attinent, inprimis homo dicitur *Infans*, qui est minor septem annis completis. Exinde vero, quia pubertas in masculis expleto decimo quarto anno, in feminis autem expleto anno duodecimo mox incipit: hinc masculi ante expletum decimum quartum annum dicuntur *Impuberes*, eoque expleto *Puberes*, feminæ autem ante duodecimum expletum *Impuberes*, postea vero *Puberes*, & *Minorennis*. Porro *Minor*, seu *Minorennis* dicitur pubes usque ad vigesimum quintum annum expletum, & quidem expletum de momento in momentum: postquam vero impleverunt modo descripto annum vigesimum quintum (de Jure Bavaroico autem annum vigesimum primum) vocantur *Majores*, seu *Majorennis*.

23 Rursum *Pupillus* dicitur, qui, cum adhuc impubes sit, definit esse in potestate patris, vel per mortem ejus, vel per emancipationem: & hic vel est pubertati proximus, vel infantia proximus, prout magis accedit

ad pubertatem, vel infantiam. *Pupillus pubertati proximus*, si masculus est, dicitur ille, qui habet ætatis decem annos cum dimidio; si femina, quæ habet novem annos cum dimidio: ante hoc autem tempus dicitur *Pupillus infantia proximus*, si est supra septimum; vel *Infans*, si est infra septimum. Hisce terminis prænotatis, sit

24 CONCL. I. Generatim loquendo omnes, & soli illi contrahere possunt, qui habent liberam bonorum administrationem. Ita omnes Doctores. Ceterum inter eos, qui non habent liberam bonorum administrationem, inprimis sunt infantes, amentes, aut alias usu rationis carentes: tales enim, licet sint capaces domini, non tamen usus vel liberæ administrationis ejus ob defectum rationis; unde nec contrahere possunt.

25 Similiter Religiosi solenniter professi, cum nullius rei dominium habeant ob votum paupertatis, consequenter nequeunt legitime disponere de bonis Monasterii, neque contrahere sine consensu Prælati. Prælati vero, & constituti ab eo Administratores bonorum communium possunt quidem contrahere, sed in multis casibus non, nisi dependenter a consensu Capituli seu Communitatis, & ad usus determinatos dumtaxat, prout fufius explicatur lib. 3. decret. tit. 13. Restat nunc ulterius particulariter agendum de filiisfamilias sub patria potestate constitutis, de uxoribus, atque de Pupillis, & Minorennibus, Patre mortuo, relictis, an & quando prædicti contrahere valeant? & licet de Filiisfamilias, atque Uxoribus id erui jam posset ex dictis Tract. 4. dist. 4. q. 2. quo loco fuit indicatum, in quibus bonis Filiisfamilias, & Uxores habeant Dominium &c. ut tamen de singulis clare procedatur.

Additio I.

\* CONCL. II. Filiisfamilias *Impuberes* ne quidem consentiente Patre possunt contrahendo se obligare in suum incommodum, uti clare deciditur §. 10. Instit. de inutilibus stipulationibus. Quoad *Puberes* autem reflectendum est ex Tract. 7. dist. 4. q. 2. ad Bona diversa, utrum nimirum sint talia, respectu quorum habent Dominium simul, ac usumfructum, & administrationem, vel non? quoad priora libere possunt contrahere juxta denuo Jus clarum l. 4. §. 1. ff. De castrensi peculio; quoad posteriora vero absque consensu Parentis nil agere possunt in ejusdem præjudicium juxta Leg. ult. §. 5. C. De bonis quæ liberis. Videatur Franciscus Schmier lib. 3. Jurisprudentia. Tract. 3. c. 1. §. 3. \*

Additio II.

\* CONCL. III. Uxores viventibus adhuc suis maritis quoad illa bona, respectu quorum nullo modo, neque quoad administrationem dependent a suis maritis, possunt libere in vivis contrahere. Ita sub his terminis Communis, patetque ex paritate dictorum in conclusione præcedenti. Ratio principalis est; quia respectu talium Bonorum plenum habent Dominium: dummodo ceteroquin ex Tract. 7. dist. 4. q. 2. recolligatur, quotuplicia sunt Bona uxorum, & simul reflectatur ad privilegium, quod in contrahendo habent mulieres vi Senatusconsulti Vellejani, de quo infra hoc Tract. dist. 4. p. 1. Additione post. n. 9. \*

26 CONCL. IV. *Pupillus pubertati proximus*, ac *Minorennis* potest quidem sine auctoritate Tutoris vel Curatoris contrahere in suum commodum, non tamen in suum incommodum seu præjudicium, ita ut civiliter obligetur. Ita Communis, & habetur expressum Instit. de auctorit. tutor. ibi: Si quid dari sibi stipulentur, non est necessaria Tutoris auctoritas; quod si alii promittant pupilli, necessaria est Tutoris auctoritas. Namque placuit, meliorem quidem suam conditionem licere eis facere etiam sine Tutoris auctoritate, deteriore vero non aliter, quam cum Tutoris auctoritate. Unde, ut ait Glossa ibidem, *Contractus claudicat quandoque*.



27 Infertur proinde, quod celebrato emptionis contractu Pupillus, sine Tutoris consensu emens, non possit actione civili compelli invitus ad standum contractui, & solvendum pretium emptionis: ipse tamen Pupillus, si contractui stare velit, potest actione civili cogere venditorem ad tradendam sibi mercem pro constituto pretio. In quo proinde casu claudicat Contractus, ut dictum.

28 Insuper infertur cum Laymano lib. 3. tract. 4. c. 9. n. 10. & aliis, quod, si Pupillus, vel Minor habens Curatorem (secus dicendum, si hic Curatorem non habeat) quidpiam ludendo perdidit, aut alio Contractu promisit, id solvere non teneatur, sed possit se exceptione Legis Civilis defendere, nisi Minor se soluturum jurasset. Quod si vero Pupillus, vel minor solvit creditori, potest is tuta conscientia rem retinere, donec ab eo repetatur per beneficium Legis talem repetitionem concedentis; cum hic saltem obligatio naturalis interveniat, quæ ex Jure Gentium per consensum oritur.

29 Dicitur notanter: cum hic saltem obligatio naturalis interveniat. Nam etsi Pupillus pubertati proximus, ac Minorennis non obligetur civiliter, si contrahat sine Tutoris vel Curatoris auctoritate, nihilominus obligatur naturaliter, ac in Foro conscientie: quamvis hujusmodi obligatio naturalis sit aliquo modo inefficax, utpote quæ per exceptionem ex beneficio Legis Civilis, non compellentis Pupillum ad solutionem, elidi potest, adeo, ut neque in Foro conscientie solvere teneatur, nisi quatenus locupletior factus est; prout observat Lessius lib. 2. c. 17. n. 61. Sanchez l. 6. de matrim. disp. 38. n. 21. Layman n. 7. Sannig. dist. 11. de Justitia qu. 3. n. 9. Communior Doctorum, etsi nonnulli dissentiant. Ratio autem, cur oriatur obligatio naturalis, donec per exceptionem Legis elidatur, illa est: quia hic vere intervenit consensus Pupilli, vel Minorennis: atqui ex consensu oritur obligatio naturalis l. Stichum. 95. § Naturalis. ff. De Solution. ergo.

30 Intellige, dummodo Pupillus sit pubertati proximus: nam, cum Pupillus infantie proximus vix ullum intellectum habeat, ideo Jura omnem ex parte ejus obligationem tollunt; de quo proin Pupillo intelligendus est textus l. Pupillus. 59. ff. De oblig. & action. ibi: Pupillus mutuum pecuniam accipiendo, ne quidem jure naturali obligatur, cum concordantiis.

#### Additio

\* Idem ait cum Sanchez la Croix l. 3. part. 2. n. 682. tenendum esse de prodigo habente Curatorem, cui specialiter a Juce interdicta est administratio Bonorum: nam & talis absque Curatoris auctoritate contrahens facit contractus irritos, neque transfert dominium l. Is cui bonis. 6. ff. De verb. oblig. Hinc, qui cum tali prodigo contraxit, v. g. ludendo lucratus est ex ipsius pecuniis, tenetur in conscientia etiam ante sententiam Judicis restituere, quamvis prodigus non repetat, neque poterit secum contrahentem cogere ad servandum contractum. Ita la Croix loc. cit. & ratio est, quia talis, cui administratio specialiter interdicta est, in odium prodigalitatis omnino inhabilitatur ad similia. \*

31 CONCL. V. Pupillus, & multo magis Minorennis cum consensu & auctoritate Tutoris, vel Curatoris potest valide contrahere, & sic contrahens obligatur tam civiliter, quam naturaliter. Ita communis; & habetur l. Impuberes. ff. De auctoritate & consensu Tutorum.

#### Additio.

\* Ubi tamen, si agitur de eorum Bonis immobilibus, vel mobilibus pretiosis, præter auctoritatem Tutoris, vel Curatoris insuper intervenire necesse est aliquod decretum Judicis, ut exinde Pupilli vel Minores adhuc securiores existant, ne in bonis suis notabile damnum patiantur l. 22. C. De administratione Tutorum, & Cura-

torum. Quod si tales (uti subjungit Pichler in Candi dato jurisprudentie abbreviato l. 1. tit. 35. n. 8.) disponat per Testamentum, vel Professionem Religiosam, illud decretum Judicis non requiritur; quia pro tempore mortis vel Religiosæ Professionis aliunde prædicti exuuntur quoad suam personam omnibus Bonis temporalibus, sicque cessat apud eos finis Legis, ne nimirum cum damno priventur suis Bonis. \*

32 Quæres, quæ sit differentia inter Tutorem & Curatorem? Resp. eos differre potissimum in sequentibus. Siquidem Tutor datur usque ad tempus pubertatis ad tuendam præcipue personam Pupilli, secundario autem ad bona ejus administranda: secuta vero pubertate Tutela finitur: Curator autem pueris, & puellis puberibus datur usque ad vigesimum quintum annum, potissimum, ut bonis eorum præsit, seu administrator existat. Deinde Tutor impuberi, etiam invito, dandus est: sed Curator puberi non datur, si est invitatus; & tunc pubes per seipsum valide contrahere potest, & contrahens obligatur tam civiliter, quam naturaliter, nisi in casu, quo graviter læsus est, eidem subveniatur per beneficium restitutionis in integrum, juxta dicenda qu. seq.

33 Quæres ulterius, quid sit obligari civiliter, & naturaliter? Resp. Obligatio civilis dicitur ea, quæ aut legibus constituta, aut certo Jure Civili comprobata est. Obligatio naturalis vero, quæ ex Jure Gentium per consensum oritur. Hinc ille dicitur obligari civiliter, qui in Foro externo, ac Civili conveniri potest. Naturaliter vero obligatur, qui ex Jure Gentium obligatus existit, ac proinde saltem in Foro conscientie tenetur, nisi beneficio Legis Civilis, seu per rescissionem actus ope Judicis factam a tali obligatione naturali liberetur.

34 Porro obligationis naturalis plures sunt effectus, quorum primus, isque præcipuus est, quod creditori jus tribuat accipiendi, ac retinendi, si, quod naturaliter ipsi debitum est, nulla opposita exceptione solvatur: & hic est effectus principalis, & inseparabilis ab obligatione naturali. Secundus obligationis naturalis effectus est, quod impediatur debiti soluti repetitionem. Tertius, quod tribuat cuipiam jus exceptionis, & compensationis. Et quartus, quod in obligatione naturali possit accedere fidejussor. Verum hi tres posteriores effectus obligationis naturalis quandoque ex dispositione juris communis separantur, ac præsertim in Pupillis, & Minoribus, si sine Tutoris vel Curatoris consensu sese cuipiam obligent. Layman lib. 3. tract. 4. c. 9. n. 9. & alii.

#### QUÆSTIO IV.

De restitutione in integrum, & quibus competat?

#### SUMMARIUM.

- 35 Restituere in integrum, quid?
- 36 Beneficium restitutionis, in quibus casibus concedatur?
- 37 Conceditur omnibus ætate minoribus.
- 38 Excipiuntur aliqui casus.
- 39 Beneficium restitutionis in integrum competit Ecclesiis &c.
- 40 Debet peti intra quadriennium.
- 41 Quadriennium hoc quando incipiat?
- 42 Præsertim si Prælatus Ecclesiæ male alienans diutius vixit.
- 43 Beneficium restitutionis in integrum, quibus aliis competat?

35 **R**estituere in integrum idem est, ac reducere aliquem in eum statum, in quo erat ante læsionem arg. l. 1. C. De sententiam passis. Nam ob æquitatem naturalem, ac Jure communi sic disponente Judex certis hominibus in contractu, vel alia actione graviter læsis, aut deceptis cognita causa subvenit restituendo eos in integrum: sic enim Minorennis, videns in aliquo contractu se graviter fuisse læsum, si petat intra debitum tempus, ut reponatur in eo statu, in quo fuit ante læsionem, Judex beneficio restitutionis in integrum eidem subvenit, ipsumque ponit in suo pristino statu.



36 Conceditur autem hoc beneficium restitutionis tunc solum, quando læsio est notabilis: nam si læsio sit dumtaxat modica, tunc extraordinarium hoc auxilium tribuere non convenit, ut dicitur *l. Scio ff. De in integrum restit.* & alibi. Siquidem juxta illud critum axiomaz: *De minimis non curat Prætor.* vel, ut Glossa cit. *l. vers. Summam* loquitur: *De minimis non curandum.* Insuper beneficium restitutionis in integrum, utpote quod est remedium extraordinarium, non conceditur, si aliud remedium suppetat contractum revocandi, *text. clar. l. In causa 16. ff. de minoribus.* His prænotatis, sit

37 CONCL. I. Beneficium restitutionis in integrum conceditur omnibus ætate minoribus (id est, qui vigesimum quintum ætatis annum necdum compleverunt) si ex contractu, vel quasi contractu graviter prudentum judicio læsi sunt. Ita habetur *L. 1. § seqq. ff. de Minor. viginti quinque annis.* Ratio hujus constitutionis est: quia fragile est, & infirmum hujus ætatis concilium, & multis captionibus suppositum, multorumque insidiis expostum; unde istud extraordinarium auxilium eisdem Prætor pollicitus est, prout ibidem loquitur textus. Et quidem hæc conclusio intelligenda est, quamvis ejusmodi contractus fuerit institutus cum Patris, vel Curatoris consensu, imo etiam Judicis decreto interveniente: adhuc enim beneficio restitutionis locus erit. *L. 2. c. Si Tutor vel Curator intervenierit, cum concordantiis.*

38 Excipiuntur tamen aliqui casus a data regula I. Si talis post expletum vigesimum quintum ætatis annum factus major ratificet ea, quæ in minori ætate cum Tutoris, vel Curatoris consensu egit: tunc enim beneficium restitutionis petendæ perdit. *L. 1. § 2. C. Si major factus § c. II.* Si minor pubertate jam adepta contractum a se initum juramento sponte facto confirmavit, *l. Sacramenta puberum. C. Si adversus venditionem.* Omittuntur nonnullæ aliæ limitationes minus ad propositum attinentes.

39 CONCL. II. Beneficium restitutionis in integrum competit insuper Ecclesiis, aliisque locis piis. Ita habetur clare in Jure Canonico *tit. De integrum restit. per plura Capitula:* siquidem Ecclesia fungitur jure minoris. Quod si vero personæ Ecclesiasticæ in propriis juribus, aut bonis suis patrimonialibus, aliisve privatis lædantur, non competit eis beneficium restitutionis: quia cessat tunc communis favor Ecclesiæ.

40 CONCL. III. Ad petendam restitutionem in integrum ex quacumque causa hodie conceditur continuum quadriennium. Ita habetur expresse *L. ult. C. De temporibus in integrum restitutionis, & tenent Doctores communiter.*

41 Circa quod notandum, quod quadriennium istud in restitutione Minorum inchoetur primum ab ætate legitima, seu a primo die exacti vigesimi quinti anni, cessante tamen alio impedimento. In restitutione vero Ecclesiæ, aliorumque piorum locorum incipit dictum quadriennium a tempore factæ læsionis; sicuti constat ex *c. Ecclesiæ. De restit. in integrum, in 6.*

42 Intellige: nisi prævaricationis, vel fraudis manifestæ probetur super hoc intervenisse commentum, aut alia rationabilis causa subsit, quæ Superiorem movere debeat ad idem beneficium concedendum; prout limitatur cit. *c. Ecclesiæ.* Ubi proinde Glossa *v. Causa, & Fagnanus c. Requirit n. 14. de Restitut. in integrum,* post Abbatem, & alios inferunt, posse concedi Ecclesiæ beneficium restitutionis etiam post quadriennium, si Prælati male alienans [hoc est, cum gravi damno Ecclesiæ] tanto tempore vixit: nam hoc quadriennium non currit, quamdiu vivit Prælati, qui male alienavit. *arg. c. Si sacerdos. 16. q. 3.* Ratio hujus esse videtur: quia Prælati ille non facile revocabit factum suum; & sic Ecclesia, quantum ad propositum, tunc censetur carere legitimo defensore, ut proinde justa causa subsit eandem restituendi post quadriennium.

43 Pro complemento hujus Quæstionis sciendum, quod Respublica quoque jure Minorum gaudeat, adeoque auxilium restitutionis implorare possit. *L. 4. c. Quibus ex causis majores § c. ubi dicitur, quod Respublica*

æquiparetur minori, & ideo habeat beneficium restitutionis in integrum. Itaque extendunt Doctores primo ad Principem, tamquam caput Reipublicæ. Deinde ad Universitatem Studiosorum, cum in ea non pauci, imo plerique minores reperiuntur. Tertio, ad Vicos communitatem habentes. Tandem idem beneficium quandoque conceditur rudibus, ut rusticis, mulieribus &c. prout amplius declarant Canonistæ.

## DISTINCTIO II.

### De Contractibus Gratuitis.

## QUÆSTIO I.

### De Promissione, ejusque Obligatione.

## SUMMARIUM

- 1 Ratio Ordinis.
- 2 Promissio, quid?
- 3 Quomodo differat a Proposito?
- 4 Propositum non servare an sit peccatum?
- 5 Promissionis quanta sit obligatio?
- 6 Loquendo de Promissione proprie dicta.
- 7 Excusantur multa Promissiones a mortali, cur?
  - (a) Dist. I. n. 13.
  - \* Notabile Corollarium.
8. 9. 10. 11. 12. Promissio variis modis obligare desinit.
  - [b] Tract. 6. dist. 2. n. 23.
  - \* Specialia de triplici Promissione in Particulari.

1 PRæmissis illis, quæ concernunt Contractus in genere, pergendum ad explicandos Contractus in specie, ordiendo a Contractibus gratuitis seu lucrativis, qui ex una solum parte obligationem inducunt, sive, in quibus nihil rependitur: ut est Promissio, Donatio, Commodatum, Precarium, & Depositum. Et quidem incipiendo a Promissione, sit

2 CONCL. I. Promissio est spontanea & deliberata fidei obligatio, facta alteri de re quapiam bona, & possibili. Ita in re communis. Et hujusmodi Promissio tunc fit, quando quis sponte, & liberaliter, atque animo sese obligandi, & quidem deliberate pollicetur alteri quidpiam dare, vel facere, quod honeste potest. Dicitur primo, quod promissio sit de re quapiam bona: siquidem ut habet Regula 69. *Juris in 6. In malis promissis fidem non expedit observari:* idque intelligendum, etiam si Promissio sit juramento firmata: nam non est obligatorium contra bonos mores præstitum juramentum. *Reg. 58. Juris in 6.* Et additur, & possibilis: quia nemo potest ad impossibile obligari, juxta *Reg. 6. Eod.*

3 Dicitur ulterius, obligatio fidei: per quod Promissio differt a Proposito; nam Promissio est actus, quo quis se alteri obligat ad aliquid dandum, vel faciendum juxta proxime dicta, & explicatur per verbum, *promitto me facturum, aut daturum hoc, vel illud.* Econtra Propositum, licet sit firmum, ac deliberatum, ex se nullam inducit obligationem: concipitur enim sine actuali obligatione, ac explicatur per verbum, *faciam, dabo, &c.* sed non intenditur obligatio.

4 Infertur proinde, quod, si quis Propositum utcumque firmum non servaverit, peccati propterea reus non sit, cum nulla se obligatione constrinxerit: ut puta si quis proposuit jejunare, dare eleemosynam, aut certas preces persolvere. Intellige, nisi quis aliunde sit obligatus ad tale quid faciendum, aut nisi id fiat ex inordinata passione, gravi socordia, vel negligentia. Quinimo *lib. 3. n. 16. post Lessius lib. 3. cap. 2. n. 49.* in tali inordinata bonorum Propositorum mutatione agnoscit peccatum inconstantie, ex genere suo veniale, cum sit quædam inordinatio mentis, quod bene consultatum, judicatum, & acceptatum est, leviter & sine ulla rationabili causa derelinquere.

5 CONCL. II. Promissio proprie dicta, si sit legiti-



me facta, & ab altero acceptata, ex genere suo obligat ex iustitia, & sub peccato mortali, nisi rei promissæ parvitas excuset. Ita Doctores communiter. Unde illud vulgatum dictum: *Omne promissum cadit in debitum*, arg. c. *Qualiter*, de Pactis, ibi: *Studij agendum est, ut ea, que promittuntur, opere compleantur*, & alibi. Ratio est: quia promittere proprie loquendo non est utcumque verum dicere, sed simul astringere alteri fidem suam.

6 Dicitur, *promissio proprie dicta*: siquidem præsens Conclusio solum procedit, si quis vere promittat animo se obligandi: nam si absque animo obligandi se facta sit Promissio, non tenetur vi illius quis adimplere promissum, eo quod revera non fuerit Promissio proprie dicta, cum deficiat voluntas se obligandi.

7 Et Hinc infert Sanchez lib. 1. de Matrim. disp. 5. n. 25, quod plurimæ Promissiones excusari possint a mortali: quia per eas non intendunt homines se obligare præcise, sed ex quadam benevola honestate: vel ignorant tantam ex simplici Promissione consurgere obligationem, existimantes, solum se obligari ad suum tuendum honorem. Unde in proverbium abiit, *Verba urbanitatis minime obligare*. Hæc ille. Verum tamen hoc intelligendum, secluso alio damno proximi: alioquin haberent locum dicta superius (a) de ceteris ficte contrahentibus.

#### Additio.

\* Notent sibi ultima hujus numeri verba illi Pseudo-liberales promittentes, qui ad alterum honorandum e. g. ad Natalem ipsius nescio quot Missas offerunt, interne tamen nil minus, quam promissum servare cogitant: ponamus enim, quod alii, qui has obligationes acceptant, sint ex voto, vel ex stipendio obligati ad aliquot Missas legendas, & hi propter tales oblationes onus celebrandi in istos promittentes transferant, certe exinde sive propter oneris translationem, sive ob damnum alias emergens tenentur in simili casu sub gravi peccato easdem celebrare, aut celebrari facere, quamvis ficto animo vel præcise ex quadam benevola honestate, aut solo titulo fidelitatis obtulerint. Nec eximit tales a gravi peccato doctrina Molinæ & Cardinalis de Lugo, qui cum Spoter Tract. 5. in Decalog. cap. 2. sect. 2. num. 69. sentiunt, si promittens liberaliter voluerit se simpliciter obligare etiam in re notabili, non tamen cogitaverit, vel se determinaverit, ex qua virtute, aut an graviter, vel leviter? quod tunc stante tali dubio solum venialiter ex virtute fidelitatis obligetur promittens: nam hæc doctrina saltem tunc non subsistit, quando alter, cui sit promissio, habet obligationem gravem, & eandem promittens externe in se suscipit, cum propter talem fictam oneris in se susceptionem sit causa notabilis damnificationis & omissionis rei graviter obligantis.\*

8 CONCL. III. Promissio valida variis modis obligare definit. Ita communis, idque patet inductione. Et I. Cessat Promissio obligare propter condonationem Promissarii, potentis condonare: nam quilibet suo juri repuntiare potest. II. Cessat obligare Promissio per mutationem objecti, si videlicet res promissa fiat interim impossibilis, illicita per leges, damnosa vel inutilis Promissario, in cujus utilitatem, commodum & gratiam facta est Promissio.

9 III. Cessat obligare Promissio propter supervenientem sine sua culpa talem mutationem status rerum, ut iudicio prudentum (quod ex qualitate rei promissæ, & ipsarum personarum formandum est) censeatur Promissor talem eventum non voluisse comprehendere: siquidem ultra ejus intentionem non obligat Promissio. Sic fieret, si quis pauperi promissit centum florenos, & postmodum ipsemet promittens in paupertatem incidat, adeoque iis ad honeste sustentandum se, suamque familiam indigeat. Item si quis puellæ promissit Matrimonium, quæ postmodum fit pauper, multum deformis, aut ab alio corrumpitur, & hujusmodi, prout in simili superius (b) dictum est, agendo de Juramento.

10 IV. Cessat Promissio obligare propter ingratitudinem Promissarii (id est, illius, cui facta est Promissio) hæc enim non tantum obligationem Promissionis tollit, sed insuper, si sit gravis, donationem facit revocabilem cap. ult. De Donationibus.

11 V. Cessat talis obligatio Promissionis per compensationem, dum videlicet duo sibi invicem quidpiam promiserunt, & alter non vult stare Promissis: tunc enim neque prior manet obligatus ad standum suo Promisso.

12 VI. Cessat obligare Promissio ob non subsistentiam causæ principalis: ut si cuiquam intuitu paupertatis quidpiam promissit, quem postea comperis revera non esse pauperem. Idem dicendum, si intuitu præstationis beneficii facta erat Promissio remuneratoria, & tamen illud beneficium præstitum non est, sed falso ita existimatum.

#### Additio.

\* Quæres, quid sentiendum sit de tribus sequentibus Promissionibus? *In primis*. Si maritus uxori, quam (cum nullas habeat proles) instituit in testamento hæredem, promittat, quod non velit testamentum hoc mutare. *Secundo*. Si is uxori ad mortem decumbenti promittat, quod ea mortua non velit ducere aliam. *Tertio*. Si vivente adhuc sua uxore alicui alteri, absque tamen interventu copulæ carnalis, promittat matrimonium post mortem suæ conjugis ineundum? Respondeo ad I. Talem Promissionem non valere, saltem nisi pacta dotalia per dispositionem inter vivos uxori talem successionem præviæ adpromiserint. Ita Lessius apud la Croix lib. 6. part. 3. num. 56. Ratio est: quia de essentia testamenti censeatur, ut voluntas testandi sit ambulatoria, relinquendo nimirum testatori jus testandi liberum; rerum autem essentia mutari nequit per pacta privata.

Respondeo ad II. Affecurationem hanc mulieri factam vel esse tantum firmum propositum (nisi forsan fiat omnino animo ficto ob alios fines politicos) vel saltem non obligare ex iustitia: imo invalidam censerem, si potius saluti expediat ducere de novo uxorem. Ita la Croix loc. cit. Vide & applica dicta num. 6. & 7.

Respondeo ad III. Promissionem istam esse graviter peccaminosam; cum exinde præbeatur ansa captandæ mortis prioris conjugis. Ita clare habetur c. *Si quis*. De eo, qui duxit in matrimonium; videtur tamen vi textus citati, & juxta Averfam post mortem uxoris præcedentis dictam Promissionem non esse dirimendam, quin saltem adhuc se habeat per modum simplicis promissi, quidquid apud la Croix contradicant Abbas, Alexander & Anchoranus.

## QUESTIO II.

De Donatione, & variis ipsam attinentibus.

### S U M M A R I U M.

- 13 Donatio, quid?
- 14 Dividitur in mere gratuitam, & remuneratariam.
- 15 Donatio mortis causa, quæ?
- 16 Potest semper revocari, sicut & Testamentum.
- 17 Donatio inter vivos, quæ, & an revocari possit?
- 18 Hæc ante acceptationem non obligat.
- 19 Censeatur acceptari a præsentem, & tacente.
- 20 An possit acceptari pro alio, aut pro determinata Ecclesia?
- 21 Donatio ante actualem rei traditionem non dat jus in re.
- 22 Donatio ultra 500. Solidos non valet quoad excessum.
- 23 Per Solidum intelligitur Aureus.
- 25 Declaratur Conclusio.
- 25 Excipitur Donatio ad pias causas.
- 26 Et nonnulla alia Donationes.

13 CONCL.



13 CONCL. I. *Donatio*, quæ juxta nominis etymologiam idem est ac *doni datio*, bene describitur cum Scoto 4. *dist.* 15. *quest.* 2. quod sit datio rei mere liberalis. Sive, ut alii loquuntur, *Donatio* est translatio domini alicujus rei per actum mere liberalem in alium facta: & hæc proprie appellatur *Donatio*.

14 CONCL. II. *Donatio* dividitur multipliciter. Et imprimis dividitur ipsa in *Donationem mere gratuitam*, cui proxime data definitio convenit: & in *Donationem remuneratorem*, quæ fit intuitu alicujus accepti beneficii. Deinde in *Donationem absolutam*, seu puram, & in eam quæ fit sub conditione aliqua, v. g. dono tibi hunc agrum, si Romam perrexeris. Præcipua tamen divisio est illa, qua ipsa dividitur in *Donationem inter vivos*, & in *Donationem mortis causa*.

15 *Donatio mortis causa* dicitur ea, quæ fit intuitu mortis, & facta mentione ejusdem: cum nempe quis ita donat, ut, si quidem humanitus ei contigisset, haberet is, qui accepit; sin autem supervixisset, is, qui donavit, reciperet. Quod posterius etiam dicendum, si eum *Donationis* poenituisse, aut si prior decessisset ille, cui causa mortis donatum est, prout habetur §. 1. *De Donationibus*.

16 Inferitur proinde, quod hæc *Donatio mortis causa*, sicut & *Testamentum*, ac quodlibet *Legatum* quocumque tempore revocari possit usque ad mortem. Neque ad hanc revocationem requiritur alia causa præter liberam voluntatem donantis, vel testantis: siquidem, cum talis *Donatio* fiat causa mortis, ac sub conditione, *Si moriar*, antea semper licet poenitere. Unde est illud vulgatum axioma inter Juristas: *Ambulatoria est voluntas defuncti usque ad vitæ supremum exitum*, l. *Quod si* 4. ff. *De adimendis legatis*. Sed de *Donationibus* mortis causa plura *Dist. seq. per totum*. agendo de *Testamentis*.

17 *Donatio inter vivos* est, quæ fit sine ulla mortis suspitione ex mera liberalitate, & ea mente, ut res donata fiat statim accipientis *arg. l. 1. ff. De donationibus*. Unde hujusmodi *Donatio* semel perfecta temere revocari non potest. Dicitur, *temere revocari non potest*: nam ob certas causas, veluti ob ingratitudinem Donatarii (si nempe impias manus in Donatorem injecerit, aut ei graves injurias, seu grave rerum suarum damnum, aut vitæ periculum inferre præsumperit) *Donatio inter vivos* per ipsum Donatorem revocari potest, non tamen per ejus heredem, si ipse Donator tacuit; prout expresse habetur *cap. ult. De donationibus*, & alibi. Et de hac *Donatione inter vivos* ex professio hic agitur.

18 CONCL. III. *Donatio* ante acceptationem non parit ullam obligationem potestque libere revocari, etiam si quis absolute se obligare voluerit. Patet hoc ex dictis *Dist. præc. num. 4. & 6.* nam nullus est contractus, nullumque pactum, donec adsit consensus reciprocos duorum.

19 Notandum tamen cum Sanchez *lib. 1. de Matr. disp. 6. num. 11.* & communiori Doctorum, paucis exceptis, quod *Donatio* præfenti & tacenti facta jam censetur ab eo esse acceptata: quia in favorabilibus, *Qui tacet, consentire videtur*, juxta *Regulam* 43. *Juris in 6.* Imo, si *Donatio* fiat ipsimet Deo, vel ad ejus honorem cuiuspiam Sancto, valet ea irrevocabiliter, nec opus est ulteriori acceptatione; cum Deus illico acceptet *Donationem* ad honorem suum factam.

20 Notandum ulterius, quamvis pro alio *Promissionem*, aut *Donationem* nemo possit regulariter loquendo acceptare absque speciali ejus mandato, seu commissione, id tamen fallere in nonnullis casibus. Siquidem primo, si *Donatio* fiat determinatæ Ecclesiæ, vel alicui alteri causæ piæ, potest ea a quolibet, etiam homine privato, acceptari, dummodo verba ad ipsum dirigantur. Et notanter hoc ultimum additur: quia, si verba nullo modo, neque expresse, neque implicite ad ipsum diriguntur, is non poterit acceptare *Promissionem*, vel *Donationem* pro alio; prout ex communi docet Covarruvias in c. *Quamvis. De pactis. in 6. part. 2. §. 4. n. 13.* & Lessius

Anacl. Reiffenstuel. Theol. Tom. I.

*lib. 2. cap. 18. n. 49.* Nam si verba ad eum nullatenus diriguntur, non intervenit reciprocos consensus, qualis tamen requiritur ad omne pactum, omnemque *Promissionem*, atque *Donationem*. Deinde in quibusdam casibus, dummodo verba dirigantur ad ipsum præsentem, potest Pater vel Mater *Donationem* acceptare pro Filio, Tutor pro pupillo, Curator pro Minore, Filius familias pro Patre, Servus pro Domino, Monachus pro Monasterio, & alii hujusmodi.

21 CONCL. IV. *Donatio* mere verbalis ante actua-lem rei traditionem non dat jus in re, sed ad rem dumtaxat. Ita communis: quia, ut dicitur l. *Traditionibus. C. De pactis. ibi: Traditionibus, & usucapionibus dominia rerum, non nudis pactis transferuntur*. Unde licet acceptes *Donationem* verbalem, qua tibi Cajus donat equum absentem, non per hoc acquiris jus in re, ac dominium equi ante traditionem: & hinc, si interea Cajus donet, aut vendat equum alteri, eique tradat, is dominium equi acquirit; tu autem habes actionem personalem in Cajum pro injuria tibi facta ratione juris ad rem, quod vi *Donationis* habebas in equo.

22 CONCL. V. *Donatio inter vivos* ultra quingentos Solidos Jure communi Cæsareo est invalida, nisi accedat insinuatio apud Judicem: sed quoad excessum dumtaxat ipsa non valet, simulque certis adhuc casibus exceptis. Ita communis, & habetur expresse decisum l. *penult. C. De donationibus* & alibi. Et hoc quidem rationabiliter est constitutum, ut obvietur fraudibus nonnullorum, simulque, ne cives ceteroquin locupletes per excessivas *Donationes* temere factas ad paupertatem redigantur.

23 Porro per quingentos Solidos hodie communiter intelliguntur quingenti Aurei, seu Ducati, qui faciunt mille Imperiales nostrates: nam in Jure Aureus accipitur pro Solido, ita ut septuaginta duo Solidi, seu Aurei faciant unam libram auri, prout sentit Glossa §. *fin. Institut. De pena temere litigantium*. Ut si quis ultra quingentos tales Solidos velit donare inter vivos, opus est, ut Actis publicis intervenientibus talem *Donationem* insinuet apud Magistratum, & judicis auctoritas accedat, alioquin ipsa quoad excessum non valebit.

24 Dicitur, *quoad excessum non valebit*: nempe quoad illam quantitatem summæ, quæ excedit quingentos Solidos. Siquidem quoad summam quingentorum Solidorum *Donatio* illa valebit. l. *Sancimus. C. De donationibus*. Accedit ratio: quia, ut habet *Regula* 37. *Juris in 6. Utile non debet per inutile vitari*: quod communiter intelligitur, quando utile ab inutili separari potest, prout fit in proposito.

25 Additur in Conclusionem: *simulque certis adhuc casibus exceptis*. Nam sunt nonnulli casus, in quibus sustinetur *Donatio* ultra quingentos Solidos. Sic enim primo valet *Donatio* in quacumque quantitate, etiam sine insinuatione apud Judicem, si facta est Ecclesiæ, vel ad alias causas pias: quia Jus Civile pietatis opera impedire, vel restringere non potest; cum Christi consilium sit *Matth. 19. Vade, vende, quæ habes, & da pauperibus*. Dummodo tamen *Donatio* non sit inofficiosa, id est, talis, quæ liberis legitimam Jure naturæ a parentibus debitam adimat, aut quæ vicissim ad sustentationem necessaria: nam talem *Donationem* Christus quoque reprobatur *Matth. cap. 15.*

26 Deinde valet *Donatio* etiam ultra quingentos Solidos facta a Principe, vel Principi a privato. Rursum valet ejusmodi *Donatio*, quæ fit militibus a belli Ducibus ex propriis bonis mobilibus, vel hostium spoliis. Insuper valet *Donatio*, quæ fit ob causam, ut puta ad militiam, aut nuptias, ad redimendos captivos, ad ædium destructarum reparationem. Item valet *Donatio* remuneratoria beneficiorum, ac obsequiorum præstitorum, prout habetur l. *Sancimus* & l. *Si quis pro redemptione. C. De donationibus* & alibi.



## Additio.

\* Quinimo loquendo de Foro interno, & ante sententiam Judicis, aut requisitionem Donantis etiam reliquæ Donationes, quingentos Solidos excedentes, in tantum valent, ut eisdem sponte donatos, & extradi- tos non teneatur Donatarius iterum reddere quoad il- lum excessum, nisi repetat Donator: repetenti tamen (inquit Christoph. Chlingensperg. lib. 3. Instit. Tit. 7. §. 16. object. 5.) tenetur in conscientia restituere, sicut & ejus hæredibus: intellige, nisi adsit aliqua ex supe- rius allegatis exceptionibus. \*

## APPENDIX.

## De variis Donationibus in specie.

## SUMMARIUM.

- \* De Donationibus, quas Parentes faciunt suis liberis. Addit. I.
- \* An sint computandæ in hereditatem? Addit. II.
- \* De Donationibus Sponsorum ad invicem. Addit. III.
- \* De Donationibus, quas ad invicem faciunt Maritus, & Uxor. Addit. IV.
- \* De Donationibus Episcoporum, Prælatorum &c. ex bonis Ecclesiasticis. Addit. V.

## Additio I.

\* Quæres I. Quid sentiendum sit de Donationibus, quas parentes faciunt suis prolibus nondum emancipa- tis? Resp. I. Si hæc Donationes factæ fuerint a matre, avia, vel avo materno, firmæ existunt, nec ad libitum revocari valent. Ita cum aliis Molina Tom. I. de Jur. & Just. disp. 191. & Sporer tract. 6. in Decal. cap. 3. sect. 3. n. 42. Ratio est: quia nullus textus Juris assignari potest, per quem similes Donationes infirmarentur. Resp. II. Si fiant a Patre tales Donationes, regulariter loquendo non sunt firmæ, sed ab ipso pro libitu iterum revocari possunt, nisi juramento fuerint confirmatæ. Ita de- ducitur ex L. 3. C. De inofficiosis donation.

Dixi: regulariter loquendo, hæc Donationes non sunt firmæ: nam patitur hæc regula aliquas exceptiones, ubi similes Donationes firmanur: sic contingit I. Si res do- nata fuerit Proli a Patre tradita: & per mortem Patris, vel per emancipationem Proles confirmata. II. Si fuerit Donatio remuneratoria, nimirum in recompensationem aliorum Beneficiorum seu extraordinariorum laborum. III. Si fuerit facta ob certam causam, puta Filio ad Nuptias, Filia in dotem, vel ad ingressum Religio- nis; nam similes Donationes nequeunt amplius pro libitu revocari. Vide Sporer loc. cit.

## Additio II.

\* Quæres II. An Donationes alicui ex Prolibus factæ, postea Parente mortuo, conferendæ sint cum reliquis bonis relictis in divisionem Hæreditatis? Hæc contro- versia sæpius jam graves tricas inter Fratres & Sorores ad invicem, mortuis eorum Parentibus, excitavit, ali- quibus, qui minus in vivis receperunt, volentibus, ut illi, qui plus acquisierunt, patiantur dictum excessum computari in divisionem Hæreditatis: aliis vero præ- tendentibus, eum excessum esse gratis donatum a Paren- tibus adhuc vivis, sicque nec subiacere collationi Hære- ditatis. Porro ante resolutionem notandum, quod non moveatur quæstio, si Parens ipsemet expresse se declara- verit: nam si is tempore Donationis voluerit tales res donatas conferri postea in Hæreditatem, haud dubie sic debebunt conferri; sicuti econtra, si noluerit computari, neque computabuntur in divisionem Hæreditatis, mo- do aliis necessariis Hæredibus adhuc remaneat legitima. Dubium itaque solummodo remanet, quando Parens nihil in testamento, vel ab intestato desuper disposuit. H. N. Resp. I. Si similes Donationes factæ fuerint Filio

propter nuptias, aut Filia in dotem, vel per modum dotis ob ingressum Religionis, dictæ Donationes mortuo Parente conferendæ sunt in divisionem Hæreditatis, si Parens in vivis aliter expresse non disposuerit. Ita eru- tur ex L. 17. C. De Collationibus. Resp. II. Si extra speci- ficatas aliæ Donationes, inter vivos factæ, fuerint validæ & firmæ, ex tempore mortis Parentum non sunt com- putandæ in divisionem Hæreditatis. Ita intus Bava- riæ Cancellarius Schmid in Commentariis in Jus Bavaric. Tit. 36. art. 10. n. 16. Ratio est, quia similes res præsu- muntur grâti donatæ absque onere computationis in legitimam, prout recte advertit Schmid loc. cit. Sunt autem in specie loquendo tales. Inprimis. Donationes remuneratoriæ ob Beneficia præstita, aut extraordina- rios labores juxta communem Doctorum. Secundo. E- quus & arma, quæ subministrantur Filio eunti ad mili- tiam l. 4. C. Familia eriscunda. Pariformiter sentiendum de expensis in studia cujusdam Filiorum factis. l. 50. ff. Familia eriscunda, quoniam armis & apparatui militari æquiparatur apparatus litterarius, hocque procedit sal- tem, si excessus expensarum quoad studia non sit nimius respectu aliorum Liberorum. Tercio. Pariter in divisio- nem Hæreditatis non computantur quotidiana alimen- ta, & vestimenta liberorum. L. un. §. 2. C. De Contract. Ratio esse potest; quia hæc causa liberorum communis est, cum omnes vestimentis indigeant, licet forsan per accidens uni plus, quam alteri obveniret, quod ad evi- tandas lites non solat inter liberos attendi, nisi excessus patenter foret nimius. Quod si plures similes casus oc- currerent, eosdem videre poteris in Jurè Bavarico, Tit. 36. art. 10. ac 14. & apud Schmid solidissime in id glossantem, vel apud Sporer Tract. 6. in Decalog. cap. 3. sect. 3. n. 43. & seqq. \*

## Additio III.

\* Quæres III. Quid statuendum sit de illis Donatio- nibus, quas Sponsi ad invicem faciunt, antequam actua- liter Matrimonium contrahant? Resp. I. Si Matrimo- nium postea contrahatur, ac consumetur, illa pars, cui res antea donatæ fuerunt, eisdem pleno jure suas facit. Ita docet Sanchez lib. 6. de Matrim. disp. 19. ac proba- tur ex Jure arg. L. Si mater. & Si a sponso. C. De donat. ante nupt. Resp. II. Si illa pars, cui res a comparte do- nata est, ex sua culpa sponsalia non servet, tenetur rem donatam restituere: si vero ex culpa donantis non se- quatur Matrimonium, nihil amplius obligatur Donata- rius reddere. Ita habetur textu claro L. Cum veterum. C. De donation. ante nupt. Resp. III. Si ex nulla culpa donantis, sed v. g. morte, aut Professione Religiosa al- terutrius sponsum Matrimonium non fuerit secutum, pariter adstringitur illa pars quæ rem donatam accepit, iterum restituere L. Si a sponso. & L. Cum veterum. C. De donat. ante nupt. ubi tamen excipitur Sponsa illa, quæ post Sponsalia accepit a Sponso osculum, vel cum eo exercuit copulam: hæc enim rei donatæ adhuc in si- mili casu poterit retinere medietatem. \*

## Additio IV.

\* Quæres IV. Quid dicendum sit de Donationibus, quas ad invicem instituunt Maritus & Uxor tempore ac- tualis Matrimonii? Resp. Tales Donationes regulariter loquendo non esse firmas, sed posse ad nutum donantis revocari. Ita deciditur cap. fin. De donat. inter virum & uxorem. Dixi: regulariter loquendo; nam dantur casus excepti, ubi tales Donationes etiam ante mortem donan- tis firmæ censentur, nec ad ejusdem libitum revocari possunt. I. Si fuerint factæ remunerationis causa ob alia obsequia a consorte præstita, dummodo inter obsequia & remunerationem sit aliqua proportio seu æqualitas. Ratio est: quia sic conjuges magis sti- mulantur ad obsequia extraordinaria sibi invicem præstanda arg. L. 1. & L. 27. ff. De donat. II. Si factæ fuerint inter Principes & Comites Sacri Roma- ni Imperii. Sanchez lib. 6. Matrimon. disp. 3. num. 1. III. Si inter alias personas conjugatas fuerint



res donatæ exigui pretii. Barbosa in cap. fin. De donat. IV. Si fuerint Donationes mutuae, saltem quando una non excedit notabiliter alteram. L. 7. §. 2. ff. De donation. V. Demum firmantur etiam aliæ Donationes per ipsam mortem donantis conjugis, si non excefferint 500 solidos. Quod si vero dictam summam excefferint, per solam mortem non firmarentur, nisi tales Donationes iterum in Testamento vel Codicillo repetitæ fuissent. L. 25. C. de donat inter vir. & uxor. ac Chlingensperg. lib. 2. Instit. Tit. 1. q. 13. Alias exceptiones vide in Jure Canonico lib. 4. Decret. Tit. 20. §. 1. hic positæ sunt communiores.

Additio V.

Quæres V. Quid resolvendum sit circa illas Donationes, quas ex Bonis Ecclesiasticis faciunt Episcopi, aliive Prælati Ecclesiarum, seu Monasteriorum, & eorum Administratores? Ante Responsionem Not. I. Quod hic non sit sermo de Bonis Ecclesiasticis Mensæ, vel honestæ sustentationi Prælatorum (si quæ talia sint) incorporatis; nam quod de illis æque ac alii possint libere disponere, inter DD. convenit, dummodo bene notetur, quod teneantur superflua erogare in causas pias.

Notand. II. Quod neque instituatur in præsentī Quæstio de Bonis ipsius Ecclesiæ immobilibus vel mobilibus pretiosis; nam quod ad alienationem horum præter gravem causam requiratur etiam consensus Capituli, patet ex Titulo Juris Canonici c. 1. De rebus Ecclesiæ alienandis. Dubium itaque solummodo movetur circa mobilia quoad Donationes moderatas. H. N.

Resp. I. Episcopi, aliive Prælati Ecclesiastici possunt de Bonis Ecclesiæ mobilibus facere Donationes respectively modicas, ac moderatas, maxime si fuerint remuneratorie, vel procedant ex causa pietatis, eleemosynæ, aut misericordiæ. Probatur ex sensu contrario: quia c. 2. De donationibus, solum prohibentur Donationes graves, & magni momenti: & certe alias, præsertim apud monasteria non evitabitur gravis murmuratio, & avaritiæ suspicio.

Resp. II. Religiosi extra monasterium degentes, & acquirentes cum licentia Superiorum Beneficium cum libera administratione, possunt de redditibus Beneficii donare, ut alii Clerici Beneficiati; cum habeantur instar aliorum a Superioribus suis non restricti, uti supponitur.

Resp. III. Si tamen eorum, vel aliorum Monasteriorum Officialium potestas a Superioribus sit limitata, tenentur se huic limitationi conformare juxta laudabiles consuetudines & consensum Superiorum saltem prudenter interpretativum. Videatur de hoc Auctor in Jure Canonico. lib. 3. Decret. Tit. 24.

QUESTIO III.

Quid sit Commodatum, Precarium, & Depositum?

SUMMARIUM.

- 27 Commodatum, quid?
- 28 Quomodo differat a Locatione,
- 29 Pignore, & Deposito, ac Mutuo?
- \* Ad quid teneatur utens re commodata?
- 30 Precarium, quid?
- 31 Depositum, quid?
- 32 Depositarius re deposita utens sine licentia, peccat.
- 33 Limitatur Conclusio.
- \* Et subjungitur notabile quæsitum duplex.
- Addit. I. & II.

27 CONCL. I. Commodatum est alicujus rei ad aliquem specialem usum gratuito facta concessio. Ita Glossa c. un. & Commodatum. De commodato, estque in re communis. Ubi tamen notandum, quod hic Commodatum definiatur, prout sumitur pro contractu: subinde enim Commodatum accipitur etiam pro ipsa re Anac. Reiffenhu. Theol. Tom. I.

commodata. Et quidem is, qui rem suam alteri commodat, dicitur Commodator, seu Commodans: qui vero accipit rem ab alio sibi commodatam, appellatur Commodatarius: & idem dicendum de Depositario, Mutuatario, & hujusmodi terminis.

28 Dicitur inprimis in data definitione, alicujus rei: intellige, siue ea immobilis sit, ut puta domus, aut stabulum, siue mobilis, præsertim quæ usu non consumitur, licet minuatur, seu atteratur, ut equus, vestis, vasa &c. hæc enim omnia commodari possunt L. 1. ff. Commodati. Et additur, gratuito facta concessio: in hoc si quidem differt Commodatum a Locatione, uti fusius videri poterit in Jure Canonico lib. 3. Decret. Tit. 18. ubi etiam plura notabilia circa Locationem, emergente aliquo casu inveniuntur; uti & illud, quod res tunc proprie intelligatur commodata, si nulla mercede accepta cuiuspiam utenda traditur, alioquin mercede interveniente locatus usus rei videatur. Gratuitum enim Commodatum esse debet, uti notatur §. Item Instit. Quibus modis re contrahitur obligatio.

29 Dicitur ulterius, ad usum: in hoc quippe Commodatum differt a Pignore, & Deposito, quorum usus non conceditur: nam si Creditor pignore, vel Depositarius re deposita, domino invito utatur, furtum committit, §. Furtum autem fit. Instit. De obligationibus, quæ ex delicto &c. Deinde per hoc differt Commodatum a Mutuo, utpote in quo rei datæ dominium transfertur, in Commodato vero solo usu, dominio aut possessione penes Commodantem remanente. Additur vero, ad aliquem specialem usum: non enim licitum est uti re commodata ad alium usum, quam ad quem concessa est, arg. cap. un. De commodato, ibi; Nisi post usum expletum, cujus gratia res fuerat commodata, & alibi.

Additio.

\* Porro, qui utitur re commodata, tenetur ad sumptus ordinarios circa eandem, e. g. obligatur præbere pabulum equo commodato, vel soleis ferreis, si deficerent, instruere: non tamen tenetur ex propriis ad sumptus extraordinarios v. g. ad expensas pro equo ægroto iterum sanando, aut pro redimendo, si equus ille citra culpam fuerit captus ab hostibus. Ita ex Cardinali de Lugo la Croix lib. 3. part. 2. n. 821. \*

30 CONCL. II. Precarium est, quod precibus petenti utendum conceditur, quamdiu is, qui concessit, patitur. Ita habetur L. 1. ff. De precario, estque communis. Unde Precarium ferme convenit cum Commodato, cum utrumque gratis fiat, differt tamen a Commodato in hoc, quod Commodatum fiat ad certum tempus, vel certum usum, ita ut antea res commodata a Domino repeti non possit, eo autem finito restituenda sit, quamvis non repetatur; cum dies statuta pro domino interpellat, cap. ult. De locato, & alibi. Econtra Precarium quocumque tempore revocari potest: nam, qui precario concedit, sic dat, quasi tunc recepturus, cum sibi libuerit cit. L. 1. ff. De precario. Intellige, dommodo non statim revocetur sine cogente necessitate, ne frustra & illusorie concessum videatur, ac beneficium alicui præstitum, ipsi damnosum existat.

31 CONCL. III. Depositum est, quod custodiendum alicui datur. Ita habetur L. 1. ff. Depositum. Et quidem Depositum regulariter fit gratia solius deponentis, nulla mercede data vel promissa; alioquin si pro custodia rei detur merces jam hoc casu Depositum transibit in contractum Locationis & Conductionis; cum Depositarius accipiens mercedem, censeatur operas suas ad rem custodiendam alteri locasse: ut dicitur cit. L. §. Si vestimenta 8. ff. Depositum.

32 CONCL. IV. Si Depositarius re deposita sine expressa, vel rationabiliter præsumpta domini licentia utatur, aut ipsam alienet, peccat, & furtum committere censetur. Ita habetur L. Si sacculum ff. Depositum & §. Furtum autem fit 6. Instit. De obligationibus, quæ ex delicto nascuntur, cum concordantiis. Ratio est: quia usus rei non est ipsi concessus, sed tantum res ipsa, ut eam custodiat.



33 Additur tamen, *sine expressa, vel rationabiliter præsumpta domini licentia*. Siquidem quando Depositarius bona fide existimat, domino id non displicere, si utatur re deposita, jam non peccabit utendo, nec furti actione tenebitur; idque multo magis dicendum, si Dominus expressam utendi licentiam concefferit. Addit Lessius lib. 2. cap. 27. num. 5. quando Depositum est res usu consumptibilis, v. g. triticum, vinum &c. & Depositarius certus est, se, quando depositum repetetur, paratum habiturum aliud ejusdem mensuræ & bonitatis, tunc non fore peccatum, saltem mortiferum, uti Deposito, & illud alienare: quia nullum incommodum taliter irrogatur deponenti, unde is rationabiliter censetur non esse invitus.

#### Additio. I.

\* Quær. I. An, si quis ex præsumpta licentia usus fuerit re deposita ipso usu consumptibili, teneatur postea deponenti eandem in simili specie reddere, vel num sufficiat, si restituat pretium, quo res deposita tempore usus æstimabatur? Casus potest esse sequens. Cajus rusticus tempore belli deposuit apud Hospitem 10. scaphas frumenti; cum tamen successu temporis immineret probabile periculum, ne totum frumentum, si diutius reser- vetur, ex integro corrumpatur, prædictus Hospes alias pro se suæque familia indigens frumento, illud sibi applicat. Cessante hostium insultu sequitur annus valde sterilis, & scapha frumenti constans antea quinque, ascendit in pretio ad decem florenos. Quæritur ergo, an Hospes satisfaciatur conscientiæ suæ, si Rustico pro qualibet ex decem scaphis frumenti consumpti det quinque florenos, prout tempore, quo acceperat quælibet scapha æstimabatur, vel num potius obligetur quamlibet scapham 10. florenis emere, & sic in specie deponenti decem scaphas restituere? Respondeo, esse in simili casu attendendum, num quis illam rem depositam ex præsumpta deponentis licentia voluerit sibi comparare titulo emptionis, vel titulo mutui? si titulo *emptionis*, satisfacit, dum reddit pretium, quo tempore usus illa res æstimata fuit; cum emptio & venditio referat pretium rei emptæ ad tempus contractus; e contra vero, si titulo *mutui* accepit, obligatur in specie similem rem (id est, quoad casum præsentem 10. scaphas frumenti) restituere: nam in mutuo non pretium rei, sed eadem res & specie & bonitate restitui debet, uti clare colligitur ex L. 3. ff. *De rebus creditis* &c. ac præter alios sic sentiunt Layman lib. 3. Theolog. Moral. Tra& 4. cap. 15. & Sporer Tra& 6. in Decalog. cap. 4. sect. 1. n. 7. Habet tamen talis Depositarius, qui titulo mutui rem depositam accepit, etiam hanc utilitatem, ut, si interea similis res in pretio non cresceret, sed potius decreveret; adhuc satisfaceret restituendo eandem specie, puta in præsentem decem scaphas frumenti, etsi longe minori pretio comparatas: qualiter non posset facere, si titulo emptionis comparasset, sed deberet reddere pretium in eo valore, quo res deposita tempore emptionis æstimabatur. \*

#### Additio II.

\* Quær. II. An, si quis, eo quod sibi a deponente aliunde ex iustitia quidpiam debeatur, titulo compensationis usus fuerit pecunia deposita absque licentia deponentis, teneatur eandem iterum restituere deponenti? Respondeo affirmative saltem in Foro externo; ubi (nisi ostendere queat, quod ipsemet pro conservando deposito expensas tales facere debuerit, *argum. L. In rebus* 18. §. 4. ff. *Commodati*.) ad restitutionem deponenti faciendam condemnabitur, quia jus suum, quod reciproce præterit, debuisset alia via apud Judicem quærere. Ita satis clare habetur cap. 2. *De deposito* & Leg. *Si quis C. Depositi*. Ex quo deducitur, quod multo minus Depositarius possit Creditori deponentis, quamvis requisitus ab eo, propria auctoritate ex deposito aliquid tradere Titulo recompensationis; uti ex Lugone, &

aliis advertit la Croix lib. 3. part. 2. n. 831. & deducitur a fortiori ex Juribus supra citatis. \*

### QUESTIO IV.

Ex qua culpa teneatur Commodatarius, Depositarius, & hujusmodi, si res commodata, deposita &c. apud ipsum pereat?

#### SUMMARIUM

- 34 Culpa aliter accipitur apud Juristas, quam Theologos, & quomodo?
- 35 Culpa juridica seu civilis, Casus, & Dolus, quid?
- 36 Culpa juridica triplex. Lata, quæ equiparatur Dolo, Levis, & Levissima, quæ?
- 37 Commodatarius, aut Depositarius non tenetur de casu fortuito.
- 38 Nisi aliter fuerit conventum.
- 39 Aut is fuerit in mora reddendi.
- 40 Vel nisi casus sua culpa acciderit.
- \* Quid sentiendum, si acciderit culpa Nuntii intermedii?
- 41 Spectando Jus naturale, quisnam teneatur de damno dato in re alterius?
- 42 Secundum Leges humanas, tenetur Commodatarius de culpa levissima, Depositarius solum de dolo, cur?
43. 44. 45 Tres Regula, quantum ad Propositum.
- 46 An data Regula obligent in conscientia ante sententiam Judicis?
- 47 Loquendo de damno ex culpa levi, vel levissima in contractibus dato, communior affirmat.
- 48 Verum sententia negativa non est improbabilis.
- 49 Quid, si dubitetur an culpa tua damnum acciderit?
- 50 Depositarius, vel Commodatarius, an possit salvare res proprias omissis alienis, si non potest utrasque?
- 51 An salvando alienas pretiosiores, possit petere compensationem?
- \* Quid sentiendum, si res aliqua fuerit deposita apud Religiosum inscio Monasterio?

34 **A**dvertendum quoad propositum, quod culpa aliter accipitur apud Juristas, aliter apud Theologos: siquidem apud Theologos culpa idem est, ac peccatum, sive id mortale sit, sive veniale; apud Jurisperitos vero culpa idem est, ac omissio alicujus diligentiae, unde sequitur quodpiam damnum proximo. Et potest facile contingere, quod hujusmodi culpa juridica seu civilis sit homini involuntaria, & omni peccato coram DEO vacet: veluti si ex naturali oblivione librum tibi commodatum in publico loco reliquisti, unde sequitur ejus amissio, culpam juridicam commisisti, quamvis coram Deo nihil peccaveris ob hujusmodi naturalem inadvertentiam.

35 Differt autem culpa hujusmodi a Casu, & Dolo: nam culpa quæcumque civilis potest caveri diligentia hominis, cum sit omissio illius diligentiae, quam homines diligentes, vel saltem diligentissimi talis status & conditionis adhibere solent. Casus autem est rei inopinatae eventus, qui neque a diligentissimo prævideri, & caveri potest: sic casu fortuito fiunt, quæ contingunt per bellum, furtum latronum, terræ motum, gelu, grandinem, fulmina, & his similia. Dolus vero dicitur omnis calliditas, fallacia, & machinatio ad circumveniendum, fallendum, & decipiendum alterum adhibita. L. 1. ff. *de Dolo malo*.

36 Porro culpa juridica, seu civilis, communiter dividitur in culpam latam, levem, & levissimam. Culpa lata est omissio ejus diligentiae & circumspectionis, quam passim homines ejusdem conditionis adhiberi solent: qualis foret, si quis librum commodatum relinqueret foris ante ostium, qui proinde perditur. Et talis culpa lata, licet dolus proprie non sit, tamen in Jure equiparatur dolo L. 1. ff. *Si mensor falsum* &c. ibi: *Lata culpa plane dolo comparabitur*, cum concordantiis. Culpa levis est omissio ejus diligentiae, & circumspectionis, quam solent



solent homines diligentiores illius conditionis, vel artis adhibere: & talis culpa foret illius, qui librum sibi commodatum intra cubiculum relinqueret, ostio tamen aperto; nam homines diligentiores solent claudere januam. Culpa tandem levissima est omissio ejus diligentiae, quam diligentissimi & prudentissimi adhibent: qualis foret ejus, qui librum sibi commodatum intra cubiculum relinquens clausit quidem ostium, sed non tentavit manu, an illud bene sit obserratum: prout hæc culpas exemplificat Navarrus cap. 17. *Manualis* n. 178. & alii. His prænotatis, sit

37 CONCL. I. Si res apud Commodatarium, aut Depositarium fortuito casu pereat, ad nullam ipse restitutionem tenetur (nam quælibet res domino suo perit) nisi aliter expresse sit conventum, aut ipse fuerit in mora reddendi, vel nisi ex sua culpa fuerit data occasio tali casui fortuito. Ita Doctores communiter, & habetur expressum in Jure Canonico cap. un. *De commodato*. ibi: *Cum gratia sui tantum quis commodatum accepit, de levissima etiam culpa tenetur: licet casus fortuitus (nisi acciderit culpa sua, vel intervenerit pactum, seu in mora fuisset) sibi non debeat imputari.* Hæc ibi.

38 Additur notanter I. *Nisi aliter expresse sit conventum*: nam si pactum intervenit de præstando seu refarciendo damno, quomodocumque res pereat, tenebitur quis etiam de casu fortuito, eo quod periculum rei in se suscepit, seque obligaverit ad quodcumque damnum refarciendum: siquidem *Contractus ex conventionem legem accipere dignoscuntur*, Reg. 85. *Juris in 6.*

39 Additur II. *Nisi fuerit in mora reddendi*: quia, si quis tardaverit reddere domino Commodatum post expletum ejus usum, vel Depositum, postquam illud dominus repetivit, sicque fuerit in mora reddendi, tenebitur etiam de casu fortuito: nam *Mora sua cuiuslibet est nociva*. Reg. *Juris in 6.* Intellige, nisi res eodem modo fuisset peritura apud dominum; quia tunc non censeretur domino fuisse causa damni, sicque non obligaretur ad recompensationem damni. Lessius lib. 2. cap. 7. num. 38. & alii.

40 Additur III. *Nisi casus fortuitus sua culpa acciderit*: prout fieret, si vas argenteum, tibi pro convivio in civitate celebrando commodatum, tecum accepisti peregre profectus, sicque illud in naufragio, vel prædonum incursum perdidisti; nam tunc teneberis de hoc casu fortuito, utpote qui tua culpa accidit, qua Commodatum sine licentia commodantis foras extulisti. Et hæc tres limitationes expresse habentur in cit. cap. un. *De commodato*.

Additio.

\* Quod si rescire desideres, an inter casus fortuitos, ita ut Commodatarius ab onere restitutionis sit liber, numerari valeat, si rem commodatam is tradat nuntio, ut Domino restituat: hic vero cum eadem occulte aufugiat? Resp. Si nuntius iste fuerit habitus communiter fidelis, tunc inter casus fortuitos talis fuga nuntii computatur, & res ipsi Domino perit, ac Commodatarius ab onere restitutionis liberatur: secus vero dicendum, si ipse nuntium constituat, de cujus fidelitate sibi alias sufficienter non constat; tunc enim Commodatarius sic faciens non est absque culpa. Vide Jus Canonicum lib. 3. *Decret. Tit. 15. §. 2. num. 34. & seqq.*

41 CONCL. II. Sistendo intra limites Juris naturalis, nemo tenetur de damno dato in re alterius, etiam si sit apud ipsum ex contractu, nisi ob dolum aut deliberatam culpam latam; siye, nisi res illa pereat apud ipsum ex tanta sua negligentia seu culpa, quæ sit peccatum mortale. Ita Lessius loc. cit. n. 38. cum aliis. Notanter dicitur: *sistendo intra limites Juris naturalis*, propter sequentem Conclusionem: unde sit

42 CONCL. III. Spectando tamen leges humanas, aliter de hoc est discurrendum. Siquidem, loquendo de Commodato, cum gratia sui tantum quis commodatum accepit, de levissima etiam culpa tenetur, ut habetur cit. cap. un. *De commodato*, cum concordantibus. Econtra vero Depositarius ordinarie tenetur solum præstare dolum, &

culpam latam arg. L. 1. C. *Depositum*. ibi: *Qui depositum accepit, dolum solum & latam culpam præstare debuit, & tenent Doctores communiter.* Ratio diversitatis inter Commodatarium, & Depositarium est: quia Depositum regulariter fit gratia solius deponentis, ut illud ipsi secure asservetur; Commodatum vero gratia solius Commodatarii, cujus necessitati atque indigentiae per rem commodatam quis subvenit: atqui naturalis æquitas postulat, ut major adhibeatur diligentia in custodienda re aliena, quam quis ad solam suam utilitatem accepit, quam si eam accepisset ob alterius dumtaxat gratiam & utilitatem: ergo.

43. Porro ut tota hæc materia clarius præ oculis habeatur, en tibi tres regulas, quas Doctores passim assignant, atque desumunt ex variis textibus utriusque Juris. I. Regula: In contractibus, qui celebrantur gratia dantis tantum (prout regulariter loquendo fit in Deposito) præstatur dolum, & culpa lata solum: exceptis tamen quibusdam contractibus nempe Tutelæ, Mandati, & Negotiorum gestorum, in quibus ob specialem rationem etiam præstatur culpa levis, ut dicitur l. *Contractus* 23. ff. *De Reg. Juris*, & amplius explicant Juristæ: qui pariter ob specialem Juris dispositionem Leg. 3. ff. *Nautas, Caupones, hosce, & quoscumque alios*, qui ex officio suscipiunt deposita, condemnant, atque ad restitutionem obligant; si etiam ex culpa tantum levissima illorum Depositum quodpiam perierit, aut deperditum fuerit.

44 II. Si contractus fiat gratia recipientis tantum (prout regulariter fit in Commodato) tunc præstatur non solum dolum & culpa lata, sed etiam culpa levis atque levissima arg. cit. c. un. *de commodato*. Excipe Precarium, in quo, quia totaliter ex liberalitate concedentis descendit, atque ad libitum ejus quolibet tempore revocari potest, non nisi dolum & culpa lata præstatur text. clar. l. *Quæsitum* §. *Eum quoque* ff. *De precario*.

45 III. Quod si vero Contractus fiat gratia utriusque (prout contingit in Pignore, quod datur & gratia Creditoris, ut ei fiat assicuratio rei creditæ, & gratia Debitoris, ut ei sub assicuratione pignoris quidpiam mutuo concedatur) tunc præstatur dolum & culpa lata, simulque culpa levis, non autem levissima arg. l. *Si ut certo* §. *Nunc videndum est* ff. *Commodati*, & tenent Doctores communiter. Verum occasione præmissorum,

46 Quæres I. An datæ Regulæ, seu Leges obligent in conscientia ante sententiam Judicis ad reparationem damni, ex culpa dumtaxat levi, vel levissima dati? & notanter additur, *ex culpa dumtaxat levi, & levissima?* nam si deliberate detur damnum ex dolo, vel culpa lata (qualis, ut dictum, dolo æquiparatur) certum est, adesse obligationem in conscientia refarciendi damnum tertio illatum in Contractibus, non minus, ac extra illos.

47 Resp. Quamvis communior sit sententia, dictas leges statuentes obligationem restituendi ratione damni, ob culpam levem, vel levissimam in contractibus dati, obligare in conscientia, & ante sententiam Judicis, nihilominus opposita sententia, negans talem obligationem in conscientia, saltem antequam ab altera parte exigatur, vel etiam ante sententiam Judicis, non est improbabilis, præsertim loquendo de damno ex culpa levissima dato. Ita Lugo disp. 8. *de Just. & Jure sect. 8. num. 105.* Lessius lib. 2. cap. 7. n. 43. & in simili Sanchez lib. 1. *de Matr. disp. 37. n. 4.* citans alios. Ratio prioris partis est: quia ejusmodi obligatio non tam descendere videtur ex culpa, quam ex natura contractus, prout argumentatur Navarrus cap. 17. *Manualis* n. 184. contra Sotum: nam hoc ipso, quod quis ineat talem contractum, censetur se obligare ad præstandam eam diligentiam, quam leges & natura talis contractus requirunt.

48 Altera pars, quæ negat talem obligationem in conscientia, saltem antequam exigatur reparatio damni, a parte adversa, vel etiam ante sententiam Judicis, ex eo suadetur: quia prædictæ leges contractuum non videntur cum tanto rigore in Foro conscientie receptæ, nemo enim



enim est, qui pignori, vel rei conductæ, aut etiam commodatæ putat se maiorem custodiam debere ex iustitia, ac pro Foro conscientie, quam dominus ipse adhibere solet. Accedit, quod potius censeatur esse casus fortuitus, saltem pro Foro conscientie, si ob culpam levissimam, quæ propter naturalem oblivionem & inadvertentiam accidere potest, perit res aliena tibi commodata, absque ulla tua culpa Theologica. Vide dicenda Tract. 9. dist. 5. q. 5.

49 Quæres II. Quid juris, quando dubium existit, an culpa tua damnum acciderit? Resp. Quando Depositarius, vel Commodatarius rationabiliter dubitat an Depositum vel Commodatum sua culpa perierit, nec ne, satis convenit inter Doctores, quod is non teneatur in conscientia ad aliquam restitutionem: tum quia in dubio non præsumitur delictum: tum etiam, quia in dubio melior est conditio possidentis. In Foro tamen externo, si res Depositarii manserint incolumes, præsumitur de dolo arg. cap. 2. De deposito. ibi: Bona fides abesse præsumitur, si rebus tuis salvis existentibus, depositas amiseris: juncta l. Quod Nerva ff. Depositum cum concordantiis. Quod ultimum intelligendum est, nisi Depositarius probet, Depositum casu periisse, vel non potuisse simul cum rebus suis, imminente v. g. incendio, salvari, tunc enim cessaret præsumptio doli.

50 Quæres III. Utrum Depositarius, vel Commodatarius possit subvenire propriis rebus vel potius teneatur salvare res depositas vel commodatas, si utraque ob casum fortuitum, ut puta ob exortum improvum incendium, aut irruptionem hostium, salvare nequeat? Resp. hic opus esse distinctione: nam si res tuæ sint pretiosiores aliis depositis, vel commodatis, fatentur omnes, quod possis præferre tuas pretiosiores aliis minus pretiosis, si ambas salvare nequeas; maxime cum quilibet magis teneatur diligere se, quam alium. Abbas cap. 2. De deposito & alii. Quod si vero res depositæ, vel commodatæ sint pretiosiores tuis, teneris eas præferre rebus tuis vilioribus, easque salvare tuis minoris momenti relictis: quia hoc suadet Prudentia, & æquitas naturalis.

51 Notat tamen Lessius l. 2. cap. 27. n. 28. Layman lib. 3. tract. 4. cap. 7. n. 7. Quod si Depositarius, vel Conductor, aliena propriis præferendo, passus fuerit jacuram, is possit petere compensationem damni sibi emergentis, eo quod nulli officium suum debeat esse damnosum. Secus est in Commodatario: nam, in huius solius gratiam Commodatum sit factum, tenetur is Commodantem servare indemnem, etiam diligentissime custodiendo res sibi commodatas.

#### Additio.

\* Quæres IV. An Ecclesia, vel Monasterium teneatur ad recompensationem deponenti faciendam, si citra consensum Capituli, seu Conventus res deposita apud Rectorem Ecclesie vel Religiosum ex sua culpa pereat. Resp. negative, dummodo hæc ipsa res deposita non fuerit conversa in utilitatem Ecclesie vel Monasterii. Ita statuitur cap. 1. De deposito, & ratio est; quia delictum personæ non debet in detrimentum Ecclesie, seu Monasterii, redundare. Reg. 76. Juris in 6. Vide Jus Canon. lib. 3. Decret. Tit. 16. num. 49. & seqq. \*

### DISTINCTIO III.

#### De testamentis, & ultimis Voluntatibus.

#### QUESTIO I.

Quid, & quoduplex sit Testamentum, & quæ ejus requisita?

#### SUMMARIUM.

1 Testamentum, quid?

\* Qualiter debeat esse constituta Voluntas Testatoris?

2 Dividitur in solemne, & minus solemne, seu privilegium.

3 Paganum, & militare. Testamentum scriptum, seu clausum, & Testamentum nuncupativum, quid?

4 Hoc a Notario solet redigi in scripturam, cur?

5 Ad Testamentum solemne scriptum requiruntur plura.  
1. Hæredis institutio.

6 II Septem Testes.

7 III. Ut testes sint legitimi; & qui sint tales?

8 IV. Ut testes sint rogati.

9 V. Subscriptio, & subsignatio Testamenti.

\* Quidam de Jure Bavarico quoad subscriptionem, & subsignationem?

10 VI. Unitas contextus &c.

11 Ad Testamentum nuncupativum, quæ requirantur?

\* An id valeat per amicum?

1 CONCL. I. Testamentum juxta nominis etymologiam idem est, ac testatio mentis; & recte definitur L. 1. ff. Qui Testamenta, dicendo: Testamentum est voluntatis nostræ iuxta sententia de eo, quod quis post mortem suam fieri velit. Quamvis enim aliqui majoris claritatis gratia addere soleant ly cum directa hæredis institutione; tum ad exprimendam differentiam Testamenti a Codicillo, & aliis ultimis voluntatibus; tum quia institutio hæredis est veluti caput, atque fundamentum totius Testamenti: nihilominus Jurisconsulti hanc particulam subintelligi volunt sub ly iuxta sententia, ist est, legitima, sive juri consona, & habens omnes solennitates Juris, inter quas est directa hæredis institutio.

#### Additio.

\* Porro, ut Testamentum, seu etiam aliquod legatum valeat, illa voluntas Testatoris requisita debet esse actualis & efficax: pro quo bene notandum, quod voluntas illa, qua aliquando volo facere Testamentum, & hunc vel illum hæredem instituere, non sit voluntas efficax actualiter testativa; sicut a pari illa voluntas, qua vult Petrus aliquando Matrimonium contrahere, non est illa actualis voluntas, qua Matrimonium ipsum actu contrahitur. Quinimo tales formulæ: volo aliquando facere Testamentum, & ibidem tui esse memor, sive: sis in tuo servitio fidelis, & faciam suo tempore aliquod pro te legatum in meo Testamento; vel cogito te instituere Hæredem &c. potius censenda sunt proposita & velleitates quam efficax voluntas actualiter testativa, prout cum Rota Romana in Rec. part. 2. decis. 576. n. 3. & part. 8. decis. 108. num. 4. advertit Card. de Luca De Testament. dist. 13. n. 5. & seqq. Unde si similem formulam proferat Herus ad famulum, maritus ad uxorem &c. & postmodum morte præventi Testamentum non condant, vi horum verborum nequeunt tales occurrere uti compensatione, & si jam fecissent, obligandi sunt a Confessariis ad restitutionem. \*

2 CONCL. II. Testamentum varie dividitur. Ec inprimis aliud est perfectum seu solemne, cui quadrat proxime data definitio; aliud minus solemne seu privilegium, quod, etsi careat solennitatibus Jure communi ceteroquin requisitis, tamen ex privilegio valet: ut est Testamentum ad pias causas, Testamentum inter liberos conditum, Testamentum militare, aut factum tempore pestis, vel coram Principe, sive apud Acta Judicis, de quibus infra Quæst. 3.

3 Rursus Testamentum dividitur in paginum, & militare: hoc fit a militibus in castris, illud domi in pace. Testamentum paginum, ac solemne dividitur ulterius in scriptum seu clausum, & nuncupativum. Testamentum scriptum, seu clausum, sic dicitur, quod scripto fiat servata debita forma Juris: & hujusmodi Testamentum scriptum, seu clausum præcipue tunc fit, quando Testator latere vult id, quod in Testamento continetur prout notatur l. Hac consultiissima C. De testament. Porro Testamentum nuncupativum dicitur illud, quo Testator non interveniente scriptura coram testibus ad hoc convocatis nuncupat, seu ore tenus exprimit nomen hæredis, quidque aliud de suis bonis post mortem fieri velit.

4. Notat



4 Notat tamen Layman *lib. 3. tract. 5. cap. 1. n. 3.* cum aliis, quod hodie nuncupatio talis coram testibus facta plerumque a Notario publico soleat in scripturam redigi: non quidem ad substantiam actus servandam, sed ad meliorem rei gestæ probationem, ac Testamenti securitatem: quia fieri potest, ut testes interim moriantur, vel inhabiles reddantur, quo minus coram Iudice voluntatem Defuncti declarare valeant, quorum defectum abunde supplet publicum instrumentum Notarii.

5 CONCL. III. Ad Testamentum solemne scriptum, seu clausum sequentia requiruntur. I. Hæredis institutio: siquidem *Institutio heredis est veluti caput, atque fundamentum totius testamenti §. Ante heredis 34. Instit. de Legatis*, ac proinde spectat ad ejus substantiam: & alioquin inutile est testamentum, in quo nemo hæres instituitur, ut dicitur *§. In primis. Instit. De fidei commissar. hered. cum concordantiis*. Et per hanc conditionem præcipue differt Testamentum a Codicillo, & aliis ultimis voluntatibus, eo quod in Testamento fiat directa hæredis institutio, non item in Codicillo.

6 II. Requiritur septem testes. Et quidem loquendo de Foro externo, ac quantum est de Jure Civili, numerus septenarius testium non tantum est de forma probatoria, sed etiam de substantia Testamenti; adeo quidem, ut si unus deficiat, Testamentum Jure Civili corruat, *arg. l. Si unus C. De testamentis*, ibi: *Si unus de septem testibus defuerit, deficit testamentum*. Covarruvias *cap. 10. De testament. num. 14.* Bartolus, Jason, & alii.

7 III. Requiritur, ut hujusmodi testes sint legitimi, id est, tales, qui de Jure non prohibentur esse testes in Testamento. Et isti, quantum est de Jure Civili, ac loquendo de Testamento ad causas profanas, debent esse homines liberi, masculi, puberes, & nonnullis aliis qualitatibus præditi, de quibus fit mentio *§. Testes & §. Pater Instit. De testam.* Hinc in tali Testamento nequit testis esse femina, neque pupillus, neque servus seu mancipium, neque furiosus, neque prodigus declaratus, neque infamis, neque surdus & cæcus, imo etiam Monachus nequit esse testis, nisi accedente licentia Superioris sui. Insuper in ejusmodi Testamento testes esse non possunt, qui sub potestate Testatoris sunt, aut qui in illo Testamento hæredes instituuntur (bene tamen ii, quibus dumtaxat aliquid legatur) nec, qui existunt in potestate hæredum: *Reprobatur enim in ea re domesticum testimonium, ut habetur cit. §. In testibus. Instit. De testamentis*.

8 IV. Requiritur, quod testes sint rogati, ut sic excludatur omnis suspicio, ac subornatio. Rogare autem in proposito nihil aliud est, quam testes certiorare, quare sint huc convocati: unde non sufficerent Testes fortuiti, vel transeuntes dumtaxat, nisi etiam dicto modo rogarentur, seu certiorarentur.

9 V. Requiritur subscriptio, & subscriptio hujusmodi testium. Nam in Testamento scripto necesse est, ut testibus præsentibus Testator suum esse Testamentum dixerit, quod offertur, eique ipse Testator in primis coram testibus sua manu in aliqua parte subscripserit: quo facto etiam testes uno eodemque die, ac tempore subscribere, & sigillis suis Testamentum consignare debent. Quod si vero Testator litteras ignoret, vel ob infirmitatem, aut aliam quamcumque causam subscribere nequeat, tunc octavus subscriptor pro eo adhibendus est, prout expresse statuitur *cit. l. Hac consultissima. C. De testamentis*.

Additio.

\* Utrum autem æque sufficiat quoad testes, si scribere quis eorum nesciat, & loco talis subscribat substitutus ex ipsis Contestibus, alia est quæstio: ubi præsens Auctor in *Jure Can. Tit. 26. n. 25. & 26.* distinctionem facit inter Jus commune, & Bavaricum, circa posterius affirmat sufficere; insistendo autem Juri communi negat, nisi Testator fuerit rusticus, & quidem existat in loco, ubi testes litterarum periti non inveniuntur,

de quo Testamento adhuc recurret mentio infra *n. 33.* Videantur in Jure communi *Lex. 21. Hac consultissima. & Lex finalis. C. De testamentis*, quoad Jus Bavaricum autem *Tit. 34. art. 1.* In quo textu pariter quoad obli- gnationem dictorum testium invenietur differentia alia inter Jus commune, & Bavaricum; quoniam ultimum in Patria, qua scribo, requirit ex parte testium sigillum non qualecumque, sed speciale habens *Cassidem & Arma*, consequenter inferitur, in Bavaria, si intenditur confessio Testamenti solemnis, non sufficere sigilla, quibus calix Sacerdotum, aut spira pistorum, vel aliorum nescio, quæ signa repræsentantur, interea tamen in textu Juris Bavarici admittitur tamquam sufficiens, si major pars testium sigillum cum Casside & Armis apponat, a quibus deinde reliqui testes, simile sigillum non habentes, etiam commodatum accipere possunt, dummodo id in subscriptione expriment. Ita declarat Illustriss. Commendator. Schmid. in *Tit. 34. art. 1.* Atque vel exinde deducitur, quantis periculis impugnationum exponatur Testamentum solemne, unde potius consultur Testamentum ad Acta, de quo suo loco. \*

10 VI. Requiritur unitas contextus; quod nempe hæc omnia fiant uno eodemque continuato, & non interrupto tempore, absque alterius negotii interpositione aut dilatione, nisi forsan ob necessaria naturæ aliud fieri deberet, idque leve foret. Tandem etiam requiritur, quod testes omnes simul præsentibus sint, ipsumque Testatorem videant, & audiant; prout omnes hæc Testamenti solemnis scripti conditiones uberius explicant Jurisperiti.

11 CONCL. IV. Ad Testamentum nuncupativum ferme eadem requiruntur conditiones, quæ ad Testamentum scriptum; dummodo demantur scriptura testamenti, & subscriptio, ac subscriptio testium, loco quorum requiritur, ut Testator coram testibus simul præsentibus [ut supra] nuncupet, seu oretenus exprimat nomen hæredis, quidque aliud de bonis suis post mortem fieri velit. Patet hoc ex *cit. l. Hac consultissima. §. Per nuncupationem. C. De testament. & §. Sed hæc quidam. Instit. Eodem.*

Additio.

\* Quæres. An valeat Testamentum nuncupativum solemne, vel etiam ad Acta factum, si Petro e. g. ex insperato periculosa infirmitate obruto, vocentur septem testes cum notario, vel Judex, aut Consul cum duobus Deputatis (si Testamentum intendatur nuncupativum ad Acta) interea tamen, usque dum hi comparent, ita destituatur viribus ipse Testator, ut iis advenientibus non nisi ad præviam uxoris suæ prolihus destitutæ, vel alterius interrogationem, *num eandem velit esse Hæredem suorum bonorum*, proferre quidquam amplius valeat, quam *ita, aut volo, seu placet*, vel si omnino non amplius loqui possit, sed tantummodo capite annuat; an (inquam) tale Testamentum nuncupativum valeat.

Resp. Nisi vel per scripturam Testatoris agnitam ut talem, vel per alios testes, vel aliunde sufficienter noscatur, hanc fuisse jam antecederet voluntatem morituri testatoris, tunc tale Testamentum saltem ad causas profanas factum non valet. Ita cum Julio Claro, Zoefio, Covarruvias, & aliis præsens Auctor in *Jure Can. lib. 3. Tit. 26. n. 63.* Et ratio est, quia in tali casu non sufficienter ac plene constat de seria, & deliberata voluntate Testatoris, prout ad substantiam Testamenti requiritur; cum suspicari non immerito liceat, ægro- tum cum morte luctantem, & ad æternitatem suos cogitatus dirigentem pauca hæc verba potius protulisse, vel capite annuisse, ad removendam molestiam & importunitatem interrogantis, quam ex serio animo testandi. Videantur in emergentia similis casus utiliter hic Auctor *loc. cit. a n. 56.* & Cancellarius intimus de Schmid in *Comment. ad Tit. 34. art. 5.* Dixi notanter saltem factum ad causas profanas; nam quoad causas pias putat præsens Auctor *loc. cit. num. 150.* cum aliis pluribus valere;



valere; quamvis meo iudicio, nisi simul alia de voluntate Testatoris adsint indicia, neque illud periculo impugnationis careret: cum in presenti neque sufficienter constet de voluntate Testatoris, essentialiter requisita etiam quoad ipsam substantiam, & non præcise quoad modum, ac cæteroquin agatur de præjudicio Tertii, nimirum Hæredis alias ab intestato succedentis.

### Q U Æ S T I O II.

An testamentum non privilegiatum in Foro conscientie validum sit, si ei desint solemnitates Juris Civilis?

#### S U M M A R I U M.

- 12 Rationes afferentium, tale Testamentum in Foro conscientie esse invalidum.
- 13 Fundamenta opposita sententiae, seu quod tale Testamentum validum sit.
- 14 Corollarium hujus sententiae.
- 15 Tertia sententia media, afferens,
- 16 Ejusmodi Testamentum in Foro conscientie validum ante sententiam Judicis.  
(c) Juxta dicta Dist. 1. n. 34.
- 17 Invalidum, quatenus rescindi debet per sententiam Judicis.
- 18 Solvuntur rationes primae sententiae.  
(d) Dist. 1. n. 34.
- 19 Satisfit rationibus secundae extremae sententiae.

**C**irca resolutionem hujus celeberrimi Quæstionis practicæ admodum variant Doctores, & generatim in tres diversas abeunt sententias. Prima est Covarruvie c. 10. De testament. n. 12. & 19. Herinck disp. 2. q. 4. De testament. n. 60. Vasquezii, & quorundam aliorum, qui docent, hujusmodi Testamentum etiam in Foro conscientie invalidum esse, ut proinde hæres in tali Testamento institutus, & Legatarii (id est, ii, quibus aliquid in Testamento illo est legatum) teneantur ad restitutionem, hæredibus ab intestato venientibus faciendam, omnium eorum quæ ex tali Testamento acceperunt. Rationem dant: tum quia Jus civile hujusmodi Testamentum vult haberi pro infecto, illudque ait sine dubio nullum esse; ut patet ex cit. l. Hac consultiissima. C. De testament. ibi: Ex imperfecto Testamento voluntatem tenere defuncti, nisi inter solos liberos a parentibus utriusque sexus habeatur, non volumus, juncta l. Si unus. C. Eod. tum quia, si talia Testamenta in Foro conscientie essent valida, inique iudices facerent ea infringendo, imo foverent apertam injustitiam; dum hæredibus ab intestato adjudicant bona defuncti, quæ aliis hæredibus in Testamento relicta sunt.

13 Secunda sententia est Lessii lib. 2. de Just. & Jure cap. 19. dub. 3. n. 12. Sannig. disp. 12. de Just. quæst. 3. n. 9. Mastrii disp. 4. Theol. Moral. n. 52. & plurium aliorum. Et hæc sententia immediate tenet oppositum priori, dum docet, tale Testamentum in Foro conscientie validum esse, & licite retineri, quod ex tali Testamento possidetur, sive titulo hæreditatis, sive legati. Idque probari solet tum auctoritate plurium Theologorum, hanc sententiam tenentium: tum ex eo, quia leges irritantes Testamenta debitis solemnitatibus destituta fundantur in præsumptione fraudis. §. 4. Instit. De testament. ergo, ubi fraus abest, etiam ipsæ leges cessant obligare, cum præsumptio cedat veritati. Et hinc l. Quæstionem. C. De fideicommissis, confessio hæredis jurata absque alia solemnitate sufficit, ut is teneatur solvere fideicommissum, nec auditur volens se tueri ex minus solemnitate voluntate. Et simile quid habetur l. Non dubium. C. De testamentis, ubi approbatio hæredis facit, ut is teneatur solvere Legata, & Fideicommissa ex inutili Testamento relicta.

14 Ex qua sententia proinde infert citatus Lessius num. 21. & seqq. hæredem ab intestato, si sciat voluntatem Defuncti, teneri restituere hæreditatem, & sol-

vere Legata illis, quibus Testamento minus solemniter debentur. Item infert, quod, si hæres ab intestato retineat hæreditatem & Legata, possint illi, quibus aliquid per tale Testamentum fuit relictum, uti occulta compensatione, cum revera res illæ sint ipsorum.

15 Tertia tandem sententia, quam præ ceteris probabilis, & in praxi expedita, ac tutam censet Layman lib. 1. tract. 4. cap. 17. & tenet Dominicus Sotus cum nonnullis aliis, est media inter duas præmissas sententias, quæ docet, ejusmodi Testamentum quadam ratione esse validum, & quadam invalidum; validum quidem, antequam per sententiam Judicis irritetur, seu irritum declaretur; invalidum vero, quatenus ejusmodi Testamentum minus solemniter potest, imo & debet per sententiam Judicis irritum declarari, ac rescindi, si his super eo mota fuerit, & ad Judicium sæculare deferatur.

16 Ratio hujus tertiæ sententiæ, quæ præ ceteris placet, utpote probabilior desumitur ex eo; quia in primis hanc videntur convincere fundamenta præmissæ utriusque extremæ sententiæ, utpote quarum prior habet locum post sententiam Judicis, posterior vero ante sententiam Judicis. Confirmatur, & ulterius prima pars, qua dicitur, tale Testamentum carens solemnitatibus Juris Civilis esse validum pro Foro Conscientie ante sententiam Judicis, probatur ex eo: quia in tali Testamento saltem adest obligatio naturalis, donec exceptione Legis Civilis elidatur; atqui obligatio naturalis sufficit ad transferendum dominium: (c) ergo Testamentum illud transfert dominium, sicque est validum donec per sententiam Judicis irritetur. Unde infertur, quod hæres in Testamento minus solemniter institutus possit rem sibi relictam julte retinere, donec ab ipso per sententiam Judicis repetatur.

17 Secunda pars tertiæ sententiæ, qua dicitur, tale Testamentum minus solemniter in tantum esse invalidum, quatenus debet rescindi per sententiam Judicis, probatur ex eo. Quia Testamentum imperfectum est invalidum secundum Jus Civile; atqui Judex debet judicare secundum Leges ac Jus Civile: ergo. Accedit, quod lex, ac sententia Judicis secundum Leges judicantis, si est iusta in Foro externo, sit etiam iusta in Foro conscientie, nisi fundetur in falsa præsumptione; prout allegatis pluribus Auctoribus docet Sanchez lib. 1. in Decalog. cap. 10. n. 11. & Layman loc. cit. n. 8. ergo etiam sententia Judicis, qua secundum Leges Civiles irritat Testamentum minus solemniter, erit iusta, & consequenter Testamentum illud post sententiam Judicis invalidum, etiam in Foro conscientie.

18 Quod si contra hanc sententiam objiciantur, atque urgeantur fundamenta utriusque extremæ sententiæ. Resp. inorimis ad textum num. 12. allegatos, Leges Cæsareas Testamentis minus solemnibus resistere tantum civiliter, non autem naturaliter. Porro effectus obligationis naturalis præcipuus est ille, quod cuipiam Jus tribuat accipiendi, & retinendi illud, quod naturaliter sibi debetur, si id nulla opposita exceptione solvatur, prout jam dictum superius. (d) Quia vero obligatio naturalis duplex est, una omnino efficax, altera aliquo modo inefficax, utpote quæ per exceptionem ex beneficio legis Civilis elidi potest, ut advertit cit. Layman cap. 9. n. 9. hinc dicendum, Testamenta minus solemniter habere obligationem naturalem dumtaxat aliquo modo inefficacem; quæ proinde per exceptionem ex beneficio Legis, ac secutam sententiam Judicis elidi potest.

19 Resp. deinde ad fundamenta alterius sententiæ num. 13. allata. Ad primum distinguitur antecedens: Leges illæ fundantur in præsumptione fraudis universalis, conceditur; in præsumptione fraudis particulari, negatur. Unde quia adhuc subest præsumptio fraudis universalis, hoc est, talis præsumptio, quæ generatim de fraudibus circa Testamenta ob avaritiam hominum facile contingentibus concipitur, Jure ad præcavendum eisdem fraudibus sic disponente, rite per sententiam Judicis Testamenta minus perfecte rescindi possunt. Ad alterum dicitur, illud esse speciale: quia hæres



hæres jurato confitens, hanc fuisse voluntatem Defuncti, aut approbans Legata ex inutili Testamento relicta, hoc ipso censetur voluntatem Defuncti agnovisse, & ratam habere; sicque noluit Jus Civile, obligationem naturalem talis ultimæ voluntatis per sententiam Judicis rescindi.

### QUESTIO III.

De Testamentis ad pias causas, aliisque privilegiatis.

#### SUMMARIUM.

- 20 Testamenta privilegiata, qua?  
Testamentum ad pias causas, quod?
- 21 Ad hoc quantum requirantur, & sufficiant?
- 22 Duo Testes in Testamento ad pias causas non sunt de forma substantiali, sed probatoria.
- 23 Hinc scriptum manu Testatoris valet absque alio Teste.
- 24 Idem, si hæredi certo constet de dispositione ejus ad pias causas.
- 25 Quid juris, si moriturus capit facere Testamentum, & non absolvit?  
(e) Num. 21. & 22.
- 26 Solvitur instantia.
- 27 An credendum Parocho, vel Confessario circa Legata pia a defuncto relicta?
- 28 Cautela circa hoc observanda.  
\* Cum solutione objectionis.
- 29 Confessarii non facile interesse debent consecutioni Testamenti &c.
- 30 Testamentum inter liberos est privilegiatum.  
+ Ad quas personas se hoc privilegium extendat?
- 31 Testamentum militare est privilegiatum, quomodo, & quando?  
\* Item quoad quales milites?
- 32 Testamentum ad acta est privilegiatum.
- 33 Quid liceat hominibus rusticis?
- 34 Quid juris de Testamento tempore pestis?
- 35 Limitatio notabilis supradictorum.  
+ Sex casus notabiles circa consecutionem Testamenti ad pias causas.

**T**estamenta privilegiata dicuntur ea, in quibus vel nulla Juris Civilis solemnitas, vel non tam plena & perfecta, sicut in aliis, requiritur. Et inter hujusmodi Testamenta privilegiata primum sibi locum vendicant Testamenta ad pias causas. Porro Testamentum ad pias causas dicitur illud, in quo hæres instituitur pia causa ut Ecclesia, Monasterium, pauperes: sive, quod principaliter & directe fit ob Dei, & Sanctorum honorem, atque animæ suæ salutem, v. g. quod pro Ecclesiis, aliisque piis locis, vel in captivorum redemptionem, pauperum aut Religiosorum sustentationem, in mortuorum suffragia, & alia hujusmodi pietatis opera factum est.

21 CONCL. I. Ut Testamentum ad pias causas sit validum in Foro tum interno, tum etiam externo, non requiruntur necessario septem testes, aut aliæ solemnitates Juris Civilis, sed sufficiunt ea, quæ sunt de Jure Naturæ, & Gentium, nimirum, ut sit potestas in disponente, capacitas in eo, in cujus favorem disponitur, & libertas in dispositione, simulque adsint duo testes. Ita Covarruvias cap. 11. De Testam. n. 1. Lessius lib. 1. cap. 19. dub. 2. estque communis. Sic enim clare decisum habetur cap. Relatum 11. De Testam. Unde, cum hæc materia sit spiritalis, tenendum est Jus Canonicum in utroque Foro, videlicet tam Ecclesiastico, quam Civili, atque etiam in Terris Romani Imperii: quod ipsum confirmat praxis communiter recepta.

22 CONCL. II. Prædicti duo testes in Testamento ad causas pias non sunt de forma substantiali, sed tantum de probatoria; adeoque ejusmodi Testamentum validum est, etiam si duo testes non fuerint adhibiti, dummodo aliunde constet de mente Testatoris, sua bona ad pias causas relinquentis. Ita Fagnanus c. Relatum n. 8. &

seqq. De Testam. Covarruvias loc. cit. n. 12. Lessius n. 7. Layman lib. 3. tr. 5. c. 2. estque nunc communis Doctorum. Ratio est: quia in Testamentis ad pias causas non procedunt Leges Civiles ob defectum jurisdictionis; in Jure Canonico autem nullibi habetur Decretum irritans ejusmodi Testamenta, sine duobus testibus facta ad causas pias: dummodo aliunde certo constet de mente Testatoris, ut puta per propriam ejus scripturam, vel si hæres ipsemet ex ore Testatoris audivit ultimam illius voluntatem, sive certum Legatum relictum ad causas pias. Accedit, quod in simili Testamentum inter liberos, sive scriptum, sive subscriptum manu Testatoris valeat quoad liberos absque alio teste. l. Hac consultiſſima. §. Ex imperfecto. C. De Testam. juncta Auth. seq. Et conformiter dictis

23 Inferitur I. Validum esse Testamentum, & quamcumque ultimam Voluntatem ad causas pias manu Testatoris scriptam, vel subscriptam, etiam si nullus testis adhibitus fuerit; modo sufficienter constet, esse Testatoris scripturam. Quia, ut dictum, interveniens testium non requiritur ad substantiam Testamenti facti ad pias causas, licet sæpe duo vel tres testes requirantur ad probationem, si aliud probationis genus haberi non possit; ergo, dum sufficienter constat, hanc esse Testatoris scripturam, atque ultimam ejus voluntatem, valebit ad pias causas absque aliis testibus.

24 Inferitur II. Si hæredi certo constet, voluntatem Testatoris fuisse, ut aliquid in pias causas expendatur, eundem in Foro conscientie obligatum esse ad satisfaciendum, esto in Foro externo id nequaquam probari possit. Ratio est: quia tunc probatione opus non est, quando de veritate constat. Layman ibidem n. 5. & sequitur ex dictis.

25 CONCL. III. Si moriturus cœpit facere Testamentum, vel Codicillum, & morte præventus non absolvit, licet secundum alia irritum sit, valet tamen quoad Legata pia, quæ in sua illa imperfecta dispositione jam expresserat. Ita Abbas Panormitan. cap. 1. De Succession. ab intestato. Covarruvias cap. 11. De Testam. n. 14. Barbosa, Layman n. 6. & alii. Ratio prioris habetur l. Si is, qui, ff. Qui testamento. ubi dicitur, magis cœpisse talem Testamentum facere, quam fecisse. Vetum hoc ipsum patitur quamdam limitationem, & valet tale Testamentum, si nomen hæredis jam est expressum: licet secus sit, si quis volens plures hæredes instituere, unius nomen expresserit, & non alterius, ut loc. cit. dicitur, & amplius explicant Juristæ. Ratio secundæ partis est: quia dispositio Juris Civilis quoad Legata ad causas pias non valet, ob rationes proxime (e) dictas.

26 Neque obstat, quod talis Testator adhuc potuerit immutare dispositionem suam. Resp. enim, quamvis id fieri potuisset, tamen re ipsa illud factum non esse: unde, cum Testator actu nullam mutationem significaverit, cum naturali pariter, & Canonico Jure debent talia pia Legata firma permanere; eo præsertim, quod sint pro remedio animæ Testatoris jam defuncti.

27 Quæres, an credendum sit Parocho, vel Confessario, qui post mortem Parochiani, vel confitentis sui producit schedulam continentem Legata quædam ad pias causas, quam hominem illum, antequam discederet, scripsisse, vel dictasse asseverat; & num talis dispositio pro ultima legitima voluntate haberi debeat? Resp. I. Si manus Testatoris agnoscitur, vel duobus testibus probari potest, tunc pia ejus voluntas omnimodis est executioni mandanda: cujus ratio patet ex dictis num. 21. & 23.

28 Resp. II. Si ipsemet Parochus, vel Confessarius Legata annotavit, non creditur illi sine alio teste. Ratio est: quia juxta illud Salvatoris Matt. 18. & Luc. 17. In ore duorum, vel trium testium stat omne verbum. Unde illud commune dictum, vox unus, vox nullius, arg. c. Licet & c. In omni & c. Veniens. De Testibus, juncta l. Jurisjurandi. C. Eod. Hinc monendi sunt Parochi, alique Confessarii, ut ultimas ejusmodi dispositiones ad pias causas non suscipiant, nisi advocatis duobus saltem testibus, masculis aut feminis, quamquam etiam unus cum



cum Parocho sufficere poterit, ut notat Layman *ibidem*.

#### Additio

\* Dices. In causis favorabilibus, quale est Testamentum ad causas pias, unus testis ad faciendam fidem sufficit, *arg. can. Cum itaque. 112. De Consecrat. Dist. 4.* ergo, posito, quod ægrotus a Parocho, vel Confessario consilium petat, ipsique suam voluntatem ultimam circa causas pias adaperiat, non est necesse, ut Parochus, seu Confessarius adhuc alium testem secum assumat. Resp. disting. antec. in causis favorabilibus specialiter in Jure exceptis, & quæ non vergunt in præjudicium tertii, sufficit unus testis, conc. in aliis, neg. antec. Inter illas autem causas in Jure specialiter exceptas dispositio ad causas pias facta, quæ ceteroquin tendit in præjudicium hæredis ab intestato, non legitur comprehensa, nisi dictum talis unius Testis simul aliis adminiculis Juris & fomentis veritatis adjuvetur; unde debemus stare textibus generalibus utriusque Juris c. 23. *De Testibus & L. 9. C. De Testib.* ubi leguntur hæc formalia: *Manifeste sancimus, ut unius omnino Testis responsio non audiatur, eiamsi NB. præclara Curia honore præfulgeat.*

Porro inter causas ab hac lege specialiter exceptas, & ubi unicus testis sufficit, sunt *inprimis* illæ, quæ alteri non afferunt præjudicium *can. Cum itaque. 112. De Consecrat. Dist. 4. Secundo.* Causæ matrimoniales, quando agitur de contrahendo, & objicitur impedimentum dirimens. c. *Super eo 22. de Testibus.* Tertio. Si Minister publicus testetur de actu a se gesto vi sui officii. *L. 2. C. De Ponderatoribus.* Quarto. Si fide dignus Interpres explicet peregrinum idioma *L. 1. §. fin. ff. De verbor. obligat. Quinto.* Si ipsemet Testator in Testamento expresse cavit, ut huic uni plena fides habeatur. *L. 14. ff. De dote prælegata.* Quoad alia vero Testamenta, vel Legata etiam pia, non legitur, quod uni Testi plena fides adhibeatur absque aliis adminiculis, hincque in casu emergenti adhibeat Parochus, vel Confessarius præter seipsum semper adhuc alium, saltem unicum Testem, vel etiam duos, maxime si ipsemet sese non libenter immiscere velit; nam \*

29 Recte Layman *cap. 5. num. 20.* advertit, ad hoc, ut Confessarii, præsertim Religiosi, majore spiritus libertate, & fructu, hominum animas juvare possint, plerumque non expedire, quod confectioni Testamentorum ipsi intersint, aut Testatori in particulari suadeant, quibus hæreditas vel Legata relinqui debeant, præsertim propriis Ecclesiis aut Conventibus, sed expediat ferme in genere tantum pias dispositiones commendare: nisi Testator consilium petens dirigendus sit, ipsique explicandum, quidnam consideratis omnibus honestius, & ad animæ suæ salutem utilius, Deoque gratius existimetur.

30 CONCL. III. Quantum ad alia Testamenta privilegiata attinet, secundum inter ea locum obtinet Testamentum inter Liberos; id est, illud, quod a patre, matre, aliove utriusque sexus ascendente inter Liberos conditum est: valet enim, licet sit imperfectum, & Juris solemnitate destitutum, utputa quia non interfuerunt septem testes, vel non rogati, aut non masculi &c. dummodo adhuc voluntas Testatoris sufficienter sit declarata. Ita omnes Doctores; estque expressum *L. Hac consultissima. §. Ex imperfecto. C. De testam. cujus verba n. 12. relata sunt.*

#### Additio

\* Ubi tamen adhuc duo in simili Testamento privilegiato inter Liberos advertenda sunt. *Inprimis*, quod valeat tantum pro ipsis Liberis; non autem pro aliis personis, seu causis profanis extraneis, si tales cum prioribus cohæredes fuissent institutæ *L. Hac consultissima. §. Ex imperfecto. C. De Testament.* Quinimo multum inter Doctores controversatur, an in simili Testamento

privilegiato subsistant Legata profana, si quæ inserta fuissent circa extraneos. *Secundo* notandum est, quod distinctio fieri debeat inter simile Testamentum nuncupativum, & scriptum: nam in nuncupativo sufficit constare de voluntate Testatoris per duos testes etiam non rogatos, masculos, vel feminas: in *scripto* autem simili Testamento [nisi forsitan pariter duo testes adhibeantur] requiritur, ut vel propria manu Testator ipsemet scribat simile Testamentum, vel ab alio scriptum subscribat, vel a cunctis Liberis suis subscribi curet, cuius eorum relinquendo saltem legitimam, & quidem *Titulo hæredis*, simulque singulorum nomina, atque designatas portiones distinctis verbis (non autem præcise signis, seu cifris Arithmeticis) exprimendo, cum appositione diei, & anni, quo tale Testamentum fuit conditum. Ego paucis tali, ut evitet omne periculum impugnationis, suaderem, ut si suis Liberis velit esse abscondita contenta, ipse vel scribat vel subscribat illud, apponendo suum sigillum, & rogando duos testes, ut pariter se subscribant. Videantur desuper Reiffenstuel *lib. 3. Decret. Tit. 16. §. 7.* & in Bavaria Schmid *in Comment. ad Tit. 34. art. 8.* \*

31 Tertium locum inter privilegiata tenet Testamentum militis, quod in bellica expeditione constitutus condidit; nam milites ejusmodi habent privilegium, ut testari valeant, quomodo possunt, ac volunt, & ideo, quod in vagina, vel clypeo, aut in pulvere inscripserint gladio, sub ipso tempore, quo in prælio vitæ sortem derelinquunt, habetur pro Testamento valido, *text. clar. l. Milites. C. De testament. militis & §. 1. Et seq. Inst. De militari testam.* Intellige, dummodo de hac eorum voluntate ultima legitime constet, aut ea per duos testes probari possit. Verum hæc doctrina procedit dumtaxat de militibus, dum actu sunt in castris, seu in actuali expeditione bellica; nam domi existentes tenentur testari juxta Leges communes *l. Ne quidam C. Eod. Testamentum tamen, quod in castris fecerunt, non jure communi, sed juxta privilegium militare, post missionem honestam sibi factam, intra annum tantum valet, l. Ex testamento C. De testament. milit. & §. Sed hætenus, Inst. De milit. testam.*

#### Additio

\* In Romano Imperio ob Recessum ejusdem de anno 1512. defacto distinctio est facienda inter milites actualiter in expeditione bellica, vel obsidioni urbis, aut obsessæ defensione existentes, & inter alios in castris, absque actuali expeditione secure morantes: nam quoad posteriores (non autem quoad priores) exiguntur juxta dictum Recessum Imperii duo testes non solum de forma probativa, sed etiam de forma substantiali. Ceterum militibus in castris existentibus apud Christophor. Clingenperg. *lib. 2. Instit. Tit. 11. quest. 1.* annumerantur etiam illi, qui equidem ibi necdum existunt, sunt tamen in via ad eadem, ita tamen, ut & ipsi duos saltem testes adhibeant. Utrum autem pariter accenseantur militibus quoad privilegiata Testamenta Medici militares, Chirurghi, Laniones, Pistores, Mercatores, Concionatores castrenses, aliique similes, qui castra sequuntur, aliud est dubium; ubi Chlingenperg. *loc. cit. quest. 6.* ipsis hoc privilegium, si non de stricto jure, saltem de æquitate concedit; quando ordinatione Principis, bellum gerentis (secus si ex propria solum voluntate quæstus causa) castra sequuntur: quod tandem etiam non improbat Cancellarius Schmid *Tit. 34. art. 7. num. 16.* si similes in acie quoque sint præsentis, & ibi remediis spiritualibus, vel temporalibus subveniant militibus, ut vel sic, dum sentiunt onus, sentiant & commodum. \*

32 Quartum locum inter privilegiata tenet Testamentum coram supremo Principe factum, vel eidem per oblatas preces insinuatam, atque ad Acta (ut loquuntur) publica repositum: valet enim absque solemnitate testium, dummodo per subsequens Testamentum non revocetur, neque alius error intervenit præter defectum testium *l. Omn. C. De testam.* Si quidem Princeps superat



superat omnes solemnitates testium, ac subscriptionum, ejusque præsentia facit cessare omnem fraudem, simulque apud Acta, nec non coram Judice semper præsumitur adesse multitudo hominum. De his Testamentis ad Acta plura videantur inferius post Quæstionem VII. in Appendice ultima, *Addit. II. III. & IV.* Item in Jure Canonico *lib. 3. Decret. Tit. 26. §. 9.*

33 Quinto hominibus rusticis concessum est *l. ult. C. De testament.* ut in locis, in quibus est raritas Litteratorum, non teneantur attendere ad Legum subtilitates, sed possint testari secundum eorum consuetudinem, ita tamen ut adhibeantur septem testes, si ibi reperiantur; sin autem in eo loco minime inventi fuerint septem testes, sufficiant quinque, non autem pauciores.

34 De Testamento tempore pestis condito dubitant, & variant Doctores; utrum valeat cum minore numero testium, quam septem. Verum alicubi Constitutiones municipales, ac præsertim Bavaricæ expresse declarant, valere ejusmodi Testamentum coram quinque testibus factum a quocumque, in loco, qui ob pestis vehementiam est bannizatus; vel si locus necdum quidem sit bannizatus, Testator tamen actu est peste infectus.

#### Additio

\* Et si ceteroquin Jus commune *Leg. 8. C. De testamentis* quoad Testamenta tempore pestis facienda satis rigorosum sit, nihil de requisitis ad solemnitatem remittendo, nisi unitatem contextus, seu simultaneam conjunctionem, & consociationem testium; puto tamen, si pestis omnino sæviat, ita ut dum jura silent, ob timorem infectionis vix amplius reperiantur, quæ Testamentum ad Acta recipiat, de æquitate sufficere, si quomodocumque, vel per duos testes fide dignos, vel aliunde voluntas Testatoris secure cognoscatur; pestis enim adeo vehemens est instar belli, quod Deus contra homines instituit, si ergo in acie sufficit secure constare quomodocumque de voluntate militis testantis: cur non pariter in loco adeo vehementer pestifero? Unde sententiam *Andræ Gail. lib. 2. observat. 118. num. 17.* cum *Mynfinger,* volentium tempore pestis sufficere duos testes, & *Berlichii lib. 3. Conclus. 5.* defendentis, tempore pestis quoad confectionem Testamentorum solam veritatem, non requisitas alias solemnitates inspicere debere, puto saltem in simili casu extraordinario locum habere. Videatur *Reiffenstuel lib. 3. Decret. Tit. 26. §. 8.* poteritque hæc sententia deservire in casu necessitatis, dum aliud remedium testare volenti non superest.\*

35 Tandem notandum, quod hætenus dicta locum dumtaxat habeant loquendo secundum Jus commune Cæsareum, & sæculis specialibus locorum consuetudinibus, statutis & aliorum Regnorum legibus. Nam in Terris temporali jurisdictioni Papæ, seu Ecclesiæ subiectis, sufficit facere Testamentum secundum formam Juris Canonici, id est coram Parocho, & duobus aut tribus testibus. *c. Cum esses. De testam.* siquidem, ut habetur *Matth. 18. In ore duorum, vel trium testium stat omne verbum.* Sic etiam Venetiis, & Viennæ in Austria duos testes sufficere ajunt: ut taceantur specialia quorundam locorum privilegia, statuta, & consuetudines vi quarum nonnullæ solemnitates ibidem in Testamentis remissæ sunt.

#### A P P E N D I X.

Additionalis continens sex notabiles casus circa confectionem Testamenti ad causas pias.

#### Additio I.

\* **A** Madæus ante mortem suam fecit Testamentum. & in eo hæredem universalem instituit Confraternitatem Redemptionis captivorum: cum autem in illa civitate non adesset Confraternitas hujus nominis, *Anach. Reiffenstuel Theolog. Tom I.*

sed alia, nimirum SS. Sacramenti, hinc illa ultima prætendit hæreditatem; contra vero excipiunt Confraternitatem ipsius defuncti Amadæi, dicendo, quod in tali casu Testamentum sit nullum, utpote cum Confraternitas Redemptionis non existat in illo loco, consequenter ipsi succedant ab intestato. Quæritur jam, an tale Testamentum pium sit a parte rei invalidum, nec ne? Ratio dubitandi, & quæ deserviret pro Confraternitatis defuncti, est; quia etiam ad Testamentum pium requiritur efficax voluntas actualiter testativa, quæ tamen hic non videtur adesse, utpote cum non subsistat hæres denominatus, nimirum Confraternitas Redemptionis. Hoc tamen non obstante *Cardinal. de Luca Tom. 2. Theatri Veritatis de Testam. disc. 22.* respondet, talium Confraternitatum, successione ab intestato prætendentium, causam esse desperatam; atque hoc ob favorem causæ piæ, inter cujus privilegia connumeratur istud, quod incertitudinis defectus non vitiet pias dispositiones; censeturque talis voluntas adhuc efficax testativa quoad substantiam ex ea ratione, quia dispositio similis principaliter dirigitur in ipsum Deum, & bonum animæ testantis (quod bonum principale in hoc casu adhuc obtinetur) unum vero, vel alterum pium opus in specie potius respicit modum, quam substantiam. Quod si ulterius indages, ad qualem ergo causam piam in specie spectet hæreditas? Resp. si ex aliis circumstantiis colligatur, quod testator voluerit intelligere per Confraternitatem Redemptionis Confraternitatem SS. Sacramenti, haud dubie ad illam pertinebit memorata hæreditas; alias autem vel ipsemet Reverendissimus Ordinarius deberet conscientiosam, & prudenter regulatam facere dispositionem ad alias causas pias, vel certe eandem hæreditatem prætereundam posset Fabrica S. Petri, utpote cum talis causa pia, quæ succedit vi Testamenti, in specie non sit certa, sed incerta, Fabrica autem S. Petri dicitur illud tribunal auctoritate Summi Pontificis erectum, quod exigit, atque ad alia pia opera applicat pias dispositiones incertas. Unde, posito, quod ex circumstantiis Confraternitas SS. Sacramenti probare nequiret, se fuisse intellectam a Testatore, in eo casu Confraternitas ipsius defuncti, forsitan pauperes, possunt apud Fabricam S. Petri obtineri compositionem, ut aliquam partem bonorum defuncti obtineant. Videatur *Card. de Luca loc. cit. & tom. 3. De Relatione Romana Curia disc. 20.\**

#### Additio II.

\* **A**ndreas propria manu scripsit, vel saltem subscripsit, & quod adhuc melius, suo quoque sigillo munivit quoddam testamentum, in quo hæredem instituit Foedus charitatis, tamquam causam piam. Hoc testamentum etiam post mortem in suo pulpito inventum fuit; quæritur, an tale Testamentum valeat? Resp. affirmative: si enim sufficienter constat, quod Testamentum ab Andrea sit scriptum, vel saltem subscriptum & signatum, etiam sufficienter constat de voluntate Testatoris; hoc autem sufficit quoad Testamentum ad causas pias: ergo. Quia vero hæredes ab intestato forsitan dicerent, hunc characterem non esse Andreæ, sed alium supposititium; ut proin tale testamentum minori periculo exponeretur, suavissem adhuc, ut præter subscriptionem propriam Andreas quoque alios duos testes, qui sese subscriberent, rogasset; nec foret necesse, hisce testibus contenta in scriptis ad legendum dare, modo in genere diceret; *Charissimi, hic continetur mea ultima voluntas circa mea bona temporalia, rogo itaque, ne gravetis hujus esse testes, & vos subscribere.* Ubi quilibet testium in subscriptione posset uti simili formula: *Ego N. testor, quod præsens ab Andrea N. audiverim, in præsentis libello & charta contineri suam ultimam voluntatem.\**

#### Additio III.

\* In domo Bertrandi subito mortui præcise reperitur aliqua schedula, in qua legitur, quod foedus charitatis ad



ad sublevandos pauperes instituat pro hærede. Dubitatur, num exinde hæc causa pia possit prætere hæreditatem, cum excipiant defuncti consanguinei alias ab intestato succedentes? Fundamentum illorum est; quia talis annotatio in scheda videtur potius velleitas, & præparatio ad futurum Testamentum, quam actualis dispositio, hincque non subsistit in ratione Testamenti, prout etiam cum nonnullis aliis sentit Julius Clarus in §. *Testam. q. 7. n. 1.* Hoc tamen non obstante respondeo, nisi aliunde constet, & a Consanguineis successionem ab intestato prætendentibus positive probari queat, quod in hac scheda voluerit Bertrandus tantum per modum præparationis quædam in scheda annotare, non autem actualiter disponere, tunc in favorem Testamenti pii potius in dubio præsumitur, quod vi hujus schedæ Bertrandus actuale fecerit dispositionem, & Testamentum, saltem si annus, mensis, dies, & alia verba complementum actus plerumque in Testamentis denotantia adjuncta sint. Mascardus *De Probat. volum. 4. conclus. 1359. n. 68. & seqq.* & ex professo, ac fusius Menochius *l. 3. consil. 224.* Quinimo ipse quoque Julius Clarus *loc. cit.* prope finem nostram sententiam in praxi consulit. Dixi autem: *saltem si annus, dies &c. adjuncta sint*; nam alias res valde periculosa videtur, præsertim, si neque sigillum esset appressum, nec se Testator ad talem schedam ante suam mortem remisisset. De hoc fusius videri poterit apud Card. de Luca *Tom. 2. De Testam. disc. 15. per totum.* \*

#### Additio IV.

\* Cajus satis dives (utpote cujus summa ascendit ad 6000. florenos (unicum ex uxore sua jam defuncta suscepit filium Jacobum, Patri non adeo obedientem, ac defacto in militia existentem. Memoratus Cajus fratri suo Titio pauperi, multisque liberis gravato mutuos dat 3000. florenos. Paulo post factus ægrotus hunc fratrem ad se vocat, eique occulte insinuat, quod ipsum, & quidem quatenus pauperem, ex amore Christi una cum filio Jacobo hæredem instituat, relinquendo pro portione hæreditaria medietatem horum bonorum, nimirum illos 3000. florenos, quos alias deberet titulo mutui: ac demum intra paucos dies obit Cajus. Filius ejusdem ex militia redux hæreditatem capit; videns autem partim massam hæreditatis ultra spem suam diminutam, partim ex fama percipiens, quod Frater defuncti magnam Parenti suo debuerit pecuniæ summam, eandem præterit; atque Titio negante, se quidquam debere, ad Judicem defert: dubitatur, an Titius Frater defuncti possit summam hanc pecuniarum bona conscientia retinere, & in judicio, si etiam ad juramentum cogeretur, negare, se quidquam debere titulo mutui Cajo Fratri? Ratio dubitandi est: quia equidem multi graves DD. defendunt, si Testamentum non est vestitum debitis solemnitatibus, constet autem alicui certo de voluntate Testatoris: quod in foro interno is ante exceptionem partis in judicio possit summam sibi vi talis Testamenti a Testatore constitutam &c. retinere: negant autem communiter, id fieri posse, postquam in foro externo hæres ab intestato in judicio contra talem excepit. Resp. tamen, Titium absolute posse hanc summam pecuniariam retinere, non obstante illa partis adversæ exceptione; imo etiam, si adigeretur ad juramentum, optima conscientia jurare valeret, se nec obulum debere Fratri suo defuncto, cum sane a parte rei nihil amplius debeat tam in foro interno, quam externo, supposito, quod hæc summa ipsi tamquam pauperi fuerit remissa: nam, etsi alias in casu, quo Testamentum pro foro externo non est privilegiatum, illa DD. sententia præcise pro foro interno, & ante sententiam Judicis procedat; secus tamen, ubi Testamentum est privilegiatum taliter, ut quoque pro foro externo sufficiat si a parte rei adsit voluntas Testatoris efficax, & actualiter testativa, nec efficaciter revocata, prout censetur adfuisse in præsentia. Plus adhuc addo;

existimo enim, in dato casu, si in foro externo Titius Frater defuncti per Chirographum proprium, forsan adhuc inter scripturas defuncti repertum, vel per testes de debito convinceretur, sitque ad restitutionem a Judice condemnaretur, talem iterum ex bonis alterius, si habeat securam occasionem, posse uti occulta recompensatione: nam sententia Judicis in dato casu nitetur falsa præsumptione; cum a parte rei nihil amplius in foro interno, & externo a Titio debeat, hincque hæc sententia in conscientia non obliget, prout DD. passim docent *Titulo de Præsumptionibus.* \*

#### Additio V.

\* Demetrius cujusdam in Bavaria oppidi Præfectus Matrimonio sibi jungit Bertham, formæ æque, ac virtutibus quidem divitem, ceteroquin tamen inopem puellam, quæ nec dotem afferre potuit, nec eandem maritus supplevit, aut Contradotem constituit, consolando tamen suam sponsam, quod, si bene se gesserit, specialiter ejusdem in Testamento memor esset, quia & hæredem instituere velit posito, quod sine liberis decedat. Elapso anno, & nullis ex Bertha susceptis liberis, Demetrius subito periculose decumbit, vocat Confessarium, & finita Confessione, aliisque peragendis devote peractis, sese in præsentia Confessarii, & uxoris suæ ad faciendum Testamentum præparat, uxorem quatenus pauperem ex amore Dei ex æsse hæredem instituturus: in quem finem etiam famulum quemdam ad Magistratum mittit, rogando, ut duos deputet, qui Testamentum suum, quod interim conscribere incipit, ad Acta recipiant. Existente famulo adhuc in via, & vix una alterave de Testamento scripta lineola adeo ingravescit morbus, ut summum existat periculum, ne usque ad Deputatorum adventum interim moriatur. Mulier cogitans futuram suam si privetur hæreditate, miseriam, lacrymabunda petit a Confessario consilium: quid igitur emergenti ex improvviso simili casu a Confessario suadendum?

Resp. in simili casu uxori suadendum esse, ut, usque dum Deputati à Magistratu veniant, convocet interim duos, vel tres vicinos pro testibus, sive viros sive mulieres, juxta Covarruviam in *c. Relatum De Testam.* Vel, si ne quidem id admitteret periculum in mora, curet advenire aliquos Domesticos, famulos, aut ancillas, omnes enim tales in eo casu probabilissime sufficient pro testimonio circa ultimam ægrotantis voluntatem ferendo, quamvis hi forent Consanguinei Uxoris, etiam sorores, ac fratres, quando aliter fieri nequit, vel qui ipsimet per modum Legati aliquid ex Testamento reportarent. Ita quoad causas pias (inter quas in nostro casu numeratur Uxor quatenus pauper) Chlingensperger *l. 2. Instit. Imper. Tit. 10. qu. 15. & 16.* ac Reiffenstuel *De Testamentis §. 2. n. 15. & 16.* Modo ceteroquin memorati vocati testes ipsimet verbis, vel signis ex Testatore hanc ultimam ejus dispositionem percipiant, nimirum quod eam NB. tamquam Pauperem ex amore Dei instituat hæredem &c. Invigilet præterea Confessarius, ut in eo casu etiam socius suus, si quem assumpsit, pro majori securitate huic actui præsens existat: etenim licet ob multas graves rationes summopere suadeatur, ut Religiosi se ipsosmet non intrudent ad ferendum in judicis simile testimonium; contingere tamen potest, ut charitas ex circumstantiis id suadeat, saltem supposito, quod reliqui, qui interfuerunt, a Judice tamquam inepti ob alias causas rejicerentur a ferendo testimonio.

Vides itaque Confessarie, quomodo emergente ex improvviso simili casu consilium in arena capere queas, suggerendo modum superius in resolutione explicatum. Quod si Vir cessante deliquio iterum sese recolligeret, usque dum Deputati a Magistratu adveniant, poterit in illorum præsentia suam mentem de novo per modum Testamenti nuncupativi aperire, vel, si mavult, & tempus admittit, hanc ultimam suam voluntatem in Scriptis clausam extradere, rogando, ut recipiant ad Acta, prout praxis extradendi taliter fusius declaratur alibi. \*

Additio.



Additio VI.

\* Erhardus maligna vexatur febris, inde ex misericordia receptus ad nosocomium vocat Confessarium, cui etiam finita Confessione confidenter aperit, quod ex labore, & industria sibi comparaverit 200 florenos domi inquam cista inveniendos; & quia nullos habet hæredes necessarios, vult, ut post mortem medietas extradatur nosocomio in aliqualem recognitionem, pro altera autem medietate curet Confessarius præter funeralia ordinaria legi Missas pro anima sua; & ita præfatus decedit ex hac vita. Consanguinei autem, quibus Confessarius hanc ultimam defuncti voluntatem aperit, nolunt dictis adhibere fidem, petentes sibi ipsi adjudicari hanc summam. Quæritur, an id bona conscientia facere queant? Resp. Si Confessarius, quando Erhardus ægrotus sibi talia oretenus manifestavit, nullum adhuc secum testem assumpsit, non tenentur huic soli adhibere fidem Consanguinei, hincque bona conscientia petere queunt a Judice hanc summam, saltem detractis prius expensis funeralium, sibi adjudicari. Ratio patet ex dictis; quia licet testes quoad Testamentum, vel Legata pia non sint de forma substantiali, requiruntur tamen necessario pro foro externo saltem duo de forma probatoria, si aliunde non constet sufficienter de voluntate Testatoris. \*

Q U Æ S T I O IV.

An omnes, præsertim Religiosi, eorumque Novitii, testari possint?

S U M M A R I U M.

- 36 Possunt omnes homines testari, nisi Jure prohibeantur.
- 37 Quales Jure prohibeantur testari?
- 38 Religiosi solemniter professi nequeunt facere Testamentum.
- 39 Secus de emitentibus Vota simplicia in Societate Jesu.
- 40 Excipiuntur Religiosi, habentes a Papa facultatem testandi, & Ordines militares.
- 41 An Religiosi possint facere donationem mortis causa?
- 42 Novitii Religionum libere testantur.
- 43 Testamenta Novitiorum an subsint Decreto Concilii Tridentini?
- 44 Sententia negativa; unde valent, quocumque tempore fiant.

36 CONCL. I. Omnibus hominibus libera facultas est de bonis suis testandi, nisi Jure prohibeantur. Ita certa, & communis. Nihil enim est, quod magis hominibus debeatur, quam ut suprema voluntatis (postquam jam aliud velle non possunt) liber sit stylus, & licitum, quod iterum non redit, arbitrium, ut dicitur L. I. C. de Sacrosanctis Ecclesiis.

37 Additur tamen limitatio, nisi Jure prohibeantur: nam imprimis aliqui prohibentur Jure naturali facere Testamentum, eo quod careant usu rationis, uti sunt infantes; item furiosi & amentes, nisi pro tempore, quo habent lucida intervalla. L. Furiosum C. Qui Testamentum facere possunt. Deinde alii testari prohibentur Jure positivo, uti prohibentur saltem ad causas profanas testari filii, ac filiae puberes quidem, sed adhuc sub paterna potestate existentes, nisi habeant bona castrensia, vel quasi castrensia, saltem si intenderent pro hærede instituere causam profanam. L. fin. De Testament. milit. Item prodigi a Judice declarati, quibus nempe bonorum administratio est interdicta: rei criminis læsæ Majestatis; vel prodicionis Patriæ (secus saltem de consuetudine in his Terris sentiendum de aliis Reis ad mortem condemnatis, & in Jure non singulariter exceptis) item Proscripti, seu Banniti a Cæsare. Hi (inquam) omnes prohibentur facere Testamentum; quibus accedunt nonnulli adhuc alii, qui referuntur tum §. ac seqq. Instit. Quibus non est permixtum facere Testamentum, tum alibi. Verum ceteris dimissis, & in extraordinariis casibus Le-Anacl. Reiffenstuel Theol. Tom. I.

store remisso ad Jus Canonicum l. 3. Decret. tit. 26. §. 10. quantum attinet ad Theologiam Moralem, quæstio præcipua est de Regularibus, nec non & Clericis Beneficiariis; unde sit.

38 CONCL. II. Prælati Religiosorum Ordinum, alique Regulares solemniter professi, non possunt condere Testamentum, & factum ab ipsis est irritum, paucis dumtaxat casibus exceptis. Ita certa & communis, atque habetur clarissime c. Quia ingredientibus 19. q. 3. juncta Autent. Ingressi C. De Sacrosanctis Ecclesiis, & alibi. Ratio est: quia Religiosi propter solemne Votum paupertatis nihil possident proprium, de quo testari possunt cum omnia sint Monasterii.

39 Dicitur notanter in Conclusionem, Regulares solemniter professi: siquidem præter Novitios, de quibus infra, etiam illi, qui in Societate Jesu, finito biennio Probationis, dumtaxat tria Vota substantialia simplicia emisissent, adhuc retinent dominium bonorum suorum, possuntque postmodum licite ac valide, accedente licentia suorum Superiorum, de eisdem testari; prout habetur ex Bulla Gregorii XIII. Ascendente Domino & refertur Tom. 2. Bullarii Romani Constitut. 89. dicti Pontificis.

40 Dicitur ulterius, paucis dumtaxat casibus exceptis: nam hinc excipiuntur illi Religiosi, quibus a Summo Pontifice concessa est facultas testandi: qualis non raro dari solet iis, qui extra Claustrum obinent Beneficium Ecclesiasticum, præsertim Episcopatum, aut Cardinalatum. Deinde excipiuntur Religiosi Ordinum Militarium, qui, cum non voveant tam rigidam paupertatem, sed bona sua retineant, possunt saltem cum licentia Superioris de bonis, & redditibus suis, Testamentum facere. Pirhing. tit. de Testam. n. 49. Nisi dicere velis, hanc testandi facultatem seu jure, seu consuetudine, concessam esse Religiosis Ordinum Militarium.

41 Addit Sanchez l. 7. in Decalog. c. 8. n. 11. citans quosdam alios, & sequitur Layman l. 3. tr. 5. c. 3. n. 4. valde probabile esse, quod Religiosus cum Prælati licentia (qui tamen hanc ante mortem Religiosi semper revocare valet) possit etiam mortis causa donationem facere. Id ipsum, dummodo res sit modica, admittit Pirhing. loc. cit. n. 48. quia si res modica sit, ut Prælati licentiam dare possit donandi inter vivos, cur non etiam mortis causa?

42 CONCL. III. Novitii Religionum libere possunt de bonis suis testari. Ita communis; atque habetur c. Si qua mulier. 19. qu. 3. Ratio est: quia Novitii sunt sui Juris, ac bonorum suorum domini, libera exeundi potestate præditi. Verum occasione hujus.

43 Quæres, an valeat Testamentum, vel alia quæcumque renunciatio, aut obligatio facta a Novitio ante duos menses a sua Professione, aut etiam ante ingressum Religionis? Ratio dubitandi desumitur ex Concilio Trid. Sess. 25. c. 16. De Regularibus, ubi statuit in hunc modum: Nulla quoque renunciatio, aut obligatio antea facta, etiam cum juramento, vel in favorem cuiuscumque causæ piæ, valeat, nisi cum licentia Episcopi, sive ejus Vicarii fiat intra duos menses proximos ante Professionem &c. aliter vero facta, sit irrita, & nullius effectus &c. Hæc ibi. Et ista quidem procedere de obligationibus, variisque donationibus durante Novitiatu per Novitios factis, certum est. Utrum autem loquantur etiam de Testamentis, quæri potest.

44. Resp. breviter. Testamentum, Codicilli, & Donationes mortis causa, sub hoc Decreto Concilii Tridentini non comprehenduntur; unde valent, quocumque tempore fiant, etiam ante ingressum Novitii in Religionem. Ita Barbosa in Collectaneis ad cit. c. 16. Concilii Tridentini n. 14. citans plurimos alios Doctores, unico solo oppositum tenente. Quinimo Fagnanus in c. Quia ingredientibus n. 17. De Testament. refert, quod Sacra Congregatio consultata, an Decretum dicti c. 16. loquens de renunciatione, locum habeat in Testamentis, & aliis ultimis voluntatibus, censuit non habere locum. Accedit ratio; quia, ut notat Miranda in Manuale Prælatorum Tom. 1. q. 23. art. 4. mens Concilii Trident. so-



lum fuit, eas renunciationes prohibere, per quas Novitii depauperantur, ita ut postea egestate & inopia compulsi, cogantur profiteri inviti: hoc autem non contingit in Testamentis, & aliis ultimis voluntatibus; cum ante Professionem semper libere revocari possint: ergo.

### QUESTIO V.

An Clerici Sæculares Beneficarii valeant testari?

#### S U M M A R I U M.

- 45 Clerici Sæculares libere testantur de Bonis patrimonialibus, industrialibus & parsimonialibus.
- (f) Tract. 7. Dist. 4. quæst. 3. n. 25. 26. & 28.
- 46 Secus de Bonis mere Ecclesiasticis, Spectato Jure communi.
- 47 De his tamen ante mortem elargiri possunt;
- 48 Ac de speciali facultate Summi Pontificis testari.
- 49 Consuetudine acquiri potest facultas testandi ad causas pias.
- 50 An etiam facultas libere testandi ad causas profanas?
- Sententia negativa.
- (g) Tract. 7. Dist. 4. quæst. 3. n. 32.
- 51 Sententia affirmativa.
- 52 Sententia media, juxta quam.
- 53 Consuetudine potest acquiri facultas, ut Clerici de Bonis mere Ecclesiasticis valide testentur ad causas profanas;
- 54 Non vero licite.
- (b) Tract. 7. Dist. 4. qu. 3. n. 32. & 34.
- 55 Respondetur ad instantias secundæ sententiæ.
- (i) Tract. 2. Dist. 4. n. 25. & 26.
- 56 Consuetudo testandi Clericorum, quæ?
- 57 Et quomodo intelligenda, si testentur ad causas profanas?
- 58 Responsio ad fundamenta primæ sententiæ.
- \* Reflexio circa hanc sententiam.

45 **CONCL. I** Clerici sæculares, sive Beneficarii, sive non Beneficarii, possunt libere testari, etiam ad causas profanas, de Bonis suis patrimonialibus, & quasi patrimonialibus, sive industrialibus, quæ suo labore atque industria compararunt; nec non & de Bonis parsimonialibus, quæ parcius vivendo de congrua sustentatione sibi subtraxerunt ex proventibus suorum Beneficiorum Ecclesiasticorum. Conclusio hæc sequitur ex jam supra dictis de dominio Clericorum, ac probatur iisdem auctoritatibus Juris, & rationibus, quæ ibidem (f) allegatæ sunt; estque satis communis inter Doctores.

46 **CONCL. II** Loquendo vero de Bonis mere Ecclesiasticis, Spectato Jure communi, Clerici Beneficarii non possunt de iisdem testari, vel disponere mortis causa, etiam ad pias causas; sed ea debent relinquere Ecclesiæ, quæ in talibus bonis succedit. Hæc Conclusio habetur clarissime c. *Ad hæc De Testamentis* ibi: *Clerici de mobilibus, quæ per Ecclesiam sunt adepti, de Jure testari non possunt*. Idemque tam de immobilibus, quam mobilibus esse intelligendum, declaratur c. *Relatum* 12. Eod. cum concordantiis. Idque merito per SS. Canones statutum fuit, ut Beneficarii promptiores redderentur ad bona Ecclesiastica superflua majori cum merito in vivis eroganda in pias causas, scientes, nullam sibi potestatem superesse eisdem post mortem disponendi; prout notavit Navarrus, & cum ipso Layman l. 4. tr. 2. c. 3. n. 6. Porro quod Spectato Jure communi talia bona penes Ecclesiam remanere debeant, patet ex c. *Cum in officiis De Testament* juncto cit. c. *Relatum*.

47 Dicitur notanter l. *Non possunt disponere mortis causa*: siquidem Clerici, dum sunt in vivis, optimo jure magnoque cum merito, redditus Ecclesiasticos superfluos in pauperes, aliasque pias causas erogant. Deinde possunt de talibus iisdem Clerici, dum sunt in ultima ægritudine constituti, tam pauperibus, locisque Religiosis, quam etiam suis inservitoribus quodpiam elargiri; prout expresse habetur cit. cap. *Relatum* 12. *De Testam.* ibi: *Consuetudinis tamen est non improbanda, ut de his*

(bonis mobilibus per Ecclesiam acquisitis) pauperibus, & Religiosis locis, & illis, qui viventi servierant, sive Consanguinei sint, sive alii, aliqua juxta servitii meritum conferantur.

48 Dicitur II. *Spectato Jure communi*: nam secus est si quispiam facultatem de talibus bonis testandi obtinuerit a Summo Pontifice, qui eam concedere potest & de facto sæpe concessit. Quinimo Paulus V. in sua Constitutæ incipit, *In eminenti*, die 6. Aprilis, 1606. edita (& refertur Tom. 3. *Bullarii Romani Constit.* 18. *dicti Pont.*) omnibus & singulis Curialibus, in ipsa Urbe, & intra decem milliaria (non tamen extra debitam Residentiam) decedentibus, concessit liberam facultatem testandi de quibuscvis redditibus Ecclesiasticis, etiam decimabus Beneficiorum, ac etiam in favorem Consanguineorum suorum, & quod hi eisdem ab intestato succedant; prout amplius videre est in cit. constitutione.

49 Deinde Doctores communiter admittunt, consuetudine pariter posse induci facultatem testandi ad pias causas. Siquidem Clerici solo Jure Canonico prohibentur condere Testamentum: atqui Juri Canonico per longævam & rationabilem consuetudinem derogari potest; ergo. Unde in locis, ubi viget talis consuetudo testandi, Clericus Beneficiarius valide & licite testabitur ad pias causas.

50 Utrum autem consuetudine induci possit facultas de Bonis mere Ecclesiasticis testandi ad causas etiam profanas, major difficultas est. Et quidem talem consuetudinem, seu corruptelam, ac foventem peccatum rejiciunt Tannerus Tom. 3. *disp.* 4. q. 6. n. 249. Layman l. 4. tract. 2. cap. 3. n. 7. Pihung tit. *De Testament.* n. 42. Ludov. Engel. part. 4. *Manualis Paroch.* q. 4. n. 26. Navarrus, & alii. Ratio eorum est: quia consuetudo, quæ Legi naturali & Divinæ repugnat, non valet, arg. c. ult. *de Consuet.* & potius est dicenda perniciose corruptela, c. *Mala Consuetudo dist.* 8. atqui talis censetur esse præfens consuetudo, quia, ut dictum superius (g) omnes Doctores fatentur, Beneficiarios mortaliter peccare, si redditus mere Ecclesiasticos notabiliter in causas profanas expendant, sicque consuetudo hoc permittens erit nutritiva peccati.

51 E contra Augustinus Barbosa lib. 3. *Juris Ecclesiastici universi* cap. 17. num. 67. & 68. putat consuetudine induci posse, quod Clerici de talibus fructibus Beneficiorum suorum in usus non pios licite testari possint: citatque inter alios primo loco pro hac sententia Covarruviam (sed male, ut ex hujus verbis n. seq. referendis liquet) quam probare nititur ex eo: tum quia Papa nonnumquam solet dare licentiam testandi de hujusmodi bonis; sed quæ sunt acquiribilia privilegio, sunt pariter acquiribilia consuetudine: tum quia neque Romani Pontifices nostris temporibus, neque Jura hæcenus istam consuetudinem improbarunt; quod utique (ait) fecissent, si intellexissent, consuetudinem hanc animas illaqueare, & Clericos sic disponentes in peccato mori.

52 Tertia, & inter utramque præfatam media, ceterisque probabilior sententia tenet, ejusmodi consuetudinem validam quidem esse, adeo, ut & Judex relicta hæredibus institutis adjudicando, & ipsi hæredes recipiendo, in conscientia tuti sint; non tamen licitam, sed Clericos ad profana de bonis mere Ecclesiasticis disponentes peccare. Ita Lessius l. 2. *De Just. & Jur.* cap. 19. n. 44. Zoësius tit. *De Testam.* n. 7. Covar. c. 7. *De Testam.* n. 23. pluresque alii ab his relati. Et notandum, quod, quamvis Covarruvias cit. n. 23. & seqq. ad longum probare nitatur ejusmodi consuetudinem esse validam, idem nihilominus loc. cit. ad finem n. 27. expresse moneat, disputationem suam eo animo, præsertim a Clericis recipi debere: ut sit illis satis, culpam mortalis criminis esse eos infectos, si male præter usum necessarium, & pias largitiones, illos (redditus superfluos) distribuere non vereantur.

53 Et quidem, quod ejusmodi consuetudo sit valida, probatur ex eo: quia Clerici de talibus bonis valide, quamvis non licite, disponunt in vita ad causas profanas; ergo



ergo idem post mortem fieri potest accedente ejusmodi longæva consuetudine. Probatur consequentia. Tum quia solo Jure Ecclesiastico Clerici de talibus testari prohibentur; atqui Juri Ecclesiastico per consuetudinem contrariam derogari potest: tum quia consuetudo illa valide testandi non est irrationalis, imo (ut notat Zoësius ibidem) fundatur in publica Reipublicæ tranquillitate, quæ alias sæpe turbaretur, si ejusmodi Testamenta non tenerent. Nam cum Clerici libere testentur de bonis suis patrimonialibus, industrialibus, & parimonialibus, ut dictum n. 45. & habet recepta Doctorum sententia, ab eisdem vero post mortem illorum Clericorum, bona mere Ecclesiastica superflua absque litigio cum hæredibus instituendo discerni vix possint: hinc consuetudo illa deservire poterit ad præsciendendas innumeras lites cum hæredibus talium Clericorum ceteroquin multipliciter instituendas, sicque ad publicam Reipublicæ pacem.

§4 Ceterum, quod Clerici de bonis mere Ecclesiasticis ad profana disponentes peccent, sequitur ex jam supra dictis (b) cum ipsi Jure non solum Ecclesiastico, sed etiam supposita, & per Beneficiarium acceptata Ecclesiæ & Fundatorum intentione, virtute Religionis; adeoque Jure naturali & Divino, teneantur redditus superfluos in causas pias erogare: atqui contra Jus naturale ac Divinum nulla valet consuetudo. Accedit: quia, ut argumentantur Lessius, & Layman, omnes Doctores fatentur, Beneficiarios graviter peccare, si Ecclesiasticos proventus superfluos in usus profanos expendant in vivis; ergo multo magis, si de eisdem taliter testentur: nam semper minus concessum fuit Clericis Beneficiariis, de talibus bonis condere Testamentum, quam disponere inter vivos.

§5 Nec urget instantia Barbosa, nempe quod Papa quandoque concedat licentiam libere testandi de talibus bonis. Nam inprimis hujusmodi licentia est strictæ interpretationis, utpote a Jure communi exorbitans, sicque non extendenda ad alios casus non expressos *arg. c. De Filiis Presbyt. in 6.* Deinde dictum illud, *acquisibilia privilegio sunt etiam acquisibilia consuetudine*, non esse universaliter verum, præsertim si consuetudo illa sit irrationalis, aut a Jure reprobata, notant Fagnanus in *c. Cum contingat, n. 8. § 11. De Foro competentis*, & Layman. *l. 1. tr. 4. c. 24. n. 9.* & alii passim. Insuper, cum Beneficiorum Ecclesiasticorum plenaria dispositio ad Romanum noscatur Pontificem pertinere, ut habetur, *c. Licet, De Præbendis in 6.* non mirum, quod ipse circa eorundem bona possit gravibus de causis aliud ordinare, qui circa ipsa etiam Vota, & Juramenta (non obstantia, quod supposita semel voventis, vel jarantis intentione, obligent ex virtute Religionis, Jureque naturali ac Divino) justis intervenientibus causis dispensare potest, modo alibi (i) jam declarato.

§6 Dum autem allegatur consuetudo, simulque conniventia Summi Pontificis, Resp. opponendo illud vulgatum dictum *c. Cum jam dudum. De Præbendis. Multa per patientiam tolerantur, quæ, si deducta fuerint in judicium, exigente justitia non debent tolerari.* Deinde de ejusmodi consuetudine sufficienter constare non videtur: nam Clerici majorem suæ conscientiæ, profectusque spiritualis curam gerentes, passim testantur (in locis, ubi viget testandi consuetudo) ad pias causas, imo nonnulli eorum, præsertim Episcopi, specialem petunt a Summo Pontifice licentiam testandi.

§7 Alii vero, dum testantur ad causas profanas, ad eas disponunt de bonis suis patrimonialibus, industrialibus, vel parimonialibus, magno labore per vitæ decursum acquisitis, & de quibus possunt libere disponere: simulque in funerealibus, Missas, eleemosynasque (sub his etiam computando Legata pauperibus consanguineis relictæ) tantum relinquere solent, donec, suæ conscientiæ obligationi satisfactum rationabiliter judicent: imo, ut hoc eo securius fiat, in nonnullis Diocesium, ubi consuetudo facultatem testandi Clericis tribuit, etiam Ordinarii loci expressus consensus desuper requiritur. Quod si unus, vel alter (quod non facile præsumen-

dum) secus egerit, inde non illico colligi poterit consuetudo testandi de bonis mere Ecclesiasticis ad causas profanas, cum hæc non nisi a majore parte Communitatis introduci valeat.

§8 Ad fundamenta prioris extremæ sententiæ n. 50. adductæ, in eo consistentis, quod si Clerici taliter testando peccent, hoc ipso consuetudo illa sit invalida, cum foveat peccatum. Resp. negando consequentiam cum sua probatione: quia, ut recte notat citatus Zoësius, hominis est hoc vitium, non rei, aut consuetudinis: unde abusus licentiæ, quam Clerici ex longæva consuetudine acquisierunt ad testandum, potestque rectissime praticari testando ad pias causas, non ponit juris iniquitatem. Et patet hoc in simili; nam Clerici in vita valide de talibus bonis mere Ecclesiasticis disponunt ad causas profanas, neque tamen hæc licentia censetur fovere peccatum ex eo, quod illicite id faciant. Idque non alia de causa, nisi quia vitium hoc non dictæ licentiæ, sed ex ejus dumtaxat abusu proficiscitur.

#### Additio

\* Hæc tertia & media sententia mihi (ut verum fatear) semper visa fuit captu valde difficilis, prout etiam præfens Auctor in Jure Canonico *l. 3. Decret. Tit. 26. §. 11.* eandem non amplius defendit. Et si enim alias aliqua reperiantur valida, & tamen non licita (sic e. g. Petrus, qui antea habuit sponsalia de futuro cum Maria, valide postea, sed tamen illicite contrahit matrimonium de præfenti cum Bertha) id tamen non procedit in casu nostro *vi consuetudinis*, supposita illa sententia, quod Clerici Jure Divino ex virtute Religionis teneantur superfluos redditus Ecclesiasticos erogare in causas pias: nam contra Jus Divinum nulla datur licque nec valida consuetudo, quæ potius censenda est corruptela, prout annotatur *Tract. 2. dist. 4. qu. 4. n. 37.* Unde, qui cum Reiffenstuel in Jure Canonico, & cum P. Francisco Schmier, pluribusque per hos citatis defendunt, Clericos Jure Divino obligari superflua de Bonis Ecclesiasticis erogare in causas pias, conformius meo judicio principiis Canonisticis inferunt exinde, consuetudinem contrariam esse prorsus nullam, sicque nec validam. Econtra vero, qui tenent cum aliis, præsertim non paucis Recentioribus, Clericos præcise ex præcepto Ecclesiastico adstringi ad erogandos superfluos Ecclesiasticos redditus in causas pias, etiam consequenter hic ajunt, consuetudinem contrariam esse validam, & licitam, tamquam non pugnantem contra Jus Divinum, nec a Jure Canonico reprobata positive tamquam irrationalibilem, ac corruptelam. Ita propugnant Barbosa, Garzias, Gonzalez, Haunoldus, ac plures cum P. Schmalzgrueber *l. 3. Decret. Tit. 26. §. 4. num. 85. § seqq.*

#### APPENDIX. I.

An, & quomodo ambo conjuges adhuc viventes possint erigere Testamentum reciprocum.

#### S U M M A R I U M.

- \* Testamentum reciprocum quid? Addit. I.
- \* Quomodo practice fiat inter Conjuges, si nulli extens Liberi? Addit. II.
- \* Qualiter, si adsint Hæredes necessarii? Addit. III.
- \* An una pars possit tale testamentum revocare, altera comparte ignorante? Addit. IV.
- \* Item: An in eo casu censeatur quoque revocatum Testamentum alterius compartis; ac quomodo? Addit. V.

#### Additio I.

\* **T**estamentum reciprocum dicitur illud, quo duo vel plures mutuo consilio ac consensu se ad invicem Hæredes instituunt; vel aliud in eo ad invicem ordinant; illudque fieri potest, vel in una eademque charta, seu (ut loquuntur Juristæ) in uno codice



seu membrana cum iisdem solemnitatibus, vel in duplici & distincta charta cum distinctis solemnitatibus. Quoad ultimum hunc testandi reciproce modum non est difficultas; cum sic fieri queat a quolibet, alias ad testandum habili, dummodo observentur omnia alia ad valorem requisita, ac utrobique instituat Hæres talis, qui alias est capax, cum non sit privilegiatum simile Testamentum. Quoad primum modum autem, an valeat ubique in eadem charta, & sub iisdem solemnitatibus? affirmat. Illustriss. Schmid in *Comment. Tit. 34. art. 1. n. 32. § art. 12. n. 1.* Christophorus autem de Chlingensperg. l. 2. *Instit. Tit. 10. qn. 37.* negare videtur, addens tamen cum communi, quod hæc facultas condendi Testamentum Conjugibus ad invicem concessa sit per Leges, prout etiam frequenter simile Testamentum reciprocum facere solent, maxime si non habeant necessarios Hæredes in linea ascendente, & quoad lineam descendente sine destituti Liberis, vel Nepotibus, aut relictis ingressi fuerint Monasterium incapax etiam in comuni bonorum. H. N. \*

#### Additio II.

\* Quær. I. Quidnam practice observandum Conjugibus necessarios Hæredes non habentibus, reciprocum Testamentum, quo se ad invicem in una eademque charta Hæredes instituunt, facientibus? Resp. Debere quemlibet Conjugum ultimam suam voluntatem tam quoad Legata, quam quoad ipsum Hæredem distinctim, & quoad sua bona propria exprimere. E.g. præpomis Maritus, postquam animam suam in manus sui Creatoris commendavit, exprimat, qualiter velit post mortem corpus suum terræ mandari, quot Missas desideret, quidnam ad causas pias, vel profanas legare intendat, &c. & demum adjungat, quod, si ante Uxorem suam moriatur, eandem bonorum suorum Hæredem instituat: demum salutarem clausulam codicillarem superaddat, se subscribat, & sigillum suum apponat cum annotatione diei, mensis, & anni, quibus conditum fuit hoc Testamentum. Ex postfacto in eadem charta, seu membrana subsequitur Testamentum Uxoris, ubi exprimat, quod ipsa pariter, si præmoriatur, Maritum Hæredem bonorum suorum instituat. Reliqua observet, uti præcedenter &c. &, si desideretur formula alicujus Testamenti, poterit a quolibet Conjugum cum grano salis adhiberi illa, quæ ad finem hujus distinctionis reperitur annexa. Porro, si tale reciprocum Testamentum Conjugum tradatur ad Acta, res ulteriori difficultate caret. Quod si vero condatur solemne scriptum, equidem ad utrumque, in eadem charta scriptum, non requiruntur plures, quam septem præcise testes legales; vult tamen cum aliis pluribus Gail apud Cancell. de Schmid *Tit. 24. art. 1. num. 32.* ut testes in suis subscriptionibus expriment, se Testamentum utriusque tam Mariti, quam Uxoris nomine subscribere, & subsignare. De Jure Bavarico *Tit. 24. art. 12.* sufficit, si primi duo testes expriment, quod fuerint rogati, & quod hæc sit utriusque Conjugis ultima voluntas.

#### Additio III.

\* Quær. II. Quidnam attendendum Conjugibus, qui habent Hæredes necessarios, si reciprocum Testamentum condere, & sese invicem Hæredes instituere velint? Resp. In simili Testamento attendi debere, ne prætereantur Hæredes necessarii, quin simul saltem in legitima, nullo onere gravata, instituuntur, & quidem Titulo honorabili &c. uti loquuntur Jura, ac ulterius videri poterit probatio *qn. 7. n. 73.* Ceterum Maritus, proles post se relinquens, solet sæpe Uxorem suam instituere non tam Hæredem quoad proprietatem, quam quoad usumfructum, vel saltem quoad administrationem bonorum, quamdiu non transit ad secundas nuptias, ut nimirum relictæ uxor Vidua exinde a prolibus magis honoretur, & major obedientia ei præstetur. Quo casu pulcherrima notanda vide apud præsentem Aucto-

rem Reiffenstuel in *Jure Canonico l. 3. Decret. Tit. 26. §. 12. \**

#### Additio.

\* Quær. III. An in dicto reciproco Testamento Conjugum facto in una eademque charta possit una pars suam ultimam voluntatem iterum revocare, sciente id, vel etiam nesciente altera comparte? Resp. I. De per se loquendo quælibet pars potest, quamdiu vivit, suam ultimam voluntatem iterum revocare; cum hæc libertas & potestas revocandi sit quasi de essentia Testamenti l. 4. ff. *De adimendis, vel transferendis legatis.* Resp. II. Si altera compars sciat hanc revocationem, & tamen non contradicat, cum facile posset, manet adhuc illud Testamentum quoad ordinationem, quam compars fecerat, in vigore suo, cum videatur saltem tacite consentire in hanc revocationem prioris partis: Testamentum enim reciprocum, quamvis in una eademque charta scriptum, adhuc censetur duplex, ubi, dum una pars revocavit suum, non sequitur, quod pariter altera compars, & non contradicens, quoque suum revocaverit Testamentum. Resp. III. Si una pars revocavit Testamentum suum clandestine (e.g. clam longe aliud recentius Testamentum ad Acta apud diversum Judicem reponens) altera comparte ante mortem suam nec quidquam de hac clandestina revocatione sciente, in tali casu regulariter loquendo censetur etiam compars suam revocare ordinationem, quantum concernit ea, quæ fecerat in favorem alterius partis revocantis: nam uti commune fert proverbium, frangenti fidem (ac præsertim tam subdole) fides frangatur eidem. Et ita quidem in Jure nostro Patrio clare deciditur *Tit. 34. art. 13.* Ex quo Illustriss. Commentator ibidem n. 12. in formalibus infert, quod, si illa compars, quæ de alterius mutatione Testamentaria nullam habuit cognitionem, præmortua fuerit, debeat ordinatio seu Testamentum præmortuæ partis pariter pro revocato haberi; quatenus & in quantum conditum est in favorem superstitis Conjugis, nisi adessent tales circumstantiæ, ex quibus adhuc colligi possit, Compertem sic circumventam adhuc in sua manere ordinatione. \*

#### Additio V.

\* Quod si autem ulterius quæras, ad quemnam ergo in hoc ultimo casu spectet id, quod a parte præmortuæ in illo Testamento fuerat dispositum in favorem conthorialis, quæ tamen suam ordinationem clam & subdole revocavit? Resp. Esse distinguendum; nam vel fuit in illo Testamento reciproco ex parte taliter subdole decepti, & modo præmortui simul institutus alius cohæres vel non? In primo casu portio illa accrescit cohæredi, uti deducitur ex *Leg. 9. ff. De suis, & legitimis hæredibus.* In posteriori vero obtingit illi, qui alias succederet ab intestato, uti clare, & solide ostendit Illustriss. Cancell. de Schmid *loc. cit. n. 14. \**

### A P P E N D I X II

An, & de quibus rebus Conjuges ex hac vita decedentes testari queant? Item de qualibus Bonis superstites relictæ vidui, vel viduæ?

### S U M M A R I U M.

- \* *Declaratur status questionis. Add. I.*
- \* *Fit principalis reflexio ad pacta dotalia. Add. II.*
- \* *Qualiter moriturus Conjug possit testari de Bonis Paraphernalibus? Add. III.*
- \* *Qualiter de Dotibus? Add. IV.*
- \* *Subjungitur aliqua cautela. Add. V.*
- \* *Circa quæ Viduus superstes possit facere Legatum vel Testamentum? Addit. VI.*
- \* *De quibus bonis testari queat Vidua, mortuo prævie Marito superstes? Addit. VII.*

Addi



## Additio I.

\* **V**olui hanc questionem prioribus annectere, non quidem eo fine, ut Confessarii ex professo sese confectioni Testamentorum immisceant (quod absit) sed potius, ut si subinde consilium dare charitas, & aliae circumstantiae apud ægros suadeant, addiscant cauti & circumspècti esse, ne per malum consilium in causa sint, ut deinde totum Testamentum & optima Testatorum voluntas ab impugnantibus invertatur. Porro duo hic moventur dubia, quæ ad invicem confundi non debent: quoad primum examinatur, an & qualiter Maritus e. g. si præmoriatur Uxori, vel vice versa Uxor, si præmoriatur Marito, ante discessum suum ex hac ad alteram vitam condere queat Testamentum? Quoad secundum vero dubium inquiritur, an & de quibusnam bonis ipsimet, decedente consorte, superstitibus viduus aut vidua illud ipsum Testamentum facere possint, sive liberi adsint, sive non? Quoad primum dubium, sit\*

## Additio II.

\* **CONCL. I.** Num, & qualiter Conjuges ex hac ad alteram vitam decedens possit ante mortem suam facere Testamentum, ante omnia desumi debet ex pactis dotalibus, quæ inspicere debent, si tamen aliqua per modum contractus inter vivos fuerint ante initum matrimonium erecta. Ita communis, & ratio est: quia vi talis contractus dotalis erecti altera compars superstitibus acquiritur, adeoque nequit ex hac vita decedens in superstitibus præjudicium quidpiam sine ejusdem consensu disponere; quod bene notent Confessarii forsitan a morituris circa ultimam dispositionem consulti, ne cæcò modo suadeant aliquam ultimam dispositionem etiam ad causas pias, antequam prius informati sint, an & qualia pacta dotalia fuerint tempore matrimonii erecta, ut sic talis dispositio non fiat in præjudicium juris tertii, alias merito invalidanda.\*

## Additio III.

\* **CONCL. II.** Si nulla pacta dotalia fuerint erecta vel saltem in ipsis nulla facta sit mentio quoad Bona Paraphernalia, tunc libere de ipsis conjuges ex hac vita decedens sive fuerit Maritus, sive Uxor, potest disponere mortis causa; dummodo non fiat hæc dispositio in tanta quantitate, ut liberi, aliive necessarii Hæredes, si qui extent, priventur sua legitima, quæ legitima computari debet ex omnibus Bonis decedentis, & quam volumus semper salvam intelligi. Ita denuò communis, patetque ratio ex natura Bonorum Paraphernalium: & quoniam acquæstus, seu illa lucra, quæ constante matrimonio communi labore, ac industria utriusque conjugis acquiruntur, merito Bonis Paraphernalibus annumerari possunt, hinc pariformiter de illis discurrendum, quod nimirum conjuges decedens de sua medietate ante mortem libere valeat disponere, nisi aliter fuerit ordinatum per pacta dotalia, vel specialia locorum statuta; nam mulier e. g. tantum de Jure Canonico c. 10. de Consuet. excluditur a medietate bonorum, quia commisit adulterium: ergo a sensu contrario, si illud non commisset, neque excluderetur a medietate. Quoad Bavariam videantur intimus Bavaricæ Cancellarius Schmid in suis Commentariis Tit. I. Juris Bavarici art. I. n. 40. & seqq. & dicta Tract. 7. dist. 4. post. n. 19. Addit. II.

## Additio IV.

\* **CONCL. III.** Conjuges ex hac vita decedens etiam ante mortem potest testari quoad bona sua dotalia, seu contradotalia saltem, si nulli extent Hæredes necessarii, ac dummodo non fuerit aliter dispositum in pactis dotalibus. Ita sub his terminis, quantum mihi constat, denuò communis: & ratio est; quia alias, si talis conjuges

decederet ab intestato, hæc bona post mortem in simili casu devenirent ad Hæredes non necessarios defuncti, adeoque ante mortem suam de iis poterit libere facere Testamentum. Illud tamen in Bavaria specialiter advertat similis Testator, quod suam compartem in hac vita adhuc relictam nequeat usufructu ex dote vel contradote, quamdiu vivit superstes, privare; quoniam usufructus dotis vel contradotis in Bavaria semper superstiti conjugum, etiam nulla desuper erecta fuissent pacta dotalia, debetur per reliquum tempus vitæ suæ, ac primum post mortem superstitis restituitur illi, qui institutus fuerat Hæres, uti habetur Tit. I. Juris Bavarici. art. 1. 3. & 4.\*

## Additio V.

\* Dixi notanter: Conjuges decedens ex hac vita posse testari de bonis dotalibus &c. saltem si nulli extent Hæredes necessarii; nam si tales adessent, major circa dotalia, posito, quod Dos foret profectitia (id est a Patre vel Avo descendens) esset difficultas; ubi Doctores inter se non conveniunt, uti videri potest apud Fachinæum lib. 3. Controvers. 71. sicque simile Testamentum expositum foret periculo multarum litium, si Hæredibus necessariis circa dotem profectitiam tantummodo legitima relinqueretur, & residuum de dote ista extraneis legaretur. Atque hæc quoad resolutionem primi dubii, circa quæ bona decedens ex hac vita disponere queat, dicta sufficiant; loquendo autem circa secundum dubium de bonis superstitis conjugis,\*

## Additio VI.

\* Quæres I. Circa quæ ex conjugibus superstes Viduus facere possit aliquod Testamentum vel Legatum? Resp. Denuò præscindendo a specialibus pactis dotalibus, & insistendo præcise juri communi, mortua prævie Uxor superstes Viduus salva legitima Hæredum necessariorum libere testari potest. I. De suis Allodialibus, quæ vel jam intra sua patrimonialia numeravit ante matrimonium, vel in matrimonio ex hæreditate, aliove titulo ipsum solum respiciente acquisivit. II. Quoad contradotem, si antea aliquam attulit, quæ post mortem Uxoris libere redit ad eundem. III. Quoad fructus, quos ex allata dote ante mortem Uxoris obtinuit; nam hi fructus debentur Marito etiam quoad proprietatem ob onera prius in matrimonio supportata. IV. Quoad donationes sibi ab Uxore tempore matrimonii factas, & ejusdem morte confirmatas modo superius allegato. V. Quod acquæstus seu lucra constante matrimonio adepti saltem quoad eam partem, quæ ejusdem industriæ ac labori correspondet: in dubio autem lucra illa potius ad virum, quam mulierem spectare præsumuntur. lib. Quintus Mutius. ff. De donat. inter virum & uxorem.\*

## Additio VII.

\* Quæres II. Circa quæ testari possit, si mortuo prævie Marito superstes sit Vidua? Respond. Mortuo prævie Marito superstes Vidua (salva prolium legitima) libere testari potest, vel legare. I. Quoad paraphernalia omnia in genere loquendo. Magis autem de aliquibus in specie discurrendo. II. Quoad Morgenaticam, quæ est donatio illa, quam mulier altero nuptiarum die acquisivit in remunerationem allatæ virginitatis. III. Quoad sponsaliciam largitatem, sub qua conformiter dictis intelliguntur illa munera, quæ mulier acceperat a viro ante matrimonium intuitu ejusdem. IV. Quoad bona constante matrimonio per propriam industriam acquisita e. g. si scivit Uxor artificiose acu phrygia pingere, unguenta conficere, obstetricem agere &c. V. Quoad medietatem acquæstum communi industria ac labore acquirentium, saltem ubi vi opificii inter conjuges censetur intercessisse tacitus contractus societatis; uti apud Cerevisarios, Pistores, Laniones: hæc enim omnia hucusque



que enarrata merito computantur inter bona sua propria. VI. Etiam quoad bona dotalia, saltem quando non amplius existit hujus Viduæ Parens, vel Avus, supposito, quod dos ab eo alias proveniret. Tandem VII. Quoad monilia, vestes sericas Uxori comparatas, aliaque munera 500. solidos non excedentia, & a viro tempore matrimonii donata, ac ipsius morte confirmata. Ratio generalis est; quia de Jure communi horum omnium bonorum habet dominium, adeoque etiam de his libere disponere valet, ubi non potest ostendi, quod aliquo Jure prohibeatur. Plura adhuc videri poterunt alia specialia in Jure Bavarico Tit. 1. art. 2. 3. & 4. & apud insignem ejusdem Commentarium Schmid *ibidem*. \*

#### QUESTIO VI.

#### De Codicillis, Legatis, & Fideicommissis.

#### SUMMARIUM.

59 Codicillus, quid?

60 Et quomodo fieri possit?

(k) Quæst. 3. n. 21. & seqq.

\* Nonnulla notabilia circa Codicillos.

61 Codicilli, ad quid inserviant?

62 Clausula Codicillaris quomodo apponatur?

63 Et multiplex ejus effectus.

\* Quem effectum habeat respectu FF. Minorum?

64 Legatum, quid?

65 In Testamento minus solemniter ad causas pias valent Legata profana.

66 Corruente Testamento minus solemniter ad causas profanas, non corrumpunt Legata pia.

67 Solvitur instantia.

68 Fideicommissum exaequatur Legato.

\* Fideicommissum quotuplex? Addit. I. & II.

59 **CONCL. I.** Codicillus dicitur quasi *parvus codex*, & in proposito aliud non est, quam ultima cuiuspiam voluntas absque hæredis institutione. Unde Codicillus est quasi imperfectum Testamentum: tum quia non requirit solemnitates Testamenti: tum quia Codicillo hæreditas directe dari non potest, nec etiam auferri juxta claram dispositionem Juris §. 2. *Instit. De Codicillis*. ibi: *Codicillis hæreditas neque dari neque adimi potest, ne confundatur Jus Testamentorum, & Codicillorum, & ideo nec exhereditatio scribi.*

60 Porro Codicillus fieri potest sive in scriptis, sive etiam nuncupative, seu oretenus: ad ejus tamen valorem requiruntur, & sufficiunt quinque testes, sive masculi, sive foeminae; qui etiam se subscribere debent, si Codicillus fiat in scriptis, quamvis sigilla apponere non sit necesse, *L. ult. C. De Codicillis*. Et hoc intelligendum, si fiat ad causas profanas: nam Codicillus ad causas pias factus non requirit tantas solemnitates, prout in simili de Testamentis ad pias causas superius (k) dictum est.

#### Additio.

\* Pariter, si Codicillus aliquis novus sive ante, sive post Testamentum jam factum, sive etiam sine ulla Testamento ad Acta reponatur, utique non desideratur numerus Testium; cum hi neque ad simile Testamentum ad Acta datum requirantur. Item, quia teste Cancellario intimo Baviaræ de Schmid *in Comment. ad Tit. 37. art. 1. n. 8. & 9.* in Civitate Metropolitana Monacensi quilibet civis Testamentum suum facere potest coram duobus testibus, a fortiori ad Codicillum talium civium similiter non requiruntur plures, quam duo testes, ut advertit Christoph. Chlingensperg. *L. 2. Inst. Tit. 25. Quæst. 1. Object. 3.* Insuper, cum in Bavaria (imo juxta Befoldum & alios apud Schmid *loc. cit. art. 2. n. 2.* probabiliter etiam de Jure communi) Testamento alicui inferi possit sequens clausula: *Volo insuper, ut quidquid huic meo Testamento in vacuis foliis, seu spatiis ipsius Testamen-*

*menti, vel in scheda aliqua separata adjecero, valeat eodem modo, ac si prius jam huic Testamento insertum esset.* Hac (inquam) clausulæ memoratæ insertione supposita, si post Testamentum scribat Testator de novo schedam, in qua adhuc varia exprimit legata, vel declarationes Testamenti cum annotatione diei, & anni, ac subscriptione Nominis, valet talis scheda, quin necessarii sint quinque testes; dummodo præcise noscatur character Testatoris, vel dictus character per duos testes e. g. se subscribentes probari queat, uti expressè habetur in Jure Patrio *Tit. 37. art. 2.* & ibi Schmid *supra*. Unde circa numerum testium quoad Codicillos attendi debet pariter ad Statuta municipalia, & consuetudinis locorum legitime introductas. \*

61 Interveniunt autem Codicilli præcipue ad Legata, & Fideicommissa, atque Donationes mortis causa faciendas, utpote quæ per Codicillum fieri possunt. Juvant etiam ad Testamentum declarandum, atque immutandum salva hæredis institutione, eique addendum. Quinimo quando Testamentum habet insertam clausulam Codicillarem, si ipsum ob defectum alicujus solemnitatis non potest valere ut Testamentum, valebit tamen ut Codicillus.

62 Et quidem frequenter Testatores in suis Testamentis apponere solent clausulam Codicillarem, idque vel expresse, dicendo: *Si hæc dispositio mea non valet ut Testamenti, volo, ut valeat ut Codicilli*; vel tacite, ac virtualiter, dicendo: *Si hæc dispositio non valet ut Testamentum, valeat modo, quo secundum Jura potest, meliori.*

63 Neque inaniter isthæc clausula Codicillaris apponitur, utpote cujus effectus non sunt exigui. Siquidem ejusmodi Testamentum, si vel ab initio habeat defectum, vel eum ex postfacto acquirat, ita ut non possit valere per modum Testamenti solemniter, valebit saltem per modum Codicilli, dummodo adfuerint testes sufficientes ad Codicillum. Unde quamvis in tali Testamento minus solemniter institutio hæredis irrita sit, ac proinde hæres ab intestato succedat: tamen tenetur is hujusmodi Testamentum quoad omnia alia adimplere, solvendo scilicet Legata, Fideicommissa, & hujusmodi. Sunt & alii effectus clausulæ Codicillaris, verum de iis Jurisperiti, atque Jus Canonicum *lib. 3. Decret. Tit. 26. §. 21.*

#### Additio.

\* Unum adhuc quæri posset, utrum nimirum, dum Fratres Minores S. Francisci Regulam pure observantes, qui consequenter vi Declarationum Nicolai III. & Clementis V. juxta dicenda *n. 72.* immediate Hæredes in aliquo Testamento institui nequeunt; si tamen ab aliquo hujus rei ignaro ex affectu erga eos bona fide Hæredes scriberentur, annexa tamen clausula Codicillari præcedenti numero declarata, an (inquam) hæc clausula Codicillaris sit tantæ virtutis, ut ille, qui vel in Testamento fuit Cohæres scriptus alias capax bonorum, vel si nullus Cohæres est expressus, qui alias in simili casu ab intestato succedit, teneatur FF. Minoribus prius detracta Trebellianica, vel Falcidia (qui termini magis declarabuntur *Quæst. 7.*) residuum moderatum, & statui eorum non difforme dare per modum eleemosynæ, ac pii legati pro necessitatibus præteritis, præsentibus, vel imminentibus Fratrum Minorum? Ad hoc quæsitum sub his limitationibus se Magnifico Professore Jurium Glettle conformare videtur P. Franciscus Schmier celeberrimus per plures annos Rector Magnificus in Universitate Salisburgensi, *De Testam. c. 1. sect. 3. §. 3. n. 192.* respondendo affirmative. Ratio est: quia ex hac clausula Codicillari colligitur, quod voluntas interpretativa Testatoris fuerit, ut illa eleemosyna Fratribus Minoribus detur modo possibili, quo ipsis accipere est licitum vi sacræ Regulæ, & Declarationum Pontificiarum; atqui sub his terminis & limitationibus ipsis est licitum recipere non quidem per modum hæreditatis, sed per modum legati ex virtute clausulæ Codicillaris: ergo. \*

64 **CONCL. II.** Legatum est donatio quadam a defun-



*Ex relicta, ab hærede præstanda.* Ita h. b. tur §. 1. *Instit. De Legatis.* Dicitur, *donatio quedam*: quæ particula stat loco generis. Additur deinde, *ab hærede præstanda*: per quod differt Legatum a Donatione mortis causa, quæ non necessario fit ab hærede, cum possit fieri, ac plerumque fiat ab ipsomet donante, quamvis ante mortem ipsius non confirmetur, sed revocari possit.

65 Quæres, an Testamentum minus solemne ad causas pias factum valeat etiam quoad Legata profana; & econtra corruente Testamento profano, corruant pariter Legata pia inserta? Resp. I. Testamentum minus solemne factum principaliter ad pias causas valet etiam quoad Legata profana in eo contenta. Ita Covarruvias c. 11. *De Testam. n. 2.* Lessius lib. 2. cap. 19. n. 9. Engel tit. *De Testam. n. 19.* & communis, paucis exceptis. Ratio est: quia *Accessorium naturam sequi congruit principalis.* Reg. 46. *Juris in 6.* atqui Testamentum valet in dato calu; ergo & Legata eidem inserta, cum sint quid accessorium, quamvis ceteroquin profana.

66 Resp. II. Econtra vero Testamento ad causas profanas corruente ob defectum solemnitatum, non idcirco corruunt inserta Legata pia, sed valent. Ita citat. Covarruvias n. 4. Lessius n. 9. Engel, & alii; idque merito tenendum favore causæ piæ (*Nam summam esse rationem, quæ pro Religione facit, habetur L. Sunt personæ. ff. De Religiosis & sumptibus funerum*) simulque ob remedium animæ Defuncti.

67 Neque urget allata regula, *Accessorium &c.* Nam inter alias limitationes ea non procedit, quando in accessorio reperitur specialis ratio, quæ non reperitur in principali, propter quam illud corruente principali sustineatur: prout in proposito est favor religionis, atque remedium animæ Defuncti.

68 CONCL. III. *Fideicommissum* dicitur illud relictum, quod fidei committitur hæredis, ab eo dandum alicui alteri; sic fit, cum Testator dicit: Hæres, fidei tuæ committo, ut post aditam hæreditatem ex ea tantam, aut tantam partem, vel hoc aut illud prædium huic consignes; idque vel statim, vel post mortem tuam &c. Porro hæres sic Fideicommissio gravatus, appellatur *Fideicommissarius.* Quoad alia vero de Fideicommissis eodem ferme modo est discurrendum, sicuti de Legatis; nam, ut L. 1. ff. 1. *De Legatis,* habetur, *Per omnia exaqua sunt legata Fideicommissis.*

#### Additio I.

\* Supple ultima dicta, quod nimirum *Fideicommissa æquiparentur Legatis*, esse intelligenda de particularibus Fideicommissis. Ubi sciendum, quod aliud dicatur *Fideicommissum universale*, aliud *particulare*: prius est, cujus Hæres succedens ex Testamento, vel etiam ab intestato jubetur alteri v. g. post certum tempus, aut primum post suam mortem hæreditatem totam, vel aliquam partem, puta tertiam aut quartam totius hæreditatis relinquere: *Fideicommissum particulare* econtra, quando per Testatorem seu Fideicommittentem jubetur tantum certa aliqua res determinata (puta *hoc prædium, hoc castrum, vel hæc domus*) alteri ab Hærede consignari, quo casu conformiter dictis Fideicommissarius talis particularis æquiparatur Legatario; sicque æqualiter utrobique sentiendum. \*

#### Additio II.

\* Porro tam in Fideicommissio universali, quam particulari a Testatore, seu primo Fideicommittente integra sæpe Familia (præsertim apud Illustres pro conservatione ejusdem) substituitur successive, ac cum certo ordine. Et quidem, si *Primogenitus* alicujus Lineæ, e. g. Petrus ex dicta Familia cum suis successive semper descendentibus, vocetur ad successionem; ac autem suorum descendendum linea extincta, *Secundogenitus*, puta Paulus cum sua linea, seu successione, atque sic deinceps, tale Fideicommissum communiter appellatur *Primogenitura.* Econtra vero, si Testator, seu primus Fideicommittens voluit, ut semper *natus maximus* de Fa-

milia illa succedat, sive is descendat ex linea ista ultimi Successoris, sive ex altera, dummodo sit Senior Familix; in hac ordinatione Fideicommissum hoc dicitur *Majoratus.* In genere autem similia dicuntur *Fideicommissa Familix, seu Gentilitia*, de quibus in casu emergenti plura videre poteris in *Jure Canonico Auctoris lib. 3. Decret. Tit. 26. §. 19. \**

### QUESTIO VI.

De institutione Hæredum, Falcidia, Trebellianica, & Successionibus ab intestato?

#### SUMMARIUM.

- 69 Hæres necessarius, & non necessarius; qui?
- \* Utrum, & quomodo Fratres, & Sorores sint Hæredes necessarii?
- 70 Hæredis institutio est fundamentum totius Testamenti.
- \* Hæres institutus quas contrahat obligationes?
- 72 Quid de FF. Minoribus de Observantia, & Capucinis?
- 73 Hæredibus necessariis debet relinqui Legitima, & quomodo?
- 74 Legitima portio, quæ?
- 75 Ea non habet locum in Regnis, Ducatibus &c.
- 76 Hæredi non necessario instituto, quantum relinquendum?
- 77 Falcidia quid? & unde sic dicta?
- 78 Trebellianica, quid?
- 79 An sit obligatio faciendi Testamentum?
- 80 Hæredes ab intestato, qui? & quando succedant?
- 81 Ordines succedentium ab intestato, qui?
- \* An, & in quo Liberi illegitimi successionem prætere possint?
- 82 Fiscus, an computandus inter ordines succedendi ab intestato?
- \* Formula faciendi quodcumque Testamentum præfice.

69 **A**dvertendum, quod Hæres alius sit necessarius, alius non necessarius. *Hæres necessarius* dicitur, quem Testator in portione legitima instituere cogitur, nisi justam exhæredandi causam habeat. Tales Hæredes necessarii sunt Descendentes in linea recta, nempe Filii, Filixque, Nepotes, Pronepotes, ex legitimo matrimonio procreati. His autem deficientibus Hæredes necessarii sunt Ascendentes in linea recta, nempe Pater, Mater, Avus, Avia, ita tamen, ut, si adsint Descendentes seu Liberi, nihil de jure debeatur Ascendentibus pro legitima, *text. clar. Auct. De hæredibus ab intestato. §. 1. Collat. 9.* *Hæredes non necessarii* sunt reliqui omnes præter enumeratos; sive, qui Testatori non sunt conjuncti in linea recta. Unde sequitur, quod Frater aut Soror de jure non sit obligatus ad instituendum pro Hærede suos Fratres, aut Sorores, eorumve Filios, neque ad relinquendum eisdem legitimam: quod a fortiori extendens ad ceteros Consanguineos, vel Affines. Ubi tamen.

#### Additio.

\* Notandum est ulterius, quod, etsi fratres & sorores Testatoris non sint Hæredes necessarii, sed possint omnino etiam quoad legata præteriti in aliquo Testamento juxta sententiam communioem conformiter §. 1. *Instit. De inofficioso testamento*, ac Juri Bavarico Tit. 36. art. 7. nihilominus tamen, si in dicto Testamento Hæres institueretur persona turpis (e. g. nota aliqua meretrix, seu concubina, aut persona infamis infamia juris vel facti, aliave macula affecta) tunc illud saltem per *querelam inofficiosi Testamenti* de Jure communi possent impugnare prædicti fratres, atque sorores. Hoc autem privilegium impugnandi simile Testamentum non extenditur ad talium fratrum vel sororum liberos per textum Leg. 21. C. *De inofficioso Testamento.* Quinimo nec id competit fratribus vel sororibus præcise uterinis, sed germanis, vel saltem consanguineis juxta L. 27. C. *Eod.*



ubi nota, quod frater & soror uterini dicantur, qui præcise ex eadem Matre, *Consanguinei*, qui solum ex uno Patre, *germani* qui ex uno eodem Patre & Matre sunt progeniti. Hoc prænotato sit\*.

70 CONCL. I. Institutio Hæredis est veluti caput, atque fundamentum totius Testamenti. Ita habetur in Jure Civili variis in locis; ut §. *Ante Hæredis. Instit. De Legatis*, & l. *Proxime, ff. De his, quæ in Testam. debentur*, & alibi. Hinc non valet Testamentum præsertim ad causas profanas (nam de Testamentis ad causas pias, utpote in quibus sufficiunt solemnitates Juris naturalis, *Letisius lib. 2. de Just. & Jure. cap. 19. n. 8.* citans *Julium Clarum*, tenet oppositum) in quo nemo Hæres instituitur, quamvis secus sit dicendum de Codicillo.

#### Additio.

\* Habet autem institutus Hæres, si absque beneficio Inventarii adivit Hæreditatem (id est, si se tamquam Hæredem declaravit, & agnovit acceptando hæreditatem) sequentes duas principales obligationes. I. Sicuti succedit in omne jus activum, ita pariter in omne passivum, sicque tenetur solvere omnia debita defuncti, si etiam hæreditatem excederent. Ratio est, quia post aditam absque beneficio Inventarii hæreditatem, Hæres censetur juxta Jus una eademque cum defuncto persona, consequenter eodem modo, ac defunctus obligatur. II. Tenetur quoque solvere omnia legata in Testamento specificata, nec potest uti Falcidia: nam aditus hæreditatis reputatur quasi contractus cum Legatariis, quo hisce sese Hæres censetur obligare §. 5. *Instit. De obligationibus, quæ quasi ex contractu nascuntur*. Unde circumspicientes Hæredes, qui aliunde non sunt certificati de nullo sibi subsequendo damno in additione hæreditatis, vel ante additionem ejusdem petunt spatium deliberandi, quod ipsis etiam concedi solet, intra quod secure se possunt informare, quanta sit hæreditas, quanta debita, & quot, ac quanta legata solvenda: vel eundem adeunt hæreditatem citius, sed cum beneficio Inventarii, quod nihil aliud est, quam legitima specificatio omnium bonorum, jurium, & debitorum defuncti &c. fitque diversissimo modo juxta diversa Statuta municipalia, & diversas locorum consuetudines.\*

71 CONCL. II. Omnes homines, non tantum singuli ac privati, sed etiam Communitates, Monasteria & Collegia, Hæredes institui possunt, nisi specialiter a jure prohibeantur. Ita communis.

72 Porro præter alios, qui de jure communi ob certas causas, vel delicta prohibentur Hæredes institui, de quibus Juristæ, vi suæ Regulæ, ac Professionis, non possunt institui Hæredes in testamento Fratres Minores de Observantia, atque Capucini, adeo ut nec eorum Monasteria in communi valeant institui; prout declaravit Clemens V. in *Clem. Exivi. De verborum significatione*. Quo tamen non obstante, consideratis eorum necessitatibus, certisque moderaminibus observatis, potest eisdem quidpiam in Testamento relinqui per modum Legati, uti declaravit Nicolaus III. c. *Exiit De verb. signif. in 6.* Dummodo non dimittatur eis valor ipsius hæreditatis, vel tanta ejus pars quasi sub modo & forma Legati, quod præsumi posset, hoc in fraudem fieri; prout limitat citat. Clemens V.

73 CONCL. III. Hæredibus necessariis debet in Testamento relinqui portio legitima, & quidem titulo honorabili institutionis, si jure hæreditario, atque sine opposito gravamine; adeo quidem, ut alioquin talia gravamina habeantur pro non apposis; vel Hæredibus necessariis competat actio ad petendum complementum legitimæ, si in minori quantitate, quam legitima portione, Hæredes instituantur; vel ad omnino rescindendum Testamentum, si nulla apposta iusta causa exhæredandi penitus fuerunt præteriti, ac nihil ipsis jure Institutionis relictum. Ita habetur tum in Jure Civili *Auth. Ut cum de appellatione. §. Aliud quoque Collat. 8.* cum concordantiis, quas citat *Layman lib. 3. tract. 5. cap.*

§. n. 11. num in Jure Canonico c. *Reynutius. De Testam.* ubi dicitur, quod *Legitima portio est debita jure nature*.

74 Circa quod notandum, quod legitima portio Descendentium sit triens (id est, tertia pars totius hæreditatis) si non sint plures Liberi, quam quatuor: semis autem (seu media pars totius substantiæ) si sint plures Liberi, quam quatuor. Loquendo vero de Ascendentibus, legitima Ascendentium semper est triens, siue tertia pars totius hæreditatis. Ubi per hanc intelligitur tota ea substantia, quæ solutis omnibus debitis, atque funeralibus pro Defuncto peragendis, post mortem Testatoris remanet.

75 Verumtamen ea, quæ nunc dicta sunt de portione legitima Liberis danda, locum dumtaxat habent in bonis privatis, non item in Regnis, Ducatibus, & Comitatibus Magnatum: talia enim bona in plerisque Provinciis ad Primogenitum pertinent, assignata tamen aliis Liberis sufficienti sustentatione, pro conservanda dignitate status & familiæ suæ.

76 CONCL. IV. Quod si in Testamento instituitur Hæres non necessarius, debet ei saltem quarta pars totius hæreditatis seu substantiæ libera remanere, ut sic onera hæreditaria sustinere valeat: alioquin si tam multa a Testatore facta sint legata, vel donationes mortis causa, ut Hæredi non remaneat quarta pars totius hæreditatis, licebit eidem detrahere Falcidiam; aut si gravetur tam magnis multisque Fideicommissis, ut eidem non remaneat quarta pars hæreditatis libera, detrahet Trebellianicam. Ita habetur in Jure Civili variis in locis, ut l. 1. §. *seqq. ff. Ad legem Falcidiam*, & *toto tit. ff. ad S. C. Trebellianum*, cum concordantiis.

77 Porro per Falcidiam intelligitur quarta pars omnium bonorum, quæ aderant tempore mortis Testatoris, deducto tamen prius ære alieno, atque expensis funerum, quam licet detrahere hæredibus institutis (servata tamen proportione) a singulis legatis, si tam multa sunt legata, ut dicta quarta pars eisdem non remaneat libera, donec ista compleatur. Et hujusmodi quarta pars appellatur Falcidia, a suo auctore Falcidio Tribuno plebis, qui primus legem tulit (quæ ex suo nomine *Lex Falcidia* nuncupatur) ut quarta pars semper superesset, ac remaneret Hæredibus in Testamento institutis.

78 Trebellianica ferme coincidit cum Falcidia, nisi quod hærescitat Legata, illa vero Fideicommissa, a quibus detrahitur. Siquidem Trebellianica detrahitur a Fideicommissis, si tam multa, vel gravia facta sint a Testatore, ut Hæredibus non remaneat quarta pars omnium bonorum, post debitorum, ac funeralium solutionem restantium libera, & absque ullo onere, donec dicta quarta pars remaneat libera Hæredibus institutis. Et dicitur Trebellianica, a suo auctore Trebellio Consule, a quo Senatusconsultum Trebellianum prodit, hoc ipsum, disponens.

79 Quæres an sit obligatio aliqua faciendi Testamentum? Resp. breviter, neminem quidem in Foro conscientiae per se obligatum esse ad condendum Testamentum, sed interdum per accidens talem adesse obligationem, ne alioquin lites, aut alia incommoda oriantur. *Layman lib. 3. tract. 5. c. 3. n. 10.* & alii.

80 CONCL. V. Quando nullum omnino factum est Testamentum, aut illud ex quodam defectu irritum fuit, & cassatum, tunc tali Defuncto succedunt Hæredes ab intestato, id est, illi, qui secundum Jura succedunt, quando nullum factum est Testamentum. Ita communis, & patet ex utroque Jure.

81 Diversi autem sunt ordines Succedentium ab intestato, quorum prior semper posteriorem excludit. Primus est Descendentium, seu Liberos. Quod si vero unus ex liberis defunctis sit, & reliquerit Nepotes, tunc hi personam Patris representant, & in ejus locum succedunt; ac proinde in divisione hæreditatis cum Patre suo, aut filiis ejus, succedunt non in capita, sed in stirpes. §. *Cum filius. Instit. De hæreditatibus, quæ ab intestato &c.* & alibi. Secundus ordo est Ascendentium, seu



seu Parentum (cum quibus tamen simul vocantur, seu ad hæreditatem admittuntur, fratres & sorores duplicis vinculi, hoc est, ex eodem patre & matre cum defuncto geniti *Authent.* De Hæredibus ab intestato. Collat. 9.) &, amplius non extantibus Parentibus, Avorum. Tertius est Collateralium, id est, Fratrum Sororumque, & hisce deficientibus aliorum Consanguineorum propinquorum. Et quartus, Conjugum inter se.

Additio.

\* Quæres. An Liberi quoque naturales, vel spurii, aut ex damnato coitu progeneri possint prætere ali- quod jus successionis ab intestato respectu suorum pa- rentum? Ante Responsum nota ex lib. 3. Decret. Tit. 26. n. 410. quod Naturales filii, vel filii sint, qui procreantur ex solutis tempore saltem conceptionis ha- bilibus ad invicem contrahendum matrimonium. Spurii, vulgo *quasiti*, ad propositum dicuntur, qui sunt quidem geniti a duobus solutis, de se ad contrahendum habili- bus, matre tamen existente meretrice passim viris ex- posita, unde merito dubitatur de vero patre. Nati *damnato coitu* censentur, qui proveniunt ex parenti- bus, neque tempore conceptionis habilibus ad contra- hendum, puta nati ex copula adulterina, vel incestuo- sa, aut sacrilega: ubi advertendum, quod etiam isti subinde, sed in alio sensu nominantur *Spurii*. H. N.

Resp. I. Liberi naturales per subsequens inter paren- tes matrimonium legitimi possunt jus successionis præ- tendere, uti alii legitimi, quibus in Jure æquiparantur c. 6. *Qui filii sint legitimi*. Econtra vero legitimi præ- cise per rescriptum Principis possunt solummodo quoad bona paterna prætere jus successionis; si non ex- tant Liberi naturales & legitimi simul, juxta *Novellam* 89. cap. 9. quinimo juxta Jus Bavaricum Tit. 39. art. 3. ut hi successionem prætere queant, neque de- bent extare collaterales, nec aliqua legitima conjux defuncti.

Resp. II. Liberi naturales non legitimi juxta *Auth. Licet. C. De naturalibus Liberis*, & juxta Jus Bavaricum Tit. 3. art. 3. in bonis paternis, si adsint legitimi Liberi, aut saltem legitima supervivat Conjux, vel de Jure Bava- rico, si supersint etiam adhuc collaterales ipsius defuncti, nullum jus successionis possunt prætere; in eorum vero defectu duas habent uncias ex *Assè*, cum Matre talium naturalium liberorum, si adhuc vivat, dividendas, Ubi adverte, quod *As* dicatur Hæreditas, in duodecim portiones; quæ uncie vocantur, divisa.

Resp. III. Quoad bona materna insistendo Juri communi, & præscindendo a Statutis municipalibus ac locorum consuetudinibus, Liberi naturales quoad jus succedendi concurrunt cum legitimis, uti a fortiori desumitur ex §. *Novissime. Instit. De Senatusconsulto Orphitiano*.

Resp. IV. Liberi spurii nequeunt prætere jus successionis quoad patrem, utpote incertum: bene vero quoad matrem; cum limitatione tamen, ut, si ea fuerit Illustris, & habeat proles alias ex legitimo matrimonio procreatas, hæc prætenso successionis juxta *L. Si qua Illustris. C. Ad Senatusconsultum Orphitianum*, ex parte spuriorum non procedat. Quinimo de Jure Bavarico conformiter Tit. 39. art. 5. idem sentiendum, siue mater spuriorum fuerit Illustris, siue non.

Resp. V. Nati ex damnato complexu nec quoad bona paterna, nec quoad materna possunt prætere jus successionis: quinimo rigor Juris Civilis *Authent. Licet. C. De natural. Liber. & Authent. Ex complexu. C. De incest. nupt.* neque his ultimis jus ad alimenta tribuit, quem tamen rigorem Jus Canonicum c. *Cum haberes. De eo, qui duxit in Matrimonium prope finem* sustulit, saltem, ut his prolibus) quod a fortiori dicendum quoad præcedentes in defectu aliorum sufficientium mediorum) succurratur in alimentatione. \*

82 Tandem his omnibus deficientibus succedit Fiscus: quamvis nonnulli merito non computent Fiscum in- ter ordines succedendi ab intestato, eo quod ceteris

deficientibus capiat bona, non jure successionis hære- ditarie, sed potius jure Regalium, tamquam vacan- tia. Sed de hoc plura Juristæ.

A P P E N D I X,

Ac quæstio Additionalis ultima.

Quomodo practice fiat aliquod Testamentum, & qualiter tradatur ad Acta?

S U M M A R I U M.

- \* Quomodo practice fiat Testamentum? Addit. I.
- \* Qualiter illud detur ad Acta? Addit. II.
- \* An possit cuicumque Judici extrahi? Ubi & alia notabilia. Addit. III.
- \* An possit Testamentum mitti per aliquem tertium ad Acta? Addit. IV.

Additio I.

\* Quæst. I. Quomodo fiat practice aliquod Testamen- tum? Resp. modo sequenti, qui mutatis mutan- dis poterit deservire pro aliquo Formulari. Nimirum: In Nomine Sanctissimæ, & Individuæ Trinitatis &c. Serio revolvens animo, hominibus infallibiliter statutum esse semel mori, serioque mente recogitans, diem æque in- certum esse, ac horam mortis, liberrima voluntate, & plene capax rationis de bonis meis ultimam dispositionem, seu Testamentum feci, ut sequitur.

Inprimis, & ante omnia animam meam offero Creatori suo omnipotenti Deo, humillime, & instantissime rogan- do, ut per infinitam suam misericordiam, per meritum, & passionem Domini Nostri J E S U Christi eandem pretioso sanguine redemptam hæredem facere velit Regni Celestis.

Secundo. Quoniam corpus humanum a limo terræ forma- tum pulvis est, & ab animo separatum in pulverem reverte- tur, hinc etiam corpus illud consigno terræ, volendo, ut terræ mandetur absque speciali pompa, conformiter tamen meo statui apud NN (hic specificetur locus sepulture, ma- xime si eligatur aliqua sepultura extraordinaria) ordinando præterea, ut celebretur in bonum animæ meæ dies Depositio- nis &c. NB. addatur, an desideret etiam diem septi- mum, trigessimum, vel aliud officium; item, quot Missas quolibet ex his diebus: posset quoque denomi- nare stipendium pro qualibet Missa.

Postmodum sequuntur Legata pia, & profana, si quæ inferere intendit, prout hic aliqua apponuntur: Exem- pli gratia:

Tertio. *Specialiter lego trecentos florenos pro sexcentis Missis in bonum animæ meæ celebrandis, medium florenum determinando pro qualibet Missa.* NB. Si quos specialiter velit, qui suas Missas legant, nomet eosdem.

Quarto. *Sorori meæ pro memoria, & in aliqualem recognitionem benevolentie mihi sæpius exhibita lego octo, quos habeo, annulos aureos.*

Quinto. *Confraternitati N. dentur centum floreni per modum Legati.* Et tali modo possunt adjungi adhuc plura alia. Quod si vero nulla alia supersint, ponatur

Sexto. *Cum agnoscam, ante omnia ad valorem Testamenti tamquam fundamentum ejusdem requiri institutionem Hæ- redis, hinc pro universali bonorum meorum Hærede bono- rabili titulo institutionis denomino, & instituo N. Hic specificatur Hæres, &, si placet, adjicitur certa con- ditio, ubi de adjectione conditionum videre poteris Jus Canonicum in 3. Decret. De Testam. §. 13. n. 437. & seqq.*

Ultimo. *Tandem, ut hac mea ultima voluntas eo citius optatum finem obtineat, pro Executore ejusdem denomino N. (hic exprimit illum, quem vult habere specialem Executorem; alias vero, si nolle assumere specialem, hoc punctum non foret necessarium) eique viginti florenos (si tamen aliquid Executori dare velit) in aliqualem recognitionem laboris in se suscipiendi assigno. Et ita demum, reservatam mihi liberam potestatem mutandi, augendi, minuendi, addendi &c. finio, uti incepi, hoc meum Testamentum in Nomine*



*Nomine Sanctissima, & individue Trinitatis, quod pro maiori robore propria manu scripsi, & sigillo meo munivi.*  
 Quod si propria manu non scriberet, sed tantum subscriberet: ponatur sic: *quod propria manu subscripsi &c.*  
 ceterum solent post hæc verba alii adjungere sequentia, jam superius in Additione post. num 60. declarata. Quidquid autem huic meo Testamento adjecero in vacuis spatiis, vel in separata aliqua scheda, valeat eodem modo, ac si prius jam huic Testamento insertum esset. Deum subjungitur clausula codicillaris.

*Volo autem, ut, si hæc mea ultima dispositio non valeret tamquam Testamentum, saltem valeat tamquam Codicillus, aut Donatio mortis causa, vel alio quocumque modo meliori, quo de Jure, Statuto, vel consuetudine valere potest.*  
 Actum Die Menſe

Anno

NB. Annotantur locus, dies, mensis, & annus, quibus conditum est Testamentum, atque se subscribit Testator, aliaque observantur, quæ tam hic, quam in Jure Canonico fusijs fuere adducta.

#### Additio II.

\* Quer. II. Qualiter Testamentum practice semel factum tradatur ad Acta, ut exinde securius ibidem subsistat contra impugnantes valorem ejusdem.

Ante responsionem suppono, quod, etsi Testamentum, quod factum est ad causas pias, non indigeat multis, dummodo constet de Testatoris voluntate e. g. per subscriptionem propriam cum sigillo, si habeatur, & pro adhuc majori securitate, ac probatione per duos testes subscriptos; nihilominus magno opus sit labore, & circumspectione, si quodpiam Testamentum condatur solemne, in quo Hæres est causa profana, cum conformiter dictis quæstione prima hujus Distinctionis plures conditiones ad simile Testamentum solemne requirantur, ex quibus facile aliqua potest deficere, sicque valor Testamenti periculo impugnationis subiacere. Quare communiter suadent Doctores, ut pro majori securitate tale Testamentum scriptum, prætermittis aliis solemnitatibus, potius tradatur ad Acta, apud quæ eodem gaudet privilegio, ac si foret solemne. Quomodo autem hæc extraditio fiat, indagatur in præsentia: ad quod Resp. Extraditionem Testamenti, ad Acta fieri modo sequenti. Si Testator adhuc sit sanus; ipsemet personaliter Judicem, seu Magistratum adeat extradendo huic suam ultimam voluntatem clausam, & rogando, ut Auctoritate Judicis sustineatur, sibi que Recepisse consignetur. Quod si Testatur domi ægrotus decumbens, aliamve ob causam Judicem accedere nequeat, eundem mediante aliquo Procuratore, aliove prudenti homine requirat, ut vel ipsemet ad domum ægroti dignetur venire, vel saltem alios suo nomine deputare, qui Testamentum ad Acta recipiant. Venientem autem Judicem, seu Deputatos cum debita reverentia excipiat, eisque Testamentum, & quidem clausum ac obsignatum, si inibi contenta celare cupit, extradat dicendo, quod in hac charta contineatur sua ultima dispositio, liberrime, & pleno intellectu facta; roget proin, ut ad Acta recipiatur, & sibi aliquod Recepisse, seu authentica attestatio de receptione extradatur.\*

#### Additio III.

\* Ceterum conformiter Juri Canonico. L. 3. Decret. tit. 26. §. 9. a Testatore, suam ultimam dispositionem ad Acta dante, adhuc tria utiliter annotanda veniunt: nimirum I. Quod etiam Judici alias incompetenti simile Testamentum dari queat; hinc valet, gaudetque privilegio Testamenti ad Acta, sive Consilio Aulico, aut alicui Regimini, sive Magistratui, aut loci Præfecto ac Judici, etiam alterius civitatis offeratur; quamvis hic Judex foret alias dignitate inferior Testatore, modo habeat jurisdictionem ordinariam civilem ad certas causas non restrictam. Pariter tamquam privilegiatum subsistit, si a Laico apud Judicem Ecclesiasticum, vel contra

a Clerico apud Judicem Laicum deponatur. II. Notetur, quod, si ad Acta Judicis in communitate consistentis suam ultimam dispositionem dare intendit, mittere debeat ad primum talis Communitatis, puta ad Præsidem Consilii, aut Cancellarium, vel ad Consulem illum, quo pro tempore fungitur officio, eumque requirere, ut curet deputari quosdam ex illo Senatu vel Consilio, qui Testamentum ad Acta suscipiant. III. Notetur, ut, si unus Judex, vel unus tantum Deputatus veniret ad ægrotum, extraditio Testamenti fiat in præsentia duorum testium pro majori securitate & fidei robore conformiter c. 28. De Test. & Attest.\*

#### Additio IV.

\* Quer. III. An sufficiat ad rationem Testamenti privilegiati ad Acta, si Testator ægrotus, non expectans adventum Judicis, seu Deputatorum a Magistratu, mittat per tertium Testamentum suum clausum ad eodem? Resp. Si per duos testes, vel aliunde probari queat, illum tertium fuisse constitutum ab ægrotato ad hunc finem Procuratorem, tunc probabiliter sufficit; alias vero non. Quinimo adsunt Auctores, qui cum König, Schmalzgruber, & Chlingensperg lib. 2. Instit. tit. 10. q. 29. negant, etiam primum sufficere, adeoque securissimum erit, ut Testator vel ipsemet accedat, vel ut ægrotus expectet venientem ad se Judicem, aut Deputatos, quibus Testamentum scriptum extradat, prout etiam suadet in lib. 3. Decret. tit. 26. n. 723.\*

### DISTINCTIO IV.

#### De Mutuo, & Contractibus onerosis.

#### QUESTIO I.

#### De Mutuo, & variis ipsum concernentibus.

#### SUMMARIUM.

- 1 Ratio Ordinis.
- 2 Mutuum dupliciter accipitur.
- 3 Mutuum ut Contractus, quid?
- 4 Declaratur ejus definitio.
- \* Solutio notabilis objectionis.
- 5 In Mutuo dominium rei transfertur in Mutuatarium.
- 6 Qui possint Mutuum dare, vel accipere?
- 7 Civitas, Ecclesia, Monasterium &c. quando obligetur ex Mutuo?
- 8 Filii familias mutuo accipientes sine consensu Parentum juvantur S. C. Macedoniano.
- 9 Limitatur hoc in pluribus casibus.
- \* Utrum Juramentum enervet Senatusconsultum Macedonianum, videtur distinctione solvendum. Addit. I.
- \* Tractatur etiam de Senatusconsulto Vellejano quoad mulieres. Addit. II.
- \* Quo loco sit facienda solutio pecunie mutuata? in Append. Addit. I.
- \* Quo tempore ea sit prestanda? Addit. II.
- \* An eadem fieri possit per partes? Addit. III.
- \* Quo ordine? Addit. IV. V. VI. & VII.
- \* De qua sorte sit facienda? Addit. VIII.
- \* Declaratur magis difficultas per aliquem casum, Addit. IX.
- \* Solvitur notabilis objectio. Addit. X.
- \* Mutuum si quis actualiter nondum accepit pecuniam, & tamen jam dedit obligationem de receptione quomodo tali succurrendum? Addit. XI.
- \* Debitor Mutuum accipiens, si non sit solvendo, ad quidnam adigi possit? Addit. XII.

POST Contractus gratuitos, nec non & Testamenta agendum restat de Mutuo, & de Contractibus onerosis, qui magis proprie sunt Contractus, utpote reciprocam hinc inde obligationem continentes. Agitur autem inprimis de Mutuo, eo quod Mutuum sit unica veluti



veluti sedes Usurarum, quarum notitia necessaria est ad omnes propemodum Contractus sequentes, ne in illis Usuræ vitium admisceatur. Et quidem

2 *Mutuum* sic dictum est, quasi ex meo tuum. Et interdum significat ipsam rem, quæ mutuo traditur, interdum vero ipsum Contractum Mutui: & in hac posteriori acceptione sermo est in præsentis de Mutuo.

3 CONCL. I. *Mutuum*, ut sumitur pro ipso Contractu seu mutatione, recte describitur, dicendo: Mutuum est traditio rei, numero, pondere, vel mensura constantis, facta eo animo, ut statim fiat accipientis, cum obligatione, ut similis in specie & bonitate restituatur. Ita desumitur ex l. *Mutuum*. ff. De rebus creditis. & tradit Lessius lib. 2. de J. & J. cap. 20. n. 3.

4 Dicitur, *traditio rei*: quia mutuum perficitur traditione, & ante actualem rei mutuatae traditionem non censetur esse Mutuum. Et additur, *rei numero, pondere, vel mensura constantis*: quia in hujusmodi rebus fieri solet Mutuum, ut in vino, oleo, frumento, pecunia numerata, ære, argento, auro. Dicitur ulterius, *facta eo animo, ut statim fiat accipientis*: quia Mutuum dicitur, quasi ex meo tuum; ita enim a me tibi datur, ut ex meo tuum fiat. Et additur; *cum obligatione, ut similis in specie restituatur*: si enim reddenda sit res alterius speciei, non erit Mutuum, sed Permutatio, prout fieret, si pro vino mihi dares frumentum. Quod si vero eadem numero res foret restituenda, etiam non esset Mutuum, sed Commodatum, vel Depositi, prout notatur cit. l. *Mutuum*. ff. De rebus creditis, & alibi.

Additio.

\* Quod si opponas contra hanc I. Conclusionem, posse loco mutuati auri totidem quoad valorem reddi in argento, nisi expresse conveniatur, ut iterum in auro restituatur, adeoque non requiri ad rationem Mutui semper, ut restituatur a Mutuatario eadem res specie: nam aurum, & argentum utique specie differunt. Respond. disting. consequ. non requiritur ad rationem Mutui, ut res semper specie physica eadem restituatur, conc. non requiritur saltem eadem specie morali, neg. consequ.

Nec exinde inferas, quod sequeretur, ad rationem Mutui sufficere, si e. g. loco frumenti mutuati daretur in æquivalenti pecunia, vel vinum, quoniam in æstimatione morali censeretur idem reddi: nam contra est, quod tunc non amplius quidpiam redderetur ejusdem moraliter speciei in se, sed tantum in æquivalenti, nec esset ille contractus Mutui, sed potius, si loco frumenti daretur pecunia, foret contractus Emptionis; ac Venditionis, aut, si loco frumenti substitueretur in æquivalenti vinum, aut oleum, diceretur contractus Permutationis: non teneretur autem ille, qui alteri quidpiam dedit Mutuum, loco contractus Mutui acceptare contractum Emptionis, aut Permutationis.

Cur vero quoad pecunias sufficiat ad rationem Mutui, si loco auri reddatur argentum, & cur idem dici nequeat, si loco frumenti daretur in æquivalenti oleum, vel vinum, ratio est; quia in pecuniis mutuatis non tam attenditur ad ipsam materiam monetæ regulariter, nisi desuper speciale pactum intercedat; quam ad valorem extrinsecum ejusdem auctoritate publica constitutum, qui valor potest utique esse idem etiam respectu argenti: econtrario in aliis rebus, si mutuantur, respicitur ad ipsam materiam mutuata, & consequenter Mutuatarius debet vere eandem in se speciem restituere, nec teneretur mutuans aliam acceptare. Videatur præter inferius dicenda desuper Sporer Tract. 6. in Decalog. cap. 4. sect. 1. §. 3. n. 7. & seqq. \*

5 CONCL. II. In Mutuo rei datæ dominium transfertur in Mutuatarium; unde si res mutuata pereat, quocumque tandem casu, aut infortunio, eadem perit Mutuatario. Ita cit. l. *Mutuum*. ff. De rebus creditis, estque communis. Ratio est; quia quælibet res domino suo perit: atqui in Mutuo datum de meo fit tuum, ut ipsum nomen significat; ergo transfertur dominium rei in eum, qui rem mutuo accipit, qui dicitur Mutuatarius.

Anacl. Reiffenstuel Theol. Tom. I.

6 CONCL. III. Omnes, qui contrahere possunt, etiam Mutuum dare, & accipere possunt. Ita communis, & patet ex terminis: quia contrahere ut sic tamquam genus complectitur sub se omnes Contractus, & consequenter etiam Mutuum. Solum duo valde notabilia quoad propositum sunt addenda; itaque

7 Notandum imprimis occasione dictorum, quod Civitas, Ecclesiæ, Monasteria, aliaque pia loca ex Mutuo, quod eorum Rectores vel Administratores susceperunt, tunc solum obligentur, si Creditor, in quem onus probandi rejicitur, ostenderit, pecuniam in Civitatis, vel Ecclesiæ, aut aliorum piorum locorum utilitatem fuisse conversam: alias enim soli Administratores conveniri poterunt, non vero Civitas, vel Ecclesia. Ita Ludovic. Engel tit. De Pactis. n. 43. idque desumitur ex l. *Civitas* ff. De rebus creditis, juncto cap. 1. De Solutionibus, cum concordantiis.

8 Notandum ulterius, de Filiisfamilias peculialiter esse constitutum in Jure Civili per Senatusconsultum Macedonianum, quod, filii sine consensu parentum pecuniam mutuo acceperint, neque ipsi, neque parentes ipsorum teneantur eam solvere, sed possint contra excipere per dictum Senatusconsultum Macedonianum. Et hoc privilegium factum est non tam in favorem filiorum, quam parentum, quorum vitæ filii insidiabantur, ut hæreditate paterna potiti debita contracta solverent: quod quidem privilegium habet locum etiam in Foro interno, seu Conscientiæ. Lessius l. 2. c. 20. n. 8. Herinx disp. 3. De Contractibus. n. 5. Sanchez, & alii.

9 Limitatur hoc I. Nisi filius habeat bona castrensia, vel quasi castrensia, nam tunc ipse ex his tenetur solvere, nec potest uti exceptione S. C. Macedoniani. Limitatur II. Quando filius publice putabatur esse sui juris. Limitatur III. Si filiusfamilias mutuo accepit non pecuniam, sed rem aliam, ut triticum, vinum, & similia: nam lex solum loquitur de Mutuo pecuniario. Limitatur IV. Si pecunia versa sit in commodum Parentum; aut hi soliti fuerint, pecuniam a filiis acceptam solvere. Limitatur V. Si pater debuisset eam secundum rectam rationem suppeditare: ut si filius absens causa Studiorum accipiat Mutuum necessarium, ut vivat, vel libros emat &c. nam hujusmodi expensas secundum rectam rationem tenentur parentes facere. Limitatur VI. Si filius juravit se soluturum; nam tunc non poterit uti exceptione S. C. Macedoniani, sed tenebitur solvere, quando commode poterit: quia omne juramentum servandum est, quod sine peccato observari potest.

Additio. I.

\* Hanc ultimam limitationem equidem P. Pichler in suo Candidato Jurisprudentiæ abbreviato Lib. 5. tit. 19. n. 15. admittit, si mutuans filiusfamilias factus fuerit exinde ditior, non luride has pecunias mutuatas dissipando: alias vero negat tale juramentum stringere ad solutionem Mutui, ex ea ratione satis efficaci; quia nimirum talis renuntiatio juramento firmata, si obligaret, cederet in præjudicium Tertii, nimirum Patris, in cujus favorem Senatus consultum Macedonianum potissime conditum fuit; quia is adhuc exponeretur periculo insidiarum &c. nullum autem juramentum obligat tendens in præjudicium Tertii innocentis. \*

Additio II.

\* Notandum finaliter, de Mulieribus pariter esse specialiter per Senatus consultum Vellejanum decretum in Jure, quod, si pro aliis mutuo quidpiam accipientibus fidejubeant, talis fidejussio regulariter nulla sit, ita, ut ne quidem tales Mulieres in conscientia obligentur in defectu principalium Debitorum ad solvendum Mutuum, nisi, de Jure communi loquendo, hæc fidejussio fiat instrumento desuper publice erecto, & tribus



testibus subfignato. *L. Antiqua. 23. §. fin. C. Ad Senatus consultum Vellejanum.* ubi præterea certiorari debent dictæ femine de Privilegio Senatus consulti Vellejani, an huic velint expresse renuntiare; alias enim vi dicti privilegii Senatus consulti Vellejani (quod ipsis peculiariter ob femineam levitatem, & iudicii imbecillitatem, ne tam faciliter inducantur, concessum est) adhuc contra talem fideiussionem possent excipere. Videantur desuper Jus Canon. Patris Reiffenstuel *lib. 3. Tit. 22. n. 18. & seqq.* ac Illustrissimi D. Schmid in *Comment. ad Jus Municipale Bavaricum, Land-Recht Tit. 1. art. 11. ac seqq.* Tu Confessarie cave, ne facile te similibus immisceas, nisi in Jure communi, & patrio (ubi sæpe particularia statuuntur) sis versatus, aut saltem allegatos Auctores, vel alios authenticos prius desuper consulueris. \*

## APPENDIX

## Additionalis continens varia Quæsitæ de Mutuo.

## Additio I.

\* Quær. I. Quo loco solutio mutuatæ pecuniæ, aut alterius rei sit facienda? Resp., solutionem faciendam esse in eo loco, in quo pecunia vel alia res mutuo data est; nec debitor tenetur Mutuum, quod restituitur, ad alium locum propriis expensis mittere, nec Creditor obligatur in alio loco acceptare, nisi sponte cum Debitore consentiat, ut in alio loco solvatur, aut nisi aliter fuerit expresse conventum tempore dati Mutui. Ita deduco ex Jure Canonico *lib. 3. Decret. tit. 23. n. 54.* Ratio est: quia nullus convenientior, quam locus dati Mutui pro solutione assignari potest, uti fuisse deducit Lessius de J. & J. *lib. 2. cap. 15. Dub. 8. n. 56.* \*

## Additio II.

\* Quær. II. Quo tempore solutio mutuatæ pecuniæ, vel alicujus rei sit facienda? Resp. I. Si tempus certum fuit in Contractu Mutui præfixum, illud quoad solutionem observari debet, ita quidem, ut, si ex culpabili dilatione solutionis Creditor patiatur damnum, id debeat a Debitore refarciri: nam *Mora sua cuilibet est noxia. Reg. 25. Juris in 6.* Nec per hoc debitor excusatur, quod elapso termino solutionis præfixo Creditor non institerit pro solutione; nam etiam eo non urgente ipse dies præfixus interpellat pro Creditore *cap. fin. De locato, & Conducto.* juncta Glossa *§. Statuta.* Unde talis, etsi non teneatur a statu suo omnino cum magno dedecore decedere, obligatur tamen in eodem juxta communem DD. parcius vivere, ac remittere de splendore apparatus, conviviorum, famulorum, equorum, ludorum &c. uti optime advertit Pater Sporer *Tract. 4. in Decalog. c. 4. sect. 3. n. 65.* quatenus exinde debito tempore suis Creditoribus satisfacere queat. Quod bene notent Confessarii, si tales obærat cum eodem luxu ad Confessionale veniant.

Resp. II. Si nullum tempus fuit solutioni a Creditore præfixum, & Creditor posset facile solutionem petere, modo vellet, in simili casu potest eadem differri, usque dum Creditor exigat; dummodo non prævideatur, ipsum Debitorem interea dejici in statum impotentis solvendi. Ita in Jure Canonico *lib. 3. Decret. Tit. 23. n. 47.* citatur pro hac sententia communis, & ratio est; quia in jure solum tunc obligatur debitor absque monitione ad solvendum, quando præfixus est certus dies: ergo a sensu contrario, si is præfixus non fuit, nec Lex aliunde specialiter monet ad solvendum, poterit solutionem differre, usque dum petatur. Quinimo non desunt graves auctores, qui defendunt in simili casu (ubi nimirum nec specialis aliqua lex, nec dies præfixus, nec ipse Creditor interpellat Debitorem ad solvendum) extingui debitum præscriptione, si intra 30. annos Mutuum a Creditore

non exigitur: sicuti a pari etiam servitutes reales rusticæ, ac personales extinguuntur præscriptione per non usum; ubi nec alter, cujus prædium servituti subiectum fuit, tenetur monere priorem, ut is utatur jure suo, antequam id præscriptione extinguatur: uti jam dictum *Tract. 7. Dist. 6. quæst. 3. post n. 24. Addit. II.* & ita quidem sentiunt Panormitanus, Bartolus, Hostiensis, Schmier & alii apud, & cum Patre Pichler in Candidato abbreviato Jurisprudentiæ *lib. 2. Tit. 26. num. 18.* \*

## Additio III.

\* Quær. III. An solutio mutuatæ pecuniæ, aut alterius rei debeat tempore præfixo simul, & semel præstari ex integro, vel non fieri possit per partes? Resp. Nisi Creditor ipsemet velit esse contentus cum solutione per partes, aut aliter tempore contractus Mutui conventum fuerit, solutio debet fieri simul & semel ex integro, sicuti simul & semel illa Summa mutuata accepta fuit, uti supponitur. Ratio est; quia solutio per partes sæpe non exigua incommoda & pericula sibi annexa habet, quæ talis Creditor non tenetur subire, uti recte statuitur *L. Plane. 3. ff. Familia eriscunda.* \*

## Additio IV.

\* Quær. IV. Quo ordine hæc solutio Creditoribus a Debitore sit præstanda? Antequam respondeam,

Notand. I. Ex Communi DD. quod ille Debitor, qui habet sufficientia media ad satisfaciendum omnibus, ad nullum in solvendo adstringatur ordinem, dummodo cuilibet Creditorum debito tempore solvat id, quod debet; quæstio igitur solummodo agitur de eo Debitore, cui deficiunt media ad satisfaciendum omnibus Creditoribus. Ubi

Notand. II. Quod Creditores alii dicantur Hypothecarii, & alii Chirographarii. *Priores* vocantur, qui sibi non solum obligatam habent personam Debitoris, sed etiam immediate res ejusdem, idque vel expresse per factum hominis, puta per legitimum instrumentum, vel tacite per ipsummet Jus. *Posteriores* vero, qui solum ipsam personam Debitoris sibi immediate tenent obligatam.

Notand. III. Quod tacitam Hypothecam in bona Debitoris per ipsummet Jus, etsi alia expressa mentio desuper in aliquo instrumento non fiat, habeant Uxores in bona Mariti quoad suam dotem allatam, Pupilli in bona Tutoris, Minorennis in bona Curatoris, si quem habeant, & causæ piæ in bona suorum Administratorum; item respectu suorum Debitorum omnes reliqui, qui in sequenti proxima additione ponuntur ante Creditores Chirographarios, etsi non habeant aliquam Hypothecam expressam. His notatis \*

## Additio V.

\* Resp. I. De Jure communi, si Debitor non est sufficiens solvendi omnibus Creditoribus de bonis suis, talis ordo in præstanda satisfactione observari debet. I. Solvantur sumptus judiciales ratione processus Edictalis &c. juste pretensi. II. Solvantur ex bonis Debitoris ab Hæredibus (si principalis jam foret mortuus) expensæ funebres. III. Debita tempore ultimæ infirmitatis apud Medicos, & Pharmacopolas, vel Chirurgos contracta. IV. Quod si Debitor haberet propriam domum, ea vendita, de comparata exinde pecunia ante alios satisfiat illis Creditoribus, qui prius ad eam emendam, vel ædificandam, aut reparandam, seu conservandam materialia, vel pecunias derunt mutuas. V. Præstetur satisfactio Uxori quoad dotem allatam, si eandem a Marito fuerit consumpta. VI. Satisfiat Pupillis, Minorennibus, vel Causis piis ex rebus Debitorum, si Debitores hi fuerint Tutores, Curatores, vel Administratores causarum piarum,



piarum, & bona sibi concredita dissipaverint. VII. Succedat Fiscus. VIII. Solvantur alii Creditores Hypothecarii, qui antecedenter non sunt memorati, quin & isti præponuntur aliis post quartam classē collocatis, puta Uxori, Pupillis, Minorennibus, & Causis piis, ac Fisco in ordine ad ea bona respectu quorum ostendere possint, quod jam habeant anteriorem, & antiquiorem, quam allegatæ personæ Hypothecam. Quod si subinde simul concurrant plures Creditores Hypothecarii ejusdem classis, seu ordinis, ac qualitatis (puta si pluribus mutuantibus pecuniam ad emendam domum eadem sit hypothecata) præponatur antiquior: nam apud hos verificatur commune illud *Regule* 54. *Juris*, in 6. *Qui prior est tempore, potior est jure*. IX. Veniant Creditores Chirographarii speciali quodam privilegio muniti; quales teste Pichler in suo Jure Canonico abbreviato *Lib. 3. Decret. Tit. 23. n. 6.* sunt dantes Mutuum ad emendam, vel reparandam domum, aut sine constitutione Hypothecæ: item Respublica, Civitas, Communitas, Ecclesia, Monasteria, Causæ piæ, vel Pupilli Hypotheca destituti. X. Demum, si quid adhuc superest de bonis debitorum, detur Creditoribus Chirographariis simplicibus, singulis proportionaliter pro sua rata, ita, ut qualis est proportio debiti quoad quantitatem, talis sit proportio ejus, quod quisque accipit ad id, quod alii accipiunt. Videatur Jus Canonicum *Lib. 3. Decret. Tit. 22. n. 79. & seqq.* ubi plures pro hoc ordine restitutionis Leges inveniuntur.

Resp. II. De Jure Bavarico vi Statutorum Municipalium *de Processu Edictali, Titulo 2.* Sequens servatur ordo in solvendis Creditoribus. I. Ponuntur sumptus Judiciales. II. Impensæ funerales, quibus æquiparantur expensæ, in Medicos, Pharmacopolas, & Chirurgo. III. Merces operariorum, & famulitii domestici quoad unum annum sui servitii. IV. Qui tribuerunt pecunias ad reparandam, vel comparandam domum modo superius indicato; item qui dederunt frumentum ad seminandum in agro; pariter hæc reducuntur ea, quæ sunt debita Principi ex Collectis, ac Tributis justis; uti & debita Domino directo ex præstationibus dominicalibus sui coloni. V. Veniunt Uxores quoad dotem & contradotem, seu donationem propter nuptias: item quoad Morgenaticam, seu illam donationem, quam Maritus facit Uxori in remunerationem delibatæ Virginitatis, imo etiam quoad allata Marito Paraphernalia, saltem si expressam sibi desuper Hypothecam constituerint. VI. Pupilli, Minorennæ, Communitates, ac Causæ piæ, uti in systemate prior. VII. Fiscus &c. VIII. Illi Creditores alii, qui sibi de expressis Hypothecis vigilarunt per instrumenta publica coram ordinario Magistratu erecta. IX. Illi Hypothecarii, quorum instrumenta non coram Magistratu ordinario, sed præcise coram aliquo Notario, & Testibus, vel ab ipso Debitore adhibitis tribus Testibus sunt erecta, & sigillata. X. Chirographarii illi, qui nullam quidem nec tacitam, nec expressam habent Hypothecam, bene tamen aliquod personale privilegium, vi cujus reliquis non sic privilegiatis Chirographariis præferantur. Videatur in casu emergenti Illustriss. Dom. Schmid de Processu Edictali. \*

## Additio VI.

\* Quær. V. An Debitor non sufficiens ad satisfaciendum cuilibet ex Creditoribus teneatur non solum in foro externo, sed & foro interno anteferre Creditori Chirographario hypothecarium, siue expresse, siue tacite sibi obligata habentem bona Debitoris? Resp. Talis Debitor quoque in foro interno, & in conscientia tenetur quoad bona hypothecata Creditorem hypothecarium anteferre Chirographario etiam anteriori, seu antiquiori, posito, quod Debitor dando dicta bona Chirographario non amplius posset alteri Hypothecario satisfacere. Ita eruitur ex *L. Eos, qui. C. Qui posteriores in pignore.* quæ Lex vel ideo etiam obligat in conscientia, quia fundatur in ipsa æquitate naturali: nam quoniam per

Anacl. Reiffenstuel. Theol. Tom. I.

Hypothecam siue expressam, siue tacitam non solum Debitor, sed ipsa res quoque obligatur, ac fit quasi inchoative Creditoris; hinc sicuti Dominus rei præferendus est aliis Creditoribus, ita & Creditor hypothecarius Chirographario merito præferri debet. Atqui hinc talis Creditor hypothecarius, si ipso inscio Debitor rem hypothecatam alienaverit; eandem post excussionem Debitoris principalis actione reali hypothecaria persequi potest, apud quemcumque Possessorem ea extiterit *L. Persecutione. & Authent. Hoc si. C. de Pignoribus &c.* \*

## Additio VII.

\* Quær. VI. An, si duo Creditores hypothecarii ejusdem classis ac qualitatis simul concurrant, an, inquam, pro tunc non possit quoad conscientiam, & in foro interno occulte Debitor solvere ex his illum, qui magis sibi placuerit, posito, quod nequeat satisfacere utrique? Resp. negative: deberet enim ceteris paribus etiam in conscientia anteponi in ordine ad bona hypothecata Creditor ejusdem ordinis anterior, seu qui habet jus antiquius, ac prius, si talis adlit. Ita habetur *Reg. 54. Juris*, in 6. Et patet ex paritate a matrimonio desumpta: sic enim, si Bertha promisit Matrimonium Titio & postea Cajo, etiam in conscientia, ac foro interno præponi debet Titius; quia habet jus prius, ac antiquius Cajo.

Nec dicas; Quod Creditores chirographarios, si plures adlit, non additur ad prioritatem, & posterioritatem temporis, sed potest a Debitore, impotenti omnibus ex integro satisfacere, præponi ille, qui prius petiit debitum. *L. Scimus. 22. §. Esi præfatam. 4. C. De jure deliberandi*, ac nullo ex ipsis petente, inter similes chirographarios Creditores fit divisio pro rata cuiuslibet: ergo pariter sic fieri poterit quoad Creditores hypothecarios: si plures similes ejusdem ordinis concurrant, & consequenter Debitor non tenetur in conscientia antiquiorem præponere.

Respondeo enim inprimis, non deesse AA. qui apud la Croix *lib. 3. part. 2. n. 403.* cum Card. de Lugo, Valentia, Tolet, Medina &c. negant antecedens, nimirum, quod in debitis chirographariis Creditor recentior possit anteponi antiquiori: sed quoniam cum nostro Francisco Henno quoad Creditores chirographarios S. Antonius, Sylvester, Layman, Herincx, Constropalao, Sporer, Bonacina, Busenbaum, ac RR. communiter concedunt illud antecedens ob satis claram Legem superius allegatam, forsan, uti in Præscriptione, ita & hic ad acuendam magis vigilantiam & diligentiam taliter per Dominium altum ob graves rationes disponentem, specialiter circa Creditores chirographarios; hinc ego transmissio illo antecedenti nego consequentiam, & paritatem. Disparitas est: quia chirographarii Creditores præcise sibi habent immediate obligatam personam Debitoris, hypothecarii autem etiam immediate ac determinate bona ejusdem; hincque mirum non est, quod præcedat in ordine ad ista bona hypothecata ille, qui in eadem antiquius jus habet, præsertim cum hic non habemus contrariam Legem, quinimo *Regula 54. De Regulis Juris* in 6. ceteris paribus positive stet pro Creditore hypothecario antiquiori. Plura si cupis, fusius vide apud la Croix *lib. 3. part. 2. n. 374. & seqq.* qui etiam *num. 388.* subjungit, ut, si quoad anterioritatem, vel posterioritatem debitorum solvendorum consulatur Theologus, seu Confessarius, is in casibus difficilioribus non resolvat ex tempore, sed potius remittat ad Juristas, aut consulat Auctores; nam plurima hic pendent a Jure posito, & Legibus particularibus, vel consuetudine certorum locorum. \*

## Additio VIII.

\* Quær. VII. In qua sorte, pretio, & valore pecunia mutuata sit solvenda, si interea eadem quoad valorem suum crescat, vel decrescat? Resp. Nisi expresse aliter fuerit conventum, pecunia mutuata solvi debet tempore debito



debito in eo valore, in quo fuerat dicta pecunia tempore dati Mutui, absque eo, quasi deberet Mutuatarius restituere Mutuanti certam sortem monetæ. Ita sentiunt Layman, Covarruvias, & alii inferius citandi. Quinimo Pichler. *lib. 3. Decretalium. Tit. 23. n. 14.* pro Germania specialiter addit, si ibidem juxta communem usum, ac praxin conventum fuerit, ut in restitutione Mutui solvantur floreni Rhenani, *gut Rheinische Gulden*, solutio fieri possit tam in moneta aurea, quam argentea tali, quæ non tantum in una limitata regione, sed communiter usualis est, nisi expressa conventio, sed saltem implicita de aliquo certo metallo ex circumstantiis specialibus desumi queat: quales circumstantiæ speciales forent, si fuisset conventum, ut solutio fieret *Moneta Rhenana in auro*, tunc enim in auro solutio deberet fieri; quia floreni argentei non solent in Germania ponderari, sicuti moneta aurea, uti citatus Auctor ex Werhnero Minsinger, & Francisco Schmier advertit. \*

## Additio IX.

\* Porro, ut totum clarius intelligatur, formatur sequens casus. Tempore hostili hostes inter alias (uti vocant) contributiones exigunt a quodam oppido ter mille quingentos florenos in moneta nostra, omnia alias, si Cives renuerent, devastaturi. Magistratus dicti oppidi depauperatus cum consensu Civium, ut se redimat a vexa, mutuo a quodam divite accipit mille ducatos, qui pro tunc, supponamus in casu, computando quemlibet aureum pro tribus & medio floreno in moneta nostra, Summæ 3500. florenorum æquivalent. Intra aliquod tempus quibet similis aureus diminuitur quoad valorem medio floreno, sicque mille tales non amplius 3500. sed solummodo 3000. æstimantur florenis. Quærit itaque Magistratus, an satisfaciatur, nec ne, si termino præfixo Mutui finito, reddat similes in specie, prout accepit, mille aureos? Item invertamus casum, ponendo, quod quislibet Ducatus intra hoc tempus in valore adhuc medio floreno ascendisset, ita ut 1000. Ducati Bavarici pro nunc non amplius, uti tempore dati Mutui, conficiant Summam ter mille quingentorum, sed quater mille florenorum: quæritur, an Magistratus, hoc non obstante, debeat restituere mille Ducatos ejusdem speciei, prout mutuos accepit; vel num sufficiat si totidem restituat, ut æquivalent ter mille quingentis florenis, prout æstimabantur, quando Magistratus mutuum accepit? Resp. Magistratum nec satisfacere in primo casu, quo valor cujuslibet aurei medio floreno descendit, si tantum mille tales aureos in specie mutuanti redderet; nec in altero casu, quo valor cujuslibet aurei medio floreno ascendit, obligari restituere similes mille aureos in specie, sed, nisi fuerit in mora culpabili solvendi, aut expresse aliter conventum fuisset, sufficere, si vel in alia moneta 3500. florenos, vel in auro reddat octingentos septuaginta quinque similes aureos, qui ascendente valore, computando nunc quemlibet aureum pro quatuor florenis, conficiant in æstimatione ter mille quingentos florenos, qualem Summam tempore hostili Magistratus mutuo accepit. Ita Molina de J. & J. Tom. 2. Tract. 2. Disp. 312. Conclus. 1. Sporer Tract. 6. in Decalog. c. 4. sect. 1. n. 11. & Castropalao part. 7. Operis moralis. de J. & J. tract. 32. disp. 4. punct. 1. n. 7. Ratio nostra colligitur ex jam dictis: quia nimirum in pecunia non tam intrinseca bonitas materiæ (nisi deducatur in pactum) attenditur, quam valor extrinsecus, quo auctoritate publica illa pecunia tempore dati Mutui communiter æstimabatur, prout erui potest ex Jure Canonico cap. Olim. De censibus: ubi decernitur, censum esse solvendum secundum monetam priorem & non posteriorem, quæ forte curret minoris valoris. Et cap. Cum Canonicis. Tit. eodem. statuitur, pensionem esse solvendam juxta æstimationem prioris pecuniæ, quando imposita est pensio. Videri potest de hoc fufius in Jure Canonico lib. 3. Decret. Tit. 23. §. 2. \*

## Additio X.

\* Dices cum Adversariis. Qui mutuo accepit 1000. scaphas frumenti, non tenetur plus, nec potest minus, quam totidem in specie reddere scaphas: sive valor frumenti tempore, quo tenetur restituere, interea quoad pretium descenderit, sive ascenderit. L. Cum quid. 3. ff. De rebus creditis. ergo etiam, qui accepit mutuo 1000. aureos, non tenetur plus, nec potest minus, quam 1000. aureos in specie restituere, sive valor monetæ intra illud tempus decreverit, sive creverit. Resp. negando consequentiam & paritatem. Disparitas est: quia in aliis rebus extra pecuniam, principaliter in Mutuatione, intrinseca bonitas materiæ mutuatiæ respicitur, prout teste Castropalao usu & consuetudine confirmatum est, & nos jam supra dist. 2. quest. 3. agendo de Deposito in quodam casu insinuavimus; econtra vero in pecunia potius ad extrinsecum valorem attenditur, prout eruitur ex jam superius allegatis textibus Juris Canonici. \*

## Additio XI.

\* Quær. VIII. Quid agendum illi, qui fidens alteri, a quo petiit mutuo pecunias, scribit obligationem, quasi eas jam accepit, cum tamen datum adhuc nil fuerit? Resp. talem in foro quidem interno ad nihil teneri; interea tamen, quia in foro externo contra ipsum produceretur scripta illa obligatio, qua fatetur, se memoratum Mutuum actu accepisse, in eo casu, si a parte rei nihil adhuc recepisset, poterit se defendere per integrum biennium, a tempore contractus Mutui computandum, exceptione non numeratæ pecuniæ, & tunc prætenfus Creditor debet positive probare quod pecuniam mutuam dederit, alioquin cadet causa, licet scriptam alterius obligationem exhibeat. Ita deducitur ex toto Titulo C. De non numerata pecunia. Ratio est: quia desiderans rem aliquam sibi dari mutuo spe citius obtinendi Mutuum, de facili inducitur ad anticipandum confessionem accepti, quod a parte rei promissum quidem, sed nondum acceptum fuit, sicque tali pauperculo per exceptionem non numeratæ pecuniæ in jure subvenitur. Econtra vero, si ille, qui alteri mutuavit actualiter pecunias, fidens suo Debitori proxime solutionem promittenti dedisset quietantiam, quasi actu jam solvisset, cum tamen nihil restituerit, in eo casu posset Creditor intra spatium 30. dierum (aut non ultra) contra suum Debitorem pariter excipere de non numerata pecunia, tuncque tenebitur Debitor probare solutionem, non obstante, quod exhibeat quietantiam de solutione jam facta. In contractibus, C. De non numerata pecunia. Cautio autem contra similes exceptiones erit, si super hunc contractum Mutui adhibeantur testes, seu omnino erigatur instrumentum publicum, in quo tabellio attestetur, in præsentia sui, & testium, pecuniam esse numeratam. Ita cum Layman, Molina & Haunoldo, Sporer Tract. 6. in Decal. cap. 4. sect. 1. n. 29. la Croix lib. 3. part. 2. non. 840. Chlengersperg. lib. 3. Institut. Tit. 22. q. 7. ac seqq. \*

## Additio XII.

\* Quær. IX. Si Debitor Mutuum accipiens non sit solvendo, ad quidnam adigi possit? Resp. I. Talis Debitor, si fuerit Laicus, & ad Judicem delatus, vi Juris communis debet cedere bonis, ac permittere, ut ea subhastentur. Ita deciditur L. 1. C. Qui bonis cedere possunt. Debeant tamen ipsi relinquere necessaria ad sustentationem: Nec enim fraudandus est alimentis quotidianis, inquit Lex. Qui Bonis ff. De cessione bonorum. Ceterum talis Cessionarius per dictam cessionem nequaquam deobligatur a solutione, in quantum potest, si postea ad pinguiorem fortunam venerit, uti clare habetur L. 1. qui. ff. De cessione bonorum. Resp. Si talis Debitor fuerit Clericus, ordinarie & servatis certis conditionibus ei competit Privilegium Competentia, uti vocatur, vi cuius, nec excommunicari, nec



nec incarcerari potest si actione personali conveniatur etiam apud Judicem Ecclesiasticum, nec bonis cedere teneretur. Ita habetur expresse *cap. Odoardus, De solutionibus*, & ratio ulterior est quia etiam milites obæati non tenentur cedere bonis juxta *L. 6. §. 18. ff. De re judicata*: bona autem est argumentatio a milite terrenæ ad militem coelestis militiæ. Dixi notanter, *Servatis certis conditionibus*: inter quas principalis est, ut ob inopiam taliter sit impotens, ut absque decore Status Clericalis solvere nequeat etiam quoad partem; alias enim contumaciter recusans a Judice Ecclesiastico in carcerem posset conjici, uti notat Fagnanus in citatum Capitulum *Odoardus*. Insuper debet talis Clericus præstare idoneam cautionem de solvendo, si ad pinguiorem fortunam pervenerit; uti citatum Capitulum *Odoardus* expresse requirit, ac insuper debet abesse omnis dolus erga illum qui dedit Mutuum, qualis tamen abesse non censeretur, si Clericus tempore dati Mutui se finxisset Laicum, aut si pendente lite super hoc principali debito interea residua bona alienaret in fraudem Creditoris. \*

QUÆSTIO II.

Quid sit Usura, & quo Jure prohibita?

SUMMARIUM.

- 10 Usura varie accipitur.
- 11 Usura, quid?
- 12 Nomine lucris Usurarii, quid intelligatur?
- 13 Id debet provenire vi Mutui.
- 14 Usura expressa, & Usura palliata, seu virtualis, quid?
- 15 Usuræ sunt prohibitæ Jure tum humano, tum Divino.
- 16 Solvitur parabola Patrisfamilias.
- 17 Deus an concesserit Judæis exercere Usuras?
- 18 Alia responsio & melior.
- 19 Usura etiam Jure naturali illicita est.
- 20 Solvitur instantia.
- 21 Disparitas magna inter Contractum Locationis, & Mutui.
- 22 Usurarius non comparat dominium rei usurariæ.
- 23 Quid de pecunia usuraria?  
(a) Tract. 7. Dist. 5. n. 28. & 29.
- 24 Pene Usurarium.  
\* An in Usura detur parvitas materia?

**U**Sura varie accipitur. Primo quidem, prout idem est, ac usus. Deinde pro commodo sive fructu ex rei usu proveniente; prout Cicero *lib. de Senectute*, ait: *Terra nunquam sine Usura reddit, quod accipit*. Denique sumitur Usura, ut idem est, ac lucrum ex Mutuo; & alio nomine *Fœnus* dicitur: & in hoc sensu procedit præfens Quæstio de Usura. Quæ adhuc dupliciter accipi potest, nempe vel pro ipso lucro usurario, prout dicitur quis solvere Usuras; vel pro pacto, de lucro temporali supra sortem reddendo præcise ratione Mutui.

**11 CONCL. I.** *Usura est lucrum immediate ex Mutuo proveniens.* Ita communis Doctorum, quamvis Usura hic sumatur pro ipso lucro Usurario. Quod si vero Usura accipiat pro contractu Usurario, tunc *Usura* aliud non est, quam mutuatio cum pacto expresso, vel implicito, recipiendi aliquid supra sortem ratione Mutui.

**12** Dicitur, *Usura est lucrum*: ubi homine lucris intelligitur quodlibet temporale, ac pretio æstimabile, quod ultra sortem mutuo datam accipitur, quasi ratione Mutui ex obligatione debitum sit: sive deinde illud sit pecunia, sive frumentum, vel alia res pretio æstimabilis, aut etiam obligatio civilis quidpiam ex pacto seu debito sibi præstandi ratione Mutui, v. g. rursum sibi mutuandi, apud se emendi merces, sibi vendendi, aut operas suas locandi, & hujusmodi. Uno verbo. *Lucrum Usurarium* est, quicquid temporale, ac pretio æstimabile ultra sortem mutuo datam accipitur, quasi ratione Mutui ex

obligatione, seu pacto expresso, vel tacito, debitum sit: ut notat D. Thomas 2. 2. q. 78. art. 2. communiter receptus, & desumitur ex *c. Si saneraveris. §. seqq. 14. quest. 3.*

**13** Dicitur ulterius *immediate*; id est, ex vi pacti mutationis. Si enim Mutuatarius propria sponte aliquid tribuat, aut vicissim obsequium mutuanti præstare velit ex mera benevolentia, liberalitate, sive gratitudine, aut ex spe alliciendi mutuante ad continuandum Mutuum, non erit Usura, dummodo illud non exigatur tamquam debitum. Additur tandem *ex Mutuo proveniens*: quia Mutuum est unica veluti sedes Usuræ. *c. 1. §. seqq. 14. q. 3.* Unde si quis lucrum acquirat ex Locatione, Conductione, & similibus Contractibus, Usura non committitur, quia tale lucrum non provenit ex Mutuo. Ut autem censeatur lucrum ex vi Mutui provenire, requiritur, ut vel expresse vel tacite Mutuator intenderit, Mutuatarium ex vi pacti mutationis obligare ad hujusmodi lucrum præstandum ultra sortem principalem.

**14 CONCL. II.** *Usura recte dividitur in expressam & tacitam seu palliatam.* Ita communis; & patet explicando terminos. Et quidem *Usura expressa* dicitur, quando expresse exigitur pretium pro Mutuo: ut si quis dat mutuos centum florenos eo pacto, ut post annum reddantur sibi centum, & tot vel tot ultra. *Usura palliata*, tacita, seu virtualis est, quæ committitur in contractu Mutui, non formalis & expressi, sed alterius contractus nomine, ac specie, velut pallio occultati: ut si mercator ob solam dilationem solutionis pretii (secus, si ratione lucris cessantis, vel damni emergentis &c.) merces multo carius vendat; nam hoc in se aliud non est, quam emptori mutuam dare pecuniam, post aliquod tempus cum auctario recipiendam; quod reprobatur *c. In civitate. De Usuris*. Aliud exemplum Usuræ palliatæ habetur in contractu Mohatra, de quo *num. 26. & 27.*

**15 CONCL. III.** *Usuræ non tantum Jure humano Ecclesiastico, sed etiam Divino sunt prohibitæ.* Ita unanimis Catholicorum Doctorum, & habetur aperte in Jure Canonico, quod non solum Usuras sub gravissimis pœnis prohibet, sed etiam *cap. Super eos. De Usuris*. expresse dicit, quod *Usurarium crimen utriusque Testamenti pagina detestetur*. Quinimo pertinaciter asserens, exercere Usuras non esse peccatum, veluti hæreticus est puniendus. *Clem. un. De Usuris*. Porro, quod Usuræ etiam Jure Divino sint prohibitæ, clare desumitur ex S. Scriptura. Nam *Leviticus cap. 25.* dicitur: *Ne accipias Usuras ab eo, nec amplius quam dedisti.* Et infra: *pecuniam tuam non dabis ei ad Usuram.* Item *Ezechielis cap. 18.* Propheta inter peccatores numerat *ad Usuram dantem, & amplius accipientem.* Et *Lucæ 6.* ait Christus: *Benefacite, & mutuum date, nihil inde sperantes.* & alibi.

**16** Dices I. Christus in parabola Patrisfamilias seregre proficiscentis, ut habetur *Lucæ 19.* servis suis talenta dedit ad negotiandum, & servo nequam, recondenti pecuniam in sudario exprobravit, eumque gravissime puniri præcepit, quod pecuniam suam non dederit nummulariis, hac addita causa: *Et ego veniens cum Usuris exegissem illam; ergo non est intrinsece malum, aut Legè Divina prohibitum, accipere Usuras pro pecunia mutuatæ.* Resp. negando consequentiam: quia, ut communiter respondent Doctores cum D. Thoma 2. 2. quest. 78. art. 1. Usura ibi metaphorice sumitur pro augmento & supercrescentia bonorum spiritualium, seu pro bona applicatione talentorum naturalium nobis a Deo concessorum: hanc enim a nobis Deus exigit, volens, ut de die in diem in bono proficiamus; siquidem in via Dei non proficere, deficere est.

**17** Urgebis Deum olim Judæis concessit Usuras exercere *Deuter. 23.* dicens: *non fenerabis fratri tuo ad Usuram, sed alieno; ergo Usuræ non sunt intrinsece malæ, neque prohibitæ.* Respondent aliqui cum D. Thoma loc. cit. Judæis fuisse olim concessum exercere Usuras erga alienigenas, non tamquam licitum, sed permissivè ad evitandum majus malum, ne scilicet a suis fratribus



tribus Usuris acciperent; cum fuerint multum avaritie dedunt.

18 Alii vero dicunt, & quidem melius, Judæis fuisse licitum exercere Usuras erga Gentiles, eo modo, quod eisdem concessum fuit *Exod. 12.* ut Egyptios spoliarent vasis argenteis, & aureis, ac vestibus sibi commodatis: quatenus nempe Deus, qui est universorum Dominus, dedit Judæis dominium in bona Egyptiorum injuste se gravantium, ac in alia bona Gentilium, utpote hostium suorum, quos proinde iuste poterant spoliare rebus suis; & has ratione Mutui dati sibi acquirere, utpote jure domini a Deo sibi concessi jam suas. Unde sicut Judæi, spoliando Egyptum, non commiserunt furtum, ita nec commiserunt Usuram, accipiendo scæus pro Mutuo ab infidelibus: cum utrobique acceperint id, quod suum erat auctoritate Divina.

19 CONCL. IV. Usura etiam jure naturali illicita est, & prohibita. Ita Doctores Catholici communiter. Ratio est: quia accipiendo Usuram pro rebus usu consumptibilibus, puta pro vino, oleo, pecunia &c. mutuo datis, vel venditur id, quod non est suum, vel eadem res bis venditur: atqui utrumque est injustum, & juri naturali repugnans; cum in contractibus humanis requiratur æqualitas dati & accepti; ergo. Major declaratur: quia mutuans alteri centum florenos, vel centum modios tritici, transfert dominium pecuniæ vel tritici in alium, ac tantumdem suo tempore recepturus est; & sic est æqualitas. Si autem post annum ultra hanc sortem exigit quinquaginta alios florenos, vel vendit, aut sibi restitui vult eandem rem bis; vel vendit, quod amplius non est suum, cum dominium Mutui transferit in Mutuatarium: atqui utrumque horum repugnat juri naturali; ergo.

20 Nec potest dici, quod pro usu sortis, v.g. pecuniæ, vel tritici, possit peti lucrum, prout fit in Locatione, nam contra est. Usus, seu utilitas rei pertinet ad Dominium: sed Mutuatarius est Dominus rei mutuatæ, ut patet ex dictis; ergo ad Mutuatarium pertinet etiam usus rei mutuatæ, & non ad mutuantem: & consequenter hic ratione usus concessi non potest licite & iuste quidpiam exigere ultra sortem principalem, cum usus rei non amplius sit suus.

21 Neque obstat adductum exemplum de contractu Locationis, cum sit maxima disparitas inter contractum Mutui, & Locationis. Nam in hoc contractu Locator manet dominus rei locatæ, & consequenter utilitas ex re sua a Conductore percepta etiam ipsum respicere debet: secus fit in Mutuo, ubi ex meo tuum fit. Præterea Locatio est talium rerum, quæ permanentes usum & utilitatem afferunt: pecunia autem ex sua natura sterilis est; unde maxime præter naturam est, ut in fœmore nummus nummum pariat.

Sed dices. Remutuare est pretio æstimabile; ergo etiam mutuare: & consequenter licite pro hoc exigitur aliquid ultra sortem. Antecedens probatur. Mutuare cum pacto remutuandi est Usurarium, ut dicitur *n. 12.* *Et n. 25.* sed non esset Usurarium, nisi istud esset quid pretio æstimabile; ergo. Resp. distinguendo antecedens: remutuare est pretio æstimabile pro parte remutuantis, quasi ille pro actu remutationis a se factæ (etiam secluso damno emergente, & lucro cessante &c.) licite possit pecuniam exigere, negatur; remutuare est pretio æstimabile pro parte recipientis, sive habentis alterum sibi ex pacto prævio obligatum ad remutuandum suo tempore, conceditur quidem antecedens cum sua probatione, sed negatur consequentia.

22 CONCL. V. Usurarius non comparat dominium rei per Usuram acceptæ. Ita communis. Ratio est: quia deest titulus, sive iusta causa Usuras accipiendi: atqui sine iusto titulo rerum dominia non transferuntur; ergo.

23 Hoc tamen intelligendum, nisi pecunia usuraria cum aliis iuste acquisitis permixta fuerit, ut amplius discerni non possit: nam tunc per accidens, seu jure permixtionis efficeretur sua. *arg. l. Si alieni. ff. 78. De solution.*

qua de causa etiam pecunia furtiva, alteri pecuniæ propriæ permixta efficitur recipientis, ut alibi (a) dictum. Verumtamen hoc dominium est dumtaxat imperfectum, & cum obligatione tantumdem restituendi, quantum quis per furtum vel Usuras acquisivit, non obstante dicta commixtione.

24 CONCL. VI. Pœnæ Usurarium variz sunt in Jure statutæ. I. Notorie Usurarius est ipso Jure infamis. *c. Infam. 3. q. 7.* II. Usurarius notorius non est admittendus ad Communionem Altaris, id est, sumptionem sacræ Eucharistiæ; neque ejus oblationes accipiendæ sunt, neque ipse mortuus Ecclesiasticæ Sepulturæ tradi debet. III. Testamentum, & quævis alia ultima voluntas Usurarii manifesti ipso jure irrita est, nisi ante mortem restituerit, quæ per Usuras acquisivit, vel de eorum restitutione idoneam cautionem per pignora videlicet, aut Fidejussores dederit; prout habetur *c. Quia in omnibus. De Usuris. juncto cap. 2. Eod. n. 6.*

#### Additio.

\* Quæres. An in Usura non detur parvitas materiæ, quæ excusat a peccato mortali? Resp. ex la Croix *L. 3. part. 2. n. 848.* dubitasse quidem aliquos apud Dianam; quia quidquid etiam minutum accipitur, Usura est: sed ratio illa non movet; sicut enim, quidquid accipitur alienum, furtum est, non tamen ideo grave, si res aliena fuerit minuta, ita etiam, quævis Usura semper fit, si quid ultra sortem accipitur, non tamen gravis erit, si res supra sortem exacta fuerit levis. Card. de Lugo. *de J. Et J. d. 25. n. 252.* \*

### QUESTIO III

An pactum remutuandi &c. Contractus Mohatra, & Montes Pietatis contineant Usuram?

#### SUMMARIUM.

- 25 An sit Usura, mutuare cum Pacto remutuandi &c.
- 26 Contractus Mohatra, quis?
- 27 Est illicitus.
- 28 Montes Pietatis, qui? eorumque origo.
- 29 Ratio movendi difficultatem.
- 30 Contradictio nonnullorum.
- 31 Montes Pietatis sunt liciti, & pii.

25 **Q**Uæritur I. Utrum sit Usura, mutuare cum pacto, atque obligatione, ut mihi vicilium remutues, aut certum officium conferas, vel ut ex mea officina, quæ tibi opus sunt, emas, & hujusmodi? Resp. Si talia dentur solummodo ex titulo remunerationis, aut si quis det mutuo ob speratam hujusmodi remunerationem, secluso alio pacto, non est Usura: secus dicendum, si ejusmodi obligatio remunerandi, officium conferendi, vel apud se merces emendi &c. in pactum deducatur, idque tamquam debitum exigitur. Patet hoc ex dictis *Quæst. præced. n. 12.* estque communis Doctorum. Unde Innocentius XI. hanc inter alias, ordine 42. Propositionem damnavit: *Usura non est, dum ultra sortem aliquid exigitur tamquam ex benevolentia, & gratitudine debitum, sed solum si exigitur tamquam ex iustitia debitum.* Hæc, inquam, Propositio est falsa & damnata.

26 Quæritur II. An Contractus Mohatra sit illicitus, ac Usurarius, nec ne? Ubi per contractum Mohatra dictum intelligitur ille, qui sic celebratur: petit quis mutuos centum florenos a mercatore, & mercator non vult pecuniam mutuare, sed paratus est illi vendere merces credito, sed summo pretio, v.g. centum quinque florenis, ut eas vendat numerata pecunia, cui voluerit, & ille res sic emptas denuo offerat mercatori, qui easdem emit, vel potius redimit pecunia numerata, pretio tamen medio, vel infimo, v.g. centum florenis, aut nonaginta quinque. Ita contractum Mohatræ explicat Lessius *lib. 2. cap. 21. n. 130.* & concordat Joannes Cardenas in *Crisi*



*Theologica ad Propositionem 40 ex damnatis ab Innocentio XI. quamvis addat, quod in eo emanatur credito merces summo pretio, cum pacto tamen retrovendendi infimo pretio pecunia numerata.*

27 Resp. Talem contractum esse illicitum. Ita novissime declaravit Innocentius XI. inter alias Propositiones etiam hanc, ordine 40. condemnando: *Contractus Mobatru licitus est etiam respectu ejusdem personæ, & cum contractu retrovenditionis prævie inito, cum intentione lucri.* Ratio est: quia talis Contractus continet Usuram mentalem, vel palliatam; nam hujusmodi venditio & emptio, cum pacto redimendi, præsumitur tantum ficta venditio & emptio, in effectu autem est Mutuum cum lucro ex fœnore.

28 Quæritur III. Utrum Montes Pietatis sint Usurarii, nec ne? Ubi sciendum, Montes Pietatis in Italia, & aliis pluribus locis esse usitatos, & dici Araria publice constituta, ut ad ea indigentes quasi ad montem refugium habeant, ne magis ab Usurariis, præsertim Judæis opprimantur. Cum enim per Judæorum immoderatas Usuras (utpote qui pro singulis florenis mutuo datis solent unum circiter crucigerum per singulas hebdomadas exigere, sicque lucrum usurarium per anni decursum ferme exæquet sortem principalem) pauperes plurimum fuerint pressi, plures successive celeberrimi Concionatores ex Ordine Fratrum Minorum, ut S. Jacobus de Marchia, B. Bernardus de Feltria, alique Viri doctrina & sanctitate celebres ejusmodi Montes Pietatis publicis suis Concionibus construere, atque instituere fecerunt; ea primum lege, ut sub sufficiente cautione pignoris præstiti ex ejusmodi Montibus gratis Mutuum pauperibus indigentibus daretur.

29 Quia verò ministri talium Montium Pietatis non potuerunt gratis laborare, atque ex ipsis Montibus sustentari congrue non poterant (nam alioquin Summa capitalis brevi defecisset) hinc postmodum pro eorum ministrorum sustentatione, & rerum ad Montes Pietatis pertinentium necessaria conservatione, sine ipsius Montis Pietatis lucro, seu Augmento, moderatum aliquid & necessarium (puta per annum duo, tres, quatuor, aut quinque floreni in centum) a Mutuatariis præstari, & exigi coëptum fuit. Si autem intra tempus præfinitum Mutuatarii non solvissent debitum, tunc pignus vendebatur, & detracta sorte, exiguoque illo adjecto, residuum de æstimatione pignoris debitori restituebatur.

30 Contradixerunt multi hujusmodi Montibus Pietatis tamquam Usurariis, eo quod ultra sortem principalem quidpiam exigetur: unde controversia ista ad Sedem Apostolicam iterato fuit devoluta. Verum hujusmodi Montes Pietatis per diversos successive Summos Pontifices, ac tandem in Concilio Lateranensi, Sessione 10. per Leonem X. fuerunt solemniter approbati tamquam liciti; & omni specie mali carentes, ut patet ex ejusdem Bulla *Cum inter nonnullos*, in dicto Concilio edita. Hinc

31 Resp. Montes Pietatis liciti sunt, & pii, non obstante, quod in debitam ministrorum sustentationem, atque ad Montis necessariam conservationem modicum quid ultra sortem principalem exigatur. Patet hoc ex definitione citati Concilii Generalis Lateranensis, & approbatione Leonis X. aliorumque Summorum Pontificum. Accedit ratio: quia quamvis in hujusmodi Montibus Pietatis aliquid detur ultra sortem, id tamen non exigitur, neque datur tamquam lucrum ex Mutuo, sed pro sumptibus necessariis ad Montis conservationem, & pro stipendio ministrorum, qui Montem administrant, & semper parati esse debent ad mutuandum, ad pignora recipienda, custodiendaque, & conficiendos libros rationum, ceteraque necessaria præstanda. Nam, quia *dignus est operarius mercede sua*, ut inquit Christus Luca 10. jure tales a Mutuatariis sustentari merentur, in quorum gratiam laborant, & inserviunt Monti Pietatis.

QUÆSTIO IV.

An aliqui Tituli excusent ab Usura?

SUMMARIUM.

- 32 Ratione lucri cessantis, damni emergentis &c. an in Mutuo possit quid exigi?
- 33 Corollarium de lucro cessante, &
- 34 Damno emergente.
- 35 Limitatio præmissorum.
- 36 Recipi aliquid ultra sortem tamquam Interesse, quid?
- 37 Corollarium de periculo amittendi sortem, aut eam difficulter recuperandi.
- 38 An in mutuo possit pacisci de pena solvenda &c.
- 39 Penam nemo potest imponere, nisi Superior, quomodo?  
\* Pena conventionalis quandonam possit per privatos imponi ob non solutum Capitale?
- 40 Pro sola carentia pecunie nihil potest exigi.
- 41 Solvitur objectio.
- 42 Minus est, actionem habere, quam rem, quomodo?
- 43 An auctoritate Principum supremorum possit in Mutuo aliquid exigi ultra sortem?
- 44 Potest lege Usuris statui modus, non tamen ea reddi licita.
- 45 Jure Civili an approbentur Usuræ?
- 46 Quid censendum de praxi Romani Imperii, exigente quinque pro centum?
- 47 Aliorum opinio refertur.
- 48 Alii justii Tituli, hanc praxim excusantes.  
I. Ob contractum Societatis.  
II. Ob contractum Censuum.  
Regula practica circa justitiam Contractuum.  
\* An citra Usuram possit de restante Interesse exigi novum Interesse? Additio I. & II.  
\* An citra Usuram possint plura Interesse computari in novum aliquod Capitale? Additio III.

32 Quæritur I. An liceat aliquid in mutuo ultra sortem exigere ratione lucri cessantis, damni emergentis, vel periculi sortis principalis admittendæ, ac hujusmodi? Resp. affirmative, prout tenent Lessius lib. 2. cap. 20. dubit. 12. & seqq. Layman, & alii satis communiter, paucis exceptis. Ratio est: quia spes lucri, qua se privat Mutuator in gratiam Mutuatarii, est pretio æstimabilis (& idem dicendum de damno emergente, ac periculo amittendæ sortis principalis, & hujusmodi) ergo licite aliquid ratione ipsius exigi potest, ac talis compensatio in pactum deduci. Hinc

33 Infertur I. Quod liceat aliquid ultra sortem accipere ratione lucri cessantis, si videlicet Mutuatori ex eo, quod alteri mutuum det, lucrum abscedat. Veluti si mercator det mutuos centum florenos, ex quibus alioquin fuisset negotiaturus cum spe, intra certum tempus lucrandi quinque alios florenos, potest istos a Mutuatario ultra sortem exigere: quia non dicitur petere Usuras, sed potius Interesse, & ne ipse mercator ratione mutui dati ex lucro sibi cessante damnum patiat.

34 Infertur II. Etiam ratione damni emergentis posse aliquid exigi ultra sortem tamquam Interesse, si Mutuatoris revera interfit non mutuare: ut si mutuum des pecuniam, quam destinaveras ad emendum frumentum tempore abundantie, & postea pretio majiori illud emere cogaris. Siquidem compensatio talis damni, Mutuatori emergentis, merito in pactum deducitur; cum nemo cum suo damno regulariter mutuare teneatur, & solet.

35 Verum notant Doctores, istud intelligendum esse, dummodo Mutuum vere sit causa talis damni emergentis, vel (loquendo de priori Corollario) lucri cessantis, neque plus exigatur ratione illius lucri cessantis vel emergentis damni, nisi quantum arbitrio boni viri, spectatis omnibus causis, atque circumstantiis, illud æstimetur: nam plus exigens, licet proprie non committat Usuram, eo quod illud non exigit vi mutui, tamen



admittit injustitiam, pretium excessivum exigendo ratione lucri cessantis vel damni emergentis. Lessius lib. 2. cap. 20. n. 96. Pirhing. tit. De Usuris. n. 40. & alii.

36 Sciendum insuper, illud, quod in ejusmodi casu exigitur ultra sortem, sive Summam capitalem, non accipi veluti Usuram (hoc est, vi Mutui) sed tamquam Interesse. Aliud siquidem est mutuum, aliud lucrum cessans, vel damnum emergens occasione mutui dati: unde quamvis mutuum debeat dari gratis, sique pro mutuo secundum se præcise spectato nihil supra sortem exigi possit, adhuc tamen mutuans potest aliquid exigere, ut lucrum inde sibi cessans, vel damnum emergens compensetur: *Nec dispendium patiatur, unde videtur premium meruisse. arg. c. Pervenit. De fidejussoribus.* Et hoc in jure vocatur Interesse, prout notat Glossa c. Quoniam. 14 q. 4. atque desumitur ex l. Si commissa. ff. Ratam rem haberi ibi: *In tantum competit, in quantum mea interfuit, id est, quantum mihi abest, quantumque lucrari potui, cum concordantiis.*

37 Inferitur III. Similiter ob probabile periculum amittendi sortem principalem, cui Mutuator se exponit mutuans homini non satis noto, vel non industrio, aut pluribus debitis obstricto, vel dubiæ fidei: item ratione difficultatum, aut expensarum, quæ in recuperanda sorte principali metuuntur, licite aliquid ultra sortem exigi. Ratio est: quia exponere res suas periculo in gratiam alterius, aut subire difficultatem easdem acquirendi, est quid pretio æstimabile; cum nemo teneatur gratis pro altero curas suscipere, aut res suas periculo exponere. Deinde Usura non fit, nisi exigendo aliquid ultra sortem vi Mutui: atqui hoc non fit in casibus præmissis; ergo.

38 Quæritur II. Utrum in Mutuo sit licitum pacisci, quod, si Mutuatarius statuto tempore non solverit Mutuum, teneatur certam pœnam solvere ultra sortem principalem? Resp. affirmative. cum Scoto 4. dist. 15. quest. 2. §. De secundo. & aliis passim. Ratio est: tum quia talis pœna imponitur, atque exigitur ad hoc, ut Mutuatarius hac ratione quasi constringatur ad sortem principalem statuto tempore reddendam, & ne culpa sua impune fallat: tum quia ea non solvitur præcise vi Mutui, sed ob moram, sive culpam solvendi Mutuum: siquidem debitor, qui est in mora culpabili, peccat contra Justitiam, retinendo alienum invito domino, ac proinde is iuste punitur pœna conventionali.

39 Dices. Nemo potest alteri pœnam imponere, nisi Superior; ergo. Resp. distinguendo assumptum. Nemo potest pœnam legalem, atque judicialem imponere, nisi Superior, conceditur: nemo, nisi Superior, potest imponere pœnam conventionalem, negatur. Hæc siquidem ex pacto, & mutuo paciscentium consensu, atque conventionione proficiscitur, juxta quod Reg. 86. Juris in 6. dicitur: *Contractus ex conventionione legem accipere dignoscuntur, cum concordantiis: prior autem vel ab ipsamet lege, vel ab auctoritate Superioris v. g. Judicis descendit, & ad eam potest obligari etiam invitatus, sed non nisi per Superiorem.*

#### Additio.

\* Urgebis. Talis exactio pecuniæ supra sortem per modum pœnæ foret Usura; sed juxta dicta præcedentia omnis Usura est illicita, ac jure prohibita Divino, & naturali: ergo etiam similis exactio. Ante Responsum notandum, quod alia dicatur Usura compensatoria, seu restauratoria, alia moratoria, seu punitoria, & alia præcise lucratoria. Prima contingit, quando ultra sortem quid exigitur ob lucrum cessans, aut damnum emergens, vel ob periculum amittendæ sortis principalis. Secunda, si quid imponitur ultra sortem per modum pœnæ ob culpam propter non solum debito tempore ipsummet Capitale commissam. Tertia, si præcise intuitu Mutui lucrum ultra sortem quæritur, quamvis nullum periculum amittendæ sortis, vel lucrum cessans, aut damnum emergens, aut culpa moræ aliæve legitimus Titulus interveniat. H. N.

Resp. concess. maj. disting. minorem: juxta dicta præ-

cedentia omnis usura est illicita præcise lucratoria absque aliquo alio Titulo, aut legitima constitutione, concedo; si fuerit compensatoria, vel moratoria, nego minorem, & sub data distinctione consequentiam. Ceterum, ut Usura proprie moratoria, seu solummodo in pœnam moræ (non autem simul propter notabile lucrum cessans, aut damnum emergens) imposita evadat licita, debet imprimis ex parte Mutuatarii vere culpa intervenisse in non solvendo præfixo tempore. Secundo, pœna imposita debet esse moderata, & culpæ proportionata. Tertio, mora interveniens circa non factam tempore præfixo solutionem debet esse non nimis modica, sed suo modo notabilis. Videatur præfens Auctor lib. 5. Decret. Tit. 19. §. 5. \*

40 Quæritur III. An pro sola carentia pecuniæ possit in Mutuo quidpiam exigi? Resp. negative. Siquidem carentia illa pecuniæ ad aliquod tempus est intrinseca & essentialis Mutuo; ergo sicuti pro Mutuo, ita & pro illa carentia nihil licite exigitur. Hinc Alexander VII. Anno 1666. jure condemnavit hanc, ordine 42. Propositionem: *Licetum est mutuanti aliquid ultra sortem exigere, si se obliget ad non repetendam sortem usque ad certum tempus.* Nam falsitas hujus Propositionis patet ex proxime allata ratione. Similiter merito Innocentius XI. sequentem inter alias, ordine 41. Propositionem damnavit: *Cum numerata pecunia pretiosior sit numeranda, & nullus sit, qui non majoris faciat pecuniam presentem, quam futuram, potest creditor aliquid ultra sortem a Mutuatario exigere, & eo titulo ab Usura excusari.* Ita sonat Propositio damnata.

41 Nec urget, quod pecunia præfens, seu numerata videatur pretiosior numeranda. Resp. enim, hoc non accidere ratione pecuniæ secundum se præcise spectatæ, sed quatenus præfens pecunia est utilis ad negotiandum, lucrumque quærendum &c. Alioquin considerando pecuniam secundum se præcise, atque independentem a lucro cessante, & secluso omni damno emergente, periculoque amittendi sortem principalem, & difficultate istam recuperandi, tantumdem est pecuniam jacere in propria, vel alterius cista. Quinimo securius pro parte mutuantis manebit pecunia illa apud Mutuatarium, ut, si furto, aut alio casu inopinato pereat, damnum Mutuatario emergat, non mutuanti, qui eam postea statuto tempore absque alia difficultate (uti supponitur) integram recipiet.

42 Neque etiam obstat Reg. Minus. 204. ff. De Regulis Juris. ibi: *Minus est actionem habere, quam rem.* Nam, ut recte notat Glossa ibidem, id procedit ratione dubii eventus executionis, & sententiæ incertæ, nec non & difficultatis in prosequenda actione intervenientis: alioquin enim seclusis similibus periculis, & incommodis locum habet Reg. Is, qui actionem. 15. ff. Eod. Afferens: *Qui actionem habet ad rem recuperandam, ipsam rem habere videtur.*

43 Quæritur IV. An auctoritate Principum supremorum, vel consuetudine Provinciarum possit in Mutuo quidpiam exigi ultra sortem? Ratio dubitandi est, quia imprimis Jure Civili videtur hoc concedi, ut l. Placuit ff. De Usuris. ibi: *Placuit, Usuras licitas peti posse.* juncta l. Eos, qui. C. Eod. cum concordantiis. Deinde id convincere videtur praxis totius Romani Imperii, post Recessum Deputatorum Imperii Spiræ, Anno 1600. celebratum, & a Rudolpho II. confirmatum, quinque pro centum mutuo datis annuatim recipiens, Tandem Princeps supremus ob dominium altum potest per commune Statutum, seu Legem, aut etiam Rescriptum ex causa justa & publica transferre dominium rerum quarundam ab uno in alterum, ut patet in Præscriptione: ergo idem potest fieri in moderatis Usuris.

44 Resp. I. Quamvis valeat lex, quæ ad vitandum majus malum statuat certum modum Usuris, ne videlicet Usurarii sub aliquo prætextu lucri cessantis, vel damni emergentis &c. nimium a Debitoribus extorqueant: nulla tamen lege, vel consuetudine Provinciarum possunt Usuræ reddi licitæ. Prima pars est Communis Doctorum, eamque tradit Engel tit. De Usuris n. 10. Sic enim Usuræ



Usuræ non approbantur ut licitæ, sed permittuntur dumtaxat, ac nimius excessus earum cohibetur. Altera pars sequitur ex dictis n. 15. & seqq. quia Usuræ sunt prohibitæ Jure Divino, & naturali, cui nulla lege positiva, vel contraria consuetudine derogari potest. *arg. cap. ult. De Consuetudine.*

45 Ad rationes dubitandi, & inprimis ad textus Juris Civilis dicitur, de mente Juris Civilis varias esse Doctorum sententias: nam nonnulli volunt, Jure Civili esse quidem permissas Usuras, in quantum eas non puniunt, ad evitanda majora mala seu peccata, non tamen approbari tamquam licitas: prout simile quid contingit in publicis lupanaribus, & quibusdam aliis. Alii Jus Civile explicant de Usuris (ut vocant) compensatoriis, quidpiam ultra sortem exigentibus ratione lucri cessantis, damni emergentis, vel alterius iusti Tituli: non vero de Usuris lucrativis, hoc est, de iis, in quibus exigitur lucrum vi Mutui ultra sortem principalem. Quod si vero leges Civiles permitterent Usuras hæc lucrativas, dicendum, eas, seu foventes peccatum, esse correctas Jure Canonico *Clem. un. De Usuris.*

46 Ad Recessum Spirensem, & praxin Germaniæ respondet Engel *loc. cit. n. 20.* post Henricum Canisium *De Usuris c. 1. n. 9.* jure Imperii quinque pro centum permitti ex præsumptione lucri cessantis, damni emergentis, aut alterius iusti Tituli: unde communiter Summa illa dicitur peti & accipi per modum Interestis. Ac proinde, si pecunia revera fuisset otiosa apud mutuantem, & nihil intersit eam mutuo dari, volunt plerique (inquit Engel) talem non fore immunem ab Usura in Foro conscientiæ, ubi non ex præsumptione, sed ex veritate proceditur.

47 Dicitur notanter, *volunt plerique*: nam propter ultimam rationem dubitandi *num. 43.* allatam conantur aliqui hanc consuetudinem ab Usura excusare, eo quod excensu ille non recipiatur præcise vi Mutui (hoc enim repugnat Juri naturali, ac Divino) sed ob auctoritatem supremi Principis, seu Reipublicæ, propter publicam utilitatem ob dominium altum validantis tale pactum. Ita Christoph. Haunoldus *Tom. 3. de Just. & Jure. tract. 9. c. 3. §. 2.* citans Sa. *Contr. lib. 4.* & Tannerum *tom. 3. disp. 4. quæst. 7. dub. 3. n. 79.* atque illam ipsam sententiam novissime multis rationibus stabilire nititur Pichler in Candidato abbreviato Jurisprudentiæ sacræ *lib. 5. Tit. 19. num. 4. & 5.* allegans pro eadem Glettle, Placidum Böcken, pluresque alios.

48 Additur etiam n. 46. *aut alterius iusti Tituli*: si quidem præter lucrum cessans, aut damnum emergens possunt intervenire nonnulli alii iusti Tituli, annuatim accipiendi quinque v. g. pro centum, ac præsertim sequentes. I. Ob contractum Societatis, sive expressum, sive saltem implicitum, ac lege publica, vel consuetudine patria constitutum, in quo unus pecuniam, alter vero industriam confert: nam iustum est, ut, si alius mediante mea pecunia negotietur, lucrumque honestum acquirat, virtute talis contractus Societatis mihi partem lucri attribuat. Engel. *tit. De Usuris. §. 3. n. 11.* Hoc ipsum plures Doctores concedunt etiam de illo contractu Societatis, quo quis salva sorte principali, ac potestate dissolvendi pro libitu contractum ipsum dat mercatori pecuniam, ut is instituta negotiatione, sive lucrum inde capiat, sive damnum patiatur, in annos singulos teneatur certum quid solvere v. g. quinque pro centum, ita tamen, ut soluto illo modico alter velit, debeatque semper esse contentus, non considerato majori lucro, si quod inde mercatori eveniat. Layman *lib. 3. tract. 4. cap. 18. n. 11.* post Hostiensium, Navarrum, Covarruviam, & alios. II. Ob contractum Censuum, si debita conditiones concurrant, posse annuam pensionem iuste exigere, amplius patebit ex proxime dicendis *Quæst. 6. per totum.*

Et quidem passim fatentur Doctores, contractum in aliqua Regione usitatum, & a Viris etiam probis atque honestis celebrari solitum non facile con-

demnandum esse iniquitatis, simulque ex parte rudiorum sufficere, si implicite intendunt iustum talem Titulum, unde consuetudo illa ortum habet, aut velint contrahere modo, quod de jure possunt, meliori. Quod si quis autem ex mutuata pecunia sua lucrum quærat præcise vi Mutui, id nulla ratione potest a peccato excusari, cum repugnet Juri naturali, ac Divino.

#### Additio I.

\* Quæst. V. An Anatocismus, seu Contractus ille sit Usurarius, quo ex ipso Interesse non persoluto exigitur novum Interesse? Casus pro majori claritate figurari potest sequens. Petrus dedit Paulo mutuos bis mille florenos; ubi in Germania vel ob præsumptum titulum lucri exinde cessantis, vel etiam juxta alios ob auctoritatem Principis vi Domini alii ad evitandas lites & scrupulos alias circa lucri cessantis quantitatem orituros &c. absolute sic statuentis, pro quolibet numero centenario florenorum deberent quolibet anno a Debitore solvi quoad Interestem quinque, & sic pro bis mille florenis centum: in hoc casu, si Paulus, anno elapso dictum Interesse centum florenorum non solveret, Quæritur, an Petrus non possit in annum futurum loco ipsius Interestis centum florenorum exigere quinque florenos tamquam novum Interesse, & sic deinceps annis sequentibus? Resp. Talem contractum fore Usurarium, quia in Jure reprobatum ille titulus, quo Usuræ novæ ab ipsis Usuris exiguntur, uti textu claro deciditur, *L. Ut nullo modo. 28. C. De Usuris.* \*

#### Additio II.

\* At promoveamus casum ulterius, ponendo, quod dictus Paulus Debitor jam decem annis nullum solverit ex Capitali Interesse, ita ut præter Capitale bis mille florenorum ipsum Interesse intra hoc tempus debitum jam ascendat ad mille florenos: modo autem, decennio elapso, tandem Paulus, vel Hæres ejusdem velit solvere Petro ex Capitali mille florenos, ita ut adhuc in futurum deberet solam medietatem Capitalis, & mille florenos ratione dilati, per decennium Interesse. Quæritur, an Petrus teneatur hos mille florenos pro medietate Capitalis accipere, vel potius nunc possit a Paulo prætere exigere, ut eisdem mille florenos solvat tamquam debitum Interesse intra decennium conficiens dictam Summam?

Resp. Paulum Debitorem hic agere astute, circumveniendo suum Creditorem: etiam dum videt, quod Petrus Creditor nequeat bona conscientia ab ipso Interesse, jam ad mille florenos intra decennium ascendente, exigere novum Interesse, bene vero a toto Capitali, libentius vult restare deinceps Debitor medietatis ex parte Capitalis, & totius Interestis, quam solvendo ex integro Interesse remanere Debitor totius Capitalis; nam in primo casu obligaretur deinceps annis sequentibus tantum pro Interesse solvere quinquaginta florenos, cum ex Capitali non plures deberentur, quam mille: quoad restans autem Interesse nequiret exigere novum Interesse. Econtra in secundo casu remanente Capitali bis mille florenorum, debet adhuc singulis annis pro Interesse solvere centum florenos, uti calculanti patet. Et hinc in simili casu Petrus Creditor potest obligare Paulum suum Debitorem, ut potius antea totum Interesse, & postmodum demum Capitale solvat, prout in Jure Canonico *lib. 3. Decret. Tit. 23. n. 44.* deducitur ex *L. In his, ff. De solutionibus.* \*

#### Additio III.

\* Quæst. VI. An sit Usura, ita ut nullo Titulo excusari queat, si multa Interesse, ex principali sorte nondum soluta, computentur in novum aliquod Capitale, ex quo dein tamquam Capitali exigatur novum Interesse?

ut



ut clarius capiasur insistendo casui præcedentis quæ-  
siti indagatur, utrum Petrus v. g. Interesse illud, quod  
in ea decennium a Paulo Debitore ex sorte principali  
non persolutum ascendit ad mille florenos, nequeat  
computare tamquam novum aliquod Capitale, ex quo  
singulis annis exigit Interesse quinquaginta florenorum,  
Titulo lucri ex non persoluto Interesse cessantis, &  
damni emergentis &c. Ratio dubitandi, & affirmati-  
vam tenendi est; quia, si hos mille florenos Paulus De-  
bitor tempore debito solvisset, eisdem Creditor aliis  
mutuasset, ex quibus tale Interesse conformiter praxi  
Imperii Romani recepisset.

Hoc tamen non obstante respondeo, etsi nequeat osten-  
di, talem praxin esse rejectam Jure naturali, aut Divino,  
reprobatur tamen saltem in contractu Mutui tamquam  
Usuraria Jure positivo civili, uti patet ex L. 28. C. De U-  
suris. ibi: *U: nullo modo Usura Usurarum a Debitoribus*  
*exigantur &c. quapropter hac apertissima lege definimus,*  
*NB. nullo modo licere cuiquam Usuras præteriti temporis*  
*vel futuri in sortem redigere, & earum iterum Usuras*  
*stipulari.* Vide de hoc, uti & pluribus aliis materiis cir-  
ca Usuras, si occurrant, in Jure Canonico lib. 5. De-  
cret. Tit. 19. præsertim § 2. Ego dubito, an hæc Lex  
ubique usu sit recepta; saltem in aliis debitis vidi præ-  
dicari contrarium a viris etiam conscientiosis, qui, dum  
Emphyteutæ seu Coloni longo tempore dominis directis  
non solverunt Canonem annuum, eundem in simul  
compuarunt in novam aliquam sortem principalem,  
exigendo deinceps exinde annuum Interesse. \*

#### QUÆSTIO V.

De Pignore, & Hypotheca; ubi & de Antichrifi,  
& Pacto Legis Commissoriæ?

#### SUMMARIUM,

44 Pignus, unde sit dictum?

(c) Quæst. I. n. 2.

Quomodo differat ab Hypotheca?

50 Pactum Antichrifeos, quid?

51 Est regulariter illicitum.

52 Nisi interveniat alius iustus titulus.

53 Pactum Legis Commissoriæ, quid?

54 In Pignoribus an valeat?

\* Cum aliqua Declaratione.

49 **P**ignus appellatur a pugno, quia res, quæ pignori dan-  
tur, manu (seu pugno) traduntur: unde etiam  
quidam putant, pignus proprie rei mobilis esse, prout nota-  
tur l. Plebs. 238. ff. De verb. signif. Porro Pignus accipitur  
vel pro re ipsa in Pignus data, vel pro contractu, ac re-  
sultante inde obligatione Pignoris, ut in simili dictum  
superius de Mutuo. (c) Differt autem Pignus ab Hy-  
potheca, quod Pignus proprie dictum sit rei mobilis,  
Creditori a Debitore traditæ ad præstandum securitatem  
de solvendo debito, vel adimplendo promisso: Hypo-  
theca vero sit rei immobilis, ut si alteri in securitatem  
solvendi debiti hypothecetur ager, domus, vel hujus-  
modi res immobilis. De cetero Pignus, & Hypotheca  
pari ferme passu ambulant, & quod dicitur de uno,  
servata proportionem intelligendum est de altero. Quini-  
mo allata quoque differentia non semper observatur;  
nam Pignus quandoque attribuitur rei etiam immobili,  
quæ traditur Creditori arg. l. 2. ff. De Religiosis & sum-  
ptibus funerum. ibi: *Qui Pignori dedit agrum.* Circa quod

50 Quæritur I. An Pactum Antichrifeos sit licitum,  
nec ne? Ubi sciendum est Antichrifi esse Pactum in-  
ter Creditorem & Debitorem, ut Creditor tamdiu Pi-  
gnore uti, & fructus ejus lucrari possit donec debitum  
sibi restitutum sit. Quo prænotato

51 Resp. Cum communi, Pactum Antichrifeos regu-  
lariter esse illicitum, ac Usurarium. Ratio est: quia  
alioquin Creditor ultra pecuniam, quam mutuo dedit,  
aliquid lucrabitur causa solius Mutui, quæ est Usura,

liquidem in tali casu Creditor lucraretur fructus ex Pi-  
gnore. Hunc in Jure Canonico c. Cum contra. De Pigno-  
ribus, habetur, quod secundum Canonicas sanctiones  
fructus restitui, & in sortem debeant computari. Hinc  
etiam cap. 1. & 2. De Usuris, dicitur, quod sit Usura,  
lucrifer fructus rei pignoratæ.

52 Dicitur regulariter: nam possunt quandoque alii  
justi Tituli intervenire, ut liceat fructus ex Pignore lu-  
crari. Primus est: si fructus ex Pignore, vel Hypotheca  
percepti non superent quantitatem pensionis, quæ Jure  
Census, super eadem Hypotheca secundum morem Pa-  
triæ constituti, exigipotest. Secundus est: si Creditor  
fundum, qui Pignori destinatus erat, certo pretio emat  
cum pacto revendendi; nam tunc Creditor fit verus do-  
minus illius fundi, quamvis ipsum revendere teneatur,  
quando alter vult pretium principale refundere. His ad-  
di poterunt casus illi, in quibus ratione lucri cessantis,  
vel damni emergentis licitum est aliquid in Mutuo ultra  
sortem principalem exigere: item & nonnulli alii casus,  
de quibus Canonistæ.

53 Quæritur II. An in Pignoribus licitum sit Pactum  
Legis Commissoriæ? Ubi notandum, quod Pactum Le-  
gis Commissoriæ dicatur illud; quo Creditor cum De-  
bitore convenit, ut, si intra certum tempus non fuerit  
debitum solutum, Pignus pleno jure acquiratur Cre-  
ditori.

54 Resp. Cum communi Doctorum, hujusmodi Pa-  
ctum Legis Commissoriæ in Pignoribus non valere, sed  
veluti Usurarium reprobare, & quidem tam a Jure Ca-  
nonico, C. Significante. De Pignoribus, quam a Jure Ci-  
vili, l. ult. C. De pactis Pignorum. Ratio est: quia Pignus  
ordinarie plus valet quam ipsum debitum; unde ejus-  
modi Pactum vere est Usurarium. Debet proinde in tali  
casu Pignus vendi, ac pretium sortem principalem ex-  
cedens ipsi Debitori restitui: sicuti observatur in Mon-  
tibus Pietatis, si debitum tempore præfinito non solva-  
tur. Nonnulla alia, quæ de Pignoribus dicenda forent,  
potius ad Juris Interpretes examinanda pertinent, quam  
ad Theologiam Moralem.

Additio.

\* Id unicum adhuc notari velim circa Pactum Legis  
Commissoriæ, quod, dum statuitur, vendito Pignore,  
pretium, sortem principalem excedens, debere restitui  
Debitori, id non ita intelligendum veniat, quasi præter  
sortem principalem, antea mutuam, alias nihil pro  
Interesse solito, & a Jure, ac legitima consuetudine,  
vel ratione lucri cessantis, aut damni emergentis, vel  
propter moram (si tamen de mora punitoria conven-  
tum fuerit) retineri possit. Plura de Pacto Legis  
Commissoriæ. vide lib. 3. Decret. Tit. 21. §. 2. num. 55.  
& seqq. \*

#### QUÆSTIO VI.

De Censibus, & an sint liciti?

#### SUMMARIUM.

55 Census, quid?

56 Censuarius, & Censualista, quis?

57 Census divisiones.

58 Census reservativus, quis? & an liceat?

59 Census realis, & personalis, quis?

60 Census perpetuus, redimibilis, & irredimibilis, Census  
temporalis, & Census vitalitius, quid?

61 Censum consignativum esse licitum, ostenditur auctoritate.

62 Ratione id ipsum probatur.

63. 64. 65 Conditiones Jure naturæ requisitæ ad Censum.

66 Aliæ conditiones ad Censum Jure Ecclesiastico requisitæ.

67 Quoad has tamen attendenda locorum consuetudo.

68 Census personalis, an licitus?

69 Solvitur objectio contra Censum.

70. 71 Inter Censum & Mutuum differentia multiplex.

55 CONCL.



55 CONCL. I. Dimissis variis aliis acceptionibus, *Census* in proposito idem est, ac *jus contractum* aliquo constitutum, percipiendi annuam pensionem ex re, vel persona alterius. Ita in re communis. Nam, quamvis interdum ipsa pensio vocetur *Census*, proprie tamen loquendo *Census* non est ipsa pensio, sed *jus eam exigendi*. Et hinc, si per contractum *Censualem* quis vendat *Censum*, non vendit pecuniam, aut fructus annuos, sed *jus quoddam*, ratione cujus emptor *Census* potest annuatim exigere certam pecuniam, aut fructus ex re alterius.

56 Porro venditor *Census* (id est ille, qui accepta certa pecuniæ quantitate supponit rem suam *Censui*, sese obligando ad solvendam annuatim certam pensionem ex ea) dicitur *Censuarius*. Qui vero pretium dedit, hique *Censum*, seu *jus percipiendi pensionem annuam* ex re alterius emit, vocatur *Censualista*.

57 CONCL. II. *Census* varie dividitur: & primo quidem in *reservativum*, & *consignativum*, deinde in *realem*, & *personalem*, in *perpetuum*, ac *temporalem*, & hujusmodi. Ita communis.

58 *Census reservativus* dicitur, cum quis rem suam pleno jure domini (id est, tam quoad dominium directum, quam quoad utile) transfert in alium, donando, legando, vendendo, aut permutando, servata sibi annua pensione ex re illa præstanda. Et hunc esse licitum, delimitur ex *L. ult. C. De rerum permutat.* & patet exemplo *Josephi Aegypti Proregis*, qui *Aegyptiis* dedit *Terras*, prius titulo *Permutationis* pro tritico subjectas dominio *Pharaonis*, sub annuo *Censu* *Pharaoni* præstando *Genes. c. 47.* *Census Consignativus* dicitur, quando quis super bonis suis, quorum dominium directum, ac utile retinet, vel etiam super persona sua alteri *jus pensionis annuæ* consignat. Et potest hic *Census* alteri constitui mediante contractum *Donationis*, *Venditionis*, vel *Permutationis*, aut alio consimili; quamvis hic potissimum sit sermo de *Censu*, qui *emptione* constituitur.

59 *Census consignativus* subdividitur in *realem*, ac *personalem*. *Realis* est, qui fundatur super re v. g. super domo, agro, vinea tua, & ideo comitatur rem, ad quemcumque possessorem perveniat, donec *Census* redimatur. *Census personalis* est, qui fundatur super certa persona obligante se ad annuam pensionem sine ordine ad aliam rem, ex qua pensio sit solvenda; quamvis interdum securitatis gratia fundus aliquis hypothecæ supponatur, ut ex eo præstetur pensio, si hæc a persona debitrice nequeat obtineri.

60 Insuper ratione temporis futuri dividitur *Census* in *perpetuum*, & *temporalem*. *Perpetuus* autem subdividitur in *redimibilem*, qui videlicet restituito per venditorem pretio potest redimi, & *irredimibilem*, qui amplius red mi nequit. *Temporalis* etiam subdividitur in eum, qui extenditur ad certum tempus v. g. ad triginta, vel 50. annos, & in eum, qui extenditur ad tempus incertum, ut puta ad vitam unius hominis vel duorum, & hic *Census* proprio nomine dicitur *Vitalitius*.

61 CONCL. III. *Census consignativus realis*, sive *perpetuus*, sive *temporalis*, etiam *vitalitius* est licitus, ac neutiquam *usurarius*, si eo pretio fuerit emptus, quod vel lex taxavit, vel loci consuetudo approbavit. Ita omnes Doctores, & constat ex *Extravag. Martini V. & Calixti III.* quarum utraque habetur in *Jure Canonico* inter *Extravagantes communes*, tit. *De Emptione & Vendit.* ubi ex professo definitur, ejusmodi contractus *Censuales*, seu *Census emptos*, in quorum redditibus, ac fructibus pleræque *Monasteriorum*, *Hospitalium*, *Ecclesiarum*, & *Beneficiorum Ecclesiasticorum* fundationes, atque proventus dignoscebantur consistere, esse licitos, *Jurique conformes*, & *vendentes eosdem*, ad ipsorum solutionem *Censuum*, & *redituum juxta dictorum contractuum tenores efficaciter teneri*.

62 Accedit ratio: quia *Usura* non committitur, præterquam in *Mutuo*. *arg. cm. Si feneraveris. 14. q. 3.* & patet ex ipsa definitione *Usuræ n. 11.* allata: atqui in *Censu* non intervenit *Mutuum*, sed verus contractus *Venditionis*, & *Emptionis*; nam *Censuarius* vendit sub certa pecunia ipsi *Censualistæ* *jus percipiendi fructus ali-*

quos ex suo agro, prædio &c. ergo. Confirmatur: quia *Census* est veluti pars quædam *Ulusfructus*; nam continet *jus percipiendi partem fructuum* sive annuorum reddituum, quod *jus* est hic & nunc certa pecunia comparatum, non minus ac *donatione*, vel *titulo legati* comparari potest.

63 CONCL. IV. Nihilominus, ut contractus *Censualis* sit licitus ac justus, *Jure naturæ* requiruntur sequentes conditiones. Prima est: ut *Census* constituatur in re *frugifera*; ut est *ager*, *domus* & hujusmodi. Nam vi *Census* venditur *jus percipiendi fructus alicujus rei*, & consequenter hæc debet esse *frugifera*.

64 Secunda conditio, *Jure naturæ* requisita ad contractum *censualem*, est, ut *justo pretio* *Census* vendatur, & ematur. Hæc enim conditio ex natura rei requiritur ad quamcumque venditionem, & emptionem, *Censetur* autem *justum pretium*, quod vel lege, consuetudine, aut saltem iis deficientibus, arbitrio proborum & prudentum virorum taxatum est: quale in Imperio communiter *censetur* esse *centum* pro *quinque annuatim* præstandis.

65 Tertia conditio est: quod, si res *Censui* subjecta pro parte, aut ex toto pereat, vel in perpetuum (secus, si ad modicum tempus cum refusione fructuum alio tempore percipiendorum) *infrugifera* reddatur, etiam *Census* ipse pro rata, juxta *Comensationem*, pro parte, aut ex toto pereat. Siquidem *Censualista* habet *jus ad fructus rei*, seu est dominus hujus juris: quælibet autem res Domino suo fructificat, aut perit. Hinc si casu fortuito domus *Censui* subjecta pereat absque culpa *Censuarii*, perit *Census*: secus, si pereat v. g. incendio ex culpa *Censuarii*; nam tunc is vel debet refundere pretium *Census*, vel hunc super alia re immobili constituere; ut post *Lessium l. 2. c. 22. n. 88.* notat *Pirhing tit. De Usuris n. 80.* pluribus hanc conditionem explicans.

66 Præter hæc *Jure naturæ* ad *Censum* requisitas conditiones sunt nonnullæ aliæ, quæ vel in duabus *Extravag. Martini V. & Calixti III.* indicantur, vel in *Bulla S. Pii V.* quæ incipit: *Cum unus Apostolica.* super *Censibus* edita (ac refertur *tom. 2. Bullarii Romani. Constit. 79. dicti Pont.*) de novo requiruntur, ut quod *Census* non nisi super re *frugifera immobili*, vel quæ pro immobili habetur, constituatur: quod *Census* impotterum non nisi *redimibiles* constitui possint: quod pretium *Census* augeri, vel novus super eadem re constitui non possit, & hujusmodi.

67 Verum hæc conditiones hic omittuntur tum brevitate gratia, tum quia quoad eas attendenda est locorum consuetudo, cum nonnullis earum, utpote mero *Jure humano Ecclesiastico* requisitis, per contrariam consuetudinem derogari possit. Et certe *Bullam* citatam *SS. Pii V.* non esse ubique receptam, ut in *Belgio*, *Gallicia*, *Germania* &c. *censet Lessius cit. 22. dubit. 13.* in quibus proinde locis non forent *Usurarii* *Census* illi, qui aliter constituti sunt, ac in *Bulla S. Pii V.* præscribitur.

68. CONCL. V. etiam *Census personalis* est licitus, quantum est spectata natura rei. Ita *Lessius loc. cit. n. 18.* *Layman*, & communior *Doctorum*, quamvis nonnulli teneant oppositum. Ratio est: quia & hic solummodo venditur *jus annuatim percipiendi aliquid ex lucris*, quæ *Censuarius* sua industria acquirit; ergo *redit ratio* superius allata. Additur vero, quantum est ex natura rei: siquidem juxta citatam *Bullam S. Pii V.* secundum quam *Census* non nisi in re immobili *frugifera* constitui potest, secus esset dicendum.

69 Objicies generatim contra omnes *Census*. In *Venditione* aut *Emptione* *Censuum* intervenit *Mutuum virtuale*, seu quasi *Mutuum*; ergo & *Usura* palliata. Antecedens probatur: nam in re idem est, emere pro 1000. florenis *Censum* annuum 50. florenorum, ac mutuos dare 1000. florenos sub lucro 50. florenorum per singulos annos recipiendo, cum utrobique *Summa capitalis* salva maneat. Resp. negando assumptum cum sua probatione; multiplex enim est differentia inter *Censum*, & *Mutuum*, Prima est: quia in *Censu* emitur



emittitur jus percipiendi certos fructus ex re vel persona alterius: in Mutuo, utpote quod gratis fit, nullum tale jus emittitur.

70 Secunda differentia inter Censum, & Mutuum est, quia Mutuatarius cogitur similem in specie, ac bonitate rem mutuam, seu fortem reddere, imo ad eam reddendam vi Mutui se obligat: secus fit in Censu, ubi Censuarius vi hujus contractus (secluso pacto redimendi ad arbitrium Emptoris, utpote prohibito per Bullam S. Pii V. aut nisi Censuarius velit sponte Censum redimere) non tenetur reddere fortem, sed dumtaxat annuam pensionem.

71 Tertia differentia est, quia in Mutuo sub Usuris obligatio principalis est ad fortem reddendam, & accessoria ad Usuras: in contractu autem censuali principalis obligatio est ad reddendam pensionem annuam, nulla ad fortem, nisi quis velit Censum redimere. Tandem nullus justus titulus potest assignari recipiendi aliquid ultra fortem vi Mutui, ut patet ex dictis n. 19. & seqq. secus fit in Censu juxta proxime dicta.

### Q U Æ S T I O VII.

Quid, & quotuplex sit Cambium, & an licitum?

#### S U M M A R I U M.

- 72 Cambium, quid?
- 73 Et quomodo differat a Mutuo? Cum Additione.
- 74 Campsor, & Campsarius, quis?
- 75 Cambium reale, & ficcum,
- 76 Cambium minutum, & Cambium locale, seu per litteras, quid?
- 77 In Cambio minuto licite aliquid accipit Campsor.
- 78 Tituli in eo plus accipiendi, quam dandi.
- 79 An pecuniam auream alteri solvendam liceat nuntio prius permutare, retento lucro?
- 80 Limitatur solutio.
- 81 Etiam in Cambio locali licite Campsor aliquid lucratur.
- 82 Titulus accipiendi plus in Cambio locali.
- 83 Alii Tituli.
- 84 Cambium ficcum est illicitum, ac usurarium.
- 85 Quid de conditionibus Cambio reali præscriptis?
- \* Qualenam pretium sit justum respectu Cambii?

62 **C**ONCL. I. Cambium generatim idem est, quod permutatio: sed ex usu vulgato, & quantum attinet ad propositum, accipitur pro permutatione numismatum, soletque communiter definiri, dicendo *Cambium est permutatio pecuniæ pro pecunia.*

73 Differt autem Cambium a Mutuo, quod contractus Mutui unica pecuniæ traditione perficiatur, quæ reddi debet, post temporis intervallum: Cambium vero, cum sit quædam species Permutationis, *do, ut des*, non ante perfectum censetur, quam utrinque pecuniarum traditio facta sit. Deinde Cambium fit ob aliquam diversitatem pecuniarum ultro citroque dandarum, cujus diversitatis ratio in Mutuo non habetur.

#### Additio.

\* Item Cambium consistit in permutatione solius pecuniæ, Mutuum vero juxta dicta *Quæst. 1. n. 4.* potest consistere in quacumque re fungibili. Insuper Mutuum est contractus stricti juris, in quo creditæ pecuniæ usura, quatenus ob damnum emergens, vel lucrum cessans prætenfa, juxta *L. 24. ff. De præscriptis verbis.* non debetur saltem in foro fori, nisi in stipulationem deducta; e contra Cambium majores habet pro se præsumptiones, & favores: licet etiam ibidem (cum quantitas determinata damni emergentis, vel lucri cessantis sit difficilis probationis) in Cambiis extraordinariis, cum magnis Principibus institutis, consulatur, ut eadem conformiter §. 7. *Instit. De verb. obligat.* singulariter specificetur, ac insuper addatur, quod contractus ille sit Cambialis; quoniam non desunt Doctores, cum Ko-

nigke, Werner, Franck &c. negantes, obligationes illas reputari tamquam Cambium, nisi hoc nomen *ly Cambium* in litteris vel explicite, vel saltem implicite occurrat.

74 Porro ille, a quo petitur pecunia permutanda, dici solet *Campsor*: alter vero, ad cujus petitionem pecunia ipsi commutatur, *Campsarius* appellatur.

75 **C**ONCL. II. Cambium dividitur in reale, & ficcum. Ita communis. *Cambium reale* est legitima permutatio pecuniarum, ex qua juste aliquid lucri capi potest. *Cambium ficcum* vocatur, quod non est verum Cambium, sed fingitur esse, eo quod imaginem quamdam Cambii præ se ferat: ut quando habetur sola ratio temporis, aut quando fingitur alibi solutio facienda, & fit eodem loco cum usura. Et dicitur *ficcum*: quia caret humore, seu justo titulo ad pariendum lucrum. Unde hujusmodi Cambia ficca, tamquam usuraria damnavit S. Pius V. in Bulla de Cambiis edita, quæ incipit: *In eam pro nostro*, (& habetur tom. 2. *Bullarii Romani. Constit. 118. dicti Pont.*) quamvis ceteroquin in ea appellet *Cambiorum usum legitimum*, & *quem necessitas, publica-que utilitas induxit*: quod de Cambiis realibus, riteque usurpatis intelligendum.

67 **C**ONCL. III. Cambium reale subdividitur in minutum, & locale. *Cambium minutum* est permutatio numismatum diversæ rationis, & speciei: ut, si major pecunia, utputa Ducatus, cum minore, vetus cum nova, patria cum externa, aurea cum argentea, argentea cum cuprea, vetita cum legitima permutatur. Et dicitur *Cambium minutum*: quia in eo frequentius pecuniæ grandiores cum minutionibus commutantur v.g. Ducatus, vel Thalerus cum sestertiis, aut crucigeris. *Cambium locale* est illud, in quo pecunia præsens commutatur cum pecunia distante in alio loco; hocque duplici modo contingere potest, nimirum, ut vel Campsor det pecunias Campsario in hoc loco e.g. Monachii, ubi defuncto in eodem Campsarius indiget; & iterum ab eodem recipiat in alio loco, in quo suas Campsarius pecunias habet, puta Romæ; vel e contra, ut Campsor in hoc loco recipiat a Campsario pecunias, & huic in altero loco iterum per suos Factores, aut Correspondentes tribuat. Et hoc ultimum dicitur etiam *Cambium per litteras*, quia nimirum litteræ dantur, quibus mandatur Correspondenti, ut in altero loco pecunias solvat.

77 **C**ONCL. IV. In Cambio minuto licite aliquid, lege definitum, accipit Campsor a Campsario supra valorem nummi permutati. Ita omnes Doctores. Siquidem, ut bene notat S. Pius V. in Bulla proxime citata, hujusmodi Cambiorum usum necessitas, publica-que utilitas induxit: alioquin enim advenæ, & peregrini in terris alienis vix possent aliquid emere; cum non eadem moneta ubique sit in usu, ac proinde non usulem oportet commutare pro usuali mediante isthoc Cambio minuto.

78 Porro titulus in Cambio minuto accipiendi plus, quam dandi est multiplex. Primus est locatio operæ & obsequii, quod Campsor præstat congregando omnis generis pecunia, quæ permutari petentibus possint, atque paratum se præbendo ad easdem commutandas secundum Campsarium voluntatem. Alter titulus est lucri, vel commodi cessantis: nam sæpe accidit, ut unum genus monetæ plures, easque pretio æstimabiles commoditates habeat, quam alterum. Tercius est labor numerandi pecuniam. Plures similes titulos refert Lessius *l. 2. cap. 23. dubit. 2.*

79 Quæres, an, si famulo, vel nuntio tradam centum Ducatos in auro, ut solvat meo creditori, non curans, qua specie id fiat, & ille Ducatos illos prius commutet pro moneta argentea cum lucro, eaque postmodum solvat Creditori, retento lucro, licite id fiat, vel potius teneatur talis ad restitutionem illius lucri? Resp. tale non teneri ad restitutionem lucri. Ita Lessius *loc. cit. n. 18.* & alii. Ratio est: quia illud lucrum est fructus industriæ, proveniens ex negotiatione pecuniaria, famuli industria & periculo facta, ac proinde nec Domino pecuniæ debetur, nec etiam suo Creditori, utpote cui integre per aliam pecuniam satisficit.



80 Dicitur notanter in casu posito, *non curans, quæ specie id fiat*: nam si mens Domini erat, ut illam pecuniæ speciem, utputa centum Ducatos in auro, famulus suo Creditori traderet, eo quod cuperet illi gratificare, vel dare occasionem lucri, tunc peccaret famulus commutando pecuniam illam in aliam speciem cum lucro: qui ageret contra justam Domini intentionem. Unde, si exinde alteri sequatur damnum, tenebitur ad restitutionem, seu recompensationem illius.

81 CONCL. V. Etiam in Cambio locali licite potest aliquid a Campfore lucrari, idque variis ex titulis: sic v. g. si Campfor Monachii accipiat a Campfario 100. florenos, datis eidem litteris, ut Romæ a suo Correspondente accipiat tantum 95. vel quid simile, cum deductione alterius iusti, & consueti Campforum lucri five auctarii, licite id fit. Ita Doctores communiter: & patet ex citata Bulla S. Pii V. Siquidem hunc Cambiorum usum necessitas, & publica utilitas induxit, ne videlicet in terras remotas abituri summo cum incommodo, quin & periculo magnum pecuniæ pondus semper secum portare cogantur.

82 Ceterum causa, seu iustus titulus plus accipiendi, quam postea dandi, imprimis est accessorius Contractus locatæ operæ ad pecuniam formaliter, vel virtualiter transferendam in locum, quo Campfarius vult. Si enim Monachio Romam usque centum florenos transferre deberes, multum laborem, periculumque subiturus esses; hoc autem onere te liberat Campfor, cum in se excipiat obligationem numerandi tibi Romæ conditam pecuniam cum magna tua commoditate: atqui tale obsequium est pretio æstimabile, ut patet; ergo. Et ex hoc fit, ut, quo longius distat locus, ad quem Cambium instituitur, & quo periculosior via, eo in ius auctarium exigi possit, & soleat.

83 Secundus titulus, quo lucrari potest Campfor in hoc locali Cambio, est æsecuratio, ac præstatio periculi. Siquidem Campfor accipiens hic pecuniam alio trajiciendam, non solum suscipit onus transferendi pecuniam illam, sed etiam periculum, ut, si pereat, non danti, sed ipsi Campfiori pereat: atqui præstare tale periculum trajectionis, atque æsecurationem est pretio æstimabile, ut constat; ergo. Accedunt alii tituli, ac præsertim illi, qui in simili de Cambio minuto procedunt, ac n. 78. referuntur.

84 CONCL. VI. Cambium siccum est illicitum, ac usurarium. Ita declaravit S. Pius V. in citata Bulla de Cambiis, quæ incipit: *In eam pro nostro*. Et talia sunt illa, in quibus ex intentione contrahentium post aliquod tempus cum lucro fit solutio in eodem loco, eo quod alter alibi pecuniam non habeat, ut jam n. 75. explicatum.

85 Tandem sciendum, quod S. Pius V. in citata Bulla quasdam conditiones in Cambiis reatibus observandas præscripserit: verum notat Lessius cit. cap. 23. num. 93. quod eadem paucis in locis, & forte nullibi (saltem quoad omnes conditiones) sint usu receptæ.

Additio.

\* Quær. Qualem iustum Cambii pretium sit censendum? Resp. I. Campforibus & similibus Negotiatoribus, præsertim vi officii sui in bonum Reipublicæ constitutis, qui numquam relinquunt pecuniam otiosam, a Jure Civili L. 26. §. 1. C. De Usuris. concedi *beſsem*, seu octo pro centum florenis: a Diana autem Tract. 8. Resolut. Moral. De contractibus. Resol. 6. & seq. & a Gail lib. 2. Observat. 6. n. 3. etiam ultro pro ratione majoris vel minoris laboris, aut periculi, vel lucri cessantis, aut damni emergentis, respiciendo etiam ad curam in aggregandis variarum Specierum monetis, atque ad expensas in transportatione scribendis, ac expediendis litteris, nec non in habendis & sustentandis famulis rei peritis ac fidelibus faciendas. Quare generaliter loquendo Resp. II. ex La Croix Lib. 3. Tract. Moral. part. 2. n. 1031. Iustum pretium esse illud, quod lege, vel legitima consuetudine, aut communi hominum proborum æstimatione.

Anacl. Reſſenſuel Tom. I.

ne taxatur spectata utilitate monetæ permutandæ, loci distantia, periculo viarum, ac copia, vel penuria pecuniarum, aut Mercatorum in aliquo loco. Potest autem ratione Cambii accipi pretium communiter taxatum, quamvis per accidens ipsimet Campfiori talis pecuniæ translatio (ut hic e. g. Monachii recipiat a Campfario pecunias, quas ei per litteras Romæ iterum solvendas curat) sit valde utilis & commoda: nam ad hoc, ut communis aliqua æstimatione imponi possit, & pretium accipi, sufficit, quod talis translatio pecuniæ sit plerisque incommoda, nunc autem fiat in gratiam Campfarii: sic etiam a pari, si conduxisses Titium, ut equum tuum duceret Monachio Ulmam, quamvis is etiam ex alia causa eo proficisci veller, foretque illi hic & nunc valde commodum uti hoc equo, posset nihilominus acceptare pretium conductionis. Ita ex Lessio, Layman & Sporer resolvit La Croix loc. cit. Illud tamen pariter ex Busenbaum ibidem sibi notet Campfor, quod, si Cambio, vel aliter pecuniam adulterinam accipiat five ex ignorantia, five ex inadvertentia, non possit illam aliis expendere, neque ex eo, quod deceptus sit, alios iterum decipere; cum actio, qua deceptus est, nullum ad hoc jus tribuat. \*

QUÆSTIO VIII

De Emptione, & Venditione.

SUMMARIUM.

- 86 Emptio, & Venditio, quid?
- 87 Pretium rerum duplex, legitimum & vulgare.
- 88 Pretium legitimum consistit in indivisibili.
- 89 Pretium vulgare triplex, summum, medium, & infimum.
- 90 Pretii vulgaris justitia, unde desumenda?
- 91 Corollarium.
- 92 Causa mutandi pretia rerum.
- 93 Corollaria.
- 94 Ratione Officii mercandi potest res pluris vendi.
- \* An etiam ob singularem affectum, vel specialem utilitatem Emptoris possit res pluris vendi?
- 95 Pro Foro Conscientiæ qualibet læsio in Emptione, & Venditione refarcienda.
- 96 Secus pro Foro externo.
- 97 Aut si læsio sit modica.
- 98 Aut aliud ex circumstantiis colligatur.
- \* Corollarium.
- 99 Res tanti valet, quanti vendi potest, commodo?
- \* Non potest licite deveniri ad pretium summum per fraudes.
- 100 Invitus regulariter cogi non potest ad vendendum.
- 101 Fallit in casu publicæ necessitatis.
- 102 Atque ob publicum favorem.

86 CONCL. I. Emptio est pactio pretii pro merce: Venditio econtra est pactio mercis pro pretio. Ita communis, & desumitur ex §. 1. Instit. De emptione. Tria siquidem ad substantiam Emptionis & Venditionis requiruntur. Primo res, quæ veniat, five ea nunc existat, ut equus, vacca, five sit futura, ut fructus nascituri, item jura & actiones: nam hæc omnia nomine mercis, seu rei venalis intelliguntur. Secundo requiritur pretium; nam sine pretio Venditio nulla est, debetque simul pretium in numerata pecunia consistere; alioquin enim non Venditio & Emptio, sed rerum Permutatio foret. Tandem ad Venditionem & Emptionem requiritur pactio, id est, ut in rem vendendam, & pretium pro ea præstandum Venditor & Emptor consentiant.

87 CONCL. II. Pretium rerum generatim est duplex, unum legitimum, quod scilicet a Magistratu est taxatum, alterum vulgare, quod ex valore rei plurimum iudicio dependet. Ita rursus communis, & patet inductione: sic enim, ut occurratur avaritiæ Venditorum, solet taxari in plurimis Regionibus pretium circa carnes apud laniones, circa vinum apud œenopolas, vel circa cere-



revisiam apud hospites, aut circa panem apud pistorum &c. Econtra vero quoad merces respectu Mercatorum habetur pretium vulgare, nec illæ taxari ordinarie solent a Potestate publica.

88 CONCL. III. Pretium legitimum consistit in indivisibili, nec licet illud præterire. Ratio est: quia hoc est censendum verum rei pretium, quod a Magistratu definitum est, ne excedatur; simulque iudicium Magistratus, qui auctoritate publica, & boni communis intuitu tale pretium constituit, est præferendum iudicio populari. Intellige, dummodo mutatis circumstantiis copie, inopie, & similibus Magistratus non sit notabiliter negligens in pretio legitimo mutando; nam alioquin lex censeretur iniqua, & posset res vendi pretio vulgari. Lessius *lib. 2. cap. 21. n. 14.* & alii. Videatur etiam in simili emergentia utiliter *lib. 3. Decret. tit. 17. §. 5. n. 135. & seqq.*

89 Pretium vulgare econtra non consistit in indivisibili, sed habet quamdam latitudinem. Hinc fit, ut pretium vulgare juxta Doctores communiter sit triplex, videlicet summum, medium, & infimum. Siquidem pretium vulgare plurimum pendet ab æstimatione & affectu hominum, qui subinde variis de rebus varie judicant, & quod aliqui æstimant novem florenis, alii æstimant decem, alii undecim.

90 CONCL. IV. Loquendo de pretio rerum vulgari generatim justum meritis pretium est, quod loci consuetudo approbat secundum communem hominum æstimationem, quæ quidem æstimatio desumitur ex abundantia vel penuria illius meritis, atque ordinaria acquirendi facilitate aut difficultate, utilitate vel usu, aliisque hujusmodi circumstantiis. Ita in re communis. Hinc

91 Inferunt Doctores, quos citat, & sequitur Layman *lib. 3. tr. 4. c. 17. n. 9.* eum nihil contra justitiam peccare, qui frumentum pretio consueto vendit, confcius brevi tempore superventuram frumenti copiam, vel hostium incursionem, aut hujusmodi, si hæ causæ minuendi pretii publice ignorentur. Ratio est: quia rerum pretia non ex privata unius, aut alterius hominis notitia vel affectione, sed ex communi hominum æstimatione ac sensu accipienda sunt. Idem de similibus dicendum.

92 CONCL. V. Variæ sunt causæ, ob quas rerum venalium pretia augeri, vel minui solent. Ita communis. Sic enim passim penuria mercium, multitudo emptorum, & paucitas vendentium auget rerum pretia: ac econtra mercium abundantia, multitudo vendentium, & paucitas emptorum minuit pretia. Hinc in transitu alicujus Principis cum magno comitatu rerum pretia accrescere solent: in fine autem nundinarum, dilapsis Emptoribus, merces vilius emuntur: idem fit tempore pestis, & post partam ab hostibus victoriam.

93 Similiter merces, quæ sub hasta venduntur, minoris æstimari solent, quam quæ in propria Officina quærentur, & rogantur. Item merces, quæ per partes venduntur, carius distrahantur ob majorem molestiam, minusque lucrum, quam quæ in magna quantitate. Sic etiam ob singularem affectionem, aut commoditatem, quam Venditor ex re vendita habet, eaque in gratiam Emptoris se spoliatur, potest res carius vendi: & econtra, si Emptori commodum non sit emere, sed a Venditore rogetur, ob hanc circumstantiam aliquantulum minuitur pretium meritis.

94 Tandem, ut taceantur plures alii Tituli variandi pretia rerum, licitum est rem pluris vendere ratione officii mercandi. Sic enim mercatores possunt paulo pluris vendere, quam ab aliis vendi soleat, qui non ex officio, sed ex occasione aliquid vendunt. Ratio est: quia pretio est æstimabile, quod illi ex officio curas, laboresque in rebus conquirendis, conservandis, & distrahendis assidue impendant, & quidem cum periculo, ne aliquæ merces tractu temporis ipsis pereant. Solet etiam a Mercatoribus augeri pretium, si in obtinenda solutione prævident difficultates, molestias, labores &c. vel si ipsis ex dilata solutione obveniat lucrum cessans, aut damnum emergens. Videatur fusius in Jure Canonico *lib. 3. Decret. tit. 17.*

#### Additio.

\* Utrum autem possint Venditores augere pretium suæ meritis etiam exinde præcise, quia cognoscunt, apud hos, vel illos Emptores in particulari residere specialem affectionem aliquam erga dictas merces, vel quia vident, dictos Emptores singularem utilitatem, quam alii communiter non haberent ejusdem Communitatis, reportaturos; alia foret Quæstio, & ratio affirmandi videtur; quia juxta dicta *n. 93.* ob specialem affectum Venditoris erga mercem potest augeri pretium meritis: cur ergo non pariformiter ob specialem affectum Emptoris erga eandem? Hoc tamen non obstante

Resp. cum communi, talem praxim esse illicitam, & restitutioni obnoxiam, saltem si affectus ille erga mercem est tantum particularis respectu unius vel alterius Emptoris. Ratio est: quia nemo cogitur emere suam propriam commoditatem, uti recte advertit D. Thomas 2. 2. q. 77. art. 1. Item Venditor non potest vendere, nisi quod præcedenter suum est: atqui affectus ille, & commoditas, seu particularis utilitas, tenens se præcise ex parte Emptoris, non est quid suum, seu non est Venditoris; ergo. Unde patet disparitas inter hunc & alterum casum *n. 93.* relatum: nam si specialis ille affectus ante Venditionem teneat se ex parte Venditoris, puta, quia pretiosa pictura provenit a Majoribus Venditoris, vel ei donata a Principe, sicque specialiter æstimata, in illo contractu Venditionis & Emptionis se Venditor in gratiam Emptoris privat aliquo, quod antea suum erat; hincque exinde licite carius vendit mercem, dummodo præcedenter moneatur desuper Emptor: econtra vero illud non contingit, uti consideranti patet, si affectus ille, aut utilitas specialis se teneat ex parte tantum unius vel alterius Emptoris. Dixi notanter, *ex parte unius tantum vel alterius Emptoris*: nam si affectus ille erga mercem esset communis certæ euidam Nationi, ac Populo, exinde jam cresceret in illa communitate æstimatio rei, hincque huic Nationi carius, quam alteri licite vendi posset. Ex quo Covarruvias, Castropalao, Salas, & alii apud Reiffenstuel *lib. 3. Decret. tit. 17. §. 5. n. 130.* approbant praxim illam, qua Europæi Indis, & Æthiopibus res vilissimas, puta acus, vel parvos cultellos, (quos tamen Indi pluris, aurum econtra & gemmas necdum politas ob magnam copiam minoris æstimant) maximò pretio vendunt, qui excessus pretii sola computatione periculorum & expensarum in navigatione factarum alias extra communem majorem communitatis æstimationem vix justificari posset. \*

95 CONCL. VI. In Foro Conscientiæ omnis Venditio & Emptio, in qua latitudo justii pretii exceditur, est iniqua, & lædens alterum tenetur ad restitutionem; nisi læsio sit valde modica, aut liberalis datio vel remissio ejus, qui deceptus fuit, saltem præsumpta accesserit. Ita D. Augustinus *lib. 13. de Trin. c. 3.* estque communis Doctorum; id enim exigit Justitia commutativa; quæ in contractibus vult servari æqualitatem.

96 Dicitur, in Foro Conscientiæ: quia in Foro externo ob multitudinem litium evitandam non succurritur alicui, nisi supra dimidium justii pretii deceptus fuerit; nam tunc primum conceditur Actio Venditori contra Emptorem, ut vel rem emptam restituat, vel id, quod deest justo pretio, suppleat, prout habetur *l. Rem majoris. C. De rescindenda vendit. juncto c. Cum delicti, & c. Cum causa. De Emptione.*

97 Dicitur ulterius, nisi læsio sit valde modica: nam tunc non tenetur quis ad restitutionem ob levitatem materiæ. Quinimo, quia durum est inter homines, in contractibus semper observare exactissimam justitiam, simulque modus commutantium quasi fundatus sit supra illud Legis naturæ, *Quod tibi vis fieri, alteri facias*: hinc Doctor Subtilis 4. dist. 15. qu. 2. art. 2. notat, ferme omnem contractum concomitari aliquam donationem, & mox subjungit, *fatis probabile esse, quod, quando contrahentes sunt mutuo consenti, mutuo volunt sibi remittere, si secundum aliquid deficiunt ab illa justitia requisita.* Et hanc doctrinam communiter recipiunt Doctores, ac ex ea Laym. *loc. cit. n. 6.* format hanc Regulam: *In dubio est æstimandum, quod contrahentes invicem remittere & condonare velint*



velint, si in contractu inæqualitas modica, & non admodum notabilis accidat.

98 Secus est dicendum, si sit notabilis inæqualitas: tunc enim non est præsumenda donatio, vel remissio, nisi ex circumstantiis de liberali donatione, aut ultro-ne remissione possit sumi conjectura: ut si Emptor cognatus sit Venditoris, & alias benefacere solitus, aut si læsio facile potuit deprehendi, & hujusmodi.

#### Additio.

\* Ex hac Conclusionem inferes, graviter peccare, nec excusari ab onere restitutionis illos mercatores, opifices, vel artifices, qui, ut ipsos dominos ad suas trahant officinas, servitiales eorum variis corrumpunt honorariis: postmodum vero in consueta specificatione debitorum, non advertentibus Dominis, notabiliter excedunt valorem rerum venditarum, ut sumptus propter eadem honoraria factos tali modo iterum occulte recompensent: nam similes non servant æqualitatem inter pretium & res venditas, cum invitis Dominis in Venditione illarum rerum transgrediantur notabiliter latitudinem justii pretii.\*

99 Quæres I. Quomodo intelligendum sit illud commune dictum: *Res tanti valet, quanto vendi potest*? Et illud, quod habetur l. in causa cognitione 16. ff. de Minoribus, ubi dicitur: *In pretio emptionis & venditionis naturaliter licere contrahentibus se circumvenire*? Resp. cum communi, hujusmodi dicta intelligenda esse de circumventionem intra limites justii pretii, seu justæ æstimationis; quia justitia pretii non consistit in indivisibili.

#### Additio.

\* Verum, ut ista circumventio intra latitudinem justii pretii liceat, atque ab onere restitutionis immunis sit, non debet deveniri ad pretium summum per fraudes v. g. per diminutionem ulnæ, mensuræ, vel ponderis &c. Ut totum clarius in exemplo eveniat, ponemus sequentem casum. Petrus Mercator libenter venderet merces suas pretio summo: quia tamen prævidet, exinde deficere Emptores, ut eorum major fiat confluxus; deinceps has merces apparenter venales exponit pretio infimo, occulte tamen pondera, ulnas, vel alias mensuras, quibus hæ merces dimetiuntur, ita diminuit, ut nihilominus vi talis diminutionis occulte consideratis considerandis ad pretium summum ascendatur. Talis circumventio nullatenus est licita, uti recte cum Molina, Diana & Sporer advertit Lugo de Just. & Jur. disp. 26. sect. 8. Ratio est partim; quia taliter vendentes proprie non stant contractui cum Emptoribus inito de vendenda e. g. integra legitima, & non corrupta ulna panni, vel integro pondere sacchari, seu integra mensura olei &c. partim, quia per similem fraudem ipsos Emptores, sibi falso persuadentes, se merces apud Petrum pretio infimo comparare posse, illegitimo modo ab aliis Venditoribus abstrahunt: licet enim quilibet mercator suas merces laudare licite valeat, quamvis per illam laudem Emptores ab aliis Venditoribus abstrahat, non tamen id poterit facere per falsas imposturas, dolos & fraudes.\*

100 Quæres ulterius II. An quis invitatus cogi possit ad vendendum rem suam? Resp. cum communi, id regulariter loquendo fieri non posse. Ratio est: quia quilibet est dominus rei suæ, sicque de ea disponere potest pro libitu, vel eam retinere, prout sibi placuerit.

101 Dicitur, regulariter loquendo: nam sunt excipienda aliqui casus, in quibus etiam invitatus cogitur vendere rem suam. Primo quidem, in casu publicæ necessitatis: sic enim, si publica urgeat necessitas, v. g. tempore inopiæ frumenti, aut aliorum victualium ad usum quotidianum requisitorum, possunt justo per Magistratum taxato pretio subditi cogi ad vendendum ejusmodi res pro sublevanda publica necessitate.

102 Secundo, ob publicum etiam favorem cogitur quis vendere rem suam: sic quippe, si domus v. g. vel fundus privatæ personæ necessarius sit ad constructionem.

Anacl. Reiffenstuel Theolog. Tom I.

nem, vel ampliationem Civitatis, vel Viæ publicæ, aut Principis Palatii, five Templi, Monasterii, Collegii, vel etiam Hospitalis, cogitur quis ejusmodi domum, vel fundum taliter necessarium justo pretio vendere. Siquidem in hujusmodi casibus favor publicæ utilitatis, vel necessitatis præponderare debet privatis commodis. Layman lib. 3. tract. 4. cap. 17. §. 5. num. 34. & alii.

#### APPENDIX.

Ad Quæstionem VIII. de Emptione & Venditione, in qua de hac materia adhuc ulteriora valde utilia, & practica per decem Additiones adjuncta continentur.

#### SUMMARIUM.

- \* Quis debeat pati damnum, si res emptæ determinata pereat ante traditionem? Additio I.
- \* Quid sentiendum, si res indeterminata ante traditionem fiat deterior? Addit. II.
- \* Ad quem spectet lucrum, si res aliqua per tertium majori pretio vendatur, vel minori ematur, quam fuerit petitorium? Addit. III.
- \* Occurritur Objectioni. Add. IV.
- \* Ad quem pertineat lucrum de Chirographis minori pretio emptis? Add. V. VI. & VII.
- \* An Mercatoribus vel aliis liceat instituere Monopolia vel Propolia? Addit. VIII.
- \* De Libris Mercatorum in ordine ad Emptionem & Venditionem. Add. IX.
- \* De Evictione, Jure Retractus, de Pacto retrovenditionis, ac de Arrhis, aliisque remissive. Add. X.

#### Additio I.

\* Quæres I. Ad quem spectet damnum cujusdam rei determinatæ emptæ, si contractus Venditionis equidem fuerit absolutus, & in se perfectus, at res illa pereat, antequam fuerit actu tradita, vel pretium solutum? Ante resolutionem Nota I. Quod alius contractus Venditionis & Emptionis sit absolutus, & alius conditionatus, seu quasi conditionatus. Prior censetur perfectus jam ante rei traditionem: nam iste contractus juxta communem solo consensu perficitur, quamvis ceteroquin ante rei venditæ traditionem &c. Emptori dominium nondum acquiratur. Posterior vero ne quidem perfectus censetur ante eventum conditionis. Nota II. Quod contractus quasi conditionatus reputetur, quando res emenda necdum in individuo fuerit determinata, prout contingere sæpius potest, si quidpiam ematur ex re consistente in pondere, numero & mensura: facit enim talis Emptio quasi hunc sensum conditionatum: *Emam e. g. ex hoc acervo tritici 10. modios, si fuerint mensurati, ex hoc grege decem oves, si fuerint determinate in individuo: ex hac carne decem libras, si fuerint ponderate*; unde, antequam facta sit mensuratio, determinatio, seu ponderatio, nondum censetur talis contractus perfectus, atque absolutus. Nos majoris claritatis gratia de contractu absoluto, & quoad res determinatas facto ponimus sequentem casum.

#### Additio II.

\* Cajus Lanio cujusdam Civitatis proficiscitur in certum oppidum, ubi venales exponuntur a Rusticis boves ex quibus Lanio seligit in individuo duodecim, eosque emit absolute; antequam autem hi fuissent actualiter extraditi, aut pecunia Rusticis desuper data, superveniunt Hufari abigentes una cum aliis etiam illos duodecim boves.

Quæritur ergo, quinam pereant, num Rusticis, vel Lanioni? Et videtur quidem ab initio eosdem perire Rusticis, sicque nec Lanionem teneri ad solutionem pretii, quia res quælibet domino suo perit; atqui ante traditionem actualem, vel solutionem pretii Rustici ad-



suo quæstu proprio, ac luxu &c. hisce Illustriss. Cancell. intimus de Schmid loc. cit. memoratu dignum proponit exemplum in Theodosio (alii vocant Theophilum) Imperatore, qui ad suam Augustissimam Conthoralem familia Monopolia suadentem ita exprobrando fuit locutus: *Cum me Deus Imperatorem designavit, tñ me Mercatorem facere contendis? Scito autem Mercaturam privatis hominibus esse concessam, ut modum habeant tolerande vitæ. Quod si Nos præter Imperii opes etiam mercaturæ emolumenta interceperimus, undenam subditi victum comparabunt?* Ita ille. \*

#### Additio IX.

\* Quæres ultimo. Quidnam probent Mercatorum libri, in quibus continetur, pro re empta necdum ab Emptoribus solutum esse pretium? Resp. Et si tales libri tamquam scripturæ privaræ, de Jure quidem contra scribentem, pro ipso autem regulariter non probent. *cap. 14. de fide instrum.* Nihilominus testibus Gail, Lauterbach, Bruneman, & aliis apud Franciscum Schmier *lib. 2. tract. 3. cap. 6. sect. 3. §. 4.* de moderna consuetudine saltem semiplenam probationem faciunt, nisi aliunde reddantur suspecti. Ratio est: quia in similibus causis non agitur juxta strictos apices Juris, sed ex æquo, & bono. Et hinc Judex, aliis probationibus deficientibus, posito, quod Emptores pretium jam esse solutum affirmarent, econtra vero dicti Mercatores negarent exhibendo desuper pro se suos libros, posset mentionatis Mercatoribus, si alias communiter habeantur pro viris fide dignis, juramentum suppletorium deferri, quo deposito Emptores condemnarentur ad solvendum pretium. Quod si Mercator conscribens jam obiisset, nihilominus hi libri propter mortem ejusdem fidem facerent pro Hærede similis Mercatoris etiam absque alio juramento, cum tantum importet mors, quantum juramentum, prout *lib. 2. decret. tit. 22. num. 218.* annotatur. \*

#### Additio X.

\* Superessent adhuc plura de Emptione, & Venditione, & quidem imprimis de *Eviçione*, an nimirum, & quando Venditor debeat Emptori in contractu Emptionis cavere de damno ac interesse, si forsan res vendita foret aliena, & suo tempore evinceretur a vero Domino, cui comparenti, ac rei vindicatione agenti deberet a Judice res illa restitui. Item *secundo* agendum restaret de *Jure Retractus*, seu Protimiseos, vi cujus proximus e. g. Venditoris consanguineus rem tertio venditam potest retrahere, seu eodem pretio ipsemet emere. Item *tertio* dicendum occurreret de *Pacto retrovenditionis*, seu de Emptione cum onere relucitionis. Item de Arrhis contractui Emptionis, & Venditionis sæpe adjectis: propriis de *Arrha penali*, & *Arrha honoraria*, ac de *Arrha obligatoria*, quæ ultima datur in partem pretii, uti *penalis* in pœnam non servati contractus, & *honoraria*, quam Venditor plerumque sibi pro honoranda uxore sua in stipulationem deducit. Quia tamen similia potius ad Jus Civile, & Canonicum, quam ad Theologiam moralem spectare dignoscuntur; ideo plura de his in præsentia non tractantur, & in emergentia casus benevolus Lector ad Jurisperitos remittitur, ubi specialiter legi poterunt præsens Auctor in *Jure Canonico lib. 3. decret. tit. 17.* Christoph. Chlingensperg. *lib. 3. instit. tit. 24.* & in *Jure Patrio* Cancellarius intimus de Schmid in *Commentariis tit. 6. & seqq.*

### QUÆSTIO IX.

#### De Ludo, & Sponsionibus.

#### SUMMARIUM.

103 Ludus dupliciter accipitur.

104 Ludi contractus, an licitus?

105. 106. 107. Tres conditiones ad justitiam Ludi requisitæ: ubi etiam de variis fraudibus.

108 Ludere principaliter propter lucrum, an sit peccatum?

109 Alia responsio.

110 Lusus alearum est Clericis, & Religiosis prohibitus.

111 Per Lusum aleartum quid intelligatur?

112 Lusus alearum etiam Laicis de Jure prohibetur.

113 Qui lucratur Ludo prohibito, an teneatur ad restitutionem.

\* An in tali Lusu perdens teneatur alteri dare id, quod perdidit, vel se exceptione tueri valeat?

114 Sponsio, quid?

115 Certus de veritate, nequit Sponsionem inire.

116 Nisi postmodum incipiat dubitare.

117 Aut protestetur alteri.

118 Valet juramentum, vel votum non amplius ludendi.

119 Sed quale?

120 Violatio talis juramenti, quale peccatum?

121 Hoc amplius declaratur.

\* Alia Additio de voto non ludendi.

103 **Q**uamvis ad primum attinet, Ludus dupliciter accipitur. I. Pro dictis, vel factis, ad oblectationem animi destinatis. II. Pro contractu, quo ludentes inter se paciscuntur, ut victori cedat, quod uterque deposuit. Et in isto posteriori sensu hic de Ludo agitur.

104 CONCL. I. Ludi contractus jure naturæ est licitus, dummodo debitæ conditiones adsint. Ita communis. Ratio est: quia sicut in potestate cujuslibet est, rem suam alteri donare absolute, ita etiam in alterum transferre sub quapiam conditione, sive ea fortuita sit, sive ex intentione pendeat. Quinimo, si Ludus debito modo instituatur, erit actus duarum virtutum, Justitiæ videlicet, ac Eutrapeliæ, simulque utilis esse potest ad vitandum otium, & quæ inde consequuntur mala. *Laym. lib. 3. tr. 4. c. 21. n. 1. & alii.*

105 CONCL. II. Tres potissimum conditiones requiruntur ad justitiam contractus Ludi. Primo, ut ludentes habeant liberam dispositionem rei quam in Ludum deponunt. Hinc quando alter ludentium non potest rem depositam alienare, ut Religiosus invito Prælato (secus, accedente ejus consensu), & Filius familias non habens bona castrensia, vel quasi castrensia, neque alia a patre sibi concessa ad animi oblectationem, seu liberam administrationem, tunc is neque Ludo quidquam acquirere, neque perdere potest: unde, si lucratur, tenetur ad restitutionem; sicut & ille, qui ab eo lucratus est. *Lessius lib. 2. de Just. & Jur. c. 26. n. 32.* *Layman n. 5. & alii.*

106 Secunda conditio ad justitiam contractus Ludi requisita est, ut alter alterum per injuriam, utputa iniuria, fraude vel convitiis ad Ludum non pertraxerit: alioquin enim, si ille sic pertractus perdat, alter est ei causa damni per injuriam, ac proinde tenetur ipsi ad restitutionem; ut docet *Lessius n. 7.* Cajetanus, Covarruvias, Sotus, & communior aliorum; etsi quidam non improbabiler oppositum teneant, eo quod talis simpliciter voluntarie luserit, & solum secundum quid involuntarie, ac ceteroquin in illo lusu æque lucrari ac perdere potuerit, ut inquit Bonacina apud Sporer *tr. 6. in Decal. c. 6. n. 65.* qui & idipsum verum credit, si fiat solummodo inductio ad ludendum persuasione, importunis precibus, aut levi tantum metu.

107 Tertia conditio justitiæ Ludi est, ut ludentes non utantur fraudibus contra leges Ludi; alioquin tenentur ad restitutionem ejus, quod sic lucrari sunt. Porro leges Ludi sunt, quas ipsi ludentes communi consensu inter se statuerunt, aut si nihil speciale statuerint, quæ eo loco communi consuetudine sunt receptæ. Nihilominus astutiæ illæ, quæ vel communi consuetudine receptæ sunt, vel in quas expresse aut tacite ludentes consentiunt, sunt licitæ: ut si quis, advertens se lucraturum, provocet adversarium ad duplum deponendum, aut si videat errantem in numerandis signis, & non moneat: quilibet enim suas dumtaxat partes agit.

*Additio.*



## Additio.

\* Econtra fraudibus contra leges utuntur, sicque lucrum, si quod exinde reportant, restituere obligantur, *Primo*. Illi, qui plura signa, seu puncta, non advertente collatore, notant, seu numerant, quam a parte rei habent, sicque exinde lucrantur. *Secundo*. Qui chartas de industria notant exterius, ut exinde in notitiam chartifoliorum sui collatoris deveniant. Quodsi ante lusum non signassent, nec novissent, sed tantum inter ludendum easdem a tergo observare & noscere studerent, Sanchez, Lugo, & Diana apud Busenbaum hic putant, hanc fraudem esse licitam, atque in hoc lutores inter se convenire, cum etiam reliqui collutores, dummodo attendere velint, idipsum observare possent. *Tertio*. Qui de industria (secus dic, si fiat casu, & ex negligentia collutoris) se ita collocant, ut alterius chartas inspicere possint, vel alios ex spectatoribus habent, qui ipsos de sorte suorum collutorum tacite signis admonent. *Quarto*. Qui suffragantur chartas meliores, vel arte quadam ita dextre componunt, ut illas in distribuendo accipiant, vel qui falsificant aleas &c. Hi omnes (inquam) fraudes contra leges lusum exercent, & nisi inter seipsum aliter convenerint, atque expresse, vel tacite remittant, obligantur ad restitutionem lucri non solum acquisiti, verum etiam saltem illius, quod alii ab ipsis, alias certo victis, obtinissent, si similis fraus non obstitisset. *Sporer loc. cit. n. 66.*

Quodsi vero dubium foret, utrum absente tali fraude alii quidpiam fuissent lucrati Lugo apud la Croix *lib. 3. part. 2. n. 1081.* existimat, deceptorum ultra lucrum ab aliis acquisitum non teneri restituere de suis plus ultra; quia est in possessione rei suæ, ad quam alii decepti non habent ullum certum titulum, quamvis Molina putet, etiam deceptorem obligari in eo casu præter lucrum aliquid addere de suo, si probabilius appareat, alios in lusu futuros fuisse alias victores, si alter non decessisset, quia hæc spes lucrandi apud collutores in eo casu erat pretio æstimabilis, quæ fuit ipsis per deceptorem injuste ablata. \*

108 CONCL. III. An ludere principaliter propter lucrum sit peccatum, & quale? variant Doctores. Non desunt, qui id grave peccatum reputent, ut Gabriel, Abulensis, alique: quos pro hac sententia refert Lugo *disp. 31. de Just. & Jure sect. 1. n. 3.* Fundamentum eorum est: quia sic desideratur, & intenditur principaliter damnum proximi, quod pugnat contra illud decimum Præceptum Decalogi: *Non concupisces rem proximi tui.* Verum hæc sententia passim relinquitur: tum quia contra dictum Præceptum dumtaxat est, desiderare rem proximi modo illicito, v. g. cupiendo eam acquirere per furta, rapines, vel dolos, non autem modo licito, volendo, ut ea res fiat tua per justum contractum, ut puta per emptionem, donationem, ludum &c. tum quia alioquin lucrum nullatenus intendi posset, ne quidem ut finis minus principalis, quod est contra communem sensum hominum.

109 Alii itaque multi volunt, ludere principaliter propter lucrum esse peccatum saltem veniale. Ita Navarrus *c. 20. Manualis n. 7. & 8.* Azorius, & alii. Ratio eorum est: tum quia finis Ludi est recreatio licita, non autem lucrum: tum quia Ludus cum illa intentione factus continet avaritiam. Ceterum quia desiderium lucri, nisi nimium sit, non semper continet avaritiam, cum possit lucrum honeste appeti, & procurari; hinc Lugo *cit. sect. 1. n. 4.* ait, quod, quando debitæ circumstantiæ concurrerent, non sit, cur damnetur peccati venialis, qui propter lucrum principaliter ludit.

110 CONCL. IV. Nihilominus Clericis, & Religiosis Jure Canonico prohibitus est Lusus alearum. Ita habetur *Can. 41. & 42. Apostolorum*, ac refertur *can. 1. dist. 35. ibi: episcopus, aut Presbyter, aut Diaconus, aleæ atque ebrietati deserviens, aut desinat, aut certe damnetur. Subdiaconus, aut Lector, aut Cantor similia faciens, aut desinat, aut Communionem privetur: similiter etiam Lai-*

*cus.* Concordat textus *cap. Clerici officia, de vita & honest. Cleric. ibi: Ad aleas & taxillos non ludant, nec hujusmodi ludis intersint.* Et Concil. Trid. *sess. 22. c. 1. de reform.* ubi omnes antiquos Canones quoad hoc innovavit.

111 Porro nomine Lusus alearum in Jure significantur omnes illi Ludi, qui magis fortuna, quam arte & industria ludentium reguntur. Et licet Doctores advertant, textus Juris allegatos loqui de iis, qui non semel vel bis, aut ad breve tempus recreationis gratia, & in modica quantitate luserint, sed de iis, qui ejusmodi Ludo prohibito deserviunt, id est, crebro & per longum tempus ludunt, nihilominus plerique notant, Religiosos adhuc magis Lusus alearum dedecere, simulque ab ipsis propter Statum perfectiorem, & scandalum posse pravius in hoc genere delinqui.

112 CONCL. V. Lusus alearum etiam Laicis est de Jure prohibitus. Patet hoc tum *ex cit. can. 1. dist. 35. tum ex l. Alearium. C. de Aleatoribus*, ubi aliarum usus generaliter prohibetur, adeo, ut nulli liceat in publicis, vel privatis domibus, vel locis ludere, neque in genere, neque in specie, si contra factum fuerit, nulla sequatur condemnatio, sed solum reddatur, & actionibus competentibus repetatur ab his, qui dederint &c. Hæc ibi: cujus quidem saluberrimæ Constitutionis (quæ, utinam! ubique terrarum esset in vigore) ratio ibidem redditur: quia quidam sic ludentes proprias perdiderunt substantias, & consequenter blasphemare, id est, Deo male dicere conantur.

113 CONCL. VI. Utrum is, qui Ludo prohibito aliquid est lucratus, teneatur ad illius restitutionem, variant Doctores. Affirmant D. Thomas in *4. dist. 15. q. 2. art. 4.* Richardus, & alii, Communior tamen sententia tenet, acquisita Ludo prohibito posse retineri, neque necessario in Foro conscientie restituenda esse, donec per sententiam Judicis restitui jubeantur. Ita Covarruvias in *c. Peccatum. De Reg. Jur. in 6. §. 4. n. 1.* Lessius *cit. cap. 26. num. 17.* Sanning, & alii. Ratio est: quia contractus Ludi Jure naturæ habet vim transferendi rerum dominium: Jus autem tum Civile, tum Canonicum, etiam prohibeat Ludum alearum, nullibi tamen prohibet translationem dominii, neque irritum reddit contractum Ludi, sed solum concedit perdenti repetitionem in judicio, adeo ut per sententiam Judicis recuperari debeat amissum; prout desumitur ex citatis supra *n. 112.* textibus Juris. Unde inferitur, non sufficere, ut repetitio privatim fiat; aut etiam, ut fiat in Judicio, nisi sequatur condemnatio, qua victor jubeatur restituere: de hac enim loquitur *Jus loc. cit.* ac proinde ante secutam condemnationem Judicis victor nihil tenetur restituere. Lessius *n. 19.* Layman *cit. c. 21. n. 2.* & alii.

## Additio.

\* Ponamus autem, quod ille, qui cum altero instituit lusum prohibitum, dum jam plurimas pecunias deperdidit, exinde magis incallescens luserit ulterius in defectu ulterioris pecuniæ præsentis credito, & quidem denuo infortunatus iterum notabilem quantitatem perdat. Quæritur, an victor possit cogere victum ad extradendas illas promissas credito pecunias, taliter, ut victus nequeat se defendere exceptione Legis?

Resp. Victorem in simili casu neutiquam posse cogere victum, qui se defendit exceptione Legis, quæ non solum in pœnam victoris, sed etiam in favorem ipsius devicti (ne tot depauperentur) lata est: si enim actualiter solvens in tali lusu prohibito potest apud Judicem pecunias solutas repetere, multo magis quoad necdum solutas poterit se defendere exceptione Legis: nam cui damus actionem (inquit Imperator L. Inventus 156. ff. de Regulis Juris) eidem & exceptionem competere multo magis quis dixerit. Videantur desuper, uti in variis aliis casibus occurrentibus extraordinariis la Croix *lib. 3. part. 2. num. 1097. ac seqq.* Sporer *tract. 6. in Decalog. cap. 6. sect. 4. num. 83.* & apud hos plures alii. Optandum sane foret, ut ad has leges tam salutes reflecterent supremi Principes, & ubi tales ludos vel maxime prohibuerunt (ne nimirum per excessivam rerum suarum



perditionem depauperentur Liberi cum Uxoribus, imo saepius integræ Familiæ) pariter dictas Leges executioni mandarent.\*

114. CONCL. VIII. Quantum ad alteram partem Quæstionis attinet, *Sponsio* est contractus, in quo duo aut plures de veritate, vel eventu alicujus rei contendentes sibi vicissim aliquid spondent, ut ejus sit, qui veritatem sit assecutus. Ita in re communis. Et quidem Sponsionis contractus est Ludo valde affinis, ac proinde, quæ de Ludo dicuntur, possunt servata proportionē ad hunc contractum applicari.

115. Quæres autem, an certus de eventu, vel veritate rei possit nihilominus Sponsionem inire, atque inde lucrum accipere? Resp. Regulariter loquendo non posse. Ratio est: quia tunc vel error dat causam contractui; neque enim quisquam censetur velle spondere cum eo, qui habet certitudinem rei: vel saltem non servatur æqualitas, cum hic, utpote certus nulli periculo perendi sese exponat, bene tamen alter.

116. Dicitur, *regulariter loquendo*: nam inprimis ille, qui a principio certus videbatur de veritate rei, quam sustinebat, si postea altero pertinaciter contradicente, ac spondere volente, incipiat formidare, & dubitare, advertens, jam alias contigisse, ut deceptus fuerit etiam in iis, quæ sibi prius certa apparebant, poterit tunc licite lucrari propter aliquale illud periculum, cui in sua existimatione se exposuit. Ita Lugo *cit. disp. 31. n. 79.* Molina, & alii.

117. Deinde si habens certitudinem protestetur alteri, se esse certum, nec velle, nec posse spondere, eo quod nulli periculo se exponat, & tamen ille alius concedat, velitque spondere, non obstante certitudine illa, multi Doctores volunt, Sponsionem acceptari, lucrumque retineri posse. Rationem dant: quia tunc nulla intervenit fraus, aut injuria, sibi que debet alter imputare suam temeritatem. Sunt tamen alii Doctores, qui id negant, eo, quod tunc non servetur æqualitas, quæ requiritur ad contractum Sponsionis, ut uterque aliquale periculum subeat, possitque & vincere, & vinci. Lugo ibidem *n. 18.* & alii. In praxi expeditius erit, sequi dicta *n. preced.*

118. Quæres, quid sentiendum de juramento, & voto non amplius ludendi, vel spondendi? Resp. I. Quamvis Ludus secundum se sit res indifferens, & quæ potest bene vel male fieri, nihilominus votum, vel juramentum de abstinendo a Ludo validum est. Ita Sanchez *lib. 3. in Decalogum c. 18. n. 1.* Lugo *loc. cit. n. 2.* contra paucos alios, qui putarunt, votum vel juramentum de abstinendo a quolibet Ludo, etiam licito, esse invalidum, eo quod Ludus licitus sit actus virtutis Eutrapeliæ. Probatum autem conclusio a simili: quia valet votum & juramentum abstinendi a Matrimonio, quod tamen res bona est, & Sacramentum; ergo multo magis abstinendi a delectatione Ludi, ut quis Deo amplius vacare possit vitareque peccata non raro inter ludendum fieri solita: nam hæc voluntas est de meliori bono.

119. Hoc tamen intelligendum est de voto, vel juramento deliberate facto, atque ad bonum finem ordinato: alioquin enim, sicut generaliter votum, vel juramentum de re indifferenti, atque in DEI honorem nullatenus conducente non valet, ita & in proposito fieret.

120. Resp. II. Quando violatio talis juramenti, vel voti sit grave vel leve peccatum, desumendum est ex intentione jurantis, vel voventis. Ratio est: quia votum, & juramentum est quædam privata lex, quam quis sibi ipsi propter Deum imponit; ergo eatenus aliquis obligabitur, quatenus intendebat sese obligare. Unde vovens, vel jurans deliberate, quod velit abstinere ab omni Lusu, sive illicito, sive licito, sive in magna, sive in modica quantitate, tenebitur abstinere ab omni: secus, si vovit, vel juravit solum abstinentiam ab illicito, vel Lusu magnæ quantitatis.

121. Resp. III. Quando non constat de expressa ju-

rantis, vel voventis intentione, tunc ea ex ipsius fine desumenda erit. Ita Sanchez *loc. cit. n. 3.* idque declaratur inductione. Sic inprimis, quando finis jurantis fuit, privare se temporali hac delectatione, ut peccata sua punire, Deoque magis servire valeat, & si non constet de alia ejus intentione, censetur sub hoc juramento omni Lusu, sive magnæ, sive parvæ quantitatis renunciasse, & tunc, an fractio sit mortalis, vel venialis, judicandum est ex duratione Ludi: ubi, Lusus non extendatur ad duas horas, Castropalao, & Tamburinus cum Sanchez *lib. 3. c. 18. n. 7.* excusant a mortali. Quod si finis jurantis, vel voventis fuit vitare jacturam pecuniæ, ipsamque prodigalitatem, tunc ex quantitate pecuniæ Ludo exposuenda pensanda erit quantitas culpæ; imo si tunc ludatur in levi dumtaxat quantitate, nullum erit peccatum.

#### Additio.

\* Quæres ulterius, quid adhuc addendum sit circa votum non ludendi? Resp. sequentia. I. Si quis vovit eo fine, ut evitet rixas, blasphemias, aut juramenta, supposito, quod hæc alias nascantur ex lusu a se facto nomine proprio, talis poterit adhuc ludere pro alio, quia hic lusus non censetur in simili casu per votum exclusus. Item loquendo de se ipso, poterit tertio dare pecunias, ut is ludat loco sui, item poterit facere Sponsiones de hoc vel illo lucrato; nam talis proprie non ludit ipsemet: adeoque in odiosis non est ad ista facienda extensio in his circumstantiis. II. Si quis in vindictam, ac signum male voluntatis & aversionis cum certo homine vovisset non ludere, votum tale non adstringeret, cum id non sit vinculum iniquitatis. III. Si quis vovisset non ludere cum certo homine, vel in certa domo &c. quia firmiter sibi persuadet, se cum isto homine determinato, vel in illa domo nil posse lucrari, simile votum pariter non teneret, cum foret de re vana, & quasi superstitiosa. Ita quoad omnia la Croix *lib. 3. part. 1. n. 454. § seqq.* Secus tamen puto dicendum, si quis vovisset non ludere cum hoc homine, quia experientia jam fuit doctus, quod saepius blasphemaverit ob mirabilem, & rixosum modum agendi ejusdem, si cum ipso lulum instituit.

### QUESTIO X.

#### De Contractu Societatis.

#### SUMMARIUM.

- 122 *Societas quid?*  
*Et frequens in negotiationibus.*
- 123 *Socii qui?*
- 124 *Societatis Contractus quomodo differat mutuo?*
- 125 *Societas expressa, tacita, quæ?*
- 126 *Societas vite, &*
- 127 *Societas bonorum.*  
*Societas questuosa, quæ?*
- 128 *Ad hanc requiruntur quinque conditiones.*
- 129 *Prima.*
- 130 *Secunda.*
- 131 *Tertia.*
- 132 *Quarta.*
133. & 134. *In Societate an sit licitum pactum de associatione sortis principalis?*
- 135 *Quelibet res domino suo perit, quomodo?*
- 136 *Instantia ex Bulla Sixti V. resolvitur.*
- 137 *Instantia alia solvitur.*
- 138 *Quinta Societatis conditio quæ?*
- 139 *In Contractu Societatis de qua culpa teneatur socii?*
- 140 *Corollarium.*
- 141 *Hujusque declaratio.*
- 142 *Expense factæ causa Societatis sunt solvenda ex communi.*
- 143 *Nisi*



- 143 *Nisi secus fuerit conventum.*  
 144 *Idem dicendum de moderatis elemosynis,*  
 145 *Et integris a Socio in itinere factis,*  
 146 *Et damnis sine sua culpa ex causa Societatis incurfis.*  
 147 *Secus si Socius ex sua culpa in damnum incidit.*  
 148 *Vel non ex causa Societatis.*  
 149 *Societas finitur plurimis modis. I. II. III.*  
 150 *IV. Morte naturali socii;*  
 151 *Imo & morte civili ejusdem.*  
 152 *V. Interitu rei,*  
 153 *Et egestate socii*  
 154 *Societas finita qualiter facienda sit divisio bonorum?*  
 155 *Societati suas operas locans, an eas etiam alteri locari possit?*  
 156 *Et quomodo secus?*

122 **C**ONCL. I. Societatis est honesta duorum pluriumque conventio, ad commune lucrum, secundum proportionem rerum contributarum inter eos æque distribuendum, suam pecuniam industriam seu laborem conferentium. Ita desumitur ex L. 4. § seqq. ff. Pro socio, estque in re communis. Et quidem contractus Societatis est frequentissimus in negotiationibus, præsertim copiosioribus, eo quod ad hæc exercendas sæpe facultates unius non sufficiant; vel saltem ob multa pericula, quæ terræ marique oriri solent, non sit consultum, ut quis omnes suas facultates simul uni eidemque negotiationi impendat, sed commodius id fiat, si plurium opes atque industriæ cum æquali omnium lucro, & damno, in unum conferantur.

123 Porro qui contractum Societatis inter se ineunt, in Jure appellantur *Socii*; ut liquet ex toto Tit. ff. de Pro Socio. Ubi L. 19. § 20. additur, quod si ego cum Titio ineam societatem, Titius possit quidem secum admittere alium socium; puta, Cajum; nihilominus per hoc Cajus non sit meus socius (nam quia Societas consensu contrahitur, socius mihi esse non potest, quem ergo socium habere nolo) sed is solus Titii, qui eum admittit, socius existat: unde *Socii mei socius, meus socius non est*, prout loquitur Ulpianus ibidem.

124 Differt autem contractus Societatis a contractu Mutui, juxta D. Thomam 2. 2. quæst. 78. art. 3. ad 5. & alios, vel maxime ex eo, quod licet utrobique interveniat aliqua contributio pecuniæ, sed aliarum rerum, hæc tamen fiat valde diverso modo. Siquidem in Mutuo dominium rei mutuatae transferitur in Mutuatarium: unde ille, cui pecunia mutuatur, sub suo periculo tenetur eam restituere integre; ac proinde non potest plus exigere ille, qui mutuavit. Secus accidit in contractu Societatis: nam dominium rei in societatem collatæ remanet adhuc penes conferentem, ita quod cum periculo ipsius mercator, seu socius de ea negotietur, vel artifex operetur, & ideo licite potest partem lucri inde provenientis expetere, tanquam de re sua.

125 **C**ONCL. II. Societatis plures sunt species. Imprimis enim alia est expressa, alia tacita. Societas expressa est, quæ verbis, seu litteris expressis de rerum suarum communione inter duos, vel plures deliberate contrahitur: atque in hac oportet attendere, specialia pacta contrahentium, contractui Societatis nonnunquam legitime opponi solita; siquidem contractus ex conventionem legem accipere dignoscuntur, juxta Reg. 85. Juris in 6. cum similibus. Societas tacita est, quæ sive verbis, seu litteris, per actus sociales rebus ipsis contrahitur: uti contingit, si duo fratres ætate majores quidpiam in commune contulerunt, atque ex eo negotiati sunt. Atque in hac proceditur secundum ipsam naturam Societatis ut sic, eo quod nulla specialis conventio intervenerit.

126 Deinde Societas alia est vitæ, alia bonorum.

*Societas vitæ* dicitur, quando duo, vel plures conjunctim vivunt ad unum panem, & vinum, seu (ut dici solet) ad eandem mensam. Et tales debent conferre suos redditus, seu proventus, usque ad necessitatem victus; ita tamen, ut si unus eorum in convictu ex laboribus suis, vel bonis adventitiis, plus contulerit præ alio, id reperere non possit: nam fructus consumpti, jure Societatis vitæ censentur invicem communicari. Reliqua tamen bona non rediguntur in commune, sed remanent singulorum propria. Franciscus Mantica lib. 6. de Tacitis Conventionibus, tit. 2. num. 5. & tit. 3. num. 12.

127 Societas bonorum e contra dicitur, quæ initur in bonis. Atque hæc juxta diversitatem bonorum subdividitur in Societatem animalium, in Societatem officiorum, ac vectigalium; item in Societatem omnium bonorum, & in Societatem aliquorum bonorum; puta ratione negotiationis in unum collatorum, quæ dicitur Societas quæstiosa, & lucratoria. Et de hac posteriori præcipue nunc loquimur, quamvis illa, quæ de Societate quæstiosa in progressu dicuntur, etiam cæteris (servata tamen proportione) commode applicari possint.

128 **C**ONCL. III. Ad Societatem quæstiosam, ut sit licita, quinque requiruntur conditiones, quarum una deficiente redditur illicita. Ita Reginaldus in Praxi Fori Penitentialis. l. 25. c. 28. num. 38. & seq. Bonac. tom. 2. disp. 3. de Contractibus, q. 5. punct. 1. num. 3. & alii.

129 Prima conditio est, ut Societas fundetur in negotiatione licita, & honesta: hoc est, ut negotiatio illa, cui sortes conferuntur, sit licita, nec in Jure prohibita. Unde iniqua, & invalida est Societas, quæ initur ad exercendas usuras, aut committendas fraudulentas emptiones, & venditiones, l. Nec permittendum, ff. Pro socio. Sicut & ipso jure nullius est momenti Societas illa; quæ dolo malo, aut fraudandi causa inita fuit uti contingit in latronibus, & hujusmodi, L. 3. § fin. ff. eod.

130 Secunda. Ut singuli Socii aliquid conferant in commune, sive deini contribuant pecuniam, aut alia bona, sive operam, seu industriam suam: nam pauperiores plerumque supplent opera, quod alii præstant pecuniis, l. Societas, §. 5. Pro socio. In tali enim communi collatione bonorum, seu laborum, consistit natura contractus Societatis: ut liquet ex ejus definitione, juncta cit. c. 5. & seqq. ff. eod.

131 Tertia. Ut fervetur æqualitas inter Socios tam quoad damna, quam quoad lucra: ita videlicet, ut pro rata collatæ sortis, aut industriæ, singuli æqualiter lucrentur; vel pereunte per casum fortuitum communi sorte, sive parte ipsius, omnes æqualiter damnum sustineant. Et notanter dicitur, pro rata collatæ sortis, &c. Quia lucrum, sicut damnum emergens, est computandum juxta proportionem quantitatis per singulos ad sortem principalem collatæ, vel impensæ industriæ; Ut si Titius ad sortem principalem contulit 900. & Cajus 600. Mævius vero impendit operam suam æstimatam 100. ac detractis omnibus expensis, remaneat lucrum 640. florenorum, tunc Titio ex hoc lucro, juxta proportionem collatæ sortis principalis, debentur 360. Cajo 240. Mævio 40. floreni; prout facile deprehenditur per Arithmeticam mediante Regula Aurea, vulgo *Del tre* appellata, sed specialibus ad propositum loquendo, per Regulam Societatis.

132 Quarta conditio, ad justitiam quæstiosæ Societatis requisita, est: Ut fors principalis, seu pecunia per socium in commune collata, subjaceat periculo conferentis: ita ut si pereat absque culpa socii, pereat illi, qui eam in commune contulit. Nam quælibet res domino suo perit: atqui dominus pecuniæ in communem sortem collatæ, est ipsemet conferens, ut dictum num. 124. Navar. c. 17. Manu. num. 251. & seqq. Covarr. l. 3. Var. Resol. c. 2. Concl. 1. & 2. Bonac.



2. Bonac. cit. quest. 7. punct. 1. num. 4. cum aliis. Quinimo Sixtus V. in sua 55. Constitutione, quæ incipit, *Detestabilis avaritia* (& habetur tom. 2. Bullarii Romani) ex professo damnat, & tamquam usurariam pravitatem sapientes reprobant omnes contractus, conventiones, & pactiones, quibus cavetur, ut in singulos annos, aut menses per alterum socium, durante Societate certa lucris quantitas, & summa, veluti tot pro quolibet centenario solvatur, ac nihilominus fors ipsa principalis, etiam si fortuito casu quamlibet jacturam, vel amissionem sequi contingerit, semper alteri maneat, & integra a socio recipiente restituatur: talis enim pactio videtur sapere usuram palliatam.

133 Controvertunt nihilominus D.D. utrum his non obstantibus in Societate licitum sit pactum de assecuratione fortis principalis, saltem sub præstatione justii pretii pro imposito assecurationis gravamine; vel ea lege, ut remisso in compensationem dicti gravaminis majori lucro incerto, velit quis esse contentus modico dumtaxat lucro, certo tamen, puta quinque pro centum in annos singulos sibi præstandis? Negant non pauci, licitum esse tale pactum assecurationis; idque ob rationes *nam. preced.* allatas, ut Sotus l. 6. de justit. quest. 6. art. 2. Azor. part. 3. lib. 9. cap. 3. quest. 9. & quidam alii, quos citat Lugo disp. 30. de just. & jur. sect. 4. n. 39.

134 Oppositam tamen, seu affirmativam sententiam esse jam satis communem, & veriore, censet Lugo loc. cit. num. 40. & seq. Lessius lib. 2. de justit. & jur. cap. 25. dub. 3. num. 23. Navarrus cap. 17. Manu. num. 254. Covarruvias lib. 3. Var. resolut. cap. 2. concl. 3. Layman lib. 3. sect. 5. tract. 4. cap. 20. num. 2. & 4. Bonacina cit. punct. 1. num. 3. vers. *Dixi nisi*, Reginaldus lib. 25. cap. 29. num. 396. & seqq. cum pluribus aliis, quos citant. Fundamentum hujus sententiæ desumitur ex l. Si non fuerint, ff. Pro socio: ubi dicitur, Ita coram Societatem posse, ut nullam partem damni alter sentiat, lucrum vero commune sit, si tanti sit opera quanti damnum est, hoc est periculum damni subeundi, ut explicat Gloss. ib. vers. *Damnum est*. Accedit ratio, quia contractus assecurationis, seu suscipiendi periculum rei alienæ, est pretio æstimabilis, ac de jure licitus, arg. l. in nave, ff. Locati: ergo potest conjungi contractui Societatis, cæteroquin pariter licito: nullo enim jure reperitur prohibitum, duos contractus cæteroquin licitos conjunctim fieri, & permisceri. Atqui ita fit in contractu illo Societatis, ubi periculum fortis amittendæ alter socius redimit præstito justo pretio, vel remittendo spem majoris lucris: ergo.

135 Nec obstat, quod quælibet res domino suo pereat. Nam hoc verum est regulariter loquendo, ac secluso speciali pacto, quo quis periculum rei alienæ sponte in se suscipit; alias secus. Sic quippe in simili Commodatarius, vel Depositarius regulariter non tenetur de casu fortuito, quo res commodata, vel deposita absque sua culpa perit: secus tamen, si præcessit pactum de præstando casu fortuito c. nu. de Commod. & c. 2. de Locato, cum similibus.

136 Ad allegatam Sixti V. Constitutionem inquit Lugo cit. disp. 30. sect. 4. num. 37. allegans plures alios, ipsummet Sixtum V. de sensu dictæ Bullæ interrogatum respondisse, se in ea solum voluisse prohibere injustos contractus, & conventiones solitas Societatibus apponi, quas Classici Doctores condemnarent, non autem eas, quas iidem approbarent, tanquam justas. Accedit Rota in decis. Romana Societatis die 3. Junii 1602. coram Coccino, ubi censuit, dictam Bullam comprehendere solum casus usurarios de Jure communi, additis tamen majoribus poenis. Id ipsum suadet ex eo, quia post memoratam Bullam Sixtinam passim similes contractus celebrantur: ut de Lusitania, Belgio, aliisque Provinciis testantur Molina, Lessius, & alii. Quare dicendum, hanc

fuisse mentem Pontificis, vel certe Bullam illam aliter non esse usu receptam. Ita discuit Lugo ubi supra.

137 Ad ultimum negatur Assumptum. Licet enim pactio illa sapiat usuram palliatam, quando ex vi solius Societatis sit pactum de assecuratione fortis principalis; secus tamen est, quando expresse, vel tacite apponitur alius contractus, quo redimitur periculum amittendi fortem principalem præstando aliud justum pretium, vel in ejusdem compensationem, remittendo spem majoris lucris incerti, ut dictum.

138 Quinta tandem conditio, ad licitam Societatem requisita, est, Ut justa pacta ab initio inter Socios inita ferventur, vel si nihil expresse conventum est, loci consuetudo attendatur: simulque non immisceatur fraus dolus sive deceptio aliqua, aut alia culpa ex parte sociorum; alioquin ea hoc ipso foret injusta, & induceret obligationem restituendi damnum inde secutum etiam pro Foro conscientie. Sic fieret, quando administrans communem pecuniam Societatis, inde clam fraudaret, surripiendo in suos privatos usus: vel quando lucrum proveniens, non fideliter ex æquo divideretur inter socios pro rata contributæ fortis principalis; item, quando ex culpa socii perit communis pecunia, vel lucrum, aut pars ipsius. Quæ omnia et clarius intelligantur, sit

139 CONCL. IV. In contractu Societatis, si quid pereat casu fortuito, & absque culpa sociorum, damnum censetur commune, juxta dicta num. 131. alioquin vero tenetur socius de dolo, culpa lata, & levi, non autem de levissima. Ita desumitur ex l. Socius socio, ff. pro socio, & §. ultim. instit. de Societate, ac tradit Angelus in Summa v. Societas 1. num. 16. Lessius decis. 25. num. 37. Bonac. cit. quest. 7. punct. 2. num. 3. vers. *Dixi in quarta*, & alii. Nam quia contractus Societatis celebratur in utilitatem utriusque, consequens est quod præstetur non solum dolus, & culpa lata, sed etiam levis, non autem levissima arg. l. Si ut certo, §. Nunc videndum est, ff. Commodati, estque jam dictum supra tract. 8. disp. 2. num. 45.

140 Infertur proinde, quod si aliquid damni acciderit, ex culpa saltem levi ipsius socii, & si res communes furto fuerint ablata ex defectu debite custodiæ, tale damnum non futurum commune: quinimo socius ille, qui ejusmodi culpam commisit in non diligenter custodiendo, tenetur cæteris sociis ad restitutionem. Lessius, Bonacina, ubi supra, & alii. Idemque dicendum de similibus: quamvis loquendo pro Foro conscientie, & ante sententiam Judicis, hoc ipsum non nihil limitetur supra cit. disp. 2. n. 46. & seqq.

141 Solum adde, quod quando unus socius ab aliis convenitur propter ea quæ ratione Societatis debet, is non sit condemnandus in plus, quam commode facere potest, ita ut non negat. Textus est in l. Verum est, §. 1. ff. pro socio, addita illa congruentiæ ratione: *Hoc enim summam rationem habet: cum Societas jus quodammodo fraternitatis in se habeat*. Quamquam istud intelligendum sit, dummodo socius dolo non fecerit, quo minus integre satisfacere posset, cit. l. Verum est, §. Tempus autem. Simulque cautionem præstet de integre satisfaciendo, si pervenerit ad meliorem fortunam, d. l. Verum est, §. Id facere. Layman lib. 3. sect. 5. tract. 4. cap. 20. num. 6.

142 CONCL. V. Expensæ non superflue causa Societatis factæ a socio apponente industriam sunt communes, ac solvendæ ex communi pecunia Societatis; nisi aliter conventum sit inter socios, vel consuetudine receptum. Ita Angelus vers. Societas 1. num. 22. Reginaldus lib. 25. num. 395. Bonacina cit. disp. 3. de contractibus, q. 6. puncto 4. num. 3. & alii. Ratio est, quia lucrum inter socios dividendum, non intelligitur, nisi deductis necessariis expensis, l. Mutuus, ff. pro socio, sicut & fructus solum intelliguntur deductis necessariis expensis, l. Fructus, ff. de operibus



bus fervor. cum similibus. Et hinc juxta Doctores passim, necessariae illæ expensæ, quas facit socius in transportandis, vel conservandis mercibus, & aliæ hujusmodi, solvi debent ex communi pecunia Societatis.

Intellige, nisi antea conventum fuerit inter socios ut is ex propriis pecuniis necessarias expensas solveret, quas postmodum reciperet à cæteris sociis; Aut nisi hoc ipsum consuetudine receptum sit; prout accidit, quando pro conservatione mercium, vel pro acquisitione desiderati lucri, expensæ quædam necessario sunt faciendæ, nec amplius suppetit pecunia, quæ extrahatur ex communibus bonis Societatis: tunc enim socius negotiator non solum ex præcepto Charitatis, sed etiam ex lege Justitiæ, tenetur dictas expensas facere ex propriis bonis postea tempore eas recepturus a sociis; vel, si non habet proprias pecunias, debet has mutuo petere ab aliis. Ita Lessius cit. c. 55. num. 35. Bonacina d. punct. 4. num. 5. Layman. cit. c. 20. num. 5. & alii. Siquidem socius negotiator ratione contractus Societatis (& consequenter etiam ex justitia) tenetur adhibere pro conservandis bonis communibus eam diligentiam, quam quisque diligens adhibere solet circa res proprias, alioquin is committeret culpam saltem levem: atqui in dicto casu quisque diligens impenderet suas pecunias, vel si non haberet, mutuo acciperet alienas, ne majus damnum incurreret; ergo ad hoc ipsum tenetur socius, & quidem ex justitia.

144 Ampliatur Conclusio ad moderatas Eleemosynas, quales socius ponens industriam facere potest ad invocandum Divinum auxilium pro felici successu Societatis; nam etiam istæ ex communibus bonis solvendæ sunt. Layman 10. n. 5. Bon. loc. cit. punct. 4. n. 3. & 4. allegans alios.

145 Ampliatur ulterius Conclusio ad integras expensas, quas facit socius in itinere causa Societatis suscepto. Licet enim Sylv. vers. Societas 1. quæst. 12. Angelus cit. num. 12. & nonnulli alii existiment, huic deducendas esse illas impensas quas socius ille domi fecisset; nihilominus magis accomodate ad Jura, & praxin, videtur dicendum integra impendia itineris ex communi sorte esse præstanda, art. 1. Si fratres, §. Si quis ex sociis, ff. Pro socio. Huic quippe socio propter Societatem proficiscenti (veluti ad merces emendas) viatica indistincte conceduntur ex bonis Societatis, Navar. c. 17. Man. n. 285. istud intelligens, nisi pactum in contrarium intervenisset. Lessius cit. c. 25. n. 35. Layman. ubi supra num. 5. Bonac. punct. 4. n. 3. cum aliis.

146 Ampliatur tertio, quod si socius absque culpa sua, etiam levi, ex causa Societatis damnum incurrit (ut puta, quia resistendo prædonibus volentibus auferre bona Societatis, vulneratus est, multasque postea expensas fecit ad se curandum) etiam tales expensæ sint communiter faciendæ. Textus est in l. Cum duobus. §. Quidam, & l. Secundum Julianum, §. Pro socio; ac tradit Angelus vers. Societas 1. n. 15. Layman cit. c. 20. n. 5. Bonacina punct. 4. n. 1. & communis aliorum.

147 Additur notanter, Si socius absque culpa sua, etiam levi, &c. Nam secus dicendum, si socius ex sua culpa in tale damnum incidit, v. g. provocando alium rixis, in quibus postea sauciatur. Tum quia is tenetur de culpa, etiam levi, ut dictum n. 129. & seqq. Tum quia æquum non est, ut Societas damnum patiatur ex culpa alicujus socii: cum peccata suos auctores tenere debeant, c. de his que sunt a maj. p. cap. Simulque non debeat alteri per alterum iniqua conditio inferri, l. Non debet, ff. de Reg. Jur. cum similibus.

148 Additur ulterius, ex causa Societatis. Nam damna propria, quæ socius aliunde incurrit, puta si ob privatas inimicitias ab aliquo vulneratus sit, aut aliquid ipsi ex propriis rebus furto ablatum fuerit, non debent esse communia. Talia enim non venerunt in Societatem l. Socium qui, §. fin. ff. Pro socio; & quia nec proveniunt ex causa Societatis, nulla subestratio obligans cæteros

socios ad refarcienda hujusmodi damna. Accedit, quod etiam lucra, quæ non ex causa Societatis, sed aliunde, v. g. ex paterna hereditate proveniunt, nequaquam sint communia; idem ergo dicendum de damnis aliunde socio obveniennibus. Bon. loc. cit. & alii.

149 CONCL. VI. Societas pluribus modis finitur, qui recensentur in l. Verum est 64. & l. Actione 66. ff. Pro socio. Et quidem I. Finitur Societas finito tempore ad Societatem constituto, cit. l. Actione, §. Item qui Societatem. II. Finita negotiatione, d. l. Actione, §. Item si alicujus. III. Per renuntiationem, seu consensum mutuum omnium sociorum: alias vero, si unus dumtaxat renunciaret, ipse quidem a se liberabit socios suos, se vero non liberabit ab ipsis, quando Societatis interfuit non dirimi tunc Societatem; prout amplius declaratur in l. Actione, §. Diximus.

150 IV. Finitur Societas morte naturali unius socii, etiam si Societas cum pluribus contracta fuerit, & plures supersint, cit. l. Actione, §. Morte unius, & l. Verum, §. Societas solvitur, ff. Pro socio. Etenim in Societate eligitur industria personæ; qualis expirat superveniente morte naturali socii, ignoratur enim qualis futura sit industria hæredis, atque ideo hæres defuncti socii non succedit in locum ejus, nisi novo consensu ineatur societas, l. Nemo potest, & l. Plane si bi, ff. eod.

151 Atque istud extenditur ad mortem etiam civilem cujuscumque sociorum, cit. l. Verum, §. Societas solvitur, qualis censetur incurrere per exilium, imo & per Professionem Religiosam. Bonac. cit. disp. 3. q. 6. punct. ult. m. 4. Regin. l. 25. n. 175. & alii.

172 V. Solvitur Societas interitu rei: hoc est, quando vel fors capitalis periit in totum, vel conditionem ita mutavit, ut non amplius sit in commercio hominum, puta, quia facta est Religiosa, Deoque consecrata, cit. §. Societas solvitur. Addit. Bon. loc. cit. num. 5. post Sylvest. vers. Societas 1. q. 14. & alios, Societatem finiri non solum, quando tota pecunia capitalis interit, sed etiam, quando modica, & exigua dumtaxat remansit quia non censetur alter socius in tali casu se voluisse obligare ad præstandam operam suam, quæ est longe majoris valoris.

153 Tandem Societas finitur, egestate alterius socii: ut quando ejus bona publicantur, aut oppressus ære alieno cedit bonis suis, cit. l. Actione, §. Publicatione, ff. Pro socio. Idemque dicendum, quando alter socius jam depauperatus non potest contribuere promissam pecuniam, vel quando is promissit operam suam, sed hanc ob supervenientem infirmitatem præstare nequit. Bonac. cit. num. 5. cum aliis.

154 CONCL. VII. Finita Societate divisio bonorum, seu lucri provenientis, facienda est inter socios ad æqualitatem, juxta proportionem illius, quod quisque contulit in Societatem, ita ut qui æqualiter contulerunt pecuniam vel industriam, æque lucrum recipiant; inæquale vero qui inæqualiter contulerunt. Ita communis, & ratio est; quia hujusmodi divisionem æqualem lucri inter socios exigit naturalis æquitas, & virtus justitiæ; sic enim unicuique datur, quod ipsi debetur. His accedunt dicta num. 131.

155 Quæres, utrum is, qui Societatem quandam iniens operas suas ad ejus expeditionem obligavit, licite possit aliam adhuc Societatem inire, suasque operas eidem impendere. Resp. Licite hoc fieri, quoties istud quis præstare potest absque præjudicio prioris Societatis, alias secus. Ita Bonac. ubi supra quæst. 1. n. 4. post Molin. disp. 419. Rebell. lib. 10. q. 8. n. 4. & alios communis. Ratio prioris partis est; quia tunc nullam facit injuriam sociis prioris societatis, neque violat pactum cum eisdem initum; censetur enim solum se priori Societate obligasse, quatenus opus est ne Societas damnum patiatur, alioquin, si ultra nihil agere liceret, potius præberetur causa oriandi.

156 Altera pars de se patet. Quia iniens secundam Societatem



cietatem cum præjudicio prioris ageret contra justum Societatis contractum cum priori jam initum; unde non solum peccaret, sed etiam teneretur ad restitutionem omnium damnorum, si qua exinde de sociis prioris Societatis obveniant; faceret enim contra justitiam, non servando pacta ipsis promissa cum eorundem præjudicio. Sicut a pari famulus, qui ab uno domino conductus fuit, alterius domini negotiis sese immiscere non potest cum præjudicio prioris; alioquin teneretur huic ad restitutionem damni illati, cum ex vi contractus conductionis teneatur huic fideliter deservire, omneque damnum ipsius, quantum potest, avertere.

### QUESTIO ADDITIONALIS.

#### De Locatione, & Conductione.

#### SUMMARIUM.

- \* *Locatio, & Conductio, quid & quotuplex? Additio I.*
- \* *Locator rerum ad quæ obligetur? Addit. II.*
- \* *Deducuntur ex obligatione Locatoris varii casus. Add. III.*
- \* *Locator operarum quales habeat obligationes? Addit. IV.*
- \* *Quas obligationes contrahat Conductor rerum? Add. V.*
- \* *Item quales Conductor operarum? Addit. VI.*

**Q**uoniam Locatio & Conductio æque, ac Emptio & Venditio, Contractus onerosus ultro citroque obligatorius existit, atque de eodem non raro variae difficultates etiam in Confessionali proponuntur, merito, dum in præsentis Distinctione de Contractibus oneris agitur, hæc ultima Quæstio annectitur succincte per quæ sita examinando magis necessaria, ac quoad residua Lectorem ad Jus Canonicum dicti Auctoris lib. 3. decret. tit. 18. remittendo. Itaque sit

#### Additio I.

\* Quæres I. Quid, ac quotuplex sit Locatio & Conductio, & quomodo ab aliis contractibus distinguatur? Ante Responsionem nota, quod, sicut Emptio & Venditio ex seipso, ita pariter Locatio & Conductio sit unus contractus, sub diverso tamen respectu; nam sicut prior contractus respectu venditoris dicitur Venditio, & respectu emptoris Emptio, ita in præsentis Contractus hic dicitur Locatio respectu locantis, & Conductio respectu conducentis. H. N.

Resp. I. Locatio Conductio est ille Contractus, quo usus, vel etiam usus fructus rei, aut opera, seu labor Persona pro certa mercede alteri conceditur. Ita in re communis. Porro ille, qui dat mercedem Conductor, alter, qui pro concessio usu rei, vel pro opera ac labore accipit mercedem, Locator vocatur. Differt autem Locatio & Conductio imprimis ab Emptione & Venditione; quia in Emptione per traditionem transfertur dominium rei in Emptorem, non sic in præsentis in Conductorem: item in Emptione & Venditione debet pretium consistere in numerata pecunia, non sic necessario in Locatione, & Conductione. Secundo differt ab Emphyteusi; quia ibi a Domino directo (ut ex supra dictis patet) conceditur Emphyteutæ Dominium utile rei pro Laudemio, quod pariter non contingit hic. Tercio differt a Commodato, quia ibidem res aliqua ad usum conceditur gratis; hic autem interveniente mercede.

Resp. II. Præter plures Locationis - Conductionis divisiones apud Juristas videndas, alia est Locatio rerum, & alia operarum, uti ex ipsa definitione Locationis jam colligi potest. Item loquendo de Locatione ipsarum rerum, alia est, qua res aliqua conceduntur ad solum usum, uti domus, vel equus; alia, qua res dantur etiam ad fructus ex illis percipiendos, ad quam reducitur illa conventio, mediante qua grex ovium, vel vaccarum locatur ea conditione, ut Conductor singulis annis certam quantitatem lanæ, butyri vel casei Locatori præbeat &c. vocaturque talis Locatio apud Italos 'Soci-

da. Item est alia Locatio, qua Conductor pro re sibi locata porrigit pecuniam, uti contingit ordinarie, quamvis non necessario: alia vero, qua e. g. prædium rusticum non pro pecunia, sed pro certa parte fructuum impensis, & periculis Conductoris consignatur: qui contractus solet vocari *Affidus*. Demum alia etiam Locatio, qua tantum certæ res particulares in contractum veniunt, & alia, qua integræ alicujus Provinciæ, vel districtus fructus, & redditus alteri conceduntur, diciturque *Admodiatio*. \*

#### Additio II.

\* Quæres II. Ad quæ obligatur Locator rerum? Ante Responsionem nota, præprimis in Locatione & Conductione rerum attendendum esse ad speciales desuper conventiones, & locorum consuetudines particulares juxta l. 19. c. de Locat. & Conduct. abstrahendo autem ab hisce, & insistendo Juri. Resp. Locatorem obligari ad sequentia I. Ut, regulariter loquendo, concedat usum rei locatæ conductori modo, & tempore per conventionem determinato l. 15. ff. Locati Conducti, nisi tamen conductor re locata ad alios usus, quam ad quos vi contractus concessa est, abutatur cum periculo notabilis destructionis ipsius domus, vel etiam incendii, quale foret, si incio prævie Locatore exerceretur alchimia, similia laboratoria erigerentur, vel si in illa domo conductor male aut perverse versaretur, e. g. commercia meretricia introducendo, de quo fundate Schmid in Comment. Bavar. II. Obligatur Locator, ut rem locatam taliter præparet, vel deterioratam ita reparet, quatenus conductor eadem ad finem suum commode uti, vel frui valeat juxta l. 15. §. 1. & l. 25. §. 2. ff. Locati Conducti. III. Ut præter tributa, aliave similia onera, si quæ imponuntur l. un. ff. De via publica, & si quid in ea factum. IV. Ut refarciat damna ex vitio rei locatæ non manifestato, aliave ex culpa lata Locatoris, vel etiam levi, conductori causata l. 19. ff. Locati Conducti. V. Ut refundat conductori expensas forsitan ab eo factas in rem ipsam locatam, & quidem non tantummodo necessarias, verum quoque utiles, etiam suo modo majores; dummodo post tempus Locationis hæc utilitas adhuc duret, & sequens adhibeatur distinctio, ut, si utiles fuerint majores, requiratur prævius consensus Domini, secus, si essent respectu modicæ: quoad voluptarias autem Conductoris, omnino non tenetur Locator facere aliquam recompensationem l. 55. §. 1. ff. Locati Conducti. VI. Ut, nisi aliter fuerit conventum, remittat proportionaliter de mercede, si Conductor absque sua culpa non potuit uti re locata, vel modicas tantum ex ea percipere fructus; dummodo damnum exinde Conductor exortum fuerit notabile, nec fertilitate præcedentium, vel subsequen- tium annorum compensetur. Ita clare decisum invenitur c. 3. de Locat. & Conduct. & l. 15. ff. Locati Conducti. \*

#### Additio III.

\* Ex his sex obligationibus Locatoris juxta earum ordinem sex deduces casus. I. Quod peccet Locator graviter, & ad refarcitionem damni emergentis, atque lucri cessantis obligetur, si ante tempus conventum inquilinum suum e domo expellat, tantummodo, ut propter majorem commoditatem, majus lucrum, & propriam utilitatem (secus dicendum, si fiat id ex necessitate Locationem non prævisa) domum immutet, aut magis ampliet &c. Quod si Locator domum venderet intra tempus Locationis absque pacto retinendi Conductorem, & Emptor novus nollet amplius tolerare Inquilinum, deberet quidem is, nisi aliter in Locatione expresse conventum fuerit, etiam ante tempus conductionis elapsam abire, vel alias per Judicem cogeretur; quia Successor particularis (qualis est Emptor vel Donatarius) non tenetur stare Locationi sui Antecessoris, juxta l. 9. c. De Locat. & Conduct. Locator tamen prior obligaretur in



in eo casu non solum mercedem conductam pro rata temporis remittere, sed etiam, quanti interest Conductoris, usum rei ante finitum tempus sibi fuisse ademptum, resarcire.

II. Pariter peccat, & ad restitutionem tenetur, præsertim in casu damni emergentis ille Dominus, qui Villico locat villam ruinofam, vel simile stabulum, aut locum, ubi greges stare oportet; interim tamen defectus istos ante Locationem, dum locus a Conductore prius inspicitur, ita artificiose scit abscondere, ut futurus Colonus minime advertat.

III. Si e. g. in magna aliqua civitate domibus contributiones pro illuminatione de nocte imponerentur, ut nimirum in certo districtu ad evitandas varias inconvenientias de nocte habeant expositas publice accensas lucernas, in eo casu peccaret Locator, si Conductorem vellet cogere ad solutionem; cum incumbat Locatori. Id tamen verum quoque est, quod Locatori vitio verti nequeat, si crescentibus in dies quasi similibus oneribus, etiam ipse post tempus designatæ prioris Locationis finitum, in nova Locatione ascendat in pretio mercedis proportionatiter, ita tamen, ut consideratis omnibus considerandis maneat adhuc intra laritu linem infimi, & summi pretii.

IV. Si quis alteri equum assuetum sese in aquam mittere locaret, nec desuper conductorem moneret, etiam peccaret, atque merces forsan propterea perditas, aliæque damna exinde secuta obligaretur recompenfare.

V. Peccaret Locator, si renueret, ut Conductor in solutione mercedis conductæ deducat expensas factas in restaurandis januis, fenestris, vel fornacibus valde ruinosis &c. dummodo a parte rei fuerint tales *arg. l. Si merces 25. §. 2. ff. Locati Conducti*. Ratio est; quia hæ expensæ sunt necessariae vel saltem valde utiles, & etiam post tempus Locationis durant, pro utilitate ipsius Locatoris.

VI. Haud dubie peccaret immisericors ille Dominus, qui Rustico conductori suorum agrorum nihil de pensione vellet remittere, quamvis is circa suam culpam tempore messis vix semen in terram jactum, vel saltem, deducto prius semine & impensis, ne quidem tot fructus acceperit, ut adæquarent medietatem pensionis annuæ præstandæ. Hoc tamen ultimum intellige, nisi aliqua adsit de exceptionibus superiori Additione allegatis. \*

Additio VI.

\* Quæres III. Ad quænam Locatores operarum, puta Famuli, Operarii, Officiales, alique salario vel mercede conducti obligentur? Resp. Tenentur toto illo tempore, quo locaverunt operas, permanere in suo officio, ita quidem, ut si absque legitima causa ante tempus conventum abirent, tenerentur Dominis conducentibus ad interesse, & insuper deperderent totam mercedem *arg. l. Dominus 55. ff. Locati Conducti*. Ratio est: quia revera Reipublicæ interest, ne similes servitia Dominorum suorum contra Locationis tempus deserant pro libitu suo. Quod si id fieret ex causa gravi, & Dominus alium æque idoneum statim ad manus haberet, nequiret is bona conscientia præfato Locatori totum salarium, seu mercedem, sed tantum pro rata temporis absentiae detrudere.

II. Obligantur tales Locatores operarum, seu laborum suorum fideliter officium suum peragere, & in casu culpabilis in hoc negligentiae ex Justitia pro rata laboris debiti intermissi, vel negligenter peracti mercedem seu salarium remittere, vel si jam acceperint, iterum restituere, atque insuper resarcire damna inde Domino secuta. E. g. Pastor mercede interveniente locans operas suas in custodiendis gregibus obligatur ad restitutionem, si sua culpa animal perit, vel perditur *l. 9. §. 4. & l. 40. ff. Locati Conducti*, quod bene notent Custodes super rem certam mercede conducti, ac Famuli & Officiales Principum; ubi tamen, si culpa in similibus casibus non fuerit Theologica, sed præcise juridica, reflectendum erit ad doctrinam traditam *tr. 8. dist. 2. q. 4. & tr. 9. dist. 5. q. 5.*

Anacl. Reiffenstuel Theolog. Tom. I.

III. Nequeunt similes Locatores suorum laborum (puta Famuli, vel etiam Officiales, aut Principum Consiliarii, aliæve Personæ pro mercede, vel salario servitia præstantes, suasque operas locando) per modum compensationis quidpiam Dominis occulte surripere, si tantum probabiliter judicent, salarium suum esse minus justo: secus dicendum, quando evidens foret, mercedem, seu salarium esse injustum. Ita deducitur ex Propositione, ordine 37. ab Innocentio XI. damnata, de qua *tract. 9. dist. 5. qu. 2. n. 39. & seqq.* & adhuc fufius practice, & pulcherrime *lib. 3. decret. tit. 18. §. 4. num. 105. & seqq.* \*

Additio V.

\* Quæres IV. Quas obligationes contrahat Conductor rerum? Resp. Juxta varia Jura passim apud Canonistas, in titulum de Locato & Conducto scribentes, contrahi a conductore rerum obligationes sequentes. I. Tenetur re conducta uti tamquam bonus Paterfamilias, & quidem citra consensum Domini saltem rationabiliter præsumptum, non nisi ad usum conductum; hinc nequit uti equo ad vehendum, seu grave onus trahendum, quem præcise conduxit ad equitandum. Ceteroquin ad eundem usum, ad quem ipse conduxit, non prohibetur, alteri personæ idoneæ vel autem loco sui iterum locare, nisi in prima Locatione aliter fuerit conventum, prout expresse habetur *l. Nemo 6. C. de Locato & Conducto*.

II. Nequit Conductor rem semel conductam deferere ante completum tempus Conductionis sine legitima absolute gravi causa, quales sunt e. g. si subit verum periculum ruituræ domus conductæ, etiam ab expertis sic judicatum, vel si domus notabiliter infestetur spectris &c. alias enim, *Qui contra Legem Conductionis fundum ante tempus sine justa, ac probabili causa deseruerit, ad solvendum totius temporis pensiones ex Conducto conveniri potest*, uti sonant formalia Juris *l. Dominus 55. §. 2. ff. Locati Conducti*. Quod si causa fuerit legitima, tenetur tantum pro rata temporis, quo re conducta utitur. Nec censetur autem legitima seu absolute gravis, & sufficiens ad deductionem pensionis pro rata temporis, si talem rem conductam propter majorem suam præcise commoditatem, aut propriam utilitatem deferat, v. g. si aliorum procurandi lucii proprii gratia discedat, vel quia alibi ad majorem dignitatem est promotus, vel quia ob matrimonium contractum, & ampliorem familiam ampliori indiget habitatione, vel si aliquod intervenerit impedimentum tenens se præcise ex parte conductoris. Videantur *La Croix lib. 3. part. 2. n. 1050.* cum Sporer a se citato, & *Reiffenstuel lib. 3. decr. tit. 18. n. 74. & 75.*

III. Obligatur Conductor Locatori resarcire damna in re locata sua culpa, etiam levi, illata e. g. (prout in formalibus exemplificat Pichler hic) si domus per culpam Inquilini, aut domesticorum conflaret, confringantur fornaces, fenestræ &c. ubi tamen loquendo de culpa suorum domesticorum conductor non tenetur, si alias selegit sedulos & bonos domesticos. Excipe, nisi talis domesticus delinquat circa suum proprium Officium, puta, si ancilla conductoris, ad pecora deputata, in stabulo ignem negligenter custodiat, & inde comburatur tota domus. In simili enim casu posset ipsemet conductor ex Lege Aquilia conveniri ad recompenlandum damnum. Ubi tamen tu Confessarie ante sententiam judicis semper reflecte ad dicta de culpa juridica, & Theologica, & simul in dubio, utrum tale damnum contigerit ex culpa conductoris, vel casu præcise fortuito, utiliter revolve doctrinam præsentis Auctoris *lib. 3. decret. tit. 18. §. 3.* quo loco inter alia invenies, in dubio Locatori incumbere probationem, quod tale incendium contingerit culpa conductoris.

Additio VI.

\* Quæres V. Quas obligationes habeat Conductor operarum? Resp. sequentes: I. Tenetur ei, qui suas locavit



cavit operas, diligenter solvere mercedem integram tempore debito, atque etiam lucrum cessans, & damnum emergens, si debito tempore non solvit pretium *l. 17. C. de locat. & Conduct.* Quinimo mortuo intra hoc tempus conductore, obligatur quoque Hæres etiam ad solvendam integram mercedem usque ad tempus antea conventum, etsi non indigeat amplius Famuli opera. Ex hoc pulchre infert præsens Auctor *loc. cit. n. 91.* quod Principes, & alii Domini, seu conductores præter grave peccatum teneantur ad restitutionem damnorum, quæ Officiales, vel Famuli ab ipsis conducti ob culpabilem moram solvendi patiuntur: puta si propterea credito, & sic carius emere, vel debita exinde, deficiente pecunia, alia contrahere, sicque ex mutuato Capitali *Interesse* solvere cogantur. Idem dicendum de honesto lucro ob dilatam culpabiliter solutionem cessante.


II. Si Conductor ante Locationis tempus finitum absque legitima causa expellat eum, qui huic suas operas locavit, tenetur is integram huic solvere mercedem, nisi forsitan conductus, puta Famulus, vel Officialis operas suas statim æquali pretio alteri locaverit. Ita clare deducitur partim ex *l. 19. & 9. & l. 38. ff. Locati Conducti.* Quod si Conductor equidem directe talem e. g. Famulum non expelleret, ita tamen eundem tractaret, aut ad illicita pertraheret, ut exinde Famulus ipsemet sponte discederet, idem esset sentiendum, ac si expelleret: cum plane talis iniquus conductor sit in causa, quod alter intra hoc tempus non acquirens æquale servitium patiatur illud damnum.

III. Si Conductor operarum nequeat toto illo tempore pro Locatione determinato uti opera personæ conductæ ob aliquod interveniens impedimentum, seu aliam circumstantiam se tenentem non ex parte Locatoris, sed ex parte Conductoris, nequit propterea quidquam detrachere de mercede pro tempore hujus absentiae, nisi interea persona conductæ statim alteri operas suas pro æquali mercede locaverit. Ita denuo clare deciditur *l. 38. ff. Locati Conducti*, & exinde infertur, quod Dominus,

si intra hoc tempus a Principe ob aliquod delictum fuerit depositus a suo Officio, sicque non amplius indigens Amanuensi conducto, eundem dimittat intra tempus conductionis, nequeat propterea diminuere salarium pro rata absentiae; bene vero si hæc absentia contigisset ex culpa illius, qui domino suam operam locavit, puta si intra locationis tempus dictus Amanuensis fuisset aliquot mensibus ob certa delicta incarceratus &c.

IV. An Conductor obligetur locanti operas suas dare integram mercedem, si intra tempus hoc iste locator factus fuerit infirmus? non conveniunt DD. teneri tamen, si infirmitas modico tempore duraverit, vel si de super expresse conventum fuerit, aut adsit communis consuetudo (qualis consuetudo vigere dicitur quoad ægrotos Officiales, & Consiliarios Principum teste Reiffenstuel *loc. cit. n. 103.*) videtur extra controversiam; quoad alios vero notabili tempore ægrotantes, Resp. Cum pluribus contra alios probabilius negative regulariter loquendo; quia *l. 5.* statim in principio, *ff. de Conditione data causa*, Conductori competit actio seu conditio repetendi mercedem, quam dedit alteri, ut Capuam iret, si hic valetudine præpeditus ire nequiverit &c. consequenter infirmitas locantis operas, si ob eandem dictas operas exhibere nequeat, est causa sufficiens pro rata temporis denegandi mercedem.

Nec dicas. Clerico Beneficiato ægrotanti etiam longiori tempore adhuc dari debent redditus Ecclesiastici: ergo etiam Famulo infirmo. Resp. enim negando paritatem: nam Clerico huic dantur hi redditus non præcise (uti Famulo) ob operas personales, sed ex singulari dispositione etiam ob excellentiam Status Clericalis, ne in dedecus dicti Status vel mendicare, vel primum post multas ambages, & cum maximo periculo Titulum Mensæ querere cogatur. Interim non nego, quod dentur conductores valde misericordes, qui Famulis, præsertim alias bene meritis propter morbum unius vel alterius mensis nihil de mercede detrachere solent. \*



## TRACTATUS IX.

### DE PRÆCEPTIS DECALOGI, UBI ET DE RESTITUTIONE.

**D**ecalogi nomine intelliguntur decem Præcepta illa quæ olim ministerio Angelorum in duabus Tabulis lapideis descripta, & per manus Moyſis Populo Israelitico tradita, & promulgata fuerunt, prout legitur *cap. 20. Exod. & cap. 5. Deuteronomii*, ac alibi. Eorum priora tria Deum immediate respiciunt, dicunturque *Præcepta primæ Tabulæ*: septem posteriora Proximum spectant, & vocantur *Præcepta secundæ Tabulæ*. Quæ quidem Decalogi Præcepta tum ex naturali lumine generi humano indita, tum rursus a Christo Domino, utpote supremo Legislatore, non solum innovata, sed etiam magis explicata & ampliata fuerunt, prout Evangelicæ Legis major perfectio postulabat; uti habetur *cap. 5. & cap. 19. Matthæi*, & alibi. De his ergo Decalogi Præceptis, simulque occasione quinti, & trium sequentium Præceptorum, de Restitutione ratione Homicidii, Stupri, Furti, ac Detractionis facienda (aliis pluribus materiis ad propria loca remissis) in præsentī Tractatu dicetur. Faveat ille, qui dixit *Matth. 19. Si vis ad vitam ingredi, serva mandata.*

#### DISTINCTIO I.

*De Præceptis Decalogi in genere, ac primis tribus in specie.*

#### QUESTIO I.

Quid generatim censendum sit de Præceptis Decalogi, eorumque obligatione?

#### SUMMARIUM.

- 1 Decalogi Præcepta, quæ?  
Dividuntur in Præcepta primæ, & secundæ Tabulæ.
- 2 Excellentia Præceptorum Decalogi.
- 3 Ea sunt de Jure naturali.
- 4 Atque obligant pro quocumque statu.
- 5 Solvitur instantia de sanctificando die Sabbati.
- 6 Alia instantia de Idololatria.
- 7 Causa dispositiva ad Idololatriam, quæ?  
Ejusdem causa consummativa.
- 8 Omnia præcepta moralia reduuntur ad Præcepta Decalogi.



- 9 Mandatum de diligendo Deo, & Proximo, an reducatur ad Decalogum.
- 10 Quomodo ad id reducantur Præcepta circa caeremonias veteris Legis, & ritus Sacramentorum, Legesque cetera?
- 11 Violatio omnium Præceptorum Decalogi est ex genere suo mortalis.
- 12 Per accidens tamen potest esse venialis.  
(a) Ut dictum Tract. 3. dist. 2. n. 8. & 15.
- 13 Notabilis differentia inter ipsa Præcepta Decalogi.
- 14 Utrum Deus possit dispensare in Præceptis Decalogi?
- 15 Exempla talis dispensationis.
- 16 Solvitur objectio, ostendendo, ibi intervenisse veram dispensationem.

2 **R**ecte notavit D. Augustinus q. 140. *super Exodum*, Decalogum, in quo Divinæ Legis præcepta continentur, esse omnium Legum Epitomen absolutissimam, Summamque omnium eorum, quæ homini Christiano agenda sunt, in eodem expressam esse, fateatur Concilium Colonienſe in *Enchiridio Christianæ institutionis*. Unde si Præcepta ipsius bene intelligantur, sufficient ad omnes Actus humanos tum interiores, tum exteriores recte ordinandos; cum omnia præcepta moralia reducantur aliqua ratione ad Præcepta Decalogi. Hinc fit

3 CONCL. I. Præcepta Decalogi sunt de Jure naturali, atque obligant pro quocumque Statu. Ita communis; & ratio est: quia Præcepta Decalogi sunt de his, quæ statim in promptu mens hominis suscipit, & quorum contrarium videtur repugnare rationi. Hinc *Rom. cap. 2.* dicitur: *Gentes, quæ legem non habent, naturaliter ea, quæ legis sunt, faciunt: ejusmodi legem (id est, scriptam) non habentes ipsi sibi sunt lex, qui ostendunt opus legis scriptum in cordibus suis.*

4 Proinde Præcepta Decalogi quocumque tempore obligabant, etiam antequam promulgabantur a Moyſe, sive jam in statu Legis Naturæ, atque obligant defacto in statu Legis Evangelicæ, eo quod lumine naturali notum sit, non esse furandum, non blasphemandum, non mentiendum, ac hujusmodi. Quamvis, ut magis memoria tenerentur, ac frequentius in cognitione versarentur, convenienter postmodum ea fuerint scripta, & a Moyſe promulgata, atque a Christo amplius declarata.

5 Si dicas: Præceptum sanctificandi Sabbatum non amplius urget, cum ex traditione Apostolorum pro Sabbatho colamus Diem Dominicam; ergo hoc Præceptum non est de Jure naturali. Resp. distinguendo antecedens: Præceptum sanctificandi Sabbatum non amplius urget, quatenus est caeremoniale veteris Legis, conceditur; quatenus est morale, negatur antecedens, & consequentia. Siquidem Præceptum de Sabbatho sanctificando partim est morale, partim caeremoniale. Morale quidem, quatenus præcipitur, quod homo aliquo tempore vacet Rebus Divinis, & sic est de Jure naturali, atque etiamnum obligat, juxta illud *Pſalm. 45. Vacate, & videte, quoniam ego sum Deus.* Caeremoniale vero, quatenus in Lege veteri pro tali cultu determinabatur dies Sabbatinus, & sic defacto non obligat.

6 Quod si urgeas: Si Præcepta Decalogi sunt lumine naturali nota, quomodo igitur ante Christi adventum Idololatria ferme totum Orbem occupavit, quæ tamen est contra primum Præceptum Decalogi? Resp. Existentiam veri Dei, huncque esse colendum, homines lumine naturali cognoverunt, aut saltem dummodo voluissent, neque propria malitia excæcati fuissent; prout aperte testatur D. Apostolus *Rom. 1. Invisibilia Dei a creatura mundi per ea, quæ facta sunt, intellecta conspiciuntur: sempiterna quoque ejus virtus, & Divinitas, ita ut sint inexcusabiles. Quia, cum cognovissent Deum, non sicut Deum glorificaverunt &c.*

7 Porro causa dispositiva ad Idololatriam partim fuit inordinatum desiderium præsentis mortuorum, quibus erigebant statuas, ut in his velut præsentis cernerent. *Anacl. Reiffenstuel Theol. Tom. I.*

rentur, qui mortui fuerant; partim tyrannis, ob quam Belus (qui est Nemrod, de quo legitur *Genes. 10.*) a filio suo Nino, Assyriorum Rege, jubebatur in erecta sibi statua coli, ut non mortuus, sed Deus esse videretur; de quo execrando cultu Beel, nec non & tyrannide diversorum Regum, subditos ad Idololatriam provocantium, toties in S. Scriptura fit mentio. His accessit successu temporis convalescens iniqua consuetudo, qua tantus error pro lege custodiebatur; prout uberius habetur *Sapient. c. 14.* Tandem, Deo ob malitiam hominum permittente, alia causa (quam *consummativam Idololatriæ causam* appellat Doctor Angelicus 2. 2. q. 94. art. 41.) accessit ex parte dæmonum, qui se colendos hominibus errantibus exhibuerunt, dando in Idolis responsa, & aliqua, quæ mirabilia videbantur, faciendo.

8 CONCL. II. Omnia Præcepta moralia possunt aliqua ratione ad Præcepta Decalogi reduci. Ita D. Augustinus *L. de decem Chordis. Matrius disp. 11. Theol. mor. n. 3.* & communis; idque patet inductione. Siquidem tria prima Decalogi Præcepta ordinant hominem ad Deum, septem vero posteriora ad proximum: ex quibus priora tria complectuntur aliquo modo, quæcumque ad Dei cultum pertinent, atque explicari solent in Tractatu *De Religione, De Fide, Spe & Charitate*, & alibi. Porro sub honore Parentibus exhibendo etiam continentur reverentia, sustentatio, obedientia, & alia hujusmodi, tam ipsis, quam ceteris legitimis Superioribus præstanda, & econtra horum obligatio erga sibi subiectos: per sequentia vero sex Præcepta prohibentur omnia nocumenta, quæ possunt Proximis inferri in bonis animæ, corporis, fortunæ, & famæ, prout amplius patebit ex dicendis.

9 Objicies I. Mandatum de diligendo Deo, & Proximo non reducitur ad Præcepta Decalogi, sed potius hæc reducuntur ad illud *Matth. 22. Diliges Dominum Deum tuum ex toto corde tuo &c. Diliges proximum tuum, sicut teipsum. In his duobus mandatis universa Lex pendet, & Prophete;* ergo. Resp. negando antecedens: licet enim Præcepta Decalogi ad illa duo mandata Dilectionis DEI, & Proximi reduci possint tamquam ad prima principia practica moralia (continentur enim Præcepta Decalogi in ipsis, tamquam Conclusiones in Præmissis) nihilominus vicissim etiam illa duo mandata reducuntur ad Præcepta Decalogi, atque in istis continentur tamquam Præmissæ in Conclusionibus, in quibus per partes explicantur.

10 Objicies II. Si omnia Præcepta moralia continentur aliquo modo in præceptis Decalogi; ergo superfluum innumeræ aliæ leges, tum Divinæ, tum Humanæ, Civiles, sive Ecclesiasticæ. Resp. negando consequentiam. Siquidem, ut taceantur plurimæ Leges caeremoniales veteris Legis, nec non & Præcepta Legis Evangelicæ circa ritus Sacramentorum, quæ non sunt Jure naturali cognita, sed pendent a libera voluntate Dei, neque aliter ad Decalogum reduci possunt, nisi quatenus Jure naturali docemur, Deum esse colendum Caeremoniis sacris a se ordinatis, atque supposita Divina institutione ac revelatione, Fide instruimur, hosce sacros ritus Sacramentorum a Deo præceptos esse. Ut, inquam, hujusmodi Leges taceantur, omnes aliæ Leges aliquo modo reduci possunt ad Præcepta Decalogi, utpote quæ explicant, atque ad casus speciales juxta rerum, temporum, locorum, personarum, aliarumque circumstantiarum exigentiam applicant, eorumque determinant obligationem: alioquin, si Lex aliqua pugnaret contra Præceptum Decalogi, eo ipso foret injusta.

11 CONCL. III. Omnium & singulorum Præceptorum Decalogi violatio ex genere suo est peccatum mortale, quamvis per accidens non raro a mortali excusetur parvitas materiæ, ubi dari potest (non enim semper, ac in omnibus dari potest, ut patet in Juramento falso, in blasphemia, & nonnullis aliis) tum defectus deliberationis, aut plenæ advertentiæ Ita communis. Prior pars patet: quia omnia Præcepta Decalogi versantur circa talem materiam, cujus violatio graviter repugnat Dilectioni DEI, vel Proximi, aut alteri



virtuti, nisi excipere placeat mendacium jocosum, & officiosum, cujus utriusque prohibitio ad octavum Præceptum Decalogi, ceteroquin ex genere sub mortali obligans, reducitur.

12 Altera pars liquet ex eo, quia generaliter ad peccatum mortale requiritur plena advertentia rationis, ac deliberatio voluntatis; alioquin, si est semiplena, seu imperfecta solum, ex peccato de genere suo mortali fit per accidens peccatum veniale (a) quo modo & perjurium, si fit ex aliqua inadvertentia, potest reddi veniale.

13 CONCL. IV. Inter Præcepta Decalogi est notabilis differentia, quod aliqua eorum simpliciter loquendo obligent positis quibuscumque circumstantiis, quædam vero non simpliciter & absolute obligent, sed sub certis ac determinatis solum circumstantiis. Ita Matrius *loc. cit. n. 6.* & alii, ac probatur inductione. Nam in primis Præcepta illa, quibus prohibetur Odium Dei, Idololatria; Perjurium, Blasphemia, Mendacium, & alii tales actus intrinsece mali, semper obligant positis quibuscumque circumstantiis, ita ut actus oppositi in nullo prorsus casu reddantur liciti; etiam si quis posset vitam suam salvare, aut totum mundum redimere. Econtra vero præceptum non furandi, non occidendi, & quædam similia obligant solum sub certis circumstantiis, ut puta ne quis surripiat rem alienam domino rationabiliter invito, ne Proximus indebite occidatur &c. Et quidem manentibus talibus circumstantiis semper obligant; si vero mutantur, non obligant: unde in extrema necessitate licite quis surripit rem Proximi, sicut & in bello iusto licita sunt spolia hostium; similiter malefactores, & hostes in bello iusto recte occiduntur.

14 Ex his patet responsio ad illam questionem inter Theologos agitatam, utrum Deus possit dispensare in Præceptis Decalogi? Resp. enim, quamvis Nominales asserunt, Deum posse dispensare in omnibus Præceptis Decalogi, Thomistæ vero id absolute negent, nihilominus cum Doctore Subtili 3. *dist. 37. q. un.* mediam sententiam esse tenendam & dicendum, quod in illis Præceptis Decalogi, quæ sunt de Jure naturali stricte sumpto (ut est Præceptum non blasphemandi, non pejerandi &c.) Deus non possit dispensare, bene tamen dispensare valeat in aliis, quæ non sunt de Lege naturali stricte, sed solum large accepta, ut est Præceptum non occidendi, non furandi &c. Quæ eatenus dicuntur esse de Lege Naturæ, quatenus regulariter loquendo, ac seclusis specialibus circumstantiis sunt consona primis principiis, & conclusionibus Legis Naturæ.

15 Porro in hisce posterioribus posse Deum dispensare, ita videlicet, ut accedente Divina auctoritate licitum evadat, quod alioquin illicitum foret, probatur ex S. Scriptura. Sic quippe Deus dispensavit cum Abrahamo, ut potuerit filium suum innocentem Isaac occidere; aut saltem voluntatem efficacem occidendi habere. Similiter dispensavit cum Hebræis exeuntibus de Ægypto, ut licite potuerint optima quæque vasa ejus, aurea & argentea sibi mutuo data, auferre. Item dispensavit cum iisdem Judæis in Polygamia, seu simultanea pluralitate uxorum, in Libello repudii, & nonnullis aliis hujusmodi.

16 Si dicas: in prædictis casibus non intervenisse veram dispensationem quoad Præcepta Decalogi, sed tantum esse factam mutationem materiæ Præcepti, aut positionem alicujus circumstantiæ, sub qua Leges illæ Juris naturalis non amplius obligabant: nam (inquies) Præceptum non occidendi, aut non furandi &c. solum prohibet furtum, vel homicidium indebite factum, quale non est, si id fiat ex concessione, vel mandato Dei, qui habet supremum in res nostras, vitamque dominium. Resp. hoc parum urgere: nam dispensatio tunc accidit, quando ab habente legitimam facultatem fit relaxatio Juris communis; atqui talis relaxatio Juris communis fit in casibus positis; quia accedente mandato Dei poterat Abraham licite velle occidere Isaac innocentem, quod alioquin non potuisset; & similiter ex concessione Divina licite potuerunt Judæi auferre bona Ægyptiorum (non obstante, quod furtum proprie non admiserint) quæ alio-

quin sine peccato auferre non potuissent; ergo tunc facta est vera dispensatio. Et certe, si hic nulla interveniebat dispensatio proprie dicta, sed sola mutatio materiæ Præcepti, sequitur, nullam omnino dari proprie dispensationem, sed omnes prorsus dispensationes esse meram Legis cessationem, ortam ex mutatione materiæ, & circumstantiarum: nam superveniente dispensationis legitimæ circumstantia cessat semper ac ubique obligatio Legis respectu dispensati.

## QUESTIO II.

Quanam sub primo, & secundo Præcepto Decalogi contineantur?

## SUMMARIUM.

17 Divisio Præceptorum Decalogi juxta quosdam.

18 Communior eorum divisio, hujusque ratio.

19 Præceptum primum Decalogi, quale?

20 Et quæ præcipiat, ac prohibeat?

21 De his remissive.

(b) Tract. 4. & 5. per totum.

22 Præceptum secundum Decalogi, quod, & quale?

23 Quanam eodem prohibeantur, & præcipiantur?

24 De his remissive.

(c) Tract. 6. dist. 2. & 3. per totum.

(d) Nempe Tract. 5. per totum & Tract. 6. dist. 1.

17 **A**dvertendum, quod non desint SS. Patres, qui distinguendo Præcepta Decalogi inter se ponunt quatuor Præcepta pertinentia ad Deum, & sex pertinentia ad Proximum, qui proinde Præceptum de *Non concupisces* &c. ad unicum revocant; primum autem, vel secundum Præceptum dividunt in duo, prout faciunt S. Efichius, & S. Hieronymus, atque Origenes, relati a D. Thoma 1. 2. q. 100. art. 4.

18 Communior tamen, & magis recepta est divisio Præceptorum Decalogi, quam ponit D. Augustinus q. 71. in *Exodum*, ut sint tria Præcepta primæ Tabulæ pertinentia ad Deum, & septem Præcepta secundæ Tabulæ pertinentia ad Proximum. Ratio hujus communis divisionis est; quia ea, quæ ad Deum pertinent, convenienter ad tria Præcepta reducuntur. Deinde, cum concupiscentia uxoris Proximi spectet ad concupiscentiam carnis, & concupiscentia bonorum temporalium Proximi pertineat ad concupiscentiam oculorum, recte D. Augustinus duo de his Præcepta distinxit, juxta illam generalem divisionem peccatorum 1. *Joan. 2.* assignatam, ibi: *Omne, quod est in mundo, concupiscentia carnis est, & concupiscentia oculorum, & superbia vitæ.* Hac igitur præceptorum Decalogi divisione retenta, quam posuit D. Augustinus, sit

19 CONCL. I. Primum Præceptum Decalogi ita sonat: *Ego sum Dominus Deus tuus &c. non habebis deos alienos coram me*, uti legitur *Exod. c. 20.* Et hoc Præceptum partim est affirmativum, partim negativum: ex una enim parte aliquid præcipit, & ex altera aliquid prohibet, prout observat Catechismus Romanus *part. 3. c. 2.* estque sensus Præcepti: *Me verum Deum coles, & diis alienis cultum non adhibebis.*

20 Et quidem, quatenus hoc Præceptum est affirmativum, seu quatenus quidpiam agendum præcipit, versatur illud circa actus virtutis Religionis, mandatque, uni Deo verum cultum, venerationemque debitam esse exhibendam; atque insuper ad hoc præceptum revocantur, quæcumque pertinent ad tres Virtutes Theologicas, Fidem, Spem, & Charitatem, utpote quibus immediate attingimus Deum, tamquam objectum, atque ultimum Finem nostrum. Quatenus vero Præceptum illud est negativum, prohibetur per illud non solum Idololatria, atque omnis Superstitio, sed etiam Infidelitas, Desperatio, atque Odium Dei, omneque aliud hujusmodi peccatum.



21 Quia igitur de Religione, ejusque diversis actionibus, atque oppositis vitiis, nec non & de Fide, Spe, & Charitate in propriis Tractatibus jam actum est (b) alia circa primum Præceptum Decalogi, hoc loco dicenda non supersunt: unde ad secundum pergendo, sit

22 CONC. II. Secundum Præceptum Decalogi c. 20. Exod. his verbis exprimitur: *Non assumes nomen Domini Dei tui in vanum.* Et similiter hoc Præceptum, etsi verbis negativis comprehendatur, partim est affirmativum, partim negativum: nam dum prohibet assumere Nomen Domini in vanum, vel falso jurando, vel aliter Sacrosanctum Dei Nomen vane atque irreverenter usurpando, polluendo, aut contemnendo, simul præcipit, debitam Divino Nomini reverentiam, atque honorem exhibendum esse.

23 Itaque inprimis hoc secundo Præcepto Decalogi prohibetur, ne Divinissimum Nomen quoquo modo vane seu irreverenter assumatur, aut falso jurando, aut Nomen Dei in levissimis rebus temere ad testimonium adducendo, aut hoc Sanctissimum Nomen blasphemando, maledicendo, sive convitiis infectando, aut etiam vota male reddendo, & hujusmodi. Deinde præcipitur debitus honor Divino Nomini impendendus, ac reverentialis ejusdem invocatio, simulque, ut in Nomine illo juremus in veritate, justitia, & judicio, juxta illud *Jeremie 4. Jurabis, vivit Dominus, in veritate, & in judicio, & in justitia.* Quibus addere oportet nuncupationem votorum, & debitam eorum præstationem, prout Psalmista ait: *Psal. 75. Vovete, & reddite Domino Deo vestro.*

24 Ceterum, quia tum de Juramento, ejusque conditionibus, atque opposito vitio Perjurii, tum de Voto, ejusque obligatione, atque cessatione abunde jam superius (c) dictum est: reliqua vero, reverentialem Divini Nominis assumptionem concernentia, comprehenduntur in Tractatu de Religione (d) non oportet eadem hoc loco repetere.

### QUESTIO III.

#### De Tertio Præcepto Decalogi ejusque obligatione.

#### SUMMARIUM.

- 25 Præceptum tertium Decalogi, quale? Et ratio ordinis.
- 26 Præceptum hoc partim est morale, partim ceremoniale.
- 27 Quatenus morale, obligat de facto?
- Non vero, quatenus ceremoniale.
- (e) Ut dictum Tract. 2. dist. 2. q. 1.
- 28 Pro Sabbato substituta est dies Dominica.
- 29 Idem Præceptum est & affirmativum, & negativum.
- (f) Tract. 10. dist. 1. per totum.

25 **T**ertium Decalogi Præceptum his verbis expressum habetur Exodi c. 20. *Memento. ut diem Sabbati sanctifices.* Et quidem istud ordine pulcherrimo subjungitur duobus primis: nam quia ex Lege Naturæ debemus Deo Fidelitatem, Reverentiam, & Famulatum, ipsumque tum corde, tum ore, tum opere honorare; hinc in primo Decalogi Præcepto instruimur quoad interiorem cultum, fidelitatemque DEO exhibendam, quæ consistit in agnitione, cultuque unius veri Dei, & falsorum deorum reprobatione: in secundo docemur, reverentiam Deo, ac Divino Nomini impertiri, ejusque Nomen verbis pravis in vanum non usurpare, & nunc in tertio Præcepto instruimur, debitum Deo famulatum in gratiarum actionem pro perceptis beneficiis Creationis, Redemptionis, aliisque innumeris devote præstare, quod fit diem Sabbati sanctificando, modo explicando. Hinc sit

26 CONCL. I. Tertium istud Præceptum partim est morale, & partim ceremoniale. Ita communis, estque breviter jam dictum superius n. 5. Et quidem hoc Præceptum censetur esse morale, atque ex ipsa Lege natu-

rali descendens, quatenus per id absolute præcipitur, ut homo sepositis temporalibus negotiis aliquod vitæ suæ temporis spatium Divino cultui impendat, Religionisque exercitiis vacet: ad hoc enim tenetur homo ex instinctu ipsius naturæ. Cærimoniale vero est, quatenus hoc tempus colendi Deum juxta Legem Mosaicam debebat esse dies Sabbati.

27 Priori modo, seu quatenus est morale, Præceptum hoc omnes semper & eodem modo obligavit, & obligat; cum ab ipsa Lege naturali derivetur obligatio, ut quandoque Deum veneremur, colamusque ob beneficium Creationis, Conservationis, aliaque innumera beneficia, idque partim in ipsum credendo, sperando, eumque super omnia diligendo, partim eundem diversis Religionis actibus humiliter colendo. Ceterum posteriori modo, seu quatenus est unum ex Præceptis Cærimonialibus Legis Mosaicæ, cum post Christi adventum, atque inducta Lege Evangelica omnia Præcepta Cærimonialia veteris Legis exspiraverint (e) utpote quæ fuerunt umbra futurorum per Christum jam impletorum, sicque defacto superstitione observarentur ob falsam eorumdem significationem; hinc etiam istud tertium Præceptum Decalogi, quatenus cærimoniale est, obligare cessavit.

28 Unde per sanctos Apostolos loco diei Sabbatini ex instinctu Spiritus Sancti substitutus fuit in memoriam Dominicæ Resurrectionis Dies Dominicus; de quo jam fit mentio cap. 1. *Apocalypsis*, ibi: *Fui in spiritu in Dominica die:* & loco aliarum Solemnitatum Judaicarum, ut explicat D. Thomas 1. 2. quæst. 103. art. 3. ad 4. alii successive dies Festi per Sanctam Matrem Ecclesiam instituti sunt, atque determinati, ut in illis speciali ratione Deo debitus cultus per pia Religionis exercitia impendatur.

29 CONC. II. Tertium hoc Præceptum Decalogi partim est affirmativum, partim negativum. Ita communis. Idque desumitur inter alia ex illo Exod. cap. 16. *Requies Sabbati sanctificata est Domino &c. Maneat unusquisque apud semetipsum;* id est: (ut explicat Doctor Subtilis 3. dist. 27. quæst. un. §. Quantum ad secundum, recolligendo se, & ascendendo ad Deum suum per actus virtuosos. Et Ecclesia specificavit, quantum ad Missam audiendam in die Dominico. De Consecr. dist. 1. can. *Missas*. 64. Unde, quatenus hoc Præcepto injungitur exercitium actuum virtuosorum, censetur esse affirmativum: quatenus vero prohibentur opera servilia, atque Judicium mortis & sanguinis, omnisque strepitus forensis cap. 1. & ult. De Feriis, hac ratione Præceptum hoc est negativum. Verum de his ex professo inferius (f) agendo de Præceptis Ecclesiæ.

### DISTINCTIO II.

#### De Quarto Præcepto Decalogi.

### QUESTIO I.

#### Quæ sit obligatio Filiorum erga Parentes?

#### SUMMARIUM.

- 1 Ratio Ordinis quarti Præcepti.
- 2 Honor Parentum tria comprehendit.
- 3 Et sunt actus Pietatis.
- (a) Ut dictum Tract. 7. dist. 2. n. 6. & 7.
- 4 Reverentia Parentibus debita in quo consistat?
- 5 Contra eam qualiter peccetur?
- 6 Amor Parentibus debetur.
- 7 Non tamen hi sunt præferendi Deo.
- 8 Obedientia Parentibus præstanda, & in quibus?
- 9 Filius an possit ingredi Religionem invitis Parentibus?
- 10 Quid, si Parentes sint in gravi necessitate?
- 11 An Filius teneatur egredi ob extremam Parentum necessitatem?



1 **P**ostque Supremus Legislator in Præceptis primæ Tabulæ compendiosa, simulque ordinatissima serie tradidisset ea, quæ Divinum Cultum, Honorem, atque Amorem respiciunt, declaraturus in altera, eaque secunda Tabula, quæ ad Dilectionem Proximi pertinent, sapientissime primo loco ponere dignatus est Præceptum de honore Parentibus impendendo, utpote qui post ipsummet DEUM sunt particulare principium nostrum, *Exodi cap. 20.* dicens: *Honora Patrem tuum & Matrem tuam.* Et addidit: *ut sis longævus super terram.* Ad quæ verba æternæ Veritatis respiciens D. Paulus ad *Ephes. 6.* subjungit: *Quod est mandatum primum in promissione.*

2 Ceterum, ut notat Catechismus Romanus, & unanimis Doctorum, nomine honoris Parentibus exhibendi tria præcipue significantur, videlicet Reverentia, Amor, & Obedientia. Addunt nonnulli sustentationem Parentibus indigentibus subministrandam: verum hæc commode reducitur ad amorem eisdem impendendum.

3 Notandum autem, quod prædicta tria sint actus propriæ virtutis, quæ *Pietas* dicitur, estque specialis virtus sub *Justitia* contenta, tamquam pars potentialis ipsius: (a) cum enim ad rationem *Justitiæ* pertineat, reddere cuique debitum suum, etiam *Pietas*, quæ parentibus debitum amorem, honorem, atque obedientiam præstamus, merito sub ipsa contineri censetur. Neque enim hic sumitur *Pietas* pro studio interno devotionis, ac sinceri affectus erga Deum & Proximum, quomodo passim accipitur in S. Scriptura, ut *1. Timoth. 4.* *Exerce te ipsum ad pietatem* & alibi. Sed sumitur hic *Pietas* pro illa speciali virtute, qua colimus Parentes, tamquam vitæ & educationis nostræ post Deum auctores, debitam ipsis reverentiam, amorem, & obedientiam præstando.

4 **CONCL. I.** Quantum attinet ad reverentiam, ex virtute *Pietatis* tenemur exhibere cultum, & reverentiam Parentibus, non solum externam, quæ præstatur signis & officiis externis, utputa ipsis assurgendo, famulando, honorifice de illis loquendo &c. sed etiam internam, quæ consistit tum in positivo actu recognitionis superioritatis, benevolentiae, æstimationis, & cujusdam timoris filialis: tum in fuga vilipensionis, malevolentiae, rancoris, contemptus interni, ac hujusmodi pravorum affectuum. Ita *Herincx disp. 10. De Religione q. 1. n. 2.* *Bonacina part. 2. disp. 6. qu. 101. punct. 2.* & alii.

5 Hinc, qui verbo, gestu, aliove signo exteriori gravem juxta morem Religionis, ac communem hominum æstimationem Parentibus inferunt irreverentiam, peccant mortaliter; juxta quod *Exodi c. 21.* dicitur: *Qui maledixerit patri suo, vel matri, morte moriatur.* Et *Deut. 27.* *Maledictus, qui non honorat Patrem suum, & Matrem.* Quinimo notant Doctores communiter, injuriam, quæ aliis hominibus illata mediocris foret, posse esse gravem, si Parentibus inferatur. Sic, prout exemplificat *Bonacina loc. cit.* & *Basæus §. Filius, n. 4.* graviter peccant filii, qui Parentes animo deliberato ad notabilem provocant iracundiam verbis contumeliosis. Item & ille mortaliter peccat, qui Parentem percutit, etiam si hæc percussio ceteroquin levis foret. Item dicendum censet, si filius cum sufficienti deliberatione manum ad percutiendum elever: hæc enim communi hominum sensu gravis in Parentes injuria, & irreverentia reputatur. Verum ista intelligenda sunt per se loquendo, ac nisi indeliberatio actus a mortali excuset.

6 **CONCL. II.** Quantum attinet ad Amorem, quo filii tenentur suos Parentes prosequi, obligatio hæc certa est. Nam cum quilibet Jure naturæ teneatur diligere Proximum suum, quanto magis proprios Parentes? utpote sibi conjunctissimos, & amplius præ ceteris proximos, cum ab ipsis vitam, & esse suum post Deum acceperit.

7 Parentes tamen idcirco non sunt præferendi Deo, neque magis præ ipso diligendi, juxta illud Salvatoris *Matth. 10.* *Qui amat Patrem, aut Matrem plus quam me, non est me dignus.* Et *Luce 14.* *Si quis venit ad me, & non odit Patrem suum, & Matrem &c. non potest meus esse discipulus.* Non quod re ipsa, & absolute odio ha-

beri debeant Parentes, sed comparative & respectively ad Deum: tum quia Deus magis appetitive diligendus est: tum etiam, quia Parentes quidpiam mali, seu illiciti præcipiant, quodque esset contra legem Dei, eisdem non est obediendum, juxta illud *Act. 4.* *Si iustum est in conspectu Dei, vos potius audire, quam Deum, judicate.* Hinc S. Gregorius Papa *Hom. 37. in Evangelia*, ad propositum sic loquitur: *Sed si vim præcepti perpendimus, utrumque agere per discretionem valeamus, ut uxorem, & eos, qui nobis carnis cognatione conjuncti sunt, & quos proximos novimus, diligamus; & quos adversarios in via Dei patimur, odiendo, & fugiendo nesciamus.*

8 **CONCL. III.** Tandem, quantum ad Obedientiam, certum quoque est, Filios teneri obedire Parentibus quidpiam legitime præcipientibus. Unde & Apostolus ad *Ephes. 6.* ait: *Filii; obedite Parentibus vestris in Domino*, cum pluribus concordantibus. Et quidem tenentur ipsis obedire in iis, quæ spectant ad bonos mores, vel ad domus gubernationem, ita ut, si obedire recusant in materia gravi, & magni momenti, peccent mortaliter: idque multo magis dicendum, si id ex contemptu, aut animi obstinatione faciant. In rebus autem pravis, quæ sine peccato fieri nequeunt, obedire non tenentur, juxta dicta *num. præced.* Verum occasione dictorum,

9 Quæres: An Filius possit ingredi Religionem invitatus Parentibus? Resp. cum D. Thoma 2. 2. *quest. 189. art. 6.* & Doctoribus communiter. Si Parentes non sint constituti in gravi necessitate, ita ut Filiorum obsequio multum indigeant, possunt Filii Religionem intrare etiam contra præceptum Parentum. Ratio est: quia in statu eligendo Filius est sui juris, ac proinde post annos pubertatis quilibet ingenuus libertatem habet quantum ad ea, quæ pertinent ad dispositionem sui status, præsertim in his, quæ sunt Divini obsequii. Insuper magis est obediendum vocanti Deo, quam Parentibus carnalibus. Unde Christus *Matth. 8.* reprehendit Discipulum, qui volebat eum statim sequi intuitu paternæ sepulturæ. Et S. Hieronymus in *Epist. ad Heliodorum*, quem refert D. Thomas 2. 2. *quest. 101. art. 4.* ait: *Per calcatum perge Patrem, per calcatam perge Matrem, ad vexillum Crucis evola: summum genus pietatis est, in hac re fuisse crudelem.*

10 Dicitur notanter, si Parentes non sint constituti in gravi necessitate: etenim si Parentes in tanta necessitate constituti existant, quod ipsis commode aliter, quam per obsequium Filiorum subveniri non possit, non licet Filiis prætermisso Parentum obsequio Religionem ingredi, sed debent eis remanendo in seculo subvenire, idque tum Jure naturali, tum Divino, de honorandis Parentibus: dummodo remanendo in seculo possint subvenire tali necessitati Parentum, & ingrediendo non possint. Ita Doctor Angelicus *cit. quest. 189. art. 6.* & *quest. 101. art. 4.* estque communis. Unde inter alias condiciones recipiendorum in Ordinem Seraphicum numeratur & hæc, quod non relinquunt Parentes in seculo gravi necessitate constitutos. Siquidem & Christus Dominus *Matth. 15.* graviter redarguit Phariseos, qui intuitu Religionis, & muneris Deo per filios oblato honorem, id est, sustentationem Parentibus debitam subtrahebant.

11 Quinimo, si Filius jam ingressus sit Religionem, in eaque Professionem emiseric, Parentes autem ejus in extremam necessitatem ex casu aliquo involvantur, tenebitur Filius, amonito prius suo Superiore, ac nisi mediante hujus vigilantia Monasterium, sive Religio æque bene succurrere possit, ac velit, egredi ad subveniendum extremæ suorum Parentum necessitati, dummodo verisimile sit, quod egrediens possit ipsis subvenire: ad hoc siquidem obligat Filium ipsa Lex naturalis, & Divina. Si autem necessitas Parentum sit tantum gravis, non tenetur egredi, tenetur tamen salva sui Prælati obedientia, & suæ Religionis statu, pium studium adhibere, qualiter suis Parentibus succurrat, aut per alios subveniatur.



Q U Æ S T I O II.

De Obligatione Parentum erga Filios.

S U M M A R I U M.

- 12 Parentum obligatio erga Liberos.
  - 13 Tria generatim debent Parentes Liberis.
  - 14 Alimentatio necessaria, quid involvat?
  - 15 Mater primo triennio tenetur alere prolem, postea Pater.
  - 16 Limitatur hoc.
  - 17 Parentes debent thesaurizare Filiis, quomodo?
  - 18 Parentes tenentur instruere Liberos in necessariis ad salutem.
  - 19 Tenentur Liberis relinquere libertatem circa electionem status.
- Excommunicantur, qui cogunt mulierem ad ingressum Monasterii.*

**S**icut Filii erga Parentes, sic etiam Parentes erga Filios ad aliqua charitatis officia obligantur. Et nomine Parentum intelliguntur non tantum ipsi Genitores, sed etiam Avus, Proavus, alique Ascendentes. Nec refert, quod hoc Præceptum Decalogi de sola Filiorum obligatione loquatur; nam, quia reciprocam obligationem ipse naturalis instinctus, & affectio Parentum erga Liberos satis inculcat, necesse non fuit, speciali præcepto eandem explicare, juxta commune adagium: *Per naturam sensualitatis amor potius descendit, quam ascendit.*

13 CONCL. I. Ex hoc Parentum amore erga Filios tria potissimum Parentes illis debent. Primum est alimentatio necessaria. Secundum instructio in Fide, Religione, & bonis moribus. Tertium cura, studium, & diligentia, ut in certo vitæ statu pro conditione personæ Liberi collocentur. Ita Maltorius *disp. 11. Theol. Mor. n. 94. & seq.* & communis aliorum.

14 Tenentur itaque imprimis Parentes gravi obligatione Juris naturalis curare conservationem & educationem Liberorum suorum, hoc est, subministrare alimenta, & alia vitæ necessaria, puta, victum, vestitum, habitationem, & tempore adversæ valetudinis competentes medicinas, & hujusmodi. Hoc tamen intelligendum est, quamdiu Filii illis indigent, nec sibi ipsis providere possunt.

15 Et quidem ad Matrem proprie spectat, alere Filios & Filias usque ad finem tertii anni, simulque lactare Filios per se, vel per bonam nutricem, quando iusta de causa per se non potest. Post triennium vero Liberiorum educatio usque ad emancipationem pertinet ad Patrem ut dicitur *1. Nec Filium. C. Patria potestate.* Unde illi vulgati versiculi:

*Mater alit puerum trimum, trimoque minorem.  
Majorem vero pascere Patris erit.*

16 Hoc tamen limitandum primo, nisi Mater dives sit, & Pater pauper: tunc enim etiam post triennium spectabit ad Matrem alere Filium. Limitandum ulterius, nisi Pater ex Infidelitate conversus ad veram Fidem, Matre in Infidelitate permanente, petat Filium etiam triennio minorem sibi assignari, ut eum ad veram Fidem perducatur: quia tunc id erit faciendum, prout habetur *cap. 2. De conversione infidelium*, juncta Glossa ibidem. Idque merito statutum est in favorem Fidei Christianæ: *nam summam esse rationem, quæ pro Religione facit, habetur 1. Sunt persone ff. De Religiosis & sumpt. funerum.*

17 Huc accedit obligatio, qua Pater tenetur providere Filiis in futurum, quantum honeste potest, habita ratione circumstantiarum particularium, ita ut possit, vel relinquat illis sufficientem hæreditatem ad vitæ sustentationem, & conditionem status, vel certe ea ratione dirigat, ut ipsimet addiscendo aliquam artem, aut scientiam possint sibi ipsis providere de necessariis. Et hoc innuunt illa verba Apostoli *2. Corinth. 12. Nec enim debent Filii Parentibus thesaurizare, sed Parentes Filiis.* Nam Filii

per accidens dumtaxat, hoc est, propter supervenientem eorum necessitatem tenentur succurrere Parentibus; econtra vero Parentibus per se convenit, ut subveniant Filiis: & propter hoc non solum ad horam debent eis subvenire, ad totam suam vitam, quod est *thesaurizare*, ut optime notat Doctor Angelicus *2. 2. quæst. 101. art. 2. ad 2.* Hinc inferunt Filiucius *tract. 28. part. 2. n. 28.* Bonacina *cit. disp. 6. punct. 5.* & alii. Parentes illos graviter peccare, qui diligentiam saltem mediocrem non adhibent, ut bona acquirant, quibus Filii alantur, & hæreditatem habeant juxta sui status conditionem, vel si bona dilapidando impotentes sese reddant ad Liberos honesto secundum statum suum educandos, & dotandos.

18 Quantum ad alteram Parentum obligationem, tenentur ii sub gravi obligatione instruere Liberos per se, vel per alios in necessariis ad salutem. Unde procurare tenentur, ut rudimenta Fidei addiscant, scilicet Orationem Dominicam, Salutationem Angelicam, Symbolum Apostolorum, Præcepta Decalogi, & Ecclesiæ, necessariam doctrinam de Sacramentis, & alia hujusmodi. Debent insuper illos verbis & exemplis, addita etiam, si opus fuerit, charitativa correctione, & paterna castigatione, ad bonos mores, ac vitam Christianam inducere, & a peccatorum occasionibus avertere. Et quidem graviter peccant Parentes, si in talibus fuerint notabiliter negligentes, cum a tali eorum instructione plurimum pendeat salus Liberorum, & bona horum conversatio per vitæ decursum: nam, ut *Proverb. cap. 22.* legitur: *Adolescens juxta viam suam, etiam cum senuerit, non recedet ab ea.*

19 Tercio tenentur Parentes Liberis relinquere libertatem circa electionem status, ita ut eum eligere sinant, ad quem ipsos a Deo vocari cognoverint. Unde graviter peccant Parentes, si absque iusta causa Filios impediant, ne Religionem ingrediantur, aut econtra, si eos invitos dolis, vel minis ad ingressum Religionis cogant. Quinimo Concilium Trident. *sess. 25. De Regularibus cap. 18.* excommunicat omnes, & singulas personas, quæ quomodocumque coegerint aliquam virginem, vel viduam, aut quamcumque aliam mulierem invitam, præterquam in casibus a Jure expressis, ad ingrediendum Monasterium.

Q U Æ S T I O III.

De Obligatione Subditorum erga Superiores, & econtra.

S U M M A R I U M.

- 20 Parentum nomine, qui omnes hic comprehendantur?
- 21 De Obligatione Subditorum erga Superiores.
- 22 Præsertim erga Prælatos Ecclesiæ.
- 23 Superiorum obligatio erga Subditos, quæ?

**E**ti nomine Parentum, quos in honore habendos esse, statuitur hoc quarto Præcepto Decalogi, præcipue intelligantur ii, qui eos secundum carnem genuerunt: nihilominus hoc nomine, simul ac præsentis Præcepto omnia ea personarum genera comprehenduntur, quæ quamdam in nos superioritatem habent, & ad sequentia quatuor capita communiter reducuntur. Primum est Parentum, qui secundum carnem nos genuerunt. Alterum est Superiorum, potestatem spiritualem in nos habentium: ut sunt Episcopi, Curati, Pastores &c. Tertium est Superiorum, potestatem in nos secularem habentium: quales sunt Reges, Principes, Duces, & Domini. Quartum est aliorum, qui aliquam super nos potestatem habent: quales sunt Magistri, Tutores, & hujusmodi. Hinc

21 Inferitur I. Quod ea, quæ de officiis & obligationibus Filiorum erga Parentes, & Parentum erga Filios hætenus dicta sunt, servata debita proportionem etiam intelligi debeant de officiis & obligationibus Pupillorum erga Tutores, & alios Parentum vicem gerentes: item de officiis, & obligationibus servorum, subditorum, & quorumcumque inferiorum erga Dominos, aut Superiores.



res suos, & econtra. Maffrius *cit. diff.* 11. n. 98. Navarrus, Bonacina, Toletus, & alii passim; idque ex *cap. 5. ad Ephesios*, & *cap. 3. ad Titum*, & aliis pluribus S. Scripturæ locis satis obviis clare liquet.

22 Infertur II. Quod Christiani omnes teneantur sub gravi culpa obedire Summo Pontifici, utpote Christi in Terris Vicario, in rebus ad Fidem, & Christianam disciplinam pertinentibus. Similiter, quod Dioecesani Episcopis, Parochiani Parochis, Servi Dominis, Subditi Superioribus, & Populi Principibus suis obligentur præstare obedientiam, in his, in quibus respective ipsis subfunt, eisque reverentiam, & amorem specialem, aliaque officia quotiescumque recta ratio & prudentia id postulat, exhibere.

23 Infertur III. Quod vicissim etiam omnes Superiores teneantur ad diligenter gerendam sibi Subditorum curam, tum in temporalibus, tum in spiritualibus, prout cujusque officium & conditio postulat. Ratio est: quia ejusmodi Superiores sunt caput Subditorum, ideoque tenentur quodammodo, servata tamen proportionem, ad eadem, ad quæ Parentes erga Filios. Totam hanc Superiorum erga Subditos, horumque erga Superiores obligationem paucis complectitur Apostolus *ad Hebræos cap. 13.* scribens: *Obedite Præpositis vestris, & subjacete eis, ipsi enim pervigilant, QUASI RATIONEM PRO ANIMABUS VESTRIS REDDITURI.*

### DISTINCTIO III.

#### De Quinto Præcepto Decalogi.

#### QUESTIO I.

Quænam quinto Præcepto Decalogi prohibeantur?

#### SUMMARIUM.

- 1 Ratio ordinis.
- 2 Hoc Præcepto prohibetur quodcumque homicidium, simulque,
- 3 Damnum injustum corporis, Mutilatio enormis, & non enormis.
- 4 Quin etiam interior voluntas deliberata occidendi, vel injuste lædendi proximum.
- 5 Intellectus verborum Christi, *Matth. 5.*
- 6 Tres gradus ad homicidium.
- 7 Quæ alia hoc quinto Præcepto prohibeantur?  
(a) Tract. 3. dist. 3. q. 5. & Tract. 9. dist. 6. q. 2. & 3.
- 8 Quomodo intelligendum? Cogitationis poenam nemo patitur.

**A** Gredimur nunc ea Præcepta Decalogi secundæ Tabulæ, quæ sunt negativa, seu quibus expresse prohibetur quodcumque jus Proximi violare, aut ipsum in bonis suis injuste lædere. Quia vero inter alia bona hominis primum locum obtinet vita, merito in hoc quinto Præcepto Decalogi per illa verba *Exod. 20. Non occides*, severissime a DEO interdicitur homicidium, ac quæcumque injusta læsio corporalis Proximi. Hinc sit

2 CONCL. I. Hoc quinto Præcepto Decalogi prohibetur, quodcumque homicidium injuste illatum, tam proximi, quam sui ipsius. Ita certa, & communis, ac habetur expresse *c. Si non licet 23. q. 5.* atque patet ex illis generalibus verbis; *Non occides.* Et quidem hoc Præcepto non solum homicidium opere consummatum, quod est ultimum damnum in corpore, videlicet mors, sed etiam quodcumque aliud damnum injustum in corpore citra mortem inferri prohibetur.

3 Porro hujusmodi damnum injustum in corpore citra mortem aliud est irremediabile, ut mutilatio, aliud remediabile, ut vulneratio, aut alia læsio curabilis. Rursus mutilatio alia est enormis, quæ impedit ex toto actum aliquem humanum, qui competeret homini secundum illam partem amputatam; prout contingit in amputatione manus dexteræ. Alia non enormis, id est, non impediens actum humanum: ut amputatio digiti,

vel alicujus partis digiti. Scotus 4. *diff. 15. q. 3. §. De secundo*, & alii.

4 CONCL. II. Quinto isto Præcepto Decalogi non tantum prohibetur homicidium exterius, sicut intelligebat Populus carnalis Judæorum in Veteri Testamento, qui solum reputabat illud prohiberi, pro quo inferebatur poena ab ipsa lege Mosaica, sed etiam secundum verum intellectum, atque authenticam declarationem Summi Legislatoris prohibetur interior deliberata voluntas occidendi, vel lædendi Proximum ex iracundia. Ita siquidem Christus Dominus *Matth. cap. 5.* docuisse legitur: *Audistis quia dictum est antiquis: Non occides. Qui occiderit, reus erit judicio. Ego autem dico vobis: quia omnis, qui irascitur fratri suo, reus erit judicio. Qui autem dixerit fratri suo, raca, reus erit consilio. Qui autem dixerit, fatue, reus erit gehennæ ignis.* Quibus verbis manifeste Christus rejicit errorem Judæorum, putantium, quod solum homicidium exterius hoc Præcepto prohibetur, dum etiam iram, seu quemlibet injustum vindictæ appetitum prohibitum esse ostendit.

5 Ubi pro clariori dictorum verborum, & sententiæ severioris intelligentia advertendum est cum S. Thoma 2. 2. *quest. 158. art. 3. ad 2.* quod ibidem Dominus loquatur de illo motu iræ, in quo quis appetit Proximi occisionem, aut quamcumque gravem læsionem: nam talis appetitus, si consensus rationis plene ac perfecte superveniat, est peccatum mortale, quod ipsum contextus verborum satis indicat.

6 Advertendum ulterius cum Lessio *lib. 4. de Just. & Jure, cap. 4. n. 26.* & aliis, quod Salvator noster dictis verbis explicaverit tres gradus ad homicidium. Primus est ira interna optans mortem Proximi. Secundus eadem ira prorumpens in contumeliam, sed leviolem, qui indicatur per *ly raca*, quod juxta D. Augustinum est interjectio spernentis, & adversantis. Tertius eadem ira erumpens in contumeliam gravem, & manifestam, qualis indicatur per *ly fatue*.

7 CONCL. III. Insuper hoc quinto Præcepto Decalogi prohibetur quodcumque convitium, aut probrosum & injuriolum verbum ex ira, vel appetitu vindictæ prolatum in Proximum, item & quilibet iræ motus, præscriptum a ratione modum excedens, similiter etiam injustus vindictæ appetitus, etiam si neque actu, neque ullo verbo, aut signo exteriori prodatur. Ita Doctores Catholici passim, & patet ex præallegatis verbis Christi Domini. Sed de his alibi. (a)

8 Nec dicas: juxta *L. 18. ff. De Panis*, & refertur *can. Cogitationis. De Penit. dist. 1.* Cogitationis poenam nemo patitur. Resp. enim cum Glossa ibidem communiter recepta, id intelligendum esse coram hominibus: nam, cum homo non scrutetur cogitationes, neque percipiat secreta cordium, bene verificatur, quod cogitationis poenam nemo patiatur ab hominibus. Secus est in ordine ad Deum, qui scrutatur corda, & *renes*, *Psal. 7.* unde coram Deo cogitatio prava ac deliberata incurrit culpam, & meretur poenam, juxta omnes, & patet ex nomo, & decimo Præcepto Decalogi.

#### QUESTIO II.

Quodnam Homicidium sit prohibitum?

#### SUMMARIUM.

- 9 Seipsum directe occidere non licet, absque Divina revelatione.
- 10 Facta quorundam Sanctorum excusantur.
- 11 Indirecte se occidere ex justa causa non est illicitum.  
Hujus exempla,
- 12 Et ratio.
- 13 Non tenemur vitam servare, nisi mediis ordinariis.
- 14 Quid de Religiosis?  
\* Quid de agrotis? *Addit. I. & II.*  
\* Quid de Hostibus in Bello justo? *Addit. III.*
- 15 Auctoritate publica possunt occidi malefactores.  
\* Num etiam malefactor, qui se opponit Licetoribus?
- 16 Auctoritate etiam privata potest occidi iniquus aggressor pro tuenda vita &c.



17 *Servato tamen moderamine inculpatae tutelæ.*  
*Hoc declaratur.*

18 *Corollaria.*

\* *Aliud notabile Corollarium.*

19 *Idem licitum pro defendenda pudicitia.*

20 *Si ea aliter defendi nequeat.*

21 *Num liceat pugnæ reperiuntur?*

22 *An liceat occidere furem ob defensionem suarum facultatum, vel honoris?*

23. 24. 25. 26. 27. 28. 29. *Propositiones diversæ circa hoc damnatæ, & cavendæ.*

30 *Item aliæ Propositiones.*

(b) Partim infra Quæst. seq. num. 37. partim supra Tract. 4. dist. 7. num. 10. & 12.

\* *Major declaratio aliquarum Propositionum damnatarum. Addit. I. & II.*

\* *Quanta debeat esse summa in Bonis Fortuna, ut liceat ob eandem aggressorem occidere? Addit. III.*

\* *An liceat occidere furem jam actu aufugientem? Ad. IV.*

\* *Solvitur aliqua Obiectio. Additio V.*

9 **C**ONCL. I. Absque Divina auctoritate, seu revelatione non est licitum seipsum directe atque ex intentione occidere, ad cavendum tandem quodcumque malum. Ita habetur c. *Si non licet*, 23. quæst. 5. estque certum. Probatur autem partim ex generali prohibitione huius quanti Præcepti Decalogi, partim ex eo: quia homo non habet jus & auctoritatem in propriam vitam, cum non sit dominus absolutus vitæ suæ (hic enim est solus Deus) sed dumtaxat custos & usufructarius, quatenus jus habet custodiendi vitam suam & membra contra quemcumque iniquum aggressorem, eisque utendi ad Dei laudem.

10 Dicitur notanter, *absque Divina auctoritate, seu revelatione*: tum propter exemplum S. Apolloniæ Virginis & Martyris, semetipsam in rogi sibi præparatum conscientis: tum aliorum quorundam Martyrum, ac præsertim Feminarum, quæ seipsas morti tradiderunt, ne pudicitiam amitterent: id enim fecisse creduntur ex Divina inspiratione, prout eas excusat S. Augustinus lib. 1. *De Civitate Dei*. cap. 20. & concordat textus cit. c. *Si non licet*, 23. quæst. 5.

11 **C**ONCL. II. Licitum tamen est, iuxta de causa aliquid facere, vel omittere: unde certe scitur præter intentionem nostram mors secutura, sicque seipsum indirecte occidere. Ita Scotus 4. *disp.* 14. quæst. 3. §. *De secundo*, & communis aliorum. Probatur Conclusio inductione. Sic enim miles potest, imo & tenetur non deserere stationem suam, etsi moraliter certus sit sese occidendum ab hostibus. Similiter tempore pestis, potest quis inservire infectis peste, etsi putet se pariter inficiendum. Potest item quis injicere ignem in pulverem tormentarium ad evertendam turrim hostilem, licet certum sit momento sese dissipandum: prout exemplificat Lessius lib. 2. *de Just. & Jure*, cap. 9. *dub.* 6. n. 27. & seqq. plura similia exempla adducens.

12 Ratio horum generalis est: quia in talibus circumstantiis proprie quis seipsum non interimit, sed ruina turris, vel impetus ignis, aut pestis &c. Neque talis seipsum interimere intendit, sed bono communi consulere, hostibusque Reipublicæ vires noscendi subtrahere. Hinc lib. 1. *Machabæorum*, cap. 6. laudatur Eleazarus, quod ad liberandum Populum suum interfecerit elephantem hostilem, cujus casu videbat se opprimendum; sicut & postmodum oppressus est, proprioque triumpho sepultus.

13 Similiter nemo tenetur vitam servare, nisi mediis ordinariis, & communibus. Unde Gobat *tract.* 5. *Quinarii*, cap. 1. num. 35. post Victoriam, & alios tradit, non teneri quempiam ad locum etiam propinquum migrare ob salubriorem auram, neque bibere vinum, quamvis Medicus dicat, ejus potu vitam ad decennium prolongatum iri nisi forte ab ejus longævitæ penderet salus Reipublicæ.

14 Et infra n. 60. & seq. subjungit, quod nullus Religiosus teneatur a suo Superiore petere potum, victum,

aut vestitum diversum ab iis, quæ sunt in ejus Conventu, Monasterio, Collegio usitata, quamvis non peccet, si ratione infirmitatis formidatæ peculiarem potum petat rogando; secus, si petat efflagitando tamquam debitum. Huc facit S. Bernardus *Serm.* 30. in *Cantica*, ubi graphice describit Religiosum plus, quam oportet, suæ valetudini studentem, ac proin inter alia queritantem: *Legumina ventosa sunt, caseus stomachum gravat, lac capiti nocet, potum aqua non sustinet pectus, pisces de stagno, aut de lotosa aqua mea penitus complexionem non congruunt* &c. Subdit autem inter alia Sanctus Pater: *Putate, quæso, Monachum esse, non Medicum; nec de complexionem judicandum, sed de professione.* Ratio jam fuit antea insinuata: nimirum quia nemo tenetur suam vitam servare, nisi mediis respectu sui status ordinariis.

#### Additio I.

\* Nec dicas: Si nemo tenetur suam vitam servare, nisi mediis ordinariis, tunc ægrotus, quin dicatur se ipsum indirecte occidere, potest bona conscientia respuere medicinas in periculo mortis, quamvis illæ medicinæ non sint nimium pretiosæ, & ceteroquin foret magna spes reconvalescentiæ, si easdem, quas absque ingenti difficultate posset, etiam fumeret. Resp. enim negando illatum, & ejusdem suppositum, quasi nimirum medicinæ respectu status infirmorum essent quid extraordinarium: etenim hæc, præsertim non nimis pretiosæ, in similibus circumstantiis respectu status ægrotantium non sunt extraordinaria, sed potius ordinaria remedia. Hoc tamen verum est, quod exinde sequatur, nec ægrotos (nisi salus Reipublicæ aliter suadeat) teneri in simili casu applicare media extraordinaria, puta respectu status nimis pretiosa, aut valde dura; e. g. vir non tenetur admittere abscissionem cruris, aut virgo infirma attactum Medici, seu Chirurgi in partibus inhonestis, vel mulier non potens parere excissionem foetus &c. Videatur la Croix l. 3. p. 1. n. 769. Item n. 776. ac n. 784. & 785. \*

#### Additio II.

\* Nec urgeas ulterius: Si probabilis spes sit per excissionem foetus salvandi Prolem quoad vitam spiritua-lem, ut nimirum eadem exinde deveniat ad Baptismum, tenetur Mater admittere sectionem Cæsaream, quamvis hoc remedium sit extraordinarium, & valde doloriferum: ergo similiter Mater ad salvandam vitam suam propriam corporalem obligatur admittere excissionem foetus, & consequenter ad salvandam vitam suam adstringitur quis adhibere quoque media extraordinaria, quamvis valde dolorifera. Ante Responsionem notandum ex P. Ildephonso Tausch. *Disp.* 1. quæst. 3. *Resolutionum Theologicarum* nomine sectionis Cæsareæ hic nil aliud intelligi, quam uteri Matris prægnantis a latere incisionem arte Chirurgica ita affabre factam, ut foetus, dum Mater eum pariendo eniti impotens est sectione facta extrahi, vel alia circa eundem fieri queant, quæ factu sunt necessaria. Et quamvis hæc sectio plerumque difficilis existat, & sæpe periculosa, eam tamen, si præsens sit Chirurgus in arte peritus, fieri posse citra periculum vitæ sive Matris, sive Proles, testantur plures apud Theophilum Raynaudum Tom. 14. *De ortu Infant. per sect. Cæs.* c. 2. & 3. ac in hac ipsa urbe Monacensi, ubi scribo, frequens ostendit experientia per famosum ac valde peritum quempiam Chirurgum Gallicum palam facta H. N.

Resp. negando consequentiam, & paritatem; Disparitas est, quia in antecedenti agitur de vita spirituali, non autem sic in consequenti: vita autem spiritualis est longe altioris ordinis quam vita corporalis, & exinde non mirum, quod si adsit peritus Sectionis Cæsareæ, & affulgeat probabilis spes salvandi alterum quoad vitam spiritua-lem, quod (inquam) aliquis teneatur ex præcepto charitatis (præsertim propria Mater) etiam cum notabili molestia, & sensibili dolore corporali salvare vitam



vitam spirituales alterius, semetipsum juvare impotentis, atque in extrema necessitate spirituali constituti, quæ omnia non verificantur in casu præsentis. Videatur de hoc fufius F. Ildephonfus Tausch. *loc. cit.* \*

*Additio III.*

\* CONCL. III. Licita est occisio Hostium nocentium in ipso conflictu, aut obfessione, aut expugnatione Fortalitii &c. five bellum illud fuerit defensivum, five etiam offensivum, dummodo justum. Ita communis, fuitque totum id jam fufius declaratum Tr. 4. Dist. 7. qu. 4. quorsum Lectorem remitto, solumque ex dictis ibidem addo, equidem talem occisionem juxta AA. pariter fieri licitam etiam post conflictum, si vita non fuerit condonata, & id ad vindicandam injuriam ob speciale aliquod atrox crimen morte dignum, & ad aliorum terrorem, five ad acquirendam, firmandamque Reipublicæ pacem videatur necessarium, aut saltem valde conducens; alias autem jam bello devictos, & captos trucidare fas non est, nec conveniens Christianæ mansuetudini: uti nec hostes occidere veneno, inficiendo puteos, farinam, aquas, glandes &c. quod foret contra Jura belli. Item licitum non est, feminas, aliasve personas gerendis armis ineptas, si ob defectum annonæ ab urbe obsessa expellantur, fame enecare, sed debent vel iterum in urbem repelli, si sit spes recipiendi, vel ipsis concedi transitus per castra, dummodo ab his expulsis revera nullum imminet obsidentibus periculum. Similiter non licet captum innocentem parvulum Filium Gubernatoris civitatis velle suspendere, nisi ipse Gubernator statim urbem illam extradat obsidentibus. Ratio est; quia non licet Innocentes, quales forent omnes hi enarrati per se & directe occidere juxta jam dicta. Plura de his vide in Jure Canonico præsentis Auctoris l. 5. Decret. Tit. 12. \*

15 CONCL. IV. Licita est occisio alterius, quando sit auctoritate publica per Justitiam punitivam ob patrata scelera. Ita communis, & patet tum ex illo Exod. 22. *Maleficos non patieris vivere.* tum idem probatur ratione: quia sceleratorum hominum punitio prorsus necessaria est ad vitam hominum politicam, & quietam; alioquin enim scelera invalescerent, & prohi præ malitia atque infestationibus impiorum non possent secure vivere.

*Additio.*

\* Quod si Lictores, seu satellites auctoritate publica aliquem malefactorem jussi sint capere, is vero se opponat, ne comprehendatur, ut tunc similis malefactor a satellitibus occidi licite possit Julius Clarus, & Farinacius apud la Croix *loc. cit.* n. 797. sequentes sex requirunt condiciones. 1. Ut crimen sit atrox. 2. Ut Lictores habeant mandatum ob id capiendi malefactorem. 3. Ut capiendus armata manu resistat. 4. Ut capiendus jam sit diffamatus de tali crimine. 5. Ut is alios modo comprehendendi nequeat, nisi occidendo eum. 6. Ut timeantur graviora mala, si evaderet. \*

16 CONCL. V. Etiam auctoritate privata licitum est occidere iniquum invasorem, & aggressorem ob defensionem vitæ suæ, & integritatem membrorum, quamvis talis aggressor fuerit furiosus, aut plane ebrius; quoniam & hic malum gravissimum infert, & saltem materialiter invasor injustus est: dummodo totum illud fiat cum moderamine inculpatæ tutelæ. Ita rursus communis. Ratio est: quia Jus naturæ permittit, ut vim vi repellas, sicque iniquum aggressorem, qui tibi vitam eripere conatur, prævenias, & occidas, si aliter mortem evadere nequis. Unde c. *Significasti.* 2. De Homicidio dicitur: *Vim vi repellere omnes leges, & omnia Jura permittunt.*

17 Sed mox pro confirmatione secundæ partis Conclusionis ibidem subjungitur: *Tamen id debet fieri non ad sumendam vindictam, sed ad injuriam propulsandam; hoc est, cum moderamine inculpatæ tutelæ.* Porro mo-

deramen inculpatæ tutelæ in homicidio tunc censetur adhiberi, quando quis occidit solum, quia revera in conscientia, & sine dolo ac fraude putat, se non posse evadere, nisi occidat.

18 Hinc infertur, quod, si quis cum levi percussione potest se ab aggressore defendere, tunc eum licite occidere non possit. Item, qui absque gravi dedecore aut alio suo incommodo potest fugere, vel clamare & implorare auxilium, tenetur ad id. Similiter si is, qui te invasit, jam fugiat, vel desistat nocere, ita ut amplius non sit metuendus, non tibi licet eum persequi, & occidere; quia talis occisio non esset amplius in defensionem vitæ, sed in vindictam accepti vulneris; nisi forte periculum adesset novæ invasionis, & quod alter regrediens te denuo sit aggressurus. Semper enim ad futurum malum est respiciendum, ad quod dumtaxat vitandum justa defensio conceditur, non autem ad præteritum, cujus non est defensio, sed vindicta.

*Additio.*

\* Ceteroquin per modum justæ defensionis, & servatis conditionibus moderaminis inculpatæ tutelæ proxime explicatis licet occidere actualem insidiatorem etiam præveniendū eundem, nec tenetur quis prius ictum expectare alterius, e. g. advertis latronem, vel hostem tuum inter dumeta ex insidiis sclopetum proxime parantem, ut contra te exoneret; in hoc casu non teneris expectare, utque dum actu fiat explosio sclopeti, sed potes, ubi nulla tuta via superest fugæ, talem insidiatorem præveniendū occidere, vel graviter vulnerare, uti recte Sporer Tract. 5. c. 2. sect. 3. n. 150.

19 CONCL. VI. Etiam pro defendenda pudicitia licitum est occidere invasorem, seu eum, qui tentat aliquam personam violare, si aliud remedium pudicitiam defendendi non suppetat. Ita Lessius l. 2. c. 9. dubit. 12. & alii. Ratio est; quia pudicitia est bonum summæ æstimationis, ac pretiosior multis opibus: simulque in tali casu adest periculum peccati, ne videlicet persona violanda ob carnis fragilitatem tandem consentiat.

20 Verum data Conclusio pariter, uti insinuatam jam fuit, intelligenda est, quando pudicitia, vel etiam integritas carnis aliter defendi non potest: nam, quando aliter periculum illud effugere potes, non licet tibi injustum aggressorem occidere, aut vulnerare, cum non amplius observaretur moderamen inculpatæ tutelæ.

21 Num autem, quando femina, vel juvenis sollicitatur, five contrectatur, aut osculum accipit ab aliquo lascivo, liceat talem post ipsum osculum seu tactum percutere, seu alapam infligere, existimat Lugo disp. 10. De Just. & Jure sect. 10. n. 196. non esse in hoc scrupulose agendum, sed id licite fieri posse, imo & aliquando expedire, non solis verbis asperioribus, sed manibus quoque puritatem animi, & constantiam graviter ostendere: etenim id puella facit non tam in vindictam, quam in defensionem pudicitiae pro futuro; nam si non ostendat indignationem, credet amarius, gratum ei hoc esse, atque alia vice iterum tentabit similia.

23 CONCL. VII. Etsi Doctores asserant; licitum esse occidere furem in defensionem suarum facultatum, si is sit fur nocturnus: aut si sit fur diurnus, telo tamen se defendat, ut habetur l. *Itaque* 4. ff. *Ad Legem Aquiliam* & tenet Covarruvias in Clem. Si furiosus part. 3. §. iii. n. 6. ac Lessius *loc. cit.* dubit. 11. cum aliis: dummodo ipsæ facultates sint magni momenti, nec sit spes illas aliter recuperandi. Etsi insuper multi affirmant Doctores, quos allegat, & sequitur Tannerus Tom. 3. disp. 4. quest. 8. n. 73. fas esse pro defensione honoris aggressorem injustum occidere, si nec aliter defendi, nec facile recuperari læsus honor possit: tamen, ne via patens homicidiis aperiatur, sequentes Propositiones, partim ab Alexandro VII. & partim ab Innocentio XI. damnatæ, merito erunt observandæ, atque omnimodis evitandæ.



23 Hinc sciendum, quod Alexander VII. in speciali Decreto, die 24. Septembris 1665. emanato, inter alias plures Propositiones, etiam sequentes damnaverit. Prima (in Decreto ordine 17.) sic habet: *Est licitum Religioso, vel Clerico calumniatorem gravia crimina de se, vel sua Religione spargere minantem, occidere, quando alius modus defendendi non suppetit; uti suppetere non videtur, si calumniator sit paratus, vel ipsi Religioso, vel ejus Religioni, publice & coram gravissimis viris prædicta impingere, nisi occidatur.*

24 Secunda (ordine 18) *Licet interficere falsum accusatorem, falsos testes, ac etiam judicem, a quo iniqua certo imminet sententia, si alia via non potest innocens damnum evitare.*

25 Tertia (ordine 19.) *Non peccat maritus occidens propria auctoritate uxorem in adulterio deprehensam.*

26 Quarta, quæ una cum sequentibus damnata est ab Innocentio Papæ XI. in Decreto, 1679. die 2. Martii edito [estque in Decreto ordine 30.] sic se habet: *Fas est viro honorato occidere invasorem, qui nititur calumniam inferre, si aliter hæc ignominia vitari nequit: idem quoque dicendum, si quis impingat alapam, vel fuste percutiat, & post impactam alapam, vel ictum fustis fugiat.*

27 Quinta [ordine 31.] *Regulariter occidere possum furem pro conservatione unius aurei.*

28 Sexta [ordine 32.] *Non solum licitum est defendere defensione occisiva, quæ actu possidemus, sed etiam, ad quæ jus inchoatum habemus, & quæ nos possessuros speramus.*

29 Septima (ordine 33.) *Licitum est tam heredi, quam legatario contra injuste impediens, ne vel hereditas adeatur, vel legata solvantur, se taliter (id est, defensione occisiva) defendere, sicut & jus habenti in Cathedrali, vel Præbendam, contra eorum possessionem injuste impediens.*

30 His addi poterit Propositio 13. 14. 15. item 34. & 35. in eodem Decreto Innocentii XI. damnata: sed eorum quælibet jam alibi (b) refertur. Hæc igitur omnes Propositiones, utpote latam homicidii portam aperientes, & singulæ ipsarum tamquam scandalosæ, & in praxi perniciosæ, merito a summa Sede damnatæ sunt, adjuncta gravissima prohibitione, ne defendantur, aut ad praxin deducantur. Proinde nonnulli Libri imposteriorum caute legendi, & si in eisdem hujusmodi occurrerint sententiæ, oportebit ab his cavere.

#### Additio. I.

\* Quær. I. Cur liceat occidere aggressorem in Bonis fortunæ, si summa sit suo modo notabilis, & cur non aggressorem per verba injuriosa seu contumeliosa in Bonis famæ ac honoris: cum tamen honor & fama sint Bonum nobilius Bonis fortunæ? Resp. Rationem hujus, ac disparitatem inter utraque Bona esse, quia *inprimis* occisio Infamatoris non esset certum medium conservandi famam; quinimo sæpius eandem magis diminueret, atque talis a prudentibus potius homo nimis vindicativus, & passionatus audiretur. *Secundo.* Quia bona fortunæ semel amissa verisimiliter amplius recuperari nequeunt, uti supponitur; alias enim nec liceret propter eandem raptorem occidere, cum excederetur moderamen inculpatæ tutelæ: econtra vero Bona famæ vel honoris ordinaria recuperari facile possunt saltem auctoritate Judicis: puta per actionem injuriarum, per actionem ad palinodiam, per retorsionem verbalem &c. *Tertio.* Quia, si talis famæ defensio ordinarie liceret, tenderet in maximam perniciem Reipublicæ, præsertim, cum plurimi vel ex superbia, aut invidia, aliove malo affectu, vel ex præoccupatione judicii, amore proprio, aut aliis passionibus excæcati, facile sibi fingerent, ab hoc vel illo imminere proximum periculum infamæ, vel læsionis honoris &c. sicque plurima committerentur duella æque, ac homicidia, & consequenter Respublica etiam nobilibus suis civibus, alias ad eam defendendam aptissimis copiose privaretur, prout ante hac misere experta est Gallia. Vide de hoc fusius Auctores in propositiones damna-

tas scribeantes, notanter Cardenam, & Dominicum Viva his \*

#### Additio II.

\* Porro si quis non solum verbo injurioso (uti sit per contumeliam) aggredieretur alterius honorem, sed simul aliud grave malum reale intentando, quod haud aliter, quam acutis averti valeret, posset illud repelli per modum inculpatæ tutelæ etiam apprehendendo gladium &c. quamvis postea sequatur alterius occisio. Ex quo Cardenas apud la Croix l. 3. p. 1. n. 802. deducit: I. Quod Titius maritus videns adulterum volentem ingredi ad uxorem suam possit huic opponere gladium, ut deterreatur adulter, & emanat: quod si vero ex tunc adulter vicissim stringat gladium, viam vi facturus, si Titius nequeat aliter arcere, potest occidere, & in hoc tueretur non solum honorem suum, sed etiam jus thori, imo & vitam suam, quam stringendo vicissim gladium adulter vult Titio eripere, ut viam sibi paret ad uxorem ejusdem. II. Si Petrus fuste intentet ignominiosam percussionem Paulo, qui sine gravi nota aliter fuga declinare non potest, in eo casu Paulus potest opponere gladium, ut avertat intentatam percussionem graviter ignominiosam. Quod si Petrus vicissim opponat gladium, jam non tantum aggreditur honorem, sed etiam vitam Pauli; unde Paulus, si aliter non possit, licite vim arcebit, etiam si aliter fieri nequit, defensione occisiva. Idem dic, si quis præter verba contumeliosa, quibus alterum afficit, pariter tentet ipsi surripere summam notabilem in bonis fortunæ. \*

#### Additio III.

\* Quær. II. Quanta debeat esse summa in Bonis fortunæ, ut censeatur notabilis, ob quam liceat raptorem, seu furem servato moderamine inculpatæ tutelæ occidere, aut graviter lædere? Resp. I. Quantitas illa debet esse major, quam quæ sufficeret in ratione forti ad peccatum mortale. Ita Sporer Tract. 5. in V. Præcept. Decalog. cap. 2. sect. 3. n. 157. Ratio est; quia regulariter ad peccatum grave furti, præsertim respectu mediocriter divitis sufficit ablatio unius aurei, qui tamen aureus, saltem regulariter loquendo, non sufficeret ad occidendum raptorem etiam servato moderamine inculpatæ tutelæ, cum Propositio contraria superius jam allegata sit damnata ab Innocentio XI. ordine 31. Ex quo infert P. Sporer, pessime egisse custodem vineæ, qui pauperculum uvæ aliquas carpentem, cum clamore monitus non mox cessaret, scilopeto trajectum occidit: item alibi pariter peccasse custodem raparum agri, qui puerum rapas extrahentem securi jacta gravissime læsit in femore cum periculo vitæ.

Resp. II. In specie, ac in particulari nequit quantitas regula aliqua universali definiri, sed debet considerari diversitas status, num sit illustris, vel plebejus, dives, vel pauper &c. Ita denuo Sporer loc. cit. Ratio est: quia ablatio respectu unius v.g. pauperis potest esse notabilis, quæ tamen non censetur talis respectu valde divitis. Cardenas apud la Croix l. 3. p. 1. n. 808. putat, respectu omnium etiam ditissimorum censi in præfæcti rem magni momenti valorem quadraginta Imperialium. Loquendo autem in specie de Pauperibus existimat Sporer cum aliis, respectu eorum rem magni esse momenti unum alterumve aureum ablatum, sine quibus difficulter aliquo notabili tempore vitam suam sustentarent: nam Propositio illa, quæ tenuit licere occidere raptorem ob unius aurei ablationem, propterea ab Innocentio XI. rejecta est; quia posuit, id licere *regulariter*, quod utique falsum est, non tamen obstat Doctrinæ Patris Sporer, non regulariter, sed tantummodo in casu extraordinario respectu pauperum loquentis. Quoad vero magis divites admittit Molina Tom. 4. tract. 3. disp. 16. nec quatuor ducatos sufficere, ut propter eosdem tur occidi licite possit, sicque mitti in infernum. Porro, an etiam per moderamen inculpatæ tutelæ, & absque peccato alterum occidens non incurrat irregularitatem ex defectu lenitatis, dicetur Tract. 13. disp. 3. n. 65. & seqq. \*

Additio



## Additio. IV.

\* Quær. III. An liceat raptorem Bonorum fortunæ occidere, non solum tunc, quando intentat eadem auferre, sed etiam, quando talia jam actu abstulit, & cum his sese fugæ commisit? Resp. Affirmative, si fur sit sub actuali fuga constitutus, & talis res, quæ sit magni momenti, alia via recuperari nequeat. Ita Sporer Tract. 5. c. 2. sect. 3. n. 156. la Croix l. 3. p. 1. n. 810. & apud eundem Card. de Lugo cum communi. Ratio est, quia re ipsa talis fugiens, antequam rem in locum tutum ponat, censetur continuare actualem aggressionem, & ablationem, uti recte advertit Illung apud La Croix loc. cit. Adeoque, sicut sub actuali aggressionem, ita & sub actuali fuga licebit occidere, si alia via recuperandi non super sit: neque censetur exerceri vindicta, sed potius moderamen inculpatæ tutelæ, præsertim, si quis talem fugientem clamando, dum tempus adhuc permittit, præmoneat, quod, nisi rem dimittat, sclopetum v. g. in eum explodat. \*

## Additio V.

\* Dices: Si quis alteri non solum verbalem, sed etiam realem injuriam v. g. infligendo alapam, aut fuste percutiendo intulerit, & postea aufugerit, talis actu fugiens nequit occidi: ergo etiam actu fugiens occidi non poterit, qui damnum intulit in Bonis fortunæ. Anteced. patet ex Propositione damnata ab Innocentio XI. & superius n. 26. relata. Consequentia vero videtur tenere a fortiori; cum talis injuria realis, præsertim Equestri, Nobili, alterive honorato viro illata apprehendatur majus sæpe malum, quam furtum quadraginta imperalium. Resp. neg. consequentiam & paritatem. Disparitas est, *in primis*; quia alter per ipsam turpem fugam jam se reum videtur fateri, ac ignavum & timidum, sicque læso exinde suus honor redire apud alios. Deinde alia disparitas est; partim, quia occisio ordinarie loquendo non est aptum remedium ad acquirendum honorem per alapæ inflictionem ac fustis percussione læsum; partim, quia alia ordinarie suppetunt media recuperandi iterum honorem, ac satisfactionem. Unde occisio in simili casu excederet moderamen inculpatæ tutelæ, & videretur potius vindicta, quæ privato homini non licet. Quid autem dicendum foret, si irrecuperabiliter honorem una cum tuo officio deperderes, dicitur post n. 45. Additione II. \*

## QUÆSTIO III.

## De Homicidiis specialem malitiam continentibus.

## SUMMARIUM.

- 31 Homicidium simplex, & qualificatum.
- 32 Occisio Parentum, Consanguineorum &c. superaddit specialem malitiam.
- 33 Quid de abortu?  
Et an illum procurans fiat irregularis?
- 34 Fœtus, quando animetur?
- 35 Contra procurantes abortum rigida Bulla Sixti VI. Moderata tamen per Gregorium XIV. & quomodo?
- 36 Pœna procurantium abortum fœtus animati.
- 37 Gemina propositio circa materiam abortus damnata.
- \* Quam difficulter impetretur dispensatio quoad irregularitatem ratione procurati abortus contractam?
- 38 Proditio Patriæ, & machinatio contra Principem est speciale peccatum.
- 39 Homicidium sacrilegum, quod?
- 40 Ejus duplex species.  
(c) Ut dictum Tract. 5. dist. 3. n. 12.
- 41 Homicidium quandoque aggravatur ex modo occidendi.  
(d) De hoc Tract. 12. dist. 2. n. 36. 37. & 39.  
(e) Vide Tract. 3. dist. 1. n. 41. & seqq.
- 42 Duellum, quid, & quam graviter prohibitum?
- 43 Quando possit acceptari tempore belli?

44 Quid in casu mortis alioquin inferenda?

45 Duella specialiter damnata.

\* Fusior declaratio, qualiter duella, &amp; quando sunt prohibita per quatuor Additiones.

\* De occisione sui ipsius &amp;c. Addit. V.

31 **A**Dvertendum, quod Homicidium generatim aliud sit simplex, aliud qualificatum. Hujus posterioris generis est occisio parentum, aut personarum propinquarum, & vulgo Parricidium appellatur. Item Homicidium sacrilegum, proditorium, & si quod est aliud, specialem malitiæ qualitatem sive circumstantiam includens, quæ non reperitur in simplici homicidio. His prænotatis, sit

32 CONCL. I. Homicidium, quo occiditur aliqua persona sanguinis cognatione, vel affinitate conjuncta; superaddit specialem malitiam in Confessione explicandam: ut si quis occidat aliquem ex suis parentibus, vel fratrem, sororem, nepotem, aut alium cognatum, vel affinem. Ita certa, & communis. Hujusmodi enim Homicidia sunt Parricidia & specie distincta ab aliis homicidiis: quia sunt non solum contra Justitiam Proximis conservandam, sed etiam contra Pietatem, qua honorare debemus parentes, (& suo modo præ ceteris) personas nobis carnis propinquitate, vel affinitate conjunctas.

33 Huc accedit, si parens deliberate abortum fœtus animati procurat: nam non solum simplex Homicidium, sed & Parricidium committit, ut notant communiter Doctores. Quod si vero quis malitiose impediat, ne fœtus humanus concipiatur, aut per pocula, aliove illicitos modos, fœtus necdum animati abortum procuret, peccat is quidem graviter, & mortaliter, non tamen vere Homicidium, sed quasi Homicidium committit; Arg. c. Quod vero & c. Moyses 32. qu. 2. juncto c. Si aliquis. De Homicidio, ubi de tali dicitur, quod ut homicida teneatur. Hinc licet procurans abortum fœtus animati fiat irregularis, cum sit vere & proprie Homicida: secus tamen est dicendum, si fœtus necdum fuit animatus text. clar. c. Sicut ex litterarum. De Homicidio.

34 Ceterum animatio fœtus post organizationem embryonis solet in masculis accidere die 32. a conceptione, & aliquando citius, vel tardius: in foeminis die 42. & aliquando citius, aut tardius, prout post Hypocratem notat Lessius l. 2. De Just. & Jure c. 5. n. 65. & Lugo disp. 10. sect. 6. n. 133. Fatendum tamen, quod non pauci post Glossam Clem. iii. v. Simul unitas. De Summa Trinit. arbitrentur, animationem masculi 40. & foeminae 80. die a conceptione fieri, econtravero nonnulli, atque inter eos quidam præclari Medici asserant, animam rationalem ordinarie statim infundi circa septimum a conceptione diem, quæ proinde, ut Temistius in 1. De Ani. c. 22. loquitur, ipsa sibi efformat, & præparat domicilium: non efformatum ante & præparatum subit. Verum, quidquid sit de hoc, priorem sententiam Glossæ utpote benigniorem, & communi persuasioni conformem, Forum etiam externum sequi solet quoad pœnam homicidii ordinariam.

35 His adde cum Barbosa part. 2. De Off. & pot. Episc. alleh. 51. n. 136. & seqq. quod contra procurantes abortum, consultantes, & quocumque modo consentientes Sixtus V. Anno 1588. ediderit rigidam Bullam, quæ incipit: Effrazatam, ac refertur Tom. 2. Bullarii Romani Constit. 87. ipsius. Eam tamen moderatus est Gregorius XIV. in Bulla, Sedes Apostolica 1591. edita (& habetur tom. 2. Bullarii Romani Constit. 8. dicti Pont.) ubi hic pœnas procurantium abortum fœtus inanimati, vel præbentium mulieri venena sterilitatis reduxit ad terminos Juris communis, juxta quod tales puniendi sunt ut homicidæ. c. Si aliquis de Homicidio: non tamen fiunt irregulares. c. Sicut ex litterarum Eod. Pœnas vero eorum, qui abortum fœtus animati procurant, eatenus moderatus est, ut a peccato & excommunicatione, quam juxta Bullam Sixtinam tales incurrunt Summo Pontifici reservatam, quilibet Confessarius, ad hos casus per Ordinarium loci specialiter deputatus absolvere possit.

36 Sequi-



36 Sequitur proinde, quod procurans abortum foetus animati defacto præter contractam exinde irregularitatem fiat excommunicatus, quamvis hæc excommunicatio non amplius sit reservata Papæ, ut dictum. Deinde sequitur, quod non sint sublatae aliæ poenæ in cit. Bulla Sixti V. contra procurantes abortum constitutæ: uti sunt poenæ in utroque Jure homicidis constitutæ, ac, si tales fuerint Clerici, cujusvis Privilegii Clericalis, Dignitatis, Beneficiiue Ecclesiastici privatio, atque inhabilitas ad talia impofterum consequenda, item poena Degradationis, ac traditionis Curiae sæculari &c. Nam de hisce poenis, earumque moderamine nihil disposuit Gregorius XIV. & consequenter eas in suo vigore reliquit, prout amplius patet ex citatis Bullis, ac Barbosa ibidem.

37 Insuper cavenda erit, quantum ad Propositum, duplex Propositio, novissime ab Innocentio XI. condemnata, quarum prior, ordine 34 latam procuratori abortus viam aperuit, docendo: *Licet procurare abortum ante animationem fetus, ne puella deprehensa gravida occidatur, aut infanctetur.* Altera, ordine 35. & malitiam prioris amplius extendens, ita sonat: *Videtur probabile, omnem fetum, quamdiu in utero est, carere anima rationali, & tunc primum incipere eandem habere, cum paritur, ac consequenter dicendum erit, in nullo abortu homicidium committi.* Et hæc quidem Propositio manifeste refellitur ex S. Scriptura; nam legitur *Jeremie c. 1. Antequam exires de vulva, sanctificavi te.* Et *Luce 1. Spiritu Sancto replebitur adhuc ex utero matris sue.* Et *Gen. 25. Dedit Dominus conceptum Rebecce, sed collidebantur in utero ejus parvuli.* Talia quippe: ac præsertim sanctificatio, non possunt convenire, nisi enti animato, ac supposito rationali. Prior vero Propositio merito reprobat: quia abortus, etiam foetus inanimati, est gravius peccatum pollutione: cum procuratio abortus opponatur proximis generationi: atqui non licet procurare pollutionem, etiam ad vitandam mortem; ergo multo minus abortum.

Additio.

\* Ceteroquin tum ex dictis superioribus, tum ex Jure Canonico l. 5. *Decret. tit. 10. n. 25.* inferes, quam infelices sint præsertim Clerici abortum foetus animati, effectu defuper secuto, directe vel indirecte procurantes, vel consilium seu auxilium ad eundem de industria præbentes, siue sint curati, siue simplices, siue Beneficium habeant, siue non: si enim nullum pro illo tempore Beneficium adhuc habeant, etiam tale acquirere licite nequeunt, nisi dispensetur a Papa, quamvis delictum tale sit occultum. Si vero Beneficium habeant, illud quidem ante sententiam dimittere non tenentur per se, attamen ante sententiam, & licet delictum sit occultum, sunt ipso facto irregulares, consequenter præter alios irregularitatis effectus non amplius possunt, si citra infamiam abstinere valeant, juxta dicta *Tr. 2. D. 2. q. 3. n. 28.* celebrare Missas, quas tamen plurima Beneficia requirunt, consequenter vel ex hoc capite tenentur, quantum sine gravi diffamatione possunt, dimittere Beneficium, cujus obligationi nequeunt satisfacere, nisi dispensentur a Papa, quod difficillime & non nisi urgentissimis de causis fieri solet. Unum saltem consolatorium pro talibus additur in jure Canon. l. 5. *Decret. Tit. 12. n. 25.* Quod nempe hi Beneficio actu possessi saltem tunc ulterius frui licite valeant, si illud præter recitationem Horarum non requirat exercitium personale alicujus Ordinis Sacri. \*

38 CONCL. II. Parricidalibus Homicidiis addi potest Proditio Patriæ, aut si ei vis inferatur: item machinatio contra Regem, siue Principem Patriæ. Hæc enim sunt specialia peccata contra Pietatem erga Patriam, ac in Jure reputantur crimina læsæ Majestatis, & gravissimis poenis merito subijciuntur.

39 CONCL. III. Datur ulterius homicidium, & sacrilega percussio, qua peccatur contra specialem virtutem Religionis, per quam debemus honorem, & reve-

rentiam personis, locis, aliisque rebus Deo sacratis. Ita communis.

40 Porro hujusmodi Homicidium, & percussio sacrilega habet duas species. Una est, qua occiditur, vel percutitur injuriose aliqua persona Ecclesiastica, id est, Clericus, vel Religiosus: & tales Clericorum percussores ipso facto incurrunt excommunicationem latam *can. Si quis suadente, 17. quæst. 4.* Altera Homicidii sacrilegi species est, qua occiditur, vel percutitur quis usque ad sanguinis effusionem in loco sacro; violatur enim tunc locus sacer, & consequenter committitur Sacrilegium. (c)

41 CONCL. IV. Insuper aggravatur Homicidium voluntarium ex modo occidendi: ut si quis occidat Proximum proditorie (hoc est, vel sub specie amicitiae, vel saltem securum, nihilque mali prævidentem, v. g. veneno, a tergo, de nocte, vel per insidias &c.) aut si Assassinium Homicidium fiat, dum quis data pecunia conducit occisorem, aut illa accepta conductus occidit. Et quidem hujusmodi circumstantiam esse in Confessione explicandam, censet Azorius *part. 3. lib. 2. cap. 18. §. fin.* eo quod specialem deformitatem contineat, quia adimit alteri jus naturale sese defendendi: unde utrumque, scilicet tam Homicidium proditorium, quam Assassinium non gaudet Immunitate Ecclesiastica, (d) atque alias a Legibus gravissime punitur. Verum Maltius *disp. 11. Theol. Moral. n. 119.* arbitratur, poenas statutas contra Homicidium qualificatum v. g. proditorium, non ostendere differentiam specificam a non qualificato: nam distinctio specifica peccatorum desumitur per oppositionem ad diversas specie virtutes, vel rectitudines. (e)

42 Quæres I. Quid censendum sit de Duello? Resp. *Duellum* (quod alio nomine, a Græcis derivato, *Monomachia* dicitur) est pugna singularis ex conducto. Et hoc quidem, si fiat privata auctoritate (vix uno, vel altero casu excepto) Juretum Civili, tum Canonico sub gravissimis poenis prohibetur. Sic, ut aliæ plures Duellantium poenæ taceantur, in Concilio Trident. *sess. 25. cap. 19. de Reform.* poena excommunicationis, ac omnium bonorum suorum proscriptionis, perpetuæque infamiae decreta est in committentes Duellum, eorumque Patrimonios: simulque statuitur, ut, si in ipso conflictu decesserint, perpetua careant Ecclesiastica Sepultura, addita etiam poena excommunicationis in spectatores, si nimirum hi sint tales ex proposito, & data opera: item in dantes consilium in causa Duelli, ipsorumque locorum Dominos, qui locum ad Monomachiam in terris suis inter Christianos concesserint. Ratio tam rigidae Constitutionis ibidem additur: quia *detestabilis duellorum usus fabricante diabolo est introductus, ut cruenta corporum morte animarum etiam perniciem lucretur.* Siquidem in actuali Duello decedentes recte in infernum descendunt, cum moriantur in statu actualis peccati mortalis, de quo vix habent spatium poenitendi.

43 Notanter tamen additur, Duellum esse licitum, *vix uno vel altero casu excepto*: nam inprimis tempore belli, quando hostis exercitui Duellum offert, licite illud acceptatur, dum necessarium videtur ad averterendam totius exercitus ignominiam, animosque hostium debilitandos, & suorum confirmandos exemplo Davidis, qui hac de causa singulare certamen cum superbo Goliath invivisse legitur. *1. Reg. cap. 17.* Idem dicendum, si communi partium consensu totum bellum, ceteroquin nonnisi copioso sanguine terminandum, ad duorum, vel paucorum certamen revocetur: nam tunc hujusmodi Duellum loco justi belli succedit. Sanchez *lib. 2. in Decalog. cap. 30.* & alii passim.

44 Alius casus est, quando provocatus ad Duellum videt se injuste occidendum a provocante, nisi Duellum acceptet: nam, si aliud remedium non suppetat sese a morte liberandi, licite potest acceptare; quia hoc nihil aliud est, quam tueri vitam suam. Azorius *cit. lib. 2. cap. 5. Maltius disp. 11. n. 113, & alii.*



45 Verumtamen litis privatæ terminandæ causa non est licitum acceptare Duellum, cap. 1. & seqq. De Purgatione vulgari. Nullus enim privatus debet esse iudex in propria causa ad vindicandam injuriam, quam sibi præcendit illatam. Insuper cavenda erit illa quorundam opinio, quam merito inter alias Propositiones, ordine 2. damnavit Alexander VII. & sic sonat: *Vir equestris ad Duellum provocatus potest illud acceptare, ne timiditatis notam apud alios incurrat.*

Additio I.

\*Et sane propositio proxime allegata meritissimo ab Alexandro VII. damnata fuit; nam nota illa timiditatis, quæ a parte rei vel omnino non, vel saltem tantummodo apud imprudentes aliquos incurritur, tanti æstimanda non est, ut propterea tuam & alterius conduellantis vitam tam corporalem, quam spirituales manifestis periculo temporalis ac æternæ miseriæ exponas. Itaque, si aliquis similibus te verbis provocat: *Si es vir honestus, genuinus, Nobilis, Cordatus miles &c. pugna mecum gladio, aut globo &c.* Responde tali provocanti: *sum, & manebo honestus, genuinus, Nobilis, Cordatus miles &c. licet tecum duellum non committam, quod recuso, non quia te ullatenus timeo, sed quia Deum, & Leges duellum gravissime prohibentes præ oculis habeo. Quod autem te non timeam, videbis, quando me aggredi tentaveris: tuam autem provocationem merito contemno; quia idem sonat, ac si diceret: si es honestus, cordatus &c. vade mecum ad furandum, vel adulterandum, cum utrobique sit gravissima prohibitio.* Ita egregie P. Pichler lib. 5. Decret. Tit. 14. num. 7. qui recte subjungit, quod, si qui mundani, ac minus prudentes nolint tibi serio protestanti credere, & si duellum non ex iusto fine sed ex timore recuses, certo tibi persuadeas, illud credi ab aliis melioris & sanioris mentis utique pluris æstimandis. Profecto, etsi juxta Statuta Illustrissimi Ordinis Equestris S. Jacobi inter alia Candidatus Ordinis interrogetur, an numquam recusaverit duellum provocatus, & si ex mera timiditate recusasse deprehendatur, tamquam ignavus repellatur, non tamen quasi indignus, seu ignavus repellitur, qui recusavit duellum ex causa, ne Deum offendant; uti testatur Dominicus Viva ad Propositionem citatam ab Alexandro VII. damnatam. \*

Additio II.

\*At ponamus, quempiam e. g. Officiale Bellicum miseris hisce temporibus in tantis circumstantiis ac angustiis esse positum, ut recusando duellum non solum apud nonnullos minus prudentes incurrat periculum timiditatis, sed etiam gravissime periclitetur de amittendo exinde officio, statu, ac dignitate sua, & competente sustentatione, ab ipso officio dependente, quaeritur an saltem tunc ad declinandam ignominiam notam cum amissione officii &c. conjunctam duellum liceat inire, si aliud non suppetat medium? Ad hoc difficile quaesitum repono formalia Patris Pichler lib. 5. Decret. Tit. 14. n. 8. qui ex Patre Seybold refert, & resolvit sequentem casum.

Cajus obscuro genere natus, sed officio bellico Nobilis, ad quod sua virtute eluctatus fuerat, e nobilissima quadam familia Germaniæ uxorem duxerat: nescio qua occasione dein idem Cajus ab alio quodam magnæ nobilitatis Officiali bellico, ejusdem fere & non multum supra Cajum eminentis officii, arundine ignominiose est percussus. Nobilitatem invaloris reveritus, nulla usus est defensione Cajus; vulgatur res in exercitum: Officiales reliqui contra eum protestantur, negant, cum eo stare milites velle, eumque tamquam imbellem e castris exesse iubent. Princeps Imperii, in cujus cohorte Centurionem (einen Hauptmann) agebat, a Cajo impioratus reponit, se non remove ipsum ab officio, cogere tamen Officiales & milites aliorum Principum se non posse, ut cum ipso stent in armis, ipse sibi prospiciat. Frustra omnia; remedium retinendi

vel recuperandi Officium erat nullum, nisi monomachia seu duellum, quod tamen Cajus non arripuit, & ideo privatus Officio, atque ad pristinae fortunæ statum reductus ad rucolas se contulit cum sua perillustri conjuge, ubi cum magna paupertate multis jam annis luctatur.

Ad hunc casum respondet P. Seybold, quod Cajo non modo licitum fuisset contra percutientem arundine in continenti se defendere etiam defensione occisiva, si aliter non potuisset evitare ignominiam; sed etiam inire duellum, postquam vidit, aliud medium non superesse ad honorem, & simul Officium suum, unde se, & nobilem uxorem competenter sustentare necesse habuit, retinendum & recuperandum. Ratio est: quia in hoc casu non præcise agebatur de puncto honoris, sed etiam de statu simul & Officio, consequenter de rebus quoque fortunæ necessariis ad vitam convenienter statui ducendam; proinde injuriosus percussor, aliter satisfacere renuens, fuit perpetuus Aggressor in rebus fortunæ magni momenti, aliter non recuperabilibus. Favet huic doctrinæ Lessius de J. & J. lib. 2. cap. 9 n. 49. Layman lib. 3. tr. 3. part. 3. cap. 3. n. 3. P. Wiestner lib. 5. Tit. 14. n. 5. allegans plures. P. Reiffenstuel n. 31 eod. tit. Ita ille. Ne autem hujusmodi Officialis bellicus conjiciatur in tantas angustias, ac necessitatem duellandi, providere sua auctoritate deberet supremus militiæ Princeps, aut is, cui & iste Princeps subjacet, saltem nisi monomachias ad evitanda majora mala permittere necesse haberet.

Utrum vero hi Principes supremi invenire medium non possint, quo detestabilis duellorum usus, imo in hujusmodi casibus etiam necessitas tollatur, ipsis considerandum relinquitur. Certe, si possint, & non faciant, in conscientia tui non sunt, severam aliquando rationem coram Divino Tribunali propterea reddituri, tamquam causa tantorum, & tot malorum. Viderint etiam Confessarii talium Principum, ne sint muti canes, sicque sese illorum peccatorum participes reddant. Potius dictis Principibus inculcent Bullam Clementis VIII. præsertim Paragraphum octavum ejusdem. Incipit dicta Bulla: *Illius vices*, & reperitur tam in Jure Canonico P. Reiffenstuel lib. 5. tit. 14. n. 8. quam in Bull. Cherubini T. 3. \*

Additio III.

\*Quæres II. Quid sentiendum de illis duellis, quæ ineuntur ea conditione, ut cessetur, quamprimum alteruter fuerit vulneratus, aut post certum congressum, vel ictuum numerum? Item, quæ suscipiuntur fide, ac sine animo se vulnerandi, sed tantum, ut legibus duelli satisfiat, & per rixam levem ex condicto initam dirimantur pugnales? Resp. denuo cum P. Pichler loc. cit. n. 4. talia duella regulariter loquendo esse illicita: priora quidem, quia per se periculosa sunt etiam quoad vitam; posteriora autem, quia aliis, tale occultum pactum ignorantibus, scandalum præbent, & Clemens VIII. prohibuit quoque duella non fatalia: quamquam (subjungit P. Pichler loc. cit.) ad hanc prohibitionem dici possit, eam solum afficere duella, quæ per accidens solummodo nullum fatalitatis periculum conjunctum habent; non vero ea, quæ per se, & ex pacto expresso, ac intentione congregientium non sunt fatalia: prout etiam cum Bassæo, Diana, Tamburino, & aliis similia posteriora duella a peccato excusat Sporer Tract. 5. in Decalog. cap. 2. sect. 4. n. 204. si aliter honor salvari, ac vilipendio vitari nequeat; quantvis tales ad speciem duellantes etiam descenderint ad locum pugnae, gladios pro forma strinxerint, & ictus aliquos sine periculo contorserint. Ita Bassæus & Tamburinus apud Sporer loc. cit. & Bonagina, Fillucius ac Escobar apud la Croix lib. 3. part. 1. num. 840. poteritque hæc sententia fortassis habere præcipue locum in casu specificato Additione II. alias vero eandem la Croix in praxi non suadet ob periculum scandali aliorum credentium tale duellum esse serium. \*

Additio



Additio IV.

\* Quæres III. Quandonam, si ex illis, qui sine sufficienti causa duellum instituerunt, unus invenitur mortuus, is possit in loco sacro sepeliri, dum ante mortem dedit adhuc aliqua signa Pœnitentiæ? Ante responsum Suppon. I. Ex Concil. Trident. Sess. 25. de Reform. c. 19. quod inter alias gravissimas pœnas a duellantibus incurrendas etiam numeretur illa, ut, si in conflictu decesserint, perpetuo careant sepultura Ecclesiastica. Supp. II. Ut hæc, aliæque pœnæ in Tridentino specificatæ incurrantur, requiri duellum proprie dictum; unde, etsi etiam rixæ particulares cum gladiis, vel sclopetis ad vindicandum, seu (uti ajunt) ad præstandam sibi metipsum satisfactionem sint gravissimum peccatum mortale, non tamen subjacent allegatis pœnis. Supp. III. Ad duellum proprie dictum necessario requiri inprimis, ut ab utraque parte deliberate ex condito seu pacto prævio duellum acceptetur. Secundo, ut certus locus & tempus duellandi designentur: adeo, ut si solus condicatur locus, & non tempus, vel tempus, & non locus, duellum proprie non sit, de quo vide plura in Jure Canon. lib. 5. Decret. tit. 14. n. 9. Supp. IV. Duellum proprie dictum dividi in solemne, & privatum. Posterius præter tempus & locum ex condito non requirit alias solemnitates: prius vero habet annexas pariter alias solemnitates puta litteras provocatorias, (vulgo chartell) testes præfentes, seu patrinos ac secundantes &c. Porro tam solemne, quam privatum, modo sit proprie tale, comprehenditur sub pœnis Concilii Tridentini & Bullæ Clementis VIII. uti recte annotatur citato libro 5. Decret. tit. 14. n. 2. His suppositis,

Respond. I. Si quis duellans culpabiliter in eodem graviter fuerit vulneratus, ac primum uno alterove post duellum die ex vulnere sub signis pœnitentiæ mortuus, talis non est privandus sepultura Ecclesiastica. Ita communis; & ratio allegata in Jure Canonico est loco superius citato n. 44. nimirum, quia vi Concilii Tridentini hæc pœna solummodo annexa est, si quis decedat in ipso duello: talis autem non censetur moraliter mori in ipso duello, sed post illud; ergo. Resp. II. Si duellum proprie tale instituens, sive dein illud sit privatum, sive publicum, brevi post vel in ipso loco duelli, vel in alio quidem loco, sed tamen paulo post duellum eodem adhuc die moriatur, sicque sine sufficienti aliquo morali intervallo, conflictum inter & mortem intercedente, caret sepultura Ecclesiastica, etsi ante mortem dederit pœnitentiæ signa. Ita partim eruitur ex c. 1. De Torneamentis, partim ex Rituali Romano jussu Pauli V. edito, Titulo De Exequiis. ibi: Negatur sepultura Ecclesiastica morientibus in duello, etiamsi ante obitum dederint signa Pœnitentiæ. Ad duo tamen Parochus, in cujus districtu cadaver taliter duellantis, & brevi post mortui reperitur, advertat. Inprimis, num constet, quod inter eosdem intercesserit verum duellum? nam, si non fuisset proprie tale, sed potius rixa, huic ante mortem signa pœnitentiæ edenti sepultura non deberet negari. Secundo, si fuisset duellum proprie tale, attendat ulterius, an illud sit notorium, seu publicum: etenim, si notorium non foret, in materia ista pœnali, & consequenter odiosa nequitiam deneget sepulturam absolute, sed rem deferat ad Episcopum, ejusque decisionem expectet. Quod si ob nimiam ab Ordinario distantiam decisio ejus in simili casu expectari nequiret, in Nomine Domini hunc interea, præsertim si adhuc ante obitum in loco conflictus non solum dederit signa pœnitentiæ, sed & Sacramentaliter adhuc ante mortem absolutus fuerit, sepeliatur in loco sacro, remque postea deferat ad Ordinarium. Videatur la Croix lib. 3. Theolog. Moral. part. 1. num. 863. & seqq. \*

\* Quæritur V. Quandonam Homicida sui ipsius (vulgo Suicida dictus) possit sepeliri in loco sacro? Ante Responsum nota ex jam dictis tamquam certum, quod non liceat seipsum directe occidere &c. Quæstio restat, quandonam taliter inventum liceat sepelire in loco sacro? ad quod Resp. I. Si ex se, vel ex circumstantiis sufficienter constet, quod quis plene compos mentis, deliberate

Anacl. Reiffenstuel Theol. Tom. I

ex tædio vitæ, vel ex desperatione, aut ex metu mortis ignominiosæ, sibi a Potestate publica ob sua delicta inferendæ, seipsum occiderit, nequit sepeliri in loco sacro, uti clare colligitur ex can. Placuit. 23. q. 5. ibi: Placuit, ut qui sibi ipsis voluntarie aut per ferrum, aut per venenum, aut per præcipitium, aut per suspendium, vel quolibet modo violentiam inferunt mortem, ad sepulturam eorum cadavera non deducantur. Quod tamen cum aliis Sylvester 7. Sepultura, limitat, nisi tales adhuc ante mortem suam sciatur desuper doluisse, & pœnituisse arg. c. 20. De sentent. excommunicat. in 6. ubi etiam suspensus ab ingressu Ecclesiæ, si decedat prohibetur in loco sacro sepeliri NB. nisi pœnituerit.

Respond. II. In dubio, utrum Suicida plene rationis compos fuerit, vel si dubitetur, an inventus mortuus sibi metipsum vim intulerit, aut casu potius, vel ab alio occisus obierit? Doctores communiter in benigniorem partem pro mortuo inclinant, præsumentes tam enorme, & quasi contra naturam pugnans delictum ab eodem non fuisse commissum, saltem non, quando erat sanæ mentis. Ita cum pluribus aliis præfens Auctor l. 3. Decret. Tit. 28. §. 3. Franciscus Schmier l. 3. Jurispr. Tract. 1. part. 3. c. 2. n. 46. Schmalzgrueber l. 3. Decret. Tit. 28. n. 66. & Pichler in Candidato abbreviato Jurisprud. ibidem n. 2. Qui tamen addit, expedire stante dubio, ut talis clam & nocte in loco sacro sepeliatur ad cavendam populi offensionem, quod verumputo, si grave adsit periculum offendendi plebem. Vincentius Petra Tom. 1. Comment. Constitut. 2. Honorii III. n. 50. & 51. existimat, si quispiam in via reperiatur interfectus, vel in puteo mortuus, aut flumine mersus, eundem in loco sacro (quidni publice) esse sepeliendum; cum probabile sit, eundem vel casu, vel ab aliis potius, quam a seipso interfectum fuisse: econtra vero alium, qui januis clausis laqueo suspensus invenitur sepultura Ecclesiastica privandum censet, quod vel maxime procedit, si simul antea Rosarium, Scapulare, & similia a se amovisse reperiatur, nec aliæ valde graves circumstantiæ contrarium suadeant. \*

QUÆSTIO IV.

De Restitutione ratione injusti Homicidii, vel Mutilationis.

SUMMARIUM.

- 46 De quo Homicidio sit sermo?
- 47 Ratione vitæ Proximo injuste ablata, quid teneatur Homicida restituere?
- 48 An hæc obligatio procedat solum ex naturali æquitate.
- 49 Vel etiam ex Justitia?
- 50 Omnia damna ex occisione alterius secuta resarciri debent &c.
- 51 Corollarium.
- \* Quid specialiter notandum sit de damnis mortem occisi subsequentibus? Addit. I. & II.
- 52 Quid de restitutione ob Mutilationem?
- 53 An pro dolore ex vulnere, ipsaque cicatrice sit aliquid restituendum?
- Fundamenta negativæ sententiæ.
- 54 Opposita sententia probabilior.
- \* Qualis pœnitentia sit injungenda Homicidæ?

46 **U**T ex titulo Quæstionis patet, sermo hic est de Homicidio injusto, atque illicita mutilatione: nam certum est, quod alterum occidens in bello justo, vel ob necessariam sui defensionem ad nullam teneatur restitutionem; quod pariter dicendum, si quis alterum penitus involuntarie, aut omnino casualiter occidat. Verum loquendo de Homicidio injusto atque voluntario, fatentur omnes, Homicidam, nisi alter ante mortem suam condonaverit, teneri ad restitutionem damni illati, utpote cum Homicidium sit actus multum damnificans proximum: non tamen conveniunt Doctores, de quo damno teneatur ad restitutionem. Pro cujus resolutione, sit.



47 CONCL. I. Ratione vitæ Proximo injuste ablata tenetur Homicida vel ex iustitia, vel saltem de consilio, & ex naturali requirata pro anima occisi, quem non constat esse mortuum in peccato mortali, orationibus, elemosynis, aliisque piis operibus DEO satisfacere, ac præsertim Sacrosanctum Missæ Sacrificium pro refrigerio animæ ejus offerendum curare: quod proinde poterit ipsi convenienter pro aliqua parte Satisfactionis Sacramentalis in Confessione injungi. Hæc Conclusio sic prolata est in re communis: nam damnificans alterum adeo graviter in vita debet refarcire damnum illatum modo, quo poterit meliori. Id ipsum confirmant dicenda n. 49.

48 Additur in Conclusionem notanter sub disjunctione, *vel ex iustitia, vel saltem de consilio, & ex naturali æquitate*: nam circa fundamentum hujus obligationis adest nonnulla concertatio speculativa inter Theologos. Et quidem Lugo disp. 11. De Just. & Jure, sect. 1. Lessius, Vasquez, alique plures volunt dictam obligationem procedere dumtaxat ex naturali quadam æquitate, non autem ex motivo iustitiæ: cum vita hominis non sit pretio æstimabilis, neque possit eidem adæquate, sed ad æqualitatem satisfieri.

49 Econtra vero, quod Homicida teneatur etiam ex iustitia ad aliquam restitutionem faciendam pro vita ipsius occisi, satis ostendit Doctor Angelicus 2.2. qu. 62. art. 2. ad 1. ubi solvens hanc instantiam præmissis aliis sic infert: *Et ideo, quando id, quod est ablatum non est restituibile per aliquid æquale, debet fieri recompensatio, qualis possibilis est.* Id ipsum expresse tenet Doctor Subtilis 4. dist. 15. q. 3. §. De secundo; tum quia pro vitæ ablatione regulariter est statuta Lex talionis, scilicet, ut Homicida moriatur, sicque reddatur vita pro vita: tum quia, si talis redditio non fiat, tenetur quis ad aliam restitutionem æquivalentem vitæ, quam abstulit, sicut potest esse æquivalentia in talibus, hoc est, faciendam saltem in spiritualibus; nam hoc exigit iustitia. Et per istud simul patet ad rationem oppositæ sententiæ.

50 CONCL. II. Omnia damna ex occisione alteri occiso in bonis suis ante mortem adhuc obvenientia etiam in Foro conscientie, & ante Judicis sententiam sunt refarcienda pro possibili ab eo, qui injuste alterum occidit. Ita Scotus loc. cit. & communis Doctorum. Ratio clara est: quia injustus damnificator tenetur ex iustitia ad reparandum damnum injuste illatum, etiam in Foro conscientie. Hinc

51 Infertur, expensas pro curatione occisi, dum is non statim mortuus fuit, per Homicidam esse solvendas: atque insuper hæredibus ejus sive ex testamento, sive ab intestato succedentibus in jus ipsius defuncti omnia damna lucri cessantis (id est, omnia ea emolumenta, quæ occisus ex artificio, negotiatione, vel officio probabiliter ipsis lucratus fuisset adhuc ante mortem suam, nisi per vulneris inflictionem ab ipso hoc lucro fuisset impeditus, detractis tamen iis, quæ ipsemet vivens consumpsisset) esse compensanda, & restituenda. Et idem dicendum de aliis similibus damnis, mortem occisi antecedentibus, quæ tamen omnia prudentis arbitrio in casibus particularibus sunt æstimanda.

#### Additio I.

\*Indagabis autem hic incidentaliter, quid ergo sentiendum sit de damnis temporalibus mortem occisi subsequenter? Ubi notandum, quod damna temporalia mortem occisi antecedentia dicantur ea, quæ occasione homicidii inferuntur ipsimet vulnerato in bonis suis ante mortem ejusdem, de quibus proxime dictum fuit. Damna vero temporalia mortem subsequenter vocantur illa, quæ primum post mortem occisi inferuntur aliis personis in futurum, quibus occisus antea ex officio, vel arte, aut industria ac opera præstabat alimenta &c. modo autem præfati illis in futurum carere debent, & de his quæritur in præfati, ad quod Resp. Si aliæ personæ propter mortem occisi privantur in

futurum aliqua re, ad quam antea habuerunt quoddam jus, tenetur occidens damnum ipsis exinde obventurum recompenfare. Ita cum Lessio, Marchantio, Molina & aliis Sporer Tractat. 5. in Decalog. cap. 3. sect. 6. n. 227. & seq. Ratio est: quia tales injuste per Homicidam damnificantur, & privantur vero aliquo jure, quod antea habuissent respectu occisi etiam in futurum, si is supervixisset: ergo ex communibus principiis Theologiæ damnificans Homicida obligatur ad restitutionem. \*

#### Additio II.

\* Ex quo infertur, quod, si occisus reliquerit post se parentes, uxorem, vel proles, quas antea, sibi met ipsis alimenta præstare insufficientes, per suum officium, artem, seu industriam alebat, quod, inquam, in supplementum occisi ante omnem sententiam Judicis teneatur id ipsum modo statui competente facere Homicida injustus usque ad tempus, quo prudenter credebatur alias supervicturus alter, si non fuisset occisus, respiciendo ad ætatem ejusdem, num fuerit adhuc vegetus &c. & ad vires, num robustus, vel imbecillis, item attendendo, usque ad quale tempus similes alter aluisset. Ratio est: quia antea hæc alimenta occisus talibus præbebat non solum ex misericordia & liberalitate, sed in similibus circumstantiis etiam debebat ex iustitia. Econtra vero, si parentes (uti subjungit Sporer loc. cit.) sint divites, filii jam puberes & ad se ipsos alendos apti, uxor non egeat, utpote sufficientissime provisa aliis medijs, vel per alias nuptias in eundem felicitatis statum reposita, ad nullam restitutionem loquendo de damnis mortem subsequenter obligabitur homicida ante Judicis sententiam. Ratio est: quia talibus in simili casu nihil debebatur ex iustitia ab ipso met occiso, si supervixisset, adeoque non censentur veram injuriam per hoc passi. Idem dic, si occisus fuit Nobilis, vel alias opulentus vivens sine speciali aliqua arte, vel officio de bonis propriis, quæ suis reliquit Hæredibus: vel si alias talis occisus jam fuerit senex, decrepitus, infirmus, qui nihil amplius officio, arte, industria, ac opera suis procurare potuit; vel si homo iners, atque incurius extiterit; qui, arte, industria, vel opera sua neglectis, suis nihil amplius comparare solebat: etenim in similibus casibus per mortem illius familia ratione sustentationis, vel lucri nullum patitur detrimentum, uti consideranti patet, & consequenter talem occidens ratione damni mortem subsequenter ad nullam restitutionem obligabitur. Videantur desuper Sporer loc. cit. & la Croix l. 3. p. 2. n. 296. & seq. \*

52 CONCL. III. Loquendo de restitutione ob mutilationem Proximi, & alia damna corporis, communiter ea fieri debet per compensationem pecuniariam: quæ quidem restitutio non solum debet correspondere expensis factis in curatione, sed etiam damno, quod quis incurrit per mutilationem pro toto tempore futuro, quo usus fuisset membro abscisso. Hinc in Jure Canonico c. 1. De Injuriis & Damno dato juxta illud Exod. c. 21. sic statuitur: *Si rixati fuerint homines, & percusserit alter proximum suum lapide, vel pugno, & ille mortuus non fuerit, sed jacuerit in lecto, qui percusserit, operas ejus, & impensas in Medicos restituat.* Hæc ibi. Sed occasione horum,

53 Quæres I. Cum læsio, tristitia, & dolor ex vulnerere, aut carentia membri resultans, ipsaque cicatrix sit vere damnum corporale injuste Proximo illatum, an vulnerans, vel mutilans idcirco etiam pro his obligetur ad aliquam restitutionem? Resp. Resolutionem hujus pendere ex proxime dictis Conclusionem prima; nam Auctores illi, qui Homicidam pro vita hominis ad nullam restitutionem faciendam ex iustitia teneri censent consequenter in proposito idem docent. Et huic sententiæ favet textus l. ult. ff. de his, qui effuderint &c. ubi legitur: *Cum liberi hominis corpus læsum fuerit, Judex computet mercedes Medicis præstatas, ceteraque impendia, quæ in curatione facta sunt: præterea operarum, quibus carnis,*



caruit, aut cariturus est ob id, quod inutilis factus est: cicatricum autem, aut deformitatis nulla fit æstimation: quia liberum corpus nullam recipit æstimationem. Hæc ibi.

54 Hæc sententia probabilis est, tum ob allegatum textum Juris Civilis, additamque rationem, tum ob multiplicem Auctoritatem. Opposita tamen sententia est probabilior, ac fundamentis Doctoris tum Angelici, tum Subtilis n. 49. relatis, conformior. Nam allegatus textus Juris præcipue loquitur pro Foro externo, in quo negatur Actio pro cicatricibus, id est, nulli conceditur, Actionem instituere ad petendum aliquid in Foro externo pro cicatricibus, aut vita hominis: siquidem de iis, quæ spectant ad Forum conscientiae, Jus Civile minus fuit sollicitum, si ceteroquin provideatur pacificæ, & bonæ Reipublicæ gubernationi. Unde Lessius l. 2. De Just. & Jure. c. 9. dubit. 11. non obstante, quod priorem sententiam amplexus sit, tandem n. 145. fatetur, pro damno vitæ, & pro injuria deberi satisfactionem quamdam signis doloris, & petitione veniæ; imo interdum, saltem ex Charitate, & naturali æquitate, adesse obligationem ad aliquam pecuniariam satisfactionem, præsertim si hæredes sint pauperes.

Additio.

\* Quæres II. Quidnam sit præctice injungendum Homicidæ in Confessionali pro aliqua satisfactione? Ad hoc quæsitum P. Sporer (etsi teneatis, Homicidam directe ratione privationis vitæ per se ad nullam obligari recompensationem, cum ea fuerit bonum altioris ordinis.) nihilominus Tract. 5. in Decalog. c. 3. sect. 2. nu. 60. respondet ex Comitolo l. 4. Moral. c. 11. n. 8. uti sequitur: Homicidæ Pœnitentia salutaris esset I. Veniam petere a Propinquis occisi. Supple: si homicidium sit publicum, nihilque aliud obstat. II. Iisdem omnia damna resarcire, (intellige modo superius in hac quæstione indicato): ubi bene distingue inter damna mortem occisi antecedentia, & inter subsequenta. III. Pro anima defuncti per unum annum singulis septimanis curare unam Missam celebrari (aut saltem, puto ego, si divitiæ defuncti, semel specialiter eandem intra septimanam pro anima defuncti devote audire). IV. Aliquam elemosynam taliter per annum juxta Homicidæ facultatem pauperibus erogare. V. Litanias vel Rosarium B. Virginis eodem modo per annum persolvere. VI. Præterea per eundem annum semel per mensem communicare. VII. Per totam vitam quotidie unum Pater & Ave flexis genibus pro anima occisi persolvere. Hæc Comitolus: interea tamen non necessario Confessarius homicidæ adstringitur ad singula, sed poterit in aliquo casu particulari quoad multa, quæ non concernunt resarcitionem Juris læsi, pœnitentiam pro sua prudentia augere, vel minuire juxta conditionem personæ pœnitentis, aliasque circumstantias. \*

DISTINCTIO IV.

De Sexto Præcepto Decalogi.

QUÆSTIO I.

De Castitate, & opposito vitio Luxuriæ, ac utriusque speciebus.

SUMMARIUM.

- 1 Quæ hoc Præcepto prohibeantur, & cur hic agatur de Castitate?
  - 2 Castitas, quid?
  - (a) Conformiter dictis Tr. 7. dist. 1. n. 24.
  - 3 Castitas alia perfecta, alia imperfecta.
  - 4 Castitas adhuc triplex.
  - 5 Conjugalis, vidualis, & virginalis, quæ ceteris est perfectior.
  - 6 Virginitas, quid, & quæ importet?
  - 7 Quid de virgine vim passa?
  - 8 Luxuria, quid?
- Anacl. Reiffenstuel Theol. Tom. I.

(b) Ut dictum Tr. 3. dist. 3. q. 3.

9 Luxuriæ species, quæ?

10 An omnes distinguantur in genere Luxuriæ.

(c) Tr. 5. Dist. 3. n. 11. 14. & 15.

1 Sexto Decalogi Præcepto, quod Exod. c. 20. proponitur his verbis: Non machaberis, non solum prohibetur Adulterium, quod proprie Machia dicitur, verum etiam universaliter omnis illicitus concubitus, & inordinatus actus in materia venerea. Antequam autem foeditas, malitiaque hujus vitii explicetur, cum contraria juxta se posita magis elucescant, operæ pretium fore visum est, ipsius Castitatis naturam excellentiamque declarare, quam admiratus Sapiens exclamando dixit: Sap. 4. O quam pulchra est casta generatio cum claritate! immortalis est enim memoria illius: quoniam & apud Deum nota est, & apud homines.

2 CONCL. I. Castitas est species Temperantiæ, quæ moderatur inordinatum appetitum, usumque venereorum. Ita communis. (a) Sicut enim Abstinencia, & Sobrietas moderantur inordinatum appetitum & usum in esculentis, & poculentis, ita Castitas moderatur inordinatum appetitum venereorum.

3 CONCL. II. Castitas generatim alia est perfecta, alia imperfecta. Perfecta est, quæ ab omnibus voluptatibus carnis tam licitis, quam illicitis, perpetuo abstinere proponit: unde hæc etiam affectum nuptiarum excludit. Imperfecta vero est, quæ ad tempus id proponit, vel solum intendit ab illicitis abstinere, sed licitis moderate uti, prout fit in Matrimonio.

4 Deinde Castitas communiter dividitur in Conjugalem, Vidualem, ac Virginalem. Et de hisce tribus castitatis speciebus mentionem faciens D. Augustinus lib. de Viduitate, inquit: bona est pudicitia conjugalis, melior vidualis, & optima virginalis. Item D. Hieronymus c. 13 in Mattheum, & lib. 1. contra Jovinianum; ac alii fructum centesimum assignant Virginibus, sexagesimum Viduis, trigessimum honestis, pisque Conjugibus.

5 Castitas Conjugalis est prædicta Castitas imperfecta, quæ delectationes tactus circa res venereas moderatur in conjugatis, ut debito, & licito dumtaxat modo admittantur: videlicet causa prolis, aut vitandæ incontinentiæ, vel reddendi debitum, & hoc temporibus, ac locis congruis, modo naturali, non autem explendæ libidinis gratia. Castitas Vidualis est, si post obitum alterius conjugis servatur perfecta Castitas. Tandem Castitas Virginalis est ipsamet Virginitas: & hæc est absolute perfecta Castitas, & omnium perfectissima; prout ostendit D. Apostolus 1. Cor. 7. estque unanimis SS. Patrum sententia, ac novissime definitum in Concilio Trid. Sess. 24. Can. 10. ibi: Si quis dixerit, statum conjugalem anteposendum esse statui Virginitatis, vel celibatus, & non esse melius ac beatius manere in Virginitate, aut celibatu, quam jungi matrimonio, anathema sit. Concordant dicta n. preced.

6 Porro Virginitas describitur a S. Augustino lib. de S. Virginitate cap. 13. quod sit in carne corruptibili incorruptionis perpetuæ meditatio. Duo enim dicit Virginitas, integritatem videlicet corporis, in tantum, ut numquam in perpetuum consentiatur in carnis corruptionem, ac insuper propositum observandi integritatem illam in perpetuum. Unde vere Virgines non sunt parvuli, quantumvis carne integri, quia hujusmodi propositum non habent: neque adulti volentes aliquando nubere, eo quod propositum perpetuo servandi Virginitatem non habeant: nec etiam illi, qui mentaliter consentiunt in rem veneream sine opere subsecuto, ob rationem proxime dictam. Verum in his Virginitas amissa adhuc recuperabilis est per pœnitentiam, ut habet Summa Angelica Vers. Virginitas, & Sylvester ibidem num. 2. & alii. Quamvis Lessius lib. 4. c. 2. n. 113. arbitretur, in talibus non manere virtutem Virginitatis, eo quod hæc dicat propositum perpetuo abstinendi a venereis: licet adhuc vulgo dicantur Virgines, quia manet corporis integritas, adeoque status ille, qui communiter vocatur Virginitas.



7 Additur notanter: *in tantum, ut numquam consentiat in carnis corruptionem*, qualis fit per fornicationem, aut pollutionem voluntariam &c. Etenim nihil obest Virginitati, si claustra pudoris violenter infringantur per involuntariam pollutionem, aut passivam oppressionem Virginis, si desit consensus hujus in ipsam. Quinimo tunc locum habet illud S. Lucie Virginis & Martyris dictum ad Paphlagonum Præfectum: *Si invitam jusseris violari, Castitas mihi duplicabitur ad coronam.*

8 CONCL. III. Castitati opponitur Luxuria, quæ est inordinatus appetitus, vel usus venerorum. Ita communis. Et istud, ceteroquin turpissimum vitium, est unum ex septem peccatis Capitalibus (b) de quo recte Doctor Angelicus 2.2. q. 151. art. 4. ad 3. dicit, quod inter cetera Intemperantiæ vitia præcipue sint exprobrabilia peccata venerea.

9 CONCL. IV. Species Luxuriæ sunt septem; videlicet simplex Fornicatio, Adulterium, Incestus, Stuprum, Raptus, Sacrilegium, & Vitium contra naturam, quorum ultimum subdividitur in Mollitiem, Bestialitatem, Sodomiam, ac indebitum concumbendi modum. Ita Mastrius disp. 15. Theol. mor. num. 141. Sannig, dist. 2. de Temperantia qu. 3. num. 4. & alii: quamvis nonnulli omittant Sacrilegium, id est, Sacrilegium concubitum a persona, vel cum persona per votum simplex, vel solemne Castitatis aut susceptionem Ordinis sacri Deo sacra commissum.

10 Notat tamen Herincx disp. 2. de Temperantia qu. 3. n. 19. quod proprie sola Fornicatio, & vitium contra naturam specie distinguantur in genere Luxuriæ. Nam cetera, quantum ad malitiam Luxuriæ, conveniunt cum Fornicatione, cui singula superaddunt specialem malitiam extra genus Luxuriæ: Adulterium quidem malitiam Injustitiæ, Incestus malitiam contra Pietatem, Stuprum malitiam violentiæ, Raptus pariter, & demum Sacrilegium concubitum malitiam contra Religionem. In proposito de singulis (dempto Sacrilegio, de quo jam alibi (c) dictum) specialiter loquendo, sit

## Q U Æ S T I O II.

### De Fornicatione, Adulterio, & Stupro.

#### S U M M A R I U M.

- 11 Fornicatio, quid, & quam grave peccatum?
- 12 Fornicatio est intrinsece mala.
- 13 Concubinatus, quid, & quanta ejus malitia?  
\* Fornicatio quotuplex? ubi etiam Corollarium pro Confessantis.
- 14 Fornicatio cum sponsa alterius, an addat specialem malitiam?
- 15 Peccatum carnale fidelis cum infideli, an habeat malitiam specie distinctam?
- 16 Adulterium, quid, & quot modis contingat?
- 17 Adulterii quanta malitia, & quæ ejus pena?
- 18 Adulterium est gravius Fornicatione, etiam consentiente altero conjuge.
- 19 Stuprum variis modis accipitur.
- 20 Stuprum propriissime, quid, & quæ pena ejus?

11 CONCL. I. Simplex Fornicatio est peccatum Luxuriæ, quo solutus cum soluta per carnalem commixtionem peccat. Ita communis. Et quidem Fornicationem esse peccatum mortale, de Fide est; & habetur ex illo ad Ephef. 5. *Omnis fornicator, aut immundus non habet hereditatem in regno Christi, & Dei, & ad Galat. 5. Manifesta sunt autem opera carnis, quæ sunt fornicatio, immunditia, impudicitia, luxuria &c. & his similia: quæ prædico vobis, sicut prædixi, quoniam, qui talia agunt, regnum Dei non consequentur*, & alibi.

13 Quinimo Fornicatio non solum est peccatum mortale ex prohibitione legis Divinæ, sed etiam est intrinsece mala, ipsique rectæ rationi diffona. Hinc quippe D. Apostolus 1. Cor. 6. pluribus rationibus demonstrat malitiam ejus: implicat autem, quod malitia cujuspiam

probetur argumentis petitis a ratione, nisi ejusmodi malitia sit diffona rationi. Accedit, quod vagus concubitus, sive fornicarius sit contra bonum prolis: nam ad educationem hominis non solum requiritur cura matris, a qua nutritur, sed multo magis cura patris, a quo est instruendus, & defendendus, atque in bonis tam interioribus, quam exterioribus promovendus: ac proinde contra naturam hominis est, quod utatur vago concubitu, utpote per quem tollitur certitudo prolis respectu patris, & econtra, prout optime argumentatur Doctor Angelicus 2.2. q. 154. art. 2. Hinc merito Innocentius XI. sequentem inter alias, ordine 48. Propositionem damnavit: *Tam clarum videtur, fornicationem secundum se nullam involvere malitiam, & solum esse malam, quia interdicta, ut contrarium omnino rationi diffonum videatur.*

13 Ad hanc Luxuriæ speciem reducitur Concubinatus, qui est fornicatio continuata cum certa aliqua persona soluta, & cohabitatio cum illa, estque peccatum grave, ac periculosum, eo quod hominem in continuo statu peccati mortalis detineat: quia Concubinarius, quamdiu Concubinam retinet, in continuo proposito, saltem virtuali, peccandi permanet; ut proinde de ejusmodi homine Concubinarius dici possit illud Job cap. 25. *Bibit quasi aquam iniquitatem.* Unde Doctores communiter docent, Concubinarium, sicut & Meretricem absolvi ordinarie non debere, nisi dimissa prius concubina, eaque e domo ejecta; alioquin enim non adesset in ipso firmum propositum emendationis, cum vellet perseverare in occasione proxima peccandi.

#### Additio.

\* Porro fornicatio alia est perfecta, alia imperfecta. Prima contingit, quando semen viri soluti immittitur in vas debitum femine solutæ: atque de hac fit sermo in questione præfata. Fornicatio imperfecta censetur, quando a solutis copula solummodo imperfecta exercetur, puta, quando vir sub actuali copula, vel omnino nullum semen emittit, vel post inceptam copulam, excitata jam ad seminandum natura, resistit, semenque dispergit extra. Atque id, si ita fieret in actu fornicario (idem dic, si contingeret in adulterio, & stupro) necessario in Confessione debet explicari; quoniam fornicatio perfecta & imperfecta distinguuntur specie, atque hæc copula imperfecta, si exerceatur absque emissionem ullius seminis, continet peccatum impurissimi tactus, seu, uti loquitur Sporer hic, actum extremæ impudicitie cum manifesto periculo pollutionis: quando vero illud ad extra dispergitur ad impediendam imprægnationem, prout sæpius fit, reduceretur ad peccatum mollitiei cum affectu fornicario conjunctæ.

Econtra vero, posito, quod copula exerceatur cum immisione seminis in vas debitum, censetur adhuc fornicatio perfecta ejusdem speciei, quamvis non servetur modus, seu situs naturalis, sed fiat stando, jacendo a latere, a tergo brutorum more, vel exerceatur viro succubo, dummodo ceteroquin ipsum semen extra non dispergatur, atque exinde generatio impediatur: etsi enim similes modi ex mera luxuria exerciti merito sint improbandi, non tamen in simili casu transferunt fornicationem ad alienam speciem mortaliter peccaminosam. Hinc pro praxi (inquit Sporer part. 4. Theolog. Sacram. c. 3. sect. 1. n. 574.) quando soluti continentur, se commississe fornicationem, & aliquando modestis terminis interrogando rescitur a Confessario, quod eadem non imperfecta fuerit, sed perfecta, ad evitandum modo possibili scandalum etiam pusillorum neutiquam ulterius a Confessario ordinarie urgeantur, præsertim femine, de modo, & situ, quo copulam exercuerunt: quia juxta jam dicta, & juxta dicenda n. 66. per diversum situm, & distinctum modum non additur præter peccatum fornicationis aliud grave, nec mutatur species fornicationis, sed tantummodo aggravatur, modo semen viri adhuc finaliter ad vas naturale femine deveniat, ibique retineri valeat. Videatur Sporer loc. cit. c. 2. sect. 3. n. 493. \*



14 Quæres, an fornicatio cum sponsa alterius de futuro addat specialem malitiam? Affirmant multi Doctores, sponsalia addere fornicationi sponsi, aut saltem sponsæ novam malitiam injustitiæ specie distinctam, & in Confessione necessario explicandam. Econtra alii negant, & quidem probabilius, ut docet Mastrius *disp. 11. Theol. mor. n. 119*. Ratio hujus posterioris sententiæ est: quia per sponsalia de futuro nondum sponsus acquisivit jus in corpus sponsæ; hoc enim jus consequitur solum per Matrimonium de presenti.

15 Quæres ulterius, an peccatum carnale personæ Fidelis cum Infideli v. g. Judæa, vel Turcissa sit fornicatio simplex, vel addat novam malitiam specie distinctam, & in Confessione necessario aperiendam? Affirmat hoc posterius Sanchez *lib. 7. de matrim. disp. 5.* cum nonnullis aliis, eo quod speciali ratione conjugium Fidelis cum Infideli fuerit prohibitum per Ecclesiam, videlicet ob motivum Religionis: & quia talia conjugia sunt damnosissima Fideli, tum bonæ educationi proli: atqui hæc eadem ratio militat in accessu fornicario; ergo. Negant econtra Azorius *part. 3. lib. 3. cap. 19.* Tamburinus, Diana, Fillucius, & alii: tum quia nullo jure probatur, malitiam illam esse specie distinctam: tum quia in Matrimonio est longe major conjunctio, quam in accessu fornicario; ergo non valet assumpta paritas.

16 CONCL. II. Adulterium est peccatum Luxuriæ, quo violatur fides conjugalis, & sit accessus ad alienum torum. Contingit vero Adulterium tribus modis. I. Quando solutus miscetur carnaliter cum conjugata. II. Quando conjugatus cum soluta. III. Quando conjugatus cum conjugata. Et quidem primis duobus modis committitur Adulterium simplex, tertio autem modo duplex, necessario proinde in Confessione aperiendum: quia tunc duæ injuriæ committuntur in utriusque conjugem innocentem, ac fidem duplicem conjugalem, duplexque Sacramentum Matrimonii.

17 Porro Adulterium esse peccatum mortale, certum est; unde specialiter hoc sexto Decalogi Præcepto dicitur: *Non mechaaberis*. Quinimo tanta ejus est malitia, ut ei secundum Leges Civiles poena capitis statuatur. *l. Quamvis 30. C. Ad Leg. Jul. de Adulteriis*, ibi: *Sacrilegos nuptiarum gladio puniri oportet*: juncto §. *Item Lex Julia. Inst. de Publicis Judiciis*. Quamvis Doctores velint, hanc poenam non competere nisi pro Adulterio duplicato, sive formato (quale est, quod committitur a personis utrinque conjugatis (vel sæpius repetito, id est, de quo jam semel punitus est Reus: atque etiam hæc poena in feminis ob sexus fragilitatem mitigata fuerit *Auct. Sed hodie. C. Ad Leg. Jul. de Adult.* ubi inter alia statuitur, quod hodie adultera verberata in Monasterium mittatur.

18 Insuper certum est, Adulterium esse gravius peccatum simplici fornicatione; quinimo duplex specie distinctum in se continet peccatum: quia præter communem Luxuriæ malitiam, quæ etiam datur in fornicatione, continet novam & specialem injustitiam, atque injuriam, quæ inferitur conjugi innocenti, cujus jus in corpus suæ consortis violatur, simulque Statui ac Sacramento Matrimonii. Et hoc intellige, etiam si alter conjux consentiat in ejusmodi turpem actum: adhuc enim ob injuriam fidei conjugali, & Sacramento Matrimonii irrogatam est Adulterium, & continet specialem malitiam. Unde Innocentius XI. hanc inter alias, ordine 50. Propositionem merito damnavit: *Copula cum conjugata, consentiente marito, non est adulterium; adeoque sufficit in Confessione dicere, se esse fornicatum*.

19 CONCL. III. Stuprum tribus modis sumitur. Primo, pro omni concubitu legibus prohibito. Sic non tantum Defloratio virginis, sed etiam Adulterium, Incestus, & Sodomia, Stuprum dicitur. Quo modo Stuprum in Jure Civili quandoque sumitur, ut *l. Inter liberas ff. Ad legem Juliam de Adulteriis*, ibi: *Lex Julia stuprum, & adulterium promiscue appellat*. Et *l. Stuprum, ff. Eod.* ibi: *Adulterium in nupta admittitur, stuprum in vidua, vel virgine, vel puero, cum concordantiis,*

Deinde, & magis stricte Stuprum sumitur pro illicita defloratione Virginis sub cura parentum existentis; ut loquitur D. Thomas 2. 2. q. 154. art. 6.

20 Tertio tandem ac propriissime Stuprum sumitur pro violenta Virginis corruptione. Unde Stupratores, & corruptores Virginum proprie dicuntur illi, qui vim inferunt. Et sic propria ratio Stupri consistit in hoc, quod Virginitati, seu claustro virginali vis inferatur: quare supra fornicationem addit injuriam gravem in puellam, cui per vim integritas corporis (quæ maximi æstimari solet ac debet) adimitur. Sic Stuprum est gravissimum peccatum, quod etiam juxta Jus commune Cæsareum poena mortis plectitur, sive illa persona, cui vis illata est, sit Virgo, sive corrupta, puta maritata, aut vidua. §. 8. *vers. Sin autem. inst. de publicis judiciis*, & alibi: licet adhuc gravius puniatur in Virgine ob deflorationem.

### QUÆSTIO III.

#### De Obligatione Restitutionis ratione Stupri, & Adulterii.

#### SUMMARIUM.

- 21 Qui virginem consentientem defloravit, an teneatur ei ad restitutionem?
- 22 Vel saltem parentibus ejus?
- 23 Quid pro Foro externo?
- \* An pro hoc Foro teneatur simul dotare, & ducere?
- 24 Quid, si vi, vel fraude quis usuram corporis a virgine extorsit?
- 25 Limitatio hujus solutionis.
- \* Quid sentiendum, si simul eandem imprægnaverit?
- 26 Qui sub promissione Matrimonii, etiam facta aliquam defloravit, teneatur eam ducere.
- 27 Limitatur hoc!
- 28 Partu non secuto, an conjux adulterans teneatur quid restituere?
- 29 Secuto partu tenetur Adultera damnum resarcire, quibus?
- 30 Quibus modis id fieri possit?
- \* Qualis sit obligatio, si Adultera dubitet, ex quo conceperit.
- 31 Non tenetur Adultera crimen suum revelare.
- 32 Nec filius tenetur credere matri, asserenti, se esse spurium.
- 33 Quid dicendum de Adultero?
- 34 Quando, & quomodo ipse teneatur ad restitutionem?
- (a) Ut dictum superius dist. 2. n. 14.

21 CONCL. I. Qui Virginem consentientem defloravit absque vi, vel fraude, aut promissione Matrimonii, corruptor in Foro conscientie ad nihil ei tenetur, quidquid sit de Juris humani dispositione, quæ ante sententiam Judicis non obligat. Ita Lessius *lib. 2. cap. 10. dubit. 1. & 2.* Mastrius *disp. 9. Theol. mor. nu. 57.* & alii. Ratio est: quia volenti non fit injuria, juxta *Reg. 27. Juris in 6.* ibi: *Scienti & consentienti non fit injuria, neque dolus*. Quinimo tunc non committitur proprie Stuprum, cum absit vis: licet in sensu largiori Stuprum appellari possit.

22 Et quamvis aliqui Doctores velint, in tali casu corruptorem teneri aliquid restituere parentibus, vel iis, sub quorum cura est puella deflorata: eo quod & his videatur injuria, damnumque aliquod irrogatum; cum hac de causa cogantur augere dotem ad inveniendas filię æque competentes nuptias, ac si violata numquam fuisset. Alii tamen magis communiter, & probabiliter id negant, ut notat citatus Mastrius *n. 58.* idque tum ob rationem prædictam: tum quia puella habet liberum usum sui corporis, potestque absque parentum, vel curatorum injuria nubere ad libitum, etiam minus æquali; ergo neque puella eis injuriam facit, neque deflorator, de puellæ ipsius consensu apponens impedimentum meliorum nuptiarum.



23 Dicitur in Conclusionem, in Foro conscientie: nam in Foro, externo virgo deflorata semper præsumitur seducta, nisi contrarium probetur. Lugo *disp. 12. de Just. & Jur. n. 3.* Et hinc deflorator obligatur ad restitutionem illam, quam Jura imponunt iis, qui Virginem seduxerunt; de quibus in Jure Canonico *cap. 1. De Adulteriis*, sic statuitur: *Si seduxerit quis virginem nondum desponsatam, dormieritque cum ea, dotabit eam, & habebit uxorem. Si vero pater virginis dare noluerit, reddet pecuniam juxta modum dotis, quam virgines accipere consueverunt.* Ceterum ante sententiam Judicis corruptor ad hoc non tenetur, si absque vi, vel fraude virginem sponte consentientem defloravit.

*Additio.*

\*Quinimo neque in Foro externo taliter seducens, aut seduxisse ex præsumptione judicatus, obligatur simul, & copulative seductam *dotare & ducere*: etsi enim Capitulum primum præcedenti numero allegatum insinuare id videtur per verba *dotabit eam, & habebit uxorem*, recepta tamen Tribunalium praxis, & communis consuetudo, quæ est optima Legum interpret, dictionem & sumit in præsentem pro *vel*, ita ut sensum faciat, quod seducens teneatur vel *seductam ducere*, vel si Puella, aut Patens Puellæ id nolle, *saltem eam dotare*. Non enim novum est in Jure, ut dictio & sumatur pro dictione *vel*, sicuti habetur *l. Sape § 3. ff. de Verb. signif. ibi: Sape ita comparatum est, ut conjuncta pro disjunctis accipiantur, & disjuncta pro conjunctis*, de quo fufius videri poterit præfens Auctor in Jure Canonico *lib. 4. decret. tit. 1. § 4.* Nos vero iterum redeundo a Foro externo ad Forum internum, quamvis in eodem deflorator ante sententiam, Judicis juxta jam dicta nec ducere, nec dotare, nec damnum aliquod resarcire teneatur defloratæ: etsi tam pingues non amplius illa, uti prius, obtineat nuptias, supposito nimirum, quod eadem absque promissione Matrimonii sponte in deflorationem consenserit, nec de copula habita a defloratore apud alios (utpote cum delictum adhuc esset occultum) diffamata fuerit. Aliter tamen sentiendum, & ad omne damnum emergens defloratæ resarciendum talis a Confessario adstringendus foret, si vel diffamaverit, occultum pandendo aliis delictum, vel simul vis, aut fraus, atque exinde præter deflorationem insuper aliud damnum defloratæ accessisset. Unde sequitur \*

24 CONCL. II. Qui vi, aut fraude usuram corporis a Virgine extorsit, etsi absque promissione Matrimonii, tenetur eam vel Matrimonio sibi copulare, vel damnum aliunde reparare. Ita Lessius *loc. cit. n. 10.* Mattius *n. 59.* Navarrus, & alii. Ratio est: quia tunc damnum per injuriam illatum est, ergo debet resarciri: hoc autem fit vel Matrimonio, vel damni æstimatione; ergo ad alterutrum horum tenetur, & quidem in Foro conscientie; atque ante sententiam Judicis.

25 Hoc tamen intelligendum est cum cit. Lessio *n. 15.* & aliis, nisi puella talis postea æque commodis potita sit nuptiis, ita ut nihil detrimenti acceperit: quia in tali casu deflorator non obligabitur eidem quidquam necessario restituere, cum damnum nullum re ipsa sit secutum, præter ipsam pudicitie deflorationem, quæ irreparabilis est, & pretio non æstimanda. Et hoc plerumque contingit, quando defloratio virginis est occulta, nec coram hominibus manifestata.

*Additio.*

\* Porro etsi nec, qui virginem sponte consentientem defloravit, nec etiam qui eandem absque promissione Matrimonii bonis verbis, blanditiis, & munusculis quidem ad copulam induxit, ita tamen, ut nihil detrimenti præter amissionem virginitatis accipiat, etsi (inquam) tam in priori, ac posteriori sub illa limitatione proposito casu deflorator non obligetur defloratæ dare certas pecunias; nihilominus tamen, si ex copula fuerit eadem imprægnata, tenetur is tamquam pater

conceptam ex copula fornicaria prolem alimentare saltem post primum triennium, usque dum proles ad eam veniat ætatem, ut sibi metipsum alimenta procurare queat; deflorata vero primo triennio tenetur proli præbere lac. Quod si ob alia impedimenta nequiret id facere, vel proles nollet lac maternum recipere, pater obligabitur suis expensis, si quæ necessariæ forent, alia proli congrua procurare alimenta. Item, si deflorator ex defectu mediorum id facere non posset, vel etiam ex malicia non vellet, adstringitur in subsidium ipsamet mater id præstare. Alias communiter ad præfens institutum sequentes duo circumferuntur Versus a Glossa, & jam supra *dist. 2. num. 15.* adducti.

*Mater alit prolem trimum, trimoque minorem, Majorem vero pascere Patris erit.*

De his vide plura in jure Can. *lib. 4. decret. tit. 1. §. 4. n. 133.* & dicenda hic *n. 34.* \*

26 CONCL. III. Qui promissit conjugium, & ea spe seu conditione usuram corporis impetravit, tenetur eam ducere, etiam si fecte promississet. Ita citati Auctores. Ratio est: quia vel sincere promissit corruptor Matrimonium, & tunc tenebitur vi promissionis; nam omne promissum cadit in debitum: vel fecte, & tunc tenebitur ratione injustæ deceptionis, atque subsecutæ læsionis.

27 Excipe, nisi deflorator talia signa dederit, quibus femina sufficienter agnoscere potuit, promissioni subesse dolum, aut ipsam conditionis, seu status inæqualitatem agnoscens facile suspicari potuit, illum simulare solum nuptias promittere, ut ea frueretur. Ratio hujus limitationis est: quia in tali casu ipsa non præsumitur decepta, sed fingere deceptionem, ac ex mera sua voluntate consensisse in actum turpem; unde corruptor in Foro Conscientie ad nihil ei tenetur, juxta dicta *n. 12.* & notat citatus Mattius *n. 62.* cum aliis.

28 CONCL. IV. Quantum attinet ad obligationem restitutionis ex Adulterio proventientem: etsi Adulterium sit peccatum gravissimum, & contra Justitiam, eo quod adulterans conjugem innocentem lædat in jure suo, quod habet in corpus ipsius: si tamen partus, aut aliud damnum non sit secutum, non tenetur conjux adulterans pro hac injuria, conjugi innocenti illata, ad aliquam compensationem pecuniariam, sed sufficit satisfactio per signa doloris, aut veniæ petitionem ab offenso, si eidem Adulterium conjugis innotescat. Quod si injuria talis sit penitus occulta, hæc satisfactio locum non habet, sed sufficit seria pœnitentia, & satisfactio coram D E O. Ita communis.

29 CONCL. V. Quod si partus sit secutus, tenetur Adultera, quantum fieri potest sine famæ dispendio, & vitæ periculo, procurare, ne legitimi hæredes, ac alter conjux innocens ratione hujus suppositæ illegitimæ proles aliquod damnum patiantur. Ita Scotus *4. dist. 15. q. 2.* & communis aliorum. Ratio clara est: quia per educationem proles adulterinæ minuitur substantia legitimorum Filiorum, alteriusque conjugis innocentis: & si proles adulterina supervivat, atque cum legitimis filiis hæreditatem adire velit, multum illis rursus de sua portione detrahatur. Atqui horum omnium damnorum causa est conjux injuste supponens partum adulterinum: ergo ipsa ex Justitia tenetur laborare, ut hæc damna legitimis hæredibus non obveniant, aut, si eventura sunt, in alio resarciantur, sicque fiat debita restitutio, seu recompensatio damnorum illatorum.

30 Quæres: quomodo hujusmodi restitutio, seu damnorum illatorum compensatio fieri possit? Resp. a Doctoribus, & præsertim Scoto *loc. cit.* varios assignari modos, quorum principales sunt sequentes. I. Si conjux adultera habeat bona paraphernalia, debet, quantum jura permittunt, eadem relinquere legitimis filiis in compensationem damnorum illatorum: quod idem facere poterit ex dote sua. II. Tenetur diligentiam adhibere, ut ex labore suo lucrum capiat, sicque



sicque bona filiorum legitimorum pro compensatione damnorum illatorum adaugere valeat. III. Debet solitos sumptus imminuere, quantum commode potest spectata conditione status, valetudinis &c. ob eundem finem.

*Additio.*

\* Ponamus autem, quod Adultera certo non sciat, sed prudenter dubitet v. g. ob vicinitatem copulæ mariti, num proles sit ex marito, vel adultero concepta, sicque legitima, vel spuria, in simili casu juxta la Croix lib. 3. Theol. mor. part. 2. n. 335. tam adulter, quam adultera excusabitur ab hoc onere restitutionis: quia in dubio præsumitur pro Matrimonio, cui proles tamquam favor adjudicatur; uti tenent non solum Card. de Lugo, Haunoldus, & Illfung; sed etiam teste Tamburino hic lib. 7. c. 3. §. 4. communis DD. Quod si vero ponas, ex una parte certum esse, quod proles sit ex adulterio concepta, ex altera vero incertum a quo, cum femina intra breve tempus cum pluribus adulterium commiserit, in simili casu, recte inquit la Croix loc. cit. nu. 337. singulos adulteros secundum proportionem dubii esse obligatos ad partialem restitutionem alimentorum, & partis hæreditariæ prolibus legitimis subtractæ, ita, ut hujus portionis hæreditariæ unum dimidium restituere debeat adultera, alterum vero ipsimet hi adulteri loco patris certi. Ratio est: quia ex una parte hic non potest præsumi in favorem Matrimonii, uti prius; quoniam certo scitur, prolem esse ex adulterio conceptam: ex altera vero parte singuli ex adulteris posuerunt causam sufficientem generandi prolem, ac præterea singuli communi opera, sunt causa ipsius incertitudinis, quæ juste impedit, ne ab uno determinato exigi possit debita restitutio; consequenter censentur singuli in hoc damnum virtualiter consensisse, volendo nimirum ipsam copulam hujusmodi damnorum causativam. \*

31 CONCL. VI. Nihilominus Adultera non tenetur se prodere, aut crimen suum revelare ullo modo, neque in mortis articulo, neque per Confessarium, sed tenetur solum aliis modis jam enumeratis laborare, quantum potest, ut hæreditas relinquatur veris hæredibus, aut in alio compensetur. Ita communis. Ratio est: quia talis revelatio non potest fieri sine jactura famæ, atque honoris, imo nec facile fieret sine periculo vitæ, aut aliorum incommodorum: atqui cum jactura famæ nemo tenetur restituere bona fortunæ, utpote quæ sunt ordinis inferioris; ergo.

32 Accedit, quod talis revelatio plerumque sit inutilis, cum filius non teneatur credere matri suæ, asserenti, se esse spurium: tum ob præsumtionem, ac publicam opinionem, qua censetur esse legitimus filius, & natus ex Matrimonio: tum ob possessionem, in qua existit, nec proinde ex ea ejici potest, donec convincatur. Quinimo nonnulli Doctores, quos citat Fagnanus c. Cui esset n. 130. de Testamentis, & sequitur Menochius de Arbitrariis Judicium lib. 2. Cent. 1. n. 28. fatuum reputant filium, si credat matri asserenti, eum ex adulterio esse genitum.

33 CONCL. VII. Loquendo nunc de Adultero, non tenetur is illico credere mulieri adulteræ, dicenti, prolem natam esse suam. Ita Doctores passim. Ratio est: quia potest probabiliter, & prudenter præsumere, feminam potius ex marito suo concepisse, nisi de opposito constet; utputa quia maritus absuit, sive, quia mater sic dicit, & insuper tempus partus correspondet cum tempore habitæ copulæ, vel concurrant aliæ conjecturæ.

34 Quod si vero Adulter cognoscat, prolem esse suam, vel certe nullam habeat justam causam dubitandi, tenetur & ipse ad restitutionem pro sua parte. Et quidem inprimis obligatur restituere, seu compensare ea, quæ impensa sunt in alimenta prolis a tertio anno ætatis, & deinceps: nam educatio primo quidem triennio ad matrem pertinet, sequentibus autem annis ad patrem. (a) Deinde ejusmodi Adulter tenetur

una cum Adultera, refarcire damnum, quod legitimis filiis ex illegitimi successionem obventurum est, etiam si suo consilio non fuisset auctor suppositionis. Ratio est: quia Adulter iniquo facto suo una cum matre est causa damnorum filiis legitimis illatorum; ergo una cum ipsa tenetur ad restitutionem: eo præsertim, quia iniquo suo facto matrem coegit, pro conservanda sua fama prolem adulterinam supponere. Lessius lib. 2. de Just. & Jure cap. 10. dubit. 6. cum communiori; quamvis quoad hoc ultimum Scotus, Henriquez, & nonnulli alii oppositum teneant, loquendo de Adultero, qui non dedit Adulteræ consilium suppositionis.

Q U Æ S T I O IV.

De Incestu, & Raptu.

S U M M A R I U M .

- 35 Incestus, quid?
- 36 Superaddit luxuriæ specialem malitiam.  
Et ad quot gradus extendatur?
- 37 Incestus inter diversos gradus an specie distinguantur?
- 38 Sententia probabilior.  
\* Altera tamen etiam valde probabilis.
- 39 Raptus, quid?
- 40 Ad Raptum tria requiruntur, quæ?
- 41 Quæ ejus malitia?
- 42 Quæ pena in Raptores constituta?

35 CONCL. I. Incestus est peccatum Luxuriæ cum consanguinea, vel affine, intra gradus jure prohibitos commissum. Ita in re communis.

36 Porro Incestus est peccatum mortale, superaddens Luxuriæ specialem malitiam contra Pietatem, & quidem eo graviolem, quo gradus consanguinitatis, vel affinitatis, inter peccantes est propinquior. Ratio est: quia est contra reverentiam juri sanguinis debitam, ipsamque virtutem Pietatis. Unde ex instinctu naturali apud omnes Gentes damnatur concubitus cum consanguineis in linea ascendente, vel descendente, imo etiam in linea collateralis intra certos gradus: quamvis Jure Ecclesiæ eo extensa sit postmodum talis prohibitio usque ad quartum gradum consanguinitatis, & affinitatis ex copula licita, seu conjugali consurgens: vel si affinitas consurgat ex copula illicita, sive fornicaria, usque ad secundum gradum inclusive ex nova Constitutione Concilii Trid. Sess. 24. De Reform. matrim. c. 4. intra quos gradus consequenter censetur contrahi Incestus, si peccetur carnaliter.

37 Quæres: an Incestus inter diversos consanguinitatis, vel affinitatis gradus commissi distinguantur specie, adeo, ut ipse gradus consanguinitatis, vel affinitatis sit necessario in Confessione explicandus? Resp. cum Matrio disp. 11. Theol. Mor. n. 122. tres esse diversas Doctorum sententias. Nam Navarrus, Valentia, Vasquez, & quidam alii volunt, omnes illos gradus specie distinguui. Contra Tamburinus, Cajetanus, Sotus & Thomistæ passim cum S. Thoma 2. 2. q. 154. art. 9. ad 2. volunt, omnes illos gradus, & Incestus in iisdem commissos, esse ejusdem speciei. Rationem dant: quia in iis omnibus peccatur contra eandem Pietatis virtutem, & reverentiam juri sanguinis debitam, & consequenter in iis omnibus reperitur una specie difformitas: licet intra eandem speciem modo gravior, modo levior juxta majorem, vel minorem graduum distantiam. Et hæc sententia tunc præcipue deservire poterit, quando poenitens non potest explicare gradum Incestus, quin Confessarius veniat in notitiam complicitis.

38 Tertia sententia est media admittendo distinctionem specificam in aliquibus, non tamen in omnibus. Hæc inprimis admittit, quod Incestus cum consanguini-



sanguinea specie differat ab Incestu cum affine in eodem gradu; ista enim vincula specie differunt. Lessius *lib. De Jus. & Jur. c. 3. n. 79.* Deinde eadem sententia docet, Incestum commissum cum consanguinea in linea recta, ut puta cum matre, vel avia specie distingui ab Incestu cum aliqua in linea collateralis commissio v.g. cum sorore, vel consobrina: nam nullo unquam casu licuit congressus cum consanguinea in linea ascendente, secus in collateralis. Tandem dicta sententia docet, etiam Incestum in primo gradu consanguinitatis lineæ lateralis, respectu remotiorum esse specie distinctum: quem proinde, sicut & primum gradum affinitatis in Confessione exprimendum putant. Ratio horum ab ipsis assignatur ista: quia longe alia reverentia debita est matri, quam sorori, & consequenter immanior censetur esse Incestus cum matre commissus: prout hoc ipsum natura dictat, a tali coitu plus, quam ab alio abhorrens. Idem dicendum putant respectu sororis in ordine ad alios remotiores gradus.

#### Additio

\* Istam tertiam sententiam equidem præfens Auctor P. Anacletus in prioribus Editionibus judicat probabilior, huic tamen contradicit noster P. Franciscus Henno *Tract. in Decalog. Disp. 6. q. 3. Concl. 3.* qui etsi gratis admittat, Incestum quemlibet continere duo specie distincta peccata, unum contra Castitatem, & alterum contra Pietatem ob reverentiam sanguinis: negat tamen valde probabiliter meo judicio cum sententia secunda, unum Incestum ab alio specie morali distingui. Ratio ipsius est; quia quilibet Incestus ex eodem fine, & motivo prohibetur; nimirum, ut servetur honor, & reverentia inter certas personas: sicuti ob eandem rationem etiam furta sunt ejusdem speciei moralis conformiter dictis; quia nimirum, quamvis versentur circa diversas res, sicque aliqua diversitas materialis, & accidentalis sæpius inter ipsa reperitur, nihilominus ex eodem fine, & motivo prohibentur, nimirum, ut proximus servetur indemnis in Bonis fortune: ex quo ipso fundamento dictum est, detractiones v. g. queis quis denigratur ut fornicarius, & tamquam fur, esse ejusdem speciei; quia nimirum ex eodem motivo, ut nimirum proximus servetur indemnis in Bonis fame, prohibentur. \*

39 CONCL. II. Raptus hoc loco proprie dicitur, cum persona aliqua invita abducitur per vim ad libidinem explendam, vel ad Matrimonium contrahendum. Ita defumitur ex *c. Lex illa 36. quest. 1. & c. Si quis virginem 36. qu. 2.* juncto Concilio Trid. *Sess. 24. de Reformat. Matr. c. 6.*

40 Colligitur proinde, ad Raptum proprie dictum tria requiri. I. Abductio personæ raptæ a domo sua, vel paterna, ejusque in aliena detentio: unde Raptus non committitur ab eo, qui Virginem in domo paterna repertam ibidem violat, aut, vi opprimit, sed id potius erit Stuprum. II. Requiritur, ut abductio illa fiat causa libidinis, vel Matrimonii contrahendi: in quo casu Raptus est impedimentum dirimens Matrimonii, ex Constitutione nova Concilii Tridentini *cit. c. 6.* III. Requiritur vis illata: unde, quando nulla vis infertur feminæ, sed ipsa sponte consentit, & insciis parentibus cum amasio discedit, proprie Raptus non est, sed fuga voluntaria.

41 Raptus igitur inter species Luxuriæ merito reponitur ratione intentionis pertinentis ad Luxuriam; quia nempe libidinis causa fit. Quamvis simul aliam malitiam contra Justitiam includat, qua vis infertur puellæ.

42 Unde merito graves poenæ utroque Jure in Raptores sunt constitutæ; videlicet de Jure Civili poena capitis, *l. un. C. de Raptu Virginum.* De Jure Canonico autem publica poenitentia, & ut Raptor sine spe conjugii maneat, *c. Raptor, & c. Statutum 27. q. 2.* His novissime Concilium Trident. *Sess. 24. de Reform. Matr. c.* alias poenas addidit, videlicet poenam ex-

communicationis a Rapto, & omnibus illi consilium, auxilium, aut favorem præbentibus ipso jure incurrendam, perpetuæque infamiæ; & quod inter Raptores, & Raptam, quamdiu hæc in potestate Raptoris manserit, nullum possit consistere Matrimonium.

#### QUESTIO V.

De prima specie Peccati contra naturam, quæ est Mollities.

#### SUMMARIUM.

- 43 Peccatum contra naturam, quid, & quæ species ejus?
- 44 Mollities, seu immunditia, quid, & quale peccatum?
- \* An subinde sit duplex peccatum? Addit. 1.
- \* Quid sit sentiendum de Pollutionibus Mulierum? Add. II.
- 45 Mollities est intrinsece mala, & in nullo casu licita.
- 46 Non licet Medicis, media applicare infirmis ad eam procurandam.
- 47 Quid de aliis pharmacis?
- 48 Solutio notabilis instantiæ.
- 49 Omnes Pollutiones sunt ejusdem speciei.
- 50 Per accidens tamen eis conjungi possunt aliæ speciei malitiæ.
- \* Duo notabilia Corollaria. Addit. 1. & II.
- 51 Pollutio indirecte voluntaria est peccatum mortale.
- 52 Quid, si non fuerit prævisus talis effectus ex posita causa secuturus?
- 53 Aliæ limitationes.
- (b) Tract. I. Dist. I. n. 12. & 13.
- 54 Qualiter peccaminosus sit effectus pollutionis, si causa est tantum venialiter mala?
- 55 Quid de pollutione in somno orta?
- 56 An sit licitum desiderare pollutionem?
- 57 Aut simplici affectu de ea naturaliter secuta gaudere?
- 58 Distillatio, quomodo differat a pollutione?
- 59 An hætenus dicta habeant locum in Distillatione?
- \* Item quid de humore menstrualis?

43 **P**eccatum contra naturam, quod est vitium inter ceteras Luxuriæ species gravissimum, est actus Luxuriæ, ex quo non potest sequi humana generatio: sive, quo pervertitur ordo a natura præscriptus, ita ut conceptio fieri nequeat. Porro hujusmodi vitium dividitur in quatuor species, videlicet in Mollitiem, Bestialitatem, Sodomiam, & indebitum concubendi modum, de quibus sigillatim in hac, & sequenti Quæstione.

44 CONCL. I. Mollities, quæ alio nomine ab Apostolo 2. Corinth. 12. & ad Gal. 5. vocatur Immunditia, est peccatum contra naturam, per quod voluntarie Pollutio seu seminis effusio quæritur extra concubitum. Hæc est peccatum mortale, quando perfecte voluntaria existit, cum sit contra ordinem naturæ, & generationis, atque excludit a regno Dei, juxta illud 1. Corinth. 6. Molles regnum Dei non possidebunt. Et cit. c. 5. ad Galat. Manifesta sunt opera carnis, quæ sunt Fornicatio, Immunditia, Impudicitia, Luxuria &c. Quæ prædico vobis, sicut prædixi, quoniam, qui talia agunt, regnum Dei non consequentur.

#### Additio I.

\* Dices: Datur etiam Pollutio, seu seminis effusio intra concubitum, prout sæpius contingit apud solutos, qui concubendo sistunt præcise in tactibus enormibus una cum effusione seminis ad extra, ne imprægnatione coram sæculo confundantur: ergo ad rationem mollitiei non requiritur, ut fiat pollutio extra concubitum. Respondeo disting. consequ. non requiritur ad rationem mollitiei, ut fiat extra concubitum, si sit pollutio, seu mollities simplex, nego, si sit mollities qualificata, id est, conjuncta cum aliquali saltem copula imperfecta, concedo consequentiam. Est autem bene notandum, quod, si pollutio sit conjuncta cum concubitu, sicque



sicque in re ipsa, seu in actu exercito cum affectu ad certam personam, non solum peccatum mollietiei, sed etiam aliud juxta qualitatem personarum concubentium contrahatur, prout dicitur num. 50.\*

Additio II.

\*Ceteroquin in definitione mollietiei studio abstrahitur, num illa pollutio, seu feminis effusio fiat intra, vel extra locum debitum, ut sic sub mollietie fluxus feminis five foras effundatur, uti fit in maribus, five intus diffuat in matricem, prout ordinarie contingit apud feminas, sub hac descriptione comprehendatur: etenim, uti recte cum Busenbaum hic docet Henno *Tract. in Decalog. disp. 6. quæst. 7. art. 1. Conclus. 1.* etiam feminæ, licet seminant in vase ad generationem subservienti, pollutionis tamen culpam incurrunt, dum id deliberate, & extra aliquam copulam ad generationem de se sufficientem faciunt. Hinc errant Confessarii (pergit citatus Henno) putantes, ex parte feminarum tunc solummodo adesse pollutionem, quando aliquem fluxum humoris extra corpus sentiunt, alias non; cum tamen hæ sæpe exterius sentiant alicujus humoris medii, puta menstrualis fluxum sine pollutione, imo sine delectatione illa, quæ in vera pollutione, aut peccaminosa inferius explicanda distillatione evenire solet. Econtra vero, præsertim accedentibus lascivis cogitationibus, osculis, vel tactibus &c. patiantur interius veras pollutiones sine fluxu externo: prout accidit, dum semen de vase decisum ad matricem mittitur, quod feminæ facile sentiunt, imo magna voluptate percipiunt. Fatendum tamen, aliquando per motus valde violentos, & enormes easdem etiam exterius pati pollutionem, licet rarius. Ita ille.

Ego autem illibenter quidem hæc addidi, timendo, ne castos offendam oculos, & aures, interea tamen, cum omnia sint munda mundis, addere necessarium duxi, ne tot errores in hac uti delicata, ita etiam (utinam non) frequenti materia contingant apud juvenes Confessarios damnantes feminas, aliquoties alias anxias, cum maxima earum perturbatione alicujus gravis pollutionis, ubi tamen potius est fluxus menstrualis, & econtra a peccato mollietiei excusantes, ubi tamen illud vere commiserunt: interea oportet, præsertim si feminæ ipsæmet se in Confessionali desuper non accusent expresse, Confessarios, maxime juvenes, esse cautissimos in interrogando. In materia castitatis (inquiunt Busenbaum, & Sporer tractando de Sacramento Pœnitentiæ) interrogationes debent esse paucæ, & cautæ, ne vel occasionem det investigandi aut traducendi Confessionem, aut ignorantem doceat, aut se, vel illum periculo exponat. Et Coninch ait: præstat aliquando Sacerdotem minus perfecte peccatum intelligere, quam sibi, vel pœnitenti aliquod scandalum causare.\*

45 CONCL. II. Mollieties est intrinsece mala, adeo, ut numquam quovis prætextu, etiam sedandæ tentationis (nam hoc est succumbere) vel tuendæ sanitatis causa, licitum sit procurare pollutionem, neque Medicus possit præbere medicinam eo fine, ut naturam ad eam concitet. Ita communis. Nam voluntaria illa emissio feminis humani est contra primum finem, ob quem a natura est institutum. Et si semel licitum esset, ex tali prætextu procurare pollutionem ob naturalem delectabilitatem, & passim prætextum ejusmodi motivum, via latissima huic sceditati aperiretur, immutando naturalem usum in eum usum, qui est contra naturam, Rom. cap. 1. cum maxima jactura generationis humanæ. Hinc merito Innocentius XI. sequentem inter alias, ordine 49. Propositionem damnavit. *Mollieties jure natura prohibita non est: unde, si Deus eam non interdixisset, sæpe esset bona, & aliquando obligatoria.*

46 Et hinc, quantum attinet ad alteram partem Conclusionis, media huc præcise tendentia suadere, vel applicare infirmis, gravissime prohibetur Medicis &c. Cum infirmitas, § fin. De Pœnit. & Remission. ibi: Ceterum, cum anima sit multo pretiosior corpore, sub inter-

minatione anathematis prohibemus, ne quis Medicorum pro corporali salute aliquid agroto suadeat, quod in periculum animæ convertatur.

47 Dicitur notanter in Conclusionem præbere medicinam eo fine, ut naturam ad eam concitet: nam dare pharmaca, quibus semen in sanguinem, vel alium humorem resolvatur, culpa vacat, ut notant Bonacina tom. 1. quæst. 4. de Matrim. punct. 10. num. 12. Sanchez, & alii. Deinde, licet forte semen, si corporis sanitati officere cœperit, prout juxta DD. obest sanitati semen jam corruptum, detrahi possit medicamento cathartico (eo modo, quo bilis, pituita, & melancholia absque libidinis sensu) tamen non potest pelli eo actu & impetu, quem natura fecit illi proprium, neque hoc fine a Medicis pharmacum præscribi; quia hic solius prolis causa a natura institutus est, & alioquin procuraretur pollutio. Lessius lib. 4. cap. 3. num. 96.

48 Nec obstat, quod licita sit emissio sanguinis, imo & amputatio manus ad vitæ conservationem. Resp. enim negando paritatem. Quia semen est institutum ad propagationem speciei, unde nec ejus usus aliter licitus, nisi ob dictum finem in legitimo Matrimonio: at sanguis, manus &c. sunt ordinata ad conservationem, & functiones individui: unde non mirum, quod ob ejus conservationem expelli, vel rescari possint, cum bonum totius præferendum sit bono partis. Accedit, quod in illius emissionem subsit delectatio naturaliter confurgens, inductiva ad mala in Conclusionem allata: secus in emissionem sanguinis, aut amputatione manus.

49 CONCL. III. Omnes Pollutiones secundum se spectatæ sunt ejusdem speciei. Ita Azorius part. 3. lib. 3. cap. 21. Bonacina loc. cit. n. 15. & alii. Ratio est: quia habent eandem deformitatem, & contrarietatem cum recta ratione.

50 Dicitur, secundum se spectatæ: quia per accidens possunt conjungi aliæ malitiæ specie distinctæ: nam si polluit se persona voto castitatis obstricta, additur nova malitia Sacrilegii: si conjugatus, nova malitia contra Castitatem conjugalem, bonumque Matrimonii: item, si aliqua persona se polluit cum imaginatione, seu desiderio peccandi cum hac vel illa persona soluta, conjugata, voto Castitatis obstricta &c. alia specie distincta turpitudine adjungitur juxta qualitatem personæ illicite concupitæ. Et hoc ipsum erit dicendum, si istud peccatum extra concubitum committatur a pluribus personis, una adjuvante alteram: nam etiam tunc exprimenda in Confessione erit qualitas personæ complicitis, num eadem fuerit ejusdem vel diversi sexus, num soluta, vel ligata, num Deo sacra, vel non, utpote cujus peccato quis cooperatur, vel eam ad hoc induxit.

Additio I.

\* Unde pro praxi, si e. g. Titius tuus pœnitens in Confessionali dicat, quod se polluerit, tu mi Confessarie non solum de numero pollutionum sollicitus esse debes, sed etiam reflexionem facere, ac nisi aliunde jam scias, interrogare I. De statu pœnitentis, quisnam sit, num solutus, vel ligatus? II. Num accesserint tactus impudici, vel oscula lasciva &c. aut similia cum alia persona, prout frequenter contingit apud diversum sexum? Quando vero se solo fecit pollutionem, III. Utrum non habuerit pro tunc simul reflexionem, & affectum specialem, vel etiam desiderium ad alias personas, & ad quas, num ad solutas, vel ligatas? quod si tuus pœnitens respondeat, se habuisse quidem sub pollutione reflexionem ad feminas, sed solum in consulo, ad nullam autem determinatam, vel si ad determinatam v. g. ligatam, tantummodo quatenus formosam, ejusmodi speciem pulchram sibi intentionaliter proponendo, non autem quali volendo, seu optando cum eadem peccare, sed a qualitate personæ prorsus abstrahendo:



in simili non contrahetur specialis malitia qualitatis, uti recte Sporer *part. 4. Theolog. Sacrament. cap. 3. sect. 5. num. 629.* eo ferme modo, quo inferius *dist. 7. num. 15. & 16.* dicetur de delectationibus morosis. \*

*Additio.*

\* Ast ponamus Confessionale tuum accedere feminam civicam, vel etiam nobilem erubescentiæ alias deditam (rusticellæ subin sunt nimis apertæ ultra, quam necessarium, aut expediens est) quæ se accusat, quod peccaverit contra sextum Præceptum, qualiter hæc prudenter erit examinanda? Talis præsupposita cognitione status poenitentis, num sit soluta, vel ligata &c. interrogetur I. Qualiter peccaverit, num cogitatione, verbo, vel opere &c. Quod si dicat, ipso opere perfectæ fornicationis se peccasse, indagetur cum quibus, & quoties, resque erit absoluta. Quando vero respondet, se peccasse quidem carnaliter, sed non perfecte, vel se non peccasse in opere, sed tantum amasio admitendo tactus impudicos, vel impura oscula &c. interrogetur II. Cum quibus personis id contigerit, num cum solutis, vel ligatis? Quod si partim cum solutis, partim cum ligatis, interrogetur III. Quoties cum solutis, & quoties cum ligatis? Item IV. Poterit addi pro interrogatione quarta, si in Confessione ex circumstantiis colligatur, quod tactus fuerint aliquo modo magis qualificati, aut oscula in longius tempus protracta, seu voluptas valde intensa exinde capta, poterit (inquam) addi; num nihil aliud exinde sit subsecutum? Si respondeat: *Nihil.* in Nomine Domini conformiter dictis *Addit. II. post num. 44.* superseadeat ultiores facere interrogationes: poterit enim prudenter se resolvere, quod vel pollutio subsecuta non sit, aut a muliere invincibiliter ignorata, vel saltem, quod non adstringatur ulterius interrogare ob periculum scandali. Subinde etiam honestiores feminæ ad quartam interrogationem: *an nihil exinde subsecutum fuerit?* respondent, magnam se exinde sensitisse delectabilitatem, per quam intelligunt, & modestis terminis, insinuare volunt ipsam pollutionem. \*

§1 CONCL. IV. Pollutio indirecte voluntaria, hoc est, illa, quæ prævidetur secutura ex positione alicujus causæ, quæ evitari posset, ac deberet, pariter est peccatum mortale, saltem si ipsa causa in genere Luxuriæ sit graviter peccaminosa, atque ex se multum excitativa talis effectus. Ita sub his terminis communis. Sic fit, quando quis prævisa ejusmodi foeditate secutura vacat libidinosis, seu ex venerea delectatione provenientius osculis, tactibus, amplexibus, & aliis hujusmodi, quæ sunt causa propinqua pollutionis, & ex natura sua talis turpitudinis excitativa. Ratio est: quia in talem causam consentiens hoc ipso in effectum inde connaturaliter secuturum consentire convincitur.

§2 Dicitur in conclusione, quæ prævidetur secutura, nam si operans nullo modo avertit ad periculum secuturi effectus pravi, tunc ejusmodi effectus, ut puta pollutio, neque in se neque in sua causa censetur voluntarius, utpote nullo modo prævisus.

§3 Et additur, ex positione causæ, quæ evitari posset, ac deberet; nam quando ejusmodi actio ceteroquin licita est, & necessaria, vel utilis, ac proinde non adest obligatio eam vitandi: effectus inde sequens, etiam prævisus, secluso alio consensu, non imputatur ad culpam, prout jam superius (b) dictum fuit. Et hinc licitum est sumere medicinam ad expellendos varios alios corpori noxios humores ordinatam, etsi per accidens citra complacentiam veneream exinde sequatur vel hanc expulsionem comitetur pollutio. Item Parochus, imo & alius Confessarius, ex officio non obligatus, potest excipere Confessiones, Chirurgus, vel Medicus tangere partes feminæ, indigentis cura, aut studere rebus medicis, ac

hujusmodi, non obstante præviso periculo pollutionis secuturæ, dummodo hanc minime intendat, neque in eam libidinose consentiat. Similiter expertus, se pollui ex equitatione absque periculo proximo consensus, non tenetur pedester incedere. Ratio generalis est: quia talia vel sunt ex officio, aut Charitate erga proximum, vel saltem sunt utilia operanti, & ceteroquin honesta & licita, neque causa per se, ac suapte natura proxima talis foeditatis. Sanchez *lib. 9. de Matr. dist. 45. num. 7. & seqq.* Azorius *cit. cap. 23. quest. 4. & 5.* Lessius, Bonacina, & communis.

NB. Subsequentia duo Quæsitæ non equidem sunt ab ipso Anacleto formata, sed a me addita: quia tamen jam in priori Editione 1722. emanata collocata fuerunt sub numeris ordinariis, etiam hic taliter relinquuntur, ne sit confusio in Indice, addendo tamen solitos Asteriscos.

\* §4 Quæres I. An si causa pollutionis sit tantum venialiter mala, hoc non obstante, effectus exinde secutus censetur mortaliter peccaminosus? e. g. ponamus, quod pollutio sequatur ex semideliberata complacentia, vel ex curioso aspectu faciei alicujus feminæ solutæ, quæritur, an talis pollutio sit mortaliter peccaminosa? Ad hoc quæsitum ex Lessio, & Sanchez noster Patritius Sporer *part. 4. Theol. Sacram. sect. 5. §. 6.* & ex utroque Marchantio, Salas, Vasquezio, ac plurimis aliis la Croix *lib. 3. p. 1. un. 922 & seqq.* respondent tripliciter. I. Si causa in genere luxuriæ non tantum venialiter, sed etiam mortaliter mala foret, atque ex sua natura proxime inducens ad similem foeditatem, tunc effectus secutus, nempe pollutio, haud dubie foret mortaliter peccaminosus, prout jam supra, Conclusionem IV. fuit insinuatam. II. Si causa illa in genere Luxuriæ est tantum peccatum veniale, etiam graves motus, vel ipsa pollutio exinde secuta, minime tamen intenta, & secluso semper periculo consensus in illam, erit dumtaxat venialiter mala. Ratio est: quia, cum tunc pollutio non sit volita in se, sed tantum in sua causa, in tantum mala erit, in quantum mala est ipsa causa, & consequenter si causa fuerit tantummodo venialiter mala, pariter effectus imputabitur tantum venialiter malus. III. Quando causa, ex qua sequitur pollutio, non est peccatum in genere Luxuriæ, quippe natura sua non ordinata ad rem veneream, etsi mortaliter peccaminosa in alio genere, puta si die Veneris comederes carnes, ex quo ad noctem in fomno sequeretur pollutio, exinde effectus pollutionis non erit mortaliter peccaminosus, si in illa pollutione non habeatur libidinosa complacentia, & pariter excludatur periculum proximum consensus. Ratio est: quia tunc illa causa non videtur per se, ac proxime, sed tantum per accidens, ac leviter & remote influere in similem effectum. Atque ex his responsionibus (inquit P. Sporer) tolluntur plurimi scrupuli, & solvuntur innumeri casus. Licet ceteroquin casta mens etiam talia studeat amovere ex abominatione hujus foeditatis. \*

\* §5 Quæres II. An liceat pollutionem involuntarie e. g. in fomno ortam permittere, secludendo omnem affectum ad eandem, ac ceteroquin se habendo negative? Ad hoc quæsitum denuo respondet P. Sporer, uti sequitur: quando motus venereus, ac ipsa decisio seminis accidit in fomno, sed emissio seu effluxio fit postea in vigilia (& multo magis, si ipsa emissio seminis jam incepit in fomnis, & partim adhuc fit in vigilia) secluso consensu in illam, nullum fit peccatum juxta Gerson, Sanchez, Tamburinum. Ratio est: quia, uti supponitur, pollutio incepit involuntarie, continuatio autem effusionis seminis est solum effectus naturalis causæ præcedentis, quæ hic & nunc impediri amplius vix potest, & consequenter nec quis tenetur: vel enim conatus ille reprimendi nihil operabitur, vel retento contra naturæ impetum extra suam sedem semine jam deciso, corpus supra modum gravabitur, & periculo infirmitatum exponetur. Cavendum tamen vel maxime, ne evigilans non tantum permittat, sed etiam positivo conatu promoveat, vel compleat, quod utique non liceret citra grave peccatum, fi



si vere deliberate fieret: nam in eo casu aliquoties non tam perfectum, quam imperfectum voluntarium intervenire, experientia patet. Tutissime ager taliter evigilans si saltem circa similem foeditatem simplicem displicentiam eliciat, ac se B. Virgini immaculate conceptæ, aut suo Angelo tutelari commendet, ejusdem implorando assistentiam, ne consentiat positive. \*

56 Quæres III. An licitum sit desiderare, vel delectari de pollutione naturaliter secuta. Resp. I. Illicitum est, eam desiderare, vel de ipsa jam secuta gaudere ob delectationem; neque ullo modo fas est, ipsam procurare, aut ad eam active cooperari, vel quidpiam facere eo fine, ut eveniat. Ita omnes Doctores; nam consensus in eam, cooperatio, vel intentio jam foret peccatum mortale.

57 Resp. II. Nihilominus simplici affectu, & sine ulla procuratione, ob finem honestum v.g. sedandæ tentationis, vel sanitatis ergo desiderare, ut pollutio naturaliter eveniat, aut de ea naturaliter secuta gaudere, multi Doctores non illicitum censent; ut Lessius cit. cap. 3. n. 105. Navarrus c. 16. Man. n. 7. Layman lib. 3. sect. 4. n. 17. & alii. Qui tamen recte addunt, ejusmodi simplex desiderium, vel gaudium indicare imperfectum Castitatis affectum: nam viri perfecti ob amorem puritatis, & timorem consentiendi in carnalem delectationem, vel maxime abhorrent ab omni, quamvis naturaliter eveniente, carnis impuritate.

58 Quæres ulterius. An, quæ hæc dicta sunt de pollutione, etiam locum habeant in Distillatione? Ubi notandum ex Gerson part. 2. tract. de Poll. D. Thoma, Sanchez, & aliis, quod e corpore humano per meatus membrorum pudendorum præter urinam, verumque semen procedat humor quodammodo medius, qui potest vocari salivialis, vel sputalis. Et hic quidem ab humore feminali non ita facile secernitur propter similitudinem coloris, infectionem, carnisque commotionem, quæ aliquando ipsum comitatur: differt tamen præ ceteris in hoc, quod facilius fluat, nec cum tanta carnis commotione, sicuti feminalis, & quandoque imperceptibiliter, ac sine ulla carnis commotione. Hoc prænotato,

59 Resp. Quando Distillatio accidit absque ulla carnis commotione, de ea non est curandum, cum sit veluti quidam sudor fluens: secus est, quando ipsa sit cum magna carnis commotione. Ita Sanchez cit. disp. 45. n. 2. & n. 31. Bonacina punct. 10. n. 13. & alii. Ratio posterioris partis est: quia ejusmodi commotio spirituum est notabiliter turpis, & veluti inchoata pollutio; ergo si est voluntaria, etiam Distillatio erit mortalis ob ejusmodi delectationem veneream. De hac proinde erunt applicanda hæc dicta, non vero de ea, quæ contingit absque dicta commotione carnali.

#### Additio.

\*Doctissimus Gerson apud nostrum Petrum Marchantium in suis notabilibus Resolut. de Sacrament. Penitent. Casu III. specificatis humoribus addit adhuc alios duos; verba formalia ejus sunt sequentia: alius additur humor (præsertim in mulieribus) qui vocatur menstrualis: & huiusmodi quandoque masculo accidit ex infirmitate, præsertim circa plenilunium cum intolerabili pruritu, ob suam fæditudinem in partibus verecundis, & quasi cum itranguria. De priori jam dictum est supra. Loquendo de posteriori humor ille in suo fluxu teste eodem Gerson vix, aut numquam causat talem modum delectationis, & concussionis totius corporis specialiter in partibus inverecundis, nec ita obnubilat in suo exitu rationem, uti humor feminalis. Et hinc Marchantius de eodem proportionalliter eo modo resolvit, quo nos de illa distillatione, quæ absque magna carnis commotione evenit, & admittit frictionem in genitalibus ad sedandum pruritum hunc, quamvis exinde per accidens sequatur effusio ejusdem falsi humoris. Cavendum tamen, ne quis hac doctrina abutatur, & mentiatur iniquitas sibi. \*

Anacl. Reiffenstuel Theolog. Tom. I.

#### QUÆSTIO VI.

#### De ceteris specialibus Peccatis contra naturam.

#### SUMMARIUM.

- 60 Bestialitas, quid?
- 61 Non variatur specie ob diversitatem bestiarum.
- 62 Concubitus cum demone, quale peccatum?
- 63 Sodomia, quid?
- 64 Sodomitarum pœna.
- (c) Juxta dicta Tract. 2. dist. 2. n. 40. & seq.
- 65 Indebitus concumbendi modus, quid?
- 66 Quale peccatum præposterus coitus inter conjuges?
- 67 Peccata contra naturam distinguuntur specie.
- 68 Solvitur objectio.
- 69 Plures Luxuriæ species concurrunt quandoque in eodem actu.

60 CONCL. I. Bestialitas, quæ est secunda species Peccati contra naturam, tunc committitur, quando concumbit quis cum re animata, non ejusdem speciei cum homine. Hoc peccatum est gravissimum, atque in Foro etiam sæculari pœna mortis, & combustionis merito punitur.

61 Ceterum istud peccatum contra naturam non variatur specie ex eo, quod committatur cum animalibus specie distinctis, ut puta ove, equa, cane &c. Omnia enim conveniunt in hac una ratione, quod non sint ejusdem speciei cum homine: malitia autem Bestialitatis consistit in hoc, quod non fervetur eadem species, & natura. Filliucius tr. 30. c. 8. n. 161. & alii communiter.

62 Quæres: An concubitus cum demone sit species Bestialitatis? Resp. cum cit. Filliucio, & aliis, peccatum cum demone assumente formam hominis, maris, vel femine, aut alicujus belluæ semper dici peccatum Bestialitatis (quia etiam dæmon est diversæ speciei ab homine) sed ultra hanc peccati malitiam etiam superaddere vitium Irreligiositatis, & Superstitionis ob societatem cum demone habitam in illo actu venereo. Addendum etiam cum citato Auctore n. 162. quantum est ex parte affectus, talia peccata posse esse diversæ speciei, nam si quis cum demone coeat in forma mulieris affectu fornicario adulterino, vel incestuoso, erit præter peccatum Bestialitatis, & Superstitionis, etiam peccatum Fornicationis, Adulterii, vel Incestus ratione illius pravi affectus, atque voluntatis, quam habet.

63 CONCL. II. Sodomia est peccatum contra naturam, quo ex affectu ad indebitum sexum vir concumbit cum viro, vel femina cum femina. Ita D. Thomas 2. 2. q. 154. art. 11. & alii.

64 Hoc peccatum est gravissimum, atque in cœlum clamans Gen. 19. ob quod Sodoma & Gomorha cum finitimis civitatibus cœlesti igne vindice conflagrarunt. Hinc Jure quoque Civili tanti sceleris Rei igne concremantur: at Jure Canonico olim Laici excommunicabantur, Clerici vero deponebantur, & in Monasterium detrudebantur. Nunc vero, quod attinet Clericos, juxta Bullam S. Pii V. quæ incipit: Horrendum illud scelus (& habetur tom. 2. Bullarum Romani cons. 72. dicti Pontif.) Clerici Sodomitæ ipso Jure sunt privati privilegio Clericorum, & dignitate, Officio, & beneficio Ecclesiastico: quamvis, quia hæc Constitutio est pœnalis, atque requirens executionem externam, ea primum in conscientia obliget post sententiam Judicis declaratoriam. (c)

65 CONCL. III. Ultima species peccati contra naturam, sive Indebitus concumbendi modus est peccatum contra naturam, per quod vir concumbit cum femina modo indebito, ita ut impediatur generatio. Ita Filliucius loc. cit. n. 156. & alii.

66 Dicitur notanter, ita ut impediatur generatio: nam alioquin in rigore non erit peccatum contra naturam, cum ei non conveniat definitio n. 43. data. Hinc secluso hoc, ac etiam periculo impediendi generationem præposterus coitus inter conjuges peccatum mortale non est: ordinarie tamen est peccatum veniale, & quidem grave

A a in



in suo genere, nisi aliqua necessitas excuset, utputa quia mulier est prægnans, vel quia corporis dispositio propter pinguedinem aliter fieri non patitur. Et hinc conjuges sic congregantes extra calum necessitatis graviter reprehendendi sunt ob periculum impediendæ generationis. *Mastrius disp. 11. Theol. moral. n. 135. Filiucius, Bonacina, & alii. Verum occasione prædictorum,*

67 Quæritur I. An prædicta quatuor peccata contra naturam distinguantur specie in genere moris? Resp. affirmative cum *Mastrio loc. cit. n. 137. ac seqq. & communi. Ratio est: quia, licet opponantur eidem virtuti Castitatis, tamen ipsi opponuntur secundum diversam specie rectitudinem. Et hinc diversam difformitatem, atque dissonantiam cum recta ratione continet. Bestialitas, & Sodomia, quam simplex pollutio.*

68 Nec obstat, quod omnia hæc sint peccata contra naturam. Resp. enim, peccatum contra naturam esse genus respectu dictarum quatuor specierum: alioquin enim, nisi intercederet ejusmodi distinctio specifica in genere moris, sequeretur, quod, si quis semel habuisset pollutionem, semel commisisset Bestialitatem, & semel Sodomiam, satisfaceret in Confessione, dicendo: *Ter peccavi contra naturam: quod est contra communem sensum Doctorum. Accedit Decretum Alexandri VII. hanc inter alias, ordine 24. Propositionem damnantis: Molities, Sodomia, & Bestialitas sunt peccata ejusdem speciei infime, ideoque sufficit dicere in Confessione, se procurasse pollutionem.*

69 Quæritur II. An plures Luxuriæ species necessario in Confessione explicandæ, quandoque in eodem actu concurrant? Resp. cum *Scoto Quodlib. 18. §. De primo, & Doctoribus communiter, affirmative. Sic enim peccatum carnis a Clerico in Sacris constituto, vel alio habente votum Castitatis, cum consanguinea sua conjugata commissum una cum effusione seminis extra vas, præter reatum Adulterii continet malitiam specie distinctam Sacrilegii, atque Incestus, & Peccati contra naturam. Idem contingere potest in desideriis illicitis, & carnalibus: sic quippe voto Castitatis obstrictus, ac seipsum voluntarie polluens cum imaginatione, atque affectu ad personam conjugatam sibi consanguineam, præter malitiam peccati contra naturam, & Sacrilegii, etiam ob pravam illam concupiscentiam internam, desideriumque carnale, contrahit malitiam Incestus, atque Adulterii, necessario in Confessione aperiendam, utpote circumstantiam speciem mutantem: & idem dicendum de similibus.*

## QUESTIO VII.

De Impudicitia, hoc est, osculis, tactibus, aspectibusque impudicis; & an detur levitas materiae in re venerea.

### SUMMARIUM.

- 70 Impudicitia est circa oscula, tactus &c. venereos.  
 71 Oscula, tactus &c. impudici, quale peccatum inter solutos?  
*Præparatoria Stupri, quæ?*  
 72 Quid de osculis, & amplexibus causa amicitiae.  
 73 Vel tactibus ex joco, aut levitate habitis.  
 74 Sive ex causa justa v. g. medendi factis?  
*An femina teneatur tale genus medendi admittere?*  
 75 Quid de fricatione pudendorum?  
 76 Tactus, & aspectus impudici inter conjuges, an, & quale peccatum?  
*An liceat, si subinde sequatur pollutio?*  
 77 Num liceant inter Sponsos de futuro.  
 78 Aut tactus in partibus honestis causa delectationis sensitiva?  
*\* Solvitur obiectio, & declaratur differentia inter delectationem veneream, & sensibilem. Addit. I. & II.*  
 79 Tactus impudici inter personas ejusdem sexus, quale peccatum?

80 In Tactibus libidinosis explicandæ circumstantia personarum complicum.

81 Aspectus, verba, & cantus turpes inter solutos, quale peccatum.

82 Quid, si fiant ex levitate, curiositate &c.

83 Discrimen inter tactum, & visum.

84 Aspectus curiosi, præsertim fixi, quam periculosi?

\* Quid de pueris & puellis copula necdum capacibus?  
 Additio I.

\* Quid de simul balneantibus? Addit. II.

\* Quid de aspectibus & tactibus impudicis animalium?  
 Addit. III.

\* Quid sit statuendum de Clericis? Add. IV. & V.

85 Levitas materiae in re venerea, an detur?

I. Sententia.

86 II. Sententia.

87 III. Sententia, merito tenenda ex auctoritate.

88 Et ratione.

89 Solvuntur rationes primæ.

90 Et secundæ sententiæ.

70 **A**dvertendum, quod Impudicitia sit circa oscula, tactus, & alios actus circumstantes actum venereum, prout notat D. Thomas 2.2. q. 154. art. 1. ad 5. de hoc loquitur Apostolus ad Galat. 5. *Manifesta sunt autem opera carnis quæ sunt fornicatio, immunditia, impudicitia, luxuria &c. Quæ dico vobis, sicut prædixi, quoniam, qui talia agunt, regnum Dei non consequentur. Quod ut melius intelligatur, sit*

71 **CONCL. I.** Certum est, quod oscula, tactus & amplexus impudici, id est, habiti causa delectationis venereæ, & sensibilis ex commotione spirituum generationi deservientium consurgens, inter personas solutas etiam quoad partes, alias de se non inhonestas, sint peccata mortalia. Ita Sanchez lib. 9. de matr. disp. 46. n. 7. & communis aliorum, idque patet ex cit. textu D. Pauli ad Galat. 5. cum concordantiis. Ratio est: quia ejusmodi oscula, tactus & amplexus impudici suapte natura ordinantur ad copulam carnalem, ad eamque proxime disponunt ob vehementem corporis, spirituumque generationi deservientium commotionem, & hoc ipso sunt pollutio aliqua inchoata: ergo. Hinc Glossa in l. Quod ait ff. Ad legem Juliam de Adulterio, præparatoria stupri refert his verbis:

*Visus, alloquium, tactus, post oscula, factum. Concordat Decretum Alexandri VII. inter alias Propositiones etiam hanc, ordine 40. damnantis: Est probabilis opinio, quæ dicit, esse tantum veniale, osculum habitum ob delectationem carnalem, & sensibilem, quæ ex osculo oritur, secluso periculo consensu ulterioris, & pollutionis.*

72 Dicitur notanter in Conclusionem, impudici, id est, habiti causa delectationis venereæ: nam si talia oscula, vel amplexus fiant causa amicitiae secundum morem patriæ, communiter excusantur a peccato: quia oscula, vel tactus de se non sunt intrinsece mali, sed indifferentes, simulque hic fiunt ex honesto fine, nimirum in signum mutuae benevolentiae, pacis, & debiti obsequii. Nec obstat, quod inde consurgat quandoque motus inordinatus sensualitatis; dummodo eidem non præbeatur deliberatus assensus, nec habeatur libidinosa complacentia; nam alioquin ejusmodi prava complacentia utique foret peccaminosa.

73 Deinde si tactus, amplexus, vel oscula solum habentur ex joco, vel quadam animi levitate, aut alia consimili ratione, non vero causa delectationis venereæ, per se loquendo non excedunt culpam venialem. Laym. lib. 3. sect. 4. n. 10. citans communem Doctorum. Quamvis recte idem post Sanchez loc. cit. n. 11. hinc excipiat tactus valde turpes & impudicos, utputa partium vicinarum verendis, vel ipsarum verendarum: nam hi ultimi, si absque necessitate, vel utilitate (quod additur propter dicenda numero sequenti) fiant etiam ex joco inter personas diversi sexus in prædictis partibus inhonestis immediate (secus si obiter tantum supra vestes) non excusantur a peccato mortali, cum ex natura rei similes tactus ad delectationem veneream propinque tendant, eam.



eamque valde excitent inter personas diverſi ſexus, niſi forſan ætas infantilis a gravitate peccati eximat, prout exinde Sanchez, & Jacobus Marchantius eximunt a gravi peccato (non item a veniali) angillas, puellas veſtientes, lavantes, eorumque pudenda ex curioſitate per breve temporis ſpatium, ſecluſo conſenſu, vel complacentia turpi, tangentes: nam licet etiam iſtæ mortaliter peccare poſſint, ſi id mora longiori faciant, ob morale periculum conſenſus libidinoſi: ſi tamen brevi temporis ſpatio contingat, non ſolet ſimilis tactus ex ſua natura tendere propinque ad delectationem veneream, eamque valde excitare.

74 Rurſus ſi tactus etiam inter personas adultas diverſi ſexus in partibus inhoneſtis fiat cauſa medendi, aut alia neceſſaria, vel juſta, ſecluſo alio pravo affectu, nullum eſt peccatum: cum talis contactus, utpote ex Charitate ordinatus, vel ex alio juſto motivo procedens, ſit conſentaneus rectæ rationi. Notat tamen Leſſius *cit. lib. 4. c. 3. n. 60.* poſt Navarrum *c. Si cui n. 13. de penit. diſt. 1.* quod mulier, præſertim virgo, non teneatur tale genus medicandi in partibus ſecretioribus admittere: tum quia mens caſta a tali curatione non minus, quam a morbo abhorret: tum quia nemo tenetur admittere id, cui eſt conjunctum periculum motus pravi, aut delectationis carnalis.

75 Ex eadem cauſa neceſſitatis excuſatur tactus, ſeu fricatio propriorum pudendorum ad ſedandum pruritum, in illis partibus quandoque vehementius conſurgentem. Imo Layman *cit. ſect. 4. num. 19.* poſt Sanchez, & Petrus Marchantius in *Reſolutionibus ad tomum 3. Tribunalis additis caſu 3.* poſt Sancium, & Villalobum exiſtimant, non eſſe peccati damnandum, qui ejuſmodi moleſtiſſimum pruritum fricatione ſedare conatur, quamvis cum periculo pollutionis, dummodo non ſubſit periculum conſenſus in iſtam.

76 Additur inſuper in Concluſione, *inter personas ſolutas*: in primis enim conveniunt Doctores, conjugibus ejuſmodi tactus eſſe licitos, ſi ad copulam conjugalem referantur, utpote ad quam licite ſe excitant. Deinde tactus, oſcula, & aſpectus ejuſmodi inter conjuges, ſi fiant cauſa ſolius voluptatis, ſunt quidem culpabiles, ſed non mortaliter, etiamſi capiantur ob delectationem abſque intentione copulæ conjugalis: quia Matrimonium eos cohoneſtat, ac defectus debiti finis non eſt mortalis. Intellige, dummodo abſit periculum pollutionis: nam alioquin juxta Bonacinam *tom. 1. quæſt. 4. de matrim. punct. 9. n. 6.* Leſſium, Layman, Maſtrium &c. a mortali non excuſarentur.

Additio.

\* Putant tamen aliqui graves DD. inter conjuges etiam hos tactus admitti poſſe, etſi ſubinde accidentaliter per eos ſequatur pollutio, ſi adefſet aliunde aliqua juſta cauſa tales tactus concedendi, qualis foret juxta Sanchez *lib. 9. diſp. 49. n. 37.* Perez *diſp. 45.* & Dianam *part. 6. tract. 6. reſol. 27.* manifeſtatio, & conſervatio mutui amoris præſertim ex parte reddentis. Vide de hoc fuſius Jus Canonicum *lib. 4. decr. tit. 15. præſertim n. 65.* & Patritium Sporer *part. 4. Theol. Sacrament. c. 2. ſect. 3. §. 4. n. 500.* Cui equidem doctrinæ ſubſcribo, ſi ex his tactibus oriatur pollutio tantum ſubinde: tunc enim, ſi exinde pollutio non oriatur valde frequenter, hic & nunc apud hos conjuges non videtur ex una parte adefſe periculum proximum pollutionis, ex altera præfati tactus cohoneſtantur per contractum præcedentem Matrimonii.\*

77 Num autem inter Sponſos de futuro liceant tactus, & oſcula, alia difficultas eſt. Et quidem tactus impudicos inter Sponſos non excuſari a mortali, paſſim fatentur Doctores, eo quod hi proxime diſponant ad copulam, quæ non eſt illis licita. Quod ſi oſcula, & amplexus de ſe non ſint impudici, ſimulque fiant abſque fine venereæ delectationis, ſed intuitu honeſti amoris, benevolentia, aut neceſſitudinis, culpa vacant. Navarrus *c. 14. manual. n. 19.* & ſequitur ex dictis *n. 72.*

Anacl. Reiffenſtuel. Theol. Tom. I.

78 Verum loquendo de hujusmodi tactibus, qui poſt ſponſalia abſoluta potius ſunt cauſa delectationis ſenſitivæ in partibus ceteroquin honeſtis, variant Doctores. Et quidem Navatrus *loc. cit. n. 12.* Layman *n. 11.* Cajetanus, Sa, pluresque alii eos excuſant a mortali, dummodo non ſubſit periculum pollutionis, vel conſenſus in actum turpem: quia (inquiunt) Sponſalia ſunt initium, ſeu prævia diſpoſitio Matrimonii; & ſic hos actus reddunt licitos, ſi abſit periculum pollutionis, vel ulterius conſenſus: quamvis ejuſmodi periculum, aut ipſos tactus impudicos brevi ſubſecuturos, præſertim ſi Sponſi ſoli abſque arbitris converſantur, ſpectata fragilitate humana raro abeſſe, ultro fateantur. Oppoſitum tenent Henriquez, Rebellus, & quidam alii, quorum ſententiam tutiorem, & probabiliorē cenſet Bonacina *loc. cit. n. 6.* & Maſtrius *diſp. 11. n. 142.* Ratio hujus poſterioris ſententia eſt: quia hæc delectatio ſenſitiva circa potentiam Tactus a natura inſtituta eſt ut prævia diſpoſitio ad copulam; & conſequenter, cum hæc inter Sponſos de futuro illicita ſit, idem cenſendum de illa. Accedunt dicta ſuperius *n. 71.* ac præcipue Decretum Alexandri VII. ibidem citatum.

Additio. I.

\* Objicies contra hanc ultimam ſententiam Patris Reiffenſtuel. Delectatio ſenſitiva non eſt peccatum grave, ſicut delectatio venerea, ſed tantum veniale; ergo quamvis inter ſponſos de futuro delectatio venerea hauſta ex tactu & oſculis in partibus ceteroquin honeſtis alterius ſexus adhuc ſit peccatum mortale, non tamen erit mortale, ſi hæc delectatio fuerit ſolummodo ſenſibilis. Sic enim etiam quoad potentiam viſivam, ſi femina præciſe aſpiciatur ex curioſitate, quia formoſa eſt, ſicque objectum pulchrum, & viſu delectabile, talis curioſus aſpectus non erit peccatum mortale, quamvis foret tale, ſi aſpectus contingeret ex delectatione venerea. Accedit, quod aſpectus alterius ſexus in partibus ceteroquin honeſtis ex levitate animi facti, item ſimiles tactus, & oſcula ex joco non excedant culpam levem: cur ergo tales tactus, & oſcula ſint peccata mortalia, ſi fiant ex delectatione ſenſibili abſque tamen venerea? Nam ſi hæc ultima ſimul accederet, gratis conceditur, & ex damnata Propoſitione Alexandri VII. ordine 40. clare colligitur, quod tunc culpa foret mortalis.

Fateor ingenue, fundamenta iſta apud me (ſalvo meliori) faciunt ſententiam primam Navarri, Laymani, & aliorum valde probabilem, ſuppoſito, quod tactus, vel oſcula facta in partibus honeſtis alterius ſexus non ſint preſſa, & ex magno ardore impreſſa, nec per longam moram repetita, aut nimium qualificata, nec etiam apud iſtam, vel illam perſonam exiſtat periculum proximum ſubſecuturæ exinde, & admittendæ delectationis venereæ; & ſub hac limitatione ipſa etiam admittit Henno *Tract. in Decal. diſp. 6. quæſt. 9. art. 1. concl. 2.* Generaliter tamen, & abſolute, ac univerſaliter prolata illam ſententiam præctice loquendo non approbarem, ſed præplacet ſententia Henriquez, ac Maſtrii a P. Reiffenſtuel adducta tamquam teſte Bonacina probabilior: quoniam ſimilis delectatio ſenſibilis orta in potentia ſenſitiva tactus, maxime ſi ſit nimis intenſa &c. poſt ſe ordinarie, & quaſi ex natura ſua trahit etiam delectationem veneream.\*

Additio II.

\* Ut autem totus diſcurſus præcedentis Additionis adhuc magis capiatur, & objectio, ex cujus reſolutione multi caſus præctici inferri poſſunt, ex integro ſolvatur, prænotandum ex la Croix *lib. 5. de peccatis nu. 93.* quod delectatio venerea ſit illa, quæ ſentitur circa partes genitales per commotionem ſeminis, vel ſpiritu generationi deſervientium, qui ſpiritus re ipſa ſunt ſubtilis ſanguis veluti in aerem attenuatus.



*Delectatio sensitiva* est, quæ oritur ex applicatione sensus ad objectum, v. g. loquendo de potentia tactus, si apprehendatur manus tenelli pueri, quatenus caro ejusdem adhuc mollis est &c. Hæc delectatio sentitur communiter circa pectus cum aliquo calore, vel quasi cum emotione sanguinis, aut spirituum animalium circa cor: & si est valde intensa, solet pariter ordinarie propter magnam connexionem potentiæ tactivæ cum concupiscentia carnis causare delectationem veneream. H. N.

Ad objectionem respondetur neg. conseq. primi antecedentis, supposito, quod delectatio illa sensibilis in potentia tactus resultans fuerit valde intensa, seu qualificata, puta causata per oscula pressa, ardentia, vel longiori tempore repetita, seu qualificata. Ad primam instantiam de aspectu negatur paritas: quia potentia visiva non tam propinque movet ad delectationem veneream, quam potentia tactus juxta dicenda inferius *Conclusione IV.* Nota etiam, quæ ibi statim subsequenti numero adjunguntur de aspectibus fixis. Ad II. instantiam de tactibus, seu osculis ex levitate, aut joco factis ex eo patet disparitas, quia ex levitate, aut joco facti nec sunt tam pressi, nec tam ardentes, aut in longius protrahi, ut hic suppono, & consequenter nec movent tam propinque ad veneream delectationem, sicuti si fiant ex intensa delectabilitate sensitiva. Videantur Gobath in *Theolog. experim. tract. 7. n. 330.* Sporer *Tract. 1. Theol. moral. cap. 5. sect. 2. num. 19.* & la Croix *lib. 3. part. 1. num. 888. & seqq. ac lib. 5. n. 93. & seqq.* ubi pro, & contra exacte hanc difficultatem examinat. \*

79 CONCL. II. Tactus impudici seu venerei inter personas ejusdem sexus sunt graviora peccata mortalia, quam inter personas solutas diversi sexus. Ita Layman *cit. sect. 4. num. 13.* Et ratio est: quia ejusmodi tactus venerei ex natura sua tendunt ad peccatum molitiei, vel etiam sodomix, quod gravius est simplici fornicatione. Dixi notanter: *Tactus venerei*, id est, facti ex motivo lascivo; nam, si a personis ejusdem sexus exercerentur tales tactus tantummodo ex levitate animi, vel joco, dum v. g. simul natant, aut balneant, Sanchez *lib. 9. disp. 46. n. 22.* excusat a mortali peccato, quod Silvius apud Sporer censet, admitti posse, si leviter, & quasi per transfennam fierent: tunc enim non solent ordinarie excitare propinque ad venerem: alias secus. Denique se ipsum tangere aut aspicere ex sola curiositate, vel levitate, seu seclusa mala intentione, vel turpi consensu, aut periculo, limites peccati venialis non excederet, cum minor videatur indecentia in corpore proprio, quam alieno, & talis tactus in proprio corpore ordinarie non adeo excitet ad venerem, quam in corpore alieno: ubi tamen caute utantur hac doctrina illi Juvenes, qui alias peccato molitiei sunt dediti, ne mentiatur iniquitas sibi.

80 Porro circa hætenus dicta ulterius quoque contra quosdam Neotericos notandum est cum Sanchez *lib. 9. de matrim. disp. 46. num. 17.* quod, quando tactus libidinosi juxta dicta sunt peccatum mortale, necessario in Confessione fatenda sit circumstantia personæ tum agentis, tum patientis, v. g. an fuerit conjugata, consanguinea, voto obstricta &c. Nam hujusmodi tactus sunt ejusdem malitiæ moralis, cujus est actus consummatus copulæ, ad quam suapte natura referuntur. Hoc ipsum ex professo tradit Azorius *part. 3. lib. 3. cap. 25. quest. 5. allegans communem.*

81 CONCL. III. Aspectus, turpiloquium, turpes cantilenæ, ac hujusmodi, si causa delectationis venereæ inter personas solutas fiant, sunt peccata mortalia. Ita Laym. *num. 13.* cum communi: nam ipsamet delectatio venerea talibus prohibita est; ergo & illud omne, quod fit causa illius venereæ delectationis. Hinc Salvator *Matth. 5.* inquit: *Omnis, qui viderit mulierem ad concupiscendum eam, jam mœchatus est eam in corde suo.*

82 Dicitur, si causa delectationis venereæ: nam, si fiant ex quadam levitate, curiositate, aut ob voluptatem, quæ præcise ex ipsa narratione capitur, vel alium hujus-

modi vanum finem, non vero ob delectationem veneream, communiter venialia censentur, per se loquendo; etsi ratione scandali, vel periculi proximi labendi in gravius peccatum mortalia esse possint. Sanchez *cit. disp. 46. n. 34. & seqq.* Lessius *lib. 4. de Just. & Jur. c. 3. n. 63.* & alii. Quod si talia fiant inter ipsosmet conjuges patet ex dictis *n. 76.* an, & quale sint peccatum.

83 CONCL. IV. Nihilominus datur aliquod discrimen inter tactum & visum, in eo consistens, quod tactus, amplexus & oscula magis propinque tendant ad concubitum, adeoque delectatio sensibilis inde confurgens frequentius sit venerea & mortalis, atque ad eam Luxuriæ speciem reducat, in qua esset, si coitus sequeretur, & propterea in Confessione exprimi debeat circumstantia personæ tactæ. E contra visus, sive aspectus mulieris, quin & alloquium illius propinque non tendit ad concubitum, potestque ex pluribus titulis licite fieri; puta ob debitam urbanitatem, aut ad se cognoscendum postea, si iterum convenerint, vel ad reprehendendam illius vanitatem, velem de rebus honestis commonendam. Quinimo, si ejusmodi aspectus fiat ob solam curiositatem, tantummodo erit peccatum veniale, nisi serio & deliberate contingat in partibus denudatis omnino oblecten diversis sexus, ubi a peccato gravi haud eximeretur talis curiosus aspectus, quando fortassis ætas adhuc infantilis non excusat.

84 Fatendum tamen, quod tales aspectus curiosi, præterim fixi & diuturni, sint valde periculosi, & innumeri ex illis fuerint perducti ad lapsum. Nam exinde naturaliter confurgit commotio spirituum generationi intervientium, & in membris rebellis, & in affectu complacentis; quin & ipsemet diabolus sese immiscere solet, faciendo, ut species visa assidue obversetur phantasiæ, quæ sensim actum allicit, & naturam commover. Hinc non immerito *Ecclesiastici cap. 31.* dicitur: *Nequius oculo quid creatum est?* Et Regius Psa tes precatur *Psal. 118. Averte oculos meos, ne videant vanitatem: in via tua vivifica me.* Et e contra 2. Petri 2. scelerati quidam memorantur, *oculos habentes plenos adulterii, & incessabilis delicti.* Unde & Daniel Seni illi, castam Susannam deperienti, impropere ait: *Species decepit te, & concupiscentia subvertit cor tuum. Dan. 13.*

#### Additio I.

\* Ceteroquin, quæ diximus de aspectibus fixis, & tactibus impudicis verendorum, intelligenda sunt etiam in ordine ad illas personas, quæ equidem perfectam copulam cum emissionem seminis exercere necdum valent ob defectum ætatis debitæ, puta quia necdum sunt puberes, adhuc tamen jam sufficienter rationis in tantum capaces sunt, ut inter bonum & malum, honestum ac inhonestum sufficienter discernere queant, uti vel maxime contingere solet, si tales jam sint pubertati proximiores; quia similes actus de se tendunt ad pollutionem, & apud tales saltem excitare solent spiritus genitales, seu venereos, atque exinde aliquam veneream causare delectationem, ob quam ipsam rationem etiam similes actus censentur interdicti Eunuchis; quamvis & isti perfectam copulam ob defectum perfecti seminis exercere nequeant, uti recte advertit la Croix *lib. 3. p. 1. n. 906. & 908.* \*

#### Additio II.

\* Ex dictis colliges, quid sentiendum sit de praxi illa plurium puberum, vel saltem pubertati proximorum in simul corpore nudo natantium; nam si sint ejusdem sexus, seque ibidem ex curiositate vel levitate in partibus verecundis invicem aspiciant, secluso tamen consensu, vel complacentia impura, non erunt condemnandi peccati mortalis, sed tantum venialis, secus, si forent diversi sexus; tum enim foret mortale etiam seclusa alia impura complacentia, cui adeoque corruptelæ Parochi loci modo possibili contradicere debent. Sanchez *lib. 5. moral. c. 6. n. 12. 13. 27. & 28.* Et Sporer *part. 4. Theolog.*



*Theolog. Sacram. cap. 3. sect. 6. n. 693.* Ratio est; quia, si hæ personæ sunt diverſi ſexus, tales aspectus, quatenus serio facti ex ſensualitate, ex ſe ſolent ordinarie vehementer incitare ad venerem, ſecus, ſi forent ſexus ejuſdem. Quinimo in ſexu eodem Buſenbaum hic excuſat à mortali etiam leves tactus ſubinde inter natandum ex levitate, ſeu petulantia citra tamen ullum deſiderium, vel complacentiam impuram factos: quia & iſti, ſi facti fuerint obiter inter perſonas ejuſdem ſexus, & non frequenter, non ſolent propinque ex ſe excitare ad venerem; quamvis ceteroquin circa potentiam tactus ob majorem conjunctionem cum concupiſcentia carnis adhuc majus ſuo modo videatur ſubefſe periculum, quam circa viſum. Et certe, ſi tactus forent preſſi, ſeu replicati &c. proxime ad ſodomiam, ſeu pollutionem diſponerent, hincque forent haud dubie graviffime peccaminofi. Unde finaliter Henno in *Decalog. diſp. 6. qu. 3. art. 3. concl. 2.* ſubjungit utiliſſime quoad balneationes ſequentia formalia: *Advertendum viris, & feminis ſe lavantibus, quærenda eſſe loca ita ſecreta, ut ad illos perſonis alterius ſexus non pateat acceſſus propter evidens ſcandalum periculum.* Unde non video, quomodo excuſari poſſint à mortali, qui de die in plena civitate, quam v. g. per abitur certus ſcruſius, ſe nudos exhibent coram mulieribus natandi cauſa. Similes igitur natationes publicas interdiciere debent Magiſtratus, imo expediret, ut nunquam adoleſcentes inter ſe natarent, niſi coopertis ſecretioribus. Tot lapſus, tot horribilia non evenirent. Ita ille.\*

Additio III.

\* Quæres I. Quid ſentiendum ſit de aspectibus, & tactibus animalium? Reſp. I. Aſpicere ex curioſitate, ſeu animi levitate animalia coeuntia, ex ſe & abſente periculo proximo impuræ delectationis moroſæ, non eſt peccatum mortale, ſed tantum veniale, ſi non interveniat complacentia, ſeu conſenſus veneris. Ita Henno *loc. cit. concl. 1.* & Sporer *part. 4. Theolog. Sacram. cap. 3. ſect. 6. num. 697.* Ratio eſt; quia non ſolet ſimilis aspectus ex ſe vehementer incitare ad venerem, ſicuti tamen fortiter incitat, ſique graviter peccaminofus foret aspectus deliberatus curioſus copulæ humanæ. Reſp. II. Animalia minora e. g. catellos, catos molliter tractare, demulcere, etiam eorum pudenda contrectare eſt ſolum veniale peccatum, ſi deluſer nulla venerea deliberata habeatur complacentia. Ita Sanchez *lib. 9. diſp. 46. num. 15.* Sporer & Henno *loc. cit.* Ratio eſt; quia etiam ſimilis tractus non notabiliter excitare ſolet ad libidinem. Quoad animalia vero grandiora, ſi tractus genitalium curioſus non tantummodo levis, ſed moroſus & vehemens foret, Henno *loc. cit. diſp. 6. qu. 9. art. 2. conclus. 3.* a peccato mortali non excuſat ob longe majus ex ſe periculum delectationis libidinofæ circa animalia grandiora quoad potentiam tactus.\*

Additio IV.

\* Quæres II. Quid ſtatuendum ſit de choreis inter perſonas diverſi ſexus-inſtitutis? Reſp. I. Si in choreis exhibentur geſtus laſcivi, tactus parum pudici, motus erga ſe ad invicem ad impuritatem proclives, eadem ab urbibus, pagis, & domibus ſunt ablegandæ. Ita communis, & ratio eſt; quia ſimiles choreæ natæ ſunt tum ſaltantes, tum ſpectantes ad libidinem provocare, & eo quidem magis, quantum frequentius hiſce exceſſivæ computationes aſſociantur: de quibus tripudiis S. Carolus Borromæus cum aliis SS. PP. intelligi debet, quando *Tract. adverſus choreas*, inquit: *chorea mundana circulus eſt, cujus centrum diabolus, & cujus circumferentia ſunt angeli ejuſdem.* Reſp. II. Si ſimilia mala abſint, choreæ ſecundum ſe ſunt indifferentes adeoque licitæ; niſi ſiant ex fine pravo, aut alicui ſpecialiter occaſionem proximam præbeant graviter cum altero ſexu peccandi. Ratio eſt; quia choreæ ex ſe ipſis non ſunt natæ proxime provocare ad libidinem. Et ita ſub his terminis DD. diverſarum etiam nationum *Amcl. Reiſenſuel Theol. Tom. I.*

conveniunt: nam ſic ſentiunt præter Cajetanum, Sylveltrum, Angelum, Azorium, Buſenbaum, & alios Felix Potestas Italus in ſuo examine *Tom. 1. p. 2. num. 309. & ſeq.* Franciſcus Henno Gallus in *Decal. diſp. 6. qu. 9. art. 4.* & Sporer Germanus in *Theol. moral. c. 5. ſect. 2. num. 20.* qui ultimus ex Filliucio *Tract. 33. c. 10. num. 229.* hæc ponit formalia: *Ruſtici diebus feſtis non ſunt prohibendi a choreis, modo ſiant poſt Miſſam, tum quia aliter otio vacarent, quod pejus eſt: tum quia ſunt pro more regionis, & publice coram aliis, ideoque magna ex parte aufertur libidinofis occaſio &c.* Hiſce Sporer *loc. cit.* ſubjungit, ut ſequitur: *Addo ego experientia patuiſſe, poſt abrogatas illas choreas publicas multo majora mala perpetrata fuiſſe quam iſ permiffis.* Sed & ego adhuc ſuperaddo, invigilandum eſſe, ne poſt finitas choreas publicas facile concedatur junioribus ruſticis forſan jam bene crapulatis, ut cum puellis amatis domum eant præſertim ſoli cum ſolis; ubi ſæpe ignis adhuc ſub choreis publicis gliſcens in apertum prorumpit incendium. Reſp. II. Etſi non ſit peccatum accedere choreas de ſe indifferentes, & a ſuperius enumeratis malis circumſtantiis præciſas, nihilominus ſi in particulari quis experiatur, ſed ſæpius etiam ſub his alias in ſe indifferentibus choreis lapſum eſſe carnaliter in peccatum grave, vel cogitationibus ac complacentiis impuris, vel verbis, aut operibus, tali in particulari non licebit ordinarie has, ubi ita lapſus fuerat, choreas amplius accedere. Ratio eſt: quia tali dictæ choreæ forent periculum proximum peccandi; tenemur autem ex communi DD. occaſionem proximam peccandi vitare ſub gravi.\*

Additio V.

\* Notent ſibi hoc I. Puellæ, quæ non horrent etiam ut larvæ accedere choreas in privatis locis inſtitutas, in quibus, experientia teſte, oſculis, vel tactibus ſollicitatæ jam ſæpe naufragium virginitatis ſuæ fecerunt. Notent ſibi II. id iplum quoque in choreis publicis illæ filiæ, vel ancillæ, quæ tempore nuptiarum procurant a parentibus, vel heris ſuis acceſſum ad easdem, ut ibidem NB. cum procis ſuis, forſan jam ex parte crapulatis, aut vino æſtuantibus, & a quibus alias jam ſe non adeo caſte amari ſciunt, poſſint ſaltare, & inter ſaltandum, ſi non externis actibus manifeſtare, ſaltem interne nescio quas impuras complacentias in corde nutrire. Porro, cum mala ſuperius mentionata ſeſe choreis non raro ingerant, prudentiſſime agunt Patres, & Matres-familias, ſi filios, ac filias, & ancillas ſuas modo moraliter poſſibili cohibeant *Primo*, ut ſaltem choreas privatas, & occultas in domibus, & conventibus ſibi non ſufficienter perſpectis inſtitutas omnino non adeant, præſertim iſſis non præſentibus. *Secundo*, ut choreas publicas ſaltem non nimium frequenter accedant: ſi enim non in ipſo acceſſu rariori, ſaltem in frequentiori pericula invenient. *Choreæ & tripudia* (inquit S. Franciſcus Saleſius *Introduct. vitæ devotæ. part. 3. cap. 33. ex ſe indifferentia ſunt, attamen hoc exercitium NB. communiter uſurpatum valde in partem mali propendet, & proinde periculorum plenum eſt.* Quare cum ſaltatrice ne aſſiduus ſis, nec audias illam, ne forte pereas in efficacia illius, ait Eccleſiaſticus *c. 9. v. 4.* Volui hæc aliquo modo fuſiori calamo adjungere; quia in libris rariis, in praxi autem frequentius cernuntur.\*

85 Quæres III. An detur levitas materiæ in re venerea? Reſp. In reſolutione hujus Quæſtionis variare Doctores. Affirmant nonnulli, quos citat Baſæus, & *Pecatum I. n. 7.* pro hac ſententia allegans Sanchez, Navarum, Sancium, Vaſquez, Sotum, & quoddam alios. Rationem dant, quia non videtur ratio, cur in aliis materiis communiter poſſit dari levitas materiæ, & non in propoſito. Deinde quis credat (inquiunt) quod quis non poſſit ex levi & ſenſuali curioſitate aſpicere feminam tranſeuntem, vel ejus manum aut pedem premere, digitos intorquere &c. quin ulterius velit progredi?

86 Alii diſtinguunt inter materiam luxuriæ & veneriam; nam luxuria (ajunt) late patet ad omnem culpam, pertinentem maxime ad ſenſum tractus, ſed res venerea,



nera, quam proprie vocamus libidinosam, restringitur ad culpas pertinentes ad generationem, atque hæc delectatio venerea oritur in, vel circa partes genitales ob commotionem, vel alterationem spirituum generationi servientium. Qua distinctione supposita asserit hæc sententia, in materia luxuriæ posse dari parvitatem materiæ, ut si fiat tactus levis ex joco, vel curiositate, vel quando matres, aut nutrices magna cum suavitate tangunt, vel osculantur pueros tenellos &c. Negat vero, dari parvitatem materiæ in re venerea: nam eo ipso, quod venerea est, pariter est inchoatio copulæ, aut pollutionis, quæ inter solutos semper est peccatum mortale, dummodo sit perfecte voluntaria, Mastrius *disp. 11. n. 145.* post Tamburinum *lib. 7. cap. 8. §. 1.* & quidam alii.

87 Tertia, & ceteris probabilior, simulque communior sententia asserit, quamvis in materia venerea possit dari, & sæpenumero detur peccatum veniale ratione imperfecti consensus, vel ob defectum plenæ advertentiæ & deliberationis, ut est certum, atque indubitatum, eo quod in hac pugna quotidiana facillime contingat aliqua negligentia in repellendis turpibus motibus, vel etiam imperfecta complacentia, sufficiens ad peccatum veniale: nihilominus ait, in re tam lubrica ex sola parvitate materiæ non dari peccatum veniale, modo ceteroquin adsit deliberata advertentia, & voluntarium sufficiens ad peccatum mortale constituendum. Ita Sanchez *lib. 5. in Decal. cap. 6. n. 12.* ubi priorem sententiam suam revocat, simulque asserit, a Summis Pontificibus Clemente VIII. & Paulo V. hanc posteriorem sententiam esse approbatam. Concordat novissimum Decretum Alexandri VII. *n. 71.* jam citatum, in quo damnatur sequens Propositio, ordine 40. *Est probabilis opinio, quæ dicit, esse tantum veniale osculum habitum ob delectationem carnalem, & sensibilem quæ ex osculo oritur, secluso periculo consensus ulterioris, & pollutionis.*

8 Accedit ratio: quia omnis delectatio venerea est inchoatio quædam pollutionis, atque omnis talis inchoatio, ceteroquin sufficienter deliberata & voluntaria, est peccatum mortale; ergo. Major desumitur ex Galeno *lib. 14. de Usu partium. cap. 9.* & 10. ubi ait, quod delectatio venerea sit, quæ in carne consurgit ex motu humoris serosi, qualis est substantia seminis incalescentis per commotionem spirituum generationi subservientium.

89 Ad rationem contrariæ sententiæ *n. 85.* adductæ, atque ad primam earum dicitur, etiam in materia Blasphemix, Perjurii, & quibusdam aliis non dari peccatum veniale ex sola parvitate materiæ: unde non mirum, quod idem dicatur de materia, seu delectatione venerea, ceteroquin plene deliberata & eo modo voluntaria, prout ad grave peccatum constituendum conformiter dictis requiritur. Ad alteram dicitur, eadem non raro excusari a mortali, eo quod non ob delectationem veneream, sed potius ex joco, levitate, aut alio consimili vano fine fiant: alias foret secus dicendum.

90 Ad secundam sententiam, ejusque fundamenta respondetur eodem modo: nam, quidquid sit de data distinctione inter materiam luxuriæ, & veneream (quæ pro solutione hujus difficultatis minus est necessaria, cum hic præcise quærat, an non detur parvitas in ipsa materia venerea NB. directe volita) ad tactus ex se non impudicos, atque ex joco, levitate vel curiositate factos, jam patet ex dictis. Oscula vero materna, vel Nutricum inde merito excusantur; quia non ob delectationem veneream (nam hæc plene voluntaria non vacaret culpa gravi) sed ex materno, castoque amore erga proprias proles, aut ætatem tenellam, innocentemque proficisci solent: quia igitur oscula, juxta consuetudinem patriæ ex motivo amicitix facta, communiter excusantur a peccato, non mirum, etiam oscula materna, vel Nutricum, ad abblandendum tenellæ ætati exhibita, pariformiter excusanda fore.

\* De hoc quæsito adhuc recurret mentio inferius *Dist. 7. quæst. 2. n. 1.* & post *n. 18.* Additione 1. agendo de delectatione morosa, utrum eadem etiam minima, deliberata tamen, semper sit peccatum mortale?

## DISTINCTIO V.

## De Septimo Præcepto Decalogi.

## QUÆSTIO I.

Quid sit Furtum, & quæ quantitas ad Furtum mortale sufficiat.

## SUMMARIUM.

- 1 Septimum Præceptum, quale?
- 2 Furtum, quid?
- 3 Tria ad Furtum concurrunt, quæ?  
Plagium, quid?  
(a) Dist. 4. n. 39. & seqq.
- 4 Furtum non fit, si dominus non est rationabiliter invito.  
(b) De hoc infra n. 10. & 13.
- 5 Furtum quale peccatum?
- 6 Quæ quantitas sufficiat ad Furtum mortale?
- 7 Ea definienda tum ex quantitate rei ablata, tum ex circumstantiis &c.
- 8 Taxatio ejus juxta varios status hominum.
- 9 Alius modus taxandi juxta victum unius diei.
- \* Solvitur notabilis Objectio. Addit. I. & II.
- \* Ponitur cautela pro Confessariis. Addit. III.
- \* An pariformiter sit discurrendum, si res ablata sit sacra, siue profana? Addit. IV.
- 10 In extrema necessitate licitum est, aliena surripere.
- 11 Nisi detinens sit in pari necessitate.
- 12 Magis debet quis diligere se, quam Proximum, quomodo?
- 13 Objectio notabilis, & an tunc sit licitum furari?
- 14 An idem possit fieri in gravi necessitate?

**S**eptimum Præceptum Decalogi per modum negationis traditur *Exodi cap. 20.* illis verbis: *Non furtum facies*; eoque non tantum prohibetur Furtum, sed etiam quæcumque injusta rei alienæ contrectatio, aut damnificatio, quæ multiplicibus modis accidere potest. Insuper virtute ejusdem Præcepti præcipitur restitutio rei alienæ; quia sicut præceptum affirmativum includit virtualiter negativum (prout præceptum de diligendo Proximo involvit aliud, ne Proximum injuste lædamus) ita econtra Præceptum negativum de non furando includit affirmativum, ut injuste ablatum restituamus; juxta quod post S. Augustinum dicitur *Reg. 4. Juris in 6. Peccatum non dimittitur, nisi restituatur ablatum.* Nunc, quantum attinet ad Furtum, sit

2 CONCL. I. Furtum est occulta acceptio rei alienæ domino rationabiliter invito. Ita in re communis Theologorum. Concordat textus *L. 1. ff. De Furtis.* ibi: *Furtum est contrectatio rei fraudulosa lucri faciendi gratia, vel ipsius rei, vel etiam usus ejus, possessionisve.*

3 Tria siquidem ad rationem Furti concurrunt. I. Quod sit contra Justitiam; nam Furtum aufert alienum domino rationabiliter invito. II. Quod aliquis rem ab altero possellam auferat, siue contrectet lucri faciendi causa: nam Furtum proprie est rerum mobilium, non vero immobilium vel incorporalium, quæ contrectari, siue ab uno loco in alium moveri nequeunt. Deinde per hoc differt Furtum ab injusta damnificatione, utpote in qua destruitur res aliena nihil autem aufertur lucri faciendi causa. Tandem per hoc differt Furtum ab Adulterio, & Homicidio, quæ sunt peccata contra personam: item à Plagio, seu crimine Plagiatus (quod committitur ab eo, qui hominem liberum, v. g. uxorem, vel prolem alterius aufert ad vendendum, aut retinendum in mancipium) simulque a Raptu, de quo jam supra. (a) III. Requiritur ad Furtum, ut res aliena occulte auferatur: nam par hoc specie morali differt Furtum a Rapina, quæ est occupatio rei alienæ cum violentia, nimirum dum sciente domino, & vim patiente auferatur ipsi invito suum.

4 Addi-



4 Additur notanter in Conclusionem, & prima conditione Furti, *domino rationabiliter invito*: nam, qui ab amente, ebrio, vel furioso gladium aufert, ne ille aliquem percutiat, Furtum non committit: etsi enim alter sit invitatus, non tamen est invitatus rationabiliter. Idem dic, si uxor mariti pecunias reservet, ne commessationibus aut ludis perdat, aut vinum subtrahat, ne inebrietur, & postmodum rixas incipiat &c. Similiter qui in extrema necessitate constitutus ab alio aufert, quod sibi ad vitæ sustentationem est necessarium, furari non dicitur: tum quia non aufert alienum, eo quod in extrema necessitate Jure naturæ sint omnia communia: tum quia hac ipsa de causa alter non est rationabiliter invitatus. (b)

5 CONCL. II. Furtum ex genere suo est peccatum mortale, licet quandoque parvitas rei Furto ablatae excuset à mortali. Ita communis: idque patet ex *cit. cap. 20. Exodi. Non Furtum facies.* Item ex illo *I Corinth. 6. Neque fures, neque rapaces regnum Dei possidebunt.* Quod autem parvitas materiæ excuset a mortali, patet de furante unicum obulum, vel hujusmodi.

6 Quænam autem quantitas sufficiat ad constituendum peccatum mortale Furti, tot propemodum sunt sententiæ, quot capita. Cujus diversitatis ratio est; quia malitia & gravitas Furti, provenit ex damno, quod Proximo injuste inferitur; non autem omnes patiuntur æquale damnum ex jactura ejusdem quantitatis, ac rei. Si quidem majus censetur damnum ex re ablata tempore annonæ, minus tempore abundantia: majus, si auferatur pauperi, minus, si diviti: majus, si auferatur pecunia in loco, ubi modica reperitur, sicque exigua pecuniæ quantitate potest vita sustentari; minus, ubi argentum est in abundantia &c. Hinc sit

7 CONCL. III. Quantitas Furti ad peccatum mortale sufficiens non potest una certa absolute taxari, sed ea prudentum arbitrio definienda est non solum ex quantitate rei ablatae, sed etiam ex circumstantiis personæ per Furtum læsæ, temporis, locorum, & hujusmodi. Hæc sententia est communior Doctorum, & patet ex proxime dictis: quia, quod respectu unius censetur notabile, respectu alterius non censetur tale, sed potius modicum, & parvi momenti. Similiter, quod tempore annonæ est quid magnum, tempore ubertatis censetur parvum &c. Hinc bene considerandæ sunt prudenti judicio omnes circumstantiæ.

8 Juxta hanc sententiam potest probabiliter dici cum Lessio *lib. 2. cap. 12. n. 29. & seqq.* quod respectu omnium, etiam Regis, & hominis prædivitis, unus Aureus (vulgo apud nostrates, unus Ducatus) videatur quid notabile. Deinde respectu mediocriter divitum quatuor Regales (*Regalis*, italice *Julius*, valet decem circiter crucigeros, aut tres pæcos nostrates, ut indicat Lugo *disp. 16. de J. & J. n. 20.* Lessius autem *loc. cit. n. 30.* quatuor Regales appellat unum florenum: alii parum plus, vel minus valere tales monetas æstimant) quatuor, inquam, Regales, vel unus florenus respectu mediocriter divitum censetur quid notabile, juxta Petrum Navarrum, & alios. Tercio, respectu Mechanicorum quantitas notabilis censetur duo Regales, vel aliquid ultra. Quarto, respectu Pauperis sufficit unus Regalis, vel etiam dimidius.

9 Alii vero, atque inter eos Sannig. *dist. 10. de Just. quæst. 1. n. 7.* & Layman *lib. 3. tract. 3. part. 1. n. 3.* probabiliter censent, eam esse notabilem Furti quantitatem, ac peccati mortalis materiam, quæ ad victum unius diei sufficit illi homini, cui injuria Furti inferitur. Veluti si à Mercatore valde divite fureris duos, vel tres nostrates florenos, à Cive mediocriter divite duodecim, vel quindecim pæcos, à Rustico, vel Cive mechanico tenuioris fortunæ, id est tali, qui uno die præcise labore suo tantum lucratur, quantum ad competentem statui suo sustentationem sufficeret, absque alio remanente desuper lucro, quinque vel sex pæcos, ab Operario tres, vel quatuor pæcos, a Mendico paucos nummos, quibus uno die utcumque se aluisset: nam auferre cuiuspiam victum unius diei, non immerito quid notabile reputatur. Duo autem, vel tres Ducati, a quocumque tandem au-

ferantur etiam Rege potentissimo, peccatum mortale constituent, juxta communem.

Additio I.

\* Nec dicas: duos vel tres ducatos non sufficere pro sustentatione unius diei respectu potentissimi Regis, adeoque conformiter præcedenti doctrinæ neque constituere peccatum grave, si tali Regi auferantur. Resp. enim ad istam objectionem la Croix *lib. 3. part. 1. n. 997.* negando anteced. si volumus respicere solam personam Regis, atque ordinariam ejus mensam, & quidem prudenter æconomicam ac frugalem: extraordinaria autem convivia, & aulae pompa, atque apparatus armorum huc non spectant, sed solummodo attenditur ad sustentationem diurnam ordinariam. Vide Sabin. Bononiens. in *Luce Morali. tract. 31. n. 20. \**

Additio II.

\* Quod si autem ulterius velis libenter scire, cur ergo gravitas Furti desumatur potius per ordinem ad sustentationem diurnam, cuilibet statui proportionatam, quam respiciendo ad aliquid aliud? Resp. ex la Croix *lib. 3. Theolog. Moral. part. 1. n. 995.* hoc ideo fieri, quia *indigere sustentatione diurna* est commune omni homini, adeoque exinde commode peti potest regula communis, ut nimirum censeatur universaliter grave & prudenter sensibile detrimentum, si quis per integrum diem hac sua sustentatione privatur, dum huic de bonis externis tamquam mediis ad hunc finem (nimirum ad vitæ sustentationem) præcipue ordinatis tantum auferatur, quantum alias sufficeret pro una diurna sustentatione; hoc enim ab omnibus fere hominibus prudentibus reputatur per se notabile damnum, uti recte advertit noster Sabinus Bononiens. in *sua Luce Morali. part. 1. Tract. 31. n. 22. \**

Additio III.

\* Porro, quando quoad gravitatem Furti dignoscendam ab Auctoribus recurritur ad sustentationem diurnam, duo præcipue notanda sunt. *Inprimis*, quod per sustentationem hic intelligantur necessaria ad honeste vivendum, & quidem secundum communem & mediocre modum, quem servant homines similis conditionis, uti superius suo modo insinuatam jam fuit. *Secundo*, quod allegata mensura dignoscendi gravitatem Furti tantummodo fiat in ordine ad personas extraneas, & quidem in eo casu, quo similis quantitas simul & semel auferatur: nam, si eadem summa surripitur occulte a domesticis, vel quidem ab extraneis, sed per furta minuta, tunc in utroque casu requiritur major quantitas ad constituendum peccatum grave; cum ordinarie utrobique homines non sint tam cito graviter invitati, ut dicatur inferius Quæstione sequenti.

Interea tamen ex Lessio *lib. 2. cap. 12. n. 15.* hoc sibi adhuc bene notent Confessarii, ut poenitentibus illis, qui commode vel ipsis Dominis, vel alias pauperibus restituere possunt, ordinarie inculcent onus illud restitutionis, quamvis Furta eorum necdum constituissent summam gravem, præsertim si res simul & semel, vel etiam per Furta minuta ablata suo modo proximius accedat ad aliquam summam notabilem: nam tunc non tam facile sicuti in rebus levissimi momenti præsumi prudenter potest condonatio Domini, adeoque saltem sub culpa levi adstringuntur ad restitutionem, & præterea non restituentes exponuntur periculo, ne pauca etiam adhuc ex se levia Furta superaddentes, exinde compleant summam gravem, faciendo computationem ac moralem unionem cum præcedentibus: item alias homines per hujusmodi furtula fiunt ad furta majora proniores. \*

Additio IV.

\* Quæres I. An circa materiam gravem vel levem Furti eodem modo discurrendum sit, si res sacræ, A a 4 si



sive profanæ auferantur? Ad hoc dubium ex Baldellio la Croix lib. 3. part. 1. n. 1003. respondet; si materia Furti sacrilegi sit res, quæ pretio temporali solet æstimari (ut sunt Patena, Calix, Casula &c.) gravitas vel levitas Furti sacrilegi eo modo, qui in aliis profanis determinari debet, attento valore secundum communem æstimationem. Quod si vero res aliqua adæquate sit sacra v. g. Reliquiæ, existimant nonnulli, non dari parvitatem materiæ, sed semper peccari mortaliter, quantumcumque parum abstrahatur: quia Clemens VIII. Paulus V. & Urbanus VIII. excommunicant ipso facto illos, qui absque consensu eorum, qui præsunt Ecclesiis in districtu Romano, extrahunt minimas, & quidquid potest habere umbram aut prætextum alicujus Reliquiæ. Recte tamen notant Sanchez, Bonacina, Castropalao & alii cum Diana part. 5. tract. 5. T. 35. pro locis extra districtum Romanum dari parvitatem materiæ, & considerandam esse dignitatem, aut raritatem Reliquiarum: ideoque fore mortale, si quis minimam particulam Sacrae Crucis furaretur: econtra fore veniale, si quis a corpore alicujus Sancti auferret aliquid pulveris, capillum, aut simile quid, quod neque deformat ipsas Reliquias, neque earum æstimationem diminuit. Hucusque ex Baldellio la Croix loc. cit. \*

10 Quæres II. Utrum in extrema, vel etiam gravi necessitate licitum sit aliena occulte sibi surripere? Resp. I. In extrema necessitate id licitum est pro vitæ suæ conservatione, nisi & ipse detinens sit in pari necessitate. Ita Scotus 4. dist. 15. quæst. 2. ad. 5. & alii. Siquidem in articulo extremæ necessitatis omnia sunt communia, non quidem hoc ita intelligendo, quasi per extremam necessitatem statim transferatur dominium omnium rerum in habentem eam; sed quia quoad jus utendi in ordine ad conservationem vitæ, omnia tunc sunt communia. Hinc c. Exit. §. nec quicquam. De Verb. signif. in 6. dicitur: Nec jure poli in extrema necessitatis articulo ad providendum sustentationi naturæ via omnibus extrema necessitate detentis concessa præcluditur, cum ab omni lege extrema necessitas sit exempta.

11 Additur notanter: nisi ipse detinens sit in pari necessitate; tunc enim hoc non liceret, prout bene notat Doctor Subtilis loc. cit. Ratio est: quia tunc duplici jure res illa detinenti debetur. Primo, propter æqualem extremam necessitatem. Secundo, propter dominium, possessionemque rei, à qua numquam cecidit.

12 Neque hisce obstat, quod quis magis debeat diligere se, quam proximum. Resp. enim, id intelligendum esse de dilectione ordinata: talis autem non foret, si quis magis vellet conservationem justam vitæ suæ, quam conservationem justam vitæ proximi. Unde non obstante dilectione sui ipsius, magis debet latro sustinere suspendium, quam occidere suspendentem, ut evadat.

13 Urgebis autem contra principalem responsionem. Innocentius XI. in Decreto 1679. die 2. Martii emanato, inter alias Propositionem damnaverit etiam hanc ordine 36. *Permissum est furari, non solum in extrema necessitate, sed etiam in gravi*; ergo data responsio non videtur posse subsistere. Resp. negando consequentiam: nam, ut habetur in Præfatione dicti Decreti, Propositiones illæ, sicut jacent, sunt damnatæ. Unde merito cavenda erit ista: *Permissum est, furari in gravi necessitate*. Deinde allata nostra responsio solum dicit, tunc licitum esse, rem alterius surripere pro vitæ suæ conservatione, non autem asserit, permissum esse, furari in extrema necessitate: nam hac stante nequit dominus esse rationabiliter invitatus, cum jure poli omnia sint communia pro necessario usu ad vitam conservandam. Et quia Furtum est occulta acceptio rei domino rationabiliter invito, proprie loquendo implicat in terminis, Furtum committi, & dominium non esse rationabiliter invitum, aut, si hic sit rationabiliter invitatus, ejusmodi Furtum esse licitum.

14 Resp. II. In gravi dumtaxat necessitate non est licitum furari, neque surripere rem proximi. Ita conformiter Doctori Subtili loc. cit. Maffrius disp. 9. Theolog.

Moral. n. 21. appellans hanc sententiam communiorē & veriorē, quamvis nonnulli apud Lugonem disp. 16. De J. & J. n. 153. oppositam sententiam probabilem censuerint. Desumitur hoc inprimis ex allegato Decreto Innocentii XI. Accedit ratio: tum quia sola extrema necessitas facit, ut omnia sint communia, non vero gravis: tum quia per oppositam sententiam datur ansa non solum pauperibus, verum & aliis in gravi necessitate constitutis, passim occulte alienum surripienti, imo verius furandi, ut sic evadere possint publicam ignominiam, status sui amissionem, vitæ abbreviationem &c. Unde plurimum Respublica perturbaretur, eo quod tales necessitates crebrius occurrere soleant.

## QUESTIO II.

### De minutis, ac Domesticorum Furtis.

#### SUMMARIUM.

- 15 Modicum furans animo furandi plura, si posset, peccat mortaliter.
- 16 An teneatur ad restitutionem?
- 17 Quomodo peccet, qui per Furta minuta intendit discedere?
- 18 Declaratur amplius.
- 19 Solvitur notabilis instantia.
- 20 Furantes minuta tenentur restituere, quomodo?
- \* Quid, si per hæc Furta minuta non intenderint discedere?
- 21 Ad Furtum mortale in minutis requiritur major quantitas, & qualis?
- \* Præsertim, si res fuerit ablata pluribus? Addit. 1.
- \* Notabile corollarium de Surtoribus, Textoribus &c. Additio II.
- 22 Per Furta domestica potest graviter delinqui.
- 23 An ex iis nascatur Actio Furti.
- 24 Quid quoad Furta famulorum, aut mercenariorum?
- 25 Ad grave Furtum Domesticorum requiritur major quantitas.
- 26 Quid de Furto Filiifamilias?
- \* Maxime quoad esculenta & poculenta.
- 27 Præsertim operantis in obsequium patris.
- 28 Uxor surripiendo potest graviter peccare.
- 29 Quæ quantitas ad hoc requiratur?
- 30 Quid, si absumat in bonum familie?
- 31 Aut maritus non sit invitatus &c.
- 32 Quid de Bonis paraphernis uxoris?
- (c) Tract. 7. Dist. 4. q. 2. n. 17.
- 33 Uxor potest facere donationes, ac elemosynas, quas?
- \* Specificatur a nonnullis Doctoribus certa aliqua quantitas.
- 34 Item Impensas necessarias pro sustentatione familie, vide adjunctam Additionem.
- 35 Aut aversione gravis damni.
- 36 Quid, si maritus sit dissipator Bonorum communium?
- 37 Ad Furtum grave famulorum major requiritur quantitas
- 38 Hæc unde colligenda?
- 39 Propositio damnata, & ratio damnationis ejus.
- 40 Quid in casu manifestæ injustitiæ?
- \* Qualiter in Confessionali debeat Confessarius in materia Furti practice examinare?

15 CONCL. I. Si quis modicum quid auferat, animo tamen & voluntate plura auferendi, si posset, certum est quod peccat mortaliter. Ratio est clara: quia talis habet pravam voluntatem, & affectum furandi quantitatem notabilem, si posset: atqui sola voluntas prava jam sufficit apud Deum pro peccato gravi; ergo. Unde notat Layman loc. cit. n. 3. si poenitens confiteatur, modicum quid se furatum, eum quandoque à Confessario esse examinandum, an non habuerit animum plura surripienti, si adfuisset occasio.

16 Ceterum talis fur, non obstante pravo affectu interiori quantitatem notabilem furandi, si posset, non incurreret sententiam excommunicationis alicubi latam in eos, qui rem notabilem furantur: neque tenebitur sub mortali (bene tamen sub veniali, si possit) ad illius modici restitutionem; cum in executione a parte rei tantum modicum quid abtulerit,



17 CONCL. II. Qui per Furta minuta intendit ditescere, & conquirere notabilem pecuniæ quantitatem, peccat mortaliter illa prava intentione, & quovis externo Furto minuto ex vi illius intentionis deliberate procedente, Ita communis Doctorum. Ratio est: quia talis intendit accipere rem alienam magni momenti, invito Domino, simulque singula externa Furta procedunt ex intentione mortifera furandi sensim quantitatem notabilem. Unde de similibus dicuntur *Proverb. 11. Statera dolosa abominatio est apud Dominum. Et Deuter. 25. Non habebis in sacco diversa pondera, majus & minus &c. Abominatur enim Deus eum, qui facit hoc.*

18 Notat tamen Lessius *cit. cap. 12. n. 48.* in singulis hujusmodi Furtis minutis non committi novum peccatum mortale, sed continuari jam coeptum, omnes enim istæ acceptiones, & detentiones acceptorum censentur una continua executio illius pravae intentionis.

19 Nec obstat dictis in Conclusionem, quod talis a pluribus successive minuta surripens nemini faciat, neque facere intendat notabilem injuriam, ac proinde non videatur peccare mortaliter. Resp. enim, etsi nemo in particulari sentiat grave detrimentum, tamen respectu Communitatis hoc est magnum incommodum, & valde repugnans societati humanæ, atque in omni Republica bene instituta adeo exosum, ut gravibus pœnis passim puniri soleat: sicque tamquam res admodum noxia societati humanæ merito sub peccato mortali prohibita censetur.

20 Ex his inferitur, quod sic furantes minuta, utputa fraudantes pondera, mensuras &c. teneantur ad restitutionem iis, a quibus acceperunt, quantum possunt: v. g. in simili occasione Furta minuta commissa dominis minutim supplendo, aut si si ignorantur, vel amplius conveniri non possint, talia pauperibus erogando, prout in simili dicitur *c. Cum tu. De Usuris*. Et merito Innocentius XI. inter alias Propositiones etiam sequentem, ordine 38. damnavit: *Non tenetur quis sub pena peccati mortalis restituere, quod ablatum est per pauca Furta, quantumcumque sit magna summa totalis.*

Additio.

\* Ast ponamus, quod quis per plures res minutas sive uni, sive pluribus ablatas non voluerit ditescere, sed eadem Furta minuta tantum ex occasione successive commiserit, non intendens notabile aliquid acquirere nec proximo graviter nocere, constatne ne summa plura Furta peccatum mortale, si tandem perveniantur ad summam gravem &c.? Item obligaturne talis sub mortali ad restitutionem? Resp. I. Quando talis auferens advertit, ac se reflectit, hanc materiam ex se levem con crescere cum præcedentibus ablatis in summam aliquam gravem, tunc deliberate ac reflexe pro eo tempore, quo actualiter sic concrevit, auferens peccat mortaliter, & sub mortali tenetur ad restitutionem, quamvis dicta materia ex se foret levis. Ita cum communi contra nonnullos Sporer *Tract. 5. in Decalog. cap. 5. n. 37.* Ratio a la Croix *lib. 3. part. 1. n. 1005.* recte assignatur ista; quia voluntas intendens retinere priores materias, & adjiciens hanc habet pro objecto totam illam materiam moraliter inter se unitam, quæ gravis est, & graviter damificat. Excipe tamen, nisi simul pro tunc quis habeat efficacem voluntatem ex præcedentibus Furtis minutis restituendi saltem tantum, ut non amplius conficiatur exinde, & cum materia præsentī moraliter una summa gravis: tunc enim ablatio non foret peccatum grave.

Resp. II. Si auferens plures res leves per plura Furta minuta nec habuit intentionem ditescendi, nec ullam fecit in auferendo reflexionem, quod concrevant Furta hæc minuta antecedentia & subsequētia ex parte objecti seu materiæ ablatæ in summam notabilem, seu damnum grave tertij, vel alicujus communitatis, tunc equidem talis auferendo non peccavit mortaliter, obligatur tamen nihilominus ad restitutionem, saltem si res illa coalescens in summam notabilem apud ipsum adhuc existat in specie, vel in æquivalenti, id est, si exinde factus fuerit di-

tior. Ita sub his terminis teste Sporer *Tract. 5. in Decalog. c. 5. sect. 2. §. 3. n. 40.* Communis, ac certa Doctorum, & patet ex Propositione damnata superius *n. 20.* allegata. Nec dicas: ex delictis venialibus (qualia solummodo intervenirent in præsentī) alias juxta multos Doctores non oriri obligationem sub gravi ad restitutionem. Resp. enim, in præsentī hanc obligationem restituendi sub gravi oriri non tam ratione delicti in ipsa injusta acceptione seu ablatione commissi, quam ratione rei acceptæ, seu rei alienæ detentæ in quantitate notabili: tenemur enim rem alienam notabilem apud non existentem sub gravi, quando recognoscimus alienam, restituere, quamvis eandem ab initio recepissemus absque interventione ullius peccati etiam venialis, credentes bona fide, & ignorantia invincibili, rem istam esse nostram dummodo res ista apud nos adhuc existat in specie, vel in æquivalenti; e. g. putavi hanc catenam auream hæreditate acquiritam esse meam, postea autem experior, eam fuisse Furto ablatam, teneor in hoc casu restituere, etsi accipiendo nullum prorsus peccatum commiserim. Quod si vero ponas in casu, quod præcedentes res leves, per Furta minuta absque aliqua reflexione ad concrevit exinde summæ gravis ablatæ, omnino sint jam consumptæ, ita, ut neque ex his surripiens factus fuerit ditior; in simili emergentia non desunt Auctores, qui ex allegato superius fundamento commoti cum Oviedo, Diana &c. contra alios negant adesse obligationem sub gravi restituendi taliter ablata. De quo vide fusius la Croix *lib. 3. part. 2. n. 245. ac seqq.* ubi plures rationes pro & contra adducit, & demum concludit, quod, etsi ex tali peccato veniali ob semel deliberationem actus non oriatur obligatio gravis, bene tamen ea oriri valeat, si tale peccatum veniale fuerit deliberatum, & ex ejus multiplicatione concrevit materia gravis. \*

21 CONCL. III. Non eadem quantitas, quæ simul accepta sufficeret ad Furtum grave, sufficit ad hoc, quando per plura fortuita Furta minuta ad eam pervenitur, sed requiritur major quantitas. Ita Doctores communiter. Ratio est: quia domini non ita facile sunt inviti in his Furtis interpolatis, & fortuitis, taliaque minus ægre ferre solent, quam si eadem quantitas simul ac semel auferatur. Unde Lessius *loc. cit. n. 46.* inquit: Si mortifere peccat, & ad restitutionem is tenetur, qui ab eodem homine aufert decem simul, requirentur quindecim, vel sedecim, aut etiam viginti, ut quis sub mortali teneatur restituere ablatum per Furta minuta fortuita, præsertim si longis intervallis facta sint.

Additio. I.

\* Similiter Lessius cum Sanchez, Rebello & aliis subjungit ex eodem fundamento, eo majorem requiri quantitatem ad constituendum peccatum grave in genere Furti, quo plures numero fuerint illi, qui per Furta minuta erant damnificati: nam damnum divisum in plures, censetur minus sensibile. Hincque Molina & Diana in simili casu requirunt saltem duplum: Sanchez & Cardenas putant, si auferatur a pluribus, qui unam communitatem constituunt, unum aureum sufficere ad peccatum mortale: ast iudicio Patris la Croix *lib. 3. part. 1. n. 1012.* poterit quandoque extendi ulterius, si communitas sit magna & dives, puta sub qua multi mercatores & opulenti cives continentur: ultra duos tamen ducatos non vult extensionem admittere loquendo de extraneis. \*

Additio II.

\* Tandem pro complemento primæ partis hujus quæstionis de Furtis minutis extraneorum adhuc indagabis, quid ergo practice, sentiendum sit de illis Sartoribus, Molitoribus, Textoribus ac similibus Opificibus, qui pluribus successive per Furta minuta surripiunt fragmenta seu reliquias materiæ datæ? Resp. cum Lugone *de J. & J. disp. 16. sect. 4. §. 2.* Diana *part. 2. tract. 6. Resolut. 16. ac Sporer tract. 5. in Decalog. sect. 2. §. 4. n. 68.* Si similia fragmenta sint suo modo majora, vel alias in pretio alicu-



alicujus momenti, quæ a Dominis curantur, & concreſcant in materiam gravem, peccari mortaliter eo modo, quo diſcurrebatur antea de rebus minutis uni, vel pluribus ablatis. Secus ordinarie dicendum, ſi talia fragmenta ſint levis momenti; cum ſimilia a dominis ordinarie non multum curentur, vel omnino pro dereliſtis habeantur, adeoque non cenſeantur ad invicem concreſcere in unam materiam gravem: quod maxime verum eſt, ſi ſimilia levia fragmenta abſque aliquo lucro ſpeciali exinde quaſito iterum aliis, ſpecialiter pauperibus, applicentur. \*

22 Quæres nunc quoad alteram partem Quæſtionis, quid ſentiendum ſit de furtis Domæſticorum, id eſt, uxoris, filiorum, famulorum &c. Reſp. I. Certum eſt, eos poſſe peccare mortaliter peccato gravis Furti, ſi rationabiliter, & graviter invito paterfamilias notabile aliquid ſurripiant. Patet hoc ex illo generali Præcepto Decalogi: *Non Furtum facies.*

23 Solum hic notandum eſt, eſſi tales in Foro conſcientiæ vere ſint fures, adhuc tamen contra eos in Foro externo non dari propriam Actionem Furti pœnalem, & famoſam. Et quidem inter conjuges vere poſſe dari Furtum, adeo ut ejuſmodi res tamquam furtiva uſucapi non poſſit, quamvis ob honorem Matrimonii ceſſet inter eos *Actio Furti*, nec vocetur *Furtum*, ſed meliori nomine *Amotio*, & inde ſequens *Actio rerum amotarum*, clare habetur *l. 1. § ſeqq. ff. De actione rerum amotarum*. Similiter, ſi filius, vel ſervus ſurripiat patri vel domino, Furtum committi, & rem eſſe furtivam, non autem inde naſci actionem Furti, textus eſt §. *Hi qui. Inſtit. De Obligat. quæ ex delicto &c.* cum non magis cum hiſ, quos in poteſtate habemus, quam nobiſcum ipſi agere poſſimus.

24 Tandem, quod alia Furta domæſtica, videlicet commiſſa a famulis, aut mercenariis nobiſcum degentibus, ſi leviora fuerint, publice vindicanda non ſint, ac proinde non pariant Actionem Furti, patet ex *l. Perſpicendum. ff. De Penis*. Unde, ſi per talia Furta læſis, poſtmodum fiat debita ſatisfactio mediante reſtitutione ablatorum, ceſſat in Foro externo omnis Actio pœnalis & famoſa. Quod ſi hoc non fiat, ac proinde paterfamilias a domæſticis, vel eorum familiaribus nequeat rem ablatam recuperare, tunc iſ etiam Judicis auxilium implorare poterit, quo hi ad reſtitutionem compellantur. Quinimo ſi eorum Furta ſint inmodica, vel nimis multiplicata, etiam pœna corporali puniri ſolent, prout poſt Julium Clarum *lib. 5. Sentent. §. Furtum, n. 22.* notat Layman. *cit. cap. 1. n. 4.*

25 Reſp. II. Ceterum videtur, ad Furtum grave Domæſticorum non ſufficere eandem quantitatem, quæ ad grave Furtum hominis externi ſufficeret. Ita Lugo *diſp. 16. de J. § J. ſect. 4. n. 63.* & alii communiter. Ratio eſt: quia reſpectu Domæſticorum non ita facile invitus eſt paterfamilias, ſicut adverſus extraneos, ut patet ex communi ſenſu hominum.

26 Et quidem de Filiisfamilias loquendo, parentes non raro magis ſunt invitati quoad modum, quam quoad ſubſtantiam. Et fortasſe (ut inquit Lugo *loc. cit. n. 76.*) diſplicet uſus ipſe in tali, vel tali materia, non tamen volunt ſemper graviter obligare, filium ad culpam lethalem in ea acceptione, & multo minus ad reſtitutionem, poſtquam pecunia conſumpta eſt.

#### Additio

\* Præſertim non oportet ordinarie loquendo facere multos ſcrupulos circa eſculenta, & poculenta, ſi filiisfamilias ipſimet abſumpſerint: ſecus ſi in magna reſpective quantitate aliis vendiderint, & pecunias exinde comparatas ad malos uſus luride applicarint, vel ſi ſimilia in notabili quantitate aliis minus indigentibus & luridis hominibus donarint, forſan ut per eoſdem occaſiones acquirant, impura, aliave illicita deſideria ſua executioni mandandi.

Item quamvis AA. moderni communiter admittant nobiſcum, quod furari tres ducatos reſpectu extranei ſit grave peccatum, eſſi auferantur prædiviti alicui Regi,

nihilominus quoad domæſticos, & filiosfamilias Navarrus, Leſſius, Filiucius & alii apud Sporer & la Croix hic volunt, Filium non eſſe condemnandum peccati mortalis, ſi duos vel tres aureos auferat a patre valde divite: quod etiam non improbat Cardinalis de Lugo. \*

27 Adde ex eodem Lugone *n. 77.* & aliis, quando filius in commodum & obſequium patris ultra ſuum debitum operatur, & lucratur, poſſe in mercedem ſui laboris & obſequii (niſi aliunde præſtetur) aliquid accipere. Sed ne laxentur habenæ filiis ad Furta domæſtica, illud bene notandum eſt, quod dicitur *Prov. 28. Qui ſubtrahit aliquid a patre ſuo, & a matre, & dicit, hoc non eſſe peccatum, particeps homicidæ eſt.*

28 Uxorem quoad tunc, ea quidem peccat, & quidem mortaliter, ſi ſummam notabilem ex bonis mariti, vel quorum adminiſtratio ad ipſum pertinet, utpote qui ex ipſis tenetur providere familiæ, ipſo rationabiliter invito accipiat. In hiſce tamen caſibus multa ſunt obſervanda.

29 I. In huiusmodi Furtis major ad peccatum mortale requiritur quantitas, quam in aliis: hæc autem quantitas iudicio prudentis, ſpectato ſtatu, opibus & ceteris dijudicanda eſt, num ſit notabilis, & excedens notabiliter conſuetudinem aliarum mulierum ſuæ conditionis, nec ne.

30 II. Si uxor abſumit in bonum familiæ, id quod maritus ipſe erat abſumpturus, ipſa non obligatur ad quidquam reſtituendum; prout inter alios notat Gobath *tract. 5. Quinarii cap. 22. n. 28.* Ratio eſt: quia nullo damno reali, & æſtimabili afficit hoc modo maritus; eſto, afferat eum injuria, uſurpando ſibi ipſius officium, atque adminiſtrationem bonorum communium.

31 III. Si maritus ipſe aut omnino invitus non ſit, ſed rogatus facile concederet, aut ſi irrationabiliter ſolum invitus, non peccat uxor aliquid ex ejuſdem bonis ſurripiendo. Ratio eſt clara: quia aut maritus invitus non eſt, aut certe non rationabiliter invitus, uti ſupponitur, ergo uxor jam hoc ipſo non committit Furtum in tali caſu, prout liquet ex ipſa definitione Furti, de qua *n. 2. § ſeqq.*

32 IV. Potest inſuper uxor libere donare ex bonis ſuis paraphernis, ſpectato Jure communi Cæſareo, ac niſi aliter inter virum & ipſam fuerit conventum. *l. Hac lege. C. De Pactis conventis.* Verum de hoc jam alibi. (c)

33 V. Potest etiam uxor ex bonis communibus facere donationes, & eleemoſynas ſecundum conſuetudinem aliarum mulierum ſuæ conditionis. Quod ſi vir vetet, videtur vetare exceſſum, alioquin foret irrationabiliter contrarius, ſeu invitus: ſiquidem uxor non eſt mancipium viri, ſed ſocia, habens etiam quamdam auctoritatem adminiſtrationis, eſſi viro ſubjectam, ne quid inordinate fiat; unde nequit ei maritus omnes donationes, etiam moderatas, & rationabiles prohibere.

#### Additio.

\* Diana, Tamburinus & Banez loquentes de expenſis, quas uxor facit in eleemoſynas, & alias honeſtas donationes, ajunt, uxorem non eſſe condemnandam gravis peccati, ſi taliter expendat ſingulis annis partem vigefimam lucri annui, ſeu annorum reddituum, quam regulam obſervari poſſe, inquit Sporer *Tract. 5. in Decalog. c. 5. ſect. 2. n. 52.* Ubi tamen ſapienter ſubjungit, eandem regulam habere locum ſolummodo tunc, quando redditus annui non ſunt nimii: nam alias uxor Principis v. g. poſſet ſingulis annis citra mortale peccatum auferre marito decem millia ducatorum, ſi redditus annui Principis forent ducenta millia, utpote cum decem millia ducatorum forent vigefima pars talis ſummæ, atqui hoc videtur contra communem perſuaſionem, idque nec diſſilimorum conſuetudo probat; ergo. \*

34 VI. Inſuper potest uxor in ſuas, liberorum, totiusque familiæ neceſſitates, atque adeo in victum, veſtitum, medicinas accipere, & convertere tantum, quantum tenetur maritus; poſito, quod hic præ avaritia, vel ignorantia non ſubminiſtret talia neceſſaria.

#### Additio.



Additio

\* Sic si Pater filio ad bellum vel ad studia misso non suppeditaret necessaria secundum statum, posset eadem occulte ex bonis mariti seu ex communibus, si adsint, mittere mater, uti tenet Lugo de J. & J. disp. 16. n. 68. modo matrum nimius erga filios & excecatus amor non sæpius suggerat necessitatem, ubi nulla est a parte rei. Item adverte, quod hæc doctrina concedens matribus licentiam occulte quidpiam mittendi filiis pro conservando statu, intelligenda sit circa proles ex hoc ipso patre genitos. Etenim, si uxor ista haberet proles ex præcedenti matrimonio, deberet potius hisce, quando aliunde proviſæ non sunt, succurrere ex propriis, si quæ habet; licet ceteroquin Auctores nec similem uxorem mortalis peccati condemnent, si prolibus ex præcedenti matrimonio, vel etiam parentibus suis aut fratribus ac sororibus considerato statu suo vere pauperibus, applicaret eas elemosynas & donationes, quas alias, conformiter dictis præcedentibus, facere posset. At ne quid nimis; alias forsitan mentietur iniquitas sibi. \*

35 VII. Potest ulterius uxor eas alienationes facere, quas necessarias rationabiliter judicat ad avertendum a marito grave damnum, siue temporale v. g. morbum, mortem, carcerem, si præ avaritia vel ignorantia id negligat maritus (sicut fecisse Abigail ad perpetuam ejus laudem legitur 1. Reg. 25.) siue spirituale, largiendo elemosynas, ne Deus ipsum ob flagitia puniat, sed misericorditer convertat. Sic enim utilissime gerit uxor negotium mariti, cujus damnum etiam redundaret in ipsammet uxorem; ac proinde is nequit rationabiliter esse invitus

36 Addit Lessius lib. 2. cap. 12. n. 87. & Layman lib. 3. tract. 4. c. 13. n. 7. quando maritus est dissipator bonorum communium patrimonii in potationes, largas donationes, vel mulieres, non prohiberi uxorem, si ita opus esse videatur, occulta compensatione uti (eo quod vir tali modo faciat injuriam uxori) aliquid de bonis mariti subtrahendo: idem dic, si maritus taliter dissiparet allatam ab uxore dotem; dummodo caveat, ne soluto matrimonio propter ignorantiam factæ occultæ compensationis restitutio dotis ipsi denuo fiat ex integro.

37 Quantum attinet ad famulos, & famulas, certum quoque est, plus requiri in iis ad Furtum grave, quam in extraneis. Ratio est; quia domini sciunt, attenta fragilitate humana non posse, moraliter loquendo, ita ab iis administrari res domesticas sibi commissas, quin aliquid, præsertim in esculentis, & poculentis, adhæreat manibus contrectantium: sicut, qui conducit operarios in vineam, supponit pro certo, uvas ab ipsis comedendas usque ad libitum & saturitatem, nec posse bovi trituranti os alligari.

38 Porro, quænam quantitas sufficiat ad peccatum mortale in famulis & ancillis, a multis pendet circumstantiis, ac præsertim a liberalitate & tenacitate dominorum, quorum aliqui liberaliores sunt, nec volunt erga famulos juris rigorem exercere, sed humana & communi fidelitate contenti esse, dummodo ceteroquin sua munia exacte præstent.

39 Ne autem hujusmodi famulis laxentur habenæ ad Furta domestica, Innocentius XI. hanc inter alias, ordine 37. Propositionem damnavit: *Famuli & famule domesticæ possunt occulte heris suis surripere ad compensandam operam suam, quam majorem judicant salario, quod recipiunt.* Et merito dicta propositio, sicut jacet, ut minimum tamquam scandalosa, & in praxi perniciosa, damnata fuit, quia erat inductiva famulorum ad plurima Furta: eo præsertim, quod judicium de insufficientia salarii relinquebat ipsis famulis, qui stante quocumque dubio, ob naturalem erga seipſos affectum, facile pro se judicarent; cum tamen nemo possit esse iudex in propria causa. Accedit, quod iniquum sit, patremfamilias, qui est in possessione suorum bonorum, superveniente dubio de sufficientia salarii, per occultam surreptionem a dicta suorum bonorum possessione deturbare, contra illud vulgatum: *In pari causa melior est conditio possidentis.* arg. c. In pari. De Reg. Juris. in 6.

40 Quod si vero luce meridiana clarius sit, herum committere injustitiam, vel minuendo salarium ex justitia debitum, vel non solvendo mercedem pacto promissam, tunc dictæ Propositionis damnatio locum non habet: & poterit famulus in judicio petere æqualitatem mercedis sibi debitæ, aut, si ex aliqua causa id obtinere nequeat, extrajudicialiter sibi occulte compensare. Joan. Cardenas in Crisi Theologica ad Propositionem 37. Innocentii XI. n. 38. & seqq. Videatur etiam Jus Canonicum lib. 3. Decret. Tit. 18. §. 4. n. 105. ac seqq. ubi fufius declaratur hæc Propositio damnata.

Additio.

\* Ceterum pro praxi eorum, quæ præcedentibus duabus quæstionibus diximus, ponamus quempiam accedere Confessionale, qui se accusat, quod furatus fuerit: ex tunc præprimis Confessarius, nisi pœnitens ipsemet specificaverit, quæret de quantitate rei ablata, quam si respectu cujuslibet status absolute gravem deprehenderit, petat numerum, quoties distinctis ac interruptis vicibus materiam gravem abstulerit, eumque obliget ad restitutionem, nisi aliqua adsit ex causis excusantibus infra enarrandis. Quando materia ablata est talis, quæ non respectu cujuslibet illico censeatur mortalis, tunc Confessarius, ut gravitatem aut levitatem Furti, nec non obligationem gravem vel levem restituendi recte dignoscere queat, prudenter respiciat ad sequentes circumstantias. I. Advertat, quisnam sit auferens, num domesticus vel extraneus? quod si domesticus, num filius aut uxor vel potius famulus illius, cui res aufertur? II. Attendat, cuinam res illa sit ablata, num uni vel pluribus, an diviti vel pauperi, num mercatori aut civi communi, vel rustico aut operario &c. III. Quomodo fuerit ablata, an simul & seme, vel successive per Furta minuta? quod si per plura Furta minuta, num habuerit animum exinde ditescendi, vel saltem se reflexerit, quod exinde deveniatur ad summam gravem vel non &c. & commodas resolutiones desumet ex jam dictis. Sic enim, si Filius familias suo Parenti valde diviti aliud abstulit successive per Furta minuta, jam confluunt simul tres causæ, singulæ diminuentes gravitatem Furti. Et licet sane non expediat, similia passim manifestare talibus pœnitentibus, ne ad Furta proniores fiant, sed potius consultum sit, eosdem juxta jam dicta nihilominus ad aliquam restitutionem, quantum prudenter possibile, adstringere, vel saltem propterea certas preces injungere, deserviunt tamen non raro ista pro consolatione Confessarii, ut gravitatem vel levitatem peccati, & exinde exurgentem gravem vel levem obligationem restituendi, aut omnimodam condonationem dignoscere valeat.

Q U Æ S T I O III.

De Cooperantibus ad Furtum, vel injustam Damnificationem.

S U M M A R I U M.

- 41 Damnificatio injusta dupliciter fit.
- 42 Novem genera cooperandi ad Furtum, vel damnificationem.
- (d) De hoc Quæst. seq. n. 60. & seqq.
- 43 Jussio, &
- 44 Consilium, quos denotet.
- 45 Quando consulens teneatur ad restitutionem.
- 39 Objeçtio notabilis,
- 47 Regula 62. Juris in 6. declaratur.
- 48 Consensus quid importet.
- 49 Et quando censeatur efficax.
- 50 Palpo, quis & quando teneatur ad restitutionem.
- 51 Recursus, quid, & quando fiat.
- 52 Participans dupliciter fit.
- (e) Adde dicta Tract. 4. dist. 7. quæst. 2. n. 23. & 24.
- \* Corollarium de militibus simul deprædantibus.
- 53 Mutus,



54 *Non obſtans*, &c.

55 *Non manifeſtans*, qui,

56 *Et quomodo peccent, ac reſtituere teneantur.*

41 **C**ertum eſt, quod contra ſeptimum Præceptum Decalogi non tantum delinquatur per Furtum, aut Rapinam, injuſta aliena ſurripiendo, aut violenter rapiendo, ſed etiam per quancumque injuſtam Damnificationem Proximi in bonis fortunæ. Dupliciter autem hoc poteſt contingere. Primo immediate, ſeu per ſe ipſum id exequendo, ut ſi quis per ſe ipſum furetur, aut rapiat violenter rem Proximi, vel ipſius bona damnificet. Secundo mediate cooperando ad tale Furtum, Rapinam, vel Damnificationem, ut mandando, conſulendo, vel alio ſimili modo.

42 Ceterum horum modorum cooperandi ad Furtum, vel Damnificationem alterius novem ſunt genera, quæ non ſolum incurrunt reatum peccati cooperando ad tale injuſtum opus, ſed etiam obligant ad reſtitutionem in ſolidum (d) & hiſce communibus verſiculis apte comprehenduntur:

*Quilibet in ſolidum reddat prius injuriato.*

*Juſſio, Conſilium, Conſenſus, Palpo, Recuſus,*

*Participans, Mutus, non obſtans, non manifeſtans.*

Quorum priores ſex modi poſitive cooperantur ad Furtum, vel damnum injuſtum inferendum, tres autem poſteriores negative, id eſt, omittendo id, quod ex officio, atque juſtitia facere tenebantur. Omnes autem hæſce perſonas, prædictis verſiculis comprehenſas, oportet breviter declarare. Itaque

43 De *Juſſione* in primis loquendo, hoc nomine ille ſignificatur, qui ita jubet, ut ulterius animum ad Furtum, vel Damnificationem injuſtam inferendam moveat: Et ſi pater filio, dominus ſervo, aut aliis perſonis, ſibi ſubditis, jubeat Furtum aut Rapinam facere, vel aliud damnum Proximo inferre. Talis ſecundum omnes non ſolum peccat jubendo opus pravum, ſed etiam cenſetur cauſa damni illati per eum, qui ejus juſſa ſequendo damnum intulit, & conſequenter etiam tenetur ad reſtitutionem injuſte ablatorum ſive compensationem damnificatorum.

44 De *Conſilio* nunc loquendo, ſub Conſilio ſeu conſulente comprehenduntur ii, qui ſuo pravo conſilio permovent alterum actualiter ad aliquod malum, damnum ſive maleficium, Proximis injuſte inferendum. Huc pertinent adhortationes, preces, atque promiſſiones, ut alter excitetur efficaciter ad damnum injuſtum inferendum. Et tales non ſolum peccant mortaliter, ſi fraude, vel culpa lata (ut vocant Theologi) iniquum conſilium dederint, ex quo grave damnum Proximo ſubſecutum eſt, ſed etiam tenentur ad reſtitutionem.

45 Intellige, ſi altero pravum conſilium ſuum ſequente, grave damnum re ipſa ſequatur: nam, ſi ſecus fiat, id eſt, ſi alter pravum conſilium non ſequatur, ac proinde conſulens non fuerit efficaciter cauſa damni alicujus, etſi graviter peccaverit ratione pravi affectus interioris, datique mali conſilii, non tamen quidpiam tenetur reſtituere; eo quod altero meliora conſilia ſequente nullum inde damnum cuiquam actualiter evenierit.

46 Dices: Nullus tenetur ſequi conſilium, quinimo explorare ac deliberare debet apud ſemetipſum, an illud ſibi expediat, nec ne l. 2. ff. *Mandati*. ergo non videtur quod Conſulens umquam poſſit incurrere obligationem reſtituendi. Accedit Reg. 62. *Juris in 6.* ibi: *Nullus ex conſilio, dummodo fraudulentum non fuerit, obligatur.* cum concordantiis. Reſp. I. retorquendo argumentum: ergo, cum allata Regula Juris loquatur de conſilio non fraudulento, ſecus erit dicendum de fraudulento, nam exceptio firmat regulam in oppoſitum.

47 Reſp. II. Argumentum, atque citatam Regulam procedere de conſilio dato circa contractus, vel quaſi contractus: nam, ſi ex tali conſilio, tamen non fraudulento, alteri illud exequenti, eveniat damnum, Conſulens ei ad nihil tenetur, ob rationes dictas. Secus eſt de

conſilio dato circa maleſicia, vel quaſi, v. g. committendi Furtum, Homicidium: ſi enim ex tali conſilio fuit damnum cuiquam tertio efficaciter ſecutum, tunc in ſolidum tenetur Conſulens, non quidem illi, qui conſilium dedit (quia is ſcire debebat, id ſibi non expedire) ſed alteri, contra quem conſilium dedit, quemque ſuo conſilio efficaciter damnificavit. Gloſſa ad cit. Reg. 62. *Juris in 6.*

48 Quoad *Conſenſum* adverte, quod nomine Conſenſus in propoſito intelligatur efficax approbatio, aut ſuffragium ad malum inferendum: veluti, ſi aliquis e Magiſtratu, Concilio vel Capitulo præſtet ſuffragium, & conſenſum ad inferendum bellum injuſtum, vel quodcumque damnum iniquum.

49 Et dicitur notanter, *efficax approbatio, aut ſuffragium*, id eſt, tale, a quo pendet, ut res fiat, ita ut ex ejusdem efficaci influxu damnum injuſtum re ipſa ſubſequatur. Nam ſi a conſenſu tuo non pendeat, ut malum inferatur, nec ne, eo quod auctoritatem nullam habeas, vel ſi abſque tuo conſenſu jam alii æque fuerint parati ad damnum inferendum, ac inſuper tuum ſuffragium ſuo conſenſu, ac per majora jam prævenerint, non cenſeris cauſa damni efficax: ac proinde, licet juxta gravitatem exceſſus potueris peccare aſſe mortaliter ob pravam voluntatem, qua conſentebas ad malum, nihilominus ad reſtitutionem, ſeu damni recompensationem non teneberis, quia per te re ipſa nullum efficaciter damnum illatum eſt. Et ex hoc innumeri caſus poſſunt reſolvi.

50 Quoad *Palponem* ſciendum, quod nomine Palponis, ſeu Palpantis intelligatur adulator laudans damnificantem, aut ſcelus patraturum commendans, ſi quod ex hoc alter moveatur ad damnificandum. Huc pertinet exprobratio ignavia, quod quis v. g. injuriam acceptam nolit ulciſci, ac huiusmodi. Et talis non ſolum peccat juxta gravitatem materiæ, pravæque intentionis, ſed etiam tenetur ad recompensationem gravis damni illati, quando ex tali adulatione, laudatione, aut exprobratione ignavia alter efficaciter excitatur, atque impellitur ad maleficium perpetrandum. Ratio eſt clara: quia talis Palpo eſt cauſa efficax damni illati; nam ſine tali palpatione (uti ſupponitur) damnum alter non intuliſſet.

51 Per *Recuſum* intelligitur hic, quicumque refugium, aut ſecuritatem, vel quodlibet receptaculum præbet malefactori, ex quo is movetur ad inferendum damnum. Et hæc aſſecuratio poteſt fieri vel receptando perſonam, vel rem ablatam, aut ejus inſtrumenta occultando, aliſque ſimilibus modis, quibus alter animatur, atque efficaciter movetur ad inferendum Proximo malum, vel omittendam debitam reſtitutionem. Quod ſi, excluſa ſpe præbendi refugium ad furra continuanda, talem præſe recipias, ne tamquam amicus hic & nunc diffametur, vel etiam abſcondas ex miſericordia, ne a licitoribus deprehendatur, non diceris præbere recuſum.

52 Quoad *Participantem* eſt notandum, dupliciter aliquem poſſe eſſe participem, ſeu participantem damni illati. I. Quia participat de re injuſte ablata, utputa quia eſt particeps prædæ jam factæ: & hac ratione præter peccatum, quod incurrit tenetur ad reſtitutionem pro ea parte, quæ ipſi obvenit. II. Si quis participet in ipſa actione mala, & injuſta, ut ſi quis adjuvet furem ad Furtum perpetrandum, v. g. ſcalas apponendo, vel ipſas fure aſcendente ſuſtinendo, excubias agendo, prædæ aſportando, aut ſimiles actiones exercendo, quæ in talibus circumſtantiis proxime juvant ad peccatum. Et tunc, ſi ita efficaciter influat, ut ſine eo actio damnosa vel omnino non poneretur, vel ſaltem non fieret abſque alia nova cauſa ſuperaddita, non ſolum peccat pro qualitate damni, ſed etiam tenetur ſuo ordine reſtituere in ſolidum totum damnum, ſi ita in totum damnum influxerit. Debet autem concuſus iſte eſſe proximus. Atque hinc notanter additur: *Qua in talibus circumſtantiis proxime juvant ad peccatum*: nam ſecus dicendum, ſi opus illud de ſe indifferens ſit, ſimulque proxime non juvet ad peccatum alterius; neque fiat ad cooperandum inferenti injuſtum damnum, ſed ob alium rationabilem finem v. g. ad avertendum grave malum alias ſibi imminens, prout exinde excuſantur miſellii ruſtici, ſi pecora a militibus in confinibus deprædata abigant,



gant, ad id faciendum ab ipsis spoliatoribus coacti sub gravibus minis. Item si de se indifferentia fiant ad reddendum licitum obsequium jure cuiusdam debitum. (c)

Additio.

\* Ex quo inferes, quod, si tres vel quatuor gregarii milites sese ad invicem excitantes & commoventes, sicque unus dependenter ab alio communi consilio intrent vineam vel cellam vinariam non hostilem, eandem ex integro spoliando, vel plures grassatores simili modo expilent domum, quod, inquam, omnes peccent graviter, & in solidum obligentur singuli sub gravi ad reparationem totius damni ab ipsis causati, quamvis nonnulli horum tantum ex præda paucos botros, vel modicum vinum, vel tantum nonnullos crucigeros accepissent. Ratio est: quia singuli non solum in re accepta, sed in ipsa actione mala & graviter alteri noxia participarunt, ac unus ab altero dependenter influendo efficaciter totum effectum causavit. Secus dicendum, si absque communi consilio, seu ad invicem dependentia ab aliquibus Furta similia fuissent perpetrata, tunc enim, qui tantum modicum abstulisset, quamvis forsan conscius Furti aliorum, non tamen exinde peccasset mortaliter, nec teneretur sub gravi ad restitutionem. Ita cum Lessio, Card. de Lugo, Sanchez, Diana ac aliis, Sporer tract. 5. cap. 5. sect. 2. n. 47. & la Croix lib. 3. part. 1. n. 1010. Ratio est: quia talis tantum participat quoad ipsam rem acceptam, quæ levis est, utpote non influens in actionem aliorum. Excipe tamen, si huic deprædationi inter fuisset præter gregarios Dux militum, vel ejusdem subordinatus: talis enim, quia non obstitit, prout tamen ex officio tenebatur, quin & adjuvit, adstringitur in solidum ad resarcitionem totius damni, prout recte notat noster Henno Tom. 2. Tract. 1. disp. 4. quæst. 4. ad finem, & colligetur ex dicendis proxime. \*

§3 Quod attinet ad reliqua tria, nempe ly *Mutus, non obstitans, non manifestans*, quibus indicantur negative concurrentes ad Furtum, aut aliam injustam Damnificationem: imprimis per *Mutum* intelligitur ille, qui id, ad quod ex officio tenebatur, omittit præcipere, si erat Superior; consulere, si Consultor; clamare, aut strepitum facere, si erat Custos rei, ad damnum impediendum.

§4 *Non obstitans* dicitur, qui omittit opem vel operam, qua poterat damnum impedire, & quam ex officio tenebatur navare: ut Princeps, Magistratus, Præpositi viarum, & similes.

§5 *Non manifestans* denotat eum, qui, cum ex officio teneatur, omittit manifestare malefactorem; idque sive ante factum, quando damnum erat impediendum, sive post factum, quando id est resarciendum: ut Custos rei alienæ custodiendæ deputatus.

§6 Et quidem certum est, quod tales peccent juxta gravitatem suæ negligentiae, damni que inde sequentis: utpote cum ex officio teneantur impedire damnum, simulque illud impedire commode & absque gravi præjudicio possint, uti supponitur. Quinimo tales etiam suo modo tenentur ad restitutionem ratione damni ex sua taciturnitate, vel non resistentia Proximo emergentis, prout amplius patebit ex dicendis Quæst. seq. Hinc sit

Q U Æ S T I O IV.

De Restitutione, atque ordine in ipsa servando, circa bona Fortunæ.

S U M M A R I U M.

§7 Restitutio, quid?

§8 Est necessaria ad salutem.

§9 Duæ generatim sunt radices seu causæ Restitutionis, quæ?

§10 Obligatio restituendi in solidum, quid?

§11 Qui omnes teneantur restituere ratione injustæ acceptionis, vel damnificationis?

(f) Ut sæpius dictum quæst. præc.

Anacl. Reiffenstuel. Theol. Tom. I.

62 Causa totius damni tenetur restituere totum, causa partis partem.

63 Quid de tribus modis negative cooperantibus?

63 Quo ordine singuli teneantur ad Restitutionem? Per Ordinem quid intelligatur?

65 Detinens rem alienam primo loco tenetur.

66 Quis ordo in Restitutione ob damnificationem injustam?

\* An hic ordo procedat etiam quoad causas negative influentes? Addit. I. § 11.

67 Si res furtiva casu pereat apud furem, adhuc is restituere tenetur.

68 Nisi similiter periisset apud Dominum.

69 Restitutio cui facienda?

70 I. Regula quoad hoc.

71 II. Regula.

72 III. Regula.

\* Cui sit facienda Restitutio, si Dominus sit absens? ubi & alia notabilis doctrina.

73 Restitutio quando facienda?

34 Quid in casu impediendi temporalis?

\* Præsertim quoad agrotos.

Quæritur I. Quid sit Restitutio, & ex quibus causis oriatur? Resp. I. Restitutio (sic dicta, quæ rei in statum pristinum statutio) quantum ad propositum, est actus Justitiæ, quo fit rei alienæ redditio, vel damni injuste illati compensatio. Ita in re communis.

§8 Porro Restitutionem esse ad salutem necessariam de præcepto, patet ex illo Decalogi: *Non furtum facies*. Quia ejusdem rationis est furari, & detinere rem alienam invito rationabiliter domino, dum reddi potest. Hinc S. Augustinus Epist. 54. ac refertur c. *Si res aliena*. 14. q. 6. ait: *Si res aliena, propter quam peccatum est, cum reddi possit, non redditur, non agitur penitentia, sed fingitur: si autem veraciter agitur, non remittitur peccatum, nisi restituatur ablatum: sed, ut dixi, cum restitui potest*. Hæc ille.

§9 Resp. II. Duæ generatim circa bona Fortunæ, sive res temporales exteriores sunt radices, seu causæ Restitutionis: una ex parte rei acceptæ, seu possessæ, quæ domino suo reddi debet; cum res quælibet juxta vulgata Juris clamet ad dominum suum. Altera ex parte injustæ acceptionis, sive damnificationis. Ratione prioris capitis tenetur quis restituere rem depositam, vel commodatam, ac hujusmodi, quando postulat a domino, vel tempus præstitutum elapsum est. Ratione posterioris capitis non solum tenetur fur restituere vero domino rem furtivam, sed etiam injuste Proximum damnificans recompensare damnum illatum, & quidem in solidum, juxta Doctores communiter, & patet ex verficulis n. 42. relatis. Sed occasione horum,

60 Quæritur II. Quid sit obligatio restituendi in solidum? Resp. cum communi. Per *Obligationem restituendi in solidum* intelligitur illa, qua quis efficaciter ad furtum, vel damnum cooperans obligatur ad restituendum seu solvendum totum id, respectu cujus erat causa efficax, si alii, sive principales, sive cooperantes, non solverint. Quod si unus eorum prius illi, qui passus est damnum, restituat, ceteri liberantur a debito Restitutionis in comparatione ad ipsum damnificatum (alioquin enim idem damnum sæpius eidem deberet resarciri, quod non exigit Justitia) adhuc tamen iidem, posito, quod sint in uno, eodemque ordine constituti (de quo ordine Restitutionis agitur n. 64. & seqq.) tenebuntur pro rata portionis, quæ eos contingit, partem suam refundere illi, qui damnificato totum damnum prior compensavit, atque restituit. Scotus 4. disp. 15. quæst. 2. §. De quarto. & alii.

61 Quæritur III. Quinam ratione injustæ acceptionis, vel damnificationis bonorum Fortunæ, teneantur restituere in solidum? Resp. I. Omnes illi tenentur ad Restitutionem in solidum, qui sua jussione, consilio, consensu, vel alio ex prædictis novem modis fuerunt causa efficax damni injuste illati. Ita communis, idque desumitur tum ex illo D. Apostoli Rom. 1. *Non solum, qui talia agunt, sed etiam qui consentiunt facientibus*. Tum ex c. *Notum sit*. 2. q. 1. ubi dicitur, quod *facientem, & consentientem*.



*sentientem par pena constringit.* Tum tandem ex eo : quia omnes illi supponuntur fuisse causa efficax damni illius, respectu cujus dicuntur obligati restituere in solidum; nam, si vel talis iussio, aut consilium prævum non fuit in opus deductum, altero meliora consilia sequente, vel saltem non fuit causa efficax damni, utpote independenter a tali consilio illati, nulla ex parte eorum oritur obligatio Restitutionis (f) Unde ille vulgatus versiculus, supra jam relatus, & loquens de omnibus prædictis novem damnificantium generibus, sic de illis pronuntiat:

*Quilibet in solidum reddat prius injuriato.*

Et hinc merito Innocentius XI. sequentem inter alias, ordine 29. Propositionem damnavit: *Qui alium movet, aut inducit ad inferendum grave damnum tertio, non tenetur ad Restitutionem.*

62 Resp. II. cum Lessio *Lib. 2. cap. 13. n. 32.* & aliis, quod ad priores quinque modos attinet, nempe *Consulens, Mandans, Consentiens, Laudans, & Receptans* (de sexto modo, nempe de *Participante*, jam dictum est *n. 52.*) tenentur ii ad reparationem totius damni in solidum, si totius damni illati causa fuerunt, vel partis, si partis tantum illati damni causa extiterunt. Hinc sequitur, quod si volenti furari decem efficaciter iussisti, suasisisti &c. ut acciperet alios decem, tenearis tantum ad decem: si vero is efficaciter non intenderat quidpiam furari, ad tuum autem consilium furetur viginti, illo non restituente teneberis totos viginti restituere, eo quod causa efficax fueris totius damni per furtum illati: & sic de similibus discurrendum.

63 Resp. III. Quod ad ceteros tres modos attinet, qui negative cooperantur ad damnum Proximi tamquam *Mutus, Non obstant, Non manifestans*: isti tunc solum obligantur, dum ex officio tenentur ad impediendum Proximi damnum, idque ex culpa gravi non impediunt, etsi commode, & absque gravi suopræjudicio, uti supponitur, possint. Lessius ibidem *n. 69. & seqq.* cum communi. Additur notanter, *dum ex officio tenentur*: nam qui non obligatur ad impediendum damnum Proximi ex officio, licet teneatur ex Charitate, ac proinde non impediendo peccet, non tamen tenetur damnum refarcire; cum violatio Charitatis non inducat necessitatem Restitutionis, sed solum violatio obligationis Justitiæ, juxta Doctores passim.

64 Quæritur IV. Quo ordine teneantur prædicti ad Restitutionem faciendam? Ubi per *Ordinem* non intelligitur prioritas temporis: omnes enim suo modo (eo nimirum, qui præscribitur inferius *n. 66.*) & nisi aliunde excusentur, obligantur statim facere Restitutionem post Furtum, vel damnum Proximo illatum, quamprimum fieri potest; cum præceptum non retinendi rem alienam injuste, & consequenter restituendi sit negativum, sicque obliget semper, & pro semper. Unde per *ordinem* intelligitur hic prioritas quoad gravitatem criminis, & obligationis.

65 Resp. I. Si aliquid Proximo injuste est ablatum, primo loco, & ante omnes tenetur is restituere, ad quem res furtiva pervenit. Ratio clara est; quia talis obligatur ratione rei alienæ apud ipsum existentis, quæ obligatio est summa; nam quælibet res transit cum suo onere, simulque res aliena, quamdiu extat in specie, per se debetur, semperque clamat, ut dici solet. Quod si is rem jam consumpserit, neque habeat aliunde, unde restituat, tunc altero loco tenetur Jubens, tertio Executor, & postmodum alii, ut in simili mox dicetur.

66 Resp. II. Si vero nihil ablatum est, sed tantummodo damnum Proximo injuste illatum, primo loco tenetur is damnum refarcire, qui coegit, vel fraude induxit; aut alteri imperavit damnum illud inferre, cui alter non fuit ausus contradicere: ut si Dux belli injusti imperet militi, ut occidat, incendat, spoliât. Idem dicendum de eo, qui suo nomine procuravit sic i maleficium, seu injustam damnificationem. Ratio utriusque partis est: quia talis causa est primaria, movens ceteras, ac proinde tenetur ante alias ad Restitutionem. Imo ob hanc rationem notant Doctores, quod si talis restituat, aliæ concause secundariæ non teneantur eidem quidpiam re-

fundere. Secundo loco tenetur Executor, in quantum fuit executor furti, vel damni injuste illati. Tertio damnum loco tenentur ceteri, qui consilium ad illud dederunt, qui consenserunt, laudaverunt, aut recursum vel obsequium præstiterunt. Ita tamen semper, ut, si hi, qui primo loco sunt positi, suam obligationem restituendi non observassent, aut in statu impossibilitatis existerent, teneantur illi, qui secundo loco sunt collocati, & in horum defectum tertio loco positi: singuli in solidum.

#### Additio I.

\* Quod si dubites, num tres causæ negative influentes, nimirum *mutus, non obstant, non manifestans* eodem ordine (nimirum tertio loco) quoad obligationem restituendi sint ponendæ, sicuti causæ secundariæ positive ad damnificationem concurrentes? Ad hoc dubium tibi ex Lessio, Card. de Lugo, Haunoldo, ac Layman &c. reponit la Croix *lib. 3. part. 2. n. 63.* causas illas positivas teneri adhuc restituere ante causas negative influentes; quia positive influentes revera procurant damnum, negative autem solummodo id non impediunt. Et consequenter causæ negativæ in ordine ad faciendam reparationem damni videntur ponendæ *quarto loco*. E. g. ponamus, quod unus famulus efficaciter extraneis sibi notis, aut ex consanguineis suadeat, vel etiam claves subministrat, siue modum ostendat, quomodo ab hero hujus famuli ex granario, cella vinaria, vel culina quædam occulte surripere valeant. Alter famulus scit, nec similia furti sæpius repetita domino indicat. In simili casu post ipsos fures *priori loco* seu ordine prior famulus suadens, & primum *posteriori* alter mutus, seu non manifestans obligatur ex Justitia restituere. \*

#### Additio II.

\* Nec dicas: allegatum exemplum de famulis omnino non esse ad propositum; quia posterior famulus *non manifestans*, si non positive ad furtum cooperetur, ne quidem *quarto loco* ad refarcitionem damni adstringitur: quoniam non tenebatur ex Justitia admonere dominum, cum ad hoc propter salarium se non obligaverit, sed tantum quod suum officium, super quod constitutus est, velit fideliter administrare, adeoque solummodo obligabatur ex Charitate, uti alii extranei homines, si non manifestarent similia furti: notum autem est apud Theologos, quod opus, ad quod erat quis obligatus Charitate, omittens equidem peccet, non autem obligetur ad Restitutionem. Resp. enim, ita quidem aliquos DD. & meo judicio non improbabiler discurrere, nihilominus communis DD. negat dictum antecedens: etenim vel ille posterior famulus fuit expresse vi officii sui ac salarii super culinam, aut frumentum &c. constitutus, vel non? Si primum; tunc certo juxta omnes *non manifestans* peccat contra Justitiam, adeoque obligatur *quarto loco* ad Restitutionem. Si vero vi salarii sui non erat conductus ad similes res custodiendas, sed ad alias functiones peragendas, tunc etsi non expresse vi salarii sui, saltem tacite censetur se obligasse ad manifestanda furti extraneorum, si quæ resciat, & absque gravi præjudicio possit manifestare. Ita enim communis habet persuasio dominorum tales famulos conducentium, prout contra Molinam, Rebellum & Bonacinam putat la Croix *lib. 3. part. 2. n. 46.* estque hoc (inquit Lessius apud eundem) quasi de Jure Gentium, quod quivis famulus censetur tacite se obligasse vi salarii sui *ad manifestanda furti extraneorum*: secus communiter sentiunt DD. quoad *furti domesticorum*. Unde, si famulus advertat alium famulum vel domesticum furari ex rebus Domini sui, & fileat, quamvis talis peccat contra Charitatem, quando facile absque suo gravi præjudicio manifestare potest, non tamen obligatur ullo modo ad faciendam Restitutionem, nisi huic vi officii sui custodia rei esset specialiter commissa, uti communiter tenent omnes, prout ait Cardinal. de Lugo apud la Croix *loc. cit.* \*

67 Quæritur V. Utrum, si res furtiva pereat apud furem, is adhuc teneatur ad Restitutionem? Resp. Si res furtiva,



furtiva, vel alias injuste parta casu pereat, nihilominus qui abstulit, tenetur ad Restitutionem pretii, nisi ea similiter fuisset certo peritura apud dominum. Prior pars est D. Thomæ 2. 2. quæst. 62. art. 6. & communis Doctorum. Ratio est: tum quia Restitutio ad hoc ordinatur, ut illi, qui per actionem injuriosam minus habet, suppleatur: tum quia Restitutio generatim oritur vel ratione rei alienæ, vel ratione injustæ acceptionis, sive damnificationis: atqui hæc in proposito intervenit; ergo.

68 Additur, *nisi ea similiter fuisset certo peritura apud dominum*: ut puta inundatione aquarum, vel iusta incurfione hostium, aut hujusmodi. Nam tunc non teneri furem, aut iniquum rei alienæ occupatorem ad Restitutionem, censent Covarruvias part. 2. in c. Peccatum. §. 6. n. 1. Lessius lib. 2. cap. 12. n. 92. Sylvester, & alii, contra quosdam oppositum tenentes: quia, si res certo apud dominum æque peritura fuisset (secus, si de hoc sit dubium) nullo notabile detrimentum eidem accidit, eo quod perierit apud furem, vel iniquum illum detentorem, & non potius penes ipsum dominum.

89 Quæritur VI. Cui facienda sit Restitutio? Resp. cum Doctore Subili 4. disp. 15. q. 2. & communiorum, ponendo quasdam regulas generales, quæ desumuntur ex Jure Canonico c. Cum tu. De Usuris. ubi circa Restitutionem usurarum (& eadem ratio est de aliis male ablatis) habetur statutum, *Quod ii, qui usuras extorserunt, cogendi sunt eas his, a quibus extorserunt, vel eorum hæredibus restituere; vel (his non superstitibus) pauperibus erogare; dummodo in facultatibus habeant, unde ipsis possint eas restituere: cum juxta verbum Beati Augustini, non remittitur peccatum, nisi restituatur ablatum. Illi autem, qui non habent in facultatibus, unde usuras valeant restituere, non debent ulla pena mulctari, cum eos nota paupertatis evidenter excuset.* Hæc Pontifex loc. cit. Unde ista applicando ad nostrum propositum, sit

70 Regula I. Restitutio est facienda ipsi damnificato, si possibile est: id est, si, qui damnum intulit, novit eum, & habeat ipsum præsentem, vel eidem mittere possit absque majori incommodo, quam illud, quod mittendum est, esset utile ipsi, cui mittitur.

72 Regula II. Si non sit possibile Restitutionem ipsi damnificato facere, quia ipse mortuus est, restituendum erit ejus hæredibus, seu propinquis. Nam Lege naturæ præsumitur, quod damnificatus in casu talis impotentiae potius velit Restitutionem fieri suis hæredibus, seu propinquis, utpote quibus jure naturali magis conjunctus est, quam aliis extraneis.

72 Regula III. Si neutrum horum fieri potest, vel quia tam ipse, quam ejus propinqui jam mortui sunt, vel quia ex una parte non est prudens spes de reditu Domini ad locum viciniorem, ex altera autem majores sumptus essent ponendi in mittendo, quam illud valeat illi, cui mitti deberet, restituendum erit causis piis, vel pauperibus. Quod si talis damnificans sit ipsemet pauper, potest id sibi applicare tamquam pauperi. Suadetur tamen ex tunc, ut adjungantur preces pro Domino persolvendæ.

#### Additio I.

\* Ast ponamus, in præcedentibus tribus Regulis Dominum ab altero damnificatum nesciri, vel esse absentem sine prudenti spe reditus in tanta distantia, ut absque maximis expensis, ipsum debitum superantibus, huic satisfactio præstari nequeat, vel eundem ex aliqua verisimili relatione fuisse creditum mortuum, hinc in dictis casibus Restitutionem bona fide fuisse applicatam pauperibus, quid faciendum, si postea Dominus rei ex insperato compareat? Ante responsum nota ex communi, quod bonæ fidei possessor rem alienam cognitam, ut talem, teneatur Domino reddere, si extat adhuc apud ipsum in specie; secus vero, si bona fide alienavit, vel consumpsit, ignorans, eam esse alienam, & neque ex hac consumptione vel alienatione factus ditior. Econtra vero malæ fidei possessor, sive factus sit ditior ex re aliena, sive non, tenetur satisfacere Domino, vel in ejus defectum dare pauperibus. H. N.

Anacl. Reiffenstuel. Theol. Tom. I.

Resp. Sub distinctione; nam vel illa res in pauperes distributa adhuc apud eosdem existit, vel non? Si prius (quod tamen raro contingit) tenentur ipsimet pauperes, quamvis sint bonæ fidei possessores, dum resciantur, & conveniri possunt, iterum reddere; cum hisce similes res videantur datæ solum conditione implicita, si Dominus verus non amplius compareat. Quando vero talis res jam fuit a pauperibus, uti alia eleemosyna consumpta, nec damnificans, nec pauperes tenentur aliquid reddere Domino comparenti. Non damnificans: utpote, qui nec titulo rei acceptæ obligatur, cum talis res apud eundem non amplius existat: nec titulo injustæ acceptionis adstringitur, quoniam huic obligationi jam videtur satisfacisse, eandem rem bona fide, & præmissa prius debita de Domino indagatione erogando in pauperes. Deinde nec pauperes tenentur iterum restituere, qui jam bona fide consumpserunt, non exinde (uti supponitur facti ditiores; & consequenter res sibi distributas nec in æquivalenti apud se retinentes. Sporer Tract. 4. in Decalog. cap. 3. sect. 3. n. 104. & la Croix lib. 3. part. 2. n. 95. \*

#### Additio II.

\* Porro incidentaliter hic bene advertendum adhuc venit ex Patre Sporer Tract. 4. in Decalog. cap. 2. sect. 3. §. 4. n. 10. quod tunc ex re aliena absumpta quis censetur factus ditior, & consequenter talem rem adhuc in æquivalenti apud se retinere, si per consumptionem hujus rei, seu occasione illius rei consumptæ suum patrimonium in aliquo est auctum, vel si exinde aliquid lucratus est, ac possidet, quod alioquin non haberet loco rei alienæ. Quod si vero occasione ejusdem rei alienæ absumptæ patrimonium suum in nullo est auctum, non dicetur quis ditior factus. \*

73 Quæritur VII. Quando facienda sit Restitutio? Resp. Restitutio regulariter loquendo, & nisi adsit alia causa rationabiliter excusans, statim facienda est, quamprimum commode fieri potest. Ita communis, & ratio est: quia restituere est actus præcepti negativi, quo tenemur non detinere alienum domino rationabiliter invito; ac proinde obligat semper, & pro semper. Unde sicut tenemur, ab alio quocumque actu peccati mortalis cessare statim, ita etiam ab injusta detentione rei alienæ.

74 Dicitur, *domino rationabiliter invito*: nam si esset impedimentum ad tempus legitime excusans Proximum a facienda Restitutione, ipse, cui res injuste ablata est, vel non erit invitatus, vel saltem non rationabiliter, quod alter differat Restitutionem exteriorem ad aliquod tempus opportunius. Unde talis, supposita voluntate restituendi, quamprimum poterit, non peccat Restitutionem differendo. Verum de hoc inferius quæst. 6.

#### Additio.

\* Ceterum, quod si etiam aliquis absque causa sufficienti differret actualem Restitutionem ad aliud tempus, si tamen haberet voluntatem restituendi, & præterea dilatio ultra tempus debitum non foret notabilis, non illico peccaret exinde mortaliter per dictam dilationem, sed tantum venialiter, quoniam Dominus non censetur prudenter esse invitatus graviter, nisi prævideat etiam per modicam illam dilationem imminere grave periculum, ne omnino restituatur: quale periculum non raro contingere potest, si periculose decumbens absque rationabili causa vellet differre ulterius onus Restitutionis. Ex quibus ultimis dictis cum Molina, Card. de Lugo, Illung, Tamburino, & la Croix communiter advertunt Doctores, homines in periculo mortis constitutos ordinarie non esse absolvendos, si non pressi magna necessitate commode absque periculo scandali, infamiae, aut alterius gravis causæ possint pro tunc restituere, & nihilominus velint onus illud in hæredes rejicere: tali enim modo creditores suos exponerent periculo proximo injustorum damnorum gravium, quia hæredes præsertim Magnatum (inquit la Croix lib. 3. part. 2. n. 357.) sæpe negligentes esse solent in Restitutione. \*



## Q U Æ S T I O V.

Ex qua culpa oriatur obligatio Restitutionis ratione damni dati?

## S U M M A R I U M.

- 75 *Damnificatio, quid?*  
 76 *Ea variis modis accidere potest.*  
 (g) Vide de his Tract. 8. dist. 2. n. 34. 35. & 36.  
 77 *Si nulla culpa intervenit, ob damnum datum nemo regulariter restituere tenetur.*  
 78 *Quid, si infans aut furiosus damnum intulit?*  
 79 *Aut adhibita fuit omnis cautela, ne damnum sequatur?*  
 80 *Quid, si animal damnum intulit?*  
 (h) Tract. 8. dist. 2. n. 37. & 38.  
 81 *Dolo vel fraude damnum inferens, ad quid teneatur?*  
 82 *Quid, si quis dolo aut fraude alium impedivit a consecutione alicujus boni?*  
 83 *Quid, si hoc accidit absque vi, dolo aut fraude?*  
 84 *Corollarium.*  
 85 *Aptissima declaratio præmissarum conclusionum.*  
 86 *Inferens damnum extra officium & contractum, ex qua culpa teneatur restituere?*  
 87 *An tunc sufficiat culpa Theologica venialis, vel requiratur mortalis?*  
 88 *Per culpam Theologicam, quando censeatur damnum illatum?*  
 89 *Ex sola culpa civili levi, aut levissima non oritur obligatio restituendi pro Foro conscientia.*  
 90 *Secus pro Foro externo.*  
 91 *Ratio diversitatis.*  
 92 *Ac notabilis instantia solutio.*  
 \* *Solvitur ulterior instantia.*  
 93 *Quæ sit obligatio restituendi ob damnum in officio datum?*  
 94 *Corollaria.*  
 95 *Limitatio circa profitentes extraordinariam diligentiam.*  
 96 *De obligatione restituendi ex contractu remissive.*  
 (i) Tract. 8. Dist. 2. q. 4. per totum.

75 **P**Ræfens Quæstio potissimum procedit de Damnificatione non lucrosa, sive damno dato absque eo, quod aliquid commodi, seu lucri exinde perveniat ad damnificantem: atque definiri solet, quod sit jactura data in bonis externis Proximi absque eorum usurpatione. Et per hoc ejusmodi injusta Damnificatio differt, saltem materialiter, a Furto & Rapina, aliisque iniquis usurpationibus; eo quod fur, vel iniquus invasor rem alienam sibi vendicat, atque inde lucrum capturus in usum suum accipiat: secus fit in damno dato, utputa si quis ædes vel segetes Proximi incendat, ejus animalia interficiat &c.

76 Ceterum hujusmodi Damnificatio in rebus externis Proximi primum dupliciter potest accidere: videlicet uno modo, destruendo illi id, quod actualiter aut virtualiter habet, v. g. domum incendendo, animalia ejus in tenera ætate occidendo, recentes arborum plantationes eradicando &c. Altero modo, impediendo eum, ne aliquid bonum consequatur, ad quod adipiscendum spem concepit. Deinde id fieri potest cum, vel sine culpa aliqua Theologica, aut Civili, sive lata, levi, sive levissima. (g) Et tandem Damnificatio illa contingere potest extra officium, & contractum, aut in officio, seu interveniente aliquo contractu v. g. Commodati, Depositi &c. Et de his omnibus per ordinem restat dicendum.

77 **CONCL. I.** Regulariter loquendo, & in Foro tum externo; tum conscientia nemo tenetur ad Restitutionem ob damnum alteri subsecutum vel illatum, si nulla culpa Theologica, aut Juridica intervenit. Ita in re communis. Sic nemo tenetur de damno dato rebus hostilibus in bello justo, vel illato, ad se defendendum cum moderamine inculpatæ tutelæ, aut quod dat Judex exequendo munus suum in puniendis Reis, & hujusmodi, prout aliunde liquet.

78 Deinde hoc idem dicendum, si casu fortuito, atque sine omni culpa Theologica, & Civili damnum datum fuit: ut si infans, vel furiosus, qui est incapax culpæ, damnum intulit. c. *Illud relatum*, 15. q. 1. & l. *Sed* & si. 5. §. 2. ff. *Ad Legem Aquiliam*. nam quia tales doli

capaces non sunt, damnum ab eisdem illatum reputatur inter casus fortuitos, nisi culpa alicujus alterius præcesserit.

79 Tandem generaliter, si quis aliquid operetur, v. g. in loco deserto emittat sagittam, adhibita omni diligentia, ne cuiusdam damnum eveniat, & tamen non obstante omni sua cautela nihilominus alteri damnum sequatur, non tenetur restituere: quia aberat omnis culpa ex parte ejus. Unde cap. ult. *De injuriis* & damno dato, Pontifex sic ait: *Sane licet, qui occasionem damni dat, damnum videatur dedisse: secus est tamen in illo dicendum, qui, ut non accideret, de contingentibus nil omisit.*

80 Additur notanter in Conclusionem, regulariter loquendo: fallit enim hoc, si animal tuum absque alia culpa tua damnum intulit, utputa percutiendo, vel occidendo animal Proximi, aut segetes depascendo: teneberis enim damnum illatum refarcire, nisi tali obligatione te ipsum eximere velis, tradendo animal vivum, quod damnum intulit, pro occiso, aut pro damno per illud illato, cit. cap. ult. *De injur.* & damno dato. juncta l. 1. ff. *Si quadrupes pauperiem* &c. Insuper, si res apud aliquem sit ex contractu v. g. Commodati, atque expresse de hoc conventum fuerit, tenebitur is etiam de casu fortuito; prout alibi (h) dictum.

81 **CONCL. II.** Qui dolo vel fraude damnum dedit, certum est, quod peccat mortaliter, atque sub gravi culpa ad Restitutionem teneatur, si quantitas rei damnificatæ ad quantitatem notabilem ascendat: imo talis injuste damnum inferens rem alienam destruendo, vel deteriorando, tenetur restituere non solum damni dati valorem, sed etiam lucrum cessans, ac quodlibet aliud damnum ex illa injusta læsione causatum. Ita communis. Nam lex Justitiæ, quæ læditur, horum omnium recompensationem exigit, ut injuste damnificato satisfiat.

82 **CONCL. III.** Loquendo de bonis primum consequendis, si quis directe (hoc est, intentione damnificandi Proximum) eundem metu injuste incusso, fraude vel dolo impedit a consecutione alicujus boni v. g. officii sive beneficii, sibi ex justitia necdum debiti, sed solum ex liberalitate alterius conferendi, tenetur quidem eidem ad aliquam Restitutionem, non tamen obligatur ipsi restituere totum illud bonum, neque valorem eidem æquivalentem, sed aliquam dumtaxat portionem, pro ratione illius spei consequendi dictum bonum. Ita Scotus 4. dist. 15. quæst. 2. *Ad ultimum principale*. Cavellus in Scholio ibidem. & alii. Ratio prioris partis est: quia, licet alter jus necdum habuerit ad rem, quam alius ex mera liberalitate collaturus fuisset, jus tamen habuit, ne per media illicita & injusta, videlicet per vim seu metum injuste incussum, fraudem aut dolum ab ejusdem consecutione impediretur: unde, si quis eum taliter injuste impediatur, tenetur ipsi ad recompensam pro ratione valoris spei, quæ sperabatur illius boni consecutio. Altera pars ex eo patet: quia multum interest inter habere, & prope esse; ergo.

83 **CONCL. IV.** Quod si quis impediatur alterum a consecutione alicujus boni sine vi, metu, fraude aut dolo, idque fiat non ex animo nocendi Proximo, qui impeditur, sed ex intentione proprii commodi, vel alterius amici, ad nullam tenetur Restitutionem. Ita cum Doctore nostro loc. cit. Maltius disp. 9. *Theolog. Mor. n. 25.* & alii.

84 Hinc si quis sciat, testatorem velle Legatum aliis relinquere, & precibus ab illo obtineat, ut voluntatem suam mutet, & potius sibi aut suo consanguineo relinquat, nulla hinc confurgit obligatio restituendi: quia hoc totum fit sine ulla fraude, dolo, metu, aut alia injustitia, simulque quilibet habet jus procurandi sibi bonum, servatis circumstantiis justis & honestis.

85 Hoc ipsum Doctor Subtilis loc. cit. paucis verbis, simulque aptissimo exemplo amplius declarat, dicens: *Si quis tantummodo propriæ utilitati intendebat providere, & sic procurat sibi, & ex consequenti alius præter intentionem illius damnificatur, iste ad nihil tenetur illi: quia licet unicuique sibi ipsi providere, alio neglecto. Confirmatur hoc per illud l. 1. §. *Idem* ajunt. ff. *De aqua pluviaria arce.* Si præscindo venas in fundo meo, per quas derivabatur aqua ad puteum alterius, intentione nocendi sibi, te-*



neor ad Restitutionem damni. Sed si hoc facio sine fraude, intencus consulere propriae utilitati, ut quia mihi est utile facere murum, qui non potest convenienter fundari sine præcissione illarum venarum, non damifico alium: quia jus habeo faciendi utilitatem meam in fundo meo. Et ff. De Regul. Jur. Nemo damnum facit, nisi qui illud facit, quod facere jus non habet. Iste autem habet jus procurandi sibi beneficium servari circumstantiis iustis & honestis. Hæc Scotus.

86 CONCL. V. Qui nec ex officio, nec ex contractu obligatus est ad alterius damnum præcavendum, pro Foro conscientiae solum tenetur ad Restitutionem damni, si nocent ex culpa Theologica, non autem ob culpam mere Civilem, saltem si illa culpa civilis fuerit præcise levis, vel levissima, & loquendo de obligatione ante sententiam Judicis. Prior pars, quod nimirum teneatur ad Restitutionem damni, si talis noceat ex culpa Theologica, est communis inter Doctores, quamvis iidem postmodum in hoc dissentiant, utrum ad inducendam obligationem gravem restituendi in Foro conscientiae, sufficiat culpa Theologica venialis, vel requiratur mortalis.

87 Et quidem sufficere culpam Theologicam venialem, Layman lib. 3. tract. 3. part. 1. cap. 6. n. 4. putat esse probabilius, eo quod altera radix Obligationis restituendi sit injusta acceptio, sive læsio: sed qui per venialem injuriam damnum infert, revera alterum injuste lædit, ergo. Oppositum nihilominus tenet Lessius lib. 2. cap. 7. n. 29. post Sotum, & alios, idemque probabile censet cit. Layman: nam, quando dumtaxat culpa venialis intercessit v. g. ob imperfectam animi considerationem, actus ille in genere moris, atque injuriæ non est perfectus: atqui actus in genere moris, & injuriæ imperfectus, ut puta elicitus cum imperfecta advertentia rationis, non potest esse causa obligationis gravis atque perfectæ in eodem genere, pro Foro conscientiae; ergo. Addit tamen idem Lessius, quod, quando damnum illatum grave est, ordinariè loquendo culpa, sive negligentia, qua commissum est, censetur mortalis, nisi aliunde constet non esse.

88 Ceterum per culpam Theologicam, & peccatum proprie dictum tunc censetur quis damnum intulisse, quando vel ex directo nocendi proposito, absque justa causa damnum intulit, vel quando perspecto damni inferendi periculo, actione aliqua non abstinuit, cum potuisset, ac debuisset abstinere, quando damnum inferri non impedivit, cum potuisset, atque ad hoc ex Justitia tenebatur, prout desumitur ex cap. ult. De injuriis & damno dato.

89 Altera pars Conclusionis, quod nempe non detur obligatio restituendi ante sententiam Judicis, si fuerit culpa civilis præcise levis, vel levissima, est cit. Lessii n. 24. Lugonis disp. 8. de J. & J. sect. 3. & 4. ac aliorum. Ratio est: quia in Foro conscientiae & ante sententiam Judicis nemo tenetur in suis actionibus majorem diligentiam adhibere ad hoc, ut non censetur alterum injuste lædere, quam communiter homines ejusdem professionis in talibus præstare solent, ne sibi, vel aliis noceant: sed qui admittit culpam civilem levem (idem a fortiori dicendum de culpa levissima) omittit diligentiam, quam communiter homines talis conditionis non adhibent; hi enim communiter non solent esse diligentiores, aut diligentissimi; ergo. Unde fit, quod ejusmodi damnum potius censetur casuale & fortuitum, quam ipsi voluntarium, saltem in Foro conscientiae.

90 Dicitur notanter, in Foro conscientiae: nam secus est dicendum in Foro externo; qui enim ex negligentia mere civili, sive ea sit culpa levis, vel levissima, damnum intulit; in Foro externo per actionem ex Lege Aquilia de damno dato ad integram ejus recompensationem compelli potest, prout habetur cit. cap. ult. De injuriis & damno dato: ibi: Si culpa tua datum est damnum, vel injuria irrogata, seu aliis irrogantibus opem forte tulisti, aut hac imperitia tua sive negligentia evenerunt, jure super his satisfacere te oportet: nec ignorantia te excusat, si scire debuisti, ex facto tuo injuriam verisimiliter posse contingere vel jacitura. Concordat Jus Civile l. 2. & seqq. ac præsertim l. 4. ff. Ad Legem Aquilianam. ibi In Lege Aquilia & levissima culpa venit.

91 Verum hæc Leges, seu nimis rigide, & in Foro animæ vix practicabiles in hoc cum tanto rigore non videntur receptæ, ac proinde in Foro conscientiae, ante condemnationem Judicis, ad nihilum obligatus esse censetur, qui absque culpa Theologica, sive peccato injuriæ per culpam civilem dumtaxat æstimatam fuit causa cujuspiam damni subsecuti, nullo præcedente contractu. Siquidem fini dictarum Legum, nec non & boni communis emolumento abunde satisfacit, sufficienterque providetur, eo quod prædictæ personæ in Foro externo, & post sententiam Judicis etiam in Foro conscientiae ad damnum resarciendum obligentur.

92 Dices. Si talis non tenetur in conscientia ante sententiam Judicis; ergo neque post ipsam tenebitur, quin potius ejusmodi sententia erit injusta. Resp. negando consequentiam: nam, cum ejusmodi Leges, volentes resarciri damnum etiam ex culpa levi, atque levissima datum, justissimis de causis, atque intuitu totius boni communis latæ fuerint; partim, ut quilibet amplius invigilet, ne sua vel suorum culpa damnum aliquod Proximis inferatur, sicque pax communis, & publica civium quies, atque indemnitas suorum conservetur; partim, ut præcaveatur innumeris fraudibus, & malitiis hominum, quæ in Foro externo sunt difficilioris probationis, sententia Judicis conformiter dictis Legibus lata merito etiam in Foro conscientiae obligat, non obstante, quod ante eam necdum adfuerit talis obligatio resarciendi damnum ex culpa mere Civili levi, vel levissima, & sine omni culpa Theologica illatum.

Additio.

\* Instabis. Culpa civilis lata obligat ante sententiam Judicis: ergo etiam culpa levis, ac levissima. Resp. neg. consequentiam & paritatem. Disparitas est; quia saltem ordinariè culpa Civilis lata solet esse conjuncta cum culpa Theologica gravi, prout jam supra n. 87. ex parte insinuatum fuit; non sic culpa levis, vel levissima. Quod si tamen ponas casus quosdam extraordinarios, in quibus culpa lata civilis e. g. ob naturalem inconsiderantiam aut ignorantiam invincibilem cum culpa Theologica conjuncta non fuit, in simili emergentia (quæ tamen fortassis ordinariè non contingit) negat P. Pichler lib. 5. Juris prudentiæ sacræ. tit. 36. n. 15. adesse obligationem in Foro conscientiae reparandi ante sententiam Judicis damnum datum ex culpa lata mere Juridica absque Theologica ob paritatem rationis; quia etiam tale damnum coram Deo est involuntarie, & quasi casu fortuito datum. \*

93 CONCL. VI. Loquendo de obligatione restituendi ex damno in officio dato, nemo tenetur in Foro conscientiae ad reparandum damnum ex culpa dumtaxat levi aut levissima in officio commisso, sed ex culpa lata, quæ Theologica sit gravis & mortalis. Ita Lessius lib. 2. cap. 7. n. 31. & alii. Ratio est, quæ supra: nemo enim tenetur in officio suo esse diligentior, doctior, ac prudentior, quam ejusmodi homines passim esse solent.

94 Inferitur proinde, quod Magistratus, Medicus, Advocatus, Architectus, & ejusmodi Officiales in Foro conscientiae immunes sint a culpa atque obligatione restituendi, si eam habeant, adhibeant que doctrinam, prudentiam, ac diligentiam, quæ passim aliis ejusmodi officii communis est. Unde, si contingat, Advocatum cadere causa, eo quod non præstiterit, quod doctissimus & diligentissimus præstitisset, fecit tamen bona fide, quod solent diligentes & docti in similibus præstare, non tenetur ad aliquam Restitutionem. Idem dicendum de Medico, Architecto, Magistratu, & aliis hujusmodi.

95 Excipe tamen, nisi quis ad extraordinariam diligentiam sese obligasset, profitendo se diligentiorum ac peritiorum aliis, & hac ratione eum, qui talem quærebat, ad se pertraxisset; tunc enim tenetur ex culpa levi, & levissima, secundum quantitatem culpæ: quia eo ipso summa diligentia, saltem implicite, deducta fuit in pactum.

96 Tandem, quæ sit obligatio restituendi ex Contractu v. g. Commodati, Depositum &c. superius (i) in proprio loco dictum est.



## QUÆSTIO VI.

De causis excusantibus a Restitutione, vel omnino, vel ad tempus.

## SUMMARIUM.

- 97 *Causæ excusantes a Restitutione variæ.*  
 98 I. *Impotentia, seu inopia debitoris.*  
 99 *Per hanc suspenditur, non autem extinguitur obligatio restituendi.*  
 100 *Limitatur in casu extremæ necessitatis.*  
 101 *Nisi quis alienum ante eam accepisset.*  
 102 *Aut res ablata post eam adhuc extaret.*  
 103 *Gravis necessitas dat facultatē differendi Restitutionem.*  
 104 *Regula duæ circa hoc.*  
 \* *Notabilis objectio solvitur.*  
 105 *Quid, si creditor sit in pari necessitate?*  
 (k) *Vide dicta superius n. 10. & seqq.*  
 106 *Quid, si quis statum suum acquisivit injuste v. g. per rapinas, usuras &c.*  
 \* *Quid, si necessitas gravis daret in perpetuum? Addit. I. & II.*  
 107 II. *Periculum infamiae, vitæ vel membrorum.*  
 108 *Quid, si possit fieri Restitutio per alium?*  
 109 *Cautela circa hoc servanda.*  
*Et quid juris, si alter defraudet?*  
 110 III. *Condonatio creditoris.*  
 111 *Quæ conditiones ad eam requirantur?*  
 112 *Sufficit quandoque remissio rationabiliter præsumpta.*  
 113 *Regula circa hoc.*  
 114 *Aliud notabile.*  
 115 IV. *Si res restituenda sit creditori nocitura.*  
 116 V. *Præscriptio.*  
 (l) *Ut dictum Tract. 7. Dist. 5. n. 5. & seqq.*  
 117 VI. *Compensatio.*  
 118 *Conditiones ad occultam compensationem, ut sit licita, requisitæ.*  
 119 VII. *Cessio bonorum, & quid juris hæc tribuat?*  
 120 *Aliæ causæ excusantes a Restitutione generatim.*  
 121 VIII. *Ignorantia, quod res sit aliena.*  
 122 *Et hæc alia facti, alia juris.*  
 123 IX. *Dubium, & quando?*  
 124 *Tacentur aliæ.*

97 **C**ausas excusantes a Restitutione plures adducunt Doctores, adeo ut Lessius lib. 2. de J. & J. cap. 16. n. 1. post Jo. Medinam enumeret duodecim, Gregorius a Valentia quindecim, & Reginaldus lib. 1. cap. 13. n. 250. sedecim adducat. Earum principales sunt, quæ sequuntur.

98 Prima causa excusans a Restitutione est *Impotentia*, seu inopia debitoris. Hæc ab omnibus Doctoribus admittitur; & ratio clara est, quia ad impossibile nemo tenetur. Unde D. Augustinus, relatus can. Si res aliena. 14. q. 6. notanter ait: *Non remittitur peccatum, nisi restituatur ablatum: sed, ut dixi, cum restitui potest. Plerumque enim, qui aufert, amittit, sive alios patiendo malos, sive ipse male vivendo: nec aliud habet, unde restituat. Huic certe non possumus dicere: Redde, quod abstulisti.* Hæc S. Augustinus.

99 Circa quod Notandum I. cum communi, per dictam Impotentiam, seu inopiam debitoris suspendi quidem obligationem restituendi, non autem penitus extinguui. Unde excusat non omnino, sed dumtaxat ad tempus, quamdiu videlicet durat illa impotentia: nam quando quis est impotens, pro tunc quidem non tenetur, cum restituere non possit: tenetur tamen postea, si ad pinguiorem fortunam, pervenerit, prout habetur c. Odoardus. de Solution.

100 Excipitur tamen is, qui in extrema necessitate quidpiam accepit, atque consumpsit, ut puta panem, vel aliud quidpiam ad victum, vitamque conservandam necessarium; talis enim, juxta satis communem Doctorum, non tenetur restituere, etiamsi postmodum perveniat ad pinguiorem fortunam. Ratio est: quia in extrema necessitate sunt omnia communia; ergo accipiens, & con-

sumens alienum in actuali extrema necessitate constitutus, re ipsa alienum non consumpsit, sed id, quod sibi cum altero tunc erat commune: & consequenter ea necessitate transacta ad nihil tenetur alteri ex Justitia.

101 Dicitur notanter, accipiens, & consumens alienum in actuali extrema necessitate: nam, si quis alienum accepit ante illam extremam necessitatem, non liberatur ab obligatione deinceps, postquam devenit ad pinguiorem fortunam, reddendi æquale: quia ista obligatio ortum habuit ab illa injusta acceptione, quæ per supervenientem extremam necessitatem non est extincta, sed sopita. Scotus 4. dist. 15. quest. 2. ad 5.

102 Deinde, si res ablata non fuerit consumpta in ipsa necessitate, sed post eam adhuc extet, tenetur quis eam reddere. Unde accipiens equum alterius, ut manus inimicorum evadat, vitamque salvet, cessante hoc periculo tenetur equum restituere: nam ad illam necessitatem sublevandam non fuit necessarius ipsemet equus, sed solum usus ejus; & consequenter, cum res adhuc extet in specie, oportet eam reddere: quia extrema necessitas non tribuit jus ad amplius, nisi quantum opus est ad eam superandam. Lessius lib. 2. cap. 16. n. 3. & communis.

103 Notandum II. Conformiter Scoto cit. quest. 2. §. De quinto scilicet &c. paucis hanc materiam subtiliter pertractanti, quem alii communiter sequuntur, quod necessitas non solum extrema, quando, si debitor restituat, fame v. g. periturus est, sed etiam gravis, quando, si restituat, vitam difficulter sustinebit, vel statu suo juste, & non per rapinam, vel usuras, neque per alia media illicita acquisito excidet, facultatem præbeat saltem differendi Restitutionem, aut paulatim & per partes restituendi. Ratio est: quia quilibet rationabiliter subdit Scotus) debet magis velle, quod vitetur magnam incommodum proximi restituentis, quam modicum incommodum suum, vel nullum in illa modica dilatione restituentis. Hæc ille.

104 Notandum III. Quod ad propositum nostrum, & conformiter Doctori subtili loc. cit. duæ passim a Doctoribus ponantur regulæ generales, quas refert Layman lib. 3. tract. 2. cap. 12. n. 1. Prima est: *Nemo tenetur restituere cum suo notabiliter majore detrimento, quam sit creditoris incommodum.* Secunda: *Quotiescunque dominus sive creditor rationabiliter contentus esse debet, ut restitutio differatur, potest differri, quamvis ille invitus sit.*

## Additio.

\* Dices: Censetur Dominus rationabiliter invitus, si alter ob gravem necessitatem, quam patitur, aut ne cadat a statu, rem aliquam Domino occulte aufert; ergo etiam censetur is rationabiliter invitus, si talis fur ob gravem, quam patitur, necessitatem rem semel injuste ablatam retinet: nam rei alienæ retentio censetur ipsamet continuata ejusdem rei ablatio, & consequenter sicut non licet ob gravem necessitatem rem alienam auferre juxta communissimam sententiam (quoniam contraria Propositio ab Innocentio XI. ordine 36. damnata videtur, quæ sic sonabat: *Permissum est furari non solum in extrema necessitate, sed etiam in gravi*) ita nec licebit eandem rem alienam semel injuste ablatam retinere, ejusque Restitutionem ad tempus differre ob gravem aliquam necessitatem &c. Antequam ad hanc objectionem meo judicio speculative satis difficilem respondeam, Nota I. Quod furari sit præcise contra aliquod præceptum negativum, nimirum contra illud: *Non furtum facies*; econtra vero retinere rem alienam equidem etiam ex una parte pugnet contra dictum præceptum negativum, interea tamen ex alia parte saltem secundoario opponatur simul præcepto affirmativo, nimirum huic *restituere*, id est, exercere actionem positivam Restitutionis. Nota II. Præcepta pure negativa magis obligare, quam illa, respectu quorum etiam includuntur præcepta affirmativa, uti per exempla ostendit Card. de Lugo de J. & J. d. 13. n. 51. & ratio est: quia præcepta negativa facilius observari possunt, quam affirmativa, cum priora præcise non agere, posteriora vero agere præcipiant: facilius autem utique sit non agere, quam agere? H.

N. Resp. Ad hanc objectionem negando consequentiam & paritatem: disparitas est; quia furari præcise pugnat contra



contra illud præceptum negativum *non furtum facies*, quod, dum facilius observari valet, etiam magis seu in pluribus circumstantiis obligat: contra vero *retinere illam rem alienam*, etsi juxta multos Doctores principaliter etiam opponatur prædicto præcepto negativo, pariter tamen est præterea etiam contrarium alicui præcepto affirmativo, nempe huic *restituere*, quod tamquam difficilius eo ipso etiam censetur non in tam frequentibus circumstantiis, quam alterum præcise, & solummodo negativum obligare; ob quam ipsam rationem, etsi aliquis nequeat Petro v. g. rem suam auferre ob periculum diffamationis apud alios, potest tamen ex communi DD. & conformiter dicendis inferius rem semel Petro ablatam retinere ad tempus ob idem periculum diffamationis. Unde finaliter etiam falsum est, quod, si adsit vere gravis necessitas, ob quam Restitutio differtur, pro tunc illa retentio rei alienæ ad tempus sit vere continuatio NB. *injusta ablationis*; seu falsum est in simili emergentia, quod dicta retentio dici queat *injusta continuata ablatio*. \*

105 Ceterum prædicta doctrina, asserens, necessitatem gravem in sensu explicato excusare a Restitutione, quædam patitur limitationes. Et primo quidem ea intelligenda est, nisi creditor sit in pari necessitate: quia tunc tenebitur quis ei restituere, juxta communior sententiam. Ratio est: quia in pari necessitate, & causa, potior est conditio creditoris, quam debitoris, multoque magis melior debet esse conditio innocentis, quam nocentis, si debita ex delicto sunt contracta. Excipiunt quidem nonnulli extremam necessitatem, in qua (inquunt) melior est conditio possidentis, cum omnia tunc sint communia: sed de hoc ipso Doctor noster ibidem, & quidam alii non immerito dubitant ob rationes allatas, quæ fortius urgent, quando & ipse creditor rem adhuc, saltem civiliter, possidet. (k)

106 Limitatur ulterius data doctrina, dum nudo quis statum illum iuste, & non per rapinas, vel usuras, neque per alia media illicita acquisiverit; quia, si quis rapinis, usuris, aut similibus fraudibus ad aliquem honorabilem statum pervenisset, teneretur etiam cum ejus amissione statim restituere. Ratio est: tum quia *fraus & dolus alicui patrocinari non debent. c. Sedes, &c. Ex tenore De Rescriptis*: tum quia hoc non est tam statum suum admittere, quam alienum dimittere, & ad suum reverti. Verumtamen hoc ipsum intelligendum est, nisi debitor ille passim habeatur vir probus & honestus, ita ut non possit subito statum suum mutare, nisi de suis fraudibus se infamet; tunc enim sensim posset restituere, quia periculum infamiae excusaret, ne statim teneretur, ut dicitur inferius.

#### Additio I.

\* Ast ponamus, quod superius n. 103. descripta necessitas gravis, vel in proxime allegato casu periculum gravis infamiae, sive etiam alia gravis causa, quæ alias concedit dilationem Restitutionis ad aliquod tempus, durent ex parte debitoris in perpetuum, excusabiturne nihilominus talis debitor a facienda Restitutione? Ad hoc dubium la Croix lib. 2. Theolog. Moral. part. 2. n. 431. respondet, uti sequitur: *si talis necessitas aut impedimentum grave Restitutionis futurum esset perpetuum, certum est, debitorem teneri intra statum suum quam parcissime vivere vel saltem, quantum moraliter possibile, per vires restituat partes debiti. Fatetur tamen Lugo D. 21. a n. 9. Et idem videntur insinuare alii apud Layman lib. 3. tr. 2. cap. 22. n. 1. agnoscitque probabile illiusque, Debitorem talem etiam in perpetuum excusandum si damnum a Debitore subeundum esset notabiliter (Et quidem meo judicio valde notabiliter) majus damno creditoris Hucusque la Croix, cui videtur assentire Sporer tract. 4. in Decalog. c. p. 4. sect. 3. §. 4. n. 69. sic e. g. si quis Petro valde diviti mercatori abstulit 50. aureos, quos nequit restituere absque certo periculo gravis infamiae, utique tamdiu excusatur a Restitutione, quamdiu durat hoc periculum, etsi perseveraret illud usque ad mortem suam. Etenim supposito, quod non idem periculum gravis infamiae subeat Petrus creditor ex carentia horum 50. aureorum) videtur in simili casu Petrus creditor irrationabiliter invitus, ac contra legem Charitatis, si vellet in tali-*

bus circumstantiis nihilominus alterum obligare ad difficultissimum actum positivum Restitutionis. Idem dic, si iter per Restitutionem talium 50. aureorum deberet omnino & cum gravissimo suo damno decedere a statu suo, alias iuste acquisito. \*

#### Additio II.

\* Quod si urgeas ulterius, quid ergo tali, apud quem causa differendi Restitutionem durat in perpetuum, ulterius sit agendum? Resp. sub distinctione: vel enim causa illa concedens licentiam differendi Restitutionem est ipsa gravis necessitas debitoris, vel alia, puta periculum gravis infamiae alias per Restitutionem incurrendæ? Quod si posterius, tunc debitor talis, præsertim si fur extiterit, & secure præviderit, impedimentum Restitutionis fore perpetuum, tenetur debitum illud, si neque per tertium v. g. per Confessarium citra periculum gravis infamiae restituere posset, erogare pauperibus, aliisve causis piis; cum exinde non redigatur ad paupertatem, nec adstringatur propterea decedere a suo statu iuste quæsito, prout suppono. Contra verò si illa, causa concedens licentiam differendi Restitutionem fuerit ipsa gravis necessitas debitoris alias per Restitutionem incurrendæ, puta, si deberet exinde decedere statu suo iuste quæsito, tunc poterit sibi tamquam pauperi tantum reservare, quantum supposita prius retractione splendoris nimii status &c. in Domino fuerit judicatum necessarium ad honestam adhuc conservationem status, vel ne deveniat in notabilem ac valde sensibilem paupertatem: residuum tamen tenetur reddere domino, aut in ejus defectum pauperibus, aliisve causis piis. Bonum præterea erit meo judicio, si tali debitori pauperi, ut magis adhuc recordetur præcedentis suæ obligationis, insuper injungantur certæ preces, aliæve bona opera persolvenda pro domino. Videantur la Croix lib. 3. Theol. Moral. part. 2. n. 365. ac seqq. & præsertim n. 425. ac Sporer Tract. 4. in Decalog. cap. 4. sect. 3. n. 73. qui ulterius adhuc pro consolatione Confessorum, & praxi subjungit, quod minus gravis necessitas, ac minus damnum debitoris sufficiat ad differendam Restitutionem, si debita fuerint incerta, quam si fuissent certa. Dicuntur autem debita incerta, quæ non alicui determinato domino, vel saltem non cognito obstruuntur, quæ sunt, quæ incurruntur apud Beneficiatos ob intermissum Breviarium, vel ab illis, qui per furta minuta in ulnis, mensuris, aut ponderibus commissa fuerunt, diversos ignotos confluentes emptores, singulos minutim, decipiendo. \*

107 Secunda causa, excusans a Restitutione, & ex parte jam superius indicata, est *Periculum infamiae*, & multo magis *vite*, vel *membrorum*: nam ob tale periculum posse differri Restitutionem, donec ejusmodi periculum cesset, passim tenent Doctores. Ratio est: quia bona ordinis inferioris non sunt necessario restituenda cum detrimento bonorum ordinis superioris. Hinc enim communiter docetur, utpote fundatum in ratione naturali, quod magis diligenda sint bona animæ, quam corporis, deinde magis bona corporis, quam famæ, & tandem magis bona famæ, quam fortunæ, juxta illud Proverb. 22. *Melius est nomen bonum, quam divitiæ multe*, cum concordantiis.

108 Circa hoc tamen recte observat D. Th. 2. 2. qu. 62. art. 6. ad 2. & sequuntur alii, quod, qui non potest per se ipsum restituere absque detrimento famæ, vel corporis (v. g. rem clam reponendo in loco debito ac securo, ut ad dominum perveniat possit autem sic restituere per aliam personam secretam & fidelem, utputa per suum Confessarium, id faciendum esse. Ratio est: quia, si hoc modo poterit fieri Restitutio absque periculo famæ (atque etiam vite, & membrorum) ex una parte cessant rationes differendi Restitutionem: ex altera vero parte urget præceptum restituendi, quamprimum fieri poterit.

109 Ceterum monet Navarrus c. 17. Manual. num. 67. post S. Antonium, caute hoc esse practicandum, & consultum fore, quod per illam personam intermediam petatur syngrapha a creditore, in qua is constetur, se accepisset tantum summam per N pro solutione ejus, quod



alius (sine huius nominis expressione) sibi debebat, eaque schedæ postmodum debitori, sive pœnitenti clam reddatur. Ratio huius cautelæ est: quia, si quis in genere debeat quidpiam restituere, v. g. decem florenos, vel etiam aliquid injuste acquisitum in specie, ut puta torquem auream furto sublatam, idque committat personæ intermediæ, quam fidelem existimavit, v. g. Confessario, ad restituendum, sed ea defraudet, vel aufugiat, non cessabit obligatio primi debitoris. Lessius *cit. c. 6. dub. 6. Laymari n. 9.* & communior aliorum. Nam si res fuit indeterminatè debita v. g. pecunia decem florenorum, ea, si casu pereat, perit domino suo, qui in proposito est debitor. Quod si vero debeat res quæpiam in specie, quæ fuerat injuste acquisita (secus, si iuste fuisset obtenta, ut puta inventa) tunc intercessit culpa, sicque, qui rem ejusmodi surripuit, tenetur de casu ejus fortuito, eo quod apud dominum non ita perisset.

110 Tertia causa excusans a Restitutione est *Condonatio creditoris*. Hæc, si fiat cum debitis conditionibus, excusat a Restitutione juxta omnes. Ratio est: quia, cum creditor sit dominus suæ rei, potest is cedere juri suo, illudque debitori remittere, & donare, quo facto expirat obligatio Restitutionis.

111 Dicitur, si fiat cum debitis conditionibus: nam ad hoc ex communi sententia requiruntur sequentes tres conditiones. Prima est, ut hæc remissio, seu Condonatio sit omnino libera, hoc est, non extorta metu gravi, vel fraude. Secunda, ut is possit condonare. Tertia, ut talis Condonatio non sit a Jure prohibita, sive quod Jus non resistat Condonationi.

112 Circa hoc punctum advertit Lugo *disp. 21. de Just. & Jure sect. 4 n. 52.* quod, sicut sufficit remissio creditoris expressa, sic etiam possit ejusdem remissio, & voluntas rationabiliter præsumpta excusare debitorem a Restitutione, vel saltem a statim facienda. Hinc ibidem *n. 53.* advertit post Molinam, excusari posse a peccato mortali aliquando domesticos, qui aliqua surripiunt, invito quidem domino quoad modum surripiendi occulte, & sine licentia, non tamen quoad substantiam rei acceptæ: quia, licet dominus sit invitus circa talem acceptionem, postquam res consumpta est, aliquando non est invitus quoad retentionem.

113 Unde regula generalis colligi potest (subdit idem Lugo) ad excusandos plures pœnitentes a Restitutione, quando scilicet putant, quod, si per se, vel per alios manifestarent domino suum debitum, ipse liberaliter condonaret, & nollet obligare ad Restitutionem: jam enim datur voluntas præsumpta domini sufficiens, ut retentio non fiat invito domino quoad substantiam rei.

114 Advertit ulterius citatus Auctor *num. 54.* communem satis esse sententiam, quæ dicit, non esse furtum grave, quando aliquis accipit rem non petitam, quam, si petisset, dominus dedisset. Quod alii extendunt etiam ad eum casum, quando domino displicet modus ille accipiendi sine licentia, dum tamen non displiceat substantia; pro quo utroque asserto plures ab ipso allegantur Doctores. Verumtamen hi passim notant, allatam doctrinam non habere locum, quando dominus non concederet rem ad illum usum: ut si dominus concederet quidem aliquid libenter ad comedendum: tu autem accipias ad vendendum, ad quod dominus etiam rogatus non concederet.

115 Quarta causa excusans a Restitutione est, si res restituenda sit creditori nocitura; tunc enim ejus Restitutionem esse differendam ex motivo Charitatis, nec statim fieri debere, donec periculum talis nocimenti cessaverit, fatentur omnes Doctores. Solet hoc vulgari exemplo declarari. Si quis v. g. apud alterum armal, vel gladium suum deposuit, & postmodum factus insanus eadem repetit, ut aliquem occidat, vel lædat, in tali casu Depositarius non tenetur mox gladium restituere, sed oportet ejus Restitutionem differre.

116 Quinta causa est *Prescriptio*; hæc enim, postquam bona fide, ac tempore a legibus definito, aliisque debitis concurrentibus conditionibus jam absoluta est, non solum in Foro externo, sed etiam in Foro conscientie vim

habet excusandi debitorem a Restitutione, adeo, ut, licet postmodum certo constet, rem fuisse alterius, eam amplius restituere non teneatur. (1)

117 Sexta causa excusans a Restitutione est *Compensatio*: si videlicet quis abstulit quidpiam ab eo, qui tantumdem sibi tenebatur solvere. Verumtamen sciendum, quod huiusmodi occulta Compensatio in Foro conscientie non sit licita, nisi concurrentibus sequentibus conditionibus.

118 I. Ut debitum sit certum; id est, ut moraliter constet, rem esse tuam, aut tibi ex Justitia deberi: nam in dubio melior est conditio possidentis, sicque non licet mediante occulta Compensazione alterum privare sua possessione. Insuper non licet uti occulta Compensazione, si res illa non est debita ex Justitia, sed solum ex gratitudine: nam hæc non inducit strictè & proprie dictum debitum. II. Ut non possis rem illam alia ratione recuperare, vel saltem non absque notabili molestia, aut expensis, vel amissione favoris aut benevolentie, sive iectura honoris: ut si debitum quidem sit certum, sed tibi desint probationes, tunc enim locus erit occultæ Compensationi. III. Ut non fiat Compensatio in re alterius, sed in re ipsius debitoris: nam Compensatio non aliunde, sed ex bonis debitoris fieri debet; alioquin tertius injuste gravaretur. IV. Ut in Compensazione non plus accipiat, quam debetur: alioquin excessus ille foret contra Justitiam, sicque in conscientia restituendus. V. Ut attendat, quatenus absit grave periculum scandalis, ne videlicet Compensatio ista alicui alteri cum gravi suo præjudicio, ac damno imputetur tamquam Furtum; item, ut absit periculum infamie, ne talis deprehensus tamquam fur habeatur, & puniatur, nam Judices solent tales Compensationes punire ut furta, præsertim si debitum non possit liquido probari. Bonacina *Tom. 2. disp. 1. de Restitut. quest. ult. punct. 2. n. 10. & seqq.* Lessius *lib. 2. cap. 12. n. 57.* & alii. Videri etiam desuper poterit Jus Canonicum *Lib. 3. tit. 23. §. 2.*

119 Septima causa a quibusdam assignatur *Cessio bonorum*, qua debitor ea relinquit creditoribus. Verumtamen recte inter alios notat Navarrus *cap. 17. Manual. n. 86.* quod, quamvis Cessio bonorum in Foro externo excuset quoad debita ex contractibus orta, ne debitor propter ea possit conjici in carcerem, vel ulterius a creditoribus molestari, *arg. l. 1. C. Qui bonis cedere &c.* & quoad nonnullos alios effectus: nihilominus in Foro conscientie non magis excuset Cessio bonorum, quam necessitas sine Cessione excusaret. Unde post Cessionem sunt cedenti suæ artis instrumenta, & aliqua ad victum judicio boni viri necessaria relinquenda *l. Qui bonis. ff. De cessione bonorum*, quæ tamen etiam sine Cessione retineri possunt, cum nemo pro facienda Restitutione teneatur se spoliare necessariis vitæ, ita ut mendicare cogatur.

120 Præter has principales causas, quæ excusant ab obligatione Restitutionis, vel omnino, vel ad tempus, dum constat, certam alioquin adesse obligationem restituendi, dantur variæ aliæ, quæ in tantum excusant, quatenus vel non constat, hic & nunc adesse obligationem restituendi, ut sit, quando ignoratur, vel rationabiliter dubitatur, num res, quam quis possidet, sit aliena, nec ne; vel quia ob varias circumstantias sit, quod revera obligatio restituendi hic & nunc non incurratur: ut, si quis accipiat alienum in extrema necessitate, vel si quis inferat damnum hostibus, ex eisdem prædam agat in bello justo, & alia huiusmodi plura, quæ ex propriis locis erunt desumenda. Itaque loquendo solum de prioribus,

121 Octava causa excusans a Restitutione est *Ignorantia probabilis vel invincibilis juris, aut facti, quod res sit aliena*. Nam talis ignorantia excusat a peccato; ergo etiam a Restitutione. Porro, quantum ad propositum,

122 *Ignorantia probabilis, vel invincibilis facti* est illa, qua quis probabiliter, vel ex errore invincibili existimat, rem esse suam, quæ revera non est sua: prout fieret, si quis bona fide rem alienam per hæreditatem acquisivit. *Ignorantia juris* est, qua ignoratur, quid sit juris: quando v. g. jus est obscurum, & controversum de aliquo contractu, num sit licitus, nec ne; vel quando quis consultavit viros doctos super



super obligatione restituendi, qui respondent, nullam adesse obligationem, cum tamen revera a parte rei subsit, tunc enim sequens eorum responsum ignorantia juris laboraret.

123 Nona causa excusans a Restitutione est *Dubium*, quod possidens post adhibitam sufficientem diligentiam in investigando, num res sit sua vel alterius, adhuc habet: siquidem in dubio melior est conditio possidentis juxta *Reg. 65. Juris, in 6.* Proinde talis vi hujus rationis licite potest retinere rem, quamdiu dubitat, num res illa sit sua, vel alterius. Et hoc ipsum extendere oportet ad dubium circa injustam damnificationem subortum: unde *Lessius lib. 2. cap. 13. n. 38.* asserit, communem ferme Doctorum sententiam esse, si quis solum dubitet, an causa damni fuerit, v. g. an alios suo consilio, vel laude efficaciter promoverit ad damnum inferendum, nec ne, talem non teneri ad Restitutionem: cum in dubio melior sit conditio possidentis.

124 Plures aliæ causæ, veluti excusantes ab obligatione restituendi adducuntur a Doctoribus, ut dictum n. 97. sed præmissæ sunt principales: ceteræ vero vel minus ad praxin conducunt, vel rarius occurrunt, quas proinde huc adducere non est necesse.

## DISTINCTIO VI.

### De Octavo Præcepto Decalogi.

#### QUESTIO I.

#### De Detractione, & variis ipsam concernentibus.

#### SUMMARIUM.

- 1 Octavo Decalogi Præcepto quæ prohibeantur?
- 2 Honor, & fama differunt, quomodo?
- 3 Detractio, quid?
- 4 Detractio quibus modis fieri possit?
- 5 Ejus gravitas.
  - (a) Conformiter dictis Tract. 3. Dist. 2. num. 15.
- \* Magis exemplificatur, & exinde varia Corollaria inferuntur. Addit. I. & II.
- 6 Detractio formalis, & materialis, quid?
7. 8. 9. 10. Casus aliqui, in quibus licitum est, manifestare crimen, vel defectus Proximi.
  - (b) Tract. 4. Dist. 6. quæst. 5.
  - (c) Ut dictum cit. Dist. 6. n. 52.
- Ratio horum generalis.
- 11 Crimen falsum cupiam imponere semper est illicitum.
- 12 Solvitur objectio.
- 13 Utrum audita referens absque asseveratione, & sub dubio peccet mortaliter?
- 14 Idcirco est rara fides &c.
- 15 Tamen periculosum est talia referre & quale id peccatum?
- 16 An, qui detractorem audit, peccet mortaliter?
- 17 Quid, si ei Detractio non placet, tamen non resistit?
- 18 Quid, si commode resistere nequeat?
- 19 Detractori quomodo resistatur?

**O**ctavum Præceptum Decalogi *Exodi cap. 20. & Deuter cap. 5.* hisce verbis comprehenditur: *Non loqueris contra Proximum tuum falsum testimonium*: eoque juxta communem Doctorum sententiam prohibetur omnis injustitia & injuria, quæ Proximo verbis inferri potest: ut sunt Detractio, Contumelia, Convitium, Irrisio, Sufurratio, Mendacium, & hujusmodi, quæ sub falso testimonio contra Proximum tamquam sub principaliori comprehenduntur, ut notat D. Thomas 2. 2. qu. 122. art. 6. de quibus proinde breviter in hac Distinctione tractandum erit, incipiendo a Detractione: cujus natura ut exactius intelligatur.

2 Advertendum est, quod, quamvis Honor, & Fama quandoque sumantur pro eodem, revera tamen differant. Nam *Fama bona* est communis opinio virtutis, sapientiae, & rerum præclare gestarum alterius: *Honor* autem est te-

stimonium excellentiæ alterius. Item *Fama* consistit in interiore opinione, &, dum exit in opus externum, dicitur *Laus*, vel (loquendo de mala fama) *Vituperatio*: *Honor* vero consistit in externa significatione nostræ estimationis de excellentia alterius: unde supponit opinionem excellentiæ ipsius, & intentionem exterius per aliquod signum eam testificandi: quod si deesset ejusmodi opinio excellentiæ, atque intentio exterius eam testandi, potius foret illusio, quam honor. Hoc prænotato, sit

3 CONCL. I. Detractio est alienæ famæ occulta & injusta læsio, seu denigratio. Ita in re communis. Duo quippe requiruntur ad Detractionem. Primo, ut aliquid dicatur, quod injuste alterius famam, quam possidet, in animo Proximi extinguere, aut minuire valeat. Deinde, ut fiat occulte, id est, non præsentem illo, cui detrahitur, saltem juxta intentionem dicentis, si quis enim in præsentia alicujus, famæ ejusdem detrahere intendat, jam non erit simplex Detractio, quæ directe lædit famam, sed Contumelia honorem alterius in coram violans.

4 CONCL. II. Detractio potest fieri dupliciter directe videlicet, & indirecte. Ita D. Thomas 2. 2. qu. 73. art. 1. ad 3. & alii. Directe quidem fit Detractio quatuor modis. I. Imponendo crimen falsum. II. Amplificando, seu exaggerando crimen verum. III. Pandendo crimen occultum. IV. Sinistre interpretando opus bonum alterius, dum scilicet quis coram aliis factum alterius sinistre interpretatur. Indirecte etiam contingit Detractio quatuor modis. I. Negando recte facta, vel doces alterius. II. Ea extenuando. III. Tacendo bona alterius eo loco, & tempore, quo tuum silentium alii interpretantur tacitam vituperationem. IV. Simulate, & figne laudando, ut quando quis simulat, se velle laudare aliquem, & tamen nihil affert laude dignum. Omnes isti octo modi detrahendi succincte comprehenduntur sequentibus duobus versibus:

*Imponens, augens, manifestans, in mala vertens,  
Qui negat, aut minuit, reticet, laudatque remisse.*

5 CONCL. III. Detractio sive viventi, sive jam mortuo facta ex genere suo est peccatum mortale contra Justitiam, gravius quidem furto, sed levius homicidio. Ita Doctores communiter, & ratio est, quia lædit Proximum in bono plurimum gravi, quodque præstantius est pecunia, juxta illud *Proverb. 21. Melius est nomen bonum, quam divitiæ multæ.* Item *Ecclesiastici 41. Caram habe de bono nomine: hoc enim magis permanebit tibi, quam mille thesauri pretiosi & magni.* Unde & Poëta canit:

*Omnia si perdas, famam servare memento.*

Dicitur notanter in Conclusionem, ex genere suo: siquidem Detractio sæpe est peccatum dumtaxat veniale, vel ob levitatem materiæ, vel ob imperfectionem actus. (a)

#### Additio I.

\* Materia autem levis in præsentem illa læsio censetur, quæ, consideratis circumstantiis, prudentum judicio solummodo vim habet similis conditionis homines defecto leviter contristandi, seu levem tantummodo dolorem causandi. Quod si vero læsio foret talis, quæ consideratis simul confluentibus circumstantiis jure merito potest etiam judicio prudentum similis conditionis homines graviter contristare, ac amicitiam inter eos dissolvere, talis læsio censeretur materia gravis. Et licet regulariter, ac ordinarie loquendo, quando Confessarius dubitat, num hæc vel illa læsio in particulari habeat vim judicio prudentum graviter vel leviter contristandi, sicque num læsio sit gravis vel levis? possit regulariter teste *Sporer tr. in Decalog. cap. 4. sect. 3. nu. 57.* se resolvere, quod peccatum grave occultum de altero absque sufficienti causa revelatum habeat vim graviter contristandi, econtra vero peccatum leve revelatum tantummodo eundem juxta prudentum judicium soleat leviter contristare; dantur tamen subinde ob certas confluentes circumstantias casus speciales, respectu quorum etiam grave



grave peccatum occultum ex judicio prudentum habeat solummodo vim leviter contristandi, econtra vero peccatum leve, vel etiam præcise defectus naturales occulti revelati ea vi sint præditi, ut possint merito etiam ex judicio prudentum graviter contristare; sic juxta communem DD. revelare de plebejo maxime in Germania, quod plene se nupero festo inebriaverit, de milite, quod duellaverit, de juvene rustico, vel pariter de milite, quod habeat amasiam &c. non censetur gravis Detractio, adeoque ordinarie nec peccatum grave in genere Detractionis. Econtra vero de Viro valde gravi dicere passim, quod sit levibus mendaciis deditus, reputatur gravis Detractio. Ratio utriusque est; quia prima revelatio apud similis conditionis homines non solet causare gravem tristitiam; quinimo non raro hi similibus gloriantur: econtra vero de Viro valde gravi manifestare, quod sit deditus mendaciis, merito apprehenditur etiam a prudentibus tamquam aptum, gravem in ejusdem animo causandi tristitiam. \*

*Additio.*

\* Ex hac Doctrina inferes I. Manifestare aliquem esse luscum, gibbosum, duri ingenii &c. communiter non esse materiam gravem, quæ constitueret peccatum mortale; partim, quia sunt defectus præcise naturales, & quidem ordinarie de se brevi patentes, ac citra aliquam culpam graviter infamatoriam regulariter contracti; partim, quia communiter alteri revelatio de his non est multum præjudiciosa, aut fit patefactio ex gravi causa.

Nec dicas. Ergo pariter non erit materia gravis, si quis alterum, qui occulte laboraret morbo gallico, manifestaret, cum etiam hic defectus sit naturalis. Respond. enim neg. illatum: etsi enim pariter hic defectus sit naturalis; quia tamen frequentissime contrahitur ex lue venerea, præberet manifestans aliis audientibus occasionem credendi, talem veneri deditum, & consequenter respectu illius, respectu cujus est materia gravis manifestare, quod sit fornicarius, pariter erit grave, dicere aliis absque alia causa gravi, quod labore morbo gallico, saltem, si non addatur, quod innocenter contraxerit, e. g. jacendo in simili lecto &c.

Inferitur II. Non esse materiam gravem dicere de alio unum malum actum equidem necdum cognitum, qui tamen de pluribus similibus in eodem genere jam est infamis. Item de infami in uno crimine aliud valde affine (secus dic, si foret disparatum) manifestare: e. g. de notorio fornicario dicere, quod nuper miserit ad aliquam puellam litteras amatorias. Ratio est; quia exinde non notabiliter augetur infamia, seu tristitia. Busenbaum, Lessius & Navarrus.

Inferitur III. Ordinarie loquendo, & nisi talis, de quo subsequenter dicuntur, aliunde patiat exinde notabile damnum v. g. in aliqua Promotione, Officio &c, non esse materiam gravem dicere de altero, quod sit superbus, iracundus, avarus, piger &c. quia talis modus loquendi communiter, & nisi speciales circumstantiæ aliud insinuent, solet potius indicare passiones naturales & inclinationes ad similia vitia, quam ipsummet peccatum, vel certe solummodo defectus in similibus leves, & non graviter peccaminosos, uti sentiunt AA. infra citandi. Oportet tamen meo judicio in hoc puncto caute procedere, ne loquaces sibi nimium abblandiantur cum magno aliorum præjudicio.

Inferes IV. Non esse gravem materiam dicere de aliquo, quod sit scrupulosus, si significetur, aux ex circumstantiis intelligatur ab audientibus, per *ly scrupulosum*, intelligi timoratum & de peccato sollicitam conscientiam, prout apud perversum hoc sæculum, teste la Croix, vix nomen scrupulosi effugiet, qui accurate vult facere, quod debet. Si autem per scrupulositatem intelligitur imanis & futilis apprehensio, & inde exorta anxietas absque ulla gravi ratione, atque sic dicatur de homine gravi, qui habet, atque habere debet famam boni judicii, & magnæ prudentiæ, hæc læsio erit materia gravis, si aliunde hæc scrupulositas non sit jam no-

ta. Ratio est; quia exinde alii credere possunt, virum istum habere defectum judicii, ac prudentiæ, timendo, ubi nulla gravis ratio timendi subest: atqui dicere de Viro magnæ auctoritatis talia, quæ apud audientes causare possunt opinionem, quod is habeat defectum judicii, & prudentiæ, utique est materia gravis, cum præbeat occasionem contristandi graviter; ergo. Quod, si diceretur idem de homine juvene, vel indocto, talis læsio seu manifestatio defectus naturalis conformiter jam dictis non foret materia gravis. Ita tenent cum communi DD. la Croix lib. 3. part. 2. nu. 1202. Sporer loc. cit. Henno Tract. in Decalog. disp. 9. qu. 3. art. 1. Felix Potestas in Exam. Confess. tom. 1. p. 2. nu. 2754. & seqq. Sabinus Bononiensis in sua Luce morali part. 2. Tract. 36. num. 27. & seqq. ac Bonacina de Restitut. in particulari disp. 2. qu. 4. punct. 2. per totum. \*

6 CONCL. IV. Detractio recte dividitur in formalem, & materialem. Ita communis. Et quidem *Detractio formalis* est, quæ fit ex intentione, & proposito alienam famam denigrandi: quæ utique est peccatum mortale, si quis graviter famam Proximi lædere intendat. *Detractio materialis* est, quando quis expresse non intendit lædere famam Proximi, sed ex quadam loquacitate narrat peccata, vel defectus ipsius, unde læditur bona fama ejus. Ceterum circa hoc posterius membrum est notandum, quod, licet Detractio materialis tam perfectum voluntarium non habeat, sicut formalis, ac proinde frequenter ob actus imperfectionem a peccato mortali excusetur, adhuc tamen sit peccatum mortale, si id, quod advertenter narratur, famam Proximi graviter lædat. Ratio est: quia, etsi expresse quis non intendat lædere famam Proximi, adhuc tamen implicite & in sua causa hoc intendit, dum vult illud, unde per se gravis læsio sequitur.

7 Queritur I. An in nullo casu licitum sit, manifestare occultum crimen, vel defectus Proximi? Resp. dari aliquos casus, in quibus id fieri potest absque vitio Detractionis. Sic inprimis Detractio non est, si quis servato modo correctionis fraternæ patefaciat testibus, vel Superiori crimen fratris in bonum ipsius, nempe ut emendetur; de quo jam supra. (b)

8 Deinde licitum est, manifestare crimen alterius occultum ad impediendum notabile damnum Proximo, vel toti alicui Communitati, vel etiam ipsimet manifestanti alias impendens, sive temporale sive spirituale, quando id ad hoc necessarium est. (c) Hinc, si novi, Titium esse furem, possum monere eos, quibuscum habitat, ut sibi caveant, & sic de similibus.

9 Insuper ex eadem ratione, quando agitur de Officio, vel Beneficio conferendo, de Matrimonio contrahendo, de Religione suscipienda, possunt justa impedimenta, etsi ceteroquin occulta, manifestari, si ex illis notabile incommodum merito timeri possit.

10 Similiter licitum est, ejus, qui fictis virtutibus famam sibi paravit, simulationem aperire, si ea vergat in alicujus detrimentum: ut si quis simulet se peritum Advocatum, Medicum, Confessarium, Pharmacopolam &c. & constet mihi, non esse talem. Lessius l. 2. c. 11. dubit. 8. & alii. Ratio horum omnium generalis est: quia nemo habet jus tuendæ famæ suæ cum tanto damno, Proximis injuste obventuro; ergo in præmissis casibus non committitur Detractio, utpote quæ est alienæ famæ injusta læsio, qualis ibi non intervenit.

11 Ceterum hætenus dicta intellige de crimine, aut defectu ceteroquin vero, licet occulto. Nam crimen falsum cuiquam imponere, semper est illicitum, & vocatur *calumnia*, estque in materia gravi mortale: falsitatem enim proponere, in nullo casu licitum existit; cum mendacium sit intrinsece malum, & si fit in materia gravi, peccatum mortale. Unde non immerito Innocentius XI. sequentes duas damnavit Propositiones, quarum prior, ordine 43. sic habet: *Quidni non nisi veniale sit, detrahentis auctoritatem magnam, sibi noxiam, falso crimine, elidere?* Altera, ordine 44. taliter sonat: *Probabile est, non peccare mortaliter, qui imponit falsum crimen alicui*



ut suam iustitiam, & honorem defendat. Et si hoc non sit probabile, vix ulla erit opinio probabilis in Theologia.

12. Nec dicas: Aequè prohibitum est, detrahere Proximo, manifestando crimen grave occultum illius, ac imponendo illi crimen falsum; ergo si hoc non licet, neque illud licitum erit etiam pro impediendo gravi damno nostro, Reipublicæ, aut aliorum. Resp. enim negando suppositum: nam manifestare crimen verum, sed occultum Proximi ex iusta causa, ut puta ad impediendum grave damnum nobis, Reipublicæ, aut tertio impendens, quodque alia ratione impedi non potest, non est detrahere, ut dictum nu. 8. 9. & 10. at imponere grave crimen falsum, vel est mendacium grave, & lethale, vel etiam est contra iustitiam, prout post D. Thomam 2. 2. quæst. 69. art. 2. notat Jo. Cardenas ad dictas Propositiones Innocentii XI. c. 3. & 4.

13. Quæres II. Utrum audita, vel alia quælibet referens absque asseveratione, & sub dubio peccet mortaliter, & teneatur ad Restitutionem? Hanc Quæstionem ex professo tractat, & subtiliter resolvit Scotus 4. dist. 25. quæst. 4. art. 1. quem sequitur Layman l. 3. tr. 3. p. 2. cap. 3. n. 7. cum aliis.

15. Et quidem imprimis respondet Doctor noster: si quis non imponit in publico crimen alteri, sed murmurat, vel indiscrete loquitur, vel alicui coram multis narrat, tamen non tamquam sibi certum, sed sic se audivisse &c. quod idcirco rara fides sit: quia multi multa loquuntur. Et ideo dicens, se tantum audivisse, nisi ex modo dicendi ostendat aliquam maiorem certitudinem, quam ex communi relatione, non aufert alteri ex natura actus bonam famam: quia, si audientes firmiter credant, illud, de quo sermo est, esse criminofum, id ex eorum levitate accidit: quia *Qui credit cito, levis corde est. Ecclesiastici cap. 19.*

15. Addit deinde Doctor Subtilis loc. cit. cum a scandalo pusillorum oporteat cavere, & multi sint tales pusilli, leves ad credendum mala de Proximis, ideo periculosum esse, similibus id est eis, qui prout sunt non solum ad suspicandum, sed etiam ad facile credendum de Proximo grave malum talia audita ex relato referre. Quod si vero hoc fiat animo malo, lædendi scilicet alterius famam, non est facile excusare, quin sit contra Charitatem, & per consequens peccatum mortale. Si autem fiat coram talibus ex inconsideratione, durum est dicere, quod exeat genus peccati venialis: quia lingua in lubrico posita est; &, si quis in verbo non offendit, hic perfectus est vir. *Jacobi cap. 3.*

16 Quæres III. An, qui detractorem audit, peccet mortaliter, & ad Restitutionem teneatur? Resp. I. Qui audit Detractiones absque resistantia, videtur detractori consentire, unde fit particeps peccati ejus: &, si quidem ipsum inducat, vel excitet ad detrahendum, aut placeat ei Detractio propter odium illius, cui detrahitur, non minus peccat, quam detrahens, imo quandoque magis. Ita D. Thomas 2. 2. quæst. 73. art. 4. cum communi. Unde D. Bernardus lib. 2. de Consideratione, sub finem, ait: *Detrahere, aut detrahentem audire, quid horum detestabilius sit, non facile dixerim.* Ratio est: quia talis non solum peccato alieno, id est, Detractioni consentit, in eoque sibi complacet, sed & quandoque ad ipsum inducit; unde, si ita inducit, gravius peccat, quam detractor ipse.

17 Resp. II. Si non placet ei Detractionis peccatum, sed ex timore, vel negligentia, vel etiam verecundia quadam omittat repellere detrahentem, peccat quidem, sed multo minus, quam detrahens, & plerumque venialiter, licet quandoque etiam peccatum mortale esse possit. Ita Doctor Angelicus loc. cit. cum aliis.

18 Sed hoc intelligendum est, dummodo quis absque incommodo possit Detractionem impedire: nam, si commode detrahentem corrigere non possit, Detractionem impedire non tenetur, licet nullatenus peccat; quia Claritas cum gravi incommodo non obligat, prout passim notant Doctores. Hinc sequitur, quod is, qui sibi grave damnum timet corrigendo, ut puta injurias, aut verbera; vel rationabilem habet verecundiam, eo quod

sit filius, aut famulus detrahentis, vel nullius auctoritatis respectu illius, non teneatur ei resistere, aut ipsum corrigere. Idem dicendum, si probabiliter existimat, suam monitionem nihil profuturam.

19 Ceterum resistitur detractori, vel redarguendo ipsum modestis verbis, ut puta, quod quis peccet detrahendo fratri, vel discursum interrompendo, aut si fieri potest, aliorum divertendo, vel saltem ostendendo per tristitiam faciei, quod sibi displiceat Detractio: quia, ut dicitur Proverb. 25. *Ventus Aquilo dissipat pluvias, & facies tristis linguam detrahentem.*

## APPENDIX.

### Continens varia adhuc quæſita de Detractione.

#### SUMMARIUM

- \* *Utrum peccet gravia referens de homine aliquo audientibus incognito? Addit. I.*
- \* *An graviter delinquat, qui uni tantum homini prudenti, & taciturno revelat? Addit. II.*
- \* *Item, qui crimen in una Communitate jam publicum propagat in altera, ubi adhuc est incognitum? Addit. III. & IV.*
- \* *Quot homines scire debeant crimen, ut illud dicatur publicum? Addit. V.*
- \* *An Detractiones sint ejusdem speciei? Addit. VI.*
- \* *Qualiter detractores sint practice in Confessionali examinandi? Addit. VII.*

#### Additio I.

Quæ. I. Utrum delicta gravia occulta asseverative referens de aliquo sibi, & aliis audientibus incognito, v. g. de homine aliquo larvato, vel si de cognito quidem, aut non apud alios audientes nominato, peccet mortaliter, & teneatur ad Restitutionem?

Respondeo quoad utrumque negative, dummodo absit periculum ex hac narratione occultorum gravium deveniendi in notitiam personæ illius, quæ commisit, ac præterea dummodo hæc manifestatio criminis non redundet in præjudicium & notabilem infamiam Familiæ, cujus est membrum ille, qui dictum crimen perpetravit. Ita sub his terminis Sporer Tract. in Decalog. cap. 4. sect. 3. num. 61. & Henno ibidem disp. 8. quæst. 3. art. 2. Conclus. 4. cum communi. Ratio est: quia sub his limitationibus non infertur grave præjudicium individuo ipsius personæ incognitæ, & consequenter nec eadem rationabiliter propterea tristatur graviter.

Dixi autem notanter: *Dummodo hæc manifestatio non redundet apud audientes in infamiam Familiæ, cujus est membrum*: tunc enim foret grave, et si persona non nominetur, quæ commisit, quoniam merito præbetur exinde tali Familiæ occasio iuste tristandi graviter; e. g. si diceres. in hoc Monasterio certus Religiosus (quem tamen in individuo non nominares) commisit nuperrime fornicationem &c. Quamvis enim (uti recte inquit Sporer hic) aliqua Communitas re ipsa non maculetur ex unius hominis scelere, sicut nec Collegium Apostolorum ex perfidia Judæ: maculatur tamen apud homines simplices, & imperfectos, quibus id sæpe multiplici scandalo & occasione vilipendendi Monasterium esse solet, si hæc de membro alicujus Familiæ, quam communiter sanctam & piam reputant, vulguntur. Quod si diceres taliter de membro innominato alicujus civitatis, non incurreres peccatum grave Detractionis; quoniam etiam simplices audientes exinde non multum scandalizantur, nec occasionem desumunt vilipendendi civitatem, utpote alias probe gnari, in tam ampla hominum sæcularium Communitate etiam reperiri aliquos improbos. \*

#### Additio II.

\* Quæ. II. Utrum in genere Detractionis peccet mortaliter, qui absque iusta aliqua, & rationabili causa uni-



tantum, vel alteri prudenti, de quo moraliter constat, eundem ulterius non evulgaturum, nec nocumento futurum, refert grave crimen de alio, nominando hanc ipsam personam, quæ crimen illud commisit? Resp. Talem probabilius peccare mortaliter. Ita cum Card. de Lugo, Illfung, ac communiori DD. Sabinus Bononiensis *part. 1. Lucis Moralis. Tract. 36. num. 37.* & Franciscus Henno *Tract. in Decalog. disp. 8. quest. 3. art. 2. Conclus. 3.* contra Cajetanum, Reginaldum, Tamburinum, Felicem Potestam, aliosque. Fundamentum principale est: quia etiam apud unum tantum Virum gravem per talem manifestationem deperdere suam famam, ac æstimationem, censetur prudentum iudicio notabile damnum aptum causandi merito magnam tristitiam: sicuti a pari ob hanc ipsam rationem iudicium temerarium unius de alio, etiam seposito periculo ulterioris divulgationis, in re gravi conceptum reputatur peccatum mortale; quia nimirum etiam apud unum illum, qui tale iudicium temerarium elicit, exinde deperdere suam æstimationem, censetur notabile damnum, vicijus, etsi fama ipsa apud Communitatem, hujus criminis ignaram, non deperderetur, apud illum tamen, qui temerarium iudicium formavit, vel in præsentem, qui manifestantem de altero grave crimen audit, eadem fama notabiliter censetur diminuta seu denigrata, quod tam ad rationem temerarii iudicii, quam ad rationem Detractionis sufficit.

Dixi autem notanter: *Si contingat absque justa causa*: etenim si fieret cum causa gravi, puta consilii aut auxilii petendi gratia, nec possit haberi, nisi crimen, & criminofum manifestando, non erit peccatum Detractionis, uti recte advertit Henno *loc. citato*, qui ulterius in terminis formalibus subjungit, neque peccare saltem mortaliter juxta Sylvium & alios, qui ad solamen, aut doloris mitigationem injuriam magnam sibi ab altero occulte illatam, uni aut alteri manifestaret, modo absit affectus Vindictæ, & Detractionis, nec pluribus aperiat, quam postulet doloris injuste illati amaritudo. Ratio est, quia videtur nimis durum, quod quis teneatur in secreto illatam sibi injuriam concoquere, ut parcat famæ injuriantis, qui noluit ipsemet injuriato parcere. Unde censetur talis injuriando, se voluisse huic inconvenienti exponere: cum sciret, aut saltem prudenter scire deberet, hujusmodi revelationem per injuriam solere valde frequenter ex injuria illata subsequi. Hæc ultima doctrina de justa querela contra injuriantem mota ad capiendum exinde solatium, hæc inquit ultima doctrina, si debite fuerit circumstantionata, poterit quidem aliquoties Confessario deservire post jam factum: ast in futurum erit vel ex eo dissuadenda, quia lingua labilis vix terminos debitarum circumstantiarum sibi ponere poterit, præsertim apud homines vindicativos, & feminas passionatas \*

#### Additio III.

\* Quæres III. Utrum in genere Detractionis peccet mortaliter, qui crimen a parte rei verum ac grave apud unam Communitatem una cum persona jam publicum, seu publice notum refert, ac revelat aliis intra, vel extra eandem Communitatem, qui dictum crimen, vel saltem personam ream nondum sciverunt? Ante Resp. advertendum, tripliciter posse crimen fieri notum, seu publicum alicui Communitati. Inprimis *Jure*, si nimirum a Communitate sciatur per confessionem Rei in iudicio publico, vel per sententiam Judicis jam publicatam. Deinde *Facto* per ipsam facti evidentiam apud tot, ut attempta conditione illorum, qui eandem evidentiam habent, & qualitate Communitatis arbitrio Prudentum iudicetur, nulla amplius tergiversatione celari posse. Denique tertio præcise ex *Fama*, quando nimirum eadem non a garrulismulierculis absque fundamento (tunc enim foret potius rumor inanis) sed ex verisimilibus indiciis originem trahens, ad majorem partem Communitatis pervenit. Nos in præsentem loquemur præcise de crimine notorio notorietate seu publicitate Juris vel Facti. Al-

terum de publicitate per Famam communem differemus ad Quæsitum sequens. H. N.

Respond. I. Si crimen sit publicum *Jure* seu (ut alii loquuntur) notorium notorietate Juris, tunc post sententiam Judicis publice latam potest illud una cum Reo citra peccatum grave Detractionis etiam aliis tam ejusdem loci incolis adhuc ignorantibus, quam diffidorum locorum habitatoribus manifestari. Ita teste Sporer communissima. Ratio est: quia exigente sic Bono publico talis graviter Reus in poenam criminis sua fama priyatur absolute, & propterea etiam publice sententia fertur, ac confluenti ex quibuscumque locis populo audiendi publicationem sententiæ licentia datur, ut exinde homines alii magis a similibus criminibus deterreantur. Dicitur autem notanter: *post sententiam Judicis publice latam*, nam si sententia ista non publice feratur, sed tantum privatim intra aliquam particularem Communitatem cum intentione, ut non vulgetur ulterius v. g. si fiat in certo Monasterio vel Religiosa Familia, non liceret tale crimen, seu talem Reum aliis extraneis adhuc occultum propagare; quoniam Judex talem Reum non absolute, sed tantum in ordine ad certam Communitatem sua fama priyavit, hincque ad publicationem sententiæ non quoscunque confluentes admittit: quoniam si similia vulgarentur ubique, ordinarie non solum illa persona particularis, sed etiam tota sacra ac innocens aliqua Religio infamaretur.

Resp. II. Si tale crimen est publicum seu notorium notorietate *Facti*, potest absque peccato gravi Detractionis, ille, qui crimen commisit, manifestari aliis ejusdem Communitatis adhuc ignaris. Ita apud Patrem Sporer hic Scotus in 4. *sent. dist. 15. quest. 4.* cum communissima DD. & ratio est; quia pro tunc ex communissima Doctorum persuasione, & teste Lessio ex consuetudine totius Orbis censetur talis criminofus respectu similis Communitatis spoliatus jure & possessione suæ famæ, eo ipso, quia crimen ejusdem ex sua culpa adeo publicum evasit, ut moraliter reputetur impossibile, qui in aliorum cohabitantium notitiam perveniat.

Resp. III. Si facti evidentia crimen alicujus est publicum ac notorium in aliqua Communitate absolute, puta in pago, oppido, civitate, potest is, qui hoc crimen perpetravit, citra grave peccatum Detractionis manifestari in locis quoque vicinioribus, vel aliis etiam suo modo remotioribus, quæ tamen commerciorum consortio ita sunt conjuncta, ut ad illa facile respective brevi, ac quasi moraliter certo idem rumor sit perventurus. Ita cum Molina, Soto, Layman & Petro Navarro, Sporer *Tract. 6. in Decal. cap. 4. sect. 3. num. 71.* & teste eodem communis. Ratio est, quæ prior; quia rem moraliter æstimando, fama absolute amissa in hoc loco etiam in vicino, vel tam conjuncto amissa censi potest, ita ut moraliter impossibile reputetur, quin & fama, alias cito volans, pariter brevi ad alia loca perveniat.

Dicitur autem notanter: *licere sic manifestare in aliis locis conjunctis &c. si evidentia facti sit notorium in aliqua Communitate NB. absolute.* Secus enim dicendum, si tantum foret notorium *limitate*, restringendo illam notorietatem præcise intra cancellos cujusdam Communitatis particularis respective, puta ad certum genus personarum v. g. ad certum Collegium, vel Monasterium talis civitatis: tunc enim extra corpus Monasterii non liceret vicinis sæcularibus, vel adjacentibus aliis Conventibus dictum crimen grave ipsis adhuc ignotum manifestare; quoniam exinde conformiter dictis non solum ipse Religiosus, sed etiam Collegium seu Monasterium infamaretur. Nec dicas, licere etiam juxta Molinam, & Rebellum saltem tunc manifestare aliis Monasteriis vicinis, si fuerint ejusdem Ordinis: nam etsi ob paritatem rationis id concedatur cum la Croix, quoad ea Monasteria intra unam Provinciam sita, ubi Religiosi mutantur de loco in locum, negatur tamen in aliis casibus: quoniam ad evitandas sæpe varias inconvenientias, & discordias inter Religiosos saltem dissuadetur, ex virtute Charitatis, etiam quoad Monasteria ejusdem Provinciæ, si nulla alia ceteroquin habeatur rationabilis causa manifestandi.

Respond.



Respond. IV. In locis remotioribus illis quorsum alias moraliter loquendo fama non poterat pervenire, probabilius non licet citra peccatum grave Detractionis aliquem, qui crimen grave notorietate facti publicum perpetravit, propalare. Ita Franciscus Henno *Tract. in Decal. disp. 8. quæst. 3. art. 3. Conclus. 1.* & Sporer *Tract. 6. in Decalog. cap. 4. sect. 3. num. 71.* ac apud ipsum plures contra tamen non paucos teste Henno *loc. cit.* Ratio est: quia licet peccans publice cedat implicate juri famæ scæ in locis vicinioribus, vel ratione commercii conjunctis, non tamen quodam alia remota: ideo enim censetur renuntiare juri suo quoad loca priora, quia fama moraliter loquendo est crimen illuc alias perlatura; ergo ubi moraliter fama non est perlatura; (uti se res habet quoad loca remotiora proxime explicata) neque censetur renuntiare suo juri.

Nec dicas: publicum publicitate Juris per sententiam Judicis potest ubivis etiam in remotioribus locis vulgari: ergo etiam publicum per evidentiam facti. Respond. enim cum Patre Henno negando consequ. & paritat. Disparitas est, quod in primo casu infamia universalis sit poena culpæ imposita, non sic in casu secundo. \*

#### Additio IV.

\* Quær. IV. An crimen; quod est publicum non quidem notorietate Juris & Facti, sed tantum per famam communem, possit aliis adhuc ignaris ex Communitate, aut vicinia revelari? Respond. Si sit vere fama communis (& non potius rumor inanis) de gravi crimine ab aliquo commisso, Doctores superius allegati in ordine ad ulteriorem manifestationem simili modo discurrent de eadem, ac de notorietate facti ob paritatem rationis; quoniam & talis fama communis cito volat ad aures aliorum, ut moraliter vix amplius posse occultari credatur. Interea tamen, quia sæpe potest esse potius rumor inanis absque solido fundamento a garrulis, vel leviter credulis in vulgum sparsus, quam vera fama communis circa crimen grave ab altero e. g. Petro commissum, hinc bene respiciatur, undenam rumor ista ortum habuerit; nam si constet, quod ipsemet e. g. Petrus, de quo est rumor, non leviter præbuerit mala indicia taliter de se discurrendi, sibi et ipsi imputet eam propagationem. Econtra vero, si nec ex viris fide dignis, nec ex præviis gravibus indiciis sciatur origo similis rumoris, sit cautus ille, qui præcise habens informationem ex rumore aliis ex Communitate vel vicinia ignaris refert, ne assertive tale crimen divulget de altero, sed vel reticeat, quod consultissimum, vel ad minus saltem addat, esse quidem rumorem, se tamen nescire, undenam rumor iste originem traxerit, & an nitatur solido fundamento? solent enim non raro a parte rei Innocentes per rumorem inanem falso diffamari tamquam Rei. \*

#### Additio V.

\* Quær. V. Quot homines crimen ab aliquo commissum scire debeant, quatenus illud dicatur publicum, seu notorium notorietate Facti taliter, ut exinde in Communitate seu vicinia ulterius aliis citra grave peccatum Detractionis revelari queat? Respondet ad hoc satis difficile & intricatum quæsitum Sabinus Bononiensis *part. 1. Lucis Moralis. Tract. 36. n. 39.* ut aliquod delictum egrediatur limites occulti, & fiat publicum, sicque aliis ex Communitate, vel vicinia revelari queat absque gravi peccato Detractionis, debere illud præcise sciri a tot hominibus, ut attentam quantitatem Communitatis, & qualitate hominum prudentum arbitrio censeatur impossibile ulterius cohibere famam communem de eodem. Alii DD. etiam specificant certum numerum hominum, quo habito, juxta proportionem majoris vel minoris Communitatis, censeatur adesse prudens arbitrium, tale delictum ita jam innotuisse, ut fama de eodem amplius cohiberi nequeat. Sic nim nonnulli apud la Croix & Sporer hic putant sufficere, si sciant decem, quia iste

Anacl. Reiffenstuel. Theol. Tom. I.

numerus sufficit ad constituendum populum seu Parochiam l. 4. §. 3. ff. Vi bonorum raptorum. Alii restringunt adhuc ad minorem numerum, & credunt ad publicum sufficere, si resciant sex: nam (inquiunt cum Abb. in can. De manifest. 2. q. 1.) equidem verum est ad Communitatem Parochiæ faciendam requiri decem personas; at, ut quidpiam intra hanc Communitatem dicatur notorium, seu publicum, non necessario debet resciri ab omnibus membris ejusdem, sed sufficit, si cognoscatur a majori parte illius, qualem majorem partem respectu numeri denarii utique conficiunt sex personæ? Molina Lugo & Hannoldus apud la Croix lib. 3. part. 2. num. 1229. dicunt, quando Communitas constat personis viginti, tunc esse aliquid publicum, seu notorium fama, quando septem sciunt. Si 100. quando quindecim. Si 1000. quando viginti, qui sint ex diversis domibus. Si autem Civitas constaret 5000. civibus, sufficere, quod, sciant triginta sparsi per illam Civitatem, aut quod una platea vicina id sciat; quia tunc moraliter impossibile est celari, attentam humanam fragilitatem, & linguæ lubricam volubilitatem. Deservient subinde similia Confessario in perplexitate pro consolatione, si nesciat se resolvere, num hoc, vel illud crimen in particulari juxta prudens arbitrium debeat dici publicum, vel non? prout præx. & experientia docebunt. \*

#### Additio VI.

\* Quær. VI. An una Detractio sit ejusdem speciei cum altera? Resp. affirmative. Ita præter alios Bosco *Disp. 7. de Sacrament. Penitent. sect. 10.* & la Croix *Lib. 3. part. 2. num. 1227.* Ratio est: quia tota malitia specifica harum Detractionum consistit in injusta denigratione famæ alterius; atqui hæc malitia specifica reperitur in qualibet Detractione: ergo quælibet est ejusdem speciei. Ob quod ipsum fundamentum etiam DD. cum Sporer *tract. 5. in Decalog. cap. 4. sect. 6. num. 145.* inferunt, quod una contumelia sit ejusdem speciei cum altera; quia per omnes læditur honor, in cujus læsione consistit malitia specifica contumeliæ: sic etiam furtum gemmarum, & furtum equi, ac furtum auri sunt ejusdem speciei moralis; quia ubique fit læsio bonorum fortunæ, in qua læsione consistit malitia specifica furti: pariformiter ob eandem rationem judicia temeraria, quando v. g. quis judicat Petrum fornicarium, & Paulum furem, sunt ejusdem speciei; quia tota malitia specifica judicii temerarii in hoc consistit, quod exinde lædatur jus, quod alter habet ad bonam existimationem sui, quæ læsio utrobique reperitur, uti recte cum Busenbaum, Escobar, Fillucio advertunt Potestas *tom. 1. part. 2. num. 2753.* & Sabinus Bononiensis *part. 1. tract. 36. num. 43.* \*

#### Additio VII.

\* Quær. VII. Quomodo practice sit interrogandus, qui confitetur, se detraxisse? Resp. talem esse interrogandum I. Num contigerit in materia levi, vel gravi, seu tali, quam ipse gravem reputaret, si contra semetipsum talis Detractio facta fuisset? Quod si contigisset in materia gravi, interrogetur ulterius II. Num talia de altero assertive dixerit, vel tantum præcise relative nihil augendo, vel addendo, ita ut prudenter credi possit, audientes non adhibuisse exinde positive fidem relatis? Quod si protulisset assertive, interrogetur III. Utrum illa res fuerit vera, vel falsa? & si vera, num occulta vel publica? IV. Quoties deliberate contigerit in materia gravi occulta? V. Demum obligandus est ad Restitutionem, nisi adsit aliqua ex causis excusantibus.

Ceterum finaliter circa istam materiam ad duo præsertim genera poenitentium attendat Confessarius. Primum genus est nimis *luxum*, alterum nimis *anxium*. Priores sunt illi, qui quaslibet ferme res de altero prolatas reputant leves, cum tamen, si de ipsis similia spargerentur, judicarent, nescio, quam graves; tales interrogandi sunt, quidnam ergo in specie occultum protulerint contra alterum, ut exinde noscatur, an materia fuerit

C c

gravis



gravis vel levis? *Posteriores* mox sibi timent de gravi peccato, si quidpiam narrent de Proximo, etsi jam publicum, vel majori saltem parti Communitatis notum, vel quamvis talem manifestationem requireret bonum Reipublicæ, seu utilitas alicujus Communitatis, aut salus Proximi temporalis vel spiritualis &c. & hi magis sunt instruendi a Confessario conformiter jam dictis. \*

## Q U Æ S T I O II.

## De Contumelia.

## S U M M A R I U M.

- 20 Contumelia, quid?  
21 Ea tribus modis accidit, quibus?  
\* Concurrit sæpe cum Detractione.  
22 Est ex genere suo peccatum mortale.  
23 Per accidens tamen potest fieri veniale.  
24 Leve convitium quando fieri possit sine omni peccato?  
25 Alii tales casus.

20 **CONCL. I.** Contumelia a contemnendo dicta est, estque injuria, qua alicujus præsentis honor & existimatio palam violatur. Ita in re communis. Differt autem Contumelia a Detractione, quod hæc directe famam lædat, Contumelia honorem. Detractio insuper fit occulte, & in absentia, sicuti furtum: Contumelia vero fit palam, & in faciem, ut rapina, aut clam quidem sed ea intentione, ut veniat ad notitiam ejus, in quem conjicitur: prout contingit per Scripturas, ac Libellos famosos.

21 **CONCL. II.** Contumelia tribus modis accidit, verbo, scripto, & facto. Et quidem sub Contumelia, quæ fit verbo, comprehenditur Convitium, Improperium, & Maledictum. Contumelia, quæ scripto fit, animo infamandi, *Libellus famosus* in Jure appellatur. Ad Contumeliam tandem, quæ facto fit v. g. honoratum virum verberando, domi includendo, pertinet Irrisio, & Subfannatio.

## Additio.

Porro quamvis Contumelia juxta jam dicta a Detractione distinguatur, & quidem specie, cum hæc duo vitia respiciant duo specie distincta objecta formalia, Detractio quidem famam quam denigrat, Contumelia vero honorem, quem lædit, nihilominus ambo sæpius confluent in uno, eodemque actu, etsi ceteroquin etiam verum sit, quod subinde ad invicem separentur. Sic v. g. si alteri objicias crimen occultum grave aliis præsentibus censeretur adesse, ac simul in illo actu concurrere Contumelia & Detractio; quoniam simul læditur fama & honor. Quod si vero alicui soli, nemine alio præsentem, crimen in occulto objecisti in faciem, vel etiam aliam viro gravi in occulto, & quod maneat occultum, infixisti, non lædisti famam per Detractionem, bene tamen honorem per Contumeliam. Econtra, si coram aliis, ipso tamen etiam ex tua intentione non præsentem, de quo loqueris, crimen grave occultum manifestasti, lædisti famam per Detractionem, non autem honorem per Contumeliam. Ita recte notat Sporer *Tract. 5. in Decalog. cap. 4. sect. 4. n. 135.*

22 **CONCL. III.** Contumelia ex genere suo est peccatum mortale. Ita Doctores unanimiter, & patet ex illo Salvatoris *Matth. 4. Qui dixerit fratri suo, Fatue, reus erit gehennæ ignis.* Nam, ut inter alios explicat hunc locum Cornelius a Lapide, sub ly *Fatue* hic intelliguntur reliqua convitiatorum, dirarum calumniarum, probro- rum, & imprecationum genera: quæ sunt peccata mortalia, si valde Proximum dehonorent, aut ex animo graviter nocendi cupido proferantur.

23 Dicitur, *ex genere suo*: siquidem verbum contumeliosum per accidens potest fieri veniale, tum ob defectum voluntarii, ac indeliberationem actus, tum ob levitatem materiæ, si nimirum Contumelia vel in se ipsa levis sit, vel saltem cum habitudine ad personam,

cui infertur, vel a qua infertur. Nam eadem Contumelia, quæ erga dominum, patrem, virum gravem & honoratum prolata, foret peccatum mortale; ergo subditum, feminam, vel puerum, veniale esse potest. Similiter viro gravi ac honorato dicere, *Fatue*, est gravis Contumelia, vili vero & stupido, qui revera est fatuus, erit levis.

24 Imo notant Doctores cum D. Thoma 2.2. *quest. 72. art. 2.* joci causa, & ad convenientem animi recreationem, non vero ad dehonorationem Proximi dicere aliquod leve convitium, aut leves alicui defectus objicere, posse pertinere ad Eutrapeliam, ac fieri sine omni peccato: dummodo debitæ circumstantiæ adhibeantur, nec periculum adsit Proximum contristandi, vel ad iram commovendi. Alioquin enim stante tali periculo dicere Proximo convitium, repugnaret Charitati.

25 Insuper justæ objurgationis, correctionis, ac disciplinæ causa parentes licite filios suos, magistri discipulos, domini servos durius per verba Convitii seu Contumeliæ pungunt, castigant, & increpant, dummodo moderate ad justam correctionem id fiat. Sic quippe Christus Dominus Petrum vocavit *Satanam* *Matth. 16.* Et Paulus ad *Galatas cap. 3.* vocat eos *insensatos*: rursumque Christus duos discipulos, euntes in Emmaus, vocavit *stultos* & *tardos corde*. Cujus rationem dat Doctor Angelicus *loc. cit.* quia sicut licitum est aliquem verberare & flagellare virgis causa disciplinæ, ita etiam verbis. Tamen, ut bene idem cum S. Augustino *lib. 2. de Sermone Domini in Monte, cap. 30.* observat, raro, & non nisi ex magna necessitate, hujusmodi objurgationes sunt adhibendæ.

## Q U Æ S T I O III.

De Convitio, Improperio, Maledicto, Irrisio-  
ne, Sufuratione, ac Libello famoso.

## S U M M A R I U M.

- 26 Convitium, quid, & quomodo differat a Contumelia?  
27 Improperium, quid?  
28 Maledictum, sive Maledictio, quid?  
29 Unde ejus malitia dimetienda?  
(d) Adde dicta Tract. 4. Dist. 7. n. 13. & 14.  
30 Irrisio, seu Derisio, ac Subfannatio, quid?  
31 Sufuratio, ejusque gravitas, quæ?  
\* Solvitur objectio.  
32 Libellus famosus, & quæ ejus pena?

26 **Q**uamvis ad Convitium attinet, Convitium sæpe confunditur cum Contumelia: stricte tamen loquendo differt ab ipsa per hoc, quod per verba contumeliosa cuiquam repræsentetur, atque exprobetur defectus culpæ, v. g. quod sit fur, adulter, dæmonium habens; per Convitium vero exprobetur defectus pœnæ, vel naturæ, vocando e. g. hominem ineptum, stupidum, truncum &c. Unde, si quis alicui injuriose objiciat, eum esse cæcum, Convitium quidem dicet, sed non Contumeliam infert, stricte loquendo: si vero ipsi dicat, quod sit fur, non solum Convitium, sed etiam Contumeliam infert. Verum, ut jam dictum est, Convitium, & Contumelia non raro sumuntur pro eodem.

27 *Improperium* exprobrat Proximo defectum minorationis, seu indigentiae. Et tunc proprie fit, quando aliquis injuriose alteri ad memoriam reducit auxilium, quod contulit ei necessitatem patienti; de quo dicitur *Ecclesiastici 20. Exigua dabit, & multa improperebit.*

28 *Maledictum*, seu *Maledictio* quandoque sumitur pro dictione cujuslibet convitii, & mali in Proximum; & in hac acceptione tam ampla in proposito non sumitur. Proprie tamen illud accipiendum, ac prout est speciale vitium, *Maledictum* est imprecatio mali pœnæ facta alicui: ut si cuiquam quis imprecetur diabolum, fulgura, vel alia hujusmodi mala.

29 Hujus peccati malitia potissimum dimetienda est ex advertentia, deliberatione, animoque proferentis: nam



nam si ex inconsideratione, vel sine pravo animo proferantur ex ira subito talia verba Maledictionis, non illico censendum est, committi peccatum mortale; nisi id fiat deliberate, & pravo animo, juxta sæpe jam allatam doctrinam S. Thomæ 2. 2. quæst. 73. art. 2. quod Peccata verborum maxime sunt ex intentione dicentis dijudicanda. (d)

30 Irrisio, seu Derisio significat risum cum alterius contemptu: unde intendit erubescantiam, seu confusio- nem derisi. Et per hoc Irrisio differt ab aliis linguæ vi- tiis, atque continet interdum culpam levem nonnum- quam graviolem, aliquando etiam lethalem, pro con- temptu & dignitate illius personæ, cui irrideretur, & ma- gnitudine turpitudinis ad jocum arreptæ. Huc pertinet Subsannatio, quæ contingit gestibus derisoriiis, ut naso contracto, vel rugato, & hujusmodi: qualia multa con- tigerunt Christo Domino in sua Passione, præsertim tempore Coronationis spineæ. Matth. 26.

31 Susurratio est peccatum linguæ, dum quis occulte de Proximo male loquendo, odium ejus, ac distensio- nem animorum molitur: nam finis Susurrationis est dis- cordiarum inter amicos disseminatio. De gravitate hu- jus vitii linguæ differens Doctor Angelicus 2. 2. quæst. 74. ait: quod, quanto amicitia præstat famæ, tanto Susurratio, per quam amicitia tollitur, sit gravius pec- catum Detractione; cum peccatum in Proximum tanto sit gravius, quanto per ipsum majus nocumentum Pro- ximo infertur; intellige, ex genere suo, ac ceteris pa- ribus. Hinc Ecclesiastici 28. dicitur: *Susurro, & bilin- guis maledictus: multos enim turbavit pacem habentes. Lingua tertia multos commovit, & dispergit illos de gente in gentem* &c. Et enarratis aliis gravissimis ejus malis, subditur: *Qui respicit illam, non habebit requiem, nec habebit amicum, in quo requiescat.*

Additio.

\* Dices. Susurratio non est Detractio, nec Contume- lia proprie loquendo, sed distinctum peccatum gravius Detractione, & Contumelia; ergo non deberet in hac quæstione, in qua explicantur diversi modi, quibus con- tingit Contumelia verbo, scripto vel facto, collocari. Anteced. probatur: quia hoc vitium Susurrationis tol- lit majus Bonum, quam priora duo, nimirum Amici- tiam, quæ majus est Bonum, quam honor & fama: quoniam Amico fideli nulla est comparatio. Ecclesiastici cap. 6. uti etiam ex parte jam supra notatum est, & advertit Henno tract. in Decalog. disp. 8. q. 3. art. 7. Con- clus. 1. ergo. Resp. negando primam consequentiam: est enim proprie Susurratio nec sit Detractio, nec Contu- melia, sed peccatum utroque hoc vitio gravius, uti be- ne probat Divus Thomas apud Franciscum Henno loc. cit. nihilominus tamen saltem reductive hic, ubi de vi- tiis linguæ summe noxium Communitati, ac tollens majus Bonum honore & fama hominis. \*

32 Libellus famosus est scriptura, quæ infamiam ali- cujus continet nondum publicatam, ut edatur, & pu- blica fiat. Huc etiam reducitur pictura famosa, v. g. appingere animo diffamandi alterius januæ cornua, vel patibulum &c. Poena componentis, seu projicientis Li- bellum famosum (quam etiam incurrit, qui Libellum famosum invenit, & non scindit, sed manifestat aliis) de Jure Civili est poena capitis l. nu. C. De famosis libel- lis. & alibi. Quod intelligendum est, quando Libellus continet aliquid grave, quod, si infamatus commisisset, dignus esset morte. De Jure autem Canonico talis im- postor punitur poena perpetuæ infamiæ. Ex quo patet gravitas Libelli famosi.

Q U Æ S T I O IV.

Quibus modis Fama, vel Honor injuste ablati refarciri possit, ac debeat?

S U M M A R I U M.

- 33 Falsum crimen scienter imponens quomodo restituat?
- 34 Crimen verum, sed occultum revelans quomodo resti- tuere possit?
- 35 Injuste infamans tenetur ad damnorum in Bonis tem- poralibus illatorum recompensam.
- \* Quid, si fecerit ex inconsiderata loquacitate?
- 36 Honor injuste ablati quomodo refarciri valeat?
- 37 Quando tunc requiratur venia petitio, nec ne?

33 CONCL. I. Si quis falsum crimen scienter Pro- ximo imposuit, oportet, ut restituat famam retrahendo verbum suum apud eos, quibus dixerat, & ad quos infamia criminis pervenit. Ita D. Thomas 2. 2. quæst. 62. art. 2. Scotus 4. dist. 15. quæst. 4. & commu- nis. Ratio est: quia hoc exigit Justitia in reddendo Proximo, quod suum est, quæ alias non servaretur. Interdum tamen satis erit, si infamator dicat, se fuisse deceptum, aliter rem sese intellexisse &c. dummodo per hoc famæ Proximi sufficienter caveatur.

34 CONCL. II. Si Detractio deliberate, ac scienter committitur revelando verum crimen, sed occultum, non servato ordine Juris, talis Detractor non quidem tenetur retractare verbum suum, dicendo, se esse men- titum, aut falsum dixisse &c. (quia hoc faciendo men- tiretur, quod nulla de causa est licitum, multo minus præceptum) nihilominus tenetur is alio licito modo fa- cere restitutionem, dicendo v. g. *Non credatis, eum esse talem, male enim dixi, aut fatue dixi, seu erravi* &c. hæc enim vera sunt: nam talis male, & fatue dixit, dum peccatum occultum Proximi in publico propala- vit, non servato ordine Juris. Ita Doctor noster loc. cit. & alii.

35 CONCL. III. Qui alterum injuste infamavit, ita ut ex infamia alteri scienter & deliberate aspersa secu- tum sit damnum in bonis temporalibus, tenetur etiam damni illati compensationem facere. Ita Lessius lib. 2. cap. 11. dubit. 19. cum aliis. Ratio est: quia ejusmodi infamatio est actio injuriosa; atqui omne damnum, quod Proximo infertur per actionem injuriosam, est restituendum; ergo. Hinc, si quis injusta sua infamatione causa fuit, quod alter Officio, vel Dignitate sua priva- tus fuerit, aut illud non assecutus, tenetur pro possibi- li tale damnum recompensare, restituendo, quantum valebat illud Officium &c. vel spes illud obrinendi, boni viri arbitrio, prout uberius declaratum est supra Dist. 5. n. 81. 82. & seqq.

Additio.

\* Quod si quæras, an hæc obligatio reparandi fa- mam, & compensandi damna exinde secuta adstringat etiam illum, qui ex considerata loquacitate, & non plena advertentia alteri graviter detraxit? Resp. Hæc obligatio reparandi famam adstringit, vel ex vir- tute Justitiæ, vel saltem ex virtute Charitatis, etiam illum, qui ex præcipitantia ac inconsiderata loquaci- tate alteri graviter detraxit, supposito tamen, quod abs- que gravi incommodo famam alterius refarcire valeat. Ita sub his terminis communis apud la Croix lib. 3. part. 2. n. 1234. & apud Sporer Tract. 5. in Decalog. cap. 4. sect. 4. n. 86 Ratio est: quia talis posuit, quamvis non plene deliberate, causam illam, ex qua alter fuit infama- tus apud alios, adeoque tenetur, si commode valeat effe- ctum tam malum exinde causatum remove. Ob quam ipsam rationis paritatem etiam ille, qui ex oblivione Theologice inculpabili reliquit candelam accensam in hy- pocaulto, per quam causatum est incendium, centetur obligatus cooperari ad extinctionem dicti incendii, si abs- que notabili damno proprio & gravi incommodo possit.



Dixi notanter : si absque gravi incommodo possit , per quas particulas fit distinctio inter eum , qui deliberate ac scienter aliquem graviter diffamat , & inter illum , qui id facit ex non plena advertentia ; nam prior obligatur , ceteris paribus , & quando aliis mediis restitutio fieri nequit , restituere etiam cum certo periculo propriæ infamiæ per revocationem incurrendæ ; non autem sic posterior : sicut a pari juxta jam dicta in Bonis fortunæ notabiliter damnificans deliberate , ceteris paribus , tenetur ad restitutionem , quamvis restituendo æque grave damnum exinde pati deberet , ac alter suffinet vi ablationis ; non autem sic adstringitur , qui in Bonis fortunæ illud damnum causavit citra culpam Theologicæ gravem , ob non plenam advertentiam ad actum ; prout jam antea insinuat fuit juxta valde probabilem sententiam *dist. 5. q. 5. n. 87.* Ex quo fundamento facile colliges , quod talis ex inconsiderata , ac non plene deliberata loquacitate detrahens , neque obligetur subsecuta damna alia in Bonis fortunæ resarcire cum suo gravi detrimento . \*

36 CONCL. IV. Quantum attinet ad obligationem restituendi honorem , per Contumeliam , & alia peccata linguæ injuste ablatum , potest id duplici modo resarciri , uno modo per externam aliquam obsequii exhibitionem , & declarationem absque ulla expressa petitione veniæ : alio modo condonatione , quæ vel sponte fit ab inhonorato , vel prævia humili veniæ petitione per inhonorem facta . Ita *Mastrius disp. 8. Theol. Moral. n. 70.* cum aliis .

37 Ceterum , an sufficiat primo dumtaxat modo restituere honorem , vel insuper requiratur expressa veniæ petitio , non potest absolute decidi , sed id ex gravitate injuriæ , & conditione personæ offensæ , aliisque circumstantiis prudentis viri judicio definiendum est . Siquidem , si Superiores , vel Prælati aliquando inferiores vel plebejos Contumelia afficiant , non decet veniam ab istis petere , ne frangatur regendi auctoritas : sed sufficit , si benigne eos tractent , ac signis vel factis ostendant , se illos non despicere . Econtra vero , si injuria adeo gravis sit , & a subdito Superiori , vel a plebejo cuipiam Nobili , aut alii viro multum honorato , quem forsitan fuisse percussit , illata , ita ut alio modo compensari non possit talis injuria , nisi veniam petendo , & inhonoratus aliam satisfactionem suscipere nolit , nisi veniæ petitionem , tunc offendens tenetur illam petere . Alioquin autem , quando aliter , quam per veniæ petitionem , honor restitui potest , nemo ad veniam petendam cogendus est , sed ad eum modum , qui est in consuetudine , atque a prudentibus sufficiens judicatur . *Mastrius loc. cit. & alii.*

## Q U Æ S T I O V.

### De Causis excusantibus a Restitutione Famæ , & Honoris.

#### S U M M A R I U M.

- 38 *Varia causa excusantes a Restitutione Famæ, & Honoris.*  
 39 *Regula tres circa hoc observanda.*  
 40 *I. Causa excusans a Restitutione Famæ , si infamia non est secuta.*  
 41 *II. Si verbum , aliæquin infamans , jam abiit in oblivionem.*  
 \* *Quid , si dubitetur , num illud abierit in oblivionem ?*  
 42 *III. Si Famæ aliunde recuperata fuit.*  
 43 *IV. Si crimen occultum , alia ratione publicum evaserit.*  
 44 *V. Si Restitutio Famæ facta sit impossibilis.*  
 45 *VI. Si ea nequeat fieri absque periculo vitæ.*  
 46 *VII. Vel non sine amissione Famæ majoris momenti.*  
 47 *VIII. Causa excusans est justa condonatio.*  
 48 *IX. Compensatio justa.*  
 49. 50. 51. 52. 53. 54. 55. *Adhuc plures alie cause excusantes.*  
 (e) *Juxta dicta n. 14.*

38 **V**arias causas passim enumerant Theologi , propter quas cessat obligatio restituendi Famam , aut Honorem , ut videre est apud *Lugonem disp. 15. de Just. & Jur. sect. 2. Lessium lib. 2. cap. 11. dubit. 26. Mastrium disp. 8. Theol. Moral. n. 71. & seqq. Reginaldum lib. 10. cap. 23. & alios passim.* Verum , antequam hæc enumerentur ,

39 Advertendum generaliter , certum esse ex communi Theologorum sententia , ad hoc , ut Famæ per Detractionem læsa (idem servata proportionem dicendum de Honore) sit restituenda , hæc tres conditiones concurrere debere . I. Ut Famæ Proximo re ipsa sit ablata . II. Ut sit injuste ablata . III. Ut eadem possit denuo obtineri , & non fuerit aliunde jam recuperata . Et defectu harum conditionum , aut saltem unius , vel alterius earundem : diversæ oriuntur causæ excusantes a Restitutione Famæ & Honoris ; quamvis etiam ex aliis capitibus nonnullæ suboriantur .

40 Prima igitur causa , excusans a Restitutione Famæ , est : si revera ex cujuscumque obloquutione nulla fuit infamia secuta ; quia nimirum vel infamator nullius erat fidei (quod sæpe accidit) ac proinde ejus dictis audientes eodem non adhibuerunt , vel quia illi , apud quos infamavit , jam sciebant crimen illud ; vel saltem (ut loquitur Lessius) jam sciebant similia , ita , ut infamia non fuerit notabiliter aucta . Ratio est clara : quia , quod re ipsa ablatum non est , hoc ipso restitui non debet .

41 Secunda causa , a Restitutione Famæ excusans , est : si id , quod contra bonam Famam alterius quis locutus est , jam in oblivionem abiisse prudenter existimatur . Ita rursus communis ; & ratio est : quia in tali causa Famæ jam censetur recuperata , vel certe damnum illatum omnino evanuisse . Imo velle se retractare coram illis , apud quos alter diffamatus fuit , infamia jam in oblivionem abeunte , non tam esset Famam restituere , quam rursus infamare : sic enim revocaretur in memoriam crimen illud , quod ab eorum memoria jam exciderat ; unde plus nocumenti sequeretur , quam utilitatis Proximo .

#### Additio.

\* Ast ponamus , quod dubitetur , num crimen illud apud alios jam in oblivionem abierit , vel non , quid tunc faciendum ? Respondeo , duas regulas tali esse observandas . I. Regula ex Cardinali de Lugo *de J. & J. disp. 15. sect. 3. n. 35.* est desumpta , ut nimirum talis si bibimet ipsi suam propriam personam ante oculos ponat , quidnam nimirum , si bibimet hæc infamatio ab alio fuisset illata , vellet in his circumstantiis fieri , & hoc ipsum circa infamatum præstet . II. Regula , quod , si circa propriam personam se resolvere non posset , notet ex Navar. & Lessio apud *la Croix lib. 3. part. 2. n. 1255.* quod stante isto dubio ob periculum , ne per similia dicta species forsitan jam sepultæ denuo resuscitentur , non facile sit renovanda memoria criminis , nisi evidens constet adesse aliud periculum , ne data occasione memoria criminis apud eos , quibus antea illud revelatum fuit , iterum redeat : interea tamen stante tali dubio saltem indirecte restituat famam laudando , quantum moraliter possibile , & recommendando illum , cui detraxit apud eos , coram quibus antea crimen occultum manifestavit , uti recte notat Molina apud *Sporer Tract. 5. in Decalog. cap. 4. sect. 5. n. 113.* \*

42 Tertia causa est : si Famæ ablata jam fuit recuperata per aliam viam . Hæc enim est una ex conditionibus ad obligationem Restitutionis Famæ requisitis , ut constat ex supra dictis . Id autem fieri potest vel viro- rum gravium testimonio , vel si infamia vitæ probitate penitus sit absterfa , aut alio consimili modo .

43 Quarta est : si crimen occultum , quod aliquibus revelasti illicito modo , ac injusto (nam si licite , ac iusta de causa id factum est , nulla subest obligatio Restitutionis) alia ratione fiat publicum , cessat obligatio Restitutionis . Ratio est ; quia talis postquam crimen suum



suum publicatum fuit, amisit jus ad Famam, ita ut nemo ex iustitia teneatur amplius priorem existimationem de illo retinere; & consequenter neque tu teneris ei ex iustitia Famam restituere, postquam tale crimen aliunde publicatum est.

44 Quinta causa excusans est: si Famæ Restitutio facta sit impossibilis. Ratio est manifesta: quia ad impossibile nemo tenetur.

45 Sexta est: si Restitutio Famæ non possit fieri sine periculo vitæ. Ratio est: quia generatim nemo tenetur restituere bona ordinis inferioris cum detrimento bonorum ordinis superioris, vita autem est bonum altioris & superioris ordinis, quam sit Fama. Hoc tamen intelligendum est, nisi & alteri ex tali infamia damnum æquale vel etiam majus emergat in bonis ordinis superioris, nempe in spiritualibus, aut vita corporali: tunc enim secus foret dicendum, & adesset obligatio restituendi.

46 Septima est: si non possit fieri Restitutio sine amissione Famæ, quæ sit longe majoris momenti: ut si Prælati, vel Vir illustri infamavit plebejum, non tenetur cum jactura sui nominis, aut notabili detrimento proprii honoris revocare, sed sufficit, ut illum laudet in eo genere virtutis, ubi sic infamavit, vel alio meliori modo Famam restituat, quo sine jactura propriæ Famæ id facere poterit. Ratio est: quia ille plebejus non potest cum ratione exigere, ut talis Prælati, Reipublicæ adeo utilis, famam suam tanti momenti amittat; sed debet esse contentus laude, humanitate, aut etiam aliqua pecuniaria compensatione, judicio prudentum facienda.

47 Octava est iusta condonatio: intellige, quæ ab eo facta est, cujus infamia non redundat in alios. Ratio est: quia homo est dominus propriæ Famæ, & Honoris; ergo, si infamatio ipsum solum tangat, nec redundet in alios (secus foret, si infamia redundaret in alios) potest cedere juri Restitutionis Famæ, ejusque obligationem alteri condonare, præsertim propter Deum, aut alium finem honestum.

48 Nona est iusta compensatio ut si ab eo, quem infamasti, pari modo sis infamatus. Hoc tamen intelligendum, non quod talis vicissim possit alterum licite infamare (hæc enim foret manifesta vindicta, quam nemo privata auctoritate potest facere; simulque, ut dicitur 1. Petri 3. debemus esse non reddentes malum pro malo, nec maledictum pro maledicto) sed solum, quod talis alium injuste infamans, a quo antea injuste fuerat infamatus, non teneatur ei ad Restitutionem, si alter sibi restituere nolit; cum possit uti compensatione, servata tamen æqualitate, quantum fieri potest.

49 Decima est: si bona fide persuasus, esse verum & publicum, narrasti aliquid, & Proximum diffamasti, nec possis sine propria infamia, vel magno damno fortunarum restituere, non teneris Famam cum tali tuo incommodo restituere. Ratio est: quia tale damnum absque tua culpa intulisti, hoc ipso, quod id bona fide narraveris. Porro causæ hæcenus enumeratæ sunt principales, quamvis nonnullæ aliæ ab Auctoribus referantur: siquidem ulterius, ut notat Reginaldus loc. cit. sect. 2. atque

50 Undecimo cessat obligatio Restitutionis Famæ, vel Honoris, quando ex tali Restitutione imminet periculum peccati mortalis, vel gravis scandalum aliorum. Ratio est: quia res ordinis inferioris non sunt restituendæ cum jactura rerum ordinis superioris: atqui bona animæ procul dubio sunt bona ordinis altioris, quam bona Famæ; ergo. Verum Casus hic habet locum, nisi forte persona infamans fuerit omnino magnæ Auctoritatis, ita ut ex ejus peccato manifestato timeatur merito scandalum aliorum.

51 Duodecimo. Quando is, qui alterum infamavit, fecit id propter ipsius bonum spirituale: ut quando peccatum ejus retulit Prælati, aut alteri, qui poterat illum juvare nec vellet obesse. Sed talis revera alterum injuste non diffamavit; unde nec mirum, quod ad Restitutionem non teneatur.

52 Decimotertio. Cum id, quod aliis dixit, erat

indifferens, & poterat tam in bonam, quam malam partem accipi, sed, qui audierunt, interpretati sunt in malam partem. Ratio est: quia id ex audientium malitia contigit, nam ceteroquin verba & facta in partem meliorem sunt interpretanda, juxta legem Charitatis de diligendo Proximo.

53 Decimoquarto. Quando quis solum narravit audita, & dixit, se audivisse, nihil addendo, ex quo faceret credulitatem. Nam talibus dictis rara fides adhibetur, & si adhibeatur, id potius ex audientium levitate contingit; quia, qui cito credit, levis est corde. Ecclesiastici 19. (e)

54 Decimoquinto. Quando quis ita narrat crimen alterius, ut simul narret poenitentiam, quam egit. Hoc tamen monet Reginaldus procedere tantum, quando talis narratio gloriam DEI concernit: prout S. Thomæ Apostoli incredulitas, S. Petri trina negatio, & aliorum quorundam crimina, simulque poenitentia crebro recensentur ad Fidelium ædificationem.

55 Decimosexto. Quando quis alterum infamat tantum in occasione remota, & per accidens: ut si quis jocans cum aliquo, illi crimen objiciat, quod putat, non esse ab ipso commissum, & ipse vociferando, atque indignando conqueratur vehementius, ex quo alii suspicantur, aut credunt, eum esse talis criminis reum.

## QUÆSTIO VI.

### De Judicio temerario, Suspicionem & Dubitationem.

#### SUMMARIUM.

- 56 Hæc tria differunt. Dubitatio,
- 57 Suspicio, &
- 58 Judicium, quid?
- 59 Suspiciari, vel judicare de Proximo ob sufficientia improbitatis indicia per se peccatum non est.
- 60 Tutius tamen est, animum ab hoc cohibere.
- 61 Conclusio declaratur.
- 62 Judicium temerarium est peccatum ex genere suo mortale.
- 63 Idque ulterius probatur.
- \* Quandoque per illud peccetur mortaliter?
- 64 Temere de Proximo malum suspiciari per se est veniale.
- 65 Per accidens tamen potest fieri mortale.
- 66 Dubia in meliorem partem sunt interpretanda, & qualiter?
- 67 Idipsum amplius declaratur.
- \* Licitum tamen est contra talem prudentes facere precautiones.

56 **C**ONTRA Octavum Præceptum Decalogi etiam contingit peccari per Judicium temerarium, ac sinistram Suspensionem de Proximo: nam & hæc pertinent ad falsum testimonium, si non ore, saltem corde contra Proximum prolatum. Ubi prænotandum, quod hæc tria, videlicet Dubitatio, Suspicio, & Judicium, inter se differant. Dubitatio quippe non est verus assensus, sed veluti Suspendio animi in neutram partem sese determinantis, ac veluti in ancipiti hærentis.

57 Suspicio est assensus debilis, junctus cum dubitatione de opposito, & hæc postmodum subdividitur in Suspensionem levem, gravem & violentam: quarum prior valde debilem assensum, multum vero dubitationis continet; altera econtra, quæ & Suspicio vehemens appellatur, plus habet assensus, & parum dubitationis. Suspicio violenta tandem (quæ in cap. Litteris. 12. De Præsumption. appellatur violenta & certa Suspicio) idem est, ac præsumptio violenta; qualis propemodum omnem excludit Dubitationem, & fidem integram atque credulitatem ex conjecturis, seu indiciis haustam producit. Navarr. in Can. Si quis. n. 8. & 9. de Penit. dist. 7. Layman. lib. 3. sect. 5. tract. 3. part. 2. cap. 2. n. 1. citans alios.

58 Judicium est firma animi sententia, seu assensus. Atque istud aliquando est prudens, si nimirum innitatur sufficientibus indiciis seu conjecturis ad generandum firmum assensum de alterius probitate, vel improbitate.



Dixi notanter : si absque gravi incommodo possit, per quas particulas sit distinctio inter eum, qui deliberate ac scienter aliquem graviter diffamat, & inter illum, qui id facit ex non plena advertentia; nam prior obligatur, ceteris paribus, & quando aliis mediis restitutio fieri nequit, restituere etiam cum certo periculo propriæ infamiæ per revocationem incurrendæ; non autem sic posterior : sicut a pari juxta jam dicta in Bonis fortunæ notabiliter damnificans deliberate, ceteris paribus, tenetur ad restitutionem, quamvis restituendo æque grave damnum exinde pati deberet, ac alter suffinet vi ablationis; non autem sic adstringitur, qui in Bonis fortunæ illud damnum causavit citra culpam Theologice gravem, ob non plenam advertentiam ad actum; prout jam antea insinuat fuit juxta valde probabilem sententiam *dist. 5. q. 5. n. 87.* Ex quo fundamento facile colliges, quod talis ex inconsiderata, ac non plene deliberata loquacitate detrahens, neque obligetur subsecuta damna alia in Bonis fortunæ resarcire cum suo gravi detrimento. \*

36 CONCL. IV. Quantum attinet ad obligationem restituendi honorem, per Contumeliam, & alia peccata linguæ injuste ablatum, potest id duplici modo resarciri, uno modo per externam aliquam obsequii exhibitionem, & declarationem absque ulla expressa petitione veniæ: alio modo condonatione, quæ vel sponte fit ab inhonorato, vel prævia humili veniæ petitione per inhonorem facta. Ita Matrius *disp. 8. Theol. Moral. n. 70.* cum aliis.

37 Ceterum, an sufficiat primo dumtaxat modo restituere honorem, vel insuper requiratur expressa veniæ petitio, non potest absolute decidi, sed id ex gravitate injuriæ, & conditione personæ offensæ, aliisque circumstantiis prudentis viri judicio definiendum est. Siquidem, si Superiores, vel Prælati aliquando inferiores vel plebejos Contumelia afficiant, non decet veniam ab istis petere, ne frangatur regendi auctoritas: sed sufficit, si benigne eos tractent, ac signis vel factis ostendant, se illos non despicere. Econtra vero, si injuria adeo gravis sit, & a subdito Superiori, vel a plebejo cuipiam Nobili, aut alii viro multum honorato, quem forsitan fuisse percussit, illata, ita ut alio modo compensari non possit talis injuria, nisi veniam petendo, & inhonoratus aliam satisfactionem suscipere nolit, nisi veniæ petitionem, tunc offendens tenetur illam petere. Alioquin autem, quando aliter, quam per veniæ petitionem, honor restitui potest, nemo ad veniam petendam cogendus est, sed ad eum modum, qui est in consuetudine, atque a prudentibus sufficiens judicatur. Matrius *loc. cit. & alii.*

## Q U Æ S T I O V.

### De Causis excusantibus a Restitutione Famæ, & Honoris.

#### S U M M A R I U M.

38 *Varia causa excusantes a Restitutione Famæ, & Honoris.*

39 *Regula tres circa hoc observanda.*

40 *I. Causa excusans a Restitutione Famæ, si infamia non est secuta.*

41 *II. Si verbum, alioquin infamans, jam abiit in oblivionem.*

\* *Quid, si dubitetur, num illud abierit in oblivionem?*

42 *III. Si Famæ aliunde recuperata fuit.*

43 *IV. Si crimen occultum, alia ratione publicum evaserit.*

44 *V. Si Restitutio Famæ facta sit impossibilis.*

45 *VI. Si ea nequeat fieri absque periculo vitæ.*

46 *VII. Vel non sine amissione Famæ majoris momenti.*

47 *VIII. Causa excusans est justa condonatio.*

48 *IX. Compensatio justa.*

49. 50. 51. 52. 53. 54. 55. *Adhuc plures alia causa excusantes.*

(e) *Juxta dicta n. 14.*

38 **V**arias causas passim enumerant Theologi, propter quas cessat obligatio restituendi Famam, aut Honorem, ut videre est apud Lugonem *disp. 15. de Just. & Jur. sect. 2. Lessium lib. 2. cap. 11. dubit. 26. Matrium disp. 8. Theol. Moral. n. 71. & seqq. Reginaldum lib. 10. cap. 23. & alios passim.* Verum, antequam hæc enumerentur,

39 Advertendum generaliter, certum esse ex communi Theologorum sententia, ad hoc, ut Fama per Detractionem læsa (idem servata proportionem dicendum de Honore) sit restituenda, hæc tres condiciones concurrere debere. I. Ut Fama Proximo re ipsa sit ablata. II. Ut sit injuste ablata. III. Ut eadem possit denuo obtineri, & non fuerit aliunde jam recuperata. Et defectu harum conditionum, aut saltem unius, vel alterius earundem: diversæ oriuntur causæ excusantes a Restitutione Famæ & Honoris; quamvis etiam ex aliis capitibus nonnullæ suboriantur.

40 Prima igitur causa, excusans a Restitutione Famæ, est: si revera ex cujuscumque obloquutione nulla fuit infamia secuta; quia nimirum vel infamator nullius erat fidei (quod sæpe accidit) ac proinde ejus dictis audientes fidem non adhibuerunt, vel quia illi, apud quos infamavit, jam sciebant crimen illud; vel saltem (ut loquitur Lessius) jam sciebant similia, ita, ut infamia non fuerit notabiliter aucta. Ratio est clara: quia, quod re ipsa ablatum non est, hoc ipso restitui non debet.

41 Secunda causa, a Restitutione Famæ excusans, est: si id, quod contra bonam Famam alterius quis locutus est, jam in oblivionem abiisse prudenter existimatur. Ita rursus communis; & ratio est: quia in tali causa Fama jam censetur recuperata, vel certe damnum illatum omnino evanuisse. Imo velle se retractare coram illis, apud quos alter diffamatus fuit, infamia jam in oblivionem abeunte, non tam esset Famam restituere, quam rursus infamare: sic enim revocaretur in memoriam crimen illud, quod ab eorum memoria jam exciderat; unde plus nocimenti sequeretur, quam utilitatis Proximo.

#### Additio.

\* Ast ponamus, quod dubitetur, num crimen illud apud alios jam in oblivionem abierit, vel non, quid tunc faciendum? Respondeo, duas regulas tali esse observandas. I. Regula ex Cardinali de Lugo *de J. & J. disp. 15. sect. 3. n. 35.* est desumpta, ut nimirum talis sibi ipse suam propriam personam ante oculos ponat, quidnam nimirum, si sibi ipse hæc infamatio ab alio fuisset illata, vellet in his circumstantiis fieri, & hoc ipsum circa infamatum præstet. II. Regula, quod, si circa propriam personam se resolvere non posset, notet ex Navar. & Lessio apud la Croix *lib. 3. part. 2. n. 1255.* quod stante isto dubio ob periculum, ne per similia dicta species forsitan jam sepultæ denuo resuscitentur, non facile sit renovanda memoria criminis, nisi evidens constet adesse aliud periculum, ne data occasione memoriæ criminis apud eos, quibus antea illud revelatum fuit, iterum redeat: interea tamen stante tali dubio saltem indirecte restituat famam laudando, quantum moraliter possibile, & recommendando illum, cui detraxit apud eos, coram quibus antea crimen occultum manifestavit, uti recte notat Molina apud Sporer *Tract. 5. in Decalog. cap. 4. sect. 5. n. 113.* \*

42 Tertia causa est: si Fama ablata jam fuit recuperata per aliam viam. Hæc enim est una ex conditionibus ad obligationem Restitutionis Famæ requisitis, ut constat ex supra dictis. Id autem fieri potest vel viro- rum gravium testimonio, vel si infamia vitæ probitate penitus sit absterfa, aut alio consimili modo.

43 Quarta est: si crimen occultum, quod aliquibus revelati illicito modo, ac injusto (nam si licite, ac iusta de causa id factum est, nulla subest obligatio Restitutionis) alia ratione fiat publicum, cessat obligatio Restitutionis. Ratio est; quia talis postquam crimen suum



suum publicatum fuit, amisit jus ad Famam, ita ut nemo ex iustitia teneatur amplius priorem existimatio nem de illo retinere; & consequenter neque tu teneris ei ex Iustitia Famam restituere, postquam tale crimen aliunde publicatum est.

44 Quinta causa excusans est: si Famæ Restitutio facta sit impossibilis. Ratio est manifesta: quia ad impossibile nemo tenetur.

45 Sexta est: si Restitutio Famæ non possit fieri sine periculo vitæ. Ratio est: quia generatim nemo tenetur restituere bona ordinis inferioris cum detrimento bonorum ordinis superioris, vita autem est bonum altioris & superioris ordinis, quam sit Fama. Hoc tamen intelligendum est, nisi & alteri ex tali infamia damnum æquale vel etiam majus emergat in bonis ordinis superioris, nempe in spiritualibus, aut vita corporali: tunc enim secus foret dicendum, & adesset obligatio restituendi.

46 Septima est: si non possit fieri Restitutio sine amissione Famæ, quæ sit longe majoris momenti: ut si Præ latus, vel Vir illustis infamavit plebejum, non tenetur cum jactura sui nominis, aut notabili detrimento proprii honoris revocare, sed sufficit, ut illum laudet in eo genere virtutis, ubi sic infamavit, vel alio meliori modo Famam restituat, quo sine jactura propriæ Famæ id facere poterit. Ratio est: quia ille plebejus non potest cum ratione exigere, ut talis Præ latus, Reipublicæ adeo utilis, famam suam tanti momenti amittat, sed debet esse contentus laude, humanitate, aut etiam aliqua pecuniaria compensatione, judicio prudentum faciendâ.

47 Octava est justa condonatio: intellige, quæ ab eo facta est, cujus infamia non redundat in alios. Ratio est: quia homo est dominus propriæ Famæ, & Honoris; ergo, si infamatio ipsum solum tangat, nec redundet in alios (secus foret, si infamia redundaret in alios) potest cedere juri Restitutionis Famæ, ejusque obligationem alteri condonare, præsertim propter Deum, aut alium finem honestum.

48 Nona est justa compensatio ut si ab eo, quem infamasti, pari modo sis infamatus. Hoc tamen intelligendum, non quod talis vicissim possit alterum licite infamare (hæc enim foret manifesta vindicta, quam nemo privata auctoritate potest facere; simulque, ut dicitur 1. Petri 3. debemus esse non reddentes malum pro malo, nec maledictum pro maledicto) sed solum, quod talis alium injuste infamans, a quo antea injuste fuerat infamatus, non teneatur ei ad Restitutionem, si alter sibi restituere nolit; cum possit uti compensatione, servata tamen æqualitate, quantum fieri potest.

49 Decima est: si bona fide persuasus, esse verum & publicum, narrasti aliquid, & Proximum diffamasti, nec possis sine propria infamia, vel magno damno fortunarum restituere, non teneris Famam cum tali tuo incommodo restituere. Ratio est: quia tale damnum absque tua culpa intulisti, hoc ipso, quod id bona fide narraveris. Porro causæ hæcenus enumeratæ sunt principales, quamvis nonnullæ aliæ ab Auctoribus referantur: siquidem ulterius, ut notat Reginaldus loc. cit. sect. 2. atque

50 Undecimo cessat obligatio Restitutionis Famæ, vel Honoris, quando ex tali Restitutione imminet periculum peccati mortalis, vel gravis scandali aliorum. Ratio est: quia res ordinis inferioris non sunt restituendæ cum jactura rerum ordinis superioris: atqui bona animæ procul dubio sunt bona ordinis altioris, quam bona Famæ; ergo. Verum Casus hic habet locum, nisi forte persona infamans fuerit omnino magnæ Auctoritatis, ita ut ex ejus peccato manifestato timeatur merito scandalum aliorum.

51 Duodecimo. Quando is, qui alterum infamavit, fecit id propter ipsius bonum spirituale: ut quando peccatum ejus retulit Præ lato, aut alteri, qui poterat illum juvare nec vellet obesse. Sed talis revera alterum injuste non diffamavit; unde nec mirum, quod ad Restitutionem non teneatur.

52 Decimotertio. Cum id, quod aliis dixit, erat

indifferens, & poterat tam in bonam, quam malam partem accipi, sed, qui audierunt, interpretati sunt in malam partem. Ratio est: quia id ex audientium malitia contingit, nam ceteroquin verba & facta in partem meliorem sunt interpretanda, juxta legem Charitatis de diligendo Proximo.

53 Decimoquarto. Quando quis solum narravit audita, & dixit, se audivisse, nihil addendo, ex quo faceret credulitatem. Nam talibus dictis rara fides adhibetur, & si adhibeatur, id potius ex audientium levitate contingit; quia, qui cito credit, levis est corde. Ecclesiastici 19. (e)

54 Decimoquinto. Quando quis ita narrat crimen alterius, ut simul narret poenitentiam, quam egit. Hoc tamen monet Reginaldus procedere tantum, quando talis narratio gloriam DEI concernit: prout S. Thomæ Apostoli incredulitas, S. Petri trina negatio, & aliorum quorundam crimina, simulque poenitentia crebro recensentur ad Fidelium ædificationem.

55 Decimosexto. Quando quis alterum infamat tantum in occasione remota, & per accidens: ut si quis jocans cum aliquo, illi crimen objiciat, quod putat, non esse ab ipso commissum, & ipse vociferando, atque indignando conqueratur vehementius, ex quo alii suspicantur, aut credunt, eum esse talis criminis reum.

## QUESTIO VI.

### De Judicio temerario, Suspicionem & Dubitationem.

#### SUMMARIUM.

- 56 Hæc tria differunt. Dubitatio,
- 57 Suspicio, &
- 58 Judicium, quid?
- 59 Suspiciari, vel judicare de Proximo ob sufficientia improbitatis indicia per se peccatum non est.
- 60 Tutius tamen est, animum ab hoc cohibere.
- 61 Conclusio declaratur.
- 62 Judicium temerarium est peccatum ex genere suo mortale.
- 63 Idque ulterius probatur.
- \* Quandoque per illud peccetur mortaliter?
- 64 Temere de Proximo malum suspiciari per se est veniale.
- 65 Per accidens tamen potest fieri mortale.
- 66 Dubia in meliorem partem sunt interpretanda, & qualiter?
- 67 Idipsum amplius declaratur.
- \* Licitum tamen est contra talem prudentes facere præcautiones.

56 **C**ONTRA Octavum Præceptum Decalogi etiam contingit peccari per Judicium temerarium, ac sinistram Suspensionem de Proximo: nam & hæc pertinent ad falsum testimonium, si non ore, saltem corde contra Proximum prolatur. Ubi prænotandum, quod hæc tria, videlicet Dubitatio, Suspicio, & Judicium, inter se differant. Dubitatio quippe non est verus assensus, sed veluti Suspensio animi in neutram partem sese determinantis, ac veluti in ancipiti hærentis.

57 Suspicio est assensus debilis, junctus cum dubitatione de opposito, & hæc postmodum subdividitur in Suspensionem levem, gravem & violentam: quarum prior valde debilem assensum, multum vero dubitationis continet; altera econtra, quæ & Suspicio vehemens appellatur, plus habet assensus, & parum dubitationis. Suspicio violenta tandem (quæ in cap. Litteris. 12. De Præsumption. appellatur violenta & certa Suspicio) idem est, ac præsumptio violenta; qualis propemodum omnem excludit Dubitationem, & fidem integram atque credulitatem ex conjecturis, seu indiciis hausitam producit. Navarr. in Can. Si quis. n. 8. & 9. de Poenit. dist. 7. Layman. lib. 3. sect. 5. tract. 3. part. 2. cap. 2. n. 1. citans alios.

58 Judicium est firma animi sententia, seu assensus. Atque istud aliquando est prudens, si nimirum innitatur sufficientibus indiciis seu conjecturis ad generandum firmum assensum de alterius probitate, vel improbitate.



Aliquando est imprudens, seu *temerarium Judicium*, nempe quod ejusmodi sufficientibus indiciis non innitur. Atque hoc ipsum servata proportionem dicendum de Suspicionem, & Dubitationem, quarum utraque vel est prudens, vel temeraria, si innitur, vel non innitur sufficientibus ad rationabiliter dubitandum, vel suspicandum indiciis. Quibus prænotatis, sit

59 CONCL. I. Suspiciari, vel judicare de Proximo, ubi sufficientia improbitatis indicia se produnt, per se loquendo nullum est peccatum. Ita Navarrus in *Commentario in Rubric. de Judiciis n. 47. Azorius part. 3. lib. 13. cap. 11. Layman lib. cit. n. 4. & communis. Ratio est: quia in tali casu, ubi sufficientia adsunt improbitatis indicia, proximus amisit jus bonæ suæ existimationis respectu illius, cui crimen est cognitum ex illis sufficientibus signis; unde iste taliter suspicando, vel etiam judicando neque peccat contra charitatem proximi, neque contra justitiā. Id ipsum patet ex *can. Quod suspecti. 3. q. 5. & c. Suspicionis. 39. De offic. delegat. cum similibus; ubi licite ac juste ob legitima indicia nunc Judices, nunc Testes, alique possunt recusari. Quod etiam de peccato Proximi licitum sit judicare, ubi adsunt sufficientia ejus indicia, patet vel ex ipsa praxi publicorum Judiciorum, atque Magistratuum, qui ex officio tenentur judicare de peccatis subditorum. Ubi nota hic incidentaliter, quod minora ad formandam prudentem suspicionem, quam ad formandum prudens Judicium sufficientiant indicia.**

60 Fatendum tamen, quod extra casum necessitatis, vel utilitatis tutius sit, animum a Suspicionibus, & Judiciis circa peccata aliena penitus cohibere; idque ob periculum errandi, cum facile contingere possit, ut decipiamur circa sufficientiam indiciorum, & ubi etiam talia adsunt, adhuc dubitari possit de operantis intentione, quæ soli Deo nota existit.

61 Dicitur in Conclusionem: *ob sufficientia indicia: nam si quis concipiat majorem, quam indicia promereantur Suspicionem, peccat, non quidem, quia suspicatur, sed quia plus, quam causa suspicandi exigit, suspicatur. Navarrus cit. n. 47. Et additur: per se loquendo: siquidem per accidens pluribus ex causis potest reddi illicitum tale Judicium, vel Suspicio: ut si quis exinde concipiat grave odium erga Proximum, & hujusmodi.*

62 CONCL. II. Judicium temerarium de Proximo in materia gravi deliberate conceptum est peccatum ex genere suo mortale. Ita D. Thomas 2. 2. *quest. 60. art. 3. illud inter alia probans ex isto 1. Corinth. 4. Nolite ante tempus judicare. ubi Glossa, desumpta ex S. August. Tract. 90. in Joan. subdit: Et si ergo Suspensiones omnino vitare non possumus, quia homines sumus: judicia tamen, id est diffinitivas firmasque sententias continere debemus. Id ipsum docet Layman ubi supra n. 5. Angelus in Summa 2. Judicium n. 17. & alii communiter. Ratio est: quia hoc repugnat graviter virtuti Justitiæ: nam quisque habet jus ad bonam existimationem sui, seu, ut saltem non judicetur positive malus, donec per sufficientia signa demonstretur malus: ergo temere, seu absque sufficienti indicio firmam de ipsius improbitate concipere sententiam, eumque in corde suo condemnare, repugnat virtuti Justitiæ: sicque est peccatum ex genere suo mortale.*

63 Unde ad indicandam hujus vitii, seu Judicii temerarii gravitatem, Christus Matth. 7. & Luca 6. dicere dignatus est: *Nolite judicare, & non judicabimini: Nolite condemnare, & non condemnabimini.* Nam ibidem sermonem esse de Judicio temerario, patet ex sequentibus verbis: *Quid autem vides festucam in oculo fratris tui &c. ponderando ly Festucam.* Item Jac. c. 4. *Qui detrahbit fratri, aut qui judicat fratrem, detrahbit legi, & judicat legem.* cum similibus. Hinc in Jure Canonico c. *Estote misericordes &c. De Reg. Jur. dicitur: Hoc loco nihil aliud nobis præcipi existimo, nisi ut ea facta, quæ dubia sunt, quo animo fiant, in meliorem partem interpretemur.*

#### Additio.

\* Ceteroquin, ut actu per Judicium temerarium peccetur mortaliter, semper præ oculis habendæ sunt quinque conditiones ad hoc grave peccatum contrahendum requisitæ, quæ etiam ex jam dictis possunt erui. I. Ut materia sit gravis, de qua gravitate eodem modo discutitur, uti de gravi materia respectu detractionis. II. Ut assensus circa illam materiam sit firmus, & non tantum debilis; ubi Cajetanus apud Busenbaum hic censet, eum assentiri firmiter, qui rogatus, an habeat rem pro certo, respondet, sibi certam, aut fere certam videri: eum vero suspicari, qui respondet, se non esse moraliter certum, sed facile posse falli. III. Ut dictus assensus sit voluntarius & deliberatus. IV. Ut motiva assentiendi sint insufficientia ad prudentem firmum assensum. V. Ut etiam pro tunc, quando talis assensus elicitur, vel positive noscantur motiva esse insufficientia, vel saltem dubitetur, num sint sufficientia, & nihilominus v. g. ex odio, rancore aut male habituata & passionata natura absque ulteriori indagatione firmus eliciatur assensus, quamvis bene advertatur obligatio inquirendi prius de sufficientia motivorum. uti recte advertit Haunoldus de J. & Ju. Tom. 2. n. 520.

Quod si una ex his conditionibus deficiat, talis assensus jam non amplius mortaliter peccaminosus erit. Ex quo deducit Molina hic d. 13. n. 4. viros timoratos raro quoad illud punctum peccare mortaliter, quoniam ordinarie una ex allegatis deerit conditionibus. Item exinde infert la Croix lib. 3. part. 2. n. 1189. *prope finem*, scrupulosos vix umquam condemnandos esse tamquam reos in ista materia alicujus peccati mortalis, quia isti homines vix umquam habent vera judicia, præsertim his conditionibus qualificata, quamvis se habere putent, sed sunt vel meræ apprehensiones violentæ, vel impressiones phantasiæ apud istos, præsertim Melancholicos, ita fortes, ut videantur assensus, cum tamen sæpius ne quidam sint voluntariæ Suspensiones. Deserviunt ista Confessario, qui, si similes confessionale accedunt, debet eosdem judicare secundum ordinarie contingentiam, nisi certo & expresse sibi constet de contrario: interea tamen etiam in hoc invigilet Confessarius, ne tales id, quod interius judicant, etiam exterius aliis manifestent, sicque detrahant. \*

64 CONCL. III. Temere de proximo suo malum suspicari, per se loquendo, est peccatum duntaxat veniale, idque multo magis de temeraria Dubitatione est dicendum. Ita D. Thomas cit. *quest. 60. art. 3. Navarrus in Commentario in Rubric. de Judiciis n. 58. & seq. Angelus Vers. Præsumptio. Layman cit. cap. 2. n. 6. & alii. Ratio est: quia ex una parte per solam Suspicionem, utpote consistentem in debili assensu, & conjunctam cum dubitatione, ac multo magis per meram dubitationem, bona fama atque existimatio Proximi graviter non læditur: ex altera vero parte, quod quis ex levibus indiciis dubitare incipiat de bonitate fratris, procedit ex fragilitate humana, sicque ex genere suo peccatum veniale involvit.*

65 Additur notanter, *per se loquendo*: quia per accidens bene potest Suspicio fieri peccatum mortale: ut si quis ex sinistra Suspicionem erga Proximum animo retenta concipiat grave odium, vel contemptum ipsius, aut ejusmodi temeraria Suspicio in opus externum graviter peccaminosum prodeat, utputa, Proximi famæ detrahendo, vel in electione, aut promotione ad dignitates alium minus dignum, vel penitus indignum ipsi præferendo, & hujusmodi.

66 Quæres, qualiter sit intelligendum dictum illud: *Dubia in meliorem partem sunt interpretanda*, prout habetur in cit. cap. *Estote misericordes. de Reg. Jur.* ac tradit D. August. lib. 2. de Serm. Dom. in Monte c. 18. estque communis. Resp. I. Loquendo de vero dubio, seu existentibus sufficientibus argumentis ad dubitandum de probitate Proximi, Regula illa non est intelligenda affirmative, quasi nihilominus proximum teneamur existimare innocentem (nemo enim obligatur ad exponendum se periculo



periculo erroris, quale in tali casu immineret) sed debet accipi *negative*: ita videlicet, ut, quamdiu res est dubia, sententia non feratur in deteriore partem; hac enim ratione evitatur quodlibet periculum erroris, simulque ratione evitatur quodlibet periculum erroris, simulque nulla proximo infertur injuria: unde & in foro externo, quamdiu reus de crimine convictus non est, absolvitur, non quidem affirmando, crimen ab eo commissum non esse, sed solum pronuntiando, crimen contra ipsum legitime probatum non fuisse. Lessius lib. 2. de Just. & Jur. cap. 19. dub. 4. Layman ubi supra num. 7. & alii.

67 Resp. II. Alter dictæ Regulæ sensus est, quod facta dubia, quæ possunt referri in bonam & malam partem, debeant, supposito, quod quis velit circa talia facta dubia elicere judicium aliquod positivum, ac determinatum, potius semper interoretari in bonam partem. Ita desumitur ex can. In Scripturis dist. 96. ac notat Glossa in can. Absit 11. q. 4. Vers. Sinistrum. Abb. in c. Esote misericordes n. 5. de Reg. Jur. & communis. Ratio est: quia ex tali interpretatione & ipsius intellectus inclinatione in partem meliorem nullum imminet periculum inferendi injuriam proximo, bene tamen, si fieret interpretatio in partem pejorem. Accedit, quod id ipsum suadeat Dilectio proximi, ac præceptum Divinum de non judicando.

#### Additio.

\* Porro, etsi stante dubio positivo (quando nimirum æque rationes graves sunt pro, ac contra) vel etiam stante dubio negativo (quando nimirum nec graves rationes sunt pro, nec contra) etsi, inquam, stante tali dubio nequeas aliquem determinate, ac positive judicare malum, cum is stante simili dubio exsistat in possessione, melior autem sit conditio possidentis, poteris tamen hoc non obstante, in simili vero dubio facere præcautiones, ne, si forsan esset malus, exinde damnificeris. Ita Henno Tract. in Decalog. disp. 8. q. 2. conclus. 4. Sporer ibidem tr. 4. cap. 4. sect. 2. n. 36. & Sabinus Bononiens. part. 1. tr. 36. n. 144. Ratio est: quia, uti bene adjungit Henno, taliter agere est actus prudentiæ, & vigilantæ, nec alteri fit injuria; quia nullum jus habet nondum sufficienter cognitus, cur teneamur ipsi positive fidere in damni periculo, cum inter homines sint fideles, & infideles, justi & injusti, probi & improbi. Idem exemplificant Sporer & Sabinus Bononiensis loc. cit. taliter: licet occidere pecunias, quia possibile est, aut saltem fieri potest, quod famuli vel hospites non sint fideles: item filix interdiceret, ne cum certo juvene conversetur; quia possibile est, aut fieri potest, ut ab eo seducatur, & ita discurrendo de pluribus aliis; quia in similibus casibus non judicas, defecto actu esse tales, sed posse esse tales, vel saltem successive fieri tales: paucis, æquivalenter sic dicis: non nego hominem illum esse Bonum, nolo tamen propterea jubere periculum, quod subesse possit, si forte sit malus. Attendant autem hic sibi aliqui nimium suspiciosi, ne ista doctrina abutantur, & suis nimis præcautionibus tales ponant actus, ex quibus præbetur aliis merito occasio suspicandi, quasi hi, contra quos illæ excessivæ præcautiones fiunt, essent positive infideles &c. ac mali. \*

## DISTINCTIO VII.

De Nono, & Decimo Præcepto Decalogi.

### QUÆSTIO I.

Quanam Nono, & Decimo Præcepto Decalogi prohibeantur?

#### SUMMARIUM.

1. Nomen, & Decimum Præceptum Decalogi, quod? Mala prava concupiscentiæ.
2. Præsertim voluptatum carnalium, & divitiarum.
3. Quid generatim de pravis concupiscentiis?

4. Fomes peccati hoc duplici Præcepto non prohibetur.
5. Motus concupiscentiæ quando sint peccatum?
6. Nono Præcepto Decalogi quæ prohibeantur?
7. Contra Decimum Præceptum qui peccent?

1 **U**trumque hoc Decalogi Præceptum peccata cordis, pravamque concupiscentiam expressius inhibens, Exodi 20. & clarius Deut. 5. sequentibus verbis proponitur: *Non concupisces uxorem proximi tui. Et rursus: Non domum, non agrum, non servum, non ancillam, non bovem, non asinum, & universa, quæ illius sunt.* Et merito: nam, quanta mala ex inordinata concupiscentia cordis oriuntur, S. Jacobus in sua Canonica cap. 4. ex instinctu Spiritus Sancti compendiose declarat illis verbis: *Unde bella, & lites in vobis? Nonne ex concupiscentiis vestris, quæ militant in membris vestris?* Et 1. Jo. 2. *Quoniam omne, quod est in mundo, concupiscentia carnis est, & concupiscentia oculorum, & superbia vitæ, quæ non est ex Patre, sed ex mundo est.* Ad hanc igitur edomandam concupiscentiam hoc duplici Præcepto Deus jubet, *Non concupisces.*

2 Quia vero vel maxime prava concupiscentia voluptatum carnalium, & divitiarum generi humano nociva est, atque periculosa, utpote ad quam homines naturaliter magis sunt proclives, hinc Æterna Sapientia utramque speciali præcepto explicite atque expresse prohibendam censuit, non obstante, quod implicite atque indirecte jam in sexto, atque septimo Decalogi Præcepto prohibeatur.

3 Insuper, quia juxta illud 1. Reg. 16. *Homo videt ea, quæ parent, Dominus autem intuetur cor;* hoc duplici Præcepto pariter innuitur, omnes alias internas, concupiscentias pravas, & voluntarias delectationes, animique proposita contra alia Præcepta Divina prohiberi, juxta quod Christus Dominus Matth. 15. expressius declarare dignatus est, dicendo: *De corde exeunt cogitationes male, adulteria, furta, falsa testimonia; & hæc coinquinant hominem.* Ut autem clarius intelligatur intentio hujus duplicis Præcepti Decalogi, sit

4 **CONCL. I.** Hoc duplici Præcepto Decalogi non prohibetur concupiscentia illa, quæ ex peccato originali residua est, & communiter *Fomes peccati* appellatur. Ita omnes Catholici, ac novissime Concilium Trident. Sess. 5. ubi ait: *Manere autem in Baptizatis concupiscentiam, vel fomitem, hæc Sancta Synodus fatetur, & sentit: quæ, cum ad agonem relicta sit, nocere non consentientibus, sed utiliter per Christi JESU gratiam repugnantibus non valet.* Accedit ratio: quia ejusmodi motus appetitus sensitivi neque in nostra sunt potestate & libertate, ac proinde frustra prohiberentur, neque sunt peccatum, quamdiu ipsis voluntas non consentit. Siquidem, ut ait D. Augustinus lib. de vera Religione cap. 14. *Usque adeo peccatum voluntarium est malum, ut nullo modo sit peccatum si voluntarium non sit.*

5 **CONCL. II.** Tunc motus concupiscentiæ in appetitu sensitivo sunt peccatum, ac contra hæc ultima Præcepta Decalogi, quando accedit consensus voluntatis. Ita omnes Catholici. Et quidem, si consensus voluntatis sit perfectus, ac pene deliberatus, in materia, ceteroquin gravi, committitur peccatum mortale: si vero solum imperfectus, ac non plene deliberatus, erit dumtaxat peccatum veniale. Et hoc postariis pariter dicendum, si versetur circa materiam levem, puta, quando quis vult furari unum obolum.

6 **CONCL. III.** Nono Præcepto Decalogi specialiter prohibetur Delectatio morosa, atque illicitum desiderium in materia venerea, de quibus ex professo in sequenti Quæstione. Quinimo eisdem peccatis, corde seu cogitatione deliberata perpetratis, peccatur contra hoc Præceptum, quibus, si opere perpetrantur, peccatur contra Præceptum sextum: juxta quod dicit Salvator Matth. 5. *Qui viderit mulierem ad concupiscendum eam, jam mactatus est eam in corde suo.* Addit Navarrus cap. 19. Manual. num. 1. quod etiam peccet contra hoc Præceptum mortaliter, qui deliberate cupit, vel gaudet amari amore libidinoso mortali ab alia persona, quamvis ipse non



sic amet: quia talis consentit peccato mortali suo, vel alieno.

7 CONCL. IV. Contra Decimum, ac ultimum Præceptum Decalogi peccant illi, qui nimia aviditate divitias expetunt, & modis pravis, atque illicitis artibus opes augere concupiscunt: illi, qui ludis immoderate abutuntur: deinde mercatores, qui rerum penuriam, & annonæ caritatem expetunt: item milites, qui bellum desiderant, ut illis suppetat facultas furandi, ac huiusmodi. Ita Catechismus Romanus, & Doctores passim. Quantum autem huiusmodi prava, & inordinata desideria noxia sint, si fiant, & habeantur animo deliberato, deducitur ex illis verbis Apostoli 1. *Timoth. 6. Habentes alimenta, & quibus tegamur, his contenti sumus: nam, qui volunt divites fieri, incidunt in tentationem, & in laqueum diaboli, & desideria multa, inutilia, & nociva, quæ mergunt homines in interitum & perditionem. Radix enim omnium malorum est cupiditas, quam quidam appetentes erraverunt a fide, & inseruerunt se doloribus multis*, Hæc ibi.

## Q U Æ S T I O II.

### De Delectationibus morosis, & Desideriis illicitis.

#### S U M M A R I U M.

- 8 Delectatio morosa generatim, quid?
- 9 Unde sic dicatur?
- 10 Desiderium illicitum, quid, & quomodo differat a Delectatione morosa?
- 11 Delectationes morosæ venereæ, & desideria venereæ quid,
- 12 Et quale peccatum?
- 13 Cogitationis peccatum pertinet ad speciem, ad quam peccatum operis.
- 14 Peccatum Cogitationis an contrahat speciales malitias circumstantiarum actus externi?
- 15 Negatur hoc quoad Delectationes morosas.
- 16 Affirmatur quoad Desideria illicita.
- 17 Disparitas inter hæc.
- 18 An quis peccet, tempore jejunii morosè se delectando in esu carniū?
- \* Adjungitur notabilis Additio magis declarans num. 13. & numerum 14. circa peccata Cogitationis. Addit. I.
- \* An Delectatio morosa de objecto turpi semper sit graviter peccaminosa? Addit. II.
- \* An cogitatio speculativa de objecto turpi arguat Delectationem morosam graviter peccaminosam? Addit. III.
- \* An optatio conditionata objecti turpis arguat internam Delectationem morosam graviter peccaminosam? Addit. IV.
- \* An involvatur eadem, si vidua de copula præterita, & sponsi de futura deliberate recogitent, atque in eadem complacent? Addit. V.
- \* An ea censeatur adesse, si quis se habeat solum negative? Addit. VI.
- \* Quid de motibus carnalibus exinde ortis sentiendum? Addit. VII.

8 **A**dvertendum, quod Delectatio morosa generatim sit simplex & deliberata complacentia, quam voluntas capit ex cogitatione rei illicitæ sine intentione ipsam in opus deducendi: ut si quis contentus sit sola Delectatione cogitationis interioris, v. g. complacendo sibi de occisione inimici, aut copula carnali absque operis intentione.

9 Porro huiusmodi Delectatio dicitur morosa non ratione temporis, quo quis ejusmodi cogitationi illicitæ immoratur (potest enim brevissimo tempore peccari per Delectationem morosam, dummodo adsit perfecta advertentia, & consensus voluntatis) sed ratione negligentiae, ignaviae, & moræ ipsius voluntatis, quæ advertens malitiam suæ cogitationis nihilominus perseverat mo-

rose in ipsa, ac sibi in ea complacet, cum ipsam expellere deberet.

10 Econtra vero *Desiderium illicitum* est actus, & motus efficax voluntatis, quo appetit, & fertur in objectum prohibitum: id est, quo voluntas vult, ac desiderat actum peccaminosum ipso opere perpetrare, si adesset facultas. Unde Desiderium illicitum per hoc differt a Delectatione morosa, quod Delectationes morosæ ferantur in objectum ut aliquo modo præsens sine intentione progrediendi ad ipsam operis executionem, Desideria autem ferantur in objectum, seu in rem desideratam ut absentem (Desiderium enim est bono absente, ut inquit Aristoteles) simulque tendat in executionem operis, si adsit facultas. Hanc generalem doctrinam ad propositum applicando, sit

11 CONCL. I. *Delectationes morosæ venereæ* sunt illæ, quæ ex rebus obscænis cogitatione, vel imaginatione apprehensis cum pleno, & deliberato voluntatis consensu percipiuntur, quamvis nulla subsit voluntas rem illam turpem, v. g. actum fornicationis, opere complendi. Econtra *Desideria illicita venereæ* sunt illa, per quæ quis ipsum actum obscænum opere externo perficere desiderat: ut puta, dum quis cupit virginem deflorare, sive deinde media opportuna ad id opere perficiendum inquirat, sive non, dummodo id deliberate desideret facere, si facultas adesset. Ita in re communis.

12 Et quidem tam Delectationem, quam Desiderium illicitum in materia venerea esse peccatum mortale, si adsit perfecta deliberatio, & consensus voluntatis, certum est inter Doctores; & patet tum ex Nono Præcepto Decalogi, tum ex cit. illo Salvatoris *Matth. 5. Qui viderit mulierem ad concupiscendum eam, jam mochatus est eam in corde suo*. Ut tamen aliæ nonnullæ difficultates breviter explicantur, hinc

13 Quæritur I. An cogitationis peccatum pertineat ad eandem speciem, ad quam peccatum operis? Resp. Affirmative, cum Lessio *lib. 4. de Just. & Jur. n. 122.* & communi aliorum. Ratio est: quia in consensu Delectationis est tacita approbatio operis. Hinc Delectatio ex cogitatione fornicationis concepta pertinet ad speciem fornicationis, & quæ ex cogitatione peccati contra naturam, pertinet ad speciem peccati contra naturam: quoniam peccatum fornicationis, & peccatum contra naturam etiam in genere luxuriæ sunt duæ distinctæ species, & consequenter etiam Delectationes circa has distinctas species versantes. Item Delectatio, quæ oritur ex imaginaria occisione inimici, spectat ad speciem homicidii, & quæ ex phantasia indebitæ excellentiæ concipitur, ad speciem superbix. Et quoad hoc conveniunt Doctores passim.

14 Quæritur II. An, si actus exterior ob speciales circumstantias speciem peccati mutantes, plures in se continet malitias, eas omnes contrahat peccatum cogitationis? Resp. cum communiori Doctorum, hic esse distinguendum inter Delectationes morosas, ac Desideria illicita.

15 Et quidem, si quis simpliciter ac præcise se oblectet cogitatione morosa peccati carnalis cum muliere, quæ ipsi est consanguinea, vel Deo per votum sacra, aut conjugata, eo quod sit pulchra, ac proinde objectum Delectationis venereæ, non vero, quatenus est conjugata &c. is committit unum peccatum mortale internæ Delectationis venereæ morosæ contra virtutem Castitatis. Ita Layman *lib. 1. Tract. 3. cap. 6. n. 15.* Lessius *loc. cit. n. 123.* & plures alii, quos allegant, quamvis nonnulli contradicant.

16 Secus est dicendum de Desiderio illicito, quo quis desiderat, vel proponit fornicari, aut peccare carnaliter cum tali femina, quam alterius uxorem, personam sacram, vel consanguineam esse non ignorat: nam tunc ejusmodi circumstantia pravo Desiderio, seu proposito specialem addit malitiam peccati.

17 Ratio diversitatis inter hunc, & priorem casum est: quia Desideria illicita tendunt in ipsam actionem externam, eandem desiderando perficere, si possent: ergo & eandem cum ipsa actione externa habent malitiam.



tam. Delectationes vero morosæ sistant præcise in complacentia carnali objecti, quatenus intentionaliter præsentis in intellectu præcise (juxta casum positum) sequentes reliquam malitiam, quæ in actione reperitur ratione circumstantiæ conjugii, voti, vel consanguinitatis annexa.

18 Si dicas. Ergo pariter quis peccabit tempore jejunii Quadragesimalis delectando se morose in cogitatione esus carniū, cum de hac, & de Delectatione morosa venerea videatur esse eadem ratio. Resp. negando consequentiam, & paritatem. Disparitas est: quia Delectatio morosa venerea versatur circa objectum ex se & intrinsece malum, causatque præterea naturaliter inordinatam corporis commotionem, ac libidinofam pruriginem, quæ disponit ad pollutionem; unde & ipsa illicita est, ac Lege naturali prohibita. Secus est de simplici imaginatione esus carniū tempore jejunii, seclusa voluntate, sive consensu contra Præceptum pro tali tempore vescendi carnibus prohibitis: siquidem pro illo tempore esus carniū non Jure Naturæ, sed sola Lege positiva Ecclesiastica prohibitus est: simulque prohibetur sola actio externa esus carniū, nec non & voluntas comedendi ipsas tempore vetito, non autem inhibetur ipsa interior Delectatio circa esum ipsarum, seclusa alia prava voluntate carnes comedendi tempore vetito. Verum quidem est, in hujusmodi cogitationibus sæpe contingere peccatum veniale, dum superflua in ipsis quaeritur Delectatio.

Additio I.

\* Quæres III. Quomodo Quæsitum I. & Quæsitum II. quoad dicta de Delectatione morosa ad invicem concordentur? Ratio dubitandi est; quia Quæsitum I. ait loquendo de Delectatione morosa, ipsam spectare ad eandem speciem, ad quam spectat peccatum operis, & consequenter Delectatio concepta ex cogitatione fornicationis, & ea, quæ oritur ex cogitatione peccati contra naturam, erunt peccata ab invicem specie diversa. E contra vero Quæsitum II. dicit, si ipsum peccatum operis, seu actus exterioris ob speciales circumstantias speciem mutantem plures in se contineat malitias, eas tamen universim non eo ipso contrahere Delectationem morosam circa tale opus, & consequenter Delectationes morosæ circa mulierem consanguineam, vel Deo per votum sacram, aut conjugatam in genere Delectationis erunt ejusdem speciei, supposito nimirum, quod per intellectum a determinata persona, & a carnali affectu singulari ad illam omnino intentionaliter abstrahatur? Respond. Illa duo Quæsitum, de quibus fufius la Croix tom. 6. part. 2. n. 1023. ac seqq. taliter commodè concordari possent, dicendo, quod Quæsitum I. sit intelligendum in casu, quo ipsa peccata operis, seu actuum exteriorum, etiam quatenus e. g. in genere luxuriæ intellectui præsentantur præcise in ordine ad Delectationem morosam, versantur vel circa diversa specie objecta in illo ipso genere, vel saltem circa moraliter diversos modos tendendi in objectum; ubi ipsæ Delectationes circa dicta objecta censentur æque diversas species contrahere, sicuti censentur diversæ specie Delectabilitates.

E contra vero Quæsitum II. loquitur in casu, quo objecta, & modi tendendi in eadem NB. in illo genere, quo intellectui, a circumstantiis externis in ordine ad Delectationem intentionaliter præscindenti, repræsentantur, specie morali ab invicem non diversificantur. E. g. quia copula naturalis carnalis in genere luxuriæ (sub qua sola repræsentatur intellectui in ordine ad Delectationem) est ejusdem rationis, sive versetur circa consanguineam, vel circa aliquam aliam ligatam, aut Deo per votum sacram, hinc neque Delectatio versans circa unam, vel alteram erit speciei diversæ, dummodo (quod semper notandum) in Delectatione prorsus abstrahatur ab aliis circumstantiis operis externi. E contra vero, quia copula carnalis naturalis, & peccatum contra naturam (puta copula sodomitica) propter diversum modum tendendi etiam in genere luxuriæ sunt ab invicem diversæ,

pariter erit dicendum de Delectabilitatibus & delectationibus circa easdem. \*

Additio II.

\* Quæritur IV. An Delectatio morosa de re turpi, ac venerea, id est circa copulam carnalem, vel circa ea, quæ eandem proxime circumstant, aut disponunt &c. semper sit ita mortaliter peccaminosa, ut numquam ex parte objecti intra terminos peccati venialis contineatur, supposito, quod fuerit deliberate voluntaria & absoluta? Ante Responsionem, Nota I. Gratis admitti, talem Delectationem morosam frequenter solummodo esse venialiter peccaminosam ex parte subjecti ob non plene cognitam malitiam ex parte intellectus, vel ob semiplenam tantummodo deliberationem ex parte voluntatis; dubium vero hic præcise agitur ex parte objecti, an nimirum deliberata aliqua immedata, absoluta & directa Delectatio circa objectum turpe, ac venereum non possit esse ita levis, ac remissa, ut non excedat culpam venialem? ubi Nota II. Quod Delectatio morosa de re turpi, seu de objecto aliquo venereo possit esse vel mere spiritualis, vel etiam carnalis. Prima in sola voluntate residet sine actuali hic & nunc sensu perceptibili commotione turpi in corpore. Secunda conjunctam habet actuale commotionem seminis, vel spirituum genitalium, & exinde Delectabilitatem sensibus perceptibilem; hæcque frequentius contingit, præsertim, si Delectatio illa fuerit aliquo modo intensior. H. N.

Resp. Omnis deliberata, & absoluta Delectatio morosa de objecto venereo, etiam si foret mere spiritualis, est mortaliter peccaminosa apud illos quibus illicita est copula. Ita S. Thomas 1. 2. qu. 47. art. 8. cum communi. Ratio est; quia omnis talis Delectatio est de objecto graviter malo; quoniam, juxta jam dicta dist. 4. qu. 7. n. 85. & seqq., in ipso objecto venereo immediate & absolute volito non datur levitas materiæ; ergo talis Delectatio erit actus mortaliter malus; nam actus sumit malitiam suam ab objecto, in quod tendit; sic enim etiam Delectatio morosa deliberata in blasphemando est mortalis, quia ipsa blasphemia, in quam illa Delectatio tendit tanquam in suum objectum, est graviter mala.

Dixi autem notanter: Delectatio morosa NB. de objecto venereo; nam, si non foret talis Delectatio morosa de objecto venereo, sed de alio sensibili, etiam si ex mera curiositate, non excederet hæc Delectatio juxta Sporer, & alios graves Auctores limites peccati venialis, quamvis exinde exsurgant motus carnales citra tamen periculum consensus, aut complacentiæ formalis in eisdem: si enim Delectatio sensibilis hausta ex aspectu curioso faciei formosæ alicujus mulieris non involvit peccatum grave quoad oculum corporalem, neque illud importabit quoad oculum spirituale, seu intellectum: uti enim ait Sporer, quando causa talium motuum carnalium citra formalem impuram in iis complacentiam habitorem est tantum venialiter culpabilis, etiam non major culpa, quam venialis derivatur in ipsos affectus, id est, motus carnales per accidens exinde citra impuram in ipsis complacentiam resultantes.

Additio III.

\* Quæritur V. An censeatur adesse Delectatio morosa graviter peccaminosa, si cogitatio de objecto turpi præcise fuerit speculativa, non autem practica? Antequam respondeam, notandum ex la Croix lib. 3. part. 1. num. 896. quod cogitatio speculativa de objecto turpi sit illa, quæ quidem cognoscit Delectabilitatem hujus objecti, non tamen exinde appetitus movetur ad eam Delectabilitatem amandam, sibi in objecto quatenus apprehenso ut sic delectabili complacendum. E contra cogitatio practica de objecto turpi ita apprehendit Delectabilitatem illius objecti, ut ex hac ipsa Delectabilitate tanquam ex motivo formali feratur appetitus in illud objectum amandum, sibi in eo ut intentionaliter præsentati complacendum H. N.



Respond. I. Si cogitatio de objecto turpi fuerit præcise speculativa, exinde non censetur illico adesse Delectatio morosa graviter peccaminosa. Ita la Croix *loc. cit. ac lib. 5. num. 108*. Et patet de aliquo studente Casibus, vel de Confessario, qui, dum cogitat, legit, & etiam subinde loquitur de copula carnali, bene intelligit ejusdem Delectabilitatem, non tamen etiam ipsius voluntas movetur ad eam objective præsentem quatenus objectum delectabile amandam.

Respond. II. Si ex tali cogitatione speculativa ob alium finem honestum, v. g. ut studeatur Casibus elicitæ exurgit in appetitu sensitivo amor, seu Delectatio carnalis contra propriam voluntatem, neque tunc censetur adesse Delectatio morosa graviter peccaminosa. Ita la Croix *loc. cit. cum communi*. Ratio est: quia, ut ea Delectatio sit graviter peccaminosa, debet deliberate esse elicitæ ab ipsa voluntate, & non solum ab appetitu sensitivo. Interea tamen merito habent, quod sibi timeant de cogitatione non solum speculativa, sed etiam practica, ac cum Delectatione morosa conjuncta, illi, qui similia in libellis (quos vulgo vocant Romanza) ardentem legunt, & reflexe considerant sine vera rationabili causa, vel taliter picturas valde obscenas etiam fixis oculis, aut longiori temporis mora, ac serio considerant; a quo enim motivo alio similes ad legendum cum tanta aviditate, vel ad adeo fixe considerandum tale objectum cum tanto periculo trahuntur, quam ab ipsa delectabilitate objecti apprehensa? Scio quidem aliquorum similium excusationes, quod nimirum non ex delectabilitate objecti quatenus venerei, sed potius ex modo proponendi similia artificiose trahantur ad legendum, seu considerandum: sic. exemp. gr. (inquiunt ulterius, si quis videt amicum suum prono vultu in terram lapsum, & efferentem sordidum nasum, si sibi placeat, & exinde rideat, id non fit ob ipsum lapsum amici (de hoc enim dolet) sed de modo lepido cadendi. Ast timeo sane ne sæpius amor proprius affingat externe tale pallium, ne similes mortaliter peccasse videantur. Et, si præcise delectaris in modo, & arte, cur non æque avide, & ardentem alios historicos libros honestos æque artificiose compositos legis? cur non æque libenter alias pariter artificiosas honestas picturas consideras? Videatur Sporer in *Decal. part. 1. c. 6. sect. 4. n. 30.* \*

#### Additio IV.

\* Queritur VI. An ille sit arguendus habitæ Delectationis morosæ graviter peccaminosæ, qui deliberate secum ipso cogitavit, vel coram aliis protulit hæc formula: *Vellem cum hac, vel illa puella fornicationem committere, dummodo non foret grave peccatum?* Respond. Si similes propositiones conditionatæ procedant ex affectu voluntatis & appetitu sensitivo ad objectum simile carnale delectabile tamquam intentionaliter præsens (uti plerumque fit apud alias luxuriosos (tunc indicant latentem Delectationem morosam graviter peccaminosam. Ita cum aliis Sporer *Tract. 1. in Decalog. cap. 6. sect. 3. n. 20.* & la Croix *lib. 5. n. 87*. Ratio est: quia apud tales ipsa Delectabilitas, quæ in copula apprehenditur, trahit tamquam motivum formale voluntatem & simul ipsum appetitum sensitivum ad taliter optandum: atque, ubi motivum formale voluntatis est ipsa Delectabilitas objecti venerei, semper ex parte voluntatis, & appetitus sensitivi intervenit Delectatio, seu complacentia morosa respectu talis objecti; ergo. Nec refert, quod talis nolit hic & nunc in his circumstantiis, quibus est illicita, ipsam copulam: etsi enim nolit copulam in actu exercito, vult tamen delectabilitatem ex eadem ut objective, seu intentionaliter præsentem moventem ad ipsum actum Delectationis, seu complacentiæ, quod non licet; cum talis Delectatio ex sua natura commoveat, & secum trahat saltem aliquos spiritus vitales generationi deservientes, & ad semen excitantes, atque impuram complacentiam in partibus inhonestis ordinarie causantes.

Interea tamen etiam id sapienter advertit Sporer *loc. cit.* quod similes enuntiationes conditionatæ subinde fieri

soleant non ex affectu voluntatis actualis, sed potius, ut per easdem significetur propensio habitualis in Delectationem, nisi turpitudine peccati, vel offensa divina ab ipsa actuali Delectatione abstergeretur; & tunc constat, non esse peccatum, quin potius propensio in ipsum peccatum, quæ motivo tali *offensa Dei, seu turpitudinis peccati* reprimatur. \*

#### Additio V.

\* Queritur VII. An involvat aliquam Delectationem morosam graviter peccaminosam, si Viduæ de copula præterita, & Sponsi de futura deliberate recogitantes exinde concipiant complacentiam? Resp. Si talis complacentia sit voluntarie sensibilis, equidem jam ex dictis in præced. Quæsitio potest erui, quod involvat Delectationem pariter morosam graviter peccaminosam; cum & ista multum ex sua natura excitet spiritus genitales ad feminationem, quæ utique Viduis, & Sponsis de futuro non licet. Ast de hoc fusius ex processu *Tract. 14. dist. 13. quæst. 6. Additione II & III. post. num. 90.* agendo de Sponsalibus, & Matrimonio, quorsum Lector pro hic, & nunc remittitur: vel si placet, poterit etiam videri Pater Sporer, qui totam materiam de Desideriis, & Delectationibus fusissime examinat *part. 1. super Decalog. cap. 6. sect. 3. & 4.* \*

#### Additio VI.

\* Queritur VIII. An interpretative inferatur hæc Delectatio morosa voluntatis graviter peccaminosa, si quis deliberate circa motum appetitus sensitivi concupiscibilis sponte nascentis se habeat negative, seu permissive? Resp. I. Si fiat exinde, ne quis per positivam resistentiam impediatur a Delectatione, quam suggerit appetitus sensitivus, haud dubie inferetur exinde graviter peccaminosa Delectatio. Idem dic, si foret prudens periculum consensus formalis in Delectationem appetitus sensitivi, cum utrobique habeatur affectus ad concupiscentiam carnalem. Resp. II. Si id fiat ex causa rationabili, nullum erit peccatum; cum exinde argui nequeat affectus ad peccatum propter causam gravem permittendi. Tales causæ juxta la Croix *lib. 5. n. 110. & seqq.* sunt, si probabiliter timeatur, ne resistendo magis augeatur tentatio, vel si ob nimis longam durationem valde grave accideret continuo positive resistere. Resp. III. Absente causa rationabili AA. inter se non conveniunt. Et quidem multi cum Castropalao volunt apud talem negative se habentem adhuc non inferri Delectationem voluntatis graviter peccaminosam, cum non adsit voluntas peccandi: contraria tamen sententia Suarezii, Vasquezii, Sanchezii & aliorum volentium, ut saltem simplex displicentia eliciatur, est securior, ac merito in praxi tenenda: nam hæc, si non sit efficax ad cohibendam Delectationem appetitus sensitivi, saltem a consensu impedit voluntatem. Videatur la Croix *loc. cit.* & fiat simul reflexio ad dicta *dist. 4. q. 5. n. 55.* \*

#### Additio VII.

\* Queritur IX. An si ex admissa deliberate Delectatione morosa, vel etiam Desiderio sequantur motus carnales, hi pariter sint exponendi in Confessionali? Resp. si tali Delectationi seu Desiderio non sit simul adjunctus deliberatus tactus impurus, aut periculum proximum pollutionis, tales motus non esse necessario in Confessionali explicandos. Ita ex Cardena denuo la Croix *lib. 6. part. 2. num. 1028*. Ratio est: quia hi motus saltem aliquales ordinarie alias solent comitari Delectationem morosam, maxime deliberatam, hincque sufficienter jam intelliguntur, si explicetur in Confessionali ipsa voluntaria Delectatio morosa. \*



# TRACTATUS X.

## DE PRÆCEPTIS ECCLESIAE.

**P**OST Præcepta Decalogi, quibus inter alia debitam legitimis Superioribus reverentiam obedientiamque præstare, divinitus edocemur, receptissima methodo agitur de Præceptis Ecclesiae, cujus Prælatos Aeterna Veritas adeo honorandos censuit, ut de eisdem in persona suorum Discipulorum, tunc præsentium, pronuntiare dignata fuerit *Lucæ c. 10. Qui vos audit, me audit: & qui vos spernit, me spernit. Et rursus Matth. c. 18. Si non audierit eos, dic Ecclesiae: si autem Ecclesiam non audierit, sit tibi sicut ethnicus & Publicanus.*

### DISTINCTIO I.

*De Primo & Secundo Præcepto Ecclesiae, sive de Festis.*

### QUESTIO I.

Quænam generatim Primo & Secundo Præcepto Ecclesiae injungantur.

### SUMMARIUM.

- 1 Ratio ordinis.
- 2 Præcepta Ecclesiae generalia, quinque.  
Tenor primi, & secundi.
- 3 Præceptum de celebratione Festorum partim affirmativum, & partim negativum est.
- 4 Dies Festi quando inchoandi?
- 5 An in ipsis Fideles præter Missam teneantur ad alia pia opera?
- 6 Præsertim ad audiendam Concionem.
- 7 Solvitur instantia.  
Fideles monendi, ut accedant propriam Parochiam.
- 8 Datur in Ecclesia potestas instituendi Festa.
- 9 Festa ab Episcopis præcepta, etiam a Regularibus servanda.

**P**RÆCIPUA Præcepta Ecclesiae, & cuius Christiano scitu, atque observatu necessaria communiter quinque numerantur, non obstante, quod plurima alia Præcepta Ecclesiastica, particulares hominum Status concernentia, & in Sacris Canonibus expressa reperiuntur. Ex illis autem quinque præcipuis, simulque generalibus Ecclesiae Præceptis primum communiter sequentibus verbis proponitur: *Statutos Ecclesiae dies festos celebrato*; de quo fit mentio frequenter in Jure Canonico, ut *c. Nullus & seqq. 15. q. 4. & can. 1. & seqq. de Consec. dist. 3. nec non & toto tit. de Feriis.* Secundum Præceptum Ecclesiae, & priori connexum sequentibus verbis completi solet: *Sacrum Missæ Officium diebus Festis reverenter audito*; de quo habetur *can. Missas 64. de Consec. dist. 1.* Et de his sigillatim in progressu.

3 CONCL. I. Præceptum Ecclesiasticum de celebratione Festorum partim est affirmativum, partim negativum. Ita Herincx *part. 3. de Festis n. 8.* estque communis. Nam, quatenus illud est affirmativum, præcipitur devota Missæ auditio omnibus diebus Festivis: quatenus vero est negativum, præcipitur abstinencia ab operibus servilibus, & nonnullis aliis, de quibus fit sermo *cap. 1. de Feriis*, ubi Pontifex omnes dies Dominicos (idem dicendum de Festivis) *(a vespera in vesperam cum omni veneratione decernit observari, & ab omni illicito opere abstinere, ut in eis mercatum minime fiat, neque placitum, neque aliquis ad mortem vel ad penam judicetur, nec Sacramenta (nisi pro pace, vel alia necessitate) præstentur.* Hæc ibi: etsi postmodum *cap. ult. de Feriis*, recte hoc limitetur, nisi necessitas urgeat, vel pietas suadeat.

4 CONCL. II. Quamvis in Jure Canonico *cit. cap. 1.*

*de Feriis*, dicatur, quod dies Festi incipere debeant a vespers præcedentis diei, & durare usque ad vespers diei sequentis, idque in Officio Divino, seu recitatione Horarum Canoniarum etiamnum observetur; tamen, quantum attinet ad abstinencia ab operibus servilibus, aliisque supra enumeratis, rationabili & antiquæ locorum consuetudini standum est. Ita expresse habetur *cap. Quoniam de Feriis.* Idem patet ex *c. ult. de Consuet.* ubi generaliter dicitur, quod consuetudo rationabilis, & legitime præscripta derogat Juri positivo humano. Hinc ex usu Romanæ Ecclesiae, qui per totam ferme Europam invaluit, solent incipere Festa a media nocte, & terminari in sequenti media nocte *arg. l. More Romanorum ff. de Feriis.* Quamvis, si alia alicubi sit consuetudo, ea recte observetur.

5 CONCL. III. Etsi saluberrimum sit, summeque omnibus suadendum, ut Fideles ad majorem dierum Festorum venerationem, debitasque DEO pro innumeris receptis beneficiis grates rependendas, præter devotam auditionem Missæ, aliis quoque pietatis operibus vacent, ac præsertim Concioni attente intersint, speciali tamen Præcepto Ecclesiastico ad id non obligantur. Ita Mastrius *disp. 11. Theol. moral. n. 81. Azorius part. 1. lib. 7. c. 3 q. 7. Herincx loc. cit. n. 9. & alii.* Nullibi enim tale præceptum aperte habetur.

6 Nec obstat Concilium Trid. *sess. 24. c. 4. de reform.* ibi: *Moneat Episcopus populum diligenter, teneri unumquemque Parochiae suae interesse, ubi commode id fieri potest, ad audiendum Verbum DEI.* Nam, quamvis nonnulli Doctores, quos citat Barbosa in *Collectan. ad cit. cap. 3. Concilii Trid. n. 15.* inde inferant, atque ex ly teneri unumquemque deducant ejusmodi obligationem intercessendi Concioni Parochiali, tamen Concilium non loquitur de rigorosa obligatione Juris positivi. Et hoc desumitur tum ex ly *Moneat Episcopus*, quod patet non involvere præceptum: tum ex addita clausula, *ubi commode id fieri potest*: tum ex communi sensu Fidelium, qui a tempore citati Concilii Tridentini tam gravem obligationem in dictis verbis non agnoverunt.

7 Nec dictis obstant illa verba, *unumquemque teneri*: nam inprimis hæc verba, etiam in toto rigore accepta, non loquuntur de obligatione absoluta, sed solum supposita commoditate. Deinde ea commode intelliguntur de obligatione audiendi Verbum DEI, non quæ procedit Jure aliquo Ecclesiastico, sed quæ procedere solet ex lege Charitatis, qua quisque tenetur habere curam animæ suæ, sibi que providere de scientia necessaria ad salutem, & observantiam mandatorum DEI, atque adhibere non solum media simpliciter necessaria ad salutem, sed etiam utilia, inter quæ connumeratur devota Concionum auditio. Et merito monendi sunt Fideles ad accedendam propriam Parochiam, utpote in qua denuntiari solent dies Festi, atque occurrentia jejunia, & alia de præcepto observanda; quamvis ceteroquin sufficiat, Concio: nem extra Parochiam suam audire. Barbosa *loc. cit.* post Suarez, Herincx, & alii.

8 CONCL. IV. Esse potestatem in Ecclesia instituendi Festa de præcepto, de fide est; atque patet ex perpetua traditione, & usu Ecclesiae, a temporibus Apostolorum usque nunc continuato. Quinimo etiam Episcopi respectu suarum Dioecesium cum consensu Cleri, & saltem tacito Populi possunt instituere quædam Festa; prout habetur *cap. ult. de Feriis*, & alibi.

9 CONCL. V. Dies Festi ab Episcopis in sua Dioecesi præcepti servari debent ab omnibus etiam exemptis, ac Regularibus. Ita expresse statuitur in Concilio Trid. *sess. 25. cap. 13. de Regularibus*, ibi: *Dies etiam Festi, quos in Dioecesi sua servandos idem Episcopus præceperit, ab exemptis omnibus, etiam Regularibus, servantur.*

QUÆ.



## QUESTIO II.

## Quæ Opera diebus Festis prohibita sint?

## SUMMARIUM.

- 10 Opera corporis & animæ seu corporalia, & liberalia, quæ?
- 11 Opera corporalia servilia seu Mechanica, & opera non servilia, quæ?
- 12 Diebus Festis non prohibentur opera animæ, nec pietatis aut necessitatis.
- 13 Opera non servilia quæ prohibeantur?  
(a) De hoc Quæst. seq. n. 27. & seqq.
- 14 Opera servilia Festis diebus prohibita.
- 15 Dies Festi Christianorum non tam stricte obligant, ut olim Judæorum.
- 16 Venari, & piscari an sit prohibitum die Festo?
- 17 An tunc liceat scribere, etiam ob lucrum?
- 18 Pingere num licitum?
- \* Magis amplificatur. Item num liceat colorare asses, &c.
- 19 Quid dicendum de Typographis?
- 20 Itineratio an licita die Festo?
- 21 Qui actus Judicii Forensis diebus Festis prohibeantur?  
Judicii tres partes.
- 22 Quomodo liceant ob necessitatem, vel pietatem?
- 23 Quæ liceant Advocato, vel Doctori diebus Festis?
- 24 Opera servilia per notabilem diei Festi partem exercere est mortale peccatum.
- 25 Quenam censeatur pars notabilis?
- 26 Quæ alia circa hoc consideranda?

10 **A**Dvertendum, Opera nostra alia esse corporis, seu corporalia, quæ nimirum per corporis exercitationem peraguntur; alia esse Opera animæ, qualia sunt legere, scribere, docere, disputare, concionari, consulere, & similia; quæ idcirco Opera animæ dicuntur, quia ab anima præcipue procedunt, & ad animum excolendum spectant; atque alio nomine Opera liberalia vocantur.

11 Rursum Opera corporalia alia ex genere suo sunt servilia, alia non item. Opera servilia dicuntur, quæ ex se habent quemdam famulatum, & solum ab iis communiter exercentur, qui aliis inserviunt: ut opus arandi, fabricandi, feminandi, suendi; & alia hujusmodi Opera mechanica, quæ servis proprie conveniunt, etiam si per liberos nonnumquam exercentur. Et hæc appellantur etiam mechanica, eo quod per artes mechanicas dirigantur, atque distinguuntur ab operibus liberalibus, quod hæc non habeant effectum materiale, vel corporeum, aut, si habent, is principaliter ordinetur ad animum excitandum, vel instruendum: contra vero Opera mechanica post se relinquunt effectus corporeos, atque in commodum corporis proxime tendentes. Opera ex genere suo non servilia vicissim dicuntur illa, quæ proprie non conveniunt servis, sed omnibus communia sunt, tam dominis, quam servis: ut iter facere, saltare, digladiari, & hujusmodi.

12 **CONCL. I.** Diebus Dominicis, Festivisque non sunt prohibita opera animæ, neque opera pietatis aut necessitatis. Ita communis; & patet ex cap. 1. & ult. De Feriis. n. 3. allegatis. Adde cum Navarro c. 13. Manual. n. 5. & aliis (quidquid nonnulli contradicant) hujusmodi opera, quæ diebus festis fieri conceduntur, non solum gratis, sed etiam ob pecuniam atque animo recipiendi mercedem, licite peragi posse: siquidem intentio, atque propositum lucrandi non facit opus servile, aut illicitum, quod ex se non est tale.

13 **CONCL. II.** Opera non servilia quædam diebus Dominicis ac Festivis sunt concessa, quædam non. Patet hoc ex cit. cap. 1. de Feriis, ubi dictis diebus prohibetur Mercatum, sive mercatura; item Placitum, cujus nomine venit quælibet lis, jurgium, seu causa Forensis, quæ in Judicio agitur: item & Præstatio Sacramenti, hoc est, juramenti judicialis; adeoque neque testes tunc recipere, aut examinare licet, utpote qui prius jurare debent, nisi suadente pietate, aut urgente necessitate, (a) non obstante, quod talia neutiquam sint opera servilia, quini-

mo a dominis communiter præstentur. Porro reliqua opera non servilia, demptis enumeratis, non sunt illicita diebus Festis.

14 **CONCL. III.** Opera servilia diebus Dominicis, per notabilem partem (de qua n. 25.) sine justa causa excusante exercet, peccat mortaliter. Ita communis; & patet ex cit. cap. 1. de Feriis, atque recepta consuetudine Ecclesiæ, & communi sensu Fidelium. Concordat illud Levitici c. 23. Omne opus servile non facietis in eo: nam hoc præceptum, utpote judiciale, ac ex parte morale, Ecclesia innovavit.

15 Recte tamen notant Doctores cum D. Thoma 2. 2. qu. 122. art. 4 quod dies Festi Christianorum, utpote post cessationem Legalium veteris Legis Jure dumtaxat Ecclesiastico introducti, non ita stricte obligent, sicut olim obligabat Præceptum Divinum de observando Sabbato. Unde multa nobis permittuntur diebus Dominicis, Festivisque, ut ignem succendere, cibos coquere, iter facere, & hujusmodi, quæ in Sabbatis antiquæ Legis non licebant, Exodi cap. 35. & cap. 16. & alibi. Simulque circa prohibita in nostris Festivitatibus facilior est dispensatio, quam olim in Sabbato. Navarrus c. 13. Manual. n. 2. Azorius, & alii. Verum occasione præmissorum occurrunt plura dubia. Hinc

16 Quæritur I. An venari, & piscari sit opus servile, ac prohibitum in die Festo? Resp. Venari, & piscari, ex se, ac nisi addantur opera servilia, non censentur prohibita, si fiant dumtaxat recreationis causa, cum non sint servilia, sed potius liberalia, & communia servis & dominis. Bonacina tom. 2. disp. 5. quæst. un. punct. 2. num. 23. Azorius, & alii. Dicitur notanter, nisi addantur opera servilia: nam fatendum, quod venatio & piscatio non liceat, quando est conjuncta cum aliis operibus servilibus, prout accidere solet in venationibus clamorosis cum canibus, & apparatu institutis, nec non & in operosis multique laboris, & piscatoriæ Tribui quasi propriis piscationibus: quales proinde in Jure c. Licet de Feriis, dumtaxat concedunt tempore necessitatis, seu propter occursum lucris transeuntis, eo quod tales pisces raro, & certis dumtaxat temporibus apparere soleant, ut Halecia, & hujusmodi.

17 Quæritur II. An scribere, si fiat ob lucrum, sit opus servile, & consequenter die Festo prohibitum? Resp. Cum scribere sit opus mentis, & locutio quædam permanens, ordinata ad instructionem mentis propriæ, vel alienæ, idcirco ex se censetur opus liberale, nec sit servile ob id, quod fiat ob lucrum. Ita Navarrus loc. cit. n. 5. & alii. Ratio est, quia Ecclesia non prohibuit operari in die Festo propter mercedem, nisi in quantum prohibuit totum opus; ergo, cum scribere die Festo non prohibeatur, utpote opus liberale conformiter jam dictis, neque prohibitum est scribere propter mercedem. Idem juxta probabilior sententiam est dicendum de transcriptione, quæ a Notariis & Scribis fit ex officio, & pacta mercede: siquidem transcribere non est aliud, quam scribere; ergo, si hoc de se est licitum die Festo, erit & illud.

18 Quæritur III. Utrum pingere diebus Festis sit prohibitum? Resp. Hic varias esse Doctorum sententias, quæ sequenti modo videntur posse concordari. Et quidem plerique fatentur, non esse licitum, ob solam voluptatem aut recreationis causa quædam delineationes facere: quod ipsum videtur suadere communis sensus hominum. Deinde Layman lib. 4. tr. 7. c. 2. num. 3. post Medinam, & Lopez, probabile censet, quod pingere in aliqua tabella, sine apparatu & magno labore opus servile non sit, ideoque nec prohibitum die Festo per se loquendo: quia talis pictio, perinde ac scriptio, consistit in ducendis lineis, ac figuris; & consequenter idem dicendum de tali pictione sine apparatu, simulque secluso scandalo facta, quod de scriptione. Tandem extra præfatas limitationes die Festo pingere, communis sententia Doctorum negat esse licitum, eo modo, quo negat esse licitum sculpere: quia (inquiunt) pingere per se loquendo est opus servile, cum soleat fieri ab iis, qui aliis inserviunt, ut argumentatur Bonacina loc. cit. num. 25. citans alios: simulque est mechani-



chanicum, cum respiciat opus sensibile & externum arte factum, principaliter non ordinatum ad instruendum animum, licet pictores contendat, suam artem esse unam ex liberalibus. *Mastrius disp. 11. n. 24. Herincx & alii.*

*Additio.*

\* *Sporer tr. 3. in Decal. c. 4. sect. 3. n. 45.* cum Medina, & aliis equidem adhuc non improbabiler negat suppositum ipsius Patris Mastrii, & Herincx, quasi nimirum pingere per se loquendo esset aliquod opus servile, ac mechanicum; cum actio talis pictoria æque, ac scriptoria, vel alicujus operis delineatio principaliter consistat in ducendis lineis, seu figuris, absque notabili labore corporali (secus dic de arte sculptoria) formati, & conceptus interni expressivis, ac propterea, uti formosa atque artificiosa aliqua scriptura, vel etiam delineatio ex mente scriptorum, ac delineatorum, ita actio pictoria ex mente pictorum annumeretur non operationibus mechanicis, & servilibus, sed illis artibus liberalibus, quas diebus Festis exercere licet, prout id ipsum ex eodem fundamento contra Franciscum Henno in *Decalog. disp. 3. q. 4. art. 2. conclus. 1. resol. 6.* tamquam probabile de arte pingendi acu phrygia defendunt *Sporer loc. cit. Felix Potestas tom. I. Exam. part. 3. n. 232. & Sabin. Bononiensis part. 1. tr. 17. n. 43.* atque hoc, uti & fabricare flores sericos ad imitationem naturæ, saltem ad tempus, & ad repellendam otiositatem cum licentia Confessarii concedit Monialibus Franciscus Barelli *part. 2. Resolutionum pract. & solut. 6.* Item id admittunt Azoguis, & Pellizarius quoad nobilissimas Matronas; Tamburinus tamen simul suadet, ut talia faciant pro necessitate pauperis Ecclesiæ, vel egenorum. Sed quidquid finaliter demum sit de ista controversia, cujus utrinque Auctoritates DD. & fundamenta satis percepta fuere, practice loquendo poterit quidem Confessarius similia, de quibus dubitatur & inter DD. controvertitur, num sint mechanica, ac servilia, nec ne? & quæ insuper absque strepitu externo, & notabili labore manuali fiunt, tandem una, alterave hora ad oblectandum animum, & repellendam otiositatem permittere, si propterea non negligentur Divina, prout Sylvester, Emanuel Sa, & alii apud Layman, & *Sporer loc. cit. num. 54.* ex hoc fine concedunt puellis, etiam nere moderate, & post Divina, ne otio vacent, vel ad fenestras conspiciendas se præbeant: ordinarie tamen, ac generaliter, & absolute loquendo, maxime in locis, ubi nondum est introducta talis consuetudo, dissuadeat, nisi simul alia gravis causa talia faciendi concurrat. Illud præterea notet Confessarius, quod, etsi controversum sit inter DD. num liceat diebus Festis pingere, hoc tamen juxta eisdem tamquam certum admittatur, quod non liceat pro tunc colores contere, vel tingere solummodo, puta colorare asseres, aut pannos, vel dealbare parietes: nam similia manualia spectant ad famulantes nec per se ordinantur principaliter ad manifestandum conceptum internum, seu ad oblectandum, & instruendum animum, hincque juxta communem æstimationem prudentum potius inter opera mechanica, & servilia computantur. \*

19 Quæritur IV. Quid dicendum de Typographis? Resp. I. Certum est, quod actualis impressio foliorum sit opus servile, ac proinde prohibitum. Num autem artificiosa illa ordinatio, seu compositio characterum sit opus servile, nec ne, major est difficultas, eo quod ipsa videatur æquipollere scriptioni. Nihilominus Herincx *disp. 3. de Festis q. 2. n. 15. & Bassæus vers. Festum II. num. 8* citans communem, contra Dianam *part. 4. tr. 4. resol. 62.* & Layman, etiam compositionem characterum inter opera servilia, & mechanica connumerat: cum per se non ordinetur ad locutionem, & expressionem mentis, sicuti transcriptio, sed sit præparatio materiæ, & fabricatio instrumenti mechanici ad opus mechanicum: scilicet ad ipsam impressionem. Verum Typographi ordinantes characteres in ea persuasionem sunt,

*Anacl. Reiffenstuel Theolo. Tom. I.*

quod post rem Divinam licite compensare possint ea, quæ præcedentibus diebus neglexerunt, ut inquit Layman *loc. cit. num. 3.*

20 Quæritur V. An itineratio sit opus servile? Resp. cum communi, itinerationem non esse opus servile, nec per se prohibitam diebus Festis, sive instituat pedibus, sive curru, vel equo, aut navi: quia potius censetur esse opus naturale, ordinatum ad corporis conservationem, & ad negotia ubique exercenda. Verum hoc intelligendum est, nisi itinerationi addantur circumstantiæ annexæ operibus servilibus: ut si magno cum labore imponenda sint jumentis, seu navibus, vel curribus onera, quæ ducantur; vel si animalia onusta, aut curtus onusti &c. de uno loco ad alium deferantur. Hinc cit. Layman *n. 5.* cum aliis infert, quod tale iter die Festo inchoare concessum non sit, quamvis inchoatum continuare liceat, si commode abrumpi non possit.

21 Quæritur VI. Quinam actus judicii Forensis diebus Festis ab Ecclesia prohibeantur extra casum necessitatis & pietatis, per textus *n. 3.* relatos, cum concordantiis? Resp. Imprimis hæc prohibitio generatim procedit de omnibus causis, seu litibus tum criminalibus, tum civilibus, utpote quæ omnes fieri solent cum strepitu Forensi, seu Judiciali processu. Deinde eadem prohibitio intelligenda est de omnibus partibus Judicii, quæ ad tres revocantur. Prima est inchoatio causæ per Rei citationem, quippe quæ est basis, & fundamentum Judicii. Secunda est processus; & fit per causæ cognitionem, examinationis & juratis testibus, exhibitisque instrumentis. Tertia per sententiæ prolationem, ejusque executionem. & omnes tales actiones (nisi necessitas urgeat, vel pietas suadeat) non solum diebus Festis prohibita sunt, sed etiam ipso jure nullæ, & irritæ, adeo quidem, ut consentientibus etiam partibus nec processus habitus teneat, nec sententia, quam contingit hujusmodi diebus promulgari; prout habetur *c. ult. de Feriis.*

22 Additur vero, nisi necessitas urgeat, vel pietas suadeat: nam tunc secus est dicendum. Et quidem satis magnæ necessitatis ratio est, si alio tempore testes vocari, aut Judex adiri non possit saltem sine jactura diurnæ mercedis, qua pauperes maxime solent indigere, ut notant Tannerus *tom. 3. disp. 5. num. 9.* Navarrus *cap. 3. Man. n. 13.* & alii. Quas ob causas excusantur in aliquibus locis Judices rusticorum, diebus Festis jus dicentes, aut sententiam promulgantes, quando aliis diebus rustici homines adesse, vel commode absque jactura mercedis diurnæ vocari nequeunt: quod ipsum consuetudo aliquarum Regionum comprobatur. Idem dicendum de causis, quæ celeritatem requirunt, eo quod alioquin res peritura sit, vel si latro de fuga suspectus die Festo possit capi, & incarcerari.

23 Non tamen idcirco prohibetur, quin Advocatus possit die Festo dare operam studiis causa litium, scribere, quibus studuit, informare Judicem scripto, agere privatim de lite cum Procuratore & referre causam apud Judicem, ut ea cognita commodius ferat sententiam. Similiter licitum est Doctori, conficere consilia diebus Festis, & civibus ad consilia convenire, & eligere ad officia. Insuper possunt die Festo confici testamenta, scripturæ, donationes, renunciationes, & hujusmodi. Ratio horum omnium est: quia talia sunt opera animæ, & non sunt opera servilia, neque comprehenduntur in processu Judiciali.

24 CONCL. IV. Opera servilia, vel alia prohibita diebus Dominicis, aut Festis, per notabilem diei partem exercere absque legitima causa excusante, est peccatum mortale. Ita communis: quia violaretur Præceptum Ecclesiasticum in materia gravi, pertinente ad virtutem Religionis. Unde merito Innocentius XI. hanc inter alias, ordine 52. Propositionem damnavit: *Præceptum servandi Festa non obligat sub mortali, seposito scandalo, si absit contemptus.*

25 Verum, quantum temporis requiratur, ut quis censeatur notabili parte diei laborare, sicque peccare mortaliter, non conveniunt Doctores, prout videre est apud Filliucium *tr. 27. c. 11. & alios.* Nam aliqui unam

D d

integram



integram horam censent esse partem notabilem, sicque materiam peccati mortalis: alii e contra tres horas requirunt, quas ex viginti quatuor horis diei censent partem notabilem. Communior tamen, ceterisque probabilior sententia est media, quæ laborem servilem duarum horarum plus minus requirit, & sufficere ait ad notabilem diei partem, atque peccatum mortale constituendum.

26 Recte tamen monet citatus Filliucius, considerandam simul esse qualitatem operis atque laboris, & an nulla concurrat necessitas. Nam si labor sit levior, aut aliqua necessitas concurrat, facile etiam quis diutius laborans excusabitur a culpa mortali: quod proinde prudentis viri iudicio dimetiendum erit. Hinc non facile pauperes feminae, vel ancillæ peccati mortalis damnandæ sunt, quæ diebus Festivis aliquot horas infumunt nendo, vel vestes suas aut suarum prolium refarciendo, sive ad fugandum otium atque inuilia colloquia sive ob paupertatem, & quia diebus ferialibus destituuntur tempore ad talia peragenda opportuno.

### QUÆSTIO III.

Quæ causæ excusent exercentes opera prohibita diebus Festis?

### SUMMARIUM.

27 Quæ generatim causæ excusent exercentes opera prohibita?

28 Necessitas quando sic excuset?

29 Corollarium circa bonum vitæ.

(b) Ut dictum Tract. 2. dist. 2. n. 25. & seqq.

30 Aliud circa bona fortunæ.

31 Sartores quando excusentur perficientes die Festo vestes? Quid de præparatione panni?

32 Alia Corollaria.

\* Num liceat die Festo exercere opera servilia causa pietatis?

33 Molere die Festo an liceat?

34 Occursus lucri transeuntis an excuset?

35 Consuetudo quid circa hoc valeat?

\* Eadem quoad varia exemplificatur.

27 **CONCL. I** Etsi plures causæ referri soleant, quæ excusare possunt exercentes opera prohibita diebus Festis, eæ tamen commode reducuntur ad necessitatem, & pietatem. Ita desumitur ex *c. ult. de Feriis*, ubi prohibentur diebus Festis opera illicita, nisi necessitas urgeat, vel pietas suadeat. Siquidem necessitas non habet legem: *c. quod non est, de Reg. Juris*, ibi: *Quod non est licitum in lege, necessitas facit licitum*. Pietas etiam excusat exercentes erga pauperes, vel miserabiles personas opera misericordiæ, vel præstantes ea, quæ ad divinum cultum pertinent: nam summam esse rationem, quæ pro Religione facit, textus est *l. Sunt persone 43. ff. de Religiosis & sumpt. funer.* Hinc versus illi:

*Non recto servat legalia Sabbata cultu,  
Qui pietatis opus credit in his vetitum.*

28 **CONCL. II.** Tunc censetur adesse necessitas exercendi opera ceteroquin die Festo prohibita, quando imminet notabile damnum animi aut corporis sive proprii, sive alieni, aut bonorum temporalium sive propriorum, sive alienorum. Ita Reginaldus *lib. 19. n. 50.* Navarrus, alique; quamvis utrum sic & nunc ejusmodi notabile damnum sit metuendum, prudentis viri arbitrio dijudicandum sit. Res exemplis fiet clarior.

39 Sic inprimis laborantes die Festo excusat necessitas imminens propriæ conservationis, vel sustentationis suæ vitæ, aut familiæ, quia lex Ecclesiastica non obligat cum tanto gravamine Fidelium. (b) Hac ratione excusantur pauperes, qui, nisi die Festo laborent, nequeunt se sustentare, & hujusmodi.

30 Deinde necessitas, seu imminens notabile damnum in bonis fortunæ excusat coquentes calcem, aut vitrum

die Festo, quia hoc genus operis inchoatum non potest intermitteri absque notabili damno. Similiter excusantur agricolæ tempore messis laborantes, ne segetes amittant ob pluviam: in quo tamen vel alio simili casu (puta tempore Vindemiarum) ad cavendum scandalum consultius est, adhibere consilium Parochi, ac petere dispensationem vel licentiam.

31 Ob eandem rationem excusantur in multis casibus sartores, perficientes vestes die Festo: ut puta si ille debeant inservire pro ejusmodi Festo, vel si sint vestes sponsi seu sponsæ, proxime nuptias celebrantium, aut vestes lugubres, vel eorum, qui iis indigent ad servandam decentiam status. Idem censet Bassæus *vers. Festum III. n. 1.* si sartores timeant aliquod notabile incommodum, vel acerbæ reprehensiones ac injurias ex eo, quod non perfecerint vestes ante Festum. Præparatio autem vestium, quæ fit per scissuram & præparationem panni die Festo, ex eo excusari potest, quia non est labor servilis, cum proprie competat Magistris, nec habeat ad junctum magnum laborem.

32 Huc accedit necessitas Reipublicæ, utpote cui magis subveniendum est, quam privatæ. Sic excusantur reficientes pontes, vel milites jacentes aggeres die Festo, vel alia servilia opera peragentes pro defensione patriæ. Item necessitas Proximi; nam ob hanc licitum est die Festivo laborare ad extinguendum incendium in domo Proximi, & Chirurgus ad sublevandum infirmum, & hujusmodi.

*Additio.*

\* **CONCL. III** Loquendo nunc conformiter *cap. 5. De Feriis*, quoad alteram causam excusantem, ob quam laborare licet, quæ dicitur *Pietas*, tunc eadem adesse censetur, si opera servilia, quæ diebus Festivis exercentur proxime ad Dei cultum spectent. Ita communis Ratio est: quia tales actiones per propinquitatem ad Dei Cultum quasi artes liberales reputantur saltem ex consuetudine; hinc licitum est diebus Festivis Altaria candelabris, imaginibus, & aliis ornamentis vestire, prout etiam in antiquo testamento (uti S. Matthæus *c. 12.* eruit ex libro Levit. *c. 24.*) Sacerdotes die Sabbati faciebant omnia quæ erant necessaria in templo: etenim præcepto illo abstinendi ab operibus servilibus, ut exinde promoveatur Cultus divinus, non censentur prohibita illa, quæ pertinent proxime ad ipsum Cultum Divinum. Dico notanter: *Quæ pertinent proxime ad Cultum Divinum*; nam, si tantum spectarent ad eundem remote, ex communiori DD. contra tamen non paucos apud la Croix *lib. 3. p. 1. n. 586.* non liceret propterea exercere opera vere, proprie servilia: alias certe foret licitum contra communem persuasionem diebus Dominicis citra ullam necessitatem, aliamve gravem rationem ædificare Ecclesias, secare ligna, & sculpere imagines pro exstruktionem Altarium &c. His tamen non obstantibus (inquiunt Sporer, & la Croix hic) diebus Dominicis, & Festivis sepulchrum Christi, Præsepe Domini, moles artificiosas ad excipiendam Eucharistiam exstruere, seu collocare Scenam in Ecclesiis ad repræsentationem Sacram, excusari a mortali, non tamen a veniali, si præcedentibus diebus talia commode fieri potuissent. Ratio est quia, etsi forsan similia, quorum erectionem in multis locis praxis jam obviavit, non influant omnino proxime in cultum Divinum, ita, ut etiam de per se, & absente alia causa rationabili a peccato levi excusent, videntur tamen propinque accedere ad talem influxum proximum, sicque tales actiones non prohiberi saltem sub gravi. \*

33 Quæres an liceat die Festo molere triticum, quando molendinum agitur aqua, vel vento? Respondens Bassæus *loc. cit.* affirmative atque pro hac sententia allegat Bonacinam, Rodriquez, & alios: quia (inquit) tunc aut nullus, aut exiguus labor intervenit. Verum seclusa necessitate, aut speciali alicujus loci consuetudine, hoc passim admittendum non est, idque tum ratione scandali vitandi, tum quia in molendinis non modicus simul labor servilis intervenit. Unde Bonacina *tom. 2. disp. 5. q. un. punct. 3. n. 9.* ait, si tales molitores notabilem temporis partem



## Quæst IV. Quæ sit obligatio audiendi Missam diebus Festivis? 315

tem in his insumant, eos non excusari, nisi id faciant ex necessitate, v. g. ob multitudinem concurrentium ad molendinum, quibus satisfacere nequeunt diebus feriatis.

34 Insuper causis excusantibus excercentes opera prohibita die Festo communiter addunt Doctores occursum lucri transeuntis, id est, illius, quod amplius acquiri non poterit, nisi diebus Festivis talia opera fiant. Et hoc prohibetur ex Jure Canonico *cap. Licet. de Feriis*, ubi Ecclesia, tamquam pia Mater, ex hac ratione diebus Festivis (præterquam in majoribus anni Solemnitatibus,) indulget piscationem halecum, quæ certo dumtaxat anni tempore transire solent. Unde ob paritatem rationis idem de piscatione aliorum piscium, certo tantum anni tempore occurrentium, & de aliis hujusmodi rebus temporalibus, quæ cum tempore pereunt, nisi Festivis diebus acquirantur, passim tradunt Doctores.

35 Tandem similia opera diebus Festivis præstari solita excusat legitima consuetudo, sive generalis, sive specialis quorundam locorum, quæ scitur, & toleratur a Prælati Ecclesiasticis. Ratio est; quia prohibitio talium operum die Festo fuit introducta solo Jure Ecclesiastico: ergo nihil obstat, eam tolli rationabili & legitime præscripta consuetudine contraria; cum generaliter hujusmodi consuetudo deroget Juri positivo humano *cap. ult. de consuetud.* Sic in pluribus locis Pistorum consueverunt pinsere panem, & Cerevisarii incipere praxaturam cerevisiæ a vespere diei Festi: Mercatores etiam in nundinis solent per aliquam diei partem exercere publicum mercatum.

*Additio.*

\* Pariter vi consuetudinis solent diebus Festivis fieri subinde præparatoria ad imminens convivium, occidi, xcoriari, vel deplumari propterea animalia &c. *Castro-palao tract. 9. p. 10. n. 3.* Item per consuetudinem eximuntur a peccato in multis locis rustici, qui tempore messis die Festo sub vespere acuunt falcem & præparant materiam pro labore sequentis diei necessariam; la *Croix lib. 3. p. 1. n. 585.* Item excusantur a peccato Barbironfores radentes tali tempore barbas, præsertim rusticis, seu operariis aliis diebus impeditis; la *Croix loc. cit. n. 591.* Sporer *tr. 3. in Decal. c. 6. sect. 4. n. 55.* & Felix Potestas *tom. 1. p. 2. n. 202.* Non debent igitur Confessarii, si similes labores audiant in Confessionalia suis poenitentibus diebus Festivis exercitos, illico eosdem arguere alicujus gravis peccati, sed in dubio ulterius interrogare, utrum id soleat passim ab aliis etiam conscientiosis similis conditionis hominibus praticari, nec ne? Et, si poenitentes respondeant, hoc passim fieri scientibus, & non contradicentibus Prælati, seu Superioribus, inferant, introductam esse desuper consuetudinem: interea tamen pariter sæpius erit valde expediens, si diebus Festivis similes labores, saltem pro deinceps, & in futurum dissuadeantur, in quantum commode intermitteri possunt, maxime, si Confessarius videat, exinde negligi Verbum Divinum, Vesperas, Cathedres &c. Profecto ex hac ipsa ratione plurimi Prælati sese opponunt consuetudini Barbitonforum quoslibet ad se venientes sine distinctione diebus Dominicis, ac Festivis radentium, prout non ita pridem inhibuit Episcopus Atrebatensis in sua Dioecesi, teste Patre Henno *tract. in Decal. disp. 3. quæst. 4. art. ult. conclus. 6.* \*

### QUÆSTIO IV.

Quæ sit obligatio audiendi Missam diebus Festivis?

### SUMMARIUM

36 Extat Præceptum de Missa reverenter audienda diebus Festivis.

\* Utrum, & in qua ætate hoc Præceptum stringat pueros?

37 Peccat mortaliter negligens notabilem ejus partem; & quæ sit talis?

Anacl. Reiffenstuel Theol. Tom. 1.

38 Audire Missam, in quo consistat?

\* An censeantur audire confabulantes sub ea?

39 Explicatur hoc amplius.

(c) *Tract. 6. dist. 1. q. 3. post n. 34. Addit. IV. & quæst. 4. n. 43.*

\* An censeantur eandem audire prospicientes e domo sua in templum?

40 An satisfaciatur, qui simul duas Missas partes audit plurimum Celebrantium?

41 Vel saltem successive?

42 Auditio Missæ num præferenda Concioni?

43 Alia Quæstio, remissive.

39 **CONCL. I.** Extat grave Præceptum Ecclesiasticum, reverenter audiendi Missam diebus Dominicis, Festivisque. Patet hoc ex *can. Missas 64. de Consecr. dist. 1.* Et licet ibidem soli Sæculares nominentur, tamen ex communi consuetudine, quæ est optima legum interpres, sub dicto Præcepto etiam comprehenduntur Clerici, & Sacerdotes non celebrantes: quamvis hi, si dictis diebus celebrent, hoc ipso, & quidem eminenter Missam audire censeantur. Idipsum liquet. ex *can. Omnes Fideles 62. de Consecr. dist. 1.*

*Additio.*

\* Utrum autem hoc ipsum Præceptum Ecclesiasticum audiendi Missam etiam afficiat pueros, & in qua ætate? alia est quæstio, in qua quidem præter jam dicta *tract. 2. dist. 3. q. 1. Add. post n. 11.* tenent Joannes Sanchez, Diana, Illung. & alii apud la Croix *lib. 1. n. 676. & lib. 3. part. 2. n. 615.* eosdem, etiam rationis capaces, non obligari ante septennium completum, uti nec ad alia Præcepta Ecclesiastica. Ratio eorum, meo judicio valde probabilis est, quia Leges Ecclesiasticæ in obligando procedunt humano modo, & consequenter nullum obligant, nisi prædictum usu rationis quem adesse non præsumunt ante completum septennium. Et licet dictus rationis usus in extraordinario aliquo casu apud unum alterumve adesset, at tamen Leges ad extraordinaria talia non attendunt, sed ad ordinariæ contingentia; & conformiter hisce statuunt suas ordinationes *L. Nam. ad ea ff. de Legibus.* Quinimo, cum ad auditionem Missæ requiratur reverentia & devota aliqua præsentia, quæ apud pueros septennes vix aderit, prout ex eorum extravagantis, & puerilibus actionibus colligitur. Gobat apud la Croix *loc. cit.* contendit, ad hanc obligationem contrahendam saltem apud pueros rusticanos, aliosque consimiles requiri annos discretionis, quam pueros communiter inter nonum & decimum annum, puellas vero inter octavum, & nonum assequi existimat. \*

37 **CONCL. II.** Peccat mortaliter, qui notabilem Missæ partem dictis diebus culpabiliter audire prætermittit. Ita omnes Catholici, & patet ex proxime dictis. Et quidem notabilis pars est dimidia vel tertia pars secundum omnes Doctores, aut totum Missæ principium una cum Epistola, & Evangelio, ut plures volunt, non autem, si ab initio Evangelii, usque ad finem quis Missam audiat, etiam si reliquum, nempe initium Missæ cum Epistola prætermiserit. Addunt multi Doctores, ut Laymam *lib. 4. tract. 7. cap. 3. num. 3.* Gobat *tract. 5. Theol. Experim. num. 135.* Suarez, Rodriguez, Azorius, & quidam alii, etiam ab eo evadi peccatum mortale, qui venit primum post Evangelium, modo permaneat usque ad finem ultimi Evangelii inclusive; quia audiendo ultimum Evangelium videtur compensare primum Evangelium neglectum.

38 **CONCL. III.** Audire Missam non est verba Missæ intelligere, utpote quod plebei non possunt, nec audire Sacrificantem quod surdi nequeunt, neque videre eundem, quod cæci frustra desiderant: sed Missam devote audire est esse præsentem Missæ, & vacare Deo, sive corpore adesse, & mente attendere ad Sacrificium. Ita communis.

D d 2

*Additio.*



## Additio.

\* Ex quo infertur, Missam audiendi Præceptum transgredi non solum eos, qui sub eadem dormiunt, sed etiam, qui sub illa per notabile tempus pingunt, scribunt, novas legunt, vel de re seria confabulantur cum tanta intentione, ut per totam Missam, vel saltem per notabilem partem non sciant, ne confuse quidem, quidnam agatur a Sacerdote: similes enim non solum interne sunt distracti, sed etiam externe ponendo tales actiones, cum quibus in adductis circumstantiis attentio quoque externa non videtur moraliter composibilis, eo ferme modo, quo discutitur, si similes actiones contingerent sub recitatione Horarum Canoniarum. Paucis, tales quidem sunt præsentis corpore, sed non devota mente. \*

39 Etenim ad auditionem Missæ requiritur simul & devota, & corporalis præsentia. Porro devotio ista ad Missæ auditionem requisita explicanda est conformiter necessariæ intentioni, & attentioni, ad recitationem Horarum Canoniarum requisitæ, de qua alibi. (c) Corporalis præsentia consistit in hoc, quod quis suo corpore præsens sit in eo loco, quo fit Sacrum, idque vel physice, ut si intra Cappellam vel Ecclesiam, ubi Missa celebratur, præsens adsit, vel saltem moraliter, prout illi Missam audire censentur, qui animo Missam audiendi stant, aut flectunt ante januam illius Ecclesiæ, quam præ hominum multitudinem ingredi non valent, vel qui introspiciunt per fenestram.

## Additio.

\* Prout etiam Gobat, Dicastillo, Tamburinus, ac Cardinalis de Lugo apud la Croix lib. 3. p. 1. num. 463. & apud Felicem Poteſtā. Clericatus c. 109. num. 7. putant, illum adhuc censi sufficere corpore præsentem, ita, ut Missam audire dicatur, qui per interjectam parvam plateam e domo sua in templum, vel ad Altare potest respicere. Quod ipsum Henno tr. in Decal. disp. 3. q. 2. concl. 1. concedit saltem in casu, si talis independentem ab assistentium aliorum multitudine plene advertat, quidnam a Sacerdote agatur. Ob quam paritatem censetur similiter juxta Gobat, & Dicastillo esse corpore præsentem, atque audire Missam remiges in navi permanentes, dum eadem legitur in littore, vel milites existentes, & auscultantes in tentoriis, dum illa celebratur in publico campo, quamvis in spatio intermedio nulli essent homines Missam audientes. At ergo similia in praxi non suaderem, si aliter commode, & faciliter Missa audiri possit: nec aliunde habetur causa excusans ex enumerandis Quæst. seqq. Etenim saltem quoad aliqua exempla ab aliis Doctores merito dubitatur pro tunc de morali præsentia. Profecto excommunicatus, si ex platea per fenestram suam audiret Missam, non credo, quod censeretur de novo peccare, nec propterea deberet celebrans a Missa desistere ex ea ratione, quia talis excommunicatus non diceretur Missæ moraliter corpore præsens, uti advertit la Croix loc. cit. \*

40 Quæres. An satisfaciat Præcepto Ecclesiæ, qui audit partem posteriorem unius Missæ v. g. ab Elevatione ad finem, & deinde priorem alterius Missæ usque ad Elevationem, vel econtra, aut si quis a duobus Celebrantibus, quorum unus Missam incipit, alter ab Elevatione pergit, simul audiat utramque? Resp. I. Si quis non successively, sed simul audiat duas tales partes Missæ a duobus Sacerdotibus simul celebrantibus, talis non satisfaciat Præcepto. Ita defacto indubitate tenendum est, & quoad hoc punctum nonnulli caute libri legendi. Siquidem Innocentius XI. hanc inter alias Propositionem, ordine 53. damnavit, & doceri, atque practitari prohibuit: Satisfaciat præcepto Ecclesiæ de audiendo Sacro, qui duas ejus partes imo quatuor simul a diversis Celebrantibus audit.

41 Resp. II. Nihilominus multi Doctores. probabile censent, mortaliter non delinqui ab eo, qui successively audit duas medietates Missæ diversis Sacerdotibus dictas; quamvis veniale peccatum, & in suo genere grave com-

mittatur per hoc, nisi quis legitime impeditus fuerit, quo minus integram ejusdem Sacerdotis Missam audiret. Ita Layman lib. 4. tr. 7. c. 3. n. 4. Gobat loc. cit. n. 143. Navarrus, & nonnulli alii, quos citant, contra non paucos oppositum tenentes. Ratio esse potest: quia parum refert, quid de æquipollentibus fiat, simulque ordo pariter inter se non videtur pertinere ad substantiam præcepti: sic enim in simili satisfaciat præcepto Ecclesiæ Clericus, qui prius recitat Laudes, quam Matutinum. Hæc sententia necdum est condemnata; unde etiam Jo. Cardenas in Crisi Theolog. ad Propositionem 53. Innoc. XI. c. 7. eam censet probabilem, dummodo impoſterum per sedem Apostolicam oppositum non declaratur.

42 CONCL. IV. Auditio Missæ per se loquendo præferenda est sacræ Concioni, si utraque audiri non possit. Ita communis: nam audire Missam diebus Dominicis, Festivisque, est de præcepto, non item audire Concione, per se & ordinarie loquendo; atqui opus consilii non est præferendum operi debito ex præcepto. Dicitur per se loquendo: nam per accidens, & in casu extraordinario fieri potest, ut Concio præferatur auditioni Missæ si nimirum urgeat necessitas addiscendi necessaria Fidei, hæcque commode nequeant alias addisci, vel si exemplum unius necessarium sit ad inducendos ceteros pro audienda Concione &c. Bonac disp. 5. de Præcept. Decal. qu. 2. punct. 2. n. 28. & alii.

43 Posset hoc loco Quæstio moveri de peregrinis & advenis, an teneantur ad Festa particularia locorum, per quæ transeunt, ibique abstinere a servilibus, & Missam audire, item an quis de loco, ubi est Festum, possit omiſſa etiam Missa ad laborandum exire in alium locum propinquum, ubi id non celebratur. Verum de hoc, atque attinentibus materiis ex professo jam dictum est tr. 2. dist. 3. q. 3. & 4. Ibi videatur.

## QUESTIO V.

Quæ Causæ excusent a Præcepto audiendi Missam?

## SUMMARIUM.

- 44 Generatim a Missa audienda excusat impotentia physica, & moralis  
(d) Tract. 2. dist. 2. n. 25. & seqq.  
45 Impotentia physica declaratur.  
46 Impotentia moralis contingit variis modis.  
47 I. Ob periculum boni animæ.  
48 II. Ob periculum corporis.  
49 Distantia loci an etiam excuset?  
50 In praxi quid circa hoc observandum?  
51 III. Ob periculum famæ & honoris.  
52 IV. Ob periculum bonorum fortune.  
53 Excusantur aliqui ex titulo pietatis,  
54 Et officii.  
\* Quid sit sentiendum de auribus, & itinerantibus?  
55 An impediti audire Missam, teneantur domi orare?  
(e) Ut dictum Tract. 4. dist. 2. num. 28. & seq. & dist. 5. n. 9. & seq. & dist. 6. n. 9. & Tract. 5. dist. 1. n. 49.

44 CONCL. I. Quamvis plures communiter assignari soleant causæ, ob quas quis excusari possit ab obligatione audiendi Missam die Festo, ex tamen commode reducuntur ad impotentiam, tum physicam, tum moralem. Hæc Conclusio supponit ex dictis (d) alibi, quod leges Ecclesiasticæ in casu impotentiae non obligent; idque, quantum ad propositum, clarius habetur cap. ultim. de Feriis, ibi: Nisi necessitas urgeat, vel pietas suadeat. Quo supposito,

45 Probatum Conclusio inductione. Et quidem ob impotentiam physicam (quæ est impotentia simpliciter) excusantur, qui detinentur in carceribus, in quibus Missa non celebratur. Item, qui tam gravi morbo decumbunt, ut Missæ interesse non possint. Similiter, qui longum iter faciunt non inveniunt locum, ubi Missam audiant; ut,



## Dist. II. Quæst. I. Quid sit Jejunium, & quæ ejus requisita? 317

ut sit in terris Infidelium, & in mari. Et idem de aliis similibus.

46 Deinde ob impotentiam moralem plures adhuc excusari possunt. Nam impotentia moralis censetur tunc contingere, cum nequit audiri Missa absque jactura boni notabilis æstimationis, aut non nisi cum magna difficultate, vel labore; quæ postea in casibus particulatim arbitrio viri prudentis dijudicanda erunt. Quia igitur generatim sunt quatuor bonorum genera, scilicet bona animæ, corporis, famæ seu honoris, atque fortunæ, hinc circa ea omnia hujusmodi impotentia moralis accidere potest.

47 Hinc imprimis ob impotentiam moralem circa bonum animæ occurrentem excusatur quis ab audienda Missa, si nequit adire templum sine periculo labendi in peccatum: ut si quis tempore persecutionis timeat periculum abnegandæ Fidei, si a persecutoribus comprehendatur; aut si virgo prævideat periculum stupri in via sibi inferendi, & hujusmodi.

48 Deinde propter periculum imminens corpori excusatur quis ex probabili conjectura, & non sola vana imaginatione ductus timeat, ne in via aut in ipso Templo vitam amittat, ut puta ob sicarios, ob aeris intemperiem, vel infectionem &c. Item si timeat jacturam sanitatis, aut reincidentiam in morbum, vel adsit periculum notabiliter retardandi convalescentiam, si ipse sacrum audiat in Templo: uti quandoque contingit laborantibus febri, & aliis hujusmodi morbis, in quibus standum est iudicio viri prudentis ac præsertim Medici.

49 Quæres. An distantia loci excuset ab auditione Missæ? Resp. Quandoquidem distantia loci ad Templum non modicam sæpe causet corporalem incommoditatem sensibus, claudis, labore pridiano valde fessis &c. proinde ex hoc capite tales nonnumquam contingit excusari, præsertim accedente tempestate nivali, aut nimbofa. Ita communis.

50 Etsi vero non possit absolute determinari certa distantia, quæ sit necessaria, simulque sufficiens pro omnibus & singulis hominibus excusandis, quandoquidem homines sint adeo diversæ complexionis, & alii robusti, alii imbecilliores, aliqui etiam divites, qui curriculo ad Ecclesiam vehi possunt, simulque tempestatibus nimbofæ atque hiemalis habenda sit ratio &c. nihilominus loquendo de hominibus mediocriter valentibus, & peculiarem excusationem non habentibus, quidam Doctores apud Gobat *tr. 5. Theol. Experim. n. 486.* sufficere asserunt pro excusatione peditis distantiam unius bonæ horæ, vel quinque horæ quadrantes: alii vero majorem exigunt distantiam, vel spectandam loci consuetudinem ajunt, aut hoc absolute iudicio prudentum relinquunt expensis circumstantiis discernendum. Certe plerique sibi ducebant Religioni, si cessante alia causa omitterent Missæ auditionem ob distantiam unius horæ, & punirentur illi, qui deprehenderentur fere semper a re divina abesse solum, quia distant sesqui hora a templo. Quamquam nullus prudens Confessarius movebit his scrupulum, etsi iterato tales maneant domi; cum varix aliæ circumstantiæ non raro concurrant iter tam longum aggravantes, ut merito detur locus excusationi.

51 Rursus propter periculum famæ, & honoris quidam excusari possunt. Sic communiter Doctores excusant illum, qui non habet vestem decentem, ita ut nequeat sine dedecore, aut gravi derisione, seu notabili pudore comparere in publico. Similiter excusant puellam ceteroquin honestâ, quæ putatur casta, & tamen gestat uterum, ne videlicet publice confundatur, & hujusmodi. Si tamen tales possint primæ Missæ in tenebris sine probro interesse, obligantur ad eam audiendam, nisi aliud excuset.

52 Tandem ob periculum bonorum fortunæ excusantur ii, quibus imminet damnum in fortunis, si pro Missa audienda velint ire ad Ecclesiam: quod intelligit Gobat *loc. cit. n. 491.* non tantum de damno notabili, sed etiam de metu mali mediocris bonorum. Sic famuli excusantur, qui domi remanent ad ejus custodiam, vel ob furtum aut incendium avertendum &c.

Anach. Reiffenstuel Theol. Tom. I.

53 His omnibus accedit titulus pietatis, officii seu obedientiæ; quamvis & hæc ad impotentiam moralem reduci possint. Sic ex titulo pietatis, seu Charitatis Proximi excusatur ab audienda Missa, qui inservit ægro, cui præsentia inservientis est necessaria, ita ut ab ipso recedere non possit: nam majus est vinculum præcepti Charitatis Proximi, quam præceptum Missæ audiendæ, cum illud Jure naturæ, hoc autem Jure dumtaxat positivo Ecclesiastico obliget. Idem in similibus casibus dicendum de matre, vel nutrice, quæ infantes deferere non possunt, dum non habent alium eisdem assistentem.

54 Ex titulo officii excusantur excubitores ad portas, valla, turres, itemque custodes pecorum, & hujusmodi. Qui tamen tenentur mutare vices, quando sunt plures, & potest a paucioribus custodia convenienter peragi, fiuntque successive plura Sacra. Et hæc dicta ad alios consimiles casus sunt extendenda, atque juxta exigentiam rerum applicanda.

Additio.

\* Sic Aurigæ, qui per consuetudinem habent jus vehendi aliquo die Festo excusantur, ab auditione Missæ, si hac audita vehere non possent absolute, vel saltem non nisi cum notabili damno: nam, cui aliquid conceditur, conceduntur etiam omnia necessaria ad illud; la Croix *lib. 3. p. 1. n. 684.* dummodo prædicti hac doctrina non abutantur fingendo notabile damnum, ubi non est. Similiter excusantur itinerantes, quando ducem, vel comitem itineris valde utilem, puta itineris gnarum, vel commodam occasionem navigandi, aut curru vehendi amissuri essent, dum interim Missam audirent. Alioquin autem, si nulla accelerandi necessitas urgeat, omnes diebus Dominicis, vel Festivis iter facturi prius Missam audire debent, nisi prudenter existimare possint, se sub ipso itinere Missam audiendi habituros esse occasionem. Sporer *Tract. 3. in Decal. c. 4. sect. 2. n. 28.*

55 CONCL. II. In casu, quo quis habet impedimentum legitimum non audiendi Missam die Festo, consilium omnino salutare est, domi per aliquod tempus vacare orationi; id tamen non esse in præcepto, docent Navarrus *cap. 21. Manual. n. 7.* Reginaldus *lib. 19. n. 19.* Henricus *part. 4. disp. 8. de Sacrificio Missæ num. 223.* & 224. solventes contraria, & alii: cum talis oratio domi peragenda minime comprehendatur sub nomine Missæ, simulque finis præcepti non cadat sub præcepto. Nihilominus opposita sententia, quam nonnulli tenent, in praxi pro possibili hominibus consulenda est, ut, cum Jure naturali teneamur Deum quibusdam tum virtutum Theologicarum, tum Religionis actibus quandoque per vitæ decursum revereri, (e) huic obligationi eo melius satisfiat. In quem proinde finem D. Augustinus *Serm. 251. de Temp.* optime loquitur, atque eum qui non potest cum ceteris Sacro interesse, exhortatur, *ut saltem in domo sua oret, & non negligat DEO solvere votum, ac reddere pensum servitutis.*

### DISTINCTIO II.

#### De Tertio Præcepto Ecclesiæ, sive de Jejunio.

#### QUÆSTIO I.

Quid sit Jejunium, & quæ ejus requisita?

#### SUMMARIUM.

- 1 Tertium Ecclesiæ Præceptum, quod?
- 2 Jejunium generaliter acceptum, &
- 3 Jejunium specialiter, quid?
- 4 Jejunium naturale, requisitum ad sumptionem Eucharistiæ, quid?  
Et quando violatur?
- 5 Jejunium Ecclesiasticum, quid?
- 6 Hoc non frangitur per potum.



- \* *Quenam se habeant per modum potus?*  
 7. *Cautela circa haustum interdiu factum.*  
 8. *Ad Jejunium Ecclesiasticum tria requiruntur.*  
 9. *Delectus ciborum, in quo consistat.*  
 10. *Circa lacticia est attendenda consuetudo locorum.*  
 \* *Quid sit sentiendum de pinguedine, & lardo porcino?*  
 11. *Abstinentia plurium refectionum, quid importet?*  
 12. *Certa refectionis hora, quæ?*

**I** Tertium Ecclesiæ Præceptum communiter sequentibus verbis comprehenditur: *Jejunia certis diebus, temporibusque interdicta servato.* Concordat Canon 68. Apostolorum, de Jeuniis Ecclesiasticis observandis expresse statuens: & textus c. *Quadragesima* 16. de *Consecrat. dist. 5. cum seqq. can.*

2. Ceterum Jejunii nomen quandoque sumitur generaliter pro abstinentia a vitiis & peccatis; in qua acceptione D. Augustinus Tr. 17. in Joannem, relatus c. *Jejunium* 25. de *consec. dist. 5.* ait: *Jejunium magnū & generale est, abstinere ab iniquitatibus & illicitis voluptatibus sæculi, quod est perfectum Jejunium.* Et D. Basiliius Homil. 1. de *Jejunio.* Verum *Jejunium est, ab omnibus vitiis esse alienum.* In proposito non accipitur Jejunii nomen tam generaliter, sed magis proprie, ac specialiter pro abstinentia a cibo & potu.

3. Jejunium, prout sumitur specialiter, ac proprie pro abstinentia a cibo & potu, rursus duplex est, naturale scilicet, & Ecclesiasticum.

4. *Jejunium naturale est abstinentia a qualibet re sumpta per modum cibi, aut potus, vel etiam per modum medicinæ.* Et tale Jejunium de præcepto Ecclesiastico requiritur ad summptionē SS. Eucharistiæ Sacramenti: unde Rubricæ Missalis Tit. De defectibus dispositionis corporis, sic loquuntur: *Si quis non est jejunus post mediam noctem, etiam post summptionem solius aquæ, vel alterius potus, aut cibi, per modum etiam medicinæ, & in quantumcunque parva quantitate, non potest communicare, nec celebrare.* Ubi tamen mox jungitur in hæc verba: *Si reliquæ cibi remanentes in ore transglutiantur, non impediunt Communionem, cum non transglutiantur per modum cibi, sed per modum salivæ.* Idem dicendum, si lavando os deglutiat stilla aquæ præter intentionem. Hæc ibi. Verum de Jejunio naturali ex professo hic non agitur, sed de Jejunio Ecclesiastico, de quo loquendo, sit

5. CONCL. I. *Jejunium Ecclesiasticum est voluntaria abstinentia a cibo juxta præscriptum Ecclesiæ.* Ita in re communis. Dicitur, *voluntaria abstinentia*: quia Jejunium est actus virtutis Temperantiæ, & consequenter debet esse actus liber, & voluntarius. Hinc, qui invitus omnino abstinet a cibo, quia nimirum eo caret, potius esurire, quam jejunare censetur.

6. Dicitur ulterius, *a cibo*: quia potus, quamvis sit vinum, non solvit Jejunium Ecclesiasticum, uti recte notat D. Thom. 2. 2. q. 147. art. 6 ad 2. Nec obstat, quod quis sæpius de die bibat non solum ad sedandam sitim (quæ cum sit vehementior, & crebrius accidat hominibus præ fame, noluit Ecclesia, utpote pia Mater, potum prohibere) verum etiam ad sedandam aliqualem famem. Resp. enim, adhuc non solvi Jejunium: quia sub præcepto Ecclesiastico Jejunii non prohibetur intentio, sed solum externa cibi resectio, quæ sit contra præscriptum Ecclesiæ.

#### Additio.

\* Porro illa censentur se habere potius per modum potus, quam per modum alicujus comestibilis, quæ ex natura sua, atque juxta communem hominum, seu moralem prudentum æstimationem non sunt ordinata ad nutriendas solidas partes corporis, sed magis ad extinguendam sitim, vel ad vehendum, & concoquendum alimentum, quamvis similia etiam aliqualem per accidens soleant nutrire. Sic imprimis cerevisia se habet per modum potus, quia ex natura sua, ac juxta communem hominum æstimationem ordinatur ad refrigerandum, ac sitim extinguendam, & deservit pro aliquo vehiculo, quamvis ob lucum triticeum, seu hordeaceum inibi contentum etiam

aliqualem soleat nutrire, famemque sedare. Econtra vero lac, vel jusculum habent se per modum alicujus comestibilis: etsi enim sint quid liquidum, ex natura tamē suæ, & juxta communem prudentum æstimationem ordinantur per se ad nutriendas partes solidas corporis. Secundo decoctum ex herba *Thee* pariter censetur se habere per modum potus, quia simile decoctum non censetur ex se ordinatum ad sedandam famem, sed potissimum ad recreandos spiritus, & purificandum, seu mitigandum sanguinem. Quidam autem sentiendum sit de Chocolata, & Caffee, sequentia ex Patre la Croix lib. 3. p. 2. n. 1291. & 1292. & aliis AA. subjungo; nimirum juxta Thomam Hurtad. Lopez, Henriquez, & alios se habere per modum potus, sicque diebus Jejunii non frangere Jejunium. Et ita teste Henriquez *vers. Jejunium* de Chocolata (de qua tamen major posset esse difficultas) declaravit Urbanus VIII. oblati sibi ingredientis, & confecta in ejus conspectu Chocolata: ubi Pontifex reposuisse fertur, esse, & manere potum. Idem responsum esse a Gregorio XIII. Pio & Paulo V. testantur plures DD. inquit Illung tr. 4. dist. 1. n. 39. quam etiam sententiam defendit Cardin. Brancatius in dissertat. de Chocolata, nec improbat Sabinus Bononiensis in Luce Morali part. 1. tr. 38. n. 68. Econtra vero habere se Chocolatam per modum cibi, sicque diebus jejunalibus frangere Jejunium docent multi alii DD. cum Castropalao hic part. 2. §. 2. n. 4. Ratio eorum est, quia potiores ingredientis habent vim nutritivam, uti etiam Fabæ, Caffee. Mihi cum Felice Potest à tom. 1. Exam. part. 3. num. 2876. præplacet sententia media Leandri, Dianæ, Remigii, & Escobar; nimirum si non multum misceatur illius materiæ, sed forbeatatur tenue, tunc se habere per modum potus, sicque non frangere Jejunium: secus, si multum misceatur, & coquatur instar densæ pultis, cum ibidem se haberet potius per modum cibi. Sic exemplificat Felix Potestas loc. cit. Si sex uncis aquæ admisceretur una, & media uncia Chocolatæ, ac media uncia sacchari, talis Chocolata se haberet per modum potus: secus, si admixtio Chocolatæ, foret in æquali, vel quasi æquali pondere. Attendant sibi hic illi, qui diebus Jejunii similibus præterea adjungunt, seu admiscunt lac, & ova, sese per modum cibi habentia, & multum nutrientia \*

7. Ceteroquin supposito semel, quod se aliquid habeat potius per modum potus, quam per modum alicujus comestibilis, exinde addunt adhuc DD. ad haustum interdiu factum etiam modicum panis, vel amygdalas paucas accipi posse, ne haustus ille noceat. Interim tamen cavendus, quantum ad hoc, excessus, ne repetitis sæpius buccellis ad magnam tandem quantitatem deveniatur: nam Alexander VII. sequentem inter alias, ordine 29. Propositionem damnavit: *In die Jejunii, qui sæpius modicum quid comedit, etsi notabilem quantitatem in fine comederit, non frangit Jejunium.* Ab hoc proinde cavendum.

8. CONCL. II. Ad Jejunium Ecclesiasticum tria requiruntur, videlicet Abstinentia ciborum certi generis: Abstinentia plurium refectionum: & certa hora refectionis. Ita rursus communis Doctorum: & patet ex perpetuo usu, atque praxi Ecclesiæ, & illico quoad singula declarabitur.

9. Quantum igitur attinet ad primum, nempe ad Abstinentiam a certis cibis, sive, ut loquitur Concilium Trid. sess. 25. cap. 21. *Delectum ciborum*: Imprimis diebus Jejunii abstinentum est a carne, deinde etiam a lacticiis, videlicet a lacte, caseo, & ovis, prout habetur can. *Denique dist. 4.* ibi: *Par autem est, ut, quibus diebus a carne animalium abstinemus, ab omnibus quoque, quæ sementinam carnis trahunt originem, jejunemus, a lacte videlicet, caseo, & ovis.* Accedit decretum Alexandri VII. hanc inter alias, ordine 32. Propositionem damnantis: *Non est evidens, quod consuetudo non comedendi ova, & lacticia in Quadragesima obliget.*

10. Verum his non obstantibus, quantum attinet ad lacticia, attendenda est consuetudo tum generalis, tum particularis locorum: utpote quæ partim est optima legum interpretes, partim etiam, sicut de novo potest legem inducere,



## Quæst. II. Solvuntur varia Dubia circa tres Jejunii conditiones. 319

inducere, ita & priori derogare. Uude imprimis in Feriis sextis, & Sabbatis per annum, quando aliud jejunium de præcepto non occurrit, ubique locorum permittuntur lacticia, etsi esus carniū sit prohibitus. Deinde in quibusdam locis ova atque lacticia solū prohibentur tempore Quadragesimæ, & extra illud non sunt vetita; alibi vero diebus jejunii etiam extra Quadragesimam non permittuntur, ut notat Navarrus *c. 21. Manual. n. 15*. Tandem in Germania ex antiqua consuetudine videmus permitti ova, & lacticia omnibus jejunii totius anni; idque factum creditur ob defectum olei, atque aliorum ciborum Quadragesimalium, quia alibi abundare solent.

### Additio.

\* Num autem in Regionibus, in quibus diebus jejunii conceduntur ova, caseus, & lacticia, pariter intelligatur concessa comestio sanguinis, aut illius pinguedinis, quæ exprimitur e lardo porcino, vel ex adipe anserum, aliorumve animalium, alia est difficultas; ubi Glossa, Holtiensis, Abbas, & Sylvester apud P. Sporer in *Decal. tr. 3. post Caput quartum in Appendice sect. 1. n. 10*. Respondent affirmative ea ratione: quia tam parum illa pinguedo est caro, ac ova, vel caseus: item lac, & sanguis juxta Philosophos tantum accidentaliter in colore differunt; si ergo licet vesci lacte, cur non & sanguine? Ita illi. Econtra probabilior DD. & communior defendit negativam, ex eo præcipue fundamento, quia de jure communi ne quidem licet vesci ovis, & lacticiis diebus formalis jejunii, nisi in locis, ubi est introducta legitima consuetudo; ergo, cum quoad lardum, & sanguinem talis consuetudo in his partibus Germaniæ necdum videatur introducta, præsertim respectu divitum aliis cibis abundantium, neque licebit vesci sanguine, vel memorata pinguedine. Et hæc sententia in praxi merito est suadenda: interea tamen, quia prior sententia habet graves pro se Doctores, nec ejusdem probabilitas ex integro exhaustur, poterit eadem Confessariis juxta Patrem Sporer *loc. cit.* principaliter ad duo deservire. Primo, ut pauperibus licentiam vescendi ejusmodi pinguedine diebus jejunii concedere facile possint ob causam paupertatis, & defectum butyri. Secundo, ut ancillis, vel famulis permitti possit, & coquere, & cocta comedere de adipe animalium, quando a Dominis jubentur, eisque similia comedenda proponuntur: interea tamen, si ipsimet heri vel heræ alias competentia pro suo statu media habentes, quæ famulis, & ancillis ex tali adipe coctos cibos diebus jejunialibus comedendos proponunt, confessionale accedant, iidem, in quantum cum fructu prudentiæ fieri potest, deinceps Confessarius similia efficaciter dissuadeat in locis, ubi non est jam introducta contraria consuetudo, qualis tamen quoad pinguedinem animalium, seu sanguinem vigere dicitur in Regno Siciliæ teste Felice Polettà *tom. 1. Exam. Ecclesiast. part. 3. n. 2880*. \*

II. Quoad secundum, videlicet quoad Abstinentioniam plurium refectorum, est sciendum, quod ad Jejunium requiratur, ut in die (sive intra spatium unius diei naturalis, a media nocte usque ad aliam mediam noctem computandum: arg. *l. More Romanoff. de Feriis*;) nonnisi unica refectio, seu comestio fiat: prout fatentur unanimiter Doctores, & patet ex perpetua atque universali Ecclesiæ consuetudine. Verum tamen est, quod Ecclesia his posterioribus sæculis ob corporum infirmitatem, quæ mundo senescente semper magis augetur, & aliis rationabilibus de causis, ex longæva consuetudine & tacito consensu indulserit, ut præter dictam unam comestionem modicum aliquid cibi sero per modum collatiunculæ sumatur. Dicitur notanter, *modicum aliquid cibi*: quia, qui notabiliter excederet, procul dubio jejunium frangeret: unde etiam illi dies, quibus prohibentur quidem carnes, non tamen duæ refectioes, dicuntur quidem dies abstinentiæ, aut non formalis jejunii. Sed de hoc amplius *num. 23. & seqq.*

12. Tertia tandem Jejunii conditio, quæ est certa refectiois hora, hoc importat, ut unica illa refectio non pran-

dii, sed cœnæ rationem obtineat; unde & Breviarium Romanum in Benedictione Mensæ præscribit, quod, quando semel comeditur (puta diebus Jejunii) omnes preces dicantur ut in cœna. Et quidem hæc unica refectio prioribus sæculis tempore Quadragesimali usque ad vesperam prorogari debebat, uti patet ex *c. Solent. 50. de Consec. dist. 1*. Aliis vero diebus jejunialibus differebatur usque ad horam nonam, quæ est tertia post meridiem, uti testatur D. Bernadus *Serm. 4. de Quadragesima*. Ceterum hisce posterioribus sæculis, quibus ob corporum infirmitatem concessa fuit collatiuncula vespertina, pariter ob eandem causam usu receptum est, ut refectio illa unica fiat circa meridiem, & Vesperæ in Choro tempore Quadragesimæ dicantur mane ante comestionem, ut sic primævæ consuetudinis Ecclesiæ memoria retineatur. Sed quia de istis tribus Jejunii Ecclesiastici conditionibus speciales occurrunt difficultates, hinc sit

## Q U Æ S T I O II.

Solvantur varia dubia circa tres Jejunii conditiones.

### S U M M A R I U M

- 13 Dispensatus circa esum carniū an possit bis comedere?
- 14 Sententia negativa multorum.  
(a) Tract. 6. dist. 1. num. 38.
- 15 Affirmativa probabilior.  
\* Nec tamen altera sententia caret suis gravibus fundamentis, estque in praxi observata apud aliquot Dioceses.
- 16 Jejunium Ecclesiasticum an violet replens ventrem cibis Quadragesimalibus?  
Ratio dubitandi.
- 17 Resolutio Questionis.
- 18 Solvuntur contraria.  
\* Quid, si comestionem primum per plures horas pertrahat?
- 19 Sapius in die Jejunii comedens carnes peccat toties, quoties comedit; & quidem mortaliter, nisi excuset levitas materiæ, quæ?
- 20 Quid, si sapius quis comedat cibos licitos?
- 21 Solvuntur instantiæ.
- 22 Differentia inter præceptum de non comedenda carne & non sumenda secunda refectioe.
- 23 Collatio vespertina an permessa?
- 24 Quantum cibi in ea sumere liceat?
- 25 I. Sententia, certas uncias admittens.  
Uncia, quid?
- 26 II. Sententia, id determinandum censens pro varietate circumstantiarum;
- 27 Vel admittens quartam partem justæ cœnæ.
- 28 III. Sententia, ad consuetudinem locorum recurrens.
- 29 In Collatione an etiam qualitas ciborum sit attendenda?
- 30 I. Sententia.
- 31 II. Sententia.
- 32 In praxi attendenda est recepta locorum consuetudo.
- 33 Quale peccatum sit anticipare tempus comestionis?
- 34 Quid, si justa causa subsit?
- 35 An sit peccatum sumpta mane Collatione differre prandium ad vesperam?  
\* An, & quando prandium interruptum possit iterum continuare? Addit. I.  
\* Quanam quantitas extra prandium & Collationem comesta constituat peccatum grave? Addit. II.

13 Q Uæritur I. Circa primam Jejunii conditionem, an dispensatus circa esum carniū, censetur dispensatus ad non jejunandum, ita ut possit sæpius de die comedere? Resp. cum Maffriodis *l. 12. Theol. mor. n. 6*. diversas quoad hoc dubium esse Doctorum sententias.

14 Et quidem negativam sententiam non pauci tenent, ut Graffæus, Petrazza, alique plures; quam sententiam amplectuntur etiam Lessius, Reginaldus, Cajetanus, Navarrus, & multi alii, loquendo de casu illo,



Quo quis dispensatus est in esu carniū non ratione debilitatis naturæ, sed quia a piscoibus abhorret, aut hi ejusdem temperamento nocere solent: vel quia cibi esuriales valde caro pretio comparantur e. g. tempore Quadragesimæ. Rationem dant; quia præceptum Ecclesiæ, quando non potest servari in totum, nihilominus in parte, quæ servari potest, servandum est, *arg. c. Cum dilecti: de Dolo & contumacia*. Idem suadetur per simile: nam qui non potest recitare totum Breviarium, potest tamen recitare partem, tenetur ad recitandam partem, prout alibi (a) dictum. Sic etiam, qui dispensatus in duplici refectioe, non idcirco est dispensatus in esu carniū. Confirmatur: quia quando quis est dispensatus in esu carniū, non ratione suæ debilitatis, sed quia a cibis ejunalibus abhorret &c. nulla subest causa, cur gemina comestio concedatur: ergo saltem tunc ea erit illicita: nam dispensatio sine causa non valet.

15 Affirmativa nihilominus sententia est probabilior, atque inter Doctores communior, quam tenent Toletus, Diana, Tamburinus, Azorius, Filliucius, & Maltrius, citans plures alios. Ratio est, quia abstinentia ab esu carniū est de substantia Jejuniæ Ecclesiæ; ergo, qui dispensatus est quoad comestionem carniū, eo ipso est dispensatus a Jejuniis, & consequenter poterit bis vel sæpius comedere, cum sublata substantia Jejuniæ censeatur solutus a lege Jejuniæ. Et per hoc patet ad rationes prioris sententiæ, quæ solum urgent in illis casibus, in quibus præceptum Ecclesiæ potest servari quoad suam substantiam saltem ex parte, licet non ex toto: quod non fit, neque concessa comestione carniū fieri potest in Jejuniis Ecclesiæ.

*Additio.*

\* Alii negabunt adversæ sententiæ Patroni, quod concessa comestione carnis non possit (uti pariformiter dicitur quoad recitationem Horarum Canoniarum) quoad alteram adhuc partem servari formale Jejunium; nam inquit, Jejunium formale & proprie tale (prout distinguitur a simplici abstinentia) includere substantialiter duas partes ab invicem divisibiles, & independentes, nimirum abstinentiam a duplici refectioe, & a carnibus; sicque non sequi, facta dispensatione in una, eo ipso eandem quoque fieri in altera parte; cum utrobique sit aliqua distincta mortificatio, uti consideranti patet. Et hoc ipsum (ait in formalibus la Croix lib. 3. p. 2. n. 1269.) communiter declarant Episcopi dispensantes pro carnibus in Quadragesima, dum addunt, se non aliter velle dispensare, quam relinquendo obligationem Jejuniæ quoad refectioem unicam. Ita ille, ego autem credo, quod equidem hæc praxis forsitan vigeat in Germania inferiori, ac vicinia; non tamen æque, saltem non ubique, in superiori, ubi potius scio in praxi ordinarie servari doctrinam primæ sententiæ, taliter nimirum, ut dispensatione facta in Quadragesima circa comestionem carnis, etiam absque scrupulo adhibeatur secunda refectio. Dixi ordinarie: etenim in duabus Diocesisibus bis jam vidi, fuisse a Reverendissimo Ordinario notanter 1739 declaratum, quod in Quadragesima admittendo comestionem carnis nullatenus intendat dispensare quoad duplicem refectioem, sicut exempti propter alias causas, puta ob longum iter, aut graves labores &c.\*

16 Quæritur II. Quantum attinet alteram conditionem Jejuniæ, an semel tantum in die Jejuniæ comedens, sed tot cibis quadragesimalibus ventrem replens, ut nullā carnis afflictionem sentiat, quinimo gulæ indulgeat, violet Jejunium Ecclesiæ? Ratio dubitandi est: tum quia Jejunium Ecclesiæ est actus temperantiæ: atqui talis actus temperantiæ in proposito non intervenit ob excessum illum, qui degenerat in gulam, vel etiam ebrietatem; tum quia parum refert, quid de æquipollentibus fiat: atqui talis una excessiva comestio potest æquivalere duabus vel tribus aliis comestionibus, per quas utique frangeretur Jejunium Ecclesiæ. Tacentur aliæ rationes, quas ponit Covarruvias lib. 4. var. resolut. cap. 20. num. 11.

17 Resp. cum Reginaldo lib. 4. cap. 14. n. 163. Cajetano, Medina, & aliis, quamvis talis perdat meritum Jejuniæ in totum, vel in partem, simulque peccet juxta qualitatem excessus (etiam mortaliter, si excessus tam magnus sit, qui in non jejunantibus culpam mortalem induceret) nihilominus is non judicabitur ab Ecclesia transgressor Jejuniæ, neque ex eo capite punietur a Deo, sed ex alio; quia videlicet peccavit peccato gulæ, aut si excessit in nimio potu, peccato ebrietatis. Ratio est; quia talis non agit contra substantiam Jejuniæ Ecclesiæ; nam Ecclesia solum præcipit abstinentiam a carnibus, & a secundæ refectioe, atque ut ante certum tempus non fiat refectio, quæ omnia in casu posito observantur.

18 Ad rationes dubitandi, & earum primam dicitur, Jejunium Ecclesiæ dici actum Temperantiæ, non quod Ecclesia illum præcipiat ut modificatum omnibus conditionibus virtutis Temperantiæ, sed ut modificatum ad minimum saltem tribus jam enumeratis. Neque obstat, quod Ecclesia præcipiens jejunium intenderit corporum nostrum castigationem. Resp. enim, hoc parum urgere quia finis præcepti non cadit sub præcepto, ita videlicet, ut finis ipse præceptus esse censeatur. Deinde ejusmodi castigatio intervenit in proposito saltem per hoc, quod fiat abstinentia a carnibus, atque secunda refectio: aliæ vero mortificationes sunt quidem saluberrimæ, atque a SS. Patribus passim commendatæ; ea tamen non cadunt sub speciali præcepto Jejuniæ Ecclesiæ, ut dictum. Ad alteram instantiam negatur minor: etsi enim unica illa comestio possit æquipollere pluribus quoad quantitatem ciborum sumptorum, non tamen pluribus æquipollere quoad multitudinem refectioem, quæ semper manet unica refectio.

*Additio*

Utrum vero ille qui tot cibis quadragesimalibus unica refectioe adeo replet ventrem ad prandium, ut nullam in abstinendo de nocte a secunda refectioe sentiat mortificationem, utrum (inquam) ille adhuc Jejunium observare censeatur, si illam primam refectioem sedendo in mensa protrahat, atque extendat per plures etiam horas, ita, ut tale convivium ferme attingat tempus collationis, alia est difficultas; ubi non desunt Auctores, qui putant cum Tamburino & Fagundez hanc primam refectioem ultra duas horas citra fractionem Jejuniæ extendi non posse, ne alias prima comestio adeo in longum tempus protrahatur censeatur moraliter duplex refectio, quæ per præceptum Ecclesiæ prohibetur. Pasqualigus tamen cum Gobat in Quin. tr. 5. l. 26. num. 8. talem apud Germanos praxin excusat: tum ratione consuetudinis etiam a Reverendissimis Ordinariis non ignoratæ, quæ in præceptis præcise humanis multum valet: tum quia, etsi fortassis æquivalenter sit duplex, formaliter tamen & actualiter est unica refectio, moraliter quidem diutius continuata, & ceteroquin finis præcepti non cadit sub præceptum conformiter dictis antecedenter.\*

19 Quæritur III. An qui sæpius comedit in die Jejuniæ, toties peccet, quot sunt comestiones? Resp. I. Quando in die Jejuniæ comeduntur cibi vetiti, ut puta carnes, toties peccatur contra præceptum Jejuniæ, quoties distinctis comestionibus manducantur tales cibi. Ita Doctores communiter. Ratio est: quia in præcepto Jejuniæ duo includuntur, quorum unum est simpliciter negativum, scilicet ne comedantur cibi vetiti, alterum vero affirmativum, nempe ut quis unica refectioe, & quidem non nisi tempore debito sumenda, contentus sit: atqui per quamcumque carniū comestionem semper violatur præceptum Jejuniæ, quatenus est negativum; ergo etiam toties peccatur, & quidem mortaliter, nisi excuset levitas materiæ. Et hoc ultimum idcirco additur, quia negari non potest, in proposito dari posse peccatum veniale ob levitatem materiæ: ut si de cibis vetitis comedatur dumtaxat modicum puta in quantitate unius uncie, vel (ut aliqui volunt) duarum unciarum.



## Quæst. II. Solvuntur varia Dubia circa tres Jejunii conditiones. 321

20 Resp. II. Qui vero sæpius in die comedit cibos ceteroquin licitos, peccat solum per secundam comestionem contra præceptum Jejunii, non vero per tertiam, vel alias subsequentes. Ita Mastrius *loc. cit. n. 9.* cum communiori & probabiliori Doctorum, contra Medinam, & alios. Ratio est: quia præceptum Jejunii non obligat ad impossibile: atqui posita jam secunda comestione, quamvis culpabili, impossibile est, ut quis unica tantum refectioe contentus sit; ergo ad hoc amplius non obligat, & consequenter fit peccatum contra legem Jejunii in secunda tantum refectioe, non autem in aliis sequentibus. Dicitur, *contra legem Jejunii*: nam per subsequentes potest quis peccare contra Temperantiam, licet non contra præceptum Jejunii.

21 Nec dicas. Præceptum Jejunii est de unica tantum refectioe: atqui toties quis agit contra hoc præceptum, quoties ultra unicam refectioem comedit interpolatis vicibus; ergo etiam toties peccat. Resp. negando minorem: quia post secundam illicitam comestionem præceptum Jejunii de unica tantum refectioe, seu potius, ut quis una dumtaxat refectioe contentus sit, amplius fervari non potest, sicque quoad hoc cessat ejus obligatio.

22 Nec obstat, quod quis sæpius comedendo carnes in die Jejunii sæpius peccet, sicque a pari etiam plures sumendo refectioes videatur sæpius peccare. Resp. enim negando consequentiam, & paritatem. Disparitas est: quia præceptum de non comedenda carne est simpliciter negativum, obligans semper & pro semper in die Jejunii, potestque post primam comestionem carnis adhuc pro reliqua diei jejunalis parte fervari: præceptum vero de sumenda una solum refectioe, non obstante, quod etiam prima fronte videatur negativum, nihilominus re melius considerata est affirmativum, obligans, ut jejunans sit unica comestione contentus; & hoc post secundam comestionem est observatu impossibile.

23 Quæritur IV. Quid censendum de Collatione vespertina? Resp. I. Collatio vespertina, quæ prioribus sæculis ignorabatur, posterioribus hæc sæculis ob corporum infirmitatem, quæ mundo senescente semper magis magisque augetur, & aliis rationabilibus de causis, ex generali consuetudine, & tacito consensu Ecclesiæ, in modica quantitate permixta est, ac licita. Ita communis. Et hanc Doctores non *refectioem*, sed *refectiunculam* dumtaxat, per quam Jejunium non solvitur, appellandam censuerunt, utpote in parva solum quantitate sumendam.

24 Resp. II. Quantum cibi in tali refectiuncula, seu Collatione licitum sit sumere, non tam facile est determinare; & forsitan aliquibus de hoc disputantibus illud D. Hieronymi dictum quadrat, quod refertur *can. Gloria 12. q. 2. Plenus venter facile de Jejunio disputat*. Referam igitur præcipuas, & probabiles sententias Doctorum, saltem in hoc convenientium, quod refectiuncula illa (ut ipsum nomen demonstrat) debeat esse modica, ne transeat in cœnam vel semicœnam.

25 Et quidem Filliucius *tr. 27. c. 2. n. 32.* ait, in hac refectiuncula quatuor, quinque, vel ad summum sex uncias seu mediam libram sumi posse, ut volunt (inquit) plerique ex recentioribus. Unde ultra sex uncias (*Un- cia* est duodecima pars assis, sive unius libræ: sed libra aromataria est major quatuor uncias, & continet triginta duas semiuncias) inciperet refectiuncula deficere a debita mensura, & accederet ad peccatum levius vel gravius, juxta qualitatem excessus.

\* Ubi tamen adhuc bene nota, quod apud modernos Theologos soleat divisio libræ fieri, uti in libra aromataria, nimirum in sedecim uncias teste la Croix *lib. 3. part. 2. n. 1299.* ubi hæc ponit formalia: *Duodecim uncia sunt libra, seu unum pondo apud veteres, sedecim vero apud nos.* \*

26 Deinde alii asserunt, non posse taxari, seu determinari certam pro omnibus jejunantibus quantitatem cibi pro Collatione vespertina, sed eam variam esse posse pro varietate tum personarum, uti videre est in profectionibus ætate, infirmis, nobilibus personis, qui pluribus epulis

& delicatioribus assueti sunt: tum locorum, uti accedit in frigidis regionibus, ubi major Collatio conceditur, quæ in calidis: tum exercitii & laboris, in quo quis occupatus est, vel defatigatur. Nam, quia hujusmodi labor quandoque totaliter excusat a jejunio, pariter existente aliqua rationabili causa v. g. laboris, studii, aut hujusmodi aliquid ultra consuetum sumi potest in Collatione.

27 Quod si regulam quamdam generalem etiam circa hoc petas, respondet Reginaldus *lib. 4. n. 185.* & post eum Layman *lib. 4. tr. 8. c. 1. n. 9.* ordinarie loquendo, & nisi aliqua causa iusta excuset v. g. laboris, infirmitatis &c. non esse notabiliter excedendum quartam partem eorum, quæ jejunanti spectata sua complexione sufficerent ad ordinariam cœnam: alioquin enim quis semicœnaret.

28 Alii vero, ut Bonacina *punct. 3. de Jejunio. n. 2.* citans Toletum, & alios, asserunt, hanc regulam esse desumendam ex consuetudine in singulis regionibus recepta: nam refectiuncula illa est per consuetudinem introducta; ergo sumi potest juxta limites receptæ consuetudinis. Cavendum tamen, ne tanta cibi quantitas sumatur, ob quam Collatio transeat in cœnam, vel quasi cœnam.

29 Resp. III. Utrum in refectiuncula illa non tantum quantitas, sed & qualitas ciborum sit attendenda, rursum diversæ sunt sententiæ; in praxi tamen tum recepta locorum consuetudo, tum aliæ circumstantiæ erunt attendendæ.

30 Prima pars de diversitate sententiarum inter Doctores ex eo patet: quia plerique Doctores pro Collatione solum admittunt leviuscula ciborum genera, quæ parum nutriunt, & potius ad sitim extinguendam deserviunt; ut sunt herbarum, pomarum, & hujusmodi fructus arborum, necnon & aliqua ex saccharo confecta. His tamen ex communi usu, vel in defectum fructuum, vel ne hi soli noceant, panem addi posse concedunt, non obstante, quod panis plurimum nutriat, famemque depellat: cibos autem, qui communiter inter fercula apponuntur, ac juscula cocta ex pane, & hujusmodi, nisi adit alia causa excusans, censent esse prohibita. Ita Filliucius, Azorius, & alii, quorum sententia communiori usu videtur esse recepta.

31 E contra Bonacina *loc. cit.* Cajetanus *vers. Jejunium.* Petrus Marchant. *Tribun. part. 2. tr. 12. tit. 3. q. 3. dub. 1.* & alii velunt, in dicta refectiuncula non tam stricte prohiberi cibi qualitatem, sicuti interdicitur quantitas: unde dictus auctor cum proxime citatis admittit, posse licite sumi jusculum, modo non sit de cibis prohibitis, comedi pisciculum, aut exiguam partem piscis majoris, imo plures res in eadem Collatione degustari posse, dummodo cibi quantitas non extendatur, neque Collatio transeat in cœnam, nec aliud præceptum obstat. Et hæc quoad diversitatem sententiarum.

32 Altera pars datæ responsionis, videlicet in hoc attendendam esse receptam consuetudinem locorum, ex eo patet: quia refectiuncula illa est introducta per consuetudinem; ergo juxta hujus limites poterit sumi. Sic in partibus hæc Septentrionalibus passim pro Collatione admittitur caseus una cum ovis frigidis, quamvis hi cibi præ ceteris nutriant, atque in aliis terris prohibeantur. Quod autem de jusculis calidis cum Cajetano & Petro Marchantio addit Bonacina, id consuetudo hætenus recepta non videtur admittere, saltem non in omnibus, præsertim in calidioribus regionibus, nisi in casu debilis complexionis, vel alia iusta causa interveniente: prout forsitan inter Personas nobiliores delicatioribus assuetas, aut studiis gravioribus defatigatas quandoque fieri solet.

33 Quæritur V. Circa tertiam Jejunii conditionem, an sit peccatum mortale, notabiliter anticipare tempus ordinarii comestionis in die Jejunii v. g. per unam, vel alteram horam? Resp. Non desunt equidem Doctores, qui putant, hoc esse peccatum mortale, si absque iusta causa fiat; pro qua sententia citatur Navarrus *cap. 21. Manualis n. 27.* Covarruvias, Cajetanus, & nonnulli alii: dicendum tamen cum communiori, & probabiliori Doctorum, id



id non esse peccatum mortale, sed veniale solum si fiat absque justa causa. Ratio est: quia non violatur substantia præcepti Jejunii, sed tantum circumstantia quædam accidentalis. Lessius *lib. 4. de Just. & Jur. c. 2. n. 13.* & alii.

34 Dicitur, *sed veniale tantum, si fiat absque justa causa*: quia tunc fit aliqua inordinatio. Quod si vero justa causa subest, utputa si iter sit ineundum, si hospites dimittendi, aut hujusmodi, nullum erit peccatum, ne quidem veniale.

35 Quæritur VI. Utrum similiter ille peccet, qui mane sumit Collationem ceteroquin sumi solitam, & prandium usque ad vespas vel noctem differt? Respondet Bonacina *loc. cit. n. 6.* & Layman *n. 10.* cum aliis communiter, id continere peccatum veniale, si fiat absque causa, eo quod pervertatur recepta consuetudo, nullum, si justa causa interveniat v.g. copia negotiorum, non permittentium sumptionem prandii in meridie, vel periculum infirmitatis, item piscatio, venatio &c. Verum Maltrius *cit. disp. 12. n. 8.* Reginaldus *lib. 4. n. 186.* Azorius, & quidam alii probabile esse censent, talem ( dummodo sumat refectiunculam hora consueta prandii, & non prius, nisi adsit alia justa causa ) nec venialiter peccare, licet sine speciali causa differat prandium ad noctem. Rationem dant: quia talis modus neque ex toto, neque ex parte solvit substantiam Jejunii: quinimo hic modus jejunandi magis conducit ad corporis afflictionem, unde & olim in Ecclesia primitiva refectio fumebatur ad vespas.

#### Additio I.

\* Quæritur VII. Utrum, & quandonam peccet ille, qui diebus jejunalibus cœnam, vel collatiunculam vespertinam semel inceptam, aut iterum interruptam denuo continuat? Resp. I. Si cœna, vel collatio vespertina tantum mathematicæ, puta per aliquot Pater, & Ave, non autem moraliter fuit interrupta, eadem de novo etiam absque ulteriori aliqua causa ad libitum potest continuari citra peccatum. Ratio est: quia tunc censetur adhuc esse una moraliter cœna, seu collatio, quoniam partes ejusdem non reputantur juxta prudentum computationem ab invicem disjunctæ. Responsio hæc magis clarescet ab exemplis. Sic videmus in multis Religionibus, quod Lector mensæ, vel inservitor antea sumat jusculum, aliudve simile, & absoluto suo officio continuet cœnam. Item ponamus, quod Petrus ab alio invitatus ibidem per aliquod tempus sedens ad mensam, & saturatus competenter jam plicarit mappulam, interea tamen afferantur adhuc nobiliores cibi, in hoc casu poterit continuare Petrus cœnam mutato suo proposito. Quinimo idem concedunt Petro Filliucius, Tamburinus, Sanchez, & Lessius contra alios, si is jam a mensa surrexisset, facta gratiarum actione, aut denuo ab aliis persuasus de novo affideret, supposito tamen, quod id fiat intra spatium unius circiter quadrantis; nam spatium unius quadrantis moraliter non censetur juxta DD. partes cœnæ discontinuare, la Croix *lib. 3. part. 2. n. 1281.* Item ponamus, quod Paulus relinquens mensam in uno loco, cui affidebat, intendat eandem absolvere in altero, in quo efficaciter invitatus expectatur, poterit id licite facere, dummodo spatium inter duas tabulas non multum excedat quadrantem horæ. Ratio est: quia tunc hæc partiales duæ comestiones videntur intra tam breve temporis spatium constituere adhuc unam moraliter cœnam, nec videtur diversitas locorum obesse, præsertim si id requirit honestas. Franciscus Henno alias satis austerus *tr. de Peccatis disp. 4. q. 4. Concl. 1. Resolut. 4.*

Resp. II. Si cœna, vel Collatio vespertina interruptitur ex gravi causa, puta ob certa negotia, Pasqualigus apud la Croix *loc. cit. n. 1273.* putat, eandem intra suos terminos posse compleri absoluto negotio, quamvis illud negotium durasset usque ad tempus vespertinum; quia, cum illa interruptio sit involuntaria, cœna, ad quam jus habet, manebit complebilis per sequentem comestionem. Contra Tamburinus, Diana, Lezana, ac Sanchez ajunt, non posse

inter primam & secundam comestionem majus spatium, quam unam, vel ad summum duas horas intercedere, ut continuatio fieri queat. Mihi præplacet distinctio Leonardi, ac Stephani a S. Paulo T. I. *Theolog. Moral. D. 5. n. 113.* vel enim talis, antequam surgit a cœna, est jam satur, vel non? si prius, non poterit peracto negotio post tantum temporis spatium continuare cœnam; quoniam ob interveniens negotium disparatū tanto tempore non videtur intercedere unio moralis inter primam, & secundam comestionem, & ceteroquin talis in prima refectioe jam fuit sufficienter saturatus, uti supponitur. Quod si autem ante abitum ad negotium non foret sufficienter satur, posset adhuc in reditu comedere ad saturitatem non obstante tam longo intervallo inter has comestiones intercedente: etenim quilibet habet jus semel intra diem jejunii ad saturitatem comedendi, prout etiam exinde ostiatis mendicantes possunt in hoc loco offam, in altero panem porrectum, in tertio aliud oblatum usque ad saturitatem in die jejunii comedere, quamvis in quolibet ex his locis per aliquod notabile tempus expectare debuerint, usque dum ipsis quidpiam fuerit porrectum; uti recte ex D. Thoma notat Sporer hic *n. 13.*

Resp. III. Loquendo proportionaliter de Collatione vespertina, si quis ob negotium v. g. vocatus subito ad infirmum periculose decumbentem debeat eandem interrumpere, vel talis ante abitum jam comedit quartam circiter partem justæ cœnæ, vel non? Si prius, nequit recedens continuare collationem: bene vero usque ad hanc mensuram, si parum, & ferme nihil sumpsisset ante discessum ad infirmum. \*

#### Additio II.

\* Quæritur VIII. Quandonam peccet mortaliter, qui diebus jejunalibus sine rationabili causa comedit quidpiam de cibis esurialibus extra cœnam, & collationem vespertinam? Resp. I. Et si comestio hæc fieret absque causa sufficienti, nihilominus ex communi DD. non peccari mortaliter, si quantitas illa de cibis esurialibus tempore intermedio inter cœnam, & collationem vespertinam comesta non excedat duas uncias. Sunt autem duæ uncie quarta pars ipsius collationis vespertinæ, si pro integra collatione vespertina octo uncie, quæ mediam libram solent conficere, computentur. Ita cum aliis Diana *art. 5. Tract. 5. Resol. 11. ac part. 10. Tract. 14. Resol. 57.* Sporer in *Decalog. Tract. 1. Proemial. cap. 5. sect. 2. n. 30. ac Tract. 3. post caput 4. in Appendice de observ. Jejun. sect. 1. n. 17.* & Tamburinus hic *Tract. 4. cap. 5. n. 30.* Ratio est: quia quantitas illa duarum unciarum, juxta communem æstimationem prudentum exigua, minusque notabilis censetur, sive consideretur secundum se, sive in ordine ad totum, sive etiam in ordine ad mortificationem carnis tamquam finem Jejunii, qui finis non læditur notabiliter, seu dictæ duæ uncie simul, seu successive sumantur. Ubi autem bene ex Sporer *loc. cit.* adverte conformiter Tractatui de Peccato, si intra eundem diem extra cœnam, & collationem vespertinam modo una, modo altera, modo tertia, ac demum alia hora quarta uncia de comestibilibus sumatur, multas materias parvas distinctis vicibus, ac successive extra tempus licitæ refectioe sumptas tandem concrefcere in unam materiam gravem, & frangentem Jejunium mortaliter. Interea tamen puto ( salvo meliori ) sicuti in furtis minutis successivis major quantitas requiritur ad constituendum peccatum mortale, quam si res simul, ac semel fuisset ablata, ita pariter ipsammet Ecclesiam tamquam benignissimam Matrem suo modo saltem, ac aliquantulum majorem quantitatem, & ultra duas uncias requirere ad constituendum peccatum mortale in ordine ad fractionem Jejunii, si similia minuta successive, quam si simul, & semel, ubi magis nutrire videntur, comedantur. Ne vero nimium laxa fiat hic extensio, pariter præ oculis est habenda Propositio ab Alexandro VII. ordine 29. superius jam allegata sequentis tenoris: *In die Jejunii, qui sapius modicum quid comedit, etsi notabilem quantitatem in fine comederit, non frangit Jejunium.*

Resp. II.



Resp. II. Si adsit aliqua causa rationabilis simile quid modicum sumendi, tunc neque peccatur venialiter per comestionem talis modici cibi. Ita communis; idque verum est, etsi causa illa non tam gravis existat, ut ex integro eximat a Jejunio: nam utique major causa requiritur ad tollendum ex integro Jejunium, quam ad sumendum quid modicum extra tempus cœnæ, & collationis vespertinæ? Tales causas rationabiles exemplificat Sporer *loc. cit.* si quis ad confortandum stomachum debilem, vel ad tollendum oris foetorem, similemve ob causam sumat offam, modicum frustum panis, vel electuarium. Item si Musicus ad conservandam vocem mane sumat ovum recens, vel Professor publicus, aut Concionator ante actum solemnem iusculum, vel alius per modum medicinæ saccharum seu aromata, sive ad refrigerandam naturam, aut extinguendam sitim aliquam uvam, seu pomum. Similiter cum pluribus aliis inquit la Croix *lib. 3. p. 2. n. 1282.* esse rationale comedere quid modicum, si prandium differri debeat ultra horam communem: tunc enim sumeretur potius per modum medicinæ, ne stomachus dolore prematur, aut vires deficiant, \*

### QUÆSTIO III.

Quæ sit Obligatio Jejunii?

#### SUMMARIUM.

- 35 Jejunia solo jure Ecclesiastico instituta sunt,
- 37 Jejunium Quadragesimale ab Apostolis institutum.
- 38 Quid de Quatuor anni Temporibus?
- 39 Violare Jejunium Ecclesiasticum est peccatum mortale.
- 40 Omnes Christiani tenentur illud servare.
- 41 Sed primum completo vigesimo primo ætatis anno.
- 42 Quid de ultimo die vigesimi primi anni?
- 43 Adolescentibus, vel infantibus an liceat vesci carnibus?
- 44 Adolescentes possunt obligari ad Jejunium ex aliis causis.
- 45 Obligatio Jejunii Ecclesiastici est personalis,
- 46 Et certis diebus affixa.
- 47 Quid de Jejunio ex voto vel pro penitentia injuncto?
- 48 Solvens Jejunium ex duplici præcepto Ecclesiæ obligatus committit unicum peccatum.
- (b) Vide Tract. 3. distinct. I. n. 41. & seqq.
- 49 Quid si quis ad illud tenebatur ex voto, ac præcepto Ecclesiæ?
- (c) Ut dictum tract. 3. dist. I. n. 47.
- 50 Statuens per totam Quadragesimam non Jejunare, vel non jejunans quot peccata committat?
- (d) Tract. 3. dist. I. n. 57.
- 51 Peccant contra Præceptum Jejunii, qui alios ad id violandum inducunt.
- 52 Corpo opponens carnes hospitibus an peccet?
- 53 An possit eis ministrare cenam?
- 54 Jejunium quomodo obliget peregrinos, & advenas? remissive.

36 **CONCL. I.** Omnia Jejunia solo jure humano, seu ex Præcepto Ecclesiæ instituta sunt, quamvis Jejunium Quadragesimale, nec non Jejunia Quatuor anni Temporum ex Apostolica traditione descendant. Ita communis. Ratio est: quia, si Jejunia essent juris Divini, sive a Christo Domino instituta, non potuisset tanta variatio circa ea intervenire, quantam ex consuetudine variis locis & temporibus patet esse inductam, siquidem contra Jus Divinum non valet consuetudo *c. ult. De Consuetud.*

37 Ceterum sub Jure humano Ecclesiastico comprehenduntur ordinationes Apostolorum, quas ipsi ut Rectores Ecclesiarum fecerunt. Et quidem Jejunium Quadragesimale ad Exemplum Christi Domini per quadraginta dies jejunantis ab Apostolis fuisse institutum, patet ex Canone 68. Apostolorum: unde D. Leo *Serm. 6. de Quadragesima*, ait: *Apostolica institutio quadraginta dierum jejunii impleatur.* Et hoc ipsum alii SS. Patres passim docent. Verum quidem est, quod S. Ambrosius *Serm. 25.* asserat, inductam esse Quadragesimam a Domino. At hujus-

modi dictum ex eo salvatur, quia Apostoli ad Christi imitationem, & ex divino instinctu illud Jejunium præceperunt.

38 Porro Quatuor anni Tempora instituit S. Callistus Papa I. quibus Jejunium ex Apostolica traditione acceptum ab omnibus servaretur, ut habetur in Breviario Romano, & Lectionibus Festi ejusdem, *die 14. Octobris*: reliqua vero Jejunia successive per Ecclesiam fuerunt instituta. \* Ubi aliqui Doctores volunt, his annumerari quoque debere tres dies Rogationum conformiter *can. Rogationes 3. dist. 3. De Consecrat.* In his tamen terris praxis & consuetudo ostendit contrarium; uti etiam vi ejusdem in Germania in aliquot Diocesis non jejunatur in Vigilia S. Matthiæ, si eadem incidat in unum diem ex tribus ultimis Bacchanalibus, quo casu ad vitanda plura peccata populi Jejunium ab Episcopis transfertur; quamvis quoad nostros in Rubricis particularibus Ordinis inferatur Decretum 23. Jan. anno 1694 editum sequentis tenoris: *Jejunium omnino servandum in Vigilia S. Matthæ Apostoli, occurrente Feria 3. post Dominicam Quinquagesimæ, nec anticipandum.* \*

39 **CONCL. II.** Hoc præceptum Jejunii ita obligat, ut, si absque justa causa violetur, committatur peccatum mortale. Ita communis, & certa Doctorum, paucis exceptis, & a Lessio *loc. cit. n. 32.* relatis, qui volebant, tunc solum peccari mortaliter, quando ex consuetudine aut contemptu violatur. Sed horum sententiam rejecit Alexander VII. inter alias etiam sequentem, ordine 23. Propositionem damnando: *Frangens Jejunium Ecclesiæ, ad quod tenetur, non peccat mortaliter, nisi ex contentu, vel inobedientia hoc faciat, puta, quia non vult se subicere præcepto.* Accedit ratio: quia generaliter Leges Ecclesiasticæ in materia gravi, qualis est hæc, obligant sub mortali. Et hinc olim violatores Jejunii jubebantur excommunicari *cit. Can. 68. Apostolorum*; atqui excommunicatio non incurritur, nisi ob peccatum mortale.

40 **CONCL. III.** Omnes Christiani completo vigesimo primo ætatis anno tenentur servare Jejunium diebus ab Ecclesia præscriptis, nisi justa aliqua causa excusetur. Ita certa, & communis Doctorum; idque patet ex praxi, & communi sensu Fidelium.

41 Additur notanter, *completo vigesimo primo ætatis anno*: quia, cum adolescentæ ante completum tertium septennium frequentiore & abundantiore cibo indigeant ratione augmentationis, seu ob crescentem ætatem, & caloris abundantiam, noluit Ecclesia obligationem jejunandi eis imponere ante completum vigesimum primum ætatis annum, ut tenet D. Thomas 2. 2. *qu. 157. art. 4. ad 2.* & communis Doctorum, ac probat recepta consuetudo.

42 Et hoc adeo verum est, ut etiam is, qui explet annum vigesimum primum in die Jejunii, ante horam ejus ultimam completam necdum teneatur jejunare, sed ea transacta tenetur, dummodo possit, nec antea receperit plures refectiones: quia tunc jam currit tempus præcepti Ecclesiastici, non vero prius. Bonac *loc. cit. punct. ult. n. 7.* & alii. Adhuc tamen conveniens est, ut adolescentes etiam priori tempore sese ad jejunandum exerceant, & assuescant, plus, & minus, secundum modum ætatis suæ.

43 Ceterum data doctrina de adolescentibus intelligenda est, quantum ad præceptum Jejunii quoad unicam refectionem: nam a carnibus, aliisque cibis prohibitis & ipsi abstinere tenentur. Infantibus tamen nondum prædictis usu rationis, utpote cum præcepti Ecclesiastici capaces non sint, infra primum septennium tales cibos dare licitum est: nisi consuetudine in contrarium existente id scandalosum foret. Reginaldus *lib. 4. n. 208.* & alii.

44 Deinde posita Conclusio loquitur solum de Jejunii Ecclesiasticis: quia adolescentes ante vigesimum primum annum possunt quandoque ex aliis causis obligari ad Jejunium. Nam imprimis possunt teneri ad Jejunia ex Voto, vel vi Regulæ: prout Professores Regulæ FF. Minorum jam ante completum vigesimum primum annum tenentur servare Jejunia suæ Regulæ, cum per Professionem dictæ Regulæ vi Voti ab ipsis emissi suo juri cesserint, promittentes servare



servare Regulam toto tempore vitæ suæ. Similiter adolescentuli tenentur ad Jejunia pro Sacramentali poenitentia imposita.

45 CONCL. IV. Obligatio Jejunii ab Ecclesia indita est personalis, unde nequit illud per alium persolveri. Ita communis. Ratio est: quia finis Jejunii Ecclesiastici est, moderate affligere corpus, carnemque propriam edomare; juxta quod Ecclesia canit in Præfatione Missæ Quadragesimalis: *Qui corporali Jejuniio vitia comprimis, mentem elevas &c.*

46 CONCL. V. Obligatio Jejunii Ecclesiastici est certis, ac determinatis ab Ecclesia diebus affixa, atque ideo ille qui tali die jejunare non potest, aut etiam culpabiliter illud violat, non tenetur loco ipsius alio die jejunare. Ita rursus communis; idque patet a simili in præcepto audiendi Missam diebus Festivis, atque in obligatione Sacerdotum recitandi Breviarium, quæ pariter diei affixa est, & cum die transit.

47 Dicitur, *Obligatio Jejunii Ecclesiastici*: nam loquendo de Jejuniio debito ex voto, est attendenda ipsius voluntas inæntio: unde, qui vovit bis in hebdomada jejunare, dies autem certos non determinavit, potest, quibus voluerit, jejunare, & non jejunans hac die hebdomadæ tenetur alia jejunare: quia sic, & non aliter sibi obligationem mediante suo Voto imposuit. Qui vero vovit singulis Sextis Feriis jejunare, tenetur hisce determinatis diebus jejunare. Sic pariter discurrendum de Jejuniio cuiuspiam imposito a Confessario pro poenitentia Sacramentali: quamvis, si secus non expriatur, Confessarius non censetur ita alligare jejunium certæ diei, ut, si tunc non servetur, aut ob impedimentum servari nequeat, poenitens sit liber a Jejuniio illo imposterum servando, ne Sacramentum Poenitentiae remaneat incompletum ob defectum Satisfactionis, quæ est pars integralis ipsius.

48 CONCL. VI. Qui solvit Jejuniium ex duplici præcepto Ecclesiæ obligatus v.g. Vigiliæ & Quatuor Temporum seu Vigiliæ & Quadragesimæ, unicum numero peccatum committit. Ita communis. Ratio est: quia, licet talis ex duplici titulo obligetur, utrumque tamen præceptum Jejunii Ecclesiastici obligat ex eodem motivo virtutis Temperantiæ: atqui peccata non multiplicantur numero ex multiplicitate præceptorum, quando eandem virtutem respiciunt. Unde in simili omittens auditionem Missæ die Dominico, in quem incidit Festum de præcepto, non peccat duplici peccato. (b)

49 Additur notanter in conclusione, *ex duplici præcepto Ecclesiæ obligatus*; dum videlicet omnia Jejunia Ecclesiastica ex eodem motivo formali virtutis Temperantiæ injunguntur. Nam secus dicendum, si quis obligetur ad Jejuniium ex duplici præcepto, quod procedit ex motivo diversarum virtutum, ut puta quando quis tenetur jejunare ex Voto, sicque ex motivo formali virtutis Religionis, simulque ex motivo Temperantiæ, ratione concurrentis præcepti Jejunii Ecclesiastici: nam violans hujusmodi Jejuniium, duplici specie peccati peccabit, nimirum & contra Temperantiam, & contra virtutem religionis. (c)

50 CONCL. VII. Si quis cessante causa rationabili excusante deliberate statuit, per totam Quadragesimam nunquam jejunare, ratione hujuspræ voluntatis unum numero peccatum committit, gravius tamen: quod si vero postmodum hæc voluntas executioni mandetur, tot committuntur peccata numero distincta omissionis externæ Jejunii, quot sunt dies jejunales. Ita Filliucius *tr. 27. c. 5. n. 87.* & concordant superius (d) dicta. Ratio primæ partis est: quia, dum quis statuit non jejunare per totam Quadragesimam, actus hic respicit omnia illa Jejunia per modum unius objecti adæquati, non autem fertur voluntas distincte super singulos dies Quadragesimæ. Altera pars ex eo probatur: quia obligatio Jejunii est singulis Quadragesimæ diebus (Dominicis dumtaxat exceptis) affixa; ergo & singulis illis diebus tenetur quis jejunare, & dum non jejunat, committit consummatam omissionem externam Jejunii præcepti.

51 CONCL. VIII. Peccant insuper contra hoc præceptum Jejunii, qui alios ad Jejuniium violandum scienter inducunt. Ita communis. Quia tunc tales censentur aliis

cooperari in fractione Jejunii: est enim regula generalis, quod non solum peccet, qui præceptum transgreditur, sed etiam, qui causa est, ut illud alii transgrediantur absque legitima causa. Hinc peccant Patresfamilias & Oeconomi, qui subditis suis præbent cibos vetitos, quibus Jejuniium solvant: quinimo non solum non debent tales cibos ministrare, sed etiam monere, & curare ex lege Charitatis, ut subditi cessante justa causa excusante Jejuniium servant. Non tamen tenentur ipsos cogere ad servanda Jejunia; nimis enim rigorosum, & durum id esset. Filliucius *ib. n. 91.*

52 CONCL. IX. Caupo, si adventantibus cibos vetitos, ut puta carnes, apponat in locis Catholicis, graviter peccat; nisi urgeat necessitas, aut hospes habeat facultatem eas comedendi. Patet hoc ex priori Conclusionem. Additur, *in locis Catholicis*: nam in locis Hæreticorum ubi communiter non observantur Jejunia, non esset illicitum carnes apponere, dummodo tamen hospites ipsas petant, vel non posset caupo recusare sine suo gravi incommodo, quia v.g. ab hospitibus ad aliud hospitium perrecturis deferendus, vel a Magistratu puniendus foret.

53 Quantum ad cœnam attinet, si quidem constet, hospites non teneri ad Jejuniium, clarum est, eam posse ministrari. Verum, quando constat eos teneri, tunc, si Caupo volentibus cœnare potest sine suo incommodo negare cœnam, tenetur: quia quilibet lege Charitatis obligatur impedire offensionem Dei, quantum commode potest. Si vero sine incommodo negare nequeat, ut puta quia hospites alio discessuri, & ibidem cœnaturi essent, aut gravius Deum offensuri blasphemando, vel maledicendo, tunc Caupo non peccat petentibus ministrando. In dubio autem, an hospites teneantur jejunare, & cœnam petant, præsumi potest eos excusari, sicque cœna porrigi. Filliucius *loc. cit. n. 92. 93.* & alii. Videatur etiam Tamb. *l. 4. c. 5. §. 6. n. 9.*

54 Circa obligationem Jejunii variæ hoc loco posset formari Quæstiones quoad peregrinos & advenas, an & quomodo obligentur ad Jejunia particularia locorum, per quæ transeunt, & universalialia totius Ecclesiæ. Verum de his copiose jam dictum Tract. 2. dist. 3. qu. 3. & 4. ibi videatur.

## Q U Æ S T I O IV.

Quæ causæ a Jejuniio excusent?

## S U M M A R I U M.

- 55 *Sensus Quæstionis, & quid de esu carniū?*
- 56 *Generatim tres causæ excusant a Jejuniio; Impotentia; pietas; Necessitas; seu Labor.*
- 57 *Ratione impotentia excusantur I. Physice impotentes.*
- 58 *II. Moraliter impotentes, ut infirmi &c.*
- 59 *Alioquin carentes somno necessario, vel vertiginem patientes.*
- 60 *Mulieres gravidae, aut lactantes; Adolescentes; Pauperes.*
- 61 *Et Senes.*
- 62 *Sexagenarii an omnes excusentur?*
- 63 *Resolutio,*  
\* *Et Refutatio cujusdam moderni.*
- 64 *Quid de Feminis quinquagenariis?*
- 65 *Ratione Pietatis, qui excusentur a Jejuniio?*
- 66 *Declaratur id ipsum.*
- 67 *Corollaria.*
- 68 *Ratione Necessitatis, sive laboris corporalis qui excusentur?*
- 69 *Limitatio quoad labores aliquorum exiguos.*
- 70 *Itinerantes an, & quando excusentur a Jejuniio?*
- 71 *Quid, si iter non sit necessarium?*  
\* *Quid de aliis operibus non necessariis?*
- 72 *Bona fide non jejunans haud peccat.*
- 73 *Secus, si quis dubitet, an habeat justam causam non jejunandi.*
- 74 *Dispensatio legitima excusat a Jejuniio.*
- 75 *Et quæ ad eam requirantur.*



- 76 *Episcopi possunt dispensare in Jejunio.*  
*Item Prælati Regulares cum suis.*  
 77 *Parochi an dispensare valeant cum Parochianis?*  
 78 *Causæ hæcenus allatæ an excusent a Jejunio ex Voto debito?*  
 79 *Quid, si constet de alia voventis intentione?*  
 80 *Exemplum de FF. Minoribus*

55 **A**dvertendum, quod præsens Quæstio præcipue loquatur de causis ab observatione Jejunii excusantibus, quatenus per præceptum Jejunii unica dumtaxat comestio permittitur, non vero, quatenus efus carniū prohibetur: siquidem comestio carniū multo difficilius, nec nisi ratione gravioris necessitatis conceditur. Et hæc quidem si evidens sit ac urgens, neque commode Superior adiri possit, licitum erit manducare carnes, & alios cibos vetitos, etiam absque ulla dispensatione: quod si tanta necessitas non urgeat, aut de ea evidenter non constet, dispensatione Superioris opus erit juxta Doctores passim.

56 CONCL. I. Quamvis causæ justæ, quibus Fideles ab obligatione Jejunii excusantur, multiplices esse possint, et tamen commode ad tria capita revocantur, nempe ad Impotentiam, Pietatem, & Necessitatem. Ita Reginald. l. 4. n. 204. quamvis nonnulli loco tertii membri ponant Laborem. Ratio est: quia, quando per observantiam præcepti Jejunii læderetur bonum corporis, excusat impotentia; quando bonum animæ seu spiritus, excusat Pietas; & quando læderetur substantia externa, excusat Necessitas, seu Labor ad bona externa sive acquirenda, sive conservanda necessarius.

57 CONCL. II. Ratione Impotentiae excusantur illi, qui sine gravi aliquo incommodo, vel notabili damno jejunare non possunt. Ita communis. Siquidem per Impotentiam non intelligitur tantummodo Impotentia physica, quæ tunc contingit, quando quis non potest absolute jejunare, sed etiam Impotentia moralis, quæ accidit, quando quis absque notabili damno jejunare nequit.

58 Sic primo ratione Impotentiae moralis excusantur a Jejunio infirmi, & convalescentes, etiam infirmitatem propria culpa contraxerint: nam, quantum ad propositum, non est attendenda culpa præterita, ob quam infirmitas contracta est, sed ipsa præsens Impotentia, ob quam quis jejunare nequit, sed indiget multiplici refectione.

59 Insuper ob dictam rationem excusari possunt, qui aliquid cibi noctu capiunt, ne necessario somno careant, aut quidpiam comedunt ad evitandam capitis vertiginem, vel membrorum tremorem, aut hujusmodi: tum quia tale quid potius sumitur per modum medicinæ: tum quia Ecclesia non censetur obligare cum tanto detrimento corporali. Bonacina *punct. ult. de Jejunio* n. 2. & alii.

60 Deinde hac de causa excusantur mulieres gravidae, aut lactantes, utpote quibuscum pro se, tum pro suo foetu opus est copiosiore cibo. Insuper excusantur adolescentes ante vigesimum primum ætatis annum completum, juxta dicta n. 41. & 42. Rursum excusantur pauperes, qui propter paupertatem alimento carent sufficienti ad unam congruam refectionem in die Jejunii sumendam: quinimo si alium cibum invenire non possant, hi etiam carnes sibi datas licite comedunt: nam Ecclesiæ præceptum non obligat sub tam gravi incommodo.

61 Tandem a Jejunio excusantur Senes: nam senectus ipsa est morbus, & quidem incurabilis, atque indigens moderato & frequentiori cibo. Et quidem certum est de Senibus septuagenariis, quia ut plurimum sunt infirmi, atque egent crebriori moderata refectione: non enim possunt semel totum alimentum naturæ sufficiens sumere, cum id ob caloris naturalis defectum, qui senectutem comitatur, concoquere non valerent.

62 Quinimo multi Doctores, quos citat, & sequitur Sanchez *lib. 7. de Matr. disp. 32. n. 17.* & Mastrius *loc. cit. n. 20.* eximunt quoscumque sexagenarios a Jejunio: quia (inquiunt) senum sanitas non est firma & constans, sed fallax & incerta, mediaque inter morbum & sanitatem perfectam, atque ex levi momento in morbum decedit: unde, *senibus simili ratione iis, qui ex morbo convalescunt,*

Anacl. Reiffenstuel Theol. Tom. I.

in victu esse curandum, notat Galenus l. 5. *De sanitate tuenda.*

63 Verum Lessius l. 4. c. 2. n. 41. Layman l. 4. tr. 8. c. 3. n. 2. Bonac. *num. 4.* & alii ab ipsis relati hoc quidem ordinarie procedere ajunt, eo quod illa ætas pluribus subjacere soleat incommodis, & natura tunc facile tum inopia, tum repletionem graviter lædatur, & præcipitur: nihilominus tenent, Sexagenarios non esse absolute eximendos a Jejunio, dum constat non esse debiles, aut infirmos, sed sine damno jejunare possunt. In dubio autem, an sint robusti & habiles ad jejunandum, fatentur omnes, ejusmodi Senes non teneri jejunare: quia stante tali dubio exponerent se periculo gravis incommodi.

Additio.

\* Supposito autem, quod constet positive, hos vel illos Senes, sexagenarios in particulari esse adhuc satis vegetos, tales a beneficio duplicis refectionis recentissime per longiorem discursum excludit quidam Italice Theologus Venetus in suis Animadversionibus, quas novissimæ Editioni Venetæ Dictionarii moralis Pontasiani adjecit, impugnans Animadversione I. R. D. Eusebium Amort scribentem, quod in favorabilem sententiam, sexagenarios absolute a jejunio eximentem, major pars Theologorum Germanorum, conniventibus Episcopis, conspiraverit, & quantum videtur, prævaluerit. Ast plane hisce temporibus, ubi videmus naturam in dies magis deficere, rem sic se habere, uti ait memoratus Eusebius Amort. Ipsemet ostendit in sua defensione *Observat. 1. fol. apud me 185.* integrum catalogum Theologorum modernorum Germanicæ pro favorabili sententia adducens, inter quos citat quoque Begnudetium Bassum per vastam Dioccesin Frisingensem, & juxta dicta Auctoris fol. 190. in sua magnitudine plures Dioceses Italice exæquantem, Vicarium Generalem in Bibliotheca Juris Canonico Civilis *Tit. Aet. n. 19.* Frisingæ anno 1712. typis vulgata.

Neque exinde Doctores Germani nimicæ laxitatis arguendi sunt, quod in hisce Regionibus Septentrionalibus, in quibus a potiori deest generosum vinum, Senibus (uti fert adagium) Laxenium &c. inclinent in benigniorem quoad jejunium sententiam: etenim si ab adversariis beneficium duplicis refectionis *illimitate* conceditur juvenibus ante annum vigesimum primum completum, etiam robustis, atque in illis Regionibus, ubi generosum vinum, NB. vires ac stomachum plurimum confortans, levi respectu comparatur pretio, cur non æque absolute in his Partibus Septentrionalibus Sexagenariis? Item, si Senibus sexagenariis duplicem non concedunt refectionem, eadem facilitate etiam octogenariis ob easdem rationes denegari poterit, si cum Navarro in *Manuali* c. 21. n. 16. affirmare possint: *Gratia Dei octuagesimum annum agens perinde possum jejunare, ac cum agerem sexagesimum; imo & quinquagesimum.* Unde meo judicio conformius suis principiis loquerentur adversarii, si non solum vegetis Sexagenariis, verum etiam robustis juvenibus, quibus moderatum jejunium vires non notabiliter diminuit, simul cum Innocentio in Rubrica *de observat. Jejunii* facultatem utendi duplici refectione denegarent, vel utrobique concederent, prout etiam quoad senes apud Italos, novissime admittunt duo Italici Auctores ex nostris, nimirum Felix Potestas Consultor S. Officii in *Examine Ecclesiastico* Tom. 1. part. 3. nu. 2891. & Sabinus Bononiensis in *Luce Morali* Tract. 38. n. 43. ambo Venetiis impressi.

64 Addit superius n. 62. citatus Sanchez, sententiam aliquorum, qui feminas quinquagenarias ob fragilitatem sexus sui censent a Jejunio excusari, sicut viros sexagenarios, esse opinionem probabilem speculative loquendo, sed in praxi non tutam. Et revera, nisi alia corporis debilitas accedat, aut constet, talem personam viribus jam defecisse, eadem in praxi sequenda non est; imo ipsam omnino improbabilem censet Layman *cit. n. 2. §. Illud.*

65 CONCL. III. Ratione Pietatis excusantur a Jejunio, quicumque operibus præstantioribus, ac majoris

E e momen-



momenti incumbunt, quæ una cum Jejunio absque gravi incommodo perficere nequeunt; ut sunt opera Misericordiz, tum corporalis, tum spiritualis, item opera Religionis, ut concionari, docere, Sacramenta administrare, ac hujusmodi. Ita communis. Ratio est: quia labor mentis, ipsiusque ingenii etiam redundat in corpus, illud affligendo, atque extenuando. Deinde Ecclesia suo præcepto intendit promovere Fideles ad opus bonum, non autem retrahere a meliori bono, seu operibus præstantioribus, ut sunt opera enumerata, & hujusmodi. Et hoc verum est, si deinde opera illa gratis exhibeantur, si ob mercedem.

66 Dicitur in Conclusionem, quæ absque gravi incommodo perficere nequeunt: nam secus dicendum, si opera illa sunt facile compatibilia cum Jejunio: quod quidem in praxi dijudicandum erit juxta arbitrium viri prudentis, spectata talium operum qualitate, attenta ipsius operantis complexione. Porro in dubio melius erit ad tollendos omnes scrupulos, ut Superior cum talibus dispenseret: quia circa hoc regula certa & universalis assignari non potest, nisi quod lex Jejunii Ecclesiastici non obliget cum magna difficultate. Restota magis declaratur exemplis.

67 Sic excusantur Concionatores, qui prædicant integra Quadragesima, quia valde laborant: scilicet, si tantum semel prædicent, nisi multum debilitentur. Similiter Lectores, Confessarii, imo & Cantores, Advocati, Judices, Medici, & alii hujusmodi, qui in suo munere sunt assidui, atque cum magna mentis & ingenii occupatione per totum diem studiis, lectionibus, & compositionibus intenti existunt, adeo ut suum officium agere nequeant cum Jejunio, excusantur ab eo: secus, si studium &c. sit leve. Et ita loquendo de aliis similibus. Ratio est: quia sicut labor magnus corporalis multum consumit de spiritibus vitalibus, ita labor spiritualis de spiritibus animalibus, qui tamen æque, imo magis sunt necessarii ad valetudinem corpori: unde ordinariè intentos labori corporali vegetiores videmus, quam occupatos continuis studiis.

68 CONCL. IV. Ratione necessitatis, si Laboris corporalis excusantur a Jejunio, quotquot labore suo victitant, cum quo Jejunium commode consistere non potest: quales sunt Agricola, & ferme mechanici omnes. Nec refert, utrum sint pauperes, vel divites: quia hoc ipso, quod ex officio laborent, excusantur a Jejunio, si re ipsa laborem subeant; prout declarasse Eugenium IV. post alios refert Lessius *cit. cap. 2. n. 43*. Accedit ratio: tum quia Ecclesia diebus jejunalibus nulli prohibet consueta servitia, & labores subire: tum quia labor corporalis, si gravis sit & ferme continuus, valde corpus defatigat, ejusque vires extenuat, adeo ut laborantibus opus sit frequentiori cibo pro restauratione virium.

69 Dicitur, & ferme Mechanici omnes: quia communiter excipiuntur Pictores, quorum opus est ingenii potius, quam virium: item Sartores, & Barbitonfores, quorum labor, cum sit exiguus, per se loquendo non excusat a Jejunio. Hinc Alexander VII. sequentem inter alias, ordine 30. Propositionem damnavit: *Omnes Officiales, qui in Republica corporaliter laborant, sunt excusati ab obligatione Jejunii, nec debent se certificare, an labor sit compatibilis cum Jejunio*. Verumtamen in casibus particularibus attendendum, an non tales quandoque excusentur ex aliis titulis, ut puta ratione paupertatis, si non habent alimentum sufficiens pro una competenti refectio- ne, vel alioque debilitatis adjunctæ, aut hujusmodi.

70 Ob eandem causam ordinariè excusantur a Jejunio itinerantes, præsertim pedites, si suscipiant longum iter, puta iter totius diei, vel iter quindecim, viginti, aut duodeviginti miliarium Italicorum: ubi nota, quod quatuor Romana, & quinque communia Italica miliaria faciunt unam Leucam Germanicam. Ita exemplificant Bonac. *n. 11.* & Azorius *p. 1. l. 7. c. 17. qu. 9.* hic enim censetur gravis labor intervenire. Secus dicendum, regulariter loquendo de iis, qui equitando, vel curru vehendo tale iter perficiunt: nam hoc genus itineris non ita defatigat. Unde & Alexander VII. sequentem inter alias Propositionem, ordine 31. damnavit: *Excusantur absolute à præcepto Jejunii omnes illi, qui iter agunt equitan-*

*do, utcumque iter agant, etiam si iter necessarium non sit, & etiam si iter unius diei conficiant*. Quod si vero iter longius sit, aut probabile periculum subit superventuræ debilitatis ob nimiam corporis agitationem, etiam equitantes, vel curru vecti a lege Jejunii excusabuntur. Et hinc curru, aut equo iter agentibus annumerandi videntur ii, qui per aquam ratibus, aut navibus vecti itinera sua necessaria perficiunt: nam ex una parte tales aqua vecti non ita defatigari solent, sicuti pedibus incedentes: ex altera vero parte etiam aquei humores multum molestant, atque extenuant corpus humanum, ejusque vires debilitant. Quamquam in casibus particularibus hoc ipsum pensata viæ diuturnitate, ac temporis, complexio- nisque conditione, aliisque circumstantiis, pro proborum virorum iudicio sit dimetiendum.

71 Ceterum allatam doctrinam de itinerantibus non pauci Doctores contra Jo. Sanchez, Paschaligo, & alios intelligendum censent de itinere necessario, & quod commode differri non potest: unde & allata Propositio damnata habet annexam clausulam illam: *Etiam si iter necessarium non sit*. Et quamvis Azorius *loc. cit.* asserat, eum, qui ludendo valde est defatigatus adeo ut cibo ulteriori indigeat, tuto Jejunium solvere: mox tamen addit, si in fraudem legis se adeo quis ludendo defatigaverit, peccatum committi per hoc, quod absque necessitate & utilitate præcise ex intentione, seu motivo non jejunandi detur causa frangendi ex lassitudine jejunium, licet ea jam data non amplius peccetur in solvendo jejunio.

#### Additio.

\* Ex dictis la Croix *l. 3. p. 2. n. 1335.* recte infert, omne opus inutile, ac incompatible cum Jejunio esse omittendum, si commode omitti possit, & supposito, quod faciendo illud non fervetur jejunium, prout cum aliis docet S. Thomas apud Moyam *T. 1. T. 6. D. 5. qu. 1. nu. 21.* Atque propterea Tambur. in *Decalog. l. 4. c. 5. §. 7. nu. 31.* censuit neutiquam fuisse a peccato exemptum Juvenem illum nobilem ideo non jejunantem, quia cum magno labore præcise ex motivo satisfaciendi suæ voluptati exinde hausit dabat operam arti ferrariæ in elaborandis solopetis. Ratio est: quia præcise voluptas non videtur sufficiens motivum ponendi tale opus laboriosum connexum cum exemptione a jejunio. Excusat tamen ceteroquin iusta causa, qualis juxta Moyam *loc. cit. n. 22.* censetur omnis labor assumptus ad utilitatem spiritualem, aut corporalem propriam, vel alienam. Item excusant opera Religionis, ac Devotionis, præsertim jam inchoata, & quæ ad aliud tempus commode differri nequiverunt: sic peregrinationem longinquam licet inchoare, & continuare, etsi per accidens aliqui dies Jejunii intercedant, in quibus Jejunium fervandi non est obligatio, si e. g. quatuor, vel quinque Leucas Germanicas simili die perfecisti, de quo pariter vide la Croix *hic n. 1345.* Bonac. *De peccatis D. 2. qu. 8. p. 1. nu. 16.* Addunt Henriquez, Castropalao, Sanchez, & Bonacina, excusare laborem ex quovis rationabili fine assumptum, ut si operose eas per plures horas ad amicum invisendum, cum posses equo; quia nulla lex actionem aliquam ex fine honesto susceptam, vi cuius ponaris in eum statum, ut non amplius adstringaris lege, prohibere videtur: sic e. g. ponamus, quod in tua Dioecesi die Veneris sit formale Jejunium, in altera vero vicinia tantummodo dies abstinentiæ, in simili casu poteris utique ex fine honesto te transferre ad alteram Dioecesin, quamvis exinde ponaris in eum statum, ut non amplius obli-geris lege formalis Jejunii? Cur igitur non etiam ex fine honesto poteris pedester iter aliquod assumere, quamvis exinde ponaris in eo statu, ut propter notabilem defatigationem non amplius adstringaris lege.\*

72 CONCL. V. Qui Jejunium non servat, bona fide putans, se justam non jejunandi causam habere, non peccat, quamvis re ipsa non sit iusta & sufficiens causa illa, Ita Reginaldus *loc. cit. n. 222.* Bonac. *punct. ult. n. 19.* & alii. Ratio est: quia bona fides eum excusat.

73 Secus dicendum de eo, qui dubitat, an habeat justam causam non jejunandi; is enim tenetur jejunare. Ratio



Ratio est: quia in dubio judicandum est pro possidente: sed possessio stat pro lege Jejunii; ergo stante dubio Jejunium est observandum. Intellige, nisi a Superiore dispensetur cum ipso in Jejunio, vel nisi is dubium practice deponat consilio Confessarii, seu alterius viri probi & prudentis, aut alia ratione.

74 CONCL. VI. Supra recensitis causis a Jejunio excusantibus addi potest alia causa, magis tamen extrinseca, videlicet legitima Superioris dispensatio. Ita omnes Doctores; & patet ex ipsa Ecclesiæ, non raro dispensantis, consuetudine. Advertendum tamen, quod dispensatione opus non sit quando necessitas est evidens, sed solum, quando ea est dubia; idque sive ad esum, carniæ, sive ad secundam tantum refactionem.

75 Porro, ut ejusmodi dispensatio sit valida & licita, requiritur causa rationabilis, id est, talis, quæ quidem sufficiens videtur, adhuc tamen de ejus sufficientia ad excusandum a Jejunio dubitatur, ideoque ad Superiorem recurratur, ut ipsius auctoritate suppleatur, si quid deesset. Et quidem minor causa, eaque privata sufficit, ut cum uno vel altero in lege Jejunii per auctoritatem Superioris dispensetur: major vero, eaque publica, ut cum integra Communitate dispensari valeat.

76 Ceterum ejusmodi Superior, habens legitimam facultatem dispensandi in lege Jejunii cum suis subditis, est Episcopus, aut Prælati Regularis respectu suorum Religiosorum. Ratio est: quia ad Episcopum pertinet dispensatio juris communis in illis casibus, qui frequenter accidunt; idque tum ex præsumpta, & interpretativa voluntate Summi Pontificis, utpote ad quem ob casuum frequentiam difficilis foret accessus pro obtinenda semper circa Jejunium dispensatione; tum ex longæva consuetudine, ac præscriptione; alioquin certe Fidelium Communitati non esset sufficienter provisum. Et hæc eadem ratio militat de Prælati Regularibus respectu suorum Religiosorum, utpote in quo Ecclesiasticam, & quasi Episcopalem jurisdictionem obtinent, ut dicitur c. Abbates De Privileg. in 6.

77 Addunt Doctores, etiam Parochos ex causa rationabili posse cum particularibus Parochianis dispensare in lege Jejunii: etsi enim Parochi (imo & Episcopi) non habeant potestatem supra Jus commune, quo præceptum est Jejunium; tamen sive ex tacito consensu Pontificis, sive ex longæva consuetudine, & præscriptione, eisdem acquisita est jurisdictio, & facultas ista dispensandi. Et hoc quidem passim fatentur Doctores in casibus illis, quando Episcopus est absens. Imo etiam præsentem Episcopum, utpote ad quem gravioribus negotiis implicatum non tam facilis pater aditus, præsertim hominibus vilioribus, ad obtinendam dispensationem, posse Parochum cum aliquibus in casu particulari, atque ex justa causa dispensare in lege Jejunii, probabilius censet Mastrius loc. cit. n. 26. cum aliis, quos allegat.

78 Quæres. An causæ, quæ juxta dicta excusant a Jejunio Ecclesiastico, pariter excusent a Jejunio ex voto debito? Resp. Affirmative, dummodo non constet de alia voventis intentione. Ita Sanchez l. 4. in Decalog. c. 11. n. 54. Bonacina punct. 6. n. 4. & alii. Ratio est: quia Votum est lex privata, quam sibi quisque sponte imponit; ergo, si non constet de alia voventis intentione, est interpretandum juxta dispositionem aliarum legum circa eandem materiam, & consequenter eandem causæ utrobique excusabunt.

79 Additur noranter, dummodo non constet de alia voventis intentione: alioquin enim hæc erit attendenda; nam sicut quis vovendo sponte sibi legem imponit, ita strictiorem, si voluerit, imponere valebit. Sic potest adolescens ex Voto obligari ad Jejunium ante vigesimum primum ætatis annum, ut dictum n. 44.

80 Deinde loquendo de FF. Minoribus, ex vi Regulæ ipsorum major requiritur necessitas, ut jejunare non teneantur in Jejuniis Regulæ, quam in Jejuniis Ecclesiæ, nam ad excusandum in Jejuniis Ecclesiæ non requiritur nisi probabilis necessitas, sed in Jejuniis Regulæ requiritur manifesta, ut patet ex c. 3. Regulæ. ibi: Tempore vero manifeste necessitatis non teneantur Fratres Jejunio cor-

porali: ac notat Petrus Marchantius ibidem Quæst. 3. & alii Expositores, quidquid nonnulli contradicant.

## DISTINCTIO II.

De Quarto, & Quinto Præcepto Ecclesiæ, Sive De annua Confessione, & Communione Paschali.

### QUESTIO I.

Quid sit, & quo Jure, ac quando obliget Confessio Sacramentalis?

#### SUMMARIUM.

- 1 Quartum Ecclesiæ Præceptum quale?
- 2 Confessio Sacramentalis?
- 3 Ea Jure Divino necessaria est omnibus peccatum mortale committentibus post Baptismum.
- 4 Probatur hoc ulterius.
- 5 Præceptum Confessionis non statim obligat post peccatum mortale.
- 6 Quid, si subsit periculum oblivionis peccatorum?
- 7 Consultissimum est illico post peccatum agere penitentiam; cur?
- (a) Ut dictum Tract. 1. dist. 2. n. 46.
- 8 Peccator non diu moraliter evitat novum peccatum.
- 9 Præceptum Confessionis obligat in mortis articulo vel periculo.
- 10 Corollaria.
- 11 Jure Divino obligat etiam quandoque extra mortis articulum.
- 12 Hinc merito Ecclesiæ præcepit Confessionem annuam.

1 **Q**uartum Ecclesiæ Præceptum sequentibus verbis comprehenditur: Peccata tua Sacerdoti proprio annis singulis confitebor. De quo in Concilio Generali Lateranensi, sub Innocentio III. celebrato, & refertur c. Omnis utriusque sexus. De Penitentis & remissionibus. sic. statutum habetur: Omnis utriusque sexus fidelis, postquam ad annos discretionis pervenerit, omnia sua peccata saltem semel in anno fideliter confiteatur proprio Sacerdoti: & inunctam sibi penitentiam propriis viribus studeat adimplere. Quod præceptum Ecclesiasticum ut clarius intelligatur nonnulla præmittenda videntur: hinc sit.

2 CONCL. II. Confessio Sacramentalis est accusatio legitima de propriis peccatis, facta coram Sacerdote, ad eorum veniam impetrandam virtute Clavium. Ita in re communis. Et quidem ly accusatio stat loco generis, reliqua ponuntur loco differentia. Porro per ly ad eorum veniam impetrandam virtute Clavium, denotatur, ob quem fieri debet Confessio Sacramentalis, qui est consecutio veniæ, ac remissio peccatorum obtinenda virtute Clavium, id est, virtute Sacramentalis absolutionis a Sacerdote legitimam jurisdictionem habente super confidentem prolata. Juxta quod Christus Joan. 20. dixit Apostolis, eorumque legitimis Successoribus: Accipite Spiritum Sanctum; quorum remiseritis peccata, remittuntur eis, & quorum retinueritis, retenta sunt.

3 CONCL. I. Confessio Sacramentalis est a Christo Domino instituta, & omnibus conscientiam peccati mortalis post Baptismum commissi habentibus Jure Divino necessaria. Ita omnes Catholici, estque novissime definitum in Concilio Trident. Sess. 14. Can. 6. ibi: Si quis negaverit, Confessionem Sacramentalem vel institutam, vel ad salutem necessariam esse jure Divino; aut dixerit, modum secreta confitendi soli Sacerdoti, quem Ecclesiæ Catholica ab initio semper observavit, & observat, alienum esse ab institutione & mandato Christi, & inventum esse humanum, anathema sit. Et cit. Sess. 14. c. 5, sic habetur: Ex institutione Sacramenti Penitentia explicata, universa Ecclesiæ semper intellexit, institutam etiam esse a Domino integram peccatorum Confessionem; & omnibus post Baptismum lapsis Jure Divino necessariam existere.



4 Eadem Catholica Veritas præter continuam traditionem, atque perpetuum sensum Ecclesiæ desumitur ex citatis verbis Christi Jo. 20. *Quorum remisistis peccata*. Siquidem, ut argumentatur Doctor Subtilis 4. dist. 17. c. 11. & declarat Concilium Trident. cit. cap. 5. per dicta verba Christus constituit Apostolos, eorumque Successores Sacerdotes, suos Vicarios, tamquam Judices habentes potestatem remittendi, & retinendi peccata, in quæ Christi Fideles ceciderunt. Patet autem, Sacerdotes Judicium hoc incognita causa exercere non posse, neque servare æquitatem in imponendis pœnis pro ipsis peccatis, si in genere dumtaxat, & non etiam in specie, ac sigillatim oporteret pœnitentes sua peccata confiteri.

5 CONCL. III. Dictum Præceptum Confessionis Sacramentalis non statim obligat, cum quis in peccatum mortale lapsus est. Ita communis; intelligendo tamen hoc salvis iis, quæ in sequentibus Conclusionibus dicuntur. Ratio est: quia præceptum Confessionis est affirmativum, quod obligat non pro semper, sed solum pro determinato tempore.

6 Neque obstat, quod nisi quis illico confiteatur, incidat in periculum obliviscendi peccatorum commissorum. Resp. enim cum Laym. l. 5. tr. 6. c. 5. n. 4. & aliis, adhuc ejusmodi peccatori oblioso non incumbere obligationem illico confitendi, vel peccata sua scriptis annotandi, cum nullo Jure id expressum reperitur. Quinimo non tenemur confiteri nisi ea peccata, quorum post diligentem discussionem habemus conscientiam, ut fateatur Concilium Trid. Sess. 14. cap. 5. & Can. 7. Quo facto, licet quorundam habeatur inculcata oblitio, adhuc eadem virtute Sacramenti remittuntur saltem indirecte.

7 Interim tamen consultissimum est, omnibusque vel maxime suadendum, post admissum peccatum mortale quam citissime per veram Contritionem ad Deum converti; imo et am data oportunitate ad Sacramentum Pœnitentiæ per dolorosam peccati Confessionem propere. Idque tum ad citius consequendam gratiam, atque amicitiam Divinam, evitandumque periculum damnationis æternæ: tum ut opera nostra bona (quæ, si fiant in statu peccati mortalis, sunt mortua, (a) neque meritoria augmenta gratiæ, & gloriæ cœlestis) hac ratione coram Deo meritoria evadant.

8 Accedit alia ratio: quia moraliter loquendo, & regulariter, nemo constitutus in peccato mortali diu observat totam legem, ac evitat novum peccatum mortale; nam, ut dicitur Psalm. 41. *Abyssus abyssum invocat*. Et S. Gregorius lib. 1. Homil. 11. in Ezechielem, ait: *Peccatum, quod per pœnitentiam non deletur, mox suo pondere in aliud trahit*.

9 CONCL. IV. Dictum præceptum Divinum de facienda Confessione Sacramentali, vel maxime obligat in articulo mortis, nec non & in probabili periculo ipsius. Ita communis. Ratio est: quia non est assignabile aliud tempus, in quo hoc præceptum Divinum potius obliget, quam in mortis articulo, a quo pendet tota æternitas. Accedit: quia, si tunc hoc præceptum non adimpleatur, id amplius secuta morte adimpleri non poterit.

10 Et conformiter dictis inferunt Doctores, quod non solum in infirmitate lethali teneatur quis ad Confessionem Sacramentalem, sed etiam in quolibet probabili periculo mortis, id est tunc, quando quis aggreditur actus arduos, in quibus verisimile est, quod mors imminet: ut in bello mortali, in naufragio, & hujusmodi, prout exemplificat Scotus cit. dist. 17. §. De Secundo. His addunt Summi feminas primo parturientes, & quæ alias maximam in partu difficultatem expertæ sunt: siquidem de hujusmodi probabili periculo mortis æque militant rationes proxime allatæ. Et per hoc patet altera pars Conclusionis.

11 CONCL. V. Etiam quandoque per vitæ decursum atque extra articulum mortis præceptum Divinum Confessionis Sacramentalis obligat omnes Fideles, conscientiam peccati mortalis habentes: quod præceptum ut a Populo Christiano generalius, observaretur optime Ecclesia in Concilio Lateranensi (n. 1. relato) præcepit, ut

Fideles singulis annis saltem semel confiteantur. Ita præter communem Theologorum, docet Concilium Trident. Sess. 14. c. 5. ubi refellens inanem eorum calumniam, qui Confessionem a Divino mandato alienam atque a Patribus in Concilio Lateranensi congregatis initium habuisse docere non verebantur, loquitur in hæc verba: *Neque enim per Lateranense Concilium Ecclesia statuit, ut Christi Fideles confiterentur, quod Jure Divino necessarium & institutum esse intellexerat; sed ut præceptum Confessionis saltem semel in anno, ab omnibus & singulis, cum ad annos discretionis pervenissent, impleretur*.

12 Ex quo clare sequitur, quod Ecclesia semper intellexerit, præceptum Confessionis quandoque extra mortis periculum obligare Jure Divino: quamvis, cum tempus illud non fuerit determinatum a Christo Domino, Ecclesia pie salubriterque, atque cum ingenti animarum fructu statuerit, ut præceptum illud ab omnibus Fidelibus impleatur singulis saltem annis, sicque tempus implendi præceptum istud Divinum determinavit.

## QUÆSTIO II.

Quomodo Præceptum Ecclesiasticum annuæ Confessionis obliget?

### SUMMARIUM

- 13 Præceptum annuæ Confessionis, quos obliget?  
*An sit præcepta Confessio venialium?*
- 14 Quid agendum habenti sola venialia?
- 15 Confessio communiter fit in Paschate, etsi sufficeret semel in anno confiteri.  
(b) Ac refertur supra n. 1.
- 16 Solvitur instantia.  
(c) Tract. 14. dist. 2. q. 3. Concl. 3.
- 17 In Paschate non confessus tenetur confiteri per annum.
- 18 Quid de confesso sola venialia, si postea peccet mortaliter.
- 19 Annus, quomodo sit computandus?
- 20 Præcepto Ecclesiastico non satisficit per Confessionem scienter invalidam.  
\* Bene tamen per Confessionem Regulari privilegiato factam.
- 21 Pueri quando teneantur ad Confessionem?
- 22 Circa pueros in praxi quid observandum?
- 23 Præsertim a Confessario?
- 24 Alia a Confessario observanda.  
\* Pueri qualiter examinandi?

13 CONCL. I. Præceptum Ecclesiasticum annuæ Confessionis obligat omnes Fideles conscientiam peccati mortalis habentes, eosque solos. Ita Theologi communiter. Ratio est: quia Ecclesia non præcipit Confessionem peccatorum dumtaxat venialium: tum quia hæc multis aliis remediis expiari possunt, ut fateatur Concilium Trident. cit. Sess. 14. cap. 5. tum quia præceptum istud Ecclesiasticum est determinatio præcepti Divini; atqui hoc est de peccatis dumtaxat mortalibus; ergo & illud.

14 Notant tamen Doctores, ex consuetudine Ecclesiarum, atque ad avertendum scandalum receptum esse, ut Fideles omnes ante Communionem Paschalem Sacerdoti proprio se sistant, & si mortaliter nunquam se peccasse asseverent, super ea re Confessarii judicio sese subjiciant. Quinimo in praxi utilissimum erit, etiam sola venialia tunc confiteri, propter uberes ex Sacramento Pœnitentiæ fructus provenientes.

15 CONCL. II. Quamvis ad satisfaciendum præcepto Ecclesiastico sufficiat semel in anno confiteri, nihilominus isthæc Confessio communiter in Paschate fieri, atque Communioni Paschali præmitti solet. Ita communior, & probabilior Doctorum, nonnullis exceptis, qui volunt, præceptum Confessionis per se obligare in Paschate, & non tantum per accidens ratione Communionis Paschalis. Prior pars desumitur ex Concilio Lateranensi c. Om.



nis utriusque sexus. De Pœnit. & remiss. (b) ubi plus non requiritur, quam ut omnis Fidelis omnia sua peccata saltem semel in anno fideliter confiteatur: quæ verba, nisi quis vim inferat, intelliguntur de toto tempore a principio usque ad finem anni, prout argumentatur Lugo disp. 15. de Sacram. Pœnit. sect. 8. n. 157.

16 Nec obstat communis consuetudo confitendi in Paschate, & quod tunc in plerisque locis soleat exigere testimonium Confessionis Paschalis; simulque, quod in Extr. Vices illius. De treuga & pace, dicatur: De jure tenetur Parochianus saltem in Paschate proprio confiteri Sacerdoti. Resp. enim, hoc totum fieri per accidens, & ratione Communionis Paschalis, sive, quia tunc urget præceptum sumendi Sanctissimum Eucharistiæ Sacramentum, cujus dignæ perceptioni, habita copia Confessarii, præmittenda est Confessio Sacramentalis; nec sufficit sola contritio de commisso peccato mortali; prout declaravit Concilium Trident. Sess. 13. cap. 7. & amplius suo loco (c) dicitur. Et per hoc patet altera pars Conclusionis.

17 Inferitur proinde, quod, si quis sive culpabiliter, sive ob legitimum impedimentum in Paschate non est confessus, is postmodum per anni decursum confiteri teneatur: quia toto anno urget hoc præceptum, neque illud est affixum tempori Paschali, ita ut cum illo transeat, sicut transit obligatio audiendi Missam die Festo.

18 Inferitur secundo, quod is, qui tempore Paschali confessus est sola venialia, teneatur adhuc confiteri mortale tunc invincibiliter omisum. Quin etiam observat Lugo loc. cit. n. 126. quod, si quis per totum annum frequenter confiteatur sola venialia, quæ habet, & circa finem anni peccet mortaliter, obligetur hoc præcepto ad confitendum eodem adhuc anno illud peccatum mortale, siquidem Ecclesia præcepit dumtaxat Confessionem mortalium semel in anno peragendam, qualem in casu quis necdum fecisse supponitur.

19 Quæres autem. Quomodo annus iste sit computandus? Resp. duos dicendi modos ceteris esse probabiliores. Primus est eorum Theologorum, qui putant, annum esse computandum a die primo Januarii, & deinceps usque ad initium sequentis anni; cum isto die communiter censeatur novus annus incipere, & prior finire. Secundus dicendi modus est illorum, qui asserunt, annum computandum esse a Paschate in Pascha, intelligendo per Pascha omnes illos dies, in quibus potest impleri præceptum Communionis Paschalis. Et huic computationi consonat praxis, atque communior sensus Fidelium, arbitrantium, se dicto præcepto Ecclesiastico satisfecisse, postquam Paschali tempore confessi sunt: quamvis etiam pro tunc, juxta computum prioris sententiæ, semel in anno confessi intelligantur. Unde patet, quod præsens quæstio in praxi parum urgeat.

20 CONCL. III. Præcepto Ecclesiastico annuæ Confessionis non satisfacit per Confessionem sacrilegam, & scienter invalidam. Ita nunc pro certo tenendum: nam oppositam quorundam sententiam rejecit Alexander VII. dum sequentem inter alias Propositionem, ordine 14. condemnavit: Qui facit Confessionem voluntarie nullam, satisfacit præcepto Ecclesiæ. Accedit ratio: tum quia, qui voluntarie facit Confessionem invalidam, revera non recipit Sacramentum Pœnitentiæ; cum ad hoc necessario requiratur vera, integra, & dolorosa Confessio: tum quia Christus, & Ecclesia præcepit talem Confessionem, quæ conducibilis est ad consequendam remissionem peccatorum virtute Sacramenti Pœnitentiæ: atqui talis non est Confessio voluntarie nulla, & sacrilega; ergo.

#### Additio.

\* CONCL. IV. Præcepto Ecclesiastico annuæ Confessionis satisfacit, si eadem etiam a sæcularibus extraneis deponatur apud Regulares Mendicantes, vel eorum privilegiis gaudentes, dummodo dicti Confessarii fuerint alias in illa Diocesi approbati. Ita Fagnanus in cap. Omnis utriusque. De Pœnit. & remiss. n. 56. Navarrus in Manuali cap. 27. n. 236. & præter plurimos alios fuisse Pignatellus Anacl. Reiffenstuel Theol. Tom. II.

Tom. 4. Consult. 163. per totum, quod de ipsa communissima praxis confirmat. Patet autem veritas hujus Conclusionis inprimis ex Bulla Innocentii X. Exponi nobis, die 7. Februarii anno 1645. emanata, ubi confirmat Decretum Sacr. Congregationis Eminentiss. Cardinal. Concilii Tridentini Interpretum die 9. Julii anno 1644. editum, quod censuit, non posse Archiepiscopum Burdigalensem prohibere Regularibus, habentibus privilegia Apostolica, ut a Dominica Palmarum usque ad Dominicam in Albis inclusive administrare non valeant Personis sæcularibus Sacramentum Confessionis. Probatur ulterius ex Bulla Superna. Clementis X. edita 21. Junii, & publicata in Urbe 2. Augusti anno 1670. ubi §. 5. expresse ait, quod satisfiat (loquendo de Confessione annua Constitutioni Omnis utriusque sexus, si eadem apud dictos Regulares exemptos peragatur. Licet ceteroquin gratis concedatur, quod, hoc non obstante, Parochis similium confitentium incumbat colligere & exigere schedam Confessionalem, seu testimonium dictæ annuæ Confessionis a suis Parochianis talium Regularium non commensalibus. Quod si dicti pœnitentes fuerint servitiales, ac simul commensales horum Regularium. de similibus apud Pitonium Tom. 2. Decisionum quoad Regulares, num. marginali 1710. Editione Veneta anno 1719. legitur sequens Delaratio Sacri Concilii edita 7. Julii anno 1607. Sacerdotes Regulares possunt absque Episcopi approbatione audire Confessiones sæcularium, qui sunt de regulari familia, & eorum continui Commensales, nec tenentur reddere rationem proprio Parocho, quod præcepto Ecclesiæ satisfecerint; sed tamen Superiori Regularium. \*

21 Quæres Quandonam teneantur Pueri ad Confessionem annuam? Resp. Eos teneri, postquam ad annos discretionis pervenerunt, semelque in peccatum mortale lapsi sunt. Ratio est clara: quia nullum est præceptum ne quidem Ecclesiasticum, confitendi sola venialia.

22 Interim tamen, cum Parentibus, vel Præceptoribus de primo peccato mortali puerorum constare nequeat, omnino consultum est, atque in praxi necessarium, ipsos tempestive de necessariis ad Confessionem requisitis instruere, atque post assecutos annos discretionis ad Confessionem mittere, ut eidem paulatim assuescant, atque, (si opus fuerit) præcepto Ecclesiastico satisfaciant.

23 Confessarius autem, utrum hujusmodi Pueri, vel Puellæ sint capaces absolutionis, dijudicare debet, non quidem ex sola ætate, num videlicet septennium impleverint (quamvis post illam ætatem de usu rationis præsumptio esse soleat, arg. c. Litteras. De desponsat. impub.) sed multo magis ex ingenii, atque educationis qualitate: multi enim post eam ætatem primum, aliqui vero citius consequuntur sufficientem usum rationis, ut non solum peccati venialis, sed etiam mortalis capaces existant. \* Quod si pueri, vel puellæ in clathris Confessionalis digitis ludant, si sub Confessione alios extra Confessionalem frequenter respiciant, si nugentur cum suo rosario, vel pileo, teste Gobat exigua dant specimina sufficientis judicii, & plenæ deliberationis, suntque magis instruendi.

24 Insuper, postquam Confessarius circumstantiis consideratis judicavit, Puerum vere ac deliberatè peccasse, sive mortaliter, sive saltem venialiter, considerare debet, utrum ille de peccato doleat, & quidem ex motivo non mere humano, ut puta, quia a patre castigatus fuit, sed ex motivo supernaturali per fidem cognito, videlicet propter offensam Dei, metum pœnæ æternæ, aut purgatorii, vel turpitudinem peccati. Sunt enim aliqui adeo natura vagi, ut, licet satis dispositi fuerint ad peccatum, non tamen dispositi sint ad dolorem supernaturalem eliciendum: qui proinde vel prius per Confessarium disponendi sunt, vel si id tam cito fieri nequeat, eisdem, dummodo necdum mortaliter peccaverint, oratio quasi loco pœnitentiæ imponatur, & benedictio (nondum vero absolutio) Cruce super eos formata impertiatur. Quod si vero omnibus consideratis adhuc dubium remaneat de pueri capacitate, tunc absolutio dari poterit sub conditione: Si es capax, ego te absolvo &c. Imo talis in mortis articulo



articulo sic absolvi debet. Layman lib. 5. Tract. 6. c. 5. n. 7. & alii.

Additio.

\* Ceterum materiam examinandi pueros in Confessionali subministrat la Croix lib. 6. part. 2. n. 1799. dum existimat ab initio ipsos, nisi sponte fateantur, interrogandos esse circa unum alterumve punctum ex sequentibus: nimirum an non fuerint mentiti, an in Ecclesia non garriverint, an aliis non dederint agnomina, an non fuerint aliis irati, vel alios perculserint, an non fuerint inobedientes Parentibus, vel superioribus suis, an non senibus illuserint? quod si per decursum examinis seu Confessionis adverteret Confessarius pueros audaces, & petulantiores, ulterius (bonis tamen ab initio verbis, ne deterreantur, sicque peccata reticeant) recte instat Confessarius, an non impura verba protulerint, vel si id factum fuisse intelligat, ulterius pro exigentia circumstantiarum (cum magna tamen circumspectione, & cautela, ne ex ipsis interrogationibus potius peccare addiscant) an non fuerint pueriliter rixati &c. nam primæ seductiones puerorum (inquit la Croix loc. cit.) incipiunt a similibus collusionibus, denudationibus corporum &c. & Gerson apud eundem suspicando exclamat: *Utinam mala tam diligenter confiterentur, quam a pueris sciuntur, & aguntur ab eis.* Quæ autem de pueris dicta sunt, cum grano salis etiam quoad adolescentes applicari possunt. Quod si ex circumstantiis Confessarius advertat, periculum subesse, ne in materia gravi personæ juvenes, præsertim alterius sexus quoad peccata carnis, ex pudore nonnulla reticeant, excitet eas ad habendam confidentiam, promittendo, se misericorditer velle cum ipsis procedere, obligari insuper ad strictissimum silentium; ubi e contra, si Confessario abscondant, id totum aliquando manifestandum esse universo mundo in extremo iudicio cum æterna damnatione. \*

QUÆSTIO III.

An, & quæ sit Obligatio Juris tum divini, tum Ecclesiastici, sumendi Eucharistiam, etiam per modum Viatici?

SUMMARIUM.

- 25 Quintum Ecclesiæ Præceptum, quod?
- 26 Jure Divino tenentur fideles sumere SS. Eucharistiam, & quidem sæpius.
- 27 Tempus hujus obligationis determinavit Ecclesia præcipiendo Communionem Paschalem.
- 28 Huic præcepto non satisfacit per Communionem sacrilegam.  
(d) Tract. 2. dist. 1. n. 48. & seqq.
- 29 Corollarium.  
\* An satisfiat, si sumatur in Ecclesiis Regularium?
- 30 Ad S. Communionem requiritur jejunium naturale.
31. 32. 33. Istud jejunium declaratur per Rubricas Missalis.  
\* Item per quatuor conditiones. Addit. I.  
\* Ex quibus varii eruuntur casus. Addit. II.  
\* Ubi etiam de dubitante, num adhuc sit jejunius? Addit. III.
- 34 In periculo mortis potest sumi Eucharistia a non jejunio.
- 35 Et sæpius per modum Viatici.
- 36 An, qui mane communicavit sanus, teneatur, vel possit communicari per modum Viatici?  
\* Assignantur varii casus, in quibus egroti possunt communicari non jejunii. Addit. I.  
\* An ipsi possint communicari, si timeatur vomitus? Addit. II.  
\* An, si vehementer vexentur tussi? Addit. III.  
\* An mediante cochleari? Addit. IV.  
\* An a Regularibus sacro Viatico provideri possint Commensales, & servitiales Monasterii? Addit. V.

\* An etiam extranei subito intra septa Monasterii infirmari? Addit. VI.

\* De modo providendi, si est periculum in mora. Addit. VII.

25 Quintum Ecclesiæ præceptum hisce verbis exprimi solet: *Sacrosanctam Eucharistiam ad minimum semel in anno, idque circa Festum Paschæ sumito.* Et hoc præceptum Ecclesiasticum habetur in Concilio Generali Lateranensi, sub Innocentio III. celebrato, atque refertur cit. c. *Omnis utriusque sexus. De Pœnit. & remiss.* ibi: *Suscipiens reverenter ad minus in Pascha Eucharistia Sacramentum, nisi forte de proprii Sacerdotis consilio, ob aliquam rationabilem causam, ad tempus ab hujusmodi perceptione duxerit abstinendum: alioquin & vivens ab ingressu Ecclesiæ arceatur, & moriens Christiana careat sepultura.* Hæc ibi. Quod ut melius intelligatur, præmittendo nonnulla de præcepto Juris Divini, fit

26 CONCL. I. Extat præceptum Divinum, obligans omnes Fideles adultos, sumendi SS. Eucharistiam, non tantum in articulo mortis per modum Viatici, sed etiam ante illud periculum, & quidem sæpius in vita. Ita communis atque desumitur ex verbis Christi Joan. 6. *Nisi manducaveritis carnem filii hominis, & biberitis ejus sanguinem, non habebitis vitam in vobis,* cum concordantiis. Accedit ratio: quia Eucharistiæ Sacramentum a Christo Domino institutum fuit per modum alimenti spiritualis; ergo non minus, atque alimentum corporale sæpius in vita sumendum est ad reficiendas vires animæ.

27 CONCL. II. Etsi præceptum Divinum sæpius per vitæ decursum per se obliget Fideles adultos ad sumendam SS. Eucharistiam, nihilominus ejusmodi tempora non possunt generatim determinari, sed definienda sunt prudenti iudicio, ita tamen, ut Sacra Communio non nimium differatur: unde, ut huic præcepto Divino generalius, atque majori cum fructu animarum satisfaciat, Sancta Mater Ecclesia pie admodum præcepit, ut Fideles post annos discretionis ad minus in Paschate Sacramentum Eucharistiæ reverenter suscipiant. Ita communis; & patet ex Concilio Lateranensi n. 25. allegato.

28 CONCL. III. Huic præcepto Ecclesiastico Communionis Paschalis non satisfacit per indignam hujus sanctissimi Sacramenti susceptionem. Ita defacto indubitanter tenendum, quidquid nonnulli olim in contrarium scripserint. Siquidem novissime Innocentius XI sequentem inter alias propositionem, ordine 55. damnavit: *Præcepto Communionis annuæ satisfacit per sacrilegam Domini manducationem.* Et merito: quia Ecclesia in citato Concilio Generali præcepit, ut Fideles suscipiant reverenter in Paschate Eucharistiæ Sacramentum: atqui hoc non fit per sacrilegam Communionem; ergo. Accedit, quod Ecclesia saltem indirecte, & concomitanter possit præcipere actus internos, prout suo loco (d) jam dictum.

29 Et hinc indigne communicans in Paschate non solum peccat gravissime contra præceptum Divinum sacrilege istud SS. Sacramentum sumendo, sed etiam contra præceptum Ecclesiasticum, non reverenter suscipiendo communionem Paschalem, ac proinde tenetur iterum, & digne communicare.

Additio.

\* Quæres an satisfiat præcepto Ecclesiastico Communionis Paschalis, si eadem a Sæcularibus peragatur in Ecclesiis Regularium Exemptorum? Ante responsiones nota, alios esse Sæculares extraneos, & alios, qui sunt Commensales, puta servitiales in dictis Monasteriis Exemptis simul habitantes &c. H. N.

Resp. I. Non defuisse Theologos videndos teste Francisco Henno Tom. 2. Tract. de Eucharistia Sacramento, disp. 9. q. 2. prope finem, qui tenuerunt illimitate, Sæculares quoscumque etiam extraneos æque quoad communionem Paschalem, uti quoad Confessionem annuam satisfacere præcepto Ecclesiastico, si eandem peragant in Ecclesiis Regularium Exemptorum: sed huic sententiæ contraria



## Quæst. III. An, & quæ sit Obligatio sumendi Eucharistiam. 331

contraria videtur Bulla Clementis X. *Superna*, §. 5. ubi id *dumtaxat* concedit quoad Confessionem annuam his formalibus: *Eos, qui dictis Religiosis (supple Exemptis) simpliciter approbatis Paschali tempore confessi fuerint, Constitutioni: Omnis utriusque &c. quoad Confessionem NB. dumtaxat satisfacisse censendos.* Accedit apud Henno *loc. cit.* aliqua Declaratio Cardinalium nomine & auctoritate Summi Pontificis Urbani VIII. 2. Martii anno 1638. edita.

Resp. II. Specialiter, & limitate loquendo quoad famulos, & Commensales eorumdem Monasteriorum Exemptorum eos satisfacere præcepto Communionis Paschalis, si eandem peragant in dictis Ecclesiis Regularium, dummodo habeant condiciones inferius post n. 36. *Addit. V.* adducendas. Ita Bonacina *De Sacramento Eucharistia, Disp. 4. qu. 1. punct. 2. n. 10.* Barbosa *De officio & potestate Parochi p. 2. cap. 20. sub. num. 12.* Franciscus Henno *loc. cit.* la Croix *lib. 6. part. 1. n. 635.* dicens per privilegium ita Societati Jesu esse concessum, Lezana in *Summa Q. Regul. Tom. 2. cap. 16. n. 19. & Tom. 3. v. Eucharistia quoad Regulares, num. 8.* & patet ex Bulla Leonis X. *His quæ*, edita anno 1513. atque videnda apud Peyerinum *Tom. 1. Privileg. Minim inter Constitutiones Leonis X. n. 4.* ubi in formalibus concessit, ut possint etiam in habitu seculari deservientium quoties opus fuerit, etiam NB. *Paschatis tempore, & in mortis articulo in eorum Domibus, & Ecclesiis hujusmodi Confessiones audire, ipsique, & eorum cuilibet Eucharistia, & extrema Unctio Sacramenta ministrare.* Simile privilegium apud Miranda in *Manuali Regul. Tom. 1. q. 49. v. Sed pro familiaribus*, reperitur a Clemente IV. datum familiaribus Fratrum Minorum.

*Nec dicas.* Juxta allegatam in responsione Bullam Clementis X. *satisfit quoad Confessionem dumtaxat*: ergo non quoad Communionem Paschalem. Respondet enim dist. antec. quoad Confessionem dumtaxat loquendo illimitate & generaliter, id est etiam quoad extraneos, conced. loquendo specificè, & limitate quoad domesticos præcise, nego. Si enim jura iuribus concordantur, unde pari modo aliqua Declaratio ab adversariis in contrarium allegata explicatur. Vide etiam dicenda inferius post n. 36. *Addit. V. \**

30 CONCL. IV. Ad recipiendum digne Sacramentum Eucharistia, extra mortis articulum, jure Ecclesiastico requiritur, ut quis a media nocte illius diei sit jejunus jejunio naturali. Ita communis, & habetur c. *Sacramenta*, 49. *De Consec. dist. 1. &c. Nihil*, 7. q. 1. cum concordantiis.

31 Porro in praxi, quantum ad propositum, bene notanda sunt verba Rubricarum Missalis Romani *Tit. 9. De defectibus dispositionis Corporis*, ita statuentium: *Si quis non est jejunus post mediam noctem, etiam post sumptionem solius aquæ, vel alterius potus aut cibi, per modum etiam medicina, & in quantumcumque parva quantitate, non potest communicare, nec celebrare.*

32 *Si autem ante mediam noctem cibum, aut potum sumpserit, etiam si postmodum non dormierit, nec sit digestus, non peccat: sed ob perturbationem mentis, ex qua devotio tollitur, consulitur aliquando abstinendum.*

33 *Si reliquia cibi remanentes in ore transglutiantur, non impediunt Communionem; cum non transglutiantur per modum cibi, sed per modum salivæ. Idem dicendum, si lavando os deglutitur stilla aquæ præter intentionem. Hactenus Rubricæ.*

### Additio I.

\* Ut autem in variis contingentis, & casibus particularibus adhuc magis cognoscatur, num quis sit jejunus jejunio naturali, vel non, sicque communicare queat, nec ne? Pater Albertus Reiffenstuel in *sua Cena magna*, §. 34. quatuor condiciones ex communi Doctorum assignat, quæ concurrere debent, ut fractum censeatur Jejunium naturale. *Primo*, illud, quod sumitur, debet esse saltem aliquo modo nutriens. *Secundo*, debet sumi ore ab extra. *Tertio*, ante sacras Species. *Quarto*, aliter, quam per

modum salivæ, aut respirationis. Assignatur pro qualibet istarum conditionum sua propria ratio. Pro *prima*; quia quod accipitur, debet se habere saltem aliquo modo per modum cibi, vel potus, prout etiam suo modo medicina solida comedi, aut liquida epotari dicitur: illud autem solum intelligitur se habere per modum cibi, vel potus, quod a stomacho alterari, vel saltem ex parte digeri potest, sicque in substantiam hominis saltem aliquo modo converti, & consequenter saltem ex aliquali parte nutrire. Pro *secunda*; quia in communi hominum æstimatione, quod non sumitur ad extra per os, non dicitur potari, aut manducari: alias enim, qui attraheret odorem, seu fumum per nares, censeretur non jejunus naturaliter: v. g. si Sacerdos in thurificatione Officii solemnis attrahit suffitum. Pro *tertia*; quia, si aliquid moraliter simul cum Eucharistia sumitur, fit una moraliter refectio: consequenter nec dicitur talis præcedenter, & ante sumptionem Eucharistia non jejunus. Exemplum poni potest die Parasceves, quando particula Hostia immixta vino non consecrato simul cum ipso sumitur. Pro *quarta*; quia salivam deglutire, vel respirare denuo moraliter non est edere, vel bibere. \*

### Additio II.

\* Ex his infiniti casus decidi, ac multi a fractione jejunii naturalis excusari, & scrupulis eximi possunt, quales sunt I. illi, qui deglutunt frustum metalli, lapillum, fragmentum testaceum, officulum durius fructuum, capillum, ungues, plumas, segmentum ligni. II. Sumentes reliquias cibi intra dentes residuas conformiter Rubricis jam superius allegatis. III. Sugentes humorem ex pustulis dentium, seu palati, vel sanguinem ex gingiva, dummodo intra os, & non ab extra. IV. Subito attrahentes per nares guttulam aquæ odoriferæ, vel tabacci pulverisati. V. Sumentes vinum cum S. Hostia, licet mathematicè loquendo vinum aliquo modo citius defluat, dummodo adhuc moraliter sit una refectio. VI. Mastigantes aromata, si parum quid inseparabiliter salivæ adhæreret. VII. Eluentes os, si fortuito, dum attrahitur aer, una, vel altera gutta propter naturalem respirationem descendat, quoniam etiam hoc non est comedere: sicut a pari non diceretur comedere muscæ, quæ subito involeret in fauces, & se ipsam sub respiratione in stomachum inferret, ut recte cum aliis a se citatis advertit la Croix *lib. 6. part. 1. num. 564. \**

### Addit. III.

\* Quod si quis ob varias circumstantias existeret dubius num adhuc sit jejunus nec ne? non desunt AA. qui cum Thoma Sanchez, Villalobos, Rodriguez, Bonacina, & Castropalao probabiliter negant, talem posse communicare; quamvis etiam habeantur alii, qui æque probabiliter defendunt, eum stante hoc dubio communicare posse, uti cum Gobat, Joanne Sanchez, ac Dicassillo tenent Layman *lib. 1. Theol. Mor. tr. 1. cap. 5. §. 4. n. 36.* Sporer *part. 2. Theol. Sacram. cap. 6. sect. 7. n. 474.* Herincx *lib. 4. sent. disp. 6. q. 5. n. 59.* & Bosco *de Sacram. disp. 4. sect. 6. concl. 6.* Ratio fundamentalis est; quia Ecclesia tamquam benignissima mater non videtur filios suos jure communicandi, quod a Deo concessum habent, voluisse privare, nisi in reverentiam Sacramenti illos, qui positive noscunt, se non esse jejunos: adeoque tantummodo dubitantes, erunt relinquendi in possessione sui juris communicandi usque dum ipsis aliunde constet se non esse jejunos: nam melior est conditio possidentis. Atque hæc sententia poterit præcipue deservire illis, qui in certa aliqua Solemnitate ceteroquin habent magnum fervorem ad Sacram Communionem. \*

34 CONCL. V. In articulo mortis, cum tunc urgeat vel maxime præceptum Divinum sumendi Eucharistiam, potest non jejunus hoc Sacramentum porrigi per modum Viatici. Ita communis Doctorum, extendentium hoc pariter ad probabile periculum mortis; & constat ex praxi, & consuetudine Ecclesiæ.



35 Addunt Doctores, quod, qui in ejusmodi articulo mortis Sacram Synaxin recepit, perseverante morbo, atque eodem periculo, possit iterum atque sæpius communicari per modum Viatici: quia moriturus valde indiget hoc alimento animæ ad vincendas tentationes tunc temporis magis occurrentes, & superanda pericula peccandi.

36 Num autem moribundus, qui mane communicaverat sanus, debeat, vel possit eodem adhuc die sumere Eucharistiam per modum Viatici, variant Doctores; prout videre est apud Gobat *Tract. 4. Theolog. Experim. n. 174. & seqq.* Qui postmodum recte negat, existentem in tali casu obligari ad denuo communicandum eodem die. Deinde asserit, probabilius esse, quod ne quidem liceat: etsi nihilominus probabile sit, quod liceat. \* Rotarius *Tom. 2. lib. 2. cap. 2. punct. 1. n. 3.* apud Thomam Montalvo in sua Glossa fundamentali *cap. 12. art. 2. n. 36.* admonet Religiosos, ut vi sui status, & Professionis amplectantur illam opinionem in præsentī, quæ magis favet devotioni, & saluti animæ, qualis utique est illa, quæ vult iteratam in simili casu sumptionem. \*

#### Additio I.

\* Ceterum, quoniam subinde quoad ægrotos quosdam in particulari occurrunt variæ circumstantiæ reddentes Sacerdotem anxium, an possit huic, vel illi infirmo non jejuno porrigere Eucharistiam, vel num potius debeat suspendere usque ad alterum diem? Pro consolatione talium Sacerdotum æque, ac ægotantium subjungo sequentem doctrinam, quam la Croix *lib. 6. part. 1. n. 612.* ex variis Auctoribus collegit. *Inprimis* notant Tamburinus, & Dicastillo; Sacerdotem non debere hic scrupulose velle expectare jejunium sequentis diei. *Secundo* advertit Aversa *quest. 8. sect. 9. §. 6.* satis esse quod ægrotto absque medicina, vel aliquo confortativo grave accideret expectare jejunium a media nocte usque mane. *Tertio* inquit Gobat, si æger longe distet v. g. duabus horis, & periculose ægrotet, poterit non jejuno Pastor dare Viaticum, quamvis probabiliter postridie jejunus illud valeret sumere infirmus, posito, quod Pastor commode expectare nequiret sequentem diem, v. g. quia mane impeditur functionibus aliis Parochialibus, vel quia statim post mediam noctem deberet de novo surgere ob itineris distantiam &c. *Quarto* addunt Navarrus, Lugo, Herincx, & Suarez, Communionem non jejuno, si fervide petat, posse dari non solum per modum Viatici, sed etiam devotionis gratia, si inter priorem sumptionem per modum Viatici, & inter aliam devotionis gratia decem, vel octo dies intercesserint. Illud præterea notet Parochus, ut portans Viaticum ad ægrotum semper ad minus deferat duas Hostias, ut nimirum semper unam residuam iterum a domo ægroti rediens secum in templum referat: alioquin enim in reditu obviantes adorarent pixidem vacuum.

#### Additio II.

\* Quæres I. An ægrotis possit dari Eucharistia, si timeatur vomitus? Resp. I. Si timeatur vomitus præcisè ex eo, quia subinde vomit talis ægrotus, potest eidem præberi Eucharistia. Ratio est: quia exinde nondum censetur adesse periculum proximum, quod nunc brevi post sumptionem Eucharistiæ sit vomitus venturus. Resp. II. Si tamen postea nihilominus contingeret casu apud talem brevi post Communionem vomitus, deberet attendi, num ibidem adhuc Species aliquæ Eucharistiæ videantur, nec ne? Si non: vomitus comburatur, & cineres in Sacrarium mittantur, conformiter Rubricis *De defect. Mis. Tit. 10. n. 14.* Quod si similes adhuc Species ibidem appareant, segregatæ purgentur, & postea suo tempore a Sacerdote sumantur: vel, si nemo sit, qui ob nauseam sumere velit, immitantur aquæ, donec dissolvantur, ac consumantur, & illa aqua in sacram piscinam conjiciatur. Resp. III. Si ob certas circumstantias timeatur prudenter vomitus brevi post sumptionem Eucharistiæ futu-

rus, tunc communior DD. ait, abstinendum esse a Communionem ob periculum irreverentiæ; non tamen desunt aliqui apud la Croix *lib. 6. part. 1. n. 552.* qui communicare adhuc licitum putant ex ea ratione; quia videtur melius esse, ut Sacramentum exponatur incerto periculo irreverentiæ, quam hominem, in cujus bonum Sacramenta instituta sunt, privari certo fructu Communionis, alias ex opere operato obtinendo. Illud certum videtur, quod ægrotis post sumptam Eucharistiam, non sit, nisi intercedente quodam spatio e. g. unius saltem quadrantis horæ danda medicina de se provocatoria vomitus ob periculum grave irreverentiæ: si enim parva Hostia juxta plures DD. vix consumitur intra spatium femiquadrantis a stomacho bene constituto, & hinc illud tempus etiam a sanis similis medicina sumi non debet, certo adhuc majus spatium requiretur apud stomachum ægroti debilem. Hinc teste la Croix *lib. 6. part. 1. n. 476.* suadent AA. (etsi non præcipiant) ut intra horam abstineatur a vomitu. Videatur Bosco *de Eucharistia. Disp. 4. sect. 6. n. 115. & n. 116.* \*

#### Additio III.

\* Quæres II. An ægrotis possit dari Eucharistia, si vexantur continua tussi? Resp. cum la Croix *loc. cit. num. 554.* affirmative. Ratio est: quia, quamvis materia, quam ejiciunt, plerumque ascendat e pectore, attamen non est periculum ejiciendi sacras Species, dummodo ad stomachum descenderint, quia via, per quam sputa ejiciuntur non est œsophagus, seu via cibi, & potus ad stomachum, sed vena aspera, sive via respirationis ad pulmones. Ex qua ipsa ratione recte inferit la Croix *loc. cit. n. 652.* posse aliquem, postquam bene deglutivit hostiam, maxime si vinum simul sumserit, brevi post expuere: quamvis ceteroquin expediat pro majori ædificatione, ac reverentia per spatium unius *Miserere* abstinere, si commode fieri possit, aut saltem intra tempus quinque Pater, ac Ave sputum in strophio excipere. \*

#### Additio IV.

\* Quæres III. An Eucharistia per modum Viatici possit dari infirmis taliter, ut frangatur minima particula, ac imposita cochleari una cum vino, jusculo vel aqua ori immitatur? Resp. cum Diana, Possentino, & Praposito affirmative, supposito, quod absit periculum irreverentiæ, & aliter sumendo ægrotus magnam sentiret difficultatem: nam si ægrotus non jejunus potest sumere Viaticum, cur non etiam medio aliquo tali instrumeto, cum utrobique praxis interpretetur concessionem piæ Matris Ecclesiæ. \*

#### Additio V.

\* Quæres IV. A quibusnam debeat dari Eucharistia per modum Viatici Donatis, Oblatis, seu Tertiariis aliquo sacro Habitu Tertii Ordinis vestitis, vel aliis Commensalibus seu Servitibus cujusdam Monasterii, si ibidem infirmi decumbant.

Ante Responsionem nota, quod teste nostro Montalvo in sua Glossa fundamentali *Tom. 1. cap. 7. art. 2. num. 1.* Donati dicantur illi, qui ultro se, & sua, Religioni donant interveniente Contractu ex parte Donati permanendi in Religionis obsequio sub Prælatorum regimine, & obedientia, atque ex parte Religionis eos alendi, & sustentandi, ac non expellendi sine legitima causa. *Tertiarii* proprie juxta eundem Auctorem *loc. cit. cap. 14. art. 4.* vocantur illi, qui sacro Habitu Tertii Ordinis induti vivunt, & aluntur sub obedientia Superioris in dicto monasterio. Hi ab aliis quoque appellantur *Oblati. Commensales* vero, *Servitiales*, aut *Familiares* nominantur quicumque etiam Sæculares, qui Conventui deserviunt, & insuper intra Monasterii septa habitant, atque degunt sub Prælatorum obedientia & disciplina non necessa-



necessario ratione Voti, sed ratione ministerii, cui incumbunt, uti notat Montalvus *loc. cit. n. 3.* atque deducitur tum ex Concilio Trid. *Sess. 24. de Reform. cap. 11.* tum ex Bulla *Circumspecta*, 67. Gregorii XIII. *n. 2.* ubi omnia enumerata copulative requiruntur. H. N. Respondetur, tales Donatos, Oblatos, seu Servitiales, ac Commensales, si graviter in Monasterio decumbant, providendos esse per modum Viatici ab ipsismet Regularibus dicti Monasterii. Item sentiendum de extrema Unctione. Ita Rodriguez apud Ildephonsum Tausch in suo Tractatu de Moribundo *disp. 3. quæst. 1. n. 489.* ex Monumentis Ordinum, & Compendio Privilegiorum varia adducens privilegia. Montalvus in Glossa fundamentali *Tom. 1. cap. 14. art. 4. n. 6. & seqq.* Vincentius Petra Cardinalis in Commentariis ad Constitutiones Apostolicas *Tom. 2. Constitutione IX. Innocentii III. n. 42.* Ubi idem sentit de sepultura. Item Passerinus apud eundem *Tom. 1. de Stat. Homin. quæst. 187. art. 4. a num. 228.* & Cardinalis de Luca de Regul. *Disc. 1. n. 50.* Et præter alias concessiones apud Montalvum videndas patet ex Bulla Pauli III. *Licet Debitum*, edita 18. Octobris anno 1540. ubi §. 15. sequentia habentur formalia: *his vero, qui in ipsorum Præpositorum, & Sociorum morantur obsequiis, cuncta libere ministrare possint Ecclesiastica Sacramenta, & ipsos, cum decedant, in eorum Cameteriis sepelire.* \*

Additio VI.

\* Quæres V. A quibus debeat administrari Viaticum (idem sic de extrema Unctione) extraneis subito intra septa cuiusdam Monasterii infirmis? Resp. Si sit periculum in mora, sique casus necessitatis, talibus Eucharistia administranda est per modum Viatici ab ipsismet Regularibus dicti Monasterii. Ita Pater Herincx *part. 4. disp. 9. quæst. 4. n. 30.* & alii apud, & cum Ildephonso Tausch *loc. cit. n. 490.* Probatur primo ex eo; quia nequit Parochus in alienum territorium involare, ibique iura Parochialia exercere similia; sicut econtra, si Religiosus extra Monasterium periculose decumberet, nequiret eundem alius Regularis ejusdem Monasterii citra licentiam Parochi districtus illius providere, sed hoc potius incumbere ipso Parocho ob eandem rationem; nam administratio Sacramentorum respicit jurisdictionem localem in tali loco, in quo fit, uti notat Eminentissimus Cardinalis Petra *loc. cit. n. 13.* asserens simul aliquam declarationem S. Congregationis Concilii Trid. in *Collen. 11. Aprilis 1609.* Probatur secundo ex concessione facta etiam post Concilium Tridentinum Benedictinis, ac Theatinis, uti refert Herincx apud Tausch *loc. cit. n. 490.* ac sub hac moderatione (si nimirum sit casus necessitatis) etiam admittit Eminentissimus Cardinalis Vincentius Petra *loc. cit. n. 49.* Extra casum vero necessitatis, & ubi non est periculum in mora, sunt contrariæ Declarationes ab eodem, & a Matthæuccio allegatæ, nisi vel petatur licentia a Parocho vel etiam extra casum necessitatis aliqua Religio adduceret desuper specialia privilegia post Concilium Tridentinum obtenta. Quamvis ceteroquin per hoc neutiquam negetur, quod talis, forsan necdum decumbens ad mortem possit a Regularibus accipere Eucharistiam ex devotione, quoties libuerit. \*

Additio VII.

\* Quæres VI. An ille, qui defert Eucharistiam per modum Viatici ad ægrotum, teneatur ita festinare, ut potius currere censeatur cum Viatico ad infirmum, quam ire? Respondet ad hoc Sabinus Bononientis in sua *Luce Morali, Tract. 44. de Eucharistia, n. 53.* ex Barbosa de *Officio Parochi, c. 20. n. 46.* negative, eo quod ex una parte hoc Sacramentum non sit necessarium necessitate mediæ, sicuti Baptismus, & apud graves peccatores Pœnitentia; ex altera vero videatur repugnare reverentiæ debitæ tanto Sacramento, & decentiæ Ministri id portantis talis festinatio. \*

Varia Quæsitæ circa sumptionem Sacramenti Eucharistiæ solvuntur; præsertim tempore Paschali.

SUMMARIUM.

- 37 An, qui Communionem Paschalem non peregit, teneatur eam compensare?
- 38 Sententia affirmativa est probabilior.
- 39 Ubi peragenda Communio Paschalis?
- 40 Quid de Peregrinis, Vagis &c.  
Quid de famulis Monasteriorum?  
Ibidem.
- 41 Sacerdotes, an tempore Paschali debeant communicare in propria Parochia?  
\* An satisfiat in Ecclesia Cathedrali?
- 42 Parvuli ante usum rationis non tenentur communicare.
- 43 Quando obligentur pueri ad Communionem Paschalem?  
Praxis circa hoc.
- \* Quid de pueris in articulo mortis sit faciendum?
- 44 Mutis & surdis a nativitate: quæ Sacramenta possint ministrari?
- 45 An etiam Sacramentum Eucharistiæ?
- 46 Energumenis, & epilepticis an possit Eucharistia ministrari, & an fatuis?  
\* Quandoque Divinatis ad mortem?
- 47 Quæ sint pene non communicantium in Paschate?
- 48 An aliquando possit differri Communio ultra tempus Paschale?
- 49 Quid, si quis prævideat impedimentum communicandi tempore Paschali?

37 Quæst. I. An, qui Communionem Paschalem culpabiliter, vel iusto impedimento detentus non peregit, teneatur eandem proximè compensare? Ratio dubitandi desumitur ex Concilio Lateranensi, & c. *Omnis utriusque sexus, n. 25.* relato, ubi præcipitur *suscipere Eucharistiæ Sacramentum in Pascha*: ac proinde videtur hoc præceptum esse affixum ipsi tempori Paschali, non minus, ac præcepta Feltorum, Juniorum, atque Horarum Canoniarum sunt affixa certis diebus; ergo sicuti hæc illis diebus culpabiliter, vel inculpabiliter ommissa, non necessario compensanda sunt aliis diebus, ita & de præcepto Ecclesiastico Communionis Paschalis videtur dicendum. Et ita sentiunt non pauci Doctores, uti videre est apud Lugonem *Disput. 12. De Eucharistia, sect. 4.* Aliqui vero distinguunt inter Communionem Paschalem culpabiliter ommissam, vel inculpabiliter; & hanc quidem compensandam censent, non illam.

38 Verum affirmativa sententia, asserens indistincte; Communionem Paschalem postmodum eo anno compensandam esse, communior & probabilior est, quam tenet Lugo *loc. cit. Mastrius disp. 12. Theol. Mor. num. 54. Sannig. dist. 4. De Eucharistia, quæst. 31. n. 15.* Layman, Gobat, Sylvelter, & alii. Ratio est: quia hoc præceptum non est præcise affixum tempori Paschali, sicuti præceptum jejunandi, vel audiendi Missam tui diei. Siquidem præceptum Communionis Paschalis non est simpliciter unum (prout fit in aliis allatis) sed continet virtualiter duo præcepta, unum Communionis, saltem semel in anno peragenda, ut satisfiat præcepto Divino sumendi Eucharistiam, alterum communicandi in Paschate, ob venerationem hujus Solemnitatis: ergo, quamvis expiret hoc præceptum quoad secundum lapsum temporis Paschalis, non tamen quoad primum. Et per hoc patet ad rationem dubitandi *n. præc.* allatam.

39 Quæritur II. Ubinam Communio Paschalis sit peragenda? Resp. eam peragenda in propria Ecclesia Parochiali, nisi adsit expressus, vel tacitus, aut saltem rationabiliter præsumptus consensus proprii Parochi, vel ejus Superioris (puta Episcopi) ad alibi communicandum. Ita Herincx *disp. 6. n. 39. De Eucharistia.* Rodriguez, & alii; idque desumitur ex *cit. c. Omnis utriusque sexus. De Panis. & remis.* juncta communi praxi Ecclesiæ, & consen-



consensu Doctorum. Unde sine ejusmodi licentia alibi communicans, juxta Bonacinam *disp. 4. De Sacramentis, quest. 7. punct. 2. n. 7.* Palaum, & alios, non satisfacit præcepto. Verum rigor iste procedit, quando ne quidem tacitus aut saltem rationabiliter præsumptus consensus proprii Parochi, vel ejus Superioris adest: nam quando talis personæ qualitas, tempus, vel aliæ causæ concurrunt, ut arbitrio prudentis viri credatur fore contentus Parochus, si quis alibi communicet, satisfiet præcepto Ecclesiastico; nec erit peccatum mortale, recipere Eucharistiam extra propriam Parochiam, quia tunc non ministraretur sine jurisdictione, cum adesset saltem tacita proprii Parochi licentia. Bassæus in *Supplemento. v. Communio. n. 3.*

40 Excipiuntur etiam Peregrini, Vagi, & illi, qui extra propriam Parochiam tunc existentes ad ipsam commode accedere nequeunt: nam tales possunt tempore Paschali in Parochia, in qua degunt Eucharistiam sumere, imo & in Ecclesiis Regularium, Bassæus *v. Communio Sacra, n. 11.* & alii. Idem communiter tenent Doctores de servis Religiosorum, qui degunt in Monasteriis, vel aliis locis a cura Parochorum exceptis; uti etiam jam fuit præcedenter Additione post *n. 29.* probatum.

41 Insuper Sacerdotes satisfaciunt integre præcepto Ecclesiæ, ubicumque tandem celebrent tempore Paschali: secus, si communicent more Laicorum. Disparitas est: quia præceptum sumendi Sacram Synaxin in propria Parochia ex recepta consuetudine extenditur ad eos, qui Eucharistiam ab alio sumunt, volendo, ut Oves a Pastore proprio pascantur: non vero ad illos, qui celebrando seipsum communicant. Bonacina *cit. disp. 4. q. 6. punct. 2. n. 7.* Gobat *loc. cit. n. 74.* & alii. Decretum aliquod Sac. Congregat. Rit. 27. Sept. anno 1608. editum & a Gavanto in *Miss. part. 4. tit. 8. n. 7.* ac a Merati eodem loco relatum sic habet: *Omnes de Clero etiam Canonici Eucharistiam sumant de manu celebrantis in Feria V. in Coena Domini.* \*

#### Additio.

\* Num autem siue Sacerdotes more Laicorum communicantes, siue alii Diocesani sacram Synaxin tempore Paschali sumentes in ipsa Ecclesia Cathedrali dictæ Diocesis satisfaciunt præcepto annuæ Communionis, adhuc dubitari posset ex ea ratione; quia Ecclesia Cathedralis videtur eminentialiter continere omnes Ecclesias Parochiales dictæ Diocesis. Hoc tamen non obstante resolvitur negative, nisi vel expressa, vel tacita, aut consuetudine approbata licentia Episcopi, seu Parochorum accedat, prout accedere censetur, si talis de manibus ipsiusmet Episcopi tamquam Parochi Parochorum dictæ Diocesis ibidem communicaret e. g. in Coena Domini. Ratio est: quia nec Cathedralis Ecclesia est omnium Civium ejusdem Diocesis, quin sæpius nec omnium ejusdem Civitatis propria Parochialis, nec Parochus Cathedralis proprius omnium Diocesanorum Parochus. Videatur Gobat hic *tract. 14. n. 66.* \*

42 Quæritur III. An, & quando Pueri teneantur præcepto Communionis Paschalis? Resp. I. Certum est, parvulos usui rationis carentes, nulla obligari necessitate ad Sacramentalem Communionem. Ita declarat Concilium Trid. *Sess. 21. cap. 4.* bene subjungens: *Neque ideo tamen damnanda est Antiquitas, si eum morem in quibusdam locis aliquando servavit.* Ratio est: tum quia parvuli sunt incapaces præcepti; tum quia ipsi non norunt debita cum reverentia hoc Sanctissimum Sacramentum suscipere; qua de causa mos ille Antiquitatis ministrandi parvulis Eucharistiam postmodum auctoritate Ecclesiæ sublatu fuit.

43 Resp. II. Tunc Pueri obligantur præcepto Ecclesiastico Communionis Paschalis, quando ad annos discretionis pervenerunt, prout loquitur Concilium Lateranense *n. 25.* relatum. Ceterum, quando censendus sit puer attigisse annos discretionis, ex actionibus rationabilibus ipsius, ceterisque circumstantiis, prudenti judicio Paren-

tum, & vel maxime Confessariorum discernendum est; cum alii citius, alii tardius sufficientem rationis usum, & spiritualium rerum intelligentiam assequantur. Praxis autem obtinuit, ut octennes & novennes non compellantur ad Sacram Synaxin, atque insuper Gobat *tr. 4. Theolog. Experim. n. 88.* post Suarez, & alios notat, posse differri Communionem Paschalem in unum alterumve annum, postquam puer est satis intelligens rerum ad illam rite obeundam spectantium: ultra annum tamen duodecimum ordinarie non differatur: \* Nec dicti pueri ordinarie admittantur, nisi jam præcedenter fuerint adstricti ad audiendam diebus præceptis Missam, ad abstinendum diebus Veneris & Sabbatinis a carnibus & ad deponendam Confessionem. Tempore Jubilæi oportet Confessarios nonnihil esse benigniores, quam alias in concedenda pueris sacra Communionem, uti Doctores communiter advertunt, & videri poterit apud Holzman *Tom. 2. tract. 4. n. 656.* \*

#### Additio.

\* Quinimo loquendo de articulo mortis, si parvuli etiam octennes ferventer peterent S. Viaticum, essentque circa illud antea jam sufficienter instructi, vel saltem sufficienter adhuc instrui possent, non foret parvulis petentibus hic panis celestis denegandus, uti recte notat Bosco *De Sacramentis. disp. 4. sect. 8. conclus. 6.* cum aliis, quos allegat. Ratio est: quia in talibus circumstantiis prudenter supponi potest, annos discretionis per judicii maturitatem esse suppletos accedente adiutorio DEI, qui intellectum dat, & sapientiam præstat parvulis. Quod si vero in simili ætate constituti parvuli ipsimet ferventer, & devote non peterent, habet Confessarius sufficientem causam apud tam imbecilem ætatem, respectu cujus alias est ordinarie præsumptio de nondum sufficiente maturitate, dissimulandi realem Communionem: etenim signum hoc est, quod nondum sufficienter penetrent dignitatem, & summam utilitatem tanti Sacramenti.

44 Quæritur IV. Utrum mutis & surdis a nativitate sit porrigendum Eucharistiæ Sacramentum, non minus, ac alia Sacramenta? Et additur, *non minus, ac alia Sacramenta*: nam certum est, posse ejusmodi furdo & muto, si ceteroquin non appareat indispositus, ministrari Sacramentum Baptismi & Confirmationis, atque in articulo mortis extremam Unctionem. Deinde potest ipsi ministrari Sacramentum Pœnitentiæ, dummodo is, in quantum valet, signis ac nutibus peccata sua confiteatur: nam in casu tantæ impotentiae sufficere Confessionem per signa & nutus, passim fatentur Doctores. Insuper, cum ad Matrimonium contrahendum non requirantur certa verba, sed sufficiat solus consensus contrahentium exterius expressus, potest mutus & surdus, si velit, atque inveniat aliquam volentem, matrimonium contrahere: *Cum, quod verbis non potest, signis valeat declarare*, ut habetur *c. Cum apud. 23. de Sponsal. Sanchez lib. 1. De Matrimon. disp. 8. n. 12.* & alii. Verum de Sacramento Eucharistiæ loquendo,

45 Resp. potest ejusmodi furdo & muto etiam ministrari Sacramentum Eucharistiæ, præsertim tempore Paschali, atque in articulo mortis, dummodo aliunde non appareat indispositus. Ita Abbas Panormitanus in *c. Cum apud. de Sponsalibus. Layman lib. 5. tract. 4. cap. 4. n. 5.* & alii. Quinimo, si discretio talium sit maturior & perfectior, posse ipsis SS. Eucharistiam sæpius ministrari, utputa in Festis solemnioribus, censet Herinæx *cit. disp. 6. quest. 2. n. 16.* Ratio est: quia tales muti & surdi ita quandoque sunt perspicacis & acuti ingenii, ut multa explicatu difficilia ex signis & nutibus facile percipiant, & vicissim manifestent; ergo visa aliorum Fidelium ad Sacram Synaxin accedentium devotione facile distinguere valent cibum istum Angelicum a profano, accedente simul interiori illustratione Spiritus Sancti: & consequenter, stantibus præmissis, poterit ipsis, utpote



## Quæst. V. Quid sit sentiendum de Communione frequenti &c. 335

utpote viatoribus, ministrari *Panis Angelorum*, *Factum Cibus Viatorum*.

46 Porro juxta hæc tenus dicta sunt de mutis & surdis, longe magis locum habent in energumenis ( hoc est, a dæmone obsessis ) epilepticis, & aliis infirmis : qui proinde non solum in Paschate, ac mortis articulo, verum & aliis temporibus rite communicantur, dummodo Sacram Eucharistiam absque irreverentia sumere possint, & ceteroquin indispositi non appareant. Circa amentes sic habet Rituale Frisingense : *Amentibus communicare non licet ; licebit tamen, si quando habeant lucida intervalla, & devotionem ostendant, dum in eo statu manent, si nullum indignitatis periculum adsit.* De semisatis omnino nullus scrupulus est formandus, dummodo prævie pro modulo sue capacitatis instruantur, & absit gravis irreverentiæ periculum.

### Additio.

\* Quær. V. An, & quando damnatis ad mortem Eucharistia dari debeat per modum Viatici ? Resp. I. Damnatis ad mortem juxta communissimam Doctorum Theologorum sententiam dari debet Eucharistia per modum Viatici. Ratio est : quia hi sunt in proximo mortis periculo constituti ; atqui constituti in proximo mortis periculo juxta omnes dari debet Eucharistia per modum Viatici : ergo. Unde testatur la Croix *lib. 6. part. 1. n. 607.* & Herincx apud Ildephonsum Thausch in *Tract. De Moribundo. disp. 3. quæst. 1. n. 533.* S. Pium V. statuisse, ut Judices id non permittentes ab Episcopis etiam per excommunicationem compellantur. Atque hoc præceptum communiter observatur in nostra patria etiam quoad milites extra bellum : *in bello autem* ) sunt formalia Alberti Reiffenstuel in *Cœna magna art. 32.* ) *fit processus summarius, & quasi instantaneus, sed an bene ? negat Gobat n. 201. sed quid juvat militibus prædicare ?* Ita ille.

Resp. II. Ordinarie Damnatis ad mortem SS. Eucharistia dari debet ante diem actualis executionis, quantum fieri potest. Ita communiter præscribunt Ritualia, in specie Frisingense *cap. 5. memb. 1. Observat. §. 4. n. 5.* & Ratio est : quia absque alia gravi ratione non satis conveniens videtur, ut qui per hoc Sacramentum spiritualiter vivificatus fuit, eodem die per manus carnificis deperdat vitam temporalem. Quod si alia gravis ratio hunc ordinem dissuadeat, ipso die executionis juxta praxin Romanam teste P. Alberto Reiffenstuel *loc. cit.* provideatur etiam non jejunus, si exigatur acceleratio executionis, uti notat la Croix *loc. cit.* \*

47 Quær. VI. Quænam sint pœnæ non communicantium in Paschate ? Resp. Tales & vivi ingressu Ecclesiæ arcendi sunt, & mortui Ecclesiastica Sepultura privandi. Ita enim statuitur in Concilio Lateranensi, & c. *Omni utriusque sexus. De Penit. & remiss. n. 25.* relato, quamvis hæc pœnæ non ipso jure incurrantur, sed primum per sententiam Judicis infligendæ sint, prout colligitur ex contextu illorum verborum, & tenet communis.

48 Quær. VII. An aliquando licite possit differri Sacra Communio ultra tempus Paschale ? Resp. Id fieri posse ob aliquam rationabilem causam, atque accedente consilio proprii Sacerdotis, prout patet ex verbis Concilii Lateranensis, *cit. n. 25.* relatis. Ceterum per proprium Sacerdotem, de cujus consilio possit differri Communio Paschalis, non solum intelligitur proprius Parochus, aut ejus Superior, sed etiam Confessarius, qui eo tempore Confessionem pœnitentis excipere potest : censetur enim ad hoc a propriis animarum Pastoribus eo delegatus, quod potestatem acceperit Confessiones excipiendi. Herincx *loc. cit. n. 38.*

49 Et conformiter dictis responderi poterit ad illud dubium, an prævidens sibi futurum impedimentum communicandi tempore Paschali, teneatur prævenire, & prius communicare ? Etsi enim quoad hoc sint diversæ Doctorum sententiæ, quorum aliqui negant, alii vero affirmant, adesse talem obligationem præveniendi, nihilomi-

nus dicendum, quod tunc de licentia proprii Sacerdotis differenda sit Communio ultra tempus Paschale, juxta citatum Concilium Lateranense, nisi forte prævideatur impedimentum duraturum per totum annum : tunc enim oportebit prævenire. Lugo *cit. disp. 16. n. 74. & seqq.*

## Q U Æ S T I O V.

Quid sit sentiendum de Communione frequenti, & quotidiana ?

### S U M M A R I U M.

- 50 Communio quotidiana nullo jure præcepta est.
- 51 Solvitur instantia.
- 52 Frequens & quotidiana Communio per se loquendo commendatur.
- 53 Quid spectatis variis hujus vite impedimentis. Notabilis sententia D. Augustini.
- 54 An ea Laicis negotiatoribus, & conjugatis permittenda?
- 55 Quid observandum circa Moniales ?
- 56 Frequens Confessio, & Communio an sit nota Prædestinationis ?

50 **C**ONCL. I. Communio quotidiana nullo Jure Divino, aut Ecclesiastico præcepta existit. Ita communis : idque novissime declaravit Decretum S. Congregationis Cardinalium Concilii Trid. Interpretum, circa Communionem quotidianam 1569. die 12. Februarii editum, quod incipit, *Cum ad aures*, estque approbatum ab Innocentio Papa XI. Ratio est : quia juxta c. *Omni utriusque sexus. De Penit. & remiss.* detecto sufficit, communicare solum in Paschate, non obstante, quod olim Laici tribus saltem temporibus in anno, nempe in Natali Domini, Paschate, & Pentecoste, communicare debuerint. arg. c. *Etsi non frequentius & c. Seculares 19. De Consecr. dist. 2.*

51 Nec obstat illud S. Anacleti Papæ. c. *Peracta 10. de Consecr. dist. 2.* *Peracta consecratione omnes communicent, qui noluerint Ecclesiasticis carere liminibus.* Resp. enim cum Glossa ibidem, hoc intelligendum esse de Sacerdotibus, qui conficiunt, seu consecrant, idque patet tum ex Summario ibidem, tum ex sequentibus Capitulis. Porro loquendo de ceteris non adesse talem obligationem, clare desumitur ex Concilio Trid. *Sess. 22. cap. 6.* ubi nihil præcipiens, sed quasi humanam infirmitatem secum reputaret, quod cuperet, tantum indicans inquit : *Optaret quidem Sacrosancta Synodus, ut in singulis Missis Fideles astantes non solum spirituali affectu, sed Sacramentali etiam Eucharistia perceptione communicarent, quo ad eos Sanctissimi hujus Sacrificii fructus uberius proveniret.*

52 **C**ONCL. II. Frequens, quin & quotidiana Communio per se loquendo, & quantum est ex parte hujus Sanctissimi Sacramenti, utilissima est, atque a Sanctis Patribus semper commendata. Hinc S. Ambrosius *lib. 5. De Sacramentis cap. 4.* ac refertur *can. Non iste. 56. de Consecr. dist. 2.* sic loquitur : *Iste panis quotidianus est : accipe quotidie, quod quotidie tibi proficit. Sic vive, ut quotidie merearis accipere, cum concordantiis.* Unde Concilium Trid. *Sess. 13. cap. 8.* Fideles exhortatur ad frequentem Communionem, & eam Fidei constantiam, animique devotionem ac pietatem : *ut Panem illum substantialem frequenter suscipere possint.*

53 Dicitur, *per se loquendo* : nam per accidens, & spectatis diversis vitæ hujus impedimentis, ac distractionibus (ut taceatur remorsus peccati gravioris) communius fieri solet, quod Laici sæculares ad Sacram Communionem ea, qua par est, reverentia, & animæ suæ fructu quotidie sumendam minus videantur dispositi. Proinde hoc sensu S. Augustinus, relatus *can. Quotidie 13. de Consecr. dist. 2.* sic ait : *Quotidie Eucharistia Communionem percipere nec laudo, nec vitupero, omnibus tamen Dominicus diebus communicandum suadeo, & exhortor : si tamen mentis sine affectu peccandi sit.*



54 CONCL. III. Quod ad Sæculares negotiatores attinet, frequens ad sacram Alimoniam accessus, Confessorum, secreta cordis explorantium, iudicio relinquendus est, qui ex conscientiarum puritate, & frequentiae fructu, & ad pietatem processu Laicis negotiatoribus, & conjugatis, quod prospicient eorum saluti profuturum, id illis præscribere debebunt: quamvis conjugati serio admonendi sint, ob Sacratissimam Eucharistiæ reverentiam amplius continentiae vacandum, puriorque mente ad Coelestium Epularum Communionem esse conveniendum. Ita citatum Decretum Sacrae Congregationis. Ubi idcirco subjungitur, quod Pastoribus incumbat, non aliquos a frequenti, aut quotidiana Sacrae Communionis perceptione deterrere, vel accedentes repellere, sed operam dare, ut unusquisque digne pro devotionis, & præparationis modo, rarius aut crebrius Dominici Corporis suavitatem degustet: & quod Episcopi, in quorum Diocesis viget huiusmodi devotio erga Sanctissimum Sacramentum, pro illa gratias Deo agere, eamque adhibito prudentiæ temperamento, sublata tamé omnis irreverentiæ, & scandali suspitione, alere debeant.

55 CONCL. IV. Moniales, quotidie Sacram Communionem petentes, admonendæ erunt, ut in diebus ex earum Ordinis Instituto præscriptis communicent: si quæ vero puritate mentis eniteant, & fervore spiritus ita in-

caluerint, ut dignæ frequentiori & quotidiana Sanctissimi Sacramenti perceptione videri possint, id illis a Superioribus permittatur. Ita verbatim citatum Decretum, quod tum alibi tum apud Jo. Cardenas in *Crist Theologica ad Propositiones ab Innocentio XI. damnatas* circa finem legi poterit.

56 Pro coronide sciendum, quod Innocentius XI. hanc inter alias, ordine 56. Propositionem, *sicut jacet*, merito condemnaverit: *Frequens Confessio & communio, etiam in his, qui gentiliter vivunt, est nota Prædestinationis*. Quamvis enim frequens Sacramentorum Confessionis, & Communionis, debita cum reverentia & devotione receptorum, usus recte connumeretur inter notas Prædestinationis (id est, inter ea signa, ex quibus probabiliter sive conjecturaliter colligi valet, aliquem consecuturum esse æternam Beatitudinem) prout ostendit, atque pluribus SS. Patrum auctoritatibus firmat Hieremias Drexelius *Signo 3. Zodiaci*: id tamen in gentiliter viventibus locum habere nequit; quia tales, hoc ipso, quod vivant gentiliter, accedunt indisposite, & Sacramenta illa recipiunt sacrilege: quia absurdissimum est dicere frequentem sacrilegam Sacramentorum receptionem esse notam Prædestinationis, cum eo amplius Divina offendatur Majestas, quo frequentius ejusmodi reiterantur Sacrilegia.



## TRACTATUS XI.

### DE BENEFICIIS ECCLIASTICIS, JURE PATRONATUS, ET DECIMIS.

**P**Ræsentium materiarum Tractatus ex professo quidem ad Jus Canonicum spectare videtur, ubi sub propriis Titulis tum de Ecclesiasticis Beneficiis, ac Jure Patronatus, tum de Decimis uberius agi consuevit. Verumtamen, quia circa præmissa plures occurrere solent materiæ practicæ, & Forum Conscientiæ respicientes, merito etiam in Theologia Morali discutuntur, ne culpabilis eorum ignorantia multorum peccatorum origo sit, & fomentum.

#### DISTINCTIO IV.

#### De Beneficiis Ecclesiasticis, eorumque Collatione

#### QUESTIO I.

Quid, & quotuplex sit Beneficium Ecclesiasticum

#### SUMMARIUM.

- 1 *Præsent materia cur hic tractetur?*
- 2 *Beneficium generatim, quid? Quomodo in proposito sumatur?*
- 3 *Beneficium Ecclesiasticum, quid?*
- 4 *Tria in eo distinguuntur.*
- 5 *Quomodo sit jus perpetuum?*
- 6 *Ejus Laicus est incapax.*
- 7 *Debet constitui auctoritate Ecclesie.*
- 8 *Beneficia Ecclesiastica majora, & minora.*
- 9 *Regularia, & Secularia.*
- 10 *Curata, & non curata, quæ?*
- 11 *Beneficia electiva, Patronata, & Collativa, seu libera, quæ?*
- 12 *Beneficia patrimonialia, & non patrimonialia.*
- 13 *Manualia, seu revocabilia, & non manualia, quæ?*
- 14 *Dignitas, Personatus, & Officium an differant?*
- 15 *Stricte quid sit Dignitas;*
- 16 *Personatus, &*
- 17 *Officium?*
- \* *Commenda, Pensio, & Præsimonium, quid?*

**B**eneficium generatim sumptum aliud non est, quam benevola actio tribuens gaudium capientibus: quo modo comprehendit quodlibet Beneficium, tam Laicale, quam Ecclesiasticum. In proposito sermo est de solis Beneficiis Ecclesiasticis, quæ auctoritate Ecclesie sunt instituta, atque conferri solent Clericis propter officia spiritualia, & honestam eorum sustentationem, ne alioquin in opprobrium Ordinis Clericalis mendicare, vel negotiari cogantur, simulque, ut adimpleatur illud Apostoli I. Corinth. 9. *Qui altari deseruiunt, cum altari participant.*

3 CONCL. I. *Beneficium Ecclesiasticum* est jus perpetuum percipiendi fructus ex bonis Ecclesiasticis propter aliquod officium spirituale, personæ Ecclesiasticæ auctoritate Ecclesie constitutum. Ita in re Doctores communiter.

4 Tria siquidem in Beneficio Ecclesiastico distinguuntur. Primum est *Officium aliquod spirituale*, utputa obligatio recitandi Horas Canonicas, deserviendi alicui Ecclesie, administrandi Sacramenta, celebrandi certas Missas &c. Et hoc est omnino spirituale, non tamen est Beneficium, sed fundamentum & causa Beneficii Ecclesiastici; nam propter *Officium datur Beneficium c. ult. De Rescriptis. in 6.* Secundum est *jus percipiendi fructus ex bonis Ecclesiasticis*; & hoc jus proprie dicitur Beneficium, estque spirituale, quia oritur ex spirituali officio, cui etiam annectitur. Tertium sunt ipsi *fructus percipiendi ex bonis Ecclesiasticis*, id est, ex bonis Deo dicatis, atque Ecclesie donatis, & hi sunt quid temporale, liciteque venduntur absque labe Simonie, prout patet in fructibus Decimarum.

5 Additur in data definitione, *Jus perpetuum*: quia, de natura Beneficii Ecclesiastici est, ut institutum perpetuo duret, & non conferatur ad certum dumtaxat tempus, sed regulariter ad totam vitam Beneficiarii, adeoque Beneficiarius in eo intuletur, seu investigatur. arg. c. *Sanctorum. dist. 70. ibi: In qua Ecclesia quilibet titulus est, in ea perpetuo perseveret.*

6 Et subjungitur, *personæ Ecclesiasticæ*: quia Laicus est incapax Beneficii Ecclesiastici; ante omne enim Beneficium



Beneficium requiritur præviis Clericatus, seu prima saltem Tonsura, adeo ut sine eo quis ad Beneficium possidendum sit inhabilis; nam generaliter Laici spiritualia possidere non possunt. *c. Causam. De Præscrip. & alibi.*

7 Dicitur ultimo, *auctoritate Ecclesie constitutum*: quia Beneficia non nisi auctoritate Ecclesie institui, seu erigi possunt. Unde, si quis certas Missas, vel etiam Anniversarium, in perpetuum fundaverit, nisi simul approbatio Episcopi accesserit, non erit Beneficium, sed tantum pia donatio, vel Legatum pium. Barboza *lib. 3. Juris Ecclesiast. univ. cap. 4. n. 16.* Engel & alii.

8 CONCL. II. Beneficia Ecclesiastica varie dividuntur. Ita omnes, & patet inductione. Inprimis enim Beneficia alia sunt *Majora*, ut Papatus, Patriarchatus, Cardinalatus, Archiepiscopatus, Episcopatus, quibus addunt Abbatiam: nam Abbates in suos *quasi Episcopalem jurisdictionem* obtinent. *c. Abbates. De Privileg. in 6.* Et hæc communi nomine Beneficii, ac nisi secus exprimatur, comprehendendi non solent, cum sint *Culmina Dignitatum*; prout appellantur *cap. Venerabilis. 37. De Præbendis.* Alia dicuntur *Beneficia Minora*, ut sunt cetera prædictis inferiora.

9 Deinde Beneficia alia sunt *Regularia*, alia *Secularia*. Illa sunt, quæ solis Regularibus competunt, aut pro ipsis tantum instituta fuerunt: ut Abbatia, Prioratus &c. *Secularia* econtra censentur, quæ sunt addicta, seu debita sæcularibus Clericis, id est, illis, qui nullam regulam ex Ordinibus ab Ecclesia approbatis sunt professi, sed in sæculo existentes serviunt Deo sub Statu Clericali. Et de hac divisione loquitur illud receptum Canonistarum: *Secularia Beneficia Sæcularibus, & Regularia Regularibus sunt conferenda. c. Cum ad nostram, & c. Officii. de Electione, juncto Concilio Trid. Sess. 14. de Reform. cap. 10.* Intellige, nisi causa necessitatis exigente, deque consensu Superiorum aliud fieri expediat.

10 Rursum alia sunt *Beneficia curata*, quæ videlicet curam animarum habent annexam: qualia habent Parochi &c. Alia dicuntur *Beneficia non curata*, seu quibus nulla ejusmodi animarum cura est annexa: & in dubio Beneficium censetur non curatum, ac proinde asserenti curatum incumbit hujus probatio.

11 Insuper Beneficia Ecclesiastica juxta triplicem modum, quo communiter conferri solent, dividuntur in collativa seu libera, in patronata, & in electiva. *Beneficia electiva* vocantur, quæ conferuntur per electionem legitime celebratam, atque a Superiore confirmatam. *Patronata*, quæ ad Patroni præviam præsentationem, & subsequenter institutionem a Prælate factam conferuntur; seu brevius: *Patronata* sunt, quæ subsunt Juri Patronatus. Tandem *Beneficia collativa*, seu *libera* appellantur, quæ per liberam Superioris collationem sine prævia Capitulari electione, vel alterius præsentatione conferuntur.

12 Beneficia ulterius dividuntur in patrimonialia, & non patrimonialia. *Patrimonialia* dicuntur, non quod Patrimonii naturam seu rationem habeant (nam successiones in Beneficiis Ecclesiasticis semper iniquæ, detestabiles, & Sacris Canonibus inimicæ reputantur. *c. Accepimus. De Pactis. & c. Ad extirpandas successiones, De Filiis Presbyt.*) sed quia juxta Fundatoris institutionem non possunt conferri, nisi Clericis ex tali patria, loco, vel Parochia oriundis. *Beneficia non patrimonialia* vicissim sunt, quæ cuilibet digno, undecumque oriundo, conferri valent.

13 Beneficia tandem alia dicuntur *manualia*, alia *non manualia*. Prioris generis sunt ea, quæ ad nutum conferentis avocari possunt, & propterea etiam appellantur *Beneficia revocabilia*. Sed hæc non sunt proprie dicta Beneficia, cum de se non sint perpetua. *Beneficia non manualia* econtra sunt, quæ semel collata amplius adimi non possunt, nisi certis de causis a Jure expressis.

14 Quæres. Quid sit Dignitas, Personatus, & Officium, & an differant? Resp. I. Hujusmodi vocabula quandoque sumuntur pro synonymis, prout liquet ex *c. Cum accessissent. Constit.* ubi idem Primicerius primo appellatur *Personatus*, deinde *Dignitas*, & tandem *Officium*. Unde in horum vocabulorum usu attendendam esse locorum consuetudinem, passim notant Doctores, ut Vallensis. *De præbendis n. 7.* Pirhing *eod. n. 10.* & alii.

15 Resp. II. Strictè loquendo prædicti termini inter se differunt: nam *Dignitas* est præcedentia cum jurisdictione, *Personatus* vero præcedentia sine jurisdictione. Unde ea Beneficia censentur *Dignitates*, quæ habent annexam præminentiam, atque administrationem rerum Ecclesiasticarum cum imperio, & jurisdictione, & quidem (ut notat Sylvester *ŷ. Dignitas. n. 1.*) in Foro externo contentioso: ut Præpositura, Decanatus, Archidiaconatus, Abbatia. Fatendum tamen, *Dignitatem* etiam oriri posse ex institutione: ut si in institutione Beneficii cautum fuerit, quod sit *Dignitas*. Item ex consuetudine: nam si de consuetudine Ecclesie aliqua reputetur *Dignitas*, licet de Jure non sit talis, tamen *Dignitas* censeri debet.

16 *Personatus*, proprie accipiendo hunc terminum, est præcedentia sine jurisdictione: qualem habere censetur ille, qui præ ceteris Canonicis sui Ordinis locum magis honorificum in Choro, in Capitulo, in Processionibus, & hujusmodi obtinet. Unde Beneficium illud, cui talis præminentia sedis, & præcedentia absque jurisdictione annexa est, dicitur esse *Personatus*, uti Senioratus &c.

19 *Officium* tandem est administratio rerum Ecclesiasticarum sine alia speciali præcedentia, vel jurisdictione: qualem administrationem habent Sacrista, Custos, Thesaurarius, & hujusmodi.

#### Additio.

\* Quæres. An Commenda, Præstimonium & Pensio sint dicenda Beneficia? Ante Responsum nota, quod *Commenda* nil sit aliud, quam *Custodia Ecclesie alicui commissa*, & quidem hæc antiquis temporibus collata fuit *ad tempus* etiam per Episcopos, defacto autem Auctoritate Pontificis, qui solet tales Commendas *in perpetuum* cum designatione certorum fructuum aliquoties concedere de Ecclesia eximie meritis, ut exinde commodius sustententur &c. *Præstimonium* est illud stipendium ab Ecclesiasticis redditibus abstractum, quod datur Clericis in vitæ subsidium, præsertim dum studiis operam impendunt. *Pensio* demum est certa portio fructuum ab aliquo Beneficio ad tempus separata vel ob causam temporalem, v. g. ob ministerium temporale Cantoris, Ædum Ecclesie &c. tuncque vocatur *Pensio Laicalis*; vel ob causam sustentationis ejusdem Clerici, e. g. Seniculi, & jam Emeriti, sicque nominatur *Pensio Clericalis*, atque hæc communiter sub nomine Pensionis intelligitur, nisi secus exprimatur. H. N.

Respondeo I. *Commenda*, prout nunc post Concilium Tridentinum a Summo Pontifice confertur, est proprie dictum Beneficium. Ita communis, & ratio est; quia in hac acceptione nihil ipsi deest ad rationem Beneficii proprie requisitum: est enim jus perpetuum percipiendi certos redditus ob aliquod spirituale Officium, nimirum custodiam Ecclesie Auctoritate Pontificia constitutum.

Resp. II. *Præstimonium* regulariter loquendo non est Beneficium; quia tantum datur ad tempus v. g. durante studii, nec habet annexum onus spirituale. Dixi *regulariter loquendo*, nam si conferretur in titulum, & quidem in perpetuum, foret proprie Beneficium, haberetque onus annexum recitandi Horas Canonicas; quoniam Beneficium datur propter aliquod spirituale Officium.



**Resp. III.** Pensio Laicalis non est Beneficium, uti de per se patet, cum etiam Laicis dari soleat: Pensio vero Clericalis regulariter loquendo eo modo, quo Praestimonium, non habet rationem Beneficii proprie dicti, hincque talis Pensionista etiam ante annum 14. inchoatum potest tenere Pensionem, quamvis nequeat absque dispensatione acceptare aliquod Beneficium proprie dictum; neque talis tenetur ad Horas Canonicas, etsi Pius V. tales Pensionarios obligaverit ad recitandum Officium parvum Beatæ Virginis Mariæ. Videatur præfens Auctor lib. 3. *Desret. Tit. 5. §. 3.* \*

## Q U Æ S T I O II.

De Collatione Beneficiorum.

### S U M M A R I U M.

- 18 Beneficia, quibus modis conferri soleant?
- 19 Alii modi eadem obtinendi.
- 20 Per Electionem, quomodo valide acquirantur?
- 21 Major pars eligentium, quæ?
- Vota majora, quæ sint?
- 22 Sanior pars eligentium, quæ?
- 23 Per Presentationem, quomodo acquirantur Beneficia?
- (a) Dist. 3. per totum.
- 24 Institutio, quid?
- 25 Institutio triplex, videlicet Auctorizabilis,
- 26 Collativa, seu Verbalis, &
- 27 Institutio corporalis, seu realis.
- 28 Investitura, Installatio &c. quid? & quam sit necessaria?
- 29 Per liberam Collationem conferri Beneficium, & Collatio Beneficii, quid?

**18 CONCL. I.** Beneficia Ecclesiastica tribus potissimum modis obtineri, conferrique solent, videlicet per Electionem, Presentationem, & liberam Collationem. Ita communis; atque desumitur ex illa vulgata divisione Beneficiorum in electiva, patronata, & collativa, de quibus n. 11. jam dictum est.

19 Dicitur notanter, *tribus potissimum modis*: nam, quamvis hi tres sint communiores, & præcipue usitati modi, quibus Beneficia Ecclesiastica obtineri, conferrique solent, ea nihilominus etiam nonnullis aliis modis acquiri possunt; utputa per Postulationem, per Translationem Episcoporum ab uno Episcopatu ad alium, item per Permutationem, & Resignationem in favorem tertii cum secuta Collatione. De quibus partim in progressu, partim uberius in Jure Canonico per diversos Titulos tractatur.

20 **CONCL. II.** Ut per Electionem valide acquiratur, & conferatur Beneficium Ecclesiasticum, necesse est, quod ea sit canonice celebrata, & facta a majori atque saniori parte Capituli, sive eorum, quibus jus eligendi competit. Ita desumitur ex c. *Quia propter.* & c. *In Genesi.* De Electione & aliis locis Juris Canonici, ubi dicitur, quod electio non valeat, nisi vel omnes, vel major & sanior pars Capituli consenserit in electum.

21 Circa quod notandum, quod *major pars* censetur ea, ubi est major numerus eligentium respectu totius Capituli præsentis. De jure enim non sufficit (quidquid sit de speciali quorundam locorum consuetudine contraria, de qua Engel tit. de Election. n. 37. post Zipræum) habere majora, seu plura vota comparatione alterius minoris partis c. *Ecclesia.* 48. De Election. sed requiruntur majora vota respectu totius Capituli præsentis, ita ut, si sint duodecim Vocales, requirantur saltem septem vota arg. c. *Cumana.* De Election. & c. *Si cui.* Eod. in 6. Sufficit autem quicumque excessus ultra medietatem, etiam si foret unius medii voti, v. g. si essent tredecim Vocales, septem vota jam sufficerent.

22 Porro *pars sanior* censetur ea, quæ est justior, & majori ratione nititur & auctoritate. Glossa in cit. c.

*In Genesi.* sive, ut alii loquuntur, *pars sanior* dicitur, quæ constet Viris dignitate, ætate, ac tempore officii, nec non & prudentia, pietateque magis conspicuis. Verum si nihil opponatur, nec non & in dubio, major pars numero præsumitur etiam sanior c. *Ecclesia.* 57. de Elect. ibi: *Cum, ubi major numerus est, zelus melior præsumatur.* cum concordantiis. Plura de Electione, vel Electionis confirmatione, occurrente aliquo casu, videri possunt in Jure Canonico lib. 1. *decret. tit. 6.*

23 **CONCL. III.** Per Presentationem conferuntur, atque obtinentur Beneficia Ecclesiastica, quando ad presentationem Patroni, & institutionem subsequutam, factam a Prælato, ea conferuntur. Ita in re communis. Dicitur, *ad presentationem Patroni*, id est, illius, qui habet jus præsentandi Clericum idoneum ad tale Beneficium: & id proprio nomine appellatur *Jus Patronatus*, de quo inferius (a) ex professo dicitur.

24 Additur, & *institutionem subsequutam, factam a Prælato*: siquidem *Institutio* est concessio Beneficii ad presentationem Patroni facta: & tam ipsa, quam presentatio pertinet ad Jus Patronatus. Beneficium namque Juris Patronatus non dicitur proprie conferri, cum Ordinarius non eligat personam providendam, sed proprie Ordinarius dicitur instituire, Patronus vero præsentare. Barbosa lib. 3. *Juris Ecclesiast. univ. cap. 13. n. 4.*

25 Ceterum allata particula intelligenda est de Institutione collativa. Nam, ut notat Fagnanus in c. *cum Ecclesia.* n. 29. & seqq. de *Causa possess. & propriet.* tres a SS. Canonibus assignantur species Institutionis. Prima dicitur *Institutio auctorizabilis.* nec aliud est, quam approbatio ad curam animarum arg. c. *Cum satis.* de Officio Archidiaconi. ubi Summarium sic habet: *Archidiaconus sine mandato Episcopi non comouit curam animarum, id est, non habet institutionem auctorizabilem.*

26 Altera vocatur *Institutio collativa* (quam alii *verbalem* appellant) estque ea, per quam titulus Beneficii confertur: ut si Episcopus, vel alius ordinarius Collator præsentato ad Beneficium, vel verbis expressis, vel per litteras impertitur confirmationem. Et hæc omnibus ad Beneficium Ecclesiasticum præsentatis adeo est necessaria, ut, si propria auctoritate Beneficium occupent, fructus illius colligant, aut simile quid facere præsumant, eo ipso jus ex presentatione sibi quæsitum amittant, arg. c. *Avaritie.* De Elect. in 6. & post Garziam de Beneficiis p. 11. cap. 12. n. 217. tradit Engel tit. de Instit. n. 2.

27 Tertia tandem dicitur *Institutio corporalis*, sive (ut alii loquuntur) *realis*, neque aliud est, quam missio in possessionem Beneficii; quando nempe datur cuspian actualis possessio ipsius. De hac fit mentio c. *Ad hac de Officio Archidiaconi.* ibi: *Institutio corporalis, tam super Beneficiis, quam etiam Dignitatibus ad ipsam (Archidiaconum) debet pertinere.*

28 Et hæc Institutio corporalis alio nomine vocatur *Investitura, Installatio, Missio in actualem possessionem.* Neque enim quoad titulum institutus possessionem etiam vacuum Beneficii propria auctoritate, & sine licentia, sive introductione Superioris apprehendere debet; alioquin poena saltem arbitraria per Prælatum puniendus erit. Covarruvias lib. 3. *variar. Resol. cap. 16. n. 7.* & seqq. Engel tit. de Institutione. n. 4. & alii. Præsertim, si alicujus Ecclesiæ consuetudo specialis, vel statutum id exigat, prout limitat Layman in c. *Nosli.* n. 5. De Elect. Alioquin enim illum, qui habet jus in re, sive titulum Canonicum Beneficii, posse propria auctoritate vacantem ejusdem possessionem apprehendere absque alio Superioris, vel Judicis decreto, censet Pirhing tit. de Præbendis. n. 55. citans alios.

29 **CONCL. IV.** Per liberam Collationem confertur, & obtinetur Beneficium Ecclesiasticum, quando illud solo jure Prælati libere, absque prævia Capitulari electione, vel presentatione confertur. Ita communis. Unde Barbosa loc. cit. n. 3. ait, quod *Collatio Beneficii* sit a Superiore gratuito facta concessio. Et hæc alio nomine vocatur *Provisio*: quia is, cui est facta Collatio, dicitur de Beneficio provisus, aut Beneficium de persona ejus provisum.

QUÆS-



QUÆSTIO III.

Quinam Beneficia libere conferre possint?

SUMMARIUM.

- 30 Papa habet potestatem conferendi Beneficia totius Mundi.  
 31 Solet ea conferre tribus modis, videlicet  
 32 Jure præventionis.  
 33 Jure devolutionis.  
 34 Cum certa tamen limitatione.  
 35 Et Jure concursus, quomodo?  
 36 Quid juris, si idem Beneficium a Papa, & inferiore duobus conferatur?  
 \* De Concordatis circa hoc. Addit. I. & II.  
 37 Episcopus est ordinarius Collator Beneficiorum suæ Diocesis.  
 Habet super his intentionem fundatam.  
 \* Nequit tamen sibi aliquos ex Collatis reservare fructus. Addit. I.  
 \* Vicarius Generalis quæ Beneficia possit conferre vi sui Officii? Addit. II.  
 \* Qualia Capitulum Cathedralis Sede vacante? Additio III.  
 38 Collatio Ecclesiarum Parochialium per Concursum, quæ?  
 39 Forma dicti Concursus.  
 40 Quid censendum de Primis precibus Imperatoris?  
 41 Non debent esse secundæ.  
 42 In quibus Beneficiis non habeant locum?

30 **CONCL. I.** Papa de Jure communi habet potestatem conferendi omnia Beneficia Ecclesiastica totius Mundi. Ita communis Catholicorum; & habetur expresse in Jure Canonico variis in locis, ut c. 2. de Præb. in 6. & c. Si Papa. De Privileg. in 6. & Clem. 1. Ut lite pendente &c. ibi Ad quem (Romanum Pontificem) Ecclesiarum, Personatum, Dignitatum, aliorumque Beneficiorum Ecclesiasticorum plena & libera dispositio ex suæ potestatis plenitudine noscitur pertinere. Unde receptum dictum est; quod Papa habeat concurrentem jurisdictionem cum omnibus Ecclesiæ Prælati: quinimo ipse est Ordinarius Ordinariorum.

31 **CONCL. II.** Tribus præcipue modis Papa loquendo de plenitudine potestatis potest Beneficia conferre: videlicet jure præventionis, jure concursus, & jure devolutionis. Ita Rebuffus in Praxi. tit. de Devolutionibus. §. 46. & alii. idque ostenditur inductione.

32 In primis Jure præventionis id fit, quando Romanus Pontifex cuiuspiam confert gratiam expectativam ad Beneficium primo vacaturum arg. c. Ductum. & c. Licet Ecclesiarum. De Præbendis. in 6. cum concordantiis. Et hoc est speciale in Summo Pontifice, neque alteri concessum, quod Beneficium, seu Præbendam nondum vacantem certæ personæ promittere, & jus ad illud dare queat arg. c. Nulla. De Concess. Præbende. Idque adeo verum est, quod etiam promissio Beneficii vacaturi per Prælatum Papa inferiorem facta nihil valeat, nullamque inducat obligationem c. Relatum. & c. Ex tenore. Eod. ubi hujusmodi promissiones Beneficii vacaturi, etiam scriptis datæ, non tenere dicuntur; cum sint attentatæ contra dispositionem Concilii Lateranensis.

33 Deinde Jure devolutionis Beneficia Ecclesiastica conferuntur a Papa, quando propter negligentiam conferendi, vel moram eligendi ab inferioribus Ecclesiæ Prælati commissa, talis potestas conferendi ab inferioribus devolvitur ad Summum Pontificem; quia enim Ecclesiæ Cathedrales, & Regulares ultra tres menses vacare, seu Prælato carere non debent. text. clar. c. Ne pro defectu. De Election. alia vero Beneficia intra semel-

tre, seu sex menses conferenda sunt c. Nulla. De Concess. Præbende. hinc, si ordinarii Electores aliquem intra præfatum tempus eligere, aut ei Beneficium conferre negligant, vel eligant, seu conferant illud indigno, jus eligendi vel conferendi Beneficium plerumque devolvitur ad proximum Superiorem, ac eo etiam negligente gradatim ad Summum Pontificem. c. Quamquam. De Elect. in 6. & cit. c. Nulla. De Concess. Præb.

34 Verumtamen in hoc posteriori loco habetur specialis limitatio; dum statuitur, quod, quando ad Episcopum spectat collatio Beneficii, & ipse ultra debitum tempus conferre distulit, tunc non ad Superiorem sive Metropolitanum, sed ad Capitulum devolvatur collatio illius Beneficii. Idque merito statutum fuit propter communionem, quæ est inter Episcopum, & Capitulum suum Cathedralis: quamquam hoc ipsum procedat dumtaxat in Beneficiis, quæ pertinent ad Episcopum jure proprio, non autem in devolutis ad Episcopum propter negligentiam, vel delictum inferioris Collatoris, ut observat Abbas in cit. cap. Nulla. De Concess. Præb. citans alios.

35 Tandem Jure concursus Papa conferre potest Beneficia Ecclesiastica, eo quod ipse cum quolibet ordinario Collatore concurrat in potestate & jurisdictione. Nam quævis Papa potestatem conferendi Beneficia Ordinarius contulerit, sibi tamen majorem reservavit. c. Ductum. De Præbendis. in 6.

36 Unde de plenitudine potestatis potest Summus Pontifex qualibet totius Mundi Beneficia Ecclesiastica conferre, etiam nulla interveniente negligentia inferiorum Collatorum ordinariorum; & tunc inter Papam & reliquos inferiores Collatores datur locus præventioni, ita ut, qui prior contulit, ejus collatio rata sit. Quod si idem Beneficium a Papa uni, & ab Ordinario alteri collatum sit eadem die, nec appareat, quæ collatio fuerit prius facta, erit potior conditio possidentis: si vero neuter possideat, præfertur is, cui Papa, vel ejus Legatus contulit Beneficium. text. clar. Si a Sede. De Præb. in 6.

Additio I.

\* Porro illud adhuc notandum hic est, quod Summus Pontifex, etsi valeat de plenitudine potestatis conferre omnia Beneficia totius mundi: hanc tamen potestatem absolutam non exerceat apud multas Nationes ob varia Concordata inter Sedem Apostolicam, & similes Nationes erecta, juxta quæ se solet regulare. Sic de Concordatis Germaniæ inter Nicolaum V. Pontificem, & Fridericum III. Imperatorem anno 1447. initis, plura poterunt videri in Jure Canonico Lib. III. Decret. Tit. §. §§. 18. & 19.

Additio II.

\* In specie ibidem Summus Pontifex promittit, quod neque per gratias expectativas, neque per quamvis aliam dispositionem velit impedire liberam Collationem Ordinariorum, neque Episcopatus Germaniæ immediate conferre, sed relinquere liberæ Electioni Canonice Cathedralium. Qua tamen ipsa occasione præter confirmationem electorum Episcoporum etiam nonnullas alias Dignitates & Beneficia sibi in Germania immediate reservavit, quæ potiora sunt sequentia. I. Quæ vacant in Curia: censentur autem Beneficia tunc vacare in Curia, quando Beneficiatus in ipsa Curia Romana, vel prope eandem nimirum intra spatium duarum dietarum (ubi una dieta, teste præsentis Auctoris in Jure Canonico Lib. 3. Decr. Tit. §. n. 453. & Tit. 40. n. 27. quatuor circiter efficit milliaria Germanica) moritur, sive id fiat in accessu, sive in recessu ab eadem Curia. II. Quæ tamquam incompatibilia vacant per novam



## 340 Tract. XI. De Beneficiis, Jure Patronatus, & Decimis. Dist. I.

Dignitatem &c. a Summo Pontifice collatam. III. Quæ vacant per obitum Cardinalium; unde Episcopi Germaniæ in Cardinales assumpti speciale indultum a Papa obtinere solent, pro libera post obitum suum Electione instituenda, uti notat P. Schmier hic. IV. Quæ vacant per legitimam cassationem; aut per depositionem interveniente sententia ipsiusmet Summi Pontificis, vel etiam per translationem Auctoritate Pontificia evenientem, aut per renuntiationem liberam a Papa acceptatam. V. Conferat Summus Pontifex in Germania, nisi alicubi sint specialia Privilegia, Dignitates majores post Pontificales in Ecclesiis Cathedralibus, & Principales in Collegiatis, quales ordinarie sunt Præposituræ. Dixi: nisi alicubi sint specialia Privilegia, qualia teste Pichler Lib. 3. Tit. 5. n. 20. habent Præposituræ Cathedralium Ecclesiarum Salisburgensis, & Augustanæ, ac Elvacensis Principalis &c. quæ sunt electivæ; Electus tamen a Summo Pontifice est confirmandus: item Præposituræ Ecclesiarum Collegiatarum Bavaricæ, ad quas nominare solet Serenissimus Elector &c. VI. Quoad reliquas Dignitates non electivas, item quoad alia Beneficia in Germania (si tamen non sint Juris-Patronatus Laicalis, nec manualia, nec Regularia ad nutum Superioris auferibilia, nec accessorie Mensæ Episcopali, Capitulari, vel Monasterio unita, neque electiva &c.) sibi Pontifex reservavit potestatem conferendi alternative seu alternis vicibus, ita, ut regulariter loquendo eadem conferat Mensibus Januario, Martio, Majo, Julio, Septembri, & Novembri, si nimirum in dictis Mensibus hæc Beneficia vacent, saltem si hæc vacatura per mortem & non præcise per resignationem contingat: pro reliquis sex Mensibus (nempe Februario, Aprili, Junio, Augusto, Octobri, & Decembri) permittitur potestas conferendi ordinariis alias Collatoribus. Incipiunt autem singuli Menses (e. g. Januarius) statim, postquam hora 12. nocturna ultimi diei præcedentis Mensis fuit audita, & finiuntur hora duodecima noctis ultimæ illius Mensis, puta in allegato exemplo hora duodecima diei trigesimi primi Mensis Januarii. Ceterum solet subinde Pontifex suos Menses aliis de Ecclesia bene meritis relinquere. Sic in Bavaria juxta particularia Concordata ibidem erecta in Mensibus Papalibus præsentat Serenissimus Elector, si pro tunc vacent. Vide de similibus plura apud hunc Auctorem Lib. 3. Decret. Tit. 5. & apud Canonistas, si extraordinarius casus occurrat. Quoad Bavariam vero de hac materia etiam tractat intimus Cancellarius de Schmid Tom. 1. Semicenturia II. Controversia XLI. XLII. & XLIII. \*

37 CONCL. III. Post Papam ordinarius Collator Beneficiorum in sua Diocesi est Episcopus. Patet hoc ex c. Nullus omnino. 16. q. 7. & c. Cum ex injuncto. §. fin. De Hereticis. ibi: Ad cujus (Episcopi) officium tam institutio, quam destitutio Sacerdotum noscitur pertinere. Hinc Abbas in cit. c. Cum ex injuncto. n. 2. ait, quod Episcopus fundatam intentionem habeat super institutione, ac destitutione Sacerdotum in Beneficiis suæ Diocesis, & sibi sibi vendicat, probare debeat, jure speciali id sibi competere, quia de jure communi ista pertinent ad Episcopum. Unde de his inferioribus Collatoribus impræsentiarum non est necesse agere; cum potius specialia jura, quæ nonnullis inferioribus Collatoribus competunt, inspicienda veniant.

### Additio I.

\* Quod si scire cupias, utrum Episcopus conferendo alicui Beneficium possit sibi ipsi, vel suæ Mensæ Episcopali ex collato quidpiam v. g. medietatem fructuum primi anni reservare? Resp. negative, nam Beneficia sunt sine diminutione conferenda juxta Titulum XII. & ejusdem Capitulum unicum Libro 3. Decretalium.

Nec dicas. Papa potest sibi reservare Annatas, id est, fructus primi anni ex Beneficiis Sedi Apostolicæ reservatis, & ab eadem impetratis Cameræ Apostoli-

cæ persolvendos: ergo idem poterit Episcopus. Respondetur enim negando consequentiam, & paritatem: nam Summo Pontifici tamquam supremo Capiti Ecclesiastico competit plenaria dispositio circa Beneficia. cap. 2. De Prab. in 6. non sic inferioribus Collatoribus quibus talis reservatio expresse reperitur interdicta, uti patet ex jam dictis superius, & cap. Prohibemus. De Censibus. De quibusnam autem Beneficiis sibi reservatis ipsemet Papa vi Concordatorum Germaniæ soleat exigere certas pensiones seu Annatas, vide lib. 3. Decret. Tit. 12. n. 16. ac seqq. & Pichler Lib. 3. Decret. Tit. 5. n. 61. \*

### Additio II.

\* Concl. IV. Vicarius Generalis Episcopi (ab aliis vocatus Officialis) vi sui Officii, ac nisi specialiter concedatur, non habet potestatem conferendi illa Beneficia, quæ alias spectant ad liberam Collationem Episcopi. Ita communis. Ratio est: quia licet alias vi generalis mandati Vicarius Generalis possit omnia, quæ suo Episcopo concessa intelliguntur; cum constituat unum cum eo Tribunal juxta cap. 2. De Consuetud. in 6. excipiuntur tamen res valde arduæ, & Collationes liberæ Beneficiorum, quæ habent se per modum donationum, uti expresse deciditur cap. 3. De Officio Vicarii. in 6. Hoc tamen non obstante potest vi officii sui ab aliis Patronis præsentatos instituere in Beneficiis, citra ulteriorem specialem sui Episcopi licentiam, quia eandem ipsiusmet Jus concedit, uti eruitur ex cap. 3. De Institutionibus. ubi Summarium sic habet: Institutio Beneficiorum spectat ad Episcopos, vel eorum Officiales.

### Additio III.

\* Concl. V. Capitulum Cathedrale Sede Episcopi vacante non potest concedere Beneficia illa, quæ sunt liberæ Collationis ipsius Episcopi, uti decisum legitur cap. 2. Ne Sede vacante. unde in tali casu, si simile Beneficium post mortem Episcopi vacare contingeret, ac novi Episcopi Electio, vel Confirmatio in longius tempus protraheretur, debet Capitulum regnans, vel potius constitutus ab eodem Vicarius Capitularis idoneum interim in illa Ecclesia vacante substituere, assignata ei ex fructibus Beneficii congrua portione, donec novus Episcopus de alio provideat; uti recte notat præsens Auctor Lib. 3. Decret. Tit. 5. n. 183. ubi, uti etiam Tit. 9. fusius tractat de hac materia. Ceterum, etsi Capitulum regnans nequeat conferre Beneficia antea libere ad Episcopum pertinentia, potest tamen per horum Vicarium Capitularem (quem tenetur juxta Concil. Trident. Sess. 24. de Reform. cap. 16. intra octiduum a morte Episcopi vel specialem constituere, vel præcedentem demortui Episcopi Vicarium Generalem confirmare) a Patronis Præsentatos ad certa Beneficia Patronatus instituere; uti clare habetur cap. 1. De Institutionibus. in 6. \*

38 Quæres. Quid censendum de Collatione Parochialium Ecclesiarum per Concursum. Resp. De hoc ex professo agi in Concil. Trid. Sess. 24. De Reform. cap. 18. Cum enim maxime expediat animarum salutem, eas a dignis & idoneis Parochis gubernari, hinc Concilium ibidem saluberrime decrevit, ut vacante Ecclesia Parochiali interim, si opus fuerit, idoneus in ea Vicarius cum congrua fructuum portione assignatione constituatur, donec ipsi de Rectore provideatur. Exinde voluit, ejusmodi Parochias non arbitrio Episcopi, sed per Concursum esse conferendas.

39 Porro forma Concursum hæc assignatur, ut vacante Ecclesia Parochiali intra decem dies, vel aliud tempus ab Episcopo præscribendum aliquot Clerici ad Ecclesiam regendam idonei, coram deputandis Examinatoribus nominentur, vel, si ita pro Regionis more



## Q. IV. Quibus conferenda sint Benefic. ubi & de Conditionib. &c. 341

more videatur magis expedire, per Edictum etiam publicum ad talem Parochiam aspirantes vocentur, & comparentes examinentur per Examinatores in Synodo Dicecesana deputatos. &, qui peracto examine idonei iudicati fuerint ætate, moribus, doctrina, prudentia, aliisque rebus ad vacantem Ecclesiam gubernandam opportunis, Episcopo denuntientur. Ex quibus deinde Episcopus eum eligat, quem ceteris magis idoneum iudicaverit, ipsique, & non alii Parochia conferatur; prout amplius habet Concil. Trid. loc. cit. Verum ab hoc Concurfu sunt eximendæ nonnullæ Parochiæ, de quibus infra Dist. 3. n. 41. & 42.

40 Quæres ulterius. Quid sit censendum de primis Precibus Imperatoris? Resp. Romanus Pontifex Imperatori recens electo, & a Papa confirmato, id postulanti, per speciales litteras concedere solet pro Ecclesiis Germaniæ singulare privilegium, virtute cuius in qualibet Ecclesia semel personam idoneam, sibi gratam & acceptam, ordinario Collatori nominare possit, qui ad Beneficium vacans, dummodo ceteroquin sit idoneus, omnino recipi debeat. Et huiusmodi nominatio per Romanorum Imperatorem facta dicitur proprio nomine, *Præces Imperatoris*.

41 Ceterum prædictæ Præces Imperatoris sunt intelligendæ, dummodo idem Collator non nisi semel, id est, pro unico tantum Beneficio gravetur, nam alioquin non primæ, sed secundæ Præces conferentur. Gravasse autem tunc censetur, si Præces ad effectum pervenerint, atque supplicans actu Beneficium illud obtinuerit: nam, si hic Precibus renunciaverit, vel ex quocumque alio impedimento Beneficium illud non obtinuerit, nihil prohibet, quin Imperator novas Præces pro alio ad eundem Collatorem dirigere valeat.

*Additio.*

\* Atque dictæ Præces se extendunt non solum ad Beneficia simplicia, verum etiam ad curata; ad illas quoque Dignitates, quæ in sequenti numero non excipiuntur: item ad Personatus, Canonicatus &c. non obstante, quod alias illa Beneficia sint reservata Summo Pontifici, vel subiecta Alternativæ: item neque obstante Turno (uti vocant Canonici) neque devolutione ad inferiorem Summo Pontifice, neque resignatione libera in manus Ordinarii, neque obstante Jure Patronatus Ecclesiastici penes alium residente. Uti vix non in formalibus notat Pichler in suo *Candidato abbreviato*. Lib. 3. Tit. 38. n. 12.\*

42 Ab his tamen primis Precibus excipiuntur Dignitates Pontificales, & primæ post illas; ut Præposituræ, vel Decanatus: item Prælaturæ, primæque dignitates in Monasteriis, & Ecclesiis Collegiatis. Excipiuntur etiam Beneficia, quæ pertinent ad Jus Patronatus Laicorum: nam huic Pontifex numquam censetur derogare, nisi id exprimat. Insuper primæ Præces Imperatoris locum non habent, nisi ordinarius Collator ad minus quatuor Beneficia conferre possit: nam si unum dumtaxat, vel alterum conferendum habeat, non tenetur ejusmodi Præces admittere. Quinimo hæc clausula, *Dummodo ipsi Collatores, & Collatrices saltem quatuor Beneficia conferre habeant*: litteris Pontificiis, Cæsareæ Majestati dictam facultatem concedentibus, inferi solet, ne alioquin facile contingat, ut quis toto vitæ suæ tempore impediatur ab usu juris liberæ suæ Collationis. Engel tit. De Præbend. n. 70. Wagnerek cap. 15. cui. §. 2. tod. in 6. atque ipsemet præfatus Auctor Lib. 3. Decret. Tit. 5. §. 20.

### QUESTIO IV.

Quibus conferenda sint Beneficia? ubi & de Conditionibus ex parte eorum requisitis.

#### SUMMARIUM.

- 43 Beneficia Ecclesiastica non nisi dignis conferenda.
- 44 Ea dignioribus in conscientia conferri debent.
- 45 Mens Concilii Trident. circa hoc. Et Decretum Innocentii XI.
- 46 Conclusio procedit de omnibus Beneficiis curatis.
- 47 Quid de Beneficiis simplicibus,
- 48 Patrimonialibus, & Patronatis?
- (b) Ut infra dicitur dist. 3. n. 44. & seqq.
- 49 Ecclesia magis utilis, quis?
- 50 Dignus respectu Beneficii, & dignior, quis?
- 51 Unde desumenda major dignitas?
- 52 Indignus, quis?
- 53 Conditiones, ut quis sit dignus ad Beneficium.
- 54 I. Thorus legitimus.
- 55 II. Status Clericalis.
- 56 III. Ætas legitima, & quis sit talis?
- 57 IV. Celibatus.
- 58 V. Absentia censura, atque irregularitatis.
- 59 Quid de excommunicato excommunicatione minori?
- 60 VI. Probitas morum. VII. Scientia debita. VIII. Habilitas corporis.
- 61 IX. Intentio Status Ecclesiastici.
- 62 X. Carentia Beneficii incompatibilis.
- (c) Juxta dicenda dist. 2. n. 19. & seqq.
- 63 Electio indigni est ipso jure irrita.
- 64 Valet tamen electio digni omisso digniore.

43 **CONCL. I.** Certum est, Beneficia Ecclesiastica non nisi dignis, atque idoneis conferenda esse. Ita communis: nam rectæ rationi adversatur, assumere ad officium spirituale personam idoneam. Hinc c. Grave nimis. De Præbend. dicitur: *Grave nimis est, & absurdum, quod quidam Ecclesiarum Prælati, cum possint viros idoneos ad Ecclesiastica Beneficia promovere, assumere non verentur indignos, quibus nec morum honestas, nec literarum scientia suffragatur, carnalitatis sequentes affectum, non iudicium rationis: unde quanta Ecclesiis damna proveniant, nemo sanæ mentis ignorat* &c.

44 **CONCL. II.** Electores, Patroni, & Collatores Beneficiorum, præsertim curatorum, quantum in ipsis est, sive in ipsorum libera dispositione, tenentur in conscientia ad præferendum inter dignos digniorem, seu quem magis Ecclesiæ utilem ipsi iudicaverint. Ita post D. Thomam 2. 2. q. 63. art. 2. & q. 185. art. 5. Doctores passim; adeo, ut Lugo disput. 35. de Just. & Jur. sect. 2. n. 10. hanc sententiam appellet communissimam. Desumitur hoc ex c. Metropolitanano. dist. 63. volente, quod optimus ordinetur. Concordat textus c. Licet. 8. q. 1. ibi: *Qui præstantior est ex omni populo, qui doctior, qui sanctior, qui in omni virtute eminentior ille eligatur ad Sacerdotium.* & alibi. Accedit ratio: quia dispensationes spiritualium principaliter ordinantur ad utilitatem communem, juxta illud 1. Corinth. 12. *Unicuique datur manifestatio spiritus ad utilitatem*: atqui communis isthæc utilitas non observatur, quando in dispensatione spiritualium, seu promotione ad Beneficia Ecclesiastica illi, qui sunt simpliciter minus boni, præferuntur melioribus; ergo.

45 Hinc Concil. Trid. Sess. 24. c. 1. De Reform. expresse ait: *Alienis peccatis communicantes mortaliter peccant, qui, nisi quos digniores, & Ecclesiæ magis utiles ipsi iudicaverint, ad Ecclesias promoveant.* Quorum verborum sensum, ceteroquin admodum clarum, cum nonnulli Auctores sinistra interpretatione perverterint, Innocentius XI. sequentem inter alias, ordine 47. Propositionem damnavit: *Cum dixit Concil. Trident., eos alienis peccatis communicantes mortaliter peccare, qui, nisi quos digniores, & Ecclesiæ magis utiles ipsi*



## 342 Tract. XI. De Beneficiis, Jure Patronatus, & Decimis. Dist. I.

*judicaverint, ad Ecclesias promovent, Concilium vel primo videtur per hoc digniores non aliud significare velle, nisi dignitatem eligendorum sumpto comparativo pro positivo; vel secundo locutione minus propria ponit digniores, ut excludat indignos, non vero dignos; vel tandem loquitur tertio, quando fit Concurfus. Haftenus Propositio damnata.*

46 Dicitur notanter in conclusione Beneficiorum, praesertim curatarum. Eam enim post citatum Decretum Innocentii XI. procedere non solum de Episcopatibus, de quibus ex professo loquebatur Concilium Tridentinum, sed etiam de omnibus illis, qui habent jurisdictionem quasi Episcopalem, sive sint Abbates, sive Vicarii, aut Priores nullius Diocesis, sive Praelati Regulares, ob identitatem rationis, quin etiam de illis qui eliguntur ad Beneficia Parochialia, ad longum deducit Jo. Cardenas in *Crisi Theologica. ad Propositionem 47. Innocentii XI.*

47 Notat tamen citatus Auctor n. 2. neque Concil. Trid. Sess. 24. cap. 1. De Reform. neque Propositionem allegatam Innocentii XI. agere de Beneficiis simplicibus, & nullam animarum curam habentibus; nam Concilium expresse agit de Pastoribus Ecclesiarum, Propositio vero citata agit contra eos, qui Concilium perperam interpretabantur. Hinc non pauci Doctores apud Lugonem, loc. cit. n. 10. oppositum tenent de Beneficiis simplicibus: & quod in his non sit peccatum mortale, praetermittere digniorem, dummodo vere dignus & idoneus instituitur, censet Layman lib. 4. tract. 2. cap. 15, n. 8. post Sotum, Lessium & alios: siquidem Ecclesia plerumque non magnum inde detrimentum patitur.

48 Additur in Conclusionem quantum in ipsis est: nam in Beneficiis patrimonialibus, sive quae ex primæva fundatione, statuto vel consuetudine, certo personarum generi, v. g. talis Familiae, Patriae &c. conferenda sunt, id observari debet, dummodo adsint idonei, qui ex tali genere institui possint non obstante, quod alii meliores, sed extranei, praesto sint. Deinde, quando Patronus, praesertim Laicus, praesentat Clericum dignum ad Beneficium, tenetur eum Episcopus instituere (b) haud obstante, quod judicet aliquem alium fore digniorem: siquidem hic est favor specialis, & privilegium ratione Fundationis Patrono concessum, ut, quem voluerit, praesentare valeat, dummodo is ceteroquin idoneus sit, ac dignus. Quinimo ex hoc fundamento probabiliter tradunt nonnulli Auctores, quos citat, & sequitur Layman loc. cit. cap. 15. n. 7. Patronum Laicum plerumque satisfacere obligationi suae, si praesentet dignum, ac idoneum, ideo, ut periculum non sit, Ecclesiam ex illius provisione damnum accepturam: quamvis secus dicendum sit de Praelatis, & Patronis Ecclesiasticis, utpote quibus ex officio incumbit, Ecclesiae quam optime providere.

49 Dicitur ultimo, seu quem magis Ecclesia utilem judicaverint: quia non tenetur quis assumere simpliciter meliorem, sed meliorem quoad regimen Ecclesiae, qui scilicet possit Ecclesiam & instruere, & defendere, & pacifice gubernare, prout loquitur Doctor Angelicus cit. q. 185. art. 3. Unde & Concilium Trid. loc. cit. notanter monet, eos a Promotoribus esse promovendos ad Ecclesias, quos digniores, & Ecclesiae magis utiles ipsi judicaverint. Hinc pro dictorum intelligentia.

50 Notandum, quod Dignus respectu Beneficii Ecclesiastici dicatur omnis ille, qui habet sufficientiam, omnesque qualitates a Jure requisitas ad ejus ministerium. Dignior vero, qui comparatione aliorum majorem sufficientiam, aptitudinemque ad administrandum habere dignoscitur. Et quidem isthaec major sufficientia, dignitasque non praecise mensuranda est ex majori doctrina, vel majori probitate, aut nobilitate, sed conjunctim ex omnibus animæ & corporis dotibus, ipsaque aptitudine ad regendum, adeo, ut Ecclesiae, sive Praelaturae, cui praeficitur, utilis fore credatur.

51 Et notanter hoc additur; nam major isthaec dignitas est desumenda per comparisonem ad bonum commune: contingit autem quandoque, quod ille, qui est minus sanctus, & minus sciens, possit magis conferre ad bonum commune, propter potentiam, vel industriam saecularem, vel propter aliquid hujusmodi: uti notat D. Thomas cit. quest. 63. art. 2.

52 Tandem Indignus censetur, cui deest aliqua ex qualitatibus ad ministerium Beneficiale Jure requisitis. Quod ultimum, ut melius pateat, sit

53 CONCL. III. Ad hoc, ut quis sit dignus sive idoneus ad Beneficium Ecclesiasticum, plures requiruntur conditiones; videlicet Thorus legitimus, Clericatus, Aetas conveniens, Coelibatus, Absentia Censurae atque Irregularitatis, Probitas morum, Scientia debita, Habilitas corporis, Intentio Status Ecclesiastici, & Carentia alterius Beneficii incompatibilis. Ita Lessius lib. 2. cap. 34. dubit. 17. & seq. omnes has conditiones ad longum explicans, & alii passim.

54 Itaque ad obtinendum Beneficium Ecclesiasticum requiritur I. Thorus legitimus; hoc est quod quis ex legitimo Matrimonio procreatus fuerit. Illegitimus enim cujuscunque Beneficii incapax est, nisi cum eo dispensetur.

55 II. Status Clericalis, id est, ut quis saltem prima Tonsura initiatus sit. Nam alias quilibet, & ad quodlibet Beneficium inhabilis existit, adeo quidem, ut non sufficiat, post illud jam acquisitum tonsurari. c. Ex litteris. De Transaction. Quinimo si Beneficium ex sua institutione requirat certum Ordinem, quicumque illo Ordine caret, hoc ipso inhabilis censetur ad ejusmodi Beneficium: nisi forsan dictum Ordinem intra tempus a jure praescriptum obtinere valeat: prout adeptus Ecclesiam Parochialem satisfacit, si intra annum, a sibi commissi regiminis tempore numerandum, se faciat ad Sacerdotium promoveri. c. Licet Canon. 23. De Elect. in 6.

56 III. Aetas legitima, nisi cum aliquo dispensetur c. Cum in cunctis. 1. de Elect. Porro pro quocunque Beneficio ad minimum requiritur aetas quatuordecim annorum inchoatorum; prout novissime statuit Concil. Trid. Sess. 23. cap. 6. de Reform. ibi: Nullus ante decimum quartum annum Beneficium possit obtinere. Deinde ad Dignitates, vel Personatus, quibus animarum cura nulla subest, requiruntur viginti duo anni juxta Concil. Trid. Sess. 24. cap. 12. de Reform. Verum ad Beneficium Parochiale requiruntur anni viginti quinque ad minus inchoati. cit. c. Licet Canon. De Elect. in 6. ibi: Decernentes, collationes de Parochialibus Ecclesiis, iis, qui non attigerint vigesimum quintum annum, de cetero faciendas viribus omnino carere. Tandem ad Episcopatum requiritur aetas triginta annorum. cit. c. Cum in cunctis. de Election.

57 IV. Calibatus, hoc est, ut quis non sit Matrimonio ligatus. Siquidem quaelibet collatio Beneficii facta ei, qui Matrimonio junctus est, invalida existit, nisi forsan quis consentiente conjuge Castitatem voverit perpetuam, nec bigamus existat. c. Sane. 2. De Clericis conjugatis. Quinimo, si Clericus in minoribus Ordinibus constitutus habeat Beneficium, & postea contrahat Matrimonium, illud ipso jure perdit arg. cap. 1. & c. Quod a te Eod. & cum Communi Doctorum tradit Sanchez lib. 7. de Matrim. disp. 42. n. 4.

58 V. Absentia Censurae atque Irregularitatis hoc est, ut quis non sit detentus ullo Juris impedimento, utputa Irregularitate, Excommunicatione, aut alia Censura Ecclesiastica. Collatio siquidem Beneficii nulla est, ipsoque jure irrita, si fiat excommunicato excommunicatione majori, vel suspensio, aut interdicto; prout patet ex c. Postulastis. De Clerico excommunicato. & c. Cum directus. De Consuetud. & c. 1. de Postulat. Pralat. cum concordantiis.

59 Additur notanter, excommunicato excommunicatione majori: quia, si Beneficium conferatur excommunicato excommunicatione minori, collationem non esse ipso



ipso jure irritam, sed irritandam *arg. c. Si celebrat. De Clerico excomm.* consuet. Lessius *loc. cit. n. 116.* quamvis nonnulli oppositum teneant.

60 VI. *Probitas morum.* VII. *Scientia debita.* Et VIII. *Habilitas corporis*, hoc est, ut quis bonis moribus, & scientia commendabilis existat. *c. Cum in cunctis. De Elect.* & alibi: simulque ea corporis aptitudine præditus sit, ut decenter officium suum præstare valeat.

61 IX. *Intentio Status Ecclesiastici.* Si enim quis accipiat Beneficium Ecclesiasticum eo dumtaxat animo, ut ex ejus fructibus sustentari valeat, donec studia sua absolverit, vel divitem uxorem repererit, intentione postea Beneficium deferendi, peccat mortaliter, nec potest tuta conscientia illud retinere. Lessius *loc. cit. dub. 26. n. 122.* allegans communem. Nihilominus satis est, ut quis sincero animo, bonaque fide proponat Statum Ecclesiasticum retinere, neque ab eo resilire, nisi iusta causa supervenerit: quia non est mens Ecclesiæ, per Beneficium ita firmiter adstringere Clericum ad Statum Ecclesiasticum, ut nulla de causa, licet adhuc sit constitutus in Ordinibus minoribus, possit eum deferere ineundo Matrimonium.

62 X. *Carentia alterius Beneficii incompatibilis*, juxta inferius dicenda *Dist. 2. Quæst. 2.* Ceterum hoc non ita intelligendum est, quasi Collatio secundi Beneficii incompatibilis sit nulla: quinimo ea est valida, sed adepta illius pacifica possessione vacat primum; prout declarasse Sac. Congregationem Cardinalium Concilii Trid. Interpretum refert Fagnanus *c. Supermordenata: n. 9. de Præbend.* Quod si vero Beneficiarius utrumque retinere perrexerit, utroque privatus existit ipso jure. (c)

63 CONCL. IV. Electio indigni, seu carentis aliqua ex qualitatibus ad ministerium Beneficiale jure requisitis, irrita est, ac nullius roboris: valet tamen electio de digno celebrata omisso digniori. Prior pars patet ex pluribus textibus Juris Canonici, in explicatione singularum qualitatium hæcenus adductis. Concordat. Concil. Trident. *sess. 22. cap. 4. de Reform.* ibi: *Nec aliis imposterum fiat provisio, nisi iis, qui jam ætatem, & ceteras habilitates integre habere dignoscantur; aliter irrita sit provisio.*

64 Altera pars est Zoësi *tit. de Elect. n. 45.* Engel *Eod. n. 47.* & aliorum. Ratio est quia Ecclesia nullibi rejicit, neque irritat electionem in de digno celebratam omisso digniore (bene tamen electionem indigni) idque ob bonum pacis: alioquin enim omnes propemodum electiones essent in discrimine, ac daretur locus infinitis litibus, si ea dumtaxat de causa posset electio impugnari, atque irritari, quod non fuerit electus dignior. Nec obstat, quod scienter eligentes dignum omisso digniori peccent; nam multa fieri prohibentur, quæ, si facta fuerint, obtinent roboris firmitatem. ut dicitur *cap. Ad Apostolicam. De Regularibus.*

## Q U Æ S T I O V.

Quæ sint Obligationes Beneficiorum?

## S U M M A R I U M.

65 Obligatio Beneficiorum multiplex.

66 Una est Horarum Canonicarum recitatio.

(d) *Tract. 6. Dist. 1. n. 24. 31. & seqq.*

67 Alia est Residentia personalis.

68 Episcopi & Pastores tenentur residere Jure Divino.

69 Alii vero Beneficarii Jure Ecclesiastico.

70 De consuetudine excipiuntur Beneficia simplicia.

71 Solvitur instantia.

72 Quibus de causis liceat abesse a Beneficio?

73 Episcopus quando, & quamdiu possit abesse?

74 Item & Canonici?

\* Ubi etiam de fructibus, quos tempore absentiae lucrantur.

75 Quid de Parochis?

76 An hi possint abesse sine alia licentia per duos menses? Affirmant aliqui.

77 Melius alii negant. cum *Addit.*

78 Quid in casu subita necessitatis?

79 Vel in absentia ultra duos menses?

80 Solvitur instantia.

\* Additiones duæ notabiles.

65 CONCL. I. Obligatio Beneficiorum multiplex esse potest, pro qualitate scilicet Beneficiorum, atque Foundationum diversitate. Patet hoc: tum quia in una Foundatione plura Missarum onera Beneficario imponuntur, quam in altera: ubi de obligatione dictas Missas perfolvendi plura invenies *Tract. 14. Dist. 5. n. 37. & seqq.* tum quia nonnulli eorum quandoque ad Chororum alligati existunt, non vero alii. Tacentur aliæ speciales obligationes, quæ quibusdam Beneficiis vi primævæ suæ Foundationis impositæ sunt, non aliis: unde tenor Litterarum Foundationis vel maxime inspiciendus & exacte observandus erit.

66 CONCL. II. Una principalis Beneficiorum omnium, etiam necdum in sacris Ordinibus constitutorum, obligatio est recitatio quotidiana Horarum Canonicarum. Ita communis, & patet ex jam superius (d) dictis.

67 CONCL. III. Alia Obligatio Clericis Beneficariis incumbens est Residentia personalis. Patet hoc tum ex Jure Canonico antiquo *1010 Titulo de Clericis non residentibus*; tum Jure novo, nempe ex Concil. Trid. *sess. 23. de Reform. cap. 1.* ubi etiam adjungitur, saltem de Patriarchis, Archi-Episcopis, Episcopis, & Inferioribus animarum curam habentibus, quod ultra tempus a Jure concessum absentes præter reatum peccati mortalis etiam pro rata temporis fructus non faciant suos, nec tuta conscientia retinere possint, alia etiam declaratione non secuta. Plura de hac Residentia videri poterunt in Jure Canonico *Lib. 3. Decret. tit. 4.*

68 CONCL. IV. Episcopi & Pastores, quibus cura animarum commissa est, tenentur ad ejusmodi Residentiam personalem de Jure naturali, & Divino, saltem loquendo in genere, ac in illis circumstantiis, ubi Jus positivum abesse non concedit. Ita Lessius *lib. 2. de J. & J. cap. 33. dubit. 26.* Herincx *disp. 7. de J. & J. quæst. 4.* Vallenſis, & alii; idque satis aperte supponitur in Concilio Trid. *cit. cap. 1.* ibi: *Cum præcepto Divino mandatum sit omnibus, quibus cura animarum commissa est, oves suas agnoscere &c. Quæ omnia nequaquam ab iis præstari, & impleri possunt, qui gregi suo non invigilant, neque assunt, sed mercenariorum more deferunt, Sacrosancta Synodus eos admonet, ut NB. præceptorum Divinorum memores &c. in judicio & veritate pascant &c.* His simul verbis insinuat ratio Conclusionis: siquidem sedulorum Pastorum est, gregi suo invigilare, eique assistere, quod fit per Residentiam personalem, non autem mercenariorum more eundem deferere.

69 CONCL. V. Etiam reliqui Beneficarii, curam animarum non habentes, spectato Jure communi Ecclesiastico, tenentur residere in loco Beneficii, siue Dignitatem annexam habeant *arg. cap. 1. & seqq. De Clericis non resid.* siue aliud obtineant simplex Beneficium, quantumvis tenue ac modicum, prout desumitur ex *c. Conquerente. & c. Inter quatuor. Eod.*

70 Dicitur notanter, spectato Jure communi Ecclesiastico: nam inprimis hujusmodi obligatio non descendit ex Jure naturali & Divino, sed vel ex primæva Fundatorum intentione, vel saltem ex Sacris Canonibus jam allegatis. Deinde loquendo de Beneficiis simplicibus, ex generali consuetudine totius Ecclesiæ eadem personalem Residentiam non amplius requirunt: ideoque potest Beneficiarius per Substitutum illis deservire, nisi Fundator disertis verbis oppositum expresserit. Fagnanus *c. Cum omnes. n. 14. de Constitut.* Vallenſis, Engel, & alii.

71 Quod si contra datas Conclusiones objicias: juxta Regulam 68. *Juris. in. 6. Potest quis per alium, quod potest facere per seipsum, cum concordantiis: ergo non*



tantum habens Beneficium simplex, sed & quilibet alius potest deservire per Substitutum. Resp. negando consequentiam: nam allata Regula fallit, seu patitur exceptionem, quando electa est industria & opera personæ; prout ipsa in collatione Beneficii semper electa intelligitur. *arg. c. Is cui De Offic. Judicis delegati. in. 6.* Simulque, ut taceatur specialis dispositio Juris quoad hoc, contra rectam rationem est, ut non obstante, quod Beneficium detur propter officium, unus habeat Beneficium, ejusque emolumentum, & alter præstet onus, atque officium: nisi major aliqua ratio cogat Clericum a suo Beneficio ad tempus abesse, eique interim per alium idoneum Substitutum deservire.

72 CONCL. VI. Nihilominus justa de causa quandoque licitum est abesse a loco Beneficii. Ita Concil. Trid. cit. Sess. 23. de Ref. cap. 1. ubi inquit: *Christiana charitas, urgens necessitas, debita obedientia ac evidens Ecclesiæ, vel Reipublicæ utilitas, aliquos nonnunquam abesse postulant, & exigunt.* Recte tamen ibidem subditur quod, quando tales, qui Beneficium Ecclesiasticum curam animarum annexam habens obtinent, abesse contigerit, debeat causa legitimæ absentiae per Episcopum esse cognita, & approbata: simulque ipsi teneantur, Vicarium idoneum, ab ipso Ordinario approbandum, cum debita mercedis assignatione relinquere; ut, quantum fieri poterit, ex ipsorum Pastorum absentia Oves concredita nullum damnum accipiant.

73 CONCL. VII. Episcopus extra tempus Adventus, Quadragesimæ, ac solemniora Festa potest abesse ab Ecclesia sua per duos, vel ad summum tres menses, siue continue, siue interruptim, sine alia Superioris approbatione, etiam causa duntaxat relaxandi animum. Ita colligitur ex cit. Concil. Trid. & notat Barbosa *ibidem in Collectaneis. n. 15. & 16.* & alii, quos citat. Ratio hujus assertur a Concil. Trid. ibi: *Quoniam, qui aliquantisper tantum absunt, ex veterum Canonum sententia non videntur abesse; quia statim reversuri sunt.*

74 CONCL. VIII. Canonici Ecclesiarum Cathedralium, & Collegiarum possunt a suis Ecclesiis insistendo Juri scripto quolibet anno per tres menses continuos, vel interpolatos vi Juris communis abesse: nisi ubi propriis Ecclesiarum constitutionibus longius servitii tempus requiritur. Ita Concil. Trid. Sess. 24. cap. 12. de Reform. & Barbosa *ibi in Collectaneis. n. 64.* cum aliis. Intellige; dummodo non omnes Canonici simul absint, sed tot semper remaneant, ut servitium Ecclesiæ possit peragi: quia Concilium non indulget tres menses absentiae toti Capitulo, sed Canonicis, scilicet singulis per vices. Fagnanus *in c. Licet n. 55. de Prob.*

#### Additio.

\* Porro Canonici per dictos tres menses absentes juxta communem DD. æque lucrantur fructus grossos, ac actualiter præsentibus: secus dicendum de distributionibus quotidianis, quæ regulariter loquendo solis præsentibus, & Officio Divino interessentibus dantur. Ubi notandum, quod fructus grossi dicantur illi, qui modo in Jure requisito residentibus tribuuntur annuatim absque respectu singularis præsentiae in Choro seu Officio Divino. *Distributiones quotidiana* autem nominantur, quæ porriguntur cum illo respectu ad interessendum Choro actualiter, unde etiam *Præsentia* intuluntur. Vide Jus Canonicum *lib. 3. Decret. Tit. 4. §. 5. & 6.*

75 CONCL. IX. Parochi vel maxime residere tenentur propter periculum, ne in ipsorum absentia quidam e Parochianis sine Sacramentis decedant, aut in aliis spiritualibus auxiliis detrimentum patiantur. Nihilominus, quia circa Parochos quoque non raro occurrunt causæ aliquantisper aliorum discedendi, provide idem Sac. Oecumenicum Concil. Sess. 23. cap. 1. de Ref. statuit in hæc verba: *Eadem omnino, etiam quoad culpam, amissionem fructuum, & penas de Curatis lo-*

*ferioribus, & aliis quibuscumque, qui Beneficium aliquod Ecclesiasticum, curam animarum habens, obtinent, Sacrosancta Synodus declarat, & decernit; ita tamen, ut quando, cumque eos, causa prius per Episcopum cognita, & probata, abesse contigerit, Vicarium idoneum, ab ipso Ordinario approbandum, cum debita mercedis assignatione relinquunt. Discedendi autem licentiam in scriptis, gratisque concedendam, ultra bimestre tempus, nisi ex gravi causa, non obtineant.* Hæc Concilium: occasione quorum

76 Quær. An Parochus per dictos duos menses possit abesse sine alia licentia Episcopi? Affirmant Navarrus *cop. 25. Manual. n. 121.* Azorius *part. 2. lib. 7. cap. 4. quæst. 10.* Bonacina & quidam alii. Rationem dant: tum quia ante Concilium id licebat. *arg. c. Præsentium. & c. Si quis in Clero. 7. q. 1.* ubi per duos menses, vel saltem per tres hebdomadas poterat Sacerdos a sua Ecclesia abesse, atqui a Jure antiquo non est recedendum sine novo Jure expresso. *l. Præcipimus. C. de Appellat.* tum quia Episcopo, qui tamen magis tenetur residere, id expresso permittitur a citato Concilio.

77 Opposita sententia asserit, Parochos ne quidem primo bimestri posse abesse sine licentia Episcopi. Ita Barbosa *in Collectaneis. ad cit. cap. 1.* Concilii Trident. *n. 67.* post Lessium *lib. 2. cap. 34. n. 159.* Vázquez, & plures alios. Et subdit Barbosa *n. 68.* quod Garzias, & Armendar, decisum referant, non posse Parochum per hebdomadam abesse non petita, vel non obtenta licentia, etiam relicto idoneo Vicario per Ordinarium approbato. Et hæc sententia est conformior verbis Concilii Trident. proxime relatis, ut patet: quamvis simul attendi debeat praxis singularum Diocesum, & an rigor iste sit ibidem receptus. *Credo tamen* (inquit cit. Lessius) *non esse usu receptum.*

#### Additio.

\* Item P. Pichler in suo Candidato Jurisprudentiæ abbreviato *lib. 3. tit. 4. n. 4.* testatur, in his terris consuetudinem vigere passim, quod Parochi ad modicum tempus, v. g. ad aliquot dies discedant sine petita Episcopi licentia, substituentes sub hoc tempus Vicarium, nisi habeant Cooperatorem, vel interim Parocho vicino curam ovium committant: prout sub hac cautela etiam contenti præsens Auctor in Jure Canonico *lib. 3. Decret. tit. 4. n. 78. & 79.*\*

78 Illud certum est, quod, quando subita necessitas occurrit, qua nequit Parochus Episcopum adire, fas sit eidem ad breve tempus abesse absque expressa Episcopi licentia (nam subita necessitas, cum gravis sit, non patitur dilationem, neque moram) dummodo relicto idoneo Vicario bene provideatur, ne in sua absentia grex sibi commissus spirituale damnum patiatur.

76 Insuper certum est, si per longius tempus, utputa ultra duos menses, Parochus siue conjunctim, siue divisim a sua Parochia abesse velit, requiri causam gravem, atque expressam licentiam Episcopi; prout clare indicat citat. Concil. Trid. juncto *c. Licet Canon. §. fin. De Elect. in 6.* ubi dicitur, quod super Residentia personali Parochi facienda possit Ordinarius gratiam dispensationis ad tempus facere, prout causa rationabilis id exposcit.

80 Nec obstat, quod Parochus Jure naturali teneatur ad Residentiam personalem. Resp. enim, id intelligendum seclusa justa causa & cessante legitima dispensatione. Verum de Residentia Beneficiarios, & pœnis non residentium plura Canonistæ *Tit. de Clericis non residentibus &c.*

#### Additio I.

\* Præsertim vero videatur præsens Auctor in Jure Canonico *Lib. 3. Decret. Tit. 4.* maxime §. 3. ubi, etsi *n. 91. & 92.* inter alias causas, quæ Parochos etiam quoad plures, quam duos menses a Residentia personali absentes excusant, admittat numerari abitum ad thermas pro recuperanda sanitate &c. dummodo interim alium-



## Quaest. V. Quae sint Obligationes Beneficiariorum; cum Append. 345

aliunde sufficienter provideatur Ecclesiae; negat tamen similem abitum Parochis esse licitum propter ingruentem pestem, vel incursum hostilem. Ego autem, etsi hunc animarum zelum omnino laudem (prout bello praeterito novi talem zelosum Parochum, qui, occupato per milites a potiori acatholicos certo oppido, sub alienis occultatus vestibus suis conceditis occulte administravit Sacramenta) nollem tamen peccati gravis condemnare illum Pastorem, qui (emergentibus praesertim subinde specialibus circumstantiis) contrariam multorum DD. praedicat sententiam dummodo ceteroquin aliunde oviculis sufficienter provideatur, prout bello praeterito vidi plures ex sacris Religionibus praesertim Ordine Seraphico interim in diversis Parochiis substitutos; cum actualis Parochorum praesentia aliquoties nil aliud praestiterit, quam quod & ipsi subsistentes fuerint per milites abducti tamquam obsides, ut citius exactae solverentur contributiones.\*

### Additio II.

\* Ceterum supposita, tempore contagionis pestiferae, Parochorum praesentia tam pro ipsismet, quam etiam in casu absentiae pro Substitutis utilissima per hunc Auctorem *loc. cit. n. 103. & 106.* praescribuntur observanda. *In primis*, quod juxta declarationem Sacrae Congregationis Concilii Tridentini teneantur peste infectis tantummodo administrare duo Sacramenta, *Baptismum* nimirum, & *Poenitentiam*, ut sic magis praeserventur pro oviculis necdum hac tabe infectis. *Secundo*, ut in administrandis Sacramentis caute atque circumspecte se gerant: quem in finem ex praescripto Medicorum ad manus habeant media praeservativa contra pestem, e. g. non visitent aegrotos jejuno stomacho, vel si aliter necessitas ob periculum in mora urgeat, opponant ad nares parum Theriacae, aut sir phiolum aceto tinctum &c. nec facile apud tales salivam, utpote vehiculum malignitatis deglutiant, sed semper exspuant. Limonibus seu eorum corticibus vesci ante accessum infirmorum saluberrimum quodque esse remedium docuit juxta praefatum Auctorem ipsamet experientia. Insuper excepturi Confessionem pestiferorum audiant eosdem a longe, & si fieri possit, curent ut vel inficiati portentur ad aliud cubile prius fumigatum, vel, si aliae circumstantiae non admittant, accedant fenestram, aut januam; ubi tamen deberent interponi prunae cum fumo ex granis, vel apicibus Juniperorum &c. ne Confessarii attrahant auram veneno infectam, & necdum per ignem purgatam. Quodsi similia fieri nequeant, attendant saltem, ut aegrotus vertat faciem non versus Sacerdotem, sed ad alteram partem, & tegumenta lectuli non moveat, ne venenatus aegroti halitus, vel vapor e lectulo egrediens pariter inficiat Pastores, sicque oviculas adhuc sanas horum privet assistentia. Praeterea jubeant, ut in cubiculo decumbentis fiat fumus salutaris contra pestem e. g. ex Juniperis, foliis seu corticibus Lauri, ex Nardo, Lavandula, Amaraco, seu Majorana, Salvia, Rosmarino aut similibus copulative, vel disjunctive applicatis. Plura similia praeservativa videri poterunt in Bezoartico animali Francisci Alberti Hueber Archiatri Frisingensis, atque de tota hac materia fusior recurret declaratio *Tr. 14. Dist. 2. in Appendice post quaest. 5.*

### A P P E N D I X.

Qualiter Beneficiario obligato dimittere Beneficium ob Simoniam in ejusdem receptionem commissam practice succurri queat?

### S U M M A R I U M.

- \* Enumerantur adhuc succincte poenae Simoniacorum. *Add. I.*
- \* Qualiter tales in Confessionali debeant examinari? *Add. II.*
- \* Ponitur casus, & instruitur Supplicia Romani dirigenda. *Addit. III. & IV.*

- \* Quidnam agendum quoad fructus jam perceptos? *Add. V.*
- \* Qualiter agendum post denegationem? *Addit. VI.*
- \* Quomodo dispensatio executioni sit demandanda? *Addit. VII.*

- \* De hac notabilis casus. *Addit. VIII.*

### Additio I.

\* **E** Quidem totum illud suo modo jam erui posset: partim ex *Tract. 5. dist. 3. quaest. 3. ac. 4.* partim ex *Jure Canonico lib. 9. Decret. Tit. 3. §. 14.* nihilominus succincte ibidem dicta recapitulando, simulque ipsam praixin in casibus, qui Confessario aliquoties, praesertim tempore alicujus Jubilaei occurrere possunt, docendo, praeter omnibus ante oculos poni debent poenae, quae propter simoniacam receptionem Beneficii incurruntur quales ex *Jure Canonico loc. cit. §. 11.* breviter extrahuntur, suntque sequentes. *Primo* Excommunicatio reservata Summo Pontifici, quae tamen non incurritur, si gravitas culpae, vel saltem poenae annexae censurae inculpabiliter ignoretur. Quinimo etsi etiam ea incurretur, ab hac tamen Regulares Mendicantes absolvere possunt. *Secundo*. Irregulares, si ante absolutionem a censura exerceatur actus Ordinis a tali Beneficiario. *Tertio*. Nullitas collati simoniacae Beneficii, ita ut prorsus nullum in illud acquirat jus nec fructus inde perceptos faciat suos. *Quarto*. Perpetua Inhabilitas praesertim ad illud ipsum Beneficium deinceps obtinendum. *Quinto*. Privatio quoque aliorum Beneficiorum antea rite obtentorum, quae tamen ultima poena ante sententiam Judicis non ligat: item si quis etiam privaretur per sententiam Judicis Beneficiis rite antea obtentis, exinde tamen non teneretur restituere fructus propter talia Beneficia perceptos. De quibus omnibus videatur *Lib. 5. Decret. Tit. 3.*\*

### Additio II.

\* Ulterius, dum similis casus in Confessionali proponitur, examinetur *Primo*. An proprie adsit Simonia nec interveniat aliquis verus titulus excusans. De quo vide *Tr. 5. D. 3. q. 3.* *Secundo*. Cognita vera Simonia attendatur, num fuerit praecise mentalis, vel conventionalis, aut realis, de quibus *Tr. 5. loc. cit.* nam quoad primas duas species, etsi graviter peccetur, poenae tamen supra allegatae non contrahuntur; si ex parte Simonia confidentialis excipitur, de qua superius *Tract. 5. Dist. 3. n. 48.* *Tertio*. Si fuerit deprehensa Simonia realis, & quidem utrobique saltem ex parte completa (puta propter praesentationem ad Beneficium ex centum ducatis promissis, interea dando quinquaginta) tunc attendendum ulterius. *Quarto*. Num illa Simonia fuerit commissa circa Beneficium proprie tale, vel improprie tale? nam si non fuisset Beneficium in sensu proprio (puta Capellania, vel Vicaria praecise temporalis) etsi adhuc peccaretur, non tamen contraherentur haec poenae. *Quinto*. Supposito autem, quod dicta Simonia versetur circa Beneficium proprie tale, tunc observetur ulterius, an haec Simonia sit perpetrata ab ipso recipiente Beneficium, vel per aliquem tertium ignorante illo, qui Beneficium recipit, e. g. si Patens, vel consanguineus Beneficiarii, inscio ipso, dedisset Patrono quinquaginta ducatos, ut praesenter filium, aut cognatum suum. *Sexto*. Quando Simonia realis foret commissa per tertium ignorante Beneficiario, tunc si dictum Beneficium esset simplex, posset ad retinendum dispensare Episcopus juxta *cap. 19. De Elect.* quinimo implemet Beneficiatus, qui integro triennio ignorans invincibiliter illam Simoniam a tertio commissam, bona fide Beneficium aliquod possedit, potest illud ulterius una cum fructibus tuta conscientia retinere etiam absque ulteriori dispensatione. De quo vide *Jus Canon. loc. cit. a n. 275. usque ad n. 480.* Item *n. 329.* *Septimo*. Quod si autem Simonia realis fuisset scilicet ab ipso Beneficiario, vel saltem per tertium eo scienter,



sciente commissa, recurrendum foret Romam ad Datariam, si Simonia esset publica, vel ad Pœnitentiariam, si foret occulta. Ubi ex Tiburtio Navar. in sua Mantuductione ad praxin *part. 3. c. 8.* notetur Octavo. Quod sacra Pœnitentiaria non semper censeatur dispensare, quando absolvit, nec semper rehabilitet, quando dispensat. Potest enim subinde absolvere a peccato Simoniz, & a Censura annexa, nec tamen dispensare quoad Irregularitatem per exercitium Ordinum a dicto Beneficiario censuræ subiecto contractam. Item potest dispensare quoad Irregularitatem, nec tamen rehabilitare ad dictum Beneficium, vel alia obtinenda. Aliquando tamen (etsi valde raro, & non nisi ex causa gravissima) contingere potest, ut quis per easdem litteras simul absolvanur a Censura, dispensetur in Irregularitate, & rehabilitetur ad Beneficia in futurum obtinenda.

### Additio III.

\* Ut totum magis capiatur, ponamus, Titium Nobili habenti Jus Patronatus Laicale ad Beneficium A. promississe centum, & actu dedisse ex his quinquaginta aureos, ex quo etiam fuit præsentatus, & actu obtinuit Beneficium. Vix integro anno elapso sub aliquo familiari discursu resciscens nullitatem collationis Beneficii, & suam tunc exinde obligationem restituendi fructus perceptos, ac dimittendi dictum Beneficium (quas gravissimas pœnas antea ignorabat) pœnitentia ducitur, instantissime rogans Confessarium, ut sibi procuret Romæ in Pœnitentiaria (quoniam casus adhuc occultus est) dispensationem tam quoad fructus perceptos retinendos, quam quoad ipsum Beneficium. Pro motivo dispensandi allegat suam, suorumque consanguineorum paupertatem, item periculum diffamationis, si relinquat Beneficium. Quid agendum Confessario? Resp. I. Si Titius ex ignorantia coram Deo vere invincibili (qualis tamen ignorantia juris invincibilis pro foro externo non præsumitur) ignoravit non solum pœnas annexas, verum etiam ipsam culpam, credens bona fide tempore Collationis, eandem non esse illicitam, tunc nullas incurrit pœnas alias in Simoniacos latas, bene tamen adhuc nullitatem, utpote quæ etiam sine culpa propria, non quidem per modum pœnæ, sed inhabilitationis contrahitur; ut patet in casu, quo Beneficium per Simoniam Tertii ignorante Beneficiario acquiritur. Ubi tamen circa nullitatem Collationis dicti Beneficii, & quoad retentionem ejusdem dispensari potuisset etiam ab Episcopo, saltem si Beneficium fuisset simplex, juxta *cap. penult. de Elect.* quinimo ex aliquorum sententia; etsi illud Beneficium extitisset curatum, seu Prælatura, supposito tamen circa hæc ultima, quod res ista necdum deducta fuerit ad forum contentiosum externum, unde dato hoc supposito non fuisset necesse recurrere ad S. Pœnitentiariam; uti totum deduci potest *Lib. 5. Decret. tit. 3. n. 320 Item n. 335. & 337.*

Et licet ibidem præfens Auctor solum loquatur in casu, quo is invincibiliter ignoravit Simoniam per Tertium commissam; videtur tamen aliquibus a pari idem dicendum saltem pro foro interno, & ante sententiam Judicis, si ipsemet quidem commisit Simoniam materiale, invincibiliter tamen ignorans, esse talem; si enim invincibilis ignorantia pro foro saltem interno tribuit potestatem Episcopo dispensandi in uno, cur non in altero? Videantur dicenda adhuc in Additione ultima, & Auctores ibidem citati.

Resp. II. Quod si Titius statim ad initium elargitionis pecuniæ rescivit eandem præsentationem esse illicitam, quamvis fortassis ignoraverit pœnas huic actu illicito annexas, in ea hypothese necdum contrahit excommunicationem reservatam (nam juxta DD. communiter censura Papalis non incurritur, nisi ea saltem in confuso resciscatur) bene tamen adhuc incurrit nullitatem Collationis dicti Beneficii, & inhabilitatem ad illud reacquirendum, in quo puncto nequit amplius dispen-

sare Episcopus, quamvis hæc Simonia adhuc foret occulta, uti fassus probatur *Lib. 5. Decret. tit. 3. n. 338. & seqq.* ubi etiam *n. 450.* allegatur Cardinalium Declaratio sequentis tenoris: *Episcopus, etsi a Simonia occulta absolvere possit, non tamen potest Simoniacum rehabilitare ad Beneficia imposterum obtinenda, neque ad ea retinenda, quæ per Simoniam NB. occultam retinet* quæ dicta, si non de materiali, saltem utique de formali Simonia intelligi debent. Quare recurrendum foret etiam in hac Simonia adhuc occulta ad curiam Romanam, ubi Resp. III. Posse quidem Confessarium tentare formando nomine Titii ad Sac. Pœnitentiariam supplicem libellum: duo tamen prophetizo tali. *Inprimis* probabilissime quoad fructus perceptos obtinebit dispensationem, si supplicans Beneficiatus considerato suo, ac suorum proximorum Consanguineorum statu fuerit pauper: alias debet instituire compositionem relinquendo saltem certam partem in Rescripto specificatam aliis causis piis ibidem determinatis: puta in pauperum subventionem, & Ecclesiæ, in qua Beneficium situm erat, utilitatem. *Secundo*, quoad rehabilitationem in dicto Beneficio ordinarie impetrabit nihil, sed inscribetur Supplicæ: *dimittat, intellige Beneficium.*\*

### Additio VI.

\* Inhærendo adhuc allegato proxime casui, si Romæ tentare dispensationem placeat, poterit præctice Supplicæ taliter inscribi.

*Titius* (ponitur in Sac. Pœnitentiaria nomen fictum) *cuidam Nobili habenti Jus Patronatus Laicale quoad Beneficium A. promissit in occulto centum, & actu deit quinquaginta aureos ex sine, & pacto, ut ipsum præmet prout etiam exinde præsentatus obtinuit Beneficium. Vix anno integro a tempore possessi Beneficii elapso ex familiari discursu devenit in notitiam, quod Collatio ista non solum illicita (de quo jam antea habuit anxietatem) sed etiam nulla fuerit, & quod teneatur ad restitutionem fructuum exinde perceptorum, ac ad dimissionem ipsius Beneficii, quas pœnas omnes antecederet ignorabat. Cum autem vitium illud adhuc sit occultum, & Orator prematur paupertate, ac prudenter timeat periculum infamiae, si Beneficium dimittat, humillime supplicat pro dispensatione ad effectum, ut fructus perceptos, & ipsum Beneficium valide, ac licite retinere valeat. Pro qua gratia &c.*

Ad talem Supplicam, si non in hoc, saltem in alio casu Simoniaco aliquando factam ipsemet legi, a Sac. Pœnitentiaria post repetitam ternam instantiam semper loco alicujus favorabilis responsi fuisse inscriptum Supplicæ: *dimittat, intellige Beneficium.* Igitur his stantibus,\*

### Additio V.

\* Quæres I. Quidnam ulterius agendum, & quomodo pauperculo tali succurrendum sit? Resp. I. Quoad fructus jam perceptos, dummodo talis ipsemet Beneficiarius simoniace acquisitum dimittat, posse adhuc succurri, formando de novo aliquam Supplicam, in qua rogetur, ut saltem fructus ex dicto Beneficio perceptos retinere liceat: prout etiam sibi spem facere poterit vel condonationis absolutæ (quando Orator fuerit pauper) vel alias saltem alicujus compositionis, uti jam innuimus supra. Resp. II. Si hoc Beneficium simoniace obtentum dimittat, & paupertate pressus supplicet, ut saltem habilitetur ad alia, pariter subinde impetrabit, prout ex nostro Navarro adjungo formulam concessionis sequentem.

*Pro parte Sacerdotis Latoris præsentium Nobis oblata petitio continebat, quod ipse alias a Sacra Pœnitentiaria absolutionem, & dispensationem super Irregularitate per eum contracta obtinuit, cum hoc tamen inter cetera . . . ut ad quacunque Beneficia Ecclesiastica in futurum obtinenda perpetuo remaneret inhabilis . . . cum autem dictus Lator hujusmodi inhabilitatem per aliquod tempus sustinuerit, & pressus sive propria, sive suorum paupertate, Beneficia reci-*



*recipere, licite posse desideret, ideo pro sua conscientia quiete caput per Sedem Apostolicam secum desuper dispensari. Quare Ec. Nos Ec. Discretionem tuam committimus, quatenus, si est ita, cum dicto Latore, audita prius ejus Sacramentali Confessione, dummodo suffragentur sibi digni Penitentia fructus, & merita salvis aliis remanentibus omnibus aliis sibi in predictis absolutione, & dispensatione impositis, quod premissis non obstantibus quacumque Beneficia Ecclesiastica, sive cum cura, sive sine cura, quatenus illa ei alias canonice conferantur, recipere, retinere, fructusque recipere licite valeat, misericorditer dispenses in Foro Conscientie Ec. Datum Ec.*

Ubi Confessarius in Executione talis gratiae ad tria advertat. Primo, an verificetur motivum, ob quod hæc gratia conceditur: quale motivum in allegato Rescripto est *Paupertas*; posset tamen, si adsit, etiam alia gravis causa adduci. Secundo attendat ad merita, & fructus talis poenitentis Simoniaci, utrum nimirum a tempore delicti meliorem instituerit vitam. Tertio notet, quod, quamvis in memorata formula poenitens rehabilitetur ad quacumque Beneficia cum, vel sine cura, id tamen non soleat fieri semper, sed aliquando ad simplicia tantum, aliquando etiam ad alia, considerata qualitate delicti, tempore primæ obtentæ gratiæ, & meritis poenitentis. \*

Additio VI.

\* Quæres II. An post trinam jam denegationem Sac. Poenitentiarie nulla amplius spes in memoratu casu super sit Titio retinendi per aliquam dispensationem ipsum Beneficium simoniace antea acquisitum? Respondeo in simili casu vix ullam amplius superesse spem. Interea tamen practicus quidam, & peritus Styli Curiae Romanæ suavit, quatenus adhuc supplicetur, saltem ut Oratori daretur certum aliquod tempus congruum ad hoc, ut, quatenus opus, Beneficium suum sine scandalo, & salva propria verecundia dimittere valeat: ubi subinde concedi solet alius adhuc annus cum inscriptione: *Dimittatur intra annum*. Tale temporis spatium, si infra illud supplicetur de novo, solet bis, vel ter adhuc ad secundum, & tertium annum prolongari perdurante gravi causa aliqua motiva, & tandem (uti Roma scripsit ille practicus) successive ad dies vitæ prolongabitur. Hoc si obtinuerit Simoniacus, felicem se poterit reputare. Interea in simili casu pro primo anno prorogationis emanavit Responsum a Sacra Poenitentiarie sequentis tenoris.

*Sacra Poenitentiarie tibi Confessario a Latore electo concedit facultatem, ipsum Latorem, quatenus, si est ita, audita prius ejus Sacramentali Confessione, a quibusvis Sententiis, Censuris, & penis Ecclesiasticis, quas propter præmissa quomodolibet incurrit, Simoniae labe, & excessibus huiusmodi auctoritate Apostolica absolvendi, & cum eodem super Irregularitate per eum ex violatione censurarum quomodolibet contracta ad suos Ordines licite exercendos, eadem Auctoritate Apostolica dispensandi, sibi fructus ex ipso Beneficio male perceptos, quatenus vere sit pauper, ita ut illos restituere nequeat, mediante aliqua Eleemosyna arbitrio suo taxanda, & in pauperes distribuenda condonandi, injuncta ei pro modo culpæ poenitentia salutari, quodque intra annum sub poena relabendi eo ipso in easdem censuras, ipsum Beneficium libere dimittat, nec non culpabiles in præmissis, quantum potest, moneat, & inducat ad impetrandam a Sede Apostolica absolutionem, & aliis injunctis de Jure injungendis. In Foro conscientie, & in Sacramentali Confessione tantum, & non aliter, neque ullo alio modo. Ita quod huiusmodi absolutio, dispensatio, & condonatio in foro judicio nullatenus ei suffragentur. Datum Romæ in Sacra Poenitentiarie die 16. Februarii Anno 1725.*

Additio VII.

\* Quæres III. Quid practice agendum Confessario a Beneficiario Simoniaci electo, ut tale Rescriptum pro-

xime allegatum executioni mandet? Resp. Talis Confessarius, antequam ad executionem litterarum Apostolicarum procedat, I. Indaget, an crimen hæc Simoniae sit adhuc occultum: est enim hæc conditio, sine qua non dispensaret Sac. Poenitentiarie. II. Utrum motiva dispensandi in Supplica allegata sint vera: puta an Beneficiarius consideratus considerandis sit pauper, & num foret periculum diffamationis, si dimitteret Beneficium. III. Præsupposita Confessione Sacramentali huic Beneficiario Simoniaci pro modo culpæ Simoniae, & exercitii Ordinum in censuris, per quod Irregularitatem contraxit, imponat poenitentiam, & insuper injungat ei, quod in illo Rescripto additur, ut ante annum finitum, nisi interim novam prorogationem Romæ impetret, Beneficium dimittat, & culpabiles in præmissis, id est, complices, & complices ejusdem delicti Simoniae, quantum moraliter potest moneat, & inducat ad impetrandam a Sede Apostolica absolutionem. IV. Demum absolvat a censuris, ac peccatis, & dispense in Irregularitate contracta, supposito, quod hanc contraxerit, puta, si sciens Simoniaci huic contractui esse annexam Excommunicationem, nihilominus celebraverit. \*

Additio VIII.

\* Non inacceptum spero Lectori, si adhuc ex Decisionibus Casuum R. Patris Pichler novissime editis sequentem decisionem, ordine 147. circa Dispensationem in puncto Simoniae adjungam.

Duo eximiae doctrinae, & probitatis Sacerdotes, Henricus, & Wolfgangus sollicitant sibi Beneficia Parochialia conferri, plane digni aliis competitoribus præferri: sed a quolibet seorsim ante Collationem exigebantur quingenti floreni sub pretextu privilegii a Sede Apostolica concessi. Tergiversabatur uterque initio, sed, quia sine hac pensione actum se agere videbant, demum confenserunt, & persoluta dicta summa in Parochialibus Beneficiis instituti sunt, quibus etiam summa cum laude præstiterunt per unum & alterum annum: interim tamen internos conscientiae stimulos passi, & multum anxii, utrum non simoniace fuerint promoti. Ambo itaque, ut hac tortura se liberarent, remedium quaesierunt, Wolfgangus quidem apud Episcopum, quia Episcopum in casu Simoniae occultæ pro foro interno absolvendi a censuris, & dispensandi ad retinendum Beneficium simoniace obtentum, facultate præditum esse cognitum habebat juxta probabilem Lessii, L. 2. de J. Ec. J. c. 35. dubit. 25. num. 140. Henriquez c. 36. de Excomm. l. 13. Palao de Simon. disp. 3. punct. ult. n. 4. P. Krimer l. 5. tit. de Simon. n. 594. Panormit. in c. Postulatis. De Cleric. excomm. Ec. c. ministrante, & quorundam aliorum sententiam, atque dispensationem absque ullo fere onere impetravit. Henricus autem, seu ignarus huius sententiæ probabilitatem, seu eidem diffidens, sicut alii Auctores noluit eam approbare, Romam recurrit ad S. Poenitentiarie, quæ quidem absolutionem a censuris, & dispensationem ab Irregularitate quomodolibet contracta Confessario Henrici commisit pro foro interno, injuncta ei pro modo culpæ poenitentia salutari, sed adjecta conditione, ac onere, ut intra annum sub poena relabendi eo ipso in easdem Censuras, Ecclesiam Parochialem libere cum effectu dimittat, nec non fructus ex ea perceptos, prout de Jure, restituat. Interea nescio, qua via innotuit Henrico alias jam desuper non parum anxio, & cum tempore semper magis dubioso indultum Papale prætextum ignorari Romæ, ipse tamen omnia dissimulavit; id quod eo tutius & consultius fecit, quod ipse post obtentam dispensationem a S. Poenitentiarie inter annum dimiserit Beneficium Parochiale, uti iussus erat, quamvis ante dimissionem actualem per amicum sibi providerit de alia Parochia, quam etiam obtinuit, at exterius per viam permutationis, eo quod coram Officio Ecclesiastico crimen suum occultum, & necessitatem resignandi aperire horruerit, interius tamen in ipso supplici libello



Libello pro obtinenda nova Parochia non expressit permutationem, sed sic scripsit; *Dimitto, & destituo possessionem Parochiam liberrime; quia tamen Parochus (is erat, cum quo exterius permutare censebatur) alio abire cogitat, rogo demississime, ut me ad illius Parochiam benignissime admittere placeat non mutative, sed intuitu meritorum meorum: quæ verba, intuitu meritorum, postea etiam inserta erant litteris Collationis. Quod autem fructuum restitutionem, quæ pariter injuncta fuit Henrico, attinet, illam necdum fecit, licet jam tertius interea a Dispensatione executioni data fluat annus: non quidem ex perversa intentione non restituendi, sed partim ne periculo manifestandi criminis commissi se exponeret, partim quia pecuniis ad alia negotia necessario, ut putabat, applicandis indigebat; firmiter tamen statuens non solum Capitale, sed etiam annuos census instar alterius debitoris solvere suo tempore Ecclesiæ, ne huic ex dilatione lucrum cesset. Quæritur jam, an in hac facti specie nihil reperitur ex parte utriusque Parochi, quod improbari queat? Respondeo I. Circa Parochum Wolfgangum, si bona fide ex probabili ratione credidit adfuisse ex parte Collatoris verum Privilegium seu Indultum Pontificium exigendi ex suis rationibus pecuniam &c. potuisse dispensari ab Episcopo; secus autem multum subsisto etiam pro foro conscientie; uti erui potest ex dictis præcedentibus Additione III. vers. Respondeo II. Respondeo II. Circa Parochum Henricum, verificatis omnibus circumstantiis in facti specie adductis, nihil habere in contrarium.\**

## DISTINCTIO II.

**De Incompatibilitate, Renunciatione, & Permutatione Beneficiorum.**

### QUÆSTIO I.

**Quæ Beneficia sint incompatibilia, vel compatibilia?**

### SUMMARIUM.

- 1 Mala ex pluralitate Beneficiorum simul retentorum obvenientia.
- 2 Ea quandoque possunt abesse.  
Et dantur Beneficia compatibilia.
- 3 Incompatibilitas Beneficiorum ex duplici capite oritur.
- 4 Si unum sufficit ad honestam sustentationem, non licet plura habere.
- 5 Quod Beneficium censeatur sufficiens ad congruam sustentationem?
- 6 Beneficia de se compatibilia, quæ?
- 7 Beneficia simplicia ultra duo nequeunt haberi.
- 8 Alia Beneficia compatibilia recensentur.
- 9 Beneficia de se incompatibilia, quæ?
- 10 Beneficia uniformia sub eodem tecto, quæ?
- 11 Corollarium de duabus Capellanis ejusdem Ecclesiæ.
- 12 Beneficium simplex potest adjungi alteri, tenues redditus habenti.
- 13 Similiter Dignitati, Personatui, vel Officio ex defectu decentis sustentationis potest adjungi Canonicatus in eadem Ecclesia.

**Q**uanta mala oriri soleant in Ecclesia Dei, dum nonnulli plura obtinent Beneficia Ecclesiastica, paucis comprehendit Pontifex c. *Quia in tantum, de Prab.* dicens: quod multitudo Præbendarum canonibus inimica, dissolutionis materiam & evagationis inducit, certumque continet periculum animarum. Eadem mala amplius deplorat Pontifex in Extravag. *Execrabilis, de Prab.* eo quod execrabilis quorundam ambitio, & improbitas importuna, plura a Romanis Pontificibus non tam obtinere, quam extorquere plerumque noscuntur Beneficia: adeo,

ut (præter alia incommoda, quæ ibidem recensentur) multi alii litterati, probique Viri a consecutione competentium Beneficiorum impediuntur, cultus Divinus minuitur, hospitalitas in ipsis Beneficiis debita non servatur, atque Ecclesiarum detrahatur commodis & honori, quæ carentes Defensorum auxilio in juribus suis, & libertatibus multipliciter collabuntur.

2 Quia vero talia incommoda atque inordinationes quandoque certis concurrentibus circumstantiis abesse possunt, hinc non sequitur, universim illicitum esse, plura simul habere Beneficia. Quinimo eorum quædam esse compatibilia, satis indicat textus in c. *Gratia, de Rescriptis in 6.* ibi: *Si talia sint Beneficia, quæ simul nequeant de jure teneri.* Et idem manifeste supponit Concilium Trident. sess. 7. cap. 4. *de reform.* ibi: *Plura curata, aut alias incompatibilia Beneficia: nam hujusmodi limitatio frustra apponeretur, nisi aliqua extarent Beneficia compatibilia.* Hinc Quæstio remanet, unde oritur, & quæ sit incompatibilitas Beneficiorum Ecclesiasticorum?

3 CONCL. I. Incompatibilitas Beneficiorum Ecclesiasticorum generatim ex duplici capite oritur; videlicet, si aut ipsa Beneficiorum institutio non permittat, ut plura ab eodem administrantur: aut si unum eorum ad honestam Beneficarii sustentationem sufficiat. Ita communis, uti patebit ex dicendis. Et quidem, quantum attinet priorem partem, seu Beneficia de se incompatibilia, ex professo de ipsis dicitur n. 9. & seqq.

4 Quod autem cessante justa dispensatione sit illicitum, plura Beneficia, licet ceteroquin compatibilia, simul retinere, si unum ipsorum ad honestam Clerici sustentationem sufficiat, tenet Glossa communiter recepta in c. *Dudum, 54. vers. Retinere, de Elect.* ubi ait: *Nota, quod, qui habet plura Beneficia, quorum alterum per se sufficeret, non potest sine mortali peccato retinere aliud.* Idem ad longum propugnat Abbas in c. *Extirpanda, §. Qui vero, nu. 34. & seqq. de Prab. & Layman lib. 4. tr. 2. c. 8. n. 2.* citans plures alios. Desumitur hoc ex c. *Sanctorum dist. 70. & c. Conquerente, de Clericis non resid. & c. Cum teneantur, de Prab.* cum concordantiis. Accedit Concilium Trid. sess. 24. c. 17. *de reform.* ibi: *Cum Ecclesiasticus ordo pervertatur, quando unus plurimum officia occupat Clericorum &c. Statuit, ut imposterum unum tantum Beneficium Ecclesiasticum singulis conferatur: quod quidem, si ad vitam ejus, cui confertur, honeste sustentandam non sufficiat, liceat nihilominus aliud simplex sufficiens, dummodo utrumque personalem residentiam non requirat, eidem conferri & consequenter a sensu contrario, & quia exceptio firmat regulam in oppositum, quando unum Beneficium sufficit ad honestam Clerici sustentationem, alterum conferri, & retineri non potest. Confirmatur: quia repugnat rationi naturali, ut quis plura simul non necessaria Beneficia occupando defraudet alios Clericos a consecutione competentium Præbendarum, deturque ansa incommodis num. 1. enumeratis, nisi justa causa interveniente, atque accedente legitima dispensatione id cohonestetur.*

5 Quæres autem, Quodnam Beneficium censeatur sufficiens ad congruam Beneficarii sustentationem? Resp. Illud Beneficium censetur taliter sufficiens, ex quo Clericus pro status sui conditione, & se, & familiam suam honeste valet sustentare. Adde cum Vallensi tit. *de Concess. Prab. §. 4. n. 10. & aliis, parentes, fratres, & consanguineos egentes, nam & hos potest Clericus ex redditibus Ecclesiasticis honeste sustentare, non autem augere, prout tum ex Can. 39. Apostolorum, tum ex Concilio Trid. sess. 25. cap. 1. de reform.* desumitur. Insuper circa hoc Glossa in c. *Conquerente, vers. Sufficiencia, de Clericis non resid.* observat, atque ex utroque Jure ostendit, quod oporteat, quantum ad propositum, considerare plura alia, utpote nobilitatem, scientiamque: quia tales Personæ sunt amplioribus redditibus honorandæ. c. *De multa, §. fin. de Prab.* Item, quod etiam hospitalitas, ipsaque jura Episcopalia persolvenda attendi debeant: nam Clerici & hospitalitatem tenere, & jura Episco-



Episcopalia persolvere, & insuper congruam suæ personæ familiæque sustentationem habere debent. *c. De Monachis, de Præb.* cum concordantiis. Et hinc, quodnam Beneficium dicatur sufficiens ad congruam sustentationem, arbitrio Judicis relinqui paulo plus, vel minus æstimandum, consideratis considerandis, qualitate scilicet personarum, locorum & temporum, resolvit Barbosa *lib. 3. Juris Eccles. univers. c. 13. n. 183.* citans plures alios.

6 CONCL. II. Beneficia de se compatible sunt ea, quæ vel ex Jure communi, vel ex Consuetudine, Statuto, aut Fundatione simul obtineri, ac retineri possunt. Talia sunt imprimis Beneficia simplicia non requirentia personalem residentiam, vel quorum unum requirit residentiam, alterum vero non: nam in his facilius admittitur pluralitas, si ita necesse sit ad honestam Clerici sustentationem; prout colligitur ex Concilio Trid. *sess. 24. de ref. c. 17.*

7 Ceterum Barbosa *loc. cit. num. 180. § 182.* refert, Sac. Cardinalium Congregationem declarasse, quod Episcopus non possit plura Beneficia simplicia ultra duo uni conferre, usque ad sufficientem ejus sustentationem absque Apostolica dispensatione. Et si defacto conferat tertium, collatio illius sit quidem valida, attamen, quando istud est sufficiens pro congrua sustentatione Clerici, vacent ambo Beneficia priora, sin minus, vacet primum. \* Quinimo præsens Auctor in Jure Canonico *lib. 3. decret. tit. 5. n. 267. § seqq.* stante consuetudine legitime præscripta admittit, quod Episcopus plura simplicia Beneficia, quam duo conferre possit absque vacatione ullius, si hæc duo ad sustentationem non sufficerent. \*

8 Deinde Beneficia compatible censentur, quæ in diversis Ecclesiis sunt, & nullam, vel saltem non incompatible residentiam exigunt. Layman *cit. c. 8. n. 7.* & alii. Insuper Beneficia de se compatible in eadem Ecclesia dicuntur, quæ difformia sunt: qualia proinde, si utrisque simul satisfieri possit, etiam in simul (si ita necesse sit ad congruam Clerici sustentationem) retineri possunt: *arg. cap. 1. de Consuet. in 6. Nisi alicujus Ecclesiæ speciale Statutum, vel Consuetudo repugnet,*

9 CONCL. III. Beneficia de se incompatible (id est, abstrahendo ab eo, quod unum eorum ad honestam Beneficiarii sustentationem sufficiat) sunt ea, quorum quodlibet vel Jure naturali, vel Jure communi Ecclesiastico, aut ex Consuetudine, Statuto, seu Fundatione continuam residentiam personalem postulat: ut sunt duo Episcopatus, duæ Abbatix, duæ Parochiæ, duæ perpetuæ Vicariæ & cetera curata Beneficia. Item duæ Dignitates, Personatus, aut duo Officia personalem residentiam ambo requirentia. *arg. c. Ad hæc, & c. Præterea, & c. Cum non ignores, & c. De multa. De præb.*

10 Similiter Beneficia uniformia sub eodem tecto censentur incompatible: ut sunt duo Canonicatus in eadem Ecclesia. Ceterum per Beneficia uniformia sub eodem tecto intelliguntur ea, quæ in eadem Ecclesia ad eundem finem eodem tempore adimplendum instituta sunt, adeoque habent idem prorsus onus & officium eodem tempore persolvendum: uti contingit in duobus Canonicatibus ejusdem Ecclesiæ.

11 Hinc infertur, quod duæ Cappellaniæ in duobus Altaribus ejusdem Ecclesiæ fundatæ cum onere, ut in uno Altari bis, in altero ter, distinctis diebus in eadem Ecclesia celebretur, non sint Beneficia uniformia, ac proinde de se compatible. Quia, licet uno nomine generali Cappellaniæ appellentur, cum tamen habeant distincta onera, seu officia in diversis Altaribus peragenda, re ipsa non sunt uniformia, sed difformia Beneficia: quæ proinde eidem conferri, & (dummodo primum eorum ad honestam Clerici sustentationem non sufficiat, neque constitutio, aut consuetudo particularis repugnet) simul retineri possunt.

12 Unde & Concilium Trid. *sess. 24. c. 13. de reform.* statuit, quod, si Canonicatus Ecclesiarum Cathedralium, aut Beneficia Parochialia, ob temporum injuriam

reditus tam tenues habeant, ut non sufficiant sustentationi decenti pro dignitate, ac qualitate personæ, & loci, auctoritate Episcopi liceat adungere simplex Beneficium, donec melius provisum fuerit.

#### Additio.

\* Quinimo juxta præsentem Auctorem, accedente præsertim consuetudine, potest in eadem Ecclesia Dignitati, vel Officio superaddi Canonicatus: e.g. ut quis simul sit Præpositus, vel Scholasticus, aut Custos, & simul Canonicus; uti notat Glossa in *c. 3. vers. Nisi unicum, de Consuet. in 6.* & Garzias apud præsentem Auctorem desuper affert unam declarationem Cardinalium in una Valentina, anno 1593. editam, talemque consuetudinem permittentem. Videatur in Jure Canonico *lib. 3. decret. tit. 5. num. 210.*

### QUESTIO II.

Quæ sint poenæ recipientium plura Beneficia incompatible absque Dispensatione?

#### SUMMARIUM

- 13 Illicitum est plura simul obtinere Beneficia incompatible.
- 14 Citra dispensationem Pontificiam.
- 15 Triplex causa dispensandi in pluralitate Beneficiorum.
- 16 I. Necessitas Ecclesiæ.
- 17 II. Utilitas Ecclesiæ.
- 18 III. Evidens meritorum prærogativa.
- 19 Plura incompatible Beneficia recipiens ipso jure privatus est priori.
- 20 Intellige defacto,
- 21 Et post receptionem, seu possessionem secundi.
- 22 Fallit, si quis fructus secundi Beneficii necdum percipiat.
- 23 Dicta privatio defacto incurritur ipso jure.
- 24 Et quomodo intelligenda?
- 25 Solvitur notabilis instantia.
- 26 Quid, si quis primum cum secundo retinere contenderit?
- 27 In quibus casibus plura simul Beneficia haberi possunt?

13 CONCL. I. Quandocumque vel alterum Beneficium sufficit ad honestam Clerici sustentationem, vel ipsamet Beneficia de se sunt incompatible, illicitum est, sicque peccaminosum, plura simul obtinere citra dispensationem Pontificiam. Ita communis. Et quidem, quantum ad primum membrum attinet, patet illud ex *c. Ad hæc, de Præbend.* ibi: Illud est omni rationi contrarium, ut unus Clericus in una, vel diversis Ecclesiis plures Dignitates, vel Personatus obtineat &c. Huc accedunt textus, & mala, ex pluralitate Beneficiorum provenientia, de quibus *n. 1.*

14 Altera pars, loquens de dispensatione Pontificia, ex eo probatur: quia habere plura Beneficia non est intrinsece malum, sicuti mentiri, blasphemare &c. sed quamvis habeat quamdam mali speciem, ea tamen concurrentibus certis causis cohonestari potest.

15 Porro ejusmodi justa causa dispensandi in pluralitate Beneficiorum triplex a Doctoribus recenseri solet; videlicet necessitas Ecclesiæ, utilitas Ecclesiæ, & evidens meritorum prærogativa. *arg. c. Tali. 1. q. 7.* ibi: Nisi forte eos aut maxima Ecclesiæ utilitas, vel necessitas postulet, vel evidens meritorum prærogativa commendet.

16 Et quidem ob necessitatem Ecclesiæ possunt quandoque plura Beneficia, etiam ultra congruam Clerici sustentationem conferri, si desint alii idonei Ministri, utputa in locis Hæreticorum, in quibus est defectus Clericorum.

17 Deinde ob utilitatem Ecclesiæ id accidere potest, quando unus solus licet absens, magis putatur Ecclesiæ profuturus sua auctoritate, potentia, doctrina &



prudencia, quam alius præsens, vel plures alii: qua de causa filiis Principum conferuntur interdum plures Episcopatus, etiam ante ætatem, ut Ecclesiæ contra Hæreticos potentius defendantur. Pirhing *titul. de Præb. num. 191.* & alii.

18 Tandem de evidenti meritorum prærogativa habetur textus clarus *c. De multa §. fin. de præb.* ibi: *Nul- lus plures Dignitates, aut Personatus habere præsumat, etiam si curam non habeat animarum. Circa sublimis tamen, & litteratas personas, quæ majoribus Beneficiis sunt honoran- de, cum ratio postulaverit; per Sedem Apostolicam poterit dispensari.*

19 CONCL. II. Quicumque defacto plura incompatibilia Beneficia, sive curata, sive alias incompatibilia si- mul recipere, ac retinere præsumpserit, per receptio- nem secundi mox priori Beneficio est ipso jure privatus, & is, ad quem spectat prioris Collatio, libere illud con- fert, statim atque institutus secundum recipit. Ita habe- tur *cit. cap. De multa, De præb. juncta Extravag. Execrabilis. §. Qui vero eod.* Accedit Concilium Trid. *sess. 7. de ref. c. 4.* quod prædicta Jura innovavit, & (cum illa loque- rentur dumtaxat de Dignitatibus, Personatibus, seu Officiis, aut aliis Beneficiis curam animarum habenti- bus annexam) ad alia Beneficia, etiam quomodolibet in- compatibilia extendit; prout notat Fagnanus *in cit. c. De multa n. 3.* allegans decisionem Rotæ, Garziam affirmantem, ita esse indubitanter tenendum, & alios.

20 Dicitur notanter in Conclusionem, *Quicumque de- facto*: quia sermo est de tempore moderno post Con- cilium Tridentinum; nam antehac varix successive ema- narunt Constitutiones Pontificiæ, ut videre est *c. Re- ferente, De Præb. & c. Quia nonnulli, de Cleric. non resid. & cit. c. De multa*: atque Extrav. *Execrabilis*. Verum moderno tempore post Concilium Trid. procedit Con- clusio, adeo ut hujus Decretum Fagnanus *loc. cit. n. 5.* ex quadam Cardinalium declaratione extendat ad plu- ra Beneficia simplicia si personalem residentiam requi- rant, aut primum ad congruam Clerici sustentationem sit sufficiens: nam & talia secundum Canones sunt in- compatibilia.

21 Additur vero, *per receptionem secundi*: siquidem sola affecturatio de altero Beneficio consequendo non sufficit ad inducendam dictam poenam privationis, sed requiritur actualis receptio, atque possessio secundi Be- neficii: hoc enim importatur per *ly receptionem*, id est, corporalem adeptionem, ut explicat *cit. Fagnanus n. 9.* & tenet Glossa *in c. De multa, de præb.* Accedit ratio: quia in Jure *verba accipienda sunt cum effectu, c. Rela- tum, de Cler. non resid. & alibi.*

22 Quinimo ob hanc rationem similiter non cense- tur vacare primum Beneficium per adeptionem secundi Beneficii, cujus fructus ex causa etiamnum alius perci- pit; prout clare decisum habetur *c. Si tibi concessio, de præb. in 6.* Rationem hujus ulteriorem dat Glossa *ibidem, vers. Vacare*, quia talis non est adeptus plene, licet enim beneficium habeat, fructus tamen non habet: & alioquin talis cogeretur mendicare, cum fructus ex se- cundo Beneficio non haberet, primo autem privatus existeret.

23 Dicitur ulterius in Conclusionem, *priori Beneficio est ipso jure privatus*, siquidem, ut hæc privatio modernis temporibus incuratur, non amplius opus est sententia Judicis eam infligentis, ut olim *c. Quia nonnulli, de Cleric. non resid.* sed defacto inducitur ipso jure; prout liquet ex *cit. c. De multa, De præb. juncto Concilio Trid. sess. 7. de reform. c. 4.*

24 Ceterum hæc Beneficii privatio intelligenda est quoad titulum, seu jus illud retinendi, non quoad pos- sessionem: nam possessione Beneficii ejusmodi Clericus privari non potest, nisi causa cognita; prout desumi- tur ex *c. Licet Episcopus, de Præb. in 6.*

25 Si dicas. Privatio Beneficii, & ipsum Beneficium nequeunt simpl stare cum privative opponantur; ergo, si Clericus ille ipso jure privatus est Beneficio, repu- gnat, quod adhuc ejus possessionem retineat. Resp.

distinguendo antecedens: privatio Beneficii quoad titu- lum & possessionem simul nequit stare cum Beneficio, conceditur: privatio Beneficii quoad titulum dumtaxat nequit stare cum Beneficio, seu Possessione ejus, nega- tur antecedens, & consequentia. Nam, ut notat Lessius *lib. 2. de Just. & Jur. c. 29. n. 64.* leges illæ, quibus additur, quod delinquens ipso facto sit privatus officio & beneficio, privant titulo, seu jure ad Beneficium, qua- tenus ipso facto quis amittit jus ad illud, nondum autem ejus possessione, nisi post sententiam Judicis.

26 CONCL. III. Insuper, si quis prius Beneficium una cum secundo forte retinere contenderit, etiam se- cundo privatus existit. Ita habetur *cit. c. De multa, jun- cto Concilio Trident. sess. 7. cap. 4. de reform.* & tradit Fagnanus *cit. c. De multa num. 6. & 8.* dicens, hanc poe- nam ipso jure incurri. Ubi ulterius addit, quamvis Glossa super illam dictionem, *contenderit*, asserat, ad hoc, ut quis secundo etiam Beneficio ipso facto privatus existat, requiri, quod quis utrumque in Jure contentioso retinere voluerit usque ad litis contestationem: contra- riam tamen aliorum sententiam, qui volunt, ex sola retentione primi Beneficii cum secundo jam induci di- ctam privationem utriusque Beneficii, etiam si, quando quis incipit conveniri, velit prius dimittere, esse te- nendam; eo præsertim, quia Concilium Trident. *loc. cit.* hanc poenam jure ipso imponit illi, qui ejusmodi Beneficia incompatibilia recipere, & simul retinere præ- sumpserit.

27 Quæres. An in nullo prorsus casu possit quis si- mul habere plura Beneficia? Resp. Hoc in nonnullis ca- sibus accidere posse. Et primo quidem per legitimam dispensationem, de qua superius *num. 15. & seqq.* De- inde id accedit sine dispensatione, quoties ipsa Beneficia non sunt incompatibilia, prout sit in Beneficiis simpli- cibus, quorum singula ad honestam sustentationem Cle- rici non sufficiunt. Tertio, si Ecclesia Cathedralis, vel Parochialis, aut Dignitas ob tenuitatem fructuum non sufficiat congruæ sustentationi Rectoris sui, potest simul cum ea uniri, vel obtineri Beneficium simplex non re- quirens residentiam, juxta Concilium Trid. *sess. 24. de reform. cap. 15. & 17.* Insuper ob eandem Ecclesiarum paupertatem possunt Episcopi, tamquam Sedis Aposto- licæ Delegati, uniones perpetuas Beneficiorum facere, & ista postmodum simul ab eodem possideri, prout con- cessit idem Tridentinum *sess. 21. de reform. cap. 5.* ubi sequentia leguntur formalia: *Possint Episcopi, etiam tam- quam Apostolicæ Sedis Delegati juxta formam juris, sine tamen præjudicio obtinentium, facere uniones perpetuas qua- rumcumque Ecclesiarum Parochialium, & Baptismalium, & aliorum Beneficiorum curatorum, vel non curatorum cum curatis propter earum paupertatem; ubi in simili casu e. g. hæ Parochiæ ad invicem unitæ censerentur non amplius duæ, sed unica Parochia, sicque nec Episco- pus conferre duo Beneficia incompatibilia proprie lo- quendo. Tandem ob præfatam causam quandoque Di- gnitati, vel Canoniatui accessorie annexa est Ecclesia Parochialis, quæ per idoneum Vicarium administrari, ac simul cum Canoniatu retineri potest: text. clar. c. Extirpanda. §. Qui vero, de Præb. De hoc fusius *lib. 3. decr. tit. 12. §. 3.**

### QUÆSTIO III.

Quid, & quotuplex sit Renuntiatio Beneficio- rum, & ex quibus causis fieri possit?

### SUMMARIUM

28 Renuntiatio Beneficii, quid?

29 Non valet, nisi fiat coram legitimo Superiore.

30 Quilibet potest suo juri renuntiare, quomodo?

\* Beneficiarius ingressurus aliquam Religionem qualiter teneatur renuntiare suo Beneficio? Addit. I.

\* An ad renuntiationem, & quando requiratur consensus Patroni, si Beneficium fuerit Patronatum? &c. Addit. II.

31 Renun-



### Quæst. III. Quid, & quotuplex sit Renuntiatio Beneficiorum 351

- 31 Renuntiatio Beneficii tacita ,  
 32 Expressa ,  
 33 Renuntiatio pura & conditionalis , quæ ?  
 34 Ad Renuntiationem requiritur iusta causa.  
 35 Sex causæ resignandi Episcopatum.  
 36 Alia pro Renuntiatione Beneficiorum.

\* De Renuntiante , qui tamen intra 20. dies à sua resignatione moritur.

28 **C**ONCL. I. Renuntiatio est spontanea Beneficii Ecclesiastici dimissio , facta coram legitimo Superiore id acceptante. Ita in re communis.

29 Dicitur , facta coram legitimo Superiore : siquidem Beneficia Ecclesiastica non nisi in manibus Ordinarii , hoc est , ipsius auctoritate interveniente resignari debent. c. Si quis vero , & c. Si quis Presbyt. 7. q. 1. Et aliter facta resignatio non est valida : atque dimittens Beneficium sine licentia sui Prælati potest compelli ad illud reassumendum , etiam per Censuras Ecclesiasticas c. Non oportet qu. 1. & c. Admonet , de Renunt. cum concordantibus.

30 Nec dicas. Quilibet potest suo juri renunciare c. Si diligenti , de Foro compet. ergo & Beneficiarius Beneficio , etiam sine licentia sui Superioris. Negatur enim consequentia : nam regula illa est intelligenda , dummodo id fiat sine præjudicio alterius , atque post acceptationem Beneficii , & confirmationem manet Clericus Ecclesiæ suæ alligatus , quæ pateretur detrimentum , si quilibet ipsorum pro libitu ei renunciare , & veniente lupo , id est , instante tribulatione , instar Mercenarii aufugere , ovesque sibi concreditas relinquere.

#### Additio I.

\* Nec istes. Potest Beneficiatus absque impetrata licentia Ordinarii ingredi aliquam Religionem a S. Sede Apostolica approbatam : ergo etiam poterit absque dicta licentia renunciare suo Beneficio. Respondeo enim , in primis antecedens non esse verum , in casu , quo ingressurus Religionem foret Episcopus , qui nequit suam sponsam deserere , etiam sub spe mercedis vitæ sine consensu Papæ juxta c. 10. de Renuntiatione. Deinde etsi quoad inferiores Beneficiatos respectu ingressus in aliquam sacram Religionem non requiratur , ut adhibeatur consensus actualis Ordinarii ; cum talis ingressus etiam contradicente Episcopo fieri queat juxta clarum textum Juris c. Dux sunt. 19. q. 2. consulitur tamen ( quinimo a pluribus Doctoribus exigitur ) ut hæc licentia ( quamvis ejus obtentio non sit necessaria ) siletem petatur ob debitam erga Ordinarium reverentiam ante ingressum , simulque humiliter supplicetur pro concedendo tempore Novitiatus idoneo , qui Beneficium interim administret.

Resp. II. negando consequentiam & paritatem. Disparitas principalis est ; quia Jus Canonicum in primo casu id expresse concedit , in puncto autem renuntiationis expresse denegat. Accedit , quod per ingressum in Religionem non æque ac per renuntiationem relinquat aliquis ex toto Beneficium , sed sibi adhuc usque ad Professionem jus reservat regrediendi , si ex Novitiatu egredere-  
 tur. Videatur de hoc fusius Jus Canonicum lib. I. decret. tit. 9. n. 21. & seqq. \*

#### Additio II.

\* Porro pergendo iterum de Renuntiatione , si Beneficium aliquod fuerit patronatum , vel electivum , etiam si tale libere ac simpliciter possit resignari in manus Superioris ; nequit tamen id fieri titulo permutationis , vel in favorem tertii absque Patronorum , vel Eligentium consensu ; alias enim , nisi prædicti velint sponte ratificare , possent ob præjudicium sibi factum agere ad irritandam resignationem , de quo vid. in Jure Can. lib. I. titul. 9. n. 61. & 62. \*

31 **C**ONCL. II. Renuntiatio Beneficii Ecclesiastici alia est tacita , alia expressa. Ita communis , ac patet in-

ductione. Et quidem Renuntiatio tacita dicitur ea , quæ fit facto aliquo resignationem significante , vel ex dispositione Juris eam importante. Nam , qui facit id , quo posito ex ipsius Juris constitutione Beneficium amittitur , seu retineri nequit ; eidem tacite , seu ipso facto renunciare censetur. Sic fit , dum Beneficiarius in Minoribus constitutus contrahit Matrimonium : quia tunc Beneficium Ecclesiasticum ipso jure vacat argum. cap. 1. & 2. de Cler. conjug. Idem dicendum de eo , qui Religionem solemniter professus est : c. Beneficium de Regularibus in 6. & hujusmodi.

32 Renuntiatio expressa Beneficii Ecclesiastici illa est ; quæ fit verbis expressis , aut Scriptis , voluntatem renunciandi aperte declarantibus , coram legitimo Superiore eam acceptante : post quam acceptationem non amplius datur locus poenitentiae , sed potest Resignans etiam invitus compelli ad dimittendam possessionem Beneficii juxta c. 12. de Renuntiatione. Ceterum

33 Renuntiatio expressa subdividitur in puram , seu simplicem , & absolutam , & in conditionalem. Renuntiatio pura seu absoluta , est , quæ fit sine adjectione ullius conditionis , modi , vel pacti. Conditionalis vero , quæ fit sub certa conditione , pacto , vel modo : ut si fiat Renuntiatio Beneficii ex causa permutationis , vel si quis illud resignet in favorem tertii , puta , ut Beneficium conferatur Cajo consanguineo suo , & non aliter intendat resignare ; quod appellant Resignare in favorem tertii , seu sub clausula , Non aliter. Insuper Renuntiatio conditionalis censetur ea , in qua resignans reservat sibi fructus vel pensionem ex Beneficio : de quibus sigillatim in progressu.

34 **C**ONCL. III. Ad Renuntiationem Beneficii requiritur iusta , & legitima causa ; alioquin Superior eam admittere non tenetur , neque debet. Ita communis. Ratio est : quia , si quilibet pro suo arbitratu posset Beneficium relinquere , talis libertas in maximum Ecclesiæ detrimentum cederet , aufugientibus passim per Renuntiationem Pastoribus : si viderent lupum venientem , seu tribulationem instantem.

35 **C**ONCL. IV. Sex sunt causæ , ob quas Episcopus post sui confirmationem potest petere , & Papa sole concedere licentiam cedendi , seu resignandi Episcopatum. Patet hoc c. Nisi cum prident de renunt. ubi sequentes sex causæ enumerantur I. Conscientia criminis : non quidem cujuscumque , sed illius dumtaxat , quod post actam poenitentiam impedit executionem Officii. II. Imbecillitas corporis per quam quis impotens redditur ad exequendum Officium Pastoralis. III. Defectus scientiæ , etiam competentis. IV. Malitia plebis , ob quam interdum cogitur Prælatas ab ipsius regimine decedere. V. Grave scandalum , quod aliter sedari non potest. VI. Irregularitas personæ ; de quibus versiculi ibidem in Summario allegati :

*Debilis , ignarus . male conscius , irregularis ,  
 Quem mala plebs odit , dans scandala : cedere possit.*

36 **C**ONCL. V. Renuntiationes Beneficiorum inferiorum solent admitti tum ex prædictis , tum etiam aliis levioribus causis. Ita Pirhing. tit. de Renunt. num. 54. post Azorium , & alios. Sic in Curia Romana solet defecto admitti Renuntiatio Beneficii inferioris , præsertim simplicis , quando resignans multo tempore servivit in Ecclesia : vel quando is resignat , ut Beneficium dimissum alteri conferatur , in cujus gratiam illud Clericus dimittit ; dummodo in Sacris constituto , & resignanti aliunde sit provisum , unde honeste sese alere possit. Concordat Bulla S. Pii V. quæ incipit : Quanta Ecclesiæ , ( & habetur tom. 2. Bullarii Romani constitut. 68. dicti Pontif. ) in qua plures causæ , ob quas inferiores Beneficarii resignare valeant , referuntur , veluti si resignantes sint senio confecti , valetudinarii , aut corpore impediti , vel vitiati ; seu quia eos ad aliud beneficium contigerit promoveri ; vel sint Religionem ingressuri , aut Matrimonium contracturi , si statim postea id re ipsa



## 352 Tract. XI. De Beneficiis, Jure Patronatus, & Decimis. Dist. III.

exequantur; quique ob capitales inimicitias nequeunt vel non audent in loco Beneficii residere securi: dummodo resignaturis, & Sacro Ordini mancipatis aliunde sit provisum, quo possint commode sustentari.

### Additio.

\* Quæres. An resignatio habeat suum vigorem, si Parochus, vel alius Beneficiatus ægrotus ob continuas suas infirmitates resignet suppliciter proponens aliud idoneum subjectum: interea tamen intra vincti dies, a die resignationis a legitimo Superiore acceptatæ numerandas, morte abripiatur? Resp. Resignationem similem, ac Collationem Beneficii postmodum titulo resignationis factam esse penitus nullam, ac si non fuisset, ipsumque tale Beneficium censi vacare per obitum. Ita expresse habetur in Regulis Cancellariæ Regula, De viginti. tempore Innocentii XII. ac Clementis XI. apud Reiffenstuel ordine 19. Atque Cochier in dictam Regulam scribens num. 15. vers. Itaque frustra. Insuper addit contra Rebuffum, eandem procedere etiam quoad illos, qui dum actu resignarunt adhuc fuerant sani; postea tamen intra hos 20. dies casu quodam aut superveniente inopinato morbo vitam suam clausurunt; ubi adducitur pro hac sententia a P. Reiffenstuel lib. 1. tit. 9. num. 71. Rota Romana, diciturque ibidem, ita declarasse Clementem VII. Ceterum ex eodem Auctore lib. 3. decret. tit. 5. §. 16. & 17. & ex dictis tract. 2. dist. 1. num. 21. nota: quod Regulæ Cancellariæ nil aliud sint, quam quædam Constitutiones, quas singuli Pontifices ad initium regiminis circa causas Beneficiales, & Judiciales facere, vel saltem a Prædecessoribus factas innovare, augere, vel minuire solent, prout in Domino videbitur. Et, licet in his partibus concordata Germaniæ Regulis Cancellariæ in multis derogent, non tamen in omnibus: in specie non derogant eadem Regulæ De viginti: uti singulariter advertit Reiffenstuel lib. 3. tit. 5. §. 19. num. 540. \*

### QUESTIO IV.

An sit licita Resignatio Beneficii in favorem tertii, vel reservata annua Pensione?

### SUMMARIUM

- 39 Resignatio in favorem tertii, an sit licita?
- 38 Quid, si quis simpliciter resignet, & certam personam solum recommendet?
- 39 An tunc Episcopus teneatur, vel possit huic conferre?
- 40 Resignare Beneficium reservata pensione, an liceat?
- 41 Pensio, quid?
- 42 Id Regulariter illicitum.
- 43 Tamen ex justa causa potest Episcopus constituere pensionem in Beneficio, & resignans pro ea sibi constituenda supplicare,
- \* Vel præcipue aliquam amicabilem compositionem cum altero instituere, & quomodo? Addit. I.
- \* Qualis pensio possit ab Episcopo resignanti designari? Addit. II.

37 CONCL. I. Resignationes in favorem tertii, seu cum clausula, Non aliter, ob speciem Simoniam, quam habent, juxta Stylum Curiae non possunt fieri, nisi in manus Summi Pontificis. Ita Lessius lib. 2. de Just. & Jur. c. 34. dubit. 14. post Navarrum, Rebuffum, & alios, ac sequitur Engel tit. de renuntiatis. nu. 8. citans communem omnium doctrinam, & in praxi observatam. Ratio est; quia Resignationes Beneficiorum in favorem tertii speciem quamdam præ se ferunt hæreditariæ successione, quam Sacri Canones semper detestantur, volentes, ut Beneficia Ecclesiastica secundum meritum personarum, & quidem dignioribus, conferantur. Accedit, quod ejusmodi Resignatio cum clausula, Non aliter, si fiat in manus Episcopi, aut alterius Papa inferioris,

vel contineat Simoniam Juris Ecclesiastici, ut multi volunt, vel saltem speciem talis Simoniam: Cum in spiritualibus omnis pactio, omnisque conventio debeat omnino cessare. cap. ult. de pactis, juncto c. Quæsitum de rerum permut. ibi: Pactio præmissa circa spiritualia, vel connexa spiritualibus labem semper continet Simonie.

38 CONCL. II. Si quis tamen simpliciter resignet, & per modum recommendationis potius, quam rigorosæ obligationis Episcopo certam aliquam personam nominet, non est jure prohibitum, quin Episcopus possit personam recommendatæ, si ea ceteroquin idonea fuerit, ejusque qualitas mereatur, Beneficium illud conferre. Ita Zoësius tit. de Simonia n. 72. Covarruvias lib. 1. var. resol. c. 5. n. 5. & Engel loc. cit. num. 8. Idque desumitur ex c. Cum universorum, de Rerum permut. & c. Ex parte N. 12. de Offic. Jud. deleg. ubi similes Resignationes leguntur, nec tamen ex hoc capite reprobantur, quamvis ex aliis rationibus non tenuerint.

39 Notandum tamen cum citatis Auctoribus, quod facta ejusmodi Resignatione pure ac simpliciter in manus Episcopi, haud obtante, quod preces pro aliquo oblatæ fuerint, Episcopus non sit adstrictus, ut huic conferat Beneficium, neque injuriam faciat nominato, si alteri conferat. Ratio est: quia, cum Renuntiatio in favorem tertii sit jure prohibita; simulque Resignatio Beneficii debeat fieri pure, hoc ipso non potest illi nominato jus quodpiam fuisse acquisitum (nam sola precum interpositio tale jus non tribuit) & consequenter neque injuria per denegatam collationem eidem irrogabitur. Attamen non peccabit Episcopus, si conferat Beneficium nominato, pro quo preces sunt oblatæ, dummodo aliud Canonicum impedimentum non obstet, & personæ qualitas id mereatur, ut dictum n. præ.

40 CONCL. III. Resignare Beneficium Ecclesiasticum reservata annua pensione, coram Episcopo, vel alio Collatore Papa inferiore, regulariter loquendo non licet. Ita communis.

41 Ubi notandum, quod per pensionem in proposito intelligatur jus percipiendi partem fructuum ex Beneficio alieno, auctoritate Superioris cuiuspiam iusta de causa constitutum: ut si auctoritate Episcopi assignetur Parochus, ob senectutem v. g. resignanti, certa pars reddituum illius Beneficii, ab ejus Successore ipsi persolvendum ad honestam vitæ suæ sustentationem. Hoc prænotato,

42 Conclusio probatur ex eo: quia beneficia Ecclesiastica sunt conferenda sine diminutione, id est, sine novi oneris impositione, aut aliqua fructuum detractio, prout habetur toto Titulo, Ut Beneficia Ecclesiastica sine diminutione conferantur: atqui hoc non fit, quando constituitur cuiuspiam pensio in Beneficio; ergo.

43 Additur in Conclusionem, regulariter loquendo: nam ex iusta & rationabili causa potest non solum Summus Pontifex, sed etiam Episcopus pensionem in Beneficio constituere: utputa quia resignans est ætate decrepitu, vel infirmus, ut sic ex pensione habeat, unde honeste sustentetur, vel quando pro bono pacis fit resignatio Beneficii litigiosi, & hujusmodi. Barbosa part. 3. de Offic. & pot. Episc. allegat. 85. n. 3. Engel. tit. de Renuntiatis. num. 10. & alii. Hoc ipsum desumitur ex c. Nisi essent. de Præb. ubi legitur quædam provisio, seu pensio quadraginta librarum, resignanti pro bono pacis per Judices facta, & per Papam tolerata; ergo pariter nihil obstat, quin pure ac simpliciter resignanti Episcopus ex ejusmodi iusta causa possit pensionem aliquam constituere. Quinimo pro ea sibi constituenda potest ipsemet resignans, ut securior sit, Episcopo ante Resignationem supplicare arg. c. Tua nos, de Simonia ibi: Rogans humiliter.

### Additio I.

\* Insuper juxta præsentem Auctorem & plures alios a se lib. 3. decret. tit. 12. num. 105. citatos possunt prævie ipsimet & adinvicem Resignans, & resignatarius



tarius futurus super pensione danda amicabiliter inter se tractare, non quidem ac si vellent, ac intendere absolute, & vi alicujus pacti per se ipsos hanc pensionem, ejusque quantitatem concludere, sed quasi sub conditione relata in consensum Episcopi, in cujus manibus beneficium libere debet resignari, sup-  
pliciter quidem rogando pro pensione resignanti constituenda; simul tamen sese ejusdem dispositioni finaliter omnino submittendo: nam omne pactum prævium circa Beneficia foret illicitum atque prohibitum Jure Canonico; in quo juxta Capitulum *Nisi essent. 21. de Præbendis*; pensionem quadraginta Librarum, ad dies gravati Prioris alteri pro bono pacis constitutam non aliter Papa toleravit, nisi quia NB. non ex *pactione partium, sed ex jussione Judicum* debebat exhiberi. Videatur Reiffenstuel *loc. cit. n. 98. \**

Additio II.

\* Quæres. Qualem pensionem possit Episcopus Beneficiato libere, & ex justa causa Resignanti designare? Resp. I. Episcopus potest libere & ex justa causa Resignanti talem designare moderatam pensionem, quæ duret usque ad mortem novi Beneficiati. Ita communis cum præfenti Auctore *lib. 3. decret. tit. 12. num. 89.* testaturque Gonzalez apud eundem, ita sæpius fuisse decisum a Rota, atque deducitur ex *cap. 21. de Præbendis*: ubi similis pensio imposita admittitur. Resp. II. Utrum Episcopus possit etiam Resignanti designare talem pensionem, quæ duret usque ad mortem ipsius Resignantis, ita ut ad eandem non solum novus Beneficiatus, sed etiam, ipso mortuo, Successor illius dare obligetur, usque dum ipsemet primus Resignans vita fungatur, inter Doctores controvertitur; ubi præfens Auctor *loc. cit. n. 91.* cum Fagnano, & aliis probabilius negat, id fieri posse ab Episcopo insistendo puncto juris; quia hanc potestatem Summus Pontifex neque concedit suis Judicibus delegatis juxta *cap. Nisi essent. 21. de Præbendis*, addens sequentem rationem, *ne forte circa proventus aliqua videatur facta sectio &c.* quæ ratio utique pugnat æque quoad Episcopum, quam quoad Judices delegatos? Dixi notanter *insistendo puncto Juris*: nam vi consuetudinis saltem posse ab Episcopo etiam talem pensionem designari, ait cum pluribus à se citatis Schmalzgrueber *lib. 3. decret. tit. 12. num. 8. \**

QUÆSTIO V.

An & quomodo possit fieri permutatio Beneficiorum Ecclesiasticorum?

SUMMARIUM.

- 44 Permutatio Beneficiorum propria auctoritate fieri nequit.
- 45 Secus, accedente auctoritate Superioris.
- 46 Solvitur instantia.
- \* Additur aliquod notandum pro permutantibus.
- 47 Forma & modus permutandi Beneficia, qualis?
- 48 In permutatione Beneficiorum, an pro habente pinguioribus proventus possit suppleri pretium?
- 49 Affirmant aliqui.
- 50 Opposita sententia est probabilior, ac merito tenenda.
- 51 Nequeunt permutari proventus sine Beneficio.
- 52 Solvuntur rationes prioris sententiae.
- 53 Potest tunc Episcopus pensionem constituere in pinguiori Beneficio.

44 CONCL. I. Etsi illicita sit, quin etiam accedente pactione Simoniacæ, permutatio Beneficiorum Ecclesiasticorum privata auctoritate facta; atque insuper Beneficia Ecclesiastica perdant, qui ea propria auctoritate commutant, nihilominus licita est resignatio Beneficiorum causa permutationis inter personas

Anacl. Reiffenstuel Theol. Tom. I.

Ecclesiasticas idoneas, auctoritate legitimi Superioris interveniente. Ita certa, & communis, patetque singula ex diversis textibus Juris. Et quidem prima pars habetur c. *Quæsitum, de Rerum permutat.* ibi: *Generaliter tenent, quod commutatione præbendarum de jure fieri non possunt, præsertim pactione præmissa, quæ circa spiritualia, vel connexa spiritualibus labem semper continet Simoniam, cum concordantiis.* Deinde, quod perdant sua Beneficia, qui eadem propria auctoritate permutant, textus est clarus in c. *Cum olim Exod.* Ceterum ex communi DD. non censentur propria auctoritate commutare, illi, qui præcise quidem inter se conveniunt, alii non nisi cum relatione ad futurum Superioris consensum.

45 Altera pars Conclusionis, quod videlicet legitima Superioris auctoritate interveniente, licita sit resignatio Beneficiorum causa permutationis, habetur *cit. c. Quæsitum, de Rerum permut.* juncta *Clem. un. exod.* Ubi insuper additur, quod, si quæ Beneficia ex causa permutationis ab aliquibus resignata fuerint, ea aliis, quam ipsis permutare volentibus conferri nequeant; alioquin Collatio nullius sit firmitatis.

46 Nec obstat textus c. *Majoribus, de Præb.* ibi: *Divisionem præbendarum, aut dignitatum permutationem fieri prohibemus.* Resp. enim cum Glossa ibidem, id intelligendum *sine auctoritate Superioris*: Superior enim si expedire viderit, poterit admittere resignationem causa permutationis factam per textus *n. præc.* allegatos, etsi ejusmodi permutatio propria auctoritate neutiquam fieri possit. Et hoc modo concordantur jura iuribus.

Additio.

\* Ubi tamen semper, ac pro semper advertendum est, quod, etsi auctoritate Superioris, vel Legis ex justa causa similis permutatio Beneficiorum cum annexis conformiter jam dictis, & adhuc dicendis licite fieri queat; eadem tamen prohibita, & simoniaca sit, si quidem auctoritas Superioris in ipsa permutatione interveniat, interim tamen permutantes *propter hanc ipsam permutationem* prævie jam in occulto varia instituerint pacta non solum conditionata ad Superiorum legitimam ratificationem, verum absoluta, & quæ potius Ordinariis abscondere allaborant. Ratio est; quia, uti deducitur ex *cap. 7. de Transact. &c. ult. De pactis*, in materia Beneficiali omne pactum privatum de pecunia, vel alio temporali dando intuitu cujuscunque resignationis longe abesse debet. Et hinc simoniaca est permutatio, quæ fit cum pacto privatorum, ut Resignatarius solvat Resignanti illas expensas, quas ille aliquando in Beneficii assécutione solvere debuit; vel posito, quod unum Beneficium ex permutandis majores ferat redditus alio, ut alter qui permutatione acquirit pinguius, propterea solvat omnes expensas in admissione permutationis propter taxam Cancellariæ v. g. in expeditione litterarum faciendas, vel ut mobilia in loco pinguioris Beneficii simul relictæ, majori emat pretio &c. Vide Jus Canonicum hujus Auctoris *lib. 1. decret. tit. 9. §. 4. \**

47 CONCL. II. Forma, & modus permutandi Beneficia, est, ut ea Clerici resignent in manus Ordinarii, exprimentes, quod id causa permutationis faciant, ita tamen, quod prius accesserit consensus eorum, qui jus conferendi, eligendi, vel præsentandi habent. Quo casu arbitrari debet Ordinarius, num admittenda sit resignatio, nec ne? & si admittendam censuerit, nulli alteri, sed præcise ipsis causa permutationis resignantibus Beneficia illa conferre poterit, ac debebit; & collatio aliis facta non tenebit. Ita habetur. *cit. Clem. un. de Rerum permutat.*

48 Quæres. An in permutatione Præbendarum, sive Beneficiorum Ecclesiasticorum quoad titulum, quorum unum pinguioribus habet proventus, absque labore Simoniacæ possit suppleri pretium pro minus valente?



## 354 Tract. XI. De Beneficiis, Jure Patronatus, & Decimis Dist. III.

Ratio dubitandi est : quia , quando duæ Ecclesiæ jure proprietatis una cum suis possessionibus invicem permutantur , potest pro alterius Ecclesiæ possessionibus pretium suppleri , dummodo adhibeatur cautela in Jure Canonico c. *Ad quæstiones , de Rerum permut.* insinuata : hoc est , dummodo id fiat , non unicum dumtaxat contractum instituendo ( alioquin enim pretium refundi videretur etiam pro ipsamet Ecclesia , quod sapit Simoniam ) sed faciendo duos contractus , quorum uno ad invicem gratis Ecclesiæ , altero autem possessione earum cum refusione certæ pecuniæ permutantur : ergo idem videtur posse fieri in proposito.

49. Resp. In solutione hujus dubii variare Doctores. Et quidem affirmant Angelus , & Sylvester *vers. Permutatio 2. q. 6.* post Abbatem c. *Ad quæstiones n. 3. de Rerum permutat.* Eandem sententiam ex professo tradit Lessius lib. 2. c. 35. n. 101. allegans Sotum & Cajetanum. Probant imprimis hanc sententiam ex cit. c. *Ad quæstiones Eod.* ob paritatem rationis. Addit Lessius , hanc compensationem exigi posse non pro excessu , qui remanet annexus ipsi titulo Beneficii , sed pro incommodo temporali , quod quis subit sese spoliando majoribus illis proventibus , aut spe ipsorum. Sed , quidquid sit de probabilitate hujus opinionis ,

50 Opposita sententia non solum est probabilior , sed jure merito tenenda ; prout eam tenent Covarruvias lib. 1. var. resol. c. 5. n. 9. Navarrus cap. 23. *Manualis* n. 100. §. *Tertio.* Laym. lib. 4. tr. 10. c. ult. n. 54. citant insuper Suarez , & Vasquez , Engel tit. *De Rerum permut.* num. 4. post Barbosa , Vallensis , & alii. Ratio hujus sententiæ , simul & disparitatis inter permutationem duarum Ecclesiarum una cum suis possessionibus quoad proprietatem , & inter permutationem duorum Beneficiorum quoad titulum una cum suis proventibus hæc est : quia in priori casu duæ possunt intervenire , atque interveniunt permutationes , sibi invicem non permixtæ ; una videlicet Ecclesiarum , altera possessionum , duobus e. g. Monasteriis pleno jure incorporatarum , juxta cit. c. *Ad quæstiones Eod.* Econtra in altero casu una dumtaxat potest intervenire permutatio , sicque nequit adhiberi consimilis cautela.

51 Probatur hoc ultimum : quia Beneficiarius non est dominus possessionum v. g. agrorum , aut prædiorum Beneficii ( sicque has distincto contractu permutare nequit ) sed ex iis tantum percipit redditus , ut quid accessorium ad ipsum Beneficium. Deinde Beneficiarius etiam non habet jus , & dominium reddituum futuro primum tempore obventurorum , sed eos primum acquiraturus est sub conditione Beneficii retinendi , atque officii debiti præstandi : ergo antecedenter eosdem permutare nequit. Tandem permutatio illorum reddituum , cum sint quid accessorium ad Beneficium , simulque primum acquirendi sub conditione Beneficii retinendi , hoc ipso nequit separari a permutatione Beneficii , sicut fit in permutatione Ecclesiæ , suarumque possessionum quoad proprietatem.

52 Et per hoc patet ad rationes prioris sententiæ. Nam ad primum negatur consequentia , & paritas inter permutationem Ecclesiarum una cum possessionibus , & permutationem Beneficiorum una cum redditibus : quia ibi possunt institui duo contractus permutationis , non hic , ut proxime explicatum. Ad alterum dicitur , redditus futuros Beneficii , ac spem ipsorum consequendorum habere necessariam dependentiam & connexionem cum Beneficio , cum sint accessorium hujus : unde urget illud can. *Si quis objecerit* l. q. 3. ibi : *Quisquis horum alterum vendit , sine quo nec alterum provenit , neutrum invenditum derelinquit.*

53 Ceterum his non obstantibus , potest auctoritate Episcopi in hujusmodi casu constitui pensio in pinguiori Beneficio , præstanda alteri Beneficiario , non

quidem pro compensatione excessus , sed quia illud e. g. ob utilitatem Ecclesiarum pro minus pingui relinquit. Engel loc. cit. num. 4. post Navarrum *de Simonia consil.* 43. num. 4. Vide Jus Canon. lib. 3. decr. tit. 19. num. 28. & seqq. præsertim num. 33.

### DISTINCTIO III.

#### De Jure Patronatus.

#### QUESTIO I

Quid sit Jus Patronatus , & quomodo acquiratur?

#### S U M M A R I U M.

- 1 Jus Patronatus , quid ?
- 2 Tribus potissimum modis acquiritur.
- 3 Quis censeatur Ecclesiam fundasse ,
- 4 Edificasse , ac
- 5 Dotasse ?
- 6 Acquiritur Jus Patronatus etiam Prescriptione ,
- 7 Ac privilegio , & quomodo ?
- 8 Legitime acquisitum transit ad heredes.
- 9 Hi succedunt non in capita , sed in stirpes.
- 10 Jus Patronatus ab uno in alium transfertur 4. modis , nimirum
- 11 Successione , Donatione ,
- 12 Permutatione ,
- 13 Venditione universitatis.
- 14 Tamen id per se vendi nequit.
- \* Jus præsentandi cui competat , si Castum , cui annexitur , detur in Feudum , Emphyteusm , aut Dotem , vel oppignoretur ?
- 15 Jus Patronatus procedit ex gratia , & privilegio Ecclesiæ.
- 16 Hodie tamen non gratia censeatur , sed Jus.
- 17 Ejus etiam Laici , ac feminae sunt capaces.
- 18 Solvitur objectio.
- \* Apud Impuberes quis præsentet ?

1 **C**ONCL. I. Jus Patronatus quantum ad propositum , est Jus nominandi , seu præsentandi Clericum idoneum , promovendum ad Beneficium Ecclesiasticum vacans. Ita in re communis. Dicitur primo , *Jus nominandi* , seu *præsentandi* : nam ista duo hic ferme sumuntur pro eodem , quamvis ceteroquin nominatio latius pateat , quam præsentatio. Et additur , *ad Beneficium Ecclesiasticum vacans* : tum ad magis explicandam naturam illius Juris Patronatus , de quo agitur in proposito ( nam Jus Patronatus nonnullas alias in Jure acceptiones habet ) tum quia , sicut institutio , ita & præsentatio ad Beneficium non vacans irrita est : arg. c. *Illud : de Jure Patronatus.* Reliquæ particulæ patebunt ex dicendis.

2 **C**ONCL. II. Tribus potissimum modis acquiritur Jus Patronatus respectu Beneficii Ecclesiastici , nimirum ex fundatione , ædificatione , & dotatione. Ita Glossa communiter recepta in c. *Pie mentis* 16. q. 7. & concordat Concilium Tridentinum sess. 14. c. 12. *de reform.* Unde versiculus ille à cit. Glossa relatus :

*Patronum faciunt dos , ædificatio , fundus.*

3 *Fundasse* dicitur , qui fundum , seu terræ solum dedit , in quo Ecclesia construeretur.

4 *Edificasse* dicitur , qui Ecclesiam suis sumptibus construxit , arg. c. *Monasterium* 16. q. 7. cum concordantibus. Quod si Ecclesia solum reparatur , seu reficiatur , Jus Patronatus non acquiritur , nisi ipsa fuerit penitus destructa. Si vero funditus destructa fuit , & de consensu Episcopi aliquis eam reedificet , licet forsan de eadem materia , verius est hunc acquirere Jus



Jus Patronatus, ac priorem dominum non amplius remanere Patronum; prout tenet, ac probat Glossa in c. Quoniam, vers. Fundatores, de Jure Patronatus.

5 Tandem Dotasse dicitur, qui Ecclesiæ annuos redditus sufficientes assignavit. Porro, qui Ecclesiam ædificat, hoc ipso videtur etiam se obligare ad dotandum, si nemo alius dotet: siquidem Ecclesia sine dote consecrari non debet, c. Nemo Ecclesiam, de Consecr. dist. 1. & c. Cum sicut, de Consecr. Eccles. juncta Glossa magna ibidem, dicente: Qui fundat Ecclesiam, tenetur dotem assignare eidem, subintellige; nisi alius dotare velit.

6 Dicitur notanter in conclusione, tribus potissimum modis: nam quamvis enumerati tres sint principales, nihilominus aliis quoque modis Jus Patronatus acquiri potest, videlicet Præscriptione, ac Privilegio. Et quidem contra Ecclesiam ab initio liberam defacto non præscribitur Jus Patronatus, nisi tempore immemoriali: quod ipsum tamen legitime probari debet, juxta præscriptum Concilii Trid. sess. 25. cap. 9. de reform. Verum contra Ecclesiam non liberam, sed patronatam, seu potius contra ejus Patronum præscribitur Jus patronatus spatio quadraginta annorum. Vallenfis tit. de Jure Patronat. §. 1. & alii. \* Quinimo, si prior Patronus non fuerit Monasterium, vel alia causa pia, sed potius aliqua persona privata, ajunt communiter Doctores, ne quidem quadraginta annos requiri; sed sufficere cum Titulo decem inter præsentantes, & viginti inter absentes; absque Titulo autem triginta. Ita præfens Auctor in Jure Canonico lib. 3. decret. tit. 38. num. 15. \*

7 Ceterum ex Privilegio potest acquiri Jus Patronatus, quando ejusmodi privilegium cuipiam de Ecclesia, vel Christiana Republica bene merito a Summo Pontifice conceditur, etiam si Ecclesiam illam non fundaverit, neque extruxerit, neque dotaverit. At vero Episcopus loci, alique Prælati Papa inferiores tale privilegium concedere non possunt: text. clar. c. 2. de Rebus Ecclesiæ non alien. in 6. juncto Concilio Trid. loc. cit.

8 CONCL. III. Jus Patronatus semel legitime acquisitum transiet etiam ad hæredes, nisi aliud ex prima Juris Patronatus constitutione appareat. Ita communis. Notanter additur, nisi aliud ex prima &c. siquidem in potestate fundatoris est, an velit omnino remittere Jus Patronatus, vel sibi tantum aut Familiæ suæ, vel etiam hæredibus extraneis reservare. Engel. tit. de Jure Patr. n. 15. & alii.

9 Notandum tamen, quod successio hæredum in Jure Patronatus non fiat in capita, sed in stirpes. Unde, si plures sint simul Patroni, atque ex iis unus mortuus fuerit relictis tribus v. g. hæredibus, isti tres hæredes unum tantum votum in præsentando habent, adeoque vel debebunt conspirare in unius Clerici præsentationem, vel inter se antea convenire, ut alternis vicibus præsentent. Clem. 2. de Jure Patr.

10 CONCL. IV. Generatim quatuor modis ab uno in alium transfertur Jus Patronatus, videlicet successione, donatione, permutatione, & venditione universitatis. Ita communis. Hinc illi versus a Glossa in c. Ex insinuatione, de Jure Patr. relati:

Jura Patronatus transire faciunt hæres:  
Res permutata, donatio, venditioque.

11 Et quidem (ut taceatur successio de qua Concl. præc.) Jus Patronatus transfertur ab uno in alium donatione arg. c. Illud, &c. Nullus eod. Verum tamen in donatione Juris Patronatus personalis, si fiat de Laico in Laicum, vel etiam in Clericum qua personam privatam, necessario debet intervenire consensus Episcopi, prout desumitur ex citatis locis: secus dicendum, si donatio Juris Patronatus fiat per Laicum loco Ecclesiastico c. un. eod. in 6. Similiter non requiri consensum Episcopi, si unus Patronus alteri Compatrono jus suum cedat, donet, aut remittat, cum aliis tenet Barbosa part. 3. de Offic. & Potest. Episc. alleg. 71. n. 8. arg. Clem. 2. de Jure Patr.

12 Permutatione quoque cum alia re spirituali transfertur Jus Patronatus ab uno ad alium, arg. c. Nemini regum. 16. q. 7. Ceterum, si talis permutatio fiat in Laicum, requiritur consensus Episcopi; secus, si fiat in Ecclesiam. Barbosa loc. cit. n. 31.

13 Tandem transfertur Jus Patronatus per venditionem universitatis, vel illius rei cui illud inseparabiliter adhæret; ut puta per venditionem Castri, sive Comitatus, habentis annexum Jus Patronatus, arg. c. Cum saculum, de Jure Patr. & alibi.

14 Dicitur notanter, per venditionem universitatis, id est, omnium eorum bonorum, ac jurium, quibus annexum est. Nam Jus Patronatus, cum sit quid spirituale, aut spirituali annexum, per se vendi non potest absque labe Simonie. c. De Jure, eod. ibi: Cum inconvenientis sit vendi jus Patronatus, quod est spirituali annexum: juncto c. Præterea quando, de Transact. Imo etiam bona ipsa non possunt carius vendi propter annexum Jus Patronatus; idque ob allegatam rationem, & notat Barbosa ibidem num. 34.

#### Additio.

\* Quæres. An, si aliquod Castrum, vel Prædium &c. cui est annexum jus præsentandi reale, detur alteri in Feudum, sive Emphyteusim, vel Dotem, aut oppignoratur per modum Hypothecæ, pariter transferatur Jus præsentandi in Feudatarium, Emphyteutam, Maritum, cui Dos affertur, aut in illum, cui tale Castrum oppignoratur?

Resp. I. Quoad Feudum, & Emphyteusim affirmative, cum pariter dominium utile Castri vel Prædii cum fructibus in Feudatarium, & Emphyteutam transferatur, sicque concomitanter etiam Jus præsentandi annexum. Ita eruitur ex c. 13. de Jure Patr. & ibi Glossa.

Resp. II. Eodem modo quoad Dotem, ita nimirum, ut regulariter loquendo stante matrimonio non Uxori, quæ Dotem hanc attulit, sed potius Marito competat Jus præsentandi. Ita communior contra Abbatem, & Azorium. Ratio est; quia nimirum Marito competit saltem fictione Juris suo modo Dominium civile una cum fructibus in allatam ab Uxore Dotem, uti eruitur l. 7. §. 3. ff. De Jure Dotium, & l. 2. c. De rei vindicatione, quamvis ceteroquin negari non possit, Dominium naturale Dotis manere penes uxorem l. 30. c. De Jure Dotium: nisi bona illa immobilia dentur Marito tamquam æstimata, & quidem æstimatione, quæ facit emptionem; ubi acquireret quoque Maritus Dominium naturale, sicque multo magis huic competere Jus præsentandi, uti facile concedunt Doctores illi, qui alioquin nobis sunt contrarii in hac Responsione.

Resp. III. Hypothecario, cui Castrum, Prædium, seu Villa oppignoratur, regulariter non competit Jus præsentandi, sed potius Domino Principali ejusdem. Ita Glossa, Abbas, Matthæucci in Officiali suo Ecclesiastico, & alii. Ratio est; quia etsi Hypothecario competat possessio, & exinde actio realis in rem oppignoratam, nullum tamen Dominium, nec fructus rei oppignoratæ. Videatur de his fufius in Jure Canonico Auctoris Lib. 3. tit. 38. \*

15 CONCL. V. Jus Patronatus ex sola gratia, permissione, atque privilegio Ecclesiæ procedit: quatenus nimirum ex benignitate ejusdem per Sacros Canones illud Fundatoribus, Ædicatoribus, & Dotatoribus Ecclesiarum, per modum cujusdam remunerationis concessum est, ut hac ratione Laici alique Fideles magis provocarentur ad fundandas, extruendas, dotandasque Ecclesias. Ita Fagnanus in c. Quoniam n. 4. & seqq. de Jure Patr. & alii communiter. Idipsum desumitur ex cit. c. Quoniam, ibi: Potestate (præsentandi) in qua em Ecclesia hucusque sustinuit: juncto c. Si quis Episcoporum 16. qu. 5. ibi: Ædicatori Episcopo hac gratia reservetur. Siquidem de Jure antiquiori Laici in Ecclesiis per eos ædificatis, vel dotatis nullum habebant Jus Patronatus, sed statim Ecclesiæ ipsæ cum Sacerdotibus



# 356 Tract. XI. De Beneficiis, Jure Patronatus, & Decimis. Dist. III.

uis ad ordinationem pertinebant Episcoporum; prout inquit ex c. Noverint 10. q. 1. & c. Pie mentis 16. q. 7.

16 Fatendum nihilominus, quod, quamvis spectato Jure antiquo Jus Patronatus, ejusque concessio fuerit gratiosa, ut dictum, hodie tamen, cum per Jura nova sit redactum in Corpus Juris, amplius non dicitur gratia, sed iustitia, & Jus commune. Fagnanus loc. cit. n. 12. Idque patet ex c. Nobis, de Jure Patr. cum concordantiis: ubi constructori Ecclesie, vel Capellae Jus Patronatus expresse tribuitur.

17 CONCL. VI. Non tantum Clerici, sed etiam Laici, tam masculi, quam feminae sunt capaces Juris Patronatus. Ita communis. Et quidem de Laicis habetur expressus textus. c. Cum autem, de Jure Patr. ibi: Si Laicus fuerit, cui in competit presentandi; & alibi. De feminis pariter fit mentio c. Ex litteris, Eod. ibi: Postmodum Abbatissa predicti Monasterii alium presentavit eidem ad Ecclesiam supra scriptam. Et c. ult. de Concess. Prab. dicitur de quadam Comitissa, quod in quibusdam Beneficiis Ecclesiarum jus habet Patronatus.

18 Dices: Laici sunt incapaces Juris spiritualis. arg. c. Decernimus, De Judiciis, & clarius c. Tua, De Decimis, ibi: Cum Laicis nulla sit de spiritualibus concedendi, vel disponendi facultas: juncto c. Causa, De Prescript. atqui Jus Patronatus est quid spirituale, vel saltem spirituali annexum; ergo ejusdem Laicus est incapax, ac praesertim femina. Resp. cum Glossa c. Quanto De Judiciis, majorem esse veram loquendo de juribus mere spiritualibus: secus de iis, quae non sunt quid mere spirituale, sed dumtaxat ei annexum; prout Laici possunt possidere jus funerandi. In Proposito autem Jus Patronatus non est quid mere ac proprie spirituale, sed spirituali annexum, ut loquitur textus c. De Jure Patr. ibi: Jus Patronatus, quod est spirituali annexum. Accedit, quod hoc Jus competat Laicis ex speciali concessione, ac privilegio Ecclesiae.

## Additio.

Quaeres. An, si ille, qui habet Jus praesentandi, sit adhuc sub tutoribus, possit per seipsum praesentare ad Beneficium, vel potius an debeat fieri per suum Tutorem? Resp. I. Si talis nondum sit egressus septennium, juxta communissimam Doctorum sententiam praesentatio debet fieri per Tutorem. Ratio est; quia talis praesumitur in tanto negotio nondum habere sufficientem perpendendi rationem. Resp. II. Si vero is septennium quidem, nondum vero annos pubertatis sit egressus, an talis praesentare valeat sine auctoritate Tutoris, major est difficultas, ubi quidem plures cum praesenti Auctore loc. cit. n. 38. dicunt esse de decentia, non de necessitate, ut fiat cum auctoritate ejusdem; Franciscus tamen Schmier lib. 3. tr. 1. part. 3. c. 2. n. 96. videtur contrarius allegans pro se c. ult. De Judiciis in 6. meo judicio fortiter stringens; cum ibidem, NB. etiam in causis Beneficialibus, major quatuordecim annis possit quidem agere per se ipsum, non tamen is, qui est infra hanc aetatem. \*

## QUESTIO II.

Quotuplex sit Jus Patronatus, & quomodo Ecclesiasticum differat a Laicali?

## SUMMARIUM.

- 19 Jus Patronatus varie dividitur.
- 20 Jus Patronatus hereditarium, ac familiare,
- 12 Activum, & passivum,
- 22 Personale, ac reale, quid?
- 23 Ejus praecipua divisio est in
- 24 Jus Patronatus Ecclesiasticum, &
- 25 Laicale, & quid?
- 26 Jus Patronatus mixtum, quid?
- 27 Et quomodo regulatur?

18 Jus Patronatus Ecclesiasticum, & Laicale differunt, I. In tempore Patronis ad praesentandum concessio.

29 Et quae circa hoc notanda?

40 II. Patronus Ecclesiasticus nequit variare, sicut Laicus.

31 Ratio disparitatis.

32 Quid juris, si plures a Patrono Laico praesententur? (a) Adde dict. Tract. 11. dist. 1. n. 63. & 64.

33 III. Si Ecclesiasticus praesentet indignum, perdit jus praesentandi; secus in Laico.

34 IV. Legatus a latere non potest conferre Beneficium Juris Patronatus Laici.

35 Huic Papa non derogat nisi id exprimat.

36 Quid de Beneficio Juris Patronatus mixti?

37 Magis dignum trahit ad se minus dignum, quomodo?

38 In mixtis non semper attenditur dignius, quando?

39 V. Papa per simplicem concessionem &c. derogat Juri Patronatus Ecclesiastico, non Laico.

40 Limitatur hoc posterius.

41 VI. Jus Patronatus Ecclesiasticum, & Laicale differunt quoad Concursum.

42 A concursu, quae aliae Parochiae exceptae?

19 CONCL. I. Jus Patronatus varie dividitur, videlicet in hereditarium, & familiare, in activum, & passivum, in personale, ac reale. Ita communis, & probatur inductione.

20 Jus Patronatus hereditarium dicitur, quod transit ad quoscumque haeredes, etiam extraneos. Jus Patronatus familiare, seu gentilitium econtra est, in quo tantum succedunt illi, qui sunt de sanguine, & Familia Fundatoris: quae divisio patet ex dictis n. 8.

21 Jus Patronatus activum vocatur, quando Patronus potest praesentare ad Beneficium: & de hoc impraesentiarum agitur. Jus Patronatus passivum est, quando certi ex aliqua Familia (dummodo idonei adsint) exclusis extraneis debent ad Beneficium praesentari, & admitti: prout accidit ex Beneficiis patrimonialibus, de quibus supra dist. 1. n. 12.

22 Jus Patronatus personale est, quod cohaeret personae Fundatoris, vel ejus haeredis, ubicumque locorum existat. Reale vero, quod cohaeret certo loco, ut puta Castro, Praedio, Monasterio, ac huiusmodi: & hoc transit ad quemcumque talis loci possessorem.

23 CONCL. II. Nihilominus praecipua divisio Juris Patronatus est in Ecclesiasticum, & Laicale. Ita communis; atque desumitur ex c. Cum autem, de Jure Patr. cum concordantiis.

24 Jus Patronatus Ecclesiasticum est, quod personae Ecclesiasticae competit ratione Ecclesiae, vel dignitatis, aut Beneficii Ecclesiastici. Et tale censetur etiam esse illud Jus Patronatus, quod primitus fuit Laicale, postea vero a Laico fuit concessum Ecclesiae, Capitulo, Monasterio, vel cuipiam Beneficio: nam quia illud vi talis donationis jam competit Ecclesiae, imposterum censetur Ecclesiasticum, & non Laicale, ut habetur c. un. de Jure Patron. in 6.

25 Jus Patronatus Laicale dicitur, quod alicui sive Laico, sive Clerico, competit ratione proprii patrimonii, vel successionis paternae, aut alterius tituli saecularis, non vero ratione Ecclesiae, aut Beneficii Ecclesiastici. arg. c. Cum dilectus, juncta Gloss. vers. Tamquam Laicus, de Jure Patr.

26 His additur communiter tertium membrum, scilicet Jus Patronatus mixtum, estque illud, quod partim nomine Ecclesiae ad Clericum, & partim ex alio titulo ad ipsum, vel ad Laicum spectat, ac proinde est mixtum ex utroque; quale est, si Ecclesia fundavit ex suis bonis aliquam Ecclesiam, eamque Laicus dotavit, vel econtra.

27 Porro hujusmodi Juri Patronatus mixto illud est speciale, quod regulatur in particularibus casibus vel ut Ecclesiasticum, vel ut Laicale, prout exigit qualitas casus magis privilegiata, magisque favens Patronatui. Glossa c. 1. vers. Ecclesiasticum, de Jure Patr. in 6. Covarruvias Pract. Quaest. c. 36. n. 5. & Fagnanus c. cum propriis n. 6.



n. 6. *Et seqq. de Jure Patr.* cum communi. Ratio est; quia, si non privilegiatus in materia individua, sive inseparabili concurrat cum privilegiato, illius privilegio utitur. *arg. l. Si communem, ff. Quomodo servitutes amittuntur &c.* Ubi hoc conceditur habenti rem communem cum pupillo. Quinimo generaliter in individuis privilegium uni ex sociis concessum porrigitur ad omnes, juxta Glossam *fin. l. 1. c. De diversis Rescriptis*, ac pluribus exemplificat Fagnanus *loc. cit. n. 53. Et seqq.*

28 CON. L. III. Inter Jus Patronatus Ecclesiasticum, & Laicale multiplex datur discrimen. Nam imprimis (præter discrimen, quod desumitur ex utriusque definitione) differunt, quod Patronus Ecclesiasticus habeat sex menses ad præsentandum, Laicus vero quatuor tantum. *c. Fam te, & c. Cum propter, de Jure Patr. & clarissime, c. un. Eod. in 6.* Quod si vero Jus Patronatus sit mixtum, & unus Patronus est Ecclesiasticus, alter Laicus, omnes ratione communionis habent semestre: nam propter communionem non privilegiatum fortitur naturam privilegiati, juxta dicta *n. præc.*

29 Ceterum istud tempus sex, vel quatuor mensium incipit currere non a die vacationis Beneficii, sed a die notitiæ dictæ vacationis, quam habent, vel considerata temporis, ac locorum distantia habere præsumuntur Patroni; prout in simili dicitur *c. Quia diversitatem, de Concess. trab.* Quod si hoc elapsum fuit, & Patronus, sive Ecclesiasticus, sive Laicus, nullum præsentavit ad Beneficium vacans, vel quia neglexit; vel quia, si plures sint Patroni, lis de Jure Patronatus inter eos orta est, & prius necdum decisa: statim elapso illo tempore pro ea vice devolvitur collatio Beneficii ad eum, ad quem spectat institutio. *arg. c. Cum propter, & c. Fam te, de Jure Patr.* Et merito: ne propter negligentiam, vel discordiam Patronorum Ecclesia diutius destituta Rectore patiatur dispendium aliquod.

30 Secundo differunt: quia, si Patronus Ecclesiasticus idoneum præsentavit, non potest amplius variare, seu alium præsentare: quod si fecerit, nihilominus præfertur ille, qui primo est præsentatus, *text. clar. c. Cum autem fo. l.* Econtra Patronus Laicus præsentato uno, vel pluribus, potest adhuc variare, ac intra quadrimestre alium præsentare, non quidem private, seu ex toto recedendo a priori, sed accumulative, seu adjungendo secundum primo. *arg. c. Cum autem, & c. Pastoralis, de Jure Patr. & Clem. Plures. Eod.* ac tenet Fagnanus *cit. cap. Cum autem n. 6. cum communi.*

31 Cur autem Laicis Patronis, permissum sit variare in præsentando, non item Ecclesiasticis, multiplex solet dari ratio. Placet præ ceteris ea, quam affert Pirhing *tit. De jure patr. n. 103. Et 104.* quia præsentatio Patroni Ecclesiastici, utpote nomine Ecclesiæ facta, habet vim electionis, ut post Innocentium, & Abbatem passim tenent Doctores; ergo sicuti eligentes publicato scrutinio variare non possunt. *c. Publicato de Elect.* ita nec Clerici præsentantes. Accedit, quod hi nomine, & jure Ecclesiæ tales actus quasi ex officio exercent, ideoque, cum officio suo semel functi sunt, acquiescere debent: prout in simili dicitur de collatione. *c. Si tibi absenti, de Præb. in 6.* Secus est de Patrono Laico: nam is suo proprio jure, & nomine præsentat. Accedit ulterius, quod Patronus Laicus sit minus expertus circa Ecclesiastica, quam Clericus, utpote qui debet esse magis discretus, & amplius scire Jura: simulque, quod Laicus habeat minus tempus ad præsentandum, quam Clericus. Unde non mirum, quod ille possit variare, &, quia gravatur minori tempore spatio, relevetur in isto.

32 Porro, si duo simul, aut successivis temporibus a Patrono Laico sint cumulative præsentati, tenetur ex iisdem Episcopus præeligere digniorem: adeo, ut non sit locus gratificationi, sed peccet contra justitiam eligendo minus dignum; quamvis post factum sustineatur electio de digno, omisso digniori, nec liceat posthabito appellare, ut litium occasiones amputentur. Fagnanus *loc. cit. num 28. Et seqq.* citans alios; & desumitur ex *c. Constitutis, de Apellat. juncto c. Pastoralis, de Jure*

*Patr. (a)* Quod si vero ambo præsentati videantur æque idonei, vel sit dubium, quisnam ex iis sit dignior, tunc illud judicio Episcopi relictum est, *text. clar. c. Cum autem. Eod.* Estque stante pari dignitate locus gratificationi, adeo ut Episcopus possit eligere, quem maluerit, juxta Glossam ibidem *vers. Judicio, & alios.*

33 Tertio differunt Jus Patronatus Ecclesiasticum, & Laicale: quia si Patronus Ecclesiasticus scienter præsentet indignum, ipso jure privatus est ea vice potestate præsentandi, & ad proximum Superiorem, ad quem spectat institutio, devolvitur libera collatio Beneficii. Secus est in Patrono Laico: nam licet is præsentet indignum, non est privatus jure præsentandi pro ea vice, sed jubendus est alium præsentare. *arg. c. Cum vos, de Officio Judicis ord. juncta Glossa ibidem, vers. Minus idonea.* Ratio hujus est eadem, quæ *n. 31* allata fuit. \* Ceterum examen, utrum præsentatus sit dignus, semper spectat ad Episcopum, quamvis post debitam præsentationem subsecutura institutio forsitan pertineret ad aliquem Episcopo inferiorem. Concilium Trid. *sess. 25. de ref. c. 9. \**

34 Quarto differunt: quia Legatus a latere Summi Pontificis potest conferre Beneficium Juris Patronatus Ecclesiastici absque consensu, & præsentatione Patroni Ecclesiastici: secus est de Beneficio Juris Patronatus Laici; nam hoc absque consensu Patroni nequit conferre. *arg. c. Cum dilectus, de Jure Patr. & amplius explicat Glossa ibidem, vers. Quempiam præsentare.*

35 Quinimo generatim Papa non censetur velle derogare Juri Patronatus Laicorum, nisi hoc exprimat. Fagnanus *c. Quoniam n. 10. de Jure Patr.* post Glossam proxime citatam, & alios. Accedit ratio: quia Laici acquirunt Jus Patronatus ratione proprii patrimonii, quando fundarunt, ædificarunt, vel dotarunt Ecclesiam; unde non est æquum, ut jure inde quæsitum facile priventur, sicque retrahantur ab aliis piis foundationibus: secus est in Patrono Ecclesiastico, cui jus hoc competit non ob proprium patrimonium, sed ratione Ecclesiæ.

36 Et ob eandem rationem Legatus nequit conferre Beneficium Juris Patronatus mixti (id est, partim ad Clericum nomine Ecclesiæ, & partim ad Laicum spectantis) ne ex societate cum Clerico Patronus Laicus in re individua præjudicium, & incommodum sentiat, contra *Reg. 22. juris in 6. Non debet aliquis alterius odio prægavari, & Doctores passim.* Quinimo, quia non privilegiatum propter communionem fortitur naturam privilegiati, privilegium Patrono Laico competens, ne ipso invito possit Legatus Beneficium conferre, etiam Patrono Ecclesiastico communicatur, juxta dicta *n. 27.*

37 Nec obstat illud commune dictum: *Magis dignum trahit ad se minus dignum*, *arg. l. Quæ Religiosis, ff. De rei vindicatione*; atqui Jus Patronatus Ecclesiasticum est magis dignum, quam Laicale; ergo. Resp. enim cum communi, dictum illud procedere tantum quoad commoda, & privilegia, non vero quoad damna, odia, & pœnas.

38 Quod si urgeas. Hermaphroditus æstimatur feminei sexus, quando hic prævalet in ipso *l. Queritur, ff. de Statu hominum*, & tamen sexus virilis est dignior, & magis prodest: ergo in mixtis non semper attenditur, quod dignius est, magisque prodest, sed quod est potentius. Resp. distinguendo consequens: ergo in mixtis naturalibus non semper attenditur, quod dignius est, conceditur: in mixtis, quæ sunt talia Juris ministerio, negatur. Nam in his Jus fingit, illud esse potentius & dignius, quod magis prodest, & jus alterius non lædit. Fagnanus *loc. cit. n. 65.*

39 Quinto differunt, quod simplici concessione, unionem, aut reservationem alicujus Beneficii per Papam facta derogetur Juri Patronatus Ecclesiastico, non vero Laico, nisi expressa & specialis mentio fiat de hoc. Pirhing. *de Jure Patr. n. 133.* estque communis aliorum Ratio est: quamvis Papa possit etiam Juri Patronatus Laicorum Fundatorum derogare, utpote cum hoc ipsis Fundatoribus ex gratia sit concessum ab Eccle-



### 358 Tra&. XI. De Beneficiis, Jure Patronatus, & Decimis. Distinct. III.

sia, non tamen huic adeo facile derogare solet; partim, ne Domini seculares a piis foundationibus retrahantur, si passim eorum juribus derogetur; partim, quia Prælati Ecclesiarum, sicuti plus juris habent in bona Ecclesiastica, quam Laicalia ita etiam in Patronatus Ecclesiasticos, utpote ex Ecclesiasticis bonis originem trahentes, quam in Patronatus Laicales. Concordant dicta n. 34. & 35.

40 Notant tamen doctores, hanc doctrinam in quarta, & quinta differentia allatam habere locum dumtaxat in Jure Patronatus Laicis competente ex foundatione, ædificatione, vel donatione, non vero in eo, quod convenit ipsis ex speciali gratia, privilegio, vel præscriptione; cum enim in his deficient rationes proxime allatae, eidem censetur sufficienter derogatum per clausulam generalem: *Ad cujuscumque Patroni præsentationem pertineat.*

41 Ultimo differunt Jus Patronatus Ecclesiasticum, & Laicale quoad Concursum: nam hic quoad Parochiales Ecclesias, etiam si sint Juris Patronatus Ecclesiastici, præmittendus est, juxta Concilium Trid. sess. 24. c. 18. de reform. Secus est de Parochiis, quæ spectant ad Jus Patronatus Laicorum: nam tunc non est locus Concursum, sed is solus examinari debet, quem Patronus Laicus præsentavit, & si dignus reperiatur, institui.

42 Notat autem Engel tit. de Præb. num. 67. per Bullam S. Pii V. *Ad exequendum* (& habetur Tom. 2. Bullarii Romani, constit. 47. dicti Pontif.) a præfato Concursum esse exceptas Parochias Monasteriis, vel aliis Ecclesiis incorporatas, in quibus non proprie Parochus, sed Vicarius ponendus est.

#### Q U Æ S T I O III.

De Jure præsentandi, aliisque Juribus Patrono competentibus.

#### S U M M A R I U M.

- 43 Patrono quatuor jura competunt, quæ?
- 44 Jus præsentandi quomodo competat Patrono?
- 45 Beneficium sine consensu Patroni regulariter nequit conferri.
- 46 Fallit hoc in certis casibus.
- 47 Collatio Beneficii sine consensu Patroni non est ipso jure irrita, sed irritanda.
- 48 Patronus nequit se ipsum præsentare.
- 46 Prælati tamen potest Patrono conferre Beneficium.
- 50 Possunt plures Patroni unum ex se ipsis præsentare.
- 51 Patronus potest præsentare suos filios, vel consanguineos.
- 52 Quid juris, si plures sint Patroni, & discordent in præsentando?
- 53 Præsertim si duo præsententur ab eis in pari numero?
- 54 Patrono debetur honor, & qualis?
- 55 Patrono competit jus defendendi Ecclesiam.
- 56 Quæ Patrono non liceant?
- 57 Patrono egenti succurrendum ab Ecclesia.
- 58 Et quomodo?

43 **C**ONCL. I. Patrono sive Ecclesiastico, sive Laico præcipue quatuor jura competunt in Beneficio Ecclesiastico, respectu cujus habet Jus Patronatus, videlicet Jus præsentandi, præcedendi, defendendi Ecclesiam, atque ut ex bonis Ecclesiæ eidem indigenti modeste succurratur. Ita habetur c. Nobis, de Jure Patr. & complectitur Glossa ibidem hisce versiculis:

*Patrono debetur honor, onus, utilitasque: Præsentet, præsit, defendat, alatur egenus.*

44 **C**ONCL. II. Jus præsentandi Clericum idoneum ad Beneficium Ecclesiasticum, sive simplex, sive curatum, postquam vacaverit, adeo competit Patrono, ut Episcopus, vel is, ad quem spectat institutio, teneatur

eundem ceteroquin habilem admittere, atque in dicto Beneficio instituere. Ita desumitur ex cit. c. Nobis. De Jure Patron. Dicitur, *Clericum idoneum*: nam, si hic sit indignus, Patronus Laicus tenetur alium præsentare: Patronus vero Ecclesiasticus pro ea vice privatur jure præsentandi, ut dictum n. 33.

45 **C**ONCL. III. Beneficium Ecclesiasticum sine consensu, & voluntate Patroni, regulariter loquendo, conferri nequit, & si defacto collatum sit alteri, quam illi, quem Patronus præsentavit, potest ad instantiam ejus collatio annullari, ipsoque instante debet is, qui sine suo consensu institutus fuit, amoveri. Ita statuitur c. Ex insinuatione. De Jure patr. juncto c. Decernimus, 16. qu. 7.

46 Dicitur, *regulariter loquendo*: nam hinc imprimis excipitur casus, si Patronus intra debitum tempus a Jure definitum neminem præsentavit: tunc enim pro ea vice devolvitur collatio Beneficii ad eum, ad quem ceteroquin pertinet institutio, c. Cum propter, & c. Eam te. De Jure Patr. Deinde valet collatio, si Summus Pontifex de plenitudine potestatis conferat Beneficium, derogando expresse Juri Patronatus, ut jam dictum n. 39. Idem accidit, quando Patroni in præsentando discordant, & præsentatus a majori eorum parte non potest sine scandalo institui: tunc enim Episcopus ordinabit Ecclesiam, sicut melius eam secundum Deum viderit ordinandam. c. Quoniam. Eod.

47 Dicitur ulterius in Conclusionem: *potest ad instantiam ejus collatio annullari*: siquidem collatio Beneficii extra dictos casus absque Patroni præsentatione facta non est ipso jure nulla & irrita, sed tantum potest per Patronum contradicentem irritari; si nempe is aliam præsentet, aut expresse contradicat. Unde, si terminus Patrono competens post collationem per Episcopum factam fuerit elapsus, non reclamante, nec contradicente Patrono, manet collatio omnino firma. Barbosa part. 3. De offic. & potest. Episc. allegat. 72. n. 171. citans plures alios.

48 **C**ONCL. IV. Patronus, quamvis sit Clericus, & ceteroquin idoneus, se ipsum ad Beneficium Ecclesiasticum præsentare non potest. Ita communis; & patet ex c. Per nostras. De Jure patron. Ratio est: quia præsentatio sui ipsius sapit vitium ambitionis. Concordat illud D. Georgii Papæ, ac refertur c. In scripturis, 8. q. 1. Sicut locus regiminis desiderantibus negandus est, ita fugientibus offerendus. Et sicut scriptum est: Nec quisque am sibi sumit honorem, sed qui vocatur a Deo, tamquam Aaron. Heb. 5.

49 Ceterum, si Prælati, ad quem spectat institutio, motu proprio vocet Clericum Patronum, eique conferat Beneficium vacans, in quo dictus Clericus habet Jus Patronatus, valebit collatio: quia tunc Patronus non censetur præsentare se ipsum, aut Beneficio sese ingerere, sed Beneficium sibi oblatum acceptare, adeoque in collationem ejus sibi factam consentire. Pirhing. tit. De Jure patron. n. 92. Imo posset hoc casu Patronus Clericus procedere per viam deprecationis & supplicationis, ac rogare Episcopum, ut sibi conferre velit illud Beneficium, atque exinde poterit Ordinarius illum gratificando admittere. Barbosa lib. 3. Juris Ecclesiast. univ. cap. 12. n. 199. Abbas in c. Per nostras. De Jure patr. & alii.

50 Insuper, si plures sint Patroni, possunt illi ex se ipsis unum Clericum Compatronum nominare, & præsentare: nam quamvis Clericus Patronus non possit præsentare se ipsum, potest tamen præsentationi de se per Compatronos factæ consentire. Glossa in c. Consultuit Eod. Barbosa part. 3. De offic. & potest. Episc. alleg. 72. n. 91. & alii.

51 **C**ONCL. V. Nihilominus non est prohibitum Patrono, ad Beneficium præsentare filios suos, aut alios consanguineos. Ita Engel tit. De Jure patron. n. 3. cum communiori. Et merito: tum, ne hi sint deterioris conditionis, quam alii, quorum parentes nullum fundarunt Beneficium: tum, ne ipsummet Jus Patronatus, quod in Favorem Fundatoris, ejusque hæredum intro-

ductum



ductum est, in ipsorum odium retorqueatur contra Reg. 61. Juris, in 6. Quod ob gratiam alicujus conceditur, non est in ejus dispendium retorquendum, cum concordantiis.

§2 CONCL. VI. Si plures sint Patroni ejusdem Ecclesiæ, vel Beneficii, & hi in præsentando discordent, aliis hunc, aliis a ium præsentantibus, præfertur is, qui majoribus juvatur meritis, & plurimum approbatur assensu, modo id sine scandalo fieri possit. Ita habet c. Quoniam. De Jur. patr. estque communis. Et quidem in tali casu sufficit præsentatio facta a majori parte respectu minorum partium, dummodo præsentatus ceteroquin sit idoneus: veluti si ex sex Patronis duo præsentent Titium, unus Sempronium, & tres Cajum, hi tres prævalent, ac præfertur Cajus, arg. cit. c. Quoniam, & notat ibidem Fagnanus n. 13. cum aliis. Additur vero, modo id sine scandalo fieri possit, propter dicta n. 46.

§3 CONCL. VII. Si autem duo sint præsentati a pluribus Patronis in pari numero, vel si ex duobus Patronis unus præsentavit unum, & alter alterum, nemini eorum acquiritur jus petendi institutionem. Ita Fagnanus in c. Cum autem, n. 23. Eod. & alii. Ratio est clara: quia ad hoc, ut præsentatus acquirat jus ad Beneficium, & consequenter jus petendi institutionem, requiritur, quod præsentatio sit a majori parte Patronorum, arg. cit. c. Quoniam. De Jure patr. ibi: Si forte in plures partes fundatorum se vota diviserint, ille præficiatur Ecclesiæ, qui majoribus juvatur meritis, & plurimorum eligitur, & approbatur assensu.

§4 CONCL. VIII. Præter jus præsentandi ulterius Patrono Ecclesiæ debetur honor. Ita communis, & patet ex c. Nobis. De Jure patr., ibi: Pro fundatione quoque Ecclesiæ honor processionis fundatori servatur. Porro honor Patrono debitus consistit in præcedentia Processionis, quatenus in Litaniis, ac aliis publicis Processionibus debetur ipsi locus dignior præ aliis Laicis. Item quod in Ecclesia sua patronata debeat honorari per præcedentiam honorabilioris sedis, & dignioris loci, atque anterioritatem in suscipienda pace, thurificatione, & aliis consimilibus casibus. Barbosa lib. 3. Juris Eccles. univer. cap. 12. n. 214. cum aliis.

§5 CONCL. IX. Insuper competit Patrono jus, seu potius onus defendendi Ecclesiam. Ita habetur c. Filiis, 16. q. 7. Unde Patroni munus est, ut curam & inspectionem habeat quoad Ecclesiam & ejus bona, ne male alienentur, aut dilapidentur; & si quid in detrimentum Ecclesiæ fieri deprehenderit, neque Beneficiarius honesta monitione præmissa desistere velit, id Episcopo denuntiet, prout ibidem dicitur. Item ipsius munus est, ut Ecclesiam intra & extra Judicium defendat, tanquam ejus Patronus & Advocatus: hoc quippe nomine ipse appellatur in c. Præterea quoniam, & c. Cum autem, & c. Nobis. De Jure patr. & alibi.

§6 Non tamen debet Patronus veram aliquam jurisdictionem in Beneficium usurpare, neque in illis, quæ ad Sacramentorum administrationem pertinent, ullatenus sese ingerere, neque visitationi ornamentorum Ecclesiæ, aut bonorum stabilium seu fabricarum proventibus se immiscere (nisi id Patrono ex primæva institutione, ac fundatione competat) sed Episcopi ipsi hæc faciant, juxta Concilium Trid. Sess. 24. De reform. cap. 3. circa finem.

§7 CONCL. X. Tandem Patrono convenit, ut, si ad inopiam vergat, ab Ecclesia illi modeste succurratur. Ita his verbis habetur cit. c. Nobis. De Jure patr. juncto c. Contra, & c. Quicumque fidelium, 16. q. 7.

§8 Dicitur notanter, modeste succurratur; id est, habito respectu ad facultates Ecclesiæ, & ad qualitatem personæ, ut bene explicat, & probat Glossa ibidem. Hinc Barbosa lib. 3. Jur. Eccles. univer. cap. 12. n. 217. notat, quod tunc primum Ecclesia teneatur dare alimenta Patrono pauperi, quando superest ultra id, quod necessarium est ad cultum Dei, atque Ministrorum alimentum. In quo casu sunt præstanda Patrono alimenta in domo propria, non autem in ipsa Ecclesia: & quidem non solum pro se, sed etiam pro uxore, filiis,

atque familia, ac insuper alimenta integra, id est, cibibus, potus, vestis, lectus, & alia omnia, quæ sub alimentorum nomine continentur, dummodo (ut dictum) Ecclesiæ suppetant facultates.

## DISTINCTIO IV.

### De Decimis

#### QUÆSTIO I.

Quid sint Decimæ, Primitiæ, & Oblationes?

#### SUMMARIUM

- 1 Decimæ, quid?
- 2 Decimarum solutio est actus Religionis, & Justitiæ.
- 3 Qui fraudant Decimas, quomodo peccent? Jubentur excommunicari.
- 4 Excommunicatio hæc non est lata sententiæ.
- 5 Bona dantium, & mala non dantium Decimas.
- 6 Primitiæ, quid? Primogenita, quid, & quomodo differant a Decimis?
- 7 An extet præceptum offerendi Primitias?
- 8 Præsertim in lege Evangelica?
- 9 Oblationes, quid?
- 10 Oblationis nomen dupliciter accipitur.
- 11 Oblationes, an sint de præcepto faciendæ?
- 12 Quid, si ministri Ecclesiæ indigeant,
- 13 Vel id habeat consuetudo loci?
- \* Plura adhuc de Oblationibus.

I CONCL. I. Decimæ sunt pars decima omnium fructuum juste acquiritorum, Deo in recognitionem sui domini universalis debita, atque Ecclesiæ Ministris quotannis exsolvenda. Ita in re communis, & desumitur hæc definitio ex c. Tua nobis. De Decimis, ibi: Decimæ, quas Deus in signum universalis domini sibi reddi præcepit, suas esse Decimas & Primitias asseverans: juncto c. Decimas Deo, 16. q. 7. & c. transmissa. De Decimis, cum concordantiis.

2 Unde colligitur, quod solutio Decimarum, quatenus solvuntur a Fidelibus ob Dei cultum, atque in signum supremiejus Domini in omnes res, & quod ab ipso bona cuncta procedant, sit actus virtutis Religionis: quatenus vero spectatur, prout est debita Ecclesiis Ministris, nobis spiritualia præbentibus, sit actus Justitiæ.

3 Hinc illi, qui fraudant Decimas, peccant & contra virtutem Justitiæ, & contra virtutem Religionis, crimenque committunt Sacrilegii, Decimas quas in usum, 16. q. 17. Insuper fraudantes Decimas, tum in c. Omnes Decimæ, 16. q. 7. & c. Tua nobis. De Decimis, tum in Concilio Trident. Sess. 25. c. 12. De reform. excommunicari jubentur, ibi: Cum Decimarum solutio debita sit Deo, & qui eas dare noluerint, aut dantes impediunt, res alienas invadunt &c. Qui vero eas aut subtrahunt, aut impediunt, excommunicentur: nec ab hoc crimine, nisi plena restitutione secuta, absolvantur. Hactenus Concilium.

4 Ceterum hæc Excommunicatio non est lata, sed primum ferendæ sententiæ; prout desumitur ex ly excommunicentur. Imo præmittendam esse trinam monitionem, antequam infligatur, recte cum aliis notat Barbosa in Collataneis ad cit. locum Concilii Trident. n. 5. & favet textus c. Omnes Decimæ, 16. q. 7.

5 Insuper, quod justo Dei judicio frequenter in rebus temporalibus damna patiantur, qui Decimas dare negligunt, & econtra, qui Decimas diligenter dant, non solum sanitatem corporis, sed etiam cum temporali fructu bona coelestia promereantur &c. urgentissimis SS. Augustini, & Hieronymi auctoritatibus comprobatur c. Revertimini & c. Decimæ tributa, 16. q. 1. ubi D. Augustinus Serm. 219. De Tempore, inter alia sic loquens refertur: Cum Decimas dando & terrena, & coelestia possis præmia promereri, quare pro avaritia duplici benedictione



## 360 Tract. XI. De Beneficiis, Jure Patronatus, & Decim. Dist. IV.

*benedictione fraudaris? Hæc est enim Dei justissima consuetudo, ut si tu illi Decimam non dederis, tu ad Decimam revoceris. Dabis impio militi, quod non vis dare Sacerdoti.*

6 CONCL. II. *Primitiæ* appellantur primi fructus agrorum, vinearum, hortorum, arborumque, DEO ut Largitori omnium bonorum in signum gratitudinis oblatis. Ita desumitur ex *cap. 18. Numer. ibi: Universa frugum initia* (id est, Primitias) *quæ gignit humus*; Additur notanter, *quæ gignit humus*; nam in animalibus, recepto stylo S. Scripturæ vocantur *Primogenita*. Unde patet discrimen inter Primitias, & Decimas; nam hæc sunt decima pars omnium fructuum justè acquiritorum, illæ vero fructus primi arborum, agrorumque, & hujusmodi.

7 Quæres. An extet præceptum aliquod offerendi Primitias? Resp. I. In Lege Mosaica extabat præceptum offerendi Primitias; uti patet ex *cap. 26. Deuteronom. ibi: Tolles de cunctis frugibus tuis Primitias, pergesque ad locum, quem Dominus Deus tuus elegerit &c.* Item *Exodi, 13. Sanctifica mihi omne primogenitum*, & alibi. Quia vero Cæremonialia, & judicialia veteris Legis per Christi mortem, atque prædicationem Evangelii evacuata fuerunt, remanet Quæstio loquendo pro statu Legis Evangelicæ, ad quam

8 Resp. II. Olim quidem ex præcepto Juris Ecclesiastici aderat ejusmodi obligatio solvendi Primitias, prout colligitur ex *c. Præter, dist. 32. & c. Decimas quas in usum, 16. qu. 7.* ac notat Glossa in *cap. 1. v. In Primitiis, de Decimis*. Hodie tamen ejusmodi obligatio solvendi Primitias in plerisque locis per contrariam consuetudinem sublata est. Ita Pirhing. *tit. de Decimis, n. 172.* Suarez, Azorius, & alii passim.

9 CONCL. III. *Oblationum* nomen, quantum ad propositum, accipitur pro illis oblationibus seu donis, quæ Fideles ad Altare offerunt inter Missarum solemnias. Ita desumitur ex *c. Antiquos, 10. q. 1. & c. Omnis Christianus. De Consecq. dist. 1.*

10 Additur notanter, *quantum ad propositum*: siquidem Oblationis nomen interdum late accipitur pro omni eo, quod offertur Ecclesiæ; siue id fiat in vita, siue in morte, siue sit quid mobile, siue immobile, *arg. c. Videntes, 12. qu. 1. ibi: ipsæ res fidelium oblationes appellantur, quia Domino offeruntur.* Quinimo oblationis nomen adeo large acceptum ipsas quoque Decimas & Primitias complectitur: verum stricte, & habito præsertim respectu ad communem modum loquendi dicitur oblatio, quod offertur Sacerdoti in Missa. Abbas *c. Causa, De verb. signif.*

11 Quæres. An homines ad faciendas hujusmodi Oblationes teneantur? Resp. I. De ratione hujusmodi Oblationum, est quod voluntarie offerantur; juxta illud *Exodi 25. Ab omni homine, qui offert ultro, accipietis eas.* Et hinc regulariter loquendo istæ Oblationes non fiunt de præcepto, nisi in certis casibus. Ita D. Thomas 2. 2. qu. 86. Abbas *ad Rubric. tit. De Parochis, & alii.*

12 Additur notanter, *nisi in certis casibus*. Etenim, si Ministri Ecclesiæ indigeant, neque habeant aliunde, unde sustententur, tenentur Parochiani Jure naturali, & Divino ad Oblationes Presbyteris indigentibus faciendas: nam ex quo Sacerdos impendit spiritualia, debet consequi temporalia; *Dignus enim est operarius cibo suo. Matth. 10.* Unde quamvis Sacerdos ob hoc non debeat subtrahere spiritualia, tamen superior debet Parochianos compellere ad præstandas has Oblationes Juris remediis. Abbas *loc. cit.* Covarruvias *lib. 1. var. resolut. cap. 17. n. 3. & alii.*

13 Deinde tenentur Parochiani ad faciendas Oblationes, ubi hoc habet consuetudo. Siquidem in multis locis consueverunt Parochiani, præsertim diebus Dominicis & aliis præcipuis Festis, facere ejusmodi Oblationes, juxta *Can. Omnis Christianus. De Consec. dist. 1.* atqui Fideles tenentur, possuntque cogi ad observandas laudabiles consuetudines, *c. Ad Apostolicam. De Simon. & amplius de Oblationibus ostendit Hostiensis in Summa, tit. De Parochis, §. In tertia.* Et quidem hæc ca-

sibus adhuc Oblatio remanet quodammodo voluntaria, saltem quoad quantitatem, vel speciem rei oblatae.

Additio.

\* Plura de Oblationibus valde practica invenies in *Jure Canonico Lib. 3. Decret. Tit. 30 §. 9. præsertim n. 190. & seq.* ubi inter alia reperies, Oblationes singulas intra limites alicujus Parochiæ factas ex communissima Doctorum sententia, repetitis decisionibus Rotæ firmata, de jure ordinario pertinere ad Parochum loci, nisi consuetudo, Privilegium speciale, vel intentio dantium aliter doceat; prout defacto teste eodem vi consuetudinis & juxta intensionem dantium, Oblationes alicui Neomystæ ad Primitias factæ pertinent ad Celebrantem, etiam de jure alias omnes Oblationes, ad Altare quodcumque intra limites Parochiæ in loco non exempto contingentes, spectent ad Parochum. Item Oblationes, quæ fiunt ad imagines beneficiis, aut miraculis, seu fama celebres, pertinent ad ipsam Ecclesiam, vel Sacellum, ubi existunt, pro fabrica, vel ornatu Ecclesiæ, præsertim ipsius Imaginis, seu statuae fama, beneficiis, vel etiam miraculis celebris. Idem dic de cippis, mensis, vel capsulis in Ecclesia vel pro reparatione, vel ad alium certum finem expositis. Item in Ecclesiis Regularium Oblationes applicari debent in eorum utilitatem; *Can. Monachis ibi servientibus debeat proficere, quidquid a fidelibus offerri contigerit, cap. 1. De statu Monachorum.* ubi tamen (nisi forsan istæ consistant in meris consumptilibus, puta in Oblatione panis, ovorum, butyri &c.) prudenter quoque ac conformiter intentioni offerentium, attendendum ad Ornatum majorem Statuæ, aut Imaginis alicujus, fama, beneficiis, aut etiam miraculis claræ, atque respiciendum similiter ad majorem statui conformem splendorem Sacelli, aut Altaris, ubi forsan hæc Statua vel Imago existit, uti rectè advertit Pichler *Lib. 3. Jurisprudentiæ. Tit. 30. n. 19.\**

### QUESTIO II.

Quo Jure, & ex quibus rebus solvendæ sint Decimæ? Ubi etiam, quotuplices sint Decimæ.

### SUMMARIUM

- 14 *Decimæ, an debéantur Jure Divino?*
- 15 *Præsertim in Lege Evangelica?*
- 16 *Quomodo ipsæ dicantur deberi constitutione Divina?*
- 17 *Solvitur instantia contra Decimas.*  
(a) Vide dicta Tract. 2. dist. 2. n. 9. & 10.
- 18 *Decimæ ex quibus rebus debeantur?*
- 19 *Declaratur hoc.*  
(b) Ut dicetur Quæst. 4. per totum.
- 20 *Decimarum divisio.*
- 21 *Decimæ Prædiales, Personales, & Mixta, quæ? cum Additione.*
- 22 *Decimæ Prædiales, & Personales, quomodo, & quibus solvendæ?*  
\* *Decimæ Prædiales, majores, & minores, quæ?*

14 CONCL. I. Decimæ secundum substantiam spectatæ, quatenus videlicet sunt necessarium stipendium Ministrorum Ecclesiæ, ad ipsorum sustentationem requisitum, debentur ipsis Jure naturali, ac Divino: quatenus vero spectantur secundum quotam, siue determinationem suam (id est, quod debeat dari ipsamet pars decima fructuum) tempore Legis Mosaicæ debebantur Jure Divino positivo, tempore vero Legis Evangelicæ Jure dumtaxat Ecclesiastico, licet antiquissimo, utpote ab Apostolis derivato. Ita Doctor Angelicus 2. 2. quæst. 87. art. 1. & alii passim, paucis exceptis. Ratio primæ partis delimitur ex citat. verbis Christi *Matth. 10. Dignus est operarius cibo suo*, cum concordantiis. Altera vero pars, loquens de Lege Mosaicæ, patet ex *c. 27. Levit. & aliis pluribus locis.*



15 Tandem ultima pars, seu quod in Lege Evangelica debeantur Decimæ secundum quotam spectatæ Jure Ecclesiastico, patet tum ex plurimis textibus Juris Canonici jam allegatis, vel in progressu allegandis; tum ex eo, quia, si Decimæ simpliciter essent Juris Divini, non posset earum obligatio tolli per privilegium Summi Pontificis, aut contrariam consuetudinem: atqui hoc fieri posse, patebit ex dicendis Quæst. 4.

16 Nec dicas. In Jure Canonico c. Parochianos. De Decimis, expresse dicitur: Decimæ non ab homine, sed ab ipso DEO sunt institutæ: juncto c. Tua. Eod. ibi: Decimæ Divina constitutione debentur; ergo non solum Jure Ecclesiastico. Resp. enim, huiusmodi auctoritates vel accipiendas esse de Decimis secundum suam substantiam spectatis, & quatenus sunt necessarium stipendium Ministrorum Ecclesiæ: vel dicendum, quod velint, Decimas Jure Divino deberi, non directe ac immediate pro statu Legis Evangelicæ, sed solum remote ac occasionaliter, quatenus ad imitationem Legis Divinæ, pro veteri Testamento statutæ, ad necessariam Ministrorum Ecclesiæ sustentationem, per Constitutionem Ecclesiasticam sunt de novo constitutæ.

17 Quod si dicas. Cæremonialia veteris Legis jam sunt evacuata, & defacto illicita observatu c. Majores. De Baptismo. Resp. cum Doctore Angelico ibi. cit. Præceptum de solutione Decimarum non fuisse cæremoniale, sed partim morale, partim judiciale. Et quatenus morale, fuit inditum a Lege naturali, atque a Christo in Lege Evangelica renovatum Matth. 10. Dignus est operarius cibo suo, cum concordantiis. Quatenus vero judiciale erat, nempe secundum quotam, seu quoad determinationem decimæ partis, est renovatum auctoritate Ecclesiæ: sicque illud defacto obligat ex vi novi præcepti Ecclesiastici. (1)

18 CONCL. II. Spectato Jure communi debentur Decimæ ex omnibus, quæ licite acquiruntur. Ita habetur c. Ex transmissa. De Decimis, ibi: Fidelis homo de omnibus, quæ licite potest acquirere, Decimas erogare tenetur, & alibi. Dicitur, quæ licite acquiruntur: nam de acquisitis per furtum, simoniam, usuras, opus meretricium, ac huiusmodi Decimæ non debentur, imo nec possunt recipi, ne Clerici censentur approbare peccatum alterius, ut notat Glossa ibidem. v. Licite. Hinc c. Non est putanda, l. q. 1. notanter dicitur; Honora Dominum de tuis justis laboribus.

19 Additur autem, spectato Jure communi: siquidem variis ex causis hæc obligatio solvendi Decimas, utpote ex Jure Ecclesiastico proveniens, tolli potest, & aliquis (b) a præstatione Decimarum eximi, vel ex parte, vel etiam in totum: dummodo Ministri Ecclesiæ aliunde congruam habeant sustentationem, utputa ex sufficientibus redditibus Foundationis Ecclesiæ, Oblationibus, aut Legatis piis.

20 CONCL. III. Decimæ dividuntur in prædiales, seu reales, personales, & mixtas. Ita communis. Siquidem, quantum est de Jure communi, debentur Decimæ de vino, grano, fructibus arborum, pecoribus, hortis, negotiatione, de ipsa etiam militia, de venatione, & de omnibus bonis, prout his ipsis verbis habetur c. Non est. De Decimis, cum concordantiis. Itaque

21 Decimæ prædiales, seu reales sunt, quæ persolvuntur ex prædiorum, aut arborum fructibus, obventionibus molendinorum, vel ædium locatarum, & huiusmodi. Personales dicuntur, quæ ex rebus, quas quisque sibi industria & opera sua acquirit, persolvuntur v. g. ex lucro honestæ negotiationis, venationis, militiæ &c. Decimæ mixtæ vocantur illæ, quæ partim prædiales, partim personales existunt: cujusmodi sunt, quæ debentur ex fructibus pecorum, veluti ex fœtu, lana, lacte &c.

Additio.

\* Plures tamen Doctores hoc tertium genus Decimarum non admittunt, defendentes, Decimas, quæ ex mero lucro honesto proveniunt, esse personales, reliquas vero Anach. Reiffenstuel Theol. Tom. I.

omnes merito dici debere prædiales: prout etiam cap. 20. De Decimis, non fit mentio de aliqua tertia specie Decimarum. Videatur in Jure Canonico Tit. 30. §. 1. n. 4. Estque expeditius pro practicis resolutionibus. \*

22 Porro Decimæ prædiales differunt a personalibus, quod illæ statim, atque collectæ sunt, solvi debeant: & quidem integræ absque deductione sparsi seminis, & impenfarum, quæ fieri solent in colendis prædiis vel agris, & colligendis fructibus &c. arg. c. Cum sint homines, & c. Tua nobis, & c. Pastoralis. Eodem. Econtra Decimæ personales solvuntur deductis prius expensis, utpote, cum residuum dumtaxat censeatur esse fructus, seu lucrum, cit. c. Pastoralis. Insuper Decimæ prædiales sunt solvendæ Parocho, in cujus Parochia fructus crescunt, & colliguntur, quamvis colonus alibi habitet: Personales autem solvuntur Ecclesiæ, seu Parocho, in cujus Parochia quis audit Divina, & percipit Sacramenta Ecclesiastica; nisi consuetudine, conventionem, aut privilegio aliud fieri oporteat, cit. c. Cum sint homines. De Decimis.

Additio.

\* Ceteroquin Decimæ prædiales adhuc subdividuntur in majores, ac minores. Majores sunt, quæ solvuntur ex frumento quocumque sive hirsuto, seu siliquas spinosas habente (quale est hordeum, & avena) sive plano, puta, ex ador, & tritico: item Decimæ ex vino & oleo &c. Minores vero censentur Carnaticæ, ex pullis, anseribus, aliisque ex rebus levioris momenti. Multumque in hoc (supposito, quod Decimæ majores ad unum, & minores ad alterum pertineant) debet attendi consuetudo locorum. In Jure Bavarico Tit. 28. art. 12. ad Decimas majores præter omne frumentum spectant ciceres, panicum, fabæ, & lentes: ad minores vero olera, rapum, linum, canabis, milium, brassica; item Decimæ ex fructibus arborum, & animalium &c. \*

### QUESTIO III.

Quibus solvendæ sint Decimæ?

#### SUMMARIUM.

23 Antiquitus Decimæ solvebantur Ecclesiæ, per Episcopos Clericis distribuendæ.

(c) Ut dictum Tract. 7. dist. 4. n. 30.

24 Tunc soli Episcopi erant Parochi: secus defacto.

25 Decimæ prædiales spectant ad Ecclesiam Parochialem.

26 Et habet super iis Parochus fundatam intentionem.

\* Quid sentiendum de Decimis Novaliū? Add. I. & II.

\* Quidnam de carnaticis? Addit. III.

27 Episcopo de Jure communi debetur quarta pars Decimarum.

28 Quid de Decimis nullius certæ Parochiæ?

29 Limitantur prædicta.

30 Laici mere seculariter sunt incapaces juris Decimarum.

31 Secus de Laicis conversis, sive Regularibus.

32 Laicis potest competere jus percipiendi fructus Decimarum, ut quid temporale sunt.

33 Interveniens iusto contractu emptionis, conductionis &c.

34 An etiam per modum Feudi?

23 Quæstio præsens procedit præcipue pro moderno statu, quo facta supponitur divisio bonorum Ecclesiasticorum in quatuor partes (c) ipsarumque distinctio Parochiarum: nam antea Decimæ debebantur Ecclesiæ, sive cœtui Clericorum in communi; & præstabantur Episcopis cujuslibet Diocesis, qui eas partim per Diaconos &c. inter pauperes tamquam Patres pauperum, partim inter Clerum & Ministros suæ Ecclesiæ, pro cujuslibet meritis, & necessitate, iuste fideliterque distribuere tenebantur, arg. c. Episcopus, & c. Præcipimus, l. 2. q. 1. juncto c. Decimas, l. 6. q. 7. cum concordantiis.



24 Siquidem Episcopi soli pro illo tempore erant Parochi, quibus totius plebis Dioecesanæ cura imminerebat: ceteri autem Presbyteri, veluti ipsorum Coadjutores, ad nutum eorumdem Episcoporum modo in hac, modo in illa parte Dioecesis Pastorale Officium exercebant, *arg. can. In novo, dist. 21. & notat Barbosa lib. 3. Juris Ecclesiast. univ. cap. 26. §. 2. n. 4.* Postmodum vero, facta illa reddituum Ecclesiasticorum divisione, Parochiæ singulæ singulis Presbyteris fuerunt constitutæ, singulisque Parochiis propria territoria per suos terminos assignata, in quibus cuilibet Presbytero tota suæ Parochiæ cura remaneret, prout habetur *c. Ecclesias, 13. q. 1.* Et de hoc tempore, sive post divisionem bonorum Ecclesiasticorum & Parochiarum distinctionem loquendo, sit

25 **CONCL. I.** De Jure communi Decimæ prædiales spectant ad Ecclesiam Parochialem, suntque persolvendæ Rectoribus illarum Ecclesiarum Parochialium, intra quarum fines prædia illa sita sunt. Ita communis; & habetur *c. Cum contingat. De Decimis, ibi: Cum perceptio Decimarum ad Parochiales Ecclesias de Jure communi pertineat, Concordat textus c. Cum in tua. Eod. ibi: Alioquin Parochialibus Ecclesiis exsolvantur, ad quas de jure communi spectat perceptio Decimarum.*

26 Et hoc adeo verum est, ut Parochus loci, in quo prædia sita sunt, habeat pro se fundatam in jure intentionem super omnibus Decimis intra limites suæ Parochiæ existentibus; ita ut præsumatur, Decimas ad ipsum pertinere, nisi adversarius, quicumque ille sit, oppositum ostenderit, *arg. c. A nobis, Eod.* Proinde propter istam Juris assistentiam Parochus non tenetur aliter probare, Decimas sibi competere, sed contrarium asserenti incumbit onus probandi, cum contra hunc militet Juris præsumptio, *arg. cap. 1. De Prescript. in 6. ac notat Barbosa loc. cit. cap. 26. §. 2. n. 8. cum aliis.*

#### *Additio I.*

\* Quinimo Parocho loci illius, in quo sita sunt prædia, in tantum Jus commune quoad Decimas affluit, ut posito etiam, quod alius positive probaret, sibi potius, quam præfato Parocho jure antiquo competere jus percipiendi Decimas generaliter circa hos vel illos fructus, hoc non obstante adhuc Parochus ille, insistendo juri communi, possit prætere Decimas integras ex Novalibus, saltem proprie talibus, *c. 66. §. fin. & c. 29. De Decimis*, nisi alter aliunde clare ostendat, Decimas etiam Novalium in specie, ac particulari ad se pertinere. Dicitur notanter: *ex Novalibus saltem proprie talibus*; ubi advertendum, Novalia proprie talia juxta SS. Canones dici illas terras nunc cultas, quæ antecederet ultra memoriam hominum vel omnino incultæ jacebant *cap. 21. De verb. significat.* vel eos solummodo proferebant fructus, qui ab immemoriali tempore non erant decimabiles, *arg. Leg. fin. §. 2. ff. de Terminis moto.* Econtra vero Novalia improprie talia appellantur terræ antea quidem intra tempus immemorabile jam cultæ, & quidem fructibus decimabilibus, aliis tamen, quam modernis, e. g. si ex pomario fiat ager, vel ex agro vinea, vel ubi nunc seritur avena, antea vero siligo &c. De his ultimis statim recurret Quæsitum distinctum. Quo autem ad Novalia proprie dicta in Bavaria, ubi scribo, illud singulare legitur, quod Decimæ Novalium proprie talium primo triennio semper spectent ad Parochum, reliquo vero tempore ad illum, qui alias Decimas ejusdem sortis colligit, de quo videatur Schmid in Commentario in Jus Bavaricum, loco citato.\*

#### *Additio II.*

\* Quæres I. Ad quem pertineant Decimæ quoad Novalia improprie talia? Resp. Præsentem quidem Auctorem *Lib. 3. Decret. Tit. 30. n. 47.* absolute decidere taliter: *Si Novalia improprie dicta sunt ex fundis, de quibus antea solvebantur Decimæ, debentur de his illi, qui prius Decimas de fundo isto percipiebat, sive Parochus sit, sive alius, cui ex privilegio v. g. Decimæ competunt.* Ita ille.

Ego autem in triplici controversia Canonica de Decimis, edita Frisingæ anno 1736. fufius probare conatus sum, insistendo Juri communi attendi debere in simili casu, utrum ab alio extraneo extra Parochum illud Jus decimandi obtentum fuerit in ordine ad fundos determinatos non respiciendo *ad certum genus frumenti*, vel an potius in ordine *ad certum genus frumenti*, non respiciendo certos & determinatos aliquos fundos? In priori casu conventio cum præfate Auctore, in posteriori autem puto, Decimas, quoad novum genus seminati frumenti spectare potius ad eum, qui antea habuit jus colligendi Decimas de hoc ipso genere frumenti, quamvis præcedenter in dictis agris non collegerit easdem pro eo tempore, quo ibidem ferebatur frumentum alterius generis. Et ita videtur mecum sentire R. P. Pichler in *Candidato Jurisprudentiæ abbreviato. Lib. 3. Tit. 30. n. 7.* dum hæc ponit formalia: *ponamus in aliqua Parochia Decimas majores NB. indistincte ad aliquod Hospitale pertinere, minores autem, puta olea, rapas, linum &c. ad Parochum. Hoc casu, si in agro, in quo prius seminari solebant certæ species fructuum ad majores Decimas spectantes, Decimæ ex his collectæ debentur Parocho. Deinde ponamus (aliud nimirum casum) quod NB. ex certis & determinatis fundis, ex hortis v. g. provenientes Decimæ spectent ad Parochum, ex aliis autem NB. determinatis fundis v. g. ex campis seu agris provenientes ad Hospitale: in hoc casu quodcumque genus fructuum NB. mutata etiam cultura pristina crescit in hortis, Decimæ ad Parochum, & quodcumque crescit in campis, ad Hospitale pertinent.* Taliter explicatam assertionem ait teneri a communi, videturque idem sentire Illustr. Cancellarius de Schmid in *Commentariis, ad Tit. 28. art. 11. n. 9.* Quid ceteroquin circa hoc punctum Jus Bavaricum quoad suos Decimatores statuatur, vide ibidem.\*

#### *Additio III.*

\* Quæres II. Ad quemnam Parochum pertineant Decimæ carnaticæ? Resp. Nisi alicubi sint speciales locorum legitimæ consuetudines: communiter & ordinarie loquendo hæc Decimæ pertinent ad Parochum, intra cujus Parochiæ limites pascuntur, seu aluntur animalia, ex quorum foetura Decimæ porriguntur. Et hinc, si pecora diversis anni temporibus pascantur, seu alantur in diversis, & distinctis ab invicem Parochiis, pariter Decimæ pro rata temporis sunt dividendæ: puta, si tempore hyemali foeno e. g. paleis & stramine alantur in una Parochia, & tempore æstivali ducantur ad pascua sita in altera Parochia. Ita deducitur *argum. cap. 4. De Decimis*, ubi præsupponitur ex pascuis solvi Decimas, ac præter plures Doctores tenet S. Thomas 2. 2. *quest. 87. art. 3. ad 2.* Videatur Melchior Friderich *Tract. de Decimis*, apud me *cap. 4. q. 1. n. 377. & seq.* qui pariter notabilem casum ponit tempore belli, si ibidem pecora ob metum hostium aliquo notabili tempore transferantur ad pascua alterius Parochiæ securioris ab hostium invasione. Illud adhuc notanter addit Illustriss. D. Cancellarius intimus de Schmid in *Jure Bavarico. Tit. 28. art. 16. n. 6.* Decimas carnaticas, ubi in usu sunt, solvi debere, quando foetus jam est maturus, id est, quo foetus quadrupedum non amplius lacte, & bipedum non amplius alis matrum indigent; nam omnium fructuum hæc natura est (inquit Joannes Andreas apud dictum Auctorem) ut in Decimationem veniant, quando ad usum sunt idonei: ad quid enim alias prodesse Decimatori immaturi foetus, & pulli implumes? Nunc a Parochis pergendo ad Episcopos, sit\*

27 **CONCL. II.** Quamvis post factam Parochiarum divisionem tanta circa perceptionem Decimarum competat Parocho assistentia Juris, & favor, exinde tamen non excluditur Episcopus loci a perceptione Decimarum prædialium. Nam imprimis spectato Jure communi debetur ei, tamquam Superiori, & Ordinario omnium Fidelium suæ Dioecesis Pastori, quarta pars Decimarum totius Episcopatus, prout liquet ex *c. Conquerente. De Offic. Jud.*



## Quæst. IV. Quibus modis eximatur quis a præstatione &c. 363

*ordinarii*, ubi Pontifex inter Jura Episcopalia recenset *quartam decimationem*, juncto *c. De quarta, de Præscript.* & concordantiis. Hinc Fagnanus *c. Cum contingat*, num. 13. *De Decimis*, cum aliis notat, quod Episcopus super quartam Decimarum habeat intentionem fundatam.

28 Deinde, quando Decimæ non sunt in certa Parochia (veluti, si prædia sint multum distantia, & non inclusa in limitibus alicujus Parochiæ; vel si novalia fiant in nemoribus remotis, & extra limites Ecclesiarum Parochialium) tunc Episcopus fundat intentionem super eas, adeo, ut ipsas secundum discretionem a Deo sibi datam, alii Ecclesiæ deputare, vel ad opus suum poterit retinere, prout habetur *c. Quoniam, de Decimis*. Notat tamen ibidem Abbas, quod, si certum sit, ejusmodi prædia, vel novalia includi in aliqua vicinaria Parochiarum, sed ignoretur, quænam illa sit, tunc Decimæ non debeantur Episcopo, sed sint dividendæ inter illas Parochias.

29 Additur notanter n. 27. *spectato Jure communi*. Nam per hæcenus dicta non negatur, quin aliquo jure speciali possit Episcopus tale jus amittere: ut puta si appareat de contraria consuetudine; illa enim servari debet, cum in transferendo jus Decimarum ab una Ecclesia in aliam, plurimum valeat consuetudo. Idem erit, si constet de compositione, vel appareat de quodam privilegio, aut intervenierit præscriptio specialis. Fagnanus ibidem num. 18 & 19.

30 CONCL. III. Laicis mere sæcularibus nullo modo competit, seu concedi potest jus Decimarum, quatenus spirituale est; adeoque nec ipsæ Decimæ, prout sunt fructus Ecclesiastici. Ita Pirhing *de Decimis* num. 135. & communis aliorum. Patet hoc ex *c. Decimas, quas in usum*, 16 q. 7. ubi Laici Decimas possidere prohibentur, & oppositum facientes dicuntur sacrilegii crimen committere, & æternæ damnationis periculum incurrere. Idem desumitur ex *c. Al hac, & c. Quamvis, de Decimis*, cum concordantiis. Ratio etiam est; quia Laici non possunt possidere spiritualia, multo minus spiritualia officia ministrare Fidelibus.

31 Additur vero, *Laicis mere sæcularibus*, sive ut loquitur Pontifex in *cit. c. Quamvis. Eod. Laicis in seculo remanentibus*. Siquidem Laici conversi, etsi nullo Clericali Ordine sint insigniti, capaces sunt juris spiritualis; quia non sunt meri Laici, sed inter Religiosos numerantur, propter tria Vota substantialia Religionis ab ipsis edita, ideoque Clericorum juribus, & privilegiis gaudent: cujusmodi sunt Hospitalarii, Professi Ordinum Militarium, Equites Melitenses, & Teutonici Ordinis, arg. *c. Cum & plantare, de Privilegiis*. Unde talibus possunt concedi Ecclesiæ, & Decimæ, argumento a contrario desumpto, cum non sint *Laici in seculo remanentes*: ita tamen, ut tales Religiosi Laici non per seipsos (hoc enim defectu Ordinis exequi nequeunt) sed per Clericos idoneos Ecclesias regant, & administrent. Abbas *c. Quamvis, n. 3. de Decimis*, & alii.

32 CONCL. IV. Nihilominus potest Laicis concedi, & competere jus percipiendi fructus Decimarum, quatenus intelligitur abstractum a titulo & jure spirituali, & quid temporale existit; videlicet jus præcise percipiendi decimam partem fructuum. Ubi notandum, quod jus percipiendi fructus decimales non sit res spiritualis intrinsece loquendo, sicut sunt tales gratiæ & virtutes per se infusæ, sed potius extrinsece, quatenus nimirum jus illud auctoritate Ecclesiastica cum aliquo titulo, seu officio spirituali e. g. cum obligatione administrandi Sacramenta connectitur. Unde, quando auctoritate Papæ aliquando connexio hæc iterum tollitur, nec etiam jus illud percipiendi fructus decimales amplius spirituale censetur, & consequenter facta prius tali separatione poterit id Laicis concedi.

33 Similiter possunt hisce justo interveniente contractu concedi ipsimet fructus decimales. Ita Glossa *c. Quamvis, v. Concesserit, de Decimis*. Zoësius *Eod. n. 45*. Pirhing *n. 138*. ac alii. Ratio est: quia ipsimet fructus Decimarum non sunt res spiritualis sed temporalis. Hinc-

Anacl. Reiffenstuel Theol. Tom. I.

que etiam juxta *c. Vestra de Locato*, possunt dari ad firmam (hoc est pro censu annuo aliis concedi) & libere locari, dummodo hujusmodi locatio ad feudum, vel alienationem perpetuam non extendatur. Et talis locatio, quin & venditio fructuum decimalem ad unum, vel plures annos, passim fit: nam Decimæ sic spectatæ sunt quid mere temporale.

34 Quinimo ante Concilium Lateranense sub Alexandro III. 1179. celebratum potuit non solum per Papam, sed etiam per ipsos Episcopos Laicis dari perpetuo in feudum ipsum jus utile percipiendi Decimas, remanente jure directo penes Ecclesiam, ut Laici propter hanc liberalitatem ipsas Ecclesias ab Hæreticis, ac aliis oppressoribus defenderent. Et quamvis hæc potestas in dicto Concilio Episcopis adempta fuerit, tamen decimæ prius perpetuo laicis in feudum concessæ penes Vassallos Laicos remanserunt. arg. *c. Cum Apostolica, De his, quæ sunt a Prelato &c. & c. Statuto. §. Same, de Decimis, in 6*.

### QUESTIO IV.

Quibus modis eximatur quis a præstatione Decimarum?

#### SUMMARIUM.

- 35 Variis modis potest quis eximi a præstatione Decimarum.
- 36 I. Privilegio, & quali?
- 37 II. Per Consuetudinem, & quomodo hoc intelligendum?
- 38 Corollaria.
- 39 III. Præscriptione.
- 40 Solvitur instantia.
- 41 Quo tempore immunitas a solvendis Decimis præscribitur? Declaratur *c. 1. De Præscript. in 6*.
- (d) Ut dictum Tract. 7. dist. 6. n. 15.
- 42 IV. Compositione, ac remissione.
- 43 V. Gravi paupertate, & quomodo?

35 CONCL. I. Variis modis accidere potest, ut quis eximatur a præstatione Decimarum; videlicet privilegio, consuetudine, præscriptione legitima, compositione, remissione, imo & ob gravem paupertatem eorum, qui solutis Decimis non habent necessaria ad se, suosque alendos. Ita Doctores passim; atque desumitur ex diversis textibus Juris, mox sigillatim referendis: unde sit

36 CONCL. II. A præstatione Decimarum potest quis eximi privilegio, non quidem alicujus Principis territorialis Laici, aut Episcopi loci, sed privilegio Summi Pontificis. Ita Vallenfis *tit. De Decimis, §. 8.* & alii. Prima pars habetur *c. Tua porro, & c. Dudum, de Decimis*, ubi dicitur neque Imperiali, neque Regali concessione quæpiam a solutione Decimarum eximi posse, utpote quæ Divina constitutione debentur, & sunt tributa egentium animarum. Altera pars ex eo patet: quia Episcopus nequit dispensare in Jure communi: nam *lex Superioris per inferiorem tolli non potest. Clem. Ne Romani. De Elect.* Verum privilegio Pontificio id fieri posse, patet ex *c. Suggestum, & c. Ex parte, & seqq. De Decimis*, ubi plura hujusmodi privilegia Cisterciensibus, aliisque concessa referuntur. Videri poterit desuper Barbosa *de Offic. & potest. Parochi, part. 3. art. 3. cap. 28. §. 3. n. 20. & seqq.* ac in Jure Canon. lib. 3. *Decret. Tit. 20. §. 4. n. 62. & seqq.*

37 CONCL. III. Per Consuetudinem alicubi legitime introductam similiter potest induci exemptio a præstatione quarundam Decimarum; dummodo adhuc ex aliis Decimis, vel redditibus, tantum supersit, quod sufficiat justæ Sacerdotum sustentationi. Ita Covarruvias *lib. 1. var. Resolut. cap. 17. n. 8.* & alii. Ratio est: quia Decimæ solo Jure Ecclesiastico debentur Clericis secundum quotam; sed secundum substantiam, sive ut sunt necessarium stipendium Ministrorum Ecclesiæ, debentur Jure naturali, & Divino: atqui huic Juri nequit derogari per contrariam consuetudinem, bene tamen priorî *cap. ult. de Consuetud. ergo*.



38 Hinc valet consuetudo, ut ex sceno, aut ex quibusdam fructibus, vel bonis, præsertim minutis v. g. oleis, fabis, rapis, & similibus, alicui non solvantur Decimæ, aut saltem non integræ: ideoque jura dicentia, quod Decimæ sint solvendæ integræ, intelligenda sunt de integritate solvi solita. Similiter valet consuetudo, ut Clerici nullas solvant Decimas, aut Laici non solvant personales: quinimo Decimas personales, seu ex lucro industriæ, hac ætate nostra ferme in toto orbe Christiano de consuetudine legitime præscripta non solvi, notat Navarrus c. 21. *Manual. n. 31.* usumque in hac Decimarum materia valde variari, ita tamen, ut adhuc Clericis supersit honesta sustentatio, passim observant Doctores.

39 CONCL. IV. Insuper præscriptione rite absoluta poterit immunitas a solvendis Decimis obtineri per privatas, seu particulares personas, sive Ecclesiasticas, sive Laicales. Ita Covarruvias *loc. cit. n. 10.* Pirhing. *tit. de Decimis, n. 129.* & alii. Ratio est: quia ut dictum, Decimæ debentur Jure dumtaxat Ecclesiastico ergo nihil obstat, quin per contrarium usum legitime præscriptum abrogari possint, & sic immunitas ab eisdem solvendis præscribi; dummodo aliunde habeant Ecclesiæ Ministri congruam sustentationem.

40 Nec dicas. Laicus non potest præscribere jus percipiendi Decimas; ergo neque jus retinendi Decimas, id est, immunitatem ab eis solvendis. Resp. enim negando consequentiam, & paritatem: quia jus percipiendi Decimas propter aliquod Officium spirituale est etiam ipsummet spirituale, cujus Laicus est incapax; jus autem immunitatis, seu exemptionis a Decimis solvendis non est spirituale: hoc etenim tantum est quædam libertas, & commoditas temporalis integre percipiendi fructus suos, & in nullo titulo spirituali fundatur, ac radicatur.

41 Ceterum immunitas a solvendis Decimis bona fide, & cum titulo præscribitur spatio quadraginta annorum: sine titulo autem contra Parochos tempore dumtaxat immemoriali; prout notant citati Auctores. Et hoc desumitur ex cap. 1. *De Præscript. in 6.* ubi generaliter decer-

nitur, quod, quando jus commune resistit præscribenti vel habetur præsumtio contra ipsum, non sufficiat bona fides, sed insuper requiratur titulus, qui possessori causam tribuat possidendi, nisi allegetur, probeturque præscriptio temporis immemorialis: atqui Jus commune resistit præscribenti immunitatem a solvendis Decimis; ergo. Accedit ratio: quia *possessor mala fidei ullo tempore non præscribit*, juxta Reg. 2. *Juris, in 6.* atqui possidens immunitatem solvendi Decimas (cum huic jus commune resistat, cujus ignorantia non excusat) præsumitur habere malam fidem; nisi alleget titulum saltem coloratum, qui det justam causam possidendi, sicque bonam fidem ex parte possessoris inducat, vel nisi probet possessionem temporis immemorialis, quæ est instar tituli, imo qua non potest allegari melior titulus de toto mundo (d) ergo.

42 CONCL. V. Compositione, ac remissione potest etiam cuiuspiam competere immunitas a solvendis Decimis. Ita Vallengis *tit. de Decimis, §. 8. n. 5.* cum communi. Idque desumitur ex c. *Ex multiplici, de Decimis*, juncto c. *Statuimus, de Transaction.* ubi ejusmodi compositio facta approbatur. Idem de remissione liquet ex c. *Quia circa, de Privilegiis*, ubi pariter quarundam Decimarum facta remissio per Papam comprobatur.

43 CONCL. VI. Tandem gravis paupertas, sive tanta, ut solutis Decimis quis non habeat necessaria ad se suosque sustentandos, excusat interim a solutione Decimarum, donec melior fortuna advenerit. Ita Layman *lib. 4. Tract. 6. cap. 2. n. 8.* Abbas, Suarez, & alii. Ratio est: quia ob necessitatem tam gravem generaliter potest differri solutio debiti. Quinimo, si quis tempore Decimarum solvendarum fuerit constitutus in extrema necessitate, prorsus liberatur obligatione eas persolvendi; cum tunc omnia sint communia, & sic ipse consumperit, quod suum erat. Verum, qui gravem solum necessitatem patitur, is liberatur non simpliciter, sed donec melior fortuna aspiet. \* Plura adhuc de Decimis in emergentia aliquis casus videri poterunt in Jure Canonico *lib. 3. Decret. Tit. 30.* \*

## T R A C T A T U S X I I

### DE IMMUNITATE ECCLESIASTICA, ET INDULGENTIIS.

**Q**uia præsens materia omnibus Clericis scitu valde necessaria existit, ne, quæ proprium statum, & Ecclesiæ sibi concredita jura concernunt, culpabiliter ignorent, ea juxta methodum a pluribus Auctoribus observatam in Theologia Morali merito pertractatur. Id ipsum, dimissis difficilioribus ad Jus Canonicum Quæstionibus, breviter præstabit præsens Tractatus, ita tamen, ut ad finem ejusdem simul agatur de Indulgentiis.

#### D I S T I N C T I O I.

*De Immunitate Ecclesiastica ut sic, ejusque Speciebus.*

#### Q U Æ S T I O I.

Quid, & quotuplex sit Immunitas Ecclesiastica, & quo jure constituta?

#### S U M M A R I U M.

- 1 Ratio Ordinis.
- 2 Munus tripliciter accipitur. Immunitatis ethymol.
- 3 Immunitas Ecclesiastica, quid?
- 4 Est triplex. Localis, Realis, & Personalis.
- 5 Certum est, Immunitatem Ecclesiasticam esse de Jure Divino quoad ea, quæ vere sunt spiritualia.

6 Immunitas Ecclesiastica etiam quoad alia est aliqua ratione de Jure Divino.

7 Qua ratione hoc fiat, variant Doctores.

I. Sententia.

(a) Tract. II. Dist. 4. n. 16.

8 II. Jurique conformior sententia.

9 Instantia contra hanc solvitur.

(b) Tract. II. Dist. 4. num. 14. & seqq.

**I**mmunitas sic dicitur a munere. Munus enim tripliciter accipitur. I. Pro dono: sic munera dari, mitti vè dicuntur. II. Pro officio: unde Munera militaria, Munera civilia, qualia solent esse conjuncta cum honore. III. Pro obligatione, seu functione cuiuspiam imposita: quo modo & *Municeps*, quasi communium onerum, seu *munerum particeps* dicitur. Et *Muneri* sic accepto opponitur *Immunitas*, quæ est exemptio, sive liberatio ab ejusmodi obligationibus, & oneribus. Hæc ad propositum applicando, sit

3 CONCL. I. Immunitas Ecclesiastica est exemptio, sive jus, quo Ecclesiæ, res, & personæ Ecclesiasticæ a publicis muneribus seu oneribus sæcularibus liberæ sunt. Ita Doctores passim, & patebunt singula ex dicendis.

4 CONCL. II. Ejusmodi Immunitas recte dividitur in localem, & realem, & personalem. Ita communis. Et quidem *Immunitas localis* est, quæ convenit Ecclesiis, aliisque locis Ecclesiasticis. *Realis*, quæ competit rebus Ecclesiasticis, id est, bonis ad Ecclesiam, vel perso-



personas Ecclesiasticas pertinentibus. *Personalis tandem, quæ debetur personis Ecclesiasticis.*

5 CONCL. III. Certum est, quod Clerici, Ecclesiæ, earumque bona, si spectentur quoad ea, quæ vere & proprie spiritualia sunt, Jure Divino sint exempta a jurisdictione & potestate sæculari. Ita Covarruv. *Pract. Qu. c. 31. n. 2. Concl. 1.* Barbosa *l. 1. Juris Eccles. univ. c. 39. §. 2. n. 6.* & communis aliorum. Exemplificatur hoc de Sacramentis, quorum cognitio ad solum Judicem Ecclesiasticum pertinet; adeo quidem, ut juxta Concilium Trid. *Sess. 4. can. 12. Si quis dixerit causas matrimoniales non spectare ad Judices Ecclesiasticos, anathema sit.* Idem accidit in donis supernaturalibus spiritualibus, in beneficiis Ecclesiasticis, in rebus sacris, & aliis similibus, ad quorum decisionem supernaturalis cognitio requiritur. Ratio est: quia super his nullam omnino potestatem a DEO acceperunt Principes sæculares (his quippe tota potestas sua immediate a Republica communicatur) sed ad talia dijudicanda per Christum supernaturaliter instituta sunt potestas Ecclesiastica, & tradita D. Petro Joan. 21. ibi: *Pasce oves meas*; ejusque legitimis Successoribus, ac per hos ceteris Ecclesiæ Prælatibus.

6 CONCL. IV. Eriam quantum ad alia prorsus concedendum est, quod Immunitas Ecclesiastica, seu exemptio Clericorum, Ecclesiarum, rerumque Ecclesiasticarum aliqua ratione sit de Jure Divino. Desumitur hoc ex diversis textibus Juris, dictam Immunitatem esse Jure Divino clare attestantibus. Loquendo enim de personali exemptione Clericorum, eam haberi de Jure Divino, patet ex *c. Si Imperator dist. 96. §. c. Sylvester. §. c. Relatum 11. q. 1.* cum concordantiis. Deinde generatim loquendo de exemptione, seu Immunitate Ecclesiarum, habetur textus clarissimus *c. Quamquam. De Censibus in 6.* ibi: *Cum igitur Ecclesiæ, Ecclesiasticæque persone, ac res ipsarum non solum jure humano, quinimo & Divino, a sæcularium personarum exactionibus sint immunes.* Et ibidem Glossa v. *Divino* probat hoc ex *Genes. cap. 47.* ubi Pharaon Rex Ægypti terram Sacerdotum fecit immunem & liberam, ne tenerentur cum aliis quintam partem fructuum solvere Regibus. Unde & in veteri Lege Sacerdotes, & Levitæ erant exempti a jurisdictione sæculari aliarum Tribuum, & obligatione solvendi tributa. His accedit Concilium Tridentinum *Sess. 25. c. 20. de Refor.* ubi ait, *Ecclesiæ, & personarum Ecclesiasticarum Immunitatem Dei ordinatione, & Canonicis sanctionibus constitutam.* Concordat *cap. Nimis. De Jurejurando* junctis variis Conciliis.

7 Dicitur notanter in Conclusionem, aliqua ratione sit de Jure Divino. Siquidem in hoc amplius declarando variant Doctores. Et quidem non pauci volunt, ejusmodi exemptionem non esse de Jure Divino obligante, sed solum a Lege humana, seu per privilegia in Corpore utriusque Juris clausa: dici tamen quadam ratione esse de Jure Divino, scilicet originaliter & initiative, quatenus Legi naturali valde conformis est, atque a veteri Lege Divina originem duxit; prout in simili superius (a) dictum est, Decimas Divina constitutione deberi. Et hujus sententiæ sunt Covarruvias *loc. cit. num. 2. Concl. 3.* Lessius *l. 2. de Just. & Jure c. 33. num. 30.* Molina, Garcias, & plures alii, quos citat Barbosa *§. 2. n. 1.*

8 Alii econtra probabilius, Jurique conformius esse censent, Clericos etiam in temporalibus Jure Divino a Civili Potestate exemptos esse; prout fortiter urgent textus *n. 6. relati*, atque tenet Glossa *c. Si Imperator dist. 96. & c. Quamquam. De Censib. in 6.* Abbas *c. Ecclesia S. Mariæ num. 6. De Constitut. Barbosa cit. cap. 39. §. 2. num. 5. & rursus §. 3. n. 3.* pro hac sententia allegans decisionem Rotæ, & plurimos Doctores; Layman. *lib. 4. tr. 9. c. 8. n. 1.* Engel *tit. de Immunit. Eccles. n. 23.* aliique communius; quibus novissime accessit Prosper Fagnanus *c. Ecclesia S. Mariæ nu. 10. De Constitut.* asserens quod *crebrior gravissimorum interpretum sententia est, eam exemptionem esse de Jure Divino.*

9 Neque obstat allata instantia de Decimis, nam De-

Anacl. Reiffenstuel Theol. Tom. I.

cimas etiam hodie esse Juris Divini, quatenus requiruntur ad necessariam Ministrorum Ecclesiæ sustentationem, superius (b) jam dictum est. Verum de hoc plura Canonistæ. \* Uti fufius præfens Auctor in Jure Canonico *Lib. 2. Decr. Tit. 2. §. 9. nu. 193. ac seqq. & Lib. 3. Tit. 49. n. 235. & 236.*

## Q U Æ S T I O II.

In quibus consistat Immunitas localis, sive Ecclesiarum.

### S U M M A R I U M.

- 10 Immunitas localis consistit in duobus; & quibus?
- 11 Judicia sæcularia prohibentur fieri in Ecclesiis, vel Cæmeteriis, sub nullitate actus.
- 12 Secus dicendum de Judiciis Ecclesiasticis.
- 13 Solvitur instantia.  
Quid magis deceat?
- 14 In Ecclesiis, ac Cæmeteriis facere contractus &c. non licet.
- 15 Sed si fiant: non sunt irriti.
- 16 Quid de venditione candelarum?
- 17 Ibidem prohibentur fieri Concilia sæcularia, Confabulationes &c.
- 18 Comædia profana.
- 19 Comestiones, vel accubitus &c.
- 20 Musica impura, omnesque actiones sæculares.
- 21 Quid de Disputationibus?
- 22 Violentia Ecclesiis non est inferenda.  
Pœna contra facientium.

10 CONCL. I. Immunitas localis (quam alii appellant Immunitatem Ecclesiarum, sub his etiam comprehendendo Cæmeteria, & alia loca Religiosa) consistit in duobus: videlicet, ut actus profani, & sæculares ab Ecclesiis arceantur: deinde, ut malefactores ad Ecclesias confugientes, ibidem in vita & membris protegantur, neque violenter inde extrahi possint. Et quidem de hoc posteriori fufius dicetur *Distinct. sequenti*; quantum vero ad prius attinet, sit

11 CONCL. II. Imprimis in Ecclesiis, earumque Cæmeteriis prohibitum est, exercere Judicia sæcularia; adeo quidem, ut totus Processus judicialis, & sententia super causa sæculari ibidem lata, ipso jure irrita, & nullius roboris existat. Ita expresse statuitur *c. Decet. §. fin. De Immunit. Eccles. in 6.* ac tenent Doctores communiter. Et hoc quidem procedit non solum de causis criminalibus, sed etiam de civilibus, quæ ad Forum sæculare pertinent; uti patet ex textu. Maxime tamen Immunitati Ecclesiarum repugnat, atque absurdum est, & crudele, ibi *judicium sanguinis exerceri*; ubi est tutela refugii constituta. ut dicitur *c. Cum Ecclesia. De Immunit. Eccles.* Ubi proin, præter nullitatem processus, etiam sub pœna excommunicationis prohibetur agitare causas sanguinis in Ecclesia, vel Cæmeterio.

12 Dicitur notanter, *Judicia sæcularia*. Siquidem Ecclesiastica Judicia ibidem valide, & licite tractari possunt *arg. c. Qua fronte De Appellat. & docet Glossa communiter recepta cit. c. Decet. v. Sæcularium. De Immunit. Eccles. in 6.*

13 Nec dicas. Judicia Ecclesiastica prohibentur exerceri in die Festo, non minus, ac sæcularia; ergo etiam utraque prohibentur exerceri in loco sacro. Respond. enim negando consequentiam & paritatem: nam æque, imo plus decet, ut Clerici in Forensibus actibus non occupentur diebus Festivis, ac Laici. At loquendo de loco, Ecclesia præsumere potuit, Judicia Ecclesiastica cum minori strepitu, minorique tempore expedienda fore, quam sæcularia: simulque Judicem Ecclesiasticum majorem curam adhibiturum, ut omnia sine irreverentia loci sacri fiant. Fatendum tamen, magis decens esse, ut etiam Ecclesiastica Judicia non in



Ecclesia, quæ domus est orationis, non jurgiorum, sed in Palatio Episcopali, aut alio competenti loco fiant. Pirhing. tit. de Immunitat. Eccles. n. 7.

14 CONCL. III. Insuper prohibitum est in Ecclesiis, earumque Cœmeteriis facere contractus, vel negotiationes, aut nundinas instituere. Ita communis; & habetur citat. cap. Decet, De Immunitat. Eccles. in 6. ibi: Cessent in Ecclesiis, earumque Cœmeteriis negotiationes, ac fori cujuscumque tumultus. Idque merito statutum est ad exemplum Christi Domini, qui ingressus in Templum Dei, ejiciebat omnes vendentes, & ementes in templo, & mensas numulariorum, & cathedras vendentium columbas evertit, & dixit eis: scriptum est, Domus mea, domus orationis vocabitur, vos autem fecistis illam speluncam latronum. Matth. 21.

15 Licet autem contractus in Ecclesiis facere sit prohibitum; iidem nihilominus defacto initi valent: nam nullo jure irritantur, sicut citat. cap. Cum Ecclesia De Immunit. Eccles. cassantur Judicia sæcularia. Simulque isthæc Constitutio, cum sit pœnalis, non est extendenda ad contractus, & notat Glossa passim recepta cit. cap. Decet. v. Processus.

16 Ceterum in Templis vendere candelas, si id fiat ad Fidelium devotionem promovendam, non est illicitum. Azorius part. 2. libr. 9. cap. 9. quest. 5. Angelus, & alii. Nam prohibetur quidem omnis negotiatio, vel contractus, qui sit lucri gratia, aut Divina Officia perturbat, vel impedit: hoc tamen non accidit in venditione candelarum causa promovendæ devotionis Fidelium.

17 CONCL. IV. Ulterius in Ecclesiis prohibentur fieri Concilia, Conciones, & publica Parlamenta (intellige) quando talia fiunt de rebus mere temporalibus, & sæcularibus; nam Concilia, & Conventus de rebus Ecclesiasticis, aut ad pietatem spectantibus, recte ibidem instituuntur. Item confabulationes qualibet, & quæcumque alia, quæ Divinum possunt turbare Officium, aut oculos Divinæ Majestatis offendere. Ita his ipsis verbis habetur citat. cap. Decet. Eod. in 6.

18 Deinde Comœdiæ profanæ, ac ludi theatrales penitus in Ecclesiis fieri prohibentur, non obstante quacumque consuetudine contraria, quæ potius corruptela dicenda est. cap. Cum decorem. De Vita & honest. Clericorum. Quamvis pia & honesta spectacula ibidem exhiberi valeant. Pirhing loc. citat. numer. 14. post Sylvestrum, & alios.

19 Item non oportet in Basilicis, seu in Ecclesiis agapen facere, & intus manducare, vel accubitus sternere. cap. 4. Non oportet. dist. 42. Neque intra Ecclesiam possunt suppellectilia reponi, nisi id necesse sit propter hostiles incurfus, aut alias necessitates, quibus tamen cessantibus ad pristina loca reportari debent argum. cap. Oratorium dist. 42. & tradit Azorius loc. citat. quest. 8.

20 Tandem novissime Concil. Trident. Sess. 22. in Decreto de observandis & evitandis in celebratione Missæ statuit, ut Ordinarii locorum ab Ecclesiis musicas, ubi sive organo, sive cantu lascivum aut impurum aliquid miscetur, item seculares omnes actiones, vana atque adeo profana colloquia, deambulationes, strepitus, clamores arceant, ut Domus Dei vere domus orationis esse videatur, ac dici possit.

21 Quæres. An licitum sit, disputationes in Ecclesiis habere? Respond. affirmative: quia scientia est donum Dei, & res sancta. arg. L. 1. §. 5. ff. De Extraordin. cognition. ibi: Est quidem res sanctissima, civilis sapientia. Abbas c. Cum Ecclesia. De Immunit. Eccles. Azorius loc. cit. q. 4. Pirhing. n. 11. & alii.

22 CONCL. V. Ad Immunitatem Ecclesiarum pertinet etiam, ne quis eis violentiam inferat, infringendo earumdem fores, vel ipsas spoliando suis bonis, aut hujusmodi quidpiam attentando. Patet hoc ex c. Omnes & c. Quisquis 17. q. 4. cum concordantiis, ubi tales judicantur sacrilegi. Quinimo Ecclesiarum Dei violatores, sive cum effractione spoliantes Ecclesias ipso jure excommunicati sunt, arg. c. Canonica 11. q. 3. & c. Sicut anti-

quitus 17. qu. 4. & c. Conquesti. De Sent. Excom. junctâ Glossa ibidem v. Excommunicatos nuncietis.

### Q U Æ S T I O III.

De Immunitate reali, & personali.

### S U M M A R I U M.

23 Immunitas realis, & personalis, in quo consistat?

\* Loquendo de ipsis Personis Ecclesiasticis certum est, quod gaudeant Immunitate personali.

24 Bona Ecclesiarum, & Personarum Ecclesiasticarum sunt triplicis generis. I.

(c) Conformiter dictis n. 6. & seqq.

25 II. ac 26. III. Declaratur.

27 Bona Clericorum patrimonialia, an gaudeant Immunitate?

(d) Ut dictum n. 6. & seqq.

\* Quid de Bonis negotiatione lucrative acquisitis?

28 Quid de Bonis Feudalibus?

29 Aut si Fundator in Bonis Ecclesiæ reservavit sibi certam pensionem?

30 Quid loquendo de oneribus antiquis?

31 Ac etiam novis, sive postea imponendis?

32 Laici non possunt, etiam in communibus necessitatibus, novas collectas Ecclesiis, & Clericis imponere.

33 An possint præstari absque ulla exactione Licorum?

34 Quæ conditiones requirantur, ut Ecclesiæ & Clerici in communibus necessitatibus contribuere teneantur?

\* Quidnam Sæculares possint a Clericis petere titulo Impensarum, & utrum tunc allegata conditiones requirantur?

23 CONCL. I. Immunitas rerum, & personarum Ecclesiasticarum (quam alias realem, & personalem appellant) generatim consistit in hoc; quod res, atque personæ Ecclesiasticæ, a jurisdictione sæcularium Magistratum, eorumque exactionibus, & oneribus, immunes sint, & liberæ. Ita omnes Theologi, Canonistæ, & Jurisconsulti Catholici, estque definitum in Concilio Lateranensi sub Alexandro III. c. 19. & refertur c. Non minus De Immunit. Eccles. ubi etiam Laici collectas Clericis, vel Ecclesiis imponentes, aut jurisdictionem ipsorum usurpantes, si moniti non desistant, una cum fautoribus suis ipso facto excommunicantur. Concordat Concilium Generale sub Innocentio III. c. 46. relatum in c. Adversus Eod. juncto c. Quia nonnulli Eod. in 6. & Clem. un. Eod. cum concordantiis.

#### Additio.

\* Loquendo nunc in specie de personali Immunitate, certum est, quod conformiter textibus Juris can. Si Imperator Dist. 96. & c. Sylvester ac c. Relatum II. qu. 1. Clerici quoad suas proprias personas eadem gaudeant, cum Laici non habeant jurisdictionem in ipsas personas Ecclesiasticas, utpote gaudentes privilegio fori, prout suffus ostensum fuit a præsentis Auctore lib. 2. Decret. Tit. 2. §. 9. & Lib. 3. Tit. 49. §. 9. & 10. Unde ex hoc capite Clerici sunt immunes a Capitatione, proprie tali, quæ imponitur absque respectu ad ipsa bona. Item ab Angariis, Perangariis, cum hæc sint onera mere personalia, seu respicientia ipsas personas præcise ratione subjectionis, quibus ab habentibus jurisdictionem in ipsas imponuntur.\*

24 Ut autem quoad ipsa bona; seu Immunitatem realem hæc Conclusio melius intelligatur, sciendum, quod bona Ecclesiarum, & Ecclesiasticarum personarum, triplicis generis distingui possunt. Primi generis sunt ipsæmet Ecclesiæ materiales, una cum Cœmeteriis; item vasa sacra, vestes, & quæcumque consecrata, sive benedicta sunt, tamquam Divini Cultus instrumenta. Et de his certum est, atque ab omnibus (c) concessum, ea Jure Divino esse exempta a jurisdictione, & qui-



quibuscumque exactionibus Magistratum sæcularium: nullam enim temporalem utilitatem habent, quæ in æstimationem venire possit; utpote cum ad Divini Cultus ministerium specialiter dedicata, nullis aliis humanis usibus applicari possint, juxta Reg. 51. *Juris in 6. Semel Deo dicatum, non est ad usus humanos ulterius transferendum.*

25 Alterum genus complectitur bona Ecclesiarum tum immobilia, tum mobilia, quæ sive a Fundatoribus, sive ab aliis Fidelibus ad honorem Dei oblata seu donata fuerunt, ut per Prælatos Ecclesiarum in pios usus, utputa in ornatum Ecclesiæ, ac Ministrorum ejus sive pauperum sustentationem convertantur. Et de hisce bonis procedere dictam Decretalem *Non minus* cum concordantiis, conveniunt pariter Doctores, eo quod sint Deo oblata, atque ad cultum ipsius specialiter destinata, sicque non nisi in pios usus convertenda (quod secus foret, si per exactiones sæcularium gravarentur, atque diminuerentur) cum sint res Dei & *Sanctum Sanctorum Domino cap. Nulli 12. qu. 2. & alibi.*

26 Tertium bonorum genus est eorum, quæ ad Ecclesiam, aut Personas Ecclesiasticas pervenerunt aliis titulis, sive causis: utputa emptione, hæreditate, arte, labore manuali, aut alio quopiam titulo temporali. Et de his, præcipue vero de bonis patrimonialibus Clericorum, posset nonnulla moveri difficultas: sit tamen

27 CONCL. II. Non solum bona Ecclesiæ quocumque justo titulo acquisita, sed etiam bona patrimonialia Clericorum gaudent Immunitate ab extraordinariis collectis, & jurisdictione sæculari, atque potiuntur privilegio Fori. Ita communis Doctorum, uti testatur Barbosa lib. 1. *Juris Eccles. univ. c. 39. §. 5. num. 6. Layman lib. 4. tr. 9. cap. 6. num. 9. Pirhing tit. De Immunit. Eccles. numer. 62. Engel num. 24. cum aliis.* Et hoc aperte desumitur ex Juribus n. 6. allegatis, utpote quæ de rebus Ecclesiæ, & Ecclesiasticarum personarum indistincte, atque pariformiter loquuntur. Accedit ratio: quia *accessorium naturam sequi congruit principalis* juxta Reg. 42. *Juris in 6. cum concordantiis.* Simulque magis dignum trahit ad se minus dignum *arg. c. Quod in dubiis. De Consecrat. Eccles.* atqui dicta bona sunt quid accessorium ad personas Ecclesiasticas, simulque hæc multo digniores illis; ergo. Quinimo Magistratus sæcularis nihil posset statuere circa ejusmodi bona Patrimonialia Clericorum, nisi obligando simul ipsasmet eorum personas: sed has gaudere Immunitate Ecclesiastica, fatentur omnes Catholici. (d) Et hæc rationes a pari, vel etiam a fortiori militent de bonis Ecclesiarum tertii generis; nam ut dicitur *L. Quæ Religiosis ff. De Rei vindicat. Quæ Religiosis adherent, Religiosa sunt.*

Additio.

\* Limitatur hæc doctrina I. quoad bona mobilia, vel immobilia, cum quibus Clericus negotiationem instituit, etenim *c. Quamquam. De Censib. in 6.* tantummodo illæ res Clericorum a similibus oneribus dicuntur immunes, quas non causa negotiandi deferunt, vel deferri faciunt, quod intelligi debet de negotiatione *lucrativa*. non autem præcise *æconomica*. Ubi nota, quod posterior sit illa, qua quis emit res, ad sui & familiæ suæ sustentationem necessarias, vel saltem multum utiles ad eam conservandam, & si quæ per accidens superflue remaneant, easdem pretio currente dividit: econtra vero prior, seu *lucrativa* est, qua præcise, vel saltem principaliter res aliquas lucri capiendi gratia comparatur, ut eadem vel in sua priori specie mutatis temporum, aut locorum circumstantiis, majori pretio distrahatur, vel ut arte ac industria in aliam formam mutata, carius vendatur. Unde teste præsentis Auctore in *Jure Canonico lib. 3. Decr. Tit. 49. nu. 249.* in sensu intento negotiari dicitur ille, qui rem aliquam emptione, mutatione, aliove contractu acquirit, & comparat eo animo, ut eam revendendo, distrahendo, vel locando lucrum reportet. E. g. I. Si Clericus varia congreget, sibi per emp-

tionem procuret frumenta, ut tempore caritiæ in majori pretio vendere queat; vel II. Si Monasterium erigat ex hoc principaliter sine Aromatarum, ut conficiendo, & distrahendo medicinas capiat lucrum: nam Sac. Congregat. Episcoporum, & Regularium die 9. Jan. 1602. declaravit: *Regulares non posse Aromatarum tenere, nisi pro seipsis, quo casu visitari non potest a Protomedico.* Videantur Barbosa 2. part. *De Potestat. Episcop. allegat. 13. n. 13. Molina De Just. & Jure Tract. 2. disp. 342. Conclus. 5. Delbene De Immunit. Eccles. cap. 5. Dubitat. 3. Lect. 5. n. 3. præsentis Auctoris Reiffenstuel in Jure Canon. loc. cit. \**

28 Limitatur hæc doctrina II. in bonis Feudalibus, & Emphyteuticis: nam hæc non pleno jure transeunt in Clericum, aut Ecclesiam, sed dominus directus, qui eadem concessit, præter dominium ipsorum directum certas sibi condiciones & jura reservat: quæ proinde a Clericis, atque Ecclesiis erunt observanda. Unde pariter, si Ecclesia, vel Clericus a sæculari domino v. g. Imperatore Feudum habeat, ac super Jure Feudi quæstio inter Clericum, & Laicum emerferit, ea non per Judicem Ecclesiasticum, sed per dominum Feudi erit terminanda, prout decisum habetur *c. Ex transmissa & c. Verum de Foro competenti.* Hinc respectu sæcularis Feudi Ecclesia, vel Clericus non gaudet privilegio Fori, sed tenetur coram sæculari domino Feudi judicium subire; & convenitur coram eo in actionibus tam realibus, quam personalibus Feudum concernentibus.

29 Limitatur III. Si Fundator, seu Patronus v. g. Princeps territorialis in ipso Foundationis limine sibi certam pensionem, sive annuos redditus in bonis Ecclesiæ attributis reservasset, atque ipsos Episcopus ante consecrationem Ecclesiæ eidem constituisset *arg. cap. Præterea quoniam. De jure Patronat.* Ubi Patronis permittitur in Ecclesiis antiquos & moderatos redditus a locorum Episcopis institutos exigere. Postquam autem Ecclesia jam ædificata, dotata, & consecrata est, novi census eidem imponi non possunt, nec veteres augeri, *c. Prohibemus. De Censibus.* cum concordantiis. Quod si secus fiat, illud irritum erit.

30 Limitatur IV. Quoad onera antiqua, seu quæ rebus, antequam ad Ecclesiam quocumque titulo devenissent, prius jam imposita fuerunt: nam quælibet res transit cum suo onere *arg. c. ex litteris. De Pignoribus & alibi.* Hinc Ecclesia, vel Clericus tenetur ad hujusmodi onera antiqua præstanda, dummodo ea sint vera, & realia, id est, ipsis fundis seu bonis infixæ, perpetua, certa, & determinata, *arg. c. 1. juncta Glossa v. Senioribus.* ac Summario *De Censibus.* Et in hoc sensu procedit textus *c. Si tributum 11. qu. 1. ibi: Agri Ecclesiæ solvunt tributum: Et illud c. Tributum 23. qu. 8. Quia de exterioribus Ecclesiæ, quod constitutum antiquitus est, pro pace & quiete, qua nos tueri, & defensare debent, Imperatoribus persolvendum est.* \* Supple Titulo *concessionis Ecclesiasticæ non autem titulo subjectionis*, seu in ipsos Clericos *jurisdictionis.* De quo videantur Panormitanus, Innocentius, Andreas, & Engel apud ac cum P. Pichler in Candidato Jurisprudentiæ abbreviato *Lib. 3. tit. 49. n. 12. \**

31 Dicitur, quoad onera antiqua; sive, ut Canone proxime relato dicitur, *quod constitutum antiquitus est.* Nam loquendo de oneribus novis, seu quæ imponuntur bonis Ecclesiarum, vel personarum Ecclesiasticarum eo tempore, quo bona illa jam spectabant ad Ecclesias vel personas Ecclesiasticas, ab ejusmodi oneribus hæc prorsus immunes sunt, per textum n. 6. allegatos. Et quamvis Bartolus in *l. Rescripto §. fin. n. 5. De Minoribus* teneat, Principes Laicos posse efficere tributaria, & affecta omnia prædia eorum Territorii, ita ut, cum exinde ad Ecclesias pervenerint, obnoxia sint collectis postea imponendis: tamen ejus cautelam esse falsam, & contra Immunitatem Ecclesiæ, & ab omnibus communiter reprobata, ait Fagnanus in *c. Non minus n. 11. De Immunit. Eccles.* post Baldum, & Rotam, quos citat.

32 CONCL. III. Etiam in communibus necessitatibus, & utilitatibus Reipublicæ, prohibitum est Laicis sub



poena excommunicationis, novas exactiones seu collectas Ecclesiis, aut Clericis imponere. Ita hodie clarissime habetur in Bulla Coenæ Domini, ubi §. 18. imponentes collectas Ecclesiis, vel personis Ecclesiasticis, ipso facto excommunicantur. Idipsum jam antehac prohibitum fuerat in Concilio Lateranensi, sub Alexandro III. ac refertur c. *Non minus De Immunit. Eccles.* ubi contra oppositum attentantes sic statutum legitur: *Quocirca sub anathematis distractione fieri de cetero iusta prohibemus: nisi Episcopus, & Clerus tantam necessitatem, vel utilitatem aspexerint, ut absque ulla exactione ad relevandas communes utilitates, vel necessitates, ubi Laicorum non suppetunt facultates, subsidia per Ecclesias existiment conferenda.* Hæc ibi.

33 Dicitur, *absque ulla exactione*; nam istud absque ulla exactione, ac sponte per Ecclesias, ex arbitrio Episcopi, qui dictam necessitatem inspicere debebat, olim conferendum erat; ita ut ea *Laici humiliter & devote reciperent cum gratiarum actione*, prout declaratum fuit in Concilio Generali sub Innocentio III. & refertur c. *Adversus Eod.* Ubi tamen iudicium super his denuo adimitur Episcopis, atque præcipitur, ut *propter imprudentiam quorundam Romanus Pontifex prius consulatur; cuius interest, communibus utilitatibus providere.*

34 CONCL. IV. Ut in casu communium necessitatum, vel utilitatum, Ecclesiæ, & Clerici contribuere debeant, plures requiruntur conditiones, ex allegatis textibus Juris desumptæ. I. Ut necessitas, vel utilitas sit publica. II. Ut Episcopus, & Clerus super hoc deliberent. III. Ut dicta necessitas, vel utilitas sit communis, tam Laicorum, quam Clericorum. IV. Ut ad eas relevandas non sufficiant Facultates Laicorum. V. Ut contributio ab Ecclesiasticis fiat sponte, & sine aliqua exactione seu compulsione Laicali: unde talis contributio, seu collecta non debet imponi auctoritate Magistratus sæcularis, sed Ecclesiastici, simulque ad eam solvendam Clerici non sunt compellendi per Judicem sæcularem, sed per Ecclesiasticum. VI. Ut, nisi periculum in mora fuerit, desuper Romanus Pontifex consulatur. Ita desumitur ex *cit. c. Non minus & c. Adversus De Immunit. Eccles.* juncta *Clem. un. Eod.* prout fusius explicat Fagnanus. c. *Non minus n. 22. & seqq.* ac tenent alii Canonistæ.

#### Ad litto.

\* Quæres. An proxime adductæ conditiones quoque requirantur, si necessitas, propter quam fiunt expensæ, non præcise respiciat ipsam communitatem in genere, seu aliquam Rempublicam in communi, sed immediate redundet particulariter in commodum privatorum, nimirum in singula ejusdem communitatis membra, etiam Ecclesiastica? Resp. In tali casu, juxta graves etiam Auctores proxime citandos, posse e. g. a Magistratu Laico peti a Clericis aliquam contributionem pro rata *titulo Impensarum*; quin necesse sit ad superius mentionatas recurrere conditiones. Pro hac sententia citantur Abbas in c. *Non minus n. 20.* Barbosa in c. *Adversus De Immunit. n. 4.* Gratianus *Discept. 399. n. 16.* & Sylvester v. *Immunitas. q. 5. n. 20.* ac tenent Pichler *Lib. 3. Tit. 49. n. 11.* & fusius Schmalzgrueber *Lib. 3. Decret. Tit. 49. n. 32. & seqq.* atque teste eodem Pignatellus *Tom. 1. Consult. 50. n. 5.* ac dens, ita sæpius respondisse S. Congregationem Immunitatis: etenim hujusmodi contributiones ex una parte non exiguntur a Principe, vel aliquo Magistratu *titulo Jurisdictionis* in Clericos, nec a Clericis præstantur in recognitionem *alicujus Subjectionis*; ex altera autem parte æquum est, ut qui in particulari & quoad privatam suam personam immediate sentit commodum, sentiat & onus, conformiter, *Regula 55. De Regulis Juris in 6.* videturque in simili emergentia quasi tacitum pactum inter sæculares, & tales Clericos intercedere. Ex quo inferunt allegati Auctores, Clericos esse obligatos contribuere, si agrorum ripæ sint adversus vim fluminis munienda, ne fluvius inundet agros etiam proprios, si aperienda fossa, ut aquæ alio deriventur, aut ducendus rivus, quo prata etiam Clericorum irrigentur, vel

fodiendus puteus communis, ex quo etiam Clerici, ob defectum alterius, aquam accipiant &c. Notanter tamen annectit P. Schmalzgrueber *loc. cit.* Sæculares non posse in simili casu per seipsos adigere ad contribuendum pro rata Clericos rementes, sed potius debere id per legitimos eorum Superiores efficere: nam, uti jam dictum est *Tr. 2. Dist. 3. n. 14.* etsi frequenter Clerici obligentur servare Leges civiles *vi directiva*, non tamen adstringuntur *vi coactiva*. Aliam cautelam adjungit P. Pichler *loc. cit.* ut nimirum a Principe, vel Magistratu non excedatur rata factarum desuper impensarum, puta, si contributiones sub *titulo Impensarum* ita augerentur apud Clericos, ut exinde aliqua pars inferri posset in ærarium publicum, vel applicari ad solvenda alia debita communitatis, aut ad conservandum splendorem majorem Principis, vel ut aliqua civitas facilius sustinere valeat expensas faciendas ob adventum Principis, Nativitatem Filii Principis, aut Donationem Principissæ, nuptias proxime celebraturæ, uti exemplificat P. Franciscus Schmier *L. 3. Jurisprudencia Tr. 1. part. 3. cap. 4. sect. 3. §. 3.* \*

## DISTINCTIO II.

### De Jure Asylorum.

## QUÆSTIO I.

Quo Jure, quibusque locis competat Privilegium Asyli?

### SUMMARIUM.

- 1 Immunitas localis, in quibus consistat?  
(a) Dist. I. n. 10.
- 2 Privilegium Asyli non est Juris Divini, sed humani.
- 3 Solvitur instantia.  
(b) De hoc Tract. 2. dist. 2. q. 1.
- 4 Circa jus Asyli magnam vim habet consuetudo.
- 5 Privilegio Asyli gaudent omnes Ecclesiæ, etiam interdictæ vel pollutæ, cum Addit.
- 6 Item Cemeteria, Sacristiæ, turres, atque atria Ecclesiarum.
- 7 Notabilis instantia solvitur.  
Ecclesia aliter sumitur in materia Immunitatis, quam violationis.
- 8 An gaudeat Immunitate tenens januam Ecclesiæ, vel ejus parietem?
- 9 Immunitate an gaudeat spatium 30. vel 40. passuum circa Ecclesiam?
- 10 Monasteria, Hospitalia, Oratoria &c. gaudent Immunitate, & quæ?
- 11 Rei cur potius confugiant ad Monasteria, quam alia loca sacra?
- 12 Confugiens ad Sacerdotem SS. Eucharistiam portantem gaudet Immunitate.
- 13 Solvitur instantia.  
Et hoc amplius extenditur.
- 14 Quid de Reo Eucharistiam sumente?  
Vel fugiente ad Sacerdotem S. Oleum portantem?
- \* Quid de confugientibus ad Domos Parochiales, & Palatia Episcoporum?

1 Immunitas localis, ut jam superius (a) dictum, consistit in duobus: videlicet, ut actus profani, & sæculares arceantur ab Ecclesiis, & ut malefactores ad eas, aliæque pia loca confugientes in vita & membris protegantur, neque inde violenter extrahantur. Siquidem tum per Leges Civiles, tum Sacros Canones speciale privilegium Ecclesiis, aliisque piis locis, ob majorem eorum reverentiam, concessum est, ut delinquentes, qui ad illas tamquam ad Asylum confugiant, per vim extrahi non possint. Et de hoc loquendo, fit

2 CONCL. I. Privilegium Immunitatis, seu Asyli Ecclesiastici non est Juris naturalis, aut Divini, sed humani.



humani dumtaxat, Civilis ac Ecclesiastici. Ita Covarruvias lib. 2. variar. Resolut. cap. 20. nu. 2. Pirhing tit. de Immunit. Eccles. n. 15. & communior aliorum. Idque desumitur ex c. Inter alia. De Immunit. Ecclesiarum, ibi: Juxta sacrorum Statuta Canonum, & Traditiones Legum Civilium, fugiens ad Ecclesiam &c. Accedit ratio: quia, licet Jure naturali, ac Divino Deus sit colendus, & reverentia Locis sacris exhibenda, non tamen inde necessario inferitur, hoc fieri debere, Immunitatem Reis ad Ecclesiam confugientibus præstando; partim quia etiam criminalia esse coercenda Jure naturali ac Divino statuitur; partim quia reverentia Locis sacris Jure Divino, & naturali debita satis observaretur per hoc, quod actus profani & sæculares inde arceantur.

3 Nec obstat, quod jam in Lege veteri Deus præcepit Civitates refugii esse constituendas Exodi 21. n. 35. & Deut. 19. simulque etiam Gentiles ex instinctu naturæ aliqua Loca designaverint, quæ vocabantur Asyla: atque ipsum Concilium Trid. Sess. 25. c. 20. De Reform. afferat, Ecclesie, & Personarum Ecclesiasticarum Immunitatem, Dei ordinatione, & Canonicis sanctionibus constitutam. Respond. enim, Leges veteris Testamenti, quæ morales non fuerunt, sed tantum ceremoniales, aut judiciales, per adventum Christi exspirasse. (b) Unde jus Asyli jam non habetur ex veteris Legis obligatione, sed solum ad quamdam ipsius similitudinem, & secundum congruam Juris naturalis æquitatem (quæ etiam Gentiles agnoverunt) defecto per sacros Canones, ac Leges Imperatorias, Ecclesiis aliisque Locis sacris concessum fuit. Nec obstat Concilium Trid. loc. cit. Nam, ut concordentur jura iuribus, loquendo de Immunitate Asyli, plus non vult, quam Asyla ad imitationem veteris Legis, atque instinctu Divino, acceptaque a Deo auctoritate, per Canonicas Sanctiones constitutum esse.

4 Inferitur proinde cum Barbosa lib. 2. Juris Eccles. univ. cap. 3. n. 82. Engel tit. de Immunit. Eccles. num. 9. Covarruvias, & aliis, quod circa hanc Immunitatem Ecclesiasticam, seu jus Asyli, habeat magnam vim consuetudo; ac propterea ad eam multis in casibus Judices recurrere debeant. Nam, quia hæc Immunitas non est Juris naturalis, aut Divini, sed humani dumtaxat, consequenter contrariam consuetudinem admittit arg. c. ult. De Consuet.

5 CONCL. II. Privilegio Asyli gaudent omnes Ecclesie, sive consecratæ, sive nondum consecratæ, dummodo auctoritate Episcopi benedictæ fuerint, aut alia ratione, utputa erectione Crucis, ad publicum Missæ Sacrificii usum deputatæ; prout liquet ex c. Ecclesie. De Immunit. Eccles. Idque procedit, etiamsi Ecclesia illa sit interdita, vel polluta, & necdum reconciliata: quia tales Censuræ, aut impedimenta Juris, utpote pœnalia & odiosa, non oportet extendere ultra casus a Jure expressos. Pirhing loc. cit. n. 3. Sylvester, & alii.

#### Additio.

\* Nec refert, quod tales Ecclesie necdum perfectæ sint constructæ, dummodo ibidem auctoritate Episcopi primus lapis jam fuerit positus, & loco Altaris modo in Rituali præscripto Crux defixa. Idem sentiendum, quamvis talis Ecclesia infortunio e. g. treræ motu corruerit, nisi sit destructa auctoritate Superioris sine spe reedificationis. Ratio horum omnium est; quia talis locus adhuc vere; & quidem auctoritate Episcopi obsequiis Divinis est dedicatus, quod sufficit arg. c. 9. De Immunitate.\*

6 Præterea jure Asyli gaudent Cœmeteria, una cum fabricis ad Templi structuram attinentibus; ut est Sacristia, Turris, Atrium, Porticus, atque Ambitus: quia hæc omnia vel spectant ad Ecclesie fabricam, vel ei sunt annexa. Quinimo Cœmeterium auctoritate Episcopi designatum, & sacratum, obtinet privilegium Immunitatis, etiamsi sit separatum ab Ecclesia. Barbosa loc. cit. n. 63. & seqq.

7 Nec dicas. Si super tectum Templi, aut in ejus Turri, vel Sacristia, sive subtus Ecclesiam in caverna committitur injuriosa humani sanguinis, vel seminis effusio, non polluitur Ecclesia; ut notat Glossa communiter recepta in c. un. De Consecrat. Eccles. in 6. ergo neque gaudent isthæc loca jure Asyli. Negatur enim consequentia: nam quando agitur de violatione, sive pollutione Ecclesie, nomen Ecclesie strictè accipiendum est pro solo spatio, sive ambitu interiore; eo quod materia hæc sit quasi pœnalis, & odiosa. Econtra dum sermo est de privilegio Asyli, quod est favorabile, & gratiosum, nomen Ecclesie accipiendum est late; quo sensu omnia ei annexa, & cohærentia complectitur: nam odia restringi, & favores convenit ampliari, juxta Reg. 15. Juris in 6.

8 Huc facit c. Si quis contumax 17. q. 4. ubi puniri jubetur, qui fugientem de atrio Ecclesie, vel de porticibus quolibet modo Ecclesie adherentibus per vim abstraxerit. Quinimo hac ipsa de causa gaudet Immunitate, nec potest violenter abstrahi, qui clausam Ecclesiam reperiens, ejus januam vel seram apprehendit: quia jam censetur existere in Loco sacro. Barbosa ibidem n. 65. Bonacina disp. 2. de Bulla Cœna qu. 3. punct. 16. §. 4. nu. 19. & alii. Et hoc extendunt non pauci Doctores ad illum, qui parietem Ecclesie exteriorem tangit: nam privilegia Immunitatis sunt amplianda, simulque talis censetur adhærere loco sacro. Diana part. 3. Tract. 1. resol. 73. post Aloysium Riccium, & Bonac. disp. 3. in Decal. qu. 3. punct. 4. n. 5. citans plures alios: quamvis non desint oppositum tenentes quoad hoc posterius.

9 Insuper dicta Immunitas non tantum Ecclesiis, sed etiam spatio quadraginta passuum circa majorem sive Matricem Ecclesiam, & spatio triginta passuum circa minores Ecclesias, concessum legitur c. Sicuti antiquitus &c. Diffinitio 17. q. 4. Verum hoc non habere locum quoad Ecclesias intra Castella, sive muros Civitatum constructas, desumitur ex c. Quisquis 17. q. 4. ibi: Capelle, quæ sunt intra ambitum murorum castellorum, non ponuntur in hac triginta passuum observatione; & post Archidiaconum notat Covarruv. lib. 2. var. Resol. c. 20. n. 5. cum quo etiam notant plerique Doctores, istam Immunitatis ad quadraginta, vel triginta passus extensionem de consuetudine vix alicubi observari: quamvis Fagnanus c. Ecclesie n. 20. de Immunit. Eccles. referat, quod S. Congregatio Cardinalium indistincte servari jussit Immunitatem per circuitum dictorum passuum, saltem in Cathedralibus & Collegiatis Ecclesiis.

10 CONCL. III. Insuper Monasteria, seu Domus Religiosorum, & eorum horti, aræ, & quæcumque intra Monasteriorum septa continentur; nec non Hospitalia, aut Oratoria auctoritate Episcopi constituta (secus, si Oratoria non sint constructa auctoritate Episcopi) atque omnia alia loca, Religioni aut pietati destinata, dummodo eadem auctoritate Episcopi fundata fuerint, gaudent privilegio Asyli. Ita Barbosa loc. cit. n. 67. & seqq. Fagnanus cit. c. Ecclesie n. 23. & seqq. & alii. Idque patet tum ex l. Pateant C. De his, qui ad Ecclesias confugiant tum ex c. Id constituimus 17. q. 4. cum concordantiis; ac præsertim ex Bulla Gregorii XIV. quæ incipit: Cum alias. 1591. desuper emanata ibi: Monasteriis, Domibus, Locisque sacris, aut Religiosis.

11 Nec dicas. Si omnia hujusmodi Loca religiosa gaudent Immunitate Ecclesiastica, cur ergo communiter Rei confugiant ad Monasteria, non vero ad Ecclesias, quarum tanta est multitudo? Resp. Id præcipue fieri ob majorem Asyli amplitudinem & commoditatem, quæ habetur potius intra septa Monasteriorum, quam in Ecclesiis, vel aliis Locis religiosis; quamvis revera & hæc gaudeant privilegio Immunitatis, seu jure Asyli Ecclesiastici.

12 CONCL. IV. Reus confugiens ad Sacerdotem, manibus Sanctissimum Eucharistiæ Sacramentum portantem extra Ecclesiam, gaudet jure Asyli. Ita Abbas Panorm.



6. Sane. De Celebr. Missar. Engel tit. De Immunit. Eccles. n. 12. Barbosa cit. c. 3. n. 69. allegans pro hac sententia plurimos Doctores; quamvis Covarruvias n. 6. non nihil de hoc dubitet. Ratio est; quia Sanctissimum Corpus Christi est longe dignius, quam Ecclesia materialis, simulque ipsis Ecclesiis conceditur hoc privilegium propter Corpus Christi; ergo multo magis huic, sive Sanctissimo Eucharistiæ Sacramento: nam propter quod unumquodque tale, & illud magis tale.

13 Nec obstat, quod de hoc non habeatur textus clarus in Jure. Siquidem præsens materia est favorabilis, sicque extendenda: & alioquin privilegium extenditur ad casum non expressum, quando ex mente Privilegiantis potest ille casus comprehendi. Et hac de causa istud intelligunt Doctores non solum in casu, quo quis Sacerdotem, vel hastam Baldachini apprehenderit, sed etiam, si se personis comitantibus Sanctissimum Sacramentum immiscuerit: quia omnes illæ cum Sacerdote Sanctissimum deferente unam Ecclesiam constituunt, quibus proinde favor iste concessus intelligitur.

14 Neque hinc sequitur, quod etiam captivus sumens Eucharistiam gaudeat Immunitate. Siquidem privilegium Asyli conceditur fugientibus ad Ecclesiam, vel Eucharistiam; captivus autem non potest ad eam fugere, bene tamen Sanctissimo Sacramento ut Viatico, & spiritali Cibo animæ refici. Multo minus confugiens ad Sacerdotem, sanctum Oleum ad infirmos deportantem, gaudebit Immunitate: cum huic neque Jus saveat, neque paritas, sive ratio faciendæ extensionis. Barbosa ibid. cum aliis.

#### Additio.

\* Quæres. An gaudeant privilegio Asyli Edificia Clericorum in communi viventium e. g. Patrum Oratorii, vel S. Philippi Neri, item Domus Parochiales, & Palatia Episcoporum?

Resp. I. Fabricæ illæ, in quibus Clerici in communi viventes in simul habitant, gaudent jure Asyli, si fuerint debita auctoritate Episcopi erectæ. Ita Peregrin. c. 4. n. 67. & Delbene De Immunit. c. 16. dub. 9. sect. 13. Ratio est; quia censentur loca sacra, utpote auctoritate Episcopi ad cultum Divinum deputata. Resp. II. Domus Parochiales insistenti juri communi, & præscindendo a consuetudine gaudent Jure Asyli, dummodo non ultra triginta passus distent a sua Ecclesia. Ita cum Barbosa & aliis præsens Auctor L. 3. Decr. Tit. 49. §. 2. ac refertur sic a Sac. Congregatione Immunitatis declaratum in una Nepefina 4. Martii anno 1626. & in altera die 10. Decembris anno 1658. uti testatur Pignatell. Tom. 1. Consultationum. Resp. III. Palatia Episcoporum pariter gaudent Jure Asyli, saltem si non distent ultra quadraginta passus a sua Ecclesia Cathedrali. Ita Menochius L. 9. De Immunit. c. 5. v. Palatium Episcopi, & sub his terminis communis, atque deducitur ex can. Sicut antiquitus 17. q. 4. ubi jubetur excommunicari, qui in tali circuitu Ecclesiæ majoris, seu Cathedralis personam hominis, vel bona ejus inde subtraherit, quod utique signum est prædictum circuitum, & Palatium Episcopi intra illud spatium contentum, gaudere Asylo. Utrum vero eodem fruatur privilegio tale Palatium ultra quadraginta passus ab Ecclesia Cathedrali distans, inter DD. non convenit, ubi præsens Auctor L. 3. Decr. Tit. 49. n. 52. cum Abbate, Fagnano, Sylvestro, Hostiensis adhuc affirmativam tenet. Econtra vero Decianus, Julius Clarus, Pignatellus, & alii negativam defendunt, putatque Menochius lib. 4. cap. 5. eam procedere saltem in casu, quo tale Episcopi Palatium, ultra quadraginta passus ab Ecclesia Cathedrali distans, neque habet aliquam Capellam publicam, in qua indifferenter homines ad audiendum Sacrum admittuntur. \*

## QUESTIO II.

Quæ personæ gaudeant Jure Asyli Ecclesiastici?

### SUMMARIUM.

- 15 Rei ad Asyla fugientes, varii.
- 16 Fideles Laici Rei, an omnes gaudeant Immunitate?
- 17 An etiam Debitores pecuniarii, vulgo Falliti?
- 18 Quid, si hi cum bonis suis fugiant ad Ecclesiam? cum Addit.
- 19 Clerici, & Religiosi delinquentes, an Immunitate gaudeant? Sententia affirmativa est probabilior.
- 20 Declaratur Conclusio. Fallit in penis mere Ecclesiasticis, quæ potius correctionem sapiunt.
- 21 Judæi & Pagani, an gaudeant Immunitate?
- 22 Sententia probabilior.
- 23 Hæretici ob crimen hæresis privantur Immunitate.
- 24 An ea pariter privati existant ob alia crimina.
- 25 Sententia negativa, hujusque fundamenta.
- \* An gaudeant Immunitate, & quando deferentes militiam? Addit. I. & II.
- \* An femina confugientes ad Monasteria virorum, aut vice versa? Addit. III.

15 **R**eorum ad Loca sacra, tamquam Asyla fugientium, alii possunt esse Fideles, alii Infideles: & illorum quidam Laici, quidam Clerici, vel Religiosi: istorum alii Pagani, aut Judæi, alii Hæretici, & denique ii vel gravitate delictorum, vel ære alieno oppressi. Et de omnibus his procedit præsens Quæstio.

16 CONCL. I. Certum est, omnes Fideles Laicos delinquentes, & ad loca sacra confugientes gaudere jure Ecclesiastici Asyli, dummodo non admiserint crimina specialiter excepta. Patet hoc ex c. Si quis contumax. 17. q. 4. & c. Inter alia. De Immunit. Eccles. cum concordantiis, ac præsertim ex cit. Bulla Gregorii XIV. Cum alias, Et hoc intellige, etiam si hi sint excommunicati, vel interdicti: nam censura non privat Immunitate, cum hujusmodi poena nullibi sit jure expressa, simulque Censuræ sint medicinales, non mortales. arg. cap. 1. De Sent. Excom. in 6. Pirhing loc. cit. n. 32. post Covarruviam cit. c. 20. n. 11. & alios.

17 CONCL. II. Fideles Debitores pecuniarii, qui solvendo non sunt (vulgo Falliti) confugientes ad Ecclesiam gaudent Immunitate. Ita Abbas c. Inter alia. n. 22. de Immunit. Eccles. Barbosa cit. lib. 2. Juris Ecclesiast. univ. cap. 3. n. 46. & 47. Covarruvias n. 14. & alii magno numero ab ipsis relati, quamvis non desint quidam oppositum tenentes. Ratio est: tum quia in favorabilibus Reorum nomine veniunt debitores; Reus enim dicitur, cui movetur quæstio, id est, intentatur actio, sive civilis, sive criminalis. c. Form. De Verb. signif. tum quia Bulla Gregoriana §. 2. expresse facit mentionem de fraudulentis Decessoribus; ita tamen, ut revocet quæcumque privilegia, & indulta ipsos extrahendi; tum tandem, quia c. Inter alia. De Immunit. Eccles. generaliter prohibetur extrahi de Ecclesia invitus: adeo, ut etiam servus, ob timorem Domini ad Ecclesiam confugiens, non sit restituendus, nisi de impunitate sua Dominus ejus Clericis juramentum præstiterit.

18 Ceterum, si fraudulentus debitor in creditorum præjudicium una cum rebus & bonis alienis ad Ecclesiam se recipiat, tunc de licentia Episcopi ejusmodi bona sunt consignanda Judici sæculari ad effectum, ut veris dominis reddantur. Barbosa cit. n. 47. Diana part. 6. Tr. 1. resol. 17. & alii. Nec obstat c. Diffinivit. 17. quæst. 4. ubi prohibetur quidpiam damni, seu spoliis residentibus in loco sancto inferri. Nam loquitur textus de bonis propriis Rei, non autem alienis, & in quorum detentione idem delinqueret.

Addit.



Additio.

\* Unde, ne forte Rectores Ecclesiarum, ad quas tales Debitores confugiunt, nimium faveant similibus, non raro in præjudicium Creditorum pecunias multas, hisce obæratas, secum in locum Asyli asportantibus, & ex eo occulte postea aliorum aufugientibus, bene notandæ sunt sequentes Declarationes S. Congregationis: Una Immunitatis, die 1. Decemb. anno 1617. dicens, quod *Decoctor non debeat re, & bona in præjudicium Creditorum ad Ecclesiam transferre, sed debeant illa Judici Seculari consignari, ut adjudicet, cui de jure competunt.* Altera Congr. Episcop. & Regularium 14. Novemb. anno 1636. ubi præcepit, *bona posita in loco Immuni in præjudicium Creditorum, deponi debere in loco non Immuni.* Et 12. Decemb. anno 1642. mandavit, *ut ex qualiam Ecclesia extraherentur bona eo transportata in fraudem Creditorum; consignanda tamen Judici competenti.* Videantur de hoc in casu emergenti fufius Delbene cap. 16. dub. 11. sect. 6. n. 17. & seqq. & Menochius lib. 4. de Immunitate, cap. 7. v. Ceterum ad finem. \*

19 CONCL. III. An Clerici, & Religiosi in Asylis tuti sint etiam contra proprios Judices Ecclesiasticos (nam contra Judices sæculares defenduntur aliunde, videlicet per privilegium Fori) ita ut ab illis extrahi extra calus Jure exceptos non possint, multum controvertunt Doctores, aliis affirmantibus, ceteris vero negativam sententiam tenentibus, uti videre est apud Fagnanum c. *Inter alia*, n. 70. & seqq. de Immunit. Eccles. Barbosa lib. 2. Juris Eccles. univ. cap. 3. n. 137. Sed merito uterque horum affirmativam sententiam amplectitur, veluti probabilior, & magis communem: nam Canones generaliter loquuntur, non distinguendo inter Clericum & Laicum, ac proinde generaliter de omnibus sunt intelligendi. Deinde privilegium Asyli, hoc est, ut nullus violenter inde extrahi valeat, principaliter concessum est ipsi Ecclesiæ, sive loco sacro, idque propter reverentiam ejus. arg. c. *Reym* & c. *Frater*, 17. quest. 4. cum concordantiis: ergo suffragatur cuilibet, sive Clerico, sive Laico, nisi sit de specialiter exceptis. Accedit, quod Clerici non debeant esse deterioris conditionis, quam Laici, simulque nullibi hoc privilegium eis ademptum reperitur.

20 Ceterum data resolutio procedit quoad crimina graviora & correspondentes ipsis pœnas judiciales enormes, quæ limites disciplinæ Ecclesiasticæ, ac Regularis correctionis excedunt: non vero quoad pœnas correctivas omnino necessarias pro conservatione Status Ecclesiastici, ac Regularis. Infertur proinde, quod Clericus perpetrans homicidium non præmeditatum, ac extra locum sacrum (quod additur, quia alioquin hoc delictum foret unum de exceptis) & confugiens ad Ecclesiam gaudeat Immunitate: adeo, quod non possit inde violenter extrahi, & tradi Curiaæ sæculari, vel mitti ad triremes.

Secus est de delictis levioribus aut pœnis mere Ecclesiasticis, quæ potius correctionem sapiunt, quam vindictam publicam. Sic enim Religiosi delinquentes possunt secundum eorum instituta per Superiorem in Monasterio coerceri, verberari, & in carcerem detrudi, imo, si opus fuerit, etiam de Monasterio expelli, neutiquam suffragante ipsis Immunitate loci: prout patet experientia, ipsaque Religionum consuetudine, quæ est optima Legum interpret, & tenent Doctores passim. Similiter potest Episcopus Clericum, in flagranti crimine in loco sacro deprehensum, suis carceribus mancipare ad correctionem, absque violatione Immunitatis Ecclesiasticæ: tum quia hic non agitur de amissione vitæ, vel membrorum arg. c. *Inter alia* De Immunit. Eccles. tum quia alioquin distrumperetur nervus Ecclesiasticæ disciplinæ contra c. *Cum inter*. De Consuet.

21 CONCL. IV. Quantum ad Judæos, & Paganos, multi censent, eos ad Ecclesiam confugientes gaudere Immunitate Ecclesiastica; eo quod privilegium istud fuerit concessum loco sacro, ob ejus reverentiam; atque

ipsum, tamquam Ecclesiis favorabile, sit ampliandum; simulque Canones illud concedentes loquantur generaliter & indistincte, prout inter plures alios vult, & argumentatur Fagnanus loc. cit. n. 59. & seqq. & Diana part. 6. tract. 1. resolut. 23. & pro hac sententia Barbosa cit. c. 3. n. 44. allegat Declarationem S. Congregationis Controversiis Jurisdictionibus præpositæ, anno 1631. factam: de qua si legitime constabit, dicta sententia omnino tenenda erit.

22 Ceterum insistendo Juri communi probabilius videtur, eos non gaudere Immunitate, nisi sincero corde parati sint veram Fidem amplecti; ut tradit Abbas c. *Inter alia*, n. 6. de Immunit. Eccles. Covarruvias n. 11. Pirhing tit. de Immunit. Eccles. n. 39 Layman lib. 4. tr. 9. cap. 3. n. 12. Bonacina disp. 3. in Decal. quest. 7 punct. 6, §. 5. n. 2. & alii quamplures Ratio est: tum quia ita habetur decisum in Jure Civili l. 1. c. de his, qui ad Ecclesias confugiunt, quæ lex non reperitur in Jure Canonico correctæ, imo potius approbata cit. c. *Inter alia*. ibi: *Juxta sacrorum statuta Canonum, & Traditiones Legum Civilium*. tum quia indignus est, ut ab Ecclesia defendatur, qui Ecclesiam contemnit arg. cap. ult. de Immunit. Eccles. Sic autem Ecclesiam contemnunt Infideles, nolentes veram Fidem amplecti, ipsamque Ecclesiam per Baptismum ingredi: tum tandem, quia Canones Immunitatis privilegium locale concedentes Ecclesiis intelligendi sunt secundum materiam subjectam, hoc est, de personis Ecclesiasticæ jurisdictioni subjectis, sive de Fidelibus: siquidem istorum curam & gubernationem gerit Ecclesia, non Judæorum aut Paganorum, de quibus dicit Apostolus 1. Corinth 5. *Quid mihi de iis, qui foris sunt, judicare?* Et per hoc patere potest responsio ad rationes in oppositum.

23 CONCL. V. Certum est, quod Hæretici ob crimen hæresis priventur Immunitate Ecclesiastica. Siquidem in Bulla Gregoriana expresse excipiuntur *Hæresis Rei*; idque merito propter enormitatem hujus criminis, ad Ecclesiæ subversionem specialiter tendentis.

24 Ceterum, an Hæretici propter solum crimen hæresis, vel (ubi publice tolerantur, v. g. in Germania) etiam propter alia crimina, ut puta homicidium, furtum &c. Immunitate priventur, rursus variant Doctores. Eos privari affirmat Covarruvias cit. cap. 20. n. 11. cum quibusdam aliis: tum quia Hæretici, tamquam Ecclesiæ hostes & proditores omni ejus favore indigni sunt; tum quia tales revera sunt *Hæresis Rei*, non obstante; quod propter hoc crimen non inquirantur: atqui hæresis Rei generaliter, & absolute excluduntur a privilegio Immunitatis per Bullam Gregorianam; ergo.

25 Oppositam nihilominus sententiam non pauci Doctores sequuntur, ut Sylvester v. Immunit. III. quest. 3. Zoësius tit. de Immunit. Eccles. n. 16. Pirhing. n. 40. Engel n. 19. & alii. Rationem dant: quia in Hæretico propter homicidium, vel aliud crimen ad Ecclesiam confugiente hæresis se habet per accidens; neque enim is fugit ad Ecclesiam propter hæresin, sed propter aliud delictum. Accedit, quod Hæreticus per Baptismum jam sit ingressus Ecclesiam, ejusque legibus obligetur; ergo pariter favoribus localibus, sive Immunitate Ecclesiis ob earum reverentiam concessa frui poterit. Et hoc vel maxime tunc, quando is a pertinacia & errore recedens per veram pœnitentiam Ecclesiæ reconciliatus fuit, sicque dignis effectus, ut illius favore & protectione, perinde ac alii Fideles, per Immunitatem defendatur, prout limitat Bonacina cit. §. 5. n. 2.

Additio I.

\* Quæres I. An milites illi, qui sine legitima dimissione militiam deferentes confugiunt ad Ecclesias, vel Monasteria, gaudeant Immunitate Ecclesiastica? Resp. ad hoc quæsitum in praxi valde frequens, tales milites, nisi simul sint conjuncta aliqua alia delicta gravia Immunitate gaudentia, de per se non gaudere, si ille, qui habet potestatem cavendi, sufficientem præstet cautionem,



nem, quod similibus nullum in vita, aut membris nocumentum, nec verberatio nimium inhumana ferme ad mortem usque, sit inferenda. Ita cum aliis Gonzalez *in cap. Inter alia, de Immunitate Eccles. n. 8.* & probatur a pari; quia etiam servus non gaudet ea Immunitate, sed is Domino exigenti extrahi debet, si Dominus præstet securam juratam cautionem de non inferendo simili nocumento; uti expresse habetur *cap. 6. De Immunit. Eccles. juncta Lege 4. C. de his, qui ad Ecclesiam confugiant*, ergo pariformiter erit discurrendum de milite deferente militiam sine legitima dimissione: nam, cur servus sub prioribus conditionibus non gaudeat Immunitate, ratio est; quia a Domino suo fugiens sui ipsius quasi furtum facit, subtrahendo se a suo legitimo Domino; sed hoc ipsum verificatur quoque quoad militem a militia transfugam; cum etiam prius per juramentum fidelitatis se Principi quasi tradiderit, sicque res quasi illius facta fuerit, consequenter deferendo militiam per hanc subtractionem, seu per fugam ad Asylum quasi sui ipsius furtum quoque facit, prout satis clare innui videtur *l. Presenti. 6. §. Sane. 5. Cod. De his, qui ad Ecclesiam confugiant.* \*

**Additio II.**

\* Ex hoc Quæsito tria bene notanda eruere possunt Superiores talium Ecclesiarum, vel Monasteriorum. I. Ne statim, & absque ulteriori examine ipsimet coeperentur, ut tales transfugæ liberi evadant fugiendo aliorum: etenim, si hoc resciretur a Præfæctis militum, possent non sine gravi fundamento petere satisfactionem, & novi militis substitutionem, quia altero fuerunt privati, cui forsitan dedissent sufficientem cautionem de non inferendo gravi nocumento, si præcedenter fuissent requisiti. II. Ne statim fidant cuilibet cautioni, ac præprimis attendant, an is, qui eandem dat, habeat sufficientem potestatem cavendi; ubi in nonnullis Provinciis hæc potestas dicitur competere Generalibus, vel etiam Chiliarchis ejusdem Legionis; in aliis vero (uti in Bavaria) non nisi Supremo Consilio Bellico. Solet autem ordinarie in praxi exigi cautio scripta, ut miles eo securior evadat a tam enormi pœna. III. Ut bene advertant, milites non gaudere Immunitate ob leviores respectu pœnas evitandas ad Ecclesiam, seu Monasterium confugientes; cum hæc Immunitas solum concessa sit ad evitandas graviores, præcipue capitales; uti eruitur tum ex *c. Inter alia. De Immunitate*, tum ex Gonzalez, ubi scribit in citatum Capitulum, *Inter alia. De Immunit. præsertim n. 8.* Hinc suadendum similibus, ut illico iterum redeant ad suos, ne, si resciaur, pœnas suas aggravent. \*

**Additio III.**

\* Quæres II. An Femina committens crimen non exceptum, & in aliquo extraordinario casu confugiens ad Monasterium Virorum, vel viceversa Vir ad Monasterium Monialium gaudeat Immunitate Ecclesiastica, ita, ut excludi nequeat? Resp. affirmative; ita tamen, ut si detur aliquis locus extra clausuram, illuc ponatur. Quod si similis locus non adesset, omni possibili præcedente cautela, & circumspectione adhibita talis persona insisteret juri, ab ipsa clausura excludi nequiret: Ratio est; quia Jus tuendi vitam tamquam de Jure naturæ excusat ab observantia Juris positivi, præcipientis, ne mulieres ingrediantur clausuram Virorum, vel Viri clausuram Monialium. Ceterum ad omne scandalum vitandum in tali casu, si aliud remedium non suppetat, nec illico absque periculo, ne deprehendatur, occulte (v. g. sub alia veste) aufugere iterum queat, posset mulier Rea ad Monasterium Monialium, vel Vir Reus ad Conventum Virorum translocari. Videantur in simili casu Rodriguez *Tom. 1. qq. Regul. q. 47. art. 4.* Lezana v. *Clausura. n. 131.* Bonacina *de Clausura. q. 4. punct. 4. n. 13.* & Delbene *De Immunitate. cap. 19. Dub. 43. & seqq.*

**QUÆSTIO III.**

Quæ crimina non gaudeant Immunitate Ecclesiastica?

**SUMMARIUM.**

- 26 *Omnia crimina gaudent Immunitate, nisi sint specialiter excepta. Corollarium.*
- 27 *Solvitur instantia.*
- 28 *Septem crimina non gaudent Immunitate.*
- 29 *I. Publici latrones, viarumque grassatores. Et qui sint tales?*
- 30 *Corollarium de furibus, & aliis, cum Addit.*
- 31 *II. Depopulatores agrorum, & qui?*
- 32 *III. Committentes homicidia, vel mutilationes in Ecclesiis, earumve Cæmeteriis.*
- 33 *Quando censeatur homicidium committi in Ecclesia?*
- 34 *Existens in Ecclesia, & occidens aliquem extra eam, an gaudeat Immunitate?*
- 35 *An Immunitas amittatur ob alia crimina commissa in Ecclesia?*
- \* *Specialiter ob furtum Ciborii, vel Monstrantiæ, ubi sunt Hostiæ?*
- 36 *IV. Proditorie hominem occidens.*
- 37 *Homicidium proditorium, quod?*
- 38 *Quid de procurante abortum fetus animati?*
- 39 *V. Assassinii Rei. Assassinium, quid?*
- 40 *VI. Rei hæresis, ac VII. Rei criminis læsæ Majestatis in personam Principis.*
- 41 *Corollaria.*
- \* *Qualiter Bulla Gregorii XIV. quoad crimina ab Immunitate excepta adhuc fuerit ampliata? Addit. I. & II.*
- \* *Ubi specialiter de Homicidio præmeditato. Addit. III.*

26 **CONCL. I.** Omnia crimina gaudent Immunitate Ecclesiastica; quæ de Jure non reperiuntur specialiter excepta. Ita communis; & habetur expressum *c. Inter alia. De Immunit. Eccles. ibi: Fugiens ad Ecclesiam, quantumcumque gravia maleficia perpetraverit, non est violenter ab Ecclesia extrahendus &c. Nisi publicus latro fuerit, vel depopulator agrorum &c.* Unde adulteri, raptores virginum, condemnati ad triremes, & hujusmodi gaudent Immunitate, cum de Jure Canonico specialiter non excipiantur.

27 Nec obstat, quod spectato Jure Civili ab Immunitate excipiantur homicidæ quicumque, adulteri, & raptores virginum. *Auth. de Mandatis Princip. §. Neque autem. Collat. 8.* Resp. enim, quod in materia Immunitatis; utpote mere Ecclesiastica non sit attendendum Jus Civile, sed Canonicum, & quidem in omni Foro, quando est discrepantia in utrumque.

28 **CONCL. II.** Septem sunt crimina, quæ non gaudent Immunitate Ecclesiastica: quæ, licet in Jure Canonico paulo aliis verbis contineantur, tamen in Bulla Gregorii XIV. *Cum alias*, (& habetur Tomo 2. Bullarii Romani, *Constit. 7. dicti Pontificis*) referuntur sequentibus verbis §. 3. *Ut Laicis ad Ecclesias, Locaque sacra & Religiosa prædicta confugientibus, si fuerint publici latrones, viarumque grassatores, qui itinera frequentata, vel publicas stratas obsident, ac viatores ex insidiis aggrediuntur, aut depopulatores agrorum, quive homicidia, & mutilationes membrorum in ipsis Ecclesiis earumve Cæmeteriis committere non verentur, aut qui proditorie proximum suum occiderint, aut Assassinii, vel hæresis, aut læsæ Majestatis in personam ipsiusmet Principis Rei, Immunitas Ecclesiastica non suffragetur.* Hæc ibi.

29 **CONCL. III.** Primo itaque Immunitate non gaudent publici latrones, viarumque grassatores, qui itinera frequentata, vel publicas stratas obsident, ac viatores ex insidiis aggrediuntur, uti loquitur Bulla Gregoriana, & concordat textus *c. Inter alia. De Immunit. Eccles.* Et hoc est primum crimen exceptum; nam Latrones, & viarum Grassatores parum differunt, nisi quod

Latro-



Latronis nomine illi tantum venire videantur, qui publicas vias obsidentes solent aggredi, & despoliare viatores cæde interveniente; Grassatores autem viarum id faciunt absque cæde hominis: & utroque casu crimen est exceptum. Tales censentur Pyratæ, & qui publicas obsident vias, vel arcem habent aut castrum, & inde erumpere solent ad despoliandum homines prætereuntes.

30 Infertur proinde, Fures recipi Asylo. Fures enim vocantur, qui occulte, & sine armis furantur, qui autem violenter aggrediuntur, sive cum armis, sive absque armis, Latrones; prout habetur *Auth. Sed novo. C. de Servis fugitivis*. Similiter is gaudet Immunitate, qui quidem in via publica hominis deprædationem attentavit, sed non perfecit: quia in pœnalibus & odiosis, præsertim quæ cedunt in præjudicium Ecclesiæ, actus debent esse perfecti, & consummati.

Additio.

\* Quinimo non desunt Auctores, qui cum Deciano & Bonacina putant, non solum illum, qui in via publica deprædationem incipiens, eandem necdum perfecit, gaudere Immunitate Ecclesiastica, sed etiam alterum quoque, qui eandem deprædationem perfecit quidem, absque tamen occisione, vel mutilatione. Et quamvis hæc doctrina videatur pugnare contra proxime dicta num. 29. insilendo tamen Bullæ Benedictinæ (de qua *Addit. post num. 41.*) gravissimum sane pro se habet fundamentum; cum ibidem apud me §. 3. ad privationem Immunitatis ex parte grassatoris requiratur in formalibus, ut *grassati mors, aut membrorum mutilatio NB secuta fuerit*. Ex quo inferunt hi Auctores, quod publicus latro a grassatore strictè loquendo non per hoc distinguitur, quasi vero quoad talem latronem cædes vel mutilatio intervenire deberet, non vero quoad grassatorem, (uti tamen n. 29. innui videbatur) sed potius per id, quod publicus latro vias, & itinera foris obsideat, grassator autem intra Urbem in itinere publico grassetur, sive dein occidat, sive non.\*

31 CONCL. IV. *Depopulatores agrorum* dicuntur, qui segetes in agris deprædantur, comburunt, aut destrunt, vel agros alienos vastant: & hi non gaudent Jure Asyli. Addit Barbosa *loc. cit. n. 87.* cum aliis, quod inspecta Bulla Gregoriana, utpote absolute loquente, hoc procedat de Depopulatoribus agrorum sive diurnis, sive nocturnis; quamvis attentio Jure communi solus nocturnus excludatur. c. *Inter alia. De Immunit. Ecclesiast.* ibi: *Vel nocturnus depopulator agrorum.*

32 CONCL. V. Qui homicidia, & mutilationes membrorum in ipsis Ecclesiis, earumve Cæmeteriis committere non verentur, illis pariter non suffragatur Immunitas Ecclesiastica; prout liquet ex allegatis verbis Bullæ Gregorianæ. Concordat *cap. ult. de Immunit. Ecclesiast.* ubi & hujus exceptionis ratio redditur, illis verbis: *Cum in eo, in quo delinquit, puniri quis debeat; & frustra legis auxilium invocet, qui committit in legem, mandamus, tales non debere gaudere immunitatis privilegio, quo faciunt se indignos.* Et hoc procedit etiam in illo casu, quo quis in una Ecclesia delinquit, & postea fugit ad aliam: cum enim una sit per totum orbem Ecclesia universalis, qui offendit unam Ecclesiam particularem, censetur omnes offendisse; ac proinde nullibi gaudet Immunitate.

33 Censetur autem homicidium, aut mutilatio in Ecclesia committi, non solum tunc, quando uterque intra Ecclesiam existit, sed etiam, quando quis extra Ecclesiam existens, sclopo, vel jaculo mutilat, vel occidit existentem intra Ecclesiam: nam talis revera occidit, vel mutilat alterum in Ecclesia. Et hoc idem dicendum, si quis lethaliter vulneraverit existentem in Ecclesia, sed vulneratus extra eam obiit; quia delictum censetur commissum in Ecclesia. Bonacina *Tom. 2. quæst. 7. punct. 6. §. 2. n. 5.* & alii.

34 Num autem vicissim, si quis intra Ecclesiam existens sclopo, vel telo interficiat, sive mutilet existentem extra Ecclesiam, privetur Immunitate, variant Doctores. Negant Bonacina *loc. cit. n. 3.* Novarius, & quidam alii, eo quod talis, proprie loquendo non in ipsa Ecclesia, sed ex Ecclesia occidat, vel mutilet: simulque in hac materia, utpote odiosa & pœnali, non sit facienda extensio ab inchoatione homicidii ad homicidium ipsum. Affirmativa tamen sententia, videlicet talem privari Immunitate, est communior; quam tenet Abbas *cap. ult. n. 11. de Immunit. Eccles.* Pirhing, *eodem n. 25.* & Barbosa *cit. cap. 3. n. 111.* citans plurimos alios: tum quia tale homicidium, quamvis consummetur extra Ecclesiam, nihilominus in ipsa inchoatur, sive principiatur: tum quia talis infert injuriam loco sacro, abutens ipso ad cædem, vel mutilationem injustam faciendam. \* Et taliter etiam novissime decidit Benedictus XIII. in sua Bulla: *Ex quo Divina.* edita anno 1725. \*

35 Quæres. An quis privetur privilegio Immunitatis non solum propter homicidium, vel mutilationem, sed etiam propter alia crimina commissa in Ecclesia, v. g. propter furtum, adulterium, & hujusmodi gravia delicta, quibus infertur specialis irreverentia loco sacro? Resp. Spectata Bulla Gregoriana negative. Siquidem Pontifex in sæpe citata Bulla §. 2. expresse declarat, delinquentes in nullis aliis casibus, præterquam in sua Bulla expressis, posse ab Ecclesiis extrahi, simulque prohibet fieri extensionem ad casus in ea non expressos, *etiam ex paritate, identitate, aut majoritate rationis.* Barbosa *cit. c. 3. n. 105.* Bonacina *loc. cit. n. 11.* & alii post dictam Bullam scribentes: quamvis ante ipsam non pauci oppositum tenuerint.

Additio.

\* Dices. Ex hac Responsione sequi, etiam illos pessimos homines, qui Ciborium, seu vas illud, in quo SS. Eucharistia actualiter continetur, surripiunt ex Ecclesia, gaudere Immunitate Ecclesiastica; cum etiam illud crimen, etsi gravissimum, in Bulla Gregoriana vel Benedictina non contineatur inter excepta. Resp. ad hoc illatum Farinacius in *Appendice de Immunitate Ecclesiastica. n. 217.* negando suppositum, quod nimirum tam enorme crimen non contineatur sub exceptis: videtur enim vere reduci posse ad crimen læsæ Majestatis in Personam ipsiusmet Supremi Principis commissum. Accedit, quod similes impiissimi homines sint vehementer suspecti de Hæresi, quæ utique in Jure est inter crimina excepta conformiter dictis superius n. 23. \*

36 CONCL. VI. Insuper, qui proditorie hominem occiderit, non gaudet Immunitate. Patet hoc ex allegata Bulla Gregoriana, ibi: *Qui proditorie proximum suum occiderint.* Ceterum Homicidium proditorium vel maxime tunc committitur; quando quis aliud verbis & aliud mente gerit, atque sub specie amicitiae Proximum interficit: prout fecit Joab duobus Principibus militiæ, Abner, & Amasæ, quos sub specie osculi præbendi occidit. 2. Reg. c. 3. & 20.

37 Deinde generalius loquendo, homicidium proditorium censetur, quando vel sub specie amicitiae (ut dictum) vel saltem nulla præcedente inimicitia, aut si præcessit, eadem per reconciliationem sublata securus, & nihil mali prævidens occiditur, v. g. ferro, veneno, a tergo, de nocte, vel per insidias &c. Siquidem Homicidii proditorii malitia in eo consistit, quod occidatur compos rationis, qui hic & nunc impotens est ad præcavendum.

38 Dicitur, *compos rationis.* Nam utrum procurans abortum foetus animati secuto effectui, censetur homicida proditorius, ac privetur Immunitate, est nova difficultas. Sed Bonacina *cit. punct. 6. §. 3. n. 8.* probabilius esse censet, talem non privari, cum infans non occidatur per insidias, ac dolose, eo quod dolus in infantem, utpote rationis impotentem, non possit committi: nam dolus est machinatio ad decipiendum, seu fallendum proximum adhibita.



39 CONCL. VII. Assassini Rei non gaudent Immunitate; ut expresse tradit citata Bulla Gregoriana. Porro Assassini crimen trahit originem, & nomen a quibusdam Infidelibus, qui Assassini vocabantur, & accepta pecunia occidebant Fideles, quos aliqui volebant occidi; uti notatur per Glossam magnam cap. 1. de Homicidio. in 6. Itaque Assassini Rei sunt tum illi, qui occisorem promisso pretio conducunt, tum qui operas suas ad occidendum locant. Et hi omnes, utpote criminis Assassini Rei, secundo effectu, non gaudent Immunitate.

40 CONCL. VII. Præter crimen hæresis (de quo jam supra n. 25. & seqq.) privantur Immunitate Ecclesiastica Rei criminis læsæ Majestatis in personam ipsiusmet Principis commissi. Ita citata Bulla Gregorii XIV.

41 Dicitur, in personam ipsiusmet Principis. Nam secus dicendum de offendentibus Statum Principis, vel eudentibus falsam monetam; non obstante, quod & tales de Jure Civili censeantur Rei læsæ Majestatis. Addunt Doctores, eum, qui offendit, sive occidit Filios Principis, aut ejus Consiliarios, vel Legatos, etsi reus existat criminis læsæ Majestatis, nihilominus gaudere Immunitate, eo quod crimen non committatur in personam ipsiusmet Principis. Bonacina cit. quest. 7. punct. 6. §. 6. n. 3. & 4. Diana part. 6. tract. 1. resol. 18. & alii, paucis exceptis, qui ex eo oppositum tenent, quod Consilarii, & Senatores censeantur esse pars corporis ipsius Principis. I. Quisquis. C. Ad Legem Julianam Majestatis.

#### Additio I.

\* Dices Juxta novissimam Bullam Benedicti XIII. Ex quo Divina &c. Romæ 15. Junii anno 1725. publicatam pariter ab Immunitate, & Asylo excluduntur falsificantes litteras Apostolicas, NB. Conflantes, adulterantes, aut tondentes quascunque Monetas, vel ipsas monetas conflatas, adulteratas aut detonsas ita expendere, & erogare præsumentes, ut fraudis conscii, & participes censeantur, item Ministri Montis Pietatis, sive alterius publici Telonii, aut Banci pro depositis Principis, privatarumque personarum destinati, furtum, aut falsitatem in prædictis locis committentes: pariter ab Immunitate excluduntur non solum homicidæ proditorii, sed etiam NB. illimitate interficientes proximum suum animo præmeditato, ac deliberato: ergo hucusque dicta, quæ omnibus hæc Asylum concedere videntur, non subsistant. Resp. præsentem Auctorem ex fundamentis superioribus, præsertim n. 25. & n. 36. adductis, ac insistendo Bullæ Cum alias Gregorii XIV. equidem allegatis hic criminibus Asylum cum aliis D. D. communiter concessisse pro suo tempore, quo necdum recentissima Bulla citati Benedicti XIII. excipiens novissime illa crimina ab Immunitate, emanavit; at de facto haud dubie pariter insistendo modernæ recentissimæ Bullæ Benedicti XIII. Ex quo Divina &c. Adulteratores Monetarum, vel alia delicta hic specificata committentes, non gaudent Immunitate Ecclesiastica; quoniam Benedictus XIII. ob auctam, atque in dies invalescentem perverforum hominum malitiam, ne abutantur tales Immunitate, priora crimina a Gregorio XIV. excepta adhuc magis ampliavit, ita, ut non solum adducta a Gregorio, & n. 28. specificata delicta excipiantur ab Immunitate, sed etiam alia a Benedicto XIII. determinata, & hic in objectione allegata, quod bene notandum legentibus Auctores ante hanc recentissimam Bullam scribes. Unde in forma Resp. ad objectionem distinguendo consequens: dicta illa, quæ adulationi pecuniarum, & homicidio non proditorio &c. Asylum concedere videntur, non subsistant, insistendo Bullæ Gregorianæ, & illi tempori, quo Auctor præsens scripsit, nego, insistendo modernæ recentissimæ Bullæ Benedicti XIII. admitto consequentiam. \*

#### Additio II.

\* Porro in memorata Bulla Benedicti XIII. Concilio Romano a se celebrato postea inserta, reperiuntur adhuc plura declarata, quæ antea erant controversa, atque nonnulla alia ultra Bullam Gregorii XIV. extensa. Sic imprimis conformiter dictis post n. 34. declaravit Immunitate non gaudere eum, qui in Ecclesia existens alterum extra Ecclesiam versantem e. g. scilicet occidit ubi antea denter non deerant Auctores contrarium docentes. Secundo definivit, pro latrone publico in ordine ad privationem Asyli habendum esse illum, qui unica tantum vice ibidem vel in via vicinali homicidium commisit, seu mutilationem. Tertio decidit ab Immunitate Ecclesiastica excludi falsificantes litteras Apostolicas. Quarto conflantes, adulterantes, aut tondentes quascunque Monetas, vel tales expendere, & erogare præsumentes. Quinto Ministros Montis Pietatis, sive alterius publici Telonii, Banci, furtum aut falsitatem in prædictis locis committentes. Sexto eos, qui Asylantes ab Ecclesia violenter extrahunt. Septimo quoad crimen Assassini, non solum Mandatarios conductæ mercede occidentes, vel mutilantes, verum etiam ipsosmet Mandantes. Octavo demum excludit ab Immunitate omnes Proximum suum interficientes animo præmeditato, sive inimicitia præcesserit, sive non: prout vidi in duabus jam Germaniæ Dioccesibus post hanc Bullam sic fuisse judicatum. \*

#### Additio III.

\* Queratur. Quodnam sit Homicidium præmeditatum, seu NB. animo præmeditato commissum? Resp. cum Farinacio part. 5. oper. criminal. de Homicidio. q. 125. n. 8. & 9. & Ubaldo Stoiber De Immunitate. Eccles. quest. 7. n. 64. Homicidium præmeditatum est illud, quod resolvitur in animo occidentis ex aliquo intervallo, antequam committatur. Unde non omne Homicidium voluntarium censetur in Jure præmeditatum; nam Homicidium subito in rixa, vel ex calore iracundiæ perpetratum absque prævia per aliquod intervallum resolutione potest adhuc esse voluntarium, & graviter peccaminosum, ita ut occidens ante occisionem præcognoscat adhuc malitiam actus, quin tamen sit præmeditatum. Ex quo consequitur, quod vi Bullæ Benedictinæ de facto quidem privatur Immunitate Ecclesiastica, qui quocumque medicamento cum prævia deliberatione abortum foetus animati procuravit, vel etiam inimicum suum præcedente jam per aliquale intervallum de occidendo resolutione interfecit: secus tamen si in ludo vel rixa ita fuerit subitanea ira inflammatus, ut occidat proximum, quin prævio intervallo de eodem occidendo quidquam resolverit. An autem animus præmeditatus intervenisse præsumi possit, debet desumi ex circumstantiis, quæ si non adsint sufficientes, potius in favorem Rei, & Immunitatis Ecclesiasticæ, ac præcedentium Bullarum judicatur absque præmeditatione id contigisse. \*

#### QUESTIO IV.

De commodis Immunitatis Ecclesiasticæ, poenisque eam violantium, ac modo extrahendi Reos criminum exceptorum.

#### SUMMARIUM.

- 42 Commoda Reorum ad Asyla fugientium.  
I. Reus nequit inde extrahi &c.
- 43 Quid, si exeat sponte? Aut fictis promissis inductus?
- 44 II. Reus nequit condemnari ad mortem, vel penam corporalem.
- 45 III. Non possunt ei prohiberi necessaria victus, & vestitus.  
Potest tamen custodiri, ne aufugiat.



46 IV. Fugiens ad Ecclesiam est recipiendus. Unde sustentari debeat?

47 V. Non potest spoliari rebus suis; & quando?

48 Violatio Immunitatis, quale peccatum?

49 Ejus violatores incurrunt Excommunicationem,

50 Et alias penas.

51 Observanda circa extractionem Reorum jure Asyli non gaudentium.

52 Hi nequeunt absque licentia Episcopi extrahi.

53 Limitatur hoc.

54 Atque amplius declaratur.

55 Alia notanda.

\* Forma extrahendi Reos præscripta a Benedicto XIII. Addit. I.

\* Compendiosa dictorum recapitulatio, & instructio pro Superioribus circa quærentes Asylum. Addit. II.,

) nam si hæc adsint, ex ipsis ei alimenta præstari debent) neque etiam a consanguineis, vel aliis necessaria vitæ habere possit, hæc per Ecclesiam, ut pote cujus tutelæ, & protectioni se se commisit, eidem velut pauperi præstanda erunt: ne alioquin inedia, & necessariorum inopia urgente, invitus abire, & sæculari Potestati sese tradere cogatur. Abbas cit. c. Inter alia, de Immunit. Eccl. Sylvester v. Immunitas III. n. 5. & alii. Qui tamen addunt, debere ejusmodi Reum, si possit, in commodum Ecclesiæ laborare: tum, ne Immunitas ipsi sit occasio oriandi: tum, ut labore recompenset alimenta sibi præstata.

47 V. Reus ad Ecclesiam fugiens nequit spoliari rebus bonisque suis, quæ secum attulit in eam. in arg. c. Diffinit. 17. q. 4. Intellige hoc de rebus propriis Rei, non autem alienis, sive alteri obligatis, & in quorum detentione idem delinqueret, ut dictum n. 18. Insuper, si Reus arma prohibita secum detulit, ea poterunt ipsi etiam intra Ecclesiam auferri: delinquit enim is, qui fert arma legibus prohibita. Covarruvias cit. c. 20. n. 18. Layman n. 131 & alii.

48 CONCL. II. Per violationem Immunitatis Ecclesiasticæ, sive violentam Reorum ex Asyliis Ecclesiasticis extractionem committitur gravissimum Sacrilegii peccatum. Patet hoc. ex c. Miror. & c. Frater 17. q. 4. ibi: Qui admittit sacrilegium non dubitavit. & alibi. Accedit ratio: quia violenta talis extractio repugnat sanctitati & reverentiæ Locis sacris debitæ. Hinc S. August. Serm. 5. de Dedicat. Eccl. ejusmodi extractionem appellat grandem injuriam Religionis, & Divinitatis offensam.

49 CONCL. III. Præter alias penas in Jure statutas violator Immunitatis Ecclesiasticæ olim excommunicari jubeatur. c. Sicut antiquitus 17. quæst. 4. cum concordantis, quæ tamen continebant excommunicationem non latæ, sed primum ferendæ sententiæ. Verum hodie, sive spectata Bulla Gregoriana, dicta excommunicatio est latæ sententiæ; prout liquet ex verbis ejusdem Bullæ §. 8. ibi: Quod si quis quacunque dignitate, & auctoritate præditus, contra hujus nostræ Constitutionis tenorem attentare præsumperit, declaramus eum ipso facto censuras, & penas easdem incurrere. Bonacina Tom. 2. disp. 3. q. 7. punct. 8. n. 3. & alii. Taceo quod in Bulla Benedicti XIII. talis extrahens privetur ipsomet Asylo.

50 Dicitur notanter, præter alias penas, nam plures pœnæ in istos Sacrilegos Jure statutæ sunt. Et quidem de Jure Civili tales censentur Rei criminis læsæ Majestatis text. clar. L. 2. C. de his, qui ad Eccles. confugiunt. Imo & ultimo supplicio affici jubentur l. Præsent. C. Exod. quamvis hæc pœna non videatur amplius esse in usu. Insuper ipsi de Jure Canonico, præter pœnitentiam publicam ab Episcopo injungendam, incurrunt pœnam pecuniariam nongentorum solidorum, c. Si quis contumax, XVII. q. 4. vel certe tringenta librarum examinati arge nti purissimi, c. Quisquis inventus, eod. XVII. q. 4. pro qualitate delicti, & delinquentium conditione, Judicis arbitrio varianda, & Ecclesiæ læsæ applicandam pro satisfactione.

51 Quæres. Quid observandum circa extractionem Reorum, privilegio Asyli non gaudentium? Resp. De facto quoad hoc est observanda Constitutio Gregorii XIV. quæ §. 3. & 4. exacte tradit formam extrahendi Reos ex Asylo Ecclesiastico ob commissâ crimina excepta. Et primo mandat Pontifex omnibus Ecclesiæ Prælati, ut eos, qui aliquod ex criminibus ibidem exceptis judicio suo commississe videbuntur, quando a Curia seculari fuerint requisiti, Ministris, & Officialibus Curia secularis absque irregularitatis nota, aut alicujus Censuræ Ecclesiasticæ incur-su, tradi, & consignari curent. Quibus verbis clare innuitur, de facto non esse opus prævia cautione, vel juramento, de impunitate vitæ & membrorum, Reo cri-

42 CONCL. I. Privilegia Asylorum, seu commodi Reorum ad Ecclesias confugientium, varia sunt. Nam I. Reus in Loco sacro nequit capi, aut vinculis constringi, multo minus per vim, seu invitus ex eo extrahi; prout habetur c. Diffinit. 17. quæst. 4. ibi: Nul-lus audeat confugientes ad Ecclesiam, vel residentes inde abstrahere, aut quodcumque nocibilitatis, vel damni, seu spoliis residentibus in loco sancto inferre. Concordat c. Inter alia. De Immunit. Eccl. ibi: Non est violenter ab Eccle-siâ extrahendus. estque unanimis Doctorum.

43 Quod si vero Reus sponte egrediatur (prout li-cite potest, etiam Rectoribus Ecclesiarum invitis) Im-munitas non violatur: quia nulla Ecclesiæ fit injuria, neque Reus inde violenter extrahitur. Secus dicendum, si Reus ad Asylum deferendum verbis dolosis, aut ficta promissione Judicis impunitatem promittentis inductus fuerit, ac postea capiatur: quia dolus hac in parte pro-vi habetur Pirhing. tit. de Immunit. Eccl. n. 52. post Azorium, Suarez, & Layman. Unde, qui verbis dolo-sis circumventus, atque præstata a Judice securitate, & impunitate Principis inductus exiit ex Asylo, is Ecclesiæ restituendus erit, aut Judex tenebitur ei servare fidem promissam de impunitate vitæ, & membrorum. Barbo-sa loc. cit. n. 54. & alii.

44 II. Reus, quamdiu est in Ecclesia, non potest per sententiam Judicis ad mortem, vel aliam pœnam corpo-rale[m] condemnari: prout desumitur ex c. Reum. 17. qu. 4. & c. Inter alia. De Immunit. Eccl. ibi: Nec inde dam-nari debet ad mortem, vel ad pœnam, sed Rectores Ecclesia-rum sibi obtinere debent membra & vitam; super hoc ta-men, quod inique fecit, est alias legitime puniendus: vide-licet pecunialiter, vel alia satisfactione præter pœnam corporalem, ut explicat Glossa v. Punendus. & sequitur Abbas ibidem, allegans communem Doctorum. Addit Pirhing. n. 47. & Layman loc. cit. c. 3. n. 13. post Sua-rez: talem neque pœna servitutis, neque exilii, neque triremium mulctari posse; eo quod hæc pœnæ sint valde graves, atque corporalibus æquiparentur, imo earum quasdam excedant.

45 III. Nequit prohiberi, quo minus ad Reum ne-cessarius victus & vestitus deferatur text. clar. l. Præsent. C. de his, qui ad Ecclesiam confugiunt. ibi: Nec aliquan-do patimur, in ipsis Ecclesiis reverendis ita quemque de-tineri, atque constringi, ut ei aliquid victualium rerum, aut vestis negetur, aut requies. Et merito ita statutum est: nam impedire Reo necessarium victum, foret aper-ta coactio; quia ipse vel fame perire, vel exeundo se tra-dere cogeretur, Nihilominus prohibitum non est, pone-re custodias circa Ecclesiam, ne Reus libere aufugiat; vel ut capi possit, si sponte exierit, aut fugam attemptaverit. Layman ibidem cum communi.

46 IV. Rei ad Ecclesias confugientes recipiendi sunt, neque inde repelli possunt, aut excludi. Nam Clerici, ac præsertim Rectores Ecclesiarum tenentur tueri Jura Ecclesiæ, ipsiusque Immunitatem; ergo hoc ipso non possunt Reos ad eam confugientes excludere. Quinimo si profugus non habeat bona propria, unde sustentetur



## 376 Tract. XII. De Immunitate Eccl. & Indulgentiis. Dist. II.

minis excepti prius obtinenda : quidquid olim secus fuerit. *c. Reum. & c. Id constituimus. 17. quest. 4.*

52 Deinde, ne Curia secularis Ministri abutantur facultate, siue de Jure communi, siue per specialia privilegia olim sibi concessa, per se & propria auctoritate extrahendi ejusmodi Reos, Pontifex dictam facultatem revocat, atque decernit, ut Curia secularis, ejusque Judices & Officiales, ab Ecclesiis, Monasteriis, Locisque sacris, predictis, Laicum aliquem, ut praefertur, delinquentem, in nullo ex casibus supra dictis sine expressa licentia Episcopi, vel ejus Officialis, & cum interuentu personae Ecclesiasticae ab eo auctoritatem habentis &c. capere, extrahere, aut incarcerare non possint.

53 Subdit tamen Pontifex unicam limitationem ejusque cautelam, dicens: Nisi eo casu, quo ipse Episcopus, & dictae Personae Ecclesiasticae requisita, illos in delictis superius expressis culpabiles tradere, aut captivum & incarcerationi intervenire, & assistere recusaverint; tuncque reverentia Ecclesiae, & Locis sacris debite memores, predictos delinquentes minori, quo id fieri poterit, cum scandalo & tumultu, extrahere curent. Haec Pontifex.

54 Et hoc quidem, videlicet extractionem Rei absque expressa Episcopi licentia per Judices seculares fieri non posse, quantumvis de qualitate criminis excepti certo constet, post dictam Constitutionem Gregorianam communiter tenetur ( licet Auctores hanc antecedentes oppositum docuerint ) & clare delumitur ex allegatis ejus verbis, utpote generaliter & indefinite loquentibus. Quod si vero super qualitate criminis dubium emergerit, ejus cognitio ( deducto prius Reo ad Carceres Curiae Ecclesiasticae, ibique debite custodito ) ad solum Judicem Ecclesiasticum, id est, Episcopum, seu ab eo Deputatum pertinet: tum quia haec res est Ecclesiastica, adeo ut ejus violatores sacrilegium committant; tum praesertim, quia novissime sic declaravit Gregorius XIV. in saepe cit. Bulla. §. 5. ibi: Nisi cognito prius per Episcopum, seu ab eo Deputatum, an ipsi vere crimina superius expressa commiserint. Barbosa lib. 2. Juris Ecclesiast. universi cap. 3. n. 1757. & alii.

55 His addendum cum eodem Barbosa n. 168. & aliis. quod non possit Episcopus delinquentes Curiae seculari tradere, nisi prius sibi de excepto delicto perpetrato constiterit certe, non autem per judicia praecise probabilia, & praesumptiva dumtaxat. Item quod Episcopus non teneatur stare processui facto a Laica potestate, nam, quod haec aliqualem cognitionem per viam facti pro informatione, an crimini commissio sit annexa qualitas impeditiva juris Asylo, possit instituire, haud negatur. Et tandem, quod, si dubium fuerit inter Doctores, an delictum gaudeat Immunitate Ecclesiastica, nec ne, debeat Judex Ecclesiasticus pro Reo Judicare: nam Immunitas haec, utpote ob reverentiam & favorem Ecclesiarum, aliorumque Locorum sacrorum principaliter concessa, censetur esse materia favorabilis; simulque in dubio potius Reo favendum est, juxta Reg. II. Juris in 6. cum concordantiis.

### Additio I.

\* Dictis ultimis iterum ex Bulla Benedicti XIII. superiori quaestione jam citata de novo adjungendum, quod in extradendis ex Asylo Reis criminum exceptorum, sequens praescribatur Episcopis norma. I. Quotiescumque Curia Ecclesiastica a Curia seculari fuerit requisita, ut Laicum aliquem delinquentem e loco immuni extrahi, & illi consignari faciat, atque talia super delicti excepti qualitate, ac personae reiterate subministrata, vel acquisita adsint indicia, quae ad capturam decernendam sufficere videantur, tunc Curia Ecclesiastica ad ejusdem delinquentis extractionem ab Ecclesia, aliisve locis immunibus ope, ac medio suorum Executorum ( impetrato etiam, quatenus opus sit brachii secularis auxilio ) cum interuentu Personae Ecclesiasticae ab Episcopo deputandae, procedere teneatur, extractumque ad suos

carceres asportari, ac ibi sub tuta custodia detineri curet, & faciat. II. Ubi vero ex processu informativo de super conficiendo constat de crimine excepto, ac insuper adversus eundem extractum talia resultant indicia, ut crimen ab eo fuisse paratum moraliter credi possit, eo tandem casu praefatum extractum Ministris, & Officialibus Curiae secularis tradere, & consignare potest, ac debet; exacta tamen, receptaque prius ab ipsis obligatione, in forma Juris valida, restituendi extractum Ecclesiae sub poena Excommunicationis latae sententiae Summo Pontifici reservatae, supposito, quod ille extractus indicia contra ipsum acquisita in suis defensionibus purget, ac diluat. Quod si ea minime purgaverit, & vere delinquens repertus fuerit, Curiae seculari in ipsum tali casu, uti juris esse censuerit, agere, atque procedere liceat. \*

### Additio II.

\* Pro complemento hujus materiae saepius occurrentis, & non raro vel ob praecipitantiam Judicis secularis, vel ob imprudentiam Rectoris Ecclesiae graves tricas excitantis utile duxi, in compendio referre ea, quae observanda sunt ab ipso Rectore Ecclesiae, vel Monasterii illius, in quo Reus quaerit Asylum. Itaque, I. Eundem eventualiter, & extrajudicialiter examinet ob quale delictum confugiat ad hoc templum, vel Monasterium; &, si intellexerit delictum esse non adeo grave, & consequenter nec adeo gravem habere annexam poenam, vel tantum concernere correctionem morum, candide aperiat, nullam pro eo adesse Immunitatem. II. Si resciverit delictum valde grave, quod mortem aut mutilationem, aliamve quasi hisce equivalentem promeretur poenam, ulterius attendat utrum tale delictum sit inter excepta, vel non? & quidem, si fuerit inter posteriora, nequit excludere petentem Asylum. Quod si vero esset inter excepta III. Candide tali aperiat, quod hoc delictum non gaudeat Asylo, & quod a Judice requisitus teneatur eundem Potestati seculari iterum, interveniente saltem Auctoritate Episcopi, extradere. IV. Quod si talis, hoc non obstante, abire nolit, poterit quidem interea eundem recipere, juxta praesentem autem Auctorem Lib. 3. Decret. tit. 49. n. 190. ad recipiendum non teneretur, si illud crimen indubitanter, & omnino certo sit inter excepta. Quando vero adhuc dubitatur aliquo modo, utrum illud inter excepta numeretur, obligatur talem Malefactorem ad Asylum admittere. V. Cum deinde fuerit a Judice seculari requisitus Rector Ecclesiae, ut hunc Malefactorem, qui non videtur gaudere Immunitate, extradat, humanis verbis respondeat, quod illico velit juxta suam, praesertim vi Bullae Benedictinae, obligationem scribere ad Reverendissimum Ordinarium, cujus est declarare, utrum talis gaudeat Immunitate vel non? ubi etiam Altissime fato veridicam speciem facti cum omnibus circumstantiis fideliter transcribat, nec ullatenus intra hoc tempus directe vel indirecte cooperetur, ut, usque dum ab Episcopo, vel Consilio Ecclesiastico, aut Vicario Generali adveniat resolutio, Malefactor fuga elabatur: alias enim Rector Ecclesiae teneretur de culpa, & deberet puniri a suo Superiore, uti apud hunc Auctorem Lib. 3. Decret. tit. 49. n. 174. praeter alios advertunt Farinacius, & Cardinalis Thuscus. VI. Si intra hoc tempus, usque dum Episcopus rescribat, Potestas secularis petat a Rectore Monasterii affecutionem de sufficiente custodia Malefactoris, ne fuga interim elabatur, Rector Ecclesiae sancte spondeat, se nec directe, nec indirecte ad talem fugam cooperari velle, impedire vero non posse, si libere & sponte sua forsan discederet. Quod si Potestas secularis, his non attentis, vigilias interim non solum extra, sed etiam intra Claustrum, aut in Camera Asylantis poneret ( quem tamen modum cum Farinacio reprobatur Pignatellus Tom. I. Consultat. 128. n. 4. dicens, contrarium saepius a S. Congregatione fuisse declaratum, quod nimirum sic non liceat ) quod si, inquam, Potestas secularis custo-



diam nihilominus intra Claustrum poneret, nec Rector precibus suis interpositis impedire posset, saltem contra hunc actum protestetur, Reverendissimum Ordinariatum desuper reddat certiore, & cum patientia exinde expectet resolutionem, atque interim allaboret, ut saltem interea non committantur a custodibus alia insolentia, & circumvagations non necessariae per Monasterium &c. VII. Postquam venerit responsio, & resolutio ab Ordinario, Rector Ecclesiæ id exacte exequatur, quod sibi in responsione injungitur: ubi plerumque conformiter Bullis Gregorianæ, & Benedictinæ juxta dicta præcedentia Reus vel ad carceres Episcopales (si nempe delictum necdum clare continetur inter excepta) ponendus, vel etiam Potestati sæculari (quando saltem per Processum informativum moraliter certo dictum crimen numeratur inter excepta) extrahendus erit. VIII. Quod si per sententiam definitivam Episcopi Reus ob commissum delictum exceptum consignari debet Potestati sæculari, hæc traditio fiat interventu deputatæ ab Episcopo Personæ Ecclesiasticæ, quæ Reum ad Ministros Justitiæ deducat, extra tamen locum Asyli foris expectantes, nisi forte prædicti vocati fuerint ad coercendum Reum obtemporare & egredi renuentem. Videatur Bulla Benedicti VIII. §. 8. ibi: *Tunc Curia Ecclesiastica ad ejusdem delinquentis extractionem ab Ecclesia, aliove loci immunitibus ope, ac medio suorum Executorum (NB. implorato etiam, quatenus opus sit, brachii sæcularis auxilio) & cum interventu Personæ Ecclesiasticæ ab Episcopo deputanda procedere teneatur.* \*

## DISTINCTIO III.

### De Indulgentiis.

### QUÆSTIO I.

#### Quid sit Thesaurus Ecclesiæ?

#### SUMMARIUM.

- 1 Indulgentiæ variæ acceptiones.
- 2 Quomodo sumatur in proposito?
- 3 Thesaurus Ecclesiæ datur, & quid sit?
- 4 Is declaratur ex verbis, Extrav. Unigenitus.
- 5 Constat ex meritis ac satisfactionibus Christi, & Sanctorum.
- 6 Solvitur instantia.
- \* Declaratur, qualiter satisfactiones Sanctorum veniant in Thesaurum Ecclesiæ.
- 7 Ubi is repositus maneat?
- 8 Thesaurus Ecclesiæ dupliciter consideratur.
- 9 Quomodo dispensetur?
- 10 Præsertim ut includit satisfactiones Sanctorum.

**I**NDULgentiæ nomen quod a verbo *Indulgeo* derivatur, quandoque accipitur pro lenitate, seu condescendentia, ut I. Cor. 7. *Hoc autem dico secundum indulgentiam, non secundum imperium.* Alio modo sumitur pro remissione; ut *Isaia* cap. 61. *Prædicare captivis Indulgentiam.* quæ verba apud S. Lucam cap. 4. referuntur taliter, *prædicare captivis remissionem*: ut proinde Indulgentia quandoque sumatur pro remissione.

6 Hanc utramque significationem Theologi conjungunt, & Indulgentiam vocant remissionem poenæ temporalis, ex condonatis peccatorum culpis sæpe remanentis, quæ fit ex causa justa & rationabili, per dispensationem Thesauri Ecclesiæ. Hujus autem nomine aliud non intelligitur, quam Thesaurus spiritualis satisfactionum Christi & Sanctorum, qui applicari possit reis alicujus poenæ temporalis, post peccata quoad culpam in Sacramento Pœnitentiæ jam dimissa non raro restantis. Et de hoc loquendo, sit.

3 CONCL. I. Datur in Ecclesia ejusmodi Thesaurus spiritualis, ex meritis Christi, & satisfactionibus Sanctorum constitutus, qui nunquam exhauriri, sed per legitimam Indulgentiarum concessionem dispensari potest. Ita omnes Catholici; atque patet tum ex perpetua traditione, ac sensu Ecclesiæ; tum ex mox alleganda Extravagant. *Unigenitus*: tum ex Concil. Trid. Sess. 25. in Decret. de Indulgentiis. cujus verba n. 25. referuntur. Fundatur insuper, hæc Catholica veritas in illo Symboli Apostolici articulo: *Credo Sanctorum Communionem.* Nam corpus mysticum Ecclesiæ non solum Christo tamquam capite constat, sed etiam Sanctis tamquam nobilissimis membris; juxta illud *Rom. cap. 12.* Multi unum Corpus sumus in Christo, singuli autem alter alterius membra. Atqui in corpore sano caput & reliqua membra habent talem communicationem ad invicem ut quod uni superfluit alteri communicetur; ergo idem dicendum de corpore Christi mystico, quod est Ecclesiæ.

4 Porro pro vera intelligentia hujus Thesauri Ecclesiæ juvat adducere verba *cit. Extr. Unigenitus.* quæ in Jure Canonico habetur inter Extravagantes Communes, *Tit. de Penit. & Remiss.* ubi præmissa prærogativa meritorum, atque satisfactionum Unigeniti Filii DEI JESU Christi sic loquitur Pontifex Clemens VI. *Quantum ergo exinde, ut nec supervacua manus aut superflua tantæ effusionis miseratio redderetur, Thesaurum Militanti Ecclesiæ acquisivit, volens suis thesaurizare filius pius Pater, ut sic sit infinitus thesaurus hominibus, quo, qui usi sunt, Dei amicitie participes sunt effecti. Quem quidem thesaurum non in sudario repositum, non in agro absconditum, sed per B. Petrum, Celi Clavigerum, ejusque Successores suos in terris Vicarios commisit Fidelibus salubriter dispensandum, & propriis & rationalibus causis, nunc pro totali, nunc pro partiali remissione poenæ temporalis pro peccatis debite tam generaliter, quam specialiter (prout cum Deo expedire cognoscerent) vere poenitentibus & confessis misericorditer applicandum. Ad cujus quidem thesauri cumulum B. Dei Genitricis, omniumque Electorum à primo Justo usque ad ultimum merita adminiculum præstare noscuntur: de cujus consumptione seu minutione non est aliquatenus formidandum, tam propter infinita Christi (ut prædictum est) merita, quam pro eo, quod, quanto plures ex ejus applicatione trahuntur ad justitiam, tanto magis accrescit ipsorum cumulus meritorum.* Hactenus Pontifex in *cit. Extravag. Unigenitus.*

5 Ex his proinde sequitur, quod Thesaurus Ecclesiæ conflet imprimis ex meritis & satisfactionibus Christi, quarum valor cum sit infinitus, Thesaurus hic exhauriri nunquam poterit. Sequitur ulterius, quod ex dignatione Divina ad constituendum dictum Thesaurum, ejusque cumulum accedant, atque adminiculum præstent merita Beatissimæ Virginis MARIE, omniumque Sanctorum: idque tum propter valorem generalissimum, qui in omni opere bono reperitur, atque universali Ecclesiæ obvenit tum ex eo, quia plurimi Sancti uberiora opera bona & satisfactoria peregerunt, plusque passi sunt quam opus fuerit pro remissione poenæ temporalis eorum peccatis debite; ut patet in D. Virgine MARIA, nullius macula peccati unquam contaminata, & S. Joanne Baptista jam sanctificato in utero materno. Item in SS. Apostolis, atque innumeris SS. Martyribus, Confessoribus, Virginibus, aliisque Sanctis. Unde, ne alioquin ejusmodi merita, sive satisfactiones Sanctorum, quoad vim satisfactoriam a Deo irremunerata remaneant, simulque, ut in Corpore Mystico Ecclesiæ perfecta servetur *Communio Sanctorum*, & quod uni ejusdem membro superabundat, alteri communicetur, prout alioquin in corpore sano fieri assolet, congruum fuit, ut ex Divina dignatione, ac non obstante infinitate meritorum Christi, etiam merita, sive satisfactiones Sanctorum, ad constituendum istum spirituales Thesaurum Ecclesiæ assumerentur.

6 Quod si objicias, satisfactiones Christi repositæ in Thesaurum Ecclesiæ sunt infinitæ; ergo non est opus, ut



## 378 Tract. XII. De Immunitate Eccl. & Indulgentiis. Dist. III.

ad eas accedant satisfactiones Sanctorum. Resp. Distinguen-  
do consequens; ergo hoc non est simpliciter & ab-  
solute necessarium, conceditur: neque hoc est congru-  
um, ac Divina Providentia, Justitia, & Munificen-  
tia consentaneum, negatur. Siquidem merita seu satis-  
factiones Sanctorum reponuntur in Thesauro Ecclesie,  
non quasi satisfactiones Christi per se non sufficerent,  
sed ex dignatione Divina, ne alioquin ipsa quoad vim  
satisfactoriam maneat irremunerata: simulque quia  
hoc ipsum perquam gloriosum existit Christo Domino,  
a quo omne bonum Sanctorum promanat, ipsisque San-  
ctis, in quibus Christus sicut Caput in suis membris ho-  
noratur, perhonorificum, magisque per hoc elucescit  
perfecta unio Sanctorum cum Christo Capite suo.

### Additio.

Urgebis. Sancti pro bonis operibus suis jam copio-  
sissimam mercedem, ac primum ipsimet receperunt in  
coelis; ergo ex illis nil superest in terris, quod repona-  
tur in Thesaurum. Accedit, quod purus homo non pos-  
sit pro aliis mereri augmentum glorie, sed tantum pro  
se ipso. Ante Resp. nota ex dictis Tract. 1. dist. 2. quest.  
6. cum Additionibus, quod in aliquo bono opere duo re-  
periantur, meritum, & satisfactio; ratione meriti accipi-  
unt Sancti mercedem ipsimet, quoniam nemo mereri  
potest alteri immediate augmentum glorie, uti recte ob-  
jectum. Econtra vero possumus satisfacere pro aliis;  
quoniam satisfactio se habet per modum solutionis, quae  
utique fieri pro altero potest: cum igitur multae satis-  
factiones a Sanctis exercitae longae superarint poenas, quas  
ob peccata sua forsitan ex altera parte incurrissent, hinc,  
ne maneat irremunerata, reponuntur in Thesaurum  
Ecclesie. Poteritque itaque in forma distingui anteceden-  
s: Sancti jam receperunt mercedem pro bonis ope-  
ribus qua meritis, concedo antec. semper etiam qua sa-  
tisfactionibus, nego ant. \*

7 Dices. Si datur talis Thesaurus Ecclesie, constans  
ex satisfactionibus Christi & Sanctorum, ubinam loco-  
rum is reperietur: Resp. Hanc esse satis lepidam instan-  
tiam: nam, cum Thesaurus iste sit mere spiritualis, ac  
moralis, utpote conflatus ex satisfactionibus Christi &  
Sanctorum, quae sunt quid spirituale ac morale, utique  
in nullo loco materiali huius mundi repositus jacet. Ille  
igitur existit dumtaxat in mente Divina, in quantum  
ante oculos Dei merita, & satisfactiones superabun-  
dantes Christi, & Sanctorum nondum oblivioni sunt tra-  
ditae, sed vivunt etiamnum, usque dum aliis indigentibus  
Ecclesie membris oportune communicentur, sicque  
quantum fieri potest, debitum ipsis primum remissionis  
poenae temporalis redditur.

8 Quæres. Quot modis dispensetur Thesaurus Eccle-  
siae? Ubi notandum, quod Thesaurus Ecclesiae possit  
dupliciter considerari. I. Ut constet ex meritis Christi.  
II. Ut constet ex meritis Christi & Sanctorum simul,  
juxta proxime dicta. Hoc praenotato,

9 Resp. I. Considerando Thesaurum Ecclesiae, prout  
constat ex meritis Christi, sic ipse dispensatur, nobisque  
applicatur variis modis, videlicet per Sacramenta, per  
Missae sacrificium, perque alia pia opera Fidelium, ipsas-  
que Indulgentias. Ratio est: quia, quotiescumque aliqua  
culpa, vel poena nobis remittitur, aut aliquod gratiae au-  
xilium praestatur, semper Thesaurus meritorum Christi  
nobis applicatur, & distribuitur; eo quod huiusmodi  
beneficia nobis non conferantur, nisi intuitu atque virtute  
meritorum & Passionis Christi.

10 Resp. II. Spectando Thesaurum Ecclesiae, prout  
non solum ex meritis Christi, sed etiam ex satisfactio-  
nibus Sanctorum constare intelligitur, sic ipse dumtaxat  
per Indulgentias dispensatur. Ita Suarez part. 3. Tom. 4.  
disp. 51. sect. 4. & Mastrius disp. 23. Theol. Moral. n. 9.  
cum communi. Ratio est: quia Sacramenta, Missaeque  
Sacrificium habent suam dignitatem, atque valorem ex  
opere operato dumtaxat meritis & passione Christi, qui  
solus, utpote Redemptor noster, promeruit nobis facul-

tatem, per bona opera consequendi gratiam vitamque  
aeternam, ac proinde per haec nobis non applicantur me-  
rita sive satisfactiones Sanctorum, bene tamen per Indul-  
gentias. Et de his loquendo, sit

## Q U A E S T I O II.

Quid, & quotuplex sit Indulgentia?

### SUMMARIUM.

- 11 Indulgentia, quid?
- 12 Haec non tollunt culpam, sed poenam peccatorum.
- 13 Earum effectus.  
(a) Modo uberius declarando n. 38. 41. & 42.  
\* Solvitur obiectio.
- 14 Indulgentiarum divisio. Plenaria, seu totales, quid?
- 15 Indulgentia plena, plenior, & plenissima, non differunt  
quoad remissionem poenae.
- 16 Bene tamen quoad aliquas facultates.
- 17 Indulgentiae non plenariae, seu partiales, quae?  
\* Qualiter intelligendum, si cum plenariis concedantur  
partiales?
- 18 Indulgentiae certorum annorum,
- 19 Aut dierum, quomodo intelligenda?
- 20 Quadragesima, seu Quarensima, Septenna, & Carensima, quid?
- 21 Haec male negliguntur.
- 22 Indulgentia personalis,
- 23 Localis, &
- 24 Realis; quid?

11 CONCL. I. Indulgentia, quantum ad propositum,  
est remissio poenae temporalis, peccatis actuali-  
bus, quoad culpam jam remissis, coram Deo adhuc de-  
bita, ab habente potestatem facta per applicationem  
sufficientis & condignae solutionis ex communi Thesauro  
Ecclesiae. Haec definitio in re est communis Theolo-  
gorum, & patebit ex declaratione ipsius.

12 Dicitur, remissio poenae temporalis; quia Indulgen-  
tiae non valent ad remissionem culpae, neque mortalis, ne-  
que venialis, sed solum ad remissionem poenae tempora-  
lis, quae post culpam jam remissam non raro restat luen-  
da, prout omnes Theologi fatentur. Accedit ratio: quia  
peccatum mortale non potest tolli, nisi per infusionem  
gratiae sanctificantis; haec autem non confertur per In-  
dulgentias, sed solum per Sacramenta, in re, vel voto  
rite suscepta. Et quamvis peccata venialia multis reme-  
diis expiari possint, ut docet Concilium Trid. Sess. 14.  
c. 5. nihilominus ipsa quoad culpam non dimittuntur per  
Indulgentias: nam haec suppleant locum satisfactionis per-  
agendae post culpam jam remissam, & consequenter hanc  
non remittunt, sed virtute boni motus interioris, aut re-  
cepti Sacramenti prius jam ablatam supponunt.

13 Unde Indulgentiae valent dumtaxat ad tollendam  
per modum condignae solutionis poenam peccatis quo-  
ad culpam jam remissis non raro adhuc debitam, seu  
restantem: ac proinde effectus earum solummodo est,  
tollere poenam peccatis debitam per applicationem suffi-  
cientis solutionis ex Thesauro Ecclesiae (a) non vero ip-  
sammet culpam peccatorum. Ceterae particulae datae de-  
finitionis patebunt ex dicendis in progressu.

### Additio.

\* Dices. Potest contingere, quod quis non nisi pec-  
cata venialia habeat, & in his subito apoplexia tactus  
moriatur absque Sacramentorum receptione vel praevio  
dolore, aut acquisitione quarundam Indulgentiarum.  
Quid ergo cum tali peccatore fiet in altera vita, si alii  
non possint applicare pro ipso Indulgentias quoad re-  
missionem culpae ex una parte, & ex altera ipsemet ne-  
queat amplius pro se in purgatorio mereri hanc remissio-  
nem? Respondetur, in tali extraordinario casu Miseri-  
cordissimum Deum reatum culpae vel sub ipso egressu  
animae



animæ justæ, vel statim post egressum remittere, quia pro tunc haud dubie retractat (quamvis non meritorie) peccata sua. Exinde remanet aliis vivis facultas pro tali applicandi Indulgentias, ut pariter acquirat remissionem pœnæ restantis. \*

14 CONCL. II. Indulgentiarum variæ sunt divisiones. Ita communis, idque patet inductione. Inprimis enim Indulgentiæ quoad quantitatem pœnæ, quæ remittitur, dividuntur in plenarias, & non plenarias. *Indulgentiæ plenariæ*, seu totales sunt, quibus remittitur tota pœna temporalis, peccatis quoad culpam jam remissis debita.

15 Ubi sciendum, quod aliqui distinguant inter Indulgentiam plenam, pleniorē, & plenissimam: cujus distinctionis fundamentum desumunt ex *Extrav. Antiquorum. De Penit. & Remiss.* ubi Pontifex pro Anno Jubilæi non solum plenam, & pleniorē, imo plenissimam omnium concedit veniam peccatorum. Sed revera quoad effectum remissionis pœnæ temporalis nullum inter eas apparet discrimen; cum non solum Indulgentia plenissima, sed etiam plenior, & plena in rite dispositis conferat omnium veniam peccatorum, sive pœnarum pro peccatis quoad culpam prius remissis debitam. Neque per illum loquendi modum Pontifex aliud intendit, quam concedere Indulgentiam adeo plenam, prout *Clavium potestas se extendit*; sicuti Papam interpretatum fuisse in Consistorio, testatur Glossa ibidem v. *Plenissimam*.

16 Nihilominus quoad specialia privilegia, & annexas facultates potest cum Marchantio *Tom. 3. Tribunalis. tr. 5. tit. 2. q. 3.* Maffrio *cit. disp. 21. n. 21.* & quibusdam aliis, sequens inter dictas Indulgentias notari discrimen: ut Indulgentia dicatur plena seu plenaria, quando tota pœna, post culpam adhuc in Foro seu iudicio Dei debita, per applicationem thesauri Ecclesiæ remittitur. *Plenior*, quando potestas extraordinaria absolvendi a Casibus reservatis superadditur. *Plenissima*, quando ultra hæc etiam dispensationes in Votis, & huiusmodi vinculis conceduntur: prout fieri solet in Jubilæo (de quo procedit *cit. Extravag. Antiquorum*.) ac Indulgentiis in forma Jubilæi datis.

17 Porro Indulgentiæ non plenariæ, seu partiales dicuntur illæ, quæ solum sunt remissivæ partis pœnæ temporalis, peccatis quoad culpam jam remissis debita: ut sunt Indulgentiæ certorum annorum, aut dierum, item Indulgentiæ illæ, quæ dicuntur *Quadragesima, Septenna, Carena*, aut quando remittitur tertia, vel quarta pars peccatorum.

#### Additio.

\* Ceterum non raro pro eodem die, præsertim tempore stationum quadragesimalium invenies concessas Indulgentias plenarias, & simul ac semel alias partiales, v. g. mille annorum &c. Quod equidem nullatenus significare vult, quasi quis simul, & semel ambas pro se lucrari valeat: etenim, si obtinet plenarias, eo ipso non indiget partialibus, uti consideranti patet. Adeoque talis conjunctio Indulgentiarum plenariarum, & partialium potius signum est, in simili casu vel fuisse diversos Indulgentiarum Largitores, unum nimirum quoad Indulgentias plenarias, alterum quoad partiales; vel, si fuerit unus, idemque Largitor, indicat additas Indulgentias partiales fuisse subjunctas, ut possint applicari defunctis per modum suffragii; vel denique insinuat, additionem hanc fieri ad cautelam, ut scilicet finis certi, causam Indulgentiarum esse sufficientem saltem ad acquirendas partiales, si non totales. Ita cum Suarez, Palao, & Corduba, Gobat *Tract. 4. de Indulgentiis. part. 2. cap. 2. n. 275.* & Kazenberger in *Supplement Theolog. Sacrament. Patris Sporer cap. 3. sect. 1. n. 9.* \*

18 Quod si quæras, quid intelligatur per Indulgentias mille vel centum annorum, aut dierum, item per Quadragesimam &c. Resp. I. Sensus huiusmodi Indulgentiarum non est, quod totidem dies, vel anni

pœnæ Purgatorii remittantur, cum dentur Indulgentiæ nonnullæ decem millium annorum, nec tamen verisimile sit Purgatorium, quod post diem extremi iudicii mox cessabit, adhuc decem millibus annorum duraturum. Unde,

19 Resp. II. Sensus illius locutionis, ac huiusmodi Indulgentiarum est, quod per talis Indulgentiæ collationem tanta pœna cuiuspiam remittatur, quanta remitteretur virtute illius pœnitentiæ, quæ secundum formam Juris, & consuetudinem Ecclesiæ olim statuebatur, si ipsa tot diebus vel annis in hoc mundo perageretur. Quæ vero, & quanta ea sit, optime novit, ac determinavit Dominus Deus. Et conformiter dictis,

20 Resp. III. *Quadragesima*, seu *Quarena* est Indulgentia quadraginta dierum, id est, relaxatio tantæ pœnæ, quanta fuisset redempta per pœnitentiam quadraginta dierum, olim ab Ecclesia pro certis peccatis statutam. Porro *Septenna* est Indulgentia septem annorum, seu relaxatio tantæ pœnæ, quanta fuisset remissa ob pœnitentiam septem annorum. *Carena* vero est Indulgentia utramque prædictam complectens, ita, ut sit remissio tantæ pœnæ, quanta fuisset redempta per pœnitentiam quadraginta dierum in pane & aqua peractam, & per aliam pœnitentiam septem annorum subsequenter. Tannerus *tom. 4. disp. 6. dubit. 8. n. 99* & alii magis communiter.

21 Quia igitur ejusmodi pœnitentiæ, olim ab Apostolis, sacrisque Canonibus sancitæ admodum graves extiterunt, per quas proinde multum expiari poterat de pœna temporali peccatis debita: hinc merito Gobat *tr. 2. Qumarii. cap. 3. n. 286.* observat, eos pessime sibi consulere, qui ad solas Indulgentias plenarias attendunt, neglectis dierum vel annorum Indulgentiis, quas tamen sæpissime sive pro se, sive etiam pro Defunctis intra modicum temporis spatium lucrari possent.

22 CONCL. III. Ulterius Indulgentia ratione subiecti, cui conceditur, dividitur in personalem, localem, & realem. *Indulgentia personalis* est, quæ directe conceditur alicui personæ determinatæ, vel toti Religioni, aut Communitati, quales plures concessæ sunt Religiosis, & variis Confraternitatibus.

23 *Indulgentia localis* est, quæ alicui pio loco conceditur ad ejus devotionem augendam, in ordine ad personas in tali loco orantes, aut alia præscripta opera ibidem peragentes: quales sunt illæ, quæ conceduntur devote visitantibus hanc vel illam Ecclesiam, ibique orantibus. Et huiusmodi Indulgentiæ dicuntur locales, non quod ipsi loco secundum se concedantur (solum enim homo est capax Indulgentiarum, non vero Ecclesia materialis, utpote quæ est res inanimata) sed quia Fidelibus in tali loco devote orantibus conceduntur.

24 *Indulgentia realis* est, quæ conceditur rebus mobilibus, utputa Granis, Numismatibus, Imaginibus, Rosariis, aut huiusmodi, in ordine ad homines. Et hæc Indulgentia pari passu ambulat cum locali, dempto eo, quod localis Indulgentia loco, sive devote ipsum visitantibus, realis autem rei mobili, sive eam devote penes se habentibus; atque opera ad Indulgentiæ consecutionem præscripta peragentibus concedatur.

### QUÆSTIO III.

De Potestate concedendi Indulgentias, & Conditionibus ad earum valorem requisitis.

### SUMMARIUM

25 Datur in Ecclesia Potestas concedendi Indulgentias.

26 Idem probatur ex S. Scriptura.

27 Papa potest Indulgentias conferre omnibus Christi Fidelibus.

28 Episcopi, quas conferre valeant de Jure communi?

29 Quid de aliis Prælatibus inferioribus?

30 Ad Indulgentias validas 4. conditiones requiruntur.



## 380 Tract. XII. De immunitate Eccl. & Indulgentiis. Dist. III.

### 1. Auctoritas legitima concedendi.

31 II. Causa justa.

32 Et quæ talis sit?

33 III. Status gratiæ ex parte recipientis.

34 IV. Executio operis præscripti.

35 Indulgentia tantum valent, quantum sonant &c.

25 **CONCL. I.** Datur in Ecclesia Potestas divinitus collata D. Petro, ejusque legitimis Successoribus, concedendi Indulgentias, & per earum concessionem dispensandi Thesaurum Ecclesiæ. Ita cetera omnium Catholicorum; estque de Fide; & patet tum ex *cit. Extravag. Unigenitus*. tum ex Concil. Trid. Sess. 25. in *Decr. de Indulgentiis*. ubi sic loquitur: *Cum potestas conferendi Indulgentias à Christo Ecclesiæ concessa sit: atque hujusmodi potestate divinitus sibi tradita, antiquissimis etiam temporibus illa usa fuerit: Sacrosancta Synodus Indulgentiarum usum Christiano populo maxime salutarem, & sacrorum Conciliorum auctoritate probatum, in Ecclesia retinendum esse docet, & præcipit: eosque anathemate damnat, qui aut inutiles esse asserunt; vel eas concedendi in Ecclesia potestatem esse negant.* Hactenus Concilium,

26 Eadem Catholica Veritas desumitur ex illis verbis Christi Matth. 16. *Tu es Petrus, & supra hanc petram ædificabo Ecclesiam meam. . . Et tibi dabo claves Regni Cælorum: & quodcumque solveris super terram, erit solutum & in cælis.* Quæ promissio, solvendi quodcumque, cum sit amplissima & generalis, extenditur ad omnia vincula solvenda, quæ possunt homines impedire a consecutione salutis æternæ: unde, cum inter hæc vincula etiam connumeretur vinculum reatus poenæ temporalis, retardans hominem ab ingressu Regni Cœlestis, etiam potestatem solvendi hoc vinculum per opportunam dispensationem Thesauri Ecclesiæ, seu Indulgentiarum concessionem Christus S. Petro, ejusque legitimis Successoribus imperavit.

27 **CONCL. II.** Summus Pontifex potestate à Christo accepta, sicque Jure Divino, & primario ac principaliter sibi competente potest ex rationabili causa Indulgentias, sive generales, sive particulares, omnibus Christi Fidelibus dispensare. Ita omnes Catholici: & desumitur ex *cit. Extr. Unigenitus*. tum ex dictis *n. præc.* Accedit ratio: quia potestas dispensandi bona communia primario penes Principem residet: atqui Summus Pontifex est Princeps, & caput visibile totius Ecclesiæ; ergo.

28 **CONCL. III.** Episcopi possunt Jure communi concedere Indulgentias unius anni pro die Dedicationis Ecclesiæ: at vero pro Anniversario Dedicationis ejus, & in aliis casibus ob justam causam dumtaxat quadraginta dierum Indulgentias. Ita habetur expressum *c. Cum ex eo. de Penit. & Remiss. juncto cap. ult. Eod. in 6.* Hinc infert Laymanus *lib. 5. tract. 7. cap. 4. n. 2.* quod, si Episcopus ultra limites potestatis suæ Indulgentiam concedit, ea omni Jure sit irrita quoad excessum. Dicitur, *quoad excessum*: valeat enim nihilominus Indulgentia illa usque ad terminum potestatis Episcopalis: quia *Utile non debet per inutile vitari*, juxta *Reg. 37. Juris in 6.* ac tenet Glossa *v. Non obtinent. cit. cap. ult.*

29 **CONCL. IV.** Nullus Prælati Episcopo inferior, neque Provinciales aut Generales Ordinum possunt jure communi atque ordinario Indulgentias concedere. Ita communis: & habetur clare decisum *c. Accedentibus. De excessibus Prælat.* Dicitur, *Jure communi & ordinario*; id est, nisi forsan quisquam eorum speciali concessione, aut commissione per Summum Pontificem sibi facta quasdam Indulgentias (ut quandoque fieri solet) concedere valeat: nam tunc Indulgentiæ conceduntur ex delegatione, seu commissione Summi Pontificis, cujus limites bene erunt observandi.

30 **CONCL. V.** Ad hoc, ut Indulgentiæ sint ratæ & validæ, requiruntur quatuor conditiones: quæ quidem ex parte concedentis, nimirum auctoritas legitima, & justa causa concedendi Indulgentias; & dux ex parte

fusipientis, videlicet status gratiæ, ac executio operis injuncti. Ita Bellarminus *lib. 1. de Indulgentiis, cap. 11.* & communis. Et quidem de Auctoritate legitima concedendi Indulgentias, per præcedentes Conclusiones, & textus Juris allegatos patet.

31, Deinde ad valorem Indulgentiarum requiri causam justam, ita quidem, quod concedens Indulgentiam sine causa justa non solum peccat, sed etiam Indulgentia ipsa sit invalida, conceditur passim ab omnibus. Ratio est: quia Papa non est dominus Thesauri Ecclesiæ, sed dispensator, juxta illud *1. Corint. 4.* *Sic nos existimet homo ut Ministros Christi, & dispensatores Mysteriorum Dei.* Dispensator autem non potest sine justa causa, & ad libitum suum de rebus Domini disponere: alias enim potius dissipator bonorum Domini sui foret, quam dispensator.

32. Porro causa justa dispensandi Indulgentias non est sola utilitas, quam Indulgentiæ afferunt personis illis, quibus conceduntur: sed præterea requiritur alia causa finalis extrinseca, quæ Pontificem moveat ad Indulgentias prudenter dispensandas: qualis præsertim est ea, quæ redundat in Ecclesiæ utilitatem, bonum commune, ac Dei & Sanctorum gloriam. Atque hoc inter alia desumitur ex praxi: quia Pontifices non solent facile concedere Indulgentias, nisi in Festivitatibus Dei & Sanctorum, ut sic Fideles magis ad eorum honorem prosequendum excitentur. Item in publicis Ecclesiæ, vel cujusdam provinciæ Catholicæ necessitatibus, ad quas sublevandas conceduntur vel Jubilæa per totum mundum, vel Indulgentiæ personales pugnantes contra Turcas. Imo ordinarie conceduntur Indulgentiæ sub onere orandi pro exaltatione Sanctæ Matris Ecclesiæ, Fidei Catholicæ propagatione, hæresum atque schismatum extirpatione, Principum Christianorum concordia, & hujusmodi.

33. Tertio ex parte recipientis Indulgentiam, certum est, quod requiratur status gratiæ: quia homo existens in peccato mortali non est capax Indulgentiæ, utpote cum per hanc sola poena temporalis peccato quoad culpam jam remisso debita remittatur. Quamvis autem nonnulli velint, requiri statum gratiæ etiam, quando opera pro lucrandis indulgentiis præscripta perficiuntur, atque hoc ipsum in praxi merito sit observandum, præmittendo vel Confessionem, vel saltem perfectam Contritionem: nihilominus communior, & probabilior est Doctorum sententia, sufficere ad lucrandam Indulgentiam, quod homo sit in statu gratiæ pro eo instanti, quo ultimum opus præscriptum perficitur, atque Indulgentia consummatur, & ejus effectus est percipiendus. Lugo *disp. 27. de Penitent. n. 83.* Massrius *n. 61.* Herincx *disp. 4. de satisfactione, quest. 11, n. 77.* & alii.

34. Quarto tandem ad consequendum fructum Indulgentiæ requiritur ex parte lucrantis executio operis præscripti. Ratio est: quia Papa concedit Indulgentiam sub conditione hujus, vel illius operis exequendi; ergo, si opus non perficitur, neque Indulgentia obtinetur.

35. Omnes hæc quatuor conditiones apte continentur in illo vulgato Theologorum dicto: *Indulgentia tantum valet, quantum sonat, Clave non errante, & Christo non reprobante.* Id est: *Clave non errante*, ob defectum legitimæ potestatis, aut justæ causæ conferendi Indulgentias: & *Christo non reprobante*, ob indispositionem recipientis, qui vel non est in statu gratiæ, vel saltem opera præscripta non rite peragit.

### Q U Æ S T I O IV.

De Subjecto Indulgentiarum capaci; & quomodo profint Defunctis?

### S U M M A R I U M

36. Beati in cælis, damnati, & infantes non sunt capaces Indulgentiarum.

37. Bene tamen Reptizati viventes adulti.



38 *Ha ipsi applicantur per modum absolutionis, habentis annexam solutionem &c.*

39 *Catechumeni, an sint Indulgentiarum capaces?*

40 *Quid de ipsis pie Defunctis?*

41 *Anima purgatorii sunt capaces Indulgentiarum, sed per modum Suffragii.*

42 *Indulgentie aliter conferuntur vivis, aliter defunctis. Clausula per modum Suffragii, quid denotet?*

43 *Indulgentia, an certo prosint illis defunctis, quibus applicantur?*

*Rationes sententiae negativae.*

44 *Affirmativa est probabilior.*

45 *Fundamenta ejus.*

46 *Solvuntur rationes in oppositum.*

47 *Cur diversae Indulgentiae pro eadem Anima applicantur?*

36 **CONCL. I.** Neque Beati in caelis, neque damnati in inferno, neque infantes, aut perpetuo amentes sunt capaces Indulgentiarum. Ita omnes Doctores. Ratio clara est: quia Indulgentia est remissio poenae temporalis ex peccatis actualibus quoad culpam jam remissis coram Deo adhuc debita. Atqui Sancti in caelis non habent talem poenam etiamnum restantem (quia illuc non intrabit aliquod coinquinatum. Apoc. 21.) damnati vero sunt in statu disgratiæ: atque ultimo termino damnationis æternæ: infantes autem, & perpetuo amentes nullum commiserunt peccatum actuale.

37 **CONCL. II.** Loquendo de adultis etiamnum viventibus, omnes baptizati, atque in statu gratiæ constituti, & opera injuncta peragentes sunt capaces Indulgentiarum, per quas ipsis poena temporalis, peccatis eorum quoad culpam jam dimissis adhuc debita, remittitur non per modum simplicis solutionis, neque per modum meræ absolutionis, sed per modum absolutionis secum habentis annexam solutionem ex communi Thesaurò Ecclesiæ. Ita Herinex loc. cit. quæst. 6. n. 55. Matrius disp. 23. Theol. Moral. n. 10. Bellarminus lib. 1. de Indulgentiis cap. 4. Suarez, & alii. Prior pars patet ex dictis n. 33. & seqq.

38 Altera pars probatur ex eo: quia per Indulgentias hinc dispensatur spiritualis Thesaurus Ecclesiæ, sicque intervenit solutio, illinc vero in dispensante requiritur Jurisdictio, qua possit alterum solvere, & consequenter simul intervenit absolutio. Unde Pontifex c. Quod autem. De Penit. & Remiss. loquens de Indulgentiis, sic ait: Cum a non suo Judice ligari nullus valeat, vel absolvi, remissiones predictas prodesse illis tantummodo arbitramur, quibus, ut prosint, proprii Judices specialiter indulserunt. Nota ly vel absolvi, & ly proprii Judices.

39 **CONCL. III.** Adulti necdum baptizati, proprio tamen actu contritionis, sive Baptismo flaminis justificati, e. g. Catechumeni etiamnum viatores, non videntur esse capaces Indulgentiarum. Ita Matrius loc. cit. n. 55. cum communi, & probabiliori Theologorum. Ratio est: quia tales per januam Baptismi, actu recepti, nondum sunt ingressi Ecclesiam, neque adhuc ejus Jurisdictioni subiecti: atqui Indulgentiæ viventibus non prosunt, nisi subditis arg. cit. c. Quod autem. De Penit. & Remiss. Idipsum probat praxis: & consuetudo Ecclesiæ, quæ hactenus non nisi Fidelibus, hoc est, jam Baptismi Characterè insignitis, consuevit Indulgentias concedere.

40 Additur notanter, Catechumeni etiamnum viatores: nam loquendo de ipsis in statu gratiæ jam defunctis, satis probabile est, prodesse eis Indulgentias per modum Suffragii: quia defunctis conceduntur Indulgentiæ non per modum absolutionis judicariæ, sicuti vivis, sed per modum Suffragii, prout illico amplius declarabitur: hinc fit.

41 **CONCL. IV.** Animæ Fidelium in gratia defunctorum, & ob remanentem poenam temporalem suis peccatis debitam in purgatorio existentium sunt capaces Indulgentiarum; quamvis hæc eisdem non applicantur per modum absolutionis (sicuti fit respectu viventium) sed per modum suffragii, habentis simul annexam solutio-

nem ex communi Thesaurò Ecclesiæ. Prima pars est certa, & patet ex receptissima praxi Ecclesiæ, atque communi sensu Fidelium: ac desumitur ex illo Articulo Symboli Apostolici: *Credo Sanctorum Communionem.* Ratio posterioris partis est: quia Summus Pontifex Christi in terris Vicarius, non habet jurisdictionem in defunctos, sicuti in Fideles viventes; non enim Christus Matth. 16. promittit D. Petro, ejusque legitimis Successoribus potestatem absolute solvendi quodcumque, sed cum limitatione: *Quodcumque solveris super terram, erit solutum & in caelis.*

42 Et hinc fit, quod Romanus Pontifex sive per se, sive per alios, quibus id commiserit, Fidelibus etiamnum viventibus conferat Indulgentias vi Clavium, ac per modum absolutionis, simul tamen habentis annexam solutionem ex Thesaurò Ecclesiæ, ut jam dictum. Verum defunctis non sic confert Indulgentias per modum absolutionis judicariæ, sed dumtaxat per modum Suffragii, habentis tamen annexam solutionem ex communi Thesaurò Ecclesiæ; quatenus offeruntur Deo Patri infinita Christi merita, & satisfactiones Sanctorum, per modum condigni pretii pro liberatione Fidelium Animarum e poenis Purgatorii, additis precibus, ut eadem pro harum liberatione misericordissime acceptare velit. Et hoc denotat clausula illa communiter inserta Brevibus Apostolicis, concedentibus Indulgentias pro defunctis per modum Suffragii, prout communior Doctorum explicat; quamvis nonnulli aliam ejus explicationem afferant, uti videre est apud Filliucium tom. 2. tract. 8. cap. 8. n. 204. & seqq. Verum occasione prædictorum,

43 Quæres. An Indulgentiæ pro defunctis certo & infallibiliter illis prosint, quibus applicantur? Non desunt, qui hoc negent: siquidem effectus Indulgentiarum pro defunctis dependet ex liberali acceptione Dei: atqui credibile est, quod Deus facilius acceptet Indulgentias applicatas pro iis defunctis, qui ex hac vita decesserunt magis digni tali gratia, utputa quia in vivis fuerunt magis solliciti in acquisitione Indulgentiarum, & oratione pro defunctis. Nam, ut in simili de Missæ Sacrificio, orationibus, atque elemosynis, inquit D. Augustinus lib. de cura pro mortuis. cap. ult. & refertur c. Non estimemus. 13. quæst. 2. Non pro quibus fiunt, omnibus prosunt; sed his tantum, quibus, dum vivunt, comparatur, ut prosint. Et his similia habet idem S. Augustinus, relatus c. Tempus 13. q. 2. Idipsum videtur suadere praxis Ecclesiæ, ac sensus piorum Fidelium, sæpius applicantium Indulgentias pro una eademque anima purgatorii. Et pro hac sententia citantur Durandus, Cajetanus, Canus, Corduba, & quidam alii. Verum his non obstantibus,

44 Resp. Indulgentiæ rite acquisitæ, & pro determinata anima ex intentione Summi Pontificis applicatæ secundum Ordinariam Dei legem certo ac infallibiliter prosunt eidem; ita, ut anima illa de Thesaurò Ecclesiæ per modum Suffragii sibi applicato juvetur vel ad totalem remissionem poenæ, & liberationem e purgatorio, si Indulgentia fuit plenaria, vel partialem, si hæc erat partialis. Ita Rodericus Tom. 2. qq. reg. quæst. 97. art. Gobat Tr. 4. Quinari. n. 483. & seqq. Filliucius loc. cit. n. 205. atque Matrius disp. 21. Theol. Moral. n. 47. asserens, hanc esse communioem & probabilio-

rem sententiam.

45 Desumitur data responsio ex modo loquendi Summorum Pontificum, qui in Brevibus Altarium privilegiatorum concedere solent, ut, quicumque Sacerdos, servatis servandis, ac diebus in Brevis specificatis, Missam Defunctorum pro anima cujuscunque fidelium Defunctorum ad præfatum Altare celebravit, anima ipsa de thesauro Ecclesiæ per modum Suffragii Indulgentiam consequatur, ita Domini nostri &c. Suffragantibus meritis, Purgatorii panis liberetur. ubi ponderandum ly pro Anima cujuscunque, ac ly Anima ipsa &c. nam hujusmodi locutio promittit liberationem Animæ determinate e purgatorio. Accedit ratio: quia ex una parte quælibet anima purgatorii est capax



capax Indulgentiarum; cum existat in statu gratiæ, sitque DEO conjuncta per charitatem: ex altera parte DEUS non solet sinere, ut preces Ecclesiæ sint irritæ; simulque Communio Sanctorum sese extendi etiam ad Ecclesiam purgantem, sives Fideles in gratia sanctificante decedentes, atque existentes in purgatorio.

46 Nec obstant rationes prioris sententiæ. Ad primam siquidem negatur consequentia: etsi enim credibile sit, Deum non solum alia Ecclesiæ Suffragia, utputa Missæ Sacrificia, orationes, elemosynas, & jejunia, sed etiam Indulgentias generaliter pro defunctis applicatas, facilius admittere pro illis, qui in vita fuere studiosi Indulgentiarum, ac ferventius memores piarum animarum; id tamen de Indulgentiis pro hac determinata anima applicatis (secundum Legem DEI ordinariam) non videtur dicendum. Ad D. Augustinum potest responderi eodem modo: nisi dicere velis, Sanctum Doctorem ita locutum fuisse ad excludendum valde malos, sive decedentes in statu peccati mortalis, qui, dum vixerunt, ob statum suum peccaminosum non promeruerunt, ut Indulgentiæ atque Suffragia Fidelium sibi post mortem prodesse.

47 Ad ultimum dicitur, diversas Indulgentias pro una eademque anima merito applicari: tum quia non constat, an Indulgentia pro tali defuncto hic & nunc rite obtenta sit, & nulla ex conditionibus ad ejus validitatem requisitis defuerit, v. g. iusta causa concedendi tales Indulgentias, celebratio numeri Missarum pro valore Altaris privilegiati præscriptarum &c. tum quia ignoratur, utrum non ob peculiarem causam Deus voluerit respectu talis animæ exceptionem quamdam facere a lege sua ordinaria, ipsique pro nunc, juxta inscrutabilia judicia sua, negare fructum Indulgentiarum sibi applicatarum: tum tandem, quia allata nostra responsio est quidem probabilior, atque communior inter Theologos, sed non omnino certa; ac proinde merito pro iisdem animabus reiterantur Suffragia, Missæ Sacrificia, atque Indulgentiæ. *Melius enim supererunt ista eis, quibus non obsunt, quam eis deerunt, quibus prosunt, ut loquitur D. Augustinus, relatus cit c. Non assememus. 13. q. 2.*

### QUESTIO V.

Varia Dubia circa Indulgentias breviter solvuntur.

### SUMMARIUM

- 48 Ad lucrandas Indulgentias an sit necessaria Confessio?
- 49 Et quando?
- 50 Quid, si quis habeat sola peccata venialia?  
(b) Ut dictum Tract. 10. Dist. 3. n. 13.
- 51 Unica Confessio, & Communio an sufficiat pro pluribus Indulgentiis?
- 52 Quanto tempore possit precedere?
- 53 An eodem opere v. g. oratione possint obtineri plures Indulgentiæ?
- 54 Sententia negativa probatur.
- 55 Sed limitatur.
- 56 An eadem Indulgentia possit sæpius obtineri repetito opere?
- 57 Decretum Sac. Congregationis circa hoc.
- 58 Praxis Fidelium.
- 59 Omittens levem partem operis injuncti an lucretur Indulgentiam?
- 60 Hac levitas quomodo mensuranda?
- 61 Non valens intrare Ecclesiam, an foris lucretur Indulgentias?
- 62 Quid de Indulgentia concessa visitantibus quinque Altaria?
- 93 An, si alicui Festo sit annexa Indulgentia, translato Festo etiam eadem transferatur?
- 64 An Indulgentia Portiuncule habeat aliquid speciale?  
\* An eadem possit applicari etiam pro aliis vivis?

65 Quomodo ibidem intelligendi sint termini: toties quoties?

66 Quomodo Indulgentiæ cessent?

\* An cessent morte concedentis, vel cessant causa motiva?

48 **Q**Uæritur. I. Utum ad lucrandas Indulgentias semper sit necessaria Confessio Sacramentalis? Resp. I. Si in concessione Indulgentiarum non expresse præscribatur Confessio, certum est, eam non requiri actualiter, sed sufficere, ut Indulgentiam lucraturus existat in statu gratiæ, aut præmittat contritionem perfectam de peccato mortali, si quod habuerit.

49 Resp. II. Quando Confessio in forma Indulgentiarum præscribitur, utputa si dicatur, *præmissa, aut facta Confessione*, & lucraturus Indulgentiam habet peccatum mortale, non sufficit sola contritio, sed requiritur actualis Confessio ad ejus consecutionem. Ita satis communis Theologorum; quia Confessio actualis tunc censetur esse conditio necessario requisita per Breve Indulgentiarum ad earum effectum, seu consecutionem.

50 Resp. III. Quando Confessio quidem in forma Indulgentiæ præscribitur, tamen Indulgentiam lucraturus nullum habet peccatum mortale, sed sola venialia, licet tutius & consultius sit, facere Confessionem de solis venialibus, nihilominus satis probabile est, tunc non requiri Confessionem actualem, nisi in forma Indulgentiæ expresse requiratur Confessio etiam de solis venialibus. Ita Suarez *disp. 52. sect. 3. n. 5. Herincx. cit. disp. 4. n. 80. & alii passim*. Ratio est: quia, etiam si Confessio requiratur, id intelligendum est, quando poenitens habet conscientiam peccati mortalis: nam Confessio peccatorum simpliciter prolata intelligitur in SS. Canonibus de Confessione mortalium; prout in simili patet ex præcepto annuæ Confessionis, ad quam (b) nemo obligatur, nisi habeat remorsum peccati mortalis. Accedit, quod Confessio videatur tantum exigere præsuppositive, seu tanquam certius medium acquirendi gratiam justificationis, vel tanquam necessaria ad Communionem in habentibus peccatum mortale, quæ simul frequenter præscribitur.

51 Quæritur. II. An unica Confessio, & Communio sufficiat ad lucrandas plures Indulgentias, eodem die diversis Ecclesiis concessas? Resp. affirmative; estque certa, & communis Doctorum sententia. Imo hoc idem dicendum erit, quamvis secunda Indulgentia non eadem die, sed sequenti (dummodo quis perseveret in statu gratiæ, ut recte limitat Bassæus v. *Indulgentia. n. 2.*) vel intra debitam distantiam occurrat. Lugo *disp. 27. de Pœnit. sect. 6. n. 93. & alii*. Quia Confessio, & Communio non videntur exigere directe, sed solum præsuppositive, ad majorem dispositionem subjecti ob finem intentum, ut proxime dictum.

52 Porro, tanquam se extendat ly *vel intra debitam distantiam*, non omnino conveniunt Doctores. Et quidem, ut taceantur dies pauciores, Portel in *Dubiis Regular. v. Indulgentia 11. n. 5.* post Commitolum, & Bonagratia Habsensis in *Summula Questionum Regularium v. Indulgentia. n. 225.* post Bassæum extendit hoc ad quatuor dies, dummodo quis de novo mortaliter non peccaverit. Deinde Gobat *tract. 3. Quinarii n. 181.* censet, non solum allatam doctrinam procedere, quando sequenti die occurrit altera Indulgentia, sed insuper arbitratur, quod, si quis primo die Augusti susceperit Sacramentum Confessionis, & Communionis, possit die sexta ejusdem mensis absque nova Confessione, & Communionem lucrari Indulgentiam, quæ omnibus confessis, & communicatis illo die proponitur; eo quod hic vere possit dici esse confessus, & communicatus.

53 Quæritur III. An eodem opere v. g. unica oratione possit quis lucrari plures Indulgentias diversis viis concessas? ut si quis eodem die plures Indulgentias diversis granis benedictis concessas lucrari intendat, quarum aliquam pro se, alias pro defunctis applicare velit, an is teneatur ad hunc finem consequendum opera præscripta v. g. preces iterare? Et quidem de Confessione, & Sacra

Commu-



## Quæst. V. Varia Dubia circa Indulgentias breviter solvuntur. 383

Communione jam patet ex proxime dictis: verum de aliis operibus ad Indulgentiarum consecutionem præscriptis loquendo.

54 Resp. Eodem opere non possunt diversæ Indulgentiæ lucrari, nisi forsitan illæ essent per modum unius. Ita Lugo loc. cit. n. 90. & seqq. post Suarez, & alios, Mastrius n. 65, Herincx n. 82. & alii. Ratio est: quia ad singulas illas Indulgentias requiritur causa propria, & diversa: simulque oratio directe præscribitur pro singulis Indulgentiis, & consequenter oportet eam reiterare.

55 Additur tamen, nisi forsitan illæ concessæ essent per modum unius: ut cum visitanti talem Ecclesiam conceduntur Indulgentiæ omnium Ecclesiarum Urbis: tunc enim per unicum actum, seu unam visitationem possunt omnes Indulgentiæ illæ lucrari; prout satis indicat ipsamet formula talis concessionis.

56 Quæritur IV. An possit obtineri sæpius eadem indulgentia repetito opere injuncto: ut si visitantibus talem Ecclesiam concedatur Indulgentia, & quis eam ter visitet, an toties lucretur Indulgentiam? Resp. I. Si ejusmodi Indulgentia sit concessa in perpetuum, & opus injunctum repetatur distinctis diebus, toties acquiritur Indulgentia, quoties illud persolvitur. Ita certa, & communis: nam id satis convincit formula dictæ concessionis.

57 Resp. II. Quod si Indulgentia concedatur pro certo dumtaxat die, & opus pium sæpius intra eundem diem repetatur, non nisi semel Indulgentia plenaria eodem die lucrari potest. Hæc responsio est quidem contra non paucos anteriores Auctores (quorum sententia circa Indulgentias non plenarias necdum videtur rejecta sed de facto indubitanter tenenda, ob Decretum Sac. Congreg. circa Indulgentias editum, ac per Innocentium XI. die 7. Martii 1678. approbatum, & inviolate servari jussum; ubi §. fin. declaratur, semel dumtaxat in die plenariam Indulgentiam in certis diebus Ecclesiam visitantibus concessam, vel aliud pium opus peragentibus lucriferi. Ita sonat Decretum.

58 Nec obstat pia praxis Fidelium, sæpius intra eandem diem opus præscriptum, v. g. orationem, aut Ecclesiæ visitationem peragentium. Nam hoc fit ad certius & securius lucrandam Indulgentiam plenariam: si enim quis prima vice opera præscripta defectuose peregerit, adeo ut Indulgentiam per ea non fuerit meritus, lucrabitur ipsam, si eadem opera iterum, & sine defectu intra debitum tempus obeat Gobat tr. 4. Quinarii n. 203. post Bonacinam.

59 Quæritur V. An prætermittens levem partem operis injuncti consequatur Indulgentiæ effectum: ut si ad consequendam Indulgentiam sit injunctum Rosarium, vel jejunium, & quis vel de die aliquid modicum degustet, vel e Rosario unum aut alterum Ave omittat? Resp. Et si res hæc nonnihil sit dubia, eo quod Indulgentia solum, ac indivisibiliter concedatur pro toto opere: adhuc tamen probabilius est, non impediri effectum Indulgentiæ ex omissione partis, quæ tum in se, tum respectu operis injuncti levis existit. Ita Mastrius loc. cit. n. 59. Gobat ibid. n. 190. & seqq. Suarez, Bonacina, & alii. Ratio desumitur ex illa generali regula: *Parum pro nihilo reputatur*, simulque, quia posita etiam levis partis omissione adhuc opus injunctum simpliciter præstatur.

60 Additur notanter, quæ tum in se, tum respectu operis injuncti levis existit: nam ejusmodi pars non tantum absolute, sed etiam respective debet esse minima: unde non lucratur Indulgentias, recitantibus tria, vel quinque *Pater* & *Ave* concessas, qui unum omittit: hæc enim omissio licet secundum se sit levis, tamen respectu talis operis censetur esse notabilis. Quod si verò quis omittat partem notabilem, ille neque totum fructum Indulgentiæ, neque partem ipsius consequitur. Lugo cit. disp. 27. n. 89. Gobat n. 188. & 189. & alii.

61 Quæritur VI. Utrum non valens intrare Ecclesiam, sive ob multitudinem hominum, sive quia eam clausam reperit, possit lucrari Indulgentias, visitantibus talem Ecclesiam concessas, orando ante fores, vel in Cœmeterio ipsius? Resp. affirmative: nam talis censetur moraliter Ecclesiam visitare, & in ipsa orare; si-

mulque in favorabilibus nomine Ecclesiæ etiam Cœmeterium comprehenditur.

62 Secus dicendum de Indulgentia concessa visitantibus quinque Altaria: licet enim existens, atque orans in Cœmeterio dicatur moraliter visitare Ecclesiam, non tamen censetur moraliter visitare hoc, vel illud Altare. Itaque ad visitanda Altaria oportet ingredi ipsam Ecclesiam, atque eadem vel motu locali devote invisere, vel saltem in loco sic situi existere, unde sese convertendo ad quodlibet eorum, sicque orando moraliter censi possit, unumquodque ipsorum visitasse; nam motus localis ad hoc simpliciter necessarius non est. Lugo cit. disp. 27. num. 98. Mastrius loc. cit. num. 23. & alii.

N.B. Sequentia Quæsitæ equidem in effectu sunt novæ Additiones; quia tamen jam in priori Editione ponebantur sub ordinariis numeris, ideo & hic relinquuntur.

\* 63 Quæres VII. Utrum, si alicui Festo est annexa Indulgentia, translato Festo etiam transferatur ipsa Indulgentia? Ad hoc Dubium post recens Decretum Sac. Congregationis respondet novissime noster Felix Potestas in Examine Confess. part. 1. tom. 4. cap. 8. num. 3739. Quando est Festum Fori, seu tale, in quo populus abstinet à servilibus, illudque præcise transferatur quoad Chorum & recitationem Officii, tunc non transferri Indulgentias, secus vero esse dicendum, si Festum illud etiam transferatur quoad forum, modo talis translatio non fiat voluntarie, sed juxta Rubricas & Ritum Ecclesiæ. Ratio desumitur ex mente Summi Pontificis, ideo teste S. Pio V. in Bulla 34. ad talia Festa Fori Indulgentiam concedentis, ut eadem sit ad usum, & devotionem populi. Populus autem non attendit multum ad ipsum Officium, sed ad id, quod est publicum, nempe ad Festi solemnitatem quoad Forum. Ex quo fit, quod translato Festo non solum quoad Officium, sed etiam juxta Rubricas quoad Forum pariter transferatur Indulgentia, non vero transferatur Indulgentia, si Festum Fori transferatur præcise quoad Officium. Respondeo II. Si Festum aliquod non est Festum Fori, seu tale, in quo debet abstineri à servilibus, tunc locum habet Decretum Sacre Congregationis. Rit. editum 10. Junii 1690. estque talis tenoris *Translato Festo, in cuius die conceditur Indulgentia, non transferatur Indulgentia, nisi ex concessione speciali*. Dicitur notanter, *nisi ex concessione speciali*, quale Indultum ab Innocentio X. teste la Croix obtinuit Societas JESU circa Festum S. Francisci Xaverii, si incidat in Dominicam primam Adventus, ubi non solum Officium, sed pariter Indulgentia transferatur in diem Lunæ proxime sequentem. Quod Indultum novissime confirmavit Clemens XI. 24. Novembris 1702.

\* 64. Quæres VIII. An Indulgentia Portiunculæ habeat aliquid speciale præter communes alias Indulgentias, & quidnam? Respondeo, præterquam quod hæc Indulgentia originem trahat ab ipso Christo Domino, adhuc sequentia habet specialia. I. Loquendo de ipsa Ecclesia Portiunculæ, seu S. Mariæ Angelorum prope Assisium, ibidem Fideles singulis diebus, si dictam Ecclesiam visitant, possunt lucrari Indulgentias plenarias. Ita novissime, & clarissimis terminis concessit Innocentius XII. in suo Brevi: *Redemptoris & Domini Nostri* &c. edito die 8. Augusti 1695. Vide nostrum Patrem Felicem Potestas part. 1. Exam. Confess. tom. 4. c. 8. n. 3797.

Secundo. In Ecclesia S. Mariæ Angelorum prope Assisium dictæ Indulgentiæ in Anno Sancto non suspenduntur. Ex Brevi Innocentii X. 5. Julii 1600. Clementis X. 12. Novemb. 1674. & Innocentii XII. 21. Augusti 1699. Quinimo Benedictus XIII. multis Provinciis pro anno Jubilæi 1725. concessit, ut tempore Jubilæi Indulgentiæ plenariæ in Festo Portiunculæ etiam alibi a Christi Fidelibus pro vivis obtineri valeant. Tertio. Extendendo gratias ad alias Ecclesias totius Ordinis S.raphici per totum orbem diffusi, certum & extra ullam est controversiam, quod in dictis Ecclesiis omnibus Christi Fidelibus sint a Summis Pontificibus in Festo Portiunculæ concessæ Indulgentiæ plenariæ, atque hoc in perpetuum 2. Augusti à primis vespere usque ad occasum



casum Solis; quas ipsas Indulgentias Fratres, & Sorores trium Ordinum, item Chordigeri, & Syndici nostri Apostolici juxta specialia Privilegia Apostolica, videnda apud Holzmam *tom. 2. tr. 4. n. 770.* lucrari possunt in casu impediti etiam extra nostra templa & Oratoria, puta infirmi in sua Camera, itinerantes in aliis Ecclesiis &c. dummodo alias conditiones adimpleant. Quarto. An Fideles frequentantes eo tempore dictas Ecclesias, toties, quoties accedunt, lucentur Indulgentias plenarias, prout est communis persuasio, teste P. Felice Potestas *loc. cit.* etiam Romæ non solum apud simplices, verum etiam apud viros doctos & Primates, exinde diem istum continuis visitationibus infuentes; magna erat suo tempore controversia, quæ ex eo crevit, quia Innocentius XI. in Brevis superius allegato, & Romæ die 7. Martii 1678. edito statuit, semel dumtaxat in die plenariam Indulgentiam in certos dies Ecclesiam visitantibus concessam lucriferi. Cum autem Summus Pontifex in citato loco videatur loqui de Indulgentiis ordinariis, Indulgentia autem Portiunculæ sit extraordinaria, utpote ortum habens a Christo Redemptore, & exinde semper à Summis Pontificibus specialibus favoribus condecorata, Sac. Congregatio Cardinalium Concilii Trid. interpretatur, die 17. Julii 1700. sustulit hanc controversiam, ac respondit: *Servandum esse solitum*, postea consequenter FF. Minores, uti antea, ita etiam deinceps licite populo persuadere, easdem Indulgentias lucriferi illo die toties, quoties. Vide de hoc futius Sabin. Bon. in *Luce Morali part. 2. tr. 65. in Apologia.* Quinto. Indulgentia Portiunculæ potest per modum Suffragii applicari etiam Defunctis. Ita concessit Innocentius XI. in suo Brevis; *Alias Fel. record. &c.* edito die 22. Januarii 1687. uti videndum apud P. Augustinum Mathæucium in suo Officiali curiæ Regularis *vers. Indulg. v. 16. \**

**Additio.**

\* Quinimo non desunt AA. qui, usque dum constet de contraria declaratione Sedis Apostolicæ, saltem tanquam probabile defendunt, etiam id specialiter competere Indulgentiis Portiunculæ, quod possint pariter applicari aliis vivis in statu gratiæ existentibus. Ita Wadingus *tom. 1. Annal. ad ann. 1223. n. 8.* Ratio est: quia etsi in ordinariis Indulgentiis id non soleat, nec legatur fieri quoad alios vivos, uti fufius deducit Sabinus Bonon. in sua *Luce morali part. 2. tr. 65. in App. prope finem*: id tamen absolute loquendo fieri per Papam posset ex una parte, prout etiam notat la Croix *lib. 6. p. 2. n. 1328.* Ex altera autem parte, quod in ordine ad speciales Indulgentias Portiunculæ actu sic contingat, probat communis persuasio fidelium miraculosis exemplis comprobata teste Pittonio *p. 2. dub. 15.* apud Bonaventuram Conorum in Jubilæo jubilo Portiunculæ. Et hinc Ecclesiæ Portiunculæ Sacristano vix aliquot millia schedarum sufficiunt, vi quarum testatur, quod peregrinantes pro aliis vivis Principibus, aut Magnatibus absentibus has Indulgentias lucraturi adfuerint. Videatur desuper Andreas Mohr. in sua portiuncula *Theologica part. 1. c. 1. dub. 3. n. 27.*

\* 65. Quæres IX. Posito, Indulgentias Portiunculæ lucriferi posse toties, quoties, quomodo hi termini sint intelligendi? Respondeo, meo quidem judicio esse singulis vicibus interpolandam aliquam moram: interea tamen pro consolatione Fidelium pono verba formalia P. Felicis Potestas *loc. cit. n. 3803. & seqq.* ubi sic ait: *Plures tenent, esse intelligendum, ut visitationes pro eodem die sint, siue moraliter interruptæ, siue continuatæ, quia favores sunt ampliandi. Alii docent, visitationes debere esse moraliter interruptas, ut inter unam & aliam visitationem aliquod mediet opus & interpolatio. Afferunt exemplum in humanis: si quis enim, postquam Principem invisit, statim, & per plures vices absque interpolatione ad invisendum rediret, tales visitationes plus saperent risus, aut stomachi quam prudentiæ. Si quid sentiam, scire cupis, dico*

*secundum modum plus sapere prudentiæ humanæ, primum plus pietatis, ac simplicitatis. Scio tamen cum S. Job. cap. 10. Dei non esse oculos carneos, nec, sicut videt homo, illum videre. Ita ille. \**

\* 66. Quæres ultimo. Quomodo Indulgentiæ semel concessæ iterum cessent? Resp. Imprimis, si tales indulgentiæ fuerint ad certum tempus limitatæ, vel sub certa conditione concessæ, tempore isto elapso, vel conditione deficiente, etiam cessant Indulgentiæ. II. Si Indulgentiæ sunt certo loco affixæ, eo destructo pariter cessant: hincque etiam opus est nova consecratione, cum moraliter non censeatur eadem numero Ecclesia, ut notant Barbosa, Abbas, Sylvester, & alii citati in *Jure Canonico lib. 3. decret. tit. 40. n. 11.* Quod, si talis locus v. g. Templum paulatim per partes destruat, & per partes iterum reedificetur, non cessabunt Indulgentiæ; etenim in simili casu videtur perdurare adhuc eadem moraliter Ecclesia, ob quam rationem juxta la Croix hic pariter non indiget nova consecratione. III. Si Indulgentiæ sint datæ ad certas res v. g. ad Rosaria, Medalias &c. iis deperditis, vel moraliter destructis etiam deperditur Indulgentia, e. g. si frangatur una pars transversa Crucis Terræ sanctæ, illa Indulgentia cessat, cum ex hac fractione moraliter defuerit forma Crucis. Et licet aliqui cum Gobat velint defendere, si talis res e. g. Crux iterum redintegretur, manere Indulgentias, mihi tamen cum pluribus aliis videtur non manere easdem, quoniam posita semel fractura jam non censetur amplius moraliter eadem numero Crux, si postea redintegraretur, sicut destructa simul & semel Ecclesia, non censetur manere eadem, etsi ex prioribus a potiori materialibus reedificetur. IV. Demum cessant Indulgentiæ per expressam concedentis, vel ejusdem Successoris revocationem. \*

**Additio.**

\* Porro per solam mortem concedentis non cessant Indulgentiæ antea per expeditionem Brevis concessæ juxta communem, & teste Suarez hic *disp. 57 sect. 2. n. 2.* certam Sententiam. Ratio est; quia hæc post expeditionem Brevis, quamvis necdum ad manus supplicantis pervenerint, jam sunt gratia facta, quæ non expirat morte concedentis, sed tanquam Beneficium Principis debet manere. *Reg. 16. Juris in 6.* Similiter Indulgentiæ non cessant cessante post intervallum causa motiva, dummodo hæc causa subsisterit ad initium concessionis; v. g. quando ad tempus Indulgentiæ fuerunt concessæ pro conversione cujusdam Provinciæ ad Fidem Catholicam: si Provincia fuerit jam ex integro conversa, antequam tempus præfixum pro Indulgentiis totaliter effluxit, exinde non illico cessant illæ Indulgentiæ. Itacum Maffrio, Gobat, Filliuccio, Card. de Lugo, & Suarez communis, & vera Sententia teste P. Kazenberger *loc. cit. num. 56.* Ratio est; quia hæc concessio Indulgentiarum non est vulnus Juris, uti dispensatio, sicque nec odiosa, aut restringenda, ac præterea se ea habet per modum liberalis donationis; donatio autem non cessat, etsi post actum donationis completum cesset causa motiva: sic, dono pauperi quinque florenos ex motivo sublevandi ejusdem miseriam, illa donatio subsistet, supposito, quod tempore donationis fuerit pauper, etsi post hanc donationem jam factam talis pauper hæreditate, vel inventione thesauri venerit ad pinguiorem fortunam, atque exinde post actum donationis cesset ipsum motivum donandi. Accedit, quod causa motiva donandi Indulgentias non soleat ita adæquate, & totaliter cessare, quin saltem remaneat partialiter bonum commune Christi fidelium, ut nimirum per ipsas similes Indulgentias reddatur populus Christianus Domino acceptior, fiat Sectator bonorum operum, atque efficiatur aptior Divinæ gratiæ. \*



Q U Æ S T I O VI.

Quæ Indulgentiæ per Paulum V. revocatæ, ac de novo Regularibus concessæ fuerint?

S U M M A R I U M.

67 Paulus V. revocavit Indulgentias Regularibus concessas.

\* Non vero Tertiariis.

68 Et quas generatim?

69 Corollaria circa non revocatæ.

\* Ulteriora Corollaria de non revocatæ.

70 Indulgentia indubitata, ac per Paulum V. de novo concessæ Regularibus. I. II. III.

71 IV. V. VI.

72 VII. (c.) Supra n. 57. citatum.

73 VIII. IX. X.

74 XI. XII. XIII.

67 **A**dvertendum, quod Paulus V. per specialem Bullam, quæ incipit *Romanus Pontifex die 23. Maji 1606.* editam (estque in Bullario Romano, Tom. 3, ac inter ejus Constitutiones ordine 21.) ob varia dubia, incertitudinem & confusionem earum, omnes & singulas Indulgentias quibuscumque Ordinibus, & Institutis Regularibus hujusmodi, etiam Mendicantibus, & quibuslibet personis Regularibus concessis, perpetuo revocaverit, atque ipsarum loco novas concesserit. Quia vero nonnulli postmodum audebant asserere, priores Indulgentias esse denuo renovatas, Alexander VII. ad istum errorem submovendum, inter alias Propositiones etiam sequentem, ordine 37. damnavit: *Indulgentia concessæ Regularibus, & revocatæ a Paulo V. hodie sunt revalidatæ.* \*

Additio.

\* Intelliguntur autem in præsentem per Regulares illi, qui in aliqua Religione approbata tria vota solemniter emiserunt. Unde, ubi non potest exhiberi specialis & expressa aliqua cassatio, revocatæ non censentur Indulgentiæ concessæ Tertio Ordini intra, vel extra claustra, absque solemnibus Votis existentibus: sic enim, quando dubium hoc fuerat S. Congregationi Indulgentiarum propositum, an nimirum in generali revocatione Indulgentiarum Pauli V. quæ continetur in Bulla *Romanus Pontifex*, comprehendantur personæ, quæ substantialia vota Religionis non emittunt sive intra, sive extra claustra degentes? Respondit, eas minime comprehendere, quod responsum Innocentius XI. in Constitut. *Alias*, emanata 10. Octobr. Anno 1686, confirmavit. His prænotatis, sit \*

86 CONCL. I. Generatim loquendo, per Bullam Pauli V. revocatæ sunt illæ solæ Indulgentiæ, quæ directe ac principaliter concessæ fuerunt ipsis Religiosis, ac Monialibus. Ita Gobat loc. cit. n. 546, Bonagratia habentis. In Summula Quæstionum Regularium, vers. Indulgentia n. 221. & alii. Siquidem Paulus V. ibidem asserit, à se revocari Indulgentias quibuscumque Ordinibus, & Institutis, & personis Regularibus concessas: quæ verba, cum sint correctiva Jurium antiquorum, sunt strictè intelligenda, videlicet de illis solis, quæ ipsis Ordinibus, & personis Regularibus concessæ fuerunt, ut, v. g. quoties FF. Minores celebrant, vel communicant, Indulgentiam plenariam consequantur, si id fecerint in die Dominico, aut Festis Domini, vel B. MARIE Virginis; aut quoties Religiosi dicerent Psalmum *Miserere*, & hujusmodi.

69 Colligitur proinde, quod per dictam Bullam non sint revocatæ Indulgentiæ, quæ promiscue concedebantur Religiosis & Sæcularibus. Neque illæ quæ concessæ sunt universis Christi Fidelibus, visitantibus in certis Festivitatibus Ecclesias Regularium; cum hi non debeant esse deterioris conditionis, quam alii Fideles. Neque eæ, quæ concessæ fuerunt Sæcularibus, utputa parentibus, cognatis, intuitu Religiosorum, aut ipsis Religiosis pro Animabus purgatorii, ac hujusmodi: nam tales non fuerunt directe concessæ ipsis Regularibus.

Anach. Reiffenstuel Theol. Tom. I.

Additio.

\* Ex dictis cum nostro Rodriguez Dominicus Viva in Append. Indulg. §. 3. ac §. infert primo, non esse revocatæ illas Indulgentias ab Innocentio VIII. Fratribus Minoribus, & hujus Ordinis Monialibus concessas, vi quarum illi, quotiescumque pro animabus sui Patris, vel Matris, aut utriusque celebraverint, easdem e purgatorio eripere valeant; hæc vero, & omnes cum ipsis communicantes, quotiescumque sacra Synaxi refectæ fuerint, animam liberare possunt: item pariformiter, quotiescumque Officium Defunctorum, vel etiam præcise Psalmum *Miserere* recitaverint, uti Leo X. Fratribus Minoribus, & prius Sixtus IV. Canonicis Regularibus Lateranensibus largitus fuit. Ratio hujus assertonis est: quia dictæ Indulgentiæ non immediatæ pro Regularibus, sed pro animabus in purgatorio fuerunt concessæ. Infert secundo, neque sub hac revocatione comprehendi Indulgentias 3800. annorum, concessas legentibus vel audientibus Missam. Item 10000. annorum, recitantibus quinque *Pater* & *Ave* in honorem Passionis Domini & amaritudinum B. V. MARIE. Quindecim annorum, audientibus Concionem Regularium privilegiatorum. Quinque annorum & totidem quadragenarum, comitantibus Viaticum ad infirmos delatum. Viginti dierum, sese inclinantibus ad SS. Nomina JESU, & MARIE. Triginta dierum, idem facientibus ad *Gloria Patri* &c. Quadraginta dierum, osculantibus S. Crucem. Totidem, recitantibus *Salve Regina*. Sexaginta dierum, persolventibus *Ave Maria*. Ducentorum dierum, genuflectentibus coram Sanctissimo. Ratio est: quia hæc Indulgentiæ non pro solis Regularibus, sed etiam pro Sæcularibus fuerunt concessæ.

70 CONCL. II. Indulgentiæ indubitata, ac per Paulum V. de novo concessæ omnibus personis Regularibus quorumvis Ordinum sunt sequentes. I. Habitum Regularem à legitimis Superioribus causa profitendi in eo suscipientibus, & vere poenitentibus, confessis, ac Sacra Communione refectis Indulgentia plenaria. II. Professionem (ut supra) emittentibus Indulgentia plenaria. III. Cuilibet Religioso intra Claustra sui Monasterii viventi, qui in Festo principali sui Ordinis confessus, & Sacra Communione refectus fuerit, aut Missam celebrans pro Christianorum Principum concordia, hæresum extirpatione, Romani Pontificis salute, ac Sanctæ Matris Ecclesiæ exaltatione, pias ad DEUM preces effuderit, Indulgentia plenaria.

71 IV. In cujuslibet vero mortis articulo, si pariter vere poenitens & confessus, & Sacra Communione refectus, vel, si id facere nequiverit, saltem contritus, nomen JESU ore, si potuerit, sin autem, corde devote invocaverit, Indulgentia plenaria. V. Qui primam Missam canonicè promotus, & confessus celebravit, vel confessus & communicatus eidem Missæ interfuerit, aut ipso die Missam similiter celebraverit, Indulgentia plenaria. VI. Spiritualia Exercitia per decem dies facientibus Indulgentia plenaria. Ubi tamen sciendum, quod novissime Alexander VII. in Bulla, *Cum sicut*. (& habetur tom. 5. Bullarii Romani Constit. 68. dicti Pont.) hujusmodi Indulgentias plenarias concesserit FF. Minoribus, qui per octiduum vacaverint Exercitiis Spiritualibus.

72 VII. Religiosi intra Claustra viventès, qui suam Ecclesiam devote visitaverint, & ut præfertur, oraverint, consequuntur easdem Indulgentias, quas visitantes Ecclesias Urbis, & extra eam diebus Stationum consequuntur, in omnibus diebus perinde, ac si ipsas Urbis Ecclesias personaliter visitarent. Circa hoc autem notandum est Decretum Sacræ Congregationis (c) quæ Indulgentias Stationum Urbis, quæ à Romanis Pontificibus singulari quodam beneficio vel communicatæ sunt, vel communicabuntur interdum aliquibus locis, Ordinibus, aut personis, diebus tantum Stationum in Missali Romano descriptis suffragari posse declarat. Ita Decretum.



73 VIII. Omnibus Religiosis intra Claustra viventibus, qui quinquies Orationem Dominicam & Salutationem Angelicam ante altare eorum Ecclesiae dixerint, in quolibet die quinque annos, & totidem quadragenas. IX. Easdem Indulgentias lucrantur existentes extra Claustra de licentia suorum Superiorum tamquam Praedicatores & Lectores, si dictas preces ante quodlibet Altare dixerint. X. Religiosi, qui per mensem integrum singulis diebus spatio mediae horae Orationem mentalem fecerint, ac confessi, & Sacra Communionem ultima Dominica mensis resecti fuerint, lucrantur sexaginta annos, & totidem Quadragenas.

74 XI. Qui vero contrito corde & poenitentes eorum culpas & peccata, ac imperfectiones in Capitulis culpae acculabunt, & spiritualiter communicabunt, & exercitium virtutum facient, tres annos & totidem Quadragenas. XII. Missiones ad Terras Infidelium acceptantibus &c. Indulgentia plenaria. XIII. Orationibus quadraginta Horarum per Superiores Ordinum indictis in Visitationibus Generalibus, qui spatio duarum horarum interfuerint &c. Indulgentia plenaria. NB. de qua ultima Indulgentia ex Cardinali de Lugo notat Viva in *Appendice de Indulgentiis* §. 3. quod absque priori onere comprecationis Provinciales in visitationibus eandem Indulgentiam plenariam soleant largiri ex concessione Gregorii XIII. deinde etiam Urbani VIII. Ceterum omnia alia patent ex citata Bulla Pauli V. unde desumpta sunt.

NB. Subsequentes duae Quaestiones sunt denuo de novo additae: relinquuntur tamen sub numeris suis, utpote sic jam in Editione quarta positae, quibus adhuc alia per modum Additionum subjunguntur.

### \* QUÆSTIO VII.

Quæ Indulgentiæ ab Innocentio XI. declaratae sint apocryphæ?

#### SUMMARIUM.

75 De Indulgentiis ab Innocentio XI. declaratis tamquam apocryphis, cum variis notabilibus.

\* Et quidem inprimis circa Indulgentias concessas ad recitationem Salutationis Angelicæ. Addit. I. II. & III.

\* Secundo quoad Cruces Caravallenses, & Monseratenses. Addit. IV. & V.

\* Tercio quoad Rosaria Hierosolymitana & Birgittina. Addit. VI. prope finem.

\* Quarto Declaratio Clausula addita Decreto Innocentii XI. quod tantum semel in die lucriferi possit Indulgentia plenaria in certos dies concessa. Add. VII. VIII. & IX.

75 **D**elatæ sæpius fuere ad Sacram Congregationem Indulgentiis, sacrisque Reliquiis præpositam Indulgentiæ quædam confictæ, & omnino falsæ, quæ per diversas orbis Christiani partes circumferuntur: aliæ vero examinandæ, quæ adhibito studio inventæ sunt, vel apocryphæ, vel a Romanis Pontificibus revocatae, vel nullæ, quod datum eis tempus præterisset: quarum quidam plurimæ, cum non facilem cognitionem habeant, Christi Fideles harum rerum minus peritos fallunt, qui spe Indulgentiæ, remissionisque peccatorum suorum consequendæ frustrantur. Quam ob rem eadem Sac. Congregatio vehementer cupiens huic malo magis in dies serpenti occurrere, animarum profectui, & Indulgentiarum dignitati consulere, plures illarum singulari diligentia colligi, & in indicem referri curavit.

Tales inprimis sunt illæ, uti asserunt, concessæ à Joanne II. & Sixto IV. recitantibus orationem Charitatis JESU Christi Domini Nostri, *Precor te piissime Domine* &c. Ab Urbano II. Ecclesiae S. MARIE, ut vulgo dici solet, Compagnoles, & S. Victoris. Ab Eugenio III.

Revelationi de Plaga in humero JESU Christi, facta S. Bernardo. Ab Innocentio III. Archi-Confraternitati, & Ordini Redemptionis. A Bonifacio IX. visitantibus Capellam S. Nicolai de Tolentino in ejus die Festo. A Joanne XXII. osculantibus mensuram plantæ pedis B. MARIE Virginis. Ab Alexandro VI. Imagini B. Mariæ, vulgo dictæ Laghetti. A Leone X. gestantibus funiculum S. Francisci, primum in Urbe impressæ, & deinde Mediolani Anno 1665. (suas tamen habent, & veras Confratres Archi-Confraternitatis Chordigerorum S. Francisci) Recitantibus salutationem Angelicam ad pulsum horologii, & Imagini Conceptionis Mariæ Virginis Immaculatæ in circulo depictæ, cujus pedibus Luna subjecta est, à Pio IV. vel Pio V. Principi Senarum. A Clemente VIII. dicentibus orationem: *O magnum Mysterium* &c. & Ecclesiae Sanctæ Mariæ quam vocant Montis Serrati, Avenione impressæ; tum aliæ pro animabus Christi Fidelium defunctorum, impressæ Madriti 20. Julii 1606. A Paulo V. cantantibus Hymnum: *Te Matrem DEI laudamus, Te MARIAM Virginem confitemur* &c. vel si die Sabbati intererint, dum idem canitur, & Coronis, Rosariis, Imaginibus, & Numismatibus, quæ Medalias appellant, ab eo benedictis, Federico Cardinali Borromeo supplicante Anno 1611. dum Ecclesia Romæ in honorem S. Caroli ædificaretur, & ab eodem Paulo, & Gregorio XV. dicentibus: *Sia lodato il Santissimo Sacramento, Laus Santissimo Sacramento*. Ab Urbano VIII. in honorem ejusdem Sacramenti precibus Cardinalis Magalotti, & Sacerdotibus, celebrata Missa dicentibus: *Ave Filia DEI Patris, Ave Mater DEI Filii* &c. A Clemente X. recitantibus mane, meridie, ac vespere consuetam Antiphonam: *Angelus Domini* &c. & in fine: *DEO gratias* & *Maria*. Ac demum aliæ à nonnullis Romanis Pontificibus tributæ, ut ajunt, Coronæ Mysteriorum Passionis Domini nostri JESU Christi, prece Magni Ducis Etruriæ.

Talis Indulgentia Sodalitatis S. Nicolai; qua repetita quinquies Oratione Dominica, & Salutatione Angelica, unam liberari animam quolibet die à purgatorii poenis affirmant. Tales aliæ Perusii Confraternitatis Sanctorum Sebastiani, & Rochi, & Romæ Societatis Sancti Bernardi ad Columnam Trajani. Tales demum aliæ Crucesignatorum S. Eustorgii Mediolani, Arimini, & Bononiæ.

Ejus generis sunt & illæ concessæ, ut ajunt, Capellæ Rosarii in Ecclesia S. Antonii de Rovigo, seu Rodigii, vel Ecclesiae Sanctissimæ Trinitatis Bergomi, aut S. Petri Montis Tondoni die Festo Inventionis Sanctissimæ Crucis, vel gestantibus funiculum S. Francisci de Paula, vel celebrantibus Missas S. Augustini, aut alias quinque in honorem quinque Festivitatum B. V. vel recitantibus Officium S. Franciscæ Romanæ, aut Antiph. *O Passio magna* &c. in memoriam Passionis JESU, aut Rosarium S. Annæ (quod Congregatio Sac. Rituum non probat) aut orationem, quæ impressa cum Imagine S. Annæ circumferri solet: *Ave gratia plena* &c. (quæ oratio prohibetur) aut Officium Conceptionis B. Virg. Immaculatæ, quod asserunt à Paulo V. probatum fuisse, aut Orationem: *DEUS, qui nobis in Sancta Syndone* &c. (excipitur Indulgentia centum dierum anno 1671. concessa precibus Ducissæ Sabaudiae ad annos 25, cunctis in illius ditione degentibus) aut aliam *Ave Filia DEI* &c. post Communionem recitandam, vel aliquo conspicuo signo venerantibus Sanctissimi Eucharisticæ Sacramenti Nomen: Indulgentiæ rursus octoginta millium annorum veteri de tabula exscriptæ, quam in Basilica Lateranensi asservari affirmant, pro dicentibus Orationem illam vere piam: *Deus, qui pro Redemptione Mundi* &c. tum quæ impressæ fuerunt, Papiæ anno 1670, sub hoc titulo, Sommario dell' Indulgenze concesse dalla Santità di N. S. Papa Leone X. all' Image della Conceptione della gloriosa Vergine Maria: vel Pisauri sub nomine beatæ Joannæ anno 1608. divulgatae: vel Barlettæ, seu Barul a recitantibus quasdam, non sane malas orationes, lucranda: vel Parmæ à visitantibus per

Quæ-



Quadragesimæ dies Ecclesiæ tertii Ordinis Sancti Francisci; vel Pistorii, & Vassallæ à recitantibus orationem: *Ave Sanctissima Maria Mater DEI, & Regina Cæli &c.* & aliæ in peculiari impresso libro descriptæ, quibus frui dicunt devotos Seraphicos, & Benefactores.

His annumerandæ sunt, quæ Crucibus *Caravacensis* tributa dicuntur, vel Coronæ, sive stellario Conceptionis Virginis Immaculatæ, quod ex duodecim globulis precariis constat, vel granis, crucibus, & Coronis Aloisii ab Ascensione Hispaniæ Monialis Ordinis Sanctæ Claræ, vel mensuræ altitudinis JESU Christi Domini nostri, vel Imagini, aut mensuræ vulneris lateri ejus inflicti, vel orationi, ut ajunt, in sepulchro Domini nostri repertæ, & Indulgentiæ, ut ajunt, innixæ revelationi factæ Sanctis Birgittæ, Mechtildi, & Elisabeth, vel Beatæ Joannæ de Cruce, & concessæ, ut asserunt, granis, quæ aliquod ex tribus granis tetigerint extantibus penes Romanum Pontificem, Hispaniarum Regem & Ministrum generalem Fratrum Minorum observantiæ Sancti Francisci.

Omnes vero & singulas jam dictas Indulgentias Sac. Congregatio partim esse confectas, & plene falsas declarat, partim, apocryphas, vel ex alio capite nullas, quæ nemini suffragari possunt, easque in futurum ullo in loco ut veras publicari, & lucrandas Christi Fidelibus proponi vetat, foliaque, & libros, ubi sic proponuntur, seu asseruntur, omnino præcipit aboleri, nisi prædictæ Indulgentiæ fuerint diligenter expunctæ; nec ideo tamen, vult, alias, quas hoc decretum non continet, pro veris, & legitimis, taciteque probatis haberi.

Ac demum omnes Indulgentias concessas ante Decretum Clementis VIII. latum die 9. Januarii 1597. Coronis Rosarii, Granis, seu Calculis, Crucibus & Imaginibus sacris, vel ante Breve Pauli V. quod incipit: *Romanus Pontifex &c.* editum 23. Maji anno 1606. personis Regularibus quarumcumque Religionum & ordinum, etiam Mendicantium, vel ante Constitutionem 115. Clementis VIII. cujus initium: *Quæcumque &c.* & 68. Pauli V. incipientem: *Quæ salubriter &c.* habitas per aggregationem, vel aliam communicationem ab Archi-Confraternitate ulla, Ordine, Congregatione, Societate etiam JESU, Capitulo, vel Coetu quocumque, vel ab eorum Officialibus, Superioribus, aliisque personis, vel persona, etiam si earum vel ejus mentio specialis, & individua facienda esset, nisi fuerint deinde Romani Pontificis Auctoritate innovatæ, aut confirmatæ, nullius esse roboris & momenti pariter declarat.

Porro Summaria Indulgentiarum pro Congregationibus Doctrinæ Christianæ, Confraternitatibus sanctissimæ Trinitatis, & Redemptionis Captivorum, Nominis DEI, Rosarii, B. Mariæ de Mercede, & Redemptionis Captivorum, B. Mariæ de Monte Carmelo, Cincturæ S. Augustini, & S. Monicæ, nisi ab eadem Congregatione recognita, non permittuntur.

Indulgentias vero Stationum Urbis, quæ à Romanis Pontificibus singulari quodam beneficio vel communicatæ sunt, vel communicabuntur interdum aliquibus locis, Ordinibus, aut personis, diebus tantum Stationum in Missali Romano descriptis, suffragari posse declarat: semel autem duntaxat in die plenariam Indulgentiam in certos dies Ecclesiæ visitantibus concessam, vel aliud pi-um opus peragentibus, lucriferi.

De quibus relatione facta per Secretarium ad Sanctissimum, cuncta Sanctitas sua probavit, & inviolate servari jussit.

Datum Romæ, die 7. Martii 1678.

*Aloysius Cardinal. Homodani.*

Loco † Sigilli.

*Michael Angelus Riccius Secret.*

#### Additio I.

\* Quod concernit *Angelus Domini*, id, quod novissimum est, addere volui, nimirum Benedictum XIII, in *Brevi Injuncta nobis*, edito 14. Septembris anno 1724. *Anacl. Reiffenstuel Theol. Tom. I.*

concessisse de novo Indulgentias perpetuas illud cum tribus *Ave Maria* ad sonitum campanæ recitantibus mane, aut meridie, seu vespere. Et quidem tales recitantes *in primis* quoties id egerint, præmissa, si in gravi peccato fuerint, contritione lucrantur Indulgentias centum dierum. *Secundo*, quolibet mense semel Indulgentias plenarias, si confessi, & Sacra Communione refecti consue- tas pro lucrandis Indulgentiis preces persolverint. Circa hanc tamen clementissimam concessionem duo moveantur dubia: & quidem. \*

#### Additio II.

\* Dubitatur primo. An Regulares has Indulgentias lucrari possint, si ad sonitum campanæ impediti recitent *Angelus Domini* privatim alio tempore? Respond. de hoc adesse indultum die 5. Decembris anno 1727. emanatum sequentis tenoris: *Litteris in forma Brevis emanatis die 14. Septembris anno 1724. Sanctissimus Dominus noster Benedictus XIII. Papa omnibus utriusque sexus Fidelibus ad sonitum campanæ consue- tas preces Angelus Domini &c. recitantibus semel in mense die ab unoquoque eligendo, si confessi, & sacra Communione refecti fuerint &c. plenariam Indulgentiam concessit. Reliquis vero diebus prædictas preces, uti supra, recitantibus Indulgentiam centum dierum. Quia vero Sanctitati suæ expositum fuit, quod sæpe Regulares, alique in Religiosis domibus commorantes eo tempore, quo mane, meridie, aut vespere campanæ pulsantur, quibusdam actionibus ad regularem observantiam spectantibus detinentur, & ideo easdem preces tunc temporis recitare minime possunt; ac in simul præfatorum nomine humilissime supplicatum fuit, ut Sedis Apostolicæ dispensatione, prædictas preces alio tempore recitando, easdem Indulgentias lucrari valeant. Eapropter Sanctissimus Dominus noster audito voto S. Congregationis Indulgentiis, sacrisque Reliquiis præpositæ benigne indulgit, ut Regulares omnes alique in Religiosis domibus commorantes, si, dum, ut supra, campanæ pulsantur, aliquod opus exercent, quod ad Regularem observantiam pertinet, nihilominus supra memoratas Indulgentias acquirere possint, dummodo statim, ac opus prædictum expletum fuerit preces supra memoratas flexis genibus devote recitent. \**

#### Additio.

\* Dubitatur secundo. An illa recitatio flexis genibus faci-enda adeo necessario ad valorem Indulgentiarum istarum requiratur, ut neque diebus dominicis, neque intra tempus Paschale dictæ preces stando persolvi queant? Ratio dubitandi est; quia juxta communem sensum contra Gavantum recitatio Angelica est potius *Oratio*, quam *Adoratio*, atqui juxta præscriptum Rubricarum ad Orationem diebus Dominicis, ac tempore Paschali potius debet dari, quam genuflecti: ergo etiam in præsentia, cum non præsumatur, Summum Pontificem velle alligare Indulgentiam illis actibus, qui sunt contra Rubricas. Hoc prænotato, Resp. Si recitationem Angelicam *Orationem esse putas* (inquit in formalibus Gavantus Tomo II. Thesauri SS. Rituum, sect. 6. cap. 13. num. 28.) stare debes, si adorationem, genua flectere. Ego existimo adorationem esse *Verbi Divini*: sed quia NB. communior est hodie sensus, & usus, quod ea sit *Oratio*, nec ego genua flecto cum aliis. Ita ille: nec censetur Summus Pontifex (uti inquiunt alii) per suam Concessionem voluisse hunc sensum communem immutare, neque laudabilem consuetudinem diebus Dominicis, & tempore Paschali ad recitationem Salutationis Angelicæ standi in rememorationem Resurrectionis Dominicæ ita tollere, ut stando non amplius obtineantur Indulgentiæ. Hoc duplici fundamento ductus pariter ego judicavi, posse probabiliter dicto tempore Indulgentias memoratas etiam stando obtineri. Cui sententiæ pariter adstipulatur novissime Apollonius Holzman Tom. 2. Theolog. moral. tract. 4. numer. 802. adjungens insuper Sum-



num Pontificem probabiliter noluisse valorem Indulgentiarum ipsi situi, ac modo Orationis, sed soli substantiæ ejusdem recitationis alligare, sicut à pari, quamvis in ordine ad obtinendas Indulgentias Stationis SS. Sacramenti in Calendario Franciscano Romæ impresso dicatur, ut *sex Pater, & Ave cum totidem Gloria Patri &c.* ante Altare SS. Sacramenti recitentur *brachiis extentis*, ob eandem rationem *brachiorum extensio* non requiritur ad ipsam valorem Indulgentiarum, sed sola substantia recitationis, uti ait Engelbertus Pauck in *Vinea seraphica* cap. 21. num. 93. *prope finem*, quia nimirum Summus Pontifex valorem dictarum Indulgentiarum censetur, soli recitationi precum in honorem Sanctissimi Sacramenti alligasse; præsertim cum recentiores Pontifices quoad Stationem SS. Sacramenti de brachiorum extensione mentionem non faciant. Ita discurrunt dicti Auctores, quos adhuc libenter sequeretur, nisi quoad recitationem Salutationis Angelicæ me absterret aliqua declaratio Sacre Congregationis genuflexionem etiam tempore Paschali requirentis apud Cajetanum Merati in suo Thesauro Sacrorum Rituum, Romæ in Typographia Vaticana impresso tom. 2. part. 1. sect. 5. cap. 2. folio apud me 237, ubi tamen addit, quod Regulares, si, dum pulsatur signum Salutationis Angelicæ, sint impediti ob aliquod exercitium sui instituti, ita ut nequeant pro tunc persolvere flexis genibus, possint id præstare cessante impedimento, & sic consequi Indulgentias; uti de hoc indultum Summi Pontificis adducit Josephus Fonseca ab Eboræ in suo Regesto Romæ impresso apud me folio 319. \*

## Additio IV.

\* Quæ. I. Cum Innocentius XI. in proxime allegato Brevi Apostolico annumeret indulgentiis apocryphis tributas Crucibus Caravacensibus (vulgo Hispanicis) quænam sint illæ Indulgentiæ apocryphæ? Respondet Pater Apollonius Holzman tom. 2. tract. 4. num. 795. esse eas, quas de novo Innocentius XIII. die 5. mensis Junii anno 1721. per Decretum *Nuper Sacre Congregationi*, rejecit contentas in aliquo Summario Indulgentiarum, Germanico pariter idiomate conscripto, cujus initium est: *Indulgentia, quæ pro Crucibus Caravacensibus concessæ fuerunt à Romanis Pontificibus Pio V. Gregorio XV. & Clemente X. denuo confirmata ab Innocentio XII.* Finis autem dicti Summarii taliter sonat: *pro Consolatione Christi Fidelium, & Sanctæ Crucis amatorum.* In hoc Summario inter alia legitur, quod singulis diebus ille, qui secum portat similem crucem, lucretur Indulgentias plenarias, & fiat particeps omnium bonorum operum potius Christianitatis, dummodo semel intra illum diem recitaverit unum Pater, & Ave. Item si diebus Dominicis, vel festivis audiat, vel legat Missam, præter Indulgentias plenarias liberet duas animas à purgatorio. Item, si talis confiteatur, & communicet, & post Sacram Communionem aliquot dicat Pater, & Ave, tot è pœnis purgatorii liberet animas, quot Pater, & Ave recitaverit. Quod idem addit sentiendum de Sacerdote celebrante. \*

## Additio V.

\* Quæ. II. Quid sentiendum sit de Indulgentiis, quæ circumferuntur concessæ Crucibus, vel etiam Numismatibus, aut Rosariis Monserratenensibus? Respondeo, nisi post Benedictum XIII. possit authentice exhiberi favorabilior concessio nova, deberi censi apocryphas, aut expresse revocatas alias Indulgentias, quæ circumferuntur concessæ dictis Crucibus &c., præter illas, quæ exprimuntur in Summario Indulgentiarum edito 2. Januarii anno 1727. & confirmato à Benedicto XIII. per Breve seu Bullam *Piis Orthodoxorum Principum* de dato Romæ 21. Martii anno 1729. Ita expresse ait Pontifex citata Bulla, in qua cum cassatione aliarum Indulgentiarum de novo Crucibus, seu Numismatibus,

aut Rosariis ab Abbate Ordinis S. Benedicti Monasterii Montis Serrati Benedictis sequentes largitur gratias.

*Primo. Indulgentias plenarias in Festis Nativit. Dom. Epiph. Resurrect. Ascension. Pentecostes. SS. Trinitatis. & Corporis Christi. Item in Festis Purificationis, Concept. Annuntiat. Assumpt. & Nativit. B.V. Item in Fest. Omni. Sanct. & Sancti Benedicti, si habentes talia Numismata vel Cruces &c. fuerint confessi, & communicati, atque consuetas pro extirpatione Haresum &c. preces persolverint, nec non saltem semel in hebdomade Coronam Domini, vel Beatæ Virginis, vel Officium Divinum recitaverint, aut pauperibus succurrerint, aut Missam legerint, vel ei assisterint, &c.*

*Secundo. Qui confessi, & communicati fuerint Feria V. in Cena Domini, & in Paschate, atque ad Deum oraverint pro exaltatione S. Matris Ecclesiæ, & conservatione Summi Pontificis, eandem Indulgentiam, quam Sanctitas sua diebus prædictis populo concedit in Benedictione solemniter.*

*Tertio. Qui oraverint pro conservatione, & augmento Religionis S. Benedicti, erunt particeps omnium bonorum operum, quæ in hac S. Religione fiunt.*

*Quarto. Quicumque in articulo mortis SS. Sacramenta receperint, vel, si per aliquod impedimentum recipere non possint, fuerint contriti, dicendo, si lingua non possint, corde JESUS & Maria, obtinent plenariam Indulgentiam omnium suorum peccatorum.*

*Quinto. Qui audierint, vel (si sint Sacerdotes) celebraverint Missam, & oraverint pro Christianorum Principum prosperitate & suorum Statuum tranquillitate, lucrantur Indulgentias septem annorum, & totidem Quadragenarum.*

*Sexto. Quicumque peregerint aliquam cujuscunque generis orationem preparatoriam ante Missæ celebrationem vel ante S. Communionem, aut ante recitationem Officii Divini, vel B. Virginis Mariæ, consequuntur qualibet vice 50. dierum Indulgentiam. \**

## Additio VI.

\* Plures adhuc partiales Indulgentiæ continentur in dicto Apostolico Benedicti XIII. Decreto circa Cruces Monserratenenses cum expressa additione, quod omnes & singulæ possint quoque applicari animabus in purgatorio. Hæ vero sunt potiores, & principales. Mandat autem ibidem Sua Sanctitas, ut in distributione similium observeretur Decretum Alexandri VII. editum 6. Febr. anno 1657. nimirum quod hæ Cruces &c. cum dictis Indulgentiis benedictæ non valeant pro alia persona ab illa, cui concessæ, vel cui prima vice fuerint distributæ, atque hæ non possint commodare aliis, à quibus rogata fuerit; *seus Indulgentia suum effectum perdet.* Ceterum dicta quoad similium Crucum concessionem, & distributionem cum P. Apollonio Holzman tom. 2. tract. 4. de Penit. num. 799. intelligo; si fuerint datæ dictæ Cruces &c. & applicatæ jam pro proprio usu, quod nimirum tunc tales Cruces pro proprio usu applicatæ nequeant ab his iterum aliis donari, vel commodari cum effectu transferendi in eos ipsas Indulgentias: secus si fuerint datæ eo fine, ut accipiens aliis pro libitu distribuat.

*Præterea declarat Sua Sanctitas, quod si aliqua talis Crux, Corona, Rosarium, vel Medalia perdatur, non possit substitui alia, quæ non sit benedicta per Abbatem Monserratensem.*

*Prohibet insuper, ne pro his Crucibus præbeat, vel solvatur res etiam minima, sub pœna perdendi omnes Indulgentias, & aliis pœnis per Episcopos, vel inquisitores Fidei imponendis Quæstoribus, & quibuscunque aliis, qui res sacras venales habent.* Similes clausulas apud Holzman loc. cit. num. 798. & duobus sequentibus reperio inferas Decretis Clementis XI & Innocentii XIII. circa Cruces Hierosolymitanas, uti & circa talia Rosaria, ac Coronas Birgittinas. \*

## Additio.



Additio VII.

\* Quæres III. Quomodo intelligenda sit ultima declaratio Decreto Innocentii XI. in fine addita, quæ sic sonabat: *Declarat* (Supple S. Congregatio cum approbatione Summi Pontificis) *semel dumtaxat in die lucrificari plenariam Indulgentiam in certos dies visitantibus Ecclesiam, aut aliud pium opus peragentibus concessam?* Respondeo, etsi plures antiquiores DD. voluerint, Indulgentias omnes indefinite, id est, absque restrictione explicita ad unicam dumtaxat vicem concessas, obtineri posse intra diem non semel dumtaxat, sed toties, quoties eodem die interruptim Ecclesia visitatur, aut aliud præscriptum opus pium peragitur: quoniam Beneficium Principis (uti aiebant) indefinite concedentis gratiam potius est ampliandum, quam restringendum ad unicam vicem, nisi ipsemet Pontifex sic restringat expresse; hæc tamen allegata doctrina sic universaliter prolata post novissimum citatum Decretum Innocentii XI. amplius sustineri nequit quoad Indulgentias ordinarias ipsimet vivis concessas, si eadem sint certo die affixæ, & quidem plenariæ, ac posito, quod vellent vivi talem Ecclesiam sæpius visitantes, aut præscriptum pium opus peragentes *sibimetipsis easdem sæpius de die applicare*. Ita clare eruitur ex formalibus allegati Decreti, dummodo ad singula verba illius bene attendatur. \*

Additio VIII.

\* Dicitur notanter I. *Loquendo quoad Indulgentias ordinarias*: nam aliter discurrendum de extraordinariis, puta Portiunculæ, sub hoc ordinario Decreto non comprehensis, pro quibus jam superius adducta est singulariter favorabilis responsio S. Congregationis, & insuper à Sabino Bononiensi *part. 2. Lucis Moralis, tr 65. in Apologia*, assertur specialis Bulla S. Pii V. Indulgentias Portiunculæ *toties, quoties* expresse largientis.

Dicitur notanter II, Supposito, quod *eadem affixæ sint certis diebus*, nam si non sic forent affixæ, sed perpetuæ pro quocumque anni die obtinendæ, non desunt DD. qui defendunt, easdem adhuc pro se etiam intra unum diem obtineri posse sæpius. Ita enim cum Petro Murgæ, Passerino & aliis tenent Gobat hic *tract. 3. n. 143. & Kazenberger in Supplem. Theolog. Sacrament. cap. 3. sect. 1. num. 51*. Rationem assignant istam: quia ex una parte Decretum Innocentii XI. superius allegatum tantum loquitur de Indulgentiis certo diei affixis, non autem de perpetuis ad quemcumque diem totius anni extentis; ex altera vero Beneficium Principis concedentis aliquam gratiam nemini præjudiciosam potius est ampliandum, quam restringendum ad unicam dumtaxat vicem, ubi ipsemet Pontifex expresse non sic restringit.

Dicitur notanter III. *Si fuerint plenariæ*: etenim quoad partiales, de quibus pariter declaratio illa Innocentii XI. nullam facit mentionem, æque sustinent aliqui DD. easdem, quamvis certo diei affixas, obtineri posse *toties, quoties* ob rationem superius adductam. Ita Dominicus Viva *tract. de Jubil. quæst. 6. art. ult. & in App. §. 1. num. 8*.

Dicitur notanter IV. Indulgentias plenarias pro vivis certo diei affixas obtineri intra diem non posse sæpius, posito, quod *vivi Ecclesiam talem plenariis Indulgentiis decoratam visitantes velint sibimetipsis applicare sæpius*: nam, si datur à Summo Pontifice licentia, eas per modum Suffragii donandi defunctis, posse pro tunc illis intra diem sæpius applicari, si Indulgentiæ non fuerint expresse ad unicam dumtaxat vicem limitatæ, & insuper repetantur visitationes aliaque præscripta pia opera illa, quæ eo die adhuc repeti possunt, tueretur Dominicus Viva *loc. cit.* \*

Additio IX.

\* Verum valeant hæc nonnullorum DD. contra allegatam Innocentii XI. declarationem exceptiones, quantum valere possunt, ego quoad tres ultimas nonnihil subsisto, an per stylum Curia approbentur, nisi Pontifex circa unam alteramve Indulgentiam extraordinariam in particulari expresse, vel saltem propter usum ac persuasionem publicam, præsertim si simul solitum à Sacra Congregatione approbetur, tacite consentiat, Indulgentias tales intra unum diem lucrificari posse *toties, quoties*. Nec dubium hoc meum sufficienter mihi solveretur per illud principale horum Doctorum fundamentum: nimirum quod Beneficium Principis gratiam aliquam indefinite concedentis sit potius ampliandum, quam ad unicam dumtaxat vicem restringendum: *respondere enim potest imprimis*, hoc argumentum, si quid evinceret, probare nimium: videlicet, Indulgentias plenarias ordinarias certo diei affixas posse quoque pro Vivis obtineri *toties, quoties*, dummodo fuerint indefinite (id est non limitando explicitè ad unicam tantum vicem) concessæ, quod equidem ob hoc ipsum fundamentum admiserunt multi DD. ante Innocent. XI. is tamen per allegatum Decretum reprobavit. Ex quo erui videtur, quod Pontifex per suum modum loquendi indefinite circa Indulgentias nolit intelligi, quasi exinde vellet concedere easdem ordinarie intra diem sæpius, quam unica vice. Dixi *ordinarie*; nam quoad extraordinarias non est difficultas, præsertim si addit insuper aliqua specialis Bulla, vel Decretum Sac. Congregationis. Igitur *Respondere posset in forma II.* Beneficium equidem Principis non debere sine gravi fundamento restringi, sed nec ampliari ultra sensum verisimiliter ab ipso Principe intentum. Quomodo autem ordinarie nolit Pontifex tamquam supremus Princeps quoad indulgentias concessas intelligi, quasi easdem de die annueret dare sæpius per hunc modum loquendi indefinite, videtur saltem probabiliter deduci ex jam dictis. Ceterum resolvendo pro praxi haud dubie nocere non poterit, si in similibus circumstantiis intra diem visitatio, aliaque pia opera repetantur, & usque dum aliter ab Ecclesia declaretur, intentio conditionata formetur, ut, si sæpius hæc Indulgentiæ in tribus ultimis exceptionibus contentæ obtineri possint, velit quis easdem sæpius pro se, vel pro defunctis, conformiter dictis superius, lucrari. Quod si ex tunc à parte rei non essent pluries, quam unica vice lucrabiles, saltem ex frequentata visitatione Ecclesiæ, & aliis piis operibus peractis habebit meritum ex opere operantis, poteritque fructum satisfactorium animabus in Purgatorio applicare. \*

\* Q U Æ S T I O VIII.

Quænam Indulgentiæ post novam reformationem soleant de facto ordinarie concedi Romæ Ecclesiis, vel Altaribus, & quomodo practice petantur? Ubi etiam de notabilioribus quibusdam Clausulis, quæ nonnullis Brevibus apponi solent.

S U M M A R I U M

76 De Indulgentiis, quæ de facto solent ordinarie ad instantiam concedi Ecclesiis.

Item, quæ Altaribus privilegiatis?

77. 78 Quomodo intelligenda sit Clausula: Dummodo alia similis &c.

\* Ponitur desuper notabilis casus.

79 De Clausula: Dummodo septem Missæ &c.

\* Adjunguntur notabiles super hanc Clausulam declarationes.

80 An non detur Altare privilegiatum cum minori numero Missarum?

\* Novum circa hoc Decretum quoad Fratres Minores. Addit. I. & II.



81 Quo tempore incipiat Concessio Altaris privilegiati, aut alterius Indulgentia?

\* An computetur annus Jubilaeus?

82 Quomodo practice petenda sit pro Ecclesia aliqua Indulgentia?

83 Qualiter petenda pro Altari privilegiato quoad omnes Defunctos?

84 Quomodo pro Confraternitate?

\* Alia circa erectionem Confraternitatis observanda.

85 Quomodo pro Altari privilegiato alicujus Confraternitatis?

86 An pro expeditione Brevium Indulgentiarum aliquid debeat expendi?

76 **E**T si Summi Pontifices alii soleant concessionem Indulgentiarum ampliare, alii vero, ne ipsa multitudo contemptum, vel negligentiam pariat, restringere, sicque ob variationem circumstantiarum nequeat adduci uniformis quoad concessionem Indulgentiarum pro perpetuis temporibus observantia; juvat tamen pro aliqua saltem directione in medium afferre, qualiter post novam Indulgentiarum reformationem ordinarie (& nisi Summus Pontifex alicui specialem faciat gratiam) soleant concedi Indulgentiae, prout hanc ipsam informationem Roma accepimus à nostro Procuratore Generali Curiae Romanae, eamque jam quartae Editioni adjunxi cum numeris ordinariis, prout etiam hic observo, ne confusio fiat in novo indice.

## FORMULA NOVA.

Qualiter de facto concedantur Indulgentiae pro Ecclesiis, aut Altaribus privilegiatis, si Romae petantur?

### §. I.

77 **I**ndulgentiae quadraginta horarum in Ecclesiis Cathedralibus, Collegiatis, Parochialibus, Conventuum Regularium, virorum tantum, & Confraternitatum, semel tantum in anno, & ad septennium: in Italia continuatarum, ultra montes interpolatarum noctis tempore. In aliis Ecclesiis, ut supra non qualificatis, ac signanter in Ecclesiis Monialium, & Conservatoriorum non concedantur.

Nota I. Quod per Conservatoria feminarum intelligantur certa Loca à feminis electa, ut ibidem Deo serviant &c.

Nota II. Non esse mirandum, quod hic, & alibi excludantur Ecclesiae Monialium; quoniam ipsis praeter Indulgentias sui Ordinis conceduntur speciales inferius. Quinimo in Bavaria vidi etiam in nonnullis Monasteriis Monialium institui Comprecationem quadraginta horarum; ubi tamen, ut desuper Romae impetrent Indulgentias per gratiam extraordinariam, indigent Patrono speciali.

### §. II.

**I**ndulgentia Novena Nativitatis Domini Nostri JESU Christi, conceditur pro Ecclesiis ut supra qualificatis, tantummodo per Septennium.

Indulgentia Feriarum sextarum Mensis Martii, vel Quadragesimae pro Ecclesiis, ut supra qualificatis, tantummodo ad Septennium.

Indulgentia plenaria ad Septennium in Ecclesiis secularibus, cum suis solitis restrictivis pro Titulari, vel in uno anni die festivo alicujus Sancti, in Martyrologio Romano descripti, vel una Dominica in anno, vel pro Dedicatione earundem Ecclesiarum.

### §. III.

In Ecclesiis Regularibus Virorum, & Monialium.

**P**ro Ecclesiis Regularium (quae nimirum alias jam habent Indulgentias Ordinis) conceditur plenaria ad Septennium sine restrictivo pro Titulari tantum. Nec hoc mirum, cum dictae Ecclesiae pluribus aliis Indulgentiis Ordinis decoratae sint, uti nostrae in Festis S. Catharinae Bonon. S. Paschalis, S. Bernardini, S. Antonii de Padua, S. Bonaventurae, S. Clarae, S. Ludovici Episcopi, S. P. Francisci, S. Petri de Alcantara, S. Jo. de Capistrano, & S. Didaci &c.

Indulgentia plenaria ad Septennium in Ecclesiis Regularium, sub titulo B. Mariae Virginis pro una ex Festivitatibus ejusdem B. Mariae Virginis cum clausula: dummodo praeter ea, quae sunt Ordinis &c.

### §. IV.

In omnibus Ecclesiis, exceptis Monialium, & Conservatoriorum.

**I**ndulgentiae septem Altarium duodecim vicibus in anno, ad Septennium.

Litaniae B. M. Virginis semel in hebdomada ad Septennium.

### §. V.

In omnibus Metropolitanis, & Cathedralibus.

**D**uae plenariae in anno cum solitis restrictivis ad Septennium.

### §. VI.

Pro Monialibus intra claustra.

**P**raeter Indulgentias Ordinis &c.

Indulgentia plenaria in quatuor anni Festis, per Moniales eligendis, & ab Ordinario approbandis, ad Septennium.

Litaniae Beatae Mariae Virginis semel in hebdomada ad Septennium.

Septem Altaria duodecim vicibus in anno ad instar septem Altarium Basilicae S. Petri de Urbe ad Septennium.

Septem Ecclesiae de Urbe ter in anno ad Septennium.

Scala Sancta ad instar &c. ad Septennium.

Novena Nativitatis Domini Nostri JESU Christi ad Septennium.

Indulgentia plenaria in Articulo mortis pro Monialibus nunc viventibus.

### §. VII.

Extra claustra.

**P**ro Titulari tantum.

Et in Ecclesiis sub titulo B. M. V. pro una ex septem Festivitatibus ejusdem B. M. V. cum clausula: dummodo praeter ea, quae sunt Ordinis &c.

Taceo hic, quod Ecclesiae Monialium saepius ex speciali gratia soleant incorporari Lateranensi, vel alteri Ecclesiae, ex qua pariter pro se, quin etiam saepe pro aliis praesertim consanguineis acquirere possint magnas Indulgentias.

### §. VIII.

Pro Hospitali.

**I**ndulgentia plenaria in articulo mortis pro morientibus in Hospitali, ad Septennium.

### §. IX.



# Quæst. VIII. Quænam Indulgentiæ post novam reformat. &c. 391

## §. IX.

### Pro Missionibus,

**I**ndulgentia plenaria ad instantiam Archi-Episcoporum, & Episcoporum, ad Septennium.

## §. X.

### In Regno Poloniæ.

**U**na plenaria, & alia septem annorum, ac totidem Quadragenarum cum solitis restrictivis in Parochialibus & Collegiatis Ecclesiis, ad Decennium.

## §. XI.

### Altaria privilegiata in genere.

**I**n omnibus Ecclesiis conceditur Altare privilegiatum (exceptis tamen Monialium, nisi sint Parochia) semel in hebdomade cum octava mortuorum, seu Commemorationis omnium Fidelium, & cum numero septem Missarum. Bis autem in hebdomade cum numero quatuordecim Missarum, ad Septennium.

Nota denno, quod, etsi Moniales hic excludantur, nihilominus in sequenti numero earum Ecclesiæ saltem quoad se, & consanguineos Altari privilegiato condecorantur. Itaque

## §. XII.

### Pro Monialibus.

**A**ltare privilegiatum semel in hebdomade sine numero Missarum pro anima cujuscunque Monialis, earumque Consanguineorum, & Affinium primi, ac secundi gradus, nec non Monasterii Benefactorum, ad Septennium.

Ex quo patet, quod Privilegium Monialium ex parte sit majus præcedenti; cum non restringatur ad numerum Missarum: partim vero minus; quia limitatur ad certas personas, ut ad Moniales, & certos Consanguineos, ac Benefactores tantum.

Quod si Monialium Ecclesiæ sint simul Parochia. conceditur Altare privilegiatum, etiam pro anima cujuscunque Christi Fidelium semel in hebdomade, cum numero septem Missarum, ad Septennium.

## §. XIII.

### Pro qualibet Confraternitate.

**A**ltare privilegiatum semel in hebdomade sine numero Missarum: aut tantum pro animabus Confratrum & Sororum, ad Septennium.

Ex quo patet, quod, si in aliqua Ecclesia Parochiali; vel alia sint tantum duo, vel ad summum tres Sacerdotes, & nequeant ob defectum numeri Missarum obtinere Romæ Altare privilegiatum absolutum pro omnibus Christi Fidelibus, consultum sit, ut ibi instituant Confraternitatem, vel incorporentur alicui Archi-Confraternitati, ex quo saltem obtinere poterunt Altare privilegiatum pro fratribus & sororibus absque eo, quod requiratur aliquis certus numerus Missarum.

## §. XIV.

### Pro Hospitali.

**A**ltare privilegiatum pro morientibus in Hospitali sine numero Missarum. ad Septennium.

## §. XV.

### In Polonia.

**A**ltaria privilegiata semel in hebdomade cum numero trium Missarum. & bis in hebdomade cum numero sex Missarum. ad Decennium.

78 Quæres I. Quomodo in Brevibus Indulgentiarum intelligenda sit illa clausula: *Dummodo in Ecclesia alia Indulgentia concessa non sit, quæ adhuc duret*, vel etiam altera: *Volumus autem, ut, si alia Indulgentia in dicta Ecclesia perpetuo, vel ad tempus nondum elapsum duratura concessa sit, præsentibus sint nulla.* Respondeo, tam nostrum Franciscum Diaz in Directorio trium Ordinum fol. 315. quam Claudium la Croix S. J. lib. 6. Theol. mor. part. 2. n. 1379. afferre Decretum Innocentii XI. declarantis hanc clausulam, ut sequitur:

Cum à S. Congregatione Indulgentiarum, sacrisque Reliquiis præposita Cameracensis Archi-Episcopus quasivisset, quæ vis & sententia clausulæ (quæ hodie Brevibus Indulgentiarum opponi solet) volumus autem, ut, si alias Christi Fidelibus dictam Ecclesiam qualibet anni die visitantibus alia Indulgentia perpetua, vel ad tempus nondum elapsum duratura, concessa fuerit, præsentibus litteræ nullæ sint. S. Congregatio, re diligentius examinata, clausulam sic explicandam censuit, si videbitur Sanctissimo Domino Nostrò. Ea minime contineri Altaria privilegiata pro defunctis, neque Indulgentias, aut certo personarum generi concessas, ut Confraternitati, Regularibus, & Capitulo, aut certum pium opus in ipsa Ecclesia peragentibus, ut Litanias, aliasve hujusmodi preces recitantibus, ac iis, qui Christiana doctrina erudiuntur, vel alios erudiunt, & qui Sanctissimi Eucharistiæ Sacramenti expositioni cum oratione quadraginta horarum intersunt, neque Stationum Urbis & septem Altarium indulgentias instar septem Altarium Basilicæ Vaticanæ concessas, neque denique, quæ pro unica vice conceduntur. Ceterum, si alia Indulgentia sive plenaria, sive non plenaria, in perpetuum, vel ad tempus, tum ab eodem, tum ab alio Romano Pontifice, generatim Christi Fidelibus, Ecclesiam vel aliquod ejus Altare seu Capellam visitantibus, eodem anni die vel diverso concessa fuerit, de qua non fiat in litteris Apostolicis mentio, has litteras ob adjectam Clausulam esse prorsus irritas, ac nullas. Datum die 23. Julii 1676. De his autem facta relatione ad Sanctissimum Dominum Nostrum die 18. Martii 1677. sententiam Congregationis approbavit. Affixum & publicatum &c.

### Additio.

\* Ast formemus sequentem casum. Ecclesia Parochialis N. ad septem annos decorata est indulgentiis plenariis ad Festum S. Jacobi Patroni dictæ Ecclesiæ. Parochus cupiens prorogationem harum indulgentiarum ad aliud Septennium, mature, & ne litteræ retardentur, jam ad initium sexti anni scribit Romam, atque etiam intra paucos menses novum Breve Concessionis impetrat cum allegata tamen clausula: *Dummodo alia Indulgentia in Ecclesia concessa non sit.* Videns autem Parochus, quod primum Septennium necdum sit elapsum, sicque Ecclesia sua adhuc vi primi Brevis ultra annum dictis indulgentiis decorata persistat, dubitat exinde, num validum sit Breve secundum pro alio tempore ex ea ratione, quia Ecclesia sua alia Indulgentia decorata jam est, utpote cum primum Septennium necdum exspiraverit? Respondeo tamen ad hoc dubium, omnino valere secundum Breve indulgentiarum, ita nimirum, ut ultimo anno primi Septennii adhuc pro Festo S. Jacobi subsistant indulgentiæ vi primæ concessionis, pro subsequenti autem tempore vi secundi Brevis Apostolici proximè impetrati. Ita recte Gobat apud Kazenberger in Supplem. Theolog. Sacram. Patris Sporer cap. 3. sect. 1. n. 59. Ratio est: quia dicta clausula, dummodo alia Indulgentia concessa non sit &c. ita intelligi debet, ut alia Indulgentia modo superius explicato in Ecclesia non existat post elapsum primum Septennium. Videatur Kazenberger loc. cit. n. 68. ad finem.

79 Quæres II. Quomodo circa Altaria privilegiata intelligenda sit illa clausula: *Dummodo in ea septem Missæ quotidie celebrentur?* Respondet ex P. Gobat Matthæus in suo Officiali Curia Regularis, vers. Indulg. n. 28. sensum esse, dummodo soleant celebrari; adeo, ut non



conditio non deficiat, si aliquando casu & fortuito contingat non tot celebrari, præsertim quia dictio *quotidie* non videtur sumi grammaticaliter, sed moraliter. Ex quo etiam Gobat apud citatum Auctorem putat, propterea Indulgentiam non corrumpere, si quandoque, aliqua iusta causa vel necessitate, aut infirmitate, vel ob hostium incursum uno die, vel etiam mense non celebrentur septem Missæ, dummodo tamen alias regulariter sic soleant celebrari.

#### Additio.

\* Ne autem tempus illud, quo subinde septem Missæ per diem in tali Ecclesia non leguntur, nimium extendatur, ex eodem Matthæucio in cantela Confessarii lib. I. cap. 27. num. 57. bene notanda veniunt Responsa Sac. Congreg. ad dubia super numerum Missarum celebrandarum in Ecclesia, in qua est Altare privilegiatum. Petebatur itaque

Primo. *An absentibus Religiosis ex causa Prædicationis tempore Quadragesimæ, & Adventus, vel quando occasione Festivitatum, vel funerum, aut similibus à Superioribus ad celebrandum alibi mittuntur, Indulgentia concessa cum certo numero Missarum, qui ob dictas causas adimpleri non potest, prorsus cessent, vel pro tempore, quo dictus numerus Missarum non fuerit adimpletus, sint suspensæ, vel potius maneant in suo robore?*

Secundo. *An idem sit statuendum deficiente præfixo numero Missarum ob infirmitatem Sacerdotum tam Regularium, quam Secularium?*

Tertio. *An pariter idem sit statuendum deficiente prædicto numero Missarum ob absentiam ab Ecclesiis secularibus Canonicorum, & Sacerdotum per aliquot dies, & menses?*

Horum dubiorum Resolutionem Summus Pontifex remisit S. Congreg. quæ anno 1701. 30. Julii respondit:

Ad primum. *Quoad primam partem pro tempore Adventus, & Quadragesimæ remanere suspensas, non autem in reliquis, dummodo raro contingat.*

Ad secundum. *Non remanere suspensas.*

Ad tertium. *Provisum in primo.*

Hucusque Respons. S. Congreg. videnda apud Kazenberger loc. cit. sect. 2. n. 134. ac in ipso Bullario Clementis XI. edito Romæ anno 1723. folio apud me 542. part. 3. Decr. 3. Sac. Congr. Conc. Trid. Interpretum. \*

80 Quæres III. An pro impetrando Altari privilegiato non possit obtineri restrictior numerus Missarum? Resp. Præter Altaria Confraternitatum (de quibus jam antea) etiam quoad alia posse obtineri Privilegium, si supplicetur, saltem cum minori numero, nimirum quinque Missarum; quinimo, quotiescumque aliqua specialis adesset circumstantia, v. g. si Ecclesia sit undequaque ab Hæreticis circumdata, vel si ob vicinarum aliarum Ecclesiarum carentiam tot essent onera Missarum, ut piis Fidelium desideriis, & intentioni alias satisfieri nequiret &c. restringeretur numerus etiam ad quatuor Missas. Ita modernus stylus Curia.

#### Additio. I.

\* Item die 14. Decembris anno 1625. per speciale Decretum Benedictus XIII. Fratribus Minoribus nostro Generali subjectis Altare privilegiatum in eorum Ecclesiis concessit absolute, & quidem in perpetuum pro animabus quorumcumque Christi Fidelium taliter, ut, si in simili Ecclesia quatuor Missæ celebrentur, Altare Privilegiatum valeat pro una feria cujuslibet hebdomadis: si decem Missæ, pro duabus feriis: si quindecim, pro tribus: si viginti, pro quatuor: si viginti quinque, pro quinque feriis: & demum si triginta quinque, quotidie. In Regno vero utriusque Poloniæ concessit Altare Privilegiatum perpetuum pro una feria cum numero trium Missarum: pro duabus feriis cum numero sex Missarum quotidianarum. Quinimo in Ecclesiis sitis in partibus infidelium, vel hæreticorum concessit Altare Privilegiatum in perpetuum pro una feria cujusvis septima-

næ absque expressione numeri Missarum: quam gratiam pariter indulgit Ecclesiis Monialium, ast tantum pro ipsis Monialibus, earumque Consanguineis, Affinibus, & Benefactoribus.

#### Additio. II.

\* Insuper novissime (id est 24. Martii anno 1741.) Benedictus XIV. clementissime per Indultam *Cum sicut*, concessit, ut in nostris Ecclesiis quoad effectum Indulgentiarum censeantur omnia & singula Altaria privilegiata, & quidem absque ullo numero Missarum præfixo, & absque determinatione certi temporis, si ibidem ab aliquo sub regimine & gubernio nostri Generalis existente celebretur Missa pro Defuncto ex Confratribus seu Sororibus in die obitus, vel alio conformiter Ordinationibus Generalibus, aut Provincialibus. Quinimo quoad Moniales amplius extendit, ita, ut Defuncta gaudeat hoc privilegio, si pro eadem in prædictarum Ecclesiis dicatur Missa etiam à Sacerdote seculari, vel Regulari extraneo; illudque Indultum datum fuit pro perpetuis temporibus. \*

81 Quæres IV. Quando in Bulla Concessionis habetur, dari gratiam ad Septennium v. g. quo tempore hoc Septennium incipiat? Respondeo, valde multos Auctores antecesserunt defendisse, hoc Septennium incipere non à die gratiæ Romæ concessæ, sed à die publicationis, & approbationis ab Episcopo; cum Papa videatur velle concedere Septennium utile, quod utile utique non incipit ante approbationem & publicationem Episcopi. Hoc tamen non obstante hodie observandum est Decretum Sac. Congreg. Indulgentiarum novissime editum sequentis tenoris:

*Discussio dubio in S. Congreg. Indulgentiis & sacris Reliquiis præposita: an attentis verbis, quæ in Brevibus Indulgentiarum apponi solent, præsentibus ad Septennium tantum valituris, Septennii initium à die Publicationis Brevis desumendum sit? Eadem S. Congreg. die 18. Maji 1711. declaravit, non à die Publicationis, sed à die dati Brevis Septennii tempus incipere. Et facta relatione SS. Domino nostro per me infra scriptum Secretarium die 20. ejusdem Mensis, Sanctitas sua Congregationis sententiam approbavit.*

I. M. Card. Gabriellus Præf.

Raphael Colmas de Hieronymis Secretarius.

Romæ Typis Camera Apostolicæ, 1711.

#### Additio.

\* Indagabis ulterius. An, dum in Brevi Concessionis datur Septennium pro duratione Indulgentiarum, etiam intra spatium hujus temporis computetur annus Jubilæus Romanus, si incidat intra idem tempus? Ratio dubitandi est; quia intra talem annum Sanctum, loquendo de Jubilæo singulis 25. annis Romæ celebrando, omnes Indulgentiæ plenariæ pro vivis extra Romam suspenduntur; adeoque loquendo quoad Indulgentias concessas pro vivis ille annus vacans non videtur computandus intra numerum septem annorum, qui pro Indulgentiis in Brevi Apostolico fuerunt clementissime assignati, & utique concessi tamquam septem anni utiles, sicque Indulgentiæ illæ adhuc poterunt uno anno extendi subtrahendo annum Jubilæum, quasi non esset, prout sic sentiunt Bellegambe part. 2. sect. 4. q. 6. Gobat de Jubilæo num. 56. & de Indulgentiis n. 663. la Croix lib. 6. part. 2. n. 1378. Kazenberger in Supplem. Theolog. Sacram. P. Sporer cap. 3. sect. 1. n. 60. & ex parte Dominicus Viva de Jubilæo q. 4. art. 5. n. 5. potestque idem probari à paritate rationis: quia etiam, quando locis piis datur concessio locandi per triennium sua prædia, juxta communem DD. annus ex natura sua sterilis non numeratur, nec computatur sub hoc triennio. Interea tamen Pasqualigus hic q. 316. est contrarius allegatis supra Doctoribus; quia in Brevi non dicitur, quod gratia valeat per septem annos, sed ad Septennium; illud autem interest inter Septennium, & septem annos, quod Septennium significet septem



Septem annos continuatos, septem anni vero indicent illos etiam interpolatos. Accedit, quod ipsemet Summus pontifex videatur insinuare velle, per Septennium non necessario debere intelligi septem annos utiles, sed continuos; quoniam conformiter dictis superius numeratur Septennium illud non à die Publicationis ipsius Brevis Apostolici, sed à tempore Dati, quamvis subinde ob locorum distantiam inter diem dati Brevis, & inter diem Publicationis, notabile temporis spatium etiam multorum mensium intercedat, antequam Breve illud sit utile. Et hoc ultimum fundamentum me nihilum trahit in sententiam Pasqualigi, nisi aliter declarer Pontifex, atque sic etiam observatur in praxi, prout novissimus testis est Franciscus Van Ranst in suo opusculo de Indulgentiis, & Jubilæo Romæ impresso, & Summo Pontifici Benedicto XIII. dedicato qu. 5. n. 14. Quinimo dum hæc jam scripseram, emanavit per Benedictum XIII. die 9. Februarii Anno 1725. Decretum sequentis tenoris: *Sua Sanctitas declarat, quod in omnibus Indulgentiis, tam plenariis, quam particularibus ad Septennium concessis, debeat computari, & continuari Septennium à die dati Brevis Apostolici, etiamsi infra dictum Septennium annus Sanctus occurrat, in quo omnes Indulgentiæ pro Vivis suspenduntur.*

82. Quæres V. Quomodo practice petatur Indulgentia pro Ecclesia aliqua? Resp. quod loquendo de Ecclesia, debeat I. exprimi patrocinium, seu Titulus Ecclesiæ. II. num ea sit secularium, vel Regularium, & quallium. III. Diocesis, ac Locus, in quo illa Ecclesia existit. IV. demum dies, pro quo Indulgentiæ desiderantur; v. g. taliter instruendo Supplicam.

*Humillime petitur Indulgentia Plenaria ad Septennium pro Ecclesia Parochiali (si sit Regularis, declaret etiam Ordinem) Divi Petri (supposito nimirum, quod hic sit Patronus Ecclesiæ) Civitatis N. Diocesis N. ac pro ipso Festo SS. Apostolorum Petri, & Pauli. Si alium diem eligas pro Indulgentiis, eundem specifica conformiter instructioni superius datæ.*

83. Quæres VI. Qualiter practice petendum sit pro quolibet defuncto indiscriminatim Altare privilegiatum? Resp. Modus petendi Altare privilegiatum est ferme idem cum præcedenti, v. g. loquendo de priore Ecclesia Parochiali, supposito, quod in aliquo ejusdem Altari petatur Privilegium, Supplica sic instrui potest.

*Petitur humillime Altare privilegiatum ad Septennium pro Ecclesia Parochiali S. Petri Civitatis N. Diocesis N. atque in ea sito Altari summo (si aliud eligatur, specificetur) pro qualibet Fer. VI. vel pro Feria una septimana ab Ordinario Loci specificanda. Quod si desideraret restrictionem numeri Missarum, deberet pariter id exprimi.*

84. Quæres VII. Quomodo, si in aliqua Ecclesia desideretur Confraternitas de novo erigenda, similis erectio practice petenda sit una cum Indulgentiis? Ante resolutionem nota, quod aliud sit petere erectionem Confraternitatis, & aliud aggregari alicui Archi-Confraternitati. Aggregare enim competit Archi-Confraternitatibus, non autem Confraternitatibus; & hinc, si petitur institutio Confraternitatis in aliqua Ecclesia, debet supplicari in Curia Romana; quod si autem petatur, Ecclesiam aliquam aggregari alicui Archi-Confraternitati, v. g. Sacri Rosarii, vel Chordæ S. P. Francisci &c. talem aggregationem ex specialibus Privilegiis, & cum conditionibus in Bulla Clementis VIII. Quæcumque à Sede, sub die 24. Decemb. 1604. edita præscriptis etiam possunt concedere Generales Ordinum. Hoc notato,

Resp. Quando petitur primo erigi aliqua Confraternitas in certa Ecclesia (ponamus adhuc in exemplo Ecclesiam Parochialem S. Petri) tunc supplicatio Romam dirigenda taliter instrui potest.

*Petitur humillime Breve cum solitis Indulgentiis pro Ecclesia Parochiali S. Petri Civitatis N. Diocesis N. & in ea erigenda Confraternitate N. (hic nominetur, qualis sit Confraternitas) Festum Principale rogatur determinari N. hic specificetur, quale Festum Principale hujus Confraternitatis petatur: etenim advertendum, quod simile*

Breve soleat non tantum ad Septennium extendi, sed de stylo Curia esse perpetuum, & quod in Festo Principali concedatur Indulgentia plenaria, uti pariter pro die ingressus, & in articulo mortis; pro quatuor autem Festis minus Principalibus plerumque ab Ordinario determinandis Indulgentiæ septem annorum dentur.

#### Additio.

\* Cæterum ne forsitan petendo Romæ approbationem alicujus Confraternitatis noviter erigendæ in vanum labores, sequentia ex Lantusca, & Matthæucio vers. Confraternitas, præ oculis habe. I. Quod non soleat in una eademque Civitate ordinario concedi duplex Confraternitas ejusdem generis, & instituti, si solam Confraternitatem SS. Sacramenti excipias, quam Paulus V. anno 1607. 7. Februarii in qualibet Ecclesia Parochiali instituendam concedit, & exoptat. II. Quod non soleat concedi talis erectio, nisi de prævio consensu Ordinarii loci cum litteris testimonialibus ejusdem. III. Quod pariter Statuta hujus novæ Confraternitatis prius ab Episcopo, qui est loci Ordinarius, examinanda, & approbanda sint. IV. Quod Breve Concessionis Romanæ promulgari non debeat, nisi prævia cognitione Ordinarii. Quoad Archi-Confraternitatem Chordigerorum S. P. Francisci datur à Summo Pontifice Superioribus Generalibus ipsimet licentia erigendi eandem in propriis, & quoad Archi-Confraternitatem SS. Rosarii etiam in alienis Ecclesiis. Vide Matthæucium.\*

85. Quæres VIII. Qualiter practice petatur Altare privilegiatum pro Confratribus, & Sororibus alicujus Confraternitatis? Ante Respons. Nota ex dictis, quod tale privilegiatum Altare detur, absque eo, quod certus numerus Missarum requiratur; & hinc (inquit la Croix lib. 6. Theolog. Moral. part. 2. n. 931.) sufficeret, etsi hebdomadatim unica tantum Missa dicatur, dummodo celebretur illa die, qua determinatur Privilegium. H. N.

Respondeo; Altare Privilegiatum pro Confratribus, & Sororibus eodem ferme modo petitur, ac pro omnibus Fidelibus Defunctis, excepto, quod in petitione hujus Brevis exprimi quoque debeat Titulus Confraternitatis, v. g. taliter.

*Petitur humillime Altare privilegiatum pro Ecclesia Parochiali S. Petri Civitatis N. Diocesis N. & in eo sito Altari Confraternitatis N. pro Feria N. (hic specificetur dies, vel si determinatus non petatur, ponatur sic) pro una Feria cujusvis septimana ad arbitrium Confratrum eligenda de consensu Ordinarii.*

86. Quæres ultimo. An pro Brevibus Indulgentiarum supra memoratis debeat expendi certa taxa pecuniaria? Resp. Si excipias institutionem Confraternitatis de novo in aliqua Ecclesia, omnia reliqua expediuntur gratis pro Deo & Scriptura, excepto, quod Agenti præter honorarium (si aliquod gratis vis offerre, ad quod tamen non obligaris, & attende, ne in hoc ignavis styli Curia ab aliquo decipiaris) ratione Agentiæ absque Memoriali viginti Bajoci, cum Memoriali autem quinquaginta Bajoci dentur, qui quinquaginta Bajoci nostra moneta conficiunt circiter unum florenum. Vide de hoc la Croix loc. cit. Dixi notanter: Si excipias institutionem Confraternitatis &c. nam teste eodem la Croix quoad hanc est certa taxa novem circiter florenorum.

#### QUESTIO VI.

De Jubilæo, & variis ipsum concernentibus.

#### SUMMARIUM.

87. Annus Jubilæus in Lege veteri, quis, & unde sic dictus?

88. Annus Jubilæus in Ecclesia Catholica, quando celebratur?

Vocatur etiam Annus Sanctus,

\* Ritus



- \* *Ritus celebrandi Jubilæum.*
- 89 In anno Sancto suspenduntur alie Indulgentie.
- 90 Jubilæum Anni Sancti sequenti anno extendi solet ad Diocesim id solicitantes.
- \* *Corollarium circa Moniales, & alios impeditos.*
- 91 Indulgentia in forma Jubilæi, extra Annum S. qua ratione concedatur?
- 92 Jubilæum, quid?
- 93 Quæ facultates in Jubilæo concedantur?
- 94 Opera tempore Jubilæi præscribi solita, quæ?
- \* *Jubilæum an expiret per mortem Papæ?*
- 95 In Anno Sancto non suspenduntur Indulgentie Altarium Privilegiatorum.
- 96 An tunc suspendantur Indulgentie pro mortis articulo?
- 97 Non suspenditur Indulgentia Ecclesiæ Portuincula concessa.
- 98 An suspendantur Indulgentie partiales?
- 99 Præsertim concessæ ab Episcopo?
- \* *De aliis quibusdam Indulgentiis in specie. Uti etiam de potestate absolvendi à casibus, an suspendatur in Anno Sancto? Add. I. & II.*
- 100 Ad Jubilæum requiritur executio operum præscriptorum.
- 101 Et quidem perfecta, cum Additione.
- 102 Quid, si omittatur pars levis?
- 103 Opera debet quis exequi per se ipsum.
- 104 Quid, si detur elemosyna per famulum?
- 105 Opera peragenda tempore præfixo.
- 106 Et non ante tempus duarum hebdomadarum.
- 107 An lethaliter decumbens possit alibi lucrari Jubilæum Romæ publicatum?
- \* *Quid sit sentiendum de existentibus in locis hæreticis &c.*
- 108 Tria Jejunia sunt statutis diebus peragenda.
- 109 Nisi fiat commutatio, & per Confessarium translatio in alios dies: & quomodo hæc facienda?
- 110 An hi statuti tres dies jejunii debeant intra unam ex duabus hebdomadibus necessario absolvi?
- \* *Utrum Confessio, & Communio possit post peracta intra unam septimanam reliqua opera differri in sequentem Dominicam? Add. I.*
- \* *Ponuntur circa hoc duo notabiles casus. Add. II.*
- 111 Opera possunt fieri in diversis locis.
- 112 Idque exemplificatur.
- 113 Itinerantes post suum reditum possunt lucrari Jubilæum.

87 **P**RO meliori sequentium intelligentia est prænotandum, quod olim in Lege veteri seu Mosai-  
ca, Hebræorum populus clangentibus tubis excitabatur ad recolendum annum quinquagesimum ingressus Filiorum Israel in terram promissionis; qui & Jubilæus dicebatur, à voce Hebræa *Jobel*, quæ buccinam significabat, ut vult Lyranus in cap. 25. *Levit.* quamvis alii alias Jubilæi derivationes ponant, uti videre est apud Navarrum tom. 3. *Commentar. de Jubilæo & Indulg. notab. 1.* Et quidem in hoc anno quinquagesimo, qui Hebræis erat Jubilæus, sive Annus remissionis, debita gratis remittebantur, possessionesque ad pristinos dominos absque pretio revertebantur, ac præter nonnulla alia servi libertate donabantur; prout patet ex *Levit. c. 25. Num. c. ult.* & aliis Sacræ Scripturæ locis.

88 Quia igitur Christus Dominus non venit solvere legem, sed spiritualiter adimplere; hinc ad similitudinem antiqui Ritus, utpote futurorum præfigurativi, in Ecclesia Catholica dudum jam altiori quadam ratione institutus fuit *Annus Jubilæus*, sive remissionis, & gaudii spiritualis, concedendo videlicet Fidelibus, Basilicas de Urbe devote visitantibus, plenissimam omnium peccatorum suorum veniam, seu Indulgentiam: qua de causa annus ille per antonomasiam *Annus Sanctus* appellatur. Et quidem juxta morem antea jam in Ecclesia vigentem, de quo Navarrus loc. cit. notab. 1. n. 11. & notab. 7. n. 4. Bonifacius VIII. in *Extravag. Antiquorum, de Penit. & Remiss.* ejusmodi Jubilæum concessit pro quolibet centesi-

mo anno. Verum ob brevitatem vitæ humanæ, atque, ut quamplures tanti Thesauri participes fieri mererentur, terminus iste per Clementem VI. inprimis reductus fuit ad annum quinquagesimum, ut habetur in *Extravag. Unigenitus Eod.* & postea per Paulum II. & Sixtum IV. ad annum vigesimum quintum. *Extravag. Quemadmodum Eod.*

## Additio.

\* Porro Ritus, quo Romæ ad annum Sanctum Jubilæum indicitur, à Dominico Viva in suo *Tractatu de Jubilæo Summo Pontifici BENEDICTO XIII.* pro tunc Archi-Episcopo Beneventano, ac S. R. E. Cardinali dedicato qu. 1. art. 2. taliter describitur. Die Ascensionis Domini ante Annum Sanctum maximo apparatu in Divi Petri Æde post Evangelium recitatur publice Pontificis Diploma de proximo Jubilæo: in privilegio deinde Nativitatis Domini mane habetur solemnissimum supplicatio, & post meridiem à Sacello Palatii ad Ecclesiam S. Petri se confert Pontifex: hanc omnino oclusam reperit, ipse vero Portam muratam (quæ Sancta dicitur; tum quia calx, & lapides ejusdem specialiter benedicuntur) ter percutit argenteo malleo, & bis summus Pœnitentiarius, dum interea certæ preces persolvuntur. Postea fabri murarii murum dejiciunt, ingrediturque Pontifex Ecclesiam, ac Vesperis interest. Quidam Cardinales interim eodem Ritu Portas Sanctas in aliis tribus Ecclesiis, quæ in Bulla Jubilæi semper specificari solent, referant, ut visitentur ab iis, qui Jubilæum sunt Romæ lucraturi. Anno integro elapso denuo in privilegio Nativitatis omnes Indulgentiæ, interea in reliquis mundi partibus suspensæ, reviviscunt, ubi denuo habentur ad S. Petrum solennes Vesperæ, post quas, præmissa solemnissimum supplicatione, lapides, calx, aliaque id genus benedicuntur, ipseque Pontifex, ac deinde Summus Pœnitentiarius calcem jaciunt cochleari argenteo, ternosque lapides ponunt, ac deinde murus à murariis erigitur, manetque integer, donec iterum Annus Sanctus recurrat. \*

89 Ut autem hoc Anno Sancto durante Christianæ Nationes ex omnibus Orbis partibus eo amplius in Fidei & Religionis unitate congregarentur, eodemque pietatis ac devotionis spiritu Basilicas de Urbe, quo maximo fieri posset concursu, durante Jubilæo visitarent, & frequentarent, hinc eodem Anno Sancto quæcumque alie Indulgentiæ solent suspendi, idque per specialem Bullam desuper expeditam, cujus exemplar refert Gregorius Gobat *Tract. 3. Quinarum, circa initium.*

90 Verum, quia non omnes pro lucrando Jubilæo Romam personaliter accedere possunt: hinc Summi Pontifices pro sua pietate solent Jubilæum Anni Sancti extendere Anno sequenti ad alios Episcopatus; istud tamen non faciunt motu proprio, sed dumtaxat ad instantiam vel Nuntiorum Apostolicorum, vel Episcoporum pro suis respective Provinciis, aut Diocesibus, ferventissime solicitantium. Gobat cit. tr. 3. *Quinarum n. 489.*

## Additio.

\* Quinimo infra ipsum Annum Sanctum ac Jubilæum Romanum solent Romani Pontifices pro singulari sua benignitate expedire specialem aliquam Bullam, vi cujus clementissime concedunt, ut Moniales, & viri Religiosi illi, qui vi Professionis habent clausuram, uti pariter carcerati, & infirmi etiam sub ipso Anno Sancto Romano possint domi lucrari Jubilæum, si vere habeant animum eundi Romam ad lucrandum Jubilæum, quando ista impedimenta essent remota. Ita ex Urbano VIII. pro anno 1625, 28. Januar. Ex Innoc. X. pro 1650. 12. Febr. Ex Clem. X. pro 1675. 6. Febr. & ex Innoc. XII. pro anno 1700. 19. Januar. talem Bullam verbotenus refert Van Ranst de *Indulg. q. 8. n. 3.*

91 Insuper extra Annum Sanctum consueverunt Summi Pontifices, tum post suam quisque Coronationem, tum



tum quando Ecclesia Catholica gravibus necessitatibus atque angustiis premitur, concedere per universum Orbem Christianum Indulgentiam plenissimam, seu in forma Jubilæi: ita tamen, quod eo tempore non fiat suspensio ceterarum Indulgentiarum (cessat enim tunc allata n. 93. ratio hæc suspendendi, unde etiam nulla apponitur Bulla ceterarum Indulgentiarum suspensiva, prout fit in Anno Sancto.) concedantur tamen facultates absolventi à reservatis, & commutandi vota, prout amplius ex dicendis patebit: solet autem Jubilæum ordinari, & nisi aliter expresse disponant Pontifices, præse concedi pro vivis, non autem pro defunctis. His prænotatis, fit

92 CONCL. I. Jubilæum est Indulgentia plenaria à Summo Pontifice concessa visitantibus certas Ecclesias, & præscripta pia opera peragentibus, una cum concessione certarum facultatum in Brevis Apostolico expressarum. Ita in re communis. Et ratio est; tum quia omne Jubilæum est Indulgentia plenaria, licet non econtra; tum quia quoad effectum remissionis poenæ temporalis, non differt Jubilæum à ceteris Indulgentiis plenariis, cum hæ omnes in rite dispositis conferant omnium veniam peccatorum, quoad culpam jam remissorum, ut dictum num. 15. differt tamen ab his quoad superadditas ipsi speciales gratias seu facultates, in Brevis Apostolico expressas.

93 Et quidem ordinariè loquendo, atque extra Annum Sanctum conceditur Jubilæum lucraturis, ac præscripta opera peragentibus expresse (alias vero saltem deductive) ut possint sibi eligere Confessarium à locorum Ordinariis approbatum, qui habeat facultatem absolventi eos pro foro conscientie à quibuscumque casibus reservatis, atque censuris, etiam in Bulla Coenæ Domini contentis, & insuper vota quæcumque (Religionis, & Castitatis perpetuæ exceptis) in alia pia opera commutandi. Aliquando tamen, una vel altera harum facultatum non conceditur, ut notat Gobat cit. tr. 3. Quinarii n. 2. sed id ex tenore Brevis Apostolici, Jubilæum indicentis, desumendum erit, sicut, & quænam pia opera pro lucrando Jubilæo sint peragenda.

94 Etenim in anno Sancto, præter Confessionem Sacramentalem, & ubi in Bulla specialiter requiritur, etiam Communionem, sufficit certo dierum numero quatuor Urbis Ecclesias devote visitare, ibique pias ad Deum preces effundere, juxta formam præscriptam: quale quid etiam accidere solet in extensione Anni Sancti ad alias Dioeceses facta. Quod si vero ad avertendas graves Ecclesiæ necessitates extraordinarium Jubilæum publicetur, solet communiter exigi, ut Fideles extra Urbem existentes prima, vel secunda hebdomada indicti Jubilæi, Ecclesiam, vel Ecclesias, ab Ordinariis locorum assignandas visitent, ibique juxta præscriptam intentionem Deum exorent, ac feria quarta, sexta, & sabbato alterius ex duabus hebdomadis jejulent, pariterque peccata sua confiteantur, & sacra Communionem reficiantur, & elemosynas pro arbitrio suo faciant: quamvis simul concedi soleat, ut, si qui ex causa infirmitatis, vel alterius iusti impedimenti, unum, vel alterum prædictorum operum præstare nequiverint, id Confessarii in alia pietatis opera commutare, vel in aliud proximum tempus prorogare valeant; prout amplius liquet ex contextu Litterarum Apostolicarum Jubilæum indicentium.

Additio.

\* Porro Jubilæum semel Romæ publicatum non expirat per mortem Papæ concedentis illud, si causa concessionis adhuc duret; præsertim, cum in eo casu gratia jam sit facta, quæ juxta Canonistas lib. 1. Decret. tit. de Rescriptis, non expirat morte concedentis. Vide de hoc in casu occurrente Pasqualigum, & Dominicum Viva apud la Croix lib. 6. pars. 2. n. 1396.

95 CONCL. II. Quamvis Anno Sancto, ac Jubilæo in Urbe durante suspendi soleant tantisper omnes & singulæ Indulgentiæ, etiam perpetuæ, per quoscumque

Romanos Pontifices concessæ, ut dictum num. 89. nihilominus tunc non intelliguntur suspensæ Indulgentiæ Altarium Privilegiatorum pro defunctis, neque aliæ concessæ eodem modo directe, ac immediate pro defunctis. Ita Gavantus in Addit. ad Manuale Episcoporum, vers. Indulgentia, & alii: atque ita fuisse declaratum tum ab Innocentio X. tum novissime à Clemente X. refert Gobat cit. tract. 3. Quinarii n. 45. & 48. in App. I. lit. a & seqq. quamvis in hac posteriori Declaratione addatur, quod illæ Indulgentiæ suspensæ habeantur, quas possunt sibi lucrari vivi, ut eas possint concedere animabus purgatorii per modum Suffragii.

96 Major difficultas est de Indulgentiis concessis pro articulo mortis. Et quidem has etiam suspendi in Anno Sancto, censet Layman lib. 5. tr. 7. c. 8. n. 2. Tannerus, & quidam alii: nam Brevis suspensivum Indulgentiarum loquitur indistincte, imo Sixtus IV. in Extravag. Quemadmodum, de Poenit. & Remiss. expresse suspendit omnes Indulgentias in vita, seu in mortis articulo concessas. Oppositum nihilominus, videlicet Indulgentias pro mortis articulo tunc non censi suspensas, tenet Gavantus loc. cit. Lezana tom. 3. Summa, vers. Jubilæum n. 5. Bonacina disp. 6. de Indulgentiis q. 1. punct. 8. n. 2. & alii, qui referunt, quod ita Urbanus VIII. declaraverit, ejusque Declaratio Romæ publicata fuerit à Vice Regente Poenitentiarie: atque hoc ipsum Declarasse Innocentium X. refert Gobat cit. n. 45. prout id ipsum fecit Clemens X. Accedit ratio; tum quia respectu agonizantium cessat ratio suspendendi Indulgentias, videlicet concursus ad Basilicas Urbis, tum quia Successores Pontifices in suis Bullis omittunt clausulam illam, seu in mortis articulo concessas, olim à Sixto IV. insertam, sicque aliud nunc velle videntur: alioquin enim, si voluissent, idem expressissent, arg. c. Inter corporalia, de Translat. Episcop.

97 Insuper, quod non sit mentis, & intentionis suæ, sub generali Indulgentiarum suspensione comprehendere, neque in verbo Romani Pontificis comprehensam esse Indulgentiam Ecclesiæ Portuiculæ prope Assisium die 2. Augusti concessam, declaravit Clemens VIII. Urbanus VIII. & Innocentius X. ut refert Lantusca in Teatro Regularium, vers. Indulgentia in 6. Declarationem dicti Innocentii X. per extensum allegans. Tacentur Indulgentiæ concessæ Basilicis Romanæ Urbis, & nonnullæ aliæ, quas pariter in Anno Sancto non suspendi, fusiùs ostendit Gobat cit. tr. 3. Quinarii n. 40. & seqq.

98 Insuper, cum Sixtus IV. in cit. Extravag. Quemadmodum, pro Anno Sancto tantum suspendat Indulgentias plenarias, hinc non suspendi tunc Indulgentias partiales, tradunt plerique Doctores: nam dictio illa, plenarias, firmat regulam in oppositum de partialibus. Et licet in recentioribus Bullis non amplius addatur ly plenarias, adhuc non suspendi tunc partiales Indulgentias, probabile censet Gobat loc. cit. n. 47. & Herinx de Poenit. disp. 4. q. 13. quia in his favorabilibus verba Successorum videntur intelligi debere ad mentem Antecessorum, ubi clare & expresse non constat de contrario. Interim tamen hæc doctrina non caret difficultate, eo quod Pontifex in modernis Bullis indistincte suspendat omnes & singulas Indulgentias.

99 Illud certius est, ac probatur ex ratione proxime allata, quod, cum Pontifex Anno Sancto solummodo suspendat Indulgentias, quæ sunt concessæ à Romanis Pontificibus, idcirco non intelligantur suspensæ Indulgentiæ ab inferioribus concessæ, ut sunt Indulgentiæ 40. dierum, quas potest concedere Episcopus.

Additio.

\* Quod si scire cupias in specie, an in Anno Sancto suspendantur Indulgentiæ concessæ Numismatibus, Granis, & Coronis, seu Rosariis: item Indulgentiæ Stationum, Scalæ Sanctæ, ac Lateranenses? Respondeo succincte I. Indulgentias plenarias affixas Coronis, Granis, seu



Numeratibus, & directe pro vivis concessas Anno Sancto suspendi. Ita la Croix *lib. 6. part. 2. n. 1401.* Ratio est: quia per Bullam Jubilæi annuntiativam sub terminis generalibus suspenduntur omnes & singula Indulgentiæ sub quacunque forma concessæ, uti recte advertit Dominicus Viva *tract. de Jubilæo q. 4. art. 1. n. 1. Resp. II.* Nec in Urbe Romana Indulgentias Stationum, nec Lateranenses, aut Scalæ sanctæ suspendi. Ita cum Fillucio, Lezana, & Gobat, Dominicus Viva *loc. cit. n. 2.* Ratio est: quia Gregorius XIII. & Clemens X. apud eundem Auctorem expresse sic declararunt. Resp. III. Indulgentias Stationum, Lateranenses, & alias quasunque saltem plenarias Ordinibus Religiosis, Sodalitibus, & Confraternitatibus extra Romam existentibus concessas per modum Communicationis in Anno Sancto suspendi. Ita Zerola in praxi Episcoporum. *vers. Annus Sanctus, cum Dominico Viva loc. cit. n. 2.* Ratio partim jam desumitur ex Respons. I. partim apud Viva deducitur ex ipsa Declaratione Gregorii XIII. in sua Bulla Jubilæa. Dico notanter saltem plenarias suspendi. Quidnam enim quoad loca extra Romam de partialibus, seu de Indulgentiis non plenariis sentiendum sit, utrum etiam hæc suspendantur, jam eruitur ex dictis supra n. 98. Qualiter autem Benedictus XIII. a suspensione in Anno Sancto exceperit Indulgentias concessas ad recitationem Angelicam, & visitantibus SS. Sacramentum, aperietur *Appendice II. Additione VII.* tibi de his plura. \*

#### Additio II.

\* Præterea, dum in Anno Jubilæo Romano suspenditur per Bullam facultas extra Romam absolvendi a casibus reservatis, & commutandi Vota, satis convenit inter DD. ibidem suspendi tantummodo eam facultatem absolvendi, & commutandi, quæ conceditur à Pontifice in ordine ad lucrandas Indulgentias, non autem illam, quæ datur independentem ab Indulgentiis. Ita expresse declararunt Urbanus, & Clemens VIII. teste Cardinali de Lugo *tom. 3. disp. 20. n. 145.* Hinc sequitur, non suspendi facultatem, quam habent Episcopi ex Trid. *sess. 24. c. 6.* absolvendi ab occultis Papæ reservatis, & dispensandi cum impeditis adire Romam, aut etiam per alia specialia privilegia. Ratio est: quia similia habent non vi Jubilæi, sed intuitu Officii, vel ex speciali gratia Summi Pontificis.

Sequitur II. Nec Anno Sancto, dum Jubilæum celebratur Romæ, suspendi privilegia Regularium ad absolvendum alias ex speciali Clementia Sedis Apostolicæ concessa; nam & ista facultas non est data intuitu lucrandi Indulgentias. Ita cum communi Dominicus Viva *de Jubilæo q. 4. art. ult. & Franciscus van Ranst de Indulg. q. 4. n. 15.* \*

100 CONCL. III. Ad obtinendum Jubilæum requiritur ex parte lucrantis executio operum præscriptorum: & quamvis optandum sit, atque pie allaborandum, ut homo saltem præmissa vera contritione sit in statu gratiæ toto illo tempore, quo singula opera præstat; tamen probabilius est, sufficere ad consequendam Indulgentiam Jubilæi, quod ultimum opus perficiatur in statu gratiæ. Hæc conclusio sequitur ex dictis n. 33. & 34.

101 Sunt autem opera præscripta ita perfecte adimplenda, ut, si aliquod ipsorum vel penitus, vel saltem quoad partem notabilem omittatur, sive id fiat ex ignorantia seu oblivione, sive etiam ex impotentia [seclusa commutatione in aliud pium opus à Confessario facta] non obtineatur quidquam de Indulgentia Jubilæi. S. Thomas 4. *dist. 20. q. 3.* Gobat *cit. tract. 3. n. 61.* & alii communiter: siquidem Papa concedit hanc Indulgentiam sub conditione executionis operum præscriptorum, dādo simul facultatem, ut eadem in casu iusti impedimenti possint per Confessarium in alia pietatis opera commutari: atqui non impleta conditione nemo consequitur id, quod sub conditione datur; quia deest animus concedentis.

#### Additio.

\* Nec dicas. Pueri necdum annos discretionis attingentes, non solent admitti ad Sacram Communionem, uti notatum fuit superius *Tract. 10. dist. 3. n. 43.* & tamen lucrantur Jubilæum, uti tenent communiter Doctores: ergo ad obtinendum Jubilæum non necessario requiritur ex parte lucrantis executio omnium præscriptorum.

Ad hanc objectionem respondent plures Doctores negando consequentiam, & suppositum, quod Bulla Jubilæi à pueris, necdum annos discretionis attingentibus, requirat ad obtinendas Indulgentias sacram Communionem, uti notant Viva *de Jubilæo q. 8. art. 4. n. 4.* & s. & Holzman *tom. 2. tr. 4. n. 656.* Interim tamen quia Gobat cum aliis contendit, ad obtinendum Jubilæum absolute necessariam esse Communionem seclusa Confessarii Commutatione in aliud opus, cum absolute, absque aliqua exceptione, exigatur; Confessarius tutius apud tales pueros, quos judicat adhuc ineptos ad Sacram Synaxim, commutabit S. Communionem in aliud opus. Unde in forma adhuc aliter posset distingui consequens argumenti contrarii: ad obtinendum Jubilæum non necessario requiritur executio omnium operum præscriptorum, si ex rationabili causa fiat commutatio aliquorum operum, conc. seclusa commutatione, negatur: etenim seclusa commutatione non obtinetur Jubilæi Indulgentia, si aliquod opus requisitum omittitur vel ex toto, vel saltem quoad partem aliquam notabilem. \*

102 Additur notanter, vel saltem quoad partem notabilem: quia, etsi res dubia sit, utrum prætermittens levem partem operis injuncti consequatur fructum Indulgentiæ, v. g. si quis sub die præscripti jejunii aliquid modicum degustet, quod tamen non sufficit ad fractionem totalem jejunii: vel si quis ex injuncto Rosario omittat unum vel alterum Ave Maria, & hujusmodi. Etsi, inquam, res sit non nihil dubia, tamen probabilius est, quod etiam hic parum pro nihilo reputetur, ac proinde omittens ejusmodi minimam partem non exdat fructu Jubilæi, aut alterius Indulgentiæ: nam adhuc opus injunctum simpliciter impletur, v. g. servatur jejunium quoad substantiam, recitatur Rosarium &c. Suarez *disp. 52. de Indulg. sect. 5. num. 3.* Bonacina *cit. disp. 6. quest. 1. punct. 5. num. 51.* & concordant dicta superius n. 59. & 60.

103 Porro lucraturus Jubilæum debet opera præscripta per semetipsum exequi, utputa jejunando (etiam si necdum attigerit vigesimum secundum annum ætatis) Ecclesias visitando &c. siquidem Pontifex in Bulla Jubilæi exigit industriam personæ, sive actus personales lucraturi Jubilæum, veluti conditionem & dispositionem ipsius ad istud digne & fructuose consequendum.

104 Nec obstat, quod quis per famulum suum possit dare eleemosynam; nam talis hoc ipso, quod det de propriis, adhuc censetur moraliter & proprie dare eleemosynam, licet interveniente ministerio sui famuli. Et nota, quod in tali casu nihil præjudicetur Domino quoad valorem Indulgentiæ, si famulus ille sit constitutus in peccato mortali: bene tamen, si famulus non det eleemosynam pauperibus, sed eam sibi fraudulenter retineat; quia tunc revera deficeret conditio datæ eleemosynæ, \* supposito nimirum, quod integram eleemosynam retineret: secus credo dicendum, si tantummodo partem, quamvis etiam notabilem, dummodo altera pars, quæ pauperibus datur actualiter, adhuc sit eleemosyna proportionata suo modo respectu principalis elargientis: alias enim Dominum suum talis famulus exponeret saltem periculo non lucrandi Indulgentias, conformiter dicendis in proxima *Appendice Addit. III.* \*

105 CONCL. IV. Insuper ad consecutionem Jubilæi requiritur, quod opera præscripta peragantur tempore in Bulla præfixo. Ratio patet ex dictis; quia nimirum nemo lucratur Jubilæum, nisi servatis conditionibus, sub quibus conceditur. Quia igitur in Jubilæis, quæ ob gravem Ecclesiæ necessitatem extraordinarie concedi solent, com-



communiter habetur inserta clausula illa, quod opera præscripta peragi debeant *prima vel secunda hebdomada*, ab Ordinariis Locorum, vel eorum Vicariis &c. indicenda; item quod *Feria quarta, sexta & Sabbato alterius ex duabus hebdomadis ab eisdem deputandis* jejunium servetur. Hinc.

106 Infertur primo, quod, etsi Confessio Sabbato ante primam Dominicam juxta praxin, scientibus, & non contradicentibus Ordinariis, juxta doctrinam Pauli Layman, Castropalao, Gobat & Kazenberger peragi queat, quoad reliqua tamen opera non lucretur Jubilæum, qui incipit opera præscripta facere ante tempus duarum hebdomadarum taliter ab Ordinario indictarum: quia deficit conditio debiti temporis. Lugo *disp. 27. de Sacram. Penit. sect. 7. num. 127. Navarrus Conf. 1. de Constitut. num. 9. & alii.*

107 Verum in casu urgentis periculi (utputa, si quis lethaliter decumbat) & accedente commutatione hujus conditionis in aliud pium opus per Confessarium facta, posse Jubilæum Romæ jam publicatum obtineri alibi, censet Filiucius *tr. 8. de Sacramentis n. 287.* citans pro se multos graves Doctores, sed tacito nomine: ejusque doctrinam securi in praxi observari ex causa sentit Gobat *cit. tr. 3. n. 64.* Ratio est: quia in Bulla Jubilæorum extraordinariorum expresse concedi solet, quod Confessarius ex causa legitimi impedimenti, ratione cuius poenitentes opera pro lucrando Jubilæo præscripta vel eorum aliquod præstare nequeunt, *in alia pietatis opera commutare, vel in aliud proximum tempus prorogare possit, eaque injungere, quæ ipsi poenitentes efficere poterunt*, prout communiter loquuntur Bullæ Pontificiæ Jubilæum, pro toto orbe Christiano concessum, hoc ipso Pontifex concedere, atque indulgere censetur, quod Confessarius circa constitutos in articulo mortis possit uti facultate commutandi opera, & conditiones præscriptas, eaque pro lucrando Jubilæo injungere, quæ ipsi poenitentes ante obitum suum adhuc efficere poterunt. Quod enim majus impedimentum, quam instans mortis Articulus? Et quis credat, ab hac largissima facultate, circa iuste impeditos Confessarios expresse concessa, voluisse Papam, pientissimum Patrem, & Pastorem omnium Fidelium, excludere solos agonizantes, eo quod tempus Jubilæi in propria Diocesi deputatum necdum adveniret?

*Additio.*

\* Profecto P. Franciscus Van Ranst, alias in hoc puncto contrarius admittit tamen in suo Opusculo de *Indulg. q. 2. n. 14.* quod, si darentur quædam loca, in quibus Jubilæum præ vehementia persecutionis Hæreticorum, & forsan emergente exinde absentia Vicarii Apostolici publicari nequiret, possit nihilominus Jubilæum à Fidelibus ibidem existentibus acquiri statim, ac ad illos pervenerit notitia de publicatione facta Romæ, per visitationem scilicet Ecclesiæ [quæ deputanda esset ab Ordinario] commutandam à Confessario in aliud quoddam opus pium juxta circumstantias locorum, & prudentiæ suæ arbitrium; quia ibi publicatio, & designatio Ecclesiæ ab ordinario faciendæ est impossibilis, nec videtur velle Summus Pontifex hujusmodi Fideles privari hac universali Indulgentia post publicationem Romanam: cur igitur hæc ipsissima voluntas Summi Pontificis non possit etiam præsumi quoad infirmos mortis quasi proximos? Idem à fortiori dicendum in casu, quo quidem in principali loco Diocesis promulgatio, & Ecclesiarum designatio facta jam fuit, non tamen in Parochiis, in quibus similes periculose decumbentes existunt.

108 Infertur ulterius, quod ille non lucretur Jubilæum, qui aliis diebus, ac in Bulla præscribuntur, jejunat; utputa, si quis loco jejunii Sabbatini jejunet Feria quinta: nam talis non peragit jejunium tempore præscripto, sicque agit contra formam, nisi forte ex causa rationabili interveniat commutatio hujus conditionis per Confessarium facta in aliud pietatis opus, juxta proxime dicta.

*Anacl. Reiffenstuel Theol. Tom. I.*

109 Ubi breviter duo sunt Confessario notanda. I. Quod, si tempore Jubilæi conceditur Confessariis facultas commutandi opera præscripta, requiratur ad hoc rationabilis causa; nempe quod poenitentes præ infirmitate, paupertate, necessario laboritio, vel alio iusto impedimento, dicta opera, vel eorum aliquod præstare nequeant, vel saltem non absque gravi difficultate; ubi Confessario id consolationi esse poterit, quod, si causa commutandi re ipsa foret insufficiens, bona tamen fide judicata sufficiens, id non impediatur valorem commutationis; quia in Bulla commutatio remittitur iudicio ipsius Confessarii. II. Notandum Confessario, quod commutatio illa debeat fieri in alia opera æquivalentia: alioquin enim non foret mera commutatio, sed partialis dispensatio. Layman *c. 3. de Indulg. n. 12.* Gobat *tr. 3. Quinarii n. 109.* citans alios. Attendendum tamen est circa hoc ad statum poenitentis, ejusque qualitates, & vires: nam commutatio præfata debet fieri juxta pruden- arbitrium Confessarii in talia opera, *quæ ipsi poenitentes efficere poterunt*, prout loqui solent Bullæ Jubilæorum. Dicta quippe æqualitas operum non præcise spectanda est ex ipsa specifica operis præstantia, seu poenaltate, sed ex fine per Pontificem in largitione Jubilæi intento. Unde ægrotis loco jejunii injungi poterit vel largitio copiosioris eleemosynæ, si possunt, vel aliquarum precum recitatio: sicut & pauperibus, nullam poenitus eleemosynam dare valentibus, oratio, aut iterata Ecclesiarum visitatio, & hujusmodi. Atque ista operum commutatio non solum intra ipsam Confessionem (prout communiter fieri solet, estque consuetus) sed etiam extra eam, nisi aliter in suis Bullis Pontifices specialiter restringant, potest per Confessarium à poenitentibus electum exerceri: dummodo, fiat saltem inchoative, intra duas hebdomadas pro Jubilæo designatas; prout amplius tradit Gobat *cit. tractat. num. 110. & 111.* cum aliis.

110 Insuper non potitur Jubilæo, qui (cessante memorata rationabili commutatione) diebus ceteroquin debitis jejunat prima hebdomada semel, & alia hebdomada bis: debent enim omnia tria jejunia diebus statutis intra unam eandemque hebdomadam peragi, prout requirunt Bullæ Pontificiæ illis verbis: *Ac Feria quarta, sexta, & Sabbato alterius ex duabus hebdomadis ab eisdem deputandis jejunaverit.* Nam dictio illa alternativa, *alterius ex duabus*, satis indicat, tria illa jejunia debere conjungi, ac fieri intra unam eandemque hebdomadam: idque eo magis, quia Pontifex hac intentione jejunium indicit, ut caro maceretur; ad hunc autem finem plus deserviunt jejunia magis unita, quam interpolata per integram hebdomadam. Lugo *cit. disp. 27. n. 105.* Gobat *tr. 3. Quinarii n. 212.* cum aliis, contra Bonacinam *cit. puncto 5. n. 34.*

Ceterum, an etiam reliqua opera, pro consequendo Jubilæo præscripta, debeant fieri intra unam eandemque hebdomadam, non adeo conveniunt Doctores. Affirmat Lugo *loc. cit. n. 105.* Henriquez, Busenbaum, Sanctarelius, & alii, qui id probare conantur ex verbis Bullæ Jubilæi. Negat Bonacina *cit. Apunct. 5. n. 34.* Diana *part. 5. tr. 12. resol. 12.* & alii, quorum sententiam esse probabiliorē, eo quod verba Bullæ Jubilæi hoc non convincant de aliis operibus præter tria jejunia: censet Gobat *loc. cit. n. 72.* Quamvis prior sententia utique sit tutior, ac proin in praxi merito tenenda, & consulenda.

*Additio.*

\* Quoad Confessionem autem, & communionem loquendo omnino extra ullum est periculum, illas, absolutis in una ex duabus hebdomadibus reliquis operibus ad Jubilæum requisitis, peragi posse in Dominica immediate sequenti, uti declaravit ipsemet Summus Pontifex Gregorius XIII. apud la Croix *lib. 6. part. 2. n. 1417.* imo (superaddit P. Schmalzgrueber *lib. 5. Decret. tit. 38. num. 157.*) sic consultum est facere, ut ita opus



# 398 Tract. XII. De Immunitate Eccl. & Indulgentiis. Dist. III.

ultimum sit Communio, quæ hoc modo certius disponit ad Indulgentiam plenariam consequendam, cum protunc status gratiæ adesse supponatur. \*

## Additio II.

\* Quod si autem ponas casum, quod quis, reliquis omnibus usque ad Sacram Communionem peractis, ultima Dominica ob interveniens impedimentum communicare nequeat, puta quia antea inadvertenter aliquid bibit, vel comedit, in tali casu poterit Confessarius Communionem vel in tempus proximum e. g. in proximum diem Lunæ prorogare, vel in aliud opus commutare, uti cum Diana notat Felix Potestas in *Examine Confess.* 3828. Ponamus autem gravem alium peccatorem, qui Confessionem & Communionem non differt usque in Dominicam sequentem, sed potius peragit intra ipsam septimanam, antequam reliqua opera pro Jubilæo præscripta ex integro absolvit; talis, si postmodum ante ultimum præscriptum opus v. g. ante jejunium Sabbatum iterum reincidat in peccatum grave, debet ante hoc ultimum opus adhuc elicere Contritionem perfectam, si Jubilæum lucrari intendit; repetita autem Confessio, & Communio, etsi pro majori securitate consulatur, neutiquam requiritur; quia in Bulla duplex Confessio vel Communio ex una parte non exigitur, ex altera vero etiam per perfectam Contritionem quis se iterum in statum gratiæ reponere potest. \*

III CONCL. V. Opera præscripta tempore Jubilæi possunt impleri in diversis locis, utputa visitando Ecclesias in loco domicilii, & alibi jejunando, confitendo &c. Ita Lugo, ubi supra n. 123. Sannig lib. 5. *Decret. tit. de Penit. & Remiss. c. 2. n. 16.* & alii. Ratio est: tum quia favor Jubilæi non est localis, sed personalis: tum quia nullibi in Bullis requiritur identitas loci, sed dumtaxat visitatio Ecclesiarum designatarum, ac devota præstatio operum præscriptorum.

II2 Inferitur proinde, quod, qui tempore promulgati Jubilæi cepit aliqua opera præscripta perficere, v. g. visitando Ecclesias, possit in itinere reliqua opera peragere. Insuper, si quis à principio promulgati in sua patria Jubilæi non erat præsens, sed primum Feria quinta advenerit, poterit is jejunio Feria quarta alibi peracto, vel hoc ex iusta causa in aliud pietatis opus per Confessarium commutato, reliqua opera in patria proseguere.

II2 Quinimo, si malit, poterit talis in itinere constitutus sequenti hebdomada jejunium præscriptum una cum ceteris operibus peragere, haud obstante, quod tempus Jubilæi in sua patria jam effluerit. Ratio est: quia in Bulla Jubilæi facultas universalis conceditur navigantibus, aut iter agentibus, ut cum primum ad sua sese domicilia receperint, possint opera præscripta peragere, sicque Jubilæum lucrari: atque in hunc finem, ut omnia majori quiete, ac devotione perfici valeant, conceditur eisdem spatium duarum hebdomadarum non minus, ac ceteris.

## A P P E N D I X I.

Ad priorem Quæstionem, explicans conditiones Jubilæi, superiori Quæstione enumeratas.

## S U M M A R I U M.

\* Qualiter sit instituenda visitatio Ecclesiarum? Add. I.

\* Quomodo ibidem sint persolvenda preces? Add. II.

\* Qualis danda elemosyna? Addit. III.

\* Quomodo observandum Jejunium? Addit. IV.

\* An satisfiat per opera alias debita? Addit. V. VI. & VII.

## Additio. I.

Quæres I. Quomodo sit instituenda visitatio Ecclesiarum in Jubilæo præscripta? Resp. I. Vi-

sitatio Ecclesiarum facienda est devote, ubi ex D. Thoma 2. 2. qu. 182. art. 1. nota cum Dominico Viva hic qu. 8. art. 5. n. 3. devotionem requisitam in eo consistere, quod talis visitatio sit ordinata ad cultum Dei; unde, si quis præcise visitaret Ecclesiam ex eo fine, ut ibidem personam alterius sexus inducat ad peccatum carnale, talis visitatio, nisi pessimus iste finis adhuc ante ingressum in Ecclesiam saltem sub itinere revocetur, non foret sufficiens, utpote non devota, id est, non ordinata ad Dei cultum: talis intentio mortaliter peccaminosa videatur impossibilis cum voluntate colendi Deum per eum ipsum actum, qui ob pessimum finem est graviter peccaminosus, ac Deo summe abominabilis. Interea per dicta ista non negatur, quod adhuc visitatio aliqua possit esse devota, si instituat a gravi peccatore habitualiter in suo peccato permanente, modo non ipsamet visitatio ordinetur ad finem mortaliter malum, sed potius ad Dei cultum, quæ ordinatio ad cultum Divinum utique etiam in peccatoribus gravibus moraliter bona est, sicque devota. Videatur Viva *loc. cit. n. 5.* Suadet tamen haud dubie tamquam melius, ut talis quoque peccator gravis conetur saltem ante visitationem elicere contritionem, vel deponere Confessionem. Quinimo supposito, quod visitatio illa esset ultimum opus Jubilæi, idipsum necessario requiritur. Ceterum la Croix hic n. 1432. putat, non ob stare devotæ visitationi, si eadem instituat curru, vel equo, nisi aliter expresse in aliqua Bulla requireretur. Resp. II. Num in Anno Sancto, in quo præscribuntur plures Ecclesiæ sæpius visitandæ; num [inquam] omnes Ecclesiæ in tali Jubilæo pro visitatione specificatæ debeant simul & semel, seu uno die absolvi, vel num una ex præscriptis Ecclesiis hoc, altera alio die assumi queat, non conveniunt inter se Doctores. Et quidem affirmativam tenent Filliucius hic tr. 1. c. 10. & la Croix lib. 6. part. 2. n. 1432. nimirum talem visitationem diebus diversis modo superius indicato posse institui; at, nisi ex rationabili causa simul interveniat aliqua commutatio, securius defenditur negativa cum Navarro, Bossio, Quarto, & Dominico Viva de Jubilæo qu. 8. art. 5. n. 2. videtur enim primæ sententiæ ob stare praxis Fidelium, qui eodem die omnes præscriptas Ecclesias simul visitant; praxis autem, & observantia declarant Jus cap. cum Dilectus de Consuetud. Quinimo Innocentius XII. pro Romano Jubilæo 1700. celebrato apud Dominicum Viva tr. de Jubilæo, ad finem folio apud me 87. expresse declaravit, quod Romæ integra visitatio præscriptarum Basilicarum debeat fieri intra unum diem 24. horas in se continentem, computando initium hujus diei, & finem ab una media nocte usque ad alteram: ergo idem erit sentiendum, si tale Jubilæum altero anno extendatur ad alias terras. Interea tamen, si post Annum Sanctum alibi conceduntur Jubilæa, attendere oportet Parochos, quantum prudenter fieri potest; ne in pagis apud rusticos pro visitatione nimium ab invicem distantes præscribant Ecclesias: alias enim præsertim mala tempestate multi has visitationes intermittunt, aut Confessarios continuo pro commutatione urgebunt, prout experientia non raro docet, dum frequenter sunt tales commutationes, & quidem prudenter a Confessariis vel in proximiores Ecclesias sæpius visitandas, vel etiam in preces, aliave pia opera maxime apud senes, debiles, operarios, ac opifices ex labore quotidiano visitantes. Resp. III. Si post Annum Sanctum Romanum ad instantiam Nuntiorum, seu Episcoporum alibi conceditur Jubilæum, ibique pro lucrands Indulgentiis præscribuntur visitationes repetitæ certarum Ecclesiarum, solent hæ visitationes ad minorem numerum restringi, si fiant cum Processionibus, quam si contingerent sine istis. Sic vidi in praxi observari præcedenti Jubilæo anno 1700. ubi in aliquibus Dioecesibus una Processio ab aliqua communitate instituta æquivalerat tribus, aliqui quatuor visitationibus particularibus, ita, ut loco quindecim visitationum particularium sufficerent quatuor, vel quinque, processionaliter institutæ. Et tali modo etiam observatur Romæ



Roma in Anno Sancto; ubi, etsi alias deberent quatuor Ecclesiæ specificatæ visitari trigiesies, si tamen Religiosi Processionem instituant, sufficit terna, & apud alias Communitates studentium quaterna, talis visitatio, prout colligitur ex Declaratione Clementis XI. emanata pro Jubilæo anno 1675. Resp. IV. In Jubilæis extraordinariis tempore Coronationis Summi Pontificis, aut valde gravis totius Ecclesiæ necessitatis concedi solitis, ad lucrandas Indulgentias sufficit unica visitatio, & quidem unius tantum Ecclesiæ, saltem extra Urbem Romanam, uti inquit Holzman tom. 2. part. 5. tr. 4. n. 647. Et licet ordinarii communiter pro majori populi communitate, aut devotione plures Ecclesias specificent, addere tamen solent, ut ad minimum semel saltem una ex specificatis Ecclesiis visitetur. \*

## Additio II.

\* Quæres II. Qualiter sint persolvendæ preces in visitatione Ecclesiarum requisitæ? Resp. I. Preces in Bulla Jubilæi, quando visitantur Ecclesiæ, requisitæ debent persolvi ad mentem Summi Pontificis: non est autem necesse, ut sub oratione exprimaturs finis Summi Pontificis specificæ, sed sufficit in genere orare ad eam intentionem, quam requirit Pontifex pro lucrando Jubilæo. Ita cum Bossio, Sanctarello, Quarto, & Pasqualigo Dominicus Viva hic q. 8. art. 5. n. 6. Ratio est: quia per illam intentionem genericam eo ipso saltem implicite oratio dirigitur ad finem à Pontifice intentum. Resp. II. Si certæ, & specificæ preces in Bulla Jubilæi sub visitatione Ecclesiarum non determinantur, tunc equidem Suarez, Henriquez, Bonacina, & alii probabilissime existimant, sufficere quascunque minimas, præsertim, si attentam mente persolvantur; cum adhuc salvetur vera persolutio alicujus orationis: ast in praxi merito consulenda est tamquam securior sententia Rodriquez, Coninch, & Dominici Viva, requirentium orationem congruam, tamquam medium magis proportionatum ad obtinendum finem à Pontifice intentum. Profecto Doctores teste P. Kazenberger tract. de Indulg. part. 3. qu. 10. suadent communiter, si aliud pro recitatione sub qualibet visitatione in Bulla non præscribitur, ut saltem sex Pater, & Ave cum Credo recitentur. Quod si quis preces vocales persolvere nequeat e. g. Mutus, non excludetur ab Indulgentiis, si saltem mentales persolvat, uti apud Holzman loc. cit. n. 648. notant Gobat, Viva, & la Croix. Securissimum erit, si id e. g. apud mutum fiat per commutationem Confessarii; non enim desunt Auctores, qui de hoc per se loquendo cum Van Ranst de Indulg. q. 7. n. 29. negant, sufficere orationem mentalem. Resp. III. Preces sub visitatione Ecclesiarum faciendæ debent persolvi cum ea attentione, quæ requiritur ad substantiam orationis, de qua in Tractatu de Horis Canonicis; unde saltem probabiliter periculo invaliditatis exponit suum Jubilæum ille, qui voluntarie, & deliberate sub his precibus requisitis mente distractus existit per notabilem requisitam orationis partem. Porro, si quis Ecclesiam, ut has preces persolvere valeat, amplius ingredi nequeat, puta, dum jam ostium invenit clausum; testibus Suarez, Lugo, & Diana, ac conformiter jam dictis de Indulgentiis in communi, satisfacit orando ad ostium; quoniam adhuc moraliter censetur preces persolvere in Ecclesia. \*

## Additio III.

\* Quæres III. Qualis sit danda eleemosyna, si ejusdem elargitio in Bulla Jubilæi desideratur, prout requiritur in Jubilæis extraordinariis, quæ tempore Coronationis Pontificis, aut pro sublevanda extraordinaria necessitate Ecclesiæ conceduntur? Resp. Equidem, si non expresse aliud insinuat in Bulla, quamplures DD. æque defendere hic, uti præcedenter de precibus ob paritatem rationis; nimirum si efficere eleemosynam quantumcumque. Interea tamen loquendo in praxi prudenter Anaclet. Reiffenstuel Theol. Tom. I.

discurrit quoad divites la Croix lib. 6. part. 2. n. 1427. ponendo sequentia vix non in omnibus verba formalia: Si Bulla nihil determinet, sufficere eleemosynam quantumcumque parvam etiam pro quovis divite, docent Diana, Faujus, Rodriquez, Leo, & alii. Econtra Navarrus, Cordub. Regiu. & Alloza probabiliter volunt, dandam proportionate ad personæ facultates. Et licet Bullæ moderna dicant, prout unicuique devotio, & charitas suggererit: nihilominus Zech, Pourre, & alii adhuc ajunt sufficere quantumcumque parvam, sed alii melius dicunt, simul habendam esse rationem dictaminis intervi plus minusve suadentis. Et quia L. si quis, l. 5. §. ff. de Dolo habetur, minima non esse consideranda, recte subinfert Dominicus Viva q. 8. art. 6. quando aliquid committitur arbitrio operantis, non sufficere quidvis minimum, sed mensurandum esse secundum Regulas prudentiæ. Quinimo, si in Bulla talis extraordinarii Jubilæi poneretur hæc clausula, juxta cuiusvis facultatem: dives utique deberet plus dare, quam alius. Ita ille merito sequendus, cum ipsa praxis doceat, quod divites (nisi omnino fuerint Eucliones) etiam de facto soleant ordinarie, & communiter plus dare, quam alii minus habentes, alias sibi timentes de non lucrando Jubilæo, si e. g. tantummodo ad eum finem darent unicum obolum, vel crucigerum, prout pariter advertit Van Ranst de Indulg. q. 7. num. 24. ac seqq. Porro per pauperes, quibus eleemosyna danda, poterunt hic etiam merito intelligi egentes necessariis ad conservandum statum: item Ecclesiæ, aliave loca pia vere indigentia luminaribus, ornamentis, ædificiis, sustentatione &c. uti cum Nav. Lug. Sanch. Diana & Bellegambe advertit la Croix loc. cit. n. 1429. qui etiam superiori num. 1426. ex S. Thoma 2. 2. q. 2. art. 2. notat, sub nomine eleemosynæ comprehendi posse quodcumque ex septem Misericordiæ operibus corporalibus, e. g. mendicum domi excipere &c. Ceteroquin in Monasteriis solet tali tempore Superior subditos monere, ut faciant intentionem, quia nomine Conventus loco eleemosynæ copiosorem panem, aliaque subministrabit egenis &c. quod idem teste van Ranst de Indulgentiis q. 7. n. 25. facere poterit Paterfamilias respectu uxoris, ac suæ familiæ. \*

## Additio IV.

\* Quæres IV. Quomodo sit observandum jejunium, si illud requiritur, prout fit in Jubilæis extraordinariis tempore Coronationis novi Pontificis, aut in gravi necessitate Ecclesiæ? Resp. Observandum esse jejunium eo modo, quem singulæ Provinciæ tenent illo tempore quoad alia jejunia: consequenter nec impedit illud collatiuncula de nocte, nec potus, nec modicum quid sumptum intra diem. Ita apud la Croix, Sanchez in Decalogum lib. 4. cap. 11. & Franciscus Bellegambe De Jubilæo p. 3. sect. 5. quæst. 1. Ratio est: quia etiam alias, si Ecclesia jejunium præcipit, illud injungit juxta modum in illis Regionibus consuetum: & hinc in vigiliis Germani comedunt adhuc ova, atque lactinia, prout utique etiam facere possunt tempore Jubilæi. Porro: cum jejunium requiratur tamquam conditio sine qua non, ad id, supposito, quod Jubilæum illud, in quo præscribitur, lucrari velint, adstringuntur etiam illi, qui alias ad jejunium necdum sunt obligati, uti pueri, senes, itinerantes, laborantes, ac infirmi, nisi hæc jejunia in aliud opus pium à Confessariis commutentur. Quæ tamen jejunii commutatio in aliud opus pium non debet facile fieri, nisi id observari nequeat absque notabili incommodo, uti contingere potest apud valde infirmos, & ex itinere, vel labore notabiliter fatigatos. Ita recte annotat Dominicus Viva hic q. 8. art. ult. præsertim num. 4. qui exinde eodem articulo accurate subjungit, quod si jejunium Jubilæi incidat in aliquod Festum principale alicujus civitatis, non illico debeat illud commutari in aliud opus pium, v. g. in eleemosynam, sed potius ab Episcopo transferri ad alium diem hebdomadis non impeditum: nam sic Ecclesia etiam prædicat in aliis jejniis, si incidant e. g. Vigiliæ in diem



Dominicam, aut in aliquod principale Festum. Quinimo teste Van Ranst hic *qu. 7. num. 22.* Urbanus VIII. simile Jubilæum anno 1634. concedens tempore Paschali etiam ibi consueta imposuit jejunia. \*

*Additio V.*

\* Quæres V. An, si pia opera superius mentionata, quæ pro Jubilæo lucrando injunguntur, jam sint alias debita, tales nihilominus satisfaciant Bullæ Jubilæi per eadem opera, sicque per ipsa adhuc obtinere possint Indulgentias Jubilæi? Casus emergentes sunt varii: puta, potest quis esse jam aliunde obligatus ad visitandam Ecclesiam, ut die Dominica audiat Missam ibidem, vel potest esse adstrictus ad jejunandum vi Voti, aut Præcepti Ecclesiastici &c. Quæritur ergo, ut nihilominus per similem visitationem Ecclesiæ, vel jejunium quis satisfaciat Bullæ Jubilæi extraordinarii, & lucratur Indulgentias inibi contentas? Resp. à potiori loquendo, & nisi contraria mens Summi Pontificis ex specialibus circumstantiis defumatur, talem per mentionata opera aliunde debita satisfacere, & lucrari Indulgentias Jubilæi. Ita Sabinus Bononiensis *part. 2. tit. 6. q. 29.* & la Croix *lib. 6. part. 2. n. 1425.* ac teste eodem communis, præsertim sub his terminis. Ratio fundamentalis est; quia ex una parte potuit supremus Christi in terris Vicarius Pontifex Indulgentias tales intuitu hujus operis alias debiti concedere: quæ enim in hoc implicantia? & ex altera parte, cum non restrinxerit expresse Bullam ad opera præcise supererogatoria, sed absolute concesserit cum his operibus, oportet ordinarie mentem ejusdem in causa hac favorabili sic interpretari, quod nimirum dederit eas Indulgentias, si allegata opera peragantur, sive dein eadem alias jam sint debita, sive non; nam Beneficium supremi Principis patitur largam interpretationem *Leg. Beneficium, ff. de Const. Princip.* nisi aliunde sit ratio restringendi, vel specialiter in Rescripto aliquo verosimilius constet de mente contraria ejusdem. Accedit, quod dum in Jubilæo illo extraordinario injunguntur jejunia, iisdem contentus sit Pontifex ad obtinendas Indulgentias juxta communem, quamvis dicta jejunia incidant in quatuor tempora, vel in dies Vigiliarum, vel in Quadragesimam, ubi alias est obligatio jejunandi, quod utique signum est, non requiri à Summo Pontifice ordinarie opera supererogatoria, seu alias indebita. Sic etiam utique censetur quis sufficienter visitasse Ecclesiam suam Parochialem, etsi aliunde fuisset obligatus eam adire pro eo tempore, puta festivo, ad audiendam Missam, quæ alibi non amplius celebratur, dummodo etiam in dicta Ecclesia preces ad intentionem Pontificis pro lucrandis Indulgentiis devote persolvat. Item, si tempore Jubilæi incideret tempus Paschale, posset quis per Confessionem & Communionem Paschalem satisfacere præcepto Ecclesiastico de annua Confessione, & Paschali Communionem, & simul etiam per hoc ipsum opus adimplere conditionem confitendi, & communicandi, pro lucrandis Indulgentiis requisitam, prout fatetur ipsemet Pater Apollonius Holzman *tract. de Sacram. Penit. loc. cit. n. 661.* alias in hoc puncto contrarius: etenim, nisi verosimilius constet de mente contraria Legislatoris, potest quis duplici obligationi per unum idemque opus satisfacere, e. g. si Festum S. Mathiæ incideret in Dominicam, foret quidem duplex obligatio audiendi Missam (nimirum tam ratione Dominicæ, quam ratione Festi) cui tamen obligationi duplici satisficit per unicam auditionem unius Missæ, uti in confirmationem hujus nostræ sententiæ adducit P. Franciscus Van Ranst *de Indulgentiis q. 7. n. 1.* \*

*Additio VI.*

\* Dices. Non obtinet aliquis Indulgentias Jubilæi per illam elemosynam, quam alias elargiri debet ex justitia: ergo per opera alias debita non acquiritur Jubilæum.

Resp. enim concedendo anteced. in casu specificato, & quoad similes obligationes ex justitia: nego tamen exinde consequentiam, & paritatem quoad alios casus, in quibus non invenitur aliqua specialis ratio. Disparitas est, quod illa solutio debiti ex justitia tollat rationem elemosynæ proprie dictæ, utpote cum datio elemosynæ non sit restitutio, sed potius aliqua gratuita donatio: econtra vero jejunium exhibitum, quia præceptum est (idem dic proportionaliter de aliis similibus piis operibus) non tollit rationem jejunii. Unde notanter diximus à potiori loquendo, & nisi contrarium ex specialibus circumstantiis colligatur (uti colligitur in materia Justitiæ) posse in ordine ad Indulgentias Jubilæi obtinendas satisfieri per opera aliunde debita, loquendo de operibus, quæ sunt in enumeratione casuum comprehensa. \*

*Additio VII.*

\* Urgebis. Si quis aliunde tenetur ex voto singulis diebus ad certam intentionem recitare septem *Pater & Ave*; non satisfacit pro obtinendo Jubilæo, si hanc recitationem applicet præcise loco precum ad Jubilæum alias requisitarum: ergo adhuc per opera alias debita non acquiritur Jubilæum. Antec. probatur à pari; nam si tali poenitenti in Confessione injungeretur pro salutari poenitentia septem *Pater & Ave*, talis non satisfaceret præcise recitando illa septem *Pater & Ave*, ad quæ aliunde vi voti adstringitur: etenim si injungitur certum opus sub titulo oneroso, ut exinde quis obtineat certam gratiam, ac beneficium, exinde non satisficit per opus aliunde debitum, uti patet in exemplo proxime allato: ergo Resp. ad hanc satis efficacem instantiam distinguendo ultimum illatum: non satisficit per opus aliunde debitum, si ex aliis circumstantiis verosimilius constet, requiri novum opus supererogatorium, conc. secus, negatur. Cum itaque Papa non solum preces, sed etiam applicationem ad certum finem præscribat positive in Jubilæo, verosimilius non videtur esse contentus cum illis precibus, quæ jam aliunde, & quidem pro longe alio fine debentur. Unde bene distinguendum est inter hæc duo, præscribere persolutionem certorum operum, & præscribere applicationem horum operum ad certum finem. Sic Clericis in Sacris constitutis præscribitur quidem persolutio Horarum Canonicarum, non tamen applicatio harum precum ad certum finem; cum possit talis recitans pro se, vel pro aliis applicare. Loquendo de Jubilæo quoad ipsas preces in Ecclesia persolvendas non solum requiritur persolutio earum, sed annectitur etiam applicatio ad certum finem: non autem talis annexio applicationis reperitur in Bulla Concessionis Jubilæi circa sacram Confessionem vel Communionem; alias certe si in aliqua Dominica Jubilæi incideret simul Communio Generalis applicanda pro Defunctis, vel si fructum hujus Communionis quis antecedenter jam alteri donasset, talis communicans per prædictam Communionem non satisfaceret Jubilæo contra communem persuasionem Fidelium. Item si talis non satisfaceret Jubilæo, nec Sacerdos in Missa satisfaceret, si obligaretur alteri integram hanc Missam ex stipendio applicare, & tamen per illam Communionem, qua in dicta Missa sumit Sacrum Corpus Christi, vellet lucrari Jubilæum. \*

**Q U Æ S T I O X.**

De Facultate absolvendi à reservatis & commutandi Vota tempore Jubilæi. Item quoties quis hac facultate frui queat?

**S U M M A R I U M.**

114 Tempore Jubilæi solet Confessariis concedi potestas absolvendi à reservatis.

115 Et commutandi vota.

\* An quilibet Confessarius ab Episcopo approbatus possit hanc



*hanc duplicem potestatem exercere etiam erga Moniales, & Regulares, si tali confiteantur? || Addit. I. & II.*

- 116 *Jubilæum non posse bis obtineri, est probabilius.*  
 117 *Nec etiam in duobus locis.*  
 118 *Quamvis non desint oppositum tenentes.*  
 \* *An possit quis virtute Jubilæi bis absolvi?*  
 119 *Valida est absolutio à reservatis, obtenta in Jubilæo ab habente animum adimplendi opera præscripta, licet postea hæc non peragat.*  
 120 *Secus, si non habuisset animum ea implendi.*  
 121 *Utrum absolutus à reservatis peccet mortaliter, si postea non præstet opera Jubilæi?*  
 122 *Virtute Jubilæi potest quis absolvi à reservatis oblitis, eo jam peracto, cum Additione.*  
 123 *Hoc ipsum tenent aliqui de commutatione votorum.*  
 124 *Alii vero negant.*  
 \* *Qualia vota in Jubilæo excipiantur?*  
 125 *Probabilius est, in Jubilæo concedi facultatem absolvendi ab Hæresi, nisi excipiantur.*  
 126 *Idque probatur multipliciter.*  
 127 *Et confirmatur.*  
 128 *Solvitur ratio opposita sententiæ.*  
 129 *Respondetur ad Declarationes SS. Pontificum.*  
 \* *Item ad aliquod Decretum.*  
 130 *Excepta Hæresi non censentur excepti casus Hæresim sapientes.*  
 \* *Quidnam pro sit opinionum probabilitas ad obtinendos favores Jubilæi?*

114 **P**RO majori intelligentia sequentium est notandum, quod tempore Jubilæi præter Indulgentias plenarias, omnibus Fidelibus opera præscripta rite peragentibus concessas, duplex communiter potestas respectu eorum concedi soleat Confessariis, quos ipsi ex approbatis ab Ordinariis locorum elegerint. Prima est, quod hi possint eos pro ea vice, & in foro conscientie tantum, absolvere ab omnibus censuris, & peccatis, quamvis jam notoriis, etiam reservatis tum à locorum Ordinariis, tum à Summo Pontifice, ac etiam contentis in Bulla Coenæ Domini: dummodo non sint publice denunciati, incidisse in aliquam sententiam seu censuram excommunicationis, suspensionis, & interdicti; nam tales expresse in Bulla excipiuntur, nisi infra tempus celebrationis Jubilæi satisfecerint, supposito tamen, quod satisfacere possint; alias enim sufficeret cautio, etiam juratoria respectu talium. Solet quoque interdum expresse excipi crimen hæresis, ut videre est in Jubilæo Innocentii X. anno 1648. die 11. Martii publicato, quod refert Gobat circa initium *Tract. 3. Quinarii.*

115 Altera facultas, concessa Confessariis, est, quod possint quæcumque vota ipsorum (Religionis, & Castitatis exceptis, atque juxta Franciscum Van Ransf de *Indulg. qu. 11. num. 3.* illis quoque demptis, quæ immediate tendunt in favorem tertii, si ab eodem fuerint acceptata) in alia pia, & salutaria opera commutare. Ubi nomine *Castitatis* intelligitur Castitas perpetua, & integra, ut in simili dictum est supra *Tract. 6. dist. 3. num. 45. & 46.* Non tamen solet concedi ordinarie ulla facultas dispensandi super aliqua Irregularitate quomodocumque contracta, prout amplius ex verbis Bullæ cujuslibet Jubilæi patere poterit.

#### Additio I.

\* Porro, utrum illa duplex potestas commutandi vota, & ab omnibus simul peccatis, atque censuris absolvendi, Confessariis quibuscumque, à locorum Ordinariis in genere approbatis, tempore Jubilæi concessa, se in tantum extendat, ut quoscumque accedentes, & Jubilæum lucrari intendentes, non solum Sæculares, verum quoque Regulares exemptos, atque Moniales, etiam absque prævia licentia, aut deputatione speciali, respectu dictarum personarum exercere valeant, major est difficultas. Ubi quoad *Moniales* communis DD. consensus.

tra Kerchove, Franciscum Van Ransf, & Montalvum respondent negative, eo quod Confessarius approbatus in genere ab Ordinario loci, non censeatur approbatus specificè & relate ad Moniales; sicut à pari juxta Clementem X. approbatus pro audiendis Confessionibus Monialium unius Monasterii, minime censeatur approbatus sine legitima licentia pro Monialibus alterius Monasterii, nec Confessarius ex sua gravi ratione præcise approbatus pro viris, censeatur approbatus pro feminis, uti recte notant Matthæucius *vers. Officialis quoad Moniales num. 10. ac 11.* Dominicus Viva *tract. de Jubilæo quæst. 9. art. 2.* Felix Potestas in *suo Examine tom. 1. n. 1444. ac seqq.* & Lantusca in *Theatro Regularium, vers. Jubilæum n. 2.* ubi etiam hic ultimus adducit aliquam Declarationem Cardinalium Congregationis Episcoporum, & Regularium. Oportet tamen, ut illi Superiores, quibus alias de jure competit deputare Confessarios pro Monialibus, in hoc puncto tempore Jubilæi non sint parci, etiam plures, si desiderentur, ex ordine deputando Confessarios extraordinarios pro plenissima earum satisfactione spiritali, uti recte advertit Lantusca *loc. cit.* adducens desuper *num. 1.* aliquod Decretum Cardinalium, editum anno 1634. 24. Martii. \*

#### Additio II.

\* Quoad Viros autem Regulares exemptos, utrum potestas absolvendi *passive loquendo*, etiam erga eosdem tempore Jubilæi exerceri queat, ita, ut à quocumque extraneo Regulari vel Sæculari Confessario (dummodo à locorum Ordinario fuerit approbatus in genere) ab omnibus peccatis, atque censuris tempore Jubilæi absolvi queant, acriter inter Doctores certatur; ubi Kerchove in *Statuta Generalia c. 7. §. 22. n. 109.* cum pluribus aliis defendit affirmativam, idque etiam citra licentiam, & assensum Superioris, afferens pro se aliquam Declarationem Gregorii XIII. editam die 19. Decembris anno 1581. E contra Dominicus Viva *tract. de Jubilæo q. 9.* cum aliis, propugnat negativam, si sit sermo de Confessariis. NB. extra illam Religionem &c. addens, ita vivæ vocis oraculo declarasse ipsummet Gregorium XIII. tempore posteriori, nimirum die 24. Octobris anni 1584. uti refertur in *Compendio Regularium S. J. vers. Gratiarum Usus*, putoque hanc sententiam saltem procedere in illis Religionibus, aut Provinciis, in quibus alias singulariter est interdictum confiteri extra Ordinem sub nullitate actus: nam tunc aliquis Confessarius extraneus, seu extra illam Religionem non censeatur à quasi Ordinario respectu sui subditi (nimirum à Provinciali in subditos suæ jurisdictioni subiectos habente quasi Potestatem Episcopalem) approbatus. Confirmatur à pari: juxta multos ex Adversariis approbatus ab Ordinario loci genericè non potest absque speciali licentia tempore Jubilæi excipere Confessiones Monialium, idque ideo, quia alias approbatus in genere non censeatur approbatus in specie pro Monialibus, sed etiam approbatus alias à loci Ordinario in genere, non censeatur approbatus in specie pro Religiosis exemptis, si Superior major eorum, habens in ipsos & eorum Monasteriis potestatem quasi Episcopalem, expresse contradicat: ergo. Et hinc novissime noster Thomas Montalvus in sua Glossa fundamentali anno 1740. Matriti edita, *tom. 1. c. 16. art. 5. m. 11.* bene advertit, de Monialibus, & supra memoratis Regularibus exemptis quoad Jubilæum debere pariformiter discursi, nimirum aut utrobique affirmative, aut utrobique negative. His de potestate commutandi vota & absolvendi à peccatis atque Censuris tempore Jubilæi prænotatis, pro solutione ulteriorum dubiorum circa materiam præsentis Quæstionis occurrentium, sit \*

116 CONCL. I. Probabilius est, quod Jubilæum ad duas hebdomadas extensum non possit bis obtineri; ac proinde, qui intuitu ejus absolutus à reservatis hebdomada priori, non possit denuo hebdomada sequenti reiteratis operibus absolvi à reservatis, in quæ noviter incidit.



Ita Lugo *disp. 27. de Sacram. Penit. n. 121.* citans Suarez, Sanchez, & alios. Filliucius *nu. 261.* asserens, ita fuisse declaratum à Sacra Congregatione Concilii, anno 1620. & rursus *n. 278.* ubi refert, ita respondisse Clementem VIII. ac novissime Sannig. *loc. cit. n. 15.* Fundatur hæc sententia præter allatas jam Declarationes in eo: quia Indulgentia tantum valet, quantum sonat Bulla; atqui Bullæ Jubilæorum utuntur clausula disjunctiva: *Qui prima, vel secunda hebdomada*, & infra: *Alterius ex duabus hebdomadis*; ergo non nisi disjunctive poterit Jubilæum obtineri prima, vel secunda hebdomada, & consequenter non bis, seu copulative in utraque.

117 Atque hinc ulterius inferitur, quod, si quis in uno loco, v. g. Salisburgi, lucratus est Jubilæum, ibi prius publicatum, & postea veniat Frisingam, ubi serius idem Jubilæum publicatur, non possit secundo idem Jubilæum lucrari, & absolvi à reservatis; quia, licet locus sit diversus, Jubilæum tamen est idem. Lugo *loc. cit. n. 121.*

118 Additur notanter in Conclusionem, *probabilius est*, quia non desunt Doctores, qui affirmant, posse Jubilæum, sæpius, atque in utraque hebdomada obtineri, si opera præscripta repetantur, eo quod Beneficium Principis sit latissime interpretandum, quando non tendit in præjudicium tertii. Henriquez *lib. 7. de Indulg. cap. 11. num. 1.* & novissime Gobat *Tract. 3. Quinarii num. 92. & seqq.* citans plures alios, ac proinde *num. 256.* inferens, quod prima hebdomada absolutus à censuris, si reincidat in illas, possit secunda hebdomada denuo absolvi repetitis operibus: quorum sententiam Lugo *cit. num. 122.* probabilem censet, etsi nostram appellet probabilior.

#### *Additio.*

\* Ex qua ultima doctrina etiam Sanchez apud la Croix *lib. 6. part. 2. n. 1450.* deducit, multo magis, & à fortiori quempiam sæpius à peccatis reservatis seu censuris absolvi posse intra spatium unius, nimirum illius septimanæ, qua quis peragit opera ratione Jubilæi præscripta; atque hanc sententiam valde favorem saltem procedere putant usque ad illud tempus, quo quis ultimum opus in Jubilæo præscriptum complevit. Quinimo Cardinalis de Lugo, & Castropalao idem respectu unius septimanæ defendunt, etiam si primis diebus illius septimanæ quis jam absolvisset omnia opera pro Jubilæo præscripta; quia (inquiunt) pro favoribus Jubilæi acquirendis ad minus videtur cuilibet assignata una tota septimana: quoniam Bulla Jubilæi absolute concedit favores Jubilæi opera præscripta peragentibus una ex designatis septimanis. Altera autem verba; *pro hac vice tantum absolvas &c.* si in aliqua Bulla Jubilæi reperiantur, non videntur referri ad actum absolvendi, quasi nimirum quis unica tantum vice absolvi posset à censuris, & casibus reservatis, sed ad tempus Jubilæi, nimirum, quod similis potestas absolvendi à censuris, & peccatis tantum daret tempore Jubilæi, non autem ultra.

Ast dices, apud Filliucium reperiri contrariam huic sententiæ Declarationem S. Congregationis, volentis semel tantum acquiri posse Indulgentiam per Jubilæum concessam, & NB. semel tantum quempiam posse à reservatis absolvi. Respondent ad hanc Declarationem Gobat, & Diana apud Dominicum Viva *tract. de Jubilæo qu. 6. art. ult. prope finem*, non constare authentice de eadem. Ego vero (ut verum ingenue fatear) in reverentiam hujus Declarationis, quæ pariter allegatur à Van Ranst *loc. cit. q. 5. n. 15.* & cui accedunt alia gravia fundamenta apud Viva *loc. cit.* videnda, vix amplius anderem, supposito, quod quis intra illam septimanam jam fuerit complete Jubilæum lucratus, & primum postea committeret de novo casum reservatum, praticare sententiam Cardinalis de Lugo, ac Castropalao, nisi aliunde doceat, hanc Declarationem, cujus valorem, ac subsistentiam alii graves DD. pro viribus defendunt, non esse authenticam.\*

119 CONCL. II. Valida est absolutio illius, qui animo adimplendi omnia requisita pro lucrando Jubilæo, die Lunæ alterius hebdomadæ confessus est peccata reservata, & ab eis, atque annexis censuris, etiam Papæ reservatis, obtinuit absolutionem pro Foro conscientie, licet postmodum opera præscripta implere negligat. Ita Zerola *part. 2. Praxis Episcopalis, vers. Absolutio q. 11.* Lugo *disp. 20. de Sacram. Penit. n. 100.* Sanchez *lib. 4. in Decalog. c. 54. n. 42.* Bonacina *disp. 5. de Sacram. Penit. q. 7. punct. 5. §. 5. n. 16.* citans insuper Suarez, Vasquez, & alios: quamvis nonnulli velint, in tali casu censuras, earumque reservationem redire. Ratio Conclusionis est: quia absolutio ejusmodi fuit data omnino absolute, non autem sub conditione de futuro, ergo semel habita simpliciter tenet. Accedit, quod poenitens cum intentione peragendi omnia requisita confessus, rite fuerit dispositus pro recipienda absolutione ab omnibus peccatis, & censuris etiam reservatis virtute Jubilæi, quod lucrari vere intendebat; nam in ordine ad istud obtinendum Papa concessit facultatem absolvendi à reservatis.

120 Additur notanter, *qui animo adimplendi omnia &c.* nam deficiente intentione adimplendi opera ad Jubilæum requisita ex parte confitentis, deficit quoque facultas absolvendi à reservatis ex parte Confessarii, cum ipsam Pontifex solum concesserit in ordine ad consequendum Jubilæum, ac proinde defectu potestatis absolutio illa numquam fuerit valida. Lugo, Bonacina, *ubi supra* cum aliis.

121 Variant autem Doctores, utrum in priori casu poenitens graviter peccet, si, postquam tempore Jubilæi obtinuit absolutionem à reservatis, mutato animo non præstet opera præscripta, sicque Jubilæum lucrari negligat. Et quidem Suarez *disp. 31. de Penit. sect. 4. n. 5.* arbitratur, talem graviter peccaturum. Econtra Sanchez *loc. cit. n. 54.* Lugo, Bonacina, *ubi supra*, Gobat *cit. tract. 3. nu. 262.* & alii, probabilius esse censent, talem non peccaturum mortaliter; nam, ex quo bona fide petiit, & accepit absolutionem à reservatis, non apparet sufficiens fundamentum inducendi obligationem sub mortali ad præstanda cetera opera; cum nulli gravem injuriam inferat, sibi que potissimum noceat non lucrando Jubilæum: ad quod nulla lege sub mortali obligatur.

122 CONCL. III. Qui confessus est tempore Jubilæi animo illud lucrandi, atque ex oblivione omisit confiteri peccatum reservatum, vel censuratum, potest peracto Jubilæo ejus absolutionem obtinere à simplici Confessario. Ita Lugo *cit. disp. 20. n. 99.* Filliucius *tr. 8. c. 10. de Jubilæo nu. 279.* Sannig *loc. cit. n. 17.* Suarez, & alii. Ratio est: quia per absolutionem tempore Jubilæi generaliter & absolute datam jam censetur ablata reservatio pro oblitis; & consequenter postea ab his potest absolvere simplex Confessarius.

#### *Additio.*

\* Quod practice loquendo bene observari debet à Confessariis, alias extra Jubilæum non præditis facultate absolvendi à Casibus reservatis Papalibus, vel Episcopalibus, si (maxime in Confessionibus Generalibus præsertim brevi post aliquod Jubilæum) ipsis similia reservata peccata à Poenitentibus suis afferuntur, interrogando ex tunc eosdem, an forsitan dicta peccata non jam ante Jubilæum commiserint, ac ibidem illa ex oblivione in Confessione tempore Jubilæi facta omiserint? nam dato hoc supposito possent adhuc similes Poenitentes à talibus Confessariis absolvi.\*

123 Id ipsum autem, quod ante de absolutione dictum fuit, non pauci Doctores cum Sanchez *lib. 8. disp. 14.* & Diana *part. 5. tr. 12. resol. 40.* extendunt etiam ad commutationem votorum, ita ut ille, qui præstitit opera pro consequendo Jubilæo præscripta, possit transacto etiam tempore Jubilæi votorum antea factorum commutationem petere, atque obtinere à quovis Confessario.

Ratio



## Quæst. X. De facultate absolvi. a reserv. & commut. vota &c. 403

Ratio esse potest: quia, qui semel lucratus est Jubilæum, acquisivit jus ad obtinendas omnes gratias Jubilæi etiam pro tempore sequenti, si eas pro tunc petere fuit oblitus; & consequenter, sicut postea potest obtinere absolutionem a reservatis, ita & commutationem votorum. Ita Sanchez lib. 4. in Decal. c. 54. n. 39, Lessius lib. 2. de Just. & Jur. c. 40. n. 109. Gobat loc. cit. n. 243. citans plures alios.

124 Fatendum tamen, quod Suarez lib. 6. de Voto c. 16. n. 14. & Bonacina disp. 4. in Decalogum q. 2. punct. 7. §. 3. n. 14. & quidam alii negent, commutationem votorum fieri posse post peractum tempus Jubilæi, nisi hæc pro tunc jam fuerit inchoata, sicque perpetuata jurisdictio delegata Confessarii, dicendo v. gr. *Commuto tua vota in ea opera, quæ postmodum ero designaturus*. Alioquin vero (inquiunt) transacto tempore Jubilæi, expirat jurisdictio Confessarii; neque enim est paritas inter absolutionem a reservatis, & commutationem votorum: nam illa jam absolute, & sine aliqua conditione facta fuit ipso tempore Jubilæi, non sic commutatio votorum, nisi in casu jam excepto. Videantur dicta n. 109. prope finem.

### Additio.

Porro, cum in potestate commutandi Vota, tempore Jubilæi concessa, excipiantur Vota perpetuæ Castitatis; & Religionis, revidendum in materia de Votis tr. 6. dist. 3. q. 3. ac 4. cum Appendice, quænam proprie censeantur Vota perpetuæ Castitatis, & Religionis: nam, si non sint proprie talia, ita, ut in ipsis etiam Religiosi Mendicantes extra Jubilæum virtute suorum Privilegiorum dispensare valeant, pariter eadem Vota alii Confessarii alias non privilegiati commutare possunt in Jubilæo illo, in quo generaliter conceditur potestas commutandi Vota exceptis Religionis, & perpetuæ Castitatis &c. Subjungunt Dominicus Viva de Jubilæo q. 12. art. 2. n. 7. ac 8. & la Croix lib. 6. part. 2. num. 1462. posse commutari Vota perpetuæ Castitatis ab impuberibus emissa, non obstante, quod in Bulla Jubilæi excipiantur Vota perpetuæ Castitatis. Ratio ipsorum est: quia impuberes præsumuntur non perpenderit sufficienter matura deliberatione statum perpetuum Castitatis, hincque eorum Vota non comprehensa sub reservatione Bullæ. Profecto impuberes juxta cap. Attestationes, de desponsat. impub. nequeunt eligere Matrimonium; quia in ea ætate non præsumuntur, (quamvis cæteroquin suo modo post septennium jam capaces rationis) deliberatione NB. sufficienter matura perpenderit statum perpetuum tam gravis obligationis.

125 CONCL. IV. Quando in Bulla Jubilæi datur Confessariis facultas absolviendi pro Foro conscientie ab omnibus censuris, & peccatis, *quantumvis gravibus & enormibus, etiam in litteris die Cane Domini legi solitis, & alias --- quomodocumque reservatis*: probabilius est, etiam concedi facultatem absolviendi ab Hæresi, nisi hæc expresse excipiat. Ita Filliucius cit. tract. 8. c. 10. n. 265. asserens, ita fuisse responsum in Sacra Pœnitentiaria 1617. occasione Jubilæi tunc promulgata. Zerola part. 2. Praxis Episcop. vers. Absolutio quæst. 8. concl. 4. citans Sotum dist. 22. quæst. 2. art. 3. Corduba in Summ. quæst. 8. Fagundez, Lugo, Azorius, pluresque alii, ac novissime Gobat cit. tract. 3. Quinari n. 248. & ibi in Appendicula, quamvis etiam multi teneant oppositum, ut videre est apud Barbosam part. 2. de Offic. & potest. Episc. alleg. 40. num. 31.

126 Ratio Conclusionis est: quia verba generalia generaliter sunt intelligenda, simulque negari nequit, quin Hæresis connumeretur inter casus Bullæ Cœnæ Domini. Deinde causa motiva, ob quam Pontifex per Bullam Jubilæi solet Confessariis concedere amplissimam illam facultatem absolviendi solet assignare ista; quia videlicet Sanctissimus Dominus Papa cupit omnes Christi Fideles participes fieri hujus pretiosissimi Thesauri. seu Jubilæi: atqui etiam lapsus in Hæresin, & de hac vere Anaclet. Reiffenstuel Theol. Tom. I.

pœnitens, & contritus pertinet ad Christi Fideles: cur igitur is solus de mente Pontificis non poterit participare fieri tanti Thesauri, nisi expresse excipiat? Notum quippe est, quod beneficium Principis, nulli tertio præjudicans, sit largissime interpretandum, ut c. Olim, de Verb. signif. & quod favores sint ampliandi, non restringendi, juxta Reg. 15. Juris. in 6. cum similibus.

127 Accedit, quod, si Papa a tam generali & favorabili concessione velit esse exceptum crimen Hæresis, soleat illud expresse excipere, prout sæpius factum esse ostendit Gobat, ubi supra; ergo, quando illud expresse non excipit, censetur per verba tam generalia, atque intuitu Jubilæi, velle dare Confessariis potestatem absolviendi etiam a crimine Hæresis pro Foro Conscientie, arg. 2. Quia circa de Privileg. ibi: *Cum nihil exceperit*. & potuerit excepisse, sicut jam fecerant alii Pontifices, quando hoc crimen voluerunt esse exceptum.

128 Nec obstat ratio Doctorum oppositæ sententiæ, sese fundantium in gravitate, & rigorosa reservatione Hæresis: unde (inquiunt) hoc crimen non venit in generali concessione absolviendi, cum sit speciali nota dignum, juxta Reg. 81. Juris, in 6. In generali concessione non veniunt ea, quæ quis non esset verisimiliter in specie concessurus. Nam contra est: quia, licet sit opinio multorum Doctorum, non venire in generali concessione Casuum Bullæ Cœnæ crimen Hæresis, propter ejus enormitatem, tamen in nullo jure probatur, & alioquin Viri etiam doctissimi contrarium sentiunt, quod & in usum, & praxin deducitur Romæ in sacra Pœnitentiaria, ut inquit Filliucius loc. cit. atque intrepide, singulariter a Confessariis Septentrionalibus, ubi impune grassantur Hæreses, in usum deduci posse, notat Gobat cit. n. 249. circa finem. Accedit, quod si vera esset opposita sententia, non nisi superflue, & negatorie quidam Pontifices expresse crimen Hæresis excepissent, utpote quod per se, & aliunde jam fuisset sufficienter exceptum.

129 Afferuntur quidem in favorem oppositæ sententiæ nonnullæ Declarationes SS. Pontificum, uti videre est apud Barbosam cit. n. 31. Verum respondet Diana part. 1. tract. 5. resolut. 1. post Fagundez, quod de illis non constet authenticæ. Certe responsio Sac. Pœnitentiariæ, per Filliucium adducta, stat in oppositum. Quod si revera tales Declarationes Pontificiæ emanarint, non erit locus dandus nostræ sententiæ: nisi dicat possit, quod dictæ Declarationes emanarint a Pontificibus circa proprias suas Bullas; aut, quod ipsæ restringantur intra limites Hispaniæ, aliorumque locorum, ubi viget Officium S. Inquisitionis, ad cujus instantiam dictæ Declarationes emanarunt, ut patet ex verbis Decreti a Diana ubi supra relati.

### Additio.

\* Oppones Decretum S. Congregationis sub Alexandro VII. 15. Maji anno 1656. editum sequentis tenoris: *Cum Crimen Hæresis præ cæteris gravissimum speciali nota dignum sit, decrevit facultatem absolviendi ab Hæresi NB. in Jubilæis, vel aliis similibus Concessionibus non censi comprehensam, nisi præcis verbis concedatur facultas absolviendi ab Hæresi*. Resp. ad hunc textum, qui etiam pro fundamento in Jure Canonico lib. 5. decr. tit. 7. §. 8. n. 400. adducitur, eundem esse intelligendum quoad loca, ubi Hæreses sunt rariores, ac viget Officium Inquisitionis; non autem, ubi ex impunitate grassantur, uti in Germania. Et ita etiam novissime resolvit Van Ranst in suo opusculo de Jubilæo, Roma impresso; & Benedicto XII. Summo Pontifici dedicato, & a Reverendissimo Magistro Sacri Palatii Apostolici approbato, q. 10. n. 4.

130 His addendum cum Diana part. 4. resol. 140. Gobat loc. cit. n. 250. & aliis, quod licet quandoque in Bulla Jubilæi expresse excipiat Hæresis a generali facultate absolviendi, non idcirco censeantur excepti alii casus Hæresin sapientes; ut est lectio, ac retentio librorum Hæreti-



hæreticorum una cum cæteris casibus in primo Articulo Bullæ Cœnæ contentis; nam talia delicta non possunt cum verborum proprietate dici hæresis.

*Additio.*

\* Quæres. Quid profit opinionum probabilitas ad lucrandas Indulgentias, vel favores Jubilæi? Ubi nota, quod favores Jubilæo annexi dicantur *electio Confessarii, potestas absolvendi a reservatis, vel commutandi Vota &c.* qui favores expresse in Jubilæis extraordinariis, quin & in ordinariis Anni Sancti quoad potestatem absolvendi, & commutandi concedi solent, prout patet ex Bulla Clementis X. annectenda in Appendice post hanc Quæstionem. Hoc prænotato, ut quæsitum istud magis capiatur, ponuntur exempla in his Quæstionibus jam comprehensa: e. g. disceptatur inter Doctores, num Anno Sancto sint revocate Indulgentiæ partiales, vel non? Item, num obtineantur Indulgentiæ Jubilæi, nec ne, si parum quid ex operibus injunctis intermittatur? Pariformiter controversi potest inter Doctores loquendo de favoribus Jubilæi, num sub potestate absolvendi, & commutandi tempore Jubilæi concessa hoc, vel illud in specie comprehendatur, nec ne &c. Posito ergo, quod ego verisimilius judicem, non revocari Anno Sancto Indulgentias partiales, vel valere easdem, etsi parum quidpiam ex operibus injunctis intermittam, aut loquendo de favoribus Jubilæi, comprehendi sub facultate absolvendi, vel commutandi etiam licentiam circa casum inter DD. controversum, sicque absolvam, vel commutem. In his, & similibus casibus quæritur, quid mihi profit iudicium meum ex similibus probabilissimis fundamentis firmatum, posito, quod a parte rei Indulgentiæ partiales æque ac plenariæ a Papa Anno Sancto essent revocate, aut Pontifex etiam ob intermissionem levem operum injunctorum non concederet Indulgentias, vel nolle sub potestate absolvendi a casibus Bullæ Cœnæ comprehendere hæresim? Ad quod

Resp. I. Opinionum probabilitas in ordine ad Indulgentias Jubilæi, vel etiam alias in tantum prodest, ut is, qui juxta eandem operatur, non incurrat notam temeritatis, & consequenter nec excommunicationem, aliasve poenas Ecclesiasticas latas in illos, qui falsas Indulgentias spargunt, & defendunt tamquam veras, aliosque ad eas inducunt. Ita communis, & ratio est; quia hæ poenæ solummodo feruntur in illos, qui scienter Indulgentias falsas faciunt tamquam veras: tales autem, quibus ex valde gravi fundamento Indulgentiæ apparent veræ, non habent scientiam de falsitate earum: ergo.

Resp. II. Non desunt aliqui AA. qui cum Amico tom. 8. D. 21. a n. 47. & Dominico Viva de Jubilæo q. 3. art. 1. defendunt, opinionum probabilitatem conferre etiam ad obtinendas ipsas Indulgentias, ita ut, si forsan sequendo talem opinionem probabilem error contingeret, ipsemet Pontifex hunc errorem suppleret, adhuc eo non obstante ex thesauro Ecclesiæ concedendo Indulgentias: ast communior Doctorum est contraria, semper sibi persuadens, Pontificem non alligasse valorem Indulgentiarum opinionibus easdem lucrantium, sed suæ voluntati, & certis præfixis conditionibus, nam juxta commune: *Indulgentiæ tantum valent, quantum sonant*: id est (uti loquitur D. Thomas) quantum sonant arbitrio eas impertientis, & ad certas condiciones adstringentis, quas concedens iudicat affigendas, non vero quas lucraturus probabiliter putat attendendas.

Resp. III. Loquendo de aliis favoribus Jubilæi tribuentibus Confessario facultatem absolvendi, & Vota commutandi respectu eorum, qui Jubilæum lucrari intendunt, opinio probabilis, saltem si sit æque probabilis, vel omnino probabilior altera, in tantum prodest, ut attendendo præsertim ad principia reflexa, moraliter certo jurisdictionem tribuat tales favores exhibendi. Ita Viva loc. cit. art. 2. & la Croix lib. 6. part. 2. n. 1445. ac teste ipso communis. Ratio est: quia in Sacramento Poenitentiae error communis jus tribuit, quatenus Ecclesia ad evitanda multa incommoda, & præjudicia supplet

in eo casu defectum jurisdictionis, eo ipso tribuendo eam, quando prudenter judicatur adesse, prout fustus solide probat Dominicus Viva loc. cit. \*

**APPENDIX II.**

Continens Bullam suspensivam tempore Jubilæi in Anno Sancto. Item subjungitur notificatio Gratiarum, & Declarationum factarum occasione Jubilæi Romæ celebrati, ac novissima Concessio Benedicti XIII. quoad Indulgentias, pro defunctis applicandas, & alias pro vivis.

**SUMMARIUM**

- \* Bulla suspensiva Indulgentiarum tempore Jubilæi in Anno Sancto. Addit. I.
  - \* Deducitur notabile Corollarium. Addit. II.
  - \* Ponuntur Declarationes Clementis X. & Benedicti XII. circa suspensionem Indulgentiarum in tali Jubilæo. Addit. III. & IV.
  - \* Eruuntur exinde notabilia Corollaria Add. V. VI. ac VII.
  - \* Apponitur specialis favor concessus pro defunctis. Addit. VIII.
  - \* Item alius pro vivis. Addit. IX.
  - \* Repetuntur succincte omnia dicta de Anno Sancto. Ad. X.
- Bulla suspensiva Indulgentiarum Tempore Jubilæi Romani anno 1728. celebrati.

*Additio. I.*

**BENEDICTUS**

**EPISCOPUS** Servus Servorum DEI.

Ad futuram rei memoriam.

**C**um Nos nuper sancti Jubilæi celebrationem a vigilia Nativitatis Domini Nostri JESU Christi proxime futura inchoandam, & usque ad finem sequentis anni duraturam universo populo Christiano, de Venerabilium Fratrum nostrorum sanctæ Romanæ Ecclesiæ Cardinalium assensu, indixerimus, ac omnibus utriusque sexus Christi Fidelibus vere poenitentibus, & confessis, qui Beatorum Petri, & Pauli Apostolorum, nec non Sancti Joannis Lateranensis, & Sanctæ Mariæ Majoris de Urbe Basilicas visitaverint, plenissimam omnium peccatorum suorum Indulgentiam, remissionem, & veniam concesserimus, prout in nostris desuper confectis litteris plenius continetur; cupientes, ut Christianæ nationes ex omnibus terrarum Orbis locis in alma Urbe nostra in Fidei, ac Religionis unitate congregata, eodem pietatis, ac devotionis spiritu Basilicas prædictas, quo maximo fieri poterit concursu, durante eodem Jubilæo visitent, & frequentent, multorum Romanorum Pontificum prædecessorum nostrorum exemplo adducti, omnes, & singulas Indulgentias, etiam perpetuas, & peccatorum remissiones, ac facultates, & indulta absolvendi, etiam a casibus Sedi Apostolicæ reservatis, etiam in litteris die Cœnæ Domini legi solitis contentis, quibusvis Ecclesiis, Monasteriis, Hospitalibus, etiam Sancti Joannis Hierosolymitani, Domibus, Militiis, Ordinibus etiam Mendicantibus, Congregationibus, Confraternitatibus etiam Laicorum, Universitatibus, & piis locis, illorumque Ordinibus, Capitulis, Conventibus, Magistris, Superioribus, & tam secularibus, quam quorumvis, etiam Mendicantium, Ordinum Regularibus personis, Coronisque, Granis, Imaginibus, Numismatibus ex metallo, seu quacunque alia materia confectis, tam singulariter, quam universaliter per quoscunque Romanos Pontifices Prædecessores nostros, ac etiam Nos, etiam ad instantiam Imperatoris, Regum, Ducum, aliorum Principum, aut ipsis etiam Imperatori, Regibus, Ducibus, & Principibus, vel aliis quacunque alia mundana, vel Ecclesiastica Dignitate, etiam speciali nota digna fulgentibus, etiam ad instar Jubilæi, aut alias quomodocunque, & ex quibusvis causis, & occasionibus sub quibuscunque tenoribus, & formis, ac cum quibusvis



## Appendix II. Bulla suspensiva Indulgent. in Anno Sancto &c. 405

quibusvis clausulis, & Decretis, etiam motu proprio, & ex certa scientia, ac alias quomodolibet concessas, & concessas, quorum omnium tenores, formas, derogationes, & decreta presentibus pro expressis haberi volumus, Apostolica Auctoritate, de eorumdem Fratrum consilio, & assensu, ac potestatis plenitudine, suspendimus, & suspensas, ac suspensas esse declaramus, easque, & ea, eodem anno durante, nulli prodesse, aut suffragari debere. Irritum quoque, & inane decernimus, si secus super his a quoquam quavis auctoritate scienter, vel ignoranter contigerit attentari. Quocirca per presentes Auctoritate Apostolica precipimus, & mandamus, ne interim alia, quam indicti a Nobis praedicti Jubilei Indulgentia sive publica, sive privata, quovis praetextu, ubivis locorum, & gentium sub excommunicationis, eo ipso incurrenda, aliisque arbitrio Ordinariorum infingendis penis publicentur, vel nuntientur, aut in usum demandentur. Non obstantibus praemissis, ac constitutionibus, & ordinationibus Apostolicis, nec non Ecclesiarum, Monasteriorum, Conventuum, Ordinum, Congregationum, Hospitalium, Confraternitatum, Universitatum, Collegiorum, & Locorum, aliorumque praedictorum etiam iuramento, confirmatione Apostolica, vel quavis firmitate alia roboratis, statutis, & consuetudinibus, privilegiis quoque, exemptionibus, ex indultis Apostolicis illis, eorumque Superioribus, & personis ac aliis quibuscumque per eosdem Romanos Pontifices Praedecessores Nostros, ac Nos, & dictam Sedem, eiusque Legatores sub quibuscumque tenoribus, & formis, ac cum quibusvis clausulis, & Decretis, & ex quibusvis causis, concessis, confirmatis, & innovatis. Quibus omnibus, etiam si in illis caveatur expresse, quod sub similibus, vel dissimilibus suspensionibus nequaquam comprehendantur, nisi de illis specialiter, & individui mentio fiat, illis alias in suo robore permansuris, ad effectum praemissum, hac vice dumtaxat, specialiter, & expresse derogamus, ceterisque contrariis quibuscumque. Et quia difficile nimis esset praesentes quocumque, ubi illis opus fuerit, perferri, volumus earum exemplis etiam impressis, Notarii publici manu, & sigillo personae in dignitate Ecclesiastica constitutae obsignatis, eandem prorsus fidem in iudicio, & extra ubique locorum adhiberi, quae adhiberetur praesentibus, si essent exhibitae, vel ostense. Nulli ergo omnino hominum liceat hanc paginam nostrae suspensionis, declarationis, decreti, praeccepti, mandati, & voluntatis infringere, vel ei ausu temerario contraire. Si quis autem hoc attentare praesumpserit, indignationem Omnipotentis Dei, ac Beatorum Petri, & Pauli Apostolorum eius se noverit incursurum. Datum Romae apud Sanctam Mariam Majorem, anno Incarnationis Dominicae Millesimo Septingentesimo vigesimo quarto, pridie Nonas Julii, Pontificatus Nostri Anno primo.

P. M. Card. Prodatarius.

F. Card. Oliverius.

Visa de Curia I. C. Archiep: Amasenus.

Registrata in Secretaria Brevium.

Loco † Plumbi,

L. Martinettus. \*

### Additio II.

\* Hanc Bulla omnino convenit cum aliis duabus, quas Clemens X. pro Anno Sancto 1675. & Innocentius XII. pro Anno Jubileo 1700. ediderunt, ubi iisdem, ac Benedictus XIII. pro anno 1735. utuntur potissimum verbis in suspensione Indulgentiarum extra Romam, prout omnes tres collationavi.

Ex quo etiam ad tollenda multa dubia recte ex Dominico Viva tract. de Jubil. q. ult. art. 1. n. 2. deducitur, quod sistendo in allegata Bulla non alia Anno Sancto 1725. intelligantur suspensae Indulgentiae, quam quae fuerunt suspensae praecedentibus duobus Jubilaeis pro Anno 1675. & 1700. Romae durantibus; nisi Pontifex expresse se aliter declaret. Ratio assertionis est; quia, dum alias Pontifices Successores iisdem, ac Antecessores utuntur verbis, etiam eodem modo veniunt intelligendi quoad illa verba. Idque praecipue locum habet; si in Bullis addant (prout faciunt in Jubilaeo) sese

multorum Praedecessorum suorum vestigiis inherere. Hinc, quamvis, si volumus nuda verba novissimae Bullae superius allegatae inspicere, viderentur pariter suspensae Indulgentiae plenariae in articulo mortis, vel Altaribus privilegiatis pro solis defunctis concessae, item illae, quae alias sunt datae pro Ecclesia Portiunculae &c. Nihilominus, quia Antecessores Pontifices, quorum NB. vestigiis se inherere ait SS. D. Benedictus XIII. expresse declarant, se nolle sub his ipsis verbis, & clausulis suspensivis comprehendere allegatas proxime Indulgentias, speciali mentione dignas, uti praeter alios in specie de Portiuncula testatus est Innocentius XII. in Bulla Cum ob sacri Jubilei &c. edita 21. Aug. 1699. pari modo intelligenda eadem ipsamet verba; quatenus sunt inserta novissimae Bullae suspensivae Benedicti XIII. \*

### Additio III.

\* Audiamus itaque Declarationem Clementis X. quam post emanatam pro Anno Jubileo 1675. talem Bullam extra Romam suspensivam Indulgentiarum poni fecit sequentis tenoris:

Caspar Tit. S. Sylvestri in Capite S. R. E. Prefbyter Cardinalis Carpineus SS. D. N. Papae Vicarius Generalis.

I. Cum Sanctitas Domini Nostri, prout nobis viva vocis Oraculo mandavit, cupiat magis dilatari gratias concessas omnibus illis, qui convenerunt, veniuntque Romam, consecuturi plenissimum Jubileum huius Anni Sancti, mandavit nobis exponere infra scriptas concessiones, declarando etiam illa, quae in dubio erant, aut vocabantur, non sine fidelium turbatione, & scrupulis conscientiarum: quarum paci, & quieti consulturus Summus Pontifex hac statuit. Ut itaque Confessarii, & Operarii multiplicentur ad maiorem commoditatem, & consolationem fidelium utriusque sexus, in omni plenitudine patrum Charitatis concedit amplam Facultatem Penitentiariis Basilicarum D. Petri, S. Pauli, S. Joannis Lateranensis, & S. Mariae Majoris, sive illi sint ex numero antehac esse solito, sive ex jam aucto, & deinceps augendo. Ad hac eadem facultas datur Parochis tam Secularibus quam Regularibus omnium Parochiarum Romae (durante tamen Jubileo Anni Sancti) absolvendi, videlicet in ordine ad lucrandum praesens Jubileum, fideles ab omnibus sententiis, & censuris Ecclesiasticis contra illos pronunciatis, & fulminatis a Sacris Canonibus, aut Judicibus quacumque de causa, & ab omnibus peccatis, & excessibus, ac delictis quantumcumque gravibus, & enormibus, etiam a casibus reservatis non solum ab Episcopis, aut alias a Praelatis inferioribus, verum etiam a Pontifice ipso, & a Sede Apostolica Censura Domini, & in aliis quibuscumque Constitutionibus Summorum Pontificum, in foro Conscientiae tantum: ubi tamen sua Sanctitas declarat, se non intelligere, aut dispensare, nec dare facultatem dispensandi, aut habilitandi, & in pristinum statum restituendi, quae ad Irregularitatem publicam, aut occultam, vel notam, defectum, incapacitatem, & inhabilitatem quomodocumque contractam spectant, ut quidem in foro Conscientiae. Neque vult Sua Sanctitas, ut praesens facultas illis suffragetur, qui a Summo Pontifice, aut Judicibus Apostolicis vel aliis Ecclesiasticis excommunicati, suspensi, vel interdicti sunt declarati, vel publice denunciati ob sententias, & censuras Ecclesiasticas, quas incurrerant, adeo, ut isti omnes absolvi non possint, nisi prius satisfecerint, aut obdixerint, & partes sibi contrarias pacificas ante reddiderint; ita, ut illi Penitentiarii, & Parochi, durante hoc Anno Jubilei Sancto, commutare possint omnia Vota (exceptis Castitatis, & Religionis) in alia opera pia; imponendo nihilominus hisce fidelibus, & quibuscumque aliis penitentiam salutarem, & alia opera pia, quae iisdem Confessarii praescribent.

II. Concedit pariter Sua Sanctitas Confessariis Religiosis cujuscumque Ordinis, Congregationis, & Instituti, qui a nobis.



nobis, vel a nostro Vicegerente sunt approbati, aut deinceps approbabitur, eandem facultatem paulo ante explicans absolvendi a censuris, & a casibus reservatis, commutandi vota, modo ea non sint substantialia Religionum, Ordinum, institutorum, imo & Religiosis Confessariis eadem datur facultas NB, respectu sui Ordinis, & illis aequae, qui modo Roma versantur, quam illis, qui huc sunt venturi hoc Anno Sancto, ad quem se extendit tantum hac facultas.

III. Ut etiam facilitetur iisdem Religiosis consecutio Anni Sancti, & Jubilaei, tantique Thesauri spiritualium gratiarum, & ut illi suo exemplo populum edificent, compareantque debito cum decore, qui decet personas Deos dicatas, significatur eisdem, Suam Sanctitatem contentam esse, ut illi visitent quatuor Ecclesias assignatas ter tribus diebus continuis, aut interpolatis, una simul, aut quoad maiorem partem euntes, & incedentes respectu eorum, qui in eodem Conventu, aut Domicilio versantur, & sic consequantur Sanctissimum Jubilaeum, ac si visitassent easdem Ecclesias triginta vicibus, aut diebus. Ut tamen observentur cetera, quae in Bulla Jubilaei continentur, hortamur & nos eosdem Religiosos in Domino, ut incedant servato ordine quam modestissime, recitantes Psalmos, vel alias Preces, & laudes Divinas decantantes.

IV. Idem Indultum, ut visitentur tamen quatuor diebus continuis, aut interpolatis eadem Ecclesias, concedit Summus Pontifex etiam alumnis, & convictoribus juvenibus, qui operam dant scientiis, & liberalibus artibus, & vivunt in eodem convictu, modo & illi eant saltem quoad mediam partem, quos comitabitur Praefectus, au Rector, vel alii, qui eisdem praesunt, aut eadem gratia fiat iisdem Praefectis, Magistris, & Pueris; monentur tamen hi omnes, ut servant modestiam, & ordinem inter eundem, orantes, vel pium quid tractantes. Regulares vero aliunde huc profecti ad lucrandum Jubilaeum Sanctum, si voluerint se conjungere aliis sua Religionis, eandem habebunt facultatem, & lucrabuntur Indulgentiis, si eodem modo ter visitaverint Ecclesias supradicto modo; si vero non possent expectare aliorum commoditatem, aut advenirent, cum alii lucrati sunt Indulgentias, concedit Sua Sanctitas, ut illi quinque visitando Ecclesias per quinque continuos, aut interpolatos dies lucrentur eadem Indulgentias, quas fuissent lucrati visitando per quindecim dies easdem Ecclesias, prout Bulla praescribit. Conceditur etiam Congregationibus, & Confraternitatibus, quae aliunde huc venerunt, ut simul, semel visitando Ecclesias, & his separatim Fratres, aut Sorores satisfaciant visitationibus praescriptis in Bulla, ac si quindecim visitassent.

V. Et cum maxime Sua Sanctitas secundum viscera paterna compatiatur paupertati, ac multiplicibus miseriis advenarum, eorumque plurimorum, qui non habent, unde se tamdiu alant, vel neque sufferre possunt molestias tot visitationum intra quindecim dies, remittit arbitrio, discreti tamen, & prudenti dictorum Penitentiarii, & Parochorum, ut quivis dispense juxta cujusvis penitentis indigentiam, & possibilitatem in assignando numero visitandarum Ecclesiarum, dando eisdem omnem facultatem circa id necessariam, & opportunam. Eodem modo, quia cives, & incola Romani, qui inceperunt visitare Ecclesias, sed morbo impediuntur prosequi sanctum opus, ne priventur fructu laborum inchoatorum, & pia intentionis, qua aggressi sunt opus, ne affligantur corpore, & animo, concedit eisdem Penitentiariis, & parochis facultatem commutandi opera adjuncta visitandarum Ecclesiarum per triginta dies, in alia, quae viderint esse proportionata possibilitati dictorum civium, & incolarum infirmorum. Quod si repente mors immineat, antequam obtineant hanc commutationem concedit illis sua Sanctitas Jubilaeum, ac si omnia opera necessaria explevisent.

VI. Ut etiam finaliter tollatur omnis ambiguitas, & fideles sint certi de Indulgentiis, quas possunt lucrari, declaramus una cum Oraculo Sua Sanctitatis, ut supra insinuatum, quod in suspensione Generali Indulgentiarum, quae continetur in Bulla data 5. Maji 1674. publicata vero 17. Septembris ejusdem anni, non intelligantur

suspensa Indulgentia Altarium privilegiatorum pro defunctis, neque alia concessa eodem modo pro defunctis (verum illa suspensa habeantur, quas sibi possunt consequi vivi, ut eas possint concedere animabus purgatorii per modum suffragii) & nec minime Indulgentia concessa in articulo mortis, & facultates communicandi eas aliis: sicut nec cessant modo facultates Sanctae Inquisitionis, & Officialium ejusdem, aut Missionariorum, & Ministrorum, qui ab eodem Tribunali, vel a Congregatione propaganda Fidei, vel cum auctoritate Apostolica ad id sunt deputati, & specialiter facultates absolvendi ab Haeresi illos, qui abjurato errore redduntur capaces earum gratiarum.

VII. Ut autem conservetur pium institutum, & consuetudo visitandi templa, in quibus celebratur comprecatio quadraginta horarum, & praecipua Sanctuaria colendi hac in Urbe, concedit Sua Sanctitas, non obstante ea generali Indulgentiarum suspensione, ut Indulgentias solitas consequi possint fideles utriusque sexus, quas alias consequebantur: si visitent septem Ecclesias, & Scalas Sanctam diebus determinatis, eo modo, & his cum conditionibus, quibus illa fuerunt concessa, easdem lucrantur Indulgentias. Quivis insuper, qui visitat templa, ubi habetur expositum venerabile, & est comprecatio quadraginta horarum Circularium, & ordinarium, quae sunt in publico folio a nobis exponendo, & publicando hujus Anni Sancti decursu, ita, ut ibidem aliquo tempore inter preces detineatur, prout illi videbitur, Confessione prius, & Sacra communione peracta, aut saltem concepto firmo proposito confitendi, lucrabitur is septem annorum Indulgentias, & totidem quarentanas toties, quoties id profuerit.

Datum Romae ex aedibus nostris die 1. Febr. 1675. Jubilaei.

#### Additio. IV.

\* Huic Declarationi aequae, ac ipsi Bullae se conformarunt Innocentius XII. Anno Jubilaei 1700. & Benedictus XIII. qui ultimus sub num. V. adhuc liberalior novissime circa suspensionem Indulgentiarum sequentem dedit notificationem.

### DECLARATIO.

Ex viva voce Oraculo Sancti. Domini Benedicti XIII. quoad Indulgentias in Anno Sancto suspensas facta per Fabricium Paulucci S. R. E. Cardinalem, & Sanctitatis Sua Vicarium Generalem.

I. Ad tollendam omnem ambiguitatem, & ut fideles sint certi quoad obtinendas in Anno Sancto Indulgentias, declaramus, quod sub suspensione Indulgentiarum in Anno Sancto non contineantur Indulgentiae concessae Altaribus privilegiatis, vel alias immediate pro defunctis. Intelliguntur autem suspensa illa Indulgentia, quas alias consequi valent vivi cum facultate applicandi easdem defunctis per modum Suffragii.

II. Item in Anno Sancto non sunt suspensa Indulgentiae concessae in articulo mortis, uti nec facultas hasce aliis communicandi.

III. Praterea non sunt suspensa Indulgentiae, quae concedi solent Cardinalibus, Legatis, Nuntiis Apostolicis, & Episcopis, sive in usu Pontificalium, sive in danda Benedictione, vel in alia solita forma.

IV. Nec cessant ullo modo facultates Tribunalis S. Inquisitionis, atque Officialium ejusdem, sive Ministrorum, ac Missionariorum ab hoc sacro Tribunali, aut a Sacra Congregatione de propaganda fide, vel alias Auctoritate Apostolica deputatorum. Specialiter apud mentionatos non cessant facultates absolvendi ab Haeresi illos, qui penitentes eandem abjurant, seque dictae absolutionis capaces reddunt.

V. Ut etiam conservetur devota consuetudo visitandi principalia Sanctuaria hujus Urbis, ac SS. Sacramentum sub comprecatione 40. horarum expositum: pariter, ut stabilatur pius usus genuflexionis ad pulsum salutationis Angelicae, Sua Sanctitas concedit sequentes Indulgentias.



## Appendix II. Bulla suspensiva Indulgent. in Anno Sancto &c. 407

*Illi, qui devote visitant septem Ecclesias, aut Scalam Sanctam, vel templum, ubi sunt Stationes, diebus, qui alias specificantur, solitas lucratur indulgentias absque ulla diminutione.*

*Item, qui comitantur Sanctissimum Viaticum deportatum ad infirmos, vel, si fuerint impediti, saltem mittentes illud quoddam lumen, obtinent eas indulgentias, quæ alias propterea à Summis Pontificibus concessæ fuerunt.*

*Insuper manent adhuc in suo vigore indulgentiæ à Sua Sanctitate concessæ Fidelibus, qui ad sonitum campanæ mane, aut meridie, seu vespere flexis genibus devote recitaverint Angelus Domini.*

*Finaliter illi, qui visitant templum, ubi habetur expositum Venerabile, & est comprecatio 40. horarum circularium, ac ordinarium (quæ horæ indicantur in publico folio à nobis exposito, & adhuc per decursum hujus Anni Sancti exponendo) lucrantur Indulgentias 7. annorum, & totidem Quadragenarum toties, quoties id præstiterint, si tamen aliquo tempore, prout ipsis in Domino videbitur, inter preces ibidem detineantur, & Confessionem, ac SS. Communionem præmittant, vel saltem firmum propositum confitendi concipiant.*

*Datum Romæ 10. Januarii 1725.*

*F. Cardinalis Vicarius.*

*Nicolaus Antonius Canon.*

*Cuggio Secretarius.\**

### Additio V.

\* Occasione dictarum Declarationum Quæres. An vi earum a suspensione Indulgentiarum in Anno Sancto intelligantur exemptæ Indulgentiæ septem Ecclesiarum, & Stationum &c. si quæ tales reperiantur extra Romam pro vivis concessæ etiam plenariæ? Supponit hoc quæsitum, similes Indulgentias superiori Declaratione Benedicti XIII. sub n. V. adductas valere adhuc Romæ in Anno Sancto, loquendo tam de Indulgentiis Stationum, quam septem Basilicarum, nimirum Lateranensis, D. Petri, D. Pauli, Sanctæ Mariæ Majoris, D. Laurentii, SS. Fabiani & Sebastiani, ac demum Sanctæ Crucis in Hierusalem: nam quamvis verba Bullæ Jubilæum pro Anno Sancto annunciantis, & sub Addit. I. allegatæ videantur velle, ubivis locorum generaliter, sicque etiam Romæ esse suspensas Indulgentias exceptis solis iis, quæ ratione Jubilæi Romæ obtinentur; ipse tamen adjunctæ Declarationes satis indicant, Romæ non solum Jubilæum, sed & Indulgentias antea dictas valere, ut conservetur consuetudo visitandi principalia Sanctuaria NB. ejusdem Urbis.

Hoc supposito Resp. Extra Romam Indulgentiæ Stationum, & septem Ecclesiarum, aliæque similes saltem plenariæ intelliguntur adhuc sub suspensione in Anno Sancto comprehensæ. Ratio est: quia in Declarationibus tam Clement. X. quam Benedicti XIII. specificatæ Indulgentiæ à suspensione excipiuntur solum in Urbe Romana: motivum enim principale concessionis est conservatio devotionis visitandi Romana Sanctuaria, ad exemplificationem peregrinorum, qui Romam tendentes, & præter Portam sanctam etiam alia principalia Sanctuaria visitantes non solum Jubilæi, sed & aliarum Indulgentiarum sese exinde participes reddere valeant. Et certe: si memoratæ Indulgentiæ non solum Romæ, sed ubique subsistere intelligerentur, tunc possent pro vivis, nempe pro se ipsis omnes Fideles ubivis locorum propter Stationes in Quadragesima, ac aliis temporibus quamplures lucrari Indulgentias plenarias, sicque frustraretur magna ex parte finis dictæ suspensionis in Anno Sancto, qui finis principalis fuerat, ut exinde Fideles magis incitentur ire Romam ad Sacra Limina pro eo tempore, quo vident alibi suspensas Indulgentias præsertim plenarias.\*

### Additio VI.

\* Dices. Quando allegata Declaratio Clementis X. & Benedicti XIII. excipit à suspensione in Anno Sancto Indulgentias immediate concessas pro defunctis, item

pro vivis in articulo mortis, intelliguntur non solum Romæ, sed ubivis locorum à suspensione exceptæ in Anno Sancto: ergo etiam pariter discurrendum de Indulgentiis proxime specificatis. Resp. neg. consequ. & paritatem: nam priores, uti patet attente legenti Declarationes, absolute excipiuntur à suspensione in Anno Sancto, posteriores vero solum in Urbe Romana. Quod si in aliis Jubilæis futuris aliter de novo declararetur, haud dubie standum esset in illa Declaratione, uti etiam, si nova gratia in futurum concederetur.\*

### Additio VII.

\* Indagabis adhuc. An pariter Indulgentiæ datæ ob Salutationem Angelicam, item occasione Comprecationis 40. Horarum ad expositionem Sanctissimi, vel alias concessæ comitantibus Sanctissimum per modum Viatici deportatum ad infirmos, an (inquam) etiam memoratæ Indulgentiæ alias pro vivis immediate datæ censeantur in Anno Sancto pro vivis extra Romam suspensæ? Ratio dubitandi, & affirmativam tenendi est; quia proxime Addit. IV. allegata Declaratio Summi Pontificis eodem modo loqui videtur de his, ac de aliis Indulgentiis septem Ecclesiarum, & Stationum, adeoque erunt æque, ac illæ conformiter dictis præcedentibus quoad vivos extra Romam suspensæ tempore Jubilæi in Anno Sancto. Et ad hanc quidem sententiam multum propendebam, usque dum contrarias litteras Roma, & Neapoli recepi, annunciantes valorem mentionatarum Indulgentiarum etiam extra Urbem. Ratio est: quia motivum eximendi dictas Indulgentias à suspensione in Anno Sancto erat consuetudo visitandi Sanctissimum Sacramentum, & stabiliendi pius usus genuflexionis ad pulsam Salutationis Angelicæ: atqui hoc motivum eximendi à suspensione non solum procedit Romæ, sed etiam alibi, ubi similis pius usus introductus est; adeoque etiam quoad alia loca erit dicta exemptio intelligenda, cum in Bulla non fiat modificatio ad solam Urbem Romanam.

Quare ad tacite præveniendum alicui objectioni notandum, quod Pontifex in superius Addit. IV. allegata Declaratione pro causa eximendi à suspensione Indulgentias Stationum, Scæ Sanctæ, & septem Basilicarum adduxerit motivum limitatum, nimirum hoc: *Ut conservetur devota consuetudo visitandi principalia Sanctuaria NB. hujus Urbis*, id est Romanæ: hincque mirum non est, quod ista exemptio à suspensione ultra Romam non sit extendenda. Econtra vero motivum eximendi à suspensione Indulgentias respectu comprecationis ad expositionem Sanctissimi, & ob recitationem Salutationis Angelicæ concessas erat illimitatum, nimirum, *ut conservetur devotio erga Sanctissimum & pius usus genuflexendi ad pulsam Salutationis Angelicæ*; adeoque non est mirum, quod etiam hic favor extra Romam extendatur. Et ita (salvo meliori) puto sentiendum, usque dum aliter declaretur à Summo Pontifice.\*

### Additio VIII.

\* Quæres ulterius. An à Benedicto XIII. intra Annum Jubilæum 1725. non fuerit concessa nova gratia Fidelibus extra Romam tempore Jubilæi in bonum Defunctorum? Resp. in bonum Defunctorum ab Altesato primum post ipsam præcedentem notificationem, seu Declarationem fuisse de novo concessam aliquam specialissimam gratiam, quæ non legitur data ab Antecessoribus: etenim Antecessores, prout jam supra innuebatur, illas Indulgentias Plenarias tempore Jubilæi extra Romam etiam suspenderunt pro Defunctis, quæ antea potuerunt ipsis applicari tantum indirecte per modum Suffragii, immediate autem datæ fuerunt pro vivis, uti sunt Communio Generalis, & menstrua nonnullarum Confraternitatum: quos equidem suos Antecessores etiam ad initium secutus est Benedictus XIII. in notificatione 10. Januarii 1725. emanata, ac superius jam allegata: postea tamen (id est 9. Februarii 1725.)



## 408 Tract. XII. De Immunitate Eccl. & Indulgentiis. Dist. III.

ex specialissima gratia concessit pro Anno Jubilæo 1725. ut omnes prorsus Indulgentiæ pro vivis concessæ, etiam illæ, quæ alias nequeunt per Suffragium donari Defunctis, hoc Anno Sancto tantum extra Romam pro ipsis Defunctis (non autem pro vivis) applicari valeant. Tenor concessionis est sequens:

*Manente in suo vigore suspensione omnium Indulgentiarum pro vivis, uti in Bulla præmemorata continetur, sua Sanctitas dat facultatem pro hoc anno solum omnibus Fidelibus lucrandi omnes illas Indulgentias suspensas pro vivis, ad effectum duntaxat eas directe, & immediate applicandi per modum Suffragii animabus Defunctorum, & non aliter: Dico: omnes, id est, Indulgentias tam temporales, quam perpetuas, tam plenarias, partiales, locales, vel personales: concessas quocumque modo per summos Pontifices, vel per Legatos Apostolicos: & non solum illas, quæ datæ sunt cum facultate eas applicandi pro Defunctis, sed etiam omnes alias, in quibus talis facultas non est appositæ: ita tamen, ut fiant omnia opera in earum concessione præscripta. Et hæc omnia, ut per merita Jesu Christi Redemptoris nostri, ejusque Sanctissimæ Matris & omnium Sanctorum, de quibus Thesaurus Indulgentiarum cumulat, illæ animæ quantocius possint transire à flamma castigante (ut ait S. Augustinus in flammam beatificantem, & celestem Jerusalem per suas sanctas portas intrare: ita, ut præsens annus etiam pro animabus Purgatorii dici possit Annus Sanctus, & annus jucundus Sanctissimi Jubilæi. Datum 9. Februarii anno 1725. Adverto tamen, quod hæc gratia utpote extraordinaria, non debeat extendi ad alios annos Sanctos, uti nec altera subsequenti quæsito specificata, nisi similiter sic subsequentes Pontifices declarant.\**

### Additio IX.

\* Quæres ultimo. An à Benedicto XIII. intra annum Jubilæum 1725. fuerit pariter concessa extraordinaria aliqua gratia pro vivis? Resp. affirmative. Sic enim alitèdictus Sanctissimus toti Nationi Germano Belgicæ nostri Seraphici Ordinis ac humiles preces ex specialissima gratia indulgit, ut in singulis ejusdem Ecclesiis ab omnibus Fidelibus utriusque sexus pro vivis obtineri valeant Indulgentiæ plenariæ in Festis S. Antonii Paduani, Portiunculæ, & S. P. Francisci. Quinimo, loquendo de Provinciis strictioris Observantiæ, has Indulgentias plenarias pro vivis quoad Festum S. Francisci idem Sanctissimus, per speciale Decretum die 18. Augusti anno 1725. emanatum, extendit ad Ecclesias Reformatorum totius Familiæ Cisimontanæ. Quod idem Sanctissimus die 7. Septembris 1725. adhuc magis ampliavit ad omnes prorsus Ecclesias totius Ordinis tam Fratrum, quam Monialium ac die 28. Septembris 1725. eodem modo concessit in Festo Immaculatæ Conceptionis B. V. MARIE.

Porro primum Breve Apostolicum clementissimæ concessionis sic sonat.

Sanctissimus Dominus noster Divina providentia Pontifex Benedictus XIII.

*Supplicationibus P. Joannis Thoni Fratrum Minorum Recollect. Nationis Germano-Belgicæ in Romana Curia Agentis (non obstante communi Indulgentiarum suspensione) pro Festis Sanctorum Antonii, & Francisci, ac sanctæ Mariæ Angelorum Portiuncula nuncupatæ in singulis Ecclesiis Ordinis & Nationis prædictorum, etiam Monialium, nec non Oratoriis Missionum prædicti Ordinis, omnibus utriusque sexus Christi Fidelibus, vere penitentibus, & confessis, ac sacra Communione refectis, qui aliquam ex supradictis Ecclesiis, seu Oratoriis à primis Vesperis usque ad occasum solis dierum hujusmodi devotè visitaverint, & ubi pro Christianorum Principum concordia, Hæresum extirpatione, ac S. Romanæ Ecclesiæ exaltatione pias ad Deum preces effuderint, plenariam omnium peccatorum suorum Indulgentiam, & remissionem misericorditer in*

*Domino consequi posse, benignè concessit. Hac die 4. Maji 1725.*

*Cosmus de Hieronymis Secretarius.*

*Loco † Sigilli.*

*Romæ Typis Rev. Cam. Apostolicæ 1725.\**

### Additio X.

\* Pro complemento totius materiæ de Jubilæo repetuntur succinctè omnia illa, quæ hætenus de eodem dicta fuere, prout ordinarie contingere solent. Quare

*Inprimis*, dum singulis viginti quinque annis Romæ Jubilæum ordinarium celebratur, illud antecederet indicitur, & per specialem Bullam *Addit. I.* allegatam omnes reliquæ Indulgentiæ suspenduntur intra hunc annum Sanctum: qualis suspensio non contingit, si aliquod Jubilæum extraordinarium e. g. tempore Coronationis novi Pontificis, vel magnæ necessitatis Ecclesiæ promulgatur.

*Secundo* post breve tempus intra ipsum Annum Sanctum manat Declaratio, quales nimirum Indulgentiæ intelligantur in Anno Sancto Suspensæ, vel non, prout legitur *Addit. II.*

*Tertio* solet intra eundem Annum Sanctum emanare aliud Breve, vi cujus Monialibus, aliisque Religiosis personis specialiter Clausuræ addictis, uti etiam infirmis, ac carceratis sub ipso Anno Sancto conceduntur Indulgentiæ Jubilæi, subjuncta tamen clausula, quod alias parati essent Romam ire ad lucrandum Jubilæum, si hoc impedimento non detinerentur. Similem concessionem fecit Benedictus XIII. per Breve Pontificia sollicitudo editum 12. Januarii anno 1725. poterisque explicationem talium Brevium, si cupis, videre apud Dominicum Viva de Jubilæo qu. 7. & apud Franciscum Van Ranst in Opusculo de Indulgentiis qu. 8.

*Quarto* finito Anno Sancto ad instantiam Episcoporum solet emanare alia Bulla, vi cujus pariter extra Romam conceditur Jubilæum, in quo non requiruntur (uti in Jubilæis extraordinariis) certa jejunia, ac elemosynæ, sed præter Confessionem & S. Communionem tantummodo aliquot visitationes Ecclesiarum. Et hæc dicta de Jubilæo sufficiant.\*

## QUÆSTIO XI.

### De Suffragiis.

### SUMMARIUM.

- 131 Suffragium dupliciter sumitur.
- 132 Suffragia Fidelium sunt triplicis generis.  
(d) Tract. 14. Dist. 5. per totum.
- \* Habentque fidelium opera triplicem fructum.
- 133 De fide est, dari inter fideles communicationem bonorum operum.
- 134 Possunt fideles justi se invicem juvare per Suffragia etiam quoad fructum satisfactorium.
- 135 Solvitur instantia.
- 136 Ut Suffragium alteri prosit, tria ex parte offerentis requiruntur. I. Status gratiæ.
- 137 II. Intentio offerendi pro alio.
- 138 III. Opus de se satisfactorium.
- 139 Quæ requirantur ex parte ejus, pro quo offertur?
- 140 Declaratur.
- 141 Suffragia pro aliis oblata, adhuc prosunt offerenti.
- 142 Is nihil perdit, quin potius lucratur.
- 143 Prælati Regulares, quid concedant per Litteras Fratemitatis, seu Suffragia Ordinis?
- 144 Hæc possunt communicare Benefactoribus.
- 145 Prodest talis communicatio,  
I. Per modum interpretationis.
- 146 II. Per modum impetrationis.
- 147 III. Per modum satisfactionis.
- 148 Indulgentia plenaria pro talibus post mortem applicabiles.



149 *Solvitur instantia.*

150 *Differentia inter concessionem Indulgentiarum, & Suffragiorum Ordinis.*

131 **S**uffragium, quod à *suffragari* (hoc est, assistere, vel auxilium præbere) derivatur, dupliciter accipitur. I. Pro voto, quale in electionibus ad Officia, & Dignitates dari solet: sed hæc acceptio ad propositum non servit. II. Pro auxilio, quod alteri præbatur: & hoc modo dicuntur Fideles mutuis sese Suffragiis juvare, quando precibus ad Deum fufis, aliisque piis operibus sese mutuo juvare satagunt.

132 Porro hujusmodi Suffragia, quibus unus Fidelis alterum juvare potest, generatim sunt triplicis generis, videlicet Sacrosanctum Missæ Sacrificium, Indulgentiæ, & propriæ actiones bonæ ac satisfactoriæ, ut orationes, jejunia, & hujusmodi, quibus Fideles sese invicem juvare possunt. Fideles autem, quibus ejusmodi Suffragia applicari possunt, duplicis generis existunt, nempe viatores, sive existentes in Ecclesia militante, & mortui in Purgatorio, sive qui sunt in Ecclesia purgante: nam Sancti in cœlis nullo indigent Suffragio, damnati vero ejusdem sunt incapaces. Quia igitur de Indulgentiis hæcenus jam dictum, & de SS. Missæ Sacrificio (d) alibi dicitur, ex professo nunc de tertio Suffragiorum genere agendum restat.

*Additio.*

\* Ubi ante Conclusiones adhuc prænotandum occurrit, quod quodlibet opus moraliter bonum, ab homine in gratia Dei sanctificante constituto elicitum, triplicem habeat fructum sibi annexum: nempe meritum, satisfactorium, & impetratorium. *Meritum* est, quatenus de condigno meretur quis augmentum gratiæ, & exinde etiam cœlestis gloriæ; cum gratia sanctificans sit semen gloriæ &c. atque hunc fructum nemo potest alteri donare juxta Theologos communissime, cujus rationem valde solidam affert P. Kazenberger in suo *Supplemento part. 1. c. 3. sect. 4. in Appendice fol. 244. Satisfactorium* dicitur, quatenus per tale opus satisfit pro pœnis temporalibus ex aliquo peccato, quoad culpam jam dimisso adhuc restantibus. *Impetratorium* est, quatenus exinde impetratur aliquod spirituale, vel etiam beneficium corporale, ad animæ tamen salutem conducens. His prænotatis, ponitur \*

133 **CONCL. I.** De fide certum est, dari aliquam inter Fideles bonorum operum communicationem, quibus ipsi sese mutuo juvare, ac sibi invicem suffragari possunt quoad fructum impetratorium. Patet hoc ex illo Articulo Symboli Apostolorum: *Credo Sanctorum Communionem.* Hujus quippe Articuli, juxta omnes Theologos, sensus est, quod detur in Ecclesia communio bonorum operum inter homines justos, quibus se invicem juvare possunt: nam homines justi sunt membra unius corporis mystici Ecclesiæ sub uno Capite Christo Rom. 12. & Ephes. 4. ergo, sicut in corpore sano unum membrum potest ferre auxilium alteri indigenti, ita & in Corpore mystico Ecclesiæ. Hinc ad Rom. cap. 15. ait Apostolus: *Obsecro vos fratres, ut adjuvetis me in orationibus vestris pro me ad Deum.* Et Jacobi 5. *Orate pro invicem, ut salvemini: multum enim valet oratio justi assidua,* & alibi.

134 **CONCL. II.** Possunt insuper Fideles justi se invicem juvare per Suffragia ad satisfactionem pro pœna temporalis. Ita certa, & communis Catholicorum, contra Hæreticos; atque hoc ipsum à Cathéchismo Romano S. Pii V. in *fine de Sacramento Penitentia*, deducitur ex citato Articulo Symboli Apostolorum de *Communione Sanctorum.* Si enim datur talis communio quoad fructum impetratorium, cur non etiam quoad fructum satisfactorium, præsertim cum superius allegati textus loquantur absolute, & ceteroquin non obstat aliqua ratio specialis quoad fructum satisfactorium?

135 Nec obstat illud ad Galat. 6. *Unusquisque onus*

*suum portabit.* Et 2. Corinth. 5. *Ut referat unusquisque propria corporis, prout gessit.* Resp. enim, hujusmodi textus Sacræ Scripturæ loqui de retributione finali post hanc vitam: & sensus eorum est, quod in extremo judicio nullus puniatur pro peccatis alterius; neque præmiandus sit propter bona opera aliorum, sed quilibet pro propriis gestis duntaxat. Per hoc tamen non negatur, quin unus de facto possit satisfacere pro pœna temporalis, post culpam peccatorum dimissam aliis adhuc restante, sicque ipsos sive viventes, sive mortuos in Purgatorio juvare suis Suffragiis. Nam etiam; *sancta, & salubris est cogitatio pro defunctis exorare, ut à peccatis solvantur* 2. Machab. c. 12.

136 **CONCL. III.** Ut Suffragium habeat suum effectum, tres ex parte offerentis requiruntur conditiones. I. Status gratiæ: nam existens in statu peccati mortalis indignus est remissione culpæ & pœnæ, sicque non potest pro altero offerre opera satisfactoria ex opere operantis, ac nomine proprio; etsi secus sit de Missæ Sacrificio, quod habet effectum suum ex opere operato, nec non de precibus, in persona Ecclesiæ à Sacerdote in Missa & Divino Officio persolutis, quæ non obstante malitia Ministri habent suum effectum, quatenus dicuntur nomine Ecclesiæ. Vide de hoc etiam *Tr. 1. dist. 2. Additione post n. 48. & Tr. 14. dist. 5. qu. 4. & 5. præsertim n. 59. & nu. 60.*

137 **II.** Requiritur, ut offerens habeat intentionem offerendi pro altero opus suum, eique Suffragium applicandi. Et hæc quidem applicatio debet antecedere opus bonum, non subsequi: alioquin vel applicabitur ipsi operanti, si indiget ejusmodi satisfactione, vel, si is non indiget, nec, dum operatur, applicavit alteri, quoad fructum satisfactorium reponitur in Thesauris Ecclesiæ. Sufficit tamen applicatio habitualis, hoc est, præterita & nondum revocata. *Mastrius disp. 23. Theol. Moral. n. 84. & alii.*

138 **III.** Ut ejusmodi opus ex se sit satisfactorium, hoc est, habeat valorem & pretium ad solvendum debitum illius, pro quo offertur. Et talia opera generatim sunt tria, videlicet Oratio, Jejunium, & Eleemosyna, sub quibus omnes aliæ operationes pœnales comprehenduntur.

139 **CONCL. IV.** Ut Suffragium quoad vim satisfactoriam habeat suum effectum, etiam ex parte illius, pro quo offertur, tres requiruntur conditiones. I. Quod indigeat Suffragio. II. Quod sit in statu gratiæ. III. Quod peccata, pro quibus satisfactio exhibetur, jam sint remissa quoad culpam. Ita communis. Siquidem pœna non remittitur, nisi prius peccatum quoad culpam fuerit dimissum.

140 **Additur, quoad vim satisfactoriam;** nam quoad vim impetratoriam potest Suffragium prodesse etiam existentibus in peccato mortali, eisdem de congruo promerendo, atque impetrando specialia gratiæ auxilia, quibus interius illuminati citius ad pœnitentiam convertantur, atque à variis tum animæ, tum corporis periculis præserventur &c.

141 **CONCL. V.** Suffragia pro aliis oblata non redduntur inutilia offerenti, quin potius adhuc multipliciter ei profunt. Ita communis, & patet inductione. Siquidem primo ejusmodi opus bonum prodest ipsi operanti in ratione meriti: seu quatenus homo justus per illud de condigno promeretur augmentum gratiæ sanctificantis, & gloriæ cœlestis: nam hoc semper manet operanti, & nequit alteri donari. Deinde ultra hoc meritum operis peracti eidem remanens, loco fructus satisfactorii, & impetratorii, aliis ex toto, vel ex parte applicati, accedit novum meritum ratione ipsius actus Charitatis, quo quis per applicationem boni operis à se peragendi vult suo Proximo subvenire. Insuper tale Suffragium prodest offerenti quoad valorem specialissimum illius boni operis, utpote quem non potest licite alteri applicare.

142 Ex quibus proinde liquet, offerentem Deo sua bona opera ex motivo Charitatis, & Misericordiæ spiritua-



virtualis pro aliis, præsertim pro Animabus in purgatorio, parum exinde perdere, quin potius lucrari: eo præsertim, quia Æterna Veritas dicere dignata fuit *Matth. 5. Beati misericordes, quoniam ipsi misericordiam consequentur*, atque ipsæmet Animæ purgatorii, tanti Beneficii nequitiam immemores, sive adhuc in statu Purgationis (ut nonnulli volunt) sive saltem in statu adeptæ cœlestis beatitudinis, Deum pro suis benefactoribus exorare ferventius studebunt.

143 Quæres: Quid concedant Prælati Regulares, dum quosdam Sæculares, præsertim Benefactores, admittunt ad communionem specialem operum & Suffragiorum Ordinis, sive Religiosorum sibi subditorum? De hoc ex professo agunt Emanuel Rodericus *Tom. 1. 99. reg. qu. 33. art. 2. & seqq.* Miranda *tom. 2. Manual. Prælat. qu. 50. art. 3.* Suarez *part. 3. tom. 4. disp. 55. sect. 5.* Lugo *disp. 7. de Penit. sect. 8.* Bassæus v. *Suffragium n. 1.* Sorbus v. *Indulgentia quoad sæculares quarto in Aynotat. & alii.*

144 Et sciendum, quod Urbanus V. prout refertur in Monumentis Ordinis, & Compendio Privilegiorum v. *Indulgentia quoad sæculares quarto n. 6.* concesserit, ut Generalis & Provinciales totius Ordinis Minorum possint communicare Suffragia, Indulgentias, orationes, & bona spiritualia Benefactoribus Ordinis: idque fieri communiter solet concedendo eis Litteras, quas vocant, *Fraternitatis*, sive *Suffragia Ordinis*, seu *Filiantias*, prout formulam talis concessio refert Lantusea in Theatro Regularium v. *Bona spiritualia*. Notant vero citati Auctores, hanc concessioem, qua gaudent etiam alii Ordinis habentes communicationem Privilegiorum, nihil continere, quod Jure communi non sit concessum: nam de Jure communi jam potest quilibet Prælatum bona & merita suorum Subditorum communicare, & applicare Benefactoribus suis. Hoc prænotato,

145 Resp. Hujusmodi communicatio bonorum operum Ordinis prodest hominibus ad eam per Prælatum admissis multipliciter. Inprimis quidem indirecte, per modum cujusdam meriti de congruo: quia, ex quo quis efficitur membrum, ac socius talis Religionis, congruum est, ut ob merita ejusdem Religionis Deus speciali auxilio & protectione foveat, atque custodiat personas ipsi Religioni conjunctas, etiamsi ad hunc finem merita illa non referantur. Sic propter decem justos, si ibi inventi fuissent, pepercisset Dominus Sodomæ & Gomorrhæ, ac finitimis Civitatibus *Genes. 18.* Rodericus *loc. cit. art. 3.* Suarez, Lugo, & alii.

146 Deinde dicta admissio prodest illis personis etiam directe per modum impetrationis: tum quia, ceteris paribus, efficacior est oratio iusti facta pro persona sibi conjuncta, quam pro extranea: tum quia tales personæ

sunt directe participes omnium Orationum, Missarum, aliorumque Suffragiorum, quæ generaliter fieri solent pro ipsa Religione, ac membris ejus. Unde bona operata Religionis possunt de congruo mereri (juxta dicta *n. 140. & 145.*) atque impetrare, ut Deus Confoederatis illis specialia gratiæ auxilia conferat, quibus à vitiis avocentur, interius illuminentur, atque animentur ad profectum in virtutibus, insuper præserventur à peccatis, à morte, & ab aliis malis tum spiritualibus, tum corporalibus. Ita citati Auctores, & alii.

146 Ulterius juvat illa unio, atque communicatio bonorum operum Confoederatis (dummodo habeant condiciones *n. 139.* assignatas) ad aliquem fructum satisfactionis consequendum: tum quia in Communitatibus Ordinum Religiosorum præter quamplures Missas, præsertim Conventuales, peraguntur plurimæ preces, pia exercitia, & bona opera pœnalia, atque satisfactoria, quæ generaliter applicantur pro Fratribus, Benefactoribus, ipsisque Confoederatis, tam vivis, quam defunctis: tum quia satisfactiones illæ, quæ piis Religiosis superabundant, vi talis communicationis applicantur ceteris.

148 Addit Bassæus *loc. cit. n. 2.* quod pro animabus habentium prædictas Litteras Participationis possint Religiosi illius Monasterii, cujus olim fuerant Benefactores, celebrare Missam, quæ eas liberet à pœnis Purgatorii; idque ex concessione Clementis VIII. Fratribus Minimis facta, & communicantibus cum eis, quæ refertur *Tom. 2. Privileg. ejusdem Ordinis Constitut. 10. de Si Clementis.*

149 Objicies contra dicta. Si Prælati Regulares possent Benefactoribus applicare bona opera subditorum, præsertim quoad vim satisfactoriam, hoc ipso concederent Indulgentias: atqui hoc dici nequit; ergo. Resp. negando sequelam: nam multiplex est differentia inter concessioem Indulgentiarum, & Suffragiorum.

150 Primo siquidem Indulgentiæ juxta jam dicta *quæ I. & II. ac IV.* conceduntur ex communi Thesouro Ecclesiæ, ac virtute Clavium, non sic Suffragia. In illis dispensantur etiam satisfactiones Christi, & Sanctorum, ex operibus olim jam peractis, in his sola pia opera Subditorum adhuc viventium, & primum peragenda. Ulterius de illarum infinitate, ac sufficientia constat; secus de bonis operibus alicujus Communitatis Religiosæ. Et ob tam multiplicem differentiam fit, quod suspensio Indulgentiis non suspendatur isthæc communio Suffragiorum Ordinis. Rodericus *loc. cit. art. 7.* pluribus isthæc Suffragia declarans, & alii, in specie P. Kilianus Kazenberg. *part. 2. cap. 3. sect. 4. in Appendice de Suffragiis* utiliter in hac materia legendus.